


# Wolaytta Bible



Portions of the Holy Bible in the Wolaytta language of  
Ethiopia

## **Wolaytta Bible** **Portions of the Holy Bible in the Wolaytta language of Ethiopia**

copyright © 2004 SIM

© Faith Comes by Hearing

Language: Wolaytta

Translation by: SIM

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2022-03-11

---

PDF generated using Haiola and XeLaTeX on 7 Nov 2023 from source files dated 31 Aug 2023

6baa8af2-99d9-51d5-a40a-ff54bdb9b793

## Contents

Domettaabaa . . . . .	1
Kessaabaa . . . . .	64
Wogaabaa . . . . .	117
Qoodaabaa . . . . .	154
Zaarettido Wogaa . . . . .	205
Yaasu . . . . .	247
Daannatu Maxaafaa . . . . .	276
Sameela Maxaafaa Koiruwaa . . . . .	309
Sameela Maxaafaa Naa77anttuwaa . . . . .	349
Kawotu Maxaafaa Koiruwaa . . . . .	385
Kawotu Maxaafaa Naa77anttuwaa . . . . .	426
Hanidabaa Odiya Koiro Maxaafaa . . . . .	467
Hanidabaa Odiya Naa77antto Maxaafaa . . . . .	505
Izira Maxaafaa . . . . .	550
Nahimiyaa Maxaafaa . . . . .	564
Asttiri Maxaafaa . . . . .	585
Iyyooba Maxaafaa . . . . .	595
Leemiso Maxaafaa . . . . .	627
Eranchchaa Maxaafaa . . . . .	656
Isiyaasa . . . . .	667
Ermmaasa . . . . .	731
Ermmaasa Zilaassaa . . . . .	800
Hizqqeela . . . . .	806
Daaneela . . . . .	867
Hoose7a . . . . .	887
Yuu7eela . . . . .	897
Amoxa . . . . .	901
Abddiyyu . . . . .	910
Yoonasa . . . . .	912
Mikiyaasa . . . . .	915
Naahooma . . . . .	921
Imbbaaqooma . . . . .	924
Hagge . . . . .	927
Milkkiyaasa . . . . .	930
Maatiyoosa . . . . .	934
Marqqoosa . . . . .	982
Luqaasa . . . . .	1013
Yohaannisa . . . . .	1063
Yesuusi Kiittidoogeetu Oosuwaa . . . . .	1098
Koiro Qoronttoosa . . . . .	1142
Naa77antto Qoronttoosa . . . . .	1160
Galaatiyaa . . . . .	1172
Efisoona . . . . .	1179
Piliphphisiyuusa . . . . .	1186
Qolasiyaasa . . . . .	1191
Koiro Tasalonqqe . . . . .	1196

Naa77antto Tasalonqqa . . . . .	1201
Koiro Ximootiyoosa . . . . .	1204
Naa77antto Ximootiyoosa . . . . .	1210
Pilimoona . . . . .	1214
Ibraawe . . . . .	1216
Yaaqooba . . . . .	1231
Koiro PHeexiroosa . . . . .	1236
Naa77antto PHeexiroosa . . . . .	1241
Koiro Yohaannisa . . . . .	1245
Naa77antto Yohaannisa . . . . .	1250
Heezantto Yohaannisa . . . . .	1251
Yihudaa . . . . .	1252

## Doomettaabaa

### *Gidduwaa Erissuwaa*

Doomettaabaa geetettiya ha maxaafai: salotinne sa7ai merettido meretaabaa, asaa zaree yiido yuussaabaa, nagarainne tugga de7oi doomettido doomettaabaa, Xoos-saaranne asaa zaretuura de7iia gaitotettaabaa odees. Doomettaabai naa77u waanna waanna sohotun shaahettidi xeelettanau danddayees.

- 1 Miraafiyaa issuwaappe biidi tammanne isiiniyaa gakkanaashin de7iia sohoi salotinne sa7ai merettido meretaabaanne asa zariyaa koiro taarikiyaa odees. Ad-daamenne Hewaani taarikee, Qaayeelanne Aabeela taarikee, Nohenne bashshaa haattaa taarikee, hegaadankka Baabiloone Gimbbiyaa taarikee de7iyoogee ha shaahuwaana.
- 2 Miraafiyaa tammanne naa77aappe biidi ishatamaa gakkanaashin de7iia sohoi Israa7eela asaayyo beni maizza aawatu taarikiyaa odees. Eta gidдон koiroi ba ammanuwaaninne Xoossaassi azazettiyo hanotan erettida Abrahaama. Hegaappe qassi a na7aa Yisaaqa, a na7aa na7aa Yaaqoobanne Yaaqooba naatu tammanne naa77atu taarikee kaallees. Hageeti Yaaqooba naati tammanne naa77ati, tammanne naa77u Israa7eela zaretussi ano gididaageeta. Hageetu ha tammanne naa77u Israa7eela naatu gidдонkka Yooseefa dummayidi, hegaadankka qassi Yaaqoobanne a naata hankkoota eta keettaa asaara Gibxxe biitti efiida hanotata minttidi xeellees.

Ha maxaafai asaa taarikiyaa odiyaaqaa gidikkokka, ubbaappe aattidi i odiyoogee Xoossai oottido oosuwaabaa. Xoossai salotanne sa7aa medhdhido taarikiyaa oduwaa doommidi, Xoossai ba asaassi qoppiyoogaa aggenaaqaa odiya hidootan polees. Ha maxaafaa gidдон ha gaxaappe ya gaxaa gakkanaashin odettiya taarikiyaa godai, bal-abaa haniyaageeta pirddiyaageenne qaxxayiyaagee, ba asaa kaalettiyaageenne maaddiyaagee, eta taarikiyaa tangguwaakka giigissiyaagee ba huuphiyan Xoossaa. Hagee beni maxaafai xaafettidoogee asaa ammanuwaa taarikiyaa mazggafidi oiqqanaas-sanne he ammanoikka paxa de7anaadan oottanaassa.

### *Meretaabaa*

<sup>1</sup> Xoossai salotanne sa7aa koiro medhdhiis. <sup>2</sup> He wode sa7ai giigiichchibeenanne aibinne bainna mela; ciimmaa bollan xumai de7ees; Xoossaa Ayyaanai haattaappe bollaara maayi uttiis.

<sup>3</sup> Xoossai hegaappe guyyiyan hagaadan yaagidi haasayiis; “Poo7oi hano” yaagiis; yaagin poo7oi haniis. <sup>4</sup> Poo7oi lo77o gididoogaa Xoossai be7iis; be7idi poo7uwaa xumaappe shaakkiis. <sup>5</sup> Xoossai poo7uwaa “Gallassa” giidi sunttiis; xumaa “Qamma” giidi sunttiis. Sa7ai qammiisinne wonttiis; hegeenne koiro gallassa.

<sup>6-7</sup> Xoossai hegaappe guyyiyan hagaadan yaagidi haasayiis; “Bollaara de7iia haattaa garssaara de7iia haattaappe shaakkiya salo gufanttoi hano” yaagiis; yaagin haniis. Xoossai salo gufanttuwaa giigissidi, salo gufanttuwaappe bollaara de7iia haattaa garssaara de7iia haattaappe shaakkiis. <sup>8</sup> Xoossai he gufanttuwaa “Saluwaa” giidi sunttiis. Sa7ai qammiisinne wonttiis; hegeenne naa77antto gallassa.

<sup>9</sup> Xoossai hegaappe guyyiyan hagaadan yaagidi haasayiis; “Saluwaappe garssaara de7iia haattai issisan eello; eellin mela sohoi qoncco” yaagiis; yaagin haniis. <sup>10</sup> Xoossai he mela sohuwaa “Biittaa” giidi sunttiis; qassi issisan eellida haattaa “Abbaa” giidi sunttiis. Yaatidi Xoossai hegee lo77o gididoogaa be7iis. <sup>11</sup> Hegaappe simmin Xoossai, “Biittai mittaa maataa mokko; zersetta aifeera de7iia kattaanne zersetta aifeera de7iia teeriya mittaa mokko” yaagiis; yaagin haniis. <sup>12</sup> Biittai mittaa maataa a qommuwan

qommuwan mokkiis. Mokkin Xoossai hegee lo77o gididoogaa be7iis. <sup>13</sup> Sa7ai qammiisinne wonttiis; hegeenne heezzantto gallassa.

<sup>14</sup> Xoossai hegaappe guyyiyan hagaadan yaagidi haasayiis; “Gallassaa qammaappe shaakkanau poo7oti salo gufantton hanona; eti gallassaa, wodiyaanne laittaa erisanau malaata gidona; <sup>15</sup> sa7aa bollan poo7issana mala eti salo gufantton poo7ona” yaagiis; yaagin haniis. <sup>16</sup> Xoossai naa77u gita poo7ota, gitatiyaagee gallassaa haaranaadaaninne guuxxiyaagee qammaa haaranaadan medhdhiis; xoolinttetakka i medhdhiis. <sup>17-18</sup> Xoossai eti ha sa7aa bollan poo7issana mala, gallassanne qammaa haarana malanne poo7uwaa xumaappe shaakkana mala, salo gufantton eta wottiis. Yaatidi Xoossai hegee lo77o gididoogaa be7iis. <sup>19</sup> Sa7ai qammiisinne wonttiis; hegeenne oiddantto gallassa.

<sup>20</sup> Xoossai hegaappe guyyiyan hagaadan yaagidi haasayiis; “Paxa de7iya dumma dumma meretati haattan darona; kafoikka sa7aappe bollaaranne salo gufanttuwaappe garssaara paallo” yaagiis. <sup>21</sup> Yaatidi Xoossai abban de7iya gita do7ata, haatta giddon woxxi qaaxxiya meretata ubbaanne qefiyaara de7iya kafuwaa ubbaa a qommuwan qommuwan medhdhiis. Medhdhidi Xoossai hegee lo77o gididoogaa be7iis. <sup>22</sup> Xoossai eta, “Yelettite; corattite; abbaa haattaa kumite; kafoikka biittaa bollan coratto” yaagidi anjjiis. <sup>23</sup> Sa7ai qammiisinne wonttiis; hegeenne ichchashantto gallassa.

<sup>24</sup> Xoossai hegaappe guyyiyan hagaadan yaagidi haasayiis; “Paxa de7iya meretati bantta qommuwan qommuwan: meheti, biittaara gooshettiya meretatinne do7ati bantta qommuwan qommuwan biittaa bollan kiyona” yaagiis; yaagin haniis. <sup>25</sup> Xoossai do7ata eta qommuwan qommuwan, mehetakka eta qommuwan qommuwaaninne, biittaara gooshettiya meretata ubbaa eta qommuwan qommuwan medhdhiis. Medhdhidi Xoossai hegee lo77o gididoogaa be7iis.

<sup>26</sup> Hegaappe simmin Xoossai, “Asa nu leemisuwan nuna milatissidi ane medhdhoos; medhdhin eti abbaa moliyaa, saluwaa kafuwaa, biittaa bolli woxxi qaaxxiya mereta ubbaa haarona” yaagiis. <sup>27</sup> Hagaadan Xoossai asaa ba leemisuwan medhdhiis; i a Xoossaa leemisuwan medhdhiis; i eta attumaasanne maccaasa medhdhiis.

<sup>28</sup> Xoossai eta hagaadan yaagidi anjjiis; “Yelettite; corattite; ha sa7aa kumitenne haarite; abbaa moliyaa, saluwaa kafuwaanne biittaa bolli woxxi qaaxxiya, paxa de7iya mereta ubbaa haarite” yaagiis.

<sup>29</sup> Hegaappe simmin Xoossai, “Be7ite! Taani ha biitta ubbaa bollan zeretta aifeera de7iya katta ubbaanne zeretta aifeera de7iya teeriya mitta ubbaa intteyyo immaas; etinne intteyyo quma gidana. <sup>30</sup> Qassikka ha sa7an de7iya mehenne do7a ubbaayyo, saluwaa kafo ubbaayyo, biittaara gooshettiya mereta ubbaayyoonne shemppooraa paxa de7iya mereta ubbaayyo miyoobaa gidanaadan, irxxa mittaanne maataa immaas” yaagiis; yaagin haniis. <sup>31</sup> Xoossai ba medhdhido ubbabaakka xeelliis; xeellidi daro lo77o gididoogaa be7iis. Sa7ai qammiisinne wonttiis; hegeenne usuppuntto gallassa.

## 2

<sup>1</sup> Salotinne sa7ai etan de7iyaabai ubbabi hagaadan oosetti polettiis. <sup>2</sup> Xoossai ba oottido oosuwaa usuppuntta gallassi polidi, ba oottido ooso ubbaappe laappuntta gallassi shemppiis. <sup>3</sup> Qassi Xoossai laappuntta gallassaa anjjiisinne geeshsha oottiis; aissi giikko, Xoossai ba oottiyo oosuwaa wurssidi shemppidoi he gallassaana. <sup>4</sup> Salotinne sa7ai merettidoogee hagaadaana.

### *Edene Gannatiyaabaa*

GODAI Xoossai sa7aanne salota medhdhido wode, <sup>5</sup> sa7aa bollan mittinne maati mokiibeenna; carshshinne caaribeenna; aissi giikko, GODAI Xoossai ira bukissi-ichchibeenna; qassi biittaa oottiya asinne baawa. <sup>6</sup> Gidikonne sa7aappe haattai pude kiyyidi, biittaa ubbaa irxxissees. <sup>7</sup> Hegaappe guyyiyan, GODAI Xoossai biittaa baanaappe

issi asa<sup>1</sup> medhdhiis; medhdhidi a siiriyān de7o shemppuwaa shemppi gelissiis; yaatin bitanee paxa de7iya asa gidiis.

<sup>8</sup> GODAI Xoossai awai mokkiyoosaa baggaara Edene giyoosan gannatiyaa kase tokkiis; yan ba medhdhido bitaniyaa wottiis. <sup>9</sup> GODAI Xoossai xeellanau lo77iya, maanaukka mal77iya ubba qommo mittaa biittaappe mokissiis. Gannatiyaa gidduwan de7o mittaanne lo77uwaanne iitaa erissiya mittaa wottiis.

<sup>10</sup> Gannatiyaa ushshiya shaafaa haattai Edeneppe goggees. Edeneppe kiyidoogaappe guyyiyan, oiddu shaafa kiyi shaahettees. <sup>11</sup> Koiro shaafaa sunttai Pishoona; Pishooni worqqai de7iyo Hawiila giyo biitta ubbaa bollan goggees. <sup>12</sup> He biittaa worqqai geeshsha worqqa; qassi al77o shittoinne kehi lo77iya shuchchai yan de7ees. <sup>13</sup> Naa77antto shaafaa sunttai Giyoona; Giyooni Toophphiya biitta ubbaa bollan goggees. <sup>14</sup> Hezzantto shaafaa sunttai Xegiroosa; Xegiroosi Asooreppe arshsho baggaara goggees. Qassi oiddantto shaafai Efiraaxiisa.

<sup>15</sup> Bitanee Edene Gannatiyaa oottana malanne naagana mala, GODAI Xoossai a efidi wottiis. <sup>16</sup> Wottidi GODAI Xoossai bitaniyaa, “Gannatiyaa mittaa teeraa ubbaappe neeni maana giikko ma; <sup>17</sup> shin lo77uwaanne iitaa erissiya mittaa teeraappe mooppa; aissi giikko, neeni appe miido gallassi tumu haiqqana” yaagidi azaziis.

<sup>18</sup> Hegaappe guyyiyan GODAI Xoossai, “Bitanee barkka de7iyoogee lo77o gidenna; taani ayyo injjetiyaabaanne a maaddiyaabaa kessana” yaagiis.

<sup>19</sup> GODAI Xoossai kase meheta ubbaa, do7ata ubbaanne saluwaa kafota ubbaa biittaappe medhdhiis; qassi bitanee eta woigi sunttiyaakkonne siyanau akko ehiis; ehin bitanee paxa de7iya meretata ubbaa sunttido sunttai eta suntta gididi attiis. <sup>20</sup> Hegaadan bitanee meheta ubbaa, saluwaa kafotanne bazzo do7ata ubbaa sunttiis; shin Addaamessi<sup>2</sup> injjetiyaabinne a maaddiyaabi beettibeenna.

<sup>21</sup> Hegaa gishshau GODAI Xoossai bitaniyaa xiskkuwaa kairissiis; i xiskkuwaa kairidaashin, a miyyiyaa meqettaappe issuwaa ekkidi, he sohuwaa ashuwaa kunttiis.

<sup>22</sup> Kunttidi GODAI Xoossai bitaniyaappe ekkido meqettaa macca asa kessiis; yaatidi o bitaniyaakko ehiis. <sup>23</sup> Ehin bitanee; “Hayyashsho! Ha meqettiyaa ta meqettaappe, ha ashiyaakka ta ashuwaappe ekettidaaro; akka attuma asaappe ekettido gishshau, macca asa geetettu”<sup>3</sup> yaagiis. <sup>24</sup> Hegaa gishshau asi ba aawaanne ba aayyiyo aggi bayidi, ba machcheera issippe de7ees; eti naa77ai issi asho gidoosona. <sup>25</sup> Bitaneenne a keettaayyiyaanne naa77aikka kallo xiire de7oosona; shin issi issuwau yeellatokkona.

### 3

#### *Asai Azazettennan Ixxiis*

<sup>1</sup> SHOOSHSHAI GODAI Xoossai medhdhido do7a ubbaappe aadhdhida genanchcha. Issi gallassi shooshshai he maccaasiyo, “Xoossai tumu inttena, ‘Gannatiyan de7iya mitta teeraa ubbaappekka mooppite’ giidee?” yaagidi oichchiis.

<sup>2-3</sup> Oichchin maccaasiyaa shooshshaayyo zaarada, “CHii, Xoossai hagaadan gibeenna; nuuni gannatiyan de7iya mittatu teeraa maanau danddayoos; shin Xoossai nuna, ‘Gannatiyaassi gidduwan de7iya mitta teeraa mooppite; bochchoppite; hinkkoode intte haiqqana’ giis” yaagaasu.

<sup>4</sup> SHOOSHSHAI maccaasiyo, “CHii, intte ainnekka haiqqekketa; <sup>5</sup> Xoossai heгаа giidoogee, he mittaa teeraa intte miikko, intte aifee dooyettin, lo77uwaanne iitaa Xoosaadan intte eranaagaa i eriyo gishshaassa” yaagiis.

<sup>1</sup> 2:7 Asa: “Asa” giyoogee Ibraawetto qaalān “Adam” geetettees; “Adamaa” giyoogee “Biittaa” geetettees; hegaassi naa77u qaalati issi issuwaa milatoosona. <sup>2</sup> 2:20 Addaama: Ibraawetto qaalān “Addaama” giyo sunttai “Asa” giyoogaa. <sup>3</sup> 2:23 “Attumaasa” giyoogee Ibraawetto qaalān “Ish” geetettees; “Maccaasa” giyoogee “Ishshah” geetettees; hegaassi naa77u qaalati issi issuwaa milatoosona.

<sup>6</sup> Maccaasiyaa he mittaa teerai maanau mal77iyaagaa, xeellana lo77iyaagaa, qassi asi aadhdhida erattetaa demmanau amoyiyaagaa gidioogaa be7aasu; be7ada he mittaa teeraappe ekkada maasu; qassi banaara de7iya ba azinaayyookka hegaappe immin, ikka miis.

<sup>7</sup> Miyoorin eta naa77aa aifeekka dooyetti aggiis; dooyettin eti banttau kallo xiire de7ioogaa eridosona; eridi ettaa giyo mittaa haittaa sikkidi, banttayyo menttuwan gixxidosona.

<sup>8</sup> Sa7ai omarido wode, gannatiyaa gidduwan GODAI Xoossai hemettishin, a giirettaa bitaneenne a keettaayyiyaa siyidosona; siyidi eti gannatiyaa mittaa gidдон GODAA Xoossaappe qosettidosona. <sup>9</sup> SHin GODAI Xoossai bitaniyaa xeesidi, “Addaamee, awan de7ai?” yaagiis.

<sup>10</sup> Yaagin bitanee, “Gannatiyaa gidдон ne giirettaa siyada, taani kallo de7iyo gishshau, yayyada qosettaas” yaagiis.

<sup>11</sup> GODAI Xoossai a, “ ‘Neeni kallo de7aasa’ giidi neeyyo odidai oonee? Taani nena, ‘Mooppa’ gaada azazido mittaa teeraappe maadiyye?” yaagidi oichchiis.

<sup>12</sup> Oichchin i, “Tanaara de7anaadan neeni immido maccaasiyaa he mittaa teeraappe tau immin maas” yaagiis.

<sup>13</sup> GODAI Xoossai hegaappe guyyiyan maccaasiyo, “Neeni heгаа aissi oottadii?” yaagidi oichchiis.

Yaagin maccaasiyaa, “Tana shooshshai cimmin maas” yaagaasu.

### *Xoossaa Pirddaa*

<sup>14</sup> GODAI Xoossai hegaappe guyyiyan shooshshaa, “Neeni hагаа oottido gishshau, mehe ubbaanne do7a ubbaa garssan ne xalaalai qanggettidaagaa! Neeni ne uluwan biittaara gooshettana; ne de7o laitta ubbankka baanaa laaccana. <sup>15</sup> Taani nenanne maccaasiyo, ne zereettaanne i zereettaa morkke kessana; i ne huuphiyaa qoxxana; neenikka a qirbbiyaa dukkana” yaagiis.

<sup>16</sup> Maccaasiyookka GODAI Xoossai, “Ne abbe ixetaa aginan neeni daro tuggatana; qassi neeni wolqqaama leessuwan naata yelana. Gidikonne neeni ne azinaara de7anau amottana; i nena haarana” yaagiis.

<sup>17</sup> Bitaniyaakka GODAI Xoossai hagaadan yaagiis; “Neeni ne keettaayee oduwaa siyido gishshaunne taani nena, ‘He mittaa teeraa mooppa’ gaada azazido mittaa aifiyaappe neeni miido gishshau, biittai ne gaasuwan qanggettidaagaa gido! Neeni ne de7o laitta ubban gita daafuran biittaa oottada maana. <sup>18</sup> Biittai neeyyo aguntanne kinddiichchuwaa morkkana; neeni bazzon morkkidabaa maana. <sup>19</sup> Neeni biittau simmana gakkanaassi, daafuran ne som77oi cawattin oottido ne qumaa maana; aissi giikko, neeni biittaappe<sup>4</sup> ekettadasa; neeni baana; neeni baanau simmana” yaagiis.

<sup>20</sup> Addaamee ba keettaayyiyo Hewaano<sup>5</sup> giidi sunttiis; aissi giikko, a paxa de7iya asa ubbau aayo.

<sup>21</sup> GODAI Xoossai Addaameyyoonne a keettaayeeyyo itiyaa giigissidi eta maizziis.

<sup>22</sup> Hegaappe guyyiyan GODAI Xoossai, “Simmi asi nuuppe issuwaadan lo77uwanne iitaa eriyaabaa gidiiis. I ba kushiya yeddidi, de7o mittaappe ekkidi, qassi meenna malanne merinau paxa de7enna mala teqettanau koshshees” yaagiis. <sup>23</sup> Hega gishshau, i ba ekettido biittaa oottana mala, GODAI Xoossai Edene Gannatiyaappe a kessiis. <sup>24</sup> A kessirggidi, de7o mittaakko efiya ogiyaa naagana mala, kiruubeta giyo ki-itanchchatanne aadhdhi aadhdhi wodhdhiya tama laco bisuwaa Edene Gannatiyaappe arshsho bagaara wottiis.

<sup>4</sup> 3:19 Biittaa: Doomettaabaa 2:7 tohossaara xaafettidaagaa xeella. <sup>5</sup> 3:20 Hewaano: Ha suntaa birshshettai “De7iyaaro” giyoogaa.



## 4

### *Qaayeelanne Aabeela*

<sup>1</sup> Addaamee ba keettaayee Hewaaniira aqiis; a abbe ixettada attuma na7a yelaasu; “GODAI tana maaddin, attuma na7a demmaas” gaada a Qaayeela<sup>6</sup> sunttaasu. <sup>2</sup> Qassi a ishaa Aabelakka yelaasu.

Aabeeli dorssa heemmees; qassi Qaayeeli biittaa oottees. <sup>3</sup> Unddenna wodiyaappe guyyiyan, Qaayeeli ba gaden mokiida kattaappe GODAAYYO yarshshuwaa yarshshiiis; <sup>4</sup> shin Aabeeli ba dorssa wudiyaa gidдон baira yelettida maratuppe ekkidi shukkidi, eta ashuwaappe modhdhiyaasaa yarshshiiis. GODAI Aabeelanne a yarshshuwaa ekkiiis; <sup>5</sup> shin Qaayeelanne a yarshshuwaa ekkibeenna. Hegaa gishshau, Qaayeeli keehi yiillotiis; ba som77uwaakka xumissiiis.

<sup>6</sup> Yaatin GODAI Qaayeela, “Aissi yiillotai? Ne som77oikka aissi xumidee? <sup>7</sup> Neeni lo77obaa oottiyaabaa gididiyaakko, ne som77oi pashkkennee? SHin neeni lo77obaa oottana xayikko, nagarai do7adan ne penggen zuggees; i nena haarana koyees; shin neeni a xoonana bessees” yaagiis.

<sup>8</sup> Hegaappe guyyiyan, Qaayeeli ba ishaa Aabeela, “Ane dembbaa boos” yaagiis. Biidi eti dembban de7ishin, Qaayeeli ba ishaa Aabeela bolli denddinne wori aggiis.

<sup>9</sup> Worin GODAI Qaayeela, “Ne ishai Aabeeli awaanee?” yaagidi oichchiis.

Oichchin Qaayeeli zaaridi, “Taani erikke; ta ishaa naagiyaagee taneeyye?” yaagiis.

<sup>10</sup> Yaagin GODAI Qaayeela, “Hagaa aissi oottadii? Be7a; ne ishaa suuttai biittaaappe taakko waassees. <sup>11</sup> Ne kushiyaappe ne ishaa suuttaa ekkidi, mittanau hanggida biittaaappe ha77i neeni qanggettidaagaa. <sup>12</sup> Neeni oottinkka biittai neeyyo aifenna; betedan neeni sa7aa bollan toilattana” yaagiis.

<sup>13</sup> Qaayeeli GODAA, “Poora! Neeni tana qaxxayiyo qixaatee taani mulekka dand-dayennaagaa. <sup>14</sup> Hekko neeni tana hachchi ha biittaaappe yedettaasa; taani ne sinttappe qosettana; betedan taani sa7aa bollan toilattana; tana demmai ooninne worana” yaagiis.

<sup>15</sup> Yaagin GODAI a, “Nena ooninne worenna; worikko, ne haluwaa taani laappun kushiya kessana” yaagiis. Hegaa gishshau, demmai ooninne a worennaadan GODAI a bolli malaataa wottiis. <sup>16</sup> Wottin Qaayeeli GODAA sinttappe kiyidi, Edene baggaappe arshshoora de7iya Nooda<sup>7</sup> giyo biittan de7iis.

### *Qaayeela Yeletaa*

<sup>17</sup> Qaayeeli ba keettaayeera aqiis; a abbe ixettada, Heenooka yelaasu. Qaayeeli katamaa he wode keexxidi, he katamaa ba na7aa sunttan “Heenooka” giidi sunttiis. <sup>18</sup> Heenooki Iraada yeliis; Iraadi Mahuyaa7eela yeliis; Mahuyaa7eeli Matushaa7eela yeliis; Matushaa7eeli Laameeka yeliis.

<sup>19</sup> Laameeki Aadonne Xiilo giyo naa77u maccaasata dautta ekkiiis. <sup>20</sup> Aada Yaabaala yelaasu; Yaabaali mehiyaa haariya, dunkkaaniyan de7iya asatu aawaa. <sup>21</sup> A ishaa sunttai Yuubaala; Yuubaali qassi diittaa diixxiyaanne pulaale punniya asatu ubbaa aawaa; <sup>22</sup> Xiila qassi Tubaaliqaina giyo na7aa yelaasu; Tubaaliqaini nahaasiyaap-penne birataappe dumma dumma miishshata qoxxiyaagaa. Tubaaliqaina michchiyaa Naa7imo.

<sup>23</sup> Issi gallassi Laameeki ba keettaayeta, “Aadee, Xiilee, siyite; ta keettaayetoo, ane taani yootiyoogaa ezggite. Issi bitanee tana dechchido gishshau, taani a woraas; ee, taani he tana mazunxxissida wodallaa woraas. <sup>24</sup> Qaayeela haluwaa kessanau laappun kushe koshshikko, Laameeka haluwaa kessanau laappun tammanne laappun kushe koshshees” yaagiis.

<sup>6</sup> 4:1 Qaayeela: Ibraawetto qaalaa “Qayin” geetettees. Birshshettai “Demmaas” giyoogaa. <sup>7</sup> 4:16 Nooda: Ha sunttaa birshshettai “Toilattiyoosaa” giyoogaa.

*Seetanne Heenoosa*

<sup>25</sup> Addaamee ba keettaayeera haranttuwaa aqin, hara na7aa yelaasu. Yelada, “Qaay-eeli worido Aabeela gishshaa Xoossai tau hara na7aa immiis” gaada, a Seeta<sup>8</sup> gaada sunttaasu. <sup>26</sup> Seetikka attuma na7aa yeliis; yelidi a “Heenoosa” giidi sunttiis. Asai GODAA sunttaa xeesidi goinniyoogaa he wode doommiis.

**5***Addaame Yeletaa*

<sup>1</sup> Addaame yeletai hagaappe kaallidi xaafettiis. Xoossai asa medhdhido gallassi bana milatissidi medhdhiis. <sup>2</sup> I attumaasanne maccaasa ootti medhdhidi, eta anjjiis. Eta medhdhidi Asa<sup>9</sup> giidi sunttiis.

<sup>3</sup> Addaamee 130 laittaa de7idi, bana milatiya attuma na7aa yeliis; yelidi a “Seeta” giidi sunttiis. <sup>4</sup> Addaamee Seeta yelidoogaappe guyyiyan, 800 laittaa de7iis; hara attuma naatanne macca naata yeliis. <sup>5</sup> Addaamee muleera 930 laittaa de7idi haiqqiis.

<sup>6</sup> Seeti 105 laittaa de7idi, Heenoosa yeliis; <sup>7</sup> Seeti Heenoosa yelidoogaappe guyyiyan, 807 laittaa de7iis; hara attuma naatanne macca naata yeliis. <sup>8</sup> Seeti muleera 912 laittaa de7idi haiqqiis.

<sup>9</sup> Heenoosi 90 laittaa de7idi, Qainaana yeliis; <sup>10</sup> Heenoosi Qainaana yelidoogaappe guyyiyan, 815 laittaa de7iis; hara attuma naatanne macca naata yeliis. <sup>11</sup> Heenoosi muleera 905 laittaa de7idi haiqqiis.

<sup>12</sup> Qainaani 70 laittaa de7idi, Malaali7eela yeliis; <sup>13</sup> Qainaani Malaali7eela yelidoogaappe guyyiyan, 840 laittaa de7iis; hara attuma naatanne macca naata yeliis. <sup>14</sup> Qainaani muleera 910 laittaa de7idi haiqqiis.

<sup>15</sup> Malaali7eeli 65 laittaa de7idi, Yaareeda yeliis; <sup>16</sup> Malaali7eeli Yaareeda yelidoogaappe guyyiyan, 830 laittaa de7iis; hara attuma naatanne macca naata yeliis. <sup>17</sup> Malaali7eeli muleera 895 laittaa de7idi haiqqiis.

<sup>18</sup> Yaareedi 162 laittaa de7idi, Heenooka yeliis; <sup>19</sup> Yaareedi Heenooka yelidoogaappe guyyiyan, 800 laittaa de7iis; hara attuma naatanne macca naata yeliis. <sup>20</sup> Yaareedi muleera 962 laittaa de7idi haiqqiis.

<sup>21</sup> Heenooki 65 laittaa de7idi, Maatusaala yeliis; <sup>22</sup> Maatusaala yelidoogaappe guyyiyan, Heenooki 300 laittaa Xoossaara hemettiiddi de7iis; hara attuma naatanne macca naata yeliis. <sup>23</sup> Heenooki muleera 365 laittaa de7iis; <sup>24</sup> i Xoossaara hemettiiddi xay bayiis; aissi giikko, Xoossai a ekki efiis.

<sup>25</sup> Maatusaali 187 laittaa de7idi, Laameeka yeliis; <sup>26</sup> Maatusaali Laameeka yelidoogaappe guyyiyan, 782 laittaa de7iis; hara attuma naatanne macca naata yeliis. <sup>27</sup> Maatusaali muleera 969 laittaa de7idi haiqqiis.

<sup>28</sup> Laameeki 182 laittaa de7idi, attuma na7a yeliis. <sup>29</sup> Yelidi, “Ha na7ai GODAI ganggido biittaa bollan nuna nu kushiya oosuwaa daafuraappe shemppissana” giidi Noha<sup>10</sup> sunttiis. <sup>30</sup> Laameeki Noha yelidoogaappe guyyiyan, 595 laittaa de7iis; hara attuma naatanne macca naata yeliis. <sup>31</sup> Laameeki muleera 777 laittaa de7idi haiqqiis.

<sup>32</sup> Nohee 500 laittaa de7idi, Seema, Kaamanne Yaafeeta yeliis.

**6***Asaa Iitatettaa*

<sup>1</sup> Asai sa7aa bollan darido wode, etau macca naati yelettidosona; <sup>2</sup> “Xoossaa naata” geetettiya meretati ha asaa macca naati puulanchcha gidioogaa be7idosona; be7idi etappe bantta dooridoogeeta machchidosona. <sup>3</sup> GODAI, “Ta Ayyaanai asan merinau

<sup>8</sup> 4:25 Seeta: Ha sunttaa birshshettai “Immiis” giyoogaa. <sup>9</sup> 5:2 Asa: Ibraawetto qaalan “Asa” giyoogee “Addaama” giyoogaa. <sup>10</sup> 5:29 Noha: Ha sunttai “SHemppissiis” giyoogaa milatees.

de7enna; aissi giikko, asi haiqqiyaagaa; a laittaikka issi xeetanne laatama gidana” yaagiis. <sup>4</sup> He wodenne hegaappe guyyiyan Xoossaa naati asaa macca naata ekkin, naati yelettido wode, wogga adussa asati sa7aa bollan de7idosona. Etinne beni wode olau minonne erettida asa.

<sup>5</sup> GODAI he wode sa7aa bollan de7iya asaa iitatetta daridoogaanne eti wozanan qoppiyoobai ubbai ubba wodekka iita xalaala gididoogaa be7iis; <sup>6</sup> be7idi GODAI asaa ha sa7aa bollan medhdhidoogau azzaniis; ba wozanan keehippe seelettiis. <sup>7</sup> Hegaa gishshau GODAI, “Taani medhdhido asaa ha sa7aa bollappe muleera quccana; asaa, mehiyaa, do7aa, biittaara gooshettiya meretatanne saluwaa kafota xaissana; aissi giikko, taani eta medhdhidoogau azzanaas” yaagiis. <sup>8</sup> SHin Nohee GODAA sinttan nashettiis.

### *Noha*

<sup>9</sup> Nohee hanidobai hagaappe kaallidi xaafettiis. Nohee xillo asa; i ba wodiyan de7ida asaa gidдон suure asa; Nohee Xoossaara hemettiis. <sup>10</sup> Nohee Seema, Kaamanne Yaafeeta giyo heezzu attuma naata yeliis.

<sup>11</sup> He wode biittai sa7ai Xoossaa sinttan tuniis; sa7ai ubbai makkalan kumiis. <sup>12</sup> Xoossai ha sa7aa xeelliis; xeellidi sa7ai tunidoogaa be7iis; aissi giikko, sa7an de7iya asai ubbai ba ogiyaa tunissi wottiis.

<sup>13</sup> Hegaa gishshau, Xoossai Noha hagaadan yaagidi azaziis; “Taani asa ubbaa xaisana hanais; eta gaasuwan sa7ai makkalan kumido gishshau, taani tumuppe asaakka sa7aakka xaissana. <sup>14</sup> Hegaa gishshau, mino mittaappe neeyyo markkabiyyaa keexxa; he markkabiyyaa gidдон cora qol77ota kessa; yaatada sooranne kareera shidan meesha. <sup>15</sup> Markkabiyyaa hagaadan yaatada keexxa; zananaa heezzu xeetu wara, gomppaa ishatamu wara, geesaa hasttamu wara ootta; <sup>16</sup> markkabiyaassi kaaraa medhdha; kaaraappenne godaappe gidduwan issi wara gidiyaasaa kallo agga baya; penggiyaa markkabiyaassi miyyessaara kessa; markkabiyyaa heezzu pooqe kessada keexxa.

<sup>17</sup> “Taani saloppe garssan de7o shemppooraa de7iya mereta ubbaa xaissanau, ha sa7aa bollan bashshaa haattaa yeddana; yeddin ha sa7an de7iyaabai ubbai xayana. <sup>18</sup> SHin taani ta maachchaa nenaara maaccettana. Neeni ne keettaayyiyo, ne attuma naatanne ne attuma naatu maccaasata nenaara ekkada markkabiyyaa gidдо gelana. <sup>19</sup> Eti nenaara paxa attana mala, paxa de7iya mereta ubbaappe qommuwan qommuwan attumaagaanne maccaagaa naa77aa naa77aa oottada, markkabiyyaa gidдо gelissaasa. <sup>20</sup> Dumma dumma qommo kafuwaappe, dumma dumma qommo mehiyaappenne biittaara gooshettiya dumma dumma qommo meretatuppe ubbaappe naa77aa naa77aa gididi, paxa attana mala neekko yaana. <sup>21</sup> Qassi neeninne nenaara de7iyaageeti maanau, dumma dumma qommo miyo kattaa efaada, markkabiyyaa gidдон qola” yaagiis.

<sup>22</sup> Yaagin Nohee ubbabaakka Xoossai azazidoogaadan oottiis.

## 7

<sup>1</sup> GODAI hegaappe guyyiyan Noha hagaadan yaagiis; “Neni ne so asaa ubbaara markkabiyyaa gidдо gela; aissi giikko, taani ha wodiya yeletaa gidдон neni xillo gididoogaa be7aas. <sup>2-3</sup> Neni geeshsha gidida mehenne do7a ubbaappe a qommuwaappe qommuwaappe attumaagaanne maccaagaa laappunaa laappunaa, geeshsha gidenna mehenne do7a ubbaappe a qommuwaappe qommuwaappe issi attumaagaanne issi maccaagaa, qassi saluwaa kafuwaappe a qommuwaappe qommuwaappe attumaagaanne maccaagaa laappunaa laappunaa oottada, sa7aa ubbaa bollan dumma dumma zeretta paxa attana mala nenaara ekkada gela. <sup>4</sup> Aissi giikko, laappun gallasaappe guyyiyan, taani oitamu gallasaanne oitamu qammaa ha sa7aa bollan iraa bukissana; yaatada taani medhdhido mereta ubbaa sa7aa bollappe quccana” yaagiis.

<sup>5</sup> Yaagin Nohee GODAI a azazido ubbaba oottiis.

<sup>6</sup> Bashshaa haattai ha sa7aa bolli yiido wode, Nohe laittai usuppun xeeta. <sup>7</sup> Nohee, a attuma naati, a keettaayyiyaanne a naatu maccaasati bashshaa haattaappe attanau markkabiya giddo gelidosona. <sup>8</sup> Geeshsha mehiyaappenne do7aappe, geeshsha gidenna mehiyaappenne do7aappe, kafuwaappenne biittaara gooshettiyaageetu ubbaappe <sup>9</sup> Xoossai Noha azazidoogaadankka attumaageenne maccaagee naa77aa naa77aa gididi, Nohekkko markkabiya giddo gelidosona. <sup>10</sup> Gelin laappun gallasaappe guyyiyan, bashshaa haattai ha sa7aa bollan yiis.

<sup>11</sup> Nohee usuppun xeetu laittaa de7in, naa77antta aginan, tammanne laappunntta gallassan, he gallassankka biittaa gidдон de7iya gita ciimmaa pultto ubbai xuuqqi bayiis; saluwan de7iya haattaa maskkootetikka dooyetti wodhdhidosa; <sup>12</sup> dooyettin irai ha sa7aa bollan oitamu gallasaanne oitamu qammaa bukkiis. <sup>13</sup> He gallassankka Noheenne a attuma naati, Seemi, Kaaminne Yaafeeti, Nohe keettaayyiyaanne a naatu heezzaa maccaasati issippe markkabiya giddo gelidosona. <sup>14</sup> Etinne do7a ubbaappe ba qommuwan qommuwan, mehe ubbaappekka ba qommuwan qommuwan, biittaara gooshettiyaageetu ubbaappe ba qommuwan qommuwan, kafo ubbaappe ba qommuwan qommuwan, etaara issippe gelidosona; <sup>15</sup> de7o shemppooraa de7iyaageeti ubbai naa77aa naa77aa gididi, Nohekkko markkabiyan gelidosona; <sup>16</sup> Xoossai Noha azazidoogaadan, mereta ubbaappe attumanne macca gididi, markkabiya giddo gelidosona; gelin Nohee gidдон de7ishin, GODAI markkabiya penggiyaa gorddiis.

<sup>17</sup> Bashshaa haattai oitamu gallasaa sa7aa bollan bukkiiddi gam77iis; haattai daridi, markkabiya biittaappe pude denttiis. <sup>18</sup> Haattai biittaa bollan keehippe darin, markkabee haattaa bollan toohettiis. <sup>19</sup> Saloppe garssaara de7iya xoqqa dereti ubbai mitettana gakkanaashin, haattai ha sa7aa bollan keehi wolqqaappe dariis. <sup>20</sup> Haattai deretu xeeraappe aadhdhidi, tammanne ichchashu wara gakkanaashin tookkiis. <sup>21</sup> Yaatin sa7aa bollan paxa qaaxxiya meretati ubbai: kafoi, mehee, do7ai, sa7aa bollan sham77i giya mereta ubbainne asai ubbai haiqqiis. <sup>22</sup> Ee, mela biittaa bollan de7iya, ba siireera de7o shemppuwaa shemppiya ubbaikka haiqqiis. <sup>23</sup> Ha sa7an paxa de7iyaabai ubbai: asai, meheenne do7ai, biittaara gooshettiya meretatinne saluwaa kafoti ubbaikka sa7aappe qucettidosona. Qucettin Nohe xalaalainne aara markkabe gidдон de7iyaageeti attidosona. <sup>24</sup> He haattai xeetanne ishatamu gallasa gakkanaassi sa7aa bollan gam77iis.

## 8

### *Bashsha Haattaa Wurssettaa*

<sup>1</sup> SHin Xoossai Noha, aara markkabiya gidдон de7iya do7a ubbaanne mehe ubbaa qoppiis; qoppidi sa7aa bollan carckuwaa carckissiis; carckissin he haattai wodhdhi wodhdhi biis. <sup>2</sup> Qassi biittaa gidдон de7iya ciimmaa pulttoinne saluwan de7iya haattaa maskkooteti gorddettidosona; iraikka saluwan teqettiis. <sup>3</sup> Yaanin haattai wodhdhi wodhdhi biis. He xeetanne ishatamantta gallasaappe guyyiyan, haattai wodhdhiis. <sup>4</sup> Haattai wodhdhin markkabee laappunntta aginan, tammanne laappunntta gallassan Araaraate giyo deretu bolli shemppiis. <sup>5</sup> Haattai tammantta aginai gakkanaassikka wodhdhi wodhdhi biis; tammantta aginaayyo koiro gallassi deretuyyo xerai beettiis.

<sup>6</sup> Oitamu gallasaappe guyyiyan, Nohee ba keexxido markkabiya maskkootiyaa dooyiis; <sup>7</sup> dooyidi issi quuruwaa kare yeddiis; yeddin quuroi haattai biittaa bollappe melana gakkanaassi, yaanne haanne paalliiddi gam77iis. <sup>8</sup> Qassi Nohee haattai biittaa bollappe wodhdhi wuridaakkonne be7anau issi haraphphiyo kare yeddiis; <sup>9</sup> shin he haraphphiya haattai biittaa ubbaa bollan ha77ikka de7iyo gishshau, shemppiyoosaa demmabeikku. Hegaa gishshau simmada, markkabiya gidдон de7iya Nohekkko yaasu; yin i ba kushiya yeddidi, baakko markkabiya giddo ekkkiis.

<sup>10</sup> Hegaappe guyyiyan, hara laappun gallassaa takkidi, haraphphiyo zaarettidikka markkabiya giddoppe kessidi yeddiis. <sup>11</sup> He haraphphiya sa7ai omariyo wode akko simmada yaasu; yaidda wogaraa aacaappe duuttido irxxa haittaa ba doonan saxxa ekkada yaasu. Hega gishshau, haattai biittaa bollappe wodhdhidoogaa Nohee eriis. <sup>12</sup> Qassi Nohee hara laappun gallassaa takkidi, he haraphphiyo zaarettidi yeddiis; shin he haraphphiya akko simmada yabeikku.

<sup>13</sup> Nohee usuppun xeetanne isiini laittaa de7in, koiro aginan koiro gallassi, haattai biittaa bollappe xi77iis; Nohee markkabiya qum77uwaa qaari xeellidi, biittai xi77idoogaa be7iis. <sup>14</sup> Naa77antto aginan laatamanne laappunnta gallassan, biittai muleera meliis.

<sup>15</sup> Xoossai he wode Noha hagaadan yaagidi azaziis; <sup>16</sup> “Neeni ne keettaayyiyo, ne attuma naatanne ne naatu maccaasata ekkada markkabiya giddoppe kiya. <sup>17</sup> Eti yelettidi, daridi corattana mala, paxa de7iya mereta ubbaappe nenaara de7iyaageeta: kafota, meheta, do7atanne biittaara gooshettiya ubbaa nenaara kessa” yaagiis. <sup>18</sup> Yaagin Nohee ba attuma naatuura, ba keettaayeeranne ba naatu maccaasatuura markkabiya giddoppe kiyiis. <sup>19</sup> Kiyin mehenne do7a ubbai, biittaara gooshettiya mereta ubbai, kafo ubbainne sa7aa bollan woxxi qaaxxiyaabai ubbai ba qommuwan qommuwan markkabiya giddoppe kiyidosona.

<sup>20</sup> Kiyidoogaappe guyyiyan, Nohee GODAAYYO yarshshiyosaa gimbbiis; gimbbidi geeshsha mehiyaanne do7aa ubbaappenne geeshsha kafo ubbaappe ekkidi, yarshshiyosoo xuu ggidi yarshshiis. <sup>21</sup> Yaatin GODAI yarshshuwaa peenuwaa sawiyaagaa singgidi, ba wozanan hagaadan yaagiis; “Naatettaasappe doommmin, asi wozanan qoppiyoobai ubbai iita gidikkokka, taani asa gishshau gaada naa77antto mulekka ha sa7aa qanggikke. Qassi taani ha77i oottidoogaadan paxa de7iya mereta ubbaa naa77antto mulekka xaissikke. <sup>22</sup> Ha sa7ai de7ido peesha ubban, zeriyo wodeenne cakkiyo wodee, meegoinne hombbee, boneenne balggoi, gallassainne qammai ubbatookka de7ana” yaagiis.

## 9

### *Xoossai Noheera Maacettido Maachchaa*

<sup>1</sup> Xoossai Nohanne a attuma naata hagaadan yaagidi anjjiis; “Yelettite; corattite; sa7a ubbaa kumite. <sup>2</sup> Sa7aa do7ati ubbai, saluwaa kafoti ubbai, biittan woxxi qaaxxiyaabai ubbainne abban de7iya moleti ubbai intteyyo yayyonanne dagammona. Eti intteyyo aadhdhidi imettidosona; <sup>3</sup> taani mokkiya dumma dumma kattata intteyyo immidoogaadankka, paxa de7iya woxxi qaaxxiya mereta ubbai intteyyo quma gidana. <sup>4</sup> SHin biron shemppooraa de7iya suuttai a giddon de7iyo ashuwaa mooppite. <sup>5</sup> Taani intte shemppuwaara de7iya intte suuttaa do7a ubbaappe tumu achchana; qassi asa ubbaappekka, a mala asaa suuttaa achchana. <sup>6</sup> Xoossai asaa bana Xoossaa milatissidi medhdhido gishshau, asa suutta gussiya oona gidikkonne, a suuttaikka asa kushen gukkana. <sup>7</sup> Intte yelettite; corattite; sa7an darite; an corattite” yaagiis.

<sup>8</sup> Hegaappe guyyiyan, Xoossai Nohanne aara de7iya a attuma naata hagaadan yaagiis; <sup>9-10</sup> “Simmi ha77i, taani ta maachchaa inttenaara, intteppe guyyiyan intte zerettaaranne paxa nenaara de7iya mereta ubbaara maacettais; ee, taani ta maachchaa kafuwaara, mehiyaara, sa7aa do7a ubbaaranne, markkabiyaappe inttenaara kiyida, paxa de7iya mereta ubbaara maacettais. <sup>11</sup> Taani inttenaara ta maachchaa maacettais; hagaappe sinttan paxa de7iyaabai ubbai bashshaa haattan mulekka xayenna; ha sa7aa bashshiya haatti hagaappe sinttan mulekka de7enna” yaagiis.

<sup>12</sup> Qassikka Xoossai, “Taani taappenne intteppe, inttenaara de7iya paxa mere-tatu ubbaappe gidduwan yaana yeleta ubbaara maacettiyo maachchaa malaatai ha-gaa; <sup>13</sup> taani ta zuullaa shaaran essaas; i taappenne ha sa7aappe gidduwan de7iya



maachchau malaata gidana. <sup>14</sup>Taani sa7aappe bollan shaaraa ehiido wodenne shaaran zuullai beettido wode, <sup>15</sup> taappenne intteppe paxa de7iya dumma dumma qommo mereta ubbaappe gidduwan maacettido ta maachchaa hassayana; paxa de7iyaabaa ubbaa xaissanau hagaappe sinttan mulekka bashshaa haatti yeenna. <sup>16</sup>Zuullai shaaran beettido wode audenne, taani a be7ana; be7ada taappe Xoossaappenne ha sa7aa bollan paxa de7iya dumma dumma qommo mereta ubbaappe gidduwan maacettido merinaa maachchaa taani hassayana” yaagiis.

<sup>17</sup> Yaagidi Xoossai Noha, “Taani taappenne ha sa7aa bollan paxa de7iyaabaa ubbaappe gidduwan maacettido maachchaa malaatai haggaa” yaagiis.

### *Nohanne A Naata*

<sup>18</sup> Markkabiyaappe kiyida Nohe attuma naati Seema, Kaamanne Yaafeeta; Kaami Kanaane aawaa. <sup>19</sup> Hageeti heezzaikka Nohe naata; sa7an ubban de7iya asai etappe yelettiis.

<sup>20</sup> Nohee goshshanchcha; i woiniyaa turaa tokettaa doommiis. <sup>21</sup> Issi gallassi i he woiniyaa eessaa uyidi mattottiis; mattottidi ba dunkkaaniyaa gidдон kallo xiire zin77iis. <sup>22</sup> Kanaane aawaa Kaami ba aawaa kalluwaa be7iis; be7idi, kare kiyidi, ba naa77u ishanttuuyo yootiis. <sup>23</sup> SHin Seeminne Yaafeeti afala issuwaa ekkidi, naa77aikka bantta hashiyaara hashiyaara gatti oiqqidi, guyyegutti hemetti gelidi, bantta aawaa kalluwaa kammidosona; eti bantta aawaa kalluwaa be7enna mala bantta som77uwaa wora zaaridosona.

<sup>24</sup> Nohee mattoi aadhdhin beegottidi, a na7ai ubbaappe kaaloi a oottidobaa eriis.

<sup>25</sup> Eridi a,  
“Kanaani qanggettidaagaa gido!  
I ba ishanttuuyo wurssetta aille gidana”  
yaagiis.

<sup>26</sup> Qassikka Nohee,  
“GODAI, Seema Xoossai galatetto!  
Kanaani Seema aille gido;

<sup>27</sup> Xoossai Yaafeeta biittaa aasso.<sup>11</sup>  
Yaafeeta zareti Seema zaretu gidдон de7ona;  
Kanaani Yaafeeta aille gido” yaagiis.

<sup>28</sup> Bashshaa haattaappe guyyiyan, Nohee heezzu xeetanne ishatamu laittaa de7iis.

<sup>29</sup> Nohee muleera uddufun xeetanne ishatamu laittaa de7idi haiqqiis.

## 10

### *Nohe Naatu Yeletaa*

*(Hanidabaa Odiya Koiro Maxaafaa 1:5-23)*

<sup>1</sup> Nohe naatu, Seema, Kaamanne Yaafeeta yeletai hagaappe kaallidi xaafettidaagaa; bashshaa haattaappe guyyiyan, etau attuma naati yelettidosona.

<sup>2</sup> Yaafeeta attuma naati: Goomera, Maagooga, Maadaaya, Yaawaana, Tubaala, Meshekanne Tiiraasa.

<sup>3</sup> Goomera attuma naati: Ashkkanaaza, Riifaatanne Togarmma.

<sup>4</sup> Yaawaana attuma naati: Eliisha, Tarsseesa, Kitiimanne Rooda.

<sup>5</sup> Hageetuppe abbaa doonan de7iya asai ubbai ba biittan biittan, ba qaalaa qaalaa, ba yaran yaraaninne, ba kawotettan kawotettan shaahettidosona.

<sup>6</sup> Kaama attuma naati: Kuusha, Mixiraima, Puuxanne Kanaana.

<sup>7</sup> Kuusha attuma naati: Saaba, Hawiila, Saabita, Raa7imanne Sabttaka.

Raa7ima attuma naati: Saabanne Dadaana.

<sup>11</sup> **9:27** Yaafeeta birshshettai “Aasso” giyoogaa milatees.

<sup>8</sup> Kuushi Naamiruuda yeliis; Naamiruudi ha sa7an koiro wolqqaama olanchcha gidii; <sup>9</sup> GODAA sinttankka i wolqqaama shankkanchcha gidii; “Naamiruudadan GODAA sinttan wolqqaama shankkanchcha gida” giyoogee heгаа gishshassa. <sup>10</sup> A kawotettaayyo koiro katamati Sanaa7oore biittan de7iya Baabiloone, Ereeka, Akkaadanne Kalnna. <sup>11-12</sup> I he biittaappe Asoore biidi, Nanawe, Rahobootanne Kaalaha keexxiis; qassi Nanaweppenne Kaalahappe gidduwan de7iya Reseena giyo gita katamaakka keexxiis.

<sup>13-14</sup> Mixiraimi Ludeta, Anaameta, Lahaabeta, Nafttuuheta, Patiroosata, Kaasiluuhetanne Pilisxxeema zareta yelida Kafttooreta yeliis. <sup>15-18</sup> Kanaanee ba baira na7aa Sidoonanne Heeta yeliis; qassi Kanaanee Yaabuusata, Amooreta, Gerggeeseta, Hiiweta, Arqgeta, Siinata, Ariwaadeta, Xamaaretanne Hamaatata yeliis.

Hegaappe guyyiyan, Kanaane zareti laalettin, <sup>19</sup> Kanaane biittaa zawai Sidoonappe doommidi, Garaaraaranne Gaazaara kanttidi, Sadoomanne Gamooraa, Adaamanne Xaboima biidi, Lashaa7an zawatees. <sup>20</sup> Kaama attuma naati bantta yaran yaran, bantta qaalan qaalan, bantta biittan biittaaninne bantta kawotettan kawotettan xaafettidaageeti hageeta.

<sup>21</sup> Seemau naati yelettidosona; i Yaafetayyo baira ishaanne Eboora naatu ubbaayyo maizza aawaa. <sup>22</sup> Seema attuma naati: Elaama, Asoora, Arifaakisaada, Luudanne Araama.

<sup>23</sup> Araama attuma naati: Uuxa, Huula, Geteeranne Mesheka.

<sup>24</sup> Arifaakisaadi SHelaaha yeliis.

SHelaahi Eboora yeliis.

<sup>25</sup> Eboorau naa77u attuma naati yelettidosona. Issuwaa sunttai Peeleega; aissi giikko, sa7an de7iya asai a wodiyan shaahettiis; a ishaa sunttai Yoqixaana.

<sup>26</sup> Yoqixaani naata yeliis. Etinne: Almmodaada, SHeleefa, Haxarmmaaweta, Yeraaha, <sup>27</sup> Hadoraama, Uzaala, Diiqila, <sup>28</sup> Oobaala, Abimaa7eela, Saaba, <sup>29</sup> Ofira, Hawiilanne Yobaaba. Hageeti ubbaikka Yoqixaana attuma naata.

<sup>30</sup> Eti de7ido heerai Meeshappe biidi arshsho baggaara de7iya deree dariyo biittan Safaara gakkées. <sup>31</sup> Seema attuma naati bantta yaran yaran, bantta qaalan qaalan, bantta biittan biittaaninne bantta kawotettan kawotettan xaafettidaageeti hageeta.

<sup>32</sup> Hageeti bantta yaran yaraaninne bantta kawotettan kawotettan xaafettida Nohe attuma naatu zareta. Bashshaa haattaappe simmin, kawotettati hageetuppe sa7a ubbau laalettidosona.

## 11

### *Baabiloone Pooqiyaa*

<sup>1</sup> Sa7aa bollan de7iya asi ubbi koiro issi doonaanne issi qaalaa haasayees. <sup>2</sup> Asati arshsho baggi simmidi biido wode, Sanaa7oore giyo biittan dembba issuwaa demmidi yan, uttidosona.

<sup>3</sup> Eti issoi issuwaa, “Haayite; xuubiyaa medhdhidi, taman xuuggoos” yaagidosona. Yaagidi eti shuchchaa gishshaa xuubiyaa, urqqaa gishshaa shidaa ekkidosona; <sup>4</sup> ekkidi, “Haayite; nu sunttaa xeesissanaanne qassi nuuni ha sa7aa ubbaa bollan laalettinnan attanau issi gita katamaanne xerai saluwaa gakkiiyo issi pooqiyaa nuuyyo keexxoos” yaagidosona.

<sup>5</sup> SHin GODAI asati keexxido gita katamaanne pooqiyaa be7anau duge wodhdhiis; <sup>6</sup> wodhdhidi GODAI hagaadan yaagiis; “Hekko eti issi asa; qassi eti ubbaikka issi qaalan haasayoosona; eti ha77i haga oottanau doommiichchaappe guyyiyan, eti banttayyo oottanau qoppiyooban etau danddayettennabi aibinne baawa. <sup>7</sup> Haayite; duge wodhdhidi eti issoi haasayiyo qaalaa issoi erenna mala, eta qaalaa dummayoos” yaagiis. <sup>8</sup> Yaagidi GODAI eta hegaappe sa7a ubbaa bollan laalin, eti he gita katamaa

keexxiyoogaa aggi bayidosona. <sup>9</sup> GODAI sa7aa asaa qaalaa yan dummayido gishshau, he katamai Baabiloona geetettiis. GODAI eta hegaappe sa7a ubbaa bollan laaliis.

### *Seema Yeletaa*

<sup>10</sup> Seema yeletai hagaappe kaallidi xaafettidaagaa. Bashshaa haattaappe guyyiyan, naa77u laitta gidin, Seema laittai xeetaa gidido wode, Seemi Arifaakisaada yeliis. <sup>11</sup> Seemi Arifaakisaada yelidoogaappe guyyiyan, ichchashu xeetu laittaa de7iis; hara attuma naatakka macca naatakka yeliis.

<sup>12</sup> Arifaakisaadi 35 laittaa de7idi, SHelaaha yeliis; <sup>13</sup> Arifaakisaadi SHelaaha yelidoogaappe guyyiyan, 403 laittaa de7iis; hara attuma naatakka macca naatakka yeliis.

<sup>14</sup> SHelaahi 30 laittaa de7idi, Eboora yeliis; <sup>15</sup> SHelaahi Eboora yelidoogaappe guyyiyan, 403 laittaa de7iis; hara attuma naatakka macca naatakka yeliis.

<sup>16</sup> Eboori 34 laittaa de7idi, Peeleega yeliis; <sup>17</sup> Eboori Peeleega yelidoogaappe guyyiyan, 430 laittaa de7iis; hara attuma naatakka macca naatakka yeliis.

<sup>18</sup> Peeleegi 30 laittaa de7idi, Raa7a yeliis; <sup>19</sup> Peeleegi Raa7a yelidoogaappe guyyiyan, 209 laittaa de7iis; hara attuma naatakka macca naatakka yeliis.

<sup>20</sup> Raa7u 32 laittaa de7idi, Saruuga yeliis; <sup>21</sup> Raa7u Saruuga yelidoogaappe guyyiyan, 207 laittaa de7iis; hara attuma naatakka macca naatakka yeliis.

<sup>22</sup> Saruugi 30 laittaa de7idi, Naakoora yeliis; <sup>23</sup> Saruugi Naakoora yelidoogaappe guyyiyan, 200 laittaa de7iis; hara attuma naatakka macca naatakka yeliis.

<sup>24</sup> Naakoori 29 laittaa de7idi, Taara yeliis; <sup>25</sup> Naakoori Taara yelidoogaappe guyyiyan, 119 laittaa de7iis; hara attuma naatakka macca naatakka yeliis.

<sup>26</sup> Taari 70 laittaa de7idi, Abraama, Naakooranne Haaraana yeliis.

### *Taara Yeletaa*

<sup>27</sup> Taara yeletai hagaappe kaallidi xaafettidaagaa. Taari Abraama, Naakooranne Haaraana yeliis; yelin Haaraani Looxa yeliis. <sup>28</sup> Haaraani ba aawai Taari paxa de7ishin, ba yelettido Kaladaawetu biittan, Uura giyo gita kataman haiqqiis. <sup>29</sup> Abraaminne Naakoorinne naa77aikka machchidosona; Abraama keettaayee sunttai Saarayo; qassi Naakoora keettaayee sunttai Milkko; Milkka Haaraana na7iyo; Haaraani Milkkissinne Yiskkaanisi aawaa. <sup>30</sup> Saaraya maine; iyyo na7i baawa.

<sup>31</sup> Taari ba na7aa Abraama, ba na7aa Haaraana na7aa Looxanne, ba na7aa Abraama keettaayyiyo Saarayo ekkidi kiyin, eti issippe Kanaane biitti baanau Uuri giyo Kaladaawetu katamaappe denddidosona; shin eti Kaaraane giyo katamaa gakkanaashin biidi, yan utti bayidosona. <sup>32</sup> Taari naa77u xeetanne ichchashu laittaa de7idi, Kaaraanen haiqqiis.

## 12

### *Abraama Xeessaa*

<sup>1</sup> GODAI Abraama yaagiis; “Neeni ne biittaappe, ne dabbotuppenne ne aawaa keettaa asaappe shaahettata, taani nena bessiyo biitti ba. <sup>2</sup> Taani nena gita kawotetta oottana; qassi taani nena anjjana; taani ne sunttaa gitayana; yaatin neeni anjjo gidana; <sup>3</sup> taani nena anjjiyaageeta anjjana; qassi nena qanggiyaageeta taani qanggana; ha sa7aa bollan de7iya asai ubbai ne baggaara anjjettana” yaagiis.

<sup>4</sup> Yaagin Abraami GODAI ayyo odidoogaadan denddidi biis; Looxeekka aara biis; Abraami Kaaraaneppe biido wode, ayyo laittai laappun tammanne ichchasha.

<sup>5</sup> Abraami ba keettaayyiyo Saarayo, ba ishaa na7aa Looxa, yan shiishshido bantta aquwaa ubbaanne, Kaaraanen eti demmido ashkkarata ekkidi, Kanaane biitti baanau denddiis; biidi eti Kanaane biitti gakkidosona.

<sup>6</sup> Gakkin Abraami he biittan Sekeemi giyoosan de7iya Moore giyo gita wolaa gakkanaassi hemettidi biis. He wode Kanaane asati he biittan de7oosona. <sup>7</sup> SHin GODAI Abraamayyo qonccidi a, “Ha biittaa taani ne zerettaayyo immana” yaagiis.



Yaagin i baayyo qonccida GODAAYYO he sohuwan yarshshiyooosaa keexxidi goinniis. <sup>8</sup> Hegaappe denddidi, Beeteleeppe arshsho baggaara de7iya deretiyaasaa biidi, hegan Beetele argo baggi aggidi, qassi Aaye arshsho baggi aggidi, gidduwan ba dunkkaaniyaa toliis; hegan GODAAYYO yarshshiyooosaa keexxidi, GODAA sunntaa xeesiis. <sup>9</sup> Hegaappe guyyiyan, Abraami yaappe denddidi biidi Neegeeba bazzuwaa gakkiiis.

### *Abraami Gibxxe Biis*

<sup>10</sup> He wode he biittai koshatiis; koshai suullido gishshau, Abraami amarida wodiya de7anau duge Gibxxe wodhdhiis. <sup>11</sup> Gibxxe gelana hanishin, Abraami ba keettaayyiyo Saarayogaagaan yaagiis; “Siya; neeni keehippe meraa lo77o maccaasa gidyoogaa taani erais. <sup>12</sup> Gibxxe asati nena be7iyo wode eti, ‘Hanna a keettaayyiyo’ yaagana; yaagidi eti tana worana; shin nena paxa aggi bayana. <sup>13</sup> Simmi eti taayyo ne gaasuwan kehana malanne, qassi taani haiqqennan ne gaasuwan attana mala neeni, ‘Taani a michchiyo’ yaaga” yaagiis.

<sup>14</sup> Abraami Gibxxe biittaa gelido wode, Gibxxe asati he maccaasiyaa daro meraa lo77o maccaasa gidyoogaa be7idosona. <sup>15</sup> Qassi Gibxxe kawuwaassi oottiya halaqatikka o be7ido wode, kawuwaa sinttan o nashshidosona; yaatidi o kawuwaa keettaa efiidosona. <sup>16</sup> Yaatin i gaasuwan kawoi Abraama lo77o aifiyan xeelliis; xeellidi Abraamayyo dorssatanne boorata, attuma haretanne macca haretta, attuma ashkkaratanne macca ashkkarata, gaameelata akka immiis.

<sup>17</sup> SHin GODAI Abraama keettaayyee Saarayi gaasuwan Gibxxe kawuwaa bollinne a so asaa bolli hanttaara harggiyaa yeddiis. <sup>18</sup> Yaatin kawoi Abraama xeesidi, “Neeni haggaa aissi ta bolli oottadii? A ne keettaayyiyo gididoogaa aissi taayyo odabeikkii? <sup>19</sup> Neeni o, ‘A ta michchiyo’ gaada taayyo aissi yootadii? Taani o ta machcho oottanau ekkidoid heggaa gishshassa. Simmi ha77i ne keettaayyiyo hanno be7a; o ekkada ba” yaagiis. <sup>20</sup> Yaagidi ba asata azazin, eti Abraama a keettaayeeranne ayyo de7iya ubbabaara kessidi yeddidosona.

## 13

### *Abraaminne Looxee SHaahettidosona*

<sup>1</sup> Heggaa gishshau Abraami ba keettaayeeranne, baayyo de7iyaabaa ubbaara Gibxxeppe Neegeeba bazzuwaa biis; Looxeekka aara biis. <sup>2</sup> Abraami he wode mehiyan, biraaninne worqqan daro duretiis.

<sup>3</sup> I Neegeebappe denddidi Beetele gakkanaassi biis; he sohoinne Beeteleppenne Aayippe gidduwan i koiro ba dunkkaaniyaa toliido sohuwaanne <sup>4</sup> yarshshiyooosaa i koiro keexxido sohuwaa. Yan Abraami GODAA sunntaa xeesiis.

<sup>5</sup> Abraamaara yuuyiya Looxeyyookka miizzai, dorssaa wudeenne dunkkaanee de7ees. <sup>6</sup> SHin eti issippe de7anau etau biittai gidibeenna; etau daro mehee de7iyo gishshau, eti issippe de7anau danddayibookkona. <sup>7</sup> Heggaa gaasuwan Abraama wudiya heemmiyaageetu giddooninne Looxe wudiya heemmiyaageetu giddon ooshshai kiyiis. He wode Kanaanetinne Parzzeti he biittan de7oosona.

<sup>8</sup> Yaanin Abraami Looxa, “Nuuni ishannta gidido gishshau, ta giddooninne ne giddon, ta wudiya heemmiyaageetu giddooninne ne wudiya heemmiyaageetu giddon ooshsha kessoppa. <sup>9</sup> Biitta ubbai ne sinttan de7ennee? Ane nuuni shaahettoos; neeni haddirssa baggi biikko, taani ushachcha baggi baana; neeni ushachcha baggi biikko, taani haddirssa baggi baana” yaagiis.

<sup>10</sup> Yaagin Looxee yuuyi aadhdhi xeellidi, Yorddaanoosa SHaafaa wombbai ubbai biidi Zoo7aara gakkanaassi, GODAA gannatiyaa <sup>12</sup> woikko Gibxxe biittaa mala daro

<sup>12</sup> 13:10 GODAA gannatiyaa: Haggaa giyoogee “Edene Gannatiyaa” giyoogaa.

haattai de7iyooogaa gidiiyoogaa be7iis. (Hegeenne GODAI Sadoomanne Gamooraa geetettiya katamata xaissanaappe kase). <sup>11</sup> Hegaa gishshau Looxee baayyo Yorddaanoosa wombbaa ubbaa dooridi, arshsho baggi biis; yaatin eti issoi issuwaappe shaahettidosona. <sup>12</sup> Abraami Kanaane biittan de7i bayiis; shin Looxee wombban de7iya gita katamatu gidduwan uttidi, Sadooma katamaa matan ba dunkkaaniyaa toliis. <sup>13</sup> He wode Sadooma asati iitanne GODAA bolli pala nagaraa oottiyaageeta.

<sup>14</sup> Looxee Abraamappe shaahettidoogaappe guyyiyan, GODAI Abraama hagaadan yaagiis; “Xoqqu gaada neeni de7iyooosaappe arshsho bagginne arggo baggi, qassi huuphessa bagginne tohossa baggi xeella. <sup>15</sup> Ha neeni xeelliyoo biitta ubbaa taani neeyyoonne ne zariyaayyo merinau immana; <sup>16</sup> taani ne zariyaa sa7aa shafiyaadan darissana; ooninne sa7aa shafiya qoodana danddayikko, ne zareekka qoodettana. <sup>17</sup> Dendda; denddada biittaa gomppan pudenne dugenne hininne haanne hemettada be7a; aissi giikko, taani ha biittaa neeyyo immana” yaagiis.

<sup>18</sup> Yaagin Abraami ba dunkkaaniyaa shoddidi, Kebroona kataman de7iya Mamire wolatu gitatu matan de7anau biis. Hegan GODAAYYO yarshshiyo sohuwaa keexxiis.

## 14

### *Abraami Looxa Wotti Ekkiis*

<sup>1</sup> He wode Sanaa7oore Kawoi Amiraafeeli, Ellaasaara Kawoi Ariyooki, Elaama Kawoi Kadorllaa7oomerinne Goima Kawoi Tidi7aali oiddai, <sup>2</sup> Sadooma Kawuwaa Beera7aara, Gamooraa Kawuwaa Birshshaara, Adaama Kawuwaa SHin77aabaara, Xaboima Kawuwaa SHemebeeraaranne (Xoo7aaro geetettiya) Belaa7a Kawuwaara olau salppidosona. <sup>3</sup> Hageeti ichchashu kawoti gaittidi issi wolqqa gididi, (Maxine Abbaa giyo) Siiddima Wombban shiiqididosona. <sup>4</sup> Eti kase tammanne naa77u laittaa Kadorllaa7oomerayyo haarettidosona; shin tammanne heezantta laittan ayyo makkalidosona.

<sup>5</sup> Tammanne oiddantta laittan Kadorllaa7oomerinne aara zuppetida kawoti bantta olanchchata ekkidi biidi, Asttaarooti Qarnnaiman de7iya Raafaayeta, Haaman de7iya Zuuzetanne SHAawe-Qiriyaataiman de7iya Eemeta olidi xoonidosona. <sup>6</sup> Xoonidi Hoora biittaa asatakka Se7iira Deriyan olidi, bazzuwaa matan de7iya Elpparaana giyoosaa gakkanaassi yedettidosona. <sup>7</sup> Hegaappe guyye simmidi, Ain-Mishppaaxa yiidosona. (Ha77i he sohoi Qaadeesa geetettes.) Eti Amaaleeqatu biittaa ubbaanne qassi Haxaaxooni-Taamaara giyoosan de7iya Amooreta olidi xoonidosona.

<sup>8</sup> Hegaappe simmin, Sadooma kawoi, Gamooraa kawoi, Addaama kawoi, Xaboima kawoinne (Xoo7aaro geetettiya) Belaa7a kawoi denddididosona; denddidi Siiddima Wombban salppidosona. <sup>9</sup> Hageeti ubbai Elaama kawuwaara, Goima kawuwaara, Sanaa7oore kawuwaaranne Ellaasaara kawuwaara (ha ichchashu kawoti oiddu kawotuura) olettidosona. <sup>10</sup> Siiddima Wombban he wode, shidaadan oiqqiyaabai kumido ollai bessii; Sadooma kawoinne Gamooraa kawoi bantta olanchchatuura olaappe baqatishin, etappe amaridaageeti he ollatun kunddididosona; shin attidaageeti deriyau baqatidosona. <sup>11</sup> Oiddu kawoti Sadoomanne Gamooraa katamatu aquwaa ubbaanne eta quma ubbaa bonqqidi ekki biidosona. <sup>12</sup> Abraama ishaa na7ai Looxee Sadooman de7iyo gishshau, akka a aquwaakka ekki biidosona.

<sup>13</sup> Hegaappe guyyiyan, issi bitanee baqati kessi ekkidi yiis; yiidi Ibraawiyaa Abraamassi haggaa yootiis. Abraami he wode, Eshkkolanne Aneera ishaa Amooriyaa Mamire wolaa matan de7ees. Eti ubbaikka olaa zaaranau Abraamaara maachchaa maacetti uttididosona. <sup>14</sup> Abraami ba dabboi omoodettidoogaa siyido wode, olaa eriya ba son yelettida heezzu xeetanne tammanne hospun asaa denttiis; he oiddu kawota kaalliiddi Daani giyo katamaa gakkanaassi biis. <sup>15</sup> Biidi gakkidi, qamman ba asaa citan citan shaakkidi, ba morkketuura olettidi eta xooniis. Xoonidi Damasqqoppe huuphessa

baggaara de7iya Hooba giyoosaa gakkanaassi yedettiis. <sup>16</sup> Aquwaa ubbaa, qassi ba dabbuwaa Looxanne a aquwaa, maccaasaanne hara asaa wotti ekkiiis.

<sup>17</sup> Abraami Kadorllaa7oomeranne aara zuppetida kawota xoonidi simmidoogaappe guyyiyan, Sadooma kawoi, (Kawotu Wombbaa giyo) SHaaweeha Wombban a mokkanau kiyiis.

### *Malkki-Xedeqi Abraama Anjjiis*

<sup>18</sup> He wode, Saleema Kawoi Malkki-Xedeqi oittaaanne woine eessaa ekkidi yiis; i Ubbaappe Xoqqiya Xoossaa qeesiyaa. <sup>19</sup> I Abraama hagaadan yaagidi anjjiis;

“Ubbaappe Xoqqiya Xoossai,

saluwaanne sa7aa medhdhidaagee Abraama anjjo;

<sup>20</sup> qassi Ubbaappe Xoqqiya Xoossai,

ne morkketa ne kushiyan

aatti immidaagee galatetto” yaagiis.

Yaagin Abraami ubbabaappe asirataa kessidi, Malkki-Xedeqayyo immiis.

<sup>21</sup> Sadooma kawoi Abraama, “Asaa tau immada, aquwaa neeyyo ekka” yaagiis.

<sup>22</sup> SHin Abraami Sadooma kawuwaa, “Taani GODAASSI, Ubbaappe Xoqqiya Xoossaassi, saluwaanne sa7aa medhdhidaagaassi, ta kushiya denttada caaqqachchaas. <sup>23-24</sup> Ta asai miidobaappenne tanaara biida Aneera, Eshkkolanne Mamire gakkiiyaabaappe attin, neeni, ‘Abraama taani dureyaas’ mulekka geennaadan, taani nebaappe harai atto qunccuute woikko caamma qachchiyoobaanne ekkikke. Eti banttana gakkiiyaabaa ekkona” yaagiis.

## 15

### *GODAI Abraamaara Maacettiis*

<sup>1</sup> Hegaappe guyyiyan, GODAA qaalai ajjuutan Abraamakko yiidi, “Abraamaa, yayy-oppa! Taani neeyyo gondalle; ne woiitoi keehi gita” yaagiis.

<sup>2</sup> Yaagin Abraami, “Abeet Ubbaa Haariya GODAU, taayyo mulekka na7i baina gishshau, neeni immiyo woiitoi taayyo aisse? Damasqqoi El77eezari tana laattana shin” yaagiis. <sup>3</sup> Qassikka Abraami, “Neeni taayyo ainne na7a immabaakka; heгаа gishshau ta son de7iya ashkkaarai tana laattiyaagaa” yaagiis.

<sup>4</sup> Yaagin GODAA qaalai akko yiidi, “Ha ashkkaarai nena laattenna; shin ne gulb-bataappe kiyiyaagee nena laattana” yaagiis. <sup>5</sup> Yaagi simmidi kare a kessidi, “Saluwaa pude xeella; neeni xoolintteta qoodanau danddayikko qooda; ne zereetaikka heгаа keena gidana” yaagiis.

<sup>6</sup> Abraami GODAA ammaniis; GODAI heгаа ayyo xillotettadan qoodiis.

<sup>7</sup> GODAI qassikka a, “Taani neeni ha biittaa laattana mala neeyyo immanau Uri giyo Kaladaawetu katamaappe nena kessa ehiida GODAATTENNEE” yaagiis.

<sup>8</sup> SHin Abraami a, “Abeet Ubbaa Haariya GODAU, taani ha biittaa laattanaagaa aibin eroo?” yaagiis.

<sup>9</sup> Yaagin GODAI a, “Heezzu laitta ussa, heezzu laitta deeshsha, heezzu laitta dorssanne naa77u qommo haraphpheta taassi ekkada ya” yaagiis. <sup>10</sup> Yaagin i hegeeta ubbaa ayyo ekki efiis; efiidi eta phalqqidi naa77u kessiis; naa77aa kessidoogaa issuwaa issuwaa ginan wottiis; shin kafota naa77u kessi phalqqibeenna. <sup>11</sup> He wode ankkoti he ashuwaa bolli wodhdhidosona; shin Abraami eta yedettiis.

<sup>12</sup> Awai wulliyo wode Abraama wolqqaama xiskkoi oiqqiis; oiqqin daganttiya sakkana xumai a bolli wodhdhiis. <sup>13</sup> Yaatin GODAI a, “Ne zereetai hara biittan bete gididi de7anaagaa neeni tumuppe era; eti ailletidi oiddu xeetu laittaa naaqettana.

<sup>14</sup> SHin ailleyidi eta haariya kawotettaa taani qaxxayana; heгааappe guyyiyan, eti daro aquwaara he biittaappe kiyana. <sup>15</sup> Nena gidikko, neeni ne maizza aawatukko sarotettan baana; neeni keehi cimada haiqqananne moogettana. <sup>16</sup> SHin oiddantto

yeletan ne zerettai ha biitti simmana; aissi giikko, Amooretu nagarai biron likkiyaa gakkiiichibeenna” yaagiis.

<sup>17</sup> Awai wullin sa7ai xumiis; xumin coociyaa cuwainne tamaa laco i akeekennan kiyi beettidi, he naa77u kessi phalqqidoogeetuppe gidduwaara kanttiis. <sup>18</sup> He gallassi GODAI Abraamaara hagaadan yaagidi maachchaa maacettiis; “Gibxxe SHaafaappe doommidi Efiraaxiisa giyo gita shaafaa gakkanaassi, ha biittaa taani ne zerettaassi immaas; <sup>19-21</sup> ha biittai Qeenatu, Qeniizetu, Qadimoonetu, Hiitetu, Parzzetu, Raafaayetu, Amooretu, Kanaanetu, Gerggeesetunne Yaabuusatu biittaa” yaagiis.

## 16

### *Aggaaronne Isimaa7eela*

<sup>1</sup> Abraama keettaayyiyaa Saaraya ayyo ha77inne na7a yelabeikku; shin iyyo Gibxxeppe yiida Aggaaro giyo issi ailliyaa de7ausu. <sup>2</sup> Hegaa gishshau Saaraya Abraama xeesada, “Be7a, GODAI tau yelo diggiis. Neeni baada, ta ailleera zin77a; ooni erii, taani i baggaara na7aayo gidanaakkonne” yaagaasu. Yaagin Abraami Saarayi qaalaa siyidi maayyiis. <sup>3</sup> Abraami Kanaane biittan tammu laitta uttidoogaappe guyyiyan, Abraama keettaayyiyaa Saaraya Gibxxeppe ehiido ba ailliyoo Aggaaro, ba keettaawaa Abraamassi machcho immaasu. <sup>4</sup> Immin Aggaaro ekkiis; ekin a shahaaraasu. A baayyo shahaarai attidoogaa erido wode, ba godiyo karuwaa doomma bayaasu.

<sup>5</sup> He wode Saaraya Abraama, “Tana ha naaquwaa naaqissiyaagee nena; taani ta ailliyoo neeyyo immin, a ha77i baayyo shahaarai attidoogaa erada, tana karauus. Nebaanne tabaa GODAI pirddo” yaagaasu.

<sup>6</sup> Yaagin Abraami Saarayo, “Hanno be7a; ne ailliyaa ne kushiyaana; neeni o ne lo77aa ootta” yaagiis. Hegaappe guyyiyan, Saaraya Aggaaro naaqqin, a kiyada ippe baqataasu.

<sup>7</sup> Baqatin GODAA kiitanchchai pulttuwaa matan bazzon Aggaaro demmiis; he pultto SHura giyo biitti efiya ogiyaa mataana. <sup>8</sup> I Aggaaro, “Bii Saarayi aillee Aggaaree, auppe yaadii? Qassi au bai?” yaagidi oichchiis.

Oichchin a, “Taani ta godee Saarayippe baqatais” yaagaasu.

<sup>9</sup> Yaagin GODAA kiitanchchai iyyo, “Neeni ne godeekko guyye simmada ba; baada iyyo haaretta” yaagidi yootiis. <sup>10</sup> Qassikka GODAA kiitanchchai o, “Ne zariyaa qoodanau danddayettennaagaa keesaa taani corayana” yaagiis. <sup>11</sup> Qassikka GODAA kiitanchchai o, “Ha77i neeni shahaara; neeni attuma na7a yelana; yelada a Isimaa7eela<sup>13</sup> gaada sunttana; aissi giikko, GODAI ne waasuwaasiyiis. <sup>12</sup> I bazzon yeda de7iya hare mala asa gidana; asa ubbaara i eqettana; qassi asai ubbaikka aara eqettana; i ba ishanttu ubbaara ixo gididi de7ana” yaagiis.

<sup>13</sup> Yaagin Aggaara, “Taani tana be7iyaagaa be7ada paxa attanee?” yaagaasu; yaagada a baayyo haasayida GODAA, “Neeni tana be7iya Xoossaa” yaagada sunttaasu. <sup>14</sup> Hegaa gishshau he pulttuwaa ollai, “Tana Be7iya De7o Xoossaa Pulttuwaa” geetettiis; he ollai hanno gakkanaassi Qaadeesappenne Baareedappe gidduwan de7ees.

<sup>15</sup> Aggaara Abraamayyo attuma na7a yelaasu; Abraami Aggaara yelido na7aa Isimaa7eela giidi sunttiis. <sup>16</sup> Aggaara Isimaa7eela Abraamayyo yelido wode, Abraama laittai hospun tammanne usuppuna.

## 17

### *Qaxxaraa, Maachchaa Malaataa*

<sup>1</sup> Abraama laittai uddufun tammanne uddufunaa gidiyo wode, GODAI ayyo qonccidi a, “Taani Ubbaa Danddayiya Xoossaa; neeni ta sinttan hemetta; suure gida. <sup>2</sup> Taani taappenne neeppe gidduwan ta maachchaa wottais; taani nena keehi corayana” yaagiis.

<sup>13</sup> 16:11 Isimaa7eela: Ha sunttaa birshshettai “Xoossai siyees” giyoogaa.



<sup>3</sup> Yaagin Abraami ba som77uwan duge gufanniis; gufannin Xoossai ayyo hagaadan yaagiis; <sup>4</sup> “Simmi, taani nenaara maacettiyo maachchai hagai; neeni daro kawotettaayyo aawa gidana. <sup>5</sup> Hagaappe doommidi ne sunntai Abraama geetettenna; shin ne sunntai Abrahaama<sup>14</sup> gidana. Aissi giikko, taani nena daro kawotettaayyo aawa oot-taas. <sup>6</sup> Taani nena keehi yeletissana; taani neeppe kawotettata medhdhana; kawotikka neeppe kiyana. <sup>7</sup> Taani taappenne neeppe, neeppe guyyiyan ne zerettaappenne gid-duwan, yeletaappe yeletaa gakkanaassi ta maachchaa maacettai; ha maachchai taani neeyyoonne neeppe guyyiyan ne zerettaayyo Xoossaa gidana mala merinaa maachcha. <sup>8</sup> Ha77i neeni bete gidada de7iyo Kanaane biittai ubbai neeyyoonne neeppe guyyiyan ne zerettaayyo merinaassi laata gidana mala taani immana; qassi taani eta Xoossaa gidana” yaagiis.

<sup>9</sup> Qassikka Xoossai Abrahaama, “Nena gidikko, neeni ta maachchaa naaga; neenikka neeppe guyyiyan ne zerettaikka, yeletaappe yeletaa gakkanaassi naagite. <sup>10</sup> Taappenne neeppenne, neeppe guyyiyan ne zerettaappe gidduwan intte naagana ta maachchai hagai; intte gidduwan de7iia attuma ubbai qaxxaretto. <sup>11</sup> Intte attumatettaa shoohuwaa qaxxareteeta; hegee taappenne intteppe gidduwan de7iia maachchayyo malaata gidana. <sup>12</sup> Intte giddon sinttappe yelettana attuma naati ubbai yelet-tido hospuntta gallasan qaxxarettana koshshees. Ne son yelettidaageeta gidin, woikko allagaappe miishshan shamettida ailleta gidin, ne zeretta gidennaageetakka attumaageeta qaxxaranau koshshees. <sup>13</sup> Ne son yelettidaageetikka ne miishshan shamettidaageetikka qaxxarettona. Hagee intte ashuwan de7iia ta maachchai meri-naa maachcha gidana. <sup>14</sup> Qaxxarettiichchibeenna, ba shoohuwaara de7iia attuma asai ubbai ba asaappe duuxxana; aissi giikko, i ta maachchaa kanttiis” yaagiis.

<sup>15</sup> Qassikka Xoossai Abrahaama, “Simmi, ne keettaayee Saarayi sunntaa Saarayo gooppa; hagaappe sinttau i sunntai Saaro.<sup>15</sup> <sup>16</sup> Taani o anjjana; taani ippe neeyyo attuma na7a tumu immana. O taani anjjana; a kawotettatuyyo aayo gidana; asaa kawoti ippe yaana” yaagiis.

<sup>17</sup> Yaagin Abrahaami ba som77uwan gufanniis; i miiccidi ba wozanan, “Xeetu laitta asi tumu na7a yelanee? Qassi uddufun tammu gidido Saara na7a yelanee?” yaagidi qoppiis. <sup>18</sup> Yaagi qoppidi Abrahaami Xoossaa, “Isimaa7eeli tana laattiyaagaa gidanau danddayennee?” yaagiis.

<sup>19</sup> SHin Xoossai, “CHii, ne keettaayyiyaa Saara neeyyo attuma na7a tumuppe yelana; yelettin neeni Yisaaqa<sup>16</sup> gaada a sunntana. Appe guyyiyan, a zerettaassi merinaa maachcha gidana mala, taani aara ta maachchaa maacettana. <sup>20</sup> Qassi Isimaa7eelabaa gidikkonne, neeni oichchidoogaa taani siyaas; taani akka anjjana; taani a yeletis-sananne a zerettaa keehi corayana; i tammanne naa77u daannata yelana; taani a zerettaa gita kawotetta oottana. <sup>21</sup> SHin taani ta maachchaa laitti hannoode Saara neeyyo yeliyo Yisaaqaara maacettana” yaagiis. <sup>22</sup> Xoossai Abrahaamaara haasayidi wurssidoogaappe guyyiyan, Abrahaamappe shaahettidi pude biis.

<sup>23</sup> He gallassankka Abrahaami ba na7aa Isimaa7eela, ba son yelettida ubbaa, ba miishshan shammidoogeeta ubbaa, ba son de7iia attuma asa ubbaa, Xoossai ayyo odidoogaadan eta attumatettaa shoohuwaa qaxxariis. <sup>24</sup> Abrahaami ba attumatettaa shoohuwaa qaxxarettiyo wode, uddufun tammanne uddufun laitta asa; <sup>25</sup> a na7ai Isimaa7eeli ba attumatettaa shoohuwaa qaxxarettiyo wode, tammanne heezzu laitta na7a. <sup>26</sup> Abrahaaminne a na7ai Isimaa7eeli naa77aikka he gallassi qaxxarettidosona. <sup>27</sup> Abrahaama son de7iia attuma asai ubbai, a son yelettidaageetinne miishshan shammidoogeeti ubbai aara qaxxarettidosona.

<sup>14</sup> **17:5** Abrahaama: Ha sunntaa birshshettai “Daro asaa aawaa” giyoogaa. <sup>15</sup> **17:15** Saaro: Ha sunntaa birshshettai “Halaqiyoo” giyoogaa. <sup>16</sup> **17:19** Yisaaqa: Ha sunntaa birshshettai “I miiccees” giyoogaa.

## 18

### *Heezzu Imattata*

<sup>1</sup> Abrahaami Mamire wolatu gitatu garssan ba dunkkaaniyaa penggen seeta gallasan uttidaashin, GODAI ayyo qoncciiis. <sup>2</sup> Abrahaami xoqqu giidi xeellidi heezzu asati a matan eqqidaageeta be7iis; be7idi etaara gaittanau ba dunkkaaniyaa penggeppe denddidi woxxiis; woxxi gakkidi, biittan hokkidi, eta sinttan ziggiis. <sup>3</sup> Ziggi simmidi i, “Abeet ta godau, taani ne sinttan nashettidabaa gidikko, tana ne ashkkaraa aggada aadhdhoppa. <sup>4</sup> Hai guutta haatti yo; yin intte tohoi meecettin, ha mittaa kuwan shemppi ekkite. <sup>5</sup> Intte ha77i taakko intte ashkkaraakko yiido gishshau, gazddidi intte biyoosaa baana mala, taani intteyyo miyoobaa ehais” yaagiis.

Yaagin eti, “Daro lo77o; neeni giyoogaadan ootta” yaagidosona.

<sup>6</sup> Yaagin Abrahaami dunkkaaniyaa giddo Saarikko eesoti biidi, “Eesotada liiqo xilliyaappe heezzu kere gidiyaagaa ekka munaqqada oittaa uukka” yaagiis. <sup>7</sup> Qassi, Abrahaami ba wudiyaakko woxxi biidi, lo77o anqqara maraa dooridi, issi ashkkarau immiin, i eesuwan shukkidi giigissiiis. <sup>8</sup> Yaatin Abrahaami meqqida maattaanne giigisido maraa ashuwaa imattatu sintti aattiis; eti miishin, i he mittaa garssan eta matan eqqiis.

<sup>9</sup> Eti a, “Ne keettaayyiyaa Saara awaanee?” yaagidi oichchidosona.

Oichchin i, “Hininkunkkaane gidдон de7ausu” yaagiis.

<sup>10</sup> Yaagin GODAI a, “Taani laitti hannode tumu neekko simmana; he wode ne keettaayyiyaa Saara attuma na7a yelana” yaagiis.

Saara he wode appe guyye baggaara de7iya dunkkaaniyaa penggen de7iyaara heгаа siyausu. <sup>11</sup> Abrahaaminne Saara bantta laittaa keehi sugidi ceggichchidosona. Saariyyo kushe qitai yiyoogaa aggirggiis. <sup>12</sup> Hega gishshau Saara ba wozanan, “Taani ha77i cima wuraichchidoogaappe guyyiyaaninne ta godai ceeggidoogaappe guyyiyan, ha77i taayyo attuma asaara gaittiyoogee waani hananee?” yaagada miiccaasu.

<sup>13</sup> GODAI Abrahaama he wode, “Taani cimaichchidoogaappe guyyiyan, tumu na7a yelaneeyye?” gaada, Saara aissi miiccadee? <sup>14</sup> GODAU danddayettennabi tumu de7iyye? Laitti hannode taani neekko simmana; he wode Saara attuma na7a yelana” yaagiis.

<sup>15</sup> Yaagin Saara keehi yayyido gishshau, “Taani miiccabeikke” yaagada lahottaasu.

SHin i, “Ee, neeni tumu miiccadasa” yaagiis.

### *Abrahaami Sadooma Gishshau Gaannatiis*

<sup>16</sup> Hegaappe guyyiyan asati denddidi biidi, Sadooma katamaa duge zaari xeellidosona; Abrahaaminne eta moissiiddi etaara biis. <sup>17</sup> GODAI he wode, “Taani ta oottana haniyoobaa Abrahaamappe qosikke. <sup>18</sup> Abrahaami tumuppe gitanne wolqqaama kawotetta gidana; ha sa7aa kawotettati ubbai a baggaara anjettana. <sup>19</sup> Aissi giikko, xillotettaanne pirddaa oottidi, GODAA ogiyaa naaganaadan ba naatanne baappe guyyiyan, ba so asaa i zorana mala, taani a dooraas; hegeenne GODAI Abrahaamayyo immana giidoogaa ubbaa polanaassa” yaagiis.

<sup>20-21</sup> Yaagidi GODAI Abrahaama, “Sadoomappenne Gamoorappe waassiyo waasoi keehi darido gishshaunne eta nagarai keehi deexxido gishshau, eti oottidobi taakko gakkida waasuwa keesa iitakkonne be7anau ane taani duge wodhdhais; heгаа mala iita gidana xayikkonne erana” yaagiis.

<sup>22</sup> Hegaappe guyyiyan, naa77u asati Sadoomakko simmidi biidosona; shin Abrahaami GODAA sinttan eqqidossankka de7ees. <sup>23</sup> He wode Abrahaami akko shiiqidi yaagiis; “Tumu neeni xillota iitatuura xaissuutee? <sup>24</sup> He gita kataman ishatamu xilloti de7iyaakkokka, neeni xaissuutee? Neeni an de7iya ishatamu xillotu gishshau he katamaa ashshikkii? <sup>25</sup> Hegee neeppe haakko; xillota iitatuura woriyooeenne

xillotanne iitata issi aifiyan xeelliyoogee neeppe haakko. Ha sa7aa ubbaa pirddiyaagee xillo pirdenneeyye?” yaagiis.

<sup>26</sup> Yaagin GODAI, “He Sadooma kataman ishatamu xilloti de7ikko, he sohuwaa ubbaa eta gishshau taani ashshana” yaagiis.

<sup>27</sup> Hegaappe guyyiyan Abrahaami, “Taani biittanne bidintta gidaidda ta Godaara xalan haasayanau simmi doommaichchaas; <sup>28</sup> ishatamu xillotuppe ichchashai pac-cikko, neeni he ichchashatu gishshau he katamaa ubbaa xaissuutee?” yaagiis.

Yaagin GODAI, “Taani yan oitamanne ichchashu xillota demmikko, he katamaa xaissikke” yaagiis.

<sup>29</sup> Abrahaami zaarettidikka, “Yan oitamaa xalaalai beettikko shin?” yaagiis.

Yaagin i, “Taani he oitamatu gishshau, he katamaa xaissikke” yaagiis.

<sup>30</sup> Hegaappe guyyiyan i, “Hai Godai taayyo hanqqettoppo; taani gujjadakka haasayais. Yan hasttamaa xalaalai beettikko shin?” yaagiis.

Yaagin GODAI, “Taani yan hasttamaa demmikko, he katamaa xaissikke” yaagiis.

<sup>31</sup> Abrahaami qassikka, “Taani Godaara xalan haasayanau doommaichchaas; yan laatamaa xalaalai beettikko shin?” yaagiis.

Yaagin GODAI, “He laatamatu gishshau taani a xaissikke” yaagiis.

<sup>32</sup> Hegaappe guyyiyan Abrahaami, “Hai Godai taayyo hanqqettoppo; taani mexi issitoo haasayais; yan tammaa xalaalai beettikko shin?” yaagiis.

Yaagin GODAI, “He tammatu gishshau taani he katamaa xaissikke” yaagiis.

<sup>33</sup> GODAI Abrahaamaara haasayaa wurssidoogaappe guyyiyan biis; Abrahaamikka ba soo simmiis.

## 19

### *Sadooma Nagaraa*

<sup>1</sup> He naa77u kiitanchchati omarssi Sadooma katamaa gakkidosona; he wode Looxee he katamaa penggen uttiis. Looxee eta be7innee etaara gaittanau eqqidi biis; biidi, ba som77uwaa sa7aa gattidi ziggii; <sup>2</sup> ziggidi, “Ta godaato, intte ashkkaraa soo sim-merkketii; intte gediya meecettidi qammaa aqite; guuran denddidi intte biyoosaa beeta” yaagiis.

Yaagin eti, “CHii; nuuni ha katamaa gutaran aqana” yaagidosona.

<sup>3</sup> SHin i eta keehi shoobbido gishshau, aara biidi a soo gelidosona; gelin i etau qumaa kattidi, caalenna oittaa uukkidi aattin, eti miidosona.

<sup>4</sup> Eti zin77ennan de7ishin, Sadooma katamaa attuma asai ubbai, naatuppe cimaa gakkanaashin, issoinne attennan yiidi, keettaa yuuyi aadhdhi dooddidosona.

<sup>5</sup> Dooddidi Looxa xeesidi yaagidosona; “Hachchi qammi ne soo yiida attuma asati awan de7iyoonaa? Nuuni etaara shaaramuxana mala eta nuukko kare kessa” yaagidosona.

<sup>6</sup> Yaagin Looxee etaara gaittanau kare kiyiiddi, kariyaa guyye gorddiis; <sup>7</sup> gorddidi eta hagaadan yaagiis; “Ta ishato, ha iita oosuwaa ootoppite. <sup>8</sup> Simmi taayyo naa77u macca naati, attuma asi xaallibeenna geela7oti de7oosona; taani eta intteyyo kare kessais; intte eta inttena lo77aadan oottana danddayeeta. SHin ha asatu bolli ainne ootoppite; aissi giikko, eti ta keettaa gelidi ta kaaraa garssan de7oosona” yaagiis.

<sup>9</sup> Yaagin asati a, “Nu sinttappe kichcha!” yaagidosona; qassikka eti, “Ha bitanee ha biittan bete gididi yiidi, ha77i nu bolli pirddanau kajjeelees! Ha77i nuuni nena etau qoppidoogaappe iitaa oottana baawee!” yaagidosona. Yaagidi eti Looxa guyye sugi yeggidi penggiyaa menttanau shiiqididosona. <sup>10</sup> SHin he naa77u asati bantta kushiya kare yeddidi, Looxa soo goochchi gelissidi penggiyaa gorddi bayidosona. <sup>11</sup> Hegaappe guyyiyan, eti keettaa penggen de7iya asaa, guuttaappe gitaa gakkanaassi qooqissi aggidosona. Yaatin eti penggiyaa demmanau koyiiddi daafuridosona.

### *Looxee Sadoomappe Kiyidi Biis*

<sup>12</sup> He naa77u asati Looxa, “Neeyyo hagan ne macca naata giigissidaageeti, ne attuma naati woikko ne macca naati woikko nebaa gidiya asi oona gidikkonne ha kataman de7ii? De7ikko, eta hagaappe kessargga. <sup>13</sup> Aissi giikko, nuuni ha sohuwaa xaissana haneettes. Etappe waassiyo waasoi GODAA sinttan keehi darido gishshau, GODAI nuna ha katamaa xaissanau kiittiis” yaagidosona.

<sup>14</sup> Hegaa gishshau Looxee kiyidi, ba macca naata giigissidaageetukko biidi eta, “Eesuwan denddidi hagaappe kiyiichchite; aissi giikko, GODAI ha katamaa xaissana hanees” yaagiis. SHin a macca naata giigissidaageeti i naacees giidi qoppidosona.

<sup>15</sup> Sa7ai wonttanau bazzozi zo77iyo wode, he kiitanchchati Looxa, “Dendda! Ne keettaayyiyoonne hagan de7iya ne naa77u macca naata ekkada eesuwan kiya! Kiyana xayikko, ha katamai pirddeettiyo wode neenikka xayaasa” yaagidi dirbbanttidosona.

<sup>16</sup> SHin Looxee yooqu gin, he asati a kushiya, a keettaayee kushiyaanne a macca naatu naa77aa kushiya oiqqidi, he katamaappe eta kessidosona; aissi giikko, GODAI etayyo qarettiis. <sup>17</sup> Kiitanchchati eta katamaappe kessidosarakka, he kiitanchchatuppe issoi yaagiis; “Intte shemppuwaa ekkidi baqatite! Guyye xeelloppite! Qassi ha wombban awanka eqqoppite! Deriyaakko baqatite! Hankkoode intte xayana” yaagiis.

<sup>18</sup> SHin Looxee etayyo yaagiis; “CHii! Hai ta godaato, yaagoppite. <sup>19</sup> Taani intte ashkkarai intte sinttan nashettido gishshau, tana ashshanau taayyo daroppe kehideta. SHin taani deriyaakko baqatanau danddayikke; hagee bashshai gakkidi tana muukkananne taanikka haiqqana. <sup>20</sup> Xeellite; hagan issi katamai de7ees; i woxxanau matanne guutta katama. Taani yaa baqatoo? I qii guutta katama gidennee? Ta shemppoi yan attana” yaagiis.

<sup>21</sup> Yaagin kiitanchchati, “Ee, taani ne oishaa siyana; taani neeni giyo katamaa xais-sikke. <sup>22</sup> SHin yaa eesuwan baqata; aissi giikko, neeni yaa gakkanaashin, taani ainne oottanau danddayikke” yaagiis. Hegaa gishshau he katamaa sunttai Xoo7aaro<sup>17</sup> geetettiis.

### *Sadoomanne Gamooraa Katamati Xayidosona*

<sup>23</sup> Looxee Xoo7aaro gakkido wode, biron xalqqee dolees. <sup>24</sup> GODAI he wode tamaanne eexxiya dinniyaa Sadoomanne Gamooraa bollan GODAA matappe saluwaappe bukissi bayiis. <sup>25</sup> Hegaadan oottidi GODAI he katamata, he wombbaa ubbaa, he katamatu gidдон de7iya ubbaanne he biittan de7iya mittaa maataa xaissiis. <sup>26</sup> SHin Looxe keettaayyiyaa guyye xeellada maxine tuussa gidaasu.

<sup>27</sup> Wonttetta gallassi maallado guuran Abrahaami denddidi, GODAA sinttan kase i eqqido sohuwaa simmidi biis. <sup>28</sup> I Sadoomanne Gamooraa he wombban de7iya biitta ubbaa duge xeelliis; xeelliyo wode cuwai coociyaa tamaa cuwaadan he biittaappe denddiyaagaa be7iis.

<sup>29</sup> Xoossai he wombbaa katamata xaissido wode, Abrahaama hassayiis; hassayidi Looxee de7ido katamata xaissiiddi Looxa bashshaappe kessiis.

### *Looxe Yeletaa*

<sup>30</sup> Looxee Xoo7aaron uttanau yayyido gishshau, ba macca naatu naa77aara deriyaa kiyiis; kiyidi gonggolo gidдон ba naa77u macca naatuura uttiis. <sup>31</sup> Issi gallassi baira na7iyaa kaaliyo, “Nu aawai cimiis; sa7a ubban de7iya wogaadan nunaara zin77anau ha biittan mulekka attuma asi baawa. <sup>32</sup> Haaya; woiniyaa eessaa nu aawaa ushshidi, aara zin77idi, nu aawaappe nu zariyaa turaa ashshoos” yaagaasu. <sup>33</sup> He gallassa qammikka bantta aawaa woiniyaa eessaa ushshidosona; uyin bairiyaa gelada aara zin77aasu; a aara zin77iyo wodekka denddiyo wodekka i eribeenna.

<sup>34</sup> Wonttetta gallassi bairiyaa kaaliyo, “Siya; zino taani ta aawaara zin77aas; hachchi qammi qassi woiniyaa eessaa ushshin, neenikka gelada aara zin77a; yaatidi nuuni

<sup>17</sup> 19:22 Xoo7aaro: Ha sunttaa birshshettai “Guutta” giyoogaa.



nu aawaappe nu zariyaa turaa ashshoos” yaagaasu. <sup>35</sup> Yaagin he gallassi qammi qassikka woiniyaa eessaa ushshidosona; uyin kaaliyaakka gelada aara zin77aasu; a aara zin77iyo wodekka denddiyo wodekka i eribeenna. <sup>36</sup> Yaatidi Looxe macca naati naa77aikka bantta aawaayyo shahaaridosona. <sup>37</sup> Bairiyaa attuma na7aa yelaasu; a sunttaa Moo7aaba<sup>18</sup> gaada sunttaasu; inne hachchi gakkanau Moo7aabatu aawaa. <sup>38</sup> Qassi kaaliyaakka attuma na7aa yelaasu; a sunttaa Ben77aama<sup>19</sup> gaada sunttaasu; inne hachchi gakkanau Amoonatu aawaa.

## 20

### *Abrahaamanne Abimeleka*

<sup>1</sup> Abrahaami Mamireppe denddidi, Neegeeba giyo biitti biis; biidi Qaadeesanne SHura giyo katamatuppe gidduwan de7iis; Garaaranka amarida wodiya takkiis.

<sup>2</sup> Yan Abrahaami ba keettaayyiyo Saaro, “A ta michchiyo” yaagiis. Yaagin Garaara Kawoi Abimeleki kiittidi Saaro efiis. <sup>3</sup> SHin Xoossai issi qammi aimuwan Abimelekakko yiidi, a hagaadan yaagiis; “Neeni ehiido maccaasee gaasuwan haiqqaasa; aissi giikko, a azina machcho” yaagiis.

<sup>4</sup> SHin Abimeleki ikko shiiqibeenna. Yaanidaagee, “Godau, neeni xillo kawotettaa xaissuutee? <sup>5</sup> I, ‘A ta michchiyo’ gibeenneeyye? Qassi a, ‘I ta ishaa’ gabeikkee? Taani ta wozanaa suuretetaaninne ta kushiya geeshshatettan hгаа oottaas” yaagiis.

<sup>6</sup> Hegaappe guyyiyan, Xoossai aimuwan a yaagiis; “Ee, neeni ne wozanaa geeshshatettan oottidoogaa taani eraas; heгаа gishshau, neeni o bochchenna malanne ta sinttan nagara oottenna mala nena taani teqqaas. <sup>7</sup> Ha77i ha bitaniyaa keettaayyiyo zaara; aissi giikko, i hananabaa yootiyaagaa; i neeyyo Xoossaa woossana; woossin neeni paxa attana. SHin o zaarana xayikko, neeninne neeyyo de7iyaabai ubbai haiqqiyoogaa tumuppe era” yaagiis.

<sup>8</sup> Yaagin Abimeleki wonttetta gallassi maallado ba kawotettaa halaqata ubbaa xeesiis; xeesidi ha yoho ubbaa etayyo yootin, eti keehi daro yayyidosona. <sup>9</sup> Yaatin Abimeleki Abrahaama xeesidi, “Neeni aibabaa nu bolli oottadii? Neeni ta bollinne ta kawotettaa bolli gita nagaraa ehaanau taani neeyyo aiba iitabaa oottidanaa? Neeni ta bolli oosettanau bessennabaa oottadasa” yaagiis. <sup>10</sup> Qassikka Abimeleki Abrahaama, “Nena hгаа ootissidabi aibee?” yaagidi oichchiis.

<sup>11</sup> Oichchin Abrahaami yaagiis; “Xoossau yayyiya issi asinne ha sohuwan baawa’ gaada qoppido gishshaassanne, ‘Ta keettaayee gaasuwan eti tana worana’ gaada qoppido gishshassa. <sup>12</sup> Hгаа bolli a tumukka ta michchiyo; ta aayee na7iyo gidennaa-gaappe attin, ta aawaa na7iyo; qassi a ta keettaayo gidaasu. <sup>13</sup> Xoossai tana ta aawaa keettaappe kessido wode taani iyyo, ‘Nuuni biido biittan ubban neeni taayyo oottana kehatettai hгаа; ‘I ta ishaa’ gaada tabaa haasaya’ yaagaas” yaagiis.

<sup>14</sup> Hegaappe guyyiyan Abimeleki dorssaa, mehiyaa, macca ailletanne attuma ailleta ehiidi, Abrahaamayyo immiis; qassi a keettaayyiyo Saaro ayyo zaariis. <sup>15</sup> Abimeleki, “Simmi ta biittai ne sinttaana; nena lo77asan de7a” yaagiis. <sup>16</sup> Saarokka, “Taani ne ishaayyo issi sha7u xaqara biraa<sup>20</sup> immais; hagee simmi nenaara de7iya ubbaa sinttan neeni xillo gidioogaanne neeni shatimmidoogaa erissiyaagaa gido” yaagiis.

<sup>17-18</sup> GODAI Abrahaama keettaayee Saari gaasuwan Abimeleka keettaa asa ubbaa qanttaa mainissi wottido gishshau, Abrahaami Xoossaa woossin, Abimeleki, a keettaayyiyaanne a macca ashkkarati na7a yelana mala Xoossai eta pattiis.

<sup>18</sup> 19:37 Moo7aaba: Ha Ibraisxxe sunttai “Ta aawaappe” yaagiyoobaa milatees. <sup>19</sup> 19:38 Ben77aama: Ha sunttaa birshshettai “Ta asatu na7aa” giyoogaa. <sup>20</sup> 20:16 Issi sha7u xaqara biraa: Hagee tammanne isiinne bagga kilo giraame deexxees.

## 21

### *Yisaaqi Yelettiis*

<sup>1</sup> Xoossai ba yootidoogaadan Saarikko yiis; yiidi Xoossai Saariyyo ba giidoogaadan oottiis. <sup>2</sup> Saara shahaarada, ceeggida Abrahaamayyo Xoossai giido wodee gakkinn, attuma na7aa yelaasu. <sup>3</sup> Saara ayyo yelido ba na7aa sunntaa Abrahaami “Yisaaqa” yaagidi sunntiis. <sup>4</sup> Abrahaami ba na7aa Yisaaqa Xoossai azazidoogaadan hosppunta gallassan qaxxariis. <sup>5</sup> A na7aa Yisaaqi ayyo yelettido wode, Abrahaama laittai xeeta. <sup>6</sup> Saara, “Xoossai taayyo miichchaa<sup>21</sup> immiis; qassi haggaa siyiya ubbai tanaara miic-cana” yaagaasu. <sup>7</sup> Qassikka Saara, “Abrahaamayyo Saara na7a xanttana giidabi oonee? Gidikkonne taani ha77i ayyo i ceeggido wodiyan na7a yelaas” yaagaasu.

### *Aggaaranne Isimaa7eeli Yedetettidosona*

<sup>8</sup> Guutta na7ai diccidi, xanttaa duuxxiis; Abrahaami Yisaaqi xanttaa duuxxido gallassi wolqqaama gibiraa kessiis. <sup>9</sup> SHin Gibxxeppe yiida Aggaara Abrahaamayyo yelido na7ai qoosyoogaa Saara be7aasu. <sup>10</sup> Be7ada Abrahaama, “Ha aillee na7ai ta na7aa Yisaaqaara mulekka laattenna gishshau, ailliyoonne i na7aa kessa yedda” yaagaasu.

<sup>11</sup> Yaagin ha yohoi ba na7aa bochchiyo gishshau, Abrahaami keehippe metootiis. <sup>12</sup> SHin Xoossai Abrahaama, “Na7aayyoonne ne ailleeyyo keehi metootoppa; Saara neeyyo yootiyoobaa ubbaa siya; aissi giikko, ne zeretta Yisaaqa baggaara xeesettana. <sup>13</sup> Qassi aillee na7aa taani kawotetta kessana; aissi giikko, ikka ne zare” yaagiis.

<sup>14</sup> Maallado guuran Abrahaami dendiis; dendididi qumaanne lukkaamon haattaa ekkidi, Aggaaro hashiyan toossidi, i na7aakka iyyo immidi kessi yeddiis. A baada, Berssaabehi giyo bazzuwan toilattaasu. <sup>15-16</sup> Haattaikka lukkaamuwan wurido wode a, “Na7ai haiqqishin, uttada be7ikke” yaagada, na7aa issi buuraa garssan wottada, naa77u xeetu wara gidiyaagaa keenaa baada utta bayaasu. Matan uttada, ba qaalaa xoqqissada yeekkaasu.

<sup>17</sup> Xoossai na7aa waasuwa siyiis; Xoossaa kiitanchchai Aggaaro saluwaappe xeesidi, “Aggaaree, waanadii? Xoossai na7ai zin77idosan waassyoogaa siyido gishshau yayyoppa; <sup>18</sup> dendda eqqa; na7aanne ne kushiyan dentta; aissi giikko, taani a gita kawotetta oottana” yaagiis. <sup>19</sup> Xoossai i aifiyaa dooyin, haatta ollaa be7aasu; baada lukkaamuwan haattaa kunttaasu; na7aakka ushshaasu. <sup>20</sup> Na7ai dicciyo wode, Xoossai aara gidiiis; i bazzuwan de7idi, wonddafiyaa dukkiya asa gidiiis. <sup>21</sup> I Paaraana giyo bazzuwan de7ishin, a aayiyaa Gibxxeppe ayyo machcho demmaasu.

### *Abrahaamappenne Abimelekappe Gidduwan Wottido Maachchaa*

<sup>22</sup> He wode, Abimeleki ba wotaaddaratu halaqaa Pikoolaara Abrahaamakko biidi, “Neeni oottiyo ubaban Xoossai nenaara de7ees. <sup>23</sup> Neeni ta bolli woikko ta naatu bolli woikko ta zerettaa bolli genebaa oottenna mala, ha77i haggan, Xoossaa sinttan taayyo caaqqa; taani neeyyo kehidoogaadan, neenikka taayyoonne neeni imattatettan de7iyo ha biittaayyo keha” yaagiis.

<sup>24</sup> Yaagin Abrahaami, “Taani caaqqais” yaagiis.

<sup>25</sup> He wode, Abrahaami Abimeleka ashkkarati ekkido haattaa ollaabaa Abimelekayyo maganniis. <sup>26</sup> SHin Abimeleki, “Hegaa ooni oottidaakko taani erikke; neenikka qassi taayyo yootabaakka; taani hachchi gakkanau hegaa siyabeikke” yaagiis.

<sup>27</sup> Hegaappe guyyiyan Abrahaami dorssanne miizzata ehiidi, Abimelekayyo immin, eti naa77ai maachchaa maacettidosona. <sup>28</sup> Abrahaami laappun macca dorssa marata wudiyaappe shaakkiis; <sup>29</sup> shaakkin Abimeleki Abrahaama, “Ha neeni dumma shaakka wottido laappun macca dorssa marata aissi shaakkadii?” yaagidi oichchiis.

21 **21:6** Miichchaa “Yisaaqa” giyoogee “I miiccees” giyoogaa.

<sup>30</sup> Oichchin Abrahaami, “Taani ha haattaa ollaa bookkidoogau markka gidana mala, ha laappun macca dorssa marata ta kushiyaappe ekka” yaagiis.

<sup>31</sup> Hegan he naa77u asati maacettido gishshau, he sohoi Berssaabehi<sup>22</sup> geetettiis.

<sup>32</sup> Berssaabehan maachchaa maacettidoogaappe guyyiyan, Abimelekinne a wotaad-daratu halaqaa Pikooli denddidi, Pilisxxeema biittaa simmidosona. <sup>33</sup> Abrahaami Berssaabehan taamaariskki giyo mittaa tokkiis. Hegan GODAA, Merinaa Xoossaa, sunntaa xeesiis. <sup>34</sup> Abrahaami Pilisxxeema biittan daro wodiya de7iis.

## 22

### *Yisaaqa Baayyo Yarshshanaadan Xoossai Abrahaama Azaziis*

<sup>1</sup> Hegaappe simmin, Xoossai Abrahaama paacciis; i a, “Abrahaamaa” yaagidi xeesiis. Xeesin i, “Yee” yaagidi koyiis.

<sup>2</sup> Koyin Xoossai, “Neeni siiqiyo ne mexi issi na7aa Yisaaqa ekkada, Mooriyaa giyo biitti ba; baada yan taani neeyyo yootiyo issi deriyaa bollan a xuuggiyo yarshsho oottada taayyo yarshsha” yaagiis.

<sup>3</sup> Yaagin wonttetta gallassi Abrahaami guuran denddidi, ba hariyaa caaniis; ba ashkkaratuppe naa77aanne ba na7aa Yisaaqa banaara ekkidi, xuuggiyo yarshshuwaayyo gidiya mittaa qeri ekkidi, Xoossai ayyo yootidosaa baanau denddiis.

<sup>4</sup> Biiddi heezantta gallassi Abrahaami xoqqu giidi, he sohuwaa haahuwan be7iis.

<sup>5</sup> Abrahaami ba ashkkarata, “Ha hariyaara hagan de7ishshite; taaninne ta na7ai yaa biidi Xoossaassi goinnidi, inttekko simmana” yaagiis.

<sup>6</sup> Abrahaami yarshshuwaa mittaa denttidi, ba na7aa Yisaaqa toossiis; toossidi tamaanne billamaa i baayyo oiqqiis. Eti naa77ai issippe biishin, <sup>7</sup> Yisaaqi ba aawaa Abrahaama, “Ta aawau” yaagiis.

Yaagin Abrahaami, “Yee, ta na7au” yaagiis.

Yaagin i, “Tamainne mittai hageeho; shin xuuggidi yarshshiyo dorssa mari awaane?” yaagiis.

<sup>8</sup> Yaagin Abrahaami, “Ta na7au, xuuggidi yarshshiyo dorssa maraa Xoossai baayyo immana” yaagiis. Yaanin eti naa77ai issippe biidosona.

<sup>9</sup> Eti Xoossai ayyo yootido sohuwaa gakkido wode, Abrahaami yarshshuwaa yarshshiyoosaa yan gimbbidi, mittaa dacia yeggiis; ba na7aa Yisaaqa qachchidi, he mittaa bollan zin77issiis. <sup>10</sup> Zin77issidi Abrahaami ba na7aa shukkanau ba kushiya yeddidi billamaa ekkiis. <sup>11</sup> SHin GODAA kiitanchchai saluwaappe a, “Abrahaamaa” yaagidi xeesiis.

Xeesin i, “Yee” giidi koyiis.

<sup>12</sup> Koyin a, “Na7aa bollan ne kushiya wottoppa; a ainne oottoppa; neeni ne mexi issi na7aakka tana diggabeenna gishshau, neeni Xoossau yayyiyaagaa gidiyooгаа taani ha77i erais” yaagiis.

<sup>13</sup> Yaagin Abrahaami xoqqu gi xeellidi, hegan dorssa isoi kacee buuran geli qaxetti uttidoogaa be7iis. Abrahaami biidi he dorssaa ekkidi, ba na7aa gishshaa xuuggiyo yarshsho oottidi yarshshi bayiis. <sup>14</sup> Hegan gishshau Abrahaami, “GODAI immana” yaagidi he sohuwaa sunttiis; hachchi gakkanaashinkka haisee, “GODAA deriyan imetana” geettees.

<sup>15</sup> GODAA kiitanchchai saluwaappe naa77anttidi Abrahaama xeesidi yaagiis; <sup>16</sup> “GODAI, ‘Hagaadan yaagada neeyyo taani ta huuphiyan caaqqais; neeni hгаа oottido gishshaunne ne mexi issi na7aakka tana diggabeenna gishshau, <sup>17</sup> taani nena tumu anjjana; ne zereetaakka taani saluwaa xoolinttiyaa keenanne abbaa doona shafiyaa keeni oottada corayana. Ne zerettati bantta morkketu katamata laattana.

22 **21:31** Berssaabehi: Ha sunntaa birshshettai “Maachchaa Haattaa Ollaa” woikko “Laappun Haattaa Ollaa” giyoogaa.

<sup>18</sup> Neeni taayyo azazettido gishshau, ha sa7aa kawotettati ubbai ne zersettaa baggaara anjjettana' yaagees" yaagiis.

<sup>19</sup> Hegaappe guyyiyan, Abrahaami ba ashkkaratukko simmin, eti ubbai issippe Berssaabeha denddidi biidosona. Abrahaami Berssaabehan de7iis.

### *Naakoora Yeletaa*

<sup>20</sup> Hegaappe simmin Abrahaamassi, "Milkka ne ishaa Naakoorayyo naata yelaasu; <sup>21</sup> etinne bairai Uuxa; Uuxa ishathi Buuza, <sup>22</sup> Araama aawaa Qamu7eela, Keesada, Haazo, Pilddaasha, Yidilaafanne Baatu7eela. <sup>23</sup> Hageeta ha hosppun naatakka Milkka Abrahaama ishaa Naakoorayyo yelaasu; Baatu7eeli Ribiqo yeliis. <sup>24</sup> Raa7uma giyo a kaadumatiyaa qassi Xebaaha, Gahaama, Tahaashanne Maa7ika yelaasu" yaagidi yootidosona.

## 23

### *Saari Haiquwaa*

<sup>1</sup> Saara xeetanne laatamanne laappun laitta de7aasu. <sup>2</sup> Hegaappe guyyiyan a Kanaane biittan de7iya (Kebroona giyo) Qiriyaati-Arbba7a kataman haiqqaasu. Haiqqin Abrahaami Saariyyo yeekkanaunne kayyottanau biis.

<sup>3</sup> Yeekki simmidi, Abrahaami ba keettaayee ahaa matappe denddidi biidi, Hiiteta hagaadan yaagiis; <sup>4</sup> "Taani intte gidдон betenne imatta; ta keettaayee ahaa mooganau taayyo intte gadiyaappe makkaanaa baizzerkktii!" yaagiis.

<sup>5-6</sup> Yaagin Hiiteti ayyo, "Godoo, nuuni yootiyooгаа siya; neeni nu gidдон wolqqaama halaqa; neeni ne keettaayee ahaa nu duufuwaappe nena lo77idaagan mooga; neeni ne keettaayee ahaa mooganau ba duufuwaa ooninne nena diggenna" yaagi zaaridosona.

<sup>7</sup> Yaagin Abrahaami dendi eqqidi, Hiitetu sinttan ziggiis. <sup>8-9</sup> I etayyo, "Intte tana, 'Ne keettaayee ahaa mooga' giikko siyite; Xoohaara na7aa Efiroonayyo a gadiyaa gaxan de7iya Maakipheela giyo gonggoluwaa taayyo makkaana kessanau baizzana mala kumetta waagan nuna zal77isserkktii" yaagiis.

<sup>10</sup> Hiitiyaa Efirooni he wode katamaa penggen shiiqida ba asaa gidдон uttiis; utti-daagee Hiiteti ubbai siyishin, Abrahaamayyo yaagiis; <sup>11</sup> "Hegaadan gidenna; ta godau, ta yootiyooгаа siya; taani gadiyaakka a gidдон de7iya gonggoluwaaakka neeyyo immais; taani neeyyo a ta asaa sinttan immais; neeni ne keettaayee ahaa mooga" yaagiis.

<sup>12</sup> Yaagin Abrahaami he biittaa asaa sinttan zaaretti ziggiidi, <sup>13</sup> asai siyishin Efiroona, "Ta yootiyooгаа siyarkkii! Taani he gadiyaa waagaa qanxxana; neeni taappe ekkarkkii! Hegan taani ta keettaayee ahaa moogana" yaagiis.

<sup>14-15</sup> Yaagin Efirooni Abrahaamayyo zaaridi, "Ta godau, taani odiyooгаа siya; gadee oiddu xeetu xaqara biraa<sup>23</sup> kessiyaagaa; shin hegee ne gidдоонinne ta gidдон ainne gidenna; ne keettaayee ahaa mooga" yaagiis. <sup>16</sup> Yaagin Abrahaami Hiiteti siyishin, Efirooni giido waagaa maayis; maayidi, he wode miishshan oiddu xeetu xaqara biraa Efiroonayyo immiis.

<sup>17</sup> Immin Mamire katamaa matan Maakipheelan de7iya Efiroona gadee, hegan de7iya gonggoloinne he gadiyan de7iya mitta ubbai, <sup>18</sup> katamaa penggen shiiqida Hiitetu ubbaa sinttan higgiiyan Abrahaama gade gidiis.

<sup>19</sup> Hegaappe guyyiyan, Abrahaami ba keettaayyiyo Saaro Kanaane biittan (Kebroona giyo) Mamire katamaa matan de7iya Maakipheela giyo gade gonggoluwaa moogiis. <sup>20</sup> Hegaa gishshau he gadeenne hegan de7iya gonggoloi Hiitetu sinttan higgiiyan Abrahaamassi makkaana gidiis.

<sup>23</sup> 23:14-15 Oiddu xeetu xaqara biraa: Hagee oiddu kilo giraamenne bagga deexxees.

## 24

### *Yisaaqassi Machcha Oishettaasu*

<sup>1</sup> Abrahaami keehippe sa7aa sugidi cimiis; GODAI a ubbankka anjjiis. <sup>2</sup> Abrahaami ba ashkkaraa, ba so asa ubbau halaqatiya, ba aqo ubbau godattiyaagaa hagaadan yaagiis; “Ne kushiyan ta gulbbataa oiqqaa; <sup>3</sup> taani eta gidдон de7iyo Kanaanetu macca naatuppe ta na7aayyo machcho oichchenna mala, GODAN, saluwaa Xoossaaninne sa7aa Xoossan taani nena caaqqettais; <sup>4</sup> shin neeni ta yelettido biittaa, ta dabbotukko baada, ta na7aa Yisaaqayyo machcho oichcha” yaagiis.

<sup>5</sup> Yaagin a ashkkarai, “Maccaasiyaa tanaara yaanau dosennabaa gidikko, ne na7aa neeni yiido biitti guyye efoo?” yaagidi oichchiis.

<sup>6</sup> Oichchin Abrahaami, “Ta na7aa yaa efeennaadan nena era! <sup>7</sup> GODAI, saluwaa Xoossai, tana ta aawaa sooppenne ta yelettido biittaaappe kessidaagee taayyo, ‘Ne zariyaayyo taani ha biittaa immana’ yaagidi caaqqidaagee, neeni ta na7aayyo yaappe machcho demmana mala, i ba kiitanchchaa neeppe sinttau kiittana. <sup>8</sup> Maccaasiyaa nenaara guyye yaanau dosennabaa gidikko, ha taani nena caaqqettido caaqoi neeyyo gometenna; shin ta na7aa yaa guyye mulekka efooppa” yaagiis. <sup>9</sup> Yaagin ashkkarai ba godaa Abrahaama gulbbataa oiqqiis; oiqqidi ha yohuwaassi caaqqiis.

<sup>10</sup> Hegaappe guyyiyan, ashkkarai ba godaa gaameelatuppe tammaa ekkidi, ba godaa miishshaappekka murutaa murutaa ekkidi biis; biidi Masphphexoomiyaa giyo biittan Naakoora katamaa gakkiiis. <sup>11</sup> Gakkidi omarssi, maccaasai haattaa tikkanau yiyo wodiyan, katamaappe gaxan haatta ollaa matan ba gaameelata gulbbatissiis.

<sup>12</sup> Yaatidi i hagaadan yaagidi woossiis; “GODAU, ta godaa Abrahaama Xoossau, hachchi taani qoppada yiidobaa tau injjeya; qassi ta godaa Abrahaamayyo kehabaa ootta. <sup>13</sup> Be7a! Taani ha haattaa pulttuwaa matan eqqais; ha katamaa asaa macca naatinne haattaa tikkanau haa yoosona. <sup>14</sup> Taani, ‘Ane otuwaa ziqqi oottada tana haattaa ushsha’ giyo wode, akka, ‘Hekko uya; qassi ne gaameelatakka taani ushshana’ yaagiyaara, hinna ne ashkkaraa Yisaaqayyo neeni dooridooro gidu; neeni ta godaayyo kehabaa oottidoogaa taani hegan erana” yaagiis.

<sup>15</sup> Biron i woosaa zaarennan de7ishin, Ribiqaa haatta otuwaa tookkada puttu gaasu. O Baatu7eeli yeliis; Baatu7eeli Milkki na7aa; Milkka Abrahaama ishaa Naakoora keetaayyiyo. <sup>16</sup> Ribiqaa keehi puulanchchanne attuma asi xalibeenna geela7o. Pulttuwaa duge wodhdhada, ba otuwaa kunttada kiyaasu. <sup>17</sup> Kiyin he ashkkarai ikko woxxi biidi o, “Ne otuwaappe tana guutta haattaa ushsharkkii!” yaagiis.

<sup>18</sup> Yaagin a, “Eeno ta godau, uyikkii” yaagaasu. Eesotada otuwaa ba hashiyaappe wot-tada, geddi ootta oiqqada a ushshaasu. <sup>19</sup> A ushshidoogaappe guyyiyan, “Ne gaameelatikka alana gakkanaassi taani etayyo haattaa duuqqana” yaagaasu. <sup>20</sup> Attida haattaa eesuwaa wonggiriyan tigada, hara haattaa duuqqanau ollaa woxxaasu; gaameelati ubbai alana gakkanaashin, haattaa ollaappe duuqqaa duuqqada ehaada wonggiriyan tigada ushshaasu. <sup>21</sup> I qoppidi yiido qofaa GODAI injjeyiiddi de7iyaakkonne eranau bitanee co77u giidi o xeellees.

<sup>22</sup> Gaameelati haattaa uyi simmin, bitanee ichchashu giraame bagga gidiya worqqa qalabatiyaanne, xeetanne tammu giraame gidiya naa77u worqqa sagaayota kessiis; <sup>23</sup> kessidi o, “Neeni o na7ee? Ane tau yoota; ne aawaa son nuuyyo aqiyoosi de7anee?” yaagiis.

<sup>24</sup> Yaagin a, “Taani Baatu7eela na7iyo; Baatu7eeli Milkka Naakooraayyo yelido na7aa. <sup>25</sup> Nuugan gidiya galabainne bassoi de7ees; qassi intte aqanaukka sohoi de7ees” yaagaasu.

<sup>26</sup> Bitanee gulbbati GODAAYYO goinnidi, <sup>27</sup> hagaadan yaagiis; “Ta godaayyo kehiyoogaanne ammanettiyoogaa aggibeenna GODAI, ta godaa Abrahaama Xoossai galatetto! Taani yiishin, GODAI tana ta godaa dabbotu soo kaalettiis” yaagiis.



<sup>28</sup> Na7iyaa woxxa baada, ba aayee son de7iya asaassi hanidabaa odaasu. <sup>29</sup> Ribiqeeyyo Laabaana giyo ishai de7ees; Laabaani kare kiyidi, haattaa pulttuwaa matan de7iya bitaniyaakko woxxiis. <sup>30</sup> Qalabatiyaanne ba michchee kushiyan de7iya sagaayota be7osaaranne Ribiqā bitanee bana giidobaa yootin siyosaara, kiyidi bitaniyaakko bi be7iis; bitanee gaameelatuura pulttuwaa matan eqqidaagaa demmiis. <sup>31</sup> Demmidi a, “GODAI nena anjjidoogoo, haaya! Neeni hagan karen aissi eqqai? Taani neeyyo keettaanne gaameelatuyyookka sohuwaa giigissaas” yaagiis.

<sup>32</sup> Yaagin bitanee soo geliis; Laabaani gaameelatu caanaa birshshiis; galabaanne basuwaa gaameelatuyyo yeggiis. Tohuwaa meecanau ayyoonne aara de7iya asatuyyo haattaa ehiis; <sup>33</sup> qumaikka a sintti aadhdhiis. SHin i, “Taani tana ehidabaa intteyyo yootennan de7aidda katta miikke” yaagiis.

Yaagin Laabaani, “Yaakko yoota” yaagiis.

<sup>34</sup> Hegaa gishshau i, “Taani Abrahaama ashkkaraa. <sup>35</sup> GODAI ta godaa keehi anjjin, i duretiis; dorssaa, miizaa, biraa, worqqaa, attuma ashkkarata, macca ashkkarata, gaameelatanne haretā ayyo immiis. <sup>36</sup> Ta godaa keettaayyiyaa Saara ba ceegatettaa laittan ayyo attuma na7a yelaasu; yelin i baayyo de7iyaabaa ubbaa ayyo immiis. <sup>37</sup> Ta godai tana hagaadan caaqettiis; ‘Taani de7iyo Kanaane biittaa macca naatuppe ta na7aayyo machcho oichchoppa; <sup>38</sup> shin ta aawaa asaakko, ta zaretukko baada, ta na7aayyo machcho oichcha’ yaagiis. <sup>39</sup> Yaagin taani ta godaa, ‘Na7iyaa tanaara yaanau dosennan aggikko shin?’ yaagaas. <sup>40</sup> Yaagin i, ‘GODAI, taani a sinttan hemettidoogee nenaara ba kiitanchchaa kiittana; neeni ta na7aayyo ta aawaa asaappe, ta zaretuppe machcho demmana mala, ne biyoobaakka injjeyana. <sup>41</sup> Neeni ta zaretukko bin, eti neeyyo o immennan ixkikko, he wode neeyyo caaqoi gometenna’ yaagiis.

<sup>42</sup> “Taani hachchi ha pulttuwaakko yiido wode yaagaas; ‘GODAU, ta godaa Abrahaama Xoossau, ne shene gidikko, taani biyo yohuwaa injjeya. <sup>43</sup> Be7a; taani ha pulttuwaa matan eqqais; geela7o issinniyaa haattaa tikkanau yiikko, taani o, “Tana ne otuwaappe guutta haattaa ushsharkkii!” yaagana. <sup>44</sup> Yaagin a tana, “Eeno uya; qassi ne gaameelatuyyookka taani haattaa duuqqana” yaagiyaara, GODAI ta godaa na7aayyo dooridooro gidu’ yaagaas.

<sup>45</sup> “Taani ta wozanan woossiyoogaa zaarennan de7ishin, Ribiqā ba otuwaa tookka ekkada, puttu gaasu; pulttuwaa duge wodhdhada haattaa duuqqasu; taani o, “Tana haattaa ushsharkkii’ yaagaas.

<sup>46</sup> “Yaagin a eesuwān ba hashiyaappe otuwaa wottada, ‘Hekko uya; qassi taani ne gaameelata ushshana’ yaagaasu. Yaagin taani uyaas; qassi ta gaameelata a ushshaasu.

<sup>47</sup> “Taani o, ‘Neni o na7ii?’ yaagaas.

“Yaagin a, ‘Taani Baatu7eela na7iyo; Baatu7eeli, Milkka Naakoorayyo yelido na7aa’ yaagaasu.

“Yaagin taani iyyo qalabatiyaa aattaas; i kushiyanikka sagaayota wottaas. <sup>48</sup> Hegaappe guyyiyan taani gulbbatada, GODAAYYO goinnaas; taani GODAA, ta godaa Abrahaama Xoossaa, ta godaa ishaa na7aa na7iyo a na7aassi ekkana tana likke ogiyaa kaalettidaagaa galatais. <sup>49</sup> Ha77ikka intte ta godaayyo kehanabaanne ammanettanabaa gidikko, taayyo yootite; gidana xayikkonne yootite; hegaappe sinttan taani hananabaa erana” yaagiis.

<sup>50</sup> Laabaaninne Baatu7eeli zaaridi yaagidosona; “Ha yohoi GODAAPPE yiis; nuuni neeyyo yaa haa gaanau danddayokko. <sup>51</sup> Ribiqo hanno be7a; ekkada efa; efin GODAI giidoogaadan ne godaa na7aassi machcho gidu bayin” yaagidosona.

<sup>52</sup> Abrahaama ashkkarai eti giyoobaa siyido wode, sa7an gulbbatidi GODAAYYO goinniis. <sup>53</sup> Ashkkarai biraa alleequwaanne worqqaa alleequwaa, maayuwaakka kessidi, Ribiqiyyo immiis; qassi al77o miishshata i ishaayyoonne i aayeyyo immiis.

<sup>54</sup> Hegaappe guyyiyan, inne aara de7iyaageeti miidosonanne uyidosona; yaatidi yan aqidosa; eti guuran denddin, “Tana ta godaakko yeddite” yaagiis.

<sup>55</sup> Yaagin i ishainne i aayyiyaa, “Na7iyaa issi tammu gallassa keenaa nunaara takku; hegaappe guyyiyan a baana” yaagidosona.

<sup>56</sup> SHin i, “GODAI taani yiidobaa injjeyirgin, intte tana gam77issoppite; taani ta godaakko baana mala tana moissite” yaagiis.

<sup>57</sup> Yaagin eti, “Na7iyo xeesidi ane o oichchoos” yaagidosona. <sup>58</sup> Yaagidi Ribiqo xeesidi, “Ha bitaniyaara buutee?” yaagidi oichchidosona.

Oichchin a, “Ee; taani baana” yaagaasu.

<sup>59</sup> Yaanin eti bantta michchiyo Ribiqo, o dichchiyaariira, Abrahaama ashkkaraanne a asatuura moissidosona. <sup>60</sup> Eti Ribiqo,

“Nu michchee Ribiqee,

sha7aappe sha7aa gakkanau coratta.

Ne zareti bantta morkketu katamata laattana” yaagidi anjjidosona.

<sup>61</sup> Hegaappe guyyiyan, Ribiqanne i danggiriixeti denddidi, gaameelata toggidi, bitaniyaara biidosona. Yaatin ashkkarai Ribiqo ekkidi biis.

<sup>62</sup> He wode Yisaaqi, “Tana Be7iya De7o Xoossaa Pulttuwaa” giyo pulttuwaa mati biidi, Neegeeba bazzuwan de7ees. <sup>63</sup> Issi gallassi omarssi Yisaaqi ba wozanan qoppiiddi dembaa kiyidi yuuyees; yuuyiiddi i xoqqu giidi xeelliyo wode, gaameelati yiyaageeta be7iis. <sup>64</sup> Ribiqakka xoqqu gaada xeelliyo wode, Yisaaqa be7aasu; be7ada gaameelaappe wodhdhaasu. <sup>65</sup> Wodhdhada ashkkaraa, “Ha nunaara gaittanau dembaara yiya bitanee oonee?” yaagaasu.

Yaagin ashkkarai, “I ta godaattennee” yaagiis. Yaagin a ba shaashiyaa ekkada gullettaasu.

<sup>66</sup> Qassi ashkkarai ba oottidobaa ubbaa Yisaaqassi yootiis. <sup>67</sup> Yisaaqi Ribiqo ba aayee Saari dunkkaaniyaa efiis. Efidi o machchiis; akka ayyo machcho gidaasu. Yaatin i o siiqiisinne ba aayee haiquwan kayyottiyoogaappe minettiis.

## 25

### *Abrahaami Hara Naata Yeliis (Hanidabaa Odiya Koira Maxaafaa 1:32-33)*

<sup>1</sup> Qassi Abrahaami Qaxuro geetettiya hara machchiyo ekkiiis. <sup>2</sup> A Ziimiraana, Yoqishaana, Madaana, Midiyaama, Yishibaaqanne SHuha ayyo yelaasu.

<sup>3</sup> Yoqishaani Saabanne Dadaana yeliis. Dadaani Ashooreta, Lexuushetanne Le7aamata yeliis.

<sup>4</sup> Midiyaama naati Eefa, Efeera, Hanooka, Abiidaa7anne Elddaa7a. Hageeti ubbaikka Qaxuri naata.

<sup>5</sup> Abrahaami babaa ubbaa Yisaaqa laatissiis. <sup>6</sup> SHin i biron paxa de7iiddi, ba kaadumatatuppe yelido naatussi bau de7iyaabaappe woitiis. Woitidi ba na7aa Yisaaqappe eta shaakkidi, arshsho bagga biittau yeddiis.

### *Abrahaama Haiquwaa*

<sup>7</sup> Abrahaami muleera issi xeetanne laappun tammanne ichchashu laittaa de7iis.

<sup>8</sup> Abrahaami daro wodiya de7idi, lo77o ceeggidi haiqqiis; haiqqidi ba maizzan gaittiis.

<sup>9</sup> A naati Yisaaqinne Isimaa7eeli a Maakipheela giyo gonggolo duufuwan moogidosona; he gonggoloi Mamire matan, Hiitiyaa Xoohaara na7aa Efiroona gadiyan de7ees.

<sup>10</sup> Hegeenne Abrahaami Hiitetuppe shammido gadiyaa. Abrahaami ba keettaayyiyaa Saara moogettidosan moogettiis. <sup>11</sup> Abrahaami haiqqidoogaappe guyyiyan, Xoossai a na7aa Yisaaqa anjiis. He wode Yisaaqi, “Tana Be7iya De7o Xoossaa Pulttuwaa” giyo pulttuwaa matan de7ees.

### *Isimaa7eela Yeletaa*

<sup>12</sup> Saari ailliyaa, Gibxxeppe yiida Aggaara, Abrahaamayyo yelido na7aa Isimaa7eela yeletai hagaappe kaallidi xaafettidaagaa. <sup>13</sup> Isimaa7eela naati bantta sunntaaninne bantta yeletaa maaran hageeta; hegeetinne: Nabaayoota, Qeedaara, Adibi7eela, Mibssaama, <sup>14</sup> Mishimaa7a, Duuma, Maasa, <sup>15</sup> Hadaada, Teema, Yixura, Naafiishanne Qeedima. <sup>16</sup> Isimaa7eela naati hageeta; eta sunntai eta moottaaninne de7iyo man77iyan haggaa. Eti bantta yarankka tammanne naa77u halaqata. <sup>17</sup> Isimaa7eeli muleera xeetanne hasttamanne laappun laittaa de7idi, haiqqiis; haiqqidi ba maizzan gaittiis. <sup>18</sup> Isimaa7eela zareti Gibxxeppe awai mokkiyo baggan de7iya Hawiilappenne SHurappe gidduwan, Asoora efiya ogiyaa matan de7idosona. Eti bantta ishanttu ubbaara morkkiyan de7idosona.

### *Yisaaqa Yeletaa*

<sup>19</sup> Abrahaama na7aa Yisaaqa yeletai hagaappe kaallidi xaafettidaagaa. Abrahaami Yisaaqa yeliis. <sup>20</sup> Yisaaqau laittai oitamaa gidido wode, Ribiqo ekkiis; a Masphexoomiyan de7iya Sooriyaa Baatu7eela na7iyoonne Sooriyaa Laabaana michchiyo. <sup>21</sup> Yisaaqi ba keettaayyiyaa maine gidido gishshau, iyyo GODAA woossiis; woossin GODAI a woosaa siyiis. Yaatin a keettaayyiyaa Ribiqaa shahaaraasu. <sup>22</sup> SHin i ulo giddon de7iya naati mentte gidi uttidi, issoi issuwaara sugettidosona; yaatin a, “Hagee tau aissi hanii?” yaagaasu. Hegaa gishshau GODAA oichchanau baasu.

<sup>23</sup> Bin GODAI iyyo, “Ne uluwan naa77u kawotettai de7ees; qassi ne giddon de7iya naa77u dere asati issoi issuwaappe shaahettana; issi dere asati hinkkootuppe minnana; qassi bairai kaaluwaayyo azazettana” yaagiis.

<sup>24</sup> A yeliyo wodee gakkinn, i uluwan mentte attuma naati de7oosona. <sup>25</sup> Koiro yelettidaagee arssa; a bollaa ubbaa ikisee maayyiis; heggaa gishshau eti a Eesawa<sup>24</sup> giidi sunntidosona. <sup>26</sup> Hegaappe guyyiyan, a ishai yelettiis; yelettiiddi i ba kushiyan Eesawa ginddiyaa oiqqi uttiis; heggaa gishshau a Yaaqooba<sup>25</sup> giidi sunntidosona. Ribiqaa eta yelido wode, Yisaaqau usuppun tammu laitta giddiis.

<sup>27</sup> Naati diccidosa; Eesawi shankkaa hiillaa eriya bazzo asa giddiis; shin Yaaqoobi dunkkaaniyan de7iya woppa asa giddiis. <sup>28</sup> Yisaaqi Eesawa siiqiis; aissi giikko, i shankkatidobaappe maanau dosiis; shin Ribiqaa Yaaqooba siiqaasu.

<sup>29</sup> Issitoo Yaaqoobi woxiyaa kattishin, Eesawi namisai woridoogee, bazzoppe yiis. <sup>30</sup> Eesawi Yaaqooba, “Tana ha zo7o woxiyaappe miza; tana namisai worees” yaagiis. (Hegaa gishshau qassi a sunntai Eedooma<sup>26</sup> geetettiis.)

<sup>31</sup> Yaaqoobi a, “Koiro taayyo ne bairatettaa baizza” yaagiis.

<sup>32</sup> Yaagin Eesawi, “Be7a! Taani haiqqana hanais; ha bairatettan tau ai go77i de7ii?” yaagiis.

<sup>33</sup> Yaagin Yaaqoobi zaaridi, “Ane taayyo koiro neeni caaqqa” yaagiis. Yaagin i caaqqiis; ba bairatettaanne Yaaqoobau baizziis. <sup>34</sup> Baizzin Yaaqoobi Eesawassi buddeenaanne misiraa woxiyaa immiis; immiin i miisinne uyiis; heggaa guyyiyan dendididi biis. Eesawi ba bairatettaa hagaadan kariis.

## 26

### *Yisaaqanne Abimeleka*

<sup>1</sup> He biittan kase Abrahaama wodiyan de7iya koshaa bolli hara koshai denddiis; yaatin Yisaaqi Pilisxxeema kawuwaa Abimelekakko Garaari biis. <sup>2</sup> GODAI Yisaaqayyo qonccidi hagaadan yaagiis; “Gibxxe biitti duge booppa; taani neeyyo yootido biittan de7a. <sup>3</sup> Ha biittan amaridaagaa takkashsha; taani nenaara gidana; nena anjjana; aissi

<sup>24</sup> 25:25 Eesawa: Ha sunntaa birshshettai “Ikisaamaa” giyoogaa. <sup>25</sup> 25:26 Yaaqooba: Ha sunntaa birshshettai “Ginddiyaa oiqqiyaagaa” giyoogaa. <sup>26</sup> 25:30 Eedooma: Ha sunntaa birshshettai “Zo7uwaa” giyoogaa.



giikko, ha biittaa ubbaa taani neeyyoonne ne zerettaayyo immana; taani ne aawaa Abrahaamayyo caaqqido caaquwaa minttana. <sup>4</sup> Ne zerettaa saluwaa xoolinttiyaadan darissana; ha biittaa ubbaa taani etayyo immana; sa7aa kawotetta ubbai ne zerettaa baggaara anjjettana. <sup>5</sup> Aissi giikko, Abrahaami ta qaalaa siyiis; ta pirddatanne ta azazota, ta awaajotanne ta higgeta naagiis” yaagiis. <sup>6</sup> Hegaa gishshau Yisaaqi Garaaran uttiis.

<sup>7</sup> He biittaa asai Ribiqibaa denttidi Yisaaqa, “Hanna neeyyo aibee?” yaagidi oichchiis.

Oichchin i, “Hanna taayyo michchiyo” yaagiis. Aissi giikko, i Ribiqaa daro meranchcha gidiyo gishshau, “Taani, ‘A ta keettaayyiyo’ giikko, ha sohuwaa asai i gaasuwan tana woranaakkonne” yaagi qoppidi yayyiis.

<sup>8</sup> Yisaaqi hegan daro wodiya de7idoogaappe guyyiyan, Pilisxxeema Kawoi Abimeleki maskkootiyaara duge xeellidi, Yisaaqi ba keettaayee Ribiqiira gaittishin be7iis. <sup>9</sup> Hegaa gishshau Abimeleki Yisaaqa xeesidi, “Hekko a tumu ne machchiyo! Neeni aissi, ‘A ta michchiyo’ gaadii?” yaagidi oichchiis.

Oichchin Yisaaqi, “ ‘A ta keettaayyiyo’ giikko, i gaasuwan asai tana worana gaada gaas” yaagiis.

<sup>10</sup> Yaagin Abimeleki, “Hagee neeni nu bollan oottidobi aibee? Ta asaappe issi asi ne keettaayyera aqi haliis shin; neeni nu bollan gomiya eha haladasa” yaagiis. <sup>11</sup> Hegaa gishshau Abimeleki ba asaa ubbaa, “Ha bitaniyaa woikko a keettaayyiyo bochchiya ooninne tumu haiqqana” yaagidi azaziis.

<sup>12</sup> Yisaaqi he biittan kattaa zeridi, he laittankka xeetu kushiya cakkiis; aissi giikko, GODAI a anjjiis. <sup>13</sup> I duretiis; i duriyaa mannana gakkanaassi ayyo aqoi dari dari biis. <sup>14</sup> Yisaaqassi dorssaa wudee, miizaa wudeenne ashkkarati keehippe darido gishshau, Pilisxxeema asati a qanaatidosona. <sup>15</sup> Hegaa gishshau, a aawaa Abrahaama wodiyan, a aawaa ashkkarati bookkido haatta olla ubbaa Pilisxxeema asati biittaa zaaridi baridosona.

<sup>16</sup> He wode Abimeleki Yisaaqa, “Nuuppe shaahettata ba; neeni nuuppe aadhdhada minnadasa” yaagiis. <sup>17</sup> Yaagin Yisaaqi hegaappe denddidi, Garaara Wombbaa biidi yan uttiis. <sup>18</sup> Yisaaqi ba aawaa Abrahaama wodiyan bookkettida haatta ollata, Abrahaami haiqqidoogaappe guyyiyan, Pilisxxeema asati baridoogeeta zaari bookki kessidi, a aawai sunttido sunttankka eta xeesiis.

<sup>19</sup> Yisaaqa ashkkarati wombban bookkidi, pulttiya haatta ollaa yan demmidosona. <sup>20</sup> SHin Garaara henttanchchati Yisaaqa henttanchchaturu, “Haattai nuugaa” yaagidi ooyettidosona. Eti aara palamettido gishshau, Yisaaqi he haatta ollaa, “Palamaa” giidi sunttiis.

<sup>21</sup> Hegaappe guyyiyan, eti hara haatta ollaakka bookkidosa; shin eti he haattaa ollaa geedonkka ooyettidosona; hega gishshau i he haattaa ollaa “Morkketettaa” giidi sunttiis. <sup>22</sup> Hegaappe guuttaa zardda7idi, hara haatta ollaa bookissiis; a gaasuwan ooninne ooyettibeenna; “Xoossai ha77i nuuyyo aassiis; nuuni ha biittan corattana” giidi a, “Aaho sohuwaa” giidi sunttiis.

<sup>23</sup> Hegaappe denddidi, pude Berssaabehi biis. <sup>24</sup> He biido gallassi qammikka GODAI ayyo qonccidi a, “Taani ne aawaa Abrahaama Xoossaa; taani nenaara de7iyo gishshau, neeni yayyoppa; taani nena anjjana; ta ashkkaa Abrahaama gishshau ne zerettaa taani corayana” yaagiis. <sup>25</sup> Yaagin Yisaaqi hegan yarshshiyosaa keexxidi, GODAA sunntaa xeesiis. Yan i ba dunkkaaniyaa toliis; qassi yan a ashkkarati haatta ollaa bookkidosa.

<sup>26</sup> Hegaappe guyyiyan, Abimeleki bana zoriya Ahuuzatanne ba wotaaddaratu ha-laqaa Pikoola ekkidi, Garaarappe Yisaaqakko yiis. <sup>27</sup> Yisaaqi eta, “Intte kase tana ixixidi, intte biittaappe kessi yeddooho; ha77i qassi taakko ai ekkana yiidetii?” yaagiis.

28-29 Yaagin eti a, “GODAI nenaara de7iyooogaa nuuni qoncciyaa be7ida. Hegaa gishshau caaqo maachchai nu giddooninne ne giddon de7ana koshshees yaagoos. Nuuni nena bochchibookko; shin nuuni neeyyo kehatetta xalaalaa oottidi, nena sarotettan moissi yeddida. Hegaadankka neeni nu bolli iitabaa oottenna mala, ane nenaara maachchaa maacettoos. Ha77i neeni GODAI anjjidoogaa” yaagidosona. <sup>30</sup> He wode Yisaaqi etau gibiraa giigissin, miidosonanne uyidosona. <sup>31</sup> Wonttetta gallassi maallado guuran denddidi, eti issoi issuwaara caaqqettidosona. Yisaaqi eta moissin, eti appe saro shaahettidi biidosona.

<sup>32</sup> He gallassi Yisaaqa ashkkaarati yiidi, bantta bookkido haatta ollaabaa ayyo odidosona; “Nuuni haattaa demmida” yaagidosona. <sup>33</sup> I he haatta ollaa Saabehe giidi sunttiis; hega gishshau he katamaa sunttai hachchi gakkanaassi Berssaabehe<sup>27</sup> geetettees.

### *Eesawi Dawutta Maccaasata Ekkiis*

<sup>34</sup> Eesawa laittai oitamaa gidiyo wode, Hiitiyaa Bi7eera na7iyo Yooditonne Hiitiyaa Eloona na7iyo Baasemaato machchiis. <sup>35</sup> Eti Yisaaqanne Ribiqo azzanissiiddi de7idosona.

## 27

### *Yisaaqi Yaaqooba Anjjiis*

<sup>1</sup> Yisaaqi cimin, a aifee xeelaa ixkido wode, ba bairatiya na7aa Eesawa xeesidi a, “Ta na7au” yaagiis.

Yaagin i, “Yee” giidi koyiis.

<sup>2</sup> Koyin i, “Be7a, ha77i taani ceeggaas; taani haiqqana gallassaa erikke. <sup>3</sup> Yaaniyo gishshau, ha77i ne shankkatiyo wonddafiyaanne zubbiyaa ekkada, bazzo ba; baada do7aa taayyo shankkatada, asho ekkada ya. <sup>4</sup> Mal77o qumaa, taani dosiyooogaa kattada aatta; hegeenne taani haiqqanaappe kase nena anjjanaassa” yaagiis.

<sup>5</sup> Ribiqaa Yisaaqi ba na7aa Eesawayyo yootiyo wode siyausu. Eesawi do7aa shankkatiidi ehaanau bazzo biidoogaappe guyyiyan, <sup>6</sup> Ribiqaa ba na7aa Yaaqooba, “Ne aawai ne ishaa Eesawa, <sup>7</sup> ‘Do7aa shankkata ehaada, taayyo mal77o qumaa taani maanau katta; hegeenne taani haiqqanaappe kasetada, GODAA sinttan nena anjjanaassa’ yaagishin taani siyaas. <sup>8</sup> Ta na7au, ha77i taani nena azaziyoobaa loittada siya. <sup>9</sup> Wudiyaa garssi baada, naa77u anqqara deeshsha marata tau ekkada ya; ehin taani ne aawaayyo mal77o qumaa i dosiyooogaadan kattana. <sup>10</sup> Ne aawai miidi haiqqennan kasetidi nena anjjana mala, assi aattaasa” yaagaasu.

<sup>11</sup> SHin Yaaqoobi ba aayyiyo Ribiqo, “Ta ishaa Eesawa bollan ikisee de7ees; shin ta bollai liiqo. <sup>12</sup> Ta aawai tana oiqqi be7ikko shin? Taani a cimmiyoobaa ayyo milatikko, taani anjuwaa gishshaa qanggettaa ta bolli ehaanaakkonne” yaagiis.

<sup>13</sup> Yaagin a aayyiya a, “Ta na7au, he qanggettai tana gakko. Taani neeyyo yootiyooogaa ootta; baada deeshsha marata tau ekkada ya” yaagaasu.

<sup>14</sup> Biidi ehiidi ba aayeyyo immiis; immin a aayyiya mal77o qumaa a aawai dosiyooogaadan kattaasu. <sup>15</sup> Hegaappe guyyiyan, Ribiqaa son ba matan de7iya ba baira na7aa Eesawa maayuwaa lo77uwaa ehaada, ba kaalo na7aa Yaaqooba maizzaasu. <sup>16</sup> Qassi he deeshshatu calaa a kushiyaanne a liiqo qooriyaa maizzaasu. <sup>17</sup> Maizzada ba kattido mal77o qumaanne oittaa ba na7aa Yaaqooba kushiyan wottaasu.

<sup>18</sup> Yaatin i ba aawaakko biidi gelidi, “Ta aawau” yaagiis.

Yaagin i, “Yee! Ta na7au, neeni oonee?” yaagiis.

<sup>19</sup> Yaagin Yaaqoobi ba aawaa, “Taani ne baira na7aa Eesawa; neeni tana azaziidogaadan taani oottaas; suura; suura uttada, taani shankkaappe ehiidobaa ma; yaatada tana anjja” yaagiis.

<sup>27</sup> 26:33 Berssaabehe: Ha sunttaa birshshettai “Caaquwaa Haattaa Ollaa” giyoogaa. (21:31 xeella.)

<sup>20</sup> Yaagin Yisaaqi ba na7aa, “Ta na7au, waata eesuwan demmadii?” yaagidi oichchiis. Oichchin i, “GODAI ne Xoossai tana maaddiina” yaagiis.

<sup>21</sup> Yisaaqi Yaaqooba, “Ta na7au, neeni tumu ta na7aa Eesawakkonne taani oiqqa be7anau ane taakko shiiqa” yaagiis. <sup>22</sup> Yaaqoobi ba aawaa Yisaaqakko shiiqin oiqqi be7idi, “Ha qaalai Yaaqooba qaalaa; shin kushee Eesawa kushiya” yaagiis. <sup>23</sup> A kushee a ishaa Eesawa kushiyaadan ikisiyaara de7iyo gishshau, eribeenna; i erennan a anjjiis. <sup>24</sup> A, “Tumu neeni ta na7aa Eesawee?” yaagidi oichchiis.

Yaagin i, “Ee, tanattennee” yaagiis.

<sup>25</sup> Yaagin i, “Ta na7au, taani neeni shankkatidobaa maanau haa aatta; maada taani nena anjjana” yaagiis. Yaaqoobi aattin, i miis; qassi i ayyo woine eessaa ehin uyiis.

<sup>26</sup> Hegaappe guyyiyan a aawaa Yisaaqi, “Ta na7au, haaya; shiiqada tana yera” yaagiis.

<sup>27</sup> Yaaqoobi shiiqidi a yeriis; Yisaaqi a maayuwaa singgi siyiiddi, hagaadan yaagidi anjjiis; “Ta na7aa peenoi GODAI anjjido goshshaadan sawees. <sup>28</sup> Xoossai saluwaa akkaanne sa7aa shicaa, kattaanne ooratta woine eessaa koridi neeyyo immo. <sup>29</sup> Kawotettati neeyyo haarettona; asati neeyyo gulbbatona. Neeni ne ishanttuyyo goda gida; ne aayee zareti neeyyo gulbbatona. Nena qanggiyaagee qanggettidaagaa gido; nena anjjiyaagee anjettidaagaa gido” yaagiis.

<sup>30</sup> Yisaaqi Yaaqooba anjji wurssidoogaappe guyyiyan, Yaaqoobi ba aawaa Yisaaqa sinttappe kiyaanne Eesawi shankkaappe puttu giis. <sup>31</sup> Ikka qassi mal77o qumaa kattidi, ba aawaayyo aattiis. Aattidi a, “Ta aawau, suura; suura uttada, taani shankkatidobaappe ma; yaatada tana anjja” yaagiis.

<sup>32</sup> Yaagin a aawaa Yisaaqi a, “Neeni oonee?” yaagidi oichchiis.

Oichchin i, “Taani ne na7aa, ne baira na7aa Eesawa” yaagiis.

<sup>33</sup> Yisaaqi dagammidi kokkoriiddi; “Yaatin do7aa shankkatidoogaa ekkidi taayyo aattidaagee oonee? Taani ha77i neeni yaana sinttan maada, a anjjaichchaas; tumukka i anjettidaagaa gidana” yaagiis.

<sup>34</sup> Eesawi ba aawaa qaalaa siyido wode, ba qaalaa xoqqu oottidi, daro yibbaata yeehuwaa yeekkiiddi ba aawaa, “Tana anjja; ta aawau, tanakka anjja!” yaagiis.

<sup>35</sup> SHin i, “Ne ishai yiidi cimmidi, ne anjjuwaa ekkirggiis” yaagiis.

<sup>36</sup> Eesawi, “A eridi Yaaqooba<sup>28</sup> sunttida; i tana cimmishin, hagee naa77antto; i ta bairatettaa ekkiis; qassi ha77i ta anjjuwaa ekkiis” yaagiis. Qassi i, “Neeni taayyo anjjuwaappe aibanne ashshabeikkii?” yaagidi oichchiis.

<sup>37</sup> Oichchin Yisaaqi Eesawa, “Taani a neeyyo goda oottaas; a ishantta ubbaakka a ashkkarata oottaas; qassi taani kattaaninne ooratta woine eessan a minttaas. Yaatin, ta na7au, neeyyo taani ai oottoo?” yaagiis.

<sup>38</sup> Eesawi ba aawaa, “Ta aawau, neeyyo issi anjjo xalaalai de7ii? Ta aawau, tanakka qassi anjja” yaagiis. Hegaappe guyyiyan, Eesawi ba qaalaa xoqqu oottidi yeekkiis.

<sup>39</sup> A aawaa Yisaaqi zaaridi, “Ne de7iyoosai ha sa7aa duretettaappe haakkana; saluwaa akkaikka neeyyo wodhdhenna; <sup>40</sup> neeni ne bisuwan aqana; neeni ne ishaayyo haarettona. SHin neeni aara eqettiyo wode, a qambaraa ne morggiyaappe olana” yaagiis.

<sup>41</sup> Yaaqooba a aawai anjjido gishshau, Eesawi ba uluwan a morkkiis; i ba wozanan, “Ta aawai haiqqana matiis; taani ayyo kayyotta simmada, ta ishaa Yaaqooba worana” yaagiis.

<sup>42</sup> SHin Ribiqha ha ba baira na7aa Eesawa qaalaa siyido gishshau, ba kaalo na7aa Yaaqooba xeesissa ehaada hagaadan yaagaasu; “Ne ishai Eesawi nena woridi haluwaa kessanau halchchees. <sup>43</sup> Hayyanaa ta na7au, taani neeyyo odiyoogaa ootta. Dendda! Denddada Kaaraanen de7iya ta ishaa Laabaanako baqata! <sup>44</sup> Yaatada ne ishaa

28 27:36 Yaaqooba: Ibraawetto qaalan ha sunntai “cimmiis” giyoobaa milatees.

hanqqoi dochchana gakkanaassi, amarida wodiya aara de7ashsha. <sup>45</sup> Ne ishai neeyyo hanqqettiyoogaa aggiyo wodenne, neeni a bolli oottidobaa i baliyo wode, taani kiittada nena yaappe ehiissana. Taani issi gallassi intte naa77aappe mela kiyana koyikke” yaagaasu.

### *Yisaaqi Yaaqooba Laabaanakko Yeddiis*

<sup>46</sup> Hegaappe guyyiyan Ribiqqa Yisaaqa, “Eesawi ekkido Hiitetu macca naatu gaasuwan taani ta de7uwaa shenetaas; qassi Yaaqoobikka hageetu mala Hiitetu macca naatuppe machcho ekkikko, taani simmi haiqqanau koyais” yaagaasu.

## 28

<sup>1</sup> Hegaa gishshau, Yisaaqi Yaaqooba xeesidi hagaadan anjjiisinne azaziis; “Kanaane biittaa macca naatuppe neeyyo machcho ekkoppa. <sup>2</sup> Dendda! Denddada ne aayee aawaa Baatu7eelakko, Masphphexoomiyaa biitti ba; baada yaappe ne aayee ishaa Laabaana macca naatuppe issinno neeyyo machcho ekka. <sup>3</sup> Ubbaa Danddayiya Xoossai nena anjjo; i nena yeletisso; neeni issi dere asa keena gakkanaassi nena corisso. <sup>4</sup> Neeni ha77i betetettan uttido ha biittaa nebbaa oottana mala neeyyoonne ne zersettaayyo Xoossai Abrahaama anjuwaa immo” yaagiis. <sup>5</sup> Yaagidi Yisaaqi Yaaqooba yeddiis; yeddin Yaaqoobi Masphphexoomiyaa biitti Laabaanakko biis. Laabaani Yaaqoobanne Eesawa yeliya aayee Ribiqqa ishaanne Sooriyaa Baatu7eela na7aa.

### *Eesawi Hara Maccaasa Gujjidi Ekkiis*

<sup>6</sup> Yisaaqi Yaaqooba anjjidoogaa, yaappe machcho ekkana Masphphexoomiyaa biitti a yeddidoogaa, qassi i Yaaqooba anjjido wode, “Kanaane maccaasa ekkoppa” yaagidi azazidoogaanne, <sup>7</sup> Yaaqoobi ba aawaayyoonne ba aayeeyyo azazettidi, Masphphexoomiyaa biitti biidoogaa Eesawi eris. <sup>8</sup> Eesawi hegan Kanaane biittaa maccaasi ba aawaa Yisaaqa ai keena iitiyaakko akeekiis. <sup>9</sup> Hegaa gishshau Eesawi Abrahaama na7aa Isimaa7eelakko biidi, a na7iyo Mahilaato ba keettaayetu bolli gujjidi ekkiis. A Nabaayoota michchiyo.

### *Yaaqoobi Beeteelen Be7ido Aimuwaa*

<sup>10</sup> Yaaqoobi Berssaabehappe Kaaraane baanau denddiis. <sup>11</sup> I issi sohuwaa gakkishin awai wullin, yan qammaa aqiis. He sohuwan de7iya shuchchatuppe issuwaa ekkidi, ba huuphiyan borkkotidi he sohuwan xiskkiis. <sup>12</sup> I aimo aimottiis; he aimuwan gayye issoi biittan eqqin, ayyo xeerai saluwaa gakkiiyoogan, Xoossaa kiitanchchati gi77ishiininne wodhdhishin be7iis; <sup>13</sup> gayyiyaassi bolla xeeran GODAI eqqidi a, “Taani GODAA, ne aawaa Abrahaama Xoossaa, Yisaaqa Xoossaa. Ha neeni zin77ido biittaa neeyyoonne ne zersettaayyo immana; <sup>14</sup> Ne zerttai sa7aa shafiyaadan darana; neeni arggoora, arshshoora, huuphessaaranne tohossaara de7iya sohota gakkanaa aakkana; sa7aa bollan de7iya asai ubbai ne baggaaranne ne zersettaa baggaara anjjettana. <sup>15</sup> Taani nenaara de7ais; neeni biyoosa ubban taani nena naagana; qassi taani nena ha biitti guyye zaarada ehaana; taani neeyyo oottana giidoogaa oottana gakkanaassi nena yeggikke” yaagiis.

<sup>16</sup> Yaaqoobi xiskkuwaappe beegottido wode, “GODAI tuma ha sohuwan de7ees; taani erabeikkeppe attin” yaagiis. <sup>17</sup> I yayyidi, “Ha sohoi aiba yashshii! Ha sohoi Xoossaa keettappe attin, ainne harasaa gidenna; hagee saluwaa pengge” yaagiis.

<sup>18</sup> Wonttetta gallassi maallado guuran Yaaqoobi denddidi, ba borkkotido shuchchaa ekkidi, tuussadan essidi, Xoossayyo dummayanau a bolli zaitiyaa tigiis. <sup>19</sup> Yaaqoobi he sohuwaa Beetele<sup>29</sup> giidi xeesiis. SHin he katamai hegaappe kase Looza geetteetes.

<sup>20-21</sup> Yaaqoobi hagaadan yaagidi shiiqettiis; “Ta aawaa soo taani saro simmana mala Xoossai tanaara gidikko, taani biyo ha buussan tana naagikkonne tau miyo

<sup>29</sup> 28:19 Beetele: Ha sunttaa birshshettai “Xoossaa keettaa” giyoogaa.

gumanne maayiyo maayo immikko, GODAI ta Xoossaa gidana; <sup>22</sup> taani tuussadan essido ha shuchchai Xoossaa keetta gidana. Neeni tau immiyoobaa ubbaappe tammaappe issuwaa taani neeyyo immana” yaagiis.

## 29

### *Yaaqoobi Laabaana Soo Gakkiis*

<sup>1</sup> Hegaappe guyyiyan, Yaaqoobi denddidi biidi, arshsho bagga asatu biitti gakkiis. <sup>2</sup> Gakkidi issi haattaa ollai dembban de7iyaagaa be7iis; heezzu dorssaa wudeti qassi he ollaa matan zin77idosona. Aissi giikko, wude ubbai haattaa uyiyo he ollaappe. He haattaa ollaa doonan de7iya shuchchai gita. <sup>3</sup> Dorssaa wude ubbai hegan dagattido wode, he wudiyaa heemmiyaageeti haattaa ollaa doonaappe he shuchchaa gonddorssidi dorssaa ushshoosona. Ushshidi he shuchchaa ollaa doonan zaaridi wottoosona.

<sup>4</sup> Yaaqoobi eta, “Ta ishato, intte auppe yiidetii?” yaagidi oichchiis.

Oichchin, “Nuuni Kaaraaneppe yiida” yaagidosona.

<sup>5</sup> Yaagin i, “Naakoora na7aa na7aa Laabaana intte ereetiiyye?” yaagiis.

Yaagin, “Ee, a eroos” yaagidosona.

<sup>6</sup> Yaaqoobi eta, “I lo77o de7ii?” yaagidi oichchiis.

Oichchin, “Ee, lo77o; a na7iyo Raaheelo dorssaa ekkada yiyaaro hanno be7a” yaagidosona.

<sup>7</sup> Yaagin Yaaqoobi eta, “Be7ite; awai ha77i xoqqan de7ees; wudiyaa mehee soo shiqiyo wodee biron gakkichchibeenna; dorssaa ha77i ushshi efidi, heemmite” yaagiis.

<sup>8</sup> SHin eti, “Wude ubbai shiiqana gakkanaassinne, shuchchaa haatta ollaa doonaappe gonddorssana gakkanaassi, nuuni ushshanau danddayokko. Hegaappe guyyiyan, nuuni dorssaa ushshana” yaagidosona.

<sup>9</sup> I biron haasayishin, Laabaana na7iyaa Raaheela ba aawaa dorssata laagga ekkada gackaasu; aissi giikko, a dorssa henttanchchiyo. <sup>10</sup> Yaaqoobi ba aayee ishaa Laabaana na7iyo Raaheelo be7ido wodenne, ba aayee ishaa Laabaana dorssaa be7ido wode, biidi ollaa doonaappe shuchchaa gonddorssiis; gonddorssidi ba aayee ishaa dorssata haattaa ushshiis. <sup>11</sup> Yaaqoobi Raaheelo yeridi, ufaissau ba qaalaa xoqqissidi yeekkiis.

<sup>12</sup> Yaaqoobi iyyo aawaa dabbonne Ribiqee na7aa gidiyogaa Raaheeliyyo yootiis. Hega gishshau a woxxa baada ba aawaayyo yootaasu.

<sup>13</sup> Laabaani ba michchee na7aa Yaaqooba woriyaa siyidosaarakka, aara gaittanau woxxiis. A idimmi yeridi, ba soo efiiis. Yan Yaaqoobi hanidabaa ubbaa Laabaanayyo yootiis. <sup>14</sup> Yootin Laabaani a, “Neeni tumu ta ashonne ta suutta” yaagiis. Yaaqoobi aara issi agina kumettaa uttiis.

### *Yaaqoobi Raaheeli Gishshaunne Liyi Gishshau Laabaanassi Oottiis*

<sup>15</sup> Hegaappe guyyiyan Laabaani a, “Neeni taayyo dabbo gidido gishshau, tau coo mela oottuuteeyye? Ane neeyyo ai qanxxanau bessiyaakko taayyo yoota” yaagiis.

<sup>16</sup> Laabaanayyo naa77u macca naati de7oosona; bairee sunttai Liyo, kaaleege Raaheelo. <sup>17</sup> Liya aifiyaara cuca; shin Raaheela yallisanne puulanchcha.

<sup>18</sup> Yaaqoobi Raaheelo siiqidi a, “Taani ne kaalo na7ee Raaheeli gishshau neeyyo laappun laittaa oottana” yaagiis.

<sup>19</sup> Yaagin Laabaani, “O hara asau immanaappe neeyyo immiyoogee lo77o; neeni tanaara hagan de7a” yaagiis. <sup>20</sup> Hega gishshau Yaaqoobi Raaheelo ekkana laappun laittaa oottiis; shin i o siiqiyo gishshau, ayyo amarida gallassa milatiis.

<sup>21</sup> Hegaappe guyyiyan Yaaqoobi Laabaana, “Ta machchiyo tau imma; ta wodeenne polettiis; taani o ekkana koyais” yaagiis. <sup>22</sup> Hega gishshau Laabaani hegan de7iya asaa ubbaa xeesidi, bullachchaa kessiis. <sup>23</sup> SHin sa7ai qammin, i ba na7iyo Liyo efidi Yaaqoobau immiis. Immin Yaaqoobi o ekkiis. <sup>24</sup> Qassi Laabaani ba ashkkariyo Zilppo ba na7ee Liyissi danggiriixe gidanaadan immiis.



<sup>25</sup> Sa7ai wonttin xeelliyo wode, hekko Liyo! Yaanin Yaaqoobi Laabaana, “Hagee neeni ta bolli oottidoogee aibee? Taani neeyyo oottidoi Raaheeli gishshassa gidenneeyye? Tana aissi cimmaadii?” yaagiis.

<sup>26</sup> Yaagin Laabaani a, “Nu biittan bairiyaa de7ishin, kaaliyo azinau immiyoogee woga gidenna. <sup>27</sup> He mishiratettaa saaminttaa wurssa; qassi kaalotiyaarokka nuuni neeyyo immana; hegaappe guyyiyan, hara laappun laittaa taayyo oottaasa” yaagiis.

<sup>28</sup> Yaaqoobi hegaadan hanidi he saaminttaa wurssiis; hegaappe guyyiyan, Laabaani ba na7iyo Raaheelo ayyo immiis. <sup>29</sup> Qassi Laabaani ba ashkkariyo Baalo ba na7ee Raaheelissi danggiriixe gidanaadan immiis. <sup>30</sup> Yaaqoobi Raaheelokka ekkiis. Raaheelo Liyippe aattidi siiqiis. Hara laappun laittaa Laabaanayyo oottiis.

### *Yaaqoobassi Naati Yelettidosona*

<sup>31</sup> GODAI Liya siiqettabeennaagaa be7idi, iyyo yeliyo uluwaa dooyiis; shin Raaheela maine. <sup>32</sup> Liya shahaarada attuma na7aa yelaasu. A sunttaanne Roobeela<sup>30</sup> sunttaasu; aissi giikko a, “GODAI ta metuwaa be7iis; ha77i tumu tana ta azinai siiqana” yaagaasu.

<sup>33</sup> A haranttuwaakka shahaarada attuma na7aa yelaasu. Yelada a, “GODAI taani siiqettabeennaagaa siyido gishshau, taayyo hagaakka gujjiis” yaagada, a Simoona<sup>31</sup> sunttaasu.

<sup>34</sup> A haranttuwaakka shahaarada attuma na7aa yelaasu. Yelada a, “Taani ayyo heezzu attuma naata yelido gishshau, ta azinai ha77i tanaara waaxettana” yaagada, a Leewa<sup>32</sup> sunttaasu.

<sup>35</sup> A haranttuwaakka shahaarada attuma na7aa yelaasu. Yelada a, “Hachchiigan taani GODAA galatana” yaagaasu. Hegaa gishshau a Yihudaa<sup>33</sup> sunttaasu. Hegaappe guyyiyan yeluwaa essaasu.

## 30

<sup>1</sup> Raaheela Yaaqoobau naata yelabeennaagaa be7ido wode, ba michchiyo qanaataasu; hega gishshau Yaaqooba, “Tau naata imma; hegee xayikko, taani haiqqana” yaagaasu.

<sup>2</sup> Yaagin Yaaqoobi Raaheelo hanqqettidi, “Tana neeyyo yelo diggida Xoossaa gaadiiyye?” yaagiis.

<sup>3</sup> Yaagin a, “Ta danggiriixiyo Baalo hinno be7a; a ta gishshaa yelana mala neeni o ekka; yaatobare i baggaara taanikka na7aayo gidana” yaagaasu. <sup>4</sup> Ba danggiriixiyo Baalo machcho ootti ekkana mala, ayyo immaasu; immin Yaaqoobi o ekkiis. <sup>5</sup> Baala shahaarada attuma na7aa Yaaqoobau yelaasu. <sup>6</sup> Yaatin Raaheela, “Xoossai taassi daannatiis; ta woosaakka siyidi, tau attuma na7a immiis” yaagaasu. Hegaa gishshau a Daana sunttaasu.

<sup>7</sup> Raaheeli danggiriixiyaa Baala haranttuwaa shahaarada, Yaaqoobayyo naa77antto attuma na7aa yelaasu. <sup>8</sup> Yelin Raaheela, “Taani ta michcheera wolqqaama baaxiyaa baaxetada xoonas” yaagaasu. Hegaa gishshau a Nifttaaleema<sup>34</sup> sunttaasu.

<sup>9</sup> Liya baayyo yeloi eqqidoogaa be7ada, ba danggiriixiyo Zilppo efaada Yaaqoobi o machchana mala immaasu. <sup>10</sup> Liyi danggiriixiyaa Zilppa attuma na7aa Yaaqoobau yelaasu. <sup>11</sup> Liya, “Laa hagee aiba lo77o qaadee!” yaagaasu. Hegaa gishshau Gaada<sup>35</sup> sunttaasu.

<sup>30</sup> 29:32 Roobeela: Ha suntaa birshshettai “Hashshu! Attuma na7aa!” woikko “Ta metuwaa be7iis” giyoogaa.

<sup>31</sup> 29:33 Simoona: Ha suntaa birshshettai “Siyiis” giyoogaa. <sup>32</sup> 29:34 Leewa: Ha suntaa birshshettai “Waaxettana” giyoogaa. <sup>33</sup> 29:35 Yihudaa: Ha suntaa birshshettai “Galataa” giyoogaa. <sup>34</sup> 30:8 Nifttaaleema: Ha suntaa birshshettai “Baaxiyaa” giyoogaa.

<sup>35</sup> 30:11 Gaada: Ha suntaa birshshettai “Lo77o qaada” giyoogaa.

<sup>12</sup> Liyi danggiriixiyaa Zilppa Yaaqoobau naa77antto attuma na7aa yelaasu. <sup>13</sup> Yelin Liya, “Taani ai keenaa ufaiittiyaanaashsha! Maccaasai tana ufaiittiyaaro gaana” yaa-gaasu. Hegaa gishshau a Aseera<sup>36</sup> sunttaasu.

<sup>14</sup> Gisttiyaa cakkiyo aginan Roobeeli gade biidi, inkkoyiyaa giyo timaatime milatiya teeraa demmidi, ba aayee Liyissi ehiis. Raaheela Liyo, “Ne na7aa inkkoyiyaappe taayyo imma” yaagaasu.

<sup>15</sup> SHin Liya, “Ta azinaa neeni wotta ekkidoogee gidennan ixxin, qassi ta na7aa inkkoyiyaa ekkuutee?” yaagaasu.

Yaagin Raaheela, “Yaanikko, ne na7aa inkkoyiyaa gishshau Yaaqoobi hachchi qamma nenaara aqo” yaagaasu.

<sup>16</sup> He gallassa omarssi Yaaqoobi bazzoppe yiido wode, Liya a mokkanau kiyada a, “Neni tanaara aqana koshshees; aissi giikko, taani ta na7aa inkkoyiyan nena keruu akkaichchaas” yaagaasu. Hegaa gishshau i he gallassa qammi iira aqiis.

<sup>17</sup> Xoossai Liyi woosaa siyiis; siyin a shahaarada, ichchashantta attuma na7aa Yaaqoobau yelaasu. <sup>18</sup> Yelin Liya, “Taani ta danggiriixiyo ta azinaassi immido gishshau, Xoossai heгаа keraa taayyo qanxxiis” yaagaasu. Hegaa gishshau a Yisaakoora<sup>37</sup> sunttaasu.

<sup>19</sup> Liya haranttuwaakka shahaarada, usuppunta attuma na7aa Yaaqoobau yelaasu.

<sup>20</sup> Liya, “Xoossai tau al77o imotaa immiis; taani ta azinaayyo usuppun naata yelido gishshau, ha77i i tana bonchchana” yaagaasu. Hegaa gishshau a Zaabiloona<sup>38</sup> sunttaasu. <sup>21</sup> Hegaappe guyyiyan issi macca na7iyo yelaasu; yelada o Diino sunttaasu.

<sup>22</sup> Xoossai Raaheelo hassayiis; i woosaa siyidi i yeliyo uluwaa dooyiis. <sup>23</sup> A shahaarada attuma na7aa yelaasu; yelada, “Xoossai ta yeellaa qucciis. <sup>24</sup> GODAI tau hara attuma na7akka gujjeerenneeshsha” yaagaasu. Hegaa gishshau a Yooseefa<sup>39</sup> sunttaasu.

### *Yaaqoobi Laabaanaara Damoozan Palamettiis*

<sup>25</sup> Raaheela Yooseefa yelidoogaappe guyyiyan, Yaaqoobi Laabaana, “Taani ta aawaa biitti simmana mala, tana moissa. <sup>26</sup> Taani eta gishshau neeyyo oottido ta maccaasatanne ta naata hamma; taani baana; aissi giikko, taani neeyyo ai keenaa ooso oottidaakko neeni eraasa” yaagiis.

<sup>27</sup> SHin Laabaani a, “Taani neeyyo issibaa odais; GODAI ne gaasuwan tana anjji-dooгаа taani be7aas. <sup>28</sup> Ne damoozaa tau oda; taani neeyyo a qanxxana” yaagiis.

<sup>29</sup> Yaagin Yaaqoobi, “Taani neeyyo waata oottidaakko, ne meheekka waani yeletti-daakko neeni eraasa. <sup>30</sup> Taani yaanaappe kase neeyyo de7iya guuttai ha77i keehi dariis; GODAI nena taani aadhdhidosan ubban anjjiis. SHin ha77i, taani ta so asau oottanai audee?” yaagiis.

<sup>31</sup> Yaagin Laabaani, “Taani neeyyo ai immoo?” yaagidi a oichchiis.

Oichchin Yaaqoobi, “Tau ainne immoppa; shin neeni taayyo issibaa oottikko, taani ne wudiyaa qassikka heemmananne naagana. <sup>32</sup> Taani hachchi ne wudiyaa ubbaa giddoora aadhdhana; hegan ne dorssaappe punccariyaa woikko gazzaa ubbaa, kareta dorssa mara ubbaanne deeshshaappe gazzaanne punccariyaa ubbaa taani shaakkana; eti ta damooza gidana. <sup>33</sup> Hegaa gishshau ta xillotetta neeni taayyo qanxxido damoozaa qoodanau sinttappe yiyo wode, taayyo markkattana; ta deeshshaappe gazza woikko punccare gidennabi woikko kareta gidenna ai dorssa marinne ta matan beettikko, wuuqettidabaadan qoodettana” yaagiis.

<sup>34</sup> Yaagin Laabaani, “Maayaas; neeni giidoogaadan gidobai” yaagiis. <sup>35</sup> SHin he gallassan Laabaani kalaade woikko gazza gidida attuma deeshsha ubbaa, punccare

<sup>36</sup> 30:13 Aseera: Ha sunttaa birshshettai “Ufaissa” giyoogaa. <sup>37</sup> 30:18 Yisaakoora: Ha sunttaa birshshettai “Keraa qanxxees” giyoogaa. <sup>38</sup> 30:20 Zaabiloona: Ha sunttaa birshshettai “Bonchchuwaa” giyoogaa. <sup>39</sup> 30:24 Yooseefa: Ha sunttaa birshshettai “Gujja” woikko “qucciis” giyoogaa.

woikko gazza gidida macca deeshshaa ubbaa, bootta gidida ubbaanne kareta dorssa mara ubbaa kessidi, ba attuma naata henttiis. <sup>36</sup> Yaatidi he wudiyaara heezzu gallassa ogiyaa Yaaqoobappe haakkidi biis. SHin Yaaqoobi attida Laabaana wudiya heemmiis.

<sup>37</sup> Yaaqoobi deeshsha loomiyaappe, gumariyaappenne xanqqarssaappe qayye gati-maa kessidi, poquwaa poqqi poqqidi, giddo bootta zawaa qaaridi gazzayis. <sup>38</sup> Wudee haattaa uyanau yiyo soho ubban, wonggiriyan, wudiya sinttan poqqido gatimata wottiis. Orggiyau eqqidaageeti haattaa uyanau yiidi, <sup>39</sup> he gatimatu sinttan biraset-tidosona; birasettidi eti kalaade, punccarenne gazza marata yelidosona. <sup>40</sup> Yelin Yaaqoobi marata wudiyaappe shaakkidi dumma wottiis; attida wudiya kalaadenne kareta gidida Laabaana mehiyaa sintti zaariis. Yaatidi baayyo wudiya dummayiis; Laabaana mehetuura eta gattibeenna.

<sup>41</sup> Gooba maccaageeti orggiyau eqqiyo wode audenne, eti he gatimatu matan biraset-tana mala, Yaaqoobi he gatimata haattaa wonggiriyan, mehetu sinttan wottees. <sup>42</sup> SHin meheti laafa gidikko, eta sinttan gatimata wottenna. Hegaa gishshau laafiya meheti Laabaanabaa gidin, goobiyaageeti Yaaqoobabaa gididosona. <sup>43</sup> Hagaadan hanidi, Yaaqoobi keehi daro duretidi, daro wudiya, macca ashkkaratanne attuma ashkkarata, daro gaameelatanne hareta haariis.

## 31

### *Yaaqoobi Laabaanappe Baqatidi Biis*

<sup>1</sup> Yaaqoobi Laabaana naati bana, “Yaaqoobi nu aawaabaa ubbaa ekkiichchiis; ha aquwaa ubbaa nu aawaabaappe demmiis” giyoogaa siyiis. <sup>2</sup> Yaaqoobi Laabaana som77oi baayyo kaseegaa mala gidennaagaa be7iis.

<sup>3</sup> He wode GODAI Yaaqooba, “Neeni ne aawatu biitti, ne dabbotukko guyye simma; taani nenaara gidana” yaagiis.

<sup>4</sup> Yaagin Yaaqoobi Raaheelonne Liyo ba wudee de7iyoosaa dembbaa yaana mala kiittidi xeesiis. <sup>5</sup> I eta, “Intte aawaa som77oi taayyo kaseegaa mala gidennaagaa taani be7ais; shin ta aawaa Xoossai tanaara de7ees. <sup>6</sup> Taani ta wolqqa ubban intte aawaayyo oottidoogaa intte ereeta; <sup>7</sup> shin intte aawai tana cimmiidi, ta damoozaa tammutoo laammiis. Gidikonne Xoossai tana i qohennaadan diggiis. <sup>8</sup> I, ‘Punccareti ne damooza gidana’ gin, wude ubbai punccariyaa yeliis; qassi i, ‘Kalaadeti ne damooza gidana’ gin, wude ubbai kalaadiyaa yeliis. <sup>9</sup> Xoossai hagaadan intte aawaa mehiyaa wotti ekkidi tau immiis.

<sup>10</sup> “Meheti orggiyau eqqiyo aginan, taani issi aimo aimottaas; he aimuwan taani xeeliyo wode, wudiya birassiya deeshsha orggeti kalaade, punccarenne gazza. <sup>11</sup> Xoossaa kiitanchchai aimuwan tana, ‘Yaaqoobaa’ yaagiis; yaagin taani, ‘Yee’ yaagada koyaas. <sup>12</sup> Koyin tana i, ‘Xoqqu gaada wudiya birassiya deeshsha orgge ubbaa kalaadiyaa, punccariyaanne gazzaa be7a; aissi giikko, Laabaani ne bolli oottiyoobaa ubbaa taani be7aas. <sup>13</sup> Neeni essido shuchchaa tiyada, taayyo shiiqettido Beetele Xoossai tana. Ha77i dendda! Denddada ha biittaappe kiya; kiyada guyye ne yeleta biitti simma’ yaagiis” yaagiis.

<sup>14</sup> Hegaappe guyyiyan, Raaheelanne Liya hagaadan yaagidi zaaridosona; “Nu aawaabaappe nuna gakkanabi aibee? <sup>15</sup> I nuna allagadan xeellees gidennee? I nuna baizzi ekkiis; baizzidi ekkidobaakka mi xaissiis. <sup>16</sup> Xoossai nu aawaappe wotti ekkido aqo ubbai tumukka nubaanne nu naatuba. Hegaa gishshau Xoossai neeyyo odidobaa ubbaa ootta” yaagidosona.

<sup>17-18</sup> Yaagin Yaaqoobi Kanaane biittan de7iya ba aawaa Yisaaqakko baanau denddiis; i ba naatanne ba keettaayeta gaameelaa togissiis; wude ubbaa baappe sinttaara laaggidi, Masphexoomiyan de7iiddi i shiishshido aqo ubbaa ekkidi biis. <sup>19</sup> Laabaani



ba dorssatu ikisiyaa qanxxanau biichchidaashin, Raaheela ba aawaa so misileta wuuqqaasu. <sup>20</sup> Qassi Yaaqoobi Sooriyaa Laabaanayyo ba baqatiyoogaa odennan cimmiis. <sup>21</sup> I baayyo de7iyaabaa ubbaa ekkidi baqatiis; baqatidi Efiraaxiisa SHAafaa pinnidi, Gala7aade giyo gezziyaakko simmidi biis.

### *Laabaani Yaaqooba Kaalliis*

<sup>22</sup> Heezzantta gallassan, Laabaani Yaaqoobi baqati biichchidoogaa siyiis. <sup>23</sup> Ba dabb-ota banaara ekkidi, laappun gallassa ogiyaa Yaaqooba geeduwaa kaalliiddi, Gala7aade gezziyan a gakkiiis. <sup>24</sup> He wode Xoossai qammi Sooriyaa Laabaanakko aimuwan yiidi a, “Neeni Yaaqooba bolli iita gidin, keha gidin, ainne haasayennaadan nena era!” yaagiis. <sup>25</sup> Laabaani gakkiiyo wode, Yaaqoobi Gala7aade gezziyan dunkkaanidi uttiis; qassi Laabaaninne a dabboti yan dunkkaanidosona.

<sup>26</sup> Hegaappe guyyiyan Laabaani Yaaqooba, “Neeni hagaadan aissi oottadii? Neeni tana cimmada, ta macca naata olan omoodettidabaadan laaggada kessadasa. <sup>27</sup> Neeni aissi qosan taappe kessa ekkada, tana cimmadii? Taani nena ufaissaaninne yettan, karaabiyaaninne diittan moissana mala taayyo aissi odabeikkii? <sup>28</sup> Neeni harai atto, ta naatu naatanne ta macca naata taani yera ekkenna mala diggadasa. Neeni eeyyabaa oottadasa. <sup>29</sup> Taani nena genanau tau wolqqai de7ees; shin ne aawaa Xoossai zino qammi tana, ‘Yaaqooba bolli iita gidin, keha gidin, ainne haasayennaadan nena era!’ yaagidi taayyo yootiis. <sup>30</sup> Ha77i gidikkonne, neeni ne aawaa soo baanau keehi laamotido gishshau kiyadasa. SHin ta so misileta neeni aissi wuuqqadii?” yaagiis.

<sup>31</sup> Yaaqoobi Laabaana, “Neeni ne naata taappe wolqqan wotta ekkanaakkonne gaada qoppido gishshaunne yayyido gishshau, hagaadan oottaas. <sup>32</sup> SHin ne so misileta oiqqida asa oonanne neeni demmikko, he urai siifetto! Nebaa gididabi ta matan beettikko, nu dabbotu sinttan koya; koyada, nebaa gidikko ekka” yaagiis; aissi giikko, Yaaqoobi Raaheela he so misileta wuuqqidoogaa eribeenna.

<sup>33</sup> Hegaa gishshau Laabaani Yaaqooba dunkkaane giddo, Liyi dunkkaane gid-donne naa77u kaadumatatu dunkkaane giddo geliis; shin ainne demmibeenna. Liyi dunkkaaniyaappe kiyidi, Raaheeli dunkkaaniyaa geliis. <sup>34</sup> Raaheela so misileta ekkada, gaameelaa kooraa garssan qosada, a bolli uttaasu. Laabaani dunkkaaniyan de7iyaabaa ubbaa patipannidi koyiis; shin ainne demmibeenna. <sup>35</sup> Raaheela ba aawaa, “Ta godau, tana hanqqettoppa; taani neeyyo eqqana danddayikke; taayyo kushe qitai yi uttiis” yaagaasu. I koyiis; shin so misileta demmibeenna.

<sup>36</sup> Yaaqoobi Laabaana hanqqettidi woqqasiis; Yaaqoobi Laabaana, “Taani ai moori-danaa? Hagaa neeni tana kaallanau, taani oottido nagari aibee? <sup>37</sup> Ha77i neeni ta miishsha ubbaa patipannada koyadasa; ne so miishshappe ai demmadii? Eti nu naa77aa gidduwan pirddana mala, ta dabbotu sinttaaninne ne dabbotu sinttan hagan wotta.

<sup>38</sup> “Taani nenaara laatamu laittaa kumettaa de7aas; ne dorssaikka ne deeshshaikka aucayibeenna; woikko ne wudiyaappe galssaa mabeikke. <sup>39</sup> Do7ai menttidoogaanne neeyyo ehabeikke; shin hegaa tanan qoodaas. Gallassi wuuqettidabaa woikko qammi wuuqettidabaa tana qanxxissadasa. <sup>40</sup> Gallassa suuloi, qamma kinchchoi tana qo-hiis; xiskkoi taappe xayyiis. <sup>41</sup> Taani hagaadan ne son laatamu laittaa de7aas; tam-manne oiddu laittaa ne naa77u macca naatu gishshaunne usuppun laittaa ne wudiya gishshau neeyyo oottaidda de7aas; shin neeni ta damoozaa tammutoo laammadasa. <sup>42</sup> Ta aawaa Xoossai, Abrahaama Xoossai, Yisaaqi Yayyidoogee tanaara gidibeennabaa gidiyaakko, siree bannan neeni tana mela kushe kessa yeddadasa; shin Xoossai ta tuggaanne ta kushiya oosuwaa be7idi, zino qammi nena seeriis” yaagiis.

### *Yaaqoobinne Laabaani Maacettido Maachchaa*

<sup>43</sup> Yaagin Laabaani Yaaqooba, “Maccaasati ta macca naata; naatikka ta naata; wudeekka ta wudiyaa; neeni be7iyo ubbai taagaa. Hachchi ha macca naatu taageetu bollinne eti yelido naatu bolli ai oottanau danddayiyaanaa? <sup>44</sup> Ha77i haaya; neeninne taani maachchaa maacettoos; hegee neepenne taappe gidduwan markka gido” yaagiis.

<sup>45</sup> Hegaa gishshau Yaaqoobi issi shuchchaa ekkidi tuussadan essiis. <sup>46</sup> Essidi i ba dab-bota, “SHuchchaa shiishshite” yaagiis; yaagin eti shuchchaa shiishshidi keelidosona; he keelaa lanqqen miidosona. <sup>47</sup> Laabaani he keelaa, Yigaari-Sahaaduta giidi sunttiis; qassi Yaaqoobi a Gal77eeda giidi sunttiis. <sup>40</sup> <sup>48</sup> Laabaani, “Ha keelai neepenne taappe gidduwan hachchi markka” yaagiis. Hegaa gishshau a sunttai Gal77eeda geetettiis.

<sup>49</sup> Qassi i he shuchchaa tuussaa Mixiphpha<sup>41</sup> giidi sunttiis; aissi giikko, Laabaani, “Nuuni issoi issuwaappe haakkidi de7iyo wode, GODAI ne gidduwaaninne ta gidduwan gididi naago. <sup>50</sup> Neeni ta macca naata naaqqikko, woikko neeni ta macca naatu bolli hara maccaasata ekkikko, nunaara ha77i ooninne bannabaa gidikkonne ne gidduwaaninne ta gidduwan Xoossai markka gidiyoojaa hassaya” yaagiis.

<sup>51</sup> Laabaani qassikka Yaaqooba, “Keelettida shuchchai hageeho; qassi taani ne gid-duwaaninne ta gidduwan essido shuchchaa tuussai hageeho. <sup>52</sup> Taani ha keelaappe nena genanau neekko kanttennaadan, neenikka tana genanau ha keelaappenne ha shuchchaa tuussaappe kanttennaadan, ha keelainne ha shuchchaa tuussai markka. <sup>53</sup> Abrahaama Xoossai, Naakoora Xoossai, eta aawaa Xoossai, nu gidduwan i pirddo” yaagiis. Yaagin Yaaqoobi ba aawaa Yisaaqi Yayyidoogaa sunttan caaqqiis. <sup>54</sup> Yaaqoobi deriyaa bollan yarshshuwaa yarshshiis; ba dabbotakka qumaa maanau xeesiis. Eti miidi deriyaa bollan aqidosa.

<sup>55</sup> Wonttetta gallassi guuran Laabaani denddidi, ba naatu naatanne ba macca naata yeriis; qassi eta anjjiis. Anjjidi, ba soo simmiis.

## 32

### *Yaaqoobi Eesawaara Gaittanau Giigiis*

<sup>1</sup> Yaaqoobi denddidi ba ogiyaa biishin, Xoossaa kiitanchchati aara gaittidosa.

<sup>2</sup> Yaaqoobi eta be7ido wode, “Hagee Xoossai aqiyoosaa” yaagidi, he sohuwaa Maahinaima<sup>42</sup> giidi sunttiis.

<sup>3</sup> Yaaqoobi Se7iira giyoosan, Eedooma biittan de7iya ba ishaa Eesawakko kiitaa baappe sinttau kiittiis. <sup>4</sup> I eta hagaadan yaagidi azaziis; “Intte ta godaa Eesawayyo gaanabai haggaa; ‘Ne ashkkaarai Yaaqoobi, “Taani Laabaana matan de7aidda hanno gakkanaassi gam77aas. <sup>5</sup> Taayyo miizzainne haree, dorssainne deeshshai, attuma ashkkaarainne macca ashkkaarati de7oosona; ha77i taani ha kiitaa ta godaa sinttan nashettana mala kiittaa” yaagiis’ yaagite” yaagiis.

<sup>6</sup> Kiitettidaageeti Yaaqoobakko simmidi a, “Nuuni ne ishaa Eesawakko biida; ha77i i qassi nenaara gaittanau yees; aaranne oiddu xeetu asai de7ees” yaagidosona.

<sup>7</sup> Yaagin Yaaqoobi yayyidi batibatiis; banaara de7iya asaa naa77u citan shaakkiis; qassi ba dorssaa, deeshshaa, miizzaanne gaameelaa naa77u citan shaakkiis. <sup>8</sup> I, “Eesawi yiidi issi citaa oliyaabaa gidikko, attida citai kessi ekkikkonne” yaagidi qoppiis.

<sup>9</sup> He wode Yaaqoobi hagaadan yaagidi woossiis; “Abeet GODAU, ta aawaa Abrahaama Xoossau, ta aawaa Yisaaqa Xoossau, tana, ‘Ne biitti, ne dabbotukko simma; taani neeyyo lo77obaa oottana’ giidaagoo, <sup>10</sup> neeni ne ashkkaraayyo oottido kehatettaunne tumatettau ubbau taani bessennaagaa. Taani ha Yorddaanoosa SHaafaa pinnido wode,

<sup>40</sup> 31:47 Yigaari-Sahaadutanne Gal77eeda: Ha Aramaisxxenne Ibraisxxe sunttata birshshettai “Markkatu keelaa” giyoogaa. <sup>41</sup> 31:49 Mixiphpha: Ha sunttaa birshshettai “Naagiyoosaa” giyoogaa. <sup>42</sup> 32:2 Maahinaima: Ha sunttaa birshshettai “Naa77u citai aqiyoosaa” giyoogaa.

taayyo issi xam77a xalaalai de7ees; shin ha77i taani naa77u cita gidaas. <sup>11</sup> Taani nena woossais; ta ishaa Eesawa kushiyaappe tana ashsha; aissi giikko, i yiidi, tananne aayeta eta naatuura xaissanaakkonne gaada yayyaas. <sup>12</sup> SHin neeni tana, “Taani neeyyo tumu lo77obaa oottana; taani ne zereettaanne qoodanau danddayettenna abbaa shafiyaa keena oottana’ giidoogaa qoppa” yaagiis.

<sup>13</sup> He gallassa qammi i yan aqiis; bau de7iyaabaa ubbaappe ba ishaa Eesawayyo immiyoobaa qoridi kessiis; <sup>14-15</sup> i kessidoogeeti naa77u xeetu macca deeshshatanne laatamu deeshsha orggeta, naa77u xeetu macca dorssatanne laatamu dorssa orggeta, hasttamu xanttiya gaameelata eta maratuura, oitamu macca miizzata, tammu korima boorata, laatamu macca haretanne tammu attuma haretta. <sup>16</sup> Hageeta wudiyaa wudiyaa shaakkidi, ba ashkkaratu kushiyan wottidi, ba ashkkarata, “Taappe sinttau biidi, wudiyaa wudiyaappe haahuwan haahuwan laaggite” yaagiis.

<sup>17</sup> Sinttan kaalettiyaagaa, “Ta ishai Eesawi nenaara gaittidi nena, ‘Neeni oossee? Neeni awa bai? Ne sinttan de7iya mehe ubbai oossee?’ yaagidi oichchiyaabaa gidikko, <sup>18</sup> neeni ayyo, ‘Hageeti ne ashkkaaraa Yaaqoobassa; eti ta godaa Eesawayyo immanau yeddidoogeeta; qassi ikka nuuppe guyyeera yees’ yaaga” yaagidi azaziis.

<sup>19</sup> Qassi i naa77antta heeztantanne wudiyaa kaalliya harata ubbata hagaadan azaziis; “Intte Eesawaara gaittiyo wode, hannidenkka geeta; <sup>20</sup> ‘Ne ashkkaaraa Yaaqoobi nuuppe guyyeera yees’ geennan aggoppite” yaagiis. Aissi giikko i, “Taani taappe sinttau immanau kiittidoban a doshissana; ooni erii, hegaappe guyyiyan taani aara gaittiyo wode, i tana mokki ekkanaakkonne” yaagidi qoppiis. <sup>21</sup> Hegaa gishshau ba immiyoobaa baappe sinttau yeddiis. SHin i ba huuphen he gallassi qammi yan aqiis.

### *Yaaqoobi Xoossaara Baaxetiis*

<sup>22-23</sup> He gallassi qammi Yaaqoobi denddidi, ba naa77u keettaayeta, ba naa77u kaadumatatanne ba naata tammanne isiineta ekkidi, Yaabooqa giyo pinuwaa gakkiiis; i eta shaafaa pinttiis; bau de7iyaabaa ubbaakka pinttidi yeddiis; <sup>24</sup> shin Yaaqoobi barkka attiis.

He wode issi asi sa7ai wonttana gakkanaassi aara baaxetiis. <sup>25</sup> He asi a xoonanau danddayibeennaagaa be7ido wode, Yaaqoobayyo bulxxiyaa meqettaa bochchiis; bochchin a bulxxiyaa meqettaa kiya wodhdhiis. <sup>26</sup> Yaatin bitanee a, “Sa7ai wonttido gishshau, tana yedda” yaagiis.

SHin Yaaqoobi a, “Neeni tana anjjennan taani nena yeddikke” yaagiis.

<sup>27</sup> Yaagin bitanee a, “Ne sunttai oonee?” yaagidi oichchiis.

Oichchin i, “Yaaqooba” yaagidi zaariis.

<sup>28</sup> Yaagin bitanee a, “Hagaappe sinttau ne sunttai Israa7eela<sup>43</sup> geetettope attin, Yaaqooba geetettope; aissi giikko, neeni Xoossaranne asaara baaxetada xoonadasa” yaagiis.

<sup>29</sup> Yaaqoobi a, “Ne sunttai oonee?” yaagidi oichchiis.

SHin bitanee, “Neeni ta sunttaa aissi oichchai?” yaagiis; yaagidi a anjjiis.

<sup>30</sup> Hegaa gishshau Yaaqoobi he sohuwaa PHinii7eela<sup>44</sup> giidi sunttiis; aissi giikko i, “Taani Xoossaa baazzan xeellaas; gidikkonne taani paxa attaas” yaagiis. <sup>31</sup> I PHinii7eelappe denddiyo wode, a bolli xalqqee doliis. I ba bulxxiyaa meqettaa gishshau wobbees. <sup>32</sup> Yaaqooba bulxxee ashuwaa matan boshettido gishshau, Israa7eela asai mehiyaa bulxxiyaa ashuwaa hachchi gakkanaassikka meenna.

## 33

### *Yaaqoobi Eesawaara Gaittiis*

<sup>43</sup> 32:28 Israa7eela: Ha sunttaa birshshettaa “Xoossaara baaxetiis” giyoogaa. <sup>44</sup> 32:30 PHinii7eela: Ha sunttaa birshshettaa “Xoossaa som77uwaa” giyoogaa.

<sup>1</sup> Yaaqoobi xoqqu gi xeellidi, Eesawi ba oiddu xeetu asaara yiyaagaa be7iis. Hegaa gishshau naata Liyissi, Raaheelissinne naa77u kaadumatatussi shaakkiis. <sup>2</sup> Kaadumatatanne eta naata sinttan, Liyonne i naata eta geeduwan, Raaheelonne Yooseefa wurssettan wottiis. <sup>3</sup> SHin i ba huuphen sinttau aadhdhidi, ba ishaakko matiiddi, sa7aa gakkid gakkidi laapputon ziggiis.

<sup>4</sup> SHin Eesawi aara gaittanau woxxidi, a qooriyaa qoommidi yeriis. Eti yeekkidosona. <sup>5</sup> Yaatin Eesawi xoqqu gi xeellidi, maccaasatanne naata be7iis; be7idi i, “Ha nenaara de7iyaageeti oonee?” yaagidi oichchiis.

Oichchin Yaaqoobi, “Eti Xoossai ne ashkkaraayyo kehatettan immido naata” yaagiis. <sup>6</sup> Yaagin kaadumatati bantta naatuura shiiqidi ziggidosona. <sup>7</sup> Hegaappe guyyiyan, Liyanne i naati yiidi ziggidosona; wurssettan Yooseefinne Raaheela yiidi ziggidosona.

<sup>8</sup> Eesawi, “Ha sinttan tanaara gaittida wudee ubbai qassi aibee?” yaagidi oichchiis. Oichchin i, “Ta godau, hegee taani ne sinttan nashettanaassa” yaagiis.

<sup>9</sup> SHin Eesawi, “Ta ishau, taayyo daroi de7ees; nebai neessa gido” yaagiis.

<sup>10</sup> Yaagin Yaaqoobi, “CHii, ha77i taani ne sinttan nashettidabaa gidikko, ha taani immiyoogaa taappe ekka. Neeni tana mokka ekkido gishshau, taani ne som77uwaa be7iyoogee Xoossaa som77uwaa be7iyooгаа mala. <sup>11</sup> Taani neeyyo ehiido ha imuwaa ekka; aissi giikko, Xoossai kehidi immin, taayyo bessis” yaagiis. Yaaqoobi shoobiya to利多 gishshau, Eesawi hegaa ekkiis.

<sup>12</sup> Hegaappe guyyiyan Eesawi, “Ane hindda; nu ogiyaa boos; taani nenaara issippe baana” yaagiis.

<sup>13</sup> SHin Yaaqoobi a, “Ta godau, naati shugo gidiyoogaa eraasa; qassi taani bantta galo marata xanttiya dorssatanne miizzaa naagana koshshees; asa eta issi gallassaa to利多 laaggikko, mehe ubbai haiqqana. <sup>14</sup> Hegaa gishshau, ta godau, ne ashkkaraappe sinttatada ba; taani Se7iiran ta godaa gakkanaassi, ta sinttan de7iya mehiyaa hemetaa keesaanne naatu hemetaa keesaa loddan kaallana” yaagiis.

<sup>15</sup> Yaagin Eesawi a, “Yaanikko taani ta asaappe amaridaagaa neeyyo ashshais” yaagiis.

SHin Yaaqoobi a, “Hegee aissee? Taani ta godaa sinttan nashettiyoogee tau gidana” yaagiis.

<sup>16</sup> Hegaa gishshau Eesawi he gallassi ogiyan gelidi, Se7iira simmiis. <sup>17</sup> SHin Yaaqoobi Sukkota biis; yan baayyo keettaa keexxiis; ba mehetuyyoonne daaseta daasiis. Hegaa gishshau he sohuwaa Sukkota<sup>45</sup> giidi sunttiis.

<sup>18</sup> Yaaqoobi Masphhexoomiyaappe simmido wode, Kanaane biittan de7iya Sekeema giyo katamaa sarotettan gakkii; i he katamaayyo baazzan uttiis. <sup>19</sup> Ba dunkkaaniyaa to利多 gadiyaa SHEkeema aawaa Hamoora naatuppe xeetu xaqara biran shammiis.

<sup>20</sup> Yan yarshshiyosaa keexxidi a, “Xoossaa, Israa7eela Xoossaa” giidi sunttiis.

## 34

### *SHekeemi Diino Dafis*

<sup>1</sup> Liya Yaaqoobayyo yelido na7iyaa Diina, he wode he biittaa maccaasata be7anau kiyaasu. <sup>2</sup> He biittaa haariya Hiiwiya Hamoora na7aa SHekeemi o be7idi, o dafi effidi mooriis. <sup>3</sup> A wozanai Yaaqooba na7iyo Diino amottiis; i o siiqiis; siiqidi o lo77iyaabaa iyyo haasayiis. <sup>4</sup> SHekeemi ba aawaa Hamoora, “Taayyo ha na7iyo machcho oichcharkkii” yaagiis.

<sup>5</sup> Yaaqoobi ba na7iyaa Diina moorettidoogaa siyiyo wode, a attuma naati bazzon mehiyaara de7oosona; hegaa gishshau eti gakkanaashin co77u giis.

<sup>6</sup> Hegaappe guyyiyan, SHekeema aawaa Hamoori Yaaqoobaara haasayanau yiis.

<sup>7</sup> Yaaqooba attuma naati hegaa siyidosara bazzoppe yiidosona; eti azzanidosonanne

<sup>45</sup> 33:17 Sukkoti: Ha suntaa birshshettai “Daaseta” giyoogaa.

yiillotidosona; aissi giikko, SHekeemi Yaaqooba na7iyo dafi efidi mooriyoogan, Israa7eela bolli pokkoba, oottanau bessennabaa oottiis.

<sup>8</sup> SHin Hamoori eta, “Ta na7ai SHekeemi intte na7eessi daro dagammiis; hayyanintta o assi machcho immerkketii! <sup>9</sup> Nunaara eckettienne gelettite; intte macca naata nuuyyo immite; nu macca naatanne intteyyo ekkite. <sup>10</sup> Intte nu gidдон uttana danddayeeta; biittai keehi aaho; an de7ite; zal77ite; an aquwaa demmite” yaagiis.

<sup>11</sup> He wode SHekeemi Diini aawaanne i ishantta, “Taani intte sinttan nashettikko, intte caddiyoobaa aiba gidikkonne immana. <sup>12</sup> Intte mishira na7eessi immiyoobaanne koitaa intte koyido keenaa darissidi tana caddite; taani intte tana caddidobaa aibanne immana; shin taani machchanau na7iyo taayyo immerkketii!” yaagiis.

<sup>13</sup> Bantta michchiyo Diino SHekeemi tunissido gishshau, Yaaqooba attuma naati SHekeemayyoonne a aawaa Hamoorayyo worddobaa yootidosona; <sup>14</sup> eta hagaadan yaagidosona; “Nuuni hegaa malabaa oottana danddayokko; nuuni nu michchiyo qaxxarettibeenna asau immokko; hegee nuna kaushshiyaabaa. <sup>15</sup> Nuuni intte issibaa oottikko intteyyo, ‘Eeno’ gaana; hegee aibee giikko, intte biittaa attumaasai ubbai qaxxarettidi nunadan hanikko, <sup>16</sup> yaanikko nuuni nu macca naata intteyyo immanau ‘Eeno’ gaana; intte macca naatakka nuuyyo ekkana. Nuuni intte gidдон uttidi, intte-naara issi asa gidana. <sup>17</sup> SHin intte qaxxarettanau maayennabaa gidikko, nuuni nu michchiyo ekkidi baana” yaagidosona.

<sup>18</sup> Yaagin eti giidobai Hamooranne a na7aa SHekeemau lo77o milatiis. <sup>19</sup> He wodallai, ba aawaa keettan de7iya ubbaappe aadhdhi bonchchettidaagee, Yaaqooba na7en ufaittido gishshau, eti giidobaa oottanau takkibeenna. <sup>20</sup> He wode Hamoorinne a na7ai SHekeemi bantta katamaa gutaraa biidi, bantta katamaa asau hagaadan yaagidi yootidosona; <sup>21</sup> “Ha asati nunaara siga; eti nu biittan de7onanne zal77ona; biittai keehi aaho. Eta macca naatanne nuuni ekkana; etinne nu macca naata ekkana. <sup>22</sup> SHin nunaara eti issi asadan de7anau nuuni issibaa maayettanau koshshees; hegeenne, eti qaxxarettidoogaadan nu attumaasai ubbai qaxxarettanaagaa. <sup>23</sup> Nuuni hegaadan oottikko, eta miizzai, eta aqoinne eta hara mehe ubbai nubaa gidennee? Hegaa gishshau ane nuuni eti giyoogaa maayoos; etinne nu gidдон de7ana” yaagidosona.

<sup>24</sup> Katamaa gutaraa shiiqida asati ubbai Hamoorayyoonne a na7aa SHekeemayyo, “Eeno” giidosona. Yaatin he katamaa attumaasati ubbai qaxxarettidosona.

<sup>25</sup> Heezzantto gallassi, eti ubbai bantta qaxxaraa masunttaa sahettishin, Yaaqooba attuma naatuppe naa77ai, Simooninne Leewi, Diini ishantti, bantta bisuwaa ekkidi, ooninne erennan katamaa gelidi, attumaasata ubbaa woridosona. <sup>26</sup> Hamooranne a na7aa SHekeema bisuwan woridi, bantta michchiyo Diino SHekeema keettaappe ekkidi effidosona. <sup>27</sup> Yaaqooba attuma naati he ahatu bolli gelidi, bantta michchiyo Diino tunissida katamaa bonqqidosona. <sup>28</sup> Eta dorssaa wudiyaa, miizzaa wudiyaa, hariyaa, katama gidдон de7iyaabaanne gaxan de7iyaabaa ubbaa ekkidosona. <sup>29</sup> Eta aquwaa ubbaa, eta naata ubbaanne maccaasata ubbaa omooddidosona; keettan de7idabaa ubbaa bonqqidosona.

<sup>30</sup> Yaaqoobi Simoonanne Leewa, “Intte ta bolli metuwaa ehiichchideta; ha biittan de7iya Kanaanetinne Parzzeti tana ixkana; nuuni qoodan guutta; eti issippe gididi ta bolli woraajjikko, taaninne ta so asai xayana” yaagiis.

<sup>31</sup> SHin eti, “Yaatin i nu michchiyo shaaramuxadan oottana bessii?” yaagidosona.

## 35

### *Yaaqoobi Beetele Simmiis*

<sup>1</sup> Xoossai hegaappe guyyiyan Yaaqooba, “Dendda! Denddada pude Beetele ba; baada yan de7a. Neeni ne ishaa Eesawappe baqatiyo wode neeyyo qonccida Xoossaayyo yan yarshshiyosaa keexxa” yaagiis.



<sup>2</sup> Yaagin Yaaqoobi ba so asaanne banaara de7iyaageeta ubbaa, “Intte gidduwan de7iya allaga xoossatu misileta diggite; intte bollaa geeshshite; intte maayuwaanne laammite. <sup>3</sup> Ane dendididi, pude Beetele boos; ta metuwaa gallassi taayyo siyida, taani biidosan ubban tanaara gidida Xoossau, taani yan yarshshiyooosaa keexxana” yaagiis. <sup>4</sup> Hegaa gishshau eti banttayyo de7iya allaga xoossatu misileta ubbaanne bantta haittan de7iya gutuchchaa ubbaa Yaaqoobau immidosona; immiin Yaaqoobi hegeeta Sekeeman de7iya wolaa garssan moogiis.

<sup>5</sup> Hegaappe guyyiyan, Yaaqoobinne a attuma naati dendididi biishin, issi urainne eta oiqqanau kaallibeenna; aissi giikko, eti biishin, eta yuushuwan de7iya katamaa asaa ubbaa bolli Xoossaa dagamai wodhdhiis.

<sup>6</sup> Yaaqoobinne aara de7iya asai ubbai Kanaane biittan de7iya (Beetele giyo) Looza gakkidosona. <sup>7</sup> Gakkin yan i yarshshiyooosaa keexxiis; i he sohuwaa El-Beetele<sup>46</sup> giidi sunttiis; aissi giikko, i ba ishaappe baqatidi biyo wode, Xoossai ayyo qonccido sohoi heгаа.

<sup>8</sup> Ribiqo dichchiya Deboora yan haiqqaasu; Beeteleppa hirkkiira de7iya wolaa garssan a moogettaasu; heгаа gishshau he mittaa sunttai Yeehuwaa Wolaa geetettiis.

<sup>9</sup> Yaaqoobi Masphhexoomiyaappe simmidoogaappe guyyiyan, Xoossai ayyo zaaretti qonccidi, a anjjiis; <sup>10</sup> Xoossai a, “Ne sunttai Yaaqooba; shin hagaappe sinttanau neeni mulekka Yaaqooba geetettakka; ne sunttai Israa7eela gidana” yaagidi i a Israa7eela sunttiis.

<sup>11</sup> Qassi Xoossai Yaaqooba, “Taani Ubbaa Danddayiya Xoossaa; neeni yeletta; coratta; kawotettatanne kawotettaa asai neeppe kiyana; kawotikka ne gulbbataappe kiyana. <sup>12</sup> Taani Abrahaamaanne Yisaaqau immido biittaa, qassi neeyyo immais; neeppe guyyiyanka taani ha biittaa ne zereettaayyo immana” yaagiis. <sup>13</sup> Hegaappe guyyiyan, Xoossai aara haasayido sohuwaappe pude kiyiis.

<sup>14</sup> Yaaqoobi Xoossai banaara haasayido sohuwan shuchchaa essidi, a bolli ushshaa yarshshuwaa tigiis; zaitiyaakka a bolli tigiis. <sup>15</sup> Yaaqoobi Xoossai banaara haasayido sohuwaa “Beetele” giidi sunttiis.

### *Raaheelinne Yisaaqa Haiquwaa*

<sup>16</sup> Eti heгааappe guyyiyan, Beeteleppa dendididosona. Eti Efiraataa gakkanau guuttaa ashshidaashin, Raaheelo maaretai oiqqiis; maaretan a keehi waayettaasu. <sup>17</sup> Maaretai o waayissido wode o yelissiyaara, “Yayyoppa; hageekka attuma na7aa” yaagaasu. <sup>18</sup> SHin a haiqqaidda, shemppoi kiyishin, ba na7aa Ben77ona<sup>47</sup> sunttaasu; shin a aawai a Biniyaama<sup>48</sup> sunttiis.

<sup>19</sup> Hegaappe guyyiyan, Raaheela haiqqa bayaasu; haiqqada Beetaliheeme giyo Efiraata efiya ogiyaa doonan moogettaasu. <sup>20</sup> Yaaqoobi i duufuwan hawulttiyaa shuchchaa essiis; he hawulttee hachchi gakkanaassikka Raaheeli duufuwaa erissees.

<sup>21</sup> Israa7eeli heгааappe dendididi, Edera gimbbiyaappe hefinttan ba dunkkaaniyaa tokkiis. <sup>22</sup> Israa7eeli he biittan de7ishin, Roobeeli biidi, ba aawaassi yelida kaadumatee Baaliira zin77iis. Israa7eelinne ha yohuwaa siyiis.

Yaaqooba attuma naati tammanne naa77a. <sup>23</sup> Liyi naati Yaaqooba baira na7aa Roobeela, Simoona, Leewa, Yihudaa, Yisaakooranne Zaabiloona. <sup>24</sup> Raaheeli attuma naati Yooseefanne Biniyaama. <sup>25</sup> Raaheeli danggiriixee Baali attuma naati Daananne Nifttaaleema. <sup>26</sup> Liyi danggiriixee Zilppi attuma naati Gaadanne Aseera. Hageeti Masphhexoomiyan Yaaqoobayyo yelettida a attuma naata.

<sup>46</sup> 35:7 El-Beetele: Ha sunttaa birshshettai “Xoossaa keettaa Xoossaa” giyoogaa. <sup>47</sup> 35:18 Ben77ona: Ha sunttaa birshshettai “Metuwaa na7aa” giyoogaa. <sup>48</sup> 35:18 Biniyaama: Ha sunttaa birshshettai “Ta ushachcha kushiyaa na7aa” giyoogaa.

<sup>27</sup> Yaaqoobi (Kebroona giyo) Qiriyaati-Arbba7a matan Mamiren de7iya, ba aawaa Yisaaqa soo yiis; he sohoi kase Abrahaaminne Yisaaqi de7ido soho. <sup>28</sup> Yisaaqi xeetanne hosppun tammu laittaa de7iis; <sup>29</sup> i daro wodiya de7idi, lo77o ceeggidi haiqqiis; haiqqidi ba maizzan gaittiis. A naati Eesawinne Yaaqoobi a moogidosona.

## 36

### *Eesawa Yeletaa*

*(Hanidabaa Odiya Koiro Maxaafaa 1:34-37)*

<sup>1</sup> Eedooma giyo Eesawa yeletai hagaappe kaallidi xaafettidaagaa. <sup>2</sup> Eesawi Kanaane biittaa macca naatuppe bau machchota ekkiis; etinne Hiitiyaa Eloona na7iyo Aado, Hiiwiya Xibaa7oona na7ai Aani yelido Oholiibaamonne <sup>3</sup> Isimaa7eela na7iyo, Nabaayoota michchiyo Baasemaato. <sup>4</sup> Aada Eesawayyo Elifaaza yelaasu; Baasemaatakka Ra7u7eela yelaasu; <sup>5</sup> Oholiibaama Ya7uusha, Yaa7ilaamanne Qoraaha yelaasu; Kanaane biittan Eesawayyo yelettida attuma naati hageeta.

<sup>6</sup> Eesawi ba keettaayeta, ba attuma naatanne macca naata, ba so asa ubbaa, ba miizzatanne ba mehe ubbaa Kanaane biittan i haaridobaa ubbaa ekkidi, ba ishaa Yaaqoobappe haakkiya biitti biis. <sup>7</sup> Eta aqoi darido gishshau, eti issippe de7anau danddayibookkona; eta mehee darido gishshau, eti de7iyo biittai eta naa77aayyo gidanau danddayibeenna.

<sup>8</sup> Yaanin Eedooma giyo Eesawi Se7iira giyo gezziyan uttiis.

<sup>9</sup> Se7iira gezziyan de7ida Eedoomatu aawaa Eesawa yeletai hagaappe kaallidi xaafettidaagaa. <sup>10</sup> Hagee Eesawa attuma naatu sunntaa; hegetinne Eesawa keettaayee Aadi na7aa Elifaazanne Eesawa keettaayee Baasemaati na7aa Ra7u7eela.

<sup>11</sup> Elifaaza naati Temaana, Omaara, Xafa, Ga7itaamanne Qanaaza. <sup>12</sup> Qassi Timinaa7a Eesawa na7aa Elifaazayyo kaadumata; a Elifaazayyo Amaaleeqa yelaasu. Hageeti Eesawa keettaayee Aadi na7aa naata.

<sup>13</sup> Ra7u7eela attuma naati Nahaata, Zaraaha, SHammanne Miiza; hageeti Eesawa keettaayee Baasemaati na7aa naata.

<sup>14</sup> Xibaa7oona na7ai Aani yelido Oholiibaama attuma naati hageeta; a Eesawayyo Ya7uusha, Yaa7ilaamanne Qoraaha yelaasu.

<sup>15</sup> Eesawa yeletaa halaqati hagaappe kaallidi xaafettidaageeta. Eesawayyo baira na7aa Elifaaza attuma naati, halaqa gididaageeti Temaana, Omaara, Xafa, Qanaaza, <sup>16</sup> Qoraaha, Ga7itaamanne Amaaleeqa; Eedooma biittan Elifaazi yelido halaqati hageeta; hageeti ubbai Aadi na7aa naata.

<sup>17</sup> Eesawa na7aa Ra7u7eela attuma naati, halaqa gididaageeti Nahaata, Zaraaha, SHammanne Miiza; Eedooma biittan Ra7u7eeli yelido halaqati hageeta; eti Eesawa keettaayee Baasemaati na7aa naata.

<sup>18</sup> Eesawa keettaayee Oholiibaami attuma naati, halaqa gididaageeti Ya7uusha, Yaa7ilaamanne Qoraaha; eti Aana na7ee, Eesawa keettaayee Oholiibaamippe yelettida halaqata.

<sup>19</sup> Eedooma giyo Eesawa attuma naati hageeta; eta halaqatikka hageeta.

### *Se7iira Yeletaa*

*(Hanidabaa Odiya Koiro Maxaafaa 1:38-42)*

<sup>20</sup> Eedooma biittan de7iya Hooriyaa Se7iira attuma naati hagaappe kaallidi xaafettidaageeta; hegetikka Loxaana, SHobaala, Xibaa7oona, Aana, <sup>21</sup> Dishoona, Exeeranne Dishaana; hegeti, Eedooma biittan de7iya Se7iira attuma naati, Hooretu halaqata.

<sup>22</sup> Loxaana attuma naati Hooranne Heemaama; Loxaana michchiyaa Timinaa7o.

<sup>23</sup> SHobaala attuma naati Aaliwaana, Manahaata, Eebaala, SHefanne Oonaama.

<sup>24</sup> Xibaa7oona attuma naati Aayanne Aana; hagee Aani bazzon ba aawaa Xibaa7oona haretu heemmiiddi haattaa bilbbuwaa demmidaagaa.

<sup>25</sup> Aana na7ai Dishoona; na7iyaa qassi Oholiibaamo.

<sup>26</sup> Dishoona attuma naati Hemddaana, Eshibaana, Yitiraananne Karaana.

<sup>27</sup> Exeera attuma naati Bilihaana, Za7iwaananne Aqaana.

<sup>28</sup> Dishaana attuma naati Uuxanne Araana.

<sup>29</sup> Hooretu halaqati hageeta; Loxaana, SHobaala, Xibaa7oona, Aana, <sup>30</sup> Dishoona, Exeeranne Dishaana. Hageeti Se7iira biittan bantta yaran yaran shaahettida Hooretu halaqata.

### *Eedooma Kawota*

*(Hanidabaa Odiya Koiro Maxaafaa 1:43-54)*

<sup>31</sup> Israa7eelan kawoi kawotanaappe kase Eedooma biittan kawotida kawoti ha-gaappe kaallidi xaafettidaageeta.

<sup>32</sup> Ba7ooraa na7ai Belaa7i Eedooman kawotiis; a katamaa sunntai Dinaaba geetettes.

<sup>33</sup> Belaa7i haiqqin, Booxirappe yiida Zaraaha na7ai Yobaabi kawotiis.

<sup>34</sup> Yobaabi haiqqin, Temaana biittaappe yiida Hushaami kawotiis.

<sup>35</sup> Hushaami haiqqin, Badaada na7ai Hadaadi, Midiyaama asata Moo7aaba biittan xoonidaagee kawotiis; a katamaa sunntai Awiita geetettiis.

<sup>36</sup> Hadaadi haiqqin, Maasireeqappe yiida Saamili kawotiis.

<sup>37</sup> Saamili haiqqin, shaafaa matan de7iya Rahobootappe yiida SHaa7uli kawotiis.

<sup>38</sup> SHaa7uli haiqqin, Akiboora na7ai Ba7aalihanaani kawotiis.

<sup>39</sup> Akiboora na7aa Ba7aalihanaani haiqqin, Hadaari kawotiis; a katamaa sunntai Paa7u geetettes; a keettaayyiyaa Mezaahaaba na7iyaa Maaxireeda yelido Mahex-aabi7eelo geettausu.

<sup>40</sup> Eesawa yeletaa halaqati bantta yaran yaran, bantta sohuwan sohuwaaninne bantta sunntan sunntan hageeta; Timinaa7a, Aliwa, Yeteeta, <sup>41</sup> Oholiibaama, Eela, Pi-noona, <sup>42</sup> Qanaaza, Temaana, Mibxxaara, <sup>43</sup> Maagidi7eelanne Iraama. Hageeti bantta haariyo biittan, bantta de7iyoosan de7iyoosan Eedooma halaqata. Hagee Eesawi, Eedoomatu aawaa.

## 37

### *Yooseefanne A Ishantta*

<sup>1</sup> Yaaqoobi ba aawai de7ido Kanaane biittan uttiis.

<sup>2</sup> Yaaqooba naati hanidobai hagaappe kaallidi xaafettidaagaa.

Yooseefi tammanne laappun laitta na7a gidido wode, ba aawaa kaadumatatuppe, Baalippenne Zilppippe yelettida ba ishanttuura wudiyaa heemmes. He wode i ba aawaayyo eti oottido iitabaa yootees.

<sup>3</sup> Israa7eeli Yooseefa cimidi yelido gishshau, ba hara attuma naatu ubbaappe aattidi siiqees. I ayyo alleeqettida maayuwaa giigissiiis. <sup>4</sup> A ishantti bantta aawai a etappe aattidi siiqiyooogaa be7ido wode, eti a ixixidi, keha qaala ayyo haasayanau danddayi-bookkona.

<sup>5</sup> Yooseefi aimo aimottidi, ba ishanttuuyo yootiis; yootin eti a yaa darissidi ixixidosona.

<sup>6</sup> I eta, “Taani aimottido aimuwaa siyite. <sup>7</sup> Nuuni gaden mirqqiyaa qachchishin, ta mirqqee issi kuttan denddidi sitti giidi eqqi bayin, intte mirqqeti yuuyi aadhdhidi ta mirqqiyaassi ziggidosona” yaagiis.

<sup>8</sup> Yaagin a ishantti a, “Neeni nu bollan kawotana hanaiyye? Woikko nuna tumu haarana hanaiyye?” yaagidosona. Eti a aimuwaa gishshaunne a oduwaa gishshau, yaa darissidi ixixidosona.

<sup>9</sup> Qassi Yooseefi hara aimuwaa aimottidi, ba ishanttuuyo yootiis; “Siyite; taani hara aimuwaakka aimottaas. He aimuwan awai, aginainne tammanne isiini xoolintteti taayyo ziggoosona” yaagiis.

<sup>10</sup> Ba aawaayyoonne ba ishanttuuyo he aimuwaa yootido wode, a aawai a, “Hagee neeni aimottidoogee aiba aimoo? Tumu taani, ne aayyiyaanne ne ishantti yiidi, ne sinttan sa7an gufannidi neeyyo zigganeeyye?” yaagidi seeriis. <sup>11</sup> A ishantti a qanaatidosona; shin a aawai ha yohuwaa ba wozanan wottiis.

### *Ishantti Yooseefa Baizzidosona*

<sup>12</sup> Issi gallassi a ishantti Sekeema matan bantta aawaa dorssaa heemmanau biidosona; <sup>13</sup> bin Israa7eeli Yooseefa, “Ne ishantti Sekeeman wudiyaa heemmiyoogaa eraasa. Haaya; taani nena etakko kiittana” yaagiis.

Yaagin Yooseefi, “Eeno” yaagiis.

<sup>14</sup> Yaagin i a, “Ba; baada ne ishanttinne wudee saro gidiyoogaa be7a; be7ada etabaa taayyo yootaasa” yaagiis. Yaagidi a Kebroona dilbbaappe kiittiis.

Kiitettidi i Sekeema biis. <sup>15</sup> Yan dembbaa gidдон i yaa haa simerettishin, issi asi a demmidi, “Na7au, ai koyai?” yaagidi oichchiis.

<sup>16</sup> Oichchin i, “Ta ishantta koyais; eti wudiyaa heemmiyoosai awaanakkonne hailaa taayyo odarkkii!” yaagiis.

<sup>17</sup> Yaagin bitanee, “Hagaappe dendiichchidosona; eti, ‘Nuuni Dootaana boos’ giishin siyaas” yaagiis. Hega gishshau, Yooseefi ba ishanttu geeduwaa biidi, eta Dootaanan demmiis.

<sup>18</sup> SHin i haahuwan de7ishin, eti a be7idosona; i etakko gakkennan de7ishin, eti a woranau a bolli maqettidosona. <sup>19</sup> Issoi issuwaa, “Be7ite! Aimuwaawai yees. <sup>20</sup> Haayite; a woridi, ha ollatuppe issuwaa gidдо yeggoos. Hegaappe guyyiyan, ‘Iita do7i a miis’ yaagana; yaatidi a aimoi ehiyoobaa be7ana” yaagidosona.

<sup>21</sup> Roobeeli heгаа siyido wode, eta kushiyaappe a ashshanau koyidi, “A worenнан aggoos. <sup>22</sup> Suutta gussoppite; a intte bazuwan de7iya ha ollaa gidдо olite; a bolli kushe wottoppite” yaagiis. Roobeeli heгаа a etappe ashshidi guyye a aawaakko yeddанau giis.

<sup>23</sup> Yooseefi ba ishanttukko gakkido wode, i maayido alleeqettida maayuwaa appe qaari ekkidosona; <sup>24</sup> a efidi haatti banna mela ollan yeggidosona.

<sup>25</sup> Eti bantta qumaa maanau uttidaashin, Isimaa7eela asati Gibxxe baanau Gala7aadeppe yiyaageeta xoqqu giidi be7idosona; eti bantta gaameelan sawuwaa, balasaane giyo xaliyaanne karbbiyaa caani wottidosona.

<sup>26</sup> Yihudai ba ishantta, “Nuuni nu ishaa woridi a suutta qosiyaabaa gidikko nuna ai go77ii? <sup>27</sup> Haayite; a Isimaa7eelatuyyo baizzoos; a bolli nu kushiya wottokko; aissi giikko, i nu ishaa, nu ashuwaa” yaagiis. Yaagin a ishantti maayidosona. <sup>28</sup> Hega gishshau Midiyaama biittaa zal77anchchati hegara aadhdhishin, a ishantti Yooseefa ollaappe kessidi, Isimaa7eela asatuyyo laatamu xaqara biran baizzidosona. Baizzin eti Yooseefa Gibxxe biittaa efidosona.

<sup>29</sup> Roobeeli ollaakko simmidi, Yooseefi yan bannaagaa be7ido wode, azzanidi ba maayuwaa pooshhiis. <sup>30</sup> I guyye ba ishanttukko biidi, “Na7ai yan baawa; ha77i taani au booshsha!” yaagiis.

<sup>31</sup> Hegaappe guyyiyan eti Yooseefa maayuwaa ekkidi, deeshsha orggiyaa shukkidi, he suuttan naaqqidosona. <sup>32</sup> Alleeqettida a maayuwaa bantta aawaakko efidi a, “Nuuni heгаа demmida; hagee ne na7aa maayuwaakkonne ane xeella” yaagidosona.

<sup>33</sup> Yaagin maayuwaa i eridi, “Hagee ta na7aa maayuwaa! Iita do7i a mirggiis. Yooseefi tumakka zaazettiichchiis” yaagiis.

<sup>34</sup> Yaagidi Yaaqoobi azzanidi, ba maayuwaa peeriis; ba xeessan waaruwaa gixxidi, ba na7aayyo daro gallassaa yeekkiis. <sup>35</sup> A attuma naatinne macca naati ubbai a minttettanau yiidosona; shin i minnennan ixxiis; ixxidi, “CHii, taani yeekkaidda ta na7aakko baada, duufuwan gelana” yaagidi, a aawai ayyo yeekkiis.

<sup>36</sup> He wode Midiyaama biittaa asati Yooseefa Gibxxe kawuwaa oosanchchaa PHoxi-ifaarayyo Gibxxen baizzidosona; i naagiyaageetu halaqa.

## 38

<sup>1</sup> He wode Yihudai ba ishanttuppe shaahettidi, Adulaama giyo kataman de7iya Hiira giyo bitaniyaara de7anau biis. <sup>2</sup> Yan Yihudai SHuu7a giyo Kanaaniyaa na7eera gaittiis; i o ekkidi machchiis. <sup>3</sup> A ayyo abbe ixettada attuma na7aa yelaasu; yelada a Eera sunttaasu. <sup>4</sup> Qassikka abbe ixettada attuma na7aa yelaasu; yelada a Oonaana sunttaasu. <sup>5</sup> Qassi gujjadakka attuma na7aa yelaasu; yelada a SHeela sunttaasu. A yelidoi Akiziiba giyo biittaana.

<sup>6</sup> Yihudai ba baira na7aa Eerayyo Ti7imaaro giyo machchiyo immiis. <sup>7</sup> Yihudaa baira na7ai, Eeri, GODAA sinttan iita asa gidiyoo gishshau, GODAI a woriis.

<sup>8</sup> Yihudai Oonaana, “Ne ishaa machcheekko gelada, o aissa; ne ishaayyo na7a yelada a xeesissa” yaagiis. <sup>9</sup> SHin Oonaani yelettiya naati baageeta gidennaagaa eriiis; heгаа gishshau ba ishaa machcheera zin77iyoo wode audenne, ba ishaayyo na7i yelettenna mala, ba zereettaa biittan gussees. <sup>10</sup> I oottidobai GODAA sinttan iitabaa gidido gishshau, GODAI akka woriis.

<sup>11</sup> Hegaappe guyyiyan, Yihudai ba na7aa machchiyo Ti7imaaro, “Ta na7ai SHeeli diccana gakkanaassi ne aawaa soo baada, am77etettan de7ashsha” yaagiis. Hega i aibissi giidee giikko, ikka ba ishanttudan haiqqanaakkonne giidi hirggido gishshaassa. Hega gishshau Ti7imaara baada ba aawaa son de7aasu.

<sup>12</sup> Daro wodiyaappe guyyiyan Yihudaa keettaayyiyaa, SHuu7a na7iyaa haiqqaasu. Yihudai ba kayyuwaappe minettido wode, ba dorssaa ikisiyaa meediya asatukko Timina kiyiis; qassi a laggee, Adulaamiyaa Hiiri aara biis.

<sup>13</sup> Asai Ti7imaaro, “Be7a; ne bolloi Yihudai, ba dorssatu ikisiyaa meedanau Timina kiyees” yaagidi yootiis. <sup>14</sup> A ba am77etettaa maayuwaa qaaraasu; bana balettanau shaashiyaa ekkada gullettaasu. Gullettada Timina efiya ogiyaa doonan de7iya Enaima katamaa penggen uttaasu. Hega a oottidoogee, SHeeli dicci gakkinkka a ayyo machcho gidanau imettabeennaagaa erido gishshaassa.

<sup>15</sup> Yihudai o be7ido wode, shaaramuxa giidi qoppiis; aissi giikko, a ba som77uwaa gulletta uttaasu. <sup>16</sup> Ba na7aa machchiyo gidiyooogaa erennan de7iiddi, ogiyaa gaxaa ikko shiiqidi o, “Tanaara zin77arkki!” yaagiis.

Yaagin a, “Taani nenaara zin77ikko, neeni taayyo ai immuutee?” yaagada oichchaasu.

<sup>17</sup> Oichchin i, “Taani ta wudiyaappe issi deeshsha maraa neeyyo yeddana” yaagiis.

Yaagin a, “Neni heгаа taayyo yeddana gakkanaassi ai oittuutee?” yaagaasu.

<sup>18</sup> Yaagin i, “Ai oitto?” yaagiis.

Yaagin a, “Ne maatafa wottiyo migiduwaa, a aattiyo baqettaanne ne kushiyan de7iya gatimaa oitta” yaagaasu. Yaagin i hegeeta immidi, iira zin77in, a ayyo shahaaraasu. <sup>19</sup> A heгааappe denddada biidoogaappe guyyiyan, ba gullettaa shaashiyaa qaarada, ba am77etettaa maayuwaa maayaasu.

<sup>20</sup> Yihudai ba oittidobaa he mishireeppe zaari ekkanau deeshsha maraa ba laggiyaa Adulaama bolli iyyo kiittiis; shin i o demmibeenna. <sup>21</sup> I he biittaa asaa, “Enaima kataman, ogiyaa doonan uttida shaaramuxa maccaasiyaa awanee?” yaagidi oichchiis.

Oichchin asai, “SHAaramuxa maccaasi hagan mulekka baawa” yaagiis.

<sup>22</sup> Yaagin i Yihudaakko simmidi a, “Taani o demmabeikke; heгаа bollikka he biittaa asai, ‘SHAaramuxa maccaasi hagan mulekka baawa’ yaagiis” yaagiis.

<sup>23</sup> Yaagin Yihudai, “Ba oiqqidoogaa bau ekku; hegee xayikko, asi nuna miiccana. Simmi taani iyyo deeshsha maraa yeddaas; shin neeni o demmabaakka” yaagiis.

<sup>24</sup> Heezzu agina keenaappe guyyiyan asai, “Ne na7aa maccaasiyaa Ti7imaara shaaramuxada shahaaraasu” yaagidi Yihudaayyo yootiis.

Yootin Yihudai, “O kare kessidi taman xuuggite” yaagiis.



<sup>25</sup> O kare kessiyo wode, “Taani shahaaridoogee ha miishshatu godaassa; be7a; ha maatafaa wottiyo migidoi, a aattiyo baqettainne gatimai obaakko erana danddayikko era” yaagada ba bolluwaassi kiitaa kiittaasu.

<sup>26</sup> Yihudai he miishshata eridi, “Taappe a xillo; aissi giikko, taani o ta na7aa SHEelayyo immabeikke” yaagiis. Hegaappe guyyiyan, i iira haranttuwaa zin77ibeenna.

<sup>27</sup> A yelana haniyo wode, i uluwan mentte attuma naati de7oosona. <sup>28</sup> A maarettishin, etappe issoi ba kushiya kessiis; kessin maaretissiyaara, “Be7ite; hagee koiro kiyees” gaanau zo7o qunccuutiya ekkada a kushiyan qachchaasu. <sup>29</sup> SHin i ba kushiya guyye ekkido wode, a ishai kiyiis; kiyin a, “Neeni waana porxxu gaada kiyadii!” yaagaasu. Hega gishshau, Paareesa<sup>49</sup> gaada a sunttaasu. <sup>30</sup> Hegaappe guyyiyan, a kushiyan zo7o qunccuutee de7iyo a ishai kiyiis; a sunttai Zaraaha<sup>50</sup> geetettiis.

## 39

### *Yoosefanne PHoxiifaara Keettaayyiyo*

<sup>1</sup> Isimaa7eela asati Yooseefa Gibxxe efi wottidosona. Efin Gibxxiyaa PHoxiifaari, kawuwaa oosanchchatuppe issoi, naagiyaageetu halaqai Yooseefa Isimaa7eelatuppe shammiis.

<sup>2</sup> GODAI Yooseefaara de7ees; hega gishshau, i oottiyoobaa ubbaa ayyo injjeyiis; yaatin ba godaa, Gibxxiyaa son de7iis. <sup>3</sup> GODAI aara de7iyoogaanne GODAI i oottidobaa ubbaa ayyo injjeyiyoogaa PHoxiifaari be7ido wode, <sup>4</sup> Yooseefi a sinttan nashettiis; i ayyo kiitettiis. PHoxiifaari a ba keettaa asaa bolli sunttiis; bau de7iyaabaa ubbaa a kushiyan wottiis. <sup>5</sup> PHoxiifaari ba keettan de7iyaabaa ubbaa bollinne ba aquwaa ubbaa bolli sunttido wodiyaappe doommidi, GODAI Gibxxe bitaniyaa keettaa Yooseefa gishshau anjjiis. GODAA anjioi PHoxiifaarayyo sooninne gaden de7ida ubbabaa bolli wodhdhiis. <sup>6</sup> Hega gishshau baayyo de7iya ubbabaa Yooseefau sheedhdhiis; i ba miyo qumaappe attin, ainne qoppenna.

Yooseefi yallisanne puulanchcha asa. <sup>7</sup> Amarida wodiyaappe guyyiyan, a godaa keettaayyiya Yooseefa xeella be7ada, “Haaya; tanaara zin77a” yaagaasu.

<sup>8</sup> SHin i ixxiis. Ba godaa keettaayyiyo, “Be7a; ta godai tau sheedhdhidi ba son de7iyaabau aibaunne hirgenna; baayyo de7iyaabaa ubbaa ta kushiyan wottiis. <sup>9</sup> Ha son taappe gitatiyai ooninne baawa. Neeni a keettaayyiyo gidiyo gishshau ne xalaalappe attin, ta godai taayyo immibeennabi baawa. Yaatin taani waatada hгаа mala daro iitabaa hanada Xoossaa bolli nagaraa oottoo?” yaagiis. <sup>10</sup> A ha yohuwaa hachchi hachchi Yooseefau yootikkonne, i iira zin77ennan woikko i matan uttendan ixxiis.

<sup>11</sup> Issi gallassi i ba oosuwaa oottanau soo geliis; geliyo wode, so ashkkaratuppe ooninne son baawa. <sup>12</sup> A Yooseefa afalaa oiqqada, “Tanaara zin77a” yaagaasu. SHin i ba afalaa i kushiyan yeggidi, sooppe kare woxxidi kiyiis.

<sup>13</sup> Yooseefi ba afalaa i kushiyan yeggidi, sooppe kare woxxiichchidoogaa a be7ido wode, <sup>14</sup> ba so ashkkarata xeesada eta, “Be7ite; ta keettaawai ehiido ha Ibraawe bitanee tana kaushshirggidi ashshiis; i tanaara zin77anau hгаа geliis; shin taani ta qaalaa xoqqissada waassaas. <sup>15</sup> Taani waassin siyido wode, i ba afalaa ta matan yeggidi, sooppe kare woxxidi kiyiis” yaagaasu.

<sup>16</sup> A godai soo yaana gakkanaassi a Yooseefa afalaa ba matan wottaasu. <sup>17</sup> Hegaappe guyyiyan, a ayyo hagaadan yaagada odaasu; “Hegee neeni nuuyyo ehiido Ibraawe aillee tanaara zin77anau taakko geliis; <sup>18</sup> shin taani ta qaalaa xoqqissada waassidoogee, ba afalaa ta matan yeggidi, sooppe kare woxxiis” yaagaasu.

<sup>49</sup> 38:29 Paareesa: Ha suntaa birshshettai “Porxxu giis” giyoogaa. <sup>50</sup> 38:30 Zaraaha: Ha suntaa birshshettai “Zo7o” giyoogaa.

<sup>19</sup> A godai ba keettaayyiyaa, “Ne aillee tana hagaadan oottiis” yaagada yootido qaalaa siyidi, hanqquwaa suulliis. <sup>20</sup> Yooseefa godai a efidi, kawuwaa qashuwaasai de7iyo qasho keettan yeggiis.

<sup>21</sup> SHin Yooseefi yan qasho keettan de7iyo wode, GODAI aara de7ees. I ayyo qarettiis; qasho keettaa halaqaa sinttan ayyo nashuwaa immiis. <sup>22</sup> Yaanin qasho keettaa halaqai qashuwaasaa ubbaa Yooseefa kushiyan wottiis; hegan oosettiyaabaa ubbaa oottiyaagee a. <sup>23</sup> Qasho keettaa halaqai Yooseefa kushiyan de7iyaabau aibaunne hirgenna; aissi giikko, GODAI aara de7ees; i oottiyoobaakka ubbaa ayyo injjeiyis.

## 40

### *Yooseefi Qashuwaasatu Aimuwaa Birshshiis*

<sup>1</sup> Amarida wodiyaappe guyyian, Gibxxe kawuwaa eessaa tigiyaageenne oittaa uukkiyaagee bantta godaa Gibxxe kawuwaa naaqqidosona. <sup>2</sup> Kawoi eessaa tigiyaageetu halaqaayyoonne oittaa uukkiyaageetu halaqaayyo naa77aayyookka keehi hanqqettiis. <sup>3</sup> Hanqqettidi Yooseefi qashettido qasho keettan, naagiyaageetu halaqaa son eta wottiis. <sup>4</sup> Naagiyaageetu halaqai eta Yooseefau sheedhdhiis; i etau oottes. Eti qasho keettan amarida wodiya uttidosa.

<sup>5</sup> Gibxxe kawuwaayyo eessaa tigiyaageenne oittaa uukkiyaagee, qasho keettan de7iya naa77aikka, issi qammi dumma dumma aimuwaa aimottidosona. Qassi aimotuyyo huuphiyan huuphiyan eta birshshettai de7ees. <sup>6</sup> Yooseefi maallado etakko gelido wode, azzani uttidaageeta be7iis. <sup>7</sup> Hegaa gishshau ba godaa son banaara qasho keettan de7iya kawuwaa oosanchchata, “Hachchi intte som77oi aibissi xumidee?” yaagidi oichchiis.

<sup>8</sup> Oichchin eti a, “Nuuni naa77ai aimo aimottida; shin nuuyyo birshshiyaabi xayiiis” yaagidosona.

Yaagin Yooseefi eta, “Aimo birshshettai Xoossaabaa gidenneeyye? Intte aimuwaa taayyo yootite” yaagiis.

<sup>9</sup> Yaagin eessaa tigiyaageetu halaqai ba aimuwaa Yooseefayyo hagaadan yaagidi yootiis; “Taani ta aimuwan issi woiniyaa turaa ta sinttan be7aas. <sup>10</sup> Qassi he woiniyaa turaayyo heezzu tashee de7ees. I maraa yelidi, ciishshaa ciyyidi, wurccuwaa wurcciiis; wurccoinne teeriis. <sup>11</sup> Kawuwaa wanccai ta kushiyan de7ees; taani woiniyaa teeraa ekkada, kawuwaa wanccan gum77ada, he wanccaa a kushiyan wottaas” yaagiis.

<sup>12</sup> Yaagin Yooseefi, “Hegaa birshshettai haggaa; heezzu tasheti heezzu gallassata. <sup>13</sup> Heezzu gallassatu gidдон kawoi nena denttana; denttidi i nena kase ne sunttatettau zaarana; kase neeni eessaa tigiyo wode oottidoogaadan, neeni kawuwaa wanccaa a kushiyan wottana. <sup>14</sup> SHin neeyyo sa7ai kehido wode tana dogoppa; taayyo keha; tabaa kawuwaayyo yootada, ha qasho keettaappe tana kesissa; <sup>15</sup> aissi giikko, tana Ibraawetu biittaappe gubaayidi ehiidosona; harai atto hagankka tana qashissiyaabaa ainne oottabeikke” yaagiis.

<sup>16</sup> Oittaa uukkiyaageetu halaqai Yooseefi aimuwaa loitti birshshidoogaa be7ido wode Yooseefa, “Taanikka aimo aimottaas; ta huuphiyan heezzu samppa oittai de7ees; <sup>17</sup> bolla bagga samppan Gibxxe kawuwaayyo uukettida ubba qommo oittai de7ees. SHin kafoi heгаа ta huuphiyan de7iya samppaappe mees” yaagiis.

<sup>18</sup> Yaagin Yooseefi, “Hegaa birshshettai haggaa; heezzu samppati heezzu gallassata. <sup>19</sup> Heezzu gallassatu gidдон kawoi nena denttana; denttidi ne qooriyaa muucissidi mittan kaqissana; ne ashuwaanne kafoi maana” yaagiis.

<sup>20</sup> Heezzantta gallasan Gibxxe kawoi ba yelettido gallassi ba oosanchchatu ubbaayyo gibiraa giigissiiis. Eessaa tigiyaageetu halaqaanne oittaa uukkiyaageetu halaqaa denttidi, ba oosanchchatu gidduwan essiis. <sup>21</sup> Eessaa tigiyaageetu halaqaa a sunttatettau zaarin, i kawuwaa kushiyan wanccaa wottiis. <sup>22</sup> SHin kawoi oittaa uukkiyaageetu

halaqaa eta aimuwaa birshshettaa Yooseefi yootidoogaadankka kaqissiis. <sup>23</sup> SHin eessaa tigiyaageetu halaqai Yooseefa hassayibeenna; dogi aggiis.

## 41

### *Yooseefi Gibxxe Kawuwaa Aimuwaa Birshshiis*

<sup>1</sup> Naa77u laitta kumettai aadhdhido wode, Gibxxe kawoi aimo aimottiis; aimuwan i Naile SHAafaa doonan eqqiis; <sup>2</sup> eqqidaashin laappun orddenne modhdho miizzati Naile SHAafaappe kiyi wodhdhidi, shombboquwaa gidдон miishin be7iis. <sup>3</sup> Etappe simmin, hara laappun meraa iitanne gilqqa miizzati Naile SHAafaappe kiyidosona; kiyidi shaafaa doonan de7iya hara miizzatu matan eqqidosa. <sup>4</sup> He meraa iitanne gilqqa miizzati laappun orddenne modhdho miizzata miidosona. Hegaappe guyyiyan kawoi beegottiis.

<sup>5</sup> I zaaretti xiskkidi, naa77antto aimuwaakka aimottiis; laappun lo77onne muruta tiyati issi anuwan diccidosona. <sup>6</sup> Etappe simmin, shoggettidanne arshsho bagga carkkuwan shullida hara laappun tiyati kiyidosona. <sup>7</sup> He shoggettida tiyati lo77onne muruta tiyata mittidosona. Hegaappe guyyiyan kawoi beegottidi, aimo gidyoogaa eriis. <sup>8</sup> Sa7ai wonttin, a wozanai shabbirettiis; heгаа gishshau Gibxxen de7iya bitanchchatu ubbaunne aadhdhida eranchchatu ubbau kiittidi xeesiis; kawoi etayyo ba aimuwaa yootiis; shin ayyo he aimuwaa birshshiyaabi xayiiis.

<sup>9</sup> Eessaa tigiyaageetu halaqai he wode Gibxxe kawuwaa hagaadan yaagiis; “Taani ta mooruwaa hachchi hassayais. <sup>10</sup> Issitoo kawoi ba ashkkaratuyyo hanqqettidi, tananne oittaa uukkiyaageetu halaqaa qasho keettan yeggiis. <sup>11</sup> Yan de7iiddi nuuni huuphiyan huuphiyan aimo aimottida; aimuwaayyo dumma dumma birshshetta de7ees. <sup>12</sup> He wode naagiyaageetu halaqaa ashkkarai, Ibraawe wodallai nunaara qasho keettan de7ees. Nuuni nu aimuwaa ayyo yootida; yootin i nuuyyo huuphiyan huuphiyan aimuwaa birshshiis. <sup>13</sup> Yaanin he yohoti i nuuyyo birshshidoogaadankka hanidosona. Hegee aibee giikko, taani ta sunttatettau simmaas; hinkko bitanee kaqettiis” yaagiis.

<sup>14</sup> Yaagin Gibxxe kawoi Yooseefayyo kiittidi xeesiis. Eti a qasho keettaappe eesuwan ehiidosona. I meedettidi ba maayuwa laammidi, kawuwaakko geliis. <sup>15</sup> Gelin kawoi Yooseefa, “Taani aimo aimottaas; shin a issoinne birshshanau danddayibeenna. SHin taani, ‘Yooseefi aimo siyikko, birshshanau danddayees’ giyoogaa siyaas” yaagiis.

<sup>16</sup> Yaagin Yooseefi, “Taani heгаа danddayikke; shin Xoossai kawuwaayyo likke birshshettaa immana” yaagiis.

<sup>17</sup> Yaagin kawoi, “Taani ta aimuwan Naile SHAafaa doonan eqqidaashin, <sup>18</sup> laappun orddenne modhdho miizzati Naile SHAafaappe kiyidi, shombboquwaa gidдон moosona. <sup>19</sup> Etappe simmin, hara laappun meraa iita, gilqqanne laafa miizzati kiyidosona; taani heгаа mala meraa iita miizza Gibxxe biittan mulekka be7a erikke. <sup>20</sup> Meraa iitanne laafa miizzati kiroogeeta, laappun modhdho miizzata miidosona. <sup>21</sup> SHin eta miidoogaappe guyyiyanikka, eti miidobaa ooninne eranau danddayibeenna; aissi giikko, eta merai kasegaadankka iiti uttiis. Hegaappe guyyiyan taani beegottaas.

<sup>22</sup> “Taani ta aimuwan qassi laappun lo77onne muruta tiyata issi anuwan diccidaageeta be7aas. <sup>23</sup> Etappe simmin, shoggettidanne arshsho bagga carkkuwan shullida hara laappun tiyati kiyidosona. <sup>24</sup> He shoggettida tiyati laappun lo77o tiyata mittidosona. Taani ha aimuwaa bitanchchatuyyo yootaas; shin taayyo aimuwaa birshshiyaabi beettibeenna” yaagiis.

<sup>25</sup> Hegaappe guyyiyan Yooseefi Gibxxe kawuwaa, “Kawuwaa aimoti issuwaa. Xoossai ba oottana haniyoobaa kawuwaayyo qonccissiis. <sup>26</sup> He laappun lo77o miizzati laappun laittata; qassi laappun lo77o tiyati laappun laittata; ha aimoi issuwaa. <sup>27</sup> He laappun meraa iitanne laafa miizzati laappun laittata; qassi arshsho bagga carkkuwan shullida, pattenna laappun tiyati laappun kosha laittata.

<sup>28</sup> “Taani kawuwaayyo yootidoogaadankka, Xoossai ba oottana haniyoobaa kawuwaa beessiis. <sup>29</sup> Laappun daro kalo laittati Gibxxe biittau ubbau yaana; <sup>30</sup> shin laappun kosha laittai heгаа kaallana. He wode Gibxxe kaloi ubbai dogettana; koshai biittaa xiixxana. <sup>31</sup> He biittaa kaloi hassayettennan attana; aissi giikko, heгаа kaallida koshai keehi suullana. <sup>32</sup> Naa77u ogiyan kawuwaayyo he aimoi beettidoi aibissee giikko, ha yohuwaa Xoossai minttidi kuuyido gishshassa; Xoossai heгаа eesuwan oottana.

<sup>33</sup> “Ha77i simmi, kawoi aadhdhida eranne cincca asa koyidi, Gibxxe biittan suntto. <sup>34</sup> Kawoi biittan sunttata laappun kalo laittan qoxxiyo kattaappe ichchashu kushiyaappe issuwaa shiishshanau suntto. <sup>35</sup> Eti yiya kalo laittatun kattaa shiishshidi, kawuwaa aawatettan minjjona; he kattaa katamatun naagona. <sup>36</sup> Biittai koshan xayenna mala, ha kattai Gibxxe biittan laappun laittan denddana koshaayyo minjettidi de7o” yaagiis.

### *Kawoi Yooseefa Gibxxe Biittaa Ubbaa Bollan Sunttiis*

<sup>37</sup> Yaagin ha yohoi Gibxxe kawuwaayyoonne a oosanchchatuyyo lo77o gididi beettiis. <sup>38</sup> Hega gishshau kawoi eta, “Nuuni Xoossaa Ayyaanaara de7iya heгаа mala hara asa demmaneeyye?” yaagidi oichchiis.

<sup>39</sup> Hegaappe guyyiyan kawoi Yooseefa, “Xoossai heгаа ubbaa nena erissido gishshau, ne mala aadhdhida erinne cincci ooninne baawa. <sup>40</sup> Taani nena ta keettan sunttais; ta asai ubbai neeyyo azazettana; taani neeppe aadhdhanai ta kawotaa araataa xalaalaana gidana” yaagiis.

<sup>41</sup> Hega gishshau kawoi Yooseefa, “Be7a; taani nena Gibxxe biittaa ubbaa bollan sunttaas” yaagiis. <sup>42</sup> Hegaappe guyyiyan, kawoi ba paramiyo migiduwaa ba biradhdhiyaappe kessidi, Yooseefa biradhdhiyan wottiis. Liinuwaappe dadettida maayuwaa i a maizzidi, a qooriyankka worqqa sanssalataa aattiis. <sup>43</sup> Kawoi ba naa77antto paraa gaariyaa Yooseefa togissii; ashkkarati, “Ziggite! Ziggite!” yaagiiddi appe sinttaara hemettidosona. Hagaadan oottidi, kawoi a Gibxxe biittaa ubbaa bollan sunttiis.

<sup>44</sup> Hegaappe guyyiyan kawoi Yooseefa, “Taani kawuwaa; shin neeni dentto geennan Gibxxe biitta ubban ooninne kushe woi toho denttenna” yaagiis. <sup>45</sup> Kawoi Yooseefa, “Xaafinaati-Pa7inaaha” giidi sunttiis; i ayyo Ooni giyo katamaa qeesiyaa PHoxiifeera na7iyo Asinaato machcho immiis. Yaanin Yooseefi Gibxxe biittaa ubbasaara kanttiis.

<sup>46</sup> Yooseefi Gibxxe kawuwaayyo oottanau doommiyo wode, ayyo laittai hasttama. Qassi Yooseefi kawuwaa sinttappe kiyidi, Gibxxe biittaa ubbaa gidduwaa hemettiis. <sup>47</sup> He laappun kalo laittatun biittai daro kattaa mokkiis. <sup>48</sup> Yooseefi Gibxxe biittan he laappun kalo laitta kattaa ubbaa shiishshidi, katamatun minjjiis. Issi issi katamaa yuushuwan de7iya goshshaa kattaa ubbaa he katamatun minjjiis. <sup>49</sup> Yooseefi abbaa shafiyaa keena daro kattaa minjjiis; kattai darin, makkanau danddayibeenna gishshau, makki makki qoliyoogaa aggi bayiis.

<sup>50</sup> Kosha laittai yaanaappe kase, Oona katamaa qeesiyaa PHoxiifeera na7ee Asinaatippe Yooseefi naa77u attuma naata yeliis. <sup>51</sup> Yooseefi ba baira na7aa Minaasa sunttiis; aissi giikko i, “Xoossai tana ta metuwaa ubbaanne ta aawaa so asaa ubbaa dogissiiis” yaagiis. <sup>52</sup> Naa77antto na7aa Efireema sunttiis; aissi giikko, i, “Xoossai taayyo ta tuggatido biittan tana aifissiiis” yaagiis.

<sup>53</sup> Gibxxe biittan de7iya he laappun kalo laittati wuridosona. <sup>54</sup> Qassi Yooseefi yootidoogaadan laappun kosha laittati doommidosona. Hara biittan ubban koshai denddiis; shin Gibxxe biitta ubban kattai de7ees. <sup>55</sup> Gibxxe biittai ubbai koshatido wode, asai kattau kawuwaayyo waassiiis. Waassin kawoi Gibxxe asaa ubbaa, “Yooseefakko biite; biidi i yootiyooobaa oottite” yaagiis.

<sup>56</sup> Koshai Gibxxe biittaa ubbaa gakkido wode, Yooseefi kattaa minjjido keettata ubbaa dooyidi, kattaa Gibxxe asau baizziis; aissi giikko, Gibxxen koshai suulliis. <sup>57</sup> Sa7a ubban



koshai suullido gishshau, sa7an de7iya asai ubbai kattaa Yooseefappe woommanau Gibxxe yiis.

## 42

### *Yooseefa Ishantti Gibxxe Biidosona*

<sup>1</sup> Yaaqoobi Gibxxen kattai de7iyooгаа siyido wode, ba attuma naata, “Intte issoi issuwaa aissi xeelleetii? <sup>2</sup> Be7ite! Gibxxen kattai de7iyooгаа taani siyaas; yaa duge biidi, nuuni haiqqennan paxa de7ana mala, yaappe amaridabaa nuuyyo woommite” yaagiis. <sup>3</sup> Yaagin Yooseefa ishantti tammati kattaa woommanau duge Gibxxe biidosona. <sup>4</sup> SHin Yaaqoobi Yooseefa ishaa Biniyaama a ishanttuura yeddibeenna; aissi giikko, i qohettanaakkonne giidi qoppiis. <sup>5</sup> Kanaane biittan wolqqaama koshai de7iyo gishshau, kattaa woommanau yiidaageetuura Israa7eela attuma naati Gibxxe gelidosona.

<sup>6</sup> He wode Yooseefi he biittaa aissiyaagaanne biittan de7iya asau ubbau kattaa baizziyaagaa; hegaa gishshau Yooseefa ishantti gakkido wode, bantta som77uwaa sa7aa gattidi ayyo ziggidosona. <sup>7</sup> Yooseefi ba ishantta be7osaara eri bayiis; shin i eta erennabaadan harshshuushiis; i eta, “Intte awappe yiidetii?” yaagidi oichchiis.

Oichchin eti, “Katta woommanau, Kanaane biittaappe yiida” yaagidosona.

<sup>8</sup> Yooseefi ba ishantta eriiis; shin eti a eribookkona. <sup>9</sup> Hegaappe guyyiyan, Yooseefi etabaa aimottido ba aimuwaa hassayidi eta, “Intte wochchi xeelliya asa; intte nu biittan naagoi leppiyo baggai augaakko be7anau yiideta” yaagiis.

<sup>10</sup> Yaagin eti, “CHii, nu godau, nuuni wochchi xeelliya asa gidokko; nuuni ne ashkkarati kattaa woommanau yiida. <sup>11</sup> Nuuni ubbaikka issi aawaa naata. Nuuni ne ashkkarati ammanettiya asa” yaagidosona.

<sup>12</sup> Yaagin Yooseefi eta, “CHii; intte nu biittan naagoi leppiyo baggai augaakko be7anau yiideta” yaagiis.

<sup>13</sup> SHin eti, “Nuuni ne ashkkarati tammanne naa77u ishanttanne Kanaane biittan de7iya issi bitaniyaa naata. Wurssetta kaaloi ha77i nu aawaara de7ees; issoi xayiiis” yaagidosona.

<sup>14</sup> Yooseefi eta, “Taani intteyyo yootidoogaadankka intte biittaa wochchiyaageeta. <sup>15</sup> Qassi intte paacettanaagee hagaana; tumuppe kawoi haiqqo; intte wurssetta kaalo ishai haggaa yaana xayikko, intte ha sohuwaappe beekketa. <sup>16</sup> Intte yootiyoogee tuma gidiyooгаа paaccanau, intteppe issuwaa kiittite; i intte ishaa ekkidi yo; attidaageeti qasho keettan qashettishsheeta. Hegaa gidana xayikko, kawoi haiqqo; intte biittaa wochchiyaageeta” yaagiis. <sup>17</sup> Yaagidi eta heezzu gallassau qasho keettan yeggiis.

<sup>18</sup> Heezzantta gallassan Yooseefi eta, “Taani Xoossau yayyiya asa; intte issibaa oot-tikko, paxa de7ana. <sup>19</sup> Intte tumukka ammanettiya asa gidikko, intte ishanttuppe issoi hagan qasho keettan de7o; attidaageeti namisettiya intte so asau kattaa ekkidi efiite; <sup>20</sup> shin intte qaalaa tumayana malanne intte haiqqenna mala intte intte wurssetta kaalo ishaa taakko ehaana koshshees” yaagiis. Etinne ha yohuwaa maayidosona.

<sup>21</sup> Eti issoi issuwaa, “Tumu nuuni nu ishau oottidobai nuna kaa7ees. I ba shemp-puwaayyo haniyoobai ixxin, nuussi watiwatiyo wode, nuuni siyiiddi ixxida; ha waayee nuna gakkidoogee hegaa gishshassa” yaagidosona.

<sup>22</sup> Roobeeli, “Taani inttena, ‘Na7aa bolli nagara oottoppote’ gaada yootabeikkinnaa? SHin intte siyennan ixxideta. Simmi ha77i, a suuttai nuna achchees” yaagiis. <sup>23</sup> Eti giyoobaa Yooseefi eridoogaa eti akeekibookkona; aissi giikko, i etaara wokkaaliyan haasayees. <sup>24</sup> I etappe wora simmidi yeekkiis; shin qassi etakko simmidi, etayyo gujjidi haasayiis. I Simoona etappe duutti ashshidi eti be7ishin qachchiis.

### *Yooseefa Ishantti Kanaane Biitti Simmidosona*



<sup>25</sup> Yooseefi ba ashkharata, “Kattaa eta ogoruwaa kunttite; eta biraakka zaaridi, eta ogoruwan ogoruwan wottite; qassi etau ogiyyaassi shinqqiyaa immite” yaagidi azaziis.

<sup>26</sup> Azazin i giidoogaadan oottidoogaappe guyyiyan, Yooseefa ishantti kattaa bantta haretun caanidi, dendididi biidosona.

<sup>27</sup> Eti qammaa aqanau simmidosan etappe issoi ba hariyaayyo kattaappe yegganau ba ogoruwaa birshshidi, he ogoruwaayyo doonan de7iya ba biraa be7iis. <sup>28</sup> Be7idi i ba ishantta, “Ta birai taayyo simmiis; tumu haggaa be7ite! Ta ogoruwan de7ees” yaagiis.

Eta wozanai taahin, kokkoriiddi issoi issuwaakko simmidi, “Xoossai nu bolli oottidobi hagee aibee?” yaagidosona.

<sup>29</sup> Eti Kanaane biittan de7iya bantta aawaa Yaaqoobakko yiido wode, banttana gakkidabaa ubbaa ayyo odidosona. <sup>30</sup> Eti ayyo, “He biittaayyo goda gidiya bitanee nuna harshshuushiis. Hegaappe guyyiyan, i nuna he biittaa wochchiyaabaadan godatiis.

<sup>31</sup> SHin nuuni a, ‘Nuuni ammanettiya asa; biittaa wochchiyaageeta gidokko. <sup>32</sup> Nuuni tammanne naa77u ishantti issi aawaa naata; issoi xayiiis; wurssetta kaaloi Kanaane biittan ha77i nu aawaara de7ees’ yaagida. <sup>33</sup> Yaagin he biittaayyo goda gidiya bitanee nuna, ‘Intte ammanettiya asa gidiyoogaa taani hagan erana; intte ishanttuppe issuwaa hagan ta matan yeggidi, namisettiya intte so asaayyo kattaa ekkidi biite. <sup>34</sup> Intte biittaa wochchiyaageeta gidennan, ammanettiya asa gidiyoogaa taani erana mala, intte wurssetta kaalo ishaa taakko ekki yiite. Yaatikko taani han attida intte ishaa intteyyo zaarada immana; intenne ha biittan zal77eeta’ giis” yaagidosona.

<sup>35</sup> Eti bantta ogoruwaappe kattaa qoliiddi, bantta ogoruwan ogoruwan bantta biraa qashuwaara uttidaagaa demmidosona. Etinne eta aawai he qashuwaara de7iya biraa be7idi yayyidosona. <sup>36</sup> Eta aawaa Yaaqoobi eta, “Intte tana ta naatuppe mela kessideta; Yooseefi baawa, Simooni baawa; qassi intte Biniyaama efaana koyeeta. Ubbabai taayyo tiraara sitti giis” yaagiis.

<sup>37</sup> Hegaappe guyyiyan Roobeeli ba aawaa, “Taani Biniyaama neeyyo zaarada ehaana xayikko, ta attuma naata naa77aakka wora; tana ammanettada a ta kushiyan wotta; qassi taani a zaarada ehaana” yaagiis.

<sup>38</sup> SHin Yaaqoobi eta, “Ta na7ai inttenaara yaa duge beenna; a ishai haiqqiichchin, attidaagee a xalaala; intte efishin, ogiyan iitabi a gakkiiyaabaa gidikko, intte ta puulunnta huuphiyaa azzanuwaara duufuwan yeggana” yaagiis.

## 43

### *Yooseefa Ishantti Biniyaamaara Simmidi Gibxxe Biidosona*

<sup>1</sup> Ha77inne koshai Kanaane biittan wolqqaamiis. <sup>2</sup> Yaanin eti Gibxxeppe ehiido kattaa ubbaa mi wurssirggin, eta aawai, “Qassikka guyye biidi nuuyyo amarida katta woommite” yaagiis.

<sup>3</sup> SHin Yihudai a, “He bitanee nuna, ‘Intte ishai inttenaara yaana xayikko, ta som77uwaa zaari be7ekketa’ yaagidi mintti yootiis. <sup>4</sup> Neeni nu ishaa nunaara yeddikko, nuuni duge biidi neeyyo kattaa shammana. <sup>5</sup> SHin neeni a yeddennabaa gidikko, nuuni duge bookko; aissi giikko, he bitanee nuna, ‘Intte ishai inttenaara xayikko, intte ta som77uwaa zaari be7ekketa’ giis” yaagiis.

<sup>6</sup> Yaagin Israa7eeli, “Intte, ‘Nuuyyo hara ishai de7ees’ giidi odidi ha metuwaa ta bolli aissi ehiidetii?” yaagiis.

<sup>7</sup> Yaagin eti a, “He bitanee nubaanne nu so asaabaa mintti oichchiis. I nuna, ‘Intte aawai ha77inne paxa de7ii? Intteyyo hara ishi de7ii?’ yaagidi oichchiis. Oichchin nuuni i oichchidoogaa ayyo zaarida. I nuna, ‘Intte ishaa duge haa ehiite’ gaanabaa nuuni aibin eranee?” yaagidosona.

<sup>8</sup> Yihudai ba aawaa Israa7eela, “Nuunikka neenikka nu naatikka paxa de7ana malanne haiqqennan attana mala, na7aa tanaara yedda; nuuni sohuwaara baana.

<sup>9</sup> Na7aa ta waasetettan imma; aban tana oichcha; taani a neeyyo saro zaarada ehaana xayikko, ta de7o ubban ne qanggettai tana gakko! <sup>10</sup> Nuuni gam77ibeennabaa gidiyaakko, hannode naa77anttuwaa yaa gakkidi simmana shin” yaagiis.

<sup>11</sup> Hegaappe guyyiyan eta aawai Israa7eeli eta, “Hegaa gidikko, yaatite; he bitaniyaassi kushe genttiyoobaa ha biittan mokkidabaa ubbaappe lo77iyaabaa doorite; hegeenne balasaane giyo xaliyaa, eessaa, sawuwaa, karbbiyaanne temire lauze giyo mittatu teeraa intte ogoruwan yeggidi ekki biite. <sup>12</sup> Intte ogoruwaa doonan simmida birai balettidabaa gidanau danddayiyo gishshau, biraakka naa77u kushe oottidi ekki biite. <sup>13</sup> Qassi intte ishaanne ekkidi, he bitaniyaakko eesuwaa guyye biite. <sup>14</sup> I hinkko intte ishaa yeddana mala, Biniyaaminne inttenaara yaana mala, Ubbaa Danddayiyya Xoossai he bitanee intteyyo qarettanaadan ootto. Tana gidikko, ta naatuppe mela attikkonne attas” yaagiis.

<sup>15</sup> Hegaa gishshau he asati immiyoobatanne naa77u kushe biraanne qassi Biniyaamanne ekkidosona. Eti duge Gibxxe biidi, Yooseefa sintti shiiqidosa. <sup>16</sup> Yooseefi Biniyaama etaara be7ido wode, ba keettaa halaqaa, “He asata ta soo ekkada ba; issi mehe shukkada giigissa; eti seeta gallassan laaxaa tanaara moosona” yaagidi azaziis.

<sup>17</sup> Yaatin i Yooseefi ayyo yootidoogaadan he asata Yooseefa soo efiis. <sup>18</sup> Asati Yooseefa soo biido gishshau, yayyidosona; eti, “Nuuni haggaa yiidoi koiro nu ogoruwaara simmida biida biraa gishshaassa; i nuna wadhdhanau, ailletettan haaranaanne nu haretta ekkana hanees” yaagidi qoppidosona.

<sup>19</sup> Hegaa gishshau eti Yooseefa keettaa pengge gakkidi, keettaa halaqaa haasayissidosona; <sup>20</sup> “Ta godau, nuuni koiro kattaa woommanau haggaa yiida; <sup>21</sup> simmiiddi nuuni qammaa aqiyooosan ogoruwaa birshshidi, huuphiyan huuphiyan nu birai paccennan nu ogoruwaa doonan de7iyaagaa demmida; haggaa gishshau ha77i nuuni a guyye ekkidi yiida. <sup>22</sup> Qassi nuuni kattaa woommanau hara biraakka ehiida. Nu biraa nu ogoruwaa ogoruwaa doonan ooni wottidaakkonne erokko” yaagidosona.

<sup>23</sup> Yaagin i eta, “Hegee aikkobaa; yayyoppite! Intte Xoossai, intte aawaa Xoossai, intte ogoruwaa giddon intteyyo biraa immiis; taani intte biraa akkaas” yaagiis. Hegaappe guyyiyan, i Simoona etakko kessiis.

<sup>24</sup> He bitanee he asata Yooseefa soo efidi, eta tohuwaayyo haattaa ehin, bantta tohuwaa meecettidosona. Eta haretuyyo harquuwaa yeggiis. <sup>25</sup> Yooseefi seeta gallassi yin immanau, eti bantta immiyoobaa ayyo giigissidosona; aissi giikko, eti yan maanaagaa siyi uttidosa.

<sup>26</sup> Yooseefi ba soo gelido wode, eti soo ehiido bantta immiyoobaa son ayyo immidosona; eti a sinttan sa7aa gakkidi ziggidosona. <sup>27</sup> I eta sarotettaa oichchi simmida, “Intte taayyo yootido intte aawai ceegai lo77oo? Ha77inne i paxa de7ii?” yaagiis.

<sup>28</sup> Yaagin eti, “Ee, ne ashkkarai, nu aawai ha77ikka paxa de7ees; i lo77o” yaagidi hokkidi ayyo ziggidosona.

<sup>29</sup> I ba aayee na7aa Biniyaama be7ido wode eta, “Intte yootido wurssetta kaalo intte ishahi hagee?” yaagiis. Qassi i Biniyaama, “Ta na7au, nena Xoossai anjjo” yaagiis. <sup>30</sup> Yooseefi a ishahi ayyo gomppan michchido gishshau, yeekkanau issisaa lauhu giis. I ba dumma qol77uwaa gelidi yan yeekkiis.

<sup>31</sup> I ba som77uwaa meecettiichchidoogaappe guyyiyan kiyidi, bana minttettidi, “Qumaa aattite” yaagiis.

<sup>32</sup> Eti ayyo dumma, he ishanttayyo dumma, hegan aara miya Gibxxe asatuyyo dumma aattidosona; aissi giikko, Gibxxe asati Ibraawe asatuura issippe mookkona. Hegee Gibxxe biittaa asata sheneyiyaabaa. <sup>33</sup> Eti Yooseefa sinttan bairai ba bairatettaadan, kaaloi ba kaalotettaadan maaran uttidosa. Eti issoi issuwaa xeellidi, eta waati uttissidaakko be7idi garamettidosona. <sup>34</sup> Yooseefa maaddaappe etau qumaa gishiyo

wode, Biniyaamayyo gakkidaagee haratuugaappe ichchashu kushe darees; yaatin eti ufaittiiddi aara miidosonanne uyidosona.

## 44

### *Yooseefa Bira Wanccaa*

<sup>1</sup> Yooseefi ba keettaa halaqaa, “Neeni ha asatu ogoroi ekkiyoogaa keena kattaa etayyo kuntta; eta ubbaa biraanne eta ogoruwaa ogoruwaa doonan wotta; <sup>2</sup> yaatada wurssetta kaaluwaa ogoruwaa doonan ta bira wanccaanne a kattaa biraa wotta” yaagidi azaziis; azazin i Yooseefi giidoogaadan oottiis.

<sup>3</sup> Sa7ai wonttin he asati bantta haretta ekkidi baanau moissetidosona. <sup>4</sup> Eti he kata-maappe kiyidi haakki biichchennan de7ishin, Yooseefi ba keettaa halaqaa, “Dendda! Ha asatu geeduwaa kaalla; neeni eta gakkido wode eta, ‘Intte aissi kehaa iitan zaaride-tii? <sup>5</sup> Hagee ta godai uyiyoonne qassi xuurabaa demmiyo wanccaa gidennee? Hagee intte oottidobai hanttaaraba’ yaaga” yaagiis.

<sup>6</sup> Yaagin i eta geeduwaa gakkidi, ha giidoogaadanka etayyo yootiis. <sup>7</sup> SHin eti, “Ta godai haggaa mala qaala aissi haasayii? Haggaa malabaa oottiyoogee nuuppe ne ashkkaratuppe haakko! <sup>8</sup> Nuuni harai atto nu ogoruwaa doonaappe demmido biraa addaa Kanaane biittaappe guyye neeyyo zaari ehiida. <sup>9</sup> Ne godaa keettaappe nuuni worqqa woi bira waati wuuqqiyoonii? Ne ashkkaratu gidдон he wanccai beettido uri haiqqo; qassi attida nuuni nu godaayyo aille gidana” yaagidosona.

<sup>10</sup> I eta, “Haggaa gidikko lo77o; intte giidoogaadan gido bayin; wanccaa ekkida ooninne ta aille gidana; hinkko attida intte boriyaappe saro attana” yaagiis.

<sup>11</sup> Hegaappe guyyiyan, eti eesuwaa bantta ogoruwaa ogoruwaa sa7an wottidi birshshidosona. <sup>12</sup> Birshshin he halaqai ubbaappe bairatiyaaggaa ogoruwaappe doommidi wurssetta kaaluwaaggaa gakkanaassi koyiis; he wanccaanne Biniyaama ogoro gidoppe demmiis. <sup>13</sup> Hegan eti azzanidi, bantta maayuwa pooshshidosona; bantta ogoruwaa bantta haretun caanidi, guyye katamaa simmidosona.

<sup>14</sup> Yihudai ba ishanttuura Yooseefakko geliyo wode, Yooseefi son de7ees; eti a sinttan sa7an gufannidosona. <sup>15</sup> Yooseefi eta, “Intte aiba palabaa oottidetii? Ta mala asi xuurabaa demmiyoogaa erekketiyye?” yaagiis.

<sup>16</sup> Yaagin Yihudai, “Ta godaayyo nuuni ai gaanee? Nuuni ai haasayanee? Woikko nuuni xillo gidiyooaggaa waati bessanee? Xoossai ne ailletu mooruwaa qonccissirggiis. Simmi nuunikka he wanccai appe beettidoogeeekka ta godaayyo aille gidida” yaagiis.

<sup>17</sup> SHin Yooseefi, “Haggaa malabaa oottiyoogee taappe haakko; ta wanccai appe beettido bitaniyaa xalaalai ta aille gidana. Hinkko intte intte aawaakko guyye saro simmite” yaagiis.

<sup>18</sup> Yaagin Yihudai akko shiiqidi a, “Ta godau, taani issi qaala haasayana mala nena woossais; tana ne ailliyaa hanqqettoppa; aissi giikko, neeni kawuwaa mala. <sup>19</sup> Neeni ta godai nuna ne ailleta, ‘Intteyyo aawi de7iyye woikko ishi de7ii?’ yaagada oichchadasa. <sup>20</sup> Nuuninne, ‘Nuuyyo ceeggida aawai de7ees; i ceeggiichchidi yelido kaalo na7aikka de7ees; he na7aa ishai haiqqiis; ba aayeeyyo issi a xalaalai attiis; a aawai a siiqees’ yaagida.

<sup>21</sup> “Neeni ne ailleta, ‘Taani a be7ana mala taayyo ehiite’ yaagadasa. <sup>22</sup> Yaagin nuuni ta godaa, ‘He na7ai ba aawaappe shaahettanau danddayenna; shaahettikko a aawai haiqqana’ yaagida. <sup>23</sup> SHin neeni ne ailleta, ‘Intte kaalo ishai inttenaara duge yaana xayikko, naa77antto ta som77uwaa be7ekketa’ yaagadasa. <sup>24</sup> Nuuni ne ailliyaa nu aawaakko simmidi biido wode, ta godai giidoogaa ayyo yootida.

<sup>25</sup> “Yootin nu aawai, ‘Guyye biidi amarida katta woommite’ yaagin, <sup>26</sup> nuuni a, ‘Nuuni nu kaalo ishai nunaara biikkoppe attin, duge baanau danddayokko; aissi giikko, nu

ishai kaaloi nunaara beennabaa gidikko, nuuni he bitaniyaa som77uwaa be7anau danddayokko' yaagida.

<sup>27</sup> “Yaagin nu aawai ne aillee nuna, ‘Ta keettaaayyiyaa Raaheela taayyo naa77u attuma naata yelidoogaa intte ereeta; <sup>28</sup> etappe issoi taappe shaahettidi bin, ‘Tumu a do7i zaazzidi miis’ yaagaas; hachchi gakkanaassikka taani a be7abeikke. <sup>29</sup> Hagaa qassi intte taappe shaakki efin, iitabi a gakkikko, intte ta puulunta huuphiyaa azzanuwaara duufuwan yeggana’ yaagiis.

<sup>30-31</sup> “Hegaa gishshau, ha77i taani guyye ne ailliyaa ta aawaakko biyo wode, ta aawai, na7aa ba shemppuwaadan siiqiyaagee, na7ai nunaara bainnaagaa be7ikko haiqqi aggana. Nuuni ne ailleti nu aawaa puulunta huuphiyaa azzanuwaara duufuwan yeggoos. <sup>32</sup> Taani ne aillee na7aa ta waasetettan ekkaas; taani a, ‘Ta aawau, taani a neeyyo saro zaarada ehaana xayikko, ta de7uwaa ubban ne qanggettai tana gakko!’ yaaga wottaas.

<sup>33</sup> “Yaanido gishshau, taani ne aillee ta godaayyo na7aa gishshaa ailletada, hagan attin, na7ai ba ishanttuura guyye simmo. <sup>34</sup> Na7ai bannan taani waanada guyye ta aawaakko simmanee? CHii, tana ta aawai seelettana seelaa bessoppa” yaagiis.

## 45

### *Yoosefi Bana Ba Ishanttuuyo Erissiis*

<sup>1</sup> He wode Yooseefi he asaa ubbaa sinttan genccana danddayibeenna; “Asa ubbaa ta sinttappe kessite” yaagidi waassiis. Hegaa gishshau Yooseefi bana ba ishanttuuyo erissido wode, aara ooninne baawa. <sup>2</sup> I ba qaalaa xoqqissidi, Gibxxeti a siyana gakkanaassi keehi yeekkiis. Kawuwaa so asai he woriyaa siyiis.

<sup>3</sup> Yooseefi ba ishantta, “Taani Yooseefattennee! Ta aawai hanno gakkanaassi paxa de7iyye?” yaagidi oichchiis. SHin a ishantti keehi dagammido gishshau, ayyo zaarana danddayibookkona.

<sup>4</sup> Yaanin Yooseefi ba ishantta, “Taakko haa shiiqite” yaagiis. Yaagin eti akko shiiqidosona; shiiqin i eta, “Taani intte ishaa Yooseefa, intte Gibxxe biittau baizzidoogaa. <sup>5</sup> Qassi intte tana hagau baizzido gishshau, zil77ettoppitenne yiillotoppite; aissi giikko, Xoossai tana intteppe sinttau kiittidoogee asaa shemppuwaa ashshanaassa. <sup>6</sup> Ha biittaa koshai geloosappe naa77antto laitta; qassi yiya ichchashu laittatun asi goyenna woikko cakkenna. <sup>7</sup> SHin taani sa7an intteyyo zereeta ashshana malanne intte de7uwaa gita ashettaa ashshana mala, Xoossai tana intteppe sinttau kiittiis. <sup>8</sup> Simmi tana ha sohuwaa kiittidaagee Xoossaa gidiyogaappe attin, inttena gidekketa. I tana Gibxxe kawuwaassi aawa, a aqota ubbaassi godanne Gibxxe biittaa haariyaagaa oottiis.

<sup>9</sup> “Ha77i eesuwana guyye ta aawaakko biidi a, ‘Ne na7ai Yooseefi hagaadan yaagees; ‘Xoossai tana Gibxxe biitta ubbaa bolla goda kessiis; neeni taakko duge haaya; gam77oppa. <sup>10</sup> Neeni Geseema biittan uttaasa; qassi neeni, ne naati, ne naatu naati, ne dorssaa wudee, ne miizzaa wudeenne neeyyo de7iyaabai ubbai ta matan de7eeta. <sup>11</sup> Biron ichchashu kosha laittati attidosona; nena, ne so asaanne ne mehiyaa koshai oiqqenna mala, taani nena mizana” yaagiis’ yaagite” yaagiis.

<sup>12</sup> Qassikka Yooseefi eta, “Intteikka ta ishaa Biniyaamikka, ha inttenaara haasayiyaagee tumu tana Yooseefa gidiyoga intte aifiyan be7eeta. <sup>13</sup> Taayyo Gibxxe biittan de7iya bonchchuwaa ubbaanne intte be7idobaa ubbaa ta aawaayyo yootite; ta aawaanne eesuwana haa duge ekki yiite” yaagiis.

<sup>14</sup> Yaagidi ba ishaa Biniyaama qooriyaa qoommida yeekkiis; Biniyaamikka ba ishaa qoommida yeekkiis. <sup>15</sup> Yooseefi ba ishantta ubbaa yeridi, eta bollankka yeekkiis. Hegaappe guyyiyan, a ishantti aara haasayidosona.

<sup>16</sup> Yooseefa ishantti yiidoogaa woree kawuwaa keettaa gakkido wode, kawoinne a oosanchchati ufaittidosona. <sup>17</sup> Kawoi Yooseefa, “Neni ne ishantta yaatite ga; ‘Intte

mehiyaa caanidi, Kanaane biitti simmite; <sup>18</sup> simmidi intte aawaanne intte so asaa ekkidi, guyye taakko haa ehiite. Taani intteyyo Gibxxe biittan ubbasaappe lo77iyaasaa immiin, intte ha biittaa modhdhuwaa kaashana' yaaga. <sup>19</sup> Qassikka neeni ne ishantta, 'Paraa gaariyaa intte naatuyyoonne intte maccaasatuyyo Gibxxeppe ekkidi biite; biidi intte aawaanne ekkidi yiite. <sup>20</sup> Gibxxe biittan de7iya ubbaappe aadhdhi lo77iyaabai inttessa gidiyo gishshau, intte aquwau qoppoppite' yaagada yoota" yaagiis.

<sup>21</sup> Yaagin Israa7eela attuma naati giidoogaadan oottidosona. Yooseefi kawoi azazi-doogaadan para gaaretanne ogiyaassi shinqqiyaa etau immiis. <sup>22</sup> Etayyo ubbaukka huuphiyan huuphiyan ooratta maayuwaa immiis; shin Biniyaamayyo heezzu xeetu xaqara biraanne ichchashu kumetta maayuwaa immiis. <sup>23</sup> I ba aawaayyo yeddidobai hagua; Gibxxen de7iya ubbabaappe lo77iyaabaa tammu hariyan caanidi, qassi ogiyaassi kattaa, oittaaanne hara shinqqiyaa tammu macca haretun caanidi yeddiis. <sup>24</sup> Yooseefi ba ishantta moissiis. Eti biishin i eta, "Ogiyan biiddi ooyettoppote" yaagiis.

<sup>25</sup> Eti Gibxxeppe kiyidi biidosona; Kanaane biittaa biidi, bantta aawaa Yaaqoobakko gakkidosona. <sup>26</sup> Eti ayyo hagaadan yaagidi yootidosona; "Yooseefi paxa de7ees! I hegaappenne Gibxxe biitta ubbaa haariyaagaa" yaagidosona; yaagin Yaaqooba dagamai wozanaa bashshido gishshau, eta ammanibeenna. <sup>27</sup> SHin eti Yooseefi banttayyo yootidobaa ubbaa ayyo yootiininne a ekki ehaana mala Yooseefi kiittido para gaareta i be7in, eta aawaa Yaaqooba shemppoi simmiis. <sup>28</sup> Israa7eeli, "Hegee taayyo gidees; ta na7aa Yooseefi hanno gakkanaassi paxa de7ees! Taani haiqqanaappe kase baada, a be7ana" yaagiis.

## 46

### *Yaaqoobinne A So Asai Duge Gibxxe Biidosona*

<sup>1</sup> Israa7eeli baayyo de7iyaabaa ubbaa ekki denddidi, Berssaabeha gakkiiis; gakkidi i ba aawaa Yisaaqa Xoossaayyo yarshshuwaa yarshshiis. <sup>2</sup> Yarshshin Xoossai qammi aimuwan a, "Yaaqoobaa, Yaaqoobaa" yaagiis.

Yaagin i, "Yee" giidi koyiis.

<sup>3</sup> Koyin a, "Taani Xoossaa, ne aawaa Xoossaa; neeni duge Gibxxe baanau yayyoppa; aissi giikko, taani nena yan gita kawotetta kessana. <sup>4</sup> Taani nenaara issippe Gibxxe baana; qassi taani ne zerettaa yaappe kessana. Yooseefi ba kushiyan ne aifiyaa shiishshana" yaagiis.

<sup>5</sup> Hegaappe guyyiyan, Yaaqoobi Berssaabehappe denddiis; Israa7eela attuma naati bantta aawaa Yaaqooba, bantta naatanne bantta maccaasata Gibxxe kawoi etau kiittido paraa gaariyan wottidi efidosona. <sup>6</sup> Eti Kanaane biittan haarido aquwaanne mehe ubbaa efidosona. Yaaqoobinne a zersetta ubbai aara Gibxxe biidosona. <sup>7</sup> I ba attuma naatanne ba naatu attuma naata, ba macca naatanne ba naatu macca naata, hegeenne ba zerettaa ubbaa banaara Gibxxe efiis.

### *Yaaqooba Yeletaa*

<sup>8</sup> Israa7eelaara Gibxxe biitti biida Israa7eela naatu sunttai hagaappe kaallidi xaafetidaagaa.

Yaaqooba baira na7ai Roobeela; <sup>9</sup> Roobeela attuma naati Hanooka, Paalu, Hexiroonanne Karmma. <sup>10</sup> Simoona attuma naati Yimu7eela, Yaamiina, Ohaada, Yaakiina, Xoohaaranne Kanaane mishiree na7aa SHaa7ula. <sup>11</sup> Leewi attuma naati Gershshoona, Qahaatanne Maraara. <sup>12</sup> Yihudaa attuma naati Eera, Oonaana, SHeela, Paareesanne Zaraaha; shin Eerinne Oonaani Kanaane biittan haiqqidosona. Paareesa attuma naati Hexiroonanne Hamuula. <sup>13</sup> Yisaakoora attuma naati Tolaa7a, Puuwa, Yaashuubanne SHimiroona. <sup>14</sup> Zaabiloona attuma naati Sereeda, Eloonanne Yaahila7eela. <sup>15</sup> Hageeti Liya Masphphexoomiyan Yaaqoobau yelido attuma naata; i macca na7iyaa Diino. Hageeti a naatinne naatu naati muleera hasttamanne heezza.



<sup>16</sup> Gaada attuma naati Xafoona, Hagga, SHuuna, Exiboona, Eri, Aroodanne Ar77eela. <sup>17</sup> Aseera attuma naati Yimina, Yishiwa, Yishiwaahanne Bari7a; eta michchiyaa Ser-aaho. Bari7a attuma naati Hebeeranne Malkki7eela. <sup>18</sup> Laabaani ba na7ee Liiyyo immido Zilppa Yaaqoobau yelido naati hageeta; eti muleera tammanne usuppuna.

<sup>19</sup> Yaaqooba keettaayee Raaheeli attuma naati Yooseefanne Biniyaama. <sup>20</sup> Oona katamaa qeesiyaa PHoxiifeera na7iyaa Asinaata Yooseefayyo Gibxxen Minaasanne Efireema yelaasu. <sup>21</sup> Biniyaama naati Belaa7a, Bekeera, Ashibeela, Geera, Naa7imaana, Eeha, Roosha, Muppiima, Huppiimanne Arada. <sup>22</sup> Yaaqoobau yelettida Raaheeli attuma naati hageeta; eti muleera tammanne oidda.

<sup>23</sup> Daana attuma na7ai Hushiima. <sup>24</sup> Nifttaaleema attuma naati Yaahixi7eela, Guuna, Yexeeranne SHiileema. <sup>25</sup> Laabaani ba na7ee Raaheeliyyo immido Baala Yaaqoobau yelido naati hageeta; eti muleera laappuna.

<sup>26</sup> Yaaqoobaara Gibxxe biida, a gulbbataappe yelettidaageeti, a naatu keettaayeta gujjennan, muleera usuppun tammanne usuppuna. <sup>27</sup> Gibxxen Yooseefayyo yelettida naa77u naata gujgin, Gibxxe biida Yaaqooba so asai muleera laappun tamma.

### *Yaaqoobinne A So Asai Gibxxen De7idosona*

<sup>28</sup> Geseema biittan mukkana mala, Yaaqoobi Yihudaa baappe sinttau Yooseefakko kiittiis; eti Geseema gakkido wode, <sup>29</sup> Yooseefi ba para gaariyaa giigissidi, ba aawaa Israa7eelaara gaittanau Geseema biis. Yooseefi ba aawaa demmidosaarakka a qooriyan xaaxetti qoommidi, daro wodiya yeekkiis.

<sup>30</sup> Israa7eeli Yooseefa, “Neeni paxa de7ishin, taani ne aifiyaa be7ido gishshau, ha77i taani haiqqikkonne aikkobaa” yaagiis.

<sup>31</sup> Hegaappe guyyiyan, Yooseefi ba ishanttanne ba aawaa so asata, “Taani Gibxxe kawuwaakko baana; baada ayyo, ‘Kanaane biittan de7iya ta ishanttinne ta aawaa so asai taakko yiidosona. <sup>32</sup> Eti dorssa henttanchcha; eti mehe heemmoosona; eti bantanaara bantta dorssata, bantta miizzatanne banttayyo de7iyaabaa ubbaa ekkidi yiidosona’ yaagana. <sup>33</sup> Kawoi inttena xeesissidi, ‘Intte oosoi aibee?’ yaagidi oichchikko, <sup>34</sup> intte ayyo, ‘Nuuni ne ashkkarati naatettaasappe doommidi, nu aawatudankka mehiyaa heemmeettes’ yaagite. Yaagikko i inttena Geseema biittan wottana; aissi giikko, dorssa henttanchcha ubbi Gibxxe asan karettidabaa” yaagiis.

## 47

<sup>1</sup> Yooseefi gelidi Gibxxe kawuwaayyo hagaadan yaagidi yootiis; “Ta aawainne ta ishantti, bantta dorssaa wudiyaara, bantta miizzaa wudiyaaranne banttayyo de7iyaabaa ubbaara Kanaane biittaappe yiidi, ha77i Geseema biittan de7oosona” yaagiis. <sup>2</sup> I ba ishanttuppe ichchashata dooridi kawuwaa sintti aattiis.

<sup>3</sup> Kawoi he ishantta, “Intte oosoi aibee?” yaagidi oichchiis.

Oichchin eti kawuwaayyo, “Nuuni ne ashkkarati nu aawatuugaadankka dorssa wude heemmoos” yaagidi zaaridosona. <sup>4</sup> Qassi eti ayyo, “Kanaane biittan koshai suullido gishshaunne ne ashkkaratu mehiyau miyoobi aibinne baina gishshau, nuuni hagan amarida wodiya daanau yiida; hayyanaa nuna ne ashkkarata Geseeman wottarkkii!” yaagidosona.

<sup>5</sup> Yaagin kawoi Yooseefa, “Ne aawainne ne ishantti neekko yiidosona. <sup>6</sup> Simmi Gibxxe biittai ne kushiyan de7ees; ha biittan ubbasaappe aadhdhidi lo77iyaasan ne aawaanne ne ishantta wotta; eti Geseema biittan de7ona. Neeni erin, eta giddoppe dumma eratetta de7iyoogeti de7ikko, hegeeta ta mehiyaa bolli suntta” yaagiis.

<sup>7</sup> Hegaappe guyyiyan, Yooseefi ba aawaa Yaaqooba gelissidi, kawuwaa sintti aattiis. Yaaqoobi Gibxxe kawuwaa anjjidoogaappe guyyiyan, <sup>8</sup> kawoi Yaaqooba, “Neeyyo woisu laitte?” yaagidi oichchiis.

<sup>9</sup> Oichchin Yaaqoobi kawuwaa, “Taani yuuyaidda de7ido laittai xeetanne hasttama; ta laittai beni ta aawati yuuyiiddi de7ido laittatuppe guuttanne metoi daridoogaa” yaagiis.

<sup>10</sup> Hegaappe guyyiyan, Yaaqoobi kawuwaa anjjidi, a sinttappe kare kiyiis.

<sup>11</sup> Yooseefi ba aawaanne ba ishantta Gibxxe biittan wottiis; kawoi azazidoogaadan Gibxxe biittan Raamisa giyo katamaa matan de7iya, ubbasaappe aadhdhidi lo77iya gadiyaa etau immiis. <sup>12</sup> Yooseefi qassi ba aawaayyo, ba ishanttuuyyoonne ba aawaa so asa ubbau eta naatu qoodaadan kattaa immiis.

### *Gibxxen Koshai Suulliis*

<sup>13</sup> Gidikkonne koshai suullido gishshau, he biitta ubban katti baawa. He koshan Gibxxenne Kanaane biittai naa77aikka qohettidosona. <sup>14</sup> Yooseefi Gibxxe kattaa baizzidi, Gibxxenne Kanaane biittatun de7iya miishshaa ubbaa shiishshii; shiishshidi Gibxxe kawuwaa keettaa gelissiiis. <sup>15</sup> Gibxxenne Kanaane miishshai wurido wode, Gibxxe asai ubbai Yooseefakko yiidi a, “Nuuyyo kattaa imma; nu miishshai wurido gishshau, nuuni ne sinttan aissi haiqqiyoonii?” yaagidosona.

<sup>16</sup> Yaagin Yooseefi eta, “Yaanikko intte mehiyaa ekki yiite; intte miishshai wuri-ichchidabaa gidikko, taani kattaa intte mehiyaara laammanna” yaagiis. <sup>17</sup> Hegaa gishshau eti bantta mehiyaa Yooseefayyo ehiidosona. Ehin Yooseefi eta paraa, dorssaa, deeshshaa, miizzaanne hariyaa kattaara laammiis; i he laittaa eta mehiyaa ubbaara kattaa laammiiddi eta mizi shaachchiis.

<sup>18</sup> He laittai wurin, eti naa77antta laittan akko yiidi a, “Nuuni nu godaappe qosiyooobi baawa; nu miishsha ubbai wuriichchiis; nu mehiyaakka neessi sheedhdhiichchida; nu bollaappenne nu gadiyaappe attin, nu godaayyo attidabi harabi baawa. <sup>19</sup> Nuuni ne sinttan aissi haiqqiyoonii? Nu gadeekka aissi xayii? Nunakka nu gadiyaakka kattann shamma; nuuni kawuwaayyo ailletana; nu gadeekka abaa gido; nuuni paxa attana mala, haiqqenna malanne nu gadeekka oxenna mala, zersettaa nuuyyo imma” yaagidosona.

<sup>20</sup> Yooseefi Gibxxe biitta ubbaa kawuwaayyo shammiis. Gibxxeti ubbai koshai suullido gishshau, bantta gadiyaa baizzidosona; baizzin gadee kawuwaabaa gidiiis.

<sup>21</sup> Yooseefi asa ubbaa Gibxxeyyo ha gaxaappe doommidi hini gaxaa gakkanaassi kawuwaayyo aille kessiiis. <sup>22</sup> Gidikkonne i qeesetu gadiyaa shammibeenna; aissi giikko, kawoi qeesetuyyo kattaa immees. Hegaa gishshau bantta gadiyaa baizzibookkona.

<sup>23</sup> Yooseefi asaa, “Simmi hachchi taani inttenanne intte gadiyaa kawuwaayyo shammaas. Zersettaa efidi, gaden zerite. <sup>24</sup> SHin kattaa cakki gelissiyo wode, aifidabaappe ichchashu kushiyaappe issi kushiyaawoo immite. Ichchashu kushiyaappe attida oiddu kushee intte gadiyaa zereettanne intteyyo, intte so asaayyoonne intte naatuyyo quma gido” yaagiis.

<sup>25</sup> Yaagin eti, “Neeeni nuna ashshadasa! Nu godaa sinttan nuuni sabetorkkoniishsha; nuuni kawuwaayyo ailletana” yaagidosona. <sup>26</sup> Hegaa gishshau, Yooseefi Gibxxen biittatappe aifidabaappe ichchashu kushiyaappe issuwaa kawuwaayyo immiyooogaa higge kessiiis. He higgeenne hachchi gakkanaassi eqqidi de7ees. Kawuwaabaa gidibeenna gadee qeesetu gadiyaa xalaala.

<sup>27</sup> Israa7eelati Gibxxe biittan Geseema giyoosan uttididosona; eti yan aqo demmidosona; eti yelettidosonanne daro corattidosona.

<sup>28</sup> Yaaqoobi Gibxxe biittan tammanne laappun laitta de7iis. Yaaqoobi de7ido laittai xeetanne oitamanne laappuna. <sup>29</sup> Israa7elayyo haiqqiyo wodee matattin, ba na7aa Yooseefa xeesissidi hagaadan yaagiis; “Taani ne sinttan sabettidabaa gidikko, ne kushiyaawoo ta gulbbatan wottada, neeni taayyo kehanaunne ammanettanau ane geppa. Tana Gibxxen moogoppa; <sup>30</sup> shin taani ta maizzan gaittiyo wode, tana Gibxxeppe efaada, eti moogettidosan mooga” yaagiis.

Yaagin Yooseefi, “Taani nena neeni giidoogaadan oottana” yaagiis.

<sup>31</sup> Yaaqoobi a, “Ane taayyo caaqqa” yaagiis. Yaagin Yooseefi ayyo caaqqiis; hegaappe guyyiyan, Israa7eeli ba hiixan gufannidi, Xoossaassi goinniis.

## 48

### *Minaasanne Efireema*

<sup>1</sup> Hegaappe guyyiyan asai Yooseefassi, “Ne aawai sakettees” yaagidi yootiis. Yootin i ba naa77u attuma naata Minaasanne Efireema ekkidi biis. <sup>2</sup> Bin asai Yaaqooba, “Be7a; ne na7ai Yooseefi neekko yiis” yaagiis; yaagin Israa7eeli minettidi ba hiixan uttiis.

<sup>3</sup> Yaaqoobi Yooseefa, “Ubbaa Danddayiya Xoossai Kanaane biittan Looza giyoosan taayyo qonccidi, yan tana anjjiis. <sup>4</sup> I tana, “Taani nena yeletissananne corayana; taani nena daro dere oottana. Ha biittaa taani neeppe guyyiyan, ne zersettaayyo merinaa laata oottada immana’ yaagiis.

<sup>5</sup> “Simmi ha77i, ne naa77u attuma naati, taani neekko haggaa yaanaappe kase Gibxxen neeyyo yelettidaageeti tabaa; Efireeminne Minaasee taayyo Roobeelanne Simoona mala. <sup>6</sup> Etappe guyyiyan neeyyo yelettidaageeti nebaa; eti laattana biittai Efireemanne Minaasa sunttan gido. <sup>7</sup> Taani Masphphexoomiyaappe simmishin, Efiraata gakkanau guuttaa ashshidaashin, Raaheela Kanaane biittan haiqqaasu. Haiqqin, taani o Beetaliheeme giyo Efiraataa efiya ogiyaa doonan moogaas” yaagiis.

<sup>8</sup> Israa7eeli Yooseefa attuma naata naa77ata be7ido wode, “Hageeti oonee?” yaagidi oichchiis.

<sup>9</sup> Oichchin Yooseefi ba aawaa, “Hageeti Xoossai taayyo hagan immido ta naata” yaagiis.

Yaagin Israa7eeli, “Taani eta anjjana mala, eta taakko haa shiishsha” yaagiis.

<sup>10</sup> Israa7eeli cimin a aifee daafurido gishshau, xeellana danddayenna. Heggaa gishshau Yooseefi ba attuma naata akko shiishshin, a aawai eta idimmidi yeriis.

<sup>11</sup> Israa7eeli Yooseefa, “Taani ne som77uwaa be7ana gaada qoppabeikke; shin Xoossai hekko ne naatakka tana bessiiis” yaagiis. <sup>12</sup> Yooseefi eta a gulbbataappe denttidi, ba som77uwaa sa7aa gattidi ziggiis.

<sup>13</sup> Yooseefi ba naa77u attuma naata, Efireema ba ushachcha baggan Israa7eelau haddirssa baggaara, Minaasa ba haddirssa baggan Israa7eelau ushachcha baggaara ekkidi, akko shiishshiis. <sup>14</sup> Efireemi kaalo gidikkokka, Israa7eeli ba ushachcha kushiya yeddidi a huuphiyan wottiis; qassi Minaasee baira gidikkokka, Israa7eeli ba kushiya qaxiballidi, ba haddirssa kushiya Minaase huuphiyan wottiis.

<sup>15</sup> Hegaappe guyyiyan, Yaaqoobi Yooseefa hagaadan yaagidi anjjiis;

“Ta aawati Abrahaamine Yisaaqi  
a sinttan hemettido Xoossai,  
ta de7o ubban hachchi gakkanaassi  
tana heemmida Xoossai,

<sup>16</sup> iitabaa ubbaappe tana ashshida kiitanchchai,  
ha naata anjjo.

Ta sunttainne  
ta aawatu Abrahaamane Yisaaqa sunttai etan xeesetto.

Eti sa7aa bollan corattona”  
yaagidi anjjiis.

<sup>17</sup> Yooseefi ba aawai ba ushachcha kushiya Efireema huuphiyan wottidoogaa be7ido wode dosibeenna. Heggaa gishshau, Efireema huuphiyaappe denttidi, Minaase huuphiyan wottanau ba aawaa kushiya oiqqiis. <sup>18</sup> Oiqqidi Yooseefi ba aawaa, “Ta aawau, heggaa gidenna; bairai hagaattennee; ne ushachcha kushiya haggaa bolli wotta” yaagiis.

<sup>19</sup> SHin a aawai ixixidi a, “Taani erais; ta na7au, taani erais; ikka gita dere gidana. Gidikonne a kaalo ishahi appe aadhdhi gitatana; a zereettaikka daro gita kawotetta gidana” yaagiis.

<sup>20</sup> I he gallassi eta anjjidi,  
“Israa7eelati anjjiyo wode,

‘Xoossai inttena Efireemadaaninne Minaasedan ootto’  
yaagidi intte sunttan anjjana” yaagiis.

Yaatiidi Efireema Minaaseppe sinttayaais.

<sup>21</sup> Hegaappe guyyiyan Israa7eeli Yooseefa, “Taani haiqqana hanais; shin Xoossai inttenaara gidana; qassi i intte aawatu biitti inttena guyye zaarana. <sup>22</sup> Qassi nena ne ishanttuura gakkiiya biittaappe issi saamaa darissada neeyyo immais; hegeenne taani Amoooretuppe ta bisuwaaninne ta wonddafiyan ekkido biittaa” yaagiis.

## 49

### *Yaaqoobi Ba Naata Anjjiis*

<sup>1</sup> Hegaappe guyyiyan, Yaaqoobi ba attuma naata xeesissidi hagaadan yaagiis; “Sinttappe intteyyo hananabaa taani intteyyo yootana mala shiiqite.

<sup>2</sup> “Inttenoo Yaaqooba naatoo,  
issippe shiiqidi siyite;  
intte aawai Israa7eeli intteyyo yootiyoobaa ezggite.

<sup>3</sup> “Roobeelaa, ta baira na7au,  
neeni ta wolqqaa;  
ta minotettaayyo koiruwaa.  
Neeni bonchchuwankka wolqqankka ubbaappe aadhdhiyaagaa.

<sup>4</sup> Neeni di7o mala; eqqosan de7akka;  
neeni ubbaappe aadhdhiyaagaa gidakka.  
Aissi giikko, neeni ne aawaa hiixaa kiyadasa;  
ne awaa arssaa tunissadasa.

<sup>5</sup> “Simooninne Leewi ishantta;  
eta bisoi makkalatettau ola miishsha.

<sup>6</sup> Taani eta zoretan gelikke;  
taani eta shiiquwankka uttikke.  
Aissi giikko, eti bantta hanqquwan  
asa woridosonanne banttana ekka ekka gin,  
boorata gilddayidosona.

<sup>7</sup> Eta suulo hanqqoinne  
eta meqettaa iitatettaa qanggettidaagaa gido!  
Taani eta Yaaqooba asaa giddon laalana;  
Israa7eela biittan piskki oottana.

<sup>8</sup> “Yihudau, ne ishantti nena galatana.  
Ne kushee ne morkketu piillanttiyaa oiqqana.  
Ne aawaa naati neeyyo hokkidi ziggana.

<sup>9</sup> Yihudau, neeni wodala gaammo.  
Ta na7au, neeni shankkaappe woridi simmidi,  
cogochchidi zin77ida gaammo mala.  
Neeni asi bosherttanau koyenna macca gaammee mala.

<sup>10</sup> Haariyaagee yaana gakkanaashin,

kawotaa xam77ai Yihudaappe,  
deriyaa haariyaageetu gatimai a toho giddoppe shaahettenna.

Qassi dere asai ayyo azazettana.

11 I ba hariyaa woiniyaa anuwan,  
ba hare maraa muruta woiniyaa turan qachchana.

I ba afalaa woiniyaa eessan,  
ba maayuwaa suutta milatiya woiniyaa eessan meeccana.

12 A aifee woine eessaappe aadhdhi dulkkana;  
a achchaikka maattaappe aadhdhi booxxana.

13 “Zaabiloonee abbaa doonan de7ana;  
i abbaa doonan markkabeti eqqiyo soho gidana;  
a zawai Sidoona gakkana.

14 “Yisaakoori mino hare;  
caaniyo naa77u joinetuppe gidduwan zin77i bayees.

15 I ba shemppiyoosai lo77o gidiyooogaanne  
ba biittai ufaissiyaagaa gidiyooogaa be7iyo wode,  
caanaa tookkanau ba hashiyaa ziqqi oottidi,  
ailletettaa ooso oottana.

16 “Daani Israa7eela zaretuppe  
issuwaa gidiya ba asaa bolli daannatana.

17 Daani oge doonan de7iya shooshsha;  
paraa toggidaagee guyye kunddana mala  
paraa ginddiyaa dukkiya,  
ogiyen de7iya haso.

18 “Abeet GODAU, taani neeni ashshanau naagais.

19 “Gaadi bonqqiyaageetun deshettana;  
shin ikka eta paanaa kaallidi  
eta bonqqana.

20 “Aseera oittai ordde;  
kawotuyyo i lo77o qumaa immana.

21 “Nifttaaleemi qashettennan yeda de7iya,  
lo77o marata yeliya genessa.

22 “Yooseefi aifiyaara herxxexxida woine tura.  
I pulttuwaa matan herxxexxa aifiyaara de7iya,  
daashshaikka godaappe bollaara zaa7iyo woine tura.

23 Wonddafiyaa dukkiyaageeti  
a bolli woraajjidosona;  
woraajjidi bantta zubbayan  
dukkidosonanne muddidosona.

24 A wonddafee minni uttiis;  
a qeseekka minnidi gam77iis.

Hegeenne Yaaqooba Wolqqaamaa kushiyaa gaasuwaana,  
ne henttanchchaa, Israa7eela Zaallaa gaasuwaana,

25 nena maaddiya ne aawatu Xoossaa gaasuwaananne,



nena bolla saluwaa anjjuwan,  
garssa ciimmaa anjjuwan,  
xanttaa anjjuwaaninne  
yeliya uluwaa anjjuwan  
anjjiya,

Ubbaa Danddayiya Xoossaa gaasuwaana.

<sup>26</sup> Ne aawaa anjjoji beni deretu anjjuwaappekka  
merinaasappe de7iya keratu anjjuwaappekka aadhdhees.

Hagee ubbai Yooseefa huuphiyan,  
ba ishanttu gidдон halaqa gidyaagaa liiphiyan shemppo.

<sup>27</sup> “Biniyaami bonqqiya wanggireello.

Ba shankkatidobaa maallado mees;  
ba omooddidobaa omarssi shaakkees” yaagiis.

<sup>28</sup> Hageeti tammanne naa77u Israa7eela zareta; qassi eta aawai eta huuphiyan  
huuphiyan etau bessiya anjjuwaa anjjiiddi etayyo giidobai haggaa.

### *Yaaqooba Haiquwaa*

<sup>29</sup> Hegaappe guyyiyan, i eta hagaadan yaagidi azaziis; “Taani ta maizza asatun  
gaittana hanais; tana Hiitiyaa Efiroona gaden de7iya gonggoluwaa, ta aawatuura  
moogite. <sup>30</sup> Hegeenne Kanaane biittan, Mamire matan de7iya, Maakipheela giyo  
gonggoluwaa; hegee Abrahaami moogossi Hiitiyaa Efiroonappe a gadiyaara sham-  
mido gonggoluwaa. <sup>31</sup> Abrahaamine a keettaayiyaa Saara yan moogettidosa;  
Yisaaqinne a keettaayiyaa Ribiqaa yan moogettidosa; taani qassi Liyo yan moogaas.  
<sup>32</sup> He gadeenne an de7iya gonggoloi Hiitetuppe shamettidaagaa” yaagiis.

<sup>33</sup> Yaaqoobi ba naatuyyo azazuwaa wurssido wode, ba tohuwaa pude ba hiixau  
shiishshi ekkidi, haiqqi aggiis; haiqqidi ba maizzan gaittiis.

## 50

<sup>1</sup> Yooseefi ba aawaa ahaa bolli kunddidi, yeekkiisinne a yeriis. <sup>2</sup> Hegaappe guyyiyan,  
Yooseefi xaliyaa shiishshiya ba oosanchchata ba aawaa Israa7eela ahaa sawiya shit-  
tuwaa tiyidi melissana mala azaziis; azazin eti tiyidi melissidosona. <sup>3</sup> SHittuwaa  
tiyyoogee oitamu gallassa kumettaa wurssiis; aissi giikko, hegee tiyoi wonikka oitamu  
gallassaa ekkees. Gibxxe asati ayyo laappun tammu gallassaa yeekkidosa.

<sup>4</sup> Yeeho gallassati aadhdhido wode, Yooseefi Gibxxe kawuwaa keettaa asata, “Taani  
intte sinttan nashettidobaa gidikko, intte tau kawuwaayyo hagaadan yaagidi odite; <sup>5</sup> “Ta  
aawai tana issi caaqa caaqissiis; i tana, “Taani haiqqana hanais; taani ta huuphessi  
Kanaane biittan bookkido gonggolo duufuwan tana mooga” yaagiis. Heggaa gishshau  
ha77i taani pude baada ta aawaa moogana mala yeddarkkii! Hegaappe guyyiyan taani  
simmana’ yaagite” yaagiis.

<sup>6</sup> Yaagin kawoi, “I nena caaqissidoogaadan pude baada ne aawaa mooga” yaagiis.

<sup>7</sup> Yaagin Yooseefi ba aawaa mooganau pude biis. Kawuwaa oosanchchati ubbai, a  
kawo keettan de7iya gita asai ubbainne Gibxxe biittan de7iya gita asai ubbai Yooseefa  
kaallidi biidosona. <sup>8</sup> Qassi Yooseefa so asai ubbai, a ishanttinne a aawaa so asai  
biidosona; eta naati, eta miizzainne eta dorssaa wude xalaalai Geseeman attiis. <sup>9</sup> Para  
gaaretikka paraasatikka aara pude biidosona; a kaallidi biida asai keehi daro.

<sup>10</sup> Eti Yorddaanoosa SHAafaa matan de7iya Axaadi giyo audiyaa gakkii, bantta  
qaalaa xoqqu oottidi, ayyo zilaalidosonanne yeekkidosa; yan Yooseefi ba aawaa  
yeehuwan laappun gallassaa uttiis. <sup>11</sup> He biittan de7iya Kanaane asati Axaadi giyo  
audiyan he yeehuwaa be7ido wode, “Gibxxeti aiba yibbaata yeeho yeekkiyoonaa!”

yaagidosona. Hegaa gishshau Yorddaanoosa matan de7iya he sohoi, Gibxxetu Yeehuwaa geetettiis.

<sup>12</sup> Yaaqooba naati bantta aawai eta azazidoogaadan oottidosona; <sup>13</sup> eti a ahaa Kanaane biitti efidi, Mamire matan de7iya Maakipheela giyo gonggoluwana, Abrahaami Hiitiyaa Efiroonappe mooguwau shammido gadiyan a moogidosona. <sup>14</sup> Yooseefi ba aawaa moogidoogaappe guyyiyan, ba ishanntuuranne a aawaa mooganau aara biida hara asatu ubbatuura Gibxxe simmiis.

### *Yooseefi Ba Ishantta Woppissiis*

<sup>15</sup> Eta aawai haiqqiichchidoogaa be7idi, Yooseefa ishannti bantta gidдон, “Ooni erii Yooseefi nuna ba uluwan morkkikkonne nuuni ayyo oottido iitabaa ubbaassi halo kessana koyikko, nuuni waananee?” yaagidosona. <sup>16</sup> Hegaa gishshau Yooseefakko haggaa mala kiitaa kiittidosona; “Ne aawai haiqqanaappe kase; <sup>17</sup> ‘Intte Yooseefa, “Neeni ne ishanntu nagaraanne eti nena naaqqido iita naaquwaa hayyanaa atto yaaga” yaagiis giidi odite’ yaagiis. Hegaa gishshau ha77i hayyanaa, nu nagaraa, ne aawaa Xoossaa ashkaratu nagaraa atto yaaga” yaagidosona. Kiitai baakko gakkido wode, Yooseefi yeekkiis.

<sup>18</sup> Hegaappe guyyiyan a ishannti bantta huuphen akko yiidi, a sinttan gufannidi, “Nuuni ne ailleta” yaagidosona.

<sup>19</sup> SHin Yooseefi eta, “Yayyoppite; tana intteyyo Xoossaa giidetiiyye? <sup>20</sup> Intte taayyo iitanau oottideta; shin hachchiigaadan daro asai haiqqennan attana mala, Xoossai lo77otettau haggaa oottiis. <sup>21</sup> Hegaa gishshau simmi intte yayyoppite; taani inttenanne intte naata mizana” yaagidi, i eta minttettidi keha qaalaa haasayiis.

### *Yooseefa Haiquwaa*

<sup>22</sup> Yooseefi ba aawaa so asa ubbaara Gibxxen gam77iis; i xeetanne tammu laittaa de7iis; <sup>23</sup> Efireema naata, heezantta yeletaa be7iis; qassi Minaase na7aa Maakiira naatanne i ba naata oottiis.

<sup>24</sup> Hegaappe guyyiyan Yooseefi ba ishannta, “Taani haiqqana hanais; shin Xoossai inttena maaddanau tumu xomoosana; i inttena ha biittaappe kessidi, Abrahamaayyo, Yisaaqayyoonne Yaaqoobayyo immana giidi caaqqido biittaa efaana” yaagiis. <sup>25</sup> Yooseefi Israa7eela naata, “Xoossai inttena maaddanau tumu xomoosiyo wode, intte ta meqettaa ha biittaappe pude ekkidi biite” yaagidi caaqissiis.

<sup>26</sup> Yooseefi xeetanne tammu laittaa de7idi haiqqiis; haiqqin, eti shittuwan a ahaa tiyidi melissidoogaappe guyyiyan, Gibxxe biittan saaxiniyan yeggidosona.

## Kessaabaa

### *Gidduwaa Erissuwaa*

Kessaabai odiyoogee Israa7eela asai ailletettan de7ido Gibxxe biittaappe kiyido hanotaabaa. Ha maxaafaassi heezzu waanna waanna kifileti de7oosona.

<sup>1</sup> Ibraaweti ailletettaappe kiyidoogaanne Siinaa Deriyaa eti biido beettaabaa odees.

<sup>2</sup> Xoossai ba asaara maachchaa maacettidobaa, iitaanne kehaa shaakkidi erissiya higgeta, asai aqiyo higgetanne ammano higgeta i etau immidobaa odees.

<sup>3</sup> Israa7eela asaassi, qeesetu oosuwaassinne Xoossaassi goinniyo goinuwaassi imetida higgetubaa yootees.

Ubbabaappe aattidi ha maxaafai Xoossai ailletettan de7iya ba asaa kessi simmidi, eti wodenau hidootai de7iyo asaa gidanaadan, i eta waati oottidaakko odees.

Ha maxaafan dariya bagga taarikiyaa godaa gididi shiiqida asi ba asaa Gibxxeppe kessana mala, Xoossai doorido Muusa. Maxaafaa gidдон daroppe erettida miraafee tammu azazoti xaafettido laatamantto miraafiyaa.

### *Israa7eela Asata Gibxxe Biittan Gakkida Naaqotanne Qohota*

<sup>1</sup> Yaaqoobaara Gibxxe gelida Israa7eela attuma naatu sunttai hagaappe kaallidi xaafettiis; eti ubbaikka bantta so asaa ekki gelidosona. <sup>2</sup> Hegeetinne: Roobeela, Simoona, Leewa, Yihudaa, <sup>3</sup> Yisaakoora, Zaabiloona, Biniyaama, <sup>4</sup> Daana, Nifttaaleema, Gaadanne Aseera. <sup>5</sup> Yaaqooba zerettati muleera laappun tamma; Yooseefi kasekka Gibxxe bi uttiis. <sup>6</sup> Yooseefi, a ishanttinne he yeleta ubbai haiqqiis; <sup>7</sup> shin Israa7eela zerettai aifidosonanne keehi daridosona; he biittaa kumana gakkanaassi eti keehi corattidosona.

<sup>8</sup> Hegaappe guyyiyan, Yooseefa erenna ooratta kawoi Gibxxe biittan denddiis. <sup>9</sup> I ba asaa, “Be7ite; ha Israa7eelati nuuppe keehi corattidosona. <sup>10</sup> Haayite, ane nuuni eta hiillan oiqqoos; hinna xayikko eti kaseegaappe yaa darana. Geelladan oli denddikko, eti nu morkketuura gaittidi, nuna olananne biittaa yeggidi baana” yaagiis. <sup>11</sup> Hega gishshau, deexo oosuwan eta tuggayana mala, eta bolli meqetti baina kaabbota sunttidosona. Eti kawuwaayyo Piitoomanne Raamisa giyo aibakko minjjiyo katamata keexxidosona. <sup>12</sup> SHin Gibxxeti eta un77uwaa dariyo wode, eti darii yelettidosonanne biittaa gakkidosona. Hega gishshau, Gibxxeti Israa7eelatau yayyidosona; <sup>13</sup> yayyidi etau biittaa goggidi ootissidosona. <sup>14</sup> Wolqqaama oosuwan, siminttuwaaninne xuubiyaa meruwan, qassi shooqan oottiyo ubba qommo oosuwan, eta de7uwaa camettidosona; bantta daafurssiya ooso ubbaa qareti bannan eta ootissidosona.

<sup>15</sup> Gibxxe kawoi Ibraawe maccaasata maaretissiya Xippaaronne Puuho giyo naa77u maccaasata hagaadan yaagiis; <sup>16</sup> “Ibraawe maccaasati yeliyo wode intte maaretissiiddi, yelettidabi attuma na7a gidikko, worite; shin macca na7a gidikko paxa aggite” yaagiis. <sup>17</sup> SHin maaretissiyaageeti Xoossau yayyidi, Gibxxe kawoi eta azazidoogaadan ootibookkona. Eti attuma naata paxa ashshidosona. <sup>18</sup> Hegaappe guyyiyan Gibxxe kawoi he maaretissiyaageeta xeesidi, “Intte aissi hagaadan oottidetii? Attuma naata aissi paxa aggi bayidetii?” yaagidi eta oichchiis.

<sup>19</sup> Oichchin maaretissiyaageeti zaaridi, “Ibraawe maccaasati Gibxxe maccaasatu mala gidokkona; eti mino gidiyo gishshau, maaretissiyaageeti gakkanaappe kasetidi yeliichchoosona” yaagidosona.

<sup>20</sup> Hega gishshau, Xoossai maaretissiyaageetussi kehiis. Asaa qoodaikka gujji gujjidi biidi, kaseegaappe yaa corattiis. <sup>21</sup> Qassi maaretissiyaageeti Xoossau yayyido gishshau, Xoossai etau eta huuphessi so asaa immiis. <sup>22</sup> Hegaappe guyyiyan kawoi ba asaa ubbaa,

“Ibraawetuppe yelettiya attuma na7a ubbaa Naile SHaafaa haattan olite; shin macca na7i yelettikko, paxa aggi bayite” yaagidi azaziis.

## 2

### *Muusee Yelettidobaa*

<sup>1</sup> He wode issi Leewa qommo gidiya bitanee Leewa maccaasa issinniyo ekkiis; <sup>2</sup> ekkin a abbe ixettada attuma na7aa yelaasu. Na7ai meraa lo77o na7a gidiyoogaa a be7ada, heezzu agina qosaasu. <sup>3</sup> SHin a hegaappe daruwaa qosanau danddayennaagaa erada, ceccaappe keeshiyaa ayyo daddaasu; daddada renjiyaaninne shidan meeshada, na7aa a gidдон wottaasu; wottada Naile SHaafaa giyo haattaa doonan maqqaa gidдон wottaasu. <sup>4</sup> A michchiyaa i haniyoobaa be7anau haahuwan eqqaasu.

<sup>5</sup> Gibxxe kawuwaa na7iyaa bollaa meecettanau Naile SHaafaa giyo shaafaa wodhdhaasu; i macca ashkkaratinne haattaa doonan yaa haa hemettoosona; a keeshiyaa maqqaa gidдон be7ada, baada ekkada yaana mala ba ashkkariyo kiittaasu; <sup>6</sup> keeshiyaa pogada, he guutta na7aa be7aasu. Be7iyo wode i yeekkees; yeekkin a ayyo qarettaasu; a, “Hagee Ibraawetu guutta naatuppe issuwaa” yaagaasu.

<sup>7</sup> He wode a michchiyaa kawuwaa na7iyo, “Neeyyo ha na7aa xanttanau Ibraawe maccaasa issinno ehaanau boo?” yaagada oichchaasu.

<sup>8</sup> Yaagin a, “Ee, ba” yaagaasu. Yaagin na7iyaa baada, he na7aa aayyiyo ehaasu. <sup>9</sup> Kawuwaa na7iyaa he maccaasiyo, “Ha na7aa efaada, taayyo xanttashsha; taani neeyyo damoozaa qanxxana” yaagaasu. Yaagin maccaasiyaa na7aa efaada, xanttaasu. <sup>10</sup> Na7ai diccin, kawuwaa na7eekko a ehaasu; i iyyo na7a giddiis; “Taani haattaappe a kessaas” gaidda, a Muusa sunttaasu.

### *Muusee Midiyaama Biitti Baqatiis*

<sup>11</sup> Muusee diccidi gitaa gididi, issi gallassi ba asai de7iyoosaa biis; biidi eti deexo ooso oottishin eta xeelliis. Gibxxe biittaa asa issoi a asatuppe, Ibraawetuppe issuwaa wadhdhishin be7iis. <sup>12</sup> I yaa haa xeellin, ooninne bannaagaa be7idi, he Gibxxe bitaniyaa woriis; woridi shaheeta gidдон qottiis. <sup>13</sup> Wonttetta gallassi kiyidi, naa77u Ibraaweti warettiyaageeta be7iis. Naaqqidaagaa i, “Neni ne lagge gidiya Ibraawiyaa aissi dechchai?” yaagidi oichchiis.

<sup>14</sup> Oichchin he bitanee, “Nena nu bolli haariyaagaanne daanna ootti sunttidai oonee? Neni he Gibxxe bitaniyaa woridoogaadan, tanakka worana qoppaiyye?” yaagiis. Muusee he wode, “Taani oottidobai erettiichchiis” yaagi qoppidi yayyiis.

<sup>15</sup> Kawoi haggaa siyido wode, Muusa woranau koyiis; shin Muusee kawuwaappe baqatidi, Midiyaama biittan de7anau biis; biidi haatta ollaa doonan uttiis.

<sup>16</sup> He wode Midiyaama qeese issuwaayyo laappun macca naati de7oosona; eti bantta aawaa dorssata haattaa ushshanau wonggiriyan haattaa duuqqi kunttanau yiidosona. <sup>17</sup> Henttanchchati yiidi macca naata yedettidosona; shin Muusee denddi eqqidi, eta ashshiisinne eta dorssata haattaa ushshiis.

<sup>18</sup> Eti bantta aawaa Yatirokko<sup>1</sup> yiido wode, “Hachchi waani eesuwan yiidetii?” yaagidi oichchiis.

<sup>19</sup> Oichchin eti zaaridi, “Gibxxe biittaa asa issoi nuna henttanchchatuppe ashshiis; i nuuyyo haattaakka duuqqidi dorssaa wudiyaa ushshiis” yaagidosona.

<sup>20</sup> Yaagin i ba macca naata, “Yaatin i awan de7ii? Intte he bitaniyaa aissi aggi bayidetii? Ane a xeesidi, miyoobaa shoobbite” yaagiis.

<sup>21</sup> Muusee he bitaniyaara yan de7anau maayiis; bitaneekka ba na7iyo Xippaaro Muuseyyo machcho oottidi immiis. <sup>22</sup> Xippaara attuma na7aa yelin, Muusee a, “Taani asa biittan bete gidaas” yaagiiddi, Gershshooma sunttiis.

<sup>1</sup> 2:18 Yatiroi Muusee bollaru; ayyo hara sunttai Ra7u7eela.

<sup>23</sup> Daro laittaappe guyyiyan, Gibxxe kawoi haiqqiis. Israa7eelati bantta ailletettaappe oolidosonanne waassidosona; bantta ailletettaappe eti waassido waasoi pude Xoossaakko gakkiiis. <sup>24</sup> Xoossai eta ooliyaa siyidi, i Abrahaamaara, Yisaaqaaranne Yaaqoobaara maacetto maachchaa hassayiiis. <sup>25</sup> Hegaa gishshau, Xoossai Israa7eelata xeellidi etau qoppiis.

### 3

#### *Muusanne Eexxiya Buuraa*

<sup>1</sup> Issi wode Muusee Midiyaama biittaa qeesiyaa, ba bollowaa Yatiro dorssata heem-mees; i he wudiyaa laaggi ekkidi bazzuwau gaxaa gakkanaashin efiis; efiidi Xoossaa deriyaa, Siinaa Deriyaa gakkiiis. <sup>2</sup> He sohuwan GODAA kiitanchchai buuran, eexxiya tama lacuwaa gidдон ayyo beettiis; buurai taman xuugettikkokka, tamai buuraa meennaagaa Muusee be7iis. <sup>3</sup> Hegaa gishshau, Muusee, “Taani yaa baada, buurai aissi taman meetettennaakkonne ha oorattabaa ane be7ana” yaagidi qoppiis.

<sup>4</sup> I be7anau yaa biidoogaa GODAI be7iis; be7idi Xoossai buuraa gidдope a, “Muusee! Muusee!” yaagidi xeesiis.

Xeesin Muusee, “Yee!” giidi koyiis.

<sup>5</sup> Koyin Xoossai a, “Haa shiiqoppa. Neeni eqqido biittai geeshsha gidiyo gishshau, ne tohuwan de7iya caammaa kessa” yaagiis. <sup>6</sup> Qassikka GODAI a, “Taani ne aawaa Xoossaa, Abrahaama Xoossaa, Yisaaqa Xoossaa, Yaaqooba Xoossaa” yaagiis. Yaagin Muusee Xoossaa xeellanau yayyido gishshau, ba som77uwaa genttiis.

<sup>7</sup> GODAI qassikka hagaadan yaagiis; “Taani Gibxxe biittan ta asai tuggatiyo tuggaa geeshsha be7ada, eti bantta kaabbotuppe waassiyoo waasuwwaa siyada, taani eta waayiyaa qoppaas. <sup>8</sup> Hegaa gishshau, taani eta Gibxxe biittaa asatu kushiyaappe ashshanaunne he biittaappe eta kessada, aahonne lo77o biitti ehaanau wodhdhaas. He biittai maattainne eessai goggiyo biitta; he biittan Kanaaneti, Hiiteti, Amooreti, Parzzeti, Hiiwetinne Yaabuusati ha77i de7oosona. <sup>9</sup> Ha77i Israa7eelatu waasoi tana gakkiiis; Gibxxe biittaa asati eta naaqqiyo naaquwaanne taani be7aas; <sup>10</sup> hejaa gishshau, ha77i ba; ta asata, Israa7eelata Gibxxeppe kessana mala, Gibxxe kawuwaakko taani nena kiittais” yaagiis.

<sup>11</sup> SHin Muusee Xoossaa, “Kawuwaakko baanaunne Israa7eelata Gibxxeppe kessanau taani oonee?” yaagiis.

<sup>12</sup> Yaagin Xoossai a, “Taani nenaara gidana; qassi taani nena kiittidoogau malaatai haggaa: neeni he asaa Gibxxeppe kessido wode, ha deriyaa bollan intte Xoossau goinnana” yaagiis.

<sup>13</sup> Muusee Xoossaa, “Gido shin, taani Israa7eelatukko baada, eta, ‘Intte aawatu Xoossai tana inttekkoo kiittiis’ yaagin, eti tana, ‘A sunttai oonee?’ yaagidi oichchikko, he wode taani etayyo woiga yootanee?” yaagiis.

<sup>14</sup> Xoossai Muusa, “Taani tanattennee; neeni Israa7eelatuyyo, ‘Tanattennee inttekkoo tana kiittiis’ yaaga” yaagiis.

<sup>15</sup> Xoossai Muusa qassi, “Neeni Israa7eelata, ‘GODAI intte aawatu Xoossai, Abrahaama Xoossai, Yisaaqa Xoossai, Yaaqooba Xoossai, i tana inttekkoo kiittiis’ yaaga; hagee yeletaappe yeletaa gakkanau taani hassayettanau merinau ta suntta.

<sup>16</sup> “Ba; baada Israa7eela cimata shiishshada, ‘GODAI intte aawatu Xoossai, Abrahaama, Yisaaqanne Yaaqooba Xoossai taayyo qoncciiis; qonccidi tana, “Taani inttena xomoosaas; Gibxxen intte bolli aibi oosettidaakko taani be7aas. <sup>17</sup> Taani inttena Gibxxe biittaa tuggaappe kessada, pude maattainne eessai goggiyo Kanaanetu, Hiitetu, Amooretu, Parzzetu, Hiiwetunne Yaabuusatu biitti efaana ga uttaas” yaagiis’ yaaga.

<sup>18</sup> “Israa7eela cimati ne qaalaa siyana; hegaappe guyyiyan neeninne he cimati Gibxxe kawuwaakko biidi a, ‘GODAI, Ibraawetu Xoossai, nunaara gaittiis. Ha77i nuuni



heezzu gallassa ogiyaa bazzo hemetti biidi, GODAASSI, nu Xoossaassi, yarshshuwaa yarshshana mala nuna yedda' yaagite. <sup>19</sup> SHin Wolqqaama kushee a wolqqan yedissana xayikko, Gibxxe kawoi inttena yeddennaagaa taani erais. <sup>20</sup> Hegaa gishshau, taani ta kushiya yeddada, eta gidдон taani oottiyo ta malaatatu ubban Gibxxeta shocana. Hegaappe guyyiyan i inttena yeddana.

<sup>21</sup> “Qassi taani Gibxxetun ha asaa sabissana; yaatobare intte kiyiyo wode kushe mela kiyekketa. <sup>22</sup> Ibraawe maccaasi ubbai ba Gibxxe shooreekkonne ba son de7iya Gibxxe maccaasai oona gidinkka ikko biidi, bira miishshata, worqqa miishshatanne attuma naatinne macca naati maayana maayota ‘Immite’ giidi oichchana. Hegaadan oottidi intte Gibxxetu aquwaa bonqqana” yaagiis.

## 4

### *Xoossai Muusessi Gita Malaatata Oottiyo Wolqqa Immiiis*

<sup>1</sup> Muusee, “Eti tana ammanennan ixkikko, woikko taani odiyoogaa siyennan ixkidi, ‘GODAI neeyyo qonccibeenna’ giikko waanoo?” yaagidi zaariis.

<sup>2</sup> Yaagin GODAI a, “He ne kushiyan de7iyaagee aibee?” yaagidi oichchiis. Oichchin, “Xam77aa” yaagiis.

<sup>3</sup> Yaagin GODAI a, “Ane a sa7an ola” yaagiis. Yaagin Muusee he gatimaa sa7an oliis; olin shooshsha kiyiis; yaatin, Muusee appe woxxiis. <sup>4</sup> Hegaappe guyyiyan GODAI a, “Ne kushiya yeddada, a goinaa oiqqa” yaagiis. Muusee yeddidi shooshshaa oiqqin, shooshshai a kushiyan simmidi, gatimau laamettiis. <sup>5</sup> GODAI, “Hagee hanidoogee, ne aawatu Xoossai, Abrahaama Xoossai, Yisaaqa Xoossainne Yaaqooba Xoossai neeyyo qonccidoogaa eti ammananaassa” yaagiis.

<sup>6</sup> Hegaappe guyyiyan GODAI a, “Ne kushiya ne shophphan naaqqaa” yaagin, Muusee ba kushiya shophphan naaqqiis; i kessiyo wode a kushee barottidi shachchaadan booxxiis. <sup>7</sup> GODAI a, “Ne kushiya ne shophphan zaarada naaqqaa” yaagiis. Yaagin Muusee ba kushiya ba shophphau zaari naaqqidi kessiyo wode, a kushee simmidi hinkko bollaa mala gidiiis.

<sup>8</sup> Qassikka GODAI a, “Eti nena ammanennan ixkikkonne koiro malaataa ammanennan ixkikko, naa77anttuwaa eti ammanana. <sup>9</sup> SHin eti Xoossi oottiyo ha naa77u malaatata ammanana xayikko, woikko neeni odiyoogaa siyennan ixkikko, Naile SHaafaappe haattaa ekkada, mela biittan gussa; neeni shaafaappe ekkido haattai biittan suutta gidana” yaagiis.

<sup>10</sup> Yaagin Muusee GODAA, “Abeet Godau, taani hagaappe kasekka, woikko neeni ne ashkkaraayyo haasayidoosappe simminkka taani biddaa danddayikke; taani leddani haasayais; qassi ta inxxarssaikka lufa” yaagiis.

<sup>11</sup> GODAI a, “Asaassi doonaa medhdhidaagee oonee? A duude, woikko tulle oot-tiyaagee oonee? Xeelliyaagaanne qooqe oottiyai oonee? Tana GODAA gidikkinaayye? <sup>12</sup> Neeni ha77i ba; taani nena haasayanau maaddana; neeni gaanabaanne taani nena tamarissana” yaagiis.

<sup>13</sup> SHin Muusee GODAA, “Godau, hayyanaa, haga oottanau hara asa kiittarkkii!” yaagiis.

<sup>14</sup> Hegaappe guyyiyan GODAI Muuseyyo keehi hanqqettidi a, “Leewa gidiiya ne ishaa Aaroonihoo? I lo77o haasayana danddayiyoogaa taani erais; ha77i i nenaara gaittanau yiiddi ogiyaa bollan de7ees; i nena be7iyo wode a wozanai ufaittana. <sup>15</sup> Neeni, ‘Yaaga; yaaga’ gaada ayyo odana; taani inttena naa77aakka haasayana maaddanne intte oottanabaa tamarissana. <sup>16</sup> I asaayyo ne gishshaa haasayana; hegeenne, i neeyyo doona mala gidin, neeni ayyo Xoossa mala gidana giyoogaa. <sup>17</sup> SHin ooratta malaatata an oottanau, neeni ha gatimaa ekkada ba” yaagiis.

### *Muusee Gibxxe Simmiis*

<sup>18</sup> Hegaappe guyyiyan Muusee ba bolluwaa Yatirokko simmi biidi, “Hanno gakkanaassi paxa de7iya asi de7ikko be7anau, taani guyye ta asaakko Gibxxe boo?” yaagiis. Yaagin Yatiroi Muusa, “Ee ba; saro gakka” yaagiis.

<sup>19</sup> Muusee Midiyaama biittan de7ishin GODAI a, “Nena woranau koyida asati ubbai haiqqiichchido gishshau, guyye Gibxxe biitti simmada ba” yaagiis. <sup>20</sup> Yaagin Muusee ba keettaayyiyoonne ba attuma naata hariyaa togissi ekkidi, guyye Gibxxe simettaa doommiis; Muusee Xoossaa gatimaa ba kushiyan oiqqidi biis.

<sup>21</sup> GODAI Muusa, “Neeni Gibxxe simmada biyo wode, taani neeyyo immido wolqqan neeni oottana malaatata ubbaa Gibxxe kawuwaa sinttan neeni oottanaagaa baloppa. Yaaninkka asaa i yeddenna mala, taani a wozanaa dammissana. <sup>22</sup> He wode taani GODAI giyoobaa kawuwaassi hagaadan yaagada oda; ‘Israa7eeli ta baira na7aa. <sup>23</sup> I taayyo goinnana mala, ta na7aa neeni yeddana mala, taani neeyyo yootaas; shin neeni a yeddennan ixxadasa; heгаа gishshau, taani ne baira attuma na7aa worana” yaagees’ yaagada oda” yaagiis.

<sup>24</sup> Ogiyan shemppiyoosan GODAI Muuseera gaittiis; gaittidi a worana haniis. <sup>25</sup> A keetaayyiya Xippaara saluwaa ekkada, ba na7aa qaxxaraasu. Qaxxarada he shoohuwan Muusee tohuwaa bochchaasu. A Muusa, “Neeni taayyo tumu suutta bullachchaawaa” yaagaasu. <sup>26</sup> GODAI heгаа gishshau a worenna aggiis. He wode qaxxaraa malaatanau a, “Neeni taayyo suutta bullachchaawaa” yaagaasu.

<sup>27</sup> GODAI Aaroonaa, “Neeni Muuseera gaittanau bazzo ba” yaagiis. Yaagin i biidi, Muuseera Xoossaa deriyan gaittidi a yeriis. <sup>28</sup> Hegaappe guyyiyan Muusee GODAI ba bolli kiittido qaala ubbaanne oottana mala, bana azazido ooratta malaatatubaa ubbaa Aaroonayyo yootiis. <sup>29</sup> Muuseenne Aarooni biidi, Israa7eelatu cimata ubbaa shiishshidosona. <sup>30</sup> SHiishshin Aarooni GODAI Muuseyyo yootido qaala ubbaa etayyo odiis. Qassi Muusee malaatata he asaa sinttan oottiis. <sup>31</sup> Etikka ammanidosona. GODAI etau qoppidoogaanne eta tuggaa be7idoogaa siyido wode, eti gufannidi goinnidosona.

## 5

### *Muuseenne Aarooni Gibxxe Kawuwaa Sintti SHiiqidosa*

<sup>1</sup> Hegaappe guyyiyan Muuseenne Aarooni Gibxxe kawuwaakko yiidi a, “GODAI, Israa7eela Xoossai hagaadan yaagees; ‘Ta asai taayyo bazzon baalaa bonchchana mala, eta yedda’ yaagees” yaagidosona.

<sup>2</sup> Yaagin kawoi, “Taani ayyo azazettada Israa7eela yeddana he GODAI oonee? Taani GODAA erikke; Israa7eelakka yeddikke” yaagiis.

<sup>3</sup> Hegaappe guyyiyan eti, “Ibraawetu Xoossai nunaara gaittiis. Ha77i nuuni GODAAYYO, nu Xoossaayyo, yarshshuwaa yarshshanau heezzu gallassa ogiyaa bazzo giddo baanau nuna yeddarkkii; hinna xayikko, i nuna boshan woikko olan worana” yaagidosona.

<sup>4</sup> SHin Gibxxe kawoi yaagiis; “Muusee! Aaroonaa! Asaa aissi oosuwaa diggeetii? Intte oosuwau simmidi biite” yaagiis. <sup>5</sup> Kawoi he wode, “Be7ite, ha biittan asai corattiis; qassi intte eta oosuwaa diggeeta” yaagiis.

<sup>6</sup> Kawoi he gallassi Gibxxetu kaabbotanne Israa7eelatu daguwaa sunttata azaziiddi, <sup>7</sup> “Harooodeegaadan xuubiyaa oottiyo utulaa asaayyo ehi immoppite; eti utulaa banttau bi biidi shiishshona; <sup>8</sup> shin eti qoodan kaseegaa keena xuubiyaa medhdhidi, sheedhdhanaadan azazite; he qoodaappe pacissoppite; aissi giikko, eti azalla; eti, ‘Nuuni nu Xoossaayyo yarshshuwaa yarshshana mala, nuna yedda’ yaagidi waassiyoogee hegaassa. <sup>9</sup> Eti oosuwaa sheekkana malanne worddo haasayaa siyennan aggana mala, etayyo oosuwaa deexettite” yaagidi azaziis.

<sup>10</sup> Hegaappe guyyiyan, he kaabbotinne he sunttati kiyidi asaa, “Kawoi hagaadan yaagees; ‘Simmi taani intteyyo mulekka utulaa immikke; <sup>11</sup> intte utulaa demmana danddayiyoosaappe intte huuphen shiishshite; shin intte sheedhdhiyo xuubiyaa qoodai mulekka paccenna’ yaagiis” yaagidosona. <sup>12</sup> Yaagin asai utulaassi haniyaabaa shiishshanau Gibxxe biitta ubban laalettis. <sup>13</sup> Gibxxetu kaabboti eta, “Intteyyo utulaa immiyo wode intte hachchi hachchi oottiyoogaa keenaa oottite” yaagidi eta godatidosona. <sup>14</sup> Gibxxetu kaabboti Israa7eelatu daguwaa sunttata wadhdhidi, “Intte kase oottiyoogaa keena xuubiyaa zino woikko hachchi aissi ootti wurssibeekketii?” yaagidi oichchidosona.

<sup>15</sup> Hegaappe guyyiyan Israa7eela sunttati biidi kawuwaayyo magannidosona; eti a, “Neeni ne ashkkarata hagaadan aissi oottai? <sup>16</sup> Ne ashkkaratuyyo utulaa immokkona; shin, ‘Xuubiyaa medhdhite’ yaagoosona; yaagidi nuna ne ashkkarata wadhdhoosona; shin balai ne asaa bollaana” yaagidosona.

<sup>17</sup> SHin kawoi eta, “Ha azallati! Intte azalla! Hegaa gishshau, intte zaari zaaridi, ‘Nuuni GODAAYYO yarshshana baanau nuna yedda’ yaageeta. <sup>18</sup> Ha77i biite; biidi oottite; eti intteyyo aiba utulakka immokkona; shin intte kaseegaa keena xuubiyaakka medhdheeta” yaagiis.

<sup>19</sup> Israa7eelatu sunttati, “Intte hachchi hachchi medhdhiyo xuubiyaa qoodaa kaseegaappe pacissoppite” giido wode, eti metuwan gelidoogaa akeekidosona.

<sup>20</sup> Eti kawuwaa matappe kiyiiddi, Muuseenne Aarooni etaara gaittanau naagiyaageeta demmidosona. <sup>21</sup> Eti, “Inttena GODAI xeello! Intte bolli i pirddo! Intte nuna kawuwaaninne a oosanchchatun ixissideta; qassi eti nuna worana mala, bisuwaa eta kushiyan wottideta” yaagidosona.

### *Muusee GODAASSI Maganniis*

<sup>22</sup> Muusee GODAAKKO simmidi, “Godau, neeni ha asaa bolli metuwaa aissi ehaadii? Neeni tana kiittidoi hagaassee? <sup>23</sup> Taani ne sunttan kawuwaayyo haasayanau biido wodeesappe doommin, i ha asaa bolli metuwaa ehiis. Qassi neenikka ne asaa mule ashshabaakka” yaagiis.

## 6

<sup>1</sup> Hegaappe guyyiyan GODAI Muusa, “Taani Gibxxe kawuwaa oottanabaa neeni ha77i be7ana; ta wolqqaama kushiya gaasuwan i eta yeddana; ta wolqqaama kushiya gaasuwan i eta ba biittaappe laaggidi kessana” yaagiis.

### *Muuse Xeesettaabaa*

<sup>2</sup> Xoossai qassikka Muusa, “Taani GODAA; <sup>3</sup> taani Abrahaamayyo, Yisaaqayyoonne Yaaqoobayyo Ubbaa Danddayiya Xoossaa gidada qonccaas; shin taani, ‘GODAA’ giyo ta sunttan, tanatetta eta erissabeikke. <sup>4</sup> Qassi taani etayyo eti bete gididi de7ido Kanaane biittaa immanau ta maachchaa etaara maacettaas. <sup>5</sup> Qassikka Gibxxe asati ailleyiyo Israa7eelatu ooliyaa taani siyada, ta maachchaa hassayaas.

<sup>6</sup> “Hegaa gishshau, neeni Israa7eelata, ‘Taani GODAA; taani inttena Gibxxetu naaquwaappe kessana; taani inttena eta aillettaappekka goqa kessana; qassi taani inttena ta gita wolqqaaninne hanttaara pirddan wozana. <sup>7</sup> Taani inttena ta huuphe asadan ekkanne taani intte Xoossaa gidana. He wode intte taani GODAA intte Xoossaa inttena Gibxxetu aillettaappe kessidaagaa gidiyooogaa erana. <sup>8</sup> Qassi taani inttena Abrahaamayyo, Yisaaqayyoonne Yaaqoobayyo immanau ta kushiya denttada caaqqido biittau ehaana; he biittaa taani intteyyo intte gade oottada immana; taani GODAA’ yaaga” yaagiis.

<sup>9</sup> Muusee haggaa Israa7eelatuyyo yootiis; shin eta heennai meqqido gaasuwaaninne meqetti banna ailletta gaasuwan a qaala siyibookkona.

<sup>10</sup> Hegaappe guyyiyan GODAI Muusa, <sup>11</sup> “Ba; baada Gibxxe kawuwaa, ‘Israa7eelata ne biittaappe kessada yedda’ yaagada yoota” yaagiis.

<sup>12</sup> SHin Muusee GODAA, “Israa7eelati tabaa siyennan ixxaappe attin, taani deddotiya inxxarssan haasayiyoogaa kawoi aissi siyii?” yaagiis.

<sup>13</sup> GODAI Muusanne Aaroona, “Biite; biidi, intte Israa7eela asaa Gibxxeppe kessana mala, taani inttena yeddidoogaa Israa7eela asaassinne Gibxxe kawuwaassi yootite” yaagidi azaziis.

### *Muusenne Aaroona Yeletaabaa*

<sup>14</sup> Eta so asatu halaqati hageeta. Israa7eelayyo baira na7aa Roobeela attuma naati, Heenooka, Paalu, Hexiroonanne Karmma; hageeti Roobeela yarata.

<sup>15</sup> Simoona attuma naati, Yimu7eela, Yaamiina, Ohaada, Yaakiina, Xoohaaranne Kanaane biittaa maccaaseeppe yelettida SHaa7ula; hageeti usuppunati Simoona yarata.

<sup>16</sup> Leewa attuma naati bantta yeletaa maaraadan Gershshoona, Qahaatanne Maraara. Leewi xeetanne hasttamanne laappun laittaa de7iis.

<sup>17</sup> Gershshoona attuma naati bantta yaran yaran Liibinanne SHim77a geetettoosona.

<sup>18</sup> Qahaata attuma naati Amiraama, Yixihaara, Kebroonanne Uzzi7eela. Qahaati xeetanne hasttamanne heezzu laittaa de7iis.

<sup>19</sup> Maraara attuma naati Maahilanne Musha giyoogeeta.

Bantta Yeletaa maaran Leewa yarati hageeta.

<sup>20</sup> Amiraami ba aawaa michchiyo Yokebeedo machchiis. A Aaroonanne Muusa ayyo yelaasu. Amiraami xeetanne hasttamanne laappun laittaa de7iis.

<sup>21</sup> Yixihaara attuma naati, Qoraaha, Nefeganne Ziikira.

<sup>22</sup> Uzzi7eela attuma naati, Mishaa7eela, Elxxaafaananne Siitira.

<sup>23</sup> Aarooni Aminadaaba na7iyo, Na7asoonna michchiyo Elisheebo machchiis. Yaatin a ayyo Nadaaba, Abiiha, El77aazaranne Itaamaara yelaasu.

<sup>24</sup> Qore attuma naati, Asiira, Elqqaananne Abiyaasaafa; hageeti Qore yartu maizza aawata.

<sup>25</sup> Aaroona na7ai El77aazari Puti7eela naatuppe issinno machchiis; a ayyo Piinihaasa yelaasu.

Hageeti bantta yaran yaran Leewatu keettaa asaa halaqata.

<sup>26</sup> GODAI, “Gibxxe biittaappe Israa7eelata eta citan citan kessite” yaagidoi ha Muusanne ha Aaroona. <sup>27</sup> Israa7eelata Gibxxe biittaappe kessiyooogaa Gibxxe kawuwaassi haasayidaageeti eta. Hageeti he Muusanne he Aaroona. <sup>28</sup> GODAI Gibxxen Muuseyyo haasayido wode a, <sup>29</sup> “Taani GODAA; taani neeyyo yootiyoobaa ubbaa neeni Gibxxe kawuwaayyo yoota” yaagiis.

<sup>30</sup> SHin Muusee GODAA, “Taani deddotiya inxxarssan haasayiyaagaa gidishin, kawoi taani yootiyoobaa waati siyanee?” yaagiis.

## 7

<sup>1</sup> Hegaappe guyyiyan GODAI Muusa, “Be7a; taani nena Gibxxe kawuwaayyo Xoossa mala oottaas; ne ishai Aarooni ne hananabaa yootiyaagaa gidana; <sup>2</sup> taani nena azazido ubbaa neeni ayyo yootaasa; ne ishaa Aarooni Israa7eelata ba biittaappe kessi yeddana mala, kawuwaayyo yootees. <sup>3</sup> SHin taani kawuwaa wozanaa dammissana; taani Gibxxe biittan ta ooratta malaataanne maalaalissiyaabaa darissada oottikkokka, <sup>4</sup> i intte yootiyoobaa siyenna. He wode taani ta kushiya Gibxxetu bolli denttana; taani ta citaa, ta asaa Israa7eela wolqqaama pirddan Gibxxeppe kessana. <sup>5</sup> Qassi Gibxxeti, taani ta kushiya Gibxxe bolli denttada, Israa7eelata eta giddoppe kessido wode, taani GODAA gidiyooogaa eti erana” yaagiis.

<sup>6</sup> Muuseenne Aarooni likke GODAI eta azazidoogaadan oottidosona. <sup>7</sup> Eti kawuwaayyo yootiyo wode, Muusee hosppun tammu laitta asa; Aarooni qassi hosppun tammanne heezzu laitta asa.

### *Aarooni Gatimai SHOoshsha Kiyiis*

<sup>8</sup> GODAI Muusanne Aarooni hagaadan yaagiis; <sup>9</sup> “Kawoi inttena, ‘Xoossai oottiyo malaataa tana bessite’ giyo wode, neeni Aarooni, ‘Ne gatimaa ekkada, kawuwaa sinttan ola’ yaaga; yaatobare i shooshsha kiyana” yaagiis. <sup>10</sup> Yaagin Muuseenne Aarooni kawuwaakko gelidosona; gelidi likke GODAI eta azazidoogaadan oottidosona; Aarooni ba gatimaa kawuwaa sinttaaninne a oosanchchatu sinttan oliis; olin shooshsha kiyiis. <sup>11</sup> Hegaappe guyyiyan kawoi aadhdhida eranchchatanne bitanchchata xeesisiis; xeesissin etikka, ha Gibxxetu shareechchoti bantta eeqaan hegaadan oottidosona. <sup>12</sup> Eti ubbaikka bantta gatimaa gatimaa olin, gatimati shooshsha kiyidosona; shin Aarooni gatimai eta gatimata mitti bayiis. <sup>13</sup> Gidikkonne GODAI yootidoogaadankka kawuwaa wozanai dammiis; i eta oduwaa siyennan ixxiis.

### *Haattai Suuttu Laamettiis*

<sup>14</sup> GODAI Muusa, “Kawuwaa wozanai dammiis; asaa i yeddennan ixxiis. <sup>15</sup> Kawoi haattau biyo wode, guurada neeni akko ba; baada aara gaittanau neeni Naile SHAafaa doonan eqqa; shooshshau laamettida gatimaa oiqqaa ekkada ba. <sup>16</sup> Neeni a, ‘GODAI, Ibraawetu Xoossai nena, “Bazzuwan taayyo goinnana mala, ta asaa yedda” yaagidi, tana neekko kiittiis; shin hanno gakkanaashin neeni siyabaakka. <sup>17</sup> GODAI, “Taani GODAA gidiyoogaa neeni hagan erana” yaagees. Taani Naile SHAafaa haattaa ta kushiyan de7iya gatiman shocana; shocin haattai suuttu laamettana. <sup>18</sup> Naile SHAafaa moleekka haiqqana; shaafaikka xinqqana; Gibxxeti he shaafaa haattaa uyanau danddayokkona’ yaagada oda” yaagiis.

<sup>19</sup> GODAI Muusa hagaadan yaagiis; “Neeni Aarooni, ‘Ne gatimaa oiqqada Gibxxe haattatu bolli, shaafatu bolli, zara haattatu bolli, dalbbanttatu bollinne haattaa dagaiyyoobatu ubbaa bolli ne kushiya micca’ yaaga; i miccin eti suuttu laamettana; Gibxxe biitta ubban, harai attin, mittaappenne shuchchaappe woocidi kessido haattaa tigiyo miishshatu ubban suutti kumana” yaagiis.

<sup>20</sup> Muuseenne Aarooni GODAI azazidoogaadan oottidosona. Kawuwaa sinttaaninne a sunttatu sinttan i ba gatimaa denttidi, abbaa haattaa shociis; shocin haatta ubbai suuttu laamettiis. <sup>21</sup> He abbaa haattaa gidдон de7iya moleti haiqqidosona; shaafaa haattai keehi zeeqqido gishshau, Gibxxe asai uyanau danddayibeenna. Gibxxen mule ubbasan suuttai kumiis. <sup>22</sup> SHin Gibxxe shareechchoti bantta eeqaan hegaadan oottidosona; GODAI yootidoogaadankka kawuwaa wozanai dammin, Muuseenne Aarooni odidoogaa siyennan ixxiis. <sup>23</sup> Hegaappe guyyiyan kawoi hagau ainne hirggennan ba soo simmidi biis. <sup>24</sup> Gibxxe asai ubbai Naile SHAafaa haattaa uyanau danddayibeenna gishshau, uyiyo haatta demmanau Naile SHAafaa lanqqiyan ollaa bookkidosona.

<sup>25</sup> GODAI haattaa shocoosappe laappun gallassa gidiiis.

## 8

### *SHodhdhiyaa*

<sup>1</sup> Hegaappe guyyiyan GODAI Muusa, “Ba; Gibxxe kawuwaakko baada, ‘GODAI hagaadan yaagees; “Taayyo goinnana mala, ta asaa yedda. <sup>2</sup> Neeni eta yeddennan ixxiikko, taani ne biitta ubban shodhdhiyaa boshaa yeddana. <sup>3</sup> Naile SHAafan shodhdhee shohattana. Eti shohatti kiyidi ne soo, ne siirixaa, ne arssaa gidдо, ne sunttatu keettaa gidдо gelana; ne asaa bolli kiyana; ne coociyaanne ne munaqa keretun gelana. <sup>4</sup> SHodhdheti ne bolli, ne asaa bollinne ne sunttatu ubbaa bolli kiyana” yaagees’ yaagada oda” yaagiis.



<sup>5</sup> Hegaappe guyyiyan GODAI Muusa, “Neeni Aaroona, ‘Ne gatimaa oiqqada, shaafatu bolli, zara haattatu bollinne dalbbantatu bolli ne kushiyaa micca; miccada shodhdheti Gibxxe biittaa bollan kiyanaadan ootta’ yaagada yoota” yaagiis.

<sup>6</sup> Yaagin Aarooni Gibxxe haattatu bolli ba kushiyaa micciis; miccin shodhdheti kiyidi, Gibxxe biittaa maayidosona. <sup>7</sup> SHin shareechchotikka bantta eeƿan hegaadan oottidosona; etikka Gibxxe biittan shodhdhee kiyanaadan oottidosona.

<sup>8</sup> Kawoi Muusanne Aaroona xeesissidi, “Ha shodhdheta taappenne ta asaappe diggana mala, GODAA intte woossite; yaanikko GODAASSI yarshshuwaa yarshshana mala, taani asaa yeddana” yaagiis.

<sup>9</sup> Yaagin Muusee kawuwaa, “SHodhdheti neeppenne ne sooppe xayana malanne Naile SHAafaa xalaalan attana mala, taani neeyyo, ne sunttatuyyoonne ne asaayyo woossana wodiya neeni keera” yaagiis.

<sup>10</sup> Yaagin kawoi, “Wontto” yaagiis.

Yaagin Muusee, “Nu GODAA Xoossaa malai ooninne bainnaagaa neeni erana mala, neeni giidoogaadan hanana. <sup>11</sup> He shodhdheti neeppenne, ne keettaappe, ne sunttatuppenne ne asaappe xayana; eti Naile SHAafaa xalaalan attana” yaagiis.

<sup>12</sup> Muuseenne Aarooni kawuwaa matappe kiyidosona; kawuwaa bolli Muusee ehiido shodhdhetubaa Muusee GODAA woossiis. <sup>13</sup> Woossin GODAI Muusee oichchiidoogaadan oottiis; shodhdheti son kareeninne dembban haiqqidosona. <sup>14</sup> Gibxxe asai eta shiishshi shiishshidi dooridosona; biittainne heгаа xinqquwan zeeqqiis. <sup>15</sup> SHin kawoi peeƿaa demmido wode a wozanai dammiis; GODAI yootidoogaadankka, i Muuseenne Aarooni odido oduwaa siyennan ixxiis.

### *Cuuchchaa*

<sup>16</sup> GODAI hegaappe guyyiyan, Muusa hagaadan yaagiis; “Neeni Aaroona, ‘Ne gatimaa miccada, biittaa buhiyaa shoca’ yaaga; shocin Gibxxe biitta ubban buhee cuuchcha kiyana” yaagiis. <sup>17</sup> Yaagin eti hegaadan oottidosona; Aarooni gatimaa oiqqidi ba kushiyaa micciis; ba gatiman biittaa buhiyaa shociis; shocin asaa, mehiyaanne do7aa bolli cuuchchai yi bayiis. Gibxxe biittan ha gaxaappe ya gaxaa gakkanaashin, buhe ubbai cuuchcha kiyiis. <sup>18</sup> SHareechchotikka bantta eeƿan hegaadan oottanau mali be7idosona; shin danddayibookkona. Cuuchchai asaa bollan, mehiyaa bollaanne do7aa bollan kumiis. <sup>19</sup> SHareechchoti kawuwaa, “Hagee Xoossaa ooso” yaagidosona. SHin kawuwaa wozanai dammiis; GODAI giidoogaadankka, i eti odiyoobaa siyennan ixxiis.

### *Dukkiya Udunxxiyaa*

<sup>20</sup> GODAI Muusa, “Guurada denddada, kawoi shaafaa biishin aara gaitta; gaittada neeni a, ‘GODAI yaagees; “Taayyo oottana mala, ta asaa yedda; <sup>21</sup> neeni ta asaa yeddenan ixkikko, taani ne bolli, ne sunttatu bolli, ne asaa bollinne ne keettatu giddo gawwiina udunxxiyaa yeddana; Gibxxetu keettaanne eti de7iyo biitta ubban udunxxee kumana. <sup>22</sup> SHin he gallassi ta asai de7iyo Goshena biittan udunxxee gawwattennaadan taani teƿƿada, eta biittaa zaggana; taani GODAI, ha biittan de7iyoogaa neeni hegan erana. <sup>23</sup> Taani ta asaanne ne asaa zaggana; ha gita malaatai wontto hanana” yaagees’ yaagada oda” yaagiis.

<sup>24</sup> GODAI hegaappe guyyiyan, giidoogaadan oottiis; kawuwaa sooninne a sunttatu son daro gawwiina udunxxee yiis; yiidi Gibxxe biittaa ubbaa bashshiis.

<sup>25</sup> He wode kawoi Muusanne Aaroona xeesissidi, “Biite; ha biittan intte Xoossaassi yarshshite” yaagiis.

<sup>26</sup> SHin Muuse, “Hegee likke gidenna; nuuni GODAA nu Xoossaassi shiishshiyo yarshshoti Gibxxeta sheneyiyaabaa gidana; nuuni eta sheneyiya yarshshota eti xeelishin yarshshikko, eti nuna shuchchan caddokkonaa? <sup>27</sup> Nuuni GODAASSI, nu Xoossaassi, yarshshota shiishshanau i nuna azaziyoogaadan, heezzu gallassa ogiyaa bazzuwaa baana koshshees” yaagiis.

<sup>28</sup> Yaagin kawoi, “GODAASSI, intte Xoossaassi, intte bazuwaa biidi yarshshana mala, taani inttena yeddana; shin intte haakkidi booppite; taayyo ha77i woossite” yaagiis.

<sup>29</sup> Muusee, “Taani ne matappe kiyosaarakka GODAA woossana; ha gawwiina udunxxee wontto kawuwaappe, a sunttatuppenne a asaappe kichchana. SHin GODAAYYO yarshshanau asaa yeddennan ixnanau kawoi nuna zaari cimmenna mala akeeko” yaagiis.

<sup>30</sup> Hegaappe guyyiyan Muusee kawuwaa matappe kiyidi, GODAA woossiis.

<sup>31</sup> Woossin GODAI Muusee oichchidoogaadan oottiis; udunxxee kawuwaappe, a sunttatuppenne a asaappe issoinne attennan kichchiis. <sup>32</sup> SHin ha77ikka qassi kawuwaa wozanai dammin, asaa yeddennan ixxiis.

## 9

### *Mehiyaa Bolli Boshai Wodhdhiis*

<sup>1</sup> GODAI Muusa hagaadan yaagiis; “Ba; Gibxxe kawuwaakko baada, ‘GODAI, Ibraawetu Xoossai nena, “Eti taayyo goinnana mala ta asaa yedda” yaagees. <sup>2</sup> Neeni yeddennan ixxada, eta oiqqa uttiyaabaa gidikko, <sup>3</sup> taani deriyan de7iya ne mehiyaa bolli, paratu bolli, haretu bolli, gaameelatu bolli, miizzatu bolli, dorssatu bollinne deeshshatu bolli hanttaara boshaa yeggana. <sup>4</sup> SHin taani GODAI Israa7eela mehetu gidduwaaninne Gibxxetu mehetu gidduwan zagaa medhdhana. Israa7eelatu mehiyaappe issoinne haiqqenna’ yaaga” yaagiis.

<sup>5</sup> GODAI wodiya keeridi, “Taani wontto haggaa ha biittaa bollan oottana” yaagiis. <sup>6</sup> Yaagidi wonttetta gallassi GODAI heggaa oottiis. Gibxxe asaa mehe ubbai haiqqiis; shin Israa7eela asaa mehiyaappe issoinne haiqqibeenna. <sup>7</sup> Kawoi ha yohuwaa paaccanau asa kiittidi, Israa7eelatu mehiyaappe, harai atto, issoinne haiqqibeennaagaa eriis. Gidikonne kawuwaa wozanai dammidosaappe simmennan ixxin, asaa yeddennan diggiis.

### *Merkkuwaa*

<sup>8</sup> GODAI hegaappe guyyiyan, Muusanne Aarona, “Intte kushiya kunttidi coociyaappe bidinttaa kuuccite; kuuccidi Muusee kawoi xeelishin, heggaa pude carkkuwau laalo; <sup>9</sup> hegee Gibxxe biitta ubbaa bolli liiqo buhe gidana; Gibxxe biitta ubban asaa bollinne mehiyaa bolli giyyiya merkkoi wodhdhana” yaagiis. <sup>10</sup> Yaagin eti coociyaappe bidinttaa ekkidi, kawuwaa sinttan eqqidosa; Muusee heggaa pude carkkuwan laalin, asaa bollinne mehiyaa bolli giyyiya merkkoi wodhdhi bayiis. <sup>11</sup> SHareechchotikka eta bollinne Gibxxe asaa ubbaa bolli wodhdhida merkkoi eesuwaa diggin, Muusee sinttan eqqanau danddayibookkona. <sup>12</sup> SHin GODAI Muusessi giidoogaadanka, kawuwaa wozanaa dammissido gishshau, Muuseenne Aarooni yootiyoogaa kawoi siyennan ixxiis.

### *SHachchaa*

<sup>13</sup> Hegaappe guyyiyan GODAI Muusa, “Guuran denddada baada, kawuwaara gaitta; gaittada a, ‘GODAI, Ibraawetu Xoossai nena, “Taayyo goinnana mala ta asaa yedda.

<sup>14</sup> Hinna xayikko, ne bolli, ne sunttatu bollinne ne asaa bolli ta boshaayyo de7iya kumetta wolqqaa taani kiittana; biittan sa7an ta mali bannaagaa neeni hegan erana.

<sup>15</sup> Taani hannode ta kushiya yeddada, nenanne ne asaa boshan ha sa7aa bollappe mulluccu oottarganashin. <sup>16</sup> Taani nena ta wolqqaa bessanaunne ta sunttai sa7a

ubbaa bollan odettanau, hegau taani nena paxa wottaas. <sup>17</sup> Neeni ha77ikka otorettada, ta asaa yeddennan ixxadaa. <sup>18</sup> Hegaa gishshau, taani wontto hannoo de Gibxxee Gibxxe gidoosappe hachchi gakkanaassi mulekka wodhdhi erenna, keehippe gita shachchaa yeggana. <sup>19</sup> Ha77i neeni ne mehiyaanne gaden neeyyo de7iyaabaa ubbaa eesuwan soo gelissanaadan azaza; aissi giikko, soo geliichchennan biron gaden de7iya asa ubbaa bollinne mehe ubbaa bolli shachchai wodhdhana; wodhdhin eti haiqqana” yaagees’ yaaga” yaagiis. <sup>20</sup> Kawuwaa sunttatuppe GODAA qaalaayyo yayyidaageeti bantta ailletanne bantta mehiyaa eesotidi soo gelissidosona. <sup>21</sup> SHin GODAA qaalaa karidaageeti bantta ailletanne bantta mehiyaa gaden aggi bayidosona.

<sup>22</sup> Hegaappe guyyiyan GODAI Muusa, “Gibxxe biitta ubbaa bollan: asa bolli, mehiyaa bollinne Gibxxe goshshatun dicciyaabaa ubbaa bolli shachchai wodhdhanaadan, ne kushiya saluwaa dentta” yaagiis. <sup>23</sup> Muusee ba gatimaa saluwaa zaaridi denttido wode, GODAI dadaanne shachchaa yeddiis; wolqqanttainne duge sa7au wolqqammiis. GODAI Gibxxe biittan shachchaa yaati bukissiiis. <sup>24</sup> SHachchai wodhdhiis; wolqqanttai yaanne haanne wolqqammiis; Gibxxe biittan kawoi kawotoosappe doommin, Gibxxe biitta ubban wodhdhida shachcha ubbaappe hegee aadhdiya iita shachcha. <sup>25</sup> He shachchai Gibxxe biitta ubban gaden de7iya ubbabaa, asaakka mehiyaakka shociis; gaden mokkidabaa ubbaa duge zaaridi diippiis; mitta ubbaa mentterettiis. <sup>26</sup> SHachchi wodhdhibeenna biitti Israa7eelati uttido Goshena biittaa xalaala.

<sup>27</sup> Kawoi kiittidi Muusanne Aarona xeesissiiis; xeesissidi, “Ha77i simmi, taani nagaraa oottaas; GODAI tumanchcha; taaninne ta asai mooranchcha. <sup>28</sup> Nuuyyo dadainne shachchai darido gishshau, GODAA woossite. Taani inttena yeddana; simmi hagaappe sinttan intte hagan takkekketa” yaagiis.

<sup>29</sup> Muusee a, “Taani ha katamaappe kiyido wode, taani woossanau ta kushiya GODAAKKO miccana; yaatobare dadai aggana; qassi shachchaa woretainne attana; sa7ai GODAABAA gidiyooгаа neeni hegan erana. <sup>30</sup> SHin neeninne ne sunttati GODAU Xoossau ha77inne yayyennaagaa taani erais” yaagiis.

<sup>31</sup> Talbbai ciyyido gishshaunne banggai tiyattido gishshau, talbbainne banggai shachchan bayidosona. <sup>32</sup> SHin gistteenne qambarai ka77iyo wodee biroona gidido gishshau, eti shachchan bayibookkona.

<sup>33</sup> Hegaappe guyyiyan Muusee kawuwaa achchappe dendididi, katamaappe gaxaa kiyiis. Kiyidi ba kushiya GODAAKKO micciis; yaatin dadainne shachchai caggiis; iraiikka biittaa bollan duge tigettiyoogee eqqiis. <sup>34</sup> SHin kawoi irai, shachchainne dadai aggidooгаа be7ido wode zaaridikka nagaraa oottiis; ikka a sunttatika bantta wozanaa dammissidosona. <sup>35</sup> GODAI Muuse doonan haasayidoogaadankka kawuwaa wozanai dammin, Israa7eelata i yeddennan ixxiis.

## 10

### *Booliyaa*

<sup>1-2</sup> Hegaappe guyyiyan Muusa GODAI hagaadan yaagiis; “Gibxxe kawuwaakko ba; aissi giikko, taani Gibxxeta waata qaxxayidaakkonne ta gita malaataa eta gidдон waata oottidaakko intte intte naatussinne intte naatu naatussi yootana mala, qassi inttekka taani GODAA gidiyooгаа erana mala, ta gita malaataa eta gidдон oottanau a wozanaanne a sunttatu wozanaa taani dammissa wottaas” yaagiis.

<sup>3</sup> Yaagin Muuseenne Aarooni kawuwaakko gelidi a, “GODAI, Ibraawetu Xoossai nena hagaadan yaagees; ‘Neeni taayyo azazettennan aude gakkanaassi ixxuutee? Taayyo oottana mala ta asaa yedda. <sup>4</sup> Neeni eta yeddennan ixxiikka, ne biittaa bolli taani wontto booliyaa ehaana; <sup>5</sup> boolee ooninne biittaa demmanau danddayennaadan biittaa kammana. Intteyyo shachchaappe attida guuttabaa, gaden dicciya mittaikka antennan ubbaa maana. <sup>6</sup> Ne keettan ne sunttatu keettaanne Gibxxe asaa ubbaa keettan eti

kumana; hegee ne aawati, woikko ne maizza aawati ha biittan uttoosappe hanno gakkanaassi mule be7ibeennaba' yaagees" yaagidosona. Hegaappe guyyiyan Muusee kawuwaa sinttappe kiyidi biis.

<sup>7</sup> Bin kawuwaa sunttati kawuwaa, "Ha bitanee nuuyyo aude gakkanaassi pire gidanee? Eti GODAU, bantta Xoossau, goinnana mala, neeni asaa yedda; Gibxxe biittai bayidoogaa neeni ha77inne akeekikkii?" yaagidosona.

<sup>8</sup> Hegaa gishshau, kawoi Muusanne Aarona guyye zaarissidi, "Biite; GODAU, intte Xoossau goinnite; shin biyaageeti oonee oonee?" yaagiis.

<sup>9</sup> Yaagin Muusee, "Nuuni nu guutta naatuuranne cimatuura, nu attuma naatuuranne macca naatuura, nu dorssaa wudetuuranne miizzaa wudetuura issippe baana; aissi giikko, nuuni biyoosan GODAA baalaa bonchchanau koshshees" yaagiis.

<sup>10</sup> Kawoi, "Taani inttena intte naatuuranne intte maccaasaara yeddiyaabaa gidikko, GODAI inttena naaganau koshshees. SHin be7ite; intte intte wozanan iitabaa halchchidoogee qoncciyen erettees. <sup>11</sup> CHii, intte, 'Yedda' giiddi gam77idoogee attumaasaa gidiyo gishshau, attumaasa xalaalai biite; biidi GODAAYYO goinnite" yaagiis. Hegaappe guyyiyan Muusanne Aarona kawuwaa sinttappe yeddetidi kessidosona.

<sup>12</sup> GODAI Muusa, "Boolee Gibxxe biittan gau7anaadan, shachchaappe attidi gaden dicciyaabaa ubbaa lim77i oottana mala, ne kushiyaa Gibxxe biittaa bollan micca" yaagiis.

<sup>13</sup> Yaagin Muusee ba gatimaa Gibxxe biittaa bollan miccin, GODAI arshsho bagga carkkuwaa he gallassa ubbaanne he qamma ubbaa he biittaa bollan carkkissii; wonttin he carkkoi booliyaa ehiis. <sup>14</sup> Boolee Gibxxe biitta ubbaa bolli woraajjidi, biitta ubbasan gau7idi uttiis. Hagaa keena boole boshi he biittan hagaappe kasenne hanibeenna; woikko hagaappe sinttaunne zaarettidi hanenna. <sup>15</sup> Biittai karexxana gakkanau boolee biitta ubbaa kammiis. He boolee shachchaappe attidi gaden dicciyaabaa ubbaanne mitta bollan de7iya aife ubbaa lim77i oottiis. Yaatin mittaa bollan irxxa haitti, woikko gaden ataakiltee Gibxxe biitta ubban aibinne attibeenna.

<sup>16</sup> Kawoi Muusanne Aarona eesuwan xeesissidi, "GODAA intte Xoossaanne inttena taani naaqqaa; <sup>17</sup> simmi intte taayyo ta nagaraa ha issitoo xalaalaayyo atto giite; ha woriya boshaa taappe diggana mala, GODAA intte Xoossaa woossite" yaagiis.

<sup>18</sup> Muusee kawuwaa matappe kiyidi, GODAA woossii. <sup>19</sup> Woossin GODAI he carkkuwaa arggo bagga wolqqaama carkkuwau laammiis; laammin booliyaa tookki ekki efidi, Zo7o Abban yeggiis. Gibxxe biitta ubban issi booleenne attibeenna. <sup>20</sup> Gidikonne, GODAI kawuwaa wozanaa dammissido gishshau, Israa7eelata yedden-nan ixxiis.

### *Sakkana Xumaa*

<sup>21</sup> GODAI Muusa, "Gibxxe biittan asi bochchi be7anau danddayiyo keena xumai xumana mala, ne kushiyaa saluwaa dentta" yaagiis. <sup>22</sup> Yaagin Muusee ba kushiyaa saluwaa denttiis; Gibxxe biitta ubban heezzu gallassa kumettaa sakkana xumai xumiis.

<sup>23</sup> He heezzu gallasatun asi ooninne issi issuwaa be7ennan, woikko ba sohuwaappe denddidi beennan takkiis. SHin Israa7eelati de7iyoosan ubban etau poo7oi de7ees.

<sup>24</sup> Kawoi Muusa xeesissidi, "Biite; biidi GODAAYYO goinnite; intte maccaasaikka intte naatika inttenaara baanau danddayoosona. Intte dorssaa wudiyaanne intte miizzaa wudiya xalaalaa yeggidi biite" yaagiis.

<sup>25</sup> SHin Muusee a, "Nuuni yarshshuwaanne xuuggidi yarshshiyo yarshshuwaa GODAASSI, nu Xoossaassi, shiishshanau, mehiyaa nuuyyo immada yeddana koshshees.

<sup>26</sup> Nu mehee ubbaikka nunaara baanau koshshees; qinccafle issoinne guyye antenna. GODAASSI, nu Xoossaassi, goinniyo goinuwaassi he mehiyaappe dooridi ekanau koshshees; nuuni yaa gakkennan de7iiddi, mehiyaappe augaa augaa yarshshanaakko eranau danddayokko" yaagiis.



<sup>27</sup> SHin GODAI kawuwaa wozanaa dammissiis; dammissin i eta yeddanaau koyibeenna. <sup>28</sup> Hegaappe guyyiyan kawoi Muusa, “Kichcha ta achchappe! Naa77antto ta sinttan lem77i gaada nena era! Neeni ta aifiyaa, ta som77uwaa be7ido gallassaikka neeyyo haiqo” yaagiis. <sup>29</sup> Yaagin Muusee a, “Tumakka; neeni giidoogaadan taani nena naa77antto mulekka be7ikke” yaagiis.

## 11

### *Bairatu Bolli Yiida Boshaa*

<sup>1</sup> Muusessi GODAI, “Taani Gibxxe kawuwaa bollinne a asaa bolli issi hara boshaa yeddana; hegaappe guyyiyan i inttena ha biittaappe kessi yeddana; kessiiddi i inttena issoinne attennan ubbaakka yedettana. <sup>2</sup> Israa7eela asai, maccai attumai ba shoorotuppe biraappenne worqqaappe oosettida miishshata oichchana mala, etau oda” yaagiis. <sup>3</sup> GODAI Israa7eela asati Gibxxetu sinttan nashettanaadan oottiis. Qassi Muusee ba huuphenkka Gibxxe biittan kawuwaa sunttatuuninne asan keehi daro bonchchettida asadan xeelettiis.

<sup>4</sup> Muusee kawuwaa hagaadan yaagiis; “GODAI hagaadan yaagees; ‘Qammau gina shaahuwan taani Gibxxe gidduwaara kanttana; <sup>5</sup> Gibxxe biittan de7iya baira attuma na7i ubbai, kawotaa araatan uttiya kawuwaa baira na7aappe doommidi, woxan gaac-ciya ashkkaree baira na7aa gakkanaassinne baira yelettida meheekka attennan ubbai haiqqana. <sup>6</sup> Gibxxe biitta ubban hegaappe kase baggan hanibeennanne sinttappekka hanenna gita yeehoi yehehettana. <sup>7</sup> SHin Israa7eelatu gidduwan asa bolli woikko mehe bolli kaninne boccenna’ yaagees. He wode GODAI Gibxxe gidduwaaninne Israa7eela gidduwan zagaa medhdhiyoogaa neeni erana. <sup>8</sup> Ha ne sunttati ubbai duge taakko yiidi, ta sinttan gufannidi ziggana; ziggidi, ‘Kiyada barkkii! Nena kaalliya asai ubbaikka bo!’ yaagana. Hegaappe guyyiyan taani baana” yaagiis. Hegaappe guyyiyan Muusee hanqquwaa suulliiddi, kawuwaa sinttappe kiyidi biis.

<sup>9</sup> Muusessi GODAI kase, “Ta maalaalissiyaabai Gibxxe biittan darana mala, kawoi intte yootiyoojaa siyennan ixkana” yaagi wottiis. <sup>10</sup> Muuseenne Aarooni ha maalaalissiyaabata ubbaa kawuwaa sinttan oottidosona; oottinkka GODAI kawuwaa wozanaa dammissiis; yaanin i Israa7eelata ba biittaappe yeddennan ixxiis.

## 12

### *Haiquwaa Boshai Worennan Kanttiis*

<sup>1</sup> GODAI Gibxxe biittan Muusanne Aarooni hagaadan yaagiis; <sup>2</sup> “Ha aginai intteyyo laittau koiro agina gido; <sup>3</sup> Israa7eela asau ubbau ha wogaa odite; ha aginai gelido tammannta gallassan, issi asi ba so asau issi orgge dorssaa woikko issi orgge deeshshaa ekko. <sup>4</sup> He keettaa asaa qoodai he dorssaa wurssi maanau guuxxikko, inne ayyo ubbaappe matattiya shooroi bantta so asaa qoodona; qoodidi issi issi asi maanau danddayiyo keenaa akeekidi, he mehiyaa shukkidi issippe moonaa. <sup>5</sup> Intte doori ekkiyo mehee yelettoosappe issi laitta gididoogaa, a bollan aiba pacinne bainna attumaagaa gido bayin. Intte he meheta dorssappe woikko deeshshappe ekkanaau danddayeeta. <sup>6</sup> Ha aginaayyo tammanne oiddantta gallassaa gakkanaassi eta heemmite; he gallassi omarssi lankkilankkiyaagan Israa7eela maabaraa asai ubbai eta shukkana koshshees. <sup>7</sup> SHukkidi suuttaappe amaridaagaa ekkidi, eti miyo keettau naa77u qosilettaanne qoriyaa tiyona; <sup>8</sup> ashuwaa he gallassi qammikka taman xiixxi xiixxidi, cammiya bonccuwaaranne uukkido oittaara mona. <sup>9</sup> Ashuwaa qayye woikko doissidi mooppite; huuphiyaakka gedetakka qantta giddo ashuwaakka ubbaa xiixxidi miite; <sup>10</sup> he ashuwaappe sa7ai wonttana gakkanaassi ainne ashshoppite; wonttana gakkanaassi amaridaagee attikko, hegaa xuugganau koshshees. <sup>11</sup> Muussaa miiddi, ogiyaassi giigiya



maayuwaa maayidi, intte caammaa intte tohuwan wottidi, intte gatimaa intte kushiyan oiqqidi meeta. Eesuwan eesuwan miite; hagee GODAA Paasikaa.

<sup>12</sup> “Taani he gallassi qammi Gibxxeera kanttana; kanttaidda baira yelettida ubbaa, asaakka mehiyaakka worana; Gibxxe eeqatu ubbaa bollikka taani pirddana; taani GODAATTENNE. <sup>13</sup> He suuttai intte de7iyo keettata erissiya malaata gidana. Taani he suuttaa be7iyo wode, inttena aggada aadhdhana; taani Gibxxe biittaa boshan shociyo wode, inttena aiba boshikka bochchenna.

<sup>14</sup> “Ha gallassai intteyyo hassayi hassayi bonchchiyo gallassa gido; intte yeletai ubbai GODAA baalaa bonchchite; hagee woga oottidi merinau bonchchite.

### *Oittaa Baalaa*

<sup>15</sup> “Laappun gallassai gakkanau irshshuwaa yeggibeenna oittaa miite; shin koiro gallassi irshshuwaa intte sooppe diggite. He koiro gallassaappe doommidi laappunnta gallassi gakkanaassi, irshshuwaara de7iyya oittaa miya asi Israa7eela asaa giddoppe duuxxidi xayoo. <sup>16</sup> Koiro gallassi geeshsha yaa7aa shiiqite; hara geeshsha yaa7aa qassi laappunnta gallassan shiiqite; asai ubbai maanau quma kattanaappe attin, ha gallassatu ubban ainne ootoppite; intte oottanabi hegaa xalaala.

<sup>17</sup> “Oittaa Baalaa bonchchite; aissi giikko, taani intte citaa Gibxxe biittaappe kessidoi he gallassa. He gallassaa, yeletaappe yeletaa gakkanaashin kantti kiyiya woga oottidi bonchchite. <sup>18</sup> Koiro aginan, he aginaayyo tammanne oiddantta gallassa omarssaappe doommidi, laatamanne isiinintta omarssa gakkanaassi irshshoi gelibeenna oittaa miite. <sup>19</sup> Laappun gallassa gakkanau irshshoi intte son beettoppo; irshshoi gelidobaa miya asi bete gidin woikko he biittaa asa gidin, he aawu Israa7eela maabaraa giddoppe bohetto. <sup>20</sup> Irshshoi gelidobaa aibanne mooppite; intte de7iyoosan awankka irshshoi gelibeenna oittaa maanau koshshees” yaagiis.

### *Koiro Paasikaa*

<sup>21</sup> Hegaappe guyyiyan Muusee Israa7eela cimata ubbaa xeesissidi eta hagaadan yaagiis; “Intte sohuwaarakka biidi, intte so asaassi Paasikau orgge dorssaa woikko orgge deeshshaa shukkite. <sup>22</sup> Hiisoophphiyya giyo mittaa haittaappe dankki ekkidi, keriyaa de7iyya suuttan naaqqi kessidi, he suuttaa naa77u qosilettatanne qoriyaa tiyite; intteppe issi asinne sa7ai wonttana gakkanaassi ba keettaa penggeppe kare kiyoppo. <sup>23</sup> GODAI Gibxxeta shoci woranau he biittaara kanttiyo wode, suuttaa qoriyaaninne naa77u qosilettatun be7ana; be7idi kareera aadhdhi bayana; xaissiyaagee intte soo gelidi, inttena worennaadan a intte soo gelissenna.

<sup>24</sup> “Intte ha azazuwaa intteyyoonne intte zerettaayyo merinau woga oottidi azazettite. <sup>25</sup> GODAI kase immana giidoogaadan i immiyo biittaa intte geliyo wode, ha wogaa naagite. <sup>26</sup> Intte naati inttena, ‘Ha bonchcho baalaa birshshettaa aibee?’ yaagidi oichchiyo wode, <sup>27</sup> intte eta, ‘Hagee GODAA bonchchanau yarshshiyoo Paasikaa yarshshuwaa; aissi giikko, GODAI Gibxxe biittan Israa7eela asaa keettaa agga aadhdhidi biidi, Gibxxeta woriiddi, nuna ashshido gishshataassa’ yaagite” yaagiis.

Hegaappe guyyiyan asai gulbbatidi goinniis. <sup>28</sup> Israa7eelati GODAI Muusanne Aarona azazidoogaadan oottidosona.

### *Gibxxetu Bairati Haiqqi Wurobaa*

<sup>29</sup> Qammau gina shaahuwan GODAI Gibxxen baira yelettida ubbaa, kawotaa araatan uttida kawuwaa baira na7aappe doommidi, qasho keettan de7iyya omoodettidaageetu baira na7aa gakkanaassi, qassi baira yelettida mehiyaa ubbaa dippi oottiis. <sup>30</sup> Kawoi, a sunttati ubbainne Gibxxe biittaa asai ubbai qammi dendidosa. Gibxxe biittan asi haiqqibeenna keetti mulekka banna gishshau, asai qaalaa xoqqu oottidi gita yeehuwaa yeekkiis. <sup>31</sup> He gallassa qammikka kawoi Muusanne Aarona xeesidi, “Denddite! Inttekka Israa7eela asaikka ta asaa gidduwaappe kiyite! Biidi intte oichchidoogaadankka

GODAAYYO goinnite! <sup>32</sup>Intte giidoogaadankka intte dorssaa wudiyaanne intte mehiyaa wudiyaa ekkidi biite! Qassi tanakka anjjite” yaagiis.

<sup>33</sup>Gibxxe asai Israa7eelati biittaappe eesuwan kiyana mala dirbbissidosona. Aissi giikko, eti, “Hinna xayikko, nuuni ubbaikka wuroos” yaagidosona. <sup>34</sup>Hegaa gishshau, Israa7eela asati bantta irshshoi gelibeenna munaqaa munaqa keriyann kunttidi, bantta maayuwan xaaxidi, bantta hashiyan tookkidosa. <sup>35</sup>Israa7eelati Muusee eta azaidoogaadan, Gibxxeta bira miishshata, worqqa miishshatanne maayuwaa, “Immite” giidi oichchidosona. <sup>36</sup>GODAI Gibxxetu sinttan he asai sabetanaadan oottin, Gibxxeti eti oichchidobaa immidosona. Hegaadan yaatidi eti Gibxxe asatu aquwaa bonqqi ekkidi biidosona.

### *Israa7eelati Gibxxeppe Kiyidosona*

<sup>37</sup>Israa7eelati Raamisa giyo katamaappe denddidi Sukkota giyo sohuwaa tohuwan hemettidi biidosona. Asai naatanne maccaasaa gujjennan qoodin, usuppun xeetu sha7a. <sup>38</sup>Qassi etaara hara daro asai, daro meheenne dorssaa deeshshaa wudee laagettidi biis. <sup>39</sup>Gibxxeppe eti ekkidi kiyido munaqaa irshshoi gelibeennaagaa oittaa uukkidosa; aissi giikko, eti Gibxxeppe dirbban kiyidosona; banttau shinqqe katanaukka, munaqi denddin uukkanaukka eta gattibeenna.

<sup>40</sup>Israa7eelati Gibxxe biittan de7ido laittai oiddu xeetanne hasttama. <sup>41</sup>He oiddu xeetanne hasttamu laittai wuriyo he wursetta gallassan, GODAA asai ubbai Gibxxe biittaappe kiyiis. <sup>42</sup>GODAI ba asaa naagidi, Gibxxe biittaappe kessiyo wode sa7ai qamma; he qammai yeletaappe yeletaa gakkanaassi, Israa7eela asai beegottidi naagiiddi aqiyo, GODAAYYO dummatida qamma.

### *Paasikaa Gallassaa Bonchchiyo Wogaa*

<sup>43</sup>GODAI Muusanne Aarona, “Paasikaa gallassaa bonchchiyo wogai hageeho; bete asi appe mulekka mooppo. <sup>44</sup>Intte miishshan shammido aillee intte a qaxxariidoo gaappe guyyiyan appe mo. <sup>45</sup>SHin ha77issau inttenaara takkiya imattinne kera oottiya imatti appe mooppo.

<sup>46</sup>“Ha Paasikaa intte issi keettan miite; intte he ashuwaappe aibanne kare kessopite. Meqettatuppe issuwaanne menttoppote. <sup>47</sup>Israa7eela maabarai ubbai Paasikaa bonchchanau koshshees.

<sup>48</sup>“Beti yiidi intte gidдон de7iya asi GODAA Paasikaa bonchchanau koyikko, ba so attuma asa ubbaara qaxxaretto. Hegaappe guyyiyan i he biittan yelettida asadan shiiqidi, Paasikaa bonchchanau danddayees. SHin qaxxarettibeenna asi mulekka appe mooppo. <sup>49</sup>Intte biittan yelettidaagaukka intte gidдон bete gididi de7iyaagaukka he wogai issuwaa” yaagiis.

<sup>50</sup>Yaagin Israa7eelati ubbai GODAI Muusanne Aarona azaidoogaadankka oottidosona. <sup>51</sup>He gallassikka GODAI Israa7eelata eta citan citan Gibxxe biittaappe kessiis.

## 13

### *Baira Yelettida Ubbai GODAASSI Dummatiis*

<sup>1</sup>GODAI Muusa hagaadan yaagiis; <sup>2</sup>“Baira yelettida attuma ubbaa taayyo dummaya. Israa7eela asaa gidдон uloppe yelettida bairi ubbi, mehiyaa gidin asaa gidin, ubbaikka tabaa” yaagiis.

<sup>3</sup>Hegaappe guyyiyan Muusee asaa, “Gibxxeppe, ailletettaa biittaappe intte kiyido gallassaa, ha gallassaa hassayite; aissi giikko, GODAI ba wolqqaama kushiyan inttena kessiis; hegaa gishshau, irshshoi gelidobaa aibanne mooppote. <sup>4</sup>Intte hachchi Abiiba aginan kiyeeta. <sup>5</sup>GODAI Kanaanetu, Hiitetu, Amooretu, Hiwetunne Yaabuusatu biittaa inttena gattiyo wode, intte ha bonchcho gallassaa ha aginaa bonchcheeta. He biittai GODAI inttessi immana mala, kase intte aawatussi caaqqi wottido biittaa. He biittai maattanne eessai goggiyo biittaa. <sup>6</sup>Intte laappun gallassi irshshoi yegettibeenna oittaa

maana; laappuntta gallassai GODAA baalaa gidana. <sup>7</sup> He laappun gallassatun irshshoi yegettibeenna oittaa intte maana; intte giddon irshshoora de7iyaabi aibinne beetto; ne biittaa zawan awaaninne irshshoi beetto.

<sup>8</sup> “He gallassi neeni ne na7aayyo, ‘Taani haggaa oottiyoogee, taani Gibxxeppe kiyiyo wode, GODAI taayyo oottidoogaa hassayanaassa’ yaagada yoota. <sup>9</sup> GODAI inttena ba wolqqaama kushiyan Gibxxeppe kessido gishshau, GODAA higgee intte doonaappe wodhdhennaadan, ha bonchchettiya ayyaana gallassai ne kushiyan qachchidonne ne merchchian wottido hassayissiyaabaa mala gidana. <sup>10</sup> Haggaa gishshau, intte ha wogaa laittan laittan keerido wodiyan bonchchite.

### *Baira Na7aa*

<sup>11</sup> “GODAI intteyyoonne intte maizza aawatuyyo immanau caaqqidoogaadan, i inttena Kanaanetu biittaa gelissidi, he biittaa intteyyo immiyo wode, <sup>12</sup> uloppe baira yelettida ubbaa GODAAYYO dummaya; ne mehiyan baira yelettiya attuma ubbai GODAASSA. <sup>13</sup> Baira yelettiya hare ubbaa dorssa maran woza ekka; wozennabaa gidikko, a morggiyaa mentta; ne attuma naatu giddon baira yelettidaageeta ubbaa woza. <sup>14</sup> Sinttaara yaana wodiyan ne na7ai nena, ‘Hagee aibee?’ yaagidi oichchikko, neeni a, ‘GODAI nuna wolqqaama kushiyan Gibxxeppe, ailletettaa biittaaappe kessiis; <sup>15</sup> Gibxxe kawoi dammidi nuna yeddennan ixxin, GODAI Gibxxe biittan de7iya baira ubbaa, asaappe doommidi mehiyaa bairaa gakkanaassi woriis. Taani aayi uloppe koiro yelettida attumaa ubbaa GODAASSI yarshshiyooegeenne ta baira attuma naata taani woziyoogee hegaassa’ yaaga. <sup>16</sup> GODAI nuna ba wolqqaama kushiyan Gibxxeppe kessidoogau, hagee intteyyo kushen qachchidonne merchchen wottido malaata mala gidana” yaagiis.

### *SHAaraa Tuussaanne Tamaa Tuussaa*

<sup>17</sup> Kawoi asaa yeddido wode, Xoossai eta Pilisxxeema biittaara kanttissiya ogee mata gidikkonne he ogiyaara kaalettibeenna; aissi giikko, Xoossai, “Asai olaa be7ikko, ba qofaa laammidi, guyye Gibxxe simmanaakkonne” yaagidi qoppiis. <sup>18</sup> Haggaa gishshau, Xoossai asaa bazzo ogiyaara yuushshidi, Zo7o Abbaakko kaalettiis. Israa7eelati Gibxxe biittaaappe olau giigidi pude kiyidosona.

<sup>19</sup> Yooseefi Israa7eela asaa caaqqetti wottido gishshau, Muusee a meqettaa banaara ekkidi biis; Yooseefi eta, “Xoossai tumuppe inttena maaddanau yaana; he wode intte ta meqettaa ha sohuwaappe pude inttenaara ekkidi biite” yaagidi odi wottiis.

<sup>20</sup> Eti Sukkotappe denddidi bazzuwaa doonan de7iya Etaaman uttidosa. <sup>21</sup> GODAI eti gallassikka qammikka hemettana mala, gallassan eta ogiyaa bessanau shaaraa tuissan, qammi etau poo7issanau tamaa tuissan eta kaalettiis. <sup>22</sup> Gallassi shaaraa tuussai woikko qammi tamaa tuussai asaa sinttappe kichchibeenna.

## 14

### *Zo7o Abbaa Pinnidosona*

<sup>1-2</sup> Hegaappe guyyiyan Muusa GODAI hagaadan yaagiis; “Eti guyye simmidi Migidoolappenne abbaappe gidduwan, Pihaahiroota matan uttanaadan oda; eti abbaa lanqqen Ba7aali-Xafoonau sintta baazzan uttona. <sup>3</sup> Kawoi, ‘Israa7eelati bazzo gorddin, haniyoobaa xayidi biittan coo toilattoosona’ yaagidi qoppaana. <sup>4</sup> Taani kawuwaa wozanaa dammissana; i eta yedettana; taani kawuwaa baggaaranne a olanchchatu ubbaa baggaara bonchchettana; Gibxxetinne taani GODAA gidiyooogaa erana” yaagiis. Yaagin Israa7eelati i yootidoogaadan oottidosona.

### *Israa7eelata Kawuwaa Parai Kaalliis*

<sup>5</sup> Asai baqatiichchidoogaa Gibxxe kawuwaayyo yootin, inne a sunttati Israa7eelatuyyo qoppido bantta qofaa laammidi, “Nuuni haggaa waatiyoonii? Nuuni

Israa7eelata yeddidi, eti nuuyyo oottiyo wolqqaappe mela attida” yaagidosona. <sup>6</sup> Hegaa gishshau, i ba para gaariyaa kooridi, ba olanchchata banaara ekkidi denddiis. <sup>7</sup> I usuppun xeetu ubbaappe aadhdhiya para gaareta, Gibxxe biittan de7iya hara gaaretu ubbaara, eta ubbau halaqaa halaqaa sunttidi ekkidi biis. <sup>8</sup> GODAI Gibxxe biittaa kawuwaa, kawuwaa wozanaa dammissin, kessaa bolli de7iya Israa7eela asaa yedettiis. <sup>9</sup> Hegaappe guyyiyan Gibxxe asati, kawuwaa parati ubbainne paraa gaareti, paraasatinne olanchchati Israa7eelata kaallidi yedettidosona. Abbaa doonan Ba7aali-Xafoona sintta baazzan de7iya Pihaahiroota matan eti uttidaashin demmidosona.

<sup>10</sup> Kawoi matiichchin, Israa7eelati xoqqu gi xeelliyo wode, Gibxxeti eta geeduwaa kaallidi yiidoogaa be7idosona; be7idi daroppe yayyidi, GODAAYYO waassidosona. <sup>11</sup> Eti Muusa, “Neeni nuna Gibxxen duufoi xayin bazzon haiqqanaadan kessadiiyye? Nuna Gibxxeppe aibau ehaadii? <sup>12</sup> Gibxxen de7iiddi nuuni, ‘Nuna aggaaga; nuuni Gibxxetuyyo haarettana’ yaagidi neeyyo odibookkonii? Bazzon haiqqanaappe etayyo haarettiyoogee nuuyyo lo77o shin” yaagidosona.

<sup>13</sup> SHin Muusee asaa, “Yayyoppite; minni eqqite; GODAI hachchi inttena ashshiyoo ashettaa intte be7ana. Hachchi intte be7iyo Gibxxeta naa77antto mulekka be7ekketa. <sup>14</sup> Intte gishshaa GODAI olettana; intteppe koyettiyai co77u getta xalaala” yaagiis.

<sup>15</sup> GODAI Muusa, “Neeni taakko aissi waassai? Israa7eelati sinttau hemettana mala yoota. <sup>16</sup> Ne gatimaa dentta; denttada abbaa bolli micca; haattai naa77u kiyidi shaahettana; Israa7eelatikka mela biittaaara abbaa pinnidi baana. <sup>17</sup> Taani Gibxxetu wozanaa dammissin, eti intte geeduwaa kaallidi abban gelana. Taani kawuwaanne a olanchchatu ubbaa baggaara, a para gaaretunne a paraasatu baggaara bonchchuwaa taayyo demmana. <sup>18</sup> Taani kawuwaa baggaara, a para gaaretu baggaaranne a paraasatu baggaara taayyo bonchchuwaa demmido wode, taani GODAA gidiyooogaa Gibxxeti erana” yaagiis.

<sup>19</sup> Hegaappe guyyiyan Xoossaa kiitanchchai, Israa7eela olanchchatuppe sinttaara hemettiyaagee, guyye aadhdhidi etappe guyyeera hemettiis. SHaaraa tuussaikka eta sinttan de7iyoosaappe guyye baggi yuuyidi, <sup>20</sup> Gibxxetu olanchchatuppenne Israa7eelatu olanchchatuppe gidduwan eqqiis. He shaarai qamma ubban issi baggaara xumissidi, hinkko baggaara poo7iisii; yaatin qamma ubbaa issoi issuwaakko shiiqi-bookkona.

<sup>21</sup> Hegaappe guyyiyan Muusee abbaa bollan ba kushiya micciis; GODAI he gallassi qamma ubban arshsho wolqqaama carckuwaa yeddidi, abbaa guyye zaariis; zaaridi mela biitta kessiis. Haattai shaahettiis. <sup>22</sup> Israa7eelati abbaa gidduwan mela biittaara hemettidi, haattai etayyo ushachchaaranne haddirssaara godadan eqqidaashin biidosona. <sup>23</sup> Gibxxeti eta yedettidosona; kawuwaa para ubbati, a para gaaretinne a paraasati eta kaallidi, abbaa giddo gelidosona. <sup>24</sup> Biron bakkaalee dolanaappe kasetidi, GODAI tamaanne shaaraa tuussaappe duge zaaridi, Gibxxetu olanchchata xeelliis; xeellidi eta wozanaa bashshiis. <sup>25</sup> Laagoi eta waissana mala, GODAI eta para gaaretu irzzuwaa binqqirssaa diggiis; diggin Gibxxeti, “GODAI eta maaddidi Gibxxe oliyo gishshau, ane nuuni Israa7eela asaappe baqatoos” yaagidosona.

<sup>26</sup> GODAI Muusa, “Haattai Gibxxetu bolli, eta para gaaretu bollinne eta paraasatu bolli guyye goggana mala, ne kushiya abbaa bollan micca” yaagiis. <sup>27</sup> Yaagin Muusee ba kushiya abbaa bollan micciis; sa7ai wonttishin, abbai ba kase sohuwaa guyye simmiis; Gibxxeti yaa a giddo baqatishin, GODAI Gibxxeta abbaa gidduwan aatti yeggiis. <sup>28</sup> Haattai guyye simmidi, para gaareta paraasatanne Israa7eelata kaallidi abbaa gelida kawuwaa olanchchata muliyaa mitti bayiis; etappe issoinne attibeenna. <sup>29</sup> SHin Israa7eelati abbaa gidduwaara mela biittan hemettidi, haattai etau ushachchaaranne haddirssaara godadan eqqidaashin biidosona. <sup>30</sup> GODAI he gallassi Israa7eela asaa Gibxxetu kushiyaappe hagaadan ashshiis. Qassi Israa7eelati

Gibxxeti haiqqidi zin77idaageeta abbaa doonan be7idosona. <sup>31</sup> Israa7eelatikka GODAI Gibxxetu bolli bessido gita wolqqa be7ido wode, asai GODAAYYO yayyiis; yayyidi akka a ashkkaraa Muusakka ammaniis.

## 15

### *Muuse Mazamuriyaa*

<sup>1</sup> He wode Muuseenne Israa7eela asai ha mazamuriyaa GODAAYYO yexxidosona; “Bonchchuwan i keehi xoqqu xoqqu giido gishshau, taani GODAAYYO mazamuriyaa yexxana.

Paraanne paraa toggidaagaa abban oliis.

<sup>2</sup> GODAI ta wolqqaanne ta mazamuriyaa; i tana ashshiyaagaa gidiis.

I ta Xoossaa; taani a sabbana.

I ta aawaa Xoossaa; taani a xoqqu xoqqu oottana.

<sup>3</sup> GODAI olanchcha; a sunttaikka GODAA.

<sup>4</sup> Gibxxe kawuwaa para gaaretanne a olanchchata abban oliis.

Gibxxe kawuwaa halaqati, ubbaappe aadhdi lo77iyaageeti Zo7o Abban muukettidosona.

<sup>5</sup> Ciimma haattai eta kammiis; eti shuchchadan ciimman mitettidosona.

<sup>6</sup> “Abeet GODAU, ne ushachcha kushee wolqqan goobidaagaa; GODAU, ne ushachcha kushee morkkiyaa mentterettiis.

<sup>7</sup> Ne bonchchuwaa gitatettan nenaara gaaddetidaageeta oladasa.

Ne eexxiya hanqquwaa neeni yeddin, i eta daladan miis.

<sup>8</sup> Ne siiriyaara kiyiya shemppuwan haattai doorettiis.

Goggiya haattainne godadan minni eqqiis; ciimma haattati abbaa gomppan irkkidi minnidosa.

<sup>9</sup> “Morkkee ceeqettiiddi, ‘Taani eta yedettada oiqqana. Taani eta aquwaa shaakkada, ta koyidobaa ubbaa ekkana. Taani ta bisuwaa shoddada, eta xaissana’ yaagidi ceeqettiis.

<sup>10</sup> SHin neeni eta ne shemppuwan punnin, abbai eta kammiis. Eti wolqqaama haattan irssaasiyaa giyo biratai mitettiyoogaadan mitettidosona.

<sup>11</sup> Abeet GODAU, Xoossatu gidдон ne malai oonee? Geeshshatettan bonchchettiyaabi, bonchchuwan yayettiyaabi, garamiyaabaa oottiyaabi ne malai oonee?



<sup>12</sup> Neeni ne ushachcha kushiyaa miccin,  
biittai eta mittiis.

<sup>13</sup> “Neeni wozido asaa  
aggenna ne siiquwan kaalettana.  
Neeni ne wolqqan  
eta neeni de7iyo geeshsha sohuwaa gelissadasa.

<sup>14</sup> Kawotettati hegaa siyidi  
kokkoridosona.  
Pilisxxeema biittaa asatika  
maareti oiqqidobaadan un77ettidosona.

<sup>15</sup> He wode Eedooma biittaa halaqati  
dagammidosona.  
Moo7aaba biittaa haariyaageeta  
yashshai kokkorssiis.

Kanaane asati maashidosona.

<sup>16</sup> Dagamainne yashshai eta oiqqiis.  
Abeet GODAU, eti ne wolqqaa gitatettaa be7idi,  
ne asai aadhdhana gakkanaassi,  
neeni wozido asai aadhdhana gakkanaassi,  
shuchchadan tolettidi eqqididosona.

<sup>17</sup> Neeni eta ehaada,  
ne buzo gaden de7iya deriyaa huuphiyan tokkana.

Abeet Godau, he sohoi  
neeni neeyyo de7anau oottido soho.

Abeet Godau, he geeshsha sohoi  
neeni ne kushiyan minttada essido soho.

<sup>18</sup> GODAI merinaappe merinau kawotana”  
yaagidi yexxidosona.

### *Miiriyaami Mazamuriyaa*

<sup>19</sup> Gibxxe kawuwaa parati, a para gaaretinne a paraasati abban gelido wode, GODAI abbaa haattaa guyye zaaridi eta bolli ehiis; shin Israa7eelati abbaa gidduwaara mela biittaara hemettidi biidosona. <sup>20</sup> Aarona michchiyaa, hananabaa yootiya Miiriyaama karaabiyaa ekkaasu; maccaasai ubbai karaabiyaa baqqiiddinne yexxiiddi o kaallidosona. <sup>21</sup> Miiriyaama etayyo mazamuriyaa yexxaidda,  
“GODAI keehi xoqqu xoqqu giido gishshau,  
ayyo yexxite.

Paraanne paraa toggidaagaa  
i abban oliis”  
yaagada yexxaasu.

### *Cammiya Haattaa*

<sup>22</sup> Hegaappe guyyiyan Muusee Israa7eela Zo7o Abbaappe kaalettin, eti Suura giyo bazzuwaa biidosona. He bazzuwan eti haatta demmennan heezzu gallassaa hemettidosona. <sup>23</sup> Eti Maara giyoosaa gakkido wode, Maara haattai camo gidido gishshau, uyana danddayibookkona; hegaa gishshau, he sohoi Maara geetettiis. <sup>24</sup> Hegaa gishshau, asai, “Nuuni ai uyanee?” yaagidi Muuse bolli zuuzummiis.

<sup>25</sup> Zuuzummin Muusee GODAAYO waassiis; waassin GODAI a issi mitta bessiis; Muusee he mittaa haatta giddo olin, haattai mal77iis.

Yan GODAI etau awaajuwaanne higgiiyaa kessiis; yan GODAI eta paacciiis. <sup>26</sup> I eta hagaadan yaagiis; “GODAI intte Xoossai odiyoobaa minttidi siyikkonne a aifiyaa sinttan likkebaa oottikko, intte a azazuwaa ezgikkonne a awaajuwaa ubbaa naagikko, taani

Gibxxetu bolli ehiido harggiyaappe issuwaanne intte bolli ehiikke; aissi giikko, taani inttena pattiya GODAATTENNE” yaagiis.

<sup>27</sup> Hegaappe eti Elaama biitti yiidosona; yan tammanne naa77u haatta pulttotinne laappun tammu zambba mittati de7oosona. Eti yan haattaa doonan uttidosa.

## 16

### *GODAI Mannaanne Kuraachchota Bukissiis*

<sup>1</sup> Gibxxeppe kiyido naa77antto aginan, tammanne ichchashantto gallassan Israa7eela asaa maabarai kumetta Eliimappe denddidi, Eliimappenne Siinaappe gidduwan de7iya Siinaa giyo bazzuwaa yiis. <sup>2</sup> Israa7eela asaa maabarai ubbai bazuwan Muuse bollinne Aarona bolli zuuzummidosa. <sup>3</sup> Israa7eelati eta, “Nuuni Gibxxe biittan GODAA kushiyan haiqqidaa gidorkkoniishsha! Yan nuuni nuugaa ashuwaa keriyaa yuuyi aadhdhi uttidi, nuuni koyido qumaa ubbaa miida; shin intte nuna kessidi, ha geeshsha yaa7aa ubbaa namisan woranau bazzo ehiideta” yaagidosona.

<sup>4</sup> Yaagin GODAI Muusa, “Taani intteyyo saluwaappe oittaa bukissana; asai ubba gallassikka kiyidi, hachchi hachchissi gidiyaagaa xalaalaa maxanau koshshees. Asai ta azazuwaa kaalliyaakko kaallennaakko taani eta hegan paaccana. <sup>5</sup> Usuppunta gallassi eti haroode maxiyoogau naa77u kushiya maxidi, kattona” yaagiis.

<sup>6</sup> Hegaa gishshau, Muuseenne Aarooni Israa7eela asa ubbaayyo, “Inttena Gibxxe biittaappe kessidaagee GODAA gidiyooгаа оmarssi intte erana; <sup>7</sup> qassi GODAA bonchuwaa maallado intte be7ana; aissi giikko, a bolli intte zuuzummidoogaa i siyiis; intte nu bolli zuuzummanau nuuni oonee?” yaagidosona. <sup>8</sup> Hegaappe guyyiyan Muusee, “I intteyyo maanau omarssi ashuwaa immiininne intte koyiyo oittaa ubbaa intteyyo maallado immin, i GODAA gidiyooгаа intte hegan erana. Aissi giikko, intte a bolli zuuzummidoogaa i siyiis. Nuuni oonee? Intte nu bolli zuuzummeetta; intte GODAA bolli zuuzummeeta” yaagiis.

<sup>9</sup> Muusee Aarona, “Neeni Israa7eela asaa maabara ubbaa, ‘GODAI intte zuuzunntaa siyido gishshau, GODAA sintti haa shiiqite’ yaaga” yaagiis. <sup>10</sup> Aarooni Israa7eela asaa maabara ubbau haasayissishin, eti bazuwaakko simmidi xeellidosona; hegan GODAA bonchchoi shaara gidдон qoncciyaagaa be7idosona. <sup>11-12</sup> GODAI Muusa, “Taani Israa7eelatu zuuzunntaa siyaas; neeni etayyo, ‘Omarssan ashuwaa intte maana; maallado oittaa intte kallana; he wode intte taani GODAA intte Xoossaa gidiyooгаа erana’ yaagada yoota” yaagiis.

<sup>13</sup> He gallassi omarssan kuraachchoti yiidi, Israa7eela asai de7iyoosaa maayidosona; qassi maallado eta dunkkaanetu yuushuwan xaazai xaazaa bolli yekekki uttiis. <sup>14</sup> Xaazai xaskkido wode, sa7an wodhdhida shachcha misatiya burcce poqoi bazzo biittaa bollan beettiis. <sup>15</sup> Israa7eelati heгаа be7ido wode, eti issoi issuwaa, “Hagee aibee?” yaagidosona. Aissi giikko, eti i aibakko eribookkona.

Yaatin Muusee eta, “Intteyyo maanau GODAI immido oittai hгаа. <sup>16</sup> GODAI hagaadan yaagidi azaziis; ‘Asai issoi issoi baayyo maanau koshshiyaagaa keenaa shiishsho; intte dunkkaane gidдон de7iya asai huuphiyan huuphiyan naa77u litiro gidiyaagaa ekkite’ yaagiis” yaagiis.

<sup>17</sup> Israa7eelati Muusee etau yootidoogaadan oottidosona; issoi darissidi, issoi guuttidi shiishshidosona. <sup>18</sup> Shiishshidi eti litiruwan makkido wode, darissidi shiishshidaagau palahibeenna; guuttaa shiishshidaagau paccibeenna; ubbaikka huuphiyan huuphiyan bau miyoogaa keenaa shiishshiis. <sup>19</sup> Hegaappe guyyiyan Muusee eta, “Ooninne appe wonttossi ashshoppo” yaagiis. <sup>20</sup> Gidikonne etappe issooti issooti Muusee yootiyoogaa ekkennan aggidi, attaa maallado gakkanau wottidosona; wottidoogee guxunidi xinqqiis. Hegaa gishshau, Muusee eta hanqqettiis. <sup>21</sup> Maallado maallado asai ubbai baayyo koshshiyaagaa shiishshiis; awai michchiyo wode sa7an attidaagee seeri aggiis.

<sup>22</sup> Usuppunta gallassan eti kaseegau naa77u kushiya shiishshoosona; issi issi asau oiddu litiro keenaa giyoogaa. Yaatin maabaraa halaqati yiidi hegaa Muuseyyo yootidosona. <sup>23</sup> Yootin i eta, “GODAI azazidoogee haggaa; wonttoi shemppo gallassa, GODAASSI geeshsha Sambbata. Hegaa gishshau, intte uukkiyoobaa uukkite; intte doissiyooaanne doissite; palahidaagaa wonttossi ashshite” yaagiis. <sup>24</sup> Hegaa gishshau, eti Muusee azazidoogaadan wonttossi wottidosona; wottin xinqqibeenna woikko gux-unibeenna. <sup>25</sup> “Hachchi miite; aissi giikko, hachchi GODAA Sambbata; intte a hachchi dembban demmekketa. <sup>26</sup> Intte usuppun gallassan a shiishshanau danddayeeta; shin laappunnta gallassai Sambbata. Sambbatan aibinne de7enna” yaagiis.

<sup>27</sup> Yaaginkka laappunnta gallassan issi issi asai shiishshanau kiyiis; shin eti ainne demmibookkona. <sup>28</sup> GODAI Muusa, “Ta azazotanne ta higgeta naagiyoogaa aude gakkanaassi ixuuteetii? <sup>29</sup> GODAI intteyyo Sambbataa immidoogaa akeekite; usuppunta gallassan i intteyyo naa77u gallassa oittaa immiyooogee hegaa gishshaassa. Laappunnta gallassi ubbai ba de7iyoosan de7iyoosan takko; ooninne kare kiyoppo” yaagiis. <sup>30</sup> Hegaa gishshau, asai laappunnta gallassan shemppiis.

<sup>31</sup> Israa7eela asai he oittaa mannaa<sup>2</sup> giidi sunttiis. Mannai deebbo aifedan bootta; eessaara uukkido lichchakkodan mal77ees. <sup>32</sup> Muusee Israa7eela asaa, “GODAI azazidobai haggaa; “Taani inttena Gibxxe biittaappe kessido wode, bazzon mizido oittaa eti be7ana mala, mannaappe naa77u xaasa gidiaagaa intte yaana yeletaassi ashshi wottite’ yaagidi azaziis” yaagiis.

<sup>33</sup> Yaagin Muusee Aarooni, “Issi xaaro ekkada naa77u litiro kumetta mannaa an qola; yaatada yaana yeletaassi minjettana mala, GODAA sinttan wotta” yaagiis.

<sup>34</sup> GODAI Muusa azazidoogaadan minjettana mala, Aarooni mannaa GODAA sinttan wottiis. <sup>35</sup> Israa7eelati bantta de7iyo biittaa yaana gakkanaassi oitamu laittaa mannaa miidosona; eti Kanaane biittaa zawaa gakkana gakkanaassi mannaa miiddi de7idosona. <sup>36</sup> He wode asai makkiyo erettida miishshai laatamanne naa77u litiro oiqqees.

## 17

### *Haattai Pulttiis*

<sup>1</sup> Israa7eelatu maabara ubbai GODAI azazidoogaadan, issi sohuwaappe hara sohuwaa yuuyiiddi, Siinaa Bazzuwaappe denddidi biidi, Rafiidima giyo sohuwan uttidosa. SHin asai uyanau haatti he sohuwan xayiiis. <sup>2</sup> Xayin eti Muuseera ooyettidi a, “Nuuyyo uyanau haatta imma” yaagidosona.

Yaagin Muusee zaaridi, “Intte tanaara aissi ooyetteetii? GODAA intte aissi paacceetii?” yaagiis.

<sup>3</sup> SHin asai yan haattaa saamettidi, Muuse bolli zuuzummidosona. Eti a, “Neeni nuna, nu naatanne nu mehiyaa saamuwan woranau Gibxxeppe kessada pude aissi ehaadii?” yaagidi Muuse bolla zuuzummidosona.

<sup>4</sup> Yaanin Muusee, “Taani ha asaa waatoo? Eti tana shuchchan caddana hanoosona” yaagidi GODAAKKO waassiis.

<sup>5</sup> GODAI Muusa, “Neeni asaappe sinttau hemetta; Israa7eela asaa cimatuuppe nenaara efa; ini neeni Naile SHAafaa haattaa shocido gatimaa ne kushiyan oiqqada ba. <sup>6</sup> Taani Siinaa Deriyaa zaallaa bolli ne sinttan eqqana; neeni he zaallaa shoca; asai uyanau appe haattai kiyana” yaagiis. Muusee Israa7eela cimatu sinttan hegaadan oottiis.

<sup>7</sup> Israa7eelati, “GODAI nu gidon de7iyye de7ennee?” yaagidi ooyettido gishshaunne GODAA paaccido gishshau, he sohuwaa Masaahanne Mariiba giidi sunttiis.

### *Israa7eelati Amaaleeqata Xoonidosona*

<sup>2</sup> 16:31 Ibraawetto qaalan “Manna” giyoogee “Hagee aibee?” giyoogaa.

<sup>8</sup> Amaaleeqati yiidi, Rafiidiman Israa7eelatuura olaa gaittidosona. <sup>9</sup> Muusee Yaasa, “Neeni nuuyyo asaa doorada, kiyada Amaaleeqatuura oletta; taani wontto Xoossaa gatimaa oiqqada, keraa huuphiyan eqqana” yaagiis.

<sup>10</sup> Yaagin Yaasu Muusee giidoogaadan, Amaaleeqatuura olettiis. Muusee, Aaroninne Huuri keraayyo huuphiyaa kiyidosona. <sup>11</sup> Muusee ba kushiya dentti gam77ido keenan ubban Israa7eelati xoonoosona; shin i ba kushiya ziqqissido wode Amaaleeqati xoonoosona. <sup>12</sup> Muuse kushee arggaacido wode, eti shuchchaa ekki ehiidi, Muusa a bolli utissidosona. Aaroninne Huuri issoi issi baggaara issoi hinkko baggaara gididi, a kushiya sitti oottidi oiqqidosona. Yaatin awai wullana gakkanaassi a kushee sitti giidi takkiis. <sup>13</sup> Hegaa gishshau, Yaasu Amaaleeqatu olanchchata bisuwan xooniis.

<sup>14</sup> Hegaappe simmin, Muusa GODAI hagaadan yaagiis; “Hagee ubbaton hassayettana mala haggaa xaafa. Yaatada Yaasa sissennan aggoppa; aissi giikko, saloppe garssan taani Amaaleeqa asata ciraara xaissana” yaagiis. <sup>15</sup> Muusee yarshshuwaa yarshshiyosaa keexxidi, “GODAI ta Banddiraa” giidi sunttiis. <sup>16</sup> I hagaadan yaagiis; “Kusheti pude GODAI kawotaa araataakko dendididosona; yeletaappe yeletaa gakkanaashinkka GODAI Amaaleeqatuura olettana” yaagiis.

## 18

### *Yatiroi Muusa Xomoosiis*

<sup>1</sup> Midiyaama biittaa qeese, Muuse bolloi Yatiroi, GODAI Muuseyyoonne a asaa Israa7eelayyo oottidobaa ubbaanne GODAI Israa7eela Gibxxeppe kessidobaa siyiis.

<sup>2</sup> He wode Muuse bolloi, Yatiroi, Muusee yeggidi biido a keettaayyiyo Xippaaronne i naa77u naata ehiis. <sup>3</sup> Etappe issuwaa sunttai Gershshooma; aissi giikko, Muusee, “Taani asa biittan bete gidaas” yaagiis. <sup>4</sup> Naa77anttuwaa sunttai El77aazara; aissi giikko, i, “Ta aawaa Xoossai tana maaddidaagaa; i tana Gibxxe kawuwaa bisuwaappe ashshiis” yaagiis.

<sup>5</sup> Muuse bolloi Yatiroi a attuma naatuuranne a keettaayeera Xoossaa deriyaa matan de7iya Muusekko yiis. <sup>6</sup> I Muusa, “Taani, ne bolloi Yatiroi, ne keettaayeeranne i naa77u naatuura neekko yais” yaagidi akko kiitti wottiis.

<sup>7</sup> Hegaa gishshau, Muusee ba bolлууwaaara gaittanau kiyidi, ayyo ziggidi a yeriis. Eti issoi issuwaa sarotidi, dunkkaane giddo gelidosona. <sup>8</sup> GODAI Israa7eela asaa gishshau, kawuwaa bollinne Gibxxetu bolli oottido ubbaa, ogiyan eta gakkida daafuraabaa ubbaanne GODAI eta ashshidobaa Muusee ba bolлууwaaayyo yootiis.

<sup>9</sup> Israa7eela asaa Gibxxetu kushiyaappe ashshanau GODAI oottido lo77o oosotubaa siyidi, Yatiroi ufaittiis. <sup>10</sup> Ufaittidi, “Inttena Gibxxetu kushiyaappenne kawuwaa kushiyaappe ashshida GODAI, Gibxxetu kushiyaappe asaa kessi ekkidaagee, i galatetto. <sup>11</sup> GODAI hara Xoossatuppe ubbaappe gooba gidiyoojaa taani ha77i erais; aissi giikko, i haggaa Israa7eela asaassi iitidaageetussi oottiis” yaagiis. <sup>12</sup> Hegaappe guyyiyan Yatiroi, Muuse bolloi, xuuggiyo yarshshuwaanne hara yarshshota Xoossaaayyo ehiis; Aaroninne Israa7eela cimati ubbai Xoossaa sinttan Muuse bolлууwaaara oittaa maanau yiidosona.

### *Daannati Sunttetidosa*

<sup>13</sup> Wonttetta gallassi Muusee asaayyo pirddanau uttiis; asai Muuse yuushuwan maalladoppe omarssi gakkanaassi eqqiis. <sup>14</sup> Muuse bolloi Muusee asaayyo oottiyoobaa ubbaa be7idi, “Neeni ha asaayyo oottiyoogee hagee aibee? Asai ubbai maalladoppe doommidi omarssi gakkanaassi ne yuushuwan eqqidaashin, neeni nerikka daannadan aissi utta bayadii?” yaagiis.

<sup>15</sup> Yaagin Muusee ba bolluwaa, “Asai Xoossaa sheniyaa oichchanau taakko yiyo gishshaassa. <sup>16</sup> Etayyo yohoi de7ikkokka taakko yoosona; taani issi uraa gid-duwaaninne a shooruwaa gidduwan pirddais; Xoossaa awaajuwaanne higgiiyaa eta erissais” yaagiis.

<sup>17</sup> Muuse bolloi, “Hagee neeni oottiyoobai lo77o gidenna. <sup>18</sup> Neeninne nenaara de7iya asai daafura xalaalaa daafureeta; ha oosoi neeyyo keehi deexo; neeni haggaa nerikka oottanau danddayakka. <sup>19</sup> Ane ha77i taani yootiyoojaa siya; taani nena zorana; Xoossai nenaara gido. Neeni ha asaa gishshaa Xoossaa sintti aadhdha; neeni eta yohuwaa Xoossaakko eha. <sup>20</sup> Awaajuwaanne higgiiyaa eta neeni tamarissa; eti de7ana maaraanne oottana oosuwaa ubbaa eta besa. <sup>21</sup> Qassi asaa ubbaa gidдон danddayiya asata, Xoossaayyo yayyiyaageeta, ammanettidaageetanne mattaayiyaa miyoogaa ixxiyaageeta doora. Doorada etappe asaayyo shaalaqata, mato halaqata, hamssaalaqatanne assiraalaqata oottada suntta. <sup>22</sup> Eti ubba wode asaayyo pirddona; shin waayissiya yoho ubbaa neekko ehona; waayissenna yoho ubbaa eti wurssona. Eti nenaara shaakkiyo gishshau, toohoi neeyyo kauyyana. <sup>23</sup> Neeni hegaadan oottikkonne hagee Xoossaa shene gidikko, neeni danddayana. Qassi ha asai ubbaikka ba allaallee polettin, ba soo ba soo baana” yaagiis.

<sup>24</sup> Muusee ba bolluwaa qaalaa siyiis; i giidobaa ubbaakka oottiis. <sup>25</sup> Muusee Israa7eela ubbaa giddoppe danddayiya asata dooriis; dooridi asaa kaalettiya shaalaqata, mato halaqata, hamssaalaqatanne assiraalaqata oottidi sunttiis. <sup>26</sup> Sunttin eti asaayyo ubba wode pirddidosona; eti banttana deexxida yohuwaa Muusekko ehiidosona; shin deexxenna yoho ubbaa eti wurssidosona.

<sup>27</sup> Hegaappe guyyiyan Muusee ba bolluwaa moissiis; moissin Yatiroi ba biitti simmiis.

## 19

### *GODAI Siinaa Deriyan Qoncciiis*

<sup>1</sup> Israa7eela asai Gibxxeppe kiyido heezantta aginan koiro gallasan Siinaa baz-zuwaa gakkidosona. <sup>2</sup> Eti Rafiidimappe denddidi Siinaa bazzuwaa biiddi, bazzon de7iya deriyau sintta baazzan uttidosona.

<sup>3</sup> Muusee Xoossaakko pude deriyaa huuphiyaa kiyin, GODAI deriyaa huuphiyan a xeesidi, “Neeni Yaaqooba keettaa hagaadan yaaga; Israa7eelau hagaadan yaagada yoota; <sup>4</sup> Taani Gibxxetu bolli ai oottidaakkonne qassi arggantaa qefiyan taani inttena waata tookkada taakko ehiidaakkonne intte intte huuphen be7ideta. <sup>5</sup> Simmi ha77i intte taayyo kumetta azazettikkonne ta maachchaa naagikko, kawotetta ubbaa gidдон intte taayyo buzo gidana. Kumetta sa7ai tabaa gidikkonne <sup>6</sup> intte taayyo qeesetu kawotettanne geeshsha kawotetta gidana’ yaaga; neeni Israa7eelatuyyo yootana qaalai haggaa” yaagiis.

<sup>7</sup> Yaagin Muusee guyye simmi biidi, dere cimata xeesi shiishshidi, GODAI yoota giido ha qaalata ubbaa etau yootiis. <sup>8</sup> Asai ubbai issi doona gididi, “GODAI giidobaa ubbaa nuuni oottana” yaagidosona. Yaagin Muuseekka eti giidoogaa GODAAKKO ekkidi efiis.

<sup>9</sup> GODAI Muusa, “Taani nenaara haasayishin asai siyanaadaaninne eti nenan ubba wodekka ammanettanaadan, taani neekko sikkida shaara giddoora yaana” yaagiis. Hegaappe guyyiyan Muusee asai giidoogaa GODAAYYO yootiis.

<sup>10</sup> GODAI Muusa, “Neeni asaakko ba; baada hachchinne wontto neeni eta geeshsha. Eti bantta maayuwaa meeconna; <sup>11</sup> meeccidi heezantto gallassau giigona. Aissi giikko, heezantto gallasan asai ubbai be7ishin, GODAI Siinaa Deriyaa bollan wodhdhana. <sup>12</sup> Neeni ha deriyaa yuushuwan asaayyo zawaa wottada etayyo, ‘Deriyaa pude kiyennaadan woikko deriyaa xaphuwaa bochchennaadan inttena erite. Deriyaa bochchida ooninne tumuppe haiqqana. <sup>13</sup> He urai shuchchan cadettidi woikko wonddafiyyaa zubbiiyan dukettidi haiqqana; i kushen boshettenna. Mehe, woikko do7a, woikko asa



gidikkonne i paxa attenna' yaaga. Malkkatai tolidi waassiyo wode, he wode eti deriyaa pude kiyana giikko kiyona" yaagiis.

<sup>14</sup> Muusee deriyaappe asaakko duge wodhdhidoogaappe guyyiyan eta geeshshin, eti bantta maayuwaa meeccidosona. <sup>15</sup> Hegaappe guyyiyan asaa i, "Heezzantta gallasaayyo gigettite; maccaasaara aqoppite" yaagiis.

<sup>16</sup> Heezzantta gallassi maallado dadaa gunttai siyettiis. Wolqqanttainne sikkida shaarai deriyaa maayidi beettiis; malkkataikka punettiyo wolqqaama cenggurssai siyettiis. Hegaa gishshau, ba de7iyoosan asai ubbai kokkoriis. <sup>17</sup> Hegaappe guyyiyan Muusee asaa Xoossaara gattanau eti de7iyo dunkkaaniyaappe kessiis; eti deriyau garssa shoobban eqqidosa. <sup>18</sup> GODAI Siinaa Deriyaa bollan tamaara wodhdhido gishshau, Siinaa Dere ubbai cuwan kamettiis. Gita coociyaappe cuwai kiyiyoogaadan, appe cuwai zuliyaa essidi pude kiyiis. Mule deree keehippe gajigajiis. <sup>19</sup> Malkkataa punettainne keehippe dari dari biido wode, Muusee haasayin, Xoossaa cenggurssai ayyo zaaridi haasayiis. <sup>20</sup> GODAI Siinaa Deriyaa kiikiyan wodhdhidi, Muusa pude deriyaayyo kiikiyau xeesiis; xeesin Muusee pude kiyiis. <sup>21</sup> Kiyin GODAI a, "Neeni duge ba; baada asai GODAA be7ana giidi, zawaa kanttennaadaaninne etappe daroi haiqqennaadan asaa seera. <sup>22</sup> Harai atto GODAA mati shiiqiya qeesetikka banttana geeshshanau koshshees; hegee xayikko, GODAI eta qaxxayana" yaagiis.

<sup>23</sup> Muusee GODAA, "Asai deriyaa kiikiyaa pude yaanau danddayenna; aissi giikko, neeni ne huuphen, 'Ha sohuwaa geeshshadan dummayidi, ha deriyaa yuushuwan zawaa wottite' gaada nuuyyo oda wottadasa" yaagiis.

<sup>24</sup> Yaagin GODAI a, "Neeni duge ba; baada Aarona nenaara pude ekkada ya. Qeesetanne asaa GODAI xaissennaadan, eti zawaa kanttidi pude GODAAKKO yooppona" yaagiis. <sup>25</sup> Hegaa gishshau, Muusee duge asaakko wodhdhidi, GODAI giidoogaa etayyo yootiis.

## 20

### *Tammu Azazota*

<sup>1</sup> Xoossai ha qaalata ubbaa hagaadan yaagidi haasayiis; <sup>2</sup> "Nena Gibxxeppe ailletettaa biittaappe kessida GODAI ne Xoossai tanattennee.

<sup>3</sup> "Taappe attin, hara xoossassi goinnoppa.

<sup>4</sup> "Bolla saluwan de7iyaabaa, woikko garssa sa7an de7iyaabaa, woikko sa7aappe garssan haatta gidдон de7iyaabaa aibanne malattissada neeyyo goinniyo misileta kessoppa. <sup>5</sup> Etayyo hokkoppa woikko etayyo goinnoppa. Aissi giikko, taani, GODAI ne Xoossai qanaatiya Xoossaa; tana ixxiyaageeta aawatu nagaraa gishshau, naata heezzantto yeletaanne oiddantto yeletaa gakkanaassi qaxxayiyaagaa. <sup>6</sup> Qassi tana siiqiyaanne ta azazuwaa naagiya sha7atussi siiquwaa bessiya Xoossaa.

<sup>7</sup> "Xoossaa ne GODAA sunntaa hadan denttoppa; aissi giikko, GODAI ba sunntaa hadan denttiyaagaa qaxxayana.

<sup>8</sup> "Geeshsha oottada, Sambbata gallassaa naaga. <sup>9</sup> Neeni oottiyo ooso ubbaa usuppun gallassatun ootta. <sup>10</sup> SHin laappuntta gallassai GODAAYYO, ne Xoossaaayyo Sambbata. He gallassi aiba oosonne oottoppa; neeni, woikko ne attuma na7ai, woikko ne macca na7iyaa, woikko ne ashkkarai, woikko ne ashkkariyaa, woikko ne miizzai, woikko ne karen de7iya betee he gallassan aiba oosokka oottoppote. <sup>11</sup> Aissi giikko, usuppun gallassaa gidдон GODAI salota, sa7aa, abbaanne eta gidдон de7iya ubbaa medhdhiis; shin laappuntta gallassan shemppiis. Hegaa gishshau, GODAI Sambbata gallassaa anjjiisinne geeshshiis.

<sup>12</sup> "GODAI ne Xoossai neeyyo immiyo biittan ne baree aduqqana mala, ne aawaanne ne aayyiyo bonchcha.

<sup>13</sup> "Asa woroppa.

14 “SHaaramuxoppa.

15 “Wuuqqoppa.

16 “Ne shooruwaa bollan wordduwaa markkattoppa.

17 “Ne shooruwaa keettaa amottoppa; ne shooruwaa keettaayyiyo, woikko a ashkkaraa, woikko a ashkkariyo, woikko a booraa, woikko a hariyaa, woikko ayyo de7iyaabaa aibanne amottoppa” yaagiis.

### *Asaa Yashshaa*

18 Asai ubbai dadai xuuqqiyoogaanne wolqqanttai wolqqammiyoogaa be7iis; malkkataa waasuwa siyiis; qassi deree cuwattiyoogaakka be7iis; be7idi asai yashshaa kokkoriiddi, haahuwan eqqiis. 19 Eti Muusa, “Neeni nuuyyo haasaya; nuuni siyana; shin nuuni haiqqennaadan, Xoossai nuuyyo haasayoppo” yaagidosona. 20 Muusee asaa, “Xoossai inttena paaccanau, nagaraa intte oottenna mala, a yashshai intte wozanan de7anaadan, i yiido gishshau yayyoppite” yaagiis. 21 Asai haakkidi eqqidaashin, Xoossai de7iyoosaa sikkida xumaakko Muusee shiiqiis.

### *Yarshshiyu Sohotun Go7ettiyo Wogata*

22 Hegaappe guyyiyan, GODAI Muusa, “Israa7eela asaayyo hagaadan yaagada yoota; ‘Taani saluwaappe intteyyo haasayidoogaa intte intte huuphen be7ideta. 23 Ta matan ai eeqanne ootoppite; bira eeqa woikko worqqa eeqa intteyyo ootoppite. 24 Neeni taayyo yarshshuwaa yarshshiyosaa urqqaappe medhdha; medhdhada ne xuuggiyo yarshshuwaa, ne atotettaa yarshshuwaa, ne dorssatanne ne boorata a bolli yarshsha. Ta sunntai hassayettana mala, taani oottiyo soho ubban neekko yaada, nena anjjana. 25 Neeni taayyo yarshshuwaa yarshshiyosaa shuchchaappe keexxikko, masettida shuchchaappe keexxoppa; aissi giikko, neeni massiyo miishshan a bochchikko, ne a tunissaasa. 26 Ta yarshsho sohuwaa pude gayyiyan kiyiyoogaa keena xoqqan gimboppa; aissi giikko, neeni kiyiyo wode, ne kalloi beettana’ yaagada yoota.

## 21

### *Ailleta Oiqqiyo Lo77o Ohettaa*

1 “Neeni etayyo immana higgee haggaa. 2 Neeni Ibraawe ailliyaa shammikko, i neeyyo usuppun laittaa ootto; shin laappunnta laitti i ainne qanxxennan, ailletettaappe coo kiyidi bo. 3 I barkka yiidabaa gidikko barkka bo; ba keettaayeera yiidabaa gidikko, a keettaayyiyaakka aara bu. 4 A godai ayyo machcho immidabaa gidikkonne machchiyaa ayyo attuma naata woikko macca naata yelidabaa gidikko, he maccaasiyaanne i naati a godaabaa; i barkka kiyidi bo. 5 SHin he aillee, ‘Taani ta godaa, ta keettaayyiyoonne ta naata siiqais; taani ailletettaappe kiyikke’ yaagikko, 6 a godai a pirddiyaageetu sintti aatto; hegaappe guyyiyan pengge woikko pengge qosilettaakko a efiidi, a haittaa goottan lukko. Simmi i ba de7o laitta ubban ayyo aille gidana.

7 “Asi ba macca na7iyo ailletettau baizzikko, attuma ailleti ailletettaappe kiyiyoogaadan a kiyuppu. 8 A bana dooridi efida godaa lo77ana xayikko, godai o wozissanau koshshees. I iyyo ammanettibeenna gishshau, o allagau baizzanau ayyo maati baawa. 9 I o ba na7aayyo immanau doorikko, macca na7assi bessiyaabaa iyyo ootto. 10 I baayyo hara maccaasa ekkikko, koiro maccaaseessi i qumau, i maayuwau woikko i inddau bessiyaabaa iyyo pacissoppo. 11 I ha heezzubata iyyo immana xayikko, ainne miishsha qanxxennan ailletettaappe kiyada bu.

### *Iitati Qaxxayettiyo Higgiyaa*

12 “Asa shocidi woriya asa tumuppe woranau bessees. 13 SHin eriiddi gidennan i woriyo wode, taani, Xoossai co77u giidobaa gidikko, i baqatanasaa intteyyo taani giigissana. 14 SHin asi halchchidi eriiddi hara asa worikko, he aawa ta yarshsho sohuwaappe diggada, hara sohuwan wora.

<sup>15</sup> “Ba aawaa woikko ba aayyiyo dechchiya uri ooninne tumuppe haiqqo.

<sup>16</sup> “Asa wolqqan oiqqidi baizziya uri woi wolqqan oiqqido asi a kushiyan beettido asi haiqqanau bessees.

<sup>17</sup> “Ba aawaa woikko ba aayyiyo cayiyaagee haiqqo.

<sup>18</sup> “Naa77u asati ooyettikko, issoi hinkkuwaa shuchchan caddikko woikko bubuxikko, he deshettidaagee haiqqennan attidabaa gidikkonne harggidi hiixan pe7ikko, <sup>19</sup> denddidi guufiyaara kare heeran hemettikko, he dechchidaagee qaxxayettennan attees; gidikkonne i a oosuwaa teqqido gishshau, miishshaa qanxxanaunne a pattanau xallanau koshshees.

<sup>20</sup> “Asi ba attuma ailliyaa woikko macca ailliyoo gatiman shocikkonne heгаа gaasuwan i a kushiyan haiqqikko, shocidaagee qaxxayettanau bessees. <sup>21</sup> SHin he deshettidaagee issi woikko naa77u gallasaara denddikko, he aillee a miishsha gidiyo gishshau, i qaxxayettenna.

<sup>22</sup> “Naa77u asati issoi issuwaara warettiiddi abbe ixeta maccaasiyo dechchikkonne a boshettikko, heгааappe hara iita deshetti xayikko, he maccaasee azinai oichchidobanne daannati pirddidobaa aibanne qanxxo. <sup>23</sup> SHin iyyo deshettai darikko, shemppoi haiqqikko shemppo, <sup>24</sup> aife gishshaa aife, achcha gishshaa achcha, kushe gishshaa kushe, toho gishshaa toho, <sup>25</sup> xuussa gishshaa xuussa, masuntta gishshaa masuntta, qoo7o gishshaa qoo7o ekkanaau koshshees.

<sup>26</sup> “Issi asi ba attuma ailliyayyo woikko macca ailleeyyo aifiyaa baqqidi toissikko, he aifiyaa gishshau aillettaappe kessi yeddo. <sup>27</sup> Hegaadankka, ba ailliyaa achchaa woikko ba aillee achchaa menttikko, he achchaa gishshau aillettaappe kessi yeddo.

### *Ba Aawatettan Poliyooobata*

<sup>28</sup> “Boori maccaasa woikko attumaasa qaicidi worikko, he boorai shuchchan cadettidi haiqqo; a ashoi meetettoppo. SHin booraa godai qaxxayettoppo. <sup>29</sup> SHin boorai kasekka qaiciyo meezee de7iyooogaa gidin, asai a godau yooti wottidaashin, a godai qachchennan ixxin, boorai attuma asa woikko macca asa worikko, he boorai shuchchan cadettidi haiqqo; qassi a godaikka haiqqo. <sup>30</sup> SHin i gumiyaa qanxxanaadan oishettikko, eti oichchidobaa aibanne qanxxidi, ba shemppuwaa wozo. <sup>31</sup> Boorai attuma na7a woikko macca na7a qaicidi worikkokka, pirddai issi mala gido. <sup>32</sup> Boorai attuma ailliyaa woikko macca ailliyoo qaicidi worikko, booraa godai ailliyaa godaassi hasttamu xaqara biraa gumiyaa qanxxo. Boorai shuchchan cadettidi haiqqo.

<sup>33</sup> “Issi asi olla qum77uwaa pogirggikko, woikko olla bookkidi qum77ennan aggikko, boori woikko haree he ollan wullikko, <sup>34</sup> he ollaa godai mehiyaa waagaa qanxxo. I a godaassi waagaa qanxxidi, haiqqida mehiyaa bau ekko.

<sup>35</sup> “Issi asa boori haraa booraa qaicidi worikko, paxa booraa baizzidi, a waagaanne haiqqida booraa likkiyan shaakki ekkona. <sup>36</sup> SHin he boorai qaiciyaagaa gidiyoogee kaseti erettishin, a godai a qachchennan aggidabaa gidikko, a godai boora qanxxo. Qanxxidi he haiqqidaagaa bau ekko.

## 22

### *Asi Babaa Naagiyo Higgiyaa*

<sup>1</sup> “Issi asi boora woikko dorssa wuuqqidi shukkikko, woikko baizzikko, booraa gishshaa ichchashu boorata, dorssaa gishshaa oiddu dorssata qanxxo.

<sup>2</sup> “Kaisoi keetta bookkiiddi ohettikkonne shocettidi haiqqikko, shocidaagee suutta gussidoogau oishettenna. <sup>3</sup> SHin hegee xalqqee doliichchin hanikko, i he gukkida suutta acuwan oishettees. Kaisoi ba wuuqqidobaa zaaro; shin ayyo aibakko xayikko, ba wuuqqidobaa zaaranau i baizetto. <sup>4</sup> I wuuqqido mehee paxa de7iiddi a kushen beettikko, boora, woikko hare, woikko dorssa gidikkokka, i ba wuuqqidoogaa naa77u kushe aattidi qanxxo.

<sup>5</sup> “Issi asi ba mehiyaa dembban woikko woiniyaa turaa gidдон heemmishin, mehee shunchchidi hara asa shooqaappe miikko, i ba shooqaappe woikko ba woiniyaa tu-raappe ubbaappe lo77iyaabaa afileamaa qanxxo.

<sup>6</sup> “Xaragi denddidi agunttaa buuraara laa7idi, dooriyan de7iya kattaa, woikko equwan de7iya kattaa, woikko goshshaa muleera miyaabaa gidikko, koiro xaragaa oittida bitanee afileamaa qanxxo.

<sup>7</sup> “Issi asi biraa woikko hara miishshaa naagissanau ba shooruwaassi hadara immi-daashin, shooruwaa sooppe he miishshai wuuqettikkonne kaisoi ohettikko, kaisoi he miishshaayyo naa77u kushe aattidi qanxxo. <sup>8</sup> SHin kaisoi beettennan xayikko, keettaa godai pirddiyaageetukko shiiqo; shiiqidi ba shooruwaa miishshaa bolli ba kushiya wottibeennaagau caaqqo.

<sup>9</sup> “Asi ai mootuwanka, boora gaasuwan, woikko hare gaasuwan, woikko dorssa gaasuwan, woikko maayo gaasuwan, woikko hara bayidabaa gaasuwan, ‘Hagee tabaa’ giidi mootettikko, naa77u baggaikka bantta mootuwaa pirddiyaageetu sintti aattona; pirddiyaageeti mooranchcha giido uri ba shooruwaayyo naa77u kushe aattidi qanxxo.

<sup>10</sup> “Asi ba shoorossi hare, woikko boora, woikko dorssa, woikko hara mehe naagissanau hadara immin haiqqikko, woikko deshettikko, woikko ooninne be7ennan amb-baanoi efiikko, <sup>11</sup> hadaraawai ba shooruwaa mehiyaa bolli ba kushiya wottibeennaagau GODAA sinttan caaqqin, eta gidдон de7iya yohoi mahettees. He mehiyaa godai caaquwaa ekko; qanxxo immanau koshshenna. <sup>12</sup> SHin mehee shooruwaappe wuuqettidabaa gidikko, keettaawaayyo qanxxo. <sup>13</sup> He mehiyaa do7i mentterettidi miidobaa gidikko, marka gidanaadan do7ai miishin attidabaappe ekki eho; yaatidi meqerettida mehiyaa gishshaa qanxxoppo.

<sup>14</sup> “Asi ba shooroppe mehe garxxikkonne a godai bainnasan he mehee deshettikko woikko haiqqikko, he mehiyaa qanxxo. <sup>15</sup> SHin a godai aara de7ikko, garxxidaagee qanxxoppo; keruu ekkidobaa gidikko, keruu qanxxiyo miishshai acuwaa qanxxiis.

### *Geeshsha De7uwaanne Ammanuwaa Wogaa*

<sup>16</sup> “Issi asi azinau giigabeenna geela7iyo cimmidi, iira zin77iyaabaa gidikko, o cilooshidi baayyo machcho ootto. <sup>17</sup> I aawai o ayyo immanau kebidi ixkikko, geela7iyo ekkiya urai cilooshiyoogaa keena biraa i aawaayyo immo.

<sup>18</sup> “Bitiya mishiriyo paxa wottoppa.

<sup>19</sup> “Meheera zin77iya ooninne haiqqo.

<sup>20</sup> “GODAA xalaalaayyoppe attin, hara xoossaassi yarshshiya ooninne muleera xayo. <sup>21</sup> Betidi yiida asa qohoppite woikko un77oppite; aissi giikko, inttekka Gibxxe biittan bete gididi de7ideta. <sup>22</sup> Azinai haiqqido am77iyoonne aawai haiqqido hiyyeesaa un77oppite. <sup>23</sup> Intte eta un77in, eti taakko waassikko, <sup>24</sup> taani eta waasuwa tumuppe siyana; he wode ta hanqqoi intte bolli denddana; taani inttena bisuwan wurssana; intte keettaayeti am77e intte naatika aawu bannaageeta gidana.

<sup>25</sup> “Intte gidдон de7iya ta asaappe issi hiyyeesau miishsha tal77ikko, miishsha dichchau immiya asadan hanoppite; neeni dichchaa a oichchoppa. <sup>26</sup> Neeni issibaa gishshau ne laggiyaa maayuwaa oiqqikko, awai wullennan de7ishin ayyo zaara; <sup>27</sup> aissi giikko, i ba bollaa kammiyoogee hinni xalaalaana; harabaa ai maayidi aqanau dand-dayii? I taayyo waassikko, taani qarettiyaagaa gidiyo gishshau, siyana.

<sup>28</sup> “Xoossaa bolli cashsha qaalaa haasayoppa, woikko ne deriyaa haariyaagaa qang-goppa. <sup>29</sup> Ne kattaa xeeraappenne ne woiniyaa gum77ettaa kumettaappe taayyo yarshshuwaa shiishsha.

“Neeeni ne attuma naatu gidдон bairatiya na7aa taayyo immanau koshshees. <sup>30</sup> Miizzaappekka dorssaappekka hegaadan ootta. Eti laappun gallassai gakkanaashin, bantta aayetuura aayetuura takkona; hospunntta gallassi eta taayyo imma.

<sup>31</sup> “Intte taayyo geeshsha asa gidanau koshshees; heгаа gishshau, bazzo do7ai ment-terettidi worido mehiyaa ashuwaa mooppite; heгаа kanau olite.

## 23

### *Likke Pirddaa*

<sup>1</sup> “Worddo odo puukkoppa; worddo markka gidada, iita asa maaddoppa. <sup>2</sup> Iitabaa oot-tanau daro asaa kaalloppa; pirddaa geellayanau daro asaara maayada markkattoppa. <sup>3</sup> Hiyyeesai pirddau shiiqikko, mootuwan a metuwaa xeellada maaddoppa.

<sup>4</sup> “Ne morkkiyaa boori woikko haree bayidaagaa demmikko, zaarada ayyo efa. <sup>5</sup> Nena ixxiya bitaniyaa haree caanaara wullidaashin be7ikko, hegan aggaagoppa; maaddada aara dentta.

<sup>6</sup> “Pirddaa dabaaban maaddada, ne hiyyeesa asaa pirddaa geellayoppa. <sup>7</sup> Oonanne malttiyan mootoppa; geeshshaa woikko xilluwaa woroppa; aissi giikko, dabaa oottidaa-gaa taani saro yeddikke. <sup>8</sup> Mattaayiyaa ekkoppa; aissi giikko, mattaayee xeelliyaageetu aifiyaa qooqisseesinne xillotu qaalaa mirqqees.

<sup>9</sup> “Betiyya naaqqoppite; bete gidiyoogee aiba azzanttiyaabaakko ereeta; aissi giikko, intte intte huuphen bete gididi Gibxxe biittan de7ideta.

### *Laappuntta Laittaanne Laappuntta Gallassaa*

<sup>10</sup> “Neeni ne gadiyaa usuppun laittau goyada, zerada kattaa cakka ekka. <sup>11</sup> Laappuntta laitti gadiyaa goyennan shaachcha; yaatikko, ne asaa giddon de7iya hiyyeesati hegaappe miyoobaa demmana; qassi etappe attiyaagaa do7ati maana. Neeni ne woiniyaa turaakka ne wogaraakka hegaadan ootta. <sup>12</sup> Usuppun gallassaa ne oosuwaa ootta; ne boorainne ne haree shemppana malanne ne son yelettida ailleenne betee, gazddana mala, laappuntta gallassi ooso oottoppa.

<sup>13</sup> “Taani inttena giidobaa ubbaa minttidi oottite; hara xoossatu sunntaa xeesoppite; intte inxxarssaappe hegee siyettoppo.

### *Gita Baalata*

<sup>14</sup> “Laittan heezzutoo intte taayyo baalaa bonchchite. <sup>15</sup> Oittaa Baalaa bonchchite; taani inttena azazidoogaadan, laappun gallassaa irshshuwaa yeggibeenna oittaa miite; intte Abiiba giyo aginan keerido gallassan ha baalaa bonchchite; aissi giikko, intte Gibxxeppe kiyidoi he aginaana.

“Intteppe issi asinne ta sinttan mela kushe beettoppo.

<sup>16</sup> “Qassi intte intte gaden zerin, koiro gakkida kattaa cakkiyo wode, Kattaa Cakkiyo Baalaa bonchchite.

“Qassikka laittaa wurssettan, kattaa aifiyaa gadeppe shiishshiyoo wode, SHiishuwaa Baalaa bonchchite. <sup>17</sup> Attumaasai ubbai Ubbaa Haariya GODAA sinttan laittan heezzu-too beetto.

<sup>18</sup> “Neeni yarshshuwaa suuttaa taayyo shiishshaidda, irshshuwaa yeggidi uukkido oittaaara shiishshoppa. Ta baalaa bonchchiyo gallassi yarshshettida modhdhuwaappe maalladossi aibinne attoppo. <sup>19</sup> Ne gaden baira kaxxida kattaappe ubbaappe lo77iyaagaa GODAA soo, ne Xoossaa soo eha. Deeshsha maraa a aayee maattan doissoppa.

### *Ufaissa Qaalatanne Kaalliyo Wogata*

<sup>20</sup> “Ne ogiyan nena naagana malanne taani neeyyo giigissido sohuwaa nena efaana mala, taani kiitanchchaa ne sinttau kiittana. <sup>21</sup> I yootiyoobaa ezggada ayyo azazetta; a bolli makkaloppa; ta sunntai a bolli de7iyo gishshau, intte nagara oottiyaabaa gidikko, intteyyo i atto geenna. <sup>22</sup> I yootiyoobaa intte minttidi ezggikkonne taani yootiyoobaa ubbaa oottikko, intte morkketa ubbaa taani morkkana; inttenaara eqettiyaageetuura taanikka eqettana. <sup>23</sup> Ta kiitanchchai intteppe sinttau biidi, inttena Amooretu biittaa,



Hiitetu biittaa, Parzzetu biittaa, Kanaanetu biittaa, Hiiwetu biittaaanne Yaabuusatu biittaa ehaana. Taani eta muleera xaissana. <sup>24</sup> Eta xoossatu sinttan hokkoppite, woikko goinnoppite, woikko eta hanuwaa qulloppite. Intte eta xaissanaunne eta eeqa shuchchata mentterettanau koshshees. <sup>25</sup> GODAASSI, intte Xoossaassi, goinnite; yaatikko, i intte kattaanne intte haattaa anjjana; taani harggiyaa intte giddoppe diggana. <sup>26</sup> Intte biittan ai maccaasinne boshettenna; mainenna. Taani intte de7ana laittaa qoodaa kunttana.

<sup>27</sup> “Taani ta yashshaa intte sinttau yeddana; inttenaara gaittiya kawotetta ubbaa daganttana; intte morkketi ubbai intteyyo zokkuwaa zaaridi, baqatanaadan taani oottana. <sup>28</sup> Taani intteppe sinttau kashiyaa yeddana; yeddada Hiiweta, Kanaanetanne Hiiteta intte sinttaappe laaggada kessana. <sup>29</sup> SHin biittai mela attennaadaaninne bazzo do7ai inttena waissennaadan, issi laittan eta gooddikke. <sup>30</sup> SHin intte qoodan daridi, he biittaa laattana gakkanaassi, taani eta guuttaa guuttaa laaggada kessana. <sup>31</sup> Taani intte zawaa Zo7o Abbaappe Pilisxxeema Abbaa, bazzuwaappe Efiraaxiisa SHaafaa gattana. He biittan de7iya ubbaa taani intte kushiyan aattada immana; inttekka eta intte sinttappe laaggidi kessana. <sup>32</sup> Etaara woikko eta xoossatuura maachcha wotoppite. <sup>33</sup> Eta intte biittan wotoppite; hinkkoode eti inttena ta bolli nagaraa ootissana; aissi giikko, eta xoossatussi goinniyoogee tumuppe intteyyo pire gidana” yaagiis.

## 24

### *Ba Asaassi Maacido Maachchaa Minttiis*

<sup>1</sup> Hegaappe guyyiyan GODAI Muusa, “Neeni, Aarooni, Nadaabi Abiihunne Israa7eelappe laappun tammu asaa halaqati GODAAKKO deriyaa huuphiyaa pude kiyite; kiyidi haahuwan goinnite. <sup>2</sup> SHin Muusee, neeni nerikka taakko shiiqa; harati ta mati yooppona. Qassi asaikka nenaara pude kiyoppo” yaagiis.

<sup>3</sup> Yaagin Muusee yiidi, GODAA qaala ubbaanne a wogaa ubbaa asaayyo yootiis; yootin asai ubbai issi qaalan, “GODAI yootidobaa ubbaa nuuni oottana” yaagidosona.

<sup>4</sup> Muusee GODAI yootidobaa ubbaa xaafiis.

Wonttetta gallassi maallado guuran denddidi, deriyaa xaphuwan yarshshiyooosaa gimbbiis. Gimbbidi Israa7eela asaa yaraa tammanne naa77aa sunttan, tammanne naa77u shuchchaa tuussaa essiis. <sup>5</sup> I Israa7eelatuppe yelaga attumaasaa kiittin, eti biidi xuuggiyo yarshshuwaa shiishshidosona; qassi issippetettaa yarshshuwaassi mirggota GODAASSI yarshshidosona. <sup>6</sup> Muusee suuttaappe baggaa ekkidi keriyani tigiis; attida bagga suuttaa i yarshshiyooosan caccafiis. <sup>7</sup> Hegaappe guyyiyan Maachchaa Maxaafaa ekkidi, asaassi nabbabiis; nabbabin eti, “GODAI yootidobaa ubbaa nuuni oottana; nuuni azazettana” yaagidosona.

<sup>8</sup> Hegaappe guyyiyan, Muusee he suuttaa ekkidi, asaa bolli caccafiidi eta, “Be7ite, GODAI ha qaala ubban inttenaara wottido maachchaa suuttai haggaa” yaagiis.

<sup>9</sup> Muusee, Aarooni, Nadaabi, Abiihunne Israa7eela cimattuppe laappun tammai pude kiyidosona. <sup>10</sup> Kiyidi Israa7eela Xoossaa be7idosona; a tohuwaappe garssaara saluwaadan geeyida sampperiyaa giyo phooliya shuchchaappe oosettidabaa milatiya wuige malabai de7ees. <sup>11</sup> SHin Xoossai Israa7eela asaa halaqata woribeenna. Eti Xoossaa be7idosona; a sinttan miidosonanne uyidosona.

### *Muusee Siinaa Deriyaa Huuphiyaa Kiyiis*

<sup>12</sup> GODAI Muusa, “Neeni taakko deriyaa pude haaya; haa taakko kiyada, hagan takka; yaatobare neeni eta tamarissana mala, taani higgiiyaanne azazuwaa xaafido masettida shuchchaa neeyyo immana” yaagiis.

<sup>13</sup> Hegaappe guyyiyan, Muusee ba ashkkaraa Yaasuura baanau denddiis; Muusee Xoossaa deriyaa pude kiyiis. <sup>14</sup> Israa7eela asaa halaqata i, “Nuuni inttekko simmanaashin hagan de7ishshite; Aarooninne Huuri hagan inttenaara de7oosona; yohoi de7iyo ooninne etakko bo” yaagiis.

<sup>15</sup> Muusee deriyaa pude kiyido wode, shaarai deriyaa kammiis. <sup>16</sup> Qassi GODAA bonchchoi Siinaa Deriyaa bollan uttiis; he shaarai usuppun gallassaa maayis; laappunta gallassan he shaaraa giddoppe GODAI Muusa xeesiis. <sup>17</sup> Israa7eelatuyyo GODAA bonchchoi deriyaa huuphiyan xuuggiya tama malatidi beettiis. <sup>18</sup> Hegaappe guyyiyan Muusee he shaaraa giddo gelidi, deriyaa pude kiyiis; kiyidi deriyaa huuphiyan oitamu gallaasanne oitamu qammaa takkiis.

## 25

### *Xoossaa Dunkkaaniyaa Keexxanau Imettida Imuwaa*

<sup>1</sup> GODAI Muuseyyo hagaadan yaagiis; <sup>2</sup> “Taayyo immiyoobaa ehaanaadan neeni Israa7eelatuyyo yoota; taayyo immanau a wozanai a imma imma giyo asa ubbaa imotaa neeni taayyo ekka. <sup>3</sup> Intte etappe ekkana imotai hгаа: worqqaa, biraa, naa haasiyaa birataa, <sup>4</sup> salo milatiya qacinaa, ochchaa teeraa milatiya qacinaa, shololla zo7o qacinaanne liiqo liinuwa, deeshshaa agoziyaa, <sup>5</sup> dorssa orggiyaa calaa zo7o qalamiyan yeggi kessidoogaa, irppaniyaa, guuganttaa, <sup>6</sup> xomppiyaassi wogaraa zaitiyaa, tiyettiyo zaitiyaanne ixaanaa sawettiya qimamiyaa; <sup>7</sup> eefuudiyaaninne tiran wottiyoogan yeggiyo maragidiyaa geetettiya shuchchatanne hara phooliya al77o shuchchata eho.

<sup>8</sup> “Yaatidi taani eta gidдон aqanaadan, eti taayyo goinniyo sohuwaa giigissona. <sup>9</sup> Likke taani nena bessana leemisuwaadan Xoossaa Dunkkaaniyaanne a gidдон de7iya miishshata oottite.

### *Maachchaa Taabootaa*

<sup>10</sup> “Eti guuganttaa mittaappe zananai naa77u waranne baggaa, gomppai issi waranne baggaa, geesai qassi issi waranne baggaa gidiya Taabootaa medhdhona. <sup>11</sup> Suwaanne kariyaa walahi bainna worqqan sheeshsha; a yuushuwaakka worqqa tigettan yuushsha aatta. <sup>12</sup> He Taabootaayyo oiddu worqqa sagaayota tiga; tigada oiddu gedetun issi baggaara naa77u sagaayota, qassi hankko baggaara naa77u sagaayota aatta. <sup>13</sup> Hegaappe guyyiyan, guuganttaappe kasota kessa; kessada worqqan sheeshsha. <sup>14</sup> Taabootaa tookkanau, Taabootaa miyyiyan de7iya sagaayotun kasota aatta. <sup>15</sup> Tookkiyo kasoti Taabootaa sagaayotu gidдон de7ona; eti hegaappe mulekka kiyoppona. <sup>16</sup> Taabootaa gidдон taani neeyyo immiyo, tammu azazoti xaafetti uttido naa77u masettida shuchchata wotta.

<sup>17</sup> “Walahi bainna worqqaappe naa77u waranne baggaa aduqqiya, issi waranne baggaa aakkiya atto giyo sohuwaa qum77uwaa medhdha. <sup>18</sup> Qum77uwaayyo wurssetta naa77u bagga gaxan naa77u kiruubeta, qoxettida worqqaappe medhdha. <sup>19</sup> Issi kiruubiyaa issi bagga gaxan, naa77antto kiruubiyaa hankko bagga gaxan naa77aakka qum77uwaara gatta oittada medhdha. <sup>20</sup> Kiruubeti bantta qefiyaa denttidi, atto giyo sohuwaa qum77uwaa bantta qefiyan kuwayi wottona; qassi issoi issuwaakko simmi uttidi, qum77uwaa xeellona. <sup>21</sup> Qum77uwaa Taabootaayyo bolla baggan wotta; qassi taani neeyyo immiyo azazoti xaafettido masettida shuchchata Taabootaa gidдон wotta. <sup>22</sup> Maachchaa Taabootaa bolla qum77uwaa bolli de7iya naa77u kiruubetuppe gidduwan taani nenaara gaittana; gaittada Israa7eela asaayyo taani immiyo azazo ubbaa yan neeyyo immana.

### *Oittaa Wottiyo Xaraphheezaa*

<sup>23</sup> “Guuganttaa mittaappe zananai naa77u wara, gomppai issi wara, geesai qassi issi waranne bagga gidiyo issi xaraphheezaa medhdha. <sup>24</sup> Yaadata walahi

bainna worqqan sheeshsha; qassi a yuushuwan worqqaa tigaretta yuushsha aatta. <sup>25</sup> Hegaadankka, qassi gomppai takkaaro gidio shaashiyaa a bolli yuushsha aatta. Yaadata a bolli worqqa tigaretta yuushsha. <sup>26</sup> He xaraphpheezaayyo oiddu worqqa sagaayota medhdhada, xaraphpheezaa tohoti de7iyo oiddu zooretun oitta. <sup>27</sup> Xaraphpheezaa tookkanau kasota aatiyo sagaayoti xaraphpheezaa shaashiyaa lanqqiyan shiiqidi de7ona. <sup>28</sup> He tookkiyo kasota guuganttaappe kessada, worqqan eta sheeshsha. <sup>29</sup> Hegaadankka, qassi sainetanne cilppata, yarshshuwaa yarshshiiyo wode go7ettiyo duuqqiyoobatanne xuu7ata walahi bainna worqqaappe ootta. <sup>30</sup> Ta sintti aatiyo geeshsha oittai ubba wodekka xaraphpheezaa bolli xayoppo.

### *Xomppiyaa Wottiyo Ballaa*

<sup>31</sup> “Xomppiyaa wottiyo ballaa qoxettida walahi bainna worqqaappe ootta; he ballai eqqiyo gedeekka, qassi giddo toomaikka ubbai qoxettida worqqaappe oosettanau koshshees. A qururuusoti, a kukkumotinne a ciishshati ubbai aara issippe oigetti merettanau koshshees. <sup>32</sup> Miyyiyaara usuppun marati ayyo kiyona; maratuppe heez-zati issi baggaara, qassi heezzati hankko baggaara de7ona. <sup>33</sup> Usuppun maratussikka huuphiyan huuphiyan issi issi kukkumoinne ciishshai de7iyo lauziyaa ciishshaa milatiya wanccai de7o. <sup>34</sup> Xomppiyaa wottiyo ballaassi giddo toomai, kukkumotinne ciishshati de7iyo lauziyaa ciishshaa milatiya oiddu wanccan alleegetto. <sup>35</sup> Naa77ai naa77ai issippe waattan de7iyo heezzu maratuppe garssaara issi issi kukkumoi de7o. <sup>36</sup> Kukkumotinne marati ubbai xomppiyaa wottiyo ballaara issippe, oigetti issuwaa gididi, walahi bainna worqqaappe qoxettidi oosettona.

<sup>37</sup> “Hegaappe guyyiyan, xomppiyaa wottiyo ballau laappun xomppeta giigissada, eti sinttaa poo7ana mala xoqqu oottada wotta. <sup>38</sup> Xomppiyaa toissiiyo qaphetanne eta wottiyoobata walahi bainna worqqaappe ootta. <sup>39</sup> Xomppiyaa wottiyo ballanne an go7ettiyo miishsha ubbai hasttamanne ichchashu kilo giraame gidia walahi bainna worqqaappe oosettona. <sup>40</sup> Akeeka; taani nena deriyaa huuphiyan bessido leemisuwaa kaallada ootta.

## 26

### *Xoossaa Dunkkaaniyaa*

<sup>1</sup> “Qassi liiqo liinuwaappenne salo milatiya, ochchaa teeraa milatiyaanne shololla zo7o qacinaappe dadettida tammu magalashotuppe Xoossaa Dunkkaaniyaa giigissa. He magalashotu bolli bollaara issi hiillan kiruubetu misiliyaa sikissa. <sup>2</sup> Magalashoti ubbai issi likke gidona; geesai laatamanne hospun wara; gomppai oiddu wara gido. <sup>3</sup> Ichchashu magalashota issippe gattada sikka; hankko attida ichchashu magalashotakka etadan ootta. <sup>4</sup> Issippe gaittidi sikettida magalashotuppe issi magalashuwaassi wurssetta gaxan salo milatiya carqqiyaappe siireta medhdha; qassi issippe gaittidi sikettida hankko magalashuwankka hegaadan ootta. <sup>5</sup> Issippe gaittida issi magalashuwaa bolli ishatamu siireta, qassi issippe gaittida hankko magalashuwaa bollikka ishatamu siireta medhdha; he siireti ubbaikka issoi issuwaassi baazzan de7ona. <sup>6</sup> Hegaappe guyyiyan, worqqaappe ishatamu qapheta medhdha; medhdhada Xoossaa Dunkkaanee issuwaa gidana mala, he magalashotu gaxaa gaxaa he qaphetun oitta.

<sup>7</sup> “Xoossaa Dunkkaaniyaa bollaara kammanna mala, tammanne isiini magalashota deeshshaa agoziyaappe daddada, issi dunkkaaniyaa medhdha. <sup>8</sup> Tammanne isiini magalashotikka issi likke gidona; issi issi magalashuwaa geesai hasttamu wara, gomppai oiddu wara gido. <sup>9</sup> Ichchashu magalashota issi baggaara, usuppun magalashota qassi hankko baggaara gattada sikka. Usuppunta magalashoi dakkotidi, dunkkaaniyaassi sintta baggaara daabulletto. <sup>10</sup> Gatti sikkido magalashotuppe issi

magalashuwaa gaxan ishatamu siireta medhdha; qassi gatti sikkido hankko magalashotuppe wurssetta magalashuwaa gaxan ishatamu siireta medhdha. <sup>11</sup> Ishotamu nahaasiyaa qapheta medhdhada, siiretu giddo gelissa; yaatada dunkkaaniyaa issippe gatta oitta. Yaatobare ha naa77u oiqettida kamoti issuwaa gidana. <sup>12</sup> Ha dunkkaaniyaa magalashotuppe palahida bagga magalashoi Xoossaa Dunkkaaniyaassi guyyessaara woxaletto. <sup>13</sup> Dunkkaaniyaa magalashoti naa77u baggaarakka issi issi wara keenaa palahona; he palahidaageeti Xoossaa Dunkkaaniyaa kammana mala, naa77u bagga miyyiyaara woxalettona.

<sup>14</sup> “Dunkkaaniyaa bollaara kammanau dorssa orggiyaa calaa zo7o qalamiyan yeggi kessidoogaa giigissa; qassi a bollaara kammanau irppaniyaa giigissa.

<sup>15</sup> “Xoossaa Dunkkaaniyaa xagaagiyoobata sitti giida guuganttaappe kessa. <sup>16</sup> Issi issi xagaagiyau geesai tammu wara, gomppai issi waranne bagga gido. <sup>17</sup> Issi issi xagaagiyaassi issuwaa issuwara gatti oittiya naa77u marata medhdha. Xoossaa Dunkkaaniyaa xagaageta ubbaakka hegaadan ootta; <sup>18</sup> Xoossaa Dunkkaaniyaayyo tohossa baggaara laatamu xagaageta medhdha. <sup>19</sup> Medhdhada issi issi xagaagiyaayyo naa77u gedeta, muleera oitamu gedeta biraappe giigissa. <sup>20</sup> Xoossaa Dunkkaaniyaayyo huuphessa baggaara, laatamu xagaageta medhdha. <sup>21</sup> Medhdhada issi issi xagaagiyau naa77u gedeti, muleera oitamu gedeti, biraappe giigona. <sup>22</sup> Qassi Xoossaa Dunkkaaniyaayyo guyye gaxan arggo baggaara usuppun xagaageta medhdha. <sup>23</sup> Medhdhada guyye gaxan de7iya zooretuyyo naa77u xagaageta giigissa. <sup>24</sup> Ha naa77u zooretun de7iya xagaageti, xaphuwaappe xeeraa gakkanaashin daabula gididi biidi, xeeran issi migiduwun geli oiqettona; yaatidi naa77ai issuwaa gidona. <sup>25</sup> Hegaa gishshau, issi issi xagaagiyaayyo garssaara naa77u naa77u gedeti de7ona; muleera hosppun xagaagetinne biraappe oosettida tammanne usuppun gedeti de7ona.

<sup>26</sup> “Qassi guuganttaappe hiraqota kessa. Xoossaa Dunkkaaniyaayyo issi bagga miyyiyan de7iya xagaagetussi ichchashu hiraqota, <sup>27</sup> qassi hankko bagga miyyiyan de7iya xagaagetussi ichchashu hiraqota giigissa. Hegaadankka, Xoossaa Dunkkaaniyaayyo guyye arggo baggaara wurssetta gaxan de7iya xagaagetuyyo ichchashu hiraqota medhdha. <sup>28</sup> Giddo hiraqoi xagaagetussi giddo ginaara ha gaxaappe ya gaxaa gakkanaashin kantti kiyanau koshshees. <sup>29</sup> Xagaageta worqqan sheeshshada, hiraqoti aadhdhiyo sagaayota worqqaappe medhdha; qassi hiraqotakka worqqan sheeshsha. <sup>30</sup> Xoossaa Dunkkaaniyaa taani nena deriyaa bollan bessido leemisuwaadan oottada tokka.

<sup>31</sup> “Salo milatiya, ochchaa teera milatiyaanne shololla zo7o qacinaappenne liiqo liinuwaappe issi magalashuwaa ootta; he magalashuwaa bolli issi hiillan kiruubetu misiliyaa sikissa. <sup>32</sup> Yaatada worqqan sheeshshido oiddu, mino guuganttaa tuussatun de7iya worqqaappe oosettida kaqqiyoogan kaqqa. He oiddu tuussati biraappe medhdhido tohotun gelona. <sup>33</sup> He magalashuwaa Xoossaa Dunkkaaniyaa kaaran de7iya qaphetuppe garssaara kaqqada, Maachchaa Taabootaa magalashuwaappe guyye baggan wotta; yaatobare he magalashoi Geeshsha Sohuwaa Ubbaappe Aadhdhida Geeshsha Sohuwaappe shaakkana. <sup>34</sup> Atto giyo sohuwaa qum77uwaa Ubbaappe Aadhdhida Geeshsha Sohuwan de7iya Maachchaa Taabootaa bolli wotta. <sup>35</sup> Xaraphpheezaa magalashuwaappe kareera, Xoossaa Dunkkaaniyaappe huuphessa baggan wotta; xomppiyaa wottiyo ballaa qassi a ginan tohossa baggaara wotta. <sup>36</sup> Dunkkaaniyaa geliyo penggiyaassi salo milatiya, ochchaa teera milatiyaanne shololla zo7o qacinaappenne liiqo liinuwaappe xilppiyan alleeqissiyaagan oosettida magalashuwaa medhdha. <sup>37</sup> Magalashuwaayyo ichchashu tuussata guuganttaappe kessada, worqqan sheeshsha; kaqqiyoogeetikka worqqaappe oosettidaageeta gidona; tuussatuyyo nahaasiyaa birataappe tigada ichchashu gedeta medhdha.



## 27

### *Xuuggiyo Yarshshuwaa Yarshshiyooosaa*

<sup>1</sup> “Guuganttaappe yarshshiyooosaa keexxa. He yarshshiyooosaayyo geesai heezzu wara gido; gomppainne zananai issi likke, ichchashu ichchashu wara gididi, oiddu zooziyaara de7o. <sup>2</sup> Oiddu zoozetu wursetta gaxan gaxan issi issi kaciya medhdha; kaceti yarshshiyooosaa issippe oiqettidi oosettona. Yaatada yarshshiyooosaa nahaasiyaa biratan sheeshsha. <sup>3</sup> An go7ettiyo miishshata, bidinttaa kessiyo balddeta, akaafata, araciyo kuixaarota, ashuwaa qaphiyo qaphetanne tamaa cooceta ubbaa nahaasiyaa birataappe medhdha. <sup>4</sup> Yaatada nahaasiyaa birataappe zazzare malabaa medhdha; qassi a oiddu zooziyan oiddu sagaayota medhdha. <sup>5</sup> Yaatada yarshshiyooosaayyo duge giddo ginan de7iya daciaa bolli wotta. <sup>6</sup> Guuganttaappe yarshshiyooosaayyo kasota kessada, nahaasiyaa biratan sheeshsha. <sup>7</sup> Yarshshiyooosaa tookkiyo wode maaddana mala, he kasota naa77u miyyiyaara de7iya sagaayotun aatta. <sup>8</sup> Taani nena deriyaa bollan bessidoogaadan, yarshshiyooosaa xaulaappe medhdhidi, gomppaa kofa kessona.

### *Xoosaa Dunkkaaniyaayyo Dabaaba Baggaa*

<sup>9</sup> “Xoosaa Dunkkaaniyaayyo asai shiiqiyo dabaabaa giigissa. Dabaabaayyo tohossa bagga zananai xeetu wara aduqqo; he dabaabaayyo liiqo liinuwaappe dadettida magalashota giigissa. <sup>10</sup> Ayyo nahaasiyaa birataappe laatamu tuussatanne tuussati eqqiyo laatamu gedeta ootta; eta huuphiyan qassi biraappe kaqqiyoogetanne tuussata huuphiyan qachchiyoogeeta ootta. <sup>11</sup> Hegaadankka, dabaabaayyo huuphessa bagga zananai xeetu waraa aduqqo; qassi laatamu tuussatuuranne he tuussatuyyo laatamu nahaasiyaa gedetuura de7iya magalashoi de7o. Yaatidi biraappe oosettida kaqqiyoogetinne tuussatu huuphiyan qachchiyoogeeti Xoosaa Dunkkaaniyaayyo de7ona.

<sup>12</sup> “Dabaabaayyo arggo bagga gomppai ishatamu waraa aakko; tammu tuussatinne, tuussatuyyo tammu gedeti de7iyo magalashoti ayyo de7ona. <sup>13</sup> Qassi arshsho bagga dabaabaa gomppaikka ishatamu wara gido. <sup>14</sup> Dabaabaa geliyoosaappe issi baggaara tammanne ichchashu wara aduqqiya magalashoti de7ona; etayyo heezzu tuussatinne heezzu gedeti de7ona. <sup>15</sup> Hegaadankka, hinkko baggaara magalashoti tammanne ichchashu wara aduqqiya magalashoti de7ona; etayyo heezzu tuussatinne tuussatuyyo heezzu gedeti de7ona.

<sup>16</sup> “Dabaabaa geliyoosaayyo laatamu wara aduqqiya magalashuwaa giigissa; hegeekka salo milatiya, ochchaa teeraa milatiyaanne, shololla zo7o qacinaappenne liiqo liinuwaappe dadettidaagaa, xilppiyan alleeqissiyaagan giigissa. Eti an zemppiyo oiddu tuussatanne tuussatuyyo oiddu gedeta giigissa. <sup>17</sup> Dabaabaa yuushuwan de7iya tuussatussi ubbaassi biraappe oosettida qachchiyoogeetinne kaqqiyoogeeti, nahaasiyaappe oosettida gedeti de7ona. <sup>18</sup> Dabaabai zananaa laatamu wara, gomppaa laatamu wara gido; pudiyaa ichchashu wara xoqqiya liiquwan dadettida liinuwaappe oosettida magalashoti de7ona; yaatidi nahaasiyaappe oosettida gedeti gidona.

<sup>19</sup> “Xoosaa Dunkkaaniyan oottiyo oosuwaassi go7ettiyo miishsha ubbai, eta go77ai aiba gidikkokka, Xoosaa Dunkkaaniyaa xishetu ubbaaranne dabaabaa xishetu ubbaarakka gujjin, nahaasiyaa birataappe oosettona.

### *Xomppiyaa Zaitiyaa*

<sup>20</sup> “Xomppee to7ennan eexxiiddi de7ana mala, assi koshshiya zaitiyaa wogaraa teeraa caddidi gum77in kiyidaagaa neeyyo ehaana mala, Israa7eelata azaza. <sup>21</sup> Aarooninne a naati, xomppee GODAA sinttan qammida sa7ai wonttana gakkanaashin poo7ana mala, Xoosaa Dunkkaaniyaa gidдон, Markkaa Taabootaa sinttan de7iya magalashuwaappe kareera eettona. Hagee Israa7eela asaayyo merinau wotto woga gididi de7o.



## 28

### *Qeesetu Maayuwaa*

<sup>1</sup> “Ne ishaa Aaroonanne a naata Nadaaba, Abiiha, El77aazaranne Itaamaara neekko ehiissa; eti qeese gididi taayyo oottana mala, Israa7eela asaa giddoppe eta dummaya. <sup>2</sup> Ayyo bonchchuwaanne puulaa immana mala, ne ishaa Aaroonayyo qeesetettaa maayota giigissa. <sup>3</sup> Taani aadhdhida eratettaa immido kushiya hiillaa eriya asa ubbaa xeesada, Aaroonayyo maayota giigissana mala yoota; i qeese gididi, taayyo oottanau dummatana. <sup>4</sup> Eti giigissana maayotikka hageeta: tiran wottiyoogaa, eefuudiyaa, adussa maayuwaa, alleeqettidi dadettida qoliyaa, shaashiyaanne danccuwaa. Ne ishai Aarooninne a naati qeese gididi taayyo oottiiddi geeshsha maayota maayana mala, sikkiyaageeti giigissoosona. <sup>5</sup> Kushiya hiillaa eriyaageetikka ha maayota giigissanau, worqqa qacinaa, salo milatiya, ochchaa teeraa milatiyaanne shololla zo7o qacinaanne liiqo liinuwa go7ettona.

### *Eefuudiyaa*

<sup>6</sup> “Eefuudiyaa giyo maayuwaa worqqa qacinaappe, salo milatiya qacinaappe, ochchaa teeraa milatiya qacinaappe, shololla zo7o qacinaappenne liiqo liinuwa qacinaappe kushe hiillanchchati alleeqissidi giigissona. <sup>7</sup> Naa77u baggai gaittidi issuwaa gidana mala, naa77u hashiyaa bolli gattidi oittiya carqqee de7o. <sup>8</sup> Hiillai alleeqissidi daddido danccoikka eefuudiyaa mala gididi, worqqaappe, salo milatiya, ochchaa teeraa milatiyaanne shololla zo7o qacinaappenne liiqissi baqqido liinuwaappe oosetto. <sup>9</sup> Maragidiyaa giyo naa77u shuchchata ekkada, Yaaqooba naatu sunntaa eta bolli woocada xaafa. <sup>10</sup> Eta yeletaa maaraadan issi shuchchaa bolli usuppun sunntaa, hinkko shuchchaa bolli qassi attida usuppunatu sunntaa woocada xaafa. <sup>11</sup> Maatafaa bolli sunntaa woocidi xaafiyooogaadan, he naa77u shuchchatu bolli Yaaqooba naatu sunntaa woocada xaafa; xaafada he shuchchata worqqaappe medhdhido shuchchaa oiqqiyaagaa bolli wotta. <sup>12</sup> Yaadata tammanne naa77u Israa7eela zaretta hassayyoobaa gidana mala, ha naa77u shuchchata eefuudiyaara oittido hashiyaa carqqiyan wotta; yaatobare GODAA sinttan ubbatoo hassayettana mala, ha sunntata Aarooni ba hashiyan tookko. <sup>13</sup> He shuchchata oiqqiyaagaa worqqaappe medhdha. <sup>14</sup> Qassi walahi baina worqqaappe wodoruwaadan dooqqido qooriyan wottiyo naa77u sanssalatata giigissada, he naa77u shuchchaa oiqqiyaageetuura gatta oitta.

### *Tiran Wottiyoogaa*

<sup>15</sup> “GODAA shenee aibakko oichchidi eriyoo tiran wottiyoogaa kushe hiillanchchan ootissa. He tiran wottiyoogaa eefuudiyaa daddidoogaadan, worqqaappe, salo milatiya, ochchaa teeraa milatiyaanne shololla zo7o qacinaappenne liiqo liinuwaappe dadda. <sup>16</sup> Ayyo oiddu zoozee de7ees; geesainne gomppai issi issi takkaaro gididi dakkoto. <sup>17</sup> Hegaappe guyyiyan, a bolli oiddu maaran al77o shuchchata wotta; koiro maaran wottido shuchchai, sarddiyoonyiyya, tophaaziyoonyiyyaanne phooliya inqquwaa. <sup>18</sup> Naa77antto maaran baluura, sampperiyaanne almaaziyya giyo al77o shuchchata; <sup>19</sup> heezantto maaran yaakinttiyya, kelqqedooniyaanne ametesxiinoosiyaa; <sup>20</sup> oiddantto maaran biralle, maragidiyaa, yasphphiidiyaa. Hageeti ubbai worqqaappe oosettida shuchchaa oiqqiyaagaa bolli uttona. <sup>21</sup> Israa7eela naatu sunntaa qoodaadan, shuchchatu qoodaikka tammanne naa77a gidona; issi issi maatafadan woocettidi, tammanne naa77u zaretu sunntai he shuchchatun xaafetto.

<sup>22</sup> “Tiran wottiyoogaayyo wodorodan dooqettida sanssalataa walahi baina worqqaappe medhdha. <sup>23</sup> Naa77u worqqa migidota medhdhada, tiran wottiyoogaayyo qommo gaxa zoozetuura gattada oitta wotta. <sup>24</sup> He naa77u worqqa sanssalatata tiran wottiyoogaayyo zoozetun de7iya migidotuura gattada oitta. <sup>25</sup> He sanssalatatuuyyo hankko bagga xeraa qassi eefuudiyaayyo sintta baggaara, hashiyaa carqqiyan de7iya

shuchchaa oiqqiyaageetuura gatta qachcha. <sup>26</sup> Qassikka naa77u worqqa migidota medhdhada, eefuudiyaappe kaallidi de7iya tiran wottiyoogaayyo soo baggaara de7iya naa77u zoozetu xeeran aatta. <sup>27</sup> Hegaadankka, worqqaappe hara naa77u migidota medhdhada; eefuudiyaayyo sintta baggaara, hashiyaa carqqiyaappe garssa baggaara, eefuudiyaa xeessan qachchiyoogaappe qommoora, sihoi gaittosaa matan eta oitta. <sup>28</sup> Tiran wottiyoogan de7iya migidota eefuudiyan de7iya migidotuura gattidi, salo milatiya baqettan qachcha; yaatikko, tiran wottiyoogee xeessaappe qommoora de7iyo gishshau, qashoi dol77enna.

<sup>29</sup> “Aarooni Geeshsha Sohuwaa geliyo wode, ha tiran wottiyoogan de7iya Israa7eela zaretu sunttata tookko. Yaatobare taani GODAI ubbatoo ta asaa hassayana. <sup>30</sup> Qassi Uriimiyaanne Tumiima giyoobata tiran wottiyoogan yegga. Aarooni GODAA sintti aadhdhiiddi, ba tiran wotti ekkidi gelo. Ta shenee aibakko Israa7eela asaa erissana mala, i ta sinttan oottanau geliyo wode ubban tiraa kiisiyaappe xaissenna.

### *Qeeseti Maayiyo Hara Maayota*

<sup>31</sup> “Eefuudiyaappe bollaara maayiyo adussa maayuwaa muleera salo milatiya carqqiyaappe giigissa. <sup>32</sup> He adussa maayuwaaayyo qooriyaa aattiyoosaa medhdha. He sohoi peeretennaadan, soo qalam77ada, yuushsha aattada sikka. <sup>33</sup> Adussa maayuwaa duge bagga macaraa yuushuwan salo milatiya, ochchaa teeraa milatiyaanne shololla zo7o qacinaappe, roomaaniyaa teeraa misileta medhdha. Yaatada eta gidduwan worqqaappe oosettida daalata walahan ootta. <sup>34</sup> Worqqa daalatinne roomaaniyaa teera misileti he adussa maayuwaa duge bagga xeeraayyo yuushuwan walahan aadhdhona. <sup>35</sup> Aarooni qeesetettan oottiyo wode, ha adussa maayuwaa maayo; GODAA sintti Geeshsha Sohuwaa geliyo wodenne kiyiyo wode, daalai waassana. I hega maayikko haiqqenna. <sup>36</sup> Walahi bainna worqqaappe issi alleequwaa medhdhada maatafaa bolli woociyoogaadan, a bolli woocada, ‘GODAASSI GEESHSHA GIDIDI DUMMATIIS’ yaagada xaafa. <sup>37</sup> Xaafada huuphiyan xaaxiyo shaashiyaa bolli qachchana mala, salo milatiya baqettaa an aatta. <sup>38</sup> Aattobare Aarooni a ba som77uwan wotto; hegan Israa7eela asai GODAASSI imotaa immiiddi mooridobi de7ikkokka, he mooruwaa Aarooni tookkees. Asai ehiyoobaa GODAI ekkana mala, i he xifatiyaa ubbatonkka ba som77uwan wottanau koshshees.

<sup>39</sup> “Aarooni qoliyaa liiqo liinuwaappe dadda; huuphiyan xaaxiyo shaashiyaakka liinuwaappe giigissa. Qassi danccuwaa xilppiyan alleeqissiyaagan sikissa. <sup>40</sup> Aarooni naatuyyo bonchchonne alleeqo gidana mala, qoleta, dancotanne huuphiyan xaaxiyo shaasheta giigissa. <sup>41</sup> Neeni ha maayota ne ishaa Aaroonanne a naata maizzidoogaappe guyyiyan, eti qeesetettan taayyo oottana mala eta tiya; tiyada eti qeese gididi taayyo oottana mala eta dummaya. <sup>42</sup> Eta kalloi kamettana mala garssaara maayiyo maayuwaa, xeessaappe biidi wodiraa gakkanau kammiyaagaa, liiqo liinuwaa qacinaappe giigissa. <sup>43</sup> Aarooninne a naati Xoossaa Dunkkaaniyaa geliyo wode, woikko Geeshsha Sohuwan qeesetettan oottanau yarshshuwaa yarshshiyooosaa shiiqiyo wode, ha maayota maayona. Hegaadan hanikko, eti bantta bolli mooronne haiqo ehookkona. Hagee Aaroonayyoonne a zaretuyyo merinau woga gido.

## 29

### *Qeesetettaa Immiiddi Poliyo Wogata*

<sup>1</sup> “Aarooninne a naati qeese gididi taayyo oottana mala, neeni eta dummayanau hagaadan ootta; tilla bollaara de7iya issi mirgguwaanne naa77u dorssa orggeta ekka; <sup>2</sup> muruta gisttiyaa xiilliyaa ekkada, irshshuwaa yeggennan oittaa uukka; qassi irshshuwaa yeggennan zaitiyan komppuwaa komppa; hegaadankka, irshshuwaa yeggennan lee7e lichchakuwaa uukkada, zaitiyaa tiya. <sup>3</sup> Neeni eta masoofiyan wottada, mirgguwaaranne naa77u dorssa orggetuura issippe taayyo shiishsha.

<sup>4</sup> “Yaadata Aaroonanne a naata Xoossaa Dunkkaaniyaa pengge ehaada, haattan eta meecca. <sup>5</sup> Hegaappe guyyiyan, maayota ekkada, qoliyaa, eefuudiyaa bolli maayiyo adussa maayuwaa, eefuudiyaanne tiran wottiyoogaa Aaroona maizza; maizzada eefuudiyaa hiillan dadettida danccuwan gixissa. <sup>6</sup> Shaashiyaakka a huuphiyan xaaxada, ‘GODAASSI geeshsha gididi dummatiis’ yaagiyaabi xaafettido alleequwaa huuphiyaa xaattaa bolli aatta. <sup>7</sup> Tiyiyo zaitiyaakka ekkada, a huuphiyan tigada tiya. <sup>8</sup> A naatakka ehaada qoleta maizza. <sup>9</sup> Maizzada shaashiyaakka eta huuphiyan xaaxa. Hegaappe guyyiyan, Aaroonanne a naata danccuwaa danccissa. Qeesetetai etayyo merinau wotto woga gido. Simmi Aaroonanne a naata yaadata qeese oottaasa.

<sup>10</sup> “Mirguwaa taayyo Xoossaa Dunkkaaniyaa sintti neeni ehin, Aarooninne a naati a huuphiyan bantta kushiya wottana. <sup>11</sup> Mirguwaa Xoossaa Dunkkaaniyaa geliyo penggen GODAA achchan shukka. <sup>12</sup> Mirguwaa suuttaappe amaridaagaa ne biradhdhiyan ekkada, yarshshiyooosaa bolli de7iya kaceta tiya; tiyishin attidaagaa yarshshiyooosaappe garssa baggaara gussa. <sup>13</sup> Hegaappe guyyiyan qantta ashuwaa kammida handda ubbaa, tiriya kammida handdaa, naa77u kilahotanne eta kamida handdaa ekkada, yarshshiyooosaa bolli wottada xuugga. <sup>14</sup> SHin mirguwaa ashuwaa, a galbbaanne a maracciyaa dirssaappe kareera xuugga; hegee nagaraa gishshau yarshshiyoo yarshshuwaa.

<sup>15</sup> “Naa77u dorssa orggetuppe issuwaa neeni ekin, Aarooninne a naati bantta kushiya a huuphiyan wottona. <sup>16</sup> Yaatobare dorssa orggiyaa shukkada, suutta yarshshiyooosaa miyyiyan ubbasaara caccafa. <sup>17</sup> Dorssa orggiyaayyo ashuwaa qanxxerettada, qantta ashuwaanne gedaa meecca; meeccada huuphiyaa bollinne hara qommo ashotu bolli eta wotta; <sup>18</sup> hegaappe guyyiyan, dorssa orggiyaa muleera yarshshiyooosan xuugga; hegee GODAAYYO xuugettiya yarshsho, sawuwaa tonggu giya yarshshonne GODAAYYO taman yarshshiyoo yarshsho.

<sup>19</sup> “Qassi hankko dorssa orggiyaa neeni ekka; ekin Aarooninne a naati bantta kushiya a huuphiyan wottana. <sup>20</sup> He dorssa orggiyaa shukkada, a suuttaappe amariidaagaa ekkada, Aaroonayyoonne a naatuyyo ushachcha haittatu xeeraa, eta ushachcha kushetuyyo wogga biradhdhetanne eta ushachcha tohotuyyo wogga biradhdheta tiya; hegaappe guyyiyan, attida suutta yarshshiyooosaa miyyiyan ubbasaara caccafa. <sup>21</sup> Yarshshiyooosan de7iya suuttaappe amaridaagaanne tiyettiyo zaitiyaappekka amariidaagaa ekkada, Aaroona bollinne a maayuwaa bolli, a naatu bollinne eta maayuwaa bolli caccafa; caccafin inne a naati, eta maayoi GODAA oosuwaayyo dummatana.

<sup>22</sup> “Ha dorssa orggiyaappe modhdhuwaanne nasiyaa, qantta ashuwaa bolli de7iya handdaa, tiriya kammida handdaa, naa77u kilahota, eta kammida handdaaranne ushachcha gedaara neeni ekka; hagee qeesetettaa sunntaa immiyo wode shukkiyo dorssaa. <sup>23</sup> GODAA sinttan wottido irshshoi gelibeenna oittaa, masoofiyaappe zaitee walahettibeenna oittaa, zaitiyaara uukkido issi komppuwaanne issi lee7e lichchakuwaa ekka. <sup>24</sup> Neeni ha katta ubbaa Aaroona kushiyaanne a naatu kushiyan wotta; wottobare eti wuxaawuxiyo yarshsho oottidi GODAA sinttan pudenne dugenne wuxaawuxona. <sup>25</sup> Hegaappe guyyiyan, eta kushiyaappe hageeta ekkada, yarshshiyooosaa bolli wottada, xuuggiyo yarshshuwaara gattada, GODAA sawuwaa tonggu gaanaadan, yarshshiyooosaa bolli taman xuugga. <sup>26</sup> Aarooni qeese gididi sunntettiyo wode shukkido dorssa orggiyaa anggaasuwa ekkada, GODAA sinttan wuxaawuxiyo yarshshodan wuxaawuxa; hegee inttena gakkiiya shaaho gidana.

<sup>27</sup> “He shukkido dorssaa ashuwaa qommotikka: yarshsho oottidi wuxaawuxido anggaasuwaanne GODAA sinttan tookkido gedaa dummaya; hegeeti Aaroonayyoonne a naatuyyo shaaho gidana. <sup>28</sup> Israa7eelati GODAAYYO immiyo issippetetta yarshshoi, ubbatonkka Israa7eela asaappe Aaroonanne a naata gakkiiya shaaho gido.

<sup>29</sup> “Aaroonni qeesetettaa maayoi appe guyyiyan a zaretussi de7o; tiyettidi qeese gidiiyo wode, ha maayuwaa maayona. <sup>30</sup> A naatuppe a sohuwan qeese gididi, Geeshsha Sohuwan oottanau Xoossaa Dunkkaaniyaa yiya na7ai, he maayuwaa laappun gallassau maayo.

<sup>31</sup> “Aarooninne a naati qeese gididi sunttettiyo wode shukettida dorssaa orggiyaa ashuwaa ekkada, geeshsha sohuwan doissa. <sup>32</sup> Aarooninne a naati dorssa orggiyaa ashuwaanne masoofiyan de7iya oittaa Xoossaa Dunkkaaniyaa geliyo penggen moona. <sup>33</sup> Eti qeese gididi sunttettiyo wodenne dummatiyo wode, nagarai atto geetettanaadan yarshshettida ha yarshshota moona. SHin he yarshshoti geeshsha gidido gishshau, hara asi oonne mooppo. <sup>34</sup> Qeese gididi sunttettiyo wode shukkido dorssa orggiyaa ashuwaappe woikko oittaaappe maallado gakkanaassi palahidi aqikko, taman xuugetto; geeshsha gidido gishshau meetettoppo.

<sup>35</sup> “Aarooninne a naati qeese gididi sunttettiyo wode wottiyo wogaa likke taani nena azazidoogaadan oottada, laappun gallassaa garssan pola. <sup>36</sup> Nagarai atto geetettanaadan hachchi hachchi nagara yarshshodan issi mirgguwaa yarshsha. Hegan yarshshiyooosaa geeshsha; yaatada yarshshiyooosaa dummayanau tiya. <sup>37</sup> Yarshshiyooosaa nagaraa atto giyo wogaa laappun gallassan polada, a dummaya. Yaatobare yarshshiyooosai aadhdhida geeshsha soho gidana. A bochchiya ubbaikka geeyana.

### *Hachchi Hachchi SHiishshiyi Yarshshuwaa*

<sup>38</sup> “Yarshshiyooosan neeni hachchi hachchi shiishshana yarshshoi haggaa. Yelettoos-appe issi laitta gakkido naa77u dorssa orggeta yarshsha. <sup>39</sup> Dorssa orggetuppe issuwaa maallado, qassi naa77anttuwaa omarssi yarshsha. <sup>40</sup> Koiro dorssa maraara issi kilo giraame gidiiya muruta gisttiyaa xiilliyaa issi litiro zaitiyan munaqqada yarshsha; issi litiro woiniyaa eessaakka ushshaa yarshsho oottada yarshsha. <sup>41</sup> Naa77antto dorssa orggiyaa omarssi yarshshaidda maalladoogaa keena, xiilliyaa, zaitiyaanne woine eessaa shiishsha. Hegee GODAAYYO taman yarshshettiya, sawuwaa tonggu giya yarshsho gidana.

<sup>42</sup> “Ha xuuggiyo yarshshoi yiya yeleta ubban Xoossaa Dunkkaaniyaa geliyo penggiyan GODAA sinttan paci bannan yarshshettanau koshshees. Taani yan gaittada, nenaara haasayana. <sup>43</sup> Qassi yan taani Israa7eelatuura gaittana; ta bonchchoikka he sohuwaa dumma soho kessana.

<sup>44</sup> “Hegaa gishshau, taani Xoossaa Dunkkaaniyaanne yarshshiyooosaa dummayana; eti taayyo qeese gididi taayyo oottana mala, Aaroonanne a naata taani dummayana. <sup>45</sup> Yaatada taani Israa7eelatu giddon de7ana; qassi taani eta Xoossaa gidana. <sup>46</sup> Taani eta giddon de7ana mala, Gibxxeppe eta kessida GODAA eta Xoossaa gidiiyoogaa eti erana. Ee, taani GODAA eta Xoossaa.

## 30

### *Ixaanaa Cuwayiyo Saaxiniyaa*

<sup>1</sup> “Ixaanaa cuwayiyo saaxiniyaa guuganttaappe medhdha; <sup>2</sup> ayyo oiddu zoozee de7o; zananai issi wara, gomppai issi wara, geesai qassi naa77u wara gido; kacetikka aara issuwaa gididi oiqetti merettona. <sup>3</sup> Ayyo bolla doonaa, oiddu miyye ubbaanne a kaceta walahi banna worqqan sheeshsha; a yuushuwankka worqqa tigtetaa yuushsha aatta. <sup>4</sup> He worqqa tigtetaappe garssaara ixanaa cuwayiyo saaxiniyaayyo worqqaappe naa77u sagaayota medhdha; yaatada ya baggaaranne ha baggaara naa77aa naa77aa oitta. Hegeeti tokkiyo wode kasota aattanaassi maaddanaassa. <sup>5</sup> Kasota guuganttaappe kessada, eta worqqan sheeshsha. <sup>6</sup> Ha yarshshiyooosaa Maachchaa Taabootaa sinttan kaqettida magalashuwaappe kare baggaara, hegaakka taani nenaara gaittiyo Maachchaa Taabootaa bolli de7iya atto giyo sohuwaa qum77uwaa sinttan wotta.



<sup>7</sup> “Aarooni maallado maallado xomppeta giigissanau yiyo wode, sawiya ixaanaa yarshshiyooosan cuwayo. <sup>8</sup> Aarooni omarssi xomppeta poo7issiyo wode, zaarettidikka ixaanaa cuwayo; yaatikko, ixaanai GODAA sinttan yiya yeletau ubbatoo cuwattana. <sup>9</sup> Ha yarshshiyooosan hara ai ixaananne, woikko xuugiyo yarshsho, woikko katta yarshsho yarshshoppa; ushshaa yarshshuwaakka a bolli tigoppo. <sup>10</sup> Aarooni laittaappe issiton nagaraappe maarettanau shukkiyo mehiyaa suutta ekkidi, he yarshshiyooosaa bolli de7iya kacetu bolli wotto. Yaatidi geeshshiyoo wogaa polo. Ha wogai sinttaara yaana wodetu ubban laittan laittan poletto. Yaatobare ha yarshshiyooosai GODAAYYO dummati geeyidaagaa gido” yaagiis.

### *Dunkkaaniyau SHiiqiya Miishshaa*

<sup>11</sup> Hegaappe guyyiyan, GODAI Muusa hagaadan yaagiis; <sup>12</sup> “Neeni Israa7eela asaa goodan ekkanaa eta paidiyo wode, issi issi urai qoodettidi, ba shemppuwaa wozanau GODAAYYO miishshaa qanxxo; qanxxikko neeni eta qoodiyo wode, eta bolli boshi yeenna. <sup>13</sup> Qoodan geliya asai huuphiyan huuphiyan Dunkkaaniyan eriyo meezaanaa likkiyan issi issi xaqara biraa qanxxo. Issi issi urai haga taayyo imo oottidi immo. <sup>14</sup> Qoodan geliya asai laittai laatamaa kumidoogeenne hegaappe bolla ubbai, GODAAYYO immiyoobaa eho. <sup>15</sup> Intte intte shemppuwaa wozanau GODAAYYO imuwaa immishin, dureekka manqqoikka issi likke immanaappe attin, duree darissidi woikko manqqoi guuttidi immoppo. <sup>16</sup> Nagaraappe maarettanau qanxxiyo miishshaa Israa7eela asaappe ekkada, Xoossaa Dunkkaaniyaa giddo oosuwaassi peeshsha. Ha miishshai intte shemppuwaa wozanau, GODAA sinttan Israa7eela asaabaa hassayiyoobaa gidana” yaagiis.

### *Meechcha Keriyaa*

<sup>17</sup> Hegaappe guyyiyan, GODAI Muusa hagaadan yaagiis; <sup>18</sup> “Meechcha keriyaanne a wottiyoogaa nahaasiyaappe medhdha; medhdhada Xoossaa Dunkkaaniyaappenne yarshshiyooosaappe gidduwan wotta; wottada an haattaa tiga. <sup>19</sup> Tigin Aarooninne a naati bantta kushiyaanne bantta tohuwaa meecettana. <sup>20</sup> Eti haiqqenna mala, Xoossaa Dunkkaaniyaa geliyo wode, audenne he haattan meecettona. Qassi GODAAYYO taman yarshshuwaa yarshshanaayyo yarshshiyooosaa mati shiiqido wode, <sup>21</sup> eti haiqqenna mala, bantta kushiyaanne bantta tohuwaa meecettona. Hagee Aaroonassinne a zaretussi, yiya yeleta ubbaassi merinau woga gidana” yaagiis.

### *Tiyettiyo Zaitiyaa*

<sup>22</sup> GODAI Muusa hagaadan yaagiis; <sup>23</sup> “Muruta qimameta, hegeetikka, usuppun kilo giraame gukkiya karbbiyaa, heezzu kilo giraame sawiya qarafaa, heezzu kilo giraame sawiya gucachchaanne <sup>24</sup> usuppun kilo giraame zimbbaanuwa ekka. Ha ubbaikka Dunkkaaniyan eriyo meezaanaa likkiyan gido. Hega bollikka oiddu litiro zaitiyaa gujja. <sup>25</sup> Hageeta shittuwaa oottiyo eran wolakkada, sawiya geeshsha tiyettiyo zaite kessa. <sup>26</sup> Yaatada Xoossaa Dunkkaaniyaa, Maachchaa Taabootaa, <sup>27</sup> xaraphpheezaanne a bolli wottiyo miishsha ubbaa, xomppiyaa wottiyo ballaanne a miishshata, ixaanaa cuwayiyo saaxiniyaa, <sup>28</sup> xuuggiyo yarshshuwaa yarshshiyooosaanne an de7iya ubba miishshata, meechcha keriyaanne a wottiyoogaa tiya. <sup>29</sup> Eti aadhdhida keehi geeshsha gidana mala, neeni eta dummaya; eta bochchiyaabai ubbaikka geeshsha gidana.

<sup>30</sup> “Hegaappe guyyiyan, Aarooninne a naati qeese gididi taayyo oottana mala, eta tiya; tiyada dummaya; <sup>31</sup> Israa7eela asaayyo hagaadan yaagada yoota; ‘Hagee yiya yeletaassikka tiyettiyo ta geeshsha zaite gido; <sup>32</sup> ha zaitiyaa asa bollan gussoppa; qassi ai zaitekka hega oottido likkiyan oottoppa. I geeshsha gidido gishshau, inttekka a geeshshabaadan qoppite. <sup>33</sup> Haga mala shittuwaa giigissiya urinne qeese gidenna hara asa tiyiya uri ooninne ba asaa giddoppe bohetto’ yaaga” yaagiis.



*Ixaanaabaa*

<sup>34</sup> Hegaappe guyyiyan, GODAI Muusa hagaadan yaagiis; “Sawiya qimameta: mittaa cooshshaa, xaadhdhiyaa keettan de7iya shittuwaa, sawiya shidaanne sawiya ixanaa akka; eta ubbaa yesoikka issi likke gido. <sup>35</sup> SHittuwaadan walahettida ixanaa oot-tada, etan go7etta; walahi bannabaanne geeshsha gidanaadan, an maxiniyaa yegga. <sup>36</sup> Appe amaridaagaa ekkada liiqissada cadda; yaatada taani nenaara gaittiyo Xoos-saa Dunkkaaniyaa gidдон Maachchaa Taabootaa sinttan wotta. Yaatobare i neeyyo ubbaappe aadhdhida geeshsha gidana. <sup>37</sup> Haggaa medhdhidoogaa likkiyan hara ix-aanaa medhdhoppite. Hegee taayyo dumma geeshshabaa gidiiyoogaa erite. <sup>38</sup> Haggaa milatiyaabaa medhdhidi, a sawuwaa singgidi ufaittanau koyiya uri de7ikko, i ba asaa giddoppe bohetto” yaagiis.

**31***Baxaali7eelanne Oholi7aaba*

<sup>1</sup> GODAI Muusa hagaadan yaagiis; <sup>2</sup> “Be7a; taani Yihudaa zare gidiiya Huura na7aa na7aa, Uura na7aa, Baxaali7eela dooraas. <sup>3</sup> A taani Xoossaa Ayyaan, hi-illan, akeekaaninne ooso ubbaa oottiyo eran kunttaas; <sup>4</sup> hegeekka hiillan oosuwaa halchchuwaa kessiiddi, worqqaappe, biraappenne nahaasiyaappe dumma dummabaa i oottanaassa. <sup>5</sup> Hegaadanka, al77o shuchchaa massidi giigissanaassa, mittaa mas-sanaassanne hara ooso ubbaa i oottanaassa.

<sup>6</sup> “Hegaa bollikka qassi a maaddana mala, Daana zare gidiiya Ahisamaaka na7aa Oholi7aaba sunttaas. Taani nena azazidobaa ubbaa eti oottana mala, kushe hiilla eriyaageetussi ubbatuzzi erattettaa immaas. <sup>7</sup> Eti oottanabati: Xoossaa Dunkkaaniyaa, Maachchaa Taabootaa, a bolli wottiyo atto giyo sohuwaa qum77uwaa, Xoossaa Dunkkaaniyaa gidдон go7ettiyo miishsha ubbaa, <sup>8</sup> xaraphpheezaanne a miishshata, xomppiyaa wottiyo ballaa walahi banna worqqaappe oosettidaagaanne a miishsha ubbaara, ixanaa cuwayiyo saaxiniyaa, <sup>9</sup> xuuggiyo yarshshuwaa yarshshiyooosanne a miishsha ubbaara, meecettiyo keriyaanne a wottiyoogaara, <sup>10</sup> dadettida maayuwaa, qeese ubbatu halaqai Aarooni maayana qeasetettaa maayotanne a attuma naati qeasetettaa oottiiddi maayana maayuwaa, <sup>11</sup> qassi tiyettiyo zaitiyaanne Geeshsha So-huwaayyo sawuwaa tonggu giya ixanaa. Eti haggaa ubbaa taani nena azazidoogaadan ootona” yaagiis.

*Sambbata - SHemppo Gallassaa*

<sup>12</sup> Hegaappe guyyiyan, GODAI Muusa hagaadan yaagidi azaziis; <sup>13</sup> “Israa7eela asaa neeni, ‘Ta Sambbataa naagite. Hegee taani GODAI inttena taassi geeshsha oottada dooridoogaa bessiyaagaa gididi, yaana yeleta ubbau taappenne intteppe gidduwan malaata gidana. <sup>14</sup> Intteyyo i geeshsha gidiiyo gishshau, Sambbataa bonchchite. A tunissiya asai ubbai mule haiqqo; he gallassan ooso oottiya ooninne ba asaa giddoppe bohetto. <sup>15</sup> Usuppun gallassatun neeni oosuwaa ootta; shin laappuntta gallassai GODAAYYO dummatida shemppo Sambbata; Sambbata gallassan ai oosonne oottiya ooninne haiqqo. <sup>16</sup> Israa7eelati ha Sambbata gallassaa yeletaappe yeletau merinaa malaata oottidi bonchchona. <sup>17</sup> Taani usuppun gallassatun saluwaanne sa7aa medhdhido gishshaunne qassi laappuntta gallassan taani oosuwaa aggada shemppido gishshau, ta gidduwaaninne Israa7eelatu gidduwan hagee merinau malaata gidana’ yaaga” yaagiis.

<sup>18</sup> GODAI Muuseyyo Siinaa Deriyaa bollan haasayyoogaa wurssido wode, i ba biradhdhiyan xaafido tammu azazota oiqqida naa77u masettida shuchchata Muuseyyo immiis.

## 32

*Worqqaappe Merettida Maraa*

<sup>1</sup> Asai Muusee deriyaappe wodhdhennan keehi gam77idoogaa be7ido wode, Aaroona yuushuwan shiiqidi, “Haaya; neeni nuna kaalettiya xoossata nuuyyo medhdha. Aissi giikko, ha nuna Gibxxeppe ehiida Muusee waanidaakkonne nuuni erokko!” yaagidosona. <sup>2</sup> Yaagin Aarooni eta, “Intte keettaayetu haittaaninne intte attuma naatunne macca naatu haittan de7iya worqqa kessidi, taayyo ekki ehiite” yaagiis. <sup>3</sup> Hegaappe guyyiyan, asai ubbai ba haittaa worqqa kessidi, Aaroonayyo ehiidosona. <sup>4</sup> Ehin i heгаа eta kushiyaappe ekkidi, seerissiis; seerissidoogaappe guyyiyan, qoxxiyooban qoxxidi, mara milatiya eeqa oottidi medhdhiis.

Medhdhin asai, “Israa7eelatoo, inttena Gibxxe biittaaappe kessida intte xoossati hageeta” yaagiis. <sup>5</sup> Aarooni hгаа be7ido wode, he maraa sinttan yarshshiyosaa gimbbidi, “Wontto GODAA baalaa gallassa gidana” yaagidi erissiis. <sup>6</sup> Hгаа gishshau, wonttetta gallassi asai guuran denddidi, xuuggiyo yarshshuwaa shiishshiis; issippetetta yarshshuwaakka yarshshiis. Yaatidi asai maanaunne uyanau uttiis. Mi uyi simmidi, qassi duranau denddiis.

<sup>7</sup> Yaanin GODAI Muusa, “Neeni eesuan duge wodhdha; aissi giikko, ne asai, neeni Gibxxeppe kessada ehiidoogee nagaraa oottidi, bantta huuphiyaa tunissiichchidosona. <sup>8</sup> Taani eta azazido ogiyaappe eti eesuan sher77i giichchidosona. Worqqa seerissidoogaa mara malatissidi, banttau eeqa medhdhididosona. Medhdhidi ayyo goinidosona; ayyo yarshshidosona. Eti, ‘Israa7eelatoo, inttena Gibxxe biittaaappe kessida intte xoossati hageeta’ yaagidosona” yaagiis.

<sup>9</sup> GODAI Muusa, “Taani ha asaa be7aas; eti morgge zozzida asa. <sup>10</sup> Ha77i ta hanqqoi eta bolli eexxi kiyin, taani eta xaissanaagaa neeni tana diggoppa. Yaatada taani nena gita kawotetta oottana” yaagiis.

<sup>11</sup> SHin Muusee GODAA ba Xoossaa hagaadan yaagidi woossiis; “Abeet GODAU, neeni ne gita wolqqaanne ne mino kushiyan Gibxxeppe kessada ehiido ne asaa bolli ne hanqqoi aissi eexxi kiyii? <sup>12</sup> Gibxxeti, ‘GODAI eta deretu bollan woranaunne biittaaappe pitti xaissanau, iita halchchuwan kessiis’ aibissi giyoonaa? Ne yashshiya hanqquwaappe simma; ne asaa xaissanau qoppoogaa aggaaga. <sup>13</sup> Ne ailleta Abrahaama, Yisaaqanne Yaaqooba hassaya; neeni etassi, ‘Taani intte zariyaa saluwaa xoolinttetudan darissana; ha taani intteyyo immana giido biittaa ubbaakka intte zariyaayyo immana; eti he biittaa merinau laattana’ gaada ne huuphiyan neeni caaqqido qaalaa hassaya” yaagiis. <sup>14</sup> Hгаа gishshau, GODAI ba asaa bolli iitabaa ehaanau qoppidoogaa aggidi, eta maariis.

<sup>15</sup> Hegaappe guyyiyan, Muusee tammu azazoti etan xaafetti uttido naa77u masettida shuchchata ba kushiyan oiqqidi, deriyaappe duge wodhdhiis. He shuchchati naa77u baggaarakka xaafettidosona. <sup>16</sup> He masettida shuchchata giigissidaagee Xoossaa; shuchchaa bolli woocidi xaafidaageekka Xoossaa.

<sup>17</sup> Yaasu asaa wocamaa siyido wode, Muusa hagaadan yaagiis; “Dunkkaanidosan ola waasoi siyettees” yaagiis.

<sup>18</sup> Yaagin Muusee zaaridi, “Taani siyioogee hagee yettappe attin, xoonidaageetu cenggurssa woikko xoonettidaageetu cenggurssa gidenna” yaagiis.

<sup>19</sup> Muusee dunkkaanidosaa matido wode, maraanne durssa be7idi keehi hanqqettiis; hanqqettidi ba kushiyan oiqqido masettida shuchchata deriyaa xaphuwan olidi mentterettiis. <sup>20</sup> Eti medhdhido maraakka ekkidi, taman xuuggiis; hegaappe guyyiyan, liiqana gakkanaashin gaacciis; gaaccidi haattaa bolli laalidi, Israa7eela asai uyanadan oottiis.

<sup>21</sup> Hegaappe guyyiyan, Muusee Aaroona, “Ha asai nena waatiinee neeni eta hгаа mala gita nagarau kaalettidoi?” yaagiis.

<sup>22</sup> Aaroonikka zaaridi, “Ta godau, hanqqettoppa; ha asai iitaa oottanau ai keena koyiyaakko neeni eraasa. <sup>23</sup> Eti tana, ‘Nuna kaalettiya xoossata nuussi medhdha. Aissi giikko, ha nuna Gibxxeppe ehiida Muusee i waanidaakkonne nuuni erokko!’ yaagidosona. <sup>24</sup> Yaagin taani eta, ‘Intte bolli de7iya worqqa kessidi, hammite’ yaagaas. Hegaappe guyyiyan, eti taayyo immido worqqa taani taman yeggin, ha marai kiyiis” yaagiis.

<sup>25</sup> Aarooni asaa gede coo yeddi aggin, asai ba morkketu sinttan kauyyidi karetti-dooгаа Muusee be7iis. <sup>26</sup> Hega gishshau, Muusee dunkkaanidosaa geliyo penggiyan eqqidi hagaadan yaagiis; “GODAA bagga gidiya asi ooninne taakko yo!” yaagiis. Yaagin Leewati ubbai akko shiiqidosa.

<sup>27</sup> Hegaappe guyyiyan i eta, “GODAI Israa7eela Xoossai hagaadan yaagees; ‘Asai ubbai bisuwaa ba xeessan xeessan gixxo; gixxidi dunkkaanidosan gaxaappe gaxaa gakkanaashin, guyyenne sinttaunne simeretto; issoi issoi ba ishaa, ba laggiiyaanne ba shooruwaa woro’ yaagees” yaagiis. <sup>28</sup> Leewati Muusee azazidoogaadan oottidosona; he gallassi asaappe heezzu sha7aa keenai haiqqiis. <sup>29</sup> Hegaappe guyyiyan Muusee Leewata, “Hachchi intte GODAAYYO dummatideta; aissi giikko, intte intte naatanne intte ishata woranauka azazetideta; hachchi GODAI inttena anjjiis” yaagiis.

### *Muusee Israa7eela Asaassi Woossiis*

<sup>30</sup> Wonttetta gallassi Muusee asaa, “Intte gita nagaraa oottideta; shin ha77i taani GODAAKKO pude deriyaa kiyana; geelladan intte nagaraa taani atto giissanaakkonne” yaagiis. <sup>31</sup> Yaatin Muusee GODAAKKO simmidi biidi hagaadan yaagiis; “Ha asai gita nagaraa oottiis; eti banttayyo worqqaappe xoossata medhdhdosona. <sup>32</sup> SHin hayyanaa, ha77i eta nagaraa atto yaaga; hegee xayikko, neeni xaafido mazggabaappe tana qucca” yaagiis.

<sup>33</sup> Yaagin GODAI zaaridi Muusa, “Taani ta mazggabaappe quccanaagee ta bolli nagaraa oottida asatu suntaa. <sup>34</sup> Ha77i baada, ha asaa taani neeyyo yootido sohuwaa kaaletta; ta kiitanchchaikka nena kaalettana; shin taani qaxxayanau wodee gakkinn, eta eta nagaraa gishshau qaxxayana” yaagiis.

<sup>35</sup> Aarooni worqqaappe maraa misiliyaa medhdhanaadan asai giddido gishshau, GODAI asaa bolli gita boshaa yeddiis.

## **33**

<sup>1</sup> Hegaappe guyyiyan, GODAI Muusa hagaadan yaagiis; “Neeninne neeni Gibxxeppe kessido asai ha sohuwaappe denddite; denddidi, ‘Taani intte yaratussi immana’ yaagada wottido biittaa biite. He biittai taani Abrahaamayyo, Yisaaqayyoonne Yaaqoobayyo immana yaagada caaqqaa wottido biittaa. <sup>2</sup> Taani intte sinttan kiitanchchaa kiittada, Kanaaneta, Amooreta, Hiiiteta, Parzzeta, Hiiwetanne Yaabuusata yedettana. <sup>3</sup> Maattainne eessai goggiyo he biittaa biite. SHin intte morggee zozzido asa gidido gishshau, taani inttena ogiyan xaissargganau, inttenaara biikke” yaagiis.

<sup>4</sup> Asai he yashshiya oduwaa siyidi keehippe yeekkiis. He wodeppe doommidi, ubbaikka bar alleequwaa aattiyooгаа aggi bayiis. <sup>5</sup> Aissi giikko, GODAI Muusa hagaadan yaagi wottiis; “Israa7eela hagaadan yaaga; ‘Intte morggee zozzido asa. Taani inttenaara harai atto guutta wodiya biyaakkokka, taani inttena xaissarggana. Ha77i simmi intte alleequwaa kessirggite; yaatobare taani inttena oottanabaa qachchana’ yaaga” yaagiis.

<sup>6</sup> Yaagin Israa7eelati Siinaa Deriyaappe doommidi bantta alleeqota kessi wottidosona.

### *Gaittiyo Dunkkaaniyaa*

<sup>7</sup> Muusee dunkkaaniyaa ekki ekkidi efidi, asai dunkkaanosaappe kareera haassidi toliis. Tolin he dunkkaanee, “Gaittiyo Dunkkaaniyaa” geetettidi xeesettiis. GODAA oichchanau koyiya ubbai dunkkaanosaappe kareera de7iya Gaittiyo Dunkkaaniyaa bees. <sup>8</sup> Muusee he dunkkaaniyaa biido wode, audenne asai ubbai denddidi, ba

dunkkaaniyaa penggen penggen eqqees; eqqidi Muusee he dunkkaaniyaa gelana gakkanaashin a xeellees. <sup>9</sup> Muusee Gaaitiyo Dunkkaaniyaa giddo gelido wode, shaaraa tuussai duge wodhdhees; wodhdhidi GODAI Muuseera haasayishin, he dunkkaaniyaa penggen takkees. <sup>10</sup> SHAaraa tuussaa he dunkkaaniyaa geliyo penggiyan be7ido wode ubban, asai ubbai ba penggen penggen denddi eqqidi, GODAAYYO goinnees. <sup>11</sup> Asi ba laggiyaara haasayiyoogaadan GODAI Muuseera sinttan eqqidi, haasayees. Hegaappe guyyiyan, Muusee asai dunkkaanidosaa guyye simmees; shin a maaddiya yelagai, Nawe na7aa Yaasu, Gaaitiyo Dunkkaaniyaappe shaahettenna.

### *Muusanne GODAA Bonchchuwaanne*

<sup>12</sup> Muusee GODAA hagaadan yaagiis; “Neeni tana, ‘Ha asaa kaaletta’ yaagadasa; shin tanaara neeni oona kiittiyaakko, tana erissabaakka. Neeni, ‘Taani nena sunttan erais; neeni tanan nashettadasa’ yaagadasa. <sup>13</sup> Neeni tana nashshidabaa gidikko, taani nena erana malanne sinttanaukka nenan nashettada daana mala, ne ogiyaa tana tamaarissa. Ha asai ne asaa gidiyoogaa hassaya” yaagiis.

<sup>14</sup> Yaagin GODAI zaaridi, “Taani nenaara baana; taani nena shemppissana” yaagiis.

<sup>15</sup> Yaatin Muusee a, “Neeni nunaara beennabaa gidikko, hagaappe nuna yeddoppa. <sup>16</sup> Neeni nunaara beennan xayikko, tanaaninne ne asaani neeni ufaittidoogaa asai ubbai waani eranee? Biitta ubban de7iya hara asa ubbaappe tananne ne asaa dum-mayiyaabi harabi aibee?” yaagiis.

<sup>17</sup> Yaagin GODAI Muusa, “Taani nenan ufaittido gishshaunne nena ne sunttan eriyo gishshau, neeni tana oichchidoogaa ubbaa taani oottana” yaagiis.

<sup>18</sup> Yaatin Muusee, “Yaanikko phooliya ne qonccettaa bonchchuwaa tana bessarkkii?” yaagiis.

<sup>19</sup> Yaagin GODAI, “Taani ta phooliya bonchchuwaa qonccetta ubbaa ne sinttaara kanttissana; ta geeshsha sunttaakka ne achchan awaajjana. Taani GODAA; taani maaranau koyiyoogeta maarana; qassi qarettanau koyiyoogetuyyookka qarettana. <sup>20</sup> SHin neeni ta som77uwaa be7akka; aissi giikko, ooninne tana be7idi paxa de7enna” yaagiis.

<sup>21</sup> Hegaappe guyyiyan GODAI, “Neeni zaallaa bolli eqqanau hagan ta matan sohoi de7ees. <sup>22</sup> Ta bonchchoi kanttiyo wode, taani nena phalqqettida zaallaa gidдон wot-tana; wottada taani kanttana gakkanaashin, ta kushiyan nena kammaana. <sup>23</sup> Hegaappe guyyiyan, taani ta kushiya diggin, neeni ta zokkuwaa be7ana; shin ta som77oi beettanau bessenna” yaagiis.

## 34

### *Naa77antto Oosettida Masetta SHuchchata*

<sup>1</sup> GODAI Muusa hagaadan yaagiis; “Koiroogeeta milatiya naa77u shuchchata mas-sada giigissa; yaatobare taani he masettida shuchchatu bolli kase neeni menttido shuchchatu bollan de7iya qaalata xaafana. <sup>2</sup> Wontto maallado pude Siinaa Deriyaa kiyanaa giiga; yaatada tanaara yan deriyaa huuphiyan gaitta. <sup>3</sup> Nenaara ooninne kiyoppo; woikko deriyaa bolli awankka beetto; harai atto dorssaa wudee woikko mehiyaa wudeekka deriyaa sinttan heemetto” yaagiis.

<sup>4</sup> Hegaa gishshau, Muusee koiro shuchchata milatiya naa77u shuchchata massiis; massidi GODAI azazidoogaadan, shuchchata ba kushiyan oiqqidi, maallado guuraara pude Siinaa Deriyaa kiyiis. <sup>5</sup> Kiyin GODAI shaaran duge wodhdhidi, aara yan eqqiis; eqqidi, “GODAA” yaagidi ba sunttaa awaajjiis. <sup>6</sup> GODAI Muusee sinttaara hagaadan yaagidi awaajjiiddi kanttiis; “Taani GODAA; taani GODAA; qaretainne maarotai kumido Xoossaa, danddayanchchaa, aggenna siiqoi daridoogaanne daro ammanettiyaagaa. <sup>7</sup> Taani ta aggenna siiquwaa sha7atussi naagiyaagaa; iitatettaa, makkalaanne nagaraa atto yaagiyaagaa. Gidikkokka, mooranchchaa qaxxayennan aggennaagaa; aawatu



nagaraa gishshau naatanne naatu naata, heezzantto yeletaanne oiddantto yeletaa gakkanaashin qaxxayiyaagaa” yaagidi awaajjiis.

<sup>8</sup> Yaagin Muusee sohuwaara biittan gufannidi goinniis; <sup>9</sup> goinnidi, “Abeet Godau, neeni tanan ufaaitidabaa gidikko, nunaara issippe hindda. Hagee asai morgge zozzidabaa gidikkokka, nu iitatettaanne nu nagaraa atto yaagada, nuna ne asa ootta” yaagiis.

### *Maachchai Ooraxxiis*

<sup>10</sup> Yaatin GODAI hagaadan yaagiis; “Taani inttenaara maachchaa maacettais; ha-gappe kase sa7a ubban de7iya kawotetta ubban hani erenna maalaalissiyaabaa ne asa ubbaa sinttan oottana; taani GODAI, intteyyo oottiyo oosoi ai keena maalaalissiyaabaakko neeni eta gidдон de7iyoy asai be7ana. <sup>11</sup> Hachchi taani inttena azaziyo azazuwaa naagite; intte sinttappe Amooreta, Kanaaneta, Hiiteta, Parzzeta, Hiiwetanne Yaabuusata taani yedettana. <sup>12</sup> Eti intteyyo pire gidenna mala, intte biyo biittan de7iya asaara maachchaa maacettoppite. <sup>13</sup> Eti yarshshiyo sohota qolite; eti goinniyo shuchchata akka mentterettite; qassi Asheero giyo eta macca xoosee misiletakka qanxxeretti olite. <sup>14</sup> Taani GODAI qanaatiya Xoossaa gidiyo gishshau, taappe hara xoossatuuyo goinnoppite.

<sup>15</sup> “He biittan de7iya asatuura aiba maachchakka maacettoppite; aissi giikko, eti tanan ammanettennan ixidi bantta xoossata kaalliyo wodenne etayyo yarshshiyo wode, eti inttenakka shoobbana; shoobbin intte eta yarshshota maana. <sup>16</sup> Qassi intte eta macca naatuppe dooridi, intte attuma naatussi immana; he wode he macca naati tanan ammanettennan ixidi, bantta xoossata kaalliiddi, intte attuma naatakka banttaagaadan ootissana.

<sup>17</sup> “Intteyyo goinniyo xoossata aibippe akka seerissidi medhdhoppite.

<sup>18</sup> “Oittaa Baalaa bonchchite; taani inttena azazidoogaadan, laappun gallassau irshshoi gelennan uukettida oittaa miite; hegaakka intte Gibxxeppe kiyido Abiiba aginan oottite.

<sup>19</sup> “Aayee uluwaappe baira yelettiya attuma na7a ubbai tabaa; intte mehe ubbaappe akka boora gidin, woikko dorssa gidin, bairai tabaa; <sup>20</sup> koiro yelettida hare maraa dorssa maraara laammada woza; wozana xayikko, a qooriyaa menttada wora. Ne naatuppe baira yelettida attuma na7a ubbaa woza.

“Ooninne immiyoobaa oiqqennan, mela kusheera ta sinttan beetto.

<sup>21</sup> “Usuppun gallassaa oottite; shin laappunnta gallassan shemppite; goyiyo wodiyan akka qassi kattaa cakkiyo wodiyan akka laappunnta gallassan shemppite.

<sup>22</sup> “Baira zerettida gisttiyaa intte cakkiyo wode, Saaminttatu Baalaa bonchchite; laittaa wursetta kattaa shiishshiyo wode akka, SHiishuwaa Baalaa bonchchite. <sup>23</sup> Laittan heezzutoo Israa7eela attuma asai ubbai Ubbaa Haariya GODAA, Israa7eela Xoossaa sinttan beettona. <sup>24</sup> Kawotettata taani intte sinttappe yedettada kessana; yaatada intte zawaa taani aassana. GODAA intte Xoossaa sinttan intte laittan heezzutoo beettanau pude kiyiyo wode, ooninne intte biittaa amottenna.

<sup>25</sup> “Intte taayyo suuttaa yarshshuwaa yarshshiyo wode, irshshuwaa yeggidi uukkido oittaa yarshshoppite. Paasikaa bonchchiyo gallassaayyo yarshshido yarshshuwappe maalladossi aibinne attoppo.

<sup>26</sup> “Intte gaden baira kaxxida kattaappe koiro murutaa GODAA intte Xoossaa keettaa ehiite.

“Deeshsha maraa a aayee maattan doissoppite” yaagiis.

<sup>27</sup> GODAI Muusa, “Taani nenaaranne Israa7eela asaara maachchaa maacettiyo ha qaalati giyo maaraana gidiyo gishshau, ha qaalata xaafa” yaagiis. <sup>28</sup> Muusee katta meennaanne haatta uyennan, oitamu gallassanne oitamu qammaa GODAARA yan gam77iis; gam77idi maachchaa qaalata, tammu azazota masettida shuchchan xaafiis.

### *Muuse Som77oi PHooliis*



<sup>29</sup> Muusee GODAARA haasayiiddi gam77ido gishshau, he naa77u masettida shuchchata i ba kushiyan oiqqidi Siinaa Deriyaappe duge wodhdhido wode, a som77oi phooliis; shin i hegaa eribeenna. <sup>30</sup> Aarooninne Israa7eela asai ubbai Muusa xeellidi, a som77oi phooliyooqaa be7idosona; be7idi eti akko shiiqanau yayyidosona. <sup>31</sup> SHin Muusee eta xeesiis; xeesin Aarooninne yaa7aa kaalettiya halaqati ubbai akko simmidosona; simmin i eta haasayissiis. <sup>32</sup> Hegaappe guyyiyan Israa7eela asai ubbai akko shiiqiis; shiiqin GODAI ayyo Siinaa Deriyan immido azazo ubbaa i etau immiis. <sup>33</sup> Muusee etau yootiyooqaa wurssido wode, ba som77uwaa naxalan kammiis. <sup>34</sup> SHin Muusee GODAA sintti aara haasayanau geliyo wode audenne kiyana gakkanaashin, naxalaa ba som77uwaappe qaarirggees. Hegaappe kiyidi, GODAI azazidobaa Israa7eela asau yootees. <sup>35</sup> Yootiyo wode, eti a som77oi phooliyaagaa be7idosona. Hegaa gishshau, Muusee GODAARA haasayanau baana gakkanaashin, ba som77uwaa zaarettidikka naxalan kammees.

## 35

### *Sambbataa Bonchchiyo Wogaa*

<sup>1</sup> Muusee Israa7eela asaa yaa7aa muliyaa shiishshidi hagaadan yaagiis; “Intte oot-tana mala, GODAI azazidobai haga: <sup>2</sup> Saaminttaa gidдон usuppun gallassa xalaalan oosuwaa oottite; shin laappunnta gallassai intteyyo geeshsha gallassa; GODAAYY-OOKKA shemppo Sambbata. He gallassi ai oosonne oottiya uri ooninne haiqqanau bessees. <sup>3</sup> Sambbata gallassan intte son son tama eettoppite” yaagiis.

### *Xoossaa Dunkkaaniyaa Oosuwau SHiishshiyi Miishshaa*

<sup>4</sup> Muusee Israa7eela maabarau muliyau hagaadan yaagiis; “GODAI hagaadan yaagidi azaziis: <sup>5</sup> Intteyyo de7iyaabaappe GODAAYYO immiyoobaa ehiite; GODAAYYO immiyoobaa ehaanau koyiya ooninne worqqa, biraa, nahaasiyaa, <sup>6</sup> salo milatiya qacinaa, ochchaa teeraa milatiya qacinaa, shololla zo7o qacinaanne liiqo liinuwwaa, deeshshaa agoziyaa, <sup>7</sup> dorssa orggiyaa calaa zo7o qalamiyan yeggi kessidoogaa, irppaniyaa, guugantaa, <sup>8</sup> xomppiyaaassi wogaraa zaitiyaa, tiyettiyo zaitiyaanne ixaanaa sawettiya qimamiyaa; <sup>9</sup> eefuudiyaaninne tiran wottiyoogan yeggiyo maragidiyaa geetettiya shuchchatanne hara phooliya al77o shuchchata eho.

### *Xoossaa Dunkkaaniyaa Oottanau Koshshiyi Miishshata*

<sup>10</sup> “Intte gidдон de7iya kushe hiilla eranchcha ubbati yiidi, GODAI azazido ubbaa oottona: <sup>11</sup> Xoossaa Dunkkaaniyaa, a kammiyo dunkkaaniyaanne a kammiyoogaa, qapheta, xagaageta, hiraqota, tuussatanne eti eqqiyo gedeta, <sup>12</sup> Taabootaanne a tookkiyo kasota, atto giyo sohuwaa qum77uwaanne Taabootaa genttiyo magalashuwaa; <sup>13</sup> xaraphpheezaanne a tookkiyo kasota, a miishshata ubbaanne GODAA sinttan wottiyo geeshsha oittaa; <sup>14</sup> xomppiyaa wottiyo ballaanne an maaraara de7iya xomppeta, miishshata, xomppiyaa zaitiyaa, <sup>15</sup> ixaanaa cuwayiyo saaxiniyaanne a tookkiyo kasota, tiyettiyo zaitiyaanne sawiya ixaanaa, Xoossaa Dunkkaaniyaa penggiyaa magalashuwaa; <sup>16</sup> xuuggiyo yarshshuwaa yarshshiyooosanne a nahaasiyaa zazariyaa, a tookkiyo kasotanne a miishshata ubbaa, nahaasiyaappe oosettida meeche keriyaanne a wottiyoogaa; <sup>17</sup> so dabaabaa godaa magalashota, tuussatanne eta gedeta, dabaabaa soo gidдо geliyo penggiyaa magalashuwaa; <sup>18</sup> Xoossaa Dunkkaaniyaa toliyo xisheta, dabaabaa gidдо xishetanne eta wodorota; <sup>19</sup> qeeseti Geeshsha Sohuwan oottiiddi maayanau dadettida maayota, qeesee Aarooninne a naati qeesetettaa oosuwaa oottiiddi maayiyo maayota oottona” yaagiis.

### *Asai Ehiido Imuwaa*

<sup>20</sup> Hegaappe guyyiyan Israa7eela maabarai ubbai Muuse sinttappe kiyiis. <sup>21</sup> Kiyidi immanau koyidaageetinne eta wozanai eta imma imma giidoogeeti ubbai yiidosona;

yiidi Xoossaa Dunkkaaniyaassi, a gidдон oottiyo ooso ubbaunne geeshsha maayuwau koshshiyaabaa ubbaa ehiidosona. <sup>22</sup> Immana koyida attuma ubbainne macca ubbai yiidi, worqqaappe medhdhido alleeqota, haittaa gutuchchata, migidota, qooriyan aattiyo gujjumatanne worqqa alleeqota ehiidosona; ehiidi GODAASSI imo oottidi immidosona. <sup>23</sup> Salo milatiya qacinai, ochcha teera milatiya qacinai, shololla zo7o qacinai, woikko liinuwaa giyo liiqo qacinai, woikko deeshshaa agozee, dorssa orggiyaa calaa zo7o qalamiyan yeggi kessidoogee, woikko irppanee de7iyo asai ubbai ekkidi ehiis. <sup>24</sup> Biraa woikko nahaasiyaa immanau danddayiya ubbai bantta imuwaa GODAAYYO immidosona; qassi guuganttai de7iyo asai ubbai dumma dumma oosuwau guuganttaa ehiis.

<sup>25</sup> Kushe hiillaa eriya maccaasai ubbai bantta kushiyan suqqido salo milatiya qacinaa, ochchaa teeraa milatiya qacinaa, shololla zo7o qacinaanne liiqo liinuwaa ehiidosona. <sup>26</sup> Qassikka imuwaa immanau koyida maccaasai ubbai deeshshaa agoziyaa daddidosona. <sup>27</sup> Halaqati eefuudiyaanne tiran wottiyoogan wottiyo maragidiyaanne hara bonchchettida shuchchata ehiidosona. <sup>28</sup> Eti qassikka xomppiyaayyo, sawiya ixaanaayyoonne tishshaassi haniya wogaraa zaitiyaanne qimamiyaa ehiidosona. <sup>29</sup> Israa7eelati asai ubbai, attumainne maccai, eti oottanaadan GODAI Muuse baggaara azazido oosuwau haniya imuwaa ubbaa bantta dosan GODAYYO ehiidosona.

### *Xoossaa Dunkkaaniyaa Oottiya Kushe Hiillanchchata*

<sup>30</sup> Muusee Israa7eela asaa hagaadan yaagiis; “Be7ite; GODAI Yihudaa zariyaappe Huura na7aa na7aa, Uura na7aa, Baxaali7eela dooriis. <sup>31</sup> Dooridi GODAI a Xoossaa Ayyaanan, hiillan, akeekaaninne ooso ubbaa oottiyo eran kunttiis. <sup>32</sup> Hegeekka hiillan oosuwaa halchchuwaa kessidi, worqqaappe, biraappenne nahaasiyaappe dumma dummabaa i oottanaassa. <sup>33</sup> Hegaadankka, al77o shuchchaa massidi giigissanaassa; mittaa massanaassanne ubba qommo oosuwaa hiillan oottanaassa. <sup>34</sup> Hegaa bollikka qassi ayyoonne Daana zariyaa Ahisamaaka na7aa Oholi7aabayyo, hara asaa tamarisiyo erattettaa immiis. <sup>35</sup> Eti ubba qommo ooso oottanaadan, hiillan oottiyaageeta, oosuwaa halchchuwaa kessiyaageeta, salo milatiya qacinan, ochchaa teeraa milatiya qacinan, shololla zo7o qacinaanne liinuwaa qacinan alleequwaa daddiyaageetanne shimainneta gidanaadan, GODAI eta erattetan kunttiis. Eti ubbaikka ubba qommo oosuwaa luxidi eriya eranchcha gididosona.

## 36

<sup>1</sup> “Hegaa gishshau, Baxaali7eeli, Oholi7aabinne Xoossaa Dunkkaaniyaa keexxana mala GODAI eraa immin, luxida asai ubbai GODAI azazidoogaadan ubbabaa oottana” yaagiis.

### *Asai Immido Imuwaa Coratettaa*

<sup>2</sup> Hegaappe guyyiyan, Muusee Baxaali7eela, Oholi7aabanne GODAI dumma erattettaa immidoogeeta oosuwaa oottanau yaana koyiya ubbaa xeesidi shiishshiis. <sup>3</sup> SHiiqidaageeti Israa7eela asai Xoossaa Dunkkaaniyaa oottanau ehiido imo ubbaa Muuseppe ekkidosona. Qassi asai ba dosan coo immiyo imotaa maallado maallado gujji gujjidi ehiyoogaa aggibeenna. <sup>4</sup> Yaatin Xoossaa Dunkkaaniyaa oottiya erai kumido asai ubbai bantta oosuwaa wottiishshidi, <sup>5</sup> Muusa hagaadan yaagidosona; “Asai GODAI azazido oosuwaaayyo koshshiyaagaappe keehi dariyaagaa ehiiddi de7ees” yaagidosona.

<sup>6</sup> Yaagin Muusee dunkkaanidosan de7iyya asaassi hagaadan yaagidi azaziis; “Naa77antto ai attumaasikka ai maccaasikka Xoossaa Dunkkaaniyaa oosuwaaassi immiyoobaa immanau ehooppo” yaagin, asai ehiyoogaa aggi bayiis. <sup>7</sup> Aissi giikko, eti ehiido imotai ooso ubbaa oottanau gididi palahees.

### *Xoossaa Dunkkaaniyaa Oosuwabaa*

<sup>8</sup> Oosuwaa oottiyaageetu giddoppe hiillaa dariyaageeti ubbati liiqo liinuwaappenne salo milatiya, ochcha teeraa milatiyaanne shololla zo7o qacinaappe dadettida tammu magalashotuppe Xoossaa Dunkkaaniyaa giigissidosona. He magalashotu bolli bollaara issi hiillai kiruubetu misiliyaa sikkiis. <sup>9</sup> Magalashoti ubbai issi likke gididi, geesai laatamanne hospupun wara; gomppai 4 wara. <sup>10</sup> Ichchashu magalashota issippe gattidi sikkidosona; qassi hankko attida ichchashu magalashotakka etadan oottidosona. <sup>11</sup> Issippe gattidi sikkido magalashotuppe issi magalashuwaassi wurssetta gaxan salo milatiya carqqiyaappe siireta medhdhididosona. Qassi issippe gaitetti sikettida hankko magalashuwanka hegaadan oottidosona. <sup>12</sup> Eti issippe gaittida issi magalashuwaa bolli ishatamu siireta, qassi issippe gaittida hankko magalashuwaa bollikka ishatamu siireta medhdhididosona. He siireti ubbaikka issi issuwaassi baazzan de7oosona. <sup>13</sup> Hegaappe guyyiyan, worqqaappe ishatamu qapheta medhdhididosona. Medhdhidi Dunkkaanee issuwaa gidana mala, he magalashotu gaxaa gaxaa he qaphetun oittidosona.

<sup>14</sup> Xoossaa Dunkkaaniyaa bollaara kammiyo dunkkaaniyaassi tammanne isiini magalashota deeshshaa agoziyaappe daddidosona. <sup>15</sup> Tammanne isiini magalashotikka issi likke; issi issi magalashuwaa geesai hasttamu wara, gomppai oiddu wara. <sup>16</sup> Ichchashu magalashota issi baggaara, usuppun magalashota qassi hankko baggaara gattidi sikkidosona. <sup>17</sup> Hegaappe guyyiyan, gatti sikkido magalashotuppe issi magalashuwaa gaxan ishatamu siireta medhdhididosona. Qassikka gatti sikkido hankko magalashotuppe wurssetta magalashuwaa gaxan ishatamu siireta medhdhididosona. <sup>18</sup> Naa77u baggaara de7iya magalashota gattidi issi Dunkkaane oottanau nahaasiyaappe ishatamu qapheta medhdhididosona. <sup>19</sup> Hegaappe guyyiyan, dunkkaaniyaa kammanau dorssa orggiyaa calaa zo7o qalamiyan yeggi kessidoogaa giigissidosona; qassi a bollaara kammanau irppaniyaa giigissidosona.

<sup>20</sup> Xoossaa Dunkkaaniyaa xagaagiyoobata sitti giida guganttaappe kessidosona. <sup>21</sup> Issi issi xagaagiyau geesai tammu wara; gomppai issi waranne bagga. <sup>22</sup> Issi issi xagaagiyaassi issuwaa issuwaara gatti oittiya naa77u marata medhdhididosona. Xoossaa Dunkkaaniyaa xagaageta ubbaakka hegaadan oottidosona. <sup>23</sup> Xoossaa Dunkkaaniyaayyo tohossa baggaara laatamu xagaageta medhdhididosona. <sup>24</sup> Medhdhidi issi issi xagaagiyaayyo naa77u gedeta, muleera oitamu gedeta biraappe giigissidosona. <sup>25</sup> Xoossaa Dunkkaaniyaayyo huuphessa baggaara laatamu xagaageta medhdhididosona. <sup>26</sup> Medhdhidi issi issi xagaagiyaayyo naa77u gedeta, muleera oitamu gedeta biraappe giigissidosona. <sup>27</sup> Xoossaa Dunkkaaniyaayyo guyye gaxan arggo baggaara usuppun xagaageta medhdhididosona. <sup>28</sup> Xoossaa Dunkkaaniyaa guyye gaxan de7iya zoozetuyyo naa77u xagaageta giigissidosona. <sup>29</sup> Ha naa77u zoozetun de7iya xagaageti xaphuwaappe xeeraa gakkanaashin daabula gididi biidi, xeeran issi sagaayuwan geli oiqettidosona. Eti naa77aikka hegaadan hanidosona. <sup>30</sup> Hega gishshau, issi issi xagaagiyaayyo garssaara naa77u naa77u gedeti de7oosona; muleera hospupun xagaagetinne biraappe oosettida tammanne usuppun gedeti de7oosona.

<sup>31</sup> Qassi eti guganttaappe hiraqota kessidosona; Xoossaa Dunkkaaniyaayyo issi bagga miyyiyan de7iya xagaagetuyyo ichchashu hiraqota, <sup>32</sup> qassi hankko bagga miyyiyan de7iya xagaagetussi ichchashu hiraqota giigissidosona. Hegaadanka, Xoossaa Dunkkaaniyaayyo guyye arggo baggaara wurssetta gaxan de7iya xagaagetuyyo ichchashu hiraqota medhdhididosona. <sup>33</sup> Giddo hiraqoi xagaagetussi giddo ginaara, ha gaxaappe ya gaxaa gakkanau kantti kiyanaadan oottidosona. <sup>34</sup> Xagaageta worqqan sheeshshidi, hiraqoti aadhdhiyo sagaayota worqqaappe medhdhididosona; qassi hiraqotakka worqqan sheeshshidosona.

<sup>35</sup> Salo milatiya, ochcha teera milatiyaanne, shololla zo7o qacinaappenne liiqo liinuwaappe issi magalashuwaa oottidosona. He magalashuwaa bolli issi hiillai kiruu-

betu misiliyaa sikkiis. <sup>36</sup> Magalashuwaayyo oiddu tuussata guuganttaappe giigissidi, worqqan sheeshshidosona. Yaatidi worqqa kaqqiyooqeeta etayyo giigissidosona. Qassi tuussata essiyo oiddu gedeta biraappe medhdhidosona. <sup>37</sup> Xoossaa Dunkkaaniyaa geliyo penggiyaassi salo milatiya, ochcha teeraa milatiyaanne shololla zo7o qacinaap-penne liiqo liinuwaappe dadettidaagaa, xilppiyaa alleeqissiyaagan magalashuwa giigissidosona. <sup>38</sup> Qassi eta kaqqiyo ichchashu tuussata, kaqqiyo ballaara de7iyaageeta medhdhidosona. Tuussatu gumbbotanne qachchiyoogeeta worqqan sheeshshidosona. Qassi eta gedeta ichchashata nahaasiyaappe medhdhidosona.

## 37

### *Taabootaa Oosuwaabaa*

<sup>1</sup> Baxaali7eeli guuganttaa mittaappe Taabootaa giigissiis. He Taabootai zananaa naa77u waranne baggaa aduqqees; gomppai issi waranne baggaa aakkees; geesaikka issi waranne baggaa xoqqees. <sup>2</sup> He Taabootaa giigissidi, suwaanne kariyaa walahi banna worqqan sheeshshii; yuushuwaakka worqqa tigetta yuushshi aattiis. <sup>3</sup> Qassi oiddu worqqa sagaayota tigidi, Taabootaayyo oiddu gedetun, issi baggaara naa77u sagaayota, qassi hankko baggaara naa77u sagaayota aattiis. <sup>4</sup> Yaatidi guuganttaappe kasota kessiis. Kessidi etakka worqqan sheeshshii. <sup>5</sup> Taabootaa tookkanau, Taabootaa miyyiyan de7iya sagaayotun kasota aattiis.

<sup>6</sup> Walahi banna worqqaappe naa77u waranne baggaa aduqqiya, issi waranne baggaa aakkiya atto giyo sohuwaa qum77uwaa medhdhiis. <sup>7</sup> Qum77uwaayyo wursetta naa77u bagga gaxan naa77u kiruubeta qoxettida worqqaappe medhdhiis. <sup>8</sup> Issi kiruubiyaa issi bagga gaxan, naa77antto kiruubiyaa hankko bagga gaxan, naa77aakka qum77uwaa gatti oittidi medhdhiis. <sup>9</sup> Kiruubeti bantta qefiyaa denttidi, atto giyo sohuwaa kammiyo qum77uwaa bantta qefiyan kuwayi wottidosona; qassi issoi is-suwaakko simmi uttidi, qum77uwaa xeelloosona.

### *Xaraphpheezaa*

<sup>10</sup> Qassi zananaa naa77u wara, gomppai issi wara, geesaikka issi waranne bagga gidido xaraphpheezaa guuganttaappe medhdhiis. <sup>11</sup> Medhdhidi walahi banna worqqan sheeshshii. Yuushuwaakka worqqa tigetta yuushshi aattiis. <sup>12</sup> Hegaadankka, gomppai takkaaro gidiya shaashiyaa a bolli yuushshi aattiis. Yaatidi a bolli worqqa tigetta yuushshii. <sup>13</sup> Yaatidi Taabootaa tookkanau giigiya oiddu worqqa sagaayota medhdhiis; medhdhidi oiddu gedeti merettido oiddu zozetuura oittiis. <sup>14</sup> Xaraphpheezaa tookkanau kasota aattiyo sagaayoti xaraphpheezaa shaashiyaa lanqqiyan shiiqidi merettidosona. <sup>15</sup> Xaraphpheezaa tookkiyo kasotakka guuganttaappe kessidi, worqqan sheeshshii. <sup>16</sup> Hegaadankka, xaraphpheezaa bolli wottiyo dumma dumma miishshata walahi banna worqqaappe medhdhiis; hegeetikka sainetanne cilppata, qassi ushshaa yarshshuwaa tigiyo keretanne xuu7ata.

### *Xomppiyaa Wottiyo Ballaa*

<sup>17</sup> Hegaappe guyyiyan Baxaali7eeli xomppiyaa wottiyo ballaa qoxettida walahi banna worqqaappe medhdhiis; he ballaa essiyo gediyaakka, gidido toomaakka qoxxido worqqaappe medhdhiis. A qururuusota, a kukkumotanne a ciishshata ubbaa aara is-sippe oittidi medhdhiis. <sup>18</sup> Miyyiyaara usuppun marata medhdhiis; marata heezzaa issi baggaara, qassi heezzaa hankko baggaara kessiis. <sup>19</sup> Usuppun maratussikka huuphiyan huuphiyan issi issi kukkumoinne ciishshati de7iyo lauziyaa ciishshaa milatiya wanccaa medhdhiis; <sup>20</sup> xomppiyaa wottiyo ballaassi gidido toomai, kukkumotinne ciishshati de7iyo lauziyaa ciishshaa milatiya oiddu wanccan alleeqetti uttiis. <sup>21</sup> Naa77ai naa77ai is-sippe waattan de7iyo heezzu maratuppe garssaara issi issi kukkumoi meretti uttiis.



<sup>22</sup> Kukkumotinne marati ubbai xomppiyaa wottiyo ballaara issippe oiqetti issuwaa gididi, walahi banna worqqaappe qoxettidi merettidosona.

<sup>23</sup> I qassi xomppiyaa wottiyo ballau laappun xomppeta, xomppiyaa toissiyoo qaphetanne eta wottiyoobata walahi banna worqqaappe medhdhiis. <sup>24</sup> Xomppiyaa wottiyo ballaanne an go7ettiyo miishshaa ubbaa medhdhanau hasttamanne ichchashu kilo giraame gidida walahi banna worqqa wurrssiis.

### *Ixaanaa Cuwayiyo Saaxiniyaa*

<sup>25</sup> Hegaadankka, qassi ixaanaa cuwayiyo saaxiniyaa guuganttaappe medhdhiis. Ayyo oiddu zoozee de7ees; zananai issi wara; gomppai issi wara, geesai naa77u wara. A kacetikka aara issuwaa gididi oiqetti merettidaageeta. <sup>26</sup> Ayyo bolla doonaa, oiddu miyye ubbaanne a kaceta walahi banna worqqan sheeshshidi, a yuushuwaakka worqqa tigettaa yuushshi aattiis. <sup>27</sup> He worqqa tigettaappe garssaara ixaanaa cuwayiyo saaxiniyaayyo worqqaappe naa77u sagaayota medhdhiis; yaatidi ya baggaanne ha baggaara naa77aa naa77aa oittiis. Hegeeti tookkiyo wode kasota aattanau maaddanaassa. <sup>28</sup> Kasota guuganttaappe kessidi, eta worqqan sheeshshiis.

### *Zaitiyaanne Ixaanaa*

<sup>29</sup> Qassi geeshsha tiyettiyo zaitiyaanne sawuwaa tonggu giya lo77o ixaanaa shittuwaa oottiyo eran giigissiis.

## 38

### *Xuuggiyo Yarshshuwaa Yarshshiyooosaa*

<sup>1</sup> Guuganttaappe xuuggiyo yarshshuwaa yarshshiyooosaa keexxiis. He yarshshiyooosaaayyo geesai heezzu wara, gomppainne zananai issi likke, ichchashu ichchashu wara gididi, oiddu zooziyaara de7iyaagaa oottidosona. <sup>2</sup> Oiddu zoozetu wurssetta gaxan gaxan issi issi kaciyaa medhdhiis. He kaceti yarshshiyooosaaara issippe oiqettidi oosettidosona. Yaatin yarshshiyooosaa nahaasiyaa biratan sheeshshiis. <sup>3</sup> An go7ettiyo miishshata, balddeta, akaafata, araciyo kuixaarota, ashuwaa qaphiyo qaphetanne tama cooceta ubbaa nahaasiyaa birataappe medhdhiis. <sup>4</sup> Yaatidi nahaasiyaa birataappe zazzariyaa yarshshiyooosaaassi giigissiis; giigissidi yarshshiyooosaaayyo duge gidido ginan de7iya daciaa bolli wottiis. <sup>5</sup> Nahaasiyaa birataappe medhdhido zazzariyaayyo oiddu zooziyan kasota aattanau oiddu sagaayota medhdhiis. <sup>6</sup> Guuganttaappe yarshshiyooosaaayyo kasota kessidi, nahaasiyaa biratan sheeshshiis. <sup>7</sup> Yarshshiyooosaa tookkiyo wode maaddana mala, ha kasota naa77u miyyiyaara de7iya sagaayotun aattiis. Yarshshiyooosaa gidduwaa kofa kessidi, xaulaappe medhdhiis.

### *Meechcha Keriya*

<sup>8</sup> Nahaasiyaa birataappe meechcha keriyaanne a wottiyoogaa medhdhiis; he biratai Xoossaa Dunkkaaniyaa penggen oottiya maccaasati ehiido heregaappe ekettiis.

### *Xoossaa Dunkkaaniyaa Dabaabaa*

<sup>9</sup> Hegaappe guyyiyan, dabaabaa giigissiis. Dabaabaassi tohossa bagga zananaa xeetu wara oottidi, liiqo liinuwaappe dadettida magalashuwaa giigissiis. <sup>10</sup> Ayyo nahaasiyaa birataappe laatamu tuussatanne tuussati eqqiyo nahaase gedeta oottiis; eta huuphiyan qassi biraappe merettida kaqqiyoogetanne tuussata huuphiyan qachchiyoogeeta oottiis. <sup>11</sup> Dabaabau huuphessa bagga zananai xeetu wara adussa; qassi laatamu tuussatinne he tuussatuyyo laatamu nahaasiyaa gedeti de7oosona. Yaatidi biraappe oosettida kaqqiyoogetanne tuussatu huuphiyan qachchiyoogeeti de7oosona. <sup>12</sup> Argo bagga dabaabaa gomppai ishatamu wara aaho gididi, tammu tuussatinne tuussatuyyo tammu gedeti de7iyo magalashota giigissiis; he tuussatu huuphiyan biraappe merettida kaqqiyoogetanne tuussatu huuphiyan qachchiyoogeeta oottiis.



<sup>13</sup> Qassi arshsho bagga dabaabaa gomppai ishatamu wara aaho. <sup>14</sup> Dabaabaa geliyoosaappe issi baggaara tammanne ichchashu wara aduqqiya magalashoti, etayyo heezzu tuussatinne tuussatuyyo heezzu gedeti de7oosona. <sup>15</sup> Hegaadankka, dabaabaa geliyoosaappe hinkko baggaara, tammanne ichchashu wara aduqqiya magalashoti, etayyo heezzu tuussatinne tuussatuyyo heezzu gedeti de7oosona. <sup>16</sup> Dabaabaa yuushuwan de7iya magalashoti ubbai liiqo liinuwaappe dadettidaageeta. <sup>17</sup> He tuusatu gedeti nahaasiyaappe, kaqqiyoogetinne tuussatu huuphiyan qachchiyoogeeti biraappe oosettidosona; eta huuphee biran sheeshettiis. Hegaa gishshau, dabaabaa yuushuwan de7iya tuussatu ubbaa huuphiyan biraappe oosettida qachchiyoogeeti de7oosona. <sup>18</sup> Dabaabaa geliyoosan kaqqiyo magalashoi salo milatiya ochchaa teeraa milatiyaanne shololla zo7o qacinaappenne liiqo liinuwaappe daddiyooqaa xilppiyan alleeqissiyaagan giigissidoogaa. Ayyo zananai laatamu wara; geesai dabaabaa magalashotu likke, ichchashu wara. <sup>19</sup> Nahaasiyaa birataappe oosettida oiddu tuussatinne tuussatussi oiddu gedeti de7oosona. Eta kaqqiyoogetinne tuussatu huuphiyan qachchiyoogeeti biraappe oosettidosona; eta huuphetikka biran sheeshettidosona. <sup>20</sup> Xoossaa Dunkkaaniyaa xisheti ubbainne a yuushuwan de7iya dabaabaa xisheti ubbai nahaasiyaa birataappe oosettidaageeta.

### *Xoossaa Dunkkaaniyan Go7ettiyo Miishshata*

<sup>21</sup> Xoossaa Dunkkaaniyau, Maachchaa Dunkkaaniyau, go7ettido miishshata Leewati mazggaban xaafidosona. He miishshata qeesiyaa Aarona na7aa Itaamaara halaqatettaa garssan de7iya Leewati mazggaban xaafanaadan Muusee azaziis.

<sup>22</sup> Biniyaama zare gidiya Hooraa na7aa na7aa, Uura na7aa, Baxaali7eeli GODAI Muusa azazido ubbaa oottiis. <sup>23</sup> Daana zare gidida Ahisamaaka na7aa Oholi7aabi aara de7ees; i kushe hiillanchchanne oottiyoobaassi koiro halchchuwaa kessiyaagaa; qassi salo milatiya, ochchaa teeraa milatiyaanne shololla zo7o qacinaaninne liiqo liinuwan daddidi, xilppiyan alleeqissiya asa.

<sup>24</sup> Xoossaa Dunkkaaniyaa oosuwaayyo GODAASSI imettida worqqai Xoossaa Dunkkaaniyan eriyo meezaanan wottin, issi sha7u kilo giraame deexxiis. <sup>25</sup> Qoodan de7iya maabaraa asaappe beettida birai Xoossaa Dunkkaaniyan eriyo meezaanan wottin, 3,430 kilo giraame deexxiis. <sup>26</sup> Asaa qoodiyo wode qoodettida attuma asai ubbai huuphiyan huuphiyan Xoossaa Dunkkaaniyan eriyo meezaanan wottin, usuppun giraame keenaa immiis. Qoodettida asai laatamu laitta kumidoogeenne laatamaappe bollaara de7iyaagee muleera 603,550. <sup>27</sup> Xoossaa Dunkkaaniyaa magalashota essido xeetu gedeti 3,400 kilo giraame tigiyo biran oosettidosona. Hegeekka issi issi gediyaassi hasttamanne oiddu kilo giraame tigiyo bira. <sup>28</sup> Attida hasttamu kilo giraame tigiyo biraa tuussatun kaqqiyoogetta medhdhanau, tuussatu huuphiyan sheeshshanaunne eta huuphiyan qachchiyoogeeta medhdhanau go7ettidosona. <sup>29</sup> Hegaadankka, asai GODAASSI ehiido nahaase biratai 2,425 kilo giraame. <sup>30</sup> He nahaasiyaa birataappe Xoossaa Dunkkaaniyaa geliyoosan eqqiya tuussatu gedeti, nahaasiyaa yarshshiyooosaa giyo yarshshiyooosai, a gidдон hiixxido nahaase zazzareenne a gidдон go7ettiyo dumma dumma miishsha ubbai merettiis. <sup>31</sup> Hegaadankka, qassi dabaabaa yuushuwan de7iya dirssaanne geliyoosaa penggee eqqido gedeti, qassi Xoossaa Dunkkaaneenne a yuushuwan de7iya dabaabaa dirssai tolettido xisheti ubbai he nahaase birataappe merettidosona.

## 39

### *Qeeseti Maayiyo Maayuwaa*

<sup>1</sup> Qeeseti Xoossaa Dunkkaaniyan oottiyo wode maayana maayuwaa, salo milatiya, ochchaa teeraa milatiyaanne shololla zo7o qacinaappe daddidosona. Aarooni maayiyo qeesetettaa maayuwaakka GODAI Muusa azazidoogaadan oottidosona.

<sup>2</sup> Qassi eti eefuudiyaa, worqqaappe, salo milatiya, ochchaa teeraa milatiyaanne shololla zo7o qacinaappenne liiqo liinuwaappe daddidosona. <sup>3</sup> Eti worqqa qoxxiidi, lee7iyan yeechchayidi, appe qaraari qaraaridi, qacina kessidosona. Yaatidi salo milatiya, ochchaa teeraa milatiyaanne shololla zo7o qacinaanne liiqo liinuwaa gattidi, kushe hiillanchchati daddidosona. <sup>4</sup> Naa77u baggai gattidi issuwaa gidana mala, naa77u hashiyaa bolli gattidi oittiya carqqiyaa giigissidosona. <sup>5</sup> GODAI Muusa azazidoogaadan, hiillai alleeqissidi daddido danccoikka eefuudiyaa mala gididi, worqqaappe salo milatiya, ochchaa teeraa milatiyaanne shololla zo7o qacinaappenne liiqo liinuwaappe dadettiis. <sup>6</sup> Eti maragidiyaa giyo naa77u shuchchata giigissidi, worqqaappe medhdhido shuchchaa oiqqiyaagaa bolli maaraara wottidosona. Maatafaa bolli sunntaa woocidi xaafiyoogaadan, he shuchchatu bolli Israa7eeliyaa naatu sunntaa woocidi xaafidosona. <sup>7</sup> GODAI Muusa azazidoogaadan, tammanne naa77u Israa7eela zaretu hassayiyooobaa gidana mala, ha tammanne naa77u shuchchata eefuudiyaa oittido hashiyaa carqqiyan wottidosona.

### *Tiran Wottiyoojaa*

<sup>8</sup> Eti tiran wottiyoojaa kushe hiillanchchan oottidosona. He tiran wottiyoojaa eefuudiyaa worqqaappe, daddidoogaadan, salo milatiya, ochchaa teeraa milatiyaanne shololla zo7o qacinaappenne liiqo liinuwaappe daddidosona. <sup>9</sup> Ayyo oiddu zoozee de7ees; geesainne gomppai issi issi takkaaro; yaanidaagaa dakkoyidosona. <sup>10</sup> Hegaappe guyyiyan a bolli oiddu maaran al77o shuchchata wottidosona; koiro maaran wottido shuchchai, sarddiyoonyaa, tophaaziyoonyaanne phooliya inqquwaa; <sup>11</sup> naa77antto maaran baluura, sampperiyaanne almaaziya giyo al77o shuchchata; <sup>12</sup> heezantto maaran yaakinttiyaa, kelqqedooniyaanne ametesxxinoosiyaa; <sup>13</sup> oiddantta maaran biralle, maragidiyaanne yasphphiidiyaa. Hegeeta ubbaa worqqaappe oosettida shuchchaa oiqqiyoogaa bolli wottidosona. <sup>14</sup> Israa7eela naatu sunntaa qoodaadan, shuchchatu qoodaikka tammanne naa77a; issoi issoi maatafaadan woocettidi, tammanne naa77u zaretu sunntai he shuchchatun xaafettiis.

<sup>15</sup> Tiran wottiyoojaaayyo wodorodan dooqettida sanssalataa walahi banna worqqaappe medhdhidosona. <sup>16</sup> Naa77u worqqaappe medhdhido shuchchaa oiqqiyaageeta oottidosona; yaatidi naa77u worqqa migidota medhdhidoogeeta, tiran wottiyoojaaayyo qommo gaxa zoozetuura gattidi oisettidosona. <sup>17</sup> He naa77u worqqa sanssalatata tiran wottiyoojaaayyo zoozetun de7iya migidotuura gatti oittidosona. <sup>18</sup> He sanssalatatuyyo hankko bagga xeraa qassi eefuudiyaaayyo sintta baggaara, hashiyaa carqqiyan de7iya shuchchaa oiqqiyoogeetuura gatti qachchidosona. <sup>19</sup> Qassikka naa77u worqqa migidota medhdhidi, eefuudiyaaappe kaallidi de7iya tiran wottiyoojaaayyo so baggaara de7iya naa77u zoozetu xeraan aattidosona. <sup>20</sup> Hegaadankka, worqqaappe hara naa77u migidota medhdhidi, eefuudiyaaayyo sintta baggaara, hashiyaa carqqiyaappe garssa baggaara eefuudiyaa xeessan qachchiyoogaappe qommoora, sihoi gaittosaa matan eta oittidosona. <sup>21</sup> GODAI Muusa azazidoogaadan, tiran wottiyoojaa de7iya migidota eefuudiyaa de7iya migidotuura gattidi, salo milatiya baqettan qachchidosona; qachchin tiran wottiyoojaa xeesaappe qommoora de7iyo gishshau, qashoi dol77enna.

### *Qeeseti Maayiyo Hara Maayota*

<sup>22</sup> Eefuudiyaaappe bollaara maayiyo adussa maayuwaawaa eti muleera salo milatiya carqqiyaappe giigissidosona; hegee shimainne ooso. <sup>23</sup> He adussa maayuwaayyo qooriyaa aattiyoosaa medhdhidosona; he sohoi peerettennaadan, soo qalam77idi, yuushshi aattidi sikkidosona. <sup>24</sup> Eti adussa maayuwaawaa duge bagga macaraa yuushuwan salo milatiya, ochchaa teeraa milatiyaanne shololla zo7o qacinaappenne liiqo liinuwaappe

roomaaniyaa teeraa misileta medhdhdidosona. <sup>25</sup> Eti qassi worqqaappe daalata medhdhidi, adussa maayuwau duge bagga gaxaa yuushshi aattidi, roomaane misiletu gidduwan, walahan aattidosona. <sup>26</sup> Eti he maayuwaayyo duge bagga macaraa yuushshi aattidi, daalaanne roomaaniyaa teeraa misiliyaa walakkidi aattidosona. Hegee GODAI Muusa azazidoogaadan, eti Xoossaa Dunkkaaniyaa oosuwaa oottiiddi maayanaassa.

<sup>27</sup> GODAI Muusa azazidoogaadan, eti Aaroonayyoonne a naatuyyo shimainnee dad-dido liiqa liinuwaappe qoleta giigissidosona. <sup>28</sup> Qassi huuphiyan xaaxiyo shaasheta, qophetanne garssaara maayiyo maayota liiqa liinuwaappe daddidi giigissidosona. <sup>29</sup> Hegaadankka, qassi eti salo milatiya, ochchaa teeraa milatiyaanne shololla zo7o qacinaappenne liiqa liinuwaappe daddidi, kushe hiillan alleeqissidi, dancuwaawaa giigissidosona.

<sup>30</sup> Eti akiliiliyaa misiliyaa walahi banna worqqaappe medhdhidi, maatafaa bolli woociyoogaadan, a bolli, 'GODAASSI GEESHSHA GIDIDI DUMMATIIS' yaagiyaa-gaa woocidi xaafidosona. <sup>31</sup> Hegaappe guyyiyan, huuphiyan shaashiyaa bolli kaqqanaadan, GODAI Muusa azazidoogaadan salo milatiya baqettaa an aattidi qachchidosona.

### *Muusee Ooso Ubbaa Xomoosiis*

<sup>32</sup> Xoossaa Dunkkaaniyaa oosoi ubbai muleera polettiis. Israa7eelati ubbabaakka GODAI Muusa azazidoogaadan oottidosona. <sup>33</sup> Hegaappe guyyiyan, eti Xoossaa Dunkkaaniyaa muleera ekkidi Muusekko ehiidosona; hegeekka: dunkkaaniyaanne a miishsha ubbaa, qapheta, xagaageta, hiraqota, tuussatanne eti eqqiyo gedeta, <sup>34</sup> bolla kamaassi dorssa orggiyaa calaa zo7o qalamiyan yeggi kessidoogaa, irppaniyaa, genttiyo magalashuwaawaa, <sup>35</sup> Maachchaa Taabootaa, a tookkiyo kasotanne atto giyo sohuwaa qum77uwaa, <sup>36</sup> xaraphpheezaanne a miishshaa ubbaa GODAA sinttan wot-tiyo geeshsha oittaa, <sup>37</sup> walahi banna worqqaappe oosettida xomppiyaa wottiyo ballaanne an maaran de7iya xomppeta, eta miishshata ubbaanne xomppiyaa zaitiyaa, <sup>38</sup> ixaanaa cuwayiyo worqqa saaxiniyaa, tiyettiyo zaitiyaa, sawiya ixaanaa, Xoossaa Dunkkaaniyaa penggiyaa magalashuwaawaa, <sup>39</sup> nahaasiyaappe oottido yarshshiyooosaa, a nahaasiyaa zazzariyaara, a tookkiyo kasota, a miishshata ubbaa, meechcha keriyaanne a wottiyoogaa, <sup>40</sup> dabaabaa godaa gennttiyo magalashota, a tuussata, eti eqqiyo gedeta, dabaabaa geliyo penggetu magalashota, dabaabaa wodorotanne xisheta, Xoossaa Dunkkaaniyaayyo koshshiya miishshata ubbaa; <sup>41</sup> qeeseti Geeshsha sohuwan oottiiddi maayanau dadettida maayota, Aarooninne a naati qeesetettaa oottiiddi maayiyo maayota.

<sup>42</sup> Israa7eelati ooso ubbaakka GODAI Muusa azazidoogaadan oottidosona. <sup>43</sup> Oottin Muusee oosuwaa xomoosi xeellidi, eti GODAI azazidoogaadan oottidoogaa be7iis. Hega gishshau, Muusee eta anjjiis.

## 40

### *Xoossaa Dunkkaaniyaa Tolettaa*

<sup>1</sup> Hegaappe guyyiyan, GODAI Muusa, <sup>2</sup> “Koiro aginaayyo koiro gallassi, neeni Xoossaa Dunkkaaniyaa tola. <sup>3</sup> Maachchaa Taabootaa a gidдон wotta; wottada he Taabootaa magalashuwan kamma. <sup>4</sup> Xaraphpheezaa gelissada, a bolli wodhdhanau koshshiya miishshata ubbaa a bolli wotta. Yaataada xomppeta wottiyo ballaa soo gelissada, a bolli xomppeta wotta. <sup>5</sup> Ixaanaa cuwayiyo worqqa saaxiniyaa Maachchaa Taabootaa sinttaara wottada, Xoossaa Dunkkaaniyaa geliyo magalashuwaawaa kaqqa.

<sup>6</sup> “Xuuggiyo yarshshuwaawaa yarshshiyooosaa Xoossaa Dunkkaaniyaa sinttaara wotta. <sup>7</sup> Meechcha keriyaa Xoossaa Dunkkaaniyaappenne yarshshiyooosaappe gidduwan wottada, an haattaa tiga. <sup>8</sup> Xoossaa Dunkkaaniyaappe kareera yuushsha aattada dabaabaa giigissa; giigissada dabaabaa geliyoosan magalashuwaawaa kaqqa.

<sup>9</sup> “Tiyiyo zaitiyaa ekkada, Xoossaa Dunkkaaniyaanne a gidдон de7iya ubbabaa tiya; anne a gidдон go7ettiyo miishsha ubbaa dummaya; yaatobare i geeshsha gidana. <sup>10</sup> Hegaappe guyyiyan, xuuggiyo yarshshuwaa yarshshiyooosaanne au go7ettiyo miishsha ubbaa tiya; yarshshiyooosaa dummaya; yaatobare i ubbaappe aadhdhiya geeshsha gidana. <sup>11</sup> Meechcha keriyaanne a utissiyo miishshaa tiya; tiyada eta dummaya.

<sup>12</sup> “Neeni Aaroonanne a naata Xoossaa Dunkkaaniyaa geliyo pengge ehaada, haattan eta meecca. <sup>13</sup> Hegaappe guyyiyan, qeesetettaa maayuwaa Aaroon maizzada, i taayyo qeesetettan oottanaadan, a tiyada dummaya. <sup>14</sup> A attuma naatakka ehaada qoliyaa maizza. <sup>15</sup> Eti taayyo qeesetettan oottanaadan, eta aawaa tiyidoogaadan, etakka tiya. Eta tiyetta etakka eta sintta yeletaa ubbaa qeese oottiyaagaa” yaagiis.

<sup>16</sup> Yaagin Muusee ubbabaakka GODAI bana azazidoogaadan oottiis.

<sup>17</sup> Hegaa gishshau, Gibxxeppe eti kiyido naa77antta laittan, koiro aginaayyo koiro gallasan Xoossaa Dunkkaanee tolettiis. <sup>18</sup> Muusee Xoossaa Dunkkaaniyaa essiyo wode, gedeta eta sohuwan sohuwan wottiis; xagaagetanne tuussaa aattiis; hiraqotakka gelissiis. <sup>19</sup> Hegaappe guyyiyan, Muusee GODAI azazidoogaadan, ha essidoogaa bollan dunkkaaniyaa toliis; he toliyaa bollan kamuwaa kammiis.

<sup>20</sup> Yaatidi tammu azazoti xaafettido masettida shuchchatu qaalaa efidi, Taabootaa gidдон wottiis; tookkiyo kasota Taabootan aattiis; atto giyo sohuwaa qum77uwaa Taabootaa bolli wottiis. <sup>21</sup> Hegaappe guyyiyan, Taabootaa Xoossaa Dunkkaaniyaa gelissiis; genttiyo magalashuwaa kaqqidi, GODAI azazidoogaadan Maachchaa Taabootaa kammiis.

<sup>22</sup> GODAI Muusa azazidoogaadan, Muusee xaraphpheezaa Xoossaa Dunkkaaniyaa gelissidi, magalashuwaappe kareera huuphessa baggaara wottiis. <sup>23</sup> Wottidi a bolli GODAA sinttan wottiyo geeshsha oittaa giigissiis.

<sup>24</sup> GODAI Muusa azazidoogaadan, xomppiyaa wottiyo ballaa Xoossaa Dunkkaaniyaa gidдо gelissidi, xaraphpheezaa hefinttaara, Xoossaa Dunkkaaniyau tohossa baggaara wottiis; <sup>25</sup> qassi xomppeta GODAA sinttan oittiis.

<sup>26</sup> GODAI azazidoogaadan, ixaanaa cuwayiyo worqqa saaxiniyaa Xoossaa Dunkkaaniyaa gidдон magalashuwaa sintta baggaara wottiis; <sup>27</sup> wottidi a bolli sawiya ixaanaa cuwayiis. <sup>28</sup> Hegaappe guyyiyan, Xoossaa Dunkkaaniyaa penggiyan magalashuwaa woxaliis.

<sup>29</sup> Xuuggiyo yarshshuwaa yarshshiyooosaa Xoossaa Dunkkaaniyaa geliyo penggiyaa lanqqen wottiis; a bolli xuuggiyo yarshshuwaanne katta yarshshuwaa GODAI azazidoogaadan yarshshiis.

<sup>30</sup> GODAI Muusa azazidoogaadan, meechcha keriyaa Xoossaa Dunkkaaniyaappenne yarshshiyooosaappe gidduwan wottiis. Yaatidi meecettanau haattaa an tigiis. <sup>31</sup> Tigin Muusee, Aarooninne a naati bantta kushiyaanne tohuwaa an meecettoosona. <sup>32</sup> GODAI Muusa azazidoogaadan, eti Xoossaa Dunkkaaniyaa gelido wode woikko yarshshiyooosaakko shiiqido wode audenne meecettoosona.

<sup>33</sup> Xoossaa Dunkkaaniyaanne yarshshiyooosaa yuushshi aattidi dabaabaa kessiis; he dabaabaa penggiyan magalashuwaa woxaliis. Hegaadan oottidi, Muusee oosuwa poliis.

### *GODAA Bonchchoi Xoossaa Dunkkaaniyaa Kumiiis*

<sup>34</sup> Hegaappe guyyiyan, shaarai Xoossaa Dunkkaaniyaa kammiis; GODAA bonchchoikka a kumiiis. <sup>35</sup> SHaarai Xoossaa Dunkkaaniyaa bolli uttido gishshaunne GODAA bonchchoi a gidдон kumido gishshau, Muusee a gidдо gelanau danddayibeenna.

<sup>36</sup> Israa7eelati bantta oge ubban, he shaarai Xoossaa Dunkkaaniyaappe denddiyo wode audenne a kaallidi hemetaa doommoosona. <sup>37</sup> SHin he shaarai denddana xayikko, i denddiyo gallassai gakkanaassi etikka qaaxxokkona. <sup>38</sup> Eta oge ubban

GODAA shaarai Israa7eela asai ubbai be7ishin, gallassi gallassi Xoossaa Dunkkaaniyaa kammeesinne qammi qammi qassi tamai he shaaraa bolli eexxees.



## Wogaabaa

### *Gidduwaa Erissuwaa*

“Wogaabai” beni Israa7eela biittan de7iya goino wogaabaanne ammanuwaa timirtiyani asai aqiyo maaratubaa odees. Hegaadankka qassi ha wogatanne ha maarata oosuwan peeshshiyo aawatetta de7iyo qeesetubaa yootees.

Maxaafaayyo gul77a qofai Xoossaa geeshshatettaa odiiyoogaa. Qassi Xoossaa asai ha geeshsha gidida Israa7eela Xoossara etau mata gaitotetta de7ana mala, eti waanidi ayyo goinnanau bessiyaakko, heгаа istti naa77an odees.

Maxaafaa gidдон daro erettida azazoi, Yesuusi naa77antto gita azazuwaa giidi suntido azazuwaa. Hegeenne miraa fiyaa 19 paiduwaa 18 beettiyaagaa; ikka, “Asa ubbaa ne huuphiyaadan siiqa” yaagiyaagaa.

### *Xuuggiyo Yarshshuwaa*

<sup>1</sup> GODAI Xoossai Xoossaa Dunkkaaniyaa giddoppe Muusa xeesidi, hagaadan yaagidi haasayiis; <sup>2</sup> “Israa7eela asaayyo hagaadan yaagada yoota; ‘Intteppe ooninne GODAAYYO yarshshuwaa shiishshiyo wode, he ba shiishshiyo yarshshuwaa ba mehiyaappenne ba dorssaa woikko deeshshaa wudiyaappe eho. <sup>3</sup> He yarshshoi mehiyaa wudiyaappe xuuggiyo yarshsho gidikko, attumaagaa gididi, tilla bollaara de7iyaagaa gido. GODAI ekkana mala, i he yarshshuwaa Xoossaa Dunkkaaniyaa geliyo penggen yarshsho. <sup>4</sup> Yarshshuwaa shiishshiya bitanee xuuggidi yarshshanau ehiido ba mehiyaa huuphiyan ba kushiya wotto. Hegee a nagaraa atto gaanau GODAI ekkido yarshsho gidana. <sup>5</sup> I korima mirgguwaa GODAA sinttan shukko; shukkin Aaroona naati qeeseti he suutaa ekki ehiidi, Xoossaa Dunkkaaniyaa geliyo penggen de7iya yarshshiyooosaa miyyetu ubban caccafona. <sup>6</sup> Hegaappe guyyiyan, i xuuggiyo yarshshuwaassi mehiyaa galbbaa qaaro; qaaridi ashuwaa a qommuwan qommuwan kesso. <sup>7</sup> Qeesiyaa Aaroona naati yarshshiyooosaa bollan tamaa eettidi, mittaa wottona. <sup>8</sup> Hegaappe guyyiyan, Aaroona naati qeeseti he kessido ashuwaa bolli huuphiyaanne modhdhuwaa gujjidi, yarshshiyooosaa bollan taman de7iya mittaa bollan maaridi wottona. <sup>9</sup> SHin he bitanee qantta ashuwaanne guyye gedata haattan meecco. Yaatobare qeesee heгаа ubbaakka ehiidi, yarshshiyooosaa bolli xuuggo; hegee GODAAYYO taman xuuggiyo, sawuwaa tonggu giya yarshsho gidana.

<sup>10</sup> “Xuuggiyo yarshshuwaassi i immiyo imoi dorssaa wudiyaappe woikko deeshshaa wudiyaappe ekketiyaabaa gidikko, attumaagaa gididi, tilla bollaara de7iyaagaa gido.

<sup>11</sup> He mehiyaa yarshshiyooosaappe huuphessa baggaara GODAA sinttan shukko. Aaroona naati qeeseti a suutaa ekkidi, yarshshiyooosaa miyyetu ubbaa bollan caccafona.

<sup>12</sup> Hegaappe guyyiyan, he bitanee a qommuwan qommuwan kessido ashuwaa ubbaa qeesee ekkidi, huuphiyaanne modhdhuwaa an gujjidi, yarshshiyooosaa bollan taman de7iya mittaa bollan wotto. <sup>13</sup> SHin qantta ashuwaanne gedata haattan meecco; yaatobare qeesee heгаа ubbaa ehiidi yarshshiyooosaa bollan xuuggo; hegee GODAAYYO taman xuuggiyo, sawuwaa tonggu giya yarshsho gidana.

<sup>14</sup> “GODAASSI yarshshiyo xuuggiyo yarshshoi kafo gidikko, haraphphiya buuba, woikko mara haraphphiya eho. <sup>15</sup> Ehobare qeesee heгаа ekkidi, qooriyaa mucuraakko; yaatidi yarshshiyooosaa bollan de7iya taman xuuggo. A suuttai yarshshiyooosaa bollappe miyyiyaara duge goggo; <sup>16</sup> ulo gidduwaa baalletuura kessidi, yarshshiyooosaappe arshsho baggaara, bidinttaa qoliyo sohuwan olo. <sup>17</sup> I he kafuwaa qefeta oiqqidi phalqqo, shin muleera daakkoppo. Hegaappe guyyiyan, qeesee yarshshiyooosaa bollan de7iya taman wottidi xuuggo; hegee GODAAYYO taman xuuggiyo, sawuwaa tonggu giya yarshsho gidana.

## 2

### *Kattaa Yarshshuwaa*

<sup>1</sup> “Ooninne kattaa yarshshuwaa GODAAYYO shiishshiyo wode, he yarshshoi liiqo xiille gido; a bolli wogaraa zaitiyaanne ixaanaa gujjo. <sup>2</sup> Hegaa i Aaroonaa naatukko qeesetukko eho; ehin qeeseti he liiqo xiilliiyaappe issi kushiya kuntti ekkidi, zaitiyaanne ixaanaa wurssi ekkidi, hassayissiyaabaa oottidi, yarshshiyooosaa bolli taman xuuggo. Hegee GODAAYYO taman xuuggiyo, sawuwaa tonggu giya yarshsho gidana. <sup>3</sup> Kattaa yarshshuwaappe attidaagee Aaroonassanne a naatussa. Hegee GODAASSI taman xuuggido yarshsho ubbaappe aadhdhida geeshsha.

<sup>4</sup> “Yarshshuwaassi shiishshiyo oittai coociyan ka77idaagaa gidikko, zaitiyan munaqqido liiqo xiilliiyaappe uukettida, irshshoi yegettibeenna komppo, woikko zaitiyan tiyido, irshshoi yegettibeenna lee7e lichchakko gido.

<sup>5</sup> “Yarshshuwaassi shiishshiyo oittai bashiyan uukettidaagaa gidikko, zaitiyan munaqqido, irshshoi baina, liiqo xiilliiyaappe giigidaagaa gido. <sup>6</sup> A menttidi a bolli zaitiyaa tigo; heгаа kattaa yarshsho oottidi shiishsho.

<sup>7</sup> “Ne yarshshuwaassi shiishshiyo oittai xiixxiyo disttiyan uuhettidaagaa gidikko, zaitiyan munaqqido liiqo xiilliiyaappe uuhettidaagaa gido. <sup>8</sup> Hagaadan giigissido kattaa yarshshuwaa GODAAYYO eha; ehaada qeesiyaayyo imma. Qeesee heгаа ekkidi yarshshiyooosaa shiishsho. <sup>9</sup> Qeesee he kattaa yarshshuwaappe ekkidi, hassayissiyaabaa oottidi, yarshshiyooosaa bollan xuuggiyo yarshshodan taman xuuggo; hegee GODAAYYO taman xuuggiyo, sawuwaa tonggu giya yarshsho gidana. <sup>10</sup> Kattaa yarshshuwaappe attidaagee Aaroonassanne a naatussa. Hegee GODAASSI taman xuuggido, yarshsho ubbaappe aadhdhida geeshsha.

<sup>11</sup> “GODAAYYO intte ehiyo ai kattaa yarshshoinne irshshoora de7iyaabaa gidoppo; aissi giikko neeni irshsho woikko eessaa ililo GODAASSI taman xuuggada yarshshanau koshsenna. <sup>12</sup> Intte laittan laittan cakettiya kattaappe xeera kessidi, GODAAYYO ehaanau danddayeeta; shin heгаа sawuwaa tonggu giya yarshsho oottidi, GODAAYYO yarshshiyooosaa bollan xuuggeketa. <sup>13</sup> Neeni shiishshiyo kattaa yarshsho ubban maxiniyaa yegga; aissi giikko, maxinee neeni ne Xoossaara maacettido maachchaayyo malaata. Heгаа gishshau ne kattaa yarshshuwaa ubbaa maxiniyan mal77etta. <sup>14</sup> Neeni koiro kattaappe xeeraa kessada GODAAYYO ehiyo wode, he kattai xiixxido tiya katta gidanau koshshees. <sup>15</sup> A bolli zaitiyaa tiga; ixaanaakka an wotta; hegee kattaa yarshshuwaa. <sup>16</sup> Qeesee he zaitee tigettido kattaappe baggaa ekkidi, ixaana ubbaarakka hassayissiyaabaa oottidi taman GODAASSI xuuggo.

## 3

### *Issippetettaa Yarshshuwaa*

<sup>1</sup> “Issi asi issippetettaa yarshshuwaassi ba wudiyaappe macca gidin attuma gidin issi mehe shiishshiyo wode, he mehee tilla bollaara de7iyaagaa gido. <sup>2</sup> Yarshshanau ehiido mehiyaa huuphiyan ba kushiya wottidi, Xoossaa Dunkkaaniyaa penggen shukko. Hegaappe guyyiyan, qeeseti Aaroonaa naati suuttaa yarshshiyooosaa miyyetu ubbaa bollan caccafona. <sup>3</sup> Issippetettaa yarshshuwaappe taman xuuggiyo yarshsho oottidi GODAAYYO shiishsho. Hegeekka qantta ashuwaa maayida handda ubbaa, <sup>4</sup> naa77u kilahota, eta bolli de7iya handdaanne tiriya bolli maayida handdaa kilahotaara gattidi ekkees. <sup>5</sup> Aaroonaa naati heгаа hara xuuggiyo yarshshuwaara yarshshiyooosaa bolli de7iya mittaa bolli wottidi xuuggona; hegee GODAAYYO taman xuuggiyo, sawuwaa tonggu giya yarshsho gidana.

<sup>6</sup> “GODAAYYO issippetettaa yarshshuwaa shiishshiya uri dorssa gidin deeshsha gidin, macca gidin attuma gidinkka tilla bollaara de7iyaagaa shiishsho. <sup>7</sup> Dorssa maraa

yarshshiya uri, GODAA sinttan shiishsho; <sup>8</sup> shiishshidi ba kushiya a huuphiyan wot-tidi, Dunkkaaniyaa sinttan shukko. Hegaappe guyyiyan, Aaroonaa naati suuttaa oiqqidi, yarshshiyoosaa miyyetu ubbaa bollan caccafona. <sup>9</sup> Issippetettaa yarshshuwaappe taman xuuggiyo yarshsho oottidi, GODAAYYO shiishsho; hegeekka modhdhuwaa, gi-icciiriyaappe qanxxido nasiyaa, ulo giddo ashuwaa maayida handda ubbaa, <sup>10</sup> naa77u kilahota, eta bolli de7iya handdaanne tiriya bolli maayida handdaa kilahotaara gattidi ekkees. <sup>11</sup> Qeesee heгаа GODAAYYO taman xuuggiyo yarshshiyoosaa bolli wottidi xuuggo.

<sup>12</sup> “A yarshshoi deeshsha gidikko, i heгаа GODAA sinttan shiishsho. <sup>13</sup> Yaatidi a huuphiyan ba kushiya wottidi, Xoossaa Dunkkaaniyaa sinttan shukko. Hegaappe guyyiyan, Aaroonaa naati suuttaa oiqqidi, yarshshiyoosaa yuushuwan ubban caccafona. <sup>14</sup> I he yarshshiyoogaappe ekkidi, taman xuuggiyo yarshsho oottidi GODAAYYO shiishsho; hegeekka qantta ashuwaa maayida handda ubbaa, <sup>15</sup> naa77u kilahota, eta bolli de7iya handdaanne tiriya bolli maayida handdaa kilahotaara gattidi ekkees. <sup>16</sup> Qeesee heгаа taman xuuggiyo, sawuwaa tonggu giya yarshsho oottidi yarshshiyoosaa bolli xuuggo. Handda ubbai GODAAGAA.

<sup>17</sup> “Handdaanne suuttaa intte de7iyoosan awaaninne mooppite. Hagee intteyyoonne intte yeletau merinau naagettiya woga’ yaagada oda” yaagiis.

## 4

### *Halchchettibeenna Nagaraa Yarshshuwaa*

<sup>1</sup> GODAI Muusa hagaadan yaagiis; <sup>2</sup> “Neeni Israa7eela asaayyo hagaadan yaagada oda; ‘Ooninne halchchennan nagara oottikkonne, GODAA azazotuppe issuwaa augaanne kanttikko, hagaappe kaallidi de7iya wogaa naago.

<sup>3</sup> “Qeesee halaqai nagaraa oottikkonne he nagarai asaa mooranchcha kessiyaagaa gidikko, i ba oottido nagaraa gishshau, tilla bollaara de7iya mirgguwaa GODAAYYO nagaraa yarshsho oottidi eho. <sup>4</sup> Ehiidi he mirgguwaa Xoossaa Dunkkaaniyaa pengge aattidi, mirgguwaa huuphiyan ba kushiya wottidi, GODAA sinttan shukko. <sup>5</sup> SHukkin qeesee halaqai mirgguwaa suuttaappe amaridaagaa ekkidi, Xoossaa Dunkkaaniyaa efo. <sup>6</sup> Efidi ba kushiya biradhdhiyaa suuttan naaqqi naaqqi kessidi, Xoossaa Dunkkaaniyaa magalashuwaa sinttan GODAA sinttan laapputoo dukko. <sup>7</sup> Hegaappe guyyiyan, qeesee halaqai amarida suuttaa ekkidi, Xoossaa Dunkkaaniyaa giddon GODAA sinttan sawiya ixaanaa cuwayiyo saaxiniyaa bolli de7iya kacetu bolli xokisso. Attida suuttaa qassi Xoossaa Dunkkaaniyaa geliyoosaa baggaara de7iya xuuggiyo yarshshuwaa yarshshiyoosaappe garssa baggaara de7iya sohuwan gusso. <sup>8</sup> Nagaraa yarshshuwaassi shukettida ha mirgguwaa modhdhuwaa ubbaa, qantta ashuwaa maayida handdaa, <sup>9</sup> naa77u kilahota, eta maayida handdaanne tiriya maayida handdaa kilahotuura issippe kessidi ekko. <sup>10</sup> Issippetettaa yarshshuwau shuhettida mirgguwaappe ekkido modhdhuwaadan ekko. Ekkidi qeesee halaqai xuuggiyo yarshshuwaa yarshshiyoosaa bollan xuuggo. <sup>11</sup> SHin mirgguwaa galbbaa, a ashuwaa ubbaa, a huuphiyaanne, a tohota, qantta ashuwaa, tociyaa, <sup>12</sup> mirgguwaa ashuwaappe attidaagaa ubbaa dunkkaanidosappe kare kesso. Kessidi bidinttaa qoliyo wogaadan geeshsha gidida sohuwaa efo; efidi yan mitta taman xuuggo.

<sup>13</sup> “Israa7eela maabarai ubbai halchchennan nagaraa oottikkonne, GODAA azazotuppe issuwaa augaanne kanttikko, eti mooranchcha gididi qoodettana. <sup>14</sup> Eti oottido nagarai erettiyo wode, nagaraa yarshshuwaayyo haniya mirgguwaa Xoossaa Dunkkaaniyaa sintti ehoona. <sup>15</sup> He maabaraa cimati GODAA sinttan bantta kushiya mirgguwaa huuphiyan wottidi, he mirgguwaa shukkona. <sup>16</sup> Hegaappe guyyiyan, qeesee halaqai mirgguwaa suuttaappe guuttaa ekkidi, Xoossaa Dunkkaaniyaa giddo gelo; <sup>17</sup> i ba kushiya biradhdhiyaa suuttan naaqqi naaqqi kessidi, magalashuwaa

sintta baggaara GODAA sinttan laapputoo dukko. <sup>18</sup> Qassi amarida suuttaa ekkidi, Xoossaa Dunkkaaniyaa gidдон GODAA sinttan ixaanaa cuwayiyo saaxiniyaa bolli de7iya kacetu bolli xokisso. Attida suuttaa qassi Xoossaa Dunkkaaniyaa geliyoosaa baggaara de7iya xuuggiyo yarshshuwaa yarshshiyooosaappe garssa baggaara de7iya sohuwan gusso. <sup>19</sup> Modhdho ubbaa ekkidi, yarshshiyooosaa bollan xuuggo. <sup>20</sup> Nagaraa yarshshossi shukettida mirgguwaa oottidoogaadan ha mirgguwaakka ootto. Hegaadan oottidi, qeesee nagaraa atto giissiyoo wogaa polana; asaikka nagaraappe maarettana. <sup>21</sup> Hegaappe guyyiyan, mirgguwaa dunkkaanidosaappe kare kessidi, kase mirgguwaa xuuggidoogaadan akka xuuggo; hagee maabaraa nagaraassi yarshshiyoo yarshsho.

<sup>22</sup> “Asaa kaalettiya sunttatuppe issoi halchchennan nagara oottikkonne GODAI Xoossai a azazido azazuwaappe issuwaa augaanne kanttikko, he uri mooranchcha. <sup>23</sup> I ba oottido nagaraa eridoogaappe guyyiyan, tilla bollaara de7iya issi deeshsha orggiyaa ekkidi eho. <sup>24</sup> He deeshsha orggiyaa huuphiyan ba kushiya wotto; wottidi xuuggiyo yarshshoi GODAA sinttan shukettiyo sohuwan shukko; hegee nagaraa yarshshuwaa. <sup>25</sup> Qeese halaqai nagaraa yarshshuwaa suuttaa giddo ba kushiya biradhdhiyaa naaqqi naaqqi kessidi, xuuggiyo yarshshuwaa yarshshiyooosaa bolli de7iya kacetu bolli xokisso; attida suuttaa qassi xuuggiyo yarshsho yarshshiyooosaappe garssa baggaara de7iya sohuwan gusso. <sup>26</sup> Modhdho ubbaa issippetettaa yarshshuwaa modhdhuwaa yarshshiyooogaadan yarshshiyooosaa bollan yarshsho. Hegaadan oottidi, qeesee bitaniyaa nagaraa atto giissees; bitaneekka ba nagaraappe maarettana.

<sup>27</sup> “He maabaraa asaappe issoi halchchennan nagara oottikkonne GODAA aza-zuwaappe issuwaa augaanne kanttikko, he urai mooranchcha gididi qoodettees. <sup>28</sup> I ba oottido nagarai ayyo erettidoogaappe guyyiyan, tilla bollaara de7iya macca deeshshiyoo ba nagaraassi eho. <sup>29</sup> Ehiidi ba kushiya nagaraa yarshsho oottidi shukkiyo deeshshee huuphiyan wotto; yaatidi xuuggiyo yarshshuwaa yarshshiyoo sohuwan nagaraa yarshsho oottidi shukko. <sup>30</sup> Hegaappe guyyiyan, qeese halaqai he deeshshee suuttaappe ba kushiya biradhdhiyan ekkidi, xuuggiyo yarshshuwaa yarshshiyooosaa bolli de7iya kacetu bolli xokisso; attida suuttaa ubbaa yarshshiyooosaappe garssa baggaara de7iya sohuwan gusso. <sup>31</sup> Modhdho ubbaa issippetettaa yarshshuwaassi shukkido mehiyaappe kessiyooogaadan, he deeshshee modhdhuwaakka qoridi kesso; kessi ekkidi, yarshshiyooosaa bolli wottidi, GODAASSI sawuwaa tonggu giya yarshsho gidana mala xuuggo. Hegaadan oottidi, qeesee he bitaniyaa nagaraa atto giissees; bitaneekka ba nagaraappe maarettees.

<sup>32</sup> “He bitanee ba nagaraa yarshshuwaassi dorssa anqqaraa shiishshanau koyikko, tilla bollaara de7iya maccaaro eho. <sup>33</sup> I ba kushiya he dorsees huuphiyan wotto; wottidi xuuggiyo yarshshuwaassi shukkiyo mehee shukettiyo sohuwan o shukko. <sup>34</sup> Hegaappe guyyiyan, qeesee nagaraa yarshsho gidida he dorsees suuttan ba biradhdhiyaa naaqqi naaqqi kessidi, xuuggiyo yarshshuwaa yarshshiyooosaa bolli de7iya kacetu bolli xokisso; attida suuttaa qassi yarshshiyooosaappe garssa baggaara de7iya sohuwan gusso. <sup>35</sup> Issippetettaa yarshshuwaassi shukettida anqqaraa modhdhuwaa qaaridi kessiyooogaadan, he dorsees modhdhuwaakka qaaridi kesso. Kessi ekkidi, yarshshiyooosaa bolli GODAASSI taman xuuggiyo yarshshuwaa bolli wottidi xuuggo. Hegaadan oottidi, qeesee he bitaniyaa nagaraa atto giissees. Bitaneekka ba nagaraappe maarettana.

## 5

### *Nagaraa Yarshshoi SHiiqiyo Gaasota*

<sup>1</sup> “Ai asinne markkau xeesettidi ba be7idoogaa woikko ba eridoogaa gutaran markkattennan ixixikko, hegee ayyo nagara; heгаа gishshau i qaxxayetto.



<sup>2</sup> “Qassi ai asinne erennan de7iiddi tunabaa, do7aa bautaa woikko mehiyaa bautaa woikko sa7aara gooshettiya do7atu bautaa bochchikko, tuna gidiyoogaa i erido wodiyaappe doommidi mooranchcha gidiis.

<sup>3</sup> “Qassikka ai asinne erennan de7iiddi, asa bollappe goggiya tunissiyaabaa aiba gidinkka bochchikko, hegee tuna gidiyoogaa i erido wodiyaappe doommidi mooranchcha gidiis.

<sup>4</sup> “Woi qassi ai asinne iitabaa gidin lo77obaa oottanau eesuwan caaqqikkonne ba caaqqidoogaakka i akeekennan xayikko, i akeekido wodiyaappe doommidi mooranchcha gidiis.

<sup>5</sup> “Ai asinne ha odettida moorotuppe issuwaa oottidabaa gidikko, ba oottido nagaraa paaxo. <sup>6</sup>I ba oottido nagaraa gishshau GODAAYYO ba wudiyaa giddoppe macca dorssaa woikko macca deeshshaa nagaraa yarshsho oottidi shiishsho. SHiishshin qeese ekkidi, he bitaniyaa nagaraa atto giissana.

<sup>7</sup> “Asi ba oottido nagaraayyo yarshshanau, dorssaa woikko deeshshaa anqqaraa shammanau ayyo miishshi gidana xayikko, naa77u haraphpheta buubata, woikko naa77u mara haraphpheta, issuwaa nagaraa yarshsho oottidi, qassi issuwaa xuuggiyo yarshsho oottidi GODAASSI eho. <sup>8</sup>Ehiidi i eta qeesiyaassi immo. Qeese naa77u haraphphetuppe issinniyo qooriyaa muucennan coo mirqqidi, nagaraa yarshsho oottidi yarshsho. <sup>9</sup>Yaatidi he nagaraa yarshshuwaa suuttaappe amaridaagaa ekkidi, yarshshiyooosaa miyyiyaa caccafo; attida suutta yarshshiyooosappe garssa baggaara gusso; hegee nagaraa yarshshuwaa. <sup>10</sup>Hankko haraphphiyo qassi higgee azaziyooogaadan, xuuggiyo yarshsho oottidi xuuggo. Qeese hegaadan oottidi, bitanee oottido nagaraa atto giissanau yarshshuwaa yarshshees; bitaneekka ba nagaraappe maarettana.

<sup>11</sup> “SHin issi urau naa77u wogga haraphpheta woikko naa77u mara haraphpheta ehaanau miishshi gidana xayikko, issi kilo giraame liiqo xiilliyaa ba nagaraassi shiishshiyoo yarshsho oottidi eho. He xiillee nagaraa yarshsho gidiyo gishshau, wogaraa zaitee woikko ixaanai an gujettoppo. <sup>12</sup>I heгаа ehiidi qeesiyaassi immo; qeese he xiilliyappe issi kushiya kuntti ekkidi, GODAASSI shiishshiyoo kattaa yarshshuwaara gattidi, hassayissiyaabaa oottidi yarshshiyooosan de7iya taman xuuggo; hegee nagaraa yarshshuwaa. <sup>13</sup>Ha geetettidaageetuppe augaaninne gido bitanee oottido nagaraassi qeese hagaadan oottidi, bitanee oottido nagaraa atto giissees; bitaneekka ba nagaraappe maarettana. Kattaa yarshshuwaadankka attidaagaa qeese ekko’ yaagada oda” yaagiis.

### *Naaquwaa Yarshshuwaa*

<sup>14</sup> GODAI Muusessi hagaadan yaagidi yootiis; <sup>15</sup> “Ooninne GODAAYYO geeshshi wottido miishshatu bolli ammanettennan xayikkonne qassi erennan nagaraa oottikko, ba naaquwaassi ba wudiyaa giddoppe tilla bollaara de7iya issi dorssa orggiyaa GODAASSI eho. A waagaikka Xoossaa Dunkkaaniyan eriyo meezaanan wottin eretto; hegee naaquwaa yarshshuwaa. <sup>16</sup>GODAASSI dummayi wottido miishshatu bolli i nagaraa oottido gishshau, i he miishshatu waagaa qanxxo; qanxxiiddi kase waagaa bolli xeetaappe laatamu kushiya gujjidi qeesiyaassi immo. Qeese he naaquwaa yarshshuwaassi ehiido dorssaa yarshshidi, bitaniyaa nagaraa atto giissees; bitaneekka ba naaquwaappe maarettana.

<sup>17</sup> “Ai asinne erennan de7iiddi, GODAI, ‘Oottoppa’ giidi azazidobaappe issuwaa oottidi nagaran gelikko, i erana xayikkonne mooranchcha gidiyo gishshau, ba nagaran qaxxayetto. <sup>18</sup>I ba wudiyaappe tilla bollaara de7iya issi dorssa orggiyaa naaquwaa yarshshuwaassi qeesiyaakko eho. He dorssai naaquwau qanxxiyo waagaa kessiyaa-gaa gido; yaatobare qeese he dorssaa yarshshidi, bitaniyaa naaquwaa atto giissees;



bitaneekka ba naaquwaappe maarettees. <sup>19</sup> Hegee naaquwaa yarshshuwaa. I tumukka GODAA naaqqiis” yaagiis.

## 6

<sup>1</sup> GODAI Muusessi hagaadan yaagidi yootiis; <sup>2</sup> “Ai asinne ba shooroi hadara wot-tidobaa woikko tal77idobaa kaadiyoogan, woikko asabaa bonqqiyoogan, woikko ba shooruwaa bollan sugettaa oottiyoogan GODAA naaqqikko, <sup>3</sup> woikko bayidabaa demmidi ta be7abeikke giidi wordduwan caaqqikkonne hageeta milatiya asi oot-tiyoobatuppe issuwaa, <sup>4</sup> i augaanne gido, oottidi, hegan nagaranchcha gidikko, ba bonqqi ekkidobaa, woikko wolqqan ekkidobaa, woikko hadara immidobaa woikko, bayin demmidobaa, <sup>5</sup> woikko wordduwan caaqqi ekkidobaa muliyaakka a godaassi zaaro. Qassi ba naaquwaa yarshshuwaa yarshshiyoo gallassi ba ekkidoogaa bolli ichchashantto kushiya gujjidi a godaassi immo. <sup>6</sup> Qassikka ba naaquwaa gishshau GODAASSI yarshshiyoo yarshshuwau ba wudiyaa giddoppe tilla bollaara de7iya issi dorssa orggiyaa qeesiyaakko eho. He dorssai naaquwau qanxxiyo waagaa kessiyaagaa gido; yaatobare. <sup>7</sup> Qeesee he dorssaa yarshshidi, bitaniyaa naaquwaa atto giissees; bitaneekka ba naaquwaa ubbaappe maarettana” yaagiis.

### *Wurssi Xuuggiyo Yarshshuwaa*

<sup>8</sup> GODAI Muusessi hagaadan yaagidi yootiis; <sup>9</sup> “Aaroonanne a attuma naata hagaadan yaagada azaza; ‘Xuuggiyo yarshshuwaassi de7iya wogai haggaa: Xuuggiyo yarshshoi gammal wonttana gakkanaashin yarshshiyoo sohuwan de7o. Tamaikka yarshshiyoo sohuwan mule wode eexxiiddi de7o. <sup>10</sup> Qeesee liinuwaappe dadettida qamisiyaanne suriyaa maayidi, xuuggiyo yarshshuwaa tamai mi simmin attida bidinttaa denttidi, yarshshiyoo sohuwaa miyyiyan laalo. <sup>11</sup> Hegaappe guyyiyan, he maayuwaa qaari wotti hara maayuwaa maayidi, he bidinttaa dunkkaanidosaa gaxi efidi, higgiiyaadan geeyida sohuwan qolo. <sup>12</sup> Yarshshiyoo bolli de7iya tamai to7ennan ubba wode eexxiiddi de7o. Qeesee maallado maallado mittaa an gujji gujjidi wotto. Xuuggiyo yarshshuwaakka he mittaa bolli maaran wottidi, issippetettaa yarshshuwaa handdaa a bolli xuuggo. <sup>13</sup> Tamai yarshshiyoo bolli ubba wode eexxiiddi de7o; to7anau koshshenna.

### *Kattaa Yarshshuwaa*

<sup>14</sup> “Kattaa yarshshuwaassi imettida wogai haggaa: Aaroonaa zare gidiiya qeeseti yarshshiyoo sohuwaappe sintta baggaara GODAA sinttan yarshshona. <sup>15</sup> Qeesee lo77o xi-illiyaappe kophphiyaagaanne zaitiyaa ekkidi, kattaa yarshshuwaa bolli de7iya ixaana ubbaakka denttidi, GODAASSI sawuwaa tonggu giya yarshsho oottidi, hassayissiyaabaa gidanaadan yarshshiyoo bolli xuuggo. <sup>16</sup> Hegaappe attidaagaa Aarooninne a attuma naati moonaa; heggaa eti irshshoi yegettibeenna oitta ootti uukkidi, Dunkkaaniyaa dabaabaa giddon de7iya geeshsha sohuwan moonaa. <sup>17</sup> He oittai irshshuwaa yeggennan uuketto. Heggaa taayyo taman xuuggiyo yarshshuwaappe eta gakkiiyaagaa taani etayyo immaas. Nagaraa yarshshuwaadaaninne naaquwaa yarshshuwaadan ikka ubbaappe aadhdhida geeshsha. <sup>18</sup> GODAASSI taman xuuggiyo yarshshuwaappe eta gakkiiyaagaa gidiiyo gishshau, yiya laittatunkka Aaroonaa zare gidiiya attumaageeti ubbai heggaa moonaa. He yarshshuwaa bochchiya ai asinne geeshsha gidana’ yaaga” yaagiis.

<sup>19</sup> GODAI qassikka Muusessi hagaadan yaagidi yootiis; <sup>20</sup> “Aarooninne a attuma naati qeesetettaassi tiyettiyo gallassi issi kilo giraame gidiiya lo77o xiilliyaa kattaa yarshsho oottidi GODAASSI ehona. Hegaappe baggaa maallado baggaa omarssi yarshshona. <sup>21</sup> He xiillee zaitiyan munaqetti, lo77o walakettidi, bashiyan uuketto; uukkidoogaa bunchchada, sawuwaa tonggu giya kattaa yarshsho oottada GODAAYYO yarshsha. <sup>22</sup> Qassi Aaroonaa attuma naatuppe a qeesetettaa laattanaadan tiyettiya ubbaikka he

wogaa ootona. Hegee GODAASSI ubbatoo yarshshiyoo yarshsho gididi muleera xuugetto. <sup>23</sup> Qeesee shiishshiyoo kattaa yarshshuwaappe guyye attennan wuri xuugetto; appe aibinne meetettoppo” yaagiis.

### *Nagaraa Yarshshuwaa Wogaa*

<sup>24</sup> GODAI Muusessi hagaadan yaagidi yootiis; <sup>25</sup> “Aaronassinne a attuma naatuzzi, hagaadan yaaga; ‘Nagaraa yarshshuwaa wogai haggaa: GODAAYYO xuuggiyo yarshshuwaassi shiishshiyoo mehee shukettiyo sohuwan nagaraa yarshshuwaassi shiishshiyoo meheekka hegan GODAA sinttan shuketto; ikka ubbaappe aadhdhida geeshsha. <sup>26</sup> He yarshshuwaa yarshshiyaa qeesee Dunkkaaniyaa dabaabaa giddon de7iya geeshsha sohuwan mo. <sup>27</sup> He ashuwaa bochchiya aibinne geeshsha gidana; qassi shukkishin ai maayuwaa bollinne suuttai xacettikko, he maayoi geeshsha sohuwan meecetto. <sup>28</sup> Ashoi doissettiddo urqqa miishshai meqqo; birata disttiyan doissidobaa gidikko, he disttiyaa qaacidi haattan shokkirrganau koshshees. <sup>29</sup> Qeesetu zariyaappe attuma asa gidida ooninne he ashuwaa mo; he ashoi keehi geeshsha. <sup>30</sup> Gido shin Geeshsha Sohuwan nagaraa atto giissanau a suutta ekkidi, Dunkkaaniyaa giddo gelissiddo ai mehiyaa ashuwaanne maanau koshshenna; i taman xuugettanau koshshees.

## 7

### *Naaquwaa Yarshshuwaa*

<sup>1</sup> “‘Naaquwaa yarshshuwaa wogai haggaa: ikka ubbaappe aadhdhida geeshsha. <sup>2</sup> Xuuggiyo yarshshuwaassi shiishshiyoo mehiyaa shukkiyo sohuwan naaquwaa yarshshuwaa mehiyaakka shukkona; a suuttaakka yarshshiyooosaa miyyetun caccafona. <sup>3</sup> Qassi a handdaa ubbaa, hegeekka nasiyaa handdaa, qantta ashuwaa maayida handdaa, <sup>4</sup> naa77u kilahota, shinccaa matan de7iya eta maayida handdaanne tiriya maayida handdaa kilahotuura issippe yarshsho oottidi shiishsho. <sup>5</sup> Taman xuuggidi GODAAYYO yarshshiyoo yarshshuwaadan, he shiiqida handdaa qeesee yarshshiyooosaa bollan wottidi xuuggo; hegee naaquwaa yarshshuwaa. <sup>6</sup> Qeesee zare gidida attuma asi ubbi he yarshshuwaa ashuwaa mo. He yarshshoi ubbaappe aadhdhida geeshsha gidiiyo gishshau, geeshsha sohuwan mo.

<sup>7</sup> “‘Naaquwaa yarshshoi nagaraa yarshshuwaakka mala; eta naa77aa wogai is-suwaa. Hegeenne yarshshettida mehiyaa ashoi nagaraa atto giissanau yarshshuwaa yarshshida qeesiyaassi imettees. <sup>8</sup> Ooninne xuuggiyo yarshshuwaa ehin ekkidi yarshshiyaa qeesee he mehiyaa galbbaa baayyo ekko. <sup>9</sup> Coociyan komppettida kattaa yarshsho ubbainne oton doissettida woikko bashen uukettida ubbaikka he yarshshuwaa yarshshida qeesiyaassi imettees. <sup>10</sup> Qassi zaitiyan munaqettida woikko munaqettibeenna kattaa yarshsho ubbai Aaroona naatu ubbaassi imettees; eti hegaa hircciyaa shaakki ekkona.

### *Issippetettaa Yarshshuwaa*

<sup>11</sup> “‘Asi issippetettaa yarshshuwaa GODAASSI yarshshiyoo wode ayyo de7iya wogai haggaa: <sup>12</sup> I shiishshiyoo issippetettaa yarshshoi galata yarshsho gidikko, he yarshshuwaara issippe zaitiyan munaqqido, irshsho yeggennan uukkido oittaa, zaitiyan tiyido, irshshoi gelibeenna lee7e lichchakkuwaanne zaitiyan loitti munaqqido, liiqo xiilliyaaappe uukettida komppuwaa shiishsho. <sup>13</sup> He galataayyo shiishshiyoo issippetettaa yarshshuwaara issippe irshshuwaa yeggido munaqaappe uukettida oittaaakka imota oottidi shiishsho. <sup>14</sup> Qassi he ubba qommo oittatuppekka i issuwaa issuwaa denttidi, GODAASSI yarshsho oottidi eho. Hegee issippetettaa yarshshuwaa suutta caccafida qeesiyaassi imetto. <sup>15</sup> He mehiyaa ashoi he yarshshettiddo gallassi meetetto; maalladossi aibinne attoppo.

<sup>16</sup> “SHin a yarshshoi shiiquwaa gattiyoogaa woikko ba dosan coo immiyo issippetet-  
taa yarshsho gidikko, he yarshshuwaa ashoi he yarshshido gallassi meetetto; appe at-  
tiyaagee qassi wonttetta gallassikka meetetto. <sup>17</sup> He yarshshuwaa ashuwaappe palahidi  
heezzantto gallassa gakkanaashin gam77iyaagee de7ikko, hegee taman xuugetto. <sup>18</sup> Issi  
asi shiishshido issippetettaa yarshshuwaa ashuwaappe augeenne heezzantto gallassi  
meetettikko, a yarshshoi ekettenna; i yarshshidobaadankka qoodettenna. He yarshshoi  
tuna; appe miida ooninne ba nagaran oishettees.

<sup>19</sup> “Tunabaa aibanne bochchida ashoi meetettoppo; i taman xuugettanau koshshees.  
Hara ashuwaa gidikko, wogan geeshsha gidiya asi ooninne maana giikko mo. <sup>20</sup> SHin  
issi asi tuna gidi uttidi, GODAAYYO shiishshido issippetettaa yarshshuwaa ashuwaappe  
miyaabaa gidikko, he asi ba asaa giddoppe bohetto. <sup>21</sup> Qassi issi asi tunabaa aibanne  
bochchikko asaa tunatetta gidin woikko tuna mehe gidin, woikko hara sheneyiya  
tunabaa bochchikkonne simmidi GODAAYYO yarshshido issippetettaa yarshshuwaa  
ashuwaappe miikko, he urai ba asaa giddoppe bohetto’ yaaga” yaagiis.

### *Suuttinne Modhdhoi Meetettennaadan Digettiis*

<sup>22</sup> GODAI Muusessi hagaadan yaagidi yootiis; <sup>23</sup> “Israa7eela asaassi hagaadan yaaga;  
‘Korima woikko dorssa woikko deeshsha ashuwan modhdho zawaa mulekka moop-  
pite. <sup>24</sup> Haiqqida mehiyaa woikko do7i worido mehiyaa modhdhuwaakka harabau  
go7ettiteppe attin, appe aibanne mooppite. <sup>25</sup> Aissi giikko, GODAAYYO taman xuuggiyo  
yarshshuwaassi shiishshiyo mehiyaa modhdhuwaa miya ooninne ba asaa giddoppe  
bohetto. <sup>26</sup> Intte de7iyo sohuwan awan gidikkokka, kafo suutta, mehe suutta woikko  
harabaa aiba suuttaanne mooppite. <sup>27</sup> Suutta miya ai asinne, ba asaa giddoppe bohetto’  
yaaga” yaagiis.

### *Qeesiyaa Gakkiya SHaahuwaa*

<sup>28</sup> GODAI Muusessi hagaadan yaagidi yootiis; <sup>29</sup> “Israa7eela asaassi hagaadan  
yaaga; ‘GODAAYYO issippetettaa yarshshuwaa shiishshiya ai asinne he issippetettaa  
yarshshuwaappe shaakkidi, ba huuphe imotaa dummayidi GODAAYYO shiishsho.  
<sup>30</sup> Hegaa i GODAAYYO taman xuuggiyo yarshsho oottidi, ba kushiyan ekkidi eho; qassi  
modhdhuwaakka anggaasuwaara eho; ehiidi, anggaasuwaa wuxaawuxiyo yarshsho  
oottidi, GODAA sinttan wuxaawuxo. <sup>31</sup> Qeesee yarshshiyosaa bollan modhdhuwaa  
xuuggo; shin anggaaso Aaroonassinne a attuma naatussi imetto. <sup>32</sup> Intte issippetet-  
taa yarshshuwaappe ushachcha gedaa imota oottidi qeesiyaassi immite. <sup>33</sup> Hegee  
ushachcha gedai Aarona attuma naatuppe issippetettaa yarshshuwaa suuttaanne  
modhdhuwaa yarshshiyaagaassi a gakkiya a qommuwaa. <sup>34</sup> Taani Israa7eela asaa  
issippetettaa yarshshuwaappe wuxaawuxido anggaasuwaanne yarshshuwau shi-  
ishshido gedaa ekkada, qeesiyaa Aaroonassinne a attuma naatussi immaas; hegee eta  
gakkiya eta qommo gidiyo gishshau, Israa7eela asai merinau hegaa etau immiiddi  
daana’ yaagada yoota” yaagiis.

<sup>35</sup> Aarooninne a attuma naati qeese gididi, GODAAYYO oottanau sunttettido gallassi  
GODAASSI shiishshido taman xuuggiyo yarshshuwaappe hegee etayyo qommo gididi  
imettiis. <sup>36</sup> GODAI eta qeesetettaassi tiyido gallassi, hegaa etayyo immana mala,  
Israa7eela asaa ubbaa azaziis; sintta yeletan ubbankka hagee woga gididi oosettees.

<sup>37</sup> Simmi hageeti, xuuggiyo yarshshuwaassi, kattaa yarshshuwaassi, nagaraa  
yarshshuwaassi, naaquwaa yarshshuwaassi, qeesetettaassi tiyettiyo wode yarshshiyo  
yarshshuwaassinne issippetettaa yarshshuwaassi imettida wogata. <sup>38</sup> Ha wogati Is-  
raa7eela asai Siinaa bazzuwan bantta yarshshuwaa GODAASSI yarshshana mala GO-  
DAI azazido gallassi, Siinaa Deriyaa bollan GODAI Muusa azazido wogata.

## 8

*Aaroninne A Naati Qeese Gidiyo Maaraa*

<sup>1</sup> GODAI Muusessi hagaadan yaagidi yootiis; <sup>2</sup> “Aaroonanne a attuma naata qassi etaara issippe, qeesetettaa maayuwaa, tiyiyo zaitiyaa, nagaraa yarshshuwaassi shukkiyo korimaa, naa77u dorssa orggetanne, irshshuwaa yeggennan uukkido, oittaa masooben ekkada ya. <sup>3</sup> Qassi Israa7eela asa ubbaakka xeeгада, Dunkkaaniyaa kare shiishsha” yaagiis.

<sup>4</sup> Yaagin Muusee GODAI azazidoogaadan oottiis; asaikka ubbai Dunkkaaniyaa karen shiiqiis. <sup>5</sup> SHiiqin Muusee asaassi, “Oottana mala GODAI azazidoogee haggaa” yaagiis.

<sup>6</sup> Muusee Aaroonanne a attuma naata ehiidi, haattan meecciis. <sup>7</sup> Meeccidi Aaroona qoliyaa maizziis; danccuwaakka danccissiis. Qassi adussa qoliyaa maizzidi, a bollan eefuudiyaa maizziis. Eefuudiyaa hiillatidi daddido qabattuwan Aaroonaara gattidi qachchiis. <sup>8</sup> Qassi tiran wottiyogaa Aaroona bollan aattidi, a gidдон Uriimiyaanne Tu-miimiyyaa wottiis. <sup>9</sup> Qassikka Aaroona huuphiyan shaashiyaa enccurssaa wottiis. GODAI Muusa azazidoogaadan he enccurssaa bollan sintta baggaara worqqa madaaliyaa, worqqaappe medhdhido akiliiliyaa misiliyaa wottiis.

<sup>10</sup> Yaatoogaappe guyyiyan Muusee tiyiyo zaitiyaa ekkidi, Dunkkaaniyaanne Dunkkaaniyaa gidдон de7iya miishsha ubbaa tiyiis; tiyidi eta dummayiis. <sup>11</sup> Qassi he zaitiyaappe ekkidi, yarshshiyooosaa bolli laapputoo caccafiis; yarshshiyooosaa, a miishshata, meechcha keriyaanne a wottiyogaa, dummayanau he zaitiyan tiyiis.

<sup>12</sup> Qassi he tiyiyo zaitiyaappe amaraa Aaroona huuphiyan tigidi, a dummayiis.

<sup>13</sup> GODAI Muusa azazidoogaadan, Muusee Aaroona attuma naata sinttau aattidi, qoliyaa maizziis; maizzidi danccuwan danccissiis. Eta huuphiyankka shaashiyaa enccurssaa wottiis.

<sup>14</sup> Hegaappe guyyiyan, nagaraa yarshshuwaassi korimaa Muusee aattiis; aattin Aarooninne a attuma naati he korimaa huuphiyan bantta kushiyaa wottidosona.

<sup>15</sup> Muusee he korimaa shukkiis; shukkidi a suuttaappe ba biradhdhiyan ekkidi, yarshshiyooosaa kaceta tiyidi, yarshshiyooosaa geeshshiis; qassi yarshshiyooosaa nagaraa atto giissanau attida suuttaa appe garssaara gussidi, Xoossaassi dummayiis.

<sup>16</sup> Qantta ashuwaa kammida handdaa ubbaa, tiriya maayida handdaa, naa77u kila-hotanne eta kammida handdaa ekkidi, Muusee yarshshiyooosaa bollan wottidi xuuggiis.

<sup>17</sup> SHin GODAI Muusa azazidoogaadan, galbaa, korimaappe attidaagaanne tociyaa dunkkaanidosaaappe gaxi kessidi, taman xuuggiis.

<sup>18</sup> Yaatidi simmidi Muusee xuuggiyo yarshshuwaassi haniya dorssa orggiyaa ehiis; ehin Aarooninne a attuma naati he dorssaa orggiyaa huuphiyan bantta kushiyaa wottidosona.

<sup>19</sup> Muusee he dorssa orggiyaa shukkiis; shukkidi a suuttaa yarshshiyooosaa miyyetu ubban caccafiis. <sup>20</sup> Qassi dorssa orggiyaa ashuwaakka a qommuwan qommuwan pariis; paridi parettaa, huuphiyaanne handdaa yarshshiyooosaa bolli wottidi xuuggiis.

<sup>21</sup> Qantta ashuwaanne guyye gedata haattan meeccoogaappe guyyiyan, dorssaa muleera GODAASSI taman xuuggiyo, sawuwaa tonggu giya yarshsho oottidi, GODAI Muusa azazidoogaadan yarshshiyooosaa bollan wottidi xuuggiis.

<sup>22</sup> Hegaappe guyyiyan, qeesetettaassi tiyettiyo wode shiishshiyo naa77antto dorssaa Muusee ehiis; ehin Aarooninne a attuma naati he dorssaa huuphiyan bantta kushiyaa wottidosona.

<sup>23</sup> Muusee he dorssaa shukkiis; shukkidi a suuttaappe ekkidi, Aaroonassi ushachcha haittaa xeeraa, ushachcha kushiyaa wogga biradhdhiyaanne, ushachcha tohuwaa wogga biradhdhiyaa tiyiis. <sup>24</sup> Qassi Muusee Aaroona attuma naataakka sinttau ehiidi, he suuttaappe ekkidi, eta ushachcha haittaa xeeraa, eta ushachcha kushiyaa wogga biradhdhiyaanne eta ushachcha tohuwaa wogga biradhdhiyaa tiyiis. Hegaappe guyyiyan, Muusee attida suuttaa yarshshiyooosaa miyyetu ubban caccafiis.



<sup>25</sup> Yaatidi modhdhuwaa, nasiyaa, qantta ashuwaa maayida handdaa, tiriya maayida handdaa, naa77u kilahotanne eta maayida handdaanne ushachcha gedaa ekkiiis. <sup>26</sup> Qassi irshshuwaa yeggennan uukkido oittaa wottiyo GODAA sinttan de7iya masoofiyaappe issi komppuwaa, zaitiyaara uukkido issi oittaaanne issi lee7e lichchakkuwaa ekkidi, hageeta modhdhuwaa bollaanne ushachcha gedaa bollan wottiis. <sup>27</sup> I ha qumaa ubbaa Aaroon kushiyaanne a attuma naatu kushiyan wottiis; wottin eti GODAA sinttan wuxaawuxiyo yarshsho oottidi wuxaawuxidosona. <sup>28</sup> Hegaappe guyyiyan, Muusee he qumaa eta kushiyaappe ekki, xuuggiyo yarshshuwaara gattidi, qeesettaassi tiyettiyo wode GODAASSI taman xuuggidi shiishshiyoo, sawuwaa tonggu giya yarshshuwaadan, yarshshiyosaa bollan wottidi xuuggiis. <sup>29</sup> Qassi Muusee anggaasuwa ekkidi, wuxaawuxiyo yarshsho oottidi GODAA sinttan wuxaawuxiis; GODAI Muusa azazidoogaadan, qeesettaassi tiyettiyo wode yarshshiyoo dorssa orggiyaa ashuwaappe hegee Muusa gakkiiya a qommuwaa.

<sup>30</sup> Muusee tiyiyoo zaitiyaappenne yarshshiyosaa bollan de7iya suuttaappe ekkidi, Aaroon bollanne a maayuwaa bolli, qassi a attuma naatu bollanne, eta maayuwaa bolliikka caccafiis; yaatidi Aaroonanne a maayuwaa qassi a naatanne a naatu maayuwaa dummayiis.

<sup>31</sup> Muusee Aaroonanne a attuma naata hagaadan yaagiis; “Ashuwaa Dunkkaaniyaa karen doissite; doissidi, ‘Aaroonanne a naati heгаа moonaa’ yaagada taani azazidoogaadan, qeesettaassi tiyettiyo wode shiishshiyoo yarshshuwaa wottiyo masoofiyaa gidдон de7iya yarshsho oittaaara hegaan miite. <sup>32</sup> He ashuwaappenne oittaaappe palahidaagee de7ikko taman xuuggite. <sup>33</sup> Qeesettaassi tiyiyoo wogai laappun gallassaa ekkiiyo gishshau, he intte qeesettaassi tiyettiyo laappun gallasai wuranaashin, Dunkkaaniyaa penggeppe kare kiyoppite. <sup>34</sup> Ha hachchi oosettidaagee GODAI azazin, intte nagaraa atto giissanau oosettiis. <sup>35</sup> Dunkkaaniyaa penggen laappun gallassa kumettaa gallassanne qamminne takkite; GODAA wogaakka naagite; ixxiikka intte haiqqana. Tana GODAI azazidoogee hagaа” yaagiis. <sup>36</sup> Yaagin Aaroonanne a naati GODAI Muuse baggaara azazidobaa ubbaa oottidosona.

## 9

### *Aarooni GODAASSI SHiishshiyoo Yarshshuwaa*

<sup>1</sup> Hosppunta gallasan Muusee Aaroonanne a naata, qassi Israa7eela cimatakka xeesiis. <sup>2</sup> Xeesidi Aaroon hagaadan yaagiis; “Nagaraa yarshshuwaassi issi korimaa, qassi xuuggiyo yarshshuwaassi issi dorssa orggiyaa GODAA sintti shiishsha. Meheti naa77aikka tilla bollaara de7iyaageeta gidona. <sup>3-4</sup> Qassi Israa7eela asaa hagaadan yaaga; ‘GODAI hachchi intteyyo qoncciiyo gishshau, a sinttan yarshshanau, nagaraa yarshshuwaassi issi deeshsha orggiyaa, xuuggiyo yarshshuwaassi tilla bollaara de7iya issi laitta maraanne issi laitta dorssaa, issippetettaa yarshshuwaassi issi korima mirgguwaa, issi dorssa orggiyaanne zaitiyan munaqettida kattaa yarshshuwaa ehiite’ yaaga” yaagiis.

<sup>5</sup> Eti Muusee azazidobaa ubbaa Xoossaa Dunkkaaniyaa sintti ehiidosona; yaatidi maabara ubbai shiiqidi, GODAA sinttan eqqidosa. <sup>6</sup> Muusee eta, “GODAA bonchchoi intteyyo qonccana mala, intte oottanaadan GODAI inttena azazidoogee hagaа” yaagiis.

<sup>7</sup> Qassi Muusee Aaroonakka hagaadan yaagiis; “Yarshshiyosaaakko haa shiiqa; shiiqada ne nagaraa yarshshuwaanne ne xuuggiyo yarshshuwaa yarshsha; yaatada ne huuphe nagaraanne ne asaa nagaraakka atto giissa. Qassi GODAI azazidoogaadan, asai shiishshiyoo yarshshuwaa yarshshada, eta nagaraakka atto giissa” yaagiis.

<sup>8</sup> Yaagin Aarooni yarshshiyosaaakko yiidi, ba huuphe nagaraassi yarshsho ootti shiishshido korimaa shukkiis. <sup>9</sup> SHukkin Aaroon naati suuttaa ekkidi ayyo ehiidosona; i ba kushiya biradhdhiyaa he suuttan yeddi kessidi, yarshshiyosaa kaceta



bochchiis; attida suuttaakka yarshshiyooaappe garssa baggaara gussiiis. <sup>10</sup> GODAI Muusa azazidoogaadan, qassi he nagaraa yarshshuwaa ashuwaappe modhdhuwaa kilahotanne tiriya maayida handdaa yarshshiyooa bollan wottidi xuuggiis. <sup>11</sup> SHin attida ashuwaanne galbaa dunkkaanidosaappe kare kessidi xuuggiis.

<sup>12</sup> Hegaappe guyyiyan, Aarooni xuuggiyo yarshshuwaa shukkiis; shukkin a naati suuttaa ekkidi ayyo ehiidosona; ehin i yarshshiyooa miyyetu ubbaa caccafiis. <sup>13</sup> Qassi eti xuuggiyo yarshshuwaa qommuwan qommuwan kessidi, huuphiyaarakka ayyo ehiidosona; ehin i yarshshiyooa bollan wottidi xuuggiis. <sup>14</sup> Qantta ashuwaanne tohotakka haattan meecidi, yarshshiyooa bollan de7iya xuuggiyo yarshshuwaa bollan wottidi xuuggiis.

<sup>15</sup> Hegaappe guyyiyan, Aarooni asai ehiido yarshshuwaa shiishshiiis; i asaa nagaraa yarshshuwaassi gidia deesha orggiyaa ekkidi shukkiis; shukkidi kase baagaadanka eta nagaraassi yarshshiiis. <sup>16</sup> Qassi i xuuggiyo yarshshuwaa mehiyaa ehiidi, wogai azaziyoogaadan oottidi yarshshiiis. <sup>17</sup> Kattaa yarshshuwaakka shiishshiiis; appe issi zolle gidiaagaa ekkidi, maallado maallado xuuggiyo yarshshuwaappe haraa yarshshiyooa bollan wottidi xuuggiis.

<sup>18</sup> Aarooni qassikka asaa issippetetta yarshshuwaassi korimaanne dorssa orggiyaa shukkiis; shukkin a attuma naati suuttaa ayyo ehiidosona; ehin i he suuttaa ekkidi, yarshshiyooa miyyetu ubbaa caccafiis. <sup>19</sup> Qassi korimaanne dorssa orggiyaa ashuwaappe modhdhuwaa, nasiyaa, qantta ashuwaa maayida handdaa, kilahotanne tiriya maayida handdaa Aarooni naati ayyo ehiidosona. <sup>20</sup> Eti he handdaa anggaasuwa bolli bollaara wottin, Aarooni yarshshiyooa bollan hegaa xuuggiis. <sup>21</sup> SHin GODAI Muusa azazidoogaadan, Aarooni anggaasotanne ushachcha gedaa wuxaawuxiyo yarshsho oottidi, GODAA sinttan wuxaawuxiis.

<sup>22</sup> Hegaappe guyyiyan, Aarooni ba kushiya asaakko zaari denttidi eta anjjiis. I nagaraa yarshshuwaa, xuuggiyo yarshshuwaanne issippetetta yarshshuwaa yarshshoogaappe guyyiyan, yarshshiyooaappe duge wodhdhiis. <sup>23</sup> Wodhdhin Muuseenne Aarooni Xoossaa Dunkkaaniyaa giddo gelidosona; eti hegaappe kiyido wode, asaa anjjidosona. Yaatin GODAA bonchchoi asa ubbaassi beettiis. <sup>24</sup> GODAA sinttappe tamai wodhdhidi, yarshshiyooa bollan de7iya xuuggiyo yarshshuwaanne modhdhuwaa miis. Asai ubbai hegaa be7ido wode ililiis; qassi eti bantta som77uwan sa7aa bochchidi gufannidosona.

## 10

### *Naadaabinne Abiihu Oottido Nagaraa*

<sup>1</sup> Aarooni attuma naati, Naadaabinne Abiihu, bantta ixaanaa cuwayiyo miishshaa miishshaa ekkidi, a bollan tamaa wottidosona; wottidi tamaa bolli qassi ixaanaa qolidosona; yaatidi, GODAI eta azazibeenna, geesha gidenna tamaa GODAA sinttan shiishshidosona. <sup>2</sup> Hegaa gaasuwan GODAA matappe tamai yiidi, eta mi aggiis; etikka GODAA sinttan haiqqi aggidosona. <sup>3</sup> Hegaappe guyyiyan, Muusee Aarooni, “GODAI, ‘Taani ta mati shiiqiyaageeta ta geeshshatettaa bessana.

Qassi asa ubbaa sinttan

taani bonchchettana’

giidi haasayidoogee be7a haggaa” yaagiis. Yaagin Aarooni co77u giis.

<sup>4</sup> Muusee Aarooni aawaa ishaa Uzzi7eela attuma naata, Mishaa7eelanne Elxxaafaana xegidi, “Haa yiite; yiidi intte aawaa ishaa naatu ahaa Xoossaa Dunkkaaniyaa sinttappe denttidi, dunkkaanidosaappe gaxi kessite” yaagiis. <sup>5</sup> Hegaa gishshau eti yiidi, Muusee azazidoogaadan, eta qeesetettaa maayuwaara eta ahaa tookkidi, dunkkaanidosaappe gaxi kessidosona.

<sup>6</sup> Hegaappe guyyiyan, Muusee Aaroonanne a attuma naata, El77aazaranne Itaamaara hagaadan yaagiis; “Intte haiqqenna malanne, GODAI maabara ubbaa bollan hanqqettenna mala, intte huuphiyaa meedissoppite; intte maayuwaakka pooshshop-pite. SHin intte ishathi, Israa7eela asati, GODAI ba eettido taman xuuggidoogeetussi yeekkana giikko eti yeekkona. <sup>7</sup> Qassikka intte Dunkkaaniyaa penggeppe kare kiyoppite; kiyikko intte haiqqana; aissi giikko GODAI tiyiyo zaitee intte bollan de7ees” yaagiis. Yaagin etikka Muusee giidoogaadan oottidosona.

### *Qeesetu Wogaa*

<sup>8</sup> GODAI Aarona hagaadan yaagiis; <sup>9</sup> “Intte haiqqenna mala, Dunkkaaniyaa giddo geliyo wode, neenikka ne naatikka woine eessaa woikko hara mattoyiya ushsha uyoppite; hegee sinttappe yaana yeletaassikka merinau higge gididi de7ana. <sup>10</sup> Intte geeshshabaanne geeshsha gidennabaa qassi tunabaanne tuna gidennabaa shaakkidi erite. <sup>11</sup> GODAI Muuse baggaara yootido woga ubbaakka Israa7eela asaa tamarissite” yaagiis.

<sup>12</sup> Muusee Aaroonanne attida a attuma naata El77aazaranne Itaamaara hagaadan yaagiis; “GODAASSI taman xuuggiyo yarshshuwaappe attida kattaa yarshshuwaa ekkite; ekkidi irshsho yeggennan uukkite; yaatidi i keehippe geeshsha gidiyo gishshau, yarshshiyooosaa matan a miite. <sup>13</sup> GODAASSI taman xuuggiyo yarshshuwaappe hegee nenanne ne attuma naata gakkiiya intte qommuwaa gidiyo gishshau, heгаа intte geeshsha sohuwan miite; aissi giikko, GODAI tana hegaadan oottana mala azaziis. <sup>14</sup> SHin wuxaawuxettida anggaasuwaanne shiiqida gedaa neeni, ne attuma naatinne ne macca naati geeshsha sohuwan miite. Aissi giikko, hegee Israa7eela asai shishshiyoo issippetettaa yarshshuwaappe nenanne ne attuma naata gakkiiya intte qommuwaa. <sup>15</sup> GODAASSI yarshshido gedaanne wuxaawuxido anggaasuwaa asai taman xuuggiyo modhdhuwaara issippe gattidi, GODAA sinttan wuxaawuxiyo yarshshodan wuxaawuxanau ehaana. GODAI azazidoogaadan, hegee neessinne nenaara de7iya ne attuma naatussi merinau inttena gakkiiya intte qommo gidana” yaagiis.

<sup>16</sup> Muusee nagaraa yarshuwaa deeshshai waanidaakko eranau koyidi oichchiis; oichchidi i xuugettiichchidoogaa erido wode, attida Aarona attuma naata, El77aazaranne Itaamaara hanqqettiis; hanqqettidi eta, <sup>17</sup> “Nagaraa yarshshoi keehippe geeshsha; qassi hegeekka asaa nagaraa GODAA sinttan atto giissana mala intteyyo imettiis; yaatin intte a geeshsha sohuwan aissi mibeekketii? <sup>18</sup> He mehiyaa suuttai Xoossaa Dunkkaaniyaa giddo gelibeennaagaa gidishin, taani inttena azazidoogaadan, intte a he geeshsha sohuwan maanau bessees; shin aggideta” yaagiis.

<sup>19</sup> Yaagin Aarooni Muusa, “Be7a; asati hachchi bantta nagaraa yarshshuwaanne xuuggiyo yarshshuwaa GODAA sintti ehiidosona; gidikkonne qassi haggaa malabai ta bolli gakkiiis. Yaatin woni taani nagaraa yarshshuwaa hachchi miidabaa gidiyaakko, GODAI ufaittanaagaa shin attideeshsha?” yaagiis. <sup>20</sup> Muusee heгаа siyido wode, he zaaroi a aliis.

## 11

### *Maanau Bessiya Meretata*

<sup>1</sup> GODAI Muusanne Aarona hagaadan yaagiis; <sup>2</sup> “Israa7eela asau hagaadan yaagidi yootite; ‘Biittaa bollan de7iya mehetu ubbaappe intte maana mehetinne do7ati hageeta. <sup>3</sup> Qinccafilee wuri phalqqettidoogeetanne waammotiya meheta ubbaa miite. <sup>4-6</sup> SHin waammo xalaalaa waammotiyaageeta woikko qassi qinccafilee xalaalai phalqqettidoogeeta mooppite. Hegeetikka gaameelaa, guppalliyaanne harbbainnuwaa mooppite; aissi giikko, eti waammotiyaageeta gidikkonne, etau qinccafilee phalqqetta gidenna gishshau, eti intteyyo tuna. <sup>7</sup> Gudunttaakka mooppite; aissi giikko, ayyo

qincafilee phalqqetta gidikkonne, waammotenna gishshau, i intteyyo tuna. <sup>8</sup> Intte hageetu ashuwaa mooppite; eta bautaakka bochchoppite; eti intteyyo tuna.

<sup>9</sup> “Haattaa gidдон de7iya meretatu ubbaappe intte maanaageeti hageeta. Abbaa gidдон gidin woi qassi goggiya haattaa gidдон gidin de7iya ubbaappe moliyaagaa mala qefeenne poqoi de7iyo ubbaa miite. <sup>10</sup> SHin abbaa gidдон woikko shaafan sham77i sham77iya meretatuppenne shemppoi de7iyo, qaaxxiya meretatuppe moliyaagaa mala qefeenne poqoi baina ubbai intteyyo tuna. <sup>11</sup> Hageeti intteyyo tuna; eta ashuwaa mooppite; eta bautaakka bochchoppite. <sup>12</sup> Qefeenne poqoi baina haatta gidдон de7iya meretati ubbai intteyyo tuna.

<sup>13</sup> “Kafotuppe tuna gidiyo gishshau intte meennaageeti hageeta: arggantaa, bazzo ankuwaa, kareta ankuwaa, <sup>14</sup> xingilliya, qoolliya zare ubbaa, <sup>15</sup> qooraase zare ubbaa <sup>16</sup> yanchchaa, cancciya guttuwaa, haatta kafuwaa, gace zare ubbaa, <sup>17</sup> qeeri guttuwaa, adussa qooree de7iyo haatta kafuwaa, wogga guttuwaa, <sup>18</sup> haatta kuttuwaa, mole kafuwaa, bauta ankuwaa, <sup>19</sup> shimalaanne saabissaa giyo haatta kafotu zare ubbaa, jinjjilaatiyaanne wurkkaawurkkuwaa.

<sup>20</sup> “Qefeera de7iya oiddu tohuwan hemettiya qeeri meretati ubbai intteyyo tuna. <sup>21</sup> Gidikkonne, qefee de7iyo oiddu tohuwan hemettiyaageetuppe eta tohuwaappe bol-laara guppanau maaddiya gedai de7iyoogeta miite. <sup>22</sup> Hegeetikka, boole zare ubbaa, ukkubbo zare ubbaanne gumbburo zare ubbaa. <sup>23</sup> SHin hara qefeera de7iya oiddu tohoi de7iyo meretati ubbai intteyyo tuna.

<sup>24</sup> “Hageeti inttena tunissana; eta bautaa bochchiya ubbai omarssi gakkanaashin tuna gidana. <sup>25</sup> Hageetu bautaa denttiya ooninne ba maayuwaa meecco; shin gidikkonne omarssi gakkanaashin i tuna. <sup>26</sup> Qincafilee de7iiddi phalqqetta giden-naageeti woi qassi, waammotennaageeti ubbai intteyyo tuna; eta bochchiya oonikka qassi tuna. <sup>27</sup> Oiddu tohotun hemettiya mehe ubbaappe garawatu ginddiyaa mala ginddiyan hemettiyaageeti intteyyo tuna; qassi eta bautaa bochchiya oonikka omarssi gakkanaashin tuna. <sup>28</sup> Hegeetu bautaa denttiya ooninne ba maayuwaa meecco; shin gidikkonne omarssi gakkanaashin i tuna. Etikka intteyyo tuna.

<sup>29</sup> “Sa7aara hemettiyaageetuppe hageeti intteyyo tuna: occoi, eceree, duma duma qommo zaree, <sup>30</sup> geeggee, haulaashoi, korchchee, wakkallainne shaqaanchchai. <sup>31</sup> Sa7aara hemettiya ubbatuppe intteyyo tuna gidiyaageeti hegeeta; etappe haiqqidabaa bochchiya ubbi omarssi gakkanaashin tuna. <sup>32</sup> Etappe haiqqidabi aiba bolli kunddikkokka, he eti a bolli kunddido miishshai tuna; mita miishsha woikko maayo woikko galbba woikko qarcciita gidinkka, go7ettiyo miishsha ubbaa haatta gidдон wottite; hegee omarssi gakkanaashin tuna; Hegaappe guyyiyan, geeshsha gidana. <sup>33</sup> Ha sa7aara hemettiyaageetuppe issuwaa bautai ai urqqa miishshaa gidдон kunddikkokka, a gidдон de7iyaabi ubbi tuna; he miishshaa menttite. <sup>34</sup> He miishshaa gidдон de7iya haattaappe miyo ai quma bolli xokkikkokka, he qumai tuna; qassi uyiyoobi aibanne gido, he miishshaa gidдон de7ikko, ikka tuna. <sup>35</sup> Hageetu ahi a bolli kunddiyooobi aiba gidikkokka tuna. Coociyaa woi kattiyo urqqa miishshaa gidikkokka menttite; eti intteyyo tuna. <sup>36</sup> Hageetu bautai bochchiyoobai ubbai tuna gidikkonne, pulttoinne haatta ollai geeshsha. <sup>37</sup> Eta bautaappe issoi zeranau wottido zeretta kattaa bolli kunddikko, hegee tunenna. <sup>38</sup> SHin he zerettaa bolli haatti gukki simmin, eta bautaappe issoinne a bolli kunddikko, he zeretta intteyyo tuna.

<sup>39</sup> “Qassi intte miyo mehetuppe issoi haiqqin, a bautaa bochchiya ooninne omarssi gakkanaashin tuna. <sup>40</sup> Ooninne he mehiyaa bautaappe miikko, ba maayuwaa meecco; omarssi gakkanaashin i tuna; qassi ooninne a bautaa tookkidi denttikko, ba maayuwaa meecco; omarssi gakkanaashin i tuna.

<sup>41</sup> “Sa7aara gooshettiya mereta ubbai intteyyo tuna; a mooppite. <sup>42</sup> Uluwan gooshettiyaabaa gidin, woi oiddu gediyan hemettiyaabaa gidin, woi qassi daro gedee

de7iyoobaa gidinkka, sa7aara gooshettiya mereta ubbai tuna gidiyo gishshau a mooppite. <sup>43</sup> Sa7aara gooshettiya mereta ubban intte huuphiyau tunoppite; qassi etan intte asatettaa tunissoppite. <sup>44</sup> Taani, GODAI, intte Xoossaattennee. Taani geeshsha gidiyo gishshau, intteikka inttena dummayidi, geeshsha gidite. Sa7aara gooshettiyaabatun intte asatettaa tunissoppite. <sup>45</sup> Aissi giikko, taani intte Xoossaa gidanau, inttena Gibxxe biittaappe kessida GODAATTENNEE. Hegaa gishshau, taani geeshsha gidiyo gishshau, intteikka geeshsha gidite' yaagite" yaagiis.

<sup>46</sup> Mehetu, kafotu, haatta gidдон paxa qaaxxiya meretatu ubbatunne sa7aara hemettiya meretatu ubbatu wogai haggaa. <sup>47</sup> Hegeenne intte tunaanne geeshshaa, qassi shemppoi de7iyo meretatuppe miyoogeeanne meennaageeta shaakkidi eranaassa.

## 12

### *Maccaasai Yeli Simmidi Geeyiyo Wogaa*

<sup>1</sup> GODAI Muusa hagaadan yaagiis; <sup>2</sup> "Israa7eela asaassi hagaadan yaagada yoota; 'Issi maccaasiyaa shahaarada attuma na7a yelikko, ba kushe qitai yiido wode a tuna gidiyooogaadankka, hegaadan a laappun gallassai gakkanaashin tuna gidana. <sup>3</sup> Hospunnata gallassi na7ai qaxxarettanau koshshees. <sup>4</sup> Hegaappe guyyiyan, maccaasiyaa ba yeluwaa suuttai xi77ana gakkanaashin, hasttamanne heezzu gallassaa takku; qassi ba geeyiyo gallassati wurana gakkanaashin, geeshshabaa aibanne bochchuppu; Xoossaa Dunkkaaniyaakka geluppu.

<sup>5</sup> " 'SHin issi maccaasiyaa macca na7a yelikko, ba kushe qitai yiido wode a tuna gidiyooogaadankka, hagaadan naa77u saamintta gakkanaashin, a tuna gidana; Hegaappe guyyiyan, ba yelo suuttai xi77ana gakkanaashin usuppun tammanne usuppun gallassaa takku.

<sup>6</sup> " 'Maccaasiyaa attuma na7a gidin macca na7a gidin yelada, ba geeyiyo wodiyaawurssoogaappe guyyiyan, xuuggiyo yarshshuwaassi issi laitta dorssaanne nagaraa yarshshuwaassi qassi issi haraphphiyaa buuba woikko issi mara haraphphiyaa Xoossaa Dunkkaaniyaa penggen de7iya qeesiyaakko ehu. <sup>7</sup> Qeesee hegaa GODAA sinttan yarshshidi, i nagaraa atto giissees; yaatobare a ba yelo suutta gogettaappe geeyausu. Attuma na7a woikko macca na7a yeliya maccaasee wogai haggaa.

<sup>8</sup> " 'SHin issi laitta dorssa orggiyaa ehaanau iyyo miishshi gidana xayikko, naa77u buuba haraphpheta woikko naa77u mara haraphpheta ehu. Etappe issoi xuuggiyo yarshshuwaassa; issoi qassi nagaraa yarshshuwaassa. Yaatobare qeesee hegeeta yarshshidi, i nagaraa atto giissees; akka geeshsha gidausu' yaaga" yaagiis.

## 13

### *Hanttaara Goga Harggiyaa Xeelliyaaagan Kiyida Higgeta*

<sup>1</sup> GODAI Muusanne Aarona hagaadan yaagiis; <sup>2</sup> "Ai asa bollinne kixi wodhdhikko, woikko xuussa masuntti woikko ilahi kiyikkonne qassi hegeekka a galbban hanttaara goga harggiyau laamettikko, he bitaniyaa qeesiyaa Aaroonakko woikko qeese gidiya a attuma naatuppe issuwaakko ehoona. <sup>3</sup> Ehin qeesee a gogaa bollan de7iya masunttaa be7o. He masunxxida sohuwan de7iya ikisee booxxikkonne, masunttaikka ollatikko, hegee hanttaara goga hargge. Qeesee hegaa be7idi, he bitanee tuna gidiyooogaa erisso. <sup>4</sup> SHin a gogaa bollan de7iya masunttai booxxikkokka, gogaappe kanttidi ollatibeennabaa gidikkonne he masunttaa bollan de7iya ikisee booxxibeennabaa gidikko, qeesee he bitaniyaa dumma kifiliyan laappun gallassaa gorddidi wotto. <sup>5</sup> Laappunnata gallasan qeesee a zaarettidikka be7o; i be7iyo wode masunttai bitaniyaa gogaa bollan aakkennan kasegaadankka de7ikko, qeesee he bitaniyaa naa77anttuwaakka dumma kifiliyan laappun gallassaa gorddidi wotto. <sup>6</sup> Qassikka laappunnata gallasan qeesee a be7o; be7iyo wode masunttai aakkiyoogaa aggidi xayii xayii biikko, qeesee i geeshsha



gidiyoogaa erisso. Hegee xuussappe attin harabaa gidenna; heгаа gishshau, i ba maayuwaa meeccidi geeshsha gidees. <sup>7</sup> SHin i geeyanau bana qeesiyaa bessidoogaappe guyyiyan, he xuussai a gogaa bollan yaa aakki aakki biikko, i naa77anttuwaa bana bessanau qeesiyaakko bo. <sup>8</sup> Qeeseekka a be7o; he xuussai bitaniyaa gogaa bollan yaa aakki aakki biikko, qeesee i tuna gidiyoogaa erisso. Aissi giikko, hegee hanttaara goga hargge.

<sup>9</sup> “Oonanne hanttaara goga harggee oiqqikko, qeesiyaakko a ehoona. <sup>10</sup> Ehin qeesee a be7o; be7iyo wode a gogaa bollan bootta kixai de7ikko, he kixai ikisiyaakka boottau laammikkonne he kixaa giddon ashoi munni uttidabaa gidikko, <sup>11</sup> hegee a gogaa bollan gam77ida hanttaara goga hargge gidiyo gishshau, qeesee i tuna gidiyoogaa erisso. I tuna gidiyoogee erettiichchido gishshau, a dumma kifiliyan gorddanau koshshenna.

<sup>12</sup> “Qassi hanttaara goga harggee bitaniyaa gogaa bollan aakkidi, huupheppe toho gakkanaashin ubban maayidabaa gidikko, qeesee be7o. <sup>13</sup> Be7in he hanttaara goga harggee a bollaa ubbaa maayikko, qeesee i geeshsha gidiyoogaa erisso; a bollai muleerakka laamettidi bootta gidido gishshau, i geeshsha. <sup>14</sup> SHin he masunttaa giddoora munnida ashoi beettikko i tuna. <sup>15</sup> Qeesee he munnida ashuwaa be7o; be7idi he bitanee tuna gidiyoogaa erisso. He munnida ashoi hanttaara goga hargge gidiyo gishshau, i tuna. <sup>16</sup> SHin he munnida ashoi qassikka laamettidi booxikko, he bitanee qeesiyaakko yo. <sup>17</sup> Qeesee a be7o; be7in a masunttai booxidabaa gidikko, he bitanee geeshsha gidiyoogaa qeesee erisso. Yaatobare i geeshsha gidana.

<sup>18</sup> “Issi asa bolli merkkoi wodhdhidi paxin, <sup>19</sup> a sohuwan bootta kixai wodhdhikko woikko zo77ida ilahai kiyikko, he urai bana qeesiyaa besso. <sup>20</sup> Qeesee a be7o; be7in he masunttai ollatikkonne masunttaa bollan de7iya ikiseekka laamettidi booxikko, he bitanee tuna gidiyoogaa qeesee erisso. Hegee merkkuwaara doommida hanttaara goga harggiyaa. <sup>21</sup> SHin qeesee be7iyo wode, ikisee booxibeennabaa gidikkonne masunttaikka gogaa kanttidi ollatibeennabaa gidikko, qassi xayii xayii biikko, qeesee a dumma kifiliyan laappun gallassaa gorddidi wotto. <sup>22</sup> Hegee a gogaa bollan aakki aakkidi biikko, he bitanee tuna gidiyoogaa qeesee erisso. Aissi giikko, hegee goga hargge. <sup>23</sup> SHin he ilahai aakki aakki beennan issi soho xallan de7ikko, hegee merkkoi paxido malaataa gidiyo gishshau, he bitanee geeshsha gidiyoogaa qeesee erisso.

<sup>24</sup> “Issi asa gogaa tami miikkonne he miido sohuwan booxida woikko zo77ida ilahai kiyikko, <sup>25</sup> qeesee he sohuwaa be7o; be7in a sohuwan de7iya ikisee booxikkonne merkkoiikka kanttidi ollatikko, hegee hanttaara goga hargge. I tamai miidosaa kiyiis; heгаа gishshau qeesee i tuna gidiyoogaa erisso. <sup>26</sup> SHin qeesee be7iyo wode, he ilahaa bollan de7iya ikisee booxibeennabaa gidikkonne masunttaikka gogaa kanttidi ollatibeennabaa gidikko, qassi xayii xayii biidabaa gidikko, qeesee a dumma kifiliyan laappun gallassaa gorddidi wotto. <sup>27</sup> Laappunnta gallassan qeesee a be7o; be7iyo wode he sohoi aakki aakki biikko, i tuna gidiyoogaa qeesee erisso. Hegee hanttaara goga hargge. <sup>28</sup> SHin he ilahai gogaa bollan aakkennan aggidi, issi sohuwan uttikkonne ubba qassi xayii xayii biikko, hegee tamai miidosan attida malaataa gidiyo gishshau, i geeshsha gidiyoogaa qeesee erisso.

<sup>29</sup> “Issi attuma asassi woikko macca asassi huuphiyaa woikko gacuwaa bollan masuntti kiyikko, <sup>30</sup> qeesee he masunttaa be7o. I be7iyo wode masunttai gogaa kanttidi ollatikkonne a bollan de7iya ikiseekka adille ciishsha milatiya lee7e gidikko, he bitanee tuna gidiyoogaa qeesee erisso. Hegee huuphiyaa woikko gacuwaa bollan kiyiia qaachchanne hanttaara goga hargge. <sup>31</sup> Qassi qeesee he harggiyaa be7iyo wode, i gogaa kanttidi ollatibeennabaa gidikkonne kareta ikiseekka a bolli xayikko, he qaachchiya harggiyaara de7iya bitaniyaa qeesee dumma kifiliyan laappun gallassaa gorddidi wotto. <sup>32</sup> Laappunnta gallassan qeesee he harggiyaa be7o; be7iyo wode qaachchiya harggee aakkennabaa gidikko, a bollan adille ciishsha milatiya ikisee bannabaa



gidikkonne, ikka gogaa kanttidi ollatibeennabaa gidikko, <sup>33</sup> he bitanee he masunttaa yuushuwan de7iya ikisiyaa meedo; qaachchiya sohuwan de7iya ikisiyaa mati meedoppo. Qeese he bitaniyaa dumma kifiliyan hara laappun gallassaa gorddidi wotto. <sup>34</sup> Laappuntta gallassan qeese he qaachchiyaasaa be7o; be7iyo wode hegee bitaniyaa gogaa bollan aakkana xayikkonne gogaa kanttidi ollatana xayikko, he bitanee geeshsha gidiyoogaa qeese erisso. Bitaneekka ba maayuwaa meeccidi, geeshsha gidees. <sup>35</sup> SHin i geeyidoogaappe guyyiyan, qaachchiyaagee he bitaniyaa gogaa bollan aakki aakki biikko, <sup>36</sup> qeese a be7o; be7iyo wode he qaachchiyaagee aakkidabaa gidikko, qeese adille ciishsha milatiya ikisiyaa koyoppo. Aissi giikko, he bitanee tuniichchiis. <sup>37</sup> SHin qeese be7iyo wode, he qaachchiyaasai aakkibeennabaa gidikkonne kareta ikiseekka a bolli mokiidabaa gidikko, he qaachchiyaasai paxiichchiis. He bitaneekka geeshsha gidiyo gishshau, i geeshsha gidiyoogaa qeese erisso.

<sup>38</sup> “Issi attuma asa woikko macca asa gogaa bolli bootta ilahai kiyikko, <sup>39</sup> qeese a be7o. Be7iyo wode he eta gogaa bollan de7iya ilahai shololla bootta gidikko, hegee goga bollan coo kiyidabaa; he bitaneekka geeshsha.

<sup>40</sup> “Issi asau huuphiyaa binnaanai qoqqofettikko, i bo77a; gidoppe attin i geeshsha. <sup>41</sup> Qassi issi asau huuphiyaa binnaani sinttaara bo77atikko, a tiishshi miis; gidoppe attin i geeshsha. <sup>42</sup> SHin a bo77aa woikko a tiishshai miidosaa bollan zo7o woikko bootta masuntti kiyikko, hegee a bo77an woikko tiishshai miidosan kiyida hanttaara goga hargge. <sup>43</sup> A qeese be7o. Be7iyo wode a bo77aa woikko tiishshai miidosaa bollan de7iya masunttai gogaa bollan kiyiida hanttaara goga harggiyaadan zo7o gidikko, <sup>44</sup> he bitanee tumukka hanttaara goga hargge sakkiyo hargganchcha. I tuna gidiyo gishshau i tuna gidiyoogaa qeese erisso. Aissi giikko, harggee a huuphiyan de7ees.

<sup>45</sup> “Hanttaara goga harggee oiqqido asi pooshettida maayuwaa maayo; ba huuphiyaa pixoppo; ba menttershshaakka kammo; yaatidi, ba qaalaa xoqqu oottidi, ‘Taani tuna, taani tuna!’ yaago. <sup>46</sup> He harggee a bolli de7ido keesan ubban i tuna. I tuna gidiyo gishshau, asappe shaahettidi dunkkaanidosaappe kareera barkka de7o.

### *Boroqoi Kiyiyo Wode Oottiyo Wogaa*

<sup>47</sup> “Ai maayuwaa bollinne boroqida sohoi beettikko, he maayoi suufe gidin woi liino gidin, <sup>48</sup> dadettida woikko sikettida liino woi suufe gidin, galbba woikko galbbappe oosettida maayo gidin, <sup>49</sup> he maayuwaa bolli kiyida boroqoi maata milatiya woikko zo7o meraa bessikko, i qacinaappe woi shaluwaappe dadettidabaa gidin, galbba woi galbbaappe oosettida maayo gidinkka, hegee boroqoi kiyido gishshau, hegee qeesiyaa bessanau koshshees. <sup>50</sup> Qeese he boroquwaa be7idi, he boroquwaara de7iya maayuwaa dumma kifiliyan laappun gallassaa gorddidi wotto. <sup>51</sup> Laappuntta gallassan qeese he maayuwaa be7o; be7iyo wode he maayuwaa bollan aakki aakki biikko, i qacina woi shalo maayo gidin, galbba woi galbbaappe oosettida maayo gidinkka, hegee issuwaappe issuwaa oiqqiya boroqo gidiyo gishshau, he maayoi tuna. <sup>52</sup> Qassi he maayoi qacina woi shalo maayo gidin, liino woi suufe gidin, galbbaappe oosettidabaa aiba gidinkka, qeese a xuuggo. Hegee issuwaappe issuwaa oiqqiya boroqo gidiyo gishshau, i xuugettanau bessees.

<sup>53</sup> “Qassikka qeese be7iyo wode, he boroqoi maayuwaa bolli aakkibeennabaa gidikko, i qacina woi shalo maayo woikko galbbaappe oosettidabaa aiba gidinkka, <sup>54</sup> he boroqoi de7iyo maayuwaa meeccanaadan qeese azazo. Hegaappe guyyiyan, he maayuwaa dumma kifiliyan hara laappun gallassaa gorddidi wotto. <sup>55</sup> He boroqo sohoi de7iyo maayuwaa meecoogaappe guyyiyan, qassikka qeese be7o; be7iyo wode he boroqoi ba meraa laammibeennabaa gidikko, i aakki aakki baana xayikkokka tuna. He boroqo sohoi maayuwaassi guyye baggaara woi sintta baggaara de7inkka, he maayoi taman xuugettanau koshshees. <sup>56</sup> SHin he maayuwaa meecci simmin qeese be7iyo

wode boroqoi xayii xayii biikko, i galbba gidin, qacina woi shalo maayo gidinkka, he boroqoi de7iyo sohuwaa qeese daakkidi kessirggo. <sup>57</sup> Hegaappe guyyiyan, maayuwaa bolli simmidikka kiyikko, he maayoi qacina woi shalo maayo gidin, galbbaappe oosettidabaa aiba gidinkka, hegee aakki aakki biya boroqo soho gidiyo gishshau, he boroqoi de7iyo maayoi taman xuugettanau bessees. <sup>58</sup> SHin meecettida maayoi qacina woi shalo maayo gidin, woi galbbaappe oosettida aiba maayo gidinkka, boroqo sohoi a bollappe xayikko, he maayoi naa77anttuwaa meecetto; Hegaappe guyyiyan, i geeshsha gidees.

<sup>59</sup> “Issi maayoi suufe woi liino gidin, qacina woi shalo maayo gidin, woi qassi galbbaappe oosettidabaa gidinkka, he maayuwaa geeshsha woi tuna giissanau danddayiya boroqo sohuwaa wogai haggaa” yaagiis.

## 14

### *Hanttaara Goga Harggiyaappe Paxiya Asi Geeyiyo Wogaa*

<sup>1</sup> GODAI Muuseyyo hagaadan yaagidi yootiis; <sup>2</sup> “Hanttaara goga harggee oiqqido bitanee geeyiyo gallassi oottanau koshshiya wogai haggaa. He bitaniyaa qeesiyaakko efaanau koshshees. <sup>3</sup> Qeese asai dunkkaanidosappe gaxaa kiyidi, a harggiyaa be7o. Be7iyo wode hanttaara goga harggee bitaniyaa bollaappe xayidabaa gidikko, <sup>4</sup> qeese paxa de7iyya naa77u geeshsha kafota, xiidda mittaa, zo7o qacinaanne hiisoophphiyaa boncuwaa he hanttaara goga harggiyaappe geeyiyya bitaniyaa gishshau ehaanaadan eta azazo. <sup>5</sup> Hegaappe guyyiyan, qassi qeese naa77u kafotappe issuwaa keriyann de7iyya pultto haattaa bolli shukkanaadan azazo. <sup>6</sup> Paxa de7iyya kafuwaa, qassi zigaara, zo7o qacinaanne hiisoophphiyaa boncuwaara ekki efiidi, keriyann de7iyya pultto haattaa bolli shukkido kafuwaa suutta giddo naaqqo. <sup>7</sup> Naaqqi kessido suutta he hanttaara goga harggiyaappe paxiya bitaniyaa bolli laapputoo caccafo; yaatidi he bitanee geeshsha gidiyooгаа erisso; paxa de7iyya kafuwaa gede dembbau yeddo.

<sup>8</sup> “He harggiyaappe geeyida bitanee ba maayuwaa meecco; ba bollan de7iyya ikise ubbaa meedetto; ba bollaakka meecetto; yaatikko i geeshsha gidana. Hegaappe guyyiyan, i dunkkaanidosaa yo; shin gidikkonne ba dunkkaaniyaa gelennan laappun gallassaa kareera gam77o. <sup>9</sup> Laappuntta gallassan ba huuphiyaa, buuchchaa, deemuaanne ba bollan de7iyya hara ikise ubbaa meedetto; qassi ba maayuwaa meecco; ba bollaakka meecetto; Hegaappe guyyiyan, i geeshsha gidana.

<sup>10</sup> “Hospuntta gallassan tilla bollaara de7iyya naa77u dorssa maratanne issi laitta gidido issi dorssiyo eho; qassi kattaa yarshshuwaassi zaitiyan munaqettida heezzu kilo giraame xiilliyaanne issi litiro wogaraa zaitiyau heeztantto kushiyya eho. <sup>11</sup> A geeshshiya qeese bitaniyaa i ehiidobaturakka issippe Xoossaa Dunkkaaniyaa pengge GODAA sintti shiishsho.

<sup>12</sup> “Qeeseekka naa77u dorssa maratuppe issuwaa ekkidi, litiruwaassi heeztantto kushe zaitiyaara issippe naaquwaa yarshsho oottidi shiishsho; he shiishshidoogaa qassi wuxaawuxiyo yarshsho oottidi, GODAA sinttan wuxaawuxo. <sup>13</sup> Yaatidi i he dorssa maraa nagaraa yarshshuwaanne xuuggiyo yarshshuwa shukkiyo geeshsha sohuwan shukko. Nagaraa yarshshuwaadan naaquwaa yarshshoikka qeesiyaassi imettes; ikka keehippe geeshsha. <sup>14</sup> Qeese naaquwaa yarshshuwa suuttaappe guutta ekkidi, he geeyiyya bitaniyau ushachcha bagga haittaa xeeraa, ushachcha kushiyyau wogga biradhdhiyaanne ushachcha tohuwau wogga biradhdhiyaa tiyo. <sup>15</sup> Hegaappe guyyiyan, qeese wogaraa zaitiyaappe guutta ekkidi, ba haddirssa kushiyya gomppan tigo.

<sup>16</sup> “Tigidi he haddirssa kushiyya gomppan de7iyya wogaraa zaitiyan ba ushachcha kushiyya biradhdhiyaa naaqqidi, GODAA sinttan laapputoo caccafo. <sup>17</sup> Yaati simmidi ba kushiyya gomppan attida zaitiyaappe ekkidi, geeyiyya bitaniyau ushachcha haittaa

xeeraa, ushachcha kushiyau wogga biradhdhiyaanne ushachcha tohuwau wogga biradhdhiyaa kase naaquwaa yarshshuwaa suutaa tiyido sohuwan tiyo. <sup>18</sup> Qassi ba kushiyaa gomppan attida zaitiyaa qeese geeyiya bitaniyaa huuphiyan gusso; yaatidi GODAA sinttan he bitaniyaa nagaraa atto giisso.

<sup>19</sup> “Hegaappe guyyiyan qeese ba tunatettaappe geeyiya bitaniyaa nagaraa atto giissanau nagaraa yarshshuwaassi shiishshido mehiyaa shukkees; hegaappe simmidi qassi xuuggiyo yarshshuwau shiishshido mehiyaa yarshshees. <sup>20</sup> Qassi qeese he xuuggiyo yarshshuwaa kattaa yarshshuwaara issippe yarshshiyooosaa bollan wottidi xuuggees; yaatidi bitaniyaa nagaraa atto giissees; bitaneekka geeshsha gidees.

<sup>21</sup> “SHin bitanee heгаа ubbaa ehaanau danddayenna manqqo gidikko, GODAA sinttan wuxaawuxidi a nagaraa atto giissanau, ba naaquwaa yarshshuwaassi issi dorssa maraa eho. Qassi kattaa yarshshuwaassikka wogaraa zaitiyan munaqettida issi kilo giraame lo77o xiilliyaanne issi litiruwaassi heezantto kushe zaitiyaa issippe eho. <sup>22</sup> Qassikka bau danddayidoogaadan naa77u buuba haraphpheta woikko naa77u mara haraphpheta, issuwaa nagaraa yarshshuwaassi, issuwaa qassi xuuggiyo yarshshuwaassi eho.

<sup>23</sup> “Hospuntta gallasan ba nagaraappe geeyanau bitanee hageeta qeesiyaakko Xoossaa Dunkkaaniyaa pengge GODAA sintti eho. <sup>24</sup> Ehin qeese naaquwaa yarshshuwau ehiido dorssa maraanne zaitiyaa ekkidi, wuxaawuxiyo yarshsho oottidi GODAA sinttan wuxaawuxo. <sup>25</sup> Yaatidi naaquwaa yarshshuwau ehiido dorssa maraa shukko; shukkidi he naaquwaa yarshshuwaa suuttaappe guutaa ekkidi, ha geeyiya bitaniyau ushachcha haittaa xeeraa, ushachcha kushiyau wogga biradhdhiyaanne ushachcha tohuwau wogga biradhdhiyaa tiyo. <sup>26</sup> Qassi qeese zaitiyaappe guutaa ba haddirssa kushiyaa gomppan tigo. <sup>27</sup> Tigidi he haddirssa kushiyaa gomppan de7iya zaitiyaappe ushachcha kushiyaa xeeran guutaa ekkidi, GODAA sinttan laapputoo caccafo. <sup>28</sup> Qassikka qeese ba kushiyaa gomppan de7iya zaitiyaappe guutaa ekkidi, geeyiya bitaniyaassi ushachcha haittaa xeeraa, ushachcha kushiyau wogga biradhdhiyaanne ushachcha tohuwau wogga biradhdhiyaa kase naaquwaa yarshshuwaa suutaa tiyido sohuwan tiyo. <sup>29</sup> Qassi GODAA sinttan bitaniyaa nagaraa atto giissanau, qeese ba kushiyan attida zaitiyaa geeyiya bitaniyaa huuphiyan tiyo. <sup>30</sup> Hegaappe guyyiyan, he aawu bau danddayidoogaadan haraphphe buuba gidin woikko mara haraphphe gidin, <sup>31</sup> issuwaa nagaraa yarshshuwaassi naa77anttuwaa qassi xuuggiyo yarshshuwaassi kattaa yarshshuwaara issippe yarshsho. Qassi qeeseekka he geeyiya bitaniyaassi GODAA sinttan a nagaraa atto giisso. <sup>32</sup> Ba bollan de7iya hanttaara goga harggiyaappe geeyanau koshshiya wogaa polanau manqqotai diggido urau de7iya wogai simmi haggaa” yaagiis.

### *Keetta Bolli Kiyiya Boroquwaa*

<sup>33</sup> GODAI Muusanne Aaroona hagaadan yaagiis, <sup>34</sup> “Taani intteyyo aqo oottada im-miyo Kanaane biittaa intte geliyo wode, qassi he biittan de7iya intte keettaappe issuwan taani boroquwaa yeddiyo wode, <sup>35</sup> he keettaawai qeesiyaakko biidi, ‘Ta son aiba boroqokko de7ees’ yaagidi yooto. <sup>36</sup> Son de7iyaabai ubbai tuna geetettennaadan, qeese boroquwaa be7anau gelanaappe kasetidi, son de7iyaabaa ubbaa kare kessanaadan azazo; yaati simmin qeese be7anau soo gelo. <sup>37</sup> Gelidi be7iyo wode, boroqo sohoi godaa bollan maata milatiya, woikko zo7o meraa bessikkonne qassi godaappe ollatidi giddo gelikko, <sup>38</sup> qeese sooppe kare kiyidi, keettaa laappun gallassa gakkanaashin gorddo. <sup>39</sup> Laappuntta gallasan qeese he keettaa zaarettidi xeello; xeelliyo wode he boroqoi keettaa godaa bollan aakkikko, <sup>40</sup> boroqoi de7iyo shuchchata ubbaa godaappe shoddidi, katamaappe gaxi yaa tunida sohuwau olanaadan azazo. <sup>41</sup> Qassi godaa

meeshido urqqaa so baggaara bookkishin, yuushshi aattidi qoqqofanaadan ootto; yaa-tidi he qoqqofido urqqaa katamaappe gaxan de7iya tuna sohuwan olona. <sup>42</sup> Hegaappe guyyiyan, he shoddido shuchchatu sohuwan hara shuchchata wottona; qassi hara urqqankka keettaa caddona.

<sup>43</sup> “SHuchchata shoddirggin, qassi urqqaakka qoqqofidi hara urqqaa caddi simmin, naa77anttuwaa simmidi boroqoi keetta gidдон aakkikko, <sup>44</sup> qeesee hegea be7o; be7iyo wode boroqoi he keettaa gidдон aakkikko, hegee issuwaappe issuwaa oiqqiya boroqo gidiyo gishshau, he keetta tuna. <sup>45</sup> Hega gishshau i he keettaa, a shuchchaa, a mittaanne i cadettido urqqaa ubbaa kolo; kolidi hegeeta katamaappe gaxi efidi, tuna sohuwan olo. <sup>46</sup> Qassi he keetta gorddiyan takkiyo wodiyan a gidдо geliya ooninne sa7ai qammana gakkanaashin tuna. <sup>47</sup> He keettan zin77iya uri woikko katta miya uri ba maayuwaa meecco.

<sup>48</sup> “SHin qeesee yiidi xeelliyo wode, keetta cadetti simmin naa77anttuwaa simmidi aakkana xayikko, boroqoi xayiichchido gishshau, he keetta geeshsha gidiyoogaa qeesee erisso. <sup>49</sup> Keettaa geeshshanau naa77u kafota, xiiddaa mittaa, zo7o qacinaanne hiisophphiyaa bonccuwaa eho. <sup>50</sup> Kafotuppe issuwaa keriyani de7iya pulutto haattaa bollan shukko. <sup>51</sup> Hegaappe guyyiyan xiiddaa, hiisophphiyaa bonccuwaa, zo7o qacinaanne paxa de7iya kafuwaa issippe ekkidi, keriyani de7iya shukkido kafuwaa suuttaanne puluttuwaa haattan yeggi kessidi, laapputoo he keetta caccafo. <sup>52</sup> Yaattidi he keetta qeesee kafuwaa suuttan, puluttuwaa haattan, paxa de7iya kafuwan, xiiddan, hiisophphiyaa bonccuwaaninne zo7o qacinan geeshsho. <sup>53</sup> Qassi paxa de7iya kafuwaa katamaappe gaxi hini dembbau yeddo. Hegaadan oottidi, keetta geeshshiyo wogaa polees; keettaikka geeshsha gidees.

<sup>54</sup> “Ai hanttaara goga hargge gidikkokka hagee woga; qaachchiyaabaa gidin, <sup>55</sup> maayuwaa bollan woi keetta bollan kiyiya boroqo gidin, <sup>56</sup> kixa gidin, xuussa masunntaa gidin woi ilaha gidinkka, <sup>57</sup> issibai tuna gidiyoogaanne geeshsha gidiyoogaa erissanau hanttaara goga harggiyaanne boroquwaa wogai hгаа” yaagiis.

## 15

### *Asaa Bollaappe Goggiya Tunabaa*

<sup>1</sup> GODAI Muusanne Aarona hagaadan yaagiis; <sup>2</sup> “Israa7eela asaayyo hagaadan yaagidi yootite; ‘Ai asa bollaappekka issi aibakko goggikko, he goggiyaabai tuna. <sup>3</sup> He goggiyaabaappe denddidaagan he aawu tuna gidiyo wogai hгаа: He goggiyaabai aggennan gogginkka woi qassi goggiyoogaa aggikkokka he a gidдон de7iyaabai a tunisees.

<sup>4</sup> “‘A bollaappe aibakko goggiyo asi zin77iyo ai hiixikka tuna; qassi i uttiyoobi aiba gidikkokka tuna. <sup>5</sup> A hiixaa bochchiya ooninne ba maayuwaa meecco; ba bollaakka meecetto; qassi omarssi gakkanaashin i tuna. <sup>6</sup> Goggiyaabaara de7iya asi uttidobaa bolli uttiya ooninne ba maayuwaa meecco; ba bollaakka meecetto; qassi omarssi gakkanaashin i tuna.

<sup>7</sup> “‘Goggiyaabai de7iyo asa bolla bochchiya ooninne ba maayuwaa meecco; ba bollaakka meecetto; qassi omarssi gakkanaashin i tuna.

<sup>8</sup> “‘Goggiyaabai de7iyo asi geeshsha asa bolli cuchchikko, he asi ba maayuwaa meecco; ba bollaakka meecetto; qassi omarssi gakkanaashin i tuna.

<sup>9</sup> “‘Qassi goggiyaabai de7iyo asi uttiyo ai kooraikka tuna. <sup>10</sup> Baappe garssaara de7iyaabaa aibin gidikkokka bochchiya ooninne omarssi gakkanaashin tuna; qassi hegeeta milatiyaabata tookkiya ooninne ba maayuwaa meecco; ba bollaakka meecetto; qassi omarssi gakkanaashin i tuna.



11 “ ‘Goggiyaabaara de7iya asi ba kushiya meecetennan de7iiddi bochchiyo asi ooninne ba maayuwaa meecco; ba bollaakka meecetto; qassi omarssi gakkanaashin i tuna.

12 “ ‘Qassi goggiyaabai de7iyo asi bochchiyo urqqa miishshaa ubbaa menttite; mitaappe oosettida miishsha ubbai qassi haattan meecetto.

13 “ ‘Goggiyaabai de7iyo asi he goggiyaabaappe geeyiyo wode, bau laappun gallassaa qoodo. Ba maayuwaa meecco; ba bollaaka pultto haattan meecetto; yaatidi i geeshsha gidees. 14 Hosppuntta gallassi naa77u buuba haraphpheta woikko naa77u mara haraphpheta ekkidi, Xoossaa Dunkkaaniyaa pengge GODAA sintti yiidi, qeesiyaayyo eta immo. 15 Immin qeese haraphphetappe issuwaa nagaraa yarshshuwaassi, naa77anttuwaa qassi xuuggiyo yarshshuwaassi yarshshees; yaatidi qeese bitaniyaa bollaappe goggiyaabaa gishshau GODAA sinttan a nagaraa atto giissees.

16 “ ‘Ai attuma asinne ba attumatettaappe zeretti gukkikko, ba kumetta bolla haattan meecetto; qassi omarssi gakkanaashin i tuna. 17 Attumatettaappe gukkida zeretta bochchido maayo ubbai woikko galbba ubbai haattan meecetto; qassi omarssi gakkanaashin i tuna. 18 Qassi issi attumaasi macca asaara zin77in, a attumatettaappe zeretti gukkikko, naa77aikka haattan meecetona; qassi omarssi gakkanaashin eti tuna.

19 “ ‘Maccaasassi aginan aginan yiya kushe qitai yiikko, laappun gallassa gakkanaashin a tuna; qassi o bochchiya ooninne omarssi gakkanaashin tuna.

20 “ ‘He kushe qitaa wode a zin77iyoobai ubbai tuna; qassi a uttiyoobai ubbaikka tuna.

21 A zin77iyo hiixaa bochchiya ubbai ba maayuwaa meecco; haattanka meecetto; omarssi gakkanaashin i tuna. 22 A uttiyoobaa bochchiya ubbai ba maayuwaa meecco; ba bollaakka meecetto; qassi omarssi gakkanaashin i tuna. 23 A zin77iyo hiixa gidinkka woikko a uttiyoobaa bochchiya ooninne omarssi gakkanaashin tuna.

24 “ ‘Ai attuma asinne he kushe qitaa wode iira zin77ikko, he kushe qitai qassi a bochchikko, laappun gallassa gakkanaashin i tuna; i zin77iyo hiixai ubbaikka tuna.

25 “ ‘Issi macca asassi i kushe qitaa wodiya gidennan hara wodiyan suuttai goggikko, woi qassi i kushe qitaikka ba wodiyaappe aattidi eqqennan ixidi goggikko, i eqqana gakkanaashin a tuna. Ba kushe qitaa wodiyan tuna gidiyooqaadan, he wodekka a tuna. 26 He suuttai ippe goggiyo wodiyan a zin77ido hiixai ubbai, ba kushe qitaa wode a zin77ido hiixaakka mala tuna; qassi a uttiyoobai ubbaikka ba kushe qitaa wode a uttiyoobai tuna gidiyooqaadan tuna. 27 Qassi he tunidabata bochchiya ooninne tuna; i ba maayuwaa meecco; ba bollaakka meecetto; qassi omarssi gakkanaashin i tuna.

28 “ ‘Ippe goggiyaabai eqqikko, a he wodiyaappe doommada laappun gallassaa qoodu; Hegaappe guyyiyan, a geeshsha gidana. 29 Hosppuntta gallasan a naa77u buuba haraphpheta woikko naa77u mara haraphpheta ekkada, Xoossaa Dunkkaaniyaa pengge qeesiyaakko ehu. 30 Ehin qeese haraphphetuppe issuwaa nagaraa yarshshuwaassi issuwaa qassi xuuggiyo yarshshuwaassi yarshsho. Yaatidi qeese ippe goggiyaabaa tunatetta gishshau GODAA sinttan i nagaraa atto giissees.

31 “ ‘Bantta gidon de7iya Xoossaa Dunkkaaniyaa tunissidi Israa7eela asai haiqqennaadan, neeni hagaadan oottada eti banttana tunissiyaabaappe shaahettidi de7anaadan naaga.

32 “ ‘A bollaappe aibakko goggiyo asassinne a attumatettaappe gukkida zerettan tuniya asassi, 33 qassi ba kushe qitaa gaasuwan tuniya maccaasassi, attuma gidin macca gidin goggiyaabai de7iyo asassinne tunida macca asaara zin77iya attuma asassi imettida wogai hagai yaagite” yaagiis.



<sup>1</sup> Aarooni attuma naati naa77ai GODAA sintti shiiqidi haiqqidoogaappe guyyiyan, GODAI Muusa hagaadan yaagiis. <sup>2</sup> “Ne ishai Aarooni Taabootaa bollan de7iya atto giyo sohuwaa qum77uwaa sinttan magalashuwaappe guyye baggaara de7iya Ubbaappe Aadhdhida Geeshsha Sohuwaa ubba wode coo gelennaadan ayyo oda. Coo gelikko i haiqqana; aissi giikko, taani shaaraa gidloora atto giyo sohuwaa qum77uwaa bollan qonccais. <sup>3</sup> Aarooni nagaraa yarshshuwaassi issi mirgguwaanne qassi xuuggiyo yarshshuwaassi issi dorssa orggiyaa ekkidi, he Ubbaappe Aadhdhida Geeshsha Sohuwaa gelo.

<sup>4</sup> “Aarooni liinuwaappe osettida geeshsha qoliyaanne liinuwaappe osettida garssaara maayiyo maayuwaa maayo. Qassi liinuwaappe osettida danccuwaa dancco; hegaadanka qassi ba huuphiyan liinuwaappe osettida shaashiyaa enccurssaa wotto. Hageeti geeshsha maayota gidiyo gishshau, i ba bollaa haattan meecettiichchidi maayo.

<sup>5</sup> “Israa7eela asaa maabarai nagaraa yarshshuwaassi naa77u deeshsha orggeta, xuuggiyo yarshshuwaassikka issi dorssaa orggiyaa Aaroonassi ehoona. <sup>6</sup> Aarooni ba nagaraanne ba so asaa nagaraa atto giissanau mirgguwaa yarshsho. <sup>7</sup> Hegaappe guyyiyan, naa77u deeshsha orggeta efidi, Xoossaa Dunkkaaniyaa penggen GODAA sinttan esso. <sup>8</sup> Yaatidi he naa77u deeshshatun saamaa yeggo; yeggin issoi GODAASSA; issoi qassi bazzo yeddiyoogaa gidees. <sup>9</sup> Aarooni GODAASSI saamai kiyido deeshshaa ehiidi, nagaraa yarshsho oottidi yarshsho. <sup>10</sup> SHin bazzo yeddiyo saamai kiyido deeshshaa paxa de7ishin GODAASSI shiishsho; bazzo a yedettiyo wode, asaa nagaraa atto giissees.

<sup>11</sup> “Aarooni ba nagaraanne ba so asaa nagaraa atto giissanau, issi mirgguwaa nagaraa yarshsho oottidi shiishsho. Yaatidi ba nagaraa yarshshuwaassi he korimaa shukko. <sup>12</sup> Qassi GODAA sinttan de7iya yarshshiyooosaappe ixaanaa cuwayiyo miishshaa kumettaa bonqquwaanne, liiqi gaacettida naa77u zolle sawiya ixaanaa ekkidi, magalashuwaa giddo eho. <sup>13</sup> Ehiidi i haiqqennaadan, ixaanaa cuwai Taabootaa bollan de7iya atto giyo sohuwaa qum77uwaa kammama mala, ixaanaa GODAA sinttan de7iya taman wotto. <sup>14</sup> Qassi he mirgguwaa suuttaappe guuttaa ekkidi, ba giddo biradhdhiyaa an naaqqidi, atto giyo sohuwaa qum77uwau sintta baggaa caccafo; qassi atto giyo sohuwaa qum77uwaappe sintta baggaara de7iya sohuwaakka laapputoo caccafo.

<sup>15</sup> “Hegaappe guyyiyan asaa nagaraa yarshshuwaassi gidiya deeshshaa shukkidi, a suuttaa magalashuwaa giddo eho; ehiidi mirgguwaa suuttaa caccafidooogaadan, atto giyo sohuwaa qum77uwaa sinttaanne atto giyo sohuwaa qum77uwaappe sintta baggaara de7iya sohuwaa caccafo. <sup>16</sup> Yaatidi Ubbaappe Aadhdhida Geeshsha Sohuwaa Israa7eela asaa tunatettaappenne nagaraappe geeshshees. Qassi eti tunabaa ootishin, eta giddon de7iya Xoossaa Dunkkaaniyaakka hegaadan oottidi geeshsho. <sup>17</sup> I Ubbaappe Aadhdhida Geeshsha Sohuwaa gelidi, ba nagaraa, ba so asaa nagaraanne kumetta Israa7eela asaa nagaraa atto giissidi kiyana gakkanaashin, ooninne Xoossaa Dunkkaaniyaa giddon de7oppo.

<sup>18</sup> “Hegaappe guyyiyan i GODAA sinttan de7iya yarshshiyooosaa kiyidi a geeshsho. Korimaa suuttaappenne deeshshaa suuttaappe guuttaa guuttaa ekkidi, yarshshiyooosaa yuushuwan de7iya kaceta tiyo. <sup>19</sup> Qassi he suuttaappe guuttaa ba biradhdhiyan ekkidi, laapputoo caccafi, Israa7eela asaa tunatettaappe he yarshshosaa geeshsho.

### *Bazzo Yeddiyo Deeshshaa*

<sup>20</sup> “Aarooni Ubbaappe Aadhdhida Geeshsha Sohuwaa, Xoossaa Dunkkaaniyaanne yarshshiyooosaa geeshshiyo wogaa polidoogaappe guyyiyan, paxa de7iya deeshshaa shiishsho. <sup>21</sup> SHiishshidi Aarooni ba naa77u kusheta paxa de7iya deeshshaa huuphiyan wottidi, Israa7eela asaa naaquwaa ubbaa, eta makkala ubbaa, eta nagara ubbaa paaxo; yaatidi he deeshshaa huuphiyan hegaa toosso; toossidi he deeshshaa efaanaadan

giigissido asa bollan bazzo yeddo. <sup>22</sup> I deeshshaa bazzo yeddin, deeshshai eta nagara ubbaa tookkidi, asi baina sohuwaa bazzo bo.

<sup>23</sup> “Hegaappe guyyiyan, Aarooni Xoossaa Dunkkaaniyaa bo; biidi Ubbaappe Aadhdhida Geeshsha Sohuwaa gelido wode, kase ba maayido liinuwaappe oosettida maayuwaa qaaridi hegan wotto. <sup>24</sup> Geeshsha sohuwan i ba bolla haattan meecettidi, hara maayuwaa maayidi kiyo; yaatidi xuuggiyo yarshshuwaa baagaanne asaagaa yarshshidi, ba nagaraanne asaa nagaraa atto giissees. <sup>25</sup> Qassi hegaadankka nagaraa yarshshuwaa handdaa yarshshiyosaa bollan wottidi xuuggo.

<sup>26</sup> “Bazzo yeddiyo deeshshaa efiida bitaneekka ba maayuwaa meecco; ba bollaakka haattan meecetto. Yaati simmidi dunkkaanidosaa yo.

<sup>27</sup> “Nagaraa atto giissanau Aarooni Ubbaappe Aadhdhiya Geeshsha Sohuwaa gelido wode, nagaraa yarshshuwaa mirgguwaa suuttaanne deeshshaa suuttaa ekkidi geliis; ha77i intte he mirgguwaanne he deeshshaanne dunkkaanidosaaappe gaxi kessite. Kessidi eta galbbaa, eta ashuwaanne eta tociyaa taman xuuggite. <sup>28</sup> Hega taman xuuggida bitanee ba maayuwaa meecco; ba bollaakka haattan meecetto; Hegaappe guyyiyan, dunkkaanidosaa yo.

### *Nagaraa Atto Giissiyo Gallassaa Bonchchiyoogaa*

<sup>29</sup> “Hagee intteyyo merinaukka woga gido: laappunnta aginai gelido tammantta gallassan intte huuphiyaa kaushshite; Israa7eela asaa gidin woi qassi intte gidдон de7iya hara biitta asa gidinkka, ai oosonne ootoppite. <sup>30</sup> Aissi giikko, inttena geeshshanau, intte nagaraa atto giissiyo gallassai he gallassa. Inttekkа GODAA sinttan intte nagara ubbaappe geeyana. <sup>31</sup> Hegee intte waanna shemppuwaa shemppiyo sambbata gallassa. He gallassan intte huuphiyaa kaushshite; hegee intteyyo merinaukka woga gido. <sup>32</sup> Qassi ba aawaa sohuwan qeese gidanaadan tiyettiyaanne dummatiya asi geeshsha gidida liinuwaappe dadettida maayuwaa maayidi, nagaraa atto giissiyo wogaa polo. <sup>33</sup> I Ubbaappe Aadhdhiya Geeshsha Sohuwaa, Xoossaa Dunkkaaniyaa, yarshshiyosaa, qeesetanne Israa7eela asaa ubbaa geeshsho. <sup>34</sup> Israa7eela asaa nagaraa ubbaa atto giissiyo wogaa intte laittan laittan issitoo oottanaadan, hagee intteyyo merinaukka woga gido” yaagiis. Yaagin Muusee GODAI azazidoogaadan oottiis.

## 17

### *Suuttai Meetettennabaa Gidiyo Hanotaa*

<sup>1</sup> GODAI Muusa hagaadan yaagiis; <sup>2</sup> “Aaroonassi a attuma naatussinne Israa7eela asa ubbaassi hagaadan yaagada oda; ‘GODAI azazidoogee hagee: <sup>3-4</sup> Israa7eela asaappe ooninne boora woi dorssa woi deeshsha Godaassi imota oottidi immanau Xoossaa Dunkkaaniyaa pengge, Godaa sintti eheennan, ba dunkkaanidosan woikko dunkkaanidosaaappe gaxan shukkikko, he suuttan i oishettees; he asi suuttaa gussiis. Hega gishshau i ba asaa giddoppe bohetto. <sup>5</sup> Hega gishshau Israa7eela asai bantta yarshshuwaa mehiyaa coo dembban shukkiyoogaa aggidi, haa GODAAKKO, Xoossaa Dunkkaaniyaa penggen de7iya qeesiyaakko ehoona. Ehin qeese hegae ekkidi, GODAASSI issippetettaa yarshsho oottidi shukko. <sup>6</sup> Qassi qeese Xoossaa Dunkkaaniyaa penggen de7iya GODAAYYO yarshshiyosaa bollan he suuttaa caccafo; handdaakka GODAAYYO sawuwaa tonggu giya yarshsho oottidi xuuggo. <sup>7</sup> Israa7eela asai GODAA kaalliyoogaa aggidi kaallido daidanttatuyyo naa77antto bantta yarshshuwaa yarshshoppona. Hagee etayyoonne yiya yeleta ubbaayyo merinau woga gido’ yaaga.

<sup>8</sup> “Eta hagaadan yaaga; ‘Israa7eela asaappe gidin woi eta gidдон de7iya hara biitta asaappe gidinkka, ooninne xuuggiyo yarshshuwaa woi hara yarshshuwaa shiishshiyoo wode, <sup>9</sup> GODAASSI yarshshanau Xoossaa Dunkkaaniyaa pengge ehaana xayikko, he asi ba asaa giddoppe bohetto.

<sup>10</sup> “Israa7eela asaappe woikko eta gidдон de7iya hara biittaa asaappe ooninne suutta miikko, he suuttaa miya asa bollan taani ta sinttaa tukkana; taani he bitaniyaa asaa gidдон bohana. <sup>11</sup> Aissi giikko asho maayida ubbaa de7oi a suuttaa gidдон de7ees; suuttaikka qassi de7oi a gidдон de7iyooгаappe denddidaagan nagaraa atto giissiyaagaa gidiyo gishshau, intte nagaraa atto giissanaadan, taani intteyyo yarshshiyosaa bollan yarshshanaadan immaas. <sup>12</sup> Hegaa gishshau taani Israa7eela asaa, “Intteppe woikko intte gidдон de7iya hara biittaa asaappe ooninne suutta mooppo” yaagaas.

<sup>13</sup> “Israa7eela asaappe woikko eta gidдон de7iya hara biittaa asaappe ooninne miyo do7a woi kafo shankkatidi worikko, a suuttaa sa7an gussidi, biittaa kammo. <sup>14</sup> Aissi giikko asho maayida ubbaa de7oi a suuttaa gidдоona. Hegaa gishshau taani Israa7eela asaa, “Asho maayida meretaa ubbaa de7oikka a suuttaa gidдон de7iyо gishshau, suuttaa mooppite; qassi miya ooninne ba asaa gidдoppe bohetto” yaagaas.

<sup>15</sup> “Israa7eela asa gidin woikko eta gidдон de7iya hara biittaa asa gidin, ooninne bauta woi do7i oiqqidi woridobaa ashuwaa miikko, ba maayuwaa meecco; ba bollaakka meecetto; yaatidi omarssi gakkanaashin i tuna. Hegaappe guyyiyan, i geeshsha. <sup>16</sup> Ba maayuwaa meeccana xayikko, ba bollaakka meecettana xayikko, ba nagaraa i bau tookkees’ yaaga” yaagiis.

## 18

### *Wogai Teqqido Zin77uwaa*

<sup>1</sup> GODAI Muusa hagaadan yaagiis; <sup>2</sup> “Israa7eela asaa hagaadan yaaga; ‘Taani, GODAI, intte Xoossaa. <sup>3</sup> Intte kase de7ido Gibxxe biittaa asai oottiyoogaadan oottoppите; woikko ha77i taani inttena efiyo Kanaane biittaa asai oottiyoogaadankka oottoppите; eta wogaakka kaalloppite. <sup>4</sup> Intte ta azazuwaa oottite; ta wogaakka naagite; qassi an biite. Taani, GODAI, intte Xoossaa. <sup>5</sup> Hegaa gishshau ta azazuwaanne ta wogaa naagikko, intte paxa de7ana. Taani GODAA.

<sup>6</sup> “Intteppe ooninne ashuwaa amuwaa polanau ba mata dabboora zin77oppo. Taani GODAA. <sup>7</sup> Ne ashuwaa amuwaa polanau ne aayeera zin77oppa; zin77ada ne aawaa kaushshoppa. A ne aayyiyo; iira zin77oppa. <sup>8</sup> Ne ashuwaa amuwaa polanau ne aawaa machcheera zin77oppa; zin77ada ne aawaa kaushshoppa.

<sup>9</sup> “Ne ashuwaa amuwaa polanau ne michcheera zin77oppa; woi qassi son yelettida woi karen yelettida ne aawaa woi ne aayee na7eerakka zin77oppa.

<sup>10</sup> “Ne ashuwaa amuwaa polanau ne na7aa na7eera woikko ne na7ee na7eera zin77oppa. Zin77ikko ne huuphen nena kaushshaasa. <sup>11</sup> Ne ashuwaa amuwaa polanau ne aawaa keettaayee na7eera zin77oppa; a ne michchiyo gidiyo gishshau iira zin77oppa. <sup>12</sup> Ne ashuwaa amuwaa polanau ne aawaa michcheera zin77oppa. A ne aawau mata dabbo. <sup>13</sup> Ashuwaa amuwaa polanau ne aayee michcheera zin77oppa; a ne aayeessi mata dabbo. <sup>14</sup> Ne aawaa ishaa kalluwaa qaarada ne ashuwaa amuwaa polanau a machcheera zin77oppa; a ne aawaa ishaa machchiyo. <sup>15</sup> Ne ashuwaa amuwaa polanau ne na7aa keettaayeera zin77oppa; a ne na7aa keettaayyiyo gidiyo gishshau, iira zin77oppa. <sup>16</sup> Ne ashuwaa amuwaa polanau ne ishaa keettaayeera zin77oppa; zin77ikko ne ishaa kaushshaasa.

<sup>17</sup> “Ne ashuwaa amuwaa polanau maccaaseeranne i na7eeranne naa77aara zin77oppa. I na7ee na7eera woi qassi i na7aa na7eerakka zin77oppa; eti iyyo mata dabbo gidiyo gishshau, hegee shaaramuxa.

<sup>18</sup> “Ne keettaayyiya paxa de7ishin, ne keettaayee michchiyo dawuttada ne ashuwaa amuwaa polanau iira zin77oppa.

<sup>19</sup> “Ne ashuwaa amuwaa polanau kushe qitai yin tuna uttida maccaaseera zin77oppa.

<sup>20</sup> “Neeni tunennaadan ne shooruwaa keettaayeera zin77oppa.

21 “Ne Xoossaa sunntaa tunissanau ne naatuppe issuwaanne taman xuuggidi, Molooka giyo eeqaassi yarshshanaadan immoppa. Taani GODAA.

22 “Maccaasaara zin77iyooogaadan attuma asaara zin77oppa; hegee sheneyiyaabaa.

23 “Neeni tunennaadan ai meheeranne zin77oppa, qassi maccaasikka meheera zin77anau mehe sintti aadhdhoppo. Hegee wogi bainnabaa.

24 “Taani intte sinttappe yedettiyo kawotettati ha oosotun tunido gishshau, intte hageeta milatiyaabatun tunoppite. 25 Harai atto eta biittaikka tunido gishshau, a nagaraassi taani a qaxxayaas; qaxxayin biittaikka banan de7iyaageeta cuchchiis. 26 SHin intte ta higgiaanne ta azazuwaa naagiteppe attin, Israa7eela asaa gidin woi intte gidдон de7iya hara biitta asappe ooninne haggaa mala tuna oosuwaa oottoppite.

27 “Intteppe kase ha biittan de7ida asati haggaa mala tunabaa oottido gishshau, biittai tuniis. 28 Intte ha biittaa tunissikko, intteppe kase de7ida kawotettata ha biittai cuchchidoogaadan, inttenakka cuchchennaadan naagettite. 29 Hageeta milatiya tuna oosotuppe issuwaanne oottiya asi de7ikko, he asi ba asaa giddoppe bohetto.

30 “Hegaa gishshau intteppe kase de7ida asati oottido tuna oosota ubbaa oottidi intte tunennaadan, intte ta azazuwaa naagite; taani, GODAI, intte Xoossaa’ yaaga” yaagiis.

## 19

### *Geeshshatettaanne Likke Pirddaa Higgeta*

1 GODAI Muusa haggadan yaagiis; 2 “Israa7eela asau ubbau haggadan yaagada yoota; Taani, GODAI, intte Xoossai geeshsha gidiyo gishshau, intteikka geeshsha gidite.

3 “Intteppe issoinne attennan ba aawaanne ba aayyiyo bonchcho; ta Sambbatata akka bonchchite. Taani, GODAI, intte Xoossaa.

4 “Tana aggidi eeqatuyyo goinnoppite; woi qassi birataappe seerissidi, xoossata intteyyo medhdhoppite. Taani, GODAI, intte Xoossaa.

5 “Intte issippetettaa yarshshuwaa GODAAYYO yarshshiyo wode, he yarshshoi intte gishshaa ekettanaadan, bessiyaagaadan yarshshite. 6 He yarshshoi intte yarshshido gallassan woikko wonttetta gallassan meetetto; hezzantto gallassai gakkanaashin attidaagee de7ikko hegee xuugetto. 7 Hezzantto gallassan a miikko, hegee sheneyiyaabaa; taani hegaa ekkikke. 8 Hegaa miya ooninne ba nagaran i bau oishettana; aissi giikko, i GODAAYYO geeshsha gididabaa tunissiis. He asi ba asaa giddoppe bohetto.

9 “Intte biittan mukkida kattaa intte cakkiiyo wode, gadiyaa gaxaa gakkanaashin cakkoppite; qassi cahaappe simmin de7iya poshiluwaakka poshiloppite. 10 Ne woiniyaa aifiyaa mule maxada mittaa polloyoppa; sa7an wodhdhida woiniyaa aifiyaakka maxoppa; hegaa hiyyeesatussinne betetussi aggaaga. Taani, GODAI, intte Xoossaa.

11 “Intte wuuqqoppite.

“Worddotoppite.

“Issoi issuwaa cimmoppite.

12 “Ta sunntan wordduwan caaqqoppite; yaatidi intte Xoossaa sunntaa tunissoppite. Taani GODAA.

13 “Ne shooruwaa sugoppa; woikko bonqqoppa.

“Keraa oottiya bitaniyaa damoozaa diggada, issi qammaanne ne matan aissoppa.

14 “Tulliyaa qanggoppa; woi qassi qooqiyaa sinttan xubbiyaabaa wottoppa; shin neeni Xoossaassi yaya. Taani GODAA.

15 “Pirddaa pirddaidda geellayoppa; hiyyeesaa a hiyyeesatettaa gishshau maaddada pirddoppa; duriyaakka a duretettaa gishshau yayyada aggoppa. SHin ne shooruwaayyo tumatettan pirdda.

16 “Ne asaa gidдон iita zigirssaa ekkada yuuyoppa.

“Ne shooruwaa woriyoobaa aibanne otoppa. Taani GODAA.



17 “Ne ishaa ne wozanan ixxoppa.

“Ne shooruwa gaasuwan neeni nagara oottenna mala, a seera.

18 “Haluwaa kiyoppa; qassi ne asaappe issuwaayyoonne uluwan lancce oiqqoppa. SHin ne shooruwa ne huuphedan siiqa. Taani GODAA.

19 “Ta azazota naaga.

“Ne mehiyaappe issi qommo mehiyaa hara qommo dumma mehiyan birasissoppa.

“Issi shooqan naa77u qommo zerettaa zeroppa.

“Qassi naa77u qommobaappe dadettida maayo maayoppa.

20 “Issi asi hara asa gelanau giiga uttida danggiriixeera zin77ikko, qassi he danggiriixiyaakka ba danggiriixetettaappe wozettabeennaaro gidikko, eti qaxxayetanau bessees; shin a ba danggiriixetettaappe wozettabeenna gishshau, eta woranau koshshenna. 21 Gidikkonne he bitanee ba naaquwaa yarshshuwaassi gidiya dorssaa Xoossaa Dunkkaaniyaakko GODAA sintti eho. 22 Ehobare qeese he naaquwaa yarshshuwa dorssaa ekkidi, bitanee oottido nagaraa GODAA sinttan atto giissees; i oottido nagaraikka atto geetettana.

23 “Intte Kanaane biittaa geliyo wode, aifiyaa miyo ai qommo mitta tokkikkokka, he mittaa aifiyaa meetettennabaadan goodite; heezzu laittai wuranaashin he mittaa aifee meetettenna; a mooppite. 24 Oiddantta laittan he mittaa aifee ubbai GODAASSI galatau shiishshiyo geeshsha yarshsho gidana. 25 SHin he mittaa aifee intteyyo keehi darana mala, ichchashantta laittaa aifiyaa miite. Intte hagaadan oottikko, intte mittaa aifee darana. Taani GODAI intte Xoossaa.

26 “Suuttai a gidдон de7iyo ai ashokka mooppite.

“Kaayoppite woi shareechchoppite.

27 “Intte huuphiyaa binnaanaa garssaara yuushshi aattidi qanxxoppite; qassi intte buuchchaakka yuushshi aattidi qanxxoppite.

28 “Haiqqida asa gishshau intte bollaa qanxxerettoppite; woikko cachchaa malaataa intte bollan kessoppite. Taani GODAA.

29 “Biittai shaaramuxaa tunatettan kumidaagaa gidenna mala, ne na7iyo shaaramuxaa oosuwaassi aatta immada tunissoppa.

30 “Ta Sambbatata bonchchite; taayyo goinniyo sohuwaakka bonchchite. Taani GODAA.

31 “Moitilliyaa haasayissiyaageetukkonne shareechchotukko booppite; intte tunenna mala eta koyyoppite. Taani, GODAI, intte Xoossaa.

32 “Puulummida asanne cimida asa be7iyo wode uttidosappe dendda eqqa; eta bonchcha; ne Xoossaassi yayya. Taani GODAA.

33 “Intte biittan inttenaara de7iya betetu bollan sugettabaa oottoppite. 34 Intte biittan inttenaara de7iya bete asa intte biittaa asadan xeellite; a intte huuphedan siiqite. Aissi giikko, inttekka kase Gibxxe biittan bete gididi de7ideta. Taani, GODAI, intte Xoossaa.

35 “Intte pirddan likkiyooban, meezaanan wottidi kiliyoobaaninne makkiyooban worddotoppite. 36 Intte kiliyo meezaanai, intte makkiyoobainne likkiyo miishshati ubbai likke gidona. Taani inttena Gibxxe biittaappe kessada ehiida GODAA intte Xoossaa. 37 Intte ta higgiiyaanne ta azazuwaa ubbaa naagitenne oottite. Taani GODAA’ yaaga” yaagiis.

## 20

### *Azazettennan Ixxin Gakkiya Qixaatiyaa*

1 GODAI Muusa hagaadan yaagiis; 2 “Israa7eela asau hagaadan yaagada yoota, ‘Israa7eela asaappe gidin, woi betidi yiidi Israa7eela gidдон de7iya hara biitta asaappe gidinkka, ooninne ba naatuppe issuwaa Molooka giyo eeqaayyo aattidi immikko, he asi haiqqo; he biittaa asai a shuchchan caddidi woro. 3 Taani he bitaniyaa morkkana; a



asaa giddoppe shoddada a xaissana. Aissi giikko, i ba naatuppe issuwaa Molooka giyo eeqaayyo immiyoogan, ta Dunkkaaniyaa tunissiis; ta geeshsha sunttaakka kaushshiis. <sup>4</sup> He bitanee ba naatuppe issuwaa Molookassi immiyo wode, he biittaa asai be7iiddi, shenehoo giikko, qassi bitaniyaakka worenna aggikko, <sup>5</sup> taani ta huuphen he bitaniyaanne asaa morkkana; anne Molookaara shaaramuxanau a kaalliya ubbata eta asaa giddoppe bohite.

<sup>6</sup> “Ai asinne tanan ammanettennan ixixidi, moitilliya haasayissiyaageetanne sha-reechchota oichchanau biikko, taani a morkkana; a asaa giddoppekka a xaissana.

<sup>7</sup> “Taani, GODAI, intte Xoossaa gidiyo gishshau, simmi intte inttena dummayite; qassi geeshsha gidite. <sup>8</sup> Ta higgiiyaa naagitenne oottite. Taani inttena geeshshiya GODAATTENNEE.

<sup>9</sup> “Ai asinne ba aawaa woikko ba aayyiyo cayikko haiqqo. I ba aawaa woikko ba aayyiyo cayido gishshau, a suuttaa acoi a bollaana.

<sup>10</sup> “Issi asi ba shooruwaa keettaayeera zin77ikko, he zin77ida bitaneenne mishiriyaa naa77aikka haiqqona. <sup>11</sup> Ba aawaa keettaayeera zin77ida asi ba aawaa kaushshiis; eti naa77aikka haiqqona. Eta suuttaa acoi eta bollaana. <sup>12</sup> Issi asi ba na7aa keettaayeera zin77ikko, eti naa77aikka haiqqona. Eti tunabaa oottidosona. Eta suuttaa acoi eta bollaana.

<sup>13</sup> “Issi attuma asi maccaasaara zin77iyoogaadan attuma asaara zin77ikko, eti naa77aikka tunabaa oottido gishshau haiqqona. Eta suuttaa acoi eta bollaana. <sup>14</sup> Issi asi na7iyoonne aayyiyoonne issippe machchiyaabaa gidikko, hegee tunabaa; intte gidon tunatetti de7enna mala, inne etinne taman xuugettona.

<sup>15</sup> “Issi asi meheera zin77ikko, i haiqqo; he macca mehiyookka worite. <sup>16</sup> Issi maccaasi meheera zin77ikko he maccaasiyoonne he mehiyaa naa77aakka worite; eti haiqqona. Eta suuttaa acoi eta bollaana.

<sup>17</sup> “Issi asi ba michchiyo ba aawaa na7iyo woikko ba aayee na7iyo machchidi, iira zin77ikko, hegee pokkoba. Eti bantta asaa sinttan haiqqona. I ba michchiyo kaushshido gishshau, ba nagaran bau oishettana. <sup>18</sup> Issi asi kushe qitai yiido maccaasee kalluwaa qaaridi iira zin77ikko, eti naa77aikka bantta asaa giddoppe bohettona. Aissi giikko i i suuttai goggiyo pulttuwaa kalloyiis; akka ba suuttai goggiyo pulttuwaa kalloyaasu.

<sup>19</sup> “Ne aayee michcheera woikko ne aawaa michcheera zin77oppa; aissi giikko, heгаа oottiyoogee ba mata dabbuwaa kaushshiyooгаа. Intte naa77aikka intte nagaran oishettana. <sup>20</sup> Issi asi ba aawaa ishaa keettaayeera zin77ikko, i ba aawaa ishaa kaushshiis. Eti bantta nagaran banttau oishettana; eti naa77aikka na7a yelennan haiqqana. <sup>21</sup> Issi asi ba ishaa keettaayyiyo machchikko, hegee tunatetta. I ba ishaa kaushshiis; eti naa77aikka na7a yelokkona.

<sup>22</sup> “Simmi intte de7anaadan, taani inttena gelissiyoo biittai inttena cuchchenna mala, intte ta higgiiyaanne ta azazuwaa naagitenne oottite. <sup>23</sup> Taani intte sinttappe xaissiyoo asatu de7uwaa wogaa kaaloppite. Eti haggaa ubbaa oottido gishshau, taani eta shenetaas. <sup>24</sup> SHin taani inttena, “Eta biittaa intte laattana; intte he biittaa inttebaa oottanaadan, he maattainne eessai goggiyo biittaa taani intteyyo immana” yaagaas. Taani inttena hara asatuppe dummayaa kessida GODAA intte Xoossaattennee.

<sup>25</sup> “Hegaa gishshau intte geeshsha gidida mehetanne kafota geeshsha gidennaagee-tuppe shaakkidi erite. Taani hageeti intteyyo tuna ga wottido mehetun, kafotuuninne biittan qaaxerettiyaabatun ubban intte huuphiyaa tunissoppite. <sup>26</sup> Taani GODAI geeshsha gidiyo gishshaunne intte tabaa gidana mala inttena hara asaappe dummayido gishshau, intteikka taayyo geeshsha gidite.

<sup>27</sup> “Issi attuma asi woikko macca asi moitilliyaara haasayiyaagaa woikko shareechcho gidikko, eti haiqqanau bessees. Eti shuchchan cadettona. Eta suuttaa acoi eta bollaana’ yaaga’ yaagiis.

## 21

### *Qeesetu Geeshshatettaa*

<sup>1</sup> GODAI Muusa hagaadan yaagiis, “Qeese gidiya Aarona attuma naatussi hagaadan yaagada oda; ‘Intteppe ooninne <sup>2</sup> ba mata dabbo, ba aayee, ba aawaa, ba attuma na7aa, ba macca na7ee, ba ishaa, <sup>3</sup> woikko azina gelennan, a son de7iya ba michchee ahaa gidana xayikko, haiqqida asa ahaa oogaanne bochchidi, bana tunissoppo. <sup>4</sup> Qassi ekuwaaninne geluwan dabbotida asa ahaa bochchidikka bana tunissoppo.

<sup>5</sup> “ ‘Qeeseti haiqqidabau kayyottanau bantta huuphiyaa meedettooppona; bantta bu-uchchaakka qanttann qanxxoppona; woi qassi bantta bollaakka qanxxerettoppona. <sup>6</sup> Eti bantta Xoossaayyo geeshsha gidona; qassi bantta Xoossaa sunttaakka tunissoppona. Aissi giikko eti GODAAYYO taman xuuggidi yarshshiyoo, qumaa yarshshuwaa shiishshiyaageeta; hegaa gishshau, eti geeshsha gidanau bessees.

<sup>7</sup> “ ‘Qassikka qeeseti shaaramuxa maccaasa, geela7otettaa eketiichchido maccaasa, woikko azinai yeddido maccaasa ekkoppona. Aissi giikko, qeeseti bantta Xoossaayyo geeshsha. <sup>8</sup> Qeesee intte Xoossaassi qumaa yarshshuwaa shiishshiyaagaa gidiyo gishshau, i hara asaappe dummato. Taani inttena geeshshiya intte GODAI geeshsha gidiyo gishshau, ikka geeshsha gido. <sup>9</sup> Ai qeesiyaa na7iyoo gidikkokka shaaramuxada bana tunissikko, hinna ba aawaa kaushshaasu. A taman xuuggettada haiqqu.

<sup>10</sup> “ ‘Qeese ubbatu halaqai, a huuphiyan tiyettiyo zaitee gukkido gishshaunne i qeesetettaa maayuwaa maayanau dummatida asa gidiyo gishshau, ba huuphiyaa binnaanaa kallo wottoppo; woikko ba maayuwaakka pooshshoppo. <sup>11</sup> Ai ahaa gidikkokka, de7iyooosaa i geloppo; harai atto ba aawaa woikko ba aayee ahaa gidikkokka, bana hegan tunissoppo. <sup>12</sup> A geeshshanau tiyiyo Xoossaa zaitee a bollann de7iyoo gishshau, qeesee Xoossaa Dunkkaaniyaappe kiyoppo; Xoossaa Dunkkaaniyaakka tunissoppo. Taani GODAA.

<sup>13</sup> “ ‘Qeesee geela7o macca na7a ekko. <sup>14</sup> Azinai haiqqido maccaasiyo, woi azinai yeddido maccaasiyo, woi shaaramuxa maccaasiyo machchoppo. SHin ba asaa gididoppe geela7o macca na7a dooridi machcho. <sup>15</sup> Yaanana xayikko, i ba asaa gididon ba zeretta gidiya ba naata tunissana. Taani a geeshshiyaagee, GODAATTENNEE’ yaaga” yaagiis.

<sup>16</sup> GODAI Muusa, hagaadan yaagiis; <sup>17</sup> “Neeni Aaroonassi hagaadan yaagada oda; ‘Sinttaara yiya ne zerettaappe bollai tilla gidenna asi ooninne qumaa yarshshuwaa taayyo immanau shiiqoppo. <sup>18</sup> Aissi giikko bollai tilla gidenna asi ooninne shiiqanau bessenna. Qooqe, woikko wobbe, woi som77oi narphphettido, woi palaha bollai de7iyoo asi, <sup>19</sup> woi toho woi kushe silai, <sup>20</sup> woi quunai, woi dinkkee, woi aifee sakkiyo asi, woi puusoi oiqqido asi, woi ilahai oiqqido asi, woi mureessa gidinkka bollai tilla gidenna asi, ooninne shiiqoppo. <sup>21</sup> Qeesiyaa Aarona zariyaappe bollai tilla gidenna asi ooninne GODAAYYO taman xuuggiyo yarshshuwaa shiishshanau shiiqoppo. Ayyo bollai tilla gidennaagaa gidaappe hini baggan, ba Xoossaassi qumaa yarshshuwaa shiishshanau i bessenna. <sup>22</sup> I geeshsha qumaanne qassi ubbappe aadhdhiya geeshsha gidiya ba Xoossaa qumaa maanau danddayees. <sup>23</sup> SHin ayyo bollai tilla gidenna gishshau, i ta Dunkkaaniyaa tunissennaadan, magalashuwaakko woi yarshshiyooosaakko shiiqoppo. Aissi giikko, eta geeshshiyaagee taani GODAATTENNEE’ yaaga” yaagiis.

<sup>24</sup> Yaagin Muusee Aaroonassi, a attuma naatussinne Israa7eela asaassi ubbaassi haggaa yootiis.

## 22

### *Imotu Geeshshatettaa*

<sup>1</sup> GODAI Muusa hagaadan yaagiis; <sup>2</sup> “Ta geeshsha sunttaa eti tunissenna mala, Israa7eela asai taayyo dummayido imota Aarooninne a attuma naati bonchchuwan ekkidi, geeshshatettan naagana mala, etau yoota. Taani GODAA.

<sup>3</sup> “Etau hagaadan yaaga; ‘Sinttaara yiya yeleta ubban intte zariyaappe ooninne tuni uttidi, Israa7eela asai GODAAYYO dummayido geeshsha yarshshuwaakko shiiqikko, he asi ta sinttaappe xayo. Taani GODAA.

<sup>4</sup> “ ‘Aaroon zariyaappe hanttaara goga harggee de7iyo, woikko bollaappe aibakko goggiyo ooninne geeyana gakkanaashin, geeshsha yarshshuwaappe mooppo. Ahaa bochchidi tunidabaa woikko a attumatettaappe zeretti gukkido ura bochchiya ooninne tuna. <sup>5</sup> Woi qassi sa7aara gooshettiya, tunissiyaabata, woi ai mala tunatetta gidikkonne tunissiya asa bochchiya uri, <sup>6</sup> woi heгаа malabaa aibanne bochchiya asi, omarssi gakkanaashin i tuna; ba bollaа haattan meecettennan de7iiddi, he geeshsha yarshshuwaappe i maanau koshshenna. <sup>7</sup> Awai wulliyo wode i geeshsha gidees; Hegaappe guyyiyan, he geeshsha yarshshuwaappe bana gakkiyaagaa mo. <sup>8</sup> Bau haiqqidabaa woikko do7i worido mehe asho mooppo; hegee tunissiyaabaa. Taani GODAA.

<sup>9</sup> “ ‘Qeeseti ta wogaa naagona; naagennan ixixikko, eti a tunissidi a nagaran haiqqana. Eta geeshshiyaagee taani GODAA.

<sup>10</sup> “ ‘He geeshsha yarshshuwaa qeesiyaa so asaappe attin, hara asi mooppo; qeesiyaa so yiida imattaa gidin, woi qaxarettidi oottiya ashkkara gidinkka mooppo. <sup>11</sup> SHin qeese ba biran shammido aillee woikko a son yelettida aillee he qumaappe mo. <sup>12</sup> Qeese gidenna hara asa gelida qeesiyaa na7iyaa he geeshsha yarshshuwaappe muuppu. <sup>13</sup> SHin qeesiyaa na7iyaa azini haiqqin, woikko azini yeddin, na7a yelennan kase ba geela7otettan de7iyoogaadan simmada ba aawaa soo yiikko, a ba aawaa gakkiya qumaappe mu. SHin hara asi ooninne hegaappe mooppo.

<sup>14</sup> “ ‘Issi asi erennan de7iiddi geeshsha yarshshuwaappe miikko, he i miido qumaa waagaa bolli xeetaappe laatamu kushiya gujjidi qeesiyaassi immo. <sup>15</sup> Israa7eela asai GODAASSI yarshshiyo geeshsha yarshshuwaa qeeseti tunissoppona. <sup>16</sup> Eti bantta ehiido geeshsha yarshshuwaa banttau miidi, bantta nagaran oishettanaadan, qeeseti oottanau koshshenna. Aissi giikko, eta geeshshiyaagee, taani GODAA!’ yaaga” yaagiis.

### *Ekettena Yarshshota*

<sup>17</sup> GODAI Muusa hagaadan yaagiis, <sup>18</sup> “Aaroonassi, a naatussinne Israa7eela asa ubbaassi hagaadan yaagada yoota; ‘Israa7eela asaappe gidin woikko eta giddon de7iya betiyaappe ooninne GODAAYYO xuuggiyo yarshshuwaa ba dosan coo immiyo woi ba shiiquwaa gattanau yarshshiyo wode, <sup>19</sup> he yarshshoi ekettana mala, mirgguwaappe woi dorssaappe woikko deeshshappe tilla bollaara de7iya attumaagaa gido. <sup>20</sup> Bollai tilla gidennaagee aiba gidikkonne ekettenna gishshau, heгаа shiishshoppa.

<sup>21</sup> “ ‘Qassi oona gidikkonne ba shiiquwaa gattanau issippetettaa yarshshuwaa GODAASSI yarshshiyo wode, woi qassi ba mehiyaappe ba dosan coo immiyo imotaa GODAASSI shiishshiyo wode, hegee ekettana mala i tilla bollaara de7iyaagaa gido. <sup>22</sup> Intte mehiyaappe qooqiyaа, woi mequwaa, woikko gunddaа, woikko giyyiya masunttai, woikko puusoi, woikko ilahai de7iyoogaa GODAASSI yarshshoppite; qassi taman xuuggiyo yarshsho oottidikka yarshshiyoosaa bollan GODAAYYO shiishshoppite. <sup>23</sup> A bollan palaha meretai woi pacabai de7iyo korimaa woi dorssaa issi asi ba dosan coo immiyo yarshshuwaassi shiishshanau danddayees; shin shiiqo gato gidikko, hegee ekettenna. <sup>24</sup> Sanggisettidaagaa woikko qoxettidaagaa woikko kaattai masunxxidoogaa woikko qanxxettidaagaa GODAAYYO yarshshoppite. Intte biittan heгаа malabaa oottoppite. <sup>25</sup> Intte giddon de7iya allaga asatuppe ekkido heгаа mala mehiyaakka intte Xoossaassi quma oottidi shiishshoppite. Eta bollai tilla gidennaagaa gaasuwan etan wotoi de7iyo gishshau, eti intte gishshaa ekettokkona’ yaaga” yaagiis.

<sup>26</sup> Qassikka GODAI Muusa hagaadan yaagiis, <sup>27</sup> “Miizza mari woi dorssa mari woikko deeshsha mari yelettiyo wode, laappun gallassaa ba aayeera takko. Hosppuntta

gallassaappe doommidi, GODAAYYO taman xuuggidi shiishshiyo yarshsho oottidi shiishshanau danddayettees. <sup>28</sup> Miizziyo, dorssiyo, woi deeshshiyo i maraara issi gallassi shukkoppite.

<sup>29</sup> “Intte galataa yarshshuwaa GODAAYYO shiishshiyo wode, intte yarshshoi eketanaadan yarshshite. <sup>30</sup> He yarshshoi he gallassikka meetetti agganau koshshees; appe aibanne wonttossi ashshoppite. Taani GODAA.

<sup>31</sup> “Ta azazuwaa naagitenne oottite. Taani GODAA. <sup>32</sup> Qassi ta geeshsha sunntaa intte tunissoppite; Israa7eela asaa gidдон taani geeshsha gidiyoogee erettanau bessees. Inttena geeshshiyaagee, taani GODAA. <sup>33</sup> Intteyyo Xoossaa gidanau, inttena Gibxxe biittaappe kessidaagee tana. Taani GODAA” yaagiis.

## 23

### *Ammano Baalaa Bonchchiyo Maaraa*

<sup>1</sup> GODAI Muusa hagaadan yaagiis; <sup>2</sup> “Israa7eela asaayyo hagaadan yaagada yoota; ‘Geeshsha yaa7a gi awaajjidi, intte bonchchanau bessiya keerettida GODAA baalati hageeta.

<sup>3</sup> “‘Intte usuppun gallassaa oosuwaa ootteeta; shin laappuntta gallassi intte shemp-piyo Sambbata gallassa; he gallassan geeshsha yaa7aa shiiqite; aiba oosonne oottoppite; intte de7iyo sohuwan ubban hegee GODAASSI Sambbata.

### *Paasikaa Baalaanne Oittaa Baalaa (Qoodaabaa 28:16-25)*

<sup>4</sup> “‘Eta wodiyan wodiyan geeshsha yaa7a ootti awaajjidi intte bonchchanau bessiya GODAA baalati hageeta. <sup>5</sup> Koiro aginan tammanne oiddantto gallassi sa7ai omariyo wode, GODAA Paasikai doommeees.

<sup>6</sup> “‘Qassi he aginankka tammanne ichchashantto gallassai GODAA Oittaa Baalaa gallassa; hegaa gishshau laappun gallassatun irshshoi gelibeenna oittaa miite. <sup>7</sup> He gallassatuppe koiro gallassan geeshsha yaa7aa shiiqite; daafurssiya ooso aibanne oottoppite. <sup>8</sup> Laappun gallassa ubbaa GODAAYYO taman xuuggiyo yarshshuwaa shiishshite; laappuntta gallassan qassi geeshsha yaa7aa shiiqite; daafurssiya ooso aibanne oottoppite’ yaaga” yaagiis.

### *Baira Kattaa*

<sup>9</sup> GODAI Muusa hagaadan yaagiis; <sup>10</sup> “Israa7eela asaayyo hagaadan yaagada yoota; ‘Taani intteyyo immiyo biittaa gelidi, intte kattaa cakkiyo wode, he kattaau koiro aifiyaa mirqqiyaa qeesiyaakko ekki yiite. <sup>11</sup> GODAI inttebaa ekkana mala, Sambbata wonttetta gallassi qeese he mirqqiyaa GODAA sinttan pudenne duge wuxaawuxo. <sup>12</sup> He intte mirqqiyaa wuxaawuxido gallassi tilla bollaara de7iyya issi laitta dorssa orggiyaa xuuggiyo yarshsho oottidi GODAAYYO shiishshite. <sup>13</sup> He yarshshuwaara issippe wogaraa zaitiyan munaqettida naa77u kilo giraame lo77o xiilliyaa kattaa yarshsho oottidi shiishshite; hegee GODAAYYO taman xuuggiyo, sawuwaa tonggu giya yarshsho gidana; hegaarakka qassi issippe issi litiro gidiiya woiniyaa eessaa shiishshite. <sup>14</sup> Ha yarshshuwaa intte intte Xoossaassi shiishshiyo gallassai gakkanaashin, ooratta gakkida kattaappe oittaa, woi xiixaa gidin, qayyiyaa gidinkka mooppite. Hagee intte de7iyoosan ubban sinttaara yiya yeletau ubbau merinau woga.

### *Saaminttatu Baalaa (Qoodaabaa 28:26-31)*

<sup>15</sup> “‘Intte wuxaawuxiyo yarshshuwaa mirqqiyaa ehiido Sambbata wonttettappe doommidi, laappun saamintta kumettaa qoodite. <sup>16</sup> Laappuntta Sambbataa wonttetta gallassai gakkanaashin, ishatamu gallassaa qoodidi, ooratta gakkida kattaa yarshshuwaa GODAASSI shiishshite. <sup>17</sup> Intte aqiyo sohuwaappe naa77u kilo giraame



gidiya lo77o xiilliyaappe irshshuwaa yeggidi uukkido naa77u oittaa wuxaawuxanau ekki yiite. Hegee koiro gakkida kattaa aifiyaappe GODAASSI yarshsho gidees. <sup>18</sup> He oittaaara issippe tilla bollaara de7iya issi laitta gidido laappun dorssa marata, issi mirgguwaanne naa77u dorssa orggeta shiishshite. Kattaa yarshshuwaaranne ushshaa yarshshuwaaara issippe GODAAYYO taman xuuggiyo, sawuwaa tonggu giya yarshsho oottidi yarshshite. <sup>19</sup> Qassi issi deeshsha orggiyaa nagaraa yarshshuwaassi, issi laitta gidido naa77u dorssa orggetakka issippetettaa yarshshuwaassi shiishshite.

<sup>20</sup> “Qeesee he koiro gakkida kattaa aifiyaa oittaaanne he naa77u dorssata wuxaawuxiyo yarshsho oottidi, GODAA sinttan wuxaawuxees; hegeeti GODAASSI geeshsha; qassi qeesiyaassikka qommo. <sup>21</sup> He gallassikka awaajjidi geeshsha yaa7aa shiiqite; daafurssiya ooso aibanne ootoppite. Hagee intte de7iyooosan ubban sinttaara yiya yeletau ubbau merinau woga.

<sup>22</sup> “Intte biittan morkkida kattaa intte cakkiyo wode, intte shooqaa gaxaa gakkanau cakkoppite; cakkishin attiya poshiluwaakka qoroppite; heгаа hiyyeesatuuyoonne bete-tuyyo aggiigite. Taani, GODAI, intte Xoossaa’ yaaga” yaagiis.

*Malkkataa Punniyo Baalaa*  
(Qoodaabaa 29:1-6)

<sup>23</sup> GODAI Muusa hagaadan yaagiis, <sup>24</sup> “Israa7eela asaayyo hagaadan yaagada yoota; ‘Laappunnta aginan koiro gallassaa shemppo gallassaa oottidi bonchchite; hassayisuwaa malkkataikka punettiyo wode, geeshsha yaa7aa shiiqite. <sup>25</sup> He gallassan GODAAYYO taman xuuggiyo yarshshuwaa shiishshiteppe attin, daafurssiya ooso aibanne ootoppite’ yaaga” yaagiis.

*Nagaraa Atto Giissiyo Gallassaa*  
(Qoodaabaa 29:7-11)

<sup>26</sup> GODAI Muusa hagaadan yaagiis, <sup>27</sup> “Ha laappunnta aginaayyo tammannta gallas-sai nagaraa atto giissiyo gallassa; he gallassi geeshsha yaa7aa shiiqite; qassi intte huuphiyaa kaushshite; yaatidi GODAAYYO taman xuuggiyo yarshshuwaa shiishshite. <sup>28</sup> He gallassai GODAA intte Xoossaa sinttan intte nagarai atto geetettana mala, intte nagaraa atto giissiyo gallassa gidiyo gishshau, he gallassi aiba oosonne ootoppite. <sup>29</sup> He gallassi banatettaa kaushshenna asi ooninne ba asaa giddoppe bohetto. <sup>30</sup> He gallassi aiba ooso gidikkonne oottiya asa taani a asaa giddoppe xaissana. <sup>31</sup> He gallassi aiba oosonne ootoppite. Hagee intte de7iyooosan ubban sinttaara yiya yeletau ubbau merinau woga. <sup>32</sup> Hegee intte waanna shemppuwaa shemppiyo Sambbata gallassa. He gallassan intte huuphiyaa kaushshite. He aginan uddufunnta gallassan omarsaappe doommidi, tammannta gallassaa omarsai gakkanaashin, intte Sambbataa bonchchite” yaagiis.

*Daase Baalaa*  
(Qoodaabaa 29:12-40)

<sup>33</sup> GODAI Muusa hagaadan yaagiis, <sup>34</sup> “Israa7eela asaayyo hagaadan yaagada yoota; ‘Ha laappunnta aginan tammanne ichchashannta gallassaappe doommidi, laappun gallassai GODAAYYO Daase Baala. <sup>35</sup> He gallassatuppe koiro gallassan geeshsha yaa7aa shiiqite; daafurssiya ooso aibanne ootoppite. <sup>36</sup> Laappun gallassan ubban GODAAYYO taman xuuggiyo yarshshuwaa shiishshite; hospunnta gallassan qassi geeshsha yaa7aa shiiqite; GODAAYYO taman yarshshiyoo yarshshuwaakka shiishshite. He gallassai intte shiiquwaa poliyo gallassa gidiyo gishshau, daafurssiya ooso aibanne ootoppite.

<sup>37</sup> “Taman xuuggiyo yarshshuwaanne kattaa yarshshuwaa, qassi hara yarshshota ubbaanne ushshaa yarshshuwaa, koshshiyaagaa keenaa keerido gallassan GODAASSI shiishshanau, intte geeshsha yaa7a oottidi awaajjana GODAA baalati hageeta. <sup>38</sup> Ha



baalati GODAA Sambbatatuppe, intte imota oottidi GODAAYYO immiyoobatuppe, shi-iquwaa gattiyoobatuppenne intte intte dosan coo immiyoobatuppe dumma.

<sup>39</sup> “Laappuntta aginan tammanne ichchashantta gallassan intte biittan mokkidabaa cakkidi shiishshidoogaappe guyyiyan, GODAA baalaa laappun gallassaa bonchchite; koiro gallassainne hosppuntta gallassai intteyyo waanna shemppo gallassa. <sup>40</sup> Koiro gallassan lo77o mittaa aifiyaappe, zambbaa tashiyaappe, irxxa haittaara de7iya mittaa tashiyaappenne shaafa lanqqen dicciya lee7e mittaaappe ekkidi, GODAA intte Xoossaa sinttan ufaittiiddi, laappun gallassaa baalaa bonchchite. <sup>41</sup> He baalaa laittan laittan laappun gallassaa GODAASSI bonchchite. Hegee sinttaara yiya yeletau ubbau merinau woga. Intte heгаа laappuntta aginan bonchchite. <sup>42</sup> He laappun gallassaa intte daasiyan de7ite; Israa7eela biitta asa gidiya ubbai daasiyan de7ite. <sup>43</sup> Hegee sinttaara yiya yeletai ubbai Israa7eela asaa taani Gibxxeppe kessido wode, eti daasiyan de7anaadan oottidoogaa eranaassa. Taani GODAA intte Xoossaa’ yaaga” yaagiis.

<sup>44</sup> Hegaadan oottidi, Muusee GODAA Baalata bonchchiyo wogaa Israa7eela asaayyo yootiis.

## 24

### *Xomppetuu Naaguwaa*

<sup>1-2</sup> GODAI Muusa hagaadan yaagiis, “Xompee to7ennan eexxiiddi de7ana mala, assi koshshiya zaitiyaa wogaraa teeraa caddidi gum77in kiyiya geeshshaa neeyyo ehaana mala, Israa7eelata azaza. <sup>3</sup> Xoossaa Dunkkaaniyaa gidдон de7iya markkatettaa magalashuwaappe kare baggaara, omarsappe maallado gakkanaashin, Aarooni GODAA sinttan he xomppiyaa ubba wode eetto. Sinttaara yiya yeletau ubbau hegee merinau woga. <sup>4</sup> Xomppiyaa wottiyo, walahi baina worqqa ballaa bolli de7iya xompeti GODAA sinttan ubba wode eexxanaadan Aarooni naago.

### *Xoossaassi SHiishshiyo Oittaa*

<sup>5</sup> “Tammanne naa77u kilo giraame gidiya liiqo xiilliyaa ekkada 12 oittaa uukka. <sup>6</sup> He oittata usuppunaa usuppunaa naa77u maaran GODAA sinttan de7iya walahi baina worqqa xaraphpheezaa bollan wotta. <sup>7</sup> GODAASSI taman xuugganau shiishshido qumaa yarshshuwaa gidiyogaa erissanau, naa77u maaratu lanqqiyan lanqqiyan geeshsha ixaanaa wotta. <sup>8</sup> Ha oittaa Sambbatan Sambbatan ubba wode Aarooni GODAA sinttan Israa7eela asaa gishshaa wotto. Hegee Israa7eela asai ubba wode oottanau koshshiya qaala maachchaa. <sup>9</sup> Hegee Aaroonassinne a attuma naatussi imetto; i GODAASSI taman xuuggiyo yarshshuwaappe wogaadan Aaroonanne a naata gakkiiya ubbaappe aadhdiya geeshsha shaaho gidiyogishshau, eti heгаа geeshsha sohuwan moona” yaagiis.

### *Likkenne Suure Pirddaa Leemisuwaa*

<sup>10</sup> Aayen Israa7eela asa, aawan qassi Gibxxe asa gidiya issi bitanee de7ees. Issi gallassi i hara Israa7eela asa gidiya issuwaara heeran warettiis. <sup>11</sup> Ha ayyo aayiyaa Israa7eela asa gidido bitanee waretaa gidдон GODAA sunntaa cayiis. Yaatin a Muusekko ehiidosona. He bitaniyaa aayiyaa Daana yaraa gidiya Xiibira na7iyo. I sunttaikka SHalomiito. <sup>12</sup> Ha bitaniyaa waatanaakko GODAA shenee etayyo qonccana gakkanaashin, eti a qasho keettan wottidosona.

<sup>13</sup> GODAI Muusa hagaadan yaagiis, <sup>14</sup> “He cayida bitaniyaa dunkkaanidosappe gaxi kessa; i cayishin siyida asai ubbai bantta kushiyaa a huuphiyaa bollan wottona; yaatobare Israa7eela asaa maabarai ubbai a shuchchan caddidi woro. <sup>15</sup> Israa7eela asaayyo hagaadan yaagada yoota; ‘Ai asinne ba Xoossaa cayikko, i ba nagaran oishettana. <sup>16</sup> GODAA sunntaa cayiya asi haiqqo; Israa7eela asaa maabarai ubbai a shuchchan caddo. Betidi yiidaagaa gidin woi biitta asa gidinkka GODAA sunntaa cayikko haiqqo.

17 “Asa woriya asi haiqqo. 18 Asa mehe woriya asi ooninne ba worido mehiyaa gishshaa paxa mehiyaa qanxxo. 19 Issi asi ba shooruwaa qohikko, i oottidooridan a bollankka oosetto. 20 Menttikko meqqo; aife gishshaa aife; achcha gishshaa achcha. Asa bolla qohuwaa gattida oonikka i gattido qohuwaa malai a bollankka gako. 21 Mehe worida asi mehiyaa qanxxo; shin asa worida asi haiqqo. 22 Betiyaukka Israa7eela asau higgee issi mala gido; aissi giikko taani GODAA intte Xoossaa’ yaaga” yaagiis.

23 Hegaa ubbaa Muusee Israa7eela asau ubbau yootiis; yootin eti he cayida bitaniyaa dunkkaanidosappe gaxi kessidi, shuchchan caddidi woridosona. Yaatiidi Israa7eela asai GODAI Muusa azazidoogaadan oottidosona.

## 25

### *Sambbata Laittaa*

1 Siinaa Deriyaa bolla GODAI hagaadan yaagiis; 2 “Neeni Israa7eela asaassi ha-gaadan yaagada yoota; ‘Taani intteyyo immiyo biittaa intte geliyo wode, biittaikka GODAA Sambbataa bonchcho. 3 Usuppun laittaa kumettaa intte shooqan zerite; qassi usuppun laittaa kumettaakka intte woiniyaa turaa xeeraa xunqqite; a aifiyaakka maxidi ekkite. 4 SHin laappunnta laittai biittaayyo shemppo Sambbata; hegee GO-DAAYYOOKKA Sambbata. He laappunnta laittan intte shooqan zeroppite; intte woiniyaa xeeraakka xunqqoppite. 5 Intte biittan azabba gididi mokkiyaabakka cakkoppite; qassi xunqqennan de7ishin coo aifida woiniyaakka shiishshoppite. He laittai biittaassi muleera shemppo laittaa gido. 6-7 He Sambbata laittan biittai oosettana xayikkonne intteyyo, intte maccanne attuma ashkkaratuyyo, intteyyo keraa oot-tiyaageetuyyo, betidi yiidi inttenaara de7iyaageetuyyo, intte mehiyaayyoonne intte biittan de7iya do7atuyyo gidiya qumaa immana; biittai mokkiyoobai ubbai meetetto.

### *Aawubai Aawussi Simmiyo Laittaa*

8 “Laittatu gididon de7iya laappun Sambbatata qooda; laappun Sambbatatu laittaa qoodai laapputoo laappuna; hegeekka oitamanne uddufun laitta. 9 Hegaappe guyyiyan, laappunnta aginan, tammannta gallasan bonchchettiya nagaraa atto giissiyo gallasan malkkataa punniya asa intte biittan ubban kiittite. 10 Ishatamantto laittaa dummayidi, he biittan de7iya ubbaassi birshshettaa awaajjite. Hegee intteyyo Ishatamantto Laittaa Baalaa. He wodiyan intte ubbaikka intte gadiyaunne intte yarau yarau simmite. 11 He laittai intteyyo Ishatamantto Laittaa Baala. He laittan zeroppite; azabba gididi mokkidabaakka cakkoppite; qassi intte a xeeraa xunqqennan aifida woiniyaa aifiyaakka shiishshoppite. 12 Hegee Ishatamantto Laittaa Baala gidियो gishshau, i intteyyo geeshsha; goyennan coo dembban mokkidabaa miite.

13 “Ha Ishatamantto Laittaa Baalaa wode asi ubbi ba gadiyau simmo.

14 “Intte intte shooruwaappe gadiyaa shammikko, woi qassi ayyo baizzikko, issoi issuwaa cimmoppite. 15 Intte Ishatamantto Laittaa Baalaappe guyyiyan de7iya laittatu qoodaadan intte shooruwaappe shammite; intte shooroikka qassi gadee kattaa mokkanau de7iyo laittatu qoodaadan baizzo. 16 Laittatu qoodai daro gidikko, waagai darees; laittatu qoodai guuxxikko, waagaikka guuxxees. Aissi giikko, intte cakkana katta cahaa qoodaadan intte shooroi intteyyo baizzees. 17 Intte issoi issuwaa cimmoppite; shin intte intte Xoossaassi yayyite. Taani GODAI, intte Xoossaa.

### *Laappunnta Laittaa Metuwaa*

18 “Ta azazuwaa oottite; ta higgiaakka naagitenne oottite; yaatikko intte ha biittan sarotettan de7ana. 19 Biittai ba aifiyaa intteyyo immana; immin intte kallana gakkanaashin maana; qassi he biittankka intte sarotettan de7ana. 20 Intte, “Nuuni zerana xayikko, qassi kattaakka cakkidi shiishshana xayikko, laappunnta laittan ai

maanee?” giikko, <sup>21</sup> taani usuppunta laittan ta anjjuwaa intte bollan kiittana; yaa-tobare biittai heezzu laittau gidiya aifiyaa aifana. <sup>22</sup> Hosppunta laittan intte intte biittan zeriyo wodekka, kase shaachcha kattaa maana; qassi intte zeriyo kattaa aifiyaa uddufunnta laittan shiishshana gakkanaashinkka, shaachcha kattaa maana.

### *Aquwaa Zaariyo Wogaa*

<sup>23</sup> “ ‘Biittai tabaa gidiyo gishshaunne inttekka ha biittan imattanne bete gididi de7iyo gishshau, biittaa naa77antto simmennaadan baizzoppite. <sup>24</sup> Intte oiqqido biittan ubban de7iyya gadiyaa gadiyaawati wozana mala, eta maataa naaganau koshshees.

<sup>25</sup> “ ‘Ne ishai hiyyeesidi ba gadiyaappe baizzikko, ayyo matattiya dabboi yiidi, he gadiyaa ayyo wozo. <sup>26</sup> Ayyo he gadiyaa woziya dabboi xayikko, qassi ikka simmi daretidi woziyoo miishshaa demmikko, <sup>27</sup> ba baizzido wodiyaappe doommidi de7iyya laittaa goodidi, attida laittaa miishshaa shammidaagaayyo zaaro; yaatidi i ba gadiyau simmo. <sup>28</sup> SHin ayyo he gadiyaa wozanau gidiya miishshi xayikko, Ishatamantto Laittaa Baalai gakkanaashin gadee shammida bitaniyaa kushiyan gam77o; Ishatamantto Laittaa Baalaa wode, a gadee ayyo simmo; ikka ba gadiyau simmo.

<sup>29</sup> “ ‘Gimbbetti uttida katamaa gidдон issi asi de7iyyo keettaa hara urau baizzikko, i baizzoosappe biidi issi laittaa gakkanaashin de7iyya wodiyan zaaridi wozanau au maatai de7ees. <sup>30</sup> Issi laittaa kumettaa gidдон wozana xayikko, he gimbbettida katamaa gidдон de7iyya keettaa shammidaagaayyo na7aa na7au merinau abaa gidees. Ishatamantto Laittaa Baalaa wodekka simmenna. <sup>31</sup> SHin gimbbettibeenna heeratun de7iyya keettati shooqa mala. Eti wozettoosona; Ishatamantto Laittaa Baalaa wodekka baizzidaagau simmoosona.

<sup>32</sup> “ ‘Gidikonne Leewatu katamatun de7iyya bantta keettaa Leewati bantta koyido wodiyan wozi ekkana danddayoosona. <sup>33</sup> Leewatuppe issi asi eta katamaa gidдон de7iyya keettaa baizzidi wozana xayikko, he eta katamaa gidдон de7iyya keettaa Ishatamantto Laittaa Baalaa wode simmees. Aissi giikko, Leewatu katamaa gidдон de7iyya keettati Israa7eela asaa gidдон Leewatussi aqo. <sup>34</sup> SHin eta katamaa yuushuwan eta ubbaassi issippe de7iyya biittai etau merinau aqo gidiyo gishshau baizettenna.

### *Manqqida Asau Tal77iyooogaa*

<sup>35</sup> “ ‘Qassi ne ishai hiyyeesidi bana danddayana xayikko, imattadaaninne betedan i nenaara de7ana mala, neeni a maadda. <sup>36</sup> Ne ishaa nenaara wottanau appe dichchaa ekkoppa; woikko wore mooppa. SHin neeni ne Xoossaassi yayya. <sup>37</sup> Ne biraa ayyo dichchau tal77oppa; ne qumaakka ayyo woriyan baizzoppa. <sup>38</sup> Intteyyo Kanaane biittaa immanaunne intte Xoossaa gidanau, inttena Gibxxe biittaappe kessidaagee, taani GODAI, intte Xoossaa.

### *Ailleti Aillettaappe Kiyiyooogaa*

<sup>39</sup> “ ‘Neeyyo dabbo gidiya Israa7eela asi hiyyeesidi, bana neeyyo ailletettau baizzikko, neeni a ailledan ootissoppa. <sup>40</sup> I keraa oottiya asadaaninne betedan nenaara de7o; Ishatamantto Laittaa Baalai gakkanaashin i neeyyo ootto. <sup>41</sup> He wode i ba naatuurakka issippe ne sooppe kiyidi ba keettaa asaakko bo; ba aawaa gadiyaakkokka simmo. <sup>42</sup> Israa7eelati taani Gibxxe biittaappe kessido ta ailleta gidiyo gishshau, eti ailletettau baizettoppona. <sup>43</sup> Neeni eta meqettaa iitada haaroppa; shin neeni ne Xoossau yayya.

<sup>44</sup> “ ‘Neeyyo attumanne macca ailleti de7ana mala koyikko, ne yuushuwan de7iyya kawotettatuppe shamma. <sup>45</sup> Qassi ne biittan de7iyya betetuppenne ne biittan de7ishin yelettida eta so asaappe shammanau danddayaasa; eti neeyyo aqo gidona. <sup>46</sup> Neepe guyyiyan ne naati eta merinau laattana mala, ne naatuyyo imma. Neeni etappe ubba wodekka aille shammanau danddayaasa; shin ne isha gidiya Israa7eela asa meqettaa iitada haaroppa.

47-48 “Ne matan de7iya imatta woikko bete asi doretin, qassi a matan de7iya ne ishahiiyyeesidi, he ne matan de7iya imattaassi woikko betiyaassi woi imatta bitaniyaa zariyaappe issuwaassi bana baizzikko, i baizetti simmin a wozanau danddayettes; a ishanttuppe issoi a wozo. 49 Woi a aawaa ishahii, woi a aawaa ishahii na7ai a wozo; woi a yaraappe ayyo mata dabbo gididi asi a wozo; woi qassi i ba huuphiyau doretikko i bana wozo. 50 I bana shammida bitaniyaara issippe gididi, i bana baizzido laittaappe doommidi Ishatamantto Laittaa Baalai gakkanaashin de7iya laittaa qoodo; a birshshissiya waagai he laittaa qoodaa keena gido. I bana shammidaagaara gam77ido wodiya waagai issi asi keraa oottidi demmiyo miishsha lagge gido. 51 Ishatamantto Laittaa Baalai gakkanaau biron daro laittai attidabaa gidikko, ba baizzido waagaappe he laittaa qoodan bana woziiyo waagaa qanxxo. 52 Qassi Ishatamantto Laittaa Baalai gakkanaau attida laittai guutta gidikko, bana shammidaagaara issippe qoodidi, he laittaa qoodan bana woziiyo waagaa qanxxo. 53 I laittan laittan kera oottiya asadan bana shammidaagaara de7oppe attin, intte xeelliiddi Israa7eela asa gididi bitaniyaa meqettaa iitidi haaroppite.

54 “SHin i hegaa mala ogiyan wozettana xayikko, Ishatamantto Laittaa Baalai gakkiiyo wode inne a naati aillettaappe kiyona. 55 Aissi giikko, Israa7eela asai ta ailletattennee! Taani Gibxxe biittaappe kessido ta ailleta. Taani, GODAI, intte Xoossaa’ yaaga” yaagiis.

## 26

### *Azazettin Beettiya Anjuwaa*

1 GODAI hagaadan yaagees; “Intte etayyo goinnanau eeqata medhdhoppite; qassi hawulttiyaa, masettida misiliyaa woikko masettida shuchchaa essoppite. Taani, GODAI, intte Xoossaa. 2 Ta Sambbatata naagite; ta Dunkkaaniyaa bonchchite. Taani GODAA.

3 “Intte ta higgiiyan biikko, ta azazotakka naagikkonne oottikko, 4 taani intteyyo iraa wodiyan bukissana; biittaikka kattaa darissidi mokkana; dembbaa mittatika aifiyaa aifana. 5 Intte kattaa qoxxiyo wodiyaappe biidi woiniyaa aifiyaa maxiyo wodee gakkanaashin kattaa qoxxana; qassi woiniyaa aifiyaa maxoikka biidi kattaa zeriyo wodee gakkanaashin wurena. Intte kallana gakkanaashin qumaa maana; qassi intte intte biittanka saruwan de7ana.

6 “Taani biittau sarotettaa immana; ooninne yashissennan intte xiskkana. Iita do7ata taani biittaappe xaissana; intte biittan naa77antto olai denddena. 7 Intte morkketa intte yedettana; yedettin intte sinttan eti bisuwan haiqqana. 8 Intteppe ichchashai xeetaa yedettana; qassi xeetai tammu sha7aa yedettana. Intte morkketi intte sinttan bisuwan haiqqana.

9 “Taani ta sinttaa inttekkoo zaarana; zaarada inttena aifissana; inttena darissana. Qassi taani ta maachchaa inttenaara minttana. 10 Intte shaachcha kattaa maana; qassi ha laitta kattaa wottanau, shaachcha kattaa diggidi sohuwaa kessana. 11 Taani ta de7iyo sohuwaa intte giddon oottana; taani inttena shenetikke. 12 Taani intte gidduwan hemettana; qassi intte Xoossaa gidana; intteikka ta asa gidana. 13 Intte Gibxxetuyyo aille gidennaadan, Gibxxe biittaappe inttena kessidaagee taani GODAI intte Xoossaa. Taani intte ailletettaa qambaraa menttaas; qassi intteikka xoqqu giidi hemettanaadan oottaas.

### *Azazettennan Ixxin Gakkiya Qixaatiyaa*

14 “SHin intte taani giyoobaa siyennan ixkikkonne, ha azazota ubbaakka oottennan ixkikko, 15 ta wogaa intte kariikko, qassi ta azazota ubbaa oottennan ixkidi, ta maachchaa kanttanau intte ta higgiiyaa shenetikko, 16 he wode taani intte bolli haga oottana: Intte akeekennan de7ishin yashshaa, gilqqatettaa, intte aifiyaa jallettiyaanne

inttena keehippe harggissiya mishuwaa intte bolli ehaana. Intte zerettaa zerana; shin i hada; aissi giikko, heгаа intte morkketi maana. <sup>17</sup> Taani ta som77uwaa intte bolli tukkana; intte morkketu sinttan intte kunddana; inttena ixxiyaageeti inttena haarana; qassi ooninne yedettennan intte baqatana.

<sup>18</sup> “Hagaa ubbaa oottinkka intte tana siyennan ixxiikko, taani intte nagaraa gishshau intte qixaatiyaa laappun dakko gujjana. <sup>19</sup> Intte wolqqaa otoruwaa taani menttana; saluwaa birata mala oottana; intte biittaakka nahaasiyaa giyo birataa mala oottana. <sup>20</sup> Intte wolqqai hadasan wurana; aissi giikko, intte biittai kattaa morkkenna; biittan de7iya mittatika aifiyaa aifokkona.

<sup>21</sup> “Intte taayyo ixxis giikkonne taani giyoobaakka siyennan ixxiikko, intte nagaraa keena laappun dakko boshaa taani intte bollan ehaana. <sup>22</sup> Taani intte bolli bazzo do7ata yeddana; eti intte naata bonqqana; intte meheta xaissana; intte qoodaakka guuttana; heгаа gaasuwan intte hemettiyo ogee bazzo gidana.

<sup>23</sup> “Ha ubba qixaatiyankka intte taakko simmennan ixxis giidi biikko, <sup>24</sup> he wode tankka intteyyo ixxis gaana; qassi intte nagaraa gishshau taani ta huuphen inttena laappun dakkuwaa qaxxayana. <sup>25</sup> Ta maachchaa menttido haluwaa kiyiya bisuwaa taani intte bolli ehaana; intte intte katamatun shiiqikkokka, taani intte bollan boshaa yeddana. Qassi intteikka intte morkketu kushiyan aadhdhidi imettana. <sup>26</sup> Intte kattaa taani xaissiyoo wode, tammu maccaasati issi bashiyan oittaa uukkana; heгааakka meezaanan likkidi shaakkana; intte heгаа maana, shin kallekketa.

<sup>27</sup> “Ha ubbankka intte taani giyoobaa siyennan ixxis giidi biikko, <sup>28</sup> he wode tankka intte bolli hanqquwan denddana; intte nagaraa gishshau taani ta huuphen inttena laappun dakkuwaa qaxxayana. <sup>29</sup> Intte intte attuma naatunne intte macca naatu ashuwaa maana. <sup>30</sup> Intte goinniyo xoqqa sohota taani kolana; intte ixaanaa yarshshiyoo sohuwaakka xaissana. Taani intte ahaa intte eeqatu ahaa bollan olana; taani inttena mule shenetana. <sup>31</sup> Taani intte katamata baisa oottana; intte goinniyo sohotakka kolereetana; intte sawiya yarshshuwaakka singgikke.

<sup>32</sup> “Taani intte biittaa xaissana; yaatobare he intte biittan yiidi uttiya morkketikka hegaan garamettana. <sup>33</sup> Taani inttena kawotettatu giddon laalana; intte bollankka ta bisuwaa shoddana. Intte biittai bayana; intte katamatikka baisa gidana. <sup>34</sup> He intte intte morkketu biittan de7iyoo wode, baisa gididi coo de7iya intte biittai ba Sambbatata bonchchiiddi ufaittana. He wode intte biittai shemppanne ba Sambbatata bonchchiiddi ufaittana. <sup>35</sup> Intte he biittan de7ido wodiyan ubban intte Sambbatatun demmibeenna shemppuwaa ha77i bayidi coo de7iyoo wodiyan demmana.

<sup>36</sup> “Intte intte morkketu biittan de7iyoo wode, intteppe shaahettidi, guyye atidi de7iyaageetu wozanan taani yashshaa yeddana; carkkoi qaattiyo bonccuwaa cenggurssai eta shabbirana; eti bisuwaappe baqatiyaabaadan baqatana; qassi eta ooninne yedettennan eti kunddana. <sup>37</sup> Inttena yedettiyaabi bannan de7ishin, intte olaappe baqatiyaabaadan issai issuwaara xubettana; qassi intte intte morkketu sinttan eqqanaukka intteyyo aiba wolqqinne de7enna. <sup>38</sup> Intte kawotettatu giddon bayana; intte morkketu biittaikka inttena mitti aggana. <sup>39</sup> Intteppe shaahettidi intte morkketu biittan attidaageeti bantta nagaraa gaasuwaaninne bantta aawatu nagaraa gaasuwan gilqqana.

<sup>40-42</sup> “SHin eti taani etau ixxis gaanaadaaninne eta morkketu biittau eta yeddanaan oottida bantta nagaraa, bantta maizza aawatu nagaraa, eti tana cimido cimuwaanne eti taayyo ixxis giidoogaa paaxikko, hegaan qassi eta azazettenna wozanaikka ziqqi giikkonne eti bantta nagaraa qixaatiyaa ekkikko, he wode taani Yaaqoobaara maacettido ta maachchaa hassayana; qassi Yisaaqaaranne Abrahamaara maacettido ta maachchaa hassayana; biittaakka hassayana. <sup>43</sup> Eti xayiichchin,



eta biittai baises attana; he eti xayin baises gididi coo de7iyo wodiyan biittai ba Sambabatata bonchchiiddi ufaittana. Eti ta azazuwaa karido gishshaunne eta shemppoikka ta wogaa shenetido gishshau, eti bantta nagaraa qixaatiyaa ekkana.

<sup>44</sup> “Gidikonne eti bantta morkketu biittan de7iyo wode, eti muleera xayana gakkanaashiininne etaara de7iya ta maachchaakka kanttana gakkanaashin, taani eta olikke; qassi shenetikke. Taani, GODAI, eta Xoossaa. <sup>45</sup> Taani eta Xoossaa gidanau, kawotettati xeellishin, Gibxxe biittaappe kessido eta maizza aawatuura taani maacettido maachchaa eta gishshau hassayana. Taani GODAA.

<sup>46</sup> “GODAI Siinaa Deriyaa bollan Muuse baggaara baappenne Israa7eela asaappe gidduwan wottido wogati, azazotinne higgeti hageeta” yaagiis.

## 27

### *GODAASSI Immiyoobaa SHiishshiyo Wogaa*

<sup>1-2</sup> GODAI Muusa hagaadan yaagiis; “Israa7eela asaassi hagaadan yaagada yoota; ‘Issi asi GODAAYYO asa immanau shiiqikko, neeni gammatiyooagaan he asa gishshaa miishshaa qanxxo. <sup>3</sup> Hegeenne laatamu laittappe biidi usuppun tammu laitta gakkanau de7iya attumaagau usuppun xeetu giraame deexxiya xaqara biraa qanxxo. <sup>4</sup> Macca asa gidikko qassi hasttamu xaqara biraa qanxxo. <sup>5</sup> Qassi ichchashu laittappe biidi laatamu laitta gakkanau de7iya attumaagau laatamu xaqara biraanne maccaarissi tammu xaqara biraa qanxxo. <sup>6</sup> Qassikka issi aginaappe biidi ichchashu laitta gakkanau de7iya attumaagau ichchashu xaqara biraanne maccaarissi heezzu xaqara biraa qanxxo. <sup>7</sup> Hegaadankka qassi usuppun tammu laittanne hegaappe bollaara de7iya attumaagau tammanne ichchashu xaqara biraanne maccaarissi tammu xaqara biraa qanxxo. <sup>8</sup> Qassi shiiqettida bitanee neeni gammatidoogaa qanxxanau danddayenna daro manqgo gidikko, i ba shiiquwaa gattanau immido asa ehiidi qeesiyaa sinttan esso; essobare shiiqettida bitanee qanxxanau danddayiyoogaa keenaa qoppidi qeese gammato.

<sup>9</sup> “I shiiqettidoo mehee GODAASSI yarshshanau haniya mehe gidikko, heгаа mala mehee ubbai GODAASSI geeshsha. <sup>10</sup> I he mehiyaa gishshaa hara mehiyaa immoppo; woi a hara mehiyaara laammoppo. Lo77uwaa iitaara woi qassi iitaakka lo77uwaara laammoppo. SHin i laammikko, koiro meheenne laamiyaa immido meheenne naa77aikka geeshsha. <sup>11</sup> I shiiqettido mehee GODAASSI yarshsho oottidi shiishshanau geeshsha gidenna mehe gidikko, he bitanee he mehiyaa qeesiyaa sintti eho. <sup>12</sup> Lo77o gidin iita gidin, qeese he mehiyaa gammato; yaatobare qeese gammatidoogee a waaga gido. <sup>13</sup> SHin he mehiyaa godai a zaaridi wozanau koyikko, he mehiyaa waagaa bolli xeetaappe laatamu kushiya gujjo.

<sup>14</sup> “‘Issi asi ba keettaa geeshsha gidanaadan GODAASSI dummayikko, lo77o gidin iita gidin, qeese he keettaa gammato. Yaatobare qeese gammatidoogaadan a waagai hegaadankka gido. <sup>15</sup> Qassi ba keettaa GODAASSI geeshsha ootti dummayida asi zaarettidi wozanau koyikko, he keettaa waagaa bollan xeetaappe laatamu kushiya gujjo; yaatobare keettaa assa gidees.

<sup>16</sup> “‘Issi asi ba laata gadiyaappe shaakkidi geeshsha ootti GODAASSI dummayikko, he gadiyaa waagai an zeriyo zerettan gammatetto. Hegeenne laatamu kilo giraame banggaa zeriyo keena shooqa gidikko, tammu xaqara biraa qanxxo. <sup>17</sup> I ba gadiyaa Ishatamantto Laittaa Baalaappe doommidi geeshsha ootti GODAASSI dummayikko, he gadiyau kumetta waagaa qanxxo. <sup>18</sup> SHin i ba gadiyaa Ishatamantto Laittaa Baalai aadhdhi simmin geeshsha ootti GODAASSI dummayikko, kaallidi de7iya Ishatamantto Laittaa Baalai gakkanaashin de7iya wodiya qeese goodo; yaatobare a kumetta waa-gaappe wodhdhees. <sup>19</sup> He gadiyaa geeshsha ootti GODAASSI dummayida asi zaaretti wozanau koyikko, i gammatettido miishshaa bolli xeetaappe laatamu kushiya gujjo;

yaatobare gadee simmidi abaa gidees. <sup>20</sup> SHin i gadiyaa zaarettidi, wozanaappe kasetidi hara asau baizzikko, he gadiyaa wozanau danddayenna. <sup>21</sup> Ishatamantto Laittaa Baalai gakkinn gadee yedettiyo wode, he gadee naa77antto guyye ekkennabaadan GODAASSI geeshsha gidees. He gadee qeesetu gade gidees.

<sup>22</sup> “ ‘Issi asi hara asappe shammido gadiyaa geeshsha ootti GODAASSI dummayanau koyikko, <sup>23</sup> kaalliyaa Ishatamantto Laittaa Baalai gakkanaashin de7iya waagaa qeese gammato; gammatobare bitanee he gallassikka he gimmitiyaa qanxxo; qanxxobare he miishshai GODAASSI dummatida miishsha gidana. <sup>24</sup> Ishatamantto Laittaa Baalai gakkiiyo wode, he gadee koiro laatan ekkidi baizzida bitaniyaassi simmees.

<sup>25</sup> “ ‘A waagai Xoossaa Dunkkaaniyan eriyo meezaanan gammatettees.

<sup>26</sup> “ ‘SHin ooninne baira yelettida mehe GODAASSI dummayidi shiishshanau danddayenna; aissi giikko, i kasekka GODAABAA. Miizza mara gidin woi dorssa mara gidinkka i GODAABAA. <sup>27</sup> He marai geeshsha gidana xayikko, ne gammatido waagaa bolli xeetaappe laatamu kushiyaa gujjidi a godai zaarettidi wozo. I wozana xayikko, ne gammatido waagan hara asau baizetto.

<sup>28</sup> “ ‘Issi asi babaappe GODAASSI dummayidi immidobai aiba gidikkokka, asa gidin mehe gidin, woi a laatan gakkida gade gidinkka, baizettennanne wozettenna. Dummayidobai ubbabi GODAASSI ubbaappe aadhdhida geeshsha. <sup>29</sup> Asaa giddoppe shaahettidi xayanaadan imettida asi wozetto; he asi haiqgo.

<sup>30</sup> “ ‘Biittaa asiratai ubbai biittaappe morkkida katta gidin woi mitta aife gidinkka GODAASSA. Hegee GODAASSI geeshsha. <sup>31</sup> Issi asi ba asirataa wozanau koyikko, a waagaa bollan xeetaappe laatamu kushiyaa gujjo. <sup>32</sup> Miizzaa gidin, dorssaa gidin, woi deeshshaa gidinkka, tammaappe issoi GODAASSA; meheta qoodi qoodidi aattiyo wode tammanntti GODAASSI geeshsha. <sup>33</sup> Tammanntta mehiyaa iita gidin lo77o gidinkka dooroppo; woi a haraara laammoppo. Laammikkonne koiroogeenne laamiyaa immidoogeenne naa77aikka GODAASSI geeshsha gidoosonappe attin, zaaridi wozanau danddayenna’ yaaga” yaagiis.

<sup>34</sup> Siinaa Deriyaa bollan GODAI Muuse baggaara Israa7eela asaa azazido azazoti hageeta.

## Qoodaabaa

### *Gidduwaa Erissuwaa*

Qoodaabaa geetettida ha maxaafai, Israa7eela asai Siinaa Deriyaappe denddido wodiyaappe doommidi, Xoossai etayyo immana giido, hidootaa biittaayyo arshsho bagga zawaa gakkana gakkanaashin, oitamu laittaa eti de7ido taarikiyaa odees. Maxaafaa sunttai, gidдон de7iya taariketuppe yesuwaa dariya kifiliyaa bessees. Hegeenne Israa7eela asai Siinaa Deriyaappe denddidi baanaappe kasetidi, qassi issi yeletaappe simmin Yorddaanoosa SHaafaappe arshsho baggaara Moo7aaban, Muusee asaa qoodido qoodaabaa bessees. Naa77u qoodatuppe gidduwan de7iya wodetun Israa7eela asai Kanaanessi tohossa bagga zawa gididiya Qaadeesa-Barnne gakki uttiis. Gidikonne eti hegaara hidootaa biitti gelanau danddayibookkona. Hegaa gishshau, eti hega heeran daro laittaa aattidi, guyyeppe Yorddaanoosa SHaafaappe arshsho baggaara de7iya biitti biidosona. Etappe baggai yan de7anau qofaa qachchin, attida asai Yorddaanoosa pinnidi, Kanaane baanau bana giigissiis.

Qoodaabai daro metoi gakkiyo wode yayyiyaanne hidootaa qanxxiya asatu taarikiyaa, Xoossaa bollinne eta kaalettana mala Xoossai etayyo doorido Muuse bolli makkalidi denddida asatu taarikiyaa oiqqidaagaa. Asai daafuranchchanne xiba gidikkonne Xoossai etassi ammanettiyaagaa gididi, eta kabboyidi wottidoogaa taarikee odees. Hegaadanka Muusee issi issiton genccaa xayikkonne, ayyo mino ammanoi de7iyoogee Xoossaassinne asaassi ammanettidi oottida asa i gidiyoogee beettiis.

### *Koiro Israa7eela Asaa Qoodaabaa*

<sup>1</sup> Siinaa Bazzuwan, Xoossaa Dunkkaaniyaa gidдон, Israa7eela asai Gibxxe biittaappe kiyido naa77antto laittan, naa77antto aginan, he aginau koiro gallasan, GODAI Muusa hagaadan yaagiis; <sup>2</sup> “Israa7eela asaa ubbaa eta yaran yaraaninne keettan keettan qoodada, attuma asaa eta sunttan sunttan xaafa. <sup>3</sup> Neeninne Aarooni yelettoosappe laatamu laittanne hegaappe bollaara de7iya Israa7eelata, olaa baanau danddayiyaageeta ubbata, eta citan citan qoodite. <sup>4</sup> Zariyaappe zariyaappe issi issi asi ba keettaa asau halaqa gididi, inttena maaddo. <sup>5</sup> Inttena maaddana asatu sunttai hagaappe kaallidi de7iyaagaa:

Zariyaa Keettaa Asaa Halaqaa

Roobeela SHade7uura na7aa Eliixuura

<sup>6</sup> Simoona Xuriishadaaya na7aa SHalumi7eela

<sup>7</sup> Yihudaa Aminadaaba na7aa Na7asoonaa

<sup>8</sup> Yisaakoora Xu7aara na7aa Nataani7eela

<sup>9</sup> Zaabiloona Heloona na7aa Eli7aaba

<sup>10</sup> Efireema Amihuuda na7aa Elishamaa7a

Minaase Padaaxuura na7aa Gamaali7eela

<sup>11</sup> Biniyaama Giidi7oona na7aa Abidaana

<sup>12</sup> Daana Amishadaaya na7aa Ahi7eezera

<sup>13</sup> Aseera Okiraana na7aa Paagi7eela

<sup>14</sup> Gaada Da7u7eela na7aa Eliyasaafa

<sup>15</sup> Nifttaaleema Enaana na7aa Ahiraa7a

<sup>16</sup> Ha asati bantta aawatu keettaa asatuppe kaalettanau doorettidaageeta; eti Israa7eela yaratuuyo halaqata” yaagiis.

<sup>17</sup> Yaagin Muuseenne Aarooni sunttai xeesettido ha asata efiidosona. <sup>18</sup> Naa77antta aginan koiro gallassi kumetta maabaraa xeesidi, issippe shiishshidosona. SHiishshin asai ba yaran yaraaninne ba keettan keettan odidi, yelettoosappe laatamu laittanne

hegaappe bollaara de7iya attumaasatu ubbaa sunttai muleera xaafettiis. <sup>19</sup> GODAI a azazidoogaadan, Muusee eta Siinaa Bazzuwan qoodiis.

<sup>20-21</sup> Olau baanau danddayiya attumaasati ubbai, laatamu laittanne hegaappe bollaara de7iyaageeti qoodettidi, huuphiyan huuphiyan xaafettidosona. Eti bantta yaran yaraaninne bantta keettan keettan shaahettidi, hagaappe kaallidi de7iya qoodan mazgafettidosona.

Zariyaa Olanchatu Qoodaa

Roobeela (Yaaqooba na7aa bairaa) 46,500

<sup>22-23</sup> Simoona 59,300

<sup>24-25</sup> Gaada 45,650

<sup>26-27</sup> Yihudaa 74,600

<sup>28-29</sup> Yisaakoora 54,400

<sup>30-31</sup> Zaabiloona 57,400

<sup>32-33</sup> Yooseefa na7aa Efireema 40,500

<sup>34-35</sup> Yooseefa na7aa Minaasa 32,200

<sup>36-37</sup> Biniyaama 35,400

<sup>38-39</sup> Daana 62,700

<sup>40-41</sup> Aseera 41,500

<sup>42-43</sup> Nifftaaleema 53,400

<sup>44</sup> Muusee, Aarooninne tammanne naa77u Israa7eela zaretu halaqati qoodido asai haga. <sup>45</sup> Olau baanau danddayiya attumaasati ubbai laatamu laittanne hegaappe bollaara de7iyaageeti bantta aawaa keettan keettan qoodettidosona. <sup>46</sup> Hegeeti muleera 603,550.

<sup>47</sup> SHin Leewa zareti ha qoodettida asaara qoodettibookkona. <sup>48</sup> Aissi giikko, GODAI Muusa hagaadan yaagiis; <sup>49</sup> “Leewa zareta qoodoppa; eta attida Israa7eelatu qoodan yeggoppa. <sup>50</sup> Leewata Xoossaa Dunkkaaniyaa bollaanne a gidдон de7iya miishshatu ubbaa bolla halaqa oottada suntta. Eti he Dunkkaaniyaanne a gidдон de7iya miishshata tookkona; eti a gidдон oottonanne a yuushuwan dunkkaanona. <sup>51</sup> Xoossaa Dunkkaanee shodettiyo wode Leewati shoddona; Xoossaa Dunkkaanee eqqiyo wodekka Leewati essona. Etappe harai ooninne akko shiiqikko, haiqqo. <sup>52</sup> Israa7eela asati ubbai bantta armman armmaaninne bantta citan citan shaahettidi, bantta dunkkaaniyaa dunkkaanona. <sup>53</sup> SHin GODAA hanqqoi Israa7eela maabaraa bolli wodhdhenna mala, Leewati Xoossaa Dunkkaaniyaa yuushuwan bantta dunkkaaniyaa dunkkaanona; Leewati Xoossaa Dunkkaaniyan aawatona” yaagiis.

<sup>54</sup> Israa7eelati haga ubbaa GODAI Muusa azazidoogaadan oottidosona.

## 2

### *Issi Issi Shaahoi Dunkkaananasaa Bessiyoojaa*

<sup>1</sup> GODAI Muusanne Aarona hagaadan yaagiis; <sup>2</sup> “Israa7eela asai bantta bagгаа bagгаа erissiya armmaaninne bantta yaraa yaraa erissiya banddiraa kaallidi, Xoossaa Dunkkaaniyaappe guuttaa haakkidi, a yuushuwan dunkkaanona.

<sup>3-4</sup> “Arshsho baggaara Yihudaa baggai bantta armmaa kaallidi dunkkaanona. Eta zaretu sunttai, zaretu halaqatu sunttainne olanchchatu qoodai hagaappe kaallees:

Zariyaa Zaretu Halaqaa Olanchatu Qoodaa

Yihudaa Aminadaaba na7aa Na7asoonaa 74,600

<sup>5-6</sup> Yisaakoora Xu7aara na7aa Nataani7eela 54,400

<sup>7-8</sup> Zaabiloona Heloona na7aa Eli7aaba 57,400

<sup>9</sup> Yihudaa baggaappe qoodettida olanchchati muleera 186,400. Hara sohuwaa biyo wode eti koiro kiyiyaageeta.

<sup>10-11</sup> “Qassi tohossa baggaara Roobeela baggai bantta armmaa kaallidi dunkkaanona. Eta zaretu sunttai, zaretu halaqatu sunttainne olanchchatu qoodai hagaappe kaallees:

Zariyaa Zaretu Halaqaa Olanchchatu Qoodaa  
 Roobeela SHade7uura na7aa Eliixuura 46,500  
 12-13 Simoona Xuriishadaaya na7aa SHalumi7eela 59,300  
 14-15 Gaada Da7u7eela na7aa Eliyasaafa 45,650

16 Roobeela baggaappe qoodettida olanchchati muleera 151,450. Hara sohuwaa biyo wode eti naa77antto kiyiyaageeta.

17 “Hegaappe guyyiyan, Xoossaa Dunkkaaneenne Leewa zareti koiro kiyida naa77u baggaappenne guyyeppe kiyiya naa77u baggaappe gidduwan kiyona; yaatidi bantta dunkkaanido maaran maaraaninne bantta banddiraa banddiraa kaallidi kiyona.

18-19 “Qassi arggo baggaara Efireema baggai bantta armmaa kaallidi dunkkaanona. Eta zaretu sunttai, zaretu halaqatu sunttainne olanchchatu qoodai hagaappe kaallees:

Zariyaa Zaretu Halaqaa Olanchchatu Qoodaa  
 Efireema Amihuuda na7aa Elishamaa7a 40,500  
 20-21 Minaasa Padaaxuura na7aa Gamaali7eela 32,200  
 22-23 Biniyaama Giidi7oona na7aa Abidaana 35,400

24 Efireema baggaappe qoodettida olanchchati muleera 108,100. Hara sohuwaa biyo wode, eti heezzantto kiyiyaageeta.

25-26 “Qassikka huuphessa baggaara Daana baggai bantta armmaa kaallidi dunkkaanona. Eta zaretu sunttai, zaretu halaqatu sunttainne olanchchatu qoodai hagaappe kaallees:

Zariyaa Zaretu Halaqaa Olanchchatu Qoodaa  
 Daana Amishadaaya na7aa Ahi7eezera 62,700  
 27-28 Aseera Okiraana na7aa Paagi7eela 41,500  
 29-30 Nifttaaleema Enaana na7aa Ahiraa7a 53,400

31 Daana baggaappe qoodettida olanchchati muleera 157,600. Hara sohuwaa biyo wode eti wurssettan kiyiyaageeta” yaagiis.

32 Bantta yaran yaran shaahettidi qoodettida Israa7eela olanchchati muleera 603,550.

33 SHin GODAI Muusa azazidoogaadan, Leewati hara Israa7eelatuura qoodetti-bookkona. 34 Israa7eelati GODAI Muusa azazidobaa ubbabaa oottidosona. Simmi eti bantta banddiraa kaallidi, hegaadan dunkkaanidosona; qassi bantta yaraa yaraanne bantta so asaa asaa kaallidi, hegaadan kiyidosona.

### 3

#### *Aaroonna Attuma Naata*

1 GODAI Siinaa Deriyaa bollan Muuseera haasayido wode de7iya Aaroonanne Muuse keettaa asai hagaappe kaallidi xaafettidaagaa. 2 Aaroonna attuma naatu sunttai bairai Nadaaba, Abiiha, El77aazaranne Itaamaara. 3 He Aaroonna attuma naati ubbai qeese gididi oottanau tiyettidi sunttettidosona. 4 SHin eta giddoppe Nadaabinne Abiihu Siinaa Bazzuwan GODAI azazibeenna tamaa yarshshidi, GODAA sinttan haiqqidosona; etau na7i baawa. Hegaa gishshau, eta aawai Aarooni paxa de7ido laitta ubban El77aazaranne Itaamaara xalaalai qeese gididi oottidosona.

#### *Leewati Qeeseta Maaddanau Sunttettidosona*

5 GODAI Muusa hagaadan yaagiis; 6 “Leewata haa ekkada ya; ehaada qeesiyaa Aaroonna maaddana mala, eta a sintti shiishsha. 7 Eti Aaroonanne Israa7eela maabarau ubbau Xoossaa Dunkkaaniyaa sinttan duma duma oosuwaa ootona. 8 Eti Xoossaa Dunkkaaniyan de7iya miishsha ubbaa aawatettaa ekkona; ekkidi Israa7eela asaa gishshaa Xoossaa Dunkkaaniyan ooso ubbaa eti ootona. 9 Neeni Leewata Aaroonanne a attuma naata maaddanaadan suntta; eti Israa7eela giddoppe muleera Aaroonayyo imettidosona. 10 Aaroonanne a attuma naata qeese oottada suntta. Etappe hara asi ooninne Xoossaa Dunkkaaniyaakko shiiqqo” yaagiis.



<sup>11</sup> Qassi GODAI Muusa hagaadan yaagiis; <sup>12</sup> “Taani Israa7eelatu maccaasai baira yeliyo attuma naatu ubbaa gishshaa Israa7eelatu giddoppe Leewata ekkaas. Leewati tabaa; <sup>13</sup> aissi giikko, baira yelettida ubbai tabaa. Taani Gibxxe biittan baira yelettidabaa ubbaa worido gallassan, Israa7eelatun baira yelettidabaa ubbaa, asa gidin, mehe gidin, taayyo dummayaas; eti tabaa gidana. Taani GODAATTENNEE” yaagiis.

### *Leewatu Qoodaabaa*

<sup>14</sup> Qassikka GODAI Muusa Siinaa Bazzuwan, <sup>15</sup> “Neeni Leewata eta so asan asaaninne eta yaran yaran qooda; yelettoosappe issi aginanne hegaappe bollaara de7iya attumaageeta ubbaa qooda” yaagiis. <sup>16</sup> Yaagin GODAI azazidoogaadan, Muusee eta qoodiis.

<sup>17</sup> Leewa attuma naati Gershshoona, Qahaatanne Maraara. <sup>18</sup> Gershshoona attuma naati Liibinanne SHim77a. <sup>19</sup> Qahaata attuma naati Amiraama, Yixihaara, Kebroonanne Uzzi7eela. <sup>20</sup> Maraara attuma naati qassi Maahilanne Musha. Leewatu maizza aawati hageeta.

<sup>21</sup> Liibina yaratinne SHim77a yarati Gershshoona zaretta. <sup>22</sup> Etappe qoodin, yelettoosappe issi aginanne hegaappe bollaara de7iya attumaageeti muleera 7,500. <sup>23</sup> Gershshoona yarati Xoossaa Dunkkaaniyaappe guyye arggo baggaara dunkkaanoosona. <sup>24</sup> Gershshoona yaratu so asaa halaqai Laa7eela na7aa Eliyasaafa. <sup>25</sup> Gershshoona yarati Xoossaa Dunkkaaniyaa, Dunkkaaniyaa kammiyoobata, geliyoosa magalashuwaa, <sup>26</sup> dabaabaa magalashota, Xoossaa Dunkkaaniyaanne yarshshiyooosaa yuushuwan de7iya dabaabaa geliyoosan magalashuwaa, wodorotanne eta go77aara gaittiyaabata ubbabaa aawatettaa ekkoosona.

<sup>27</sup> Amiraama yarati, Yixihaara yarati, Kebroona yaratinne Uzzi7eela yarati Qahaata zaretta. <sup>28</sup> Yelettoosappe issi aginanne hegaappe bollaara de7iya attumaageeti muleera 8,600. Qahaata yarati Xoossaa Dunkkaaniyaa aawatettaa ekkoosona. <sup>29</sup> Qahaata yarati Xoossaa Dunkkaaniyaappe tohossa baggaara dunkkaanoosona. <sup>30</sup> Qahaata yaratu so asaa halaqai Uzzi7eela na7aa Elxxaafaana. <sup>31</sup> Eti Taabootaa, xaraphpheezaa, xomppiyaa wottiyo ballaa, yarshshiyooosaa, ixaanaa cuwayiyo saaxiniyaa, oottiyo wode go7ettiyo Xoossaa Dunkkaaniyaa miishshata, magalashuwaanne eta go77aara gaittiyaabata ubbabaa aawatettaa ekkoosona.

<sup>32</sup> Leewatu halaqatu halaqai qeesiyaa Aaroona na7aa El77aazara; Geeshsha Sohuwau aawatiyaageetu bolli i sunttettiis.

<sup>33</sup> Maahila yaratinne Musha yarati Maraara zaretta. <sup>34</sup> Etappe qoodin, yelettoosappe issi aginanne hegaappe bollaara de7iya attumaageeti muleera 6,200. <sup>35</sup> Maraara yaratu so asaa halaqai Abihaila na7aa Xurii7eela. Maraara yarati Xoossaa Dunkkaaniyaappe huuphessa baggaara dunkkaanoosona. <sup>36</sup> Maraara yarati Dunkkaaniyaa xagaageta, hiraqota, tuussata, gedeta, he oosuwaassi koshshiya miishshata ubbaanne eta go77aara gaittiyaabata ubbaa aawatettaa ekkoosona. <sup>37</sup> Hegaa bollikka gujjidi, yuushuwan de7iya dabaabaa tuussatanne eta gedeta, xishetanne wodorota aawatettaa ekkoosona.

<sup>38</sup> Qassi Xoossaa Dunkkaaniyaappe sintta arshsho baggaara Muusee, Aarooninne a attuma naati dunkkaanoosona. Eti Israa7eelatu gishshaa Xoossaa Dunkkaane gidдон oottiyo oosuwaa aawatettaa ekkoosona. Hara asi Xoossaa Dunkkaaniyaakko shiiqikko, haiqqo.

<sup>39</sup> GODAI azazin, Muuseenne Aarooni qoodido attuma Leewati, yelettoosappe issi aginanne hegaappe bollaara de7iya attumaageeti muleera 22,000.

### *Baira Yelettida Israa7eelatu Gishshaa Leewati Ekettidosona*

<sup>40</sup> GODAI Muusa, “Israa7eelatu baira attuma naata, yelettoosappe issi aginanne hegaappe bollaara de7iyaageeta ubbaa qooda; qoodada eta sunttaa xaafa. <sup>41</sup> Israa7eelatun baira yelettida ubbaa gishshaa Leewata taayyo ekka; qassi

Israa7eelatu mehiyan baira yelettida ubbaa gishshaa Leewatu mehiyaa taayyo ekka. Taani GODAATTENNEE” yaagiis. <sup>42</sup> Yaagin Muusee GODAI a azazidoogaadan, Israa7eelatun baira yelettida ubbaa qoodiis. <sup>43</sup> Yelettoosappe issi aginanne hegaappe bollaara de7iya baira yelettida attumaageeti, sunttaikka xaafettidoogeeti muleera 22,273.

<sup>44</sup> GODAI Muusa qassikka hagaadan yaagiis; <sup>45</sup> “Leewata Israa7eela attumaageetu ubbaa gishshaa ekka; Leewatu meheta Israa7eelatu mehetu gishshaa ekka; Leewati tabaa gidana. Taani GODAATTENNEE. <sup>46</sup> Leewatu qoodaappe dariya 273 baira gididi yelettida Israa7eela attuma naata wozanau, <sup>47</sup> issuwaassi issuwaassi ichchashu xaqara biraa Xoossaa Dunkkaaniyan eriyo meezaanaa likkiyan ekka. <sup>48</sup> Palahida Israa7eelata woziyo he miishshaa Aaroonayyoonne a attuma naatuyyo imma” yaagiis. <sup>49</sup> Yaagin Muusee, Leewatun wozettidaageetuppe palahidaageeta woziyo miishshaa shiishshiiis. <sup>50</sup> Baira yelettida Israa7eelatuppe 1,365 xaqara biraa Xoossaa Dunkkaaniyan eriyo meezaanaa likkiyan i shiishshiiis; <sup>51</sup> shiishshidi GODAI azazido azazuwaadan, Muusee woziyo miishshaa Aaroonayyoonne a attuma naatuyyo immiis.

## 4

### *Qahaata Yara Gidiya Leewatu Oosuwa*

<sup>1</sup> GODAI Muusanne Aarona hagaadan yaagiis; <sup>2</sup> “Leewa zaretun Qahaata yarata eta dabbuwan dabbuwaaninne eta so asan asan shaakkada qooda; <sup>3</sup> yelettoosappe lait-tai hasttamaappe biidi ishatamaa gakkido attumaasa ubbaa, Xoossaa Dunkkaaniyaa gidдон oottanau yiyaageeta qooda. <sup>4</sup> Qahaata yarati Xoossaa Dunkkaaniyaa gidдон oottana oosoi haggaa: eti ubbaappe aadhhdida geeshsha miishshatun aawatoosona.

<sup>5</sup> “Asai dunkkaanidosaaappe baanau haniyo wode, Aarooninne a attuma naati Xoossaa Dunkkaaniyaa gidдо gelidi, Taabootaa sintta magalashuwaa kaquwaappe wottona; wottidi he Maachchaa Taabootaa an kammona. <sup>6</sup> He kammidoogaa bollikka qassi irppaniyaa kammona; heggaa bollikka qassi gujjidi, salo milatiya carqqiyaa kammona; kammidi tookkiyo kasota eta sagaayotun aattona.

<sup>7</sup> “Aattidi GODAA sintti shiishshiyoo oittaa wottiyo xaraphpheezaa bollan salo milatiya carqqiyaa hiixxona; hiixxidi a bolli saineta, cilppata, xuu7atanne ushshaa yarshshuwau go7ettiyo otota wottona; qassi oittai ubba wodekka a bollappe xayoppo. <sup>8</sup> Heggaa bollan zo7o carqqiyaa hiixxidi, irppaniyaa qassi a bolli kammona; kammidi tookkiyo kasota sagaayotun aattona.

<sup>9</sup> “Aattidi eti salo milatiya carqqiyaa ekkidi, xomppiyaa wottiyo ballata xomppetuura, toissiyoo qaphetuura, eta wottiyoobatuuranne zaitiyaa tigiyo xaarotuurakka ubbaa kammona. <sup>10</sup> Yaatidi akka miishshata ubbaakka irppaniyan kammidi, tookkiyo halaa bollan wottona.

<sup>11</sup> “Wottidi ixaanaa cuwayiyo worqqa saaxiniyaa bollan salo milatiya carqqiyaa hiixxona; hiixxidoogaa qassi irppaniyan kammona; kammidi tookkiyo kasota eta sagaayotun aattona. <sup>12</sup> Heggadankka, qassi Xoossaa Dunkkaaniyaa gidдон go7ettiyo miishshata ubbaa ekkidi, salo milatiya carqqiyaa xaaxona; xaaxidoogaa irppaniyan kammidi, tookkiyo halaa bollan wottona.

<sup>13</sup> “Yaatidi nahaasiyaappe oottido yarshshiyooosaa bolli de7iya bidinttaa diggona; diggidi a bolli ochchaa teera milatiya carqqiyaa hiixxona. <sup>14</sup> Hiixxidi a bolli yarshshiyooosan go7ettiyo miishshata ubbaa, tama cooceta, ashuwaa qaphiyoo qapheta, akaafatanne araciyo kuixaarota wottona. Wottidi irppaniyan kammona; kammidi tookkiyo kasota eta sagaayotun aattona.

<sup>15</sup> “Aarooninne a attuma naati, geeshshabatanne geeshsha miishshata ubbaa kammidi makkobarenne dunkkaanidosaaappe denddiyo wodee gakkobare, heggaa ubbaa tookkanau Qahaata yarati yoona. SHin geeshsha miishshata eti bochchoppona;

bochchikko haiqqona. Xoossaa Dunkkaaniyaa gidдон de7iya he miishshaa Qahaata yarati tookkona.

<sup>16</sup> “Qeesiyaa Aaroonna na7ai El77aazari xomppiyaa zaitiyaassi, sawiya ixaanaassi, hachchi hachchi yarshshiyo kattaa yarshshuwaassinne tiyiyo zaitiyaassi, qassi Xoossaa Dunkkaaniyaa muliyaanne a gidдон de7iya dumma geeshsha miishshata ubbaa bolli aawato” yaagiis.

<sup>17</sup> Qassi GODAI Muusanne Aaroonna hagaadan yaagiis; <sup>18</sup> “Qahaata yarati Leewa zaretuppe haiqqidi xayenna mala xeellite. <sup>19</sup> Ubbaappe aadhdhida geeshsha miishshaa mati shiiqiyo wode, eti haiqqennan paxa attidi de7ana mala, etayyo hagaadan oot-tite: Aarooninne a attuma naati Xoossaa Dunkkaaniyaa gidдо gelona; gelidi Qahaata yarati ubbai huuphiyan huuphiyan oottana oosuwaanne tookkana toohuwaa shaakki shaakkidi gishona. <sup>20</sup> Qahaata yarati haiqqennaadan, ubbaappe aadhdhiya geeshshabata qeeseti xaaxishin be7anau gidдо geloppona” yaagiis.

#### *Gershshoona Yara Gidiya Leewatu Oosuwaa*

<sup>21</sup> GODAI Muusa hagaadan yaagiis; <sup>22</sup> “Gershshoona yaratakka eta dabbuwan dab-buwaaninne eta so asan asan shaakkada qooda; <sup>23</sup> yelettoosappe laittai hasttamaappe biidi ishatamaa gakkido attumaasa ubbaa, Xoossaa Dunkkaaniyaa gidдон oottanau yiyaageeta qooda.

<sup>24</sup> “Gershshoona yarati oottiyo oosoinne tookkiyo tohoi hagua: <sup>25</sup> eti Xoossaa Dunkkaaniyaa magalashota, Xoossaa Dunkkaaniyaa, a kammiyoobatanne bollaara kammiyo irppaniyaa, Xoossaa Dunkkaaniyaa geliyoosan kaqqiyo magalashuwaa tookkona; <sup>26</sup> qassi Xoossaa Dunkkaaniyaanne yarshshiyoosaa yuuyi aadhdhida dabaabaa magalashota, dabaabaa geliyoosaa magalashuwaa, wodorotanne etayyo go77iya miishshata ubbaa tookkona. Gershshoona yarati ha miishshatun oottanau bessiya ooso ubbaa ootona. <sup>27</sup> Tookkiyoobaa gidin, hara ooso gidinkka eti oottiyo ooso ubbai Aarooninne a attuma naati eta azazin oosettona. Neeni eti tookkanau bessiyaabata ubbaa eta aawatettaa aawatettaadan etau gisha. <sup>28</sup> Xoossaa Dunkkaaniyaa gidдон Gershshoona yarati oottana oosoi muleera hagua. Eti oottana ooso ubbai qeesiyaa Aaroonna na7aa Itaamaara aawatettaa garssaana gidana.

#### *Maraara Yara Gidiya Leewatu Oosuwaa*

<sup>29</sup> “Maraara yarata eta dabbuwan dabbuwaaninne eta so asan asan shaakkada qooda; <sup>30</sup> yelettoosappe laittai hasttamaappe biidi ishatamaa gakkido attumaasa ubbaa, Xoossaa Dunkkaaniyaa gidдон oottanau yiyaageeta qooda.

<sup>31</sup> “Eti Xoossaa Dunkkaaniyaa gidдон oottana oosoti hageeta: eti Dunkkaaniyaa xagaageta, hiraqota, tuussatanne gedeta, <sup>32</sup> qassikka dabaabaa yuushuwan eqqiya tuussata, he tuussatu gedeta, toliyo xisheta, wodorota, hegeetussi koshshiya miishshata ubbaanne he miishshatuura gaittiyaabata ubbaa tookkona. Issi issi uraassi i tookkan- abaa shaakkada gisha. <sup>33</sup> Xoossaa Dunkkaaniyaa gidдон Maraara yarati oottana oosoi muleera hagua. Eti oottana ooso ubbai qeesiyaa Aaroonna na7aa Itaamaara aawatettaa garssaana gidana” yaagiis.

#### *Leewatu Qoodaabaa*

<sup>34</sup> Muusee Aarooninne maabaraa halaqati Qahaata yaratu attumaasaa eta dabbuwan dabbuwaaninne eta so asan asan shaakkidi qoodidosona. <sup>35</sup> Yelettoosappe laittai hasttamaappe biidi ishatamaa gakkido attumaasati ubbati, Xoossaa Dunkkaaniyaa gidдон oottanau yiyaageeti, <sup>36</sup> eta so asan asan qoodin muleera 2,750. <sup>37</sup> Qahaata yaratan Xoossaa Dunkkaaniyaa gidдон oottida asaa qoodai hagua. GODAI Muuse baggaara azazidoogaadan, Muuseenne Aarooni eta qoodidosona.

<sup>38</sup> Gershshoona yaratikka bantta dabbuwan dabbuwaaninne bantta so asan asan shaahettidi qoodettidosona. <sup>39</sup> Yelettoosappe laittai hasttamaappe biidi ishatamaa

gakkido attumaasati ubbati, Xoossaa Dunkkaaniyaa gidдон oottanau yiyaageeti, <sup>40</sup> eta so asan asan qoodin muleera 2,630. <sup>41</sup> Gershshoona yaratun Xoossaa Dunkkaaniyaa gidдон oottida asaa qoodin haggaa. GODAI Muuse baggaara azazidoogaadan, Muuseenne Aarooni eta qoodidosona.

<sup>42</sup> Maraara yaratikka qassi dabbuwan dabbuwaaninne bantta so asan asan shaa-hettidi qoodettidosona. <sup>43</sup> Yelettoosappe laittai hasttamaappe biidi ishatamaa gakkido attumaasati ubbati, Xoossaa Dunkkaaniyaa gidдон oottanau yiyaageeti, <sup>44</sup> eta so asan asan qoodin muleera 3,200. <sup>45</sup> Maraara yaratu qoodai haggaa. GODAI Muuse baggaara azazidoogaadan, Muuseenne Aarooni eta qoodidosona.

<sup>46</sup> Hegaa oottidi Muusee, Aarooninne Israa7eela halaqati Leewata ubbaa, eta yaran yaraaninne eta so asan asan shaakkidi qoodidosona. <sup>47</sup> Yelettoosappe laittai hasttamaappe biidi ishatamaa gakkido attumaasati ubbati, Xoossaa Dunkkaaniyaa gidдон oosuwa oottanaunne ayyo go77iya miishshata ubbaa tookkanau yiidaageeti <sup>48</sup> muleera 8,580. <sup>49</sup> GODAI Muuse baggaara azazidoogaadan, eti huuphiyan huuphiyan oottana oosoi woikko tookkana toohoikka etau odettiis. GODAI Muusa azazidoogaadan, eti ubbaikka qoodettidosona.

## 5

### *Wogaadan Geeyibeenna Asaa*

<sup>1</sup> GODAI Muusa hagaadan yaagiis; <sup>2</sup> “Neeni Israa7eelata, ‘Intte gidдон hanttaara goga harggee oiqqido uraa, woikko bollaappe aibakko uzuuziyo uraa, woikko ahaa oiqqidi tunida uraa oonakka intte dunkkaanidosappe kessirggite’ yaagada azaza. <sup>3</sup> Hegee maccaa attumaa gidinkka kessona. Taani eta gidduwan de7iyo eti dunkkaanidosaa hegeeti tunissenna mala, eta dunkkaanidosappe kessa yedda” yaagiis. <sup>4</sup> Yaagin GODAI Muusa azazidoogaadan, Israa7eelati eta ubbaa dunkkaanidosappe kessidi yeddidosona.

### *Naaquwaassi Edatiyo Edaa*

<sup>5</sup> Hegaappe guyyiyan, GODAI Muusa hagaadan yaagiis; <sup>6</sup> “Neeni Israa7eelata hagaadan yaaga; ‘Issi attumaasi woikko issi maccaasi ai ogiyaaninne hara asa naaqqikkonne hegan GODAASSI ammanettennan ixnikko, he urai mooranchcha. <sup>7</sup> Hegaa gishshau, i ba oottido nagaraa paaxo; paaxidi ba mooridobaa kumettaa zaaridi qanxxo; hega bollikka ichchashantta kushiya gujjidi, ba naaqqido uraassi edato. <sup>8</sup> SHin he naaqqetida uri haiqqidabaa gidikkonne, edaa ekkana au mata dabboi xayikko, he edai GODAASSA. He edatiyo edai naaqqida urai maarettanau yarshshuwaassi immiyo dorssa orggiyaara issippe qeesiyaayyo imetto. <sup>9</sup> Qassi Israa7eelati qeesiyaassi immiyo geeshsha imo ubbai he qeesiyaassa. <sup>10</sup> Issi issi asi immiyo imotai he immida uraaba; shin qeesiyaassi i immiyo imotai he qeesiyaassa’ yaaga” yaagiis.

### *Ba Azinan Sirettiya Keettaayeebaa*

<sup>11</sup> Hegaappe guyyiyan GODAI Muusa, <sup>12</sup> “Neeni Israa7eelatussi hagaadan yaagada yoota; ‘Issi uraa keettaayiyaa kare hemettada, ayyo ammanettennan ixxada, <sup>13</sup> hara attuma asaara zin77ikko, qassi hega a ba keettaawaappe qosikko, markkai bannabaa gidikkonne, a shaaramuxaidda ohettennan attikko, <sup>14</sup> a tunido gishshau, i keettaawai o siriyaagaa gidanau danddayees; woikko a tunennan de7ishin, i ba keettaayiyi siriyaagaa gidanau danddayees. <sup>15</sup> Yaatikko, he bitanee ba keettaayiyi qeesiyaakko efo; qassi i gishshau yarshshanau issi kilo giraame banggaa xiilliyaa efo. SHin xiilliyaa bolli zaitiyaa tigoppo, woikko ixaanaa a bolli wottoppo; aissi giikko, he xiillee i ba keettaayiyi sirido gishshau yarshshiyo kattaa yarshsho; qassi i mooruwaa qonccisiya yarshsho.



16 “Hegaappe guyyiyan, qeese he mishiriyo shiishshidi, GODAA sinttan esso. 17 Essidi anjettida haattaa kuixaaruwan ekko. Hegaappe guyyiyan, Xoossaa Dunkkaaniyaa wuigen de7iya buhiyaa ekkidi, he haattan gujjo. 18 Gujjidi he mishiriyo GODAA sinttan esso; hegaappe guyyiyan, he mishiree huuphiyaa birshsho; birshshidi sirido gishshau yarshshiyo i mooruwaa qonccissiya kattaa yarshshuwaa i kushiyan wotto; qassi he qeese ba kushiyan qanggettaa ehiya camo haattaa kuixaaruwaara oiqqo. 19 Oiqqidi mishiriyo hagaadan yaagidi caaqetto; “Neeni hara attumaasaara zin77abeennabaa gidikkonne, ne keettaawaa aggada kare hemettada tunabeennabaa gidikko, qanggettaa ehiya ha camo haattai neeyyo gometoppo. 20 SHin neeni ne keettaawaa aggada kare hemettada tunidobaa gidikkonne, hara attuma asaara zin77idabaa gidikko, 21 GODAI ne yelo keettaa gunddissiyooqaanne ne uluwaakka puurissiyooqaanne, ne asan nena qanggisso. 22 Ha qanggettaa ehiya haattai ne ulo giddo gelo; gelidi ne uluwaa puurisso; ne yelo keettaakka gunddisso” yaagidi caaqetto.

“Mishiriyaakka, “Amin77i; amin77i” yaagu.

23 “Hegaappe guyyiyan, qeese ha qanggettata xaaxettida maxaafan xaafu; xaafido qanggettata camo haattaa giddo meeco. 24 Yaatidi qanggettaa ehiya he camo haattaa mishiriyo ushsho; qanggettaa ehiya haattai mishiree uluwan gelidi, o camo sahuwaa sakkana. 25 Qeese mishiree kushiyaappe sirido gishshau yarshshiyo kattaa yarshshuwaa ekkidi, he yarshshuwaa GODAA sinttan wuxaawuxidi, yarshshiyoosaa eho. 26 Ehiidi qeese kattaa yarshshuwaappe zolliyaagaa ekko; ekkidoogaa mooruwaa qonccissiya yarshsho oottidi, yarshshiyoosan xuuggo. Hegaappe guyyiyan, mishiriyo he haattaa ushsho. 27 Haattaa o ushshidoogaappe guyyiyan, hagaadan hanana: a ba keettaawaassi ammanettana xayada tunidabaa gidikko, qanggettaa ehiya haattai i uluwan gelidi, o camo sahuwaa sakkana; i uluwaakka puurana; i yelo keettaakka gunddana. A ba asan qanggettidaaro gidana. 28 SHin a tunabeenna xillo maccaasa gidikko, a saro attada naata yelana.

29-30 “Issi asi ba keettaayyiyo siriyoo wode oottana wogai haggaa. A kare hemettada tunikko, woikko issi asi ba keettaayyiyo sirikko, GODAA sinttan o esso; essidi qeese ha wogaa ubbaa i bolli polo. 31 Polobare keettaawai mooro ubbaappe saro attana; shin maccaasiyaa ba nagaraa gaasuwan yiyaabaa tookkana’ yaaga” yaagiis.

## 6

### *Naaziraawiyaa Higgiyaa*

1 GODAI Muusa hagaadan yaagiis, 2 “Neeni Israa7eela asaassi hagaadan yaagada yoota; ‘Attuma asi woikko macca asi Naaziraawe gididi, bana GODAAYYO dummayanau geppikko, 3 woiniyaa eessaanne hara mattoyiya ushshaa uyoppo; woiniyaa aifiyaappe agettiya caalabaanne mattoyiyaabaa uyoppo; woiniyaa teeraa gum77idoogaa uyoppo. Woikko woiniyaa teeraa shuguwaa gidin, melaa gidinkka mooppo; 4 i bana dummayido wodiyan ubban, woine turaappe beettiyaabaa ubbaa, woiniyaa zerettaa gidin, woikko woiniyaa poquwaa gidinkka mooppo.

5 “I bana GODAAYYO dummayanau geppido wodiyan ubban, a huuphee meedettoppo woikko qanxxettoppo. I ba huuphiyaa binnaanaakka adussidi dichcho. I bana GODAAYYO dummayido wodee polettana gakkanaassi, geeshsha gidanau koshshees.

6 “I bana GODAAYYO dummayido wodiyan ubban ahaakko shiiqoppo. 7 Harai attin a aawai, woikko a aayiyaa, woikko a ishai, woikko a michchiyaa haiqqikkokka, i bana tunissoppo. Aissi giikko, i bana Xoossaassi dummayidoogaa erissiyoi ba huuphiyaana. 8 I bana GODAAYYO dummayido wodiyan ubban i GODAASSI geeshsha.

9 “Asi a matan akeekennan haiqqin, GODAAYYO dummayido a huuphee tunikko, laappun gallassaa gam77idi, ba geeyiyo he laappunnta gallassi ba huuphiyaa meedetto.



<sup>10</sup> Hosppuntta gallassan naa77u haraphpheta woikko naa77u mara haraphpheta Xoos-saa Dunkkaaniyaa pengge qeesiyaayyo eho. <sup>11</sup> Ehin qeese haraphphetuppe issuwaa nagaraa yarshshuwau, issuwaa qassi xuuggiyo yarshshuwau yarshsho. Aissi giikko, ahai a mati shiiqido mooruwaa gishshau, ayyo atto giissanaassa. He gallassi i ba huuphiyaa wogaadan geeshsho; <sup>12</sup> i bana kase geppido wodiya keenaa bana GODAAYYO dummayanau koshshees. Yaatidi yelettoosappe issi laitta gidiyo attuma dorssaa naaquwaassi immiyo yarshsho oottidi yarshsho. SHin hegaappe kase i bana GODAAYYO dummayido gallassati qoodettokkona; aissi giikko, i bana dummayido he wodetu gidon bana tunissirggiis.

<sup>13</sup> “Ba gefaa wodiya wurssido wode bana GODAAYYO dummayida Naaziraawiyaa wogai hгаа: Xoosaa Dunkkaaniyaa pengge i shiiqo; <sup>14</sup> shiiqiiddi GODAAYYO tilla bollaara de7iya issi laitta attuma dorssaa xuuggiyo yarshshuwau, tilla bollaara de7iya issi laitta dorssiyo nagaraa yarshshuwaanne tilla bollaara de7iya dorssa orggiyaa issippetettaa yarshshuwau he sohuwaa eho. <sup>15</sup> Qassi kattaa yarshshuwaanne ushshaa yarshshuwaa etaara issippe yarshshanau eho; he kattaa yarshshoi irshshoi gelibeennaagaa gido; qassi zaitiyan munaqqido liiqo xiilliyaa komppotanne zaitiyaa tiyido lee7e lichchakkota masoofiyan eho.

<sup>16</sup> “Ehin qeese heгаа ubbaa shiishshidi, nagaraa yarshshonne xuuggiyo yarshsho oottidi, GODAAYYO a gishshaa yarshsho. <sup>17</sup> Qeese dorssa orggiyaa, irshshoi gelibeenna komppotanne lichchakkota issippetettaa yarshsho oottidi, GODAASSI yarshsho. Qassi hegaara issippe kattaa yarshshuwaanne ushshaa yarshshuwaa yarshsho. <sup>18</sup> Hegaappe guyyiyan, Naaziraawee GODAAYYO dummayido ba huuphiyaa Xoosaa Dunkkaaniyaa penggen meedetto; meedettido binnaanaa efidi, issippetettaa yarshshuwaappe garssa baggaara de7iya taman yeggo.

<sup>19</sup> “Bana GODAAYYO dummayida Naaziraawee ba huuphiyaa meedettoogaappe guyyiyan, qeese doissetida dorssa orggiyaa missaa, irshshoi gelibeenna issi komppuwaanne issi lee7e lichchakkuwaa ekkidi, ha Naaziraawiyaa kushiyan wotto. <sup>20</sup> Wottidi qeese eta wuxaawuxo yarshsho oottidi, GODAA sinttan wuxaawuxo. Yaatobare hegeeti wuxaawuxido anggaasuwaaranne yarshshido gedaara geeshshanne qeesiyaassa. Hegaappe guyyiyan, GODAAYYO bana dummayida Naaziraawee woiniyaa eessaa uyana giikko uyo.

<sup>21</sup> “Simmi GODAASSI bana dummayanau geppida Naaziraawiyaassi wotto wogai hгаа: bana GODAASSI yarshshanau koshshiya yarshshotuppe aadhdhiyaabaa immanau geppidabaa gidikko, i ba geppido gefaa keenaa gattanau koshshees’ yaaga” yaagiis.

### *Qeeseti Anjjana Anjuwaa*

<sup>22</sup> GODAI Muusa hagaadan yaagiis; <sup>23</sup> “Aaronassinne a attuma naatussi hгаа yoota; ‘Israa7eela asaa intte hagaadan yaagidi anjjite;

<sup>24</sup> “GODAI inttena anjjonne  
inttena naago;

<sup>25</sup> GODAI intteyyo ba som77uwaa  
poo7issonne intteyyo qaretto;

<sup>26</sup> GODAI inttena ba keha aifiyan  
xeellonne intteyyo sarotettaa immo”  
yaagidi anjjite’ yaaga.

<sup>27</sup> “Eti Israa7eela asaa ta sunttan anjjiyo wode, taani eta anjjana” yaagiis.

<sup>1</sup> Muusee Xoossaa Dunkkaaniyaa tolidi makkido wode, he Dunkkaaniyaanne a miishshaa ubbaa tiyidi geeshshiis; qassi yarshshiyooaanne a miishshaa ubbaakka tiyidi geeshshiis. <sup>2</sup> Hegaappe guyyiyan, Israa7eela asaa kaalettidaageeti, hegeetinne zareta goodida so asaa halaqati <sup>3</sup> GODAAYYO imota shiishshidosona; hegeetikka kamettida usuppun gaareta, tammanne naa77u boorata, halaqan halaqan issi issi booraanne naa77u naa77u halaqati issi issi gaariyaa Xoossaa Dunkkaaniyaa ehiidosona.

<sup>4</sup> GODAI Muusa hagaadan yaagiis; <sup>5</sup> “Xoossaa Dunkkaaniyaa oosuwaassi go77ana mala, neeni hegeeta etappe ekkada, Leewatuyyo eta oosuwaassi oosuwaassi koshshiyaadan shaakkada imma” yaagiis. <sup>6</sup> Yaagin Muusee gaaretanne boorata ekkidi, Leewatuyyo immiis. <sup>7</sup> Gershshoona yaratuyyo eta oosuwaassi koshshiyooagaan shaakkidi, naa77u gaaretanne oiddu boorata immiis. <sup>8</sup> Qassi Maraara yaratuyyo eta oosuwaassi koshshiyooagaan shaakkidi, oiddu gaaretanne hosppun boorata immiis. Eti ubbaikka qeesiyaa Aarona na7aa Itaamaara aawatettaa garssaana. <sup>9</sup> SHin Muusee Qahaata yaratussi hegaappe aibanne immibeenna; aissi giikko, eta aawatettan de7iya geeshsha miishshati bantta hashiyan tookkanau koshshiyaageeta gidido gishshaassa.

<sup>10</sup> Yarshshiyooosaa Muusee tiyidi geeshshido gallasan, halaqati yarshshiyooosaa anjjissanau bantta imuwaa ekkidi, he yarshshuwaa saaxiniyaa sintti ehiidosona. <sup>11</sup> GODAI Muusa kase, “Issi issi gallassi issi halaqai yarshshiyooosaa anjjanau ba imuwaa GODAAYYO immo” yaagi wottiis.

<sup>12</sup> Koiro gallassi ba imuwaa ehiidaagee Yihudaa zariyaappe Aminadaaba na7aa Na7asoonaa.

<sup>13</sup> Na7asooni ehiido imoi erettida meezaanan wottin, issi kilo giraamenne bagga deexxiya biraappe medhdhido issi keriyaanne hosppun xeetu giraame deexxiya biraappe medhdhido issi kuixaaruuwaa, naa77aikka kattaa yarshshuwaa yarshshanau liiqo xiillee zaitiyan munaqqidoogee kumidoogeeta; <sup>14</sup> qassi issi xeetanne tammu giraame deexxiya worqqaappe medhdhido, ixaanai kumido shaatiyaa; <sup>15</sup> xuuggiyo yarshshuwaassi, issi mirgguwaa, issi dorssa orggiyaanne issi laitta kumido attuma dorssaa; <sup>16</sup> nagaraa yarshshuwaassi issi deeshsha orggiyaa; <sup>17</sup> issippetettaa yarshshuwaassi naa77u korimata, ichchashu dorssa orggeta, ichchashu gakkida deeshsha orggetanne issi laitta kumido ichchashu attuma dorssata. Aminadaaba na7ai Na7asooni ehiido imoi haggaa.

<sup>18</sup> Naa77antta gallassi Yisaakoora zaretu halaqai, Xu7aara na7ai Nataani7eeli ba imuwaa ehiis.

<sup>19</sup> Nataani7eeli ehiido imoi erettida meezaanan wottin, issi kilo giraamenne bagga deexxiya biraappe medhdhido issi keriyaanne hosppun xeetu giraame deexxiya biraappe medhdhido issi kuixaaruuwaa, naa77aikka kattaa yarshshuwaa yarshshanau liiqo xiillee zaitiyan munaqqidoogee kumidoogeeta; <sup>20</sup> qassi issi xeetanne tammu giraame deexxiya worqqaappe medhdhido, ixaanai kumido shaatiyaa; <sup>21</sup> xuuggiyo yarshshuwaassi issi mirgguwaa, issi dorssa orggiyaanne issi laitta kumido attuma dorssaa; <sup>22</sup> nagaraa yarshshuwaassi issi deeshsha orggiyaa; <sup>23</sup> issippetettaa yarshshuwaassi naa77u korimata, ichchashu dorssa orggeta, ichchashu gakkida deeshsha orggetanne issi laitta kumido ichchashu attuma dorssata. Xu7aara na7ai Nataani7eeli ehiido imoi haggaa.

<sup>24</sup> Heezantta gallassi Zaabiloona zaretu halaqai, Heloona na7ai Eli7aabi ba imuwaa ehiis.

<sup>25</sup> Eli7aabi ehiido imoi erettida meezaanan wottin, issi kilo giraamenne bagga deexxiya

biraaappe medhdhido issi keriyaanne hosppun xeetu giraame deexxiya biraappe medhdhido issi kuixaaruuwaa, naa77aikka kattaa yarshshuwaa yarshshanau liiqo xiillee zaitiyan munaqettidaagee kumidoogeeta; <sup>26</sup> qassi issi xeetanne tammu giraame deexxiya worqqaappe medhdhido, ixaanai kumido shaatiyaa; <sup>27</sup> xuuggiyo yarshshuwaassi issi mirgguwaa, issi dorssa orggiyaanne issi laitta kumido attuma dorssaa; <sup>28</sup> nagaraa yarshshuwaassi issi deeshsha orggiyaa, <sup>29</sup> issippetettaa yarshshuwaassi naa77u korimata, ichchashu dorssa orggeta, ichchashu gakkida deeshsha orggetanne issi laitta kumido ichchashu attuma dorssata. Heloona na7ai Eli7aabi ehiido imoi haggaa.

<sup>30</sup> Oiddantta gallassi Roobeela zaretu halaqai SHade7uura na7ai Eliixuuri ba imuwaa ehiis.

<sup>31</sup> Eliixuuri ehiido imoi erettida meezaanan wottin, issi kilo giraamenne bagga deexxiya biraappe medhdhido issi keriyaanne hosppun xeetu giraame deexxiya biraappe medhdhido issi kuixaaruuwaa, naa77aikka kattaa yarshshuwaa yarshshanau liiqo xiillee zaitiyan munaqqidoogee kumidoogeeta; <sup>32</sup> qassi issi xeetanne tammu giraame deexxiya worqqaappe medhdhido, ixaanai kumido shaatiyaa; <sup>33</sup> xuuggiyo yarshshuwaassi issi mirgguwaa, issi dorssa orggiyaanne issi laitta kumido attuma dorssaa; <sup>34</sup> nagaraa yarshshuwaassi issi deeshsha orggiyaa; <sup>35</sup> issippetettaa yarshshuwaassi naa77u korimata, ichchashu dorssa orggeta, ichchashu gakkida deeshsha orggetanne issi laitta kumido ichchashu attuma dorssata. SHade7uura na7ai Eliixuuri ehiido imoi haggaa.

<sup>36</sup> Ichchashantta gallassi Simoona zaretu halaqai, Xuriishadaaya na7ai SHalumi7eeli ba imuwaa ehiis.

<sup>37</sup> SHalumi7eeli ehiido imoi erettida meezaanan wottin, issi kilo giraamenne bagga deexxiya biraappe medhdhido issi keriyaanne hosppun xeetu giraame deexxiya biraappe medhdhido issi kuixaaruuwaa, naa77aikka kattaa yarshshuwaa yarshshanau liiqo xiillee zaitiyan munaqqidoogee kumidoogeeta; <sup>38</sup> qassi issi xeetanne tammu giraame deexxiya worqqaappe medhdhido ixaanai kumido shaatiyaa; <sup>39</sup> xuuggiyo yarshshuwaassi issi mirgguwaa, issi dorssa orggiyaanne, issi laitta kumido attuma dorssaa; <sup>40</sup> nagaraa yarshshuwaassi issi deeshsha orggiyaa; <sup>41</sup> issippetettaa yarshshuwaassi naa77u korimata, ichchashu dorssa orggeta, ichchashu gakkida deeshsha orggetanne issi laitta kumido ichchashu attuma dorssata. Xuriishadaaya na7ai SHalumi7eeli ehiido imoi haggaa.

<sup>42</sup> Usuppunta gallassi Gaada zaretu halaqai, Da7u7eela na7ai Eliyasaafi ba imuwaa ehiis.

<sup>43</sup> Eliyasaafi ehiido imoi erettida meezaanan wottin, issi kilo giraamenne bagga deexxiya biraappe medhdhido issi keriyaanne hosppun xeetu giraame deexxiya biraappe medhdhido issi kuixaaruuwaa, naa77aikka kattaa yarshshuwaassi yarshshanau liiqo xiillee zaitiyan munaqqidoogee kumidoogeeta; <sup>44</sup> qassi issi xeetanne tammu giraame deexxiya worqqaappe medhdhido ixaanai kumido shaatiyaa; <sup>45</sup> xuuggiyo yarshshuwaassi issi mirgguwaa, issi dorssa orggiyaanne issi laitta kumido attuma dorssaa; <sup>46</sup> nagaraa yarshshuwaassi issi deeshsha orggiyaa; <sup>47</sup> issippetettaa yarshshuwaassi naa77u korimata, ichchashu dorssa orggeta, ichchashu gakkida deeshsha orggetanne issi laitta kumido ichchashu attuma dorssata. Da7u7eela na7ai Eliyasaafi ehiido imoi haggaa.

<sup>48</sup> Laappunta gallassi Efireema zaretu halaqai Amihuuda na7ai Elishamaa7i ba imuwaa ehiis.

<sup>49</sup> Elishamaa7i ehiido imoi erettida meezaanan wottin, issi kilo giraamenne baggaa deexxiya biraappe medhdhido issi keriyaanne hosppun xeetu giraame deexxiya biraappe medhdhido issi kuixaaruwaa, naa77aikka kattaa yarshshuwaassi yarshshanau liiqo xiillee zaitiyan munaqqidoogee kumidoogeeta; <sup>50</sup> qassi issi xeetanne tammu giraame deexxiya worqqaappe medhdhido ixaanai kumido shaatiyaa; <sup>51</sup> xuuggiyo yarshshuwaassi issi mirgguwaa, issi dorssa orggiyaanne, issi laitta kumido attuma dorssaa; <sup>52</sup> nagaraa yarshshuwaassi issi deeshsha orggiyaa; <sup>53</sup> issippetettaa yarshshuwaassi naa77u korimata, ichchashu dorssa orggeta, ichchashu gakkida deeshsha orggetanne issi laitta kumido ichchashu attuma dorssata. Amihuuda na7aa Elishamaa7a imoi haggaa.

<sup>54</sup> Hosppuntta gallassi Minaase zaretu halaqai Padaaxuura na7ai Gamaali7eeli ba imuwaa ehiis.

<sup>55</sup> Gamaali7eeli ehiido imoi erettida meezaanan wottin, issi kilo giraamenne baggaa deexxiya biraappe medhdhido issi keriyaanne hosppun xeetu giraame deexxiya biraappe medhdhido issi kuixaaruwaa, naa77aikka kattaa yarshshuwaassi yarshshanau liiqo xiillee zaitiyan munaqqidoogee kumidoogeeta <sup>56</sup> qassi issi xeetanne tammu giraame deexxiya worqqaappe medhdhido ixaanai kumido shaatiyaa; <sup>57</sup> xuuggiyo yarshshuwaassi issi mirgguwaa, issi dorssa orggiyaanne, issi laitta kumido attuma dorssaa; <sup>58</sup> nagaraa yarshshuwaassi issi deeshsha orggiyaa, <sup>59</sup> issippetettaa yarshshuwaassi naa77u korimata, ichchashu dorssa orggeta, ichchashu gakkida deeshsha orggetanne issi laitta kumido ichchashu attuma dorssata. Padaaxuura na7ai Gamaali7eeli ehiido imoi haggaa.

<sup>60</sup> Uddufuntta gallassi Biniyaama zaretu halaqai Giidi7oona na7ai Abidaani ba imuwaa ehiis.

<sup>61</sup> Abidaani ehiido imoi erettida meezaanan wottin, issi kilo giraamenne baggaa deexxiya biraappe medhdhido issi keriyaanne hosppun xeetu giraame deexxiya biraappe medhdhido issi kuixaaruwaa, naa77aikka kattaa yarshshuwaassi yarshshanau liiqo xiillee, zaitiyan munaqqidoogee kumidoogeeta; <sup>62</sup> qassi issi xeetanne tammu giraame deexxiya worqqaappe medhdhido, ixaanai kumido shaatiyaa; <sup>63</sup> xuuggiyo yarshshuwaassi issi mirgguwaa issi dorssa orggiyaanne, issi laitta kumido attuma dorssaa; <sup>64</sup> nagaraa yarshshuwaassi issi deeshsha orggiyaa; <sup>65</sup> issippetettaa yarshshuwaassi naa77u korimata, ichchashu dorssa orggeta, ichchashu gakkida deeshsha orggetanne, issi laitta kumido ichchashu attuma dorssata. Giidi7oona na7ai Abidaani ehiido imoi haggaa.

<sup>66</sup> Tammantta gallassi Daana zaretu halaqai Amishadaaya na7ai Ahi7eezeri ba imuwaa ehiis.

<sup>67</sup> Ahi7eezeri ehiido imoi erettida meezaanan wottin, issi kilo giraamenne baggaa deexxiya biraappe medhdhido issi keriyaanne hosppun xeetu giraame deexxiya biraappe medhdhido issi kuixaaruwaa, naa77aikka kattaa yarshshuwaassi yarshshanau liiqo xiillee, zaitiyan munaqqidoogee kumidoogeeta; <sup>68</sup> qassi issi xeetanne tammu giraame deexxiya worqqaappe medhdhido, ixaanai kumido shaatiyaa. <sup>69</sup> Xuuggiyo yarshshuwaassi issi mirgguwaa, issi dorssa orggiyaanne, issi laitta kumido attuma dorssaa; <sup>70</sup> nagaraa yarshshuwaassi issi deeshsha orggiyaa; <sup>71</sup> issippetettaa yarshshuwaassi naa77u korimata, ichchashu dorssa orggeta, ichchashu gakkida deeshsha orggetanne issi laitta kumido ichchashu attuma dorssata. Amishadaaya na7ai Ahi7eezeri ehiido imoi haggaa.

<sup>72</sup> Tammanne isiinintta gallassi Aseera zaretu halaqai Okiraana na7ai Paagi7eeli ba yarshshuwaa ehiis.

<sup>73</sup> Paagi7eeli ehiido imoi erettida meezaanan wottin, issi kilo giraamenne bag-gaa deexxiya biraappe medhdhido issi keriyaanne hosppun xeetu giraame de-exxiya biraappe medhdhido issi kuixaaruwaa, naa77aikka kattaa yarshshuwaassi yarshshanau liiqo xiillee, zaitiyan munaqqidoogee kumidoogeeta; <sup>74</sup> qassi issi xeetanne tammu giraame deexxiya worqqaappe medhdhido shaatiyaa, ixaanai kumidoogaa; <sup>75</sup> xuuggiyo yarshshuwaassi issi mirgguwaa, issi dorssa orggiyaanne issi laitta kumido attuma dorssaa; <sup>76</sup> nagaraa yarshshuwaassi issi deeshsha orggiyaa; <sup>77</sup> issippetettaa yarshshuwaassi naa77u korimata, ichchashu dorssa orggeta, ichchashu gakkida deeshsha orggetanne issi laitta kumido ichchashu attuma dorssata. Okiraana na7ai Paagi7eeli ehiido imoi haggaa.

<sup>78</sup> Tammanne naa77antta gallassi Nifttaaleema zaretu halaqai Enaana na7ai Ahiraa7i ba imuwaa ehiis.

<sup>79</sup> Ahiraa7i ehiido imoi erettida meezaanan wottin, issi kilo giraamenne bag-gaa de-exxiya biraappe medhdhido issi keriyaanne hosppun xeetu giraame deexxiya biraappe medhdhido issi kuixaaruwaa, naa77aikka kattaa yarshshuwaassi yarshshanau liiqo xiillee, zaitiyan munaqqidoogee kumidoogeeta, <sup>80</sup> qassi issi xeetanne tammu giraame deexxiya worqqaappe medhdhido issi shaatiyaa, ixaanai kumidoogaa; <sup>81</sup> xuuggiyo yarshshuwaassi issi mirgguwaa, issi dorssa orggiyaanne issi laitta kumido attuma dorssaa; <sup>82</sup> nagaraa yarshshuwaassi issi deeshsha orggiyaa, <sup>83</sup> issippetettaa yarshshuwaassi naa77u korimata, ichchashu dorssa orggeta, ichchashu gakkida deeshsha orggetanne issi laitta kumido ichchashu attuma dorssata. Enaana na7ai Ahiraa7i ehiido imoi haggaa.

<sup>84</sup> Yarshshiyooosai tiyettido wode, Israa7eelatu halaqati yarshshiyooosaa anjjanau ehiido imoti muleera hageeta: Biraappe medhdhido tammanne naa77u kereta, biraappe medhdhido tammanne naa77u kuixaarotanne worqqaappe medhdhido tammanne naa77u shaateta; <sup>85</sup> biraappe medhdhido issi issi keree issi kilo giraamenne bag-gaa deexxees; biraappe medhdhido issi issi kuixaroi hosppun xeetu giraame deexxees; biraappe merettida kereenne kuixaroi erettida meezaanan wottin, muleera laatanne hosppun kilo giraame keenaa deexxoosona. <sup>86</sup> Tammanne naa77u worqqa shaateti erettida meezaanan wottin issoi issoi issi xeetanne tammu giraame, muleera issi kilonne heezzu xeetu giraame deexxoosona. Etan ixaanai kumi uttiis. <sup>87</sup> Kattaa yarshshuwaara issippe xuuggiyo yarshshuwaassi ehiido mehee muleera tammanne naa77u mirggota, tammanne naa77u dorssa orggetanne issi laitta kumido tammanne naa77u attuma dorssata. Eti nagaraa yarshshuwaassi ehiido deeshsha orggeti muleera tammanne naa77a. <sup>88</sup> Eti issippetettaa yarshshuwaassi ehiido mehee muleera laatanne oiddu korimata, usuppun tammu dorssa orggeta, usuppun tammu gakkida deeshsha orggetanne issi laitta kumido usuppun tammu attuma dorssata. Yarshshiyooosai tiyettidoogaappe guyyiyan, anjuwaassi ehiido imoti hageeta.

<sup>89</sup> Muusee GODAARA haasayanau Xoossaa Dunkkaaniyaa geliyo wode, Maachchaa Taabootaa bollan de7iya atto giyo sohuwaa qum77uwaa bollan, naa77u kiruubetuppe gidduwaara GODAI haasayiyo cenggurssaa siyiis; siyidi ikka aara haasayiis.



<sup>1</sup> GODAI Muusa, <sup>2</sup> “Neeni Aaronassi hagaadan yaagada oda; ‘Neeni laappun xomppeta wottiyo wode xomppeti xomppiyaa wottiyo ballatuppe sintta baggaara de7iya heerata poo7issona’ yaaga” yaagiis.

<sup>3</sup> Yaagin i giidoogaadan Aarooni oottiis. GODAI Muusa azazidoogaadan, Aarooni xomppeta wottiyo ballatuppe sintta baggaara de7iya heerata poo7issanaadan oottidi, ballatun wottiis. <sup>4</sup> Xomppiyaa wottiyoogee garssa tohuwaappe bolla ciishshaara alleeqettida ballata xeeraa gakkanaassi qoxettida worqqaappe merettiis. Xomppiyaa wottiyo ballai GODAI Muusa bessido leemisuwaadan oosettiis.

### *Leewati GODAAYO Dummatidosona*

<sup>5</sup> Qassi GODAI Muusa, <sup>6</sup> “Hara Israa7eela asaa gidduwaappe Leewata ekkada, eta wogaadan geeshsha. <sup>7</sup> Neeni eta geeshshanau hagaadan ootta: geeshshiya haattaa ekkada eta araca; aracin eti bantta bolla ubbaa meedettona; bantta maayuwaakka meeconna; yaatidi eti wogaadan geeshsha gidana. <sup>8</sup> Hegaappe guyyiyan, eti mirgguwaa issuwaanne liiqo xiilliyaa zaitiyan munaqqidoogaa kattaa yarshshuwaassi ekkona; ekin neeni qassi naa77antto mirgguwaa nagaraa yarshshuwaassi ekka. <sup>9</sup> Yaatada Leewata Xoossaa Dunkkaaniyaa sintti eha; ehaada Israa7eela asaa maabaraa ubbaa shiishsha. <sup>10</sup> Neeni Leewata GODAA sinttau ehin, Israa7eela asai eta bolli bantta kushiya wotona. <sup>11</sup> Leewati GODAA oosuwaa oottanau giigana mala, Aarooni Israa7eela asaappe Leewata wuxaawuxiyo yarshsho oottidi, GODAA sintti shiishsho.

<sup>12</sup> “Leewati bantta kushiya mirggotu huuphiyan wotona; issuwaa nagaraa yarshsho oottada, issuwaa qassi Leewati atto geetettana mala, xuuggiyo yarshsho oottada GODAASSI yarshsha. <sup>13</sup> Leewata Aaroonanne a attuma naatu aawatettaa garssan wotta; yaatada eta wuxaawuxiyo yarshsho oottada, GODAA sintti shiishsha. <sup>14</sup> Hegaadan oottada Leewata hara Israa7eela asaappe dummaya; dummayobare Leewati tabaa gidana.

<sup>15</sup> “Neeni Leewata geeshshidoogaappenne wuxaawuxiyo yarshsho oottada shiishshidoogaappe guyyiyan, Xoossaa Dunkkaaniyan bantta oosuwaa oottanau yona. <sup>16</sup> Israa7eela asaa gidduwaappe eti taayyo muleera imettidosona; Israa7eela maccaasaappe yelettida baira attumaageetu ubbaa gishshaa taani Leewata taayyo ekkaas. <sup>17</sup> Israa7eela asaa gidduwan baira yelettidabi asa gidin, mehe gidinkka ubbai tabaa. Taani Gibxxe biittan baira ubbaa worido gallasan, eta taayyo dummayaas. <sup>18</sup> Israa7eela baira attumaageetu ubbaa gishshaa taani Leewata ekkaas. <sup>19</sup> Israa7eela asaa ubbaa gidduwaappe taani Leewata Aaroonayyoonne Aarona attuma naatuyyo imo oottada immaas. Israa7eela asai Xoossaa Dunkkaaniyaa shiiqiyo wode, boshai eta bochchenna mala, Leewati Israa7eela asaa gishsha Xoossaa Dunkkaaniyan bantta oosuwaa oottonanne eta gishshaa atto geetettana” yaagiis.

<sup>20</sup> GODAI Muusa Leewata dummayanau azazidoogaadan Muusee, Aarooninne Israa7eela asaa maabarai ubbai oottidosona. <sup>21</sup> Leewati nagaraappe banttana geeshshidosona; bantta maayuwaakka meeccidosona. Meeccin Aarooni eta wuxaawuxiyo yarshsho oottidi, GODAA sintti shiishshiis; eta geeshshanau eta nagaraa atto giis-siis. <sup>22</sup> Hegaappe guyyiyan, Leewati Aaroonanne Aarona attuma naatu aawatettaa garssan, Xoossaa Dunkkaaniyaa gidon bantta oosuwaa oottanau yiidosona. GODAI Muusa Leewata dummayanau azazidoogaadan eti oottidosona.

<sup>23</sup> Qassikka GODAI Muusa hagaadan yaagiis; <sup>24</sup> “Hagee Leewata xeelliyaa wogaa: laittai laatamanne ichchashaanne hegaappe bollaara de7iya attumaageeti oosuwaa oottanau Xoossaa Dunkkaaniyaa yona. <sup>25</sup> SHin eta laittai ishatamaa gidiyo wode eti bantta oosuwaappe xurataa kiyona; kiyi simmidi naa77antto oottoopona. <sup>26</sup> Eti Xoossaa Dunkkaaniyan oottiya bantta ishantta ootti maaddana giikko maaddonappe attin, eti banttarkka ai oosonne oottoopona. Simmi neeni Leewata oosuwaa hagaadan ootissaasa” yaagiis.

## 9

*Naa77antto Paasikaa Baalaa*

<sup>1</sup> Israa7eela asai Gibxxeppe kiyido naa77antta laittan koiro aginan Siinaa Bazzuwan GODAI Muuseyyo hagaadan yaagidi haasayiis; <sup>2</sup> “Israa7eela asai Paasikaa Baalaa keerido gallassan bonchcho. <sup>3</sup> Ha aginan tammanne oiddantta gallassan, a keerido wode, awai wullana haniyo wode, a wogaa ubbaadaaninne a azazo ubbaadan bonchcho” yaagiis. <sup>4</sup> Yaagin Muusee Israa7eela asai Paasikaa Baalaa bonchchana mala, etayyo yootiis. <sup>5</sup> Koiro aginaayyo tammanne oiddantta gallassi, awai wullana haniyo wode Siinaa Bazzuwan eti Paasikaa Baalaa bonchchidosona. Israa7eela asai GODAI Muusa azazidoogaadan ubbabaa oottiis.

<sup>6</sup> SHin etappe amaridaageeti haiqqida asa ahaa bochchidi tunido gishshau, he gallassi Paasikaa Baalaa bonchchanau danddayibookkona. Hega gishshau, eti Muusekkonne Aaronakko he gallassi yiidi, <sup>7</sup> Muusa, “Nuuni haiqqida asa ahaa bochchido gishshau tunida; shin keerido wodiyan hara Israa7eela asaara GODAAYYO yarshshuwaa shiishshiyogaa nuuni aissi digettiyoonii?” yaagidosona.

<sup>8</sup> Yaagin Muusee eta, “GODAI inttebaa taassi azaziyoobaa taani siyana gakkanaassi intte takkishshite” yaagiis.

<sup>9</sup> Hegaappe guyyiyan GODAI Muusa, <sup>10</sup> “Neeni Israa7eela asaa hagaadan yaaga; ‘Intteppe woikko intte zaretuppe ooninne ahaa bochchidi tunikko, woikko manddaridabaa gidikko, i GODAAYYO Paasikaa Baalaa bonchcho; <sup>11</sup> naa77antto aginan tammanne oiddantta gallassi awai wullana haniyo wode Paasikaa Baalaa bonchcho. Bonchchiiddi Paasikaa dorssaa irshshoi gelibeenna oittaaranne camo bonccuwaara mo. <sup>12</sup> Sa7ai wonttanaashin he dorssaappe aibanne ashshoppo; qassi a meqettaappekka issuwaanne menttoppo. Paasikaa Baalau a woga ubbaa ootto. <sup>13</sup> SHin manddaribeenna geeshsha asi Paasikaa bonchchennan ixkikko, hegaappe sinttau i ta asaa giddoppe bohetto. Aissi giikko, GODAA yarshshuwaa keerido wodiyan i shiishshibeenna. He asi ba nagarai ehiido metuwaa ekkanau bessees.

<sup>14</sup> “ ‘Intte gidduwan de7iya bete asi Paasikaa Baalaa GODAAYYO bonchchana koyikko, Paasikaa wogaadan bonchcho. Betiyaukka dere asaukka issi mala wogai de7o’ yaaga” yaagiis.

*Tamaadan Poo7ida SHaaraa*

<sup>15</sup> Xoossaa Dunkkaanee tolettido gallassi shaarai Xoossaa Dunkkaaniyaa maayiis; omarssaappe doommidi, wonttana gakkanaassi Xoossaa Dunkkaaniyaappe bollaara de7iya shaarai tama milatees. <sup>16</sup> Hegaadan ubba wode gallassi gallassi shaarai maayees; qammi qammi he shaarai tamadan poo7ees. <sup>17</sup> He shaarai Xoossaa Dunkkaaniyaa bollaappe denddiyo wode audenne Israa7eelati bantta dunkkaanidosappe denddoosona; qassi he shaarai wodhdhiyo ai sohuwaaninne Israa7eelati dunkkaanoosona. <sup>18</sup> Israa7eelati GODAA azazuwan denddoosona; hegaadankka, GODAA azazuwan dunkkaanoosona. SHaarai Xoossaa Dunkkaaniyaa bollan gam77iyo wode ubban bantta dunkkaanidosan gam77oosona. <sup>19</sup> SHaarai Xoossaa Dunkkaaniyaa bollan daro gallassaa gam77ikko, Israa7eelati GODAA azazuwaa naagoosonappe attin, awanne bookkona. <sup>20</sup> Issitoo issitoo shaarai Xoossaa Dunkkaaniyaa bollan amarida gallassaa gam77ees. GODAA azazuwan eti dunkkaanoosona; qassi hegaadankka, GODAA azazuwan eti denddoosona. <sup>21</sup> Issitoo issitoo shaarai omarssaappe wonttana gakkanaashin xalaalaa gam77ees; wonttin shaarai denddiyo wode etikka denddoosona. Gallassa gidin, qamma gidin, shaarai denddiyo wode etikka denddoosona. <sup>22</sup> SHaarai Xoossaa Dunkkaaniyaa bollan naa77u gallassaa gam77in, woikko issi aginaa, woikko issi laittaa gam77in, Israa7eelati bantta dunkkaanidosan gam77oosonappe attin bookkona. SHin

shaarai dendiyo wode etikka denddoosona. <sup>23</sup> Eti GODAA azazuwan dunkkaanoosonanne qassi GODAA azazuwan denddoosona; GODAI Muuse baggaara azazidoogaadan, eti GODAA azazuwaa naagidosona.

## 10

### *Biraappe Oosettida Naa77u Xurumbbata*

<sup>1</sup> GODAI Muusa hagaadan yaagiis; <sup>2</sup> “Naa77u xurumbbata biraappe qoxxada ootta; yaatada asaa shiiquwau xeeganaunne qassi dunkkaanidosappe denddanau denttettanaadan punna. <sup>3</sup> Ha naa77u xurumbbati punettiyo wode, asai ubbai Xoossaa Dunkkaaniyaa penggee neekko shiiqo. <sup>4</sup> SHin issi xurumbba xalaalai punettikko, Israa7eela zareta halaqati ne sintti shiiqona. <sup>5</sup> Neeni xurumbbaa xoqqu oottada punniyo wode Xoossaa Dunkkaaniyaappe arshsho baggaara dunkkaanida zareti denddona. <sup>6</sup> Xurumbbaa naa77antto xoqqu oottada punniyo wode, tohossa baggaara dunkkaanida zareti denddona. Xurumbbai xoqqu gi punettiyoogee denddanau malaata gido. <sup>7</sup> Yaa7au asaa shiishshanau xurumbbaa punna; shin cenggurssaa xoqqu oottada punnoppa. <sup>8</sup> Aaroonaa naati qeeseti xurumbbaa punnona. Hagee neeyyoonne yiya yeleta ubbau merina woga gido.

<sup>9</sup> “Intte biittan woraajjiya intte morkkiyaara intte olettanau kiyiyo wode, he xurumbbata xoqqu oottidi punnite. Hegan GODAI intte Xoossai inttena he wode hassayidi, intte morkkiyaappe inttena ashshana. <sup>10</sup> Hegaadankka, qassi intte ufaittiyo gallassi, baalaa bonchchanau intte keerido gallassinne aginai xeeriyo baalan, intte xuuggiyo yarshshiyo wodenne intte issippetettaa yarshshuwaa yarshshiyo wode he xurumbbata punnite; hegee Xoossaa sinttan inttena hassayissiyaagaa gidana. Taani GODAA, intte Xoossaa” yaagiis.

### *Israa7eela Asai Siinaa Bazzuwaappe Denddiis*

<sup>11</sup> Naa77antta laittan naa77antta aginan laatamannta gallassi, shaarai Xoossaa Dunkkaaniyaa bollappe denddiis. <sup>12</sup> Hegaappe guyyiyan, Israa7eela asai Siinaa Bazzuwaappe denddiis; shaarai Paaraana giyo bazzuwaa gakkidi wodhdhiis. <sup>13</sup> Eti ha koiro buussau GODAI Muuse baggaara azazidoogaadan denddidosona.

<sup>14</sup> Yihudaa zaretuura dunkkaanida baggai bantta armmaa oiqqidi denddiis. Yihudaa zaretu halaqai Aminadaaba na7aa Na7asoonaa; <sup>15</sup> Yisaakoora zaretu halaqai Xu7aara na7aa Nataani7eela; <sup>16</sup> Zaabiloonaa zaretu halaqai Heloonaa na7aa Eli7aaba.

<sup>17</sup> Hegaappe guyyiyan, Xoossaa Dunkkaaniyaa shoddin, Gershshoonaa yaratinne Maraara yarati tookkidi denddidosona.

<sup>18</sup> Kaallidi Roobeela zaretuura dunkkaanida baggai bantta armmaa oiqqidi denddiis. Roobeela zaretu halaqai SHade7uura na7aa Eliixuura; <sup>19</sup> Simoonaa zaretu halaqai Xuriishadaaya na7aa SHalumi7eela; <sup>20</sup> Gaada zaretu halaqai Da7u7eela na7aa Eliyasaafa.

<sup>21</sup> Hegaappe guyyiyan, Qahaata yarati geeshsha miishshata tookkidi denddidosona. Eti gakkanaappe kasetidi, Xoossaa Dunkkaanee toletti uttiis.

<sup>22</sup> Kaallidi Efireema zaretuura dunkkaanida baggai ba armmaa oiqqidi denddiis. Efireema zaretu halaqai Amihuuda na7aa Elishamaa7a; <sup>23</sup> Minaase zaretu halaqai Padaaxuura na7aa Gamaali7eela; <sup>24</sup> Biniyaama zaretu halaqai Giidi7oonaa na7aa Abidaana.

<sup>25</sup> Wurssettan, ha cita ubbaayyo guyye baggan naagiya Daana zaretuura dunkkaanida baggai ba armmaa oiqqidi denddiis. Daana zaretu halaqai Amishadaaya na7aa Ahi7eezera; <sup>26</sup> Aseera zaretu halaqai Okiraana na7aa Paagi7eela; <sup>27</sup> Nifttaaleema zaretu halaqai Enaana na7aa Ahiraa7a. <sup>28</sup> Israa7eela asai ba baggan baggan denddidi biyo maarai hagaadaana.

<sup>29</sup> Muusee Midiyaama asa gidiya ba bolluwaa Yatiro na7aa Hobaaba, “Nuuni GODAI, ‘Taani intteyyo immana’ giido sohuwaa boos; GODAI Israa7eelayyo lo77obaa oottana giido gishshau, neeni nunaara hindda. Nuuni neeyyo lo77obaa oottana” yaagiis.

<sup>30</sup> Yaagin Hobaabi, “CHii, taani biikke; taani ta biitti ta asaakko baana” yaagiis.

<sup>31</sup> Yaagin Muusee a, “Hayyanaa, nuna yeggada boopparkkii! Bazzuwan nuuni dunkkaanau bessiyaasaa neeni eraasa; neeni nu biyo ogiyaa nuna kaalettanaukka danddayaasa. <sup>32</sup> Neeni nunaara biikko, GODAI nuuyyo immiyo anjuwaa ubbaa nuuni nenaara shaakkana” yaagiis.

<sup>33</sup> Yaatin eti GODAA deriyaappe denddidi, heezzu gallassa keena ogiyaa biidosona. GODAA Maachchaa Taabootai eti shemppiyo sohuwaa demmanau he heezzu gallassan etappe sinttau biis. <sup>34</sup> Eti dunkkaanidosappe dendiyo wode ubban, GODAA shaarai gallassi gallassi etappe bollaara de7ees. <sup>35</sup> Taabootai dendiyo wode ubban Muusee, “Abeet GODAU, dendda! Ne morkketi laalettona; Nena ixxiyaageetakka ne sinttappe baqatona” yaagees. <sup>36</sup> Taabootai shemppiyo wode ubban Muusee, “Abeet GODAU, ha daro sha7an qoodettiya Israa7eela asaakko neeni simma” yaagees.

## 11

### *GODAAPPE Yiida Tamaa*

<sup>1</sup> Asai ba metuwaayyo GODAA bolli zuuzummiis; eti zuuzummishin GODAI siyidi, hanqquwaa eexxi kiyiis. Yaatin GODAA tamai eta gidduwan eexxidi, eti dunkkaanidosayyo issi issi gaxaa baggaa miis. <sup>2</sup> Yaatin asai Muuseyyo waassin, Muusee GODAA woossiis. Woossin tamai to7iis. <sup>3</sup> GODAA tamai eta gidduwan eexxido gishshau, he sohoi Tabi7eera<sup>1</sup> geetetti xeesettiis.

### *Muusee Laappun Tammu Halaqata Dooriiis*

<sup>4</sup> Israa7eelatuura de7iya dumma dumma dere asai hara qumaa keehi amottiis. Israa7eela asaikka qassi hagaadan yaagidi yeehuwaa doommiis; “Laa nuuni asho auppe demmanee? <sup>5</sup> Nuuni Gibxxe biittan miishsha qanxxennan coo miyo moliyaa hassayeettees; qassi qayye miyo paranjja lehiyaa, zolddo leehe milatiya mal77iya haattai kumido meelooniyaa, adussa paranjja sunkkuruutuwaanne tuummuwaa has-sayeettees. <sup>6</sup> SHin ha77i nu qooree gorddettiis; nu aifeekka ha mannaappe attin, harabaa ainne be7enna” yaagidosona.

<sup>7</sup> Mannai deebbuwaa aifiyaa milatees; a merai booxxiya adil77e ciishshaa milatees.

<sup>8</sup> Asai yuuyi yuuyi a qorees; qoridi woxan gaacces, woikko udulan caddees; eti a otuwan penttissidi, bashiyan komppoosona. I zaitiyan munaqqidi uukkido oittaadan mal77ees. <sup>9</sup> Qammi dunkkaanidosan xaazai wodhdhiyo wode, mannai aara wodhdhees.

<sup>10</sup> Asai ba dunkkaaniyaa penggen penggen yeekkishin, Muusee siyiis. GODAA hanqqoi eexxi kiyido gishshau, Muusee un77ettiis. <sup>11</sup> Hegaa gishshau, Muusee GODAA hagaadan yaagidi oichchiis; “Neeni ta bolli ne ashkkaraa bolli aissi ha metuwaa ehaadii? Neeni tanan aissi ufaittabeikkii? Neeni ha asaa ubbaa toohuwaa ta bolli aissi wottadii? <sup>12</sup> Ha asaa ubbaa taani shahaaridanaayye? Woikko eta taani yelidanaa? ‘Neeni eta maizza aawatuyyo, “Taani intteyyo immana” gaada caaqqido biittaa gattanaassi, naata dichchiyaara xanttiyo na7aa ba qesiyan idimmiyoogaadan, neeni eta ne qesiyan idimma’ yaagada taayyo aissi yootai? <sup>13</sup> Ha asau ubbau taani asho auppe demmanee? Eti tana, ‘Miyo asho nuuyyo imma’ yaagidi yeekkoosona. <sup>14</sup> Taani ha asaa ubbaa tarkka tookkana danddayikke; toohoi tau keehi deexxees. <sup>15</sup> Simmi neeni tana hagaadan metootanaadan oottanaagaappe taayyo qarettada tana ha77i wora baya; yaatikko, taani metuwaappe shemppana” yaagiis.

<sup>1</sup> 11:3 Tabi7eera: Ha sunntaa birshshettaa “Eexxiis” giyoogaa.



<sup>16</sup> GODAI Muusa, “Israa7eela cimatusuppe kaalettiyaageetanne halaqata gidiya, neeni eriyo laappun tammu cimata taayyo shiishsha; eti nenaara yan eqqana mala, Xoossaa Dunkkaaniyaakko, eta neeni eha. <sup>17</sup> Taani duge wodhdhada nenaara yan haasayana; taani nenan de7iya Ayyaanaappe ekkada, he Ayyaanaa eta bolli wottana. Nenei nerikka tookkenna mala, eti asaa tohuwaa tookkidi, nena maaddana.

<sup>18</sup> “Nenei asaasi hagaadan gaada yoota, ‘Wonttoyoy inttena geeshshite; yaatidi intte ashuwaa maana. Intte, “Laa nuuni asho auppe demmanee? Nuuyyo Gibxxe biittan sa7ai lo77o shin!” yaagidi yeekkidoogaa GODAI siyiis. GODAI ashuwaa ha77i intteyyo immana; immin intte maana. <sup>19-20</sup> Intte gidduwan de7iya GODAA intte karido gishshaunne intte, “Nuuni Gibxxe biittaappe aissi kiyidonii?” yaagidi a sinttan yeekkido gishshau, intte issi gallassa, woikko naa77u gallassa, woikko ichchashu gallassa, woikko tammu gallassa, woikko laatamu gallassa xalaalaa asho meekketa; shin intteyyo siiriyaara kiyana gakkanaassi, inttena salettana gakkanaassi, issi agina kumettaa intte asho maana’ yaaga” yaagiis.

<sup>21</sup> SHin Muusee GODAA, “Be7a, taani usuppun xeetu sha7u tohuwaasaa gidduwan de7ais; neeni, ‘Issi agina kumettaa eti maanau etayyo taani asho immana’ gaasa. <sup>22</sup> Miizzaa wudiyaanne dorssaa wudiyaa etau shukkin kalissanee? Abban de7iya mole ubbaa shiishshiyaabaa gidyaakko, etayyo gidanee?” yaagiis.

<sup>23</sup> Yaagin GODAI Muusa, “GODAA kushee qantteeyye? Taani neeyyo giyoobai tumakkonne worddokko neeni ha77i be7ana” yaagiis.

<sup>24</sup> Yaagin Muusee kare kiyidi, GODAI giidobaa asaayyo yootiis. I Israa7eela cimatusuppe laappun tammu asaa shiishshidi, Xoossaa Dunkkaaniyaa yuushuwan essiis. <sup>25</sup> Essin GODAI shaaran duge wodhdhidi, aara haasayyiis; yaatidi a bollan de7iya Ayyaanaappe ekkidi, he laappun tammu cimatu bolli wottiis. Ayyaanai eta bollan shemppido wode, eti hananabaa yootidosona. SHin hegaappe guyyiyan, zaarettidi hananabaa yootibookkona.

<sup>26</sup> He laappun tammu cimatuura mazggafan xaafettida asati Elddaadanne Medaada giyo naa77ati dunkkaanidosan attidosona; attidi Xoossaa Dunkkaaniyaakko yi-bookkona; shin eta bollikka Ayyaanai wodhdhin, dunkkaanidosan hananabaa yootidosona. <sup>27</sup> Issi wodallai woxxi yiidi, Muusa, “Elddaadinne Medaadi dunkkaanidosan hananabaa yootosona” yaagidi yootiis.

<sup>28</sup> Yootin ba yelagatettaappe doommidi, Muusa maaddiya Nawe na7ai Yaasu Muusa, “Ta godau Muusee, neeni eta teqqa” yaagiis.

<sup>29</sup> SHin Muusee a, “Ta gishshataa ne mishettai? GODAA asai ubbai hananabaa yootiyaabaanne GODAI ba Ayyaanaa eta bolli wottiyaabaa gideerenneeshsha!” yaagiis.

<sup>30</sup> Hegaappe guyyiyan, Muuseenne Israa7eela cimati dunkkaanidosaa simmidosona.

<sup>31</sup> Hegaappe guyyiyan, GODAI carkkuwaa denttin, abbaa baggappe kuraachchuwaa asai dunkkaanidosaa ubbaa yuushuwaakko carkkoi ehiis; ehin he kafoti sa7aa doonaara biittaappe pude naa77u wara keenan paallidosona. Paalli yiidi eti dunkkaanidosaa ubbaappe gaxaara, issi gallassa oge keenaa sa7an uttididosona. <sup>32</sup> He gallassa ubban, he qamma ubbaaninne wonttetta gallassa ubban asai kare kiyidi, ha kuraachchota oiqqidi shiishshiis; etappe ooninne issi sha7u kilo giraameppe guutaa shiishshibeenna. Eti hegaappe guyyiyan, dunkkaanidosaa yuusho ubban melissanau miccididosona. <sup>33</sup> SHin ashoi biron eta achchan de7ishin, eti coommidi mittennan de7ishin, GODAA hanqqoi asaa bolli eexxi kiyiis; yaatin GODAI asaa wolqqaama boshan shociis. <sup>34</sup> Yaatin he sohoi Amuwaa Duufuwaa geetetti sunttettiis; aissi giikko, ashuwaa amottida asaa eti he sohuwan moogidosona. <sup>35</sup> Asai hegaappe denddidi Haxeroota giyoosaa biidi, yan dunkkaaniis.



## 12

### *Miiriyaamanne Aarooni Muusa Boridosona*

<sup>1</sup> Muusee Toophphiyaa biittaa maccaasiyo ekkiiis. I ekkido Toophphiyaa maccaasee gishshau, Miiriyaamanne Aarooni Muusa boridosona. <sup>2</sup> Eti, “GODAI Muuse bagga xalaalaa haasayideeeye? Qassi i nu baggaara haasayibeenneeye?” yaagidosona. Yaagin GODAI hegaa siyiis. <sup>3</sup> Muusee biittan sa7an ubban de7iya asaa ubbaappe aadhdhiya ashkke asa.

<sup>4</sup> GODAI sohuwaara Muusessi, Aaroonassinne Miiriyaamissi, “Intte heezzaikka Xoossaa Dunkkaaniyaakko kiyite” yaagiis; yaagin eti heezzaikka kiyidosona. <sup>5</sup> Kiyin GODAI shaaraa tuusan duge wodhdhiis; wodhdhidi Xoossaa Dunkkaaniyaa penggen eqqidi, Aaroonanne Miiriyaamo xeesiis. Eti naa77aikka a sintti shiiqin, <sup>6</sup> i eta, “Ta yootiyooгаа siyite: Intte gidduwan hananabaa yootiyaagee de7ikko, taani GODAI tana ayyo ajjuutan qonccissais; taani ayyo aimuwan yootais. <sup>7</sup> SHin ta ashkkaraa Muuseera hegaadan gidenna; i ta keetta ubban ammanettidaagaa. <sup>8</sup> Taani Muuseera sintta baazzan haasayaisippe attin, leemisuwana haasayikke. I ta meraa be7ees. Yaatin ta ashkkaraa Muusa boranau intte aissi yayyibeekketii?” yaagiis.

<sup>9</sup> GODAA hanqqoi eta bolli eexxi kiyiis; kiyin GODAI biis. <sup>10</sup> SHaarai Xoossaa Dunkkaaniyaa bollaappe denddido wode, Miiriyaama hanttaara gogaa harggiyan mulxxu gaada booxxaasu. Aarooni ikko simmidi xeelliyo wode, hanttaara gogaa harggiyan ohattidaaro be7iis. <sup>11</sup> Yaatin i Muusa, “Hai ta godau, nuuni eeyyatetan oot-tido nagaraayyo nuna qaxxayoppa. <sup>12</sup> Ba aayee uluwaappe kiyiyo wode, a ashuwaappe baggai meetettiichchin, haiqqiichchidi yelettida gacino na7a mala gidopparkkee” yaagiis.

<sup>13</sup> Yaagin Muusee, “Hai Xoossau, o pattarkkii!” yaagidi GODAAYYO waassiis.

<sup>14</sup> Waassin GODAI Muusa, “I aawai i som77uwan cuuchchaa cuchchidabaa gidiyaakko, laappun gallassaa a yeellaa maayada uttana gidekkeeye? Hegaa gishshau, neeni o laappun gallassaa dunkkaanidosaappe gaxa baggaara dumma sohuwan utissa; hegaappe guyyiyan, simmada yu” yaagiis. <sup>15</sup> Yaatin Miiriyaama asai dunkkaanidosaappe gaxi kiyada laappun gallassaa uttaasu. A simmana gakkanaassi asai baanau denddibeenna. <sup>16</sup> Hegaappe guyyiyan, asai Haxeroota giyoosaappe denddidi, Paaraana Bazzuwan dunkkaaniis.

## 13

### *Kanaane Biittaa Wochchanau Biida Asata*

<sup>1</sup> GODAI, Muusa, <sup>2</sup> “Taani Israa7eelatuyyo immiyo Kanaane biittaa wochchana mala, amarida asa kiitta; eta zare ubbaappe issi issi halaqaa kiitta” yaagiis. <sup>3</sup> Yaagin Muusee GODAA azazuwan Paaraana Bazzuwaappe eta kiittiis. Eti ubbaikka Israa7eela asaa halaqata. <sup>4</sup> Eta sunntai hagaappe kaallidi xaafettidaagaa:

Zariyaa Halaqaa Roobeela Zakkuura na7aa SHaamu7a

<sup>5</sup> Simoona Hooraa na7aa SHafaaxa

<sup>6</sup> Yihudaa Yifune na7aa Kaaleeba

<sup>7</sup> Yisaakoora Yooseefa na7aa Yigi7aala

<sup>8</sup> Efireema Nawe na7aa Hoshee7a

<sup>9</sup> Biniyaama Raafu na7aa Palxxa

<sup>10</sup> Zaabiloona Sooda na7aa Gaddi7eela

<sup>11</sup> Yooseefa na7aa Minaasa Suusa na7aa Gadda

<sup>12</sup> Daana Gamaalla na7aa Ami7eela

<sup>13</sup> Aseera Mikaa7eela na7aa Satuura

<sup>14</sup> Niftaaleema Waafisa na7aa Naahiba

<sup>15</sup> Gaada Maaka na7aa Ge7u7eela

<sup>16</sup> He biittaa wochchana mala, Muusee kiittido asatu sunttai hagaappe qommoora de7iyaagaa. Muusee Nawe na7aa Hoshee7a sunttaa Yaasa yaagidi sunttiis.

<sup>17</sup> Eti Kanaane biittaa wochchana mala, Muusee eta kiittiyo wode hagaadan yaagiis; “Hagaappe Neegeeba Bazzuwaa pude kiyidi, yaappe huuphessa baggan de7iya gezze biittaa biite. <sup>18</sup> Biidi biittai ai mala biittakonne be7ite; he biittan de7iya asai minokkonne laafakko, guuttakonne darokko, <sup>19</sup> eti de7iyo biittai lo77okko iitakko, eti de7iyo katamainne ai mala katamakko, gimbbiyan diretti uttidaakko direttibeennaakko, <sup>20</sup> biittai ai mala araddakko ladakko, he biittan mitti de7iyaakko bainaakko be7ite. Minnite! He biittan mokkidabaa aifiyaappe ekkennan yooppite” yaagiis. He wodee woine turai koiro aifiyaa aifiyo wode.

<sup>21</sup> Yaagin eti pude kiyidi, Xiina giyo bazzuwaappe doommidi, biidi Hamaata Pinuwaa matan de7iya Rahooba gakkanaassi he biittaa wochchidosona. <sup>22</sup> Neegeeba Bazzuwaa pude kiyidi, Kebroona gakkidosona; hegan Ahimaana, SHeshaayanne Talmmaaya geetettiya Anaage zareti de7oosona. Kebrooni Gibxxen de7iya Xo7aane katamaappe laappun laittaa kaseti keexettiis.

<sup>23</sup> Hegaara kanttidi, eti Eshkkoola giyo zanggaaraa biidi gakkido wode, woine tura issuwaappe issi wurccuwaara de7iya issi tashiyaa qanxxidosona; qanxxidi etappe naa77ai kasuwaa gidduwan gelissi tookkidosona. Hegaara roomaaniyaanne balasiyaa giyo mittatu aifiyaa ehiidosona. <sup>24</sup> Israa7eela asati hegaappe qanxxido woine turaa wurccuwaa gishshau, he sohuwaa Eshkkoola Zanggaaraa giidi xeesidosona.

<sup>25</sup> Eti he biittaa wochchiiddi, oitamu gallasaappe guyyiyan simmidosona; <sup>26</sup> simmidi Paaraana Bazzuwan Qaadeesa giyoosan de7iya Muusekko, Aaroonakkonne Israa7eela asaa maabaraa ubbaakko yiidosona. Yiidi bantta be7idobaa etaunne asa ubbau yootidosona; he biittan aifiya aifiyaakka eta bessidosona. <sup>27</sup> Eti Muuseyyo hagaadan yaagidi yootidosona; “Neeni nuna kiittido biittaa nuuni biida; he biittan maattainne eessai goggees. An aifiya aifiyaakka hagua be7a. <sup>28</sup> SHin he biittan de7iya asai wolqqaama; eta katamaikka gimbbe dirssan diretti uttidaagaanne gita. Nuuni qassi Anaage zareta yan be7ida. <sup>29</sup> Neegeeba Bazzuwan Amaaleeqa asati de7oosona; gezziyan Hiiteti, Yaabusatinne Amooreti de7oosona; qassi Kanaaneti Meediteraane Abbaa doonaaninne Yorddaanoosa SHaafaa xanxxan de7oosona” yaagidosona.

<sup>30</sup> Yaagin Kaaleebi asaa Muuse sinttan co77u giissidi, “Nuuni tumu xoonanau dand-dayiyo gishshau, pude ha77i kiyidi, he biittaa olidi ane oiqqoos” yaagiis.

<sup>31</sup> SHin Kaaleebaara pude biida asati, “He biittaa asai nuuppe minniyo gishshau, nuuni eta xoonanau danddayokko” yaagidosona. <sup>32</sup> Eti yuuyi wochchido biittaabaa Israa7eela asaayyo hagaadan giidi, iita oduwaa odidosona, “Nuuni wochchido biittai banan de7iya asaakka miyaagaa; asai ubbaikka keehi adussa. <sup>33</sup> Nuuni wogga adussa asatu yara gidiya Anaage zareta yan be7ida; nuuni nu aifiyan nuna xeelliyo wode gumbburo milatida; qassi nuuni eta aifiyan hegaakka mala” yaagidosona.

## 14

### *Asaa Ubbaa Zuuzunntaa*

<sup>1</sup> He gallasa qammi maabarai ubbai bantta qaalaa xoqqissidi yeekkidosona.

<sup>2</sup> Israa7eela asai ubbai Muuse bollinne Aaroon bolli zuuzummidosona. Maabarai kumettai eta, “Nuuni Gibxxe biittan de7iiddi haiqqidabaa gidorkkonii! Woikko nuuni ha bazzuwan haiqqidabaa gidorkkonii! <sup>3</sup> Bisuwan nuna wori wurssanau GODAI ha biitti nuna aissi ehii? Nu maccaasatinne nu naati omoodettana. Hegaappe guyye Gibxxe biitti simmiyoogee nuuyyo kehenneeyye?” yaagidosona. <sup>4</sup> Qassi eti issai issuwaa, “Nuuni kaalettiyaabaa dooridi, guyye Gibxxe simmoos” yaagidosona.

<sup>5</sup> Yaagin Muuseenne Aarooni hegan shiiqida Israa7eela asaa maabaraa ubbaa sinttan som77uwaa sa7an gattidi gufannidosona. <sup>6</sup> He biittaa wochchida asatu giddoppe Nawe

na7ai Yaasunne Yifune na7ai Kaaleebi bantta maayuwaa pooshshidosona. <sup>7</sup> Pooshshidi Israa7eela asaa maabaraa ubbaayyo, “Nuuni kantti kiyidi wochchido biittai keehi daro lo77o. <sup>8</sup> GODAI nunan ufaiittiyaabaa gidikko, maattainne eessai goggiyo he biittau nuna i gelissana; he biittaa nuuyyo i immana. <sup>9</sup> Hegaa gishshau, GODAA bolli makkala makkaloppite. He biittaa asau yayyoppite; eti nuuyyo haatta ushshakka gakkokkona. Etau ambboomiyaabi baawa; shin GODAI nunaara de7ees. Intte etayyo yayyoppite!” yaagidosona. <sup>10</sup> Yaagin maabarai ubbai eta shuchchan caddanau denddiis.

He wode GODAA bonchchoi Xoossaa Dunkkaaniyan Israa7eela asa ubbau qoncciiis. <sup>11</sup> GODAI Muusa, “Ha asai aude gakkanaassi tana karanee? Taani eta gidduwan oottido malaata ubbaa be7iiddi, aude gakkanaassi eti tanan ammanennan ixxanee? <sup>12</sup> Taani eta boshan shocada xaissana; yaatada taani nena etappe dariyaanne minniya kawotettaayyo aawa oottana” yaagiis.

### *Muusee Asaa Ubbaa Gishshau Gaannatidi Woossiis*

<sup>13</sup> Yaagin Muusee GODAA hagaadan yaagidi woossiis; “Neeni ne wolqqan ha asaa Gibxxeppe pude kessidoogaa eriya Gibxxeti haga siyikko, eti woigane? <sup>14</sup> Eti ha biittan de7iyaageetuyyookka hegaa odana. Abeet GODAU, neeni ha asaa gidduwan de7iyooogaa eti siyidosona. Abeet GODAU, nuuni nena be7idoogaa eti eridosona; ne shaarai etappe bollaara takkiyoogaanne gallassi shaaraa tuussan, qammi tamaa tuussan neeni eta sinttan biyoogaa be7idosona. <sup>15</sup> Ha77i neeni ha asaa ubbaa issi kuttan woriyaabaa gidikko, ne kase oottidoogaa siyida kawotettati, <sup>16</sup> ‘GODAI ha asaa, “Intteyyo immana” giidi caaqqido biittaa eta efaanau danddayibeenna gishshau, bazuwan eta woriis’ yaagidi haasayana.

<sup>17-18</sup> “Hegaa gishshau, Godau, neeni ne wolqqaa nuna besa; neeni gaidda, ‘GODAI danddayanchchanne aggenaa siiquwan kumidaagaa; nagaraanne makkalaa atto giyaagaa; gidikkonne, mooranchchaa qaxxayennan aggenaaagaa; aawatu nagaraa gishshau naata heezantanne oiddantta yeletaa gakkanaassi qaxxayiyaagaa’ gaada yoota wottidoogaa pola. <sup>19</sup> Ha asai Gibxxeppe kiyosappe doommada hachchi gakkanaassi neeni atto giidoogaadan, ne aggenaa siiquwaa daruwan ha asaa nagaraa atto garkkii!” yaagiis.

<sup>20</sup> Yaagin GODAI Muusa, “Neeni oichchidoogaadan taani etayyo atto gaas. <sup>21</sup> SHin ta de7uwan caaqqais; ta bonchchoi sa7a ubbaa kumiyoogaadan, <sup>22-23</sup> ha asaappe issoinne he biittaa be7enna. Ta bonchchuwaanne Gibxxe biittaaninne bazuwan taani oottido malaataa ha asati be7idosona; shin eti zaaretti zaarettidi tana paaccidosonanne ta qaalaa siyennan ixxidosa. Hegaa gishshau, taani eta maizza aawatuyyo immana gaada caaqqido biittaa tana karidaageetuppe issoinne mulekka be7enna. <sup>24</sup> SHin ta ashkkarai Kaaleebi etappe dummatiyo gishshaunne i tana polo wozanaappe kaallido gishshau, taani i kase biido biittaa a gattana; a zerettai he biittaa laattana. <sup>25</sup> SHin ha77i Amaaleeqatinne Kanaaneti wombban de7iyo gishshau, wontto guyye simmidi, Zo7o Abbaakko efiya ogiyaa oiqqidi bazzo biite” yaagiis.

### *GODAI Zuuzummida Asaa Qaxxayiis*

<sup>26</sup> Qassi GODAI Muusanne Aaroona hagaadan yaagiis; <sup>27</sup> “Ha iita asai ta bolli aude gakkanaassi zuuzummanee? Taani Israa7eela asaa zuuzunttaa ubbaa siyaas. <sup>28</sup> Hegaa gishshau, neeni eta hagaadan yaagada oda; ‘Ta de7uwan caaqqais; taani intte haasayishin ta haittan siyidoogaa intteyyo oottana. Taani GODAI hegaa odais. <sup>29</sup> Intte ahai ha bazuwan kunddana; aissi giikko, asaa qoodiyo wode qoodettida laatamu laittanne hegaappe bollaara de7iya asai ubbai ta bolli zuuzummideta. <sup>30</sup> Yifune na7aa Kaaleebappenne Nawe na7aa Yaasuppe attin, intteppe ooninne taani inttena wottanau caaqqido he biittaa gelenna. <sup>31</sup> Intte, “Nu naati omoodettana” giido intte guutta naata he intte karido biittaa gelissana; biittaikka etassa gidana. <sup>32</sup> SHin inttena gidikko, intte

ahai ha bazzuwan kunddana. <sup>33</sup> Intte ammanettibeenna gishshau, intte wurssetta ahai ha bazzuwan wullana gakkanaassi, intte naati waayettiiddi, ha bazzuwan oitamu laittaa henttanchcha gididi yuuyana. <sup>34</sup> Intte he biittaa wochchido he oitamu gallassaa goodan, issi gallassaayyo issi laittaa, hegeenne, oitamu laittau intte nagaraa gishshau intte waayettana; taani intte bolli dendiyoogaa intte erana' yaaga yoota. <sup>35</sup> Taani GODAI haggaa odais. Ta bolli shiiqi uttida ha iita maabaraa bolli hagaadan tumu oottana: eti ha bazzuwan wurana; hagan eti haiqqana” yaagiis.

<sup>36</sup> He biittaa wochchana mala, Muusee eta kiittin biidi simmida asati, he biittaabaa iita oduwaa odidi, Muuse bolli asai ubbai zuuzummana mala oottidaageeti, <sup>37</sup> he iita oduwaa odida asati, GODAA sinttan boshan haiqqidosona. <sup>38</sup> He biittaa wochchanau biida asatuppe Yifune na7ai Kaaleebinne Nawe na7ai Yaasu xalaalai paxa attidosona.

### *Israa7eela Asai Biittaa Bolli Woraajjanau Koiro Denddiis*

<sup>39</sup> Muusee haggaa Israa7eela asau ubbau yootido wode, asai keehi yeekkiis. <sup>40</sup> Wonttetta gallassi maallado guuran eti denddidi, pude gezze biittaa kiyidi, “Nuuni nagaraa oottida; shin ha77i GODAI nuuyyo immana giido sohuwaa pude kiyana” yaagidosona.

<sup>41</sup> SHin Muusee eta, “GODAA azazuwaa intte aibissi mentteetii? Intteyyo hanenna. <sup>42</sup> GODAI inttenaara de7enna gishshau, pude kiyoppite; intte morkketi inttena xoonana. <sup>43</sup> Amaaleeqa asatuuranne Kanaane asatuura intte olettana; olettidi intte bisuwan haiqqana. GODAAPPE intte wora simmido gishshau, GODAI inttenaara de7enna” yaagiis.

<sup>44</sup> SHin eti GODAA Maachchaa Taabootainne Muuseenne dunkkaanidosappe denddana xayikkokka, gezze biittaa kyanau xalidi denddidosa. <sup>45</sup> Denddin gezze biittan de7iya Amaaleeqa asatinne Kanaane asati wodhdhidi eta oli xoonidi, Horima gakkanaassi eta yedettidosona.

## 15

### *Yarshshuwaa SHiishshanau Imettida Higgiyaa*

<sup>1</sup> GODAI Muusa hagaadan yaagiis; <sup>2</sup> “Israa7eela asaayyo hagaadan yaaga; ‘Intte de7ana mala, taani intteyyo immiyo biitti geliyo wode, <sup>3</sup> mehiyaappe woikko dorssaappe, xuuggiyo yarshsho gidin, woikko shiiqo gattanau yarshshiyoo yarshsho gidin, woikko taani keerido baala gallassatun intte dosan coo immiyo yarshsho gidin, GODAAYYO taman xuuggiyo, sawuwaa tonggu giya yarshshota yarshshite. <sup>4</sup> Yarshshuwaa shiishshiya urai kattaa yarshshuwaassi issi kilo giraame xiilliyaa issi litiro wogaraa zaitiyan munaqqidoogaakka eho. <sup>5</sup> Qassi xuuggiyo yarshshuwaassi, woikko hara yarshshuwaassi ehiyo issi issi dorssaara issi litiro woiniyaa eessaa ushshaa yarshsho oottidi giigissite.

<sup>6</sup> “ ‘Dorssa orggiyaa yarshshanau shiishshiyoo wode, kattaa yarshshuwaassi naa77u kilo giraame xiilliyaa issi litironne bagga wogaraa zaitiyan munaqqidoogaanne <sup>7</sup> issi litironne bagga woine eessaa ushshaa yarshshuwaassi ehiite. Ehiidi GODAAYYO sawuwaa tonggu giya yarshshuwaa yarshshite.

<sup>8</sup> “ ‘Issi mirguuwaa xuuggiyo yarshsho, woikko shiiquwaa gattiyo yarshsho, woikko issippetettaa yarshsho oottidi yarshshanau GODAAYYO ehiyo wode, <sup>9</sup> mirguuwaa issippe kattaa yarshshuwaassi heezzu kilo giraame xiilliyaa naa77u litiro wogaraa zaitiyan munaqqidoogaanne <sup>10</sup> ushshaa yarshshuwaassi naa77u litiro woiniyaa eessaakka ehiite. Ehiidi GODAAYYO sawuwaa tonggu giya yarshshuwaa taman yarshshite.

<sup>11</sup> “ ‘Issi issi korima booraa, woikko issi issi dorssa orggiyaa, woikko yelaga deeshsha orggiyaa, woikko attuma dorssa maraa yarshshanau shiishshiyoo wode, kattaa



yarshshoinne ushshaa yarshshoi hagaadan issippe shiiqees. <sup>12</sup> Issi meheppe daroi shiiqiyo wode, kattaa yarshshoinne ushshaa yarshshoi hegaadan daridi shiiqees. <sup>13</sup> Israa7eela asa gidiya ooninne taman xuuggiyo, sawuwaa tonggu giya yarshshuwaa GODAAYYO shiishshiyo wode ubban, hagaadan oottanau koshshees. <sup>14</sup> Sinttappe yaana yeletan intte gidдон de7iya betee woikko hara asi ooninne xuuggiyo, sawuwaa tonggu giya yarshshuwaa GODAAYYO shiishshanau koyikko, ikka intte oottiyoogaadan oottanau koshshees. <sup>15</sup> Inttessikka intte gidдон de7iya betetussikka ha wogai issuwaa; hagee sinttappe yaana yeletaassikka eqqidi de7iya woga. Inttekka betetikka GODAA sinttan issuwaa. <sup>16</sup> Inttessikka intte gidдон de7iya bete asatussikka higgeenne wogai issuwaa gidana' yaaga" yaagiis.

<sup>17</sup> Hegaappe guyyiyan, GODAI Muusa hagaadan yaagiis; <sup>18</sup> "Israa7eela asaayyo hagaadan yaagada oda; 'Taani inttena efiyo biitti intte gelidi, <sup>19</sup> he biittan mokkiya kattaa miyo wode, he kattaappe xeeraa kessidi, intte GODAAYYO yarshsho oottidi shiishshite. <sup>20</sup> Hegeekka, baira ka77ida kattaappe uukkido koiro komppuwaa, kattaa qoxxiyo audiyaappe immiyo yarshsho oottidi shiishshite. <sup>21</sup> Yaana yeleta ubban intte intte biittan mokkida kattaappe xeeraa kessido komppuwaa, GODAAYYO yarshsho oottidi shiishshite.

<sup>22</sup> " 'GODAI Muusessi odido ha azazota ubbaa intte erana xayidi, naagennan aggikko, <sup>23</sup> GODAI a baggaara inttena azazido azazota ubbaa, GODAI immido gallasaappe doommidi, yaana yeletaa gakkanaashin, paccennan naagennan aggikko, <sup>24</sup> qassi heгаа maabarai erennan oottidobaa gidikko, maabarai ubbai GODAAYYO issi mirgguwaa xuuggiyo, sawuwaa tonggu giya yarshsho oottidi, ayyo wogai azaziyoogaadan, kattaa yarshshuwaaranne ushshaa yarshshuwaara shiishsho; qassi nagaraa yarshsho oottidi, issi deeshsha orggiyaa shiishsho. <sup>25</sup> Yaatobare qeesee kumetta Israa7eela maabaraa nagaraa atto giissiyo wogaa polo; polin eta nagarai atto geetettana. Aissi giikko, eti erididi oottibookkona; qassi eti bantta mooruwaa gishshau, GODAAYYO taman xuuggiyo yarshshuwaanne bantta nagaraa yarshshuwaa shiishshidosona. <sup>26</sup> Asai ubbai erennan he mooruwan hambbalaashettido gishshau, kumetta Israa7eela maabaraukka eta gidдон de7iya bete asaukka atto geetettana.

<sup>27</sup> " 'Issi asi barkka erana xayidi nagaraa oottikko, yelettoosappe issi laitta gidiyo issi deeshshiyo nagaraa yarshsho oottidi shiishsho; <sup>28</sup> shiishshin erennan de7iiddi nagaraa oottida uraayyo qeesee GODAA sinttan nagaraa atto giissiyo wogaa polo; polin a nagarai atto geetettana. <sup>29</sup> Erennan de7iiddi nagaraa oottiya asa ubbau, yeletan Israa7eela asa gidinkka bete asa gidinkka ha higgee issuwaa.

<sup>30</sup> " 'SHin yeletan Israa7eela asa gidinkka bete asa gidinkka eriiddi otoruwan nagara oottiya uri GODAA cayeese. He aawu haiqqidi, ba asaa giddoppe xayo. <sup>31</sup> He aawu GODAA qaalaa karido gishshaunne a azazuwaa kanttido gishshau, i tumuppe haiqqanau bessees; a mooroi aana' yaaga" yaagiis.

### *Sambbataa Wogaa Menttida Bitaniyaa*

<sup>32</sup> Issi gallassi Israa7eela asai bazzon de7ishin, issi bitanee Sambbatan mittaa mixiiddi beettiis. <sup>33</sup> Mittaa i mixishin demmida asati Muusekko, Aaroonakkonne kumetta yaa7aakko a ehiidosona. <sup>34</sup> Ehin eti a oottanabaa eribeenna gishshau, qashuwan takissidosona. <sup>35</sup> Hegaappe guyyiyan GODAI Muusa, "Ha bitanee haiqqanau bessees; kumetta yaa7ai bantta dunkkaanidosappe gaxi kessidi, shuchchan caddidi a woro" yaagiis. <sup>36</sup> Yaagin kumetta yaa7ai GODAI Muusa azazidoogaadan, dunkkaanidosappe gaxi kessidi, shuchchan caddidi a woriis.

### *Maayuwaa Macaraa Wogaa*

<sup>37</sup> GODAI Muusa hagaadan yaagiis; <sup>38</sup> "Israa7eela asaayyo hagaadan yaagada oda; 'Inttekka sinttappe yaana yeletaikka intte maayuwaa gaxa xeeran xeeran macaraa



kessite; kessidi he macaraa bolli salo milatiya qacinaa sikkite. <sup>39</sup> He macaraa intte be7iyo wode ubban ta azazota hassayidi polite; yaatikko, intte intte aifiyaanne intte wozanaa amuwaa kaallidi, taappe wora simmekketa. <sup>40</sup> He macaraa be7iyoogan intte ta azazota ubbaa hassayidi polananne intte intte Xoossaayyo geeshsha gidana. <sup>41</sup> Taani GODAA, intte Xoossaattennee; taani intte Xoossaa gidanau, inttena Gibxxeppe kessaas. Taani GODAA, intte Xoossaa' yaaga" yaagiis.

## 16

### *Qoraahi, Daataaninne Abiiraami Muuse Bolli Denddidosona*

<sup>1</sup> Leewa zariyaappe Qahaata yara gidiya Yixihaara na7ai Qoraahi, Roobeela zariyaappe Eli7aaba naati Daataaninne Abiiraaminne qassi Peleeta na7ai Ooni <sup>2</sup> Muuse bolli denddidosona. Etaara naa77u xeetanne ishatamu Israa7eela asati de7oosona; eti erettida asanne maabaran doorettida kaalettiyaageeta. <sup>3</sup> Eti Muusenne Aaroona sintti shiiqidi, hagaadan yaagidosona; "Intte darissideta! Maabarai ubbai huuphiyan huuphiyan geeshsha; GODAIKKA eta gidduwan de7ees; yaatin GODAA maabaraa bolli inttena aissi xoqqu xoqqu ootteetii?" yaagidosona.

<sup>4</sup> Muusee haggaa siyido wode GODAA sinttan sa7an gufanniis; <sup>5</sup> gufannidi Qoraahanne a citaa ubbaa, "Wontto maallado GODAI ooni agaakkonne ooni geeshshakkonne bessana; i he dooriyo asa baakko shiishshana. <sup>6</sup> Qoraahaa, neeninne ne citai ubbai haggaa oottite: wontto ixaanaa cuwayiyoogeta ekkidi, <sup>7</sup> bonqquwaa an wottidi, GODAA sinttan ixaanaa cuwayite. GODAI dooriyo asi, i geeshsha gidana. Leewa zaretoo, intte darissideta" yaagiis.

<sup>8</sup> Muusee qassikka Qoraaha, "Inttenoo Leewa zaretoo, siyite! <sup>9</sup> Israa7eela Xoossai inttena Israa7eela maabaraappe dummayidi, Xoossaa Dunkkaaniyaa oosuwaa oottana malanne asaa sinttan he oosuwaa oottanau intte eqqana mala, baakko shiishshidoogee intteyyo guuxxidee? <sup>10</sup> I inttenanne intte ishantta Leewata ubbaa baakko shiishshiis; qassi ha77i intte qeesettaakka kajjeeleeta. <sup>11</sup> Neeninne ne citai ubbai Aaroona bolli zuuzummiyoogaa GODAA bolli makkaleeta" yaagiis.

<sup>12</sup> Hegaappe guyyiyan, Muusee kiittidi Eli7aaba naata, Daataananne Abiiraama xeesissiis; shin eti a, "Nuuni bookko! <sup>13</sup> Neeni bazzuwan nuna woranau maattainne eessai goggiyo biittaaappe kessidoogee guuxxidee? Qassi ha77i neeni nu bolli halaqa gidanau koyai? <sup>14</sup> Heggaa bollikka qassi maattainne eessai goggiyo biittaa neeni nuna gellissabaakka, woikko neeni nuuyyo laata oottada gadiyaanne woine turaa immabaakka; neeni ha asaa cimmaasa. Nuuni bookko!" yaagidosona.

<sup>15</sup> Yaagin Muusee keehi hanqqettidi GODAA, "Neeni eti yarshshiyo yarshshuwaa ekkoppa; taani etappe hare issuwaanne ekkabeikke, woikko taani etappe issi asanne naaqqabeikke" yaagiis.

<sup>16</sup> Qassi Muusee Qoraaha, "Wontto neeni, ne citai ubbainne Aarooni GODAA sintti shiiqite. <sup>17</sup> Issi issi asai ba ixaanaa cuwayiyooogaa muleera naa77u xeetanne ishatamaa ekkidi, ixaanaa an wottidi, GODAA sintti shiishsho. Qassi neeninne Aarooni intte ixaanaa cuwayiyoogeta ehiite" yaagiis. <sup>18</sup> Yaagin asai ubbaikka ba ixaanaa cuwayiyooogaa ekkidi, bonqquwaanne ixaanaa an wottiis; wottidi Xoossaa Dunkkaaniyaa penggen Muuseeranne Aaroonaara eqqidosa. <sup>19</sup> Eqqidaashin Qoraahi kumetta maabaraa Xoossaa Dunkkaaniyaa penggen shiishshiis.

He wode GODAA bonchchoi kumetta maabarau qoncciiis. <sup>20</sup> GODAI Muusanne Aaroona, <sup>21</sup> "Taani issi kuttan ha maabaraa xaissana haniyo gishshau, etappe shaahettite" yaagiis.

<sup>22</sup> SHin Muuseenne Aarooni sa7an gufannidi, "Abeet Xoossau, asho maayida asaa ubbaa medhdhida Xoossau, issi uri nagara oottikko, neeni kumetta maabaraa hanqqettai?" yaagidosona.

<sup>23</sup> Yaatin GODAI Muusa, <sup>24</sup> “Neeni maabaraa, ‘Qoraaha, Daataananne Abiiraama dunkkaanetuppe kichchite’ yaagada yoota” yaagiis.

<sup>25</sup> Muusee denddidi, Daataanakkonne Abiiraamakko bin, Israa7eela cimati a kaalidosona. <sup>26</sup> Maabaraa i, “Ha iita asatu dunkkaanetuppe kichchite; etabaa gididabaa aibaanne bochchoppite. Hinkkoode eta nagaraa ubbaa gaasuwan inttekka pitetti xayana” yaagidi minttidi yootiis.

<sup>27</sup> Yootin eti Qoraaha, Daataananne Abiiraama dunkkaanetuppe kichchidosona. Daataaninne Abiiraami kare kiyidi, bantta maccaasatuura, bantta naatuuranne bantta guutta naatuura bantta dunkkaanetu penggen eqqidosona. <sup>28</sup> Muusee asaa, “Taani ha ooso ubbaa oottana mala, GODAI tana kiittidoogaanne taani ta sheniyann oottennaagaa intte hagan erana. <sup>29</sup> Ha asati asi haiqqiyooogaadan haiqqikko, woikko asa bolli gakkiiyaabaa xalaalai eta bolli gakkikko, yaatikko GODAI tana kiittibeenna. <sup>30</sup> SHin GODAI muleera ooratabaa oottin, biittai dooyettidi etanne etau de7iyaabaa ubbaa mitti aggikko, eti paxa de7iiddi Si7ooliyaa duge wodhdhikko, he wode ha asati GODAA karidoogaa intte erana” yaagiis.

<sup>31</sup> I yaagidi wurssido sohuwaarakka, eti eqqido biittai phalqqetti wodhdhiis. <sup>32</sup> Biittai dooyettidi, etanne eta so asaa, Qoraaha citaa ubbaa etassi de7iyaabaa ubbaara mitti bayiis. <sup>33</sup> Yaatin eti banttau de7iyaabaa ubbaara paxa de7iiddi, Si7ooliyaa duge wodhdhidosa. Biittaikka eta bolli gorddetti bayiis; eti maabaraa giddoppe tippi giidi xay bayidosona. <sup>34</sup> Eta waasuwan eta matan de7iya Israa7eelati ubbai, “Biittai nunakka qassi mittana hanees!” yaagiiddi baqatidosona.

<sup>35</sup> Qassi tamaikka GODAA matappe yiidi, ixaanaa cuwayiya naa77u xeetanne ishataamu asaa mi bayiis.

### *Ixaanaa Cuwayiyobata*

<sup>36</sup> Hegaappe guyyiyan GODAI Muusa, <sup>37</sup> “Neeni qeesiyaa Aaroona na7aa El77aazarassi yaagada yoota, ‘Ixaanaa cuwayiyobata taman xuuettida asaa giddoppe ekka; bonqquwaa cuwayiyobatuppe haassada laala. He ixaanaa cuwayiyobati geeshsha. <sup>38</sup> Bantta nagaraa gishshau haiqqida ha asatu ixaanaa cuwayiyobata lee7issada qoxxada, yarshshuwaa saaxiniyaa kamma. Eti hegeeta GODAA sinttan shiishshido gishshau, hegeeti geeshsha; hegeeti Israa7eelata hassayissiya malaata gidana’ yaaga” yaagiis.

<sup>39</sup> Yaagin qeese El77aazari xuuettida asati shiishshido nahaase birataappe ooset-tida ixaanaa cuwayiyobata ekkidi, yarshshuwaa saaxiniyaa kammanau lee7issidi qoxxiis. <sup>40</sup> Aaroona zare gidenna ooninne GODAA sinttan ixaanaa cuwayanau shi-iqenna mala, Qoraahanne a citaa gakkidaagee a gakkenna mala, Israa7eelata has-sayissanau hageeta oottiis. GODAI Muuse baggaara El77aazara azazidoogaadan hagee haniis.

### *Aarooni Asaa Boshappe Ashshiis*

<sup>41</sup> Wonttetta gallassi Israa7eela maabarai ubbai, “GODAA asaa intte worideta” yaagidi, Muuse bollinne Aaroona bolli zuuzummidosona. <sup>42</sup> Maabarai Muusenne Aaroona bolli denddanau shiiqidi, Xoossaa Dunkkaaniyaakko simmi xeelliyo wode, shaarai Xoossaa Dunkkaaniyaa kammin, GODAA bonchchoi qoncciiis.

<sup>43</sup> Hegaappe guyyiyan, Muuseenne Aarooni Xoossaa Dunkkaaniyaa sinttau yidosona. <sup>44</sup> Yin GODAI Muusa, <sup>45</sup> “Ha asaa gidduwaappe kichchite; taani eta issi kuttan xaissa bayana” yaagiis.

Yaagin eti sa7an gufannidosona. <sup>46</sup> Muusee Aaroona, “Ne ixaanaa cuwayiyoo-gaa ekkada, bonqquwaa yarshshiyoo-saappe ekkada, ixaanaa an wotta; wottada etayyo atto giissanau eesuwan maabaraakko efa. Aissi giikko, GODAA hanqqoi a matappe kiyiichchiis; boshaiikka doommiichchiis” yaagiis. <sup>47</sup> Yaagin Muusee giidoogaadan

Aarooni ba ixaanaa cuwayiyoogaa ekkidi, maabaraa giddo woxxiis. Boshai asaa gidduwan doommidaashin, Aarooni ixaanaa cuwayidi, asaayyo atto giissii. <sup>48</sup> Yaatidi i haiqqidaageetuppenne paxa de7iyaageetuppe gidduwan eqqin, boshai aggi bayiis. <sup>49</sup> Qoraaha gaasuwan haiqqida asai goodettennan, ha boshan haiqqidaageeti 14,700. <sup>50</sup> Boshai eqqidoogaappe guyyiyan, Aarooni Xoossaa Dunkkaaniyaa penggen de7iya Muusekko simmiis.

## 17

### *Aarooni Xam77aa Aacettaa*

<sup>1</sup> GODAI Muusa hagaadan yaagiis; <sup>2</sup> “Neeni, ‘Intte zariyan zariyan intte halaqatuppe huuphiyan huuphiyan issi issi xam77aa muleera tammanne naa77u xam77aa tau im-mite’ yaagada Israa7eelatuppe ekka. Issi issi asaa sunntaa xam77aa bollan xaafa. <sup>3</sup> Issi issi zariyaa halaqaassi issi xam77a gidiyo gishshau, Leewa xam77an Aarooni sunntaa xaafa. <sup>4</sup> Xaafada Xoossaa Dunkkaaniyaa gidдон taani nenaara gaittiyo Taabootaa sinttan wotta. <sup>5</sup> Taani dooriyo asa xam77ai aacana; hagaadan oottada intte bollan Israa7eelati zuuzummiyo zuuzunntaa taani mule xaissana” yaagiis.

<sup>6</sup> Yaagin Muusee Israa7eela asau yootin, eta halaqati tammanne naa77u xam77ata, issi issi zariyaa halaqati issi issi xam77aa ayyo immidosona. He xam77atu gidduwan Aarooni xam77aikka de7ees. <sup>7</sup> Muusee he xam77aa ubbaa Xoossaa Dunkkaaniyaa gidдон GODAA sinttan wottiis.

<sup>8</sup> Wonttetta gallassi Xoossaa Dunkkaaniyaa giddo Muusee gelido wode, Leewa zare gidiya Aarooni xam77ai aacidaagaa, gumbbidaagaa, ciyyidaagaanne ciyidi lauziyaa giyo mita aifiyaa aifidaagaa be7iis. <sup>9</sup> Hegaappe guyyiyan, Muusee xam77a ubbaa GODAA sinttappe Israa7eela asaa ubbaakko ehiis. Ehin asai eta be7idoogaappe guyyiyan, halaqati bantta xam77aa xam77aa ekkidosona. <sup>10</sup> GODAI Muusa, “Aarooni xam77aa Taabootaa sinttan zaara wotta. Hega makkalidaageeti ta bolli naa77antto zuuzummidi haiqqennaadan, etau malaata oottada naaga” yaagiis. <sup>11</sup> Yaagin GODAI azazidoogaadan Muusee oottiis.

<sup>12</sup> Israa7eela asai Muusa, “Nuuni haiqqana; xayana; nuuni ubbaikka xayana! <sup>13</sup> Xoossaa Dunkkaaniyaakko, harai atto mataa shiiqiya uri ooninne haiqqana. Simmi nuuni ubbaikka haiqqiyoo?” yaagidosona.

## 18

### *Qeesetunne Leewatu Oosuwa*

<sup>1</sup> GODAI Aarooni, “Neeni, ne attuma naatinne Leewati geeshsha sohuwaa oosuwan polettiya nagaraa tookkana; neeninne ne attuma naatu xalaalai intte qeesetetta oosuwan polettiya nagaraa tookkana. <sup>2</sup> Neeninne ne attuma naati Xoossaa Dunkkaaniyaa sinttan oottiyo wode, nenaara oottidi maaddana mala, Leewa zare gidiya ne dabbota eha. <sup>3</sup> Eti intteppe garssaara Xoossaa Dunkkaaniyaa ooso ubbaa ootona; shin etikka intteppe issippe haiqqennaadan, eti geeshsha sohuwaa miishshaakkonne yarshshiyooosaakko shiiqoppona. <sup>4</sup> Eti inttenaara issippe gidona; Xoossaa Dunkkaaniyan de7iya ooso ubbaa ootona. Leewatuppe attin, hara uri ooninne inttekke shiiqoppo. <sup>5</sup> Naa77anttuwaa Israa7eelatu bolli hanqqoi wodhdhenna mala, geeshsha sohuwaanne yarshshiyooosa oosuwa oottite. <sup>6</sup> Leewata intte dabbota Israa7eelatu giddoppe taani ta huuphen dooraas. Eti Xoossaa Dunkkaaniyaa oosuwa oottanau intteyyo imodan immada, GODAU dummayaas. <sup>7</sup> SHin neeninne ne attuma naatu xalaalai yarshshiyooosa oosuwa ubbaanne magalashuwaa gidдон de7iya qeesetetta ooso ubbaa oottite. Qeesetetta oosuwa taani intteyyo imodan oottada immais; hara uri ooninne geeshsha sohuwaakko shiiqiyaabi haiqqo” yaagiis.

<sup>8</sup> Hegaappe guyyiyan GODAI Aaroonaa, “Israa7eelati taayyo immiyo geeshsha imota ubbaa taani neeyyo immaas. Taani neeyyo ne gishshaanne ne attuma naatuyyo eta gishshaa merinau gishsha oottada immaas. <sup>9</sup> Taayyo immiyo aadhhdida geeshsha imuwaappe taman xuugettenna baggai intessa gidana: eti taassi immiyo geeshsha imuwaa ubbaappe kattaa yarshshoi, woikko nagaraa gishshau yarshshiyo yarshshoi, woikko naaquwaa gishshau yarshshiyo yarshshoi neessanne ne attuma naatussa gidana. <sup>10</sup> Intte hegaa geeshsha sohuwan miite; attumaagee ubbai hegaa mo; hegee intessi geeshsha gidana.

<sup>11</sup> “Hagee qassi neessa. Israa7eelatu wuxaawuxo yarshsho ubbaa neeyyo, ne attuma naatuyyoonne ne macca naatuyyo merinau gishsha oottada immais; intte keettaa asaa gidдон wogaadan geeshsha gidiya ubbai hegaa mo.

<sup>12</sup> “Eti taayyo immiyo koiro aifiyaappe lo77o wogaraa zaitiyaa ubbaa, yelaga woine eessaa ubbaanne muruta kattaa ubbaa neeyyo immais. <sup>13</sup> Eti GODAAYYO ehiyo eta biittan de7iya koiro gakkida aifee intessa; intte keettaa asaa gidдон wogaadan geeshsha gidiya ubbai hegaa mo.

<sup>14</sup> “Israa7eelan GODAAYYO dummatidabai ubbai intessa. <sup>15</sup> Baira yelettida asi woikko mehee, Israa7eelati GODAAYYO immidobi intessa. SHin baira yelettida asanne baira yelettida geeshsha gidenna mehe intte wozanau bessees. <sup>16</sup> Issi agina naata wozanau Xoossaa Dunkkaaniyan eriyo meezaanaa likkiyan ichchashu xaqara biraa wozo waagaa qanxxite. <sup>17</sup> SHin miizzaa bairaa, woikko dorssaa bairaa, woikko deeshshaa bairaa intte wozanau koshshenna; eti geeshsha. Neeni eta suut-taa yarshshiyoosaa bollan caccafa; GODAA tonggu giidi sawana mala, eta modhd-huwaa taman xuugga. <sup>18</sup> Etappe beettiya ashoi wuxaawuxido anggaasuwaadaaninne ushachcha gedaadan intessa. <sup>19</sup> Israa7eelati GODAAYYO immiyo geeshsha yarshsho ubbaa neessi, ne attuma naatussinne ne macca naatussi merinau gishsha oottada immais. Hageekka taani nenaaranne ne zerettatuura maacettiyo merinaa maachcha” yaagiis.

<sup>20</sup> Qassikka GODAI Aaroonaa, “Eta biittan neeni ainne laattakka; eta gidдон nena gakkiya shaahoi aibikka baawa; Israa7eelatu gidдон ne laatainne nena gakkiya shaahoi tana” yaagiis.

### *Leewata Gakkiya SHaahuwaa*

<sup>21</sup> GODAI, “Leewati Xoossaa Dunkkaaniyan oottiyo oosuwaa gishshau, Israa7eelatu asirata ubbaa etayyo immaas. <sup>22</sup> Hachchippe doommidi, Israa7eela asati bantta nagaran haiqqenna mala, Xoossaa Dunkkaaniyaakko shiiqoppona. <sup>23</sup> Xoossaa Dunkkaaniyaa oosuwaa oottiyaageetinne hegan polettiya nagaraa tookkiyaageeti Leewata. Hagee yeleta ubbau merinaa wogaa. Leewati Israa7eela asaa gidдуwan ainne laattokkona. <sup>24</sup> Hegaa gishshaa, Israa7eelati GODAAYYO imodan immiyo asirataa, taani Leewatuyyo eta laatadan immaas. Taani etabaa, ‘Eti Israa7eela asaa gidдуwan ainne laattokkona’ yaagidoogee hegaassa” yaagiis.

<sup>25</sup> Qassi GODAI Muusa, <sup>26</sup> “Neeni Leewata hagaadan yaaga; ‘Taani intteyyo laatadan immido asirataa intte Israa7eela asaappe ekkiyo wode, intte he asirataappe asirataa GODAAYYO immite. <sup>27</sup> Intte imoi intteyyo kattaa qoxxiyo audiyaa kattaadaaninne gum77iyo woine aifiyaadan qoodettes. <sup>28</sup> Qassi hagaadan Israa7eela asaappe intte ekkiyo asirata ubbaappe imuwaa GODAAYYO immite; ha asirataappe GODAA gishshaa qeesiyaa Aaroonayyo intte immanau bessees. <sup>29</sup> Intte ekkiyo imota ubbaappe, lo77iyaagaanne geeshshaa GODAASSI gishsha oottidi, intte immanau bessees’ yaaga.

<sup>30</sup> “Qassi neeni Leewata, ‘Ubaappe lo77o imuwaa intte immidoogaappe guyyiyan, attidaagee intteyyo kattaa qoxxiyo audiyaa kattaadaaninne gum77iyo woiniyaa aifiyaadan qoodettana. <sup>31</sup> Inttenne intte keettaa asai hegaappe attidaagaa awaaninne



miite; aissi giikko, hegee Xoossaa Dunkkaaniyan intte oottiyo oosuwaayyo intte damoozaa. <sup>32</sup> Lo77o baggaa GODAASSI immirggidoogaappe guyyiyan intte miyo wode, mooranchcha gidekketa. SHin lo77o baggaa he imotaappe kessennan de7iiddi, he imotaappe miidi, intte Israa7eela asaa imotaa tunissennaadan naagettite. Hegaadan oottana xayikko, intte haiqqana' yaaga" yaagiis.

## 19

### *Tunatettaappe Geeyiyo Haattaa*

<sup>1</sup> GODAI Muusanne Aarona hagaadan yaagiis; <sup>2</sup> "GODAI higgiiyan azazido wogai haggaa: Tilla bollaara de7iya woikko borssoi baina, i morggiyan qambari wodhd-hibeenna zo7o ussiyo neeyyo ehaana mala, Israa7eela asaayyo yootite. <sup>3</sup> Qeesiyaa El77aazarayyo o immite; i o dunkkaanidosaaappe gaxi efin, issi asi o a sinttan shukko. <sup>4</sup> Qeesiyaa El77aazari i suuttaappe amaridaagaa ba biradhdhiyan ekkidi, Xoossaa Dunkkaaniyaayyo sintta baggaara laapputto caccafo. <sup>5</sup> I xeellishin ussiyaa xuugettu; i galbbai, ashoi, suuttainne tocee xuugetto. <sup>6</sup> Qeesee zigaa, hiisophphiyaa tashiyaanne zo7o qunccuutiya ekkidi, ussiyo xuuggiyo taman olo. <sup>7</sup> Hegaappe guyyiyan, qeesee ba maayuwaa meeco; ba bollaakka haattan meecetto; meecettidi dunkkaanidosaa gelo; shin omarsa gakkanaassi i wogaadan tuna gidana. <sup>8</sup> He ussiyo xuuggidaagee qassi ba maayuwaa meeco; ba bollaakka haattan meecetto; ikka qassi omarsa gakkanaassi wogaadan tuna gidana.

<sup>9</sup> "Hegaappe guyyiyan, geeshsha asi ussiyaa xuugettido bidinttaa shiishshidi, dunkkaanidosaaappe gaxaara geeshsha sohuwan wotto. Israa7eela asai tunatettaappe geeyiyo haattan go7ettanau heгаа naagi wottana; hegee nagaraappe geeshshanaassa. <sup>10</sup> Qassi ussee bidinttaa shiishshida asi ba maayuwaa meeco; omarsa gakkanaassi i wogaadan tuna gidana. Ha wogai Israa7eela asaanne eta gidduwan de7iya hara dere asau naa77aukka merinaa woga gidana.

<sup>11</sup> "Haiqqida asa ahaa bochchiya ooninne laappun gallassaa wogaadan tunana. <sup>12</sup> He tunatettaappe geeyiyo haattan heezantta gallassinne laappuntta gallassi, i bana geeshsho; hegaappe guyyiyan, i wogaadan geeshsha gidana; shin heezantta gallasaaninne laappuntta gallassan bana geeshshana xayikko, i geeshsha gidenna. <sup>13</sup> Haiqqida uraa ahaa bochchiya ooninne bana geeshshennan aggikko, GODAA Dunkkaaniyaa i tunisees; he urai Israa7eela asaa giddoppe bohetto. Tunatettaappe geeyiyo haattai a bolla caccafettibeenna gishshau, i tuna; a tunatettai a bolla gam77ees.

<sup>14</sup> "Issi uri dunkkaaniyaa gidдон haiqqikko de7iya wogai haggaa: dunkkaaniyaa gidдо geliya ooninne, qassi dunkkaaniyaa gidдон de7iya ubbaikka laappun gallassaa tuna gidana. <sup>15</sup> Hegaadankka, qum77ettennan dooya de7iya miishsha ubbai tuna gidana. <sup>16</sup> Qassi dembban bisuwan haiqqida asa, woikko coo haiqqida ahaa, woikko asa meqetta, woikko duufuwaa bochchiya ooninne laappun gallassaa tuna gidana.

<sup>17</sup> "Tunatettaappe geeshshanau xuuggido ussee bidinttaappe amaridaagaa ekkada, otuwan wottada, pultto haattaa an tiga; <sup>18</sup> tigin geeshsha asi hiisophphiyaa boncuwaa ekkidi, haattan naaqqi kessidi, dunkkaaniyaa, dunkkaaniyan de7iya miishshaa ubbaaninne hegan de7iya asaa ubbaa bolla caccafo. Qassi asa meqetta, woikko duufuwaa, woikko worido uraa, woikko haiqqida uraa bochchida asa o bollinne i caccafo. <sup>19</sup> Geeshsha asi heezanttanne laappuntta gallassan tunida uraa bolla caccafo. I laappuntta gallassan he uraa tunatettaappe geeshsho; he geeyida bitanee ba maayuwaa meeco; ba bollaakka haattan meecetto; he gallassa omarsa i geeshsha gidana.

<sup>20</sup> "SHin tuna uri bana geeshshennabaa gidikko, he uri GODAA geeshsha sohuwaa tunissido gishshau, Israa7eela asaa giddoppe bohetto; tunatettaappe geeyiyo haattai



a bollan caccafettibeenna gishshau, i tuna. <sup>21</sup> Hagee intteyyo merinaa woga gidana. Qassi tunatettaappe geeyiyo haattaa caccafiya asi ba maayuwaa meecco; tunatettaappe geeyiyo haattaa bochchiya ooninneka omarssi gakkanaassi tuna gidana. <sup>22</sup> Tuna uri bochchiyo aibinne tunees. Qassi hegaa bochchiya ooninne omarssa gakkanaassi tuna gidees” yaagiis.

## 20

### *Qaadeesan Hanidabaa (Kessaabaa 17:1-7)*

<sup>1</sup> Koiro aginan Israa7eelati ubbai Xiina giyo bazzuwaa gakkidi, Qaadeesa giyoosan dunkkaanidosona. Hegan Miiriyaama haiqqada moogettaasu.

<sup>2</sup> Hegan asaayyo haatti xayin, asai shiiqidi, Muuse bollinne Aarona bolli denddiis. <sup>3</sup> Eti, “Nu ishantti GODAA sinttan haiqqido wode, nuunikka haiqqidabaa gidorkkonishsha! <sup>4</sup> Nuuninne nu mehee ha bazzuwan haiqqanaadan, GODAA asaa hagu intte aissi ehiidetii? <sup>5</sup> Ha hanttaara sohuwaa nuna Gibxxeppe pude aissi ehiidetii? Hagan katta aifee, woikko balasee, woikko woine aifee, woikko roomaane baawa; qassi uyiyo haattikka hagan baawa” yaagidi Muuseera ooyettidosona.

<sup>6</sup> Yaatin Muuseenne Aarooni asaa matappe Xoossaa Dunkkaaniyaa pengge biidi gufannidosona; gufannin GODAA bonchchoi etayyo qoncciiis. <sup>7</sup> GODAI Muusa, <sup>8</sup> “Ne gatimaa ekka; neeninne ne ishaa Aarooni yaa7aa shiishshite; shiiqin eta sinttan zaallai haattaa goggana mala yoota. Zaallaappe haattaa intte kessidi, yaa7aanne eta mehiyaa ushshana” yaagiis. <sup>9</sup> GODAI azazidoogaadan, Muusee GODAA sinttappe gatimaa ekkiis.

<sup>10</sup> Inne Aarooni yaa7aa zaallaa sinttan shiishshidosona; shiishshin Muusee eta, “Inttenoo makkalanchchatoo, siyite; ha zaallaappe haattaa intteyyo nuuni tumu kessanee?” yaagiis. <sup>11</sup> Yaagidi Muusee ba kushiyyaa xoqqu oottidi, ba gatiman naa77utoo zaallaa shocin, haattai xuuqqidi kiyiis; kiyin yaa7ainne eta mehee uyiis.

<sup>12</sup> SHin GODAI Muusanne Aarona, “Israa7eela asaa sinttan intte ta geeshshatettaa bessanau ammanettibeenna gishshau, taani etayyo immiyo biittaa ha asaa intte gelissekketa” yaagiis.

<sup>13</sup> Israa7eela asai GODAARA ooyettidonne i ba geeshshatettaa eta gidдон qonccissidosai ha Mariiba haattaana.

### *Eedooma Kawoi Israa7eela Asai Ba Biittaara Kanttennaadan Diggiis*

<sup>14</sup> Muusee Qaadeesappe Eedooma biittaa kawuwaakko, ba kiitettiyaageeta hagaadan yaagidi kiittiis; “Ne dabbo gidiya Israa7eela asai hagaadan yaagees; ‘Nuna gakkida meto ubbaa neeni eraasa. <sup>15</sup> Nu maizza aawati duge Gibxxe wodhdhidosona; yan nuuni daro laittaa de7ida. Gibxxeti nunanne nu aawata huqqunnidosona. <sup>16</sup> Huqqunnin nuuni GODAASSI waassin, nu waasuwa siyidi, kiitanchchaa kiittidi, nuna Gibxxeppe kessiis. Ha77i nuuni ne biittaa gaxan de7iya Qaadeesa kataman de7oos. <sup>17</sup> Hayyanaa, nuna ne biittaara kanttissarkii! Nuuni ai gade giddoorakka woikko woine turaa giddoorakka kanttokko! Qassi nuuni ai haatta ollappenne haattaa uyokko. Nuuni Kawo Ogiyaa oiqqidi baana; nuuni ne biittaara kanttana gakkanaassi, haddirssi woikko ushachchi gookko’ yaagees” yaagiis.

<sup>18</sup> SHin Eedooma kawoi, “Nu biittaara kanttissikke; intte hagaara kanttana kajjeelikko, nuuni denddidi inttena bisuwan olana” yaagidosona.

<sup>19</sup> Yaagin Israa7eelati a, “Nuuni Kawo Ogiyaara baana; nuuni woikko nu mehee intte haattaa uyikko, nuuni hegaayyo waagaa qanxxana. Nuuni tohuwan aaretta xalaalaa koyoos; harabaa aibanne koyokko” yaagidosona.

<sup>20</sup> Eedooma kawoi zaarettidi, “Inttena kanttissikke” yaagiis. Hegaappe guyyiyan, daronne wolqqaama olanchchata ekkidi, Israa7eela asaara olaa gaittanau kiyiis.

<sup>21</sup> Eedoomati bantta biittaara Israa7eela asai kanttanau diggido gishshau, Israa7eela asai simmidi hara ogiyaa biis.

<sup>22</sup> Israa7eela asai ubbai Qaadeesappe denddidi, Hooraa giyo deriyaa biidosona.

<sup>23</sup> Eedooma zawaa matan de7iya Hooraa Deriyan, GODAI Muusanne Aaroonaa,

<sup>24</sup> “Aarooni haiqqidi ba maizzan gaittiyo wodee gakkiiis. Mariiba haattaa matan intte naa77aikka ta azazuwaa bolli makkalido gishshau, Israa7eela asaayyo taani immiyo biittaa i gelenna. <sup>25</sup> Aaroonanne a na7aa El77aazara ekkada, Hooraa Deriyaa eha. <sup>26</sup> Aaroonaa maayuwaa qaarada, a na7aa El77aazara maizza. Aarooni ba maizzan gaittana; i yan haiqqana” yaagiis.

<sup>27</sup> GODAI azazidoogaadan Muusee oottiis; asai ubbai xeellishin, eti Hooraa Deriyaa kiyidosona. <sup>28</sup> Kiyin Muusee Aaroonaa maayuwaa qaaridi, a na7aa El77aazara maizziis. Aarooni he deriyaa huuphiyan haiqqiis. Hegaappe guyyiyan, Muuseenne El77aazari deriyaappe wodhdhidosa. <sup>29</sup> Aarooni haiqqidoogaa asai ubbai erido wode, Israa7eela asai ubbai Aaroonayyo hasttamu gallassaa yeekkiis.

## 21

### *Kanaaneti Xoonettidosona*

<sup>1</sup> Neegeeba Bazzuwan, Kanaane biittan de7iya Araada kawoi Israa7eela asai Ataarima efiya ogiyaa baggaara yiyoogaa siyido wode, i Israa7eelatuura olaa gaittidi, etappe amaridaageeta omooddiis. <sup>2</sup> He wode Israa7eela asai, “Neeni ha asaa nu kushiyan aattada immikko, nuuni eta katamata muleera xaissana” yaagidi GODAA shiiqqidosona. <sup>3</sup> GODAI Israa7eela qaalaa siyidi, he Kanaaneta etayyo aatti immiis; immiin eti he Kanaanetanne eta katamata muleera xaissidosona. Hega gishshau, he sohoi Horima geetetti sunttettiis.

### *Nahaasiyaa Birataappe Merettida SHOOSHSHAA*

<sup>4</sup> Israa7eela asai Hooraa Deriyaappe denddidi, Eedooma biittaa yuushuwaa baanau Zo7o Abbaa efiya ogiyaara biidosona; shin ogiyaa bollan asau danddayai wuriis. <sup>5</sup> Asai, “Nuuni bazzuwan haiqqanau Gibxeppe pude nuna aissi ehiidetii? Qumi baawa; haatti baawa; ha iita qumai nuna sheneyiis” yaagidi Xoossaa bollinne Muuse bolli zuuzummiis.

<sup>6</sup> Zuuzummin GODAI asaa gidduwan marzziyaara de7iya shooshshata yeddiis; eti dukkin, daro Israa7eelati haiqqidosona. <sup>7</sup> Eti Muusekko yiidi a, “Nuuni GODAA bollinne ne bolli zuuzummidi, nagaraa oottida. Nuuppe ha shooshshaa haassana mala, neeni GODAA woossa” yaagidosona. Yaagin Muusee asaa gishshau woossiis.

<sup>8</sup> Hegaappe guyyiyan GODAI Muusa, “Neeni nahaase shooshshaa medhdhada, eta sinttan mittaa bollan kaqqa; dukettida ooninne a xeellikko paxana” yaagiis. <sup>9</sup> Yaagin Muusee nahaase birataappe shooshshaa medhdhidi, mittaa bollan kaqqiis. Hegaappe guyyiyan, shooshshai dukkido asai ubbai nahaase shooshshaa xeellidi paxiis.

### *Hooraa Deriyaappe Denddidi Moo7aaba Biitti Biidosona*

<sup>10</sup> Israa7eela asai denddidi, Oboota giyoosan dunkkaanidosona. <sup>11</sup> Obootappe denddidi, Moo7aabappe sintta baazzan de7iya bazzuwan, arshsho baggaara, laalettida Abaarima kataman dunkkaanidosona. <sup>12</sup> Hegaappe denddidi, Zareeda Zanggaaran dunkkaanidosona. <sup>13</sup> Hegaappe denddidi, Amooretu biittaa gaxaa gakkanau biya bazuwaa gidдон Arnnoona SHaafaappe hefinttan dunkkaanidosona. Arnnoona SHaafai Moo7aaba biittaappenne Amooretu biittaappe gidduwan de7iya zawaa. <sup>14</sup> Hega gishshau, GODAA Olaa Maxaafan, “Suufa heeran de7iya Waaheeba katamaanne Arnnoona SHaafaa zanggaaraa, <sup>15</sup> Eera katamaa gakkanaassinne Moo7aaba zawaa gakkanaassi de7iya zanggaara dugettaa” yaagetti xaafettiis.

<sup>16</sup> Eti hegaappe denddidi, Beera giyoosaa biidosona; hegee GODAI Muusa, “Asaa shiishsha; taani etau haattaa immana” yaagidi yootido haatta ollaa. <sup>17-18</sup> Hegan Israa7eela asai ha mazamuriyaa yexxiis.

“Haattaa ollau, pultta!

Halaqati bookkido haattaa ollaayyo,

asaa kaalettiyaageetu ollaayyo,

kawotaa xam77aaninne eta kazaran bookkido haatta ollaayyo

ane yexxoos” yaagiis.

Eti he bazzuwaappe Mataana giyoosaa biidosona; <sup>19</sup> Mataanappe Naahili7eela, Naahili7eelappe Baamoota giyoosaa, <sup>20</sup> Baamootappe denddidi, Moo7aaban de7iya zanggaaraa biidosona; ha zanggaarai Pisgga Deriyaappe garssan bazzuwaa giigan de7ees.

### *Kawoi Sihooninne Kawoi Oogi Xoonettidosona*

<sup>21</sup> Hegaappe guyyiyan, Israa7eela asai Amooore biittaa Kawuwaa Sihoonakko kiitettiyaageeta hagaadan yaagidi kiittiis; <sup>22</sup> “Nuna ne biittaaara kanttissarkkii! Nuuni ne gadiyaa giddo woikko woine turaa giddo gelokko; qassi haatta ollaa augaappenne uyokko. Nuuni ne biittaaara kanttana gakkanaassi, Kawo Ogiyaara baana” yaagiis.

<sup>23</sup> SHin Sihooni ba biittaaara Israa7eela asaa kanttissennan diggiis; i ba olanchchata ubbaa shiishshidi, Israa7eela asaa olanau bazzo biis; Yahaaxa giyoosaa bi gakkidi, Israa7eela asaara olettiis. <sup>24</sup> SHin Israa7eela asai olan Amoooretuppe daruwaa woridi, eta biittaa Arnnoona SHaafaappe doommidi, Amoonatu zawan de7iya Yaabooqa SHaafaa gakkanaassi oiqqiis. Amoonaa asatu biittaa zawai gimbbetti uttido gishshau, eti yaa gelibookkona. <sup>25</sup> Yaatin Israa7eelati Amoooretu katamata ubbaa xoonidi ekkidosona. Qassi Haseboonanne a yuushuwan de7iya qeeri katamata akka ubbaa oiqqidi, yan uttidosona. <sup>26</sup> Haseboona katamai Amoooretu Kawuwaa Sihoona katamaa. Sihooni Moo7aaba biittaa kawuwaa kaseegaa olidi, Arnnoona SHaafaa gakkanaassi a biittaa ubbaa appe ekkidaagaa.

<sup>27</sup> Hegaa gishshau, leemisuwan hagaadan yaagidosona;

“Hasebooni haayite;

he katamai zaaretti keexetto;

Sihoona gita katamai wodhdhi eqqidi keexetto!

<sup>28</sup> Aissi giikko, tamai Haseboonappe,

lacoii Sihoona katamaappe kiyiis;

kiyidi Moo7aaban de7iya Eeranne

Arnnoona SHaafaa heeran gezziyan de7iya halaqata miis.

<sup>29</sup> Moo7aabaa, neeyyo aayye7ana!

Kamooshau goinniyaageetoo, intte xayideta.

Intte xoossai, Kamooshi,

intte attuma naata baqatau,

intte macca naata omooduwau,

Amoooretu Kawuwaa Sihoonayyo immiis.

<sup>30</sup> Intte zerettati Haseboonappe doommidi,

Diboona gakkanaassi muleera xayidosona.

Medaaba matan de7iya Nofaaha gakkanaassi

wurssidi bashshidosona” yaagidosona.

<sup>31</sup> Hagaadan hanidi, Israa7eelati Amoooretu biittan uttidosona. <sup>32</sup> Qassi Muusee wochchiyaageeta Yaa7izeera giyo katamaa yeddin, Israa7eelati he katamaanne a heeran de7iya qeeri katamata oiqqidi, hegan de7iya Amoooretu kessidi yedettidosona.

<sup>33</sup> Hegaappe guyyiyan, Israa7eelati simmidi, Baasaane efiya ogiyaara kiyidosona. Kiyin Baasaane Kawoi Oogi ba olanchchatu ubbaara Ediraa7a giyo katamaa etaara

olettanau kiyiis. <sup>34</sup> SHin GODAI Muusa, “Ayyo yayyoppa! Aissi giikko, taani Kawuwaa Ooga a asaa ubbaaranne a biittaara ne kushiyan aattada immaas. Haseboonan uttidi haarida Amooretu Kawuwaa Sihoona bolli oottidoogaadan, neeni a bollikka oottana” yaagiis. <sup>35</sup> Yaagin Israa7eelati Ooga, a attuma naatanne a asaa ubbaa issuwaanne paxa ashshennan woridosona. Woridi eti a biittaa laattidosona.

## 22

### *Moo7aaba Kawoi Baalaaqi Balaama Xeegissiis*

<sup>1</sup> Hegaappe guyyiyan Israa7eela asai denddidi, Yarkko ginan Yorddaanoosa hefinttan de7iya Moo7aaba dembban dunkkaaniis.

<sup>2</sup> Israa7eela asai Amooretu bolli oottidoogaa ubbaa Xippoora na7ai Baalaaqi siyiis. <sup>3</sup> Siyin Israa7eela asai keehi daro gidido gishshau, Moo7aabati keehi dagammidi yayyidosona. <sup>4</sup> Moo7aabati Midiyaama cimata, “Boorai maataa mi xaissiyooogaadan ha wude asai nu yuushuwan de7iya ubbaa mi xaissana” yaagidosona.

Yaagin he wode Moo7aaba Kawoi, Xippoora na7ai Baalaaqi <sup>5</sup> Amaawa biittan Efi-raaxiisa SHaafaa matan Patoora kataman de7iya Bi7oora na7aa Balaamakko asa kiittiis. Kiittiiddi Baalaaqi, “Be7a, Gibxxeppe daro asai kiyiis; eti biitta ubbaa maayidi, taappe ya baggan de7oosona. <sup>6</sup> Eti taayyo keehi wolqqaamiyo gishshau, hayyanaa ha77i yaada, eta taayyo qanggarkkii! Ooni erii, taani eta xoonanaunne biittaappe kessanau danddayanaakkonne. Aissi giikko, neeni anjjidoogee anjjettidaagaanne neeni qanggidoogee qanggettidaagaa gidiyooгаа taani erais” yaagiis.

<sup>7</sup> Yaagin Moo7aaba cimatinne Midiyaama cimati qanggissiyo waagaa ekkidi, Balaamakko biidosona. Biidi Baalaaqi giidoogaa ayyo yootidosona. <sup>8</sup> Yootin Balaami eta, “Hachchi qammi hagan aqite; GODAI taayyo yootiyooгаа taani intteyyo yootana” yaagiis. Yaagin Moo7aaba halaqati Balaamaagan takkidosona.

<sup>9</sup> Xoossai Balaamakko yiidi, “Hageeti nenaara de7iya asati oonee?” yaagidi oichchiis.

<sup>10</sup> Oichchin Balaami Xoossaa, “Moo7aaba Kawoi, Xippoora na7ai Baalaaqi, <sup>11</sup> ‘Gibxxeppe daro asai kiyiis; eti biitta ubbaa maayidosona. Ha77i neeni yaada, eta taayyo qanggarkkii! Ooni erii, taani eta xoonanaunne biittaappe kessanau danddayanaakkonne’ yaagidi eta taakko kiittiis” yaagiis.

<sup>12</sup> Yaagin Xoossai Balaama, “Neeni etaara booppa. Israa7eelati anjjettidaageeta gidiyoo gishshau, neeni he asaa qanggoppa” yaagiis.

<sup>13</sup> Wonttetta gallassi maallado Balaami denddidi, Baalaaqa halaqata, “Taani intte-naara beennaadan GODAI diggido gishshau, intte biitti simmite” yaagiis.

<sup>14</sup> Yaagin Moo7aaba halaqati yaappe denddidi, Baalaaqakko simmidi a, “Balaami nunaara yeennan ixxiis” yaagidosona.

<sup>15</sup> Zaaridikka Baalaaqi kaseegetuppe aadhdhi bonchchettidanne qoodankka corattida hara halaqata akko kiittiis. <sup>16</sup> Eti Balaamakko yiidi, “Xippoora na7ai Baalaaqi nena, ‘Neeni taakko yaanaagaa nena aibinne teqqoppo. <sup>17</sup> Aissi giikko, taani neeyyo daro woiuwaa immana; neeni giyoobaa ubbaa aibanne taani oottana. Yaada ha asaa taayyo qanggarkkii!’ yaagiis” yaagidi yootidosona.

<sup>18</sup> SHin Balaami etayyo, “Baalaaqi harai atto birainne worqqai kumido ba kawo keettaa tau immidabaa gidiyaaakkonne, GODAA ta Xoossaa azazuwaappe kanttada, taani aibanne pacissanau woikko gujjanau danddayikke. <sup>19</sup> GODAI taayyo yootiyo harabi de7ikko taani eranaadan, inttekka hachchi qamma hagan aqite” yaagiis.

<sup>20</sup> He gallassa qammi Xoossai Balaamakko yiidi, “Ha asai nena xeesanau yiido gishshau, neeni etaara ba. SHin taani neeyyo yootiyoobaa xalaalaa ootta” yaagiis.

### *Balaamanne A Hariyo*

<sup>21</sup> Yaagin wonttetta gallassi Balaami ba hariyo kooridi, Moo7aaba halaqatuura biis. <sup>22</sup> SHin i biyo wode Xoossaa hanqqoi eexxi kiyiis; yaatin GODAA kiitanchchai a teqqanau ogiyan eqqiis. He wode Balaami ba hariyo toggidaashin, a naa77u ashkkarati aara de7oosona. <sup>23</sup> GODAA kiitanchchai bisuwaa zaaretti oiqqidi, ogiyan eqqidaagaa hariyaa be7annee, ogiyaa aggada, goshshaa giddo gelaasu. Gelin Balaami ogiyaa zaaranau hariyo bukkiis.

<sup>24</sup> Yaatin GODAA kiitanchchai naa77u woine turaa sohotuppe gidduwan, ya baggaaranne ha baggaara gimbbiyan diretti uttida un77o ogiyan eqqiis. <sup>25</sup> Hariyaa GODAA kiitanchchaa be7ido wode, gimbbe dirssaakko shiiqada, Balaama tohuwaa gimbbe dirssaara daraxaasu; daraxin i hariyo naa77anttokka bukkiis.

<sup>26</sup> Hegaappe guyyiyan, GODAA kiitanchchai sinttaukko aadhdhidi, haddirssa baggaarakka ushachcha baggaara kanttiyoosi bainna un77o sohuwan eqqiis. <sup>27</sup> Hariyaa GODAA kiitanchchaa be7ada, Balaami toggidaashin zin77aasu. Balaami keehi hanqqet-tidi, ba xam77an hariyo bukkiis. <sup>28</sup> Hegaappe guyyiyan, GODAI haree doonaa dooyin, hariyaa Balaama, “Taani neeyyo ai oottiinee neeni tana ha heezzutoo bukkidoogee?” yaagaasu.

<sup>29</sup> Yaagin Balaami hariyo, “Neeni tana eeyettido gishshataassa. Ta kushiyan bisoi de7idabaa gidiaakko, taani nena ha77i worana shin!” yaagiis.

<sup>30</sup> Yaagin hariyaa Balaama, “Taani ne de7o ubban hachchi gakkanaassi toggiyo ne hariyo gidikkaana? Taani neeyyo hagaadan hana eriyaanaa?” yaagaasu.

Yaagin Balaami, “Hana erakka” yaagiis.

<sup>31</sup> Hegaappe guyyiyan, GODAI Balaama aifiyaa dooyin, GODAA kiitanchchai shoohuwaappe shoddido bisuwaa oiqqidi, ogiyan eqqidaagaa be7iis. Be7idi i lichchi giidi, som77uwaa sa7aa gattidi gufanniis. <sup>32</sup> GODAA kiitanchchai a, “Ne hariyo ha heezzutoo aissi bukkadii? Ne ogee ta sinttan geella gidioy gishshau, taani nena teqqanau haggaa yaas. <sup>33</sup> Hariyaa tana be7ada, ta sinttappe heezzutoo wora simmaasu. Hariyaa wora simmabeennabaa gidiaakko, taani nena hannoode tumu worarggada, hariyo ashshana shin” yaagiis.

<sup>34</sup> Yaagin Balaami GODAA kiitanchchaa zaaridi, “Taani nagaraa oottaas. Neeni tana teqqanau ogiyaa bollan eqqidoogaa taani erabeikke. Neeni dosabeennabaa gidikko, taani ha77i guyye simmana” yaagiis.

<sup>35</sup> Yaagin GODAA kiitanchchai Balaama, “Neeni ha asatuura ba; shin taani neeyyo yootiyoogaa xalaalaa haasaya” yaagiis. Yaagin Balaami Baalaaqa biittaa halaqatuura biis.

### *Baalaaqi Balaama Ufaissan Mokkiis*

<sup>36</sup> Balaami yiyoogaa Baalaaqi siyido wode, Arnnoona SHaafaa zawan ba biittaa gaxan de7iya Moo7aabbatu kataman aara gaittanau biis. <sup>37</sup> Baalaaqi Balaama, “Neeni eesuwan yaanaadan taani kiittabeikkaana? Neeni aibissi taakko sohuwaara yabeikkii? Taani neeyyo woitanau tumu danddayikkaana?” yaagiis.

<sup>38</sup> Yaagin Balaami Baalaaqa, “Be7a, ha77i taani neekko yaas; shin taani aibanne gaanau tumu danddayikke. Xoossai tana haasayissiyoogaa xalaalaa taani haasayana” yaagiis. <sup>39</sup> Hegaappe guyyiyan, Balaami Baalaaqaara Qiriyaati-Huxoota giyo katamaa biis. <sup>40</sup> Bin Baalaaqi miizzaanne dorssaa yarshshidi, ashuwaappe amaridaagaa Balaa-mayyoonne aara de7iya halaqatuyyo immiis.

### *Balaama Koiro Hiraagaa*

<sup>41</sup> Wonttetta gallassi maallado Baalaaqi Balaama ekkidi, Baamooti-Ba7aali giyoosaa pude kessiis; kessin hegan eqqidi, Balaami Israa7eela asaappe baggaa be7iis.



## 23

<sup>1</sup> Balaami Baalaaqa, “Hagan neeni tau laappun yarshshiyo sohota gimmba; qassi laappun korima booraanne laappun dorssa orggeta neeni taayyo giigissa” yaagiis.

<sup>2</sup> Balaami giidoogaadan Baalaaqi oottiis; eti naa77aikka issi issi yarshshiyo sohuwan issi korima booraanne issi dorssa orggiyaa yarshshidosona. <sup>3</sup> Hegaappe guyyiyan, Balaami Baalaaqa, “Neeni ne xuuggiyo yarshshuwaa matan hagan eqqashsha; taani gedekko bais. GODAI tanaara gaittanau geelladan yeennan aggenaa. I taayyo qoncissiyooobaa aibanne taani neeyyo yootana” yaagiis. Yaagidi xoqqa booddila sohuwaa kiyiis. <sup>4</sup> Hegan Xoossai Balaamaara gaittin Balaami, “Taani laappun yarshshiyo sohota giigissaas; issi issi yarshshiyo sohuwan issi korima booraanne issi dorssa orggiyaa yarshshaas” yaagiis.

<sup>5</sup> Yaagin Balaami gaanabaa GODAI ayyo yootidi, “Neeni Baalaaqakko simmada, ayyo ha hiraagaa yoota” yaagiis. <sup>6</sup> Yaagin i Baalaaqakko simmiyo wode, Baalaaqi Moo7aaba halaqatu ubbaara ba xuuggiyo yarshshuwaa matan eqqiis.

<sup>7</sup> Hegaappe guyyiyan, Balaami ba hiraagaa hagaadan yaagidi yootiis; “Moo7aaba kawoi arshsho bagga deretuppe,

Sooriyaa biittaappe tana hagaadan yaagidi ehiis;

‘Haa ya; Yaaqooba taayyo qangga!

Israa7eela asaa, “Wurite!” yaaga’ yaagiis.

<sup>8</sup> Xoossai qanggibeennaageeta taani waata qanggoo?

GODAI, ‘Wurite!’ yaagibeennaageeta

taani waatada, ‘Wurite!’ yaagoo?

<sup>9</sup> Taani xoqqa zaallaa huuphiyan eqqada eta xeellais;

keran eqqada taani eta be7ais.

Eti banttarkka de7iya asa;

eti banttana kawotettatuppe issuwaadan qoodokkona.

<sup>10</sup> Baanaadan corattida Yaaqooba zersettaa ooni

qoodanau danddayii?

Harai atto Israa7eela asau oiddantta kushiyaa ooni

qoodanau danddayii?

Ta haiqoi xillotu haiquwaa mala gido;

ta de7uwaa wurssettaikka etaagaadan hano!” yaagiis.

<sup>11</sup> Yaagin Baalaaqi Balaama, “Neeni ta bolli oottiyoobi aibee? Taani nena ta morkketa qangganaadan ehaas; shin neeni eta anjjadasappe attin, haraba ainne oottabaakka!” yaagiis.

<sup>12</sup> Yaagin Balaami zaaridi, “Taani GODAI tana haasayissiyooogaappe haraa haasay-ooyye?” yaagiis.

### *Balaama Naa77antto Hiraagaa*

<sup>13</sup> Hegaappe guyyiyan, Baalaaqi a, “Eta neeni be7anau danddayiyo harasaa tanaara hindda. Neeni etappe amaridaagaa be7anaappe attin, eta ubbaa be7akka. Neeni hegan taayyo eta qanggarkkii” yaagiis. <sup>14</sup> Yaagidi Pisgga giyo deriyaa huuphiyan de7iya Xofima dembbaa ekkidi efiis. Hegan laappun yarshshiyo sohota gimbbiis; gimbbidi issi issi yarshshiyo sohuwan issi korima booraanne issi dorssa orggiyaa yarshshiis.

<sup>15</sup> Balaami Baalaaqa, “Taani hinin GODAARA gaittiyo wode, neeni hagan ne xuuggiyo yarshshuwaa matan eqqashsha” yaagiis.

<sup>16</sup> GODAI Balaamaara gaittidi kiittiiddi, “Neeni Baalaaqakko simmada, ayyo ha hiraagaa yoota” yaagiis.

<sup>17</sup> Yaagin i akko simmidi, ba xuuggiyo yarshshuwaa matan Moo7aaba biittaa halaqatuura eqqidaagaa demmiis. Baalaaqi a, “GODAI yootidobai aibee?” yaagiis.

<sup>18</sup> Yaagin Balaami ba hiraagaa hagaadan yaagidi yootiis;

“Xippoora na7aa Baalaaqaa denddada ezgga;  
taani yootiyooqaa siya!

<sup>19</sup> Xoossai worddotanau asa gidenna;  
ba qofaa laammanau i asa na7a gidenna.

I yootidi, ba yootidoogaa oottennee?  
Woikko i ba giidobaa polennee?

<sup>20</sup> Taani anjjanau azazuwaa ekkaas.  
I anjjiichchiis;  
taani heгаа laammanau danddayikke.

<sup>21</sup> Yaaqooba zariyau iitabi yaanabi,  
Israa7eela asau metoi gakkanabi taayyo beettibeenna.  
GODAI eta Xoossai etaara de7ees;  
i etau kawo gidiyooqaa awaajjoosona.

<sup>22</sup> Xoossai eta Gibxxeppe kessiis;  
i mino menttaadan etau de7ees.

<sup>23</sup> Yaaqooba zariyaa gakkana biti baawa;  
Israa7eela asaa qohana murunnoikka baawa.

Asai ha77i, ‘Yaaqoobassinne Israa7eelassi Xoossai oottidobaa be7ite’ yaagana.

<sup>24</sup> Ha asai macca gaammeedan denddiis.

Ba oiqqidobaa maana gakkanaashiininne  
ba woridoogaa suuttaa uyana gakkanaashin,  
shemppenna gaammuwaadan eti eqqi denddoosona” yaagiis.

<sup>25</sup> Hegaappe guyyiyan, Baalaaqi Balaama, “Neeni eta mulekka qanggoppanne mulekka anjjoppa” yaagiis.

<sup>26</sup> Yaagin Balaami zaaridi, “ ‘GODAI giyoobaa ubbaa oottana’ gaada taani neeyyo yootabeikkinaa?” yaagiis.

### *Balaama Hezzantto Hiraagaa*

<sup>27</sup> Hegaappe guyyiyan, Baalaaqi Balaama, “Haa ya; taani nena harasaa efaana. Ooni erii, nena yaa efin Xoossai ufaittidi, nena eta taayyo qanggissanaakko” yaagiis.

<sup>28</sup> Baalaaqi Balaama bazzuwaa bollaara duge xeelliyo Pa7oora Deriyaa huuphiyaa efiis.

<sup>29</sup> Efin Balaami, “Neeni hagan tau laappun yarshshiyo sohota gimmba; qassi laappun korima booratanne laappun dorssa orggeta taayyo giigissa” yaagiis. <sup>30</sup> Balaami giidoogaadan Baalaaqi oottiis; issi issi yarshshiyo sohuwan issi korima booraanne issi dorssaa orggiyaa yarshshiis.

## 24

<sup>1</sup> Israa7eela anjjiyoogee GODAA ufaissidoogaa Balaami be7ido wode, kase i ootidoogaadan murunnau koyibeenna; shin ba som77uwaa bazzuwaakko zaariis.

<sup>2</sup> Zaaridi xoqqu giidi xeellidi, Israa7eela asai ba zariyan zariyan dunkkaani uttidaagaa be7iis; be7in Xoossaa Ayyaanai a bolli wodhdhiis. <sup>3</sup> Wodhdhin i ba hiraagaa hagaadan yaagidi yootiis;

“Bi7oora na7aa Balaama hiraagai,  
a aifee tishshi ootti xeelliyoogaa hiraagai,

<sup>4</sup> Xoossai giyoobaa siyiyaagaa hiraagai,  
lichchi giidi gufannin,

a aifee dooyettidoogaanne

Ubbaa Danddayiya Xoossaa ajuutaa be7iyaagaa hiraagai haggaa.

<sup>5</sup> Yaaqooba zaretoo, intte dunkkaaneti,  
Israa7eela asau, intte de7iyooosatikka

aiba lo77oo!

<sup>6</sup> Eti micettida wombbaadan,  
shaafaa doonan de7iya ataakilttiyaa sohuwaadan,  
GODAI tokkido godare uuttaadaaninne  
haattaa doonan de7iya zigaadan hanoosona.

<sup>7</sup> Etao daro haattai pulttana;  
eta zerettau gidiya haattai de7ana.

Eta kawoi Kawuwaa Agaagappe gitatana;  
eta kawotettaikka bonchchettana.

<sup>8</sup> Xoossai eta Gibxxeppe kessiis;  
i mino menttaadan eta de7ees.

Eti morkke kawotettaa mittana;  
eta meqettaakka liiqissana;  
eti bantta wonddafiya zubbiiyan eta caddana.

<sup>9</sup> Israa7eela asai gaammuwaadan zin77ees.  
Macca gaammeedan eta denttanau ooni xalanee?

Inttena anjiya ubbai anjettidaagaa gidana;  
inttena qanggiya ubbai qanggettidaagaa gidana” yaagiis.

<sup>10</sup> Hegaappe guyyiyan, Baalaaqi Balaama bolli hanqquwaa eexxi kiyiis. Baalaaqi ba kushiya dukkidi Balaama, “Ta morkketa qangganaadan taani nena xeesaas; shin neeni ha heezzutookka eta anjjadasa. <sup>11</sup> Simmi ha77i neeni ne soo baqata; “Taani neeyyo darobaa woitana’ gaas; shin neeni woituwaa ekkennaadan GODAI nena diggiis” yaagiis.

<sup>12</sup> Yaagin Balaami Baalaaqa zaaridi, “Neni taakko kiittidoogeeetun, <sup>13</sup> ‘Baalaaqi harai atto ba birainne worqqai kumido ba kawo keettaa tau immidabaa gidiyaakkonne, GODAI yootidoogaa kanttada, lo77uwaa woikko iitaa ta sheniyan oottanau danddayikke. Taani GODAI giyoobaa xalaalaa gaana’ yaagada neeyyo yootabeikkinaayye?” yaagiis.

### *Balaama Wurssetta Hiraagata*

<sup>14</sup> Yaagidi, “Taani ha77i ta asaakko bais; shin neeni haa ya; ha asai wurssetta wodiyan ne asaa oottanabaa taani neeyyo yootana” yaagiis. <sup>15</sup> Yaagidi i ba hiraagaa hagaadan yaagidi yootiis;

“Bi7oora na7aa Balaama hiraagai,  
a aifee tishshi oottidi xeelliyooogaa hiraagai,

<sup>16</sup> Xoossai giyoobaa siyiyaagaanne  
Ubbaappe Xoqqiya Xoossaappe  
gidida eratetta de7iyooogaa hiraagai,

lichchi giidi gufannin,

a aifee dooyettidoogaanne

Ubbaa Danddayiya Xoossaa ajuutaa be7iyaagaa hiraagai haaa.

<sup>17</sup> Taani a be7ais; shin wodee ha77a gidenna;  
taani a xeellais; shin matan gidenna.

Yaaqooba zariyaappe xoolinttee kiyana.

Israa7eelappe kawotaa xam77ai kiyana.

Moo7aaba asaa som77uwaa i gaacci qolana.

Seeta asaa ubbaa huuphiyaa i kinchchana.

<sup>18</sup> Eedoomi xoonettana;  
a morkkee Se7iirikka xoonettana;

shin Israa7eeli minni minnidi baana.

<sup>19</sup> Yaaqoobappe haariyaagee kiyana;  
kiyidi eta kataman paxa attidaageeta xaissana” yaagiis.

<sup>20</sup> Hegaappe guyyiyan, Balaami Amaaleeqa asata be7idi, ba hiraagaa hagaadan yaagidi yootiis;

“Kawotettatu gidдон Amaaleeqi koiro;  
shin eta wurssetta xayo” yaagiis.

<sup>21</sup> Qassi Balaami Qeena asata be7idi, ba hiraagaa hagaadan yaagidi yootiis;  
“Intte de7iyo sohoi saro soho gidees;

intte keetta zaallaa bollan keexettiis.

<sup>22</sup> SHin Asooreti inttena omooddiyo wode,  
intte Qeena asati xayana” yaagiis.

<sup>23</sup> Hegaappe guyyiyan, Balaami ba hiraagaa hagaadan yaagidi yootiis;  
“Aayye7ana!

Xoossai hгаа oottiyo wode  
ooni de7ana danddayii?

<sup>24</sup> Markkabeti Kitiima haruuruwaappe yaana;  
eti Asooretanne Ebeerata huqqunnana;

shin qassi etikka xayana” yaagiis.

<sup>25</sup> Hegaappe guyyiyan, Balaami denddidi, ba soo simmiis; Baalaaqikka ba ogiyaa biis.

## 25

### *Israa7eelati Pa7ooraa Giyoosan Nagaraa Oottidosona*

<sup>1</sup> Israa7eelati SHiixima giyoosan dunkkaanido wode, asai Moo7aaba biittaa maccaasatuura shaaramuxettaa doommiis. <sup>2</sup> He maccaasati bantta xoossatu yarshshuwaa maanau eta shoobbidosona; shoobbin eti miidi, eta xoossatuuyo goinnidosona.

<sup>3</sup> Israa7eelati Pa7ooraa Ba7aala giyo eeqaa kaallido gishshau, GODAA hanqqoi eta bollan eexxi kiyiis. <sup>4</sup> Yaatin GODAI Muusa, “GODAA hanqqoi Israa7eelappe wora simmana mala, ha asaa kaalettiyaageeta ubbaa efaada, seeta gallassi GODAA sinttan kaqqa” yaagiis. <sup>5</sup> Yaagin Muusee Israa7eela daannata, “Pa7ooraa Ba7aala giyo eeqaayyo goinnida intte asaa ubbaa intte huuphiyan huuphiyan worite” yaagiis.

<sup>6</sup> Muuseenne Israa7eela maabarai ubbai Xoossaa Dunkkaaniyaa penggen yeekkishin, Israa7eelatuppe issoi Midiyaama biittaa maccaasiyo eta sinttaara aattidi, ba keettaa asaakko ehiis. <sup>7</sup> Qeesiyaa Aaroonaa na7aa El77aazara na7ai Piinihaasi heгаа be7ido wode, maabaraa gid dope denddidi, tooraa ba kushiyan oiqqidi, <sup>8</sup> he Israa7eela bitaniyaa kaallidi, dunkkaaniyaa gid do geliis. Gelidi Israa7eela bitaniyaanne mishiriyoonne naa77aakka tooran caddidi, kantti kessiis. Hegaadan hanin, boshai Israa7eelatuppe qaarettiis; <sup>9</sup> shin he boshan haiqqida asai laatamanne oiddu sha7a.

<sup>10</sup> Hegaappe guyyiyan, GODAI Muusa hagaadan yaagiis; <sup>11</sup> “Qeesiyaa Aaroonaa na7aa El77aazara na7ai Piinihaasi Israa7eela asaa gid don taani ta bonchchuwau mishettiyoogaadan mishettido gishshau, eta bolli taani hanqqettido hanqqoi dochchiis; taanikka eta ta hanqquwan xaissabeikke. <sup>12</sup> Hega gishshau, taani ta sarotettaa maachchaa aara maacettiyoogaa Piinihaasayyo neeni oda. <sup>13</sup> I ba Xoossaa bonchchuwau mishettido gishshaunne Israa7eela asaayyo atto giissido gishshau, inne a zerettati merinau qeese gidana” yaagiis.

<sup>14</sup> Midiyaama biittaa mishireera worido Israa7eela bitaniyaa sunttai Saalu na7aa Zimira; Saalu Simoonaa zaretun issi yaraa halaqaa. <sup>15</sup> Haiqqida Midiyaama biittaa mishiree sunttai Kozibo; i aawai Xuuri Midiyaamatu yaraa halaqaa.

<sup>16</sup> GODAI Muusa hagaadan yaagiis; <sup>17</sup> “Midiyaama biittaa asata morkkite; morkkidi eta worite. <sup>18</sup> Aissi giikko, eti inttena Pa7ooran cimmiidi, inttessi morkke gididosona; qassi boshaa gallassi Pa7ooran worido mishiree, Midiyaamatu yaraa halaqaa na7ee Kozibi gaasuwan eti inttena morkkidosa” yaagiis.

## 26

### *Naa77antto Israa7eela Asaa Qoodaabaa*

<sup>1</sup> Boshaappe guyyiyan, GODAI Muusanne qeesiyaa Aaroonaa na7aa El77aazara, <sup>2</sup> “Yelettoosappe laatamu laittanne hegaappe bollaara de7iya Israa7eelata, olau baanau danddayiyaageeta ubbata, eta keettan keettan qoodite” yaagiis.

<sup>3</sup> Yaagin Muuseenne qeesee El77aazari Yorddaanoosa SHaafaappe hefintta baggaara, Yarkko matan, Moo7aaba Dembban etaara haasayiiddi, <sup>4</sup> “GODAI Muusa azazi-dooqaadan, yelettoosappe laatamu laittanne hegaappe bollaara de7iya asaa qoodite” yaagidosona.

Gibxxeppe kiyida Israa7eelati hageeta:

<sup>5</sup> Israa7eela baira na7aa Roobeela zareti: Hanooka yarata, Paalu yarata, <sup>6</sup> Hexiroona yaratanne Karmma yarata. <sup>7</sup> Hageeti Roobeela zareta; eti muleera 43,730. <sup>8</sup> Paalu na7ai Eli7aaba; <sup>9</sup> Eli7aaba attuma naati Nemu7eela, Daataananne Abiiraama; ha Daataaninne Abiiraami maabarai dooridoogeeta. Eti Qoraahaaranne a kaalliyaageetuura zuppetidi, Muuse bolli, Aaroonaa bollinne GODAA bolli makkalidosona. <sup>10</sup> Biittai dooyettidi, eta Qoraahaara issippe mittiis; eta kaalliya naa77u xeetanne ishatamu asaa tamai min haiqqidosona. Yaatin eti asi be7idi duuxxiyo malaata gididosona. <sup>11</sup> SHin Qoraaha attuma naati he gallassi haiqqibookkona.

<sup>12</sup> Simoonaa zareti bantta yaran yaran: Nemu7eela yarata, Yaamiina yarata, Yaakiina yarata, <sup>13</sup> Zaraaha yaratanne SHaa7ula yarata. <sup>14</sup> Hageeti Simoonaa zareta; eti muleera 22,200.

<sup>15</sup> Gaada zareti bantta yaran yaran: Xafoona yarata, Hagga yarata, SHuuna yarata, <sup>16</sup> Oozina yarata, Eera yarata, <sup>17</sup> Arooda yaratanne Ar77eela yarata. <sup>18</sup> Hageeti Gaada zareta; eti muleera 40,500.

<sup>19</sup> Yihudaa attuma naati Eeranne Oonaana; shin eti Kanaane biittan haiqqidosona. <sup>20</sup> Yihudaa zareti bantta yaran yaran: SHEela yarata, Paareesa yaratanne Zaraaha yarata. <sup>21</sup> Paareesa zareti Hexiroona yaratanne Hamuula yarata. <sup>22</sup> Hageeti Yihudaa zareta; eti muleera 76,500.

<sup>23</sup> Yisaakoora zareti bantta yaran yaran: Tolaa7a yarata, Puuwa yarata, <sup>24</sup> Yaashuuba yaratanne SHimiroona yarata. <sup>25</sup> Hageeti Yisaakoora zareta; eti muleera 64,300.

<sup>26</sup> Zaabiloona zareti bantta yaran yaran: Sereeda yarata, Eloona yaratanne Yaahila7eela yarata. <sup>27</sup> Hageeti Zaabiloona zareta; eti muleera 60,500.

<sup>28</sup> Minaasenne Efireema aawaa Yooseefa zareti hagaappe kaallidi xaafettidosona. <sup>29</sup> Minaase zareti Minaase na7aa Maakiira yarata, Maakiira na7aa Gala7aade yaratanne Gala7aade naatu yarata. <sup>30</sup> Gala7aade zareti I7eezera yarata, Heleeqa yarata, <sup>31</sup> Asiri7eela yarata, SHEkeema yarata, <sup>32</sup> SHamidaa7a yaratanne Hefeera yarata. <sup>33</sup> Hefeera na7ai Xalofihaadi macca naatu xalaalaa yeliis; ayyo attuma na7i baawa. Xalofihaada macca naatu sunttai Maahilo, No7o, Hoogilo, Milkkonne Tirxxo. <sup>34</sup> Hageeti Minaase zareta; eti muleera 52,700.

<sup>35</sup> Efireema zareti bantta yaran yaran: SHutelaaha yarata, Bekeera yarata, Tahaana yaratanne <sup>36</sup> SHutelaaha na7aa Eraana yarata. <sup>37</sup> Hageeti Efireema zareta; eti muleera 32,500. Yooseefa zareti bantta yaran yaran hegeeta.

<sup>38</sup> Biniyaama zareti bantta yaran yaran: Belaa7a yarata, Ashibeela yarata, Ahiraama yarata, <sup>39</sup> SHafufaama yarata, Hufaama yarata, <sup>40</sup> Belaa7a na7aa Arada yaratanne Belaa7a na7aa Naa7imaana yarata. <sup>41</sup> Hageeti Biniyaama zareta; eti muleera 45,600.

<sup>42</sup> Daana zareti SHuhaama yarata. <sup>43</sup> SHuhaama yarati muleera 64,400.

<sup>44</sup> Aseera zareti bantta yaran yaran: Yimina yarata, Yishiwaaha yarata, Barii7a yarata, <sup>45</sup> Barii7a na7aa Hebeera yaratanne Barii7a na7aa Malkki7eela yarata. <sup>46</sup> Aseerau Seraaho giyo macca na7iyaa de7ausu. <sup>47</sup> Hageeti Aseera zareta; eti muleera 53,400.



<sup>48</sup> Nifttaaleema zareti bantta yaran yaran: Yaa7izi7eela yarata, Guuna yarata, <sup>49</sup> Yexeera yaratanne SHilleema yarata. <sup>50</sup> Hageeti Nifttaaleema zareta; eti muleera 45,400.

<sup>51</sup> Qoodettida Israa7eela attuma asai muleera 601,730.

<sup>52</sup> Qassikka GODAI Muusa, <sup>53</sup> “Ha zaretuyyo eta sunntaa sunntaa qoodaadan biittai shaahettidi, laata gididi etau imetto. <sup>54</sup> Qoodan coratuyyo eta coratettaa keenaa, qoodan guuttatuyyo eta guuttatettaa keenaa shaakkada imma. Ubbaikka xaafettida bantta qoodaa keenaa keenaa ekkona. <sup>55</sup> SHin biittai saaman shaahetto; issi issi zaree laattiyo biittai eta aawaa zariyaa sunntaadan gido. <sup>56</sup> Laata ubbai qoodan coratuppenne qoodan guuttatuppe gidduwan saaman shaahetto” yaagiis.

<sup>57</sup> Bantta yaran yaran qoodettida Leewati hageeta: Gershshoona yarata, Qahaata yaratanne Maraara yarata. <sup>58</sup> Hageetikka qassi Leewatu yarata: Liibina yarata, Kebroona yarata, Maahila yarata, Musha yaratanne Qoraaha yarata. Qahaati Amiraama yeliis. <sup>59</sup> Amiraama keettaayee sunntai Yokebeedo; a Gibxxen Leewayyo yelettida na7iyo. A Amiraamayyo Aaroon, Muusanne eta michchiyo Miiriyaamo yelaasu. <sup>60</sup> Aarooni Nadaaba, Abiiha, El77aazaranne Itaamaara yeliis. <sup>61</sup> SHin GODAI azazibeenna tamaa a sinttan yarshshido wode, Nadaabinne Abiihu haiqqidosona. <sup>62</sup> Yelettoosappe issi aginanne hegaappe bollaara de7iya qoodettida attuma Leewati muleera laatamanne heezzu sha7a. Israa7eelatu gidduwan etau laattiyo biittai imetibeenna gishshau, eti Israa7eelatuura qoodettibookkona.

<sup>63</sup> Yorddaanoosa SHaafaappe hefintta baggaara, Yarkko matan, Moo7aaba Dembban Muuseenne qeese El77aazari Israa7eelata qoodido wode, qoodettida asai haggaa.

<sup>64</sup> Muuseenne qeese Aarooni kase Siinaa Bazzuwan Israa7eelata qoodido wode, qoodettida asaappe harai atto mexi issi asinne attibeenna. <sup>65</sup> Aissi giikko, GODAI he Israa7eelatubaa odiiddi, “Eti bazzuwan tumu haiqqana” yaagi wottiis. Yifune na7aa Kaaleebappenne Nawe na7aa Yaasuppe attin, harai issi asinne attibeenna.

## 27

### *Xalofhaada Macca Naatu Oishaa*

<sup>1</sup> Xalofhaada macca naati Maahilo, No7o, Hoogilo, Milkonne Tirxxo. Xalofhaadi Hefeera na7aa; Hefeeri Gala7aade na7aa; Gala7aadee Maakira na7aa; Maakiri Minaase na7aa; Minaasee Yooseefa na7aa. <sup>2</sup> Ha macca naati Xoossaa Dunkkaaniyaa penggen Muuse sinttan, qeesiyaa El77aazara sinttan, halaqatu sinttaaninne maabaraa ubbaa sinttan eqqidi, hagaadan yaagidosona; <sup>3</sup> “Nu aawai bazzuwan haiqqiis; i ba nagaran haiqqiisippe attin, GODAA bolli denddida Qoraaha kaalliyaageetu gidдон de7enna. Ayyo attuma na7i baawa. <sup>4</sup> Attuma na7i ayyo bannabaa gidikkonne, nu aawaa sunntai a dabbotu gidduwaappe aissi xayii? Nu aawaa ishanttu gidдон nuuyyo laattiyo biittaa imma” yaagidosona.

<sup>5</sup> Yaagin Muuse eta oishaa GODAA sintti shiishshiis. <sup>6</sup> SHiishshin GODAI Muusa, <sup>7</sup> “Xalofhaada macca naati oichchidoogee likke; eta aawaa ishanttu gidдон neeni etayyo laattiyo biittaa imma; a laatai eta gakko. <sup>8</sup> Qassi neeni Israa7eelata hagaadan yaaga; ‘Issi asi attuma na7i bannan haiqqiyaabaa gidikko, a biittaa a macca na7i laatto; <sup>9</sup> macca na7ikka ayyo bannabaa gidikko, a biittaa a ishantti laattana; <sup>10</sup> ayyo ishantti bannabaa gidikko, a aawaa ishantti laattana; <sup>11</sup> a aawaa ishanttika bannabaa gidikko, a zariyaappe ubbaappe matattiya dabbuwaa laattana. Taani GODAI nena Muusa azazidoogaadan, hagee Israa7eelatuyyo higge gido’ yaaga” yaagiis.

### *Muuse Sohuwan Yaasu Doorettiis*

<sup>12</sup> Hegaappe guyyiyan, GODAI Muusa, “Pude Abaarima Dereta kiyada, taani Israa7eela asaayyo immido biittaa be7a. <sup>13</sup> Be7idoogaappe guyyiyan, ne ishaa Aaroonadan neenikka haiqqada, ne maizzan gaittana. <sup>14</sup> Aissi giikko, Xiina Bazzuwan de7iya

haattan asai ubbai makkalido wode, intte naa77aikka eta sinttan tana geeshshadan bonchchanau taayyo azazettibeekketa” yaagiis. Hegee haattai Xiina Bazzuwan, Qaadeesan de7iya Mariiba haattaa.

<sup>15</sup> Muusee GODAA hagaadan yaagiis; <sup>16-17</sup> “Abeet GODAU, asa ubbau de7uwaa immiya Xoossau, ne asai, GODAA asai henttanchchi bainna wude mala gidennaadan, ha asaa sinttan kiyiyaanne geliya, etakka kaalettidi kessiyaanne gelissiya, issi asa ha maabaraa bolli sunttarkii” yaagiis.

<sup>18</sup> Yaagin GODAI Muusa, “Ayyaanai an de7iyo Nawe na7aa Yaasa ekkada, ne kushiya a bolli wotta; <sup>19</sup> yaatada qeesiyaa El77aazara sinttaaninne maabara ubbaa sinttan essada, eti be7ishin suntta. <sup>20</sup> Israa7eelatu maabara ubbai ayyo azazettanaadan, ne maataappe ayyo shaakkada imma. <sup>21</sup> Immin qeesiyaa El77aazara sinttan i eqqo; eqqin El77aazari Uriimiyaa ayyo GODAA sheniyaa oichcho. Yaasunne Israa7eela maabarai ubbai El77aazara azazuwan kiyonanne a azazuwan gelona” yaagiis.

<sup>22</sup> GODAI azazidoogaadan Muusee oottiis; Yaasa efidi, qeesiyaa El77aazara sinttaaninne maabaraa ubbaa sinttan essiis. <sup>23</sup> GODAI azazidoogaadan, Muusee ba kushiya a bolli wottidi, a sunttiis.

## 28

### *Hachchi Hachchi SHiishshiyo Yarshshuwaa* (Kessaabaa 29:38-46)

<sup>1</sup> GODAI Muusa, <sup>2</sup> “Israa7eelata hagaadan yaagada azaza; ‘Ta qumaa, tana tonggu giidi sawana mala, taman yarshshiyo ta yarshshuwaa keerido wodiyan wodiyan taayyo naagidi immite’ yaaga. <sup>3</sup> Qassi neeni eta, ‘GODAAYYO taman yarshshiyo yarshshoi haggaa: tilla bollaara de7iya, issi laitta gidido naa77u dorssa orggeta hachchi hachchi xuuggiyo yarshshuwaa ayyo yarshshite; <sup>4</sup> dorssa orggetuppe issuwaa maallado, naa77anttuwaa omarssi yarshshite. <sup>5</sup> Qassi hegaara issi litiro gidiya zaitiyan munaqettida issi kilo giraame muruta gisttiyaa xiilliyaa kattaa yarshshuwaa ayyo yarshshite. <sup>6</sup> Hagee GODAA tonggu giidi sawana mala, Siinaa Deriyaa bollan azazettida, hachchi hachchi taman xuuggiyo yarshsho. <sup>7</sup> Hegaara yarshshiyo ushshaa yarshshoi issi dorssa orggiya ayyo issi litiro gidiya woine eessa. Ushshaa yarshshuwaa Geeshsha Sohuwan GODAAYYO gussite. <sup>8</sup> Omarssi naa77antto dorssa orggiyaa, maalladoogaa oottidoogaadan oottidi, kattaa yarshshuwaaranne ushshaa yarshshuwaa GODAA tonggu giidi sawana mala, taman yarshshite.

### *Sambbata Gallassa Yarshshuwaa*

<sup>9</sup> “Sambbata gallasan, tilla bollaara de7iya issi laitta gidido naa77u dorssaanne zaitiyan munaqettida naa77u kilo giraame gidiya muruta xiilliyaa kattaa yarshshonne ushshaa yarshsho oottidi yarshshite. <sup>10</sup> Hachchi hachchi xuuggiyo yarshshuwaanne a ushshaa yarshshuwaa bolli, Sambbata gallassa ubban intte yarshshiyo xuuggiyo yarshshoi haggaa.

### *Aginai Xeeriyoo Gallassaa Yarshshuwaa*

<sup>11</sup> “ ‘Aginai xeeriyoo gallassa ubban, naa77u mirggota, issi dorssa orggiyaanne issi laitta gidido laappun dorssa orggeta, ubbaikka tilla bollaara de7iyaageeta, xuuggiyo yarshsho oottidi, GODAAYYO yarshshite. <sup>12</sup> Issi issi mirgguwaa zaitiyan munaqettida heezzu kilo giraame gidiya muruta gisttiyaa xiilliyaa, issi dorssa orggiyaara zaitiyan munaqettida naa77u kilo giraame gidiya muruta gisttiyaa xiilliyaanne <sup>13</sup> laappun dorssa maratuppe issi issi dorssa maraara zaitiyan munaqettida issi kilo giraame gidiya muruta gisttiyaa xiilliyaa kattaa yarshsho oottidi, GODAA tonggu giidi sawana mala, taman yarshshiyo yarshshuwaa yarshshite. <sup>14</sup> Qassi ushshaa yarshshuwaa ayyo issi issi mirgguwaa naa77u litiro gidiya woine eessaa, issi dorssa orggiyaara issi

litironne bagga woine eessaanne issi issi dorssa maraara issi litiro gidiya woine eessaa shiishshite. Hagee laittaa gididon aginai xeeriyoo gallassa ubban yarshshiyoo xuuggiyoo yarshsho. <sup>15</sup> Hachchi hachchi xuuggiyoo yarshshuwaanne a ushshaa yarshshuwaa bolli, issi deeshsha orggiyaa nagaraa yarshsho oottidi, GODAAYYO yarshshite.

*Paasikaa Baalaanne Oittaa Baalaa Yarshshota  
(Wogaabaa 23:5-14)*

<sup>16</sup> “Koiro aginan tammanne oiddantta gallassai GODAA Paasikaa bonchchiyo gallassa gido. <sup>17</sup> Qassi he aginanka tammanne ichchashantta gallassan doommidi, Oittaa Baalai bonchchettees; heгаа gishshau, laappun gallassatun irshshoi gelibeenna oittaa miite. <sup>18</sup> He gallassatuppe koiro gallassan geeshsha yaa7aa shiiqite; daafurssiya ooso aibanne ootoppite. <sup>19</sup> Naa77u mirggota, issi dorssa orggiyaanne issi laitta gidido laappun dorssa orggeta, ubbaikka tilla bollaara de7iyaageeta, taman yarshshiyoo yarshsho oottidi, GODAAYYO yarshshite. <sup>20</sup> Kattaa yarshshuwaayyo issi mirgguwaara zaitiyan munaqettida heezzu kilo giraame gidiya muruta gisttiyaa xiilliyaa, issi dorssa orggiyaara naa77u kilo giraame gidiya xiilliyaanne <sup>21</sup> laappun dorssa maratuppe issi issi maraara issi kilo giraame xiilliyaa yarshshite. <sup>22</sup> Qassi issi deeshsha orggiyaa nagaraa yarshshuwaassi, intte nagaraa atto giissanau yarshshite. <sup>23-24</sup> Hachchi hachchi maallado xuuggiyoo yarshshuwaanne a kattaa yarshshuwaa bolli, sawuwaa tonggu giya qumaa taman yarshshiyoo yarshshuwaa gujjidi, GODAAYYO yarshshite. Laappun gallassaayyo hegaadan oottite. <sup>25</sup> Laappuntta gallassan qassi geeshsha yaa7aa shiiqite; daafurssiya ooso aibanne ootoppite.

*Saaminttatu Baalaa Yarshshuwaa  
(Wogaabaa 23:15-22)*

<sup>26</sup> “Saaminttatu Baalaa gallassan intte GODAAYYO ooratta kattaa shiishshiyoo wode, geeshsha yaa7aa shiiqite; daafurssiya ooso aibanne ootoppite. <sup>27</sup> Naa77u mirggota, issi dorssa orggiyaanne issi laitta gidido laappun dorssa orggeta sawuwaa tonggu giya xuuggiyoo yarshsho oottidi, GODAAYYO yarshshite. <sup>28</sup> Issi issi mirgguwaara zaitiyan munaqettida heezzu kilo giraame gidiya muruta gisttiyaa xiilliyaa, issi dorssa orggiyaara naa77u kilo giraame xiilliyaanne <sup>29</sup> laappun dorssa maratuppe issi issi maraara issi kilo giraame xiilliyaa kattaa yarshshuwaayyo yarshshite. <sup>30</sup> Qassi issi deeshsha orggiyaa nagaraa atto giissiyo yarshsho oottidi yarshshite. <sup>31</sup> Hachchi hachchi xuuggiyoo yarshshuwaanne a ushshaa yarshshuwaa bolli, hageeta eta kattaa yarshshuwaara yarshshite. Meheti tilla bollaara de7iyaageeta gidiyooгаа geeshshidi erite.

## 29

*Ooratta Laittai Geliyo Baalaa Yarshshuwaa  
(Wogaabaa 23:23-25)*

<sup>1</sup> “Laappuntta aginaayyo koiro gallassan, geeshsha yaa7aa shiiqite. Daafurssiya ooso aibanne ootoppite. He gallassai xurumbbai punettiyo gallassa. <sup>2</sup> GODAA sawuwaa tonggu gaana mala, xuuggiyoo yarshshuwaayyo, issi mirgguwaa, issi dorssa orggiyaanne issi laitta gidido laappun dorssa orggeta, ubbaikka tilla bollaara de7iyaageeta, yarshshite. <sup>3</sup> Kattaa yarshshuwaayyo issi mirgguwaara zaitiyan munaqettida heezzu kilo giraame gidiya muruta gisttiyaa xiilliyaa, issi dorssa orggiyaara naa77u kilo giraame xiilliyaanne <sup>4</sup> laappun dorssa maratuppe issi issi maraara issi kilo giraame xiilliyaa yarshshite. <sup>5</sup> Qassi issi deeshsha orggiyaa nagaraa yarshshuwaassi, intte nagaraa atto giissanau yarshshite. <sup>6</sup> Hageeta aginai xeeriyoo gallassan xuuggiyoo yarshshuwaa bollinne a kattaa yarshshuwaa bolli, hachchi hachchi xuuggiyoo

yarshshuwaa bolli, a kattaa yarshshuwaa bollinne a ushshaa yarshshuwaa bolli gujjidi, wogaadan yarshshite; hageeti GODAA sawuwaa tonggu giya, taman yarshshiyoo yarshshota.

*Nagaraa Atto Giissiyoo Gallassaa Yarshshuwaa  
(Wogaabaa 23:26-32)*

<sup>7</sup> “Ha laappuntta aginaayyo tammannta gallassan geeshsha yaa7aa shiiqite; intte huuphiyaa kaushshite; aiba oosokka oottoppote. <sup>8</sup> Yaatidi GODAA tonggu giidi sawana mala, xuuggiyo yarshshuwaayyo issi mirgguwaa, issi dorssa orggiyaanne issi laitta gidido laappun dorssa orggeta, ubbaikka tilla bollaara de7iyaageeta, yarshshite. <sup>9</sup> Kattaa yarshshuwaayyo issi mirgguwaara zaitiyan munaqettida heezzu kilo giraame gidiya muruta gisttiyaa xiilliyaa, issi dorssa orggiyaara naa77u kilo giraame xiilliyaanne <sup>10</sup> laappun dorssa maratuppe issi issi maraara issi kilo giraame xiilliyaa yarshshite. <sup>11</sup> Qassi nagaraa yarshshuwaayyo issi deeshsha orggiyaa yarshshite. Hageeta nagaraa atto giissiyoo yarshshuwaa bolli, hachchi hachchi xuuggiyo yarshshuwaa bolli, eta kattaa yarshshuwaa bollinne eta ushshaa yarshshuwaa bolli gujjidi yarshshite.

*Daase Baalaa Yarshshota  
(Wogaabaa 23:33-44)*

<sup>12</sup> “Laappuntta aginan tammanne ichchashantta gallassan, geeshsha yaa7aa shiiqite; daafurssiya ooso aibanne oottoppote. GODAAYYO Daase Baalaa laappun gallassaa bonchchite. <sup>13</sup> GODAA tonggu giidi sawana mala, taman yarshshiyoo tammanne heezzu mirggota, naa77u dorssa orggetanne issi laitta gidido tammanne oiddu dorssa orggeta, ubbaikka tilla bollaara de7iyaageeta, yarshshite. <sup>14</sup> Kattaa yarshshuwaayyo tammanne heezzu mirggotuppe issi issi mirgguwaara zaitiyan munaqettida heezzu kilo giraame gidiya muruta gisttiyaa xiilliyaa, naa77u dorssa orggetuppe issi issi orggiyaara naa77u kilo giraame xiilliyaanne <sup>15</sup> tammanne oiddu dorssa maratuppe issi issi maraara issi kilo giraame xiilliyaa yarshshite. <sup>16</sup> Qassi nagaraa yarshshuwaayyo issi deeshsha orggiyaa yarshshite. Hageeta hachchi hachchi xuuggiyo yarshshuwaa bolli, a kattaa yarshshuwaa bollinne a ushshaa yarshshuwaa bolli gujjidi yarshshite.

<sup>17</sup> “Naa77antta gallassan tammanne naa77u mirggota, naa77u dorssa orggetanne issi laitta gidido tammanne oiddu dorssa orggeta, ubbaikka tilla bollaara de7iyaageeta, yarshshite. <sup>18</sup> Mirggotuura, dorssa orggetuuranne dorssa maratuura, eta kattaa yarshshuwaanne eta ushshaa yarshshuwaa wogai azaziyo qoodaadan yarshshite. <sup>19</sup> Qassi nagaraa yarshshuwaayyo issi deeshsha orggiyaa yarshshite. Hageeta hachchi hachchi xuuggiyo yarshshuwaa bolli, a kattaa yarshshuwaa bollinne a ushshaa yarshshuwaa bolli gujjidi yarshshite.

<sup>20</sup> “Heezzantta gallassan, tammanne isiini mirggota, naa77u dorssa orggetanne issi laitta gidido tammanne oiddu dorssa orggeta, ubbaikka tilla bollaara de7iyaageeta, yarshshite. <sup>21</sup> Mirggotuura, dorssa orggetuuranne dorssa maratuura, eta kattaa yarshshuwaanne eta ushshaa yarshshuwaa wogai azaziyo qoodaadan yarshshite. <sup>22</sup> Qassi nagaraa yarshshuwaayyo issi deeshsha orggiyaa yarshshite. Hageeta hachchi hachchi xuuggiyo yarshshuwaa bolli, a kattaa yarshshuwaa bollinne a ushshaa yarshshuwaa bolli gujjidi yarshshite.

<sup>23</sup> “Oiddantta gallassan, tammu mirggota, naa77u dorssa orggetanne issi laitta gidido tammanne oiddu dorssa orggeta, ubbaikka tilla bollaara de7iyaageeta, yarshshite. <sup>24</sup> Mirggotuura, dorssa orggetuuranne dorssa maratuura, eta kattaa yarshshuwaanne eta ushshaa yarshshuwaa wogai azaziyo qoodaadan yarshshite. <sup>25</sup> Qassi nagaraa yarshshuwaayyo issi deeshsha orggiyaa yarshshite. Hageeta hachchi hachchi xuuggiyo yarshshuwaa bolli, a kattaa yarshshuwaa bollinne a ushshaa yarshshuwaa bolli gujjidi yarshshite.



<sup>26</sup> “Ichchashantta gallassan, uddufun mirggota, naa77u dorssa orggetanne, issi laitta gidido tammanne oiddu dorssa orggeta, ubbaikka tilla bollaara de7iyaageeta, yarshshite. <sup>27</sup> Mirggotuura, dorssa orggetuuranne dorssa maratuura eta kattaa yarshshuwaanne eta ushshaa yarshshuwaa wogai azaziyo qoodaadan yarshshite. <sup>28</sup> Qassi nagaraa yarshshuwaayyo issi deeshsha orggiyaa yarshshite. Hageeta hachchi hachchi xuuggiyo yarshshuwaa bolli, a kattaa yarshshuwaa bollinne a ushshaa yarshshuwaa bolli gujjidi yarshshite.

<sup>29</sup> “Usuppunta gallassan, hospun mirggota, naa77u dorssa orggetanne issi laitta gidido tammanne oiddu dorssa orggeta, ubbaikka tilla bollaara de7iyaageeta, yarshshite. <sup>30</sup> Mirggotuura, dorssa orggetuuranne dorssa maratuura eta kattaa yarshshuwaanne eta ushshaa yarshshuwaa wogai azaziyo qoodaadan yarshshite. <sup>31</sup> Qassi nagaraa yarshshuwaayyo issi deeshsha orggiyaa yarshshite. Hegeeta hachchi hachchi xuuggiyo yarshshuwaa bolli, a kattaa yarshshuwaa bollinne a ushshaa yarshshuwaa bolli gujjidi yarshshite.

<sup>32</sup> “Laappunta gallassan, laappun mirggota, naa77u dorssa orggetanne issi laitta gidido tammanne oiddu dorssa orggeta, ubbaikka tilla bollaara de7iyaageeta, yarshshite. <sup>33</sup> Mirggotuura, dorssa orggetuuranne dorssa maratuura eta kattaa yarshshuwaanne eta ushshaa yarshshuwaa wogai azaziyo qoodaadan yarshshite. <sup>34</sup> Qassi nagaraa yarshshuwaayyo issi deeshsha orggiyaa yarshshite. Hegeeta hachchi hachchi xuuggiyo yarshshuwaa bolli, a kattaa yarshshuwaa bollinne a ushshaa yarshshuwaa bolli gujjidi yarshshite.

<sup>35</sup> “Hospunta gallassan geeshsha yaa7aa shiiqite; daafurssiya ooso aibanne oottopite. <sup>36</sup> Taman yarshshiyo yarshshoi GODAA tonggu giidi sawana mala, issi mirgguwaa, issi dorssa orggiyaanne issi laitta gidido laappun dorssa orggeta, ubbaikka tilla bollaara de7iyaageeta, yarshshite. <sup>37</sup> Mirgguwaa, dorssa orggiyaaranne dorssa maratuura eta kattaa yarshshuwaanne eta ushshaa yarshshuwaa wogai azaziyo qoodaadan shishshite. <sup>38</sup> Qassi nagaraa yarshshuwaayyo issi deeshsha orggiyaa yarshshite. Hegeeta hachchi hachchi xuuggiyo yarshshuwaa bolli, a kattaa yarshshuwaa bollinne a ushshaa yarshshuwaa bolli gujjidi yarshshite.

<sup>39</sup> “Intte shiiquwaa gattanau yarshshiyo yarshshotu bollinne intte intte dosan coo immiyo yarshshotu bolli, xuuggiyo yarshshuwaa, kattaa yarshshuwaa, ushshaa yarshshuwaanne issippetettaa yarshshuwaa, hageeta GODAA baalaa intte bonchchanau keerido wodiyan wodiyan yarshshite’ yaaga” yaagiis.

<sup>40</sup> Yaagin Muusee bana GODAI azazidobaa ubbaa Israa7eelatuyyo yootiis.

## 30

### *Gefaa Wogaa*

<sup>1</sup> Muusee Israa7eela zaretu halaqata hagaadan yaagiis; “GODAI azaziyoogee haggaa. <sup>2</sup> Issi asi GODAAYYO issibaa oottanau geppikko, woikko issibaa agganau caaqqikko, ba doonaappe kessidobaa ubbaa poloppe attin, ba qaalaa birshshoppo.

<sup>3</sup> “Ba aawaa son de7iya geela7o na7iyaa, GODAAYYO issibaa oottanau geppikko, woikko issibaa agganau caaqqikko, <sup>4</sup> i aawai i gefaabaa woikko i caaquwaabaa siyidi, o ainne geennan aggikko, a oottanau geppidobaa ubbaanne agganau caaqqidobaa ubbaa polu. <sup>5</sup> SHin i aawai hegaa siyidi phalqqikko, a geppido gefainne agganau caaqqido caaqoi polettinnan attees. I aawai o diggido gishshau, GODAI iyyo atto gaana.

<sup>6</sup> “Gelabeenna maccaara geppa uttada, woikko issibaa agganau eesuan ba doonaappe caaqqaa uttada azinaa gelikko, <sup>7</sup> i azinai hegaa siyidi, o ainne geennan aggikko, a oottanau geppido gefaanne issibaa agganau caaqqido caaquwaa polu. <sup>8</sup> SHin i azinai hegaa siyidi phalqqikko, a geppido gefai woikko issibaa agganau eesuan caaqqido caaqoi polettinnan attees. Hegaa gishshau, GODAI iyyo atto gaana.



<sup>9</sup> “SHin am77iyaa woikko azinai yeddido maccaasiyaa oottanau geppidobaa woikko issibaa agganau caaqqidobaa polu.

<sup>10</sup> “Maccaasiyaa ba azinaa son de7aidda geppikko, woikko issibaa agganau caaquwaa caaqqikko, <sup>11</sup> i azinai heгаа siyidi o ainne geennan aggikko, a geppido gefaanne issibaa agganau caaqqido caaquwaa ubbaa polu. <sup>12</sup> SHin i azinai heгаа siyidi phalqqikko, i gefai woikko a agganau caaqqido caaqoi aibinne polettoppo. I azinai diggido gishshau, GODAI iyyo atto gaana. <sup>13</sup> I azinai a geppiyo gefaa ubbaa woikko a bana ziqqi oottanau caaqqidobaa ubbaa phalqqanau woikko maayanau danddayees. <sup>14</sup> SHin i azinai he gallassi woikko wonttetta gallassi heгааbaa ainne geennan aggikko, i i gefaa ubbaa woikko i caaquwaa ubbaa maayees. I heгаа siyido gallassi co77u giidoogaadan i gefa ubbaa woikko i caaquwaa ubbaa maayi uttiis. <sup>15</sup> SHin i heгаа siyido amarida wodiyaappe guyyiyan phalqqikko, i gomee a gakkees” yaagiis.

<sup>16</sup> Azina gelabeenna, ba aawaa son de7iya geela7o na7eenne i aawaa gidduwan woikko keettaayeenne keettaawaa gidduwan de7ana mala, GODAI Muusa azazido gefaa wogai hагаа.

## 31

### *Midiyaama Asatu Bolli Denddida Olaa*

<sup>1</sup> GODAI Muusa, <sup>2</sup> “Israa7eela asaa gishshau, neeni Midiyaama asaa bolli GODAA haluwaa kiya; heгааappe guyyiyan, neeni haiqqana” yaagiis.

<sup>3</sup> Heгаа gishshau, Muusee asaa, “Midiyaama asaa bolli GODAA haluwaa kessana mala olaa baanau, intte asaa ola miishshaa gixissite. <sup>4</sup> Issi issi Israa7eela zaretuppe issi sha7u attuma asaa olau yeddite” yaagiis.

<sup>5</sup> Yaagin Israa7eelappe tammanne naa77u sha7u attuma asai, issi issi zariyaappe issi sha7u asai, olau giigidosona. <sup>6</sup> Issi issi zariyaappe issi sha7u asaa Muusee qeesiyaa El77aazara na7aa Piinihaasaara olau yeddiis; yeddin Piinihaasi geeshsha miishshatanne malaatau punniyo xurumbbaa banaara ekkidi biis. <sup>7</sup> GODAI Muusa azazidoogaadan, eti Midiyaama asaara olettiiddi, attuma asaa ubbaa woridosona. <sup>8</sup> Qassi Midiyaama kawota ichchashata, Eewa, Reqeema, Xuura, Huuranne Rebaa7a giyoogeeta woridosona. Eti qassi Bi7oora na7aa Balaamakka bisuwan siifidosona. <sup>9</sup> Israa7eelati Midiyaama maccaasatanne naata omooddidi, eta miizzaa, eta dorssaa wudiyaanne eta miishsha ubbaa bonqqidosona. <sup>10</sup> Midiyaama asati de7ido kata-mata ubbaanne eta moottata ubbaa taman xuuggidosona. <sup>11</sup> Eti asaa, mehiyaanne omooddidobaa ubbaa ekki efiidosona. <sup>12</sup> Eti omooddido asatanne bonqqidobata Muusekko, qeesiyaa El77aazarakonne Israa7eela maabaraakko, Yarkkoppe hefinttan, Yorddaanoosa SHaafaa matan de7iya Moo7aaba Dembban eti dunkkaanidosaa ehiidosona.

### *Olanchhati Simmidosona*

<sup>13</sup> Muusee, qeesee El77aazarinne maabaraa halaqati ubbai dunkkaanidosappe gaxi etaara gaittanau kiyidosona. <sup>14</sup> Olaappe simmida gadaawatu bolli, shaalaqatu bollinne mato halaqatu bolli Muusee hanqqettiis. <sup>15</sup> Muusee eta hagaadan yaagiis; “Maccaasa ubbaa intte aissi ashshidetii? <sup>16</sup> Eti Balaama zoriyan, Pa7oora giyoosan Israa7eela asai GODAA naaqqidi, eeqau goinnanaadan oottidaageeta; GODAA asaa bolli boshai yiidoogee heгааassa. <sup>17</sup> Heгаа gishshau, ha77i attuma naata ubbaa worite; qassi attuma asaara zin77ida maccaasa ubbaa worite. <sup>18</sup> SHin attuma asaara zin77ibeenna macca naata ubbaa intteyyo ashshite. <sup>19</sup> Intte giddoppe asa worida uri woikko ahaa bochchida uri ooninne dunkkaanidosappe gaxan laappun gallassaa utto; heezzantta gallassinne laappuntta gallassi inttenanne intte omooddidoogeeta geeshshite. <sup>20</sup> Qassi maayo ubbaanne galbbappe, deeshsha ikiseppenne mittappe oosettidabata ubbaa geeshshite” yaagiis.

<sup>21</sup> Yaagin qeesee El77aazari olaappe simmida olanchchata hagaadan yaagiis; “GODAI Muuseyyo immido higgiiyaa maarai haga: <sup>22</sup> Worqqaa, biraa, nahaasiyaa, birataa, qorqqoruwaanne irssaasiyaa giyo birataa <sup>23</sup> taman meetettennabata ubbaa tama giddoora aattin, hegee geeyana. SHin hegee qassi tunatettaappe geeyiyo haattan geeyanau koshshees. Qassi taman meetettiyaabata ubbaa tunatettaappe geeyiyo haattan geeshshanau koshshees. <sup>24</sup> Laappuntta gallassi intte maayuwaa meeccite; meeccidi intteikka geeyite. Hegaappe guyyiyan, dunkkaanidosaa gelite” yaagiis.

### *Omooduwaa SHaakkidosona*

<sup>25</sup> GODAI Muusa hagaadan yaagiis; <sup>26</sup> “Neeni, qeesee El77aazarinne maabaraa halaqati omoodettida asaanne mehiyaa ubbaa qoodite. <sup>27</sup> Qoodidi olan olettida olanchchatuyyoonne attida maabaraayyo naa77u kessidi shaakkite. <sup>28</sup> Olettida olanchchata gakkida shaahuwaappe, asa gidin, miizza gidin, hareta, dorssata woikko deeshshata gidin, ichchashu xeetaappe issuwaa GODAAYYO giiraa giirite. <sup>29</sup> Eta gakkida baggaappe ekkido giiraa GODAA gishshaadan qeesiyaa El77aazarayyo immite. <sup>30</sup> Hinkko Israa7eelata gakkida shaahuwaappe, asa gidin, miizza gidin, hareta, dorssata, woikko deeshshata gidin, mehetu ubbaappe ishatamaappe issuwaa ekkite; ekkidi hegaa GODAA Dunkkaaniyau aawatiya Leewatuyyo immite” yaagiis. <sup>31</sup> Yaagin Muuseenne qeesee El77aazari GODAI azazidoogaadan oottidosona.

<sup>32-35</sup> Olanchchati banttayyo ekin, attida omoodoi 675,000 dorssata, 72,000 miizzata, 61,000 haretanne attuma asaara zin77ibeenna 32,000 macca naata. <sup>36</sup> Olan olettidaageeta gakkida shaahoi 337,500 dorssata; <sup>37</sup> etappe GODAASSI giirau kessidoogeeti 675. <sup>38</sup> Miizzati 36,000; etappe GODAASSI giirau kessidoogeeti 72. <sup>39</sup> Hareti 30,500; etappe GODAASSI giirau kessidoogeeti 61. <sup>40</sup> Maccaasati 16,000; etappe GODAASSI giirau kessidoogeeti 32. <sup>41</sup> GODAI Muusa azazidoogaadan, GODAA gakkiiya giiraa Muusee qeesiyaa El77aazarayyo immiis.

<sup>42-46</sup> Olanchchati ehiido omooduwaa Muusee naa77u kessidi shaakkin, Israa7eela maabaraa gakkida shaahoi 337,500 dorssata, 36,000 miizzata, 30,500 haretanne 16,000 maccaasata. <sup>47</sup> Israa7eela maabaraa gakkida shaahuwaappe ishatamu ishatamu asaappe issuwaanne ishatamu ishatamu mehiyaappe issuwaa Muusee ekkidi, GODAI bana azazidoogaadan, Xoossaa Dunkkaaniyau aawatiya Leewatuyyo immiis.

<sup>48</sup> Hegaappe guyyiyan, ola gadaawati, shaalaqatinne mato halaqati Muusekko yidosona. <sup>49</sup> Yiidi eti Muusa, “Nuuni ne ashkkarati nu azazuwaa garssan de7iya olanchchata qoodin, issoinne paccibeenna. <sup>50</sup> GODAI nu shemppuwaa ashshido gishshau, nuuni huuphiyan huuphiyan ekkido worqqaa alleeqota, kushe sagaayota, toho albbota, migidota, haitta gutichchatanne qooriyan aattiyo gujjumata GODAAYYO imuwaa ehiida” yaagidosona. <sup>51</sup> Muuseenne qeesee El77aazari worqqaa alleeqota ubbaa etappe ekkidosona. <sup>52</sup> Shaalaqatinne mato halaqati ehiidi GODAAYYO immido worqqai ubbai naa77u xetu kilo giraame gidiyaagaa. <sup>53</sup> SHin hara olanchchati ubbai bantta omooduwaa omooduwaa banttau ekkidosona. <sup>54</sup> Muuseenne qeesee El77aazari shaalaqatuppenne mato halaqatuppe ekkido worqqaa GODAA sinttan Israa7eela asaa hassayissana mala, Xoossaa Dunkkaaniyaa giddo gelissidosona.

## 32

### *Yorddaanoosa SHaafaa Arshsho Baggaara De7iya Zareta*

<sup>1</sup> Roobeela zaretuyyoonne Gaada zaretuyyo keehi daro mehee de7ees. Eti Yaa7izeera biittainne Gala7aade biittai meheyyo injje gidiyooгаа be7idosona. <sup>2</sup> Be7idi eti Muusekko, qeesiyaa El77aazarakkonne maabaraa halaqatukko yiidi, eta hagaadan yaagidosona; <sup>3-4</sup> “GODAI Israa7eela asan xoonissido biittati, Axaarooti, Dibooni, Yaa7izeeri, Niimiri, Hasebooni, Eli7aali, Seebimi, Naboinne Ba7ooni mehiyaayyo injje

biitta; nuuyyo intte ashkkaratuyyo mehee de7ees. <sup>5</sup> Nuuni inttena ufaissidabaa gidikko, ha biittati nuussi intte ashkkaratussi laata gade gididi imettona. Nuna Yorddaanoosa SHaafaa hefintti pinttoppiti” yaagidosona.

<sup>6</sup> Yaagin Muusee Gaada zaretanne Roobeela zareta hagaadan yaagiis; “Hara Israa7eela asai olaa biyo wode, intte hagan uttuuteetii? <sup>7</sup> GODAI etayyo immido biittaa Israa7eelati pinnennaadan, intte aibissi eta wozanaa shugisseetii? <sup>8</sup> Qaadeesa Barnneppe he biittaa wochchi xeellanau intte aawata taani yeddido wode, etikka hagaadan oottidosona. <sup>9</sup> Waanidi giikko, eti Eshkkoola Zanggaaraa kiyidi, he biittaa xeellido wode, Israa7eelati GODAI etayyo immido biittaa gelenna mala, eti Israa7eelatu wozanaa shugissidosona. <sup>10</sup> GODAI he gallassi hanqquwaa eexxi kiyidi, hagaadan yaagidi caaqqiis; <sup>11-12</sup> ‘GODAA bantta kumetta wozanaappe kaallida Qeniiziyaa Yifune na7aa Kaaleebappenne Nawe na7aa Yaasuppe attin, yelettoosappe laatamu laittanne hegaappe bollaara de7iya attuma asan Gibxxe biittaaappe kiyidaageetuppe issoinne, taani Abrahaamayyo, Yisaaqayyoonne Yaaqoobayyo immanau caaqqido biittaa be7enna. Aissi giikko, eti tana bantta kumetta wozanaappe kaallibookkona’ yaagidi caaqqiis. <sup>13</sup> GODAA hanqqoi Israa7eela bolli eexxi kiyiis; yaatin GODAA sinttan iitaa oottida he yeleta ubbai wuri xayana gakkanaassi, bazzuwan oitamu laittaa i eta toilayiis. <sup>14</sup> Inttenoo, nagaranchcha yeletatoo, GODAI Israa7eela bolli gujji hanqquwaa eexxi kiyanaadan, intte intte aawatu sohuwan ha77i eqqideta. <sup>15</sup> Intte GODAA kaalliyooгаа aggidi wora simmikko, i qassikka ba asaa bazzuwan aggi bayana. Yaatidi intte ha asaa ubbaa xaissana” yaagiis.

<sup>16</sup> Yaagin eti Muusee mati yiidi, a hagaadan yaagidosona; “Nuuni hagan nu mehetuyyo dirssaa, nu naatuyyo katamata keexxana. <sup>17</sup> SHin nuuni ola miishshaa gixxidi, Israa7eela asaa eta sohuwaa gattana gakkanaashin olettanau baana. Hegaa keenan, ha biittan de7iya asatuppe naagettanau, nu naati gimbbettidi uttida katamatun de7ona. <sup>18</sup> Israa7eelati ubbai bantta laataa laataa ekkana gakkanaassi, nuuni nu soo simmokko. <sup>19</sup> Nuuni nu laataa Yorddaanoosa SHaafaappe hafintta arshsho baggaara laattido gishshau, nuuni Yorddaanoosappe hefintta baggaara, yan etaara laataa laattokko” yaagidosona.

<sup>20</sup> Yaagin Muusee eta, “Intte haggaa oottikko, intte GODAA sinttan olaa baanau giigikkonne <sup>21</sup> intte olanchchati ubbai ola miishshaa gixxidi, GODAI ba morkketa ba sinttaappe yedettana gakkanaassi, Yorddaanoosa SHaafaa GODAA sinttan pinnikko, <sup>22</sup> GODAI he biittaa xoonidoogaappe guyyiyan, intte simmanau danddayeeta. Yaatikko, intte olettanau bessiya olaa GODAAYYONNE Israa7eela asaayyo olettidi polideta giyoogaa. Qassi he biittai GODAA sinttan intteyyo laata biittaa gidana.

<sup>23</sup> “SHin intte hegaadan oottennan ixixikko, GODAA bolli nagaraa ootteeta; simmi inttena intte nagarai gakkioogaa tumu erite. <sup>24</sup> Intte intte naatuyyo katamata keexxite; intte dorssaa wudiyaayyookka birddeta giigissite; shin intte giidobaa aggennan oottite” yaagiis.

<sup>25</sup> Yaagin Gaada zaretinne Roobeela zareti Muusa, “Nuuni ne ashkkarati neeni nu godai azazidoogaadan oottana. <sup>26</sup> Nu naatinne nu maccaasati, nu dorssatinne nu miizzati hagan Gala7aade katamatun de7ishshona. <sup>27</sup> SHin nuuni ne ashkkarati, olau gixxida olanchchati ubbai, neeni nu godai giyoogaadan, olettanau GODAA sinttan Yorddaanoosa SHaafaa pinnana” yaagidosona.

<sup>28</sup> Hegaa gishshau, Muusee qeesiyaa El77aazara, Nawe na7aa Yaasanne Israa7eela zaretu halaqata etabaa azaziis. <sup>29</sup> Muusee eta hagaadan yaagiis; “Gaada zaretinne Roobeela zareti ubbai ola miishshaa gixxidi, GODAA sinttan inttenaara Yorddaanoosa SHaafaa pinnikkonne intte he biittaa xoonikko, hegaappe guyyiyan, Gala7aade biittaa intte eta laatissite. <sup>30</sup> SHin eti olaa miishshaa gixxidi, inttenaara pinnennan ixixikko, eti Kanaane biittaa inttenaara laattona” yaagiis.

<sup>31</sup> Yaagin Gaada zaretinne Roobeela zareti zaaridi, “Nuuni ne ashkkaarati GODAI giidoogaa oottana. <sup>32</sup> Ola miishshaa gixxidi, GODAA sinttan nuuni Kanaane biittaa gelanau pinnana; shin nuuni laattiyo laatai Yorddaanoosappe hafintta baggaara gidana” yaagidosona.

<sup>33</sup> Hegaa gishshau, Muusee Gaada zaretuyyo, Roobeela zaretuyyoonne Yooseefa na7aa Minaase zaretuppe baggaayyo Amooretu Kawuwaa Sihoona kawotettaanne Baasaane Kawuwaa Ooga kawotettaa, eta gidдон de7iya katamatuura immiis. <sup>34</sup> Gaada zareti Diboona, Axaaroota, Aaro7era <sup>35</sup> Axirooti-SHofaana, Yaa7izeera, Yogibaaha, <sup>36</sup> Beeti-Niimiranne Beeti-Haaraana geetettiya gimbbiyan direttida katamata zaarettidi keexxidosona. Bantta dorssatuyyookka eti birddeta giigissidosona.

<sup>37</sup> Roobeela zaretikka Haseboona, Eli7aala, Qiriyaataimanne, <sup>38</sup> Naba, Ba7aali-Ma7oonanne Siibima geetettiya katamata zaaretti keexxidosona. Keexxidi he katamatuppe issootu issootu sunntaa laammidosona.

<sup>39</sup> Minaase na7aa Maakira yarati Gala7aade biidi, oli oiqqidi, yan de7iya Amooreta yedettidosona. <sup>40</sup> Hegaa gishshau, Minaase na7aa Maakira yaratuyyo Muusee Gala7aade biittaa immin, eti yan de7idosona. <sup>41</sup> Minaase zare gididiya Yaa7iiri biidi, eta oli oiqqidi, Yaa7iira katamata yaagidi sunntiis. <sup>42</sup> Nobaahi biidi, Qanaata katamaanne a yuushuwan de7iya moottata oli oiqqidi, ba sunntan Nobaaha giidi xeesiis.

## 33

### *Israa7eelatu Hemetaa Taarikiyaa*

<sup>1</sup> Israa7eelati Muuseenne Aarooni kaalettin, bantta citan citan Gibxxeppe kiyido wode, yaanidi hemettidosona. <sup>2</sup> GODAI azazin, eti baana beettaa doommido sohota Muusee xaafiis; eta beettaa maarai haggaa.

<sup>3</sup> Koira aginaayyo tammanne ichchashantta gallassi, Paasikaa bonchchiyo gallas-saappe kaalliyaa gallassi denddidi, Gibxxe asai ubbai xeellishin, yayyennan Raamisappe kiyidosona. <sup>4</sup> He wode Gibxxe asai GODAI worido bantta baira naata moogoosona. Haggadan oottidi, GODAI eta xoossatu bolli pirddaa ehiis.

<sup>5</sup> Israa7eelati Raamisappe denddidi, Sukkota giyo sohuwan dunkkaanidosona.

<sup>6</sup> Sukkotappe denddidi, bazzuwaa xeeran de7iya Etaaman dunkkaanidosona.

<sup>7</sup> Etaamappe denddidi, Ba7aali-Xafoonappe arshsho baggaara de7iya Pihaahiroota simmidi, Migidoola matan dunkkaanidosona.

<sup>8</sup> Pihaahirootappe denddidi, Zo7o Abbaa pinnidi, bazzuwaa biidosona. Etaama Bazzuwan heezzu gallassa ogiyaa hemettidi, Maaran dunkkaanidosona.

<sup>9</sup> Maarappe denddidi, tammanne naa77u pulttotinne laappun tammu zambbati de7iyo Eliima biidi, yan dunkkaanidosona.

<sup>10</sup> Eliimappe denddidi, Zo7o Abbaa lanqqen dunkkaanidosona.

<sup>11</sup> Zo7o Abbaa lanqqeppe denddidi, Siinaa Bazzuwan dunkkaanidosona.

<sup>12</sup> Siinaa Bazzuwaappe denddidi, Doofiqaan dunkkaanidosona.

<sup>13</sup> Doofiqaappe denddidi, Aluushan dunkkaanidosona.

<sup>14</sup> Aluushappe denddidi, Rafidiman dunkkaanidosona. Yan asaayyo uyanau haatti baawa.

<sup>15</sup> Rafidimappe denddidi, Siinaa Bazzuwan dunkkaanidosona.

<sup>16</sup> Siinaa Bazzuwaappe denddidi, Amuwaa Duufuwaa giyoosan dunkkaanidosona.

<sup>17</sup> Amuwaa Duufuwaa giyoosaappe denddidi, Haxerootan dunkkaanidosona.

<sup>18</sup> Haxerootappe denddidi, Riitiman dunkkaanidosona.

<sup>19</sup> Riitimappe denddidi, Rimmoonni-Pereezan dunkkaanidosona.

<sup>20</sup> Rimmoonni-Pereezappe denddidi, Liibinan dunkkaanidosona.

<sup>21</sup> Liibinappe denddidi, Riissan dunkkaanidosona.

<sup>22</sup> Riissappe denddidi, Qahelaatan dunkkaanidosona.



<sup>23</sup> Qahelaatappe denddidi, SHefaara Deriyan dunkkaanidosona.

<sup>24</sup> SHefaara Deriyaappe denddidi, Haraadan dunkkaanidosona.

<sup>25</sup> Haraadappe denddidi, Maaqihelootan dunkkaanidosona.

<sup>26</sup> Maaqihelootappe denddidi, Tahaatan dunkkaanidosona.

<sup>27</sup> Tahaatappe denddidi, Taaran dunkkaanidosona.

<sup>28</sup> Taarappe denddidi, Miitiqan dunkkaanidosona.

<sup>29</sup> Miitiqappe denddidi, Hashimoonan dunkkaanidosona.

<sup>30</sup> Hashimoonappe denddidi, Moserootan dunkkaanidosona.

<sup>31</sup> Moserootappe denddidi, Bene-Yaa7iqaanan dunkkaanidosona.

<sup>32</sup> Bene-Yaa7iqaanappe denddidi, Hoori-Hagidigaadan dunkkaanidosona.

<sup>33</sup> Hoori-Hagidigaadappe denddidi, Yoxibaatan dunkkaanidosona.

<sup>34</sup> Yoxibaatappe denddidi, Abroonan dunkkaanidosona.

<sup>35</sup> Abroonappe denddidi, Eexiyooni-Gaabiran dunkkaanidosona.

<sup>36</sup> Eexiyooni-Gaabirappe denddidi, Xiina Bazzuwan de7iya Qaadeesan dunkkaanidosona.

<sup>37</sup> Qaadeesappe denddidi, Eedooma biittaa zawan de7iya Hoori Deriyan dunkkaanidosona. <sup>38</sup> Qeese Aarooni GODAI azazin, Hoori Deriyaa huuphiyaa kiyiis; kiyidi Israa7eelati Gibxxe biittaaappe kiyido oitamantta laittan, ichchashantta aginan, aginaayyo koiro gallassan yan haiqqiis. <sup>39</sup> Aarooni Hoori Deriyaa huuphiyan haiqqiyo wode, a laittai xeetanne laatammanne heezza.

<sup>40</sup> Neegeeba Bazzuwan, Kanaan de7iya Araada giyoosaa kawoi Israa7eela asaa yuussaa siyiis.

<sup>41</sup> Israa7eelati Hoori Deriyaappe denddidi, Xalmoonan dunkkaanidosona.

<sup>42</sup> Xalmoonappe denddidi, Punoonan dunkkaanidosona.

<sup>43</sup> Punoonappe denddidi, Obootan dunkkaanidosona.

<sup>44</sup> Obootappe denddidi, Moo7aaba biittaa zawan de7iya Abaariman dunkkaanidosona.

<sup>45</sup> Abaarimappe denddidi, Diboona-Gaadan dunkkaanidosona.

<sup>46</sup> Diboona-Gaadappe denddidi, Almmoona-Dibilaataiman dunkkaanidosona.

<sup>47</sup> Almmoona-Dibilaataimappe denddidi, Nabo Deriyaa matan Abaarima deretun dunkkaanidosona.

<sup>48</sup> Abaarima deretuppe denddidi, Yarkkoppe hefinttaara, Yorddaanoosa SHaafaa matan de7iya Moo7aaba Dembban dunkkaanidosona. <sup>49</sup> Yorddaanoosa SHaafaa matan de7iya Moo7aaba Dembban, Beeti-Yashimootappenne SHiixima Zanggaaraappe gid-duwan dunkkaanidosona.

<sup>50</sup> Yarkko hefinttaara, Yorddaanoosa SHaafaa matan de7iya Moo7aaba Dembban GODAI Muusa hagaadan yaagiis; <sup>51</sup> “Israa7eelata neeni yaaga; ‘Yorddaanoosa SHaafaa pinnidi, Kanaane biitti intte geliyo wode, <sup>52</sup> he biittan de7iya asaa ubbaa intte sinttappe yedettite; yedettidi shuchchaappe masettida eta misileta ubbaanne seerissidi medhdhido eeqata ubbaa xaissite. Eti goinniyo xoqqa sohota ubbaakka laalite. <sup>53</sup> Taani intteyyo he biittaa laatau immido gishshau, he biittaa laattidi, an de7ite. <sup>54</sup> Intte zariyan zariyan saamaa kessidi, biittaa shaakkite. Qoodan corattiya zaretuyyo daro laataa immite; qoodan guuxxiya zaretuyyo guutta laataa immite. Saaman eta gakkida augeenne etaagaa gidana. Biittaa intte maizza aawatu zariyan zariyan shaakki ekkite.

<sup>55</sup> “ ‘SHin he biittan de7iya asaa intte yedettennan aggikko, intte ashshidoogeeti intteyyo intte aifiyaayyo pincco, intte miyyiyaayyo aguntta gidana; intte de7ana biittan eti inttena waayissana. <sup>56</sup> Intte eta yedettennan aggikko, eta bolli taani oottanau halchchidobaa intte bolli oottana’ yaagada yoota” yaagiis.



## 34

### *Israa7eela Biittaa Zawaa*

<sup>1</sup> GODAI Muusa hagaadan yaagiis; <sup>2</sup> “Neeni Israa7eelata hagaadan yaagada azaza; ‘Laatadan inttena gakkiya Kanaane biittaa zawai hгаа. <sup>3</sup> Tohossa baggaara intte zawai Xiina Bazzuwaanne Eedooma zawaa gidana. Intte tohossa zawai Maxine Abbaa tohossaappe doommes; <sup>4</sup> doommidi Akirabiima pudettaara tohossa baggaara sim-midi, Xiina Bazzuwaa kanttidi, Qaadeesa-Barnne tohossi gакkees; hegaappe Hadaari-Adaara kanttidi, Aximoonna gакkees. <sup>5</sup> Aximoonappe Gibxxe SHaafaakko simmidi, Meediteraane Abbaa gакkees.

<sup>6</sup> “Arggo baggaara intte zawai Meediteraane Abbaa gaxaa gidana.

<sup>7</sup> “Huuphessa baggaara intte zawai Meediteraane Abbaappe Hooraa Deriyaa sitti ootti malaatidi, <sup>8</sup> Hooraa Deriyaappe Hamaata Pinuwaa gакkanaassa; hegaappe Xadaadan zawatees. <sup>9</sup> Qassi Zifiroona biidi, Haxaari-Enaana gакkees. Huuphessa baggaara intte zawai hгаа gidana.

<sup>10</sup> “‘Arshsho baggaara intte zawai Haxaari-Enaanappe SHafaama gакkanaassi sitti ootti malaatidi, <sup>11</sup> SHafaamappe biidi, Ainappe arshsho baggaara de7iya Ribila wodhdhidi, Galiila Abbaappe arshsho baggaara de7iya keraa gакkees. <sup>12</sup> Hegaappe duge Yorddaanoosa SHaafaa wodhdhi zawatidi, Maxine Abbaa gакkees. Intte biittaa zawai ubba baggaarakka hгаа’ yaaga” yaagiis.

<sup>13</sup> Yaagin Muusee Israa7eelata hagaadan yaagidi azaziis; “Saamaa yeggidi, intte laattana mala, uddufun zaretuyyoonne bagga zaretuyyo he biittai imettanaadan GODAI azaziis. <sup>14-15</sup> Aissi giikko, Roobeela zareti Gaada zaretinne, Minaase zaretuppe baggai bantta laataa Yarkko hefinttan Yorddaanoosa SHaafaappe arshsho baggaara ekkidosona” yaagiis.

<sup>16</sup> GODAI Muusa hagaadan yaagiis; <sup>17</sup> “He biittaa intteyyo laata oottidi, shaakki immana asatu sunttai hгаа; qeesiyaa El77aazaranne Nawe na7aa Yaasa. <sup>18</sup> Qassi biittaa shaakkanau maaddana mala, zare ubbaappe issi issi halaqaa sunttite. <sup>19</sup> Eta sunttai hagaappe kaallidi de7iyaagaa.

Zariyaa Halaqaa

Yihudaa Yifune na7aa Kaaleeba

<sup>20</sup> Simoonna Amihuuda na7aa SHalumi7eela

<sup>21</sup> Biniyaama Kisiloonna na7aa Elddaada

<sup>22</sup> Daana Yoogila na7aa Buuqa

<sup>23</sup> Yooseefa na7aa Minaase Efooda na7aa Hani7eela

<sup>24</sup> Yooseefa na7aa Efireema SHifxxaana na7aa Qamu7eela

<sup>25</sup> Zaabiloonna Parnnaaka na7aa Elxxaafaana

<sup>26</sup> Yisaakoora Azzaana na7aa Palxxi7eela

<sup>27</sup> Aseera SHalooma na7aa Ahihuuda

<sup>28</sup> Nifttaaleema Amihuuda na7aa Padaahi7eela

<sup>29</sup> Kanaane biittan Israa7eelatuyyo laataa shaakki immana mala, GODAI azazido asati hageeta” yaagiis.

## 35

### *Leewatussi Imettana Katamata*

<sup>1</sup> Yarkko hefinttaara, Yorddaanoosa SHaafaa matan de7iya Moo7aaba Dembban, GODAI Muusa hagaadan yaagiis; <sup>2</sup> “Israa7eelati bantta laataappe Leewati de7ana katamatanne eta yuushuwan de7iya hentta gadeta immana mala, neeni eta azaza. <sup>3</sup> He katamatun eti de7ona; hentta gadeti eta miizzaassa, eta dorssaassanne eta hara mehe ubbaassa gidona. <sup>4</sup> Intte Leewatuyyo immana katamaa yuushuwan de7iya hentta gadeti katamaa gimbbe dirssaappe karekko issi sha7u wara gidona. <sup>5</sup> Katamaappe kareera, arshsho baggaara naa77u sha7u waraa, tohossa baggaara naa77u sha7u

waraa, arggo baggaara naa77u sha7u waraanne huuphessa baggaara naa77u sha7u waraa likkite; yaatobare katamai giddo ginan de7ana. Leewati he heeraa bantta katamaayyo hentta gade ootona.

<sup>6</sup> “Leewatuyyo intte immana katamati, asa worida uri baqatidi attiyo usuppun katamata; hegeetu bolli gujjidi, oitamanne naa77u hara katamata etayyo immite. <sup>7</sup> Leewatuyyo intte muleera oitamanne hosppun katamata eta hentta gadetuura issippe immite. <sup>8</sup> Israa7eelatu laataappe Leewatuyyo intte immana katamati issi issi zaree laattidoogaa keena gidanau koshshees; cora asai de7iyo zariyaappe cora katamata ekkite; shin qoodan guutta asai de7iyo zariyaappe guutta katamata ekkite” yaagiis.

*Baqati Attiyo Katamata  
(Zaarettido Wogaa 19:1-13; Yaasu 20:1-9)*

<sup>9</sup> Hegaappe guyyiyan, GODAI Muusa hagaadan yaagiis; <sup>10</sup> “Neeni Israa7eela asaa hagaadan yaaga; ‘Yorddaanoosa SHaafaa pinnidi, Kanaane biittaa intte geliyo wode, <sup>11</sup> erennan asa worida uri baqati biidi attana mala, katamata intteyyo doorite. <sup>12</sup> Erennan asa woridaagee yaa7aa sintti pirddau eqqana gakkanaassi, suutaa achchiyaagee a worenna mala, he katamati baqati attiyo soho gidona. <sup>13</sup> Ha intte immiyo usuppun katamati intteyyo baqati attiyo katamata gidona. <sup>14</sup> Yorddaanoosa SHaafaappe hafintta baggaara heezzu katamaanne Kanaane biittan heezzu katamata intte baqati attanau immite. <sup>15</sup> Ha usuppun katamati erennan asa worida Israa7eelati, hara dere asatinne eta giddon de7iya beteti baqatidi attiyo soho gidona.

<sup>16</sup> “ ‘Issi asi issi asa birata miishshan shocin, he uri haiqqikko, hegee shemppuwaa woridaagaa; shemppo woridaagee haiqqo. <sup>17</sup> Qassi worana danddayiya shuchcha ba kushiyan oiqqida asi issi asa he shuchchan caddin, he uri haiqqikko, hegee shemppuwaa woridaagaa; shemppo woridaagee haiqqo. <sup>18</sup> Qassikka worana danddayiya mitta ba kushiyan oiqqida asi issi asa he mittan shocin, he uri haiqqikko, hegee shemppuwaa woridaagaa; shemppo woridaagee haiqqo. <sup>19</sup> Suutaa achchiyaagee he shemppuwaa woridaagaa demmikko woro.

<sup>20</sup> “ ‘Issi asi issi asa morkkidi caddin, woikko zuggidi issibaa a bolli olin, he urai haiqqikko, <sup>21</sup> woikko morkkidi ba kushiyan bubbuxin, he urai haiqqikko, i shemppuwaa woridaagaa; shemppo woridaagee haiqqo. Suutaa achchiyaagee shemppuwaa woridaagaa demmikko woro.

<sup>22</sup> “ ‘SHin morkketetti bainnan, issi asi issi asa akeekennan sugikko, woikko zuggidi naagennan issibaa a bolli olikko, <sup>23</sup> woikko a worana danddayiya shuchcha i be7ennan a bolli yeggikkonne he urai haiqqikko, hegee a morkke gidenna gishshaunne a qohanau halchchibeenna gishshau, <sup>24</sup> yaa7ai erennan woridaagaappenne suutaa achchiyaagee gidduwan ha wogatudan pirddo. <sup>25</sup> Erennan woridaagaa suutaa achchiyaagaa kushiyaappe yaa7ai ashshidi, i baqatidi attiyo katamaa zaaro. Zaarin geeshsha zaitiyan tiyettida, qeese ubbatu halaqai haiqqana gakkanaassi, i yan de7o.

<sup>26</sup> “ ‘SHin erennan woridaagee baqatidi attiyo katamaa zawaappe kare kiyiyaabaa gidikkonne, <sup>27</sup> baqati attiyo katamaappe kareera suutaa achchiyaagee a demmidi worikko, i woridoogau oishettenna. <sup>28</sup> Aissi giikko, qeese ubbatu halaqai haiqqana gakkanaassi, he erennan woridaagee ba baqatido kataman uttanaagaashin aggiis. SHin qeese ubbatu halaqai haiqqidoogaappe guyyiyan, erennan woridaagee ba laata gade simmanau danddayees.

<sup>29</sup> “ ‘Intteyyoonne biron yelettana yeletaayyo, intte de7iyoosa ubban hagee higge gido.

<sup>30</sup> “ ‘Asa worida ooninne shemppo i woridoogaadan markkati markkattin haiqqo; shin issi asa xalaalai markkattin, ai asinne haiqqoppo. <sup>31</sup> SHemppuwaa worido gishshau haiqqanau bessiya asa paxa ashshanau gumiyaa ekkoppite; i haiqqo. <sup>32</sup> Attiyo

katamaa baqatida ooppenne qeese ubbatu halaqai haiqqanaappe kase, i guyye sim-midi, ba biittan de7anaadan oottanau gumiyaa ekkoppite.

<sup>33</sup> “Hegaadan oottidi, intte de7iyo biittaa tunissoppite. Aissi giikko, suuttaa gus-siyoogee biittaa tunissee; suuttaa gussidaagaa suuttaanappe attin, suuttai gukkido biitti hara ogeera tunatettaappe geeyenna. <sup>34</sup> Taani, GODAI, Israa7eela asaa gidduwan de7iyo gishshau, intte de7iyo biittaa, taanikka de7iyo biittaa tunissoppite’ yaagada yoota” yaagiis.

## 36

### *Gadiyaa Laattiya Maccaasata*

<sup>1</sup> Yooseefa zaretuppe, Minaase na7aa Maakiira na7aa Gala7aade yaratu halaqati Muusekkonne Israa7eelatu yaratu halaqatukko yiidosona. <sup>2</sup> Eti yiidi, “Nu godau, Israa7eela asaayyo biittaa saaman shaakkada immana mala, GODAI nena azaziis; qassi GODAI nu ishaa Xalofihaada laataa a macca naatuyyo neeni immana mala, nena azaziis. <sup>3</sup> Leemisuwau eti hara zare gidiya Israa7eela asa gelikko, eta laatai nu aawatu laataappe ekkettidi, eti geliyo zariyaayyo gujettees. Hega gishshau, nuuyyo saaman imettida laatai paccana. <sup>4</sup> Qassi Israa7eelatuyyo Ishatamantto Laittaa Baalai gakkiiyo wode, eta laatai eti geliyo asa zariyaayyo gujettees; eta laatai nu aawatu zariyaa laataappe paccana” yaagiis.

<sup>5</sup> Hegaappe guyyiyan, GODAA qaalaadan, Muusee Israa7eelata hagaadan yaagidi azaziis; “Yooseefa zareti giyoogee likke. <sup>6</sup> GODAI Xalofihaada macca naatubaa azazi-doogee haggaa; eti bantta dosido azinaa gelanau danddayoosona; shin bantta aawaa zariyaappe gidanau koshshees. <sup>7</sup> Israa7eelatu laatai issi zariyaappe hara zariyau aadhdhoppo; Israa7eela ubbai ba maizza aawatu zaree laattido biittaa minttidi oiqqo. <sup>8</sup> Israa7eela asaa gidдон ai zareppe gidinkka, biitta laattiya macca na7i ubbi, Israa7eeli ubbi ba maizza aawatu laataa laattana mala, a ba aawaa zare gidiya asa gelu. <sup>9</sup> Hegaadan hanidi, laatai issi zariyaappe hara zariyau mulekka aadhdhennan de7ana. Hega gishshau, Israa7eela ubbai ba maizza aawatu zaree laattido biittaa minttidi oiqqo” yaagiis.

<sup>10</sup> Yaagin Xalofihaada macca naati GODAI Muusa azazidoogaadan oottidosona. <sup>11</sup> Xalofihaada macca naati, Maahilo, Tirxxo, Hoogilo, Milkkonne No7o geetettiyaageeti, bantta aawaa ishanttu naata gelidosona. <sup>12</sup> Eti Yooseefa na7aa Minaase naatu zariyaa gidдон azinaa gelidosona; gelin eta laatai eta aawaa zariyaunne yarau attiis.

<sup>13</sup> Yarkkoppe hefinttaara, Yorddaanoosa SHAafaa matan de7iya Moo7aaba Dembban Muuse baggaara GODAI Israa7eela asaa azazido higgetinne wogati hageeta.

## Zaarettido Wogaa

### *Gidduwaa Erissuwaa*

“Zaarettido Wogaa” geetettiya ha maxaafai, Israa7eela asai daro wodiya bazzon hemettidoogaappe guyyiyan, Kanaane gakkanau, guuttai attidaashin, eti Moo7aaba biittan takkido wode, Muusee kaalli kaalli etayyo haasayido haasayaa oiqqidaagaa.

“Zaarettido Wogaa” maxaafan mazggafettidi de7iya, issi issi daro go77iya yohoti hagaappe kaallidi xaafettidaageeta.

1. Muusee aadhdhida oitamu laittatu gidдон polettida, gita gita oosota hassayidi odees. Xoossai eta bazzon waati kaalettidaakko asaa hassayissidi, eti Xoossaassi ammanettidaageeta gidana malanne suure assi azazettana mala, eta qofissees.
2. Muusee tammu azazota zaari zaaridi odiiddi, hegeetuppekka koiro azazuwaa birshshettaa etassi qonccissii. Asai Xoossaa xalaalaassi goinnanaadankka has-sayissees. Hegaara oittidi, Israa7eela asai hidootaa biittan aqana dumma dumma wogaa bochchi bochchi ekkidi odees.
3. Muusee, Xoossai etaara maacettido maachchai ai malakko etayyo birshshidi, eti he maachchaassi oorattiidi, ammanettanaadan qofissees.
4. Iyyaasu Muusee sohuwan gelidi, Xoossaa asaa kaalettiya asa gidanau sunttetiis. Muusee Xoossai ammanettiyaagaa gididiyoogaa sabbanau kiyida mazamuriyaa yexxidoogaappenne Israa7eela zariyaa ubbaa anjjidoogaappe guyyiyan, Yorddaanoosa SHAafaappe arshsho baggaara de7iya Moo7aaba biittan haiqqiis.

Maxaafaayyo huuphe qofai Xoossai ba siiqiyoonne ba doorido asaa ashshidoogaanne anjjidoogaa odees. Asaikka Xoossaa anjoi etappe shaahettennan paxa de7anau dandayana mala, Xoossai etassi oottidobaa ubbaa hassayissidi, eti ubba wodekka Xoossaa siiqanaanne ayyo azazettanau eta erissees.

Maxaafaayyo waanna qofaa oiqqida xiqiseti: 6:4-6 de7iyaageeta gididiyo wode, etikka, Yesuusi, “Azazo ubbaappe aadhdhiya gita azazo” giidi odido qaalata oiqqidaageeta. Hegeetinne, “GODAA ne Xoossaa ne polo wozanaappe, ne polo shemppuwaappenne ne polo wolqqaappe siiqa” yaagiyaageeta.

### *Israa7eelati Siinaa Deriyaappe Denddidi Baanaadan Imettida Azazuwaa*

<sup>1</sup> Ha maxaafan xaafettida qaala ubbai Yorddaanoosa SHAafaappe hefintta arshsho baggaara de7iya bazzuwan eti de7ishin, Muusee Israa7eela asaayyo yootido qaalaa. Muusee ha qaalaa etau yootiyo wode, eti Suufa geetettiya sohuwan sintta baggaara, Paaraana katamau issi baggaaranne hegaadankka qassi Tofeela, Laabaana, Haxerootanne Diizahaaba geetettiya katamatu gidduwan de7iya Yorddaanoosa wombban de7oosona. <sup>2</sup> Eedooma Deriyaa ogiyaara biikko, Siinaa Deriyaappe Qaadeesa-Barnne gakkanau gediyan tammanne isiini gallassa oge.

<sup>3</sup> Gibxxeppe eti kiyido oitamantta laittan, tammanne isiinintta aginan, aginaayyo koiro gallassan, Muusee GODAI etabaa a azazidobaa ubbaa Israa7eelatuyyo yootiis.

<sup>4</sup> Hegee Haseboona kataman uttidi kawotida Amooretu Kawuwaa Sihoonanne Asttaarootaaninne Ediraa7an uttidi kawotida Baasaane Kawuwaa Ooga, Muusee xoonidoogaappe guyyiyaana.

<sup>5</sup> Asai Yorddaanoosappe arshsho baggaara Moo7aaban de7ishin, Muusee ha higgiiya hagaadan yaagidi qonccissiyooogaa doommiis.

<sup>6</sup> “Nuuni Siinaa Deriyan de7ishin, GODAI nu Xoossai nuna hagaadan yaagiis; ‘Intte ha deriyaa bollan keehin gam77ideta. <sup>7</sup> Dunkkaaniyaa qolidi denddite; denddidi deretiya Amooretu biittaanne Aaraban de7iya eta shooro biitta ubbaa biite; hegeekka Yorddaanoosa wombbaa, deretiyaasaanne barggottiya biittatukko, tohossa baggaanne

Meediteraane Abbaa gaxau aadhhdhite. Kanaane biittaaakko biite; Liibaanoosa dereta kanttidi, Efraaxiisa SHaafaa gakkanaashin biite. <sup>8</sup> Be7ite, taani intteyyo ha biittaa immaas. Biite; biidi intte aawatuyyo, Abrahaamayyo, Yisaaqayyo, Yaaqoobayyoonne, etappe guyyiyan, eta zariyaayyo immanau GODAI caaqqido biittaa laattite' yaagiis" yaagiis.

*Muusee Halaqata Sunttiis  
(Kessaabaa 18:13-27)*

<sup>9</sup> Qassikka Muusee asaayyo hagaadan yaagiis; "He wode taani intteyyo hagaadan yaagada yootaas; 'Taani tarkka inttena tookkanau danddayikke. <sup>10</sup> GODAI intte Xoossai intte qoodaa saluwaa xoolinttiyaadan darissiis. <sup>11</sup> GODAI intte aawatu Xoossai, inttena hagaappe sha7utoo gujjidi darissonne i giidoogaadan inttena anjjo. <sup>12</sup> SHin intte metuwaa, intte toohuwaanne intte ooshshaa ubbaa taani tarkka tookkanau waana danddayiyaanaa? <sup>13</sup> Intte zariyaappe zariyaappe aadhhdhida eranchcha, akeekanchchanne oosuwaa meezee de7iyo asata doorite; doorin taani intte bolli eta halaqa sunttana' yaagaas.

<sup>14</sup> "Yaagin inttekka tana, 'Nuuni oottanaadan neeni giidobai lo77o' yaagideta. <sup>15</sup> Hega gishshau, taani intte zariyaappe zariyaappe aadhhdhida eranchchanne oosuwaa meezee de7iyo asata ekkaas; ekkada, shaalaqa, mato halaqa, hamssaalaqa, assiraalaqanne haariyaageeta oottada intte zariyan zariyan intte bollan sunttaas.

<sup>16</sup> "Yaadata taani eta, 'Intte ishanttu gidduwan de7iya mootuwaa siyite; he mootoi issi Israa7eela asappenne a ishaappe gidduwan woikko Israa7eela asaappenne hara dere asaappe gidduwan de7iyaagaa gidikkokka, siyidi xilluwaa pirddite. <sup>17</sup> Intte pirddan issi baggaa maaddoppite; gitaagaa siyiyooogaadan, guuttaagaakka hegaadan siyite; asa som77uwaassi yayyoppite; aissi giikko, pirddi Xoossaabaa. Qassi intteyyo daro deexo gidida mootuwaa taakko ehiite; hega taani pirddana' yaagaas. <sup>18</sup> Qassi inttekka oottanabaa ubbaa taani he wode inttena azazaas.

*Muusee Qaadeesa-Barnnepe Biittaa Xomoosiyaageeta Kiittiis  
(Kessaabaa 13:1-33)*

<sup>19</sup> "Hegaappe guyyiyan, nuuni Siinaa Deriyaappe denddida; denddidi GODAI nu Xoossai nuna azazidoogaadan, deretiya Amooretu biittaa biyo ogiyan de7iya he intte be7ido gitanne yashshiya bazuwaa kanttidi, Qaadeesa-Barnne gakkida. <sup>20</sup> He wode taani intteyyo hagaadan yaagaas; 'GODAI nu Xoossai nuna laatissiyo deretiya Amooretu biittaa hekko ha77i gakkideta. <sup>21</sup> Be7ite, GODAI intte Xoossai ha biittaa intteyyo immiis. GODAI intte aawatu Xoossai intteyyo odidoogaadan kiyidi, ha biittaa laattite; yayyoppite; ufaissaa qanxxoppite' yaagaas.

<sup>22</sup> "Yaagin intte ubbai taakko yiidi tana, 'He biittaa xomoosidi, nuuni baanau bessiya ogiyaabaanne, nuuni gelana katamatu oduwaa nuuyyo ehiya asata nuuppe sinttau yeddoos' yaagideta.

<sup>23</sup> "He qofai taayyo lo77o milatiis; yaatin, intteppe tammanne naa77u asaa, zariyaappe zariyaappe issi asa dooraas. <sup>24</sup> Eti biidosona; biidi, he deretiya biittaa pude kiyidosona; qassi Eshkkoola Zangaaraakkokka biidi, biittaa xomoosidosona. <sup>25</sup> He biittan mokkiyaabaappe amarida aifiyaa bantta kushiyan oiqqidi, nuukko ekki yiidosona; qassi, 'GODAI nu Xoossai nuuyyo immiyo biittai lo77o' yaagiyo oduwaakka ehiidi odidosona.

<sup>26</sup> "SHin intte GODAA intte Xoossaa azazuwaayyo makkalidi, kiyennan ixxideta. <sup>27</sup> Intte dunkkaaniyaa gidдон issoi issuwaara, hagaadan yaagidi zuuzummideta; 'GODAI nuna ixxido gishshau, xaissanau Amooore biittaa asatu kushiyan aatti immanau, Gibxxe biittaaappe kessiis. <sup>28</sup> Nuuni awa kiyiyoo? Nu ishantti "He biittan de7iya asai nuuppe daroosonanne aduqqoosona. Katamatikka gitanne saluwaa gakkanaashin



gimbbettidaageeta. Hegaa bollikka qassi Anaaqeta geetettiya daro adussa asata yan be7ida” yaagidi, nu wozanaa seerissidosona’ yaagideta.

<sup>29</sup> “Hegaappe guyyiyan, taani hagaadan yaagaas; ‘Etau yayyoppite woikko shabbirettoppate. <sup>30</sup> Intteppe sinttaara biya GODAI intte Xoossai kase Gibxxen intte aifiyaa sinttan i intteyyo oottidoogaadan, ha77ikka intteyyo i olettana. <sup>31</sup> Qassi bazzuwan, intte ha sohuwaa gakkanaashin yiido oge ubban, asi ba na7aa tookkiyoogaadan, GODAI intte Xoossai inttena tookkidoogaa be7ideta’ yaagaas.

<sup>32-33</sup> “Ha ubbaa ta yootinkka, intte dunkkaanana sohuwaa bessanaunne intte baana ogiyaa bessanau qammi tamaa tuussan, gallassi shaaraa tuussan inttena kaalettida GODAN, intte Xoossan, ammanibeekketa.

### *Xoossai Israa7eelata Qaxxayis (Qoodaabaa 14:20-45)*

<sup>34</sup> “GODAI intte haasayaa siyidi hanqqettiis; hanqqettidi hagaadan yaagidi caaqqiis; <sup>35</sup> ‘Taani intte maizza aawatuyyo immana gaada caaqqido ha lo77o biittaa, ha iita yeletaappe issoinne be7enna. <sup>36</sup> He biittaa be7anai Yifune na7aa Kaaleeba xalaala. I yedhdhido biittaa ayyoonne a zariyau taani immana; aissi giikko, i ba kumetta wozanaappe GODAA kaalliis’ yaagidi caaqqiis.

<sup>37</sup> “Intte gaasuwan GODAI ta bollikka hanqqettidi, hagaadan yaagiis; ‘Muusee, harai atto neenikka he biittaa gelakka. <sup>38</sup> SHin nena maaddiyaagee, Nawe na7ai Yaasu he biittaa gelana. I Israa7eela asaa he biittaa laatissanau de7iyo gishshau, neeni a minttetta. <sup>39</sup> Qassi intte, “Nu naati omoodettana” giido guuttatinne iitaa kehaa shaakki eribeenna intte naati he biittaa gelana. Taani he biittaa etayyo immana; etikka a laattana. <sup>40</sup> SHin inttena gidikko, intte guyye simmidi, Zo7o Abbaa efiya ogiyaa oiqqidi, bazzo biite’ yaagiis.

<sup>41</sup> “Yaagin intte zaaridi taayyo hagaadan yaagideta; ‘Nuuni GODAA bolli nagaraa oottida; ha77i nuuni GODAI nu Xoossai azazidoogaadan, kiyidi olettana’ yaagideta. Yaagidi intte ubbai ola miishshaa gixxideta; qassi gezze biittaa kiyidi olettanaagaakka laafabaadan qoppideta.

<sup>42</sup> “SHin GODAI tana, ‘Taani etaara de7enna gishshau, eti kiyidi olettennaadan oda; hegee xayikko eta morkketi eta xoonana’ yaagiis. <sup>43</sup> Yaagin taani intteyyo yootaas; shin intte GODAA azazuwaassi makkalidetappe attin, taani yootidoogaa siyibeekketa; yaatidi intte otoruwan gezze biittaa kiyideta. <sup>44</sup> Yaatin, he gezze biittan de7iya Amoorati inttenaara olaa gaittidi, inttena mattai yedettiyoogaadan yedettidi, he Eedooma biittan biidi Horima gakkanaashin shocidosona. <sup>45</sup> Inttekka guyye simmidi, GODAA sinttan yeekkideta; shin GODAI intte yeehuwaa siyibeenna woikko ezggibeenna. <sup>46</sup> Yaanin Qadeesan he intte gam77ido keena gallassaa gam77ideta.

## 2

### *Bazzon Aattido Wodeta*

<sup>1</sup> “Hegaappe guyyiyan nuuni, GODAI tana azazidoogaadan, Zo7o Abbaa efiya ogiyaa oiqqidi, guyye simmidi, bazzo biida; hegan metootiiddi, deretiya Eedooma biittan daro gallassaa yuuyida.

<sup>2</sup> “Hegaappe guyyiyan, GODAI tana hagaadan yaagiis; <sup>3</sup> ‘Ha deretiya biittaa yuushshai intteyyo gidana; guyye simmidi, huuphessa baggi biite. <sup>4</sup> Asaa neeni hagaadan yaagada azaza; “Eedooman de7iya intte ishannta gidiya Eesawa naatu biittaara intte kantteeta. Eti intteyyo yayyana; shin intte keehi naagettite. <sup>5</sup> Taani eta biittaappe tohoi yedhdhiy-oosaa keenaanne intteyyo immenna gishshau, etaara ooyettoppate; aissi giikko, taani deretiya Eedooma biittaa laata oottada Eesawassi immarggaas. <sup>6</sup> Intte miyo qumaanne uyiyo haattaa, etappe miishshan shammite” yaagada azaza’ yaagiis.

<sup>7</sup>“GODAI intte Xoossai intte oottidobaa ubbaa anjjiis; intte ha gooba bazzuwan hemet-tyo wode, inttena naagiis. Ha oitamu laitta ubban GODAI intte Xoossai inttenaara de7iis. Aibanne intteyyo pacissibeenna.

<sup>8</sup>“Hegaa gishshau, nuuni nu ishannta gidiya Eesawa naati de7iyo Eedooma biittaara kanttidi biida. Qassi Eelaatanne Eexiyooni-Gaabira giyo katamatuppe denddidi, Max-ine Abbaakko gattiya ogiyaa aggidi, Moo7aaba bazzuwaara aadhdhida.

<sup>9</sup>“GODAI tana hagaadan yaagiis; ‘Taani eta biittaappe aibanne intteyyo immenna gishshau, Moo7aaba asaara ooyettoppote woi eta oloppite; aissi giikko, Eera katamaa taani laata oottada Looxe zaretussi immarggaas’ yaagiis.”

<sup>10</sup> (He biittan kase minonne cora gidida, qassi Anaaqe zaretudan adussa gidida Eemeta geetettiya asati de7idosona. <sup>11</sup> Eti Anaagetudankka Rafaayeta geettoosona. SHin Moo7aaba asai eta Eemeta giidi xeesees. <sup>12</sup> Hooraa biittaa asai qassi kase Eedooman de7iis; shin Israa7eelati laattanaadan GODAI etau immido biittan eti oottidoogaadan, Eesawa zareti Hoorata eta biittaappe shoddidosona; qassi bantta sinttappe eta xaissidi, eta sohuwan uttidosa.)

<sup>13</sup> Muusee, “GODAI nuna, ‘Ha77i denddite; denddidi Zareeda SHaafaa pinnite’ yaagin, nuuni Zareeda SHaafaa pinnida. <sup>14</sup> Nuuni Qaadeesa-Barnneppe denddidi, Zareeda SHaafaa pinnana gakkanaashin de7iya wodee hasttamanne hosppun laitta; he wode GODAI etayyo caaqqidoogaadan, olau gakkida he yeletaa attumaageeti ubbai wuridosona. <sup>15</sup> Dunkkaanidosappe eti muleera dim77i giidi xayana gakkanaashin, GODAA kushee eta bolli de7ees.

<sup>16</sup>“Olau gakkida attuma asai ubbai muleera xayidoogaappenne asaa giddoppe haiqqi wuridoogaappe guyyiyan, <sup>17</sup> GODAI tana hagaadan yaagiis; <sup>18</sup> ‘Eera ogiyaara hachchi intte Moo7aaba biittaa kantteeta. <sup>19</sup> Intte Amoonaa asatu biittaa gakkiiyo wode, eta qaaserettoppote woikko etaara ooyettoppote. Aissi giikko, Amoonaa asatu biittaappe aibanne taani intteyyo laata oottada immikke. Taani he biittaa Looxe zariyaayyo laata oottada immarggaas’ yaagiis.

<sup>20</sup> (He biittai kase yan de7iya asai xeasettiyo sunntan Rafaayetu biittaa geetettidi xeeseetes. Qassi Amoonati eta Zaamizuumeta giidi xeesoosona. <sup>21</sup> Etikka Anaagetudan adussa, minonne cora dere; shin GODAI eta xaissin, Amoonati eta biittaa laattidi uttidosa. <sup>22</sup> GODAI Eedooman de7iya Eesawa zaretuyyo oottidoogaadan, etayyookka oottiis; hegeekka i he biittan de7iya Hoorata xaissin, Eesawa zareti eta biittaa laattidi hachchi gakkanaashin uttidosa. <sup>23</sup> Gaaza gakkanaashin de7iya heeratun de7iya Aaweta gidikko, Kafttoora giyo biittaappe yiida Kafttooreti eta xaissidi, eta sohuwan uttidosa.)

<sup>24</sup>“Qassikka GODAI nuna hagaadan yaagiis; ‘Denddite; denddidi Arnnoona SHaafaa pinnite. Be7ite, Amooore biittaa asa gidiya Haseboona Kawuwaa Sihoonanne a biittaa taani intte kushiyan aattada immaas; a olidi a biittaa laattiyoogan doommite. <sup>25</sup> Hachchippe doommidi saloppe garssaara de7iya asai ubbai intteyyo yayyanaadan taani oottana; eti inttebaa siyiyo wode ubban, yashshan kokkorana’ yaagiis.

*Israa7eela Asai Kawuwaa Sihoona Xooniis  
(Qoodaabaa 21:21-30)*

<sup>26</sup>“Hegaappe guyyiyan, Qidemoota Bazzuwaappe Haseboona Kawuwaa Sihoonayyo saro qaalaa kiitettiyaageetu bolli hagaadan yaagada kiittaas; <sup>27</sup> ‘Nuna ne biittaara kanttissarkkii! Nuuni wogga oge xallaa oiqqidi baana; appe ushachchi woi haddirssi simmokko. <sup>28</sup> Nuuni miyo qumaunne uyiyo haattau miishshaa qanxxana. Nu koyiyoogee ne biittaara kanttanaagaa xalaala. <sup>29</sup> Eedooman de7iya Eesawa zaretinne, Eeran de7iya Moo7aaba zareti nuna kanttissidoogaadan, GODAI nu Xoossai, nuuyyo immiyo biittau Yorddaanoosa SHaafaa nuuni pinnana gakkanaashin, oge xallaara nuna aatta’ yaagaas.

<sup>30</sup> “SHin Haseboona Kawoi Sihooni nuna kanttissennan diggiis. Aissi giikko, GODAI intte Xoossai hachchi intte be7iyooogaadan, a intte kushiyan aattidi immanau a wozanaa mintidi, a morgge zozza oottiis.

<sup>31</sup> “Hegaappe guyyiyan GODAI tana, ‘Be7a, Sihoonanne a biittaa taani neeyyo imettaa doommaas; ha77i xoonada, a biittaa laatta’ yaagiis.

<sup>32</sup> “Yaatin, Sihooni ba asaa ubbaa ekkidi, Yahaaxa giyoosan nunaara olettanau denddiis. <sup>33</sup> SHin GODAI nu Xoossai nuuyyo a aatti immiis; immin a, a attuma naatanne a asaa ubbaa nuuni worida. <sup>34</sup> He wode nuuni a katamata ubbaa omooddidi, mule katamatakka, an de7iya attuma asaara, maccaasaaranne naatuura xaissida; aibanne ashshibookko. <sup>35</sup> Eta mehiyaanne nuuni woraajjido katamatuppe omooddidobatu xallaa nuuyyo ekkida.

<sup>36</sup> “Arnoona Zanggaaraa gaxan de7iya Aaro7erappenne he wombbaa gidдон de7iya katamaappe doommidi biidi Gala7aade biittaa gakkanaashin, nuuyyo minnida issi kataminne de7ibeenna. GODAI nu Xoossai eta ubbaa nu kushiyan aatti immiis. <sup>37</sup> SHin nuuni Amoona zaretu biittaakko, hegeekka Yaabooqa SHaafaa doona ubbaakko, deretiya biittaa katamatukkonne GODAI nu Xoossai nuuni baanaadan azazibeenna soho ubbaakko shiiqibookko.

### 3

#### *Israa7eelati Baasaane Kawuwaa Ooga Xoonidosona (Qoodaaba 21:31-35)*

<sup>1</sup> “Hegaappe guyyiyan nuuni simmidi, Baasaane efiya ogiyaara kiyida; yaatin, Baasaane biittaa Kawoi Oogi ba olanchchatu ubbaara Ediraa7a giyo kataman nunaara olettanau kiyiis. <sup>2</sup> SHin GODAI tana; ‘Ayyo yayyoppa! Aissi giikko, taani a, a olanchchatu ubbaaranne a biittaara ne kushiyan aattada immaas. Haseboonan uttidi kawotida Amooretu Kawuwaa Sihoona bolli oottidoogaadan, neeni a bollikka oottana’ yaagiis.

<sup>3</sup> “Hegaa gishshau, GODAI nu Xoossai Baasaane biittaa Kawuwaa Ooganne a asaa ubbaa nu kushiyan aattidi immiis; nuuni etappe issuwaanne ashshennan wurssi worida. <sup>4</sup> He wode nuuni a katamata ubbaa oiqqida; nuuni oiqqibeenna issi katamikka de7enna; hegeetikka Baasaane Kawuwaa Oogi Arggooba biittan aissiyo usuppun tammu katamata. <sup>5</sup> Ha katamati ubbaikka adussa gimbbiyan direttidaageetanne penggiyaaranne gordde mittaara de7iyaageeta. Qassi gimbbe dirssai baina keehi daro moottatikka de7oosona. <sup>6</sup> Haseboona biittaa Kawuwaa Sihoona bolli oottidoogaadan, nuuni eta muleera xaissida. Eta katamata ubbaa, etan de7iya attumaara maccaaranne naatuurakka mule xaissida. <sup>7</sup> SHin mehe ubbaanne katamatuppe bonqqidobaa omoodo oottidi, nuuyyo ekkida.

<sup>8</sup> “He wode nuuni Arnoona SHaafaappe biidi Hermmoone Deriyaa gakkanaashin de7iya biittaa Yorddaanoosa SHaafaappe arshsho baggaara de7iyaagaa he naa77u Amooore biittaa kawotuppe ekkida. <sup>9</sup> (Sidoonaa biittaa asai Hermmoone Deriyaa Siriyoone Deriyaa giidi xeegoosona; Amooore biittaa asai qassi Saniira giidi xeegoosona.) <sup>10</sup> Nuuni dembba biittan de7iya katamata ubbaa, Gala7aade biitta ubbaa, Baasaane biitta ubbaanne Baasaane biittan Oogi haariyo Salaakanne Ediraa7a katamata gakkanaashin de7iya sohota oiqqida. <sup>11</sup> (Rafaayetuppe attidai Baasaane biittaa Kawuwaa Ooga xalla. A arssai birata arssa; he arssai hachchi gakkanaashinkka Raaba geetettiya Amoonatu kataman de7ees; ayyo geesai udufun wara; gomppaikka oiddu wara.)

#### *Yorddaanoosa SHaafaappe Arshsho Baggaara Uttida Yarata (Qoodaaba 32:1-42)*

<sup>12</sup> “He biittaa nuuni laattidoogaappe guyyiyan, Arnoona SHaafaa doonan de7iya Aaro7era katamaappe doommidi de7iya sohuwaanne, deretiya Gala7aade biittaappe

bagгаа a katamatuurakka Roobeela zaretuyyoonne Gaada zaretuyyo taani immaas. <sup>13</sup> Gala7aadeppe attidaagaan Oogi haariyo Baasaane biittaa ubbaa, hegeekka Arggooba kawotettaa qassi Minaase zariyaappe baggatuyyo immaas. (He Baasaane biittai ubbai Rafaayetu biittaa geetetti xesettiis. <sup>14</sup> Minaase zariyaappe Yaa7iiri, kumetta Arggooba biittaa laattiis; hegeekka Gashuuratunne Maa7ikatu biittaa gaxaa gakkanaashin de7iya Baasaane biittaa. I qeeri katamata ba sunttan xesettanaadan oottiis; heгаа gishshau, eti hachchi gakkanaashin, Yaa7iira katamata geetetti xesettoosona.)

<sup>15</sup> “Qassi Gala7aade biittaaakka Minaase zare gidiya Maakiirassi immaas.

<sup>16</sup> Roobeelanne Gaada zariyau Gala7aadeppe biidi Arnnoona SHaafaa mataa gakkanaashin de7iya biittaa immaas. Tohossa baggaara etau Arnnoona SHaafau baggai zawa; qassi huuphessa baggaara Amoonatu biittaa gaxa gidiya Yaabooqa SHaafai zawa. <sup>17</sup> Arggo baggaara, eta zawai Arabian de7iya Yorddaanoosa SHaafaa gakees; hegeekka Galiila Abbaappe doommidi Pisgga Deriyaa xaphon de7iya Haiquwaa Abbaa, hegeenne Maxine Abbaa gakkanaashiina.

<sup>18</sup> “He wode taani inttena hagaadan yaagada azazaas; ‘GODAI intte Xoossai ha biittaa intte laattanaadan intteyyo immiis. Simmi intteyyo de7iya tooranchcha asa ubbaa ola miishshaa gixissidi, intte ishantta gidiya Israa7eela asaappe sinttaara olettanaa aadhdhite. <sup>19</sup> Intteyyo daro mehee de7iyooгаа taani erais; heгаа gishshau, intte keettaayeti, intte guutta naatinne intte mehee taani intteyyo immido katamatun de7ishshona. <sup>20</sup> Hegeenne, GODAI inttena shemppissidoogaadan, intte ishanttakka shemppissana gakkanaashiinanne, qassi Yorddaanoosa SHaafaa hefinttan, GODAI intte Xoossai etayyo immiyo biittaa eti ekkana gakkanaashiina. Hegaappe guyyiyan, intte huuphiyan huuphiyan, taani intteyyo immido biittaa simmeeta’ yaagaas.

<sup>21</sup> “Taani he wode Yaasa hagaadan yaagada azazaas; ‘GODAI, intte Xoossai, ha naa77u kawotu bolli oottidobaa ubbaa neeni ne aifiyan be7adasa; intte oiqqanau biyo kawotettatu ubbaa bollikka GODAI hegaadan oottana. <sup>22</sup> Intte gishshau olettiyaagee, GODAA intte Xoossaa gidiyo gishshau, etau yayyoppite’ yaagaas.

### *Muusee Kanaane Gelennaadan Digettiis*

<sup>23</sup> “He wode taani hagaadan yaagada GODAA minttada woossaas; <sup>24</sup> ‘Ubbaa Haariya GODAU, ne gitatettaanne ne mino kushiyaa tana, ne ashkkaraa bessanau doommadasa; aissi giikko, neegaadan heгаа mala oosotanne wolqqaamabata oottanau danddayiyai salon gidin sa7an ai xoossi de7ii? <sup>25</sup> GODAU! Taani baada Yorddaanoosa SHaafaappe, hefinttan de7iya he lo77o deretiya biittaaanne Liibaanoosa be7anaadan tana yeddark-kii!’ yaagaas.

<sup>26</sup> “SHin GODAI intte gaasuwan tana hanqqettidi, taayyo siyennan ixxiis; ixxidi GODAI tana hagaadan yaagiis; ‘Simmi neeyyo gidana; ha yohuwaa denttada naa77antto taayyo haasayoppa. <sup>27</sup> Hegaaggada denddada, Pisgga Deriyaa huuphiyaa kiya; hegan eqqada biittau arggo baggi, huuphessi, tohossinne arshsho baggi ne aifiyaa denttada xeella. Aissi giikko, neeni ha Yorddaanoosa SHaafaa mulekka pinnakka. <sup>28</sup> Mati neeni Yaasussi azazuwaa imma; a xalissanne minttetta; aissi giikko, i ha asaa kaalettidi pinttananne ha neeni be7iyo biittaa i eta laatissana’ yaagiis.

<sup>29</sup> “Hegaaggashshau, nuuni Beeti-Pa7oora katamaa sinttan de7iya wombban gam77ida” yaagiis.

## 4

### *Azazettanaadan, Muusee Israa7eelata Zoriis*

<sup>1</sup> Hegaappe guyyiyan, Muusee asaa hagaadan yaagiis; “Ha77ikka Israa7eela asau, intte de7uwan de7anaadaaninne GODAI, intte maizza aawatu Xoossai, intteyyo immiyo biittaa intte laattanaadan, taani inttena tamarissiyo awaajuwaanne higgiiyaa



siyitenne oottite. <sup>2</sup> Taani inttena azaziyo GODAA intte Xoossaa azazuwaa naagiteppe attin, a bolli ainne gujjoppite; qassi appe ainne pacissoppite. <sup>3</sup> Pa7oora Deriyaa bollan GODAI oottidobaa intte intte aifiyan be7ideta; GODAI intte Xoossai Pa7ooran de7iya Ba7aalassi goinnidaageeta ubbaa intte giddoppe xaissii. <sup>4</sup> SHin intte GODAASSI, intte Xoossaassi, ammanettido gishshau, hachchi gakkanaashin ubbaikka de7uwan de7eeta.

<sup>5</sup> “Be7ite, intte laattanau geliyo biittan oottana mala, GODAI, ta Xoossai tana azazi-doogaadan, awaajuwaanne higgiiyaa taani inttena tamaarissaas. <sup>6</sup> Intte eta naagitenne oottite; hegaa intte oottikko, intte ai keena aadhdhida eranchchakonne hara asai inttena be7ana. Eti ha awaajuwaabaa siyiyo wode, ‘Tumukka ha gita kawotettaa aadhdhida eranchchanne akeekanchcha kawotetta’ yaagana.

<sup>7</sup> “Nuuni a xeesiyo wode audenne, GODAI nu Xoossai nuuyyo mata gidiiyoogaadan, mata xoossi ayyo de7iyo ai wolqqaama kawotetti de7ii? <sup>8</sup> Taani hachchi intte sinttan wottiyo ha higge ubbaadan xillo gidida awaajoinne higgee de7iyo hara ai gita kawotetti de7ii?

<sup>9</sup> “Simmi intte de7iyo laitta ubban ha intte be7idobaa ubbaa dogennaadaaninne intte huuphiyaappe xaissennaadan naagettite; intte naatanne intte naatu naata tamaaris-site. <sup>10</sup> Siinaa Deriyaa bollan GODAA intte Xoossaa sinttan intte eqqido wode, GODAI tana, ‘Ha sa7an de7ido wode ubban, eti taayyo yayyiyoogaa tamaaranaadaaninne bantta naatakka hegaa tamaarissanaadan, taani ta qaalaa eta sissana mala, asaa taakko shiishsha’ giidoogaa hassayite.

<sup>11</sup> “He wode intte shiiqidi deriyaa xaphon eqqideta; saluwaayyo giddo ginaa gakkanaashin, he deriyaa bollan tamai eexxees; he deriyaa xaphoi sakkana xumaaninne shaaran goozetti uttiis. <sup>12</sup> GODAIKKA tamaa gidoppe intteyyo haasayis; haasayin intte a cenggurssaa siyidetappe attin, a be7ibeekketa. <sup>13</sup> Intte oottanaadan i inttena azazido ba maachchaa intteyyo yootiis; hegeetikka Tammu Azazota. I eta naa77u masettida shuchchatu bolli xaafiis. <sup>14</sup> Intte laattanau biyo biittan oottanaadan, awaajuwaanne higgiiyaa inttena tamaarissana mala, GODAI tana he wode azaziis.

### *Eeqaa Misiliyaassi Goinnennaadan Imettida Zoriyaa*

<sup>15</sup> “GODAI Siinaa Deriyaa bollan tamaa giddoppe intteyyo haasayido gallassi, intte a be7ibeenna gishshau, keehippe naagettite. <sup>16</sup> Attuma woikko macca meran oosetidabaa gidin, <sup>17</sup> sa7an de7iya do7a ubbaa leemiso gidin, salo gufantton paalliyaa kafo ubbaa leemiso gidin, <sup>18</sup> sa7aa bollan qaaxxiyaabatu leemiso gidin, biittaappekka garssaara haattaa giddon de7iya moliyaa leemiso gidinkka, intte tunennaadan masettidabaa intteyyo xoossa oottidi goinnoppite. <sup>19</sup> Qassi saluwaa pude xeellidi, GODAI intte Xoossai saloppe garssaara de7iya kawotettatussi ubbaassi immido awaa, aginaa, xoolinttetanne saluwaa meretata ubbaa be7idi, intte etassi goinnidi, balennaadan naagettite. <sup>20</sup> SHin GODAI inttena hachchi intte gidiiyoogaadan, baayyo dummatida asa oottanau birata cooce mala gidiiya Gibxxeppe kessidi ehiis.

<sup>21</sup> “Qassi intte gaasuwan GODAI tana hanqqettiis; hanqqettidi taani Yorddaanoosa pinnennaadaaninne, GODAI, intte Xoossai, laata oottidi intteyyo immiyo lo77o biittaa taani gelennaadan caaqqiis. <sup>22</sup> Hegaa gishshau, taani Yorddaanoosa SHaafaa pinnenan ha biittan haiqqana; shin intte pinnidi, he lo77o biittaa laatteeta. <sup>23</sup> Hegaa gishshau, GODAI intte Xoossai inttenaara maacettido maachchaa dogoppite. Qassi GODAI intte Xoossai inttena oottoppiti giido ai meran masettida misiliyaa gidikkonne intteyyo eeqa oottennaadan naagettite. <sup>24</sup> Aissi giikko, GODAI intte Xoossai miya tamanne qanaatiya Xoossaa.

<sup>25</sup> “Intte naatanne, naatu naata yelidi he biittan adussa wodiya de7iyo wode, ai meran gidikkonne masettida misiliyau goinnidi tunikko, qassi GODAA intte Xoossaa hanqqetissanau a sinttan iitabaa oottikko, <sup>26</sup> intte Yorddaanoosa SHaafaa pinnidi laattanau biyo biittaappe issoinne attennan, elle xayanaagau, taani intte bollan



hachchi saluwaanne sa7aa markkayais. Intte muleerakka xayanaappe attin, he biittan adussa wodiya de7ekketa. <sup>27</sup> GODAI inttena hara asaa gidдон laalana; he inttena i laaliyo kawotettatu gidдон intte qoodai guutta gidana. <sup>28</sup> Hegan intte mittaappenne shuchchaappe asa kushiyan giigida be7enna, siyenna, meennanne singgenna xoossat-ussi goinnana. <sup>29</sup> SHin hegan de7iiddi, intte GODAA, intte Xoossaa koyana; intte a intte kumetta wozanaappenne intte kumetta shemppuwaappe koyikko demmana. <sup>30</sup> Ha ubba metuwaa gidдон intte un77ettidi de7idi, wodiya wurssettan GODAAKKO, intte Xoossaakko, intte simmananne a qaalaayyookka azazettana. <sup>31</sup> GODAI intte Xoossai maarotettan kumida Xoossaa gidiyo gishshau, i inttena aggenna; woikko xaissenna; intte aawatussi i caaqqido maachchaakka dogenna.

<sup>32</sup> “GODAI biittan asa medhdhido gallassaappe doommidi, intteppe kase aadhdhida wodiya ane qorite; haggaa mala gitabai mulekka hani eriyaakko woi siyetti eriyaakko, saluwaayyo ha gaxaappe ya gaxaa gakkanaashin ane oichchite. <sup>33</sup> Tamaa lacuwaa giddoora GODAI haasayin siyidi, intte xayennan de7uwan de7idoogaadan, GODAI haasayin siyidi, de7uwan de7ida hara asi de7ii? <sup>34</sup> Woikko GODAI intte Xoossai intte xeellishin, Gibxxe biittan intteyyo oottidoogaadan, paacyan, malaatan, maalaalis-siyaaban, olan wolqqaama kushiyaaninne micettida qesiyan, qassi gita yashshan hara kawotettaa gidдо gelidi, issi kawotettaa baayyo ekkana baaxetida hara xoossi de7ii? <sup>35</sup> GODAI Xoossaa gidiyoogaa intte erana mala, haggaa i inttena bessii; appe attin hari baawa. <sup>36</sup> I inttena tamarissanau koyido gishshau, ba cenggurssaa saluwaappe inttena sissii. Qassi ha sa7an ba gita tamaa inttena bessii; he tamaa giddoppe intte a qaala siyideta. <sup>37</sup> I haggaa oottidoogee intte aawata siiqidoogaappe denddidaagan, etappe guyyiyan yelettiya eta zareta doorido gishshaassa. Qassi inttenakka Gibxxeppe ba gita wolqqaan kessido gishshaassa. <sup>38</sup> Hachchi intte be7iyoogaadan, inttena gelissanaunne eta biittaa intteyyo laata oottidi immanau, intteppe dariyaanne wolqqaamiya kawotet-tata intte sinttappe yedettiis.

<sup>39</sup> “Simmi yaakko, bolla saluwan gidin, garssa sa7an gidin, GODAI Xoossaa gidiyoogaa erite; intte wozanankka wottite; hara xoossi baawa. <sup>40</sup> Haggaa gishshau, intteyyoonne intteppe guyyiyan intte naatuyyo ubbabai lo77o gidanaadan, qassi GODAI intte Xoossai intteyyo merinau immiyo biittan intte baree aduqqanaadan, taani hachchi inttena azaziyo awaajuwaanne higgiiya naagite” yaagiis.

### *SHemppo Woridaageeti Baqatidi Attiyo Katamata*

<sup>41</sup> Hegaappe guyyiyan, Muusee Yorddaanoosa hefinttan arshsho baggaara heezzu katamata dummayiis. <sup>42</sup> Haggaa i dummayidoogee kase morkketetti bannan de7ishin, erennan, ba shooruwaa worida asi yaa baqatanaassa. He katamatuppe issuwau baqa-tidi, he bitanee ba shemppuwaa ashshanau danddayees. <sup>43</sup> Haggaa gishshau, Roobeela zariyau bazzon xoqqasan de7iya Beexera katamaa, Gaada zariyau Gala7aaden de7iya Raamootanne Minaase zariyau Baasaanen de7iya Golaana katamata dummayiis.

### *Higgee Imettiyoogaa Erissiyoo-gaa*

<sup>44</sup> Muusee Israa7eela asaayyo immido GODAA higgee haggaa. <sup>45-46</sup> Ha wogaa, awaajuwaanne higgiiya eti Gibxxeppe kiyidi, Beeti-Pa7oora katamaa sinttan de7iya, Yorddaanoosappe arshsho baggaara de7iya wombban de7ishin, etau immiis. He sohoi Haseboonan uttidi Amoo-re haariya Kawuwaa Sihoona biittaa giddoona. Muuseenne Israa7eela asai Gibxxeppe kiyido wode, Sihoona olidi xoonidosona. <sup>47</sup> He wode eti a biittaanne Baasaane Kawuwaa Ooga biittaa, hegeekka qassi Yorddaanoosappe arshsho baggaara de7iya naa77u Amoo-re kawotu biittaa laattidosona. <sup>48</sup> He biittai Arnnoona SHaafaa doonan de7iya Aaro7era katamaappe biidi, Siriyoone Deriyaa gakkees; he Siriyoone geetetti xesettiya deree Hermmoone giyo deriyaa. <sup>49</sup> Qassikka he biittai

Yorddaanoosappe arshsho baggaara de7iya Aaraba biittaa ubbaa ekkidi biidi, Pisgga Deriyaa xaphon de7iya Haiquwaa Abbaa gakkees.

## 5

### *Tammu Azazota (Kessaabaa 20:1-17)*

<sup>1</sup> Muusee Israa7eela asaa ubbaa issippe xeesidi, hagaadan yaagiis; “Inttenoo Israa7eela asau, taani hachchi intteyyo yootiyo awaajuwaanne higgiiyaa siyite; intte eta tamaritenne minttidi oottite. <sup>2</sup> GODAI nu Xoossai Siinaa Deriyaa bollan nunaara maachchaa maacettiis. <sup>3</sup> GODAI ha maachchaa maacettidoogee nu aawatu xallaara gidenna; hachchi de7uwan de7iya nu ubbaarakka maacettiis. <sup>4</sup> He deriyaa bollan eexxiya tamaa gidдон gididi, GODAI intte baazzan eqqidi inttenaara haasayiiis. <sup>5</sup> Taanikka he wode GODAI giyoobaa intteyyo yootanau, GODAAPPENNE intteppe gidduwan eqqaas; aissi giikko, intte tamau yayyidi, deriyaa pude kiyibeekketa. GODAIKKA hagaadan yaagiis.

<sup>6</sup> “Gibxxe biittaaappe ailletettaa keettaappe nena wozidaagee taani GODAA ne Xoossaa.

<sup>7</sup> “Taappe attin, hara xoossati neeyyo de7oppona.

<sup>8</sup> “Bolla saluwan de7iyaabaa gidin, woikko garssa sa7an de7iyaabaa gidin, woikko sa7aappe garssaara de7iya haattaa gidдон de7iyaabaa gidinkka, aiba misiliyaanne neeyyo eeqa oottoppa. <sup>9</sup> Neeni etau hokkoppa; woikko etau goinnoppa; aissi giikko, taani tana ixxiyaageeta aawatu nagaraa gishshau, naata heeztantanne oidantta yeletaa gakkanaassi qaxxayiyaagaa; taani, GODAI ne Xoossai qanaatiya Xoossaat-tenne. <sup>10</sup> SHin taani tana siiqiyaageetanne ta azazuwaa naagiyaageeta sha7u yeletaa gakkanaassi ta aggenna siiquwaa bessais.

<sup>11</sup> “GODAA ne Xoossaa sunntaa hadan xeesoppa; aissi giikko, GODAI ba sunntaa hadan xeesiyaagaa qaxxayennan aggenna.

<sup>12</sup> “GODAI ne Xoossai nena azazidoogaadan, geeshsha oottada Sambbata gallassaa naaga. <sup>13</sup> Neeni oottiyo ooso ubbaa usuppun gallassan ootta. <sup>14</sup> SHin laappunnta gallassai GODAAYYO, ne Xoossaayyo Sambbata. He gallassi ai oosonne oottoppa; neeni woikko ne attuma na7ai, woikko ne macca na7iyaa, woikko ne ashkkarai, woikko ne ashkkariyaa, woikko ne boorai, woikko ne haree, woikko ne hara meheti, woikko ne kataman de7iya betee, he gallassi aiba oosonne oottoppite. Neeni shemppiyoogaadan ne attumanne macca ashkkaratikka shemppona. <sup>15</sup> Neeni Gibxxe biittan aille gidada de7idoogaa dogoppa; qassi GODAI ne Xoossai ba wolqqaama kushiyaaninne ba micettida qesiyan yaappe nena kessidoogaa dogoppa. GODAI ne Xoossai Sambbata gallassaa neeni naaganaadan, nena azazidoogeeekka hegaa gishshaassa.

<sup>16</sup> “GODAI ne Xoossai neeyyo immiyo biittan ne baree aduqqana malanne neeyyo lo77ana mala, GODAI ne Xoossai nena azazidoogaadan, ne aawaanne ne aayyiyo bonchcha.

<sup>17</sup> “Asa woroppa.

<sup>18</sup> “SHAaramuxoppa.

<sup>19</sup> “Wuuqqoppa.

<sup>20</sup> “Ne shooruwaa bollan wordduwaa markkattoppa.

<sup>21</sup> “Ne shooruwaa machchiyo amottoppa; a keettaa, a shooqaa, a attuma ashkkaraa, woikko a macca ashkkariyo, woikko a booraa, woikko a hariyaa, woikko ayyo de7iyaabaa aibanne amottoppa’ yaagiis.

<sup>22</sup> “Deriyaa bollan tamaa giddoppe, shaaraa giddoppenne gorddida xumaa giddoppe GODAI xoqqu giida cenggurssan yaa7a ubbaayyo yootido qaalati hageeta; i eta bollan aibanne gujjibeenna. Qassi eta i naa77u masettida shuchchatu bolli xaafidi, taayyo immiis.

*Asaa Yashshaa*  
(*Kessaabaa 20:18-21*)

<sup>23</sup> “Deree taman xuugettishin, xumaa giddoppe cenggurssaa intte siyido wode, intte zariyaa halaqatinne intte cimati taakko yiidi, <sup>24</sup> hagaadan yaagideta; ‘Be7a, nuuni GODAA nu Xoossaa cenggurssaa tamaa giddoppe siyido wode, GODAI nu Xoossai ba bonchchuwaanne ba angгаа nuna bessiis. Qassi nuuni Xoossai aara haasayinkka asi de7uwan de7anau danddayiyoogaa hachchi be7ida. <sup>25</sup> SHin ha wolqqaama tamai nuna xaissanau danddayees; yaatin, nuuni aissi haiqqiyoonii? GODAA nu Xoossaa qaalaa nuuni naa77antto siyikko, nuuni haiqqoos. <sup>26</sup> Aissi giikko, asho maayidaban, nuuni siyidoogaadan tamaa gidon gididi haasayishin, de7o Xoossaa qaalaa siyidi, paxa de7ida asi oonee? <sup>27</sup> Hegaa gishshau, Muusee! Neeni shiiqada, GODAI nu Xoossai giyoobaa ubbaa siya; siyada GODAI nu Xoossai neeyyo yootiyoobaa ubbaa neeni nuuyyo yoota; nuunikka siyidi oottana’ yaagideta.

<sup>28</sup> “Intte taayyo haasayishin, GODAI intte giyoogaa siyidi, tana hagaadan yaagiis; ‘Ha asai neeyyo yootidobaa ubbaa siyaas; eti giidobaa ubbaa likke giidosona. <sup>29</sup> Etayyoonne eta naatuyyo merinau ubbabi lo77o gidanaadan, taayyo yayyanaunne ta azazota naaganau etau ubbatookka hгаа mala wozanai de7eerenneeshsha! <sup>30</sup> Ha77i neeni baada, eti bantta dunkkaaniyau simmanaadan yoota. <sup>31</sup> SHin neeni hagan ta matan eqqashsha; eti laattanaadan taani etau immiyo biittan eti oottana mala, neeni eta tamarissana ta azazuwaa, ta awaajuwaanne ta higgiiyaa ubbaa taani neeyyo yootana’ yaagiis.

<sup>32</sup> “Inttenoo Israa7eela asau, yaakko GODAI intte Xoossai inttena azazidobaa ubbaa oottanau naagettite; appe ushachchi woi haddirssi gooppite. <sup>33</sup> Intte de7uwan de7ana mala, ubbabi intteyyo injjetana mala, qassi intte laattiyo biittankka intte baree aduqqidi de7ana mala, GODAI intte Xoossai inttena azazido oge ubban hemettite.

## 6

*Gita Azazuwaa*

<sup>1</sup> “Intte laattanau biyo biittan intte oottanaadan taani inttena tamarissana mala, GODAI intte Xoossai tana azazido azazoti awaajotinne higgeti hageeta. <sup>2</sup> Intte laittai adussa gidana mala, intte, intte naatinne intte naatu naatika taani hachchi inttena azaziyo GODAA awaajuwaanne higgiiyaa naagiyoogan intte laittan ubban GODAASSI, intte Xoossaassi yayyite. <sup>3</sup> Inttenoo Israa7eela asau, ubbabi intteyyo lo77o gidanaadaaninne GODAI, intte aawatu Xoossai, intteyyo giidoogaadan, maattaanne eessaa goggiya biittan intte keehi corattanaadan, ha higgeta siyitenne minttidi oottite.

<sup>4</sup> “Nenoo Israa7eelaa, siya; GODAI nu Xoossai issi GODAA. <sup>5</sup> Neeni GODAA ne Xoossaa ne kumetta wozanaappe, ne kumetta shemppuwaappenne ne kumetta wolqqaappe siiqa. <sup>6</sup> Hachchi taani nena azaziyo ha azazota ne wozanan wotta. <sup>7</sup> Eta neeni ne naata tamarissa; neeni ne son uttiyo wode, ogiyan hemettiyo wode, zin77iyo wodenne denddiyo wode etabaa haasaya. <sup>8</sup> Malaata oottada ne kushiyan eta qachcha; qassi ne som77uwankka malaatadan wotta. <sup>9</sup> Ne penggiyaa qosilettaa bollaanne ne dirssaa penggiyaa bollan neeni eta xaafa.

*Azazetennan Ixxiyaageetussi Imettida Seeraa*

<sup>10-11</sup> “GODAI intte Xoossai intteyyo immana giidi intte aawatuuyyo, Abrahaamayyo, Yisaaqayyoonne Yaaqoobayyo caaqqido, intte keexxibeenna gitanne lo77o kata-mati kumido biittaa immana. Intte kunttibeenna duretai kumido keettata, intte bookkibeenna ollata, intte tokkibeenna woinetanne zaitiyaa wogarata intteyyo immiyo wode, inttekkamiidi kallido wode, <sup>12</sup> inttena Gibxxeppe, aillettaa biittaappe kessida GODAA dogennaadan naagettite. <sup>13</sup> GODAAYYO, intte Xoossaayyo, yayyite; a xallaayyo goinnite; a sunttankka caaqqite. <sup>14</sup> Intte yuushuwan de7iya asai goinniyo

hara xoossatuyyo goinnoppite. <sup>15</sup> Aissi giikko, intte giddon de7iya GODAI intte Xoossai qanaatiya Xoossa; a hanqqoi intte bollan eexxi kiyana; i inttena biittaa bollappekka quccidi xaissana.

<sup>16</sup> “Masaahan intte a paaccidoogaadan, GODAA intte Xoossaa paaccoppite. <sup>17</sup> GODAI intte Xoossai inttena azazido a azazota, a wogatanne a awaajota minttidi naagite. <sup>18</sup> Intteyyo ubbabai lo77o gidana mala, GODAA sinttan intte likkebaanne lo77obaa oottite. Yaatikko, intteyyo immanau GODAI intte aawatuyyo caaqqido, he lo77o biittaa intte laattana. <sup>19</sup> GODAI ba giidoogaadan intte morkketa ubbaa intte sinttappe yedettana.

<sup>20</sup> “Sinttappe intte naati, ‘GODAI nu Xoossai inttena azazido ha wogaa, awaajuwaanne higgiiyaa birshshettai aibee?’ yaagidi inttena oichchiyo wode, <sup>21</sup> intte etau hagaadan yaagidi zaarite; ‘Nuuni Gibxxe biittan Gibxxe kawuwaa ailleta; shin GODAI ba mino kushiyan nuna Gibxxeppe kessiis. <sup>22</sup> Qassi GODAI nu xeellishin, Gibxxe biittaa bollan, Gibxxe kawuwaa bollaanne a sunttatu ubbaa bollan gitanne yashshiya malaatanne maalaalissiyaabata oottiis. <sup>23</sup> SHin i nu maizza aawatuyyo immana giidi caaqqido biittaa nuna gelissidi, nuuyyo immanau nuna Gibxxeppe kessiis. <sup>24</sup> Yaatidi hachchi be7iyooogaadan, nuuyyo ubba wodekka lo77o gidana malanne nuuni de7uwan de7ana mala, GODAI nuna ha awaajota ubbaa naaganaadaaninne GODAASSI, nu Xoossaassi, yayyanaadan azaziis. <sup>25</sup> I nuna azazidoogaadan, GODAA, nu Xoossaa, sinttan ha azazota ubbaa minttidi naagikko, hegee nuuyyo xillotetta gidana’ yaagite.

## 7

### *Xoossai Doorido Asaa (Kessaabaa 34:11-16)*

<sup>1</sup> “GODAI intte Xoossai intte laattanau biyo biittaa inttena gelissiiyo wodenne, qassi intteppe wolqqaamiyaanne minniya laappun kawotettata, hegeetikka Hiiteta, Gerggeeseta, Amooreta, Kanaaneta, Parzzeta, Hiiwetanne Yaabuusata intte sinttappe xoqolliyo wode, <sup>2</sup> etakka GODAI intte Xoossai intte kushiyan aatti immin, intte eta xooniyo wode, eta muleera suppu oottidi xaissite. Etaara aiba maachchanne maacettoppote. Etaa ainne qarettoppite. <sup>3</sup> Intte etaara ekettoppitenne gelettoppote. Intte macca naata eta attuma naatuyyo immoppite. Woikko eta macca naatakka intte attuma naatuyyo ekkoppite. <sup>4</sup> Aissi giikko, eti intte naata tana kaalliyoosaappe hara eeqatuyyo goinnanaadan, wora zaarana. He wode GODAA hanqqoi intte bolli eexxi kiyana; inttenakka sohuwaara xaissi bayana. <sup>5</sup> Hegaa gishshau, eti yarshshiyosaa kolite. Eti goinniyo shuchchata mentterettite. Asheero giyo macca xoosee misiliyaa kinchcherettite; eta masettida misiletakka taman xuuggite. <sup>6</sup> Aissi giikko, intte GODAAYYO, intte Xoossaayyo, geeshsha asa. GODAI intte Xoossai inttena baayyo dumma asa oottidi, biittaa bollan de7iya asa ubbaappe dooriis.

<sup>7</sup> “GODAI inttena siiqidoogeenne dooridoogee intte hara asaappe qoodan darido gishshassa gidenna. Intte hara asa ubbaappekka qoodan guuxxiyaageeta. <sup>8</sup> SHin GODAI inttena siiqido gishshaunne intte maizza aawatuyyo caaqqido caaquwaa naagido gishshau, i inttena ailletettaa biittaappe, Gibxxe kawuwaa kushiyaappe, ba wolqqaama kushiyan kessiisinne woziiis. <sup>9</sup> Hegaa gishshau, GODAI intte Xoossai Xoossaa gidiyooogaa erite. I bana siiqiyaageetuyyoonne ba azazuwaa naagiyaageetuyyo sha7u yeletaa gakkanaashin, ba aggenaa siiquwaa maachchaa naagiya, ammanettiya Xoossaa. <sup>10</sup> SHin i bana ixxiyaageetuyyo eta tal77iyaa zaarees; i eta tal77iyaa zaaranau gam77enna. <sup>11</sup> Hegaa gishshau, taani hachchi intteyyo immiyo azazota, awaajotanne higgeta naagite.

### *Xoossaassi Azazettin Beettiya Anjuwaa (Zaarettido Wogaa 28:1-14)*



<sup>12</sup> “Intte ha azazota siyidi, eta mintti naagikko, GODAI intte Xoossai intte maizza aawatuyyo caaqqidoogaadan, ba aggenaa siiquwaa maachchaa intteyyo naagana. <sup>13</sup> I inttena siiqana; inttena anjjana; intte qoodaa darissana. Qassi i intteyyo immanau intte maizza aawatuyyo caaqqido biittan intte uluwaa aifiyaa, intte biittaa aifiyaa, kattaa, woiniyaa, zaitiyaa, intte mehiyaa maratanne intte dorssaa marata corissidi anjjana. <sup>14</sup> Intte hara ai asappenne aadhdhidi anjjettidaageeta gidana. Issoinne attuma gidin, macca gidin mainenna. Intte meheekka mainenna. <sup>15</sup> GODAI hargge ubbaappe inttena naagana. Intte eriyo Gibxxe biittaa iita harggiyaa intte bolli eheenna; shin i inttena ixxiya ubbaa bollan he harggiyaa ehaana. <sup>16</sup> GODAI intte Xoossai intteyyo aatti immiyo asa ubbaa xaissite; etayyo ainne qarettoppite. Eta xoossatuyyookka goinnoppite. Aissi giikko, hegee intteyyo pire gidana.

<sup>17</sup> “Intte intte wozanan, ‘Ha kawotettati nuuppe minnoosona; yaatin, nuuni eta waatidi yedetti kessanee?’ gaanau danddayeeta. <sup>18</sup> SHin etayyo yayyoppite. GODAI, intte Xoossai, Gibxxe kawuwaa bollinne Gibxxe biittaa ubbaa bolli oottidoogaa has-sayite. <sup>19</sup> GODAI intte Xoossai inttena Gibxxeppe kessiyo wode oottido gita boshata, malaatata, maalaalissiyaabata, a wolqqaama kushiyaanne a micettida qesiyaa intte intte aifiyan be7ideta. Ha77i intte yayyiyo asa ubbaa bollanka GODAI, intte Xoossai hegaadan oottana. <sup>20</sup> Qassi etappe attidi baqatidi, intteppe qosettidaageetikka xayana gakkanaassi, GODAI intte Xoossai eta gidon kashiyaa yeddana.

<sup>21</sup> “Hegaa gishshau, intte etayyo yayyoppite; aissi giikko, inttenaara de7iya GODAI, intte Xoossai, gitanne yashshiya Xoossaa. <sup>22</sup> GODAI intte Xoossai he kawotettata guuttaa guuttaa xoqolliiddi, intte sinttappe xaissana. Intte eta ubbaa issi kuttan xaissekketa; hegae intte oottikko, biittan de7iya do7ati daridi, inttena waissana. <sup>23</sup> SHin GODAI intte Xoossai eta intte kushiyan aatti immana; eti xayana gakkanaashin, i eta shabbirana. <sup>24</sup> Qassi eta kawotakka i intte kushiyan aatti immana. Inttekka eta sunntaa saloppe garssa baggappe quccidi xaissana. Ooninne inttenaara eqetti danddayenna; intte eta xaissana.

<sup>25</sup> “Masettida eta xoossatu misileta taman xuuggite. He misiletu bollan de7iya biraa woikko worqqaamottoppite. Hegee GODAASSI, intte Xoossaassi, tuna gidiyo gishshau, intte a piriyan ohettennaadan, a intteyyo ekkoppite. <sup>26</sup> Intte he tuna eeqata intte soo gelissidi, etadan qanggettidaageeta gidoppite. Intte eta muleerakka ixxitenne shenetite; aissi giikko, eti bantta huuphiyau qanggettidaabata.

## 8

### *Laattiyo Lo77o Biittaa*

<sup>1</sup> “Intte de7uwan de7ana mala, intte qoodaikka darana malanne GODAI kase intte maizza aawatuyyo immana giidi caaqqido biittaa gelidi, intte laattana mala, hachchi taani inttena azaziyo azazuwaa ubbaa minttidi naagite. <sup>2</sup> GODAI ne Xoossai neeyyo immido azazuwaa ne naagiyaakko naagennaakko, ne wozanaa qofaa eranaayyo, nena paaccanaunne nena ziqqi oottanau, oitamu laittaa kumettaa i nena bazzuwan kaalettido oge ubbaa hassaya. <sup>3</sup> I nena ziqqi oottiisinne namisissii; hegaappe simmidi nena gidin, woi ne maizza aawata gidinkka, erenna mannaa nena miziis. Hegaa i oottidoogee asi GODAI haasayiyo qaala ubbaanappe attin, oitta xallan de7ennaagaa nena tamarissanaassa. <sup>4</sup> Ha oitamu laittatu gidon neeni maayido maayoi wuribeenna; ne tohoikka kixxibeenna. <sup>5</sup> Yaatikko, asi ba na7a seeriyoogaadan, GODAI ne Xoossaikka nena seeriyoogaa ne wozanan akeeka.

<sup>6</sup> “A ogiyan hemettiyoogaaninne a bonchchiyoogan GODAA ne Xoossaa azazota naaga. <sup>7</sup> Aissi giikko, GODAI ne Xoossai nena wombaappenne deriyaappe pulttiya qeeri shaafatinne goggiya pulttoti de7iyo lo77o biittaa gelissanau ehees. <sup>8</sup> He biittai gistteenne banggai, woinee, balaseenne roomaannee, wogaraa zaiteenne eessai kumido



biitta. <sup>9</sup> Qassikka he biittai oitti paccennan neeni miyo biitta; aibinne neeyyo paccenna biitta. He biittai shuchchi birata gidido biitta. Deriyaappekka madaabiyya giyo birataa bookkidi ekkiyo biitta. <sup>10</sup> Neeni hegan maada kallana; yaatada, i neeyyo immido lo77o biittaa gishshau, GODAA ne Xoossaa galatana.

### *Xoossaa Dogiyaageetussi Imettida Seeraa*

<sup>11</sup> “Taani hachchi nena azaziyo a azazota, a higgetanne a awaajota naagennan aggada, GODAA ne Xoossaa dogennaadan, naagetta. <sup>12</sup> Neeni maada kalliyoo wode, lo77o keettaa keexxada an uttiyo wode, <sup>13</sup> ne meheenne dorssaa wudee dariyo wode, neeyyo birainne worqqai dagattiyo wode, qassi neeyyo de7idabai ubbai dariyo wode, <sup>14</sup> he wode ne wozanai otorettennaadan, neenikka Gibxxe biittaappe, ailletettaa keettaappe nena wozida GODAA ne Xoossaa dogennaadan naagetta. <sup>15</sup> I nena marzziyaara de7iya shooshshainne masimasoi kumido, haatti bainna, he gitanne yashshiya bazzuwaara kaalettiis; i neeyyo mela bazzuwan zaallaappe haattaa xuussiis. <sup>16</sup> Ne maizza aawati erenna mannaa i nena mizidoogee nena ziqqi oottanaassanne nena paaccanaassa; i heгаа oottidoogee wurssettan neeyyo ubbabai lo77o gidanaassa. <sup>17</sup> Neeni, ‘Ta wolqqainne ta kushiya minotettai ha duretettaa taayyo ehiis’ geennaadan naagetta. <sup>18</sup> SHin neeni GODAA ne Xoossaa hassaya; aissi giikko, hachchi neeni be7iyooagaan, ne maizza aawatuura maacettido maachchaa minttanau, neeni duretaa demmanaadan neeyyo wolqqaa immidaagee attennee.

<sup>19</sup> “Neeni GODAA ne Xoossaa dogikko, hara xoossata kaallikko, qassi etayyo oot-tikkonne goinnikko, neeni tumu xayanaagaa taani hachchi markkattais. <sup>20</sup> GODAAYYO, ne Xoossaayyo, neeni azazettennan ixido gishshau, GODAI ne sinttappe xaissido kawotettatudan neenikka xayana.

## 9

### *Asai Azazettennan Ixxobaa*

<sup>1</sup> “Inttenoo Israa7eela asau siyite; intte intteppe gitatiyaanne wolqqaaamiya kawotet-tata, qassi yuushuwaa gimbee saluwaa gakkido gita katamatakka laattanau hachchi Yorddaanoosa pinneeta. <sup>2</sup> He biittan de7iya asai minonne adussa; eti, ‘Ooninne etaara eqettanau danddayenna Anaage zareta’ giishin, intte siyideta. <sup>3</sup> SHin miya tamadan intteppe sinttaara biyaagee GODAA intte Xoossaa gidiyoogaa hachchi erite. I eta xaissananne intte sinttan eta kaushshana. GODAI intteyyo giidoogaadan intte eta yedettidi kessanne sohuwaarakka xaissana.

<sup>4</sup> “GODAI intte Xoossai eta intte sinttappe yedettidoogaappe guyyiyan, intte intte wozanan, ‘Nuuni xillo gidiyo gishshau, ha biittaa nuuni laattana mala, GODAI nuna gelissiis’ yaagoppite. GODAI eta intte sinttappe yedettidi kessiyoojee, eti iita gidiyo gishshassa. <sup>5</sup> Intte eta biittaa laattanau geliyoogee intte xillonne suure gidiyo gishshassa gidenna; shin GODAI intte Xoossai eta intte sinttappe yedettiyoogee ha kawotettati iita gidiyo gishshassanne beni intte maizza aawatussi, Abrahaamassi, Yisaaqassinne Yaaqoobassi caaqqido qaala naaganaassa. <sup>6</sup> Simmi yaakko intte haggaa akeekite; GODAI intte Xoossai ha lo77o biittaa inttena laatissiyoojee intte xillotettaa gishshaassa gidenna; aissi giikko, intte morgge zozzida asa.

<sup>7</sup> “Intte GODAA intte Xoossaa bazzuwan waati hanqqetissidaakko dogoppite; intte Gibxxe biittaappe kiyido gallassaappe doommidi, hachchi ha sohuwaa gakkido gal-lassai gakkanaashin, GODAA bolli makkalideta. <sup>8</sup> Siinaa Deriyaa bollikka GODAI inttena xaissanau denddana gakkanaashin, intte GODAA hanqqetissideta. <sup>9</sup> GODAI inttenaara maacettido maachchai xaafettido masettida shuchchata ekkana taani deriyaa huuphiyaa kiyido wode, hegan kattaa meennaaninne haattaa uyennan, oitamu gallassaanne oitamu qammaa gam77aas. <sup>10</sup> Hegaappe guyyiyan, Xoossaa biradhdhiyan xaafettida naa77u masettida shuchchata GODAI taayyo immiis. Intte shiiquwaa oottido

gallassi deriyaa bollan tama gidдон gididi, GODAI intteyyo haasayido qaalati ubbai he masettida shuchchatu bolli xaafetti uttidosona. <sup>11</sup> He oitamu gallassaappenne oitamu qammaappe guyyiyan, GODAI ba maachchai xaafettido naa77u masettida shuchchata taayyo immiis.

<sup>12</sup> “Hegaappe guyyiyan, GODAI tana hagaadan yaagiis; ‘Hagaappe eesuwan wodhdha; aissi giikko, neeni Gibxxeppe kessido ne asai tuniichchiis; taani eta azazido azazuwaappe eesuwan wora simmidi, seerissidi medhdhido eeqaa banttayyo goinnanau giigissidosona’ yaagiis.

<sup>13</sup> “GODAI qassikka tana, ‘Taani ha asaa be7aas; eti tumukka morgge zozza asa. <sup>14</sup> Yaanikko, taani eta xaissanaagaanne eta sunttaakka saloppe garssa baggappe quccanaagaa tana diggoppa. Yaadata nena etappe minniyaanne corattiya kawotetta kessana’ yaagiis.

<sup>15</sup> “Yaagin taani maachchaa qalalai xaafettido naa77u masettida shuchchata naa77u kushiyan tookkada deriyaappe wodhdhaas; he wode deriyaa bolli tamaa laco beettes.

<sup>16</sup> Ta xeelliyo wode, intte GODAA intte Xoossaa bolli nagaraa oottidoogaa be7aas; intte seerissidi medhdhido mirgguwaa misiliyaa intteyyo eeqa oottidi giigissideta. Intte GODAI inttena azazido ogiyaappe eesuwan wora simmideta. <sup>17</sup> Yaatin, taani ta naa77u kushiyan oiqqido naa77u masettida shuchchata olada, intte xeellishin menttaas.

<sup>18</sup> “Hegaappe guyyiyan, taani intte oottido nagara ubbaa gishshau, hegeenne GODAA hanqqetissanau intte a sinttan iitabaa oottido gishshau, kaseegaadankka oitamu gallassaanne oitamu qammaa GODAA sinttan gufannada gam77aas; he wode taani quma mabeikke; haattaakka uyabeikke. <sup>19</sup> GODAI intte bollan hanqqettido a eexxiya hanquwaayyo taani yayyaas; aissi giikko, i inttena xaissanau giigiis; shin GODAI zaarettidikka taayyo siyiis. <sup>20</sup> Qassi GODAI Aaroonakka xaissanau keehi hanqqettiis; yaatin, he wode taani Aaroonayookka woossaas. <sup>21</sup> Taani intte medhdhido he nagaran kumida mirgguwaa misiliyaa ekkada, taman xuuggaas; yaadata a kinchcherettata i buhiyaadan liiqana gakkanaashin gaaccaas; he buhiyaa deriyaappe goggiya haattan olaas.

<sup>22</sup> “Intte qassikka Tabi7eeran, Masaahaaninne amuwaa duufuwaa geetettiya Qibiroote-Hataawan GODAA hanqqetissideta. <sup>23</sup> GODAI inttena, ‘Biite, biidi taani intteyyo immido biittaa laattite’ yaagidi, Qaadeesa-Barnneppe yeddido wodekka, intte GODAA intte Xoossaa azazuwaa ixixidi makkalideta; an ammanettibeekketa woi a qaalaayyookka azazettibeekketa. <sup>24</sup> Taani inttena eroosappekka doommidi, intte GODAA bollan makkalanchcha.

<sup>25</sup> “GODAI inttena xaissana giido gishshau, taani he oitamu gallassaanne oitamu qammaa GODAA sinttan gufannada gam77aas. <sup>26</sup> Taani GODAA Xoossaa hagaadan yaagada woossaas; ‘Abeet Ubbaa Haariya GODAU, neeni ne gita wolqqan wozidonne ne mino kushiyan Gibxxeppe kessido, neeyyo laata gidiya ne asaa xaissopparkkii! <sup>27</sup> Ne ashkharata, Abrahaama Yisaaqanne Yaaqooba qoppa; ha asaa morgge zozzatettaa, eta iitatettaanne eta nagaraa qoodoppa. <sup>28</sup> Hegee xayikko, neeni nuna yaappe kessido Gibxxe biittaa asai, “GODAI eta gelissana giido biittaa gelissanau danddayibeenna gishshaunne eta ixixido gishshau, bazzuwan worana giidi kessiis” yaagana. <sup>29</sup> Gido shin, ha asai neeni ne gita wolqqaaninne ne micettida qesiyan Gibxxeppe kessido ne laata gidiya ne asaattenne’ yaagaas.

## 10

### *Muusee Tammu Azazota Naa77anttuwaa Ekkiis (Kessaabaa 34:1-10)*

<sup>1</sup> “He wode GODAI tana hagaadan yaagiis; ‘Koiroogeetu mala naa77u masettida shuchchata giigissa. Yaadata taakko deriyaa haa pude kiya; qassi mitta Taabootaakka

medhdha. <sup>2</sup> Kase neeni menttido masettida shuchchatu bolli de7iya qaalata ha masettida shuchchatu bolli taani xaafana; neenikka eta Taabootaa gidдон wottaasa' yaagiis.

<sup>3</sup> “Yaagin taani guuganttaappe Taabootaa medhdhaas. Kasegeetu mala naa77u masettida shuchchata akka giigissaas; yaatada he naa77u masettida shuchchata ta kushiyan oiqqada, deriyaa pude kiyaaas. <sup>4</sup> Intte shiiquwaa oottido gallassi, deriyaa bollan tamaa giddoppe GODAI intteyyo yootido qaalata, hegeetikka Tammu Azazota, kase xaafidoogaadankka ha masettida shuchchatu bolli GODAI xaafiis; yaatidi i eta taayyo immiis. <sup>5</sup> Hegaappe guyyiyan, taani deriyaappe duge wodhdhada, GODAI tana azazidoogaadan, he masettida shuchchata taani medhdhido Taabootaa gidдон wottaas; ha77ikka eti yan de7oosona.

<sup>6</sup> “Israa7eela asai Yaa7iqaana asatu haatta ollai de7iyoosaappe denddidi, Mooseri biidosona. Aarooni yan haiqqidi moogettiis; a na7ai El77aazari a laattidi, a sohuwan qeese kiyiis. <sup>7</sup> Eti hegaappe Gudigooda giyoosaa biidosona; yaappe qassi goggiya haattati de7iyo biittaa Yoxibaata giyoosaa biidosona. <sup>8</sup> He wode, GODAA Maachchaa Taabootaa tookkana mala, GODAU oottana mala, a sinttan eqqana malanne, hachchi gakkanaashinkka eti oottiyoogaadan GODAA sunttan anjjana mala, Leewa zareta GODAI baayyo dummayiis. <sup>9</sup> Hegaa gishshau, eta ishanttuura shaakkin, eta gakkiiyaabi woikko laati Leewa zaretussi baawa; GODAI intte Xoossai etayyo yootidoogaadankka, eta laatai GODAATTENNE.

<sup>10</sup> “Taani kasegaadankka oitamu gallaanne oitamu qammaa deriyaa bollan gam77aas; gam77in GODAI ha77ikka ta woosaa siyidi, inttena xaissanau koyibeenna. <sup>11</sup> GODAI tana, ‘Taani immana gaada eta aawatuyyo caaqqaa wottido biittaa eti gelanaadaaninne laattanaadan, ha asaappe sinttaara eta kaaletta’ yaagiis.

### *Xoossai Koyiyoogee Azazettiyoogaa*

<sup>12</sup> “Israa7eela asau, GODAI intteppe koyiyoogee hagua: GODAAYYO, intte Xoossaayyo, yayyite; a ogiyan ubban hemettite; a siiqite; intte kumetta wozanaappenne kumetta shemppuwaappe GODAAYYO, intte Xoossaayyo oottite. <sup>13</sup> Intteyyo lo77anaadan, taani hachchi intteyyo immiyo GODAA azazotanne awaajota naagite.

<sup>14</sup> “Saloinne saluwaappe bollaara de7iya saloti, qassi sa7ainne sa7an de7iya ubbabati GODAA intte Xoossaabata. <sup>15</sup> Gidikonne GODAI intte maizza aawatun ufaattidi, eta siiqiis; qassi hachchi intte be7iyoogaadan, etappe guyyiyan eta zerettata gididiya inttena kawotettatu ubbaappe dooriis. <sup>16</sup> Hegaa gishshau, intte wozanaa shoohuwaa qaxxarite; qassi hagaappe sinttanau morgge zozza gidoppite. <sup>17</sup> Aissi giikko, GODAI intte Xoossai xoossatu Xoossaanne godatu Godaa. I gita Xoossaa; i wolqqaamanne yashshiya Xoossaa. I som77o xeelli pirddenaagaanne maganxxo ekkennaagaa. <sup>18</sup> I aawu baina naatussinne am77etussi eta pirddaa kessees; betiyaakka siiqidi, qumaanne maayuwaa ayyo immees. <sup>19</sup> Intteikka beteta siiqite; aissi giikko, intte intte huuphiyaukka bete gididi Gibxxen de7ideta. <sup>20</sup> GODAAYYO, intte Xoossaayyo, yayyite; ayyo oottite; aara ohettite; a sunttanka caaqqite. <sup>21</sup> Intte intte aifiyan be7ido he gitanne yashshiya maalaalissiyaa-bata, intteyyo oottidaagee i intte galataattenne; qassi intte Xoossaattenne. <sup>22</sup> Gibxxe biittaa wodhdhida intte maizza aawati muleera laappun tamma; ha77i GODAI intte Xoossai inttena saluwaa xoolinttetudan corayiis.

## 11

### *Xoossaa Gitatettaa*

<sup>1</sup> “Simmi GODAA intte Xoossaa siiqite; i intteppe koyiyo a awaajota, a higgetanne a azazota, ubba wode naagite. <sup>2</sup> GODAA seeraa intte eridoogaa keenaa abaa intte tamaridoogaa ubbaa hachchi hassayite; hega eriyaageeti inttenappe attin, intte naata gidokkona; GODAA angгаа, a wolqqaama kushiyaanne a micettida qesiyaa, <sup>3</sup> i oottido malaatatanne i Gibxxe kawuwaa bollinne a biittaa ubbaa bolli oottidoogaa

be7ideta. <sup>4</sup> Qassi eti inttena kaallidi yedettido wode, GODAI Gibxxe biittaa olanchchata, eta paratanne para gaareta Zo7o Abban mitissidi, hachchi gakkanaashin, eta muleera xaissidoogaa be7ideta. <sup>5</sup> Intte ha sohuwaa gakkanaashin, bazzuwan GODAI intteyyo oottidobaa intte ereeta. <sup>6</sup> Qassi Roobeela zariyaappe Eli7aaba naata gidiya Daataana bollinne Abiiraama bolli GODAI oottidoogaa hassayite. Israa7eela asai ubbai xeellishin, biittai dooyettidi, eta, eta so asaa, eta dunkkaaniyaanne etayyo de7iya shemppooraa de7iyaabaa ubbaa mittiis. <sup>7</sup> Ee! GODAI oottido ha gita ooso ubbaa intte aifiyan be7idaageeti inttena.

### *Immana Giido Biittaa Anjuwaa*

<sup>8</sup> “Hegaa gishshau, intte mino gidanaadaaninne Yorddaanoosa pinnidi intte ekkanau biyo biittaa intte laattanaadan, taani hachchi inttena azaziyo azazuwaa ubbaa naagite. <sup>9</sup> Yaatikko, GODAI intte maizza aawatuyyoonne eta zaretuyyo immana giidi caaqqido, maattainne eessai goggiyo biittan intte adussa laittaa de7ana. <sup>10</sup> Intte laattanau geliyo biittai intte kiyidi yiido Gibxxe biittaa mala gidenna; Gibxxen intte kattaa zeridi, shooqa ubbaa ataakilttiyaa sohuwaadan haattaa ushsheeta. <sup>11</sup> SHin Yorddaanoosa pinnidi intte laattanau biyo biittai keratinne wombbati de7iyo, saluwaa iran aliya biittaa. <sup>12</sup> He biittai GODAI intte Xoossai xomoosiyo biitta; laittaa doomettaappe biidi laittaa wurssettaa gakkanaashin, GODAA intte Xoossaa aifee a bollan de7iyo biittaa.

<sup>13</sup> “Hegaa gishshau, intte GODAA intte Xoossaa siiqanaadaaninne intte intte kumetta wozanaappenne intte kumetta shemppuwaappe ayyo oottanaadan, taani intteyyo hachchi immiyo azazota intte polikko, <sup>14</sup> intte kattaa, woiniyaanne zaitiyaa paccennan shiishshana mala, ofinttaa iraanne balguwaa iraa, a wodiyan wodiyan GODAI intte biittan bukissana. <sup>15</sup> GODAI intte mehiyaayyo dembban maataa darissana. Qassi inttekka maananne kallana.

<sup>16</sup> “Intte wozanai balin wora simmidi, intte hara xoossatussi oottennaadaaninne etau goinnennaadan naagettite. <sup>17</sup> Hegee xayikko, GODAA hanqqoi intte bolli eexxi kiyana; irai bukkennaadaaninne biittaikka mokkennaadan i saluwaa gorddana; inttekka GODAI intteyyo immiyo lo77o biittaappe eesuwana xayana.

<sup>18</sup> “Simmi, ha azazota taageeta, intte wozanaaninne intte qofan wottite. Malaatadan eta intte kushiyan qachchite; qassi malaatadan intte som77uwankka wottite. <sup>19</sup> Hageeta intte naatakka tamarissite. Intte son de7iyo wode, ogiyan hemettiyo wode, zin77iyo wodenne denddiyo wodekka, etayyo yootite. <sup>20</sup> Intte penggiyaa qosilettatu bollaanne intte dirssaa penggiyaa bollan intte eta xaafite. <sup>21</sup> Yaatikko, GODAI intte maizza aawatuyyo immana giidi caaqqido biittan intte laittainne intte naatu laittai sa7aappe bollaara de7iya saloi de7iyoogaa keena gidana.

<sup>22</sup> “Intte GODAA intte Xoossaa siiqanaadan, a oge ubban hemettanaadaaninne ayyo ammanettanaadan, taani hachchi intteyyo immiyo azazota intte minttidi naagikko, <sup>23</sup> GODAI ha kawotettata ubbaa intte sinttappe yedettidi kessana; inttekka intteppe gitatiyaanne wolqqaamiya kawotettatu biittaa wotti ekkana. <sup>24</sup> Intte tohuwan intte yedhdhido biitta ubbai inttessa gidana. Intte zawai bazzuwaappe biidi Liibaanoosa gakkanaashiinne Efiraaxiisa SHaafaappe biidi arggo bagga Meediteraane Abbaa gakkanaashiina gidana. <sup>25</sup> Inttenaara ai asinne egettana danddayenna; GODAI intte Xoossai intteyyo giidoogaadan, intte biyoosan ubban asai inttena be7idi dagamanaadaaninne inttessi yayyanaadan oottana.

<sup>26</sup> “Be7ite, hachchi taani intte sinttan anjuwaanne qanggettaa wottais. <sup>27</sup> Taani hachchi inttena azaziyo GODAA intte Xoossaa azazota naagikko, intte anjjettana. <sup>28</sup> SHin taani inttena hachchi azaziyo GODAA intte Xoossaa azazota naagennan ixixidi, intte eribeenna hara xoossatuyyo goinnanau a ogiyaappe wora simmikko, intte qanggettana. <sup>29</sup> GODAI intte Xoossai intte laattanau biyo biittaa inttena gelissiyo wode, anjuwaa Gariizaana Deriyan qanggettaakka Eebaala Deriyaa bollan awaajjite.



<sup>30</sup> Ha naa77u dereti Yorddaanoosa SHaafaappe hefinttaara ogiyyaappe arggo baggan, Aaraban de7iya Kanaanetu biittan de7oosona; eti qassi Gelggala katamaa sinttan de7iya anjjetida Moore mittaassikka matan de7oosona. <sup>31</sup> Intte ha77i GODAI intte Xoossai intteyyo immiyo biittaa laattanau Yorddaanoosa SHaafaa pinnana haneeta. Intte he biittaa ekkidi yan de7iyo wode, <sup>32</sup> taani hachchi intteyyo immiyo awaajotanne higgeta ubbaa minttidi naagite.

## 12

### *Asai Goinniyo Mexi Issi Sohuwaa*

<sup>1</sup> “Intte laattanaadan, GODAI intte aawatu Xoossai intteyyo immido biittan intte de7ido keenan ubban intte balennan oottana awaajotinne higgeti, hageeta. <sup>2</sup> Intte laattiyo kawotettati deriyaa bollan, keraa bollaanne mittatu xaphuwan bantta xoos-satussi goinniyo sohota ubbaa muleera xaissite. <sup>3</sup> Eti yarshshiyo sohota kolite; eta goin-niyo shuchchatakka mentterettite; Asheero giyo eta xoosee misiliyaa taman xuuggite; masettida eta xoossatu misileta xaissite; eta sunttatakka he sohotuppe quccirggite.

<sup>4</sup> “GODAU, intte Xoossau eti bantta xoossau goinniyoogaadan goinnoppite. <sup>5</sup> GODAI intte Xoossai zare ubbai de7iyoosaappe ba sunttai hegan xeesettanaadan doorido so-huwaa koyite. He sohuwaa intte baanau koshshees. <sup>6</sup> Intte intte xuuggiyo yarshshuwaa, hara yarshshuwaa, intte asirataa, intte imuwaa, intte shiiquwaa, intte dosidi immiyo imuwaa, intte mehiyaanne dorssaappe bairaa he sohuwaa ehiite. <sup>7</sup> Hegan GODAI intte Xoossai de7iyoosan intte maana; qassi intte kushee oottidoban ubbaanne GODAI intte Xoossai inttena anjjidoban intte ufaittana.

<sup>8</sup> “Ha77i hagan intte sheneegaa oottiyoogaadan, he wode hegaadan oottekketa. <sup>9</sup> Aissi giikko, GODAI intte Xoossai intteyyo immiyo shemppo biittaa biron gakkichchibeekketa. <sup>10</sup> SHin intte Yorddaanoosa pinnidi, GODAI intte Xoossai immiyo he biittaa laattidi, intte yan uttana. Inttena dooddida morkketuppe inttena i shemppisiyo gishshau, intte woppu giidi hegan de7ana. <sup>11</sup> He wode GODAI intte Xoossai ba sunttai hegan xeegettanau doorido he sohuwaa, taani inttena azaziyooba ubbaa, xuuggiyo yarshshuwaa, hara yarshshuwaa, intte asirataa, intte imuwaanne intte shiiqqido shiiqo ubbaa hegau eheeta. <sup>12</sup> Intte, intte attumanne macca naati, attumanne macca ashkkaratinne inttenaara laata ekkibeenna intte kataman de7iya Leewatuurakka is-sippe hegan GODAA intte Xoossaa sinttan ufaittite. <sup>13</sup> Intte xuuggiyo yarshshuwaa intte koyidosan awaaninne coo yarshshennaadan naagettite. <sup>14</sup> Intte intte zareti de7iyo soho ubbaappe issuwan, GODAI doorido sohuwan intte xuuggiyo yarshshuwau yarshshite; taani inttena azaziyoobaa ubbaakka hegan oottite.

<sup>15</sup> “SHin intte de7iyoosan awaaninne intte mehiyaappe GODAI inttena anjjidoogaatto shukkidi miite; wogan geeshsha asa gidin woikko geeyenna asa gidinkka ubbaikka gaaraa ashuwaanne genessaa ashuwaa miyoogaadan, intte mehiyaappe shukkidi mi-ite. <sup>16</sup> SHin suuttaa haattadan sa7an gussiteppe attin mooppite.

<sup>17</sup> “Intte intte kattaappe, woiniyaappenne zaitiyaappe immiyo asirataa, intte mehiyaappenne dorssaa wudiyaappe bairaa, GODAU immanau shiiqqidobaa ub-baanne intte intte dosan coo immiyo imuwaa ubbaa intte de7iyo heeran mulekka mooppite. <sup>18</sup> SHin intte, intte attumanne macca naati, intte attumanne macca ashkkaratinne intte katamatun de7iya Leewatuurakka issippe, GODAI intte Xoossai doorido sohuwan GODAA intte Xoossaa sinttan ha yarshsho ubbata miite; hegan intte daafuran shiishshidoban GODAA intte Xoossaa sinttan ufaittite. <sup>19</sup> Intte intte biittan de7iyo laitta ubban Leewata shenhoo geennaadan naagettite.

<sup>20</sup> “I intteyyo gelido qaalaadan GODAI intte Xoossai intte zawaa aassiy wode, inttena ashuwaa maanau koshshiyo wode, intte koyido keenaa miite. <sup>21</sup> SHin GODAI intte Xoos-sai ba sunttai hegan xeesettanaadan doorido he issi sohoi intteyyo haakkikko, GODAI



intteyyo immido intte mehiyaa woi dorssaa wudiyaappe augaa gidinkka, ta inttena azazidoogaadan, intte koyido keenaa intte kataman shukkidi miite. <sup>22</sup> Wogan geeshsha asa gidin, woi geeyennaagaa gidinkka, ai asikka gaaraa gidin, genessaa ashuwaa kase miyoogaadan mo. <sup>23</sup> SHin suuttai de7iyo ashuwaa meennaadan naagettite; aissi giikko, shemppoi suuttan de7ees; heгаа gishshau, de7uwaa ashuwaara mooppite. <sup>24</sup> Suuttaa haattadan biittan gussiteppe attin uyoppite. <sup>25</sup> Intte GODAA sinttan intte lo77obaa oottiyoogee inttessi, intteppe guyyiyan, intte naatussikka lo77o gidana mala, suuttaa uyoppite.

<sup>26</sup> “SHin intte GODAAYYO dummayidobaanne shiiqqidobaa ekkidi, GODAI doorido sohuwau biite. <sup>27</sup> Biidi intte xuuggiyo yarshshuwaa, ashuwaanne suuttaa, GODAASSI, intte Xoossaassi, yarshshiyooosan shiishshite; intte yarshshuwaa suuttaa GODAASSI, intte Xoossaassi, yarshshiyooosaa matan gussite; gussidi ashuwaa intte miite. <sup>28</sup> Taani inttena azaziyo wogaa minttidi naagite; heгаа oottikko, intteyyoonne intte naatuyyo lo77o gidana; aissi giikko, intte likkebaanne GODAA intte Xoossaa ufaissiya lo77obaa oottefa.

### *Eeqa Misilessi Goinnennaadan Imettida Seeraa*

<sup>29</sup> “Intte laattanau biyo kawotettaa GODAI intte Xoossai intte sinttappe xaissiyoo wodenne intteikka eta biittaa laattidi de7iyo wode, <sup>30</sup> eti intte sinttappe xayiiichchin intte eta kaallanau, eta piriyan ohettennaadan naagettite; ‘Nuunikka etadan goinnanau, ha kawotettati bantta xoossatussi waati goinniyoona’ yaagidi, kaalli oichchennaadan naagettite. <sup>31</sup> Eti bantta xoossatussi goinniyo wode, GODAI ixxiyo tunaba ubbaa oottiyo gishshau, intte GODAASSI, intte Xoossaassi, hegaadan goinnanau bessenna. Aissi giikko, eti harai atto bantta yelido attumanne macca naata bantta xoossatussi yarshshidi, taman xuuggoosona.

<sup>32</sup> “Simmi intte ta inttena azazidoogaa ubbaa oottite; a bolli aibanne gujjoppite; appe aibanne pacissoppite.

## 13

<sup>1</sup> “Intte giddon hananabaa yootiyaagee woikko aimo birshshiya asi denddidi, malaataanne maalaalissiyaabaa oottikko, <sup>2</sup> i yootido malaatai woikko maalaalissiyaabai tumu gididi polettin, i inttena, ‘Ane kase intte erenna hara xoossatussi goinnos’ yaagikko, <sup>3</sup> intte a mulekka siyoppite. Intte a kumetta wozanaappenne kumetta shemppuwaappe GODAA intte Xoossaa dosiyaakkonne giidi, inttena i paaccanau heгаа oottes. <sup>4</sup> GODAA intte Xoossaa kaallite; ayyo yayyite; a azazuwaa naagite; a qaalaakka siyite; ayyo goinnite; appe duuxxoppite. <sup>5</sup> Inttena Gibxxeppe kessidi, ailletettaappe inttena wozida GODAA intte Xoossaa bolli intte makkalanaadan tamarissiya hananabaa yootiyaagaa, woikko aimuwaa birshshiyaagaa worite; heгаа mala asi inttena GODAA intte Xoossaa azazuwaappe wora baanaadan oottiyo gishshau, heгаа malaa woridi, iitaa intte giddoppe diggite.

<sup>6</sup> “Harai atto ne aayee na7ai ne ishai, ne attumanne macca na7i, ne siiqiyo ne machchiyaa, woikko ne siiqo laggee nena, ‘Hindda, kase neeninne ne maizza aawati goinni erenna xoossaassi goinnana’ giikko, <sup>7</sup> biittau ha gaxaappe ya gaxaa gakkanaashin de7iya, ne yuusho ubban mataaninne haahuwan de7iya asai ubbai goinniyo xoossatussi, ‘Hindda biidi etau goinnana’ giidi balettikko, <sup>8</sup> au eeno gooppa; i giyoogaakka siyoppa. Ayyo qarettada a guyye ashshoppa; <sup>9</sup> a woranau koshshees. A woranau koiro ne doomma; heгааappe guyyiyan, asai ubbai ba kushiya a bolli wottidi woro. <sup>10</sup> I haiqqana gakkanaashin, shuchchan caddite; aissi giikko, i inttena Gibxxe biittaappe, ailletettaa keettaappe kessida GODAAPPE, intte Xoossaappe, inttena shaakkanau koyiis. <sup>11</sup> Israa7eela asai ubbai heгаа siyidi yayyana; qassi heгаа mala iitabaakka naa77antto intte giddon ooninne oottenna.

<sup>12</sup> “GODAI intte Xoossai intte de7anaadan immiyo katamaappe issuwan intte de7iyo wode, <sup>13</sup> intte asaa gidдон итати denddidi, asaa, ‘Hinddite! Biidi intte erenna xoossatussi goinnoos’ yaagidi balettiyoogaa siyikko, <sup>14</sup> he yohuwaabaa oichchite; minttidi qorite. Qorin he intte gidдон tunabai oosettidoogee tuma gidikko, <sup>15</sup> he kataman de7iya asa ubbaa mashshaa qaran wurssite; he katamaanne an de7iya mehiyaarakka ashshennan xaissite. <sup>16</sup> He katamaappe intte ekkido omoodo ubbaa katamaa dabaabaa shiishshite. SHiishshidi he katamaanne a omooduwaa ubbaa GODAAYYO, intte Xoossaayyo, xuuggiyo yarshsho oottidi wurssi xuuggite. I merinaukka naa77antto keexettenna; laalettida soho gididi, he sohoi attana. <sup>17</sup> Hirima geetettida miishshaappe aibinne intte kushiyan beettoppo. Yaatikko, GODAI ba wolqqaama hanqquwaappe simmidi, inttena maarana; i intteyyo qarettana. Kase intte maizza aawatuyyo caaqqido maachchaadan, intte qoodaa darissana. <sup>18</sup> Aissi giikko, taani hachchi inttena azaziyo azazo ubbaa intte naagiyoogan GODAASSI, intte Xoossaassi azazettikko, qassi GODAA intte Xoossaa sinttankka likke gidiyaabaa oottikko, he gidobai intteyyo tumu polettana.

## 14

### *Yeeho Wode Oottanau Bessenna Meezeta*

<sup>1</sup> “Intte GODAA intte Xoossaa naata; intte haiqqida asau inttena gom77oroppitenne sintta bagga huuphiyaa meedoppite. <sup>2</sup> Aissi giikko, intte GODAASSI, intte Xoossaassi, geeshsha asa; GODAI inttena ba asa gidanaadan, biittan de7iya asa ubbaappe dooridi wottiis.

### *Miyo Meheta Do7atanne Meenna Meheta Do7ata*

<sup>3</sup> “Intte tunabaa aibanne mooppite. <sup>4</sup> Intte maana mehetinne do7ati hageeta; booraa, dorssaa, deeshshaa, <sup>5</sup> genessaa, dogaa, wushaa, wora deeshshaa, cofoshuwaa, gaaraanne deriyaa dorssaa. <sup>6</sup> Qinccafilee wuri phalqqettidoogeeta, waammotiya mehetanne do7ata ubbaa miite. <sup>7</sup> SHin waammotiyaageeta gididi, qinccafilee phalqqettibeennaageeta mooppite; hegeetikka gaameelaa, harbbainnuwaanne guppalliyyaa. Hageeti waammotoosona; shin eta qinccafilee phalqqettibeenna gishshau, eti intteyyo tuna. <sup>8</sup> Gudunntaikka qinccafilee phalqqetta gidikkonne waammotenna gishshau, i intteyyo tuna. A ashuwaa mooppite; a bautaakka bochchoppite.

<sup>9</sup> “Haatta gidдон de7iya meretatu ubbaappe intte maanaageeti hageeta; moliyaagaa mala qefeenne poqoi de7iyo ubbaa miite. <sup>10</sup> SHin moliyaagaa mala qefeenne poqoi baina augaanne mooppite. Hegeeti intteyyo tuna.

<sup>11</sup> “Geeshsha gidida kafo ubbaa miite; <sup>12</sup> shin kafotuppe intte meennaageeti hageeta: arggantaa, bazzo ankkuwaa, kareta ankkuwaa, <sup>13</sup> golluwaa, xinggille zare ubbaa, <sup>14</sup> qooraase zare ubbaa, <sup>15</sup> yanchchaa, cancciya guttuwaa, haatta kafuwaa, gace zare ubbaa, <sup>16</sup> qeeri guttuwaa, wogga guttuwaa, haatta kuttuwaa, <sup>17</sup> bazzo guttuwaa, yinduwwaa, ganggaanuwaa, adussa qooree de7iyo haatta kafuwaa, <sup>18</sup> saabissaa giyo kafo zare ubbaa, jinjjilaatiyaanne wurkkaawurkkuwaa. <sup>19</sup> Qefeera de7iya qeeri meretati ubbai intteyyo tuna; eta mooppite. <sup>20</sup> SHin he qefeera de7iyaabatuppe geeshsha gidiyaageeta miite.

<sup>21</sup> “Intte GODAASSI, intte Xoossaassi, geeshsha asa gidido gishshau, bautidabaa ubbaa aibanne mooppite. Hegaa intte kataman de7iya beteti maanaadan etau immanau danddayeeta; woikko hara biittaa asassi baizzanau danddayeeta.

“Deeshsha maraa a aayee maattan doissoppa.

### *Asirataa Kessiyo Wogaa*

<sup>22</sup> “Intte intte gadeppe laittan laittan gakkiya katta aife ubbaappe asirataa kessite. <sup>23</sup> Intte ubba wode, GODAAYYO, intte Xoossaayyo, yayyiyoogaa tamarana mala, i ba sunttai xeesettana mala doorido sohuwan, GODAA intte Xoossaa sinttan, intte

kattaa, woiniyaa eessaanne zaitiyaa asirataa, intte dorssaappenne mehiyaappe baira yelettidaagaa hegan miite. <sup>24</sup> GODAI intte Xoossai ba sunntai xeesettana mala doorido sohoi, intte de7iyooosaappe keehi haaho gidikko, GODAI inttena anjjana mala, intte intte asirataa yaa tookkanau danddayennan ixkikko, <sup>25</sup> baizzite; baizzidi he miishshaa kushiyan oiqqidi, GODAI intte Xoossai doorido sohuwaa biite. <sup>26</sup> Biidi he miishshan intte koyidobaa augaanne, miizza gidin, dorssa gidin, woine eessaa gido, woikko hara mino ushshaa, woikko hara intte koyiyoobaa aibanne shammidi, inttenne intte so asai ubbai GODAA intte Xoossaa sinttan heгаа miitenne ufaittite.

<sup>27</sup> “Hegaa intte oottiyo wode, intte kataman de7iya Leewata dogoppite; aissi giikko, eti inttenaara shaakki ekkido hara laati baawa. <sup>28</sup> Heezzannta laittan laittan ubba wode, intte katta asirataa ehiidi, intte kataman shiishshite. <sup>29</sup> Hegaa intte kataman de7iya inttenaara shaakki ekkido, hara laati baina Leewati, beteti, aawi baina naatinne am77e maccaasati yiidi moona; miidikka kallona. Yaatikko, intte oottiyo intte kushiya ooso ubban GODAI intte Xoossai inttena anjjana.

## 15

### *Laappuntta Laittaa (Wogaabaa 25:1-7)*

<sup>1</sup> “Laappuntta laittaa laittaa wurssettan intteppe tal77idaageetuuyo eta acuwaa maarite. <sup>2</sup> Intte acuwaa maarana wogai haggaa: ba lagge Israa7eeliyaayyo tal77ida ai asinne he acuwaa maaro. GODAA maarotettai awaajettido gishshau, tal77idaagee ba lagge Israa7eelassi woikko ba ishaassi tal77idobaa oichchoppo. <sup>3</sup> Hara biitta asau intte tal77ido acuwaa ekkanau danddayeeta; shin intte intte zaretussi tal77idobaa ubbaa maarite.

<sup>4-5</sup> “Intte GODAA intte Xoossaa qaalaassi azazettikko, taani hachchi inttena azaziyo azazo ubbaa balennan oottikko, intte gidon issi asinne hiyyeesenna. Aissi giikko, intte laattanaadan GODAI intte Xoossai inttessi aqo oottidi immiyo biittan GODAI inttena anjjana. <sup>6</sup> GODAI intte Xoossai intteyyo giidoogaadan, i inttena anjjana; daro kawotetta intteppe tal77ana; shin intte issuwaappenne tal77ekketa. Qassi intte kawotettata haarana, shin issoinne inttena haarena.

<sup>7</sup> “GODAI intte Xoossai intteyyo immiyo biittan de7iya qeeri katamatuppe augaaninne de7iya intte lagge Israa7eelatu gidon issi asi hiyyeesikko, ayyo meqettaa iitoppite; qassi intte kushiyaakka shiishshi ekkoppite. <sup>8</sup> Intte kushiya ayyo birshshite; a koshshiyaabaa aibanne ayyo tal77ite. <sup>9</sup> ‘Acuwaa maariyo laappuntta laittai matiis’ gaada, hiyyeesa Israa7eelaa iita aifiyan xeellada, ayyo aibanne tal77iyoogaa digganau iita qofai ne wozanan gelennaadan naagetta. Hegee xayikko, i neeppe GODAU waasana; hegee neeyyo nagara gidana. <sup>10</sup> Neeni ayyo coo imma; neeni ayyo immiyo wode, ne wozanan aissi immiyaanaa gooppa; yaatikko, intte ooso ubban, intte oiqqidoban yedhdhidoban ubban GODAI intte Xoossai inttena anjjana. <sup>11</sup> He biittan ubba wodekka hiyyeesi xayenna gishshau, taani nena Israa7eelatuuyo, ne biittan de7iya hiyyeesatuuyoonne metootanchchatuuyo keha gidanaadan azazais.

### *Ailleta Wottiyo Maaraa (Kessaabaa 21:1-11)*

<sup>12</sup> “Neeni attuma gidin macca gidin, ne dabbo Israa7eela asa aille oottada shammikko, i neeyyo usuppun laittaa ootto; laappuntta laittan ailletettaappe kessa yedda. <sup>13</sup> Neeni ailletettaappe a kessa yeddiyo wode, mela kushe yeddoppa. <sup>14</sup> Neeni ne wudiyaappe, ne audiyaappenne ne woiniyaa gum77iyoosaappe ayyo kehatettan imma; GODAI ne Xoossai nena anjjidoogaa keenaa ayyo imma. <sup>15</sup> Inttekka Gibxxe biittan kase aille gididoogaanne GODAI intte Xoossai inttena yaappe wozidoogaa dogoppite. Taani inttena hachchi azaziyoogee hegaassa.

<sup>16</sup> “SHin he aillee nenanne ne keettaa asaa dosido gishshaunne nenaara ayyo de7oi lo77o gidiyo gishshau, ‘Taani ne sooppe kiyada biikke’ yaagikko, <sup>17</sup> pengge a efaada, goottaa ekkada, a haittaa lukka. Yaatobare i neeyyo merinaukka aille gidana. Qassi aille gidiya maccaarissikka hegaadan ootta. <sup>18</sup> A neeni ailletettaappe kessa yeddiyo wode, neeni qohettidabaadan qoppoppa; aissi giikko, i ha usuppun laittaa gidдон керau oottiyaabi oottiyoogaayyo dakko daruwaa neeyyo oottiis. Hegaa gishshau, neeni oottiyooban ubban GODAI ne Xoossai nena anjjana.

### *Miizzainne Dorssai Yeliyo Baira Marata*

<sup>19</sup> “Neeni ne mehiyaappenne ne dorssaa wudiyaappe baira yelettida attumaagaa ubbaa GODAASSI, ne Xoossaassi, dummaya. Ne dummayido mehiyaappe baira yelettidaagaa aibiyyoonne go7ettoppa; ne dorssaa wudiyaappe baira yelettidaagaa ikisiyaakka meedoppa. <sup>20</sup> Neeninne ne so asai GODAI dooriyo sohuwan GODAA intte Xoossaa sinttan hegeeta laittan laittan miite. <sup>21</sup> SHin ne yarshshiyo mehiyaa bollai tillana xayikko, i silidaba woikko qooqe gidikko, woikko qassi hara iita boree a bollan de7ikko, hega GODAASSI, ne Xoossaassi, yarshshoppa. <sup>22</sup> Hegaa intte de7iyo intte kataman miite; wogan geeshsha asa gidin, woi tuna asa gidinkka genessaanne gaaraa ashodan mo. <sup>23</sup> SHin intte a suuttaa haattadan sa7an gussiteppe attin, mooppite.

## 16

### *Paasikaa Baalaa (Kessaabaa 12:1-20)*

<sup>1</sup> “Abiiba aginan GODAA intte Xoossaa Paasikaa Baalaa bonchchite; aissi giikko, GODAI intte Xoossai inttena Abiiba aginan qammi Gibxxeppe kessiis. <sup>2</sup> Intte dorssaa wudiyaappenne mehiyaa wudiyaappe GODAI ba sunttai xeesettanaadan dooriyo sohuwan, GODAASSI, intte Xoossaassi, Paasikaayyo yarshshite. <sup>3</sup> He yarshshuwaa intte miyo wode, irshshuwaa yeggi uukkido oittaara mooppite; shin laappun gallassaa kumettaa irshsho yeggibeenna oittaara miite. Intte Gibxxeppe eesuwaa kiyido gishshaunne intte de7iyo laitta ubban intte Gibxxeppe kiyido gallassaa hassayanaadan, he metuwaa oittaa miite. <sup>4</sup> Intte biittan ubban laappun gallassau aiba irshshoinne beettoppo. Qassi intte koiro gallassa omarssi yarshshido ashuwaappe maalladossi aibinne attoppo.

<sup>5</sup> “Intte Paasikaa yarshshuwaa GODAI intte Xoossai intteyyo immiyo ai katamaaninne coo shukkoppite. <sup>6</sup> GODAI intte Xoossai ba sunttai xeesettanaadan dooriyo sohuwan intte Paasikaa yarshshuwaa shukkite; qassi awai wulliyo wode intte Gibxxeppe kiyido gishshau, he saatian shukkite. <sup>7</sup> GODAI intte Xoossai dooriyo sohuwan, hegan kattidi miite; yaatidi sa7ai wonttiyo wode, intte soo soo biite. <sup>8</sup> Usuppun gallassa kumettaa irshshuwaa yeggibeenna oittaa miite; laappunnta gallassan GODAAYYO, intte Xoossaayyo, goinnanau geeshsha yaa7aa shiiqite; he gallassi aiba oosonne oottoppite.

### *Saaminttatu Baalaa (Kessaabaa 34:22; Wogaabaa 23:15-21)*

<sup>9</sup> “Intte kattaa cakkanau koiro doommido wodiyaappe doommidi, laappun saaminttaa kumettaa qoodite. <sup>10</sup> Yaatidi GODAI intte Xoossai inttena anjjidoogaa keenaa intte intte dosan coo immiyo imuwaa ehiidi, GODAAYYO, intte Xoossaayyo, Saaminttatu Baalaa bonchchite. <sup>11</sup> Hegan intte, intte attuma naati, intte macca naati, intte attuma ashkkaratinne intte macca ashkkarati, intte katamatun de7iya Leewati, beteti, aawu baina naatinne intte gidдон de7iya am77eti ubbai GODAI intte Xoossai ba sunttai xeesettanaadan dooriyo sohuwan, ufaittite. <sup>12</sup> Intte Gibxxe biittan aille gididoogaa hassayidi, ha wogaa balennan naagite.



*Daase Baalaa  
(Wogaabaa 23:33-43)*

<sup>13</sup> “Intte audiyaappe intte kattaa, qassi woiniyaa yedhdhiyoosaappekka intte woiniyaa shiishshidoogaappe guyyiyan, laappun gallassaa Daase Baalaa bonchchite.

<sup>14</sup> Intte, intte attuma naatinne macca naati, intte attuma ashkkaratinne macca ashkkarati, intte katamatun de7iya Leewati, beteti, aawu bainna naatinne am77eti ubbai ha baalan keehi ufaittite. <sup>15</sup> GODAI dooriyo sohuwan laappun gallassaa GODAASSI, intte Xoossaassi, baalaa bonchchite; aissi giikko, intte ubbaikka issippe ufaittana mala, intte aifissidoban ubbaaninne intte kushee oottiyooban ubban GODAI intte Xoossai inttena anjjana.

<sup>16</sup> “Intte biittan attuma asa gidida ubbai laittan heezzutoo, Oittaa Baalaa wode, Saaminttatu Baalaa wodenne Daase Baalaa wode, GODAA intte Xoossaa sinttan i dooriyo sohuwan beetto. Eti GODAA sintti yiiddi, mela kushe yooppona. <sup>17</sup> GODAI intte Xoossai anjjidoogaa keenaa ubbaikka ba danddayiyoogaa keenaa immo.

*Xillo Pirddaa Pirddiyoogaa*

<sup>18</sup> “Intte zaretu ubbaassi GODAI intte Xoossai immiyo katamatun ubban intte daannatanne halaqata sunttite; etikka asaassi xillo pirddaa pirddona. <sup>19</sup> Xillo pirddaa geellayoppite; som77uwaa xeellidi maaddoppite. Maganxxaa ekkoppite; aissi giikko, maganxxai aadhdhida eranchchatu aifiyaakka qooqissidi, xillotu qaalaakka geellayees. <sup>20</sup> Intte de7uwan de7ana malanne GODAI intte Xoossai intteyyo immiyo biittaa intte laattana mala, xillo pirddaa pirddite.

<sup>21</sup> “Intte GODAAYYO, intte Xoossaayyo, keexxiyo yarshshiyosaa matan Asheero giyo xooseessi mittaappe merettida misiliyaa malaa aibanne essoppite. <sup>22</sup> Intte GODAI intte Xoossai ixxiyo goinniyo shuchchaa intteyyo essoppite.

## 17

<sup>1</sup> “GODAASSI, intte Xoossaassi, tilla bollaara de7enna mehiyaa, woikko intte dorssaa yarshsho oottidi shiishshoppite; hegee a sinttan sheneyiyaabaa.

<sup>2</sup> “GODAI intte Xoossai intteyyo immiyo katamatuppe augankka attuma gidin macca gidin a maachchaa kolidi, GODAA intte Xoossaa sinttan iitaa oottida asi intte gidon beettikko, <sup>3</sup> qassi ta azazuwaa menttidi, hara xoosatuyyo goinnida uri, awaassi, woikko aginaassi, woikko saluwaa xoolinttetussi goinnida uri de7ikko, <sup>4</sup> hegea malabaa intte siyikko, he yohuwaa minttidi qorite. Intte qorin, hegea mala tunabai Israa7eela gidon oosettidoogee tumanne geeshsha gidikko, <sup>5</sup> he iitaa oottida bitaniyaa woikko mishiriyo intte katamaappe gaxi kessidi, shuchchan caddidi worite. <sup>6</sup> He woriyo asi haiqqanau bessiyoogee naa77u woikko heezzu markkai markkattiina gido; issi asa markkaa qaalan ai asinne haiqqoppo. <sup>7</sup> A woranau markkati koiro shuchchan a caddona; eta kaallidi asai ubbai a caddo. Hegaadan oottidi, iitaa intte giddoppe diggite.

<sup>8</sup> “Intte intte katamatun pirddanau keehi deexxiya shemppo mooto gidin, shochcha masunta mooto, woikko qassi tau bessees giyo aqo mooto gidinkka denddikko, he wode intte GODAI intte Xoossai doorido sohuwaa ehiite. <sup>9</sup> Hegan Leewatuppe qeese gidiyaa-gaakkonne he wodiyan daanna gididi pirddiyaagaakko shiishshite; he yohuwaa eti pirddana. <sup>10</sup> GODAI doorido sohuwan eti pirddidoogaadan oottite; eti pirddidoogaappe ashshennaadan naagettite. <sup>11</sup> Eti inttena tamarissido higgiaadaaninne eti yootido pirddaadan oottite; eti pirddido pirddaappe ushachchinne haddirssi ainne sher77i gooppite. <sup>12</sup> Hegan GODAASSI, intte Xoossaassi, oottiya daannaassi, woikko qeesiyaassi azazettennan ixxidi, otorettiya asi de7ikko, he asi haiqqo; hegaadan oottidi, iitaa Israa7eela giddoppe diggite. <sup>13</sup> Hegaappe guyyiyan hegea siyidi, asai ubbai yayyana; naa77antto otorettenna.

*Kawo Xeelliya Wogata*



<sup>14</sup> “GODAI intte Xoossai intteyyo immiyo biittaa laattidi, yan de7uwaa doommiyo wode, intte yuushuwan de7iya kawotettatuugaadan, inttekka, ‘Ane nuunikka nu bollan kawuwaa kawoyoos’ yaagidi qoppikko, <sup>15</sup> intte kawoyanaagee GODAI intte Xoossai intteyyo dooridoogaa gidiyoogaa erite. Hegeekka intte asaa giddoppe doorettidaagaa gidoppe attin, hara biittaa asa intte bolli kawoyoppite. <sup>16</sup> He kawoi paraa daruwaa shiishshanau bessenna; qassi asaikka paraa corayanau naa77antto Gibxxe simmanaadan oottoppo. Aissi giikko, GODAI, ‘He ogiyaara naa77antto mulekka simmoppite’ yaagiis. <sup>17</sup> A wozanaa balettennaadan, kawoi cora maccaasaa ekkoppo. Worqqaakka biraakka darii shiishshoppo.

<sup>18</sup> “I ba kawotettaa araatan uttiyo wode, Leewa zare gidiya qeeseti naagiyo maxaafaappe ha higgiiyaa duuqqidi bau ekko. <sup>19</sup> I ha higgiiyaa qaalaanne wogaa naagiyoogaanne eta oottiyoogan GODAASSI, ba Xoossaassi, yayyiyoogaa tamarana mala, ha maxaafai aara de7o; ikka ha maxaafaa ba de7o laittan ubban nabbabo. <sup>20</sup> Yaatikko, i ba wozanan, ‘Taani ta laggetuppe aadhdhais’ giidi ba ishanttu bolli otorettenna. Ikka Xoossaa higgiiyaappe haddirssinne ushachchi geenna. I ba kawotettan aduqqidi de7ana; a naatika Israa7eela biittan kawo gidana.

## 18

### *SHAahuwan Qeeseta Gakkiyaabaa*

<sup>1</sup> “Qeesetettan oottiya kumetta Leewa zaretussi Israa7eela gidдон biittaa laatai baawa. Eti asai GODAASSI shiishshiyo taman xuuggiyo yarshshuwaappe miiddi de7iyoogee etau laata. <sup>2</sup> Etau eta ishanttu gidдон laati de7enna; GODAI etau geppi-doogaadanka i eta laata.

<sup>3</sup> “Korimaa woikko dorssaa asai yarshshuwau shiishshidoogaappe qeesetussi bessiyaagee haggaa: missaa, naa77u bagga manggaagaanne ulo gidдо ashuwaa etau immona. <sup>4</sup> Intte kattaappe, woiniyaappenne zaitiyaappe koiro gakkida aifiyaanne intte dorssaa ikisiyaappe bairattuwaaw qeesetuuyo immeeta. <sup>5</sup> Aissi giikko, etinne eta naati GODAA sunttan eqqidi, merinau qeese gididi oottana mala, intte zariyaa ubbaa giddoppe GODAI intte Xoossai eta dooriis.

<sup>6</sup> “Leewa zare gidiya issi asi Israa7eela biittan ai katamaappenne denddidi, GODAI dooriyo sohuwau yiikko, <sup>7</sup> i biyoosan de7iya Leewati GODAA sinttan eqqidi oottiyoogaadan, ikka GODAA ba Xoossaa sinttan eqqidi ootto. <sup>8</sup> Qassi ba aawaa aquwaa baizzin, bana gakkiiyaagaa ekkidaagaa gidikkokka, qeeseti go7ettiyoobaa ubbaa etaara likke shaakkidi ekko.

### *Aihuda Gidenna Kawotettati Oottiyo Meeziyaappe Naagettanaadan Imettida Seeraa*

<sup>9</sup> “GODAI intte Xoossai intteyyo immido biittaa geliyo wode, he biittan de7iya asai oottiyo tuna oosuwaa oottoppote. <sup>10</sup> Ba attuma na7a woikko macca na7a yarshshossi giidi, taman xuuggiia ai asinne intte gidдон beettoppo. Bitiyaabi, maracce xeelliyaabi, murunniyaabinne qaadaa odiyaabi qassi intte gidдон de7oppo. <sup>11</sup> Daggamiyaagee, ayyaanata xeejiyaagee, shareechchiyaageenne haiqqida asaa ayyaanaa xeejiyaagee intte gidдон de7oppo. <sup>12</sup> Hegaa malabaa oottiya ai asinne GODAA matan ixettida asa. Eti heggaa mala tunaa oottiyo gishshau, GODAI intte Xoossai he kawotettaa intte sinttappe gooddana. <sup>13</sup> SHin intte GODAA intte Xoossaa sinttan kumetta boree bannaageeta gidite.

### *Xoossai Hananabaa Yootiyaagaa Kiittana Giidobaa*

<sup>14</sup> “Ha intte laattanau biyo biittan de7iya kawotettati murunniyaageetinne maraciyaa xeelliyaageeti odiyoogaa siyiyaageeta. SHin intte heggaa oottennaadan GODAI intte Xoossai inttena teqqiis. <sup>15</sup> GODAI intte Xoossai, intte zariyaa giddoppe, ta mala

hananabaa yootiyaagaa intteyyo denttana. Intte i giyoogaa siyite. <sup>16</sup> Intte Siinaa Deriyaa bollan shiiqido wode, GODAA intte Xoossaa hagaadan yaagidi oichchideta; ‘Nuuni haiqqennaadan, GODAA nu Xoossaa cenggurssaa zaari siyokko; qassi ha wolqqaama tamaakka naa77antto be7okko’ yaagideta.

<sup>17</sup> “GODAI tau hagaadan yaagiis; ‘Eti giidobaa ubbaa likke giidosona. <sup>18</sup> Taani eta zaretu giddoppe, ne mala hananabaa yootiyaagaa etayyo denttana; denttada ta qaalaa a doonan wottana; ikka taani a azaziyo ubbaa etayyo yootana. <sup>19</sup> I ta sunttan yootiyo ta qaalaa siyenna oossinne haluwaa taani kiyana. <sup>20</sup> SHin ta azazabeennaagaa xalidi ta sunttan yootiyaagee woikko hara xoossatu sunttan yootiya he hananabaa yootiyaagee haiqqo’ yaagiis.

<sup>21</sup> “Intte, ‘Hananabaa yootiyaagee yootiyo qaalai Xoossaappe gidennaagaa aibin shaakki eranee?’ yaagikko, <sup>22</sup> he hananabaa yootiyaagee GODAA sunttan yootin, i yootido qaalai polettennan ixzikko, hegee GODAI yootibeenna qaala gidiyooгаа ereeta. He hananabaa yootiyaagee wordduwan yootido gishshau, au yayyoppite.

## 19

### *Baqatidi Attiyo Katamata (Qoodaabaa 35:9-34; Yaasu 20:1-9)*

<sup>1</sup> “GODAI intte Xoossai intteyyo immiyo biittan de7iya kawotettaa xaissiyo wode, qassi inttekka eta gooddidi, eta katamatuuninne eta keettatun de7uwaa doommiyo wode, <sup>2</sup> GODAI intte Xoossai laata oottidi immiyo biittan de7iya katamatuppe heezzu katamata intteyyo dummayite. <sup>3</sup> GODAI intte Xoossai intteyyo laata oottidi immiyo biittaa heezzu kessidi shaakkite. Yaatidi asa worida ooninne he katamatukko baqatanaadan ogiyaa giigissite.

<sup>4</sup> “Issi asi kase morkketetti bannan de7ishin, erennan ba shooruwaa worikko, i he katamatuppe issuwau baqatidi, ba shemppuwaa ashsho. <sup>5</sup> Naa77u asi mittaa qanxxanau woraa bin, issoi mittaa qanxxishin, tuutiyaappe aifee koletti wodhdhidi hinkkuwaa worikko, he woridaagee ha heezzu katamatuppe issuwaa baqatidi, ba shemppuwaa ashsho. <sup>6</sup> Qosetti attiyo katamai issuwaa xalla gidikko, woxxidi eesuwan gakkanau ogee aduqqido gaasuwan suuttaa achchiyaagee suulliya hanqquwan dendididi, yedetti gakkidi, haiqqanau bessennaagaa woranau danddayees; aissi giikko, i ba shooruwaa woridoogee kase morkketetta de7iyo gishshaassa gidenna. <sup>7</sup> Intte heezzu katamata dummayi wottanaadan, taani inttena hassayissidoogee hegaassa.

<sup>8</sup> “GODAI intte Xoossai kase intte maizza aawatuyyo caaqqidoogaadan intte zawaa aassikko, qassi intte maizza aawatussi immana giido biittaa ubbaa intteyyo immikko, <sup>9</sup> ha heezzu katamatuppe hara heezzu katamata gujjeeta. Hachchi taani inttena azaziyoogaa ubbaa intte polikko, GODAA intte Xoossaa dosikkonne i inttena tamarissido ogiyan minnidi de7ikko, ha biittai intteyyo imettana. <sup>10</sup> Hegaa oottikko, GODAI intte Xoossai laata oottidi intteyyo immiyo biittan geeshsha asa suuttai gukkenna; qassi inttekka suuttaa gussiyo nagaraappe atteeta.

<sup>11</sup> “SHin issi asi ba shooruwaa ixixidi, zuggi naagidi a woridi, ha katamatuppe issuwau baqatikko, <sup>12</sup> a katamaa cimati i baqatido katamaappe kiitti ehiissidi, haluwaa kiyana a koyiyaagau aatti immona. <sup>13</sup> Ayyo ainne qarettoppite; intteyyo ubbabai lo77o gidana mala, geeshsha suuttaa gussiyaagaa Israa7eela giddoppe xaissite.

### *Beni Zawata*

<sup>14</sup> “GODAI intte Xoossai intte laattanaadan immiyo biittan, beni asai essido ne shooruwaa biittaa zawaa shoddoppa.

### *Markkatubaa*

<sup>15</sup> “Issi asa mooranchcha gaanau issi markka xalaalai gidenna. Naa77u woikko heezzu markkai markkattin, he mootoi pirddeettanau koshshees.

<sup>16</sup> “Issi asi haraa wordduwan mootanau denddikko, <sup>17</sup> he mootiyaageenne mootetiyaagee naa77aikka GODAA sinttan, qeesetu sinttaaninne he wode pirddiya daannatu sinttan eqqona. <sup>18</sup> Yaatabare daannati he yohuwaa minttidi qorona; qorin he mootiyaagee ba ishaa wordduwan mootidoba gidikko, <sup>19</sup> i he mootuwan ba ishaa qaxxayissanau qoppido qixaatiyaa bau qaxxayetto; hegaadan oottidi, heгаа mala iitaa intte giddoppe diggite. <sup>20</sup> Yaatikko, hara asai heгаа siyidi yayyana; heгаа mala iita oosuwaa naa77antto oottenna. <sup>21</sup> Heгаа mala iitaa oottidaagau ainne qarettoppite; shemppo woridaagee haiqqo; aife gishshaa aife; achcha gishshaa achcha; kushe gishshaa kushe; gede gishshaakka gede.

## 20

### *Olaabaa*

<sup>1</sup> “Intte morkkiyaara olettanau biyo wode, eta parati, paraa gaaretinne eta olanchchati intteppe darin be7idi, etau yayyoppite; aissi giikko, inttena Gibxxeppe kessida GODAI intte Xoossai inttenaara de7ees. <sup>2</sup> Intte olaa doommanaappe kasetidi, qeesees sinttau aadhdhidi hagaadan yaago; <sup>3</sup> ‘Inttenoo Israa7eela asatoo, siyite; intte hachchi intte morkkiyaara olettanau haneeta. Simmi intte wozanai dagammoppo; yayyoppite; eta sinttan kokkoroppitenne shabbirettoppite. <sup>4</sup> Aissi giikko, GODAI intte Xoossai inttenaara biyo gishshau, intte morkkiyaa olidi, intteyyo xoonuwaa immana’ yaago.

<sup>5</sup> “Ola gadaawati eta hagaadan yaagona; ‘Ooratta keettaa keexxidi gelibeenna asi de7ikko, i ha olan haiqqin, hara asi a keettaa gelennaadan, i soo simmo. <sup>6</sup> Woikko woiniyaa tokkidi, a aifiyan ufaittibeenna uri de7ikko, i ha olan haiqqin, hara asi a woiniyaa aifiyan ufaittennaadan, i ba soo simmo. <sup>7</sup> Maccaasa giigissidi ekkibeenna asi de7ikko, i ha olan haiqqin, hara asi o machchennaadan, i ba soo simmo’ yaagona.

<sup>8</sup> “Gadaawati gujjidikka asaayyo hagaadan yaagona; ‘Ha asaa gidдон yayyiya asinne hirggiya asi ooninne de7ikko, i ba laggetu wozanaakka yashshan seerissennaadan i ba soo simmo’ yaagona. <sup>9</sup> Gadaawati hagaasau yooti wurssiyo wode, citaassi citaassi ola gadaawata doorona.

<sup>10</sup> “Issi katamaa olanau biidi intte akko matiyo wode, koirottidi saruwan eti kushiyaa immanaadan oichchite. <sup>11</sup> Oichchin eti saruwan bantta kushiyaa immidi, bantta gimbbiyaa penggiyaa dooyidi inttena gelissikko, he kataman de7iya asai ubbai intteyyo haggazonanne deexo oosuwaa intteyyo ootona. <sup>12</sup> SHin he katamaa asai intteyyo saruwan kushiyaa immennan ixixidi, inttenaara olau giigikko, intte he katamaa yuushuwaa dooddite. <sup>13</sup> GODAI intte Xoossai eta intteyyo aatti immiyo wode, he kataman de7iya attumaasa ubbaa mashshan wurssite. <sup>14</sup> SHin maccaasaa, naata, mehiyaanne katamaa gidдон de7iya ubbabaa omoodo oottidi intteyyo ekkite. Qassi GODAI intte Xoossai intteyyo immiyo intte morkketu omooduwan go7ettite. <sup>15</sup> Intte de7iyoosaappe haakkidi de7iya katamatakka oiqqiyo wode, hegaadan ootteeta.

<sup>16</sup> “SHin GODAI intte Xoossai intteyyo laata oottidi immiyo biittan shemppoora de7iyaabaa issibaanne ashshennan worite. <sup>17</sup> GODAI intte Xoossai azazidoogaadan, Hiiteta, Amooreta, Kanaaneta, Parzzeta, Hiiwetanne Yaabuusata wurssidi worite. <sup>18</sup> Hegee xayikko, eti bantta xoossatuyyo goinniyo tuna oosuwaa intte oottanaadan inttena tamarissana; hegan intte GODAA intte Xoossaa bolli nagaraa oottana.

<sup>19</sup> “Katamaa oiqqanau yuushuwaa dooddi, daro gallassaa olettiiddi gam77iyo wode, an de7iya aifiyaa immiyo mittaa kalttan qanxxoppite; eta aifiyaa miiteppe attin, eta qanxxoppite. Aissi giikko, intte yuushuwan dooddidi oliyoi asaappe attin, dembban

de7iya mittaa gidenna. <sup>20</sup> SHin intte eriyoo aifiyaa immenna hara mittata qanxxidi, intenaara olettiya katamai kunddana gakkanaashin, hegan dooddiyo qatuwaa keexxite.

## 21

### *Worida Urai Erettibeenna Daafaa*

<sup>1</sup> “Intte laattanaadan GODAI intte Xoossai intteyyo immiyo biittan, ooni woridaakko erenna ahai kunddidi beettikko, <sup>2</sup> intte daannatinne intte cimati biidi, heгаа yu-ushuwan de7iya katamatuppenne he ahaappe gidduwan de7iya haahotettaa likkona. <sup>3</sup> Hegaappe guyyiyan, ahai kunddidosa matattiya katamaa cimati, oosuwaayyo gakkabeenna, i morggen qambari wodhdhibeenna ussiyo ekkona. <sup>4</sup> Ekkidi goggiya haattai de7iyo goyettibeennasaanne zerettibeenna zanggaaraa efiidi, he ussee garbbal-liyaa mirqqidi menttona. <sup>5</sup> Yaatobare Leewa naati, qeeseti he sohuwaa issippe boona; aissi giikko, hагаа mala iita haiquwaanne mootuwaa shaakkidi pirddanau, GODAI intte Xoossai ba sinttan oottanau, ba sunttanka anjjanau eta dooriis. <sup>6</sup> Hegaappe guyyiyan, he ahai kunddidosa matattiya katamaa cimati ubbai, zanggaaran garbbal-liyaa mirqqidi worido ussee bolli bantta kushiyaa meecettiiddi, hagaadan yaagona; <sup>7</sup> ‘Nu kushee ha suuttaa gussibeenna; nu aifeekka hагаа oottidabaa be7ibeenna. <sup>8</sup> Abeet GODAU, neeni wozido ne asaa, Israa7eela maara; ha geeshshaa suuttaa ne asaa bolli naaqo oottada qoodoppa’ yaagona. He suuttaa gishshau, etau atto geetettana. <sup>9</sup> Intte GODAA aifiyaa sinttan hegaadan oottidi, geeshshaa suuttai gukkido nagaraa intte giddoppe diggite.

### *Olan Omoodettida Maccaasatubaa*

<sup>10</sup> “Intte morkkiyaara intte olettanau kiyin, GODAI, intte Xoossai, eta intte kushiyan aatti immin, eta omooddiyo wode, <sup>11</sup> omoodettida asaa gidдон issi malanchcha maccaasiyo be7ada, o amottada, machchanau koyikko, <sup>12</sup> ne soo eha; i huuphiyaa meeda; i xugunttaakka cigga. <sup>13</sup> Omoodettiyo wode de7iya maayuwaa qaararggada, ne son uttada, ba aawaassinne ba aayeessi issi agina kumettaa kayyottu. Hegaappe guyyiyan, o machcha. <sup>14</sup> Yaata simmin, iira de7iyoogee nena ufaissana xayikko, a ba koyosaa baanaadan yeddaaga. Neeni o machcho oottada issippe aqido gishshau, o miishshan baizzanau woikko aille oottanau bessenna.

### *Baira Na7i Laattiyo Maataa*

<sup>15</sup> “Issi asassi i dosiyoonne ixxiyo naa77u maccaasati de7ikko, qassi ha naa77atika ayyo attuma naata yelidaageeta gidishin, baira yelettidaagee ha ixxiyo maccaaseeppe yelettidaagaa gidikko, <sup>16</sup> ba naatuyyo ba aquwaa i laattisiyo wode, i ixxiyoorippe yelettida bairai de7ishin, i dosiyoorippe yelettida kaaluwaa bairattanau bessenna. <sup>17</sup> Hara naatuyyo immiyoogaappe naa77u kushiyaa aatti immiyoogan ha ixxiyoori na7ai baira gidiyoogaa erissanau bessees. Aissi giikko, he na7ai ayyo kushe toho phalqqida baira gidiyo gishshau, bairattuwwa i ekkanaу bessees.

<sup>18</sup> “Aawaassinne aayeessi azazettennan ixxida, eti seerinkka simmenna morgge zozzanne makkalanchcha gididi simmenna na7i de7ikko, <sup>19</sup> aawainne aayyiya he katamaa penggen de7iya cimatuikko a oiqqi ekki ehoona. <sup>20</sup> Ehiidi cimatuyyo hagaadan yaagona; ‘Hagee nu na7ai morgge zozzanne makkalanchcha; i nuuyyo mulekka azazettenna; miishshaa laali kaa7iyaagaanne ushshanchcha’ yaagidi yootona. <sup>21</sup> Hegaappe guyyiyan, he kataman de7iya attumaasai ubbai i haiqqana gakkanaashin, shuchchan caddidi a worona. Hegaadan oottiyoogan intte giddoppe iitaa xaissite. Yaatobare Israa7eela ubbai heгаа siyidi yayyana.

### *Dumma Dumma Higgeta*

<sup>22</sup> “Issi asi haiquwaa pirddissiya dabaa oottin, intte a mittan kaqqi worikko, <sup>23</sup> he kaqettido mittan a ahai aqoppo; a he gallassi moogite. Aissi giikko, mittaa bollan kaqetti

haiqqiya ooninne Xoossan qanggettidaagaa. GODAI intte Xoossai intteyyo laata oottidi immiyo intte biittaa intte tunissoppite.

## 22

<sup>1</sup> “Israa7eela asa boorai woikko dorssai bayidi wora biishin be7ikko, shenehoo gaada aggaagoppa; a godaassi laagga ehaada imma. <sup>2</sup> He mehiyaa godai ne heera gidana xayikko, woikko a godai oonakko neeni erana xayikko, a godai koyiiddi yaana gakkanaashin, ne soo ekkada efa; i yiidi, demmiyo wode, au imma. <sup>3</sup> Hegaadan hare gidin, maayuwaa woikko aibanne bayidabaa demmikko, a godau zaarappe attin, shenehoo gooppa.

<sup>4</sup> “Israa7eela asa haree woikko boorai ogiyan kunddidaashin be7ikko, maaddada denttappe attin, shenehoo gaada aggaagoppa.

<sup>5</sup> “Maccaasai attumaasaa maayuwaa maayoppo; attumaasaikka maccaasaa maayuwaa maayoppo. Aissi giikko, heгаа malabaa oottiya oonanne GODAI intte Xoossai shenetees.

<sup>6</sup> “Ogiyan ne biishin, mittan gidin, sa7an ba maraa woikko phuuphphulliyaa haphpha uttida kafiyo demmikko, o i maraara gatta oiqqada ne soo efooppa. <sup>7</sup> Marata ekka efaanau danddayaasa; shin aayyiyo baanaadan yeddaaga. Hegaadan oottikko, neeni duretada adussa laittaa de7ana.

<sup>8</sup> “Ooratta keettaa keexxiyo wode, xoqqa kaaraappe asi kunddi haiqqin ne oishettennaadan, zempidi attiyoogaa giigissa.

<sup>9</sup> “Ne woiniyaa shooqan naa77u qommo kattaa zeroppa; heгаadan ootikko, ne zerido kattainne woinee naa77aikka moorettana.

<sup>10</sup> “Booraanne hariyaa issippe waaxada goyoppa.

<sup>11</sup> “Suufiyaappenne liinuwaappe wolahan dadettida maayuwaa maayoppa.

<sup>12</sup> “Ne maayido maayuwau oiddu baggaarakka macarai de7o.

### *Geluwaa Ehuwaa Gaitotettaa Geeshshatettan Naagiyoogaa*

<sup>13</sup> “Issi asi machcho bullachchidi, iira aqi simmidi, o dosana xayikkonne, <sup>14</sup> ‘Hanno ta machhada iira aqiyo wode, geela7otetti iyyo baawa’ yaagidi o mooridi haasayikko, <sup>15</sup> he na7ee aawainne aayyiya i geela7otettaa malaataa ekki efidi, katamaa penggen de7iya cimata bessona. <sup>16</sup> Na7ee aawai cimatuuyo hagaadan yaagidi yoto, ‘Taani ta na7iyo hagaayyo machcho oottada immaas; shin i o ixxiis. <sup>17</sup> I, “Ne na7en geela7otetti baawa” yaagidi o mooridi haasayees; shin ta na7ee geela7otettaa malaataa hгаа be7ite’ yaagidi, i geela7otettaa erissiya carqqiyaa besso. <sup>18</sup> Yaatin he katamaa cimati a xurqqayiyani shocona. <sup>19</sup> I Israa7eela geela7ee sunntaa moorido gishshau, cimati a xeetu xaqara biraa qaxxayidi, heгаа na7ee aawaayyo immona. Na7iyaakka ayyo machcho gidada de7u; ba de7o laitta ubban i o yeddana bessenna.

<sup>20</sup> “A mootoi tuma gididi, na7en geela7otettaa xayikko, <sup>21</sup> na7iyo i aawaa kare ehiidi, he katamaa attumaasai o shuchchan caddidi woro. Aissi giikko, a ba aawaa son de7aidda shaaramuxa gidada, Israa7eela gidon ha pokkobaа oottaasu; heгаadan oottidi intte giddoppe iitaa diggite.

<sup>22</sup> “Ai asinne hara asa maccaasaara shaaramuxiiddi ohettikko, ikka aara shaaramuxida maccaasiyaakka haiqqona. Hegaadan oottidi, intte giddoppe iitaa diggite.

<sup>23</sup> “Ai asinne harau giigida geela7iyo katamaa gidon demmidi iira shaaramuxikko, <sup>24</sup> eta naa77aakka katamaappe gaxaa kessidi, shuchchan caddidi worite. Aissi giikko, na7iyaa kataman de7aidda, asi ashshanaadan waassabeikku. I haiqqiyoogee qassi hara asau giiga uttida geela7iyo moorido gishshaassa. Hegaadan oottiyoogan intte giddoppe iitaa diggite.

<sup>25</sup> “Issi asi asau giigida geela7iyo asi bainna sohuwan wolqqan oiqqidi, iira zin77ikko, a xallai haiqqo. <sup>26</sup> Na7iyo ainne ootoppite; o woranau bessiya nagara oottabeikku.



Hagee issi asi coo ba shooruwaa bolli denddidi, woriya asa pirddaa mala pirdda. <sup>27</sup> Aissi giikko, i o asi banna sohuwan demmido oiqqin, he geela7o na7iyaa waassaasu; shin o ashshiya asi de7ibeenna.

<sup>28</sup> “Ai asinne asau giigabeenna geela7iyo oiqqidi, i geela7otettaa ekkirggidi ohettikko, <sup>29</sup> na7ee aawaassi ishatamu xaqara biraa qanxxo. Yaatidi na7iyo bau machcho ootto. Ba de7o laitta ubban o yeddoppo.

<sup>30</sup> “Ai asinne ba aawaa machchiyo ekkidi, ba aawaa kaushshoppo.

## 23

### *Asaa GODAA Asaa Maabaraappe SHAakkiya Hanota*

<sup>1</sup> “Sanggisettida woikko qaarattida attumaasi, GODAA yaa7aa gididon beettoppo.

<sup>2</sup> “SHAaramuxan yelettida asi GODAA asaa maabaraa geloppo; harai atto biidi tammannta yeletaa gakkanaashinkka, a zariyaappe ooninne GODAA asaa maabaraa giddo geloppo.

<sup>3</sup> “Amoona asa gidin, woi Moo7aaba asa gidinkka, GODAA asaa maabaraa geloppo; harai atto biidi tammannta yeletaa gakkanaashinkka, eta asa gidida ooninne merinaukka GODAA asaa maabaraa geloppo. <sup>4</sup> Aissi giikko, intte Gibxxeppe kiyidi hemetishin, eti inttena kattaaranne haattaara mokiibookkona. Hegaadankka, Masphhexoomiyan Patoora giyo kataman de7iya Bi7oora na7aa Balaami inttena qanggana mala qaxaridosona. <sup>5</sup> Qaxarinkka GODAI, intte Xoossai, Balaami giyoogaa siyanau koyibeenna; a qanggettaa intteyyo anjuuwau laammiis. Aissi giikko, GODAI intte Xoossai inttena siiqees. <sup>6</sup> Intte de7o laitta ubban merinaukka eti saro de7anaadaaninne eti duretanaadan amottoppite.

<sup>7</sup> “Intteyyo eti dabbo gidido gishshau, Eedoomata karidi ixoppite; qassi Gibxxet akka ixoppite. Aissi giikko, intte eta biittan bete gididi de7ideta. <sup>8</sup> Etayyo heezantto yeletaa naati GODAA asaa maabaraa gelanau danddayoosona.

### *Olau Dunkkaanidosan Wogaadan Geeshshan Naagettiyoogaa*

<sup>9</sup> “Intte intte morkkiyaa olanau kiyidi issisan galchchiyo wode, inttena tunisiyaabaappe ubbaappe shaahettite. <sup>10</sup> Qammi aimuwan maccaasaara gaittidoogaa erissiya irxxabai an de7iyo ai asinne de7ikko, dunkkaanidosaaappe gaxaa kiyidi yan gam77o. <sup>11</sup> Sa7ai omariyoode, ba bollaa meecettidi, lem77iyoode dunkkaanidosaa simmo.

<sup>12</sup> “Intte sheeshshau uttiyoosaa dunkkaanidosaaappe kareera giigissite. <sup>13</sup> SHEeshshau uttiyoosaa bookkanau shoodiraa intte ola miishshaara gatti oiqqite; sheeshshau utti simmido, ollan biittaa zaarite. <sup>14</sup> Aissi giikko, GODAI intte Xoossai inttena naaganaunne intte morkketa intte kushiyan aatti immanau, intte moottan yaanne haanne hamettees. Hegan i sheneyiyaabaa aibanne be7idi, intteppe wora simmennaadan, intte moottai geeshsha gidanau koshshees.

### *Dumma Dumma Higgeta*

<sup>15</sup> “Ba godaappe baqatidi, neekko yiida ailliyaa zaarada a godaayyo immoppa. <sup>16</sup> I intte katamatuppe ba koyidoogan ba koyido wodiya de7o; a huqqunnoppite.

<sup>17</sup> “Israa7eela asaappe ooninne attuma gidin, macca gidinkka, allaga xoossaassi goinnyaageeti oottiyoogaadan, shaaramuxiyaagaa gidoppo. <sup>18</sup> Hegaadankka, attumaagaa gidin, maccaaro gidin, shaaramuxan demmido miishshaa shiiquwaa gattanau GODAA intte Xoossaa keettaa ehoooppona. Aissi giikko, eta naa77aakka GODAI intte Xoossai shenetees.

<sup>19</sup> “Ne zare gidiya Israa7eela asau miishshaa, kattaa gidin harabaa tal77ada dichchaa ekkoppa. <sup>20</sup> Hara biittaa asaappe dichchaa oichchanau danddayaasa; shin neeni

laattanau geliyo biittan neeni oottiyooban ubban GODAI ne Xoossai nena anjjana mala, ne zare gidiya Israa7eela asaassi dichchau tal77oppa.

<sup>21</sup> “GODAAYYO, ne Xoossaayyo, immanau geppidobaa immanau gam77oppa. GODAI ne Xoossai neeni geppidoogaa kumettan neeppe koyiyo gishshau, polana xayikko, neeyyo nagara gidana. <sup>22</sup> SHin neeni geppana xayikko, hegan neeyyo nagari baa. <sup>23</sup> GODAAYYO, ne Xoossaayyo, immana gaada neeni doonan haasayidoogaa ne dosan immana giido gishshau, ne inxxarssan haasayidoogaa pola.

<sup>24</sup> “Ne shooruwaa woiniyaa gidduwaara kanttiyo wode, woiniyaappe ne koyido keenaa mappe attin, appe aibanne ne oiqqido miishshan yeggoppa. <sup>25</sup> Ne shooruwaa shooqaara kanttiyo wode, he shooqan de7iya tiyaappe duuttada mappe attin, ne shooruwaa kattaa baacan cakkada soo efooppa.

## 24

### *Machchiyo Yeddiyoogaanne Zaariyoogaa*

<sup>1</sup> “Issi asi machcho ekki simmidi, issi iitabaa i bolli demmidi o ixnikko, iyyo paramaa xaafi immidi, ba sooppe kessidi yeddikko, <sup>2</sup> a a sooppe kiyada, hara azinaa gelikko, <sup>3</sup> he naa77antto azinaikka o dosennan ixniki, paramaa iyyo xaafi immidi, ba sooppe o kessidi yeddikko, woikko o ekkida he naa77antto azinai haiqqikko, <sup>4</sup> a tunido gishshau, koiro paramida azinai naa77antto o zaaridi machchoppo. Hegee GODAA matan ixettidaba; qassi inttekka GODAI intte Xoossai intteyyo immiyo biittan haggaa mala nagaraa oottoppite.

<sup>5</sup> “Ooratta machcho ekkida asi olau booppo; hara deexo oosuwaakka ayyo immoppite. Issi laittai aadhdhana gakkanaashin, aunne beennan ba ekkido machchiyo ufaisso.

### *Dumma Dumma Higgeta*

<sup>6</sup> “Ai asinne acoyyo woxaa woikko maidiyaa oiqqoppa; aissi giikko, hegee keettaa asai gaacciyooxa xayidi, haiqqona giyoogaa.

<sup>7</sup> “Ba isha gidiya Israa7eela asa wuuqqi efidi, aille kessiya asi woikko harau baizziya ai asinne haiqqo. Hegaadan oottiyoogan intte giddoppe iitaa diggeeta.

<sup>8</sup> “Hanttaara goga harggiyan sakettiya asassi Leewa zare gidiya qeeseti inttena tamarissidoogaadan ubbabaa polite; ta eta azazidoogaa hegaadan oottanau naaget-tite. <sup>9</sup> Intte Gibxxeppe kiyidi ogiyan de7ishin, GODAI intte Xoossai Miiriyaami bolli oottidobaa hassayite.

<sup>10</sup> “Neeeni ne shooruwaassi issibaa tal77ada, i oittiyoobaa oichchanau a soo geloppa. <sup>11</sup> Neeeni karen eqqidaashin, ne tal77ido bitanee oittiyoobaa ba sooppe kessidi neeyyo immo. <sup>12</sup> I hiyyeesa gidikko, ne acuwau oiqqido a maayuwaa ne son aissoppa. <sup>13</sup> I maayidi aqanaadan, omariyo wode au guyye zaara; i hegan nena galatana. Hegee GODAA ne Xoossaa matankka neeyyo geeshshatetta gidana.

<sup>14</sup> “Ne ishaa gidiya Israa7eela asa gidin, woikko ne biittaa katamaappe issuwan de7iya kare biitta asa hiyyeesaa qaxarada naaqqoppa. <sup>15</sup> I hachchi oottidoogaa hachchi ekkanau minttidi koyiyo gishshau, awai wullennan hachchi qanxxa. Hegee xayikko, metootanchchai neeppe GODAU waassin, neeyyo nagara gidana.

<sup>16</sup> “Naati oottido nagaraa gishshau, aawata woranau bessenna; qassi aawati oottido nagaraa gishshaukka, naata woranau bessenna. Asai ubbai ba oottido nagaran nagaran haiqqanau bessees.

<sup>17</sup> “Kare biitta asatu pirdaanne aawu aaya bainnaageetu pirdaa geellayoppa; am77ee maayuwaa a tal77idobau gaada oiqqoppa. <sup>18</sup> Inttekka Gibxxe biittan aille gididoogaanne GODAI intte Xoossai inttena yaappe wozidi kessidoogaa hassayite. Taani haggaa inttena azaziyoogee hegaa gishshaassa.

<sup>19</sup>“Ne shooqaappe kattaa cakkiyo wode, ne dogido mirqqiyaa qoranau guyye booppa. GODAI ne Xoossai ne kushiya ooso ubban nena anjjana mala, heгаа betiyaassi, aaya aawu baina naatuyyoonne am77etuyyo aggaaga. <sup>20</sup>Ne wogaraa aifiyaa maxiyo wode, issoinne attennan wurssada maxanau naa77anttuwaa guyye simmoppa; attidaagaa betiyaassi, aaya aawu baina naatussinne am77etussi aggaaga. <sup>21</sup>Ne woiniyaa aifiyaa maxiyo wode, attidaagaa poshilanau naa77anttuwaa guyye booppa; heгаа betiyaassi, aaya aawu baina naatuyyoonne am77etuyyo aggaaga. <sup>22</sup>Intteka Gibxxe biittan aille gididi de7idoogaa dogoppite. Taani hагаа inttena azaziyoogee heгаа gishshaassa.

## 25

<sup>1</sup>“Naa77u asati ooyettidi pirdda keettaa yiikko, daannati geeshshaa ne likke giidi, naaqqidaagaa ne mooranchcha giidi pirddona. <sup>2</sup>Mooranchchau warai bessiyooгaa gidikko, tiran zin77issidi zokkuwaa shocanau daannai azazo; yaatobare mooranchchai daannaа sinttan ba mooruwaa keenaa shocetto. <sup>3</sup>I oitamaa gakkanau shocettoppe attin, heгааappe daruwaa shocettoppo. Hegaappe daruwaa a shocikko, ne ishai ne sinttan kauyyana.

<sup>4</sup>“Audiyан kattaa yedhdhiya booraa doonaa qachchoppa.

### *Na7a Yelennan Haiqqida Asassi A Ishai Oottanau Bessiyaabata*

<sup>5</sup>“Issippe de7iya ishantuppe issoi na7a yelennan haiqqikko, a maccaasiyaa haraa baada geluppu; i keettaawaa ishai o aisso; aissidi iyyo koshshiyaagaa polo. <sup>6</sup>Yaatobare ha haiqqidaagaa sunttai Israa7eelappe qucetti xayennaadan, a koiro yeliyo attuma na7ai ha haiqqidaagaa sunttan xeegetto.

<sup>7</sup>“Gido shin, i ba ishaa machchiyo aissanau koyana xayikko, a katamaa penggen uttida cimatumko baada, ‘Ta azinaa ishai ba ishaa sunttai Israa7eelan de7anau koyibeenna; tana aissidi, tau koshshiyaaba kunttenan ixxiis’ yaagada magannu. <sup>8</sup>Magannin katamaa cimati a xeeгidi oichchona; oichchin ha77ikka, ‘Taani o aissikke’ giidi ixxiikko, <sup>9</sup>he haiqqidaagaa maccaasiyaa cimatu sinttan akko shiiqada, a gediyaа caammaappe issuwaa kessada, a som77uwan cuchchaa cuchchaidda hagaadan yaagu; ‘Ba ishaassi zeretti de7anau koyenna asa bolli, hагаа mala kaushshai gakkanau bessees’ yaagu. <sup>10</sup>Yaagin a zaree Israa7eelan, ‘Caamma Kessantasoo’ geetetti xeegettiiddi de7ana.

### *Hara Higgeta*

<sup>11</sup>“Naa77u asati warettishin, issuwaa machchiyaa yaada, ba azinaa shociyaagaa kushiyaappe ashshanau, ba kushiyaа yeddada hinkkuwaa attumatettaa oiqqikko, <sup>12</sup>iyyo ainne qarettennan i kushiyaа qanxxite.

<sup>13</sup>“Ne joiniyaa gidдон gitanne guutta gidida naa77u meezaanati dooppona. <sup>14</sup>Ne sooni darissidinne guuttidi likkiya naa77u makkiyoobai dooppo. <sup>15</sup>GODAI ne Xoossai neeyyo immiyo biittan adussa laittaa ne de7anaadan kumettanne likke meezaanainne makkiyoobai neeyyo de7o. <sup>16</sup>Aissi giikko, GODAI ne Xoossai heгаа malabaa oottidi, balettiya asaa ubbaа shenetees.

### *Amaaleeqata Woranau Imettida Azazuwaa*

<sup>17</sup>“Intte Gibxxeppe kiyidi biiddi de7ishin, Amaaleeqati intte bolli oottidobaa has-sayite. <sup>18</sup>Eti Xoossau yayyenna asa; intte ogiyan inttenaara eqettidosona. Intte hemettishin, daafuridi guyye attida asaa ubbaа woridosona. <sup>19</sup>Hegaa gishshau, GODAI intte Xoossai inttena he biittaa laatissidi, intte yuushuwan de7iya morkketu ubbaappe inttena shemppisiyo wode, ha biittan eta hassayiya asi xayana gakkanaashin, Amaaleeqata ubbaа salo gufanttoppe xaissite; heгаа oottanaagaa mulekka dogoppite.

## 26

### *Baira Kattaa Yarshshuwaa*

<sup>1</sup> “GODAI intte Xoossai inttena laatissiyoo biittaa gelidi, woppu giidi uttiyo wode, <sup>2</sup> GODAI intte Xoossai intteyyo immiyo biittan morkkida kattaa ubbaappe bairattuwa keeshiyaara GODAI intte Xoossai ba sunntai hegan xeesettanaadan doorido sohuwau ekkidi biite. <sup>3</sup> Yaatidi he wodiyan aawatiya qeesiyaakko biidi, hagaadan yaagite; ‘GODAI nuuyyo immana giidi kase nu maizza aawatuyyo caaqqido sohuwaa tana gelissidoogau GODAASSI, nu Xoossaassi, hachchi taani markkattais’ yaago.

<sup>4</sup> “Yaatobare qeese kattai kumido keeshiyaa ne kushiyaappe ekkidi, GODAAYYO, ne Xoossaayyo yarshshiyosaa sinttan wotto. <sup>5</sup> Hegaappe guyyiyan, GODAA ne Xoossaa sinttan hagaadan yaagada haasaya; ‘Ta maizza aawai de7iyoosaa xayidi metootida Sooriyaa biittaa asa; i metootidi, qoodan guutta asatuura Gibxxe wodhdhidi yan de7iis. Hegan de7iiddi i gita wolqqaamanne qoodan cora dere kiyiis. <sup>6</sup> Hega be7idi, Gibxxeti nuuyyo meqettaa iitidosona; nuna un77ettidosona. Nu oottanaadan deexo oosuwa nu bolli caanidosona. <sup>7</sup> Yaatin, nuuni GODAASSI, nu aawatu Xoossaassi, waassida; waassin GODAI nu waasuwa siyiis; nu un77uwa, nu daafuraanne nu huqqunnaa be7iis. <sup>8</sup> Be7idi GODAI ba wolqqaama kushiyaaninne ba micettida qesiyan, gita dagaman, malaataaninne maalaalissiya ooratabaa oottiyoogan, nuna Gibxxeppe kessiis. <sup>9</sup> Ha sohuwaa nuna ehiidi, maattaanne eessaa goggiya ha biittaa nuuyyo immiis. <sup>10</sup> Immin hekko taani GODAI immido biittaa aifiyaappe bairattuwa ehaas’ yaagada, keeshiyaa GODAA ne Xoossaa sinttan wottada, a sinttan goinna. <sup>11</sup> Neeyyoonne ne so asaayyo GODAI ne Xoossai immidoban ufaiittiiddi, GODAA galatite; Leewatinne intte gidon de7iya beteti ubbaikka inttenaara ufaittona.

<sup>12</sup> “Asirataa kessiyo heezantta laittan laittan morkkidabaa ubbaappe asirataa kessada poliyo wode, ne kataman de7iya Leewatuyyo, betetuyyo, aaya aawu bainnaageetuyyoonne am77etuyyo imma; yaatobare eti intte kataman banttau koshshiya kattaa maananne kallana. <sup>13</sup> Hegaappe guyyiyan GODAAYYO, ne Xoossaayyo, hagaadan yaaga; ‘Taani ta sooppe GODAASSI dummatida kattaa kessada, neeni tana azazido ne azazuwaadan Leewatuyyo, betetuyyo, aaya aawu bainnaa naatuyyoonne am77etuyyo immaas. Taani ne azazuwaappe issuwaanne menttabeikke; qassi issuwaanne dogga aggabeikke. <sup>14</sup> Ta azzanuwa wodekka, he asirataappe ainne mabeikke; taani wogan geeshsha gidenna wodekka, appe kare kessidobikka baawa; haiqqida asaukka acaa hegaappe wottabeikke. Taani GODAAYYO, ta Xoossaayyo, azazettaas; qassi neeni tana azazidoogaa ubbaa polaas. <sup>15</sup> Neeni de7iyo geeshsha sohuwaappe, saluwaappe haa duge xeella; ne deriyaa Israa7eelanne kase nu maizza aawatuyyo ne immana gaada caaqqidoogaadan nuussi immido ha maattainne eessai goggiyo biittaa anjja’ yaaga.

### *Xoossaassi Dummatida Asaa*

<sup>16</sup> “Neeni ha awaajotanne wogata naaganaadan, GODAI ne Xoossai nena hachchi azaziis; hega gishshau, neeni eta ne kumetta wozanaappenne kumetta shempuwaappe naaga. <sup>17</sup> GODAI neeyyo Xoossaa gididoogaa, ne a ogiyan hemettiyoogaa, a wogaa, a azazuwaanne a higgiiyaa neeni poliyoogaa hachchi erissadasa. <sup>18</sup> Qassi GODAIKKA ba gelido qaalaadan neeni a asa gidiiyoogaa, ayyo buzo aqo gidiiyoogaanne neeni a azazo ubbaa naaganaagaa erissiis. <sup>19</sup> Hega neeni oottikko, i medhdhido asa ubbaappe nena galatan, sunntaaninne bonchchuwan gita dere oottana. I gelido qaalaadan neenikka ayyo geeshsha dere gidanaagaa hachchi erissiis” yaagiis.

## 27

### *Masettida SHuchchatu Bolli Xaafettida Higgeta*

<sup>1</sup> Hegaappe guyyiyan, Muusee Israa7eela cimatuura gididi, asaa hagaadan yaagiis; “Taani hachchi inttena azaziyo azazuwaa naagite. <sup>2</sup> Yorddaanoosa SHaafaa pinnidi, GODAI intte Xoossai intteyyo immiyo biittaa geliyo wode, gita shuchchata essidi, nooran tiyite. <sup>3</sup> GODAI intte aawatu Xoossai intteyyo immana giidoogaadan, eessainne maattai goggiyo biittaa, GODAI intte Xoossai intteyyo immiyo biittaa intte pinniyo wode, ha higgiiyaa qaalata ubbaa he shuchchatu bolli xaafite. <sup>4</sup> Intte Yorddaanoosa pinnido wode, taani inttena hachchi azazidoogaadan, ha shuchchata Eebaala Deriyaa bollan essidi, eta nooran tiyite. <sup>5</sup> He sohuwan GODAASSI, intte Xoossaassi, birata miishshi bochchibeenna shuchchaappe yarshshiyooosaa oottite. <sup>6</sup> He intte GODAASSI, intte Xoossaassi, yarshshiyooosaa masettibeenna shuchchaappe oottite; yaatidi heгаа bollan GODAASSI, intte Xoossaassi, xuuggiyo yarshshuwaa shiishshite. <sup>7</sup> Issippetettaa yarshshuwaakka shiishshidi, hegan miiddi, GODAA intte Xoossaa sinttan ufaiittite. <sup>8</sup> Ha higgiiyaa qaalata ubbaa qoncciiyan beettiyaadan oottidi, ha intte essido shuchchatu bolli xaafite” yaagiis.

<sup>9</sup> Muusee qassikka Leewa gidiya qeesetuura issippe gididi, Israa7eela asa ubbau hagaadan yaagiis; “Inttenoo Israa7eela asau, co77u giidi ezggite! Hekko hachchi intte GODAA intte Xoossaa asa gidideta. <sup>10</sup> Hegaa gishshau, hachchi taani intteyyo immiyo azazuwaanne awaajuwaa naagiyoogan, GODAA intte Xoossaa qaalau azazettite” yaagiis.

### *Azazettennan Ixxiyoogee Ehiyo Qanggettaa*

<sup>11</sup> He gallassikka Muusee asaa hagaadan yaagidi azaziis; <sup>12</sup> “Intte Yorddaanoosa pinnido wode, Gariizaana Deriyaa bolli eqqidi asaa anjjanaageeti: Simoona, Leewa, Yihudaa, Yisaakoora, Yooseefanne Biniyaama zareta. <sup>13</sup> Qassi asaa qangganau Eebaala Deriyaa bolli eqqanaageeti: Roobeela, Gaada, Aseera, Zaabiloona, Daananne Nifttaaleema zareta. <sup>14</sup> Leewati bantta qaalaa xoqqu oottidi, Israa7eela asau hagaadan yaagona.

<sup>15</sup> “ ‘GODAA sinttan tuna gididabaa, kushe hiillanchchi massidi kessido mittaa gidin, woikko birataa tigidi medhdhido eeqaa gidin, ayyo geeman goinniya asi qanggettidaagaa gido’ yaagin, asai ubbai, ‘Amin77i!’ yaago.

<sup>16</sup> “ ‘Ba aawaa woikko ba aayyiyo kaushshiya asi qanggettidaagaa gido’ yaagin, asai ubbai, ‘Amin77i!’ yaago.

<sup>17</sup> “ ‘Ba shooruwaa zawaa sugiya asi qanggettidaagaa gido’ yaagin, asai ubbai, ‘Amin77i!’ yaago.

<sup>18</sup> “ ‘Qooqiyaa baanau bessiya ogiyaappe balasaa zaariya asi qanggettidaagaa gido’ yaagin, asai ubbai, ‘Amin77i!’ yaago.

<sup>19</sup> “ ‘Betiyaa, aaya aawu bainna naatu pirddanne am77ee pirddaa geellayiya asi qanggettidaagaa gido’ yaagin, asai ubbai, ‘Amin77i!’ yaago.

<sup>20</sup> “ ‘Ba aawaa machcheera zin77idi, ba aawaa bonchchuwaa kaushshiya asi qanggettidaagaa gido’ yaagin, asai ubbai, ‘Amin77i!’ yaago.

<sup>21</sup> “ ‘Ai meheerakka zin77iya asi qanggettidaagaa gido’ yaagin, asai ubbai, ‘Amin77i!’ yaago.

<sup>22</sup> “ ‘Ba michchiyo gidiya, aawaa na7eera gidin, ba aayee na7eera zin77iya asi qanggettidaagaa gido’ yaagin, asai ubbai, ‘Amin77i!’ yaago.

<sup>23</sup> “ ‘Ba bolloteera zin77iya asi qanggettidaagaa gido’ yaagin, asai ubbai, ‘Amin77i!’ yaago.

<sup>24</sup> “ ‘Ba shooruwaa geeman woriya asi qanggettidaagaa gido’ yaagin, asai ubbai, ‘Amin77i!’ yaago.

<sup>25</sup> “ ‘Miishshan shamettidi, xillo asa woriya asi qanggettidaagaa gido’ yaagin, asai ubbai, ‘Amin77i!’ yaago.



<sup>26</sup> “Ha higgiiyaa qaalata polidi minttenna asi qanggettidaagaa gido’ yaagin, asai ubbai, ‘Amin77i!’ yaago.

## 28

### *Azazettin Beettiya Anjuwaa*

*(Wogaabaa 26:3-13; Zaarettido Wogaa 7:12-24)*

<sup>1</sup> “GODAAYYO, ne Xoossaayyo, polo azazettikko, hachchi taani neeyyo immiyo azazo ubbaa minttada kaallikko, GODAI ne Xoossai biittan de7iya kawotettatu ubbaappe nena xoqqu xoqqu oottana. <sup>2</sup> GODAAYYO, ne Xoossaayyo, neeni azazettikko, hagaappe kaallidi de7iya anjjoi ubbai nebbaa gidana.

<sup>3</sup> “Neeni kataman anjjettidaagaa gidana;  
gaxariyankka anjjettidaagaa gidana.

<sup>4</sup> Ne uluwaa aifee, ne shooqaa aifee,  
ne mehiyaa maratinne  
ne dorssaanne ne deeshshaa wudiyaa marati  
corattidi anjjettidaageeta gidana.

<sup>5</sup> Ne kattaa keesheenne ne munaqa keree  
anjettidaageeta gidana.

<sup>6</sup> Neeni gelaiddakka kiyaiddakka  
anjettidaagaa gidana.

<sup>7</sup> “Ne bollan denddiya ne morkketa GODAI ne sinttan xoonettidaageeta oottana. Eti ne bolli issi ogiyaara yaana; shin laappun ogiyaara ne sinttappe baqatidi xayana.

<sup>8</sup> “GODAI ne kushee oiqqidobaa ubbaanne ne gootaraa anjjana; GODAI ne Xoossai neeyyo i immiyo biittan nena anjjana.

<sup>9</sup> “Neeni GODAA ne Xoossaa azazuwaa naagikkonne a ogiyan hemettikko, i neeyyo kase caaqqidoogaadan, GODAI nena baayyo dummatida geeshsha dere oottidi essana.

<sup>10</sup> Hegaappe guyyiyan, biittan de7iya asai ubbai GODAA sunntai nenan xeegettidoogaa be7idi yayyana. <sup>11</sup> GODAI neeyyo immanau kase ne maizza aawatuyyo caaqqido he biittan, ne uluwaa aifiyaa, ne mehiyaa aifiyaanne, ne shooqaa aifiyaa darissidi nena anjjana.

<sup>12</sup> “Ne kushiyaa oosuwaa ubbaa anjjanaanne, GODAI ne biittaassi iraa wodiyan bukissanau ba minjja keettaa, saluwaa penggiyaa neeyyo dooyana; qassi neeni daro kawotettatussi tal77anappe attin, ooppenne haa tal77akka. <sup>13</sup> GODAI nena huuphe kessanappe attin, guyye goina kessenna. Hachchi taani neeyyo immiyo, GODAA ne Xoossaa azazuwaa siyada, hegaa minttada kaallikko, neeni bolla gidanappe attin, garssa gedakka. <sup>14</sup> Taani neeyyo hachchi immido azazuwaappe haddirsinne ushachchi gaada, hara xoossata kaalloppanne etau oottoppa.

### *Azazettinnan Ixxiyoogee Ehiyo Qanggettaa*

*(Wogaabaa 26:14-46)*

<sup>15</sup> “SHin neeni GODAA ne Xoossaa qaalaayyo azazettinnan ixxada, hachchi taani nena azaziyo wogaanne azazuwaa ubbaa naagennan aggikko, hagaappe kaallidi de7iya qanggettati ubbai ne bolli yaananne nena eti demmana.

<sup>16</sup> “Neeni kataman qanggettidaagaa gidana; gaxariyankka neeni qanggettidaagaa gidana.

<sup>17</sup> “Ne kattaa keesheenne ne munaqa keree qanggettidaagaa gidana.

<sup>18</sup> “Ne uluwaa aifee, ne shooqaa aifee, ne marainne ne aayee, ne dorssaanne deeshshaa wudee qanggettidaagaa gidana.

<sup>19</sup> “Neeni gelaiddakka kiyaiddakka qanggettidaagaa gidana.

<sup>20</sup> “Neeni ne iita oosuwan tana aggido gishshau, eesuwan neeni xayana gakkanaashin, ne oottiyo ooso ubban GODAI qanggettaa, shabbirssaanne seeraa yeddana. <sup>21</sup> Neeni laattanau biyo biittaappe xayana gakkanaashin, GODAI boshai neeppe duuxxennaadan oottana. <sup>22</sup> GODAI nena gilqqatettan, mishuwaaninne masunttan, xuuggiya awaaninne koshan, carckkuwaaninne dumma dumma kattaa harggiyan neeni xayana gakkanaashin shocana. <sup>23</sup> Neepe bollaara ne ginan de7iya saloi nahaase birata gidana; ne biittaikka birata gidana. <sup>24</sup> GODAI ne biittan bukkiya iraa buhenne baana kessana; neeni biittaappe xayana gakkanaashin, baanai saluwaappe duge bukkana.

<sup>25</sup> “GODAI nena ne morkketun xoonissana; neeni eta olanau issi ogiyaara kiyana; shin laappun ogiyaara ne eta sinttappe baqatana. Biittan de7iya kawotetta ubbai ne bolli gakkidabaa be7idi, yashshan shabbirettana. <sup>26</sup> Ne ahai saluwaa kafo ubbaanne bazzo do7au quma gidana; eta yedettiyaabikka de7enna.

<sup>27</sup> “GODAI nena xalee bainna Gibxxe masunttan, kixan, ilaaninne puusuwan harggisana. <sup>28</sup> GODAI nena gooshshan, qooqetetaaninne dagaman shocana. <sup>29</sup> Gallassa seetan neeni qooqee xuman tattaafiyooqaadan tattaafana; ne oottiyoobai ubbai neeyyo giigennan ixkana. Ne de7o laitta ubban huqqunnettadanne bonqqettada daana. Nena maaddiya asakka demmakka.

<sup>30</sup> “Neeni macca na7a giigissana shin, harai o dafidi efaana. Keettaa neeni keexxana; shin an de7akka. Woiniyaa ne tokkana; shin a aifiyaa maakka. <sup>31</sup> Ne boorai ne sinttan shukettana; shin a ashuwaa maakka. Ne haree neeppe bogettidi ekettana; shin neeyyo guyye simmenna. Ne dorssai ne morkkiyau imettana; hegaa ashshanau nena maaddiyaabi de7enna. <sup>32</sup> Ne aifiyaa sinttan ne attuma naatinne macca naati hara kawotettau imettana; eti simmin be7ana gaada xeellishin, ne aifee galjjana; hegaa digganau neeyyo aiba wolqqinne de7enna. <sup>33</sup> Ne biittaa aifiyaanne ne daafuridobaa ubbaa ne erenna asai maana; ne de7o ubban huqqunnettidaagaanne naaqaattidaagaa gidana. <sup>34</sup> Ne be7iyo iitai nena gooshshana. <sup>35</sup> GODAI xalee bainna iita masunttan ne gulbbataanne ne wodiraa harggissana; yedhdhiya gediyaappe huuphiyaa gakkanaashin, nena he masunttan shocana.

<sup>36</sup> “GODAI nenanne ne kawuwaa, nena gidin, ne maizza aawata gidinkka eribeenna asa dere efaana. Hegan neeni mittaappenne shuchchaappe merettida hara xoosatuyyo goinnana. <sup>37</sup> GODAI nena laaliyo hara kawotettatu ubbaa giddon poora hageetubaa giidi, qilliicciyoobaanne baceessiyooobaa gidana.

<sup>38</sup> “Neeni daro kattaa ne shooqan zerana; shin boolee mirggin, guutta kattaa shishshana. <sup>39</sup> Woiniyaa tokkada, a oottana; shin guxunee a mirggin, appe ainne maxakka; agad akka appe uyakka. <sup>40</sup> Ne biitta ubban zaitiyaa wogarai mukkana; shin aifee qoqqofettiichchin, wogaraa zaite demmakka. <sup>41</sup> Attumanne macca naata ne yelana; shin olai omooddi efirggin, eti nenaara de7okkona. <sup>42</sup> Ne mitta ubbaanne ne biittaa aifiyaa boolee wurssana.

<sup>43</sup> “Ne giddon de7iya betee ne bolli xoqqu xoqqu gaana; shin neeni guyye yaada ziqqi ziqqi gaana. <sup>44</sup> I neeyyo tal77anappe attin, neeni ayyo tal77akka; i huuphe gidana; neeni goina gidana.

<sup>45</sup> “GODAAAYO, ne Xoossaayyo, azazettennan ixkido gishshaunne i azazido azazuwaanne wogaa naagennan ixkido gishshau, neeni xayana gakkanaashin, ha qanggettati ubbai ne bolli wodhdhana; nena eti yedettana. <sup>46</sup> Ha qanggettati ne bollaanne ne zaretu bollan merinau malaatanne maalaalissiyaaba gidana. <sup>47</sup> Neeyyo sa7ai injjetido wode, GODAU, ne Xoossau, ufaissaanne galatan goinnabaakka. <sup>48</sup> Hegaa gishshau, nena namisan, saamuwan, kalluwaaninne metuwan ubbabaa xayada, GODAI ne bolli yeddiyo ne morkketuyyo haarettana; GODAI nena xaissana gakkanaashin, ne morggiyan birata qambarangaa waaxana.

<sup>49</sup> “GODAI neeni eta qaalaa erenna kawotettaa ankkoi paalliyooogaadan eesoyi-iddi, biittaa gaxaappe, haahuwaappe ne bolli ehaana. <sup>50</sup> Eti hanqo som77uwaara de7iyaageeta; cimaa bonchchennaageeta; guuttatuyyookka qarettennaageeta. <sup>51</sup> Neeni xayana gakkanaashin, ne mehiyaa maraanne, ne biittaa aifiyaa maana. Eti neeni xayana gakkanaashin, ne kattaa, ne woiniyaa eessaa, ne zaitiyaa, ne miizzaanne ne dorssaa wudiyaa wurssana. <sup>52</sup> Ne biittan de7iya neeni ammanettiyo, adussa, mino dirssati mulesaara kolettana gakkanaashin, ne katamaa yuushuwan dooddidi, nena un77ettana. GODAI ne Xoossai neeyyo immido biitta ubbaa yuushuwan dooddidi nena un77ettana.

<sup>53</sup> “Ne morkketi katamaa dooddidi nena un77ettiyo wode, miyoobaa xayada, GODAI ne Xoossai neeyyo immido, ne uluwaa aife gidiya, ne attuma naatunne ne macca naatu ashuwaa neeni maana. <sup>54</sup> Ne giddon harai atto kase injjiyan de7iis giyo asikka ba ishaassi, ba siiqiyo machcheessinne ba yelido naatussi qarettenna. <sup>55</sup> Morkketi katamaa dooddidi un77ettidoogaappe denddidaagan, harabi maanau bainna gishshau, ba miyo ba naatu ashuwaappe harau ooyyoonne immenna. <sup>56</sup> Ne giddon kase injjiyan de7aasu giyo, ba injjiyaappe denddidaagan sa7aa yedhdhanau shaatettiya maccaasiyaakka, ba siiqiyo azinaassi ba attumanne macca naatussi qarettukku. <sup>57</sup> A ba yelido do7aanne ba yelido yiiraa ba siiqiyo azinaakka ba yelido naatakka gattennan, uuzettada geeman barkka marggana. Aissi giikko, morkkee a de7iyo katamaa dooddidi o un77ettidonne tuggayido gishshau, iyyo miyoobi harabi aibinne baawa.

<sup>58</sup> “Ha maxaafan xaafettida higgiiyaa qaalata ubbaa neeni naagana xayikko, GODAA ne Xoossaa maalaalissiyaanne yashshiya sunntaa bonchchennan aggikko, <sup>59</sup> ne bollinne ne zariyaa ubbaa bolli GODAI yashshiya boshaa, simmenna bashshaanne xalee bainna iita harggiyaa ne bolli yeddana.

<sup>60</sup> “Kase Gibxxe asaa bolli be7ada, neeni yayyido Gibxxe harggiyaa ubbaa zaaridi, ne bolli ehaana; he harggee nena yeddenna. <sup>61</sup> Qassi ha higgiiyaa maxaafan xaafettibeenna hargge ubbaanne bosha ubbaa ne xayana gakkanaashin, GODAI ne bolli ehaana. <sup>62</sup> GODAA intte Xoossaa qaalaa siyennan ixido gishshau, saluwaa xoolinttiyaadan corattida intteppe guuttai attana. <sup>63</sup> GODAI intteyyo lo77obaa oottiyo wodenne intte qoodaa corayiyo wode dosidoogaadan, ha77i intte bollan bashshaa ehiyo wodekka inttena laaliyo wodekka ufaittana; intte laattanau biyo biittaappekka shodettidi xayana.

<sup>64</sup> “GODAI inttena biittau ha gaxaappe ya gaxaa gakkanaashin, biitta ubban laalana. Hegan inttena gidin, woi intte maizza aawati eribeenna, hara mittanne shuchcha xoossatuyyo goinnana. <sup>65</sup> He kawotettatu giddon intte woppaa demmekketa; intte tohuwaa caammai yedhdhiyo sohuwaa keena gadeekka intteyyo de7enna. Hegan GODAI intteyyo metobaa qofa xallan kumida huuphiyaa, amo xallan daafurida aifiyaanne hidootaa qanxxuwan kumida wozanaa immana. <sup>66</sup> Intte de7oi ubbai hirggaana gidana; gallassinne qammi shabbirssaaninne haiquwaa yashshan un77ettidi daana. <sup>67</sup> Intte wozanan kumida yashshaappenne intte aifee be7iyo palaappe denddidaagan, intte wonttiyo wode, ‘Aude qammanddeeshsha’ qassi qammiyo wode, ‘Aude wonttanddeeshsha’ yaagana. <sup>68</sup> Taani inttena, ‘Naa77antto ha ogiyaa beekketa’ giido ogiyaara GODAI inttena zaaridi markkabiyan guyye Gibxxe yeddana. Hegan intte aille gidanau, intte morkketuyyo inttena baizzanau koyana; shin inttena ailleyanaukka shammiyaabaa demmekketa” yaagiis.

## 29

### *GODAI Israa7eela Asaara Moo7aaba Dembban Maacettido Maachchaa*

<sup>1</sup> GODAI Siinaa Deriyan Israa7eelatuura maacettido maachchaa qaalaa bolli haraa Moo7aabaa etaara maacettanau Muusa azazido maachchaa qaalati hageeta. <sup>2</sup> Muusee Israa7eela asaa ubbaa xeesi shiishshidi, etassi yootidobai haggaa;

“GODAI intte sinttan Gibxxe kawuwaa bolli, a olanchchatu ubbaa bollinne a biittaa ubbaa bolli oottidobaanne gattidobaa intte aifiyan be7ideta. <sup>3</sup> He iita metota, gita maalaalissiyaabatanne oorattabata intte aifiyan be7ideta. <sup>4</sup> SHin hachchi gakkanaashin, GODAI intteyyo akeekiya wozanaa, xeelliya aifiyaanne siyiya haittaa immibeenna. <sup>5</sup> GODAI oitamu laittaa kumettaa inttena biittaa bazzuwan kaalettiyo wode, intte maayoi intte bollaappe wuribeenna, intte caammaikka intte tohuwaappe wuribeenna. <sup>6</sup> Intte miyo oittai, uyiyo woiniyaa eessai, woikko hara mattoyiya ushshai baawa; xayikkonne GODAI intteyyo Xoossaa gidiyooгаа erissidi tamaarissanaayyo, inttessi koshshiyaabaappe ainne pacissibeenna.

<sup>7</sup> “Nuuni ha sohuwaa gakkido wode, Haseboona Kawoi Sihooninne Baasaane Kawoi Oogi nunaara olettanau yiidosona; shin nuuni eta xoonida. <sup>8</sup> Eta biittaa ekkidi, Roobeelanne Gaada zaretu qassi Minaase zariyaappe baggaayyo laata oottidi immida.

<sup>9</sup> “Intte oiqqobainne yedhdhobai intteyyo anjjettana mala, ha maachchaa qaalata ammanettidi polite. <sup>10</sup> Hachchi intte ubbai, zariyaa halaqati, cimati, sunttatinne Israa7eela asai ubbai hagan eqqideta. <sup>11</sup> Intte naatuura, intte maccaasaara intte giddon de7iya kare biittaa asaaranne intte son mittaa qoriyaanne haattaa tikkiya oosanchchatuura issippe, hagan eqqideta. <sup>12</sup> GODAARA, intte Xoossaara, qaalaa caaquwaa gelanau, GODAARA maachchan maayidobaa polanau giigidi shiiqideta. <sup>13</sup> GODAI inttena ba asa oottidi minttana; intteyyoonne beni intte maizza aawatuyyo, Abrahaamayyo, Yisaaqayyoonne Yaaqoobayyo gelido maachchaa qaalaadan, i intteyyo Xoossaa gidana. <sup>14</sup> Taani ha maachchaa caaquwaa wottiyooгаа intte xallaara gidenna. <sup>15</sup> Hachchi hagan nunaara GODAA nu Xoossaa sinttan eqqida nu ubbaaranne sinttanau yaana nu yeleta ubbaara wottais.

<sup>16</sup> “Nuuni Gibxxen waani de7idaakkonne qassi haggaa gakkanaashin, ogiyan de7iya kawotettatu gidduwaara waani kanttidi yiidaakko ereeta. <sup>17</sup> Eta giddon de7iya tuna eeqaa, massido mittaa, shuchchaa, biraanne worqqaa eeqa misileta be7ideta. <sup>18</sup> Ha intteppe ooninne attuma gidin macca gidin, issi keetta asa gidin zare gidin, GODAAPPE, nu Xoossaappe, sher77i giidi, hara kawotettatu xoossatuyyo goinnennaadan naagettite. Hegaa oottiya asi cammiyaanne woriya aifiyaa aifiya mitta gidana.

<sup>19</sup> “Ha caaquwaa qaalaa siyidi, ba wozanan, ‘Ta sheniyen taani biikkokka, aiba metoinne baawa’ yaagidi bana cimmikko, hegaa mala asi lo77otu bollinne iitatu bolli bashshaa ehaana. <sup>20</sup> GODAA hanqqoinne qanaatee hegaa mala asa bolli eexxi kiyanaappe attin, GODAI a maarena. Ha maxaafan xaafettida qanggetta ubbai a bolli yaana; saloppe garssa baggaappe a sunttaa GODAI xaissana. <sup>21</sup> GODAI ha Higgiyaa Maxaafan xaafettida qanggettaa maachchaadan he asa Israa7eela asaappe shaakkidi xaissana.

<sup>22</sup> “Sinttappe yiya yeletai, intte zareenne haaho deriyaappe yiya hara biittaa asai GODAI intte bolli ehiido boshaanne metuwaa be7ana. <sup>23</sup> Biitta ubbai dinniyaaninne maxiniyan kamettidi, aiba go77anne immennaagaa gidana; aibanne zeranaunne mokissanau danddayettenna; in maati mitti diccenna. GODAI ba hanqquwan xaissido Sadoomadaaninne Gamooran, Adaamadaaninne Xaboima katamatudan hanana. <sup>24</sup> Kawotetta ubbai hagaadan yaagana; ‘GODAI ha biittan haggaa malabaa aibissi oot-tidee? Ha wolqqaama hanqquwaassi gaaso gididabai aibee?’ yaagana.

<sup>25</sup> “Asai zaaridi, ‘Eti GODAI, eta aawatu Xoossai, eta Gibxxeppe kessiyo wode, etaara gelido maachchaa qaalaa menttido gishshaassa. <sup>26</sup> Qassi eti biidi, erenna xoossatuyyoonne i eta goinnoppite giido xoossatuyyo goinnidosona. <sup>27</sup> Hegaa gishshau, GODAI hanqqettidi, ha maxaafan xaafettida qanggetta ubbaa eta bolli ehiis. <sup>28</sup> GODAI wolqqaama hanqquwaa hanqqettidi, eta biittaappe eta shoddidi, hagaadan hara biitti yedettiis’ yaagana.



<sup>29</sup> “Xuura yohoti GODAA nu Xoossaassa; shin nuuni ha higgiiyaa qaalaa oottanaadan, qonccida yohoti merinau nuussanne nu naatussa.

## 30

### *Wotti Yeggidi Denddiyoonne Anjjettiyo Hanotaa*

<sup>1</sup> “Ha ta intte sinttan wottido anjjoinne qanggettai intte bollan gakkiiyo wode, GODAI intte Xoossai inttena laaliyo hara kawotettatu gidдон de7iiddi, haggaa intte hassayana. <sup>2</sup> He wode inttenne intte naati GODAAKKO, intte Xoossaakko, simmidi, intte kumetta wozanaappenne intte kumetta shemppuwaappe taani hachchi inttena azazido qaalau azazettikko, <sup>3</sup> hegan GODAI intte Xoossai intte omooduwaa zaarana; i intteyyo qaretana. GODAI intte Xoossai inttena laalido kawotettatu ubbaa gidoppekka zaaridi shiishshana. <sup>4</sup> Biittaa gaxaa gakkanaashin laalettikkokka, hegaappe GODAI intte Xoossai inttena zaaridi shiishshana. <sup>5</sup> Intte aawati kase laattido biittaa intteikka laattanaadan GODAI intte Xoossai inttena he biittau ehaana. Yan inttena intte aawatuppe aattidi dureyananne intte goodaa darissana.

<sup>6</sup> “Intte de7uwan de7ana malanne GODAA intte Xoossaa intte kumetta wozanaappenne intte kumetta shemppuwaappe siiqanaadan, i intteyyoonne intte naatuyyo azazettiya wozanaa immana. <sup>7</sup> GODAI intte Xoossai ha qanggetta ubbaa intte morkketunne inttena yedettiyaageetu bolli ehaana. <sup>8</sup> Intteikka zaaridi GODAAYYO, intte Xoosaayyo, azazettana; taani hachchi inttena azaziyo a azazuwaakka naagana. <sup>9-10</sup> Intte ha Higgiiyaa Maxaafan xaafettida GODAA intte Xoossaa azazotanne a wogata naaganau GODAAYYO, intte Xoosaayyo, azazettikko, qassi intte intte kumetta wozanaappenne intte kumetta shemppuwaappe GODAAKKO, intte Xoossaakko, simmikko, i inttena intte kushiyaa ooso ubban, intte uluwaa aifiyan, intte mehiyaa aifiyaaninne intte biittaa aifiyan darissidi anjjana. Aissi giikko, kase intte aawata anjjiyoogan ufaittidoogaadan, GODAI ha77i inttena anjjiyooganka ufaittana.

<sup>11</sup> “Taani hachchi inttena azaziyo ha azazoi heggaa keena deexo gidenna; intteppe haahokka gidenna. <sup>12</sup> Intte, ‘Nuuni siyidi azazettanaadan, saluwaa kiyidi nuuyyo wottanai oonee?’ geennaadan saluwan de7enna. <sup>13</sup> ‘Nuuni siyidi azazettanaadan, nuuyyo abbaa pinnidi ehaanai oonee?’ geennaadan abbaa hefinttan de7enna. <sup>14</sup> Qaalai intteyyo keehi matan de7ees; intte oottanaadan, qaalai intte wozanaaninne intte doonan de7ees.

<sup>15</sup> “Be7ite, taani hachchi intte sinttan de7uwaanne lo77otettaa, haiquwaanne bashshaa wottaas. <sup>16</sup> Intte GODAA intte Xoossaa siiqiyoogan a ogiyan hemettiyoogaaninne a azazuwaa, a awaajuwaanne a wogaa naagiyoogan, taani hachchi inttena azaziyo GODAU, intte Xoossau, azazettikko, intte de7uwan de7ananne corattana; qassi intte laattanau geliyo biittan GODAI intte Xoossai inttena anjjana.

<sup>17</sup> “SHin intte wozanai wora simmin, intte azazettennan ixkikko, hara xoossatussi goinnikko, qassi etau oottikko, <sup>18</sup> intte wuri xayanaagaa taani hachchi intteyyo yootais. Yorddaanoosa pinnidi, intte laattanau biyo biittan intte laittai aduqqenna.

<sup>19</sup> “Taani intte sinttan de7uwaanne haiquwaa, anjuwaanne qanggettaa wottidoogau hachchi saluwaanne sa7aa intte bolli markkayana; simmi inttenne intte zaree de7uwan de7ana mala, de7uwaa doorite. <sup>20</sup> GODAA intte Xoossaa siiqite; a qaalaa siyite, ayyo azazettite; aara ohettite. Hegaadan hanikko, GODAI kase intte maizza aawatuyyo, Abrahaamayyo, Yisaaqayyoonne Yaaqoobayyo immanau caaqqido biittan inttenne intte naati adussa laittaa de7ana” yaagiis.

## 31

### *Yaasu Muuse Sohuwan Sunttettiis*



<sup>1</sup> Muusee gujjidikka Israa7eela asau hagaadan yaagiis; <sup>2</sup> “Ha77i taayyo xeetanne laatamu laitta gidido gishshau, hagaappe sinttanau inttena kaalettana danddayikke; heгаа болликка GODAI tana, ‘Neeni Yorddaanoosa hefintti pinnakka’ yaagidi yootiis. <sup>3</sup> GODAI intte Xoossai intte sinttan hemettidi inttena kaalettana. Hegan de7iya kawotettata i wurssiyo gishshau, eta biittaa intte laattana. Qassi GODAI giidoogaadan Yaasu inttena kaalettana. <sup>4</sup> GODAI Amooore Kawota Sihoonanne Ooga xoonidi, eta biittaa xaissidoogaadan, intte morkketakka hegaadan oottana. <sup>5</sup> GODAI eta intteyyo aatti immana; immin intte eta bolli taani inttena azazidoogaadan oottana. <sup>6</sup> Minnite; aikko baawa; yayyoppite. Eta be7idi dagammoppite. Aissi giikko, GODAI intte Xoossai inttenaara gidana. I inttena yeggenna woikko aggenna” yaagiis.

<sup>7</sup> Hegaappe guyyiyan, Muusee Yaasa xeesidi, Israa7eela asaa ubbaa sinttan hegaadan yaagiis, “Minna; minna; aikko baawa. Aissi giikko, neeni ha asaara issippe GODAI eta maizza aawatuyyo immana giidi caaqqido biittaa gelaasa; he biittaakka eta laatissaasa. <sup>8</sup> I GODAI ba huuphen nenaara gididi nena kaalettana. I nena olenna; ainnekka nena aggenna. Hega gishshau, yayyoppa; ne wozanan dagammoppa” yaagiis.

### *Higgee Laappun Laappun Laittan Nabbabettanau Koshshees*

<sup>9</sup> Yaagidi Muusee ha higgiiya xaafidi, GODAA Maachchaa Taabootaa tookkiya qeese gidiya Leewa naatussinne Israa7eela cimatu ubbaassi immiis. <sup>10</sup> Immidi Muusee eta hagaadan yaagidi azaziis; “Aco ubbai atto geetettiyo laappuntta laittaa wurssettan, bonchchettiya Daase Baalaa gallassan, ha higgiiya xoqqu oottidi nabbabite. <sup>11</sup> GODAA intte Xoossaa sintti i doorido sohuwaa ayyo goinnanau Israa7eela asai ubbai shiiqiyo wode, eti siyyaadan nabbabite. <sup>12</sup> Eti ubbaikka siyidi, GODAASSI, intte Xoossaasi, yayyiyoogaa tamarana mala, ha higgiiya qaala ubbaa ammanettidi polana mala, asaa, attumanne macca, naatanne intte biittan de7iya kare biitta asaa issippe shiishshite. <sup>13</sup> Ha higgiiya qaalaa erenna eta naatika Yorddaanoosa pinnidi, intte laattanau biyo biittan intte de7iyo laitta ubban ha higgiiya siyona; GODAAYYO, intte Xoossaayyo, yayyiyoogaa tamarana” yaagiis.

### *GODAI Muusa Wurssetta Azazuwaa Azaziis*

<sup>14</sup> Hegaappe guyyiyan, GODAI Muusa hagaadan yaagiis; “Be7a, neeni haiqqiyo gallassai matiis. I kaaletettiyo azazuwaa ayyo taani immana mala, Yaasa xegada, neeni aara issippe Dunkkaaniyaa giddo gelite” yaagin, Muuseenne Yaasu Dunkkaaniyaakko shiiqidosa.

<sup>15</sup> SHiiqin GODAI he Dunkkaaniyan shaaraa tuussan etau qoncciiis; he shaaraa tuussaikka Dunkkaaniyaa penggen eqqiis.

<sup>16</sup> GODAI Muusa hagaadan yaagiis; “Neeni matan haiqqada ne aawatun gaittaasa. Neepe guyyiyan, ha asai tau ammanettennaagaa gidana; taani etaara wottido maachchaa kanttana. Eti tana aggidi, shaaramuxatudan, bantta laattiyo biittan de7iya eeqata kaallana. <sup>17</sup> Hegee haniyo wode, ta hanqqoi eta bolli eexxi kiyana. Taanikka eta aggaagana; ta som77uwaa etappe wora zaarana. Yaatin, eti xayana; iita metoinne bashshai eta bolli yaana. He wodiyan eti, ‘Tumu ha metoi gakkidoi nu Xoossai nu gidon bainnaagaa gishshaassa gidennee?’ yaagidi oichchana. <sup>18</sup> Hara xoossatussi goinnidi, eti hanido itabaa gishshau, taani he gallassi ta som77uwaa mulekka etappe wora zaarana.

<sup>19</sup> “Hega gishshau, ha77i ha mazamuriyaa xaafada, Israa7eela asaa ubbaa tamarissa. Ha mazamuree taayyo Israa7eela asaa bolla markka gidana mala, eta yexissa. <sup>20</sup> Eta maizza aawatuyyo gelido qaalaadan, maattainne eessai goggiyo biittaa taani eta gelissidoogaappe guyyiyaninne eti mi kallidi, wozanaa muumidoogaappe guyyiyan, hara xoossatuyyo goinnidi, tana karana; ta maachchaakka kanttana. <sup>21</sup> Daro metoinne bashshai eta bolli gakkido wode, ha mazamuree eta naatu doonaappe kichchenna gishshau, eta bolli markka gidana. Aissi giikko, taani caaqqido biittaa eta

biron gelissennan de7ishin, haarakka eti qoppiyo qofaa eraichchaas” yaagiis. <sup>22</sup> Yaagin Muusee he gallassi he mazamuriyaa xaafidi, Israa7eela asaa tamarissiiis.

<sup>23</sup> Hegaappe guyyiyan, GODAI Nawe na7aa Yaasa hagaadan yaagidi azaziis; “Minna, aikko baawa; taani etau immanau qaalaa gelido biittaa Israa7eela asaa efaada gelissaasa. Taanikka nenaara issippe gidana” yaagiis.

<sup>24</sup> Muusee ha higgiiyaa qaalata koiroppe wurssettaa gakkanaashin, xaafidi wurssi-doogaappe guyyiyan, <sup>25</sup> GODAA Maachchaa Taabootaa tookkiya Leewata hagaadan yaagidi azaziis; <sup>26</sup> “GODAA higgee xaafettido ha maxaafaa efiite; efiidi GODAA intte Xoossaa Maachchaa Taabootaa matan wottite. Hegan i intte bolli markka gidana mala yan wottite. <sup>27</sup> Intte woisa makkalanchchakonne woisa morgge zozzakko taani erais. Be7ite, ta inttenaara de7ido laitta ubban intte GODAU iita makkala; shin taani haiqqaichchin, ubba woisaa makkalanddetii? <sup>28</sup> Hegaa gishshau, haggaa ubbaa ta etau yootanau, saluwaanne sa7aa ta eta bolli markkayanau, intte zariyaa halaqata ubbaanne deriyaa kaalettiya asa ubbaa tau shiishshite. <sup>29</sup> Ta haiqqidoogaappe guyyiyan, intte mule iita asa gidanaagaanne taani inttena tamarissido azazuwaappe wora simmanaagaa taani erais. I ootoppite giido iitabaa intte kushiyan oottidi, GODAA hanqquetissiiyo gishshau, sinttappe yiya wodiyan intte bolli iita boshaa ehaana” yaagiis.

<sup>30</sup> Hegaappe guyyiyan, Muusee ha mazamuriyaa qaalati wurana gakkanaashin, shiiqida Israa7eela yaa7aa ubbaa sissidi yootiis.

## 32

### *Muuse Mazamuriyaa*

<sup>1</sup> “Inttenoo, salotoo, taani yootiyoogaa ezggite; biittaikka ta doonaa qaalaa siyo. <sup>2</sup> Ta timirttee iraadan bukko; ta qaalaiikka akkaadan, purcco maataa bollan wodhdhiya nazziina iraadaaninne carshshaa bollan wodhdhiya diifiyaadan wodhdho.

<sup>3</sup> “Taani GODAA sunntaa awaajjana; gitatettaa nu Xoossau immite. <sup>4</sup> I nu zaallaat-tenne, a oosuwan wotoi baa; a oge ubbaikka suure. Nu Xoossai ammanettiyaagaanne iitatettaa bainnaagaa; i tumanchchanne suure.

<sup>5</sup> “Intte ammanettennanne aibaunne pattenna, nagaranchchanne balettiya yeleta gidiyo gishshau, a asa gidanau intte bessekketa. <sup>6</sup> Inttenoo eeyyanne akeeki bainna asau, intte GODAAYO immiyo zaaroi hagee? I inttena medhdhida intte Aawaa gidennee? I inttena medhdhidi, mintti essiis.

<sup>7</sup> “Kase wodiya qoppite; daro yeletatu laittaikka akeekite. Intte aawata oichchite; eti inttena bessana. Intte cimatakka oichchite; eti intteyyo yootana. <sup>8</sup> Ubbaappe Wolqqaamai kawotettatuyyo eti de7iyoosaa laatissido wode, asaa naata eta zariyan zariyan shaakkido wode, Israa7eela asaa qoodaadan, eta zawaa essiis. <sup>9</sup> Aissi giikko, shaahuwan GODAA gakkidaagee Israa7eela; Yaaqoobikka a gakkida laataa.

<sup>10</sup> “Biittaa bazzuwan eti saamuwan de7ishin, carkko xallai suraggiyoosan bichchaarishin, eta demmiis. Yaatidi ba aifiyaa buluwaadan, etau gondalle gididi, eta minttidi naagiis. <sup>11</sup> Argganttai ba maraa paaluwaa tamarissiiyoogaadan, ba micciddo qefiyan gakkii oiqqidi ashshiiyoogaadan, hegaadan GODAI ba qefiyan haphphidi eta ashshiiis. <sup>12</sup> Hara allaga xoossi bannan, GODAA xalaalai ba asaa kaalettiis.

<sup>13</sup> “I biittaayyo xoqqa sohuwaa eta kessiis. SHooqan morkkida aifiyaa eta miziis. Zaallaa kooppuwaappe eta eessaa miziis; shuchcha biittaappe zaitiyaa miziis. <sup>14</sup> Eti mehiyaa wudiyaappe me77ida yeesuwaanne deeshshaa wudiyaappekka maattaa, dorssaa anqqaraanne galssaa miidosona; qassi Baasaane dorssaa wudiyaanne deeshshaa, lo77o gisttiyaara miidosona; suuttaa milatiya woiniyaa eessaakka uyidosona.

<sup>15</sup> “Yaanidi Israa7eeli orddiis; makkaliis; mii miidi, boborcciis. Bana medhdhida Xoossaa aggiis; ba Atotettaa Zaallaa bollankka qilliicciis. <sup>16</sup> Eti allaga xoossatuyyo

goinniyoogan a mishissidosona; bantta tuna eeqatun a hanqqetissidosona. <sup>17</sup> Xoossaa gidenna xalahetuyyo, kase eti eribeenna xoossatuyyo, zino kiyidaageetuyyo, eta aawati yayyibeenna xoossatuyyo yarshshidosona. <sup>18</sup> Eti de7uwaa immida Zaallaa qoppi-bookkona; qassi yeli dichchida Xoossaa dogidosona.

<sup>19</sup> “GODAI hegaa be7idi, eta bolli hanqqettiis. A attumanne macca naata a sinttappe diggiis. <sup>20</sup> Yaatidi hagaadan yaaggiis; ‘Taani ta som77uwaa etappe genttana; eti geellanne ammanettenna dere gidiyo gishshau, eta omarsaa co77u gaada xeellana. <sup>21</sup> Xoossa gidennaban tana mishissidosona; bantta eeqatun tana hanqqetissidosona. Taanikka eta zare gidennaageetun mishissana; eeyya asa zaretun taani eta hanqqetissana. <sup>22</sup> Ta hanqqoi tamaadan eexxidi, biittan de7iyaaba ubbaa xuuggana. He tamai Si7ooliyan de7iyaagaarakka gattidi xuuggana; deriyaa baasuwa gakkanaashin, he tamai maana.

<sup>23</sup> “ ‘Taani etau metuwa metuwa bolli doorana; ta wonddafiyana eta dukkana. <sup>24</sup> Eti namisan, xuuggiya mishuwaaninne iita harggiyan wurana. Eta bolli meto gattiya bazzo do7atanne eta dukkiya allaga shooshshata eta bolli yeddana. <sup>25</sup> Toorai oge ubban eta naata wurssana. Keetta ubban shabbirssainne dagamai kawotana. Yelaga attumaageetinne maccaageeti wurana; guutta naatika cimatika palahokkona. <sup>26</sup> Eta taani haaho sohuwau laalana; hegaappe guyyiyan, eta hassayiyaabi xayana. <sup>27</sup> SHin eta morkketi, “Nu wolqqai eta xooniis; haggaa ubbaa GODAI oottibeenna” yaagidi otoruwan ceeqettennan aggokkona yaagada qoppaas’ yaaggiis.

<sup>28</sup> “Israa7eela asai zoreti baina dere; akeeki etau baawa. <sup>29</sup> Eti xoonettidoi aibi-inakko be7anau etau ixettiis; bantta wursettaikka aibakko erokkona. <sup>30</sup> Issi sha7u asai issi asan, tammu sha7u asai naa77u asan, waani xoonettidee? GODAI eta Xoossai eta baizzido gishshaassanne eta medhdhida Wolqqaamai eta aatti immido gishshaassa gidennee! <sup>31</sup> Eta morkketi bantta xoossai laafa gidiyoogaanne Israa7eela Xoossaa mala gidennaagaa eroosona. <sup>32</sup> Eta woinee Sadooma woiniyaappenne, Gamoora shooqaappe yiidaagaa. Eta teerai marzze; eta wurccoikka cammiyaagaa. <sup>33</sup> Eta woiniyaa eessai shooshshaa marzze; woriya marzzee de7iyo haso.

<sup>34</sup> “GODAI, ‘Haggaa taani dogidanaa? Ta mazggafan attamabeikkinaa? <sup>35</sup> Eta bashshaa gallassai matattiis; eta bolli gakkanabai eesotees. He wode eta gedee xubettana. Taani etau haluwaa kessanne kushiya zaarana’ yaaggiis.

<sup>36</sup> “Eta wolqqai daafuridoogaanne etakka maaddiyaabi bainaagaa be7ido wode, GODAI ba asau pirddana; ba ashkkaratussikka qarettana. <sup>37</sup> I eta hagaadan yaagana; ‘Eti ammanettiyo eta xoossati awaane? Eti baqatidi a gidдон qosettiyo eta zaallai awaane? <sup>38</sup> Eta yarshshuwaa modhdhuwaa miidaageeti, eta ushshaa yarshshuwaa woiniyaa eessaa uyidaageeti ha77i denddidi, ane eta maaddona; ane eta ashshona.

<sup>39</sup> “ ‘GODAI tanattenne. Ta xallai Xoossaa. Taappe attin, hara xoossi baawa. Woriyaagee, de7uwaakka immiyaagee tana; taani masunxxissada, taani pattana; ta kushiyaappe ooninne ashshenna. <sup>40</sup> Ta kushiya pude denttada hagaadan yaagana; “Taani merinaukka de7o. <sup>41</sup> PHopholqqu giya ta bisuwaa leefada, pirddanau ta kushiyan oiqqiyo wode, ta morkketu bolli ta haluwaa kiyana; tana ixxiyaageetau eta kushiya zaarana. <sup>42</sup> Ta wonddafeti eta suuttan mattottana; ta bisoikka eta ashuwaa maana. Tana ixxiya ubbaakka maarikke. Harai atto masunxxidaageetikka omoodetti-daageetikka haiqqana” yaagana’ yaaggiis.

<sup>43</sup> “Inttenoo kawotettatoo, GODAA asaara ufaittite. I ba ashkkaratu suutta achchana; ba morkketa bollankka haluwaa kiyana. Biittan de7iya ba asaa nagaraakka atto gaana” yaaggiis.

<sup>44</sup> Muuseenne Nawe na7ai Yaasu Israa7eela asaa sissiiddi, ha mazamuriyaa qaala ubbaa haasayidosona.

<sup>45</sup> Muusee ha qaala ubbaa Israa7eela asa ubbau yooti wurssido wode, <sup>46</sup> eta hagaadan yaagiis; “Ha higgiiyaa qaala ubbaa eti naaganaadaaninne oottanaadan intte naata azazana mala, hachchi ta intteyyo markkattiyo qaala ubbaa intte wozanan wottite. <sup>47</sup> Ha qaalai intteyyo de7oppe attin, coo mela qaala gidenna. Ha qaalaa naagikko, intte Yorddaanoosa pinnidi laattana biittanka adussa laittaa de7ana” yaagiis.

<sup>48</sup> He gallassanka GODAI Muusa hagaadan yaagiis; <sup>49</sup> “Moo7aaban Yarkko kata-maappe sintta baggaara de7iya Abaarima Deretuppe issuwaa, hini Nabo Deriyaa kiya; hegan Israa7eela asaa ta laatissana Kanaane biittaa hefintti xeella. <sup>50</sup> Ne ishaa Aarooni Hooraa Deriyan haiqqidi, ba maizza aawatun gaittidoogaadan, neenikka ha kiyido deriyan haiqqada, ne maizza aawatun gaittana. <sup>51</sup> Aissi giikko, intte naa77aikka Israa7eela asaa sinttan taayyo ammanettibeekketa; Xiina bazzuwan, Qaadeesa katamaa matan de7iya Mariiba haattaa matan, ta geeshshatettaa Israa7eela asaa bessibeekketa. <sup>52</sup> Hegaa gishshau, biittaa haahuwan hefintti xeellanaappe attin, taani Israa7eela asaa laatissana biittaa gelakka” yaagiis.

### 33

#### *Muusee Israa7eela Zareta Ubbaa Anjjiis*

<sup>1</sup> Xoossa asa gidiya Muusee haiqqanaappe kasetidi, Israa7eela asaa anjjido anjuwaa qalalai haga. <sup>2</sup> I hagaadan yaagiis; “GODAI Siinaa Deriyaappe yiis; Eedoomappe nu bollan haa poo7iis; Paaraana Deriyaappe ba asau poo7iis. SHa7an qoodettiya kiitanchchati aara de7oosona. A ushachcha baggaara tamaa laco de7ees. <sup>3</sup> GODAU neeni ne asaa siiqadasa. Geeshshati ubbai ne kushiyan de7oosona; ne gediya xaphon gulbbatidi goinnoosona; yaanidi neeppe azazuwaa ekkoosona. <sup>4</sup> Muusee immido higgee Yaaqooba asaayyo laata. <sup>5</sup> Israa7eela zareti ubbainne Israa7eela zariyaa halqati shiiqido wode, GODAI ba asaa, Israa7eela bolli kawotiis.

<sup>6</sup> “Roobeeli haiqqoppo; i paxa de7o. A asaikka qoodan coratto” yaagiis.

<sup>7</sup> Muusee Yihudaa zariyaabaa hagaadan yaagiis; “Abeet GODAU, Yihudaa waasuwa siya; hara ba dabbotuura eti gaittanaadan ootta. Eta kushiya minttetta; eti bantta morkkiyaara olettiyo wode, neeni eta maadda!” yaagiis.

<sup>8</sup> Muusee Leewa zariyaabaa hagaadan yaagiis; “Ne Tumiimeenne Uriimee ne dosido asassa. Neeni Masaahan paaccido, Mariiba haattan palamettido asassa. <sup>9</sup> Banttana yeli-daageetuppe, ba ishanttupenne bantta naatuppe aattidi, eti neeyyo ammanettidoogee aadhdhees; ne maachchaa qaalaayyo eti ammanettidosona. <sup>10</sup> Eti ne wogaa Yaaqooba, ne higgiiyaakka Israa7eela tamarissoosona. Ne sinttan ixaanaa cuwayoosona; neeyyo yarshshiyooosan muleera xuuggiyo yarshshuwaa yarshshoosona. <sup>11</sup> Abeet GODAU eta kushee oottidobaa anjja; eti oottiyo ubaban ne ufaittiyoogaa etau qonccissa. Eta bolli denddiyaabaa mentteretta ola; eta morkketa naa77antta denttoppa” yaagiis.

<sup>12</sup> Biniyaama zariyaabaa hagaadan yaagiis; “GODAI siiqido asai an ammanettidi de7ees. Gallassa kumettan eta i naagees; ba hashiyan tookkidi shemppisees” yaagiis.

<sup>13</sup> Yooseefa zariyaabaa hagaadan yaagiis; “GODAI iraa immiyoogan, biittaaappe haattaa pulitissiyooogan, eta biittaa anjjo. <sup>14</sup> Awai kattiyo doorettida aifiyaaninne wodiyan wodiyan ka77iya aifiyan anjjetto. <sup>15</sup> Beniisappe de7iya eta deretinne kerati lo77o aifiyan anjjettona. <sup>16</sup> Eta biittai lo77obaa xallaa kumidaagaa gido; buuran eexxiya tamaa gidon haasayida, GODAAPPE beettiya anjjo xallan kumidaagaa gido. Ha anjjoti ubbai Yooseefa zariyaa gakkona; aissi giikko, i ba ishanttu gidon halaqa. <sup>17</sup> Yooseefi koiro yelettida korimadan mino; a kaceti menttaa kaciyaaadan minnona. A kaceti sha7an qoodettiya Minaase zareta; tammu sha7an qoodettiya Efireema zareta. He kacetun i kawotettata qaicana; biittaa gaxaa gakkanaashin eta i sugana” yaagiis.

<sup>18</sup> Zaabiloonaa zariyaabaa hagaadan yaagiis; “Nenoo Zaabiloonaa, neeni ne kessan ufaatta; Yisaakooraa, neenikka ne dunkkaaniyan ufaatta. <sup>19</sup> Eti kare dere asaa bantta



deriyaakko xeesana; hegan eti geeshshatettaa yarshshuwaa yarshshana. Bantta aquwaanne bantta duretettaa, abbaappenne abbaa lanqqe shafiyaappe demmana” yaagiis.

<sup>20</sup> Gaada zariyaabaa hagaadan yaagiis; “Eta biittaa aassida GODAI galatetto; Gaadi morkkiyaa som77uwaa menttanau, gaammuwaadan shankkatees. <sup>21</sup> Halaqatussi giido payya biittaa eti ekkidosona; Israa7eela halaqati shiiqido wode, eti GODAA sheniyan geeshsha pirddaa pirddidosona” yaagiis.

<sup>22</sup> Daana zariyaabaa hagaadan yaagiis; “Daani wodala gaammo mala; i Baasaaneppe guppidi kiyana” yaagiis.

<sup>23</sup> Nifttaaleema zariyaabaa hagaadan yaagiis; “Nifttaaleemi GODAA aaro kehatettaanne anjuwan duretiis; eta biittai Galiila Abbaappe biidi tohossa baggaa gakkées” yaagiis.

<sup>24</sup> Aseera zariyaabaa hagaadan yaagiis; “Aseeri hara zaretu ubbaappe aadhdhidi anjettidaagaa. Ba ishanttunkka dosettidaagaa gido. A biittai zaitiyan dureto. <sup>25</sup> Eta katamatikka birata kariyan gorddettidi naagettona; ba laitta ubban i wolqqaama gido.

<sup>26</sup> “Nenoo Israa7eelaa, saluwaappe inttena maaddanau, ba anggan shaaran hemettiya intte Xoossaa mala xoossi baawa. <sup>27</sup> Merinaa Xoossai intteyyo qato; a merinaa kusheti intteppe garssaara de7oosona. I intte sinttappe intte morkketa gooddiis; intte eta wurssi xaissanaadan intteyyo yootiis. <sup>28</sup> Hegaa gishshau, Israa7eela asai, saluwaa irai bukkiyoosan, qumainne woiniyaa eessai kumido biittan, bochchiyaabi bannan sarotettan de7ana. <sup>29</sup> Inttenoo Israa7eela asau! Intte aiba anjettidetii! GODAI ashshido intte mali oonee? I intteyyo gondallenne inttena maaddiyaagaa; an intte xooniyo bisuwaa. Intte morkketi intte sinttan gufannana; intteikka eta qatuwaa laalana” yaagiis.

## 34

### *Muuse Haiquwaa*

<sup>1</sup> Muusee Moo7aaba dembaappe denddidi, Nabo Deriyaa huuphiyaa, qassi Yarkkoppe arshsho baggaara de7iya Pisgga Deriyaa huuphiyaa gakkiiis. Hegan GODAI Daana gakkanaashin de7iya Gala7aade biittaa, <sup>2</sup> Nifttaaleema biittaa ubbaa, Efireemanne Minaase biittaa, arggo baggaara biidi Meediteraane Abbaa gakkanaashin de7iya Yihudaa biittaaanne <sup>3</sup> tohossa baggaara Xoo7aarappe denddidi, zambbai de7iyo Yarkko katamaa, zanggaaran de7iya dembaa ubbaa bessiiis. <sup>4</sup> Bessidi GODAI Muusa hagaadan yaagiis; “Abrahaamassi Yisaaqassinne Yaaqoobassi, ‘Taani intte zariyaassi immana’ yaagada caaqqido biittai haggaa. Ha77i neeni ne aifiyan be7anaadan taani oottaas; shin neeni yaa pinnakka” yaagiis.

<sup>5</sup> Yaagin GODAA ashkkaraa Muusee GODAI giidoogaadan, hegan Moo7aaba biittan haiqqiiis. <sup>6</sup> GODAI Beeti-Pa7oora katamaappe sintta baggan Moo7aaba wombban a moogiis; shin hachchi gakkanaashin, i moogettido man77iyaa eriya asi baawa. <sup>7</sup> Muusee haiqqiyo wode, a laittai xeetanne laatama; shin au aifee ixxibeenna; a wolqqaikka ixxibeenna. <sup>8</sup> Israa7eela asai Moo7aaba dembban hasttamu gallassaa Muusessi yeekkidosa. Hegaappe guyyiyan, Muusessi yeekkiyoonne kayyottiiyo wodee wuriis.

<sup>9</sup> Nawe na7ai Yaasu aadhdhida eratettaa ayyaanan kumiis; aissi giikko, Muusee ba sohuwan i oottanaadan, a bolli ba kushiya wottiis. Israa7eela asai Yaasuyyo azazettiis; GODAI Muuse baggaara immido azazuwaakka naagiis.

<sup>10</sup> GODAI som77uwan dummayidi erido Muuse mala hananabaa yootiya asi Israa7eelan mulekka denddibeenna. <sup>11</sup> GODAI Gibxxe kawuwaakko, aara oottiya halaqatukkonne kumetta asaakko yeddidi, a baggaara oorattabaanne maalaalissiyaabaa ubbaa oottido, Muuse mala hananabaa yootiya hara asi ooninne baawa. <sup>12</sup> Israa7eela ubbaa sinttan gita wolqqan maalaalissiyaabaa oottida Muuse mala asi ooninne baawa.



## Yaasu Maxaafaa

### *Gidduwaa Erissuwaa*

Yaasu Maxaafai Israa7eela asai Muuse sohuwan sunttettida Yaasu kaalettin olaa xoonidi, Kanaane biittaa waati oiqqidaakko yootiya taarikiyaa oiqqiis. Ha maxaafaa gidдон xaafettida gita gita taariketu gidдoppe waannatiyaageeti: Yorddaanoosa SHaafaa pinettaa, Yarkko gimbbiyaa laaletttaa, Aaya katamaa olaanne asai Xoossaara gelido caaquwaa ooraxissido taariketa yootiyaageeta. Ha maxaafaa gidдон daro erettida kifiletuppe issoi, “Intte goinnanaagaa hachchi doorite. SHin tananne ta keettaa asaa gidikko, nuuni GODAAYYO goinnana” yaagiyaagaa. (24:15)

### *Kanaane Xoonidi Gelanaadan GODAI Yaasa Azaziis*

<sup>1</sup> GODAA ashkkarai Muusee haiqqidoogaappe guyyiyan, GODAI Muusa maaddiya Nawe na7aa Yaasa, hagaadan yaagiis; <sup>2</sup> “Ta ashkkarai Muusee haiqqiis. Hegaa gishshau neeninne ha asai ubbai denddite; denddidi taani Israa7eela asaayyo immiyo biittaa gelanau haggaa Yorddaanoosa SHaafaa pinnite. <sup>3</sup> Taani Muuseyyo yootidoogaadan, intte tohoi yedhdhiyoosaa ubbaa taani intteyyo immaas. <sup>4</sup> Intte zawai Neegeeba Bazzuwaappe denddidi, Liibaanoosa Deriyaa gakkana; Efiraaxiisa giyo wogga shaafaappe denddidi, Hiitetu biittaa ubbaara kanttidi, arggo baggaara de7iya Meediteraane Abbaa gakkana. <sup>5</sup> Neeni de7ido laitta ubban ai asinne nena olidi teqqenna. Taani Muuseera gididoogaadan, nenaarakka gidana; taani nena mulekka yeggikkenne aggikke. <sup>6</sup> Minna; xala! Aissi giikko, taani eta maizza aawatussi immana gaada caaqqido biittaa neeni ha asaa laatissana. <sup>7</sup> Minna; keehippe xala! Ta ashkkarai Muusee nena azazido higgiiyaa ubbaa minttada naaga. Neeni biyo soho ubban neeyyo injjetana mala, appe ushachchi woikko haddirssi booppa. <sup>8</sup> Ha Higgiiyaa Maxaafai ne doonaappe shaahettoppo; an xaafettidabaa ubbaa minttada naaganau, gallassinne qammi a qoppa. Yaatikko, neeyyo ubbabaikka injjetananne giigana. <sup>9</sup> Minna; xala! Ne biyo soho ubban taani GODAI ne Xoossai nenaara de7iyo gishshau, yayyoppa! Hirggoppa! Haggaa ubbaa taani nena azazaas” yaagiis.

### *Yaasu Asaa Azaziis*

<sup>10</sup> Yaagin Yaasu asaa halaqata hagaadan yaagiis; <sup>11</sup> “Biite; asai dunkkaanidosaa kanttidi biiddi, asaa, ‘Intte shinqqiyaa giigissite; heezzu gallassaa garssan, GODAI intte Xoossai intteyyo immiyo biittaa laattanau Yorddaanoosa SHaafaa pinneeta’ yaagidi yootite” yaagiis.

<sup>12</sup> Yaasu, Roobeela zaretta, Gaada zaretanne Minaase zaretuppe baggata hagaadan yaagiis; <sup>13</sup> “GODAA ashkkarai Muusee inttena azazidoogaa hassayite. I inttena, ‘GODAI intte Xoossai inttena shemppissana; ha biittaaakka intteyyo immana’ yaagiis. <sup>14-15</sup> Intte maccaasati, intte naatinne intte mehee Yorddaanoosa SHaafaappe hafinttaara Muusee intteyyo immido biittan de7ishshona. SHin intte olanchchati bantta ola miishshaa oiqqidi, intte dabbotuppe sintta xeeran olettanau Yorddaanoosa SHaafaa pinnona. GODAI inttena shemppissidoogaadan, etakka shemppissana gakkanaashiininne GODAI intte Xoossai etayyookka immiyo biittaa eti laattana gakkanaashin, eta maaddite. Hegaappe guyyiyan simmidi biidi, GODAA ashkkarai Muusee Yorddaanoosa SHaafaappe hafinttan awai mokkiyoosaa baazzayidi immido intte biittan de7ite” yaagiis.

<sup>16</sup> Yaagin eti Yaasa, “Neeni nuna azazidobaa ubbaa nuuni oottana; neeni kiittiyoosaa awanne baana. <sup>17</sup> Muuseyyo ubbaban azazettidoogaadan, neeyyookka azazettana. GODAI ne Xoossai Muuseera gididoogaadan, nenaarakka gido. <sup>18</sup> Ne azazuwaassi

makkaliyaabainne ne azazidobaa aibanne azazettennan ixxiyaabai haiqqo. Neeni mati minna; xala!” yaagidosona.

## 2

### *Yaasu Xomoosiyaaageeta Yarkko Kiittiis*

<sup>1</sup> Nawe na7ai Yaasu biittaa xomoosiyaa naa77u asata SHiixima giyo sohuwaappe qosan kiittiis; kiittiiddi eta, “Biite; biidi biittaa xomoosite; Yarkko katamaa qassi dumma xomoosite” yaagiis.

Yaagin eti biidi, Ra7aabo giyo shaaramuxee soo aqanau gelidosona. <sup>2</sup> Gelin Yarkko kawoi, “Israa7eela asaappe kiitettidaageeti ha biittaa xomoosanau qammi yiidosona” giyo oduwaa siyiis.

<sup>3</sup> Siyidi Yarkko kawoi Ra7aabiyyo hagaadan yaagidi kiittiis; “Ne soo yiidi gelida asata kessada imma. Aissi giikko, eti biittaa ubbaa xomoosanau yiidosona” yaagiis.

<sup>4</sup> SHin mishiriyaa he naa77u asata qottarggada, hagaadan yaagaasu; “Ee asati taakko yiidosona; shin eti auppe yiidaakkonne taani erabeikke. <sup>5</sup> Omarssi katamaa penggiyaa gorddana haniyo wode, eti kiyidi biidosona; eti au biidaakko taani erikke. Ellelli kaalliyaa gidikko, intte eta oiqqana” yaagaasu. <sup>6</sup> SHin Ra7aaba asata keettaa bolla dembbayidi oottidosaa kessada, liinuwaa giyo maayuwaa kiyiya talbba dalaa dooriyaa gidon eta qotta wottaasu. <sup>7</sup> Yaatin, asati xomoosiyaaageeta koyanau kiyidi, Yorddaanoosa SHaafaa pinuwaa efiya ogiyaa oiqqidi biidosona. Koyiyaageeti katamaappe kiyaanne, katamaa penggee gorddettiis.

<sup>8</sup> Xomoosiyaaageeti xiskkanaappe kasetada, a etakko pude kiyada, eta hagaadan yaagaasu; <sup>9</sup> “GODAI ha biittaa intteyyo immidoogaa, intte nuna gita yashshaa yashshiyooogaanne ha biittan de7iya asai ubbai intteyyo hirggaa maashiyoooga taani erais.

<sup>10</sup> Aissi giikko, Gibxxe biittaappe intte kiyido wode, intte sinttan Zo7o Abbaa GODAI waati melissidaakkonne nuuni siyida. Qassi Yorddaanoosa SHaafaappe arshsho baggaara de7iya Amooore biittaa kawota naa77ata, Sihoonanne Ooganne intte waati muleera xaissidaakkonne siyida. <sup>11</sup> Nuuni heгаа siyido wode, nu wozanai maashiis; asai ubbai intteyyo xaliyoogaa aggi bayiis. Aissi giikko, GODAI intte Xoossai bolla saluwaanikka garssa sa7aanikka Xoossa. <sup>12</sup> Hega gishshau, taani intteyyo kehidooogaadan, inttekka ta aawaa keettaa asau kehanaadan taayyo GODAN caaqqite; hegaayyookka ammanttiya malaataa immite. <sup>13</sup> Ta aawaanne ta aayyiyo, ta ishantanne ta michcheta etassa gididabaa ubbaarakka paxa aggite; nuna haiquwaappe ashshite” yaagaasu.

<sup>14</sup> Yaagin he asati, “Nuuni oottidobaa neeni odennan aggin, nuuni neeyyo caaqqido caaquwaa polana xayikko, Xoossai nuna woro! GODAI ha biittaa nuuyyo immiyo wode, nuuni neeyyo ammanettanne kehana” yaagidosona.

<sup>15</sup> Ra7aaba de7iyo keettaa katamaa dirssaara ohettidi keexetti uttido gishshau, maskkootiyaara wodoruwaa duge yeddada, an duge wottaasu. <sup>16</sup> Ra7aaba eta, “Inttena koyiyaageeti demmenna mala, deriyaa biite; biidi eti simmana gakkanaassi, yan heezzu gallassaa qosettishshite. Hegaappe guyyiyan intte biyoosaa beeta” yaagaasu.

<sup>17-18</sup> Yaagin asati o, “Nuuni ne biitti geliyo wode, ha zo7o kaaloosiyaa neeni nuna kessido maskkootiyan qachchana xayikkonne ne aawaa, ne aayyiyo, ne ishantanne ne so asaa ubbaa neekko soo ehaana xayikko, neeni nuna caaqqissido caaqoi nuuyyo gometenna. <sup>19</sup> Ooninne ne sooppe kare ogiyaa kiyidi haiqqikko, hegee a gome; nuuni hegan oishettokko. Nenaara son issippe de7iyaabi kushen boshettikko, a suutta gomee nuna gakko. <sup>20</sup> SHin nuuni oottidobaa neeni odikko, neeni nuna caaqqettido caaqoi nuuyyo gometenna” yaagidosona.

<sup>21</sup> Yaagin a, “Intte giidoogaadan hano” gaada, eta moissaasu. Eti biidoogaappe guyyiyan, he zo7o kaaloosiyaa maskkootiyan qachchaasu.

<sup>22</sup> Eti pude gezziyaa biidi, yan qosettidosona; qosettidi yedettiyaageeti Yarkko simmana gakkanaassi, eti yan heezzu gallassaa gam77idosona. Yedettiyaageeti oge ubban koyidosona; shin eta demmibookkona. <sup>23</sup> Hegaappe guyyiyan he naa77u asati gezziyaappe wodhdhidi, Yorddaanoosa SHaafaakka pinnidi, Nawe na7aa Yaasukko simmidi yiidosona. Yiidi banttana gakkidabaa ubbaa ayyo yootidosona. <sup>24</sup> Eti Yaasa, “GODAI tumu biitta ubbaa nuuyyo aatti immiis. Qassi biittan de7iya asai ubbai nuuyyo yashshaa maashees” yaagidosona.

### 3

#### *Israa7eela Asai Yorddaanoosa SHaafaa Pinniis*

<sup>1</sup> Yaasunne Israa7eela asai maallado guuran denddidosa. Eti SHiixima giyo sohuwaappe denddidi, Yorddaanoosa SHaafaakko biidosona; biidi pinnennan yan takkidosa. <sup>2</sup> Heezzu gallasaappe guyyiyan, halaqati eti dunkkaanidosan simerettidosona. <sup>3</sup> Simerettiiddi asaa hagaadan yaagidi azazidosona; “GODAA intte Xoos-saa Maachchaa Taabootaanne a tookkida Leewa zare qeeseta be7iyo wode, intte dunkkaanidosaaappe denddidi, eta kaallite. <sup>4</sup> Intte kase ha ogiyaara bi erenna gishshau, intte baana ogiyaa eti inttena bessana. SHin Maachchaa Taabootaakko shiiqoppite; Maachchaa Taabootaappe naa77u sha7u wara gidiyaagaa keena haahuwan eqqite” yaagidosona.

<sup>5</sup> Yaasu asaa, “Intte huuphiyau geeyite; aissi giikko, GODAI wontto intte gidдон maalaalissiyaabaa oottana” yaagiis. <sup>6</sup> Qassi Yaasu qeeseta, “Maachchaa Taabootaa tookkidi, asaappe sinttau aadhdhite” yaagidi yootiis. Yootin Maachchaa Taabootaa tookkidi, asaappe sinttau aadhdhidosa.

<sup>7</sup> GODAI Yaasa, “Taani Muuseera gididoogaadan, nenaara gidanaagaa Israa7eela asai ubbai erana mala, hachchi eta sinttan taani nena xoqqu xoqqu oottanau doommana. <sup>8</sup> Neeni Maachchaa Taabootaa tookkiya qeeseta, ‘Yorddaanoosa SHaafaa dooni gakkiiyo wode, haattan gelidi eqqite’ yaagada azaza” yaagiis.

<sup>9</sup> Yaasu Israa7eela asaa, “Haa yiite; yiidi GODAA intte Xoos-saa qaalaa siyite. <sup>10</sup> De7o Xoossai intte gidдон de7iyooogaanne i tumuppe Kanaaneta, Hiiteta, Hiiweta, Parzzeta, Gerggeeseta, Amooretanne Yaabuusata intte sinttappe kessanaagaa intte eranaagee, <sup>11</sup> sa7aa ubbaa Godaa Maachchaa Taabootai intteppe sinttatidi, Yorddaanoosa SHaafaa pinniyo wodiyaana. <sup>12</sup> Ha77i Israa7eela zaretuppe tammanne naa77u asata doorite; issi issi zariyaappe issi issi asa gido. <sup>13</sup> Sa7aa ubbaa Godaa, GODAA Maachchaa Taabootaa tookkida qeesetu tohoi Yorddaanoosa haattaa bochchiyo wode, qommoppe duge goggiya Yorddaanoosa haattai eqqana; eqqidi issisaa shiiqidi doorettana” yaagiis.

<sup>14</sup> Asai Yorddaanoosa SHaafaa pinnanau bantta dunkkaaniyaappe kiyido wode, Maachchaa Taabootaa tookkida qeeseti asaappe sinttan hemettidosona. <sup>15</sup> Kattaa cakkiyo wodiyan ubban Yorddaanoosa SHaafai kixxees. Gidikonne, Maachchaa Taabootaa tookkida qeeseti Yorddaanoosa SHaafaa gakkina, eta tohoi haattaa gaxaa yedhdhido wode, <sup>16</sup> qommoppe duge goggiya haattai eqqi bayiis; hini daro haahosan, Xarttaana giyoosan de7iya Addaama giyo kataman issisaa shiiqidi doorettiis. Duge Aaraba garan de7iya Maxine Abbau goggiya haattai qassi muleera duuxxidi atti bayiis. Yaatin, asai Yarkko katamaa baazzaara pinniis. <sup>17</sup> Israa7eela asai mela biittaa yedhdhidi pinniyo wode, asai ubbai pinnidi wurana gakkanaassi GODAA Maachchaa Taabootaa tookkida qeeseti Yorddaanoosa SHaafaa gidдон mela biittan eqqidosa.

### 4

#### *Hassayissiya SHuchchata Essidosona*

<sup>1</sup> Asai ubbai Yorddaanoosa SHaafaa pinnidi wurido wode, GODAI Yaasa, <sup>2</sup> “Israa7eela asaappe tammanne naa77u asata doora; issi issi zariyaappe issi issi asa gido. <sup>3</sup> Yaatada

eta, ‘Yorddaanoosa SHaafaa gidдон qeesetu tohoi eqqidosaappe tammanne naa77u shuchchata ekkite; he shuchchata tookki efidi, hachchi qammi intte aqiyu sohuwan wottite’ yaagada azaza” yaagiis.

<sup>4</sup> Yaasu Israa7eela zariyaappe issuwaa issuwaa ekkidi, tammanne naa77u asaa dooridoogeeta xeesiis. <sup>5</sup> Xeesidi eta, “GODAA intte Xoossaa Maachchaa Taabootai de7iyo sohuwaa guyye Yorddaanoosa SHaafaa gelite; gelidi Israa7eela zaretu qoodan, ubbaikka issi issi shuchchaa intte hashiyan tookkite. <sup>6</sup> Ha shuchchati GODAI hachchi oottidobaa inttena hassayissiya malaata gidona. Wodeppe intte naati inttena, ‘Ha shuchchati aibabee?’ yaagidi oichchiyo wode, <sup>7</sup> intte, ‘GODAA Maachchaa Taabootaa sinttan Yorddaanoosa SHaafai gogettaa aggidi eqqidoogaa Israa7eela asaa merinau hassayissoosona. Maachchaa Taabootai pinnishin, Yorddaanoosa haattai duuxxiis’ yaagidi etau odite” yaagiis.

<sup>8</sup> Yaagin Israa7eelati Yaasu azazidoogaadan oottidosona. GODAI Yaasussi yootidoogaadan, Israa7eela zaretu qoodan asati tammanne naa77u shuchchata Yorddaanoosa SHaafaa gidoppe ekkidosona; tookki ehiidi, bantta aqiyu sohuwan wottidosona. <sup>9</sup> Yaasu Maachchaa Taabootaa tookkida qeesetu tohoi Yorddaanoosa SHaafaa gidдон eqqidosa, hara tammanne naa77u shuchchata essiis; he shuchchati hachchi gakkanaassi yan de7oosona. <sup>10</sup> GODAI Yaasa azazidobaa ubbaa asai polana gakkanaashin, Maachchaa Taabootaa tookkida qeeseti Yorddaanoosa SHaafaa gidдон eqqidi gam77idosona; Muusee Yaasa azazido azazoikka hegaa.

Asai eesotidi shaafaa pinniis. <sup>11</sup> Asai ubbai pinnidoogaappe guyyiyan, GODAA Maachchaa Taabootainne qeeseti asai xeellishin pinnidosona. <sup>12</sup> Muusee azazidoogaadan, Roobeela zareti, Gaada zaretinne Minaase zaretuppe baggai ola miishshaa oiqqidi, Israa7eela asaa sinttaara pinni uttidosa. <sup>13</sup> Eta qoodai oitamu sha7u gidiyaagaa. Eti GODAA sinttan, Yarkko matan de7iyya dembban olau salppidosona. <sup>14</sup> He gallassi GODAI Yaasa Israa7eela asaa ubbaa sinttan xoqqu xoqqu oottiis. Hegaa gishshau Muusa bonchchidoogaadan Yaasakka a de7o laitta ubban bonchchidosona.

<sup>15</sup> GODAI Yaasa, <sup>16</sup> “Maachchaa Taabootaa tookkida qeeseti Yorddaanoosa SHaafaappe kiyanaadan azaza” yaagidi yootin, <sup>17</sup> Yaasu qeeseta, “Yorddaanoosa SHaafaappe kiyite” yaagidi azaziis. <sup>18</sup> Azazin GODAA Maachchaa Taabootaa tookkida qeeseti Yorddaanoosa SHaafaa gidoppe kiyidosona; kiyidi mela biittaa eti yedhdhaanne, sohuwara Yorddaanoosa haattai ba sohuwaa simmi bayiiis. Simmidi kase goggiyoogaadan gaxaa gakkanaassi kixxidi, gogettaa doommiis.

<sup>19</sup> Asai koiro aginan he aginau tammannta gallassan Yorddaanoosa SHaafaa pinnidi, Yarkkoora arshsho baggan zawatiya Gelggalan dunkkaanidosona. <sup>20</sup> Yaasu Yorddaanoosa SHaafaappe ehettida tammanne naa77u shuchchata Gelggalan essiis. <sup>21</sup> Essidi Israa7eela asaa hagaadan yaagiis; “Wodeppe intte zareti bantta aawata, ‘Ha shuchchati aibabee?’ yaagidi oichchiyo wode, <sup>22</sup> ‘Israa7eela asai Yorddaanoosa SHaafaa mela biittaa yedhdhidi pinnidoogaa hassayissiyaageeta’ yaagidi odite. <sup>23</sup> Nuuni pinnana gakkanaassi, GODAI nu Xoossai Zo7o Abbaa kase nu sinttan melissidoogaadan, inttekka pinnana gakkanaassi, GODAI intte Xoossai Yorddaanoosa SHaafaa intte sinttan melissiiis. <sup>24</sup> Hegaa i oottidoogee sa7an de7iyya asai ubbai GODAA wolqqai ai keena gitakko eranaassanne inttekka GODAU, intte Xoossau, merinau yayyanaassa” yaagiis.

## 5

<sup>1</sup> Yorddaanoosa SHaafaappe arggo baggaara de7iyya Amooretu kawotinne Meediteraane Abbaa lanqqiyaa lanqqiyaa oiqqidi de7iyya Kanaanetu kawoti ubbai, Israa7eela asai pinnana gakkanaassi GODAI Yorddaanoosa SHaafaa haattaa melissidoogaa siyido wode, eta wozanai maashiis. Maashin eti Israa7eela asaara gaittanau xalibookkona.

*Israa7eela Attumaasai Qaxxarettiis*



<sup>2</sup> He wode GODAI Yaasa, “Saluwaa giyo shuchchaappe qara magilaalaa giigissada, Israa7eela attumaasaa beniigeetuugaadan ha77ikka qaxxara” yaagiis. <sup>3</sup> Yaagin Yaasu saluwaa giyo shuchchaappe qara magilaalaa giigissidi, Qaxxaraa Keraa giyo sohuwan Israa7eela asaa qaxxariis. <sup>4</sup> I heгаа oottido gaaso: Gibxxeppe kiyida asan laittai olau gakkido attumaasai ubbai Gibxxeppe biiddi bazzon haiqqiis. <sup>5</sup> Gibxxeppe kiyida attumaasai ubbai qaxxarettiis; shin bazzon yuuyiyo wode yelettida attuma naati issoinne qaxxarettiibeenna. <sup>6</sup> Israa7eela asai GODAASSI azazettennan ixido gishshau, Gibxxeppe kiyiyo wode laittai olau gakkido attumaasai ubbai haiqqidi wurana gakkanaashin bazzon oitamu laittaa yuuyiis. Hegeenne, GODAI eta, “Eessainne maattai goggiyo aradda biittaa, taani kase intte maizza aawatussi immana giido he biittaa intte be7ekketa” giido qaalai polettanaassa. <sup>7</sup> Hegaа gishshau GODAI eta naata eta sohuwan denttiis; Yaasu qaxxaridoogeetikka hegeeta. Eti qaxxarettennan de7iyoogee ogiyan biiddi eti qaxxarettiibeenna gishshaassa.

<sup>8</sup> Asai ubbai qaxxarettidoogaappe guyyiyan, eta mazunttai paxana gakkanaassi bantta dunkkaanidosan takkidosona. <sup>9</sup> GODAI Yaasa, “Hachchi taani Gibxxetu boriyaa intteppe diggaas” yaagiis. Yaagin he sohuwaa sunttai hachchi gakkanaassi Gelggala1 geetettes.

<sup>10</sup> Israa7eela asai Yarkko dembban Gelggala giyoosan dunkkaanidi, aginau tammanne oiddantta gallassi omaridaagan Paasikaa Baalaa bonchchiis. <sup>11</sup> Paasikaappe guyyiyan wonttetta gallassi, biittan morkkida kattaa aifiyaappe irshshoi gelibeenna oittaaanne xiixettida tiyaa miis. <sup>12</sup> He biittan morkkida kattaa miido wonttetta gallassi mannai bukkiyoogaa aggi bayiis. Hegaappe guyyiyan Israa7eela asai mannaa demmibeenna. He wodeppe doommidi eti Kanaanen morkkida kattaa miiddi de7idosona.

### *Yaasanne Bisuwaa Oiqqida Bitaniyaa*

<sup>13</sup> Yaasu Yarkko matan de7iyo wode, xoqqu giidi xeellidi, issi bitanee bisuwaa shoddi oiqqidi, ba sinttan eqqidaagaa be7iis. Yaasu akko shiiqidi, “Neeni nu bagga aseeyye nu morkketu bagga aseey?” yaagiis.

<sup>14</sup> Yaagin bitanee, “Taani o baggakka gidikke. SHin taani GODAA olanchchatu gadaawa gidada ha77i yaas” yaagiis.

Yaagin Yaasu sa7an kunddi goinnidi, “Ta godai ba ashkkaraayyo yootiyoobai aibee?” yaagiis.

<sup>15</sup> GODAA olanchchatu gadaawai, “Neeni eqqido sohoi geeshsha gidido gishshau, ne tohuwaappe caammaa kessa” yaagiis. Yaagin Yaasu i giidoogaadan oottiis.

## 6

### *Yarkkoi Kunddiis*

<sup>1</sup> Israa7eela asaayyo yayyido gaasuwan Yarkko katamaa dirssaa penggeti gorddet-tidi naagettoosona; katamaa gelanaunne katamaappe kiyanau danddayiya ooninne baawa. <sup>2</sup> GODAI Yaasa, “Xeella, taani Yarkko katamaa a kawuwaarakka a mino olanchchatuurakka ne kushiyan aattada immaas. <sup>3</sup> Neeninne ne olanchchati salppidi, usuppun gallassi gakkanaassi hachchi hachchi katamaa dirssaa issitoo yuuyi aadhdhite. <sup>4</sup> Qassi laappun qeeseti dorssatu kaciyaappe kessido laappun malkkatata oiqqidi, GODAA Maachchaa Taabootaa sinttaara hemettona. Laappuntta gallassi qeeseti malkkatata punnishin, olanchchati salppidi, issippe katamaa laapputoo yuuyi aadhdhite. <sup>5</sup> Hegaappe guyyiyan malkkatata punettaa goochchidi punniyoogaa siyiyo wode, sohuwaara asai ubbai ba qaalaa xoqqu oottidi waasso. Yaatobare katamaa dirssaa gimbee kunddana; kunddin asai ubbai sinttau lauhu giidi gelana” yaagiis.

1 5:9 “Gelggala” giyoogee Ibraawettuwan “Diggiis” woikko “Gonddorssiis” giyoogaa milatees.



<sup>6</sup> Nawe na7ai Yaasu qeeseta xegidi, “GODAA Maachchaa Taabootaa tookkite; inteppe laappun qeeseti laappun malkkatata oiqqidi, Maachchaa Taabootaappe sinttau aadhdhidi hemettona” yaagiis. <sup>7</sup> Yaagidi asaa, “Sinttau biite; katamaa yuuyi aadhdhite; olau giigidaageetikka GODAA Maachchaa Taabootaa sinttan hemettona” yaagidi azaziis.

<sup>8</sup> Yaasu asaassi haasayidoogaadan, laappun qeeseti laappun malkkatata GODAA sinttan oiqqidi, punniiddi hemettidosona; qassi GODAA Maachchaa Taabootai eta kaalliis. <sup>9</sup> Olau giigidaageeti malkkatata punniya qeesetu sinttan hemettiyo wode, guyyeera naagiya olanchchati Maachchaa Taabootaa guyyeera kaallidosona. He wode ubbankka malkkatati punettoosona. <sup>10</sup> SHin Yaasu asaa, “Taani inttena, ‘Waassite!’ gaana gallasai gakkanaassi, ola waasuwaa waassoppite; intte qaalai siyettoppo; issi qaalakka qaattoppite. Digin he wode waassite!” yaagidi azaziis. <sup>11</sup> Yaatidi GODAA Maachchaa Taabootai tookettidi, he katamaa issiton yuuyi aadhdhanaadan oottiis. Hegaappe guyyiyan asai ba dunkkaanidosaa simmidi, qammaa yan aqiis.

<sup>12</sup> Wonttetta gallassi Yaasu guuridi denddiis; qeesetikka GODAA Maachchaa Taabootaa tookkidosa. <sup>13</sup> Laappun malkkatata oiqqida laappun qeeseti sinttau aadhdhidi, malkkatata punniiddi GODAA Maachchaa Taabootaa sinttan hemettidosona. Olau giigidaageeti etappe sinttaara hemettidosona; guyyeera naagiya olanchchatikka GODAA Maachchaa Taabootaa guyyeera kaallidosona. He wode ubbankka malkkatati punettoosona. <sup>14</sup> Naa77antto gallassi katamaa issitoo yuuyi aadhdhidi, bantta dunkkaanidosaa simmidosona. Usuppun gallassi gakkanaassi hegaadan hanidosona.

<sup>15</sup> Laappunnta gallassi xalqgee dolishin denddidi, kaseegaadan katamaa laapputoo yuuyi yuuyi aadhdhidosa. Katamaa eti laapputoo yuuyi yuuyi aadhdhidoi he gallassa xalaalaana. <sup>16</sup> Laappunnta yuushshan, qeeseti malkkatata punniyo wode, Yaasu asaa, “GODAI katamaa intteyyo aattidi immido gishshau, waassite! <sup>17</sup> Katamainne katamaa giddon de7iyaabai ubbai GODAAYYO baqa gididi, xayanau bessees. Nuni biittaa xomoosanau kiittido asata qosada ashshido gishshau, shaaramuxiyaa Ra7aabanne i son iira issippe de7iya asaa xalaalai attana. <sup>18</sup> SHin intte baqa gididabaappe aibanne ekkennaadan intte huuphiyau naagettite. Baqa gididabaappe intte ekkikko, Israa7eelati dunkkaanido sohuwaa bayiya soho oottana; yaatidi he sohuwaayyo metuwaa ehaana. <sup>19</sup> Birainne worqqai ubbai, qassi nahaasiyaappenne birataappe oosettida miishshati ubbai GODAAYYO geeyidabaa gidona. Eti GODAA buquraa minjiyo sohuwan de7ona” yaagiis.

<sup>20</sup> Hegaa gishshau malkkatati punettin asai waassiis. Malkkatatu punettan asai ba qaalaa xoqqu oottidi waassiis; waassin sohuwaara katamaa dirssaa gimbee kunddi bayiis! Hegaappe guyyiyan asai ubbai sinttau lauhu gi gelinne katamaa oiqqi bayiis. <sup>21</sup> Oiqqidi kataman shemppooraa paxa de7idabaa ubbaa, maccaa attumaa, naatuwaa cimaa, miizaa, dorssanne hariyaa ubbaa qara bisuwan wurssi woriis.

<sup>22</sup> Yaasu biittaa xomoosanau kiittetida naa77u asata, “SHaaramuxee Ra7aabi soo biite; biidi kase intte iyyo caaqqidoogaadan, onne i so asaa ubbaa gaxi kessite” yaagiis. <sup>23</sup> Yaagin biittaa xomoosida wodallati biidi, Ra7aabo, i aawaa, i aayyiyo, i ishanttanne i dabbota ubbaa gaxi kessidosona. Kessidi Israa7eela asai dunkkaanido sohuwaappe gaxaara wottidosona. <sup>24</sup> Hegaappe guyyiyan katamaanne a giddon de7iyaabaa ubbaa taman xuuggidosona; shin biraanne worqqaa qassi nahaasiyaappenne birataappe oosettida miishshata GODAA buquraa minjiyo sohuwan wottidosona. <sup>25</sup> SHin Yaasu shaaramuxiyo Ra7aabo i aawaa so asaaranne iira de7iya dabbotu ubbaara haiquwaappe ashshiis. Aissi giikko, Yaasu Yarkko katamaa xomoosanau kiittido asata a kase qosada ashshaasu. I zreti hachchi gakkanaassi Israa7eela biittan de7oosona.

<sup>26</sup> He wode Yaasu,  
“Denddidi ha Yarkko katamaa

zaaretti keexxiya urai GODAA sinttan  
qanggettidaagaa gido.  
Biron baasuwaa baasiyo wode,  
a baira na7ai haiqqo.  
Penggiiyaa aattiyo wode,  
a wurssetta kaalo na7ai haiqqo”  
yaagidi qanggiis.

<sup>27</sup> GODAI Yaasuura gidiis; Yaasu woreenne biitta ubbaa gakkiiis.

## 7

### *Akkaana Nagaraa*

<sup>1</sup> Israa7eela asai GODAAYYO ammanettennan ixxiidi, hirima gi wottidobaappe ekkiis. Hegaa ekkidaagee Akkaana; Akkaani Karmma na7aa; Karmmi Zimira na7aa; Zimiri Yihudaa zare gidiya Zaraaha na7aa. Yaatin, GODAA hanqqoi Israa7eela asaa bolli eexxi kiyiis.

<sup>2</sup> Yaasu Yarkkon de7iiddi Beetele katamaappe arshsho baggaara Beeti-Aweena giyoosaa matan de7iya Aaya giyo katamaa asa kiittiis. Kiittiiddi, “Biite; biidi he biittaa xomoosite” yaagiis. Yaagin asati biidi, Aaya katamaa xomoosidosona.

<sup>3</sup> Xomoosida asati Yaasukko simmidi yiidi, “Ubba asai Aaya katamaa olanau baanau koshshenna; naa77u woikko heezzu sha7u asaa yedda. Yan amarida asai de7iyo gishshau, asai ubbai daafuroppo” yaagidosona. <sup>4</sup> Yaatin, heezzu sha7u gidiya asati olettanau Aaya katamaa biidosona. SHin eti Aaya katamaa asaa sinttaappe baqatidosona. <sup>5</sup> Aaya katamaa dirssaa penggiyaappe doommidi, shuchchaa qoo7iyoosaa gakkanaassi Israa7eela asaa yedettidosona; yedettiiddi keraa dugettan hasttamanne usuppun gidiya asaa woridosona. Hegan asaa wozanai maashidi, haatta kiyiis.

<sup>6</sup> Hegaappe guyyiyan Yaasu azzanidi, ba maayuwaa pooshshiis; pooshshidi GODAA Taabootaa sinttan omarssi gakkanaashin gufanniis. Israa7eela cimatikka aagaadan hanidosona; bantta huuphiyanka baanaa qolidosona. <sup>7</sup> Yaatin, Yaasu hagaadan yaagiis; “Hai poora! Ubbaa Haariya GODAU, nuna Amooore asaassi aatta immada wurssissanaashin aibissi Yorddaanoosa SHAafaa pinttada ehaadii? Nuuni Yorddaanoosa SHAafaappe hefintta baggan attorkkoniishsha! <sup>8</sup> Abeet Godau, Israa7eela asai xoonettidi, ba morkketu sinttaappe baqatidoogaa, taani woigoo? <sup>9</sup> Kanaanetinne ha biittan de7iya asai ubbai ha yohuwaa siyidi, nuna dooddana; dooddidi nuna biittaappe xaissana. Yaatin, ne gita sunttaayyo neeni oottiyoobai aibee?” yaagiis.

<sup>10</sup> Yaagin GODAI Yaasa, “Dendda eqqa! Hagaadan aissi gufannadii? <sup>11</sup> Israa7eela asai nagaraa oottiis; taani etaara maacettido ta maachchaa kanttidosona. Eti hirima geetettida miishshatuppe ekkidosona; wuuqqidosona; worddotidosona. Qassi he miishshaa eti bantta miishshaara gatti wottidosona. <sup>12</sup> Hegaa gishshau, Israa7eelati bantta morkketu sinttan eqqanau danddayokkona. Eti xayanau bessiyo gishshau, bantta morkketu sinttappe baqatidosona. Hirima geetettida miishshaa intte gidдон de7iyaagaa intte xaissana xayikko, hagaappe sinttau taani inttenaara gidikke.

<sup>13</sup> “Dendda; denddada asaa geeshsha. Etayyo hagaadan yaagada oda; ‘Wonttossi intte huuphiyau geeyite. GODAI Israa7eela Xoossai inttena hagaadan yaagees; ‘Israa7eelatoo, hirima geetettida miishshai intte gidдон de7ees. Intte he miishshaa intte gidдoppe diggana gakkanaashin, intte morkketu sinttan eqqanau danddayekketa” yaagees. <sup>14</sup> Wontto maallado, intte zariyan zariyan shiiqite; shiiqin GODAI, “Hagaa” giyo zaree, ba yaran yaran shiiqana; qassi GODAI, “Hagaa” giyo yarai ba so asan asan shiiqana; qassi GODAI, “Hagaa” giyo so asai issi issi asi kayan kayan shiiqana. <sup>15</sup> Hegaappe guyyiyan hirima geetettidabaara oiqettida asi, babaa ubbaara taman

xuugettana. Aissi giikko, GODAA maachchaa i kanttidi, Israa7eela asaa gidдон kaushshabaa oottiis' yaaga" yaagiis.

<sup>16</sup> Yaasu wonttetta gallassi guuran denddidi, Israa7eela asaa a zariyan zariyan shiishshiis; shiishshin Yihudaa zaree ehettiis. <sup>17</sup> Yihudaa zaree shiiqin, Zaraaha yarai ehettiis; Zaraaha yarai shiiqin, Zimira so asai ehettiis. <sup>18</sup> Zimira so asai shiiqin, wurs-settan Zimira na7aa na7ai, Karmma na7ai Akkaani ehettiis. <sup>19</sup> Yaatin, Yaasu Akkaana, "Ta na7au, GODAA Israa7eela Xoossaa bonchcha; a galata. Ane neeni oottidobaa taassi qosennan oda" yaagiis.

<sup>20</sup> Yaagin Akkaani Yaasa, "Ee tuma! Taani GODAA Israa7eela Xoossaa naaqqaa. Taani oottidoogee haggaa: <sup>21</sup> nuuni omooddido miishshaa gidдон taani issi lo77iya Baabiloone biittaa kaabbaa, naa77u xeetu xaqara biraanne bagga kilo gidiya worqqaa be7aas; be7ada ekkanau amottido gishshau ekkaas. Yaatada ta dunkkaaniyaa gidдон biitta garssan qottaas; biraikka ubbaappe garssaara de7ees" yaagiis.

<sup>22</sup> Yaagin Yaasu asaa kiittin, eti dunkkaaniyaa woxxidi geliyo wode, dunkkaane gidдон miishshaa qotti wottidoogaa demmidosona; biraikka miishshatuppe garssaara de7ees. <sup>23</sup> Kiitettidi biida asati miishshaa dunkkaane giddoppe ekkidi, Yaasukkonne Israa7eela asaa ubbaakko ehiidosona; ehiidi GODAA sinttan wottidosona.

<sup>24</sup> Hegaappe guyyiyan Yaasunne Israa7eela asai ubbai Akkaana biraa, kaabbaa, worqqaa, a attuma naatanne macca naata, a miizaa, haretanne dorssata, a dunkkaaniyaanne ayyo de7iyaabaa ubbaa ekkidi, Metuwaa Wombbaa giyoosaa ehiidosona. <sup>25</sup> Ehin Yaasu Akkaana, "Ha metuwaa nu bolli aissi ehaadii? GODAI hachchi ne bolliikka metuwaa ehaana" yaagiis.

Yaagin Israa7eela asai ubbai Akkaananne a so asaa shuchchan caddi woridi, ayyo de7iyaabaa ubbaarakka taman xuuggiis. <sup>26</sup> Eti Akkaana bollan hachchi gakkanaassi de7iya daro shuchchaa keelidosona. Yaatin, GODAI ba eexxiya hanqquwaa wodhdhiis. Hachchi gakkanaashin he sohoi Metuwaa Wombbaa geetettidoi hegaassa.

## 8

### *Aaya Katamai Xoonettiis*

<sup>1</sup> GODAI Yaasa, "Yayyoppa; hirggoppa! Olanchchata ubbaa nenaara ekkada, Aaya katamaa olanau kiya. Aaya katamaa kawuwaa, a asaa, a katamaanne a biittaa taani ne kushiyan aattada immaas. <sup>2</sup> Neeni Yarkko katamaanne a kawuwaa xaissidoogaadan, hegaadankka Aaya katamaanne a kawuwaa xaissa. Gidikkonne, bonqqido omooduwaanne di7ido mehiyaa intteyyo ekkite. Katamaappe guyye baggaara zuggidi naagiya olanchchata wotta" yaagiis.

<sup>3</sup> Yaagin Yaasunne olanchchati ubbai Aaya katamaa olanau denddidosona. Yaasu ba olanchchatu giddoppe hasttamu sha7u gidiya mino olanchchata dooridi, qamman yeddiis. <sup>4</sup> Yeddiiddi eta hagaadan yaagidi azaziis; "Siyite, katamaappe guyye baggaara zuggidi naagite. Katamaappe haakkidi booppite; ubbaikka giigidi naagite. <sup>5</sup> Taaninne tanaara de7iya asai ubbai katamaakko shiiqana. He wode Aaya katamaa asai kaseegaadankka nuna olana giidi kiyana; kiyin nuuni etappe baqatana. <sup>6</sup> Katamaappe eti wuri kiyana gakkanaashin, nuuni etau woxxana; yaatobare eti, 'Kaseegaadankka Israa7eelati nu sinttappe baqatoosona' yaagana. <sup>7</sup> He wode intte zuggidosaappe kiyinne, katamaa oiqqi aggana; GODAI intte Xoossai katamaa intte kushiyan aatti immana. <sup>8</sup> Katamaa oiqqidoogaappe guyyiyan, GODAI azazidoogaadan taman xuuggite. Simmi taani intteyyo odaas" yaagiis.

<sup>9</sup> Yaagidi Yaasu olanchchata yeddiis; yeddin eti zuggiyoosaa biidosona; biidi Aaya katamaappe arggo baggaara de7iya Beeteleppenne Aayappenne gidduwan zuggidi naagidosona. SHin Yaasu he galla qammi asaara issippe aqiis.

<sup>10</sup> Wonttetta gallassi guuran Yaasu denddidi, olanchchata salppissiis; yaatidi inne Israa7eela cimatinne olanchchata kaalettiiddi Aaya katamaa biidosona. <sup>11</sup> Aara de7iya olanchchati ubbai biidi, Aaya katamaa matidosona; matidi katamaappe huuphessa baggaara dunkkaanidosona; etappenne Aaya katamaappenne gidduwan wombbai de7ees. <sup>12</sup> Yaasu ichchashu sha7u olanchchata efiidi, katamaappe arggo baggaara, Beeteleppenne Aayappe gidduwan zugissi wottiis. <sup>13</sup> Katamaappe huuphessa baggaara de7iya olanchchatanne katamaappe arggo baggaara zuggi uttida olanchchata ubbaa sohuwaa sohuwaa oittiis. He gallassi qammi Yaasu he wombban aqiis.

<sup>14</sup> Aaya katamaa kawoi heгаа be7ido wode, inne a olanchchatinne ubbai guuran ellelli denddidi, Yorddaanoosa SHaafaa duge efiya ogiyaa oiqqidi, Israa7eela asaara olaa gaittanau yiidosona; shin kawoi katamaappe guyye baggaara zuggi uttida olanchchati de7iyooogaa eribeenna. <sup>15</sup> Yaasunne Israa7eela ubbainne xoonettidabaa milatidi, eta sinttappe bazzo simmidi baqatidosona. <sup>16</sup> Aaya kataman de7iya asai ubbai eta yedettanau xeegettidosa. Xeegettidi Yaasa yedettidosona; yedettiiddi katamaappe haakkidi biidosona. <sup>17</sup> Aayaaninne Beeteelen de7iya asai ubbai Israa7eela asaa yedettanau wuri kiyiichchin, katamai naagiyaabi bannan coo dooya attiiis.

<sup>18</sup> Hegaappe guyyiyan GODAI Yaasa, “Ne kushiyan de7iya tooraa Aaya katamaakko zaarada mala. Aissi giikko, taani Aaya katamaa ne kushiyan aattada immana” yaagiis. Yaagin Yaasu ba tooraa katamaakko zaaridi maliis. <sup>19</sup> Yaasu tooraa yaa zaaridi malaanne, zугan de7iya olanchchati bantta zuggidosoappe eesoti denddidi, katamaa geli bayidosona. Gelidi oiqqidosona; sohuwaarakka katamaa taman oitti bayidosona.

<sup>20</sup> Aaya katamaa asai guyye simmidi xeelliyoo wode, katamaa cuwai saluwaa kiyidoogaa be7idosona; shin yaanne haanne baqatanau danddayibookkona. Aissi giikko, bazzo baqatida Israa7eela asai banttana yedettida eta bolli guyye simmiis. <sup>21</sup> Yaasunne Israa7eela asai ubbai zuggi uttida olanchchati katamaa oiqqidoogaanne cuwai saluwaa kiyidoogaa be7ido wode guyye simmidi, Aaya katamaa asaa woridosona. <sup>22</sup> Zuggi uttida olanchchatikka katamaappe eta bolli kiyidosona. Yaatin, Aaya olanchchati Israa7eela olanchchatun naa77u baggaara direttidosona. Issi asinne paxa attennan woikko kessi ekkennan ubbaa wori wurssidosa. <sup>23</sup> SHin Aaya katamaa kawuwaa paxa oiqqidi, Yaasukko ehiidosona.

<sup>24</sup> Israa7eela asai Aaya katamaa asaa banttana yedettido dembban qara bisuwan butti wurssidoogaappe guyyiyan, ubbaikka guyye Aaya katamaa simmidi, kataman attida asaa ubbaa qara bisuwan woridosona. <sup>25</sup> He gallassi Aaya katamaa asai attumainne maccai ubbai wuri haiqqiis; haiqqida asai muleera tammanne naa77u sha7a. <sup>26</sup> Yaasu Aaya kataman de7iyaabaa ubbaa mule wurssana gakkanaashin, katamaakko mali wottido tooraa duge wottibeenna. <sup>27</sup> SHin GODAI Yaasa azazidoogaadan, Israa7eela asai he katamaa mehiyaanne omooduwaa banttau ekkidosona. <sup>28</sup> Yaasu Aaya katamaa xuuggiis; xuuggin hachchi gakkanaassi shuchcha keelanne baisa soho gididi atti aggiis. <sup>29</sup> Aaya katamaa kawuwaa omarssa gakkanaassi mittaa bollan kaqqiis. Awai wulliyoo wode, Yaasu azazin, a ahaa kaqqido mittappe wottidosona; wottidi katamaa geliyo penggiyan olidosona; a bollan daro shuchchaa keelidosona. Keelido shuchchai hachchi gakkanaassi he sohuwan de7ees.

### *Eebaala Deriyan Higgee Nabbettiis*

<sup>30</sup> Hegaappe guyyiyan Yaasu Eebaala giyo deriyaa bollan GODAASSI Israa7eela Xoossaassi yarshshuwaa yarshshiyo sohuwaa gimbbiis. <sup>31</sup> GODAA ashkkarai Muuse Israa7eela asaa azazidoogaadaaninne Muuse Higgiyaa Maxaafan xaafettidoogaadan, yarshshiyo sohoi masettibeennanne birati bochchibeenna shuchchaappe gimbbettiis. Gimbbettin an GODAAYYO xuuggiyo yarshshuwaanne issippetettaa yarshshuwaa yarshshidosona. <sup>32</sup> He sohuwan Israa7eela asai xeellishin, Yaasu Muuse higgiyaa koppiyaa shuchchaa bollan xaafiis. <sup>33</sup> Xaafiyo wode, Israa7eela asai ubbai, Israa7eela



zareti, allagati, cimati, gadaawatinne daannati ubbai GODAA Maachchaa Taabootaa tookkida Leewa zare gidiya qeesetu sinttan Maachchaa Taabootaappe ushachcha baggaaranne haddirssa baggaara eqqidosa. Etappe bagga asai bantta zokkuwaa Gariizana giyo deriyaakko zaarin, bagga asai Eebaala giyo deriyaakko zaaridi eqqidosa. Eti GODAA ashkkaarai Muusee kase azazidoogaadan, Israa7eela asaa anjjanau hegaadan hanidosona. <sup>34</sup> Hegaappe guyyiyan Higgiyaa Maxaafan xaafidoogaadan, Yaasu higgiyaa qaalaa ubbaa, anjuwaakka qanggettaakka nabbabiis. <sup>35</sup> Muusee azazidobaa ubbaappe Yaasu nabbabennan aggido issi qaalikka baawa. Kumetta Israa7eela yaa7aassi, maccaasaassi, naatussi, eta gidдон de7iya allagatussaarakka ubbaassi nabbabiis.

## 9

### *Gabaa7oona Asati Yaasa Cimmidosona*

<sup>1</sup> Yorddaanoosa SHaafaappe arggo baggaara de7iya kawoti ubbai, gezziyan de7iyaageeti, bargguwan de7iyaageeti, Meediteraane Abbaa xanxxaa oiqqidi biidi Liibaanoosa gakkanaashin de7iyaageeti, Hiitetu, Amooretu, Kanaanetu, Parzzetu, Hiiwetunne Yaabuusatu kawoti ubbai Israa7eela asai xoonidoogaa siyidosona. <sup>2</sup> Siyidi Yaasanne Israa7eela asaa olanau baanau issippe shiiqidosa.

<sup>3</sup> Gabaa7oona kataman de7iya Hiiweti Yaasu Yarkko katamaaninne Aaya kataman oottidobaa siyido wode, <sup>4</sup> cimmanau koyidosona. Eti shinqqiyaa qachchidi curqqa joinetanne daassaa wotti sikkido eessa ogorota hariyan caanidi, Yaasukko asa kiittidosona. <sup>5</sup> Kiitettida asati wurida ceega maayuwaa maayidi, wotti sikkido caammaa bantta tohuwan wottidosona; eti shinqqiyaassi giidi oiqqido qumai ubbai melidaaganne puulummidaagaa. <sup>6</sup> Hegaappe guyyiyan eti Yaasu dunkkaanidosaa Gelggala biidi, assinne Israa7eela asaassi, “Nuuni haaho biittaappe yiida. Hai nunaara saro de7ana mala maachchaa maacetterkktii” yaagidosona.

<sup>7</sup> Yaagin Israa7eela asai Hiiweta, “Intte nu biittan de7iya asakkonne shin, aibin eridi inttenaara maacettanee?” yaagiis.

<sup>8</sup> Yaagin eti Yaasa, “Nuuni ne ashkkaarata” yaagidosona.

Yaasu, “Intte oonee? Auppe yiidetii?” yaagidi oichchiis.

<sup>9</sup> Oichchin eti, “Nuuni ne ashkkaarati GODAA ne Xoossaa woriyaa siyidi, daro haaho biittaappe yiida. I Gibxxe biittan oottidobaa ubbaa nuuni siyida. <sup>10</sup> Qassi Yorddaanoosa SHaafaappe hefintta arshsho baggaara de7iya Amooretu kawota naa77aa, Haseboona Kawuwaa Sihoonanne Asttaaroota kataman de7iya Baasaane Kawuwaa Ooga i oottidobaakka siyida. <sup>11</sup> Nu dere cimatinne nu biittan de7iya asai ubbai nuna, ‘Intte baana ogiyau shinqqiyaa oiqqidi, biidi etaara gaittite; gaittidi eta, “Nuuni intte ashkkaarata; intte nunaara saro de7ana mala maachchaa maacetterkktii” yaagite’ yaagidosona.

<sup>12</sup> “Nuuni inttekko yaanau nu sooppe shinqqiyaa ekkiyo gallassi, ha oittai ho77ees; shin ha77i melidoogaanne puulummidoogaa be7ite! <sup>13</sup> Hageeti eessa ogoroti nuuni kunttiyo wode ooratta; shin ha77i daakettidoogaa be7ite! Ogee haaho gididoogaa gaa-suwan, nu maayoinne nu caammai wuriis” yaagidosona. <sup>14</sup> Yaagin GODAA oichchenan, Israa7eela asai eta shinqqiyaa amaridaagaa ekkiis. <sup>15</sup> Yaatin, Yaasu eti paxa atidi banttanaara saro de7ana mala maachchaa etaara maacettiis; maacettin maabaraa kaalettiyaageetikka he maachchaa qaalaa kanttennaadan caaqqidosona.

<sup>16</sup> Etaara maachchaa maacettido heezzantto gallasaappe guyyiyan, ha asati eta biittan de7iya shooro gidiyooгаа Israa7eela asai siyiis. <sup>17</sup> Siyidi Israa7eela asai heezzu gallassaa hemettidi, asati de7iyo katamata gakkiiis. Eta katamati Gabaa7oona, Kafira, Ba7erootanne Qiriyaati-Yi7aariima geettoosona. <sup>18</sup> SHin maabaraa sunttati etau GODAA Israa7eela Xoossaa sunttan caaqqido gishshau, eta woribookkona. Yaatin, kumetta maabarai sunttatu bollan zuuzummiis. <sup>19</sup> SHin halaqati ubbai hagaadan yaagidosona; “Nuuni etayyo GODAA Israa7eela Xoossaa sunttan caaqqido gishshau,



ha77i simmi eta bochchanau danddayokko. <sup>20</sup> SHin nuuni eta hagaadan oottana; nuuni etayyo caaqqido caaquwaa kaddin GODAA hanqqoi nu bollan wodhdhennaadan, eti paxa de7ona. <sup>21</sup> Eti de7ona; shin de7iiddi maabarau ubbau mittaa qanxxiyaageetanne haattaa tikkiyaageeta gidona” yaagidosona. Hegaa gishshau Gabaa7oonati sunttati giidoogaadan hanidosona.

<sup>22</sup> Yaasu Gabaa7oona asata xegidi, “Nu biittan de7iiddi, ‘Nuuni daro haaho biittaappe yiida’ giidi, aibissi nuna cimmidetii? <sup>23</sup> Intte hegaa hanido gishshau qanggettideta; intte merinau ta Xoossaa keettan mitta qanxxiyaanne haattaa tikkiya aille gidana” yaagiis.

<sup>24</sup> Eti Yaasuyyo zaaridi hagaadan yaagidosona; “Nuuni ne ashkkarati GODAI ha biittaa ubbaa intteyyo immanaadaaninne an de7iya asaa ubbaa intte sinttappe xaisanaadan ba ashkkaa Muusa azazidoogaa geeshshidi siyida. Hegaa gishshau intteppe nu shemppuwau daro yayyidi haga oottida. <sup>25</sup> Ha77i simmi nuuni ne kushiyan de7oos. Nuna neeyyo lo77onne suure milati beettaadan ootta” yaagidi zaaridosona. <sup>26</sup> Yaatin, Yaasu eta Israa7eela asai worennaadan ashshiis. <sup>27</sup> He gallassi Yaasu Gabaa7oona asata Israa7eela maabaraassinne GODAAYYO yarshshiyooaassi mittaa qanxxanaadaaninne haattaa tikkanaadan oottiis; oottin eti hachchi gakkanaassi GODAI asai baayyo goinnanaadan doorido sohuwan awaaninne hegaadan oottiiddi de7oosona.

## 10

### *Amooretu Kawoti Xoonettidosona*

<sup>1</sup> Yaasu kase Yarkko katamaa olidi bashshidoogaadaaninne eta kawuwaa woridoogaadan, Aaya katamaa olidi muleera bashshidoogaanne eta kawuwaakka woridoogaa Yerusalaame Kawoi Adoonixedeqi siyiis. Qassi Gabaa7oona asai Israa7eela asaara saro de7anau maacettidoogaanne ha77i etaara issippe de7iyooogaa siyiis. <sup>2</sup> Siyidikka a asaikka keehi yayyiis. Aissi giikko, Gabaa7oona katamai kawotu katamatuppe issuwaa mala gita katama; qassi he katamai Aaya katamaappe darees; an de7iya attumaasaikka mino. <sup>3</sup> Yaatin, Yerusalaame Kawoi Adoonixedeqi, Kebroona Kawuwaa Hohaamassi, Yarmmuuta Kawuwaa Piiraamassi, Laakisha Kawuwaa Yaafi7assinne, Egiloona kawuwaa Dabiirassi hagaadan yaagidi kiittiis; <sup>4</sup> “Gabaa7oona katamaa asai Yaasuuranne Israa7eela asaara saro de7anau maacettido gishshau, etaara olettanau yiidi tana maadderkketii” yaagiis. <sup>5</sup> Hegaappe guyyiyan Amooretu kawoti ichchashati Yerusalaame kawoi, Kebroona kawoi, Yarmmuuta kawoi, Laakisha kawoinne Egiloona kawoi bantta olanchchata issippe gattidosona. Bantta olanchchata ubbaa ekkidi pude biidi, Gabaa7oona katamaa dooddidi olidosona.

<sup>6</sup> Gabaa7oona asai Gelggalan dunkkaanida Yaasukko kiittidi, “Nuna ne ashkkarata aggoppa; eesuwan nuukko yaada nuna ashsha. Gezziyan de7iya Amooretu kawoti ubbai nuna olanau bantta olanchchata issuwaa oottido gishshau, neeni nuna maadda” yaagidosona.

<sup>7</sup> Yaagin Yaasu, aara de7iya olanchchati ubbainne mino asati ubbai Gelggalappe denddidi biidosona. <sup>8</sup> Biishin GODAI Yaasa, “Etau yayyoppa! Taani eta ne kushiyan aattada immaas. Etappe issoinne nenaara eqettanau danddayenna” yaagiis. <sup>9</sup> Hegaappe guyyiyan Yaasu Gelggalappe qamma ubban hemettiiddi aqidi, eti akeekennan de7ishin eta bolli woraajjiis. <sup>10</sup> GODAI Israa7eela asaa sinttan etau wozanaa kahaa bashshiis; yaatin, Israa7eela asai etappe daro asaa Gabaa7oonan woriis. Israa7eelati eta Beeti-Horoona efiya ogiyaa oittidi gooddiiddi, Azeeqanne Maqqeeda gakkanaashin buttidosa. <sup>11</sup> Beeti-Horoonappe duge Azeeqa efiya ogiyaa oiqqidi eti Israa7eela asaa sinttappe baqatishin, GODAI wolqqaama shachchaa saluwaappe eta bollan bukissiis. Bukissin Israa7eela asai bisuwan worido asaappe, shachchai worido asai qoodan dariis.

<sup>12</sup> GODAI Amooreta, Israa7eela asaayyo aattidi immido gallassi, Israa7eela asaa sinttan Yaasu Godaa,  
 “Awa aiffee Gabaa7oona bollan  
 wullennan takko.  
 Aginaikka Ayyaaloona Zanggaaraa bollan  
 eqqi bayo”

yaagiis. <sup>13</sup> Yaagin Israa7eela asai bantta morkketa xoonana gakkanaashin, awai wullennan takkiis. Aginaikka ba de7iyoosaappe qaaxxibeenna.

Hegee Yaashaara Maxaafan xaafetti uttiis. Awai saluwaassi giddo ginan qaaxxennan eqqiis; issi gallassa ubbaa awai wullennan takkiis. <sup>14</sup> GODAI asi yootidobaa siyido he gallassaa mala gallassi hegaappe kase gidinkka, hegaappe haa simminkka mulekka de7ibeenna. Tumukka GODAI Israa7eela asaassi olettiis.

<sup>15</sup> Hegaappe guyyiyan Yaasunne Israa7eela olanchchati ubbai bantta dunkkaanidosaa Gelggala simmidosona.

<sup>16</sup> He Amooretu kawoti ichchashati baqatidi, Maqqeeda katamaa matan de7iya gonggoluwaa gidдон qosettidosona. <sup>17</sup> Qosettin Yaasussi, “Ichchashu kawoti, Maqqeeda katamaa matan de7iya gonggoluwaa gidдон qosettidaageeta demmida” yaagidi odidosona.

<sup>18</sup> Odin Yaasu, “Gita shuchchata gondдорssidi, gonggoluwaa penggiyaa gorddite; gorddidi eta naagana mala, asa yan wottite. <sup>19</sup> SHin intte yan gam77oppite; intte morkketa gooddiiddi, guyyeera eta olite, eta eta katamaa gelissoppite. GODAI intte Xoossai eta intte kushiyan aattidi immiis” yaagiis. <sup>20</sup> Bantta gimbbettida katamata baqatidi gelida amara asati attin, hinkko asaa ubbaa Yaasunne Israa7eela asai wurssi woridosona. <sup>21</sup> Hegaappe guyyiyan, asai ubbai saruwan simmidi, Yaasu dunkkaanidi de7iyo Maqqeeda giyoosaa yiis. Heedeppe doommin Israa7eela asaa bollan issi qaalaanne qaattida asi baawa.

<sup>22</sup> Hegaappe guyyiyan Yaasu, “Gonggoluwaa penggiyaa dooyidi, he ichchashu kawota kessidi, tau haa ekki yiite” yaagiis. <sup>23</sup> Yaagin gonggoluwaa gidдoppe Yerusalaame kawuwaa, Kebroona kawuwaa, Yarmmuuta kawuwaa, Laakisha kawuwaanne Egiloona kawuwaa kessidi akko ehiidosona. <sup>24</sup> Eti he kawota Yaasukko ehiido wode, Yaasu Israa7eela asaa ubbaa baakko xeesiis; xeesidi banaara biida ola gadaawata, “Haa yiite; yiidi intte tohuwan ha kawotu qooriyaa yedhdhite” yaagiis. Yaagin yiidi bantta tohuwan eta qooriyaa yedhdhidosa. <sup>25</sup> Yaatin, Yaasu eta, “Yayyoppite; hirggoppite; minnitenne xalite. Intte olettiyo intte morkketa ubbaa GODAI hagaadan oottana” yaagiis. <sup>26</sup> Hegaappe guyyiyan Yaasu ichchashu kawota woriis; woridi ichchashu mittaa bollan kaqqiis; kaqqin eti omarssi gakkanaassi kaquwan pe7idosona. <sup>27</sup> Awai wulliyo wode, Yaasu azazin eta mittaappe wottidosona; wottidi eti kase qosettidi de7ido gonggoluwaa gidдо olidosona. Yaatidi gonggoluwaa penggiyaa gita gita shuchchata gondдорssidi gorddidosa. He shuchchati hachchi gakkanaassikka yan de7oosona.

### *Yaasu Amooretu Katamata Haraatakka Xooniis*

<sup>28</sup> He gallassi Yaasu Maqqeeda katamaa oiqqiis; oiqqidi katamaa muleera xaissiis; kataman de7iya asaa ubbaa issuwaanne ashshennan wurssi woriis. Yarkko katamaa kawuwaa kase woridoogaadan, Maqqeeda katamaa kawuwaakka woriis.

<sup>29</sup> Hegaappe guyyiyan Yaasunne aara de7iya asai Israa7eela asai ubbai Maqqeeda katamaappe Liibina giyo katamaa biidi olidosona; <sup>30</sup> GODAI he katamaakka katamaa kawuwaakka Israa7eela asaa kushiyan aattidi immiis. Yaasu issuwaanne ashshennan, kataman de7iya asaa ubbaa qara bisuwan busakkiis. Yarkko katamaa kawuwaa kase woridoogaadan, Liibina katamaa kawuwaakka woriis.

<sup>31</sup> Hegaappe guyyiyan Yaasunne aara de7iya Israa7eela asai ubbai Liibina katamaappe Laakisha katamaa biidosona; biidi he katamaa dooddidi olidosona. <sup>32</sup> GODAI Laakisha katamaa Israa7eela asaa kushiyan aattidi immiis; immin Yaasu he katamaa

naa77antto gallassaara oiqqiis; oiqqidi Liibina katamaa oottidoogaadan Laakisha kata-  
maakka oottiis; he kataman de7iya asaa ubbaa qara bisuwan busakkiis. <sup>33</sup> He wode,  
Gezeera katamaa Kawoi Horaami, Laakisha katamaa kawuwaa maaddanau yiis; shin  
Yaasu akka a asaakka xooniis; etappe issi asinne paxa attibeenna.

<sup>34</sup> Hegaappe simmidi, Yaasunne aara de7iya Israa7eela asai ubbai Laakisha kata-  
maappe Egiloona katamaa biidosona; biidi he katamaa dooddidi olidosona. <sup>35</sup> He gal-  
lassi Egiloona katamaa oiqqidosona; oiqqidi qara bisuwan busakkidosona. Laakisha  
katamaa oottidoogaadan, Egiloona kataman de7iya asa ubbaa wurssi woridosona.

<sup>36</sup> Hegaappe guyyiyan Yaasunne aara de7iya Israa7eela asai ubbai Egiloonappe  
Kebroona biidosona; biidi Kebroona olidosona. <sup>37</sup> Olidi he katamaa, eta kawuwaanne  
he katamaa yuushuwan de7iya qeeri katamata oiqqidosona. Etan de7iya asaa ub-  
baakka qara bisuwan busakkidosona. Issi asakka ashshibookkona. Yaasu Egiloona  
oottidoogaadan he katamaakka oottiis; etan de7iya asaakka wurssi woriis.

<sup>38</sup> Hegaappe guyyiyan Yaasunne aara de7iya Israa7eela asai ubbai Dabiira katamaa  
simmidi olidosona. <sup>39</sup> Eti he katamaakka, kawuwaakka, katamaa yuushuwan de7iya  
qeeri katamata ubbaa oiqqidosona; oiqqidi etan de7iya asaa ubbaa issuwaanne  
ashshennan wurssi woridosona. Yaasu Kebroona katamaanne Liibina katamaanne a  
kawuwaa oottidoogaadan, Dabiira katamaanne a kawuwaa oottiis.

<sup>40</sup> Yaasu biitta ubbaa, gezziyaa Neegeeba Bazzuwaa, garaanne bargguwaa, eta  
kawotuurakka oiqqiis. Oiqqidi GODAI Israa7eela Xoossai azazidoogaadan, biittaa  
bollan paxa shemppora de7iya asa ubbaa issuwaanne ashshennan wurssi woriis.

<sup>41</sup> Yaasu eta Qaadeesa-Barnneppe doommidi biidi Gaaza gakkanaassi, qassi Goshena  
biitta ubbaappe doommidi biidi Gabaa7oona gakkanaassi muliyaa xooniis. <sup>42</sup> GODAI,  
Israa7eela Xoossai Israa7eela asaassi olettido gaasuwan, Yaasu he kawota ubbaa eta  
biittaaarakka issi dentta olan xooniis. <sup>43</sup> Hegaappe guyyiyan Yaasunne Israa7eela asai  
ubbai bantta dunkkaanidosaa Gelgala simmidosona.

## 11

### *Yaasu Huuphessa Bagga Biittaa Kawota Xooniis*

<sup>1</sup> Haxoora katamaa Kawoi Yaabini Israa7eela asai xoonidoogaa siyido wode,  
Madoona katamaa Kawuwaa Yobaabassi, SHimiroona katamaa kawuwaassi, Ak-  
ishaafa katamaa kawuwaassi, <sup>2</sup> huuphessa baggaara gezziyan de7iya kawotussi, Gali-  
ila Abbaappe tohossa Yorddaanoosa Wombban de7iya kawotussi, arggo baggaara  
bargguwan de7iya kawotussinne arggo baggaara de7iya Doora kawuwaassi asaa ki-  
ittiis. <sup>3</sup> Qassi arshsho baggaaranne arggo baggaara de7iya Kanaanetussi, Amoore-  
tussi, Hiitetussi, Parzzetussi, gezziyan de7iya Yaabuusatussinne Mixiphpha biittan  
Hermmoone Deriyaappe garssaara de7iya Hiiwetussi kiittiis. <sup>4</sup> Kiittin eti ubbai bantta  
olanchchata denttidi, Israa7eela olanau issippe gaittidosona. He olanchchati paratu-  
uranne paraa gaaretuura gaittidi, qoodin wurena abbaa doona shafiyaadan corat-  
tidosona. <sup>5</sup> He kawoti ubbai bantta wolqqaa issippe gattidi, Israa7eela asaa olanau  
Merooma giyo haattaa matan dunkkaanidosona.

<sup>6</sup> GODAI Yaasa, “Neeni etayyo yayyoppa! Taani wontto hannoode eta ubbaakka  
worada, Israa7eela asaassi aattada immana. Neeni eta parata ubbaa gilddayana;  
eta paratu gaaretakka taman xuuggana” yaagiis. <sup>7</sup> Yaagin Yaasunne a olanchchati  
ubbai eti akeekennan de7ishin Merooma Haattaa matan eta bolli puttu giidi, eta  
olidosona. <sup>8</sup> Godai eta Israa7eelatu kushiyan aattidi immiis. Immin eta xoonidi,  
Gita Sidoona giyo biitti, Misirafoota-Maimanne arshsho baggaara de7iya Mixiphpha  
Wombbaa gakkanaashin yedettidosona. Etappe issi asanne ashshennan woridosona.  
<sup>9</sup> Yaasu GODAI a azazidobaa ubbaa eta bollan poliis; eta paratakka gilddayiis; eta paraa  
gaaretakka taman xuuggiis.

<sup>10</sup> Hegaappe guyyiyan Yaasu guyye simmidi, Haxoora giyo katamaa xoonidi oiqqiis; oiqqidi he katamaa kawuwaa bisuwan woriis. He wode Haxoora katamai he kawotetta ubbau huuphe katama. <sup>11</sup> Israa7eela asai he kataman de7iya asa ubbaa qara bisuwan woriis. SHemppooraa paxa de7iyaabaa ubbaa issuwaanne ashshennan wurssi woridosona. Yaasu Haxoora katamaakka taman xuuggiis.

<sup>12</sup> GODAA ashkkarai Muusee azazidoogaadan, Yaasu he kawotu katamatanne eta kawota ubbaa omoooddiis; omooddidi asaa ubbaa qara bisuwan wurssi woriis. <sup>13</sup> Gidikonne, Yaasu xuuggido Haxoora katamaappe attin, Israa7eela asai keraa bollan keexettida katamata ubbaa xuuggibookkona. <sup>14</sup> Israa7eela asai he katamatuppe bonqqido miishsha ubbaanne mehe ubbaa banttau ekkidosona. SHin asaa ubbaa xaissana gakkanaashin qara bisuwan woridosona; paxa de7iyaabaa aibakka ashshibookkona. <sup>15</sup> GODAI ba ashkkaraa Muusa azazidoogaadan, Muuseekka Yaasa azaziis. Azazin Yaasukka azazuwaa poliis; GODAI Muuseyyo azazidobaa ubbaappe i ootennan aggidobi aibinne baawa.

### *Yaasu Oiqqido Biittaa*

<sup>16</sup> Hegaadan oottidi Yaasu he biittaa ubbaa, gezziyaa, Neegeeba Bazzuwaa ubbaa, Goshena giyo biittaa ubbaa, arggo baggaara de7iya bargguwaanne Yorddaanoosa garaa ekkiis. <sup>17</sup> He biittai Eedooma matan de7iya Halaaga giyo deriyaappe doommidi biidi, Hermmoone Deriyaappe garssa baggaara de7iya Liibaanoosa Wombban de7iya Ba7aali-Gaada gakkanaassi de7iya sohota gakees. Eta kawota ubbaa Yaasu omooddidi woriis. <sup>18</sup> Yaasu daro wodiya he kawotu ubbaara olettiiddi gam77iis. <sup>19</sup> Gabaa7oonan de7iya Hiiwetuppe attin, hara katami issoinne Israa7eelatuura saro de7ana maachchaa maacettibeenna; Israa7eelati he katamata ubbaa olan xoonidi oiqqidosona. <sup>20</sup> GODAI Muusa azazidoogaadan, Yaasu eta qareti bannan issuwaanne ashshennan wurssi woriis. Aissi giikko, eti Israa7eelatuura olettanaadan GODAI ba huuphen eta wozanaa muumissiis.

<sup>21</sup> He wode Yaasu biidi, gezziyan Kebroona kataman, Dabiira kataman, Anaaba kataman, Yihudaa gezziyan ubbaaninne Israa7eela gezziyan ubban de7iya Anaage zareta adussata wori wurssiis. Yaasu etanne eta katamaa muleera xaissiis. <sup>22</sup> Xaissin Anaage zaretuppe Israa7eela biittan ooninne attibeenna; shin amaridaageeti Gaaza, Gaatenne Ashddooda katamatu xalaalan attidosona. <sup>23</sup> GODAI Muusa azazidoogaadan, Yaasu biittaa ubbaa oiqqiis; oiqqidi Israa7eela asaayyo eta zariyan zariyan shaakkidi immiis. Hegaappe guyyiyan biittai olaappe shemppiis.

## 12

### *Muusee Olidi Xoonido Kawota*

<sup>1</sup> Israa7eela asai Yorddaanoosa SHaafaappe arshsho baggaara de7iya Arnnoona Zanggaaraappe biidi Hermmoone Deriyaa gakkanaashin, qassi arshsho baggaara Yorddaanoosa garaa gakkanaashin de7iya biittaa kawota ubbaa xoonidi wotti ekkiis. He xoonettida kawoti hagaappe kaallidi xaafettidaageeta. <sup>2</sup> Etappe issoi, Haseboona kataman uttida Amooretu Kawuwaa Sihoona. I Haaridosai Arnnoona Zanggaaraa lanqqiyan de7iya Aaro7era katamaappe denddidi, Amoonatu zawaa gakkanaassi de7iya Yaabooqa SHaafaa gakees; he sohoi Gala7aade giyo biittaassi bagгаа. <sup>3</sup> I qassi arshsho baggaara Yorddaanoosa garaappe bagгаа ekkidi, Galiila Abbaappe biidi, Beeti-Yashimoota katamaara kanttidi, Pisgga giyo deriyaappe garssa bagгаа de7iya Maxine Abbaa gakkanaassi, biittata haariis.

<sup>4</sup> Hegaadankka, Rafaayetu zariyaappe wurssettan attida Baasaane biittaa Kawuwaa Ooga xooniis. Oogi Asttaaroota katamaaninne Ediraa7a kataman de7iis. <sup>5</sup> I haaridoosai Hermmoone Deriyaa, Salaaka giyoosaa, Baasaane biittaa ubbaa biidi Gashuuranne



Maa7ika asatu zawaa gakkées; qassi Gala7aade biittaappe baggaa ekkidi, biidi Haseboona Kawuwaa Sihoona zawaa gakkanaashin de7iya biittaa gakkées.

<sup>6</sup> GODAA ashkkaarai Muuseenne Israa7eela asai ha kawota xoonidosona. Xoonin GODAA ashkkaarai Muusee eta biittata Roobeela zaretussi, Gaada zaretussinne Minaase zaretuppe baggaassi shaakkidi immiis.

### *Yaasu Olidi Xoonido Kawota*

<sup>7</sup> Yaasunne Israa7eela asai Yorddaanoosa SHaafaappe arggo bagga biittan de7iya kawota ubbaa xoonidosona. He biittati Liibaanoosa Wombban de7iya Ba7aali-Gaadappe doommidi, tohossa baggaara Eedooma matan de7iya Halaqa Deriyaa gakkooona. Yaasu he biittata shaakkidi, Israa7eela zaretussi laata gade oottidi immiis. <sup>8</sup> Immido biittati, gezziyaa, arggo baggaara de7iya bargguwaa, Yorddaanoosa garaa, Yihudaa Bazzuwaanne Neegeeba Bazzuwaa. He biittati kase Hiiteti, Amooreti, Kanaaneti, Parzzeti, Hiiwetinne Yaabuusati de7ido sohota. <sup>9</sup> Israa7eela asai xoonido kawoti hageeta; Yarkko kawuwaa, Beetele matan de7iya Aaya kawuwaa, <sup>10</sup> Yerusalaame kawuwaa, Kebroona kawuwaa, <sup>11</sup> Yarmmuuta kawuwaa, Laakisha kawuwaa, <sup>12</sup> Egiloona kawuwaa, Gezeera kawuwaa, <sup>13</sup> Dabiira kawuwaa, Gedeera kawuwaa, <sup>14</sup> Horima kawuwaa, Araada kawuwaa, <sup>15</sup> Liibina kawuwaa, Adulaama kawuwaa, <sup>16</sup> Maqqeeda kawuwaa, Beetele kawuwaa, <sup>17</sup> Taappuha kawuwaa, Hefeera kawuwaa, <sup>18</sup> Afeeqa kawuwaa, Lasharona kawuwaa, <sup>19</sup> Madoona kawuwaa, Haxooraa kawuwaa, <sup>20</sup> SHimirooni-Maroonaa kawuwaa, Akishaafa kawuwaa, <sup>21</sup> Taa7inaaka kawuwaa, Magiddo kawuwaa, <sup>22</sup> Qaadeesa kawuwaa, Qarmmeloosan de7iya Yoqina7aama kawuwaa, <sup>23</sup> Doora gezziyaa de7iya Doora kawuwaa, Gelggalan de7iya Goima kawuwaanne <sup>24</sup> Tirxxa kawuwaa. Eti muleera hasttamanne isiini kawota.

## 13

### *Biron Oiqettibeenna Biittata*

<sup>1</sup> Yaasu cimidi, wodiya keehippe sugido wode, GODAI ayyo, “Neeni cimadasa; wodiyaakka keehi sugadasa. SHin oiqettinnan attida daro biittai bironkka de7ees. <sup>2</sup> Oiqettibeenna biittati hageeta: Pilisxxeematu biittaanne Gashuuratu biittaa ubbaa. <sup>3</sup> Gibxxeppe arshsho baggaara de7iya SHihoora SHaafaappe doommidi, huuphessa baggaara de7iya Eqiroona biittaa gakkanaassi de7iya biittati ubbai Kanaane biittan qoodettoosona. Ichchashu Pilisxxeema kawoti haariyo katamati Gaaza, Ashddooda, Asqqaloona, Gaatanne Eqiroona geetettiyaageeta. Aawetu biittaikka biron oiqettibeenna. <sup>4</sup> Tohossa baggaara Kanaanetu biittai ubbai, Sidoonatussi de7iya Ma7aara giyoosaappe denddidi biidi, Amooretu biittan de7iya Afeeqa katamaa gakkanaas-sikka oiqettibeenna. <sup>5</sup> Gebaalatu biittainne arshsho baggaara Liibaanoosa biittai ubbai, Hermmoone Deriyaappe garssa baggaara de7iya Ba7aali-Gaada katamaappe biidi, Hamaata Pinuwaa gakkanaassi biron oiqettibeenna. <sup>6</sup> Liibaanoosappe biidi Misirafota-Maima gakkanaassi de7iya gezziyaa de7iya Sidoonatu biittaikka oiqettibeenna. Taani ta huuphen Israa7eela asaa sinttappe eta laaggada kessana. Taani nena azazidoogaadan, neeni ha biittata Israa7eela asaayyo gade oottada shaakka. <sup>7</sup> Ha77i neeni ha biittaa uddufun zaretussinne Minaase zaretuppe baggaassi shaakka” yaagiis.

### *Yorddaanoosa SHaafaappe Arshsho Bagga Biittaa SHaahuwaa*

<sup>8</sup> Minaase zaretuppe baggati, Roobeela zaretinne Gaada zreti GODAA ashkkaarai Muusee Yorddaanoosa SHaafaappe hefintta arshsho baggaara etayyo bazzi wottido biittaa ekkidosona. <sup>9</sup> Eta biittai Arnoonaa Zanggaaraa lanqqiyaa de7iya Aaro7era katamaappe denddidi, he zanggaaraa gidдон de7iya katamaa oiqqidi, Medaaba giyo gezziyaa kanttidi biidi, Diboonaa gakkées. <sup>10</sup> Qassi Haseboonan uttidi haariya Amooretu Kawuwaa Sihoona katamatu ubbaa oiqqidi biidi, Amoonatu zawaa gakkées.



<sup>11</sup> Hegaadankka, qassi Gala7aade biittaa, Gashuuratu biittaa, Maa7ikatu biittaa, Hermmoone Deriyaa ubbaanne Salaaka gakkanaashin de7iya Baasaane biittaa gaktees.

<sup>12</sup> Asttaaroota katamaaninne Ediraa7a kataman de7idi haariya, Rafaayetu zariyaappe wurssettan attida Baasaane Kawuwaa Ooga biittaa ubbaa oiqqiis. Muusee he asaa ubbaa xoonidi, eta biittaappe laaggidi kessiis. <sup>13</sup> SHin Israa7eela asai Gashuura asaanne Maa7ika asaa biittaappe kessibookkona; heгаа gishshau eti hachchi gakkanaassi Israa7eela asaa gidдон de7oosona.

<sup>14</sup> Muusee Leewa zaretu xalaalaayyo laattiyo biittaa immibeenna. GODAI Muuseyyo giidoogaadan, GODAASSI Israa7eela Xoossaassi taman xuuggiyo yarshshuwaa yarshshiyoogee etayyo laata.

### *SHAahuwan Roobeela Zareta Gakkida Biittaa*

<sup>15</sup> Muusee Roobeela zaretuyyo eta yaran yaran biittaa shaakkidi immiis. <sup>16</sup> Eta biittai Arnnoona Zanggaaraa lanqqiyan de7iya Aaro7era katamaappe denddidi, he zanggaaraa gidдон de7iya katamaa oiqqidi, Medaaba gezziyaa gaktees. <sup>17</sup> Qassi Haseboona, gezziyan de7iya katamata, Diboona, Baamooti-Ba7aala, Beetiba7aali-Me7oona, <sup>18</sup> Yahaaxa, Qidemoota, Mefa7aata, <sup>19</sup> Qiriyaataima, Siibima, zanggaara gidдон de7iya keraa bolli de7iya Xeereta-SHAahara, <sup>20</sup> Beeti-Pa7oora, Pisgga Deriyaappe garssaara de7iya biittaanne Beeti-Yashimoota geetettiya katamata ubbaa gaktees. <sup>21</sup> Hegaadankka, qassi gezziyan de7iya katamatanne Haseboona katamaa haarida Amooretu Kawuwaa Sihoona biittaa ubbaa gaktees. Muusee Kawuwaa Sihoonanne Midiyaamatu halaqata Eewa, Reqeema, Xuura, Huuranne Rebaa7a xooniis; hageeti Sihoonappe garssaara he biittaa haariyaageeta. <sup>22</sup> Israa7eela asai olan worido asaappe haraa, shareechchuwaa, Ba7oora na7aa Balaamakka bisuwan woridosona. <sup>23</sup> Roobeela zaretu zawai Yorddaanoosa SHAafaa. Ha katamatinne eta heeran de7iya moottati Roobeela zareta eta yaran yaran gakkidaageeta.

### *SHAahuwan Gaada Zareta Gakkida Biittaa*

<sup>24</sup> Muusee Gaada zaretuyyo eta yaran yaran biittaa shaakkidi immiis. <sup>25</sup> Eta biittai Yaa7izeera, Gala7aaden de7iya katamata ubbaanne Amoonatu biittaappe baggaa ekkidi, Raabappe arshsho baggaara de7iya Aaro7era gaktees. <sup>26</sup> Hegaadankka, Haseboonappe denddidi, Raamoota-Mixiphphanne Bexoniima gaktees; qassi Maahinaimappe denddidi biidi, Lodabaara zawaa gaktees. <sup>27</sup> Yorddaanoosa Wombbaassi gidduwan Haseboona Kawuwaa Sihoona kawotettaappe attidaageeta, Beeti-Haraama, Beeti-Niimira, Sukkotanne Xafoona geetettiya katamata ekkees. Argo baggaara eta zawai Yorddaanoosa SHAafaa gididi biidi, Galiila Abbaa gaktees. <sup>28</sup> He katamatinne eta heeran de7iya moottati Gaada zaretuyyo eta yaran yaran gakkidaageeta.

### *SHAahuwan Minaase Zaretuppe Bagga Gakkida Biittaa*

<sup>29</sup> Muusee Minaase zaretuppe baggaayyo eta yaran yaran biittaa shaakkidi immiis. <sup>30</sup> Eta biittai Maahinaimanne Baasaane biittaa ubbaa xaaxi waaxees; Baasaane Kawuwaa Ooga kawotettaa ubbaanne Baasaanen de7iya usuppun tammu Yaa7iira katamata oiqqees. <sup>31</sup> Qassi Gala7aadeppa baggaanne Baasaanen Ooga kawotettaayyo huuphe gidida Asttaarootanne Ediraa7a geetettiya katamata gaktees. He ubbai Minaase na7aa Maakiira zaretuppe baggatussi, eta yaran yaran gakkidaagaa.

<sup>32</sup> Yorddaanoosappe hefinttaara, Yarkkoppe arshsho baggaara de7iya Moo7aaba dembban de7iiddi Muusee shaakkidi immido biittai haggaa. <sup>33</sup> SHin Muusee Leewa zaretuyyo laattiyo biittaa immibeenna; kase GODAI etau giidoogaadan, GODAI Israa7eela Xoossai eta laata.

## 14

*Yorddaanoosa SHAafaappe Argo Bagga Biittaa SHAahuwaa*

<sup>1</sup> Qeesee El77aazari, Nawe na7ai Yaasunne Israa7eela zaretu halaqati, Kanaane biittaa eta yaran yaran shaakkin, eta gakkida heerati hagaappe kaallidi xaafettidaageeta. <sup>2</sup> GODAI Muuse baggaara azazidoogaadan, eta laata biittai uddufunanne bagga gidiya zaretuyyo saaman shaahettiis. <sup>3</sup> Aissi giikko, Muusee naa77anne bagga gidiya zaretuyyo Yorddaanoosa SHaafaappe hefintta arshsho baggaara kase biittaa immi wottiis; shin Leewa zaretuyyo eta gidduwan laata biittaa immibeenna. <sup>4</sup> Yooseefa naati Minaasanne Efireema geetettidi naa77u zare gididosona. Muusee Leewa zaretussi laata biittaa immibeenna; shin hegaa gishshaa etau de7iyo katamatanne eti bantta mehiyaa wudiyaanne dorssaa wudiya heemmiyo hentta gadeta immiis. <sup>5</sup> GODAI Muusa azazidoogaadan, Israa7eela asai biittaa shaakkidi ekkiis.

### *Kebrooni Kaaleebassi Imettiis*

<sup>6</sup> Issi gallassi Yihudaa asai Yaasukko Gelggali shiiqidosa; shiiqin etappe isoi, Qeniiziyaa Yifune na7ai Kaaleebi Yaasa hagaadan yaagiis; “Nuuni Qaadeesa-Barnnen de7iyo wode, GODAI Xoossaa asa gidiya Muuseyyo nebaanne tabaa odidoogaa eraasa. <sup>7</sup> GODAA ashkkaarai Muusee biittaa wochchada yaanaadan, Qaadeesa-Barnneppe tana kiittiyo wode, taayyo laittai oitama. He wode taani ayyo ammanettiya oduwaa ehaada odaas. <sup>8</sup> Taani GODAA ta Xoossaa polo kaallaas; shin tanaara biida asati asaa wozanaa yashshan maashissidosona. <sup>9</sup> He gallassi Muusee, ‘Neeni GODAA ta Xoossaa polo kaallido gishshau, ne tohoi yedhdhido biittai merinau neessinne ne zariyaassi laattiyo biittaa gidana’ giidi caaqqiis.

<sup>10</sup> “Ane akeeka; GODAI ha yohuwaa Muuseyyo haasayoosappe, oitamanne ichchashu laitta gidiiis. He wodeesappe Israa7eela asai bazzuwan simerettishin, hachchi gattanau GODAI tana paxa wottiis. Be7a, ha77i ta laittai hosppun tammanne ichchashaa gidiiis. <sup>11</sup> Gidinkka ha77i tau de7iyya minotettai beni Muusee tana kiittiyo wode de7iyya minotettaakka mala. Taani ha77ikka olettanaunne aiba gidikkonne oottanau beni he wodeegaadan wolqqaama. <sup>12</sup> Hegaa gishshau, GODAI taayyo immana giido ha gezze biittaa ha77i taayyo imma. He wode, Anaqeti he biittan de7iyoogaanne eta katamatikka gitanne gimbettidaageeta gidiyoogaa nuuni haasayishin neeni ne huuphiyau siyadasa. SHin GODAI tanaara gidikko, i giidoogaadan, taani eta he biittaappe yedettana” yaagiis.

<sup>13</sup> Yaagin Yaasu Yifune na7aa Kaaleeba anjjidi, Kebroona ayyo laata oottidi immiis. <sup>14</sup> GODAA Israa7eela Xoossaa polo kaallido gishshau, Kebroona biittai he wodeppe hachchi gakkanaassi, Qeniiziyaa Yifune na7aa Kaaleebayyo laata biitta gidiiis. <sup>15</sup> Kase Kebroona sunttai Qiriyaati-Arbbaa7a geetettes; Arbbaa7a giyo bitanee Anaqetu ubbaappe aadhdhida asa.

Hegaappe guyyiyan, he biittai olaappe shemppiis.

## 15

### *SHaahuwan Yihudaa Zareta Gakkida Biittaa*

<sup>1</sup> Yihudaa zaretussi eta yaran yaran shaakkin gakkida biittai biidi Eedooma biittan zawatidi, tohossa bagga gaxan de7iyya Xiina giyo bazzuwaa wurssettaa gakkées. <sup>2</sup> Tohossa baggaara eta zawai Maxine Abbaappe tohossa bagga wurssettaappe doommidi, <sup>3</sup> Akirabiima Pinuwaa kanttidi, Xiina Bazzuwaara biidi, Qaadeesa-Barnne tohossaa gakkées. Qassi hegaappe shaakkidi biidi, Hexiroonaara kanttidi, pude Adaara gakkidi, Qarqqakko simmees. <sup>4</sup> Hegaappe qassi Aximoona kanttidi, Gibxxe SHaafan gaittidi biidi, Meediteraane Abban zawatees. Tohossa baggaara de7iyya Yihudaa zawai haggaa.

<sup>5</sup> Arshsho bagga zawai Maxine Abbaa gididi, Yorddaanoosa SHaafai an geliyo sohuwaa gakkées. Huuphessa zawai qassi Yorddaanoosa SHaafaa Maxine Abban geliyoosappe doommidi, <sup>6</sup> pude Beeti-Hoogila kiyidi, Beeti-Yorddaanoosa Zanggaaraappe

huuphessaara kanttidi, Roobeela na7aa Bohaana shuchchan zawatees. <sup>7</sup> Yaatidi zawai Metuwaa Wombbaappe Dabiira katamaa pude kiyidi, wombaappe tohossa baggaara de7iya Adumiima Pinuwaa sintta baazzan de7iya Gelggalakko huuphessi mirqqettees. Hegaappe qassi Enishemeesha giyo pulttuwaa kanttidi, Eniroogeela giyoosan zawatees. <sup>8</sup> Hegaappe Hinnooma Zanggaaraa kanttidi, Yaabuusatu katamai Yerusalamee de7iyo keraappe tohossa baggaara kanttidi, deriyaa huuphiyaa kiyees; he deree Hinnooma Zanggaaraappe arggo baggaaranne Rafaima Wombbaappe huuphessa baggaara de7ees. <sup>9</sup> He deriyaa huuphiyaappe sinttau biidi, Nefttooha haattaa pulttuwaa kanttidi, Efiroona Deriyan de7iya katamatukko kiyees. Hegaappe qassi duge Baa7aala woikko Qiriyaati-Yi7aariima geetettiya katamaakko simmees; <sup>10</sup> Baa7aalappe qassi arggo baggaara de7iya Se7iira Deriyaakko mirqqettees. Hegaappe qassi huuphessa baggi Yi7aariima woikko Kisaloonaa geetettiya deriyaa gakkidi, appe duge Beeti-SHemesha wodhdhidi, Timina kanttidi bees. <sup>11</sup> He zawai Eqiroona huuphessa baggaara de7iya pudettan zawatidi, SHikaroonakko mirqqettees; hegaappe Baa7aala Deriyaara kanttidi, Yaabini7eelan zawatees. He huuphessa bagga zawai Meediteraane Abban zawatees. <sup>12</sup> Arggo baggaara de7iya zawai Meediteraane Abbaayyo gaxan zawatees. Yihudaa zareti bantta yaran yaran ekkidi de7idoi ha zawati zaarin de7iya sohotuuna.

*Kaaleebi Kebroonanne Dabiira Xoonidi Oiqqiis  
(Daannatu Maxaafaa 1:11-15)*

<sup>13</sup> GODAI a azazidoogaadan, Yaasu Yifune na7aa Kaaleeba gakkiiya shaahuwaa Yihudaa biittaappe Qiriyaati-Arbbaa7a geetettiya Kebroona immiis. Arbbaa7i Anaage aawaa. <sup>14</sup> Kaaleebi Anaage zareta, SHeshaaya, Ahimaananne Talmmaaya geetettiya heezzu yarata Kebroonappe kessiis. <sup>15</sup> Hegaappe denddidi, Dabiira giyo kataman de7iya asaa olanau biis; Dabiira katamai kase Qiriyaati-Sefera geetettees. <sup>16</sup> Kaaleebi, “Qiriyaati-Sefera olidi oiqqiya uraassi taani ta na7iyo Akiso immana” yaagiis. <sup>17</sup> Yaagin Kaaleeba ishaa Qanaaza na7ai Otini7eeli he katamaa olidi oiqqiis; oiqqin Kaaleebi ba na7iyo Akiso ayyo immiis.

<sup>18</sup> Akisa Otini7eela geliyo wode, i aawai iyyo gade immanaadan woossana mala Otini7eeli o zoriis. Zorin a baquluwaappe wodhdhaasu; wodhdhin Kaaleebi o, “Ai koyai?” yaagidi oichchiis.

<sup>19</sup> Oichchin a, “Taayyo woiuwaa imma. Neeni kase taayyo immido biittai qa77e gidido gishshau, haatta pulttota taayyo immarkkii” yaagaasu. Yaagin Kaaleebi iyyo killi pulttuwaakka hirkki pulttuwaakka immiis.

*Yihudaa Katamata*

<sup>20</sup> Yihudaa zareti bantta yaran yaran laattido laatati hagaappe kaallidi xaafetti-daageeta. <sup>21</sup> Tohossa bagga gaxan Eedooma zawaa matan de7iya Yihudaa asaa katamati Qabxxi7eela, Edeera, Yaagura, <sup>22</sup> Qiina, Dimoona, Adi7aada, <sup>23</sup> Qedeesha, Haxooraa, Yitinaana, <sup>24</sup> Ziifa, Xelema, Ba7aaloota, <sup>25</sup> Haxoori-Hadaata, Qiriyooti-Hexiroona woikko Haxooraa, <sup>26</sup> Amaama, SHamaa7a, Molaada, <sup>27</sup> Haxaari-Gaadda, Heshimoona, Beeti-PHaleexa, <sup>28</sup> Haxaari-SHu7aala, Berssaabeha, Biiziyootiyaa, <sup>29</sup> Baa7aala, Iyuma, Exeema, <sup>30</sup> Elttolaada, Kasiila, Horima, <sup>31</sup> Xiqilaaga, Madimaana, Sanssaana, <sup>32</sup> Lebaawoota, SHilihiima, Ainanne Rimmoona. Ha katamati bantta moottatuura issippe laatamanne uddufuna.

<sup>33</sup> Garan de7iya katamati Eshttaa7oola, Xor77a, Ashiina, <sup>34</sup> Zaanooaha, Engganiima, Taappuha, Enaama, <sup>35</sup> Yarmmuuta, Adulaama, Sooko, Azeega, <sup>36</sup> SHaa7iraima, Aditaima, Gaderanne Gaderootaima. Ha katamati bantta moottatuura issippe tammanne oidda.

<sup>37</sup> Qassi Yihudaa katamati Xinaana, Hadaasha, Migidaala-Gaada, <sup>38</sup> Diili7aana, Mixiphpha, Yoqiti7eela, <sup>39</sup> Laakisha, Boxiqaata, Egiloona, <sup>40</sup> Kaboona, Laahimaasa, Kitiliisha, <sup>41</sup> Gaderoota, Beeti-Daagoona, Naa7imaananne Maqqeeda. Ha katamati bantta moottatuura issippe tammanne usuppuna.

<sup>42</sup> Qassikka Liibina, Eteera, Ashaana, <sup>43</sup> Yifttaaha, Ashiina, Naxiiba, <sup>44</sup> Qa7iila, Akizi-ibanne Mareesha. Ha katamati bantta moottatuura issippe uddufuna.

<sup>45</sup> Hegaadankka, qassi Eqiroona katamaa ba heeran de7iya qeera katamatanne mootata ubbaa. <sup>46</sup> Ashddooda matan Eqiroonappe biidi, Meediteraane Abbaa gakkanaassi de7iya katamatanne eta moottata ubbaa.

<sup>47</sup> Qassi Ashddooda katamaanne a moottata, Gaaza katamaanne a moottata, biidi Gibxxe SHaafaanne Meediteraane Abbaa lanqqiyaa gakkanaassi de7iya sohota.

<sup>48</sup> Gezziyan de7iya katamatikka SHamiira, Yattira, Sooko, <sup>49</sup> Daana, Qiriyaati-Sefera woikko Dabiira, <sup>50</sup> Anaaba, Eshttamoo7a, Aniima, <sup>51</sup> Goshena, Holoonanne Giilo. Ha katamati bantta moottatuura issippe tammanne isiino.

<sup>52</sup> Qassi Araba katamaa, Duuma, Esh77aana, <sup>53</sup> Yaaniima, Beeti-Taappuha, Afeeqa, <sup>54</sup> Humixa, Kebroona woikko Qiriyaati-Arbbaa7anne Xi7oora. Ha katamati bantta moottatuura issippe uddufuna.

<sup>55</sup> Qassikka Maa7oona, Qarmmeloosa, Ziifa, Yuuxa, <sup>56</sup> Iziraa7eela, Yoqidi7aama, Zaanooaha, <sup>57</sup> Qaina, Gib77anne Timina. Ha katamati bantta moottatuura issippe tamma.

<sup>58</sup> Qassi Halihuula, Beetixuura, Gadoora, <sup>59</sup> Ma7iraata, Beeti-Anootanne Elttiqoona. Ha katamati bantta moottatuura issippe usuppuna.

<sup>60</sup> Hegaadankka qassi Qiriyaati-Ba7aala woikko Qiriyaati-Yi7aariimanne Raaba. Ha katamati bantta moottatuura issippe naa77a.

<sup>61</sup> Bazzuwan qassi Beeti-Aaraba, Middiina, Sekaaka, <sup>62</sup> Nibishaana, Maxine katamaanne Enggaada. Ha katamati bantta moottatuura issippe usuppuna.

<sup>63</sup> Gidikonne, Yihudaa asai Yerusalaamen de7iya Yaabuusata kessanau danddayi-bookkona. Hegaa gishshau Yaabuusati hachchi gakkanaassikka Yihudaa asaara issippe Yerusalaamen de7oosona.

## 16

### *SHAahuwan Efiremanne Minaase Zareta Gakkida Biittata*

<sup>1</sup> Yooseefa zerettata gakkida biittai tohossa baggaara Yarkko katamaa matan de7iya Yorddaanoosa SHaafan doommees; Yarkko pulttotuppe arshsho bagga gaxaappe denddidi biidi, bazzuwaa kanttidi, gezziyaa pude kiyidi, biidi Beetele gakees. <sup>2</sup> Beeteleppe denddidi, Arkketu biittan de7iya Axaaroota katamaa kanttidi, Looza gakees. <sup>3</sup> Hegaappe arggo baggi Yaaffleexatu biittaa duge wodhdhidi, Hirkki Beeti-Horoona giyoosaara kanttidi, hegaappe Gezeeraara biidi, Meediteraane Abban zawatees.

<sup>4</sup> Yooseefa zaretta gidiya Minaase zaretinne Efireema zareti banttana gakkiiya biittaa laattidosona.

### *Efireema Gakkida SHAahuwaa*

<sup>5</sup> Efireema zareta eta yaran yaran gakkida biittai haggaa; eta gakkida biittaa zawai arshsho baggaara de7iya Axaarooti-Addaarappe denddidi, Qommo Beeti-Horoona kanttees; <sup>6</sup> hegaappe simmidi Meediteraane Abban zawatees. Qassi huuphessa baggaara de7iya zawai Mikimataatappe arshsho baggi Taa7anaati-SHiilokko simmidi, arshsho baggaara de7iya Yaanooha gakees. <sup>7</sup> Yaanoohappe duge Axaarootanne Na7araata wodhdhidi, Yarkko gakees; wurssettai Yorddaanoosa SHaafan zawatees. <sup>8</sup> Gaxa zawai Taappuhappe doommidi biidi, arggo baggaara de7iya Qaana SHaafaa xanxxaa oiqqidi



biidi, Meediteraane Abban zawatees. Efireema zareti bantta yaran yaran laattido biittai haggaa. <sup>9</sup> Hegee Minaase zaretu biittaappe Efireema zaretussi immido katamatanne eta moottata ubbaa gujjennan de7ishiina. <sup>10</sup> SHin Efireema zareti Gezeera kataman de7iya Kanaane asata kessibookkona. Yaatin, Kanaane asati hachchi gakkanaassi Efireema zaretu gidдон de7oosona. SHin Efireema zareti eta ailleyidi ootissoosona.

## 17

### *Minaase Zareta Gakkida SHaahuwaa*

<sup>1</sup> Yooseefa baira na7aa Minaase zaretuyyo imettida biittai haggaa. Gala7aade aawai Maakiiri Minaasessi baira na7aa; Maakiira yarati mino olanchcha gidido gishshau, Gala7aadenne Baasaane biittata ekkidosona. <sup>2</sup> Yorddaanoosa SHaafaappe arggo baggaara de7iya biittai hankko attida Minaase asaayyo imettiis; he yaratikka Abi7eezera, Heleeqa, Asiri7eela, SHEkeema, Hefeerranne SHamidaa7a. Yooseefa na7aa Minaase yara gididiya attumaageeti hageeta.

<sup>3</sup> Xalofihaadi Hefeera na7aa; Hefeeri Gala7aade na7aa; Gala7aadee Maakiira na7aa; Maakiiri Minaase na7aa. Xalofihaadayyo macca naatuppe attin, attuma naati baawa; a macca naati Maahilo, No7o, Hoogilo, Milkkonne Tirxxo geetettoosona. <sup>4</sup> Eti qeesiyaa El77aazarakko, Nawe na7aa Yaasukonne halaqatukko shiiqidi, “Nu dabbotu gidдон nuuyyookka gadiyaa shaahuwan immana mala GODAI Muusa azazi wottiistennee” yaagidosona. Yaagin GODAI azazidoogaadan, eta aawaa ishanttu gidдон etayyookka gadiyaa immiis. <sup>5</sup> Minaase yarati Yorddaanoosa SHaafaappe arshsho baggaara de7iya Gala7aadenne Baasaane bolli gujjidi, tammu saama biittaa ekkidosona. <sup>6</sup> Aissi giikko, Minaase zaretuppe macca naatika attuma naatuura issippe shaakki ekkidosona. Gala7aade biittai attida Minaase yaratussa gididiis.

<sup>7</sup> Minaase yaratu biittaa zawai Aseera biittaappe doommidi, Sekeemappe arshsho baggaara de7iya Mikimataata gakkees. He zawai hegaappe denddidi biidi, tohossa baggaara de7iya Taappuha asai de7iyooosaa xaaxi waaxees. <sup>8</sup> Taappuha biittai Minaasessa; shin Minaase zawan de7iya Taappuha katamai ba huuphen Efireema zaretussa. <sup>9</sup> Qassi he zawai hegaappe denddidi biidi, Qaana SHaafan zawatees. Minaase katamatu gidduwan Efireemassa gididiya katamatikka de7oosona; shin Minaase zawai Qaana SHaafaappe huuphessa bagga gididi, biidi Meediteraane Abban zawatees. <sup>10</sup> SHaafaappe tohossa baggaara de7iya biittai Efireemassa; huuphessa baggaara de7iya biittai qassi Minaasessa. Minaase biittaayyo arggo bagga zawai Meediteraane Abbaa. Qassi huuphessa baggaara Aseera biittaa, arshsho baggaara Yisaakoora biittaa gakkees. <sup>11</sup> Yisaakooraanne Aseera biittatu gidduwan Beetishaana, Yibila7aama, Dooraa, Enddoore, Taa7inaakanne Magiddo geetettiya katamati bantta yuushuwan de7iya moottatuurakka Minaasessa. <sup>12</sup> SHin Minaase zareti he katamatun de7iya asata kessanaunne katamata oiqqanau danddayibookkona. Hegaa gishshau Kanaane asati yan de7i bayidosona. <sup>13</sup> Israa7eela asai minnido wode, Kanaane asata wolqqan haggaaazissidoogaappe attin, eta biittaappe muleera kessibookkona.

### *Yooseefa Zareti Gujo Biittaa Oichchidosona*

<sup>14</sup> Yooseefa zareti biidi Yaasa, “Biittaa laataa shaahuwan nuussi aibissi issi saamaa xalaalaa immadii? Nuuni qoodan cora; aissi giikko, GODAI nuna anjjiis” yaagidosona.

<sup>15</sup> Yaagin Yaasu eta, “Intte cora gidikkonne, Efireema gezzee intteyyo guuxxikko, Parzzetinne Rafaayeti de7iyo biittaa biidi, woraa intteyyo qeexite” yaagiis.

<sup>16</sup> Yaagin Yooseefa zareti, “Ha gezzee nuussi gidenna; hejaa bollikka qassi Beetishaana kataman, a yuushuwan de7iya moottatuuninne Iziraa7eela Wombban de7iya Kanaanetuyyo parati goochchiyo birataa gaareti de7oosona” yaagidosona.

<sup>17</sup> Yaagin Yaasu Yooseefa naatu Efireemanne Minaase zaretuyyo, haggaaan yaagiis; “Intte coranne daro wolqqaama; intteyyo issi saamaa xalaalai gidenna. <sup>18</sup> Hegaa



gishshau gezze biittaakka intte ekkana. He gezzee wora gidikkokka qeexite; qeexidi wurssettaa gaxaa gakkanaassikka inttessa oottite. Kanaanetuyyo parati goochchiyo birata gaareti de7ikkokka, eti mino gidikkokka, intte eta kessanau danddayeeta” yaagiis.

## 18

### *Attida Biittaa SHaahuwaa*

<sup>1</sup> Biittaa xoonidi oiqqidoogaappe guyyiyan, Israa7eela maabara ubbai Seelon shiiqiis; shiiqidi GODAASSI goinniyo Dunkkaaniyaa yan essiis. <sup>2</sup> SHin Israa7eela asaappe biittaa shaakki ekkibeenna laappun zareti attidosona.

<sup>3</sup> Yaatin, Yaasu Israa7eela asaa, “GODAI intte aawatu Xoossai intteyyo immido biittaa laattennan aude gakkanaassi gam77uuteetii? <sup>4</sup> Issi issi zariyaappe heezzu heezzu asata doorite. Issi issi zaree laattana biittaa hanotaa eranaadan, taani eta kiittana. Kiittin eti biittaa ubbaa biidi xomoosana; xomoosidi he biittaabaa xaafi ekkidi, taakko simmidi yaana. <sup>5</sup> Eti he biittaa laappun kessidi shaakkana. SHin Yihudaa zareti tohossa baggaara de7iya bantta biittan, Yooseefa zaretikka huuphessa baggaara de7iya bantta biittan de7ana. <sup>6</sup> Ha laappun kiyi shaahettida biittaa hanotaa xaafidoogaappe guyyiyan, taakko ekki yiite. Ehin taani GODAA nu Xoossaa sinttan intteyyo saamaa yeggana. <sup>7</sup> Gidikkonne, Leewa zareti inttenaara saaman laattokkona; aissi giikko, eti qeese gididi GODAASSI oottiyo oosoi eta laata. Gaada zareti Roobeela zaretinne Minaase zaretuppe baggai Yorddaanoosa SHaafaappe arshsho baggaara, GODAA ashkkaarai Muusee etassi immido biittaa kaseti laattidosona” yaagiis.

<sup>8</sup> Asati biittaa hanotaa xaafanau baanaappe kasetidi, Yaasu eta, “Biite; biidi yuyi be7idobaa xaafite. Yaatidi taakko simmidi yiite. Yin hagan Seelon GODAA sinttan taani intteyyo saamaa yeggana” yaagidi azaziis. <sup>9</sup> Azazin asati biidi, biitta ubbaa yuuyidosona. Yuuyidi katamata ubbaa xaafidi, biittaa waatidi laappun kessi shaakkanaakko erissidosona. Yaatidi Yaasu dunkkaanidosaa Seelo simmidosona. <sup>10</sup> Hegaappe guyyiyan Yaasu GODAA sinttan Seelon etassi saamaa yeggiis; yan Yaasu Israa7eela asaayyo biittaa eta zariyaa shaahuwaadan shaakkidi immiis.

### *Biniyaama Zareta Gakkida SHaahuwaa*

<sup>11</sup> Koiro saamai Biniyaama zareta eta yaran yaran gakkiiis. Eta gakkida biittai Yihudaa zaretu biittaappenne Yooseefa zaretu biittaappe gidduwan de7ees. <sup>12</sup> Huuphessa baggaara eta zawai Yorddaanoosa SHaafaappe doommidi, Yarkkoppe huuphessa baggaara de7iya pudettan zawatees; hegaappe arggo baggaara gezziyaa kanttidi, Beeti-Aweena bazuwan zawatees. <sup>13</sup> Hegaappe tohossa baggi simmidi, kase Looza geetettiya Beetele pudettaa kanttidi, Axaarooti-Addaara dugettaa kanttidi, Hirkki Beeti-Horoonappe tohossa baggan de7iya deriyan zawatees. <sup>14</sup> He zawai tohossa baggaara Beeti-Horoonappe sinttan de7iya deriyaappe arggo baggi mirqqettidi, Qiriyaati-Ba7aala woikko Qiriyaati-Yi7aariima geetettiya Yihudaa zaretu kataman zawatees. Arggo baggaara de7iya zawai haggaa. <sup>15</sup> Tohossa bagga zawai Qiriyaati-Yi7aariimappe dendidi, Nefittooha haattaa pulttotan zawatees. <sup>16</sup> Hegaappe zawai duge biidi Rafaima Wombbaappe huuphessa baggan de7iya Hinnooma Zanggaaraappe sintta bagga keraa tohossan zawatees. Hegaappe Hinnooma Zanggaaraa kanttidi biidi, Yaabuusatu katamaa Yerusalaaamessinne Eniroogeela katamaassi tohossa bagga pudettan zawatees. <sup>17</sup> Hegaappe qassi huuphessa baggi Enishemeeshakko mirqqettidi, Adumiima pudettaappe sintta baggaara de7iya Galilootan zawatees; hegaappe qassi Roobeela na7aa Bohaana shuchchau duge wodhdhees. <sup>18</sup> Hegaappe qassi Beeti-Aaraba huuphessa bagga pudettaara kanttidi, duge Yorddaanoosa Wombbaa wodhdhees. <sup>19</sup> Hegaappe qassi Beeti-Hoogila pudettaappe huuphessa baggaara kanttidi, Yorddaanoosa SHaafai goggidi geliyoosaa, Maxine Abbaappe huuphessa bagga gaxaa gakkees. Hegee tohossa

bagga zawaa. <sup>20</sup> Arshsho baggaara de7iya zawai Yorddaanoosa SHaafaa. Biniyaama zareti laattido biittai ubbasaarakka zawatido zawati hageeta.

<sup>21</sup> Biniyaama zareti bantta yaran yaran ekkido katamati Yarkko, Beeti-Hoogila, Emeqi-Qaxiixa, <sup>22</sup> Beeti-Aaraba, Xamaraima, Beetele, <sup>23</sup> Awiima, Paara, Oofira, <sup>24</sup> Kaafaari-Amoona, Oofinanne Gebaa7a. Eti muleera tammanne naa77a; eta yuushuwan de7iya moottatika etan gujettoosona. <sup>25</sup> Qassi Gabaa7oona, Raama, Ba7eroota, <sup>26</sup> Mixiphpha, Kafira, Mooxa, <sup>27</sup> Reqeema, Yirphpha7eela, Taraala, <sup>28</sup> Xelaa7a, Eleefa, Yerusalaame geetettiya Yaabuusatu katamaa, Gib77anne Qiriyaati-Yi7aariima. Eti muleera tammanne oidda; eta yuushuwan de7iya moottatika etan gujettoosona. Biniyaama zareti bantta yaran yaran laattido biittai haggaa.

## 19

### *Simoonaa Zareta Gakkida SHaahuwaa*

<sup>1</sup> Naa77antto saamai Simoonaa zareta eta yaran yaran gakkiiis. Eta gakkida biittai Yihudaa zareti laattido biittaa gidдон de7ees. <sup>2</sup> Eti laattido katamati Berssaabeha woikko SHEbaa7a, Molaada, <sup>3</sup> Haxaari-SHu7aala, Baala, Exeema, <sup>4</sup> Elttolaada, Batu-ula, Horima, <sup>5</sup> Xiqilaaga, Beeti-Markkaboota, Haxaari-Suusa, <sup>6</sup> Beeti-Labaa7ootanne SHaruheena. Eti muleera tammanne heezza; eta yuushuwan de7iya moottati etan gujettoosona. <sup>7</sup> Qassi Aina, Rimmoonaa, Eteeranne Ashaana. Eti muleera oiddu katamata; eta yuushuwan de7iya moottatika etan gujettoosona. <sup>8</sup> Neegeeba Bazzuwan de7iya Baa7ilaati-Ba7eera woikko Raama gakkanaashin, ha katamatu yuushuwan de7iya moottata ubbaa laattidosona. Simoonaa zareti bantta yaran yaran laattido biittai haggaa. <sup>9</sup> Yihudaa zareta gakkida biittai etayyo aahuwaa darido gishshau, appe shaakkin Simoonaa zaretussi imettiis.

### *Zaabiloonaa Zareta Gakkida SHaahuwaa*

<sup>10</sup> Heezantto saamai Zaabiloonaa zareta eta yaran yaran gakkiiis. Eti laattido biittai Sariida giyo katamaa gakkies. <sup>11</sup> Hegaappe qassi arggo baggi biidi Mar77ila kanttidi, biidi Dabasheeta bochchiiddi biidi, Yoqina7aamappe arshsho baggan de7iya shaafaa gakkies. <sup>12</sup> Hara baggaara qassi Sariida katamaappe arshsho baggi simmidi, Kisilooti-Taaboora gakkidi, Dabiraataaninne Yaafi7an zawatees. <sup>13</sup> Hegaappe qassi arshsho baggaara Gaate-Hefeera, Iiti-Qaxiinanne Rimmoonaa gakkidi, Nee7akko mirqqettees. <sup>14</sup> Huuphessa baggaara zawai Hanatoona simmidi, Yifttaahi7eela Wombban zawatees. <sup>15</sup> Yan Qaxaata, Naahilaala, SHimiroona, Yidaalanne Beetaliheme geetettiya katamatikka de7oosona. Eti muleera tammanne naa77a; eta yuushuwan de7iya moottatika etan gujettoosona. <sup>16</sup> Zaabiloonaa zareti bantta yaran yaran laattido biittaa gidдон de7iya katamatinne eta yuushuwan de7iya moottati hageeta.

### *Yisaakoora Zareta Gakkida SHaahuwaa*

<sup>17</sup> Oiddantto saamai Yisaakoora zareta eta yaran yaran gakkiiis. <sup>18</sup> Eta biittaa katamati Iziraa7eela, Kasuloota, SHuneema, <sup>19</sup> Hafaraima, SHi7oona, Anaharaata, <sup>20</sup> Rabbiita, Qishiyoona, Abeexa, <sup>21</sup> Remeeta, Engganiima, Enihaadanne Beeti-PHaxeexa. <sup>22</sup> He biittaa zawai Taaboora, SHahaxuumanne Beeti-SHemesha bochchiiddi biidi, Yorddaanoosa SHaafan zawatees. Eti muleera tammanne usuppuna; eta yuushuwan de7iya moottatika etan gujettoosona. <sup>23</sup> Yisaakoora zareti bantta yaran yaran laattido biittaa gidдон de7iya katamatinne eta yuushuwan de7iya moottati hageeta.

### *Aseera Zareta Gakkida SHaahuwaa*

<sup>24</sup> Ichchashantto saamai Aseera zareta eta yaran yaran gakkiiis. <sup>25</sup> Eta biittaa katamati Helqqaata, Hala, Bexeena, Akishaafa, <sup>26</sup> Alaameleka, Ami7aadanne Mish77aala. Arggo baggaara Qarmmelooasaaninne SHihoori-Libinaatan zawatees. <sup>27</sup> Qassi arshsho baggi simmi Beeti-Daagoonakko mirqqettidi, Zaabiloonaa biittaaanne Yifttaahi7eela Wombbaa

bochchiiddi biidi, Beeti-Emeeqanne Na7i7eela gaktees. Qassi huuphessa baggaara Kaabula gaktees. <sup>28</sup> Hegaappe qassi Ebroona, Rahooba, Hammoonanne Qaana kanttidi, Sidoonan zawatees. <sup>29</sup> Hegaappe qassi biittaa zawai Raama simmidi, gimbbettida Xiirsoosa katamaa gaktees. Hegaappe qassi Hoosakko mirqqettidi, Meediteraane Abban zawatees. Qassi Mahalaaba, Akiziiba, <sup>30</sup> Uuma, Afeeqanne Rahooba geetettiya katamatikka yan de7oosona. Eti muleera laatamanne naa77a; eta yuushuwan de7iya moottatika etan gujettoosona. <sup>31</sup> Aseera zareti bantta yaran yaran laattido biittan de7iya katamatinne eta yuushuwan de7iya moottati hageeta.

### *Nifttaaleema Zareta Gakkida SHaahuwaa*

<sup>32</sup> Usuppunta saamai Nifttaaleema zareta eta yaran yaran gakkiiis. <sup>33</sup> Eta zawai Heleefappenne Da7inaaniima wolaappe doommidi, Adaami-Neqeeba, Yaabini7eelanne Laaqquma kanttidi biidi, wursettai Yorddaanoosa SHaafaa gaktees. <sup>34</sup> Hegaappe qassi zawai arggo baggi Azinooti-Taabooraakko mirqqettees; hegaappe qassi Huqooqa simmidi, tohossa baggaara Zaabiloona biittaaninne arggo baggaara Aseera biittan zawatidi, arshsho baggaara Yorddaanoosa SHaafaa gaktees. <sup>35</sup> Gimbbettida katamati Xiddiima, Xeera, Haamata, Raaqata, Kinaareeta, <sup>36</sup> Adaama, Raama, Haxoora, <sup>37</sup> Qedeesha, Ediraa7a, Enihaxoora, <sup>38</sup> Yir77oona, Migidaali7eela, Horeema, Beeti-Anaatanne Beeti-SHemesha. Eti muleera tammanne uddufuna; eta yuushuwan de7iya moottatika etan gujettoosona. <sup>39</sup> Nifttaaleema zareti bantta yaran yaran laattido biittan de7iya katamatinne eta yuushuwan de7iya moottati hageeta.

### *Daana Zareta Gakkida SHaahuwaa*

<sup>40</sup> Laappunta saamai Daana zareta eta yaran yaran gakkiiis. <sup>41</sup> Eti laattido biittaa katamati Xor77a, Eshttaa7oola, Irshshemeesha, <sup>42</sup> SHa7albhiima, Ayyaaloona, Yitaala, <sup>43</sup> Eloona, Timina, Eqiroona, <sup>44</sup> Elttaaqe, Gibbatoona, Baa7ilaata, <sup>45</sup> Yihuda, Banabaraaqa, Gaate-Rimmoona, <sup>46</sup> Meyarqqoona, Raaqoonanne qassi Yoophphe katamaa yuushuwan de7iya heerata. <sup>47</sup> Daana zareti biittaa laattanau injjetennaagaa be7ido wode, biidi Laayisha katamaa olidi xoonidosona; xoonidi he kataman de7iya asaa qara bisuwan wori wurssidi, katamaa banttau ekkidosona; ekkidi yan de7idosona. He katamaa sunttaakka laammidi, bantta aawaa Daana sunttan Daana giidi sunttidosona. <sup>48</sup> Daana zareti bantta yaran yaran laattido biittan de7iya katamatinne eta yuushuwan de7iya moottati hageeta.

<sup>49</sup> Israa7eela asai biittaa shaakkidi wurssido wode, Nawe na7aa Yaasussi laattiyo biittaa bantta gidon immidosona. <sup>50</sup> GODAI azazidoogaadan, Yaasu oichchin, Efireema gezziyan de7iya Timinaati-Seraaha giyo katamaa ayyo immidosona. Immin katamaa wotti yeggi keexxidi, yan de7iis. <sup>51</sup> Qeesee El77aazari, Nawe na7ai Yaasunne Israa7eela asaa zaretuyyo yaratu halaqati GODAA sinttan Seelon, Xoossaa Dunkkaaniyaa penggen saamaa yeggidi, gishido laata biittai haggaa. Eti biittaa yaati shaakkidi polidosona.

## 20

### *Baqati Biidi Attiyo Katamata*

<sup>1</sup> Hegaappe guyyiyan GODAI Yaasa hagaadan yaagiiis; <sup>2</sup> “Israa7eela asaayyo hagaadan yaaga; ‘Taani Muuse baggaara inttena azazidoogaadan, asai baqati biidi attiyo katamata doorite. <sup>3</sup> Ai asinne akeekennaaninne erennaani asa worikko, yaa baqati biidi, suutaa achchiyaagaappe attana. <sup>4</sup> Asa woridaagee he katamatuppe issuwaakko baqato; baqatidi biidi, katamaa geliyo penggiyan eqqidi, hanidabaa he katamaa cimatuuyyo yooto. Yootin eti bantta katamaa efidi, i de7ana sohuwaa immin, i etaara yan de7o. <sup>5</sup> Suutaa achchiyaagee a kaallidi yiikko, he katamaa cimati a aattidi immoppona. Aissi giikko, ba shooruwaa i halchchidi, ba kase morkketettaa gishshau woribeenna. <sup>6</sup> Yaa7aa sinttan pirddau i eqqana gakkanaassinne he wodiyan de7iya qeese ubbatu

halaqai haiqqana gakkanaassi, he kataman de7o. Hegaappe guyyiyan, baqatidi kiyido katamaa guyye simmidi, ba soo gelo' yaaga" yaagiis.

<sup>7</sup>Yaagin Israa7eela asai Nifftaaleema gezziyan, Galiilan de7iya Qedeeshanne a hentta gadeta, Efireema gezziyan de7iya Sekeemanne a hentta gadetanne Yihudaa gezziyan de7iya Qiriyaati-Arbbaa7a woikko Kebroona dummayidosona. <sup>8</sup>Yorddaanoosa SHAafaappe hefinttan, Yarkkoppe arshsho baggaara bazzon, xoqqasan de7iya Roobeela zaretu biittaappe Beexera, Gaada zaretu biittaappe Gala7aaden de7iya Raamootanne Minaase zaretu biittaappe Baasaanen de7iya Golaana dummayidosona. <sup>9</sup>Israa7eela asaa ubbaassinne eta giddon de7iya betetussi dummayido katamati hageeta; erennan de7iiddi asa worida ai asinne, yaa7aa sinttan eqqana gakkanaassi, suuttaa achchiyaa-gaa kushiyan haiqqennaadan, he katamatuppe issuwaakko baqatanau danddayees.

## 21

### *Leewatu Katamata*

<sup>1</sup>Hegaappe guyyiyan Leewa zaretu yaratu halaqati qeesiyaa El77aazarakko, Nawe na7aa Yaasukonne Israa7eela asaa zaretuyyo yaratu halaqatukko shiiqidosona. <sup>2</sup>SHiiqidosan Kanaane biittan de7iya Seelon eta hagaadan yaagidosona; "Nuuni de7ana katamatanne nu mehiyaassi hentta gadeta neeni nuussi immana mala GODAI Muuse baggaara azaziis" yaagidosona. <sup>3</sup>Yaagin GODAI azazidoogaadan, Israa7eela asai Leewa zaretuyyo ha katamatanne hentta gadeta bantta biittaappe qanxxidi etau immidosona.

<sup>4</sup>Koiro saamai Qahaata yaratussi kiyiis. Qeesiyaa Aaroona zare Leewati Yihudaa zaretuppe, Simoona zaretuppenne Biniyaama zaretuppe tammanne heezzu katamata saaman ekkidosona. <sup>5</sup>Attida Qahaata yarati Efireema zaretuppe, Daana zaretuppenne Minaase zaretu baggaappe tammu katamata saaman ekkidosona.

<sup>6</sup>Gershshoona yarati Yisaakoora zaretuppe, Aseera zaretuppe, Nifftaaleema zaretuppenne Baasaanen de7iya Minaase zaretu baggaappe tammanne heezzu katamata saaman ekkidosona.

<sup>7</sup>Maraara yarati Roobeela zaretuppe, Gaada zaretuppenne Zaabiloona zaretuppe tammanne naa77u katamata ekkidosona.

<sup>8</sup>GODAI Muuse baggaara azazidoogaadan, Israa7eela asai ha katamatanne eta hentta gadeta Leewatuyyo saaman shaakkidi immidosona.

<sup>9</sup>Yihudaa zaretuppenne Simoona zaretuppe Israa7eela asai ekkidi immido katamatu sunttai hagaappe kaallidi xaafettiis. <sup>10</sup>Koiro saamai Leewa zaretuppe yelettidi, Qahaata yara gidida Aaroona zaretussi kiyin, etau immido katamati hageeta: <sup>11</sup>Israa7eela asai Yihudaa gezziyan de7iya Qiriyaati-Arbbaa7a woikko Kebroonanne a yuushuwan de7iya hentta gadeta etayyo immidosona. (Arbbaa7i Anaage aawaa.) <sup>12</sup>SHin he katamaa yuushuwan de7iya gadetanne moottata Yifune na7aa Kaaleebayyo laata oottidi immidosona. <sup>13</sup>Qeesiyaa Aaroona zaretuyyo asa worida asi baqati biidi attiyo Kebroona katamanne a hentta gadeta, Liibinanne a hentta gadeta, <sup>14</sup>Yattiranne a hentta gadeta, Eshttamoo7anne a hentta gadeta, <sup>15</sup>Holoonanne a hentta gadeta, Dabiiranne a hentta gadeta, <sup>16</sup>Ainanne a hentta gadeta, Yuuxanne a hentta gadetanne Beeti-SHemeshanne a hentta gadeta, muleera uddufun katamata Yihudaa zaretuppenne Simoona zaretuppe ekkidi immidosona. <sup>17</sup>Biniyaama zaretuppe Gabaa7oonanne a hentta gadeta, Gebaa7anne a hentta gadeta, <sup>18</sup>Anatootanne a hentta gadetanne Almoonanne a hentta gadeta, muleera oiddu katamata ekkidi immidosona. <sup>19</sup>Aaroona zare qeesetu katamatanne eta hentta gadeti muleera tammanne heezza.

<sup>20</sup>Attida Qahaata yarati, Leewa zare gidiyaageeti Efireema zaretu katamatuppe shaakkin ekkidosona. <sup>21</sup>Etayyo Efireema gezziyan de7iya, asa worida asi baqati biidi attiyo Sekeemanne a hentta gadeta, Gezeeranne a hentta gadeta, <sup>22</sup>Qibixaimanne a hentta gadetanne Beeti-Horoonanne a hentta gadeta, muleera oiddu katamata ekkidi



immidosona. <sup>23</sup> Daana zaretuppe Elttaaqenne a hentta gadeta, Gibbatoonanne a hentta gadeta, <sup>24</sup> Ayyaaloonaanne a hentta gadetanne Gaate-Rimmoonanne a hentta gadeta, muleera oiddu katamata ekkidi immidosona. <sup>25</sup> Minaase zaretu baggatuppe Taa7inaakanne a hentta gadetanne Gaate-Rimmoonanne a hentta gadeta, muleera naa77u katamata ekkidi immidosona. <sup>26</sup> Attida Qahaata yaratu katamatinne eta hentta gadeti muleera tamma.

<sup>27</sup> Minaase zaretu baggatuppe asa worida asi baqati biidi attiyo, Baasaanen de7iya Golaana katamaanne a hentta gadetanne Ba7eshttaaranne a hentta gadeta, muleera naa77u katamata ekkidi, Gershshoona yara gidiya hara Leewatuyyo immidosona. <sup>28</sup> Yisaakoora zaretuppe Qishiyoonaanne a hentta gadeta, Dabiraatanne a hentta gadeta, <sup>29</sup> Yarmmuutanne a hentta gadetanne Engganiimanne a hentta gadeta, muleera oiddu katamata ekkidi immidosona. <sup>30</sup> Aseera zaretuppe Mish77aalanne a hentta gadeta, Abddoonanne a hentta gadeta, <sup>31</sup> Helqqaatanne a hentta gadetanne Rahoobanne a hentta gadeta, muleera oiddu katamata ekkidi immidosona. <sup>32</sup> Hegaadankka Nifttaaleema zaretuppe asa worida asi baqati biidi attiyo Galiilan de7iya Qedeeshanne a hentta gadeta, Hammootanne a hentta gadeta, Dooranne a hentta gadetanne Qarttaananne a hentta gadeta, muleera oiddu katamata ekkidi, etayyo immidosona. <sup>33</sup> Gershshoona yaratu katamatinne eta hentta gadeti muleera tammanne heezza.

<sup>34-35</sup> Attida Maraara yara gidiya Leewatuyyo Zaabiloona zaretuppe asa worida asi baqati biidi attiyo Yoqina7aamanne a hentta gadeta, Qarttanne a hentta gadeta, Diimianne a hentta gadetanne Naahilaalanne a hentta gadeta, muleera oiddu katamata ekkidi immidosona. <sup>36</sup> Roobeela zaretuppe Beexeranne a hentta gadeta, Yahaaxanne a hentta gadeta, <sup>37</sup> Qidemootanne a hentta gadetanne Mefa7aatanne a hentta gadeta, muleera oiddu katamata ekkidi, etayyo immidosona. <sup>38</sup> Qassi Gaada zaretuppe asa worida asi baqati biidi attiyo, Gala7aaden de7iya Raamootanne a hentta gadeta, Maahinaimanne a hentta gadeta, <sup>39</sup> Haseboonanne a hentta gadetanne Yaa7izeeranne a hentta gadeta, muleera oiddu katamata ekkidi, etayyo immidosona. <sup>40</sup> Maraara yara gidiya hara Leewatuyyo shaakkin gakkida katamati muleera tammanne naa77a.

<sup>41</sup> Israa7eela asai laattido biittan de7iya Leewatuyyo muleera oitamanne hosppun katamati eta hentta gadetuura de7oosona. <sup>42</sup> He katamatu ubbaa yuushuwan hentta gadeti de7oosona.

<sup>43</sup> Hegaadan oottidi, GODAI eta aawatuyyo immanau caaqqido biittaa ubbaa Israa7eela asaayyo immiis; immin eti laattidi, yan de7idosona. <sup>44</sup> GODAI eta aawatuyyo caaqqidoogaadan, eta ubba baggaarakka shemppissiis. GODAI eta morkketa ubbaa etayyo aatti immido gishshau, eta morkketuppe issoinne etaara eqettanau danddayibeenna. <sup>45</sup> GODAI Israa7eela asaayyo immana giido lo77o qaala ubbaa poliisippe attin issoinne sa7an attibeenna.

## 22

### *Naa77u Zaretinne Baggati Bantta Soo Soo Simmidosona*

<sup>1</sup> Hegaappe guyyiyan Yaasu Roobeela zaretu, Gaada zaretanne Minaase zaretuppe baggata xeegeis. <sup>2</sup> Xeegeidi, "GODAA ashkkaarai Muusee inttena azazido ubbaa polideta; qassi taassikka ubaban azazettideta. <sup>3</sup> Daro wodiyaasappe hachchi gakkanaassi, intte intte ishannta yeggibeekketa; GODAI intte Xoossai inttessi immido hadaraa polideta. <sup>4</sup> Simmi GODAI intte Xoossai etayyo giido qaalaadan, intte ishannta shemppissiis. Hega gishshau, GODAA ashkkaarai Muusee intteyyo Yorddaanoosa SHAafaappe hefintta baggaara immido laata biittan de7iya intte soo soo simmite. <sup>5</sup> GODAA ashkkaarai Muusee inttena azazido azazuwaanne higgiiyaa mintti naagite. GODAA intte Xoossaa siiqite; a ogetu ubban hemettite; a azazuwaassi azazettite; aara minni oiqettite; intte kumetta wozanaappenne kumetta shemppuwaappe ayyo oottite" yaagiis.



6-8 Yaasu eta anjjidi yeddiiddi hagaadan yaagiis; “Be7ite, intte ha77i daro mehiyaa, biraa, worqqa, nahaasiyaa, birataanne daro maayuwaa ekki daretidi, intte biittaa simmana haneeta. Hegaa gishshau intte morkketuppe omooddidoogaa, intte ishanttuura shaakki ekkite” yaagiis. Hegaappe guyyiyan eti bantta soo soo biidosona.

Muusee Minaase zaretuppe baggatussi Baasaanen biittaa immi wottiis; shin attida Minaase zaretu baggatussi Yaasu Yorddaanoosa SHAafaappe arggo baggan hara zaretuura issippe laattiyo biittaa immiis.

<sup>9</sup> Roobeela zreti, Gaada zaretinne Minaase zaretu baggati bantta laata biittaa simmidi biidosona. GODAI Muuse baggaara azazin laattido Gala7aade biittaa baanau, Kanaane biittan Seelon de7iya Israa7eela asaappe shaakettidosona.

*Yorddaanoosa SHAafaa Matan Gimbbido Yarshshosaa*

<sup>10</sup> Roobeela zreti, Gaada zaretinne Minaase zaretuppe baggati Yorddaanoosa SHAafaa matan Kanaane biittan de7iya Galiloota yiido wode, shaafaa matan yarshshuwaa yarshshiyoo gita sohuwaa gimbbidosona. <sup>11</sup> Gimbbin, “Roobeela zreti, Gaada zaretinne Minaase zaretuppe baggati Yorddaanoosa matan, Galilootan, Kanaane zawan, Israa7eelatu baggaara yarshsho sohuwaa gimbbidosona” giyoogaa Israa7eelati siyidosona. <sup>12</sup> Siyinne kumetta Israa7eela asaa yaa7ai eta olanau baanau Seelo giyoosan issippe shiiqiis.

<sup>13</sup> SHiiqidi Israa7eela asai qeesiyaa El77aazara na7aa Piinihaasa, Gala7aade biittan de7iya Roobeela zaretukko, Gaada zaretukkonne Minaase zaretuppe baggatukko kiittiis. <sup>14</sup> Issi issi zaree ba yaratu halaqatuppe issi issi asa dooridi, tammu asaa Piinihaasaara yeddiis.

<sup>15</sup> Eti Roobeela zreti, Gaada zaretinne Minaase zaretu baggati de7iyo Gala7aade biittaa biidosona. Biidi eta, <sup>16</sup> “GODAA asai kumetta yaa7ai inttena hagaadan yaagees; ‘Israa7eela Xoossaa bolli aissi haggaa mala iitabaa oottidetii? Waanidi giikko, intte hara yarshsho sohuwaa intteyyo gimbbidi, GODAA bolli makkalideta! A kaalliyoogaakka aggideta! <sup>17</sup> Pa7ooran nuuni oottido nagarai nuuyyo gidennee? Israa7eela yaa7aa bolli boshai wodhdhidabaa gidikkonne, hachchi gakkanaassikka nuuni he nagaraappe geeyibookko. <sup>18</sup> GODAA kaalliyoogaappe hachchikka wora simmuuteetiyye?”

“Intte hachchi GODAA bolli makkalikko, GODAI wontto kumetta Israa7eela yaa7aa hanqqettana. <sup>19</sup> Intte de7iyo biittai tunidabaa gidikko, GODAA Dunkkaanee eqqido biittaa haa yiidi, nunaara gadiyaa shaakkite. SHin kaseppe de7iya GODAA nu Xoossaa yarshsho sohuwaappe hara yarshsho sohuwaa gimbbidi, Xoossaa bolli makkaloppite; woikko nunakka makkalanchcha kessoppite. <sup>20</sup> Zaraaha zaree Akkaani hirima gidobaappe ekkidi, nagaraa oottido gishshau, kumetta Israa7eela yaa7aa bolli GODAA hanqqoi wodhdhibeennee? Ba nagaraa gaasuwan haiqqidai a xalaalaa gidenna’ yaagees” yaagidosona.

<sup>21</sup> Yaagin Roobeela zreti, Gaada zaretinne Minaase zaretuppe baggati Israa7eela yaratu halaqatuyyo hagaadan yaagidi zaaridosona; <sup>22</sup> “Wolqqaamai Xoossaa GODAA! Wolqqaamai Xoossaa GODAA! Nuuni haggaa aibissi oottidaakko i erees! Nuuni aibissi oottidaakko inttekka eranaadan koyoos. Nuuni GODAA bollan makkalidabanne azazettennan ixxidabaa gidikko, hachchi nuna paxa wottoppite. <sup>23</sup> Nuuni GODAA kaalliyoogaa aggidi, xuuggiyo yarshshuwaa, kattaa yarshshuwaanne issip-petettaa yarshshuwaa yarshshanaunne yarshshiyoo sohuwaa gimbbidabaa gidikko, GODAI nuna he autiyaa achcho. <sup>24</sup> Nuuni hegaassi gimbbibookko; nuuni yarshsho sohuwaa gimbbidoogee, sinttappe yaana laittan intte naati nu naata, ‘Inttena GODAN Israa7eela Xoossan aibee gattiyai? <sup>25</sup> Inttenoo, Roobeelanne Gaada zaretoo, GODAI nu giddooninne intte giddon Yorddaanoosa SHAafaa zawayiis. GODAN inttena gattiyaabi baawa’ yaaganaakkonne giidi hirggido gishshaassa. Hegaadan oottidi, intte zreti nu zaretu GODAAYYO goinnennaadan teqqennan aggokkona.

<sup>26</sup> “Hegaa gishshau nuuni nu gidдон yarshsho sohuwaa ane gimboos giida; shin xuuggiyo yarshshuwaassa woikko hara yarshshuwaassa gidenna. <sup>27</sup> Nuuni yarshsho sohuwaa gimbbidoogee xuuggiyo yarshshuwaassa, issippetettaa yarshshuwaanne hara yarshshuwaassa yarshshiiddi, GODAASSI a Dunkkaaniyan goinnana mala, hagee nu gidduwaaninne intte gidduwaani, qassi nu kaalliya yeletaa gidduwan markka gidanaaassa. Wodeppe intte zareti nu zareta, ‘Inttena GODAN gattiyaabi aibinne baawa’ gaanau danddayokkona. <sup>28</sup> Eti geelladan nuna woikko nu yeletaa wodeppe hegaadan giikko, nuuni etau zaaridi, ‘GODAASSI yarshshiyo sohuwaa leemisuwaa haggaa be7ite. Haggaa nu aawati xuuggiyo yarshshuwaanne hara yarshshuwaassa yarshshanaassa gidennan, intteppenenne nuuppenne gidduwan markka gidana mala gimbbidosona’ yaagana. <sup>29</sup> GODAA bolli makkalanaagee nuuppe haakko! GODAA nu Xoossaa Dunkkaaniyaa sinttan eqqida yarshshuwaasaappe haraa, xuuggiyo yarshshuwaassa, katta yarshshuwaanne hara yarshshuwaassa yarshshiyo sohuwaa gimbbidi, hachchi wora simmibookko” yaagidi zaaridosona.

<sup>30</sup> Qeesee Piinihaasinne aara de7iya Israa7eela yaratu halaqati, Roobeela, Gaadanne Minaase zareti yootidoogaa siyidi, keehi ufaiddosona. <sup>31</sup> Qeesiyaa El77aazara na7ai Piinihaasi Roobeela, Gaadanne Minaase zaretussi, “GODAI nu gidдон de7iyooogaa nuuni hachchi erida; aissi giikko, ha yohuwaa intte GODAA bolli makkalanau oottibeekketa. Intte ha77i GODAA qixaatiyaappe Israa7eela asaa ashshideta” yaagiis.

<sup>32</sup> Hegaappe guyyiyan qeesiyaa El77aazara na7ai Piinihaasinne halaqati Gala7aaden de7iya Roobeelanne Gaada zaretu matappe Kanaanen de7iya Israa7eela asaakko simmidosona; simmidi hanidabaa etayyo yootidosona. <sup>33</sup> Yootidobai Israa7eela asaa ufaissin, Xoossaa galatidosona. Qassi Roobeela asatinne Gaada asati de7iyo biittaa olidi bashshanau baanau haasayyoogaakka aggi bayidosona.

<sup>34</sup> Roobeelanne Gaada zareti, “Ha yarshsho sohoi GODAA xalaalai Xoossaa gididoogau nu ubbaappe gidduwan markka gidana” yaagidosona; yaagidi he yarshsho sohuwaa Markka sunttidosona.

## 23

### *Yaasu Israa7eela Asaassi Wurssetta Haasayaa Haasayis*

<sup>1</sup> Daro wodiyaappe guyyiyan, GODAI Israa7eela asaa eta yuushuwan de7iya morkketu ubbaappe shemppissiis. He wode Yaasu cimidi, wodiya keehippe sugiis.

<sup>2</sup> Yaatidaagee Israa7eela asaa ubbaa, cimata, halaqata, daannatanne ola gadaawata issippe xeegidi, haggadan yaagiis; “Taani cimada, wodiya keehippe sugaas. <sup>3</sup> GODAI intte Xoossai intte gishshau ha kawotettata ubbaa oottidobaa intte intte huuphiyau be7ideta. Intteyyo olettidaagee GODAA intte Xoossaattennee. <sup>4</sup> Be7ite, Yorddaanoosa SHaafaappe doommidi arggo baggaara de7iya Meediteraane Abbaa gakkanaassi de7iya, attida kawotettatu biittaa ubbaa, taani xaissido kawotettatu biittaaarakka laata gade oottada, intte zaretuyyo taani shaakkada immaas. <sup>5</sup> GODAI intte Xoossai eta sugananne intte sinttaappe laaggana; laaggin GODAI intte Xoossai giidoogaadan, intte eta biittaa laattana.

<sup>6</sup> “Hegaa gishshau, Muuse Higgiyaa Maxaafan xaafettida ubbaa naaganaunne oot-tanau keehippe minnite; appe ushachchi haddirssi gooppite. <sup>7</sup> Hagan intte gidдон attida ha kawotettatuura walahettoppite. Eta xoossatu sunttaa denttoppite woikko eta sunttan caaqqoppite. Etayyo oottoppite woikko etayyo goinnoppite. <sup>8</sup> SHin hachchi gakkanaassi intte oottidoogaadan, GODAA intte Xoossaa mintti oiqqite.

<sup>9</sup> “Aissi giikko, GODAI gitanne mino kawotettata intte sinttappe kessiis. Inttena gidikko, hachchi gakkanaassi ooninne inttenaara eqettanau danddayibeenna. <sup>10</sup> GODAI intte Xoossai intteyyo giidoogaadan, i ba huuphen intteyyo olettiyo gishshau, intteppe issi asi sha7u asaa yedettees. <sup>11</sup> GODAA intte Xoossaa ubbaton siiqanaagaa

dogoppite. <sup>12</sup> Intte guyye simmidi, kawotettatuppe hagan intte giddon attida asaara issuwaa gidikko, eta maccaasaa intteyyo, intte maccaasaa etayyo immi walahettikko, <sup>13</sup> GODAI intte Xoossai ha kawotettata intte sinttaappe gooddiiddi de7i bayennaagaa geeshshidi erite. SHin GODAI intte Xoossai immido ha lo77o biittaappe intte xayana gakkanaassi, eti intteyyo pirenne gite gidana; intte zokkuwaayyo lisso, intte aifiyaayyookka aguntta gidana.

<sup>14</sup> “Ha77i simmi taani haiqqana mataas. GODAI intte Xoossai intteyyo immana giido lo77o ubbaappe issibinne attibeennaagaa intte ubbai intte wozanaaninne shempuwan ereeta. I intteyyo immana giidobaappe issibinne attennan, ubbai polettiis. <sup>15</sup> GODAI intte Xoossai intteyyo immana giido lo77obai ubbai attennan polettidoogaadan, GODAI intte Xoossai intteyyo immido ha lo77o biittaappe inttena xaissana gakkanaassi, iita qixaatiyaa ubbaakka intte bollan hegaadan ehaana. <sup>16</sup> GODAI intte Xoossai inttenaara maacettido maachchaa intte kanttikko, biidi hara xoossatussi oottikkonne goinnikko, GODAA hanqqoi intte bolli eexxi kiyana; i intteyyo immido lo77o biittaappekka intte eesuwan xayana” yaagiis.

## 24

### *Yaasu Sekeeman Haasayido Haasayaa*

<sup>1</sup> Hegaappe guyyiyan Yaasu Israa7eela zaretu ubbaa Sekeema giyo kataman shishshiis. Cimata, halaqata, daannatanne ola gadaawata ubbaa xeegiis; xeejin eti Xoossaa sinttan shiiqidosona. <sup>2</sup> Yaasu asau ubbau hagaadan yaagiis; “GODAI Israa7eela Xoossai hagaadan yaagees; ‘Beni intte aawati Efiraaxiisa SHaafaappe hefinttan de7idosona; eti hara xoossatussi oottidosona. Etappe issoi Abrahaamanne Naakoora aawaa Taara. <sup>3</sup> Hegaappe guyyiyan intte aawaa Abrahaama, he shaafaappe hefinttan de7iya biittaappe xeesada, Kanaane biitta ubban kaalettaas. A zariyaakka corayaas; Yisaaqakka au immaas. <sup>4</sup> Yisaaqassikka Yaaqoobanne Eesawa immaas. Eesawassi Eedooma gezziyaa laattanaadan immaas; shin Yaaqoobinne a naati duge Gibxxe biidosona.

<sup>5</sup> “Guyyeppe Muusanne Aaroonna kiittada taani yan oottidoban Gibxxe biittaa asaa boshan shocaas; hegaappe guyyiyan inttena kessaas. <sup>6</sup> Taani intte aawata Gibxxeppe kessin, Zo7o Abbaakko yiideta; yin Gibxxeti intte aawata parati goochchiyo gaartuuninne paraasatun yedettidosona. <sup>7</sup> Eti GODAASSI waassido wode, etappenne Gibxxetuppe gidduwan xumaa yeggaas; yaatada, abbai eta bolli simmanaadaaninne eta muukkanaadan oottaas. Taani Gibxxetu bolli oottidobaa intte intte aifiyan be7ideta. Inttekka bazzon daro wodiyaa de7ideta.

<sup>8</sup> “‘Hegaappe guyyiyan Yorddaanoosa SHaafaappe arshsho baggaara de7iya Amooretu biittaa taani inttena ehaas. Eti inttenaara olettin, taani eta intte kushiyan aattada immaas; immin eta biittaa laattideta. Qassi taani eta intte sinttaappe xaissaas. <sup>9</sup> Hegaappe guyyiyan Xippoora na7ai Baalaaqi, Moo7aaba biittaa kawoi denddidi, Israa7eelatuura olettiis. Ba7ooru na7ai Balaami inttena qangganaadan, kiittidi xeesissiis; <sup>10</sup> shin taani Balaamabaa siyabeikke. Hegaa gishshau i inttena anjjiis; yaatin, taani inttena Baalaaqa kushiyaappe ashshaas.

<sup>11</sup> “‘Ashshin Yorddaanoosa SHaafaa pinnidi, Yarkko yiideta; yin Yarkko asainne Amooreti, Parzzeti, Kanaaneti, Hiiteti, Gerggeeseti, Hiiwetinne Yaabusati inttenaara olettin, taani eta intte kushiyan aattada immaas. <sup>12</sup> Kashiyaa intteppe sinttau kiittada, Amooretu kawota naa77ata intte sinttaappe kessaas. Hagee ubbai hananau danddayidoogee, intte bisuwaaninne intte wonddafiyaani gidenna. <sup>13</sup> Intte oottidi kessibeenna biittaanne intte keexxibeenna katamata taani intteyyo immin, an de7eeta. Ha77i intte tokkibeenna woiniyaa turaa aifiyaanne wogaraa aifiyaa meeta’ yaagees.

<sup>14</sup> “Hegaa gishshau ha77ikka GODAAYYO yayyite; tumu wozanaappe ammanettidi ayyo goinnite. Intte maizza aawati Efiraaxiisa SHaafaappe hefinttaaninne Gibxxen goinnido allaga xoossata wora olidi, GODAAYYO goinnite. <sup>15</sup> GODAASSI goinniyoogee inttena iitikko, intte aawati shaafaappe hefinttan de7iiddi goinnido xoossata gidin, woikko ha77i intte de7iyo Amooore biittaa asatu xoossata gidin, intte goinnanaagaa hachchi doorite. SHin tananne ta keettaa asaa gidikko, nuuni GODAAYYO goinnana” yaagiis.

<sup>16</sup> Yaagin asai zaaridi, “GODAA aggi bayidi, hara xoossatussi goinnanaagee nuuppe haakko! <sup>17</sup> Gibxxe biittaappe, ailletettaa keettaappe, nunanne nu aawata kessidi ehidaagee, he gita malaatata nu xeellishin oottidaagee, nuuni biido oge ubbaaninne kanttido biittatu ubbaa giddon nuna naagidaagee, GODAA nu Xoossaattennee. <sup>18</sup> Qassi GODAI asaa ubbaa, he biittan de7iia Amooore asatuurakka nu sinttaappe laaggidi kessiis. Hegaa gishshau nuunikka GODAASSI goinnana; aissi giikko, i nu Xoossaa” yaagiis.

<sup>19</sup> SHin Yaasu asaa hagaadan yaagiis; “Intte GODAAYYO goinnanau danddayekketa. Aissi giikko, i geeshsha Xoossaa; i qanaatiya Xoossaa; i intte naaquwaa woikko intte nagaraa atto geenna. <sup>20</sup> Intte GODAA aggidi, allaga xoossatussi goinnikko, i intteyyo lo77obaa oottidoogaappe guyyiyan, simmidi inttena qohananne xaissana” yaagiis.

<sup>21</sup> Yaagin asai Yaasa, “CHii, chii! Nuuni GODAAYYO goinnana” yaagiis.

<sup>22</sup> Yaagin Yaasu asaa, “Intte GODAASSI goinnanaagaa dooridoogau intte huuphiyau intte markka” yaagiis.

Yaagin eti, “Ee nuuni markka!” yaagidosona.

<sup>23</sup> Yaasu, “Yaatikko, intte giddon de7iia allaga xoossata wora olite; intte wozanaa GODAAKKO, Israa7eela Xoossaakko zaarite” yaagiis.

<sup>24</sup> Yaagin eti, “Nuuni GODAASSI, nu Xoossaassi, goinnana; a azazuwaakka polana” yaagidosona.

<sup>25</sup> He gallassi Yaasu asaara maachchaa maacettiis; maacettidi, Sekeeman higgiiyaanne wogaa etau kessiis. <sup>26</sup> Kessidi Yaasu he qaalata Xoossaa Higgiiyaa Maxaafan xaafiis. Hegaappe guyyiyan, issi gita shuchchaa ekkidi, GODAA Dunkkaaniyaa matan de7iia wolaa garssan essiis. <sup>27</sup> Yaasu asau ubbau, “Be7ite, GODAI nuuyyo haasayido qaalaa ubbaa ha shuchchai siyido gishshau, i nu bolli markka gidana. Intte Xoossaa bollan makkalikko, ha shuchchai intte bolli markka gidana” yaagiis. <sup>28</sup> Hegaappe guyyiyan, Yaasu asaa ubbaa yeddin, ubbaikka ba laata biitti biitti simmidi biis.

### *Yaasu Haiquwaanne El77aazara Haiquwaa*

<sup>29</sup> Hegaappe guyyiyan GODAA ashkkarai, Nawe na7ai Yaasu, laittai xeetanne tammaa gidin haiqqiis. <sup>30</sup> Haiqqin asai Ga7aasha Deriyaappe huuphessa baggan, Efireema gezziyan de7iia a laata gadiyan, Timinaati-Seeran moogidosona.

<sup>31</sup> Yaasu paxa de7ido wode ubbaaninne Yaasuppe simmin de7idi, Xoossai Israa7eelatussi oottido ooso ubbaa erida cimatu wode ubban Israa7eelati GODAASSI goinnidosona.

<sup>32</sup> Israa7eela asai Gibxxe biittaappe ehiido Yooseefa meqettaa Sekeeman moogidosona. He sohuwaa Yaaqoobi SHEkeema aawaa Hamoora naatuppe xeetu xaqara biran shammiis; shammin guyyeppe Yooseefa zareti laattidosona.

<sup>33</sup> Aaroon na7ai El77aazari haiqqiis; haiqqin a na7aa Piinihaasassi imettida Efireema gezziyan de7iia Gib77a giyo kataman moogidosona.



## Daannatu Maxaafaa

### *Gidduwaa Erissuwaa*

Daannatu Maxaafai Kanaanee oiqettido wodiyaappe doommidi, kawoi kawotiyo kawotettaa eqqana gakkanaashin de7iya taariketa oiqqiis; he wodee Israa7eela asaa taarikiyan higgee baina wode. Ha taariketi “Daannata” geetettiya mino asati oot-tidobaa bessoonsa. Ha daannatuppe dariya baggati ola gadaawata. Etappe qassi keehi erettidaagee, a minotettaa miraafiyaa 13-16 gakkanaashin xaafettido Samssoona giyo asa. Ha maxaafaappe nuuni demmiyo gita timirttee, Israa7eela asaa de7oi tumu de7o gidiyoogee eti Xoossaassi ammanettidi de7ido keesaana gidiyooгаа. Eti ayyo ammanettennan ixxiyo wode, ubbatonkka eta bolli bashshai yees. Hegaappekka qassi aadhdhiya harabai de7ees; hegeenne, asai Xoossaassi ammanettennan ixxido gaasuwan eta bolli bashshai gakkikkokka, eti nagaraa paaxidi simmido wode ubban, Xoossai eta ashshanau giigi uttidoogaa.

### *Yihudaa Zaretinne Simoona Zareti Adooni-Beezeqa Olidi Oiqqidosona*

<sup>1</sup> Yaasu haiqqidoogaappe guyyiyan, Israa7eela asai, “Kanaane biittaa asaa olanau nu zaretuppe koirottidi kiyanaa oonee?” yaagidi GODAA oichchiis.

<sup>2</sup> Oichchin GODAI, “Yihudaa zareti koirottidi kiyona. Taani biittaa eta kushiyan aattada immaas” yaagiis.

<sup>3</sup> Yihudaa asai bantta dabbota, Simoona zareta, “Nuuni Kanaanetuura olettana mala, nuna shaakkin gakkidasaa nunaara hinddite. Hegaappe guyyiyan, inttena shaakkin gakkidasaa inttenaara issippe baana” yaagiis. Yaagin Simoona zaretinne Yihudaa zareti olau issippe biidosona. <sup>4</sup> Bin GODAI Kanaanetanne Parzzeta eta kushiyan aattidi immiis; immin Bezeeqa giyo kataman tammu sha7u asaa woridosona. <sup>5</sup> Bezeeqa kataman Adooni-Bezeeqa demmide, aara olettidosona; olettidi Kanaanetanne Parzzeta xoonidosona. <sup>6</sup> Adooni-Beezeqi baqatidaagaa yedetti oiqqidi, a kushiya wogga biradhdhetanne a tohuwaa wogga biradhdheta qanxxidosona.

<sup>7</sup> Qanxxin Adooni-Beezeqi, “Kushiya wogga biradhdhetanne tohuwaa wogga biradhdheta taani qanxxido laappun tammu kawoti ta masoofiyaappe laalettida suuppaa pippaariidi moosona. Taani eta oottidoogaadan, Xoossai tana oottiis” yaagiis. A Yerusalaame ehin, yan haiqqiis.

### *Yihudaa Zareti Yerusalaamenne Kebroona Oiqqidosona*

<sup>8</sup> Yihudaa asai Yerusalaame olidi oiqqiis; oiqqidi asaa qara bisuwan woridi, kata-maa taman xuuggiis. <sup>9</sup> Hegaappe guyyiyan, Yihudaa asai gezziyan, Neegeeba Baz-zuwaaninne garan de7iya Kanaaneta olanau biis. <sup>10</sup> Biidi kase Qiriyaati-Arbbaa7a geetettiya Kebroona kataman de7iya Kanaaneta olidosona; olidi SHeshaaya, Ahimaananne Talmmaaya geetettiya yarata xoonidosona.

### *Otini7eeli Dabiira Katamaa Oiqqiis*

#### *(Yaasu Maxaafaa 15:13-19)*

<sup>11</sup> Hegaappe denddidi Yihudaa asai Dabiira giyo kataman de7iya asaa olanau biis. Dabiira katamai kase Qiriyaati-Sefera geetettees. <sup>12</sup> Kaaleebi, “Qiriyaati-Sefera olidi oiqqiya uraassi taani ta na7iyo Akiso immana” yaagiis. <sup>13</sup> Yaagin Kaaleeba ishaa kaaluwaa Qanaaza na7ai Otini7eeli he katamaa olidi oiqqiis; oiqqin, Kaaleebi ba na7iyo Akiso ayyo immiis.

<sup>14</sup> Akisa Otini7eela geliyo wode, i aawai iyyo gade immanaadan woossana mala, Otini7eeli o zoriis. Zorin a baquluwaappe wodhdhaasu; wodhdhin Kaaleebi o, “Ai koyai?” yaagidi oichchiis.



<sup>15</sup> Oichchin a, “Taayyo woituwaa imma. Neeni kase taayyo immido biittai qa77e gidido gishshau, haatta pulttota taayyo immarkkii” yaagaasu. Yaagin Kaaleebi killi pulttuwaakka hirkki pulttuwaakka iyyo immiis.

*Yihudaa Zaretinne Biniyaama Zareti Xoonido Xoonuwaa*

<sup>16</sup> Muuse bollowaa zareti Qeenati Yihudaa asaara Zambbaa Katamaa geetettiya Yarkko katamaappe denddidosona; denddidi Araada giyo katamaappe tohossa baggaara, Neegeeban de7iya Yihudaa Bazzuwaa biidosona; biidi yan de7iya asaa gidduwan uttidosona. <sup>17</sup> Yihudaa asai Simoona asaara issippe biidi, Xafaata giyo kataman de7iya Kanaaneta xooniis; xoonidi katamaa muleera xaissii. Xaissidi Horima<sup>1</sup> yaagidi sunttidosona. <sup>18</sup> Yihudaa asai gujjidikka Gaaza, Asqqaloonanne Eqiroona katamata eta yuushuwan de7iya biittatuurakka oiqqiis. <sup>19</sup> GODAI Yihudaa asaara de7iyo gishshau, gezze biittaa eti laattidosona; shin dembbaa biittaa asatuyyo birataappe oosettida olaa para gaareti de7iyo gishshau, Yihudaa asai eta yedettanau danddayibeenna. <sup>20</sup> Muusee giidoogaadan, Kebroona katamaa Kaaleebayyo immidosona; immiin Kaaleebi Anaqezare gidiya heezzu yarata yedettidi kessiis.

<sup>21</sup> SHin Biniyaama zareti Yerusalaamen de7iya Yaabuusata yedettibookkona; yaatin, Yaabuusati Biniyaama zaretuura hachchi gakkanaassi Yerusalaamen issippe de7oosona.

*Efireema Zaretinne Minaase Zareti Beetele Xoonidi Oiqqidosona*

<sup>22-23</sup> Yooseefa naatu, Efireemanne Minaase zareti qassi Beetele katamaa bollan woraajjidosa. Kase he katamai Looza geetettes. Woraajjiyo wode GODAI etaara de7ees. Yooseefa zareti Beetele katamaa xomoosiya asata kiittidosona. <sup>24</sup> Kiittin eti katamaappe kiyiya issi bitaniyaa demmidi, “Katamaa giddo waani gelanau danddayettiyaakko nuna bessa; bessikko, nuuni neeyyo kehana” yaagidosona. <sup>25</sup> Yaagin i eta bessiis; bessin kataman de7iya asaa qara bisuwan busakkidosona; shin he bitaniyaanne a so asaa ubbaa ashshidosona. <sup>26</sup> Guyyeppe he bitanee Hiitetu biittaa biidi, yan katamaa keexxiis; keexxidi Looza yaagidi sunttiis; sunttin hachchi gakkanaassi he katamai he sunttan xeesettes.

*Israa7eela Asati Biittaappe Yedettibeenna Asata*

<sup>27</sup> Minaase zareti Beetishaana, Taa7inaaka, Doora, Yibila7aamanne Magiddo katamatuuninne eta yuushuwan de7iya moottatun de7iya asata kessidi yedettanau danddayibookkona. Yaatin, Kanaaneti yan de7uwaa minttidosona. <sup>28</sup> Israa7eela asai minnido wode, Kanaaneta banttau wolqqan ootissidosona; shin eta muleera biittaappe kessidi yedettibookkona.

<sup>29</sup> Efireema zaretikka Gezeera giyo kataman de7iya Kanaaneta kessidi yedettibookkona; yaatin, Kanaane asati yan etaara issippe de7idosona.

<sup>30</sup> Zaa7iloona zareti Qitiroona katamaaninne Naahilaala kataman de7iya asata kessidi yedettibookkona; yaatin, Kanaaneti yan etaara issippe de7idosona. SHin Zaa7iloona zareti eta banttau wolqqan ootissidosona.

<sup>31</sup> Aseera zaretikka Aakkon, Sidoonan, Ahilaaban, Akiziiban, Helbban, Afeeqaaninne Rahooban de7iya asata kessidi yedettibookkona. <sup>32</sup> Kanaaneti kiyennan aggido gishshau, Aseera zareti etaara yan issippe de7idosona.

<sup>33</sup> Nifftaaleema zaretikka Beeti-SHemesha katamaaninne Beeti-Anaata kataman de7iya asata kessidi yedettibookkona; shin Kanaanetuura yan issippe de7idosona. Beeti-SHemeshanne Beeti-Anaata katamaa asata banttau wolqqan ootissidosona.

<sup>34</sup> Amooreti Daana zareta pude gezziyau yedettidosona; eti duge dembba biittaa wodhdhennaadan teqqidosona.

<sup>1</sup> 1:17 Horima: Ha sunttaa birshshettai “Muleera xaissii” giyoogaa.

<sup>35</sup> Amooreti Hereesa Deriyaaninne Ayyaaloonaanne SHa7albbiima geetettiya kata-matun de7uwaa minttidosona; shin Efireemanne Minaase zareti minni minnidi biidi, banttau wolqqan ootissidosona. <sup>36</sup> Amooretu biittaa zawai Selaa7a matan de7iya Akirabiima giyo pudettaappe doommidi, huuphessa baggi gakkées.

## 2

### *GODAA Kiitanchchai Bokiima Biis*

<sup>1</sup> GODAA kiitanchchai Gelggalappe Bokiima biidi, Israa7eela asaa hagaadan yaagiis; “Taani inttena Gibxxeppe kessaas; kessada beni intte maizza aawatussi immana gaada caaqqido biittaa inttena gelissaas. Gelissada inttena hagaadan yaagaas; ‘Taani inttenaara maacettido maachchaa mulekka kanttikke. <sup>2</sup> Intte ha biittan de7iya asatuura maachchaa maacettoppiti; eti yarshshiyooosaa kolite’ yaagaas; shin intte taayyo azazettibeekketa. Aissi hegaadan hanidetii? <sup>3</sup> Hegaa gishshau, taani inttena, ‘Eta taani intte sinttaappe yedettikke; eti intteyyo morkke gidana; eta xoosatikka intteyyo pire gidana’ yaagais” yaagiis. <sup>4</sup> GODAA kiitanchchai heгаа Israa7eela asau ubbau haasayido wode, asai ba qaalaa xoqqu oottidi yeekkiis. <sup>5</sup> Yaatidi he sohuwaa Bokiima<sup>2</sup> yaagidi sunttiis; sunttidi hegan GODAASSI yarshshuwaa yarshshiis.

### *Yaasu Haiquwaa*

<sup>6</sup> Yaasu Israa7eela asaa yeddidoogaappe guyyiyan, asai issoi issoi bana shaakkin gakkiiya biittaa ekkana biis. <sup>7</sup> Yaasu paxa de7ido laitta ubban asai GODAASSI oottiis; i haiqqidoogaappe guyyiyanikka, GODAI Israa7eela asaassi oottido gita ooso ubbaa be7ida cimatu wode ubban GODAASSI oottiyoogaa aggibeenna.

<sup>8</sup> GODAA ashkkaarai, Nawe na7ai Yaasu, laittai xeetanne tammaa gidin haiqqiis; <sup>9</sup> haiqqin Ga7aasha Deriyaappe huuphessa baggan, Efireema gezziyan, Timinaati-Seraaha giyoosan de7iya a laata gadiyan moogidosona. <sup>10</sup> He yeleta ubbai haiqqidi ba maizzan gaittidoogaappe guyyiyan, GODAA woikko Israa7eela asaassi i oottidobaa ubbaa erenna hara yeletai denddiis.

### *Israa7eela Asai GODAAYYO Goinniyoogaa Aggi Bayiis*

<sup>11</sup> Hegaappe guyyiyan, Israa7eela asai GODAA sinttan iitabaa oottiis; Ba7aala geetettiya eeqatuyyo goinniis. <sup>12</sup> Gibxxe biittaappe eta kessida GODAA, bantta maizza aawatu Xoossaa aggi bayidosona; bantta yuushuwan de7iya asatu eeqatukko simmidi, etassi goinnidosona; hegan GODAA hanqqetissidosona. <sup>13</sup> Qassi GODAA aggi bayidi, Ba7aalayyoonne Asttaarootiyyo goinnidosona. <sup>14</sup> Yaatin, GODAA hanqqoi Israa7eela asaa bolli eexxi kiyiis; bonqqiyaageeti bonqqanaadan eta bessi bayiis; eta yuushuwan de7iya morkketuyyo eta aattidi immiis. Yaatin, eti bantta morkketuura eqettanau dand-dayibookkona. <sup>15</sup> Eti olettanau kiyido wode ubban, GODAI kase etassi caaqqidoogaadan eti xoonettana mala, i eta bolli denddiis. Yaatin, eti keehippe waayettidosona.

<sup>16</sup> Yaatin, GODAI pirddiya daannata etau denttiis; denttin eti Israa7eela asaa bonqqidaageetu kushiyaappe ashshidosona. <sup>17</sup> SHin Israa7eela asai pirddiya daannatussi azazettibeenna; eti GODAASSI ammanettennan ixxidosa; ixxidi hara xoosatukko simmidi, etassi goinnidosona. Eta aawati hemettido ogiyaappe sohuwaara guyye simmidosa; eta maizza aawati GODAAYYO azazettidoogaadan, eti azazettibookkona. <sup>18</sup> GODAI etau pirddiya daannata denttido wode audenne i he pirddiya daannatuura issippe gidii; gididi he daannai paxa de7ido laitta ubban eta morkketu kushiyaappe eta ashshiis. Aissi giikko, huqqunnainne tuggai darin, eti waassiyooogaa siyidi, GODAI etau qarettiis. <sup>19</sup> SHin pirddiya daannai haiqqidoogaappe guyyiyan, asai guyye simmidi, kase eta aawati oottido iitaappe aadhdhida iitaa oottidosona; eti hara xoosatukko simmidi, etassi goinnidosona; bantta iita oosuwaanne geella ogiyaa aggennan ixxidosa.

2 2:5 Bokiima: Ha suntaa birshshettai “Yeekkiyaageeta” giyoogaa.

<sup>20</sup> Ixxin GODAA hanqqoi Israa7eela asaa bolli eexxi kiyiis; yaatin, GODAI hagaadan yaagiis; “Ha asai taani eta maizza aawatussi gelido maachchaa kanttido gishshaunne taayyo azazettennan ixrido gishshau, <sup>21</sup> hachchippe doommin, Yaasu haiqqido wode biittaa bollan attida dere asatuppe issuwaanne taani eta sinttaappe yedettada kessikke. <sup>22</sup> Ha Israa7eela asai kase bantta maizza aawatudan ta ogiyaa kaalliyaakko, woikko kaallennaakko paaccanau, taani he attida dere asatun go7ettana” yaagiis. <sup>23</sup> Hegaa gishshau, GODAI he dere asati kiyennan gam77anaadan oottiis. I eta eesuwan yedettidi kessibeenna; Yaasussikka eta aattidi immibeenna.

### 3

#### *Biittaa Bollappe Yedetettennan Attida Asata*

<sup>1</sup> Kase Kanaanen ai olanne olettidi meezetibeenna Israa7eela asaa paaccana mala, GODAI ha asata ashshiis. <sup>2</sup> I hegaa oottidoogee, hagaappe kase olaa olettidi meezetibeenna Israa7eela yeletaa olettiyo hiillaa tamarissanaassa. <sup>3</sup> He asati oonee oonee giikko, ichchashu Pilisxxeema katamata haariya asata, Kanaaneta ubbaa, Sidoona katamaa asatanne Ba7aali-Hermmoone giyo deriyaappe doommidi, Hamaata Pinuwaa gakkanaassi Liibaanoosa Deriyan de7iya Hiiweta. <sup>4</sup> GODAI Muuse baggaara kase Israa7eela maizza asaa aawatussi immido azazuwaa eti azazettiyaakko azazettennaakko paacissanau eta ashshiis. <sup>5</sup> Yaatin, Israa7eela asai Kanaanetuura, Hiiwetuura, Amooretuura, Parzzetuura, Hiitetuuranne Yaabuusatuura issippe de7iis. <sup>6</sup> Eta macca naata banttau machchidosona; bantta macca naatakka eta attuma naatussi immidosona. Yaatidi eta xoossatuyyo goinnidosona.

#### *Otini7eela*

<sup>7</sup> Israa7eela asai GODAA sinttan iitabaa oottiis. Eti GODAA bantta Xoossaa dogidi, Ba7aalanne Asheero geetettiya xoossatuyyo goinnidosona. <sup>8</sup> Hegaa gishshau, GODAA hanqqoi Israa7eela asaa bolli eexxi kiyiis; yaatin, GODAI Masphphexoomiyaa biittaa Kawuwaa Kushaani-Rish77ataima kushiyan eta aattidi immiis; immiin eti ayyo hospun laittaa haarettidosona.

<sup>9</sup> SHin Israa7eela asai GODAASSI waassido wode, eta ashshiya uraa kiittiis; ikka Kaaleeba kaalo ishaa Qanaaza na7aa Otini7eela geetettes. <sup>10</sup> GODAA Ayyaanai a bolli wodhdhin, i Israa7eela bolli pirddiya daanna gidiiis. Gididi olaa olettanau biis; bin GODAI Masphphexoomiyaa biittaa Kawuwaa Kushaani-Rish77ataima ayyo aattidi immiis; immiin Kushaani-Rish77ataima xooniis. <sup>11</sup> Yaatin, biittai oitamu laittaa woppaa demmiis. Hegaappe guyyiyan, Qanaaza na7ai Otini7eeli haiqqiis.

#### *Ehuuda*

<sup>12</sup> Israa7eela asai zaarettidikka GODAA sinttan iitabaa oottiis. GODAA sinttan eti iitabaa oottido gishshau, GODAI Moo7aaba Kawoi Egilooni Israa7eela bollan wolqqamaanaan oottiis. <sup>13</sup> Egilooni Amoonatanne Amaaleeqata baakko shiishshidi biidi, Israa7eela asaa olidi xooniis; xoonidi Zambbaa Katamaa geetettiya Yarkko katamaa oiqqiis. <sup>14</sup> Yaatin, Israa7eela asai Moo7aaba Kawuwaa Egiloonayyo tammanne hospun laittaa haarettiis.

<sup>15</sup> SHin Israa7eela asai GODAASSI waassido wode, eta ashshiya uraa kiittiis; ikka Biniyaama zariyaappe Geera na7aa Ehuuda geetettes; i haddirssa kushiyan oot-tiya asa. Israa7eela asai Ehuuda Moo7aaba Kawuwaa Egiloonakko giiraara kiittiis. <sup>16</sup> Ehuudi naa77u baggaara qarattida issi wara gidida bisuwaa baayyo giigissiis; giigis-sidi ushachcha miyyiyaa baggaara ba maayo gididon gixxiis. <sup>17</sup> Hegaappe guyyiyan, Moo7aaba Kawuwaa Egiloonayyo giiraa ekki efidi immiis. Egilooni keehippe ordde asa. <sup>18</sup> Ehuudi giiraa kawuwaayyo immidoogaappe guyyiyan, giiraa tookkidi biida asata moissiis. <sup>19</sup> SHin Ehuudi Gelggala matan de7iya masettida shuchchatu matappe Egiloonakko guyye simmi biidi, “Kawuwau, taani neeyyo xuuriyoobi de7ees” yaagiis.

Yaagin kawoi, “Co77u ga!” yaagiis; yaagin a naagiyaageeti ubbai kare kiyidosona.

<sup>20</sup> He wode kawoi pooqiyani de7iya issi kifiliyan barkka uttidaashin, Ehuudi akko shiiqidi, “Xoossai neeyyo kiittidobai de7ees” yaagiis. Yaagin kawoi ba uttidosaappe eqqiis; <sup>21</sup> eqqin Ehuudi ba haddirssa kushiya yeddidi, ushachcha bagga miyiyaappe bisuwaa shoddidi, kawuwaayyo uluwan dirggintti bayiis. <sup>22</sup> Yaatin, bisuwaayyo tuutee attennan ulo giddo gelin, handdai kammiis. Ehuudi bisuwaa kawuwa uluwaappe shoddibeenna gishshau, zokkuwaara kantti kiyiis. <sup>23</sup> Hegaappe guyyiyan Ehuudi kare kiyidi, pooqiyani de7iya kifiliya penggiyaa gorddidi, a bolli qulppiis.

<sup>24</sup> I biichchidoogaappe guyyiyan, ashkkarati yiidi, penggee gorddettidaagaa be7idosona; be7idi, giddo kifiliyan katta sheeshshau uttendan aggenaa yaagidi qoppidosona. <sup>25</sup> Eta naagoi pokkana gakkanaassi keehippe naagidosona. SHin kawoi penggiyaa dooyennan ixxin, qulppiyaa ekkidi penggiyaa dooyidosona; dooyidi bantta godai haiqqidi, wuigen kunddidaagaa be7idosona.

<sup>26</sup> Eti naagiiddi gam77idaashin, Ehuudi kessi ekkidi, masettida shuchchata kanttidi, Sa7iira giyoosaa baqatiis. <sup>27</sup> Baqati biidi Efireema gezziyaa gakkido wode, Israa7eela asai olau shiiqanaadan malkataa punniis; punnin asai a kaallidi, yaappe duge wodhdhiis. <sup>28</sup> Wodhdhin eta, “Tana kaallite; aissi giikko, GODAI intte morkketa, Moo7aabata intte kushiyan aattidi immiis” yaagiis. Yaagin a kaallidi wodhdhidi, Yorddaanoosa SHaafaa pinniyoosaa oiqqidosona; oiqqidi Moo7aaba asaappe issi urainne hegaara kanttennaan teqqidosona. <sup>29</sup> He wode Moo7aaba asaappe tammu sha7u gidiya doorettida mino olanchchata woridosona; issi asinne kessi ekkidi attibeenna. <sup>30</sup> He gallassi Moo7aaba asai Israa7eela asaassi haarettiis; yaatin biittai hosppun tammu laittaa woppaa demmiis.

### *SHamggaara*

<sup>31</sup> Ehuudappe guyyiyan, Anaata na7ai SHamggaari denddiis; denddidi Pilisxxeema asaappe usuppun xeetaa booraa laaggiyo philxxuwan woridi, Israa7eela asaa ashshiis.

## 4

### *Debooronne Baaraaqa*

<sup>1</sup> Ehuudi haiqqidoogaappe guyyiyan, Israa7eela asai GODAA sinttan zaarettidikka iitabaa oottiis. <sup>2</sup> Hega gishshau, GODAI Haxoora giyo kataman kawotida Kanaane Kawuwaa Yaabinayyo eta aattidi immiis; a olanchchatu gadaawai Sisaari Dere-Harosheeta giyo kataman de7ees. <sup>3</sup> Yaabinayyo birataappe oosettida uddufun xeetu paraa gaareti de7iyo gishshaunne i Israa7eela asaa qareti bannan laatamu laittaa huqqunnido gishshau, eti maaduwaa demmanau GODAASSI waassidosona.

<sup>4</sup> He wode Laappidoota machchiyaa Deboora, hananabaa yootiyaara Israa7eela biittan pirddiya daanniyo. <sup>5</sup> Deboora Efireema gezziyan, Raama katamaappenne Beetele katamaappe gidduwan de7iya Deboori zambbaa garssan uttada pirddaasu; Israa7eela asai ba yohuwaa pirddissanau ikko yeess. <sup>6</sup> Issi gallassi Deboora Abino7aama na7aa Baaraaqa Nifttaaleema biittan de7iya Qedeesha katamaappe kiittada xeesissaasu; xeesissada, “GODAI Israa7eela Xoossai nena hagaadan yaagidi azazees; ‘Nifttaaleema zariyaappenne Zaabiloona zariyaappe tammu sha7u asaa ekkada, Taaboora Deriyaa ba. <sup>7</sup> Taani Yaabina olanchchatu gadaawai Sisaari paraa gaaretanne olanchchata ekkidi, Qiishoona SHaafan nenaara olaa gaittanau yaanaadan oottana; yin taani neeyyo a aattada immana’ yaagees” yaagaasu.

<sup>8</sup> Yaatin, Baaraaqa, “Neeni tanaara biikko, taani baana; shin neeni tanaara baana xayikko, taanikka biikke” yaagiis.

<sup>9</sup> Yaagin a, “Eeno, taani nenaara baana; shin GODAI Sisaara macca asa kushiyan aattidi immana gishshau, he buussai neeyyo bonchcho gidenna” yaagaasu. Yaagada

Deboora denddada, Baaraaqaara Qedeesha baasu. <sup>10</sup> Baaraaqa Nifttaaleemanne Zaa-biloona zaretta Qedeesha xeesin, tammu sha7u asai a kaallidi kiyiis; Deboorakka aara baasu.

<sup>11</sup> He wode Hebeera giyo issi bitanee de7ees; i Qeena asa; i Muuse bollarwaa Hobaaba yara. I hara Qeenatuppe shaahettidi, Qedeeshakko shiiqidi, Da7inaaniiman de7iya wolaa matan ba dunkkaaniyaa toliis.

<sup>12</sup> Abino7aama na7ai Baaraaqa Taaboora Deriyaa biidoogaa Sisaari siyido wode, <sup>13</sup> birataappe oosettida ba uddufun xetu paraa gaaretanne banaara de7iya asaa ubbaa xeesissidi, Dere-Harosheetappe Qiishoona SHAafaa shiishshiiis.

<sup>14</sup> Yaatin, Deboora Baaraaqa, “Dendda! Hachchi GODAI ne kushiyan Sisaara aattidi immiyo gallassa. Be7a, GODAI neeppe sinttatidi biis” yaagaasu. Yaagin Baaraaqa tammu sha7u asaa kaalettidi, Taaboora Deriyaappe wodhdhiis. <sup>15</sup> GODAI Sisaara, a paraa gaareta ubbaanne a olanchchata ubbaa qara bisuwan Baaraaqa sinttaappe baqatissiiis. Yaatin, Sisaari ba paraa gaariyaappe wodhdhidi, gediyan baqatiis. <sup>16</sup> Baaraaqa he paraa gaaretanne olanchchata Dere-Harosheeta gakkanaassi yedettiis. Sisaara olanchchata ubbai qara bisuwan haiqqidosona; issi asinne attibeenna.

<sup>17</sup> He wode Haxoora Kawoi Yaabini Qeena Hebeera keettaa asaara saro de7ees. Hegaa gishshau, Sisaari gediyan baqatidi, Qeena Hebeera machchee Yaa7eeli dunkkaaniyaa gakkiiis. <sup>18</sup> Gakkin Yaa7eela Sisaara mokkanau kiyada, “Ta godau, gela; haa gela; yayyoppa” yaagaasu. Yaagin dunkkaaniyaa ikko gelin, a ba bullukkuwan kammaasu.

<sup>19</sup> Sisaari, “Tana saammee; uyiyo guutta haatta immarkkii” yaagiis. Yaagin maattaa tigiyo ogoruwaa pogada ushshaasu; yaatada zaarettada kammaasu. <sup>20</sup> Hegaappe guyyiyan i o, “Dunkkaaniyaa penggen eqqa. Ai asinne yiidi, ‘Hagan asi de7ii?’ yaagidi oichchikko, ‘Baawa’ ga” yaagiis.

<sup>21</sup> Sisaari keehi daafurido gishshau, xiskkuwaa kairiis. Kairin Hebeera machchiyaa Yaa7eela madooshaanne dunkkaaniyaa xishiyaa ekkada, loddaara akko shiiqaasu; shiiqada xishiyaa haitta kariyan essada, madooshan xishada, biittaara sikkin, Sisaari haiqqiiis.

<sup>22</sup> Baaraaqa Sisaara koyiiddi yin, Yaa7eela a mokkanau kare kiyaasu; kiyada, “Haaya; neeni koyiyo bitaniyaa taani nena bessana” yaagaasu. Yaagin iira dunkkaane giddo gelidi, Sisaara haitta kariyan xishee gelin, a ahai sa7an zin77idaagaa be7iis.

<sup>23</sup> He gallassi Xoossai Israa7eela asai Kanaane Kawuwaa Yaabina xoonanaadan oot-tiis. <sup>24</sup> Israa7eela asai Kanaane Kawuwaa Yaabina bolli minni minnidi biidi, wurssettan a xaissiiis.

## 5

### *Deboorinne Baaraaqa Yettaa*

<sup>1</sup> He gallassi Debooranne Abino7aama na7ai Baaraaqa ha yettaa yexxidosona.

<sup>2</sup> “Israa7eela asaa kaalettiyaageeti

kaalettido gishshau,

asaikka dosidi,

ba huuphiyaa aattidi immido gishshau,

GODAA galatite!

<sup>3</sup> Inttenoo kawotoo, haggaa siyite!

Inttenoo deriyaa haariyaageetoo, ezggite!

Taani GODAASSI yexxana.

GODAASSI Israa7eela Xoossaassi

galataa yettaa yexxana.

<sup>4</sup> Abeet GODAU, neeni

Se7iira Deriyaappe dendiddo wode,



neeni Eedooma biittaappe kiyido wode,  
 biittai qaaxxiis.  
 Saluwaappe irai bukkiis;  
 ee, haattai shaaratuppe duge soosiis.  
<sup>5</sup> GODAA sinttan dereti qaaxxidosona;  
 harai attin, Siinaa Dereekka GODAA  
 Israa7eela Xoossaa sinttan kokkoriis.

<sup>6</sup> “Anaata na7aa SHamggaara wodenne  
 Yaa7eeli wode caana mehiyaa laaggiya  
 zal77anchchati he biittaara kanttiboorkona.  
 Ogiyaara biyaageetikka ogiyaa aggidi,  
 loossuwaara biidosona.

<sup>7</sup> Israa7eela katamati  
 asi de7enna baisa gididosona.  
 Nenoo Debooraa, neeni Israa7eela asaayyo  
 aayo gidada denddana gakkanaashin onidi attidosona.

<sup>8</sup> Israa7eela asai allaga xoossata  
 doorido wode,  
 biittan olai denddiis.  
 Oitamu sha7u Israa7eela olanchchatu gidдон  
 issi gondalallee woikko issi toori beettibeenna.

<sup>9</sup> Ta wozanai Israa7eela  
 ola gadaawatuura de7ees.  
 Asaa gidдон dosidi banttana aattidi  
 immidaageetuura de7ees.  
 GODAA galatite!

<sup>10</sup> “Inttenoo, gilaasiyaa wottido  
 bootta hareta toggiyaageetoo,  
 inttenoo, ogiyaara hemettiyaageetoo,  
 haggaa siyite!

<sup>11</sup> Haattaa ollatu matan  
 shiiqida yettanchchatu yettaa siyite.  
 Eti GODAI xoonidoogaa yexxoosona;  
 qassi Israa7eela asai xoonidoogaa yexxoosona.  
 Hegaappe guyyiyan, GODAA asai  
 katamaa geliyo penggetukko duge wodhdhiis.

<sup>12</sup> “Debooraa! Beegotta! Beegotta!  
 Beegotta! Beegottada mazamuriyaa yexxa.  
 Baaraaqaa, dendda!  
 Nenoo, Abino7aama na7au,  
 ne omooduwaa ekkada ya.

<sup>13</sup> “Hegaappe guyyiyan, attida asati  
 halaqatukko duge wodhdhidosa.  
 GODAA asati olettanau giigidi  
 Baaraaqakko yiidosona.

<sup>14</sup> Amaaleeqa zareti  
 beni de7ido sohuwan  
 de7iya Efireema asati yiidosona.  
 Qassi Biniyaama asati

eta kaallidosona.  
 Halaqati Maakira zaretuppenne,  
 ola gadaawati Zaabiloona zaretuppe  
 duge wodhdhidosona.

15 Yisaakoora halaqati  
 Debooriira yiidosona;  
 ee, Yisaakoora asai yiis.

Baaraaqikka yiis;  
 yin eti a geeduwaa kaallidi, zanggaaraa gelidosona.

SHin Roobeela zareti qofan shaahettidi,  
 yaanaagaa agganaagaa qachchibookkona.

16 Eti aibissi attidonaa? Dorssata heemmiyaageetu imbbiliitiyaa  
 siyanau attidonaayye?

Roobeela zareti qofan shaahettidi,  
 yaanaagaa agganaagaa qachchibookkona.

17 Gala7aade asati Yorddaanoosa  
 SHaafaappe hefinttan attidosona.

Daana zareti markkabetu matan  
 attidosona.

Aseera zareti bantta de7iyosan  
 Meediteraane Abbaa lanqqen attidosona.

18 Zaabiloona zareti  
 bantta shemppuwaa haiquwau  
 aattidi immida asata.

Nifftaaleema zaretikka etaagaadan  
 ola dembban bantta shemppuwaa aattidi immidosona.

19 “Kawoti yiidi, Magiddo pulttotu matan  
 de7iya Taa7inaakan olettidosona.  
 He Kanaane kawoti yan olettiiddi,  
 omooddanau aiba biranne demmibookkona.

20 Saluwan de7iya xoolinttetikka  
 olettidosona.

Bantta yuuyiyo yuushshan  
 eti Sisaaraara olettidosona.

21 Qiishoona SHaafai, beniisappe  
 erettida Qiishoona SHaafai kixxidi,

he kawota shokkidi efiis.  
 Ta shemppee, simmi minna;  
 minnada sinttau horddofa.

22 “Hegaappe guyyiyan, paraasati  
 adaraasissiiddi yiidosona.

Parati bantta kottiyān  
 biittaa giirissidosona.

23 “GODAA kiitanchchai,  
 ‘Merooza qanggite!  
 Yan de7iya asaa iissidi qanggite!

Aissi giikko, eti GODAA  
 maaddanau yibookkona.

A wolqqaama morkketuura olettanau  
 kiyibookkona’ yaagiis.

24 “Qeenaa Hebeera machchiyaa  
Yaa7eela macca asa ubbaappe  
anjettidaaro gidu.

Dunkkaane gidдон de7iya macca  
asa ubbaappe a anjettidaaro gidu.

25 Sisaari o haattaa oichchin,  
maattaa ayyo immaasu.

Lo77o xibbuwan meqqida maattaa ehaasu.

26 Issi kushiyaa yeddada  
dunkkaaniyaa xishiyaa, ushachcha kushiyan  
oosanchchatu madooshaa oiqqaasu.

Oiqqada Sisaara huuphiyan xishaasu;  
xishada haitta kariyaara kantta kessaasu.

27 Yaatin, i bolqqu giidi kunddiis.

I he i tohuwaa matan  
bolqqu giidi kunddiis.

He kunddido sohuwan haiqqiis.

28 “Sisaara aayiyaa  
maskkootiyaara xeellaasu.

Xeellada, ‘Ta na7aa paraa gaaree  
aibissi gam77idee?

Parati eesotidi aibissi simmibookkona?  
yaagada oichchaasu.

29 I aadhdhida eranchcha macca asati  
i oishaa zaaridosona.

SHin a ba qofan zaara zaaradakka  
hagaadan yaagaasu;

30 ‘Eti omooddidi  
shaakkiyoobaa demmennan aggokkona.

Issi issi olanchchaa issi issi woikko  
naa77u naa77u geela7oti gakkennan aggokkona.

Sisaarayyo eti lo77iya maayuwaa immana;  
qassi taayyookka qooriyan xaaxanau  
xilifiyan alleegettidi lo77iya maayota  
eti ehaana’ yaagaasu.

31 “Abeet GODAU, ne morkketi ubbai  
hegaadan haiqqona!

SHin ne siiqoti  
maallado mokkiya awaadan phoolona”

yaagidosona.

Hegaappe guyyiyan, biittai oitamu laittaa woppaa demmiis.

## 6

### *Geedoona*

<sup>1</sup> Israa7eela asai GODAA sinttan zaarettidi iitabaa oottiis. Hegaa gishshau, GODAI eta Midiyaama asaayyo aattidi immiis. Immin laappun laittaa eta haaridosona.

<sup>2</sup> Midiyaama asai Israa7eela asaa bolli minniis; minnin Israa7eela asai etappe attanau deriyaa bollan kooppuwaa, gonggoluwanne qatuwaa giigissiis. <sup>3</sup> Israa7eela asai kattaa zerido wode ubban, Midiyaama asai Amaaleeqa asaaranne arshsho bagga

biittan de7iya asaara yiidi eta oloosona. <sup>4</sup> Eti he biittan dunkkaanidi, Gaaza katamaa

gakkanaashin, biittaa ubbaa bollan mokkidabaa xaissoosona; dorssaa, mehiyaanne hariyaa laaggidi efiyo gishshau, Israa7eela asaassi aibanne ashshokkona. <sup>5</sup> Bantta mehiyaanne bantta dunkkaaniyaa ekkidi, boolee yiyoogaadan corattidi yoosona; etanne eta gaameelata qoodanau danddayettenna; eti yiiddi biittaa bashshoosona. <sup>6</sup> Israa7eela asai Midiyaama asaa gaasuwan kauyyiis; yaatidi maaduwa demmanau GODAASSI waassiis.

<sup>7</sup> Midiyaama asaa gaasuwan Israa7eela asai GODAASSI waassido wode, <sup>8</sup> GODAI etakko issi hananabaa yootiyaagaa kiittiis. Kiittin hananabaa yootiyaagee eta, “GODAI Israa7eela Xoossai hagaadan yaagees; ‘Gibxxeppe, ailletetta biittaappe taani intena kessaas. <sup>9</sup> Taani intena Gibxxe asaa kushiyaappenne huqqunniya asaa ubbaa kushiyaappe ashshaas; intte sinttaappekka huqqunniya asaa yedettada, eta biittaa intteyyo immaas. <sup>10</sup> Yaadata taani intena, “Taani GODAA intte Xoossaattennee; intte eta biittaa laattido Amooretu xoossatuuyo goinnoppite” yaagada yootaas. SHin intte ta qaalaa siyennan ixxideta’ yaagees” yaagiis.

<sup>11</sup> Hegaappe guyyiyan, GODAA kiitanchchai Oofira giyoosan de7iya Abi7eezera yaraa Yo7aasha wolaa garssan uttiis. He wode Yo7aasha na7ai Geedooni Midiyaama asaappe qosettanau woine eessaa gum77iyoosan gisttiyaa qoxxees. <sup>12</sup> Hegan GODAA kiitanchchai ayyo beettidi, “Laa neno, mino olanchchau, GODAI nenaara de7ees” yaagiis.

<sup>13</sup> Yaagin Geedooni a, “Hai ta godau! GODAI nunaara de7iyaabaa gidikko, ha metoi ubbai yaatin nuna aibissi gakkidee? Nu aawati, ‘GODAI nuna Gibxxe biittaappe kessiis’ yaagidi nuuyo yootido maalaalissiya a oosoti ubbai awan de7iyoona? SHin ha77i GODAI nuna mule aggidi, Midiyaama asaassi aattidi immiis” yaagiis.

<sup>14</sup> Hegaappe guyyiyan GODAI akko simmidi, “Neeyyo de7iya wolqqan baada, Israa7eela asaa Midiyaama asaa kushiyaappe ashsha. Be7a, nena kiittiyaagee tana” yaagiis.

<sup>15</sup> Yaagin Geedooni, “Abeet Godau, taani Israa7eela asaa waatada ashshoo? Ta yarai Minaase zaretu ubbaappe aadhdhida laafa; taanikka ta aawaa so asaa ubbaappe guutta” yaagidi zaariis.

<sup>16</sup> Zaarin GODAI, “Tumuppe taani nenaara gidana; issi asa shociyoogaadan, neeni Midiyaama asaa shocada xoonana” yaagiis.

<sup>17</sup> Yaagin Geedooni, “Neni tanan ufaittidabaa gidikko, tanaara haasayiyaagee neeni tumuppe GODAA gidiyoojaa taani erana mala, malaataa tana bessa. <sup>18</sup> Taani guyye simmada baada, neeyyo immiyoobaa ehaana gakkanaashin, hayyanaa hannippe booppa” yaagiis.

Yaagin GODAI, “Neni simmana gakkanaashin, taani hagan naagana” yaagiis.

<sup>19</sup> Geedooni ba soo gelidi, anqqara deeshsha maraa shukkidi kattiis; issi tammu kilo giraame gidiya xiilliyaa ekkidi, irshsho yeggennan oittaa uukkiis. Ashuwaa masoobiyan wottidi, cambbaa keriyani tigiis; ubbaakka ekki efiidi, wolaa garssan uttida GODAA kiitanchchaassi shiishshiis. <sup>20</sup> Xoossaa kiitanchchai a, “Ashuwaanne irshshoi gelibeenna oittaa ekkada, ha shuchchaa bolli wotta; cambbaakka a bolli tiga” yaagiis; yaagin Geedooni hegaadan oottiis. <sup>21</sup> GODAA kiitanchchai ba kushiyan oiqqido xam77aa xeeran ashuwaanne irshshoi gelibeenna oittaa bochchiis; bochchin tamai shuchchaa giddoppe kiyidi, ashuwaanne irshshoi gelibeenna oittaa miis; hegaappe guyyiyan, GODAA kiitanchchai a sinttappe geemmiis.

<sup>22</sup> Geedooni be7idoogee GODAA kiitanchchaa gidiyoojaa akeekido wode, “Aayye7ana! Ubbaa Haariya GODAU, taani GODAA kiitanchchaa ta aifiyan be7aas!” yaagiis.

<sup>23</sup> SHin GODAI, “Saroi neeyyo gido! Yayyoppa! Haiqqakka” yaagiis. <sup>24</sup> Yaagin Geedooni GODAAYYO yarshshiyoojaa yan giigissidi, he sohuwaa GODAI Saro Xoossaa

yaagidi sunttiis. He yarshshiyosai Abi7eezera yaratubaa gidinya Oofiran hachchi gakkanaashin eqqidi de7ees.

<sup>25</sup> He gallassi qammi GODAI Geedoona, “Ne aawaa booraa naa77anttuwaa, laittai laappuna gididoogaa ekka. Ne aawai Ba7aala giyo eeqaayyo yarshshiyosaa kola; a lanqqiyan de7iya Asheero giyo macca xoosee misiliyaakka qanxxeretta yegga. <sup>26</sup> Ha keeraa huuphiyan GODAASSI, ne Xoossaassi, shuchchaappe yarshshiyosaa loittada giigissa; hegaappe guyyiyan, neeni qanxxerettido Asheero giyo xoosee misiliyaa qerettaa eettada, naa77antto booraa muleera xuuggiyo yarshsho oottada yarshsha” yaagiis. <sup>27</sup> Yaagin Geedooni ba ashkkaratuppe tammata ekkidi, GODAI ayyo yootidoogaadan oottiis. SHin i ba aawaa so asaassinne kataman de7iya asaassi yayyido gishshau, heгаа gallassan oottiyoogaa aggidi qamman oottiis.

<sup>28</sup> Maallado guuran katamaa asai denddido wode, Ba7aala giyo eeqau yarshshiyosai kolettiichchidaagaanne a lanqqen de7iya Asheeri misilee qanxxerettidi wodhdhidaagaa be7iis. Qassi eti yarshshiyosai giigidaagaanne a bolli naa77antto boorai yarshshettidaagaa be7idosona. <sup>29</sup> Bantta gidдон, “Laa hагаа oottidaagee oonee?” yaagidi issoi issuwaa oichchidosona. Eti yuuyi yuuyidi oichchidi, heгаа oottidaagee Yo7aasha na7aa Geedoona gidiyooгaa eridosona. <sup>30</sup> Hegaappe guyyiyan katamaa asai Yo7aasha, “Ba7aala giyo eeqau yarshshiyosaa kolido gishshaunne a lanqqen de7iya Asheeri misiliyaa qanxxerettidi yeggido gishshau, nuuni a worana mala, ne na7aa haa kessa” yaagiis.

<sup>31</sup> Yaagin Yo7aashi ba bollan denddida asa ubbaa, “Intte Ba7aalayyo mootetteetii? Woikko intte a ashshanau xabaqateetii? Intte giddoppe ayyo mootettiya urai de7ikko, sa7ai wonttanaashin i haiqqo! Ba7aali xoossa gidikko, ba yarshshiyosaa kolidaagaara i bau mootetto” yaagiis. <sup>32</sup> Yaatin, he gallassi Yo7aashi, “Kolettidai au yarshshiyо sohuwaa gidido gishshau, aara Ba7aali mootetto” yaagidi Geedoona sunttaa Yeruba7aala giidi sunttiis.

<sup>33</sup> Hegaappe guyyiyan, Midiyaama biittaa asai, Amaaleeqa biittaa asainne arshsho bagga biittaa asai ubbai issippe shiiqidi, Yorddaanoosa SHaafaa pinnidosona; pinnidi Iziraa7eela giyo wombban dunkkaanidosona. <sup>34</sup> Hegaappe guyyiyan, GODAA Ayyaanai Geedoona bolli wodhdhiis; wodhdhin Abi7eezera yara gidinya asai ubbai bana kaallana mala, eta xeesanau malkkataa punniis. <sup>35</sup> Minaase zaretu ubbaassi asaa kiittidi, bana kaallana mala etakka xeesissiiis. Qassi Aseera zaretuyyo, Zaabiloona zaretuyyoonne Nifttaaleema zaretuyyo asaa kiittin, etikka aara olaa baanau kiyidosona.

<sup>36</sup> Hegaappe guyyiyan Geedooni Xoossaa, “Taani Israa7eela asaa ashshana mala, neeni tana dooridoogaa tau yootadasa. <sup>37</sup> Be7a, gisttiyaa qoxxiyo audiyan dorssaa agoziyaa taani wottana; xaazai he dorssaa agoziyaa xalaalan de7in, biitta ubbai mela gidikko, neeni yootidoogaadan, Israa7eela asaa neeni ta kushiyan ashshanaagaa taani erana” yaagiis. <sup>38</sup> Yaagin i giidoogaadan haniis. Wonttetta gallassi maallado guuraara denddidi, dorssa agoziyaa gum77ido wode, issi kuixaaro gidinya haattai appe kiyiis.

<sup>39</sup> Yaatin, Geedooni qassikka Xoossaa, “Hayyanaa hanqqettoppa! Taani nena gujjadakka issiton oichchais; dorssa agoziyaa bolli hara malaataa bessanaadan taani nena oichchais. Ha77i qassi dorssa agozee mela gidin, biittai haaxxidi xaazatanaadan oottarkkii” yaagiis. <sup>40</sup> Yaagin he gallassi qammi Xoossai he malaataa oottiis. Wonttetta gallassi maallado dorssaa agozee mela gidin, biitta ubbai haaxxidi xaazatiis.

## 7

### *Geedooni Midiyaamata Xooniis*

<sup>1</sup> Issi gallassi Yeruba7aala geetettiya Geedooninne aara de7iya asai ubbai maallado guuran denddidi biidi, Harooda giyo pulttuwaa matan dunkkaaniis. Midiyaama biittaa



asatika etappe huuphessa baggaara Moore giyo keraa matan de7iya wombbaa gidдон dunkkaanidosona.

<sup>2</sup> GODAI Geedoona hagaadan yaagiis; “Midiyaama asaa taani intte kushiyan aattada immanau, nenaara de7iya asai dariis; Israa7eela asai, ‘Nu wolqqan attida’ giidi ta bolli ceeqettenna mala, Midiyaama asaa taani etau aattada immikke. <sup>3</sup> Hega gishshau, ha77i asaayyo, ‘Yashshan kokkoriya asi ooninne de7ikko, Gala7aade Deriyaappe sim-midi, guyye ba soo ba soo bo’ yaagada awaajja” yaagiis. Yaatin, laatamanne naa77u sha7u asai guyye simmiis; simmin tammu sha7u asai attiis.

<sup>4</sup> Hegaappe guyyiyan GODAI Geedoona, “Ha77ikka asai dariis. Neeni eta duge haattau efa; efin taani eta neeyyo yan paaccana. Taani, ‘Hagee nenaara bo’ giyoogee nenaara bo; taani, ‘Hagee nenaara booppo’ giyoogee booppo” yaagiis.

<sup>5</sup> Yaatin, Geedooni asaa haattaakko efiis. Efin GODAI Geedoona, “Ha asaa gid-doppe gulbbatidi, haattaa uyiyaageetanne kanadan equwan haattaa inxxarssan labaci labaci oottidi uyiyaageeta shaakka” yaagiis. <sup>6</sup> Bantta kushiyan haattaa equwan kophphetidi labaci oottidi uyidaageetu qoodai heezzu xeeta; shin attidaageeti ubbai haattaa uyanau gulbbatidosona.

<sup>7</sup> GODAI Geedoona, “Bantta kushiyan haattaa equwan kophphetidi labaci oottida heezzu xeetu asatan taani inttena ashshana; Midiyaama asata intteyyo aattada im-mana. SHin attida asai ubbai ba soo ba soo simmo” yaagiis. <sup>8</sup> Yaatin, Geedooni asatu shinqqiyaanne malkkataa sheeraa ekkida heezzu xeetu asata banaara ashshidi, hankko asaa ubbaa eta soo eta soo yeddiis. Ha ubbabi haniyo wode, Midiyaama olanchchati etappe hirkki baggaara wombban dunkkaanidi uttidosa.

<sup>9</sup> He galla qamman GODAI Geedoona, “Taani neeyyo aattada immido gishshau, denddada eti dunkkaanidosan etaara olaa gaitta. <sup>10</sup> Neeni baada olanau yayyikko, ne ashkkaraa Puura ekkada, eti dunkkaanidosaa duge ba; <sup>11</sup> baada eti giyoobaa siya. Hegaappe guyyiyan, neeni eta olanau minnana” yaagiis.

Yaagin Geedooninne a ashkkarai Puuri, Midiyaamati dunkkaanidosaa lanqqiyan naagiya olanchchatukko biidosona. <sup>12</sup> He wode booledan corattida Midiyaama asai, Amaaleeqa asainne arshsho baggaara de7iya asai ubbai wombbaa gidдон dunkkaanidi uttidosa. Eta gaameelati abbaa doonan de7iya shafiyaadan qoodanau danddayetten-naageeta.

<sup>13</sup> Geedooni yaa gakkiiyo wode, issi bitanee ba aimottido aimuwaa ba laggiyaayyo yootees; yootiiddi, “Siya, taani aimo aimottaas. Issi bangga oittai bululidi, Midiyaamati dunkkaanidosaa yiis. Yi gakkidi dunkkaaniyaa dom77iis; dom77in dunkkaanee aadhdhi wodhdhidi micettiis” yaagiis.

<sup>14</sup> Yaagin a laggee zaaridi, “Hegge Israa7eeliyaa Yo7aasha na7aa Geedoona bisuwaappe attin, harabaa gidenna. Xoossai Midiyaamanne Midiyaamatuura de7iya olanchchata ubbaa Geedoonayyo aattidi immirggiis” yaagiis.

<sup>15</sup> Geedooni he odido aimuwaanne aimuwaa birshshettaa siyido wode, gulbbatidi Xoossaassi goinniis. Hegaappe guyyiyan, Israa7eelati dunkkaanidosaa guyye simmidi, “Denddite! GODAI Midiyaama olanchchata intte kushiyan aattidi immirggiis!” yaagiis.

<sup>16</sup> Heezzu xeetu asata heezzu citan shaakkiis; shaakkidi etau huuphiyan huuphiyan issi issi malkkataanne gidдон eexxiya xompee de7iyo issi issi xaaruwaa immiis.

<sup>17</sup> Immidi eta, “Taakko haa xeellidi, taani oottiyoogaa oottite. Taani eti dunkkaanidosaa mataa gakkada oottiyoogaadan, inttekka oottite. <sup>18</sup> Taaninne tanaara de7iyaageeti ubbati malkkataa punniyo wode, inttekka eti dunkkaanidosaa yuuyi aadhdhidi, intte malkkataa punniiddi, ‘GODAASSINNE Geedoonassi olettoos!’ yaagidi waassite” yaagiis.

<sup>19</sup> Qammau gidдо shaaho gidanau guuttai attidaashin, naagiya olanchchati laamettidoogaappe guyyiyan, Geedooninne aara de7iya xeetu asati biidi, Midiyaamati dunkkaanidosaa mati gakkidosona; gakkidi bantta malkkataa punnidosa; bantta

oiqqido xaaro ubbaakka menttidosona. <sup>20</sup> Hara baggaara de7iya naa77u citatikka bantta malkkataa punnidi, xaarotakka menttidosona; haddirssa kushiyan eexxiya xomppiyyaa, ushachcha kushiyan malkkataa oiqqidi punniiddi, “GODAASSINNE Geedoonassi bisuwan olettoos!” yaagidi waassidosona. <sup>21</sup> Asai ubbai Midiyaamati dunkkaanidosaa yuushuwan ba sohuwan sohuwan eqqidaashin, Midiyaama olanchchati ubbai waassiiddi baqatidosona. <sup>22</sup> Geedoona asai heezzu xeetu malkkataa punnido wode, morkketu olanchchati bantta bisuwan issai issuwaa woranaadan GODAI oottiis; yaatin, attida olanchchati Xarttakko simmidi, Beetishiixa giyo katamaa gakkanaashin, hegaappekka kanttidi, Xabaata matan de7iya Aabeeli-Mahoola gakkanaashin baqatidosona.

<sup>23</sup> Hegaappe guyyiyan Geedooni, Nifttaaleema zariyaappe, Aseera zariyaappenne Minaase zaretu ubbaappe Israa7eela asaa xeesidi shiishshin, eti Midiyaamata yedettidosona. <sup>24</sup> Efireema gezziyan de7iya asaa ubbaakko Geedooni asaa kiittidi, “Midiyaama asaa olanau duge wodhdhite; wodhdhidi Beetibaara gakkanaashin de7iya Yorddaanoosa SHaafaanne an geliya qeeri shaafata etappe kasetidi oiqqite” yaagiis. Yaagin Efireema asai ubbai xeegetti shiiqidi, Beetibaara gakkanaassi Yorddaanoosa SHaafaanne an geliyo qeeri shaafata oiqqiis. <sup>25</sup> Oreebanne Za7eeba geetettiya Midiyaamatu halaqata naa77aa omooddidosona; Oreeba Oreeba Zaallaa giyoosan woridosona; Za7eeba qassi Za7eeba Woiniyaa Gum77iyoosaa giyoosan woridosona. Hegaappe guyyiyanikka attida Midiyaamata yedettiiddi, Oreeba qooriyaanne Za7eeba qooriyaa muucidosona; muucidi eta guuggeta Geedoonakko ehiidosona. He wode Geedooni Yorddaanoosa SHaafaappe hefintta arshsho baggaara de7ees.

## 8

### *Midiyaamati Wurssetta Xoonetuwa Xoonettidosona*

<sup>1</sup> Hegaappe guyyiyan, Efireema asai Geedoona, “Midiyaamata olanau baidda nuna aibissi xeesabeikkii? Nuna aibissi hagaadan oottadii?” yaagidi keehippe palamettidosona.

<sup>2</sup> SHin Geedooni zaaridi, “Taani oottidoogaappe intte oottidoogee aadhdhenneeyye? Ta yarati Abi7eezerati shiishshido mule kattaappe intte Efireema zaretu qorido poshilo kehenneeyye? <sup>3</sup> Midiyaamatu halaqata, Oreebanne Za7eeba Xoossai intte kushiyan aattidi immiis. Intte oottidoogaa mala, taani ai oottanau danddayiyaanaa?” yaagiis. I hegaadan gin, eti hanqquwaappe zarbbidosona.

<sup>4</sup> Geedooninne aara de7iya heezzu xeetu asai Yorddaanoosa SHaafaa yiidi pinnidosona; eti ai daafurikkokka, bantta morkketa yedettiyoogaa aggibookkona. <sup>5</sup> Yedettiiddi Sukkota gakkido wode, Geedooni katamaa asaa, “Ta asai daafurido gishshau, hayyanintta amarida oitta immerkketii. Taani Midiyaamatu kawota Zebaahanne Xalmmunaa7a yedettaidda de7ais” yaagiis.

<sup>6</sup> Yaagin Sukkota katamaa halaqati, “Zebaahanne Xalmmunaa7a neeni omooddabaakkashin, ne olanchchatussi aibissi oittaa immanee?” yaagidosona.

<sup>7</sup> Yaatin, Geedooni, “Lo77o aikkobaa! GODAI Zebaahanne Xalmmunaa7a ta kushiyan aattidi immiyo wode, taani bazzo agunttaaninne kinddiichchuwan inttena wadhdhana” yaagiis. <sup>8</sup> Yaagidi hegaappe Panu7eela giyoosaa biis; biidi yan de7iya asaakka he oishaa oichchiis. Oichchin Panu7eela asaikka Sukkota katamaa asai zaaridoogaadan zaariis. <sup>9</sup> Yaatin, Panu7eela asaakka, “Taani xoonada saro simmiyo wode, intte katamaa naagiyo ha adussa gimbbiyaa laalana” yaagiis.

<sup>10</sup> Zebaahanne Xalmmunaa7i arshsho baggappe yiida olanchchatuppe attida bantta tammanne ichchashu sha7u olanchchatuura Qarqqoora giyo kataman de7oosona. Kase arshsho baggappe yiida olanchchatuppe bisuwan olettiya issi xeetanne laatamu

sha7u gidiya olanchchati olan haiqqi wuridosona. <sup>11</sup> Geedooni Nobaahappenne Yogibaahappe arshsho baggan de7iya bazzuwaa gaxaa ogiyaara biidi, hegan de7iya olanchchatu bolli eti akeekennan de7ishin woraajjiis; <sup>12</sup> woraajjin eti ubbai dagammidosona. Midiyaama kawoti Zebaahinne Xalmmunaa7i naa77aikka baqatidosona; shin Geedooni eta yedetti gakkidi omooddiiis.

<sup>13</sup> Yo7aasha na7ai Geedooni olaappe Hereesa Pinuwaara simmiis. <sup>14</sup> Simmiiddi Sukkotappe issi wodallaa oiqqidi oichchiis. Oichchin wodallai Sukkota halaqatunne cimatu laappun tammanne laappunatu sunntaa xaafidi au immiis. <sup>15</sup> Hegaappe guyyiyan, Geedooni Sukkota asaakko yiidi, “Zebaahanne Xalmmunaa7a neeni omooddabaakkashin, ne daafurida asaassi aibissi oittaa immanee?” giidi intte tana qilliiccideta; shin Zebaahanne Xalmmunaa7a hageeta be7ite” yaagiis. <sup>16</sup> Hegaappe guyyiyan, bazzo agunntaaninne kinddiichchuwan wadhdhidi; Sukkota halaqata qaxxayyiis. <sup>17</sup> Qassi Panu7eelan katamaa naagiyo adussa gimbbiyaa laalidi, kataman de7iya attumaasaa woriis.

<sup>18</sup> Yaatidi Geedooni Zebaahanne Xalmmunaa7a, “Intte Taabooran worido asati ai malee?” yaagidi oichchiis.

Oichchin eti, “Ne mala; eti ubbaikka kawuwaa naata milatoosona” yaagidi zaaridosona.

<sup>19</sup> Geedooni, “Eti ta ishannta; eti ta aayee naata. GODAI ero! Intte eta woribeennabaa gidiaakko, taanikka inttena worikke shin” yaagiis. <sup>20</sup> Yaagidi ba baira na7aa Yetera, “Dendda eqqada, hageeta wora” yaagiis. Yaagin Yeteri biron yelaga gidido gishshau yayyidi, ba bisuwaa shoddibeenna.

<sup>21</sup> Hegaappe guyyiyan, Zebaahinne Xalmmunaa7i Geedooni, “Dendda eqqada, neeni nuna wora. Attumaasa ooso oottanau attumaasa koshshees” yaagidosona. Yaatin, Geedooni denddidi, eta woriis; woridi eta gaameelatu qooriyan de7iya alleeqo ubbaa ekkiiis.

<sup>22</sup> Hegaappe guyyiyan, Israa7eela asai Geedooni, “Neeni nuna Midiyaama asaappe ashshido gishshau, neeni, neeppe guyyiyan ne na7ainne ne na7aa na7ai nuna haarite” yaagiis.

<sup>23</sup> Yaagin Geedooni, “Taani inttena haarikke; ta na7aikka inttena haarena; GODAI inttena haarana” yaagiis. <sup>24</sup> Yaagidi eta, “Ane taani inttena issibaa oichchais: intte ubbai omooddidi ehiido haittaa worqqaa taayyo immite” yaagiis. Isimaa7eela asaadan, Midiyaama biittaa asatikka haittan worqqaa wottoosona.

<sup>25</sup> Israa7eela asai zaaridi, “Eeno, nu immana” yaagiis. Yaagidi afalaa hiixxididosona; hiixxidi asai ubbai ba omooddido haittaa worqqaa hiixxetida afalaa bollan yeggiis.

<sup>26</sup> Geedooni ekkido haittaa worqqai laatamu kilo giraame deexxiyaagaa. Hegeenne, hara alleeqota, qooriyan aattiyo gozddata, Midiyaamatu kawoti maayiyo ochcha teeraa milatiya maayotanne eta gaameelatu qooriyaappe ekettida alleeqota gujjennaana.

<sup>27</sup> Geedooni worqqaaappe eeqa misiliyaa giigissidi, ba de7iyo Oofira kataman wottiis. Guyyeppe Israa7eela asai ubbai GODAA aggidi, he eeqa misiliyaayyo goinniis; Geedoonassinne a so asaassi hegee pire giidiis.

<sup>28</sup> Hegaadan hanidi, Midiyaama asai Israa7eela asaassi haarettiis; eti Israa7eela asaa bolli naa77anttuwaa denddibookkona. Geedooni haiqqana gakkanaashin, oitamu laittaa biittai woppaa demmiis.

### *Geedooni Haiquwaa*

<sup>29</sup> Yo7aasha na7ai, Yeruba7aala giyo Geedooni ba soo guyye biidi, ba keettan de7iis.

<sup>30</sup> Geedooni cora maccaasa ekkido gishshau, assi laappun tammu attuma naati yeletidosona. <sup>31</sup> Qassi Sekeema kataman de7iya kaadumatiyaa attuma na7aa ayyo yelin, sunntaa Abimeleka yaagidi sunntiis. <sup>32</sup> Yo7aasha na7ai Geedooni lo77i cimidi haiqqiis;

ba aawaa Yo7aasha duufuwan moogettiis. Ha duufoi Abi7eezera yarati de7iyo Oofira kataman de7ees.

<sup>33</sup> Geedooni haiqqidoogaappe guyyiyan, Israa7eela asai GODAAPPE guyye simmidi, Ba7aala geetettiya xoosatuyyo goinniis; Ba7aali-Bariita giyo eeqaa banttayyo xoossa oottidosona. <sup>34</sup> Yaatidi Israa7eela asai eta yuushuwan de7iyya morkketu ubbaappe eta ashshida GODAA bantta Xoossaa hassayibookkona. <sup>35</sup> Qassi Geedooni Israa7eela asaayyo oottido lo77o ooso ubbaayyo, eti a so asaayyo kehan kushiyya zaaribookkona.

## 9

### *Abimeleka*

<sup>1</sup> Geedooni na7ai Abimeleki Sekeema kataman de7iyya ba aayee dabbotukko biis; biidi etanne ba aayee zareta ubbata hagaadan yaagiis; <sup>2</sup> “Ane Sekeema kataman de7iyya asaa ubbaa hagaadan yaagidi oichchite; ‘Geedooni laappun tammu naati ubbai inttena haarikko lo77ooyye? Woikko issi asi haarikko lo77oo?’ yaagidi oichchite. Taani inttessi ashuwan mata dabbo gidiyooqaa qassi dogoppite” yaagiis.

<sup>3</sup> Yaagin a aayee dabboti ha qaala ubbaa a gishshata Sekeema katamaa asaasi yootidosona; yootin Abimeleki etau dabbo gidido gishshau, Sekeema asai a kaallanau qofaa qachchiis. <sup>4</sup> Yaagidi eti Ba7aali-Bariita Eeqaa Keettaappe laappun tammu xaqara biraa ekkidi, assi immidosona.

Immin Abimeleki he biran shufurotanne bonqqiyaageeta qaxaridi, bana kaal-lanaadan oottiis. <sup>5</sup> Oofira giyoosan de7iyya ba aawaa soo biidi, ba ishannta, Geedooni naata laappun tammata, issi shuchchaa bollan siifissiis. SHin Geedooni na7ai, wurssetta kaaloi, Yo7aataami qosettidi, haiqqennan attiiis. <sup>6</sup> Hegaappe guyyiyan, Sekeema asainne Beetimiillo asai issippe shiiqidi, Sekeeman de7iyya goinniyo wolaakko biidosona; biidi yan Abimeleka kawoyidosona.

<sup>7</sup> Yo7aataami hegea siyido wode, biidi Gariizaana Deriyaa xeeraa kiyidi, ba qaalaa xoqqu oottidi, hagaadan yaagidi waassiis; “Inttenoo Sekeema asatoo, intte taani odiyoogaa siyite! Xoossaikka intte odiyoogaa siyana.

<sup>8</sup> “Issi gallassi mittati ubbai shiiqidi, bantta bolli kawuwaa kawoyanau biidosona; biiddi wogaraa, ‘Haaya, nu bolli kawota’ yaagidosona. <sup>9</sup> SHin wogarai, ‘Ta intte bolli kawotana koshshiyaabaa gidikko, xoossatanne asata bonchchissiya ta zaitiyaa immiyoogaa aggais giyoogaa’ yaagidi zaariis.

<sup>10</sup> “Hegaappe guyyiyan, mittati balasiyaa giyo mittaa, ‘Haaya, nu bolli kawota’ yaagidosona. <sup>11</sup> SHin balasee, ‘Ta intte bolli kawotana koshshiyaabaa gidikko, mal77iyya lo77o aifiyaa aifiyoogaa aggais giyoogaa’ yaagidi zaariis.

<sup>12</sup> “Yaatin, mittati woiniyaa turaa, ‘Haaya, nu bolli kawota’ yaagidosona. <sup>13</sup> SHin woiniyaa turai, ‘Ta intte bolli kawotana koshshiyaabaa gidikko, xoossatanne asata ufaissiya woiniyaa eessaa immiyoogaa aggais giyoogaa’ yaagidi zaariis.

<sup>14</sup> “Yaatin, wurssettan mittati ubbai kinddiichchuwaa, ‘Haaya, nu bolli kawota’ yaagidosona. <sup>15</sup> Yaagin kinddiichchoi, ‘Intte tumuppe tana intte bolli kawoyanau koyikko, haa yiidi ta kuwan shemppite. Hega intte ixzikko, kinddiichchuwaappe tamai kiyidi, Liibaanoosa zigata mo’ yaagiis.

<sup>16</sup> “Abimeleka intte kawoyidooqee tumatettaannee suuretettaanee? Geedooni intteyyo oottidobaa akeekidi, a keettaa asaayyo bessiyaadan kushiyya zaaridetii? <sup>17</sup> Ta aawai intteyyo olettidoogaa akeekite; Midiyaama asaappe inttena ashshana yaagidi, bana haiquwau aattidi immiis. <sup>18</sup> SHin intte hachchi ta aawaa keettaa asaa bollan denddidi, a laappun tammu naata issi shuchchaa bollan siifideta; Geedooni ashkkareeppe yelido Abimeleki intteyyo dabbo gidido gishshau, Sekeeman kawoyideta. <sup>19</sup> Ha77i simmi Geedoonassinne a keettaa asatussi intte oottido oosoi tumatettaannee suuretettaana gidikko, Abimelekaara issippe ufaittite; ikka inttenaara ufaitto. <sup>20</sup> SHin hegea



gidana xayikko, Abimelekappe tamai kiyidi, Sekeema asaanne Beetimiillo asaa mo; hegaadankka qassi, Sekeema asaappenne Beetimiillo asaappe tamai kiyidi, Abimeleka mo” yaagiis. <sup>21</sup> Yaagidi Yo7aataami ba ishaa Abimelekassi yayyido gishshau, baqatidi Ba7eera giyoosaa biidi yan de7iis.

<sup>22</sup> Abimeleki Israa7eela biittan heezzu laitta kawotiis. <sup>23</sup> Hegaappe guyyiyan, Xoossai Abimelekappenne Sekeema asaappe gidduwan iita ayyaanaa kiittiis; kiittin Sekeema asai Abimeleka bolli makkalidi denddiis. <sup>24</sup> Xoossai heгаа oottidoogee, Abimeleki ba ishantta worido gishshaassanne Geedoona laappun tammu naata i woranaadan Sekeema asai a minttettido gishshaassa. <sup>25</sup> Sekeema asai amarida asaa dooridi, deriyaa xeeran Abimeleka bolli zuggidi uttanaadan oottiis. Zuggi uttidaageeti ogiyaara kanttiya asaa ubbaa bonqqidosona; bonqqin Abimeleki heгаа ubbaa siyiis.

<sup>26</sup> Hegaappe guyyiyan, Ebeeda na7ai Ga7aali ba ishanttuura Sekeema yiis; yin Sekeema asai an ammanettiis. <sup>27</sup> Ubbaikka bantta gade biidi, woiniyaa teeraa maxidosona; maxidi woiniyaa eessaa agidi, gita gibiraa kessidosona. Bantta eeqa keettaa gelidi, yan miiddinne uyiiddi Abimeleka cayidosona. <sup>28</sup> Ebeeda na7ai Ga7aali, “Nuuni Sekeema asai haarettanau Abimeleki oonee? I Geedoona na7aa gidennee? Zabuulikka ha katamaa haaranaadan Abimeleki suntidoogaa gidennee? Hegaappe nu maizza aawaa Hamoora zaretussi ane haarettoos. <sup>29</sup> Ha asaa kaalettiyaagee tana gidarkkinaashsha! Yaatiyaakko taani Abimeleka diggana shin. Abimeleka xeesada, ‘Ne olanchchata darissa ekkada, olettanau haaya’ yaagana shin” yaagiis.

<sup>30</sup> Ebeeda na7ai Ga7aali giidoogaa katamaa haariya Zabuuli siyido wode, hanqquwaa eexxi kiyiis; <sup>31</sup> yaatidi Aruuma kataman de7iya Abimelekakko asa kiittiis. Kiittidi, “Ebeeda na7ai Ga7aalinne a ishantti Sekeema yiidosona; yiidi kataman de7iya asaa ne bolli denttettoosona. <sup>32</sup> Hega gishshau, neeninne nenaara de7iya asai qamman denddidi, shooqan zuggidi naagite. <sup>33</sup> Wontto maallado awai mokkiyo wode, eti akeekennan katamaa bolli woraajjite; Ga7aalinne aara de7iya asai inttena olanau kiyiyo wode, intteyyo hanettido keenaa minnidi olettite” yaagiis.

<sup>34</sup> Yaagin Abimelekinne aara de7iya asai ubbai qamman denddidi, Sekeemappe kareera oiddu citan shaahettidi zuggidosona. <sup>35</sup> Abimelekinne aara de7iya asai Ebeeda na7ai Ga7aali kiyidi, katamaa geliyo penggiyan eqqidaagaa be7idi, qosettido sohuwaappe kiyidosona. <sup>36</sup> Ga7aali asaa be7ido wode Zabuula, “Xeella! Asai deretu huuphiyaappe wodhdhees” yaagiis.

Yaagin Zabuuli, “Hegeeti asa gidokkona; deretu eeshoi asaa milatiyaagaa be7ada gaasa” yaagidi zaariis.

<sup>37</sup> Ga7aali zaarettidi, “Xeella! Asai deriyaassi gidduwaa oiqqidi wodhdhees; hara citai qassi SHareechchotu Wolai de7iyo ogiyaara yees” yaagiis.

<sup>38</sup> Yaatin, Zabuuli Ga7aala, “‘Nuuni ayyo haarettanau Abimeleki oonee?’ yaagido ne doonai ha77i au biidee? Hageeti neeni karido asata gidokkonaayye? Ha77i kiyada etaara oletta!” yaagiis. <sup>39</sup> Yaagin Ga7aali Sekeema asaa kaaletti kiyidi, Abimelekaara olettiis. <sup>40</sup> Abimeleki yedettin, Ga7aali baqatiis; katamaa geliyo penggiyaa gakkanaassi daroti deshettidi kunddidosona. <sup>41</sup> Abimeleki Aruuman de7in, Zabuuli Ga7aalanne a ishantta Sekeemappe yedettidi kessiis.

<sup>42</sup> Wonttetta gallassi Sekeema asai goshshau biidoogaa Abimeleki siyiis; <sup>43</sup> siyidi ba asaa ekkidi, heezzu citan shaakkidi, shooqan zuggidi naaganaadan oottiis. Yaatidi asai katamaappe kiyiyoogaa be7ido wode, eta woranau qosettido sohuwaappe kiyiis.

<sup>44</sup> Abimelekinne aara de7iya citai sinttau woxxi biidi, katamaa geliyo penggiyan eqqidosona; attida naa77u citati goshshan de7iya asata olidi woridosona. <sup>45</sup> Gallassa muliyaa Abimeleki katamaa asaa olettiis; olettidi katamaa oiqqidoogaa guyyiyan, kataman de7iya asaa ubbaa woriis. Yaatidi katamaa qoliis; qolidi ubbaa biittaa bolli maxiniyaa zeriis.



<sup>46</sup> Sekeema Adussa Gimbbiyaa gidдон de7iya asai ubbai heгаа siyido wode, Ba7aali-Bariita Eeqa Keettan de7iya qato gidдо geliis. <sup>47</sup> Eti he sohuwan shiiqidoogaa Abimeleki siyiis. <sup>48</sup> Siyidi inne aara de7iya asai ubbai Xalmmoona giyo deriyaa pude kiyidosona. Kiyin Abimeleki kalttaa ekkidi, mittaa tashiyaa qanxxidi, ba hashiyan tookkiis; tookkidi banaara de7iya asata, “Taani oottishin be7idoogaa, inttekka eesuwan ha77i oottite” yaagiis. <sup>49</sup> Yaagin asai ubbaikka mittaa tashiyaa qanxxi ekkidi, Abimeleka kaalliis; he tasheta qatuwaa yuushuwan zemppissi wottidi, asai a gidдон de7ishin tamaa oittidosona; yaatin, qatuwaa gidдон de7iya asai ubbai haiqqi wuriis. Haiqqida attuma asaanne macca asaa goodai issi sha7aa gidana.

<sup>50</sup> Hegaappe guyyiyan, Abimeleki Tebexa giyo katamaa biidi, katamaa dooddidi oiqqiis. <sup>51</sup> He katamaa gidдон issi mino adussa gimbbеe de7ees. Katamaa asai ubbai, maccai attumai, kaalettiyaageetuurakka attennan he adussa gimbbiyaakko yaa woxxidi, a gidдо gelidosona; penggiyaa gorddidi, gimbbiyaa bolli dembbayidi keexxidosaa pude kiyidosona. <sup>52</sup> Abimeleki olettiiddi adussa gimbbiyaa gakkidi, taman xuugganau penggiyaakko shiiqiis. <sup>53</sup> SHin issi maccaasiyaa Abimeleka huuphiyan woxaa maidiyaa gonddorssa olada, a guuggiyaa homppu oottaasu. <sup>54</sup> Ba ola miishshaa tookkiya wodallaa eesuwan xeeгidi, “Tana asi, ‘Ebela maccaasi woriis’ geennaadan, ne bisuwaa shoohuwaappe shoddada, tana wora” yaagiis. Yaagin wodallai caddin i haiqqiis. <sup>55</sup> Israa7eela asai ubbai Abimeleki haiqqidoogaa be7idi, ba soo ba soo biis.

<sup>56</sup> Abimeleki ba ishannta laappun tammata woridi, ba aawaa bolli oottido gomiyaа Xoossai a bolli zaariis. <sup>57</sup> Hegaadankka, Xoossai Sekeema asaa iitatetta ubbaа eta bolli zaariis. Hegaadan hanidi, Geedoona na7ai Yo7aataami qanggido qanggettai eta gakkiiis.

## 10

### *Tolaa7a*

<sup>1</sup> Abimeleki haiqqidoogaappe guyyiyan, Doodo na7aa Puuha na7ai Tolaa7i Israa7eela ashshanau denddiis. I Yisaakoora zare gididi, Efireema gezziyan SHamiira giyoosan de7iis. <sup>2</sup> Tolaa7i Israa7eela asaa laatamanne heezzu laittau pirddiya daanna gidiiis. Tolaa7i haiqqidi, SHamiiran moogettiis.

### *Yaa7iira*

<sup>3</sup> Tolaa7appe kaallidi, Gala7aadiyaa Yaa7iiri denddiis; denddidi Israa7eela asaa laatanne naa77u laittau pirddiya daanna gidiiis. <sup>4</sup> Assi hasttamu hareta toggiya hasttamu attuma naati de7oosona; etassi Gala7aade biittan hasttamu katamati de7oosona. He katamati hachchi gakkanaassi Yaa7iira katamata geetettidi xeesettoosona. <sup>5</sup> Yaa7iiri haiqqidi, Qaamoonan moogettiis.

### *Yofttaaha*

<sup>6</sup> Israa7eela asai GODAA sinttan qassikka iitabaa oottiis; eti Ba7aalanne Asttaarooto geetettiya eeqatussinne Sooriyaa xoossatussi, Sidoona xoossatussi, Moo7aaba xoossatussi, Amoonatu xoossatussinne Pilisxxeema xoossatussi goinnidosona. Eti GODAA aggi bayidosona; ayyo goinniyoogaakka aggiigidosona. <sup>7</sup> Yaatin, GODAI Israa7eela asaa bolli hanqqettidi, eta Pilisxxeema asatussinne Amoona asatussi aattidi immiis. <sup>8</sup> Immin he laitti Israa7eela asaa eti naaqqidosonanne huqqunnidosona. Yorddaanoosa SHaafaappe hefintta arshsho baggan, Amooreti kase de7ido Gala7aade biittan de7ida Israa7eela asaa ubbaа eti tammanne hospun laittaa huqqunnidosona. <sup>9</sup> Amoona asati qassikka Yihudaa, Biniyaamanne Efireema zareta olanau Yorddaanoosa SHaafaa pinnidosona; yaatin, Israa7eela asai keehippe un77ettiis.

<sup>10</sup> Hegaappe guyyiyan Israa7eela asati, “Nuuni nena nu Xoossaa aggidi, Ba7aala eeqatussi goinnidi, nena naaqqida” yaagidi GODAASSI waassidosona.

<sup>11</sup> Waassin GODAI etau, “Gibxxeti, Amooreti, Pilisxxeemati, <sup>12</sup> Sidoonati, Amaalee-qatinne Maa7oonati inttena huqqunnin, taassi waassideta; waassin taani inttena eta kushiyaappe ashshabeikkinaa? <sup>13</sup> SHin intte tana aggidi, hara xoossatussi goinnideta. Hegaa gishshau, taani inttena mulekka ashshikke. <sup>14</sup> Biidi intte doorido xoossatussi waassite. Intte metuwaa wode eti inttena ashshona” yaagidi zaariis.

<sup>15</sup> SHin Israa7eela asai zaarettidi GODAA, “Nuuni nagaraa oottida. Neeyyo lo77o milatiyaabaa nu bolli ootta; shin hayyanaa, hachchi nuna ashsha” yaagiis. <sup>16</sup> Yaagidi allaga xoossata bantta giddoppe diggidi, GODAAYYO goinnidosona. Israa7eela asai tuggatidoogau GODAIKKA mishettiis.

<sup>17</sup> Hegaappe guyyiyan, Amoonatu olanchchati olau giigidi, Gala7aaden galchchidosona; Israa7eela asaikka issippe shiiqidi, Gala7aaden Mixiphpha giyoosan galchchiis. <sup>18</sup> Gala7aade biittaa asainne halaqati bantta gidдон, “Amoonatu olanchchatuura koirottidi olaa gaittanai oonee? He urai Gala7aade biittan de7iya asau ubbau halaqa gidana” yaagidosona.

## 11

<sup>1</sup> Gala7aadiyaa Yofttaahee mino olanchcha. A aawai Gala7aada; shin a aayyiya shaaramuxiya maccaasa. <sup>2</sup> Gala7aadee ekkido machchiyaakka assi attuma naata yelaasu. Eti dicci gakkido wode, bantta ishaa Yofttaaha, “Neeni hara maccaasee na7aa gidido gishshau, nu aawaa aquwaappe aibanne laattakka” yaagidi sooppe yedettidosona. <sup>3</sup> Yaatin, Yofttaahee ba ishanttuppe baqatidi, Xoba giyo biittan de7iis. Yan i de7ishin, amarida shufuro asati akko shiiqidi, a kaallidosona.

<sup>4</sup> Amarida wodiyaappe guyyiyan, Amoonati Israa7eelatuura olettidosona. <sup>5</sup> Amoonati Israa7eela asaara olettido wode, Gala7aade biittaa cimati Xoba biittaappe Yofttaaha zaari ehanau biidosona. <sup>6</sup> Biidi eti a, “Haaya, Amoonata nuuni olana mala, yaada nuuyyo gadaawa gida” yaagidosona.

<sup>7</sup> Yaagin Yofttaahee Gala7aade cimata, “Tana ixxidi, ta aawaa keettaappe yedettidai inttena gidekketii? Ha77i metuwan gelidi, taakko aibissi yiidetii?” yaagiis.

<sup>8</sup> Yaagin Gala7aade cimati a, “Gidikkonne, ha77i nuuni neekko simmida; aissi giikko, neeni nunaara olaa baada, Amoonata nuussi olana malanne Gala7aade asaa ubbaayyo neeni halaqaa gidana mala, nuuni koyoos” yaagidosona.

<sup>9</sup> Yaagin Yofttaahee, “Amoonatuura olettanau intte tana guyye soo zaarin, GODAI eta ta kushiyan aattidi immikko, taani tumu intte halaqa gidanee?” yaagiis.

<sup>10</sup> Gala7aade cimati Yofttaaha, “GODAI nu gidдон markka! Neeni giyoobaa tumu nuuni oottana” yaagidi zaaridosona. <sup>11</sup> Yaatin, Yofttaahee Gala7aade cimatuura biis; bin a bantta halaqanne gadaawa oottidosona. Yofttaahee Mixiphphan GODAA sinttan ha yohuwaa ubbaa maayiiis.

<sup>12</sup> Hegaappe guyyiyan, Yofttaahee Amoonatu kawuwaakko asaa kiittidi, “Neeni nu biittaa bollan woraajjidoogee aibi gaasuwaanee?” yaagidi oishissiiis.

<sup>13</sup> Yofttaahee kiittido asatuyyo Amoonatu biittaa kawoi zaaridi, “Israa7eela asai Gibxxe biittaappe kiyido wode, Arnnoona SHaafaappe doommidi, Yaabooqa SHaafaa gakkanaashin, qassi Yorddaanoosa SHaafaa gakkanaashin de7iya ta biittaa ekkiis. Ha77i ta biittaa saruwan zaarite” yaagiis.

<sup>14</sup> Yofttaahee naa77anttuwaakka Amoonatu kawuwaakko asaa kiittiis. <sup>15</sup> Kiittiiddi hagaadan yaagiis; “Israa7eela asai Moo7aaba biittaa woikko Amoonata biittaa ekkibeenna. <sup>16</sup> Israa7eela asai Gibxxe biittaappe kiyido wode, bazzuwaa kanttidi biidi, Zo7o Abbaa gakkiiis; hegaappe qassi Qaadeesa giyoosaa yiis. <sup>17</sup> Yiidi Israa7eela asai Eedooma biittaa kawuwaakko asaa kiittidi, ‘Ne biittaara nuna aattarkii’ yaagiis; shin Eedooma kawoi aattennan ixxiis. Hegaadankka, Moo7aaba kawuwaakko kiittin, ikka aattennan ixxiis. Yaatin, Israa7eela asai Qaadeesan gam77iis.

18 “Hegaappe guyyiyan bazzuwaara kanttidi, eti Eedoomanne Moo7aaba biittata yuuyidi, Moo7aaba biittaappe arshsho baggaara yiidosona; yiidi Arnnoona SHAafaappe hefintta baggaara de7iya sohuwan dunkkaanidosona; shin Arnnoona SHAafai Moo7aaba zawa gidido gishshau, Moo7aaba baggi pinnibookkona.

19 “Hegaappe guyyiyan, Israa7eela asai Haseboona giyo kataman de7iya Amooretu Kawuwaa Sihoonakko asaa kiittiis; kiittidi eti, ‘Hayyanaa, ne biittaara nuna nu biitti aattarkkii’ yaagidosona. 20 SHin Sihooni Israa7eela asaa aattanau ammanibeenna. I ba asaa ubbaa shiishshidi, Yahaaxa giyoosan dunkkaanidi, Israa7eela asaara olettiiis. 21 Olettin GODAI Israa7eela Xoossai Sihoonanne a asaa ubbaa Israa7eela asaa kushiyan aattidi immin, eta xoonidosona; xoonidi yan de7ida Amooretu biitta ubbaa laattidosona. 22 Arnnoona SHAafaappe biidi, Yaabooqa SHAafaa gakkanaashiinne bazzuwaappe biidi, Yorddaanoosa SHAafaa gakkanaashin de7iya Amooretu biittaa ubbaa omooddidi ekkidosona.

23 “Hegaadan oottidi, GODAI Israa7eela Xoossai ba asaa Israa7eela sinttaappe Amooreta yedettidi xaissiiis. Yaatin, neeni neeyyo ekkanau waana qoppadii? 24 Neeni ne xoossai Kamooshi neeyyo immiyoobaa ekkikkii? Hegaadankka, nuuni GODAI nu Xoossai nuuyyo immidobaa ubbaa laattidi de7ana.

25 “Bau neeni Xippoora na7aa Moo7aaba Kawuwaa Baalaaqappe minnai? I Israa7eela asaara ooyettidee woikko olettidee?

26 “Israa7eela asai Haseboona, Aaro7eranne eta yuushuwan de7iya katamata ubbaa, hegaadankka, qassi Arnnoona SHAafaa lanqqiyan de7iya katamata ubbaa laattidi, heezzu xeetu laittaa de7iis. Yaatin, he wode aibissi wotti ekkibeekketii? 27 Taani ta baggaara inttena aibanne naaqqabeikke; shin tana ola olada naaqqiyai nena. Pirddiya GODAI hachchi Israa7eela asaappenne Amoonata asaappe gidduwan pirddo” yaagiis.

28 SHin Yofttaahee kiittido kiitaa Amoonatu kawoi siyennan ixxiis.

29 He wode GODAA Ayyaanai Yofttaahe bolli wodhdhin, Gala7aadenne Minaase biittata kantti biiddi, Gala7aade biittan de7iya Mixiphpha simmiis; hegaappe olanchchata kaalettidi, Amoonatu biitti biis. 30 Biiddi GODAASSI shiiquwaa shiiqettiiddi, “Neeni Amoonata ta kushiyan aattada immikko, 31 olan xoonada taani soo simmiyo wode, tana mokkanau ta sooppe kiyiyaabi aibanne gidin neessa; taani a neessi xuuggiyo yarshsho oottada shiishshana” yaagiis.

32 Hegaappe guyyiyan, Yofttaahee Amoonata olanau zawaa pinnidi biis; bin GODAI eta a kushiyan aattidi immiis. 33 Aaro7erappe doommidi, biidi Miiniitanne Aabeeli-Karaamiima mati gakkanaashin, laatamu katamata olidi bashshiis; daro asaa wori wurssiis. Hegaappe guyyiyan, Amoonati Israa7eelatussi haarettidosona.

### *Yofttaahe Na7iyo*

34 Yofttaahee Mixiphphan de7iya ba soo simmido wode, koirottad akka a na7iyaa karaabiyaa oiqqada yexxaiddanne duraidda a mokkanau kiyaasu. Ayyo ippe hara na7i baawa. 35 I o be7ido wode, azzanuwan ba maayuwa pooshshidi, “Hai poora ta na7ee! Tana kaushsharggadasa; tana gakkiiya metuwaayyo neeni gaaso gidadasa. Aissi giikko, taani GODAASSI shiiqetta uttaas; heгаа shiiquwaa gattennan agganau danddayikke!” yaagiis.

36 Yaagin na7iyaa, “Ta aawau, neeni GODAASSI shiiqettidabaa gidikko, GODAI ne morkketu, Amoonatu bolli ne haluwaa kessido gishshau, neeni shiiqettidobaa ta bolli pola” yaagaasu. 37 Qassikka a ba aawaa, “Taayyo issibaa oottarkkii. Taani muleera azina gelennan attiyo gishshau, ta laggetuura baada deretu bolli ta geela7otettaassi yeekkana mala, naa77u aginau tana yeddarkkii” yaagada oichchaasu.

38 Oichchin i, “Ba” yaagidi, naa77u aginau yeddiis; yeddin a ba laggetuura deriyaa huuphiyaa kiyada ba geela7otettaassi etaara yeekkaasu. 39-40 Naa77u aginaappe

guyyiyan, ba aawaakko simmada yaasu; yin GODAASSI ba shiiqettido shiiquwaa gattiis. A mulekka attumaasan gaittennan attaasu.

He wodeppe doommidi, Israa7eelatu macca naati laittan laittan oiddu gallassaa bantta sooppe haakki biidi, Gala7aadiyaa Yofttaahe na7eessi yeekkiyoogeenne azzaniyoogee meeze gidiiis.

## 12

### *Yofttaahanne Efireema Asaa*

<sup>1</sup> Efireema asai olaa baanau xeegettidi, Yorddaanoosa SHaafaa pinnidi, Xafoona giyo katamaa gakkido wode, Yofttaaha, “Amoonata olanau zawaa pinnada baidda, nenaara baanaadan aissi nuna xeesabeikkii? Nuunikka ne keettaa ne bolli taman xuuggana” yaagidosona.

<sup>2</sup> Yaagin Yofttaahee eta hagaadan yaagiis; “Taaninne ta asai Amoonatuura keehippe warettido wode, taani inttena xeesaas; shin intte tana etappe ashshibeekketa. <sup>3</sup> Intte tana ashshennaagaa be7ido wode, zawaa pinnada ta shemppuwaassi qarettennan Amoonata olanau baas; bin GODAI eta ta kushiyan aattidi immiis. Yaatin, intte hachchi aissi tana olanau yiidetii?” yaagiis.

<sup>4</sup> Hegaappe guyyiyan, Yofttaahee Gala7aade asaa ubbaa shiishshidi, Efireema asaara olettiis; olettin Gala7aade asati xoonidosona. Aissi giikko, Efireema asai kase eta, “Intte Gala7aaden de7iya asati kase Efireema zaretuppenne Minaase zaretuppe betidi yiidaageetappe attin, harata gidekketa” yaagi wottiis.

<sup>5</sup> Efireema asai baqatennaadan, Yorddaanoosa SHaafaa pinuwaa ubbaa Gala7aadeti oiqqidosona; oiqqin baqatanau koyiya Efireema asi ooninne pinnanau oichchiyo wode Gala7aadeti, “Neeni Efireema asee?” yaagidi oichchoosona. Oichchin, “Gidikke” giikko, <sup>6</sup> “Ane, ‘SHiboleeta’ ga” yaagoosona. SHin i, “SHi” giyo pitaliyaa loitti xeeگانau danddayenna gishshau, “Siboleeta” yaagees. Yaagiyo wode oiqqidi, Yorddaanoosa SHaafaa pinniyoosan woroosona. He wode yan Efireema asaappe oitamanne naa77u sha7u asai haiqqiis.

<sup>7</sup> Yofttaahee Israa7eela asaa bollan daannatidi, usuppun laittaa pirddiis. Hegaappe guyyiyan, Gala7aadiyaa Yofttaahee haiqqiis; haiqqidi Gala7aaden de7iya ba kataman moogettiis.

### *Ibxxaana*

<sup>8</sup> Yofttaaheppe kaallidi, Beetaliheemee Ibxxaani Israa7eela asaa bolli pirddiya daanna gidiiis. <sup>9</sup> Ibxxaanayyo hasttamu attuma naatinne hasttamu macca naati de7oosona; i ba macca naata ba yara gidenna attuma naatussi immiis; ba attuma naatussikka ba yara gidenna macca naata giigissidi ehiis. Ibxxaani Israa7eela bolli laappun laittaa daannatidi pirddiis. <sup>10</sup> Hegaappe guyyiyan haiqqidi, Beetaliheeme kataman moogettiis.

### *Eloona*

<sup>11</sup> Ibxxaanappe kaallidi, Zaabilooniyaa Elooni Israa7eela asaa bolli daannatidi, tammu laittaa pirddiis. <sup>12</sup> Hegaappe guyyiyan haiqqiis; haiqqidi Zaabiloona biittan de7iya Ayyaaloona kataman moogettiis.

### *Abddoona*

<sup>13</sup> Eloonappe kaallidi, Hilleela na7ai Abddooni, Pir77aatoona giyoosan de7idaagee, Israa7eela bolli pirddiya daanna gidiiis. <sup>14</sup> Abddoonayyo laappun tammu hareta toggiya oitamu attuma naatinne hasttamu naatu naati de7oosona; Abddooni Israa7eela asaa bolli daannatidi, hosppun laittaa pirddiis. <sup>15</sup> Hegaappe guyyiyan, Hilleela na7ai Abddooni haiqqiis; haiqqidi Amaaleeqatu gezziyan Efireema biittan de7iya Pir77aatoonan moogettiis.



## 13

### *Samssooni Yelettiis*

<sup>1</sup> Israa7eela asai GODAA sinttan qassikka iitabaa oottiis. Yaatin, GODAI eta oitamu laittau Pilisxxeema asaa kushiyan aattidi immiis.

<sup>2</sup> He wode Xor77a giyo kataman Maanuha giyo issi bitanee de7ees. I Daana zare; a machchiyaa maine gidido gishshau, na7a yelabeikku. <sup>3</sup> Issi gallassi GODAA kiitanchchai he maccaaseessi qonccidi, hagaadan yaagiis; “Be7a, neeni na7a yelabeenna maine; shin neeyyo ixetai attana; attin neeni attuma na7a yelana. <sup>4</sup> Hega gishshau, woine eessaa woikko mattoyiya ushshaa uyennaadaaninne tunabaa aibanne meennaadan naagetta. <sup>5</sup> Neeyyo ixetai attin, neeni attuma na7a yelana. Na7ai yelettiyo wodeppe doommidi, Xoossaassi dummatida Naaziraawe gidiyo gishshau, a binnaanaa mulekka meedoppa. I Israa7eela Pilisxxeema asaa kushiyaappe ashshanau doommanna” yaagiis.

<sup>6</sup> Hegaappe guyyiyan maccaasiyaa baada, ba keettaawaassi hagaadan yaagada odaasu; “Xoossaa asa issoi taakko yiis; ayyo meraikka Xoossaa kiitanchchaa meraa mala keehippe yashshiyaagaa. I awappe yiidaakkokka taani a oichchabeikke; ikka ba sunntaa taayyo yootibeenna. <sup>7</sup> SHin i tana, ‘Neeyyo ixetai attin, neeni attuma na7a yelana. Na7ai yelettoosappe doommidi haiqqana gakkanaassi, Xoossaassi dummatida Naaziraawe gidiyo gishshau, woine eessaa woikko mattoyiya ushshaa uyoppa; aiba tunabaakka mooppa’ yaagiis” yaagada yootaasu.

<sup>8</sup> Hegaappe guyyiyan Maanuhee, “Abeet GODAU, na7ai yelettiyo wode ai oottanau koshshiyaakko erissana mala, neeni wontta kiittido Xoossaa asi nuukko simmidi yaanaadan oottarkkii” yaagidi GODAA woossiis.

<sup>9</sup> Woossin Xoossai Maanuhe woosaa siyiis. Maccaasiyaa gaden uttidaashin naa77anttuwaa yiis; shin he wode i keettaawai Maanuhee iira de7enna. <sup>10</sup> Maccaasiyaa eesuwan ba keettaawaakko baada, “Be7a, ini gallassi taakko yiida bitanee hachchikka hagan de7ees” yaagaasu.

<sup>11</sup> Yaagin Maanuhee uttidosaappe denddidi, ba maccaasiyo kaallidi biis; bi gakkidi, bitaniyaa, “Ini ta machcheera haasayidai nenee?” yaagidi oichchiis.

Oichchin bitanee, “Ee tana” yaagiis.

<sup>12</sup> Yaagin Maanuhee, “Neeni yootido qaalai polettiyo wode, yelettana na7aa de7uwaassinne oosuwaassi wogi aibee?” yaagidi a oichchiis.

<sup>13</sup> Oichchin GODAA kiitanchchai, “Ne machchiyaa taani yootido ubbabaappe naagettu. <sup>14</sup> Woiniyaa turaappe kiyiyaabaa aibanne muuppu; woine eessaa woikko mattoyiya ushshaa uyuppu; aiba tunabaakka muuppu. Taani iyyo yootido ubbaa polu” yaagidi zaariis.

<sup>15</sup> Maanuhee qassi GODAA kiitanchchaa, “Nuuni neeyyo issi yelaga deeshshaa shukkidi giigissanaashin, hayyanaa takkarkkii” yaagiis.

<sup>16</sup> Yaagin GODAA kiitanchchai zaaridi, “Taani takkikkokka, ne qumaa miikke. SHin neeni xuuggiyo yarshshuwaa giigissana koyikko, GODAASSI yarshshanau dandayaasa” yaagiis. I GODAA kiitanchchaa gidiyoogaa Maanuhee eribeenna.

<sup>17</sup> Maanuhee qassikka GODAA kiitanchchaa, “Neeni yootido qaalai polettiyo wode, nuuni nena bonchchana mala, ne sunntai oonee?” yaagiis.

<sup>18</sup> Yaagin GODAA kiitanchchai a, “Ta sunntai maalaalissiyaagaa gidiyo gishshau, neeni ta sunntaa aibissi oichchai?” yaagidi zaariis.

<sup>19</sup> Yaagin Maanuhee he deeshshaanne a kattaa yarshshuwaa ekkidi, shuchchaa bolli GODAASSI yarshshiis. Maanuheenne a maccaasiyaa xeellishin, GODAI maalaalissiyaabaa oottiis. <sup>20</sup> Yarshshuwaa yarshshiyooosappe tamaa lacoi pude pololattishin, GODAA kiitanchchai tamaa lacuwaa giddoora saluwaa kiyiis. Maanuheenne a maccaasiyaa hega be7idi, som77uwaa sa7aa gattidi gufannidosona.



<sup>21</sup> GODAA kiitanchchai Maanuhessinne a maccaaseessi naa77anttuwaa beettennan aggin, i GODAA kiitanchchaa gididoogaa Maanuhee he wode akeekiis. <sup>22</sup> Maanuhee ba machchiyo, “Nuuni Xoossaa be7ido gishshau, nuuni haiqqanaagee geeshsha” yaagiis.

<sup>23</sup> SHin a zaarada, “GODAI nuna woranau koyidobaa gidiyaakko, xuuggiyo yarshshuwaanne kattaa yarshshuwaa nu kushiyaappe ekkenna, woikko he ubbabaa nuna bessenna, woikko haggaa nuussi odenna” yaagaasu.

<sup>24</sup> Maccaasiyaa attuma na7aa yelaasu; yelada Samssoona gaada sunttaasu. Na7aikka dicciis; GODAIKKA a anjjiis. <sup>25</sup> Na7ai Xor77appenne Eshttaa7oolappe gidduwan de7iya Daana moottan de7ishin, GODAA Ayyaanai a denttettiyoogaa doommiis.

## 14

### *Samssooni Machcho Ekkiis*

<sup>1</sup> Issi gallassi Samssooni Timina giyoosaa wodhdhiis; wodhdhidi yan issi Pilisxxeema geela7iyo be7iis. <sup>2</sup> Soo simmidi ba aawaanne ba aayyiyo, “Taani Timinan issi Pilisxxeema geela7iyo be7aas; ha77i o taayyo oichchidi immite” yaagiis.

<sup>3</sup> SHin a aawainne aayyiya a, “Machcho oichchanau ha qaxxaretti beenna Pilisxxematukko baanau nena aibissi koshshidee? Nu dabbotu giddon woikko nu asaa ubbaa giddon neeyyo haniya issi macca na7a demmanau danddayabeikkii?” yaagidi oichchidosona.

SHin Samssooni ba aawaa, “Taani o dosido gishshau, o giigissada taayyo imma” yaagiis. <sup>4</sup> Pilisxxeemata olanau GODAI gaasuwaa koyidi, haggaa eta bolli oottiyoogaa Samssoona aawainne aayyiyaanne eribookkona. He wode Pilisxxeemati Israa7eela asaa haaroosona.

<sup>5</sup> Hegaappe guyyiyan, Samssooni ba aawaaranne ba aayeera Timina wodhdhiis. Yan woiniyaa turaa giddoora i kanttidi biishin, issi wodala gaammoi gudiiddi a bolli kiyiis. <sup>6</sup> Kiyin GODAA Ayyaanai Samssoona bollan wolqqappe wodhdhiis; wodhdhin deeshsha maraa duuterettiyoogaadan, ba kushiyan aibanne oikkennan gaammuwaa duuteretti yeggiis. He ba oottidoogaa ba aawaassinne ba aayeessi odibeenna. <sup>7</sup> Hegaappe guyyiyan biidi, geela7iyo haasayissiis; haasayissidi o dosiis.

<sup>8</sup> Guutta wodiyaappe guyyiyan, o bullachchanau yaa simmidi biis; biiddi ba worido gaammuwaa gauxaa be7anau ogiyaappe sher77i giidi biyo wode, gaammuwaa gauxaa giddon mattai eessaa eessidoogaa be7iis. <sup>9</sup> Be7idi eessaappe amaridaagaa kaashi ekkidi, ogiyan miiddi biis. Ba aawaakkonne ba aayeekko gakkidi, ba oikkido eessaappe amaridaagaa immin, etikka miidosona; shin Samssooni he eessaa gaammuwaa gauxaa gidloppe ekkidoogaa etau odibeenna.

<sup>10</sup> A aawai maccaasee soo bin, Samssooni yan gibiraa giigissiis. Heggaa mala gibirai bullachchaawu kaseesappekka oottiyo woga. <sup>11</sup> He asai a be7ido wode, aara takkanaadan hasttamu wodalla naata dooriis. <sup>12</sup> Samssooni eta, “Ane intte eriyaakkonne issi qan77ishiyaa taani inttena qan77ishais; bullachchaa baalai bonchchettiyo laappun gallassatu giddon ha qan77ishiyaa birshshettaa taassi intte yootiyaabaa gidikko, taani inttessi hasttamu liino iirichchotanne hasttamu kumetta maayota immana. <sup>13</sup> SHin intte taayyo birshshettaa yootanau danddayana xayikko, intte taayyo hasttamu liino iirichchotanne hasttamu kumetta maayota immeeta” yaagiis.

Yaagin eti, “Ero, ne qan77ishiyaa ane nuussi yoota” yaagidosona.

<sup>14</sup> I eta,

“Miyaagaappe miyoobai beettiis.

Minuwaa gidloppe mal77iyaabai kiyiis” yaagiis. Heezantto gallassi gakkanaassi eti qan77ishiyaa birshshettaa immanau danddayibookkona.

<sup>15</sup> Oiddantto gallassi eti Samssoona machchiyo, “Ane ne keettaawaa cimmada qan77ishiyaa birshshettaa i nuuyyo yootanaadan ootta. Hegee xayikko, nuuni nenanne ne aawaa keettaa taman xuuggana. Intte nuna xeesidoogee nuna manqqettanaassee?” yaagidosona.

<sup>16</sup> Yaatin, Samssoona machchiyaa yeekkaidda akko shiiqada, “Neeni tana siiqakka! Neeni tana keehippe ixxaasa! Aissi giikko, neeni ta biittaa asaa qan77ishiyaa qan77ishada, a birshshettaa taassi yootabaakka” yaagaasu.

Yaagin i zaaridi, “Be7a, hagua taani ta aawaassikka ta aayeessikka yootabeikke. Yaatin, neessi aibissi yootoo?” yaagiis. <sup>17</sup> Yaagin bullachchaa baalai bonchchettiyo laappun gallassatu ubban yeekkada shemppuwaa diggin, laappuntta gallassi qan77ishiyaa birshshettaa iyyo yootiis. Yootin akka baada bantta biittaa asaayyo yootaasu.

<sup>18</sup> Yaatin, laappuntta gallassi awai wullanaappe kase katamaa asati ba zaaruwaa ekki yiidi, Samssoona,  
“Eessaappe aadhdhidi mal77iyaabi,  
gaammoppe aadhdhidi minniyaabi aibee?”  
yaagidosona.

Yaagin Samssooni eta, “Intte ta ussen goyennabaa gidiyaakko, ta qan77ishiyaa birshshettaa erekketa shin” yaagiis.

<sup>19</sup> Hegaappe guyyiyan, GODAA Ayyaanai a bollan wolqqappe wodhdhin, Asqqaloona katamaa wodhdhidi, hastamu asata woriis; woridi eta maayuwaa qaari ekkidi, qan77ishiyaa birshshida asatussi ehiidi immiis. Hanidaban ubban hanqquwaa suulliddi, ba aawaa soo simmidi biis. <sup>20</sup> Bin Samssoona machchiyaa a laggiyaassi, a waanna miiziyaassi imettaasu.

## 15

<sup>1</sup> Guuttaa takkishin, gisttiyaa cakkiyo wode, Samssooni ba machchiyo be7anau issi anqqara deeshshaa ekkidi biis; biidi i aawaa, “Taani ta machchiyaa de7iyo kifiliyaa gelanau koyais” yaagiis.

SHin i gelennaadan, i aawai diggiis. <sup>2</sup> I aawai Samssoona, “Neeni o ubba ixxidabaa milatin, ne miiziyaayyo immaas. SHin i kaalo michchiyaa ippekka aadhdha lo77o; i gishshaa o akka” yaagiis.

<sup>3</sup> Yaagin Samssooni etau, “Ha77i simmi Pilisxxeema biittaa asaa bolli taani iitabaa oottikko, mooranchcha gidikke” yaagiis. <sup>4</sup> Yaagidi biidi, heezzu xeetu worakanata oiqqiis; oiqqidi naa77aa naa77aa goinaa issippe gattidi, goinatuppe gidduwan yiicettida xomppiyaa wottidi qachchiis. <sup>5</sup> Hegaappe guyyiyan, yiicettida xomppiyan tamaa oittidi, biron cakettibeenna Pilisxxeema asaa kattaa giddo worakanata yeddiis; yeddidi cakettida kattaa, equwan de7iya kattaa, woiniyaa turatanne wogaraa xuuggiis.

<sup>6</sup> Pilisxxeemati, “Hagua oottidai oonee?” yaagidi oichchidosona.

Oichchin asai, “Samssooni oottiis; aissi giikko, Timina asa gidiya a bolloi, a machchiyo a miiziyaayyo immido gishshaassa” yaagiis. Yaagin Pilisxxeemati biidi, onne i aawaa taman xuuggidosona.

<sup>7</sup> Xuuggin Samssooni etau, “Intte heгаа oottido gishshau, haluwaa kessennan ag-gikke” yaagiis. <sup>8</sup> Yaagidi eta wolqqaama shochchaa shocidi, darota woriis. Hegaappe guyyiyan biidi, Exaama giyo sohuwan de7iya zaallaa kooppuwaa gidдон gam77iis.

### *Samssooni Pilisxxeemata Xooniis*

<sup>9</sup> Hegaappe guyyiyan, Pilisxxeema asai yiidi, Yihudan dunkkaaniis; dunkkaanidi Leea giyo katamaa oliis. <sup>10</sup> Yihudaa asai eta, “Aibissi nuna olanau yiidetii?” yaagidi oichchiis.

Oichchin eti, “Nuuni Samssoona oikki qachchanaunne i nu bolli oottidoogaadan a bolli oottanau yiida” yaagidi zaaridosona. <sup>11</sup> Yaatin, Yihudaappe heezzu sha7u asati Exaama giyo sohuwan de7iya zaallaa kooppuwaa biidi Samssoona, “Nuna haariyaageeti Pilisxeema asata gidioogaa erikkiyye? Yaatin, nu bolli haggaa aiba palabaa oottai?” yaagidosona.

Yaagin i zaaridi, “Eti ta bolli oottidoogaadan, taanikka eta bolli oottaas” yaagiis.

<sup>12</sup> Etikka zaarettidi, “Nuuni haggaa yiidoogee nena qachchidi, Pilisxeematussi aattidi immanaassa” yaagidosona.

Yaagin Samssooni eta, “Intte intte huuphen tana worennaadan caaqqite” yaagiis.

<sup>13</sup> Yaagin eti, “Eeno, nuuni nena qachchidi, etau aattidi immanaappe attin, worokko” yaagidi au zaaridosona. Hegaappe guyyiyan, naa77u ooratta wodoruwan qachchidi, zaallaa kooppuwaappe kessidi efiidosona.

<sup>14</sup> Samssooni Leeha biido wode, Pilisxeema asati wocamiiddi, aara gaittanau yidosona. Yin GODAA Ayyaanai a bolli wolqqappe wodhdhiis; wodhdhin a kushiya qachchi wottido wodoruwaa, shaloi tamaa be7idi duuxxiyoogaadan, duuteretti yeggiis.

<sup>15</sup> Yaatidi mata wode haiqqida issi hariyaa gappataa demmi ekkidi, an sha7u asaa woriis. <sup>16</sup> Woridi Samssooni haggaa yaagiis;

“Hariyaa gappatan taani

ahaa bollan ahaa dooraas.

Hariyaa gappatan sha7u asaa woraas”

yaagiis. <sup>17</sup> Haasayioogaa wurssidoogaappe guyyiyan, ba oikkido gappataa kushiyaappe oliis; olidi he sohuwaa Raamaati-Leeha<sup>3</sup> yaagidi sunttiis.

<sup>18</sup> Hegaappe guyyiyan, Samssooni keehippe saamettidi, GODAASSI waassiiddi, “Neeni haggaa mala gita xoonuwaa taassi ne ashkkaraassi immadasa. Yaatin, taani ha77i saamuwan haiqqoo? Qassi ha qaxxarettibeennaageetu kushiyan kunddoo?” yaagidi waassiis. <sup>19</sup> Yaagin Xoossai Leehan de7iya biittaa phalqqin, appe haattai kiyiis. Samssooni he haattaappe uyidi alido gishshau, ayyo shemppoi simmiis. Yaatin, he sohuwaa Aini-Haqqoore<sup>4</sup> yaagidi sunttiis. Hegee hachchi gakkanaassi Leehan de7ees.

<sup>20</sup> Pilisxeema asai biittaa haarido wode, Samssooni Israa7eelan laatamu laittau pirddiya daanna gidiiis.

## 16

### *Samssooni Gaazan Oottidobaa*

<sup>1</sup> Issi gallassi Samssooni Gaaza giyo Pilisxeematu katamaa biis; biidi yan issi shaaramuxa maccaasiyo be7idi, iira aqanau i keettaa geliis. <sup>2</sup> Gaaza kataman de7iya asai Samssooni eta katamaa yiidoogaa siyidi, katamaa yuuyi aadhdhidi, qammaa muliyaa katamaa penggiyaa naagiiddi aqiis; “Sa7ai wonttanaashin naagidi, nuuni a worana” yaagidi qammaa muliyaa co77u giidosona. <sup>3</sup> SHin Samssooni yan zin77idoi bilahe gakkanaashin xalaala. Bilahe denddidi, katamaa dirssaa penggiyaa oikkidi, sanqqaa, qoriyaa, qosilettaanne gorddiyo hiraqota shoddiis. He ubbaakka hashiyan tookkidi, Kebroonappe sintta baggaara de7iya keraa huuphiyaa kessiis.

### *Samssoonanne Daliilo*

<sup>4</sup> Hegaappe guyyiyan, Samssooni Soreeqa giyo zanggaaran de7iya issi Daliilo giyo maccaasiyo siiqiis. <sup>5</sup> Yaatin, Pilisxeematu halaqati ikko yiidi, “Neeni a cimmada, he wolqqaa ubbaa aibippe i demmidaakkonne qassi nuuni a waati xoonidi qachchanau danddayiyaakko oichcha. Issoi issoi nuuni neeyyo issi sha7anne issi xeetu xaqara biraa immana” yaagidosona.

<sup>3</sup> 15:17 Raamaati-Leeha: Ha sunntaa birshshettai “Gappataa Keraa” giyoogaa.

<sup>4</sup> 15:19 Aini-Haqqoore: Ha sunntaa birshshettai “Waassiyagaa Pulttuwaa” giyoogaa.

<sup>6</sup> Yaagin Daliila Samssoona, “Hagaa keena wolqqaa neeni auppe demmidaakko, hayyanaa tau odarkkii! Issi asi nena qachchidi, waatidi ne wolqqaa daafurssanau danddayii?” yaagaasu.

<sup>7</sup> Samssooni, “Tana laappun irxxa dafotun asi qachchikko, daafurada, hara asadan hanana” yaagidi zaariis.

<sup>8</sup> Hegaappe guyyiyan, Pilisxxeematu halaqati Daliliyyo laappun irxxa dafota ehi-idosona; ehin a Samssoona qachchaasu. <sup>9</sup> Ba qol77on asaa qotta wottada, “Samssoonaa, Pilisxxeemati yiichchidosona” gaada xeesaasu. SHin shaloi tamai oiqqin duux-erettiyoogaadan, dafota duuteretti yeggiis. Yaatin, i waani wolqqaamiyaakko xuurai erettiibeenna.

<sup>10</sup> Yaatin, Daliila Samssoona, “Hekko neeni tanan kaa7aasa; neeni taayyo wordduwaa odadasa. Ha77ikka neeni qashettanaagee aibiinakko, hayyanaa taayyo yootarkkii!” yaagaasu.

<sup>11</sup> Yaagin i o, “Asi go7ettibeenna ooratta wodoruwan tana qachchikko, daafurada, hara asadan hanana” yaagiis.

<sup>12</sup> Yaagin Daliila ooratta wodoruwa ekkada, Samssoona qachchaasu. Qassikka ba qol77on asaa qotta wottada, “Samssoona, Pilisxxeemati yiichchidosona” yaagaasu. SHin i wodoruwa qesiyaappe shalodan duuteretti yeggiis.

<sup>13</sup> Yaatin, Daliila Samssoona, “Ha77i gakkanaassi neeni tanan kaa7adasa; neeni taayyo wordduwaa odadasa. Ha77ikka neeni qashettanaagee aibiinakko hayyanaa taayyo yootarkkii!” yaagaasu.

Yaagin i o, “Ta huuphiyaa laappun datta binnaanaa qacinaara gattada, harppan quxarada, muhuhaa xongga xonggada daddikko, taani daafurada, hara asadan hanana” yaagiis.

<sup>14</sup> Hegaappe guyyiyan, Samssooni xiskkishin, Daliila a huuphiyaa laappun datta binnaanaranne qacinaara gatta quxarada daddaasu. Hegaappe guyyiyan, “Samssoonaa, Pilisxxeemati yiichchidosona” yaagaasu. Yaagin i xiskuwaappe beegottidi, ba binnaanaa dadettida maayuwaappenne harppaappe shoddi ekkiis.

<sup>15</sup> Yaatin a, “Ne wozanai tanaara de7ennan, ‘Taani nena siiqais’ waatada gai? Tanan hagaara heezzutoo kaa7adasa. Neeni ha wolqqaa aibippe demmidaakko, taayyo yootabaakka” yaagaasu. <sup>16</sup> Hachchi hachchi zaara zaara oichchada waissin, haniy-oobaa xayiiis.

<sup>17</sup> Yaatin, “Ta aayee uluwaappe doommin, taani Xoossaassi dummatida Naaziraawe asa gidido gishshau, ta huuphiyaa binnaanai meedetti erenna. Ta binnaanai meedet-tikko, ta wolqqai taappe xayin, taani daafurada, hara asadan hanana” yaagidi, ba wozanan de7iyaabaa ubbaa iyyo yootiis.

<sup>18</sup> Ba wozanan de7iyaabaa ubbaa i yootidoogaa Daliila be7ido wode, “Ba wozanan de7iyaabaa ubbaa taayyo odido gishshau, ane issitoo simmidi yiite” yaagada Pilisxxeematu halaqatuyyo kiitaa yeddaasu. Yeddin eti biraa ekkidi, ikko yiidosona.

<sup>19</sup> Daliila Samssoona ba kiyuwan xiskkissaasu; xiskkissada issi asa xeejin yiidi, a huuphiyaa laappun datta binnaanaa meediis; meedin a wolqqai appe xayiiis. Hegaappe guyyiyan, a waissiyooogaa doommaasu; <sup>20</sup> “Samssoonaa, Pilisxxeemati yiichchidosona!” yaagaasu.

Yaagin xiskuwaappe beegottidi, kaseegaadan duuterettada baana yaagidi qoppiis; shin GODAI appe shaakettiichchidoogaa i eribeenna.

<sup>21</sup> Pilisxxeemati a oiqqidoogaappe guyyiyan, a naa77u aifeta wooci kessidi, Gaaza katamaa efiidosona. Efiidi nahaasiyaa sanssalatan qachchidosona; qachchidi qasho keettan de7iya woxan kattaa gaaccanaadan oottidosona. <sup>22</sup> Eti a huuphiyaa binnaanaa meedidoogaappe guyyiyan, binnaanai simmidi mokettaa doommiis.

<sup>23</sup> Pilisxxeematu halaqati, “Nu xoossai nu morkkiyaa Samssoona nu kushiyan aattidi immiis” yaagidi bantta xoossaa Daagoonassi gita yarshshuwaa yarshshanaunne ufaitanau issippe shiiqidosona.

<sup>24</sup> Asai ubbai a be7ido wode, “Nu biittaa bashshida, nu asaappe daruwaa worida nu morkkiyaa nu xoossai nu kushiyan aattidi immiis” yaagidi bantta xoossaa galatiis.

<sup>25</sup> Eti keehippe ufaittido gishshau, “Kaa7idi nuna ufaissana mala, Samssoona xeesite” yaagidosona. Yaagin Samssoona qasho keettaappe xeesidi ehin, i eta sinttan kaa7iis; kaa7idoogaappe guyyiyan, tuussatuppe gidduwan essidosona.

<sup>26</sup> Samssooni a kushiya oiqqidi kaalettiya na7aa, “Taani etan zemppada eqqana mala, keettaa tookkida tuussata tana boshissa” yaagiis. <sup>27</sup> Keettaa gidдон atumaasatinne maccaasati kumi uttidosona; qassi hegan Pilisxxeematu halaqati ubbatikka de7oosona. Samssooni kaa7ishin, keettaa bollan dembbayidi keexxido sohuwan uttidi, heezzu sha7u gidiya attumaasatinne maccaasati be7oosona.

<sup>28</sup> He wode Samssooni GODAA woossiiddi, “Abeet Ubbaa Haariya GODAU, hai tana hassayarkkii! Abeet Xoossau, Pilisxxeemati ta naa77u aifeta kessidoogaa, haluwaa taani kessanaadan, hai tana issiton minttarkkii!” yaagiis. <sup>29</sup> Yaagidi Samssooni keettaa tookkida gidдо tuussata naa77aakka oiqqiis. Ushachcha kushiyan issuwaa, haddirssa kushiyan issuwaa oiqqidoogaappe guyyiyan, <sup>30</sup> “Ane taani Pilisxxeematuura issippe haiqqais!” yaagidi waassiis. Waassidi bau de7iya wolqqa ubban sugin, keettaa halaqatu bollinne gidдон de7iya asaa ubbaa bolli kunddiis. Samssooni haiqqiiddi worido asai, i paxa de7iiddi worido asaappe dariis.

<sup>31</sup> Yaatin, a ishatinne a dabboti ubbai yiidi, a ahaa efidosona; efidi Xor77a katamaappenne Eshtaa7oola katamaappe gidduwan, a aawaa Maanuhe duufuwan moogidosona. Samssooni Israa7eelan laatamu laittaa daannatidi pirddiis.

## 17

### *Miika Eeqa Misileta*

<sup>1</sup> Efireema gezziyan Miika giyo issi bitanee de7ees. <sup>2</sup> Issi gallassi Miiki ba aayyiyo, “Neepe issi asi issi sha7anne issi xeetu xaqara biraa wuuqqido wode, neeni he wuuqqida bitaniyaa qanggishin taani siyaas. Be7a, he miishshai ta achchan de7ees; taani ekkaas” yaagiis.

Yaagin a aayyiya, “Ta na7au, nena GODAI anjjo” yaagaasu. <sup>3</sup> Yaagin na7ai issi sha7anne issi xeetu xaqara biraa ba aayeessi zaariis; zaarin a aayyiya, “Qanggettai ta na7aa gakkennaadan, taani ha miishshaa ta GODAAYO dummayana. Yaatobare biraa seerissidi, mittaappe masettidi giigida eeqaa misiliyaa an sheeshshanau go7ettana. Hegaa gishshau, biraa taani neessi zaarana” yaagaasu.

<sup>4</sup> Na7ai ba aayeessi miishshaa zaarin, a aayyiya he xaqara biraappe naa77u xeetaa ekkada, mittaa massidi biran sheeshshi sheeshshidi eeqa misiliyaa medhdhiya issi hiillaassi immaasu; immiin i oottido misilee Miika son de7iis.

<sup>5</sup> He Miikassi eeqau goinniyo keettaa de7ees. I eefuudiyaanne so gidдо eeqaa misileta giigissidi, he keettan ba naatuppe issuwaa qeese oottidi sunttiis. <sup>6</sup> He wode Israa7eela biittan kawoi baawa; asi ubbi bau likke milatidabaa coo oottiis.

<sup>7</sup> He wode Yihudaa biittan Beetaliheeme kataman issi wodallai de7ees; i Leewa zare. <sup>8</sup> Ha bitanee baayyo de7iyo soho koyanau Beetaliheeme katamaappe denddidi biis; biidi Efireema gezziyan de7iya Miika soo gakkiiis. <sup>9</sup> Gakkin Miiki, “Auppe yaadii?” yaagiis.

Yaagin bitanee, “Taani Yihudaa biittan Beetaliheeme katamaappe yaas; taani Leewa zaree. Ha77i taayyo de7iyo soho koyaidda de7ais” yaagidi au zaariis.

<sup>10</sup> Yaagin Miiki a, “Tanaara de7a; taayyo aawanne qeese gida. Taani neeyyo laittan laittan tammu xaqara biraa, kumetta maayuwaanne miyoobaa immana” yaagiis.



<sup>11</sup> Yaagin Leewa wodallai Miikaara issippe de7anau maayettiis; maayettidi Miikayyo yelido na7adan haniis. <sup>12</sup> Miiki a ba qeese oottidi sunttin, a son de7iis. <sup>13</sup> Miiki, “Issi Leewee taayyo qeese gidido gishshau, GODAI taayyo ubbabaa loittanaagaa erais” yaagiis.

## 18

### *Miikanne Daana Zareta*

<sup>1</sup> He wode Israa7eela biittan kawoi baawa. He wode gakkanaassi Daana zaretussi Israa7eela zaretu gididon laattido biitti baawa. Hegaa gishshau, eti banttau de7iyo biittaa koyiiddi de7oosona. <sup>2</sup> Hegaa gishshau, Daana zareti bantta zaretuppe ichchashu mino asata dooridi, biittaa wochchidinne akeekidi simmanaadan, Xor77anne Eshtaa7oola geetettiya katamatuppe eta kiittidosona.

Kiittin eti Efireema gezziyaa gakkidi, Miika son aqidosona. <sup>3</sup> Eti Miika son de7ido wode, Leewa zare gidida yelagaa a haasayan eridosona. Eti akko shiiqidi, “Nena haggaa ehiidai oonee? Haggaa aissi yaadii?” yaagidi oichchidosona.

<sup>4</sup> Oichchin i, “Miiki tau haggaa haggaa oottiis; i taayyo damoozaa qanxxin, taani ayyo qeese gidada oottais” yaagidi etau zaariis.

<sup>5</sup> Zaarin, “Nuuni biyo ogee nuuyyo giiganaa aggananaa hayyananaa ane nuuyyo Xoossaa oichcharkkii” yaagidosona.

<sup>6</sup> Yaagin qeese etau, “Saro gakkite; intte biyo ogiyan GODAI inttenaara gidana” yaagidi zaariis.

<sup>7</sup> Hegaappe guyyiyan, ichchashu asati yaappe denddidi, Laayisha giyo katamaa biidosona; biidi yan de7iya asai Sidoona biittaa asaadan saruwan de7iyoogaa be7idosona; asati oonanne sirennan woppa asa; eti aibinne paccennan, ubbabai kumido asa. Ai asaaranne gaittannan Sidoona biittaa asaappe haakkidi, banttarkka dumma de7oosona.

<sup>8</sup> Ichchashu asati Xor77anne Eshtaa7oola katamatun de7iya bantta ishanttukko simmidosona; simmin eta ishantti, “Ai oduwaa ekkidi yiidetii?” yaagidosona.

<sup>9</sup> Yaagin eti zaaridi, “Biittai keehippe aradda gidiyoojaa nuuni be7ida. Hegaa gishshau denddidi, Laayisha kataman de7iya asaa oloos! Hagan ooso xayidi coo uttoppate; eesuwan biidi oiqqite. <sup>10</sup> Intte yaa biidi, oonanne sirennan saro uttida asaakko gakkana. Biittai aaho; asaassi koshshiya ubbabai he biittan de7ees. Xoossai he biittaa intteyyo immiis” yaagidosona.

<sup>11</sup> Yaatin, Daana zaretuppe usuppun xeetu asati ola miishshaa oiqqidi, Xor77anne Eshtaa7oola katamatuppe denddidi biidosona. <sup>12</sup> Biidi Yihudaa biittan de7iya Qiriyaati-Yi7aariima giyo katamaappe arggo baggaara uttidosa. Hegaa gishshau, he sohoi hachchi gakkanaassi Daana Moottaa geetettidi sunttettiis. <sup>13</sup> Hegaappe denddidi, Efireema gezziyaa de7iya Miika soo yiidosona.

<sup>14</sup> Laayisha biittaa wochchanau biida ichchashu asati bantta ishantta, “Ha sohuwan, ha keettatuppe issuwan eefuudee, so giddo eeqaa misiletinne mittaappe masettidi biran sheeshettida misilee de7iyoogaa ereetii? Ane ai oottanau koshshiyaakko qoppite” yaagidosona. <sup>15</sup> Yaagin ogiyaappe simmidi, Leewa zare gidida yelaga qeese de7iyo Miika soo biidi, a sarotidosona. <sup>16</sup> He wode usuppun xeetu Daana asati ola miishshaa oiqqidi, geliyo penggiyan eqqidosa. <sup>17</sup> Eti he qeesiyaara yan eqqidaashin, biittaa wochchida ichchashu asati Miika soo gelidi, mittappe masettidi biran sheeshettida misiliyaa, eefuudiyaanne so giddo eeqaa misileta ekkidosona.

<sup>18</sup> He wode qeese eta, “Waateetii?” yaagiis.

<sup>19</sup> Yaagin eti a, “Haizza! Issi qaalanne qaattoppa! Nunaara baada nuuyyo aawanne qeese gida. Issi keetta asau qeese gidiyoojaa Israa7eela gidiya issi zare asaassi qeese gidiyoojee neeyyo kehennee?” yaagidosona. <sup>20</sup> Yaagin qeese ufaittiis; ufaittidi

eefuudiyaa, so giddo eeqaa misiletanne mittappe masettida misiliyaa ekkidi, asatuura issippe biis.

<sup>21</sup> Hegaappe denddidi, bantta naata, bantta mehiyaanne banttassi de7iyaabaa sinttan wottidi biidosona. <sup>22</sup> Eti Miika keettaappe haakkidi biidoogaappe guyyiyan, Miiki ba shooron de7iya asata xeesin, olau kiyidosona; kiyidi Daana asata kaallidi gakkidosona. <sup>23</sup> Gakkidi waassin, Daana asati guyye simmidi Miika, “Waanadii? Ha asaa ubbaa aissi shiishshadii?” yaagidi oichchidosona.

<sup>24</sup> Oichchin Miiki zaaridi, “Taani medhdhido ta xoossatanne tau oottiya qeesiyaa ekki yiichchideta. Tau harai aibee attidai? Intte tana aibissi, ‘Waanadii?’ geetii?” yaagiis.

<sup>25</sup> Daana asati, “Issi qaala qaattada nena era! Ha yiilluwaara de7iya asaa neeni dent-tettikko, eti ne bolli denddananne ne so asaa ubbaa wurssana” yaagidosona. <sup>26</sup> Yaagidi Daana asati bantta ogiyaa biidosona. Miikikka eti baappe keehi wolqqaamiyoogaa be7idi, ba soo simmidi biis.

<sup>27</sup> Daana asati Miiki medhdhido xoossatanne a qeesiyaa ekkidi, Laayisha kata-man oonanne sirennan saro de7iya asatukko biidosona; biidi kataman de7iya ubbaa qara bisuwan woridi, katamaa taman xuuggidosona. <sup>28</sup> Laayisha katamai Sidoona katamaappe haakkidi de7iyo gishshaunne asai hara asaara gaitti erenna gishshau, eta ashshanau ooninne danddayibeenna. Laayisha katamai Beeti-Rahooba giyoosaa matan de7iya wombbaa gidдон de7ees.

Daana asati katamaa wotti yeggi keexxidi, yan de7idosona. <sup>29</sup> Katamaa sunttaakka beni bantta maizza aawaa, Yaaqooba na7aa Daana sunttan laammidi, Daana yaagidi sunttidosona; shin koiro he katamai Laayisha geetettes.

<sup>30</sup> Daana asati banttau he masettida misiliyaa wottidi, Muuse na7aa Gershshoomappe yelettida Yonaataana bantta qeese oottidosona. A zareti asai omooddettidi biido wodee gakkanaashin, yan qeese gididosona. <sup>31</sup> Hegaadan hanidi, Xoossaa Dunkkaanee Seelon de7ido laittatun ubban Miiki masissido misileti yan gam77idosona.

## 19

### *Issi Leewiyaanne I Laggettiyo Ashkkariyo*

<sup>1</sup> Israa7eela biittan kawoi baina wode, Efireema gezziyan, haahosan Leewa zare gidiya issi bitanee de7ees. He bitanee Yihudaa biittan Beetaliheeme katamaappe issi laggettiyo ashkkariyo ehiis. <sup>2</sup> SHin aara ooyettada, Yihudaa biittan Beetaliheeme kataman de7iya ba aawaa soo baasu; baada yan oiddu agina uttaasu. <sup>3</sup> I godai iyyo yooti maizzidi, soo zaaranau denddidi, ba ashkkaraanne naa77u hareta ekkidi biis; bin a mokka ekkada, ba aawaa soo gelissaasu. Gelissin i aawai a be7ido wode, ufaittidi mokkiis. <sup>4</sup> Na7ee aawai bitaniyaa yeddennan diggin, yan aara miiddinne uyiiddi heezzu gallassaa takkiis. <sup>5</sup> Oiddantto gallassi maallado guuran denddidi, baanau giigidosona. SHin na7ee aawai ba na7ee godaa, “Guutta katta maada, gasttidoogaappe guyyiyan baasa” yaagiis.

<sup>6</sup> Yaagin naa77u attuma asatikka uttidi, issippe miidosonanne uyidosona. Hegaappe guyyiyan na7ee aawai a, “Hayyanaa, hachchi ufaittaidda hagan aqa” yaagiis. <sup>7</sup> Leewa zaree baanau denddin, beennan aqana mala woossiis; i laggettiyo ashkkaree aawai a woossin, qassikka yan aqiis.

<sup>8</sup> Aqidi ichchashantto gallassi baanau maallado guuran denddin, na7ee aawai, “Hayyanaa, gastaidda takkada, omarssi baasa” yaagiis. Yaagin eti naa77aikka qumaa issippe miidosona.

<sup>9</sup> Min bitanee ba laggettiyo ashkkareeranne ba ashkkaraara baanau kiyin, na7ee aawai hagaadan yaagiis; “Be7ite, sa7ai qammiichchiis! Ufaiittiiddi hagan aqi aggite. Maallado guuraara denddidi, intte soo beeta” yaagiis.

<sup>10</sup> SHin i he gallassi yan aqanau koyibeenna. Hegaa gishshau, denddidi biis; biidi Yaabuusa geetettiya Yerusalaame katamaa mati gakkiiis; i laggettiyo ashkkariyaanne naa77u caanido hareti aara de7oosona. <sup>11</sup> Eti Yaabuusa matin, sa7ai keehi omariis; yaatin, ashkkarai ba godaa, “Biyogaa aggidi aibissi ha Yaabuusatu kataman aqokkonii?” yaagiis.

<sup>12</sup> Yaagin a godai ayyo zaaridi, “Hagaa Israa7eela asi bainna allaga katamaa bookko. Gib77a katamaa gakkanaashin nuuni baana” yaagiis. <sup>13</sup> Qassi zaarettidi ba ashkkaraa, “Haaya, nuuni Gib77a kataman woikko Raama kataman aqiyo soho demmana” yaagiis. <sup>14</sup> Yaatidi bantta ogiyaa oiqqidi biidosona. Biidi Biniyaama biittan de7iya Gib77a katamaa matin, awai etau wulliiis. <sup>15</sup> Eti Gib77a katamaa gelidi aqanau, yaa biidosona; biidi katamaa asai yaa7aa uttiyo sohuwan uttidosa; shin yaappe eta ba soo efidi aissiya asi beettibeenna.

<sup>16</sup> Eti hegan uttidaashin, gaden oottiyoosaappe sa7ai omarsin, ba soo simmiya issi cima bitanee eta mataara kanttiis. Ha bitanee kase Efireema gezziyaappe yiida asa; shin ha77i i de7iyoi Gib77a giyo katamaana; he biittan Biniyaama zariyaappe yelettida asati de7oosona. <sup>17</sup> He cima bitanee katamaa asai yaa7aa uttiyo sohuwan uttida bitaniyaa be7idi, “Auppe yaadii? Au bai?” yaagidi oichchiis.

<sup>18</sup> Oichchin Leewa zaree zaariiddi, “Nuuni Yihudaa biittan de7iya Beetaliheeme katamaappe yiida. Ha77i Efireema gezziyaappe hefintta baggan de7iya nu soo boos; qassi GODAA keettinne boos. Yaanidaageeti nuna ba soo efidi aissiya asa demmi-bookko. <sup>19</sup> Nu haretussi utulainne dalai de7ees; taassi, ta laggettiyo ashkkareessinne ta ashkkaraassi gidia oittainne woiniyaa eessai de7ees; nuussi koshshiyaabaa ubbaa oiqqida” yaagiis.

<sup>20</sup> Yaagin cima bitanee, “Saroi intteyyo gido; intte koyiyoobaa ubbaa taani intteyyo immana; ai gidikkonne, ha katamaa asai yaa7aa uttiyo sohuwan aqanau koshshenna” yaagiis. <sup>21</sup> Yaagidi eta ba soo efis; eta haretuyyookka miyoobaa yeggiis. Hegaappe guyyiyan, imattati bantta tohuwaa meecettidi, kahuwaa miidosona.

<sup>22</sup> Eti ufaittishin, katamaappe shufuro asati yiidi, keettaa yuushuwan dooddidi, penggiyaa qoxettaa doommidosona; eti he keettaa godaa, he cima bitaniyaa, “He ne soo gelida bitaniyaa haa kessa; nuuni aara zin77anau koyoos!” yaagidosona.

<sup>23</sup> Yaagin keettaa godai kare kiyidi eta, “Hai ta ishenttoo, heгаа mala palabaa oottop-pite; ha bitanee ta imatta. <sup>24</sup> Be7ite, ta geela7o na7iyaanne i laggettiyo ashkkariyaa hagan de7oosona. Taani eta intteyyo kare kessana; yaatobare eta intte koyidobaa oottite; shin ha bitaniyaa bolli heгаа mala hanttaarabaa oottop-pite” yaagiis.

<sup>25</sup> SHin asati i giidoogaa siyennan ixidosa. Yaatin, Leewa zaree ba laggettiyo ashkkariyo kare kessidi, etayyo immiis; immin sa7ai wonttana gakkanaashin, qamma ubbaa kayan kayan iira wolqqan zin77idi, o paxa kaa7iiddi aqidosona; yaatidi sa7ai wonttana hanishin, o yeddidosona. <sup>26</sup> Laggettiyo ashkkariyaa wonttanau bazzoizoz77iyo wode yaada, i godai aqido cima bitaniyaa keettaa penggen kunddaasu; xalqqee dolana gakkanaassi hegan zin77aasu.

<sup>27</sup> He gallassi maallado i godai denddidi, ba ogiyaa baanau keettaa penggiyaa dooyidi kiyido wode, i laggettiyo ashkkariyaa keettaa penggen ba kushiyaa pengge gocillaa bolli miccada, zin77idaaro be7iis. <sup>28</sup> Be7idi o, “Ane dendda; denddada hindda!” yaagiis; shin a ayyo ainne zaarabeikku. Hegaappe guyyiyan, i ahaa hariyan caanidi, ba soo biis. <sup>29</sup> Biidi gakkidi, mashshaa ekkidi, ba laggettiyo ashkkaree ahaa tammanne naa77u kessidi qanxxerettiis. Qanxxerettidi issi issi shaahuwaa issi zariyaassi, muleera tammanne naa77u Israa7eela zaretuyyo kiittiis.

<sup>30</sup> Hegaa be7ida ubbai, “Israa7eela asai Gibxxe biittaappe kiyooosappe hachchi gakkanaashin, hagaa milatiyaabi mulekka hanibeenna; nuunikka be7iibookko. Ane hagaa issippe akeeki zorettidi, issibaa oottoos” yaagidosona.

## 20

### *Israa7eela Asai Olau Giigettiis*

<sup>1</sup> Daanappe Berssaabeha giyo katamaa gakkanaashiininne Gala7aadeppa Israa7eela asai ubbai issi asadan Mixiphpha giyo kataman GODAA sinttan issippe shiiqiis. <sup>2</sup> He shiiqida Xoossaa asaara Israa7eela zaretu ubbaa halaqatikka de7oosona. Eta gidдон bisuwan olettanau danddayiya oiddu xeetu sha7u olanchchati de7oosona. <sup>3</sup> He wode Israa7eela asai Mixiphpha kataman shiiqidoogaa Biniyaama asati siyidosona.

Israa7eela asai, “Ha iitabai ane waanidi hanidaakko, nuuyyo yootite” yaagiis.

<sup>4</sup> Yaagin haiqqida laggettiyo ashkkaree godai, Leewa zaree etau hagaadan yaagidi zaariis; “Taaninne ta laggettiyo ashkkariyaa qammaa aqanau Biniyaama biittan de7iya Gib77a giyo katamaa yiida. <sup>5</sup> Yiidaashin Gib77a katamaa asati tana woranau yiidi, qamman keettaa yuuyi aadhhdidi eqqidosa; shin guyyeppe ta laggettiyo ashkkariyo ekkidi, wolqqan iira eti zin77ishin, a haiqqaasu. <sup>6</sup> Haiqqin taani i ahaa ekkada qanxxerettidoogaappe guyyiyan, eti ha tunabaanne pokkoba Israa7eelan oottido gishshau, Israa7eela asai laattido biitta ubbaa issi issi qanxxuwaa kiittaa. <sup>7</sup> Be7ite, intte ubbai Israa7eela asa; zorettidi intte pirdda immite” yaagiis.

<sup>8</sup> Yaagin asai ubbai issippe denddidi eqqidi, “Nu giddoppe ooninne ba dunkkaaniyaa woikko ba keettaa guyye beenna. <sup>9</sup> Nuuni Gib77a oottanaagee hagai; saamaa yeggidi, Gib77a katamaa asaa olanau baana asata doorana. <sup>10</sup> Israa7eela zare ubban olaa olettanau biya olanchchatuppe xeetaappe tammati, sha7aappe xeetati, tammu sha7aappe qassi sha7ati shinqqiyyaa asaassi giigissona. Giigissin attida olanchchati Biniyaama biittan de7iya Gib77a katamaa biidi, Gib77a asai Israa7eela bolli hagai mala tunabaa oottidoogaa haluwaa, Gib77a kataman de7iya asata qaxxayana” yaagidosona. <sup>11</sup> Yaagin Israa7eela asai ubbai katamaa olanau issippe shiiqiis.

<sup>12</sup> Israa7eela zareti Biniyaama zaretu ubbaassi hagaadan yaagidi asa kiittidosona; “Intte gidдон hanida ha iitabai aibee? <sup>13</sup> Nuuni eta woridi, Israa7eelappe ha iitaa xaissana mala, Gib77a kataman de7iya he shufuro asata kessidi, nuuyyo aattidi immite” yaagidosona.

SHin Biniyaama asati Israa7eela asai yootiyooogaa siyennan ixxidosa. <sup>14</sup> Eti Israa7eela asaara olettanau bantta katamatuppe kiyidi, issippe Gib77a katamaa shiiqidosa. <sup>15</sup> He gallassikka Biniyaama katamatuppe yiida bisuwan olettiya laatamanne usuppun sha7u olanchchata shiishshidosona. Hegee qoodai Gib77a kataman de7iya asaa giddoppe dumma doorettida asata gujjennaana. Gib77appe doorettidaageeti laappun xeeta. <sup>16</sup> He ubbatu giddoppe laappun xeetu asati haddirssa kushiyan oliyaageeta; ha ubbatikka yambbarshshan shuchchaa olidi, harai atto issi binnaan akka halokkona. <sup>17</sup> Biniyaama asai binnan, Israa7eela asai bisuwan olettiya oiddu xeetu sha7u olanchchata shiishshiis; he ubbatikka olau giigidaageeta.

### *Biniyaama Zaretu Bollan Denddida Olau*

<sup>18</sup> Israa7eela asai denddidi, Beetele biis; biidi, “Biniyaama asaa olanau nuuppe sinttatidi kiyanau koshshiyai oonee?” yaagidi Xoossaa oichchiis.

Oichchin GODAI, “Yihudaa zaree sinttatidi bo” yaagiis.

<sup>19</sup> Yaagin wonttetta gallassi maallado guuran Israa7eela asai denddidi, Gib77a katamaa matan galchchiis. <sup>20</sup> Hegaappe Israa7eela asai Biniyaama asaara olettanau biis; biidi Gib77a katamaa matan etaara olettanau salppiis. <sup>21</sup> Salppin Biniyaama asati Gib77a katamaappe kiyidi, he gallassi Israa7eelappe laatamanne naa77u sha7u olanchchata woridosona. <sup>22-23</sup> Israa7eela asai biidi sa7ai qammaa gakkanaassi, GODAA sinttan yeekkiis; yeekkidi, “Nu ishātuura, Biniyaama asatuura olettanau naa77anttuwaa pude bonii?” yaagidi GODAA oichchiis.



Oichchin GODAI, “Ee, etaara olettanau pude biite” yaagiis. Yaagin Israa7eela asai issoi issuwaa minttettidi, koiro gallassi eti olau salppido sohuwan naa77anttuwaakka salppidosona.

<sup>24</sup> Naa77antto gallassi Israa7eela asai Biniyaama asaara olettanau shiiqiis. <sup>25</sup> Naa77antto gallassikka Biniyaama asai Gib77a katamaappe kiyidi, Israa7eela asaappe tammanne hospun sha7u asata woriis; worido ubbatikka bisuwan olettiyaageeta.

<sup>26</sup> Hegaappe guyyiyan, Israa7eelati ubbai Beetele biidi yeekkidosona; yan xoomiiddi sa7ai qammaana gakkanaassi, GODAA sinttan uttidosona; GODAA sinttan xuuggiyo yarshshuwaanne issippetetta yarshshuwaa shiishshidosona. <sup>27-28</sup> He wode Xoossaa Maachchaa Taabootai Beetele kataman de7ees; he Taabootaa naagiyaagee Aarooni yelido El77aazara na7aa Piinihaasa. Israa7eela asai GODAA, “Biniyaama asa gidiya nu ishanttuura olettanau qassikka pude boniiyye boopponii?” yaagidi oichchiis.

Oichchin GODAI, “Biidi olettite! Taani eta wontto intte kushiyan aattada immana” yaagiis.

<sup>29</sup> Yaagin Israa7eela asai amarida olanchchata Gib77a katamaa yuushuwan zuggidi naagana mala oottiis. <sup>30</sup> Heezantto gallassi Israa7eela olanchchati kaseegaadankka Biniyaama olanchchata olanau biidi, Gib77a katamaappe sintta baggaara salppidosona. <sup>31</sup> Biniyaama asati etaara olettanau katamaappe kiyidi, eta kaallidi, haakkidi biidosona. Kaseegaadankka Beeteleenne Gib77a efiya aaho ogetuuninne dembbatun Israa7eela asaappe hasttamu gidiya asata woridosona. <sup>32</sup> Biniyaama asati, “Nuuni kaseegaadankka eta xoonida!” yaagidosona.

SHin Israa7eela asati kase, “Eti katamaappe haakkidi, ogetukko kiyana mala, ane nuuni baqatoos” yaagi wottidosona. <sup>33</sup> Yaatin, Israa7eela asai ubbai bantta sohuwaappe denddidi, Ba7aali-Taamaara giyoosan salppiyo wode, Israa7eelati bantta zuggi uttido Gebaa7a Dembbaappe kiyidosona; <sup>34</sup> Israa7eela ubbaappe doorettida tammu sha7u asati Gib77a bolli olaa denttidosona; olai keehippe wolqqaamiis. He ubbai haniyo wode, banttau bashshai matattidoogaa Biniyaama asati ainne eribookkona. <sup>35</sup> Israa7eelati Biniyaama asatu bolli xoonuwaa demmanaadan GODAI oottiis. He gallassi Israa7eela asai Biniyaama asaappe laatamanne ichchashu sha7anne issi xeetu olanchchata woriis; worido ubbatikka bisuwan olettiyaageeta. <sup>36</sup> Hega gishshau, Israa7eela asai banttana xoonidoogaa Biniyaama asai eriis.

Israa7eela asai Gib77a katamaa yuushuwan zuggi uttida olanchchatun ammanettido gishshau, Biniyaama asan xonettidabaa milatidi guyye shiiqiis. <sup>37</sup> Zuggidi naagiya olanchchati Gib77a katamaa eesuwan woxxi gelidi, katamaa gidдон demmido ubbaa woridosona. <sup>38</sup> Zuggidi naagiya Israa7eela olanchchati katamaa gidдoppe daro cuwaa shaaradan pude denttana malanne hegee malaataa gidana mala, kase haasayi wottidosona. Hega gishshau, daro cuwaa shaarai katamaappe kiyiyoogaa be7ido wode, <sup>39</sup> ola dembban de7iya Israa7eela asati baqatiyoosaappe guyye simmidi, eta olidosona.

Biniyaama asati Israa7eela asaappe hasttamu gidiya asata woridi, “Kaseegaadan ha77ikka nuuni eta xoonida” yaagidosona. <sup>40</sup> SHin malaataa cuwai katamaappe pude kessaa doommiis; doommin Biniyaama asati bantta guyye xeellido wode, katamai muleera taman xuugettin, tamaa cuwai pude kiyiyaagaa be7idosona. <sup>41</sup> Hegaappe guyyiyan, Israa7eelati Biniyaama asatu bolli guyye simmidosona; guyye simmin, Biniyaama asati dagammidosona; aissi giikko, eti wurana haniyoogaa eridosona. <sup>42</sup> Hega gishshau, eti Israa7eela asaa sinttaappe bazzo simmidi baqatidosona; shin olai eta kaallidi gakkiiis. Katamatuppe kiyida Israa7eela olanchchati gidduwan eta wori wurssidosona. <sup>43</sup> Israa7eelati Biniyaama asata dooddidi, Gib77a katamaappe arshsho baggaara de7iya sohuwaa gakkanaashin kaallidi yedettidosona; yedettiiddi



daroti ogiyan de7ishin woridosona. <sup>44</sup> Hegan Biniyaama asaappe tammanne hosp-pun sha7u mino olanchchati haiqqidosona; <sup>45</sup> etappe attidaageeti guyye simmidi, bazzuwaa kanttidi, Rimmoona giyo zaallaakko baqatidosona; Israa7eelati etappe ichchashu sha7u asata ogetun woridosona; etappe attidaageeta Giidi7ooma giyo so-huwaa gakkanaashin yedettiiddi, naa77u sha7aa woridosona. <sup>46</sup> He gallassi Biniyaama biittaappe bisuwan olettiya laatamanne ichchashu sha7u asati haiqqidosona; he ub-batika mino olanchchata.

<sup>47</sup> SHin usuppun xeetu asati bazzuwaa kanttidi, Rimmoona Zaallau baqatidi, yan oiddu aginaa takkidosa. <sup>48</sup> Israa7eela asai attida Biniyaama asaakko guyye simmidi, attumaasaanne maccaasaa, naatanne mehiyaa ubbaa woriis; demmido katamata ub-baa taman xuuggiis.

## 21

### *Biniyaama Zaretussi Maccaasa Immanau Koshshiis*

<sup>1</sup> Israa7eela asai Mixiphpha giyoosan shiiqido wode, “Nu giddoppe ooninne Biniyaama asaassi ba na7iyo machcho immenna” yaagidi caaqqi wottiis. <sup>2</sup> Israa7eelati Beetele katamaa biidi, yan sa7ai qamma gakkanaassi Xoossaa sinttan uttidi, bantta qaalaa xoqqu oottidi, misho yeehuwaa yeekkidosa. <sup>3</sup> Yeekkiiddi, “Abeet GODAU, Israa7eela Xoossau, ha yohoi aibissi Israa7eelan hanidee? Hachchi Israa7eela asaa giddoppe issi zaree aibissi paccii?” yaagidosona.

<sup>4</sup> Wonttetta gallassi maallado guuraara eti denddidi, yarshshiyooosaa yan giigissidosona; giigissidi xuuggiyo yarshshotanne issippetettaa yarshshota shiishshidosona. <sup>5</sup> Yaatidi Israa7eelati, “Israa7eela zare ubbaappe GODAA sinttan shiiqiyoosaa yibeenna zaree oonee?” yaagidi oichchidosona. Eti hega oichchido gaasotai, Mixiphpha kataman GODAA sinttan shiiqanau yibeenna asi ooninne, “I muleera haiqqo” yaagidi kase caaqqido gishshaassa.

<sup>6</sup> Israa7eela asati bantta ishanntuyyo, Biniyaama zaretuyyo qarettidi, “Hachchi Israa7eelappe issi zaree xayiiis. <sup>7</sup> Nuuni nu macca naata etassi immennaadan GODAN caaqqido gishshau, haiquwaappe attida Biniyaama zareti macca asa ekkana mala, nuuni ai oottanee?” yaagidosona.

<sup>8</sup> Qassikka eti, “Israa7eela zaretuppe Mixiphpha kataman GODAA sintti yibeennai oonee?” yaagidi oichchidosona. Oichchidi, Gala7aaden de7iya Yaabeesha giyo kamaappe issi asinne shiiquwaa yibeennaagaa eridosona. <sup>9</sup> Eti asaa qoodido wode, Gala7aaden de7iya Yaabeeshappe issi asinne beettibeenna.

<sup>10</sup> Hega gishshau, maabarai tammanne naa77u sha7u mino olanchchata Gala7aaden de7iya Yaabeesha katamaa kiittidosona; kiittiiddi, “Biite; biidi Yaabeeshan de7iyaageeta ubbaa bisuwan busakkite; maccaasaakka guutta naatakka ashshoppite. <sup>11</sup> Hagaadan oottite; attuma asa ubbaanne attumaasaara zin77ida macca asaa ubbaa worite” yaagidi azazidosona. <sup>12</sup> Yaabeesha kataman de7iya asaa giddoppe attumaasaara zin77ibeenna, oiddu xeetu geela7o macca naata demmidosa; demmidi Kanaane biittan, Seelon de7iya dunkkaanidosaa ekkidi ehiidosona.

<sup>13</sup> Hegaappe guyyiyan, kumetta maabarai Rimmoona Zaallaa giyoosan de7iya Biniyaama asatukko sigaa kiittidosona. <sup>14</sup> Kiittin Biniyaama asati simmidi yiidosona. Yin Israa7eela asai Yaabeesha kamaappe worennan ehiido geela7o naata etassi immiis. SHin geela7o naati attuma asaa ubbaa gakkibookkona.

<sup>15</sup> Israa7eela zaretu gidдон de7iya issippetetta duuxxanaadan GODAI oottido gishshau, asai Biniyaama asaassi keehippe qarettiis. <sup>16</sup> Qarettidi maabaraa cimati, “Biniyaama zaretuppe maccaasi haiqqi wurido gishshau, haiquwaappe attida attuma asaayyo nuuni maccaasa waati immanee? <sup>17</sup> Israa7eela asaa giddoppe qucetti xayenna mala, Biniyaama zaretuppe attidaageetussi laattiya naati de7anau koshshees.

<sup>18</sup> Gidikkonne, nuuni nu macca naatuppe etau immanau danddayokko; aissi giikko, Israa7eela asai kase, ‘Ba na7iyo Biniyaama zariyaassi immiya urai qanggettidaagaa gido’ yaagidi caaqetti wottiis” yaagidosona.

<sup>19</sup> Hegaappe guyyiyan, maabaraa kaalettiya cimati, “Be7ite, laittan laittan Seelon GODAA bonchchiyo baalai matiis” yaagidosona. Seeloi Beeteleppe huuphessa baggaara, Laboonappe tohossa baggaara, Beeteleppe Sekeema efiya ogiyaappe arshsho baggaara de7ees. <sup>20</sup> He maabaraa kaalettiya cimati Biniyaama asata hagaadan yaagidi azazidosona; “Biite; biidi woiniyaa turaa gidдон zuggidi, <sup>21</sup> naagite. Seelo katamaa macca naati baalaa gallassi karaabiyaa oiqqidi, yexxiiddinne duriiddi yiyo wode, intte woiniyaa turaa gidдoppe kiyite. Kiyidi ubbaikka Seelo macca naatuppe intteyyo dafidi, Biniyaama biitti ekkidi biite. <sup>22</sup> Eta aawati woikko eta ishantti nuukko magannanau yiyo wode, nuuni eta, ‘Hai hayyanintta, eta nuussi immiigite; aissi giikko, nuuni eta huuphiyan huuphiyan gakkiya maccaasa olaa sohuwaappe demmibookko. Intte dosidi immibeenna gishshau, mooranchcha gidekketa’ yaagana” yaagidosona.

<sup>23</sup> Yaagin Biniyaama asatikka Israa7eela cimati giidoogaadan oottidosona; ubbaikka Seelon yexxiya macca naatuppe bantta qoodaa keenata dafidi efiidosona. Eti bantta laata biitti simmidi, katamata wotti yeggi keexxidi, yan de7idosona. <sup>24</sup> He wode Israa7eela asai yaappe laalettidi, ubbaikka ba zariyaakko zariyaakkonne ba so asaakko asaakko biis.

<sup>25</sup> He wode Israa7eela biittan kawoi baawa; asi ubbi baayyo likke milatidabaa coo oottees.

## Sameela Maxaafaa Koiruwa

### *Gidduwaa Erissuwaa*

Sameela Maxaafan koiro shaahoi Israa7eela asai daannatu haaruwaappe kawoti haariyo kawotettau pinnido hanotaa odees. Ha laamee Israa7eela asaa ubbaa de7uwaa gidдон oosettanau danddayidoogee heezzu asatu gaasuwaana. Hegeetuppe koiroi wurssettan de7ida gita gita daannatuppe issuwaa gididiya Sameela gidishin, naa77anttoi Israa7eelassi koiro kawo gididiya Saa7oola. Heezzanttoi qassi maataa oiqqanaappe kase a taarikee Sameelanne Saa7oola taarikiyaara oiqetti uttido Daawita.

Ha maxaafaassi waanna kiitai Gal77a Maachchaa gidдон de7iya hara taarike maxaafatuugaadankka, Xoossaassi ammanettiyoogee anjuwaunne injje de7uwau kaalettiyoogaanne azazettennan ixxiyoogee kunddettaanne bashshaa ehiyoogaa bessees. Hegeenne Xoossai qeesiyaa Eelassi odiiddi, “Tana bonchchiyaageeta taani bonchchana; tana kariyaageeta taani kaushshana” giidi haasayido qaalaa qoncciyaa odees. (2:30)

Ha maxaafai kawoi haariyo kawotettaa essiyo maaran asaassi siyettiya hanotaa qonccissees. Kase peeshshan Israa7eela asaassi tumu kawo gididi erettidaagee ba huuphen Xoossaa. SHin guyyeppe takkiiddi asai oishaa denttin, Xoossai etayyo kawuwaa dooriis. SHin ha ubbankka waannabai kawuwaa gidin, Israa7eela asaa gidinkka, Xoossai etappe bollanne pirddiyaagaanne gidin, a garssan eti de7anaagaa (2:7-10). Hegeekka Xoossaa higgiiyaappe garssaara dure gidin, manqqo gidinkka, asaa ubbaa maatai bonchchettin de7anau koshshiyooгаа bessees.

### *Elqqaananne A So Asaa*

<sup>1</sup> Efireema gezziyan, Raama giyo kataman de7iya, Efireema zarenne Xufa yara gididiya, Elqqaana giyo issi bitanee de7ees; i Yirohaama na7aa; Yirohaami Eeliha na7aa; Eeliha Toohu na7aa; Toohu Xufa na7aa. <sup>2</sup> Elqqaanassi naa77u maccaasati de7oosona; issinne sunttai Haanno; hinkkoree sunttai Piniino. Piniinissi naati de7oosona; shin Haannissi issi na7ikka baawa.

<sup>3</sup> Ubbaappe Wolqqaama GODAASSI goinnanaunne yarshshanau Elqqaani laittan laittan ba katamaappe Seelo bees. Eela naati naa77ai, Hofiniinne Piinihaasi yan GODAA qeeseta. <sup>4</sup> Elqqaani yarshshuwaa yarshshiyoo wode audenne ashuwaappe issi kituwaa ba keettaayee Piniinissi, qassi issi issi kituwaa i attuma naatussinne macca naatussi huuphiyan huuphiyan immees. <sup>5</sup> GODAI Haanno yeluwaa diggikkokka, Elqqaani o siiqiyo gishshau, iyyo naa77u kituwaa immees. <sup>6</sup> GODAI Haanniyoo muleera yeluwaa diggido gishshau, i dawuttiyaa o hanqqetissausunne yiilloyausu. <sup>7</sup> Hagee laittaappe laittan haniyaabaa; Haanna GODAA keetti biido wode audenne i dawuttiyaa o yeekkana gakkanaassinne qumaa meettaa ixkana gakkanaassi yiilloyausu. <sup>8</sup> I keettaawai Elqqaani o, “Haannee, neeni aissi yeekkai? Aissi qumaa miikkii? Ne wozanai aissi azzanii? Taani neeyyo tammu naatuppe aadhdhikkinaayye?” yaagees.

### *Haanni Woosaa*

<sup>9</sup> Issi gallassi eti Seelon miidoogaappenne uyidoogaappe guyyiyan, Haanna dendda eqqaasu. Dendda eqqiyo wode, GODAA keettaa penggiyaa matan de7iya oidiiyan qeesiyaa Eeli uttiis. <sup>10</sup> Haanna keehi mishettada, camo yeehuwaa yeekkada GODAA woossaasu. <sup>11</sup> A hagaadan yaagada shiiquwaa shiiqettaasu; “Ubbaappe Wolqqaama GODAA, tana ne ashkkariyo xeella! Ta mishuwaa be7ada, tana hassaya; tana ne ashkkariyo dogoppa. Neeni taayyo ne ashkkareeyyo attuma na7a immikko, a de7o laitta ubban taani a neeyyo immana; a huuphee mulekka meedettenna” yaagaasu.

<sup>12</sup> Haanna GODAA woosaa adussido wode, Eeli i doonaa xeellees. <sup>13</sup> Haanna ba wozanaa gidдон Xoossaa woossiyo wode, i menttershshai qaaxxiyoogaappe attin, i

qaalai siyettenna; heгаа gishshau, Eeli o mattottidabaadan qoppiis. <sup>14</sup>Qoppidi o, “Neeni aude gakkanaashin mattottuutee? Woine eessaa ne achchappe digga” yaagiis.

<sup>15</sup>Yaagin Haanna hagaadan yaagada ayyo zaaraasu; “CHii, ta godau, taani keehi metootanchcha maccaasa; taani ta shemppuwaappe GODAA woossaisippe attin, woine eessaa woikko mattoyiya ushshaa uyabeikke. <sup>16</sup>Taani ta tuggaanne ta mishuwaa daruwaa hagan haasayido gishshau, tana ne ashkkariyo ‘Pattenna maccaasa’ gaada qoppoppa” yaagaasu.

<sup>17</sup>Yaagin Eeli iyyo zaaridi, “Sarotettan ba; neeni a woossidobaa Israa7eela Xoossai neeyyo immo” yaagiis.

<sup>18</sup>Yaagin Haanna, “Ne ashkkariyaa ne sinttan nashuwaa demmu” yaagaasu. Hegaappe guyyiyan, a ba ogiyaa baada, qumaa maasu; hegaappe simmin mulekka azzanabeikku.

### *Haanna Sameela Yelaasu*

<sup>19</sup>Wonttetta gallassi guuraara denddidi, Elqqaaninne a so asai GODAAYYO goinidoogaappe guyyiyan, bantta soo, Raama katamaa simmidosona. Elqqaani ba maccaasee Haanniira aqiis; GODAI o qoppiis; <sup>20</sup>qoppin a abbe ixettada wodee wurin attuma na7aa yelaasu. Haanna, “Taani GODAA woossin siyiis” gaada a sunntaa Sameela<sup>1</sup> sunntaasu.

<sup>21</sup>Elqqaani ba so asaa ubbaara laittaa yarshshuwaa GODAU yarshshanaunne shiquwaa gattanau Seelo biis; <sup>22</sup>shin Haanna babeikku. A ba keettaawaa, “Ta na7ai xanttaa duuxxidoogaappe guyyiyan, taani a efaada, GODAAYYO immana; merinau i yan de7ana” yaagaasu.

<sup>23</sup>I keettaawai Elqqaani, “Nena lo77abaa ootta; a neeni xanttaa duuttana gakkanaassi son takkashsha; yaaninkka GODAI ba qaalaa polo bain” yaagiis. Yaagin Haanna xanttaa duuttana gakkanaassi ba na7aa xanttaidda son takkaasu.

<sup>24</sup>Haanna i na7ai xanttaa duuxxidoogaappe guyyiyan, Sameelanne heezzu laitta korimaa, tammu kilo giraame xiilliyaanne ogoro kumetta woine eessaa ekkada GODAA keettaa Seelo baasu; na7ai he wode guutta. <sup>25</sup>Eti mirgguwaa shukkidoogaappe guyyiyan, na7aa Eelakko efiidosona. <sup>26</sup>Haanna Eela, “Ta godau, ne de7oi ero! Ne sinttan eqqada GODAA woossida maccaasiyaa tumu tanattennee. <sup>27</sup>Taani ha na7aa yelanau woossin, GODAI taani a woossidobaa immiis. <sup>28</sup>Hegaa gishshau, taani GODAAYYO a immaas; i ba de7o laitta ubban GODAAYYO imettiis” yaagaasu. Hegaappe guyyiyan, eti GODAAYYO yan goinnidosona.

## 2

### *Haanni Woosaa*

<sup>1</sup>Haanna hagaadan yaagada woossaasu;

“Ta wozanai GODAN ufaittees;

GODAN ta wolqqai dariis.

Ta morkketu bollan taani ceeqettada haasayais;

GODAI tana ashshido gishshau, taani ufaittais.

<sup>2</sup>GODAA mala geeshshi issoinne baawa;

a mali issoinne baawa.

Nu Xoossaappe attin,

hara attiyo wogga Zaalli baawa.

<sup>3</sup>“Otoro haasayaa aggite;

otoro qaalai intte doonaappe kiyoppo.

Aissi giikko, GODAI eriya Xoossaa;

<sup>1</sup> 1:20 Sameela: Ha sunntaa birshshettai “Xoossai siyettiis” giyoogaa.

asa ooso i yiggi xeellees.

<sup>4</sup>“Olanchchatu wonddafee meqqiis;  
shin xubettidaageeti wolqqaa gixxidosa.

<sup>5</sup>Kalli uttidaageeti namisettidi,  
qumau keraa oottoosona;  
shin namisetti uttidaageeti ha77i kallidosona.  
Mainiyaa laappun naata yelaasu;  
shin cora naata yelidaara daafuraasu.

<sup>6</sup>“GODAI woreesinne pattees;  
qassi i duge Si7ooliyan yeggeesinne pude kessees.

<sup>7</sup>GODAI manqqettesinne dureyees;  
qassi i ziqqisseesinne xoqqissees.

<sup>8</sup>I hiyyeesata buhiyaappe denttees.  
Metootanchchatakka bidinttaa pituwaappe denttees;  
denttidi eta halaqatuura utissees;  
eta bonchcho araataa laatissees.

“Aissi giikko, biittaa baasoti GODAASSA;  
i eta bollan sa7aa essiis.

<sup>9</sup>I Xoossaa asatu gediya naagees;  
shin iitata i xuman co77u oottana.

Asi ba wolqqan xoonenna;

<sup>10</sup>GODAARA eqettiyaageeti liiqana.

GODAI saluwaappe eta bolli dadadan guummana;  
GODAI sa7an de7iyaageeta ubbaa pirddana.

I ba kawuwaayyo wolqqaa immana;  
i ba tiyidoogaayyo xoonuwaa immana”

yaagada woossaasu.

<sup>11</sup>Hegaappe guyyiyan, Elqqaani Raaman de7iya ba soo biis; shin na7ai Sameeli qeesiyaa Eelappe garssaara GODAAYYO oottees.

### *Eela Attuma Naata Iitata*

<sup>12</sup>Eela attuma naati iita asata; eti GODAA erokkona, <sup>13</sup>woikko yarshshuwaa immiya asaayyo qeeseti oottiyo wogaa naagokkona. Hegeenne, asi yarshshuwaa yarshshiyo wode, qeesiyaa ashkkarai heezzu achcha birata sirinttaa ekkees; ekkidi ashoi biron porshshishin, <sup>14</sup>doissiyo wogga otuwan woikko keriyen he sirinttaa yeddidi, sirinttai oiqqi kessiyo ai qommo asho gidikkonne efidi, qeesiyaayyo immees. Yarshsho yarshshanau Seelo yiya Israa7eela asaa ubbaa eti hagaadan oottoosona. <sup>15</sup>Qassi modhdhuwaa yarshshiyoosan xuugganaappe kasetidi, qeesiyaa ashkkarai yarshshuwaa yarshshiya bitaniyaakko biidi, “Qeesee qayye ashoppe attin, doisa asho neeppe ekkenna gishshau, ayyo xiixxanau amarida ashuwaa hamma” yaagees.

<sup>16</sup>Yaagin bitanee zaaridi, “Wogaadan qeeseti modhdhuwaa koiro xuuggona; hegaappe guyyiyan, neeni koyiyoogaa ekka” yaagees; yaagikko qeesiyaa ashkkarai, “CHii; taayyo ha77i imma; shin neeni diggikko, taani neeppe wolqqan ekkana” yaagees.

<sup>17</sup>GODAU immiyo yarshshuwaa Eela naati karido gishshau, eta nagarai GODAA sinttan keehi dariis.

### *Na7aa Sameela*

<sup>18</sup>SHin Sameeli na7atettan de7iiddi, liinuwaa giyo kiriyaappe dadettida eefuude giyo maayuwaa maayidi, GODAAYYO oottees. <sup>19</sup>Sameela aayiyaa laittan laittan gutta qoliyaa giigissada, laittaa yarshshuwaa yarshshanau ba keettaawaara baidda



Sameelayyo ekkada bausu. <sup>20</sup> Bin Eeli Elqqaananne a keettaayyiyo, “Ne keettaayyiya GODAAYYO immido na7aa gishshaa GODAI neeyyo ha maccaasen hara naata immo” yaagidi anjjees; yaatin, eti bantta soo simmoosona. <sup>21</sup> GODAI Haanno anjjin, sha-haarada heezzu attuma naatanne naa77u macca naata yelaasu. Na7ai Sameeli GODAA sinttan dicciis.

### *Eelanne A Naata*

<sup>22</sup> Eeli keehippe ceeggiis. A naati Israa7eela asaa ubbaa bolli oottido ub-babaanne qassi Xoossaa Dunkkaaniyaa penggiyan GODAAYYO oottiya maccaasatuura zin77idoogaa siyiis. <sup>23</sup> Siyidi eta, “Intte haggaa malabaa aissi ootteetii? Intte iita oosuwa taani asa ubbaappe siyais. <sup>24</sup> Ta naatoo, haggaa aggite; GODAA asai inttena giyoobaa taani siyidoogee lo77obaa gidenna. <sup>25</sup> Issi asi asa naaqqikko, Xoossai au gaannatana; shin asi GODAA naaqqikko, oonee ayyo gaannatanai?” yaagiis.

GODAI, “Taani eta worana” giido gishshau, eti bantta aawaa seeraa siyennan ixxi-dosona.

<sup>26</sup> Na7ai Sameeli GODAA sinttaaninne asaa sinttan dicciisinne sabettiis.

### *Eela So Asaa Bolli Odettida Hiraagaa*

<sup>27</sup> Issi gallassi Xoossaa asi Eelakko yiidi a, “GODAI hagaadan yaagees; ‘Ne maizza aawai Aarooninne a so asai Gibxxen kawuwaa ailletettan de7iyo wode, taani etayyo qonccaas. <sup>28</sup> Qonccada Aarooni ta yarshshiyosaa pude kiyana mala, ixaanaa cuwayana malanne ta sinttan eefuudiyaa maayana mala, taayyo qeese oottada Israa7eela zaretu ubbaappe a dooraas. Qassi Israa7eela asai taman yarshshiyoo yarshsho ubbaa taani ne aawaa zariyaayyo immaas. <sup>29</sup> Taani ta de7iyoosaa shiishshana mala azazido ta yarshshuwaanne immiyoobaa intte aissi yedhdhi kaa7eetii? Ta asai Israa7eeli, taayyo shiishshido yarshsho ubbaappe murutiyaagaa intteyyo miidi orddiy-oogan, neeni ne naata taappe aattada aissi bonchchadii?’ yaagees.

<sup>30</sup> “Hegaa gishshau, Israa7eela Xoossai hagaadan yaagees; ‘“Ne zareenne ne aawaa zaree merinau taayyo oottana” gaas; shin ha77i, hegee taappe haakko! Tana bonchchiyaageeta taani bonchchana; tana kariyaageeta taani kaushshana. <sup>31</sup> Ne zariyan asi ceeggenna mala, taani ne wolqqaanne ne aawaa zariyaa wolqqa xaissiyo gallassati yaana. <sup>32</sup> Neeni metootana; taani Israa7eela asaayyo immiyo anjuwaa be7ada neeni qanaatana; shin ne zariyan ceeggana asi ooninne baawa. <sup>33</sup> Taani ta yarshshiyosaappe xaissenna asi de7ikko, a gaasuwan ne aifee afuxxiiddi qooqananne ne wozanaikka mishuwaa xuugettana; ne daro zersetta ubbai yelagattetan de7iiddi haiqqana.

<sup>34</sup> “‘Ne naati naa77ai Hofiniininne Piinihaasi issi gallassi haiqqana; hegee neeyyo malaata gidana. <sup>35</sup> Taani taayyo ammanettiya qeesiyaa, ta wozanaadaaninne ta qofaadan oottiyaagaa denttana; taani a zaretu de7i be7anaadan oottana; taani doorido kawuwaa sinttan eti ubba wode oottana. <sup>36</sup> Ne zariyan attida ubbai guutta miishsha woikko baso oitta woossanau yiidi, a sinttan gufannidi, “Taani oitta maana mala, qeesetuppe issuwaa sohuwaa malan tana wottarkkii” yaagana’ yaagees” yaagiis.

## 3

### *GODAI Sameela Xeesiis*

<sup>1</sup> Na7ai Sameeli Eelappe garssaara GODAAYYO oottees; GODAA qalalai he wode keehi al77o; ajjuutinne darena. <sup>2</sup> Aifee xeellanau leppin, waayetti xeelliya Eeli issi gallassi gammi ba sohuwan zin77iis. <sup>3</sup> He wode Xoossaa xomppee biron to77ibeenna; qassi Xoossaa Taabootai de7iyo GODAA keettan Sameeli xiskkees. <sup>4</sup> Xiskkidaashin GODAI Sameela xeesiis; xeesin Sameeli, “Yee!” giidi koyiis. <sup>5</sup> Koyidi Eelakko woxxi biidi, “Neeeni xeesin hekko yaas” yaagiis.

SHin Eeli, “Taani nena xeesabeikke; baada zin77a” yaagiis; yaagin Sameeli biidi zin77iis.

<sup>6</sup> Qassikka GODAI, “Sameelaa” yaagidi naa77anttuwaa xeesiis; xeesin Sameeli denddidi, Eelakko biidi, “Neeni xeesin hekko yaas” yaagiis.

SHin Eeli, “Ta na7au, taani nena xeesabeikke; baada zin77a” yaagiis.

<sup>7</sup> Sameeli hegee GODAA gidiyooгаа eribeenna; aissi giikko, GODAA qaalai biron ayyo qonccibeenna. <sup>8</sup> GODAI Sameela heezanttuwaa xeesiis; xeesin denddidi, Eelakko biidi, “Neeni xeesin hekko yaas” yaagiis.

Hegan GODAI na7aa xeesiyooгаа Eeli akeekiis; akeekido gishshau, <sup>9</sup> “Baada zin77a; i nena xeesiyaabaa gidikko, ‘GODAU, yoota; taani ne ashkkaarai siyais’ yaaga” yaagidi yootiis; yootin Sameeli ba sohuwaa biidi zin77iis.

<sup>10</sup> Hegaappe guyyian, GODAI yiidi hegan eqqidi kaseegaadankka, “Sameelaa, Sameelaa” yaagidi xeesiis.

Xeesin Sameeli, “Yoota; taani ne ashkkaarai siyais” yaagiis.

<sup>11</sup> GODAI Sameela, “Be7a! Siyiya asa ubbau haittau iitiya issibaa Israa7eela bolli taani oottana hanais. <sup>12</sup> Taani Eela so asaa bolli haasayido ubbabaa he gallassan koiruwaappe wurssettaa gakkanaassi Eela bolli ehaana. <sup>13</sup> Eeli erido nagaraa gishshau, taani a so asaa bolli merinau pirddanaagaa ayyo yoota wottaas; aissi giikko, a naati qanggissiyaabaa oottiyo wode, i eta seeribeenna. <sup>14</sup> Hega gishshau, ‘Eela so asaa nagarai yarshshuwaaninne imuwan mulekka atto geetettoppo’ yaagada taani a so asaassi caaqqas” yaagiis.

<sup>15</sup> Sameeli sa7ai wonttana gakkanaashin zin77iis; wonttin denddidi, GODAA keettaa penggiyaa dooyiis. Sameeli ajjuutaabaa Eelayyo yootanau yayyiis. <sup>16</sup> Eeli Sameela, “Ta na7au Sameelaa” yaagidi xeesiis.

Xeesin Sameeli, “Yee” giidi koyiis.

<sup>17</sup> Koyin Eeli hagaadan yaagidi Sameela oichchiis; “GODAI neeyyo yootidobi aibee? Taappe ainne qosoppa; neeni Xoossai neeyyo yootidobaappe issibaanne taappe qot-tikko, Xoossai hegaadan ne bolli ootto” yaagiis. <sup>18</sup> Yaagin Sameeli ainne qosennan ubbabaa Eelayyo yootiis. Eeli, “I GODAA; i bana lo77aa ootto” yaagiis.

<sup>19</sup> Sameeli dicciyo wode GODAI aara de7ees; Sameeli haasayidobaappe issi qaalinne sa7an wodhdhenna. <sup>20</sup> Israa7eela zawan Daanappe biidi Berssaabeha gakkanaassi, Sameeli GODAAYYO tumu hananabaa yootiyaagaa gidiyooгаа Israa7eela asai ubbai eriiis. <sup>21</sup> GODAI Seelon qoncces; yan ba qaalan banatettaa Sameelayyo qonccissees. Sameeli haasayido qaalai Israa7eela ubbaa gakkiiis.

## 4

### *GODAA Taabootai Omoodettiis*

<sup>1</sup> Israa7eelati Pilisxxeematuura olettanau kiyidosona; Israa7eelati Eben77eezeran shiiqin, Pilisxxeemati Afeeqan shiiqidosona. <sup>2</sup> Pilisxxeemati citan citan gididi, Israa7eelatuura olettanau denddidosona; olai suullin, oiddu sha7u Israa7eelata worida Pilisxxeematun Israa7eelati xoonettidosona. <sup>3</sup> Olanchchati galchchidosaa simmido wode, Israa7eela cimati, “Hachchi GODAI nuna Pilisxxeematun aissi xoonissidee? Nunaara baanaadaaninne nuna nu morkketu kushiyaappe ashshanaadan GODAA Maachchaa Taabootaa Seelophe ane ehoos” yaagidosona. <sup>4</sup> Hega gishshau, asai Seelo kiittin, kiruubetu gidduwan araatan uttiya Ubbaappe Wolqqaama GODAA Maachchaa Taabootaa ehiidosona. Eela naati naa77ati Hofiniininne Piinihaasi Xoossaa Maachchaa Taabootaara yan de7oosona.

<sup>5</sup> GODAA Maachchaa Taabootai galchchidosaa gakkido wode, Israa7eelati ubbai biittai qaaxxana gakkanaashin bantta qaalaa xoqqu oottidi, “GODAA Maachchaa Taabootai gakkiiis” yaagidosona.

<sup>6</sup> Israa7eelatu wocamaa Pilisxxeemati siyidi, “Hagee Ibraaweti galchchidosan siyetiya, wolqqaama wocamai aibee?” yaagidosona.

GODAA Taabootai eti galchchidosaa yiidoogaa Pilisxxeemati eridi yayyidosona. <sup>7</sup> Yayyidi hagaadan yaagidosona; “Xoossai eti galchchidosaa yiis. Aayye7ana nunoo! Hagaa malabi hagaappe kase hani erenna. <sup>8</sup> Aayye7ana nunoo! Ha wolqqaama xoossatu kushiyaappe nuna ashshanai oonee? Ha xoossati Gibxxeta bazzon bosha ubban shocidaageeta. <sup>9</sup> Inttenoo Pilisxxeemato, minnite! Asadan olettite! Hinna xayikko, intte eta kase ailletettan haaridoogaadan, etikka inttena haarana. Hegaa gishshau, asadan olettite!” yaagidosona.

<sup>10</sup> Pilisxxeemati olettidi, Israa7eelata xoonidosona; xoonin Israa7eelati bantta dunkkaaniyau baqatidosona. He olan daro asai goora7ettiis; Israa7eela olanchchatuppe hasttamu sha7ai haiqqiis. <sup>11</sup> Xoossaa Taabootai omoodettiis; Eela naati naa77ai, Hofiniininne Piinihaasi haiqqidosona.

### *Eela Haiquwaa*

<sup>12</sup> Biniyaama zare gidiya issi bitanee olaa dembbaappe woxxidi, he gallassi Seelo gakkiiis; gakkidi kayyuwaa erissanau i ba maayuwaa pooshshidi, ba huuphiyanka biittaa qoliis. <sup>13</sup> He bitanee gakkiiyo wode, Eeli ba wozanan Xoossaa Taabootaabaa hirggido gishshau, naagiiddi ogiyaa doonan de7iya ba oidiiyan uttiis. Bitanee katamaa gelidi, hanidabaa yootin, katamai ubbai waasuwa xulluusiiis.

<sup>14</sup> Eelikka he waasuwa siyidi, “Hagee aiba waasoo?” yaagiis.

Bitanee eesuwan yiidi, Eelassi yootiis; <sup>15</sup> Eeli uddufun tammanne hosppun laitta cima gidida, aifeekka xeelaa aggidi galjjido asa. <sup>16</sup> Bitanee Eelassi, “Olaa dembbaappe yiidaagee tana; taani hachchi yaappe baqataas” yaagiis.

Yaagin Eeli, “Ta na7au, yaatin waanidee?” yaagidi oichchiis.

<sup>17</sup> Oichchin oduwaa ehiida bitanee, “Israa7eelati Pilisxxeematu sinttaappe baqatidosona; daro asai wuriis; ne naati naa77ai Hofiniininne Piinihaasi haiqqidosona; Xoossaa Taabootaikka omoodettiis” yaagiis.

<sup>18</sup> Bitanee Xoossaa Taabootaabaa yootido wode, penggiyaa matan de7iya ba oidiyaappe Eeli guyye kunddiis; kunddidi garbballee meqqin haiqqiis; aissi giikko, i ceeganne ordde. Eeli Israa7eela biittan oitamu laittaa daannatiis.

<sup>19</sup> Eela na7aa Piinihaasa maccaasiyaa yelanau wodee wurido ixeta. Xoossaa Taabootai omoodettoogaanne ba bolloinne ba keettaawai haiqqidoogaa a siyido wode, goppennan maaretai o oiqqin yelaasu. <sup>20</sup> A haiquwau matattido wode, yelissiyaageeti, “Neeni attuma na7aa yelido gishshau yayyoppa” yaagidosona; shin etayyo a ainne zaarabeikku; eti giyoobaakka ezggabeikku. <sup>21</sup> A ba na7aa Ikaabooda<sup>2</sup> sunttaasu; Xoossaa Taabootai omoodettido gishshaunne ba bolloinne ba keettaawai haiqqido gishshau, “Bonchchoi Israa7eelatuppe shaahettiis” yaagaasu. <sup>22</sup> A, “Bonchchoi Israa7eelatuppe shaahettiis; aissi giikko, Xoossaa Taabootai omoodettiis” yaagaasu.

## 5

### *GODAA Taabootai Pilisxxeema Katamatun De7iis*

<sup>1</sup> Pilisxxeemati Xoossaa Taabootaa omoodidoogaappe guyyiyan, Eben77eezerappe Ashddooda efidosona. <sup>2</sup> Xoossaa Taabootaa efiidi, Daagoona giyo eeqaa keettaa gelissidi, Daagoona matan essidosona. <sup>3</sup> Ashddooda asai wonttetta gallassi guuridi dendidido wode, GODAA Taabootaa sinttan Daagooni ba som77uwan biittan gufannidaagaa be7idosona! Daagoona denttidi, kase sohuwan essidosona. <sup>4</sup> Qassikka wonttetta gallassi guuraara dendididi yiidi, eti GODAA Taabootaa sinttan Daagooni ba som77uwan biittan gufannidaagaa be7idosona! He wode Daagoona guuggeenne a

<sup>2</sup> 4:21 Ikaabooda: Ha sunttaa birshshettai “Bonchchoi baawa” giyoogaa.

naa77u kushee meqerettidi, pengge gophphiyan de7ees; hinkko asatettai aagee dumma attii. <sup>5</sup> Hegaa gishshau, Daagoona qeesetinne Ashddoodan de7iya Daagoona keettaa geliya asati ubbai Daagoona pengge gophphiyaa hachchi gakkanaashinkka yedhdhi erokkona.

<sup>6</sup> Ashddooda katamaa bollinne hegaa heeran de7iya asaa bolli GODAA kushee wolqqaamiis; GODAI eta bollan boshaa yeddidi, kixa harggiyan eta qaxxayiiis.

<sup>7</sup> Ashddooda katamaa asai hanidabaa be7ido wode, “Israa7eela Xoossaa kushee nu bollinne nu xoossaa Daagoona bolli wolqqaamido gishshau, Israa7eela Xoossaa Taabootai nu matan gam77oppo” yaagidosona. <sup>8</sup> Yaagidi Pilisxxeema halaqata ubbaa banttakko xeesi shiishshidi, “Israa7eela Xoossaa Taabootaa waatonii?” yaagidi oichchidosona.

Oichchin halaqati, “Israa7eela Xoossaa Taabootai Gaate giyo katamaa bo” yaagidi zaaridosona. Yaatin, Israa7eela Xoossaa Taabootaa Gaate efiidosona.

<sup>9</sup> SHin Taabootai Gaate gakkidoogaappe guyyiyan, GODAA kushee he katamaa bolli wolqqaamidi, keehi gita daganttuwaa daganttiis; yaatidi kataman de7iya asaa naatuppe cimaa gakkanaassi kixa harggiyan shociis. <sup>10</sup> Hegaa gishshau, Xoossaa Taabootaa Eqiroona katamaa yeddidosona.

Xoossaa Taabootai Eqiroona geliyo wode, Eqiroona asati hagaadan yaagidi waassidosona; “Nunanne nu asaa woranau Israa7eela Xoossaa Taabootaa nuukko ehiidosona” yaagidosona. <sup>11</sup> Hegaa gishshau, Pilisxxeema halaqata xeesi shiishshidi, “Israa7eela Xoossaa Taabootaa hagaappe diggite; i guyye ba sohuwaa simmo; hegee xayikko, nunanne nu asaa worana” yaagidosona. Aissi giikko, katamaa ubban haiquwaa dagamai de7ees; GODAA kusheekka katamaa bolli wolqqaamiis. <sup>12</sup> Haiquwaappe palahida asati kixaa harggidosona; he katamaa waasoinne saluwaa gakkiiis.

## 6

### *GODAA Taabootai Israa7eela Simmiis*

<sup>1</sup> GODAA Taabootai Pilisxxeema biittan laappun aginaa uttiis. <sup>2</sup> He wode Pilisxxeema asati qeesetanne shareechchota xeesidi, “GODAA Taabootaa nuuni waatonii? Nuuni guyye a sohuwaa a waati yeddanaakko, nuuyyo yootite” yaagidosona.

<sup>3</sup> Yaagin eti, “Israa7eela Xoossaa Taabootaa guyye yeddiyaabaa gidikko, mela yeddoppite; ai hanidinne intte mooruwaa yarshshuwaa ayyo yeddite; yaatikko, intte paxana; a kushee intte bollappe aibissi kichchibeennaakkokka intte erana” yaagidi zaaridosona.

<sup>4</sup> Yaagin Pilisxxeema asati, “Nuuni ayyo yeddanaa bessiya mooruwaa yarshshoi aibee?” yaagidi oichchidosona.

Oichchin eti, “Inttenanne intte halaqata gakkida boshai issuwaa gidiyo gishshau, Pilisxxeema halaqatu qoodaadan ichchashu worqqa kixatanne ichchashu worqqa ecereta yeddite. <sup>5</sup> Intte he kixaanne intte biittaa bashshiya he eceretu misileta medhdhidi, Israa7eela Xoossaayyo bonchchuwaa immite; ooni erii intte bollappe, intte xoossatu bollappenne intte biittaa bollappe ba kushiyaa i denttana. <sup>6</sup> Gibxxe asatinne eta kawoi zoriyaa ekkennan ixidoogaadan, intte aissi zoriyaa ekkennan ixheetii? GODAI eta iissidi qaxxayin, eti Israa7eelata bantta ogiyaa baana mala yeddibookkonaayye?

<sup>7</sup> “Ha77i issi ooratta gaariyaa giigissite; qambari eta morggen wodhdhi erenna, xanttiya naa77u miizzata he gaariyan waaxite; shin marata etappe duuttidi soo efiite.

<sup>8</sup> GODAA Taabootaa ekkidi, gaariyaa bollan wottite; mooruwaa yarshshuwaaayyo shiishshido worqqa miishshaa saaxiniyaa giddon yeggidi, saaxiniyaa GODAA Taabootaa matan wottidi, i baana mala yeddite. <sup>9</sup> SHin i biyoosaa xeellite; i ba zawaa oiqqidi, Beeti-SHemeshi simmidi biyaabaa gidikko, ha gita boshaa nu bolli ehiidaagee GODAA; beennabaa gidikko, hagee nu bolli coo gakkiiisippe attin, nuna dechchidai GODAA kushe gidennaagaa nuuni erana” yaagidi zaaridosona.



<sup>10</sup> Eti hegaadan oottidosona; eti xanttiya naa77u miizzata ekkidi, gaariyan waaxidosona; miizzatu maratakka son gorddidosona. <sup>11</sup> Eti GODAA Taabootaanne qassi worqqa eceretanne kixa milatissi medhdhido misileta yeggido saaxiniyaa gaariyan wottidosona. <sup>12</sup> Hegaappe guyyiyan, miizzati Beeti-SHemeshe efiya ogiyaa oiqqi sitti giidi, “Himbbaa!” gi waassiiddi biidosona; eti ogiyaara biiddi, ushachchi woikko haddirssi simmibookkona; Pilisxxeema halaqati miizzatu geeduwaa kaallidi, Beeti-SHemesha zawaa gakkanaassi biidosona.

<sup>13</sup> Beeti-SHemesha asati he wode wombban gisttiyaa cakkoosona; eti pude xoqqu gi xeellidi, Taabootaa be7idosona; be7idi ufaittidosona. <sup>14</sup> Gaaree Beeti-SHemeshiyaa Yaasu gade gakkidi, issi gita zaallaa matan eqqiis; eti gaariyaa mittaa qeridi, xuuggiyo yarshshodan he miizzata GODAASSI yarshshidosona. <sup>15</sup> Leewati GODAA Taabootaanne worqqa miishshaara de7iya saaxiniyaa gaariyaappe denttidi, gita zaallaa bolli wottidosona. He gallassi Beeti-SHemesha asati xuuggiyo yarshshuwaa GODAAYYO yarshshidosona; qassi hara yarshshotakka yarshshidosona. <sup>16</sup> Pilisxxeema halaqati ichchashati hanidabaa ubbaa be7idi, he gallassikka Eqiroona simmidosona.

<sup>17</sup> Pilisxxeema asati mooruwaa yarshshuwaa GODAAYYO kiittido worqqa kixati Ashddooda, Gaaza, Asqqaloona, Gaatanne Eqiroona geetettiya eta ichchashu katamatu sunttan issuwaa issuwaa kiittidoogeeta. <sup>18</sup> Worqqa eceretu qoodai Pilisxxeema halaqatu ichchashatuyyo de7iya gimbbettida katamatunne gimbbettibeenna moottatu ubbaa keena. Eti GODAA Taabootaa wottido gita zaallai, Beeti-SHemeshiyaa Yaasu gaden de7iyaagee hachchi gakkanaashinkka hegau markka gididi de7ees.

<sup>19</sup> SHin GODAI Beeti-SHemesha asaappe amaridaageeta shociis; etappe laappun tammaa woriis; aissi giikko, eti GODAA Taabootaa giddo xeellidosona. GODAI eta asaa suppu oottido gishshau, asai yeekkiis. <sup>20</sup> Hegaa gishshau, Beeti-SHemesha asai, “GODAA sinttan, ha geeshsha Xoossaa sinttan ooni eqqanau danddayii? Taabootainne nuuppe pude ookko baanee?” yaagiis. <sup>21</sup> Yaagidi Qiriyaaati-Yi7aariiman de7iya asatukko kiitaa yeddidi, “Pilisxxeema asati GODAA Taabootaa zaaridosona; duge yiidi, a pude inttekkko ekki biite” yaagidosona.

## 7

<sup>1</sup> Qiriyaaati-Yi7aariima asati yiidi, GODAA Taabootaa efiidosona; efiidi keraa huuphiyan de7iya Abinadaaba so ehiidosona. GODAA Taabootaa naaganaadan, Abinaadaaba na7aa El77aazaara dummayidi sunttidosona.

### *Sameeli Israa7eela Asaa Bolli Daannatiis*

<sup>2</sup> Taabootai Qiriyaaati-Yi7aariiman daro wodiyaa gam77iis; hegeenne, laatamu laittaa heera gidiaagaa. Israa7eela asai ubbai azzanidi, GODAASSI waassiis.

<sup>3</sup> Sameeli Israa7eela asaayyo ubbaayyo, “Kumetta wozanaappe intte GODAAKKO simmikko, allaga xoossatanne Asttaarooto giyo xoossiyo intte giddoppe diggite; intte huuphiyaa GODAAYYO sheedhdhite; a xalaalaayyo kiitettite; yaatikko, i inttena Pilisxxeematu kushiyaappe ashshana” yaagidi haasayiis. <sup>4</sup> Hegaa gishshau, Israa7eela asati Ba7aalanne Asttaarooto bantta giddoppe diggidi, GODAA xalaalaayyo goinidosona.

<sup>5</sup> Hegaappe guyyiyan, Sameeli Israa7eelata, “Ubbaikka Mixiphpha shiiqite; taani intteyyo yan GODAA gaannatana” yaagiis. <sup>6</sup> Yaagin eti Mixiphpha shiiqidosa. SHiiqidi haattaa duuqqidi, GODAA sinttan tigidosona; he gallassi eti xoomidosona; xoomiiddi he sohuwan, “Nuuni GODAA bolli nagaraa oottida” yaagidi paaxidosona. Mixiphphan Sameeli Israa7eela asaa bolli daannatiis.

<sup>7</sup> Israa7eelati Mixiphphan shiiqidoogaa Pilisxxeema asati siyido wode, eta halaqati Israa7eelata olanau pude kiyidosona. Israa7eelati hegaa siyidi, Pilisxxeematuyyo yayyidosona. <sup>8</sup> Israa7eelati Sameela, “I Pilisxxeema asatu kushiyaappe nuna ashshana



mala, neeni nuuyyo GODAAKKO, nu Xoossaakko, waassiyoojaa aggoppa” yaagidosona. <sup>9</sup> Sameeli issi xammiya dorssa maraa ekkidi, ashuwaa wurssi xuuggiyo yarshshodan GODAAYYO yarshshii; yarshshidi Israa7eelatu gishshaa GODAAYYO waassii; waassin GODAI ayyo siiyiis.

<sup>10</sup> Sameeli xuuggiyo yarshshuwaa yarshshiyo wode, Pilisxxeemati Israa7eelatuura olettanau shiiqidosa. SHin he gallassi Pilisxxeematu bolli GODAI gita dadaa gunttidi daganttin, eti Israa7eelatu sinttappe baqatidosona. <sup>11</sup> Israa7eelati Mixiphphappe woxxi kiyidi, Pilisxxeemata yedettidi, Beetikaarappe garssaa gakkanaassi ogiyan woridosona.

<sup>12</sup> Hegaappe guyyiyan, Sameeli issi shuchchaa ekkidi, Mixiphphappenne SHenappe gidduwan essiis; essidi, “GODAI ha77i gakkanaassi nuna maaddiis” yaagiiddi he sohuwaa Eben77eezera<sup>3</sup> sunttiis. <sup>13</sup> Pilisxxeema asatika xoonettidosona; eti Israa7eela biittaa bolli naa77anttuwaa woraajjibookkona. Sameeli de7ido laitta ubban GODAA kushee Pilisxxeema asatu bolli wolqqaamiis. <sup>14</sup> Pilisxxeema asati Eqiroonappe Gaate gakkanaassi Israa7eelatuppe omooddido katamati Israa7eelatussi simmidosona; Israa7eelatika bantta kase zawaa Pilisxxeema asatu kushiyaappe wotti ekkidosona. Qassi Israa7eela asainne Amooore asai saro de7iis.

<sup>15</sup> Sameeli ba de7o laitta ubban Israa7eela bollan daannatiis. <sup>16</sup> Sameeli laittan laittan Beetele, Gelggalanne Mixiphpha yuuyees; i yuuyiyo sohotu ubban Israa7eela bollan daannatees. <sup>17</sup> A keetta Raaman de7iyo gishshau, yaa simmees; simmidi he sohuwanka Israa7eela bollan daannatees. I he sohuwan GODAAYYO yarshshiyoosaa keexxiis.

## 8

### *Israa7eela Asai Kawo Koyiis*

<sup>1</sup> Sameeli cimido wode, ba naata Israa7eela bolli daanna oottidi sunttiis. <sup>2</sup> A baira na7aa sunntai Yuu7eela; kaalo na7aa sunntai Abiyya; he naati Berssaabehan daanna-toosona. <sup>3</sup> A naati a ogiyaa hemettibookkona. Eti bessenna go77aa demmanaayyo wora simmidosona; mattaayiyaa ekkidi, xillo pirdaa mirqqidosona.

<sup>4</sup> Hegaa gishshau, Israa7eela cimati ubbai issippe shiiqidi, Sameelakko Raama kata-maa yiidi, <sup>5</sup> “Hekko neeni cimadasa; ne naati ne ogiyaa hemettokkona; hara kawotetta ubbaadan nuna aissanau kawuwaa ha77i nuuyyo sunnta” yaagidosona.

<sup>6</sup> Eti, “Nuna aissanau kawuwaa nuuyyo imma” giido yohoi Sameela ufaissibeenna. Hegaa gishshau, Sameeli GODAA woossiis. <sup>7</sup> Woossin GODAI Sameela, “Asai nena giyo qaalaa ubbaa siya; aissi giikko, taani eta bolli kawotennaadan, eti tana ixxidosaappe attin, nena ixxibookkona. <sup>8</sup> Eta taani Gibxxeppe kessido gallasaappe doommidi, hachchi gakkanaassi tana aggidi, hara xoossatuyyo goinniiddi de7idosona; simmi ha77i eti ta bolli oottidoogaa ubbaa ne bollika oottoosona. <sup>9</sup> Ha77ikka eta qaalaa siya; shin eta minttada seera; eta bollan kawotana kawuwaa wogaa eta erissa” yaagiis.

<sup>10</sup> Kawuwaa oichchida deriyaayyo GODAI odido qaalaa ubbaa Sameeli yootiis. <sup>11</sup> I etayyo hagaadan yaagiis; “Intte bolli kawotana kawoi inttena oottanabai ha-gaa: intte attuma naata ekkidi, gaariyaasatanne paraasata kessana; eti a gaariyaa sinttan woxxana. <sup>12</sup> Etappe attaa shaalaqatanne hamssaalaqata, haraata a biittaa goyyaageetanne a kattaa cakkiyaageeta, qassi haraata a ola miishshaanne a para gaaretu miishshaa oottiyaageeta kessana. <sup>13</sup> Intte macca naatakka efidi, baayyo shit-tuwaa giigissiyaageeta, kattiyaageetanne uukkiyaageeta kessana. <sup>14</sup> Intte goshshaappe, woiniyaa turaa sohuwaappenne wogaraa sohuwaappe ubbaappe lo77iyaagaa ekkidi, ba oosanchchatuyyo immana. <sup>15</sup> Kattaappenne woiniyaappe tammaappe issi kushiya

<sup>3</sup> 7:12 Eben77eezera: Ha sunntaa birshshetta “Maaddiya shuchchaa” giyoogaa.

i ekkidi, ba sunttatuyyoonne ba oosanchchatuyyo immana. <sup>16</sup> Intte attuma ashkkarat-appenne macca ashkkaratappe, qassi intte miizzaappenne hariyaappe lo77iyaageeta ekkidi, ba oosuwaa ootissana. <sup>17</sup> Intte dorssaappenne deeshshaappe tammaappe issi kushiya i ekkana; intteka a ashkkarata gidana. <sup>18</sup> He gallassi intte intteyyo doorido kawuwaappe waassana; shin he gallassi GODAI intte waasuwa siyenna” yaagiis.

<sup>19</sup> Yaaginkka asai Sameela qaala siyennan ixidi, “CHii! CHii! Nuussi kawoi de7o. <sup>20</sup> Yaanikko, nuunikka hara kawotettatu ubbaa mala gidana. Nu kawoi nuna aissana; nu sintti aadhdhidi, i nu gishshatau olettana” yaagidosona.

<sup>21</sup> Sameeli asaa qaala ubbaa siyiis; siyidi GODAAYO yootiis. <sup>22</sup> Yootin GODAI Sameela, “Eta qaala siya; eta bolli kawuwa kawoya” yaagiis.

Sameeli Israa7eela asaa, “Asai ubbai ba katamaa katamaa simmo” yaagiis.

## 9

### *Saa7oolanne Sameela*

<sup>1</sup> Biniyaama zariyaappe Qiisa giyo issi bitanee de7ees; i Abii7eela na7aa; Abii7eeli Xarooraa na7aa; Xaroori Bakoraata na7aa; Bakoraati Biniyaama zariyaa Afiha na7aa; he bitanee wolqqaama asa. <sup>2</sup> Ayyo Saa7oola giyo issi wodalla lo77o na7ai de7ees; Israa7eelatu gidдон appe aadhdhi lo77iya asi baawa; i hasheppe qommo baggan asa ubbaappe aduqqees.

<sup>3</sup> Issi gallassi Saa7oola aawaa Qiisa haretu bayidosona; bayin Qiisi ba na7aa Saa7oola, “Ashkkaratuppe issuwaa ekkada, dendda; denddada haretu koyanau ba” yaagiis.

<sup>4</sup> Eti Efireema gezziyaaranne SHaliisha biittaara koyiiddi kanttidosona; shin haretu demmibookkona. Qassi SHaa7iliima biittaara kanttidosona; shin hegaanikka haretu de7okkona. Biniyaama biittaarakka kanttidosona; shin yaanikka demmibookkona.

<sup>5</sup> Eti Xufa biittaa gakkido wode, Saa7ooli banaara de7iya ashkkaaraa, “Haaya; ane guyye simmoos; hinna xayikko, ta aawai haretubaa qoppiyoogaa aggidi, nuuyyo hirggana” yaagiis.

<sup>6</sup> SHin ashkkarai, “Be7a! Xoossaa asa issoi ha kataman de7ees. I bonchchettida asa; i odiyo ubbabai tumattees. Ane ha77i nuuni yaa boos; ooni erii nuuni baana ogiyaa i nuuyyo yootanaakkonne” yaagiis.

<sup>7</sup> Saa7ooli ba ashkkaaraa, “Nuuni biyaabaa gidikko, ayyo ai immanee? Korjuwaappe qumai wuriis; nuuni Xoossaa asaayyo immiyoobi baawa. Nuuyyo aibi de7ii?” yaagiis.

<sup>8</sup> Yaagin ashkkarai Saa7oolayyo, “Be7a; ta kushiyan issi xaqara biraayyo uruubee de7ees; nuuni baana ogiyaa Xoossaa asi nuuyyo yootanaadan ha biraa ayyo immana” yaagidi zaariis.

<sup>9</sup> (Beni wode Israa7eela biittan issi asi Xoossaa oichchanau biiddi, “Haayite; ane xeelliyagaakko boos” yaagees. Aissi giikko, ha wodiyan hananabaa yootiyaagee beni wodiyan xeelliyagaaga geettees.) <sup>10</sup> Saa7ooli ba ashkkaaraa, “Lo77o; hindda” yaagin, Xoossaa asi de7iyo katamaa biidosona. <sup>11</sup> Katamaa pudettaa eti kiyishin, haattaa tikkanau yiya geela7otuura ogiyan gaittidosona; gaittidi he geela7ota, “Xeelliyagee hagan de7ii?” yaagidi oichchidosona.

<sup>12</sup> Oichchin eti, “Ee de7ees; heгаа be7ite; i intteppe sinttan de7ees; eesuwan akko biite. Asai hachchi goinniyo xoqqa sohuwan yarshshiyo gishshau, i nu katamaa yiis.

<sup>13</sup> Katamaa intte gelidosaara, i maanau goinniyo xoqqa sohuwaa kiyennan de7ishin demmana. I gakkennan de7ishin, asai meettaa doommenna; aissi giikko, yarshshuwaa i anjjanau koshshees. I anjjidoogaappe guyyiyan, shoobettidaageeti maana. Pude biite; intte a ha77i demmana” yaagidosona. <sup>14</sup> Yaagin eti katamaa biidosona; eti katamaa geliyo wode, Sameeli goinniyo xoqqa sohuwaa pude biiddi, etaara gaittanau yiyaagaa be7idosona.

<sup>15</sup> Saa7ooli yaanaappe kase gallassi, Sameelayyo GODAI hagaadan yaagidi qonccissi wottiis; <sup>16</sup> “Wontto hannode Biniyaama biittaappe issi bitaniyaa taani neekko yeddana; i ta asaa Israa7eela kaalettana mala a tiya; ta asaa Pilisxxeema asatu kushiyaappe i ashshana; aissi giikko, ta asaa waasoi taakko gakkinn, taani eta xeellaas” yaagiis.

<sup>17</sup> Sameeli Saa7oola be7ido wode, GODAI Sameela, “Be7a! Taani neeyyo yootido bitanee haggaa; i ta asaa haarana” yaagiis.

<sup>18</sup> Saa7ooli penggiyaa matan de7iya Sameelakko shiiqidi, “Xeelliaagaa keettaa awaanakko hai taayyo yootarkkii?” yaagiis.

<sup>19</sup> Yaagin Sameeli Saa7oolayyo, “Xeelliaagee tana. Hachchi intte tanaara miyo gishshau, taappe sinttatidi, pude goinniyo xoqqa sohuwaa biite. Taani nena wontto guuraara yeddana; ne wozanan de7iya ubbabaa taani yootana. <sup>20</sup> Heezzu gallassaappe kase bayida ne haretubaa gidikko, eti beettido gishshau, hirggoppa. Israa7eela asai ubbai amottiyoi oonee? Nenanne ne aawaa so asaa gidennee?” yaagiis.

<sup>21</sup> Saa7ooli zaaridi, “SHin taani Israa7eela zare ubbaappe laafiya Biniyaama zare gidikkinaa? Ta so asaikka Biniyaama zariyaa gidдон guuxxiyaagaa gidennee? Neeni aissi taayyo haggaa malabaa haasayai?” yaagiis.

<sup>22</sup> Hegaappe guyyiyan, Sameeli Saa7oolanne a ashkkaraa efidi, aaho wuigiya gelissii; gelissidi he sohuwan shoobettida hastamu gidiya asaappe qommo baggaara araatan utissii. <sup>23</sup> Sameeli qumaa kattiyaagaa, “ ‘Ne matan wottashsha’ gaada taani neeyyo immido ashuwaa hamma” yaagiis.

<sup>24</sup> Yaagin kattiyaagee gedaanne a bollan de7iyaagaa ekki ehiidi, Saa7oola sinttan wottiis. Sameeli Saa7oola, “Neeyyo ashshidoogee haggaa; ekkada ma. Aissi giikko, taani imattata shoobboosappe doommada, haggaa neeyyo ashshaas” yaagiis. He gallassi Saa7ooli Sameelara miis. <sup>25</sup> Eti goinniyo xoqqa sohuwaappe duge katamaa wodhdhin, Sameeli Saa7oolayyo keettaa bollan dembbayidi oottidosan hiixaa hiixxin zin77iis.

### *Sameeli Saa7oola Tiyidi Kawoyiis*

<sup>26</sup> Eti guuraara denddidosona; sa7ai wonttin, Sameeli Saa7oola he keettaa bollaappe xeesidi, “Giiga; taani nena moissana” yaagiis. Saa7ooli giigin, inne Sameelinne naa77ai issippe ogiyaa kiyidosona. <sup>27</sup> Eti katamaa gaxaa wodhdhishin, Sameeli Saa7oola, “Ashkkarai nuuppe sinttau aadhdhana mala yoota” yaagiis; yaagin ashkkarai sinttau aadhdhiis. Aadhdhin Sameeli Saa7oola, “Taani neeyyo Xoossai giidobaa odana mala, haggaa guutaa takkashsha” yaagiis.

## 10

<sup>1</sup> He wode Sameeli tigiyoobaara zaitiyaa ekkidi, Saa7oola huuphiyan tigiis; tigidi Saa7oola yeridi, hagaadan yaagiis; “Ba asaa Israa7eela haarana mala GODAI nena tiyiis gidennee? Neeni a asaa kaalettada, eta yuushuwan de7iya morkketu kushiyaappe eta ashshana. A asaa neeni haarana mala, GODAI nena tiyidoogau malaatai haggaa. <sup>2</sup> Neeni hachchi taappe shaahettiyo wode, Raaheeli duufuwaa matan, Biniyaama zawan de7iya Xelxxaaha giyo sohuwan naa77u asatuura gaittana; gaittin eti nena, ‘Neeni koshshaa biido haretu beettidosona; ha77i ne aawai haretu qoppiyoogaa aggidi, “Ta na7ai xayiis; shin waanooshsha?” yaagiiddi nebaa hirggees’ yaagidi yootana.

<sup>3</sup> “Neeni he sohuwaappe denddada, Taaboora giyo gita mittaa gakkanaashin baana; neeni biishin, Xoossaakko Beetele biya heezzu asati nenaara gaittana. Etappe issoi heezzu deeshsha marata tookkiis; naa77anttoi heezzu oittaa tookkiis; heezzanttoi ogoro kumida woine eessaa tookkiis. <sup>4</sup> Eti nena sarotana; neeyyo naa77u oittaa eti immana; neeni eta kushiyaappe he oittaa ekkana.

<sup>5</sup> “Hegaappe guyyiyan, neeni Pilisxxeema olanchchatu citai de7iyo Xoossaa Gib77aa giyo katamaa baana. Neeni he katamaa gakkiiyo wode, diittaara karaabiyaara, pu-laaliyaaranne maazinqqiyaara kaa7iiddinne hananabaa yootiiddi, goinniyo xoqqa

sohuwaappe duge wodhdhiya hananabaa yootiyaageetu citaara gaittana; <sup>6</sup> GODAA Ayyaanai ne bolli wolqqappe wodhdhana; wodhdhin neenikka etaara hananabaa yootana; neeni laamettada hara asa kiyana. <sup>7</sup> Ha malaatati polettiyo wode, ne kushiyan gaittidabaa aibanne ootta; aissi giikko, Xoossai nenaara de7ees.

<sup>8</sup> “Neeni taappe sinttatada Gelggala aadhdha. Taanikka tumuppe xuuggiyo yarshshuwaanne sarotettaa yarshshuwaa yarshshanau neekko duge baana. Taani neekko baada neeni oottanabaa odana gakkanaashin, laappun gallassaa gam77aasa” yaagiis.

<sup>9</sup> Saa7ooli Sameelappe shaahettishin, Xoossai Saa7oola wozanaa laammiis; qassi he malaatati ubbai he gallassan hanidosona. <sup>10</sup> Saa7oolinne ashkkaarai Gib77aa gakkinn, hananabaa yootiyaageetu citai aara gaittiis; Xoossaa Ayyaanai a bolli wolqqappe wodhdhiis; wodhdhin eta gidдон hananabaa yootiis. <sup>11</sup> Saa7oola kase eriyaageeti ubbai hananabaa yootiyaageetuura hananabaa yootiyoogaa be7idi, issoi issuwaa, “Qiisa na7ai waaniichhidee? Qassi Saa7oolikka hananabaa yootiyaageetu zateeyye?” yaagidosona. <sup>12</sup> He sohuwan de7iya issi bitanee etayyo, “Eta aawai oonee?” yaagidi zaariis. Hegaa gishshau, “Saa7oolikka hananabaa yootiyaageetu zateeyye?” giyoogee haise gididi. <sup>13</sup> Saa7ooli hananabaa yootiyoogaa wurssidoogaappe guyyiyan, goinniyo xoqqa sohuwaa biis.

<sup>14</sup> Saa7oola aawaa ishai Saa7oolanne ashkkaaraa, “Awa biidetii?” yaagiis.

Yaagin Saa7ooli, “Hareta koshshaa biida; hareti beettennan xayin, Sameelakko biida” yaagiis.

<sup>15</sup> Saa7oola aawaa ishai, “Hayyanaa Sameeli neeyyo giidobaa taayyo yootarkkii” yaagiis.

<sup>16</sup> Yaagin Saa7ooli ba aawaa ishaayyo, “Hareti beettidoogaa Sameeli nuuyyo geeshshidi yootiis” yaagiis; shin Sameeli, “Kawo gidaasa” giidi ayyo odidoogaa yootibeenna.

### *Saa7ooli Kawotidoogee Qoncciyaa Odettiis*

<sup>17</sup> Hegaappe guyyiyan, Sameeli Mixiphphan Israa7eela asaa GODAAKKO xeesi shiishshiiis. <sup>18</sup> SHiishshidi eta, “GODAI, Israa7eela Xoossai hagaadan yaagees; ‘Taani Israa7eela Gibxxeppe kessaas; Gibxxe asatu kushiyaappenne inttena naaqqiya kawotet-tatu ubbaa kushiyaappe taani ashshaas’ yaagees. <sup>19</sup> SHin hachchi intte metuwaappenne waayiyaappe ubbaappe inttena ashshiya intte Xoossaa ixxideta; ixxidi, ‘CHii! Nu bolli kawo kawoya’ yaagideta. Hegaa gishshau, ha77i intte intte zariyaaninne intte yaran gididi, GODAA sintti aadhdhite” yaagiis.

<sup>20</sup> Hegaayyo Sameeli Israa7eela zare ubbaa aattin, saamai Biniyaama zariyan wodhdhiis. <sup>21</sup> Biniyaama zariyaa yaran yaran aattin, saamai Maaxira yaran wodhdhiis; wursettan Qiisa na7ai Saa7ooli doorettiis. Eti a koyidosona; shin i beettibeenna. <sup>22</sup> Hegaa gishshau eti GODAA, “Biron ha sohuwaa yaana asi de7ii?” yaagidi oichchidosona.

Oichchin GODAI, “Ee! Saa7ooli miishshatu gidдон qosetti uttiis” yaagiis.

<sup>23</sup> Eti woxxi biidi, yaappe a kessi ehiidosona. Asaa gidдон i eqqiyo wode, hasheppe qommo baggan asa ubbaappe aduqqees. <sup>24</sup> Sameeli asa ubbaayyo, “GODAI doorido bitaniyaa be7eetii? Ha asaa gidдон a milatiyaabi ooninne tumu baawa” yaagiis.

Yaagin asai ubbai ba qaalaa xoqqu oottidi, “Kawoi shemppo gam77o” yaagiis.

<sup>25</sup> Hegaappe guyyiyan, Sameeli kawotettaa wogaa asaayyo yootiis; xaaxettiya maxaafan he wogaa xaafidi, GODAA sinttan wottiis. Yaatidi Sameeli asa ubbaa huuphiyan huuphiyan a soo a soo yeddiis.

<sup>26</sup> Saa7oolikka ba soo Gib77a biis; Xoossai eta wozanaa bochchido mino asati Saa7oolaara biidosona. <sup>27</sup> SHin issi issi pattenna asati, “Ha bitanee nuna waatidi ashshanee?” yaagidosona; eti a karidi, ayyo ainne imota immibookkona. SHin Saa7ooli co77u giis.



## 11

### *Saa7ooli Amoona Asata Xooniis*

<sup>1</sup> Issi aginaappe guyyiyan, Amoona biittaa Kawoi Naa7oosi denddidi, Gala7aaden de7iya Yaabeesha katamaa dooddidi uttiis. Uttin Yaabeesha asai ubbai a, “Neeni nunaara maachchaa wotta; nuuni neeyyo haarettana” yaagiis.

<sup>2</sup> Yaagin Naa7oosi, “Taani issibaa oottanau intte eeno giikko, inttenaara maachchaa wottana; hegeenne, taani intteyyo ubbaayyo ushachcha aifiyaa woocada kessana; yaatada Israa7eela ubbaa kaushshana” yaagiis.

<sup>3</sup> Yaabeesha cimati ubbai Naa7oosa, “Israa7eela biitta ubbau nuuni kiitaa yeddana mala, laappun gallassaa takkashsharkkii; nuna ashshiyaabi ooninne xayikko, nuuni neeyyo kushiya immana” yaagidosona.

<sup>4</sup> Kiitettidaageeti Saa7ooli de7iyoosaa Gib77aa biidi, ha yohuwaa asaayyo yootidosona; yootin asai ubbai ba qaalaa xoqqissidi yeekkiis. <sup>5</sup> He wode Saa7ooli ba boorata laaggidi goshshaappe yiyaagee, “Asai waanidee? Aibissi yeekki?” yaagidi oichchiis; oichchin Yaabeesha asai giidobaa ayyo yootidosona.

<sup>6</sup> Ha qaalaa Saa7ooli siyido wode, Xoossaa Ayyaanai a bollan wolqqan wodhdhiis; Saa7ooli hanqquwaa suulliis. <sup>7</sup> Saa7ooli waaxa boorata ekki muxerettidi, kiitettidaageetun Israa7eela biitta ubbau yeddiiddi, “Saa7oolanne Sameela kaallidi, kiyenna o booratinne hagaadan muxettana” yaagiis.

Hegaappe guyyiyan, GODAA dagamai asaa bolli wodhdhin, eti issi asadan kiyidosona. <sup>8</sup> Saa7ooli Bezeeqan eta shiishshidi qoodido wode, Israa7eela asai heezzu xeetu sha7a; Yihudaa asai hasttamu sha7a. <sup>9</sup> Eti kiitetti yiidaageeta hagaadan yaagidosona; “Biidi Yaabeesha Gala7aade asatuyyo, ‘Wontto xalqqee michchiyo wode, nuuni inttena ashshana’ yaagidi yootite” yaagidosona. Kiitettidaageeti biidi, Yaabeesha asatuyyo hegaa yootidosona; yootin eti keehi ufaittidosona.

<sup>10</sup> Yaabeesha asati Amoona asatuyyo, “Nuuni wontto intteyyo kushiya immana; intte nuna dosiyoo gaadan oottana danddayeeta” yaagidosona.

<sup>11</sup> Wonttetta gallassi Saa7ooli ba asaa heezzu citan shaakkiis; eti sa7ai wonttiyo wode, Amoona asati galchchidosaa gelidi, xalqqee michchana gakkanaassi Amoona asata goora7idosona; goora7aappe attidaageeti naa77u asi issippe de7ennaadan ubbai bau bau laalettiis.

<sup>12</sup> Hegaappe guyyiyan, Israa7eela asai Sameela, “Saa7ooli nu bolli kawotanee?” yaagida asati oonee? Eti oonakko kessite; nuuni eta worana” yaagiis.

<sup>13</sup> SHin Saa7ooli eta, “Issi asinne hachchi haiqqenna; aissi giikko, GODAI Israa7eela wotti ekkido gallassai hachcha” yaagidi zaariis.

<sup>14</sup> Hegaappe guyyiyan, Sameeli asaa, “Haayite; Gelggali boos; biidi yan Saa7ooli kawo gidiyoo ga zaarettidi erissoos” yaagiis. <sup>15</sup> Hegaa gishshau, asati ubbai Gelggali biidi, Gelggalan, GODAA sinttan Saa7ooli kawo gidiyoo ga erissidosona. Yan sarotettaa yarshshuwaa GODAA sinttan yarshshidosona; Saa7oolinne Israa7eela asai ubbai he sohuwan xoonuwaa baalaa gita ufaissan bonchchidosona.

## 12

### *Sameeli Asaayyo Biddiis*

<sup>1</sup> Hegaappe guyyiyan, Sameeli Israa7eela ubbaa hagaadan yaagiis; “Intte taayyo yootido ubbabaa taani siyada, intte bolli kawuwaa kawoyaas. <sup>2</sup> Ha77i simmi inttena kaalettanau kawoi de7ees. Tana gidikko, taani daro de7aasinne cimaas; ta naati inttenaara de7oosona. Taani ta yelagatettaasappe hachchi gakkanaashin inttena kaalettaas. <sup>3</sup> Hekko taani hagan eqqaas; GODAA sinttaaninne i tiyido kawuwaa sinttan ta bolli markkattite. Taani o boora ekkidanaa? O hare ekkidanaa? Oona cimmidanaa?



Oona huqqunnidanaa? Ta aifiyaa qooqissanau o kushiyaappe mattaaye miidanaa? Hageetuppe issuwaanne taani oottidobaa gidikko, taani qanxxana” yaagiis.

<sup>4</sup> Yaagin eti zaaridi, “Neeni nuna cimmabaakka; woikko nuna huqqunnabaakka; neeni asa kushiyaappe aibanne mattaaye mabaakka” yaagidosona.

<sup>5</sup> Sameeli eta, “Intte ta kushiyan aibanne demmibeennaagau GODAINNE i tiyido kawoinne hachchi intte bollan markka” yaagiis.

Etikka, “Ee, i markka” yaagidosona.

<sup>6</sup> Sameeli asaa, “Musanne Aaroona dooridaageenne intte aawata Gibxxeppe kessi-daagee GODAA. <sup>7</sup> Ha77i simmi intteyyoonne intte aawatuyyo GODAI oottido xillo oosuwau ubbau taani inttenaara GODAA sinttan mootettanaadan, hagan eqqite.

<sup>8</sup> Yaaqoobinne a so asai Gibxxe biidi de7ishin, Gibxxe asati eta naaqqido wode, intte aawati GODAAYYO waassidosona; waassin GODAI Musanne Aaroona kiittiis; eti intte aawata Gibxxeppe kessidi, hagan wottidosona.

<sup>9</sup> “SHin Israa7eela asati GODAA bantta Xoossaa dogidosona; dogin GODAI eta Haxoora olanchchatu gadaawaa Sisaara kushiyan, Pilisxxeema asatu kushiyaaninne Moo7aaba kawuwaa kushiyan aattidi immiis; aattidi immin eta olidosona. <sup>10</sup> Eti GODAAYYO, ‘Nuuni nagaraa oottida; nuuni GODAA aggidi, Ba7aalayyoonne Asttaarootiyyo goinnida. SHin ha77i neeni nuna nu morkketu kushiyaappe ashsha; nuuni neeyyo goinnana’ yaagidi waassidosona. <sup>11</sup> Waassin GODAI Geedoona, Baaraaqa, Yofttaahanne Sameela kiittidi, intte yuusho ubban de7iya morkketu kushiyaappe inttena ashshiis; yaatin, intte saro de7ideta.

<sup>12</sup> “Amoona asatu Kawoi Naa7oosi inttekko yiidoogaa be7ido wode, GODAI intte Xoossai intte kawo gidikkokka, intte tana, ‘CHii, nuuni nuna haaranau kawo koyoos’ yaagideta. <sup>13</sup> Ha77ikka intte dooridi oichchido kawoi hageeho! Be7ite; GODAI intte bolli kawuwaa wottiis. <sup>14</sup> GODAAYYO intte yayyikko, ayyo kiitettikko, a qaalaayyo azazettikko, a azazuwaayyo makkalennan aggikkonne inttekka intte bolli kawotiya kawoikka GODAA intte Xoossaa kaallikko, yaatikko lo77o. <sup>15</sup> SHin GODAA qaalaayyo intte azazettennan ixzikonne a azazuwaayyo makkalikko, GODAA pirddai kase intte aawatu bolli yiidoogaadan, intte bollikka yaana.

<sup>16</sup> “Simmi ha77i eqqi bayite; GODAI intte aifiyaa sinttan oottiyo ha gitabaa be7ite!

<sup>17</sup> Gisttiyaa cahaa wodee ha77a gidenneeyye? GODAI dadaanne iraa yeddana mala, taani GODAAYYO waassana. Yaaniyaabaa gidikko, kawuwaa intte oichchidoogee GODAA sinttan gita iitatetta gidiyoojaa intte erananne be7ana” yaagiis.

<sup>18</sup> Sameeli GODAAYYO waassiis; GODAI he gallassi dadaanne iraa yeddiis; heгаа gishshau, asai ubbai GODAANNE Sameela keehippe yayyiis.

<sup>19</sup> Asai ubbai Sameela, “Nuuni kawuwaa oichchidi, nu nagaraa ubbaa bolli ha iitatetta gujjido gishshau, nuuni ne ashkharati haiqqennaadan nuuyyo GODAA ne Xoossaa woossarkii” yaagiis.

<sup>20</sup> Yaagin Sameeli asaayyo hagaadan yaagiis; “Yayyoppite; tumakka intte ha iitatetta ubbaa oottideta; shin intte kumetta wozanaappe GODAAYYO kiitettiteppe attin, a kaalliyoogaa aggoppite. <sup>21</sup> Maaddenna, ashshennanne pattenna eeqata kaaloppite; aissi giikko, hegee pattennabaa. <sup>22</sup> GODAI ba gita sunntaa gishshau ba asaa aggenna; aissi giikko, i inttena ba asa oottanau ufaittees. <sup>23</sup> Intte gishshau woossiyoogaa aggada GODAA bolli nagaraa oottanaagee taappe haakko; taani inttena lo77onne suure ogiyaa tamarissana. <sup>24</sup> GODAAYYO yayyite; intte kumetta wozanaappe ammanettidi, ayyo kiitettite; intteyyo i oottido gitabaa hassayite. <sup>25</sup> SHin intte iitabaa zaari zaaridi oottikko, inttekka intte kawoikka xayana” yaagiis.

## 13

<sup>1</sup> Saa7ooli Israa7eela bolli naa77u laittaa kawotidoogaappe guyyiyan, <sup>2</sup> Israa7eelatu giddoppe heezzu asaa dooriis; naa77u sha7ai Mikimaasan, Beetele gezziyan Saa7oolaara de7ees; issi sha7ai qassi Biniyaaman de7iya Gib77an Yonaataanaara de7ees; attida asaa Saa7ooli eta soo soo yeddiis.

<sup>3</sup> Yonaataani Gebaa7an de7iya Pilisxxeema olanchchatu citaa bolli woraajjiis; Pilisxxeema asati heгаа siyidosona. Hegaappe guyyiyan Saa7ooli, “Ibraaweti hагаа siyona” giidi, biittaa ubban malkkataa punissiis. <sup>4</sup> Punissin Israa7eela asai ubbai, “Saa7ooli Pilisxxeema olanchchatu citaa bolli woraajjiis; woraajjin ha77i Israa7eela asai Pilisxxeema asaassi sheneyiyaabaa gidiiis” yaagiyo oduwaa siyiis. Siyidi asai Saa7oolakko Gelggala xeesettidi shiiqiis.

<sup>5</sup> Pilisxxeema asati Israa7eelata olanau hasttamu sha7u para gaaretuura, usup-pun sha7u paraasatuuranne abbaa doonan de7iya shafiyaa keena olanchchatuura shiiqidosa; eti pude biidi, Beeti-Aweenappe arshsho baggaara de7iya Mikimaasan galchchidosona. <sup>6</sup> Israa7eela olanchchati banttau leelidoogaanne eta citaikka keehippe un77ettidoogaa be7idi, gonggoluwaa gidдон, buuraa gidдон, zaallatu gidдон, kakaa giddooninne haattau bookko ollaa gidдон qosettidosona. <sup>7</sup> Ibraawetuppe aramidaageeti Yorddaanoosa SHaafaa pinnidi, Gaadanne Gala7aade biitti biidosona. SHin Saa7ooli Gelggalan attiis; aara de7iya olanchchati ubbai yashshau kokkoridosona.

<sup>8</sup> Saa7ooli Sameeli keerido laappun gallassaa gam77iis; shin Sameeli Gelggali yibeenna; yaatin, Saa7oola asai laalettiiyogaa doommiis. <sup>9</sup> Hega gishshau, Saa7ooli, “Xuuggiyo yarshshuwaanne issippetettaa yarshshuwaa taayyo hammite” yaagiis; ehin Saa7ooli xuuggiyo yarshshuwaa yarshshiis. <sup>10</sup> Saa7ooli xuuggiyo yarshshuwaa polosaarakka Sameeli gакki wodhdhiis. Yaatin, Saa7ooli Sameela mokkanau kare kiyiis.

<sup>11</sup> Sameeli Saa7oola, “Hagee neeni oottidoogee aibee?” yaagiis.

Yaagin Saa7ooli, “Asai laalettiiyogaa, neenikka giido wode yabeennaagaanne Pilisxxeemati Mikimaasan shiiqidoogaa taani be7ada, <sup>12</sup> ‘Pilisxxeemati tanaara olettanau ha77i Gelggala wodhdhana; taani GODAA maaduwaa oichchabeikke; heгаа gishshau, xuuggiyo yarshshuwaa taani yarshshanau koshshees’ gaada qoppaas” yaagidi zaariis.

<sup>13</sup> Sameeli Saa7oola, “Neeni eeyabaa oottadasa; GODAI ne Xoossai neeyyo immido azazuwaa naagabaakka. Naagidaakko GODAI hachchi ne kawotettaa Israa7eela bolli merinau minttanaagaashin. <sup>14</sup> Simmi ha77i ne kawotettaa gam77enna; neeni GODAA azazuwaa naagabeenna gishshau, GODAI ba wozanaadan oottiya asa koyiis; koyidi a ba asaa haaranaadan sunttiis” yaagiis.

<sup>15</sup> Hegaappe guyyiyan, Sameeli Gelggalappe denddidi, Biniyaaman de7iya Gib77aa biis. Bin Saa7ooli banaara de7iya asaa qoodiis; qoodin asai usuppun xeetu keena gidiiis.

<sup>16</sup> Saa7ooli, a na7aa Yonaataaninne etaara de7iya asai Biniyaaman de7iya Gebaa7an galchchidosona; Pilisxxeema asatika Mikimaasan galchchidosona. <sup>17</sup> Pilisxxeemati galchchidosoappe woraajjiyaageeti heezzu cuge gididi kiyidosona; etappe issi cugee SHu7aala biittan de7iya Oofirakko simmidi biis; naa77anttoi Beeti-Horooni biis; <sup>18</sup> heezzantto cugee bazzuwaa sinttayida, Xabo7iima Wombbaa duge xeelliyaa zawaa ogiyaa oiqqidi biis.

<sup>19</sup> Pilisxxeema asati, “Ibraaweti bisuwaanne tooraa qoxxoppona” giido gishshau, Israa7eela biitta ubban birata qoxxiyaabi beettibeenna. <sup>20</sup> Hega gishshau, Israa7eela ubbai bantta marashaa xeeraa, xikkiyaa, kalttaanne baacaa poshissanau Pilisxxeema asatukko boosona. <sup>21</sup> Marashaa xeeraanne shalkkiyaa poshissanau hospun giraame deexxiya biraa qanxxoosona; kalttaa, xikkiyaanne philxxuwaa poshissanau heгаа bagga qanxxoosona. <sup>22</sup> Hega gishshau, Saa7oolaaranne Yonaataanaara de7iya asaa ubbaa kushiyan olaa gallassi toorinne bisoi baawa; shin Saa7oolaanne a na7aa Yonaataanaara de7ees. <sup>23</sup> Pilisxxeematu cugee Mikimaasa pinuwaa baanau kiyiis.

## 14

### *Yonaataani Pilisxxeematu Bolli Woraajjiis*

<sup>1</sup> Issi gallassi Saa7oola na7ai Yonaataani ba ola miishshaa tookkiya wodallaa hagaadan yaagiis; “Haaya; hefintta baggan de7iya Pilisxxeemati galchchidosaa ane boos” yaagiis. SHin ba aawaayyo ha yohuwaa yootibeenna.

<sup>2</sup> He wode Saa7ooli Gib77a matan Migiroonan, roomaane giyo mittaa garssan de7ees. Aara usuppun xeetu asatinne <sup>3</sup> eefuudiyaa maayida qeese, Akiiyi de7oosona. Akiiyi Ikaabooda ishaanne Ahixuuba na7aa; Ahixuubi Seelon GODAA qeese gidida Eela na7ai Piinihaasi yelidoogaa. Yonaataani biichchidoogaa asai eribeenna.

<sup>4</sup> Yonaataani Pilisxxeemati galchchidosaa gakkanau pinnanau qoppiyo pinuwaassi naa77u baggaarakka xeera puixatiyo gita zaallati de7oosona; issuwaa sunntai Bode-exa; naa77anttuwaa sunntai Seena. <sup>5</sup> Zaallatuppe issoi pinuwaassi huuphessa baggaara Mikimaasau baazzatidi de7iyo wode, issoi qassi tohossa baggaara Gebaa7au baazzatidi de7ees.

<sup>6</sup> Yonaataani ba ola miishshaa tookkiya wodallaa hagaadan yaagiis; “Haaya; ha qaxxarettibeennaageeti galchchidosaa ane hefintti boos. Ooni erii, GODAI nu gishshaa oottanaakkonne; GODAI daro asan gidin, guutta asan gidin, ashshanaagaa a diggiyaabi aibinne baawa” yaagiis.

<sup>7</sup> Yaagin a ola miishshaa tookkiyaagee, “Neeni qoppidobaa ubbaa ootta; ba; ta kumetta wozanaappe taani nenaara de7ais” yaagiis.

<sup>8</sup> Yaagin Yonaataani, “Yaanikko haaya; hefintti asaakko pinnidi, asan be7ettana. <sup>9</sup> Eti nuna, ‘Nuuni inttekkoo baanaashin hegan naagite’ yaagikko, nuuni de7iyoosan takkanaappe attin, etakko bookko. <sup>10</sup> SHin eti, ‘Haa nuukko pude kiyite’ giikko, nuuni pude kiyana; aissi giikko, hegee GODAI eta nu kushiyan aattidi immidoogau nuuyyo malaata gidana” yaagiis.

<sup>11</sup> Yaatin, naa77aikka Pilisxxeematu qatuwau banttana bessidosona. Bessin Pilisxxeemati, “Be7ite! Ibraaweti bantta qosettido ollaappe zuummidi kiyooosona” yaagidosona. <sup>12</sup> Qatuwan de7iya asati Yonaataananne ola miishshaa tookkiyaagaa xegidi, “Haa nuukko pude kiyite; nuuni inttena bessana” yaagidosona.

Hegaa gishshau, Yonaataani ba ola miishshaa tookkiyaagaa, “Tana kaallada ha pudettaa kiya. GODAI eta Israa7eela kushiyan aattidi immirggiis” yaagiis.

<sup>13</sup> Yonaataani ba ola miishshaa tookkiyaagaa kaalettidi, tohuwaaninne kushiyan hambburuucidi pudettaa kiyiis. Pilisxxeemati Yonaataana kushiyan kunddidosona; kunddin a ola miishshaa tookkiyaagee kaalli kaallidi eta woriis. <sup>14</sup> He koiro woraajjiyan Yonaataaninne a ola miishshaa tookkiyaagee bagga booraso gaden laatamu gidia asaa woridosona. <sup>15</sup> Hegaappe guyyiyan, gaxa biittan de7iya Pilisxxeema asati dagammidosona; ambaanotinne qatuwan de7iya olanchchati yashshau kokkoridosona. Biit-taikka qaaxxiis; hegeenne, Xoossaappe kiitettida dagamaa.

### *Pilisxxeemati Xoonettidosona*

<sup>16</sup> Saa7ooli Biniyaama biittan, Gib77an wottido wochchiya asati xeellidi, Pilisxxeema olanchchati yaara haara piskki giidi laalettiiyaageeta be7idosona. <sup>17</sup> Yaatin, Saa7ooli banaara de7iya asata, “Ane olanchchata shiishshite; shiishshidi nu giddoppe ooni biidaakko be7ite” yaagiis. Yaagin eti shiishshidi qoodiyo wode, Yonaataaninne a ola miishshaa tookkiyaagee bainnaagaa be7idosona.

<sup>18</sup> Saa7ooli qeesiyaa Akiiya, “GODAA oichchanau ane eefuudiyaa haa ekkada ya” yaagiis. He wode Akiiyi Israa7eela asaa sinttan eefuudiyaa maayees. <sup>19</sup> Saa7ooli qeesiyaara haasayishin, Pilisxxeematu qatuwan wocamai dari daridi biis. Hegaa gishshau, Saa7ooli qeesiyaa, “Eefuudiyaaappe ne kushiya kessargga” yaagiis.

<sup>20</sup> Hegaappe guyyiyan, Saa7oolinne a asai ubbai shiiqidi, olaa biidosona. Biidi Pilisxxeema asati ubbai shabbirettidi, bantta bisuwan issoi issuwaa busakkiiddi

de7iyaageeta demmidosona. <sup>21</sup> Kase Pilisxxeema asatuura de7idi, etaara pude eti galchchidosaa biida Ibraawetikka eta aggidi, Saa7oolaaranne Yonaataanaara de7iya Israa7eela asan gaittidosona. <sup>22</sup> Efireema gezziyan qosetti uttida hara Israa7eelatikka Pilisxxeemati baqatiiddi de7iyoojaa siyidosona. Siyidi, etikka yedetaa uukkiya asan gaittidosona. <sup>23</sup> GODAI he gallassi Israa7eela asaa ashshiis. Beeti-Aweena katamaappe hefintti gakkanaukka olai olettiis.

### *Olaappe Simmin Hanidabata*

<sup>24</sup> He gallassi Israa7eela asati namisan labbanidosona; aissi giikko, Saa7ooli asaa, “Sa7ai qammennan de7ishiinne taani ta morkketuyyo halo kessennan de7ishin, quma miya urai qanggettidaagaa gido” yaagidi asaa caaquwan qachchiis. Hegaa gishshau, olanchchatuppe quma doonaakko shiishshida asi ooninne baawa.

<sup>25</sup> Olanchchati ubbai muleera woraa giddo geliyo wode, sa7an eessai de7ees. <sup>26</sup> Eti woraa gidдон eessai uzuuziyaagaa be7idosona; shin caaquwaa yayyido gishshau, issi asinne ba kushiya doonaakko shiishshibeenna. <sup>27</sup> SHin Yonaataani ba aawai asaa caaquwan qachchidoogaa siyibeenna. Hegaa gishshau, ba kushiyan de7iya xam77aa xeeraa ililuwan yeddi kessidi, laacciis; laaccin a aifee dooyettiis. <sup>28</sup> Hegaappe guyyiyan, olanchchatuppe issoi a, “Ne aawai olanchchata ubbaa, ‘Hachchi quma miya urai qanggettidaagaa gido’ yaagidi, caaquwan qachchi wottiis; asai ubbai labbanidoi hegaassa” yaagiis.

<sup>29</sup> Yaagin Yonaataani hagaadan yaagiis; “Ta aawai biittaassi meto medhdhiis. Taani ha eessaappe guuttaa laaccin, ta aifee ai keenaa dooyettidaakko be7a. <sup>30</sup> Asai ba morkketuppe omooddidobaappe hachchi miidabaa gidiyaakko, aiba lo77oo shin; eti worana Pilisxxeematu qoodaikka ai keenaa daranaagaa shin” yaagiis.

<sup>31</sup> He gallassi Israa7eela asati Mikimaasappe Ayyaaloona gakkanaashin, Pilisxxeemata shoci simmidi daafuridosona. <sup>32</sup> Eti omooduwaa gauhiyidi, dorssata, miizzatanne marata ekkidosona; ekkidi biittan coo shukkidi, suuttaarakka miidosona. <sup>33</sup> Hegaappe guyyiyan, issi asi Saa7oola, “Be7a; asai suuttaara de7iya ashuwaa miiddi, GODAA bolli nagaraa oottees” yaagiis.

Yaagin i eta, “Intte nagaraa oottideta; wogga shuchchaa eesuwan haa taakko gond-dorssite” yaagiis. <sup>34</sup> Zaarettidikka, “Kiyidi asaa giddo biite; biidi eta hagaadan yaagite; ‘Huuphiyan huuphiyan intte booraanne dorssaa taayyo haa ekki yiite; yaatidi hagan wogaadan shukkidi miite. Suuttaara de7iya ashuwaa miidi, GODAA bolli nagaraa oottoppote’ yaaga” yaagiis.

Hegaa gishshau, he gallassi qammi asati ubbai ba booraa booraa ehiidi, yan shukkidosona. <sup>35</sup> Saa7ooli he sohuwan GODAASSI yarshshiyosaa gimbbiis; GODAASSI yarshshiyosaa i gimbbishin, hegee ayyo koiro.

<sup>36</sup> Saa7ooli, “Ha qammaara duge Pilisxxeemata kaallidi ane boos; biidi sa7ai wont-tana gakkanaashin, etabaa ubbaa bonqqoos; etakka issuwaanne ashshennan woroos” yaagiis.

Yaagin eti, “Eeno, nena lo77idabaa ubbaa ootta” yaagidi zaaridosona.

SHin qeese, “Ane hagan Xoossaa oichchoos” yaagiis.

<sup>37</sup> Hegaa gishshau, Saa7ooli Xoossaa, “Pilisxxeema asata kaallada boo? Bin neeni eta Israa7eelatu kushiyan aattada immuutee?” yaagidi oichchiis. SHin he gallassi Xoossai ayyo odibeenna.

<sup>38</sup> Yaanin Saa7ooli, “Olanchchata halaaqatoo, ubbai haayite; hachchi aiba nagari oosettidaakkonne ane qoridi demmoos. <sup>39</sup> Israa7eela ashshiya GODAI ero! Ta na7aa Yonaataana gidikkokka, haiqqanau bessees” yaagiis. SHin asaappe issi urainne qaala qaattibeenna.

<sup>40</sup> Hegaappe guyyiyan, Saa7ooli Israa7eela asaa ubbaa, “Intte ubbaikka ya baggan eqqite; taaninne ta na7aa Yonaataani ha baggan eqqana” yaagiis.



Yaagin asati, “Eeno, nena lo77abaa ootta” yaagidosona.

<sup>41</sup> Hegaappe guyyiyan, Saa7ooli GODAA Israa7eela Xoossaa, “Taayyo likke zaaruwaa imma” yaagidi woossiis. Woossin saamai Saa7oola bollinne Yonaataana bolli wodhdhin asai geeyiis. <sup>42</sup> Qassi Saa7ooli, “Ta bollinne ta na7aa Yonaataana bolli yeggite” yaagiis. Yaagin saamai Yonaataana bolli wodhdhiis.

<sup>43</sup> Wodhdhin Saa7ooli Yonaataana, “Ane neeni oottidobaa oda” yaagiis.

Yaagin Yonaataani, “Taani guutta eessa ililo ta xam77aa xeeraappe laaccaas. Hekko taani hagan de7ais; taani haiqqana” yaagiis.

<sup>44</sup> Saa7ooli hagaadan yaagiis; “Yonaatanaa, neeni haiqqana xayikko, Xoossai tana woro!” yaagiis.

<sup>45</sup> SHin asai Saa7oola, “Yonaataani, Israa7eelassi ha gita xoonuwaa ehiidaagee haiqqanee? Hegee mulekka hanenna! De7o Xoossai ero! A huuphiyaappe issi binnaaninne biittan wodhdhenna; aissi giikko, i hachchi haggaa Xoossaa maaduwan oottiis” yaagidosona. Yaatidi asai Yonaataana ashshin, i haiqqennan attiis.

<sup>46</sup> Hegaappe guyyiyan, Saa7ooli Pilisxeema asata yedettiyoogaa aggiis; aggin eti bantta biitti simmidosona.

### *Saa7oola Kawotettaanne A So Asaa*

<sup>47</sup> Saa7ooli Israa7eela bolli kawotidoogaappe guyyiyan, ubba sohuwaara de7iya ba morkketa oliis; hegeetikka: Moo7aabata, Amoonata, Eedoomata, Xooaba kawotanne Pilisxeema asata. Ba biidosan ubban xooniis. <sup>48</sup> I minnidi olettiis; Amaaleeqa asata xooniis; Israa7eela asaa bonqqiyaageetu kushiyaappe ashshiis.

<sup>49</sup> Saa7oola attuma naati Yonaataana, Yishiwanne Malkkishuu7a; ayyo baira na7ee sunttai Meraabo; kaalo na7ee sunttai Miikaalo. <sup>50</sup> A keettaayyiyaa Ahima7aaxa na7iyo Ahino7aamo. A olanchchatu gadaawai a aawaa ishaa Neera na7aa Abaneera. <sup>51</sup> Saa7oola aawaa Qiisinne Abaneera aawaa Neeri Abii7eela naata.

<sup>52</sup> Saa7ooli de7ido laitta ubban Pilisxeema asatuura suulo olaa olettiiddi de7iis. Mino asa woikko xala asa demmido wode ubban, i he uraa ba olanchchatun gujjees.

## 15

### *Saa7ooli Amaaleeqa Asaa Bolli Denttido Olaa*

<sup>1</sup> Sameeli Saa7oola, “Ba asaa Israa7eela bolli neeni kawotanaadan tiyanau GODAI kiittidoogee tana; GODAA qaalaa siya. <sup>2</sup> Ubbaappe Wolqqaama GODAI hagaadan yaagees; ‘Israa7eelati Gibxxeppe kiyidi yiyo wode Amaaleeqa asati ogiyan etaara eqettido gishshau, taani Amaaleeqa asata qaxxayana. <sup>3</sup> Ha77i ba; baada Amaaleeqa asata shoca; etayyo de7iyaabaa ubbaa muleera xaissa; eta ashshoppa; eta maccaa attumaa, xammiyaagaa qucciyaagaa, miizzaa dorssaa, gaameelaanne hariyaa wora’ yaagees” yaagiis.

<sup>4</sup> Yaagin Saa7ooli asaa xeegidi, Xeleema giyoosan qoodiis; qoodiyo wode tohuwaasai naa77u xeetu sha7a; Yihudaappe tammu sha7u asai de7ees. <sup>5</sup> Saa7ooli Amaaleeqatu katamaa biidi, issi zanggaaraa gidдон geemetti uttiis. <sup>6</sup> Saa7ooli Qeena asata, “Taani intena Amaaleeqa asatuura issippe bashshenna mala, denddite! Denddidi eta giddoppe kiyite! Hagaappe kichchite! Aissi giikko, Israa7eelati Gibxxeppe kiyiyo wode, intte eta ubbaayyo kehideta” yaagiis. Yaagin Qeena asati Amaaleeqa asatu giddoppe kiyidi biidosona.

<sup>7</sup> Saa7ooli Amaaleeqa asata Hawiilappe doommidi, Gibxxe sinttan de7iya SHura gakkanaashin shociis. <sup>8</sup> Amaaleeqatu Kawuwaa Agaaga paxa de7ishin, Saa7ooli omooddiis; a asaa ubbaa qara bisuwan wori wurssiis. <sup>9</sup> SHin Saa7oolinne a olanchchati, Agaaganne ubbaappe lo77iya dorssata, miizzata, anqqara marata, galotanne hara lo77obata ubbaa ashshidosona; eti hageeta muleera wori wurssanau dosibookkona; shin eti laafabaanne karettidabaa muleera xaissidosona.



### *Saa7ooli Kawo Gidiyoogaa GODAI Ixxiis*

<sup>10</sup> GODAA qaalai Sameelakko hagaadan yaagiiddi yiis; <sup>11</sup> “Taani Saa7oola kawo kessidoogau azzanais; aissi giikko, Saa7ooli tana kaalliyoogaa aggiis; ta azazuwaa oottibeenna” yaagiis. Yaagin Sameeli metootiis; metootidi he qamma kumettaa GODAAKKO waassiis.

<sup>12</sup> Maallado guuran Sameeli denddidi, Saa7oolaara gaittanau biis; shin asai ayyo, “Saa7ooli Qarmmeloosa katamaa biis; biidi yan bana hassayissiya hawulttiyaa essiis; hegaappe simmidi, Gelgala wodhdhiis” yaagidi yootiis.

<sup>13</sup> Yootin Sameeli Saa7oolakko gakkii; gakkii Saa7ooli Sameela, “GODAI nena anjjo; taani GODAA azazuwaa oottaas” yaagiis.

<sup>14</sup> SHin Sameeli Saa7oola, “Ha taani siyiyo dorssaa waasoinne miizaa waasoi aibee?” yaagiis.

<sup>15</sup> Yaagin Saa7ooli, “Olanchatu hageeta Amaaleeqatuppe ehiidosona; eti GODAAYYO, ne Xoossaayyo yarshshanau, ubbaappe lo77iya dorssatanne miizata ashshidosona; shin haraata muliyaakka xaissida” yaagiis.

<sup>16</sup> Sameeli Saa7oola, “Ane nangga; GODAI zino qammi taayyo yootidobaa taani neeyyo odais” yaagiis.

Yaagin Saa7ooli, “Oda” yaagiis.

<sup>17</sup> Sameeli Saa7oola yaagiis; “Neeni nena xeellin guutta gidikkokka, Israa7eela zaretuuyo kawo gidabeikkii? Israa7eela bolli kawotana mala, GODAI nena tiyiis. <sup>18</sup> GODAI nena, ‘Baada Amaaleeqa asata iitata muleera xaissa; eti wurana gakkanaashin eta ola’ yaagidi kiittiis. <sup>19</sup> Yaatin, aissi GODAAYYO azazettabeikkii? Aissi omooduwau yaaretada GODAA sinttan iitabaa oottadii?” yaagiis.

<sup>20</sup> Yaagin Saa7ooli, “Taani GODAA qaalau azazettaasittennee! I tana kiittidoogaadan baas; baada Amaaleeqa asata wora wurssaas; eta Kawuwaa Agaaga ehaas.

<sup>21</sup> SHin olanchchatu omooduwaappe dorssanne miizaa ubbaappe lo77iyaageeta, GODAAYYO, ne Xoossaayyo, Gelggalan yarshshanau ekki yiidosona” yaagiis.

<sup>22</sup> Sameeli Saa7oola, “GODAI ba qaalau azazettiyoogan ufaittiyoogaa keenaa xuggiyo yarshshuwaaninne imotan ufaittii? Be7a; azazettiyoogee yarshshiyoo gaappe aadhdhees; qassi ezggiyoogee dorssaa modhdhuwaappe aadhdhees. <sup>23</sup> Aissi giikko, xibiyoogee shareechchiyo nagaraa mala; qassi otorettiyoogee ee qau goinniyo iitatettaa mala. Neeni GODAA qaalaa ixido gishshau, GODAI neeni kawo gidiyoogaa ixiiis” yaagiis.

<sup>24</sup> Saa7ooli Sameela, “Taani nagaraa oottaas; GODAA azazuwaanne ne qaalaa toochchaas. Taani asaayyo yayyido gishshau, eti giidobaa oottaas. <sup>25</sup> Hai ta nagaraa atto garkkii; taani GODAAYYO goinnana mala, tanaara Gelgala hinddarkkii” yaagiis.

<sup>26</sup> Yaagin Sameeli Saa7oola, “Taani nenaara simmada biikke! Neeni GODAA qaalaa ixido gishshau, neeni Israa7eela bolli kawo gidiyoogaa GODAI ixiiis” yaagiis.

<sup>27</sup> Sameeli Saa7oola matappe baanau denddin, Saa7ooli a maayuwaa macaraa oiqqiis; oiqqin maayoi pooshettiis. <sup>28</sup> Sameeli Saa7oola, “GODAI hachchi Israa7eela kawotettaa neeppe pooshhiis; pooshshidi neeppe lo77iya ne shooruwaayyo immiis.

<sup>29</sup> Israa7eela Bonchchoi worddotenna, woikko ba qofaa laammenna; aissi giikko, ba qaalaa laammanau i asa gidenna” yaagiis.

<sup>30</sup> Yaagin Saa7ooli Sameela, “Taani nagaraa oottaas; shin ta biittaa cimatu sinttaaninne Israa7eela asaa sinttan hai tana kaushshopparkkii; taani GODAAYYO, ne Xoossaayyo goinnanaadan, neeni tanaara hinddarkkii” yaagidi zaariis.

<sup>31</sup> Hega gishshau, Sameeli Saa7oolaara issippe Gelgala biis; bin Saa7ooli GODAAYYO goinniis.

<sup>32</sup> Hegaappe guyyiyan Sameeli, “Amaaleeqatu Kawuwaa Agaaga taakko ehiite” yaagidi azaziis.

Agaagi kokkoriiddi Sameelakko yiis; yiidi, “Tumu haiqoi hagaadan cammii!” yaagiis.

<sup>33</sup> Yaagin Sameeli Agaaga, “Ne bisoi maccaasata xontta ashshidoogaadan, ne aayyiyaakka maccaasatu gidдон xontta attana” yaagiis. Sameeli Agaaga GODAA sinttan Gelggalan siifiis.

<sup>34</sup> Hegaappe guyyiyan, Sameeli denddidi, Raama katamaa biis; Saa7oolikka ba soo Gib77aa biis. <sup>35</sup> Sameeli haiqqana gakkanaashin, Saa7oola naa77antto bibeenna; gidikkonne, Sameeli Saa7oola gishshau yeekkiis. Saa7oola Israa7eela bolli kawoyidoogau GODAI azzaniis.

## 16

### *Daawiti Doorettidi Kawo Gidanau Tiyettiis*

<sup>1</sup> GODAI Sameela, “Israa7eela bolli i kawo gidenna mala, taani ixxaichchido Saa7oola gishshau, neeni aude gakkanaashin yeekkuutee? Ane kaciyan zaitiyaa kunttada kiya; taani nena Beetaliheemiyaa Isseyakko kiittais; kawo gidana mala, taani a naatu gidloppe issuwaa doora wottaas” yaagiis.

<sup>2</sup> Yaagin Sameeli, “Taani waanada boo? Saa7ooli siyidi tana worana” yaagiis.

GODAI Sameela, “Ussa issinniyo ekkada ba; baada, ‘Taani GODAAYYO yarshshanau yaas’ yaaga. <sup>3</sup> Isseyakka yarshshuwaasaa xeesa. Neeni oottanabaa taani nena bessana; taani neeyyo yootiyoogaa taassi tiya” yaagiis.

<sup>4</sup> Yaagin Sameeli GODAI yootidoogaa oottiis; Beetaliheeme biis. Beetaliheeme kata-maa cimati kokkoriiddi aara gaittidosona. Eti a, “Neni sarotettau yaadii?” yaagidi oichchidosona.

<sup>5</sup> Oichchin Sameeli, “Ee; sarotettau yaas; taani GODAAYYO yarshshanau yaas; inttekka geeyite; yaatidi tanaara yarshshuwaasaa hinddite” yaagiis; qassi Isseyanne a naata geeshshidi, yarshshuwaasaa eta xeesiis.

<sup>6</sup> Eti yarshshuwaasaa gakkiiyo wode, Sameeli Isseya na7aa Eli7aaba be7idi, “Tumuppe GODAI tiyoogee hagan a sinttan eqqiis” yaagidi qoppiis.

<sup>7</sup> SHIN GODAI Sameela, “A meraa woikko a geesaa adussatettaa xeelloppa; taani a ixxaas. Aissi giikko, taani GODAI asi xeelliyooogaadan xeellikke; asi som77uwaa xeellees; shin GODAI wozanaa xeellees” yaagiis.

<sup>8</sup> Isseyi Abinadaaba xeesidi, Sameela sintti aattiis; aattin Sameeli, “CHii; GODAI hagaakka dooribeenna” yaagiis. <sup>9</sup> Yaatin, Isseyi SHaama aattiis; aattin Sameeli, “CHii; GODAI hagaakka dooribeenna” yaagiis. <sup>10</sup> Hegaadan oottidi, Isseyi ba naata laappunaa Sameela sintti aattiis; shin Sameeli Isseya, “GODAI hageeta dooribeenna” yaagiis. <sup>11</sup> Hegaa gishshau, i Isseya, “Neeyyo de7iya naati hageetu xalaaleeyye?” yaagidi oichchiis.

Oichchin Isseyi, “Ubbaappe kaalo na7ai attiis; shin i dorssata heemmees” yaagiis.

Yaagin Sameeli, “Kiittada a ehiissa; i yaana gakkanaashin nuuni yarshshokko” yaagiis. <sup>12</sup> Yaagin Isseyi kiittidi, na7aa ehiissiis; he na7ai arssa; aifiyaara lo77iya puulanchcha.

GODAI Sameela, “Dendda eqqada tiya; hagee a” yaagiis. <sup>13</sup> Yaagin Sameeli kaciya zaitiyaa ekkidi, a ishata sinttan Daawita tiyiis. He gallassappe doommidi, GODAA Ayyaanai Daawita bollan wolqqappe wodhdhiis. Hegaappe guyyiyan, Sameeli denddidi, Raama katamaa biis.

### *Daawiti Saa7oolayyo Oottees*

<sup>14</sup> GODAA Ayyaanai Saa7oolappe shaahettiis; shaahettin GODAAPPE kiitettida iita ayyaanai Saa7oola niqiichchiis. <sup>15</sup> Saa7oola ashkkarati a, “Xoossaappe kiitettida iita ayyaanai nena niqiichchees. <sup>16</sup> Nu godai diittaa loitti diixxiya asa koyana mala, ba ashkkarata, hagan de7iyaageeta azazo. Xoossaappe kiitettida iita ayyaanai nena oiqqiyo wode, he bitanee diittaa diixxana; i diixxin neeyyo kehana” yaagidosona.

<sup>17</sup> Yaagin Saa7ooli ba ashkkarata, “Diittaa loittidi diixxiya asa koyidi, taayyo ekki yiite” yaagiis.

<sup>18</sup> Ashkkaratuppe issoi Saa7oola, “Be7a; Beetaliheemiyaa Isseyayyo diittaa loittidi diixxiya issi na7ai de7ees. He na7ai xalanne tooranchcha asa; haasayassi cinccanne puulanchcha asa; qassi GODAI aara issippe de7ees” yaagiis.

<sup>19</sup> Yaatin, Saa7ooli Isseyakko kiittidi, “Ne dorssaa heemmiya ne na7aa Daawita taayyo yedda” yaagiis. <sup>20</sup> Yaagin Isseyi oittaa, ogoro woine eessaanne galo dorssa mara issuwaa hariyan caanidi, ba na7aa Daawitaara Saa7oolayyo yeddiis.

<sup>21</sup> Daawiti Saa7oolakko yiis; yiidi a oosuwan geliis. Saa7ooli Daawita keehippe dosiis; Daawiti Saa7oolayyo ola miishshaa oiqqiyaagaa gidiis. <sup>22</sup> Yaatin, Saa7ooli Isseyayyo, “Daawiti taayyo oottiiddi takkishsho; taani a dosaas” yaagidi kiittiis.

<sup>23</sup> Hegaappe simmin, Xoossaappe kiittetida iita ayyaanai Saa7oola oiqqiyo wode ubban, Daawiti diittaa ekkidi ba kushiyan diixxees; diixxin iita ayyaanai a yeddiyo gishshau, Saa7oolayyo keheesinne i paxees.

## 17

### *Daawitanne Gooliyaada*

<sup>1</sup> Pilisxxeema asati bantta olanchchata Yihudan de7iya Sooko giyo sohuwaa olau shiishshidosona; Sookoppenne Azeeqappe gidduwan de7iya Efesxxamiima giyo issi sohuwan shiiqi uttidosa. <sup>2</sup> Saa7oolinne Israa7eelati Eela giyo zanggaaran shiiqi uttidosa; uttidi Pilisxxeema asatuura olettanau salppiyan kiyidosona. <sup>3</sup> Pilisxxeema olanchchati issi keran salppin, Israa7eelatika hara keran salppidosona; eta naa77aa zanggaarai shaakkees.

<sup>4</sup> Gaate kataman de7iya, Gooliyaada giyo issi tooraa qara bitanee Pilisxxeemati galchchidosaaappe yiis; a geesai usuppun waranne takkaaro. <sup>5</sup> I ishatanne laappun kilo giraame deexxiya nahaase birata kootiyaa maayii; qassi nahaase birata qophiyaa ba huuphiyan wottiis. <sup>6</sup> Nahaase birataa gambbaaliyaa ba tohuwan aattiis; ba hashiyan nahaase birataappe qoxettida xinqqaa tookkiis. <sup>7</sup> A bodaa toomai shimainniyaa wondarashiyaa keena; bodaa aifee laappun kilo giraame deexxees; gondalliyyaa tookkida issi bitanee a sinttan hemettees.

<sup>8</sup> Gooliyaadi eqqidi, qaala xoqqu oottidi, Israa7eela olanchchatuyyo hagaadan yaagidi gairiis; “Intte waanana giidi olau salppidetii? Taani Pilisxxeema asa gidikkinnaa? Qassi intte Saa7oola ashkkarata gidekketii? Ane intte giddoppe issi asa doorite; he bitanee taakko wodhdho. <sup>9</sup> He bitanee tanaara olettidi tana worikko, nuuni intte ashkkarata gidana; shin taani a xoonada worikko intte nu ashkkarata gidanne nuussi haarettana” yaagiis. <sup>10</sup> Qassikka he Pilisxxeeme bitanee, “Taani hachchi Israa7eela olanchchata naassais; taayyo issi asa immite; ane naa77ai olettoos!” yaagiis. <sup>11</sup> Saa7oolinne Israa7eelati Pilisxxeemiyaa qaala siyidi, yeellatidosonanne daroppe yayyidosona.

<sup>12</sup> Daawiti Yihudaa biittan Beetaliheemen de7iya Efiraataa Isseyaa na7aa. Isseyayyo hosppun attuma naati de7oosona; Saa7ooli kawo gididi de7iyo wode, Isseyi keehippe cimidanne daro de7ida asa. <sup>13</sup> Isseyaa attuma naati bairatiyaageeti heezzati Saa7oola kaallidi olaa biidosona; olaa biida a heezzu naatu sunttai haggaa; bairai Eli7aaba; kaaloi Aminadaaba; heezzanttoi SHAama. <sup>14</sup> Daawiti naatu ubbaappe kaalo. Baira heezzu naati Saa7oola kaallidosona; <sup>15</sup> shin Daawiti ba aawaa dorssata heemmanau Saa7oola mataaappe Beetaliheeme simerettees.

<sup>16</sup> He Pilisxxeemee oitamu gallassau maalladonne omarssi yiidi, Israa7eelata naassees.

<sup>17</sup> Issi gallassi Isseyi ba na7aa Daawitayyo hagaadan yaagiis; “Ha xiixettida tiyaappe tammu kilo giraamiyaanne ha tammu oittata ekkada, ne ishanttuyyo efa; efaada ne

ishantti galchchidosaa eesuwan gatta. <sup>18</sup> Ha tammu nuha pilatakka eta shaalaqaayyo efa; ne ishantti waani de7iyaakko be7ada, eti saro de7iyoo gau malaataa etappe ekkada ya. <sup>19</sup> Kawoi Saa7ooli, ne ishanttinne Israa7eela asai ubbai, Pilisxxeema asatuura olettiiddi, Eela Zanggaaran de7oosona” yaagiis.

<sup>20</sup> Yaagin Daawiti maallado guuraara denddiis; denddidi dorssaa wudiyaa hara asa henttidi, Isseyi azazidobaa caani ekkidi biis. Israa7eela olanchchati bantta qaalaa xoqqu oottidi garmmaamiiddi olau salppishin, Daawiti gakkiiis. <sup>21</sup> Israa7eela asatinne Pilisxxeema asati issoi issuwaakko xeellidi salppidosona. <sup>22</sup> Daawiti ba ehiido mi-ishshaa shinqqiyaa naagiyaagaa kushiyan wottidi, olaa salppiyaa woxxi biidi, ba ishannta sarotiis. <sup>23</sup> Daawiti ba ishanttuura haasayishin, Gaateppe yiida tooraa qarai, Pilisxxeemiyaa Gooliyaadi ba salppiyaappe gaxi kiyidi, haroodeegaadanka Israa7eelata naassiis; i naassiyoo ga Daawiti siyiis. <sup>24</sup> Israa7eela asai ubbai he bitaniyaa be7ido wode, keehippe yayyidi appe baqatidosona.

<sup>25</sup> Israa7eela asai issoi issuwaa, “Ha kiyiya bitaniyaa be7idetii? I tumaappe Israa7eela naassanau kiyiis! Ha bitaniyaa woriya urau Kawoi Saa7ooli daro aquwaa immana; qassi ba na7iyookka ayyo immana; a aawaa keettaa asai Israa7eelan kawo giiraakka giireenna” yaagidosona.

<sup>26</sup> Yaagin Daawiti ba matan eqqida asaa, “Ha Pilisxxeemiyaa woridi, ha yeellaa Israa7eelappe qucciya uraassi aibi oosettanee? Ha qaxxarettibeenna Pilisxxeemee, de7o Xoossaa olanchchata naassiyaagee i oonee?” yaagidi oichchiis.

<sup>27</sup> Oichchin eti a, “Ha bitaniyaa woriya urau hagee hagee oosettana” yaagidi kaseegaadanka ayyo zaaridosona.

<sup>28</sup> Daawiti asaara haasayiyoo ga a ishai ubbaappe bairai Eli7aabi siyidi, Daawita bolli hanqquwaa eexxi kiyiis; eexxi kiyidi, “Neeni ha sohuwaa aibissi yaadii? He amarida dorssata bazzon oonaara yeggadii? Ne otoruwaanne ne wozanaa iitatettaa taani erais; neeni olaa be7anau yaadasa” yaagiis.

<sup>29</sup> Yaagin Daawiti, “Taani ha77i ai oottidanaa? Harai attikko haasayanaukka dand-dayikkinaa?” yaagiis. <sup>30</sup> Daawiti ba ishaa aggidi, hara asaakko simmidi, kaseegaadanka oichchiis; oichchin asai ayyo kaseegaadanka zaariis.

<sup>31</sup> Daawiti haasayidoogaa siyida asati Saa7oolayyo yootidosona; yootin Saa7ooli Daawita xeesissiis. <sup>32</sup> Daawiti Saa7oola, “Ha bitaniyaa gaasuwan o wozanaikka maashoppo; taani ne ashkkaarai baada, ha Pilisxxeemiyaara olettana” yaagiis.

<sup>33</sup> Yaagin Saa7ooli Daawita, “Ha Pilisxxeemiyaara neeni olettanau danddayakka; aissi giikko, neeni na7a; shin naatettaappe doommidi, i olettiiddi diccida asa” yaagiis.

<sup>34</sup> SHin Daawiti Saa7oola, “Taani ne ashkkaarai ta aawaa dorssata heemmais; gaam-moi woikko beere giyo do7ai yiidi wudiyaaappe dorssaa oiqqiyo wode, <sup>35</sup> a kaallada taani baada a doonaappe wotta ekkais; taakko simmiyo wode, buuchchaa oiqqada, shoca worais. <sup>36</sup> Taani ne ashkkaarai gaammuwaanne beeriyaa woraas; ha qaxxarettibeenna Pilisxxeemee de7o Xoossaa olanchchata naassido gishshau, ikka etappe issuwaadan hanana. <sup>37</sup> Gaammuwaanne beeriyaa xugunttaappe tana ashshida GODAI ha Pilisxxeemiyaa kushiyaappekka ashshana” yaagiis.

Saa7ooli Daawita, “Ba; Xoossai nenaara gido” yaagiis.

<sup>38</sup> Hegaappe guyyiyan, Saa7ooli ba maayuwaa Daawita maizziis; Daawita huuphiyan nahaase birataa qophiyaa wottiis; nahaase birataa kootiyaakka Daawita maizziis. <sup>39</sup> Daawiti ba ola maayuwaa bolli bisuwaa gixxiis; gixxidi hemetti be7iis; shin dand-dayibeenna; aissi giikko, heгаа mala maayuwaa maayi erenna.

Hegaappe guyyiyan, Daawiti Saa7oola, “Taani haga mala maayuwaa maayada meezetabeenna gishshau, hagaara baanau danddayikke” yaagidi ola maayuwaa ubbaara qaariis. <sup>40</sup> Daawiti ba hentta gatimaa oiqqidi, shaafaappe muila shuchcha



ichchashata maxi ekkidi, ba qarcciitan yeggiis; ba yambarshshaa oiqqidi, Gooliyaadakko matiis.

<sup>41</sup> Gooliyaadikka Daawitakko shiiqi shiiqidi matattiis; gonnalliyaa tookkiya bitanee a sinttan de7ees. <sup>42</sup> I Daawita tishshi ootti xeellidi, Daawiti na7a gididoogaanne meraa lo77onne arssa gididoogaa be7idi kariis. <sup>43</sup> Karidi Daawita, “Neeni gatimaa oiqqada ta bolli yaanau, tana kana gaadiyye?” yaaggiis; yaagidi ba xoossatu sunttan Daawita qanggiis. <sup>44</sup> I qassikka Daawita, “Haaya; taani ne ashuwaa saluwaa kafotussinne sa7aa do7atussi immana” yaaggiis.

<sup>45</sup> Yaagin Daawiti Pilisxxeemiyaa, “Neeni bisuwaa, bodaanne xinqqaa oiqqada ta bolli yaasa; shin taani Ubbaappe Wolqqaama GODAA sunttan, neeni naassido Israa7eela olanchchatu Xoossaa sunttan ne bolli yais. <sup>46</sup> Hachchi GODAI nena ta kushiyan aatti immana; taani nena shocana; ne qooriyaakka muuca olana. Pilisxxeema olanchchatu ahaa saluwaa kafotuyyoonne sa7aa do7atuyyo taani hachchi immana; yaatin, Israa7eelan Xoossai de7iyooogaa sa7an de7iya asai ubbai erana. <sup>47</sup> GODAI ba asaa ashshanau toora woikko biso koyennaagaa hagan shiiqida asai ubbai erana; aissi giikko, olai GODAAGAA. I inttena ubbaa nu kushiyan aatti immana” yaaggiis. <sup>48</sup> Pilisxxeemee denddidi biidi, Daawitaara olaa gaittanau shiiqido wode, Daawiti olettiyo baazzau eesuwaa woxxiis. <sup>49</sup> Daawiti ba qarcciitaa giddo kushiya yeddidi, issi shuchchaa ekkii; ekkidi yambarshshan wottidi yambaridi, Pilisxxeemiyaa som77uwaa caddiis. SHuchchai bitaniyau som77o giddo geliis; yaatin, bitanee biittan gufannidi kunddiis.

<sup>50</sup> Yaatidi Daawiti Pilisxxeemiyaa yambarshshaanne shuchchan xooniis. Daawiti ba kushiyan bisoi bannan Pilisxxeemiyaa caddidi woriis. <sup>51</sup> Daawiti woxxiiddi biidi, a bolli kiyi eqqidi, Pilisxxeemiyaa bisuwaa oiqqidi shoohuwaa gidlope shoddi ekkidi, a qooriyaa muucidi woriis.

Pilisxxeema asati bantta toora qarai haiqqidoogaa be7ido wode baqatidosona. <sup>52</sup> Israa7eela asanne Yihudaa asai denddidi alaahiiddi, Pilisxxeema asata Gaatenne Eqiroona katamatu penggeta gattanaashin yedettidosona; Pilisxxeema asaa ahaa Gaatenne Eqiroona gakkanaashin, SHaa7iraima efiya ogiyan ubban kunddiis. <sup>53</sup> Israa7eela asai Pilisxxeema asata yedetti simmidi, eti galchchidosaa bonqqidosona. <sup>54</sup> Daawiti Pilisxxeemiyaa qooriyaa Yerusalaame ehiis; shin Pilisxxeemiyaa ola miishshaa ba dunkkaaniyaa giddon wottiis.

<sup>55</sup> Daawiti Pilisxxeemiyaakko biishin, Saa7ooli be7ido wode, olanchchatu halaqaa Abaneera, “Abaneeraa, ha wodallai o na7ee?” yaagidi oichchiis.

Oichchin Abaneeri Saa7oola, “Kawuwau, ne shemppoi ero taani a erikke” yaagidi zaariis.

<sup>56</sup> Kawoi zaaridi, “Yaanikko ha wodallai o na7akkonne ane oichchada gakka” yaaggiis.

<sup>57</sup> Daawiti Pilisxxeemiyaa woridi simmidoogaappe guyyiyan, muucido Pilisxxeemiyaa huuphiyaa oiqqidosaa, Abaneeri a Saa7oola sintti ekki efiis.

<sup>58</sup> Saa7ooli a, “Wodallau, neeni o na7ee?” yaagidi oichchiis.

Oichchin Daawiti, “Taani Beetalheemiyaa ne ashkkaraa Isseya na7a” yaagidi zaariis.

## 18

### *Daawitanne Yonaataana*

<sup>1</sup> Daawiti Saa7oolaara haasayyoogaa wurssidoogaappe guyyiyan, Saa7oola na7aa Yonaataani Daawitaara daro mata dabbotettaa medhdhiis; Yonaataani Daawita ba huuphedan siiqiis. <sup>2</sup> He gallassaappe doommidi, Saa7ooli Daawita banaara wottiis; ba aawaa soo guyye simmennaan diggiis. <sup>3</sup> Yonaataani Daawita ba huuphedan siiqiyo gishshau, aara maachchaa maacettiis. <sup>4</sup> Yonaataani ba maayido kaabbaa qaaridi,



ba ola maayuwaara, ba bisuwaara, ba wonddafiyaaranne ba qabattuwaara issippe Daawitayyo immiis.

<sup>5</sup> Saa7ooli kiittido ubbabaa Daawiti polidi oottiyo gishshau, Saa7ooli Daawita ba olanchchatu gidдон gadaawa sunttiis; hegee asaa ubbaakka a olanchchatakka ufaissiiis.

### *Saa7ooli Daawita Qanaatiis*

<sup>6</sup> Daawiti Pilisxxeemiyaa Gooliyaada worin asai soo simmiyo wode, maccaasai ufaissa yettaa yexxiiddinne duriiddi, karaabiyaa baqqiiddinne diittaa diixxiiddi, Kawuwaa Saa7oola mokkanau Israa7eela katamatu ubbatuppe kiyiis. <sup>7</sup> Maccaasati duriiddi,

“Saa7ooli sha7aa woriis;

Daawiti tammu sha7aa woriis”

yaagidi yexxidosona. <sup>8</sup> Saa7ooli ha yettai iitin, keehippe hanqqettiis; Saa7ooli ba qofan, “Daawita, ‘Tammu sha7aa woriis’ giidi, tana, ‘Issi sha7aa woriis’ giidosona; yaatin, kawotettappe attin ayyo aibee attidai?” yaagiis. <sup>9</sup> He gallassaappe doommidi, Saa7ooli Daawita qanaate aifiyan xeelliis.

<sup>10</sup> Wonttetta gallassi iita ayyaanai Xoossaappe kiitettidi, Saa7oola oiqqiis; oiqqin Saa7ooli ba son elumettiis. Daawiti haroodeegaadan diittaa diixxiis; diixxishin Saa7ooli tooraa ba kushiyan oiqqi uttidaagee, <sup>11</sup> “Daawita godaara gattada sikkaas” giidi tooraa xonggiis. SHin Daawiti naa77utoo appe halettiis.

<sup>12</sup> GODAI Saa7oola aggidi Daawitaara de7iyo gishshau, Saa7ooli Daawitayyo yayyiis.

<sup>13</sup> Hegaa gishshau, Saa7ooli Daawita ba sinttappe haassidi, sha7u olanchchatussi ha-laqa kessiis. Yaatin, Daawiti ba citaa olan kaalettiis. <sup>14</sup> GODAI Daawitaara issippe de7iyo gishshau, i oottiyoobai ubbai ayyo injjetiis. <sup>15</sup> Daawiti oottiyoobai ubbai keehippe injjetiyoogaa Saa7ooli be7idi, ayyo keehi yayyiis. <sup>16</sup> SHin Daawiti eta olan kaalettiyo gishshau, Israa7eelanne Yihudaa asai ubbai a siiqidosa.

<sup>17</sup> Hegaappe guyyiyan, Saa7ooli Daawita, “Ta na7iyaa bairiyaa Meraaba hannaho; taani o neeyyo machcho immana; neeni mino asa gida; yaatada GODAA olaa oletta” yaagiis. Saa7ooli ba wozanan, “Taani a bochchikke; Pilisxxeema asati a worona” yaagidi qoppiis. <sup>18</sup> SHin Daawiti Saa7oola, “Kawoorra bollotanau taani oonee? Ta so asaikka aibee? Woikko ta aawaa yaraikka Israa7eela asaa gidдон aibee?” yaagiis. <sup>19</sup> SHin Saa7oola na7iyaa Meraaba Daawitau imettiyo wodee gakkinn, Mahoola kata-maappe yiida, Adirii7eela giyo issi bitaniyau imettaasu.

### *Daawiti Saa7oola Na7iyo Machchiis*

<sup>20</sup> Gidikkonne, Saa7oola na7iyaa Miikaala Daawita siiqaasu; Saa7ooli heгаа siyidi ufaittiis. <sup>21</sup> I ba wozanan, “Ayyo pire gidana malanne Pilisxxeema asati a worana mala, taani Miikaalo Daawitayyo immana” yaagidi qoppiis. Hegaa gishshau, Saa7ooli Daawita, “Neeni tanaara bollotanau hagee neeyyo naa77antto qaada” yaagiis.

<sup>22</sup> Qassikka Saa7ooli ba ashkkarata xeesidi, “ ‘Kawoi nenan ufaittiis; a ashkkarati ub-baikka nena dosoosona; ha77i neeni kawuwaara bollota’ yaagidi xuuran Daawitayyo yootite” yaagidi azaziis.

<sup>23</sup> Azazin eti i giidoogaadankka Daawitayyo yootidosona; shin Daawiti etau, “Kawoorra bollotanaagee intteyyo laafabaa milatiyye? Taani hiyyeesanne erettenna asa” yaagidi zaariis.

<sup>24</sup> Saa7oola ashkkarati Daawiti giidobaa Saa7oolayyo yootidosona. <sup>25</sup> Yootin Saa7ooli ba ashkkarata, “Daawitau hagaadan yaagidi yootite; ‘Kawoi ba morkketu haluwaa kessanau xeetu Pilisxxeema asatu qaaratuwaappe attin, neeppe hara koitaa koyenna’ yaagite” yaagiis. Saa7ooli heгаа giidoogee, “Daawiti Pilisxxeematu kushiyan haiqqo” giidi qoppido gishshaassa.

<sup>26</sup> Saa7oola ashkkarati Saa7ooli giidobaa Daawitayyo yootidosona; kawuwaara bol-lotiyoogee Daawita ufaissii. Hegaa gishshau, bullachchaa gallassai gakkanaappe kasetidi, <sup>27</sup> Daawitinne a asai denddidi biidosona; biidi Pilisxxeematuppe naa77u xetu asaa woridosona. Daawiti kawuwaara bollotanau he asatu qaaratuwaa ehiidi, kawuwaayyo kumettaa qoodidi sheedhdhiis. Hegaa gishshau, Saa7ooli ba na7iyu Miikaalo Daawitayyo immiis.

<sup>28</sup> Saa7ooli GODAI Daawitaara issippe de7iyooqaanne a na7iyaa Miikaala Daawita siiqiyoogaa eriiis. <sup>29</sup> Hegaa gishshau, Saa7ooli Daawitayyo kaseegaappe aattidi yayyiis. Saa7ooli ba de7o laitta ubban Daawitayyo morkke gidiiis.

<sup>30</sup> Pilisxxeeme halaqati olettanau kiyiyooqaa aggibookkona; shin olau kiyido paido ubban Saa7oola gadaawatu ubbaappe xoonoi haniyoi Daawitassa; hegaa gishshau, i erettida asa gidiiis.

## 19

### *Saa7ooli Daawita Yedetaa Doommiis*

<sup>1</sup> Saa7ooli ba na7aa Yonaataanayyoonne ba ashkkaratu ubbaayyo, “Daawita worite” yaagidi yootiis; shin Saa7oola na7ai Yonaataani Daawita keehippe siiqiis. <sup>2</sup> Hegaa gishshau, Yonaataani Daawitassi hagaadan yaagidi odiis; “Ta aawai Saa7ooli nena woranau koyees; wontto maallado neeyyo naagetta; issi sohuwan qosettada de7ashsha. <sup>3</sup> Taani ta aawaara baada, neeni qosettido gaden eqqana; taani nebaa ayyo yootada, appe siyidobaa neeyyo yootana” yaagiis.

<sup>4</sup> Yonaataani Daawitabaa nashshidi, ba aawaa Saa7oola hagaadan yaagiis; “Kawoi ba ashkkaa Daawita naaqqoppo; aissi giikko, i nena naaqqibeenna; i oottidobai nena keehi go77iis. <sup>5</sup> I Pilisxxeemiyaa woriyo wode ba shemppuwau qarettibeenna. GODAI Israa7eela ubbaayyo gita xoonuwaa immiis; hegaa be7ada neenikka ufaittadasa. Yaatin, neeni geeshsha asa naaqqanau aissi qoppai? Gaasoi bannan Daawita woranau aissi koyai?” yaagiis.

<sup>6</sup> Saa7ooli Yonaataani yootidobaa siyidi, “De7o Xoossai ero, taani Daawita worikke” yaagidi caaqqiis.

<sup>7</sup> Yonaataani Daawita xeesidi, haasayidobaa ubbaa yootiis. Yaatidi Daawita Saa7oolakko ehiis; ehin Daawiti Saa7oolaara kaseegaadankka de7iis.

<sup>8</sup> Haranttuwaakka olai denddiis; Daawiti kiyidi Pilisxxeema asatuura olettiis; olettidi eta gita shochchaa shocin, eti a sinttappe baqatidosona.

<sup>9</sup> Hegaappe simmin, Saa7ooli tooraa oiqqidi ba son uttidaashin, iita ayyaanai GODAAPPE kiitettidi a oiqqiis. Yaatin, Daawiti diittaa diixxishin, <sup>10</sup> Saa7ooli Daawita godaara gattidi sikkanau tooraa xonggiis; shin Daawiti appe halettiis; halettin toorai godan torettiis. He gallassa qammi Daawiti baqatidi kessi ekkiis.

<sup>11</sup> Hegaappe guyyiyan, “Daawita keettaa naagidi, maallado a worite” yaagidi Saa7ooli asaa Daawita soo kiittiis.

Yaatin, Daawita keettaayyiyaa Miikaala, “Hachchi qammi neeni ne shemppuwaa ashshana xayikko, wontto haiqqaasa” yaagada Daawitayyo yootaasu. <sup>12</sup> Miikaala Daawita maskkootiyaara luuxissaasu; luuxissin Daawiti baqatidi kessi ekkiis. <sup>13</sup> Miikaala so misiliyaa ekkada arssan zin77issaasu; zin77issada huuphessaara deeshsha ikisiyaa wottaasu; yaatada afalaa maizzaasu.

<sup>14</sup> Daawita omooddidi ehaana mala, Saa7ooli asaa kiittiis; kiittin Miikaala, “Daawiti sakettiis” yaagaasu.

<sup>15</sup> Hegaappe guyyiyan, Daawita be7ana mala, Saa7ooli he asata guyye kiittidi, ha-gaadan yaagiis; “Taani Daawita woranaadan a arssaara tookkidi ekki ehiite” yaagiis.

<sup>16</sup> SHin asati soo geliyo wode, he so misilee arssan zin77idaagaa demmidosona; a huuphessaara deeshshaa ikisee de7ees.

<sup>17</sup> Saa7ooli Miikaalo, “Neeni aissi hagaadan oottada tana cimmaadii? Ta morkkee kessi ekkanaadan aissi baqatissadii?” yaagiis.

Yaagin Miikaala, “I tana, ‘Tana kessada yedda; hinna xayikko, taani nena worana’ yaagiis” yaagada zaaraasu.

<sup>18</sup> Daawiti baqati attidi, Raaman de7iya Sameelakko biis; biidi Saa7ooli bana oottido ubbabaa Sameelayyo yootiis. Inne Sameeli Raaman de7iya Naayoota giyoosan biidi uttidosona. <sup>19</sup> Saa7ooli, “Daawiti Raaman de7iya Naayootan de7ees” yaagiyoogaa siyiis.

<sup>20</sup> Siyidi Daawita omooddana mala, asaa yaa kiittiis. SHin hananabaa yootiyaageetu citai hananabaa yootishiinne Sameelikka eqqidi eta kaalettishin eti be7ido wode, Saa7ooli yeddido asatu bolli Xoossaa Ayyaanai wodhdhiis; wodhdhin etikka hananabaa yootidosona. <sup>21</sup> Saa7ooli hegea siyido wode, hara asaa yeddiis; etikka qassi hananabaa yootidosona. Saa7ooli hezzantto asaa yeddiis; yeddin hegeetikka hananabaa yootidosona. <sup>22</sup> Yaatin, i ba huuphiyau Raama baanau denddiis; biidi Seekon de7iya gita ollaa gakkii; gakkidi, “Sameelinne Daawitinne awan de7iyoonaa?” yaagidi oichchiis.

Oichchin eti, “Hinin Raaman de7iya Naayootan de7oosona” yaagidi zaaridosona.

<sup>23</sup> Hegaa gishshau, Saa7ooli Raaman de7iya Naayoota biis; qassi Xoossaa Ayyaanai a bolliikka wodhdhiis; wodhdhin Raaman de7iya Naayoota gakkanaashin, hananabaa yootiiddi biis. <sup>24</sup> Bi gakkidi, ba maayuwaa qaaridi, Sameela sinttan hananabaa yootiis; he gallassa ubbaanne qammaa ubbaa kallo zin77iis. Asai, “Saa7oolikka hananabaa yootiyaageetu zateeyye?” giyoogee hegaassa.

## 20

### *Yonaataani Daawita Maaddiis*

<sup>1</sup> Hegaappe guyyiyan, Daawiti Raaman de7iya Naayootappe baqatidi, Yonaataanakko biis; biidi Yonaataana, “Taani ai oottidanaa? Ta mooroi aibee? Ne aawai tana woranau koyiyoogee, taani a waata qohiinee?” yaagidi oichchiis.

<sup>2</sup> Oichchin Yonaataani, “Hegge neeppe haakko! Neeni haiqqakka. Be7a, guuttabaa gidin, gitabaa gidin, ta aawai taayyo yootennan de7iiddi aibanne oottenna. Ta aawai ha yohuwaa taappe aissi qottii? Hegaatto gidenna!” yaagidi zaariis.

<sup>3</sup> SHin Daawiti Yonaataana, “Neeni tana siiqiyoogaa ne aawai keehi erees; ne aawai baayyo, ‘Yonaataani ha yohuwaa eroppo; erikko i azzanana!’ yaagiis. SHin de7o Xoossai ero; ne shemppoi ero; taappenne haiquwaappe gidduwan mexi issi tanggoi attiis” yaagidi caaqqiis.

<sup>4</sup> Caaqqin Yonaataani, “Neeni ootta giidobaa aibanne taani neeyyo oottana” yaagiis.

<sup>5</sup> Yaagin Daawiti hagaadan yaagiis; “Siya, wonttoi aginaa xeeruwaa bonchchiyo gallassa; taani kawuwaara qumaa maana koshshees. SHin taani baada wontti pe7in omarssi gakkanaashin, gaden qossettana. <sup>6</sup> Ne aawai tana koyikko, neeni a, ‘Daawitant-taso asai ubbai laittaa yarshshuwaa yarshshiyo wode gidido gishshau, Beetalheeme ba katamaa eesuwan baana giidi, tana oichchidi biis’ yaaga. <sup>7</sup> Yaagin i, ‘Yaanikko lo77o’ yaagikko, tau ne ashkkarau saro; shin i hanqqettikko, i tana qohanau ba qofaa qachchidoogaa hegan era. <sup>8</sup> Nena gidikko, neeni taayyo ne ashkkaraayyo kehabaa ootta; aissi giikko, neeni tanaara ne ashkkaraara GODAA sinttan maacettadasa. SHin tanan mooroi de7ikko, tana neeni wora! Ne aawaassi tana aatta immoppa” yaagiis.

<sup>9</sup> Yaagin Yonaataani, “Hegge neeppe haakko! Ta aawai nena qohanau ba qofaa qachchidobaa taani eridaakko, neeyyo yootikkinaayye?” yaagidi zaariis.

<sup>10</sup> Yaagin Daawiti, “Ne aawai neeyyo iita zaaruwaa zaarikko, taayyo yootanai oonee?” yaagidi oichchiis.

<sup>11</sup> Oichchin Yonaataani, “Haaya; gade boos” yaagiis; yaatin, naa77aikka gade biidosona.

<sup>12</sup> Bin Yonaataani Daawita hagaadan yaagiis; “GODAI Israa7eela Xoossai ero, taani wontti pe7in ta aawaa qorana. I neeyyo keha qoppikko, taani kiittada nena erissana. <sup>13</sup> SHin ta aawai nena qohanau koyidabaa gidikko, qassi hegaa taani nena erissennan aggikkonne nena saron moissa yeddennan aggikko, GODAI taayyo iito! GODAI ta aawaara issippe gididoogaadan nenaarakka issippe gido. <sup>14</sup> Tana asi worennaadan ta de7o laitta ubban aggenaa siiquwaa, GODAAGAA malaa taayyo ootta. <sup>15</sup> Qassi GODAI Daawita morkketa ubbaa biittaappe xoqollido wodekka, ta keettaa asaappe ne siiquwaa haassoppa” yaagiis.

<sup>16</sup> Hegaa gishshau, Yonaataani, “GODAI Daawita morkketa achcho” yaagidi Daawita keettaa asaara maachchaa maacettiis. <sup>17</sup> Yonaataani Daawita ba huuphedan siiqido gishshau, “Neni tana tumu siiqiyoogaa qonccissanau ane taayyo naa77anttuwaa caaqqa” yaagidi caaqettiis.

<sup>18</sup> Hegaappe guyyiyan, Yonaataani Daawita, “Wontto aginaa xeeruwa bonchchiyo gallassa; neeni uttiyo sohoi mela de7ikko, neeni bannaagee erettana. <sup>19</sup> Wontti pe7in omarssi baada, ha metoi doommido gallassi neeni qosettidosan qosetta; qosettada Exela giyo zaallaappe guyyeera takkashsha. <sup>20</sup> Taani aibakko zambbiyaabaa milatada, a miyyessaara heezzu zubbeta wondafiyan dukkana. <sup>21</sup> Hegaappe guyyiyan, ta ashkkaraa, ‘Baada zubbeta koya’ yaagada kiittana; taani a kiittaidda, ‘Be7a; zubbeti neeppe ha baggaara de7oosona; taakko ekkada ya’ yaagiyaabaa gidikko, haaya; aissi giikko, de7o GODAI ero, neeyyo sa7i saro; nena aibinne bochchenna. <sup>22</sup> SHin taani ta ashkkaraa, ‘Be7a; zubbeti neeppe hini baggaara de7oosona’ yaagiyaabaa gidikko, neeni aggada ba; aissi giikko, GODAI nena wora yeddiis. <sup>23</sup> Neeninne taani haasayido maachchaa gidikko, hegau neepenne taappe gidduwan GODAI merinaayyo markka” yaagiis.

<sup>24</sup> Hegaa gishshau, Daawiti gaden qosettiis. Aginaa xeeruwa bonchchiyo gallassai gakkido wode, Kawoi Saa7ooli qumaa maanau yiis. <sup>25</sup> Yiidi haroode ba uttiyo sohuwan godaa lanqqen uttiis; Yonaataani appe sintta baazzan uttiis; Abaneeri Saa7oola lanqqen uttiis; shin Daawita sohoi mela de7ees. <sup>26</sup> Saa7ooli he gallassa ainne gibeenna; aissi giikko, Saa7ooli, “Daawiti aibakko haniis; he gallassaa bonchchennaadan tuniis; tuma i tuniis” yaagidi qoppiis. <sup>27</sup> SHin wonttetta gallassikka, aginau naa77antto gallassi Daawita sohoi mela de7ees. Saa7ooli ba na7aa Yonaataana, “Isseya na7ai zinokka hachchikka qumaa maanau aibissi yibeennee?” yaagidi oichchiis.

<sup>28</sup> Oichchin Yonaataani, “Daawiti Beetaliheeme baana giidi tana oichchiis; <sup>29</sup> i tana, ‘Nu keettaa asai kataman yarshshuwaa yarshshiyo gishshaunne ta ishaikka tana azazido gishshau, hai tana yeddarkkii; neeni tana siiqiyaabaa gidikko, ane taani ta ishannta be7anau bais’ yaagiis. Kawuwaa maadaappe maanau i yibeennaagee hegaa gishshassa” yaagidi zaariis.

<sup>30</sup> Saa7ooli Yonaataana bolli hanqquwaa eexxi kiyidi hagaadan yaagiis; “Laa geellanne makkalanchcha mishiree na7au, neeni ne huuphen kauyyanaunne nena yelida ne aayyiyo kaushshanau neeni Isseya na7aa bagga gididoogaa taani erikkinaayye? <sup>31</sup> Isseya na7ai ha sa7aa bollan de7ido peeshan ubban neeni woikko ne kawotetta eqqenna. Ha77i kiittada taayyo a ehiissa; aissi giikko, i haiqqanau bessees” yaagiis.

<sup>32</sup> Yaagin Yonaataani ba aawaa Saa7oola, “I aibissi haiqqii? I oottidobi aibee?” yaagidi oichchiis.

<sup>33</sup> Oichchin Saa7ooli Yonaataana woranau tooraa a bolli xonggiis. Hegaa gishshau, Yonaataani ba aawai Daawita woranau qofaa qachchidoogaa eriiis. <sup>34</sup> Eridi, hanqquwaa suulliiddi maadaappe denddi eqqiis; ba aawai Daawita kaushshido gishshau Yonaataani azzanidi, he aginau naa77antto gallassaa mibeenna.

<sup>35</sup> Maallado Yonaataani Daawitaara gaittanau gade biis; biidi banaara issi yelaga na7aa ekki biis. <sup>36</sup> Yonaataani na7aa, “Taani wondafiyan dukkiyo zubbeta woxxada



koya” yaagiis; yaagin na7ai woxxiyo wode, zubbiyaa hefintti dukkiis. <sup>37</sup> Na7ai Yonaataana zubbee wodhdhido sohuwaa gakkido wode, Yonaataani na7aa xegidi, “Zubbee neeppe hini baggaara de7ennee?” yaagiis. <sup>38</sup> Qassikka Yonaataani na7aa, “Eesota; ellellada ba; eqqoppa!” yaagidi ba qaalaa xoqqu oottidi odiis. He na7ai zubbiyaa maxidi ekkidi, ba godaakko ehiis. <sup>39</sup> Na7ai ha yohuwaa ainne erenna; Yonaataananne Daawita xalaalai eroosona. <sup>40</sup> Yonaataani ba ola miishshaa na7aassi immidi, “Tookka ekkada katamaa efa” yaagiis.

<sup>41</sup> Na7ai biidoogaappe guyyiyan, Daawiti he zaallaa guyyeppe kiyiis; kiyidi Yonaataana sinttan gulbbatidi, ba som77uwaa biittaa boshissidi heezzutoo ziggiis. Hegaappe guyyiyan, issoi issuwaara yerettidi yeekkidosona; shin Daawiti Yonaataanappe aruwaa yeekkiis.

<sup>42</sup> Yonaataani Daawita, “Saro ba; ‘Ne giddooninne ta gidдон, ne zersetta giddooninne ta zersetta gidдон, GODAI merinaayyo marka de7o’ yaagidi nuuni naa77ai GODAA sunttan caaqqida” yaagiis. Hegaappe guyyiyan, Daawiti denddidi biis; Yonaataanikka katamaa guyye simmiis.

## 21

### *Daawiti Saa7oolappe Baqatiis*

<sup>1</sup> Daawiti qeesiyaa Abimelekakko Nooba katamaa biis; Abimeleki Daawitaara gaitanau kokkoriiddi yiidi, “Neeni aibissi nerikka de7ai? Aibissi hara asi nenaara de7ennee?” yaagidi oichchiis.

<sup>2</sup> Oichchin Daawiti qeesiyaa Abimeleka, “Kawoi tana, ‘Taani nena kiittido yohuwaanne azazido azazuwaa ooninne eroppo’ yaagidi tana issibaa azaziis. Ta asati issi sohuwan tanaara gaitanaadan yootaas. <sup>3</sup> Ha77i ne kushiyan aibi de7ii? Ichchashu bashe oitta woikko de7idabaa aibanne taayyo immarkii” yaagiis.

<sup>4</sup> Yaagin qeese Daawita, “Asi ubbi miyo oitti taayyo baawa; shin geeshsha oittai de7ees; he asati banttana maccaasappe naagidabaa gidikko, eti maanau danddayoosona” yaagiis.

<sup>5</sup> Yaagin Daawiti qeesiyaa, “Tuma nuuni ha kiitau kiyooosappe doommidi, maccaasappe naagettida; harai atto geeshsha gidenna kiitaa wodekka eta asatetta geeshsha; hachchi usa aadhdhidi geeyanau koshshennee!” yaagiis. <sup>6</sup> Hegaa gishshau, qeese Daawitayyo geeshsha oittaa immiis; aissi giikko, qeesiyaayyo de7iyai ho77iya oittaa a sohuwan wottanau GODAA sinttappe denttido geeshsha oittaa xalaala.

<sup>7</sup> Saa7oola ashkkaratuppe issi bitanee he gallassa GODAA sinttan naagiiddi de7ees; a sunttai Doiqa; i Eedooma biittaa asa; Saa7oola mehiyaa heemmiyaageetuyyo i halaqa.

<sup>8</sup> Daawiti Abimeleka, “Toori woikko bisoi neeyyo de7anddeeshsha? Kawuwaa kiitai eesoyido gishshau, taani ta bisuwaa woikko hara ola miishshaa ehabeikke” yaagidi oichchiis.

<sup>9</sup> Oichchin Abimeleki, “Neeni Eela Zanggaaran worido Pilisxxeemiyaa Gooliyaada bisoi hagan de7ees; curqqan i xaaxettidi, eefuudiyaa giyo maayuwaappe guyye baggaara de7ees. Neeni koyiyaabaa gidikko a ekka; appe attin, hara bisoi hagan baawa” yaagidi zaariis.

Yaagin Daawiti, “Hegaa mala hara bisoi baawa; a taayyo hamma” yaagiis.

<sup>10</sup> He gallassi Daawiti denddidi, Saa7oolappe baqatidi, Gaate katamaa Kawuwaa Akiishakko biis. <sup>11</sup> SHin Akiisha oosanchchati, “Hagee Daawiti ba biittan kawo gidenneeyye? Qassi maccaasati yexxiiddinne duriiddi, ‘Saa7ooli sha7aa woriis; Daawiti tammu sha7aa woriis’ yaagidi sabbido bitaniyaa gidenneeyye?” yaagidosona.

<sup>12</sup> Daawiti eta haasayaa ba wozanan oiqqidi, Gaate Kawuwaa Akiisha keehippe yayyiis. <sup>13</sup> Hegaa gishshau, Daawiti eta sinttan wozani boshettido asa milatiis; eti a



oiqqana haniyo wode, gooyiyaabaadan kare penggiyaa ifittaa qaacerettesinne bu-uchchaara duge zaaridi saassuwaa lorkayees. <sup>14</sup> Akiishi ba oosanchchatuyyo, “Be7ite; hagee bitanee gooyees. Intte aissi a taakko ehiidetii? <sup>15</sup> Ha bitanee ta sinttan gooyanaadan intte ehiidoogee, ta matan hari gooyiyaabi xayiineeyye? Ha bitanee ta soo gelanau bessiiyye?” yaagiis.

## 22

### *Qeeseta Woridosona*

<sup>1</sup> Daawiti Gaate katamaappe baqatidi, Adulaama katamaa matan de7iya gong-goluwaa biis; a ishanttinne a aawaa so asai ubbai hegaa siyido wode, eti yaa duge akko wodhdhdidosona. <sup>2</sup> Metootidaageeti, woikko acuwan gelidaageeti, woikko sa7ai iitidoogeeti ubbati Daawitakko shiiqididosona; shiiqin i etayyo halaqa gidiis. Issi oiddu xeetaa gidiya asai aara de7ees.

<sup>3</sup> Daawiti he sohuwaappe denddidi, Moo7aaban de7iya Mixiphpha biis; biidi Moo7aaba kawuwaa, “Xoossai taayyo oottanabaa taani erana gakkanaassi ta aayyiyoonne ta aawaa ne achchan wotissarkkii” yaagidi woossiis. <sup>4</sup> Hegaa gishshau, Daawiti eta Moo7aaba kawuwaa achchan wottiis; qatuwaa gidдон Daawiti qosetti uttido wode ubban eti kawuwaa achchan de7idosona.

<sup>5</sup> Hegaappe guyyiyan, hananabaa yootiya Gaadi Daawitakko yiidi, “Qatuwaa gidдон gam77oppa; ha sohuwaappe denddada Yihudaa biitti ba” yaagiis; yaagin Daawiti he sohuwaappe Hereta woraa biis.

<sup>6</sup> Daawitinne a asai beettidoogaa Saa7ooli siyiis; Saa7ooli Gib77a katamaa matan de7iya keran, taamaariskka giyo mittaa garssan tooraa oiqqidi uttiis; a oosanchchati a dooddidi eqqididosona. <sup>7</sup> Saa7ooli eta, “Inttenoo, Biniyaama asatoo, siyite! Isseya na7ai goshshaanne woiniyaa tokkiyoosaa intte ubbaayyo immanee? SHaalaqatanne mato halaqata oottidi inttena sunttanee? <sup>8</sup> Intte ubbai ta bolli maqettideta; ta na7ai Isseya na7aara maachchaa maacettidoogaa ooninne taayyo yootibeenna. Intteppe issi asinne taayyo qarettenna; hachchiigaadankka ta na7ai ta ashkkaraa tana worissanau denttidoogaa ooninne taayyo yootibeenna” yaagiis.

<sup>9</sup> Yaagin Saa7oola oosanchchatuura eqqida Eedoomiyaa Doiqi Saa7oola, “Isseya na7ai Ahixuuba na7aa Abimelekakko Nooba katamaa biidaagaa taani be7aas. <sup>10</sup> Abimeleki Daawiti oottanabaa GODAA oichchiis; yaatidi Daawitayyo shinqqiyaa immiis; qassi Pilisxxeemiyaa Gooliyaada bisuwaakka ayyo immiis” yaagiis.

<sup>11</sup> Hegaappe guyyiyan, Ahixuuba na7aa qeesiyaa Abimelekanne Nooba kataman qeese gididi de7iya a aawaa so asaa ubbaa kawoi xeesissin, eti kawuwaakko yiidosona. <sup>12</sup> Saa7ooli Abimeleka, “Ahixuuba na7au, siya” yaagiis.

Yaagin Abimeleki, “Ero ta godau” yaagiis.

<sup>13</sup> Saa7ooli a, “Neeninne Isseya na7ai ta bolli aibissi maqettidetii? Neeni ayyo oittaanne bisuwaa immada, i tana woranau denddana mala, ayyo Xoossaa aissi oichchadii?” yaagiis.

<sup>14</sup> Yaagin Abimeleki kawuwaa, “Ne ashkkaratu ubbaa gidдон Daawitadan amanettiyai, kawuwaara bollotidai, nena naagiyaageeta azaziyainne ne so asaa gidдон keehippe bonchchettiyai hari oonee? <sup>15</sup> Taani ayyo Xoossaa oichchishin, hagee tau koiro? Akkaikka! Kawuwau, tana ne ashkkaraa woikko ta aawaa so asa ubbaa ainne mootoppa; aissi giikko, taani ne ashkkarai ha yohuwaa guutta gidin gita gidinkka mule erikke” yaagiis.

<sup>16</sup> Yaagin kawoi, “Abimelekaa, neeninne ne aawaa keettaa asai ubbai haiqqana” yaagiis. <sup>17</sup> Hegaappe guyyiyan, Saa7ooli ba matan eqqidi naagiyaageeta, “GODAA qeeseta worite; aissi giikko, etikka Daawita maaddidosona; Daawiti baqatidoogaa

eriiddi, taayyo yootibookkona” yaagiis. SHin kawuwaa oosanchchati GODAA qeesetu bolli bantta kushiya wottennan ixxidosa.

<sup>18</sup> Yaanin kawoi Doiqa, “Qeeseta neeni wora” yaagidi azaziis. Azazin Eedoomiyaa Doiqi qeeseta shociis; shocidi he gallassi eefuudiyaa maayida hosppun tammanne ichchashu qeeseta i woriis. <sup>19</sup> Hegaa bollikka qeesetu katamaa, Nooba qara bisuwan busakkiis; he kataman de7iya attumaa, maccaa, naata, yiirata, meheta, haretanne dorssata qara bisuwan Doiqi suppu oottiis.

<sup>20</sup> SHin Ahixuuba na7aa Abimeleka naatuppe Abiyaataara geetettiya issi na7ai kessi ekkidi, Daawitakko baqatiis. <sup>21</sup> Baqati biidi, Saa7ooli GODAA qeeseta woridoogaa Daawitayyo yootiis. <sup>22</sup> Daawiti Abiyaataara, “Eedoomiyaa Doiqi he sohuwan de7iyooogaa taani be7ido wode, i Saa7oolayyo yootanaagaa he gallassi eraas. Ne aawaa so asaa ubbaa haiquwau oishettiya tana. <sup>23</sup> Simmi neeni tanaara de7a; yayyoppa. Nena woranau koyiya urai tana woranau koyiyaagaa; shin neeni ta achchan saro de7ana” yaagiis.

## 23

### *Daawiti Qa7iila Katamaa Pilisxeematuppe Ashshiis*

<sup>1</sup> “Pilisxeema asati Qa7iila katamaa oloosona; audiyaakka bonqqoosona” yaagiyo oduwaa Daawiti siyiis.

<sup>2</sup> Siyidi Daawiti GODAA, “Taani baada Pilisxeema asata oloo?” yaagidi oichchiis.

GODAI Daawita, “Ba; Pilisxeema asata ola; Qa7iila katamaa ashsha” yaagiis.

<sup>3</sup> SHin Daawita asati, “Nuuni hagan Yihudaa biittan de7iiddinne yayyoos; shin Pilisxeema asatuura olettanau nuuni Qa7iila katamaa biiddi, waani aatti yayyandoniishsha!” yaagidosona.

<sup>4</sup> Hegaa gishshau, Daawiti zaarettidi GODAA oichchiis; oichchin GODAI a, “Pilisxeema asata taani neeyyo aatta immana; dendda; denddada Qa7iila katamaa ba” yaagiis. <sup>5</sup> Daawitinne a asai Qa7iila katamaa biidi, Pilisxeema asatuura olettidosona; olettidi eta mehiyaa di77idosona. Etappe daro asaa woridi, Daawiti Qa7iila katamaa asaa ashshiis.

<sup>6</sup> Abimeleka na7ai Abiyaataari Daawitakko Qa7iila katamaa baqatiyo wode, eefuudiyaa giyo maayuwaa ekki biis.

<sup>7</sup> Daawiti Qa7iila katamaa biidoogaa Saa7ooli siyiis; siyidi, “Xoossai Daawita ta kushiyan aatti immiis; aissi giikko, ifittainne hiraqoi de7iyo katamaa gelidi, barkka qashettiis” yaagiis. <sup>8</sup> Qa7iila katamaa biidi, Daawitanne a asaa dooddana mala, Saa7ooli ba olanchchata ubbaa xeesiis.

<sup>9</sup> Saa7ooli ba bolli iitabaa maqettidoogaa Daawiti erii; eridi qeesiyaa Abiyaataara, “Eefuudiyaa haa ekka ya” yaagiis. <sup>10</sup> Hegaappe guyyiyan Daawiti, “Abeet GODAU, Israa7eela Xoossau, ta gaasuwan Saa7ooli Qa7iila katamaa bashshanau maqettidoogaa taani ne ashkkaarai wurssada siyaas. <sup>11</sup> Qa7iila katamaa asai tana Saa7oolayyo aattidi immaneesha? Taani ne ashkkaarai siyidoogaadan Saa7ooli tumukka haa yaaneeshsha? Abeet GODAU, Israa7eela Xoossau, taayyo ne ashkkaarayyo yootarkkii” yaagiis.

Yaagin GODAI Daawita, “Ee; Saa7ooli yaana” yaagidi zaariis.

<sup>12</sup> Daawiti, “Qa7iila katamaa asati tananne ta asaa Saa7oolayyo aattidi immaneesha?” yaagidi zaarettidikka GODAA oichchiis.

Oichchin GODAI, “Ee; eti inttena aattidi immana” yaagiis. <sup>13</sup> Daawitinne usuppun xeetu gidiya asai Qa7iila katamaappe kiyidi, issisaappe issisaa hemetaa oiqqidosona. Daawiti Qa7iila katamaappe baqatidoogaa Saa7ooli siyido wode, baanau qoppidoogaa aggi bayiis.

### *Saa7ooli Daawita Oiqqanau Koyiis*

<sup>14</sup> Daawiti bazzo qatotuuninne Ziifa bazzuwan de7iya keratun de7iis. Saa7ooli a demmanau ubba gallassi koyees; shin Xoossai a Saa7oola kushiyan aatti immibeenna. <sup>15</sup> Daawiti Ziifa bazzuwan de7iya Horeesha giyoosan de7ishin, Saa7ooli bana woranau kiyidoogaa Daawiti eriiis. <sup>16</sup> Saa7oola na7aa Yonaataani denddidi, Daawitakko Horeesha biis; biidi Daawita GODAN wolqqaa demmanaadan minttettiiddi, <sup>17</sup> “Yayyoppa; ta aawaa Saa7ooli nena kushiyaaninne bochchenna; neeni Israa7eela bolli kawotana; taanikka neeppe garssaara haarana; harai atto ta aawai Saa7oolikka hegaa erees” yaagiis. <sup>18</sup> Eti naa77aikka GODAA sinttan issoi issuwaara maacettidosona; Daawiti Horeeshan gam77in Yonaataani ba soo biis.

<sup>19</sup> Ziifa asati Saa7oolakko Gib77a katamaa biidi, “Daawiti Yasemoonappe tohossa baggaara Hakiila Deriyaa bolli Horeesha qatuwan nu matan qosetti uttiis. <sup>20</sup> Nu kawuwau, ha77ikka neeni dosido wode haa duge wodhdha; yaatikko, nuuni a ne kushiyan aatti immana” yaagidosona.

<sup>21</sup> Yaagin Saa7ooli eta, “Intte taayyo qarettido gishshau, inttena GODAI anjjo. <sup>22</sup> Biidi ane gujjidikka geeshshite; Daawiti darotoo awa biyaakkonne qassi yan ooni a be7idaakko, qoridi erite; aissi giikko, i keehi cincca giyoogaa taani siyaas. <sup>23</sup> Daawiti qosettiyo sohota ubbaa be7idi, muruta yohuwaa ekkidi, taakko simmidi yiite. Hegaappe guyyiyan, taani inttenaara baana; i he heeran de7ikko, taani a kumetta Yihudaa yaraa gidдон demmana gakkanau koyana” yaagiis.

<sup>24</sup> Hegaa gishshau, eti Saa7oolappe sinttatidi Ziifa biidosona. Daawitinne a asai Yasemoonappe tohossa baggaara de7iya Maa7oona bazzuwan Aaraba giyo garan de7oosona. <sup>25</sup> Saa7oolinne a asai Daawita koyanau biidosona. Daawiti hegaa siyido wode, zaallaakko wodhdhidi, Maa7oona bazzuwan uttiis. Saa7ooli hegaa siyido wode Maa7oona bazzuwaa Daawita koyiiddi biis. <sup>26</sup> Saa7ooli deriyaappe issi bagga miyyiyaara bees; Daawitinne a asai hinkko bagga miyyiyaara boosona. Eti Saa7oolappe baqatanau eesotoosona; aissi giikko, Saa7oolinne a asati, Daawitanne a asata oiqqanau mati uttididosona. <sup>27</sup> SHin kiitettidaagee Saa7oolakko yiidi, “Haaya! Pilisxxeema asati biittaa bolli woraajjididosona” yaagiis. <sup>28</sup> Saa7ooli Daawita koyiyoogaa aggidi, Pilisxxeema asatuura olettanau biis. Hegaa gishshau, he sohoi “SHAakkiya zaallaa” geetettiis. <sup>29</sup> Daawiti he sohuwaappe kiyidi, Enggaada katamaa matan de7iya qatotun uttiis.

## 24

### *Daawiti Saa7oola SHemppuwaa Ashshiis*

<sup>1</sup> Saa7ooli Pilisxxeema asata yedettiyoosaappe simmin, “Daawiti Enggaada katamaa matan de7iya bazzuwan de7ees” giidi ayyo yootidosona. <sup>2</sup> Israa7eela ubbaa giddoppe doorettida heezzu sha7u asaa Saa7ooli ekkidi, Daawitanne a asaa koyanau, “Wora Deeshshati Geessiyoo Zaallaa” giyoosaa mati biis.

<sup>3</sup> Saa7ooli ogiyaa doonan dorssaa birddiyaa matan de7iya gonggoluwaaakko yiis; yiidi sheeshshau uttanau gonggoluwaa gidдо geliis. Geliyo wode Daawitinne a asai gonggoluwaaayyo gidдоkko shiiqidi uttididosona. <sup>4</sup> Daawita asai a, “‘Hekko taani ne morkkiyaa ne kushiyan aatta immana; neeni a ne koyidoogaadan oottana’ yaagidi GODAI neeyyo yootido gallassai hachcha” yaagidosona. Daawiti Saa7oola erissennan shiiqidi, Saa7oola maayuwaa xeeraappe qanxxi ekkiis.

<sup>5</sup> Qanxxidoogaappe guyyiyan, Daawiti ba wozanan azzaniis. <sup>6</sup> Azzanidi Daawiti ba asata, “GODAI tiyidi kawoyido ta godaa taani hegaa oottanaagaa woikko a bolli ta kushiya denttanaagaa GODAI taappe haasso; aissi giikko, GODAI tiyidi kawoyidoogee a” yaagiis. <sup>7</sup> Daawiti hagaadan seeridi, Saa7oola ba asan boshissennan diggiis. Saa7ooli gonggoluwaa giddoppe kiyidi, ba ogiyan geliis.

<sup>8</sup> Saa7ooli biidoogaappe guyyiyan, Daawiti gonggoluwaa giddoppe kiyidi, Saa7oola, “Ta godau, kawuwau!” yaagidi xeesiis; xeesin Saa7ooli guyye simmidi xeelliis; Daawiti

biittan duge gufannidi, Saa7oolayyo ziggiis. <sup>9</sup> Yaatidi Daawiti Saa7oola, “ ‘Daawiti nena qohanau koyees’ giya asatu qaalaa neeni aibissi siyai? <sup>10</sup> Ha gonggoluwaa gidдон GODAI nena hachchi taayyo aatti immidoogaa neeni ne aifiyan be7adasa; taani nena woranaadan amaridaageeti tana denttettidosona; shin taani, ‘GODAI tiyidi kawoyidoogaa i gidiyo gishshau, taani ta godaa bolli ta kushiya denttikke’ yaagada nena ashshaas. <sup>11</sup> Ta aawau, be7a; ta kushiyan de7iya ne maayuwaa xeeraa haggaa xeella! Ne maayuwaa xeeraappe qanxxa ekkaas; shin nena worabeikke; taani nena qohabeennaagaanne makkalabeennaaggaa akeekada era; taani nena qohabeikke; shin neeni tana woranau shankkataasa. <sup>12</sup> Nebaanne tabaa GODAI pirddo; GODAI neeni tana qohidoogaa haluwaa kesso; shin taani ne bolli ta kushiya denttikke. <sup>13</sup> Beni wode, ‘Iitaa oottiyaageetuppe iitabi kiyees’ yaagiyo leemisoi de7ees; heggaa gishshau, taani nena kushiyaanne bochchikke. <sup>14</sup> Israa7eela kawoi o bolli kiyidee? Neeni oona oiqqanau koyai? Haiqqida kanaa woikko kasttolliyyaa koyai? <sup>15</sup> GODAI nu gidдон daannato; nebaanne tabaa i pirddo; ta yohuwaa xeellidi, ta gishshau i mootetto; ne kushiyaappe tana i ashsho” yaagiis.

<sup>16</sup> Daawiti Saa7oolayyo haasayiyoogaa wurssido wode, Saa7ooli Daawita, “Ta na7au Daawitaa, hegee ne qaalee?” yaagiis; yaagidi Saa7ooli ba qaalaa xoqqissidi yeekkiis. <sup>17</sup> Qassikka Daawita, “Neeni taappe aadhdhida xillo; aissi giikko, taani neeyyo iitabaa oottin, neeni taayyo lo77obaa oottadasa. <sup>18</sup> GODAI tana hachchi neeyyo aatti imminkka neeni tana worabeenna gishshau, taayyo neeni oottido lo77obaa tana bessadasa. <sup>19</sup> Asi ba morkke demmidi qohennan yeddiyye? Neeni taayyo hachchi oottido kehatettaa gishshau, GODAI nena anjjo. <sup>20</sup> Ha77ikka neeni Israa7eelau kawo gidanaagaanne Israa7eela kawotettaa ne maataa garssan eqqanaaggaa taani erais. <sup>21</sup> Ha77i simmi taappe guyyiyan, ta zereetta neeni duuttennaadaaninne ta sunttaakka ta aawaa keettaappe quccennaadan GODAA sunttan taayyo caaqqaa” yaagiis.

<sup>22</sup> Yaagin Daawiti Saa7oolayyo caaqqiis. Hegaappe guyyiyan, Saa7ooli ba soo simmidi biis; Daawitinne a asai pude qatuwaa biidosona.

## 25

### *Sameela Haiquwaa*

<sup>1</sup> Sameeli haiqqiis; haiqqin Israa7eela asati ubbai shiiqidi, ayyo yeekkidosona; Raama kataman de7iya a son moogidosona.

### *Daawita, Naabaalanne Abigaalo*

Hegaappe guyyiyan, Daawiti Paaraana bazzuwaa biis. <sup>2</sup> Maa7oonan issi bitanee de7ees; he bitaniyaayyo aqoi Qarmmeloosan de7ees; i daro dure; issi sha7u deeshshatinne heezzu sha7u dorssati ayyo de7oosona. I eta ikisiyaa Qarmmeloosa kataman meedees. <sup>3</sup> He bitaniyaa sunttai Naabaala; a keettaayee sunttai Abigaalo. A eranchchanne puulanchcha maccaasa; shin i keettaawai meqetti bainna iita asa. I Kaaleebaa yara.

<sup>4</sup> Daawiti bazzuwan de7iiddi, dorssaa ikisiyaa Naabaali meediyoogaa siyiis. <sup>5</sup> Daawiti tammu wodallata hagaadan yaagidi kiittiis; “Naabaalakko Qarmmeloosa katamaa biidi, ta sunttan a sarotite; <sup>6</sup> ‘Saro de7ai! Neenikka ne keettaa asaikka saro! Neessi giidobai ubbai saro de7ii!

<sup>7</sup> “ ‘Neeni dorssaa ikisiyaa meediyoogaa taani siyaas; ne dorssaa heemmiyaageeti nunaara issippe de7ido wode, nuuni eta genibookko; eti Qarmmeloosa kataman uttido wode ubban etabaappe aibinne paccibeenna. <sup>8</sup> Heggaa neeni ne ashkkarata oichchikko, eti neeyyo yootana. Nuuni hachchi gibira gallassi neekko yiido gishshau, ta wodalla asatussi hayyanaa keha; ne kushiyan de7iyaabaappe ne ashkkaratuyyoonne ne na7aa Daawitayyo hayyanaa imma’ yaagite” yaagidi azaziis.



<sup>9</sup> Daawita asati Naabaalakko gakkidi, Daawita kiitaa ayyo yootidosona; yootidi hegan naagidosona.

<sup>10</sup> Naabaali Daawita ashkkarata, “Daawiti oonee? Isseya na7ai oonee? Ha wodiyan daro ashkkarati bantta godatuppe baqatoosona. <sup>11</sup> Ta oittaa, ta haattaanne ta dorssaa meediyaageetuyyo shukettida ashuwaa denttada, ha oonakkonne yiidosai erettenna asatuyyo aissi immoo?” yaagiis.

<sup>12</sup> Yaagin Daawita asati simmidi guyye biidosona. Bi gakkidi Naabaali giidobaa ubbaa Daawitayyo yootidosona. <sup>13</sup> Daawiti ba asata, “Intte bisuwaa bisuwaa gixxite” yaagiis; yaagin ubbatikka bantta bisuwaa bisuwaa gixxidosa; Daawitikka ba bisuwaa gixxiis. Daawiti oiddu xeetaa gidiya asatuura pude biis; naa77u xeetu asai etabaa naagiiddi attiis.

<sup>14</sup> Ashkkaratuppe issoi Naabaala keettaayyiyo Abigaalo hagaadan yaagiis; “Daawiti bazzuwan de7iiddi nu godaa, ‘Saro’ gaanau asa kiittiis; shin i eta cayiis. <sup>15</sup> Gidikkokka, ha asati nuuyyo keehippe lo77o; eti nuna genibookkona; nuuni etaara issippe dembban pe7ido wode ubban nubaappe aibinne paccibeenna. <sup>16</sup> Nuuni nu dorssaa wudiyaa eta matan heemmiyo wode, qamminne gallassi eti nuuyyo dirssa gididosona. <sup>17</sup> Hayyanaa ha yohuwaa waatanaakkonne qoppa; aissi giikko, nu godaa bollinne a so asaa bolli kobabai kiyana hanees. Nu godai heгаа mala meqetti baina iita asa gidido gishshau, ooninne ayyo haasayanau danddayenna” yaagiis.

<sup>18</sup> Abigaala sohuwaarakka naa77u xeetu komppo oittaaanne naa77u ogoro woine eessaa, xiixettida dorssata ichchashata, tammanne laappun kilo giraame tiyaa xiixaa, issi xeetu wurcco woiniyaa teeraanne balasiyaa lichchakuwaa melaappe naa77u xeetaa ekkada, hariyan caanaasu. <sup>19</sup> Yaatada ashkkarata, “Intte taappe sinttau aadhdhidi biite; taani intte geeduwaa kaallana” yaagaasu; shin ba keettaawaa Naabaalayyo ainne yootabeikku. <sup>20</sup> Ba hariyaa toggada deriyaara duge zanggaaraa wodhdhiyo wode, Daawitinne a asai ikko simmidi duge wodhdhoosona; wodhdhin a etaara gaittaasu.

<sup>21</sup> Daawiti ba wozanan, “Abaappe aibinne paccennaadan taani ha bitaniyaa aquwaa ubbaa naagidoogee coo mela; taani lo77idoogaa kushiya i taayyo iitaa zaariis. <sup>22</sup> Wontto maallado gakkanaashin, taani abaa gidida ubbaappe issi attumaanne paxa aggikko, Xoossi tana paxa aggoppo” yaagiis.

<sup>23</sup> Abigaala Daawita be7ido wode, hariyaappe eesota wodhdhada, Daawita sinttan biittan gufannada ayyo ziggaasu. <sup>24</sup> A a tohuwan wullada, “Hai ta godau, ha mooroi ta xalaalaassa gido! Tana ne ashkkariyo haasayissarkkii; taani ne ashkkariyaa haasayiyoogaa siyarkkii. <sup>25</sup> Ha meqetti baina iita bitaniyaabaa, Naabaalabaa siyoppa; ‘Naabaala’ giyoogee ‘Eeya’ giyoogaa; i ba sunttaadankka eeya. Ta godau, neeni kiittido asata taani ne ashkkariyaa be7abeikke.

<sup>26</sup> “De7o GODAI ero! Ne shemppoi ero! Neeni suutta gussennaadaaninne ne kushen ne halo kessennaadan, nena ta godaa teqqidaagee GODAA. Ne morkketinne nena ta godaa qohanau koyiyaageeti Naabaaladan hanona. <sup>27</sup> Ha imotai taani ne ashkkariyaa neeyyo ta godaayyo ehiidoogee nena kaalliya asatuyyo imetto. <sup>28</sup> Hai ta godau, taani ne ashkkariyaa balido balaa atto yaaga! Neeni GODAA olaa olettiyo gishshau, GODAI nenanne ne zerttaa kawoyana. Neeni de7ido laitta ubban iitatetti ne bolli beetto.

<sup>29</sup> “Ai asinne nena woranau koyikko, issi urai ba al77o miishsha naagiyoogaadan, GODAI ne Xoossai nena saro naagana. SHin shuchchaa yambbarshshan oliyoogaadan, i ne morkketu de7uwaa olana. <sup>30</sup> GODAI ta godaayyo oottanau haasayido kehatettaa ubbaa oottiyo wodenne Israa7eela bolli kawoyiyo wode, <sup>31</sup> gaasoti bannan suutta gussidoban woikko ba halo kessidoban ta godaa wozanai dagammennanne hirgenna. GODAI neeyyo kehido wode, tana ne ashkkariyo dogoppa” yaagaasu.

<sup>32</sup> Yaagin Daawiti Abigaalo, “Nena tanaara gaittanau hachchi kiittida GODAI, Israa7eela Xoossai galatetto. <sup>33</sup> Neeni lo77o qoppido gishshaunne taani asa suutta



gussennaadaani ta kushiyan halo kessennaadan teqqido gishshau, anjjetta. <sup>34</sup> Hegee bannaakko, tana nena qohennaadan teqqida de7o GODAI, Israa7eela Xoossai ero! Neeni tanaara gaittanau eesotada yeennaakko, sa7ai wonttana gakkanaashin, Naabaal-abaa gidiya issi attumaasinne paxa attenna” yaagiis. <sup>35</sup> Abigaala ayyo ehiidobaa i kushiyaappe Daawiti ekkidi, “Ne soo saro gakka. Taani ne qaalaa siyaas; ne oishaakka akkaas” yaagiis.

<sup>36</sup> Abigaala simmada Naabaalakko yiyo wode, kawo son giigiya gibiraa mala gibiraa miziiddi son uttiis; Naabaali keehippe mattottidi, ba wozanan ufaittees. Hegaa gishshau, sa7ai wonttanaashin, Abigaala ayyo aibanne qaattabeikku. <sup>37</sup> Maallado Naabaali mattuwaa zaaridoogaappe guyyiyan, a keettaayyiyaa ha yoho ubbaa ayyo yootaasu; Naabaala wozanai daafurin i jollu giis. <sup>38</sup> Tammu gallassaappe simmin, GODAI Naabaala shocin, i haiqqiis.

<sup>39</sup> Naabaali haiqqidoogaa Daawiti siyido wode, “GODAI galatetto! Naabaali tana cayidoogaa haluwaa GODAI kessiis; taani a ashkkarai iitabaa oottennaadan teqqiis; Naabaali oottido iitatettaa GODAI a huuphiyan zaariis” yaagiis.

Hegaappe guyyiyan, Daawiti Abigaalo ekkanaa kiitaa yeddidi oishissiiis. <sup>40</sup> Daawita ashkkarati Qarmmeelooosa katamaa Abigaalikko biidi, “Neni Daawita gelanaadan nena ekki baanau i nuna neekko kiittiis” yaagidosona.

<sup>41</sup> Abigaala biittan gufanna ziggada, “Taani ne ashkkariyaa neeyyo kiitettanaunne ne ashkkaratu tohuwaa meeccanau giiga uttaas” yaagaasu. <sup>42</sup> Abigaala eesuwan daddada ba hariyaa toggaasu; i danggiriixeti ichchashati o kaallidi biidosona; Daawita ashkkaratuura baada, Daawita gelaasu.

<sup>43</sup> Daawiti hagaappe kase Iziraa7eeliyo Ahino7aamoko ekkiiis; eti naa77aikka a keettaayeta. <sup>44</sup> Saa7ooli Daawita keettaayyiyo, ba na7iyo Miikaalo Galliima kataman yelettida Laawisha na7aa Palxxi7eelassi immiis.

## 26

### *Daawiti Saa7oola SHemppuwaa Naa77anttokka Ashshiiis*

<sup>1</sup> Ziifa asati Saa7oolakko Gib77a katamaa biidi, “Daawiti Yasemoona sinttan de7iya Hakiila giyo keran qosetti uttiis gidennee?” yaagidosona. <sup>2</sup> Yaagin Saa7ooli daddidi, Israa7eelatuppe doorettida heezzu sha7u asata ekkidi, Daawita koyanau Ziifa bazuwaa biis. <sup>3</sup> Saa7ooli Yasemoona sinttan de7iya Hakiila keraa bolli ogiyaa lanqqiyan dunkkaaniis; shin Daawiti he bazuwan uttiis. Saa7ooli a kaallidi yaa biidoogaa eridi, <sup>4</sup> kafuwaa yeddidi, Saa7ooli tumukka he sohuwaa gakkidoogaa geeshshiiis. <sup>5</sup> Daawiti daddidi, Saa7ooli dunkkaanidosaa biis; biidi Saa7oolinne ola gadaawai Neera na7aa Abaneeri zin77ido sohuwaa be7iis. Saa7ooli qato gidдон zin77iis; olanchchati a yuushuwan de7oosona.

<sup>6</sup> Daawiti Hiitiyaa Abimelekanne Xaruuya na7aa Yoo7aaba ishaa Abishaaya, “Saa7ooli galchchidosaa tanaara baanai oonee?” yaagidi oichchiis.

Oichchin Abishaayi, “Taani nenaara baana” yaagiis.

<sup>7</sup> Hegaa gishshau, Daawitinne Abishaayi he gallassa qammi olanchchatukko yiyo wode, Saa7ooli ba tooraa huupheessaara biittan toridi, qato gidдон zin77idaagaa demmidosona. Abaneerinne olanchchati a yuuyi aadhdhidi zin77idosona.

<sup>8</sup> Abishaayi Daawita, “Xoossai ne morkkiyaa hachchi ne kushiyan aatti immiis; taani ta tooran a issitoo biittaara gattada sikkais; taani a naa77utoo caddanau koshshenna” yaagiis.

<sup>9</sup> SHin Daawiti Abishaaya, “Neni a woroppa; GODAI tiyido kawuwaa bolli ba kushiya denttiya oonanne GODAI qaxxayana” yaagiis. <sup>10</sup> Qassikka i Abishaaya, “De7o GODAI ero! GODAI a shocanaagaa taani erais; ba gallasai gakkini i haiqqana, woikko olettanau biidi i xayana. <sup>11</sup> GODAI tiyido kawuwaa bolli taani kushiya denttennaadan

tana GODAI teqqo. Ane a huuphessan de7iya tooraanne haattaa otuwaa ekkada hindda” yaagiis.

<sup>12</sup> Yaagin Daawiti Saa7oola huuphessan de7iya tooraanne haattaa otuwaa ekkiis; ekin eti biidosona. SHin eta ooninne be7ibeenna, woikko ooninne eribeenna, woikko ooninne beegottibeenna; GODAI wolqqaama xiskkuwaa eta bolli yeggido gishshau, ubbatikka xiskkuwaa kairidosona.

<sup>13</sup> Daawiti hefintti pinnidi, hara keraa huuphiyan unddenna sohuwan haakkidi eqqiis. <sup>14</sup> Daawiti Saa7oola olanchchatanne Neera na7aa Abaneera, “Abaneeraa! Abaneeraa! Taani xeejiyoogaa siyikkii?” yaagidi waassiis.

Waassin Abaneeri, “Ha xeejidi kawuwaa xiskkuwaa diggiyaagee oonee?” yaagiis.

<sup>15</sup> Yaagin Daawiti, “Neeni wozannaama asa gidikkiyye? Israa7eela gidдон ne mali ooni de7ii? Yaatin, kawuwaa ne godaa aibissi naagikkii? Aissi giikko, issi asi kawuwaa ne godaa woranau yaa biis. <sup>16</sup> Neeni oottidobi lo77o gidenna. De7o GODAI ero! Neeninne ne olanchchati GODAI tiyido intte godaa naagibeenna gishshau, intte haiqqanau bessees. Kawuwaa tooraanne a huuphessan de7iya haattaa otuwaa be7ai?” yaagiis.

<sup>17</sup> Saa7ooli Daawita qaalaa gidiiyoogaa eridi, “Ta na7au Daawitaa, hegee ne qaalee?” yaagiis.

Yaagin Daawiti, “Ee; ta godau, kawuwau, hegee ta qaalaa” yaagiis. <sup>18</sup> Qassikka i Saa7oola, “Ta godau, tana ne ashkkaraa neeni aibissi kaallai? Taani ai oottidanaa? Taani ai mooridanaa? <sup>19</sup> Ha77ikka ta godau, kawuwau, neeni ta qaalaa, ne ashkkaraa qaalaa siyanaadan taani nena woossais; GODAI nena ta bolli denttidobaa gidikko, yarshshuwaa i ekko; shin asati nena denttidobaa gidikko, eti GODAA sinttan qangget-tidaageeta gidona! Aissi giikko, ‘Ba; hara xoossatussi goinna’ yaagidi, GODAA biittan taayyo de7iya saamaappe eti tana ha77i kessidosona. <sup>20</sup> Ha77i simmi GODAA sinttappe haakkidi de7iya biittan ta suuttaa gussoppa; issi asi kuraachcho shankkatanau deriyaa huuphiyaa kiyiyoogaadan, Israa7eela kawoi issi kasttolle koyanau kiyiis” yaagiis.

<sup>21</sup> Yaagin Saa7ooli Daawita, “Taani nagaraa oottaas. Ta na7au Daawitaa, haa simma! Hachchi qammi neeni tana haiquwaappe ashshido gishshau, taani nena naa77antto genikke. Tumuppe taani eeyabaa hanaas; gita balaa balaas” yaagiis.

<sup>22</sup> Yaagin Daawiti, “Kawuwau, ne toorai hageeho; ne asatuppe issi asi yiidi ekko. <sup>23</sup> Asi huuphiyan huuphiyan xillidobaunne ammanettidobau GODAI a waagaa qanxxees. Nena GODAI hachchi ta kushiyan aattidi immiis; shin GODAI tiyido kawuwaa bolli taani ta kushiya denttanau dosabeikke. <sup>24</sup> Taani tumu hachchi nena ashshidoogaadan GODAI tanakka ashsho; qassi meto ubbaappekka tana wotti ekko” yaagiis.

<sup>25</sup> Yaagin Saa7ooli, “Ta na7au Daawitaa, neeni anjjetta. Neeni gitabaa oottana; neeni tumuppe xoonana” yaagiis. Daawiti ba ogiyaa biis; Saa7oolikka ba soo simmiis.

## 27

### *Daawiti Pilisxeema Biitti Baqatiis*

<sup>1</sup> Daawiti ba wozanan, “Issi gallassi taani Saa7oola kushiyan daafettana; taani Pilisxeema biitti baqatanaappe attin, harabi taayyo lo77enna. Yaatin, Saa7ooli Israa7eela biitta ubban tana koyiyoogaa aggana; yaanikko taani a kushiyaappe kessa ekkana” yaagidi qoppiis.

<sup>2</sup> Hegaa gishshau, Daawitinne aara de7iya usuppun xeetu asati denddidi, Gaate Kawuwaa Maa7ooka na7aa Akiishakko biidosona. <sup>3</sup> Daawitinne a asai Akiishaara Gaaten uttidosa. Asai ubbai ba so asaa asaa ekki biis; Daawitikka ba keettaayeta, Iziraa7eeliyo Ahino7aamonne Naabaala am77iyo, Qarmmeloosiyo Abigaalo ekkidi biis. <sup>4</sup> “Daawiti Gaate baqatiis” giyoogaa siyidi, Saa7ooli naa77antto a koyiyoogaa aggi bayiis.

<sup>5</sup> Daawiti Kawuwaa Akiisha, “Neeni tanan ufaittikko, taani yan de7ana mala, ne kawotettan de7iya katamatuppe issinniyo taayyo imma. Taani ne ashkkarai kawoi de7iyo kataman nenaara issippe aibissi uttiyaanaa?” yaagiis.

<sup>6</sup> He gallassi Akiishi Xiqilaaga katamaa Daawitayyo immiis; hachchi gakkanaashinkka Xiqilaaga katamai Yihudaa kawotussa gididi attiis. <sup>7</sup> Daawiti Pilisxxeema biittan issi laittanne oiddu aginaa de7iis.

<sup>8</sup> Daawitinne a asati pude biidi, Gashuurata, Girzzetanne Amaaleeqata oloosona. Beniisappe doommidi, he asati SHurappe biidi Gibxxe gakkanaashin de7iya biittan de7idosona. <sup>9</sup> Daawiti he biittaa oliyo wode audenne he biittan de7iya maccaa gidin, attuma gidin, paxa aggibeenna; dorssaanne miizaa, hariyaanne gaameelaa, maayuwaa akka di77ees; yaatidi Akiishakko simmees. <sup>10</sup> Akiishi, “Hachchi awan woraa-jjidetii?” yaagidi Daawita oichchees.

Oichchin Daawiti, “Neegeeba bazzuwan de7iya Yihudaa asatu bolli, woikko Yi-raahima7eela asatu bolli, woikko Qeena asatu bolli woraajjida” yaagees.

<sup>11</sup> Etappe issi asinne Gaate katamaa yiidi, “Daawiti haggaa oottiis” giidi odenna mala, Daawitinne a asati maccaa attumaa ashshennan wurssi woroosona. Daawiti Pilisxxeema biittan de7ido wode ubban hegaadan oottiis. <sup>12</sup> Akiishi Daawitan amanettidi, “Daawiti ba asan, Israa7eelan keehippe ixettiis; heggaa gishshau, i taayyo merinau ashkkara gidana” yaagidi qoppiis.

## 28

### *Saa7oolanne Enddoore SHareechchiyo*

<sup>1</sup> He wode Pilisxxeema asati Israa7eelata olanau bantta olanchchata shiishshidosona. Akiishi Daawita, “Neeninne ne asati tanaara olaa baanaagaa tuma era utta” yaagiis.

<sup>2</sup> Yaagin Daawiti, “Hegaa gidikko, taani ne ashkkarai oottanabaa neeni be7ana” yaagiis.

Yaagin Akiishi, “Daro lo77o; taani nena ta de7ido laitta ubban tana naagiyaagaa kessana” yaagiis.

<sup>3</sup> Haggaa kase baggan Sameeli haiqqin, Israa7eela asati ubbati ayyo yeekkidi, a kataman Raaman a moogidosona. Saa7ooli moitilliyaa xeesiyaageetanne shareechchota Israa7eela biittaappe yedettidi kessirggiis.

<sup>4</sup> Pilisxxeema olanchchata shiiqidi yiidi, SHuneema kataman uttidosa; Saa7oolikka Israa7eela asaa ubbaa shiishshidi, Gilbboo7a Deriyan uttiis. <sup>5</sup> Saa7ooli Pilisxxeema olanchchata be7idi yayyiis; a wozanaikka keehippe dagammiis. <sup>6</sup> Heggaa gishshau, i ai oottanaakkonne GODAA oichchiis; shin GODAI aimuwan gidin, woikko Uriimiyan gidin, woikko hananabaa yootiyaageetu baggaara gidin, ayyo yootibeenna. <sup>7</sup> Haggaa guyyiyan, Saa7ooli ba ashkkarata, “Moitilliyaa xeesiya shareechchiyo taayyo koyite; taani ikko baada o oichchana” yaagidi azaziis.

Azazin Saa7oola ashkkarati, “Moitilliyaa xeesiya issi shareechchiyaa Enddooren de7ausu” yaagidosona.

<sup>8</sup> Yaagin Saa7ooli bana erissenna mala hara maayuwaa maayidi, naa77u asata ekkidi, qammi he shareechcheekko biis; biidi maccaasiyo, “Hayyanaa taayyo issi moitilliyaa xeesarkkii; taani sunntaa odiyo asa taayyo denttarkkii” yaagiis.

<sup>9</sup> Yaagin maccaasiyaa, “Moitilliyaa xeesiyaageetanne shareechchota Israa7eela biittaappe Saa7ooli waati yedetti kessidaakko, tuma neeni eraasa. Tana worissanau neeni taayyo aissi piriya yeggai?” yaagaasu.

<sup>10</sup> Yaagin Saa7ooli maccaasiyo, “De7o GODAI ero! Neeni haggaa gishshau qaxxayetakka” yaagidi GODAN caaqqiis.

<sup>11</sup> Yaatin, maccaasiyaa, “Taani neeyyo oona denttoo?” yaagada oichchaasu. Oichchin Saa7ooli, “Sameela taayyo dentta” yaagiis.

<sup>12</sup> Maccaasiyaa Sameela be7ada, waasuwa xulluusaasu; xulluusada Saa7oola, “Neeni tana aibissi cimmaadii? Neeni Saa7oola gidikkii!” yaagaasu.

<sup>13</sup> Yaatin, kawoi, “Aikkobaa; yayyoppa! Neeyyo aibee beettiyai?” yaagiis.

Yaagin maccaasiyaa, “Issi moitillee biittaa giddoppe kiyiyaagee beettes” yaagaasu.

<sup>14</sup> Saa7ooli maccaasiyo, “I ai milatii?” yaagiis.

Yaagin maccaasiyaa, “Afalaa maayida issi cima bitanee kiyees” yaagaasu.

Saa7ooli he bitanee Sameela gididoogaa eridi, a sinttan sa7an lichchi giidi gufanniis.

<sup>15</sup> Sameeli Saa7oola, “Tana duufuwaappe denttada aibissi shabbirai?” yaagiis.

Yaagin Saa7ooli, “Taani daroppe un77ettaas; aissi giikko, Pilisxxeema asati tana oloosona; Xoossaikka taappe shaahettiis; hananabaa yootiyaageetu baggaara gidin woikko aimuwan gidin, i taani oichchiyoobaa odenna. Hegaa gishshau, taani oottanabaa neeni taayyo yootanaadan nena xeegaas” yaagiis.

<sup>16</sup> Yaagin Sameeli, “GODAI shaahettidi ne morkke gidiichchaappe attin, tana aibissi zoretaa bessai? <sup>17</sup> GODAI ta baggaara kaseti yootidobaa oottiichchiis; GODAI kawotettaa neeppe dafi ekkidi, ne shooro Daawitayyo immiichchiis. <sup>18</sup> Neeni GODAAYO azazettaabenna gishshaunne a hanqquwaa suulliyaagaa Amaaleeqa asatu bolli polabeenna gishshau, GODAI hachchi ha yohuwaa ne bolli oottes. <sup>19</sup> Nennanne Israa7eela, GODAI Pilisxxeema asatuyyo aatti immana; neeninne ne naati wontto tanan gaittana; GODAI Israa7eela olanchchata Pilisxxeema asatuyyo aatti immana” yaagiis.

<sup>20</sup> Saa7ooli Sameela oduwaa siyidi yayyido gishshau, sohuwaarakka biittan borccu giidi kunddi be7iis. Saa7ooli he gallassaa kumettaanne qammaa kumettaa quma mibeenna gishshau, a wolqqai hitiis. <sup>21</sup> He maccaasiyaa Saa7oolakko yaada, i keehi kokkoriyoogaa be7aasu; be7ada, “Taani ne ashkkariyaa neeyyo azazettaas; neeni tana oichchidobaa ta shemppuwaa balada oottaas. <sup>22</sup> Ha77i taani ne ashkkariyaa giyoobaa hayyanaa siya; neeni maada, gazddada ne ogiyaa baana mala, taani neeyyo guutta quma aattais” yaagaasu.

<sup>23</sup> Yaagin Saa7ooli, “Miikke” yaagidi ixxiis. SHin a asati he maccaaseerakka gididi shoobidosona; shoobbin Saa7ooli shoobettidi biittaappe denddidi, hiixan uttiis.

<sup>24</sup> He maccaasiyaa sohuwaarakka ba son de7iya anqqara maraa shukka bayaasu; xiilliyaa ekka munaqqada, irshshuwaa yeggennan oittaa uukkaasu. <sup>25</sup> Yaatada Saa7oolayyoonne a asatuyyo aattin, eti miidosona. He gallassi qammikka denddidi biidosona.

## 29

### *Akiishi Daawita Guyye Xiqilaagi Yeddiis*

<sup>1</sup> Pilisxxeema asati bantta olanchchata ubbaa Afeeqan shiishshidosona. Israa7eelati Iziraa7eelan de7iya haattaa pulttuwaa matan uttidosa. <sup>2</sup> Pilisxxeematu halaqati bantta xeetatu citaaninne sha7atu citan salppidosona; Daawitinne a asai Akiishaara issippe guyye baggaara salppidosona. <sup>3</sup> Pilisxxeematu halaqati be7idi, “Ha Ibraaweti hagan ai oottiyoona?” yaagidosona.

Yaagin Akiishi Pilisxxeematu halaqata, “Hagee beni Israa7eela Kawuwaa Saa7oola ashkkaraa Daawita gidennee? I daro wodeesappe tanaara issippe de7ees; i Saa7oola kaddidi kiyosappe hanno gakkanaashin, taani an bala demmabeikke” yaagiis.

<sup>4</sup> SHin Pilisxxeematu halaqati Akiisha hanqqettidi, “Ha bitaniyaa neeni ayyo immido katamaa guyye zaara; i nunaara olaa booppo. Biikko i nuna zaaridi olana. I ba godaara sigettanau nu asatu qooriyaa muuciyoo gaappe hara lo77iyaabi aibee? <sup>5</sup> Qassi maccaasati yexxiiddinne duriiddi, ‘Saa7ooli ba sha7aa woriis; Daawiti ba tammu sha7aa woriis’ yaagidi sabbidoogee ha Daawita gidenneeyye?” yaagidosona.

<sup>6</sup> Hegaa gishshau, Akiishi Daawita xeesidi, “De7o GODAI ero! Neeni ammanettiya asa; neeni tanaara olau baanaagaa taani ufaittais; neeni taakko yoosappe hanno



gakkanaashin, taani ne bolli bala demmabeikke. SHin halaqati neeni olau baanaagaa ufaittokkona. <sup>7</sup> Neeni ha77i simmada saruwan ba; Pilisxxeematu halaqata ufais-sennabaa ainne oottoppa” yaagiis.

<sup>8</sup> Yaagin Daawiti Akiisha, “Taani ai oottidanaa? Taani nenaara de7oosappe hanno gakkanaashin, tanan bala demmabeikke gaadasa; yaatin, kawuwaa ta godaa morkke-tuura baada aibissi olettikkinaa?” yaagiis.

<sup>9</sup> Akiishi Daawita, “Xoossaa kiitanchchadan neeni taayyo ammanettiyaagaa gidiy-oogaa taani erais; gidikkokka, Pilisxxeematu halaqati, ‘I nunaara olaa booppo’ yaagidosona. <sup>10</sup> Ha77i simmi maalladoora denddada, nenaara yiida ne godaa ashkkaratuu-rakka issippe sa7ai wonttaanne biite” yaagiis.

<sup>11</sup> Yaagin Daawitinne a asati Pilisxxeema biitti simmanau maallado guuran denddi-dosona; Pilisxxeema asatika pude Iziraa7eela biidosona.

## 30

### *Daawiti Amaaleeqatuura Olettiis*

<sup>1</sup> Daawitinne a asati heezzantto gallassi Xiqilaaga katamaa gakkidosona. Amaaleeqa asati Neegeeba bazzuwaanne Xiqilaaga katamaa woraajjidosa; woraajjidi Xiqilaaga katamaa taman xuuggidosona. <sup>2</sup> Xiqilaaga kataman de7iya maccaasatanne naatuppe cimaa gakkanaashin de7iya ubbata omooddidosa; eta ubbaa ekki efiidosonappe attin, issi asanne woribookkona.

<sup>3</sup> Daawitinne a asati Xiqilaaga katamaa gakkiyo wode, katamai taman xuugetti-ichchidoogaanne qassi eta maccaasati, eta attuma naatinne eta macca naati omood-ettiichchidoogaa be7idosona. <sup>4</sup> Yaatin, Daawitinne aara issippe de7iya asai bantta wolqqai ixkana gakkanaashin waassidi yeekkidosa. <sup>5</sup> Daawita maccaasati naa77ati, Iziraa7eeliyaa Ahino7aamanne Qarmmeloosiyaa Naabaala am77iyaa Abigaala omood-ettidosona.

<sup>6</sup> Asai Daawita shuchchan caddanau haasayido gishshau, Daawiti keehippe tuggatiis; aissi giikko, a asai ubbai ba attuma naatunne macca naatu gishshau, keehippe yiillotiis; shin Daawiti GODAN ba Xoossan minettiis.

<sup>7</sup> Daawiti Abimeleka na7aa qeesiyaa Abiyaataara, “Eefuudiyaa haa ekkada ya” yaagiis; yaagin Abiyaataari eefuudiyaa Daawitayyo ehiis. <sup>8</sup> Daawiti GODAA, “Taani ha woraajjidaageetu geeduwaa kaallada boo? Biikko taani eta gakkanee?” yaagidi oichchiis.

Oichchin GODAI, “Ee; eta kaallada ba; eta neeni gakkana; omoodettidaageetakka zaarana” yaagiis.

<sup>9</sup> Daawitinne aara de7iya usuppun xeetu asati dendididi Bisoora SHaafaa gakkinn, asaappe amaridaageeti yan attidosona. <sup>10</sup> Aissi giikko, naa77u xeetu asati shaafaa pinnanau keehippe daafuridosona. SHin Daawitinne oiddu xeetu asati paanaa kaal-lidosona.

<sup>11</sup> Hegaappe guyyiyan, asati issi Gibxxiyaa dembban demmidi, Daawitakko ehi-idosona; ehiidi ayyo uyanau haattaa, maanauka qumaa immidosona; immiin miis.

<sup>12</sup> Qassi balasiyaa lichchakuwaa melaappe baggaanne naa77u wurcco woiniyaa teeraa ayyo immidosona; immiin miidi gasttiis; aissi giikko, i heezzu gallassinne heezzu qammi quma mibeenna haattakka uyibeenna. <sup>13</sup> Daawiti he bitaniyaa, “Neeni oossee? Auppe yaadii?” yaagidi oichchiis.

Oichchin bitanee, “Taani Amaaleeqa bitaniyaassi ailletida Gibxxe asa; heezzu gallas-sappe kase taani sakettido gishshau, ta godai tana yeggi bayiis. <sup>14</sup> Nuuni Yihudaa asatu bolli, Kariita asatu bollinne Kaaleeba yaratu bolli Neegeeba bazzuwan woraajjida; Xiqilaaga katamaanne taman xuuggida” yaagiis.

<sup>15</sup> Yaagin Daawiti, “Neeni tana he woraajjida citaakko kaalettana danddayai?” yaagidi oichchiis.



Oichchin i, “Neeni tana worennaadaaninne ta godaayyo aattada immennaadan taayyo Xoossan caaqqa; yaatikko, taani nena etakko duge kaalettana” yaagiis.

<sup>16</sup> Hegaappe guyyiyan, bitanee Daawita etakko kaalettidi gattiis. Eti Pilisxxeeme biittaapenne Yihudaa biittaappe omooddidobai keehippe daro gidido gishshau, ufaittidi miiddinne uyiiddi biitta ubban laaletti uttidosona. <sup>17</sup> He galla omarssaappe biidi wontetta gallassa omarssai gakkanaashin, Daawiti eta shociis; gaameelaa toggidi baqatida oiddu xeetu yelagatappe attin, hari issi asinne attidi bibeenna. <sup>18</sup> Amaaleeqa asati efido ubbabaa, ba naa77u maccaasatuurakka gujjidi, Daawiti wotti ekkiis. <sup>19</sup> Asati omooddi efiidobaappe aibinne paccibeenna; naatoi woikko cimai, attuma naati woikko macca naati, eti omooddi efido harabai ubbabaikka paccennan de7ees; Daawiti ubbaakka zaariis. <sup>20</sup> Qassi Daawiti dorssaanne miizzaa wudiyaa ubbaa omooddiis; Daawita asai i omooddido wudiyaa hinkko mehiyaappe sinttaara laaggidi, “Hagee Daawita omooduwa” yaagiis.

<sup>21</sup> Hegaappe guyyiyan, Daawiti bana kaallanau daafuridi, Bisooraa SHaafaa achchan attida naa77u xeetu asatukko yiis. Eti Daawitanne aara issippe de7iya asata mokkanau kiyidosona; Daawitinne a asai etakko shiiqin, Daawiti eta sarotiis. <sup>22</sup> SHin Daawitaara biidaageetu giddoppe issi issi pattenna iita asati, “Eti nunaara bibeenna gishshau, nuuni zaaridi ehiidobaappe aibanne etaara shaakkokko; eti bantta naatanne bantta maccaasaa ekkidi boona” yaagidosona.

<sup>23</sup> Yaagin Daawiti eta, “CHii; ta ishanttoo! GODAI nuussi immidoban intte hagaadan oottanau bessenna. I nuna naagidi, nu bolli woraajjida citaa nuuyyo aattidi immiis. <sup>24</sup> Intte giyoobaa ooninne maayenna. Olettanau biidaageetinne nubaa naagiiddi hagan gam77idaageeti issi lagge shaakkana; ubbaageekka issi mala gidana” yaagiis. <sup>25</sup> He gallasappe doommidi, hachchi gakkanaashin, Daawiti Israa7eela biittaayyo hega woganne awaajo oottidi wottiis.

<sup>26</sup> Daawiti Xiqilaaga katamaa gakkido wode, ba dabbo Yihudaa cimata, “GODAA morkketuppe omoodettidabaappe taani intteyyo immiyooqaa heite” yaagidi omooduwaappe amaridaagaa yeddiis. <sup>27</sup> I hega Beetele, Neegeeban de7iya Raamootanne Yattira katamatun de7iyaageetuyyo, <sup>28</sup> Aaro7era, Sifimoota, Eshtamoo7anne <sup>29</sup> Rakaala katamatun de7iyaageetuyyo, Yiraahima7eela katamatun de7iyaageetuyyo, Qeena katamatun de7iyaageetuyyoonne, <sup>30</sup> Horima, Bor77ashaana, Ataakanne <sup>31</sup> Kebroona katamatun de7iyaageetuyyo yeddiis; inne a asati yuuyido sohotu ubbaayyo yeddiis.

## 31

### *Saa7ooli Barkka Bana Woriiis (Hanidabaa Odiya Koiro Maxaafaa 10:1-12)*

<sup>1</sup> Pilisxxeema asati Israa7eela asatuura olettidosona; Israa7eela asati Pilisxxeema asatu sinttaappe baqatidosona; daro Israa7eelati Gilbboo7a Deriyan haiqqidosona.

<sup>2</sup> Pilisxxeema asati Saa7oolanne a attuma naata yedetti gakkidi, Saa7oola naata Yon-aataana, Abinadaabanne Malkkishuu7a woridosona. <sup>3</sup> Olai Saa7oola yuuyi aadhdhidi un77ettiis; wonddafiyaasati a demmido wode, zubbiiyan a caddidi, keehi mazunxxissidosona.

<sup>4</sup> Mazunxxissin Saa7ooli ba ola miishshaa tookkiyaagaa, “Ha qaxxarettibeennaageeti yiidi, tana caddidi kaa7ennaadan, ne bisuwan caddada, tana neeni wora” yaagiis.

SHin a ola miishshaa tookkiyaagee keehippe yayyido gishshau ixxiis; ixxin Saa7ooli ba bisuwaa sa7an essidi, a bolli kunddiis. <sup>5</sup> A ola miishshaa tookkiyaagee Saa7ooli haiqqidoogaa be7idi, ikka ba bisuwaa sa7an essidi, a bolli kunddidi, Saa7oolaara haiqqi aggiis. <sup>6</sup> Hagaadan hanidi, Saa7oolinne a naati heezati, a ola miishshaa tookkiyaageenne a asati ubbai he gallassi issippe haiqqidosona.

<sup>7</sup> Wombbaappenne Yorddaanoosa SHaafaappe hefintta baggaara de7iya Israa7eela asati Israa7eela olanchchati baqatidoogaanne Saa7oolinne a naati haiqqidoogaa be7idi, etikka bantta katamaa aggidi baqatidosona. Baqatin Pilisxeema asati yiidi, he katamata oiqqidosona.

<sup>8</sup> Wonttetta gallassi Pilisxeemati ahatu bollaappe ola miishshata qaari ekkanaui yiidi, Saa7oolinne a naati heezzati Gilbboo7a Deriyan haiqqidi zin77idaageeta demmidosona. <sup>9</sup> Demmidi eti Saa7oola qooriyaa muucidosonanne a ola miishshaa qaari ekkidosona. Yaatidi bantta eeqatu keettaaninne bantta asaa gidдон xoonuwaa awaajjana mala, Pilisxeema biitta ubbau kiitaa yeddidosona. <sup>10</sup> Saa7oola ola miishshaa Asttaarooto giyo eta xossee keettaa gidдон wottidosona; Saa7oola ahaa Beetishaana giyo katamaa gimbbiyan misimaariyan xishidi kaqqidosona.

<sup>11</sup> Pilisxeema asati Saa7oola oottidobaa Gala7aaden de7iya Yaabeesha asati siyido wode, <sup>12</sup> eta mino asati ubbai qamman denddi biidi, Saa7oola ahaanne a naatu ahaa Beetishaana katamaa gimbbiyaappe wotti ekkidi, Yaabeesha katamaa ehiidosona. Ehiidi yan xuuggidosona. <sup>13</sup> Hegaappe guyyiyan, eta meqettaa maxi ekkidi, Yaabeeshan de7iya taamaariskka giyo mittaa garssan moogidosona; yaatidi laappun gallassaa xoomidosona.

## Sameela Maxaafaa Naa77anttuwaa

### *Gidduwaa Erissuwaa*

Sameela Maxaafaa naa77antto kifilee, Sameela Maxaafaa koiro kifiliyaa kaalliyaagaa gidishin, Daawiti koiro tohossa bagga Yihudaa kawo (1-4) gididi, takkiiddi qassi huuphessa bagga kifile gidiya Israa7eela gujjidi, kumetta biittau kawo gididi haaridoogaa odiya taarikiyaa oiqqidaagaa (5-24). Maxaafai Daawiti ba kawotettaa aassanaunne ba maataa minttanau, sooranne kareera de7iya morkketuura olettido mino olaabaa loittidi qonccissees. Qassi Daawiti mino ammanoi de7iyoonne Xoossaa siiqiya asa gidiyooqaanne asaikka ayyo ammanettiyo asa gidiyooqaa odees. Hegaa bollankka qassi issi issi meqetti baina oosotakka i oottidoogaanne ba ashuwaa amuwaa alanau pala hanttaara nagarata i oottidoogaakka qonccissees. Gidikonne Xoossaa aillee, hananabaa yootiya Naataani akko shiiqidi, a nagaraa a hassayissido wode, i ba nagaraa paaxidi Xoossaa qixaatiyaa ekkiis.

Daawita de7oinne i oottido oosoti Israa7eela asaa keehippe ufaissido gishshau, appe simmin de7ida laittatun eta biittaa bolli metoi gakkiiyo wode ubban, eti hara kawo koyiiddi, Daawita na7i, woikko Daawita zare gididi, likke Daawitaagaadan eta aissiya asa demmanau amottoosona.

### *Daawiti Saa7ooli Haiqqidoogaa Siyiis*

<sup>1</sup> Saa7ooli haiqqidoogaappe guyyiyan, Daawiti Amaaleeqa asata xoonidosappe simmiis; simmidi Xiqilaaga kataman naa77u gallassaa takkiis. <sup>2</sup> Heezantto gallassi issi bitanee kayyuwau ba maayuwaa pooshshidi, ba huuphiyan buhiyaa laalidi, Saa7oola qatuwaappe yiis. Daawitakko i yiido wode, sa7an lichchi giidi ziggiis. <sup>3</sup> Daawiti a, “Neeni awappe yaadii?” yaagidi oichchiis.

Oichchin i, “Taani Israa7eelatu qatuwaappe kessa ekkada yaas” yaagiis.

<sup>4</sup> Daawiti a, “Aibi kiyaadaakko ane taayyo oda” yaagiis.

Yaagin i Daawita, “Nu olanchchati olaappe baqatidosona; nu asaappe daroti haiqqidosona; qassi Saa7oolinne a na7ai Yonaataani haiqqidosona” yaagiis.

<sup>5</sup> Oduwaa ehiida wodallaa Daawiti, “Saa7oolinne a na7aa Yonaataani haiqqidoogaa neeni aibin erai?” yaagidi oichchiis.

<sup>6</sup> Wodallai, “Qaadadan taani Gilbboo7a deriyan de7ishin, Saa7ooli ba tooraa guufetidi eqqidaagaa be7aas; paraa gaaretinne paraasati Saa7oolakko matattidosona. <sup>7</sup> He wode Saa7ooli yuushshi xeellidi tana be7iis; be7idi tana xeesin taani, ‘Yee!’ yaagaas. <sup>8</sup> Yaagin Saa7ooli tana, ‘Neeni oonee?’ yaagidi oichchiis; oichchin, ‘Taani Amaaleeqa asa’ yaagada zaaraas. <sup>9</sup> Hegaappe guyyiyan Saa7ooli tana, ‘Taani keehi masunxxada, haiquwau mata uttaas; neeni ta bolli kiya eqqada tana wora’ yaagiis. <sup>10</sup> I kunddidoogaappe guyyiyan, haiquwaappe palahennaagaa erido gishshau, taani a bolli kiya eqqada a woraas; a huuphiyan de7iya kallachchaanne a qesiyan de7iya hirbbooraa ekkada neekko ta godaakko ehaas” yaagiis.

<sup>11</sup> Hegaappe guyyiyan, Daawitinne Daawita asai azzanidi, bantta maayuwaa dafidi pooshshidosona. <sup>12</sup> Eti Saa7ooli, Yonaataani, GODAA olanchchatinne Israa7eela asai olan wurido gishshau, omarssi gakkanaashin kayyottidosona, yeekkidosonanne xoomidosona.

<sup>13</sup> Oduwaa ehiida wodallaa Daawiti, “Neeni awa asee?” yaagidi oichchiis.

Oichchin i Daawita, “Taani betiyaa Amaaleeqa bitaniyaa na7a” yaagiis.

<sup>14</sup> Yaagin Daawiti a, “GODAI tiyido kawuwaa woranau ne kushiyaa denttaidda, aissi yayyabeikkii?” yaagiis. <sup>15</sup> Daawiti ba asatuppe issuwaa xeesidi, “Ba; baada a wora!” yaagiis; yaagin i Amaaleeqiyaa dechchidi woriis. <sup>16</sup> Daawiti Amaaleeqiyaa, “GODAI

tiyido kawuwaa taani woraas' yaagada neeni ne doonan markkattido gishshau, ne suutta gomee nena oiqqo" yaagiis.

*Daawiti Saa7oolayyoonne Yonaataanayyo Zilaalido Zilaassaa*

17 Daawiti Saa7oolayyoonne a na7aa Yonaataanayyo hagaadan yaagi zilaaliis.  
18 Yihudaa asaikka "Wonddafiya" giyo ha zilaassaa tamarana mala azaziis; ha zilaassai Yaashaara maxaafan xaafettiis.

19 "Nenoo Israa7eela,  
ne halaqati ne xoqqa sohotun haiqqidosona.  
Wolqqaamati waani kunddidonaashsha!

20 Hagaa Gaate kataman yootoppite;  
Asqqaloona ogetunkka awaajjoppite.  
Hegaa siyikko, Pilisxxeematu macca naati ufaittana;  
shaamatu macca naati 'Hashshu!' gaana.

21 "Inttenoo Gilbboo7a deretoo,  
intte bollan iri bukkoppo;  
xaazikka xaazatoppo.  
He biittaa goshshaikka kattaa mukkoppo;  
aissi giikko, yan wolqqaamaa gondaltee tunabaa kiyiis;  
Saa7oola gondalleekka zaitiyan qucettiyoogaa aggiis.

22 Goora7ettidaageetu suuttaappenne  
wolqqaamatu ashuwaappe Yonaataana wonddafee guyye gibeenna.  
Qassi Saa7oola bisoikka kallennan simmibeenna.

23 "Saa7oolinne Yonaataani  
asi siiqiyoogeeanne lo77iyaageeta;  
bantta haiquwanka bantta paxanka shaahettibookkona.  
Eti argganttaappekka aadhdhida eeso;  
gaammuwaappekka aadhdhida mino.

24 "Israa7eela maccaasatoo,  
Saa7oolayyo, inttena zo7onne alleeqo maayuwa maizzidaagaayyoonne  
worqqan intte maayuwa alleeqissidaagaayyo yeekkite.

25 "Wolqqaamati olan waani kunddidonaashsha!  
Yonaataani ne xoqqa sohotun goora7etti zin77iis.

26 Ta ishaa Yonaataanaa,  
taani neeyyo azzanais;  
ne taayyo daroppe al77o.  
Neeni tana siiqiyo siiqoi garamissiyaagaa,  
maccaasa siiqoppekka aadhdhidi garamissiyaagaa.

27 "Wolqqaamati waani kunddidonaashsha!  
Ola miishshaikka waani dippi giidee!"  
yaagidi Daawiti zilaaliis.

## 2

*Daawiti Yihudaa Bolli Kawotiis*

1 Hegaappe guyyiyan Daawiti, "Yihudaa katamatuppe issuwaa boo?" yaagidi GODAA oichchiis.  
Oichchin GODAI a, "Ee; ba" yaagiis.

Yaagin Daawiti, “Awa boo” yaagidi oichchiis.

Oichchin i, “Kebroona ba” yaagidi zaariis.

<sup>2</sup> Daawiti ba maccaasata naa77ata, Iziraa7eeliyo Ahino7aamonne Qarmmeloosiyo, Naabaala am77iyo Abigaalonne ekkidi, Kebroona katamaa biis. <sup>3</sup> Daawiti banaara de7iya asatakka eta so asaa ubbaara ekki ehin, Kebroonaaninne a heeran de7iya guutta katamatun uttidosona. <sup>4</sup> Yihudaa asati Kebroona katamaa yiidi, yan eti Daawita Yihudaa asaa bolli kawoyanau tiyidosona.

Saa7oola moogidaageeti Gala7aaden de7iya Yaabeesha katamaa asata gididoogaa Daawiti siyido wode, <sup>5</sup> asaa kiittidi eta, “Intte intte godaa Saa7oola moogido kehatettaa gishshau, GODAI inttena anjjo. <sup>6</sup> Ha77ikka GODAI aggenaa siiquwaanne tumatettaa inttena besso; qassi intte ha kehatettaa oottido gishshau, taanikka intteyyo lo77otettan kushiyaa zaarana. <sup>7</sup> Ha77i simmi minnite; xalite; aissi giikko, intte godai Saa7ooli haiqqiichchiis; qassi Yihudaa asati tana tiyidi, bantta bolli kawoyidosona” yaagiis.

### *Yaabusttee Israa7eela Bolli Kawotiis*

<sup>8</sup> Saa7oola olanchchatu gadaawai Neera na7aa Abaneeri Saa7oola na7aa Yaabustta ekkidi, Maahinaima giyo sohuwaa efiis. <sup>9</sup> Efiidi Gala7aade, Aseera, Iziraa7eela, Efireema, Biniyaamanne Israa7eela biittaa ubbaa bollan kawoyiis. <sup>10</sup> Saa7oola na7aa Yaabusttee Israa7eela bolli kawotiyo wode ayyo oitamu laitta; i naa77u laittaa kawotiis; gidikkonne, Yihudaa asai Daawita kaalliis. <sup>11</sup> Daawiti Kebroonan Yihudaa asatu bolli laappun laittanne usuppun aginaa kawotiis.

### *Israa7eelanne Yihudaa Giddon Denddida Olaa*

<sup>12</sup> Neera na7aa Abaneerinne Saa7oola na7aa Yaabustte asai Maahinaimappe Gabaa7oona katamaa biidosona. <sup>13</sup> Xaruuyi na7ai Yoo7aabinne Daawita asai kiyi biidi, Gabaa7oona dalbbanttaa matan etaara gaittidosona; issi citai dalbbanttaappe hefintta baggaara uttin, issi citai hafintta baggaara uttidosona. <sup>14</sup> Yaatin, Abaneeri Yoo7aaba, “Ane wodallati denddidi, nu sinttan olaa gaittona” yaagiis.

Yaagin Yoo7aabi, “Eeno, denddidi gaittona” yaagiis. <sup>15</sup> Hegaa gishshau, Biniyaama baggaanne Saa7oola na7aa Yaabustte baggau tammanne naa77u asati goodan kiyidi, Daawita baggau eqqida tammanne naa77u asatuura olaa gaittidosona. <sup>16</sup> Gaittidi issoi issuwaa huuphiyaa oiqqidi, ba oiqqidoogaa daaddan daaddan bisuwaa dirgginttidi, issippe haiqqidosona; hegaa gishshau, Gabaa7oonan de7iya he sohoi Bisuwaa Gade geetettes. <sup>17</sup> He gallassi wolqqaama olai olettin, Daawita asai Abaneeranne Israa7eela asaanne xooniis.

<sup>18</sup> Xaruuyi naati heezzaa Yoo7aabi, Abishaayinne Asaaheeli he sohuwan de7oosona; Asaaheeli wushadan eesotidi woxxees. <sup>19</sup> Asaaheeli ushachchi woikko haddirssi geenan Abaneera yedetaa sikkiis. <sup>20</sup> Abaneeri guyye simmi xeellidi, “Asaaheela, laa nenee?” yaagidi oichchiis.

Oichchin Asaaheeli, “Ee tana” yaagiis.

<sup>21</sup> Yaagin Abaneeri a, “Issi baggi, ushachchi woikko haddirssi simma; simmada asatuppe issuwaa oiqqada a ola miishshaa qaara ekka” yaagiis; shin Asaaheeli a gooddiyoogaa agganau koyibeenna.

<sup>22</sup> Qassikka Abaneeri Asaaheela, “Taani nena biittaaara gattada sikkennan de7ishin, tana gooddiyoogaa agga! Nena worada, taani ne ishaa Yoo7aaba som77uwaa waatada xeellanee?” yaagidi seeriis. <sup>23</sup> SHin Asaaheeli a gooddiyoogaa aggenan ixxiis. Hegaa gishshau, Abaneeri tooraa guyye tum77idi, Asaaheela uluwaa caddiis; caddin toorai zokkuwaara kantti kiyiis; Asaaheeli he sohuwankka kunddidi haiqqiis. Asaaheeli haiqqido sohuwaa gakkida asai ubbai hegan eqqiis.

<sup>24</sup> SHin Yoo7aabinne Abishaayi Abaneera gooddidosona; awai wulliyo wode, Gabaa7oona Bazzuwaa efiya ogiyan Giyaaha katamaappe sintta baggaara de7iya Ama giyo keraa kiyidosona. <sup>25</sup> Biniyaama asati Abaneera guyyen shiiqqidosona; eti issi cita



gididi, issi keraa huuphiyan eqqidosa. <sup>26</sup> Hegaappe guyyiyan Abaneeri Yoo7aaba xeesidi, “Merinau olettiiddi de7aneeyye? Haggaa wursettai camo gidanaagaa neeni erikkii? Ne asata, ‘Intte ishannta gooddiyoojaa aggite’ geennan aude gattuutee?” yaagiis.

<sup>27</sup> Yaagin Yoo7aabi Abaneera, “Xoossai ero! Neeni haasayennan aggidabaa gidiyaakko, ta asai ba ishannta sa7ai wonttana gakkanaashin gooddana shin” yaagiis.

<sup>28</sup> Heggaa gishshau, Yoo7aabi malkkataa punniis; punnin asai ubbai eqqiis. Israa7eelata akka zaarettidi gooddibookkonna woikko olibookkonna. <sup>29</sup> Abaneerinne a asai he gallassa qammaa ubbaa salppiyan Aaraba garaara biidosona; biidi Yorddaanoosa SHaafaa pinnidosona. Pinnidi, maalladoora hemettidi Maahinaima simmidosona.

<sup>30</sup> Yoo7aabi Abaneera gooddiyoojaa aggi bayidi, ba asa ubbaa issi sohuwaa shiishshii; shiishshidi xeelliyo wode, Asaaheeli bannan Daawita asaappe tammanne uddufun asai pacciis. <sup>31</sup> SHin Daawita asai Abaneera asaappenne Biniyaama zaretuppe heezzu xeetanne usuppun tammu asata woridosona. <sup>32</sup> Asaaheela ahaa ekkidi, Beetaliheeme kataman de7iya a aawaa duufuwan moogidosona; Yoo7aabinne a asai qammaa hemettiiddi aqidosa; sa7ai wonttishin Kebroona katamaa gakkidosona.

### 3

<sup>1</sup> Saa7oola asainne Daawita asai daro wodiya olettidosona; Daawiti olan minni minnidi biyo wode, Saa7oola asai laafi laafidi bees.

#### *Daawita Attuma Naata*

<sup>2</sup> Kebroona kataman Daawitayyo naati yelettidosona; Iziraa7eeliyaa Ahino7aama yelido baira na7ai Aminoona; <sup>3</sup> Qarmmeloosiyaa Naabaala am77iyaa Abigaala yelido na7ai Kil77aabi naa77antto; Gashuura Kawuwaa Talmmaaya na7iyaa Maa7ika yelido Abeseloomi heeztantto. <sup>4</sup> Oiddanttoi Haggiiti na7aa Adooniyaa; ichchashanttoi Abiix-aali na7aa SHafaaxiyaa. <sup>5</sup> Usuppunttoi Daawita keettaayee Egili na7aa Yitira7aama; ha naati ubbai Kebroonan Daawitayyo yelettidosona.

#### *Abaneeri Daawitaara Maacettiis*

<sup>6</sup> Saa7oola asaaranne Daawita asara olettiyo wode, Abaneeri Saa7oola asatu giddon minni minnidi biis. <sup>7</sup> Saa7oolassi Aaya na7iyaa Rixifo giyo issi baakkiyaa de7ausu; Yaabusttee Abaneera, “Ta aawaa baakkeera aissi aqadii?” yaagidi oichchiis.

<sup>8</sup> Abaneeri a haasayan daro yiillotidi Yaabustta, “Tana neeni Yihudaa kana huuphe gaadiyye? Hachchi taani ne aawaa Saa7oolayyo, a ishanntuuyyoonne a dabbotuyyo amanettais; taani nena Daawita kushiyan aattada immabeikke. SHin ha77i neeni tana ha mishiree gaasuwan mootaasa! <sup>9-10</sup> Saa7oola zariyaappe kawotettaa wotti ekkidi, Israa7eela zawan Daanappe biidi Berssaabeha gakkanaashin, Israa7eela bollinne Yihudaa bolli, Daawita kawotettaa essanau GODAI maaci wottido ha yohuwaa taani oottana xayikko, Xoossai Abaneera gufantto” yaagiis. <sup>11</sup> Yaabusttee Abaneerayyo yayyido gishshau, hara qaala qaattibeenna.

<sup>12</sup> Abaneeri Kebroonan de7iya Daawitakko, “Biittai oossee? Neeni tanaara maachchaa maacetta; Israa7eela asai ubbai neekko simmanaadan taani nena maaddana” yaagidi kiitaa yeddiis.

<sup>13</sup> Yaagin Daawiti, “Lo77o! Taani nenaara maachchaa wottana. SHin taani nena issibaa oichchais; neeni tana be7anau yiyo wode, Saa7oola na7iyo Miikaalo taayyo ekkenan yooppa” yaagiis. <sup>14</sup> Hegaappe guyyiyan, Daawiti Saa7oola na7aa Yaabustteekko kiittidi, “Xeetu Pilisxxematu qaaratuwaa cilooshada ekkido ta maccaasiyo Miikaalo tau imma” yaagiis. <sup>15</sup> Yaagin Yaabusttee kiitaa yeddidi, i keettaawaa Laawisha na7aa Palxxi7eelappe wotti ekkidi ehiissiis. <sup>16</sup> I keettaawai Baahuriima katamaa gakkanaassi yeekkiiddi i geeduwaa kaalliis; kaallin Abaneeri a, “Guyye simmada so ba” yaagiis; yaagin bitanee guyye simmidi biis.

<sup>17</sup> Abaneeri Israa7eela cimatumko biidi, hagaadan yaagiis; “Daawiti intte bolli kawotana mala, daro wodiya amottideta; <sup>18</sup> ane hekko ha77i polite! Aissi giikko, GODAI, “Ta asaa Israa7eela, taani Pilisxxeema asatu kushiyaappenne eta morkke ubbatu kushiyaappe ta ashkkaraa Daawita baggaara ashshana’ giidoogaa hassayite” yaagiis. <sup>19</sup> Abaneeri Biniyaama zaretuyyo dumma haasayiis; hegaappe guyyiyan, Israa7eela asainne Biniyaama asai ubbai oottanau koyido ubbabaa Daawitayyo yootanau Kebroona katamaa biis.

<sup>20</sup> Abaneeri banaara laatamu asata ekkidi, Kebroona katamaa bin, Daawiti ayyoonne a asaayyo imatuwaa makkiis. <sup>21</sup> Hegaappe guyyiyan Abaneeri Daawita, “Eti nenaara maachchaa maacettanaadaaninne ne wozanai amottiyo ubbaa haaranaadan, taani baada Israa7eela asaa ubbaa kawuwaassi ta godaassi shiishshais” yaagiis; yaagin Daawiti Abaneera moissidi saro yeddiis.

### *Yoo7aabi Abaneera Woriis*

<sup>22</sup> He wode Daawita asainne Yoo7aabi olaappe darobaa omooddidi simmidosona; shin Abaneeri Kebroona kataman Daawitaara de7enna; aissi giikko, Daawiti yeddin i saro biichchiis. <sup>23</sup> Yoo7aabinne aara de7iya olanchchati gakkio wode, asai Yoo7aaba, “Neera na7aa Abaneeri kawuwaa Daawitakko yin, kawoi a yeddin, i saro biis” yaagidi yootiis.

<sup>24</sup> Hegaa gishshau, Yoo7aabi kawuwaakko biidi, “Waanadii! Abaneeri neekko yin, aibissi saro yeddadii? Hekko i biichchiis! <sup>25</sup> Neera na7ai Abaneeri nena cimmanau, neeni geliyoosanne kiyiyoosaa be7anaunne neeni oottiyo ubbabaa eranau yiis” yaagiis.

<sup>26</sup> Yoo7aabi Daawita sinttappe kiyidi, Abaneera geeduwaa kiitaa yeddiis; yeddin eti a Siira haatta ollaa lanqqeppe guyye zaaridosona; shin Daawiti ha yohuwaa erenna. <sup>27</sup> Abaneeri Kebroona katamaa guyye simmidi yiido wode, Yoo7aabi aara dumma haasayanabaadan dirssaa pengge a ekkidi efiis; ba ishaa Asaaheela suutaa achchanau Abaneera uluwaa caddiis; caddin Abaneeri he sohuwan haiqqiis.

<sup>28</sup> Daawiti ha yohuwaa siyidoogaappe guyyiyan, “Taaninne ta kawotetta Neera na7aa Abaneera suuttan GODAA sinttan merinaukka ashettokko. <sup>29</sup> A suuttai Yoo7aabanne a aawaa so asaa ubbaa achcho; uzuuziya cittoi de7iyo asi, woikko gogai keehippe sakkiyo asi, woikko wobbiya asi, woikko bison haiqqiya asi, woikko namisettida asi Yoo7aaba zariyan mulekka xayoppo!” yaagiis. <sup>30</sup> Hegaadan oottidi, Gabaa7oona kataman kiyida olan bantta ishaa Asaaheela Abaneeri worido gishshau, Yoo7aabinne a ishaa Abishaayi Abaneera woridosona.

<sup>31</sup> Daawiti Yoo7aabanne aara de7iya asa ubbaa, “Intte maayuwaa pooshshite; maaqiyaa maayite; Abaneera halaa sinttan hemettiiddi yeekkite” yaagiis. Kawoi Daawiti halaa kaallidi biis. <sup>32</sup> Abaneeri Kebroonan moogettiis; kawoi ba qaalaa xoqqissidi duufuwan yeekkiis; asai ubbaikka yeekkiis. <sup>33</sup> Kawoi Abaneerayyo, “Abaneeri eeya asadan haiqqanau bessii?

<sup>34</sup> A kushee qashettibeenna;

a tohoikka sanssalatan qashettibeenna.

Asi iita asatu kushiyan haiqqiyoogaadan i haiqqiis” yaagidi zilaaliis. Asai ubbai Abaneerayyo zaarettidikka yeekkiis.

<sup>35</sup> Sa7ai poo7o de7ishin, Daawiti oittaa maanaadan shoobbanau asai ubbai akko yiis; shin Daawiti, “Awa aifee wullennan de7ishin, oitta woikko harabaa baara be7ikko, Xoossai tana woro” yaagidi caaqqiis. <sup>36</sup> Kawoi oottidobaa asai ubbai be7idi ufaittiis; tumukka kawoi oottido ubbabai asa ubbaa ufaissiis. <sup>37</sup> Hegaa gishshau, he gallassi Daawita asai ubbainne Israa7eela asai ubbai kawoi Neera na7aa Abaneera worissi-beennaagaa akeekidosona.

<sup>38</sup> Kawoi ba ashkkarata hagaadan yaagiis; “Israa7eela biittan gita asinne halaqi haiqqidoogaa intte akeekketii? <sup>39</sup> Taani Xoossai tiyido kawo gidikkokka, hachchi taayyo miyyee pacciis. Hageeti Xaruuyi naati taayyo minnidosona; iitaa oottidaageetuyyo GODAI eta oosuwaadan zaaro” yaagiis.

## 4

### *Yaabusttee Asa Kushen Haiqqiis*

<sup>1</sup> Saa7oola na7ai Yaabusttee Abaneeri Kebroonan haiqqidoogaa siyido wode, a wozanai taahiis; Israa7eela asai ubbaikka dagammiis. <sup>2</sup> Saa7oola na7aa Yaabustteyyo ambaanota kaalettiya naa77u halaqati de7oosona; issuwaa sunttai Ba7aana; hinkkuwaa sunttai Rekaaba; eti Biniyaama zare gidiya Ba7erootiyaa Rimmoona naata. Ba7eroota katamai Biniyaama baggadan qoodettes; <sup>3</sup> aissi giikko, Ba7erootan de7ida koiro asati Gittaima biitti baqatidi, heedeesappe hachchi gakkanau betedan yan de7idosona.

<sup>4</sup> Saa7oola na7aa Yonaataanayyo naa77u tohoi silido na7ai de7ees; Saa7oolanne Yonaataana woree Iziraa7eelappe gakkido wode, i ichchashu laitta na7a; he na7aa dichchiyaara a ekkada baqataasu; shin a baqatanau dirbbishin, na7ai kunddidi sila kiyiis; he na7aa sunttai Mafibosheeta.

<sup>5</sup> Ba7erootiyaa Rimmoona naati Rekaabinne Ba7aani Yaabustte so baanau kiyidosona; eti biidi seeta gallassi gakkidosona; gakkio wode, i awaappe shempees.

<sup>6</sup> Kariyaa naagiya mishiriyaa gisttiyaa punnishin, xiskkoi oiqqin zin77aasu; Rekaabinne a ishaa Ba7aani leelan Yaabusttee zin77iyoosaa gelidosona.

<sup>7</sup> Eti soo geliyo wode, Yaabusttee qol77on arssan zin77idaagaa demmidi, a uluwaa caddidi woridosona; woridi a qooriyaappe muucidosona; muucido huuphiyaa ekkidi, Aaraba garaara efiya ogiyaa oiqqidi, qammaa ubbaa hemettidosona. <sup>8</sup> Yaabustte huuphiyaa Kebroonan de7iya Daawitau ehiidosona; ehiidi kawuwaa, “Nena woranau koyida ne morkkiyaa Saa7oola na7aa Yaabustte huuphiyaa haggaa be7a; Saa7oola bollaanne a naatu bolla kawuwaa nu godaa haluwaa Xoossai hachchi kessiis” yaagidosona.

<sup>9</sup> SHin Ba7erootiyaa Rimmoona naata Rekaabanne a ishaa Ba7aana Daawiti hagaadan yaagiis; “Meto ubbaappe tana ashshida GODAI ero! <sup>10</sup> Issi bitanee taakko yiidi, mishiraachcho odiyaabaadan, ‘Saa7ooli haiqqiis’ yaagidi taayyo yootin, taani a Xiqilaagan oiqqada worissaas; taani a mishiraachchuwaassi immido woiitoi heggaa. <sup>11</sup> Ba son ba arssan zin77ida xillo bitaniyaa worida iita asatuyyo a haluwaa kessiyoogee ai keenaa iitanddeeshsha! A suutta taani intte kushiyaappe ha77i achchana; inttena taani biittaa bollappe xaissana!” yaagiis.

<sup>12</sup> Rekaabanne Ba7aana woranaadan Daawiti ba olanchchata azaziis; azazin olanchchati eta woridosona; eta kushiyaanne tohuwaa qanxxirggidi, dalbbantta haataa matan Kebroona kataman kaqqidosona. Yaabustte huuphiyaa ekki efidi, Abaneera duufuwan Kebroonan moogidosona.

## 5

### *Daawiti Israa7eela Asaa Bolli Kawotiis (Hanidabaa Odiya Koiro Maxaafaa 11:1-9; 14:1-7)*

<sup>1</sup> Israa7eela zare ubbati Daawitakko Kebroona katamaa yiidi, “Nuuni ne ashonne ne suutta. <sup>2</sup> Kase Saa7ooli nuuyyo kawo gididi de7iyo wodekka, Israa7eela asaa olau kaalettidai nena. GODAI nena, ‘Neni ta asaa Israa7eela heemmana; neni eta bolli kawotana’ yaagi wottiis” yaagidosona. <sup>3</sup> Heggaa gishshau, Israa7eela cimati ubbai Daawitakko Kebroona katamaa yiidosona; yin i etaara Kebroonan GODAA sinttan maachchaa maacettiis; Israa7eela bolli kawotanaadan Daawita eti tiyidosona.

<sup>4</sup> Daawiti kawotiyo wode ayyo hasttamu laittaa; oitamu laittaa i kawotiis. <sup>5</sup> Kebroona kataman Yihudaa bolli laappun laittanne usuppun agina i kawotiis; Yerusalaamen Israa7eela ubbatu bollinne Yihudaa bolli hasttamanne heezzu laittaa kawotiis.

<sup>6</sup> Yerusalaamen de7iya Yaabuusa asata olanau Daawitinne Daawita asai biidosona; Yaabuusa asati, “Daawiti ha katamaa gelanau danddayenna” giidi qoppidosona. Yaatidi eti a, “Neeni ha sohuwaa gelakka; harai attoshin, qooqetinne wobbeti nena teqqanau danddayoosona” yaagidosona. <sup>7</sup> Gidikkonne, Daawiti Xiyoonen de7iya eta qatuwaa oiqqiis; oiqqin Xiyoonen Daawita Katamaa geetettiis.

<sup>8</sup> He gallassi Daawiti ba asaa, “Yaabuusa asata xooniya asi ooninne Daawita morkketi, he ‘wobbetinne qooqeti’ de7iyosaa gakkanau, haattai goggidi kiyiyo xoo7iyaara gelanau koshshees” yaagiis. Hegaa gishshau, “Qooqetinne wobbeti kawo keettaa gelokkona” geetettiis. <sup>9</sup> Daawiti he qatuwaa oiqqidi, yan de7iis; he qatuwaa Daawita Katamaa yaagidi sunttiis. Daawiti Miiloppe doommidi, he katamaa yuushshi aattidi gimbbissiis. <sup>10</sup> Ubbaappe Wolqqaama GODAI Xoossai aara de7iyoo gishshau, Daawiti minni minnidi biis.

<sup>11</sup> Xiirsoosa Kawoi Kiiraami Daawitayyo asa kiittiis. Kiittiiddi zigaa mudettaa, anaax-etanne shuchchaa massiyaageeta ayyo yeddiis; yeddin asati Daawitayyo keettaa ke-exxidosona. <sup>12</sup> GODAI Israa7eela bolli a kawo oottidi essidoogaanne ba asaa Israa7eela gishshau a kawotettaa xoqqu oottidi bonchchidoogaa Daawiti eriis.

<sup>13</sup> Daawiti Kebroonappe Yerusalaame yiidoogaappe guyyiyan, hara baakkotanne hara maccaasata gujjidi ekkiis. Ekkin hara macca naatinne attuma naati ayyo yelettidosona. <sup>14</sup> Yan ayyo yelettida attuma naatu sunntai SHaamu7a, SHobaaba, Naataana, Solomona, <sup>15</sup> Yibihaara, Elishuu7a, Nefega, Yaafi7a, <sup>16</sup> Elishamaa7a, Eliyadaa7anne Elifeleexa.

### *Daawiti Pilisxeema Asata Xooniis (Hanidabaa Odiya Koiro Maxaafaa 14:8-17)*

<sup>17</sup> Daawiti Israa7eela bolli kawo gididi tiyettidoogaa Pilisxeema asati siyido wode, eti ubbai Daawita koyanau kiyidosona; shin Daawiti hejaa siyidi, duge qatuwaa biis.

<sup>18</sup> Pilisxeemati qassikka biidi, Rafaima Wombban laalettidi uttidosona. <sup>19</sup> Hegaa gishshau, Daawiti GODAA, “Taani baada Pilisxeemata oloo? Neeni eta taayyo aatta immuutee?” yaagidi oichchiis.

Oichchin GODAI Daawita, “Ee ola. Taani eta neeyyo aatta immana” yaagiis.

<sup>20</sup> Yaagin Daawiti Ba7aali-Paraaxiima giyoosaa biidi, yan eta xooniis. Yaatidi Daawiti, “Haattaa di7oi xuussi kanttiyoogaadan GODAI ta morkketu giddoora tana kanttiisii” yaagiis. Hegaa gishshau, he sohuwaa sunntai Ba7aali-Paraaxiima<sup>1</sup> geetettiis.

<sup>21</sup> Pilisxeemati bantta eeqata he sohuwan yeggidi biidosona. Yaatin Daawitinne a asai he eeqata ekkidi efiidosona.

<sup>22</sup> Pilisxeemati guyye simmidi biidi, naa77anttuwaakka Rafaima Wombban laalettidosona. <sup>23</sup> Daawiti GODAA naa77anttuwakka oichchin, GODAI a, “Sitti gaada pude eta bolli booppa; eta guyyeera yuuya aadhdhada, ettaappe sintta baggaara olanau giiga. <sup>24</sup> Ettaa huuphiyan salppiyaa cenggurssaa neeni siyiyo wode eesota. Aissi giikko, hegee Pilisxeema olanchchata shocanau GODAI neeppe sinttau aadhdhiis giyoogaa” yaagiis. <sup>25</sup> Yaagin Daawiti GODAI azazidoogaadan oottiis; Gebaa7appe biidi Gezeera gakkanaashin, Pilisxeema olanchchata Daawiti woriis.

## 6

### *GODAA Taabootai Yerusalaame Yiis (Hanidabaa Odiya Koiro Maxaafaa 13:1-14; 15:25-16:6,43)*

<sup>1</sup> 5:20 Ba7aali-Paraaxiima: Ha sunntaa birshshettai “Xuussidi gelida Godaa” giyoogaa.



<sup>1</sup> Israa7eela giddoppe doorettida hasttamu sha7u asata Daawiti naa77anttuwaa xeesidi shiishshiis. <sup>2</sup> SHiishshidi inne a asai ubbai Yihudan de7iya Ba7aala kata-maappe dendididi, kiruubetuppe gidduwan ba kawotaa araataa bolli uttida Ubbaappe Wolqqaama GODAA sunttan xeesettida Xoossaa Taabootaa yaappe ehaanau biidosona. <sup>3</sup> Eti Xoossaa Taabootaa ooratta gaariyan wottidi, keraa huuphiyan de7iya Abinadaaba sooppe ehiidosona; Abinadaaba naati Uzzinne Ahiyyoi ooratta gaariyaa kaalettoosona. <sup>4</sup> Keraa huuphiyan de7iya Abinadaaba sooppe Xoossaa Taabootaa ehiyo wode, Ahiyyoi Taabootaappe sinttaara hemettees. <sup>5</sup> Daawitinne Israa7eela asai ubbai diittaanne maazingqiyaa diixxiiddi, karaabiyaa baqqiiddinne daalaanne shaashooraa qaattiiddi, banttau kumetta wolqqan GODAA sinttan ufaittiiddi bonchchidosona.

<sup>6</sup> Naakona kattaa qoxxiyo audiya gakkiiyo wode, boorati xubettin, Uzzi ba kushiya yeddidi, Xoossaa Taabootaa oiqqiis. <sup>7</sup> Uzzi Taabootaa bochchido gishshau, GODAA hanqqoi Uzza bolli eexxi kiyiis. Xoossai a shocin, he sohuwankka Xoossaa Taabootaa matan i haiqqi aggiis. <sup>8</sup> GODAA hanqqoi Uzza shocido gishshau, Daawiti yiillotiis. He sohoi hachchi gakkanaashin, Uzzi SHocettosaa geetettees.

<sup>9</sup> He gallassi Daawiti GODAAYYO yayyidi, “GODAA Taabootai taakko simmi waani yaanee?” yaagiis. <sup>10</sup> Hegaa gishshau, Daawiti GODAA Taabootaa banaara Daawita Katamaa ehaanau koyibeenna; hegaa aggidi Gaatiyaa Obeedi-Eedooma giyo bitaniyaa so efiis. <sup>11</sup> GODAA Taabootai Obeedi-Eedooma son heezzu agina gam77iis; GODAI anne a soo asa ubbaa anjjiis.

<sup>12</sup> Hegaappe simmin, “Xoossaa Taabootaa gishshau, GODAI Obeedi-Eedooma so asaanne ayyo de7iya ubbabaa anjjiis” yaagiyoogaa Kawoi Daawiti siyiis; hegaa gishshau, Daawiti Obeedi-Eedooma soo biidi, Xoossaa Taabootaa Daawita Katamaa ufaissan ehiis. <sup>13</sup> GODAA Taabootaa tookkida asati usuppunaa tanggido paiduwan paiduwan eta essidi, issi korimaanne issi anqqara maraa Daawiti yarshshiis. <sup>14</sup> Daawiti liinuwaa giyo qacinaappe dadettida eefuudiyaa maayidi, bau de7iya wolqqa ubban GODAA sinttan duriis. <sup>15</sup> Inne Israa7eela asati ubbati ufaissan hombbociiddinne malkkataa punniiddi GODAA Taabootaa Daawita Katamaa ehiidosona.

<sup>16</sup> GODAA Taabootai Daawita Katamaa geliyo wode, Saa7oola na7iyaa Miikaala maskkootiyaara xeellada, Kawoi Daawiti GODAA sinttan guppishiinne durishin be7aasu; be7ada Daawita ba wozanan karaasu.

<sup>17</sup> Daawiti GODAA Taabootaa wottanau toливо dunkkaaniyaa gidдон Taabootaa ehiidi wottidosona; wottin Daawiti xuuggiyo yarshshuwaanne issippetettaa yarshshuwaa GODAAYYO yarshshiis. <sup>18</sup> Daawiti xuuggiyo yarshshuwaanne issippetettaa yarshshuwaa yarshshiyooogaa polidoogaappe guyyiyan, Ubbaappe Wolqqaama GODAA sunttan asaa anjjiis. <sup>19</sup> Anjjidi Israa7eela asau ubbau, maccau attumau huuphiyan huuphiyan issi issi komppo oittaa, issi issi muxo ashuwaanne woiniyaa teeraa melaappe issi issi lichchakkuwaa gishiis. Hegaappe guyyiyan asai ubbai ba soo ba soo simmiis.

<sup>20</sup> Daawiti ba so asaa anjjanau soo simmido wode, Saa7oola na7iyaa Miikaala a mokkanau kiyada, “SHufuro asati kallo hemettiyoogaadan, hachchi Israa7eela kawoi ba ashkkaratu macca ashkkaratu sinttan kallottidi, aiba bonchchettidee!” yaagaasu.

<sup>21</sup> Yaagin Daawiti, “Ne aawaappenne a so asaappe aattidi, ba asaa Israa7eela kaalet-tanaadan tana doorida GODAA sinttan duraas. Taani GODAA bonchchanau duriyoogaa aggikke. <sup>22</sup> Taani hagaappe aattada bironkka tana toochchana; taani ta huuphiyaa ziqqi oottana. SHin neeni giido macca ashkkaratu sinttan taani bonchchettana” yaagiis.

<sup>23</sup> Hegaa gishshau, Saa7oola na7iyaa Miikaala haiqqana gakkanaashin, na7a yelabeikku.



## 7

*GODAI Daawitassi Immana Giido Ufaissaa  
(Hanidabaa Odiya Koiro Maxaafaa 17:1-15)*

<sup>1</sup> Kawoi Daawiti ba kawo keettan uttidoogaappe guyyiyaaninne GODAI a a morkketu ubbaappe shemppissidoogaappe guyyiyan, <sup>2</sup> hananabaa yootiya Naataana, “Taani zigaappe keexettida keettan de7ais; shin Xoossaa Taabootai dunkkaaniyan de7ees” yaagiis.

<sup>3</sup> Yaagin Naataani Daawita, “Oottanau ne wozanai qoppidobaa ubbaa ootta; GODAI nenaara de7ees” yaagiis.

<sup>4</sup> SHin he gallassa qammi GODAA qaalai Naataanakko yiidi, <sup>5</sup> “Ba; baada ta ashkkaraa Daawita hagaadan yaaga; ‘GODAI hagaadan yaagees; “Taani de7ana keettaa keexxanai nena gidakka. <sup>6</sup> Aissi giikko, taani Israa7eelata Gibxxe biittaappe kessido gallassaappe doommada hachchi gakkanaashin keettan de7abeikke; taani dunkkaanen yaanne haanne yuuyaidda de7aas. <sup>7</sup> Taani Israa7eela asaa ubbaara yuuyido soho ubban, ta asaa Israa7eela heemmana mala, taani sunttidoogeetuppe issuwaanne ‘Taayyo zigaa keettaa aissi keexxabeikkii?’ gaada oichchabeikke” yaagees’ yaaga.

<sup>8</sup> “Hegaa gishshau, ha77ikka ta ashkkaraa Daawitassi oda; ‘Ubbaappe Wolqqaama GODAI nena hagaadan yaagees; “Taani nena hentta gadeppe, dorssaa heemmiyoosaappe denttada, ta asaa Israa7eela kaalettanaadan ekkaas. <sup>9</sup> Neeni biido soho ubban taani nenaara gidaas; ne morkketa ubbaa taani ne sinttaappe diggaas. Ha77i simmi taani ha sa7an erettida gita asatu sunttaadan ne sunttaa gitayana. <sup>10-11</sup> Qassi taani ta asaassi Israa7eelassi soho immada, eta he sohuwan tokkana. Hegaa gishshau, eti bantta sohuwan de7ana; naa77antto eti shabbirettokkona. Beni wodiyaaninne ta asaa Israa7eela bolli daannatiyaageeta taani sunttido wodiyaadan, iitati eta zaarettidi naaqqokkona. Qassi taani nena ne morkketu ubbaappe shemppissana.

“ “Hegaa bollankka GODAI ba huuphen ne zareti de7i be7anaadan oottanaagaa neessi yootes. <sup>12</sup> Ne baree wurin haiqqada, ne maizza aawatun gaittiyo wode, ne gulbbataappe yelettida na7aa taani denttana; denttada a kawotettaa minttana. <sup>13</sup> Ta sunttaayyo keettaa keexxanai a; taani a kawotaa araataa merinau mintta essana. <sup>14</sup> Taani ayyo aawa gidana; ikka taayyo na7a gidana. I baliyo wode, taani a asaa xam77an, asai shociyo lissuwan a seerana. <sup>15</sup> SHin taani ne sinttaappe diggido Saa7oolappe ta siiqoi ekettidoogaadan, appe mulekka ekettenna. <sup>16</sup> Ne zaretinne ne kawotettai ta sinttan merinau gam77ana; ne kawotaa araataikka merinau minni eqqana” yaagees’ yaaga” yaagiis.

<sup>17</sup> Naataani GODAI ayyo ajjuutan qonccissido qaalaa ubbaa Daawitayyo odiis.

*Daawita Woosaa  
(Hanidabaa Odiya Koiro Maxaafaa 17:16-27)*

<sup>18</sup> Hegaappe guyyiyan, Kawoi Daawiti dunkkaaniyaa gelidi, GODAA sinttan uttiis. Uttidi hagaadan yaagidi woossiis; “Abeet Ubbaa Haariya GODAU, neeni haga ubbaa taayyo oottanau taani oonee? Ta so asaikka aibee? <sup>19</sup> Abeet Ubbaa Haariya GODAU, hagee ne aifiyaa sinttan guutta milatin, sinttappe ne ashkkaraa zaretussi hananabaakka haasayadasa. Ubbaa Haariya GODAU, hagee neeni asassi oossikka oottiyo ooso gidenna.

<sup>20</sup> “Hagaappe aadhdhiyaabaa taani Daawiti neeyyo ai gaanau danddayiyaanaa? Ubbaa Haariya GODAU, neeni tana ne ashkkaraa eraasa. <sup>21</sup> Neeni ne qaalaa gishshau, ne wozanaa qofaadan ha gitabaa oottada, tana ne ashkkaraa erissadasa.

<sup>22</sup> “Abeet Ubbaa Haariya GODAU, neeni ai keena giteeshsha! Ne mali issoinne baawa; nuuni nu haittan siyidoogaadankka, neeppe attin hara xoossi baawa. <sup>23</sup> Neeni ne asa oottanau wozido ne asaa Israa7eela milatiya hara kawotetti sa7aa bollan baawa. Neeni

etayyo oottido gitanne maalaalissiya oosotu gaasuwan ne sunttai biittan sa7an erettiis. Neeni ne asaa sinttaappe hara kawotettatanne eta xoossata laaggadasa. <sup>24</sup> Neeni ne asaa Israa7eela merinau nebaa oottadasa. Abeet GODAU, neenikka eta Xoossaa gidadasa.

<sup>25</sup> “GODAU Xoossau, simmi ha77i neeni ne ashkkaraayyoonne a zersettaayyo oottana giidoogaa merinau naaga; neeni oottana giidoogaadankka ootta. <sup>26</sup> Hegan ne sunttai merinau gitatana; asaikka nena, ‘Ubbaappe Wolqqaama GODAI Israa7eela Xoossaa’ yaagana. Ne ashkkaraa Daawita zaretikka ne sinttan minnidi eqqana.

<sup>27</sup> “Abeet Ubbaappe Wolqqaama GODAU, Israa7eela Xoossau, neeni haggaa, ‘Taani ne zareti de7i be7anaadan oottana’ yaagada taassi ne ashkkaraassi qonccadasa; heggaa gishshau, taani ne ashkkarai nena ha woosaa woossanau xalaas. <sup>28</sup> Abeet Ubbaa Haariya GODAU, neeni Xoossaattennee! Ne qaalaikka ammanettiyaagaa; neeni ha lo77o qaalaa taayyo ne ashkkaraayyo oottana gaadasa. <sup>29</sup> Ne sinttan yaa merinau gam77anaadan, ne ashkkaraa zariyaa anjjanau ufaitta. Aissi giikko, Abeet Ubbaa Haariya GODAU, heggaa haasayadasa; qassi ne anjuwan ne ashkkaraa zareti merinau anjjetana” yaagidi woossiis.

## 8

### *Daawiti Xoonido Xoonota (Hanidabaa Odiya Koiro Maxaafaa 18:1-17)*

<sup>1</sup> Hegaappe guyyiyan, Kawoi Daawiti Pilisxxeemata xoonidi haariis; yaatidi Metegi7aama giyo katamaa Pilisxxeema asatu kushiyaappe wotti ekkiis.

<sup>2</sup> Qassi Moo7aaba asatakka Daawiti xooniis. Biittan i eta zin77issidi wodoruwan likkiis; naa77u wodoro likettida ubbata woriis; heezzantto wodoro likettidaageeta paxa aggiis. Yaatin Moo7aaba asati Daawitayyo haarettidi giiraa giiridosona.

<sup>3</sup> Rahooba na7ai, Xooba Kawoi Hadaadi7eezeri Efiraaxiisa SHaafaa matan de7iya ba zawaa zaari ekkanau biidi, Daawitaara olettin, Daawiti a xooniis. <sup>4</sup> Daawiti a asaappe issi sha7anne laappun xeetu paraasatanne laatamu sha7u tohuwaasata omooddiis. Daawiti gaareta goochchanau xeetu parata ashshidi, hara paratu ubbau gaadiyaa gilddayyiis.

<sup>5</sup> Damasqqo kataman de7iya Sooriyaa olanchchati Xooba Kawuwaa Hadaadi7eezera maaddanau yiido wode, Daawiti etappe laatamanne naa77u sha7ata woriis.

<sup>6</sup> Hegaappe guyyiyan, Daawiti Sooriyaa kawotettaanne Damasqqo kataman olanchchatu qatota medhdhiis. Yaatin Sooriyaa asati Daawitayyo haarettidi, giiraa giiridosona. Daawiti biido soho ubban GODAI ayyo xoonuwaa immiis.

<sup>7</sup> Hadaadi7eezera ola gadaawati oiqqiyo worqqa gondalliyyaa Daawiti ekkidi, Yerusalaame ehiis. <sup>8</sup> Bexaahanne Berotaaya giyo Hadaadi7eezera katamatuppe Kawoi Daawiti nahaasiyaa giyo birataa keehi daruwaa ekkiis.

<sup>9</sup> Hadaadi7eezera olanchchata ubbaa Daawiti xoonidoogaa Hamaata Kawoi Too7i siyiis. <sup>10</sup> Siyidi Hadaadi7eezera olidi xoonido gishshau, a hashshu gaanaanne sarotanau ba na7aa Yoraama Kawuwaa Daawitakko kiittiis. Aissi giikko, Hadaadi7eezeri Too7aara olettiiddi gam77iis. Yoraami yiiddi worqqaappe, biraappenne nahaasiyaappe merettida miishshata Daawitayyo ehiis. <sup>11-12</sup> Ehin Kawoi Daawiti ha miishshata GODAAYYO dummayi wottiis. Qassi Daawiti ba xoonido kawotettatuppe ubbaappe, Sooriyaappe, Moo7aabappe, Amoonaa asatuppe, Pilisxxeema asatuppenne Amaaleeqa asatuppe ekkido worqqaanne biraa Rahooba na7aa, Xooba Kawuwaa Hadaadi7eezerappe ekkido omooduwaa kase peeshan GODAAYYO dummayi wottiis.

<sup>13</sup> Maxine Wombban tammanne hospun sha7u Eedooma asata Daawiti wori simmi-doogaappe guyyiyan, i haittatiis. <sup>14</sup> Daawiti Eedooma biitta ubban olanchchatu qatota

medhdhiis; yaatin he biittaa asai ubbai Daawitayyo haarettiis. Daawiti biido soho ubban GODAI ayyo xoonuwaa immiis.

### *Daawiti Ba Kawotettan Suntuudo Asata*

<sup>15</sup> Hegaadan oottidi, Daawiti Israa7eela ubbaa bolli kawotiis; kawotidi ba asaa ubbaa xillotettaanne suure pirddan aissiis. <sup>16</sup> Xaruuyi na7ai Yoo7aabi olanchchatu gadaawaa; Ahiluuda na7ai Yoosaafixi hanidabaa xaafiyaagaa. <sup>17</sup> Ahixuuba na7ai Xaadooqinne Abiyaataara na7ai Abimeleki qeeseta; Saraayi<sup>2</sup> qassi waanna xaafiya; <sup>18</sup> Yoodaaha na7ai Banaayi Daawita naagiya olanchchatu halaqaa; Daawita attuma naati kawuwaa zoriyaageeta.

## 9

### *Daawitanne Mafibosheeta*

<sup>1</sup> Issi gallassi Daawiti, “Yonaataana gishshau, taani ayyo kehanaadan hanno gakkanau Saa7oola qanttaappe attida asi de7iishsha?” yaagidi oichchiis.

<sup>2</sup> He wode Xiiba giyo issi ashkkaarai Saa7oola son de7ees; i Daawita sintti yaanaadan xeesidosona; yin kawoi a, “Neeni Xiibee?” yaagidi oichchiis.

Oichchin, “Ee taani Xiiba, ne ashkkaaraa” yaagiis.

<sup>3</sup> Yaagin kawoi a, “Xoossaa kehatettaa taani kehanaadan, Saa7oola qanttaappe palahida issi asinne baawee?” yaagiis.

Yaagin Xiibi kawuwaa, “Yonaataana naatuppe issoi hanno gakkanaashin de7ees; he na7aayyo naa77u tohotikka sila” yaagiis.

<sup>4</sup> Yaagin kawoi, “I awan de7ii?” yaagiis.

Yaagin Xiibi, “Lodabaara giyoosan Ammi7eela na7aa Maakira son de7ees” yaagiis.

<sup>5</sup> Yaagin Kawoi Daawiti kiittidi, Lodabaarappe Ammi7eela na7aa Maakira sooppe ehiissiis.

<sup>6</sup> Saa7oola na7aa Yonaataana na7ai Mafibosheeti Daawitakko yiis; yi gakkidi, Daawita sinttan lichchi giidi zin77iis.

Yaatin, Daawiti a, “Mafibosheetaa!” yaagidi xeesiis.

Xeesin i, “Abe ta godau, taani ne ashkkaaraa” yaagiis.

<sup>7</sup> Daawiti a, “Yayyoppa; ne aawaa Yonaataana gishshau, taani neeyyo kehana. Ne aawaa aawaa Saa7oola gadiyaa ubbaa taani neeyyo zaarana; qassi neeni ubba wode ta masoofiyaappe maana” yaagiis.

<sup>8</sup> Yaagin Mafibosheeti naa77anttuwaakka lichchi gi zin77idi, “Haiqqida kana malaa tana neeni wudada xeellanau, ne ashkkaarai taani oonee?” yaagiis.

<sup>9</sup> Kawoi Saa7oola ashkkaaraa Xiiba xeesidi, “Saa7oolabanne Saa7oola so asaabaa gididabaa ubbaa taani ne godaa na7aa na7aayyo immaas. <sup>10</sup> Ne godaa na7aa na7ai maanaadan neeni, ne naatinne ne ashkkaarati ayyo gadiyaa goyite; goyidi mokkida kattaa ayyo ehiite. Gidikkokka, ne godaa na7aa na7ai Mafibosheeti ubba wode ta masoofiyaappe maana” yaagiis. Xiibayyo tammanne ichchashu attuma naatinne laatamu ashkkaarati de7oosona.

<sup>11</sup> Xiibi kawuwaa, “Neeni ta godai kawoi ne ashkkaaraa azazido ubbabaa taani ne ashkkaarai polana” yaagiis. Hegaa gishshau, Mafibosheeti kawuwaa naatuppe issuwaadan kawuwaa masoofiyaappe miis.

<sup>12</sup> Mafibosheetayyo Miika giyo guutta na7ai de7ees. Xiiba son de7iya asati ubbati Mafibosheetayyo ashkkaarati gididosona. <sup>13</sup> Mafibosheeti ubba wode kawuwaa masoofiyaappe miyo gishshau, i Yerusalaamen de7ees. A gedee naa77aikka sila.

<sup>2</sup> 8:17 Saraayi: Ha bitaane Ibraisxxettuwan oiddu dumma dumma sunttan xeesettees. Sameela Maxaafaa Naa77anttuwaa 20:25, Kawotu Maxaafaa Koiruwaa 4:3, Hanidabaa Odiya Koiro Maxaafaa 18:6 xeella.

## 10

### *Daawiti Amoonatanne Sooreta Xooniis (Hanidabaa Odiya Koiro Maxaafaa 19:1-19)*

<sup>1</sup> Hegaappe guyyiyan, Amoonatu Kawoi Naa7oosi haiqqiis; haiqqin a na7ai Hanuuni a sohuwan kawotiis. <sup>2</sup> Daawiti, “A aawai taayyo kehidoogaadan Naa7oosa na7aa Hanuunayyo taanikka kehana” yaagiis. Hega gishshau, a minttettanau Daawiti ba asaa akko kiittiis.

Daawita asai Amoonaa biitti gakkido wode, <sup>3</sup> Amoonaa asaa halaqati bantta godaa Hanuuna, “Daawiti nena minttettanau ha asata kiittidoogee ne aawaa bonchchuwaa gishshaassa gaadiyye? I ba asaa kiittidoogee ha katamaa xeellanaassa, wochchanaas-sanne olidi xoonanaassa” yaagidosona. <sup>4</sup> Yaagin Hanuuni Daawiti kiittidoogeeta oiqqidi, eta buuchchaappe baggaa meediis; eta maayuwaakka uttiyo dulliyaa baggaappe qanxxi ekkidi, eta yeddiis.

<sup>5</sup> Hega gishshau, asati daro yeellatidosona. Daawiti hega siyidi, i etaara gaittiya asa kiittiis; etakko kiittidi, “Intte buuchchai diccana gakkanaashin, Yarkko Kataman de7ishshite; hegaappe guyyiyan haa yiite” yaagiis.

<sup>6</sup> Amoonati bantta oosuwan Daawiti eta morkkanaadan oottidoogaa erido wode, Beeti-Rahoobanne Xooba katamatun de7iya Sooriyaa asatuppe laatamu sha7u tohuwaasata, Xoba biittaappe tammanne naa77u sha7u asatanne Maa7ika biittaa kawuwaappe issi sha7u asata qaxaridosona.

<sup>7</sup> Daawiti hega siyido wode, Yoo7aabanne de7iya olanchchata ubbaa eta bolli yeddiis. <sup>8</sup> Amoonati kiyidi, katamaa penggiyan olau salppidosona; Xoobappenne Rahoobappe yiida Sooriyaa asati, Xooba asatinne Maa7ika asati dembban banttarkka de7oosona.

<sup>9</sup> Yoo7aabi bana olai sinttaaranne guyyeera doggomidoogaa be7iis; be7idi Israa7eelatu giddoppe ubbaappe minniya olanchchata doori ekkidi, Sooriyaa asatu sinttan salppissiis. <sup>10</sup> Attida asata ba ishahi Abishaayi azazana mala oottidi, Amoonaa asatu sinttan salppissiis. <sup>11</sup> Yoo7aabi ba ishahi, “Sooriyaa asati taayyo wolqqaamikko, neeni yaada, tana maadda. Qassi Amoonaa asati neeyyo wolqqaamikko, taani yaada, nena maaddana. <sup>12</sup> Simmi minna! Nu asaa gishshaunne nu Xoossaa katamatu gishshau, ane minni olettoos. GODAI bana lo77iyaabaa otto” yaagiis.

<sup>13</sup> Hegaappe guyyiyan, Yoo7aabinne aara de7iya asai Sooriyaa asatuura olettanau lauhu giidosona. Yaatin, Sooriyaa asati a sinttappe baqatidosona. <sup>14</sup> Sooriyaa asati baqatidoogaa Amoonaa asati be7ido wode, etikka Abishaaya sinttappe baqatidi, katamaa gelidosona. Gelin Yoo7aabi Amoonaa asatuura olettiyoogaa aggidi, Yerusalaame simmiis.

<sup>15</sup> Sooriyaa asati Israa7eela asati eta xoonidoogaa erido wode, bantta olanchchata ubbaa zaaridi shiishshidosona. <sup>16</sup> Kawoi Hadaadi7eezeri Sooriyaa asata Efiraaxiisa SHaafaappe hefintta baggappe kiittidi ehiissiis; ehiissin Helaama biidosona. Hadaadi7eezera olanchchatu gadaawai SHobaaki eta kaalettees.

<sup>17</sup> Daawiti hega siyido wode, Israa7eela olanchchata shiishshidi, Yorddaanoosa SHaafaa pinniis; pinnidi Helaama gakkiiis. Sooriyaa asati Daawitaara gaittanau salppidi, aara olettidosona. <sup>18</sup> SHin Sooriyaa asati Israa7eelatu sinttappe baqatidosona; Daawiti Sooriyaa olanchchatuppe paraa gaariyaa laaggiya laappun xeetu asatanne oitamuu sha7u tohuwaasata woriis; eta ola gadaawaa SHobaakakka shocin, he sohuwan haiqqiis. <sup>19</sup> Hadaadi7eezeru haarettidi de7iya kawoti Israa7eelati eta xoonidoogaa erido wode, Israa7eelatuura sigettidi, etayyo haarettidosona. Hegaappe simmin, Sooriyaa asati Amoonaa asata maaddanau yaagidosona.

# 11

## *Daawitanne Berssaabo*

<sup>1</sup> Ofinttan, kawoti olau kiyiyo wode, Daawiti ba asaaranne Israa7eela olanchchatuura Yoo7aaba yeddiis. Yeddin biidi Amoona biittaa woraajjiis; woraajjidi Raaba katamaa dooddidosona; shin Daawiti Yerusalaamen takkiis.

<sup>2</sup> Issi gallassa omarssi Daawiti ba hiixaappe denddidi, kawo keettaa bollan dembbayidi oottidosan hemettiis; hemettiiddi bollaa meecettiya issi mishiriyo be7iis; he mishiriya daro puulanchcha. <sup>3</sup> Daawiti asa kiittidi, a oonakko oishissii; oishissin he bitanee, “Hanna Elii7aama na7iyo Hiitiyaa Ooriyoona maccaasiyo Berssaabo” yaagiis. <sup>4</sup> Daawiti asa kiittidi, o xeesissi ehiissidi, iira aqiis. He wode he maccaasiyaa kushe qitai yiidi aadhdhin, geeyosaara de7ausu. Hegaappe guyyiyan, a ba soo simmada baasu. <sup>5</sup> Maccaaseessi shahaarai attin, Daawitakko kiitaa yeddada, “Taayyo shahaarai attiis” yaagaasu.

<sup>6</sup> Hegaappe guyyiyan Daawiti, “Hiitiyaa Ooriyoona tau haa yedda” yaagidi Yoo7aabau kiittiis; kiittin Yoo7aabi Ooriyoona Daawitayyo yeddiis. <sup>7</sup> Ooriyooni yin Daawiti a, “Yoo7aabi ai malee? Olanchchatikka ai malee? Qassi olai waanii?” yaagidi oichchiis. <sup>8</sup> Hegaappe guyyiyan Daawiti Ooriyoona, “Soo ba; baada shemppa ekka” yaagiis; yaagin Ooriyooni kawuwaa keettaappe kiyidi biis; kawoi Ooriyoonau aibakko immiyoobaa a geeduwaa yeddiis. <sup>9</sup> SHin Ooriyooni soo beennan kawuwaa keettaa dirssaa penggiyan ba godaa ashkkaratu ubbaara zin77i aqiis.

<sup>10</sup> “Ooriyooni ba soo bibeenna” giyoogaa Daawiti siyiis; siyidi Ooriyoona, “Neeni haahosaappe yaadasa gidikkii? Ne soo aibissi babeikkii?” yaagidi oichchiis.

<sup>11</sup> Oichchin Ooriyooni Daawita, “Taabootai, Israa7eela asai, Yihudaa asai, ta godaa Yoo7aabinne ta godaa asai dembban dunkkaaniyan de7oosona. Yaanin taani waanada soo baada moo, uyoo, qassi ta keettaayeera aqoo? Ne shemppoi ero! Taani haggaa malabaa oottikke” yaagidi zaariis.

<sup>12</sup> Yaagin Daawiti Ooriyoona, “Issi gallassaa hagan takka; wontto nena guyye yeddana” yaagiis; yaagin Ooriyooni he gallassinne wonttetta gallassi Yerusalaamen takkiis. <sup>13</sup> Daawiti shoobbin, Ooriyooni aara miisinne uyiis. Daawiti a mattoyiis. SHin he omarssi Ooriyooni ba soo beennan, ba hiixaa hiixxidi, ba godaa ashkkaratu giddon aqiis.

<sup>14</sup> Wonttin maallado Daawiti Yoo7aabayyo dabddaabbiyaa xaafidi, Ooriyoona bolli yeddiis. <sup>15</sup> Daawiti dabddaabbiyan Yoo7aaba, “Olai teequwaa dariyoosan, sintta baggaara Ooriyoona wotta; hegaappe guyyiyan, i shocetti haiqqana mala, a matappe kichchiichchite” yaagiis.

<sup>16</sup> Yoo7aabi he katamaa dooddiiddi, morkkiyaa olanchchatuppe minoti de7iyoosaa eridi, Ooriyoona yan wottiis. <sup>17</sup> Katamaa asati kiyidi Yoo7aabaara olettin, Daawita olanchchatuppe aramati haiqqidosona; Hiitiyaa Ooriyoonikka haiqqiis.

<sup>18</sup> Yoo7aabi olan hanidabaa ubbaa Daawitayyo kiittiis. <sup>19</sup> Kiittetidi biya bitaniyaa Yoo7aabi, “Olan hanidabaa ubbaa neeni kawuwaayyo oda wurssishin, <sup>20</sup> ooni erii, kawoi hanqquwaa eexxi kiyana; hanqqettidi nena, ‘Intte etaara olettanau katamaakko aibissi keehi shiiqidetii? Eti gimbbiyaa xeeraara wonddafiya dukkanaagaa eribeekketiyye? <sup>21</sup> Geedoona na7aa Abimeleka ooni woridee? Gaacciyoo maidiyaa gimbbiyaa xeeraara duge olada, Tebexa giyoosan issi maccaara woraasu gidekke? Yaatin, intte gimbbiyaakko aibissi shiiqidetii?’ yaagidi oichchiyaabaa gidikko neeni kawuwaa, ‘Ne ashkkarai, Hiitee Ooriyoonikka haiqqiis’ yaaga” yaagidi azaziis.

<sup>22</sup> Kiittetidaagee denddidi bi gakkidi, Yoo7aabi bana kiittidobaa ubbaa Daawitayyo yootiis. <sup>23</sup> Bitanee Daawita, “Nu morkketi nuuppe wolqqaamidosa; nunaara olettanau katamaappe gaxi dembbaa kiyidosona; shin nuuni eta katamaa penggiyaa gakkanaashin, guyye zaaridi yeddetida. <sup>24</sup> Hegaappe guyyiyan, wonddafiya



dukkiyaageeti gimbbiyaa xeeraara ne ashkkaratu bolli dukkidosona; dukkin kawuwaa asatuppe amaridaageeti haiqqidosona; qassi ne ashkkarai, Hiitee Ooriyoonikka haiqqiis” yaagiis.

<sup>25</sup> Yaagin Daawiti kiitettidi yiidaagaa, “Neeni Yoo7aaba hagaadan yaaga; ‘Hagau yiillotoppa; aissi giikko, bisoi issitoo haggaa, issitoo qassi haraa worees; katamaa olada oiqqanau minna’ yaagada a minttetta” yaagiis.

<sup>26</sup> Ooriyoona maccaasiyaa ba keettaawai haiqqidoogaa siyido wode, ayyo yeekkaasu. <sup>27</sup> A kayyottiyo wodee polettoogaappe guyyiyan, Daawiti o ba soo kiittidi ehiissii. Ehiissin a ayyo machcho gidaasu; yaatada ayyo attuma na7aa yelaasu. SHin Daawiti oottido oosoi GODAA sinttan iitabaa gidiiis.

## 12

### *Naataani Ehiido Kiitaanne Daawita Nagaraa Paaxettaa*

<sup>1</sup> GODAI Naataana Daawitakko kiittiis; kiittin Naataani akko yiidi, hagaadan yaagiis; “Issi kataman naa77u asati de7oosona; etappe issoi dure; qassi issoi manqqo. <sup>2</sup> Dure bitaniyaayyo daro dorssainne miizzai de7ees; <sup>3</sup> shin manqqo bitaniyaayyo i sham-midi heemmiyo issi dorssa mareeppe harabi aibinne baawa. He dorssiyyaa aaranne a naatuura diccaasu; a a qumaappe mausu; a wanccaappe uyausunne a kiyuwan zin77ausu. He dorssiyyaa ayyo macca na7a mala.

<sup>4</sup> Issi gallassi issi imattai he dure bitaniyaa soo yiis; shin duree ba dorssaappe woikko ba miizzaappe ekki shukkidi, ba soo yiida imattaa imattanau koyibeenna. I he manqqo bitaniyaa dorssiyo ekkidi, he soo yiida imattaa miziyoobaa kattiis” yaagiis.

<sup>5</sup> Daawiti he dure bitaniyaa bolli hanqquwaa eexxi kiyidi Naataana, “GODAI ero! Haggaa oottida bitanee haiqqanau bessees. <sup>6</sup> Qassi i he dorssa maree gishshaa oiddu kushiyaa aattidi qanxxanau koshshees; aissi giikko, qaretaa xayidi i heggaa oottiis” yaagiis.

<sup>7</sup> Naataani Daawita, “He bitanee nena! GODAI Israa7eela Xoossai hagaadan yaagees; ‘Taani nena Israa7eela bolli tiyada kawoyaas; Saa7oola kushiyaappekka taani nena ashshaas; <sup>8</sup> taani ne godaa keettaa neeyyo immaas; ne godaa maccaasatakka ne kiyuwan yeggaas; Israa7eela keettaa asaanne Yihudaa keettaa asaa taani neeyyo immaas. Hagee ubbaikka guuxxikko, taani neeyyo haraakka gujja immana shin. <sup>9</sup> Haggaa mala iitabaa GODAA sinttan oottada, aibissi GODAA qaalaa karadii? Hiitiyyaa Ooriyoona bisuwan woradasa; yaatada a keettaayyiyo neeyyo ekkadasa. Ee, Amoona asatu bisuwan a woradasa. <sup>10</sup> Neeni tana karada, Hiitiyyaa Ooriyoona keettaayyiyo neeyyo ekkido gishshau, ne zariyaappe bisoi mulekka shaahettenna’ yaagees.

<sup>11</sup> “Heggaa gishshau GODAI, ‘Taani ne so asaa giddoppe ne bolli iitabaa ehaana; ne maccaasata neeni xeellishin denttada, neeyyo matattiya urau immana; seeta gallassan he bitanee ne maccaasatuura zin77ana. <sup>12</sup> Neeni heggaa geeman oottadasa; shin taani haggaa seeta gallassi Israa7eela asaa ubbaa sinttan oottana’ yaagees” yaagiis.

<sup>13</sup> Yaagin Daawiti Naataana, “Taani GODAA bolli nagaraa oottarggaas” yaagiis.

Yaagin Naataani, “GODAIKKA ne nagaraa atto girggiis; neeni haiqqakka. <sup>14</sup> Neeni haggaa oottada, GODAA morkketi a karanaadan oottido gishshau, neeyyo yelettida na7ai haiqqana” yaagiis.

<sup>15</sup> Naataani ba soo biidoogaappe guyyiyan, Ooriyoona maccaasiyaa Daawitayyo yelido na7aa GODAI shociis; shocin i harggiis. <sup>16</sup> Daawiti ha na7aassi Xoossaa woossiis; Daawiti kattaa meennan xoomiisinne ba soo gelidi, qamma qamma biittan zin77i aqiiis. <sup>17</sup> A so cimati a biittaappe denttanau a matan eqqidosa; shin biittaappe denddennan ixxiis; i etaara qumaa mibeenna.

<sup>18</sup> Laappuntta gallassi na7ai haiqqiis. Daawita ashkkarati na7aa haiquwaa odanau yayyidosona; yayyidi, “Na7ai paxa de7ishin nuuni Daawita haasayissida; shin siyennan

ixxiis. Yaatin, na7ai haiqqidoogaa nuuni ayyo waatidi yootanau danddayiyoo? Ooni erii, i bana qohanaakkonne” yaagidosona.

<sup>19</sup> Ba ashkkarati issoi issuwaara saasukettiyoogaa Daawiti be7ido wode, yiirai haiqqidoogaa erii. Daawiti eta, “Yiirai haiqqidee?” yaagidi oichchiis.

Oichchin eti, “Ee haiqqiis” yaagidosona.

<sup>20</sup> Yaagin Daawiti biittaappe denddi eqqiis. Meecettidi, tiyettidinne ba maayuwaa laammidi, GODAA keettaa geliis; gelidi goinniis. Hegaappe guyyiyan ba soo biidi, qumaa oichchin eti a sintti aattidosona; aattin qumaa miis.

<sup>21</sup> A ashkkarati a, “Neeni hagaadan aissi hanadii? Na7ai paxa de7ishin xoomadasanne yeekkadasa; shin na7ai haiqqin denddada, qumaa maadasa!” yaagidosona.

<sup>22</sup> Yaagin Daawiti eta, “Na7ai paxa de7ishin taani xoomaasinne yeekkaasi; aissi giikko, ‘Ooni erii, GODAI tana maarin, na7ai paxanaakkonne’ yaagada qoppaas. <sup>23</sup> SHin na7ai ha77i haiqqiichchin, taani aibissi xoomoo? Taani na7aa guyye zaarana danddayiyaanaa? Taani akko baanaappe attin, i taakko simmenna” yaagiis.

<sup>24</sup> Hegaappe guyyiyan, Daawiti ba keettaayyiyo Berssaabo minttettiis. Daawiti ikko gelidi iira aqiis; yaatin, a ayyo attuma na7aa yelaasu; na7aa Solomona sunttiis; GODAI he na7aa siiqiis. <sup>25</sup> GODAI na7aa siiqido gishshau, na7aa “Yidiidiyaa” giidi sunttana mala, hananabaa yootiya Naataana bolli kiittiis.

### *Daawiti Raaba Katamaa Olidi Oiqqiis*

*(Hanidabaa Odiya Koiro Maxaafaa 20:1-3)*

<sup>26</sup> He wode Yoo7aabi Amoonatu katamaa Raaba olidi, kawo qatuwaa oiqqiis.

<sup>27</sup> Oiqqidi, Yoo7aabi Daawitakko kiitaa yeddidi, “Taani Raaba katamaa olada, haataa duuqqiyo sohuwaa oiqqaa. <sup>28</sup> Hegaa gishshau, attida olanchchata shiishshada katamaa olada oiqqaa. Hegee xayikko, taani katamaa oiqqais. Yaatikko, i ta sunttan xeegettana” yaagiis.

<sup>29</sup> Yaagin Daawiti ba olanchchata ubbaa shiishshidi, Raaba katamaa biidi, olidi oiqqiis. <sup>30</sup> Eta kawuwaa kallachchaakka a huuphiyaappe ekkiis. He worqqa kallachchai hasttamanne ichchashu kilo giraame deexxees; a gidдон inqquwaa giyo al77o shuchchai de7ees. He kallachchai Daawita huuphiyan goxettiis. Katamaappe keehi daro omooduwaa Daawiti omooddidi ehiis. <sup>31</sup> He katamaa asaa yaappe kes-sidi, magaaziyan, birata shalkkiyaaninne birata kalttan oottanaadan oottiis; qassi eta urqqaappe xuubiyaa medhdhanaadan oottiis. Amoonatu katamatu ubban de7iya asaa i hegaadan oottiis. Hegaappe guyyiyan, Daawitinne a olanchchati ubbai Yerusalaame simmidosona.

## 13

### *Aminoonanne Taamaaro*

<sup>1</sup> Issi wode hagaadan haniis. Daawita na7aa Abeseloomayyo Taamaaro giyo issi puulanchcha michchiyaa de7ausu; Daawita na7ai Aminooni Taamaaro siiqiis. <sup>2</sup> A michchiyaa Taamaara geela7o gidido gishshaunne i o ainne oottanau danddayennabaa au milatido gishshau, Aminooni Taamaaro qoppidi gilqqiis.

<sup>3</sup> SHin Aminoonayyo Daawita ishaa SHAama na7aa Yonadaaba giyo laggee de7ees; Yonadaabi daro gaica asa. <sup>4</sup> Yonadaabi Aminooni, “Neeni kawuwaa na7a; yaatin, maallado maallado aissi gilqqai? Neeni taayyo aibissi odikkii?” yaagidi oichchiis.

Oichchin Aminooni a, “Ta ishaa Abeselooma michchiyo Taamaaro taani siiqais” yaagiis.

<sup>5</sup> Yonadaabi Aminooni, “Ba; baada sakettiyaabaa malatada hiixan zin77a baya. Ne aawai nena be7anau yiyo wode, “Ta michchiyaa Taamaara yaada taayyo miyoobaa

immu; taani o xeellishin qumaakka ta sinttan kattada tana barssu' yaagada oichcha" yaagiis.

<sup>6</sup> Yaagin Aminooni sakettidabaa milatidi biidi hiixan zin77iis. Kawoi a be7anau yiido wode, Aminooni a, "Ta michchiyaa Taamaara yaada, taayyo issi lo77o oittaa ta xeellishin uukkiyaakkonne taani i kushiyaappe miyaakko dosais shin" yaagiis.

<sup>7</sup> Yaagin Daawiti Taamaarikko kawo soo kiittidi, "Ne ishaa Aminoona soo ha77i baada, ayyo qumaa katta" yaagiis. <sup>8</sup> Taamaara ba ishaa Aminoona soo baasu; he wode i zin77iis. Taamaara aramida xiilliyaa munaqqada, Aminooni xeellishin oittaa uukkaasu. <sup>9</sup> Taamaara bashiyaappe oittaa kessada ayyo aattaasu; shin i meennan ixxiis.

Aminooni, "Asa ubbaa hagaappe kessirggite" yaagiis; yaagin asai ubbai a matappe kiyiis. <sup>10</sup> Hegaappe simmin Aminooni Taamaaro, "Taani ne kushiyaappe maanaadan qumaa haa ta siirixaa ekkada ya" yaagiis; yaagin Taamaara ba uukkido oittaa ekkada, ba ishaa Aminoona siirixaa gelissaasu. <sup>11</sup> Taamaara qumaa akko shiishshido wode, o oiqqidi, "Ta michchee, haaya! Tanaara zin77a" yaagiis.

<sup>12</sup> Yaagin a, "Ta ishau, chii hanenna! Tana wolqqanttoppa! Haggaa malabi Israa7eela biittan oosettanau bessennabaa; haggaa mala iitabaa oottoppa. <sup>13</sup> Ta pokkuwaa taani waatada genttanau danddayiyaanaa? Qassi neenikka Israa7eela gidдон kaushsha asa gidana. Hayyanaa kawuwaa ha77i oichcha. I taani nena gelanau diggenna" yaagaasu. <sup>14</sup> SHin a odiyoojaa siyennan ixxiis. I ippe wolqqaama gididiyo gishshau, o wolqqan oiqqidi mooriis.

<sup>15</sup> Hegaappe guyyiyan, Aminooni o keehippe ixxiis; kase o siiqidoogaappe aattidi ixxiis. Aminooni o, "Kiyaa! Kiyada ba!" yaagiis.

<sup>16</sup> Yaagin a, "Biikke! Neeni tana ha77i kare iiggiyo balai neeni hanno gakkanaashin ta bolli oottido balaappe aadhdhees" yaagaasu.

SHin i iyyo siyennan ixxiis. <sup>17</sup> Aminooni ba ashkkaraa xeesidi, "Ha maccaasiyo ta sinttaappe kessa; o kare kessarggada, kariyaa gorddada hiraqa" yaagiis. <sup>18</sup> Yaagin ashkkarai maccaasiyo kare kessirggidi, kariyaa gorddidi hiraqiis.

A daro alleequwaara de7iya maayuwaa maayaasu; aissi giikko, kawo macca naati geela7oti heggaa mala maayuwaa maayoosona. <sup>19</sup> Taamaara bidinttaa ba huuphiyan qolada, ba maayido alleequwaara de7iya maayuwaa pooshshaasu; pooshshada ba huuphiyaa oiqqada, waasuwa xulluusaidda baasu.

<sup>20</sup> I ishaa Abeseloomi o be7ido wode, "Ne ishai Aminooni nena mooridee? Ta michchee, neeni ha77i co77u ga. I ne ishaa; ha yohuwaa neeni uluwan oiqqoppa" yaagiis. Heggaa gishshau, Taamaara azzanaidda ba ishaa Abeselooma son, asan gait-tennan de7aasu.

<sup>21</sup> Kawoi Daawiti ha yohuwaa siyido wode, keehi hanqqettiis. <sup>22</sup> Abeseloomi Aminoona mal77aa cammaakka qaattibeenna. Ba michchiyo Taamaaro moorido gishshau, Aminoona morkkiis.

### *Abeseloomi Aminoona Woriis*

<sup>23</sup> Naa77u laittaappe guyyiyan, Efireema zawaa matan Haxooraa giyoosan Abeseloomi dorssaa ikisiyaa meedissee; kawuwaa naati ubbai he sohuwaa yaanaadan Abeseloomi eta xeesiis. <sup>24</sup> Abeseloomi kawuwaakko yiidi, "Ta kawuwau, taani ne ashkkarai ta dorssatu ikisiyaa meedisais; neeninne ne oosanchchati nunaara hindderkketii!" yaagiis.

<sup>25</sup> Yaagin kawoi Abeselooma, "CHii ta na7au! Nuuni ubbai biikko, neeyyo tooho gidana" yaagiis. Abeseloomi kawuwaa daroppe shoobbiis; shoobbin kawoi beettaa ixxiis; shin Abeselooma anjjiis.

<sup>26</sup> Abeseloomi kawuwaa, "Neeni baana xayikko, ta ishaa Aminooni nunaara bo" yaagiis.

Yaagin kawoi, “I nenaara aibissi bii?” yaagiis. <sup>27</sup> SHin Abeseloomi shoobbidi aggenan ixxin, Daawiti Aminoona ba attuma naata hinkkoota aara yeddiis.

<sup>28</sup> Abeseloomi ba ashkkarata, “Siyite! Aminoona woiniyaa eessaa uyidi kalliyo wodenne taani inttena, ‘Aminoona shocite’ yaagiyo wode, intte a worite. Yayyoppite! Inttena azazidai tana. Minnite! Xalite!” yaagidi azaziis. <sup>29</sup> Azazin Abeselooma ashkkarati i azazidoogaadan Aminoona oottidosona. Hegaappe guyyiyan, kawuwaa attuma naati ubbati denddidi, bantta baquluwaa baquluwaa toggidi baqatidosona.

<sup>30</sup> Eti biron ogiyan de7ishin, “Abeseloomi kawuwaa naata ubbaa wurssiis; etappe issoinne attibeenna” giyo odoi Daawitakko gakkiiis. <sup>31</sup> Gakkin kawoi dendi eqqidi, azzanu wau ba maayuwaa pooshshiis; yaatidi biittan zin77iis. A ashkkarati ubbatikka bantta maayuwaa pooshshidi, a matan eqqidosa.

<sup>32</sup> Daawita ishaa SHaama na7ai Yonadaabi, “Ta godau, ‘Eti kawo naata ubbaa worirggidosona’ gaada qoppoppa; Aminoona xallai haiqqiis. Aissi giikko, Aminoona ba michchiyo Taamaaro moorido gallasaappe doommidi, Abeseloomi a bollan polanau halchchidobaa gidiis. <sup>33</sup> Ha77ikka ta godai kawoi ba wozanan, ‘Kawuwaa naati ubbati haiqqidosona’ yaagidi odido oduwaa tuma gooppo; Aminoona xallai haiqqiis” yaagiis.

<sup>34</sup> He wode Abeseloomi baqatiis.

Naagiya bitanee xoqqu giidi xeelliyo wode, baappe awai wulliyo baggaara de7iya ogiyaara keraa lanqqiyaa oiqqidi, cora asai yiyaagaa be7iis; be7idi kawuwaayyo yootiis. <sup>35</sup> He wode Yonadaabi kawuwaa, “Be7a! Taani ne ashkkarai odidoogaadan kawo naati yiidosona” yaagiis.

<sup>36</sup> I haasayidi wurssaanne kawuwaa naati gelidosona; gelidi bantta qaalaa xoqqu oot-tidi waassidosona. Qassi kawoinne a oosanchchati ubbai yibbaata yehe yeekkidosa.

<sup>37</sup> Abeseloomi baqatidi, Amihuuda na7aa Talmmaayakko, Gashuura biittaa kawuwaakko biis; shin Kawoi Daawiti ubba gallassi ba na7aayyo yeekkiis.

<sup>38</sup> Abeseloomi baqatidi Gashuura biitti biidoogaappe guyyiyan, yan heezzu laittaa de7iis. <sup>39</sup> Kawoi Daawiti Abeseloomakko baanau amottiis; aissi giikko, Aminoona haiquwaassi azzaniyoogaappe i minettiis.

## 14

### *Abeseloomi Yerusalaame Simmiis*

<sup>1</sup> Xaruuyi na7ai Yoo7aabi Kawoi Daawiti Abeselooma laamotidoogaa eriis. <sup>2</sup> Hegaa gishshau, Yoo7aabi Taqo7a katamaa kiittidi, yaappe issi eranchcha mishiriyo ehiissiis; ehiissidi o, “Neeni kayyottiya asadan hana; kayyo maayuwaa maaya; shicissiyaabaa tiyettoppa; daro wodeesappe doommidi, haiqqida asau kayyottiya maccaasadan hana. <sup>3</sup> Yaatada kawuwaakko baada ha qaalata ayyo oda” yaagiis. Yoo7aabi a kawuwaayyo odanabaa iyyo yootiis.

<sup>4</sup> Taqo7a katamaa maccaasiyaa kawuwaakko biido wode, biittan lichchi gaada gufan-nada, “Kawuwau, tana maaddarkkii!” yaagaasu.

<sup>5</sup> Yaagin kawoi o, “Nena aibee metidai?” yaagidi oichchiis.

Oichchin a, “Taani azini haiqqido maccaasa. <sup>6</sup> Taayyo ne ashkkareeyyo naa77u attuma naati de7oosona. Eti issoi issuwara dembban warettidosona; eta shaakkanau issi asinne xayin, issoi hinkkuwaa shocidi woriis. <sup>7</sup> Ha77i ta dabboti ubbai ta bolli denddidi, ‘Ba ishaa i worido gishshau, nuuni a woranaadan ba ishaa woridaagaa nuuyyo hamma; yaatidi nuuni laattiyaabaa xaissana’ yaagidosona. Yaatikko, eti taayyo laatau attida issi xiifaa toissoosona; ta keettaawaa sunttaakka a zersettaa biittaappe xaissoosona” yaagaasu.

<sup>8</sup> Kawoi he mishiriyo, “Ne soo ba; taani neeyyo azazana” yaagiis.

<sup>9</sup> SHin Taqo7a katamaa maccaasiyaa kawuwaa, “Ta godau kawuwau, gomee tananne ta aawaa keettaa asaa oiqqo; shin kawoinne a kawotaa araatai geeshsha gido” yaa-gaasu.

<sup>10</sup> Yaagin kawoi maccaasiyo, “Ne bolli qaala qaattiya oonanne taakko eha; i nena naa77antto bochchenna” yaagiis.

<sup>11</sup> Yaagin maccaasiyaa kawuwaa, “Suutaa achchiyaagee bashshaa bolli bashshaa gujjennaadaaninne ta na7aakka worennaadan kawoi GODAA ba Xoossaa sunntan taayyo caaqqo” yaagaasu.

Kawoi o, “Xoossai ero! Ne na7aa huuphiyaa binnaanaappe issoikka biittan wodhd-henna” yaagiis.

<sup>12</sup> Hegaappe guyyiyan, maccaasiyaa kawuwaa, “Ta godaa kawuwaayyo taani issi qaalaa haasayais” yaagaasu.

Yaagin kawoi, “Haasaya” yaagiis.

<sup>13</sup> He maccaasiyaa kawuwaa, “Yaatin, neeni Xoossaa asaa bolli haggaa malabaa aibissi oottadii? Kawoi iiggido ba na7aa guyye zaaribeenna gishshau, ba haasayido qaalau kawoi mooranchcha gidennee? <sup>14</sup> Nuuni ubbai haiqqana; biittan gukkida haattai simmennaagaadan, nuuni naa77antto simmokko. SHin Xoossai bohattida asi mulekka xayenna mala, ayyo ogiyaa giigisseesippe attin, i coo xayanaadan koyenna.

<sup>15</sup> “Tana asai yashissiyo gishshau, ta godaayyo kawuwaayyo taani haggaa yootanau ha77i yaas. Taani ne ashkkariyaa, ‘Taani kawuwaayyo haasayana; ooni erii, taani a ashkkariyaa oichchiyoobaa kawoi polanaakkonne; <sup>16</sup> Xoossai nuuyyo im-mido laataappe tananne ta na7aa xaissanau koyiya asa kushiyaappe kawoi siyidi ashshanaakkonne’ yaagada qoppais. <sup>17</sup> Qassikka taani ne ashkkariyaa, ‘Lo77uwaanne iitaa shaakkanau ta godai kawoi Xoossaa kiitanchcha mala gidio gishshau, ta godaa kawuwaa qalalai tana woppisso. GODAI ne Xoossai nenaara gido’ yaagais” yaagaasu.

<sup>18</sup> Kawoi mishireeyyo, “Taani nena oichchana haniyoobaa zaaruwaa neeni taappe gottoppa” yaagiis.

Yaagin maccaasiyaa, “Ta godai kawoi haasayo” yaagaasu.

<sup>19</sup> Kawoi mishiriyo, “Hagan ubban Yoo7aaba kushe nenaara de7ii?” yaagidi oichchiis.

Oichchin maccaasiyaa, “Ta godau kawuwau, ne shemppoi ero! Neeni ta godai kawoi haasayido ubbabaappe ushachchi woikko haddirssi gaanau danddayiya issi asikka baawa. Ee; haggaa tana azazidaagee, ta doonan, ne ashkkaree doonan haggaa wottidaagee ne ashkkaraa Yoo7aaba. <sup>20</sup> Ha77i de7iya hanotaa laammanau ne ashkkarai Yoo7aabi haggaa oottiis. Xoossaa kiitanchchaayyo de7iya aadhdhida eraa malai ta godaayyo de7ees; biittan haniyaabaa ubbabaa i erees” yaagaasu.

<sup>21</sup> Kawoi Yoo7aaba, “Daro lo77o! Taani haggaa oottana! Ba; baada he yelaga bitaniyaa Abeselooma ekkada ya” yaagiis.

<sup>22</sup> Yaagin Yoo7aabi kawuwaa sinttan lichchi giidi gufannidi, kawuwaa haggadan yaagidi anjjiis; “Ta godau kawuwau, ne sinttan nashettidoogaa ne ashkkarai hachchi erii; aissi giikko, kawoi ba ashkkarai oichchidobaa siyiis” yaagiis.

<sup>23</sup> Hegaappe guyyiyan, Yoo7aabi denddidi Gashuura biitti biis; biidi Abeselooma Yerusalaame ekki ehiis. <sup>24</sup> SHin kawoi, “I ba soo baanau bessees; i ta som77uwaa be7oppo” yaagiis; yaagin Abeseloomi ba soo biis; kawuwaa som77uwaakka be7ibeenna.

<sup>25</sup> Israa7eela ubbaa gidдон mera lo77on Abeseloomadan sabettida issi asinne baawa. A huuphiyaappe biidi tohuwaa yachchaa gakkanaashinkka an boriyoobi baawa. <sup>26</sup> I bana deexxiyo wode ba huuphiyaa binnaanaa qanxxissees; ba huuphiyaa binnaanaa qanxxissiyo wode ubban miizaanan wottidi mazzanees; mazzanin kawo meezaanaa likkiyan naa77u kilonne heezzu xetu giraame deexxees. <sup>27</sup> Abeseloomayyo heezzu



attuma naatinne issi macca na7iyaa yelettidosona; macca na7ee sunttai Taamaaro; he na7iyaa puulanchcha maccaasa gidaasu.

<sup>28</sup> Abeseloomi naa77u laitta kumettaa kawuwaa som77uwaa be7ennan Yerusalaamen de7iis. <sup>29</sup> “Taani nena kawuwaakko kiittana mala, taakko haaya” yaagidi Abeseloomi Yoo7aabassi kiittiis; shin Yoo7aabi yeennan ixxiis. Ixxin naa77anttokka kiittiis; shin Yoo7aabi akko yeennan ixxiis. <sup>30</sup> Hegaappe guyyiyan, Abeseloomi ba ashkkarata, “Siyite! Ta goshshaa matan Yoo7aabayyo goshshai de7ees; ayyo hegan banggai de7ees. Biite; biidi tamaa oittite” yaagiis. Yaagin Abeselooma ashkkarati Yoo7aaba bangгаа tamaa oittidosona.

<sup>31</sup> Yaatin, Yoo7aabi denddidi, Abeselooma soo biis; biidi “Ne ashkkarati ta bangгаа aibissi tamaa oittidonaa?” yaagiis.

<sup>32</sup> Yaagin Abeseloomi Yoo7aaba, “Neeni taani kiittin yeennan ixxido gishshaassa. Neeni kawuwaakko baada, ‘Abeseloomi hagaadan yaagees; “Taani Gashuura biit-taappe aibissi yiidanaa? Taani hanno gakkanaashinkka yan de7idabaa gidiyaakko taayyo keha shin” yaagees’ gaada taayyo oichchanaadan koyaas. Ha77ikka taani kawuwaa som77uwaa be7anau koyais; taani mooranchcha gidikko, i tana woro” yaagiis.

<sup>33</sup> Yaagin Yoo7aabi kawuwaakko biidi, Abeseloomi giidoogaa yootiis. Kawoi Abeselooma xeesiis; xeesissin Abeseloomi soo gelidi, kawuwaa sinttan sa7an lichchi giidi ziggiis; yaatin, kawoi Abeselooma yeriis.

## 15

### *Abeselooma Maqquwaa*

<sup>1</sup> Hegaappe guyyiyan, Abeseloomi para gaariyaa, paratanne ba sinttan woxxanau ishataamu asata giigissiis. <sup>2</sup> Abeseloomi maallado guuraara denddidi, katamaa pengge efiya ogiyaa doonan eqqees. Mootoi de7iyo ai asinne kawuwaa sintti pirddau yiido wode, Abeseloomi he bitaniyaa xeesidi, “Neeni awa katamaappe yaadii?” yaagidi oichchees. Oichchin he bitanee, “Taani ne ashkkarai Israa7eela zaretuppe issuwaappe yaas” yaagidi ayyo zaarees. <sup>3</sup> Abeseloomi a, “Be7a! Ne yohoi lo77onne suure; shin kawuwaa baggappe neeyyo siyiyaabi baawa” yaagees. <sup>4</sup> Abeseloomi gujjidikka, “Taani Israa7eela biittan pirddanau sunttetidabaa gidarkkinaashsha! Hega gidiyaakko, mootoi woikko yohoi de7iyo ubbai taakko yin, taani ayyo suure pirddaa pirddana shin” yaagees.

<sup>5</sup> Ooninne akko yiidi ayyo ziggiyo wode, Abeseloomi ba kushiya yeddidi, he uraa oiqqidi yerees. <sup>6</sup> Pirddettanau kawuwaakko yiya Israa7eelatu ubbaayyo Abeseloomi hegaadan haniis; yaatidi Israa7eela asaa wozanaa Abeseloomi wuuqqiis.

<sup>7</sup> Oiddu laittaappe guyyiyan, Abeseloomi kawuwaa, “Taani GODAAYYO shiiqqido shiiquwaa gattanau Kebroona biitti baana. <sup>8</sup> Taani ne ashkkarai Gashuura kataman Sooriyaa biittan de7aidda, ‘Tana GODAI Yerusalaame guyye efiyaabaa gidikko, Kebroona kataman taani GODAAYYO goinnana’ yaagada shiiqqa uttaas” yaagiis.

<sup>9</sup> Yaagin kawoi Abeselooma, “Saro ba” yaagin, i denddidi Kebroona katamaa biis.

<sup>10</sup> SHin Abeseloomi Israa7eela zaretu ubbaakko qosan kiitaa yeddidi, “Malkkataa punaa intte siyido wode, ‘Abeseloomi Kebroonan kawotiis’ yaagite” yaagiis.

<sup>11</sup> Abeseloomi xeesin, Yerusalaameppe aara issippe biida imattati naa77u xeetu asa; he asati ainne erennan coo ashkкетettan biidosona. <sup>12</sup> Abeseloomi yarshshuwaa yarshshiiddi, Daawita zoriya Akixoofeela Giilo katamaappe xeesiis; kawuwaa bolli denddida maqqoi goobiis; Abeselooma kaalliyaaagetikka coratti coratti biidosona.

### *Daawiti Yerusalaameppe Baqatiis*

<sup>13</sup> Issi kiittetidaagee yiidi Daawita, “Israa7eela asaa wozanai Abeseloomakko simmi-ichchiis” yaagiis.

<sup>14</sup> Hegaappe guyyiyan, Daawiti banaara issippe Yerusalaamen de7iya ba oosanchchata, “Denddite! Nuuni baqatoos! Hegee xayikko, nu giddoppe ai asinne Abeseloomappe kessi ekkenna. Nuuni eesotidi baana koshshees; hegee xayikko, i eesotidi yiidi nuna xaissana; nu katamaa bisuwan busakkana” yaagiis.

<sup>15</sup> Yaagin kawuwaa oosanchchati a, “Neeni nu godai kawoi doorido ubbabaa nuuni ne ashkkarati oottanau giigi uttida” yaagidosona.

<sup>16</sup> Yaagin kawoi kiyidi biis; a so asai ubbai aara issippe biis; shin ba keettaa naaganaadan tammu baakkota ashshiis. <sup>17</sup> Kawoi kiyin, asai ubbai aara biis; biidi katamau wurssetta keettaa lanqqen eqqidosa. <sup>18</sup> A oosanchchati ubbai appe sinttaara salppidi aadhdhidosa; eta kaallidi kawuwaa naagiyaageeti salppidosona; qassi eta kaallidi Gaate katamaappe yiida usuppun xee tu asati, kawuwaa sinttaara salppidi aadhdhidosa.

<sup>19</sup> Kawoi Gaatiyaa Ittaaya, “Neeni nunaara aibissi yai? Guyye simmada, kawuwaa Abeseloomaara de7ashsha. Neeni asa biittaa asa; neeni bete. <sup>20</sup> Neeni sa7a zino yaadasa; taani ta huuphessi biyoosaa erennan de7aidda, nena hachchi waatada tanaara yuushshoo? Guyye simma; ne dere biittaa asatakka nenaara efa. GODAI neeyyo kehonne ammanetto!” yaagiis.

<sup>21</sup> Yaagin Ittaayi kawuwaa, “GODAI ero! Ta godai kawoi ero! Ta godai kawoi de7iyoosan awan gidinkka, i tau haiqo gidin, paxa gidinkka, taani ne ashkkarai nenaara de7ana” yaagiis.

<sup>22</sup> Yaagin Daawiti Ittaaya, “Lo77o! Baada salppa” yaagiis; yaagin Gaatiyaa Ittaayi ba asatu ubbaaranne ba so asaa ubbaara salppiis.

<sup>23</sup> He ubba asai kanttishin, he biittaa asai ubbai bantta qaalaa xoqqissidi yeekkidosa; kawoi Qediroona SHaafaa pinniis; asai ubbaikka bazzo simmidi biis.

<sup>24</sup> Qeesiyaa Saadooqikka he sohuwan de7ees; Xoossaa Maachchaa Taabootaa tookkiya Leewatikka aara issippe de7oosona. Asai ubbai katamaappe kiyi wurana gakkanaashin, Xoossaa Taabootaa biittan wottin, qeesiyaa Abiyaataari yarshshuwaa yarshshiis.

<sup>25</sup> Hegaappe guyyiyan kawoi Xaadooqa, “Xoossaa Taabootaa katamaa guyye efa. GODAI tanan ufaittiyaabaa gidikko, tana i zaaretti ehiidi, ba Taabootaanne ba de7iyoosaa naa77anttuwaa bessana. <sup>26</sup> SHin i, ‘Taani nenan ufaittikke’ giikko, i bana lo77iyaabaa ootto; taani hagan de7ais” yaagiis.

<sup>27</sup> Qassikka kawoi qeesiyaa Xaadooqa, “Siya; neeni ne na7aa Ahima7aaxanne Abiyaataara na7aa Yonaataana ekkada katamaa saro ba. <sup>28</sup> Intte tana erissanau qaala kiittana gakkanaashin, taani bazzon de7iya shaafaa pinuwan de7ashshana” yaagiis.

<sup>29</sup> Hegaa gishshau, Xaadooqinne Abiyaataari Xoossaa Taabootaa Yerusalaame guyye efidosona; efidi yan de7idosona.

<sup>30</sup> SHin Daawiti yeekkiiddi Dabira Zaite pudettaa kiyiis. I azzanuwau ba huuphiyaa gulletti uttiis; i mela tohuwan hemettiis; aara de7iya asatika gulletti yeekkiiddi pudettaa kiyidosona. <sup>31</sup> Asai Daawita, “Akixoofeelikka Abeseloomaara maqettiyaageetu giddon de7ees” yaagidi yootidosona.

Yootin Daawiti, “GODAU, Akixoofeela zoriyaa eeyyatettau laamma” yaagidi woossiis.

<sup>32</sup> Daawiti asai Xoossaayyo goinniyoosaa, deriyaa huuphiyaa gakkido wode, Arkkiyaa Hushaayi azzanuwau ba maayuwaa pooshshidi, ba huuphiyaanikka buhiyaa qolidi, Daawitaara gaittanau yiis. <sup>33</sup> Yin Daawiti a, “Neeni tanaara biyaabaa gidikko, neeni taayyo tooho kiyana. <sup>34</sup> SHin neeni katamaa guyye simmada Abeselooma, ‘Kawuwau, taani ne ashkkara gidana; hagaappe kase ne aawaa ashkkara gididoogaadankka neeyyookka ashkkara gidana’ yaagikko, Akixoofeela zoriyaa halissada tana maaddana.

<sup>35</sup> Qeeseti Xaadooqinne Abiyaataari nenaara yan issippe de7ana gidokkonaa? Neeni kawuwaa son siyiyobaa ubbaa etayyo yoota. <sup>36</sup> Xaadooqa na7aa Ahima7aaxinne

Abiyaataara na7aa Yonaataani yan etaara de7oosona; neeni siyyoobaa aibanne eta bolli taayyo kiitta” yaagiis.

<sup>37</sup> Abeseloomi Yerusalaame gelishin, Daawita laggee Hushaayikka katamaa gakkiiis.

## 16

### *Daawitanne Xiiba*

<sup>1</sup> Daawiti deriyaa huuphiyaappe hefintta baggaara aadhdhishin, Xiiba giyo Mafibosheeta ashkkarai aara gaittiis; naa77u xeetu baso oittaa, woiniyaa teeraa lichchakkuwaa xeetaa, balasiyaa teeraa lichchakkuwaa xeetaanne issi ogoro woine eessaa naa77u haretun caaniis.

<sup>2</sup> Kawoi Xiiba, “Hagaa aibissi ehaadii?” yaagidi oichchiis.

Oichchin Xiibi, “Hareti kawuwaa so asai togkanaassa; oittainne lichchakko asati maanaassa; qassi woiniyaa eessai bazzuwan daafuriyaageeta ushshanaassa” yaagiis.

<sup>3</sup> Hegaappe guyyiyan kawoi Xiiba, “Ne godaa na7aa na7ai awan de7ii?” yaagidi oichchiis.

Oichchin Xiibi, “I, ‘Israa7eela asai ta aawaa aawaa kawotettaa hachchi taayyo zaari immana’ yaagidi Yerusalaamen uttiis” yaagiis.

<sup>4</sup> Kawoi Xiiba, “Be7a! Mafibosheetayyo de7iyaabai ubbai ha77i neessa” yaagiis.

Yaagin Xiibi, “Eeno ta godau kawuwau! Taani biittan gufannais; taani nena ufais-siyaabaa oottana” yaagiis.

### *Daawitanne SHim77a*

<sup>5</sup> Kawoi Daawiti Baahuriima giyo katamaa yiido wode, Saa7oola dabbo gidiya issi bitanee hegaappe kiyiis. A sunntai Geera na7aa SHim77a. I Daawita qanggiiddi kiyiis.

<sup>6</sup> Daawita bollinne kawuwaa oosanchchatu bolli shuchchaa olees; i heгаа oottiyo wode, olanchchati ubbainne kawuwaa naagiyaageeti ushachchaaranne haddirssaara kawuwaa Daawita doggomi wottidosona. <sup>7</sup> SHim77i Daawita qanggiiddi, “Kichcha; kichcha! Ha suuttaa gussiyaagee! Ha pattenaaagee! <sup>8</sup> Neeni Saa7oola sohuwan kawotadasa; neeni gussido Saa7oola asaa suuttaa ubbaa GODAI ne bolli zaariis; qassi GODAI kawotettaa ne na7aa Abeseloomayyo sheedhdhiis. Neeni suutta gussida asa gidiyo gishshau, neeni xayiyoo wodee gakkiiis” yaagiis.

<sup>9</sup> Hegaappe guyyiyan, Xaruuyi na7ai Abishaayi kawuwaa, “Ha kana bautai ta godaa kawuwaa aibissi qanggi? Taani baada a qooriyaa muucais” yaagiis.

<sup>10</sup> Yaagin kawoi, “Inttenoo, Xaruuyi naatoo, inttena gattiyaabi aibee? GODAI a, ‘Daawita qangga’ yaagido gishshau i qanggiyaabaa gidikko, ‘Neeni aibissi hagaa oottai?’ yaagidi oichchanau danddayiyai oonee?” yaagiis.

<sup>11</sup> Hegaappe guyyiyan, Daawiti Abishaayanne ba ashkkarata ubbata, “Ta na7ai, ta ashoi, tana woranau koyees; yaatin, ha Biniyaama asi waati agguutee! A bochchoppite; i qanggo bayin! Aissi giikko, GODAI a azaziis. <sup>12</sup> Ooni erii, GODAI ta metuwaa be7idi, taani hachchi ekkiyo qanggettaa gishshau taayyo kehaa zaaranaakkonne” yaagiis.

<sup>13</sup> Daawitinne a asai ogiyaa oiqqidi boosona. SHim77ikka keraa xanxxaa oiqqidi, Daawita ginaara bees; biiddi a qanggeesinne shuchchaa a bolli olees; buhiyaakka a bolli laalees. <sup>14</sup> Kawoinne aara de7iya asati bantta biyoosaa daafuridi gakkidosona. Gakkin kawoi yan shemppiis.

### *Abeseloomanne A Zoriyaageeta*

<sup>15</sup> Abeseloominne Israa7eela asati ubbai Yerusalaame gelidosona; Akixoofeelikka etaara issippe de7ees. <sup>16</sup> Daawita laggee Arkkiyaa Hushaayi Abeseloomakko yiidi, “Kawoi shemppo gam77o! Kawoi shemppo gam77o!” yaagiis.

<sup>17</sup> Yaagin Abeseloomi Hushaaya, “Neeni ne laggiyaa siiqido siiqoi hageekka? Ne laggiyaara aibissi babeikkii?” yaagiis.

<sup>18</sup> Hushaayi Abeselooma, “CHii! GODAINNE ha asai qassi Israa7eela asai ubbainne dooridoogaayyo taani aqana; taani aara attana. <sup>19</sup> Hegaappekka qassi taani ooyyo oottanee? A na7aayyo oottanau bessikkinaayye? Taani ne aawaayyo oottidoogaadan ha77i neeyyookka oottana” yaagiis.

<sup>20</sup> Abeseloomi Akixoofeela, “Neeni ane nuna zora; nuuni ai oottonii?” yaagiis.

<sup>21</sup> Yaagin Akixoofeeli Abeselooma, “Kawo keettaa naaganau attida ne aawaa baakkotuura baada zin77a; neeni ne aawaa siiryan xinqqidoogaa Israa7eela asai ubbai siyana; nenaara issippe de7iya ubbatu kushee hegan minnana” yaagiis. <sup>22</sup> Kawuwaa keettaa bollan dembbayidi oottidosan, Abeseloomayyo dunkkaaniyaa tolicosona; tolin asai ubbai xeellishin Abeseloomi gelidi, ba aawaa baakkotuura zin77iis.

<sup>23</sup> He gallassatun Akixoofeeli a zorido zore issi asi GODAA oichchidi ekkiyo zore mala. Daawitinne Abeseloominne naa77aikka Akixoofeela zoriyaa ubbaa ekkidoogee hagaadaana.

## 17

<sup>1</sup> Hegaappe guyyiyan Akixoofeeli Abeselooma, “Hachchi qammi taani tammanne naa77u sha7u asata doorada, Daawita yedettada oiqqanau kiyais. <sup>2</sup> I daafuridaashininne xalalidaashin, taani a bolli woraajjana. Taani a daganttana; hegan aara de7iya asai ubbaikka baqatana; taani kawuwaa xalaalaa shocana. <sup>3</sup> Yaatada taani asa ubbaa neekko zaarana. Neeni issi asa xalaalaa woranau koyaasa; hara asai saro attana” yaagiis. <sup>4</sup> Akixoofeela zoree Abeseloomanne Israa7eela cimata ubbaa ufaissiis.

<sup>5</sup> Hegaappe guyyiyan Abeseloomi, “Arkkiyaa Hushaaya qassi xeesite; ane i giyoobaa siyoos” yaagiis. <sup>6</sup> Hushaayi akko yiido wode, Abeseloomi a, “Akixoofeeli zorido zoree haggaa; nuuni i giyoobaa oottanau bessii? Bessennabaa gidikko, ne qofai aibee?” yaagiis.

<sup>7</sup> Yaagin Hushaayi Abeselooma, “Akixoofeeli zorido zoree ha wodiyan lo77o gidenna. <sup>8</sup> Ne aawainne ne aawaa asati mino olanchchata gidiyooqaanne ba marata bonqqettida maahere mala yashshiyaageeta gidiyooqaa neeni eraasa. Ne aawai olau meeze asa; i qammi ba olanchchatuurakka aqenna. <sup>9</sup> Be7a, i hannoode gonggolo gididon woikko hara sohuwan qosetti uttiis. I intte citaa bolli koiro woraajjikko, heggaa siyida asi ooninne, ‘Abeselooma kaalli biida asati shocettidosona’ yaagana. <sup>10</sup> Ne aawai toora qara gidiyooqaanne aara de7iya asatikka mino gidiyooqaa Israa7eela asai ubbai eriyo gishshau, harai atto gaammodan xaliya minotu wozanaikka maashana.

<sup>11</sup> “SHin taani nena zoriyoogee haggaa; Israa7eela zawan Daanappe biidi Berssaabeha gakkanaashin de7iya Israa7eela ubbaa, abbaa doonan de7iya shafiyaa keenaa neekko shiishsha; yaatada neeni ne huuphen eta olau kaaletta. <sup>12</sup> Yaatobare nuuni a demmosan awaaninne shocana; xaazai sa7an wodhdhiyoogaadan nuuni a bolli wodhdhana. A gidinkka woikko aara de7iya asaa gidinkka issoinne paxa attenna. <sup>13</sup> I katamaa gidido gelikkokka, Israa7eela asai ubbai wodoruwaa he katamaa ehiidi, katamaa gididon issi shuchchikka beettennaadan nuuni he katamaa zanggaarau duge goochchana” yaagiis.

<sup>14</sup> Abeseloominne Israa7eela asai ubbai, “Arkkiyaa Hushaaya zoree Akixoofeela zoriyaappe lo77o” yaagidosona. Hegee hanidoogee, GODAI Abeselooma bolli iitabaa ehaana mala, Akixoofeela zoriyaa lo77uwaa halissanau qachchido gishshaassa.

<sup>15</sup> Hegaappe guyyiyan, Hushaayi qeeseta Xaadooqanne Abiyaataara, “Akixoofeeli Abeseloomanne Israa7eela cimata haggaa haggaa giidi zoriis; taanikka eta haggaa haggaa gaada zoraas. <sup>16</sup> Ha77ikka Daawitakko eesuwan kiittidi, ‘Bazzo pinuwan hachchi qammi aqoppa; hefintti pinnaichcha! Hinna xayikko, kawoinne aara de7iya asai ubbai xayana’ yaagidi yootite” yaagiis.

<sup>17</sup> Yonaataaninne Ahima7aaxi qoncciyaa katamaa gelishin eta asi be7enna mala, Eniroogee giyoosan uttidi naaganaunne issi ashkkariyaa ya yaada etayyo yootin, eti biidi Kawuwaa Daawitayyo yootanau qoppidosona. <sup>18</sup> SHin issi wodallai eta



be7iis; be7idi Abeseloomayyo yootiis. Hegaa gishshau, eti naa77aikka he sohuwaappe eesuwana kichchidi biidi, Baahuriima kataman issi bitaniyaa soo gakkidosona. He bitaniyaayyo dirssaappe so baggaara haatta ollai de7ees; eti he ollaa giddo duge gelidosona. <sup>19</sup> Aibinne erettennaadan bitaniyaa maccaasiyaa kammiyoobaa ekkada ollaa doonan hiixxaasu; yaatada a bolli kattaa miccaasu.

<sup>20</sup> Abeselooma ashkkarati bitaniyaa soo yiidi maccaasiyo, “Ahima7aaxinne Yon-aataani awan de7iyoona?” yaagidi oichchidosona.

Oichchin maccaasiyaa, “Eti shaafaa pinnidi biidosona” yaagaasu; eti koyin beettennan xayin, Yerusalaame aggidi simmidosona.

<sup>21</sup> He asati biidoogaappe guyyiyan, naa77u asati ollaappe kiyidi, Kawuwaa Daawitayyo yootanau biidosona; biidi Daawita, “Eesuwana denddidi shaafaa pinnite; aissi giikko, Akixoofeeli intte bolli haggaa haggaa giidi zori wottiis” yaagidosona. <sup>22</sup> Yaagin Daawitinne aara issippe de7iya asai ubbai Yorddaanoosa pinnidi biidosona. Wonttiyo wode Yorddaanoosa pinnennan attida issi asinne baawa.

<sup>23</sup> Akixoofeeli ba zoree ekettibeennaagaa be7ido wode, ba hariyaa kooridi, ba de7iyo katamaa biis; Akixoofeeli ba soo giigissidi, barkka sulettidi haiqqiis; haiqqidi ba aawaa duufuwan moogettiis.

<sup>24</sup> Daawiti Maahinaima katamaa gakkido wode, Abeseloominne aara de7iya asai ubbai Yorddaanoosa Shaafaa pinnidosona. <sup>25</sup> Abeseloomi ba olanchchatu bolli Yoo7aaba sohuwan Amaasa sunttiis. Amaasi Israa7eeliyaa Yetera na7aa; Yeteri Abigaalo ekkidaagaa; Abigaala Naa7oosa na7iyoonne Yoo7aaba aayee Xaruuyi michchiyo.

<sup>26</sup> Israa7eelatinne Abeseloomi Gala7aade biittan uttidosona.

<sup>27</sup> Daawiti Maahinaima katamaa gakkio wode, Amoonna biittaappe Raabappe yiida Naa7oosa na7ai SHoobi, Lodabaara katamaappe yiida Ammi7eela na7ai Maakiirinne Rogaliima katamaappe yiida Gala7aadiyaa Barzzillaayi <sup>28</sup> hiixxiyoobata, samppatanne urqqa miishshata ehiidosona. Qassi eti gisttiyaanne banggaa, xiilliyaanne shaashshaa, baa7eelaanne misiraa, <sup>29</sup> eessaanne meqqida maattaa, miizzaa maattaa pilaanne dorssaa Daawitinne a asai maanaadan ekki yiidosona. Hegaa eti ehiidoogee, “Asai bazzon namisettiis, daafuriisinne saamettiis” giidi qoppido gishshaassa.

## 18

### *Abeseloomi Xoonettidi Haiqqiis*

<sup>1</sup> Daawiti ba asata ubbaa issippe shiishshii; shiishshidi shaalaqatanne mato halaqata eta bolli sunttiis. <sup>2</sup> Daawiti asaa heezzu citan shaakkiis; issi citaa Yoo7aabi azaziis; naa77antto citaa Yoo7aaba ishai, Xaruuyi na7ai Abishaayi azaziis; heezzantto citaa qassi Gaatiyaa Ittaayi azaziis. Kawoi asaa, “Taani ta huuphenkka inttenaara issippe baana” yaagiis.

<sup>3</sup> SHin asai a, “Neeni baanau bessenna! Nuuni baqatiyaakkonne, eti nubaa koyokkona; harai atto nuuni baggai haiqqiyaakkokka, nubaa eti wudokkona. SHin neeni nuuppe tammu sha7atuppe daraasa; heggaa gishshau, neeni kataman uttada, nuuyyo maaduwaa kiittikko lo77o” yaagiis.

<sup>4</sup> Yaagin kawoi eta, “Inttena lo77idabaa taani oottana” yaagiis.

Daawiti dirssaa penggen eqqidaashin, asai ubbai xeetai xeetai, sha7ai sha7ai ba citan citan salppidi kiyiis. <sup>5</sup> Yaatin, kawoi Yoo7aaba Abishaayanne Ittaaya, “Ta gishshau giidi, he yelaga bitaniyaa Abeselooma qohoppite” yaagidi azaziis. Kawoi Abeseloomabaa gadaawatu ubbaayyo odiyo wode, olanchchati ubbai siyidosona.

<sup>6</sup> Daawita olanchchati Israa7eelatuura olettanau gaxariyan salppidosona; olaa sohoi Efireema woraana. <sup>7</sup> He sohuwan Daawita olanchchati Israa7eela olanchchata xoonidosona; he gallassi keehi daro asai, laatamu sha7u asai haiqqiis. <sup>8</sup> Olai gaxariyaa ubbaa gakkii; he gallassi worai wurssido asai bisoi wurssido asaappe daro.



<sup>9</sup> Abeseloomi akeekennan de7iiddi Daawita asatuura gaittiis; Abeseloomi ba baquluwaa toggidaashin, daro daashshai de7iyo wolaa garssi baquloi geliis; gelin Abeselooma huuphee wolaa ballan oiqettiis. Abeseloomi sa7aappenne saluwaappe gidduwan giili giishin, i toggido baquloi sinttau bi aggiis. <sup>10</sup> Asaappe issoi heгаа be7idi Yoo7aaba, “Be7a! Abeseloomi issi wolaa bolli kaqettidaagaa taani be7aas” yaagidi yootiis.

<sup>11</sup> Yootin Yoo7aabi baayyo yootida bitaniyaa, “Hee? Be7aas gai? Aibissi biittau duge shocabeikkii? Neeni shocidabaa gidiyaakko, taani neeyyo tammu xaqara biraanne issi qabattuwwa immanaagaa shin” yaagiis.

<sup>12</sup> Yaagin bitanee, “Neeeni sha7u xaqara biraa ta kushiyan wottiyaakkokka, taani kawuwaa na7aa bolli ta kushiya denttikke! Nuuni ubbai siyishin, kawoi nenanne Abishaaya Ittaaya, ‘Ta gishshau giidi, yelaga bitaniyaa Abeselooma ashshite’ yaagidi azaziis. <sup>13</sup> Taani kawuwaa azazuwaa shaarada Abeselooma woridabaa gidiyaakko, kawoi ubbabaa siyyoogaadan hegaakka siyanaagee attenna. Neeni he wode taappe haahuwan eqqana” yaagiis.

<sup>14</sup> Yaagin Yoo7aabi a, “Taani nenaara hagaadan gam77ikke” yaagiis; yaagidi heezzu tooraa ba kushiyan ekkidi, Abeseloomi wolaa kaqettidi paxa de7iyaagaa wozana aifiyan caddiis. <sup>15</sup> Caddin Yoo7aaba ola miishshaa tookkiya tammati Abeselooma dooddidi, shoci woridosona.

<sup>16</sup> Hegaappe guyyiyan, Yoo7aabi olaa essanau malkkataa punniis; punnin asai Israa7eelata yedettiyoogaa aggiis. <sup>17</sup> Eti Abeselooma ekki efidi, woran de7iya gita ollaa giddon yeggidi, daro shuchchaa a bolli dooridosona. He wode Israa7eela asai ubbai ba so ba so baqatiis.

<sup>18</sup> Abeseloomi paxa de7iiddi, “Ta sunntaa hassayissiya na7i taayyo baawa” yaagidi, bana hassayissiya shuchchaa massido tuussaa kawo dilbban essiis; essidi he tuussaa ba sunntan xeesiis. Hachchi gakkanaashin, he tuussai “Abeselooma tuussaa” geetettees.

### *Daawiti Abeseloomi Haiqqidoogaa Siyidi Yeekkiis*

<sup>19</sup> Hegaappe guyyiyan, Xaadooqa na7aa Ahima7aaxi Yoo7aaba, “A morkketu kushiyaappe GODAI a ashshido mishiraachchuwwa sissanau, taani kawuwaakko woxxa baada yootais” yaagiis.

<sup>20</sup> Yaagin Yoo7aabi Ahima7aaxa, “CHii! Hachchi neeni mishiraachcho yootiyo gallassa gidenna; hara gallassi yootanau danddayaasa. Kawuwaa na7ai hachchi haiqqido gishshau, neeni hachchi yootanau koshshenna” yaagiis.

<sup>21</sup> Yaagidi Yoo7aabi Toophphe asa gidiya issi bitaniyaa xegidi, “Ba; baada neeni be7idobaa kawuwaayyo yoota” yaagiis; yaagin he bitanee Yoo7aabayyo ziggidi woxxiis.

<sup>22</sup> Xaadooqa na7ai Ahima7aaxi naa77anttuwaakka Yoo7aaba, “Ainne hano; taani ha Toophphe bitaniyaa geeduwwa woxxais” yaagiis.

Yaagin Yoo7aabi, “Ta na7au, neeyyo woito ehiya odoi bainnaashin, neeni aibissi woxxanau koyai?” yaagiis.

<sup>23</sup> Yaagin Ahima7aaxi Yoo7aaba, “Ainne hano; taani woxxanau koyais” yaagiis.

Yaagin Yoo7aabi a, “Yaanikko woxxa” yaagiis. Hega gishshau, Ahima7aaxi dembbaa ogiyaa oiqqidi woxxiis; woxxidi Toophphe bitaniyaa yeggidi aadhdhiis.

<sup>24</sup> Gimbbiyaa penggiyaayyo kare dooyettiya sanqqaappenne soo dooyettiya sanqqaappe gidduwan aaho sohuwan Daawiti uttidaashin, naagiya bitanee gimbbiyaara ohettida penggiyaa sarggaa huuphiyaa pude kiyiis; kiyidi xeellidi, issi bitanee barkka woxxiyaagaa be7iis. <sup>25</sup> Naagiya bitanee kawuwaa xeesidi yootiis.

Yootin kawoi, “I barkka de7ikko, mishiraachchuwwa ekki yees” yaagiis. Woxxiya bitanee etakko mati matidi yiis.

<sup>26</sup> Naagiyaagee hara asikka woxxiyaagaa be7iis; be7idi penggiyaa naagiya bitaniyaa, “Be7a! Hara bitaneekka barkka woxxees” yaagiis.

Kawoi, “Ha bitaneekka qassi mishiraachchuwaa ekki yees” yaagiis.

<sup>27</sup> Naagiyaagee, “Koiro bitaniyaa wottai Xaadooqa na7aa Ahima7aaxa wottaa tau milatees” yaagiis.

Yaagin kawoi, “I lo77o asa; i lo77o odoora yees” yaagiis.

<sup>28</sup> Ahima7aaxi kawuwaa xeesidi, “Ubbabaikka lo77o!” yaagiis. Kawuwaa sinttan lichchi giidi gufannidi, “Ta godaa kawuwaa bolli bantta kushiya denttida asata neeyyo aattidi immida GODAI ne Xoossai galatetto” yaagiis.

<sup>29</sup> Yaagin kawoi, “Yelaga bitanee Abeseloomi saroo?” yaagidi oichchiis.

Oichchin Ahima7aaxi, “Yoo7aabi tana kiittana haniyo wode, wolqqaama gurubai de7iyaagaa be7aas; shin i aibakkonne taani erabeikke” yaagiis.

<sup>30</sup> Kawoi a, “Yaa shiiqa eqqa” yaagiis; yaagin i yaakko shiiqidi eqqiis.

<sup>31</sup> Hegaappe guyyiyan, Toophphe bitanee gakkidi kawuwaayyo, “Ta godau kawuwau, mishiraachcho! Ne bolli denddidaageetu ubbaa kushiyaappe GODAI hachchi nena ashshiiis” yaagiis.

<sup>32</sup> Kawoi Toophphe bitaniyaa, “Yelaga bitanee Abeseloomi saroo?” yaagidi oichchiis.

Oichchin Toophphe bitanee kawuwaa, “Ta godau kawuwau, ne morkketinne ne bolli iitabaa oottanau denddiyaageeti ubbati he yelaga bitaniyaadan hanona” yaagiis.

<sup>33</sup> Yaagin kawoi daroppe azzaniis; gimbbiyaa penggiyaa huuphen de7iya keettaa gelidi yeekkiis; kawoi biiddi, “Aayye ta na7au Abeseloomaa! Ta na7au! Ta na7au Abeseloomaa! Ne gishshaa taani haiqqarkkinaashsha! Aayye ta na7au Abeseloomaa! Ta na7au!” yaagidi yeekkiis.

## 19

<sup>1</sup> “Abeseloomayyo kawoi yeekkeesinne zilaalees” yaagidi Yoo7aabayyo yootidosona.

<sup>2</sup> Olanchat ubbai, “Kawoi ba na7aayyo yeekkees” giyoogaa siyido gishshau, he gallassi eti ubbai xoonido xoonoi yeehuwau laamettiis. <sup>3</sup> Olaappe baqatidi yeellatida olanchatudan, asai he gallassi wuuqettidi katamaa geliis. <sup>4</sup> Kawoi ba som77uwaa gullettidi, ba qaala xoqqissidi, “Aayye ta na7au Abeseloomaa! Aayye Abeseloomaa ta na7au! Ta na7au!” yaagidi zilaaliis.

<sup>5</sup> Hegaappe guyyiyan, Yoo7aabi he keettaa biidi kawuwaa, “Ne shemppuwaa, ne attuma naatunne ne macca naatu shemppuwaa, ne maccaasatunne ne baakkotu shemppuwaa hachchi ashshida ne asaa ubbaa neeni hachchi kaushshadasa. <sup>6</sup> Nena ixxiyaageeta neeni siiqaasa; nena siiqiyaageeta neeni ixxaasa. Ne olanchatinne eta halaqati neeyyo aibanne gidennaagaa neeni hachchi qonccissadasa. Nuuni ubbai haiqqin, Abeseloomi hachchi paxa attidaakko, neeni ufaittanaagaa taani be7aas. <sup>7</sup> Ha77i dendda! Kare kiyada ne asaa minttetta. GODAI ero! Neeni kiyana xayikko, hachchi qammi nenaara issi asinne attenna. Ne yelagatettaasappe hachchi gakkanaashin, nena gakkida iitaa ubbaappe hagee neeyyo aadhdiya iita gidana” yaagiis.

<sup>8</sup> Yaagin kawoi denddidi gimbbiyaa penggen uttiis. “Kawoi penggen uttiis” giyoogaa asati ubbai siyido wode, kawuwaa sintti yiidosona.

### *Daawiti Yerusalaame Simmiis*

He wode Israa7eela asati ubbai bantta so bantta so baqatidosona. <sup>9</sup> Israa7eela zareti ubbai issoi issuwaara hagaadan yaagidi palamettoosona; “Kawoi Daawiti nuna nu morkketu kushiyaappe ashshiiis; nuna Pilisxxeema asatu kushiyaappe wotti ekkiis; shin i ha77i Abeselooma gaasuwan biittaa aggidi baqatiis. <sup>10</sup> Nu bolli kawotanaadan nuuni tiyido Abeseloomi olan haiqqiichchiis. Yaatin, kawuwaa guyye ehaanau intte aibissi co77u giidetii?” yaagidosona.

<sup>11</sup> Kawoi Daawiti qeesetuuyo Xaadooqayyoonne Abiyaataarayyo kiitaa yeddidi, “Yihudaa cimata hagaadan yaagite; ‘Daawiti hagaadan yaagees; ‘Israa7eela asai ubbai

haasayioogee kawuwaa gakkiiis. Yaatin, kawuwaa a keettaa zaari ehaanau intte aibissi haratuppe guyye atteetii? <sup>12</sup> Intte ta ishantta; intte ta ashonne ta suutta. Yaatin, kawuwaa guyye zaari ehaanau intte aibissi haratuppe guyye atteetii?” yaagees’ yaagite. <sup>13</sup> Qassi Amaasayyookka, ‘Daawiti nena, “Neeni ta ashonne ta suutta gidikkii? Hachchippe doommin, taani nena Yoo7aaba sohuwan ta olanchchatuyyo gadaawa kessana xayikko, Xoossai tana woro!” yaagees’ yaagite” yaagiis.

<sup>14</sup> Kawuwaa haasayai Yihudaa asatu ubbaa wozanaa issuwaa oottidi maizziiis. Hegaa gishshau, eti kawuwaakko kiittidi, “Neenikka ne asai ubbaikka haa simmite” yaagidosona. <sup>15</sup> Yaagin kawoi simmidi, Yorddaanoosa SHaafaa gakkanaassi yiis. Yihudaa asati kawuwaa mokkanaunne Yorddaanoosa SHaafaa pinttanau, Gelgala giyoosaa yiidosona.

<sup>16</sup> Baahuriima katamaappe yiida Biniyaama zaree, Geera na7ai SHim77i Daawita mokkanau ellellidi, Yihudaa asatuura biis. <sup>17</sup> Biishin aara Biniyaama zare gidida sha7u asati, Saa7oola so ashkkaarai Xiibi, a naati tammanne ichchashatinne a ashkkaarati laata-mati de7oosona. Eti kawoi de7iyooosaa Yorddaanoosa SHaafaa jaamiiddi biidosona. <sup>18</sup> Kawuwaa so asaa pinttanaunne kawuwaa ufaissiyooosaa oottanau pinuwaara pin-nidi biidosona.

Geera na7ai SHim77i Yorddaanoosa SHaafaa pinnido wode, kawuwaa sinttan gufan-nidi, <sup>19</sup> hagaadan yaagiis; “Ta mooruwaa kawoi atto go. Ta godai kawoi Yerusalaameppe kiyiyo gallassi taani ne ashkkaarai balido balaa neeni hassayoppa. Hegaa ne uluwan oiqqoppa. <sup>20</sup> Aissi giikko, ne ashkkaarai taani nagaraa oottidoogaa erais; shin nena ta godaa kawuwaa mokkanau, Yooseefa so asa ubbaappe koirottada taani hachchi yaas” yaagiis.

<sup>21</sup> Hegaappe guyyiyan, Xaruuyi na7ai Abishaayi, “SHim77i GODAI tiyido kawuwaa ganggido gishshau, i haiqqanau bessenneeyye?” yaagiis.

<sup>22</sup> Yaagin Daawiti Abishaaya, “Inttenoo, Xaruuyi naatoo, inttena gattiyaabi aibee? Intte hachchi taayyo morkke gideetii! Hachchi Israa7eelan ai asinne haiqqenna! Hachchi Israa7eela kawoi tanattennee!” yaagiis.

<sup>23</sup> Kawoi SHim77a, “Neeni haiqqakka” yaagidi ayyo caaqqiis.

<sup>24</sup> Qassi Saa7oola na7ai Mafibosheeti kawuwaa mokkanau duge wodhdhiis. Kawoi biido gallassaappe doommidi, i sarotettan guyye simmiyo gallassi gakkanaassikka, Mafibosheeti ba tohuwaa meeccibeenna; ba buuchchaa qanxxibeenna; qassi ba maayuwaakka meeccibeenna. <sup>25</sup> Mafibosheeti kawuwaara gaittanau Yerusalaameppe yiido wode, kawoi a, “Mafibosheetaa, neeni tanaara aissi babeikkii?” yaagidi oichchiis.

<sup>26</sup> Oichchin i, “Ta godau kawuwau, taani ne ashkkaarai sila gidiyo gishshau, ‘Taani toggada kawuwaara baanaadan ta hariyaa koora’ yaagaas. SHin ta ashkkaarai Xiibi tana cimmiis; <sup>27</sup> cimmidi tana ne ashkkaaraa ta godaassi kawuwaassi zigiriis. Neeni ta godai kawoi Xoossaa kiitanchchaa mala; hejaa gishshau, nena ufaissiyaabaa ootta. <sup>28</sup> Ta aawaa aawaa asai ubbai harabaa gidennan, ta godai kawoi beni woranau bessiyo asa; shin taani ne ashkkaarai ne masoofiyaappe miyaageetuura maanaadan neeni taayyo sohuwaa immadasa. Yaatin, taani hagaappe aadhdiyaabaa kawuwaa oichchanau taayyo aiba maati de7ii?” yaagiis.

<sup>29</sup> Yaagin kawoi a, “Neeni darobaa haasayanau koshshenna. Neeninne Xiibi gadiyaa shaakki ekkana mala taani azazais” yaagiis. <sup>30</sup> Mafibosheeti kawuwaa, “Ta godai kawoi saro so simmaappe attin, ubbabaakka Xiibi ekko” yaagiis.

<sup>31</sup> Gala7aadiyaa Barzzillaayi kawuwaara issippe Yorddaanoosa SHaafaa pinnanaunne yaappe a moissanau Rogaliima giyoosaappe yiis. <sup>32</sup> Barzzillaayi laittai hosppun tammaa gidido cima asa. I daro dure asa gidiyo gishshau, kawoi Maahinaima kataman de7iyo wode, kawuwaassi koshshiyaabaa immiis. <sup>33</sup> Kawoi Barzzillaaya, “Neeni tanaara Yerusalaame hindda; taani nena yan koshshiyaabaa immana” yaagiis.

<sup>34</sup> SHin Barzzillaayi kawuwaa, “Taani hagaappe sinttan daro laittaa de7ikke; yaatin, taani kawuwaara Yerusalaame aibissi boo? <sup>35</sup> Taani ha77i hospupun tammu laitta asa; taani ha77i iitaanne lo77uwaa shaakkada eranau danddayiyaanaa? Taani ne ashkkarai ta miyoobaanne uyiyoobaa mal77uwaa masuhuwaa shaakkada eranau danddayiyaanaa? Attumaageetinne maccaageeti yexxiyo yettaa taani siyanau danddayiyaanaa? Yaatin, taani ne ashkkarai ta godau kawuwau aibissi gujo tooho gidoo? <sup>36</sup> Taani ne ashkkarai Yorddaanoosa SHaafaa pinnada nena guuttaa moissana. SHin kawoi taayyo hegaadan kushe zaaranau aibissi koshshii? <sup>37</sup> Taani ta aawaanne ta aayee duufuwaa matan ta kataman haiqqana mala simmais. Ta na7ai Kimihaami hageeho; ta godaara kawuwaara issippe i bo; nena ufaissiyaabaa neeni ayyo ootta” yaagiis.

<sup>38</sup> Yaagin kawoi, “Kimihaami tanaara pinno; nena ufaissiyaabaa taani ayyo oottana. Qassi neeni tana oichchiyoobaa aibanne taani neeyyo oottana” yaagiis. <sup>39</sup> Hegaappe guyyiyan, asai ubbai Yorddaanoosa SHaafaa pinniis; kawoikka pinniis. Pinnidi Barzzillaaya yeridi anjjiis; yaatin, Barzzillaayi ba soo simmiis.

<sup>40</sup> Kawoi pinnidi Gelgala biyo wode, Kimihaamikka aara issippe biis. Yihudaa olanchchatu ubbatinne Israa7eela olanchchatuppe baggati kawuwaara issippe biidosona.

<sup>41</sup> Hegaappe guyyiyan, Israa7eelati ubbai kawuwaakko biidi, “Nu ishantti Yihudaa asati kawuwaanne a so asaa aibissi wuuqqidonaa? Qassi a asaa ubbaara issippe Yorddaanoosa SHaafaa aibissi pinttidonaa?” yaagidosona.

<sup>42</sup> Yaagin Yihudaa asati ubbai Israa7eelata, “Kawoi nuuyyo mata dabbo gidiyo gishshau, nuuni haggaa oottida; yaatin, intte hegau aibissi hanqqetteetii? Nuuni kawuwaa qumaappe aibakko miidoniyye? Woikko nuuni appe aibakko nuuyyo ekkidoniyye?” yaagidosona.

<sup>43</sup> Israa7eela asati Yihudaa asata, “Kawuwaappe tammu kushee nuna gattees; haggaa gishshau, Daawita achchan nuuyyo intteppe aaro maatai de7ees! Yaatin, intte nuna aibissi karidetii? Nu kawuwaa guyye zaaridi ehaanau kasetidi haasayidai nuna gidokkonii?” yaagidosona.

SHin Israa7eela asatuppe Yihudaa asati haasayaa keehippe wolqqanttidosona.

## 20

### *SHebaa7i Daawita Bolli Denddiis*

<sup>1</sup> Biniyaama zare gidiya Biikira na7ai SHEbaa7a giyo issi shori bainna bitanee yan de7ees. He bitanee malkkataa punnidi, “Nuuni Daawitaara ekkiyo saami baawa! Isseya na7aara nuuni laattanabai baawa! Israa7eela asatoo, ubbaikka intte soo intte soo gelite!” yaagiis. <sup>2</sup> Yaagin Israa7eela asati ubbai Daawita aggidi, Biikira na7aa SHEbaa7aara biidosona. SHin Yihudaa asati ammanettidi, Yorddaanoosappe Yerusalaame gakkanaashin, bantta kawuwaa kaallidosona.

<sup>3</sup> Daawiti ba soo Yerusalaame simmido wode, kawo keettaa naaganau ashshido tammu baakkota ekki efidi, issi keettan naagissi wottiis; etayyo koshshiyaabaa immiis; shin i etaara aqibeenna. Eti he keettan naagettidi, bantta haiquwaa gallassai gakkanaassi am77edan de7idosona.

<sup>4</sup> Hegaappe guyyiyan kawoi Amaasa, “Yihudaa asaa ubbaa heezzu gallassan taayyo xeesada shiishsha; yaatada neenikka ne huuphen etaara shiiqa” yaagiis. <sup>5</sup> Yaagin Amaasi Yihudaa asata xeesanau biis; shin kawoi ayyo keerido gallassaappe gam77iis.

<sup>6</sup> Daawiti Abishaaya, “Ha77i Biikira na7aa SHEbaa7i Abeseloomaagaappekka aattidi nuna qohana. Ne godaa ashkkarata ekkada neeni a paanaa kaalla. Hegee xayikko, i gimbbettida katamata demmida nuuppe kessi ekkana” yaagiis. <sup>7</sup> Yaagin Yoo7aaba asati, kawuwaa naagiyaageetinne mino olanchchatu ubbai Abishaayaara Biikira na7aa SHEbaa7a paanaa kaallanau Yerusalaameppe kiyidi biidosona.



<sup>8</sup> Eti biidi Gabaa7oonan de7iya wogga zaallaa gakkiiyo wode, Amaasi etaara gaittanau yiis; Yoo7aabi olaa maayuwaa maayi uttiis; ba xeessan bisuwaa shoochuwaara aatti wottido qabattuwaa gixxiis. I sinttaukko tanggishin, he bisoi shoochuwaappe kessi ekkidi wodhdhiis.

<sup>9</sup> Yoo7aabi Amaasa, “Ta ishau, neeni saro de7ai?” yaagiis; yaagidi Yoo7aabi Amaasa yeranau ba ushachcha kushiyan a buuchchaa oiqqiis. <sup>10</sup> SHin Amaasi Yoo7aaba haddirssa kushiyan de7iya bisuwaa be7ibeenna; heгаа gishshau, appe naagettibeenna. Yoo7aabi a uluwaa caddidi, a maracciyaa biittan zaaziis; naa77anttuwaa cadetten-nankka Amaasi sohuwaara haiqqi bayiis.

Hegaappe guyyiyan, Yoo7aabinne a ishaa Abishaayi Biikira na7aa SHEbaa7a paanaa kaallidosona. <sup>11</sup> Yoo7aaba asatuppe issoi Amaasa ahaa matan eqqidi, “Yoo7aaba dosiyaageenne Daawitabaa gidiyaagee ooninne Yoo7aaba kaallo” yaagiis. <sup>12</sup> Amaasi ogiyaa giddo ginan kunddidi, ba suuttan moorettidi zin77iis. Olanchchati ubbai yiidi, he sohuwan eqqidoogaa he bitanee be7iis; be7idosaarakka Amaasa ahaa ogiyaappe gaxi shooqau goochchi yeggidi, a bolli maayuwaa oliis. <sup>13</sup> Amaasa ogiyaappe diggidoo gaappe guyyiyan, Biikira na7aa SHEbaa7a paanaa kaallanau olanchchati ubbai Yoo7aabaara biidosona.

<sup>14</sup> SHEbaa7i Israa7eela zaretu ubbaa biittaara kanttidi, Aabeeli-Beetimaawika giyo katamaa gakkiiis. Biikiratu biittaara kanttishin, asai ubbai shiiqidi a kaalliis. <sup>15</sup> Yoo7aabaara de7iya asati ubbai gakkidi, SHEbaa7a Aabeeli-Beetimaawika kataman yuuyi aadhdhidi dooddidosona. Eti katamaa gimbbiyan zemppissidi biittaa dooridosona. Qassi Yoo7aabaara de7iya asati ubbai gimbbiyaa qolanau bookkoosona. Eti bookkishin, <sup>16</sup> katamaappe issi eranchcha mishiriyaa eta xeesada, “Siyite! Siyite! Biidi, Yoo7aaba xegite. Taani ayyo yootiyoobai de7ees” yaagaasu. Yaagin i mishireekko bin a, <sup>17</sup> “Neeeni Yoo7aabee?” yaagada oichchaasu.

Oichchin i, “Ee, tana” yaagiis.

Mishiriyaa a, “Taani ne ashkkariyaa giyoobaa siya” yaagaasu.

Yaagin Yoo7aabi, “Taani siyais” yaagiis.

<sup>18</sup> Mishiriyaa Yoo7aaba, “Beni wode asai ‘Aabeela katamaappe ne oishau zaaruwaa demma’ yaagees; hegan yohoi wurees. <sup>19</sup> Israa7eela giddon saro de7iya ammanettiya asi nuna. Israa7eela biittan de7iya aaye katamaa neeni bashshanau malaasa. Neeeni GODAA buzo biittaa aibissi xaissanau koyai?” yaagada haasayaasu.

<sup>20</sup> Yaagin Yoo7aabi o, “Hegee taappe haakko! Bashshiyoogee woikko xaissiyoogee taappe haakko! <sup>21</sup> Yohoi heгаа gidenna; Efireema gezziyaappe Biikira na7aa SHEbaa7a giyo issi bitanee Kawuwaa Daawita bolli ba kushiya denttiis. He bitaniyaa taayyo sheedhdhite; yaatikko, taani katamaappe baana” yaagiis.

Yaagin mishiriyaa Yoo7aaba, “A huuphee gimbbiyaa xeeraara neeyyo olettana” yaagaasu.

<sup>22</sup> Hegaappe guyyiyan, mishiriyaa ba era zoriyaara asaa ubbaakko baasu. Hega gishshau, asai Biikira na7aa SHEbaa7a qooriyaappe muucidi, huuphiyaa Yoo7aabayyo oliis. Yaatin, Yoo7aabi malkkataa punniis; punnin asai ubbai katamaappe kiyidi, ba soo ba soo biis; bin Yoo7aabi kawuwaakko Yerusalaame simmiis.

### *Daawita Oosanchchata*

<sup>23</sup> Yoo7aabi Israa7eela olanchchatu ubbaayyo gadaawaa; Yoodaaha na7ai Banaayi Daawita naagiya olanchchatu halaqaa. <sup>24</sup> Adooniraami wolqqan coo ootissiyoogettu halaqaa; Ahiluuda na7ai Yoosaafixi hanidabaa xaafiyaagaa. <sup>25</sup> Suusi<sup>3</sup> waanna xaafe; Xaadooqinne Abiyaataari qeeseta. <sup>26</sup> Yaa7iira katamaa asa gidiya Irikka Daawitayyo qeese.

<sup>3</sup> 20:25 Suusi: Ibraawettuwan “SHawa” geetettes; ha bitanee Ibraawettuwan oiddu dumma dumma sunntan xeesettes. Sameela Maxaafaa Naa77anttuwaa 8:17, Kawotu Maxaafaa Koiruwaa 4:3, Hanidabaa Odiya Koiro Maxaafaa 18:6 xeella.



## 21

### *Saa7oola Yaratu Bolli Wodhdhida Pirddaa*

<sup>1</sup> Daawiti kawotido wode, heezzu laitta kumettaa biittai koshatiis. Hegaa gishshau, Daawiti GODAA oichchiis; oichchin GODAI a, “Hegee hanidoogee Saa7oola asai gussido suutta gishshaassa; aissi giikko, i Gabaa7oona asata woriis” yaagiis.

<sup>2</sup> Hegaa gishshau, kawoi Gabaa7oona asata xeesidi haasayissiis. Gabaa7oona asati Israa7eela zare gidokkona; eti Amooore biittaa asatu atettata. Israa7eelati eta ashshanau etaara caaqqettidosona; shin Saa7ooli Israa7eelayyoonne Yihudaayyo mishettido gishshau, eta ubbaara xaissanau doommiis. <sup>3</sup> Daawiti Gabaa7oona asata, “Taani intteyyo ai oottoo? GODAA buzo biittaa intte anjjana mala, taani intteyyo ai kaasoo?” yaagiis.

<sup>4</sup> Yaagin Gabaa7oona asati zaaridi kawuwaa, “Nuuppenne Saa7oolappe gidduwan, woikko nuuppenne Saa7oola keettaa asaappe gidduwan de7iya yohoi worqqa woikko bira yoho gidenna; qassi nuuni Israa7eela gidдон issi uraanne woranau nuuyyo maati baawa” yaagidosona.

Yaagin Daawiti eta, “Yaatin, taani intteyyo ai oottanau koyeetii?” yaagidi oichchiis.

<sup>5</sup> Oichchin eti kawuwaa, “Saa7ooli nuna xaissiis; nuuppe ai asinne Israa7eela zawan awaaninne paxa attennaadan maqettiis. <sup>6</sup> Hegaa gishshau, Saa7oola yaraappe laappun attuma asata nuuyyo aattada imma; GODAI dooridi kawoyido Saa7oola kataman Gib77an GODAA sinttan nuuni eta kaqqana” yaagidosona.

Yaagin kawoi eta, “Taani eta intteyyo aattada immana” yaagiis.

<sup>7</sup> Saa7oola na7ai Yonaataaninne Daawiti GODAA sinttan caaqqido caaquwaa gishshau, Saa7oola na7aa Yonaataana na7aa Mafibosheeta kawoi ashshiis. <sup>8</sup> SHIN Daawiti Aaya na7iyaa Rixifa Saa7oolayyo yelido naa77u attuma naata, Armmoonanne Mafibosheeta, qassi Saa7oola na7iyaa Meraaba Mahoola katamaappe yiida Barzzillaaya na7aa Adirii7eelayyo yelido ichchashu naata ekkiiis. <sup>9</sup> Ekkidi Gabaa7oona asatuyyo aattidi immiis; immin eti eta GODAA sinttan deriyaa huuphiyan kaqqidosona; laappunatikka issippe haiqqidosona; katta cahan, bangгаа cahai doommiyo wodiyan eta woridosona.

<sup>10</sup> Aaya na7iyaa Rixifa maaqiyaa ekkada, zaallaa bolli baayyo hiixxaasu; hiixxada kattaa cakkiyo aginai doommiyo gallasaappe biidi ahatu bolli irai saluwaappe wodhdhana gakkanaashin, gallassi saluwaa kafoti woikko qammi sa7aa do7ati bochennaanadan naagaasu.

<sup>11</sup> Saa7oola baakkiyaa, Aaya na7iyaa Rixifa oottidoogee Daawitayyo odettiis. <sup>12</sup> Odettin Daawiti biidi, Saa7oola meqettaanne a na7aa Yonaataana meqettaa Gala7aaden de7iya Yaabeesha katamaa asatuppe ekkiiis. Pilisxxeema asati Saa7oolanne a naata Gilbboo7a deriyan woridi, Beetishaana gutaran kaqqidoogaappe guyyiyan, he gutaraappe Gala7aaden de7iya Yaabeesha asati qosan ekkidosona. <sup>13</sup> Daawiti Saa7oola meqettaanne a na7aa Yonaataana meqettaa he sohuwaappe ehiis; qassi kaqettida laappun asatu meqettaakka shiishshidosona. <sup>14</sup> Saa7oola meqettaanne a na7aa Yonaataana meqettaa Biniyaama biittan Xelaa7a kataman de7iya a aawaa Qiisa duufuwan moogidosona. Kawoi azazidobaa ubbaa eti polidosona; hegaappe guyyiyan, eti he biittaayyo woossido woosaa Xoossai siyiis.

### *Pilisxxeema Asatuura Olettido Olata (Hanidabaa Odiya Koiro Maxaafaa 20:4-8)*

<sup>15</sup> Pilisxxeema asatuuranne Israa7eela asatuura naa77anttuwaakka olai denddiis; denddin Daawiti ba asatuura biis. Pilisxxeematuura olettidi Daawiti daafuriis. <sup>16</sup> Adussa mino asatu yaraappe gididiya Yishibibanooba giyo issi bitanee de7ees; i oiqqido toorai heezzu kilo giraamenne bagгаа deexxiya, nahaasiyaa giyo birataappe qoxettidaagaa; i ooratta bisuwaa gixxi uttiis. Yaanidaagee “Taani Daawita worana”

giis; <sup>17</sup> shin Xaruuyi na7ai Abishaayi Daawita ashshiis; Pilisxxeemiyaa shocidi woriis. Hegaappe guyyiyan Daawita asati Daawita, “Israa7eela xomppee to7ennaadan neeni naa77antto mulekka nunaara olau baakka” yaagidi caaqqidosona.

<sup>18</sup> Hegaappe guyyiyan, Gooba giyo sohuwan Pilisxxeema asatuura olai olettiis; olettin Huushappe yiida Sibbakaayi adussa mino asatu yaraappe gidiya Saafa woriis.

<sup>19</sup> Qassikka he sohuwan Pilisxxeema asatuura hara olai olettiis; olettin Beetal-ihemeppe yiida Yaa7iira na7ai Elihanaani, tooraa toomai shimainniyaa wondarashiyaa keeniyo, Gaate katamaappe yiida Gooliyaada woriis.

<sup>20</sup> Qassikka Gaate kataman hara olai olettiis. He sohuwan issi wogga adussa bitanee de7ees. He bitaniyaayyo issi issi kushiyan usuppun biradhdheti, issi issi tohuwankka usuppun biradhdheti, muleera laatamanne oiddu biradhdheti de7oosona. Ikka adussa mino asatu yaraappe gidiya asa. <sup>21</sup> He bitanee Israa7eela naassido wode, Daawita ishaa SHAama na7ai Yonaataani a woriis.

<sup>22</sup> He oiddati Gaate kataman de7iya adussa mino asatu yarata. Eta Daawitinne a asati woridosona.

## 22

### *Daawiti Xoonidi Simmiiddi Yexxido Mazamuriyaa (Mazamure Maxaafaa 18)*

<sup>1</sup> GODAI a morkketu ubbaa kushiyaappenne Saa7oola kushiyaappe ashshido gallassi Daawiti GODAASSI ha yettaa yexxiis.

<sup>2</sup> “GODAI tau wogga zaallaa;  
taani olaappe naagettiyo miixaa;  
i tana ashshiyaagaa.

<sup>3</sup> Ta Xoossai taani akko baqatiyo ta wogga zaallaa.  
I ta gondalliyaa;  
i tana ashshiya wolqqaamaa.

I taani qosetta attiyo soho;  
i tana makkalanchcha asatuppe ashshees.

<sup>4</sup> Galatai bessiyo GODAA taani xeesais;  
i ta morkketuppe tana ashshees.

<sup>5</sup> “Haiquwaa beetai ta heeran sirimettees;  
bashshai di7odan tana muukkiis.

<sup>6</sup> Duufuwaa wodoroi tana qachchana hanees;  
haiqoi piredan tana oiqqiis.

<sup>7</sup> Tana metoi iissin GODAA xeesaas;  
‘Tana maadda’ gaada ta Xoossaayyo waassaas.  
I ba Beeta Maqidasiyan ta cenggurssaa siyiis;  
taani waassido waasoi a haittan wodhdhiis.

<sup>8</sup> “Wodhdhin Xoossai hanqqettido gishshau,  
biittai yaaqiyaagidi qaaxxiis;  
deretu xaphoi gajigajidi kokkoriis.

<sup>9</sup> A siiriyaappe hanqquwaa cuwai cuwattiis;  
a doonaappe miya tamaa lacoinne xuuggiya bonqqoi kiyiis.

<sup>10</sup> Saluwaa i phalqqidi,  
duge wodhdhiis.

He wode a gediyaappe garssaara sikkida shaarai de7ees.

<sup>11</sup> Qefiyaara de7iya kiitanchchatun, kiruubetun uttidi paalliis;

- carkkuwaa qefiyaa bollan beettiis.
- 12 Bana xuman kammiis;  
a dunkkaanee iraara sikkida shaaraa.
- 13 A sinttan de7iya gita poo7uwaappe  
tamaa lacoī kiyiis.
- 14 “Qassi GODAI dadaadan  
saluwaappe guummiis.  
Ubbaappe Xoqqiya Xoossai ba cenggurssaa sissiis.
- 15 Ba wonddafiya zubbiiya yeddidi,  
ba morkketa laaliis.  
Wolqqanttaa poo7uwaa kiittidi,  
eta yedettiis.
- 16 GODAI seerido wodenne  
hanqqettidi peenuqido wode,  
abbaa haattai zin77ido biittai beettiis.  
Qassi sa7aa baasoikka qoncciiis.
- 17 “GODAI bollappe kushiya duge yeddidi, tana oiqqiis;  
ciimma haattaappe tana kessiis.
- 18 I tana ta wolqqaama morkkiyaappenne  
tana ixxiyaageetuppe ashshiis;  
aissi giikko, eti taayyo keehi daro wolqqaama.
- 19 Ta waayiyaa gallassi  
eti ta bolli denddidosona;  
shin GODAI tana zemppissiyaagaa.
- 20 I tana aaho sohuwaa kessiis;  
tanān ufaittido gishshau, tana ashshiis.
- 21 “Ta xillotettaadan GODAI tau qanxxiis;  
ta kushiya geeshshatettaadan i tau zaariis.
- 22 Taani GODAA ogiyaa kaallaas;  
taani ta Xoossaa aggada wora babeikke.
- 23 Taani a higgiiya ubbaa naagaas;  
a wogaa poliyooгаа aggabeikke.
- 24 Taani a sinttan suure de7aas;  
taani tana nagarappe naagaas.
- 25 Hegaa gishshau, GODAI tau  
ta xillotettaadaaninne ta geeshshatettaadan zaariis.
- 26 “Abeet GODAU, ammanettiyaageetuyyo neeni ammanettiyaagaa;  
suuretuyyo neenikka suure.
- 27 Geeshshatuyyo neenikka geeshsha;  
shin geellatuyyo neeni cincca.
- 28 Banttana ziqqissiyaageeta ashshaasa;  
shin banttana xoqqissiyaageeta ziqqissanau neeni eta xeellaasa.
- 29 Abeet GODAU, ta xomppee nena;  
GODAI poo7issin, ta xumai kichchees.
- 30 Ne maaduwan taani ta morkke olanchchatu bolli woraajjais;  
ta Xoossan taani eta miixaa xeeraara guppa aadhdhais.
- 31 “Xoossaa ogee suure.

GODAA qaalai ammanettiyaagaa.  
Akko baqatiya ubbatussi i gonddalle.

32 GODAAPPE attin, hara xoossi baawa;  
nu Xoossaappe attin,  
hara wogga zaalli baawa.

33 Taayyo wolqqaa immiyaageenne  
ta ogiyaa saro oottiyaagee  
Xoossaattennee.

34 I ta gediya  
genessaa gediyaadan minttees.  
Tana xoqqa sohotun sarotettan wottees.

35 I ta kushiya olaa meezeyees;  
heгаа gishshau, taani ta qesiyan  
nahaasiyaa giyo birataa wonddafiyaa dafada dukkais.

36 “Tana ashshiya ne gonddalliyaa  
neeni taayyo immadasa;  
ne lo77o ohettai tana gitayees.

37 Taani hemettiyoosaa aassaasa;  
heгаа gishshau, ta tohoi harchchibeenna.

38 Ta morkketa taani yedettada mentterettaas;  
taani eta xaissennan de7aidda guyye simmabeikke.

39 Taani eta naa77antto denddenaanadan shocaas;  
eti ta tohuwan wullidosona.

40 Olau tana wolqqaa gixissadasa;  
tanaara gaaddetiyaageeta taayyo gulbbatissadasa.

41 Ta morkketa ta sinttappe guyye baqatissadasa;  
tana ixxiyaageeta taani xaissaas.

42 Banttana maaddiyaabaa koyidosona;  
shin ooninne eta ashshibeenna.

GODAAKKA eti xeesidosona;  
shin i etau koyibeenna.

43 Taani eta baanadan liiqissaas;  
ogiyaa de7iya urqqaadankka eta dirxxerettada yedhdhaas.

44 “Ta asaa makkalaappe tana ashshadasa.  
Kawotettatu bolli sunttada, tana naagadasa;  
taani erenna asai tau haarettiis.

45 Allaga dere asaikka ta sinttan lahottees.  
Eti ta woriyaa siyidi,  
tau azazettoosona.

46 Eti wozanaa kahaa bayoosona.  
Bantta naagettiyo miixaappe kokkoriiddi yoosona.

47 “GODAI de7ees! Xoossai,  
ta wogga zaallai galatetto.  
Xoossai, tana ashshiya zaallai,  
xoqqu xoqqu go.

48 I ta haluwaa kessiya Xoossaa;  
kawotettata taappe garssaara wottiyaagaa.

49 Ta morkketuppe tana kessi ekkiyaagaa.  
Abeet GODAU, neeni tanaara gaaddetiyaageetu bollan

tana xoqqu xoqqu oottaasa.  
Makkalanchcha asatuppe neeni tana ashshaasa.  
<sup>50</sup> Hegaa gishshau, taani  
nena kawotettatu gidдон galatana;  
taani ne sunttaakka sabbana.

<sup>51</sup> “Xoossai ba kawuwaassi  
xoonuwaa bollan xoonuwaa immees.  
Ba tiyidoogaassi, Daawitassinne a zersettaassi,  
aggenna siiquwaa merinau bessees”  
yaagidi yexxiis.

## 23

### *Daawiti Wurssettan Haasayido Qaalata*

<sup>1</sup> Hageeti Daawiti wurssettan haasayido qaalata.

Isseya na7ai Daawiti haasayees;  
Xoossai xoqqu xoqqu oottidoogee,  
Yaaqooba Xoossai tiyidi kawoyidoogee,  
Israa7eelan lo77o mazamuriyaa kessidaagee hagaadan yaagees;

<sup>2</sup> “GODAA Ayyaanai ta baggaara haasayees;  
a qaalai ta inxxarssan de7ees.

<sup>3</sup> Israa7eela Xoossai haasayiis;  
Israa7eela Zaallai tana hagaadan yaagiis;  
‘Xillotettan deriyaa haariya kawoi,  
Xoossaassi yayyiiddi kawotiya kawoi

<sup>4</sup> shaari baina guuran doliya xalqqiyaa poo7uwaa mala.  
He urai irai bukki simmin,  
biittaappe maataa mokissiya booqalssaa mala’ yaagiis.

<sup>5</sup> “Tumu ta keettaa asai Xoossaa sinttan suure.  
I tanaara merinaa maachchaa maacettiis;  
ubbabaikka ha maachchaa gidдон giigidinne minnidi uttiis.  
Xoossai taayyo xoonuwaa immana;  
qassi taani amottidobaa ubbaa i tumuppe polana.

<sup>6</sup> SHin iita asati ubbai  
kushen shiishshanau hanenna agunttatudan  
wora olettana.

<sup>7</sup> Agunttata bochchiya ooninne  
birataa woikko toora toomaa ba kushiyan oiqqanau koshshees.  
He agunttati bantta de7iyo sohuwan eexxana”  
yaagiis.

### *Daawita Asata Minota (Hanidabaa Odiya Koiro Maxaafaa 11:10-41)*

<sup>8</sup> Daawita asatu minotu sunttai hagaappe kaallidi xaafettiis. Etappe heezzati keehippe erettidaageeta. Hezzatuppe koiroi Taahikimoonappe yiida Yooshebi-Baashebeeta geetettes; i issitoo olan ba tooran hospun xeetu asaa woriis.

<sup>9</sup> Heezzu mino asatu gidдон a kaallidi de7iyaagee Ahoohiyaa Doodo na7aa El77aazara. Issi gallassi inne Daawiti olau shiiqida Pilisxxeemata naassidosona; hegaappe guyyiyan, Israa7eela asai guyye simmiis. <sup>10</sup> SHin i ba sohuwan minni eqqidi, a kushee xalalidi, bisuwaara oiqettana gakkanaashin, Pilisxxeema asata shociis. He



gallassi GODAI gita xoonuwaa immiis. Olai eqqin, olanchchati El77aazarakko simmidi yiidosona; shin eti haiqqida Pilisxxeematuppe olaa maayuwaa qaaridosonappe attin, harabaa oottibookkona.

<sup>11</sup> Appe kaalliyaagee qassi Haaraarappe yiida Age na7aa SHamma. Issi gallassi Pilisxxeema asati misirai kumi uttido shooqan shiiqidosa; shiiqin Israa7eela asati eta sinttaappe baqatidosona. <sup>12</sup> SHin SHammi shooqau giddo baazzan murttidi eqqidi olettiis. Pilisxxeema asata shocidi dippiyiis. Hegan GODAI wolqqaama xoonuwaa immiis.

<sup>13</sup> Katta cahan hasttamu mino asatuppe heezzati Daawitakko Adulaama katamaa matan de7iya gonggoluwaa biidosona. He wode Pilisxxeema olanchchati Rafaima Wombban shiiqi uttidosona. <sup>14</sup> He wode Daawiti qatuwaa gidдон de7ees; Pilisxxeema olanchchatu citai qassi Beetaliheemen de7ees. <sup>15</sup> Daawiti haattaa uyanau amottidi, “Beetaliheeme katamaa penggiyaa lanqqen de7iya pulitto haattaappe tana ooni ushshanddeeshsha!” yaagiis. <sup>16</sup> Yaagin heezzu mino asati Pilisxxeema olanchchatu moottaa kanttidi, Beetaliheeme katamaa penggen de7iya pulttuwaappe haattaa duuqqidi Daawitayyo ehiidosona. SHin i uyennan ixxiis; ixxidi, GODAA sinttan tigidi, <sup>17</sup> “Abeet GODAU, haggaa uyanaagee taappe haakko! Ha haattai bantta shemppuwaa shenehoo giidi xalidi biida asatu suuttaa gidennee?” yaagidi uyennan ixxiis.

Ha heezzu mino asati haggaa oottidosona.

<sup>18</sup> Xaruuyi na7aa Yoo7aaba ishai Abishaayi hasttamatuyyo halaqa; i heezzu xeetu asata ba tooran olidi woriis; yaatidi ikka hara heezzatudan erettiis. <sup>19</sup> I hasttamatuppe aadhdhidi bonchchettida asa; i etayyo halaqa gididiis. Gidikonne, i he heezzatu goodan de7enna.

<sup>20</sup> Qassi Qabxxi7eelappe yiida Yoodaaha na7ai Banaayikka mino asa. I mino oosota oottiis. I naa77u erettida Moo7aaba asata woriis. Qassi shachchai dariyo issi gallassi ollaa duge gelidi, gaammuwaa woriis. <sup>21</sup> Qassi Gibxxe bitaniyaa issi pomppollaa woriis; Gibxxe bitanee tooraa oiqqiis; shin i dullaa oiqqidi a bolli biis; biidi a kushiyaappe tooraa dafi ekkidi, a tooran a woriis. <sup>22</sup> Yoodaaha na7ai Banaayi hageeta oottiis. A sunttaikka he heezzatuugaadan erettiis. <sup>23</sup> I hasttamatu gidдон daro bonchchettis; shin i heezzatu goodan de7enna. Daawiti a bana naagiya olanchchatussi halaqa kessiis.

<sup>24</sup> He hasttamatu gidдон de7iyaageeti: Yoo7aaba ishaa Asaaheela, Beetaliheemeppe yiida Doodo na7aa Elihanaana, <sup>25</sup> Haroodappe yiida SHammanne Eliiqa, <sup>26</sup> Palxxa yara gididiya Heleexa, Taqo7appe yiida Iqqeesha na7aa Ira, <sup>27</sup> Anatootappe yiida Abi7eezera, Huushappe yiida Mabunaaya, <sup>28</sup> Ahooa yara gididiya Xalmmoona, <sup>29</sup> Naxoofappe yiida Maahiraayanne Ba7aana na7aa Heleeba, Biniyaama biittaappe, Gib77appe yiida Ribaaaya na7aa Ittaaya, <sup>30</sup> Pir77aatoonappe yiida Banaaya, Ga7aasha Zanggaaraa matappe yiida Hiddaaya, <sup>31</sup> Aarabappe yiida Abi7albboona, Baahiruumappe yiida Azimaaweeta, <sup>32</sup> SHa7albboonappe yiida Eliyaahiba, Yaasheena naata, Yonaataana, <sup>33</sup> Haaraarappe yiida SHamma, Haaraarappe yiida SHaraara na7aa Ahi7aama, <sup>34</sup> Maa7ikappe yiida Ahasabaaya na7aa Elifeleexa, Giiloppe yiida Akixoofeela na7aa Elii7aama, <sup>35</sup> Qarmmeloosappe yiida Hexira, Araba katamaappe yiida Pa7araaya, <sup>36</sup> Xooba katamaappe yiida Naataana na7aa Yigi7aala, Gaadappe yiida Baana, <sup>37</sup> Amoonappe yiida Xeleqa, Xaruuyi na7aa Yoo7aaba ola miishshaa tookkiya Ba7erootappe yiida Naahiraaya, <sup>38</sup> Yatira yara gididiya Ira, Yatira yara gididiya Gaareebanne <sup>39</sup> Hiitiyaa Ooriyoona. Eti muleera hasttamanne laappuna.

## 24

*Daawiti Asaa Qoodissiis  
(Hanidabaa Odiya Koira Maxaafaa 21:1-27)*

<sup>1</sup> Qassikka GODAA hanqqoi Israa7eela bolli eexxi kiyiis; yaatin, GODAI Daawita eta bolli denttettidi, “Ba; baada Israa7eelanne Yihudaa asaa qooda” yaagiis. <sup>2</sup> Hegaa gishshau, kawoi Yoo7aabanne aara de7iya olanchchatu halaqata hagaadan yaagiis; “Israa7eela zaretu giddo Daanappe biidi Berssaabeha gakkanaashin biite; biidi eti aappunakko taani erana mala, Israa7eela asaa qoodite” yaagiis.

<sup>3</sup> SHin Yoo7aabi kawuwaa, “GODAI ne Xoossai ha de7iya asaa bolli xeetu kushiya gujjo! Hegaa ne aifee, ta godaa kawuwaa aifee be7o! SHin ta godai kawoi aissi hega malabaa oottanau koyii?” yaagiis. <sup>4</sup> SHin kawuwaa qaalai Yoo7aabanne olanchchatu halaqata xooniis. Xoonin eti kawuwaa sinttappe kiyidi, Israa7eela asaa qoodanau biidosona.

<sup>5</sup> Eti Yorddaanoosa SHaafaa pinnidoogaappe guyyiyan, zanggaaraappe tohossa baggan de7iya Aaro7era kataman uttidosona; hegaappe qassi Gaada kanttidi Yaa7izeera gakkidosona. <sup>6</sup> Hegaappe guyyiyan, eti Gala7aadenne Hiitetu biittan de7iya Qaadeesa biidosona; he sohuwaappe qassi Daana katamaa biidosona; hegaara Sidoona katamaa biidosona. <sup>7</sup> He sohuwaappe denddidi, Xiiroosa katamaa qatuwaanne Hiiwetunne Kanaanetu katama ubbaa biidosona. Wurssettan qassi Yihudaa Neegeeban de7iya Berssaabeha katamaa biidosona.

<sup>8</sup> Eti biittaa ubbaa yuuyiiddi, uddufun aginanne laatamu gallassaa gam77idoogaappe guyyiyan, Yerusalaame katamaa simmidosona.

<sup>9</sup> Yoo7aabi qoodido asaa qoodaa kawuwaa erissii: erissidoogaadan Israa7eelan bisuwan olettanau danddayiya hosppun xeetu sha7a; mino olanchchati de7oosona; Yihudan qassi ichchashu xeetu sha7ai de7oosona.

<sup>10</sup> Asaa qoodidoogaappe guyyiyan, Daawita wozanai shabbarettiis; hega gishshau, Daawiti GODAA, “Taani ha oosuwan gita nagaraa oottaas. SHin ha77i abeet GODAU, taani nena woossais; ta mooruwaa, ne ashkkaraa mooruwaa qucca. Taani daro eeyyabaa hanaas” yaagiis.

<sup>11</sup> Wonttetta gallassi maallado, Daawiti hiittaappe denddido wode, Daawitassi hananabaa yootiya Gaadakko GODAA qaalai yiis. <sup>12</sup> Yiidi, “Ba; baada Daawita, ‘GODAI nena, “Taani nena heezzubaappe dooruwaa bessais; taani ne bolli polanau taayyo etappe issuwaa doora” yaagees’ yaaga” yaagiis.

<sup>13</sup> Yaagin Gaadi Daawitakko biidi, “Heezzu laitti ne biittai koshatanaagaa doorai? Woikko ne morkketi nena yedettishin, heezzu aginaa neeni eta sinttappe baqatanaagaa doorai? Woikko ne biittaa bolli heezzu gallassa boshai yaanaagaa doorai? Ane ha77i qoppa kuuyada, taani tana kiittidaagaayyo zaariyoobaa oda” yaagiis.

<sup>14</sup> Hegaappe guyyiyan Daawiti Gaada, “Taani keehippe un77ettaas. GODAA maarotai gita gidiyo gishshau, nuuni ane a kushiyan kunddoos; tana asatu kushiyan kunddisoppa” yaagiis.

<sup>15</sup> Hegaa gishshau, maalladoppe biidi ba giido gallassai gakkanaashin, GODAI Israa7eela biittan boshaa kiittiis; kiittin Israa7eela zawan Daanappe biidi Berssaabeha gakkanaashin, laappun tammu sha7u asai haiqqiis. <sup>16</sup> Yerusalaame katamaa xaissanau kiitanchchai ba kushiya yeddido wode, GODAI he gakkida boshau azzaniis; azzanidi asaa shociya kiitanchchaa, “Agga! Hegee gidana!” yaagiis. GODAA kiitanchchai he wode Yaabuusiya Ornna audiyaa de7ees.

<sup>17</sup> Asaa shociya kiitanchchaa Daawiti be7ido wode, GODAA, “Be7a! Nagaraa ootidaagee tana; taani mooraas! Ha dorssati, eti ai oottidonaa? Hayyanaa, tananne ta aawaa so asaa neeni qaxxayana mala taani woossais” yaagiis.

<sup>18</sup> He gallassi Gaadi Daawitakko yiidi, “Ba; pude Yaabuusiya Ornna audiyaa baada, GODAAYYO yarshshiyooosaa yan gimba” yaagiis. <sup>19</sup> Yaagin Daawiti GODAI Gaada baggaara azazidoogaadan pude biis. <sup>20</sup> Ornni duge xeelliyo wode, kawoinne a asati

baakko yiyaageeta be7iis; be7idi gaxi kiyidi, ba som77uwaa sa7aa gattidi, kawuwaassi ziggiis.

<sup>21</sup> Ziggidi Ornni, “Ta godai kawoi ba ashkkaraakko, taakko aibissi yiidee?” yaagiis.

Yaagin Daawiti, “Asaa bollaappe boshai kichchanaadan taani GODAAYYO yarshshiy-oosaa gimbbanau, ne audiyaa shammanau yaas” yaagiis.

<sup>22</sup> Yaagin Ornni, “Ta godai kawoi ba koyidobaa aibanne ekkidi yarshsho! Be7a; xu-uggiyo yarshshuwaayyo boorati, eettiyo mittaayyo qassi kattaa qoxxiyo miishshatinne booraa qambbarati hageetihoona. <sup>23</sup> Kawuwau, haggaa ubbaa taani Ornni kawuwaayyo immais” yaagiis. Qassikka Ornni kawuwaa, “GODAI ne Xoossai ne yarshshuwaa ekko” yaagiis.

<sup>24</sup> SHin kawoi Ornna, “CHii, chii! Taani tumuppe miishshan shammana; aissi giikko, miishsha ekkibeenna xuuggiyo yarshshuwaa taani GODAAYYO, ta Xoossaayyo, yarshshikke” yaagiis.

Hegaa gishshau, kawoi audiyaanne boorata Ornnappe ishatamu xaqara biran sham-miis. <sup>25</sup> Daawiti he sohuwan yarshshiyooosaa gimbbidi, xuuggiyo yarshshuwaanne issippetettaa yarshshuwaa GODAAYYO yarshshiis; yaatin, GODAI he biittaa gishshau woosettida woosaa siyidi, boshaa Israa7eelappe diggiis.

## Kawotu Maxaafaa Koiruwa

### *Gidduwaa Erissuwaa*

Kawotu Maxaafaa koiro shaahoi, Sameela maxaafatun naa77atun doomettida, Israa7eela biittaa kawotu taarikiyaappe attidaagaa kaallidi odees. Maxaafaa heezzu waanna waanna kifiletun shaakkidi xeellana danddayoos.

1. Solomoni ba aawaa Daawita sohuwan Israa7eelanne Yihudaa kawo gidiyooaanne a aawaa Daawita haiquwaabaa odees.
2. Qassi ha maxaafai Solomona kawotettaa equwaanne i oottido oosuwa odiya taarike. I oottido oosotuppe odanau doonaa kumiyaagee Yerusalaamen gimbbet-tida Beeta Maqidasiyaa.
3. Israa7eeli huuphessanne tohossa kawotetta geetettidi naa77u kiyidi shaahetti-doogaanne he shaahettida kawotettata Kiristoosi yelettanaappe kase, uddufunnto xeetu laittai gakkanaashin dumma dumma haarida kawotu taarikiyaa odees.

Ha naa77u maxaafatun asaa kaalettiya kawoi lo77onne iitanne geetettidi pirddet-tiyoogee, Xoossaassi i ammanettiyoogaa keenaana. Hegaadanka qassi he biittai dicciyo dichchainne demmiyo injjee he kaalettiya kawoi Xoossaassi ammanettidoogaa keenaana. Hara baggaara qassi allaga xoossatussi goinnidoogeenne azazettennan ixxidogee kaalettiyaageetakka kaalliyaa asaakka bashshau efiis. Huuphessa bagga kawotettaa kawoti ubbaikka paaciyan kunddidosona. SHin Yihudaa kawotu taarikee iitatuugaakka lo77otuugaakka odees.

Kawotu maxaafan koiro kifiliyan daro erettidageeti, Xoossa doona gididi hiraagaa qaalaa yootidanne asai eeqassi goinnenna malanne Xoossaassi azazettennan ixxenna mala, minttidi erissida hananabaa yootiya mino asata. Etappekka eretaa dariyaagee Eelaasa. Eelaasi Ba7aala qeesetuura naasettido taarikeekka he sohuwan odettiis (Miraafiyaa 18 xeella).

### *Kawoi Daawiti Cimiis*

<sup>1</sup> Kawoi Daawiti cimidi wodiya keehippe sugiis. Yaataagau ashkarati maayuwa a bolli kuurinkka a ho77ennan ixxiis. <sup>2</sup> Hegaa gishshau, a oosanchchati a, “Kawuwaa achchan de7ana malanne a heemmana mala, issi geela7o na7iyo nuuni neeyyo koyana; nu godaa kawuwaa ho7ettanau a a lanqqen zin77anau danddayausu” yaagidosona. <sup>3</sup> Yaagidi eti Israa7eela biittan ubban koyidi Abishaago giyo issi puulanchcha geela7iyo SHuneema giyo katamaappe demmidosona. Demmidi o kawuwaassi ehiidosona. <sup>4</sup> He geela7iyaa keehippe puulanchcha na7a. A kawuwaa heemmasunne ayyo oottaasu; shin kawoi iira inddan gaitti erenna.

### *Adoonee Kawotanau Koyiis*

<sup>5</sup> Haggiiti na7ai Adoonee, “Taani kawotanau koyais” yaagidi denddiis; denddidi paraa gaaretanne parata ba sinttan woxxiya ishatamu asaara giigissiis. <sup>6</sup> A aawai aban gelidi, “Aissi haggaa oottai?” giidi mulekka a oichchi erenna. Adooneekka qassi meraa keehippe lo77o asa; i Abeselooma kaallidi yelettiis. <sup>7</sup> Adoonee Xaruuyi na7aa Yoo7aabanne qeesiyaa Abiyaataara ha yohuwaa zoretaa bessii; bessin eti a maad-danau maayidosona. <sup>8</sup> SHin qeesiyaa Xaadooqi, Yoodaaha na7ai Banaayi, hananabaa yootiya Naataani, SHim77i, Ree7inne Daawita naagiyaageeti Adooniyaara de7okkona.

<sup>9</sup> Issi gallassi Adoonee Eniroogeela katamaa matan Zoheleeta Zaallaa giyo sohuwan dorssata, mehetanne anqqara marata yarshshiis. Kawo naata ba ishata ubbaanne kawuwaassi oottiya Yihudaa asata ubbaa ba yarshshiyo sohuwaa xeesiis; <sup>10</sup> shin hanan-abaa yootiya Naataana, Banaaya, kawuwaa naagiyaageetanne ba ishata Solomona xeesibeenna.

### *Solomoni Kawotiis*

<sup>11</sup> Hegaappe guyyiyan, Naataani Solomona aayyiyo Berssaabo hagaadan yaagidi oichchiis; “Nu godai Daawiti erennan de7ishin, Haggiiti na7ai Adoonee kawotidoogaa neeni siyabeikkiyye? <sup>12</sup> Yaatikko, ha77i neeni ne shemppuwaanne ne na7aa Solomona shemppuwaa waatada ashshanaakko nena taani ane zorais. <sup>13</sup> Kawuwaa Daawitakko gelada hagaadan yaaga; ‘Ta godau kawuwau, taassi ne ashkkareessi, “Tuma, taappe guyyiyan ne na7ai Solomoni kawotana; ta kawotaa araatan i uttana” yaagada caaqqabeikkii? Yaatin, Adoonee aibissi kawotidee?’ yaaga. <sup>14</sup> Neeni kawuwaara haasayaidda yan de7ishin taani gelada, ne haasayaa maizzada haasayana” yaagiis.

<sup>15</sup> Yaagin Berssaaba cimida kawuwaa haasayissanau i de7iyo ilppinniyaa gelaasu; SHuneema katamaappe yiida Abishaaga kawuwaa heemmausu. <sup>16</sup> Berssaaba kawuwaa sinttan lichchi gaada gufannaasu.

Gufannin kawoi, “Ai koyadii?” yaagidi oichchiis.

<sup>17</sup> Oichchin a, “Ta godau, taassi ne ashkkareessi, ‘Taappe guyyiyan ne na7ai Solomoni kawotana; ta kawotaa araatan i uttana’ gaada GODAN, ne Xoossan, neeni ne huuphen caaqqadasa. <sup>18</sup> SHin ha77i Adoonee kawotiis; neeni ta godai kawoi hegaa erakka. <sup>19</sup> I keehi daro meheta, anqqara maratanne dorssata yarshshiis. Yarshshiiddi kawuwaa naata ubbaa, qeesiyaa Abiyaataaranne ola gadaawaa Yoo7aaba xeesiis; shin ne ashkkaraa Solomona xeesibeenna. <sup>20</sup> Ta godau kawuwau, ta godaappe kawuwaappe guyyiyan ooni ne kawotaa araatan uttanaakko eranau Israa7eela asaa ubbaa aifee nena xeelli uttiis. <sup>21</sup> Hinna xayikko, ta godai kawoi haiqqidi ba maizzan gaittiyo wode, taaninne ta na7ai Solomoni daafabaa oottida asadan qoodettana” yaagaasu.

<sup>22</sup> Berssaaba biron kawuwaara haasayishin, hananabaa yootiya Naataani kawo keettaa gakkiiis. <sup>23</sup> Gakkin kawuwaayyo, “Hananabaa yootiya Naataani yiis” yaagidi yootidosona. Yaatin, Naataani kawuwaa sintti aadhdhidi, ba som77uwaa sa7aa gattidi ziggiis.

<sup>24</sup> Hegaappe guyyiyan Naataani, “Ta godau kawuwau, neeppe guyyiyan Adoonee kawotanaadaaninne ne kawotaa araatan uttanaadan odadiyye? <sup>25</sup> Hachchi i duge biidi keehi daro meheta, anqqara maratanne dorssata yarshshiis. Yarshshiiddi kawuwaa naata ubbaa, ola gadaawatanne qeesiyaa Abiyaataara xeesiis. Eti ha77i aara miiddinne uyiiddi, ‘Kawoi Adoonee merinau de7o!’ yaagiiddi de7oosona. <sup>26</sup> SHin tana ne ashkkaraa, qeesiyaa Xaadooqa, Yoodaaha na7aa Banaayanne ne ashkkaraa Solomona xeesibeenna. <sup>27</sup> Hagee ta godaa kawuwaappe guyyiyan a kawotaa araatan ooni uttanaakko ba ashkkarata erissennan de7iiddi ta godai kawoi oottidobeeyye?” yaagiis.

<sup>28</sup> Yaagin Kawoi Daawiti, “Berssaabo tau xeesite” yaagiis; yaagin kawoi de7iyoosaa gelada a sinttan eqqaasu. <sup>29</sup> He wode kawoi iyyo hagaadan yaagidi caaqqiis; “Tana meto ubbaappe ashshida GODAI ero! <sup>30</sup> GODAN, Israa7eela Xoossan taani neeyyo caaqqido caaquwaa tumu hachchi polana; taappe guyyiyan ne na7ai Solomoni kawotana; ta kawotaa araatan, ta sohuwan i uttana” yaagiis.

<sup>31</sup> Yaagin Berssaaba ba som77uwaa sa7aa gattada kawuwaa sinttan ziggaasu; ziggada kawuwaa, “Ta godai, Kawoi Daawiti merinau de7o!” yaagaasu.

<sup>32</sup> Hegaappe guyyiyan Kawoi Daawiti, “Tau qeesiyaa Xaadooqa, hananabaa yootiya Naataananne Yoodaaha na7aa Banaaya xeesidi gelissite” yaagiis. Yaagin eti gelidi, kawuwaa sintti aadhdhidosa. <sup>33</sup> Aadhdhin i eta, “Ta ashkkarata inttenaara ekkidi biidi, ta na7aa Solomona taani toggiyo baquluwaa togissidi, duge Giyoona pulttuwaa efiite. <sup>34</sup> Efin qeesiyaa Xaadooqinne hananabaa yootiya Naataani a tiyidi Israa7eela asaa bollan kawoyona. Hegaappe guyyiyan malkkataa punnidi, intte qaalaa xoqqu oottidi, ‘Kawoi Solomoni merinau de7o!’ yaagite. <sup>35</sup> Hegaappe guyyiyan intte a ajabidi aara pude biite; bin i yiidi ta kawotaa araatan uttidi, ta sohuwan kawoto. Taani Israa7eelanne Yihudaa haariyaagaa oottada a sunttaas” yaagiis.



<sup>36</sup> Yoodahe na7aa Banaayi kawuwaayyo zaaridi, “Amin77i! GODAI, ta godaa kawuwaa Xoossaikka hegaa go! <sup>37</sup> GODAI ta godaara kawuwaara gididoogaadan Solomonaarakka gido; yaatin, a kawotaa araataa ta godaa Kawuwaa Daawita kawotaa araataappekka aattidi gitayo” yaagiis.

<sup>38</sup> Hegaa gishshau, qeesiyaa Xaadooqi, hananabaa yootiya Naataani, Yoodahe na7ai Banaayinne kawuwaa naagiyaageeti Solomona Kawoi Daawiti toggiyo baquluwaa togissidi, Giyoona efidosona. <sup>39</sup> Qeesiyaa Xaadooqi Xoossaa Dunkkaaniyaappe zaitiyaa kaciyan tigi ekkidi, Solomona tiyidi kawoyiis. Hegaappe guyyiyan eti malkkataa punnin, asai ubbai ba qaala xoqqu oottidi, “Kawoi Solomoni merinau de7o!” yaagiis. <sup>40</sup> Asai ubbaikka a kaallidi pude biis; eti pulaaliyaa punni punnidi kaa7iiddi keehippe ufaattidosona. He hobbocettan biittai qaaxxiis.

<sup>41</sup> Adooneenne aara de7iya imattati gibiraa mi wurssiiddi haggaa siyidosona. Malkkataa punettaa siyidi Yoo7aabi, “Ha kataman wocamiya wocamai ubbai aibabee?” yaagidi oichchiis.

<sup>42</sup> I biron haasayishin qeesiyaa Abiyaataara na7ai Yonaataani gakki wodhdhiis. Gakkin Adoonee, “Ane haa gela. Ne mala lo77o asi lo77o odo eheennan aggenna” yaagiis.

<sup>43</sup> Yaagin Yonaataani, “CHii, taani lo77o odo ehabeikke! Nu godai Kawoi Daawiti Solomona kawoyiis. <sup>44</sup> A ajabana mala kawoi qeesiyaa Xaadooqa, hananabaa yootiya Naataana, Yoodahe na7aa Banaayanne kawuwaa naagiyaageeta aara yeddiis; eti kawoi toggiyo baquluwaa a togissidosona. <sup>45</sup> Qeesiyaa Xaadooqinne hananabaa yootiya Naataani, Giyoona SHaafan a tiyidi kawoyidosona; hegaappekka eti hobbociiddi pude biidosona; hegau katamaikka kooshimmes. Ha77i intte siyiyo wocamai hegaa. <sup>46</sup> Hegaa bollikka Solomoni kawotaa araatan uttiis. <sup>47</sup> Qassi kawo oosanchchatikka nu godaa Kawuwaa Daawita, ‘Ne Xoossai Solomona woriyaa neegaappekka aatti woreyo! A kawotaa araataa neegaappekka aatti gitayo!’ yaagidi anjjidosona. Anjjin kawoi ba arssan de7iiddi hokkidi Xoossaassi goinniis. <sup>48</sup> Goinnidi, ‘Ta kawotaa araatan uttidi ta sohuwan kawotiyaabaa tana hachchi ta aifiyan bessida GODAI Israa7eela Xoossai galatetto!’ yaagiis” yaagiis.

<sup>49</sup> Hegaa siyidi, Adooniyaa imattati ubbai dagammi denddidi, laalettidosona. <sup>50</sup> Laalettin Adoonee Solomonayyo yayyidi biidi, yarshshiyosaa kaceta oiqqiis. <sup>51</sup> Oiqqin asai Solomona, “Adoonee Kawuwaa Solomonayyo yayyidi, yarshshiyosaa kaceta oiqqiis; oiqqidi, ‘Kawoi Solomoni tana ba ashkkaraa bisuwan worennaadan taayyo hachchi caaqqo’ yaagees” yaagidi yootidosona.

<sup>52</sup> Yaagin Solomoni zaaridi, “I ba hanuwaa loittanabaa gidikko, harai attin a huuphiyaappe issi binnaaninne boshettenna; shin an iitatetti beettikko, i haiqqana” yaagiis. <sup>53</sup> Hegaappe guyyiyan Kawoi Solomoni asaa kiittin, eti yarshshuwaa yarshshiyosaaappe duge a wottidosona. Wottin Adoonee yiidi, Solomonayyo ziggiis; yaatin, Solomoni a, “Ne soo ba” yaagiis.

## 2

### *Daawiti Solomonayyo Wurssetta Azazuwaa Azaziis*

<sup>1</sup> Daawiti haiqqiyo wodee matin, ba na7aa Solomona hagaadan yaagidi azaziis; <sup>2</sup> “Taani haiqqiyo wodee matiis. Hegaa gishshau, minna; yeeqenna asa gida. <sup>3</sup> GODAI ne Xoossai azazidobaa naaga; a ogetun hemetta; Muuse Higgiyan xaafettidoogaadan a awaajuwaa, a azazuwaa, a higgiaanne a wogaa naaga. Yaatikko, neeni oottiyobai ubbainne neeni biyo soho ubbai neeyyo injjetana. <sup>4</sup> Qassi GODAI tana, ‘Ne zerettati bantta de7uwan naagettidi de7ikko, eti ta sinttan bantta kumetta wozanaappenne bantta kumetta shemppuwaappe ammanettidi hemettikko, Israa7eela kawotaa araatan uttiya asi neeyyo mulekka xayenna’ yaagido ufaissaa qaala taayyo polana.

<sup>5</sup>“Qassi Xaruuyi na7ai Yoo7aabi Israa7eela ola gadaawata naa77aa, Neera na7aa Aba-neeranne Yetera na7aa Amaasa woridi, i tana oottidobaa neeni akeekaasa. Hegeenne, eti olaa wode woridoogaa haluwaa eta sigaa wode woridi, he suuttan ba xeessaa qabattuwaanne ba gediya caammaa alleeqiis. <sup>6</sup> Neeni a ne aadhdhida eratettaadan ootta; bau mati i ceeggidi saro haiqqanaadan oottoppa.

<sup>7</sup>“SHin Gala7aade giyo biittan de7iya Barzzillaaya naatuyyo keha; eti ne maaddan miya asaara mona. Aissi giikko, taani ne ishaa Abeseloomappe baqatiyo wode, eti taayyo miyye gididosona.

<sup>8</sup>“Taani Maahinaima katamaa biido wode, tana iita qanggettaa qanggida Biniyaama biittan Baahuriima katamaappe yiida Geera na7aa SHim77i nenaara de7iyooogaa has-saya. I tanaara gaittanau Yorddaanoosa SHaafaa duge yiido wode, ‘Taani nena worikke’ gaada GODAN ayyo caaqqas. <sup>9</sup> SHin ha77i neeni a xillo asadan qoodoppa. Neeni aadhdhida erai de7iyoo asa; neeni a waatanaakko erana. Neeni he cima bitaniyaa suuttaara mooga” yaagiis.

### *Daawita Haiquwaa*

<sup>10</sup> Hegaappe guyyiyan Daawiti haiqqidi, ba maizzan gaittiis; yaatidi Daawita Kata-man moogettiis. <sup>11</sup> Daawiti Israa7eela bolli oitamu laitta kawotiis; Kebroonan laappun laitta, Yerusalaamen hasttmanne heezzu laitta kawotiis. <sup>12</sup> Solomoninne ba aawaa Daawita kawotaa araatan uttiis; a kawotettaikka keehippe minniis.

### *Adooniyaa Haiquwaa*

<sup>13</sup> Haggiiti na7ai Adoonee, Solomona aayee Berssaabikko biis; bin Berssaaba, “Neeni taakko saruwan yaadii?” yaagada a oichchaasu.

Oichchin i, “Ee; saruwan yaas” yaagidi zaariis. <sup>14</sup> Hegaappe guyyiyan gujjidikka, “Taani nena oichchiyoobi de7ees” yaagiis.

Yaagin a, “Oichcha” yaagaasu.

<sup>15</sup> Yaagin i hagaadan yaagiis; “Kawotanau bessiyai tana gididoogaanne Israa7eela asai ubbai tana bantta kawodan xeellidoogaa neeni ne huuphen eraasa. SHin yohoti laamettin kawotettaa ta ishaayyo yuuyiis; hegeenne, ayyo GODAAPPE yiis. <sup>16</sup> Ha77i taani nena issibaa oichchana. Hayyanaa taayyo ixxoppa” yaagiis.

Yaagin a, “Oichcha” yaagaasu.

<sup>17</sup> Yaagin i, “Kawoi Solomoni neeyyo ixxis geenna; hegaa gishshau, SHuneema katamaappe yiida Abishaago giyo geela7iyoo taani machchanau i o taayyo immana mala, hayyanaa a taayyo oichcharkkii” yaagiis.

<sup>18</sup> Yaagin Berssaaba, “Daro lo77o; taani hegaa neeyyo kawuwaassi odana” yaagaasu.

<sup>19</sup> Hegaa gishshau, Berssaaba Adooniyaa kiitaa odanau Solomonakko gelin, kawoi o mokkanau dendi eqqidi, iyyo ziggiis; ziggi simmidi ba kawotaa araatan uttiis. Qassi ba aayeessi hara kawotaa araataa ehiissidi, an baappe ushachcha baggaara utissiis.

<sup>20</sup> Uttidoogaappe guyyiyan, “Nena taani issi guuttanaa oichchiyoobi de7ees. Hayyanaa taayyo ixxis gooppa” yaagaasu.

Yaagin kawoi zaaridi o, “Ta aayee, oichcha. Taani ixxis giikke” yaagiis.

<sup>21</sup> Yaagin a, “SHuneema katamaappe yiida Abishaago ne ishai Adoonee machchana mala ayyo immarkkii” yaagaasu.

<sup>22</sup> Yaagin Kawoi Solomoni zaaridi ba aayyiyo, “SHuneema katamaappe yiida Abishaago neeni Adooniyaayyo aissi oichchai? I ta bairaa gidennee? Neeni ayyo kawotettaakka oichchanaagaa shin aggadasa! Ee, neeni ayyo, qeesiyaa Abiyaataarayy-oonne Xaruuyi na7aa Yoo7aabayyo kawotettaakka oichchanaagaa aggadasa!” yaagiis.

<sup>23</sup> Yaagidi Kawoi Solomoni GODAN caaqqidi, “Adoonee haggaa oichchido gishshau taani a worana xayikko, GODAI tana woro! <sup>24</sup> Ha77i simmi tana ta aawaa Daawita kawotaa araatan utissidi, ta kawotettaa mintti essidi, ta zareti de7i be7anaadan oottida

GODAI ero! Adooniyaa hachchi worana!” yaagiis. <sup>25</sup> Yaagidi Kawoi Solomoni Yoodaaha na7aa Banaaya azazin, i biidi Adooniyaa shocidi woriis.

### *Abiyaataara Guyye Yeddidosona*

<sup>26</sup> Hegaappe guyyiyan, Kawoi Solomoni qeesiyaa Abiyaataara hagaadan yaagiis; “Neeni Anatootan de7iya ne gade guyye ba. Neeni haiqqanau besaasa; shin nena taani ha77i worikke. Aissi giikko, neeni ta aawaa Daawita sinttan Ubbaa Haariya GODAA Taabootaa tookkadasa; qassi ta aawaa metuwaa ubbaa aara metootadasa” yaagiis. <sup>27</sup> Yaatidi Solomoni Abiyaataara GODAA qeese gidyoosaappe diggidi, GODAI Seelon Eela keettaa asaaba yootidoogaa poliis.

### *Yoo7aaba Haiquwaa*

<sup>28</sup> Abeselooma maaddana xayikkonne Adooniyaa maaddida Yoo7aabakko ha odoi gakkiiis. Gakkin GODAA Dunkkaaniyau i baqati biidi, yarshshiyosaa kaceta oiqqiis. <sup>29</sup> Yoo7aabi GODAA Dunkkaaniyau baqatidi biidi, yarshshiyosaa lanqqen de7iyooogaa Kawuwaa Solomonassi yootidosona. Yootin Solomoni Yoodaaha na7aa Banaaya, “Ba, baada a wora!” giidi azaziis.

<sup>30</sup> Yaagin Banaayi GODAA Dunkkaaniyaa giddo gelidi Yoo7aaba, “Kawoi nena, ‘Hegaappe kiya’ yaagees” yaagiis. SHin i zaaridi, “Kiyikke! Taani hagan haiqqana” yaagiis.

Yaagin Banaayi kawuwaayyo, “Yoo7aabi taayyo haggaa haggaa giidi zaariis” giidi odiis.

<sup>31</sup> Kawoi Banaaya, “I giidoogaadan a ootta; a worada mooga! Yaatikko, Yoo7aabi xillo asatu suuttaa gussido daafaappe tananne ta aawaa keettaa asaa geeshshaasa. <sup>32</sup> I gussido suuttaa acuwaa GODAI ayyo qanxxana. Aissi giikko, i ta aawai Daawiti erennan de7ishin naa77u asata bisuwan woriis; Israa7eela ola gadaawai Neera na7ai Abaneerinne Yihudaa ola gadaawai Yetera na7ai Amaasi, eti naa77aikka appe kehaanne suuriyaa daro asa. <sup>33</sup> Yoo7aabi ha asata worido gishshau, eta suuttaa daafai merinau Yoo7aaba huuphiyaaninne a zerettatu huuphiyan wodhdho. Daawita bollinne a keettaa asaa bolli, a zerettatu bollinne a kawotaa araataa bolli merinau GODAA saroi gido” yaagiis.

<sup>34</sup> Heggaa gishshau, Yoodaaha na7ai Banaayi pude kiyidi, Yoo7aaba shocidi woriis; worin i bazzon de7iya ba gaden moogettiis. <sup>35</sup> Kawoi Yoodaaha na7aa Banaaya Yoo7aaba sohuwan ola gadaawa oottidi sunttiis; qassi Abiyaataara sohuwan qeesiyaa Xaadooqa sunttiis.

### *SHim77a Haiquwaa*

<sup>36</sup> Hegaappe guyyiyan Kawoi Solomoni SHim77ayyo kiittidi hagaadan yaagiis; “Neessi Yerusalaamen keettaa keexxada, yan de7a; harasaa awanne booppa. <sup>37</sup> Neeni katamaappe kiyada, Qediroona Zanggaaraa pinnido gallassi haiqqanaagaa era. Ne suuttaa gomee nena oiqqana” yaagiis.

<sup>38</sup> Yaagin SHim77i zaaridi kawuwaa, “Neeni giyoogee lo77o; taani ne ashkkarai neeni ta godai kawoi giidoogaadan oottana” yaagiis. SHim77i Yerusalaamen daro wodiya de7iis.

<sup>39</sup> SHin heezzu laittaappe guyyiyan, SHim77a ashkkaratuppe naa77ati betidi, Maa7ika na7aa, Gaate Kawuwaa Akiishakko biidosona; bin, “Ne ashkkarati Gaaten de7oosona” giidi SHim77ayyo yootidosona. <sup>40</sup> Yootin i ba hariyaa kooridi, ba ashkkarata koyanau Akiishakko Gaate biis; biidi Gaateppe ba ashkkarata zaaridi ehiis.

<sup>41</sup> SHim77i Yerusalaameppe Gaate katamaa biidi simmidoogaa Solomoni siyido wode, <sup>42</sup> SHim77a xeesissidi hagaadan yaagiis; “ ‘Neeni yaappe denddada harasaa awanne biido gallassi, haiqqiyooogaa era’ gaada taani nena GODAN caaqqettada seer-abeikkinaa? He wode neeni ‘Ne giyoogee lo77o; eeno, taani azazettana’ gaadasa. <sup>43</sup> Yaatin, GODAAYYO caaqqido caaquwaanne ta azazuwaa aissi naagabeikkii?” yaagiis.

<sup>44</sup> Qassikka kawoi SHim77a, “Ta aawaa Daawita bolli neeni oottido iita oosuwaa ubbaa ne wozanai erees. Ha77i simmi ne iita oosuwaa GODAI neeyyo zaarana. <sup>45</sup> SHin Kawoi Solomoni anjjettana; Daawita kawotaa araataikka GODAA sinttan merinau saro de7ana” yaagiis. <sup>46</sup> Yaagidi kawoi Yoodaaha na7aa Banaaya azaziis; azazin Banaayi biidi, SHim77a shocidi woriis.

Yaatin, kawotettaa Solomona kushiyan minnidi eqqiis.

### 3

#### *GODAI Aadhdhida Eratettaa Immana Mala Solomoni Woossiis (Hanidabaa Odiya Naa77antto Maxaafaa 1:3-12)*

<sup>1</sup> Solomoni Gibxxe Kawuwaara zuppetidi, a na7iyo baayyo machcho ekkiiis; ekkidi ba kawo keettaa, GODAA Beeta Maqidasiyaanne Yerusalaame yuushuwaa dirssaa gimb-bidi polanaashin, o Daawita Katamaa ehiis. <sup>2</sup> GODAA sunttaayyo Beeta Maqidasee biron keexettiichchibeenna gishshau, asai he wode goinniyo xoqqa sohotun yarshshiiddi takkiis. <sup>3</sup> Solomoni GODAA siiqiyoogaa ba aawaa Daawita wogan hemettiyoogan erissiis; shin goinniyo xoqqa sohotun yarshshiisinne ixaanaa cuwayiis.

<sup>4</sup> Kawoi yarshshuwaa yarshshanau Gabaa7oonaa biis; aissi giikko, he sohoi hara ubbaappe aadhdhi koshshiya goinniyo xoqqa soho. Solomoni sha7u mehiyaa ehi-idi, he yarshshiyoosan xuuggiyo yarshshuwaa yarshshiis. <sup>5</sup> GODAI Solomonayyo Gabaa7oonan qammi aimuwan qoncciiis. Qonccidi Xoossai a, “Taani neeyyo ai im-manau koyai?” yaagiis.

<sup>6</sup> Yaagin Solomoni, “Ne ashkkarai ta aawai Daawiti neeyyo ammanettiya xillonne suure asa gidiyo gishshau, neeni aggenaa siiquwan a siiqadasa. Neeni ha gita siiquwaa aggenan siiqaidda, hachchi ha gallassi a kawotaa araatan uttiya attuma na7aa ayyo immadasa.

<sup>7</sup> “Ha77ikka abeet GODAU, ta Xoossau, neeni tana ne ashkkaraa, ta aawaa Daawita sohuwan kawoyadasa. SHin taani guutta na7a gidiyo gishshau, asaa waata kaalet-tanaakko taani erikke. <sup>8</sup> Taani ne ashkkarai neeni doorido asaa gidдон, qoodai banna asaa gidдон de7ais. <sup>9</sup> Hegaa gishshau, taani ne asaa aissananne lo77uwaanne iitaa shaakkada eranau taayyo ne ashkkaraayyo akeeka wozanaa imma. Hegee xayikko, ha ne gita asaa ooni kaalettanau danddayii?” yaagiis.

<sup>10</sup> Solomoni heгаа oichchido gishshau, GODAI ufaittiis. <sup>11</sup> Hegaa gishshau, Xoossai a hagaadan yaagiis; “Neeeni neeyyo baree aduqqanau, woikko dure gidanau, woikko ne morkketi haiqqanau oichchennan aggada, hгаа asaa suure pirddan aissiyo aadhdhida eratettaa oichchido gishshau, <sup>12</sup> neeni oichchidoogaa taani oottana. Be7a, neeppe kase ne mali bannaagaadan neeppe simminkka ne mali denddenaagaadan, aadhdhida eratettaanne akeeka wozanaa taani neeyyo immana. <sup>13</sup> Qassi neeni oichch-abeennabaakka taani neeyyo immana; neeni de7ido laitta ubban kawotu gidдон ne keena kawoi de7ennaadan, duretaanne bonchchuwaa taani neeyyo immana. <sup>14</sup> Neeni ne aawai Daawiti hemettidoogaadan ta ogiyan hemettikko, ta wogaunne ta azazuwau azazettikko, taani ne bariyaa adussana” yaagiis.

<sup>15</sup> Hegaappe guyyiyan Solomoni beegottiis; beegottidi hegee aimo gidiyoogaa akeekiis. I Yerusalaame simmidi biidi, GODAA Maachchaa Taabootaa sinttan eqqiis; eqqidi xuuggiyo yarshshuwanne issippetettaa yarshshuwaa yarshshiis. Yaatidi ba oosanchchatu ubbaayyo gibiraa kessiis.

#### *Solomoni Era Pirdda Pirddiis*

<sup>16</sup> Issi gallassi naa77u shaaramuxati Kawuwaa Solomonakko yiidi, a sinttan eqqi-dosona. <sup>17</sup> Eqqin etappe issinniyaa hagaadan yaagaasu; “Ta godau, taaninne ha mishiriya issi keettan de7oos. Yan a tanaara issippe de7ishin, taani issi na7a yelaas.



<sup>18</sup> Ta na7ai yelettido heezzantto gallassi ha mishiriyaakka issi na7a yelaasu. He keettan nu naa77aappe hara asi ooninne baawa.

<sup>19</sup> “Issi gallassi qammi a a bolli zin77ido gishshau, ha mishiree na7ai haiqqiis. <sup>20</sup> Haiqqin a qamma bilahe denddada, taani ne ashkkariyaa xiskkidaashin, ta na7aa ta miyyiyaappe ekkaasu; ekkada a ba kiyuwan wottada, ba haiqqida na7aa ta kiyuwan wottaasu. <sup>21</sup> Wonttin guuran taani ta na7aa xanttanau denddido wode, haiqqiichchiis! SHin taani maallado poo7uwan tishshi oottada xeelliyo wode, hekko taani yelido na7aa gidenna” yaagaasu.

<sup>22</sup> Yaagin hankko maccaasiya hagaadan yaagaasu; “CHii! Paxa de7iyaagee ta na7aa; haiqqidaagee neegaa” yaagaasu.

SHin koiro maccaasiyaa zaarada, “CHii, haiqqidaagee ne na7aa; paxa de7iyaagee ta na7aa” yaagaasu. Hegaadan giidi eti kawuwaa sinttan palamettidosona.

<sup>23</sup> Palamettin Kawoi Solomoni hagaadan yaagiis; “Ha maccaasiyaa, ‘Paxa de7iya na7ai taagaa; haiqqidaagee neegaa’ yaagaasu; hankkorakka, ‘CHii! Ne na7ai haiqqidaagaa; ta na7ai paxa de7iyaagaa’ yaagaasu” yaagiis.

<sup>24</sup> Yaagidi kawoi, “Tau bisuwaa ekki yiite” yaagiis; yaagin eti ayyo bisuwaa ehiidosona. <sup>25</sup> Ehin kawoi, “Paxa de7iya na7aa naa77u kessidi phalqqite; phalqqidi issi baggaa hannissi immite; issi baggaa hinnissi immite” yaagidi azaziis.

<sup>26</sup> Azazin ha paxa de7iya na7ai ibaa gidiyo maccaasiyaa ba na7aassi mishettada kawuwaa, “Hai ta godau, paxa de7iya na7aa iyyo imma! A woroppa!” yaagaasu.

SHin hankkoriyaa, “Taayyookka neeyyookka gidoppo; naa77u kiyidi phalqqetto” yaagaasu.

<sup>27</sup> Hegaappe guyyiyan kawoi, “Ha paxa de7iya na7aa ha koiro maccaaseeyyo immite; na7aa woroppite. Hanna na7aa aayyiyo!” yaagidi pirddiis.

<sup>28</sup> Israa7eela asai ubbai kawoi pirddido pirddaa siyido wode, eti kawuwaa keehippe bonchchidosona. Aissi giikko, asaayyo xillotettan pirddanau ayyo aadhhdida eratettai Xoossaappe imettidoogaa be7idosona.

## 4

### *Solomoni Sunttido Oosanchchata*

<sup>1</sup> Kawoi Solomoni Israa7eela biittaa ubbaa bolli kawotiis. <sup>2</sup> I sunttido halaqati hagaappe kaallidi xaafettidaageeta. Xaadooqa na7ai Azaariyaasi qeese; <sup>3</sup> SHiishsha1 naati Elihoreefinne Akiiyi waanna xaafeta; Ahiluuda na7ai Yoosaafixi hanidabaa xaafiyaagaa; <sup>4</sup> Yoodaaha na7ai Banaayi ola gadaawaa; Xaadooqinne Abiyaataari qeeseta; <sup>5</sup> Naataana na7ai Azaariyaasi deriyaa heemmiyaageetu halaqaa; Naataana na7ai Zaabudi qeesenne kawuwaa dumma zoriyaagaa; <sup>6</sup> Ahishaari kawo keettaa halaqaa; Abdda na7ai Adooniraami gabbaaratu halaqaa.

<sup>7</sup> Qassi Solomonayyo Israa7eela biittan ubban tammanne naa77u dereta heemmiyaageeti de7oosona; eti kawuwaassinne kawuwaa son de7iya asaa ubbaassi miyo kattaa ehiyaageeta. Etappe issoi issoi laittaa gidдон issi issi aginaa kattaa ehees. <sup>8</sup> Eta sunttai hagaappe kaallidi xaafettiis.

Benihuuri Efireema gezziyaa heemmiyaagaa. <sup>9</sup> Benddeqari Maaqaxa, SHa7albbiima, Beeti-SHemeshanne Elooni-Beetihanaana katamata heemmiyaagaa. <sup>10</sup> Beniheseedi Arubboota biittaa heemmiyaagaa; Sooko biittainne Hefeera biittai ubbaikka abaa. <sup>11</sup> Benabinadaabi Dooraa giyo biitta ubbaa heemmiyaagaa; i Solomona na7iyo Xaafaato ekkidaagaa. <sup>12</sup> Ahiluuda na7ai Ba7aana Taa7inaakanne Magiddo giyo katamata, Iziraa7eelappe garssan Xarttaana matan de7iya Beetishaana biittaa ubbaa, Beetishaanappe biidi Aabeeli-Mahoolaara kanttidi, Yoqima7aama hefintti

<sup>1</sup> **4:3** Shiishsha: Ha bitaane Ibraawettuwan oiddu dumma dumma sunttan xeesettees. Sameela Maxaafaa Naa77anttuwa 8:17; 20:25nne Hanidabaa Odiya Koiro Maxaafaa 18:16 xeella.



gakkanaashin de7iya katamata heemmiyaagaa. <sup>13</sup> Benggebeeri Gala7aaden Raamoota giyo katama, Gala7aaden Minaase na7aa Yaa7iira katamatanne, yuushuwan gimbeenne gimbbiyaa penggetun nahaasiyaa birataa hiraqoti de7iyo usuppun tammu gita katamatuura de7iya, Arggooba giyo biittaa heemmiyaagaa. Arggoobi Baasaanen de7ees. <sup>14</sup> Iddo na7ai Ahinaadaabi Maahinaima giyo biittaa heemmiyaagaa. <sup>15</sup> Ahima7aaxi Nifttaaleema biittaa heemmiyaagaa; i Solomona na7iyo Baasemaato ekkiis. <sup>16</sup> Hushaaya na7ai Ba7aani Aseera biittaaanne Ba7aaloota katamaa heemmiyaagaa. <sup>17</sup> Paaruha na7ai Yoosaafixi Yisaakoora biittaa heemmiyaagaa. <sup>18</sup> Eela na7ai SHim77i Biniyaama biittaa heemmiyaagaa. <sup>19</sup> Uura na7ai Gebeeri Gala7aade biittan Amooretu Kawoi Sihooninne Baasaane Kawoi Oogi kawotido biittata heemmiyaagaa; he biittata heemmiyaagee a xalaala.

### *Duretetai Kumido Solomona Kawotettaa*

<sup>20</sup> Yihudaa asainne Israa7eela asai abbaa doona shafiyaadan corattidosona; eti miiddinne uyiiddi ufaittidi de7idosona. <sup>21</sup> Solomoni Efraaxiisa SHaafaappe doommidi Pilisxxeema biittaa gakkanaashin, hegaappekka Gibxxe zawaa gakkanaashin de7iya kawotettata ubbaa haariis. He biittaa asati au giiraa giiridosona; eti a de7o laitta ubban ayyo haarettidosona.

<sup>22</sup> Solomonayyo hachchi hachchi qumau ishatamu konttaale muruta xiilliyaa, xeetu konttaale xiilliyaa, <sup>23</sup> xiikkin modhdhida tammu boorata, yedan miida laatamu booratanne xeetu dorssata, eta bollikka cofoshota, gaarata, genessatanne ordde kuttota koshshees.

<sup>24</sup> Solomoni Efraaxiisa SHaafaappe arggo baggaara de7iya kawotettata ubbaa Tifisaaha katamaappe doommidi Gaaza katamaa gakkanaashin haariis; ba yuushuwan de7iya biitta ubbaarakka saro de7iis. <sup>25</sup> A de7o laitta ubban Yihudaa asainne Israa7eela asai Daanappe biidi Berssaabeha gakkanaashin, ubbai ba woiniyaa turaa kuwaaninne ba ettaa kuwan saro de7iis.

<sup>26</sup> Solomonayyo olaa paraa gaareta goochchiya oitamu sha7u gaaxaata paratinne tammanne naa77u sha7u paraasati de7oosona. <sup>27</sup> He deriyaa heemmiyaageeti bantta aginan aginan Kawoi Solomoninne a maaddan maanau yiida asai ubbai miyoobaa shiishshidosona. Eti hegaappe aibanne pacissokkona. <sup>28</sup> Eti qassi gaariyaa paratinne hankko parati maanau banggaanne dalaa peeriyaa banttana gakkidaagaa gakkidaagaa ehiidi a wottiyoosan wottidosona.

<sup>29</sup> Xoossai Solomonayyo aadhdhida eratettaa, akeekaanne zawi baina aaho qofaa immiis. <sup>30</sup> Solomona aadhdhida eratetta arshsho baggaara de7iya asa ubbaa aadhdhida eratettaappenne Gibxxetu aadhdhida eratetta ubbaappekka aadhdhiis. <sup>31</sup> I asa ubbaappe aadhdhida eranchcha; qassi i Ezirahiyaa Etaanappekka, Maahola naatu Hemaanappe, Kalkkoolappenne Darddaa7appekka aadhdhida eranchchaa. A woree yuushuwan de7iya kawotettata ubbaa gakkiiis. <sup>32</sup> I heezzu sha7u leemisota haasayiis; qassi a yettati issi sha7anne ichchasha. <sup>33</sup> Solomoni Liibaanoosa zigaappe doommidi, keettaa gimbbiyaa bolli mokkiya hiisooophphiya giyo mittaa gakkanaashin, mittaabaa yootiis; hegaadankka qassi mehetubaa, do7atubaa, kafotubaa, sa7aara gooshettiya meretatubanne moletubaa tamarissiis. <sup>34</sup> A aadhdhida eratettaa siyida biittan sa7an de7iya kawoti ubbai kiittin, kawotetta ubbaappe asai Solomona aadhdhida eraa siyanau yiis.

## 5

### *Solomoni Beeta Maqidasiyaa Keexxanau Giigissiis*

*(Hanidabaa Odiya Naa77antto Maxaafaa 2:1-18)*

<sup>1</sup> Xiirsoosa Kawoi Kiiraami Daawitaara ubbaton siiqettiiddi gam77ido gishshau, Solomoni ba aawaa Daawita sohuwan kawotanau tiyettidoogaa siyidi, ba oosanchchata

Solomonakko kiittiis. <sup>2</sup> Kiittin Solomonikka Kiiraamayyo zaaridi hagaadan yaagidi kiittiis; <sup>3</sup> “GODAI a morkketa a tohuwaappe garssaara haarissana gakkanaashin, ta aawaa Daawita bolli ubbasaara denddida olaa gaasuwan, GODAA ba Xoossaa sunttaayyo Beeta Maqidase i keexxibeennaagaa neeni eraasa. <sup>4</sup> SHin ha77i GODAI ta Xoossai taayyo ubbasaara shemppuwaa immiis; immin taayyo aiba morkkeekka woikko iitabikka baawa. <sup>5</sup> GODAI ta aawaa Daawitayyo, ‘Taani ne sohuwan, ne kawotaa araatan kawoyiyo ne na7ai ta sunttaayyo Beeta Maqidasiyaa keexxana’ giidoogaadankka, taani GODAA ta Xoossaa sunttaayyo Beeta Maqidasiyaa keexxanau halchchaas. <sup>6</sup> Hegaa gishshau, Liibaanoosappe zigaa taayyo qanxxiya asata azaza; ta asati ne asatuura oottana. Yaatobare ne asatussi neeni qanxxa giido damoozaa aiba gidikkonne, taani qanxxana. Sidoona asatudan mittaa qanxxuwaa hiillaa nu asai erennaagaa neeni eraasa” yaagiis.

<sup>7</sup> Kiiraami Solomona kiitaa siyidi keehippe ufaittiis; ufaittidi, “Ha gita kawotettaa haarana mala, Daawitassi ha aadhdhida eranchcha na7aa immida GODAI hachchi galatetto” yaagiis.

<sup>8</sup> Hegaappe guyyiyan Kiiraami Solomonayyo hagaadan yaagidi kiittiis; “Neeni taayyo kiittido kiitai tana gakkiiis. Neeni koyidobaa ubbaa taani oottana; zigaa mudettaanne xiiddaa mudettaa taani neeyyo shiishshana. <sup>9</sup> Ta asati ne mudettaa Liibaanoosappe duge abbau miyyana. Miyyin taani qashissada, abbaa bollaara tookettidi neeni malaatosaa gakkanaadan oottana; gakkin taani yan birshshissana; birshshissada yaappe efiissana. Hegaappe guyyiyan neeni ne baggaara ta kawo keettan de7iya asaayyo miyoobaa kiittiyoogan ta amuwaa polana” yaagiis.

<sup>10</sup> Hegaadan oottidi Kiiraami Solomoni koyido keena zigaa mudettaanne xiiddaa mudettaa ubbaa immiis. <sup>11</sup> Immin Solomonikka kawo keettan de7iya asai maanau laatamu sha7u konttaale gisttiyaanne oiddu xeetu sha7u litiro geeshsha wogaraa zaitiyaa laittan laittan paccennan Kiiraamayyo immiis. <sup>12</sup> GODAI Solomonassi immana giidoogaadan, ayyo aadhdhida eratettaa immiis. Kiiraaminne Solomoni bantta gidдон saro de7idosona; eti naa77ai bantta gidдон maachchaa maacetidosona.

<sup>13</sup> Kawoi Solomoni Israa7eela ubbaappe hasttamu sha7u gabbaarata dooridi kessiis. <sup>14</sup> Dooridi Adooniraama giyo bitaniyaa eta bolli halaqa oottidi sunttiis. Gabbaarata akka tammu sha7aa tammu sha7aa shaakkidi, heezzu cita kessiis; issi issi citai kayan kayan biidi, issi aginaa Liibaanoosan oottanaadaaninne naa77u aginaa bantta son de7anaadan kuuyiis. <sup>15</sup> Solomonayyo tooho tookkiya laappun tammu sha7u asatinne shuchchaa qoo7iya hosppun tammu sha7u asati gezziyan de7oosona. <sup>16</sup> Hageeti halaqa gididi asaa oosuwaa ootissiya heezzu sha7anne heezzu xeetu asata gujjennaana. <sup>17</sup> Oosanchchati Kawoi Solomoni azazin, Beeta Maqidasiyaayyo baaso gidana mala wogga muruta shuchchata qoo7idi massidosona. <sup>18</sup> Solomona asatinne Kiiraama asati kushe hiillaa eriyaageeti, Gebaala asatuurakka gididi, Beeta Maqidasiyaa keexxanau mittaa qanxxidinne shuchchaa qoo7idi giigissidosona.

## 6

### *Solomoni Beeta Maqidasiyaa Keexxiis*

<sup>1</sup> Israa7eela asai Gibxxe biittaappe kiyido oiddu xeetanne hosppun tammannta laittan, Solomoni Israa7eela bolli kawotido oiddantto laittan, Ziifa giyo naa77antto aginan, Solomoni GODAA Beeta Maqidasiyaa keexxanau doommiis. <sup>2</sup> Solomoni GODAAYYO keexxido Beeta Maqidasee zananaa usuppun tammu wara adussa; gomppaa laatamu wara aaho; geesaa hasttamu wara xoqqa. <sup>3</sup> Beeta Maqidasiyaa geliyoosan de7iya baranddaa gomppai Beeta Maqidasiyaa gomppaakka keena laatamu wara; keettaa zananai Beeta Maqidasiyaa geliyoosaa gakkanaashin tammu wara. <sup>4</sup> Beeta Maqidasiyau so baggaara aakkidi, kare baggaara xuummida maskkooteti de7oosona. <sup>5-6</sup> He

keettaa yuushuwan hara kifileta keexxiis; he kifileti heezzu pooqeti de7iyooqeeta; zamadaa yeggiyo mittai geeshsha sohuwaa giddo gelenna mala, koiro godaara oisettidi shuchchaa wottidi, gimbbiyaayyo hirkki wurssettaa orddissiis. Hegaa gaasuwan garssa koiro pooqee ichchashu wara aaho; naa77antto pooqee usuppun wara aaho; heeztantto pooqee laappun wara aaho.

<sup>7</sup> Beeta Maqidasee hini qoo7iyooosan masettida shuchcha xalaalan gimbbettiis; yaatin, Beeta Maqidasee gimbbettido wode, dijino, kaltta, woikko hara ai birata ceng-gurssinne Beeta Maqidasiyan siyettibeenna.

<sup>8</sup> Ubbaappe garssaara de7iya pooqiyaa geliyo penggee Beeta Maqidasiyaappe to-hossa baggaara de7ees; he sohuwaappe naa77antto pooqiyaunne heeztantto pooqiyau baanau yedhdhi kiyiyo xekkati de7oosona. <sup>9</sup> Hegaadan oottidi, Solomoni keettaa ke-exxidi poliis; yaatidi zigaa xaulanne masettaa bollaara kammiis. <sup>10</sup> Qassi Beeta Maqidasiyaa yuushuwan pooqeta keexxidi poliis; eta xoqqatettai issuwaagee issuwaagee ichchashu wara gididi, godaara zigaa xaulan oiqettidosona.

<sup>11</sup> GODAA qaalai Solomonakko yiis; yiidi Solomona, <sup>12</sup> “Ha neeni keexxiyo Beeta Maqidasiyaa gidikko, neeni ta awaajuwaa kaallikko, ta wogaa oottikko, ta azazota ubbaa naagikkonne azazettikko, yaatikko, taani ne aawaa Daawitassi immido ufaissaa ne baggaara polana. <sup>13</sup> Yaatada taani Israa7eela asaa gidдон de7ana; taani ta asaa Israa7eela aggikke” yaagiis.

*Beeta Maqidasiyaayyo So Giddo Oosuwaa  
(Hanidabaa Odiya Naa77antto Maxaafaa 3:8-14)*

<sup>14</sup> Solomoni Beeta Maqidasiyaa keexxidi poliis. <sup>15</sup> Beeta Maqidasiyaayyo so bagga godaa, wuigiyaappe biidi kaaraa gakkanaashin zigaa xaulaa licidi kammiis; qassi wuigiyanikka xiiddaa xaulaa hiixxiis. <sup>16</sup> Beeta Maqidasiyaa gidдон Ubbaappe Aadhdhiya Geeshsha Sohuwaa giyo qol77uwaa medhdhanau, gyye baggaara laatamu wara gididiya sohuwaa shaakkiis; shaakkidi wuigiyaappe kaaraa gakkanaashin zigaa xaulaa godaa essiis. <sup>17</sup> He qol77uwaappe sintta baggaara de7iya wuigiya zananai oitamu wara adussa. <sup>18</sup> Beeta Maqidasiyaayyo so baggai massido gosiyaanne ciyyida ciishshaa misiliyaa medhdhido zigaa xaulan licetti kamettiis; ubbabaikka ziga; aiba shuchchinne beettenna.

<sup>19</sup> Solomoni GODAA Maachchaa Taabootaa wottanau Beeta Maqidasiyaa gidдон Ubbaappe Aadhdhiya Geeshsha Sohuwaa giigissiis. <sup>20</sup> Ubbaappe Aadhdhiya Geeshsha Sohoi laatamu wara adussa, laatamu wara aahonne laatamu wara xoqqa. Solomoni he qol77uwaassi so baggaa walahi banna worqqan sheeshshiis. Qassi yarshshiyooaikka zigaa xaulan kamettiis. <sup>21</sup> Solomoni Beeta Maqidasiyaa gidduwaa walahi banna worqqan sheeshshiis; worqqaa sheeshshido qol77uwaa geliyo penggiyaayyo bolla qoriyaa yaanne haanne gakkiiya worqqa sanssalataa toliidi alleeqissiis. <sup>22</sup> Yaatidi keetta gidдо ubbaa worqqan sheeshshiis; qassi Ubbaappe Aadhdhiya Geeshsha Sohuwaa sinttan de7iya yarshshiyooosaa worqqan sheeshshiis.

<sup>23</sup> Ubbaappe Aadhdhiya Geeshsha Sohuwan wottanau issoi issoi tammu waraa aduqqiya wogaraappe naa77u kiruubetu misileta massidi giigissiis. <sup>24</sup> Koiro kiruubiyaa qefee issoi ichchashu wara; naa77anttoi qassi ichchashu wara; koiro qefiyaa xeeraappe biidi naa77antto qefiyaa xeeraa gakkanaashin tammu wara. <sup>25</sup> Naa77antto kiruubeekka tammu wara; naa77u kiruubetu qottainne merai issi mala. <sup>26</sup> Issi kiruubiyaa geesai tammu wara; naa77anttuwaageekka hegaa keena. <sup>27</sup> Solomoni Beeta Maqidasiyan de7iya Ubbaappe Aadhdhiya Geeshsha Sohuwan kiruubeta wottiis. Eta qefee micetti uttiis; issi kiruubiyaa qefee issi bagga godaa bochchiyo wode, hinkko kiruubiyaa qefee qassi hinkko bagga godaa bochchees; eta naa77aa qefetikka so gidдон issoi issuwaa bochchoosona. <sup>28</sup> Solomoni kiruubetakka worqqan sheeshshiis.

<sup>29</sup> Qol77uwaanne wuigiya godaa ubbaa kiruubeta, zambbaanne ciyyida ciishshaa misiliyaa massidoogan alleeqissiis. <sup>30</sup> Beeta Maqidasiyaayyo so giddo kifiliyaa wuigiyaakka kare bagga kifiliyaa wuigiyaakka worqqan sheeshshiis.

<sup>31</sup> Ubbaappe Aadhdhiya Geeshsha Sohuwaa geliyo penggiyaassi wogaraa mittaappe sanqqata kessiis. Qosilettati ichchashu baggaara zoozee de7iyooqeeta. <sup>32</sup> Wogaraa mittaappe oosettida naa77u sanqqatu bolla kiruubeta, zambbaanne ciyyida ciishshaa misiliyaa massidi, sanqqata, kiruubetanne zambbaa worqqan sheeshshiis. <sup>33</sup> Hegaadankka, Beeta Maqidasiyaa wuige geliyo penggiyau wogaraappe kessido oiddu zooziyaara de7iya qosilettaa essiis. <sup>34</sup> I qassi he penggiyaayyo issi issi sanqqai gidduwan dakkotidi dooyettiyo naa77u sanqqata kessiis. <sup>35</sup> Kiruubeta, zambbaanne ciyyida ciishshaa misileta eta bolli massiis; he masettidaageetu bolli worqqaa issi mala oottidi sheeshshiis.

<sup>36</sup> So baggaara de7iya dabaabaa gimbbiis; he gimbee masettida shuchchaa heezzaa, issuwaa issuwaa bolli wottidi, issi zigaa masettaa eta bolli wottidi gimbbidoogaa.

<sup>37</sup> GODAA Beeta Maqidasiyaa baasoi Solomoni kawotido oiddantto laittan, Ziifa giyo naa77antto aginan baasettiis. <sup>38</sup> Solomoni kawotido tammanne isiinintta laittan, Bula giyo hospunnata aginan Beeta Maqidasee halchchidoogaadan muleera keexettidi polettiis. Solomoni Beeta Maqidasiyaa laappun laittan keexxidi wurssiis.

## 7

### *Solomoni Baayyo Kawo Keettaa Keexxiis*

<sup>1</sup> Solomoni ba keettaa tammanne heezzu laittan keexxidi wurssiis. <sup>2</sup> Liibaanoosa Wora Keettaa geetettiya keettaa Solomoni keexxiis; he keettaa zananai xeetu wara; gomppai ishatamu wara; geesai hasttamu wara. Zigaa tuuqeti oiddu maaran eqqidosona; qassi masettida zigaa mudettati eta bolli wodhdhidosa; <sup>3</sup> mudettati heezzu maaran, issi issi maaran tammanne ichchashu mudettati de7oosona; eti muleera oitamanne ichchasha. <sup>4</sup> He keettaayyo maskkooteti heezzu maaran de7oosona; eti issi issuwau sintta baazzan de7oosona. <sup>5</sup> Penggetinne maskkooteti oiddu zooziyaara de7oosona; maskkooteti heezzu maaran gididi, issi issuwau sintta baazzan de7oosona.

<sup>6</sup> Solomoni Tuuqetu Keettaa geetettiya keettaakka keexxiis; he keettaa zananai ishatamu wara; gomppai hasttamu wara. He keettaa sinttan daro tuuqiyan zempidanne bollaara kaaran kamettida baranddai de7ees. <sup>7</sup> Qassi i pirddaayyo kawotaa araatai de7iyo Pirdda Keettaakka keexxiis; he keettaa wuigiyaappe biidi kaaraa gakkanaashin zigan kametti uttiis. <sup>8</sup> Pirdda Keettaappe guyyen de7iya hara dabaaban bau daanau kawo keettaa hankko keettatudan oottidi keexxiis; ba keettaayeessi, Gibxxe kawuwaa na7eessikka he keettaa mala keettaa keexxiis.

<sup>9</sup> Ha keettati ubbai, kareppe doommidi biidi dirssaappe soora de7iya gita gutaraara gakkanaashin, baasuwaappe doommidi kaaraa gakkanaashin, likkidi massidonne sooranne kareera soofidi giigissido muruta shuchchaappe oosettidosona. <sup>10</sup> Gimbee hiixettidoi tammu wara woikko hospun wara gididi lo77o masettida gita shuchchaana. <sup>11</sup> Hegaappe bolla baggaara likettidi masettida muruta shuchchainne zigaa mudettai de7ees. <sup>12</sup> Gita dabaabaa yuushuwan de7iya gimbee GODAA Beeta Maqidasiyaadaaninne baranddaadan masettida shuchchaa heezzaa, issuwaa issuwaa bolli wottidi, issi zigaa masettaa eta bolli wottidi gimbbidoogaa.

### *Huraama Oosuwaa*

<sup>13</sup> Kawoi Solomoni kiittidi, Huraama giyo bitaniyaa Xiirsoosa katamaappe ehiissiis. <sup>14</sup> Huraama aayiyaa am77e; a Nifttaaleema zare asa. A aawai Xiirsoosa asa. Huraami nahaasiyaa giyo birataa qoxxiyo hiillai de7iyo asa; i nahaasiyaappe qoxxidi kessiyoooban ubban keehippe loohida asa; Solomonakko i yiidi, a ooso ubbaa oottiis.



### *Naa77u Nahaasiyaa Tuussata*

*(Hanidabaa Odiya Naa77antto Maxaafaa 3:15-17)*

<sup>15</sup> Huraami issuwaa issuwaa geesai tammanne hosppun wara aduqqidi, yuushoi tammanne naa77u wara aakkido naa77u tuussata nahaasiyaa seerissidi tigidi kessiis. Tuussatuyyo giddoi kofa. <sup>16</sup> Hegaadankka, tuussatu huuphiyan wottanau naa77u gumbbota nahaasiyaappe seerissidi, medhdhiis; issi issi gumbboi ichchashu wara aduqqees. <sup>17-18</sup> Tuussaa huuphiyan de7iya issi issi gumbbota gitedan oottido laappun sanssalataa qaxiqallotuuninne naa77u maaraara roomaane giyo teeraa misiletun alleeqissi wottiis. <sup>19</sup> Baranddan eqqida tuussatu bolli de7iya gumbboti ciishshaa meran merettidosona; eta geesai oiddu wara. <sup>20</sup> Naa77u tuuqetu huuphiyan de7iya gumbbotun mulumuggetti uttida sohuwaappe bolla baggaara, sanssalataa qaxiqalluwaappe kaallidi, naa77u xeetu roomaane teeraa misileti naa77u maaran yuuyi aadhdhidi de7oosona. <sup>21</sup> Huraami he naa77u tuussata Beeta Maqidasiyaa baranddaa matan essiis. Essidi ushachcha baggaara eqqida tuussaa Yaakiina sunttiis; haddirssa baggaara eqqida tuussaa qassi Boo7eeza sunttiis. <sup>22</sup> Tuussatu huuphiyan de7iya gumbboti ciishsha milatidi merettidosona. Hegaadan hanidi tuussatu oosoi polettiis.

### *Nahaasiyaappe Medhdhido Abba Sainiyaa*

*(Hanidabaa Odiya Naa77antto Maxaafaa 4:2-5)*

<sup>23</sup> Huraami Abba Sainiyaa giyo issi keehi gita sainiyaa nahaasiyaa birataappe seerissi tigidi medhdhiis. He Abba Sainiyaa doonai ha gaxaappe ya gaxaa gakkanaashin tammu wara; geesai ichchashu wara; yuushoi qassi hastamu wara. <sup>24</sup> Abba Sainiyaa doonan kare baggaara ziqqi giidi, aara oiqettidi merettida gosetu misileti de7oosona; he gosetu misileti naa77u maaran, issi issi waran tammai tammai yuuyi aadhdhidi shuuyettidosona.

<sup>25</sup> He Abba Sainee nahaasiyaa birataappe merettida tammanne naa77u booratu misiletu zokkuwan uttiis. Booratu misiletuppe heezzati huuphessa baggi, heezzati arggo baggi, heezzati tohossa baggi, heezzati qassi arshsho baggi simmidi xeelliaabaa milatoosona. Abba Sainee eta bolli uttiis; etayyo guyye baggai giddokko simmi uttiis. <sup>26</sup> Abba Sainee issi takkaaro keena ordde; a doonai wanccaa doonaa mala; qassi ciishshai ciyyidaagaakka malatees. He Abba Sainee oitamuu sha7u litiro gididiya haattaa oiqqiyaagaa.

### *Nahaasiyaa Gaareta*

<sup>27</sup> Huraami qassi tammu gaareta nahaasiyaa birataappe medhdhiis. He gaareti issoi issoi oiddu wara adussa; oiddu wara aahonne heezzu wara xoqqa. <sup>28</sup> He gaareti hagaadan oosettidosona; pude eqqida oiddu biratatu bolli piddi giida lochcha nahaase biratati oiqetti uttididosona. <sup>29</sup> He biratatu bolli gaammota, booratanne kiruubeta milatissidi medhdhido misileti de7oosona; gaammotunne booratu misiletuppe huuphessaaranne tohossaara de7iya biratatu bolli qassi qoxxidi medhdhido ciishshaa encuurssaa misileti de7oosona. <sup>30</sup> Issi issi gaariyaayyo nahaasiyaappe oottido oiddu irzziizotinne irzziizota gatti waaxiyo nahaasiyaa kasoti de7oosona. Hegaadankka, oiddu zoozetun keriyaa zemppissiyooobati de7oosona. He zemppissiyooobati ciishshaa encuurssaa milatiya misiletun alleeqetti uttididosona. <sup>31</sup> Gaariyaa zemppissiyooobatu huuphiyan irzziizoti uttida shaashee de7ees; he shaashee gaariyaa xeeraappe pude issi wara gididiyaagaa xoqqu giidi, duge bagga wara gididiyaagaa ziqqi giidi merettiis. He shaashiyaayyo doonai yuuyi aadhdhidi misiliyan alleeqetti uttiis. <sup>32</sup> Irzziizotu geesai issi waranne bagga; irzziizoti lochcha nahaase biratatuyyo garssa baggaara de7oosona. Irzziizoti oiqetti uttido kasoti gaariyaara oiqetti uttididosona. <sup>33</sup> Irzziizoti olaa paraa gaariyaa irzziizotudan merettidosona; irzziizota gattidi oiqqiya kasoti, charkketinne raazheti ubbaikka nahaasiyaappe tigettidi oosettidosona. <sup>34</sup> He gaaretu



ubbaa zoozetussikka eta tohossaara tohossaara etaara issuwaa gidi oiqettidi, nahaasiyaappe merettida zemppoti de7oosona. <sup>35</sup> Issi issi gaariyaa huuphiyaa yuushuwan issi waraayyo baggaa aduqqiya shaashee de7ees; zemppotinne lochcha nahaaseti gaariyaara oiqettidi, issuwaa gididi oosettidosona. <sup>36</sup> Ha zemppotupenne lochcha nahaasetuppe gidduwan de7iya kallo sohotu ubbai kiruubetu, gaammotunne zambbatu misiletun alleeqetti uttidosa; qassi eta yuushoi ciishsha encurssaa misiliyan alleeqetti uttiis. <sup>37</sup> Simmi tammu gaaretikka hagaadan oosettidosona; seerissidi eta tigido miishshai issuwaa gididi gishshau, eta geesaikka eta qottaikka issi mala.

<sup>38</sup> Huraami meecettiyo tammu kereta nahaasiyaappe medhdhiis; issi issi keriyaa gomppai oiddu wara aaho gididi, hosppun xeetu litiro haattaa oiqqees; tammu gaarettussi huuphiyan huuphiyan issi issi meecettiyo keree de7ees. <sup>39</sup> Huraami gaareta ichchashata Beeta Maqidasiyaayyo huuphessa baggaara, ichchashata qassi Beeta Maqidasiyaayyo tohossa baggaara wottiis; qassi nahaasiyaappe oosettida Abba Sainiyaa Beeta Maqidasiyaappe tohossa arshsho baggi zaaridi essiis.

*Beeta Maqidasiyaa Miishshata  
(Hanidabaa Odiya Naa77antto Maxaafaa 4:11-5:1)*

<sup>40</sup> Qassi Huraami kereta, akaafatanne kuixaarota medhdhiis; yaatidi Kawuwaa Solomonassi GODAA Beeta Maqidasiyaa oosuwa oottidi poliis. <sup>41</sup> I oottido oosotikka: naa77u tuussata,

tuussatu huuphiyan wottiyo saine mala naa77u gumbbota,

tuussatu bolli de7iya naa77u gumbbota alleeqissiyo naa77u gite mala sanssalatata,

<sup>42</sup> issi issi gumbbuwaa bolli naa77u maaran nahaasiyaappe merettida issi issi xeetu roomaane teeraa misileta, muleera oiddu xeetu roomaane teeraa misileta,

<sup>43</sup> tammu gaareta, gaaretu bollan wodhdhiya, meecettiyo tammu kereta,

<sup>44</sup> Abba Sainiyaanne appe garssan de7iya tammanne naa77u booratu misileta,

<sup>45</sup> kereta, akaafatanne kuixaarota.

Huraami Kawuwaa Solomonayyo GODAA Beeta Maqidasiyaa oosuwaassi medhdhido ha miishshata ubbaa qucettida nahaasiyaappe medhdhiis. <sup>46</sup> Kawoi Solomoni Sukkottappenne Xarttaanappe gidduwan, Yorddaanoosa dembban de7iya, nahaasiyaa birataa seerissiyo sohuwan hageeta ubbaa ootissiis. <sup>47</sup> Nahaasiyaa birataappe merettida ha miishsha ubbai keehi daro gidido gishshau, Solomoni a mazzanissibeenna; heгаа gishshau, woisaa deexxiyaabaakko likkee erettibeenna.

<sup>48</sup> Qassikka Solomoni GODAA Beeta Maqidasiyaa gidдон de7iya miishshata ubbaa worqqaappe merissiis. Hegeetinne:

worqqaappe oottido yarshshiyooosaa,

GODAA sinttan wottiyo oittai uttiyo xaraphpheezaa,

<sup>49</sup> Ubbaappe Aadhdhiya Geeshsha Sohuwaappe sinttan ushachcha baggaaranne haddirssa baggaara eqqida, ichchashu ichchashu xomppiyaa wottiyo ballata,

ciishshata, xomppetanne qapheta,

<sup>50</sup> xuu7ata, xomppiyaa toissiyooobata, kuixaarota, ixaanaa cuwayiyooobata, tamaa ekkiyo miishshatanne,

Ubbaappe Aadhdhiya Geeshsha Sohuwaa giyo qol77uwaa penggetanne Beeta Maqidasiyaayyo kare bagga penggeta oiqqida maaxafeta. Ha miishshati ubbai worqqaappe oosettidosona.

<sup>51</sup> Kawoi Solomoni GODAA Beeta Maqidasiyaa oosuwa ubbaa polidoogaappe guyyiyan, a aawai Daawiti GODAAYYO dummayidi wottido biraa, worqqaanne hara miishshatakka ubbaa ehiidi, Beeta Maqidasiyaa buquraa minjjiyoosan wottiis.

## 8

*GODAA Taabootai Beeta Maqidasiyaa Geliis  
(Hanidabaa Odiya Naa77antto Maxaafaa 5:2-6:2)*

<sup>1</sup> Hegaappe guyyiyan Kawoi Solomoni GODAA Taabootaa Daawita Katamaappe, Xiyooneppe kessidi, Beeta Maqidasiyaa ehanaadan, Israa7eela cimata, zaretu ubbaa haqaqatanne Israa7eela keettaa asata kaalettiyaageeta Yerusalaame katamaa shiishshiiis.

<sup>2</sup> Etaaniima giyo laappuntta aginan, Daase Baalai bonchchettiyo wode, Israa7eela asai ubbai Kawuwaa Solomonakko shiiqiis.

<sup>3</sup> Israa7eela cimati ubbai gakkini, qeeseti Taabootaa denttidosona. <sup>4</sup> Leewatinne qeeseti, GODAA Taabootaa, Dunkkaaniyaanne Dunkkaaniyaa gidдон de7iya geeshsha miishshata ubbaa tookkidi ehiidosona. <sup>5</sup> Kawoi Solomoninne aara de7iya Israa7eela yaa7ai kumettai Taabootaa sinttan shiiqidi, qoodanau danddayettenna cora dorssaanne mehiyaa yarshshidosona.

<sup>6</sup> Hegaappe guyyiyan qeeseti GODAA Maachchaa Taabootaa Beeta Maqidasiyaayyo gidдо geeshsha qol77uwaa, Ubbaappe Aadhdhida Geeshsha Sohuwaa giyo sohuwaa ehiidi, kiruubetu misiletu qefetuppe garssa baggaara wottidosona. <sup>7</sup> Micetti uttida kiruubetu qefeti Taabootaanne Taabootaa tookkiyo kasota kammidosona. <sup>8</sup> Kasoti keehippe adussa gidiyo gishshau, eta xeerai Ubbaappe Aadhdhiya Geeshsha Sohuwaa sinttan de7iya Geeshsha Sohuwan beettanau danddayees; shin Geeshsha Sohuwaappe kareera beettanau danddayenna. Eti hachchi gakkanaashin he sohuwan de7oosona. <sup>9</sup> Israa7eela asai Gibxxe biittaappe kiyido wode, GODAI etaara maachchaa maacettido Siinaa Deriyan Muusee wottido naa77u masettida shuchchatuppe attin, Taabootaa gidдон harabi aibinne baawa.

<sup>10</sup> Qeeseti Geeshsha Sohuwaappe kiyin, shaarai GODAA Beeta Maqidasiyaa kumiis.

<sup>11</sup> He shaaraa gaasuwan qeeseti bantta oosuwaa oottanau danddayibookkona; aissi giikko, GODAA bonchchoi a Beeta Maqidasiyaa kumi uttiis.

<sup>12</sup> Hegaappe guyyiyan Solomoni hagaadan yaagiis; “Abeet GODAU, neeni, ‘Taani xuma shaaran de7ana’ yaaga wottadasa. <sup>13</sup> Taani tumuppe neeyyo lo77o Beeta Maqidasiyaa, neeni an merinau de7ana sohuwaa keexxaas” yaagiis.

*Solomoni Asaassi Haasayido Haasayaa  
(Hanidabaa Odiya Naa77antto Maxaafaa 6:3-11)*

<sup>14</sup> Israa7eela yaa7ai kumettai eqqidaashin, kawoi etakko simmidi, hagaadan yaagidi eta anjjiis; <sup>15</sup> “GODAI Israa7eela Xoossai galatetto! Ta aawaa Daawitassi ba doonan odido ufaissaa ba kushiyan poliis. He i odido ufaissai, <sup>16</sup> ‘Taani ta asaa Israa7eela Gibxxeppe kessada ehiido gallassaappe doommin, ta sunttai an de7ana mala, Beeta Maqidase keexxanau Israa7eela zaretu gidдон ai katamanne doorabeikke; shin ta asaa Israa7eela kaalettana mala, taani Daawita dooraas’ yaagiis.

<sup>17</sup> “Ta aawai Daawiti GODAA Israa7eela Xoossaa sunttaayyo Beeta Maqidase keexxanau ba wozanan qoppiis. <sup>18</sup> Shin GODAI ta aawaa Daawita, ‘Neeni ta sunttaayyo Beeta Maqidase keexxanau ne wozanan qoppido gishshau, lo77obaa oottadasa. <sup>19</sup> Gidikkonne, Beeta Maqidasiyaa keexxanaagee nena gidakka; ta sunttaayyo Beeta Maqidasiyaa keexxanaagee ne gulbbataappe yelettana ne na7aa’ yaagiis.

<sup>20</sup> “Ha77ikka GODAI ba immana giido ufaissaa qaala poliis. GODAI kase immido ufaissaadankka taani ta aawaa Daawita sohuwan kawotaasinne ha77i Israa7eela kawotaa araatan uttaas. Qassi GODAA Israa7eela Xoossaa sunttaayyo Beeta Maqidasiyaa keexxaas. <sup>21</sup> GODAI nu aawata Gibxxeppe kessido wode etaara maacettido maachchai de7iyo Taabootaayyookka a gidдон sohuwaa injjeyaas” yaagiis.

*Solomona Woosaa  
(Hanidabaa Odiya Naa77antto Maxaafaa 6:12-42)*

<sup>22</sup> Hegaappe guyyiyan Solomoni GODAAYYO yarshshiyo sohuwaa sinttan, Israa7eela yaa7ai kumettai de7iyoosan eqqidi, ba kushiya saluwaa zaaridi micciis. <sup>23</sup> Miccidi hagaadan yaagidi woossiis; “Abeet GODAU, Israa7eela Xoossau, bolla saluwan woikko garssa sa7an ne mala xoossi baawa. Neeni ne maachchaa naagaasa; ba kumetta wozanaappe ne sinttan hemettida ne ashkkarata aggenaa siiquwan siiqaasa. <sup>24</sup> Ne ashkkaraayyo, ta aawaa Daawitayyo neeni oottana gaada haasayido qaalaa naagadasa; neeni kase ne doonan haasayidoogaa ne kushiyan hachchi poladasa.

<sup>25</sup> “Ha77ikka abeet GODAU, Israa7eela Xoossau, neeni ne ashkkaraassi, ta aawaa Daawitassi, ‘Neni ta sinttan hemettidoogaadan ne naatika ta sinttan hemettana mala bantta ogiyaa naagikko, ta sinttan Israa7eela kawotaa araatan uttiya asa neeni mulekka xayakka’ yaagido qaalaa pola. <sup>26</sup> Abeet Israa7eela Xoossau, neeni ne ashkkaraayyo, ta aawaa Daawitayyo haasayido ne qaalaa ha77ikka aggoppa.

<sup>27</sup> “SHin Xoossai tumu sa7an de7aneeyye? Be7a, saloti, ubbaappe xoqqan de7iya saloikka neeyyo gidanau danddayenna. Yaatin, ha taani keexxido Beeta Maqidasee neeyyo ai keenaa guuxxanddeeshsha! <sup>28</sup> Gidikonne, abeet GODAU, ta Xoossau, taani ne ashkkaarai hachchi woossiyoogaanne watiwatiyoogaa neeni ezgga. <sup>29</sup> Neeni, ‘Ta sunttai he sohuwan de7ana’ giido ha Beeta Maqidasiyaa ne aifee qamminne gallassi xeello. Taani ne ashkkaarai ha sohuwaakko simmada, woossiyo woosaa neeni siya. <sup>30</sup> Taani ne ashkkaarainne ne asai Israa7eeli ha Beeta Maqidasiyaakko simmidi, watiwatiyo watiwatuwaa neeni siya. Neeni de7iyoosan saluwan siyada, nuuyyo atto yaaga.

<sup>31</sup> “Issi asi ba shooruwaa naaqqidi kashi gin, a caaqqetanau ha Beeta Maqidasiyaa ehin, a gidдон de7iya yarshshiyo sohuwaa sinttan i caaqqikko, <sup>32</sup> neeni saluwan siya; siyada ootta. Ne ashkkaratu gidduwan pirdada. Mooranchchaa bolli pirdada, i oottidobaa a bolli zaara; xilluwaa shatinttada, ayyo a xillotettaadan zaara.

<sup>33</sup> “Ne asai Israa7eeli ne bolli nagaraa oottido gaasuwan morkkiyan xoonettidi, eti neekko simmidi, ne sunttaa xeesidi, ha Beeta Maqidasiyan nena woossikkonne neeyyo watiwatikko, <sup>34</sup> neeni saluwan siya. Siyada ne asaa Israa7eela nagaraa atto yaaga; yaatada neeni kase eta maizza aawatuyyo immido biittau eta guyye zaara.

<sup>35</sup> “Ne asai ne bolli nagaraa oottido gaasuwan saloti gorddettiinne irai bukkennan ixxin, eti ha sohuwaa simmidi, woossikkonne neeni eta un77ettido gishshau ne sunttaa xeesidi, bantta nagaraappe simmikko, neeni saluwan siya. <sup>36</sup> Siyada ne ashkkaratu nagaraa, ne asaa Israa7eela nagaraa atto yaaga. Eti hemettanau bessiya lo77o ogiyaa eta tamarissa; yaatada neeni ne asaa laatissido biittan iraa bukissa.

<sup>37</sup> “Biittaa bollan koshai woikko boshai yin, woikko kattaa xuuggi xaissiya carkkoi woikko boolee woikko gumbburoi biittaa bollan yin, woikko morkkee eta katamata dooddin, woikko ai mala bashshai woikko harggee yin, <sup>38</sup> ne asaa Israa7eelappe ooninne nena woossikkonne neeyyo watiwatikko, qassi ai asinne ba wozanan un77ettiyoobaa eridi, ha Beeta Maqidasiyaakko simmidi, ba kushiya miccikko, <sup>39</sup> neeni de7iyoosan saluwan siya. Siyada eta nagaraa atto yaaga; yaatada etau ootta. Neeni asaa wozanaa eriyoogaadankka, asa ubbau a oosuwaadan oosuwaadan imma. Aissi giikko, asaa ubbaa wozanaa eriyai ne xalaala. <sup>40</sup> Yaatikko, neeni nu maizza aawatuyyo immido biittan de7iyo wode ubban, eti neeyyo yayyana.

<sup>41-42</sup> “Hegaadankka, ne asaa Israa7eela gidenna kare biittaa asi ne gita sunttaabanne neeni ne asaayyo oottido maalaalissiya oosotubaa siyidi, haaho biittaappe yiidi, ha Beeta Maqidasiyaakko simmidi, nena woossikko, <sup>43</sup> neeni de7iyoosan saluwan siya. Ne asati Israa7eelati eriyoogaadan, sa7an de7iya asai ubbai ne sunttaa erana malanne neeyyo yayyana mala, qassi taani keexxido ha Beeta Maqidasee, neeyyo goinniyo soho gididoogaa eti erana mala, he kare biittaa asi nena woossiyoobaa ayyo pola.

<sup>44</sup> “Ne asati bantta morkketa olana mala neeni kiittidosaa aunne biidi, eti neeni doorido ha katamaakkonne taani ne sunttaayyo keexxido Beeta Maqidasiyaakko simmidi, nena GODAA woossikko, <sup>45</sup> eta woosaanne watiwatuwaa saluwan neeni siya; siyada etau xoonuwaa imma.

<sup>46</sup> “Nagara oottenna asi bainnaagaadankka, eti ne bolli nagaraa oottin, neeni etayyo hanqqettada morkketuyyo eta aattada immiin morkketikka eta omooddidi, haakkin matinkka bantta biitti ekkidi efin, <sup>47</sup> eti he omoodettido biittan de7iiddi, bantta wozanan nagaraappe simmikko, he omoodettido biittan eti de7iiddi, ‘Nuuni nagaraa oottida; nuuni moorida; nuuni iitabaa hanida’ yaagidi neeyyo watiwatikko, <sup>48</sup> banttana omooddidi efida morkketu biittan de7iiddi, eti bantta kumetta wozanaappenne bantta kumetta qofaappe neekko simmikko, neeni eta maizza aawatuyyo immido eta biittaakko, neeni doorido katamaakkonne taani ne sunttaayyo keexxido Beeta Maqidasiyaakko simmidi, nena woossikko, yaatikko, <sup>49</sup> eta woosaanne eta watiwatuwaa neeni de7iyoosan saluwan siya. Siyada etau pirda. <sup>50</sup> Ne asai ne bolli oottido nagaraanne moorido mooruwaa atto yaaga; eta omooddidi efida asati etayyo qaretanaadan ootta. <sup>51</sup> Aissi giikko, eti he birataa seerissiya cooce mala biittaappe, Gibxxeppe neeni kessido ne asatanne ne buzota.

<sup>52</sup> “Taani ne ashkkarainne ne asai Israa7eeli watiwatiyoogaa ne aifee xeello; qassi eti waassiyoo wode audenne neeni etayyo alla. <sup>53</sup> Aissi giikko, abeet Ubbaa Haariya GODAU, neeni kase nu aawata Gibxxeppe kessiyo wode ne ashkkaraa Muuse baggaara odidoogaadan, eta neeni sa7an de7iya kawotettatu ubbaa giddoppe ne buzo oottanau dummayadasa” yaagidi woossiis.

### *Solomona Wurssetta Anjuwaa*

<sup>54</sup> Solomoni GODAA woosaanne watiwatuwaa polidoogaappe guyyiyan, ba kushiya saluwaa miccidi yarshshiyoo sohuwaa sinttan gulbbatidosaaappe denddi eqqiis. <sup>55</sup> Eqqidi Israa7eela yaa7aa ubbaa ba qaala xoqqissidi, hagaadan yaagidi anjiis; <sup>56</sup> “I kase haasayido ba qaalaadan ba asaa Israa7eela shemppissida GODAI galatetto; i ba ashkkaraa Muuse baggaara immido lo77o ufaissai ubbai polettiis. <sup>57</sup> GODAI nu Xoossai kase nu aawatuura de7idoogaadan, nunaarakka de7o; i nuna mulekka aggoppo woikko yeggoppo. <sup>58</sup> Nuuni a ogetun ubban hemettana malanne i nu aawatussi immido azazota, wogatanne higgeta naagana mala, nu wozanaa baakko zaaro. <sup>59</sup> Hachchi hachchi de7uwaassi koshshiyooogaadan, GODAI tana ba ashkkaraanne ba asaa Israa7eela maaddana mala, taani GODAA sinttan woossaidda giido ha qaalati qaminne gallassi GODAAKKO, nu Xoossaakko, shiiqona. <sup>60</sup> Hegeenne, sa7an de7iya asai ubbai GODAI Xoossaa gidioogaanne appe attin hara xoossi bainnaagaa eranaassa. <sup>61</sup> Hachchiigaadankka intte a wogaadan hemettanaunne ayyo azazettanau GODAAYYO, nu Xoossaayyo, intte wozanai ammanettiyaagaa gido” yaagidi anjiis.

### *Beeta Maqidasiyaa Anjissuwaa*

#### *(Hanidabaa Odiya Naa77antto Maxaafaa 7:4-10)*

<sup>62</sup> Hegaappe guyyiyan kawoinne Israa7eela asai ubbai issippe GODAA sinttan yarshshuwaa yarshshidosona. <sup>63</sup> Solomoni GODAAYYO issippetettaa yarshshuwaa yarshshanau laatamanne naa77u sha7u booratanne xeetanne laatamu sha7u dorssata shiishshiis. Hegaadan oottidi kawoinne Israa7eela asai ubbai GODAA Beeta Maqidasiyaa anjissidosona. <sup>64</sup> Kawoi Solomoni Beeta Maqidasiyaayyo sintta baazzan de7iya giddo dabaabaa he gallassi dummayiis. Dummayidi he sohuwan xuuggiyo yarshshuwaa, kattaa yarshshuwaanne issippetettaa yarshshuwaappe modhdhuwaa yarshshiis. I heгаа oottidoogee GODAA sinttan de7iya, nahaasiyaa giyo birataappe oosettida yarshshiyoo sohoi xuuggiyo yarshshuwaa, kattaa yarshshuwaanne issippetettaa yarshshuwaappe modhdhuwaa yarshshanau guuxxido gishshaassa.



<sup>65</sup> He wode Solomoninne Israa7eela asai ubbai laappun gallassaayyo Daase Baalaa bonchchiis; Israa7eela zawan Hamaata Pinuwaappe biidi Gibxxe SHaafaa gakkanaashin de7iya cora asai GODAA Xoossaa sinttan baalaa bonchchanau shiiqiis.

<sup>66</sup> Wonttetta gallassi kawoi asaa moissiis; asai kawuwaa anjjidi, GODAI ba ashkkaraa Daawitayyoonne ba asaa Israa7eelayyo oottido kehatettan ufaittiiddinne wozanappe pashkkiiddi, ba soo ba soo biis.

## 9

### *GODAI Solomonayyo Naa77anttuwaa Qoncciiis (Hanidabaa Odiya Naa77antto Maxaafaa 7:11-22)*

<sup>1</sup> Solomoni GODAA Beeta Maqidasiyaanne kawo keettaa keexxidi makkidoogaap-penne oottanau amottido amuwaa ubbaa polidoogaappe guyyiyan, <sup>2</sup> Gabaa7oona kata-man kase qonccidoogaadan, GODAI naa77anttuwaa ayyo qoncciiis. <sup>3</sup> Qonccidi GODAI a hagaadan yaagiis; “Neeni ta sinttan woossido woosaanne watiwatido watiwatuwaa taani siyaas. Neeni keexxido Beeta Maqidasee merinau ta sunttai an xeesettana mala oottada taani geeshshaas; ta aifeenne ta wozanai ubba wode ha Beeta Maqidasiyan de7ana.

<sup>4</sup> “Nena gidikko, neeni ne aawai Daawiti hemettidoogaadan boree bainnan su-uretettan ta sinttan hemettikko, taani azazidobaa ubbaa oottikkonne ta wogaanne ta higgiiyaa naagikko, <sup>5</sup> taani ne aawaa Daawitayyo, ‘Israa7eela kawotaa araatan uttiya asa neeni mulekka xayakka’ giidoogaadan, ne kawotaa araataa Israa7eela bolli merinau minttada essana.

<sup>6</sup> “SHin neeni woikko ne naati tana kaalliyooгаа aggidi wora simmikko, taani inttena azazido ta azazuwaanne ta wogaa naagennan ixxiikkonne hara xoossatuyyo oottanaunne goinnanau biikko, <sup>7</sup> yaatikko, Israa7eela asaa taani kase etayyo immido biittaappe xoqollana; taani ta sunttaayyo geeshshido ha Beeta Maqidasiyaakka aggaagana. Aggin Israa7eelati asaa ubbaa gidдон haiseyiyooбаanne qilliicciyoobaа gidana. <sup>8</sup> Ha Beeta Maqidasee qolettidabai keelettido soho gidana; mataara kanttiya asi ubbi dagammiiddinne ‘Poora!’ giiddi, ‘GODAI ha biittaanne ha Beeta Maqidasiyaa aibissi hagaadan oottidee?’ yaagana. <sup>9</sup> Yaagin asai, ‘Eta maizza aawata Gibxxeppe kessida GODAA bantta Xoossaa eti aggidi, hara xoossata kaallido gishshaassinne etayyo oottidi goinnido gishshaassi, GODAI eta bolli ha iitabaa ubbaa ehiis’ yaagidi zaarana” yaagiis.

### *Solomoni Oottido Hara Oosota (Hanidabaa Odiya Naa77antto Maxaafaa 8:1-18)*

<sup>10</sup> Solomoni ha naa77u keettata, Beeta Maqidasiyaanne kawo keettaa keexxido laatamannta laittaa wurssettan, <sup>11</sup> Xiiroosa Kawoi Kiiraami i koyiyo xiiddaa, zigaanne worqqa ubbaa immido gishshau, Galiilan de7iya laatamu katamata Solomoni ayyo immiis. <sup>12</sup> SHin Kiiraami Xiiroosa katamaappe kiyidi, Solomoni ayyo immido katamata be7anau biido wode, katamati a ufaissibookkona. <sup>13</sup> Yaatin, Kiiraami Solomona, “Ta ishau, hageeti neeni taayyo immidoogeeti aiba katamee?” yaagiis. Hegaa gishshau, i he katamata, “Pattenna biittaa” yaagidi sunttiis. He heerai hachchi gakkanaashinkka he sunttan xeesettees. <sup>14</sup> Kiiraami oiddu sha7u kilo giraame deexxiya worqqaа Kawuwaa Solomonayyo yeddi wottiis.

<sup>15</sup> GODAA Beeta Maqidasiyaa, ba keettaa, Miillo, Yerusalaame katamaa gimbiyaanne Haxoora, Magiddonne Gezeera katamata gimbbanau Kawuwaa Solomonayyo gabbaarati de7oosona. <sup>16</sup> Gibxxe biittaa Kawoi kase Gezeera katamaa oiqqiis; oiqqidi katamaa taman xuuggiis. Kataman de7iya Kanaane asatakka woriis; yaatidi Solomoni machchido ba na7eeyyo woito oottidi immiis; <sup>17</sup> immiin Solomoni Gezeera katamaa wotti yeggidi keexxiis.



Hegaadankka qassi, Solomoni Hirkki Beeti-Horoona, <sup>18</sup> Baa7ilaata, Yihudaa Baz-zuwan de7iya Taamaara katamaa, <sup>19</sup> miishshaa minjjiyo katamata ubbaa, ba paratanne paraa gaareta wottiyo katamatanne Yerusalaamen, Liibaanoosaaninne ba haariyo biittan ubban keexxanau amottido ubbaa keexxiis.

<sup>20</sup> Amooretuppe, Hiitetuppe, Parzzetuppe, Hiiwetuppenne Yaabuusatuppe attida asati ubbai Israa7eela asa gidokkona; <sup>21</sup> eti Israa7eela asati biittaappe wurssi xaissanau danddayennan aggin, he biittan attida asatu zerettata. Solomoni eta gabbaaratettaa ootissiis; eti hachchi gakkanaashinkka gabbaaratettan oottoosona. <sup>22</sup> SHin Solomoni Israa7eela asatuppe oonanne ailleyibeenna; eti ayyo oosanchchata, olanchchata, olanchchatu halaqatanne gadaawata, paraa gaareta laaggiyaageetu halaqatanne paraasata gididi oottidosona. <sup>23</sup> Hegaadankka qassi, eti Solomona oosuwa oot-tiyaageetu halaqata; etappe ichchashu xeetanne ishatamati oosuwa oottiya gab-baarata xeellidi ootissoosona.

<sup>24</sup> Gibxxe Kawuwaa na7iyaa Daawita Katamaappe Solomoni iyyo keexissido keettaa pude biidoogaappe guyyiyan, i Miillo gimbbiis.

<sup>25</sup> Solomoni GODAAYO gimbbido yarshsho sohuwan xuuggiyo yarshshuwaanne issippetettaa yarshshuwa laittan heezzutoo yarshshees; GODAA sinttan ixaanaakka cuwayees. Yaatiiddi Beeta Maqidasiyaa poliis.

<sup>26</sup> Hegaappe guyyiyan Kawoi Solomoni Eedooma biittan Zo7o Abbaa doonan, Eelaata giyo katamaa matan de7iya Eexiyooni-Gaabiran markkabeti medhdhiis. <sup>27</sup> Kawoi Kiiraami Solomona asatuura oottana mala markkabiya laaguwa loohida ba asata kiittiis. <sup>28</sup> Kiittin eti Ofira biitti biidosona; biidi yaappe tammanne oiddu sha7u kilo giraamiyaappe dariya worqqaa Kawuwaa Solomonayyo ekkidi yiidosona.

## 10

### *Saaba Kawiyo*

#### *(Hanidabaa Odiya Naa77antto Maxaafaa 9:1-12)*

<sup>1</sup> Saaba kawiya GODAA sunttan woretida Solomona woriyaa siyada, deexo oishata ekkada, a paaccanau denddaasu. <sup>2</sup> Denddada sawuwaa, keehi daro worqqaanne al77o shuchchaa caanettida daro gaameelatu cugiyaara keehi daro ajaban Yerusalaame gakkada, Solomona sintti aadhdhaasu. Aadhdhada ba wozanan de7iyaabaa ubbaa Solomonayyo yootaasu. <sup>3</sup> Solomoni a oichchidobaa ubbaa odiis; iyyo birshshennan appe geemmi attidabi aibinne baawa. <sup>4</sup> Saaba kawiya Solomona aadhdhida eratettaa, i keexxido kawo keettaa, <sup>5</sup> a maaddan shiiqiya qumaa, a oosanchchati uttiyo utettaa, a ashkharati oottiyo oosuwaanne maayiyo maayuwa, a eessaa tigiyaageetanne GODAA Beeta Maqidasiyan i xuuggiyo yarshshuwa be7ido wode, i wozanai gageettiis.

<sup>6</sup> Hegaappe guyyiyan a kawuwaa, “Nebaanne ne aadhdhida eratettaabaa taani ta deren de7aidda siyidoogee tuma. <sup>7</sup> SHin taani yaada, ta aifiyaa biraanan be7ana gakkanaashin eti taayyo yootidobaa ammanabeikke. Taayyo asai yootidoogee bag-ganne gakkenna; aadhdhida eratettankka duretettankka taani siyidoogaappe keehi darees. <sup>8</sup> Ubba wode ne sinttan eqqidi, ne aadhdhida eratettaa siyiya ne asatinne ne oosanchchati aiba ufaiyyoonaashsha! <sup>9</sup> Nenan ufaiyttidi, nena Israa7eela kawotaa araatan utissida GODAI ne Xoossai galatetto! GODAI Israa7eela asaa merinau siiqido gishshau, neeni suure pirddaanne xillotettaa oottana mala i nena kawoyiis” yaagaasu.

<sup>10</sup> Yaagada kawiya oiddu sha7u kilo giraame deexxiya worqqaa, keehi daro sawuwaanne al77o shuchchaa kawuwaayyo immaasu. Saaba kawiya Kawuwaa Solomonayyo immidoogaa keena daro sawuwaa hegaappe simmin ooninne ehibeenna.

<sup>11</sup> (Kawuwaa Kiiraama markkabeti, Ofirappe worqqaa ehiidaageeti yaappekka sanddale giyo keehi daro mittaanne al77o shuchchaa ehiidosona. <sup>12</sup> Kawoi Solomoni he sanddalliyaappe GODAA Beeta Maqidasiyaanne kawo keettaa tuuqeta, mazamuriyaa

yexxiyaageetuuyo diittaanne maazinqqiyaa merissiis. Hegaa mala sanddalee he gallassappe haa simmin yinne erenna, beettinne erenna.)

<sup>13</sup> Kawoi Solomoni kawoi immanau bessiya imotaappe haraa, Saaba Kawiyaa amotada a oichchidobaa ubbaa iyyo immiis. Hegaappe guyyiyan Saaba Kawiyaa ba ajabaara denddada, ba biitti simmaasu.

### *Solomona Aquwaa*

*(Hanidabaa Odiya Naa77antto Maxaafaa 9:13-28)*

<sup>14</sup> Solomoni laittan laittan ekkiiyo worqqai laatamanne heezzu sha7u kilo giraame deexxiyaagaa. <sup>15</sup> Hegee zal77anchchatuppe ekkido qaraxaanne Araba biittaa kawotu ubbaappenne Israa7eela biittaa haariyaageetuppe ekkido giiraa gujjennaana.

<sup>16</sup> Solomoni naa77u xeetu wogga gondalleta qoxxido worqqaappe merissiis; issi issi gondalliyan laappun kilo giraame gidiya worqqai geliis. <sup>17</sup> Qassikka i heezzu xeetu qeeri gondalleta qoxxido worqqaappe merissiis; issi issi qeeri gondalliyan naa77u kilo giraame gidiya worqqai geliis. Kawoi he gondalleta Liibaanoosa Wora Keettaa giyo keettan wottiis.

<sup>18</sup> Qassikka kawoi issi gita kawotaa araataa danggarssaa zaaliyaappe merissidi, muruta worqqan sheeshshiis. <sup>19</sup> Kawotaa araatai de7iyoosaa pude kiyanau yedhdhiyo usuppun xekkati de7oosona. He araatai guyye baggaara kiikiyan muumi uttiis. Araatau naa77u baggaarakka qesiyaa zempmissiyo sohota de7oosona; he naa77u sohota lanqqiyankka eqqida issi issi gaammo misilee de7ees. <sup>20</sup> He araataa pude kiyiyo usuppun xekkatun ya baggaaranne ha baggaara issi issi gaammo misilee, muleera tammanne naa77u misileti de7oosona. Hagaa mala kawotaa araatai hara kawotettan awaaninne oosettiibeenna.

<sup>21</sup> Kawoi Solomoni ushshaa uyiyo miishsha ubbai worqqaappe oosettiis; Liibaanoosa Wora Keettan de7iya miishsha ubbaikka muruta worqqaappe oosettiis. Issibainne birappe oosettiibeenna; aissi giikko, Solomona wode biri mulekka go77iyaabadan goodetti erenna. <sup>22</sup> Kawuwaayyo Kiiraama markkabetuura zal77iya gita markkabeti abban de7oosona. He markkabeti worqqaanne biraa, danggarssaa zaaliyaa, geleshshotanne qaareta caani ekkidi, heezzu laittaappe issiton simmoosona.

<sup>23</sup> Kawoi Solomoni duretettaanne aadhdhida eratettan sa7an de7iya kawotu ubbaappe dariis. <sup>24</sup> Sa7an de7iya asai ubbai a sintti aadhdhanaanne Xoossai a wozanan wottido aadhdhida eratettaa siyanau koyees. <sup>25</sup> Laittaappe laittan yiya ubbai ayyo immanau worqqanne bira miishshata, maayota, ola miishshatanne sawuwaa, paratanne baqulota ekkidi yees.

<sup>26</sup> Solomoni paraa gaaretanne parata shiishshiis; ayyo issi sha7anne oiddu xeetu paraa gaaretinne tammanne naa77u sha7u parati de7oosona. I eta paraa gaaretu katamatuuninne banaara Yerusalaamen wottiis. <sup>27</sup> Kawoi Yerusalaamen biri shuchchadan korettanaadan, zigikka bargguwan dicciya ettaadan corattanaadan oottiis. <sup>28</sup> Solomona parati Gibxxeppenne Qaawe giyo biittaappe yiidosona. Kawuwaa zal77anchchati eta Qaaweppe miishshan shammidi ehoosona. <sup>29</sup> Eti issi issi paraa gaariyaa usuppun xeetu xaqara biran, issi issi paraa xeetanne ishatamu xaqara biran Gibxxeppe shammidi ehoosona; ehiidi etikka Hiitetu kawotussi ubbatussinne Sooriyaa kawotussi baizzoosona.

## 11

### *Solomoni Xoossaappe Wora Simmiis*

<sup>1</sup> Kawoi Solomoni daro allaga biittaa maccaasata siiqiis; hegeetinne Gibxxe kawuwaa na7ee bolli gujjin Moo7aabaatu, Amoonatu, Eedoomatu, Sidoonatunne Hiitetu maccaasata. <sup>2</sup> Eti, “Intte ha asatuura ehuwan geluwan walahettoppote; aissi giikko, eti intte wozanaa tumuppe bantta eeqaa xoossatukko zaarana” yaagidi GODAI Israa7eela

asaayyo odido kawotettatu maccaasata; shin Solomoni etaara siiquwan qashettiis. <sup>3</sup> Solomonayyo kawotu naata gidiya laappun xeetu machchetinne heezzu xeetu baakkoti de7oosona. A maccaasati a wora zaaridosona. <sup>4</sup> Solomoni cimi cimidi biishin, a maccaasati a wozanaa hara xoossatukko zaaridosona; yaatin, a aawaa Daawiti kumetta wozanaappe siiqidoogaadan, GODAA ba Xoossaa i siiqibeenna. <sup>5</sup> Solomoni Asttaarooto giyo Sidoonatu xosseeyyoonne Molooka giyo Amoonatu xoossaayyo, sheneyiyaagaayyo goinniis. <sup>6</sup> Yaanidi Solomoni GODAA sinttan iitabaa oottiis; a aawaa Daawiti kaallidoogaadan, GODAA polo kaallibeenna.

<sup>7</sup> Hegaappe guyyiyan Solomoni Kamoosha giyo tuna eeqaayyoonne Amoonati ee-giyo, Molooka<sup>2</sup> giyo tuna eeqaayyo Yerusalaame katamaappe arshsho baggan de7iya deriyaa huuphiyan goinniyo xoqqa sohota keexxiis. <sup>8</sup> Allaga biittaaappe ekkido ba maccaasatu ubbaayyookka i hegaadan giigissiis; giigissin eti bantta xoossatuyyo yan ixaanaa cuwayidosonanne yarshshuwaa yarshshidosona.

<sup>9</sup> Ayyo naa77utoo qonccida GODAAPPE Israa7eela Xoossaappe Solomona wozanai wora simmido gishshau, GODAI a hanqqettiis. <sup>10</sup> Hara xoossata kaallennaadan GODAI Solomona azaziis; gidikkonne, Solomoni GODAA azazuwaa naagibeenna. <sup>11</sup> Hegaa gishshau, GODAI Solomona hagaadan yaagiis; “Neeni hagaadan hanido gishshau, taani nena azazido ta maachchaanne ta wogaanne neeni naagennan ixido gishshau, taani ne kawotettaa neeppe dafa ekkada, ne ashkkaratuppe issuwaayyo immana. <sup>12</sup> Gidikkonne, ne aawaa Daawita gishshau taani haggaa neeni paxa de7iyo laittan dafa ekkikke; ne na7aa kushiyaappe dafa ekkana. <sup>13</sup> Hegaakka qassi kawotettaa muliyaa appe dafa ekkikke; ta ashkkaaraa Daawita gishshaunne taani doorido katamaa Yerusalaame gishshau issi zariyaa ayyo immana” yaagiis.

### *GODAI Solomona Bolla Baarigaarata Denttiis*

<sup>14</sup> Hegaappe guyyiyan GODAI Eedoomiyaa Hadaada, Eedooma biittaa kawotu zare gididaagaa baarigaara oottidi Solomona bolli denttiis. <sup>15</sup> Hegaappe kase baggan Daawiti Eedooma asatuura olettido wode, haiqqidaageeta moogissanau pude biida ola gadaawai Yoo7aabi, Eedooman de7iya attumaasa ubbaa wori wurssiis. <sup>16</sup> Eedooman de7iya attumaasa ubbaa xaissana gakkanaashin Yoo7aabinne Israa7eela asai ubbai yan usuppun agina uttiis.

<sup>17</sup> SHin he wode guutta na7a gidida Hadaadi, a aawaassi oottida Eedooma oosanchchatuppe amaridaageetuura Gibxxe biitti baqatiis. <sup>18</sup> Eti Midiyaamappe denddidi, Paaraana biidosona; Paaraanappe banttanaara asaa ekkidi Gibxxe biitti, Gibxxe kawuwaakko biidosona. Kawoi Hadaadayyo issi keettaanne gadiyaa immidi, qumaakka ayyo azaziis. <sup>19</sup> Hadaadi kawuwaa keehippe ufaissiis; ufaissin kawoi ba keettaayee, Kawee Xaafineesi michchiyo ayyo machcho immiis. <sup>20</sup> Xaafineesi michchiya ayyo Ganubaata giyo na7aa yelaasu. Yelin Xaafineesa a kawo keettan dichchaasu; Ganubaati yan kawuwaa naatuura issippe de7iis.

<sup>21</sup> Hadaadi Gibxxen de7iiddi Daawiti haiqqidi ba maizzan gaittidoogaanne ola gadaawai Yoo7aabikka haiqqidoogaa siyiis; siyidi Hadaadi kawuwaayyo, “Taani ta biitti simmana mala tana yedda” yaagiis.

<sup>22</sup> Yaagin kawoi a, “Neeyyo hagan aibi pacciinee neeni ne biitti baanau koyiyoi?” yaagidi oichchiis.

Oichchin Hadaadi, “Taayyo aibinne paccibeenna; shin taani baana” yaagiis.

<sup>23</sup> Hegaadankka qassi, Xoossai Eliyadaa7a na7aa Razoona giyoogaa Solomona bolli baarigaara oottidi denttiis; Razooni Xooba Kawuwaa Hadaadi7eezerappe baqatiis. <sup>24</sup> Daawiti Xooba biittaa olanchchata xaissido wode, Razooni baayyo asaa shiishshidi, shittatu halaqa gidiiis; shittati Damasqqo biidi, he katamaa oiqqidi, yan uttidi, Razoona

<sup>2</sup> 11:7 Molooka: Amoonatu eeqai, Molooki Ibraawettuwan Milkkaama geetettes.

kawoyidosona. <sup>25</sup> Hadaadi medhdhido metuwaa bollikka gujjidi, Solomoni de7ido keenan ubban Razooni Israa7eelatuyyo baarigaara gidiiis; yaatidi i Sooriyan kawotidi Israa7eela asaa morkkiis.

### *Xoossai Iyorbbaamassi Immana Giidobaa*

<sup>26</sup> Hegaa bollikka Nabaaxa na7ai Iyorbbaami Solomona bolli makkalidi denddiis; i Solomona ashkkaratuppe issuwaa. I Efireema biittan Xareedappe yiida asa; a aayyiyaakka Xiruu7o giyo am77iyo. <sup>27</sup> Kawuwaa bolli i makkalidi denddido taarikee hagaappe kaallidi xaafettidaagaa. Solomoni Miillo gimbbiisinne ba aawaa Daawita Katamaa yuushuwaa gimbbiyan de7iya kallo sohuwaa kunttiis. <sup>28</sup> Iyorbbaami mino asa; Solomoni ha wodallai ba oosuwaa waati loitti oottiyaakko be7iis; be7idi Mi-naasenne Efireema biittan oottiya gabbaaratu ubbaa bolli a halaqa oottidi sunttiis.

<sup>29</sup> Issi gallassi Iyorbbaami Yerusalaame katamaappe kiyidi bees; biishin Seeloppe yiida, hananabaa yootiya Akiiyi aara ogiyan gaittiis. Akiiyi he wode ooratta maayuwaa maayi uttiis. Dembban eta naa77aa xalaalai de7oosona. <sup>30</sup> Akiiyi ba maayido ooratta maayuwaa oiqqidi, tammanne naa77u kessidi pooshshiis. <sup>31</sup> Pooshshidi Iyorbbaama hagaadan yaagiis; “Tammu pooshota neeyyo ekka. Aissi giikko, GODAI Israa7eela Xoossai hagaadan yaagees; ‘Be7a, taani kawotettaa Solomona kushiyaappe pooshshada, tammu zaretu neeyyo immana hanais. <sup>32</sup> SHin ta ashkkaraa Daawita gishshaunne Israa7eela zaretu ubbaa giddoppe taani doorido Yerusalaame katamaa gishshau, issi zariyaa ayyo aggana. <sup>33</sup> Taani haggaa oottana gaasoi, Solomoni tana aggidi Sidoonatu xoosee Asttaarootiyyo, Moo7aabatu xoossaa Kamooshayyoonne Amoonatu xoossaa Molookayyo goinnido gishshaassanne ta ogiyan hemettennan, ta sinttan suurebaa hanennaaninne a aawai Daawiti naagidoogaadan ta wogatanne ta higgeta naagennan ixxido gishshaassa.

<sup>34</sup> “ ‘Gidikkonne, taani kawotettaa Solomona kushiyaappe wurssa ekkikke; taani dooridonne ta azazuwaanne ta wogaa naagida ta ashkkaraa Daawita gishshau, Solomoni paxa de7ido peeshan ubban i haaranaadan oottaas. <sup>35</sup> Hegaappe guyyiyan taani kawotettaa a na7aa kushiyaappe ekkana; ekkada tammu zaretu neeyyo immana. <sup>36</sup> Ta sunttai an xeesettana mala, taani doorido Yerusalaame kataman ubba wodekka ta ashkkaraa Daawita zerettai kawotana mala, taani issi zariyaa a na7aassi immana.

<sup>37</sup> “ ‘Nena gidikko, taani nena ekkana; ekin ne wozanai amottido ubbaa neeni haarana; neeni Israa7eela bolli kawotana. <sup>38</sup> Taani nena azaziyoogaa neeni oot-tikko, ta ogiyan hemettikkonne ta ashkkarai Daawiti naagidoogaadan ta wogatanne ta azazota naagada ta sinttan suurebaa hanikko, taani nenaara gidana; Daawitassi oottidoogaadankka ne zaretu de7i be7anaadan oottana; Israa7eelakka taani neeyyo immana. <sup>39</sup> Solomona nagaraa gishshau Daawita zerettata taani qaxxayana; shin merinassi gidenna’ yaagees” yaagiis.

<sup>40</sup> Yaatin, Solomoni Iyorbbaama woranau kajeeliis; shin Iyorbbaami Gibxxe bi-itti Kawuwaa SHiishaaqakko baqatidi biis; biidi Solomoni haiqqana gakkanaashin Gibxxen takkiis.

### *Solomona Haiquwaa*

#### *(Hanidabaa Odiya Koiro Maxaafaa 9:29-31)*

<sup>41</sup> Solomoni hanido harabai, i oottidobai ubbai, a aadhdhida eratettaabai Solomona Taarikiyaa Maxaafan xaafetti uttiis. <sup>42</sup> Solomoni Israa7eela ubbaa bolli Yerusalaamen oitamu laitta kawotiis. <sup>43</sup> Hegaappe guyyiyan Solomoni haiqqidi, ba maizzan gaittiis; ba aawaa Daawita Kataman moogettiis. A na7ai Robi7aami a sohuwan kawotiis.

## 12

### *Israa7eela Zareti Tammati Makkalidosona*

#### *(Hanidabaa Odiya Naa77antto Maxaafaa 10:1-19)*



<sup>1</sup> Israa7eela asai ubbai Robi7aama kawoyanau Sekeema katamaa biido gishshau, ikka yaa biis. <sup>2</sup> Nabaaxa na7ai Iyorbbaami, Kawuwaa Solomonappe baqatidi Gibxxen de7iyaagee haggaa siyido wode, Gibxxeppe simmidi yiis. <sup>3</sup> Yin Israa7eela asai Iyorbbaamayyo kiittidi xeesissin, inne Israa7eela maabarai ubbai Robi7aamakko biis; biidi, <sup>4</sup> “Ne aawai nuna deexo qambbaraa toossiis; shin ha77i neeni i nuna ootissiyo wolqqaama oosuwaanne deexo qambbaraa nuuyyo kaushsharkkii. Yaatikko, nuuni neeyyo haarettana” yaagidosona.

<sup>5</sup> Yaagin Robi7aami etayyo, “Biite; biidi heezzantto gallassi simmidi taakko yiite” yaagiis; yaagin asai biis.

<sup>6</sup> Hegaappe guyyiyan Kawoi Robi7aami a aawai Solomoni paxa de7iyo wode, Solomona zorida cimata zoretaa bessii. I eta, “Ha asaayyo woigada zaara geetii?” yaagidi oichchiis.

<sup>7</sup> Oichchin cimati Robi7aama, “Hachchi neeni asaayyo ashkkara gidada oottikkonne eti oichchiyoobau neeni lo77o qaalaa zaarikko, ubbaton eti neeyyo ashkkara gidana” yaagidosona.

<sup>8</sup> SHin Robi7aami cimati zorido zoriyaa aggidi, aara diccidi ayyo oottiya yelaga asata zoretaa bessii. <sup>9</sup> I eta, “Intte tana zoriyoobi aibee? ‘Ne aawai nuna toossido deexo qambbaraa nuuyyo kaushsharkkii’ yaagiya ha deriyaayyo woigada zaaroo?” yaagidi oichchiis.

<sup>10</sup> Oichchin aara diccida yelagati, “‘Ne aawai nuna deexo qambbaraa toossiis; shin neeni nuuyyo kaushsharkkii’ yaagiya asaayyo, ‘Ta gil77a biradhdhee ta aawaa xeessaappe orddees. <sup>11</sup> Ta aawai intte qambbaraa deexettiis; shin taani hegaappekka aattada deexettana. Ta aawai inttena lissuwan wadhdhiis; shin taani inttena masimasuwaadan dukkiya lissuwan wadhdhana’ yaagada zaara” yaagidosona.

<sup>12</sup> Hegaappe guyyiyan Kawoi Robi7aami, “Heezzantto gallassi simmidi taakko yiite” giidoogaadankka, Iyorbbaaminne asai ubbai heezzantto gallassi simmidi yiidosona.

<sup>13</sup> Yin kawoi etayyo hanqqo zaaruwaa zaariis. Cimatu zoriyaa aggi bayidi, <sup>14</sup> yelagati zorido zoriyaa kaalliis. Yaatidi hagaadan yaagiis; “Ta aawai intte qambbaraa deexettiis; shin taani hegaappekka aattada deexettana. Ta aawai inttena lissuwan wadhdhiis; shin taani inttena masimasuwaadan dukkiya lissuwan wadhdhana” yaagidi zaariis.

<sup>15</sup> Kawoi asai giyoogaa siyennan ixxiis; aissi giikko, GODAI Seelophe yiida Akiya baggaara kase Nabaaxa na7aa Iyorbbaamayyo yootido qalalai polettanaadan hagee GODAAPPE haniis.

<sup>16</sup> Israa7eela asai ubbai kawoi eti giyoogaa siyennan ixxidoogaa be7idi, kawuwaa hagaadan yaagidosona; “Daawitabaappe nuna gakkiiyaabi aibee? Issey na7aappe nuuni laattanabi baawa! Israa7eela asau, intte soo intte soo simmite! Ha77i simmi Robi7aami bau naagetto!” yaagidosona. Yaagidi Israa7eela asai ubbai bantta soo bantta soo simmidosona. <sup>17</sup> SHin Robi7aami Yihudaa katamatun de7iya Israa7eela asaa bolli kawotiis.

<sup>18</sup> Hegaappe guyyiyan Kawoi Robi7aami ba gabbaaratu halaqaa Adooniraama Israa7eela asaakko kiittiis; kiittin eti shuchchan caddidi woridosona. Yaatin, Kawoi Robi7aami ba paraa gaariyan eesuwan kiyi uttidi, Yerusalaame baqatiis. <sup>19</sup> Heedeppe doommidi hachchi gakkanaashin Israa7eela zareti tammati Daawita zariyaappe kawotida kawotu bolli makkalidosona. <sup>20</sup> Iyorbbaami Gibxxeppe simmidoogaa Israa7eela asai ubbai siyido wode, a bantta yaa7au xeesisidi, Israa7eela bolli kawoyidosona; Daawita zariyaappe kawotida kawotussi ammanettidi attidai Yihudaa zariyaa xalaala.

*SHamaa7ee Hananabaa Yootiis  
(Hanidabaa Odiya Naa77antto Maxaafaa 11:1-4)*

<sup>21</sup> Solomona na7ai Robi7aami Yerusalaame katamaa gakkido wode, Israa7eela biittaa asaara olettidi, kawotettaa baayyo zaarana mala, Yihudaa zariyaappenne Biniyaama zariyaappe doorettida issi xeetanne hosppun tammu sha7u olanchchata



shiishshiis. <sup>22</sup> SHin Xoossaa qaalai, Xoossaa asa gidiya SHamaa7iyaakko yiis; yiidi, <sup>23</sup> “Solomona na7aa, Yihudaa Kawuwaa Robi7aamayyo, Yihudaanne Biniyaama zare-tuyyoonne attida asa ubbaayyo hagaadan yaaga; <sup>24</sup> ‘GODAI inttena, “Intte dabbotuura, Israa7eelatuura olettanau booppite. Haga taani oottido gishshau, intte ubbaikka intte soo intte soo simmite” yaagees’ yaagada yoota” yaagiis. Yaagin eti GODAA qaalaa siyidi, simmidi soo biidosona.

### *Iyorbbaami GODAAPPE Wora Simmiis*

<sup>25</sup> Hegaappe guyyiyan Iyorbbaami Efireema gezziyan de7iya Sekeema qato kessidi gimbbidi, yan de7iis; hegaappe kiyi biidi PHinii7eela gimbbiis.

<sup>26</sup> Iyorbbaami ba wozanan, “Kawotetta Daawita zariyaassi simmana. <sup>27</sup> Ha asai GODAA Beeta Maqidasiyan yarshshuwaa yarshshanau Yerusalaame katamaa biyaabaa gidikko, eti qassikka bantta godaakko, Kawuwaa Robi7aamakko simmana. Eti tana woridi, Yihudaa Kawuwaa Robi7aamakko simmana” yaagidi qoppiis.

<sup>28</sup> Hega gishshau, kawoi zorettidoogaappe guyyiyan worqqaappe naa77u maratu misileta medhdhiis. Medhdhidi asaayyo, “Intte hegaappe Yerusalaame biido keenai gidana. Inttenoo Israa7eela asatoo, inttena Gibxxeppe kessida intte xoossati hageeti-hoona!” yaagiis. <sup>29</sup> Etappe issuwaa Beeteelen, issuwaa qassi Daanan wottiis. <sup>30</sup> Ha yohoi etayyo nagaratiis; aissi giikko, issi maraa misiliyaayyo goinnanau asai Daana gakkanaashin bees. <sup>31</sup> Iyorbbaami keraa huuphiyan goinniyo xoqqa sohuwaa giigissiis; giigissidi Leewa zare gidana xayikkokka, ubba qommo asaappe qeese oottidi sunttiis.

<sup>32</sup> Yihudan bonchchiyoogaadan hospunnata aginan tammanne ichchashantta gallassan baalai bonchchettanaadan, Iyorbbaami gallassaa keeriis; keeridi yarshshuwaa yarshshiis. I hagaadan haniis; Beetele biis; biidi ba medhdhido maraa misiliyaayyo yarshshuwaa yarshshiis. Qassi ba medhdhido goinniyo xoqqa sohotun qeeseta Beeteelen sunttidi wottiis. <sup>33</sup> I ba huuphen doorido hospunnata aginan, he aginau tammanne ichchashantto gallassi Beetele biis; biidi he gallassai Israa7eela asaayyo baalaa gidanaadan awaajiis. Yaatidi ixaanaa cuwayanau pude yarshshiyo sohuwaa kiyiis.

## 13

### *Beetele Bolli Hananabaa Yootida Bitaniyaa*

<sup>1</sup> Iyorbbaami ixaanaa cuwayanau yarshshuwaa yarshshiyo sohuwaa matan eqqidaashin, GODAA qaalaa kiitettida, Xoossaa asa giyo issi bitanee Yihudaappe yiis; <sup>2</sup> yiidi GODAI azazin he yarshshiyo sohuwaa bolli hagaadan yaagidi waassiis; “Yarshshiyo sohuwau, yarshshiyo sohuwau, GODAI nena hagaadan yaagees; ‘Daawita zariyaassi Yoosiyaasa geetettiya issi na7ai yelettana. He na7ai ha77i hagan yarshshiiddi de7iya xoqqa sohotu qeeseta ne bolli yarshshana; ne bolli asaa meqetta xuugettana’ yaagees” yaagidi waassiis. <sup>3</sup> He gallassi Xoossaa asi malaataa immiiddi, “GODAI yootido malaatai haga; ha yarshshiyo sohoi phalqqettana; a bollan de7iya bidinttaikka wora laalettana” yaagiis.

<sup>4</sup> Kawoi Iyorbbaami Xoossaa asi Beeteelen de7iya yarshshiyo sohuwaa bolli waasidoogaa siyido wode, yarshshiyo sohuwaappe ba kushiya yeddidi, “He bitaniyaa oiqqite!” yaagiis. SHin i bitaniyaayyo yeddido kushee sohuwaarakka xiiggidi siliis; Hega gishshau, ba kushiya guyye zaaridi ekanau danddayibeenna. <sup>5</sup> Qassi Xoossaa asi GODAA qaalaa immido malaataadan yarshshiyo sohoi phalqqetti wodhdhin, a bollan de7iya bidinttaikka wora laalettis. <sup>6</sup> Yaatin, Kawoi Iyorbbaami Xoossaa asa, “Ta kushee kaseegaadan hanana mala taayyo gaannatada GODAA ne Xoossaa woossarkkii!” yaagiis. Hega gishshau, Xoossaa asi kawuwaayyo gaannatidi GODAA woossin, kawuwaa kushee simmidi kaseegaadan haniis.

<sup>7</sup> Kawoi Xoossaa asa, “Tanaara ta soo hindda; kattanne ma. Qassi taani neeyyo imotaa immana” yaagiis.

<sup>8</sup> SHin Xoossaa asi kawuwaassi hagaadan yaagidi zaariis; “Harai attin neeni ne aquwaayyo baggaa taassi immiyaakkokka, taani nenaara biikke; hagan oittaaakka miikke, haattaakka uyikke. <sup>9</sup> Aissi giikko, GODAA qalalai tana, ‘Neeni oittakka mooppa, haattakka uyoppa, ne yiido ogiyaarakka simmada booppa’ yaagidi azaziis” yaagiis. <sup>10</sup> Hegaa gishshau, bitanee hara ogiyaara biis; i Beetele yiido ogiyaara simmidi bibeenna.

*Beeteelen Hananabaa Yootiya Cima Bitaniyaa*

<sup>11</sup> Hananabaa yootiya issi cima bitanee Beetele kataman de7ees. Beetele he gallassi Xoossaa asi oottido ubbabaa he cima bitaniyaa naati yiidi yootidosona; qassi he bitanee kawuwaayyo yootido qaalaati bantta aawaayyo yootidosona. <sup>12</sup> Yootin aawai eta, “Awa ogiyaara biidee?” yaagiis; yaagin Yihudaappe yiida Xoossaa asi biido ogiyaa ayyo malaatidosona. <sup>13</sup> Hegaappe guyyiyan i ba naata, “Taayyo ane hariyaa koorite” yaagiis; yaagin eti ayyo hariyaa koorin toggiis. <sup>14</sup> Toggidi Xoossaa asa geeduwaa kaallidi biis; issi wolaa kuwan uttidaagaa demmidi, “Yihudaappe yiida Xoossaa asi neneeyye?” yaagiis.

Yaagin bitanee, “Ee tana” yaagiis.

<sup>15</sup> Yaagin hananabaa yootiya cima bitanee a, “Qumaa maanau ta soo tanaara hindda” yaagiis.

<sup>16</sup> Xoossaa asi zaaridi, “Taani guyye simmada nenaara baanau, woikko ha sohuwan nenaara oittaa maanau, woikko haatta uyanau danddayikke. <sup>17</sup> Aissi giikko, GODAA qalalai tana, ‘Neeni he sohuwan oittakka mooppa, haattakka uyoppa, ne yiido ogiyaarakka simmada booppa’ yaagidi azaziis” yaagiis.

<sup>18</sup> Yaagin hananabaa yootiya cima bitanee, “Taanikka nenadan hananabaa yootiyaa-gaa. Kiitanchchai GODAA qalalan tana, ‘Oittaa i maana malanne haattaa uyana mala, a zaarada ne soo nenaara ekkada ya’ yaagiis” yaagiis. SHin cima bitanee hegaa ayyo wordduwaa odiis. <sup>19</sup> Hegaa gishshau, Xoossaa asi aara simmidi, a son miisinne uyiis.

<sup>20</sup> Eti maaddan uttidaashin, GODAA qalalai bitaniyaa guyye zaarida hananabaa yootiya cima bitaniyaakko yiis. <sup>21</sup> Yin bitanee Yihudaappe yiida Xoossaa asayyo ba qaalaati xoqqu oottidi, “GODAI hagaadan yaagees; ‘Neeni GODAA qaalaati ixxada; GODAI ne Xoossai nena azazido azazuwaakka naagabaakka. <sup>22</sup> Neeni GODAI, “He sohuwan mooppa woikko uyoppa” giido sohuwaa guyye simmada baada, yan oittaa maadasa; haattaakka uyadasa. Hegaa gishshau, ne ahai ne aawatu duufuwan moogettenna’ yaagees” yaagiis.

<sup>23</sup> Xoossaa asi miyoogaanne uyiyoogaa polidoogaappe guyyiyan, hananabaa yootiyaagee ba guyye zaaridi ehiido bitaniyaayyo hariyaa kooriis. <sup>24</sup> Koorin i ogiyan biishin gaammoi aara gaittidi, a woriis. Worin ahai ogiyan canggaraariis; hareenne gaammoinne naa77aikka ahaa lanqqen eqqidosona. <sup>25</sup> He ogiyaara aadhdiya asai ahai canggaraaridaagaanne gaammoi ahaa lanqqen eqqidaagaa be7iis; be7idi biidi hananabaa yootiya cima bitanee de7iyo kataman yootiis.

<sup>26</sup> Biyoosaappe bitaniyaa guyye zaarida hananabaa yootiya cima bitanee hegaa siyido wode hagaadan yaagiis; “Hegee GODAA qaalaayyo azazettinnan ixxada Xoossaa asa. Hegaa gishshau, GODAA qalalai ayyo kasetidi odidoogaadan, GODAI gaammuwaa a gattiis; yaatin, gaammoi a mentterettidi woriis” yaagiis.

<sup>27</sup> Hegaappe guyyiyan cima bitanee ba naata, “Taayyo hariyaa koorite” yaagiis. Yaagin eti ayyo hariyaa kooridosona; <sup>28</sup> koorin bitanee kiyidi biis. Biidi ogiyan canggaraarida ahaanne ahaa matan eqqida hariyaanne gaammuwaa demmiis; gaammoi ahaa mibeenna woikko hariyaakka menttibeenna. <sup>29</sup> Hananabaa yootiya cima bitanee Xoossaa asa ahaa denttidi, hariyaa zokkuwan wottidi, yeekkanaanne mooganau guyye ba katamaa ekkidi ehiis. <sup>30</sup> Ehiidi bau makki wottido duufuwan ahaa wottiis; wottin a bolli, “Aayyee ta ishau! Aayyee ta ishau!” yaagidi yeekkididosona.

<sup>31</sup> Moogi simmidi ba naata hagaadan yaagiis; “Taani haiqqiyo wode, Xoossaa asi moogettido duufuwan tana moogite; ta meqettata a meqettata lanqqiyan wottite. <sup>32</sup> Aissi giikko, Beetele kataman de7iya yarshshiyosaa bollinne Samaariyaa kata-matun de7iya goinniyo xoqqa sohotu bolli GODAI azazin he bitanee waassidoogee tumu polettana” yaagiis.

### *Iyorbbaama Keettaa Asaa Xaissanau Gattida Nagaraa*

<sup>33</sup> Hegaappe guyyiyankka Iyorbbaami ba iita ogiyaappe simmibeenna; shin goinniyo xoqqa sohotuyyo ubba qommo asaappe qeeseta gujjidi sunttiis; qeese gidanau koyiya oonanne goinniyo xoqqa sohuwan wottiis. <sup>34</sup> Iyorbbaama keettaa asaa ongganaunne biittaa bollaappe xaissanau gattida nagarai heгаа.

## 14

### *Akiyi Iyorbbaama Bolli Hananabaa Yootiis*

<sup>1</sup> He wode Iyorbbaama na7ai Abiiyi harggiis. <sup>2</sup> Yaatin, Iyorbbaami ba keettaayyiyo, “Dendda; denddada neeni Iyorbbaama keettaayyiyo gidiyooqaa ooninne erenna mala, ne maayuwaa laamma; laammada Seelo ba. Taani ha asaa bolli kawotanaagaa taayyo yootida hananabaa yootiya Akiyi yan de7ees. <sup>3</sup> Tammu oittaa, amarida kompuwaanne issi oto eessaa ayyo ekkada akko ba. Bobare ha harggida na7ai hananabaa i neeyyo yootana” yaagiis.

<sup>4</sup> Yaagin Iyorbbaama keettaayyiya i giidoogaadan oottaasu; denddada Akiya soo Seelo baasu. Akiyi xeellanau danddayenna; i cimmido gishshau, a aifee demenna. <sup>5</sup> SHin GODAI Akiya, “Iyorbbaama keettaayyiya ba na7aa harggiyaabaa nena oichchanau yausu. Neeni iyyo hгаа hгаа yaagada oda. A ya gakkada hara maccaasa milatana” yaagiis.

<sup>6</sup> Hгаа gishshau, Akiyi maccaasiyaa penggen di77i di77iyooqaa siyidi hagaadan yaagiis; “Iyorbbaama keettaayee, ane haa gela. Aissi hagaadan hara asa milatadii? Taani iita wore neeyyo yootanau kiitettaas. <sup>7</sup> Neeni Iyorbbaamakko baada hagaadan yaaga; ‘GODAI Israa7eela Xoossai nena, “Taani nena asaa giddoppe xoqqissaas; ta asaa Israa7eela bolli nena kawoyaas. <sup>8</sup> Taani Daawita zariyaappe kawotettaa wotta ekkada, neeyyo immaas. SHin neeni ta ashkkaraa Daawita mala gidakka; i ta azazuwaa naagiisinne ta sinttan suurebaa xalaalaa oottiiddi, ba kumetta wozanan tana kaalliis. <sup>9</sup> Neepe kase de7ida ubbati oottidoogaappe dariya iitaa neeni oottadasa; neeni neeyyo hara xoossata, seerissido birataappe eeqata medhdhadasa. Yaatada tana hanqqetis-sadasa; tana neeppe guyye aattadasa.

<sup>10</sup> “ “Hгаа gaasuwan taani Iyorbbaama keettaa asau iitaa ehaana. Israa7eela biittan Iyorbbaama keettaa asaappe aille gidin goqa gidin, issi attumaasinne attennan xoqollana. Issi uri oshai wurana gakkanaashin kessiyooqaa, Iyorbbaama keettaa asaa taani wurssa kessana. <sup>11</sup> Iyorbbaama zare gididi kataman haiqqiya oonanne kanati maana; gaxariyan haiqqiyaageeta qassi saluwaa kafoti maana. Taani GODAI hгаа odaas!” yaagiis’ yaaga.

<sup>12</sup> “Nena gidikko, ha77i neeni denddada ne soo ba. Ne tohoi katamaa geliyo wode, na7ai haiqqana. <sup>13</sup> Israa7eela ubbai na7aayyo yeekkidi moogana; Iyorbbaama keettaa asan GODAA Israa7eela Xoossaa sinttan ha na7an lo77obai beettido gishshau, Iyorbbaama keettaa asaappe a xalaalai duufuwan moogettana.

<sup>14</sup> “Hгааappe guyyiyan Iyorbbaama keettaa asaa xoqolli xaissiya kawuwaa GODAI baayyo Israa7eela bolli denttana. <sup>15</sup> Haattaa giddon woshi qaxxiyoogaadan, GODAI he wode Israa7eelata shocidi qaattana. Asheero giyo xooseessi eti misiliyaa essidi, GODAA hanqqetissido gishshau, eta aawatuyyo i immido lo77o biittaaappe eta diggana; yaatidi eta Efiraaxiisa SHaafaappe hefinttan laalana. <sup>16</sup> Iyorbbaami oottido nagaraa

gishshaunne Israa7eela asaa i ootissido nagaraa gishshau, GODAI Israa7eela aggi bayana” yaaggiis.

<sup>17</sup> Hegaappe guyyiyan Iyorbbaama keettaayyiyaa denddada baada Tirxxa gakkasu. Gakkada keettaa pengge goccillaa yedhdhaanne na7ai haiqqi aggiis. <sup>18</sup> Ba ashkkaraa hananabaa yootiya Akiiya baggaara GODAI yootidoogaadankka a moogidosona; Israa7eela asai ubbai ayyo yeekkiis.

### *Iyorbbaama Haiquwaa*

<sup>19</sup> Iyorbbaami hanido harabai, a olatinne a aisuwaa maarati Israa7eela Kawotu Taarikiyaa Maxaafatun xaafetti uttidosa. <sup>20</sup> Iyorbbaami laatamanne naa77u laittaa kawotiis. Hegaappe guyyiyan haiqqidi ba maizzan gaittiis. A sohuwan a na7ai Nadaabi kawotiis.

### *Yihudaa Kawuwaa Robi7aama*

*(Hanidabaa Odiya Naa77antto Maxaafaa 11:5-12:15)*

<sup>21</sup> Solomona na7aa Robi7aami Yihudan kawotiis; Robi7aami kawotiyo wode laittai ayyo oitamanne isiino. GODAI ba sunntaa wottanau Israa7eela zaretu katamatu ubbaa gidoppe doorido Yerusalaame kataman Robi7aami tammanne laappun laitta kawotiis. A aayee sunntai Naa7imo; a Amoona biittaa asa. <sup>22</sup> Yihudaa asati GODAA sinttan iitabaa oottidosona; bantta oottido nagaran eti bantta aawatuppe aattidi GODAA qanaatissidosona. <sup>23</sup> Hegaa bollikka qassi eti banttau goinniyo xoqqa sohota, eeqa shuchchatanne Asheero giyo xoosee misileta xoqqa keratu ubbaa bollinne irxxa mittatu ubbaa garssan essidosona. <sup>24</sup> Harai attin eti goinniyo sohotun goino woga oottidi attumaasati attumaasatuura shaaramuxiyaageeti de7oosona. GODAI Israa7eelatu sinttaappe kessidi yedettido dere asati meezetido, he sheneyiya oosota ubbaa Israa7eela asati oottidosona.

<sup>25</sup> Robi7aami kawotido ichchashantto laittan Gibxxe Kawoi SHiishaaqi Yerusalaame katamaa bolli woraajjiis. <sup>26</sup> Woraajjidi GODAA Beeta Maqidasiyaaninne kawo keettan de7iya buquraa, Solomoni qoxissido worqqa gondalletuura ubbaa bonqqi ekkidi biis. <sup>27</sup> Yaatin, kawoi Robi7aami he gondalletu gishshaa nahaasiyaa birataappe hara gondalleta merissiis; merissidi eti naagidi wottana mala kawo keettaa penggiyaa naagiyaageetu halaqatuyyo immiis. <sup>28</sup> Kawoi GODAA Beeta Maqidasiyaa biyo wode ubban, naagiyaageeti gondalleta oiqqoosona. Hegaappe simmin eti zaaridi, naagiyaageetu keettan wottoosona.

<sup>29</sup> Robi7aami hanido harabainne i oottidobai ubbai Yihudaa Kawotu Taarikiyaa Maxaafan xaafetti uttiis. <sup>30</sup> Robi7aaminne Iyorbbaami ubba wode olettiiddi de7idosona. <sup>31</sup> Robi7aami haiqqidi ba maizzan gaittiis; i Daawita Kataman de7iya ba aawatu duufuwan moogettiis. A aayee sunntai Naa7imo; a Amoona biittaa asa. Robi7aama sohuwan a na7ai Abiiyi kawotiis.

## 15

### *Yihudaa Kawuwaa Abiiya*

*(Hanidabaa Odiya Naa77antto Maxaafaa 13:1-14:1)*

<sup>1</sup> Nabaaxa na7aa Iyorbbaami kawotido tammanne hosppuntta laittan Abiiyi Yihudan kawotiis. <sup>2</sup> Abiiyi Yerusalaamen heezzu laitta kawotiis. A aayiyaa Abeselooma na7ee na7iyo; i sunntai Maa7iko. <sup>3</sup> Appe kase a aawai oottido nagarata ubbaa oottiis; a wozanai a aawaa aawaa aawaa Daawita wozanai polo gididoogaadan GODAAYYO, ba Xoossaayyo polo gidibeenna. <sup>4</sup> Gidikonne, appe guyyiyan Yerusalaamen kawotana malanne Yerusalaame sarotettaa naagana mala, GODAI a Xoossai Daawita gishshau Abiiyassi issi attuma na7aa immiis. <sup>5</sup> GODAI haggaa oottido gaasotai, Daawiti GODAA sinttan suurebaa oottiis; Hiitiyaa Ooriyoona bolli nagara oottoorippe attin, ba de7o



laitta ubban GODAA azazotuppe issibaanne naagennan aggabeenna. <sup>6</sup> Abiiyi de7ido laitta ubban Robi7aama asaaranne Iyorbbaama asaara olettiiddi de7idosona.

<sup>7</sup> Abiiyi hanido harabainne i oottidobai ubbai Yihudaa Kawotu Taarikiyaa Maxaafan xaafetti uttiis. Abiiyinne Iyorbbaami olettiiddi de7idosona. <sup>8</sup> Abiiyi haiqqidi ba maizzan gaittiis; i Daawita Kataman moogettiis. A sohuwan a na7ai Asi kawotiis.

*Yihudaa Kawuwaa Asa  
(Hanidabaa Odiya Naa77antto Maxaafaa 15:16-16:6)*

<sup>9</sup> Israa7eela Kawoi Iyorbbaami kawotido laatamantto laittan Asi Yihudan kawotiis. <sup>10</sup> Asi Yerusalaamen oitamanne isiini laitta kawotiis. A aawaa aayee sunntai Maa7iko; a Abeselooma na7iyo. <sup>11</sup> Asi ba maizza aawai Daawiti oottidoogaadan, GODAA sinttan suurebaa oottiis. <sup>12</sup> Goino woga oottidi attumaasaara shaaramuxiya attumaasata Asi ba biittaappe xaissiis; appe kase de7ida kawoti medhdhido eeqa misileta ubbaa xoqolerettidi oliis. <sup>13</sup> A aawaa aayyiyaa Maa7ikakka Asheero giyo xooseessi tuna eeqa misiliyaa medhdhido gishshau, Kawuwaa Aayyiyo a geetettiyo bonchchuwaappe o diggiis. Asi he eeqa misiliyaa qanxxerettidi, Qediroona Zanggaaran xuuggiis. <sup>14</sup> Asi goinniyo xoqqa sohota xaissennan aggikkonne, i ba de7ido laitta ubban Xoossaassi wozanappe ammanettiya asa gididi de7iis. <sup>15</sup> Inne a aawai Xoossaayyo dummayi wottido biraa, worqqaanne hara miishshata ehiidi, GODAA Beeta Maqidasiyaa giddon wottiis.

<sup>16</sup> Yihudaa Kawoi Asinne Israa7eela Kawoi Baa7ishi, bantta kawotido laitta ubban olettidosona. <sup>17</sup> Israa7eela Kawoi Baa7ishi Yihudaa bolli woraajjiis; woraajjidi Yihudaa Kawuwaa Asa biittaappe ooninne gelennaadaaninne kiyennaadan teqqanau Raama katamaa yuushuwaa minttidi gimbbiis.

<sup>18</sup> Hegaa gaasuwan Kawoi Asi GODAA Beeta Maqidasiyaaninne ba kawo keettan attida worqqaanne biraa ubbaa kessidi, ba oosanchchatu kushiyan wottiis. Wottidi Heziyoona na7aa na7aa, Xabrimmoona na7aayyo, Damasqqo kataman de7iya Sooriyaa Kawuwaa Benihadaadayyo, imota oottidi yeddiis. Yeddiiddi hagaadan yaagiis; <sup>19</sup> “Kase ta aawaaranne ne aawaara maacettidoogaadan, ane tanaaranne nenaara maacettoos. Be7a, haga biraanne worqqa taani neeyyo imotaa immanau yeddaas. Israa7eela Kawoi Baa7ishi ba olanchchata ta biittaappe kessana mala, neeni kase aara maacettido maachchaa kola” yaagiis.

<sup>20</sup> Yaagin Benihadaadi Kawoi Asi giidoogaa maayidi, ba ola gadaawata Israa7eela katamata olanau yeddiis. Yeddin eti Iyoona, Daananne Aabeeli-Beetimaa7ika geetettiya katamata, Galiila Abbaa matan de7iya biittaa, Nifttaaleema biittaarakka gujjidi ubbaa xoonidosona. <sup>21</sup> Kawoi Baa7ishi hegaa siyidi, Raama katamaa gimbbiyoogaa aggiigidi, Tirxxa katamaa biis.

<sup>22</sup> Hegaappe guyyiyan Kawoi Asi Yihudan de7iya asaa ubbaa azaziis; azazin issoinne attennan denddidi, Baa7ishi kase yan go7ettiyo shuchchaanne mittaa Raamappe miyyidosona. Miyyin Kawoi Asi Mixiphphanne Biniyaama biittan de7iya Gebaa7a an minttidi gimbbiis.

<sup>23</sup> Asi hanido harabai, a minotettai ubbai, i oottidobai ubbainne i keexxido katamati Yihudaa Kawotu Taarikiyaa Maxaafan xaafetti uttidosa. SHin i cimido wode tohuwaa sakettiis. <sup>24</sup> Asi haiqqidi, ba maizzan gaittiis; ba maizza aawaa Daawita Kataman moogettiis. A na7ai Yoosaafixi a sohuwan kawotiis.

*Israa7eela Kawuwaa Nadaaba*

<sup>25</sup> Yihudaa Kawoi Asi kawotido naa77antto laitti Iyorbbaama na7ai Nadaabi Israa7eelan kawotiis; i Israa7eela biittan naa77u laitta kawotiis. <sup>26</sup> Nadaabi kase ba aawaa ogiyaanne Israa7eela asaa i ootissido a nagaraa ogiyan hemettidi, GODAA sinttan iitabaa oottiis.



<sup>27</sup> Yisaakoora zare gidida Akiiya na7ai Baa7ishi Nadaaba bolli maqettiis. He wode Nadaabinne a olanchchati Pilisxxeeman de7iya Gibbatoona katamaa dooddidi de7oosona. <sup>28</sup> Yihudaa Kawoi Asi kawotido heezzantto laittan Baa7ishi Nadaaba woriis; woridi a sohuwan i bau kawotiis. <sup>29</sup> Baa7ishi kawotaa doommosaarakka Iyorbbaama so asaa ubbaa wori wurssiis; GODAI Seeloppe yiida ba ashkkaraa hananabaa yootiya Akiiya baggaara yootidoogaadankka Iyorbbaama keettaa asai ubbai haiqqi wuriis. <sup>30</sup> Hegee hanidoogee Iyorbbaami ba huuphen oottido nagaraa gishshaassa, Israa7eela asaa i ootissido nagaraa gishshaassanne GODAA Israa7eela Xoossaa hanqquetissido gishshaassa.

<sup>31</sup> Nadaabi hanido harabainne i oottidobai ubbai Israa7eela Kawotu Taarikiyaa Maxaafan xaafetti uttiis. <sup>32</sup> Yihudaa Kawoi Asinne Israa7eela Kawoi Baa7ishi bantta kawotaa laitta ubban olettiiddi de7idosona.

### *Israa7eela Kawuwaa Baa7isha*

<sup>33</sup> Yihudaa Kawoi Asi kawotido heezzantto laittan Akiiya na7ai Baa7ishi Israa7eela asaa ubbaa bolli kawotiis; i Tirxxa kataman laatamanne oiddu laitta kawotiis. <sup>34</sup> Iyorbbaami Israa7eela asaa ootissido nagaraa oottidinne a ogiyan hemettidi, Baa7ishi GODAA sinttan iitabaa oottiis.

## 16

<sup>1</sup> Hanaana na7aa Yeehu baggaara GODAA qaalai Baa7ishabaa hagaadan yaagiiddi yiis; <sup>2</sup> “Taani nena buhiyaappe denttada ta asaa Israa7eela bolli halaqa kessaas; shin neeni Iyorbbaama ogiyan hemettadasa. Qassi ta asaa Israa7eela nagaraa ootissada, eta nagaran tana hanqquetissadasa. <sup>3</sup> Hegaa gishshau, be7a! Taani Baa7ishanne a keettaa asaa pittana hanais. Baa7ishaa, taani ne keettaa asaa Nabaaxa na7aa Iyorbbaama keettaa asaadan oottana. <sup>4</sup> Baa7isha zare gididi, kataman haiqqiya oonanne kanai maana; qassi gaxariyan haiqqiya oonanne saluwaa kafoti maana” yaagiis.

<sup>5</sup> Baa7ishi hanido harabai, i oottidobainne a minotettai Israa7eela Kawotu Taarikiyaa Maxaafan xaafetti uttiis. <sup>6</sup> Baa7ishi haiqqidi ba maizzan gaittiis; Tirxxa kataman moogettiis. A na7ai Eeli a sohuwan kawotiis. <sup>7</sup> GODAI hananabaa yootiya Yeehu baggaara Baa7isha bollinne a so asaa bolli he hananabaa yootido gaasoi Baa7ishi oottido nagaraa gishshaassanne Iyorbbaaminne a so asai oottidoogaadan, iitabaa oottidi, GODAA hanqquetissido gishshaassa. Qassi i Iyorbbaama so asaa ubbaa wori wurssido gishshaassa.

### *Israa7eela Kawuwaa Eela*

<sup>8</sup> Yihudaa Kawoi Asi kawotido laatamanne usuppunta laittan Baa7isha na7ai Eeli Israa7eelan kawotiis. Tirxxa kataman i naa77u laitta kawotiis. <sup>9</sup> Kawuwaa ola gadaawatuppe issuwaa gididi, a paraa gaaretuppe baggaa azaziya Zimiri kawuwaa bolli maqettiis. Kawoi Eeli he wode Tirxxan de7iya kawo keettau aawatiya Arxxa son Tirxxan mattotti uttiis. <sup>10</sup> Yihudaa Kawoi Asi kawotido laatamanne laappunta laittan Zimiri Arxxa soo gelidi kawuwaa woriis; woridi a sohuwan bau kawotiis.

<sup>11</sup> Zimiri kawotidi, kawotaa araatan uttosaarakka Baa7isha so asaa ubbaa woriis. Baa7ishayyo dabbo gidin lagge gidin issi attumaasanne paxa ashshibeenna. <sup>12</sup> Hananabaa yootiya Yeehu baggaara GODAI Baa7isha bolli haasayido qaalaadan Zimiri Baa7isha so asaa ubbaa wori xaissiis. <sup>13</sup> Hegee hanidoogee Baa7ishinne a na7ai Eeli bantta eeqau goinnidi, oottido nagaraa ubbaa gaasuwaaninne Israa7eela asaa ootissido nagaraa gaasuwan, GODAA, Israa7eela Xoossaa hanqquetissido gishshaassa.

<sup>14</sup> Eeli hanido harabainne i oottidobai ubbai Israa7eela Kawotu Taarikiyaa Maxaafan xaafetti uttiis.

### *Israa7eela Kawuwaa Zimira*

<sup>15</sup> Yihudaa Kawoi Asi kawotido laatamanne laappuntta laittan Zimiri Tirxxan laappun gallassa xalaalaa kawotiis. He wode Israa7eela olanchchati Gibbatoona giyo Pilisxxeema katamaa dooddidi uttidosona. <sup>16</sup> Dooddi uttida Israa7eelati Zimiri kawuwaa bolli maqettidi a woridoogaa siyido wode, ola gadaawaa Omira he gallassikka he sohuwan Israa7eela kawo kessidi kawoyidosona. <sup>17</sup> Omirinne aara de7iya Israa7eela asai ubbai Gibbatoona katamaappe kiyidi biidi, Tirxxa katamaa dooddidosona. <sup>18</sup> Katamai ohettiichchidoogaa be7ido wode, Zimiri kawo keettaa gidдон de7iya qatuwaa gelidi, kawo keettan tamaa oittiis; yaatidi ikka haiqqiis. <sup>19</sup> Hegee hanidoogee Iyorbbaami oottido nagaraanne Israa7eela asaa ootissido nagaraa kaallidi, Zimiri GODAA sinttan iitabaa oottido gishshaassa.

<sup>20</sup> Zimiri hanido harabainne i maqqido maqqoi Israa7eela Kawotu Taarikiyaa Maxaafan xaafetti uttiis.

### *Israa7eela Kawuwaa Omira*

<sup>21</sup> He wode Israa7eela asai naa77u kiyidi shaahettiis. Asaappe baggai Ginaata na7aa Tiibina kawoyanau koyin, baggai qassi Omira kawoyanau koyiis. <sup>22</sup> SHin Omira maaddiya asai Ginaata na7aa Tiibina maaddiya asaappe minniis. Hegaa gishshau, Tiibini haiqqin Omiri kawotiis.

<sup>23</sup> Yihudaa Kawoi Asi kawotido hasttamanne isiinintta laittan Omiri Israa7eela asaa bolli kawotiis. Kawotidi tammanne naa77u laittaa haariis; hegaappe usuppun laittaa Tirxxan haariis. <sup>24</sup> Omiri Samaariyaa giyo keraa SHemeera giyo bitaniyaappe usuppun sha7u xaqara biran shammiis; shammidi issi katamaa an keexxiis. Yaatidi he katamaa kase he keraa godaa sunttan Samaariyaa giidi sunttiis.

<sup>25</sup> SHin Omiri GODAA sinttan iitabaa oottiis; i baappe kase de7ida kawotu ubbatuppekka aadhdhiya nagaraa oottiis. <sup>26</sup> Nabaaxa na7ai Iyorbbaami oottido nagaraanne Israa7eela asaa ootissido nagaraa Omiri kaalliis; he eeqau goinniyo hanotai GODAA Israa7eela Xoossaa hanqqetissiis.

<sup>27</sup> Omiri hanido arabai, i oottidobainne a minotettaa Israa7eela Kawotu Taarikiyaa Maxaafan xaafetti uttiis. <sup>28</sup> Omiri haiqqidi ba maizzan gaittiis; Samaariyaa kataman moogettiis. A na7ai Akaabi a sohuwan kawotiis.

### *Israa7eela Kawuwaa Akaaba*

<sup>29</sup> Yihudaa Kawoi Asi kawotido hasttamanne hospuntta laittan Omira na7ai Akaabi Israa7eelan kawotiis; Omira na7ai Akaabi Samaariyaa kataman Israa7eela bolli laatamanne naa77u laitta kawotiis. <sup>30</sup> Omira na7ai Akaabi baappe kase wode de7ida kawotu ubbatuugaappekka aadhdhiya iitabaa GODAA sinttan oottiis. <sup>31</sup> Nabaaxa na7ai Iyorbbaami oottido nagaraa oottiyoogaa laafabaa giidi qoppiyoogaa xalaala gidennan Sidoonatu Kawuwaa Etiba7aala na7iyo Elzzaabeelo bau machcho ekkidi, Ba7aala giyo eeqau oottanaunne au goinnanau doommiis. <sup>32</sup> Samaariyaa kataman i keexissido Ba7aala Eeqaa Keettan Ba7aalayyo yarshshiyooosaa keexxiis. <sup>33</sup> Qassi Akaabi Asheero giyo xoosee misiliyaa essidi, baappe kase de7ida kawotu ubbatuppe aattidi GODAA Israa7eela Xoossaa hanqqetissiya nagaraa oottiis.

<sup>34</sup> Akaaba kawotettaa wode Beeteleppe yiida Hii7eela giyo issi bitanee Yarkko katamaa zaarettidi keexxiis. Nawe na7aa Yaasu baggaara GODAI odidoogaadan, Hii7eeli Yarkko keexxanau baasiyo wode, Abiiraama giyo a baira na7ai haiqqiis; qassi penggiyaa aattiyo wode Saguba giyo a wurssetta kaalo na7ai haiqqiis.

## 17

### *Eelaasi Iri Xayanaagaa Odiis*

<sup>1</sup> Gala7aaden Tishbbe giyoosaappe yiida, hananabaa yootiya Eelaasa giyo issi bitanee Kawuwaa Akaaba hagaadan yaagiiis; “Taani ayyo oottiyo GODAI Israa7eela Xoossai ero!

Ha sinttaara yiya laittatun taani odennan de7ishin, sa7an iri bukkenna woikko xaazi xaazatenna” yaagiis.

<sup>2</sup> Hegaappe simmin GODAA qalalai hananabaa yootiya Eelaasakko yiidi a hagaadan yaagiis; <sup>3</sup> “Hegaappe denddada arshsho baggi ba; yan Yorddaanoosa SHaafaappe arshsho baggaara de7iya Kariita SHaafaa matan qosetta. <sup>4</sup> Neeni he shaafaappe haattaa uyana; qooraaseti nena he sohuwan qumaa mizanaadan taani eta azazaas” yaagiis. <sup>5</sup> Yaagin Eelaasi GODAI giidoogaa oottiis; Yorddaanoosa SHaafaappe arshsho baggaara de7iya Kariita SHaafaa biidi, yan uttiis. <sup>6</sup> Maalladonne omarssi qooraaseti oittaaanne ashuwaa Eelaasayyo ehoosona; haattaakka shaafaappe uyees. <sup>7</sup> Biittan iri bukkenna gishshau, guutta wodiyaappe guyyiyan shaafai meliis.

### *Eelaasanne Siraafitan De7iya Am77iyo*

<sup>8</sup> Hegaappe guyyiyan GODAA qalalai Eelaasakko yiidi, a hagaadan yaagiis; <sup>9</sup> “Ha sohuwaappe denddada, Sidoona matan de7iya Siraafiti ba; baada yan de7ashsha. Issi am77e maccaasiyaa nena qumaa mizanaadan taani azazaas” yaagiis.

<sup>10</sup> Yaagin Eelaasi denddidi Siraafiti biis; i biidi katamaa penggiyaakko gakkiiyo wode, issi am77e maccaasiyaa mittaa mixausu. Eelaasi mishiriyo xeesidi, “Hayyanaa, tau uyanau haatta bulen ekka yarkkii” yaagiis. <sup>11</sup> Mishiriyaa haattaa ehaanau biishin i xeesidi, “Hayyanaa guutta baso oittakka ekkada yarkkii” yaagiis.

<sup>12</sup> Yaagin mishiriyaa ayyo, “GODAI ne Xoossai ero! Taayyo oitti baawa. Taayyo otuwan issi kuuchcha xiilleenne xaaruwan qii zaite xalaalai de7ees. Taani haggaa yiidoogee guutta mitta mixada, soo simmada, hinnokka taayyoonne ta na7aayyo issitoo uukkanaassanne miidi haiqqanaassa” yaagaasu.

<sup>13</sup> Yaagin Eelaasi mishireeyyo, “Aikko baa, yayyoppa; baada neeni giidoogaadan ootta. SHin kasetada ne xiilliyaaappe guutta komppuwaa komppada taayyo ekka ya; hegaappe simmada neeyyoonne ne na7aayyo komppa. <sup>14</sup> Aissi giikko, GODAI Israa7eela Xoossai, ‘Sa7aa bollan GODAI iraa bukissana gakkanaashin, xiillee otuwaappe wurenna; zaiteekka xaaruwaappe coroshettenna’ yaagees” yaagiis.

<sup>15</sup> Heggaa gishshau, mishiriyaa baada, Eelaasi yootidoogaadan oottaasu; hegan Eelaasi, mishiriyaanne i so asai ubba gallassi qumaa miidosona. <sup>16</sup> Aissi giikko, GODAI Eelaasa baggaara yootido qaalaa naagidi, otuwaappe xiillee wuribeennanne xaaruwaappe zaiteekka coroshettibeenna.

<sup>17</sup> Guutta wodiyaappe guyyiyan he keettaa godee na7ai harggiis; harggee goobi goobidi bin, wurssettan na7ai shemppuwaa teqettidi haiqqiis. <sup>18</sup> Yaatin, mishiriyaa Eelaasa, “Xoossaa asoo, neeni tana morkkiyoobi aibiinee? Neeni ta nagaraa hassayissada ta na7aa woranau yaadii?” yaagaasu.

<sup>19</sup> Yaagin Eelaasi o, “Ne na7aa taayyo hamma” yaagiis. Na7aa i kiyuwaappe ekkidi, pude ba de7iyo pooqiyaa efiis; efiidi ba arssan zin77issiis. <sup>20</sup> Yaatidi GODAAYYO hagaadan yaagidi waassiis; “Abeet GODAU, ta Xoossau, qassi ha taani de7iyo mishiree am77ee na7aa worada, i bollakka meto ehai?” yaagiis. <sup>21</sup> Hegaappe simmidi na7aa bolli heezzutoo zaqullidi, GODAAYYO hagaadan yaagidi waassiis; “Abeet GODAU, ta Xoossau, ha na7aa shemppuwaa zaara” yaagiis.

<sup>22</sup> Yaagin GODAI Eelaasa waasuwaasiyiis. Na7aa shemppoikka simmin, na7ai paxiis. <sup>23</sup> Eelaasi na7aa ekkidi pooqiyaaappe duge wodhdhiis; na7aa aayeeyyo immidi hagaadan yaagiis; “Be7a, ne na7ai paxiis” yaagiis.

<sup>24</sup> Hegaappe guyyiyan mishiriyaa Eelaasa, “Neeni Xoossaa asa gididoogaanne ne doonaappe odettiya GODAA qalalai tuma gididoogaa taani ha77i eraas” yaagaasu.

<sup>1</sup> Irai xayooſappe heezzantto laittan, unddenna aginai aadhhdhin GODAI Eelaasa, “Ba; baada Kawuwaa Akaabayyo beetta. Taani ha biittan iraa bukissana” yaagiis. <sup>2</sup> Yaagin Eelaasi Akaabayyo beettanau denddidi biis.

He wode Samaariyan wolqqaama koshai de7ees. <sup>3</sup> Akaabi ba keettau aawatiya Obaadiyaa xeesiis. Obaadee GODAA minttidi ammaniya asa. <sup>4</sup> Elzzaabeela GODAA sunttan hananabaa yootiyaageeta worissiyo wode, Obaadee etappe xeetata ekkidi, ishatamaa ishatamaa shaakkidi, gonggolotu gidдон qosidi, kattaa miziiddi haattaakka ushshiiddi wottiis.

<sup>5</sup> Akaabi Obaadiyaa xeesidi, “Biittan sa7an pulttoi de7iyoosaa ubbaanne shaafaa qoco ubbaa ba. Ooni erii, nuuni maataa demmidi paratanne baqulota worenna ashshanaakkonne” yaagiis. <sup>6</sup> Yaagin eti biittaa shaakki shaakki ekkid, Akaabi issi ogiyaa oiqqidi barkka biis; qassi Obaadeekka hara ogiyaa oiqqidi barkka biis.

<sup>7</sup> Obaadee ba ogiyaa oiqqidi biishin, Eelaasi aara gaittiis. Gaittin Obaadee Eelaasa eridi ba som77uwan gufannidi, “Ta godau Eelaasaa, hagee neneeyye?” yaagiis.

<sup>8</sup> Yaagin Eelaasi ayyo, “Ee tana. Neeni baada, ‘Eelaasi hagan de7ees’ yaagada ne godaassi oda” yaagiis.

<sup>9</sup> Yaagin Obaadee Eelaasayyo, “Taani nena ai naaqqiinee neeni tana ne ashkkaraa haiqqo gaada Akaaba kushiyan aatta immiyoi? <sup>10</sup> GODAI ne Xoossai ero! Ta godai nena koyissanau kiittibeenna deree woikko kawotetti mulekka baawa. Eti, ‘Eelaasi hagan baawa’ yaagiyo wode, neeni hegan bannaagee tuma gidiyooſaa eranau Akaabi deriyaa haariyaageeta caaqettiis. <sup>11</sup> Ha77i neeni tana, ‘Baada ne godaayyo, “Eelaasi hagan de7ees” yaagada yoota’ yaagaasa. <sup>12</sup> Taani nena yeggada baanne, GODAA Ayyaanai nena denttidi, taani erenna sohuwaa efaana. Taani Akaabayyo yootin, i nena demmana xayikko, tana worana. Taani ne ashkkarai naatettaappe doommada GODAAYYO yayyiya asa. <sup>13</sup> Elzzaabeela GODAA sunttan hananabaa yootiyaageeta worissiyo wode, taani etappe xeetaa ekkada, ishatamaa ishatamaa issi gonggoluwana qosada, qumaa mizaasinne haattaakka ushshaas. Yaatin, ha taani oottidobai neeyyo ta godaayyo odettibeenneeyye? <sup>14</sup> Ha77i qassi neeni tana, ‘Baada ne godaayyo, “Eelaasi hagan de7ees” yaagada yoota’ yaagaasa. Yootikko i tana worana” yaagiis.

<sup>15</sup> Yaagin Eelaasi a, “Taani ayyo azazettiyo, Ubbaappe Wolqqaama GODAI ero! Tuma taani hachchi Akaabayyo beettana” yaagiis.

<sup>16</sup> Obaadee Akaabaara gaittanau biis; biidi Akaabayyo yootiis. Yootin Akaabi Eelaasaara gaittanau biis. <sup>17</sup> Akaabi Eelaasa be7ido wode, “Israa7eela biittaa aatta yeggiyaagee, laa hagee nenee?” yaagiis.

<sup>18</sup> Yaagin Eelaasi Akaaba, “Israa7eela biittaa aatti yeggiyai tana gidikke. GODAA azazuwaa aggidi, Ba7aala eeſatussi goinnidi, biittaa aatti yeggiyai nenanne ne aawaa so asaa. <sup>19</sup> Ha77i Israa7eela asaa ubbaa Qarmmeeloosa Deriyaa taakko shiishsha; qassi Elzzaabeeli maaddaappe miya hananabaa yootiyaageeta ubbaa etaara issippe he sohuwaa shiishsha. Hegeetikka Ba7aala sunttan hananabaa yootiya oiddu xeetanne ishatamatanne Asheeri sunttan hananabaa yootiya oiddu xeetata” yaagiis.

<sup>20</sup> Hega gishshau, Akaabi kiittidi, Israa7eela asaa ubbaanne hananabaa yootiyaageeta Qarmmeeloosa Deriyaa shiishshiis. <sup>21</sup> Eelaasi shiiqida asaakko biidi, “Aude gakkanaashin naa77u qofan buuteetii? GODAI Xoossaa gidikko, a kaallite; gidennan Ba7aala gidikko, ini akka kaallite” yaagiis. Yaagin asai ayyo qaalanne qaattennan sirphphi giis.

<sup>22</sup> Hegaappe guyyiyan Eelaasi asaayyo hagaadan yaagiis; “GODAA sunttan hananabaa yootiyaageetuppe ta xalaalai attas; shin Ba7aala sunttan hananabaa yootiyaageeti oiddu xeetanne ishatama. <sup>23</sup> Ane nuuyyo naa77u korima boorati imettona. He korimatuppe issuwaa eti doorona; korimaa shukkidi qanxxerettona; yaatidi ashuwaa mittaa bolli wottona; shin tamaa eettoppona. Taanikka naa77antto



korimaa giigissada, mittaa bolli wottana; taanikka tamaa eettikke. <sup>24</sup>Intte intte xoossaa sunntaa xeesite; taanikka GODAA sunntaa xeesana. Xeesin koyidi, yarshshuwaa miya tamaa kiittiya xoossai Xoossaa gido” yaagiis.

Yaagin asai, “Hagee lo77o qofa” yaagidi maayiiis.

<sup>25</sup>Hegaa gishshau, Eelaasi Ba7aala sunntan hananabaa yootiyaageeta, “Intte cora gidiyo gishshau, issi korimaa doori ekkidi, kasetidi giigissite. Yaatidi intte xoossaa sunntaa xeesite; shin an tamaa eettoppita” yaagiis.

<sup>26</sup>Eti banttau imettida korimaa ekkidi giigissidosona.

Maalladoppe seeta gallassi gakkanaashin, Ba7aala sunntaa xeesidi, “Hai Ba7aalaa, nu woosaa siya” yaagidi woossidosona. SHin siyettiya cenggurssi baawa; issi asinne koyibeenna. Yaatin, bantta giigissido yarshshiyooosaa yuuyi aadhdhidi duridosona.

<sup>27</sup>Sa7ai seeta gallassa gidin, Eelaasi eta bolli, “Intte qaalaa xoqqu oottidi woossite! I xoossa gidennee! Ooni erii, i qofan sheekkidaakko, woikko au oosoi daridaakko, woikko manddaridaakko, woikko xiskkidabaa gidikko denttanau koshshees!” yaagidi qilliicciis.

<sup>28</sup>Yaagin bantta qaalaa xoqqu oottidi woossidosona. Qassi kase bantta goinniyo wogaadan bantta bollaara suuttai goggana gakkanaashin tooraaninne mashshan bant-tana caddidosona. <sup>29</sup>Yarshshuwaa shiishshiyoo omarsai gakkanaashin eti hegaadan haniiddi, hananabaa yootoosona; shin siyettiya cenggurssi baawa. Etabaa ezggidi zaaro immiyaabi issoinne baawa.

<sup>30</sup>Yaatin, Eelaasi asaa ubbaayyo, “Haa taakko shiiqite” yaagiis. Yaagin asai akko shiiqin, GODAASSI yarshshiyooosai qolettichchidaagaa zaarettidi gimbbiis. <sup>31</sup>GODAA qaalai Yaaqoobakko yiidi, “Ne sunntai Israa7eela gidana” yaagidi yootido Yaaqooba naatu zaretu goodaadan Eelaasi tammanne naa77u shuchchata ekkiis. <sup>32</sup>Ekkidi GODAA sunntaayyo he shuchchatun yarshshiyooosaa gimbbiis. Gimbbidi tammanne oiddu litiro haattaa tigin ekkiya ollaa yarshshiyooosaa yuushuwan bookkiis.

<sup>33</sup>Hegaappe guyyiyan yarshshiyooosaa bolli mittaa giigissi wottidi, korimaa ashuwaa a qommuwan qommuwan qanxxerettidi, mittaa bolli wottiis. Wottidi asata, “Oiddu baattatun haattaa kunttidi, xuuggana yarshshuwaa bollinne mittaa bolli gussite” yaagiis; yaagin eti gussidosona. <sup>34</sup>Yaatin, Eelaasi asata, “Naa77anttuwaakka gujjite” yaagiis; yaagin eti naa77anttuwaakka gujjidosona.

Qassikka Eelaasi asata, “Heezanttuwaakka gujjite” yaagiis; yaagin heezant-tuwaakka gujjidosona. <sup>35</sup>Haattai yarshshiyooosaa yuushuwan goggiis; goggidi ollan haattai kumiis.

<sup>36</sup>Omarssa yarshshuwaa shiishshiyoo wodee gakkinn, hananabaa yootiya Eelaasi yarshshiyooosaa shiiqidi hagaadan yaagidi woossiis; “Abeet GODAU, Abrahaama Xoos-sau, Yisaaqa Xoossau, Israa7eela Xoossau, neeni Israa7eela biittan Xoossa gidiy-oogeenne, taanikka ne ashkkara gidiyooogeenne, qassi taani haggaa ubbaa ne qaalan oot-tiyoogee hachchi eretto. <sup>37</sup>Abeet GODAU, koya! Neeni GODAI Xoossaa gidiyooogaanne neeni eta wozanaa neekko zaaraidda de7iyooogaa ha asati eranaadan neeni taayyo koya!” yaagiis.

<sup>38</sup>Yaagin GODAA tamai wodhdhidi, xuuggiyo yarshshuwaa, mittaa, shuchchaanne biittaa miis; ollaa gidдон de7iya haattaakka laacchiis. <sup>39</sup>Asai ubbai hegaa be7ido wode, bantta som77uwan gufannidi, “GODAI Xoossaa! GODAA xalaalai Xoossaa!” yaagidosona.

<sup>40</sup>Hegaappe guyyiyan Eelaasi eta, “Ba7aala sunntan hananabaa yootiyaageeta oiqqite. Etappe issi asinne kessi ekkidi booppo” yaagiis. Yaagin eta oiqqidosona; Eelaasi eta Qiishoona SHaafaa efidi woriis.



<sup>41</sup> Eelaasi Akaaba, “Kiyada ba; baada ma uya. Aissi giikko, wolqqaama iraa gunttai siyettees” yaagiis. <sup>42</sup> Hegaa gishshau, Akaabi maanaunne uyanau biis. SHin Eelaasi Qarmmeloosa Deriyaa xeeru kiyiis; kiyidi ba som77uwa ba gulbbatatu giddo duge gelissidi gufanniis.

<sup>43</sup> Hegaappe guyyiyan Eelaasi ba ashkkaraa, “Ba; pude kiyada ane abbaakko zaarada xeella” yaagiis.

Yaagin a ashkkarai biidi xeelliis; xeellidi ayyo, “Aibinne baawa” yaagiis.

Eelaasi ba ashkkaraa laapputon, “Qassikka ane xeella” yaagiis.

Yaagin ashkkarai laapputoo xeelliis. <sup>44</sup> Laappuntto xeelan, “Be7a, asa kushe keena shaarai abbaappe kiyiis” yaagiis.

Yaagin Eelaasi ba ashkkaraa, “Ba; baada Akaaba, ‘Irai nena beettaa diggennaadan, ne paraa gaariyan uttada, duge ne soo wodhdha’ yaaga” yaagiis.

<sup>45</sup> Guutta keenaa gam77ishin, saloi shaaraa dulkkiis; carkkoikka carkkiis; wolqqaama iraiikka bukkiis. Akaabi paraa gaariyan uttidi Iziraa7eela katamaa biis.

<sup>46</sup> GODAA wolqqai Eelaasa bolli wodhdhiis; Eelaasi kaabbaa qabattuwan pude sirqqidi, Iziraa7eela katamaa gakkanaashin Akaabappe sinttatidi woxxiis.

## 19

### *Eelaasi Siinaa Deriyaa Biis*

<sup>1</sup> Eelaasi oottidobaa ubbaanne Ba7aala sunttan hananabaa yootiyaageeta ubbaa bisuwan i waati woridaakko Akaabi Elzzaabeeliyyo yootiis. <sup>2</sup> Yootin Elzzaabeela, “Neeni he hananabaa yootiyaageeta oottidoogaadan, wontto hannoode taani nena oottana xayikko, xoossati tana worona” yaagada Eelaasassi kiittaasu.

<sup>3</sup> Yaatin, Eelaasi ba shemppuwau yayyidi, Yihudaa biittan de7iya Berssaabehe yaas. Ba ashkkaraa hegan yeggiis; <sup>4</sup> yeggidi barkka issi gallassa ogiyaa bazuwan hemettiis. Hemettiiddi biidi issi sankkaaraa kuwan uttidi, “Abeet GODAU, taayyo gidana; taani ta maizza aawatuppe kehikke. Ta shemppuwaa ekka” yaagidi haiqqanau woossiis.

<sup>5</sup> Hegaappe guyyiyan sankkaaraa kuwan zaqqullidi xiskkiis; xiskkidaashin issi kiitanchchai a bochchidi, “Dendda; denddada ma” yaagiis. <sup>6</sup> Yaagin denddidi i xeelliyo wode, ho77o shuchchaa mishuwan uukettida komppoo oittainne oto haattai a huuphes-san de7iyaagaa be7iis. Be7idi miidi uyiis; yaatidi guyye zin77iis. <sup>7</sup> GODAA kiitanchchai naa77anttuwaakka yiidi Eelaasa bochchidi, “Neeni baana ogee daro adussa gidiyo gishshau, denddada ma” yaagiis.

<sup>8</sup> Yaagin Eelaasi denddidi miisinne uyiis. He i miido kattaa wolqqan Xoossaa deriyaa Siinaa gakkanaashin, oitamu gallasaanne oitamu qammaa hemettiis. <sup>9</sup> He sohuwan de7iya gonggoluwaa giddo gelidi aqiis.

GODAI a, “Eelaasaa; hagan ai oottai?” yaagiis.

<sup>10</sup> Yaagin Eelaasi, “Ubbaappe Wolqqaama GODAAYO Xoossaayyo taani daroppe mishettaas. Aissi giikko, Israa7eela asai nenaara maacettido maachchaa kanttiis; neeyyo yarshshiyooosaakka qoliis; ne sunttan hananabaa yootiyaageetakka bisuwan woriis. Yaatin, taani tarkka attaas; ha77i eti ta shemppuwaakka ekanau koyoosona” yaagiis.

<sup>11</sup> Yaagin GODAI a, “Hegaappe kiyada baada, deriyaa huuphiyan ta sunttan eqqa” yaagiis. Yaagin Eelaasi eqqidaashin GODAI a mataara kanttiis. He wode mino wolqqaama carkkoi deriyaa phalqquerettiis; zaallataakka kinchcherettiis; shin GODAI he carkkuwaa giddon baawa. Carkkuwaappe simmin biittai qaaxxiis; shin GODAI he biittaa qaattankka baawa. <sup>12</sup> Biittaa qaattaappe simmin tamai kiyiis; shin GODAI tamaa giddon baawa. Tamaappe simmin saasukettaa siyettiis. <sup>13</sup> Eelaasi he saasukettaa siyido wode, ba som77uwa kaabban kammiis. Yaatidi kare kiyidi gonggoluwaa penggen eqqiis.

Eelaasakko cenggurssai yiidi, “Eelaasaa, hagan ai oottai?” yaagiis.

<sup>14</sup> Yaagin Eelaasi, “Ubbaappe Wolqqaama GODAAYYO Xoossaayyo taani daroppe mishettaas. Aissi giikko, Israa7eela asai nenaara maacettido maachchaa kanttiis; neeyyo yarshshiyooosaakka qoliis; ne sunttan hananabaa yootiyaageetakka bisuwan woriis. Yaatin, taani tarkka attaas; ha77i eti ta shemppuwaakka ekkanau koyoosona” yaagiis.

<sup>15</sup> Yaagin GODAI Eelaasa, “Neeni yiidosaaara simmada, Damasqqo bazzuwaa ba. Baada yaa gakkada, Hazaa7eeli Sooriyaa bolli kawotanaadan tiya. <sup>16</sup> Qassi Nimisha na7ai Yeehu Israa7eela bolli kawotanaadan tiya. Ne sohuwan hananabaa yootanaadan Aabeeli Mahoolappe yiida SHafaaxa na7aa Elssaa7a tiya. <sup>17</sup> Hazaa7eela bisuwaappe kessi ekkiya ubbaa Yeehu worana; qassi Yeehu bisuwaappe kessi ekkiya ubbaa Elssaa7i worana. <sup>18</sup> Ba7aalayyo gulbbatibeenna woikko bantta doonan Ba7aala eeqaa yeribeenna laappun sha7u asaa taani Israa7eelan taayyo ashshana” yaagiis.

### *Eelaasi Elssaa7a Xeesiis*

<sup>19</sup> Eelaasi he sohuwaappe denddidi biidi, SHafaaxa na7ai Elssaa7i tammanne naa77u waaxa booran gadiyaa goyiyaagaa demmiis; tammanne naa77antta waaxaa Elssaa7i ba huuphen oiqqidi goyees. Goyishin Eelaasi a achchaara aadhdhiiddi, ba kaabbaa a maizziis. <sup>20</sup> Elssaa7i boorata yeggi aggi, Eelaasa geeduwaa woxxidi, “Taani ta aawaanne ta aayyiyo saruwan gaada, yera ekkada, hegaappe simmada, nena kaallana” yaagiis.

Yaagin Eelaasi Elssaa7a, “Ba. Taani neeyyo ai oottidanaa?” yaagiis.

<sup>21</sup> Hegaa gishshau, Elssaa7i aggidi guyye simmiis. Simmidi waaxa boorata shukkiis; boora miishshaa qeri eettidi ashuwaa doissis; doissido ashuwaa aattin asai miis. Hegaappe guyyiyan denddidi biidi, Eelaasassi oottiis.

## 20

### *Sooree Samaariyaa Oliis*

<sup>1</sup> Sooriyaa Kawoi Benihadaadi ba olanchchata ubbaa issippe shiishshiiis. Hasttamanne naa77u kawotun, eta paratuuninne paraa gaaretun maadettidi, pude biidi Samaariyaa katamaa dooddiis; dooddidi a bolli woraajjiis. <sup>2</sup> Woraajjidi Israa7eela Kawuwaa Akaabassi katama giddo asaa kiittidi hagaadan yaagiis; <sup>3</sup> “Benihadaadi, ‘Ne birainne ne worqqai tabaa ne maccaasatuppenne ne naatuppe lo77uwaa dariyaageeti tabaa’ yaagees” yaagiis.

<sup>4</sup> Yaagin Israa7eela kawoi zaaridi, “Ee, ta godau kawuwau, neeni giidoogaakka mala; taanikka taayyo de7iyaabaikka ubbai nebaa” yaagiis.

<sup>5</sup> Qassikka kiittetida asati naa77anttuwaa yiidi, “Nena Benihadaadi, ‘Taani kase nena, ‘Ne biraanne ne worqqaa, ne maccaasaanne ne naata taayyo sheedhdhaasa” gaada kiittaa. <sup>6</sup> SHin wontto hannode ne keettaanne ne oosanchchatu keettaa pilggi xeellana mala ta oosanchchata yeddana. Eti neeni payyabaa gaada wottidobaa ubbaa ekkidi efaana’ yaagees” yaagidosona.

<sup>7</sup> Yaagin Israa7eela kawoi he biittaa cimata ubbaa xeesi shiishshidi, “Ha bitanee nuna bashshanau koyiyooogaa be7ite. I ta maccaasatanne ta naata, ta biraanne ta worqqaa ekkanau kiittiis; kiittin taani au ixxisi gabeikke” yaagiis.

<sup>8</sup> Yaagin cimatikka asaikka ubbai Akaaba, “I odiyoobaa siyoppa! Woikko ayyo, ‘Eeno’ gooppa!” yaagidosona.

<sup>9</sup> Hegaa gishshau, Benihadaadi kiittidoogeetuyyo Akaabi, “Intte ta godaassi kawuwaassi, ‘Neeni koiro kiittido kiitaa taani polana; shin ha kiitaa taani polanau danddayikke’ yaagees giidi odite” yaagiis.

Yaagin kiittetidi yiidaageeti biidi hega Benihadaadayyo odidosona. <sup>10</sup> Hegaappe guyyiyan Benihadaadi hara kiitaa yeddidi, “Tana kaalliya asaa Samaariyaa katamaa buhee issi issi kuuchcha gakkikko, xoossati tana worona” yaagiis.

<sup>11</sup> Yaagin Israa7eela kawoi kiitettidi yiidaageeta, “Tumu olanchchi olaappe simmi-iddi gaireesippe attin, biron biiddi gaireenna’ yaagidi odite” yaagiis.

<sup>12</sup> Benihadaadinne kawoti, bantta dunkkaaniyaa gidдон ushshaa uyiiddi heгаа siyido wode, kawoi ba olanchchata, “Olanau salppite” yaagidi azaziis. Azazin eti katamaa olanau salppidosona.

<sup>13</sup> He wode hananabaa yootiya issi bitanee Israa7eela Kawuwaa Akaabakko yiidi, “GODAI nena hagaadan yaagees; ‘Ha kenchcho olanchchata ubbaa be7ai? Taani hachchi eta ne kushiyan aattada immana; immobare taani GODAA gidiyoogaa neeni hegan erana’ yaagees” yaagiis.

<sup>14</sup> Akaabi, “Olaa doommanai oonee?” yaagiis.

Yaagin hananabaa yootiyaagee, “Auraajjaa haariyaageeti azaziyo yelaga olanchchati doommana” yaagiis.

Yaagin kawoi, “Attiya olanchchata oonee azazanai?” yaagiis.

Yaagin hananabaa yootiyaagee, “Neeni azazana” yaagiis.

<sup>15</sup> Hegaа gishshau, Akaabi auraajjaa haariyaageeti azaziyo yelaga olanchchata, naa77u xeetanne hasttamanne naa77ata shiishshiis. Qassi attida Israa7eela asaa, laappun sha7aa shiishshiis.

<sup>16</sup> Benihadaadi bana maaddida hasttamanne naa77u kawotuura issippe dunkkaaniyan uttidi ushshan mattottidaashin, seeta gallassi Israa7eela olanchchati olau kiyidosona. <sup>17</sup> Auraajjaa haariyaageeti azaziyo yelaga olanchchati koiro kiyidi biidosona.

Benihadaadi xomoosiyaageeta kiittin, eti simmidi ayyo, “Samaariyaappe asai kiyidi yiiddi de7ees” yaagidi odiis.

<sup>18</sup> Odin i, “Eti sigau yiikkokka olau yiikkokka, eta paxa oiqqite” yaagiis.

<sup>19</sup> Auraajjaa haariyaageeti azaziyo yelaga olanchchati salppidi, katamaappe gaxi kiyidosona; Israa7eela olanchchatikka eta kaallidi kiyidosona. <sup>20</sup> Ubbatika huuphiyan huuphiyan banttanaara olaа gaittida morkkiyaa woridosona. Yaatin, Sooriyaa asati baqatidosona; baqatin Israa7eela asati kaallidi yedettidosona. Qassi Sooriyaa Kawoi Benihadaadi ba paraasatuura ba paran kessi ekkidi biis. <sup>21</sup> Israa7eela kawoi olau kiyidi, paratanne paraа gaareta omooddiis; Sooriyaa asat akka woruwaa buttiis.

<sup>22</sup> Hegaappe guyyiyan hananabaa yootiyaagee Israa7eela kawuwaakko yiidi, “Ba; baada ne bagгаа mintta. Minttada, oosettanau bessiyaabi aibakko akeeka. Aissi giikko, yiya laitti bone Sooriyaa kawoi nena naa77anttuwaakka olana” yaagiis.

### *Sooreti Naa77anttuwaakka Olidosona*

<sup>23</sup> Hegaadan de7ishin Sooriyaa kawuwaa oosanchchati a hagaadan yaagidi zori-dosona; “Eta xoossati deretu xoossata; eti nuuyyo wolqqaamidoikka hegaassa. SHin nuuni etaara dembban olaа gaittiyaakko, nuuni tumu etappe minnana. <sup>24</sup> Issibaa hana; kawota ubbaa eti azaziyoosaappe diggada, hara halaqata eta sohuwan wotta. <sup>25</sup> Nuuni Israa7eelatuura dembban olettanaunne xoonanau danddayana mala, neeyyo kase wurida olanchchatu sohuwan olanchchata, paratu sohuwan parata, paraа gaaretu sohuwan paraа gaareta wottada, denttanau koshshees” yaagidosona. Yaagin ikka eta zoriyaa maayidi, hegaadan oottiis.

<sup>26</sup> Yiya laitti bone Benihadaadi Sooriyaa olanchchata shiishshidi, Israa7eelatuura olettanau Afeeqa giyo katamaa biis. <sup>27</sup> Israa7eela olanchchatikka shiiqidi, shin-qqiyaanne ola miishshaa ekkidi, etaara olaа gaittanau naa77u cita gididi kiyidosona. Kiyidi Israa7eelati naa77u guutta deeshsha wude malatidi, etakko simmidi uttidosona; shin Sooreti gaxariyaa ubbaa maayidosona.

<sup>28</sup> Xoossaa asa giyo issi bitanee pude yiidi, Israa7eela kawuwaa, “GODAI hagaadan yaagees; ‘Sooriyaa asati, “GODAI deretu Xoossaa gidiyoogaappe attin dembbatu Xoossaa gidenna” yaagido gishshau, ha kenchchechcha olanchchata ubbaa taani ne

kushiyan aatta immana. He wode taani GODAA gidiyoojaa neeninne ne asai erana' yaagees" yaagiis.

<sup>29</sup> Sooretinne Israa7eelati issoi issuwaakko simmidi salppidi, laappun gallassaa takkidosona. Laappunnta gallassan olaa gaittidosona; gaittin Israa7eelati issi gallassan Sooriyaa asaappe xeetu sha7u tohuwaasata woridosona. <sup>30</sup> Etappe attidaageeti kessi ekki biidi, Afeeqa katamaa gelidosona. Gelidaageetuppe laatamanne laappun sha7u asaa bolli katamaa yuushuwaa gimbee kunddidi yan woriis.

Benihadaadikka he katamau baqatidi, issi qol77uwan qosettiis. <sup>31</sup> A oosanchchati a, "Israa7eela kawoti maariyaageeta gidiyoojaa nuuni siyida. Waaruwaa nu shayan maayidi, wodoruwaa nu qooriyan xaaxidi, ane Israa7eela kawuwaakko boos. Ooni erii, i nena paxa ashshanaakkonne" yaagidosona. <sup>32</sup> Yaagidi waaruwaa bantta shayan maayidi, wodoruwaa bantta qooriyan xaaxidi, Israa7eela kawuwaakko biidosona. Biidi a, "Ne ashkkarai Benihadaadi nena, 'Hai tana woropparkkii' yaagees" yaagidosona.

Yaagin kawoi, "I hanno gakkanaashinkka paxa de7ii? I ta ishaa" yaagiis.

<sup>33</sup> Asati lo77o malaatadan a haasayaa ellelli ekkidi, "Ee, ne ishai Benihadaadi paxa de7ees" yaagidosona.

Yaagin i eta, "Biidi a taakko ekkidi yiite" yaagiis. Benihadaadi kiyidi yin, Akaabi a pude ba para gaariyaa bolli kessidi utissiis.

<sup>34</sup> Yaatin, Benihadaadi Akaaba hagaadan yaagiis; "Ta aawai ne aawaappe ekkido katamata taani neeyyo zaarana. Ta aawai Samaariyan giyaa essidoogaadan neenikka Damasqqo kataman giyaa essana" yaagiis.

Yaagin Akaabi a, "Taani ha maachchan nena yeddana" yaagiis. Yaagidi aara maachchaa maacetidi a yeddiis.

### *Akaaba Bolli Hananabai Odettiis*

<sup>35</sup> Hananabaa yootiyaageetu citaappe issi bitanee GODAA qaalan azazettidi issi ba laggiiyaa, "Tana shoca" yaagiis; shin he bitanee shocennan ixxiis. <sup>36</sup> Ixxin hananabaa yootiyaagee a, "Neeni GODAAYYO azazettennan ixxido gishshau, neeni taappe shaahettada baanne sohuwaarakka nena gaammoi worana" yaagiis. Yaagin bitanee hananabaa yootiyaagaappe shaahetti baanne sohuwaarakka gaammoi gaittidi wori bayiis.

<sup>37</sup> Hananabaa yootiyaagee qassikka hara issi bitaniyaa demmidi, "Tana shoca" yaagiis. Yaagin bitanee a shociis; shocin hananabaa yootiyaagee masunxxiis.

<sup>38</sup> Masunxxidi biidi, kawuwaa naagiiddi ogiyaa doonan eqqiis. Erettannan attanau ba som77uwaa gooziiis. <sup>39</sup> Kawoi ogiyaara kanttiyo wode, hananabaa yootiyaagee kawuwaa xeesidi hagaadan yaagiis; "Taani ne ashkkarai olan olettishin issi bitanee taakko yiidi, 'Ha omoodettida bitaniyaa naaga. Ha bitanee baqatiyaabaa gidikko, ne shemppoi a shemppuwaara gada, woikko heezzu sha7u xaqara biraa gumiyaa qanxxaasa' yaagiis. <sup>40</sup> Yaagin taani ne ashkkarai osoi darin, yaanne haanne giishin, bitanee kessi ekkidi biichchiis" yaagiis.

Yaagin Israa7eela kawoi, "Neeni nerikka pirddadasa; ne pirddaikka heгаа gidana" yaagiis.

<sup>41</sup> Hananabaa yootiyaagee ba som77uwaa goozido carqqiyaa pooshshi yeggiis. Pooshshin i hananabaa yootiyaageetuppe issuwaa gidiyoojaa kawoi sohuwaarakka eriiis. <sup>42</sup> Hananabaa yootiyaagee kawuwaayyo, "GODAI, 'Taani, 'I haiqqana bessees" giido bitaniyaa neeni yedda aggadasa. Hegaa gishshau, ne shemppoi a shemppuwaara gada; ne asai a asaara gada' yaagees" yaagiis. <sup>43</sup> Yaagin Israa7eela kawoi yiillotiiddinne lancciiddi, ba soo Samaariyaa katamaa biis.

## 21

### *Naabute Woiniyaa Turaa Sohuwaa*



<sup>1</sup> Iziraa7eeliyaa Naabutessi Samaariyaa Kawuwaa Akaaba keettaa matan Iziraa7eelan woiniyaa turaa sohoi de7ees. <sup>2</sup> Akaabi Naabuta, “Ta keettaa matan de7iyo gishshau, taani taayyo ataakiltte soho oottanau taayyo ne woiniyaa turaa sohuwaa imma. A gishshaa neeyyo taani hara lo77o woine turaa sohuwaa immana; woikko neeni dosikko, a waagaa taani neeyyo qanxxana” yaagiis.

<sup>3</sup> Yaagin Naabutee Akaabayyo, “Taani ta aawatuppe laattido gadiyaa tana neeyyo imissiyaabaappe GODAI ashsho” yaagiis.

<sup>4</sup> Iziraa7eeliyaa Naabutee, “Taani ta aawatuppe laattido gadiyaa neeyyo immikke” giido gishshau, Akaabi yiillotidinne lanccidi ba soo biis. Biidi ba hiixan godaakko simmi zin77idi, qumaa meennan ixxiis.

<sup>5</sup> A maccaasiyaa Elzzaabeela akko gelada, “Neeni haggaa keeni aibissi yiillotadii? Aibissi qumaa meennan ixxai?” yaagada oichchaasu.

<sup>6</sup> Oichchin Akaabi iyyo, “Iziraa7eeliyaa Naabuta taani, ‘Ne woiniyaa turaa sohuwaa taayyo baizza; woikko ne dosikko, a gishshaa taani neeyyo hara woiniyaa turaa sohuwaa immana’ yaagin, i, ‘Ta woiniyaa sohuwaa neeyyo immikke’ yaagiis. Taani heggaa gishshau yiillotaas” yaagiis.

<sup>7</sup> A maccaasiyaa Elzzaabeela a, “Neeni Israa7eela bolli kawo gidaidda hagaadan hanai? Dendda; denddada ma! Wozanappe ufaitta! Iziraa7eeliyaa Naabute woiniyaa turaa sohuwaa taani neeyyo immana” yaagaasu.

<sup>8</sup> Heggaa gishshau, maccaasiyaa Akaaba sunttan dabddaabbeta xaafada, a maatafan attamaasu; attamada Naabuteera issippe kataman de7iya cimatuuyoonne gita asatuuyyo kiittaasu. <sup>9</sup> He dabddaabbeta hagaadan yaagada xaafaasu; “Issi gallassau xoomaa awaajjite; yaatidi asaa giddon Naabuta bonchcho sohuwan utissite. <sup>10</sup> Utissidi naa77u pattenna asata a sinttan utissite. He asati, ‘Naabutee Xoossaanne kawuwaa cayiis’ yaagidi markkattanaadan oottite. Hegaappe guyyiyan gaxi kessidi, shuchchan caddidi worite” yaagada xaafaasu.

<sup>11</sup> Heggaa gishshau, Naabuteera issippe kataman de7iya cimatinne gita asati Elzzaabeela etau xaafido dabddaabbetun giidoogaadan oottidosona. <sup>12</sup> Eti xoomaa awaajjidi, Naabuta asaa giddon bonchcho sohuwan utissidosona. <sup>13</sup> Hegaappe guyyiyan naa77u pattenna asati yiidi, akko simmi uttidi, asaa sinttan, “Naabutee Xoossaanne kawuwaa cayiis” yaagidi wordduwaa markkattidosona. Markkattin Naabuta katamaappe gaxi kessidi, shuchchan caddidi woridosona.

<sup>14</sup> Hegaappe guyyiyan cimati Elzzaabeelikko kiittidi, “Naabutee shuchchan cadettidi haiqqiis” yaagidosona.

<sup>15</sup> Naabutee shuchchan cadettidi haiqqidoogaa Elzzaabeela siyosaarakka, Akaaba, “Iziraa7eeliyaa Naabutee neeyyo miishshan baizzanau ixxido woiniyaa turaa sohuwaa denddada baada, neeyyo ekka. I ha77i paxa de7enna; haiqqiichchiis” yaagaasu.

<sup>16</sup> Iziraa7eeliyaa Naabutee haiqqidoogaa Akaabi siyidi, Naabute woiniyaa turaa sohuwaa bau ekkanau denddidi, duge biis.

<sup>17</sup> Hegaappe guyyiyan Tishbbiyaa Eelaasakko GODAA qalalai yiidi, <sup>18</sup> “Samaariyan kawotida Israa7eela Kawuwaa Akaabaara gaittanau duge wodhdha. I ha77i Naabute woiniyaa turaa sohuwaa ekkanau biidi, yan de7ees. <sup>19</sup> Neeni a hagaadan yaaga; ‘GODAI nena, “Bitaniyaa worada, a gadiyaa neeyyo ekkadasa gidikkii?” yaagees’ yaaga. Qassikka a, ‘GODAI nena, “Naabute suutta kanati laaccido sohuwan ne suuttaakka kanati laaccana” yaagees’ yaaga” yaagiis.

<sup>20</sup> Hegaappe guyyiyan Akaabi Eelaasa, “Hai ta morkkiyau, tana demmarggadii?” yaagiis.

Yaagin, “Ee, taani nena demmarggaas; aissi giikko, neeni GODAA sinttan iitabaa oottanau, ne huuphiyaa nagaraassi baizzadasa. <sup>21</sup> GODAI nena hagaadan yaagees; ‘Siya, taani ne bolli iitabaa ehaana. Taani ne zereetta xaissana; taani Israa7eela biittan



Akaaba keettaa asaappe aille gidin goqa gidin, issi attumaasinne attennan xoqollana. <sup>22</sup>Taani ne so asaa Nabaaxa na7aa Iyorbbaama so asaadaaninne Akiiya na7aa Baa7isha so asaadan oottana. Aissi giikko, neeni Israa7eela asaa nagaraa ootissada, tana hanqqetissadasa' yaagees. <sup>23</sup>Qassi GODAI Elzzaabeelibaa yootiiddi, 'Iziraa7eela katamaa gimbbiyaa lanqqen kanati Elzzaabeelo maana' yaagees. <sup>24</sup>Akaaba zare gididi kataman haiqqiya oonanne kanai maana; qassi gaxariyan haiqqiya oonanne saluwaa kafoti maana" yaagiis.

<sup>25</sup>Ba maccaasiyaa Elzzaabeela denttettin, GODAA sinttan iitabaa oottanau ba huuphiyaa nagaraassi baizzida, Akaaba mala asi mulekka baawa. <sup>26</sup>GODAI Israa7eela asaa sinttappe laaggidi kessido Amooretudan eeqau goinniyoogan Akaabi aadhdhiya sheneyiyaabaa haniis.

<sup>27</sup>Akaabi ha haasayaa siyido wode, ba maayuwaa pooshshidi, waaruwaa maayiiis; yaatidi xoomiis. Waaruwaa maayosaara zin77iis; azzaniiddi hemettiis.

<sup>28</sup>Hegaappe guyyiyan GODAA qalalai Tishbbiyaa Eelaasakko yiidi, <sup>29</sup>"Akaabi ba huuphiyaa ta sinttan kaushshidoogaa be7adii? I ta sinttan ba huuphiyaa kaushshido gishshau, taani ha bashshaa a wodiyan ehiikke. SHin taani a na7aa wodiyan a so asaa bolli ha bashshaa ehaana" yaagiis.

## 22

### *Hananabaa Yootiya Mikaayi Akaabayyo Xoonettiyoogaa Odiis (Hanidabaa Odiya Naa77antto Maxaafaa 18:2-27)*

<sup>1</sup>Sooreenne Israa7eeli olettannan heezzu laittaa saro de7idosona. <sup>2</sup>Heezzantto laittan Yihudaa Kawoi Yoosaafixi Israa7eela kawuwaa be7anau biis. <sup>3</sup>Biidaashin Israa7eela kawoi ba ashkkaratuyyo, "Gala7aaden de7iya Raamoota katamai nuugaa gidiyooaanne nuuni hanno gattanau he katamaa Sooriyaa kawuwaappe wotti ekkanaa ainne oottibeennaagaa erekkeitii?" yaagiis. <sup>4</sup>Qassikka i Yoosaafixa, "Gala7aaden de7iya Raamoota katamaa olanau tanaara buutee?" yaagiis.

Yaagin Yoosaafixi Israa7eela kawuwaa, "Ee, neeni olaa baanau giigiyo wode audenne, taani giigana. Ta olanchchati ne olanchchatu mala; ta paratikka ne paratu mala" yaagiis. <sup>5</sup>Qassikka Yoosaafixi Israa7eela kawuwaa, "Gidikkonne, neeni kasetada GODAA oichcha" yaagiis.

<sup>6</sup>Yaagin Israa7eela kawoi hananabaa yootiya oiddu xeetu asata issippe shiishshidi, "Gala7aaden de7iya Raamoota katamaa olanau booyye booppoo?" yaagidi eta oichchiis.

Oichchin eti, "Ba; aissi giikko, GODAI he katamaa kawuwaa kushiyan aattidi immana" yaagidosona.

<sup>7</sup>SHin Yoosaafixi, "Nuuni GODAA oichchanau danddayiyo hananabaa yootiya hara asi hagan baawee?" yaagiis.

<sup>8</sup>Yaagin Israa7eela kawoi Yoosaafixassi zaaridi, "Nuuni a baggaara GODAA oichchanau danddayiyo issi hara bitanee de7ees; i Yimila na7aa Mikaaya. SHin taani a ixkais; aissi giikko, i ubba wodekka tabaa iitabaa yooteesippe attin lo77obaa yooti erenna" yaagiis.

Yaagin Yoosaafixi Israa7eela kawuwaa, "Kawoi hegaadan gooppo!" yaagiis.

<sup>9</sup>Hegaappe guyyiyan Israa7eela kawoi ba oosanchchatuppe issuwaa xeesidi, "Yimila na7aa Mikaaya eesuan ekkada ya" yaagiis.

<sup>10</sup>Israa7eela kawoinne Yihudaa Kawoi Yoosaafixi bantta kawotaa maayuwaa maayidi, Samaariyaa katamaa geliyo penggiyaa matan de7iya audiyan bantta kawotaa araatan uttidosona; uttin hananabaa yootiya ubbati eta sinttan hananabaa yootoosona. <sup>11</sup>Etappe issi, Kanaa7ina na7ai Xidiqee birataappe kaceta giigissidi, Akaaba, "GODAI hagaadan yaagees; 'Sooreti xayana gakkanaashin neeni eta ha kacetun qaicana'

yaagees” yaagiis. <sup>12</sup> Hananabaa yootiya hara ubbatikka, “Gala7aaden de7iya Raamoota katamaa ba; baada ola; oladakka xoonaa. Aissi giikko, GODAI he katamaa kawuwaa kushiyan aattidi immana” yaagidi yootidosona.

<sup>13</sup> Hegaappe guyyiyan Mikaaya xeesanau kiitetti biida bitanee a, “Be7a, hananabaa yootiya ubbati issi doona gididi, ‘Kawoi ha olaa xoonana’ yaagidi yootidosona. Hegaa gishshau, hayyanaa ne odoikka etappe issuwaagaa mala gido; neenikka lo77obaa oda” yaagiis.

<sup>14</sup> SHin Mikaayi he bitaniyaa, “GODAI ero! GODAI taayyo yootiyoojaa taani yootana” yaagiis.

<sup>15</sup> Mikaayi kawuwaakko yiido wode, kawoi a, “Mikaayaa, nuuni Gala7aaden de7iya Raamoota katamaa olanau boniiyye boopponii?” yaagidi oichchiis.

Oichchin Mikaayi kawuwaa, “Ba; baada ola; oladakka xoonaa. GODAI he katamaa kawuwaa kushiyan aattidi immana” yaagiis.

<sup>16</sup> Yaagin kawoi a, “Neeni GODAA sunttan tumaappe attin harabaa taayyo odenaan taani nena aapputoo caaqqetanau koshshii?” yaagiis.

<sup>17</sup> Yaagin i, “Israa7eela olanchchati ubbai henttanchchi bainna dorssatudan deriyan laalettidaageeta taani be7aas. GODAI eta, ‘Hageetuyyo godi baawa. Eti ubbaikka bantta soo bantta soo saro boona’ yaagees” yaagiis.

<sup>18</sup> Yaatin, Israa7eela kawoi Yoosaafixa, “ ‘I tabaa iitabaa yootelesippe attin, lo77obaa yooti erenna’ gaada, taani neeyyo yootabeikkinaa?” yaagiis.

<sup>19</sup> Mikaayi gujjidikka hagaadan yaagiis; “Simmi GODAI giyoobaa siya! GODAI ba kawotaa araatan uttin, saluwaa olanchchati ubbai a ushachchaaranne haddirssaara eqqidaageeta taani be7aas. <sup>20</sup> GODAI, ‘Akaabi Gala7aaden de7iya Raamoota katamaa biidi, yan haiqqanaadan balettana oonee?’ yaagiis. Yaagin issoi hagaadan giyo wode, harai qassi hegaadan giis. <sup>21</sup> Hegaappe guyyiyan issi ayyaanai kiyidi GODAA sinttan eqqidi, ‘Taani a balettana’ yaagiis.

<sup>22</sup> “Yaagin GODAI ayyaanaa, ‘Waata balettuutee?’ yaagiis.

“Yaagin ayyaanai, ‘Taani kiyada baada, ayyo hananabaa yootiyaageetu ubbatu doonan worddotiya ayyaana gidana’ yaagiis.

“Yaagin GODAI, ‘Ee, neeni a balettana; neeyyo hegee hanana. Ba; baada baletta’ yaagiis” yaagiis.

<sup>23</sup> Mikaayi gujjidikka, “Hegaa gishshau, GODAI neeyyo hananabaa yootiyaageetu hageetu ubbatu doonan worddotiya ayyaanaa wottiis; aissi giikko, GODAI ne bolli bashshaa ehaanau qachchiis” yaagiis.

<sup>24</sup> Hegaappe guyyiyan Kanaa7ina na7ai Xidiqee shiiqidi, Mikaaya qinxalliyyaa baqqiis. Baqqidi, “GODAA Ayyaanai ta achchappe waanidi neeyyo odanau biidee?” yaagiis.

<sup>25</sup> Yaagin Mikaayi a, “Neeni qosettanau qol77o geliyo gallassi hegae demmana” yaagiis.

<sup>26</sup> Hegaappe guyyiyan Israa7eela kawoi ba olanchchatuppe issuwaa azaziiddi, “Mikaaya oiqqaa; oiqqada katamaa haariya Amoonayyoonne ta na7aa Yo7aashayyo efaada imma. <sup>27</sup> Immada eta, ‘Kawoi inttena, ‘Ha bitaniyaa qasho keettan qachchite. Qachchidi taani saro simmana gakkanaashin, qii oittaappenne haattaappe harabaa aibanne ayyo immoppite’ yaagees’ yaaga” yaagiis.

<sup>28</sup> Yaagin Mikaayi a, “Tumu neeni saro simmiyaabaa gidikko, GODAI tanan haasay-ibeenna” yaagiis. Qassikka Mikaayi, “Asau ubbau, taani yootidobaa akeekite” yaagiis.

### *Akaaba Haiquwaa*

*(Hanidabaa Odiya Naa77antto Maxaafaa 18:28-34)*

<sup>29</sup> Hegaappe guyyiyan Israa7eela kawoinne Yihudaa Kawoi Yoosaafixa Gala7aaden de7iya Raamoota katamaa biidosona. <sup>30</sup> Israa7eela kawoi Yoosaafixa, “Taani

maayuwaa laammada, hara asa malatada, olau gelana; shin neeni ne kawo maayuwaa maaya” yaagiis. Yaagin Israa7eela kawoi maayuwaa laammidi, hara asa malatidi, olau geliis.

<sup>31</sup> Sooriyaa kawoi ba paraa gaareta azaziya hasttamanne naa77u asata, “Gitatin guuxxin hara asa onaarakka olettoppite; Israa7eela kawuwaa xalaalaa olettite” yaagidi azaziis.

<sup>32</sup> Paraa gaariyaa azaziyaageeti Yoosaafixa be7ido wode, “Tuma hagee Israa7eela kawuwaa” yaagidosona. Yaagidi aara olettanau simmidosona; simmin Yoosaafixi waassiis. <sup>33</sup> Waassin paraa gaareta azaziyaageeti i Israa7eela kawuwaa gidennaagaa be7idi, a yedettiyoogaa aggiigidosona.

<sup>34</sup> Issi bitanee coo ba wonddafiyaa olanchchatu bolli dukkidi, Israa7eela kawuwaa olaa maayoi gaittiyo kayyiyaara caddiis. Caddin Israa7eela kawoi ba gaariyaa laaggiya bitaniyaa, “Gaariyaa guyye zaarada, tana olaa gidduwaappe kessa. Aissi giikko, taani iita cachcha cadettaichchaas” yaagiis. <sup>35</sup> He gallassi olai suulliyo wode, Israa7eela Kawoi Akaabi ba paraa gaariyaa gidдон zemppidi, Sooretu sinttan takkiis. A cachcha suuttai paraa gaariyaa gidдо gukkin, he omarsikka i haiqqi bayiis.

<sup>36</sup> Awai wullanau matishin olanchchatu gidдон, “Asai ubbai ba katamaa ba katamaa bo! Asai ubbai ba biitti ba biitti bo!” yaagiya azazoi kiyiis.

<sup>37</sup> Hegaappe guyyiyan eti kawuwaa Samaariyaa katamaa ehiidi yan moogidosona.

<sup>38</sup> SHaaramuxati meecettiyo, dagatti uttida Samaariyaa haattan eti gaariyaa meeccidosona. GODAI kase haasayido qaalaadankka, a suuttaa kanati laaccidosona.

<sup>39</sup> Akaabi hanido harabai, i oottidobai ubbai, danggarssaa zaaliyan kawo keettaa i keexxidobainne i gimbbido katamatubai ubbai Israa7eela Kawotu Taarikiyaa Maxaafan xaafetti uttiis. <sup>40</sup> Akaabi haiqqidi ba maizzan gaittiis; a sohuwan a na7ai Akaaziyaasi kawotiis.

### *Yihudaa Kawuwaa Yoosaafixa*

#### *(Hanidabaa Odiya Naa77antto Maxaafaa 20:31-21:1)*

<sup>41</sup> Israa7eela Kawoi Akaabi kawotido oiddantto laittan Asa na7ai Yoosaafixi Yihudan kawotiis. <sup>42</sup> I kawotiyo wode laittai ayyo hasttamanne ichchasha; i Yerusalaamen laatamanne ichchashu laitta kawotiis. A aayiyaa SHiiliha na7iyo Azuubo geetettausu.

<sup>43</sup> Yoosaafixi ba aawaa Asa ogiyan ubban hemettiis; i he ogiyaappe sher77i gibeenna; GODAA sinttan suurebaa oottiis. Gidikkonne, goinniyo xoqqa sohota xaissibeenna; asai he sohotun yarshshuwaa yarshshiyooaanne ixaanaa cuwayiyoogaa aggibeenna.

<sup>44</sup> Yoosaafixikka Israa7eela kawuwaara sigettiis.

<sup>45</sup> Yoosaafixi hanido harabai, a minotettainne i olettido olai Yihudaa Kawotu Taarikiyaa Maxaafan xaafetti uttiis. <sup>46</sup> Goino woga oottidi attumaageeti attumaageetuura shaaramuxiyaageeta, a aawai Asi kawotido wodiyaappe attidaageeta biittaappe xaissiis.

<sup>47</sup> He wode Eedooma biittan kawoi baawa; he biittaa sunttettida halaqai haariis.

<sup>48</sup> Ofiira biitti biidi worqqa ehaanaadan Yoosaafixi gita markkabeti medhdhiis; shin he markkabeti Eexiyooni-Gaabiran meqerettidosonappe attin mulekka bibookkona.

<sup>49</sup> He wode Akaaba na7ai Akaaziyaasi Yoosaafixa, “Ta ashkkarati ne ashkkaratuura issippe markkabiyan boona” yaagiis; shin Yoosaafixi ixxiis.

<sup>50</sup> Yoosaafixi haiqqidi ba maizzan gaittiis. Ba maizza aawaa Daawita Kataman moogettiis. A sohuwan a na7ai Yoraami kawotiis.

### *Israa7eela Kawuwaa Akaaziyaasa*

<sup>51</sup> Yihudaa Kawoi Yoosaafixi kawotido tammanne laappuntta laittan Akaaba na7ai Akaaziyaasi Israa7eela bolli Samaariyan kawotiis; Israa7eela bolli naa77u laitta kawotiis. <sup>52</sup> Akaaziyaasi GODAA sinttan iitabaa oottiis; ba aawaanne ba aayee ogiyaaninne Israa7eela asaa nagaraa ootissida Nabaaxa na7aa Iyorbbaama ogiyan

hemettiis. <sup>53</sup> Akaaziyaasi Ba7aalayyo oottiisinne goinniis. A aawai kase ootti-  
doogaadan, GODAA, Israa7eela Xoossaa i hanqqetissiis.

## Kawotu Maxaafaa Naa77anttuwaa

### *Gidduwaa Erissuwaa*

Kawotu Maxaafaa naa77antto shaahoi, Kawotu Maxaafaa koiro shaahoi eqqidosaaappe doommidi, naa77u Israa7eela kawotettatubaa yootees. Maxaafaa naa77u waanna waanna kifiletun shaakkidi xeellana danddayoos.

1. Kiristtoosa yeletaappe kase uddufuntto xeetu laittau baggaappe doommidi biidi, Kiristtoosa yeletaappe kase laappun xeetanne laatamanne isiini laittan huuphessa bagga kawotettai kunddana gakkanaashin de7iya naa77u kawotettatu taarikiyaa,
2. Israa7eela kawotettaa kunddettaappe biidi, Kiristtoosa yeletaappe kase ichchashu xeetanne hosppun tammanne usuppun laittan Kawoi Naabukadanaxoori Yerusalaame katamaa oiqqidi laalido wodiya gakkanaashin de7iya Yihudaa kawotettaa taarikiyaa. Maxaafai Gadaalee Baabiloona haaruwaa garssan Yihudaa biittaa haariyaagaa gididoogaanne Yihudaa kawoi Yo7aakiini Baabiloona qasho keettaappe kiyidoogaa qonccissi odidi, taarikiyaa wurssees.

Ha bashsha ubbai Israa7eela bolli yaanau danddayidoogee Yihudaanne Israa7eela kawotinne asai Xoossaassi ammanettiyo ammanaatuwaa pacissido gishshataassa. Yerusalaame katamai laalettidoogeenne Yihudaa asaappekka dariya baggai ba biittaappe betidoogee, Israa7eela asaa taarikee biyo ginna laammanaadan ootida gaasotuppe waannatiyaageeta.

Kawotu maxaafan naa77antto shaahuwan daro erettida asi Eelaasa sohuwan hananabaa yootiyaagaa kiyida Elssaa7a.

### *Eelaasanne Kawuwaa Akaaziyaasa*

<sup>1</sup> Akaabi haiqqidoogaappe guyyiyan, Moo7aaba biittaa asai Israa7eela bolli denddiis.

<sup>2</sup> He wode Kawoi Akaaziyaasi Samaariyaa kataman bolla pooqiyaa baranddaappe kunddidi deshettiis. Hegaa gishshau asata, “Biite; biidi, taani ha deshettaappe paxanaakko, agganaakko, Eqiroona katamaa xoossaa Bi7eeli-Zeebula ane tau oichchite” yaagidi kiittiis.

<sup>3</sup> SHin GODAA kiitanchchai Tishbbiyaa Eelaasa hagaadan yaagiis; “Ba; pude baada, Samaariyaa kawoi kiittido asataara gaitta. Gaittada eta, ‘Intte Eqiroona katamaa xoossaa Bi7eeli-Zeebula oichchanau biidoogee, Israa7eelan Xoossi xayiineeyye?’ yaaga.

<sup>4</sup> Hegaa gishshau, GODAI hagaadan yaagees; ‘Kawuwau, neeni haiqqanaappe attin, ha zin77ido hiixaappe denddakka’ yaagees” yaagiis. Yaagin Eelaasi biidi, etayyo odiis.

<sup>5</sup> Kiittido asati kawuwaakko guyye simmin, i eta, “Aissi simmidetii?” yaagidi oichchiis.

<sup>6</sup> Oichchin eti ayyo hagaadan yaagidi zaaridosona, “Issi bitanee nunaara gaittanau yiidi, ‘Inttena kiittida kawuwaakko simmidi biite. Biidi ayyo hagaadan yaagite; “GODAI nena, ‘Eqiroona xoossaa Bi7eeli-Zeebula oishissanau neeni asaa kiittiyoogee, Israa7eelan Xoossi xayiineeyye? Hegaa gishshau, neeni haiqqanaappe attin, ha zin77ido hiixaappe denddakka’ yaagees” yaagite’ yaagiis” yaagidosona.

<sup>7</sup> Yaagin kawoi eta, “Inttenaara gaittanau yiidi, ha yohuwaa intteyyo yootida bitanee ai mala asee?” yaagidi oichchiis.

<sup>8</sup> Oichchin eti, “Mehiyaa ikisiyan dadettida kaabbaa maayidi, ba xeessan dafuwaa gixxees” yaagidi zaaridosona.

Yaagin i, “Hegee Tishbbiyaa Eelaasa” yaagiis.

<sup>9</sup> Hegaappe guyyiyan, kawoi hamssaalaqaa a ishatamu olanchchatuura kiittiis. Kiitin halaqai keraa huuphiyan uttida Eelaasakko pude kiyidi, “Xoossaa asoo, kawoi nena, ‘Duge wodhdha’ yaagees” yaagiis.



<sup>10</sup> SHin Eelaasi hamssaalaqaayyo, “Taani Xoossaa asa gidikko, tamai saluwaappe wodhdhidi, nenanne ne ishatamatanne mo” yaagidi zaariis. Yaagin tamai saluwaappe wodhdhidi, hamssaalaqaanne a ishatamatanne miis.

<sup>11</sup> Qassi kawoi hara ishatamu olanchchatuura hara hamssaalaqaa Eelaasakko kiittiis. Kiittin hamssaalaqai Eelaasa, “Xoossaa asoo, kawoi nena, ‘Eesuwan duge wodhdha’ yaagees” yaagiis.

<sup>12</sup> Yaagin Eelaasi ayyo, “Taani Xoossaa asa gidikko, tamai saluwaappe wodhdhidi, nenanne ne ishatamatanne mo” yaagiis. Yaagin Xoossaa tamai saluwaappe wodhdhidi, hamssaalaqaanne a ishatamatanne miis.

<sup>13</sup> Qassikka kawoi ishatamu olanchchatuura hara heezzantto hamssaalaqaa kiittiis. Kiittin hamssaalaqai pude kiyidi, Eelaasa sinttan gulbbatidi, “Xoossaa asoo, hayyanaa, tananne tanaara de7iya ha ishatamu asata maara! Nu shemppuwaakka haiquwaappe ashsha! <sup>14</sup> Tamai saluwaappe wodhdhidi, kase hamssaalaqata naa77aanne eta ishata-mata ubbaanne miis. SHin ha77i tana maara!” yaagidi woossiis.

<sup>15</sup> GODAA kiitanchchai Eelaasayyo, “Yayyoppa! Aara duge wodhdha” yaagiis.

Yaagin Eelaasi denddidi, aara kawuwaakko duge wodhdhiis. <sup>16</sup> Wodhdhidi i kawuwaayyo, “GODAI nena hagaadan yaagees; ‘Neeyyo oichchanau Israa7eelan Xoossi xayinee, neeni Egiroona xoossaa Bi7eeli-Zeebula oichchanau asaa kiittidoogee? Neeni haggaa oottido gishshau, haiqqana! Ne zin77ido hiixaappekka denddakka’ yaagees” yaagiis.

<sup>17</sup> Eelaasi haasayido GODAA qaalaadankka Akaaziyaasi haiqqiis; Akaaziyaasayyo attuma na7i bainna gishshau, a ishahi Yoraami a sohuwan kawotiis; hegee hanidoogee Yoosaafixa na7ai Yoraami Yihudan kawotido naa77antto laittaana. <sup>18</sup> Akaaziyaasi hanido harabainne i oottidobai ubbai Israa7eela Kawotu Taarikiyaa Maxaafan xaafetti uttiis.

## 2

### *GODAI Eelaasa Saluwaa Efiis*

<sup>1</sup> GODAI Eelaasa gotiyan saluwaa efaanau haniyo wode, Eelaasinne Elssaa7i Gelggalappe denddidi biidosona. <sup>2</sup> Biishin Eelaasi Elssaa7a, “GODAI tana Beetele katamaa kiittido gishshau, hayyanaa neeni hagan takkashsha” yaagiis.

SHin Elssaa7i, “GODAI ero! Ne shemppoi ero! Taani neeppe shaahettikke” yaagiis. Yaagin eti duge Beetele wodhdhidosa.

<sup>3</sup> Beeteelen de7iya hananabaa yootiyaageetu citai Elssaa7ekko kiyidi, “GODAI hachchi ne godaa neeppe shaakkidi efaanaagaa neeni erai?” yaagidi oichchidosona.

Oichchin Elssaa7i, “Ee erais. SHin intte co77u giite” yaagidi zaariis.

<sup>4</sup> Hegaappe guyyiyan, Eelaasi Elssaa7a, “GODAI tana Yarkko kiittido gishshau, hayyanaa neeni hagan takkashsha” yaagiis.

SHin Elssaa7i, “GODAI ero! Ne shemppoi ero! Taani neeppe shaahettikke” yaagidi zaariis. Heggaa gishshau, eti Yarkko biidosona.

<sup>5</sup> Yarkkon de7iya hananabaa yootiyaageetu citai Elssaa7ekko kiyidi, “GODAI hachchi ne godaa neeppe shaakkidi efaanaagaa neeni erai?” yaagidi oichchidosona.

Oichchin i, “Ee erais. SHin intte co77u giite” yaagidi zaariis.

<sup>6</sup> Hegaappe guyyiyan, Eelaasi Elssaa7a, “GODAI tana Yorddaanoosa SHAafaa kiittido gishshau, hayyanaa neeni hagan takkashsha” yaagiis.

Yaagin Elssaa7i, “GODAI ero! Ne shemppoi ero! Taani neeppe shaahettikke” yaagiis. Yaagin eti naa77aikka issippe biidosona.

<sup>7</sup> Hananabaa yootiyaageetuppe ishatamu asati eta kaallidi, Yorddaanoosa SHAafaa gakkanaashin biidosona. Eelaasinne Elssaa7i shaafaa doonan eqqidaashin, hananabaa yootiyaageeti etappe guutta haakkidi eqqidosa. <sup>8</sup> He wode Eelaasi ba kaabbaa

ekkididi xaaxidi, an haattaa shociis. SHocin haattai yaanne haanne shaahettiis; shaahettin mela biittaa yedhdhidi pinnidosona. <sup>9</sup> Pinnin Eelaasi Elssaa7a, “Taani neeppe ekettaichchanaappe kasetada, neeyyo ai oottana mala koyai? Ane oda” yaagiis.

Yaagin Elssaa7i, “Taani nena laattishin, ne ayyaanai taayyo naa77u sama gidana mala, taani nena woossais” yaagidi zaariis.

<sup>10</sup> Yaatin Elssaa7a, “Neeni waissiyaabaa oichchadasa. SHin taani neeppe ekettiyo wode neeni tana xeelliyabaa gidikko, hegee neeyyo hanana. Hinna xayikko hanenna” yaagiis.

<sup>11</sup> Hegaappe guyyiyan, eti issippe haasayiiddi hemettishin, tamaa paratinne eti goochchiyo tamaa gaaree akeekennan puttu giidi, eta naa77aappe gidduwan gelidi, shaakki bayiis. SHAakkin Eelaasi gotiyan saluwaa kiyiis. <sup>12</sup> Elssaa7i heгаа be7idi, “Ta aawau, Ta aawau! Neeni Israa7eela asau wolqqanne gondalle shin!” yaagidi waassiis. Hegaappe simmin, i Eelaasa mulekka be7ibeenna.

Elssaa7i hegan azzanidi, ba maayuwa naa77u kessidi, pooshshi oliis. <sup>13</sup> Yaatidi Eelaasappe wodhdhida kaabbaa i denttidi, guyye simmiis; simmidi Yorddaanoosa SHAafaa doonan eqqiis. <sup>14</sup> Eelaasappe wodhdhida kaabbaa ekkidi, haattaa an shociiddi, “GODAI Eelaasa Xoossai awan de7ii?” yaagiis. Elssaa7i haattaa shocido wode, haattai yaanne haanne shaahettiis; shaahettin shaafaa pinniis.

<sup>15</sup> Yarkkoppe yiida hananabaa yootiyaageetu citai Elssaa7a be7ido wode, “Eelaasa ayyaanai Elssaa7a bolli shemppiis” yaagidosona. Eti aara gaittanau yiidi, a sinttan sa7an gufannidosona. <sup>16</sup> Yaatidi eti a, “Be7a, nuuni ne ashkkarati ishatamu mino asati hagan de7oos. Hayyanaa nuuni ne godaa koyanau baana. Ooni erii, GODAA Ayyaanai a ekkidi, issi deriyaa huuphiyan woikko zanggaaraa gidдон yeggidaakkonne” yaagidosona.

Yaagin Elssaa7i, “CHii, booppite!” yaagiis.

<sup>17</sup> SHin ixxisi gaanaagee a yeellayana gakkanaashin, eti a oichchidi aggennan ixxin, “Biite” yaagiis. Yaagin eti ishatamai biidosona. Biidi heezzu gallassaa koyidi, a demmibookkona. <sup>18</sup> Elssaa7i Yarkkon takkidaashin, eti akko simmidi yiidosona. Yin, “Woni taani inttena ‘Booppite’ yaagabeikkinaa?” yaagiis.

### *Elssaa7i Oottido Maalaalissiyaabata*

<sup>19</sup> Hegaappe guyyiyan, Yarkko kataman de7iya asati Elssaa7a, “Neeni nu godai be7iyooгаadan ha katamai de7iyooсai lo77o. SHin haattai iita; qassi biittaikka aifenna” yaagidosona.

<sup>20</sup> Yaagin i eta, “Ane ooratta keriyaa maxiniyaa qolidi, taayyo ekki yiite” yaagidi azaziis; azazin ayyo ehiidosona. <sup>21</sup> Ehin Elssaa7i pulttuwaa biidi, maxiniyaa an yeggiiс. Yeggidi, “GODAI, ‘Taani ha haattaa pattaas. Hegaappe sinttanau ha haattai haiquwaassi gaaso gidenna; biittaikka aifana’ yaagees” yaagiis. <sup>22</sup> Elssaa7i haasayidoogaadankka hachchi gakkanaashin, he haattai xillo gidiis.

<sup>23</sup> Elssaa7i yaappe denddidi, pude Beetele kiyiis. I ogiyan biishin, yelaga attuma naati katamaappe kiyidi, “Laa ha huuphiyaara bo77au, pude kiya! Laa ha huuphiyaara bo77au, pude kiya!” yaagidi a bolli qilliiccidosona.

<sup>24</sup> Qilliiccin guyye simmi xeellidi, eta GODAA sunttan qanggiis. Yaatin beere geetetiya naa77u macca do7ati woraappe kiyidi, naatuppe oitamanne naa77u yelagata puuzerettidi woridosona. <sup>25</sup> Worin Elssaa7i heгааappe denddidi, Qarmmeloosa Deriyaa biis; qassi heгааappekka Samaariyaa simmiis.

## 3

### *Moo7aabi Israa7eela Bolli Denddiis*

<sup>1</sup> Yihudaa Kawoi Yoosaafixi kawotido tammanne hospunnata laittan Akaaba na7ai Yoraami Samaariyan Israa7eela bolli kawotiis; i tammanne naa77u laitta kawotiis. <sup>2</sup> I

GODAA sinttan iitaa oottiis. SHin ba aawaanne ba aayee Elzzaabeeli keena iita gidenna; aissi giikko, a aawai oottido Ba7aala eeqaa i xoqolliis. <sup>3</sup> Gidikkonne Nabaaxa na7ai Iyorbbaami Israa7eela asaa ootissido nagaraa i baxuuxi oiqqiis.

<sup>4</sup> Moo7aaba biittaa Kawoi Meeshi dorssaa heemmes. I Israa7eela kawuwaayyo xeetu sha7u anqqara dorssatanne xeetu sha7u orgge dorssatu ikisiyaa laittan laittan giirees. <sup>5</sup> SHin Israa7eela Kawoi Akaabi haiqqidoogaappe guyyiyan, Moo7aaba Kawoi Meeshi Israa7eela bolli makkaliis.

<sup>6</sup> He wode Kawoi Yoraami Samaariyaappe kiyidi, Israa7eela ubbaa shiishshiis. <sup>7</sup> Qassi Yihudaa Kawuwaa Yoosaafixakko kiitaa yeddidi, “Moo7aaba kawoi ta bolli makkaliis; Moo7aabaara olettanau neeni tanaara buutee?” yaagiis.

Yaagin Yoosaafixi, “Ee taani baana. Taani ne mala; ta asaikka ne asaa mala; qassi ta paratika ne paratu mala” yaagidi zaariis. <sup>8</sup> Yoosaafixi qassi, “Nuuni awa ogiyaara biidi eta olanee?” yaagidi oichchiis.

Oichchin kawuwaa Yoraami, “Eedooma Bazzuwan de7iya ogiyaara biidi olana” yaagidi zaariis.

<sup>9</sup> Hegaa gishshau, Israa7eela kawoi, Yihudaa kawoinne Eedooma kawoi olau kiyidosona. Eti laappun gallassa ogiyaa yuuyidoogaappe guyyiyan, olanchchatuyyookka eta kaallida mehiyaayyookka aiba haattinne attibeenna. <sup>10</sup> He wode Israa7eela kawoi, “Aayye7ana! GODAI nuna ha heezzu kawota issippe Moo7aaba kawuwaassi aattidi immanau xeesiis” yaagiis. <sup>11</sup> SHin Yoosaafixi, “Nuuni a baggaara GODAA oichchanaadan hagan hananabaa yootiyaabi baawee?” yaagidi oichchiis.

Oichchin Israa7eela kawuwaa ola gadaawatuppe issoi, “Eelaasa maaddidi de7ida SHafaaxa na7ai Elssaa7i hagan de7ees” yaagidi zaariis.

<sup>12</sup> Yaagin Yoosaafixi, “Ee, i tumu hananabaa yootiyaagaa” yaagiis. Hegaappe guyyiyan, Israa7eela kawoi, Yoosaafixinne Eedooma kawoinne Elssaa7ekko duge wodhdhidsona.

<sup>13</sup> Elssaa7i Israa7eela kawuwaa, “Tanaaranne nenaara aibee gattiyai? Ba; baada ne aawainne ne ayyiyaanne oichchido hananabaa yootiyaageeta oichcha” yaagiis.

Yaagin Israa7eela kawoi zaaridi, “CHii, aissi giikko, ha heezzu kawotakka issippe Moo7aaba kawuwaassi aattidi immanau nuna xeesidaagee GODAATTENNEE!” yaagiis.

<sup>14</sup> Elssaa7i, “Taani ayyo oottiyo Ubbaappe Wolqqaama GODAI ero! Yihudaa Kawuwaa Yoosaafixa gishshi bainnaakko, taani nena aifiyaaninne xeellikkenne be7ikke shin.

<sup>15</sup> Ane taayyo ha77i diittaa diixxiyaagaa ehiite” yaagiis.

Diixxiyaagee diixxishin, GODAA wolqqai a bolli wodhdhiis. <sup>16</sup> Wodhdhin Elssaa7i, “GODAI, ‘Ha mela zanggaara ubban ollaa kaashite’ yaagees. <sup>17</sup> Aissi giikko, GODAI, ‘Carkkuwaa woi iraa be7ekketa; shin ha kaashido zanggaaran haattai kumana; kumin intte, intte miizzainne intte hara mehee uyana’ yaagees. <sup>18</sup> Hagee GODAA sinttan laafabaa; qassi GODAI Moo7aabakka intteyyo aattidi immana. <sup>19</sup> Gimbettida kata-matanne gita katamata ubbaa intte xoonana. Lo77o mittata ubbaakka qanxxana; haattaa pulttota ubbataakka intte barana; aradda shooqatu ubbaa bollan shuchchaa laalidi moorana” yaagiis.

<sup>20</sup> Wonttetta gallassi maallado yarshshuwaa yarshshiyo wodee gakin, Eedooma baggaara haattai goggiis; goggidi haattai biittan eelliis.

<sup>21</sup> Moo7aaba biittaa asai heezzu kawoti eta olanau yiidoogaa siyiis. Siyidi naatoi cimai, ola miishshaa tookkanau danddayiya asai ubbai xeesetti yiidi, bantta biittaa zawaa naagidosona. <sup>22</sup> Eti maallado guuraara dendiyo wode, haattaa bolli wodhdhida xalqqee zo77idi, etau suutta milatidi beettiis. <sup>23</sup> Yaatin eti, “Be7ite, hagee suutta! Kawoti bantta gidon issoi issuwaara olettidi, haiqqi wuridosona. Moo7aaba asau, ane biidi, eta qatuwaa qociroos” yaagidosona.

<sup>24</sup>Yaagidi Moo7aaba biittaa asai Israa7eelatu qatuwaa biis; bin Israa7eelati denddidi, eta shocidosona. SHocidi eta biittaa bollan woraajjidosona; woraajjidi Moo7aaba asaa woridosona. <sup>25</sup>Katamata akka olidi bashshidosona. Asai ubbai huuphiyan huuphiyan issi issi shuchchaa ekkidi, aradda shooqati ubbati kamettana gakkanaashin, eta bolli oliis. Pultto ubbaa baridi, lo77o mitta ubbaakka qanxxidosona. Qiirihereesa giyo issi katamaa gimbbe xalaalai equwan attiis; shin yambbarshshan oliya asati he kata-maakka dooddidi shocidosona.

<sup>26</sup>Moo7aaba kawoi olai ba bolli goobidoogaa be7ido wode, bisuwaa gixxida laappun xeetu asata ekkiiis. Ekkidi olaa gidduwan daakkidi, Eedooma kawuwaakko pinnanau denddiis; shin ayyo hanennan ixxiis. <sup>27</sup>Hegaappe guyyiyan, ba sohuwan kawotanau de7iya ba baira na7aa ekkidi, katamaa gimbbiyaa bollan taman xuuggidi yarshshiis. Moo7aabati Israa7eelatu bolli hanqquwaa suullidosona. Yaatin Israa7eelati he kata-maa aggidi, bantta biitti simmidosona.

## 4

### *Elssaa7i Issi Hiyyeesa Am77iyo Maaddiis*

<sup>1</sup>Hananabaa yootiyaageetuppe issuwaa maccaasiyaa Elssaa7ekko baada, “Ne ashkkarai ta azinai haiqqiis. I GODAASSI yayyiya asa gidyoogaa neeni eraasa. SHin ha77i a acuwaawai ta naata naa77aa bau aille kessanau yiis” yaagada ayyo waassaasu.

<sup>2</sup>Waassin Elssaa7i iyyo, “Yaatin taani neeyyo ai oottoo? Ne son aibi de7ii? Ane taayyo yoota” yaagiis.

Yaagin maccaasiyaa, “Taayyo ne ashkkareeyyo issi xaaron zaitee de7iyoorippe attin, harabi aibinne baawa” yaagaasu.

<sup>3</sup>Yaagin Elssaa7i o, “Ba; baada ne shoorotu ubbaappe mela otota garxxa. Garxxaidda guutaa garxxoppa. <sup>4</sup>Hegaappe guyyiyan, soo gelada, ne bollinne ne naatu bolli kariyaa gordda. Gorddada ototu ubban zaitiyaa tiga; zaitee kumido otuwaa otuwaa issi baggi zaara” yaagiis.

<sup>5</sup>Yaagin maccaasiyaa baada, kariyaa ba bollinne ba naatu bolli gorddaasu. Eti iyyo otota shiishshin, a zaitiyaa tidgettaa oiqa gaasu. <sup>6</sup>Oto ubbai kumido wode, maccaasiyaa ba na7aa, “Ane tau hara otuwaa ekkada ya” yaagaasu.

SHin na7ai zaaridi, “Hari issi otoiinne attibeenna” yaagiis. Hegaappe guyyiyan, zaitee goggiyoogaa aggi bayiis.

<sup>7</sup>Maccaasiyaa simmada baada, Elssaa7essi odaasu. Odin i “Ba; baada zaitiyaa baizzada, ne acuwaa qanxxa. Attidaagan neeninne ne naatinne go7ettidi de7anau danddayeeta” yaagiis.

### *Elssaa7anne SHuneema Kataman De7iya Maccaasiyoonne*

<sup>8</sup>Issi gallassi Elssaa7i issi dure maccaasiyaa de7iyo SHuneema giyo katamaa biis. Bin maccaasiyaa a shoobbada, qumaa mizaasu. He gallassappe doommidi, i hegaara kanttiyo wode ubban, qumaa maanau i soo gelees. <sup>9</sup>A ba keettaawaa, “Ha ubba wode nu mataara kanttiya bitanee Xoossaa asa gidyoogaa taani erais. <sup>10</sup>Hegaa gishshau, ane issi guutta kifile bolla pooqiyani assi keexxos; keexxidi a giddon arssaa, araataa, xaraphpheezaanne xomppiyaa wottoos. Hegaappe guyyiyan, i nuukko yiido wode ubban, hegan gelana danddayees” yaagaasu.

<sup>11</sup>Issi gallassi Elssaa7i SHuneema katamaa yiidi, ba kifliiyaa pude kiyidi, yan shemp-piis. <sup>12</sup>Hegaappe guyyiyan, ba ashkkaraa Gehaaza, “Ba; baada he maccaasiyo xeesa” yaagiis; yaagin Gehaazi xeesin, a yaada Elssaa7a sinttan eqqaasu. <sup>13</sup>Elssaa7i Gehaaza, “Ha maccaaseeyyo ‘Neeni nu gishshau, haggaa ubbaa metootadasa. Yaatin nuuni neeyyo ai oottinoo? Neeyyo nuuni biidi, kawuwaa woikko ola gadaawaa haasayissiyoobi de7ii?’ yaagada o oichcha” yaagiis.

Yaagin maccaasiyaa, “Taani hagan ta asaa gidдон de7ishin, tana metiyaabi baawa” yaagaasu.

<sup>14</sup> Hegaappe guyyiyan, Elssaa7i Gehaaza, “Yaatin nuuni iyyo ai oottanee?” yaagidi oichchiis.

Oichchin Gehaazi, “Iyyo na7i baawa; i azinaikka cimiis” yaagiis.

<sup>15</sup> Yaagin Elssaa7i, “Maccaasiyo qassikka xeesa” yaagiis. Yaagin o xeesiis; xeesin a yaada, penggen eqqaasu. <sup>16</sup> Elssaa7i maccaasiyo, “Laitti hannotte neeni attuma na7aa idimmana” yaagiis.

Yaagin maccaasiyaa, “CHii ta godau, neeni Xoossaa asa gidikkii, taayyo worddoppa!” yaagaasu.

<sup>17</sup> SHin maccaasiyaa shahaaraasu; Elssaa7i iyyo yootidoogaadan laitti he wode attuma na7aa yelaasu.

<sup>18</sup> He na7ai dicciis; diccidi issi gallassi kattaa cakkiya asatuura de7iya ba aawaakko biis. <sup>19</sup> Biidi ba aawaayyo, “Woo ta huuphiyau! Woo ta huuphiyau!” yaagiis.

Yaagin a aawai issi ashkkarau, “Tookkada a aayeekko efa” yaagidi yootiis.

<sup>20</sup> Yaagin ashkkarai na7aa ekkidi, aayeekko efiis. Efin gallassa seetai gakkanaashin, na7ai ba aayee kiyuwan uttiis; hegaappe guyyiyan, na7ai haiqqi aggiis. <sup>21</sup> Maccaasiyaa na7aa pude efaada, Xoossaa asa arssan zin77issaasu. Yaatada a bolli kariyaa gorddada baasu.

<sup>22</sup> Hegaappe guyyiyan, ba azinaa xeesada, “Taani Xoossaa asakko eesuwan baada yaana mala, ashkkaratuppe issuwaanne haretuppe issuwaanne taayyo yedda” yaagaasu.

<sup>23</sup> Yaagin i, “Hachchi agina xeero gallassa woikko Sambbata gidennabaa, aibee nena akko efiyai?” yaagiis.

Yaagin a, “Aibinne baawa” yaagaasu. <sup>24</sup> Hegaappe guyyiyan, hariyaa koorada, ba ashkkaraayyo, “Hariyaa laagga! Taani neeyyo yootana gakkanaashin, leddan laag-goppa” yaagaasu. <sup>25</sup> Maccaasiyaa hegaappe denddada, Qarmmeloosa Deriyan de7iya Xoossaa asakko baasu.

Elssaa7i maccaasiyaa yiyaaro haahuwan be7idi, ba ashkkaraa Gehaazayyo, “Be7a, SHuneema kataman de7iya maccaasiyaa yausu. <sup>26</sup> O mokkanau woxxa baada, ‘Neni saroo? Ne azinai saroo? Ne na7ai saroo?’ yaagada oichcha” yaagiis.

Yaagin maccaasiyaa, “Nuuni ubbaikka saro” yaagaasu.

<sup>27</sup> Maccaasiyaa deriyaa bollan de7iya Xoossaa asakko gakkido wode, hokkada a tohuwaa oiqqaaasu.

Oiqqin Gehaazi maccaasiyo digganau shiiqqiis; shin Xoossaa asi a, “Agga! A gita metuwan de7ausu; shin GODAI taappe heгаа genttiis. I metuwaa taayyo yootibeenna” yaagiis.

<sup>28</sup> Hegaappe guyyiyan maccaasiyaa, “Ta godau, neeni tau na7a immanaadan taani nena oichchidanaa? Taani nena, ‘Tana coo mela qaaqqayoppa’ yaagabeikkinaa?” yaagaasu.

<sup>29</sup> Yaagin Elssaa7i Gehaaza, “Ne adussa maayuwaa ne qabattuwan sirqqa; yaatada ta gatimaa ekkada eesota. Ogiyan oonaaranne gaittikko, sarotoppa; ooninne nena sarotikko, zaarada sarotoppa. Ta gatimaa na7aa som77uwan wotta” yaagiis.

<sup>30</sup> SHin na7aa aayiyaa, “GODAI ero! Ne shemppoi ero! Taani nena yeggada biikke” yaagaasu. Yaagin Elssaa7i denddidi, o kaalliis. <sup>31</sup> Gehaazi etappe sinttatidi biis. Biidi gatimaa na7aa som77uwan wottiiis; shin cenggurssi woikko shemppoi baawa. Yaatin Gehaazi Elssaa7eera gaittanau simmidi yiidi, “Na7ai beegottibeenna” yaagidi yootiis.

<sup>32</sup> Elssaa7i soo gelidi, he na7aa ahai a arssan zin77idaagaa be7iis. <sup>33</sup> Be7idi ba bollinne na7aa bollinne kariyaa gorddidi, GODAA woossiis. <sup>34</sup> Hegaappe guyyiyan, na7aa ahaa bolli kiyidi, ba doonaa a doonan, ba aifiyaa a aifiyan, ba kushetakka a kushetun gatti wottidi zin77iis. Zin77aanne na7aa bollai ho77iis. <sup>35</sup> Ho77in Elssaa7i



denddidi, so gidдон yaanne haanne simerettiis. Naa77anttuwaakka simmidi, na7aa bolli cogochchidi zin77iis. Yaatin na7ai laapputoo hedhdhishidoogaappe guyyiyan xeelliis.

<sup>36</sup> Yaatin Elssaa7i Gehaaza xeesidi, “Ane ha SHuneemiyo xeesa” yaagiis. Yaagin Gehaazi o xeesiis. Xeesin a yiido wode, Elssaa7i o, “Ne na7aa ekka” yaagiis. <sup>37</sup> Hegaappe guyyiyan, maccaasiyaa Elssaa7a tohuwan wullada, biittan gufannaasu. Yaatada ba na7aa ekkada kare kiyaasu.

### *Hara Naa77u Maalaalissiyaabata*

<sup>38</sup> Elssaa7i Gelggala simmidi yiido wode, biittai namisetti uttiis. Hananabaa yootiyaageetu citai a sinttan uttidaashin, i ba ashkkaraa, “Wogga keriyaa taman wottada, ha asatuyyo woxiyaa katta” yaagiis. <sup>39</sup> Etappe issoi santta milatiya bonccota maxidi ehaanau gade biis. Biidi morkkida gosiyaa turaa demmiis; demmidi tookkanau danddayiyoogaa keena daro gosiyaa ekkidi yiis. I aibakko erennan anccidi, keriyaa yeggiis. <sup>40</sup> Asati maana mala, woxiyaa tigidosona. Eti woxiyaa tushkki a mi be7ido wode, “Xoossaa asoo, ha keriyaa woriyaabai de7ees!” yaagidi waassidosona. Asati maanau danddayibookkona.

<sup>41</sup> Yaatin Elssaa7i, “Yaatikko tau xiilliyaa ekkidi yiite” yaagiis. He xiilliyaa keriyaa qolidi, “Asai maanaadan woxiyaa tigite” yaagiis. Hegaappe simmin, keriyaa iitabi beettibeenna.

<sup>42</sup> Koiro gakkida kattaappe uuhettida laatamu, banggaa komppuwaa, tiya kattaara issippe ba ogoruwan yeggi ekkidi, Xoossaa asassi ehiya issi bitanee Ba7aali-SHaliisha giyoosaappe yiis. Yin Elssaa7i ba ashkkaraa, “Maanaayyo asau aatta” yaagiis.

<sup>43</sup> Yaagin a ashkkarai, “Taani xeetu asaa sintti haggaa waata aattoo?” yaagidi oichchiis. SHin Elssaa7i, “Maanaayyo asau aatto aatta; aissi giikko, GODAI ‘Eti maana; min xarzzaikka attana’ yaagees” yaagiis. <sup>44</sup> Heggaa gishshau, ashkkarai eta sintti aattin, eti miidosona. Min GODAI giidoogaadan, xarzzai attiiis.

## 5

### *Naa7imaani Hanttaara Goga Harggiyaappe Paxiis*

<sup>1</sup> Sooriyaa kawuwaa ola gadaawai Naa7imaani ba godan daroppe dosettidanne bonchchettida asa. Aissi giikko, a baggaara GODAI Sooriyaa olanchchatuyyo xoonuwaa immiis. Naa7imaani toorau qara asa; shin hanttaara goga harggee a oiqqi uttiis.

<sup>2</sup> Issi wode Sooriyaa biittaappe ambbaanoti Israa7eela biitti biidoogan, issi gutta na7iyo Israa7eelappe omooddidosona. He na7iyaa Naa7imaana maccaaseeyyo ashkkara gidaasu. <sup>3</sup> He na7iyaa ba godiyo, “Ta godai Samaariyan de7iya hananabaa yootiyaagaara gaittidabaa gideerennee! Yaatiyaakko i a pattana shin” yaagaasu.

<sup>4</sup> Yaagin Naa7imaani ba godaakko biidi, Israa7eelappe yiida na7iyaa giidoogaa ayyo yootiis. <sup>5</sup> Yootin Sooriyaa kawoi Naa7imaana, “Ba, taani Israa7eela kawuwaayyo dabddaabbiyaakka kiittana” yaagidi zaariis. Yaatin Naa7imaani hasttamu sha7u xaqara biraa, usuppun sha7u worqqa santtimiyaanne tammu kumetta maayuwaa ekkidi biis. <sup>6</sup> Israa7eela kawuwaayyo i ekkidi efido dabddaabbee, “Ha hanttaara goga harggiyaappe neeni ta ashkkaraa Naa7imaana pattana mala, ha dabddaabbiyaara taani a neekko kiittaas” yaagiyaagaa.

<sup>7</sup> Israa7eela kawoi dabddaabbiyaa nabbabido sohuwaara dagammidi, ba maayuwaa pooshshidi, hagaadan yaagiis, “Taani a woranaunne pattanaunne Xoosseeyye? Taani issi asa a hanttaara goga harggiyaappe pattana mala, ha bitanee taakko aissi kiittii? I tanaara ooyettanau gaasuwa koyiyoogaa be7ite” yaagiis.

<sup>8</sup> Xoossaa asa gidia Elssaa7i Israa7eela kawoi ba maayuwaa pooshshidoogaa siyido wode, akko asa kiittidi, “Ne maayuwaa aissi pooshshadii? A haa taakko yedda; Israa7eelan hananabaa yootiyaagee de7iyoogaa taani a erissana” yaagiis.

<sup>9</sup> Yaatin Naa7imaani ba paratanne paraa gaareta ekkidi biis; biidi Elssaa7a karen eqqiis. <sup>10</sup> Elssaa7i akko asa kiittidi, “Ba, baada Yorddaanoosa SHaafan laapputoo meecetta; ne harggiyaappe neeni paxananne geeyananne” yaagidi azaziis.

<sup>11</sup> SHin Naa7imaani hanqqetti denddidi, “Be7ite, taani, tumukka i taakko yi eqqidi, GODAA ba Xoossaa sunntaa xeesidi, qassi ba kushiyaa he xeleguwaa bollan qaattidi, tana ha hanttaara goga harggiyaappe pattees yaagada qoppaas. <sup>12</sup> Damasqqo shaafati, Abaaninne Parifaari Israa7eelan de7iya shaafa ubbaappe kehokkonaayye? Yaatin taani etan meecettada geeyaichchikkinnaa?” yaagiis. Yaagi hanqqettidi, guyye simmiis.

<sup>13</sup> Simmin a ashkkarati akko shiiqidi, “Nu aawau, hananabaa yootiyaagee neeni gitabaa oottanaadan neeyyo yootiyaakko, woni neeni oottikkiyye? Yaatin i nena, ‘Baada meecettada geeya’ yaagidoogee ai deexxi?” yaagidosona. <sup>14</sup> Yaatin i duge wodhdhidi, Xoossaa asi ayyo yootidoogaadan Yorddaanoosa SHaafan laapputoo muukettidi meecettiis. Meecettin a bollai yiira na7a bollaadan hanidi paxiis; paxidi geeyiis.

<sup>15</sup> Hegaappe guyyiyan, Naa7imaaninne aara yiida asai ubbai Elssaa7ekko guyye biis. Bin Naa7imaani a sinttan eqqidi, “Israa7eela biittaaanappe attin, sa7a ubban Xoossi bannaagaa taani ha77i eraas. Hayyanaa ha77i taani ne ashkkarai immiyo imuwaa ekka!” yaagiis.

<sup>16</sup> Yaagin Elssaa7i, “Taani ayyo oottiyo GODAI ero! Taani neeppe aibanne ekkikke” yaagiis. Elssaa7i imuwaa ekkanaadan Naa7imaani woossinkka, i ixxiis.

<sup>17</sup> Hegaappe guyyiyan Naa7imaani, “Ekkana xayiyaabaa gidikko, neeni taayyo naa77u baqulo caana biittaa immanaadan taani nena woossais. Aissi giikko, taani ne ashkkarai hachchippe hini baggan xuuggiyo yarshshuwaa GODAAYYO yarshshanaappe attin, hara xoosatuyyo yarshshikke. <sup>18</sup> SHin GODAI taayyo ne ashkaraayyo issibaa atto go. Ta kawoi Rimmoona giyo eegau goinnanau geliyo wode, taanikka a ajjabada gelada goinnanau koshshees. GODAI taayyo ne ashkaraayyo hegaa atto go” yaagiis.

<sup>19</sup> Yaagin Elssaa7i, “Saruwan gakka!” yaagiis. Yaagin Naa7imaani denddidi biis.

I guuttaa zardda7idi biishin, <sup>20</sup> Xoossaa asa gidiya Elssaa7a ashkkarai Gehaazi, “Ta godai Elssaa7i Sooree Naa7imaani ehiidobaappe aibakka ekkennan coo yeddiis. GODAI ero! Taani a geeduwaa woxxada, appe issibaa ekkana” yaagidi qoppiis. <sup>21</sup> Hegaa gishshau, Gehaazi Naa7imaana kaalliis. Ba geeduwaa woxxiyoogaa Naa7imaani be7idi, aara gaittanau paraa gaariyaappe wodhdhidi, “Aibeeshsha, saro gidennee?” yaagidi oichchiis.

<sup>22</sup> Oichchin Gehaazi, “Aikko baa; saro! SHin tana ta godai, ‘“Efireema gezziyaappe hananabaa yootiyaageetu zata gidiya naa77u wodallati ha77i taakko yiidosona. Hayyanaa etayyo heezzu sha7u xaqara biraanne naa77u kumetta maayonne imma” gaada a oichcha’ yaagidi kiittiis” yaagiis.

<sup>23</sup> Yaagin Naa7imaani Gehaaza, “Yaatikko hayyanaa usuppun sha7u xaqara biraa ekka” yaagiis. Naa7imaani Gehaaza shoobbidi, he biraa naa77u qarcciitan yeggidi, naa77u kumetta maayuwaarakka naa77u ashkkarata toossidi, Gehaazappe sinttau yeddiis. <sup>24</sup> Gehaazi de7iyo keraa eti gakkinn, biraanne maayuwaanne etappe ekkidi, soo gelissiis. Yaatidi eta moissin, eti biidosona.

<sup>25</sup> Hegaappe guyyiyan, soo gelidi, ba godaa Elssaa7a sinttan eqqiis. Yaatin Elssaa7i Gehaaza, “Au baadii?” yaagidi oichchiis.

Oichchin Gehaazi, “Taani ne ashkkarai awanne babeikke” yaagidi zaariis.

<sup>26</sup> SHin Elssaa7i zaaridi, “Bitanee nenaara gaittanau paraa gaariyaappe wodhdhiyo wode, ta ayyaanai nenaara de7ees gidennee? Hagee miishshaanne maayuwa, woikko wogaraanne woiniyaa turaa sohuwaa, woikko dorssaa wudiyaanne miizaa wudiya, woikko attuma ashkaraanne macca ashkaraa ekkiyo wodeeeye? <sup>27</sup> Hegaa gishshau, Naa7imaana oiqqida hanttaara goga harggee nenanne ne zerettaa ubbaa meri merinau

oiqqana” yaagiis. Yaagin Gehaazi Elssaa7a sinttappe kiyidi biishin, he harggee a oiqqin, a gogai shachchaadan booxxi bayiis.

## 6

### *Haattaa Bollan Toohettida Beexiyaa Aifiyaa*

<sup>1</sup> Hananabaa yootiyaageetu citai Elssaa7a, “Hagaa be7a! Nuuni de7iyo sohoi nuna daroppe un77ees. <sup>2</sup> Nuuni ubbatikka mittaa qanxxanau Yorddaanoosa SHaafaa ane boos. Yan nuuyyo de7iyo soho ane keexxoos” yaagidosona.

Yaagin Elssaa7i, “Biite” yaagiis.

<sup>3</sup> Yaagin hananabaa yootiyaageetuppe issoi, “Hayyanaa neenikka ne ashkkaratuura nunaara hinddarkkii?” yaagiis.

Yaagin Elssaa7i, “Eeno baana” yaagidi zaariis; <sup>4</sup> yaatidi etaara issippe biis.

Biidi eti Yorddaanoosa gakkido wode, mittaa qanxxuwaa doommidosona. <sup>5</sup> SHin etappe issoi mittaa qanxxishin, beexiyaa aifee kessi ekkidi, haattaa gidдон geliis. Gelin he bitanee, “Hai ta godau, taani garxxa ekkidoogaa; shin waanooshsha!” yaagidi waassiis.

<sup>6</sup> Waassin Xoossaa asi, “Awan gelidee?” yaagidi oichchiis; oichchin bitanee gelido sohuwaa bessiis. Bessin Elssaa7i gatimaa qanxxidi, haattan oliis; olin beexiyaa aifee haattaa bollan toohettiis. <sup>7</sup> Hegaappe guyyiyan, Elssaa7i bitaniyaa, “Kessada ekka” yaagiis. Yaagin bitanee ba kushiya yeddidi ekkiis.

### *Elssaa7i Sooriyaa Olanchchata Qooqissidi Wora Kaalettiis*

<sup>8</sup> Sooriyaa biittaa kawoi Israa7eelatuura olettiiddi de7ees. Yaanidaagee ba ola gadaawatuura zorettiiddi, “Taani hiqqasan, hiqqasan qatuwaa medhdhana” yaagiis.

<sup>9</sup> Xoossaa asi Elssaa7i Israa7eela kawuwaakko asa kiittidi, “Sooriyaa asati he sohuwaa duge wodhdhiyo gishshau, he sohuwaara kanttoppa” yaagiis. <sup>10</sup> Hega gishshau, Israa7eela kawoi Xoossaa asi malaatido sohuwaa kiittidi, yan de7iya asai naaget-tanaadan hassayissiis. Kawoi naagettana mala, Elssaa7i wodiyan wodiyan hassayissiis.

<sup>11</sup> Ha yohoi Sooriyaa kawuwaa keehippe hanqquetissiis; yaatin i ba ola gadaawata xeesidi, “Nu gidдон Israa7eela kawuwaa bagga gididai oonakko ane taayyo yootite” yaagidi oichchiis.

<sup>12</sup> A ola gadaawatuppe issoi, “Ta godau, kawuwau, nu gidдон hega oottiyai ooninne baawa. SHin ne siirixan de7aidda neeni haasayiyoobaa ubbaa Israa7eelan de7iya hananabaa yootiya Elssaa7i Israa7eela kawuwaayyo yootees” yaagiis.

<sup>13</sup> Yaagin kawoi, “Taani asa kiittada a omooddanaadan, biidi awan de7iyaakkonne koyite” yaagiis.

Guyyeppe eti, “I Dootaana giyo kataman de7ees” yaagidi yootidosona.

<sup>14</sup> Yootin kawoi daro olanchchata paratuuranne paraa gaaretuura yaa yeddiis. He yeddidoogeeti qammi yiidi, katamaa dooddidosona. <sup>15</sup> Xoossaa asa Elssaa7a ashkkarai wonttetta gallassi guuraara denddidi, kare kiyiyo wode, olanchchati paratuuranne paraa gaaretuura katamaa dooddi wottidosona. He ashkkarai, “Aayye7ana nunoo! Ta godau, nuuni waananee?” yaagidi oichchiis.

<sup>16</sup> Oichchin i, “Yayyoppa! Nunaara de7iyaageeti etaara de7iyaageetuppe daroosona” yaagidi zaariis.

<sup>17</sup> Hegaappe guyyiyan Elssaa7i, “Abeet GODAU, i be7anaadan a aifiyaa poga” yaagidi woossiis. Woossin GODAI Elssaa7a ashkkaraa aifiyaa pogin, Elssaa7a yuusho ubban de7iya tamaa paratinne paraa gaaretinne keraa maayidaageeta be7iis.

<sup>18</sup> Sooreti a bolli woraajjido wode Elssaa7i, “Ha asatu aifiyaa qooqissarkkii” yaagidi GODAA woossiis. Elssaa7i woossidoogaadan GODAI eta aifiyaa qooqissiis. <sup>19</sup> Hegaappe guyyiyan, Elssaa7i eta, “Ogee hagaa gidenna; katamaikka hagaa gidenna. Intte koyiyo

asa taani inttena bessana; tana kaallite” yaagiis. Yaagidi eta kaalettidi, Samaariyaa katamaa efiis.

<sup>20</sup> Eti Samaariyaa katamaa gelosaarakka Elssaa7i, “Abeet GODAU, ha asati xeellanaadan eta aifiyaa poga” yaagiis. Yaagin GODAI eta aifiyaa pogin, eti Samaariyaa gidдон de7iyooḡaa be7idosona. <sup>21</sup> Israa7eela kawoi eta be7ido wode Elssaa7a, “Ta aawau, taani eta woroo? Taani eta woroo?” yaagidi oichchiis.

<sup>22</sup> Oichchin Elssaa7i, “CHii woroppa! Hageeti attin, neeni ne bisuwaaninne ne wonddafiiyan omooddidooḡeetakka woranau bessenna. Eti miidi uyidi bantta godaakko baanaadan, oittaanne haattaanne eta sintti aatta” yaagiis. <sup>23</sup> Hegaa gishshau, Israa7eela kawoi etau gibiraa giigissiis. Giigissin eti miidoogaappenne uyidoogaappenne guyyiyan, i eta yeddin, bantta godaakko simmidosona. He wodeppe doommin, Sooreti Israa7eelatu bollan woraajjiyoḡaa aggi bayidosona.

### *Samaariyaa Katamai Doodettiis*

<sup>24</sup> Hegaappe guyyiyan, Sooriyaa Kawoi Benihadaadi ba olanchchata ubbaa shishshidi, biidi Samaariyaa katamaa dooddiis. <sup>25</sup> Eti dooddido gaasuwan Samaariyaa kataman hanttaara koshai geliis; gelin issi hariyaa huuphee hosppun tammu xaqara biran, naa77u xeetu giraame gidiiya haraphphiyaa shiyai ichchashu xaqara biran baizettiis.

<sup>26</sup> Israa7eela kawoi katamaa dirssaa gimbbiyaa bollaara aadhdhishin, issi maccaasiyaa, “Ta godau, kawuwau, tana maaddarkkii” yaagada waassaasu.

<sup>27</sup> Waassin kawoi o, “Nena GODAI maaddennan ixkiko, taani neeyyo maaduwaa auppe demmanau danddayiiaanaa? Kattaa qoxxiyo audiyaappeeyye, woiniyaa aifiyaa gum77iyo sohuwaappee?” yaagiis. <sup>28</sup> Qassi i o, “Neeeni waanadii?” yaagidi oichchiis.

Oichchin maccaasiyaa zaarada, “Ha maccaasiyaa tana, ‘Hachchi ne na7aa maanau ekkada ya; qassi wontto nuuni ta na7aa maana’ yaagaasu. <sup>29</sup> Hegaa gishshau, ta na7aa doissidi miida; wonttetta gallassi taani o, ‘Nuuni maanau ne na7aa ekkada ya’ yaagaas. SHin a ba na7aa qosaasu” yaagaasu.

<sup>30</sup> Kawoi maccaasiyaa yootidoogaa siyidi, ba maayuwaa pooshshi oliis. Yaatidi i gimbbiyaa bollaara aadhdhishin, garssa baggaara i maayido waaruwaa asai be7iis.

<sup>31</sup> Hegaappe guyyiyan kawoi, “SHafaaxa na7aa Elssaa7a guuggee a bolli hachchi pe7ikko, Xoossi tana woro!” yaagiis.

<sup>32</sup> He wode Elssaa7i ba son uttiis; cimaticka aara issippe de7oosona. Kawoi baappe sinttau asa kiittiis; shin he bitanee gakkanaashin, Elssaa7i cimata, “Ha shemppo woriyaagee ta qooriyaa muucissanau asa kiittidoogaa intte be7eetii? He kiittetidaagee yiido wode, kariyaa gorddidi gelissoppite. A godaikka a kaallidi yiiddi de7ees” yaagiis.

<sup>33</sup> I cimatuura haasayishin, kiittetidaagee akko yiis. Yin kawoikka yiidi, “Ha metoi GODAAPPE yiis. Yaatin taani hagaappe daruwaa GODAA aissi naagiyaanaa?” yaagiis.

## 7

<sup>1</sup> Yaagin Elssaa7i, “GODAA qaalaa siya! GODAI hagaadan yaagees, ‘Wontto hannode heezzu kilo giraame gisttiyaa xiillee woikko usuppun kilo giraame banggai Samaariyaa katamaa penggen issi xaqara biran baizettana’ yaagees” yaagiis.

<sup>2</sup> Kawuwaassi matattiya halaqai Xoossaa asayyo, “Be7a, GODAI salotu maskkootiyaa dooyiyaakkonne hegee hanenna” yaagiis.

Yaagin Elssaa7i zaaridi, “Neeeni heḡaa ne aifiyan be7ana; shin appe ainne maakka” yaagiis.

### *Sooriyaa Olanichchati Baqatidosona*

<sup>3</sup> Katamaa geliyo penggiyan hanttaara goga harggee oiqqido oiddu asati de7oosona. Eti issoi issuwaa, “Nuuni haiqqana gakkanaashin, hagan aissi gam77iyoo? <sup>4</sup> Nuuni katamaa gelana giikko, koshai de7iyo gishshau, nuuni yan haiqqana. Qassi hagan



gam77ikkokka haiqqana. Hegaa gishshau, Sooretu qatuwaa ane boos. Eti nuna ashshikko attana; eti worikko haiqqana” yaagidosona.

<sup>5</sup> Sa7ai lem77ido wode denddidi, Sooretu qatuwaa biidosona. Eti biidi qatuwaa gakkio wode, issi asinne yan baawa. <sup>6</sup> Aissi giikko, GODAI paraa gaaretunne paratu gurubanne daro olanchchatu cenggurssaa Sooriyaa asata sissii. Yaatin eti issoi issuwaa, “Siyite, Israa7eela kawoi nuna olissanau, Hiitetunne Gibxxetu kawota keraa qanxxidi ehiis” yaagidosona. <sup>7</sup> Hegaa gishshau, eti denddidi, bantta qatuwaa, bantta dunkkaaniyaa, bantta paratanne bantta haretanne muliyaa yeggi bayidi, sa7ai lem77idaagan bantta shemppuwaa ashshanau baqatidosona.

<sup>8</sup> He hanttaara goga harggee oiqqido asati Sooretu qatuwaa gakkidi, eta dunkkaane-tuppe issuwaa gelidosona. Gelidi miidosonanne uyidosona; qassi biraa, worqqaanne maayuwaa ekki efidi qottidosona. Naa77anttuwaa simmidi, hara dunkkaaniyaa gelidosona; gelidi appe ekkidoogaakka qottidosona.

<sup>9</sup> Hegaappe guyyiyan, eti issoi issuwaa, “Nuuni lo77obaa oottibookko. Hachchi mishiraachcho gallassa; shin nuuni co77u giida. Sa7ai wonttana gakkanaashin, co77u giidi uttikko, nuuni qaxxayettana. Ane ha77i sohuwaara biidi, kawuwaa so asau yootoos” yaagidosona. <sup>10</sup> Hegaa gishshau, eti biidi, katamaa penggiyaa naagiyaageeta xeesidi, hagaadan yaagidosona; “Nuuni Sooretu qatuwaa biida; shin issi asi woikko asa cenggurssinne he sohuwan baawa. Qashetti uttida paratu xalaalainne haretinne de7oosona; qassi eti aggidi biido dunkkaanetikka de7oosona” yaagidosona. <sup>11</sup> Yaagin penggiyaa naagiyaageeti xeesidi, kawuwaa so asaayyo yootidosona.

<sup>12</sup> Yootin kawoi qammi denddidi ba halaqatuyyo, “Sooreti nuna oottidobaa taani intteyyo yootana. Nuuni namisettiyoogaa eti eroosona. Hegaa gishshau, bantta qatuwaappe kiyidi, gaxariyan qosettidi, eti katamaappe kare kiyin, nuuni eta paxa oiqqidi, katamaa gelana yaagidi qoppidosona” yaagiis.

<sup>13</sup> Kawuwaa halaqatuppe issoi, hagaadan yaagiis; “Ha kataman attida asai kase haiqqida asaakka mala; haiquwaappe antenna. Hegaa gishshau, hanidabaa eranau ane asa dooroos. Dooridi attida ichchashu paratuura ane eta Sooretu qatuwaa yeddoos” yaagiis.

<sup>14</sup> Hegaa gishshau, eti parai goochchiyo naa77u gaaretanne eta paratanne dooridosona. Doorinne kawoi eta Sooriyaa olanchchatu geeduwaa yeddiis. Kawoi tog-giyaageeta, “Biidi hanidabaa be7ite” yaagidi azaziis. <sup>15</sup> Azazin eti Sooretu geeduwaa kaallidi, Yorddaanoosa SHaafaa gakkanaashin biidosona. Sooriyaa asati baqatiiddi olido maayoinne ola miishshainne ogiyan kumiis. Kiitetti biida asati guyye simmidi, kawuwaayyo yootidosona.

<sup>16</sup> Hegaappe guyyiyan, asai biidi, Sooretu qatuwaa bonqqiis. Bonqqin GODAI gidoogaadan heezzu kilo giraame gisttiyaa xiillee woikko usuppun kilo giraame banggai issi xaqara biran baizettiis. <sup>17</sup> Kawoi baassi matattiya halaqaa penggiyaa naagiyaageetu halaqa kessidi sunttiis; shin asai a penggen dirxxiis. Kawoi Elssaa7ekko biido wode, Elssaa7i ha halaqaa bolli yootidoogaadan, bitanee haiqqiis. <sup>18</sup> Aissi giikko, Xoossaa asi Elssaa7i kase kawuwaayyo, “Wontto hannoode heezzu kilo giraame gisttiyaa xi-illee woikko usuppun kilo giraame banggai Samaariyaa kataman issi xaqara biran baizettana” yaagiis.

<sup>19</sup> He wode he halaqai Elssaa7eyyo, “Be7a, GODAI salotu maskkootiyaa dooyiyaakkonne hegee hanenna” yaagidi zaariis. Yaagin Elssaa7i, “Neeni hegaa ne aifiyan be7ana; shin appe ainne maakka” yaagidi zaariis. <sup>20</sup> Yaatin Elssaa7i yootidoogaadan, he bitanee asai penggen dirxxin haiqqiis.

## 8



<sup>1</sup> Elssaa7i i na7aa haiqqidaagaa pattido maccaasiyo issi wode, “Ne so asaa ekkada hagaappe ba; baada neeni danddayiyo sohuwan awaaninne gam77ashsha. Aissi giikko, GODAI laappun laitta gam77iya koshaa ha biittaa bolli awaajjirggiis” yaagiis. <sup>2</sup> Yaagin maccaasiyaa Elssaa7i yootidoogaadan ba so asaara baada, Pilisxxeema biittan laappun laittaa de7aasu. <sup>3</sup> Laappunтта laittaa wurssettan maccaasiyaa Pilisxxeema biittaaappe simmaasu. Simmada ba keettaanne ba gadiyaanne oichchanau kawuwaakko baasu.

<sup>4</sup> He wode kawoi Xoossaa asa Elssaa7a ashkkaraa Gehaazaara haasayiiddi, “Elssaa7i oottido gita ooso ubbaa taayyo ane oda” yaagiis. <sup>5</sup> Elssaa7i haiqqida na7aa waatidi pattidaakko, Gehaazi kawuwaayyo odishin, Elssaa7i na7aa pattido maccaasiyaa ba keettaanne ba gadiyaanne oichchanau yaasu.

Yin Gehaazi, “Ta godau, kawuwau, maccaasiyaakka hanno; Elssaa7i haiquwaappe pattido i na7aikka hagua” yaagiis. <sup>6</sup> Kawoi maccaasiyo hegaabaa oichchin, ayyo yootaasu.

Hegaa gishshau, kawoi halaqaa xeesidi, “Ha maccaaseessa gidida ubbabaanne qassi a agga biido wodiyaappe hachchi gakkanaashin, i gaden mukkida ubbabaa iyyo zaara” yaagidi azaziis.

### *Hazaa7eeli Sooriyaa Biittan Kawotiis*

<sup>7</sup> Elssaa7i Damasqqo katamaa biis; biidi gakkiiyo wode, Sooriyaa Kawoi Benihadaadi harggees. Harggiyaagaayyo, “Xoossaa asi hagua yiis” yaagidi odidosona.

<sup>8</sup> Odin kawoi Hazaa7eela, “Immiyoobaa oiqqada, Xoossaa asaara gaittanau ba. Baada a baggaara, “Taani ha harggiyaappe paxanee?” yaagada GODAA oichcha” yaagiis.

<sup>9</sup> Hegaa gishshau, Hazaa7eeli Damasqqon de7iya dumma dumma qommo murutabaappe oitamu gaameelan caanidi ekkidi, Elssaa7eera gaittanau biis. Biidi Elssaa7a sinttan eqqidi, “Ne na7ai Sooriyaa Kawoi Benihadaadi, “Taani ha harggiyaappe paxanee?” yaagidi, nena oichchanaadan tana neekko kiittiis” yaagiis.

<sup>10</sup> Yaagin Elssaa7i Hazaa7eelayyo, “Neeni baada ayyo, “Tuma neeni paxana’ yaaga. SHin i tuma haiqqanaagaa tana GODAI bessiiis” yaagiis. <sup>11</sup> Hegaappe guyyiyan, Hazaa7eeli yeellatana gakkanaashin, Elssaa7i a tishshi oottidi xeelliis; xeellidi yeekkiiis.

<sup>12</sup> Yaatin Hazaa7eeli, “Ta godai aibissi yeekkii?” yaagidi oichchiis.

Oichchin Elssaa7i, “Neeni Israa7eela asaa bolli oottana iitabaa taani eriyo gishshau yeekkais. Eta qatuwaa neeni taman xuuggana; eta wodallata neeni bisuwan worana. Qassi eta yiiratakka neeni shuchchan mentterettana; eta shahaara maccaasatu uluwaakka neeni daakkana” yaagidi zaariis.

<sup>13</sup> Hazaa7eeli zaaridi, “Taani ne ashkkarai, pattenka kanai, hagua mala gitabaa oottanau waatada danddayiyaanaa?” yaagiis.

Yaagin Elssaa7i zaaridi, “Neeni Sooriyaa biittan kawotanaagaa tana GODAI bessiiis” yaagiis.

<sup>14</sup> Hegaappe guyyiyan, Hazaa7eeli Elssaa7eppe shaahettidi, ba godaakko simmidi biis. Bin Benihadaadi a, “Elssaa7i nena woigidee?” yaagidi oichchiis.

Oichchin Hazaa7eeli, “Neeni tumuppe paxana yaagidi taayyo yootiis” yaagiis.

<sup>15</sup> SHin wonttetta gallassi Hazaa7eeli bullukkuwaa ekkidi, haattan yakkissidi, kawuwaa an tucciis; tuccin kawoi haiqqiis. Haiqqin Hazaa7eeli a sohuwan bau kawotiis.

### *Yihudaa Kawuwaa Yoraama*

#### *(Hanidabaa Odiya Naa77antto Maxaafaa 21:1-20)*

<sup>16</sup> Akaaba na7ai, Israa7eela Kawoi Yoraami kawotido ichchashantto laittan, Yihudaa Kawuwaa Yoosaafixa na7ai Yoraami Yihudan kawotiis. <sup>17</sup> Yoraami kawotiyo wode laittai ayyo hasttamanne naa77a; i Yerusalaaamen hospun laitta kawotiis. <sup>18</sup> Yoraami Akaaba na7iyo machcho ekkido gishshau, Akaaba so asai hemettidoogaadankka kase Israa7eela kawotu ogiyan i hemettiis; GODAA sinttankka iitabaa oottiis. <sup>19</sup> Gidikkonne

ba ashkkaraa Daawita gishshau, GODAI Yihudaa xaissanau koyibeenna; Daawita zeretta merinau kawotanau GODAI ufaissaa immi wottiis.

<sup>20</sup>Yoraami kawotido wode, Eedooma asai Yihudaa kawuwaa bolli makkalidi, banttau kawuwaa kawoyidosona. <sup>21</sup>Hegaa gishshau, Yoraami ba paraa gaaretu ubbaara Xa7iira giyo sohuwaa biis. Bin Eedooma asati anne a paraa gaaretu halaqatanne dooddidosona; shin Yoraami qammi denddidi, doodaa duuterettidi kanttiis. A olanchchatikka baqatidi, guyye soo simmidosona. <sup>22</sup>He wodeppe doommidi hachchi gakkanaashin, Eedooma asai Yihudaa asaassi haarettibeenna. Liibina asai qassi he wode makkaliis.

<sup>23</sup>Yoraami hanido harabainne i oottidobai ubbai Yihudaa Kawotu Taarikiyaa Maxaafan xaafetti uttiis. <sup>24</sup>Yoraami haiqqidi, ba maizzan gaittiis. Ba maizza aawatuura Daawita Kataman moogettiis. A sohuwan a na7ai Akaaziyaasi kawotiis.

### *Yihudaa Kawuwaa Akaaziyaasa*

#### *(Hanidabaa Odiya Naa77antto Maxaafaa 22:1-6)*

<sup>25</sup>Akaaba na7ai, Israa7eela Kawoi Yoraami kawotido tammanne naa77antto laittan, Yihudaa Kawuwaa Yoraama na7ai Akaaziyaasi Yihudan kawotiis. <sup>26</sup>Akaaziyaasi kawotido wode, laittai ayyo laatamanne naa77a;<sup>1</sup> i Yerusalaamen issi laitta kawotiis. A aayee sunttai Ataalo; a Israa7eela Kawuwaa Omirayyo na7aa na7iyo. <sup>27</sup>Akaaba so asaa ogiyaa i hemettiis; Akaaba so asai oottidoogaadan, GODAA sinttan iitabaa oottiis. I hegaa hanidoogee etayyo bollo gidido gishshaassa.

<sup>28</sup>Akaaziyaasi Sooriyaa Kawuwaa Hazaa7eelaara Gala7aaden de7iya Raamoota giyo kataman olettanau biiddi, Akaaba na7aa Yoraamaara issippe biis. Bin Sooriyaa asati Yoraama caddidosona. <sup>29</sup>Yoraami Sooriyaa Kawuwaa Hazaa7eelaara olettiyo wode, Sooriyaa asati caddido cachcha patti ekkanau Iziraa7eela katamaa simmiis. Hegaappe guyyiyan, Yoraama na7ai, Yihudaa Kawoi Akaaziyaasi Akaaba na7aa Yoraama cadetti-daagaa oichchanau duge Iziraa7eela katamaa biis.

## 9

### *Yeehu Israa7eela Bolli Kawotanau Tiyettiis*

<sup>1</sup>Hananabaa yootiya Elssaa7i hananabaa yootiyaageetu citaappe issi bitaniyaa xeesidi, hagaadan yaagiis; “Ne kaabbaa ne qabattuwan sirqqa; sirqqada ha xaaruwaa zaitiyaa ekkada, Gala7aaden de7iya Raamoota giyo katamaa ba. <sup>2</sup>Baada gakkada, Yoosaafixa na7aa, Nimishayyo na7aa na7aa Yeeha koya. Koya demmada, a laggetuppe a gaxi kessada, qol77o gelissa. <sup>3</sup>Hegaappe guyyiyan, xaaruwaa zaitiyaa ekkada, a huuphiyan tigaidda, ‘Nena GODAI, “Neeni Israa7eela bolli kawotanaadan taani nena tiyais” yaagees’ yaaga. Yaatada kariyaa dooyada, baqatappe attin, gam77oppa” yaagiis.

<sup>4</sup>Hegaa gishshau, hananabaa yootiya wodallai Gala7aaden de7iya Raamoota katamaa biis. <sup>5</sup>Biidi i yaa gakkido wode, ola gadaawati issippe zorettiyaageeta demmiis. Demmidi, “Gadaawau, taani neeyyo yootiyoobai de7ees” yaagiis.

Yaagin Yeehu, “Nu giddoppe oossi yootuutee?” yaagidi oichchiis.

Oichchin hananabaa yootiyaagee, “Gadaawau, neeyyo yootana” yaagidi zaariis.

<sup>6</sup>Yeehu denddidi soo gelin, hananabaa yootiyaagee a huuphiyan zaitiyaa tigidi, “GODAI Israa7eela Xoossai nena hagaadan yaagees, ‘Neeni GODAA asaa bolli, Israa7eela bolli kawotanaadan taani nena tiyais. <sup>7</sup>Neeni ne godaa Akaaba zariyaa xaissana. Aissi giikko, taani Elzzaabeela gussido hananabaa yootiya ta ashkkaratu suuttaanne ta hara ashkkaratu suuttaa haluwaa kessana. <sup>8</sup>Akaaba zare ubbai xayana; taani Israa7eelan Akaaba zariyaappe aille gidin, goqa gidin, attuma ubbaa xoqollana. <sup>9</sup>Akaaba zariyaa Nabaaxa na7aa Iyorbbaama zariyaadaaninne Akiiya na7aa Baa7isha zariyaadan taani oottana. <sup>10</sup>Elzzaabeelo gidikko, Iziraa7eela goshshan o kanati maana; ooninne o

<sup>1</sup> 8:26 Laatamanne naa77a: Laittai ayyo laatamanne naa77a woikko oitamanne naa77a. Hanidabaa Odiya Naa77antto Maxaafaa 22:2 xeella.

moogenna' yaagees" yaagiis. Hegaa yootidoogaappe guyyiyan, kariyaa dooyi yegginne wottaa kati bayiis.

<sup>11</sup> Yeehu ba lagge gidida ola gadaawatukko biido wode, etappe issoi a, "Sa7ai saroo? Ha gooyiya bitanee neekko aibissi yiidee?" yaagidi oichchiis.

Oichchin Yeehu etayyo, "Ha bitaniyaanne a haasayaanne intte ereeta" yaagiis.

<sup>12</sup> Yaagin eti, "Hagee worddo. Ane neeni nuuyyo yoota" yaagidosona.

Yaagin Yeehu, "I taayyo, 'GODAI nena, "Neeni Israa7eela bolli kawotanaadan taani nena tiyaas" yaagees' yaagiis" yaagiis.

<sup>13</sup> He wode eti eesuwan bantta maayuwaa ekkidi, Yeehu yedhdhidi kiyiyo xekkan hiixxidosona; hiixxidi malkkataa punnidosona. Bantta qaalaakka xoqqu oottidi, "Yeehu kawotiis" yaagidosona.

### *Israa7eela Kawuwaa Yoraama Woridosona*

<sup>14</sup> Yaatin Yoosaafixa na7ai, Nimishayyo na7aa na7ai Yeehu Yoraama bolli maqettiis. Hegee haniyo wode, Yoraaminne Israa7eela asai ubbai Sooriyaa Kawuwaa Hazaa7eelappe Gala7aaden de7iya Raamoota giyo katamaa naaganau biichchidosona.

<sup>15</sup> SHin etappekka Kawoi Yoraami Sooriyaa Kawuwaa Hazaa7eelaara olettido wode, Sooriyaa biittaa asati a caddido cachchaa xalettanau Iziraa7eela katamaa yiichchiis.

Yaatin Yeehu gadaawata, "Intte qofai hegaa gidikko, ha katamaappe issi asinne kiyi biidi, Iziraa7eela kataman ha oduwaa odennaadan teqqite" yaagiis. <sup>16</sup> Hegaappe guyyiyan, Yeehu paraa gaariyan kiyi uttidi, Iziraa7eela katamaa biis. Aissi giikko, Yoraami paxiichchibeennaagee yan shemppees. Qassi Yihudaa Kawoi Akaaziyaasi a oichchanau yaa duge bi uttiis.

<sup>17</sup> Iziraa7eela katamaa gimbbiyaa bolli eqqidi wochchiyaagee xeesidi, "Issi citai yiyaagee tau beettes" yaagiis.

Yaagin Yoraami, "Etaara gaittanaadan issi paraasa yedda. Paraawai biidi, 'Sa7ai saroo?' yaago" yaagiis.

<sup>18</sup> Paraawai Yeehuura gaittanau biidi, "Kawoi nena, 'Sa7ai saroo?' yaagees" yaagiis.

Yaagin Yeehu, "Saroban nena gattiyaabi baawa. Ta guyye aadhdhada tana kaalla" yaagidi zaariis.

Yaatin wochchiyaagee kawuwaa, "Kiitettidaagee etakko gakkiiis; shin guyye simmibeenna" yaagidi yootiis.

<sup>19</sup> Hegaa gishshau, kawoi naa77antto paraawaakka etakko kiittiis. Kiittin i etakko yiidi, "Kawoi inttena, 'Sa7i saroo?' yaagees" yaagiis.

Yaagin Yeehu bitaniyaa, "Saroban nena gattiyaabi baawa. Ta guyye aadhdhada tana kaalla" yaagiis.

<sup>20</sup> Wochchiyaagee, "Naa77antto paraawai etakko gakkiiis; shin guyye simmidi yeenna. Qassi gaariyaa laagoi Nimisha na7aa na7aa Yeehu laaguwaa mala; i gooyiya asadan laaggees" yaagidi yootiis.

<sup>21</sup> Hegaappe guyyiyan, Kawoi Yoraami, "Taayyo paraa gaariyaa waaxite" yaagidi azaziis.

Azazin paraa gaariyaa waaxidosona. Waaxin Israa7eela Kawoi Yoraaminne Yihudaa Kawoi Akaaziyaasi bantta gaariyan gaariyan uttidi, Yeehuura gaittanau biidosona. Biidi Iziraa7eeliyaa Naabute gaden a demmidosona. <sup>22</sup> Yoraami Yeeha be7ido wode, "Yeehu, sa7i saroo?" yaagidi oichchiis.

Oichchin Yeehu, "Ne aayee Elzzaabeeli eeqaa goinoinne bitainne hegaa keeni dari-daashin, saroi waani de7anau danddayii?" yaagidi zaariis.

<sup>23</sup> Yaatiyoorin Yoraami ba paraa gaariyaa guyye zaaridi baqatiis. Baqatiiddi Akaaziyaasa xeesidi, "Akaaziyaasaa, hagee makkala" yaagiis. <sup>24</sup> Hegaappe guyyiyan, Yeehu ba wonddafiya ba kumetta wolqqaappe dafidi, Yoraama naa77u katissiyaappe

gidduwan dukkiis. Dukkin zubbee a wozanaara kanttidi kiyin, ba gaariyaa giddo kunddiis. <sup>25</sup> Kunddin Yeehu gadaawaa Bidiqaara, “Yoraama denttada, kase Iziraa7eeliyaa Naabute gaden ola. Neenne taanne issippe Yoraama aawaa Akaaba kaallidi toggidi biishin, GODAI a bolli hananabaa giidi yootidoogaa hassaya. <sup>26</sup> He wode GODAI, ‘Naabute suuttaanne a attuma naatu suuttaa taani zino be7aas; hegaa acuwaa taani nena tumu ha gaden qanxxissana’ yaagiis. Ha77i simmi GODAI giidoogaadan, Yoraama denttada, ha gaden ola” yaagiis.

### *Yihudaa Kawuwaa Akaaziyaasa Woridosona*

<sup>27</sup> Yihudaa Kawoi Akaaziyaasi hegaa be7ido wode, Beeti-Haggaana giyo katamaa baqatidi biis. Bin Yeehu a kaallidi yedettiiddi, “Akka dukkite” yaagiis. Yaagin eti a kaallidi, Yibila7aama katamaa matan de7iya Guura giyo pudettan a gaariyaa bolli dukkidosona. Yaatin i Magiddo giyo katamaa baqatidi, yan haiqqiis. <sup>28</sup> Haiqqin a ashkharati gaariyan a ekkidi, Yerusalaame efidosona; efidi a maizza aawatuura Daawita Kataman moogidosona.

<sup>29</sup> Akaaba na7ai Yoraami kawotido tammanne isiinintta laittan Akaaziyaasi Yihudan kawotiis.

### *Kawee Elzzaabeeli Haiquwaa*

<sup>30</sup> Hegaappe guyyiyan, Yeehu Iziraa7eela katamaa biis. Elzzaabeela hegaa siyido wode, ba aifiyaa tiyada, ba huuphiyaakka pixada, maskkootiyaara duge ogiyaa xeellaasu. <sup>31</sup> Yeehu penggeera gelishin, “Laa ne godaa worida Zimiraa,<sup>2</sup> haggaa sarossi yaadii?” yaagaasu.

<sup>32</sup> Yaagin Yeehu pude maskkootiyaakko xeellidi, “Laa ta bagga gidanai oonee? Ane oonee?” yaagiis. Yaagin naa77u woikko heezzu mureessati akko xeellidosona. <sup>33</sup> Xeelliyaaageeta Yeehu, “O duge oli aggite” yaagiis. Yaagin eti o duge olidosona. Yaatin i suuttai godaa bollinne paratu bollinne caccafettiis; parati bantta tohuwan o yedhdhididosona.

<sup>34</sup> Hegaappe guyyiyan, Yeehu kawo keettaa gelidi, miisinne uyiisinne. Yaatidi i, “Ha ganggettida mishiriyo efidi moogite; ai gidikkonne a kawo na7a” yaagiis. <sup>35</sup> SHin eti o mooganau biiddi, iyyo guuggiyaappe, tohotuppenne kushetuppe attin, harabaa demmibookkona.

<sup>36</sup> Hegaa gishshau, eti simmidi, Yeehuuyo yootidosona; yootin i, “GODAI ba ashkaraa Tishbbiyaa Eelaasa baggaara, ‘Iziraa7eelan de7iya gaden Elzzaabeeli ashuwaa kanati maana. <sup>37</sup> Miishin attidaageekka Iziraa7eelan de7iya gadiyan pito mala gidana. Hegaa gishshau ooninne, “Hanna Elzzaabeelo” gaanau danddayenna’ yaagidi yootido qaalai haggaa” yaagiis.

## 10

### *Akaaba Zareta Ubbaa Woridosona*

<sup>1</sup> Akaabayyo Samaariyaa kataman laappun tammu zareti attumaageeti de7oosona. Hegaa gishshaa Yeehu dabddaabbiyaa xaafidi, he katamaa halaqatussi, cimatussinne Akaaba zareta dichchiyaageetussi Samaariyaa katamaa kiittiis. He dabddaabbiyan i, <sup>2</sup> “Simmi intte godaa zareti inttenaara de7iyo gishshau, qassi paratinne paraa gaareti, yuushoi gimbbettido katamatinne ola miishshati intteyyo de7iyo gishshau, ha dabddaabbee inttena gakko sohuwaarakka, <sup>3</sup> intte godaa naatuppe issi payyaa dariyaagaa dooridi, a aawaa kawotaa araatan utissite. Yaatidi intte godaa keettau olettite” yaagiis.

<sup>4</sup> SHin eti daroppe yayyidi, “Be7ite, naa77u kawoti a sinttan eqqanau danddayibookkona! Yaatin nuuni waani eqqanee?” yaagidosona. <sup>5</sup> Hegaa gishshau, kawo keettau aawatiyaagee, katamaa halaqai, cimatinne Akaaba zareta dichchiyaageeti

<sup>2</sup> 9:31 Zimiraa: Zimiri ba kawuwaa woriis. Kawotu Maxaafaa Koiruwaa 16:8-12 xeella.



Yeehussi hagaadan yaagidi kiittidosona; “Nuuni ne ashkkarata; neeni giyoobaa ubbaa nuuni oottana. Nu bolli oonanne kawoyokko. Nena lo77idabaa aibanne ootta” yaagidi kiittidosona.

<sup>6</sup> Kiittin Yeehu etayyo naa77antto dabddaabbiyaa xaafidi, “Intte ta bagga gididi, tau azazettanau giigidabaa gidikko, intte godaa naatu qooriyaa muucite; muucidi eta guuggiyaa ekkidi, wontto hannotte Iziraa7eela katamaa yiite” yaagiis.

Kawuwaa zareti laappun tammatikka banttana dichchiya, he kataman erettida asatuura de7oosona. <sup>7</sup> He kawuwaa zareta dichchiya asatukko dabddaabbee gakkido wode, kawuwaa zareta laappun tammata akka woridosona. Woridi eta qooriyaa muucidi, eta guuggiyaa keeshiyan aattidi, Iziraa7eela kataman de7iya Yeehussi yeddidosona.

<sup>8</sup> Yeddin asai, “Eti kawuwaa zaretu guuggeta ekki yiidosona” yaagidi Yeehussi yootiis.

Yootin Yeehu, “Wontto maallado gakkanaashin, katamaa geliyo penggiyan eta naa77usan dooridi wottite” yaagidi azaziis.

<sup>9</sup> Wonttetta gallassi maallado Yeehu kare kiyidi, asaa ubbaa sinttan eqqiis. Eqqidi, “Intte xillo. Ta godaa bolli maqettada woridai tana. SHin hageeta ubbaa woridai oonee?

<sup>10</sup> Yaatikko simmi GODAI Akaaba zaretu bolli yootidoogaappe issi qaalinne sa7an wodhdhennaagaa inttiyo erite. Aissi giikko, GODAI ba ashkkaaraa Eelaasa baggaara yootidobaa poliis” yaagiis. <sup>11</sup> Hegaa gishshau, Yeehu Iziraa7eelan attida Akaaba zareta, a gita asata, a laggetanne a qeeseta ubbaa, ayyo aibanne ashshennan wori wurssiis.

<sup>12</sup> Hegaappe guyyiyan, Yeehu denddidi, Samaariyaa biis. Biidi Henttanchchatu Moottaa giyoosaa gakkiddi, <sup>13</sup> Yihudaa kawuwaa Akaaziyaasa dabbotuura gaittiis. Gaittidi “Intte oonee?” yaagidi oichchiis.

Oichchin eti, “Nuuni Akaaziyaasa dabbota; nuuni kawuwaa zaretanne kawee Elzaabeeli naatanne sarotana beettees” yaagidosona.

<sup>14</sup> Yeehu ba asata, “Eta paxa oiqqite” yaagidi azaziis. Azazin eta paxa oiqqidi, Henttanchchatu Moottan de7iya haattaa ollaa matan eta oitamanne naa77ata akka woridosona; i etappe issuwaanne ashshibeenna.

<sup>15</sup> Yeehu he sohuwaappe denddidi yiidi, Rekaaba na7aa Yonadaabaara gaittiis. Gaittidi a sarotidi, “Ta qofainne ne qofainne issuwaa. Yaatin ta bagga giduutee?” yaagiis.

Yaagin Yonadaabi, “Ee gidana” yaagidi zaariis.

Zaarin i “Ane ta kushiyaa oiqqaa” yaagiis. Yaagin a kushiyaa oiqqidaagaa pude gaariyaa bolli kessiis. <sup>16</sup> Kessidi, “Tanaara hindda. Taani GODAU mishettiyoogaanne be7a” yaagiis. Yaagidi a ba gaariyan utissiis. <sup>17</sup> Yeehu Samaariyaa yiido wode, Akaaba zariyaappe attida ubbaa woriis; GODAI Eelaasassi odido qaalaadan eta xaissiis.

### *Ba7aalayyo Goinniyaageeta Woridosona*

<sup>18</sup> Hegaappe guyyiyan, Yeehu asaa ubbaa issippe shiishshidi, “Akaabi Ba7aalayyo guutta keenaa goinniis; shin taani appe daro goinnana. <sup>19</sup> Ha77i simmi Ba7aala sunttan hananabaa yootiya ubbata, ayyo goinniyaageeta ubbatanne a qeeseta ubbata taayyo xeesidi shiishshite. Etappe issi asinne paccennaadan xeellite. Aissi giikko, taani Ba7aalayyo daro yarshshuwaa yarshshanau hanais. He sohuwaa yeennan aggiya asi paxa de7enna” yaagiis. SHin Yeehu Ba7aalayyo goinniyaageeta cimmiidi xaissanau hega oottiis.

<sup>20</sup> Yeehu, “Ba7aalayyo goinnana gallassaa awaajjite” yaagiis. Yaagin eti awaajjidosona. <sup>21</sup> Hegaappe guyyiyan, Yeehu Israa7eela biitta ubbaa kiittin, Ba7aalayyo goinniyaageetappe issi asinne attennan ubbati yiidosona; yiidi ubbaikka Ba7aala Eeqa Keettaa ha gaxaappe ya gaxaa gakkanaashin, qilxxi giidi kumidosona.

<sup>22</sup> Yeehu goinniyaageetu maayuwaayyo aawatiya issi bitaniyaa, “Ba7aalayyo goinniyaageetu ubbatussi maayuwaa eha” yaagiis. Yaagin bitanee etayyo maayuwaa ehiis.



<sup>23</sup> Hegaappe guyyiyan, Yeehunne Rekaaba na7ai Yonadaabinne Ba7aala Eeqa Keettaa gelidosona. Gelin Yeehu Ba7aalayyo goinniyaageeta, “Ba7aalayyo goinniyaageetappe attin, GODAA ashkkaratuppe issi asinne intte gidдон de7ikko xeellite” yaagiis. <sup>24</sup> Hegaappe guyyiyan, eti xuuggiyo yarshshotanne hara yarshshotanne yarshshanau gidдо gelidosona.

Yeehu Ba7aala Eeqa Keettaappe kareera hospun tammu asata giigissi wottiis. Yaatidi, “Intteppe issi urai taani intte kushiyan wottiyo asatuppe issuwaa yeddikko, a shemppoi he uraa shemppuwaara gada” yaagiis.

<sup>25</sup> Yeehu xuuggiyo yarshshuwaa yarshshiyooгаа polosaa, naagiyaageetanne halaqatanne, “Gidдо gelidi, eta worite. Etappe issi asinne kessi ekkoppo” yaagidi azaziis. Azazin eta bisuwan suppiyidi wurssidosona. Yaatidi naagiyaageetinne halaqatinne eta ahaa kare olidosona. Hegaappe guyyiyan, Ba7aala Eeqa Keettaa qol77o gelidosona. <sup>26</sup> Gelidi Ba7aala Eeqa Keettaappe eeqa tuussata kessidi xuuggidosona. <sup>27</sup> Qassikka Ba7aalau goinniyo eeqa shuchchaa kinchcherettidosona; Ba7aala eeqa keettaakka qolidosona. Yaatidi he sohuwaa sheeshsha keetta kessidosona; hachchi gakkanaashinkka he sohoi sheeshsha keetta gididi attiis.

<sup>28</sup> Hegaadan oottidi, Yeehu Ba7aala Israa7eelappe xaissiiis. <sup>29</sup> Gidikonne Nabaaxa na7ai Iyorbbaami Israa7eela asaa ootissido nagaraa oottiyooгаа i aggibeenna. Beeteleeninne Daanan Iyorbbaami essido worqqa maratu misiletuyyo i ba huuphen goinniis.

<sup>30</sup> Hegaappe simmin, GODAI Yeeha, “Neeni ta sinttan likke gididabaa oottada polido gishshaunne ta qofan de7iyaabaa ubbaa neeni Akaaba zaretu bolli oottido gishshau, ne zareti oiddantto yeletaa gakkanaashin, Israa7eela kawotaa araatan uttana” yaagiis. <sup>31</sup> Hegaa gidi uttinkka, Yeehu GODAA Israa7eela Xoossaa higgiiya ba kumetta wozanaappe minttidi naagibeenna; qassi Iyorbbaami Israa7eela naata ootissido nagaraa oottiyooгаа aggibeenna.

### *Yeehu Haiquwaa*

<sup>32</sup> He wodiyan GODAI Israa7eela biittaa xunttanau doommiis. Sooriyaa Kawoi Hazaa7eeli Israa7eela biittaappe daro sohota xooniis. <sup>33</sup> Xoonidi Yorddaanoosa SHaafaappe arshsho baggaara de7iya Gala7aadenne Baasaane biitta ubbaa oiqqiis. He biittati Arnnoona SHaafaa matan de7iya Aaro7era katamaappe doommidi, Roobeela biittaa, Gaada biittaanne Minaase biittaa gakkosona.

<sup>34</sup> Yeehu hanido harabai, i oottidobai ubbainne a minotetta ubbai Israa7eela Kawotu Taarikiyaa Maxaafan xaafetti uttiis. <sup>35</sup> Hegaappe guyyiyan, Yeehu haiqqidi, ba maizzan gaittiis; i Samaariyan moogettiis. A sohuwan a na7ai Yo7akaazi kawotiis. <sup>36</sup> Yeehu Samaariyaa kataman Israa7eela biittaa bolli laatamanne hospun laittaa kawotiis.

## 11

### *Yihudaa Kawiyo Ataalo*

#### *(Hanidabaa Odiya Naa77antto Maxaafaa 22:10-23:15)*

<sup>1</sup> Akaaziyaasa aayyiya Ataala ba na7ai haiqqidoogaa be7ido wode, denddada kawuwaa zariyaa ubbaa xaissaasu. <sup>2</sup> SHin Kawuwaa Yoraama na7iyaa, Akaaziyaasa michchiyaa Yihoshebaa7a, haiqqanau de7iya kawuwaa naatu gidдоppe Akaaziyaasa na7aa Yo7aasha wuuqqada ekkaasu. Ekkada anne a xanttiyaaronne hiixa keettan gottada, Ataala worennaadan ashshaasu. <sup>3</sup> Ataala biittaa haariyo wode ubban, na7ai Yihoshebaa7i matan GODAA Beeta Maqidasiyan usuppun laittaa qosettidi de7iis.

<sup>4</sup> Laappunnta laittan Yoodaahе kawuwaa naagiyaageetunne kawo keettaa naagiyaageetu halaqatussi kiittidi, baakko GODAA Beeta Maqidasiyaa ehiissiiis. Ehiissidi etaara maachchaa maacettidi, eta GODAA Beeta Maqidasiyan caaqiissiiis. Hegaappe guyyiyan, eta kawuwaa na7aa Yo7aasha bessiiis. <sup>5</sup> I eta, “Intte oottanabai

hagaa. Sambbatan naaguwau geliyo kayai gakkido intte heezzu citaappe issi citai kawuwaa keettaa naago; <sup>6</sup> issi citai Suura giyo penggiyaa naago; qassi issi citai naagiyaageetuppe guyye baggaara de7iya penggiyaa naago. <sup>7</sup> Qassikka Sambbatan naaguwaappe haa kiyiya hankko naa77u citati kumettati kawuwaayyo Beeta Maqidasiyaa naagona. <sup>8</sup> Ola miishshaa oiqqidi, kawuwaa giddoyidi, kawoi kiyiyo wodenne geliyo wode ubban aara issippe de7ona. Inttekko shiiqiya oonakka worite” yaagiis.

<sup>9</sup> He halaqati qeese Yoodaahē azazidobaa ubbaa oottidosona. Eti ubbaikka Sambbata gallassan naaguwaa kayai gakkidoogeetakka naaguwaa kayaa polidaageetakka ekkidi, qeesiyaa Yoodaahēkko yiidosona. <sup>10</sup> Yin qeese GODAA Beeta Maqidasiyan de7iya, beni Kawuwaa Daawita gondalletanne tooratanne ubbaa halaqatuyyo immiis. <sup>11</sup> Naagiyaageeti issoi issoi ola miishshata bantta kushiyan oiqqidi, Beeta Maqidasiyaappe haddirssa baggaappe doommidi, ushachcha bagga gakkanaashin, yarshshiyosaa mataanne Beeta Maqidasiyaa matan kawuwaa yuushuwan eqqidosa. <sup>12</sup> Hegaappe guyyiyan, Yoodaahē kawuwaa na7aa kare kessidi, a huuphiyan kallachchaa wottiis. Wottidi Kawotaa Higgiyaa Maxaafaa ayyo immidi, tiyidi kawoyiis. Kawoyin asai kushiya baqqidi, ba qaalaa xoqqu oottidi, “Kawoi shemppo gam77o!” yaagiis.

<sup>13</sup> Kawiyaa Ataala naagiyaageetu wocamaanne asaa wocamaanne siyido wode, asaakko GODAA Beeta Maqidasiyaa baasu. <sup>14</sup> Baada kawoi kase kawoti haniyoogaadan tuussaa matan eqqidaagaa be7aasu. Halaqatinne xurumbbaa punniyaageeti kawuwaa matan de7oosona; he biittaa asai ubbai ufaittidi, xurumbbaa punnees. Punnin Ataala ba maayuwaa pooshshada, “Hagee makkala! Hagee makkala!” yaagada waassaasu.

<sup>15</sup> Qeese Yoodaahē olanchchatu halaqata, “Ataalo Beeta Maqidasiyan woroppite! O yaaranne haaranne salppida salppetu gidduwan wottidi, kare kessite. O ashshanau kajeeliya asi de7ikko worite!” yaagiis. <sup>16</sup> Hega gishshau, eti o oiqqidi, kawo keettaa efidosona; efidi Paraa Penggiyan o woridosona.

*Yoodaahē Maachchaa Ooraxiisii*  
(*Hanidabaa Odiya Naa77antto Maxaafaa 23:16-21*)

<sup>17</sup> Hegaappe guyyiyan, asai GODAA asa gidana mala, Yoodaahē kawoinne asainne GODAARA maachchaa maacettana mala oottiis. Qassi kawuwaappenne asaappenne gidduwankka maachchaa maacissiis. <sup>18</sup> He wode Yihudaa asai ubbai Ba7aala Eeqa Keettaa biidi, he keettaa qoliis; qolidi yarshshiyō sohotanne a misileta kinchcherettiis. Qassi Mataana giyo Ba7aala qeesiyaa yarshshiyō sohotu sinttan woridosona.

Hegaappe simmin, qeesiyaa Yoodaahē GODAA Beeta Maqidasiyan naagiyaageeta wottiis. <sup>19</sup> Wottidi banaara gadaawata, kawuwaa naagiyaageeta, kawo keettaa naagiyaageetanne Yihudaa asaa ubbaa ekkin, eti kawuwaa GODAA Beeta Maqidasiyaappe duge ehiidi, Naagiyaageetu Penggiyaa giyo penggiyaa baggaara kawo keetti issippe gelidosona. Gelin kawoi ba kawotaa araatan uttiis. <sup>20</sup> Yaatin Yihudaa asai ubbai ufaittiis. Ataala kawo keettan bisuwan haiqqidoogaappe guyyiyan, katamaikka woppu giis.

<sup>21</sup> Yo7aashi kawotiyo wode laappun laitta na7a.

## 12

*Yihudaa Kawuwaa Yo7aasha*  
(*Hanidabaa Odiya Naa77antto Maxaafaa 24:1-16*)

<sup>1</sup> Yeehu Israa7eela biittan kawotido laappun laittan, Yo7aashi Yihudan kawotiis; i Yerusalaaamen oitamu laitta kawotiis. A aayee sunttai Xiibiyo; a Berssaabehe katamaappe yiida asa. <sup>2</sup> Qeese Yoodaahē a tamarissidonne zorido gishshau, i de7ido laitta ubban Yo7aashi GODAA sinttan suurebaa oottiis. <sup>3</sup> Gidikonne asai goinniyo

xoqqa sohota xaissibeenna; asaikka he sohotun yarshshuwaa yarshshiyooaanne ixaanaa cuwayiyooqaa aggabeenna.

<sup>4</sup> Yo7aashi qeeseta xeesidi, “GODAA Beeta Maqidasiyaa yiya geeshsha miishshaa ubbaa shiishshite. Hegeekka huuphiyaa qoodaa wode imettiya miishshaanne asai ba sheniyaa Beeta Maqidasiyaayyo ehiyo miishsha. <sup>5</sup> Yaatobare qeeseti ubbai he miishshaa ehiya asatuppe bantta siiriyaara siiriyaara ekkidi, Beeta Maqidasiyaa gidдон moorettidasaa ubbaa bottokonona” yaagiis.

<sup>6</sup> SHin Kawoi Yo7aashi kawotido laatamanne heezantto laitti gakkanaashin, qeeseti GODAA Beeta Maqidasiyaa bottokonibookkona. <sup>7</sup> Hega gishshau, Kawoi Yo7aashi qeesiyaa Yoodaahanne hara qeesetanne xeesidi, “Beeta Maqidasiyaa gidдон moorettida sohota aibissi bottokonekketii? Miishshaa Beeta Maqidasiyaa bottokononau im-miteppe attin, intteyyo imettiya miishshaa oiqqoppite” yaagiis.

<sup>8</sup> Yaagin qeeseti, “Asaappe hara miishshaa ekkokko; Beeta Maqidasiyaa gidдон moorettida sohotakka bottokonokko” yaagidi maayidosona.

<sup>9</sup> Hegaappe guyyiyan, qeesiyaa Yoodaahanne saaxine issuwaa ekkidi, a qum77uwan xoo7iyaa lukkiis; lukkidi yarshshiyooosaa matan GODAA Beeta Maqidasiyaa geliyoosan ushachcha baggaara wottiis. Geliyoosaa naagiya qeeseti GODAA Beeta Maqidasiyaa yiida miishsha ubbaa saaxiniyaa gidдон yeggoosona. <sup>10</sup> Saaxiniyaa gidдон daro miishshai dagattidaagaa eti be7ido wode ubban, kawo xaafenne qeese ubbatu halaqai yoosona; yiidi GODAA Beeta Maqidasiyaa yiida miishshaa qoodidi, qarcciitatu qoloosona.

<sup>11</sup> Qoodettida miishshaa likkiyaa eridoogaappe guyyiyan, Beeta Maqidasiyaa oosuwaa wochchanau sunttettida asatuyyo immoosona. Immin eti miishshaa ekkidi, GODAA Beeta Maqidasiyan anaaxetussinne gimbbiyaageetussi immoosona. <sup>12</sup> Qassi shuchchaa massiyaageetuyyoonne shuchchaa qoo7iyaageetuyyo qanxxoosona. Qassikka GODAA Beeta Maqidasiyaa bottokononau sanqqaanne shuchchanne koshshiya harabata shammoosona. <sup>13</sup> SHin Beeta Maqidasiyaa yiida miishshaappe GODAA Beeta Maqidasiyaayyo bira burcukkota, qapheta, keretanne xurumbbata woikko worqqaappenne biraappenne medhdhiyo hara geeshsha miishshata oottanau kessibookkona. <sup>14</sup> He miishsha ubbai Beeta Maqidasiyaa bottokoniya asaayyo qanxxettiis. <sup>15</sup> Beeta Maqidasiyaa oosuwaa wochchanau sunttettida asata ooninne, “Miishshan ai ai oottidetii?” giidi oichchibeenna; aissi giikko, asati ammanttiyaageeta. <sup>16</sup> Mooruwaa gishshaunne nagaraa gishshau yarshshiyoo yarshshuwau qanxxettiya miishshai qeesetuyyo gelesippe attin, GODAA Beeta Maqidasiyaa bottokoniyo miishshaa saaxiniyan gelenna.

<sup>17</sup> He wode Sooriyaa Kawoi Hazaa7eeli biidi, Gaate katamaa olidi oiqqiis. Yaatidi Yerusalaame olanau simmiis. <sup>18</sup> SHin Yihudaa Kawoi Yo7aashi appe kase kawotida Yihudaa kawoti Yoosaafixi, Yoraaminne Akaaziyaasi GODAAYYO dummayi wottido miishshata, qassi i ba huuphen immido imotanne GODAA Beeta Maqidasiyaanne kawo keettaa buquraa minjjiyoosan de7iya worqqa ubbaa ekkiiis. Ekkidi Sooriyaa Kawuwaassi Hazaa7eelassi yeddiis; yeddin Hazaa7eeli Yerusalaame olanaagaa aggi bayiis.

<sup>19</sup> Kawoi Yo7aashi hanido harabainne i oottidobai ubbai Yihudaa Kawotu Taarikiyaa Maxaafan xaafetti uttiis. <sup>20</sup> Hegaappe guyyiyan, a oosanchchati a bolli maqettidi, Siilla giyo sohuwaa efiya ogiyan Miillo giyoosan de7iya keettan woridosona. <sup>21</sup> A worida oosanchchati SHim77aata na7aa Yozakaaranne SHomeera na7aa Yihozabaada, Yo7aashi Daawita Kataman ba maizza aawatu duufuwan moogettiis; a sohuwan a na7ai Amesiyaasi kawotiis.

## 13

### *Israa7eela Kawuwaa Yo7akaaza*

<sup>1</sup> Akaaziyaasa na7ai, Yihudaa Kawoi Yo7aashi kawotido laatamanne heezzantto laittan, Yeehu na7ai Yo7akaazi Samaariyaa kataman Israa7eela bolli kawotiis; i tammanne laappun laitta kawotiis. <sup>2</sup> Nabaaxa na7ai Iyorbbaami Israa7eela asaa ootissido nagaraa kaallidi, Yo7akaazi GODAA sinttan iitabaa oottiis; i he nagaraa oottiyoogaa aggibeenna. <sup>3</sup> Hegaa gishshau, GODAA hanqqoi Israa7eela bolli suulliis; GODAI eta daro wodiyau Sooriyaa Kawuwaa Hazaa7eelayyoonne a na7aa Benihadaadayyo zaari zaaridi aattidi immiis.

<sup>4</sup> Hegaappe guyyiyan, Yo7akaazi GODAA woossiis. Woossin GODAI ayyo siyiis; aissi giikko, Sooriyaa kawoi Israa7eela ai mala iita huqqunnaa huqqunnidaakko GODAI be7iis. <sup>5</sup> Be7idi Israa7eela asaa ashshiyaagaa immiis; immin eti Sooriyaa asatu kushiyaappe kessi ekkidosona. Yaatidi Israa7eela asai kaseegaadankka ba son saruwan de7iis. <sup>6</sup> Gidikkokka Israa7eela asai Iyorbbaama so asai ootissido nagaraappe simmibeenna; eti he nagaraa oottiyoogaa aggibookkona. Qassi Asheero giyo xoosee misilee Samaariyan eqqosan attiiis. <sup>7</sup> Yo7akaazayyo ishatamu paraasatuppenne tammu gaaretuppenne, tammu sha7u toho olanchchatuppe attin, hara olanchchi attibeenna. Aissi giikko, Sooriyaa kawoi eta xaissiis; i eta audiyan de7iya suulladan oottiis.

<sup>8</sup> Yo7akaazi hanido harabai, i oottidobai ubbainne a minotettai Israa7eela Kawotu Taarikiyaa Maxaafan xaafetti uttiis. <sup>9</sup> Yo7akaazi haiqqidi, ba maizzan gaittiis; a sohuwan a na7ai Yo7aashi kawotiis.

### *Israa7eela Kawuwaa Yo7aasha*

<sup>10</sup> Yihudaa Kawoi Yo7aashi kawotido hasttamanne laappunnta laittan, Yo7akaaza na7ai Yo7aashi Samaariyan Israa7eela bolli kawotiis; i tammanne usuppun laitta kawotiis. <sup>11</sup> Yo7aashi GODAA sinttan iitabaa oottiis. Nabaaxa na7ai Iyorbbaami Israa7eela asaa ootissido nagaraappe issuwaanne ashshennan oottiis; i he nagaraa oottiyoogaa aggibeenna.

<sup>12</sup> Yo7aashi hanido harabai, i oottidobai ubbainne Yihudaa Kawuwaa Amesiyaasaara olettido minotettai Israa7eela Kawotu Taarikiyaa Maxaafan xaafetti uttiis. <sup>13</sup> Yo7aashi haiqqidi, ba maizzan gaittiis; Samaariyan Israa7eela kawotuura moogettiis. A sohuwan a na7ai Iyorbbaami kawotiis.

### *Elssaa7a Haiquwaa*

<sup>14</sup> Elssaa7i bana woriya harggiyaa harggiyo wode, Israa7eela Kawoi Yo7aashi a be7anau biidi, “Ta aawau; ta aawau! Neeni Israa7eela asau wolqqanne gondalle!” yaagidi yeekkiis.

<sup>15</sup> Yeekkin Elssaa7i, “Wonddafiyaanne zubbetanne ekka ya” yaagiis; yaagin Yo7aashi ehiis.

<sup>16</sup> Hegaappe guyyiyan, Elssaa7i Israa7eela kawuwaa, “Wonddafiyaa giigissa oiqla” yaagiis; wonddafiyaa i giigissi oiqqidaashin, Elssaa7i ba kushiyaawo kawuwaa kushiyaawo bolli wottiis.

<sup>17</sup> Wottidi, “Arshsho bagga maskkootiyaa dooya” yaagin dooyiis. Dooyin Elssaa7i, “Zubbiyaa wonddafiyaa dukka” yaagiis; yaagin dukkiis. Dukkin Elssaa7i, “Hagee GODAA zubbe! Hagee Sooriyaa asata xooniya zubbe! Neeni Sooriyaa asata Afeeqa kataman xoonana gakkanaashin olana” yaagiis.

<sup>18</sup> Hegaappe guyyiyan Elssaa7i kawuwaa, “Zubbeta ekka” yaagin ekkiis. Ekkin Elssaa7i, “Etan biittaa cadda” yaagiis. Yaagin heezzutoo biittaa caddidi aggi bayiis.

<sup>19</sup> Yaatin Xoossaa asi kawuwaa hanqqettidi, “Ichchashutoo woikko usupputoo biittaa caddidabaa gidiyaakko, neeni Sooriyaa asata xoonada muleera xaissanaagaa shin! Neeni ha77i eta heezzutoo xalaala xoonana” yaagiis.

<sup>20</sup> Elssaa7i haiqqidi moogettiis.



Moo7aaba biittaaappe ambbaanoti Israa7eela biittaa bolli laittan laittan woraa-jjoosona. <sup>21</sup> Issi gallassi amarida Israa7eela asati issi bitaniyaa ahaa moogiiddi, Moo7aaba biittaa ambbaanota be7idosona. Be7idi bitaniyaa ahaa Elssaa7a duufo giddo olidi baqatidosona. Yaatin ahai Elssaa7a meqettaa bolli wodhdhiis; wodhdhosaara paxinne dendra eqqiis.

### *Israa7eelanne Sooriyaa Giddon Denddida Olaa*

<sup>22</sup> Yo7akaazi kawotido laittan ubban Sooriyaa Kawoi Hazaa7eeli Israa7eela huqqunniis. <sup>23</sup> SHin GODAI Abrahaamaara, Yisaaqaaranne Yaaqoobaara maacettido maachchaa gishshau, etayyo kehiis, qarettiisinne qoppiis. Hachchi gattanaukka i eta xaissibeenna woikko ba sinttappe diggibeenna.

<sup>24</sup> Sooriyaa Kawoi Hazaa7eeli haiqqin, a sohuwan a na7ai Benihadaadi kawotiis. <sup>25</sup> Hegaappe guyyiyan, Hazaa7eeli a aawaa Yo7akaazappe olan oiqqido katamata Yo7akaaza na7ai Yo7aashi Hazaa7eela na7aa Benihadaadappe wotti ekkiis. Yo7aashi a heezzutoo xoonidi, Israa7eela katamata zaariis.

## 14

### *Yihudaa Kawuwaa Amesiyaasa*

#### *(Hanidabaa Odiya Naa77antto Maxaafaa 25:1-24)*

<sup>1</sup> Yo7akaaza na7ai, Israa7eela Kawoi Yo7aashi kawotido naa77antto laittan, Yihudaa Kawuwaa Yo7aasha na7ai Amesiyaasi kawotiis. <sup>2</sup> I kawotiyo wode laittai ayyo laatanmanne ichchasha; i Yerusalaamen laatanmanne uddufun laitta kawotiis. A aayee sunttai Yiho7aadino; a Yerusalaame asa. <sup>3</sup> Amesiyaasi GODAA sinttan suurebaa oottiis; shin a maizza aawai Daawiti oottidoogaadan oottibeenna. Ubbabaakka i ba aawaa Yo7aasha qulliis. <sup>4</sup> Asai goinniyo xoqqa sohota xaissibeenna; asaikka he sohotun yarshshuwaa yarshshiyooogaanne ixaanaa cuwayiyoogaa aggibeenna.

<sup>5</sup> Amesiyaasi kawotettaa ba kushiyan mintti oiqqidosaarakka, kase kawuwaa ba aawaa Yo7aasha worida oosanchchata woriis. <sup>6</sup> Muuse higgiiyaa maxaafan xaafetti-doogaadan, GODAI, “Naati oottido nagaraa gishshau, aawata woranau bessenna; qassi aawati oottido nagaraa gishshaukka, naata woranau bessenna. Asai ubbai ba oottido nagaran nagaran haiqqanau bessees”<sup>3</sup> yaagidi azazidoogaadankka, woridaageetu naata woribeenna.

<sup>7</sup> Amesiyaasi Maxine Zanggaaraa giyo sohuwan tammu sha7u Eedooma biittaa asaa woriis; woridi Selaa7a giyo katamaakka olan oiqqiis. Oiqqidi Yoqiti7eela yaagidi sunttiis; sunttin hachchi gakkanaashin ha sunttan xeesettees.

<sup>8</sup> Hegaappe guyyiyan, Amesiyaasi Yeehu na7aa na7aa, Yo7akaaza na7aa, Yo7aashassi asa kiittidi, “Haaya; ane naa77ai olaa gaittoos” yaagidi naassiis.

<sup>9</sup> SHin Israa7eela Kawoi Yo7aashi Yihudaa Kawuwaa Amesiyaasa hagaadan yaagiis; “Liibaanoosan de7iya kinddiichchoi Liibaanoosan de7iya zigaayyo kiittidi, ‘Ne na7iyo ta na7aassi imma’ yaagiis. SHin Liibaanoosan de7iya issi do7ai hegara kanttiiddi, he kinddiichchuwaa yedhdhiis. <sup>10</sup> Ee, neeni tumukka Eedooma biittaa asaa xoonadasa; hegan ha77i otorettaasa. Neeni ne xoonuwan ufaittaidda, ne son woppu gaada uttaaga. Ne bollinne ne biittaa Yihudaa bolli metonne bashshanne ehiyaabaa aibissi denttetai?” yaagidi zaariis.

<sup>11</sup> SHin Amesiyaasi sissaa ixxiis. Hega gishshau, Israa7eela Kawoi Yo7aashi olanau kiyin, inne Yihudaa Kawoi Amesiyaasinne Yihudan de7iya Beeti-SHemesha giyo katanman olaa gaittidosona. <sup>12</sup> Gaittin Israa7eela asai Yihudaa asaa xooniis; xoonin Yihudaa asai ubbai baqatidi, ba soo ba soo biis. <sup>13</sup> Israa7eela Kawoi Yo7aashi Akaaziyaasa na7aa na7aa, Yo7aasha na7aa, Yihudaa Kawuwaa Amesiyaasa Beeti-SHemesha kataman

<sup>3</sup> 14:6 Ha xiqisee Zaarettido Wogaa 24:16 beettees.



omooddiis. Hegaappe guyyiyan, Yo7aashi Yerusalaame biidi, Yerusalaame dirssaa gimbbiyaa, Efireema Penggiyaappe biidi, Zooziyaa Penggiyaa gakkanaashin de7iya oiddu xeetu wara gidiya, sohuwaa laaliis. <sup>14</sup> Laalidi GODAA Beeta Maqidasiyaaninne kawo keettaa buquraa minjjiyoosan de7iya worqqa, biraanne miishshaa ubbaa ekkiis; qassi iggitiyaa oiqettida asatakk ekkidi, Samaariyaa simmiis.

<sup>15</sup> Yo7aashi hanido harabai, i oottidobai, a minotettainne Yihudaa Kawuwaa Amesiyaasaara i olettidobai Israa7eela Kawotu Taarikiyaa Maxaafan xaafetti uttiis.

<sup>16</sup> Yo7aashi haiqqidi, ba maizzan gaittiis; i Samaariyaa kataman Israa7eela kawotuura moogettiis. A sohuwan a na7ai Iyorbbaami kawotiis.

*Yihudaa Kawuwaa Amesiyaasa Haiquwaa  
(Hanidabaa Odiya Naa77antto Maxaafaa 25:25-28)*

<sup>17</sup> Yo7akaaza na7ai, Israa7eela Kawoi Yo7aashi haiqqidoogaappe guyyiyan, Yo7aasha na7ai, Yihudaa Kawoi Amesiyaasi tammanne ichchashu laittaa de7iis. <sup>18</sup> Amesiyaasi hanido harabai Yihudaa Kawotu Taarikiyaa Maxaafan xaafetti uttiis.

<sup>19</sup> Amesiyaasa woranau asai Yerusalaamen maqettiis; yaatin i Laakisha giyo katamaa baqatiis. SHin eti a geeduwaa Laakisha katamaa asa kiittin, a yan woridosona. <sup>20</sup> Woridi a ahaa paran caani ehiidi, Daawita Kataman Yerusalaamen a maizza aawatuura moogidosona. <sup>21</sup> Hegaappe guyyiyan, Yihudaa asai ubbai tammanne usuppun laitta gidियो na7aa Ooziyaana a aawaa Amesiyaasa sohuwan kawoyiis. <sup>22</sup> A aawai Amesiyaasi haiqqidoogaappe guyyiyan, i Ooziyaani Eelaata giyo katamaa zaaretti keexxidi, Yihudan timiis.

*Israa7eela Kawuwaa Naa77antto Iyorbbaama*

<sup>23</sup> Yo7aasha na7ai, Yihudaa Kawoi Amesiyaasi kawotido tammanne ichchashantto laittan, Israa7eela Kawuwaa Yo7aasha na7ai Iyorbbaami Samaariyan kawotiis; i oitamanne isiini laitta kawotiis. <sup>24</sup> Iyorbbaami GODAA sinttan iitabaa oottiis; Nabaaxa na7ai Iyorbbaami Israa7eela asaa ootissido nagara ubbaa oottiyoogaa aggibeenna.

<sup>25</sup> Gaate-Hefeeriyaami Amiitaaya na7aa hananabaa yootiya ba ashkkaraa Yoonasa baggaara GODAI Israa7eela Xoossai ba qaalan haasayidoogaadan, Hamaata Pinuwaa giyoosaappe doommidi, Maxine Abbaa gakkanaashin de7iya Israa7eela zawaa Yo7aasha na7ai Iyorbbaami xoonidi zaariis. <sup>26</sup> Aissi giikko, Israa7eelan de7iya asai ubbai aille gidin, goqa gidin, ai keena tuggaa tuggatidaakko, GODAI be7iis; eta maaddiyaabi ooninne baawa. <sup>27</sup> GODAI Israa7eela asaa sunntaa saluwaappe garssan quccana yaagibeenna. Hegaa gishshau, GODAI eta Yo7aasha na7aa Iyorbbaama baggaara ashshiis.

<sup>28</sup> Iyorbbaami hanido harabai, i oottidobai ubbai, i olettidobainne Yihudaa bagga gidida Damasqo katamaanne Hamaata katamaa Israa7eelayyo zaaridobai Israa7eela Kawotu Taarikiyaa Maxaafan xaafetti uttiis. <sup>29</sup> Iyorbbaami haiqqidi, ba maizza aawatun Israa7eela kawotun gaittiis; a sohuwan a na7ai Zakkaariyaasi kawotiis.

## 15

*Yihudaa Kawuwaa Ooziyaana  
(Hanidabaa Odiya Naa77antto Maxaafaa 26:1-23)*

<sup>1</sup> Israa7eela Kawoi Iyorbbaami kawotido laatamanne laappuntta laittan, Yihudaa Kawuwaa Amesiyaasa na7ai Ooziyaani<sup>4</sup> kawotiis. <sup>2</sup> I kawotido wode, laittai ayyo tammanne usuppuna; i Yerusalaamen ishatamanne naa77u laitta kawotiis. A aayee sunntai Yikoolo; a Yerusalaame asa. <sup>3</sup> A aawai Amesiyaasi oottidoogaadan, ikka GODAA sinttan suurebaa oottiis. <sup>4</sup> Gidikkonne asai goinniyo xoqqa sohota xaissibeenna; he sohotun yarshshuwaa yarshshiyooaanne ixaanaa cuwayiyooogaa aggibeenna. <sup>5</sup> GODAI

<sup>4</sup> 15:1 Ooziyaani: Ibraawettuwan Kawoi Ooziyaani ha miraafiyan Azaariyaa geetettees.

Ooziyaana hanttaara goga harggiyan oittiis; haiqqana gakkanaashinkka he harggee a yeddibeenna gishshau, dumma keettan barkka de7iis. He wode kawuwaa na7ai Yo7aataami kawo keettan de7idi, he biittaa asaa haariis.

<sup>6</sup> Ooziyaani hanido harabainne i oottidobai ubbai Yihudaa Kawotu Taarikiyaa Maxaafan xaafetti uttiis. <sup>7</sup> Ooziyaani haiqqidi, ba maizzan gaittiis; Daawita Kataman ba maizza aawatuura moogettiis. A sohuwan a na7ai Yo7aataami kawotiis.

### *Israa7eela Kawuwaa Zakkaariyaasa*

<sup>8</sup> Yihudaa Kawoi Ooziyaani kawotido hasttamanne hosppuntta laittan, Iyorbbaama na7ai Zakkaariyaasi Israa7eela asaa bolli Samaariyaa kataman kawotiis; i usuppun agina kawotiis. <sup>9</sup> A maizza aawati oottidoogaadan, ikka GODAA sinttan iitabaa oottiis; Nabaaxa na7ai Iyorbbaami Israa7eela asaa ootissido nagaraa oottiyooгаа aggibeenna. <sup>10</sup> Hegaappe guyyiyan, Yaabeesha na7ai SHaaluumi Zakkaariyaasa bolli maqetti denddidi, Yibila7aama giyoosan woriis; woridi a sohuwan bau kawotiis.

<sup>11</sup> Zakkaariyaasi hanido harabainne i oottidobai ubbai Israa7eela Kawotu Taarikiyaa Maxaafan xaafetti uttiis.

<sup>12</sup> Hagaadan hanidi, GODAI Yeehuyyo, “Ne zaree oiddantto yeletaa gakkanaashin, Israa7eela kawotaa araatan uttana” yaagidi yootido qaalai polettiis.

### *Israa7eela Kawuwaa SHaaluuma*

<sup>13</sup> Yihudaa Kawoi Ooziyaani kawotido hasttamanne uddufuntta laittan, Yaabeesha na7ai SHaaluumi kawotiis; i Samaariyan issi agina kawotiis. <sup>14</sup> Hegaappe guyyiyan, Gaada na7ai Minaaheemi Tirxxa giyo katamaappe Samaariyaa biis. Biidi Samaariyan de7iya Yaabeesha na7aa SHaaluuma woriis; woridi a sohuwan bau kawotiis.

<sup>15</sup> SHaaluumi hanido harabainne i maqettido maqqoi Israa7eela Kawotu Taarikiyaa Maxaafan xaafetti uttiis. <sup>16</sup> He wode Minaaheemi Tirxxa katamaappe denddidi, Tifisaaha giyo katamaa, kataman de7iya asaanne katamaa heeran de7iya biittata ubbaa oliis. Eti bantta katamaa dirssaa penggiyaa ayyo dooyennan ixxido gishshau, Tifisaaha katamaa olidi bashshiis; qassi he kataman de7iya ixeta maccaasaa uluwaa ubbaa phalqqi yeggiis.

### *Israa7eela Kawuwaa Minaaheema*

<sup>17</sup> Yihudaa Kawoi Ooziyaani kawotido hasttamanne uddufuntta laittan, Gaada na7ai Minaaheemi Israa7eela bolli kawotiis; i Samaariyan tammu laittaa kawotiis. <sup>18</sup> I GODAA sinttan iitabaa oottiis; Nabaaxa na7ai Iyorbbaami Israa7eela asaa ootissido nagaraa oottiyooгаа aggibeenna.

<sup>19</sup> Hegaappe guyyiyan, Asoore biittaa Kawoi Tigilaati-Paleseeri Israa7eela biittan woraajjiis. Woraajjin kawotettan bana minttana malanne maaddana mala, Minaaheemi Tigilaati-Paleseerayyo hasttamanne oiddu sha7u kilo giraame xaqara biraa immiis. <sup>20</sup> Minaaheemi he miishshaa Israa7eela asaa wolqqan peerissiis; Asoore biittaa kawuwaassi immanau dure asa ubbai issoi issoi ishatamu xaqara biraa peeridosona. Hegaadan oottin, Asoore kawoi Israa7eela biittaa aggidi, ba biitti simmiis.

<sup>21</sup> Minaaheemi hanido harabainne i oottidobai ubbai Israa7eela Kawotu Taarikiyaa Maxaafan xaafetti uttiis. <sup>22</sup> Minaaheemi haiqqidi, ba maizzan gaittiis; a sohuwan a na7ai Paqaahi kawotiis.

### *Israa7eela Kawuwaa Paqaaha*

<sup>23</sup> Yihudaa Kawoi Ooziyaani kawotido ishatamantta laittan, Minaaheema na7ai Paqaahi Israa7eela bolli Samaariyan kawotiis; i naa77u laitta kawotiis. <sup>24</sup> Paqaahi GODAA sinttan iitabaa oottiis; Nabaaxa na7ai Iyorbbaami Israa7eela asaa ootissido nagaraa oottiyooгаа aggibeenna. <sup>25</sup> A ola gadaawatuppe issoi, Ramaaliyaa na7ai Paaquha giyoogee a bolli maqettidi denddiis. Denddidi Gala7aade asaappe ishatamu attumaasaa banaara ekki biidi, Samaariyaa kataman kawo keettan de7iya qatuwaa

geliis. Gelidi Paaquhi Paqaaha Arggoobaarakka Haariyaarakka issippe woriis; woridi a sohuwan bau kawotiis.

<sup>26</sup> Paqaahi hanido harabainne i oottidobai ubbai Israa7eela Kawotu Taarikiyaa Maxaafan xaafetti uttiis.

### *Israa7eela Kawuwaa Paaquha*

<sup>27</sup> Yihudaa Kawoi Ooziyaani kawotido ishatamanne naa77antto laittan, Ramaaliyaa na7ai Paaquhi Israa7eela bolli Samaariyan kawotiis; i laatamu laitta kawotiis.

<sup>28</sup> Paaquhi GODAA sinttan iitabaa oottiis; Nabaaxa na7ai Iyorbbaami Israa7eela asaa ootissido nagaraa oottiyoogaa aggibeenna.

<sup>29</sup> Israa7eela Kawuwaa Paaquha wodiyan Asoore Kawoi Tigilaati-Paleseeri yiidi Iyoona, Aabeeli-Beetima7ika, Yaanooha, Qedeeshanne Haxoora geetettiya katamata olidi oiqqiis; qassikka Gala7aade, Galiilanne Nifttaaleema biittata ubbaa olidi, asaa Asoore biitti omooddidi efiis.

<sup>30</sup> Ooziyaana na7ai Yo7aataami kawotido laatamannta laittan, Eela na7ai Hoshee7i Ramaaliyaa na7aa Paaquha bolli maqettidi woriis; woridi a sohuwan bau kawotiis.

<sup>31</sup> Paaquhi hanido harabainne i oottidobai ubbai Israa7eela Kawotu Taarikiyaa Maxaafan xaafetti uttiis.

### *Yihudaa Kawuwaa Yo7aataama (Hanidabaa Odiya Naa77antto Maxaafaa 27:1-9)*

<sup>32</sup> Ramaaliyaa na7ai, Israa7eela Kawoi Paaquhi kawotido naa77antto laittan, Yihudaa Kawuwaa Ooziyaana na7ai Yo7aataami kawotiis. <sup>33</sup> Yo7aataami kawotiyo wode ayyo laittai laatamanne ichchasha; i Yerusalaamen tammanne usuppun laitta kawotiis. A aayee sunttai Yaruusho; Yaruusha Xaadooqa na7iyo. <sup>34</sup> Ba aawai Ooziyaani oottidoogaadan, Yo7aataamikka GODAA sinttan suurebaa oottiis. <sup>35</sup> Gidikkonne asai goinniyo xoqqa sohota xaissibeenna; he sohotun yarshshuwaa yarshshiyogaanne ixaanaa cuwayiyoogaa aggibeenna. Yo7aataami Beeta Maqidasiyaa geliyo qommo bagga penggiyaa zaarettidi oottiis.

<sup>36</sup> Yo7aataami hanido harabainne i oottidobai ubbai Yihudaa Kawotu Taarikiyaa Maxaafan xaafetti uttiis. <sup>37</sup> He wodiyan GODAI Sooriyaa Kawuwaa Raaxiinanne Ramaaliyaa na7aa, Israa7eela Kawuwaa Paaquha Yihudaa biittaa olissanau doommiis. <sup>38</sup> Yo7aataami haiqqidi, ba maizzan gaittiis; ba maizza aawaa Daawita Kataman ba maizza aawatuura moogettiis. A sohuwan a na7ai Akaazi kawotiis.

## 16

### *Yihudaa Kawuwaa Akaaza (Hanidabaa Odiya Naa77antto Maxaafaa 28:1-27)*

<sup>1</sup> Ramaaliyaa na7ai Paaquhi kawotido tammanne laappunnta laittan, Yo7aataama na7ai Akaazi Yihudan kawotiis. <sup>2</sup> I kawotiyo wode laittai ayyo laatama; Yerusalaamen i tammanne usuppun laitta kawotiis. A maizza aawai Daawiti suurebaa oottidoogaadan, GODAA ba Xoossaa sinttan i suurebaa oottibeenna. <sup>3</sup> I kase de7ida Israa7eela kawotu ogiyan hemettiis. Qassi GODAI Israa7eela asaa sinttappe laaggidi kessido asatu de7uwaa wogaa, he sheneyiyaagaa qullidi, ba yelido na7aa addaa taman xuuggidi, eeqau yarshshiis. <sup>4</sup> Akaazi asai goinniyo xoqqa sohotun, keratu huuphiyaaninne daashsha mitta ubbaa garssan yarshshuwaa yarshshiisinne ixaanaa cuwayiis.

<sup>5</sup> Hegaappe guyyiyan, Sooriyaa Kawoi Raaxiininne Ramaaliyaa na7ai, Israa7eela Kawoi Paaquhi Yerusalaame olanau yiidosona. Yiidi dooddidosona; shin Akaaza xoonanau danddayibookkona. <sup>6</sup> He wode Sooriyaa Kawoi Raaxiini Eelaata giyo katamaa zaaridi ekkidi, Yihudaa asaa laaggidi kessiis. Yaatin Eedooma asati Eelaata katamaa yiidi, hachchi gakkanaashin yan de7oosona.

<sup>7</sup> Hegaa gishshau, Akaazi Asoore Kawuwaa Tigilaati-Paleseerassi kiitaa yeddidi, “Taani ne na7anne ne ashkkara. Hayyanaa haaya; yaada tana oliya Sooriyaa kawuwaa kushiyaappenne Israa7eela kawuwaa kushiyaappe tana ashsha” yaagiis. <sup>8</sup> Qassi Akaazi GODAA Beeta Maqidasiyaaninne kawo keettaa buquraa minjjiyoosan de7iya biraanne worqqaa ekkidi, Asoore kawuwaayyo imo oottidi yeddiis. <sup>9</sup> Akaazi giidoogaa Asoore kawoi maayidi, Damasqo katamaa olidi oiqqiis. Oiqqidi asaa omooddidi, Qiira giyo sohuwaa efiis; Kawuwaa Raaxiinakka woriis.

<sup>10</sup> Hegaappe guyyiyan, Kawoi Akaazi Asoore Kawuwaa Tigilaati-Paleseeraara gaittanau Damasqo biis. Biidi Damasqon de7iya yarshshiyosaa be7iis; be7idi a milatiya yarshshiyosaa keexxana mala, he yarshshiyosaa misiliyaanne keexxiyo hanotaa qeesiyaa Ooriyoonyo kiittiis. <sup>11</sup> Hegaa gishshau, Kawoi Akaazi Damasqoppe simmidi yaanaashin, qeesiyaa Ooriyooni he leemisuwaa milatiya yarshshiyosaa giigissiis.

<sup>12</sup> Kawoi Damasqoppe simmido wode, yarshshiyosai osettidi polettidoogaa be7iis. Be7idi yarshshiyosaakko shiiqidi, <sup>13</sup> ba xuuggiyo yarshshuwaanne ba kattaa yarshshuwaa yarshshiis. Qassi ba ushshaa yarshshuwaa gussiis; ba issippetettaa yarshshuwaa suuttaakka yarshshiyosaa bolli caccafiis. <sup>14</sup> Nahaasiyaa giyo birataappe oottidi, GODAAYO dummayi wottido yarshshiyosai ooratta yarshshiyosaappenne Beeta Maqidasiyaappe gidduwan de7ees. Yaatin Akaazi he gal77a yarshshiyosaa denttidi, ba ootissido ooratta yarshshiyosaappe huuphessa baggaara wottiis.

<sup>15</sup> Hegaappe guyyiyan, Kawoi Akaazi qeesiyaa Ooriyoona hagaadan yaagidi azaziis; “Ha wogga ooratta yarshshiyosaa maallado xuuggiyo yarshshuwaa, omarsii shiishshiyoo kattaa yarshshuwaa, kawoi shiishshiyoo xuuggiyo yarshshuwaanne kattaa yarshshuwaa, asai ubbai shiishshiyoo xuuggiyo yarshshuwaa, eta kattaa yarshshuwaanne eta ushshaa yarshshuwaa yarshshiyosaa ootta. Hankko nahaasiyaappe osettida yarshshiyosaa taani tau oichchiyo soho kessana” yaagiis. <sup>16</sup> Yaagin Ooriyooni Kawoi Akaazi azazidoogaadan oottiis.

<sup>17</sup> Kawoi Akaazi Beeta Maqidasiyaa gidдон go7ettiyo, nahaase birataappe osettida gaaretu lochcha birata qanxxidi, miyyiyaappe diggiis; diggidi meecettiyo kereta gaaretu bollaappe denttiis. Qassi Abba Sainiyaa, a zemppissida nahaase booratu misiletu bollappe denttidi, shuchchaa baasuwa bolli wottiis. <sup>18</sup> Asoore kawuwaa gishshau, Akaazi ba kawotaa araataa kase wottiyo sohuwaappe diggiis. Qassi appe kase de7ida kawoti GODAA Beeta Maqidasiyaa geliyo penggiyaa gorddiis.

<sup>19</sup> Kawoi Akaazi hanido harabainne i oottidobai ubbai Yihudaa Kawotu Taarikiyaa Maxaafan xaafetti uttiis. <sup>20</sup> Akaazi haiqqidi, ba maizzan gaittiis; Daawita Kataman ba maizza aawatuura moogettiis. A sohuwan a na7ai Hizqqiyaasi kawotiis.

## 17

### *Israa7eela Kawuwaa Hoshee7a*

<sup>1</sup> Yihudaa Kawoi Akaazi kawotido tammanne naa77antto laittan, Eela na7ai Hoshee7i Israa7eela bolli Samaariyaa kataman kawotiis; i uddufun laitta kawotiis. <sup>2</sup> GODAA sinttan i iitabaa oottiis; gidikkonne appe kase de7ida Israa7eela kawoti oottidoogaa keesa iitaa oottibeenna.

<sup>3</sup> Asoore Kawoi SHalmman77eeseri yiidi, aara olaa gaittiis; gaittin Hoshee7i xoonetidi, ayyo giiraa giiriis. <sup>4</sup> SHin amarida laittaappe simmin, Kawoi Hoshee7i Soo7a giyo Gibxxe kawuwaassi kiitaa yeddidi, bana maaddana mala oichchiis. Yaatidi kaseegaadan Asoore kawuwaassi giiriyoogaa aggi bayiis. Kawoi SHalmman77eeseri hegaa siyidi, a oittidi, qasho keettaa gelissiis.

### *Samaariyaa Katamai Xoonettiis*



<sup>5</sup> Hegaappe guyyiyan, Asoore kawoi Israa7eela biittaa ubbaa bolli woraajjidi, Samaariyaa katamaa dooddiis; dooddidi heezzu laitta gattiis. <sup>6</sup> Hoshee7i kawotido udufunnta laittan Asoore kawoi<sup>5</sup> Samaariyaa katamaa omooddiis. Omooddidi Israa7eela asaa ekkidi, Asoore biitti efiis. Efiidi eta attaa Halaaha kataman, attaa Meedoonatu katamatun, haraata qassi Gozaana biittan de7iya Haboora SHAafaa matan wottiis.

<sup>7</sup> Hagee ubbai hanidoogee, Israa7eela asai GODAA bantta Xoossaa bolli, eta Gibxxeppe, Gibxxe kawuwaa kushiyaappe kessidaagaa bolli nagaraa oottido daafaana. Qassi eti hara xoossatussi goinnidi, <sup>8</sup> GODAI eta sinttappe laaggidi kessido dere asati de7ido de7uwaa wogaa kaallido daafaana. Hega bollikka qassi Israa7eela kawoti doommido iita wogaa kaallido daafaana. <sup>9</sup> Israa7eela asai GODAA bantta Xoossaa bolli iitabaa geeman oottidosona; qii guutta moottaappe biidi, wogga gita katamaa gakkanaassi de7iya sohotun ubban banttau goinniyo xoqqa sohota medhdhdidosona. <sup>10</sup> Qassi eti eeqa shuchchatanne Asheero giyo xoosee misileta keraa huuphe ubbaaninne daashsha mitta ubbaa garssan essidosona. <sup>11</sup> Qassikka eti GODAI beni eta sinttappe laaggidi kessido dere asati oottidoogaadan, xoqqa soho ubban ixaanaa cuwayidosona. Eti GODAA hanqquetissiya iitabaa oottidosona. <sup>12</sup> GODAI eta, “Eeqau goinnoppite” gi wottidaashin, eti eeqa goinnidosona.

<sup>13</sup> GODAI Israa7eela asanne Yihudaa asaa ba hananabaa yootiya ubbatu baggaanne ajjuutan be7iya ubbatu baggaara, “Inttena erite! Intte iita ogiyaappe simmite; taani hananabaa yootiya ta ashkkaratu baggaara, intte aawati azazettanaadan immido higgiiyan de7iya wogaanne awaajuwaa ubbaa naagite” yaagi wottiis. <sup>14</sup> SHin eti siyennan ixxididosona. GODAA bantta Xoossaa ammanettibeenna bantta aawatudan morggiyaa zozzissidosona. <sup>15</sup> Eti a wogaa, i eta aawatuura maacettido maachchaanne a seeraa karidosona. Eti shufuro eeqatau goinnidi, bantta huuphiyaukka shufuro gididosona.

GODAI eta, “Intte yuushuwan de7iya dere asati oottiyoogaadan oottoppite” gi wottidaashin ixxidi, eti eta de7uwaa wogaa kaallidosona. <sup>16</sup> GODAA bantta Xoossaa azazuwaa ubbaa aggiigididosona. Aggiigidi mara milatiya, naa77u goinniyo misiletanne Asheero giyo xoosee misiliyaa medhdhdidosona. Saluwan de7iya xoolintte ubbaassi goinnidosonanne Ba7aala giyo eeqaassi oottidosona. <sup>17</sup> Eti bantta attuma naatanne macca naata taman xuuggidi yarshshidosona. Kaayiyoogaanne moitilliyaa haasayis-siyooqaa meezetidosona. Hegaadan iitabaa oottanau bantta huuphiyaa baizzidi, GODAA hanqquetissidosona. <sup>18</sup> Hega gishshau, GODAI Israa7eela asaa keehippe hanqquetiis; hanqgettidi eta ba sinttappe diggiis. Diggin Yihudaa zariyaa xalaalai attiis.

<sup>19</sup> SHin Yihudaa asatikka GODAA bantta Xoossaa azazuwaa naagibookkona; eti Israa7eela asai doommido de7uwaa wogaa kaallidosona. <sup>20</sup> Hega daafan GODAI Israa7eela zeretta ubbaa aggi bayiis. I eta tuggayidi, ba sinttappe diggana gakkanaashin, eta bonqqiyaageetu kushiyan yeggi bayiis.

<sup>21</sup> GODAI Israa7eela asaa Daawita zerettatu kawotettaappe beni shaakkido wode, Israa7eela asai Nabaaxa na7aa Iyorbbaama banttau kawoyidosona. Hegaappe guyyiyan, Israa7eela asai GODAA kaallennaadan Iyorbbaami diggiis; i eta hanttaara nagaraa ootissiis. <sup>22-23</sup> GODAI hananabaa yootiya ba ashkkaratu ubbatu baggaara kase yooti wottidoogaadan, ba sinttappe diggana gakkanaashin, Israa7eela asai Iyorbbaami oottido nagaraa ubbaa oottiis. Hega gishshau, Israa7eela asai bantta yelettido biittaappe omoodettidi, Asoore biitti biidosona; biidi eti hanno gakkanaashinkka yan de7oosona.

### *Asooreti Israa7eela Biittan Uttidosona*

<sup>24</sup> Hegaappe guyyiyan, Asoore kawoi Baabiloone biittan de7iya Kuuta, Iiwa, Hamaatanne Safariwaima geetettiya katamatun de7iya asaa ehiis; ehiidi Israa7eela

<sup>5</sup> 17:6 Asoore kawoi: I Naa77antto Sarggoona gidennan aggenna.



asaa sohuwan Samaariyaa katamatun wottiis. Eti he katamata laattidi, etan de7idosona.

<sup>25</sup> Eti koiro yan duussaa doommido wode, GODAASSI goinnibookkona. Hegaa daafan GODAI eta giddo gaammota yeddiis; yeddin gaammoti eta giddoppe aramata mentterettidi woridosona. <sup>26</sup> Yaatin Asoore kawuwaa, “Neeni dentta efaada Samaariyaa katamatun wottido asai he biittaa xoossaa wogaa erenna. Erennaagaa daafan i eta mentteretti woriya gaammota eta bolli yeddiis” yaagidi yootidosona.

<sup>27</sup> Yootin Asoore kawoi, “Intte Samaariyaappe omooddidi ehiido qeesetuppe issuwaa zaaridi, yaa yeddite. Yeddin i yan de7idi, he biittaa xoossaa wogaa eta tamarisso” yaagidi azaziis. <sup>28</sup> Hegaa gishshau, Samaariyaappe omooddidi efiido qeesetuppe issai Beeteelen de7anau yiis; yiidi GODAAYYO goinniyo wogaa eta tamarissiis.

<sup>29</sup> Gidikonne Samaariyaa yiidi uttida asai bau goinniyo eeqa misileta ba de7iyoosan de7iyoosan medhdhiis. Medhdhidi Samaariyaa asai keexxido goinniyo xoqqa sohotun wottiis. <sup>30</sup> Hegaa maaran Baabiloone asai Sukkoti-Banooba giyo eeqa misileta medhdhiis. Kuuta asai Nerggaala giyo eeqa misileta medhdhiis. Hamaata asai qassi Ishiima giyo eeqa misileta medhdhiis. <sup>31</sup> Iiwa asai Nibihaazanne Tarttaaqaa geetettiya eeqatu misileta medhdhiis. Safariwaima asai qassi Adiraamelekanne Anaameleka geetettiya bantta xoossatuyyo bantta naata taman xuuggidi yarshshiiis. <sup>32</sup> Eti GODAASSI goinnidosona; shin bantta giddoppe duma duma asaa dooridi, goinniyo xoqqa sohotun qeese oottidi sunttidosona. <sup>33</sup> Eti GODAASSI goinnidosona; shin bantta yiido biittaa biittaa asaa meeziyaa kaallidi, bantta xoossatuyyookka goinnidosona. <sup>34</sup> Eti hachchi gakkanaashinkka kase bantta meeziyaadan oottoosona.

Eti tumuppe GODAAYYO goinnokkona woikko GODAI Israa7eela giidi sunttido Yaaqooba zerettaassi immido awaajuwaanne wogaa, higgiaanne azazuwaa naagokkona. <sup>35</sup> GODAI Israa7eela asaara beni maacettido wode, eta hagaadan yaagidi azaziis; “Hara xoossatussi goinnoppite; etau gulbbatoppite; etau oottoppote woikko etau yarshshoppite. <sup>36</sup> SHin Gibxxeppe inttena ba gita wolqqaaninne ba yeddido kushiyan kessida GODAAYYO oottite; ayyo gulbbatite; ayyo yarshshuwaa yarshshite. <sup>37</sup> Taani GODAI intteyyo xaafido awaajuwaanne wogaa, higgiaanne azazuwaa ubba wode naagite; hara xoossatuyyo goinnoppite. <sup>38</sup> Taani inttenaara maacettido maachchaa dogoppite; hara xoossatuyyookka goinnoppite. <sup>39</sup> Hegaa aggidi, GODAAYYO intte Xoossaayyo goinnite. Intte morkketu ubbaappe inttena ashshanaagee tana” yaagidi azaziis. <sup>40</sup> Azazinkka eti ayyo eenennan ixixidi, kase bantta meeziyaakka baqqi oiqqidosona.

<sup>41</sup> He asati GODAAYYO goinniiddikka, issi baggaara bantta eeqa misiletuyyo goinnoosona. Hachchi gakkanaashinkka eta zerettaa eta aawati goinniyoogaadan goinniiddi de7ees.

## 18

### *Yihudaa Kawuwaa Hizqqiyaasa*

#### *(Hanidabaa Odiya Naa77antto Maxaafaa 29:1-2; 31:1)*

<sup>1</sup> Eela na7ai Hoshee7i Israa7eelan kawotido heezzantto laittan Yihudaa Kawuwaa Akaaza na7ai Hizqqiyaasi kawotiis. <sup>2</sup> I kawotiyo wode laittai ayyo laatamanne ichchasha; Yerusalaamen i laatamanne udufun laittaa kawotiis. A aayee sunttai Abiiyo geetettes; a Zakkaariyaasa na7iyo. <sup>3</sup> A maizza aawaa Daawiti oottidoogaadan, Hizqqiyaasikka GODAA sinttan suurebaa oottiis. <sup>4</sup> Asai goinniyo xoqqa sohota i diggiis. Eeqa tuussata mentterettiis. Asheero giyo xoossee misiliyaa qanxxi oliis. Qassi Muusee nahaasiyaappe medhdhido shooshshaakka mentterettiis. Aissi giikko, he wodee gakkanaashinkka Israa7eela asai ayyo ixaanaa cuwayiiddi takkiis. He shooshshaa sunttai Nehushtaana.

<sup>5</sup> Hizqqiyaasi GODAA Israa7eela Xoossaa ammaniis; Yihudaa kawotu ubbaa gidдон a mala kawoi appe kase gidin, appe guyye gidin beettibeenna. <sup>6</sup> Aissi giikko, GODAA i baxuuxiis; GODAA kaalliyoogaa aggibeenna; GODAI Muusa azazido azazota naagiis. <sup>7</sup> GODAI aara issippe gidiis; yaatin i oottiyoobai ubbai ayyo injjetiis. I Asoore kawuwaa bolli makkaliis; makkalidi ayyo haarettennan ixxiis. <sup>8</sup> I Pilisxxeema asaa oliis; olidi qii guutta moottaappe biidi, wogga gita katamaa gakkanaashin, Gaazakka a yuushuwan de7iya biittatikka attennan eti de7iyo sohota ubbaa xooniis.

<sup>9</sup> Kawoi Hizqqiyaasi kawotido oiddantto laittan, Eela na7ai Israa7eela Kawoi Hoshee7i kawotido laappuntta laittan, Asoore Kawoi SHalmman77eeseri Israa7eela bolli woraajjiis; woraajjidi Samaariyaa katamaa dooddiis. <sup>10</sup> Dooddido heezzantto laitti Samaariyaa katamaa xooniis. Yaatin Hizqqiyaasi kawotido usuppuntta laittan, Israa7eela kawoi Hoshee7i kawotido uddufuntta laittan, Samaariyaa katamai xoonettiis. <sup>11</sup> Asoore kawoi Israa7eela asaa Asoore biitti efiis. Efiidi eta attaa Halaaha kataman, attaa Meedoonatu kataman, haraata qassi Gozaana biittan de7iya Haboora SHAafaa matan wottiis. <sup>12</sup> Hagee hanidoogee eti GODAASSI bantta Xoossaassi azazettennan ixxidi, GODAA maachchaa, GODAA ashkkarai Muusee azazido azazuwaa ubbaa kanttido daafaana. Eti a azazota siyanaukka azazettanaukka koyibookkona.

*Asooreti Yerusalaame Olanau Naassidosona  
(Hanidabaa Odiya Naa77antto Maxaafaa 32:1-19; Isiyaasa 36:1-22)*

<sup>13</sup> Kawoi Hizqqiyaasi kawotido tammanne oiddantto laittan, Asoore Kawoi Sanaakireebi gimbbetti uttida Yihudaa katamata ubbaa olidi oiqqiis. <sup>14</sup> Yaatin Yihudaa Kawoi Hizqqiyaasi Laakisha kataman de7iya Asoore Kawuwaa Sanaakireebassi kiitaa yeddidi, “Taani mooraas. Hayyanaa ta biittaa yeddada kiya. Neeni tana oichchidobaa aibanne ta immana” yaagiis.

Yaagin Asoore kawoi Yihudaa Kawuwaa Hizqqiyaasa, “Neeni tammu sha7u kilo giraame biraanne issi sha7u kilo giraame worqqa tau yedda” yaagiis.

<sup>15</sup> Yaagin Hizqqiyaasi GODAA Beeta Maqidasiyaaninne kawo keettaa buquraa minjjiyoosan de7ida biraa ubbaa ayyo yeddiis. <sup>16</sup> He wode Yihudaa Kawoi Hizqqiyaasi GODAA Beeta Maqidasiyaa penggiyaa sanqqata maayi uttida worqqaanne qassi i ba huuphen he pengge qosilettata maizzi wottido worqqa poqqi qaaridi, Asoore kawuwaa yeddiis.

<sup>17</sup> Hegaappe guyyiyan, Asoore kawoi heezzu ola gadaawata<sup>6</sup> cora olanchchatuura Laakisha giyo katamaappe Kawuwaa Hizqqiyaasakko Yerusalaame yeddiis. Yeddin eti biidi, Yerusalaame gakkidosona; gakkidi Maayuwaa Meecciyaagaa gade efiya ogiyaappe qommo baggaara de7iya, dagattida haattai goggiyo zaraa lanqqen eqqidosa. <sup>18</sup> Yaatidi eti kawuwaa xeesidosona. Xeesin Hilqqiyaa na7ai kawo keettan aawatiya Eliyaaqiimi, waanna xaafee SHEebininne Asaafa na7ai taarikiyaa xaafiya Yo7aahi akko kare kiyidosona.

<sup>19</sup> Kiyin Asooretu gadaawai eta, “Hizqqiyaasassi hagaadan yaagidi yootite; ‘Asoore kawoi, wolqqaamai nena hagaadan yaagees; “Neeni haga keeni aibin ammanettadii? <sup>20</sup> Neeni coo mela, ‘Olaa olettanau taayyo aadhdhida erainne wolqqainne de7ees’ yaagaasa. SHin neeni oonan ammanettada ta bolli haga makkaladii? <sup>21</sup> Neeni Gibxxe kawoi maaddana gaada qoppidabaa gidikko, meqqida shombboqo gatiman guufetiya asa mala. Aissi giikko, gatimai meqqin, pincoi kushiya caddeesinne masunxxisees. Gibxxe Kawoi banan ammanettiya asa ubbau hegaa mala.

<sup>6</sup> 18:17 Ha ola gadaawati Ibraawettuwan Tarttaana, Rab-Saarisanne Rab-SHaaqa geettoosona. Rab-Saarisanne Rab-Sahaqa birshshettai, “Waanna Mureessaanne Eessaa Tigiyageetu Halaqaa” giyoogaa.

<sup>22</sup> “ ‘SHin neeni taayyo, ‘Nuuni GODAN nu Xoossan ammanettoos’ yaagikko, Hizqqiyaasi Yihudaa asaanne Yerusalaame asaa, ‘Intte Yerusalaamen de7iya yarshshiy-oosan goinnanau koshshees’ giidi, ayyo goinniyo xoqqa sohotanne yarshsho sohota diggirgido Xoossaa i gidennee?

<sup>23</sup> “ ‘Ane ha77i haaya! Yaada ta godaa Asoore kawuwaara naasetta. Neeni togganau danddayiya, gidiya asa demmikko, naa77u sha7u parata taani neeyyo immana. <sup>24</sup> Neeni ‘Gibxxeti paraasatanne paraa gaareta taayyo yeddana’ gaada ammanikkonne, ta godaa olanchchatu halaqatuppe issi laafiyaagaakka zaaranau danddayakka. <sup>25</sup> Hega bollikka qassi, taani ha77i tumu GODAA azazoi binnan ha biittaa xaissanau kiyidanaa? GODAI ba huuphen tana, ‘Ba, he biittaa baada, olada bashsha’ yaagidi odiis” yaagees’ yaagite” yaagiis.

<sup>26</sup> Hegaappe guyyiyan, Hilqqiyaa na7ai Eliyaaqiimi, SHEebininne Yo7aahi Asooretu gadaawaa hagaadan yaagidosona; “Nuuni birshshettaa eriyo gishshau, hayyanaa neeni nuuyyo ne ashkkaratuyyo Sooriyaa qaalana oda. Dirssaa gimbbiyaa huuphiyan de7iya asai siyenna mala, Ibraawetto qaalana nuuyyo odoppa” yaagidosona.

<sup>27</sup> SHin gadaawai zaarettidi, “Ha qaalata taani inttessinne intte godaa xalaalaassi yootanau tana ta godai kiittideeyye? Inttenaara issippe bantta shiyaa maanaunne bantta sheeshshaa uyanau de7iya, ha dirssaa gimbbiyaa bolli uttida asaassaara ubbau odanaassa gidenneeyye?” yaagiis.

<sup>28</sup> Hegaappe guyyiyan, Asooretu gadaawai dendi eqqidi, ba qaalaa xoqqu oottidi, Ibraawetto qaalana hagaadan yaagiis; “Asoore kawoi wolqqaamai inttena giyoobaa siyite! <sup>29</sup> Kawoi inttena hagaadan yaagees; ‘Hizqqiyaasi inttena cimmooppo; aissi giikko, i inttena ta kushiyaappe wotti ekkana danddayenna. <sup>30</sup> I inttena, “GODAI tuma nuna ashshana; ha katamaikka Asoore kawuwa kushiyan gelenna” yaagidi inttena GODAN ammanttoppo’ yaagees.

<sup>31</sup> “Ee, intte Hizqqiyaasi odiyoobaa siyoppite. Asoore kawoi inttena, ‘Tanaara sigettite; haa taakko kiyite. Yaatikko intte ubbaikka intte woiniyaa teeraappenne intte balasiyaa teeraappe miishshana; intte bookkido ollaappekka haattaa uyishshana. <sup>32</sup> Hegaappe guyyiyan, taani yaada, inttena intte biittaa milatiya biitti ekkada efaana. He biittai kattinne woine eessi, oittinne woine ataakilttee kumido biitta; wogarainne mattaa eessainne kumido biitta. Intte taayyo azazettikko, paxa de7ana; haiqqekketa’ yaagees.

“Hizqqiyaasi inttena, ‘GODAI nuna ashshana’ yaagidi cimmiyoogaa siyoppite. <sup>33</sup> Dere asatu xoossatuppe ba biittaa Asoore kawuwa kushiyaappe ashshida xoossi de7iyye? <sup>34</sup> Hamaata xoossatinne Arifaada xoossati awan de7iyoona? Safariwaima, Henaa7anne liwa xoossati awan de7iyoona? Eti Samaariyaa ta kushiyaappe wotti ekkidona? <sup>35</sup> Ha biittatu xoossatu ubbaa gidona ba biittaa ta kushiyaappe ai xoossi ashshidoogaa shin, GODAI Yerusalaame ta kushiyaappe ashshanee?” yaagiis.

<sup>36</sup> SHin asai issi qaalanne ayyo zaarennan co77u giis. Aissi giikko, kawoi eta, “Ayyo ainne zaaridi odoppite” yaagi wottiis. <sup>37</sup> Hegaappe guyyiyan, Hilqqiyaa na7ai kawo keettan aawatiya Eliyaaqiimi, waanna xaafee SHEebininne taarikiyaa xaafee Asaafa na7ai Yo7aahi bantta maayuwaa pooshshidi, Hizqqiyaasakko biidosona; biidi Asooretu gadaawai giidobaa ubbaa ayyo odidosona.

## 19

### *Kawoi Hizqqiyaasi Isiyaasa Zoriyaa Oichchiis (Isiyaasa 37:1-7)*

<sup>1</sup> Kawoi Hizqqiyaasi hega siyido wode, ba maayuwaa pooshshiis; pooshshidi waaruwaa maayidi, GODAA Beeta Maqidasiyaa geliis. <sup>2</sup> Kawo keettan aawatiya Eliyaaqiimi, waanna xaafee SHEebininne cima qeeseti waaruwaa maayidi, Amoxa

na7aa hananabaa yootiya Isiyaasakko baana mala kiittiis. <sup>3</sup> Kiittin eti Isiyaasakko biidi, “Hizqqiyaasi hagaadan yaagees; ‘Hachchi gallasai meto gallassa, seera gallassanne yeella gallassa. Hegeekka na7i yelettanau wodee gakkinn, bannakkada yelanau maccaaseessi wolqqi xayiyooqaa mala. <sup>4</sup> De7o Xoossaa cayanaadan, a godai, Asoore kawoi, kiittido gadaawaa qaalaa ubbaa GODAI, ne Xoossai siyennan aggenna. Qassi GODAI, ne Xoossai he siyido qaalaa daafan a qaxxayennan aggenna. Hegaa gishshau, nu asaa gidдон palahi attanaageetussi woossa!’ yaagees” yaagidosona.

<sup>5</sup> Kawuwaa Hizqqiyaasa ashkkarati Isiyaasakko yiido wode, <sup>6</sup> Isiyaasi eta hagaadan yaagiis; “Intte godaassi hagaadan yaagidi odite; ‘GODAI nena, “Asoore kawuwaa ashkkarati tana cayishin, neeni siyido cashshaa qaalaassi yayyoppa. <sup>7</sup> Be7a, oduwaa siyidi, i ba biitti simmana mala, taani a gidдон issi ayyaanaa wottana. Yaataa i ba biitti biidi, yan bisuwan i haiqqanaadan taani a oottana” yaagees’ yaagite” yaagiis.

*Asooreti Haranttuwaakka Naassidosona  
(Isiyaasa 37:8-20)*

<sup>8</sup> Asoore kawoi Laakisha katamaappe denddidi biichchidoogaa Asooretu gadaawai siyidi, guyye simmiis. Simmidi kawoi Liibina kataman olettiyaagaa demmiis.

<sup>9</sup> Kawoi Sanaakireebi, “Toophphiyaa Kawoi Tirihaaqqi nena olanau yiis” yaagiyo oduwaa siyiis. Siyidi Hizqqiyaasassi hagaadan yaagidi kiittiis; <sup>10</sup> “Yihudaa Kawuwau Hizqqiyaasaa, neeni ammanettiyo xoossai nena, ‘Yerusalaamee Asoore kawuwaa kushiyan gelenna’ yaagidi cimmoppo. <sup>11</sup> Be7a, Asoore kawoti biittata ubbaa muleera xaissidi, eti oottidobaa neeni siyadasa. Yaatin neeni attuutee? <sup>12</sup> Beni ta maizza aawati bashshido biittatu xoossati, hegeetinne Gozaana, Kaaraanenne Rexeefa biittatu xoos-satinne Talassaraan de7iya Edene asaa xoossati he biittata bashshaappe ashshidonaa? <sup>13</sup> Hamaata kawoi, Arifaada kawoi, Safariwaima kawoi, Henaa7a kawoinne liwa kawoi awan de7iyoonaa?” yaagidi kiittiis.

<sup>14</sup> Hizqqiyaasi dabddaabbiyaa kiittetida asatuppe ekkidi nabbabiis. Nabbabido dabddaabbiyaa GODAA Beeta Maqidasiyaa ekki efidi, GODAA sinttan micciis. <sup>15</sup> Yaatidi GODAA hagaadan yaagidi woossiis; “Abeet GODAU, kiruubetuppe gidduwan uttiya Israa7eela Xoossau, sa7aa kawotettatu ubbaa bolli ne xalaalai Xoossaa. Saluwaanne sa7aa neeni medhdhadasa. <sup>16</sup> Abeet GODAU, ne haittaa haa yeggada siya. Abeet GODAU, ne aifiyaa pogada xeella. Nena, de7o Xoossaa cayanau Sanaakireebi kiittido qaalaa siya. <sup>17</sup> Abeet GODAU, Asoore biittaa kawoti kawotettatanne eta biittaa bashshidoogee ee tuma. <sup>18</sup> Eta xoossata taman xuuggi xaissidosona; aissi giikko, eta xoossati wonikka asa kushee massidi kessido mittanne shuchchanne gidiyo gishshau, tumu xoossata gidokkona; hegaa gishshau, eti eta xaissidosona. <sup>19</sup> Abeet GODAU, ne xalaalai Xoossaa gidiyoogaa sa7aa kawotettati ubbai erana mala, ha77i simmi, GODAU, nu Xoossau, neeni nuna a kushiyaappe wotta ekka!” yaagidi woossiis.

*Isiyaasi Kawuwaassi Yeddido Kiitaa  
(Isiyaasa 37:21-38)*

<sup>20</sup> Hegaappe guyyiyan, Amoxa na7ai Isiyaasi Hizqqiyaasassi hagaadan yaagidi kiittiis; “GODAI Israa7eela Xoossai hagaadan yaagees; ‘Neni Asoore Kawuwaa Sanaakireeba gaasuwan tana woossido woosaa siyaas’ yaagees. <sup>21</sup> GODAI Sanaakiree-babaa hagaadan yaagidi haasayees;

“ ‘Xiyoonen de7iya asai nena karees;

Yerusalaame asai ba huuphiyaa qaattidi, nena qoosees.

<sup>22</sup> “ ‘Neni cayidoogeenne  
toochchidoogee oonee?

Neeni o bollan ne qaalaa  
xoqqu oottada haasayadii?

Qassi otoruwan oona  
 xoqqu gaada xeelladii?  
 Hegaa neeni oottidoi ta bollaana,  
 Israa7eela Geeshshaa bollaana gidennee!

<sup>23</sup> Neeni kiittido asatu baggaara  
 GODAA cayadasa.

Qassi hagaadan yaagadasa;  
 “Taani taayyo de7iya cora paraa gaaretun  
 xoqqa deretu huuphiyaa,  
 Liibaanoosa Deriyaa kiikiyaa kiyaas.  
 Kiyada ubbaappe aduqqiya zigatanne  
 ubbaappe lo77iya xiiddata qanxxaas.

Taani ayyo wurssetta gaxaanne  
 tuujjuma woraa gakkaas.

<sup>24</sup> Taani allaga biittatun haatta ollata  
 bookkada, haattaa etappe uyaas.

Gibxxe biittan goggiya haatta ubbaa  
 taani ta tohuwaa gomppan yedhdhada melissaas” yaagadasa.

<sup>25</sup> “Daro wodiyaappe kase neeni  
 gimbbettida katamata qoqqofada,  
 shuchcha keela kessana mala,  
 taani qofaa qachcha wottidoogaa neeni erabeikkii?

Taani ha77i poliyoo halchchota  
 beni halchcha wottaas.

<sup>26</sup> Hegaa gishshau, eta asaayyo  
 wolqqai ixxin,

eti kauyyidosonanne yeellatidosona.

Eti gade maataa mala;  
 goshshan morkkida carshshaa mala.

Eti keettaa huuphiyan mokkiya  
 sharafaadaaninne ka77ennan de7ishin, leege miido kattaadan hanidosona.

<sup>27</sup> “SHin neeni uttiyoosaa,  
 kiyiyoosaa, geliyoosanne ta bolli  
 neeni hanqqettido hanqquwaa taani erais.

<sup>28</sup> Neeni ta bolli hanqqettido gishshaunne  
 ne otoruwaakka taani siyido gishshau,

taani ne siiriyaa ta dafuwaa aattana;  
 ne doonankka ta bixaalaa barssana.

Yaataada ne yiido ogiyaara taani  
 nena guyye zaarana’

yaagees” yaagiis.

<sup>29</sup> Hegaappe guyyiyan, Isiyaasi Kawuwaa Hizqqiyaasa hagaadan yaagiis; “Hagee polettanaagau neeyyo malaatai hagee: Ha laitti intte azabba morkkida kattaamaana; laitti qassi ha laitti morkkidaagaa azabbaa maana. SHin kaalla laitti intte intte huuphen zeritenne cakkite; woiniyaa turaakka tokkitenne a teeraa miite. <sup>30</sup> Yihudaa asaa atettati xaphuwaa duge yeddidi, bollan aifiyaa aifiya mittaa mala gidana. <sup>31</sup> Aissi giikko, wuriiddi attidaageeti Yerusalaameppe, palahidaageetikka Xiyooneppe kiyana. Ubbaappe Wolqqaa GODAA mishoi hegaa oottidi polana.



<sup>32</sup> “Hegaa gishshau, Asoore kawuwaabaa GODAI hagaadan yaagees; ‘Asoore kawoi ha katamaa gelenna; woikko hagan ba wonddafiyaa dukkenna. I ba gondalliyaa oiqqidi, ha katamaa sintti aadhdhenna; woikko qassi katamaa yuushuwaa biittaa dooriyan diddiqenna. <sup>33</sup> Asoore kawoi ba yiido ogiyaara guyye simmana; i ha katamaa gelenna. Taani GODAI haggaa odaas. <sup>34</sup> Taani ta bonchchuwaa gishshaunne ta ashkkaraa Daawita gishshau, ha katamaa boshissennan ashsha ekkana’ yaagees” yaagiis.

<sup>35</sup> He gallassi qammi GODAA kiitanchchai kiyidi, Asoore asai dunkkaanidosan issi xeetanne hospun tammanne ichchashu sha7u attumaasaa woriis. Yaatin asai maal-lado suuridi be7iyo wode, haiqqida asaa ahai hegan kumiis. <sup>36</sup> Hegaa gishshau, Asoore Kawoi Sanaakireebi denddidi, guyye simmi biidi, Nanawe kataman uttiis. <sup>37</sup> Issi gallassi Sanaakireebi ba xoossaa Nisirooka Eeqaa Keettan goinniiddi de7ishin, a naati Adiraamelekinne Sar77eexeri bisuwan a woridosona. Woridi Araaraate giyo biitti baqatidosona. A na7ai Asaarihi<sup>7</sup> a sohuwan kawotiis.

## 20

### *Kawoi Hizqqiyaasi Harggidi Paxiis*

*(Hanidabaa Odiya Naa77antto Maxaafaa 32:24-26; Isiyaasa 38:1-8,21-22)*

<sup>1</sup> He wode Kawoi Hizqqiyaasi harggidi, haiqqana matiis. Yaanidaashin Amoxa na7ai hananabaa yootiya Isiyaasi akko biidi, “GODAI nena, ‘Neni haiqqaasappe attin paxakka; heggaa gishshau, ne keettaa giigissa’ yaagees” yaagiis.

<sup>2</sup> Yaagin Hizqqiyaasi godaakko simmi zin77idi, GODAA woossiis. <sup>3</sup> Woossiiddi, “Abeet GODAU, taani ne sinttan tumatettaanne kumetta wozanan hemettidoogaanne qassi nena ufaissiyaabaa oottidoogaa taayyo neeni hassayana mala, taani nena woossais” yaagidi woossiis. Woossiiddi Hizqqiyaasi keehi mishettidi yeekkiis.

<sup>4</sup> Isiyaasi kawuwaa sinttappe kiyiis; kiyidi kawo keettaa dabaabaappe kanttidi bi-ichchennan de7ishin, GODAA qaalai hagaadan yaagiiddi, akko yiis. <sup>5</sup> Yiidi, “Guyye simmada ba; baada ta asaa kaalettiya Hizqqiyaasayyo hagaadan yaagada oda; ‘GODAI, ne maizza aawaa Daawita Xoossai hagaadan yaagees; ‘Taani ne woosaa siyaas; ne afuttaakka be7aas. Taani nena pattana; heezzu gallasaappe guyyiyan, neeni pude GODAA Beeta Maqidasiyaa baana. <sup>6</sup> Ne laittaa bolli taani neeyyo tammanne ichchashu laittaa gujjana. Taani nenanne ha katamaanne Asoore biittaa kawuwaa kushiyaappe ashshana. Taani ta bonchchuwaa gishshaunne ta ashkkaraa Daawita gishshau, ha katamaayyo olettada ashshana” yaagees’ yaaga” yaagiis.

<sup>7</sup> Hegaappe guyyiyan Isiyaasi, “Balasiyaa teeraa daaxxidi, a kixaa bolli wottite. Yaatikko i paxana” yaagiis.

<sup>8</sup> Hizqqiyaasi Isiyaasa, “GODAI tana pattanaagaunne taani heezzantto gallassi GODAA Beeta Maqidasiyaa pude baanaagau malaatai aibee?” yaagidi oichchiis.

<sup>9</sup> Oichchin Isiyaasi, “GODAI ba giido qaalaa polanaagau neeyyo malaataa immana. Simmi neeni hagaappe augaa doorai? Hagee kuwai tammu xekkata sinttau baanaagaa dooraiyye, tammu xekkata hagaappe guyye simmanaagaa doorai?” yaagidi oichchiis.

<sup>10</sup> Yaatin Hizqqiyaasi a, “Kuwai sinttau baanaagee metenna; hegaappe kuwai guyye simmanaadan ootta” yaagiis. <sup>11</sup> Hegaappe guyyiyan, hananabaa yootiya Isiyaasi GODAA woossiis; woossin GODAI Kawoi Akaazi gimbbissido xekkata kuwayida kuwaa tammu xekkata he sohuwaappe guyye zaariis.

### *Baabilooneppe Kiitettidi Yiida Asata*

*(Isiyaasa 39:1-8)*

<sup>12</sup> He wode Baladaana na7ai, Baabiloone Kawoi, Marodaaki Baladaani Hizqqiyaasi harggidoogaa siyido gishshau, dabddaabbiyaanne imuwaa Hizqqiyaasayyo yeddiis.

<sup>7</sup> 19:37 Asaarihi: Ibraawettuwan “Esar-Haddon” geetettees.

<sup>13</sup>Yeddin Hizqqiyaasi kiitettidi yiida asata mokkiis. Yaatidi ba buquraa minjjiyo keettan de7iya biraa, worqqaa, sawuwaa, al77o zaitiyaa, ba ola miishshaanne ba buquraa minjjiyo keettan de7iyaabaa ubbaa eta bessiis. Ba son woikko ba kawotettaa gidдон de7iyaabaa ubbaappe Hizqqiyaasi eta bessennan aggidobi aibinne baawa.

<sup>14</sup>Hegaappe guyyiyan, hananabaa yootiya Isiyaasi Kawuwaa Hizqqiyaasakko yiidi, “Ha asati woigidonaa? Eti auppe yiidonaa?” yaagidi oichchiis.

Oichchin Hizqqiyaasi, “Eti taakko haaho biittaappe, Baabilooneppe yiidosona” yaagiis.

<sup>15</sup>Isiyaasi qassikka, “Eti ne son ai ai be7idonaa?” yaagiis.

Yaagin Hizqqiyaasi, “Eti ta son de7iya ubbabaa be7idosona; ta buquraa minjjiyo keettan de7iyaabaappe taani eta bessabeennabi aibinne baawa” yaagiis.

<sup>16</sup>Hegaappe guyyiyan, Isiyaasi Hizqqiyaasa, “GODAI giyoobaa siya. <sup>17</sup>I ha-gaadan yaagees; ‘Ne kawo keettan de7iyaabai ubbabainne ne maizza aawati hachchi gakkanaashin shiishshidobai ubbabai muleera omoodettidi, Baabiloone biitti baana gallassati yaana; appe aibinne attenna. <sup>18</sup>Qassi neeyyo yelettana, ne ashonne ne suuttanne gidiya ne attuma zaretuppekka omoodettidi baana; biidi Baabiloone kawo keettan mureessa gididi oottana’ yaagees” yaagiis.

<sup>19</sup>Yaagin Hizqqiyaasi zaaridi, “Neeni odido GODAA qaalai lo77o” yaagiis. Aissi giikko, Hizqqiyaasi, “Taani de7ido laittan saroinne woppai de7ana gidennee” yaagidi qoppiis.

### *Hizqqiyaasa Haiquwaa*

*(Hanidabaa Odiya Naa77antto Maxaafaa 32:32-33)*

<sup>20</sup>Hizqqiyaasi hanido harabai, a minotettainne haatta zeeridi, biitta giddoora waaruwan katamaa i gelissidobai Yihudaa Kawotu Taarikiyaa Maxaafan xaafetti uttiis.

<sup>21</sup>Hizqqiyaasi haiqqidi, ba maizzan gaittiis; a sohuwan a na7ai Minaasee kawotiis.

## 21

### *Yihudaa Kawuwaa Minaasa*

*(Hanidabaa Odiya Naa77antto Maxaafaa 33:1-20)*

<sup>1</sup>Minaasee kawotiyo wode laittai ayyo tammanne naa77a; i Yerusalaamen ishata-manne ichchashu laitta kawotiis. A aayee sunntai Hefxxiibo.

<sup>2</sup>GODAI Israa7eela asaa sinttappe laaggidi kessido asatu de7uwaa wogaa, he sheneyiyaagaa qullidi, Minaasee GODAA sinttan iitabaa oottiis. <sup>3</sup>A aawai Hizqqiyaasi laalido, goinniyo xoqqa sohota i zaarettidi keexxiis; Israa7eela Kawoi Akaabi oot-tidoogaadan, Ba7aala giyo xoossaassi yarshshiyo sohotanne Asheero giyo xoosee misileta medhdhiis. Qassi saluwaa xoolinttetu ubbaayyookka goinniisinne etau oottiis.

<sup>4</sup>GODAI kase, “Taani ta sunntaa Yerusalaamen xeesissana” yaagi wottido GODAA Beeta Maqidasiyan hara xoossatussi yarshshiyo sohota giigissiis. <sup>5</sup>GODAA Beeta Maqidasiyan de7iya naa77u dabaabatun saluwaa xoolinttetu ubbau yarshshiyo sohota giigissiis. <sup>6</sup>Ba yelido na7aa taman xuuggidi yarshshiis. I ba huuphenkka bitiyaagaanne gojiyaagaa gididi, shareechchotanne moitilliyaa haasayissiyaageeta zoriyaa oichchiis. GODAA sinttan daro iitabaa oottidi, a hanqquetissiis.

<sup>7</sup>Asheero giyo xoosee misiliyaa, masetti kiyidaagaa ehiidi, GODAA Beeta Maqi-dasiyaa gidдон essiis. He Beeta Maqidasee, GODAI Daawitanne a na7aa Solomona, “Israa7eela zare ubbaa giddoppe taani doorido ha Beeta Maqidasiyaaninne Yerusalaamen taani ta sunntaa merinau xeesissana. <sup>8</sup>Israa7eela asaa taani azazido azazo ubbaanne ta ashkkaarai Muusee etau immido higgiiyaa ubbaa naagidi oottikko, taani eta maizza aawatuyyo immido biittaappe eta denttada toilayikke” yaagi wottido Beeta Maqidasiyaa. <sup>9</sup>SHin asai siyennan ixxiis. GODAI Israa7eela asaa sinttappe xaissido dere asaagaappekka aadhdiya iitaa oottana mala, Minaasee eta balettiis.

<sup>10</sup> GODAI hananabaa yootiya ba ashkkaratu baggaara hagaadan yaagiis; <sup>11</sup> “Yihudaa Kawoi Minaasee ha tuna oosuwa oottiis; baappe kase de7ida Amooore asaa ubbaa nagaraappekka aadhdiya iitaa oottiis; Yihudaa asaa ba medhdhido eeqa misiliyaayyo goinissidi, nagaraa ootissiiis. I hega oottido gishshau, <sup>12</sup> taani GODAI Israa7eela Xoossai hagaadan yaagais; ‘Siyiya asa ubbaa haittau iitiya bashshaa taani Yerusalaame bollinne Yihudaa bolli ehaana hanais. <sup>13</sup> Taani Samaariyaa bolli goochchido wodoruwa, Yerusalaame bolli goochchana; Akaaba so asaa bolli yeddido tumbbiyaakka, Yerusalaame bolli yeddana. Issi asi keriyaa qucci gufanttidi melissiyooogaadan, taani Yerusalaame quccada gufanttana. <sup>14</sup> Ta asaappe attidaageeta taani haassana; taani eta eta morkketu kushiyan aattada immana. Eta morkketi ubbai eta oiqqananne bonqqana. <sup>15</sup> Eta maizza aawati Gibxxeppe kiyoosappe doommidi, hachchi gakkanaashin, eti ta sinttan iitabaa oottido gishshaunne tana hanqqetissido gishshau, taani hagaadan oottana’ yaagais” yaagiis.

<sup>16</sup> Minaasee Yihudaa asaa GODAA sinttan nagaraa ootissidoogaa bollikka gujjidi, xillo asaa woriis; woridi Yerusalaamen ha gaxaappe ya gaxaa gakkanaashin, suutaa kunttiis.

<sup>17</sup> Minaasee hanido arabai, i oottidobai ubbainne i oottido nagaraabai Yihudaa Kawotu Taarikiyaa Maxaafan xaafetti uttiis. <sup>18</sup> Minaasee haiqqidi, ba maizzan gaittiis; yaanidi ba keettaa matan de7iya Uzza Ataakilttiyaa Sohuwaa giyoosan moogettiis. A sohuwan a na7ai Amooni kawotiis.

*Yihudaa Kawuwaa Amoona  
(Hanidabaa Odiya Naa77antto Maxaafaa 33:21-25)*

<sup>19</sup> Amooni kawotiyo wode, laittai ayyo laatamanne naa77a; i Yerusalaamen naa77u laitta kawotiis. A aayee sunttai Mashulemeeto; a Yaaxiba kataman de7iya Haruuxa na7iyo. <sup>20</sup> A aawai Minaasee oottidoogaadan, Amoonikka GODAA sinttan iitabaa oottiis. <sup>21</sup> I ba aawai hemettido ogiyan ubban hemettiis; ba aawai oottido eeqatussi ikka oottiisinne etassi goinniis. <sup>22</sup> GODAA, ba maizza aawatu Xoossaa aggi bayiis; GODAA ogiyanka i hemettibeenna.

<sup>23</sup> Amoona oosanchchati a bolli maqettidi, a kawo keettan a woridosona. <sup>24</sup> Hegaappe guyyiyan, Yihudaa asati Kawuwaa Amoona bolli maqettida ubbata woridosona. Woridi Amoona sohuwan a na7aa Yoosiyaasa kawoyidosona.

<sup>25</sup> Amooni hanido arabainne i oottidobai ubbai Yihudaa Kawotu Taarikiyaa Maxaafan xaafetti uttiis. <sup>26</sup> Amooni Uzza Ataakilttiyaa Sohuwaa giyoosan de7iya ba duufuwan moogettiis; a sohuwan a na7ai Yoosiyaasi kawotiis.

## 22

*Yihudaa Kawuwaa Yoosiyaasa  
(Hanidabaa Odiya Naa77antto Maxaafaa 34:1-2)*

<sup>1</sup> Yoosiyaasi kawotiyo wode, laittai ayyo hosppuna; i Yerusalaamen hasttamanne isiini laitta kawotiis. A aayee sunttai Yidiido; a Boxiqaata giyo kataman de7iya Adaaya na7iyo. <sup>2</sup> Yoosiyaasi GODAA sinttan suurebaa oottiis; ushachchi haddirssi geennan ba maizza aawaa Daawita ogiyan ubban hemettiis.

*GODAA Higgiyaa Maxaafai Beettiis  
(Hanidabaa Odiya Naa77antto Maxaafaa 34:8-28)*

<sup>3</sup> Kawoi Yoosiyaasi ba kawotido tammanne hosppunta laittan, Mashulaama na7aa na7aa, Axaaliyaa na7aa, waanna xaafiyaa Saafaana GODAA Beeta Maqidasiyaa hagaadan yaagidi kiittiis; <sup>4</sup> “Asai Beeta Maqidasiyaa ehin, Beeta Maqidasiyaa penggiyaa naagiyaageeti asaappe shiishshido miishshaa qoodanaadan, qeese ubbatu halaqaa

Hilqqiyaakko ba. <sup>5</sup> Qeese ubbatu halaqai miishshaa GODAA Beeta Maqidasiyaa bottokonissiya halaqatussi sheedhdhana mala oda. Etikka Beeta Maqidasiyaa bottokoniyaa oosanchchatuyyo, <sup>6</sup> anaaxetuyyo gimbbiyaageetuyyoonne shuchchaa massiyaageetuyyo qanxxona. Qassi Beeta Maqidasiyaa bottokonanau, mittaanne qoo7ettida shuchchaa shammiyaageetuyyo qanxxona. <sup>7</sup> He oosuwaa wochchiyaageeti amanettiya asa gidiyo gishshau, eta kushiyan gelida miishshan ai ai oottidaakko, eta oichchanau koshshenna” yaagiis.

<sup>8</sup> Hegaappe guyyiyan, qeese ubbatu halaqai Hilqqee waanna xaafiyaa Saafaana, “Higgiyaa Maxaafaa GODAA Beeta Maqidasiyan demmaas” yaagiis. Yaagidi maxaafaa Saafaanayyo immiis; immiin Saafaani ekkidi nabbabiis.

<sup>9</sup> Waanna xaafee Saafaani kawuwaakko simmidi biidi, “Beeta Maqidasiyan de7iya miishshaa ne oosanchchati wurssi ekkidi, Beeta Maqidasiyaa bottokonissiya halaqatuyyo immidosona” yaagidi yootiis. <sup>10</sup> Qassikka waanna xaafee Saafaani kawuwaa, “Qeese Hilqqee taayyo maxaafaa immiis” yaagiis; yaagidi kawuwaa sinttan he maxaafaa nabbabiis.

<sup>11</sup> Nabbabin Kawoi Higgiyaa Maxaafan de7iya qaala siyido wode, azzanidi ba maayuwaa pooshshiis. <sup>12</sup> Hegaappe guyyiyan, kawoi qeesiyaa Hilqqiyaa, Saafaana na7aa Ahiqaama, Mikaaya na7aa Akiboora, waanna xaafiyaa Saafaananne kawuwaa oosanchchaa Asaaya hagaadan yaagidi azaziis; <sup>13</sup> “Biite; biidi ta gishshaa, ha asaa gishshaanne Yihudaa ubbaa gishshaa, ha beettida maxaafaa qaalaabaa ane GODAA oichchite. Aissi giikko, nuussi xaafettida ubbabaa oottanau, nu maizza aawati ha maxaafaa qaalaayyo azazettibeenna gishshau, nu bolli suullida GODAA hanqqoi keehippe daro” yaagiis.

<sup>14</sup> Yaagin qeese Hilqqee, Ahiqaami, Akiboori, Saafaaninne Asaayi hananabaa yootiya Hulddo giyo mishiriyo oichchanau biidosona. Huldda Harihaasa na7aa Tiiqiwa na7aa, Beeta Maqidasiyaa maayuwaa naagiya SHAaluuma maccaasiyo. A Yerusalaamen naa77antto shuchchan de7ausu. He biida asati iira haasayidosona.

<sup>15</sup> Haasayin Huldda eta, “GODAI Israa7eela Xoossai, ‘Inttena taakko kiittida bitaniyaayyo yootite’ yaagees. <sup>16</sup> GODAI hagaadan yaagees; ‘Be7ite, Yihudaa kawoi nabbabido maxaafan xaafettida iita qaala ubbaa taani ha sohuwaa bollinne ha sohuwan de7iya asaa bolli ehaana hanais. <sup>17</sup> Eti tana aggidi, hara xoosatuyyo ixaanaa cuwayidosona; yaatidi eti bantta kushiyan oottidoban ubban tana hanqqetissidosona. Hegaa gishshau, ta hanqqoi ha sohuwaa bolli eexxi kiyiis; to7anau danddayenna’ yaagees.

<sup>18</sup> “GODAA oichchanau inttena kiittida kawuwaa hagaadan yaagite; ‘GODAI Israa7eela Xoossai neeni siyido qaalaabaa hagaadan yaagees; <sup>19</sup> “Taani ha sohuwaa bollinne ha sohuwan de7iya asaa bolli, ‘Taani inttena xaissananne baisa kessana’ gaada haasayidoogaa neeni siyido wode, ne wozanai shuggin, ta sinttan ne huuphiyaa kaushshido gishshaunne ne maayuwaa pooshshada, ta sinttan yeekkido gishshau, taani ne woosaa siyaas. <sup>20</sup> Hegaa gishshau, taani nena saruwan ne maizzan gattana; neeni saro moogettana. Taani ha sohuwaa bollinne ha sohuwan de7iya asaa bolli ehaana iitabaa ne aifee be7enna” yaagees’ yaagite” yaagaasu. Yaagin eti biidi, ha haasayettidabaa kawuwaayyo yootidosona.

## 23

*Yoosiyaasi Eeqaa Goinuwaa Biittaappe Xaissiis  
(Hanidabaa Odiya Naa77antto Maxaafaa 34:3-7,29-33)*

<sup>1</sup> Hegaappe guyyiyan, Kawoi Yoosiyaasi kiittidi, Yihudaa cimatanne Yerusalaame cimata ubbaa i shiishshiis. <sup>2</sup> Kawoi GODAA Beeta Maqidasiyaa pude kiyiis; Yihudaa asai ubbai, Yerusalaamen de7iya asai ubbai, qeesetinne hananabaa yootiyaageeti,



guuttaappe gitaa gakkanaashin, asai ubbai aara issippe GODAA Beeta Maqidasiyaa pude kiyidosona. Kiyin GODAA Beeta Maqidasiyaappe beettida Maachchaa Maxaafaa qaalaa ubbaa kawoi eti siyishin nabbabiis. <sup>3</sup> Hegaappe guyyiyan, kawoi tuussaa matan eqqidi, eti GODAA ogiyan hemettanaunne, a higgiiyaa, a wogaanne a azazuwaa ba kumetta wozanaaninne ba kumetta shemppuwan naaganau, qassi ha maxaafan xaafettida maachchaadan oottanau GODAA sinttan geppiis. Yaatin asai ubbaikka maachchaa naaganau geppiis.

<sup>4</sup> Hegaappe guyyiyan, kawoi qeese ubbatu halaqaa Hilqqiyaa, appe garssaara de7iya qeesetanne penggiyaa naagiyaageeta Ba7aalayyo, Asheeriyoonne saluwaa xoolintetuyyo goinnanau giigissido miishshata ubbaa Beeta Maqidasiyaappe kessanaadan azaziis. Kawoi hegeeta Yerusalaameppe gaxi kessidi, Qediroona Zanggaaran xuuggiis; xuuggidi bidinttaa Beetele efiis.

<sup>5</sup> Yihudaa katamatuuninne Yerusalaame yuushuwan de7iya xoqqa sohotun ubban ixaanaa cuwayanaadan Yihudaa kawoti sunttido eeqatu qeeseta ubbaa oosuwaappe kessiis. Ba7aalayyo, awaayyo, aginaayyo, xoolinttetuyyoonne saluwan de7iya hara meretatuyyo ixaanaa cuwayiyaageeta ubbaa diggiis.

<sup>6</sup> Asheero giyo xoosee misiliyaa GODAA Beeta Maqidasiyaappe ekkidi, Yerusalaame katamaappe gaxi kessidi, Qediroona Zanggaaraa efiis. Efidi yan xuuggiis; xuuggidoogaa liiqissi gaaccidi, xiille kessiis. Yaatidi he buhiyaa dere asaa makkaanaa bolli laaliis.

<sup>7</sup> GODAA Beeta Maqidasiyaa gidдон goino woga oottidi, attumaasati attumaasatuura shaaramuxiyo keettata qoliis; he keettatun maccaasai Asheero giyo xooseeyyo magalashuwaa suqqees.

<sup>8</sup> Yoosiyaasi qeeseta ubbaa Yihudaa katamatuppe ehiis; ehiidi kase qeeseti ixaanaa cuwayido xoqqa sohota, Gebaa7appe biidi Berssaabeha gakkanaashin de7iyaageeta tunissiis. Katamaa haariya Yaasu Penggiyaa giyo penggiyaa geliyoosaappe haddirssa baggaara de7iya goinniyo sohotakka qoqqofiiis. <sup>9</sup> Xoqqa sohuwaa qeeseti Yerusalaamen GODAASSI yarshshiyosaa pude yookkona; shin eti hara qeesetuura issippe irshshoi gelibeenna oittaa moosona.

<sup>10</sup> Kawoi Yoosiyaasi Hinnooma Zanggaaran de7iya Toofeeta giyo yarshsho sohuwaa tunissiis. Yaatidi Molooka giyo xoossau issi asinne ba attuma na7aa woikko ba macca na7iyo taman yarshshennaadan teqqiis.

<sup>11</sup> Yihudaa kawoti GODAA Beeta Maqidasiyaa geliyo penggiyan awaayyo dummayi wottido parata diggiis. Awa parati Naataani-Meleka giyo halaqaa kifiliyaa matan de7iya dabaaban de7oosona. Hegaappe guyyiyan, awaayyo dummayi wottido paraa gaareta Yoosiyaasi taman xuuggiis.

<sup>12</sup> Akaaza keettaa pooqiyaa bollan Yihudaa kawoti giigisissido yarshsho sohotanne Minaasee GODAA Beeta Maqidasiyaayyo de7iya naa77u dabaabatu gidдон giigissido yarshshiyosata Kawoi Yoosiyaasi qoliis. Eta he sohuwaappe diggidi kinchcherettiis; kinchcherettidi suuppaa Qediroona Zanggaaran oliis.

<sup>13</sup> Qassikka kawoi Yerusalaame katamaappe arshsho baggaara Dabira Zaites giyo deriyaappe tohossa baggan de7iya goinniyo xoqqa sohota tunissiis. He xoqqa sohota Israa7eela Kawoi Solomoni Sidoonatu xoosee Asttaarootiyyo, Moo7aabatu xoossaa Kamooshayyoonne, Amoonatu xoossaa Molookayyo,<sup>9</sup> he tuna xoossatuyyo goinnanau giigissido xoqqa sohota. <sup>14</sup> Kawoi Yoosiyaasi goinniyo shuchcha tuussata akka mentterettidi, Asheero giyo xoosee misiletakka qanxxerettiis. Yaatidi eti eqqido sohuwan haiqqida asaa meqettaa kunttiis.

<sup>8</sup> 23:13 Dabira Zaites: Ibraawettuwan “Zaites Deriyaa” woikko “Tuna Deriyaa” geetettees. <sup>9</sup> 23:13 Molookayyo: Ibraawettuwan Molooki “Milkom” geetettees.



<sup>15</sup> Qassi Israa7eela asaa nagaraa ootissida Nabaaxa na7ai Iyorbbaami Beeteelen xoqqa sohuwan giigissido yarshshiyosaa Kawoi Yoosiyaasi qoliis. Qolidi he yarshshiyosaa shuchchatakka mentterettidi, xiille kessiis; Asheeri misiliyaakka xuuggiis. <sup>16</sup> Hegaappe guyyiyan, Yoosiyaasi yuushuwaa xeellidi, keraa lanqqiyan de7iya duufota be7iis; be7idi meqettata duufotuppe kessidi, yarshshiyosaa sohuwaa bolli wottidi, taman xuuggiis. Yaatidi yarshshiyosaa sohuwaa tunissiis. Hegee hanidoogee Xoossaa asi kase awaajjido GODAA qaalaa maaraana. <sup>17</sup> Hegaappe guyyiyan kawoi, “Ha beettiyaagee o duufoo?” yaagidi oichchiis.

Oichchin Beetele katamaa asati, “Yihudaappe yiidi, Beetele yarshshiyosaa sohuwaa bolli ha77i neeni ootta simmiyoogee polettanaagaa kasetidi odida Xoossaa asa duufuwaa” yaagidi yootidosona.

<sup>18</sup> Kawoi, “Aggi bayite; issi asinne a meqettaa sohuwaappe qaattoppo” yaagiis. Hega gishshau, Samaariyaappe yiida hananabaa yootiya bitaniyaa meqettaara issippe a meqettaa bochchennan aggi bayidosona.

<sup>19</sup> Israa7eela kawoti Samaariyaa katamatun ootissidi, GODAA hanqqetissido, goinniyo xoqqa sohota Yoosiyaasi diggiis; Beeteelen oottidoogaadan, etakka oottiis. <sup>20</sup> I he xoqqa sohotun oottiya qeeseta ubbaa yarshshiyosaa bolli woriis; qassi he yarshshiyosaa bolli asaa meqettaa xuuggiis. Hega ubbaa oottidi, Yerusalaame simmiis.

*Yoosiyaasi Paasikaa Baalaa Bonchchiis  
(Hanidabaa Odiya Naa77antto Maxaafaa 35:1-19)*

<sup>21</sup> Hegaappe guyyiyan, kawoi asaa ubbaa, “Ha Maachchaa Maxaafan xaafetti doogaadan GODAAYYO intte Xoossaayyo Paasikaa Baalaa bonchchite” yaagidi azaziis. <sup>22</sup> Israa7eela haariya daannatu wodeppe doommidi, Israa7eela kawotu wodiyaaninne Yihudaa kawotu wodiyan ubban haggaa mala Paasikaa Baalai mulekka bonchchetti erenna. <sup>23</sup> SHin Kawoi Yoosiyaasi kawotido tammanne hosppunta laittan Yerusalaame kataman GODAA bonchchanau ha Paasikaa Baalai GODAAYYO bonchchettiis.

*Yoosiyaasi Oottido Hara Oosota*

<sup>24</sup> Qassi qeesetu ubbaa halaqai Hilqqee GODAA Beeta Maqidasiyan beettida maxaafan xaafettida higgiiyaa qaalaa minttanaadan, iita ayyaanaa xeesiyaageetanne shareechchota, so giddo eeqa misileta, eeqa miishshatanne Yihudaa biittaaaninne Yerusalaame kataman beettida hara sheneyiyaabata ubbaa Yoosiyaasi xaissiis. <sup>25</sup> Muuse higgiiyaadan ba kumetta wozanan, ba kumetta shemppuwaaninne, ba kumetta wolqqan GODAAKKO simmidaban Yoosiyaasa mala kawoi, appe kase gidin, appe guyye gidin, mulekka denddibeenna.

<sup>26</sup> Gidikonne Minaasee GODAA hanqqetissanau oottido iita ooso ubbaa gishshau, GODAI Yihudaa bolli hanqqettido ba hanqquwaa teegaappe simmibeenna. <sup>27</sup> Hega gishshau GODAI, “Taani Israa7eela ta sinttappe diggidoogaadan, Yihudaakka ta sinttappe diggana; taani doorido katamaa, Yerusalaamenne taani, ‘Ta sunttai hagan de7ana’ giido ha Beeta Maqidasiyaa diggana” yaagiis.

*Yoosiyaasa Kawotaa Wurssettaa  
(Hanidabaa Odiya Naa77antto Maxaafaa 35:20-36:1)*

<sup>28</sup> Yoosiyaasi hanido harabainne i oottidobai ubbai Yihudaa Kawotu Taarikiyaa Maxaafan xaafetti uttiis. <sup>29</sup> Yoosiyaasa wode Gibxxe Kawoi Nakoi, Asoore biittaa kawuwaa olan maaddanau Efiraaxiisa SHaafaa biis. Biishin Kawoi Yoosiyaasi aara olettanau ba olanchchata ekkidi kiyiis; shin Kawoi Nakoi aara Magiddon gaittidi, a woriis. <sup>30</sup> Worin a ashkharati a ahaa paraa gaariyan wottidi, Magiddoppe Yerusalaame ehiidosona; ehiidi a duufuwan a moogidosona. Hegaappe guyyiyan, he biittaa asati Yoosiyaasa na7aa Yo7akaaza dooridosona; dooridi a aawaa sohuwan a tiyidi kawoyidosona.

*Yihudaa Kawuwaa Yo7akaaza*  
(*Hanidabaa Odiya Naa77antto Maxaafaa 36:2-4*)

<sup>31</sup> Yo7akaazi kawotiyo wode, laittai ayyo laatamanne heezza; i Yerusalaamen heezzu agina kawotiis. A aayee sunttai Hamuxaalo; a Liibina kataman de7iya Ermmaasa na7iyo. <sup>32</sup> Ba maizza aawati oottidoogaadan, Yo7akaazi GODAA sinttan iitabaa oottiis. <sup>33</sup> Yo7akaazi Yerusalaamen kawotennaadan Gibxxe Kawoi Nakoi Hamaata giyo biittan Ribila giyoosan a qachchiis. Qachchidi heezzu sha7anne oiddu xeetu kilo giraame deexxiya xaqara biraanne hasttamanne oiddu kilo giraame deexxiya worqqaa Yihudaa asaa giirissiis. <sup>34</sup> Kawoi Nakoi Yoosiyaasa na7aa Eliyaaqiima a aawaa sohuwan kawoyiis; yaatidi a sunttaa Yo7aqeema yaagidi laammiis. SHin Yo7akaaza Gibxxe efiis; efin Yo7akaazi yan haiqqiis.

*Yihudaa Kawuwaa Yo7aqeema*  
(*Hanidabaa Odiya Naa77antto Maxaafaa 36:5-8*)

<sup>35</sup> Yaatin Yo7aqeemi Kawoi Nakoi oichchido giiraa biraanne worqqaanne ayyo immiis. He giiraa qanxxanau Yo7aqeemi he biittaa asai demmiyo keena biraappenne worqqaappe giiraa shiishshiis.

<sup>36</sup> Yo7aqeemi kawotiyo wode laittai ayyo laatamanne ichchasha; i Yerusalaamen tammanne isiini laitta kawotiis. A aayee sunttai Zabido; a Ruuma kataman de7iya Padaaya na7iyo. <sup>37</sup> Yo7aqeemi ba maizza aawati oottidoogaadan, GODAA sinttan iitabaa oottiis.

## 24

<sup>1</sup> Yo7aqeema wode Baabiloone biittaa Kawoi Naabukadanaxoori Yihudaa bolli woraajjiis. Yaatin Yo7aqeemi ayyo heezzu laittaa haarettiis. Hegaappe guyyiyan simmidi, Naabukadanaxoora bolli makkaliis. <sup>2</sup> GODAI Baabiloone biittaa ambbaanota, Sooriyaa biittaa ambbaanota, Moo7aaba biittaa ambbaanotanne Amoonaa biittaa ambbaanota Yo7aqeema bolli yeddiis; hananabaa yootiya ba ashkkaratu baggaara GODAI kase haasayidoogaadan, Yihudaa biittaa bashshanaadan hageeta yeddiis. <sup>3-4</sup> Kawoi Minaasee oottido nagara ubbaa gishshau, qassi xillo asaa suuttaa i gussidi, Yerusalaamen kunttido gishshau, GODAI Yihudaa asaa ba sinttappe digganau ha bashshaa yeddiis; GODAI Minaaseyyo he nagaraa atto gaanau koyibeenna.

<sup>5</sup> Yo7aqeemi hanido harabainne i oottidobai ubbai Yihudaa Kawotu Taarikiyaa Maxaafan xaafetti uttiis. <sup>6</sup> Yo7aqeemi haiqqidi, ba maizzan gaittiis. A sohuwan a na7ai Yo7aakiini kawotiis.

<sup>7</sup> Gibxxe biittaa kawoi naa77antto ba biittaaappe dendididi, olau yibeenna; aissi giikko, Gibxxe SHaafaappe doommidi, biidi Efiraaxiisa SHaafaa gakkanaashin, Gibxxe kawoi haarido biittaa ubbaa Baabiloone kawoi ekkirggiis.

*Yihudaa Kawuwaa Yo7aakiina*  
(*Hanidabaa Odiya Naa77antto Maxaafaa 36:9-10*)

<sup>8</sup> Yo7aakiini kawotiyo wode laittai ayyo tammanne hosppuna;<sup>10</sup> Yo7aakiini Yerusalaamen heezzu agina kawotiis. A aayee sunttai Nahushtto; a Yerusalaamiyaa Elnaataana na7iyo. <sup>9</sup> Yo7aakiini ba aawai oottidoogaadan, GODAA sinttan iitabaa oottiis.

<sup>10</sup> He wode Baabiloone Kawuwaa Naabukadanaxoora olanchchati Yerusalaame yiidi, katamaa doggomi wottidosona. <sup>11</sup> Doggomi uttidaashin, Baabiloone Kawoi Naabukadanaxoori he katamaa yiis. <sup>12</sup> Yihudaa Kawoi Yo7aakiini, a aayiyaa, a ashkkarati, a halaqatinne kawo keettaa oosanchchati ubbati Baabiloone kawuwaayyo kushiyaa immidosona.

<sup>10</sup> **24:8** Tammanne hosppuna: Laittai ayyo tammanne hosppuna woikko hosppuna. Hanidabaa Odiya Naa77antto Maxaafaa 36:9 xeella.

Yo7aakiini kawotido hospunnatta laittan, Baabiloone kawoi Yo7aakiina qachchiis. <sup>13</sup> GODAA Beeta Maqidasiyaaninne kawo keettan de7iya aquwaa ubbaa he sohuwaappe denttidi efiis. GODAI kase haasayidoogaadan Kawoi Solomoni GODAA Beeta Maqidasiyan giigissido worqqa miishshata ubbaa Baabiloone kawoi qanxxerettiis. <sup>14</sup> Naabukadanaxoori Yerusalaame asaa, halaqata ubbaa, olanchchata ubbaa, kushe hiillanchchata ubbaanne birataa qoxxiyaageeta ubbaa, muleera tammu sha7u asaa, Yerusalaameppe omooddidi efiis; efin biittan hiyyeesa asa xalaalai attiis.

<sup>15</sup> Naabukadanaxoori Yo7aakiina omooddidi, Baabiloone efiis; aara kawo aayyiyo, a maccaasata, a oosanchchatanne biittan de7iya gita asaa ubbaa ekkidi biis. <sup>16</sup> He asaappe laappun sha7ati olanchchata; issi sha7u asati dumma dumma kushe hiillanchchata; eti ubbaikka minonne olaa olettanau danddayiyaageeta. <sup>17</sup> Hegaappe guyyiyan, Baabiloone kawoi Yo7aakiina sohuwan a aawaa ishaa Mataaniyaa kawoyiis. Kawoyiiddi a sunntaa Sedeqiyaasa yaagidi laammiis.

### *Yihudaa Kawuwaa Sedeqiyaasa*

*(Hanidabaa Odiya Naa77antto Maxaafaa 36:11-12; Ermmaasa 52:1-3)*

<sup>18</sup> Sedeqiyaasi kawotiyo wode, laittai ayyo laatamanne isiino; Yerusalaamen i tammanne isiini laittaa kawotiis. A aayee sunntai Hamuxaalo; a Liibina kataman de7iya Ermmaasa na7iyo. <sup>19</sup> Yo7aqaemi oottidoogaadan, Sedeqiyaasikka GODAA sinttan iitabaa oottiis. <sup>20</sup> GODAI hanqqettido gishshau, Yerusalaame asaa bollinne Yihudaa asaa bolli hagee haniis; wurssettan eta i ba sinttappe diggiis.

### *Yerusalaame Kunddettaa*

*(Hanidabaa Odiya Naa77antto Maxaafaa 36:13-21; Ermmaasa 52:3-11)*

Sedeqiyaasi Baabiloone kawuwaa bolli makkaliis.

## 25

<sup>1</sup> Makkalin Sedeqiyaasi kawotido uddufunnta laitti, tammannta aginan, tammannta gallassi, Baabiloone Kawoi Naabukadanaxoori ba olanchchata ubbaa ekkidi yiidi, Yerusalaame dooddiis. A yuushuwankka biittaa keelaa diddiqiis. <sup>2</sup> Sedeqiyaasi kawotido tammanne isiinintta laittaa gakkanaassi, katamai doodettidi gam77iis.

<sup>3</sup> Hega gaasuwan biittan koshai suullin, he laitti oiddantto aginan, uddufunnta gallassan he biittaa asaayyo miyoobi xayiiis. <sup>4</sup> Yaanidaashin katamaa yuushuwaa gimbee issi baggaara qolettiiis. Qolettin Baabiloone asai katamaa yuuyi aadhhdidi naagikkokka, Yihudaa kawuwaa olanchchati mule ubbai qammi kawo ataakilttiyaa sohuwaa efiya ogiyaa oiqqidi, naa77u dirssaa gimbbeta issippe gattiya penggiyaara kiyidi baqatidosona. Eti Yorddaanoosa dilbbaakko simmidi biidosona; <sup>5</sup> shin Baabiloone olanchchati kawuwaa yedettidi, Yarkko dembbaa gattiiddi oiqqidosona. Oiqqin a olanchchati ubbai appe shaahettidi laalettidosona. <sup>6</sup> Hegaappe guyyiyan, eti a Ribila kataman de7iya Naabukadanaxoorakko efiidosona. Efin Baabiloone kawoi yan Sedeqiyaasa bolli pirddiis. <sup>7</sup> Sedeqiyaasa naata Sedeqiyaasi xeellishin woridosona. Hegaappe guyyiyan, a aifeta wooci kessidi, sanssalatan a qachchidosona; yaatidi Baabiloone biitti ekkidi efiidosona.

### *Beeta Maqidasee Qolettiiis*

*(Ermmaasa 52:12-33)*

<sup>8</sup> Naabukadanaxoori Baabiloonen kawotido tammanne uddufunnta laitti, ichchashantta aginan, laappunnta gallassi kawuwaa oosanchchatuppe issoi, kawuwaa naagiyaageetu halaqai Naabuzaraadaani Yerusalaame geliis. <sup>9</sup> Gelidi GODAA Beeta Maqidasiyaa, kawo keettaanne Yerusalaamen de7iya keetta ubbaa xuuggiis; gita keetta giyo keetta ubbaa eetti wurssiis. <sup>10</sup> Baabiloone olanchchati ubbai kawuwaa naagiyaageetu halaqaa azazuwan Yerusalaame katamaa yuushuwan de7iya dirssaa

gimbbiyaa ubbaa qolidosona. <sup>11</sup> Naabuzaraadaani kataman attida asatanne Yihudan attida asata, kaddidi Baabiloone olanchchatun gaittida asatuurakka ubbaa oiqqidi, omooduwau efiis. <sup>12</sup> SHin Naabuzaraadaani wurssetta hiyyeesatuppe amaridaageeta woiniyaa turaa tokkanaadaaninne gadiyaa goyanaadan Yihudan ashshiis.

<sup>13</sup> Baabiloone asati GODAA Beeta Maqidasiyan de7iya nahaasiyaappe medhdhido tuussata, miishshata wottiyo gaaretanne Abbaa Sainiyaa mentterettidosona; mentterettidi nahaasiyaa ubbaa Baabiloone efidosona. <sup>14</sup> Hegaadanka qassi kereta, akaafata, xomppiyaa shaluwaa xeeraa pittiyobata, cilppatanne yarshshiyoo wode go7ettiyo nahaase miishshata ubbaa ekki efidosona. <sup>15</sup> Kawuwaa naagiyaageetu halaqai Naabuzaraadaani muruta biraappenne muruta worqqaappe merettida tamaa kaashiyo shaatetakka kuixaarotakka ubbaa ekkidi efiis. <sup>16</sup> Kawoi Solomoni GODAA Beeta Maqidasiyan oosettiyaabatussi medhdhido naa77u tuussati, Abbaa Saineenne gaareti merettido nahaasiyaa biratai meezaanan likkanau danddayettennaagaa keena daro. <sup>17</sup> Naa77u tuussati issi mala gididi, issuwaa issuwaa geesai tammanne hosppun wara; qassi issi issi tuussaa huuphiyan de7iya gumbboti heezzu wara adussa. He gumbbotu yuushoi nahaasiyaa qaxiqallotuuninne nahaasiyaappe medhdhido roomaane giyo teeraa misiletun alleeqetti uttiis.

*Yihudaa Asai Omoodettidi Baabiloone Biis*  
(Ermmaasa 52:24-27)

<sup>18</sup> Kawuwaa naagiyaageetu halaqai Naabuzaraadaani qeese ubbatu halaqaa Saraaya, appe kaalliyaa qeesiyaa Xafaaniyaanne penggiyaa naagiya hara heezzu asata oiqqiis. <sup>19</sup> Qassi he wode gakkanaashin, kataman de7iya asaappe Yihudaa ola gadaawaa, kawuwaa zoriyaageetuppe ichchashu asata, ola gadaawaa xaafiyaa, hegeenne olanchchata asaa gidloppe qoridi kessiyaagaanne hara usuppun tammu gita asata efiis. <sup>20</sup> Halaqai Naabuzaraadaani eta ubbaa ekkidi, Baabiloone kawuwaakko Ribila katamaa efiis. <sup>21</sup> Yan Ribila kataman, Hamaata biittan Baabiloone kawoi eta ubbaa worissiis. Hegaadan hanidi, Yihudaa asai ba biittaappe omoodetti denddidi biis.

*Gadaalee Yihudaa Haariis*  
(Ermmaasa 40:7-9; 41:1-3)

<sup>22</sup> Hegaappe guyyiyan, Kawoi Naabukadanaxoori Saafaana na7aa na7aa, Ahiqaama na7aa Gadaaliyaa, Baabiloone beennan Yihudan attida asaa haariya halaqa oottidi sunttiis. <sup>23</sup> Kushiya immibeenna Yihudaa ola gadaawatinne olanchchati heгаа siyidi, Mixiphphan de7iya Gadaaliyan biidi gaittidosona. He gadaawati Nataaniyaa na7aa Isimaa7eela, Qaareeha na7aa Yohanaana, Naxoofa katamaappe yiida Taanihumeeta na7aa Saraayanne Maa7ikappe yiida issi bitaniyaa na7aa Yazaaniyaa. <sup>24</sup> Gadaalee etassinne eta olanchchatussi caaqqidi, hagaadan yaagiis; “Hageetussi Baabiloone halaqatussi yayyoppite. Ha biittan de7ite; yaatidi Baabiloone kawuwaassi haarettite. Yaatikko mule ubbabai inttessi lo77o gidana” yaagiis.

<sup>25</sup> SHin laappuntta aginan kawo zare gidiya Elishamaa7a na7aa Nataaniyaa na7ai Isimaa7eeli tammu asaara Mixiphpha biidi, Gadaaliyaanne aara de7iya Yihudaa asaanne Baabiloone asaa ubbaa woriis. <sup>26</sup> Hegaappe guyyiyan, Baabiloone asaayyo yayyidi, Yihudaa asai, guuttai gitai attennan, ola gadaawatuurakka ubbai Gibxxe biitti baqatidosona.

*Yo7aakiini Qashuwaappe Birshshettiis*  
(Ermmaasa 52:31-34)

<sup>27</sup> Ewiili-Marodaaki kawotido laitti Yihudaa Kawuwaa Yo7aakiina qashuwaappe birshshidi maariis. Hegee hanidoogee Yo7aakiini omoodetti qashettidi biido hasttamanne laappuntta laitti, tammanne naa77antta aginan, laatamanne laappuntta gallaasana. <sup>28</sup> Ewiili-Marodaaki Yo7aakiinaara mal77o qaalaa haasayidi, Baabiloonen omooduwan

de7iya hara kawotu ubbaappe aattidi, a bonchchiis. <sup>29</sup> Hegaa gishshau, Yo7aakiini qasho keettan maayido maayuwaa laammiis. Laammidi i attida ba de7o laitta ubban kawo maaddaappe miis. <sup>30</sup> Hachchi hachchi ayyo koshshiyaabaa ubbaa Baabiloone kawoi immiis.



## Hanidabaa Odiya Koiro Maxaafaa

### *Gidduwaa Erissuwaa*

Hanidabaa Odiya maxaafati, Sameela maxaafatuuninne Kawotu maxaafatun xaafetida taariketa dumma ogiyan naa77anttidi odoosona. Hanidabaa odiya maxaafatun Israa7eela kawotu kawotettaa taarikee naa77u waanna waanna kifiletun shaahettidi odettiis.

1. Israa7eelanne Yihudaa kawotettati mooruwan kunddidaageeta gidikkonne, Xoos-sai ba asaassi gelido qaalaa ubbaa naagidoogaanne Yihudan de7iyaageetu baggaara ba asaassi ba halchchido halchchuwaa polidoogaa bessanaassa. Hagee tuma gidiyooгаа erissanau, ha maxaafaa xaafidaagee Daawitinne Solomoni oottido gita gita oosota, Yoosaafixi, Hizqqiyaasinne Yoosiyaasi asaa de7uwaa ooraxissido ooraxissuwaanne Xoossaassi minnidi ammanettida asaa hanotaa loittidi xeelliis.
2. Yerusalaamen de7iya Beeta Maqidasiyan Xoossaassi goinniyo goinoidi waanidi doomettidaakko odanaassa. Qassi he wode goinuwaa wogaa kaalettiyaageeti qeeseta gidiyoo gishshau, eti kaalettiyo ooso keettaa waanidi doomettidaakkonne qonccissanaassa. Beeta Maqidasiyaa keexxidaagee Solomona gidikkokka, Beeta Maqidasiyaanne goinuwaa wogaa koiro essidaagee Daawita gidiyooгаа odanaassa.

### *Addaameppe Biidi Abrahaama Gakkanaassi De7iya Yeletaa* (Doomettaabaa 5:1-32; 10:1-32; 11:10-26)

<sup>1</sup> Addaamee Seeta yeliis; Seeti Heenoosa yeliis; Heenoosi Qainaana yeliis; <sup>2</sup> Qainaani Malaali7eela yeliis; Malaali7eeli Yaareeda yeliis; <sup>3</sup> Yaareedi Heenooka yeliis; Heenooki Maatusaala yeliis; Maatusaali Laameeka yeliis; <sup>4</sup> Laameeki Noha yeliis. Nohee Seema, Kaamanne Yaafeeta yeliis.

<sup>5</sup> Yaafeeta attuma naati Goomera, Maagooga, Maadaaya, Yaawaana, Tubaala, Meshekanne Tiiraasa. <sup>6</sup> Goomera attuma naati Ashkkanaaza, Riifaatanne Togarmma. <sup>7</sup> Yaawaana attuma naati Eliisha, Tarsseesa, Kitiimanne Rooda.

<sup>8</sup> Kaama attuma naati Kuusha, Mixiraima, Puuxanne Kanaana. <sup>9</sup> Kuusha attuma naati Saaba, Hawiila, Saabita, Raa7imanne Sabttaka. Raa7ima attuma naati Saabanne Dadaana. <sup>10</sup> Qassi Kuushi Naamiruuda yeliis. Naamiruudi sa7an wolqqaama olanchcha gidiiis. <sup>11</sup> Mixiraimi Ludeta, Anaameta, Lahaabeta, Nafttuuheta, <sup>12</sup> Patiroosata, Kaasiluuhetanne Pilisxxeema zareta yelida Kafttooreta yeliis. <sup>13</sup> Kanaanee baira na7aa Sidoonanne a kaaluwaa Heeta yeliis; <sup>14</sup> qassi Kanaanee Yaabusata, Amooreta, Gerggeeseta, <sup>15</sup> Hiiweta, Arqqeta, Siinata, <sup>16</sup> Ariwaadeta, Xamaaretanne Hamaatata yeliis.

<sup>17</sup> Seema attuma naati Elaama, Asoora, Arifaakisaada, Luuda, Araama, Uuxa, Huula, Geteeranne Mesheka. <sup>18</sup> Arifaakisaadi SHelaaha yeliis; SHelaahi Eboora yeliis. <sup>19</sup> Eboori naa77u naata yeliis; issoi yelettido wode sa7ai shaahettido gishshau, a sunttai Peeleega geetettiis; a ishaa sunttai Yoqixaana. <sup>20</sup> Yoqixaani Almmodaada, SHeleefa, Haxarmmaaweta, Yeraaha, <sup>21</sup> Hadoraama, Uzaala, Diiqila, <sup>22</sup> Eebaala, Abimaa7eela, Saaba, <sup>23</sup> Ofiira, Hawiilanne Yobaaba yeliis. Hageeti ubbati Yoqixaana zareta.

<sup>24</sup> Seemappe biidi, Abrahaama gakkanaassi de7iya yeletai hagaappe kaallidi xaafetidaagaa: Seema, Arifaakisaada, SHelaaha, <sup>25</sup> Eboora, Peeleega, Raa7a, <sup>26</sup> Saruuga, Naakoora, Taaranne <sup>27</sup> Abrahaama geetettidi xeesettiya Abraama.

### *Isimaa7eela Yeletaa* (Doomettaabaa 25:12-16)

<sup>28</sup> Abrahaama attuma naati Yisaaqanne Isimaa7eela. <sup>29</sup> Eta yeletai hagaappe kaallidi xaafettiis.

Isimaa7eela bairai Nabaayoota; hegaappe simmin Qeedaaree, Adibi7eeli, Mibssaami, <sup>30</sup> Mishimaa7i, Duumi, Maasi, Hadaadi, Teemi, <sup>31</sup> Yixuri, Naafiishinne Qeedimi yeletti-dosona. Hageeti Isimaa7eela naata.

<sup>32</sup> Abrahaama kaadumatee Qaxuri attuma naati Ziimiraana, Yoqishaana, Madaana, Midiyaama, Yishibaaqanne SHuha. Yoqishaana attuma naati Saabanne Dadaana.

<sup>33</sup> Midiyaama attuma naati Eefa, Efeera, Hanooka, Abiidaa7anne Elddaa7a. Hageeti ubbati Qaxuri zareta.

### *Eesawa Yeletaa*

*(Doomettaabaa 36:1-19)*

<sup>34</sup> Abrahaami Yisaaqa yeliis. Yisaaqa attuma naati Eesawanne Israa7eela. <sup>35</sup> Eesawa attuma naati Elifaaza, Ra7u7eela, Yi7uusha, Yaa7ilaamanne Qoraaha. <sup>36</sup> Elifaaza attuma naati Temaana, Omaara, Xafa, Ga7itaama, Qanaaza, Timinaa7anne Amaaleeqa.

<sup>37</sup> Ra7u7eela attuma naati Nahaata, Zaraaha, SHammanne Miiza.

### *Eedooman Koiro De7ida Asata*

*(Doomettaabaa 36:20-30)*

<sup>38</sup> Eedooman koiro de7ida Se7iira attuma naati Loxaana, SHobaala, Xibaa7oona, Aana, Dishoona, Exeeranne Dishaana. <sup>39</sup> Loxaana attuma naati Hooranne Homaama. Loxaana michchiyaa Timinaa7o. <sup>40</sup> SHobaala attuma naati Aaliwaana, Manahaata, Eebaala, SHefanne Oonaama. Xibaa7oona attuma naati Aayanne Aana. <sup>41</sup> Aana na7ai Dishoona. Dishoona attuma naati Hemddaana, Eshibaana, Yitiraananne Karaana. <sup>42</sup> Exeera attuma naati Bilihaana, Za7iwaananne Aqaana. Dishaana attuma naati Uuxanne Araana.

### *Eedooma Kawota*

*(Doomettaabaa 36:31-43)*

<sup>43</sup> Israa7eelan ai kawoinne kawotanaappe kase Eedooma biittan kawotida kawoti hagaappe kaallidi xaafettidaageeta.

Ba7ooraa na7ai Belaa7i kawotiis; a katamaa sunttai Dinaaba.

<sup>44</sup> Belaa7i haiqqin, Booxirappe yiida Zaraaha na7ai Yobaabi a sohuwan kawotiis.

<sup>45</sup> Yobaabi haiqqin, Temaana biittaappe yiida Hushaami a sohuwan kawotiis.

<sup>46</sup> Hushaami haiqqin, Moo7aaba biittan Midiyaamata xoonida Badaada na7aa Hadaadi a sohuwan kawotiis; a katamaa sunttai Awiita.

<sup>47</sup> Hadaadi haiqqin, Maasireeqappe yiida Saamili a sohuwan kawotiis.

<sup>48</sup> Saamili haiqqin, shaafaa matan de7iyya Rahobootappe yiida SHaa7uli a sohuwan kawotiis.

<sup>49</sup> SHaa7uli haiqqin, Akiboora na7ai Ba7aalihanaani a sohuwan kawotiis.

<sup>50</sup> Ba7aalihanaani haiqqin, Hadaadi a sohuwan kawotiis; a katamaa sunttai Paa7a. A keettaayyiyaa Mezaahaaba na7ee Maaxireedi na7iyo Mahexaabi7eelo. Hegaappe guyyiyan, Hadaadi haiqqiis.

<sup>51</sup> Eedooma zaretu halaqati hageeta: Timinaa7a, Aliwa, Yeteeta, <sup>52</sup> Oholiibaama, Eela, Piinoona, <sup>53</sup> Qanaaza, Temaana, Mibxxaara, <sup>54</sup> Maagidi7eelanne Iraama. Hageeti Eedooma halaqata.

## 2

### *Yihudaa Yeletaa*

<sup>1</sup> Israa7eela attuma naati hageeta: Roobeela, Simoona, Leewa, Yihudaa, Yisaakoora, Zaabiloona, <sup>2</sup> Daana, Yooseefa, Biniyaama, Nifttaaleema, Gaadanne Aseera.

<sup>3</sup> Kanaanee Baatishu7ippe Yihudai yelido heezzu attuma naati Eera, Oonaananne SHEela. Yihudaa na7ai bairai, Eeri GODAA sinttan iitabaa oottido gishshau, GODAI

a woriis. <sup>4</sup> Yihudaa na7aa machchiya Ti7imaara Yihudaayyo Paareesanne Zaraaha yelaasu. Yihudaayyo ubbaara ichchashu attuma naati de7oosona.

<sup>5</sup> Paareesa attuma naati Hexiroonanne Hamuula.

<sup>6</sup> Zaraaha attuma naati Zimira, Etaana, Hemaana, Kalkkoolanne Darddaa7a; eti muleera ichchasha. <sup>7</sup> Zaraaha zerettaappe gidida Karmma na7ai Akkaani Xoossaayyo dummayi wottido omooduwaa ekkidi, Israa7eela asaa waissidaagaa. <sup>8</sup> Etaana na7ai Azaariyaa.

### *Hexiroonappe Biidi Daawita Gakkanaassi De7iya Yeletaa*

<sup>9</sup> Hexirooni yelido naati Yiraahima7eela, Raamanne Kaaleeba. <sup>10</sup> Raami Aminadaaba yeliis. Aminadaabi Yihudaa zaretu halaqaa Na7asooni yeliis. <sup>11</sup> Na7asooni Salm-mooni yeliis; Salmmoonni Boo7eeza yeliis; <sup>12</sup> Boo7eezi Yoobeeda yeliis; Yoobeedi Isseya yeliis. <sup>13</sup> Isseyi ba baira na7aa Eli7aaba, naa77antto na7aa Aminadaaba, heezzantto na7aa SHAama, <sup>14</sup> oiddantto na7aa Nataani7eela, ichchashantto na7aa Raddaaya, <sup>15</sup> usuppuntto na7aa Ooxeemanne laappuntto na7aa Daawita yeliis. <sup>16</sup> Isseya macca naati Xaruuyonne Abigaalo. Xaruuyi naati heezzati Abishaaya, Yoo7aabanne Asaa-heela. <sup>17</sup> Abigaala Amaasa yelaasu; Amaasa aawai Isimaa7eeliyaa Yetera.

### *Hexiroona Yeletaa*

<sup>18</sup> Hexiroona na7ai Kaaleebi ba maccaasee Azuubin, Yirii7ooto giyo na7iyo yeliis. Yirii7oota Yesheera, SHobaabanne Arddoona yelaasu. <sup>19</sup> Azuuba haiqqin, Kaaleebi Efiraato ekkii; Efiraata Huura yelaasu. <sup>20</sup> Huuri Uura yeliis; Uuri Baxaali7eela yeliis.

<sup>21</sup> Hexirooni usuppun tammu laitta asa gididoogaappe guyyiyan, Gala7aade aawaa Maakira na7iyo ekkidi, Saguba yeliis. <sup>22</sup> Sagubi Yaa7iira yeliis. Yaa7iiri beni Gala7aade biittan laatamanne heezzu katamata haariis. <sup>23</sup> SHin Gashuuranne Sooriyaa kawoti Yaa7iira katamata Qanaataaranne Qanaata moottatuura usuppun tammu katamata olidi oiqqidosona; yan de7ida asai ubbai Gala7aade aawaa Maakira zare. <sup>24</sup> Hexirooni Kaaleeba Efiraata giyoosan haiqqidoogaappe guyyiyan, Hexiroona maccaasiyaa Abiiya Taqo7a aawaa Ashihuura yelaasu.<sup>1</sup>

### *Yiraahima7eela Yeletaa*

<sup>25</sup> Hexiroona na7aa bairaa Yiraahima7eela na7ai bairai Raama; kaaloti Buuna, Oreena, Ooxeemanne Akiiya. <sup>26</sup> Yiraahima7eelayyo Ataaro geetettiya hara maccaasiyaa de7ausu; Ataara Oonaama aayyiyo.

<sup>27</sup> Yiraahima7eela na7aa bairaa Raama naati Ma7aaxa, Yaamiinanne Eqeera.

<sup>28</sup> Oonaama naati SHammaayanne Yaada.

SHammaaya naati Nadaabanne Abishuura. <sup>29</sup> Abishuura maccaasiyaa Abihaila Ahibaananne Moliida yelaasu. <sup>30</sup> Nadaaba attuma naati Seledanne Afaayima; Seledi na7a yelennan haiqqiis. <sup>31</sup> Afaayima na7ai Yishi7a; Yishi7a na7ai SHEeshaana; SHEeshaana na7ai Ahilaaya.

<sup>32</sup> SHammaaya ishaa Yaada naati Yeteranne Yonaataana; Yeteri na7a yelennan haiqqiis. <sup>33</sup> Yonaataana naati Peleetanne Zaaza.

Hageeti Yiraahima7eela zareta.

<sup>34</sup> SHEeshaanayyo maccappe attin, attuma naati baawa. SHEeshaanayyo Yaariha7a geetettiya ashkkarai Gibxxe biittaappe yiidaagee de7ees. <sup>35</sup> SHEeshaani ba ashkkaraa Yaariha7ayyo ba macca naatuppe issinno immiis; immin na7iyaa Attaaya yelaasu. <sup>36</sup> Attaayi Naataana yeliis; Naataani Zabaada yeliis; <sup>37</sup> Zabaadi Efilaala yeliis; Efilaali Yoobeeda yeliis; <sup>38</sup> Yoobeedi Yeeha yeliis; Yeehu Azaariyaa yeliis; <sup>39</sup> Azaaree Heleexa yeliis; Heleexi El77aasa yeliis; <sup>40</sup> El77aasi Sisimaaya yeliis; <sup>41</sup> Sisimaayi SHaaluuma yeliis; SHaaluumi Yiqaamiyaa yeliis; Yiqamee Elishamaa7a yeliis.

<sup>1</sup> 2:24 Woikko Hexirooni haiqqidoogaappe guyyiyan, Kaaleebi ba aawaa am77iyo Efiraato aissii. Aissin eti Taqo7a katamaa keexxida, Ashihuura giyo attuma na7aa yelidosona.

*Kaaleeba Yeletaa*

<sup>42</sup> Yiraahima7eela ishaa Kaaleeba na7ai bairai Meesha. Meesha na7ai Ziifa; Ziifa na7ai Mareesha; Mareesha na7ai Kebroona. <sup>43</sup> Kebroona naati Qoraaha, Taappuha, Reqeemanne SHemaa7a. <sup>44</sup> SHemaa7i Yorqqa7aama aawaa Rahaama yeliis. Reqeemi SHammaaya yeliis. <sup>45</sup> SHammaaya na7ai Maa7oona. Maa7ooni Beetixuura yeliis.

<sup>46</sup> Kaaleeba kaadumatiyaa Eefa Haaraana, Moxanne Gazeza yelaasu; Haaraani Gazeza yeliis.

<sup>47</sup> Yaahidaaya naati Regeema, Yo7aataama, Geshaana, Peleexa, Eefanne SHa7aafa.

<sup>48</sup> Kaaleeba kaadumatiyaa Maa7ika SHebeeranne Tirahaana yelaasu. <sup>49</sup> Qassikka Maa7ika SHa7aafanne SHawa yelaasu. SHa7aafi Madimaana yeliis. SHawi Maak-ibeenanne Gibaa7a yeliis.

Kaaleeba na7iyaa Akiso.

<sup>50</sup> Kaaleeba naati harati hagaappe kaallidi xaafettidosona. Kaaleebi ba baira na7aa Huura ba keettaayee Efiraatin yeliis. Huura naati Qiriyaati-Yi7aariima aawaa SHobaala, <sup>51</sup> Beetaliheema aawaa Salmmoonanne Beeti-Gadeera aawaa Hareefa. <sup>52</sup> Qiriyaati-Yi7aariima aawaa SHobaala yarati Haro7eetatanne Manuhoota yaratuppe baggata. <sup>53</sup> Qiriyaati-Yi7aariima yarati Yatirata, Puutata, SHumaatanne Mishiraa7ata. Xor77atinne Eshttaa7oolati hageetuppe yelettidosona. <sup>54</sup> Beetaliheema aawaa Salmmoona yarati Naxoofata, Axirooti-Beetayoo7aabata, Manuhoota yaratuppe attiya baggatanne Xor77ata. <sup>55</sup> Yaabeexa kataman de7iya xaafiyaageetu yarati qassi Tir77ata, SHim77aatanne Sukkata. Hageeti Rekaabatu aawaa Haamatappe yelettida Qeenata.

**3***Kawuwaa Daawita Naata*

<sup>1</sup> Kebroona kataman Daawiti yelido naati hagaappe kaallidi xaafettidosona. Iziraa7eeliyaa Ahino7aama yelido a bairai Aminoona. Qarmmeloosiyaa Abigaala yelido a naa77antto na7ai Daaneela. <sup>2</sup> Gashuura biittaa Kawuwaa Talmmaaya na7iyaa Maa7ika yelido a heeztantto na7ai Abeselooma. Haggiita yelido a oiddantto na7ai Adooniyaasa. <sup>3</sup> Abiixaala yelido a ichchashantto na7ai SHafaaxiyaa. A maccaasiyaa Egila yelido a usuppunta na7ai Yitira7aama. <sup>4</sup> Daawiti he usuppun naata Kebroonan yeliis. Daawiti Kebroonan laappun laittanne usuppun agina kawotiis.

Qassi Yerusalaamen hasttamanne heezzu laitta kawotiis. <sup>5</sup> Daawiti Yerusalaamen yelido naati oiddati Ami7eela na7iyaa Berssaaba yelido SHim77a, SHobaaba, Naataananne Solomona. <sup>6</sup> Qassi hara uddufun attuma naati Yibihaara, Elishamaa7a, Elifeleexa, <sup>7</sup> Nogaaha, Nefega, Yaafi7a, <sup>8</sup> Elishamaa7a, Eliyadaa7anne Elifeleexa. <sup>2</sup> <sup>9</sup> Ha attuma naatu ubbaa bollikka Daawitayyo kaadumatatuppe yelettida attuma naati de7oosona; qassi Taamaara ha attuma naatu michchiyo.

*Kawuwaa Solomona Yeletaa*

<sup>10</sup> Kawuwaa Solomona yeletai hagaappe kaallidi xaafettidaagaa. Solomona na7ai Robi7aama; Robi7aama na7ai Abiyya; Abiyya na7ai Asa; Asa na7ai Yoosaafixa; <sup>11</sup> Yoosaafixa na7ai Yoraama; Yoraama na7ai Akaaziyaasa; Akaaziyaasa na7ai Yo7aasha; <sup>12</sup> Yo7aasha na7ai Amesiyaasa; Amesiyaasa na7ai Ooziyaana; Ooziyaana na7ai Yo7aataama; <sup>13</sup> Yo7aataama na7ai Akaaza; Akaaza na7ai Hizqqiyaasa; Hizqqiyaasa na7ai Minaasa; <sup>14</sup> Minaase na7ai Amoona; Amoona na7ai Yoosiyaasa. <sup>15</sup> Yoosiyaasa na7ai bairai Yohanaana; naa77anttoi Yo7aqeema; heeztanttoi Sedeqiyaasa; oiddanttoi SHaaluuma. <sup>16</sup> Yo7aqeema naati Yo7aakiinanne<sup>3</sup> Sedeqiyaasa.

<sup>2</sup> **3:8** Daawitassi Yerusalaamen yelettida attuma naatu sunttai Naa77antto Sameela 5:14-16; Hanidabaa Odiya Koiro Maxaafaa 3:5-7nne 14:4-7 xaafettiis; shin Ibraawettuwan issuwaa issuwaa sunttai ubbasan issi mala gidenna.

<sup>3</sup> **3:16** Yo7aakiinanne: Ibraawettuwan ha sunttai “Yokoniya” geetettes.

*Kawuwaa Yo7aakiina Yeletaa*

<sup>17</sup> Omoodettidi Baabiloone biida Yo7aakiina attuma naati Salaatiyaala,  
<sup>18</sup> Malkkiraama, Padaaya, SHenaaxaara, Yiqaamiyaa, Hoshamaa7anne Nadaabiyaa.  
<sup>19</sup> Padaaya attuma naati Zarubaabeelanne SHim77a. Zarubaabeela attuma naati Mashulaamanne Hanaaniyaa; eta michchiyaa SHalomiito. <sup>20</sup> Hageeta bollan hara ichchashu attuma naati Zarubaabeelassi de7oosona; etikka Hashuuba, Oheela, Berekiyaa, Hasaadiyaanne Yushaabi-Heseeda.

<sup>21</sup> Hanaaniyaa attuma naati Palaaxiyaanne Yishaa7iyaa. Yishaa7iyaa na7ai Rafaaya; Rafaaya na7ai Arnnaana; Arnnaana na7ai Obaadiyaa; Obaadiyaa na7ai SHakaaniyaa; <sup>22</sup> SHakaaniyaa na7ai SHamaa7iyaa. SHamaa7iyaa naati ichchashati Haxxuusha, Yigi7aala, Bariyaaha, Na7aariyaanne SHafaaxa. <sup>23</sup> Na7aariyaa naati heezzati Eliyoo7enaaya, Hizqqanne Aziriqaama. <sup>24</sup> Eliyoo7enaaya naati laappunati Hodaawiyaa, Eliyaashiba, Palaaya, Aqquuba, Yohanaana, Dalaayanne Anaana.

**4***Yihudaa Yeletaa*

<sup>1</sup> Yihudaa zareti Paareesa, Hexiroona, Karmma, Huuranne SHobaala.

<sup>2</sup> SHobaala na7ai Ra7aayi Yahaata yeliis; Yahaati Ahumaayanne Lahaada yeliis. Hageeti Xor77atu yarata. <sup>3-4</sup> Huuri ba aayee Efiraatissi baira na7aa; Huuri Beetaliheema yeliis. Exaama attuma naati Iziraa7eela, Yuushimanne Yidibaasha; eta michchiyaa Haxilelppoono. Panu7eeli Gadoora yeliis. Exeeri Huusha yeliis. Hageeti Huura yarata.

<sup>5</sup> Taqo7a aawaa Ashihuurayyo Heelonne Naa7iro geetettiya naa77u maccaasati de7oosona. <sup>6</sup> Naa7ira Ahuzaama, Hefeera, Teminanne Ahashttaara Ashihuurayyo yelaasu; hageeti Naa7iri naata. <sup>7</sup> Heela Xeereta, Xoohaaranne Etinaana Ashihuurayyo yelaasu. <sup>8</sup> Qooxi Anuuba, Xobeebanne Haruuma na7aa Ahariheela yarata yeliis.

<sup>9</sup> Yaabeexi ba ishanttu ubbaappe aadhdhi bonchchettes. A aayiyaa, “Taani a iita maaretan yelido gishshau, a sunttai Yaabeexa” gaada sunttaasu. <sup>10</sup> Yaabeexi Israa7eela Xoossaa xeesidi, “Abeet Xoossau, hai tana neeni anjja; ta gadiyaakka aassa. Tanaara issippe gida; tana sakkennaadan tana qohiyaabaappe neeni naaga” yaagidi woossiis. Woossin Xoossai a woosaa siyiis.

*Hara Asatu Yeletaa*

<sup>11</sup> SHuha ishai Kaluubi Mahiira yeliis; Mahiiri Eshttoona yeliis. <sup>12</sup> Eshttooni Beeti-raafa, Paaseehanne Tahinna yeliis. Tahinni Nahaasha katamaa asaa yeliis. Hageeti Reeka biittan de7idosona.

<sup>13</sup> Qanaaza naati Otini7eelanne Saraaya; Otini7eela naati Hataatanne Ma7onootaaya. <sup>14</sup> Ma7onootaayi Oofira yeliis. Saraayi Yoo7aaba yeliis. Yoo7aabi Kushe Hiillatu Zanggaaraa giyoosan de7ida asaa yeliis.

<sup>15</sup> Yifune na7aa Kaaleeba naati Ira, Eelanne Na7aama. Eela na7ai Qanaaza.

<sup>16</sup> Yihaali7eela naati Ziifa, Ziifaaha, Tiirayanne Asaari7eela.

<sup>17</sup> Eezira naati Yetera, Mereda, Efeeranne Yaaloona. Meredi Gibxxe kawuwaa na7iyo Biitiyo ekkiiis; ekkii a Miiriyaaamo, SHammaayanne Yishiba ayyo yelaasu. Yishibi Eshttamoo7a yeliis. <sup>18</sup> Yihudaa biittaappe ekkido maccaasiyaa Gadoora aawaa Yereda, Sooko aawaa Hebeeranne Zaanooaha aawaa Yaqiiti7eela Meredayyo yelaasu. <sup>19</sup> Nahaama michchee, Hodiya a maccaasee naati Gaariman de7ida Qa7iila aawaanne Maa7ikan de7ida Eshttamoo7a aawaa.

<sup>20</sup> SHimoona naati Aminoona, Riinna, Benihanaananne Tiiloona.

Yishi7a naati Zoheetanne Benzsoheeta.

*SHeela Yeletaa*



<sup>21</sup> Yihudaa na7aa SHeela zareti Leeka aawaa Eera, Mareesha aawaa Laa7idanne Beeti-Ashibee7a kataman de7iya liinuwa giyo maayuwaa daddiyaageetu yarata. <sup>22</sup> Harati qassi Yoqiima, Yo7aasha, Yaashubiliheema, Moo7aaba biittaa haarida Saraafanne Kozeeba kataman de7ida asata. Ha yeletaa mazggafai beni wodeesappekka de7iyaagaa. <sup>23</sup> Hageeti Naxa7iimaaninne Gadeeran de7ida urqqaa medhdhiya asata. Eti kawuwaa oosuwaa oottanau aara issippe de7idosona.

### *Simoonaa Yeletaa*

<sup>24</sup> Simoonaa naati Nemu7eela, Yaamiina, Yaariiba, Zaraahanne SHaa7ula. <sup>25</sup> SHaa7ula na7ai SHaaluuma; SHaaluuma na7ai Mibssaama; Mibssaama na7ai Mishimaa7a; <sup>26</sup> Mishimaa7a na7ai Hammu7eela; Hammu7eela na7ai Zakkuura; Zakkuura na7ai SHim77a. <sup>27</sup> SHim77aayyo tammanne usuppun attuma naatinne usuppun macca naati de7oosona; shin a ishatuyyo cora naati de7okkona. Yihudaa zaretudan Simoonaa zareti corattibookkona.

<sup>28</sup> Simoonaa zareti Berssaabeha katamaaninne Molaada, Haxaari-SHu7aala, <sup>29</sup> Baala, Exeema, Tolaada, <sup>30</sup> Baatu7eela, Horima, Xiqilaaga, <sup>31</sup> Beeti-Markkaboota, Hoxaari-Susiima, Beetibiiranne SHaa7iraima katamatun de7idosona. Daawiti kawotana gakkanaassi hageeti eta katamata gididi de7idosona. <sup>32</sup> Qassi eta moottati Exaama, Aina, Rimmoonaa, Tokeenanne Ashaana. Eti muleera ichchashu katamata. <sup>33</sup> Baa7ilaata gakkanaashin, ha katamatu yuushuwan de7iya moottati ubbai etan gujettoosona. Hageeta eti de7ido sohota eti bantta yeletaa maaran mazggafan xaafidi oiqqidosona.

<sup>34</sup> Simoonaa yaratu halaqati hagaappe kaallidi xaafettidaageeta. Eti Mashobaaba, Yaamileeka, Amesiyaasa na7aa Yoosha, <sup>35</sup> Yuu7eelanne Yoshiibiyaa na7aa Yeeha. Yeehu aawaa aawai Asa7eela na7aa Saraaya. <sup>36</sup> Hara halaqati qassi Eliyoo7enaaya, Yaaqooba, Yashohaaya, Asaaya, Adii7eela, Yashimi7eela, Banaayanne <sup>37</sup> Ziiza. Ziizi SHif77a na7aa; SHif77i Alloona na7aa; Allooni Yadaaya na7aa; Yadaayi SHiimira na7aa; SHiimiri SHamaa7iyaa na7aa. <sup>38</sup> Simoonaa yaratu halaqati hageeta.

Eta aawatu zerettai keehippe corattiis. <sup>39</sup> Eti bantta mehiyaayyo heemmiyoosaa koyanau Gadoora geliyoosaa matan de7iya wombbaayyo arshsho baggaara de7iya sohota gakkanaassi biidosona. <sup>40</sup> Biidi issi keehippe araddida lo77o heemmiyo sohuwaa demmidosona; he biittai woppainne saroi kumido aaho biitta. Beni wode he biittan de7idaageeti Kaama zerettata. <sup>41</sup> Hagaappe qommo baggaara sunttai xaafettido Simoonaa zareti Yihudaa Kawuwaa Hizqqiyaasa wode Gadoora biitti biidi, yan de7iya Kaama zerettatanne Ma7uuna asata olidi xaissidosona. Xaissidi he biittan eta mehiyaayyo heemmiyo sohoi de7iyo gishshau, Simoonaa zareti hachchi gattanau yan uttidosona.

<sup>42</sup> Simoonaa zaretuppe ichchashu xeetu asati Se7iira Deriyaakko biidosona. Eta halaqati Palaaxiyaa, Na7aariyaa, Rafaayanne Uzzi7eela; eti Yishi7a naata. <sup>43</sup> Amaaleeqa asatuppe kase baqati attidaageeta Simoonaa asati xaissidosona. Eti hachchi gakkanaassi he biittan de7oosona.

## 5

### *Roobeela Yeletaa*

<sup>1</sup> Israa7eela na7aa bairaa Roobeela yeletai hagaappe kaallidi xaafettidaagaa. Roobeeli baira na7a; shin ba aawaa hiixaa i tunissido gishshau, bairatettau bessiyaabai Israa7eela na7aa Yooseefa naatuyyo imettiis. Hegaa gishshau, i yeletan baira gididoogee xaafettibeenna. <sup>2</sup> Yihudai ba ishantuppe minniis; a bairatettau Yooseefau imettidabaa gidikkokka, Israa7eela asaa haariyaagee Yihudaappe kiyiis. <sup>3</sup> Israa7eela na7aa bairaa Roobeela attuma naati Hanooka, Paala, Hexiroonanne Karmma.

<sup>4</sup> Yuu7eela na7ai SHamaa7iyaa; SHamaa7iyaa na7ai Googa; Googa na7ai SHim77a; <sup>5</sup> SHim77a na7ai Mikiyaasa; Mikiyaasa na7ai Ra7aaya; Ra7aaya na7ai Ba7aala.

<sup>6</sup> Ba7aala na7ai Asoore Kawoi Tigilaati-Paleseeri omooddidi efiido Ba7eera; Ba7eeri

Roobeela zaretu halaqaa. <sup>7</sup> Ba7eera dabboti, bantta yeletaa mazggafan xaafettida Roobeela yaratu halaqati Yi7i7eela, Zakkaariyaasanne <sup>8</sup> Belaa7a. Belaa7i Azaaza na7aa; Azaazi SHemaa7a na7aa; SHemaa7i Yuu7eela zare. Yuu7eela zareti Aaro7era kataman, Nabo biittaaaninne Ba7aali-Ma7oona biittan de7idosona.

<sup>9</sup> Roobeela zaretu mehee Gala7aaden corattido gishshau, eti yaappe arshsho baggi biidi, Efiraaxiisa SHaafaa gakkanaashin tanggaccida bazzuwan uttidosona. <sup>10</sup> Saa7oola laittan Aggaari yaratuura Roobeela yarati olettin, Roobeela yarati xoonidosona. Xoonidi Gala7aadeppe arshsho baggaara de7iya Aggaari yaratu biittan uttidosona.

### *Gaada Yeletaa*

<sup>11</sup> Gaada zareti Roobeela zaretuppe huuphessa baggan, Salaaka gakkanaashin de7iya Baasaane biittan uttidosona. <sup>12</sup> Yuu7eeli koiro yaratussi halaqa; SHafaami naa77antto yaratussi halaqa. Yaa7inaayinne SHafaaxi Baasaanen uttida yaratussi halaqata. <sup>13</sup> Eta dabboti, laappun yaratu halaqati, Mikaa7eela, Mashulaama, Saaba, Yoraaya, Yaa7ikaana, Zii7anne Ebeera. <sup>14</sup> Hageeti Abihaila naati Buuza zareta. Buuzi Yaahida yeliis; Yaahidoi Yeshishaaya yeliis; Yeshishaayi Mikaa7eela yeliis; Mikaa7eeli Gala7aada yeliis; Gala7aadee Yaaroooha yeliis; Yaarooohi Huura yeliis; Huuri Abihaila yeliis. <sup>15</sup> Eta aawatu so halaqai Guuna na7aa na7aa Abddi7eela na7aa Aaha. <sup>16</sup> Eti Gala7aadeeninne Baasaanen he biittatu katamatuuninne Saaroonna biittan mehee heemettiyo sohotun uttidosona. <sup>17</sup> Hageetu ubbaa yeletai Yihudaa Kawuwaa Yo7aataama wodenne Israa7eela Kawuwaa Iyorbbaama wode yeletaa mazggafan xaafettiis.

### *Yorddaanoosa SHaafaappe Arshsho Baggan Uttida Zaretu Olanchchata*

<sup>18</sup> Roobeela zaretuppe, Gaada zaretupenne Minaase zaretuppe baggatuppe olanchchati, wolqqaamati, gonnalliyaanne bisuwaa oiqqiyaageeti, wonddafiya duhan loohidaageetinne olaa salppiyaa eriyaageeti oitamanne oiddu sha7anne laappun xeetanne usuppun tamma. <sup>19</sup> Eti Aggaari yaratuura, Yixuratuura, Naafiishatuuranne Nodaabatuura olettidosona. <sup>20</sup> Eti he asatuura olettiiddi, Xoossaakko waassido gishshau, maaduwaa demmidosona. Eti Xoossan ammanettido gishshau, i etau woosettiis. Hegaa gishshau, Aggaari yaratanne etaara de7iya harati eta kushiyan gelidosona. <sup>21</sup> Bantta morkketuppe ishatamu sha7u gaameelata, naa77u xeetanne ishatamu sha7u dorssata, naa77u sha7u haretanne xeetu sha7u asata omooddidi efidosona. <sup>22</sup> Olai Xoossaagaa gidido gishshau, daroti haiqqidosona. Xoonidaageeti omooduwaa wodee gakkanaashinkka he asatu sohuwan uttidosona.

### *Yorddaanoosa SHaafaappe Arshsho Baggan Uttida Minaase Zareta*

<sup>23</sup> Minaase zaretuppe bagga yarati Baasaaneppe doommidi, Ba7aali-Hermmoone, Saniiranne Hermmoone Deriyaa gakkanaashin de7iya he biittatun uttidosona; eti he sohotun corattidosona. <sup>24</sup> Eta aawatu so halaqati Efeera, Yishi7a, Eli7eela, Aziri7eela, Ermmaasa, Hodaawiyaanne Yaahidi7eela. Hageeti eta aawaa keettan erettida, xalanne wolqqaama asata.

<sup>25</sup> SHin ha zareti bantta aawatu Xoossaa naaqqidosona; Xoossai eta sinttaappe xaassido he biittaa asatu xoossatuura shaaramuxidosona. <sup>26</sup> Hegaa gishshau, Israa7eela Xoossai Tigilaati-Paleseera woikko Puula giyo Asoore kawuwaa ayyaanaa denttettiis. Yaatidi Roobeela zareta, Gaada zaretanne Minaase zaretuppe baggata omooddidi, Halaaha, Habooranne Haara biittatanne Gozaana SHaafaa efiis. Eti hachchi gakkanaashin yan de7oosona.

## 6

### *Qeese Ubbatu Halaqatu Yeletaa*

<sup>1</sup> Leewa naati Gershshoona, Qahaatanne Maraara.

<sup>2</sup> Qahaata naati Amiraama, Yixihaara, Kebroonanne Uzzi7eela.

<sup>3</sup> Amiraama naati Aarona, Muusanne Miiriyaamo.

Aarona naati Nadaaba, Abiiha, El77aazaranne Itaamaara.

<sup>4</sup> El77aazari Piinihaasa yeliis; Piinihaasi Abishuu7a yeliis; Abishuu7i Buuqa yeliis;

<sup>5</sup> Buuqi Uzza yeliis; <sup>6</sup> Uzzi Zaraahiyaa yeliis; Zaraahee Maraayoota yeliis; <sup>7</sup> Maraayooti Amaariyaa yeliis; Amaaree Ahixuuba yeliis; <sup>8</sup> Ahixuubi Xaadooqa yeliis; Xaadooqi Ahima7aaxa yeliis; <sup>9</sup> Ahima7aaxi Azaariyaasa yeliis; Azaariyaasi Yohanaana yeliis; <sup>10</sup> Yohanaani Azaariyaasa yeliis. Solomoni Yerusalaamen keexissido Beeta Maqidasiyan oottida qeese Azaariyaasa. <sup>11</sup> Azaariyaasi Amaariyaa yeliis; Amaaree Ahixuuba yeliis; <sup>12</sup> Ahixuubi Xaadooqa yeliis; Xaadooqi SHaaluuma yeliis; <sup>13</sup> SHaaluumi Hilqqiyaa yeliis; Hilqqee Azaariyaasa yeliis; <sup>14</sup> Azaariyaasi Saraaya yeliis; Saraayi Yoxedeeqa yeliis. <sup>15</sup> GODAI Yihudaanne Yerusalaame Naabukadanaxooran omoodisido wode Yoxedeeqikka omoodettidi biis.

### *Leewa Zareta Haraata*

<sup>16</sup> Leewa naati Gershshoona, Qahaatanne Maraara. <sup>17</sup> Gershshoona naatu sunttai Liibinanne SHim77a. <sup>18</sup> Qahaata naati Amiraama, Yixihaara, Kebroonanne Uzzi7eela. <sup>19</sup> Maraara naati Maahilanne Musha. Bantta aawaa keettan keettan xaafettida Leewatu yarati hageeta.

<sup>20</sup> Gershshoona na7ai Liibina; Liibina na7ai Yahaata; Yahaata na7ai Ziimma. <sup>21</sup> Ziimma na7ai Yo7aaha; Yo7aaha na7ai Idda; Iddo na7ai Zaraaha; Zaraaha na7ai Ya7atiraaya.

<sup>22</sup> Qahaata na7ai Aminadaaba; Aminadaaba na7ai Qoraaha; Qoraaha na7ai Asiira; <sup>23</sup> Asiira na7ai Elqqaana; Elqqaana na7ai Ebiyaasaafa; Ebiyaasaafa na7ai Asiira; <sup>24</sup> Asiira na7ai Tahaata; Tahaata na7ai Uri7eela; Uri7eela na7ai Ooziyaana; Ooziyaana na7ai SHaa7ula.

<sup>25</sup> Elqqaana naati Amaasaayanne Ahimoota. <sup>26</sup> Ahimoota na7ai Elqqaana; Elqqaana na7ai Xofaaya; Xofaaya na7ai Nahaata; <sup>27</sup> Nahaata na7ai Eli7aaba; Eli7aaba na7ai Yirohaama; Yirohaama na7ai Elqqaana.

<sup>28</sup> Sameela na7ai bairai Yuu7eela; kaaloi Abiiya.

<sup>29</sup> Maraara na7ai Maahila; Maahila na7ai Liibina; Liibina na7ai SHim77a; SHim77a na7ai Uzza; <sup>30</sup> Uzza na7ai SHim77a; SHim77a na7ai Haggiiya; Haggiiya na7ai Asaaya.

### *Beeta Maqidasiyan Yexxiyaageeta*

<sup>31</sup> Daawiti Taabootaa Yerusalaame ehiidoogaappe guyyiyan, mazamuriyaa yexxanaadan GODAA keettan sunttidoogeeti hagaappe kaallidi xaafettidosona.

<sup>32</sup> Solomoni Yerusalaamen GODAA Beeta Maqidasiyaa keexxana gakkanaashin, GODAA Taabootai de7iyo Dunkkaaniyaa sinttan eti mazamuriyaa yexxiiddi, kayan kayan oottoosona. <sup>33</sup> Bantta naatuura issippe yexxidaageeti hagaappe kaallidi xaafettidaageeta.

Qahaata yaratuppe yexxiyaagee Hemaana. Hemaani Yuu7eela na7aa; Yuu7eeli Sameela na7aa; <sup>34</sup> Sameeli Elqqaana na7aa; Elqqaani Yirohaama na7aa; Yirohaami Eli7eela na7aa; Eli7eeli Tooha na7aa; <sup>35</sup> Toohi Xufa na7aa; Xufi Elqqaana na7aa; Elqqaani Mahaata na7aa; Mahaati Amaasaaya na7aa; <sup>36</sup> Amaasaayi Elqqaana na7aa; Elqqaani Yuu7eela na7aa; Yuu7eeli Azaariyaasa na7aa; Azaariyaasi Xafaaniyaa na7aa; <sup>37</sup> Xafaanee Tahaata na7aa; Tahaati Asiira na7aa; Asiiri Ebiyaasaafa na7aa; Ebiyaasaafi Qoraaha na7aa; <sup>38</sup> Qoraahi Yixihaara na7aa; Yixihaari Qahaata na7aa; Qahaati Leewa na7aa; Leewi Israa7eela na7aa.

<sup>39</sup> A dabboi Asaafi a ushachcha baggaara eqqees. Asaafi Berekiyaa na7aa; Berekee SHim77a na7aa; <sup>40</sup> SHim77i Mikaa7eela na7aa; Mikaa7eeli Ba7iseeya na7aa; Ba7iseeyi Malkkiyaa na7aa; <sup>41</sup> Malkkee Etaana na7aa; Etaani Zaraaha na7aa; Zaraahi

Adaaya na7aa; <sup>42</sup> Adaayi Etaana na7aa; Etaani Ziimma na7aa; Ziimmi SHim77a na7aa; <sup>43</sup> SHim77i Yahaata na7aa; Yahaati Gershshoona na7aa; Gershshooni Leewa na7aa.

<sup>44</sup> Eta haddirssa baggaara eta dabboti, Maraara yarati eqqoosona. Etaani Qiisha na7aa; Qiishi Abdda na7aa; Abddi Malluuka na7aa; <sup>45</sup> Malluuki Hashaabiyaa na7aa; Hashaabee Amesiyaasa na7aa; Amesiyaasi Hilqqiyaa na7aa; <sup>46</sup> Hilqqee Amoxa na7aa; Amoxi Baana na7aa; Baani SHemeera na7aa; <sup>47</sup> SHemeeri Maahila na7aa; Maahili Musha na7aa; Mushi Maraara na7aa; Maraari Leewa na7aa. <sup>48</sup> Eta dabboti Leewati Xoossaa Dunkkaaniyaayyo oottanau sunttettidosona.

### *Aaroonaa Yeletaa*

<sup>49</sup> SHin Aarooninne Aaroonaa zerettati ixaanaa cuwayoosona; yarshshiyooosan xuggiyo yarshshuwaakka yarshshoosona. Xoossaa ashkkarai Muusee azazidoogaadan, Ubbaappe Aadhdhiya Geeshsha Sohuwan goinniyo goino ubbaayyonne Xoossai Israa7eela nagaraa atto giyo yarshshuwaayyo aawatetta etayyo de7ees.

<sup>50</sup> Aaroonaa yeletai hagaappe kaallidi xaafettidaagaa. Aaroonaa na7ai El77aazara; El77aazara na7ai Piinihaasa; Piinihaasa na7ai Abishuu7a; <sup>51</sup> Abishuu7a na7ai Buuqa; Buuqa na7ai Uzza; Uzza na7ai Zaraahiyaa. <sup>52</sup> Zaraahiyaa na7ai Maraayoota; Maraayoota na7ai Amaariyaa; Amaariyaa na7ai Ahixuuba; <sup>53</sup> Ahixuuba na7ai Xaadooqa; Xaadooqa na7ai Ahima7aaxa.

### *Leewa Yarati De7ido Sohota*

<sup>54</sup> Aaroonaa zaretu bantta zawaa gidдон de7anau eta utettaadan etayyo imettida sohota hagaappe kaallidi xaafettidaageeta.

Qahaata yarati koiro saamaa ekkidosona. <sup>55</sup> He saaman Yihudan de7iya Kebroona katamaanne Kebroona yuushuwan de7iya hentta gadeta etayyo immidosona; <sup>56</sup> shin katamaa goshshaanne katamaa yuushuwan de7iya moottata Yifune na7aa Kaaleebayyo immidosona. <sup>57</sup> Aaroonaa naatuyyo asai baqati biidi attiyo katamata, Kebroona, Yattira, Liibinanne eta hentta gadeta Eshttamoo7anne a hentta gadeta, <sup>58</sup> Hiilenanne a hentta gadeta, Dabiiranne a hentta gadeta, <sup>59</sup> Ashaananne a hentta gadetanne Beeti-SHemeshanne a hentta gadeta immidosona. <sup>60</sup> Qassi Biniyaama zaretuppe Gebaa7anne a hentta gadeta, Alemeetanne a hentta gadetanne Anatootanne a hentta gadeta immidosona. Aaroonaa naatuyyo imettida katamati muleera tammanne heezza. <sup>61</sup> Minaase yaratu baggatu biittaappe tammu katamata attida Qahaata yaratuuyyo saaman immidosona.

<sup>62</sup> Yisaakoora zaretu biittaappe, Aseera zaretu biittaappe, Nifttaaleema zaretu biittaappenne Baasaanen de7iya Minaase yaratu biittaappe tammanne heezzu katamata Gershshoona yaratuuyyo saaman immidosona.

<sup>63</sup> Roobeela zaretu biittaappe, Gaada zaretu biittaappenne Zaabiloona zaretu biittaappe tammanne naa77u katamata Maraara yaratuuyyo saaman immidosona.

<sup>64</sup> Hegaadan oottidi, Israa7eela asai Leewatuyyo ha katamatanne katamatu heeran de7iya hentta gadeta immiis. <sup>65</sup> Qassi Yihudaa zaretu biittaappe, Simoonaa zaretu biittaappenne Biniyaama zaretu biittaappe, hagaappe qommo baggaara bantta sunttan xaafettida katamata etayyo saaman immiis.

<sup>66</sup> Qahaata yaratuuyyo amaridaageeti bantta katamata Efireema zaretu katamatuppe ekkidosona. <sup>67</sup> Etayyo asai baqati biidi attiyo katamata, Efireema gezziyan de7iya Sekeemanne a hentta gadeta, Gezeeranne a hentta gadeta, <sup>68</sup> Yoqima7aamanne a hentta gadeta, Beeti-Horoonanne a hentta gadeta, <sup>69</sup> Ayyaaloona a hentta gadetanne Gaate-Rimmoonanne a hentta gadeta immidosona. <sup>70</sup> Minaase zaretu baggatuppe Aneeranne a hentta gadetanne Bil77aamanne a hentta gadeta ekkidi, Qahaata yaratuuyyo attidaageetuyyo immidosona.

<sup>71</sup> Minaase zaretu baggatuppe Baasaanen de7iya Golaananne a hentta gadetanne Asttaarootanne a hentta gadeta ekkidi, Gershshoona yaratuuyyo immidosona. <sup>72</sup> Qassi

Yisaakooraa zaretuppe Qaadeesanne a hentta gadeta, Dabiraatanne a hentta gadeta, <sup>73</sup> Raamootanne a hentta gadetanne Aaneemanne a hentta gadeta ekkidi, etayyo immidosona. <sup>74</sup> Qassikka Aseera zaretuppe Maashaalanne a hentta gadeta, Abddoonanne a hentta gadeta, <sup>75</sup> Huqooqanne a hentta gadetanne Rahoobanne a hentta gadeta ekkidi, etayyo immidosona. <sup>76</sup> Hegaadankka Nifttaaleema zaretuppe Galiilan de7iya Qedeeshanne a hentta gadeta, Hammoonanne a hentta gadetanne Qiriyaataimanne a hentta gadeta ekkidi, etayyo immidosona.

<sup>77</sup> Attida Maraara yaratuuyyo Zaabiloona zaretuppe Rimmoonanne a hentta gadetanne Taaboornanne a hentta gadeta ekkidi immidosona. <sup>78</sup> Qassi Roobeela zaretuppe Yarkko ginan, Yorddaanoosappe hefinttan arggo baggaara, xoqqa dembban de7iya Beexeranne a hentta gadeta, Yaahixanne a hentta gadeta, <sup>79</sup> Qidemootanne a hentta gadetanne Mefa7aatanne a hentta gadeta ekkidi, etayyo immidosona. <sup>80</sup> Qassikka Gaada zaretuppe Gala7aaden de7iya Raamootanne a hentta gadeta, Maahinaimanne a hentta gadeta, <sup>81</sup> Haseboornanne a hentta gadetanne Yaa7izeeranne a hentta gadeta ekkidi etayyo immidosona.

## 7

### *Yisaakooraa Yeletaa*

<sup>1</sup> Yisaakoorayyo oiddu naati de7oosona; etikka Tolaa7a, Puuwa, Yaashuubanne SHimiroona.

<sup>2</sup> Tolaa7a naati Uzza, Rafaaya, Yirii7eela, Yaahimaaya, Yibisaamanne SHalumi7eela; eti Tolaa7a yaratu halaqata. Eti wolqqaamanne xala asata. Daawita wode eta qoodai laatamanne naa77u sha7anne usuppun xeeta.

<sup>3</sup> Uzza na7ai Yiziraahiyaa. Yiziraahiyaa naati Mikaa7eela, Obaadiyaa, Yuu7eelanne Yishiyaa; ha ichchashatikka so asaa halaqata. <sup>4</sup> Bantta aawatu so asaa yeletaadan Uzza yaratu olau giigida olanchchati hasttamanne usuppun sha7a; aissi giikko, etayyo cora maccaasainne cora naati de7oosona.

<sup>5</sup> Yisaakooraa zaretuppe olanchchati bantta yeletaa mazggafan qoodettidi, muleera hosppun tammanne laappun sha7a gididosona.

### *Biniyaamanne Daana Yeletaa*

<sup>6</sup> Biniyaamayyo heezzu naati de7oosona; etikka Belaa7a, Bekeeranne Yidi7eela.

<sup>7</sup> Belaa7a naati Exiboona, Uzza, Uzzi7eela, Yaarimootanne Ira; ha ichchashatikka so asaa halaqata. Eti wolqqaamanne xala asata. Bantta yeletaadan qoodettida olanchchati laatamanne naa77u sha7anne hasttamanne oiddaa gididosona.

<sup>8</sup> Bekeera naati Zamiira, Yo7aasha, El77eezara, Eliyoo7enaaya, Omira, Yaarimoota, Abiiya, Anatootanne Alemeeta; hageeti ubbati Bekeera naata. <sup>9</sup> Bantta yeletaa mazggafaadan qoodettida wolqqaamanne xala asati laatamu sha7anne naa77u xeeta gididosona.

<sup>10</sup> Yidi7eela na7ai Bilihaana. Bilihaana naati Yi7uusha, Biniyaama, Ehuuda, Kanaa7ina, Zetaana, Tarsseesanne Ahishahaara; <sup>11</sup> hageeti ubbati Yidi7eela naata. Eti so asaa halaqatanne wolqqaamanne xala asata. Bantta yeletaadan qoodettida olanchchati tammanne laappun sha7anne naa77u xeeta.

<sup>12</sup> Qassi SHufiiminne Hufiimi Ira naata. Hushiimi Daana na7aa.

### *Nifttaaleema Yeletaa*

<sup>13</sup> Nifttaaleema naati Yaahixi7eela, Guuna, Yexeeranne SHaaluuma; hageeti Baali naatu naata.

### *Minaase Yeletaa*

<sup>14</sup> Minaase zreti hagaappe kaallidi xaafettidaageeta. Minaasee Sooriyaa biittaappe ekkido kaadumatiyaa yelido attuma naati Asiri7eelanne Gala7aade aawaa Maakiira.

<sup>15</sup> Maakiiri Hufimassinne SHufimassi issi issi maccaasa oichchidi immiis. Maakiira



michchee sunttai Maa7iko. Maakiira na7ai kaaloi Xalofihaada. Xalofihaadi macca naatu xalaalaa yeliis.

<sup>16</sup> Maakiira maccaasiyaa Maa7ika ayyo naata yelaasu. Baira na7aa Peresha sunttaasu; Peresha ishaa sunttai SHereesha. Peresha naati Ulaamane Rageema. <sup>17</sup> Ulaama na7ai Badaana. Hageeti Minaase na7aa na7aa, Maakiira na7aa Gala7aade zareta.

<sup>18</sup> Gala7aade michchiyaa Hamolekeeta Ishooda, Abi7eezeranne Maahila yelaasu.

<sup>19</sup> SHamidaa7a naati Ahiyaana, SHekeema, Liiqihanne Ani7aama.

### *Efireema Yeletaa*

<sup>20</sup> Efireema na7ai SHutelaaha; SHutelaaha na7ai Bereeda; Bereeda na7ai Tahaata; Tahaata na7ai El77aada; El77aada na7ai Tahaata; <sup>21</sup> Tahaata na7ai Zabaada; Zabaada na7ai SHutelaaha.

Efireemayyo Edeeranne El77aada geetettiya hara naa77u naati de7oosona. Eti Gaate katamaa asatu mehiyaa wuuqqishin, asai eta oiqqidi woriis. <sup>22</sup> Hegaa gishshau, eta aawai Efireemi daro wodiya azzaniis; azzanin a ishantti a minttettanau yiidosona.

<sup>23</sup> Hegaappe guyyiyan, i ba keettaayeera gaittiis; gaittin a shahaarada attuma na7aa yelaasu. Efireema soo gakkida iita metuwaa gishshau, i ba na7aa Bari7a sunttiis.

<sup>24</sup> Efireemayyo SHe7ihiro giyo na7iyaa de7ausu; Hirkki Beeti-Horoon, Qommo Beeti-Horoonanne Uzenishe7iira geetettiya katamata he na7iyaa keexxaasu.

<sup>25</sup> Efireema attuma na7ai Refaaha; Refaaha na7ai Resheefa; Resheefa na7ai Telaaha; Telaaha na7ai Tahaana; <sup>26</sup> Tahaana na7ai La7idaana; La7idaana na7ai Amihuuda; Amihuuda na7ai Elishamaa7a; <sup>27</sup> Elishamaa7a na7ai Nawa; Nawe na7ai Yaasa.

<sup>28</sup> Efireema zaretu biittanne eti de7iyosai Beeteelenne Beetele moottata, arshsho baggaara de7iya Na7iraana, arggo baggaara de7iya Gezeeranne Gezeera moottata, SHekeemanne SHekeema moottanne Aayanne Aaya moottata. <sup>29</sup> Qassi Minaase zaretu biittaa zawan de7iya Beetishaananne Beetishaana moottata, Taa7inaakanne Taa7inaaka moottata, Magiddonne Magiddo moottanne Dooranne Doora moottata. Israa7eela na7aa Yooseefa zareti ha katamatun de7idosona.

### *Aseera Yeletaa*

<sup>30</sup> Aseera attuma naati Yimina, Yishiwaaha, Yishiwanne Bari7a; eta michchiyaa Seraaho.

<sup>31</sup> Bari7a attuma naati Hebeeranne Birzzaawita aawaa Malkki7eela.

<sup>32</sup> Hebeeri Yaafileexa, SHomeeranne Hotaama yeliis; eta michchee sunttai SHuu7o.

<sup>33</sup> Yaafileexa attuma naati Paasaaka, Bimihaalanne Ashiwaata; hageeti Yaafileexa naata.

<sup>34</sup> Yaafileexa ishaa SHomeera attuma naati Aaha, Rohiga, Yahuubanne Araama.

<sup>35</sup> A ishaa Hotaama attuma naati Xofaaha, Yiminaa7a, SHeleeshanne Amaala.

<sup>36</sup> Xofaaha attuma naati Suha, Harnneefera, SHu7aala, Beera, Yimira, <sup>37</sup> Beexera, Hooda, SHamma, SHilshsha, Yitiraananne Ba7eera.

<sup>38</sup> Yetera attuma naati Yifuna, Pisppanne Aara. <sup>39</sup> Ulla attuma naati Araaha, Hani7eelanne Riixiyaa.

<sup>40</sup> Hageeti ubbati Aseera zareta. Eti bantta aawatu so asaa halagatanne doorettida wolqqaamanne xala asata. Bantta yeletaadan goodettida olanchchati laatamanne usuppun sha7aa gididosona.

## 8

### *Biniyaama Yeletaa*

<sup>1</sup> Biniyaama na7ai bairai Belaa7a; kaaloi Ashibeela; heezanttoi Ahiraaha; <sup>2</sup> oiddanttoi Noha; ichchashanttoi Raafa.

<sup>3</sup> Belaa7a attuma naati Adaara, Geera, Abihuuda, <sup>4</sup> Abishuu7a, Naa7imaana, Ahooha,

<sup>5</sup> Geera, SHafufaamanne Huraama.

<sup>6-7</sup> Ehuuda attuma naati Naa7imaana, Akiyyanne Geera. Eti Gebaa7an de7ida bantta aawatu so asaa halaqata. Hegaappe guyyiyan, eti Manahaata biitti omoodetti biidosona. Eta halaqai Geeri Uzzanne Ahihuuda aawaa.

<sup>8</sup> SHaharaami ba maccaasata Hushiimonne Baa7iro yeddidoogaappe guyyiyan, Moo7aaba biittan attuma naata yeliis. <sup>9</sup> SHaharaami ba maccaasee Hodeeshin Yobaaba, Xiibiyaa, Meesha, Malkkaama, <sup>10</sup> Ya7uuxa, Saakiyaanne Mirmma yeliis. A naati ubbai so asaa halaqata gididosona. <sup>11</sup> I ba maccaasee Hushiimin, Ahixuubanne Elppa7aala yeliis.

<sup>12</sup> Elppa7aala attuma naati Ebeera, Misha7aamanne SHemeda. SHemedi Oonanne Looda katamatanne eta heeran de7iya moottata keexxiis.

<sup>13</sup> Qassi SHaharaami Bari7anne SHemaa7a yeliis. Eti Ayyaaloona kataman de7iya bantta so asaa halaqata. Eti Gaate kataman de7iya asaa yedettidosona. <sup>14</sup> Qassikka SHaharaami Ahiiyya, SHAashaqa, Yiremoota yeliis.

<sup>15</sup> Zabaadee, Araadi, Edeeri, <sup>16</sup> Mikaa7eeli, Yishppinne Yoohi Bari7a attuma naata.

<sup>17</sup> Zabaadee, Mashulaami, Hizqqi, Hebeeri, <sup>18</sup> Yishimaraayi, Yuzilii7inne Yobaabi Elppa7aala attuma naata.

<sup>19</sup> Yaaqiimi, Ziikiri, Zabddi, <sup>20</sup> Eli7enaayi, Xilttaayi, Eli7eeli, <sup>21</sup> Adaayi, Baraayinne SHiimiraati SHim77a attuma naata.

<sup>22</sup> Yishphphaani, Ebeeri, Eli7eeli, <sup>23</sup> Abddooni, Ziikiri, Hanaani, <sup>24</sup> Hanaanee, Elaami, Anttootee, <sup>25</sup> Yifidaayinne Panu7eeli SHAashaqa attuma naata.

<sup>26</sup> SHAamisharaayi, SHahaaree, Ataalee, <sup>27</sup> Yaa7ireeshee, Eelaasinne Ziikiri Yirohaama attuma naata.

<sup>28</sup> Hageeti bantta yeletan Yerusalaamen uttida bantta so asaa halaqata.

### *Kawuwaa Saa7oola Yeletaa (Hanidabaa Odiya Koiro Maxaafaa 9:35-44)*

<sup>29</sup> Gabaa7oona aawai Yi7i7eeli Gabaa7oona kataman de7iis. A keettaayee sunttai Maa7iko. <sup>30</sup> A na7ai bairai Abddoona; a attuma naati harati Xuura, Qiisa, Ba7aala, Nadaaba, <sup>31</sup> Gadoora, Ahiiyya, Zekeranne <sup>32</sup> Miqiloota. Miqilooti SHim77a yeliis. Hageeti qassi Yerusalaamen de7iya bantta dabbotu matan de7idosona.

<sup>33</sup> Neeri Qiisa yeliis; Qiisi Saa7oola yeliis. Saa7ooli Yonaataana, Malkkishuu7a, Abinadaabanne Eshiba7aala yeliis. <sup>34</sup> Yonaataana na7ai Mariiba7aala;<sup>4</sup> Mariiba7aali Mikiyaasa yeliis.

<sup>35</sup> Mikiyaasa attuma naati Pittoona, Meleka, Taree7anne Akaaza. <sup>36</sup> Akaazi Yaho7aada yeliis. Yaho7aadi Alemeeta, Azimaaweetanne Zimira yeliis. Zimiri Moxa yeliis; <sup>37</sup> Moxi Biini7a yeliis; Biini7i Raafa yeliis; Raafi El77aasa yeliis; El77aasi Axeela yeliis.

<sup>38</sup> Axeelayyo usuppun attuma naati de7oosona. Eta sunttai Aziriqaama, Bookera, Isimaa7eela, SHa7aariyaa, Obaadiyaanne Hanaana; hageeti ubbai Axeela naata.

<sup>39</sup> Axeela ishaa Esheeqayyo heezzu naati de7oosona. A na7ai bairai Ulaama; kaaloi Yi7uusha; heezzanttoi Elifeleexa.

<sup>40</sup> Ulaama naati wolqqaamanne xala asata; eti wonddafiyaasata. Ulaamayyo xee-tanne ishatamaa gidiya naatinne naatu naati de7oosona.

Hageeti ubbati Biniyaama zareta.

## 9

### *Omooduwaappe Simmida Israa7eela Asaa*

<sup>1</sup> Israa7eela asai ubbai ba yeletan yeletan xaafettiis; ha taarikee Israa7eela Kawotu Maxaafan de7ees.

<sup>4</sup> 8:34 Mariiba7aala: I qassi Mafibosheeta geetettiis. Sameela Maxaafaa Naa77anttuwaa 4:4 xeella.

Yihudaa asai ammanettibeenna gishshau, Baabiloone biitti omoodetti biidosona. <sup>2</sup> Koiro simmida Israa7eela asai, qeeseti, Leewatinne Beeta Maqidasiyan oottiyaageeti bantta sohoutuuninne bantta katamatun uttidosona. <sup>3</sup> Yihudaa zaretuppe, Biniyaama zaretuppe, Efireema zaretuppenne Minaase zaretuppe amaridaageeti Yerusalaamen de7idosona.

### *Yihudaa Yarata*

<sup>4</sup> Yihudaa na7aa Paareesa yaratuppe Utaayi Yerusalaamen uttidaageetu halaqaa. Utaayi Amihuuda na7aa; Amihuudi Omira na7aa; Omiri Imira na7aa; Imiri Baana na7aa.

<sup>5</sup> Yihudaa na7aa SHeela yaratuppe Asaayinne a naati Yerusalaamen uttidaageetu halaqata.

<sup>6</sup> Yihudaa na7aa Zaraaha yaratuppe Yi7u7eeli Yerusalaamen uttidaageetu halaqaa. Yihudaa zreti qoodin muleera usuppun xeetanne uddufun tamma.

### *Biniyaama Yarata*

<sup>7-9</sup> Biniyaama yaratu halaqati hagaappe kaallidi xaafettidosona.

Halaqai Saalu Mashulaama na7aa; Mashulaami Hodaawiyaa na7aa; Hodaawee Hassanuu7a na7aa.

Halaqai Yibinaayi Yirohaama na7aa.

Halaqai Eeli Uzza na7aa; Uzzi Miikira na7aa.

Halaqai Mashulaami SHafaaxiyaa na7aa; SHafaaxee Ra7u7eela na7aa; Ra7u7eeli Yibiniyaa na7aa.

Biniyaama zreti qoodin muleera uddufun xeetanne ishatamanne usuppuna.

### *Yerusalaamen De7ida Qeeseta*

<sup>10</sup> Yerusalaamen de7ida qeeseti hagaappe kaallidi xaafettidaageeta.

Eti Yadaaya, Yihoyaariba, Yaakiinanne <sup>11</sup> Xoossaa Beeta Maqidasiyan halaqatiya Azaariyaasa. Azaariyaasi Hilqqiyaa na7aa; Hilqqee Mashulaama na7aa; Mashulaami Xaadooqa na7aa; Xaadooqi Maraayoota na7aa; Maraayooti Ahixuuba na7aa.

<sup>12</sup> Harati qassi Yirohaama na7aa Adaayanne Adii7eela na7aa Ma7isaaya. Yirohaami Paashihuura na7aa; Paashihuuri Malkkiyaa na7aa. Adii7eeli Yaahizeera na7aa; Yaahizeeri Mashulaama na7aa; Mashulaami Mashilemiita na7aa; Mashilemiiti Imeera na7aa.

<sup>13</sup> Bantta so asaassi halaqatiya qeeseti issi sha7anne laappun xeetanne usuppun tamma. Hageeti Xoossaa Beeta Maqidasiyan oottanau danddayiya asata.

### *Yerusalaamen De7ida Leewata*

<sup>14</sup> Yerusalaamen de7ida Leewati hagaappe kaallidi xaafettidaageeta.

Hashshuuba na7ai SHamaa7ee Maraara yara. Hashshuubi Aziriqaama na7aa; Aziriqaami Hashaabiyaa na7aa.

<sup>15</sup> Harati qassi Baqibaqaara, Hereesha, Galaalanne Mataaniyaa. Mataanee Miika na7aa; Miiki Ziikira na7aa; Ziikiri Asaafa na7aa.

<sup>16</sup> Harati qassi Naxoofa asatu moottatun uttida Obaadiyaanne Berekiyaa. Obaadee SHamaa7iyaa na7aa; SHamaa7ee Galaala na7aa; Galaali Yidutuuna na7aa. Berekee Asa na7aa; Asi Elqqaana na7aa.

### *Yerusalaamen Penggiyaa Naagiyaageeta*

<sup>17</sup> Beeta Maqidasiyaa penggiyaa naagiyaageeti SHaaluuma, Aqquuba, Xalmmoona, Ahimaananne eta dabbota. SHaaluumi eta halaqaa. <sup>18</sup> Ha yarati kase arggo baggaara de7iya, Kawo Penggiyaa giyo penggiyaa naagidosona. Hegaappe kase eti Leewati dunkkaaniyo wode, eta dunkkaaneta naagidosona.

<sup>19</sup> SHaaluumi Ebiyaasaafa na7aa Qore na7aa; i Qoraaha yara asa. Qoraaha yarati kase GODAA Dunkkaaniyaa naagidoogaadan, SHaaluuminne Qoraaha yara gidiya a dabboti Beeta Maqidasiyaa geliyo penggiyaa naagoosona.

<sup>20</sup> El77aazara na7ai Piinihaasi beni wode Qoraaha yartu halaqaa; GODAI aara de7iis.

<sup>21</sup> Mashelemiyaa na7ai Zakkaariyaasi Dunkkaaniyaa geliyo penggiyaa naagiis.

<sup>22</sup> Penggiyaa naaganau doorettidaageeti muleera naa77u xeetanne tammanne naa77a; hageeti bantta moottan moottan qoodettidi xaafettidosona. Eta yaratuyyo ha aawatettaa immidaageeti Kawuwaa Daawitanne hananabaa yootiya Sameela. <sup>23</sup> Hegaa gishshau, etinne eta naati Beeta Maqidasiyaa geliyo penggiyaa naagoosona. <sup>24</sup> Oiddu zozetun arggon, arshshon, huuphessaaninne tohossan issi issi penggee de7ees; he penggeta naagiyaageetikka de7oosona. <sup>25</sup> He moottan de7iya eta dabboti laappuntta laappuntta gallassan laametti naagidi, eta maaddoosona.

<sup>26</sup> Penggiyaa naagiya oiddu halaqati Leewata; eti Xoossaa Beeta Maqidasiyaayyo, a giddu kifiletuyyoonne kifiletu gidдон de7iya miishshatuyyo aawatoosona. <sup>27</sup> Xoossaa Beeta Maqidasiyaa naagiyaageetinne qassi maallado maallado kariyaa dooyiyaageeti eta gidiyo gishshau, yan aqoosona.

### *Hara Leewata*

<sup>28</sup> Leewatuppe amaridaageeti goinniyo wode go7ettiyo miishshatuyyo aawatoosona; he miishshata kare kessiyo wodenne soo gelissiyo wode eti qoodoosona. <sup>29</sup> Qassi etappe issooti issooti Beeta Maqidasiyaa gidдон go7ettiyo hara miishshatuyyo, liiqo xiilliyaayyo, woine eessaayyo, zaitiyaayyo, ixaanaayyoonne sawotuyyo aawatoosona. <sup>30</sup> SHin qeesetu naatuppe issooti issooti sawuwaa likki likkidi walakkoosona.

<sup>31</sup> Qoraaha yaratuppe SHaaluuma baira na7ai Matiitee yarshshuwaa oittaa uukkiy-oogau aawatees. <sup>32</sup> Qahaata yara gidiya eta dabbotuppe amaridaageeti qassi Sambbatan Sambbatan xaraphpheezan wottiyo oittaa giigissiyo aawatettaa oiqqoosona.

<sup>33</sup> Leewatu zaretuppe amarida halaqati Beeta Maqidasiyan yexxiyaageeta. Qam-mikka gallassikka eti oottiyo gishshau, hara ooso ootennan, Beeta Maqidasiyaa dirssaa gidдон de7iya keettatun de7oosona.

<sup>34</sup> Leewa zaretu so asaa halaqati ubbai hagaappe qommoora xaafettidaageeta; eti Yerusalaamen de7idosona.

### *Kawuwaa Saa7oola Yeletaa*

*(Hanidabaa Odiya Koiro Maxaafaa 8:29-38)*

<sup>35</sup> Gabaa7oona aawai Yi7i7eeli Gabaa7oona kataman de7iis. A keettaayee sunntai Maa7iko. <sup>36</sup> A na7ai bairai Abddoona; a naati harati Xuura, Qiisa, Ba7aala, Neera, Nadaaba, <sup>37</sup> Gadoora, Ahiyya, Zekeranne Miqiloota. <sup>38</sup> Miqilooti SHim77a yeliis. Hageeti qassi Yerusalaamen de7iya bantta dabbotu matan de7idosona.

<sup>39</sup> Neeri Qiisa yeliis; Qiisi Saa7oola yeliis. Saa7ooli Yonaataana, Malkkishuu7a, Abinadaabanne Eshiba7aala yeliis. <sup>40</sup> Yonaataana na7ai Mariiba7aala;<sup>5</sup> Mariiba7aali Mikiyaasa yeliis.

<sup>41</sup> Mikiyaasa naati Pittoona, Meleka, Taree7anne Akaaza. <sup>42</sup> Akaazi Yaa7iira yeliis. Yaa7iiri Alemeeta, Azimaaweeanne Zimira yeliis. Zimiri Mooxa yeliis; <sup>43</sup> Mooxi Biini7a yeliis; Biini7i Rafaaya yeliis; Rafaayi El77aasa yeliis; El77aasi Axeela yeliis.

<sup>44</sup> Axeelayyo usuppun attuma naati de7oosona. Eta sunntai Aziriqaama, Bookera, Isimaa7eela, SHa7aariyaa, Obaadiyaanne Hanaana; hageeti ubbai Axeela naata.

## 10

### *Kawuwaa Saa7oola Haiquwaa*

*(Sameela Maxaafaa Koiruwa 31:1-13)*

<sup>5</sup> 9:40 Mariiba7aala: I qassi Mafibosheeta geetettiis. Sameela Maxaafaa Naa77anttuwaa 4:4 xeella.

<sup>1</sup> Pilisxxeema asati Israa7eela asatuura olettidosona. Israa7eela asati Pilisxxeema asatu sinttappe baqatidosona. Daro Israa7eelati Gilbboo7a Deriyan haiqqidosona. <sup>2</sup> Pilisxxeema asati Saa7oolanne a attuma naata yedetti gakkidi, Saa7oola naata Yonaataana, Abinadaabanne Malkkishuu7a woridosona. <sup>3</sup> Olai Saa7oola yuuyi aadhdhidi un77ettiis; wondafiyaasati Saa7oola demmido wode, zubbayan a caddidi masunxxisidosona.

<sup>4</sup> Masunxxissin Saa7ooli ba ola miishshaa tookkiyaagaa, “Ha qaxxarettibeenna Pilisxxeemati yiidi, ta bolli kaa7ennaadan, ne bisuwan caddada, tana neeni wora” yaagiis.

SHin a ola miishshaa tookkiyaagee keehippe yayyido gishshau ixxiis; ixxin Saa7ooli ba bisuwaa sa7an essidi, a bolli kunddiis. <sup>5</sup> A ola miishshaa tookkiyaagee Saa7ooli haiqqidoogaa be7idi, ikka ba bisuwaa sa7an essidi, a bolli kunddidi, haiqqi aggiis. <sup>6</sup> Hagaadan hanidi, Saa7ooli, a naati heezzainne a so asai ubbai he gallassi issippe haiqqidosona. <sup>7</sup> Wombban de7iya Israa7eela asati ubbai bantta olanchchati baqatidoogaanne Saa7oolinne a naati haiqqidoogaa be7idi, etikka bantta katamata aggidi baqatidosona. Baqatin Pilisxxeema asati yiidi, he katamatun de7idosona.

<sup>8</sup> Wonttetta gallassi Pilisxxeemati ahatu bollaappe ola miishshata qaari ekkanau yiidi, Saa7oolinne a naati Gilbboo7a Deriyan haiqqidi, zin77idaageeta demmidosona.

<sup>9</sup> Demmidi eti Saa7oola qooriyaa muucidosonanne a ola miishshaa qaari ekkidosona. Yaatidi bantta eeqatu keettaaninne bantta asaa gidдон xoonuwaa awaajjana mala, Pilisxxeema biittau ubbau asaa kiitaa yeddidosona. <sup>10</sup> Eti Saa7oola ola miishshaa bantta xoossatu keettatuppe issuwan wottidosona; a guuggiyaakka bantta xoossaa Daagoona Eeqa Keettan kaqqidosona.

<sup>11</sup> Pilisxxeema asati Saa7oola oottidobaa ubbaa Gala7aaden de7iya Yaabeesha katamaa asati siyido wode, <sup>12</sup> eta mino asati ubbai biidi, Saa7oola ahaanne a naatu ahaa ekkidi, Yaabeesha katamaa ehiidosona. Ehiidi Yaabeeshan de7iya wolaa garssan eta meqettaa moogidosona; yaatidi laappun gallassaa xoomidosona.

<sup>13-14</sup> Saa7ooli GODAASSI ammanettibeenna gishshau haiqqiis. GODAA qaalaa i naagibeenna; GODAARA zorettiyoogaa aggidi, moitilliyaa xeesiya asaara zorettiis. Hegaa gishshau, GODAI a woridi, a kawotettaa Isseye na7aa Daawitayyo aattidi immiis.

## 11

### *Daawiti Israa7eelaaninne Yihudan Kawotiis (Sameela Maxaafaa Naa77anttuwaa 5:1-10)*

<sup>1</sup> Hegaappe guyyiyan, Israa7eela asai ubbai issippe Kebroonan de7iya Daawitakko shiiqidi, “Nuuni ne suuttanne ne asho. <sup>2</sup> Kase Saa7ooli kawo gididi de7iyo wodekka, Israa7eela asaa olau kaalettida nena. GODAI ne Xoossai nena, ‘Ta asaa Israa7eela neeni heemmana; eta bollika neeni kawotana’ yaagiis” yaagiis. <sup>3</sup> Hegaa gishshau, Israa7eela cimati ubbai Kawuwaa Daawitakko Kebroona katamaa yiidosona; i etaara Kebroonan GODAA sinttan maachchaa maacettiis. GODAI Sameela baggaara haasayido qaalaadan, Daawiti Israa7eela bolli kawotanaadan eti a tiyidosona.

<sup>4</sup> Daawitinne Israa7eela asai ubbai Yerusalaame katamaa biidosona. He wode Yaabuusa asati he sohuwan de7iyo gishshau, he katamai Yaabuusa geetettes. <sup>5</sup> Yaabuusa asati Daawita, “Neeni ha katamaa gelanau mulekka danddayakka” yaagidosona. Gidikkonne, Daawiti Xiyoonen de7iya eta qatuwaa oiqqiis; oiqqin Xiyoonen Daawita Katamaa geetettiis. <sup>6</sup> Daawiti ba olanchchata, “Yaabuusa asata kaseti oliya ooninne ola gadaawa gidana” yaagiis. Yaagin Xaruuyi na7ai Yoo7aabi kaseti biidi oliis; yaatidi gadaawa gididiis. <sup>7</sup> Daawiti he qatuwan de7iis; hegaa gishshau, he katamai Daawita Katamaa geetettiis.

<sup>8</sup> Daawiti Miiloppe doommidi, he katamaa zaarettidi keexxiis; attida katamaa qassi Yoo7aabi zaarettidi keexxiis. <sup>9</sup> Ubbaappe Wolqqaama GODAI aara de7iyo gishshau, Daawiti minni minnidi biis.



*Daawita Asatu Minotaa  
(Sameela Maxaafaa Naa77anttuwaa 23:8-39)*

<sup>10</sup> Daawita asati minoti hagaappe kaallidi xaafettidosona. GODAI Israa7eelabaa haasayidoogaadan, Daawiti kawotana mala, ha asati Israa7eela asaara gididi, keehippe maaddidosona. Qassi a kawotettaakka minttidosona.

<sup>11</sup> Daawita asati minoti hagaappe kaallidi xaafettidaageeta. Etappe heezzati keehippe erettidaageeta. Heezzatuppe koiroi Hakimoonappe yiida Yaashobi7aama; Yaashobi7aami issitoo olan heezzu xeetu asaa ba tooran woriis. <sup>12</sup> Heezzu mino asatu gidдон a kaallidi de7iyaagee Ahoohiyaa Doodo na7aa El77aazara. <sup>13-14</sup> Pilisxxeema asati olettanau Pasddaamima giyoosaa shiiqido wode, El77aazari Daawitaara issippe de7ees. Israa7eela olanchchati Pilisxxeema asatu sinttaappe baqatiyo wode, El77aazari banggaa shooqan de7ees. Inne a asati shooqaa gidдон eqqidi, Pilisxxeema asataara olettidosona. Olettin GODAI gita xoonuwaa immidi, eta ashshiis.

<sup>15</sup> Pilisxxeema olanchchati Rafaima Wombban dunkkaanido wode, hasttamu ha-laqatuppe heezzati Daawiti de7iyo Adulaama gonggoluwana de7iyo zaallaakko yidosona. <sup>16</sup> He wode Daawiti qatuwaa gidдон de7ees; Pilisxxeema olanchchatu citai Beetaliheemen de7ees. <sup>17</sup> Daawiti haattaa uyanau amottidi, “Beetaliheeme katamaa penggiyaa lanqqen de7iyo pultto haattaappe tana ooni ushshanddeeshsha!” yaagiis. <sup>18</sup> Yaagin heezzu mino asati Pilisxxeema asati dunkkaanidosaa kantti biidi, Beetaliheeme katamaa penggen de7iyo pulttuwaappe haattaa duuqqidi, Daawitayyo ehiidosona. SHin Daawiti uyennan ixxiis; ixxidi i he haattaa GODAA sinttan tigiis. <sup>19</sup> Tigidi, “Hagaa uyanaagee taappe haakko! Bantta shemppuwaa olidi biida ha asatu suuttaa taani uyoo? Aissi giikko, eti bantta shemppuwaa aatti immidi, haattaa ehiidosona” yaagiis. Hegaa gishshau, Daawiti he haattaa uyibeenna. He heezzu mino asati hegaa oottidosona.

<sup>20</sup> Yoo7aaba ishai Abishaayi hasttamatuyyo halaqa. I ba tooran heezzu xeetu asata olidi woriis. Yaatidi ikka hara heezzatudan erettiis. <sup>21</sup> I hasttamatuppe aadhdhi bonchchettida asa; i etau halaqa gididi. SHin i he heezzatu qoodan de7enna.

<sup>22</sup> Qabxxi7eelappe yiida Yoodaaha na7ai Banaayi mino asa; mino oosota oottiis. I naa77u erettida Moo7aaba biittaa asata woriis. Qassi shachchai darido issi gallassi ollaa gidдо gelidi, gaammuwaa woriis. <sup>23</sup> Banaayi geesai ichchashu wara gakkiiyo Gibxxe biittaa bitaniyaa adussaa woriis. Gibxxe bitaniyaa kushiyan shimainniyaa wonddarashiyaa keena toorai de7ees; shin Banaayi gatimaa oiqqidi, bitaniyaakko biis. Biidi he bitaniyaa kushiyaappe tooraa dafi ekkidi, a tooran a woriis. <sup>24</sup> Yoodaaha na7ai Banaayi hageeta oottiis. A sunttaikka he heezzatuugaadan erettiis. <sup>25</sup> I hasttamatu gidдон daro bonchchettiis; shin i heezzatu qoodan de7enna. Daawiti a bana naagiya olanchchatussi halaqa kessiis.

<sup>26</sup> Mino asati Yoo7aaba ishaa Asaaheela, Beetaliheemeppe yiida Doodo na7aa Elihanaana, <sup>27</sup> Haroodappe yiida SHammoota, Pilonappe yiida Heleexa, <sup>28</sup> Taqo7appe yiida Iqqeesha na7aa Ira, Anatootappe yiida Abi7eezera, <sup>29</sup> Huushappe yiida Sibbakaaya, Ahoohiyaa Ilaaya, <sup>30</sup> Naxoofappe yiida Maahiraaya, Naxoofappe yiida Ba7aana na7aa Heleeda, <sup>31</sup> Biniyaama biittan de7iyo Gib77a katamaappe yiida Ribaaya na7aa Ittaaya, Pir77aatoonappe yiida Banaaya, <sup>32</sup> Ga7aasha Zanggaaraa matappe yiida Huraaya, Aarabappe yiida Abii7eela, <sup>33</sup> Baahiruumappe yiida Azimaaweeta, SHa7albboonappe yiida Eliyaahiba, <sup>34</sup> Giizoonappe yiida Hasheema, Haaraarappe yiida SHaage na7aa Yonaataana, <sup>35</sup> Haaraarappe yiida Sakaara na7aa Ahi7aama, Uura na7aa Elifaala, <sup>36</sup> Makeerappe yiida Hefeera, Pilonappe yiida Akiiya, <sup>37</sup> Qarmmeloosappe yiida Hexira, Ezbbaaya na7aa Naa7iraaya, <sup>38</sup> Naataana ishaa Yuu7eela, Haagira na7aa Mibihaara, <sup>39</sup> Amoonappe yiida Xeleqa, Xaruuyi na7aa Yoo7aaba ola miishshaa tookkiya Ba7erootappe yiida Naahiraaya, <sup>40</sup> Yatira yara gididi Ira, Yatira yara gididi Gaareeba,

<sup>41</sup> Hiitiyaa Ooriyoona, Ahilaaya na7aa Zabaadanne <sup>42</sup> Roobeela zare gidiya SHiiza na7aa Adiina. I Roobeela zaretu halaqa; aara issippe hasttamu asati de7oosona. <sup>43</sup> Hara mino asati qassi Maa7ika na7aa Hanaana, Mitaanappe yiida Yoshafaaxa, <sup>44</sup> Ashttaarappe yiida Ooziyaana, Aaro7erappe yiida Hotaama naata SHamaa7anne Yi7i7eela, <sup>45</sup> SHiimira na7aa Yidi7eelanne a ishaa Tiixappe yiida Yooha, <sup>46</sup> Mahaawappe yiida Eli7eela, Elnna7aama naata Yiriibaayanne Yooshaawiyaa, Moo7aaba biittaappe yiida Yitima, <sup>47</sup> Xooba katamaappe yiida Eli7eela, Yoobeedanne Ya7isi7eela.

## 12

### *Biniyaama Zariyaappe Daawita Kaallida Asata*

<sup>1</sup> Daawiti Qiisa na7aa Saa7oolappe baqati biidi, Xiqilaagan uttido wode, akko yiida asati hagaappe kaallidi xaafettidaageeta. Eti kase Daawita olan maaddida mino asatu gidдон de7oosona. <sup>2</sup> Eti wonddafiyaasata; qassi bantta ushachcha kushiyaaninne haddirssa kushiyan shuchcha yambbarshshan olanau danddayoosona. Eti Biniyaama zare gidiya Saa7oola dabbota. <sup>3</sup> Eta halaqai Ahi7eezera; Ahi7eezerappe simmin Yo7aasha; eti Gib77appe yiida SHamaa7a naata.

Harati qassi Azimaaweeta naata gidiya Yizi7eelanne Peleexa, Baraaka, Anatootappe yiida Yeeha, <sup>4</sup> hasttamatu gidдон wolqqaama gididi, eta kaalettiya Gabaa7oonappe yiida Yishimaa7iyaa, Ermmaasa, Yahaazi7eela, Yohanaana, Gedeerappe yiida Yozabaada, <sup>5</sup> El77uzaaya, Yaarimoota, Ba7aaliyaa, SHamaariyaa, Hariifappe yiida SHafaaxiyaa, <sup>6</sup> Qoraaha yarata gidiya Elqqaana, Yishiyaa, Azaari7eela, Yo7eezeranne Yaashobi7aama, <sup>7</sup> Gadoorappe yiida Yirohaama naata Yo7eelanne Zabaadiyaa.

### *Gaada Zariyaappe Daawita Kaallida Asata*

<sup>8</sup> Daawiti bazzuwan de7iya baqati attiyo sohuwan uttidaashin, Gaada zariyaappe asati akko yiidosona. Eti mino asatanne olau giigidaageeta; qassi gondalliyaanne tooraa oiqqanau danddayiyaageeta. Eta som77oi gaammuwaa som77uwaa milatees; eti deretu huuphiyan guppiya genessaadan eesotoosona. <sup>9</sup> Eta halaqai Exeera; naa77anttoi Obaadiyaa; heezanttoi Eli7aaba; <sup>10</sup> oiddanttoi Mishimaanna; ichchashanttoi Ermmaasa; <sup>11</sup> usuppunttoi Attaaya; laappunttoi Eli7eela; <sup>12</sup> hosppunttoi Yohanaana; uddufunttoi Elzzabaada; <sup>13</sup> tammanttoi Ermmaasa; tammanne isiininttoi Maakibanaaya. <sup>14</sup> Hageeti Gaada zare olanchchatuyyo halaqata. Etappe laafiyaageeti mato halaqata; minniyaageeti shaalaqata. <sup>15</sup> Yorddaanoosa SHAafai, gaxaappe gaxaa gakkanaashin kumi kixxido koiro aginan pinnidaageeti hageeta. Eti wombban arshshooranne arggoora uttida asaa ubbaa yedettidosona.

### *Biniyaamanne Yihudaa Zaretuppe Daawita Kaallida Asata*

<sup>16</sup> Biniyaama zaretuppenne Yihudaa zaretuppe amarida asati Daawitakko qatuwaa yiidosona. <sup>17</sup> Yin Daawiti etaara gaittanau kiyidi, hagaadan yaagiis; “Intte tana maaddanau saruwan taakko yiidabaa gidikko, ta wozanai inttenaara issippe gidana. SHin intte tana ta morkketuyyo aatti immanau yiidabaa gidikko, inttena erite! Taani oottido iitabi baina gishshau, nu aawatu Xoossai hegaa be7o; i inttena pirddo!” yaagiis.

<sup>18</sup> Hegaappe guyyiyan, hasttamatu halaqaa Amaasaaya bolli Xoossaa Ayyaanai wodhdhin,

“Daawitaa, nuuni neegeeta!

Issey na7au, nuuni nenaara issippe de7eettes!

Saroi neessi gido!

Nena maaddiyaageetussikka saroi gido!

Ne Xoossai nena maaddees” yaagiis.

Yaagin Daawiti eta ekkidi, ba olanchchatuyyo halaqata oottiis.

### *Minaase Zariyaappe Daawita Kaallida Asata*

<sup>19</sup> Daawiti Pilisxxeematuura issippe gididi, Saa7oola olanau biido wode, Minaase zariyaappe amarida asati Daawitan gaittidosona. SHin Pilisxxeema asatu halaqati Daawitinne Daawita asai banttanaara beennaadan diggidosona. Pilisxxeema asati keehippe zorettidoogaappe guyyiyan, eta guyye yeddidosona; aissi giikko, Daawitinne Daawita asai eta Kawuwaa Saa7oolayyo aatti immanaakkonne giidi yayyidosona. <sup>20</sup> Daawiti Xiqilaaga katamaa simmishin, Minaase zariyaappe Daawita maaddanau kiyida shaalaqati Adinaaha, Yozabaada, Yidi7eela, Mikaa7eela, Yozabaada, Eelihanne Xiltaaaya. <sup>21</sup> Eti ubbaikka xalanne wolqqaama asa gidiyo gishshau, Daawiti ambbaanota paanaa kaalliyo wode, eti a maaddidosona. <sup>22</sup> Daawita olanchchati Xoossaa olanchchatudan corattana gakkanaashin, a maaddiya asai gallassi gallettes.

### *Daawita Olanchchatu Qoodaa*

<sup>23</sup> GODAI haasayidoogaadan Saa7oola kawotettaa Daawitayyo zaaranau olau gixxi giigidi, Kebroonan de7iya Daawitakko yiida olanchchatu qoodai hagaappe kaallidi xaafettidaagaa. <sup>24</sup> Gonddalliyaanne tooraa oiqqidi, olau gixxi giigida Yihudaa zareti usuppun sha7anne hosppun xeeta. <sup>25</sup> Simoonaa zariyaappe olau giigida xalanne wolqqaama olanchchati laappun sha7anne issi xeeta. <sup>26</sup> Leewa zariyaappe oiddu sha7anne usuppun xeeta. <sup>27</sup> Aaroonaa zaretu halaqai Yoodaaha; Yoodaaha heera issippe heezzu sha7anne laappun xeetu asati de7oosona. <sup>28</sup> Qassi Xaadooqi yelaga xalanne wolqqaama asa; Xaadooqa aawaa keettaa asaappe laatamanne naa77u halaqati aara issippe de7oosona. <sup>29</sup> Biniyaama zare gidiya Saa7oola dabboti heezzu sha7u asa. SHin Biniyaama zariyaappe dariya bagga asai Saa7oola keettaa asau he wodee gakkanaashin ammanettiyaageeta. <sup>30</sup> Efireema zariyaappe bantta aawatu keettaa asan erettida xalanne wolqqaama asati laatamu sha7anne hosppun xeeta. <sup>31</sup> Daawita kawoyanau baanau doorettida Minaase zariyaappe baggati tammanne hosppun sha7a. <sup>32</sup> Qassi Israa7eela asai ai oottanau bessiyaakko, wodiyaabaa shaakki eriya akeekanchcha asati, Yisaakoora zariyaayyo halaqati naa77u xeeta; eta dabboti ubbai etayyo azazettoosona. <sup>33</sup> Ola miishshaa ubbaa oiqqidi, bantta kumetta wozanan Daawita maaddanau giigida olanchchatun Zaabiloonaa zare asati ishatamu sha7a. <sup>34</sup> Nifttaaleema zariyaappe issi sha7u halaqati de7oosona; gonddalliyaanne tooraa oiqqiya hasttamanne laappun sha7u asati etaara issippe de7oosona. <sup>35</sup> Daana zariyaappe olau giigida asati laatamanne hosppun sha7anne udufun xeeta. <sup>36</sup> Olau kiyanau Aseera zariyaappe giigidaageeti oitamu sha7a. <sup>37</sup> Yorddaanoosa SHaafaappe hefintta arshsho baggan de7iya Roobeela zariyaappe, Gaada zariyaappenne Minaase zariyaa baggaappe ola miishshaa ubbaa oiqqidi yiida asati issi xeetanne laatamu sha7a.

<sup>38</sup> Ha olau giigida olanchchati ubbai Daawita Israa7eela bolli kawoyanau bantta qofaa qachchidi, Kebroona katamaa yiidosona. Qassi Israa7eelappe attidaageetikka Daawita kawoyanau issi wozana gididosona. <sup>39</sup> Eta dabboti etayyo koshshiyaabaa giigissi wottido gishshau, miiddinne uyiiddi Daawitaara heezzu gallassaa uttidosona. <sup>40</sup> Israa7eela asaayyo ufaissa gidiyo gishshau, huuphessa baggaara de7iya Yisaakooraappe, Zaabiloonappenne Nifttaaleemappe asati daro qumaa ehiidosona. Xiilliyaa, balasiyaa lichchakkuwaa, woiniyaa teeraa, woine eessaanne zaitiyaa hariyan, baquluwan, gaameelaaninne booran caanidi ehiidosona; qassikka eti miizzaanne dorssaa shukkidi maanau ekkidi yiidosona.

## 13

### *Taabootaa Qiriyaati-Yi7aariimappe Denttidosona*

#### *(Sameela Maxaafaa Naa77anttuwaa 6:1-11)*

<sup>1</sup> Hegaappe guyyiyan, Daawiti shaalaqatuuranne mato halaqatuura zorettiis. <sup>2</sup> Zorettidi Israa7eela asaa ubbaa, “Intteyyo lo77o milatiyaabaa gidikkonne, GODAA

nu Xoossaa shene gidikko, Israa7eela biittaa gaxan de7iya nu dabboti, qeesetinne bantta kataman de7iya Leewati nunaara issippe shiiqanaadan asa kiittoos. <sup>3</sup> Saa7ooli kawotido wode shenehoo gin, dogettidi attida nu Xoossaa Taabootaa ane zaaridi ehoos” yaagiis. <sup>4</sup> Daawiti odido yohoi suure gidido gishshau, asai ubbai maayiis.

<sup>5</sup> Hegaa gishshau, Daawiti Xoossaa Taabootaa Qiriyaati-Yi7aariimappe ehaana mala, Gibxxe zawaappe doommidi, Hamaata Pinuwaa gakkanaashin de7iya Israa7eela asaa ubbaa shiishshiis. <sup>6</sup> Daawitinne Israa7eela asai ubbai kiruubetuppe gidduwan ba kawotaa araataa bolli uttida GODAA sunttan xeessettida Xoossaa Taabootaa ehaanau Yihudaa biittan de7iya Ba7aala giyo Qiriyaati-Yi7aariima katamaa biidosona. <sup>7</sup> Xoossaa Taabootaa parai goochchiyo ooratta gaariyan wottidi, Abinadaaba sooppe ehiidosona; Uzzinne Ahiyyoi gaariyaa laaggoosona. <sup>8</sup> Daawitinne Israa7eela asai ubbai diittaaanne maazinqqiyaa diixxiiddi, karaabiyaa baqqiiddi, daalaa qaattiiddinne xurumbbaa punniiddi, bantta kumetta wolqqan Xoossaa sinttan ufaittidi bonchchidosona.

<sup>9</sup> Eti Kiidoona giyosan de7iya kattaa qoxxiyo audiyaa gakkiiyo wode, boorati xubettin, Uzzi Taabootaa oiqqanau ba kushiya yeddiis. <sup>10</sup> Yeddin a kushee Taabootaa bochchido gishshau, GODAA hanqqoi Uzza bolli eexxi kiyiis. Hegaa gishshau, GODAI a shocin, i he sohuwan Xoossaa sinttan haiqqi aggiis. <sup>11</sup> GODAI hanqqettidi Uzza worido gishshau, Daawiti yiillotiis. Hachchi gakkanaashin, he sohoi Uzzi SHocettosaa geetteetes.

<sup>12</sup> He gallassi Daawiti Xoossaayyo yayyido gishshau, “Xoossaa Taabootaa taakko waata ehaanau danddayiyaanaa?” yaagiis. <sup>13</sup> Hegaa gishshau, Taabootaa banaara Daawita Katamaa efibeenna. SHin Gaatiyaa Obeedi-Eedooma giyo bitaniyaa soo efii. <sup>14</sup> Xoossaa Taabootai Obeedi-Eedooma keettan a keettaa asaara heezzu aginaa gam77iis. GODAI a keettaa asaanne ayyo de7iya ubbabaa anjjiis.

## 14

### *Daawiti Yerusalaamen Oottido Oosuwaa (Sameela Maxaafaa Naa77anttuwaa 5:11-16)*

<sup>1</sup> Xiirsoosa Kawoi Kiiraami Daawitayyo asata kiittiis. Kiitettida asatuura keettaa keexxanaadan zigaa mudettaanne qassi shuchchaa massiyaageetanne anaaxeta ayyo yeddiis. <sup>2</sup> GODAI Israa7eela bolli a kawo oottidi essidoogaanne ba asaa Israa7eela gishshau, a kawotettaa xoqqu oottidi bonchchidoogaa Daawiti eriiis.

<sup>3</sup> Hegaappe guyyiyan, Daawiti Yerusalaamen hara maccaasaa gujji ekkidi, attuma naatanne macca naata yeliis. <sup>4</sup> Daawiti Yerusalaamen yelido attuma naati SHaamu7a, SHobaaba, Naataana, Solomona, <sup>5</sup> Yibihaara, Elishuu7a, Elppaaleexa, <sup>6</sup> Nogaaha, Nefega, Yaafi7a, <sup>7</sup> Elishamaa7a, Be7eliyaadanne Elifeleexa.<sup>6</sup>

### *Daawiti Pilisxeema Asaa Xooniis (Sameela Maxaafaa Naa77anttuwaa 5:17-25)*

<sup>8</sup> Daawiti Israa7eela ubbaa bolli kawo gididi tiyettidoogaa Pilisxeema asai siyido wode, eti ubbai Daawita koyanau kiyidosona. Daawiti eti kiyidoogaa siyidi, etaara olettanau kiyiis. <sup>9</sup> Pilisxeema asai Rafaima Wombbaa yiidi bonqqidosona. <sup>10</sup> Daawiti Xoossaa, “Taani baada Pilisxeemata oloo? Neeni eta taayyo aatta immuutee?” yaagidi oichchiis.

Oichchin GODAI a, “Baada ola. Taani eta neeyyo aatta immana” yaagiis.

<sup>11</sup> Yaagin Daawitinne a asai Ba7aali-Paraaxiima giyoosaa biidi, yan eta xoonidosona. Xoonin Daawiti, “Haattaa di7oi xuussi kanttiyoogaadan Xoossai ta morkketu giddoora tana kanttissiis” yaagiis. Hegaa gishshau, he sohuwaa sunttai Ba7aali-Paraaxiima

<sup>6</sup> 14:7 Daawitassi Yerusalaamen yelettida attuma naatu sunttai Naa77antto Sameela 5:14-16, Hanidabaa Odiya Koiro Maxaafaa 3:5-7nne 14:4-7 xaafettiis; shin Ibraawettuwan issuwaa issuwaa sunttai ubbasan issi mala gidenna.



geetettiis. <sup>12</sup> Pilisxxeemati bantta eeqata he sohuwan yeggidi biidosona. Yaatin Daawiti azazidi, eta eeqata taman xuugissiis.

<sup>13</sup> Pilisxxeema asati naa77anttuwaakka ha wombbaa simmi yiidi bonqqidosona. <sup>14</sup> Bonqqin Daawiti Xoossaa naa77anttuwaakka oichchiis. Oichchin Xoossai a, “Neeni eta geeduwaa booppa. Eta guyyeera yuuya aadhdhada ettaappe sintta baggaara olanau giiga. <sup>15</sup> Ettaa huuphiyan salppiyaa cenggurssaa neeni siyiyo wode, olanau kiya. Aissi giikko, hegee Pilisxxeema olanchchata shocanau Xoossai neeppe sinttau aadhdhiis giyoogaa” yaagiis. <sup>16</sup> Xoossai azazidoogaadan Daawiti oottiis. Gabaa7oonappe biidi Gezeera gakkanaashin, Israa7eela asai Pilisxxeema olanchchata woriis. <sup>17</sup> Hegaappe guyyiyan, Daawita woree biittaa ubbaa gakkiiis. Kawotettati ubbai Daawitayyo yayyanaadan GODAI oottiis.

## 15

### *Taabootaa Ehaanau Makkido Mahaa*

<sup>1</sup> Daawiti ba kataman baayyo keettaa keexxiis; Xoossaa Taabootaukka sohuwaa giigissidi, dunkkaaniyaa essiis. <sup>2</sup> Hegaappe guyyiyan Daawiti, “Xoossaa Taabootaa tokkanaadaaninne meri merinau Xoossau oottanau GODAI doorido Leewatuppe atin, ooninne Xoossaa Taabootaa tookkanau bessenna” yaagiis. <sup>3</sup> Daawiti GODAA Taabootaayyo giigissido sohuwaa Taabootaa ehaanaadan, Israa7eela asaa ubbaa Yerusalem shiishshiis.

<sup>4</sup> Qassi Daawiti Aaroon zaretanne Leewata xeesidi shiishshiis. <sup>5</sup> Qahaata yaratuppe halaqai Uri7eelinne issi xeetanne laatamu a dabboti yiidosona. <sup>6</sup> Maraara yaratuppe halaqai Asaayinne naa77u xeetanne laatamu a dabboti yiidosona. <sup>7</sup> Gershshoona yaratuppe halaqai Yuu7eelinne xeetanne hasttamu a dabboti yiidosona. <sup>8</sup> Elxxaafaana yaratuppe halaqai SHamaa7eenne naa77u xeetu a dabboti yiidosona. <sup>9</sup> Kebroona yaratuppe halaqai Eli7eelinne hosppun tammu a dabboti yiidosona. <sup>10</sup> Uzzi7eela yaratuppe halaqai Aminadaabinne xeetanne tammanne naa77u a dabboti yiidosona.

<sup>11</sup> Hegaappe guyyiyan, Daawiti qeeseta Xaadooqanne Abiyaataara, qassi Leewata Uri7eela, Asaaya, Yuu7eela, SHamaa7iyaa, Eli7eelanne Aminadaaba xeesissiis. <sup>12</sup> Xeesissidi eta, “Intte Leewatu zaretuyyo halaqata. GODAA Israa7eela Xoossaa Taabootaa taani giigissa wottido sohuwaa ehaanau inttenne intte dabboti geeyite. <sup>13</sup> Intte Leewati koiro Xoossaa Taabootaa tookkibeenna gishshaunne nuuni a wogaadan waati efaanaakko Xoossaa oichchibeenna gishshau, GODAI nu Xoossai nuna qaxxayyiis” yaagiis.

<sup>14</sup> Hegaappe guyyiyan, GODAA Israa7eela Xoossaa Taabootaa ehaanau qeesetinne Leewati banttana geeshshidosona. <sup>15</sup> GODAI Muuse baggaara kase azazidoogaadan, Leewati Xoossaa Taabootaa kasuwaara bantta hashiyan tookkidosona.

<sup>16</sup> Hegaappe guyyiyan, diittaanne maazingqiyyaa diixxiiddi, daalaa qaattiiddi, ufais-siya yettaa yexxana mala, Leewata kaalettiyaageeti bantta dabbota sunttanaadan Daawiti azaziis. <sup>17</sup> Azazin Leewati Yuu7eela na7aa Hemaana, a dabbotuppe Berekiyaa na7aa Asaafanne eta dabbotuppe Maraara yaraa Qusaaya na7aa Etaana sunttidosona. <sup>18</sup> Qassi naa77antto kayan Zakkaariyaasa, Yaa7izi7eela, SHamiraamoota, Yihi7eela, Uunna, Eli7aaba, Banaaya, Ma7iseeya, Matiitiyaa, Elifaala, Miiqineeyanne penggiyaa naagiyaageeta Obeedi-Eedoomanne Yi7i7eela sunttidosona.

<sup>19</sup> Nahaasiyaa daalaa xoqqu oottidi qaattanaadan Hemaani, Asaafinne Etaani sunttidosona. <sup>20</sup> Qassi Zakkaariyaasi, Yaa7izi7eeli, SHamiraamooti, Yihi7eeli, Uunni, Eli7aabi, Ma7iseeyinne Banaayi diittaa lee7iyan diixxoosona. <sup>21</sup> Matiitee, Elifaali, Miiqineeyi, Obeedi-Eedoomi, Yi7i7eelinne Azaazee diittaa orddiyan diixxoosona.

<sup>22</sup> Leewatu halaqai Kanaanee mazamuriyaa kaalettanau sunttettiis; i eranchcha gidiyo gishshau, eta tamarissee. <sup>23</sup> Berekeenne Elqqaani Taabootaa dunkkaaniyaa



penggiyaa naaganau doorettidosona. <sup>24</sup> Qassi qeeseti SHabaanee, Yoshafaaxi, Nataani7eeli, Amaasaayi, Zakkaariyaasi, Banaayinne El77eezari Xoossaa Taabootaa sinttan xurumbbaa punnanau doorettidosona. Obeedi-Eedoominne Yuuhee Taabootaa naaganau doorettidosona.

*Taabootaa Yerusalaame Efiidosona*  
(*Sameela Maxaafaa Naa77anttuwaa 6:12-22*)

<sup>25</sup> Hegaappe guyyiyan Daawiti, Israa7eela cimatinne shaalaqati GODAA Maachchaa Taabootaa Obeedi-Eedooma sooppe ehaanau ufaittidi biidosona. <sup>26</sup> GODAA Maachchaa Taabootaa tookkida Leewata Xoossai maaddido gishshau, eti laappun korimatanne laappun dorssa orggeta yarshshidosona. <sup>27</sup> Daawiti, Taabootaa tookkida Leewati ubbai, mazamuriyaa yexxiyaageetinne mazamuriyaa yexxiyaageetu halaqai Kanaanee liinuwaaw giyo qacinaappe dadettida maayuwaaw maayidosona. Daawitikka qassi liinuwaappe dadettida eefuudiyaa giyo maayuwaaw maayiis. <sup>28</sup> Hagaadan oottidi, Israa7eela ubbai hobbociiddi, xurumbbaanne malkkataa punniiddi, daalaa qaattiid-dinne, diittaanne maazingqiyaa diixxiiddi, GODAA Maachchaa Taabootaa ehiidosona.

<sup>29</sup> GODAA Maachchaa Taabootai Daawita Katamaa gelido wode, Saa7oola na7iyaa Miikaala maskkootiyaara xeellada, Kawoi Daawiti ufaittidi durishiininne kaa7ishin be7aasu; be7ada Daawita ba wozanan karaasu.

## 16

<sup>1</sup> Eti Xoossaa Taabootaa ehiidi, Daawiti Taabootaa wottanau to利多 dunkkaaniyaa gidдон wottidosona. Wottidi xuuggiyo yarshshuwaanne issippetettaa yarshshuwaaw Xoossaayyo yarshshidosona. <sup>2</sup> Daawiti xuuggiyo yarshshuwaanne issippetettaa yarshshuwaaw yarshshidi polidoogaappe guyyiyan, GODAA sunttan asaa anjjiis. <sup>3</sup> Israa7eela asau ubbau, maccaunne attumau, huuphiyan huuphiyan issi issi komppo oittaa, issi issi muxo ashuwaanne woiniyaa teeraa melaappe issi issi lichchakkuwaa gishiis.

<sup>4</sup> GODAA Taabootaa sinttan oottanaadaaninne GODAA Israa7eela Xoossaa sab-banaadan, galatanaadaaninne bonchchanaadan, amarida Leewata Daawiti sunttiis. <sup>5</sup> Leewatu halaqai Asaafa; Asaafa kaallidi naa77antto halaqai Zakkaariyaasa. Zakkaariyaasa kaallidi de7iyaageeti Yi7i7eela, SHamiraamoota, Yihi7eela, Matiitiyaa, Eli7aaba, Banaayanne Obeedi-Eedooma. Eti maazingqiyaanne diittaa diixxanau sunttettidosona; shin Asaafi daalaa qaattanau sunttettiis. <sup>6</sup> Qeesiyaa Banaayinne Ya-haazi7eeli Xoossaa Maachchaa Taabootaa sinttan ubba wode xurumbbaa punnanau sunttettidosona. <sup>7</sup> He gallassi Daawiti kasetidi, Asaafinne a dabboti GODAA sab-banaadan azaziis.

*Galata Mazamuriyaa*  
(*Mazamure Maxaafaa 105:1-15; 96:1-13; 106:1,47-48*)

<sup>8</sup> GODAA galatite; a sunttaa xeesite.  
I oottidobaa kawotettatu gidduwan erissite.

<sup>9</sup> A sabbite; galata yettaa au yexxite.  
A maalaalissiya oosuwaaw ubbaaw yootite.

<sup>10</sup> A geeshsha sunttan ceeqettite;  
GODAA koyiyaageetu wozanati ufaittona.

<sup>11</sup> GODAANNE a wolqqaa xomoosite;  
ubbatoo a sinttaa koyite.

<sup>12-13</sup> Inttenoo,  
a ashkkaraa Abrahaama zerettatoo,  
doorettida Yaaqooba naatoo,

i oottido maalaalissiyaabaa,  
a malaataanne i pirddido pirddaa hassayite.

14 I GODAA nu Xoossaa;  
a pirddaikka sa7aa ubbaa bollaana.

15 I ba maachchaa merinaassi,  
ba azazido qaalaa  
sha7u yeletaa gakkanaassi naagees.

16 Hegeenne,  
i Abrahaamaara maacettido maachchaa,  
Yisaaqassi caaqqido maachchaa.

17 Yaaqoobassi woga,  
Israa7eelassikka merinaa maachcha  
oottidi minttidoogaa.

18 Hagaadan yaagiis;  
“Neeyyo Kanaane biittaa immana;  
i ne zerettatuyyo laata gidana” yaagiis.

19 Xoossaa asati qoodan qii guuttanne  
Kanaane biittan bete gididi de7iyo wode,

20 issi deriyaappe hara deriyaa,  
issi kawotettaappe hara kawotettaa yuuyidosona.

21 Xoossai eta ooninne naaqqanau immibeenna;  
eta gishshau kawota seeriiddi,

22 “Taani tiyidoogeeta bochchoppite;  
ta hananabaa yootiyaageeta qohoppite” yaagiis.

23 Sa7an de7iyya asau, ubbaikka GODAASSI yexxite;  
i ashshiyoo mishiraachchuwaa hachchi hachchi yootite.

24 Kawotettatu gidдон a bonchchuwaabaa,  
asaa ubbaa gidдон a maalaalissiya oosuwaabaa awaajjite.

25 Aissi giikko, GODAI gita;  
aaro galatai ayyo bessees.  
Xoossatu ubbaappe aadhdhidi, i yayettanau bessees.

26 Hara asaa xoossati ubbai eeqata;  
shin GODAI salota medhdhida Xoossaa.

27 Bonchchoinne anggai a yuushuwan de7ees;  
minotettainne ufaissai a Beeta Maqidasiyan de7ees. 28 Inttenoo, asa zaretoo ubbau,  
GODAABAA yootite;

“Bonchchoinne wolqqai GODAABAA” giidi yootite.

29 “Bonchchoi a sunttaassa” giidi  
GODAABAA yootite.

Yarshshuwaa ekkidi, a sintti yiite.  
A geeshshatettaa puulan GODAAYYO goinnite.

30 Biittan de7iyya asau ubbau, a sinttan kokkorite.  
Sa7ai minni eqqiis; mulekka qaaxxenna.

31 Saloti ufaittona; sa7aikka hashshu go!  
Kawotettatu gidдон eti, “GODAI kawotiis!” yaagona.

32 Abbainne a gidдон kumidabati guummona.  
SHooqainne shooqan de7iyyaabati ubbati ufaittona.

<sup>33</sup> Hegaappe guyyiyan woran de7iya mitta ubbai ufaissan GODAA sinttan yexxana.  
Aissi giikko, i sa7aa bollan pirddanau yees.

<sup>34</sup> GODAI keha gidiyo gishshaunne aggenna a siiqoi merinaagaa gidiyo gishshau, GODAA galatite.

<sup>35</sup> Hegaappe guyyiyan intte,  
“Abeet nuna ashshiya Xoossau, nuna ashsha.  
Nuuni ne geeshsha sunntaa galatanaadaaninne ne bonchchuwan ceeqettanaadan,  
kawotettatu giddoppe shiishshada ashsha” yaagite.

<sup>36</sup> GODAI Israa7eela Xoossai merinaappe merinaa gakkanaayyo galatetto!  
Hegaappe guyyiyan asai ubbai, “Amin77i” giidi, GODAA galatiis.

*Yerusalaameeninne Gabaa7oonan Hanida Goinuwaa Maaraa*

<sup>37</sup> GODAA Maachchaa Taabootaa sinttan hachchi hachchi goinuwaassi koshshiyaabaa ubba wode eti oottanaadan, Daawiti Asaafanne a dabbota wottiis.

<sup>38</sup> I qassi Obeedi-Eedoomanne a dabbota usuppun tammanne hosppunata etaara oottanaadan wottiis; Yidutuuna na7aa Obeedi-Eedoomanne Hoosa penggiyaa naaganaadan wottiis.

<sup>39</sup> Qeesee Xaadooqinne aara oottiya qeeseti Gabaa7oonan de7iya xoqqa sohuwan, Dunkkaaniyaa sinttan oottanaadan yan attidosona. <sup>40</sup> GODAI Israa7eelayyo imido higgiiyan xaafettidoogaadan, eti maalladonne omarssi ubba wode xuuggiyo yarshshuwaa yarshshiyoosan yarshshoosona. <sup>41</sup> Aggenna a siiqoi merinaagaa gidiyo gishshau, GODAA yettan galatanaadan Hemaana, Yidutuunanne doorettida haraata Daawiti etaara issippe wottiis. <sup>42</sup> Hemaaninne Yidutuuni xurumbbaa punnoosona, daalaa qaattoosonanne galataa mazamuriyaa yexxiiddi kaa7iyo hara miishshata kaa7oosona. Yidutuuna attuma naati penggiyaa naaganau sunttettidosona.

<sup>43</sup> Hegaappe guyyiyan, asai ubbai ba soo ba soo biis. Daawitikka ba so asaa anjjanau simmiis.

## 17

*Naataani Daawitassi Hananabaa Yootiis  
(Sameela Maxaafaa Naa77anttuwaa 7:1-17)*

<sup>1</sup> Daawiti ba kawo keettan de7iiddi, hananabaa yootiya Naataana, “Taani zigaappe keexettida keettan de7ais; shin GODAA Maachchaa Taabootai dunkkaane garssaana” yaagiis.

<sup>2</sup> Yaagin Naataani Daawita, “Oottanau ne wozanai qoppidobaa ubbaa ootta; GODAI nenaara de7ees” yaagiis.

<sup>3</sup> SHin he gallassa qammi GODAA qalalai Naataanakko yiidi, <sup>4</sup> “Ba; baada ta ashkkaraa Daawita hagaadan yaaga; ‘GODAI hagaadan yaagees; “Taani de7ana keettaa keexxanai nena gidakka. <sup>5</sup> Aissi giikko, taani Israa7eelata Gibxxeppe kessido gallasaappe doommada hachchi gakkanaashin, keettan de7abeikke; taani dunkkaaniyaappe dunkkaaniyau, qassi issi sohuwaappe hara sohuwau yuuyada de7aas. <sup>6</sup> Taani Israa7eela asaa ubbaara yuuyido soho ubban, ta asaa heemmanau taani azazido Israa7eela daannatuppe oossinne, “Taayyo zigaa keettaa aissi keexxabeikkii?” gaada oichchabeikke” yaagees’ yaaga.

<sup>7</sup> “Hegaa gishshau, ha77ikka ta ashkkaraa Daawita, ‘Ubbaappe Wolqqaama GODAI nena hagaadan yaagees; “Taani nena hentta gadeppe, dorssaa heemmiyoosaappe

denttada, ta asaa Israa7eela kaalettanaadan ekkaas. <sup>8</sup> Neeni biido soho ubban taani nenaara issippe gidaas; ne morkketa ubbaa ne sinttaappe diggaas. Ha77i simmi taani ha sa7an erettida gita asatu sunttaadan ne sunttaa gitayana. <sup>9-10</sup> Qassi taani ta asaassi, Israa7eelassi soho immada, eta he sohuwan tokkana. Hegaa gishshau, eti bantta sohuwan de7ana; eti naa77antto shabbirettokkona. Kase taani ta asaa Israa7eela bolli daannata sunttido wodiyaappe doommin naaqqidoogaadan, naa77antto iita asati eta naaqqokkona. Taani ne morkketa ubbaa neeyyo haarissana.

“ “Hegaa bollankka GODAI ba huuphen ne zareti de7i be7anaadan oottanaagaa neessi yootees. <sup>11</sup> Ne baree wurin, haiqqada ne maizza aawatun gaittiyo wode, taani neeppe guyyiyan ne zariyaa, ne naatuppe issuwaa denttada, a kawotettaa minttana. <sup>12</sup> Taayyo keettaa keexxanai a; taani a kawotaa araataa merinau mintta essana. <sup>13</sup> Taani ayyo aawa gidana; ikka taayyo na7a gidana. Neepe kase kawotida Saa7oolappe taani ta siiquwaa ekkarggidoogaadan, taani appe mulekka ekkikke. <sup>14</sup> Taani a ta asaa bollinne ta kawotettaa bolli merinau sunttana; a kawotaa araataikka merinau minni eqqana” yaagees’ yaaga” yaagiis.

<sup>15</sup> Naataani Xoossai ayyo ajjuutan qonccissido qaalaa ubbaa hagaadan Daawitayyo odiis.

*Daawita Woosaa  
(Sameela Maxaafaa Naa77anttuwaa 7:18-29)*

<sup>16</sup> Hegaappe guyyiyan, Kawoi Daawiti dunkkaaniyaa gelidi, GODAA sinttan uttiis. Uttidi hagaadan yaagidi woossiis; “Abeet GODAU, Xoossau, neeni hгаа ubbaa taayyo oottanau taani oonee? Ta so asaikka aibee? <sup>17</sup> Abeet GODAU, hagee ne aifiyaa sinttan guutta milatin, ne ashkkaraa zareti sinttappe yaana laittatun hananabaa yootadasa. Tana qassi gita asa kessadasa. <sup>18</sup> Neeni tana ne ashkkaraa bonchchido gishshau, taani Daawiti simmi ai gaanau danddayiyaanaa? Neeni tana ne ashkkaraa eraasa. <sup>19</sup> Abeet GODAU, ne ashkkaraa gishshau, ne wozanaa qofaadan ha gitabaa ubbaa oottada, ha gitatettaa ubbaa tana erissadasa.

<sup>20</sup> “Abeet GODAU, ne mali issoinne baawa. Nuuni nu haittan siyidoogaadan, neeppe attin, hara xoossi baawa. <sup>21</sup> Neeni ne asa oottanau wozido ne asaa Israa7eela milatiya hara kawotetti sa7aa bolla baawa. Neeni oottido gitanne maalaalissiya oosotu gaasuwan ne sunttai biittan sa7an erettiis. Neeni Gibxxeppe wozido ne asaa sinttaappe kawotettata laaggadasa. <sup>22</sup> Neeni ne asaa Israa7eela merinau nebaa oottadasa. Abeet GODAU, neenikka eta Xoossaa gidadasa.

<sup>23</sup> “Abeet GODAU, neeni ne ashkkaraabanne a zrettaabaa haasayidoogee merinau minni eqqo; neeni oottana giidoogaadankka ootta. <sup>24</sup> ‘Ubbaappe Wolqqaama GODAI, Israa7eela Xoossai tumaappe Israa7eelassi Xoossaa’ geettanaadan ne sunttai merinau minni eqqananne gitatana. Ne ashkkaraa Daawita zareti ne sinttan minni eqqana.

<sup>25</sup> “Abeet ta Xoossau, ‘Taani ne zareti de7i be7anaadan oottana’ yaagada neeni taassi ne ashkkaraassi qonccadasa. Hegaa gishshau, taani ne ashkkarai ha woosaa nena woossanau xalaas. <sup>26</sup> Abeet GODAU, neeni Xoossaattennee! Neeni ha lo77o qaalaa taayyo ne ashkkaraayyo oottana gaadasa. <sup>27</sup> Ne sinttan yaa merinau gam77anaadan, ne ashkkaraa zariyaa anjjanau ufaitta. Abeet GODAU, neeni anjjidoogee merinau anjjetidaagaa gidana” yaagidi woossiis.

## 18

*Daawiti Xoonido Xoonota  
(Sameela Maxaafaa Naa77anttuwaa 8:1-18)*

<sup>1</sup> Hegaappe guyyiyan, Daawiti Pilisxxeemata xoonidi haariis; yaatidi Gaate giyo katamaanne a moottata Pilisxxeema asatu kushiyaappe wotti ekkiis. <sup>2</sup> Qassi Daawiti Moo7aaba biittaa asata xoonin, eti ayyo haarettidosona; haarettidi giiraa giiridosona.

<sup>3</sup> Hamaata katamaa matan de7iya Xooba biittaa Kawoi Hadaadi7eezeri, ba kawotettaa Efraaxiisa SHaafaa gakkanaashin aassanau biishin, Daawiti a xooniis. <sup>4</sup> Daawiti Hadaadi7eezerappe issi sha7u para gaareta, laappun sha7u paraasatanne laatamu sha7u tohuwaasata omooddiis. Daawiti xeetu gaaretuyyo gidiya parata ashshidi, hara paratu ubbau gaadiyaa gilddayiis.

<sup>5</sup> Damasqqo kataman de7iya Sooreti Xooba biittaa Kawuwaa Hadaadi7eezera maad-danau yiido wode, Daawiti etappe laatamanne naa77u sha7u asaa woriis. <sup>6</sup> Hegaappe guyyiyan, Sooriyaa biittan Damasqqo kataman olanchchatu qatota medhdhiis. Yaatin, Sooriyaa asati Daawitayyo haarettidi, giiraa giiridosona. Daawiti biido soho ubban GODAI ayyo xoonuwaa immiis.

<sup>7</sup> Kawoi Daawiti Hadaadi7eezera oosanchchati tookkido worqqa gondalleta ekkidi, Yerusalaame efiis. <sup>8</sup> Qassi Daawiti Hadaadi7eezeri haariyo Xebaahanne Kuna kata-matuppe nahaasiyaa giyo birataa keehi daruwaa ekkiiis. Hegaappe simmin, Solomoni he nahaasiyaa birataappe Abba Sainiyaa, tuussatanne dumma dumma miishshata medhdhiis.

<sup>9</sup> Daawiti Xooba biittaa Kawuwaa Hadaadi7eezera olanchchata ubbaa xoonidoogaa Hamaata Kawoi Too7i siyiis. <sup>10</sup> Siyidi Hadaadi7eezera olidi xoonido gishshau, a hashshu gaanaunne sarotanau ba na7aa Hadoraama Kawuwaa Daawitakko kiittiis. Aissi giikko, Hadaadi7eezeri Too7aara olettiiddi gam77iis. Hadoraami worqqaappe, biraappenne nahaasiyaappe medhdhido miishshata ekkidi yiis. <sup>11</sup> Kawoi Daawiti Eedoomappe, Moo7aabappe, Amoona asatuppe, Pilisxxeematuppenne Amaaleeqa asatuppe omooddi ekkido biraanne worqqa ha miishshatuura issippe gattidi, GODAU dummayidi wottiis.

<sup>12</sup> Xaruuyi na7ai Abishaayi Eedooma asaappe tammanne hosppun sha7ata Maxine Wombban woriis. <sup>13</sup> Hegaappe guyyiyan, Daawiti Eedooman olanchchatu qatota medhdhiis; yaatin, he biittaa asai ubbai Daawitayyo haarettiis. Daawiti biido soho ubban GODAI ayyo xoonuwaa immiis.

<sup>14</sup> Hegaadan oottidi, Daawiti Israa7eela ubbaa bolli kawotiis; kawotidi ba asaa ubbaa xillotettaaninne suure pirddan aissiis. <sup>15</sup> Xaruuyi na7ai Yoo7aabi ola gadaawa; Ahiluuda na7ai Yoosaafixi hanidabaa xaafiyaagaa; <sup>16</sup> Ahixuuba na7ai Xaadooqinne Abiyaataara na7ai Abimeleki qeeseta; Saraayi<sup>7</sup> waanna xaafe; <sup>17</sup> Yoodaaha na7ai Banaayi Daawita naagiya olanchchata halaqa; Daawita attuma naati a kawotettan xoqqa sohuwaa oiqqida halaqata.

## 19

### *Daawiti Amoonatanne Sooreta Xooniis (Sameela Maxaafaa Naa77anttuwaa 10:1-19)*

<sup>1</sup> Hegaappe guyyiyan, Amoonatu Kawoi Naa7oosi haiqqiis; haiqqin a na7ai a so-huwan kawotiis. <sup>2</sup> Daawiti, “A aawai Naa7oosi taayyo kehido gishshau, taani a na7aa Hanuunayyo kehana” yaagiis. Hanuuna aawai haiqqido gishshau, Daawiti a minttettanau asa kiittiis.

Daawiti kiittidoogeeti Hanuuna minttettanau Amoona biitti gakkido wode, <sup>3</sup> Amoona asaa halaqati Hanuuna, “Daawiti nena minttettanau ha asata kiittidoogee ne aawaa bonchchuwaa gishshaassa gaadiiyye? I ba asaa kiittidoogee ha katamaa xeellanaassa, wochchanaassanne olidi xoonanaassa” yaagidosona.

<sup>4</sup> Yaagin Hanuuni Daawiti kiittido asata oiqqidi, eta buuchchaa meediis; eta maayuwaakka uttiyo dulliyaa baggaappe qanxxi ekkidi, eta yeddiis. <sup>5</sup> Hegaa gishshau, asati daro yeellatidosona. Daawiti hegaa siyidi, i etaara gaittiya asa kiittiis. Kiittidi,

<sup>7</sup> **18:16** Saraayi: Ha bitaane Ibraawettuwan oiddu dumma dumma sunntan xeesettees. Sameela Maxaafaa Naa77anttuwaa 8:17; 20:25nne Kawotu Maxaafaa Koiruwaa 4:3 xeella.



“Intte buuchchai diccanaashin, Yarkko kataman de7ishshite; hegaappe guyyiyan haa yiite” yaagiis.

<sup>6</sup> Amoonati bantta oosuwan Daawiti eta morkkanaadan oottidoogaa erido wode, Hanuuninne Amoonati Masphhexoomiyaappenne Sooriyan de7iya Maa7ikanne Xooba geetettiya katamatuppe paraa gaaretanne paraasata qaxaranau hasttamanne oiddu sha7u kilo giraame deexxiya xaqara biraa yeddidosona. <sup>7</sup> Yeddidi hasttamanne naa77u sha7u paraa gaareta, paraasata, Maa7ika kawuwaanne a olanchchata qaxaridosona; qaxarin yiidi, Medaaban dunkkaanidosona. Qassi Amoonati bantta katamaappe shiiqidi, olau giigettidosona.

<sup>8</sup> Daawiti heгаа siyido wode, Yoo7aabanne olanchchata ubbaa yeddiis. <sup>9</sup> Amoonati kiyidi, katamaa penggiyan olau salppidosona. Eta maaddanau yiida kawotikka bantta sohuwaa oiqqidi, dembban shiiqidosa.

<sup>10</sup> Yoo7aabi bana olai sinttaaranne guyyeera doggomidoogaa be7ido wode, Israa7eelatu giddoppe ubbaappe minniya olanchchata doori ekkidi, Sooriyaa asatu sinttan salppissiis. <sup>11</sup> Attida asatuppe ba ishah Abishaayi azazana mala oottidi, Amoonaa asatu sinttan salppidosona. <sup>12</sup> Yoo7aabi ba ishah Abishaaya, “Sooriyaa asati taayyo wolqqaamikko, neeni yaada tana maadda. Qassi Amoonaa asati neeyyo wolqqaamikko, taani yaada nena maaddana. <sup>13</sup> Simmi minna! Nu asaa gishshaunne nu Xoossaa katamatu gishshau, ane minni olettoos. GODAI bana lo77iyaabaa ootto” yaagiis.

<sup>14</sup> Hegaappe guyyiyan, Yoo7aabinne aara de7iya asai Sooriyaa asatuura olettanau lauhu giidosona. Yaatin, Sooriyaa asati a sinttaappe baqatidosona. <sup>15</sup> Sooriyaa asati baqatidoogaa Amoonaa asati be7ido wode, etikka a ishah Abishaaya sinttaappe baqatidi, katamaa gelidosona. Hegaappe guyyiyan, Yoo7aabi Yerusalaame simmiis.

<sup>16</sup> Sooriyaa asati Israa7eela asati eta xoonidoogaa erido wode, asa kiittidi Efiraaxiisa SHaafaappe hefinttaara de7iya Sooriyaa asata ehiissidosona. Hadaadi7eezera ola gadaawai SHobaaki eta kaalettees.

<sup>17</sup> Daawiti heгаа siyido wode, Israa7eela olanchchata shiishshidi, Yorddaanoosa SHaafaa pinniis; pinnidi Sooriyaa asatuura olettanau eta sinttan salppidosona. Daawiti etaara olettanau salppin, etikka aara olettidosona. <sup>18</sup> Olettin Sooriyaa asati Israa7eelatu sinttaappe baqatidosona; Daawiti Sooriyaa asatuppe paraa gaariyaa laaggiya laappun sha7u asatanne oitamu sha7u tohuwaasata woriis; eta ola gadaawaa SHobaakakka woriis. <sup>19</sup> Hadaadi7eezera olanchchati Israa7eelatun xoonettidoogaa erido wode, Daawitaara sigettidi, ayyo haarettidosona. Hegaappe simmin, Sooriyaa asai Amoonaa asaa maaddanau dosibeenna.

## 20

### *Daawiti Raaba Katamaa Olidi Oiqqiis (Sameela Maxaafaa Naa77anttuwaa 12:26-31)*

<sup>1</sup> Ofinttan, kawoti olau kiyiyo wode, Yoo7aabi olanchchata kaalettidi, Amoonaa biittaa woraajjiis; woraajjidi Raaba katamaa dooddiis. SHin Daawiti Yerusalaamen takkiis; Yoo7aabi Raaba katamaa olidi bashshiis. <sup>2</sup> Hegaappe guyyiyan Daawiti yiidi, eta kawuwaa worqqa kallachchaa a huuphiyaappe ekkiis. Kallachchai mazzaniyo wode hasttamanne oiddu kilo giraame gidiiis; a giddon inqquwaa giyo al77o shuchchai de7ees. He kallachchai ekettidi, Daawita huuphiyan goxettiis. Qassi Daawiti he katamaappe keehi daro omooduwaa ekkiis. <sup>3</sup> Yaatidi kataman de7iya asaa kessidi, magaaziyan, birata shalkkiyaaninne kalttan ootissiis. Amoonaa katamatun de7iya asaa ubbaakka hegaadan ootissiis. Hegaappe guyyiyan, Daawitinne a asai ubbai Yerusalaame simmiis.

### *Pilisxeema Asatuura Olettido Olata (Sameela Maxaafaa Naa77anttuwaa 21:15-22)*

<sup>4</sup> Hegaappe simmin, Pilisxeema asatuura Gezeeran olai denddiis; denddin Hushappe yiida Sibbakaayi adussa mino asatu yaraappe gidiya Sippaaya woriis. Yaatin, Pilisxeemati xoonettidosona.

<sup>5</sup> Hegaappe simminka Pilisxeema asatuura hara olai denddiis; denddin Yaa7iira na7ai Elihanaani toora toomai shimainniyaa wondderashiyaa keeniyo, Gaate katamaappe yiida Gooliyaada ishaa Laahima woriis.

<sup>6</sup> Qassikka hara olai Gaate kataman denddiis. He sohuwan issi wogga adussa bitanee de7ees. He bitaniyaayyo issi kushiyan usuppun biradhdheti, issi tohuwankka usuppun biradhdheti, muleera laatamanne oiddu biradhdheti de7oosona. He bitanee adussa mino asatu yaraappe gidiya asa. <sup>7</sup> He bitanee Israa7eelata naassido wode, Daawita ishaa SHaama na7ai Yonaataani a woriis. <sup>8</sup> Hageeti Gaate kataman de7iya adussa mino asatu yarata; eti ubbai Daawita kushiyaaninne a asaa kushiyan haiqqidosona.

## 21

### *Daawiti Asaa Qoodissiis*

*(Sameela Maxaafaa Naa77anttuwaa 24:1-25)*

<sup>1</sup> Seexaanai Israa7eela bolli metuwaa ehaanau koyidi, Daawiti Israa7eela asaa qoodanaadan denttettiis. <sup>2</sup> Daawiti Yoo7aabanne olanchchatu halaqata hagaadan yaagiis; “Daanappe Berssaabeha gakkanaashin biite; biidi Israa7eela asaa qoodite. Yaatidi asaa qoodai aappunakko tana erissite” yaagiis.

<sup>3</sup> SHin Yoo7aabi a, “GODAI ha de7iya ba asaa bolli xeetu kushiya gujjo! Ta godau, kawuwau, eti ubbai ta godaa ashkharata gidokkonaayye? Ta godai heгаа malabaa oottanau aibissi koyii? Israa7eela kawotettaa aibissi mooranchcha kessii?” yaagiis.

<sup>4</sup> SHin kawuwaa qaalai Yoo7aaba xooniis. Xoonin Yoo7aabi kiyidi, Israa7eela biittaa ubbaa yuuyiis; yuuyidi Yerusalaame simmiis. <sup>5</sup> Yoo7aabi qoodido asaa qoodaa Daawitayyo immiis. Israa7eela biittan ubban bisuwan olettanau danddayiya issi miiloonenne issi xeetu sha7u mino asati de7oosona. Qassi Yihudaa biittan bisuwan olettanau danddayiya oiddu xeetanne laappun tammu sha7u mino asati de7oosona.

<sup>6</sup> Yoo7aabi kawuwaa azazuwaa shenetido gishshau, Leewatanne Biniyaama zareta qoodan gujibeenna.

<sup>7</sup> Xoossai ha yohuwan ufaittibeenna gishshau, Israa7eela qaxxayiiis. <sup>8</sup> Yaatin Daawiti Xoossaa, “Taani ha oosuwan gita nagaraa oottaas. SHin ha77i nena woossais; ta mooruwaa, ne ashkharaa mooruwaa qucca. Taani daro eeyyabaa hanaas” yaagiis.

<sup>9</sup> Yaagin GODAI Daawitayyo hananabaa yootiya Gaada hagaadan yaagidi haasayis-siis; <sup>10</sup> “Ba; baada Daawita, ‘GODAI nena, “Taani nena heezzubaappe dooruwaa bessais; taani ne bolli polanau taayyo etappe issuwaa doora” yaagees’ yaaga” yaagiis.

<sup>11-12</sup> Yaagin Gaadi Daawitakko biidi a, “GODAI nena, ‘Haageetuppe issuwaa doora: heezzu laitta koshaa doorai? Woikko ne morkketi nena yedettishin, heezzu aginaa eta sinttaappe baqatanaagaa doorai? Woikko GODAA bisoi ne biittaa heezzu gallassaa shocanaagaanne hegaarakka qassi Israa7eela biittaa kantti kiyanaashin haiquwaa boshan shociya kiittanchchaa i kiittiyoogaa doorai?’ yaagees. Ane ha77i kuuyada, taani tana kiittidaagaayyo zaariyoobaa oda” yaagiis.

<sup>13</sup> Daawiti Gaada, “Taani keehippe un77ettaas. GODAA maarotai keehi gita gidiyo gishshau, ane taani a kushiyan kunddana; taani asa kushiyan kunddikke” yaagiis.

<sup>14</sup> Hega gishshau, GODAI Israa7eela bolli boshaa yeddin, laappun tammu sha7u Israa7eela asati haiqqidosona. <sup>15</sup> Hegaappe guyyiyan, Xoossai Yerusalaame bashshanau kiitanchchaa kiittiis. SHin kiitanchchai Yerusalaame bashshanau mati uttidaashin, GODAI be7idi azzaniis. Azzanidi bashshiya kiitanchchaa, “Agga! Hegee gidana!” yaagiis. He wode GODAA kiitanchchai Yaabuusiya Ornna audiya matan eqqiis.

<sup>16</sup> Kiitanchchai ba bisuwaa ba kushiyan oiqqidi, Yerusalaame bashshanau sa7aappenne saluwaappe gidдон eqqidaagaa Daawiti be7iis. Hegaappe guyyiyan, Daawitinne cimati waaruwaa maayidi, bantta som77uwan gufannidosona. <sup>17</sup> Daawiti Xoossaa, “Asai qoodettanaadan oottidai tana gidikkinaayye? Naagqidaageenne iitabaa oottidaagee tana. SHin ha dorssati, eti ai oottidonaa? Abeet GODAU, ta Xoossau, hayyanaa ne kushee tananne ta aawaa so asaa qaxxayo. Ne kushee ne asaa qaxxayoppo!” yaagiis.

<sup>18</sup> Hegaappe guyyiyan, GODAA kiitanchchai Gaada hagaadan yaagidi azaziis; “Daawiti pude Yaabuusiyyaa Ornna audiyaa biidi, GODAAYYO yarshshiyooosaa yan gimbanaadan yoota” yaagiis. <sup>19</sup> GODAA sunttan Gaadi yootidoogaadan Daawiti biis.

<sup>20</sup> He wode Ornninne a oiddu attuma naati audiyann gisttiyaa qoxxoosona. Qoxxiiddi guyye simmi xeellidi, kiitanchchaa be7idosona; be7in aara de7iya naati qosettidosona. <sup>21</sup> Daawiti Ornnakko yiido wode, Ornni a be7idi, audiyaa gaxi kiyidi, ba som77uwan sa7aa gattidi, Daawitayyo ziggiis.

<sup>22</sup> Hegaappe guyyiyan, Daawiti Ornna, “Boshai asaa bollappe kichchana mala, taani GODAAYYO yarshshuwaa yarshshiyooosaa keexxanau ne audiyaa taayyo baizzarkkii. Taani neeyyo kumetta waagaa qanxxana” yaagiis.

<sup>23</sup> Yaagin Ornni Daawita, “Neeyyo ekka; ta godai kawoi bana ufaissiyaabaa ootto. Be7a, xuuggiyo yarshshuwau booraa, eettanau kattaa qoxxiyo miishshaanne kattaa yarshshuwau gisttiyaa taani immana. Taani ha ubbaakka neeyyo immana” yaagiis.

<sup>24</sup> SHin Kawoi Daawiti Ornna, “CHii, chii! Taani kumetta waagaa qanxxada shamana. Aissi giikko, taani nebaa GODAAYYO ekkikke; qassi taani miishshaa kessabeennabaa xuuggiyo yarshsho oottada yarshshikke” yaagiis.

<sup>25</sup> Hegaa gishshau, Daawiti he audiyaa usuppun xeetu worqqa santtimiyaa immiis. <sup>26</sup> Hegaappe guyyiyan, Daawiti he sohuwan GODAAYYO yarshshuwaa yarshshiyooosaa keexxiis. Yaatidi xuuggiyo yarshshuwanne issippetettaa yarshshuwaa yarshshiis; yarshshidi GODAA woossin, GODAI xuuggiyo yarshshuwaa bolli saluwaappe tamaa yeddidi, ayyo zaariis.

<sup>27</sup> Hegaappe guyyiyan, GODAI kiitanchchaa azazin, kiitanchchai ba bisuwaa shoohuwau zaariis. <sup>28</sup> Daawiti GODAI a woosau zaaridoogaa be7idi, Yaabuusiyyaa Ornna audiyann naa77anttuwaa yarshshiis. <sup>29</sup> Muusee bazzon giigissido GODAA Dunkkaaneenne xuuggiyo yarshshuwaa yarshshiyooosai he wode Gabaa7oonan goinniyo xoqqa sohuwan de7ees. <sup>30</sup> SHin Daawiti GODAA kiitanchchaa bisuwau yayyido gishshau, Xoossaa oichchanau he sohuwaa baanau danddayibeenna.

## 22

<sup>1</sup> Hegaa gishshau, Daawiti, “GODAA Beeta Maqidasee hagan de7ana; Israa7eela asai xuuggiyo yarshshuwaa yarshshana sohoi haggaa gidana” yaagiis.

### *Beeta Maqidasiyyaa Keexxanau Giigissiyo Giigaa*

<sup>2</sup> Hegaa gishshau, Daawiti Israa7eela biittan de7iya hara biittaa asata shiishshanaadan azaziis. Xoossaa Beeta Maqidasiyyaa keexxanau shuchchaa massiyaageeti shuchchaa massidi loittanau eta gidloppe sunttiis. <sup>3</sup> Daawiti penggiyaa sanqqa oottanau misimaariyaayyoonne maaxafiyau haniya cora birataanne mazzananau danddayetenna, zawi banna nahaasiyyaa birataa giigissiis. <sup>4</sup> Sidoona asatinne Xiirsoosa asati Daawitayyo zigaa ehiyo gishshau, Daawiti qoodai banna zigaa giigissiis. <sup>5</sup> Daawiti, “Ta na7ai Solomoni lammachchane yelaga na7a. GODAAYYO keexettiya Beeta Maqidasee biitta ubban erettidanne bonchchettida, lo77o keetta gidanau bessees. Hegaa gishshau, au koshshiyaabaa taani giigissana” yaagiis. Daawiti haiqqanaappe kasetidi darobaa giigissi wottiis.

<sup>6</sup> Hegaappe guyyiyan, Daawiti ba na7aa Solomona xeesidi, GODAAYYO Israa7eela Xoossaayyo Beeta Maqidasiyaa keexxanaadan azaziis. <sup>7</sup> Daawiti Solomona, “Ta na7au, taani GODAA ta Xoossaa sunttaayyo Beeta Maqidasiyaa keexxanau ta wozanan qoppaas. <sup>8</sup> SHin GODAA gaalai tana, ‘Neeni daro suuttaa gussadasa; qassi daro olaakka oletadasa. Neeni ha sa7aa bollan ta sinttan daro suuttaa gussido gishshau, ta sunttaayyo Beeta Maqidasiyaa keexxakka. <sup>9</sup> Be7a; neeyyo issi saro na7i yelettana. A yuushuwan de7iya morkketu ubbaara taani a saro oottana. A sunttai Solomona; taani i kawotido laittan Israa7eela asaayyo sarotettaanne woppaa immana. <sup>10</sup> I ta sunttaayyo Beeta Maqidasiyaa keexxana. I ta na7a gidana; taanikka ayyo aawa gidana. A kawotaa araataa Israa7eelan merinau mintta essana’ yaagiis.

<sup>11</sup> “Ha77ikka ta na7au, GODAI nenaara gido. GODAI kase nebbaa haasayidoogaadan, GODAA ne Xoossaa Beeta Maqidasiyaa keexxanaagaa nena polisso. <sup>12</sup> GODAI nena Israa7eela asaa bolli kawo oottiyo wode, GODAA ne Xoossaa higgiiyaa naaganaadan, GODAI neeyyo aadhdhida eratettaanne akeekaa immo. <sup>13</sup> GODAI Muuse baggaara Israa7eela azazido azazuwaanne wogaa naagiyaabaa gidikko, ubbai neeyyo hanana. Aikko baa minna! Yayyoppa woikko dagammoppa! <sup>14</sup> Taani daro tuggan GODAA Beeta Maqidasiyaa keexxanau heezzu sha7anne oiddu xeetu kilo giraame deexxiya worqqaanne hasttamanne oiddu sha7u kilo giraame deexxiya biraa shiishshaas; qassi zawi baina nahaasiyaanne birataa shiishshaas; qassikka mittaanne shuchchaa giigisaas. Gidikkokka, neeni heгаа bolli haraa gujjanau koshshees. <sup>15</sup> Ne matan daro oosanchchati de7oosona; shuchchaa qoo7iyaageetinne massiyaageeti, anaaxetinne ubba oosuwaa oottanau danddayiya eranchcha asati de7oosona. <sup>16</sup> Eti oottiyo worqqau, birau, nahaasiyaanne biratau zawi baawa. Ha77i neeni oosuwaa doomma. GODAI nenaara gido” yaagiis.

<sup>17</sup> Daawiti Israa7eela kaalettiyaageeti ubbai ba na7aa Solomona maaddanaadan hagaadan yaagidi azaziis; <sup>18</sup> “GODAI intte Xoossai inttenaara de7enneeyye? I inttena ubbasaara shemppissibeennee? Ha biittan de7iyaageeta i ta kushiyan aatti immido gishshau, ha biittai GODAAYYONNE a asaayyo haarettiis. <sup>19</sup> Ha77ikka GODAA intte Xoossaa koyanau intte wozanaanne intte shemppuwaa immite. GODAA sunttau keexettida Beeta Maqidasiyaa gidдон GODAA Maachchaa Taabootaanne Xoossaa geeshsha miishshata ehiidi wottanaadan, intte denddidi, GODAA Xoossaa Beeta Maqidasiyaa keexxite” yaagiis.

## 23

<sup>1</sup> Daawiti ceeggido wode, ba na7aa Solomona Israa7eela bolli kawoyiis.

### *Leewatu Oosuwaa*

<sup>2</sup> Daawiti Israa7eela kaalettiyaageeta ubbata, qeesetanne Leewata issippe shiishshiis. <sup>3</sup> Hasttamu laittanne hegaappe bollaara de7iya Leewati goodettidosona; goodettidi eti muleera hasttamanne hospun sha7u attumaasa gididosona. <sup>4</sup> Hageetu giddoppe GODAA Beeta Maqidasiyaayyo aawatiya laatamanne oiddu sha7ata kawoi wottiis. Qassi halaqatanne pirda daannata usuppun sha7ata wottiis. <sup>5</sup> Penggiyaa naagiyaageeta oiddu sha7ata wottiis. GODAA galatanau Daawiti medhdhido yetta miishshan GODAA galatiyaageeta oiddu sha7ata wottiis.

<sup>6</sup> Daawiti Leewi yelido attuma naata Gershshoona, Qahaatanne Maraara eta yaran yaran heezzu citan shaakkiis.

<sup>7</sup> Gershshooni yelido attuma naati La7idaananne SHim77a. <sup>8</sup> La7idaana attuma naati heezza; etikka Yihi7eela, Zetaamanne Yuu7eela. <sup>9</sup> SHim77a attuma naati heezzati SHalomoota, Hazii7eelanne Haaraana; hageeti La7idaana yaratuyyo halaqata. <sup>10-11</sup> SHim77a attuma naati oiddati, bantta yeletaa yeletaa maaran Yahaata, Ziina,



Yi7uushanne Bari7a. Yi7uushassinne Bari7assi naati darenna; heгаа gishshau, eti issi yaradan qoodettidosona.

<sup>12</sup> Qahaata naati oiddati Amiraama, Yixihaara, Kebroonanne Uzzi7eela. <sup>13</sup> Amiraama attuma naati Aaroonanne Muusa. Aarooninne a zerettai ubbaappe aaro geeshsha gidanaadan dummatidosona. Eti GODAA sinttan ixaanaa cuwayanau, GODAAYYO ootanaunne GODAA sunttan asaa anjjanau merinau dummatidosona. <sup>14</sup> Xoossa asa gidiya Muuse naati Leewa zaretuura gatto qoodettidosona. <sup>15</sup> Muuse naati Gershshoomanne El77eezara. <sup>16</sup> Gershshooma naatu giddoppe halaqai SHabu7eela. <sup>17</sup> El77eezara na7ai Rahaabiyaa. El77eezarayyo hara na7i baawa; shin Rahaabiyaa naati keehi cora.

<sup>18</sup> Yixihaara naatu halaqai SHalomiita. <sup>19</sup> Kebroona na7ai bairai Yiriiya; naa77anttoi Amaariyaa; heezanttoi Yahaazi7eela; oiddanttoi Yiqami7aama. <sup>20</sup> Uzzi7eela na7ai bairai Mikiyaasa; naa77anttoi Yishiyaa.

<sup>21</sup> Maraara naati Maahilanne Musha. Maahila naati El77aazaranne Qiisha. <sup>22</sup> El77aazari macca naatuppe attin, attuma naata yelennan haiqqiis. Hegaa gishshau, eta ishantti Qiisha naati eta machchidosona. <sup>23</sup> Musha naati heezzati Maahila, Edeeranne Yiremoota.

<sup>24</sup> Leewa yeletan bantta zariyaaninne keettan bantta sunttan mazggafettidaageeti hageeta; laatamu laittanne hegaappe bollaara de7iya Leewa zareti ubbai GODAA Beeta Maqidasiyan oottidosona. <sup>25</sup> Daawiti, “GODAI Israa7eela Xoossai ba asaa shemppisiis. GODAI Yerusalaamen merinau de7ana. <sup>26</sup> Hegaa gishshau, Dunkkaaniyaanne a gidдон go7ettiyo miishshata hagaappe sinttanau Leewati tookkanau bessenna” yaagiis. <sup>27</sup> Daawiti wurssettan azazido azazuwaadankka laatamu laittanne hegaappe bollaara de7iya Leewati qoodettidosona. <sup>28</sup> Eti GODAA Beeta Maqidasiyan oottiya Aaroonanne zerettata maaddoosona. GODAA Beeta Maqidasiyan kareeranne soora oot-toosona; geeshsha miishsha ubbaa tunennaadan naagoosona. <sup>29</sup> Qassi eti Xoossaa sinttan wottiyo oittaayyo, kattaa yarshshuwaayyo, shiishshiyo xiilliyayyo, irshshoi gelibeenna oittaayyoonne zaitiyan munaqettiya xiilliyayyo aawatoosona; eti makkiyo oobaayyoonne likkiyoobau ubbau aawatoosona. <sup>30-31</sup> Qassi eti ubba gallassi maal-ladonne omarssi, GODAASSI xuuggiyo yarshshoi yarshshettiyo Sambbata gallassi, ag-inai xeeriyo wodenne higgiiyan xaafettida hara baala gallassati gakkiyo wode, GODAA galatanaunne bonchchanau sunttettidosona. <sup>32</sup> Dunkkaaniyaanne GODAA Beeta Maqidasiyaa naaganaadaaninne Aaroonanne zerettata maaddanaadan aawatetta Leewatuyyo imettiis.

## 24

### *Qeesetu Oosuwaa*

<sup>1</sup> Aaroonanne zaretu citati hagaappe kaallidi xaafettidaageeta. Aaroonanne naati Nadaaba, Abi7ha, El77aazaranne Itaamaara. <sup>2</sup> SHin Nadaabinne Abi7hu na7a yelennan bantta aawaappe kase haiqqidosona. Hegaa gishshau, El77aazarinne Itaamaari qeese gididosona. <sup>3</sup> Daawiti Aaroonanne zareta eta oosuwaadan oosuwaadan citan shaakkiis. El77aazara yaraappe Xaadooqinne Itaamaara yaraappe Abimeleki Daawita maaddidosona. <sup>4</sup> El77aazara yarati tammanne usuppun citan shaahettin, Itaamaara yarati qassi hosppun citan shaahettidosona. El77aazara yaratu halaqati Itaamaara yaratu halaqatuppe dari beettido gishshau, hegaadan haniis. <sup>5</sup> El77aazara yaratu gid-dooninne Itaamaara yaratu gidдон Beeta Maqidasiyau halaqatinne Xoossaa oosuwau halaqati de7iyo gishshau, hageetinne hinkkootinne oosuwaa saaman shaakkidosona. <sup>6</sup> El77aazara yaratinne Itaamaara yarati bantta kayan kayan saamaa kessidosona. Kessin Leewa zare gidiya Nataani7eela na7ai xaafee SHamaa7ee eta mazggafiis. Kawoinne a halaqati, qeesiyaa Xaadooqinne Abiyaataara na7ai Abimeleki, qeesetu yaratu halaqatinne Leewatu yaratu halaqati ubbati ha yohuwau markka.



<sup>7</sup> Ha asati saamaa kessin, koiro saamai Yihoyaariba gakkiis. Naa77anttoi Yadaaya gakkiis. <sup>8</sup> Heezanttoi Hariima gakkiis. Oiddanttoi Sa7oorima gakkiis. <sup>9</sup> Ichchashanttoi Malkkiyaa gakkiis. Usuppunttoi Miyaamiina gakkiis. <sup>10</sup> Laappunttoi Haqqooxa gakkiis. Hospunttoi Abiyya gakkiis. <sup>11</sup> Uddufunttoi Yaasa gakkiis. Tammanttoi SHakaaniyaa gakkiis. <sup>12</sup> Tammanne isiininttoi Eliyaashiba gakkiis. Tammanne naa77anttoi Yaaqiima gakkiis. <sup>13</sup> Tammanne heezanttoi Huppa gakkiis. Tammanne oiddanttoi Yesheka7aaba gakkiis. <sup>14</sup> Tammanne ichchashanttoi Bilgga gakkiis. Tammanne usuppunttoi Imeera gakkiis. <sup>15</sup> Tammanne laappunttoi Heziira gakkiis. Tammanne hospunttoi Happixeexa gakkiis. <sup>16</sup> Tammanne uddufunttoi Pataahiyya gakkiis. Laatamanttoi Yihezqqeela gakkiis. <sup>17</sup> Laatamanne isiininttoi Yaakiina gakkiis. Laatamanne naa77anttoi Gamuula gakkiis. <sup>18</sup> Laatamanne heezanttoi Dalaaya gakkiis. Laatamanne oiddanttoi Ma7aaziyya gakkiis.

<sup>19</sup> GODAI Israa7eela Xoossai eta maizza aawaa Aaroona baggaara azazidoogaadan, eti GODAA Beeta Maqidasiyaa gelidi, kayan kayan oottanau xaafettidosona.

### *Hara Leewatu Sunntaa*

<sup>20</sup> Leewa zaretu halaqati harati hagaappe kaallidi xaafettidaageeta.

Yehidaayi SHabu7eela baggaara Amiraama zare.

<sup>21</sup> Yishee Rahaabiyaa zare.

<sup>22</sup> Yahaati SHalomiita baggaara Yixihaara zare.

<sup>23</sup> Yiriiyi, Amaaree, Yahaazi7eelinne Yiqami7aami Kebroona zare; eti bantta yeletaa maaran xaafettidosona.

<sup>24</sup> SHamiiri Mikiyaasa baggaara Uzzi7eela zare.

<sup>25</sup> Zakkaariyaasi Mikiyaasa ishaa Yishiyaa baggaara Uzzi7eela zare.

<sup>26</sup> Maahili, Mushinne Yaa7izee Maraara zareta. <sup>27</sup> Yaa7iziyaa naati heezati SHohaama, Zakkuuranne Iibira. <sup>28</sup> Maahila naati naa77ati El77aazaranne Qiisha. El77aazarayyo attuma na7i baawa. <sup>29</sup> Qiishayyo Yiraahima7eela giyo issi attuma na7ai de7ees. <sup>30</sup> Mushayyo Maahila, Edeeranne Yiremoota geetettiya heezzu attuma naati de7oosona.

Hageeti Leewa zaretu halaqata.

<sup>31</sup> Kase eta dabboti, Aaroona zare qeeseti oottidoogaadan, Leewa zaretu halaqatinne kaalotiya ishanttuppe issoi saamaa yeggees. Saamai kiyiyo wode Kawoi Daawiti, Xaadooqi, Abimeleki, qeesetu halaqatinne Leewatu halaqati markka.

## 25

### *Beeta Maqidasiyan Yexxiyaageeta*

<sup>1</sup> Daawitinne ola gadaawati Asaafa naatuppe, Hemaana naatuppenne Yidutuuna naatuppe maazingqiyan diittaaninne daalan hananabaa yootiyaageetu oosuwaa oot-tanaadan dummayidosona. Banttau imettida oosuwaa oottin, sunntai mazggafettido asati hageeta.

<sup>2</sup> Asaafa naati Zakkuura, Yooseefa, Nataaniyaanne Asaari7eela. Asaafa naati kawoi azazin, hananabaa yootiya Asaafappe garssaara azazettoosona.

<sup>3</sup> Yidutuuna naati Gadaaliyaa, Xara, Yishaa7iyaa, SHim77a, Hashaabiyaanne Mati-itiyaa. Ha usuppunati maazingqiyan hananabaa yootiiddi, GODAA galatiiddinne bonchchiiddi, bantta aawaa Yidutuunappe garssaara azazettidosona.

<sup>4</sup> Hemaana naati Buqqiyaa, Mataaniyaa, Uzzi7eela, SHabu7eela, Yaarimoota, Hanaaniyaa, Hanaana, Eli7aata, Giddalita, Romamtti7eezera, Yoshibaqaasha, Mal-loota, Hotiiranne Maahizi7aata. <sup>5</sup> Hageeti ubbai kawuwaayyo hananabaa yootiya Hemaana naata. Xoossai kase immana giidoogaadan, Hemaana xoqqu xoqqu oottana mala, ha tammanne oiddu attuma naatanne heezzu macca naata ayyo immiis. <sup>6</sup> Hageeti

ubbai GODAA Beeta Maqidasiyan daalaa qaattanau, diittaanne maazinqqiyaa diixxiid-dinne yexxiiddi goinnanau, bantta aawaappe garssaara de7oosona.

Asaafi, Yidutuuninne Hemaani kawuwaa azazuwan de7oosona. <sup>7</sup> Hageeti laatanne oiddu asati daro erai de7iyo asata. Eta dabboti yettan loohidaageeta; eti muleera naa77u xeetanne hosppun tammanne hosppuna. <sup>8</sup> Eti bantta oosuwa shaakki eranau gitai guuttai, asttamaaree tamaaree, ubbaikka lagge saamaa yeggidosona.

<sup>9</sup> Yeggin koiro saamai Asaafa na7aa Yooseefa gakkii; i, a naatinne a dabboti muleera tammanne naa77a. Naa77antto saamai Gadaaliyaa gakkii; i, a naatinne a dabboti muleera tammanne naa77a. <sup>10</sup> Heezantto saamai Zakkuura gakkii; i, a naatinne a dabboti muleera tammanne naa77a. <sup>11</sup> Oiddantto saamai Xara gakkii; i, a naatinne a dabboti muleera tammanne naa77a. <sup>12</sup> Ichchashantto saamai Nataaniyaa gakkii; i, a naatinne a dabboti muleera tammanne naa77a. <sup>13</sup> Usuppuntta saamai Buqqiyaa gakkii; i, a naatinne a dabboti muleera tammanne naa77a. <sup>14</sup> Laappuntta saamai Asaari7eela gakkii; i, a naatinne a dabboti muleera tammanne naa77a. <sup>15</sup> Hosppuntta saamai Yishaa7iyaa gakkii; i, a naatinne a dabboti muleera tammanne naa77a. <sup>16</sup> Uddufuntta saamai Mataaniyaa gakkii; i, a naatinne a dabboti muleera tammanne naa77a. <sup>17</sup> Tammantta saamai SHim77a gakkii; i, a naatinne a dabboti muleera tammanne naa77a. <sup>18</sup> Tammanne isiinintta saamai Uzzi7eela gakkii; i, a naatinne a dabboti muleera tammanne naa77a. <sup>19</sup> Tammanne naa77antta saamai Hashaabiya gakkii; i, a naatinne a dabboti muleera tammanne naa77a. <sup>20</sup> Tammanne heezantta saamai SHabu7eela gakkii; i, a naatinne a dabboti muleera tammanne naa77a. <sup>21</sup> Tammanne oiddantta saamai Matiitiyaa gakkii; i, a naatinne a dabboti muleera tammanne naa77a. <sup>22</sup> Tammanne ichchashantta saamai Yaarimoota gakkii; i, a naatinne a dabboti muleera tammanne naa77a. <sup>23</sup> Tammanne usuppuntta saamai Hanaaniyaa gakkii; i, a naatinne a dabboti muleera tammanne naa77a. <sup>24</sup> Tammanne laappuntta saamai Yoshibaqaasha gakkii; i, a naatinne a dabboti muleera tammanne naa77a. <sup>25</sup> Tammanne hosppuntta saamai Hanaana gakkii; i, a naatinne a dabboti muleera tammanne naa77a. <sup>26</sup> Tammanne uddufuntta saamai Malloota gakkii; i, a naatinne a dabboti muleera tammanne naa77a. <sup>27</sup> Laatamantta saamai Eli7aata gakkii; i, a naatinne a dabboti muleera tammanne naa77a. <sup>28</sup> Laatamanne isiinintta saamai Hotiira gakkii; i, a naatinne a dabboti muleera tammanne naa77a. <sup>29</sup> Laatamanne naa77antta saamai Giddalnta gakkii; i, a naatinne a dabboti muleera tammanne naa77a. <sup>30</sup> Laatamanne heezantta saamai Maahizi7aata gakkii; i, a naatinne a dabboti muleera tammanne naa77a. <sup>31</sup> Laatamanne oiddantta saamai Romamtti7eezera gakkii; i, a naatinne a dabboti muleera tammanne naa77a.

## 26

### *Beeta Maqidasiyaa Penggiyaa Naagiyaageeta*

<sup>1</sup> Beeta Maqidasiyaa penggiyaa naagiyaageeti hagaappe kaallidi xaafettidaageeta.

Koiroi Qoraaha yaraappe Asaafa baggaara Qore na7aa Mashelemiyaa. <sup>2</sup> Mashelemee laappun attuma naata yeliis; eti bantta yeletaa maaran Zakkaariyaasa, Yidi7eela, Zabaadiyaa, Yaatini7eela, <sup>3</sup> Elaama, Yahohanaanne Eliyaho7enaaya.

<sup>4</sup> Xoossai Obeedi-Eedoomakka anjjido gishshau, i hosppun attuma naata yeliis. Eti bantta yeletaa maaran SHamaa7iyaa, Yihozabaada, Yo7aaha, Sakaara, Nataani7eela, <sup>5</sup> Ami7eela, Yisaakooranne Pa7ulntaaya. <sup>6</sup> Qassi Obeedi-Eedooma na7ai SHamaa7eekka usuppun attuma naata yeliis; eti mino asa gidido gishshau, bantta aawaa keettan halaa gididosona. <sup>7</sup> SHamaa7iyaa naati Ootina, Rafaa7eela, Yobeedanne Elzabaada; eta ishantti Eelihunne Samaakee aadhida mino asata. <sup>8</sup> Hageeti ubbati Obeedi-Eedooma zareta; eti, eta naatinne eta dabboti oosuwau mino. Obeedi-Eedooma zareti muleera usuppun tammanne naa77a.

<sup>9</sup> Mashelemyaayyo mino naatinne mino dabboti de7oosona; eti muleera tammanne hosppuna.

<sup>10</sup> Maraara yaraappe Hoosayyookka naati de7oosona. SHiimiri baira na7a gidenna; shin a aawai a halaqa oottiis. <sup>11</sup> A ishantti Hilqqiyaa, Xabaaliyaanne Zakkaariyaasa. Hoosa naatinne a dabboti muleera tammanne heezza.

<sup>12</sup> Beeta Maqidasiyaa penggiyaa naagiyaageeti bantta keettaa asaa halaqatun, citan citan shaahettidosona. Hara Leewatudan etakka GODAA Beeta Maqidasiyaa oosoi shaahuwan gakkiiis. <sup>13</sup> Penggiyaa ubbaa naaganau bantta keettan keettan guuttai gitai saamaa kessidosona. <sup>14</sup> Arshsho Penggiyaa giyo penggiyaa naagiyo saamai SHEleemiyaa gakkiiis. Lo77o zoriya a na7aa Zakkaariyaasa Huuphessa Penggiyaa giyo penggiyaa naagiyo saamai gakkiiis. <sup>15</sup> Obeedi-Eedooma Tohossa Penggiyaa giyo penggiyaa naagiyo saamai gakkiiis. A naata buquraa minjjiyo keettaa naagiyo saamai gakkiiis. <sup>16</sup> Arggo Penggiyaanne bolla ogiyaa baggaara de7iya SHalekoota Penggiyaa geetettiya penggeta naagiyo saamai SHufimanne Hoosa gakkiiis. Naagoi kayan kayan gakkees.

<sup>17</sup> Gallassan gallassan arshsho baggaara usuppun Leewati naagoosona. Huuphessa baggaara oiddati naagoosona. Tohossa baggaara oiddati naagoosona. Qassi naa77ai naa77ai buquraa minjjiyo keettaa naagoosona. <sup>18</sup> Arggo baggaara dabaabau efiya ogiyaa oiddati naagoosona. Qassi dabaabaa gidduwaa naa77ati naagoosona. <sup>19</sup> Simmi Qoraaha yaratussinne Maraara yaratussi imettida pengge naago oosoi haggaa.

#### *Beeta Maqidasiyaa Giddon Oottiyo Hara Oosota*

<sup>20</sup> Akiyya giyo Leewee Xoossaa Beeta Maqidasiyan de7iya buquraanne Xoossaayyo dummayi wottido imota naaganau sunttettiis. <sup>21</sup> Gershshoona na7aa La7idaana yaraappe Yihi7eeli dumma dumma keettaa asau aawatees. <sup>22</sup> Yihi7eela naati Zetaa-manne a ishaa Yuu7eela; eti GODAA Beeta Maqidasiyan de7iya buquraa naaganau sunttettidosona.

<sup>23</sup> Amiraama yaratuyyo, Yixihaara yaratuyyo, Kebroona yaratuyyoonne Uzzi7eela yaratuyyo oosoi shaahetti imettiis. <sup>24</sup> Muuse na7aa Gershshooma yara gidiya SHabu7eeli Beeta Maqidasiyan de7iya buquraa naagiyaageetu halaqatu bolli sunttettiis. <sup>25</sup> I Gershshooma ishaa El77eezara baggaara SHalomiitayyo dabbotees. El77eezari Rahaabiyaa yeliis; Rahaabee Yishaa7iyaa yeliis; Yishaa7ee Yoraama yeliis; Yoraami Ziikira yeliis; Ziikiri SHalomiita yeliis. <sup>26</sup> Kawoi Daawiti, aawatu keettaa asaa halaqati, shaalaqati, mato halaqatinne ola gadaawati Xoossaayyo dummayi wottido miishsha ubbaa bolli SHalomiitinne a dabboti sunttettidosona. <sup>27</sup> Ha miishshaa Beeta Maqidasiyaa bottokonanau dummayi wottida asati ha miishshaa kase olaappe omoooddi wottidosona. <sup>28</sup> Qassi hananabaa yootiya Sameeli, Qiisa na7ai Saa7ooli, Neera na7ai Abaneerinne Xaruuyi na7ai Yoo7aabi kase dummayi wottido imota ubbaa SHalomiitinne a dabboti naagoosona.

#### *Hara Leewata Gakkida Oosuwaa*

<sup>29</sup> Yixihaara yaraturuppe Kanaaneenne a naati Beeta Maqidasiyaappe kareera de7iya oosuwaa Israa7eela asaa aissanaunne daannatanau sunttettidosona.

<sup>30</sup> Kebroona yaraturuppe Hashaabeenne a dabboti, issi sha7anne laappun xeetu mino asati, GODAA ooso ubbaunne kawuwaa ooso ubbau Yorddaanoosa SHaafaappe hefintan arggo baggaara de7iya Israa7eela asaa bolli sunttettidosona. <sup>31</sup> Kebroona yaraturuppe halaqatiyaagee Yiriiya. Daawiti kawotido oitamantto laittan koyin, eta asaa gidloppe mino asati Gala7aade biittan Yaa7izeera giyo sohuwan beettidosona. <sup>32</sup> Aawatu keetta asau halaqatiya Yiriiya dabboti minoti naa77u sha7anne laappun xeeta. Kawoi Daawiti Xoossaa ooso ubbaunne kawuwaa ooso ubbau eta Roobeela zaretu biittaa bolli, Gaada zaretu biittaa bollinne Minaase zaretuppe baggatu biittaa bolli sunttiis.

## 27

### *Israa7eela Asaa Kaalettiyaageeta*

<sup>1</sup> Bantta citan citan kawotettaa aissida Israa7eela keettaa asatu halaqati, shaalaqatinne mato halaqati hagaappe kaallidi xaafettidaageeta. Issi issi citan laatamanne oiddu sha7u asati de7oosona. Issi issi citai laittaa gidдон issi issi aginau kayan kayan kawotettaa oosuwa oottanau kiyees.

<sup>2</sup> Koiro aginan kiyiya citaa kaalettiyaagee Zabddi7eela na7aa Yaashobi7aama; a citan laatamanne oiddu sha7u asai de7ees. <sup>3</sup> Yaashobi7aami Paareesa zeretta; i koiro aginau olanchchatu halaqatuyyo gadaawa.

<sup>4</sup> Naa77antto aginan kiyiya citaa kaalettiyaagee Ahoohiyaa Dodaaya; a citan laatamanne oiddu sha7u asai de7ees. Appe kaalliyaagee Miqiloota.

<sup>5</sup> Heezzantto aginan kiyiya citaa kaalettiyaagee qeesiyaa Yoodaaha na7aa Banaaya; a citan laatamanne oiddu sha7u asai de7ees. <sup>6</sup> Banaayi hasttamu erettida asatu gidдон mino asa gididi, hasttamatuyyo halaqatiis. A sohuwan a na7ai Amizabaadi halaqatiis.

<sup>7</sup> Oiddantto aginan kiyiya citaa kaalettiyaagee Yoo7aaba ishaa Asaaheela; a citan laatamanne oiddu sha7u asai de7ees. A sohuwan a na7ai Zabaadee halaqatiis.

<sup>8</sup> Ichchashantto aginan kiyiya citaa kaalettiyaagee Yixihaara yaraappe SHamihuuta; a citan laatamanne oiddu sha7u asai de7ees.

<sup>9</sup> Usuppuntta aginan kiyiya citaa kaalettiyaagee Taqo7appe yiida Iqqeesha na7aa Ira; a citan laatamanne oiddu sha7u asai de7ees.

<sup>10</sup> Laappuntta aginan kiyiya citaa kaalettiyaagee Efireema zariyaappe Pilonappe yiida Heleexa; a citan laatamanne oiddu sha7u asai de7ees.

<sup>11</sup> Hosppuntta aginan kiyiya citaa kaalettiyaagee Huushappe yiida Sibbakaaya; a citan laatamanne oiddu sha7u asai de7ees. Sibbakaayi Yihudaa zarenne Zaraaha yara.

<sup>12</sup> Uddufuntta aginan kiyiya citaa kaalettiyaagee Biniyaama zare gidida Anatootiyaa Abi7eezera; a citan laatamanne oiddu sha7u asai de7ees.

<sup>13</sup> Tammantta aginan kiyiya citaa kaalettiyaagee Naxoofappe yiida, Zaraaha yara gidiya Maahiraaya; a citan laatamanne oiddu sha7u asai de7ees.

<sup>14</sup> Tammanne isiinintta aginan kiyiya citaa kaalettiyaagee Pir77aatoonappe yiida, Efireema zare gidiya Banaaya; a citan laatamanne oiddu sha7u asai de7ees.

<sup>15</sup> Tammanne naa77antto aginan kiyiya citaa kaalettiyaagee Naxoofappe yiida, Otini7eela yara gidiya Helddaaya; a citan laatamanne oiddu sha7u asai de7ees.

### *Israa7eela Zareta Aissiyaageeta*

<sup>16</sup> Israa7eela zareta aissanau sunttettidaageeti hagaappe kaallidi xaafettidaageeta. Roobeela zariyaa aissiyaagee Ziikira na7aa El77eezara.

Simoonaa zariyaa aissiyaagee Maa7ika na7aa SHafaaxiyaa.

<sup>17</sup> Leewa zariyaa aissiyaagee Qamu7eela na7aa Hashaabiya.

Aaroonaa zariyaa aissiyaagee Xaadooqa.

<sup>18</sup> Yihudaa zariyaa aissiyaagee Daawita ishaa Eeliha.

Yisaakoora zariyaa aissiyaagee Mikaa7eela na7aa Omira.

<sup>19</sup> Zaabiloonaa zariyaa aissiyaagee Obaadiyaa na7aa Yishimaa7iyaa.

Nifttaaleema zariyaa aissiyaagee Aziri7eela na7aa Yaarimoota.

<sup>20</sup> Efireema zariyaa aissiyaagee Azaaziyaa na7aa Hoshee7a.

Yorddaanoosa SHaafaappe arggo baggan de7iya Minaase zaretuppe baggaa aissiyaagee Padaaya na7aa Yuu7eela.

<sup>21</sup> Yorddaanoosa SHaafaappe arshsho bagga Gala7aaden de7iya Minaase zaretuppe baggaa aissiyaagee Zakkaariyaasa na7aa Idda.

Biniyaama zariyaa aissiyaagee Abaneera na7aa Ya7isi7eela.

<sup>22</sup> Daana zariyaa aissiyaagee Yirohaama na7aa Azaari7eela.

Hageeti Israa7eela zareta aissiyaageeta.

<sup>23</sup> GODAI Israa7eela asaa saluwaa xoolinttiyaadan corayana giido gishshau, Daawiti laatamu laittanne laatamu laittaappe garssaara de7iyaageeta qoodan gelissibeenna. <sup>24</sup> Xaruuyi na7ai Yoo7aabi asaa qoodaa doommiis; shin goodi wurssibeenna. Asaa goodido gaasuwan GODAI Israa7eela asaa bolli hanqqettiis. Hegaa gishshau, eta qoodai Kawuwaa Daawita taarikiyaa mazggafan xaafettibeenna.

### *Kawo Aquwaassi Aawatiyaageeta*

<sup>25</sup> Kawo buquraa minjjiyoosau aawatiyaagee Adii7eela na7aa Azimaaweeta. Gaxariyan, katamatuuninne moottatun de7iya miishshaassi aawatiyaagee Ooziyaana na7aa Yonaataana. <sup>26</sup> Biittaa goyiya goshshanchchatu bolli aawatiyaagee Kaluuba na7aa Eezira. <sup>27</sup> Woiniyaa turaa sohotuuyo aawatiyaagee Raamappe yiida SHim77a. Woiniyaa eessaa minjjiyoosau aawatiyaagee SHafaamappe yiida Zabdda.

<sup>28</sup> Bargguwan de7iya wogaraayyoonne ettaayyo aawatiyaagee Gedeerappe yiida Ba7aalihanaana. Zaitiyaa minjjiyoosau aawatiyaagee Yo7aasha. <sup>29</sup> Saaroonna Dembban heemettiya miizzaayyo aawatiyaagee Saarooniyaa SHiixiraaya. Wombban hemettiya miizzaayyo aawatiyaagee Adilaaya na7aa SHafaaxa. <sup>30</sup> Gaameelatuyyo aawatiyaagee Isimaa7eeliyaa Obiila. Haretuyyo aawatiyaagee Meronootiyaa Yehidaaya. <sup>31</sup> Dorssatuyyoonne deeshshatuyyo aawatiyaagee Aggaari zariyaappe Yaaziiza. Hageeti ubbai Daawita aquwaa bolli aawatidaageeta.

### *Daawita Zoriyaageeta*

<sup>32</sup> Daawita aawaa ishai Yonaataani xaafee, akeekanchcha asanne kawuwaa zoriya asa. Hakimoona na7ai Yihi7eeli kawuwaa naata tamarissee. <sup>33</sup> Akixoofeeli qassi kawuwaa zoriyaagaa. Arkkiyaa Hushaayi kawoi siiqiyo asa. <sup>34</sup> Akixoofeeli haiqqin, a sohuwan Banaaya na7ai Yoodaaheenne Abiyaataari kawuwaa zoriyaageeta; Yoo7aabi kawuwaa ola gadaawaa.

## 28

### *Daawiti Beeta Maqidasiyaa Waati Keexxanaakko Odiis*

<sup>1</sup> Israa7eela halaqati ubbai Yerusalaamen shiiqanaadan Kawoi Daawiti azaziis; hegaa gishshau, zaretu halaqati, kawo oosanchchatu halaqati, shaalaqati, mato halaqati, kawuwaayyoonne kawuwaa naatuuyo de7iya aquwaayyoonne mehiyaayyo aawatiyaageeti, kawuwaa keettan oottiya halaqati, erettida mino asatinne gita asati ubbai Yerusalaamen shiiqidosa.

<sup>2</sup> SHiiqin Kawoi Daawiti dendra eqqidi, hagaadan yaagiis; “Ta ishanttoo, ta asatoo, siyite! GODAA Maachchaa Taabootaa wottiyoonne nu Xoossaa tohoi shemppiyo Beeta Maqidasiyaa keexxanau ta wozanan qoppaas; keexxanau koshshiyaabata akka giigisaas. <sup>3</sup> SHin Xoossai tana, ‘Neeni olanchchanne suutta gussida asa gidiyo gishshau, ta sunttaayyo keetta keexxakka’ yaagiis. <sup>4</sup> Taani Israa7eela bolli merinau kawotanaadan, GODAI Israa7eela Xoossai ta aawaa keetta asaa ubbaappe tana dooriis. Kaalet-tanaadan koiro Yihudaa zariyaa dooriis; Yihudaa zariyaappe ta aawaa so asaa dooriis; ta aawaa naatu giddoppe tana dooridi, Israa7eela ubbaa bolli kawoyanau ufaittiis. <sup>5</sup> GODAI taayyo cora naata immiis; ta naatu ubbaappe GODAA kawotaa araatan uttidi, Israa7eela bolli kawotanaadan ta na7aa Solomona dooriis.

<sup>6</sup> “GODAI tana, ‘Ta Beeta Maqidasiyaanne ta dabaabaa keexxanaagee ne na7aa Solomona. Aissi giikko, i taayyo na7a gidanaadan taani a dooraas; taanikka ayyo aawa gidana. <sup>7</sup> I ha77i oottiyoogaadan sinttappekka ta azazuwaanne ta higgiiyaa minnidi naagikko, taani a kawotetta merinau minttana’ yaagiis. <sup>8</sup> Hegaa gishshau, ha77ikka GODAA yaa7ai, Israa7eela asai ubbai be7ishiininne nu Xoossai siyishin, GODAA intte Xoossaa azazuwaa ubbaa intte minttidi naagana mala, taani intteyyo odais. Yaatikko, intte ha lo77o biittaa laattanne intte naat akka merinau laatissana.



<sup>9</sup> “Solomona, ta na7au, ne aawaa Xoossaa era. Ne kumetta wozanaaninne ne eeno giya qofan ayyo ootta. Aissi giikko, GODAI wozanaa ubbaa qorees; qofan de7iya halchchuwaa ubbaakka erees. Neeni a koyikko, i neeyyo beettana; shin neeni a aggikko, i nena merinau aggi bayana. <sup>10</sup> Ha77ikka Beeta Maqidasiyaa keexxanau GODAI nena dooridoogaa dogoppa. Minnada oosuwaa ootta” yaagiis.

<sup>11</sup> Hegaappe guyyiyan, Daawiti ba na7aa Solomonayyo Beeta Maqidasiyaa keexxiyo halchchuwaa immiis; baranddaa halchchuwaa, buquraa minjjiyoosaa halchchuwaa, bolla kifiliyaanne giddo kifiliyaa halchchuwaanne nagarai atto geetettiyo sohuwaa qum77uwaa wottiyo kifiliyaa halchchuwaa immiis. <sup>12</sup> Qassikka Daawiti ayyo GODAA Beeta Maqidasiyaa dabaabaa keexxanau ba qofan de7iya halchchuwaa, a yuushuwan de7iya ubba kifiletu halchchuwaanne Xoossaa Beeta Maqidasiyaa buquraa minjjiyo sohotunne GODAASSI dummayi wottido imota minjjiyo sohotu halchchuwaa immiis.

<sup>13</sup> Hegaadankka Daawiti qeesetunne Leewatu citati bantta oosuwaa oottana maaraa, GODAA Beeta Maqidasiyaa oosuwaa oottana maaraanne Beeta Maqidasiyaa miishshata naagiyo maaraa yootiya halchchuwaa ayyo immiis.

<sup>14</sup> Qassikka Daawiti hagaappe kaallidi xaafettida dumma dumma miishshata medhdhanau wosa keenaa deexxiya worqqaanne wosa keenaa deexxiya biraa koshshiyaakko xaafidi, Solomonayyo immiis. <sup>15</sup> Hegeetikka, worqqa xomppeta wottiyo ballaanne worqqa xomppeta, bira xomppeta wottiyo ballaanne bira xomppeta, <sup>16</sup> GODAA sinttan oittaa wottiyo worqqa xaraphpheedata, bira xaraphpheedata, <sup>17</sup> worqqa qapheta, worqqa kereta, worqqa wanccata, worqqa kuixaarota, bira kuixaarotanne <sup>18</sup> ixaanaa cuwayiyo geeshsha worqqa saaxiniyaa. GODAA Maachchaa Taabootaa bolli bantta qefiyaa miccidi kammiya, kiruubeta wottiyo worqqa gaariyaa giigissiyo halchchuwaakka ayyo immiis. <sup>19</sup> Daawiti, “GODAI ba kushiya ta bolli wottidi, ha xaafettida halchchuwaa ubbaa tana erissiis” yaagiis.

<sup>20</sup> Hegaappe guyyiyan, Daawiti ba na7aa Solomona, “Aikko baa; minna! Oosuwaa ootta! GODAI Xoossai, ta Xoossai nenaara de7iyo gishshau, yayyoppa; dagammoppa! GODAA Beeta Maqidasiyaa oosoi polettana gakkanaashin, Xoossai nena yeggennanne aggenna. <sup>21</sup> Xoossaa Beeta Maqidasiyan de7iya ooso ubbau qeesetinne Leewati sunttetti uttidosa. Kushe hiilla erai de7iyo asai ubbai nena ooso ubban maaddana. Halaqatinne asai ubbai neeyyo ubbabankka azazettana” yaagiis.

## 29

### *Beeta Maqidasiyaa Keexxanau Imettida Imota*

<sup>1</sup> Hegaappe guyyiyan, Kawoi Daawiti shiiqida asau ubbau hagaadan yaagiis; “Xoossai dooridoi ta na7aa Solomona; i yelaganne oosuwaaayyookka lammachcha. Ha keexettana keetta asa keetta gidennan GODAA Xoossaa Beeta Maqidasiyaa gidiyo gishshau, oosoi gita. <sup>2</sup> Taani taayyo de7iya wolqqaa keenaa ta Xoossaa Beeta Maqidasiyaayyo worqqan oosettanabau worqqaa, biran oosettanabau biraa, nahaasiyan oosettanabau nahaasiyaa, biratan oosettanabau birataanne mittan oosettanabau mittaa giigissa wottaas. Qassi maragidiyaa, ibinabaradiyaa, dumma dumma meraara de7iya alleeqo shuchchata, al77o shuchchatanne inqqota giigissa wottaas. <sup>3</sup> Ta Xoossaa Beeta Maqidasiyaa taani keehippe siiqiyo gishshau, taani ta Xoossaa Beeta Maqidasiyaayyo giigissidoogaappe haraa taayyo buzo de7iya worqqaappenne biraappe geeshsha Beeta Maqidasiyaayyo immaas. <sup>4</sup> Beeta Maqidasiyaa godaa maizzanau xeetu sha7u kilo giraame deexxiya geeshsha worqqaanne naa77u xeetanne oitamu sha7u kilo giraame deexxiya geeshsha biraa immaas. <sup>5</sup> Kushe hiillati oottana ooso ubbaassi, worqqan oosettanabau worqqaa, biran oosettanabau biraa, immaas. Yaatin, intteppe hachchi ba sheniyan GODAAYYO kehidi immanai oonee?” yaagiis.

<sup>6</sup> Yaagin Israa7eela keettaa asatu halaqati, zaretu halaqati, shaalaqati, mato halaqatinne kawo oosanchchatu halaqati bantta sheniyan banttau de7iyaabaa immidosona. <sup>7</sup> Eti Xoossaa Beeta Maqidasiyaa oosuwaayyo issi xeetanne laappun tammu sha7u kilo giraame deexxiya worqqaa, heezzu xeetanne oitamu sha7u kilo giraame deexxiya biraa, usuppun xeetanne laatamu sha7u kilo giraame deexxiya nahaasiyaa birataanne heezzu miiloonenne oiddu xeetu sha7u kilo giraame deexxiya birataa immidosona. <sup>8</sup> Al77o shuchchai de7iyo asai ubbai buquraa naagiya Leewaa Gershshoona yara gidiya Yihi7eela baggaara GODAA Beeta Maqidasiyaa buquraa minjjiyo keettau immiis. <sup>9</sup> Asai ba sheniyan ba kumetta wozanan GODAAYYO immido gishshau ufaittiis; Kawoi Daawitikka keehippe ufaittiis.

### *Daawiti GODAA Galatiis*

<sup>10</sup> Hegaa gishshau, Daawiti yaa7aa ubbaa sinttan hagaadan yaagidi, GODAA galatiis; “Abeet GODAU, nu aawaa Israa7eela Xoossau, neeni merinaappe merinau galatetta. <sup>11</sup> Abeet GODAU, saluwaaninne sa7an de7iya ubbapai nebba! Gitatetta, wolqqai, bonchchoi, xoonoinne anggai nebba! Abeet GODAU, maatai nebba; neeni ubbaappe bollanne huuphe. <sup>12</sup> Duretainne bonchchoi neeppe yees; neeni ubbaba haaraasa. Wolqqainne minotai ne kushiyaana; neeni asaa ubbaa gitayanaanne minttanau dandayaasa. <sup>13</sup> Ha77ikka nu Xoossau, nuuni nena galatoos; ne bonchchoi sunttaakka sabboos.

<sup>14</sup> “Nuuni haggaa keenabaa immanau taanne ta asainne oonee? Aissi giikko, ubbapai neeppe yees; nuuni ne kushiyaappe ekkidobaa neeyyo zaaretti immida. <sup>15</sup> Kase nu aawatu ubbaadan nuunikka ne sinttan betenne imatta. Ha sa7aa bollan nu de7o laittai kuwaadan aadhhiyaagaa; nuuni haiqoppe attanau danddayokko. <sup>16</sup> Abeet GODAU, nu Xoossau, ne geeshsha sunttau nuuni Beeta Maqidasiyaa keexxanau shiishshido ubbai ne kushiyaappe yiidabaa; hagee ubbai nebba.

<sup>17</sup> “Ta Xoossau, neeni wozanaa paacciyoo gaanne suuretettaa dosiyoogaa taani erais. Taani ta wozanaa suuretettan ta sheniyan haggaa ubbaa immaas. Ha sohuwan de7iya ne asaikka neeyyo ba sheniyan ufaissan immidoogaa taani be7aas. <sup>18</sup> Abeet GODAU, nu maizza aawatu Abrahaama, Yisaaqanne Israa7eela Xoossau, ne asaa wozanan ha gita siiquwaa merinau naaga; eta wozanaakka neekko shiishsha. <sup>19</sup> Ne wogaa, ne azazuwaanne ne higgiiyaa naaganaadaaninne taani halchhada giigissa wottidoban Beeta Maqidasiyaa i keexxanaadan ta na7aa Solomonau kumetta wozanaa imma” yaagidi galatiis.

<sup>20</sup> Hegaappe guyyiyan, Daawiti yaa7au ubbau, “GODAA intte Xoossaa galatite” yaagiis. Yaagin yaa7ai ubbai GODAA bantta aawatu Xoossaa galatidosona. Galatidi GODAAYYO gufannidi goinnidosonanne kawuwaayyookka lichchi giidi gufannidosona. <sup>21</sup> Wonttetta gallassi asai GODAAYYO yarshshuwaa yarshshiis. Qassi xuuggiyo yarshshuwaakka GODAAYYO yarshshiis; issi sha7u korimata, issi sha7u dorssa orggeta, issi sha7u dorssa marata, ushshaa yarshshuwaanne daro yarshshota yarshshiis. <sup>22</sup> Asai he gallassi GODAA sinttan keehippe ufaittiiddi, miisinne uyiis. Yaatidi asai Kawuwaa Daawita na7aa Solomona naa77anttuwaa zaitiyaa tiyidi, a kawotettan minttiis. Xaadooqakka qeese gidanaadan GODAA sinttan tiyiis.

<sup>23</sup> Hegaappe guyyiyan, Solomoni ba aawaa Daawita sohuwan GODAA kawotaa araatan uttiis. Au ubbapai haniis; Israa7eela ubbaikka ayyo azazettiis. <sup>24</sup> Halaqati ubbai, mino asatinne Kawuwaa Daawita naati Kawuwaa Solomonau azazettanau qaalaa gelidosona. <sup>25</sup> GODAI Solomona Israa7eela asaa ubbaa sinttan xoqqu xoqqu oottiis; appe kase Israa7eela kawotuyyo imettibeenna bonchchuwaa Solomonayyo immiis.

### *Daawita Haiquwaa*

<sup>26</sup> Isseya na7ai Daawiti Israa7eela ubbaa bolli kawotiis. <sup>27</sup> Daawiti Israa7eela bolli oitamu laitta kawotiis; Kebroonan i laappun laitta kawotiis; Yerusalaamen hasttamanne heezzu laitta kawotiis. <sup>28</sup> Daawiti daro laittaa de7idi, duretidi, bonchchettidi, lo77o cimidi haiqqiis. A sohuwan a na7ai Solomoni kawotiis. <sup>29</sup> Daawiti koiroppe doommidi wurssettaa gakkanaashin oottidobai, Hananabaa Yootiya Sameela Taarikiyaa Maxaafan, Hananabaa Yootiya Naataana Taarikiyaa Maxaafaaninne Hananabaa Yootiya Gaada Taarikiyaa Maxaafan xaafetti uttiis. <sup>30</sup> I waati haaridaakkonne i waanida wolqqaama asakko, i hanidobai, Israa7eela asainne heeran de7iya kawotettati ubbai hanidobai he maxaafatun xaafetti uttiis.

## Hanidabaa Odiya Naa77antto Maxaafaa

### *Gidduwaa Erissuwaa*

Hanidabaa Odiya Maxaafaa Naa77antto shaahoi Hanidabaa Odiya Maxaafaa Koiro shaahoi eqqidosaappe doommee. Hegeekka Kawuwaa Salomona haaruwaappe doommidi, i haiqqana gakkanaashin de7iya wodiya kantti kiyees. Huuphessa baggan de7iya zareti ba aawaa Salomona sohuwan kawotida Yihudaa Kawuwaa Roobaama bolli makkalido hanotaa odi simmidi, Yerusalaamee laalettido wodiya, Kiristtoosa yeletaappe kase 586 laittaa gakkanaashin de7iya tohossa bagga Yihudaa taarikiyaa shiishshidi odees.

### *Kawoi Solomoni Aadhdhida Eraa Ekkanau Woossiis (Kawotu Maxaafaa Koiruwaa 3:1-15)*

<sup>1</sup> Daawita na7ai Kawoi Solomoni ba kawotettaa minttiis. GODAI a Xoossai aara gididi, a keehippe gitayiiis.

<sup>2</sup> Solomoni Israa7eela ubbaa, shaalaqata, mato halaqata, daannata, Israa7eela asaa kaalettiya ubbatanne keettaa asatu halaqata xeesidi shiishshiis. <sup>3</sup> Hegaappe guyyiyan, Solomoninne shiiqida asai ubbai Gabaa7oonan de7iya goinniyo xoqqa sohuwaa biidosona; aissi giikko, GODAA ashkkarai Muusee bazzon medhdho Xoossaa Dunkkaanee yan de7ees. <sup>4</sup> Kase Daawiti Xoossaa Taabootaayyo Yerusalaamen dunkkaaniyaa toliidi, Xoossaa Taabootaa Qiriyaati-Yi7aariima katamaappe he giigissi wottido sohuwau ehi wottiis. <sup>5</sup> Huura na7aa Uura na7ai Baxaali7eeli nahaasiyaa birataappe oottido yarshshiyosai Gabaa7oonan GODAA Dunkkaaniyaa sinttan de7ees. Solomoninne he shiiqida asai GODAAYYO hegan goinnidosona. <sup>6</sup> Solomoni Xoossaa Dunkkaaniyaa sinttan de7iya nahaasiyaappe oosettida yarshshiyosaakko, GODAA sintti biidi, issi sha7u xuuggiyo yarshshuwaa yarshshiis.

<sup>7</sup> He gallassa qammi Xoossai Solomonassi qonccidi, “Taani neeyyo ai immanau koyai?” yaagiis.

<sup>8</sup> Yaagin Solomoni Xoossaa, “Neeni ta aawaa Daawita aggenna gita siiquwan siiqadasa; yaatada tana a sohuwan kawoyadasa. <sup>9</sup> Ha77ikka abeet GODAU, Xoossau, neeni ta aawaa Daawitayyo kase giido qaalai poletto. Neeni tana sa7an de7iya baanaadan corattida asaa bolli kawoyido gishshau, <sup>10</sup> taani ha asaa kaalettanau neeni taayyo aadhdhida erattetanne akeekaa imma. Hegee xayikko, ha ne gita asaa ooni aissanau danddayii?” yaagiis.

<sup>11</sup> Yaagin Xoossai Solomona hagaadan yaagiis; “Neeni dure gidanau, woikko aquwaa demmanau, woikko bonchchettanau, woikko ne morkketi haiqqanau, woikko neeyyo baree aduqqanau oichchennan aggada, taani nena kawoyido ta asaa aissiyo aadhdhida erattetanne akeekaa oichchido gishshau, <sup>12</sup> taani neeyyo aadhdhida erattetanne akeekaa immana. Qassi neeppe kase de7ida kawotuyyo woikko neeppe guyyiyan yaana kawotuyyookka bainna duretaa, aquwaanne bonchchuwaa taani neeyyo immana” yaagiis.

<sup>13</sup> Hegaappe guyyiyan, Solomoni Xoossaa Dunkkaanee Gabaa7oonan de7iyo, goinniyo xoqqa sohuwaappe simmidi, Yerusalaame biis; biidi Israa7eela bolli kawotiis.

### *Kawuwaa Solomona Minotettaanne Durettaa (Kawotu Maxaafaa Koiruwaa 10:26-29)*

<sup>14</sup> Solomoni paraa gaaretanne parata shiishshiis. Ayyo issi sha7anne oiddu xeetu paraa gaaretinne tammanne naa77u sha7u parati de7oosona. I eta paraa gaaretu kata-matuuninne banaara Yerusalaamen wottiis. <sup>15</sup> Kawoi worqqinne biri Yerusalaamen shuchchaadan korettanaadan, zigikka bargguwan dicciya ettaadan corattanaadan

oottiis. <sup>16</sup> Solomona parati Gibxxeppenne Qaawe giyo biittaaappe yiidosona. Kawuwaa zal77anchchati eta Qaaweppe miishshan shammidi ehoosona. <sup>17</sup> Eti issi issi paraa gaariyaa usuppun xeetu xaqara biran, issi issi paraa issi xeetanne ishatamu xaqara biran Gibxxeppe shammidi ehoosona; ehiidi Hiitetu kawotu ubbatussinne Sooriyaa kawotussi baizzoosona.

## 2

### *Solomoni Beeta Maqidasiyaa Keexxanau Giigissiis (Kawotu Maxaafaa Koiruwaa 5:1-18)*

<sup>1</sup> Solomoni GODAA sunttaayyo Beeta Maqidasiyaanne baayyo kawo keettaa keexxanau halchchiis. <sup>2</sup> Hegaa gishshau, Solomoni tookkiyoobaa toossanau laappun tammu sha7u asatanne gezziyan shuchchaa qoo7anau hospun tammu sha7u asata dooriis; qassi eta wochchiya heezzu sha7anne usuppun xeetu asata eta bolli sunttiis.

<sup>3</sup> Hegaappe guyyiyan, Solomoni Xiirsoosa Kawuwaa Kiiraamayyo kiitaa kiittidi, “Ta aawai Daawiti baayyo kawo keettaa keexxanau neeni zigaa yeddidoogaadan, taayyookka yedda. <sup>4</sup> Ha77i taani GODAA ta Xoossaa sunttaayyo Beeta Maqidasiyaa keexxanau hanais. Taani sawuwaa tonggu giya ixaanaa cuwayanau, ubba wode GODAA sinttan oittaa wottanaanne ubbato maalladonne omarssi, Sambbata gallassatun, aginai xeeriyo wodetuuninne GODAA nu Xoossaa baalaa gallassatun xuuggiyo yarshshuwaa yarshshanau, he Beeta Maqidasiyaa dummayana. Israa7eela asai merinau ootanaadan azazettido oosoti hageeta.

<sup>5</sup> “Nu Xoossai hara xoossatu ubbaappe gita gidiyo gishshau, taani keexxanau haniyo Beeta Maqidasee gita. <sup>6</sup> SHin ayyo Beeta Maqidasiyaa keexxanau danddayiyai oonee? Aissi giikko, saluwaappe xoqqa saloikka ayyo gidanau danddayenna! Yaatin, taani a sinttan ixaanaa cuwayanaappe attin, taani ayyo Beeta Maqidasiyaa keexxanau oonee?

<sup>7</sup> “Ha77ikka alleeqota kessiyo oosuwaa, worqqaa, biraa, nahaasiyaanne birataa seerissi tigiyo oosuwaanne zo7o maayuwaa, ochchaa teera milatiya maayuwaanne salo milatiya maayuwaa giigissiyo oosuwaa eratetta de7iyo asa taayyo yedda. Ta aawai Daawiti Yihudaaninne Yerusalaamen de7iyya kushe hiillaa eriyaageeta doori wottiis; i etaara issippe oottana. <sup>8</sup> Liibaanoosan de7iyya ne asati mittaa waati qanxxiyaakko eriyooqaa taani erais. Hegaa gishshau, neeni taayyo Liibaanoosappe zigaa, xiiddaanne sanddalliyaa yedda. Ta asati ne asatuura gididi, <sup>9</sup> taayyo daro mittaa giigissana. Aissi giikko, taani keexxiyo Beeta Maqidasee gitanne maalaalissiyaagaa. <sup>10</sup> Mittaa qanxxiya ne ashkkaratuyyo taani laatamu sha7u konttaale gisttiyaanne laatamu sha7u konttaale banggaa, qassi oiddu xeetu sha7u litiro woine eessaanne oiddu xeetu sha7u litiro wogaraa zaitiyaa immana” yaagiis.

<sup>11</sup> Yaagin Xiirsoosa Kawoi Kiiraami Solomonayyo dabddaabbiyaa kiittidi, “GODAI ba asaa siiqiyo gishshau, i nena eta bolli kawoyiis” yaagiis. <sup>12</sup> Kiiraami qassikka, “GODAAYYO Beeta Maqidasiyaanne baayyo kawo keettaa keexxanaadan aadhdhida eranchcha, akeekanchchane cincca na7aa Kawuwaa Daawitayyo immida, saluwaa sa7aa medhdhida GODAI, Israa7eela Xoossai galatetto.

<sup>13</sup> “Ha77ikka taani neeyyo Huraama giyo hiillanchchane akeekanchcha bitaniyaa yeddaas. <sup>14</sup> A aayiyaa Daana zare; qassi a aawai Xiirsoosa biittaa asa. I worqqaa, biraa, nahaasiyaa, birataa, shuchchanne mittaa oottiya asa; qassi ochchaa teeraa milatiya maayuwaa, salo milatiya maayuwaa, zo7o maayuwaanne liinuwaa giyo maayuwaa giigissiyo oosuwaa erees. Qassikka i duma duma alleeqota kessidi, odidoogaadan ubbabaa oottanau danddayees. Hegaa gishshau, kushe hiillan loohida ne asatuuranne kase ne aawaassi, Daawitassi oottida asatuura a ootissa.

<sup>15</sup> “Ha77ikka neeni ta godai immana giido gisttiyaanne banggaa, zaitiyaanne woiniyaa eessaa ta ashkkaratuyyo yedda. <sup>16</sup> Neeni Liibaanoosappe koyido mittaa



keenaa nuuni qanxxana; qanxxidi qashissidi, abbaa bollaara toohettidi, neekko Yoophphe baanaadan oottana. Yaatobare neeni yaappe Yerusalaame gakkanau efiissana” yaagiis.

*Solomoni Beeta Maqidasiyaa Keexxiis*  
(*Kawotu Maxaafaa Koiruwaa 6:1-38*)

<sup>17</sup> A aawai Daawiti kase qoodidoogaadan, Solomoni Israa7eela biittan de7iya kare biitta asaa ubbaa qoodiis; qoodin eti xeetanne ishata manne heezzu sha7anne usuppun xeeta gididosona. <sup>18</sup> Solomoni he asaappe laappun tammu sha7aa tookkiyoobaa toossanau, hosppun tammu sha7aa gezziyan shuchchaa qoo7anau dooriis; qassi eta wochchanau heezzu sha7anne usuppun xeetu asata sunttiis.

### 3

<sup>1</sup> Solomona aawai Daawiti GODAA Beeta Maqidasee keexettana sohuwaa Mooriyaa giyo deriyan Yerusalaamen giigissi wottiis. He sohoi GODAI Daawitayyo qonccido, Yaabuusiya Ornna audiyaa. <sup>2</sup> Solomoni ba kawotido oiddantto laittan, naa77antto aginan Beeta Maqidasiyaa keexxanau doommiis.

<sup>3</sup> Solomoni Xoossaa Beeta Maqidasiyaa keexxanau baasido baasuwa zananai usuppun tammu wara; gomppai laatamu wara. <sup>4</sup> Beeta Maqidasiyaa geliyoosan de7iya baranddaa gomppai Beeta Maqidasiyaa gomppaakka keena laatamu wara; geesai laatamu wara.<sup>1</sup> A gidduwaa geeshsha worqqan sheeshshiis. <sup>5</sup> Wuige godaa xiiddaa xallaa licidi kammiis; kammidi muruta worqqan sheeshshiis; yaatidi zambbaa misiliyaanne sanssalatan alleeqissiis. <sup>6</sup> Beeta Maqidasiyaakka al77o shuchchan alleeqissiis; i alleeqissido worqqai Pariwaima biittaappe yiida worqqaa. <sup>7</sup> Godata, zabaayeta, qosilettanne penggeta worqqan sheeshshiis; qassi godaa bolli kiruubetu misiliyaa massiis.

<sup>8</sup> Solomoni Ubbaappe Aadhdhiya Geeshsha Sohuwaa keexxiis. He sohuwaa zananai Beeta Maqidasiyaa gomppaadan laatamu wara; gomppai laatamu wara. He sohuwaa godaa laatamu sha7u kilo giraame muruta worqqan sheeshshiis. <sup>9</sup> Eti go7ettido misi-maaree ichchashu xeetanne laappun tammu giraame worqqaappe merettiis. Pooqiyann de7iya kifiletakka worqqan sheeshshiis.

<sup>10</sup> Solomoni Ubbaappe Aadhdhiya Geeshsha Sohuwan naa77u kiruubetu misileta massi giigissidi, worqqan sheeshshiis. <sup>11</sup> He kiruubetu qefee micettidi, laatamu wara; koiro kiruubiyau koiro qefee ichchashu wara gididi, Beeta Maqidasiyaa godaa bochchees; naa77antto qefeekka ichchashu wara gididi, hara kiruubiyaa qefiyaa bochchees. <sup>12</sup> Naa77antto kiruubiyau koiro qefee ichchashu wara gididi, Beeta Maqidasiyaa godaa bochchees; naa77antto qefeekka ichchashu wara gididi, koiro kiruubiyaa qefiyaa bochchees. <sup>13</sup> Ha naa77u kiruubetu qefee micettidi, laatamu wara gididi; eti bantta som77uwaa Geeshsha Sohuwaakko zaaridi, bantta tohuwan eqqidosa.

<sup>14</sup> Solomoni salo milatiya maayuwaappe, ochchaa teeraa milatiya maayuwaappe, zo7o maayuwaappenne liinuwaa qacinaappe dadettida maayuwaappe magalashuwaa oottidi, a bolli kiruubetu misileta medhdhiis.

*Naa77u Nahaasiyaa Tuussata*  
(*Kawotu Maxaafaa Koiruwaa 7:15-22*)

<sup>15</sup> Solomoni Beeta Maqidasiyaa sinttan issuwaa issuwaa geesai hastamanne ichchashu wara aduqqiyo naa77u tuussata merissidi, eta huuphiyan ichchashu wara gumbbuwaa wottiis. <sup>16</sup> Qassi sanssalataa gitedan merissidi, tuussatu huuphiyan wottiis; yaatidi roomaane giyo teeraa misileta xeetata merissidi, sanssalataa bolli wottiis. <sup>17</sup> Tuussatuppe issuwaa Beeta Maqidasiyaa sinttan ushachcha baggaara,

<sup>1</sup> 3:4 Laatamu wara: Ibraawettoi issi xeetanne laatamu wara gees.

naa77anttuwaa qassi haddirssa baggaara essiis. Essidi ushachcha baggaara de7iya tuussaa Yaakiina sunttiis; haddirssa baggaara de7iya tuussaa Boo7eeza sunttiis.

## 4

### *Beeta Maqidasiyaa Miishshata (Kawotu Maxaafaa Koiruwaa 7:23-51)*

<sup>1</sup> Hegaappe guyyiyan, Solomoni zananai laatamu wara, gomppai laatamu wara, geesai tammu wara gidiyo yarshshiyooosaa nahaasiyaa birataappe ootissiis.

<sup>2</sup> Qassi nahaasiyaa birataa seerissidi, doonai ya gaxaappe ha gaxaa gakkanaashin tammu wara, geesai ichchashu waranne yuushoi hasttamu wara gidiyo Abba giyo sainiyaa merissiis. <sup>3</sup> Abba Sainiyaa doonan kare baggaara ziqqi giidi, aara oiqettidi merettida misileti de7oosona; he misileti naa77u maaran de7iya booratu misileta.

<sup>4</sup> He Abba Sainee nahaasiyaa birataappe merettida tammanne naa77u booratu misiletu zokkuwan uttiis. Booratuppe heezzati huuphessa baggi, heezzati arggo baggi, heezzati tohossa baggi, heezzati qassi arshsho baggi simmidi xeelliyaabaa milatoosona. Abba Sainee eta bolli uttiis; etayyo guyye baggai giddokko simmi uttiis. <sup>5</sup> Abba Sainee issi takkaaro keena ordde; a doonai wanccaa doonaa mala; qassi ciishshai ciyyidaagaakka milatees. He Abba Sainee usuppun tammu sha7u litiro gidiya haattaa oiqqiyaagaa.

<sup>6</sup> Solomoni qassikka meecettiyo tammu kereta merissiis; merissidi ichchashata tohossa baggaara, qassi ichchashata huuphessa baggaara wottiis. Etan xuuggiyo yarshshuwaa ashoo meecettees; shin Abba Sainiyaa haattan qeeseti meecettoosona.

<sup>7</sup> Hegaappe guyyiyan, Solomoni etau imettida halchchuwaadan xomppiyaa wottiyo ballata tammata worqqaappe ootissidi, ichchashata ushachcha baggaara, ichchashata haddirssa baggaara Beeta Maqidasiyaa gidдон wottiis. <sup>8</sup> Qassikka i tammu xaraphpheezata oottidi, ichchashata ushachcha baggaara, ichchashata haddirssa baggaara Beeta Maqidasiyaa gidдон wottiis. Qassi xeetu kuixaarotakka worqqaappe merissiis.

<sup>9</sup> Solomoni qeesetuyyo gidдо dabaabaanne kare bagga gita dabaabaa giigissiis; dabaabaayyo penggeta giigissidi, penggeta nahaasiyaa biratan sheeshshiis. <sup>10</sup> Abba Sainiyaa Beeta Maqidasiyaappe tohossa arshsho baggi wottiis.

<sup>11</sup> Huraami kereta, akaafatanne kuixaarota medhdhiis; yaatidi Huraami Kawuwaa Solomonassi Xoossaa Beeta Maqidasiyan oosuwaa oottidi poliis. <sup>12</sup> I oottido oosotikka naa77u tuussata, tuussatu huuphiyan wottiyo saine mala naa77u gumbbota, tuussatu bollai de7iya naa77u gumbbota alleeqissiyo naa77u gite mala sanssalatata, <sup>13</sup> issi issi gumbbuwaa bolli naa77u maaran nahaasiyaappe merettida issi issi xeetu roomaane teeraa misileta, muleera oiddu xeetu roomaane teera misileta, <sup>14</sup> tammu gaareta, gaaretu bollan wodhdhiya, meecettiyo tammu kereta, <sup>15</sup> Abba Sainiyaanne appe garssan de7iya tammanne naa77u booratu misileta, <sup>16</sup> kereta, akaafata, qaphetanne hara miishshata ubbaa.

Huraami Kawuwaa Solomonayyo GODAA Beeta Maqidasiyaa oosuwaassi medhdhido ha miishshata ubbaa qucettida nahaasiyaappe medhdhiis. <sup>17</sup> Kawoi Solomoni Sukkotappenne Xareedappe gidduwan, Yorddaanoosa dembban de7iya nahaasiyaa birataa seerissiyo sohuwan hageeta ubbaa ootissiis. <sup>18</sup> Nahaasiyaa birataappe merettida ha miishshai ubbai keehi daro gidido gishshau, woisaa deexxiyaabaakko, likkee erettibeenna.

<sup>19</sup> Qassikka Solomoni Xoossaa Beeta Maqidasiyan de7iya miishshata worqqaappe ubbaa merissiis. Hegeetinne worqqaappe oottido yarshshiyooosaa, GODAA sinttan wottiyo oittai uttiyo xaraphpheezaa, <sup>20</sup> etau wottido wogaadan Ubbaaappe Aadhdhiya Geeshsha Sohuwaa sinttan poo7anaadan xomppiyaa wottiyo worqqa ballata, eta worqqa xomppeta, <sup>21</sup> geeshsha worqqaappe oottido ciishshaa misileta, xomppetanne

qapheta, <sup>22</sup> xomppiyaa toissiyooobata, kuixaarota, ixaanaa cuwayiyoobatanne tamaa ekkiyo miishshata. Ha miishshati ubbai geeshsha worqqaappe oosettidosona. Beeta Maqidasiyaayyo kare bagga penggetanne Ubbaappe Aadhdhiya Geeshsha Sohuwaa geliyo penggeta worqqan sheeshshiis.

## 5

<sup>1</sup> Solomoni GODAA Beeta Maqidasiyaa oosuwaa ubbaa polidoogaappe guyyiyan, a aawai Daawiti GODAAYYO dummayi wottido biraa, worqqaanne hara miishshata ubbaa ehiidi, Xoossaa Beeta Maqidasiyaa buquraa minjjiyoosan wottiis.

### *GODAA Taabootai Beeta Maqidasiyaa Geliis (Kawotu Maxaafaa Koiruwaa 8:1-9)*

<sup>2</sup> Hegaappe guyyiyan, Kawoi Solomoni GODAA Maachchaa Taabootaa Daawita Kata-maappe, Xiyooneppe ehanaadan Israa7eela cimata, zaretu ubbaa halaqatanne Israa7eela keettaa asata kaalettiyaageeta Yerusalaame katamaa shiishshiis. <sup>3</sup> Israa7eela asai ubbai laappunnta aginan, Daase Baalai bonchchettiyo wode, kawuwaakko shiiqiis. <sup>4</sup> Israa7eela cimati ubbai gakkin, Leewati Taabootaa denttidosona. <sup>5</sup> Leewatinne qeeseti Taabootaa, Xoossaa Dunkkaaniyaanne Dunkkaaniyaa gidдон de7iya geeshsha miishshata ubbaa tookkidi ehiidosona. <sup>6</sup> Kawoi Solomoninne aara issippe de7iya Israa7eela yaa7ai kumettai Taabootaa sinttan shiiqidi, goodanau danddayetenna, cora dorssaanne mehiyaa yarshshidosona.

<sup>7</sup> Hegaappe guyyiyan, qeeseti GODAA Maachchaa Taabootaa Beeta Maqidasiyaayyo gidдо geeshsha qol77uwaa, Ubbaappe Aadhdhiya Geeshsha Sohuwaa giyo sohuwaa ehiidi, kiruubetu misiletu qefetuppe garssa baggaara wottidosona. <sup>8</sup> Micetti uttida kiruubetu qefeti Taabootaanne Taabootaa tookkiyo kasota kammidosona. <sup>9</sup> Kasoti keehippe adussa gidiyo gishshau, eta xeerai Ubbaappe Aadhdhiya Geeshsha Sohuwaa sinttan de7iya Geeshsha Sohuwan beettanau danddayees; shin Geeshsha Sohuwaappe kareera beettenna. Eti hachchi gakkanaashin, he sohuwan de7oosona. <sup>10</sup> Israa7eela asai Gibxxe biittaappe kiyido wode, GODAI etaara maachchaa maacettido Siinaa Deriyan Muusee wottido naa77u masettida shuchchatuppe attin, Taabootaa gidдон harabi aibinne baawa.

### *GODAA Bonchchuwaa*

<sup>11-14</sup> He sohuwan de7iya qeeseti ubbati bantta oottiyo sohuwan sohuwan shaahet-tennan, issippe banttana GODAASSI dummayi wottidosona. Mazamuriyaa yexxiya Leewati ubbati, Asaafi, Hemaaninne Yidutuuni, eta naatinne eta dabboti liinuwaa giyo maayuwaa maayidosona. He maayuwaa maayidi, daalata, diittatanne maazinqqeta oiqqidi, yarshshiyooosaappe arshsho baggaara eqqidosa; xeetanne laatamu qeeseti xurumbbata punnanau etaara issippe eqqidosa. Eti ubbai xurumbbata punniiddi, daalata qaattiiddi, diittata diixxiiddinne hara kaa7iyo miishshatun kaa7iiddi, “GODAI keha!

Aggenna a siiqoi merinaagaa”  
yaagidi GODAA sabbidosona.

Qeeseti Beeta Maqidasiyaappe kiyiyo wode, shaarai GODAA Beeta Maqidasiyaa kumiis; he shaaraa gaasuwan qeeseti bantta oosuwaa oottanau danddayibookkona; aissi giikko, GODAA bonchchoi Xoossaa Beeta Maqidasiyaa kumi uttiis.

## 6

### *Solomoni Asaassi Haasayido Haasayaa (Kawotu Maxaafaa Koiruwaa 8:12-21)*

<sup>1</sup> Hegaappe guyyiyan, Solomoni hagaadan yaagiis; “Abeet GODAU, neeni, ‘Taani xuma shaaran de7ana’ yaaga wottadasa. <sup>2</sup> SHin taani neeyyo lo77o Beeta Maqidasiyaa, neeni an merinau de7ana sohuwaa keexxaas” yaagiis.

<sup>3</sup> Israa7eela yaa7ai kumettai eqqidaashin, kawoi etakko simmidi, eta hagaadan yaagidi anjjiis; <sup>4</sup> “GODAI Israa7eela Xoossai galatetto! Ta aawaa Daawitassi ba doonan odido ufaissaa ba kushiyan poliis. He i odido ufaissai, <sup>5</sup> ‘Taani ta asaa Israa7eela Gibxxeppe kessada ehiido gallasaappe doonmin, ta sunntai an xeesettana mala, Beeta Maqidase keexxanau Israa7eela zaretu gidдон ai katamanne doorabeikke; woikko i ta asaa Israa7eela kaalettana mala, oonanne doorabeikke. <sup>6</sup> SHin ha77i ta sunntai Yerusalaamen xeesettana mala, taani Yerusalaame dooraas; qassi ta asaa Israa7eela kaalettana mala, Daawita dooraas’ yaagiis.

<sup>7</sup> “Ta aawai Daawiti GODAA Israa7eela Xoossaa sunntaayyo Beeta Maqidase keexxanau ba wozanan qoppiis. <sup>8</sup> SHin GODAI ta aawaa Daawita, ‘Neeni ta sunntaayyo Beeta Maqidase keexxanau ne wozanan qoppido gishshau, lo77obaa oottadasa. <sup>9</sup> Gidikkonne, Beeta Maqidase keexxanaagee nena gidakka; ta sunntaayyo Beeta Maqidasiyaa keexxanaagee ne gulbbataappe yelettana ne na7aa’ yaagiis.

<sup>10</sup> “Ha77ikka GODAI ba giido ufaissaa qaalaa poliis. GODAI kase immido ufaissaadankka, taani ta aawaa Daawita sohuwan kawotaasinne ha77i Israa7eela kawotaa araatan uttaas. Qassi GODAA Israa7eela Xoossaa sunntaayyo Beeta Maqidasiyaa keexxaas. <sup>11</sup> GODAI Israa7eela asaara maacettido maachchai xaafettido masettida shuchchati de7iyo Taabootaakka a gidдон wottaas” yaagiis.

### *Solomona Woosaa*

#### *(Kawotu Maxaafaa Koiruwaa 8:22-53)*

<sup>12-13</sup> Solomoni zananai ichchashu wara, gomppai ichchashu waranne qassi geesai heezzu wara gidido madirakiyaa nahaasiyaa birataappe giigissidi, dabaabaa gidдон essi wottiis. Hegaappe guyyiyan, Solomoni GODAAYYO yarshshiyooosaa sinttan, Israa7eela yaa7ai kumettai de7iyoosan eqqidi, ba kushiya saluwaa zaaridi micciis; miccidi Israa7eela yaa7aa kumettaa sinttan gulbbatiis. <sup>14</sup> Gulbbatidi hagaadan yaagidi woossiis; “Abeet GODAU, Israa7eela Xoossau, saluwan woikko sa7an ne mala xoossi baawa. Neeni ne maachchaa naagaasa; bantta kumetta wozanaappe ne sinttan hemettida ne ashkharata aggenaa siiquwan siiqaasa. <sup>15</sup> Ne ashkkaraayyo, ta aawaa Daawitayyo neeni oottana gaada haasayido qaalaa naagadasa; neeni kase ne doonan haasayidoogaa ne kushiyan hachchi poladasa.

<sup>16</sup> “Ha77ikka abeet GODAU, Israa7eela Xoossau, neeni ne ashkkaraassi, ta aawaa Daawitassi, ‘Neeni ta sinttan hemettidoogaadan ne naatikka ta higgayan hemettanau bantta ogiyaa naagikko, Israa7eela kawotaa araatan uttiya asa neeni mulekka xayakka’ yaagido qaalaa pola. <sup>17</sup> Abeet GODAU, Israa7eela Xoossau, neeni ne ashkkaraa Daawitayyo haasayido ne qalalai ha77ikka poletto.

<sup>18</sup> “SHin Xoossai tumu, asaara issippe ha sa7an de7aneeyye? Be7a, saloti, ubbaappe xoqqan de7iya salotikka neeyyo gidanau danddayokkona. Yaatin, ha taani keexxido Beeta Maqidasee neeyyo ai keenaa guuxxanddeeshsha! <sup>19</sup> Gidikkonne, abeet GODAU, ta Xoossau, ta woosaa, ne ashkkaraa woosaanne watiwatuwaa neeni ezgga. Taani ne ashkharai ne sinttan woossiyo woosaanne waasuwa neeni siya. <sup>20</sup> Neeni ‘Ta sunntai he sohuwan xeesettana’ giido ha Beeta Maqidasiyaakko, ne aifee qamminne gallassi xeello. Taani ne ashkharai ha Beeta Maqidasiyaakko simmada, woossiyo woosaa neeni siya. <sup>21</sup> Taani ne ashkharainne ne asai Israa7eeli ha Beeta Maqidasiyaakko simmidi, watiwatiyo watiwatuwaa neeni siya. Neeni de7iyoosan saluwan siyada, nuuyyo atto yaaga.

<sup>22</sup> “Issi asi ba shooruwaa naaqqidi kashi gin, a caaqqettanau ha Beeta Maqidasiyaa ehin, a gidдон de7iya yarshshiyooosaa sinttan i caaqqikko, <sup>23</sup> neeni saluwan siya; siyada



ootta. Ne ashkkaratu gidduwan pirdda. Mooranchchaa bolli pirddada, i oottidobaa a bolli zaara; xilluwaa shatinttada, ayyo a xillotettaadan zaara.

<sup>24</sup> “Ne asai Israa7eeli ne bolli nagaraa oottido gaasuwan morkkiyan xoonettidi, eti neekko simmidi, ne sunntaa xeesidi, ha Beeta Maqidasiyan nena woossikkonne neeyyo watiwatikko, <sup>25</sup> neeni saluwan siya. Siyada ne asaa Israa7eela nagaraa atto yaaga; yaatada neeni kase etayyoonne eta maizza aawatuyyo immido biittau eta guyye zaara.

<sup>26</sup> “Ne asai ne bolli nagaraa oottido gaasuwan saloi gorddettiinne irai bukkennan ixxin, eti ha sohuwaa simmidi, woossikkonne neeni eta un77ettido gishshau, ne sunntaa xeesidi, bantta nagaraappe simmikko, <sup>27</sup> neeni saluwan siya. Siyada ne ashkkaratu nagaraa, ne asaa Israa7eela nagaraa atto yaaga. Eti hemettanau bessiya lo77o ogiyaa eta tamarissa; yaatada neeni ne asaa laatissido biittan iraa bukissa.

<sup>28</sup> “Biittaa bollan koshai woikko boshai yin, woikko kattaa leege, woikko leeshoi, woikko boolee, woikko gumburoi bashshin, woikko morkkee eta katamata dooddin, woikko ai mala bashshai woikko harggee yin, <sup>29</sup> ne asaa Israa7eelappe ooninne woikko ne asai ubbai nena woossikkonne neeyyo watiwatikko, qassi ai asinne ba wozanan un77ettiyoobaanne azzaniyoobaa eridi, ha Beeta Maqidasiyaakko simmidi, ba kushiya miccikko, <sup>30</sup> neeni de7iyoosan saluwan siya. Siyada eta nagaraa atto yaaga; yaatada etau ootta. Neeni asaa wozanaa eriyooaadankka asa ubbau a oosuwaadan oosuwaadan imma. Aissi giikko, asaa ubbaa wozanaa eriyai ne xalaala. <sup>31</sup> Yaatikko, neeni nu maizza aawatuyyo immido biittan bantta de7iyo wode ubban, eti neeyyo yayyidi, ne ogiyan hemettana.

<sup>32</sup> “Hegaadankka, ne asaa Israa7eela gidenna kare biitta asi ne gita sunntaa gishshaunne neeni ne asaayyo oottido maalaalissiya oosotu gishshau, haaho biittaappe yiidi, ha Beeta Maqidasiyaakko simmidi woossikko, <sup>33</sup> neeni de7iyoosan saluwan siya. Siyada he kare biittaa asi oichchiyoobaa ubbaa ootta. Ha sa7aa asai ubbai ne sunntaa eranaadan, ne asaa Israa7eeladan neeyyo yayyanaadaaninne taani keexxido ha Beeta Maqidasee neeyyo goinniyo soho gididoogaa eti eranaadan kare biittaa asi nena woossiyooobaa ubbaa pola.

<sup>34</sup> “Ne asati bantta morkketa olana mala, neeni kiittidosaa aunne biidi, eti neeni doorido ha katamaakkonne taani ne sunntaayyo keexxido Beeta Maqidasiyaakko simmidi, nena woossikko, <sup>35</sup> eta woosaanne watiwatuwaa saluwan neeni siya; siyada etau xoonuwaa imma.

<sup>36</sup> “Nagara oottenna asi bainnaagaadankka, eti ne bolli nagaraa oottin, neeni etayyo hanqqettada morkketuyyo aatta immin, morkketikka eta omooddidi, haakkin matinkka bantta biitti ekkidi efin, <sup>37</sup> eti he omoodettido biittan de7iiddi, bantta wozanan nagaraappe simmikko, qassi he omoodettido biittan de7iiddi, ‘Nuuni nagaraa oottida; nuuni moorida; nuuni iitabaa hanida’ yaagidi neeyyo watiwatikko, <sup>38</sup> banttana omooddidi efiida morkketu biittan de7iiddi, eti bantta kumetta wozanaappenne bantta kumetta qofaappe neekko simmikko, neeni eta maizza aawatuyyo immido eta biittaakko, neeni doorido katamaakkonne taani ne sunntaayyo keexxido Beeta Maqidasiyaakko simmidi, nena woossikko, <sup>39</sup> yaatikko, eta woosaanne watiwatuwaa neeni de7iyoosan saluwan siya. Siyada etau pirdda; ne bolli nagaraa oottida ne asaayyo atto yaaga.

<sup>40</sup> “Ha77ikka abeet ta Xoossau, ha sohuwan woossiyo woosaa ne aifee xeello; ne haittaikka ezggo. <sup>41</sup> Hegaa gishshau, abeet GODAU, Xoossau, dendda! Denddada ne wolqqau malaata gidida ne Taabootaara ne shemppiyo sohuwaa gela. Abeet GODAU, Xoossau, ne geeseti atotettaa maayona; ne geeshsha asatikka ne kehatettan ufaittona. <sup>42</sup> Abeet GODAU, Xoossau, neeni tiyido kawuwaa aggoppa. Ne ashkkaa Daawitassi aggenna ne siiquwaa hassaya” yaagiis.



## 7

*Beeta Maqidasiyaa Anjjissuwaa  
(Kawotu Maxaafaa Koiruwaa 8:62-66)*

<sup>1</sup> Solomoni woosaa polido wode, saluwaappe tamai wodhdhidi, xuuggiyo yarshshuwaanne hara yarshshuwaa miis. Yaatin, GODAA bonchchoi Beeta Maqidasiyaa kumiis. <sup>2</sup> GODAA bonchchoi GODAA Beeta Maqidasiyaa kumido gishshau, qeeseti GODAA Beeta Maqidasiyaa gelanau danddayibookkona. <sup>3</sup> Israa7eela asai ubbai tamai saluwaappe wodhdhishiinne GODAA bonchchoi Beeta Maqidasiyaa kumishin be7ido wode, bantta som77uwaa biittaa gatti gufannidi goinnidosona; goinnidi, “GODAI keha!

Aggenna a siiqoi merinaagaa”  
yaagidi GODAA galatidosona.

<sup>4</sup> Hegaappe guyyiyan, kawoinne asai ubbai GODAA sinttan yarshshuwaa yarshshidosona. <sup>5</sup> Kawoi Solomoni laatamanne naa77u sha7u korimatanne xeetanne laatamu sha7u dorssata yarshshiis. Hegaadan oottidi, kawoinne asai ubbai Xoossaa Beeta Maqidasiyaa anjjissidosona. <sup>6</sup> Qeeseti banttau giigida sohuwan eqqin, Leewati qassi Kawoi Daawiti GODAA sabbanau kase oottido, mazamuriyaa yexxiyo miishshaa oiqqidi, eta sinttan eqqidi, “Aggenna a siiqoi merinaagaa” yaagidi yexxiiddi, GODAA galatidosona. Qeeseti Leewatu sinttan eqqidi, xurumbbata punnidosona; punnishin Israa7eela asai ubbai eqqiis.

<sup>7</sup> Solomoni GODAA Beeta Maqidasiyaa sintta baazzan de7iya giddo dabaabaa dummayiis. Dummayidi he sohuwan xuuggiyo yarshshuwaanne issippetettaa yarshshuwaappe modhdhuwaa yarshshiis. I heгаа oottidoogee GODAA sinttan de7iya, nahaasiyaa giyo birataappe oosettida yarshshiyosai xuuggiyo yarshshuwaa, kattaa yarshshuwaanne issippetettaa yarshshuwaappe modhdhuwaa yarshshanau guuxxido gishshaassa.

<sup>8</sup> He wode Solomoninne Israa7eela asai ubbai Daase Baalaa laappun gallassau bonchchidosona; Israa7eela zawan Hamaata Pinuwaappe biidi, Gibxxe SHaafaa gakkanaashin de7iya cora asai he sohuwaa shiiqiis. <sup>9</sup> Asai yarshshiyosaa anjjissiyo baalaa laappun gallassaa, qassi Daase Baalaa hara laappun gallassaa bonchchiis. Hospunta gallassan geeshsha yaa7au asai shiiqiis. <sup>10</sup> Hegaappe guyyiyan, Solomoni laappunta aginan, laatamanne hezzantto gallassi asaa moissiis; GODAI Daawitayyo, Solomonayyoonne ba asaa Israa7eelayyo oottido kehatettan asai ufaittiiddinne wozanappe pashkkiiddi, ba soo ba soo biis.

<sup>11</sup> Solomoni GODAA Beeta Maqidasiyaanne kawo keettaa keexxidi wurssiis; Solomoni GODAA Beeta Maqidasiyaanne ba kawo keettan oottanau ba wozanan qoppidobaa ubbaa poliis. <sup>12</sup> GODAI Solomonayyo qammi qonccidi, hagaadan yaagiis; “Taani ne woosaa siyaas; taani ha sohuwaa taayyo yarshshoi yarshshettiyo Beeta Maqidase gidanaadan dooraas. <sup>13</sup> Taani irai bukkennaadan saluwaa gorddin, woikko sa7aa kattaa maanaadan booliyaa azazin, woikko ta asaa giddon boshaa yeddin, <sup>14</sup> ta sunttan xeesettida ta asati bantta asatettaa kaushshidi woossikko, eti tana koyikkonne bantta iita ogiyaappe simmikko, taani saluwan eta woosaa siyana. Siyada eta nagaraa atto gaana; eta biittaaakka pattana. <sup>15</sup> Ha77ikka ha sohuwan woosettiya woosaa ta aifee xeellana; ta haittaikka siyana. <sup>16</sup> Ha77ikka ha Beeta Maqidasee merinau ta sunttai an de7ana mala oottada taani dooraas; doorad akka geeshshaas. Ta aifeenne ta wozanai ubba wode ha Beeta Maqidasiyan de7ana.

<sup>17</sup> “Nena gidikko, neeni ne aawai Daawiti hemettidoogaadan ta sinttan hemettikko, taani azazidobaa ubbaa oottikkonne ta wogaanne ta higgiiyaa naagikko, <sup>18</sup> taani ne aawaa Daawitaara, ‘Israa7eela haariya asa neeni mulekka xayakka’ yaagada maacetti-doogaadan, ne kawotaa araataa mintta essana.

<sup>19</sup> “SHin intte Israa7eela asati wora simmikko, taani inttena azazido ta aza-zuwaanne ta wogaa aggi bayikkonne hara xoossatuuyo oottanaunne goinnanau biikko, <sup>20</sup> yaatikko, taani kase intteyyo immido biittaappe inttena xoqollana; taani ta sunt-taayyo geeshshido ha Beeta Maqidasiyaakka aggaagana. Taani ha Beeta Maqidasiyaa asaa ubbaa giddon haiseyiyoobaanne qilliicciyoobaa oottana. <sup>21</sup> Ha77i keehippe bonchchettida ha Beeta Maqidasiyaa mataara kanttiya asi ubbi dagammiiddi, ‘GODAI ha biittaanne ha Beeta Maqidasiyaa aibissi hagaadan oottidee?’ yaagana. <sup>22</sup> Yaagin asai, ‘Eta maizza aawata Gibxxeppe kessida GODAA bantta Xoossaa eti aggidi, hara xoossata kaallido gishshaassinne etayyo oottidi goinnido gishshaassi, GODAI eta bolli ha iitabaa ubbaa ehiis’ yaagidi zaarana” yaagiis.

## 8

### *Solomoni Oottido Hara Oosota (Kawotu Maxaafaa Koiruwaa 9:10-28)*

<sup>1</sup> Solomoni GODAA Beeta Maqidasiyaanne ba kawo keettaa keexxido laatamannta laittaa wurssettan, <sup>2</sup> Kawoi Kiiraami zaaridi immido katamata Solomoni wotti yeggidi keexxiis; keexxidi Israa7eela asaa he katamatun wottiis.

<sup>3</sup> Hegaappe guyyiyan, Solomoni Hamaatanne Xooba geetettiya biittata biidi, he biittata omooddiis. <sup>4</sup> Yaatidi bazzuwan de7iya Taaximooraa giyo katamaanne miishshaa ubbaa minjjiyo katamata Hamaata biittan keexxiis. <sup>5</sup> Hegaadankka, Solomoni Killi Beeti-Horoonanne Hirkki Beeti-Horoonaa geetettiya katamata zaarettidi keexxiis; he katamati dirssai, penggeenne gorddee de7iyo diretti uttida katamata. <sup>6</sup> Baa7ilaata katamaa, miishshaa minjjiyo katamata ubbaa, ba paratanne paraa gaareta wottiyo katamata ubbaanne i keexxanau amottido ubbaa Yerusalaamen Liibaanoosaaninne ba haariyo biitta ubban keexxiis.

<sup>7</sup> Hiitetuppe, Amooretuppe, Parzzetuppe, Hiiwetuppenne Yaabuusatuppe attida asati ubbai Israa7eela asa gidokkona; <sup>8</sup> eti Israa7eela asati biittaappe wurssi xaissennan aggin, he biittan attida asatu zerettata. Solomoni eta gabbaaratettaa ootissiis; eti hachchi gakkanaashinkka gabbaaratettan oottoosona. <sup>9</sup> SHin Solomoni ba oosuwaayyo Israa7eela asaappe oonanne ailleyibeenna; eti ayyo olanchchata, ola gadaawata, para gaareta laaggiyaageetu halaqatanne paraasata gididi oottidosona. <sup>10</sup> Hegaadankka, qassi eti Kawuwaa Solomona oosuwaa oottiyaageetu halaqata. Etaappe naa77u xee-tanne ishatamati oosuwaa oottiya gabbaarata xeellidi ootissidosona.

<sup>11</sup> Hegaappe guyyiyan Solomoni “GODAA Taabootai gelido sohoi geeshsha gidiyo gishshau, ta keettaayyiyaa Israa7eela Kawuwaa Daawita keettan de7anau bessukku” yaagiis; yaagidi Gibxxe kawuwaa na7iyo Daawita Katamaappe denttidi, i iyyo keexxi wottido kawo keettaa ehiis.

<sup>12</sup> Solomoni he wode Beeta Maqidasiyaa sinttan GODAAYYO keexxido yarshshiy-oosan xuuggiyo yarshshuwaa GODAAYYO yarshshees. <sup>13</sup> Muuse higgee azaziy-oogaadan hachchi hachchissi bessiya xuuggiyo yarshshuwaa yarshshees. Solomoni Sambbatan Sambbataaninne aginai xeeriy wodiyan wodiyan, qassi laittaappe heez-zuton bonchchiyo baalatun (Oittaa Baalan, Saaminttatu Baalaaninne Daase Baalan) GODAAYYO yarshshuwaa yarshshees.

<sup>14</sup> A aawai Daawiti kase azazidoogaadan, qeeseta eta oosuwan oosuwan shaakkidi sunttiis; qassi gallassi gallassi mazamuriyan sabbanaunne qeeseta maaddanau Lee-wata shaakkidi sunttiis. Qassikka Xoossaa asa gidida Daawiti azazidoogaadan, pengge ubbaa kayan kayan naaganaadan penggiyaa naagiyaageeta shaakkidi sunttiis. <sup>15</sup> Hegaadankka, kase Daawiti buquraa minjjiyoosaabaanne hara allaalletubaa qeesetanne Leewata azazidoogaadan, issoinne antennan ubbaikka polettiis.

<sup>16</sup> Solomoni halchchido ooso ubbai oosettidi wuriis; GODAA Beeta Maqidasee baasettido wodiyaappe doommidi, polettana gakkanaashinkka ooso ubbai lo77o oosettiis.

<sup>17</sup> Hegaappe guyyiyan, Kawoi Solomoni Eedooma biittan Zo7o Abbaa doonan de7iya Eexiyooni-Gaabiranne Eelaata geetettiya katamata biis. <sup>18</sup> Kawoi Kiiraami markkabanne markkabiya laaguwan loohida ba asata Solomonayyo yeddiis; yeddin eti Solomona asatuura issippe Ofira biitti biidosona; biidi yaappe tammanne ichchashu sha7u kilo giraame deexxiya worqqaa Kawuwaa Solomonayyo ekkidi yiidosona.

## 9

### *Saaba Kawiyo*

#### *(Kawotu Maxaafaa Koiruwaa 10:1-13)*

<sup>1</sup> Saaba kawiya Solomona woriyaa siyada, deexo oishata ekkada, a paaccanau denddaasu. Denddada sawuwaa, keehi daro worqqaanne al77o shuchchaa caanettida daro gaameelatu cugiyaara keehi daro ajaban Yerusalaame gakkada, Solomona sintti aadhdhaasu. Aadhdhada ba wozanan de7iyaabaa ubbaa Solomonayyo yootaasu.

<sup>2</sup> Solomoni a oichchidobaa ubbaa odiis; i iyyo birshshennan appe geemmi attidabi aibinne baawa. <sup>3</sup> Saaba kawiya Solomona aadhdhida eratettaa, i keexxido kawo keettaa, <sup>4</sup> a maaddan shiiqiya qumaa, a oosanchchati uttiyo utettaa, a ashkharati oottiyo oosuwaanne maayiyo maayuwaawaa, a eessaa tigiyaageeti maayiyo maayuwaanne GODAA Beeta Maqidasiyan i xuuggiyo yarshshuwaa be7ido wode, i wozanai gagettiis.

<sup>5</sup> Hegaappe guyyiyan, a kawuwaa, “Nebaanne ne aadhdhida eratettaabaa taani ta deren de7aidda siyidoogee tuma. <sup>6</sup> SHin taani yaada ta aifiyaa biraanan be7ana gakkanaashin, eti taayyo yootidobaa ammanabeikke. Ne aadhdhida eratettaa gitatettaayyo baggaanne taayyo yootibookkona; taani siyidobaappe neeni keehi xoqqaasa. <sup>7</sup> Ubba wode ne sinttan eqqidi, ne aadhdhida eratettaa siyiya ne asatinne ne oosanchchati aiba ufaiyyoonaashsha! <sup>8</sup> Nenan ufaiyttidi, nena ba kawotaa araatan utissida GODAI ne Xoossai galatetto! Ne Xoossai Israa7eela asaa siiqido gishshaunne merinau mintti essanau koyido gishshau, neeni suure pirdaanne xillotettaa oottana mala, i nena eta bolli kawoyiis” yaagaasu.

<sup>9</sup> Yaagada kawiya 4,000 kilo giraame deexxiya worqqaa, keehi daro sawuwaanne al77o shuchchaa kawuwaayyo immaasu; Saaba kawiya Kawuwaa Solomonayyo immido sawuwaa milatiya sawoi mulekka baawa.

<sup>10</sup> (Ofirappe worqqaa ehiida, Kiiraama asatinne Solomona asati yaappekka sanddalle giyo mittaanne al77o shuchchaa ehiidosona. <sup>11</sup> Kawoi Solomoni he sanddalliyaappe GODAA Beeta Maqidasiyaa, kawo keettaa geliyoosaayyo xekkatanne mazamuriyaa yexxiyaageetuyyo maazinqqiyaanne diittaa merissiis. Hega milatiyaabi Yihudaa biittan kase beetti erenna.)

<sup>12</sup> Kawoi Solomoni Saaba kawiya amottada a oichchidobaa ubbaa iyyo immiis. A ayyo ehiidoogaappe daruwaa i iyyo immiis. Hegaappe guyyiyan, Saaba kawiya ba ajabaara denddada, ba biitti simmaasu.

### *Solomona Aquwaa*

#### *(Kawotu Maxaafaa Koiruwaa 10:14-25)*

<sup>13</sup> Solomoni laittan laittan ekkiiyo worqqai laatamanne heezzu sha7u kilo giraame deexxiyaagaa. <sup>14</sup> Hegee zal77anchchatuppe ekkido qaraxaanne Araba biittaa kawotu ubbaappenne Israa7eela biittaa haariyaageetuppe ekkido worqqaanne biraa gujjen-naana. <sup>15</sup> Kawoi Solomoni naa77u xeetu wogga gonddalleta qoxxido worqqaaappe merissiis; issi issi gonddalliyan laappun kilo giraame gidiya worqqai geliis. <sup>16</sup> Qassikka i heezzu xeetu qeeri gonddalleta qoxxido worqqaaappe merissiis; issi issi qeeri gonddalliyan naa77u kilo giraame gidiya worqqai geliis. Kawoi he gonddalleta Liibaanoosa Woraa Keettaa giyo keettan wottiis.

<sup>17</sup> Qassikka kawoi danggarssaa zaaliyaappe issi gita kawotaa araataa merissidi, geeshsha worqqan sheeshshiis. <sup>18</sup> Kawotaa araatai de7iyooosaa pude kiyana u yedhdhiyo usuppun xekkati de7oosona. Gediyan yedhdhanau kawotaa araataara gattidi, worqqaappe oottido oidee de7ees. Araatau naa77u baggaarakka qesiyaa zemppissiyo sohota de7oosona; he naa77u sohota lanqqiyankka ya baggaaranne ha baggaara eqqida issi issi gaammo misilee de7ees. <sup>19</sup> He araataa pude kiyiyo usuppun xekkatun ya baggaaranne ha baggaara issi issi gaammo misilee, muleera tammanne naa77u misileti de7oosona. Hagaa mala kawotaa araatai hara kawotettan awaaninne oosettiibeenna.

<sup>20</sup> Kawoi Solomoni ushshaa uyiyo miishsha ubbai worqqaappe oosettiis; Liibaanoosa Wora Keettan de7iya miishsha ubbaikka muruta worqqaappe oosettiis. Solomona wode biri mulekka go77iyaabadan qoodetti erenna. <sup>21</sup> Kawuwaayyo Kiiraama markkabetuura zal77iya gita markkabeti abban de7oosona. He markkabeti worqqaanne biraa, danggarssaa zaaliyaa, qaaretanne geleshshota caani ekkidi, heezzu laittaappe issiton simmoosona.

<sup>22</sup> Kawoi Solomoni duretettaanne aadhdhida erattetan sa7an de7iya kawotu ubbaappe darees. <sup>23</sup> Sa7an de7iya kawoti ubbai a sintti aadhdhanaunne Xoossai a wozanan wottido aadhdhida erattetta siyanau koyoosona. <sup>24</sup> Laittaappe laittan yiya ubbai ayyo immanau worqqanne bira miishshata, maayota, ola miishshatanne sawuwaa, paratanne baqulota ekkidi yees.

<sup>25</sup> Solomonau paratuuyoonne gaaretuuyo oiddu sha7u gaaxatai de7ees; qassi tammanne naa77u sha7u parati ayyo de7oosona. Solomoni hegeeta paraa gaaretu katamatuuninne banaara Yerusalaamen wottiis. <sup>26</sup> Solomoni Efiraaxiisa Shaafaappe doommidi, Pilisxxeema biittaanne Gibxxe zawaa gakkanaassi de7iya kawota ubbaa haariis. <sup>27</sup> Kawoi Yerusalaamen biri shuchchadan korettanaadan, zigikka bargguwan dicciya ettaadan corattanaadan oottiis. <sup>28</sup> Solomonayyo parata Gibxxeppen hara biitta ubbaappe ehoosona.

### *Solomona Haiquwaa*

*(Kawotu Maxaafaa Koiruwaa 11:41-43)*

<sup>29</sup> Koiroppe wurssettaa gakkanaassi Solomoni hanido harabai Hananabaa Yootiya Naataana Taarikiyaa Maxaafan, Seeloppe Yiida Akiiyi Hananabaa Yootido Maxaafaanne Nabaaxa Na7aa Iyorbbaamabaa Hananabaa Yootida Iddoi Be7ido Ajjuutaa Maxaafan xaafetti uttiis. <sup>30</sup> Solomoni Israa7eela ubbaa bolli Yerusalaamen oitamu laitta kawotiis. <sup>31</sup> Hegaappe guyyiyan, Solomoni haiqqidi, ba maizzan gaittiis; ba aawaa Daawita Kataman moogettiis. A na7ai Robi7aami a sohuwan kawotiis.

## 10

### *Israa7eela Zareti Tammati Makkalidosona*

*(Kawotu Maxaafaa Koiruwaa 12:1-20)*

<sup>1</sup> Israa7eela asai ubbai Robi7aami kawoyanau Sekeema katamaa biido gishshau, ikka yaa biis. <sup>2</sup> Nabaaxa na7ai Iyorbbaami, Kawuwaa Solomonappe baqatidi Gibxxen de7iyaagee hagaa siyido wode, Gibxxeppe simmidi yiis. <sup>3</sup> Yin Israa7eela asai ubbai Iyorbbaamayyo kiittidi xeesissin, inne Israa7eela yaa7ai ubbai Robi7aamakko biis; biidi, <sup>4</sup> “Ne aawai nuna deexo qambbaraa toossiis; shin ha77i neeni i nuna ootissiyo wolqqaama oosuwaanne deexo qambbaraa nuuyyo kaushsharkkii. Yaatikko, nuuni neeyyo haarettana” yaagidosona.

<sup>5</sup> Yaagin Robi7aami eta, “Biite; biidi heezzantto gallassi simmidi, taakko yiite” yaagiis. Yaagin asai simmidi biis.

<sup>6</sup> Hegaappe guyyiyan, Kawoi Robi7aami a aawai Solomoni paxa de7iyo wode, Solomona zorida cimata zorettaa bessiiis. I eta, “Ha asaayyo woigada zaara geetii?” yaagidi oichchiis.



<sup>7</sup> Oichchin cimati Robi7aama, “Neeni ha asaayyo kehikko, eta ufaissikkonne etau lo77o qaalaa zaarikko, eti ubbaton neeyyo ashkkara gidana” yaagidosona.

<sup>8</sup> SHin Robi7aami cimati zorido zoriyaa aggidi, aara diccidi, ayyo oottiya yelaga asata zoretaa bessii. <sup>9</sup> I eta, “Intte tana zoriyoobi aibee? ‘Ne aawai nuna toossido deexo qambaraa nuuyyo kaushsharkkii’ yaagiya ha asaayyo woigada zaaroo?” yaagidi oichchiis.

<sup>10</sup> Oichchin aara diccida yelagati, “‘Ne aawai nuna deexo qambaraa toossiis; shin neeni nuuyyo kaushsharkkii’ yaagiya asaayyo, ‘Ta gil77a biradhdhee ta aawaa xeessaappe orddees. <sup>11</sup> Ta aawai intte qambaraa deexettiis; shin taani hegaappekka aattada deexettana. Ta aawai inttena lissuwan wadhdhiis; shin taani inttena masimasuwaadan dukkiya lissuwan wadhdhana’ yaagada zaara” yaagidosona.

<sup>12</sup> Hegaappe guyyiyan, Kawoi Robi7aami, “Hezzantto gallassi simmidi, taakko yiite” giidoogaadankka, Iyorbbaaminne asai ubbai hezzantto gallassi simmidi yiidosona. <sup>13</sup> Yin Kawoi Robi7aami etayyo hanqqo zaaruwaa zaariis. Cimatu zoriyaa aggidi bayidi, <sup>14</sup> yelagati zorido zoriyaa kaalliis. Yaatidi hagaadan yaagiis; “Ta aawai intte qambaraa deexettiis; shin taani hegaappekka aattada deexettana. Ta aawai inttena lissuwan wadhdhiis; shin taani inttena masimasuwaadan dukkiya lissuwan wadhdhana” yaagidi zaariis. <sup>15</sup> Kawoi asai giyoogaa siyennan ixxiis; aissi giikko, GODAI Seelophe yiida Akiya baggaara kase Nabaaxa na7aa Iyorbbaamayyo yootido qaalai polettanaadan hagee Xoossaappe haniis.

<sup>16</sup> Israa7eela asai ubbai kawoi eti giyoogaa siyennan ixxidoogaa be7idi, kawuwaa hagaadan yaagidosona; “Daawitabaappe nuna gakkiiyaabi aibee? Issey na7aappe nuuni laattanabi baawa! Israa7eela asau, intte soo intte soo biite! Simmi Robi7aami bau naagetto!” yaagidosona. Hega gishshau, Israa7eela asai ubbai bantta soo bantta soo biidosona. <sup>17</sup> SHin Robi7aami Yihudaa biittan de7iya Israa7eela asaa bolli kawotiis.

<sup>18</sup> Hegaappe guyyiyan, Kawoi Robi7aami ba gabbaaratu halaqaa Adooniraama Israa7eela asaakko kiittiis; kiittin eti a shuchchan caddidi woridosona. Yaatin, Kawoi Robi7aami ba paraa gaariyan eesuwan kiyi uttidi, Yerusalaame baqatiis. <sup>19</sup> Heedeppe doommidi, hachchi gakkanaashin, Israa7eela zareti tammati Daawita zariyaappe kawotida kawotu bolli makkalidosona.

## 11

### *SHamaa7ee Hananabaa Yootiis (Kawotu Maxaafaa Koiruwa 12:21-24)*

<sup>1</sup> Robi7aami Yerusalaame katamaa gakkido wode, Israa7eela biittaa asaara olettidi, kawotettaa baayyo zaarana mala, Yihudaa zariyaappenne Biniyaama zariyaappe doorettida issi xeetanne hospun tammu sha7u olanchchata shiishshiis. <sup>2</sup> SHin GODAA qaalai Xoossaa asa gididiya SHamaa7iyaakko yiis; yiidi, <sup>3</sup> “Solomona na7aa Yihudaa Kawuwaa Robi7aamayyoonne Yihudaaninne Biniyaaman de7iya Israa7eela asaa ubbaayyo hagaadan yaaga; <sup>4</sup> ‘GODAI inttena, “Intte ishanttuura, Israa7eelatuura olettanau booppite. Haga taani oottido gishshau, intte ubbaikka intte soo intte soo simmite” yaagees’ yaagada yoota” yaagiis. Yaagin eti GODAA qaalaa siyidi, Iyorbbaama olanau biyoogaa aggidi simmidosona.

### *Robi7aami Qatota Gimbbiis*

<sup>5</sup> Robi7aami Yerusalaamen uttidi, hagaappe kaallidi xaafettida Yihudaanne Biniyaama katamatussi qatota gimbbiis. <sup>6</sup> He katamatikka Beetaliheeme, Exaama, Taqo7a, <sup>7</sup> Beetixuura, Sooko, Adulaama, <sup>8</sup> Gaate, Mareesha, Ziifa, <sup>9</sup> Adoraima, Laakisha, Azeega, <sup>10</sup> Xor77a, Ayyaaloonne Kebroona. <sup>11</sup> Robi7aami katamatu qatuwaa minttidi, halaqata etan wottiis; qassi qumaa, zaitiyaanne woine eessaa etan wottiis.



<sup>12</sup> He gimbbettida katamatu ubban gondalletanne toorata wottiis; yaatidi eta keehippe minttiis. Hegaadan oottidi, Yihudaanne Biniyaama biittata haariiddi de7iis.

### *Qeesetinne Leewati Ubbai Yihudaa Yiidosona*

<sup>13</sup> Israa7eela ubban de7iya qeesetinne Leewati ubbai bantta de7iyoosaappe Robi7aamakko yiidosona. <sup>14</sup> Leewati bantta hentta gadiyaanne bantta sohuwaa aggidi, Yihudaanne Yerusalaame yiidosona. Aissi giikko, eti qeese gididi GODAAYYO oottennaadan, Iyorbbaamine a naati diggidosona. <sup>15</sup> Iyorbbaami goinniyo xoqqa sohotun hara qeeseta sunttiis; sunttin eti xalahetussinne i medhdhido maratu misiletussi qeese gididi oottidosona. <sup>16</sup> Leewati yiidoogaappe guyyiyan, Israa7eela zaretu ubbaappe GODAAYYO, Israa7eela Xoossaayyo bantta wozanappe goinnanau koyiyaageeti GODAAYYO, bantta aawatu Xoossaayyo yarshshuwaa yarshshanau eta geeduwaa kaallidi, Yerusalaame yiidosona. <sup>17</sup> Eta yuussai Yihudaa kawotettaa minttiis; eti heezzu laitta kumettaa Solomona na7aa Robi7aama maaddidosona. Eti Kawuwaa Daawita ogiyaanne Kawuwaa Solomona ogiyaa kaallidi, heezzu laittaa saro de7idosona.

### *Robi7aama So Asaa*

<sup>18</sup> Robi7aami Mahilaato giyo maccaasiyo ekkiis. Mahilaati aawai Daawita na7aa Yaarimoota; i aayyiyaa Isseya na7aa Eli7aaba na7iyo Abihailo. <sup>19</sup> Mahilaata Robi7aamayyo Yi7uusha, SHamaariyaanne Zahaama geetettiya attuma naata yelaasu. <sup>20</sup> Hegaappe guyyiyan, Abeselooma na7ee na7iyo Maa7iko ekkiis; Maa7ika Robi7aamayyo Abiyya, Attaaya, Ziizanne SHalomiiita yelaasu. <sup>21</sup> Robi7aami ba maccaasatuppenne ba baakkotu ubbaappe Abeselooma na7ee na7iyo Maa7iko aaro siiqees. Ayyo tammanne hosppun maccaasatinne usuppun tammu baakkoti de7oosona. I laatamanne hosppun attuma naatanne usuppun tammu macca naata yeliis. <sup>22</sup> Robi7aami Maa7iki na7aa Abiyya baappe guyyiyan kawoyanau qoppido gishshau, a ishanttu bolli halaqa oottidi sunttiis. <sup>23</sup> Robi7aami cinccidi, ba attuma naata Yihudaanne Biniyaama biittatu ubban de7iya gimbbettida katamatu ubban shaakki shaakki wottiis; wottidi etayyo daro kattaa immiis. Qassi etayyo cora maccaasaa immiis.

## 12

### *Gibxxee Yihudaa Bolli Woraajjiis*

#### *(Kawotu Maxaafaa Koiruwaa 14:25-28)*

<sup>1</sup> Robi7aama kawotettaa minni eqqido wode, inne Israa7eela asai ubbai GODAA higgiiyaa aggi bayidosona. <sup>2</sup> Eti GODAU ammanettennan ixido gishshau, Robi7aami kawotido ichchashantto laittan Gibxxe Kawoi SHiishaaqi Yerusalaame katamaa bolli woraajjiis. <sup>3</sup> Aara issippe Gibxxeppe yiidai issi sha7anne naa77u xeetu paraa gaareta, usuppun tammu sha7u paraasatanne qoodai banna Liibiyaa olanchchata, Sukka olanchchatanne Toophphiyya olanchchata. <sup>4</sup> Kawoi SHiishaaqi gimbbettida Yihudaa katamata omooddidi, Yerusalaame katamaa yiis.

<sup>5</sup> Hegaappe guyyiyan, hananabaa yootiya SHamaa7ee Robi7aamakonne SHiishaaqappe baqatidi, Yerusalaamen shiiqi uttida Yihudaa kaalettiyaageetukko yiidi, “GODAI hagaadan yaagees; ‘Intte tana aggideta; hega gishshau, taanikka inttena SHiishaaqa kushiyan aggaas’ yaagees” yaagiis.

<sup>6</sup> Yaagin Israa7eela kaalettiyaageetinne Kawoi Robi7aami banttana kaushshidi, “GODAI xillo” yaagidosona.

<sup>7</sup> Eti banttana kaushshidoogaa GODAI be7ido wode, SHamaa7iyaa GODAI hagaadan yaagiis; “Eti banttana kaushshido gishshau, taani eta wurssa xaissikke; taani eta ashshana. Ta hanqqoi SHiishaaqa baggaara Yerusalaame bolli tigettenna.

<sup>8</sup> Gidikonne, eti taayyo haarettiyoogaaninne hara biittatu kawotuyyo haarettiyoogan de7iya dummatettaa erana mala, eti SHiishaaqqayyo haarettana” yaagiis.

<sup>9</sup> Hegaa gishshau, Gibxxe Kawoi SHiishaaqa Yerusalaame katamaa olidi, GODAA Beeta Maqidasiyaaninne kawo keettan de7iya buquraa ubbaa ekkiis. Qassi Solomoni worqqaappe ootissido gondalletakka ekki efiis. <sup>10</sup> I efiido worqqa gondalletu gishshaa, Kawoi Robi7aami nahaasiyaa birataappe hara gondalleta ootissiis; ootissidi kawo keettaa penggiyaa naagiyaageetu halaqaa kushiyan wottiis. <sup>11</sup> Kawoi GODAA Beeta Maqidasiyaa geliyo wode ubban, penggiyaa naagiyaageeti yiidi, he gondalleta oiqqoosona. Hegaappe simmin, eti zaaridi, naagiyaageetu keettan wottoosona. <sup>12</sup> Robi7aami bana kaushshido gishshau, i wuri xayennaadan GODAA hanqqoi appe kichchiis. Ubba Yihudaa biittau muliyau sa7ai injjetiis.

### *Robi7aama Kawotaa Wurssetta*

<sup>13</sup> Kawoi Robi7aami bana minttidi, Yerusalaamen kawotiis. Robi7aami kawotido wode a laittai oitamanne isiino; GODAI ba sunntaa yan wottanau Israa7eela biitta ubbaappe doorido Yerusalaame kataman tammanne laappun laitta kawotiis. Robi7aama aayyiyaa Amooniyo Naa7imo. <sup>14</sup> Robi7aami GODAAYYO wozanappe goinnanau koyibeenna gishshau, iitabaa oottiis.

<sup>15</sup> Robi7aami koiroppe wurssettaa gakkanaassi hanidobainne a yeletaa maarai Hananabaa Yootiya SHamaa7iyaa Taarikiyaa Maxaafaaninne Iddoi Be7ido Ajjuutaa Maxaafan xaafetti uttiis. Robi7aaminne Iyorbbaami ubba wode olettiiddi de7idosona. <sup>16</sup> Robi7aami haiqqidi, ba maizzan gaittiis; i Daawita Kataman moogettiis. A sohuwan a na7ai Abiiyi kawotiis.

## 13

### *Yihudaa Kawuwaa Abiiya*

#### *(Kawotu Maxaafaa Koiruwwa 15:1-8)*

<sup>1</sup> Kawoi Iyorbbaami kawotido tammanne hosppuntta laittan Abiiyi Yihudan kawotiis. <sup>2</sup> Abiiyi Yerusalaamen heezzu laitta kawotiis. A aayee sunntai Mikaayo;<sup>2</sup> Mikaaya Gib77appe yiida Uri7eela na7iyo.

Abiiyinne Iyorbbaami olettiiddi de7idosona. <sup>3</sup> Abiiyi doorettida oiddu xeetu sha7u mino olanchchata ekkidi, olanau kiyiis; kiyin Iyorbbaamikka doorettida hosppun xeetu sha7u mino olanchchata ekkidi, Abiiyaara olettanau kiyiis.

<sup>4</sup> Hegaappe guyyiyan, Abiiyi Efreema gezziyan de7iya Xamaraima giyo deriyaa huuphiyan eqqidi, hagaadan yaagiis; “Inttenoo, Iyorbbaamaanne Israa7eela asatoo, ubbaikka taani giyoobaa siyite! <sup>5</sup> GODAI Israa7eela Xoossai Daawitinne a zerettai Israa7eela bolli merinau kawotanaadan, Daawitaara i laamettenna maachchaa maacetti-doogaa intte ereketiiyye? <sup>6</sup> SHin Daawita na7aa Solomona ashkkarai, Nabaaxa na7ai Iyorbbaami denddidi, ba godaa bolli makkaliis. <sup>7</sup> Robi7aami yelaganne lammachcha gididi, etaara eqettanau danddayenna wode, pattenna shufuro asati Iyorbbaamakko shiiqidi, Solomona na7aa Robi7aama bolli minnidosona.

<sup>8</sup> “Ha77ikka GODAI Daawita zerettatuyyo immido kawotettaara intte gaaddetanau qoppeeta. Intte hegaa qoppidoogee intte keehippe cora asa gidido gishshaassanne intteyyo xoossata gidana mala, Iyorbbaami worqqaappe merissido marati inttenaara de7iyo gishshaassa. <sup>9</sup> Aaroon zare gididi, GODAASSI oottiya qeesetanne Leewata intte yedettideta. Yedettidi hara biittaa asai oottiyoogaadan intteyyo hara qeeseta sunttideta. Bana dummayanau issi mirgguwaanne laappun dorssa orggeta ekkidi yiya ooninne worddo xoossatuyyo qeese gidana.

<sup>2</sup> 13:2 Mikaayo: Mikaayo woikko Maa7iko geetettausu. Hanidabaa Odiya Naa77antto Maxaafaa 11:20 xeella.

<sup>10</sup> “SHin nuna gidikko, GODAI nu Xoossaa; nuuni a aggibookko. Aaroona zare gididi GODAASSI oottiya qeeseti nuuyyo de7oosona; qassi Leewati eta maaddoosona. <sup>11</sup> Eti ubba gallassi maalladonne omarssi GODAAYYO xuuggiyo yarshshuwaa yarshshoosonanne sawiya ixaanaa cuwayoosona. GODAA sinttan wottiyo oittaa geeshsha xaraph- pheezean wottosona. Omarssi omarssi poo7issanaadan worqqaappe oottido xomppeta wottiyo ballan wottidi giigissoosona. Aissi giikko, nuuni GODAA nu Xoossaa azazuwaa naagoos; shin intte a aggideta. <sup>12</sup> Be7ite, Xoossai nunaara de7ees; i nuna kaalettiyaagaa. Olaa xurumbbaa punniya a qeesetikka nunaara de7oosona; nuuni inttenaara olaa doommanau xurumbbaakka eti punnana. Israa7eela asau, GODAARA intte aawatu Xoossaara olettoppite! Aissi giikko, intte a xoonanau danddayekketa” yaagiis.

<sup>13</sup> I haasayishin, Iyorbbaami ba olanchchatuppe issi citaa etappe guyyeera zuggidi naagana mala yeddiis. Israa7eela olanchchati Yihudaa olanchchatu sinttan de7iyo wode, zuggidi naagiya olanchchati etappe guyyeera de7oosona. <sup>14</sup> Yihudaa olanchchati guyye simmi xeelliyo wode, eta olanau yiidaageeti guyyeeranne sinttaara de7iyoogaa be7idosona. Be7idi GODAASSI waassidosona; qeesetikka xurumbbaa punnidosona. <sup>15</sup> Hegaappe guyyiyan, Yihudaa olanchchati ola waasuwwa waassidosona. Eti ola waasuwwa waassido wode, GODAI Iyorbbaamanne Israa7eela asaa ubbaa Abiiya sinttaanne Yihudaa sinttan xooniis. <sup>16</sup> Israa7eela olanchchati Yihudaa olanchchatu sinttaappe baqatin, Xoossai eta Yihudaa olanchchatu kushiyan aattidi immiis. <sup>17</sup> Abiiyinne a olanchchati eta suppu oottidi wurssidosona; yaatin, ichchashu xeetu sha7u doorettida Israa7eela olanchchati haiqqidosona. <sup>18</sup> Israa7eela asai he wode xoonettiis; Yihudaa asai GODAN, bantta aawatu Xoossan ammanettido gishshau, eta xoonidosona.

<sup>19</sup> Abiiyi Iyorbbaama yedettidi, appe Beetele katamaa, Yishaana katamaanne Efiroona katamaa eta moottatuura oiqqiis. <sup>20</sup> Abiiyi de7ido laittan ubban Iyorbbaami simmidi minnibeenna. GODAI Iyorbbaama dechchin haiqqiis.

<sup>21</sup> SHin Abiiyi minni minni biis. Abiiyi tammanne oiddu maccaasaa ekkidi, laatanne naa77u attuma naatanne tammanne usuppun macca naata yeliis. <sup>22</sup> Abiiyi oottido harabai, i hanidobainne i giidobai ubbai Hananabaa Yootiya Iddo Taarikiyaa Maxaafan xaafetti uttiis.

## 14

### *Kawoi Asi Toophphiyaa Olanchchata Xooniis*

<sup>1</sup> Abiiyi haiqqidi, ba maizzan gaittiis; Daawita Kataman a moogidosona. A sohuwan a na7ai Asi kawotiis. I kawotido wode biittai tammu laitta woppaa demmiis.

<sup>2</sup> Asi GODAA ba Xoossaa sinttan lo77obaanne suurebaa oottiis. <sup>3</sup> Asi allaga xoossatuyyo yarshshiyo sohotanne goinniyo xoqqa sohuwaa xaissiiis. Goinnanau shuchchaappe oottido tuussatakka mentterettiis; Asheero giyo xoosee misiletakka qanxxeretti oliis. <sup>4</sup> Yihudaa asai GODAA bantta aawatu Xoossaa koyanaadaaninne a higgiiyaanne a azazuwaa naaganaadan Asi azaziis. <sup>5</sup> Qassi goinniyo xoqqa sohotanne ixaanaa cuwayiyo sohota Yihudaa katamaa ubbaappe xaissiiis. Xaissin a kawotettaa laittan biittai woppaa demmiis. <sup>6</sup> Kawoi Asi Yihudan de7iya katamatussi qatota medhdhiis. GODAI a shemppissido gishshau, biittaikka shemppiis; he laittatun aara ooninne olettibeenna.

<sup>7</sup> Asi Yihudaa asaa hagaadan yaagiis; “Ane nuuni ha katamata keexxoos; keexxidi eta yuushuwan miixata medhdhoos. Medhdhidi eta bolli adussa gimmbeta, penggetanne penggeta gorddiyo hiraqota kessoos. Nuuni GODAA nu Xoossaa koyido gishshau, biittai ha77ikka nuussa. Nuuni a koyida; i nuuyyo ubba baggaara woppaa immiis” yaagiis. Hegaa gishshau, eti katamata keexxidi polidosona.

<sup>8</sup> Asayyo wogga gondalletanne toorata oiqqiya heezzu xeetu sha7u olanchchati Yihudaa zariyaappe de7oosona; qassi qeeri gondalleta oiqqiyaageetinne wonddafiya

dukkiyaageeti naa77u xeetanne hosppun tammu sha7u olanchchati Biniyaama zariyaappe de7oosona. Hageeti ubbaikka mino asata.

<sup>9</sup> Zeraaha giyo issi Toophphiyaa asi issi miiloone olanchchatanne heezzu xeetu paraa gaareta ekkidi, Yihudaa olanau yiidi, Mareesha gakkiiis. <sup>10</sup> Gakkin Asikka aara olettanau kiyiis; kiyidi ba olanchchata Mareesha matan de7iya Xafaata Wombban salppissiis. <sup>11</sup> Hegaappe guyyiyan, Asi GODAA ba Xoossaa woossidi, “Abeet GODAU, wolqqi baina olanchchati wolqqaama olanchchata xoonanaadan maaddiyai neeppe attin, harai baawa! Abeet GODAU, nu Xoossau, nuuni nenan ammanettidi, ha cora olanchchatuura ne sunttan olettanau yiido gishshau, neeni nuna maadda. Abeet GODAU, neeni nu Xoossaa; nena asi xoonenna” yaagiis.

<sup>12</sup> Hegaa gishshau, GODAI Asa sinttaaninne Yihudaa olanchchatu sinttan Toophphiyaa olanchchata shociis; shocin Toophphiyaa olanchchati baqatidosona. <sup>13</sup> Asinne aara de7iya asai eta Garaara gakkanaassi yedettidosona. Toophphiyaa olanchchatuppe daroi haiqqido gishshau, eti simmidi minnanaunne olettanau danddayibookkona. Hegaadan hanidi, Toophphiyaa olanchchati GODAANINNE a olanchchatun xoonettidosona. Kawuwaa Asa olanchchatikka darobaa omooddidosona. <sup>14</sup> Hegaa heeran de7iya asai GODAI oottidobaa be7idi, daro dagammiiis. Asa olanchchatikka Garaara yuushuwan de7iya katamata ubbaa bonqqidi xaissidosona. <sup>15</sup> Qassi mehiyaa heemmiyaageetu moottata olidi, daro dorssaa, deesshaanne gaameelaa di7idi, Yerusalaame simmidosona.

## 15

### *Kawoi Asi Yihudan De7iya Eeqaa Misileta Xaissiis*

<sup>1</sup> Odeeda na7aa Azaariyaasa bolli Xoossaa Ayyaanai wodhdhiis; <sup>2</sup> Wodhdhin Asaara gaittanau biidi, hagaadan yaagiis; “Asaa, neeni, Yihudaa asainne Biniyaama asai ubbai siyite! Intte GODAARA issippe de7iyo keena ubban ikka inttenaara de7ees. Intte a koyikko, i intteyyo beettana; shin intte a aggikko, ikka inttena aggana. <sup>3</sup> Israa7eela asai tumu Xoossai, tamarissiya qeeseenne higgee bannan daro wodiya de7iis. <sup>4</sup> SHin banttana metoi gakkido wode, eti GODAAKKO, Israa7eela Xoossaakko simmidi, a koyidosona; koyin i etau beettiis. <sup>5</sup> He wodiyan kare kiyiyaagaunne soo geliyaagau sarotetta baawa; aissi giikko, biittaa ubbaa bollan de7iya asai daro shabbarettees. <sup>6</sup> Xoossai eta dumma dumma metuwan yeggido gishshau, deree deriyaa, katamaikka katamaa un77ettees. <sup>7</sup> SHin intte minnite; laafoppite! Aissi giikko, intte oottido oosuwau woiitoi de7ees” yaagiis.

<sup>8</sup> Odeeda na7ai hananabaa yootiya Azaariyaasi odido qaalaa siyido wode, Asi minniis. Asi Yihudaanne Biniyaama biittatu ubbaappenne Efireema gezziyan i omooddidi oiqqido katamatuppe sheneyiya eeqa misileta xaissiis. Hegaappe guyyiyan, GODAA Beeta Maqidasiyaa sinttan de7iya GODAAYYO yarshshiyooosaakka bottokoniis.

<sup>9</sup> GODAI a Xoossai aara de7iyooogaa be7ido gishshau, daro asai Israa7eelappe akko yiis; Yihudaa asaanne Biniyaama asaa ubbaa, etaara de7iya Efireema zareta, Minaase zaretanne Simoona zareta Asi shiishshiiis. <sup>10</sup> Asi kawotido tammanne ichchashantto laittan, heezzantto aginan he asai Yerusalaamen shiiqiis. <sup>11</sup> He gallassi omooddi ehiidobaappe laappun xeetu korimatanne laappun sha7u dorssata GODAAYYO yarshshidosona. <sup>12</sup> GODAA bantta aawatu Xoossaa bantta kumetta wozanaaninne bantta kumetta shemppuwan koyanau qaalaa gelidosona. <sup>13</sup> “GODAA Israa7eela Xoossaa koyenna asi, guutta gidin gita gidin, attuma gidin macca gidin, haiqqo” giidi maacettidosona. <sup>14</sup> Hegaa bollankka malkkataanne xurumbbaa punniiddi, bantta qaalaa xoqqu oottidi, GODAASSI caaqqidosona. <sup>15</sup> Yihudaa asai ubbai bantta kumetta wozanan ha caaquwaa caaqqido gishshau, ufaittidosona. Aissi giikko, GODAA eti laamotidi koyin, i etau beettiis. GODAI etayyo ubba baggaarakka woppaa immiis.



<sup>16</sup> Kawoi Asi ba aawaa aayyiya Maa7ika Asheero giyo xooseessi sheneyiya eeqaa misiliyaa medhdhido gishshau, Kawuwaa Aayyiyo a geetettiyo bonchchuwaappe o diggiis. Asi he eeqaa misiliyaa qanxxeretti suuppayidi, Qediroona Zanggaaran xuuggiis. <sup>17</sup> Goinniyo xogga sohota Asi Israa7eela biittaappe xaissennan aggikkonne, i ba de7ido laitta ubban GODAAYYO wozanappe ammanettiya asa gididi de7iis. <sup>18</sup> Inne a aawai GODAAYYO dummayi wottido biraanne worqqaqaa hara miishshata ehiidi, Xoossaa Beeta Maqidasiyaa giddon wottiis. <sup>19</sup> Asi kawotido hasttamanne ichchashantto laitti gakkanaassi oli baawa.

## 16

### *Yihudainne Israa7eeli Olettidosona (Kawotu Maxaafaa Koiruwaa 15:16-22)*

<sup>1</sup> Asi kawotido hasttamanne usuppuntta laittan Israa7eela Kawoi Baa7ishi Yihudaa bolli woraajjiis; woraajjidi Yihudaa Kawuwaa Asakko ooninne gelennaadaaninne kiyennaadan teqqanau Raama katamaa yuushuwaa minttidi gimbbiis. <sup>2-3</sup> Hegaa gaasuwan Kawoi Asi GODAA Beeta Maqidasiyaanne ba kawo keettaa buquraa minjjiyoosaappe worqqaanne biraa ekkiis. Ekkidi Damasqqo kataman de7iya Sooriyaa Kawuwaa Benihadaadayyo hagaadan yaagidi yeddiis; “Kase ta aawaaranne ne aawaara maacettidoogaadan, ane tanaaranne nenaara maacettoos. Be7a, taani neeyyo biraanne worqqaqaa yeddaas. Israa7eela Kawoi Baa7ishi ba olanchchata ta biittaappe kessana mala, neeni kase aara maacettido maachchaa kola” yaagiis.

<sup>4</sup> Yaagin Benihadaadi Kawoi Asi giidoogaa maayidi, ba ola gadaawata Israa7eela katamata olanau yeddiis. Yeddin eti Iyoona, Daananne Aabeeli-Beetimaa7ika geetettiya katamatanne Nifttaaleema biittan de7iya miishshaa minjjiyo katamata ubbaa xoonidosona. <sup>5</sup> Baa7ishi hegaa siyidi, Raama katamaa gimbbiyooqaa aggi bayiis.

<sup>6</sup> Hegaappe guyyiyan, Kawoi Asi Yihudaa asaa ubbaa shiishshiis; shiishshin asai Baa7ishi kase yan go7ettiyo shuchchaanne mittaa Raamappe miyyidosona. Miyyin i Gebaa7anne Mixiphpha geetettiya katamata an minttidi gimbbiis.

### *Kawoi Asi Hananabaa Yootiya Hanaana Qasho Keettan Yeggiis*

<sup>7</sup> He wode hananabaa yootiya Hanaani Yihudaa Kawuwaa Asakko yiidi, “Neeni Sooriyaa kawuwan ammanettada, GODAN, ne Xoossan, ammanettabeenna gishshau, Sooriyaa kawuwaa olanchchati ne kushiyaappe kessi ekkidosona. <sup>8</sup> Toophphiya asatinne Liibiyaa asati, cora paraa gaaretinne parati de7iyo daro olanchchata gidokkonaayye? SHin neeni GODAN ammanettido gishshau, GODAI eta ne kushiyan aatti immiis. <sup>9</sup> Aissi giikko, ba kumetta wozanaappe GODAN ammanettiya asa minttettanau GODAA aifee sa7aa bollan ubbasaa xeellees. Neeni ha yohuwan eeyyadasa; hegaa gishshau, hachchippe doommin, neeppe oli shaahetenna” yaagiis.

<sup>10</sup> Yaagin Asi hananabaa yootiyaagaa bolli daro hanqqettiis; hanqqettidi qasho keettan yeggiis. Qassi Asi he wode asaappe amaridaagaa waissiis.

### *Kawuwaa Asa Haiquwaa*

<sup>11</sup> Asi oottidobai koiroppe wurssettaa gakkanaassi Yihudaa Kawotunne Israa7eela Kawotu Taarikiyaa Maxaafan xaafetti uttiis. <sup>12</sup> Asi kawotido hasttamanne uddufuntta laittan tohuwaa sakettiis; au sahoi kehi darikkokka, i aakimeta koyiisippe attin, GODAA koyibeenna. <sup>13</sup> Asi ba kawotido oitamanne isiinintta laittan haiqqidi, ba maizzan gaittiis. <sup>14</sup> Eti a ahaa duufuwan dumma dumma shittoinne sawoi de7iyo arssaa bolli wottidosona. Eti a bonchchuwau daro mittaa dooridi, tamaa eettidi, daroppe yeekkidosa. Asi baayyo Daawita Kataman shuchchaa woocidi giigissido duufuwan a moogidosona.



## 17

### *Yoosaafixi Yihudan Kawotiis*

<sup>1</sup> Asa na7ai Yoosaafixi a sohuwan kawotiis; Yoosaafixi Israa7eela olanau bana minttiis. <sup>2</sup> Gimbbetti uttida Yihudaa katamatu ubban olanchchata wottiis; qassi Yihudaa biittaaninne a aawai Asi omooddido Efireema biittaa katamatun olanchchatu qatuwaa medhdhiis.

<sup>3-4</sup> GODAI Yoosaafixa anjjiis; aissi giikko, a aawai koiro kawo gidido wode, GODAASSI ammanettidoogaadan, ikka ammanettiis. Ammanettidi Ba7aala eeqa misiliyaayyo goinnennan ixxiis. Yoosaafixi ba aawaa ogiyan hemettidi, GODAA azazuwaa poliis. I Israa7eela kawoti oottido iita oosuwaa oottibeenna. <sup>5</sup> Hegaa gishshau, GODAI a Yihudaa kawotettan mintti essiis. Yihudaa asai ubbai Yoosaafixayyo imuwaa ehiidosona; yaatin, i keehippe duretiisinne bonchchettiis. <sup>6</sup> Yoosaafixi GODAASSI wozanappe oottiya asa gidiiis. Hegaa bollankka goinniyo xoqqa sohotanne Asheero giyo Xoossee eeqa misileta Yihudaa biittaaappe xaissiiis.

<sup>7</sup> Yoosaafixi ba kawotido heezzantto laitti Yihudaa katamatun tamarissanaadan ba oosanchchata Benihaila, Obaadiyaa, Zakkaariyaasa Nataani7eelanne Mikaaya kiittiis. <sup>8</sup> Qassi etaara issippe Leewata SHamaa7iyaa, Nataaniyaa, Zabaadiyaa, Asaaheela, SHamiraamoota, Yonaataana, Adooniyaa, Xoobbiyaanne Xobaadooniyaa yeddiis; qas-sikka qeeseta Elishamaa7anne Yoraama etaara issippe kiittiis. <sup>9</sup> Eti ubbai GODAA Higgiyaa Maxaafaa banttanaara ekkidi, Yihudaa biittan de7iya katamata ubbaa biidi, yan asaa tamarissidosona.

### *Yoosaafixa Gitatettaa*

<sup>10</sup> Yihudaa biittaa yuushuwan de7iya kawotettata ubbaa GODAI yashissin, eti Yoosaafixaara olettibookkona. <sup>11</sup> Pilisxeema atatuppe aramidaageeti imuwaanne biraa giiraa Yoosaafixayyo ehiidosona; qassi Arabatikka ayyo laappun sha7anne laappun xeetu dorssa orggetanne laappun sha7anne laappun xeetu deeshsha orggeta ehiidosona. <sup>12</sup> Hegaa gishshau, Yoosaafixi keehippe minni minni biis. I Yihudan qatotanne minjjiyoobaa wottiyo katamata keexxiis. <sup>13</sup> Keexxidi i he katamatun darobaa minjjiis.

Yerusalaamen ayyo mino olanchchati de7oosona. <sup>14</sup> Eti bantta aawatu keettan keettan hagaappe kaallidi xaafettidosona. Yihudaa zariyaappe shaalaqai Adinaaha; aara 300,000 mino olanchchati de7oosona.

<sup>15</sup> Adinaaha kaallidi de7iya halaqai Yohanaana; aara 280,000 mino olanchchati de7oosona.

<sup>16</sup> GODAASSI ba sheniyan kiyida Amaasaayi a kaallidi de7iya heezzantto halaqa; i Ziikira na7aa. Amaasaayaara 200,000 mino olanchchati de7oosona.

<sup>17</sup> Biniyaama zariyaappe halaqai mino olanchchaa Eliyadaa7a; aara wonddafiyaanne gondalliyyaa oiqqiya 200,000 olanchchati de7oosona.

<sup>18</sup> Eliyadaa7a kaallidi de7iya halaqai Yihozabaada; aara olaa baanau gixxida 180,000 olanchchati de7oosona.

<sup>19</sup> Ha ubba olanchchati kawuwaayyo Yerusalaamen oottidaageeta; hageetu qoodai Yihudan de7iya gimbbettida katamatun ubban kawoi wottido olanchchata gujjenna.

## 18

### *Hananabaa Yootiya Mikaayi Akaabayyo Xoonettiyoogaa Odiis (Kawotu Maxaafaa Koiruwaa 22:1-28)*

<sup>1</sup> Yoosaafixi keehippe duretiisinne bonchchettiis; qassi Akaabaarakka bollotiis. <sup>2</sup> Amarida laittaaappe guyyiyan, Yoosaafixi Akaaba be7anau Samaariyaa biis. Bin Akaabi assinne aara issippe de7iya asaassi daro dorssatanne boorata shukkiis. Yaatidi Yoosaafixi Gala7aaden de7iya Raamoota giyo katamaa olanau banaara baanaadan

maizziis. <sup>3</sup> Israa7eela Kawoi Akaabi Yihudaa Kawuwaa Yoosaafixa, “Gala7aaden de7iya Raamoota olanau tanaara buutee?” yaagidi oichchiis.

Oichchin Yoosaafixi, “Ee, neeni olaa baanau giigiyo wode audenne taani giigana. Ta olanchchati ne olanchchatu mala; nuuni nenaara olanau baana” yaagiis. <sup>4</sup> Qassikka Yoosaafixi Israa7eela kawuwaa, “Gidikkonne, neeni kasetada GODAA oichcha” yaagiis.

<sup>5</sup> Yaagin Israa7eela kawoi hananabaa yootiya oiddu xeetu asata shiishshidi, “Taani Gala7aaden de7iya Raamoota katamaa olanau booyye booppoo?” yaagidi eta oichchiis.

Oichchin eti, “Ba; aissi giikko, Xoossai he katamaa kawuwaa kushiyan aattidi immana” yaagidosona.

<sup>6</sup> SHin Yoosaafixi, “Nuuni GODAA oichchanau danddayiyo hananabaa yootiya hara asi hagan baawee?” yaagiis.

<sup>7</sup> Yaagin Israa7eela kawoi Yoosaafixassi zaaridi, “Nuuni a baggaara GODAA oichchanau danddayiyo issi hara bitanee de7ees; i Yimila na7aa Mikaaya. SHin taani a ixkais; aissi giikko, i ubba wodekka tabaa iitabaa yooteesippe attin, lo77obaa yooti erenna” yaagiis.

Yaagin Yoosaafixi, “Kawoi hegaadan gooppo!” yaagiis.

<sup>8</sup> Hegaappe guyyiyan, Israa7eela kawoi ba oosanchchatuppe issuwaa xeesidi, “Yimila na7aa Mikaaya eesuan ekkada ya” yaagiis.

<sup>9</sup> Israa7eela kawoinne Yihudaa Kawoi Yoosaafixi, bantta kawotaa maayuwaa maayidi, Samaariyaa katamaa geliyo penggiyan bantta kawotaa araatan uttidosona; uttin hananabaa yootiya ubbati eta sinttan hananabaa yootosona. <sup>10</sup> Etappe issoi, Kanaa7ina na7ai Xidiqee birataappe kaceta giigissidi, Akaaba, “GODAI hagaadan yaagees; ‘Sooreti xayana gakkanaashin, neeni eta ha kacetun qaicana’ yaagees” yaagiis.

<sup>11</sup> Hananabaa yootiya hara ubbatikka, “Gala7aaden de7iya Raamoota katamaa ba; baada ola; oladakka xoon. Aissi giikko, GODAI he katamaa kawuwaa kushiyan aattidi immana” yaagidi yootidosona.

<sup>12</sup> Hegaappe guyyiyan, Mikaaya xeesanau kiitetti biida bitanee a, “Be7a, hananabaa yootiya ubbati issi doona gididi, ‘Kawoi ha olaa xoonana’ yaagidi yootidosona. Hega gishshau, hayyanaa ne odoikka etappe issuwaagaa mala gido; neenikka lo77obaa oda” yaagiis.

<sup>13</sup> SHin Mikaayi he bitaniyaa, “GODAI ero! Ta Xoossai yootiyoobaa taani yootana” yaagiis.

<sup>14</sup> Mikaayi kawuwaakko yiido wode, kawoi a, “Mikaayaa, nuuni Gala7aaden de7iya Raamoota olanau boniiyye boopponii?” yaagidi oichchiis.

Oichchin Mikaayi kawuwaa, “Ba; baada ola; oladakka xoon. Aissi giikko, eti ne kushiyan aadhdhi imettana” yaagiis.

<sup>15</sup> Yaagin kawoi a, “Nee ni GODAA sunttan tumaappe attin, harabaa taayyo odenaan taani nena aapputoo caaqqettanau koshshii?” yaagiis.

<sup>16</sup> Yaagin i, “Israa7eela olanchchati ubbai henttanchchi bainna dorssaadan deriyan laalettidaageeta taani be7aas. GODAI eta, ‘Hageetuyyo godi baawa. Eti ubbaikka bantta soo bantta soo saro boona’ yaagees” yaagiis.

<sup>17</sup> Yaatin, Israa7eela kawoi Yoosaafixa, “ ‘I tabaa iitabaa yooteesippe attin, lo77obaa yooti erenna’ gaada taani neeyyo yootabeikkinaa?” yaagiis.

<sup>18</sup> Mikaayi gujjidikka hagaadan yaagiis; “Simmi GODAI giyoobaa siya! GODAI ba kawotaa araatan uttin, saluwaa olanchchati ubbai a ushachchaaranne a haddirssaara eqqidaageeta taani be7aas. <sup>19</sup> GODAI, ‘Israa7eela Kawoi Akaabi Gala7aaden de7iya Raamoota katamaa biidi, yan haiqqanaadan a balettanai oonee?’ yaagiis. Yaagin issoi hagaadan giyo wode, harai qassi hegaadan giis. <sup>20</sup> Hegaappe guyyiyan, ayyaanai kiyidi GODAA sinttan eqqidi, ‘Taani a balettana’ yaagiis.

“Yaagin GODAI, ‘Waata balettuutee?’ yaagiis.

<sup>21</sup> “Yaagin ayyaanai, ‘Taani kiyada baada, ayyo hananabaa yootiyaageetu ubbatu doonan worddotiya ayyaana gidana’ yaagiis.

“Yaagin GODAI, ‘Ee, neeni a balettana; neeyyo hegee hanana. Ba; baada baletta’ yaagiis” yaagiis.

<sup>22</sup> Qassikka i, “Hegaa gishshau, GODAI neeyyo hananabaa yootiyaageetu hageetu doonan worddotiya ayyaanaa wottiis; aissi giikko, GODAI ne bolli bashshaa ehaanau qachchiis” yaagiis.

<sup>23</sup> Hegaappe guyyiyan, Kanaa7ina na7ai Xidiqee shiiqidi, Mikaaya qinxalliyyaa baqqiis. Baqqidi, “GODAA Ayyaanai ta achchappe waanidi neeyyo odanau biidee?” yaagiis.

<sup>24</sup> Yaagin Mikaayi a, “Neeni qosettanau qol77o geliyo gallassi heгаа demmana” yaagiis.

<sup>25</sup> Hegaappe guyyiyan, Israa7eela kawoi ba olanchchatuppe issuwaa azaziiddi, “Mikaaya oiqqqa; oiqqada katamaa haariya Amoonayyoonne ta na7aa Yo7aashayyo efaada imma. <sup>26</sup> Immada eta, ‘Kawoi inttena “Ha bitaniyaa qasho keettan qachchite. Qachchidi taani saro simmana gakkanaashin, qii oittappenne haattappe harabaa aibanne ayyo immoppite” yaagees’ yaaga” yaagiis.

<sup>27</sup> Yaagin Mikaayi a, “Tumu neeni saro simmiyaabaa gidikko, GODAI tanan haasay-ibeenna” yaagiis. Qassikka Mikaayi, “Asau ubbau, taani yootidobaa akeekite” yaagiis.

### *Akaaba Haiquwaa*

#### *(Kawotu Maxaafaa Koiruwaa 22:29-35)*

<sup>28</sup> Hegaappe guyyiyan, Israa7eela kawoinne Yihudaa Kawoi Yoosaafixi Gala7aaden de7iya Raamoota katamaa biidosona. <sup>29</sup> Israa7eela kawoi Yoosaafixa, “Taani ta maayuwaa laammada, hara asa malatada, olau gelana; shin neeni ne kawo maayuwaa maaya” yaagiis. Yaagidi Israa7eela kawoi ba maayuwaa laammidi, hara asa milatidi olau geliis.

<sup>30</sup> Sooriyaa kawoi ba paraa gaareta azaziya asata, “Gitatin guuxxin, hara asa oon-arakka olettoppite; Israa7eela kawuwaa xalaalaa olettite” yaagidi azaziis.

<sup>31</sup> Paraa gaareta azaziyaageeti Yoosaafixa be7ido wode, “Hagee Israa7eela kawuwaa” yaagidosona. Yaagidi aara olettanau simmidosona. Simmin Yoosaafixi waassiis; waassin GODAI Xoossai a maaddidi, eta guyye zaariis. <sup>32</sup> Paraa gaareta azaziyaageeti i Israa7eela kawuwaa gidennaagaa be7idi, a yedettiyoogaa aggiigidosona.

<sup>33</sup> Issi bitanee coo ba wonddafiyaa olanchchatu bolli dukkidi, Israa7eela kawuwaa olaa maayoi gaittiyo kayyiyaara caddiis. Caddin kawoi ba gaariyaa laaggiya bitaniyaa, “Gaariyaa guyye zaarada, tana olaa giddoppe kessa. Aissi giikko, taani iita cachchaa cadettaichchaas” yaagiis. <sup>34</sup> He gallassi olai suulliyo wode, Israa7eela Kawoi Akaabi ba paraa gaariyaa gidдон zempidi, omarssi gakkanaashin, Sooretu sinttan takkiis. Takkidi awai wullido wode, i haiqqi bayiis.

## 19

### *Hananabaa Yootiya Yeehu Yoosaafixa Seeriis*

<sup>1</sup> Hegaappe guyyiyan, Kawoi Yoosaafixi ba soo Yerusalaame saro simmiis. <sup>2</sup> Simmin hananabaa yootiya Hanaana na7ai Yeehu aara gaittanau kiyidi, Kawuwaa Yoosaafixa, “Neeni iitata maaddanau woikko GODAA ixxiyaageeta siiqanau bessii? Hegaa gishshau, GODAA hanqqoi ne bolli yiis. <sup>3</sup> Gidikkonne, Asheero giyo eegee misileta biittaappe diggido gishshaunne Xoossaa koyanau ne wozanaa giigissido gishshau, neeni lo77obaa oottadasa” yaagiis.

### *Yoosaafixi Daannata Sunttiis*

<sup>4</sup> Yoosaafixi Yerusalaamen de7iis. Qassi Yoosaafixi Berssaabehappe doommidi, Efireema gezziyaa gakkanaashin, asaa gidдон yuuyidi, GODAAKKO, eta aawatu Xoosaakko, eta zaariis. <sup>5</sup> Yihudaa biittan de7iya gimbbettida katamatu ubban daannata sunttiis. <sup>6</sup> Sunttidi i daannatuyyo, “Intte oottiyooban inttena erite. Aissi giikko, intte asayyo pirddekketa; GODAAYYO pirddeeta. Intte pirddiyo wode, i inttenaara de7ees. <sup>7</sup> Ha77ikka intte GODAAYYO yayyite; intte oottiyooban inttena erite. Aissi giikko, GODAA nu Xoossaa matan naaqoi, asa sinttaa xeellidi maaddiyooeenne mattaaiyaa miyoogee baawa” yaagiis.

<sup>8</sup> GODAA higgiiyaa kanttiyoogaanne asaa gidдон denndiya yohuwaa pirddanaadan Leewatuppe, qeesetuppenne Israa7eela asaa aawatu keettaa halaqatuppe amarida asata Yoosaafixi Yerusalaamen sunttiis. <sup>9</sup> Hegaappe guyyiyan, Yoosaafixi eta hagaadan yaagidi azaziis; “GODAASSI yayyidi, ammanettiyoogaanne kumetta wozanan oottite. <sup>10</sup> Bantta kataman de7iya intte ishantti shemppo yoho, woikko higgebaa, woikko azazobaa, woikko awaajobaa, woikko pirddabaa inttekkko ehiikko, eti GODAA sinttan mooranchcha gidennaadaaninne a hanqqoi intte bollinne intte ishanttu bolli yeen-naadan eta seerite. Intte eta seerikko, intte intte huuphiyau mooranchcha gidekketa. <sup>11</sup> GODAA bagga yoho ubbaayyo aawatiyaagee qeesetu halaqaa Amaariyaa; qassi kawuwaa bagga yoho ubbaayyo aawatiyaagee Yihudaa zaretu halaqaa Isimaa7eela na7aa Zabaadiyaa. Leewati intte sinttan halaqa gidana. Intte minnidi oottite. Suurebaa haniyaageetuura GODAI issippe gido” yaagiis.

## 20

### *Eedooma Biittai Yihudaa Bolli Woraajjiis*

<sup>1</sup> Hegaappe guyyiyan, Moo7aabatanne Amoonati qassi etaara issippe Ma7uunati Yoosaafixa bolli woraajjidosa. <sup>2</sup> Yaatin, amarida asati yiidi Yoosaafixayyo, “Maxine Abbaappe hefinttaara de7iya Sooriyaappe daro olanchchati nena olanau yiidosona. Be7a, eti Haxaaxooni-Taamaaran de7oosona” yaagidi yootidosona. (Haxaaxooni-Taamaari Enggaadayyo harantto sunntaa.)

<sup>3</sup> Yaatin, Yoosaafixi yayyidi, GODAA oichchanau ba qofaa qachchiis; qachchidi Yihudaa biittan ubban xoomaa awaajjiis. <sup>4</sup> Awaajjin Yihudaa asai ubbai GODAAPPE maaduwaa koyanau issippe shiiqiis; eti GODAAPPE maaduwaa koyanau Yihudaa katamatu ubbaappe yiidosona.

<sup>5</sup> Yin Yoosaafixi Yihudaanne Yerusalaame yaa7aa gidдон, GODAA Beeta Maqidasiyan de7iya Ooratta Dabaabaa sinttan eqqiis. <sup>6</sup> Eqqidi hagaadan yaagiis, “Abeet GODAU, nu aawatu Xoossau, saluwan de7iya Xoossai nena! Sa7an de7iya kawotettata ubbaa haariyaagee nena! Gitatettainne wolqqai ne kushiyan de7iyo gishshau, nenaara egettana danddayidabi baawa. <sup>7</sup> Abeet nu Xoossau, kase ha biittan de7iyaageeta ne asaa Israa7eela sinttaappe yedettada, ne siiquwaa Abrahaama zerettatuyyo merinau immidai nena! <sup>8</sup> Eti ha biittan de7idosona; eti hagan ne sunntaayyo Beeta Maqidasiyaa keexxidi, <sup>9</sup> ‘Nu bolli iitabai, woi olai, woi boshai, woikko koshai yiyaakko, nuuni ne sunntai de7iyo ha Beeta Maqidasiyaa sinttaaninne ne sinttan eqqidi, nu metuwan neekko waassana. Neeni nu waasuwa siyada, nuna ashshana’ yaagidosona.

<sup>10</sup> “Ha77ikka Amoonati, Moo7aabatanne Eedoomati nu bolli woraajjidosa. Beni nu aawati Gibxxeppe kiyido wode, neeni eta he biittata gelennaadan diggadasa; hega gishshau, nu aawati he biittatun yuuyidi aadhdhidonappe attin, eta xaissibookkona. <sup>11</sup> Nuuni oottidobau eti nuuyyo zaaridobaa be7a. Neeni nuuyyo immido laata biittaappe eti nuna yedettanau yiidosona. <sup>12</sup> Abeet nu Xoossau, neeni eta bolli pirddikii? Aissi giikko, nuna olanau yiida ha daro olanchchatuura olettanau nuuyyo wolqqi baawa. Nuuni oottanabaakka erokko; shin nu aifeti nena xeelloosona” yaagiis.



<sup>13</sup> Yihudaa asai ubbai bantta yiira naatuura, bantta maccaasatuuranne bantta naatuura issippe gididi, GODAA sinttan eqqidosa.

<sup>14</sup> Hegaappe guyyiyan, Zakkaariyaasa na7ai Yahaazi7eeli yaa7aa giddon eqqidaashin, GODAA Ayyaanai a bolli wodhdhiis. Zakkaariyaasi Banaaya na7aa; Banaayi Yi7i7eela na7aa; Yi7i7eeli Mataaniyaa na7aa; Mataanee Leewa zarenne Asaafa yara. <sup>15</sup> GODAA Ayyaanai Yahaazi7eela bolli wodhdhin, hagaadan yaagiis; “Kawuwau Yoosaafixaa, Yihudaaninne Yerusalaamen de7iya asau, ubbaikka siyite! GODAI inttena hagaadan yaagees; ‘Ha daro olanchchatu gaasuwan yayyoppitenne dagammoppite. Aissi giikko, olai Xoossaagaappe attin, intteegaa gidenna. <sup>16</sup> Intte wontto eta bolli kiyite. Kiyidi Xiixa giyo pudettan Yiru7eela Bazzuwan de7iya zanggaaraa wurssettan intte eta demmana. <sup>17</sup> Ha olaa olettiyaageeti inttena gidekketa. Intte sohuwaa sohuwaa oiqqi eqqidi, GODAI inttena ashshiyooгаа be7eeta’ yaagees. Yihudaa asau, Yerusalaame asau, yayyoppitenne dagammoppite! Etaara olettanau wontto kiyite. GODAI inttenaara gidana” yaagiis.

<sup>18</sup> Yoosaafixi som77uwaa sa7aa gattidi goinniis; hegaadankka, Yihudaa asai ubbainne Yerusalaamen de7iya asai ubbai GODAA sinttan kunddidi, GODAAYYO goinnidosona.

<sup>19</sup> Qahaata yaraappenne Qoraaha yaraappe amarida Leewati eqqidi, bantta qaalaa xoqqu oottidi, GODAA Israa7eela Xoossaa galatidosona.

<sup>20</sup> Eti maallado guuran denddidi, Taqo7a Bazzuwaa baanau kiyidosona; eti kiyido wode Yoosaafixi dendi eqqidi, “Yihudaaninne Yerusalaamen de7iya asau, taani giyoogaa siyite. GODAN, intte Xoossan, ammanettite; intte minnana. Qassi hananabaa yootiyaageetun ammanettite; yoho ubbi intteyyo injjetana” yaagiis.

<sup>21</sup> Yoosaafixi asaara zorettidoogaappe guyyiyan, mazamuriyaa yexxiyaageetanne GODAA galatiyaageeta sunttiis. Sunttin eti ba7aala gallassa maayuwaa maayidi, olanchchatu sinttaara kanttiiddi, “GODAA galatite!

Aggenna a siiqoi merinaagaa”  
yaagi yaagidi yexxanaadan azaziis.

<sup>22</sup> Eti mazamuriyaa yexxiyoogaanne galatiyoogaa doommido wode, Yihudaa olanau yiida Amoonatu bolli, Moo7aabatu bollinne Eedoomatu bolli GODAI shabbirssaa yeddiis. <sup>23</sup> Yeddin Amoonatinne Moo7aabati Eedoomatu bolli denddidi, eta muleera xaissidosona. Eti Eedoomata xaissidoogaappe guyyiyan, bantta giddon issoi issuwaa xaissidosona. <sup>24</sup> Yihudaa asai bazzuwan de7iya wochchiyo sohuwaa yiido wode, bantta morkketi de7iyo sohuwaa xeellidosona; xeellidi eta ahai biittan zin77idaagaa be7idosona. Etappe issi asinne kessi ekkidi bibeenna.

<sup>25</sup> Hegaappe guyyiyan, Yoosaafixinne a asai omooduwaa ekkana biidi, daro meheta, shinqqeta, ola miishshata, maayotanne hara al77o miishshata demmidosona. SHin omoodo ubbabaa tookki efaanau danddayibookkona. Omooddidobai keehippe daro gidido gishshau, hegaa shiishshanau heezzu gallassaa ekkiiis. <sup>26</sup> Hegaappe guyyiyan, eti oiddantto gallassi Beraaka Wombbaa giyoosan shiiqidosa; shiiqidi he sohuwan GODAA galatidosona. Hegaa gishshau, eti he sohuwaa Galataa Wombbaa yaagidi sunttidosona.

<sup>27</sup> Hegaappe guyyiyan, Yihudaa asai ubbainne Yerusalaame asai ubbai, Yoosaafixi kaalettin, ufaissan Yerusalaame simmiis. <sup>28</sup> Eti Yerusalaame gakkidi, diittaara, maazinqqiyaaranne xurumbbaara GODAA Beeta Maqidasiyaa gelidosona.

<sup>29</sup> Israa7eela morkketa GODAI olidoogaa biittan de7iya kawotettati ubbai siyido wode, eti Xoossaayyo yayyidosona. <sup>30</sup> Yaatidi Xoossai Yoosaafixayyo ubba baggaara shemppuwaa immido gishshau, a kawotetta sarotetta demmiis.

*Yoosaafixa Kawotaa Wurssettaa*  
(Kawotu Maxaafaa Koiruwaa 22:41-50)



<sup>31</sup> Yoosaafixi Yihudan kawotiyo wode, a laittai hasttamanne ichchasha; i Yerusalaamen laatamanne ichchashu laitta kawotiis. A aayyiyaa SHiiliha na7iyo Azuubo geetetausu. <sup>32</sup> Yoosaafixi ba aawaa Asa ogiyan hemettiis; i he ogiyaappe sher77i gibeenna; GODAA sinttan i suurebaa oottiis. <sup>33</sup> Gidikkonne, goinniyo xoqqa sohota xaissibeenna; asai biron ba kumetta wozanaappe ba maizza aawatu Xoossaakko simmibeenna.

<sup>34</sup> Yoosaafixi hanido harabai, koiroppe wurssettaa gakkanaassi Israa7eela Kawotu Taarikiyaa Maxaafan, Hanaana Na7aa Yeehu Taarikiyaa gidдон xaafetti uttiis.

<sup>35</sup> Issi wode, Yihudaa Kawoi Yoosaafixi iitabaa oottida Israa7eela Kawuwaa Akaaziyaasaara issippetettaa oottiis. <sup>36</sup> Yaatidi Yoosaafixi aara zal77iyo gita markkabetta medhdhanau maayiis. Maayidi he markkabetta Eexiyooni-Gaabira kataman merissidosona. <sup>37</sup> Hegaappe guyyiyan, Mareeshappe yiida Dodaawa na7ai El77eezari, “Neeni Akaaziyaasaara issippetettaa oottido gishshau, neeni oottido oosuwaa GODAI xaissana” yaagidi, Yoosaafixa bolli hananabaa yootiis. Hega gishshau, markkabeti meqqidosona; eti awanne baanau danddayibookkona.

## 21

<sup>1</sup> Hegaappe guyyiyan, Yoosaafixi haiqqidi, ba maizzan gaittiis. Daawita Kataman ba maizza aawatuura moogettiis. A sohuwan a na7ai Yoraami kawotiis.

### *Yihudaa Kawuwaa Yoraama (Kawotu Maxaafaa Naa77anttuwaa 8:17-24)*

<sup>2</sup> Yoraama ishantti Azaariyaasa, Yihi7eela, Zakkaariyaasa, Azaariyaasa, Mikaa7eelanne SHafaaxiyaa; hageeti ubbai Yihudaa Kawuwaa Yoosaafixa naata. <sup>3</sup> Eta aawai Yoosaafixi etayyo daro biraa, worqqaanne al77o miishshaa immiis; qassi gimbettida Yihudaa katamata akka immiis. SHin Yoraami ba aawau baira na7a gidiyo gishshau, kawotettaa ayyo immiis. <sup>4</sup> Yoraami ba aawaa kawotetta ekkidi minnido wode, ba ishantta ubbatanne issi issi Israa7eela halaqata bisuwan woriis.

<sup>5</sup> Yoraami kawotiyo wode, laittai ayyo hasttamanne naa77a; i Yerusalaamen hosppun laitta kawotiis. <sup>6</sup> Yoraami Akaaba na7iyo ekkido gishshau, Akaaba so asai hemettidoogaadanka kase Israa7eela kawotu ogiyan hemettiis; GODAA sinttankka iitabaa oottiis. <sup>7</sup> Gidikkonne, GODAI kase Daawitaara maacettido maachchaa gishshau, Daawita zeretta xaissanau koyibeenna. Daawita zeretta merinau kawotanau GODAI ufaissaa inmi wottiis.

<sup>8</sup> Yoraami kawotido wode, Eedooma asai Yihudaa kawuwaa bolli makkalidi, banttau kawuwaa kawoyidosona. <sup>9</sup> Hega gishshau, Yoraami ba ola gadaawatuuranne ba paraa gaaretu ubbaara issippe Eedooma biittaa olanau biis; bin Eedooma asai anne a paraa gaaretu halaqata dooddidosona. SHin Yoraaminne a asai qammi denddidi, dooda kanttidi baqatidosona. <sup>10</sup> He wodeppe doommidi, hachchi gakkanaashin, Eedooma asai Yihudaa asaassi haarettibeenna. Yoraami GODAA ba aawatu Xoossaa aggido gishshau, Liibina asai qassi he wode Yihudaa kawuwaa bolli makkaliis.

<sup>11</sup> Yoraami qassi Yihudaa gezziyan goinniyo xoqqa sohota giigissii; giigissidi Yerusalaamen de7iya asai shaaramuxanaadan oottiis; Yihudaa asaakka balettiis. <sup>12</sup> Hegaappe guyyiyan, hananabaa yootiya Eelaasi Yoraamayyo dabddaabbiyaa haagan yaagidi kiittiis; “GODAI, ne maizza aawaa Daawita Xoossai, ‘Neeni ne aawaa Yoosaafixa ogiyan woikko Yihudaa Kawuwaa Asa ogiyan hemettiyoogaa aggada, <sup>13</sup> Israa7eela kawotu ogiyan hemettadasa. Akaaba so asai oottidoogaadan, Yihudaaninne Yerusalaamen de7iyaageeti shaaramuxanaadan oottadasa. Qassikka neeppe kehiya, ne aawaa keettan de7iya ne ishantta woradasa. <sup>14</sup> Hega gishshau, GODAI ne asaa, ne naata, ne maccaasatanne neeyyo de7iya ubbabaa wolqqaama boshan shocana. <sup>15</sup> Nena maracciyaa harggee oiqqin, neeyyo sahoi yaa goobi goobidi baana’ yaagees” yaagiis.

<sup>16</sup> Hegaappe guyyiyan, GODAI Pilisxxeematanne Toophphiya matan de7iya Arabata Yoraama olanaadan denttettiis. <sup>17</sup> Yaatin, eti Yihudaa bolli woraajjidosa; woraajjidi kawo keettan de7iya miishshaa ubbaa, kawuwaa attuma naatanne a maccaasata omooddidosa. A naatu ubbaappe kaaluwaa Akaaziyaasappe attin, hara issi na7inne ayyo attibeenna.

<sup>18</sup> He ubbaappe guyyiyan, paxanau danddayenna maracciyaa harggiyan Yoraama GODAI shociis. <sup>19</sup> Naa77u laittaa gidдон harggee a bolli goobiis; goobin a maraccee kare kiyiis; yaatin, keehi sahettidi haiqqiis. A moogiyo wode asai kase a maizza aawatuyyo oottidoogaadan, a bonchchuwau mittaa dooridi, tamaa eettibeenna.

<sup>20</sup> Yoraami kawotiyo wode, laittai ayyo hasttamanne naa77a; i Yerusalaamen hospun laitta kawotiis. I haiqqiyo wode ooninne azzanibeenna. Yoraami Daawita Kataman moogettiisippe attin, kawotu makkaan moogettibeenna.

## 22

### *Yihudaa Kawuwaa Akaaziyaasa*

*(Kawotu Maxaafaa Naa77anttuwaa 8:25-29; 9:21-28)*

<sup>1</sup> Arabati yiidi Yoraamayyo baira naata ubbata worido gishshau, Yerusalaame asai Yoraama na7aa ubbaappe kaaluwaa Akaaziyaasa a sohuwan kawoyidosona. Hega gishshau, Yoraama na7ai Akaaziyaasi kawotaa doommiis. <sup>2</sup> Akaaziyaasi kawotiyo wode, laittai ayyo oitamanne naa77a;<sup>3</sup> i Yerusalaamen issi laitta kawotiis. A aayee sunttai Ataalo; a Omirayyo na7aa na7iyo.

<sup>3</sup> Akaaziyaasi iitatettan baanaadan a aayiyaa a zorido gishshau, ikka Akaaba so asaa ogiyan hemettiis. <sup>4</sup> A aawai haiqqidoogaappe guyyiyan, Akaaba so asaikka a zoriyo gishshau, Akaaba so asaadan ikka GODAA sinttan iitabaa oottiis. Yaatidi a xayuwau gaaso gididosona. <sup>5</sup> Akaaziyaasi Akaaba so asaa zoriyaa kaallidi, Akaaba na7aa Israa7eela Kawuwaa Yoraamaara issippe, Sooriyaa Kawuwaa Hazaa7eela olanau Gala7aaden de7iya Raamoota giyo katamaa biis. Bin Sooriyaa asati Yoraama caddidosona. <sup>6</sup> Sooriyaa Kawuwaa Hazaa7eelaara i olettiyo wode, Sooriyaa asati a Raamootan caddido cachchaa patti ekkanau Iziraa7eela katamaa simmiis. Hegaappe guyyiyan, Yoraama na7ai, Yihudaa Kawoi Akaaziyaasi Akaaba na7aa Yoraama cadetti-daagaa oichchanau duge Iziraa7eela katamaa biis.

<sup>7</sup> Akaaziyaasi Yoraamakko biidoogee Akaaziyaasau haiqo gidanaadan Xoossai oottiis. Akaaziyaasi Yoraama be7ishin, Akaaba zariyaa xaissanaadan GODAI doorido Nimisha na7aa Yeeha mokkanau naa77ai issippe kiyidosona. <sup>8</sup> Yeehu Akaaba zariyaa bolli pirddiyogaa polido wode, Yihudaa halaqatanne Akaaziyaasa maaddiya a ishanttu naata demmidi woriis. <sup>9</sup> Qassi Yeehu Akaaziyaasa koyiis; koyin Samaariyan qosetti uttidaagaa a asati demmidosa; demmidi Yeehukko ehiidi woridosona. Woridi, “Ba kumetta wozanaappe GODAA koyida Yoosaafixa na7aa” yaagidi moogidosona.

Hega gishshau, Akaaziyaasa so asaappe kawotettaa oiqqanau danddayiyai ooninne baawa.

### *Yihudaa Kawiyo Ataalo*

*(Kawotu Maxaafaa Naa77anttuwaa 11:1-3)*

<sup>10</sup> Akaaziyaasa aayiyaa Ataala ba na7ai haiqqidoogaa be7ido wode, denddada Yihudaa kawuwaa zariyaa ubbaa xaissaasu. <sup>11</sup> SHin kawuwaa na7iyaa Yihoshebaa7a, haiqqanau de7iya kawo naatu giddoppe Akaaziyaasa na7aa Yo7aasha wuuqqada ekkaasu. Ekkada anne a xanttiyaaro hiixa keettan qosaasu. Hegaadan oottada, Ataala na7aa worennaadan, Kawuwaa Yoraama na7iyaa, Akaaziyaasa michchiyaa, qeesiyaa

<sup>3</sup> 22:2 Oitamanne naa77a: Ayyo laittai laatamanne naa77a woikko oitamanne naa77a. Kawotu Maxaafaa Naa77anttuwaa 8:26 xeella.

Yoodaahē machchiyaa, Yihoshebaa7a a qosaasu. <sup>12</sup> Ataala biittaa haariyo wode ubban, na7ai eta matan Xoossaa Beeta Maqidasiyan usuppun laitta qosettidi uttiis.

## 23

### *Ataali Bolli Makkalidi Denddidosona (Kawotu Maxaafaa Naa77anttuwaa 11:4-16)*

<sup>1</sup> Laappuntta laittan Yoodaahē minnidi, mato halaqata Yirohaama na7aa Azaariyaasa, Yahohanaana na7aa Isimaa7eela, Yoobeeda na7aa Azaariyaasa, Adaaya na7aa Ma7iseeyanne Ziikira na7aa Elishafaaxa shiishshidi, etaara maachchaa maacettiis. <sup>2</sup> Eti Yihudaa biitta ubbaa yuuyidi, Yihudaa katamatun de7iya Leewatanne Israa7eela yaratu halaqata ubbaa ekkidi, Yerusalaame yiidosona.

<sup>3</sup> Hegaappe guyyiyan, he shiiqida asai ubbai Xoossaa Beeta Maqidasiyan kawuwaara maachchaa maacidosona. Yoodaahē he asaa, “Kawuwaa na7aa haggaa be7ite! GODAI kase Daawita zerettaabaa haasayidoogaadan i kawoto. <sup>4</sup> Intte oottanau bessiyaabai haggaa: Sambbata gallassan ha Beeta Maqidasiyaa geliya qeesetuppenne Leewatuppe heezzu kushiyaappe issi kushee penggiyaa naagite; <sup>5</sup> qassi heezzu kushiyaappe issi kushee kawo keettan de7ite; heezzu kushiyaappe issi kushee qassi Baasuwaaw Penggen de7ite. Asai ubbai GODAA Beeta Maqidasiyaa dabaabaa shiiqo. <sup>6</sup> Qeesetuppenne oottiya Leewatuppe attin, ooninne GODAA Beeta Maqidasiyaa geloppo. Eti geeshsha gidiyo gishshau, gelona; shin hara asai ubbai GODAA azazuwaa naagiiddi, Beeta Maqidasiyaappe kareera de7ona.

<sup>7</sup> “Leewati ubbai bantta ola miishshaa bantta kushiyan kushiyan oiqqidi, kawuwaa giddoyidi, kawoi kiyiyo wodenne geliyo wode ubban aara issippe de7ona. Beeta Maqidasiyaa geliya oonanne worite” yaagiis.

<sup>8</sup> Leewatinne Yihudaa asai ubbai qeesee Yoodaahē azazidobaa ubbaa oottidosona. Qeesee Yoodaahē Sambbatan oosuwaappe kiyanau bessiya Leewata kessidi yed-dibeenna. Haggaa gishshau, naaguwaa kayai gakkidoogeetikka naaguwaa kayaa pol-idaageetikka ubbai yan de7oosona. Hegan halaqatussi ekkanau gidiya asai de7ees. <sup>9</sup> Hegaappe guyyiyan, qeesee Yoodaahē Xoossaa Beeta Maqidasiyan de7iya, beni Kawuwaa Daawita toorata, wogga gondalletanne qeera gondalleta halaqatuyyo immiis. <sup>10</sup> Asai ubbai ola miishshaa ba kushiyan ba kushiyan oiqqidi, Beeta Maqidasiyaayyo ushachcha baggaappe haddirssa bagga gakkanaassi, yarshshiyooosaa mataaninne Beeta Maqidasiyaa matan kawuwaa yuushuwan eqqanaadan qeesee Yoodaahē oottiis. <sup>11</sup> Hegaappe guyyiyan, Yoodaahē kawuwaa na7aa Yo7aasha kare kessidi, a huuphiyan kallachchaa wottiis; wottidi Kawotaa Higgiyaa Maxaafaa ayyo immidi kawoyiis. Yoodaahēenne a naati Yo7aasha tiyidi, “Kawoi shemppo gam77o!” yaagidosona.

<sup>12</sup> Asai woxxiiddinne kawuwaa sabbiiddi hobbociyoogaa Ataala siyido wode, asaakko GODAA Beeta Maqidasiyaa baasu. <sup>13</sup> Baada kawoi penggen ba tuussaa matan eqqidaaggaa be7aasu. Halaqatinne xurumbbaa punniyaageeti kawuwaa matan de7oosona; Yihudaa asai ubbai ufaittidi, xurumbbaa punnoosona; mazamuriyaa yexxiyaageetikka sinttau aadhdhidi, banttau de7iya yetta miishshan galatoosona. Ataala ba maayuwaaw pooshshada, “Hagee makkala! Hagee makkala!” yaagada waas-saasu.

<sup>14</sup> Qeesee Yoodaahē olanchchatu halaqata, “Ataalo Beeta Maqidasiyan woroppite! O yaaranne haara salppida salppetu gidduwan wottidi, kare kessite; o ashshanau kajeeliya asi de7ikko worite!” yaagiis. <sup>15</sup> Haggaa gishshau, eti o oiqqidi, kawo keettaa effidosona; effidi Paraa Penggiyan o woridosona.

### *Yoodaahē Maachchaa Ooraxissiis (Kawotu Maxaafaa Naa77anttuwaa 11:17-20)*

<sup>16</sup> Hegaappe guyyiyan, Yoodaahee i ba huuphen, asai ubbainne kawoi GODAA asa gidanaadan maachchaa wottiis. <sup>17</sup> He wode asai ubbai Ba7aala Eeqa Keettaa biidi, he keettaa qoliis; qolidi yarshshiyoo sohotanne misileta kinchcherettiis. Qassi Mataana giyo Ba7aala qeesiyaa yarshshiyoo sohotu sinttan woridosona.

<sup>18</sup> Yoodaahee qeesetanne Leewata Beeta Maqidasiyaa oosuwaassi halaqa oot-tidi sunttiis. Eta oosoi Muuse higgiiyan xaafettidoogaadan GODAAYYO xuuggiyo yarshshuwaa yarshshiyooogaanne Kawoi Daawiti odidoogaadan mazamuriyaa yexxiyoogaanne baalaa bonchchissiyoooga. <sup>19</sup> Higgiiyan xaafettidoogaadan tuna asi issoinne gelennaadan Yoodaahee GODAA Beeta Maqidasiyaa penggen naagiyaageeta wottiis.

<sup>20</sup> Yoodaahee olanchchatu halaqata, gita asata, deriyaa haariyaageetanne he biittaa asaa ubbaa banaara ekkidi, kawuwaa GODAA Beeta Maqidasiyaappe duge wottiis. Qommo bagga penggiyaara kawo keettaa gelidosona; gelidi kawuwaa kawotaa araatan utissidosona. <sup>21</sup> Yaatin Yihudaa asai ubbai ufaiittiis. Ataalo kawo keettan bisuwan haiqqidoogaappe guyyiyan, katamai woppu giis.

## 24

### *Yihudaa Kawuwaa Yo7aasha (Kawotu Maxaafaa Naa77anttuwaa 12:1-16)*

<sup>1</sup> Yo7aashi kawotiyo wode, laittai ayyo laappuna; i Yerusalaamen oitamu laitta kawotiis. A aayee sunttai Xiibiyo; a Berssaabehe katamaappe yiida asa. <sup>2</sup> Qeesee Yoodaahee de7ido laitta ubban Yo7aashi GODAA sinttan suurebaa oottiis. <sup>3</sup> Yoodaahee Yo7aashayyo naa77u maccaasata immiis; immiin eti ayyo attuma naatanne macca naata yelidosona.

<sup>4</sup> Hegaappe guyyiyan, Yo7aashi GODAA Beeta Maqidasiyaa bottokonanau qoppiis. <sup>5</sup> Yo7aashi qeesetanne Leewata shiishshidi, “Yihudaa katamata biidi, intte Xoossaa Beeta Maqidasiyaa laittan laittan bottokonanau Israa7eela ubbaappe miishshaa shiishshite; ha yohuwaa eesuwan oottite” yaagiis. SHin Leewati eesuwan oottibookkona. <sup>6</sup> Hegaa gishshau, kawoi qeese ubbatu halaqaa Yoodaaha xeesidi, “Yerusalaame asaap-penne Yihudaa asaappe giiraa shiishshanau aissi Leewata kiittabeikkii? GODAA ashkkarai Muuseenne Israa7eela asai Xoossaa Dunkkaaniyaa oosuwaassi giirai shi-iqanaadan beni maayi uttidosona. <sup>7</sup> He iita mishiriyo Ataalo kaalliyaa asati Xoossaa Beeta Maqidasiyaa moorirggidosona; eti GODAA Beeta Maqidasiyan de7iya geeshsha miishsha ubbaa ekkidi, Ba7aalayyo goinnanau go7ettidosona” yaagiis.

<sup>8</sup> Hegaa gishshau, kawoi Leewata azazin, eti saaxiniyaa giigissidi, GODAA Beeta Maqidasiyaa penggiyaappe kare baggaara wottidosona. <sup>9</sup> Xoossaa ashkkarai Muusee bazzon de7iiddi, Israa7eela asaappe shiishshanaadan azazido giiraa GODAAYYO ehaana mala, Yihudaaninne Yerusalaamen Leewati awaajjidosa. <sup>10</sup> Awaajjin halaqatinne asai ubbai ufaiittidi, giirai saaxiniyaa kumana gakkanaashin, an yeggidosona. <sup>11</sup> Saaxinee Leewatu baggaara kawo oosanchchatukko gakkinn, saaxiniyaa gidдон daro miishshai dagattidaagaa eti be7ido wode ubban, kawo xaafeenne qeese ubbatu halaqai sunttido bitanee yoosona; yiidi saaxiniyaappe miishshaa kessoosona; kessidi saaxiniyaa sohuwan zaari wottoosona. Eti ubba gallassi hegaadan oottidi, daro miishshaa dagayidosona.

<sup>12</sup> He miishshaa kawoinne Yoodaahee GODAA Beeta Maqidasiyaa oosuwaa wochchanau sunttettida asatuyyo immoosona. Immin eti GODAA Beeta Maqidasiyaa bottokonanau shuchchaa massiyaageetanne anaaxeta, qassi GODAA Beeta Maqidasiyaa bottokonanau birataanne nahaasiyaa oosanchchata qaxaridosona. <sup>13</sup> Qaxarin oosanchchati Xoossaa Beeta Maqidasee moorettidaagaa minni oottidi, bantta kushiyan kaseegaadan ooraxissidosona. <sup>14</sup> Oosanchchati Beeta Maqidasiyaa bottokonuwaa polido wode, palahida worqqaanne biraa kawuwaakkonne



Yoodaahikko ehiidosona. Ehin eti he worqqaaninne biran GODAA Beeta Maqidasiyaa giddo oosuwaayyo maaddiya miishshata, xuuggiyo yarshshuwaayyo haniya sainetanne hara dumma dumma miishshata ootissidosona.

Yoodaahée de7ido laittan GODAA Beeta Maqidasiyan xuuggiyo yarshshuwaa ubba wode eti yarshshoosona.

<sup>15</sup> Yoodaahée keehippe cimmidi haiqqiis; i haiqqiyo wode a laittai xeetanne hasttama.

<sup>16</sup> Yoodaahée Israa7eelan Xoossaayyoonne Xoossaa Beeta Maqidasiyaayyo lo77obaa oottido gishshau, Daawita Kataman kawotu makkaanan a moogidosona.

### *Yo7aashi GODAAPPE Wora Simmiis*

<sup>17</sup> Yoodaahée haiqqidoogaappe guyyiyan, Yihudaa halaqati yiidi, kawuwaayyo lichchi giidi gufannidosona. Yaatin, kawoi eta zoriyaa siyiis. <sup>18</sup> Eti GODAA bantta maizza aawatu Xoossaa Beeta Maqidasiyaa aggidi, Asheeri misiletuyyoonne eeqatuyyo goinnidosona. Eti oottido balaa gishshau, Yihudaa bollinne Yerusalaame bolli GODAA hanqqoi wodhdhiis. <sup>19</sup> Asai baakko simmanaadan GODAI hananabaa yootiyaageeta etakko kiittiis; kiittin hananabaa yootiyaageeti eta bolli markkattidosona; shin eti siyennan ixxididosona.

<sup>20</sup> Hegaappe guyyiyan, qeesiyaa Yoodaahée na7aa Zakkaariyaasa bolli Xoossaa Ayyaanai wodhdhiis; wodhdhin Zakkaariyaasi asaa sinttan eqqidi, “Xoossai hagaadan yaagees; ‘Intte GODAA azazuwaa poliyoogaa aissi ixxeetii? Hege intteyyo iita. Intte GODAA aggido gishshau, ikka inttena aggiis’ yaagees” yaagiis. <sup>21</sup> Yaagin asai a bolli maqettiis. Kawoi eta azazin, GODAA Beeta Maqidasiyaa dabaaban a shuchchan caddidi woridosona. <sup>22</sup> Kawoi Yo7aashi Zakkaariyaasa aawai Yoodaahée baayyo oottido kehatettaa hassayennan aggidi, a na7aa Zakkaariyaasa worissiis. Zakkaariyaasi haiqqiiddi, “GODAI haga be7idi, halo kesso” yaagiis.

### *Yo7aasha Kawotaa Wurssettaa*

<sup>23</sup> He laittai laamettiyo wode, Sooriyaa olanchchati Yo7aasha olanau yiidosona. Yiidi Yihudaa bollinne Yerusalaame bolli woraajjidi, asaa halaqata ubbaa woridi, etappe omooddidobaa ubbaa Damasqqon de7iya bantta kawuwaassi yeddidosona. <sup>24</sup> Sooriyaa olanchchati qoodan guutta; shin Yihudaa asai GODAA bantta aawatu Xoossaa aggido gishshau, GODAI keehi daro gidida eta olanchchata Sooriyaa olanchchatu kushiyan aattidi immiis. Eti hagaadan oottidi, Yo7aasha qaxxayidosona.

<sup>25</sup> Sooriyaa olanchchati appe shaahettiyo wode, Yo7aashi keehippe masunxxi uttiis. Qeesiyaa Yoodaahée na7aa suuttaa gishshau, a oosanchchati a bolli maqettidi, i ba hiixan zin77idaashin woridosona. I haiqqin, Daawita Kataman a moogidosona; shin kawotu makkaanan a moogibookkona. <sup>26</sup> Yo7aasha bolli maqettidaageeti Amoonnee SHim77aati na7aa Zabaadanne Moo7aabee SHiimiriiti na7aa Yihozabaada. <sup>27</sup> Yo7aasha naatubai, a bolli hananabaa yootido darobainne Xoossaa Beeta Maqidasiyaa i bottokonissidobai Kawotu Taarikiyaa Maxaafan xaafetti uttiis. Yo7aashi haiqqin, a sohuwan a na7ai Amesiyaasi kawotiis.

## 25

### *Yihudaa Kawuwaa Amesiyaasa*

#### *(Kawotu Maxaafaa Naa77anttuwaa 14:2-6)*

<sup>1</sup> Amesiyaasi kawotiyo wode, laittai ayyo laatamanne ichchasha; i Yerusalaamen laatamanne uddufun laitta kawotiis. A aayee sunttai Yiho7aadino; a Yerusalaame asa. <sup>2</sup> Amesiyaasi GODAA sinttan suurebaa oottiis; shin kumetta wozanaappe gidenna. <sup>3</sup> Amesiyaasi kawotettaa mintti oiqqidosaa, ba aawaa worida oosanchchata woriis. <sup>4</sup> Muuse Higgiiyaa Maxaafan xaafettidoogaadan, GODAI, “Naati oottido nagaraa gishshau, aawata woranau bessenna; qassi aawati oottido nagaraa gishshaukka, naata



woranau bessenna. Asai ubbai ba oottido nagaran nagaran haiqqanau bessees” yaagidi azazidoogaadan, woridaageetu naata woribeenna.

*Eedooma Bolli Denddida Olaa*  
(Kawotu Maxaafaa Naa77anttuwaa 14:7)

<sup>5</sup> Amesiyaasi Yihudaa asaa shiishshidi, bantta aawatu keettan keettan shaalaqatunne mato halaqatu sunttatettaa gidдон wottiis. I laatamu laittanne laatamu laittaappe bollaara de7iya Yihudaa zaretanne Biniyaama zareta ubbaa qoodiis; qoodidi gondalliyaanne tooraa oiqqidi, olau giigida heezzu xeetu sha7u doorettida asata demmiis. <sup>6</sup> Qassi Israa7eelappe xeetu sha7u mino asata heezzu sha7anne oiddu xeetu kilo giraame deexxiya biran Amesiyaasi qaxariis. <sup>7</sup> SHin Xoossaa asa giyo issi bitanee Amesiyaasakko yiidi, “Kawuwau, GODAI Israa7eelaaranne Efireema asaara de7enna gishshau, Israa7eela olanchchati nenaara booppona. <sup>8</sup> Neeni, eti tana minttana gaada qoppikko, Xoossai nena ne morkketu sinttan kaushshana. Aissi giikko, maaddanau woikko kaushshanau Xoossau wolqqai de7ees” yaagiis.

<sup>9</sup> Yaagin Amesiyaasi Xoossaa asa, “Taani Israa7eela olanchchatussi qanxxido he birai ubbai waananee?” yaagiis.

Yaagin Xoossaa asi, “GODAI neeyyo hegaappe aattidi immanau danddayees” yaagiis. <sup>10</sup> Hegaa gishshau, Amesiyaasi Efireemappe baakko yiida olanchchati bantta soo soo baanaadan moissiis. Moissin eti Yihudaa asaa bolli keehippe hanqqettiiddi, bantta soo soo simmidosona.

<sup>11</sup> Hegaappe guyyiyan, Amesiyaasi bana minttidi, ba olanchchata kaalettidi, Maxine Wombbaa biis; bin a olanchchati Se7iira asaappe tammu sha7aa woridosona. <sup>12</sup> Qassi eti tammu sha7u olanchchata paxa omooddidosona; omooddidi eta aafuwaa dooni efiidosona; efiidi he aafuwan duge olin, hirkkin de7iya shuchchan asati ubbai meqerettidi wuridosona. <sup>13</sup> SHin he wode Amesiyaasi banaara olau beennaadan guyye yeddido Israa7eela olanchchati Samaariyaappe biidi, Beeti-Horoona gakkanaassi de7iya Yihudaa katamata olidosona. Eti Yihudaa asaappe heezzu sha7aa woridi, daro omooduwaa ekkidosona.

<sup>14</sup> Amesiyaasi Eedooma asata woridi simmiiddi, Se7iira asaa xoossatu misileta ekkidi yiis. He misileti baageeta gidanaadan essidi, etayyo goinniisinne ixaanaa cuwayiis.

<sup>15</sup> Hegaa gishshau, GODAA hanqqoi Amesiyaasa bolli eexxi kiyiis; yaatin, GODAI issi hananabaa yootiyaagaa Amesiyaasakko kiittiis. Kiittin biidi, “Bantta asaa ne kushiyaappe ashshanau danddayibeenna xoossatussi neeni aibissi goinnadii?” yaagiis.

<sup>16</sup> Hananabaa yootiyaagee haasayishin, kawoi, “Neeni kawuwaara zorettanaadan nuuni nena sunttidooyye? Agga! Neeni aibissi haiqqanau koyai?” yaagiis.

Yaagin hananabaa yootiyaagee aggi ekkidi, “Neeni haggaa oottido gishshaunne taani nena zoridoogaa siyabeenna gishshau, Xoossai nena xaissanau qachchidoogaa ha77i taani eraas” yaagiis.

*Israa7eela Bolli Denddida Olaa*  
(Kawotu Maxaafaa Naa77anttuwaa 14:8-20)

<sup>17</sup> Hegaappe guyyiyan, Yihudaa Kawoi Amesiyaasi bana zoriya asatuura zorettidi, Israa7eela Kawuwaa Yeehu na7aa na7aa, Yo7akaaza na7aa, Yo7aashassi asa kiittidi, “Haaya; ane naa77ai olaa gaittoos” yaagidi naassiis.

<sup>18</sup> Naassin Israa7eela Kawoi Yo7aashi Yihudaa Kawuwaa Amesiyaasa hagaadan yaagiis; “Liibaanoosan de7iya kinddiichchoi Liibaanoosan de7iya zigaayyo kiittidi, ‘Ne na7iyo ta na7aassi imma’ yaagiis. SHin Liibaanoosan de7iya issi do7ai hegaara kanttiiddi, he kinddiichchuwaa yedhdhiis. <sup>19</sup> Neenikka, ‘Be7a, Eedooma biittaa asaa xoonas’ yaagada ne wozanan otoruwan kumadasa. SHin ha77i neeni ne son woppu gaada uttaaga. Ne bollinne ne biittaa Yihudaa bolli metonne bashsha ehiyaabaa aibissi denttetta?” yaagidi zaariis.

<sup>20</sup> SHin Amesiyaasi sissaa ixxiis. Eti Eedooma xoossatussi goinnido gishshau, Xoossai eta eta morkketu kushiyan aattidi immanau koyiis. <sup>21</sup> Hegaa gishshau, Israa7eela Kawoi Yo7aashi olanau kiyin, inne Yihudaa Kawoi Amesiyaasi Yihudan de7iya Beeti-SHemesha giyo kataman olaa gaittidosona. <sup>22</sup> Gaittin Israa7eela asai Yihudaa asaa xooniis; xoonin Yihudaa asai ubbai baqatidi, ba soo ba soo biis. <sup>23</sup> Hegaappe guyyiyan, Israa7eela Kawoi Yo7aashi Akaaziyaasa na7aa na7aa, Yo7aasha na7aa, Yihudaa Kawuwaa Amesiyaasa Beeti-SHemeshan omooddidi, Yerusalaame ehiis. Yaatidi Yerusalaame dirssaa gimbbiyaa, Efireema Penggiyaappe biidi Zooziyaa Penggiyaa gakkanaashin de7iya, oiddu xeetu wara gidiya sohuwaa laaliis. <sup>24</sup> Laalidi Xoossaa Beeta Maqidasiyan de7iya worqqaanne biraa ubbaa, Obeedi-Eedooma zerettai naagiyo miishshaanne kawo keettan de7iya miishshaa ubbaa ekkiiis; qassi iggitiyaa oiqettida asata akka ekkidi, Samaariyaa simmiis.

<sup>25</sup> Yo7akaaza na7ai, Israa7eela Kawoi Yo7aashi haiqqidoogaappe guyyiyan, Yo7aasha na7ai Yihudaa Kawoi Amesiyaasi tammanne ichchashu laitta de7iis. <sup>26</sup> Amesiyaasi oottidobai ubbai, koiroppe wursettaa gakkanaassi, Yihudaa Kawotunne Israa7eela Kawotu Taarikiyaa Maxaafan xaafetti uttiis. <sup>27</sup> Amesiyaasi GODAA kaalliyogaa ag-gidoogaappe guyyiyan, eti a bolli Yerusalaamen maqettidosona. Maqettin i Laakisha katamaa baqatiis. SHin eti a geeduwaa Laakisha asa kiittin, a yan woridosona. <sup>28</sup> Woridi a ahaa paran caani ehiidi, Daawita Kataman a maizza aawatuura moogidosona.

## 26

### *Yihudaa Kawuwaa Ooziyaana*

*(Kawotu Maxaafaa Naa77anttuwaa 14:21-22, 15:1-7)*

<sup>1</sup> Hegaappe guyyiyan, Yihudaa asai ubbai tammanne usuppun laitta gidiyo na7aa, Ooziyaana a aawaa Amesiyaasa sohuwan kawoyiis. <sup>2</sup> A aawai Amesiyaasi haiqqidoogaappe guyyiyan, i Eelaata giyo katamaa zaaretti keexxidi, Yihudan timiis.

<sup>3</sup> Ooziyaani kawotiyo wode, laittai ayyo tammanne usuppuna; i Yerusalaamen ishatamanne naa77u laitta kawotiis. A aayee sunttai Yikoolo; a Yerusalaame asa. <sup>4</sup> A aawai Amesiyaasi oottidoogaadan, ikka GODAA sinttan suurebaa oottiis. <sup>5</sup> Xoossaa yashshatettaa bana tamarissida Zakkaariyaasi paxa de7ido wodiyan, Xoossaassi i ammanettidi oottiis. GODAASSI i oottido wode ubban, Xoossai a anjiis.

<sup>6</sup> Ooziyaani Pilisxxeematuura olettanau kiyidi, Gaate katamaa yuushuwaa gimbbiyaa, Yaabine katamaa yuushuwaa gimbbiyaanne Ashddooda gimbbiyaa laaliis; yaatidi Ashddooda katamaa mataaninne Pilisxxeematu gidдон katamata keexxiis. <sup>7</sup> Ooziyaani Pilisxxeemata, Gurbba7aalan de7iya Arabatanne Ma7uunata xoonanaadan Xoossai a maaddiis. <sup>8</sup> Amoonaa asati Ooziyaanayyo giiridosona. Ooziyaani keehippe minnido gishshau, a woree Gibxxe zawaa gakkanaassi siyettiis.

<sup>9</sup> Qassi Ooziyaani Zooziyaa Penggiyaa matan, Zanggaara Penggiyaa mataaninne dirssai sookko baqqiyo zooziyaa matan adussa gimbbeta gimbbissidi, Yerusalaame qatuwaa minttiis. <sup>10</sup> Ayyo bargguwaaninne dembban cora mehee de7iyo gishshau, he sohotun adussa gimbbiyaa gimbbiis; gimbbidi daro ollaa bookkiis. I qassi goshshaa dosiyo gishshau, keratuuninne aradda gadiyan ayyo daro goshshanchchatinne woiniyaa turaa tokkiyaageeti de7oosona.

<sup>11</sup> Qassikka Ooziyaanayyo olau giigida keehi daro olanchchati de7oosona. Olanchchatu xaafee Yi7i7eelinne halaqai Ma7iseeyi olanchchatu sunttaa mazggafan xaafidosona. Eta halaqai gadaawaa Hanaaniyaa. <sup>12</sup> Bantta aawatu keettau halaqatiya mino asati naa77u sha7anne usuppun xeeta. <sup>13</sup> Kawuwaa morkketuura olettidi, bantta kumetta wolqqan kawuwaa maaddanau kiyiya heezzu xeetanne laappun sha7anne ichchashu xeetu olanchchati eta kushiyan de7oosona. <sup>14</sup> Ooziyaani olanchchatu ubbau gondalliyaa, tooraa, huuphiyan wottiyo birata qophiyaa, tiran maayiyo

ola miishshaa, wonddafiyyaa, yambarshshaanne mulumuqqe shuchchaa giigissiiis. <sup>15</sup> Yerusalaamen de7iya kushe hiillaa eriya asata Kawoi Ooziyaani azazidi, wochchiyo adussa gimbbetuppenne katamaa dirssaa gimbbiyaa zoozetuppe, wonddafiyyaa zubbeta dukkiyo miishshatanne gita gita shuchchata pixiridi oliya miishshata merissiiis. Xoossai a maaddin, i keehippe minniis; a woreekka ubbasaa gakkidi siyettiis.

### *Ooziyaani Ba Otoruwan Qaxxayettiis*

<sup>16</sup> SHin Ooziyaani minnido wode otorettiis; otoroi a kunddettau kaalettiis. Ooziyaani GODAA ba Xoossaa naaqqiis; i ixaanaa cuwayiyo saaxiniyan ixaanaa cuwayanau GODAA Beeta Maqidasiyaa geliis. <sup>17</sup> Qeesee Azaariyaasinne GODAA qeeseti hosppun tammati a geeduwaa kaallidi gelidosona; he qeeseti mino asata. <sup>18</sup> Qeeseti Kawuwaa Ooziyaana teqqidi, “Ooziyaanaa, neeni GODAAYYO ixaanaa cuwayanau bessakka. Ixaanaa cuwayiyoogee bessiyoi, ixaanaa cuwayanau geeyi uttida, Aaroonaa zeretta gidiya qeesetu xalaalaassa. Ha Geeshsha Sohuwaappe kiya! Aissi giikko, neeni GODAA Xoossaa naaqqadada; neeni appe bonchcho demmakka” yaagidosona.

<sup>19</sup> SHin Ooziyaani ixaanaa cuwayanau ixaanaa cuwayiyo miishshaa ba kushiyan oiqqi uttidi hanqqettiis. Ooziyaani qeeseta hanqqettidi, GODAA Beeta Maqidasiyan ixaanaa cuwayiyo saaxiniyaa matan qeesetu sinttan eqqidaashin, a som77uwaa hanttaara goga harggee oiqqiis. <sup>20</sup> Qeesiyaa halaqai Azaariyaasinne hara qeeseti ubbai akko xeelliyo wode, a som77uwaa hanttaara goga harggee oiqqidoogaa be7idi, a eesuwan Beeta Maqidasiyaappe kessidosona. Ikka GODAI a qaxxayidoogaa erido gishshau, eesuwan hegaappe kiyidi biis. <sup>21</sup> Kawoi Ooziyaani haiqqana gakkanaashinkka he harggiyaara de7iis; GODAA Beeta Maqidasiyaa geliyoosaappekka teqettiis. He harggiyaa gaasuwan dumma keettan barkka de7iis. He wode a na7ai Yo7aataami kawo keettan de7idi, he biittaa asaa haariis.

<sup>22</sup> Kawoi Ooziyaani hanido harabaa ubbaa koiroppe wurssettaa gakkanaassi Amoxa na7ai, hananabaa yootiya Isiyaasi xaafi wottiis. <sup>23</sup> Ooziyaani haiqqidi, ba maizzan gaittiis. Yaatin, asai a, “Hanttaara goga harggen oiqettidaagaa” giidi, kawotu makkaanaa matan a moogidosona. I haiqqin, a sohuwan a na7ai Yo7aataami kawotiis.

## 27

### *Yihudaa Kawuwaa Yo7aataama (Kawotu Maxaafaa Naa77anttuwaa 15:32-38)*

<sup>1</sup> Yo7aataami kawotiyo wode, laittai ayyo laatamanne ichchasha; i Yerusalaamen tammanne usuppun laitta kawotiis. A aayee sunntai Yaruusho; a Xaadooqa na7iyo.

<sup>2</sup> Ba aawai Ooziyaani oottidoogaadan, Yo7aataamikka GODAA sinttan suurebaa oottiis; shin i a aawai GODAA Beeta Maqidasiyaa gelidoogaadan gelibeenna. Gidikkonne, asai nagaraa oottiyooqaa aggibeenna.

<sup>3</sup> Yo7aataami GODAA Beeta Maqidasiyaa geliyo Qommo Penggiyaa zaarettidi oottiis; qassi Yerusalaame katamaa gimbbiyan Ofeela giyoosan daro oosuwa oottiis.

<sup>4</sup> Yihudaa gezziyan katamata keexxiis; worai dariyo keran qatuwaanne adussa gimbbiyaa gimbbiis.

<sup>5</sup> Yo7aataami Amoonaa kawuwaara olettidi xooniis. Amoonati he laitti heezzu sha7anne oiddu xeetu kilo giraame deexxiya biraa, tammu sha7u konttaale gidiya gisttiyaanne tammu sha7u konttaale gidiya banggaa ayyo giiridosona. Amoonati naa77antto laittinne heeztantto laitti hegaadankka ehiidi, ayyo giiridosona.

<sup>6</sup> Yo7aataami GODAA ba Xoossaa sinttan suure hemettido gishshau, keehippe minniis.

<sup>7</sup> Yo7aataami hanido harabai, i olettido olaabai ubbainne i oottidobai ubbai Israa7eela Kawotunne Yihudaa Kawotu Taarikiyaa Maxaafan xaafetti uttiis.

<sup>8</sup> Yo7aataami kawotiyo wode, laittai ayyo laatamanne ichchasha; i Yerusalaamen

tammanne usuppun laitta kawotiis. <sup>9</sup> Yo7aataami haiqqidi, ba maizzan gaittiis. Eti a Daawita Kataman moogidosona. A sohuwan a na7ai Akaazi kawotiis.

## 28

### *Yihudaa Kawuwaa Akaaza (Kawotu Maxaafaa Naa77anttuwaa 16:1-5)*

<sup>1</sup> Akaazi kawotiyo wode, laittai ayyo laatama; i Yerusalaamen tammanne usuppun laitta kawotiis. Akaazi ba maizza aawai Daawiti suurebaa oottidoogaadan, GODAA sinttan i suurebaa oottibeenna; <sup>2</sup> i kase de7ida Israa7eela kawotu ogiyan hemettiis. Ba7aalayyo goinnanaadan nahaasiyaa seerissidi, misiliyaa medhdhiis. <sup>3</sup> Qassi Hinnooma Zanggaaran ixaanaa cuwayiis; GODAI Israa7eela asaa sinttaappe laaggidi kessido asatu de7uwaa wogaa, he sheneyiyaagaa qullidi, ba attuma naata taman xuug-gidi, eeqau yarshshiis. <sup>4</sup> Akaazi asai goinniyo xoqqa sohotun, keratu huuphiyaaninne daashsha mitta ubbaa garssan yarshshuwaa yarshshiisinne ixaanaa cuwayiis.

<sup>5</sup> Hegaa gishshau, GODAI a Xoossai a Sooriyaa kawuwaa kushiyan aatti immiis. Immin eti a xoonidi, a asaappe daro asaa omooddidi, Damasqqo efidosona. Qassikka GODAI a Israa7eela kawuwaa kushiya aatti immin, kawoi iita shochchaa shociis.

<sup>6</sup> Yihudaa asai GODAA bantta maizza aawatu Xoossaa aggidu gishshau, Ramaaliyaa na7ai Paaquhi Yihudaa olanchchatuppe xeetanne laatamu sha7u mino asata issi gallassi woriis. <sup>7</sup> Efireema zare gididi mino olanchchai Ziikiri kawuwaa na7aa Ma7iseeya, kawo keettau aawatiya Aziriqaamanne kawuwaa kaallidi de7iya Elqqaana woriis.

<sup>8</sup> Israa7eela asai bantta dabbotuppe naa77u xeetu sha7u maccaasaa, attuma naatanne macca naata omooddidosona; qassi eti keehippe daro omooduwaa ekkidi, Samaariyaa efidosona.

### *Hananabaa Yootiya Odeeda*

<sup>9</sup> GODAA sunttan hananabaa yootiya Odeeda giyo issi bitanee Samaariyan de7ees. Odeedi Samaariyaa yiya olanchchatuura gaittanau kiyidi, hagaadan yaagiis; “Be7ite, GODAI, intte aawatu Xoossai Yihudaa hanqqettido gishshau, intte kushiyan aatti immiis. SHin inttekka saluwaa gakkida hanqquwan eta siifideta. <sup>10</sup> Ha77ikka Yihudaa asainne Yerusalaame asai intteyyo maccane attuma aille gididi, haarettanaadan qoppeeta. Inttekka etaagaadan hanidi, GODAA intte Xoossaa naaqqideta gidekketii? <sup>11</sup> Hegaa gishshau, ha77i intte taani giyoogaa siyite. GODAA hanqqoi intte bolli wodhdhido gishshau, intte omooddidi qachchido intte dabbota yeddiigite” yaagiis.

<sup>12</sup> Hegaappe guyyiyan, Efireema zaretu halaqatuppe oiddati, Yohanaana na7ai Azaariyaasi, Mashilemoota na7ai Berekee, SHaaluuma na7ai Yihizqqeenne Hadilaaya na7ai Amaasi olaappe simmidaageetu bolli denddidosona. <sup>13</sup> Denddidi, “He omoodettida asata intte hagau ehooppite! Ehiikko, kase nuuni GODAA bolli oottido nagaraanne naaquwaa bolli hara naaquwaa gujjeeta. Nu naaqoi kasekka dari uttido gishshau, Israa7eela bolli GODAA hanqqoi wodhdhiis” yaagidosona.

<sup>14</sup> Hegaa gishshau, olanchchati omoodettida asatanne omoodettida miishshaa halaqatu sinttaaninne kumetta yaa7aa sinttan sheedhdhdidosona. <sup>15</sup> Hegaappe guyyiyan, sunttai hagaappe qommoora xaafettido asati denddi eqqidi, omoodettida asata ekkidosona. Ekkidi eta gididon kallo de7iyaageeta omoodettidabaappe maizzidosona; eti he asatussi maayuwaanne caammaa immidosona. Qassi eta mizidosonanne ushshidosona; eta mazunttaakka zaitiyaa tiyidosona. Eta gididon daafurida ubbata hariyaa togissidi, eta ishanttukko, zambbai de7iyo Yarkko katamaa ehiidosona. Hegaappe guyyiyan, eti Samaariyaa simmidosona.

### *Akaazi Asoore Kawuwaa Maaduwaa Oichchiis (Kawotu Maxaafaa Naa77anttuwaa 16:7-9)*



<sup>16</sup> He wode Kawoi Akaazi Asoore kawoi bana maaddanaadan kiitaa kiittiis. <sup>17</sup> Aissi giikko, Eedooma asati naa77anttuwaakka Yihudaa bolli woraajjidi, daro asaa omooddidi efidosona. <sup>18</sup> Pilisxxeema asati qassi Yihudaa bargguwaanne Neegeeba Bazzuwan de7iya katamata olidosona; olidi Beeti-SHemesha, Ayyaaloona, Gaderoota, Sooko, Timina, Giimizonne eta yuushuwan de7iya moottata woraajji oiqqidi, yan de7idosona. <sup>19</sup> Yihudaa Kawoi Akaazi Yihudaa asaa nagaraa ootissido gishshaunne GODAASSI ammanettibeenna gishshau, GODAI Yihudaa kaushshiis. <sup>20</sup> Hegaa gishshau, Asoore Kawoi Tigilaati-Paleseeri Akaazakko yiidi, a tuggayisippe attin maaddibeenna. <sup>21</sup> Akaazi GODAA Beeta Maqidasiyaappe, kawo keettaappenne asaa halaqatuppe darobaa ekkidi, Asoore kawuwaayo immiis. SHin hegaa oottidoogekka a ainne go77ibeenna.

### *Akaaza Nagaraa*

<sup>22</sup> Kawoi Akaazi ba huuphen ba tuggaa wode GODAASSI ammanettinna hanotaa kasegaappe gujji gujjidi biis. <sup>23</sup> Bana xoonida Damasqqo xoossatuyyo yarshshiiddi, “Sooriyaa kawotu xoossati eta maaddido gishshau, tanakka eti maaddanaadan taani etau yarshshana” yaagiis. SHin he xoossati ayyoonne Israa7eela asaa ubbaayyo bashshaa ehiidosona. <sup>24</sup> Akaazi Xoossaa Beeta Maqidasiyaa miishshaa ubbaa issisaa shiishshidi kinchcherettiis. Kinchcherettidi GODAA Beeta Maqidasiyaa penggeta gorddiis. Yaatidi Yerusalaamen ubbasan baayyo yarshshiyo sohota essiis. <sup>25</sup> Akaazi hara xoossatuyyo ixaanaa cuwayanau Yihudan de7iya katamatu ubban goinniyo xoqqa sohota medhdhiis. Yaatidi GODAA ba aawatu Xoossaa hanqgetissiis.

<sup>26</sup> Akaazi hanido harabainne i oottidobai ubbai koiroppe wurssettaa gakkanaassi Yihudaa Kawotunne Israa7eela Kawotu Taarikiyaa Maxaafan xaafetti uttiis. <sup>27</sup> Akaazi haiqqidi, ba maizzan gaittiis. Yerusalaame kataman a moogidosona; shin Israa7eela kawotu makkaan moogibookkona. A sohuwan a na7ai Hizqqiyaasi kawotiis.

## 29

### *Yihudaa Kawuwaa Hizqqiyaasa*

#### *(Kawotu Maxaafaa Naa77anttuwaa 18:1-3)*

<sup>1</sup> Hizqqiyaasi kawotiyo wode, laittai ayyo laatamanne ichchasha; i Yerusalaamen laatamanne uddufun laitta kawotiis. A aayee sunttai Abiiyo; a Zakkaariyaasa na7iyo. <sup>2</sup> A maizza aawai Daawiti oottidoogaadan, Hizqqiyaasikka GODAA sinttan suurebaa oottiis.

### *Beeta Maqidasiyaa Geeshshatettaa*

<sup>3</sup> Hizqqiyaasi ba kawotido koiro laittan, koiro aginan, GODAA Beeta Maqidasiyaa penggeta dooyidi bottokoniis. <sup>4</sup> Qeesetanne Leewata ehiissidi, Beeta Maqidasiyaayyo arshsho baggaara de7iya dabaaban shiishshiis. <sup>5</sup> SHiishshidi hagaadan yaagiis; “Lee-watoo, taani giyoogaa siyite! Ha77i intte huuphiyau geeyite; GODAA intte aawatu Xoossaa Beeta Maqidasiyaakka geeshshite. Beeta Maqidasiyaa tunissiyaabaa ubbaa diggite. <sup>6</sup> Aissi giikko, kase nu aawati ammanettibookkona; GODAA nu Xoossaa sinttan iitabaa oottidosona. Eti GODAA aggidi, GODAI de7iyoosaappe bantta som77uwaa wora zaaridi, bantta zokkuwaa akko zaaridosona. <sup>7</sup> Eti qassi Beeta Maqidasiyaa penggeta gorddididosona; xomppiyaakka toissidosona. Beeta Maqidasiyan Israa7eela Xoossaayyo ixaanaa cuwayibookkona, woikko xuuggiyo yarshshuwaa yarshshibookkona. <sup>8</sup> Hegaa gishshau, GODAA hanqqoi Yihudaa bollinne Yerusalaame bolli wodhdhiis. Intte aifiyan intte be7iyoogaadan, GODAI eta intteyyo yashsha, dagamanne ‘Poora!’ giyoobaa oottiis. <sup>9</sup> Hegaa gaasuwan nu aawati bisuwan haiqqidosona; nu attuma naati, nu macca naatinne nu maccaasati omoodettidosona.

<sup>10</sup> “GODAA hanqqoi eexxiyaagee nu bollappe kichchana mala, taani GODAARA, Israa7eela Xoossaara maachchaa maacttanau ta wozanan qoppais. <sup>11</sup> Ta naatoo, intte



GODAA sinttan eqqidi, ayyo oottiya oosanchcha gididi, ixaanaa cuwayanaadan inttena i doorido gishshau, shenehoo gooppite” yaagiis.

<sup>12</sup> He sohuwan de7iya Leewati hagaappe kaallidi xaafettidaageeta:

Qahaata yaraappe Amaasaaya na7aa Mahaatanne Azaariyaasa na7aa Yuu7eela.

Maraara yaraappe Abdda na7aa Qiisanne Yihaali7eela na7aa Azaariyaasa.

Gershshoona yaraappe Ziimma na7aa Yo7aahanne Yo7aaha na7aa Edeena.

<sup>13</sup> Elxxaafaana yaraappe SHiimiranne Yi7u7eela.

Asaafa yaraappe Zakkaariyaasanne Mataaniyaa.

<sup>14</sup> Hemaana yaraappe Yihi7eelanne SHim77a.

Yidutuuna yaraappe SHamaa7iyaanne Uzzi7eela.

<sup>15</sup> Eti bantta dabbota, Leewata, shiishshin, eti ubbaikka bantta huuphiyau geeyidosona. Kawoi eta azazin, GODAA higgayan xaafettidoogaadan eti GODAA Beeta Maqidasiyaa geeshettaa doommidosona. <sup>16</sup> Hega gishshau, qeeseti GODAA Beeta Maqidasiyaa geeshshanau giddo gelidosona; gelidi GODAA Beeta Maqidasiyaa gidдон de7iya tunabaa ubbaa kessidi, GODAA Beeta Maqidasiyaa dabaabaa ehiidosona. Ehin Leewati ekkidi, Qediroona Zanggaaran olidosona. <sup>17</sup> Eti koiro aginan, koiro gallassi Beeta Maqidasiyaa geeshshiyooгаа doommidosona; he aginaayyo hosppuntta gallassi baranddaa gakkidosona. Hara hosppun gallasan GODAA Beeta Maqidasiyaa goin-uwaassi giigissidosona. Koiro aginaayyo tammanne usuppuntta gallassi eti he oosuwa polidosona.

<sup>18</sup> Hegaappe guyyiyan, eti Kawuwaa Hizqqiyaasakko gelidi, “Nuuni GODAA Beeta Maqidasiyaa ubbaa, xuuggiyo yarshshuwaa yarshshiyooaanne he yarshshiyooaan go7ettiyo miishshaa ubbaa, GODAA sinttan wottiyo oittaa xaraphpheezaanne he xaraphpheezaan de7iya miishshata ubbaa geeshshida. <sup>19</sup> Qassi Kawoi Akaazi kawotidi de7iyo wode, Xoossaayyo ammanettennan aggidi, efiido miishsha ubbaa nuuni zaaridi geeshshida. Be7a, nuuni geeshshido miishshai ubbai GODAASSI yarshshuwaa yarshshiyooaan sinttan de7ees” yaagidosona.

<sup>20</sup> Kawoi Hizqqiyaasi wonttetta gallassi guuran denddidi, katamaa halaqata shiishshidi, etaara issippe GODAA Beeta Maqidasiyaa biis. <sup>21</sup> Eti kawotetta gishshau, Beeta Maqidasiyaa gishshaunne Yihudaa asaa gishshau, laappun korimata, laappun dorssa orggeta, laappun dorssa maratanne qassi laappun deeshsha orggeta nagaraa yarshshuwaayyo ehiidosona. Aaroonaa zersetta gididi qeeseti, GODAAYYO yarshshuwaa yarshshiyooaan hegeeta yarshshanaadan kawoi azaziis. <sup>22</sup> Azazin qeeseti korimata shukkidi, eta suuttaa yarshshiyooaan bolli caccafidosona. Qassi dorssa orggeta shukkidi, eta suuttaa yarshshiyooaan bolli caccafidosona. Qassikka dorssa marata shukkidi, eta suuttaa yarshshiyooaan bolli caccafidosona. <sup>23</sup> Nagaraa yarshshuwaassi haniya deeshsha orggeta kawuwaa sinttinne shiiqida asaa sintti ehiidosona; ehin eti ubbai bantta kushiyaa deeshshatu bolli wottidosona. <sup>24</sup> Wottin qeeseti deeshshata shukkidi, Israa7eela asaa ubbaa nagarai atto geetettana mala, eta suuttaa yarshshiyooaan bolli yarshshidosona. Aissi giikko, kawoi eti xuuggiyo yarshshuwaanne nagaraa yarshshuwaa yarshshanaadan azazido gishshaassa.

<sup>25</sup> Hegaappe guyyiyan, GODAI kawuwaa hiraagiya Gaada baggaaranne hananabaa yootiya Naataana baggaara Kawuwaa Daawita azazido azazuwaa Hizqqiyaasi kaallidi, Leewata daalaa, diitaaanne maaziinqiyaa oittidi, GODAA Beeta Maqidasiyan essiis. <sup>26</sup> Leewati Daawiti kase yettaa yexxido miishshata oiqqin, qeeseti qassi xurumbbata oiqqidi eqqididosona. <sup>27</sup> He wode eti xuuggiyo yarshshuwaa yarshshanaadan Hizqqiyaasi azaziis. Xuuggiyo yarshshuwaa yarshshiyooanee doomettido wode, xurumbbatuuninne Israa7eela Kawuwaa Daawita yettaa miishshatun GODAAYYO yettai doomettiis. <sup>28</sup> Xuuggiyo yarshshuwaa yarshshiyooanee polettana gakkanaashin,

kumetta yaa7ai GODAAYYO goinnees; yettaa yexxiyaageetikka yexxoosona; xurumbaa punniyaageetikka punnoosona. <sup>29</sup> Qeeseti yarshshuwaa yarshshiyooгаа polido wode, kawoinne aara de7iya asai ubbai gulbbatidi goinnidosona. <sup>30</sup> Kawoi Daawitinne hananabaa yootiya Asaafi xaafido galataa mazamuriyaa GODAAYYO yexxanaadan Kawoi Hizqqiyaasinne halaqati Leewata azazidosona; azazin Leewati ufaissan galatidi, gulbbatidi goinnidosona.

<sup>31</sup> Hegaappe guyyiyan, Hizqqiyaasi asaa, “Ha77i intte inttena GODAAYYO dummayideta. Intte shiiqidi, yarshshuwaanne galataa yarshshuwaa GODAA Beeta Maqidasiyaa ehiite” yaagiis. Yaagin shiiqida asai yarshshuwaanne galataa yarshshuwaa ehiidosona; qassi koyida asati xuuggiyo yarshshuwaa ehiidosona. <sup>32</sup> He shiiqida asai ehiido xuuggiyo yarshshuwaa qoodai laappun tammu korimata, xeetu dorssa orggetanne naa77u xeetu dorssa marata; hegeeti ubbai GODAAYYO xuuggiyo yarshshota. <sup>33</sup> Qassi issippetettaa yarshshoti usuppun xeetu korimatanne heezzu sha7u dorssata. <sup>34</sup> SHin xuuggiyo yarshsho ubbaa shukkidi, galbaa qaarana de7iya qeeseti qoodan keehi guutta. Hegaa gishshau, oosoi wurana gakkanaashiininne hara qeeseti bantta huuphiyau geeyana gakkanaashin, eta dabboti, Leewati eta maaddidosona. (Bantta huuphiyau geeyiyoogan Leewati qeesetuppe aadhdhidi ammanettoosona.) <sup>35</sup> Qeesetu oosoi daro; xuuggiyo yarshshuwaa, issippetettaa yarshshuwaa handdaanne xuuggiyo yarshshuwaara issippe yarshshettiya ushshaa yarshshuwaa ubbaa eti yarshshoosona.

Hegaadan hanidi, GODAA Beeta Maqidasiyaa oosoi naa77anttuwaa doommiis. <sup>36</sup> Hegaappe guyyiyan, Hizqqiyaasinne asai ubbai he oosuwa eesuwan polanaadan Xoossai eta maaddido gishshau, keehippe ufaittidosona.

## 30

### *Paasikaa Baalaa Bonchchanau Makkiyo Mahaa*

<sup>1</sup> GODAA Israa7eela Xoossaa Paasikaa Baalaa bonchchanau, Yerusalaamen de7iya GODAA Beeta Maqidasiyaa Israa7eela asai ubbainne Yihudaa asai ubbai yaanaadan Hizqqiyaasi kiittiis; qassi Efireema asaayyoonne Minaase asaayyo dabddaabbiyaa xaafiis. <sup>2</sup> Kawoi, halaqatinne, Yerusalaamen shiiqida asai ubbai Paasikaa Baalaa naa77antto aginan bonchchanau qofaa qachchidosona. <sup>3</sup> Qoodin gidiya qeeseti bantta huuphiyau geeyibeenna gishshaunne daro asikka Yerusalaamen shiiqibeenna gishshau, asai Paasikaa a wodiyan, koiro aginan bonchchanau danddayibeenna. <sup>4</sup> He qofai kawuwaassinne shiiqida asaassi lo77o qofa gidiiis. <sup>5</sup> Hegaa gishshau, GODAA Israa7eela Xoossaa Paasikaa Yerusalaamen bonchchanau Berssaabehappe doommidi Daana gakkanaaasi de7iya Israa7eela asai ubbai yaanaadan awaajjanau qofaa qachchidosona. Aissi giikko, ha Paasikaa Baalaabai kase higgiiyan xaafettidoogaadan daro asai bonchchibeenna.

<sup>6</sup> Kawoinne kawuwaa halaqati azazin, kiittetidaageeti Israa7eela biittaa ubbaanne Yihudaa biittaa ubbaa hagaadan yaagiya dabddaabbiyaa ekkidi efidosona; “Israa7eela asau, Asoore biittaa kawotu kushiyaappe kessi ekkidi, intte biittan attida inttekko i simmanaadan, inttekka GODAAKKO, Abrahaama, Yisaaqanne Israa7eela Xoossaakko simmite! <sup>7</sup> Bantta GODAAYYO, bantta aawatu Xoossaayyo ammanettibeenna intte aawatudaaninne intte ishanttudun hanoppite. Intte eriyoogaadan Xoossai eta hanttaara qixaatiyaa qaxxayiiis. <sup>8</sup> Intte GODAAYYO azazettiteppe attin, kase intte aawatudun intte morggiyaa zozzissoppite! GODAI merinau geeshshido Beeta Maqidasiyaa haa yiite. GODAA hanqqoi eexxiyaagee intte bollappe kichchanaadan, GODAAYYO, intte Xoossaayyo, goinnite. <sup>9</sup> Intte GODAAKKO simmikko, intte ishanttinne intte naati banttana omooddidaageetu sinttan maarotaa demmide, ha biitti simmana. Aissi giikko, GODAI intte Xoossai qarettiyaagaanne maariyaagaa. Intte akko simmikko, ba sinttaa intteppe wora zaarena” yaagiyaagaa.

<sup>10</sup> Kiitettidaageeti Efireema biittaanne Minaase biittaa kanttidi, Zaabiloona biittaa gakkanaassi katamaappe katamaa biidosona. SHin he katamatun de7iya asati eta karidi, eta bolli miiccidosonanne qilliiccidosona. <sup>11</sup> Gidikonne, Aseera asatuppe, Minaase asatuppenne Zaabiloona asatuppe aramida asati banttana kaushshidi, Yerusalaame yiidosona. <sup>12</sup> Kawoinne kawuwaa oosanchchati GODAA qaalaa maaran azazidobaa, Yihudaa asai issi wozanan azazettanaadan, Xoossaa kushee Yihudaa asaa bolli de7ees.

### *Paasikaa Baalai Bonchchettiis*

<sup>13</sup> Naa77antto aginan Oittaa Baalaa bonchchanau keehi daro asai Yerusalaamen shiiqiis. <sup>14</sup> Eti denddidi, Yerusalaamen de7iya yarshshiyo sohota qolidi, ixaanaa cuwayiyo miishsha ubbaa diggidi, Qediroona Zanggaaran olidosona. <sup>15</sup> Hegaappe guyyiyan, naa77antto aginan, tammanne oiddantto gallassi Paasikaa dorssaa shukkidosona. Bantta huuphiyau geeyibeenna qeesetinne Leewati yeellatidi, bantta huuphiyau geeyidosona; yaatidi xuuggiyo yarshshuwaa GODAA Beeta Maqidasiyaa ehiidosona. <sup>16</sup> Xoossaa asa gidiya Muuse higgiaadan, Beeta Maqidasiyaa gidдон bantta sohuwan sohuwan eqqidosa; eqqidi qeeseti Leewatu kushiyaappe ekkido suuttaa caccafidosa.

<sup>17</sup> He yaa7aa gidдон geeyibeenna daro asati de7oosona. Hegaa gishshau, he dorssata GODAAYYO geeshshanau, geeshsha gidenna ubbatuyyo Leewati Paasikaa dorssaa shukkidosona. <sup>18-19</sup> Efireema zariyaappe, Minaase zariyaappe, Yisaakoora zariyaappenne Zaabiloona zariyaappe daro asati higgee azaziyoogaadan bantta huuphiyau geeyibeennabaa gidikkokka, Paasikaa Baalaa gibiraa miidosona. Hegaa gishshau, Kawoi Hizqqiyaasi etau woossiiddi, “Abeet, asa ubbau keha GODAU, hageeti higgee azaziyoogaadan bantta huuphiyau geeyibeennabaa gidikkokka, eti neeyyo, GODAAYYO, bantta aawatu Xoossaayyo goinnoosona. Hegaa gishshau, neeni etayyo atto yaaga” yaagidi woossiis. <sup>20</sup> Woossin GODAI Hizqqiyaasa woosaa siyidi, etayyo atto giis.

<sup>21</sup> Yerusalaamen shiiqida Israa7eela asai Oittaa Baalaa gita ufaissan laappun gallassi bonchchiis. Leewatinne qeeseti yetta miishshan yexxiiddi, gallassi gallassi GODAA galatoosona. <sup>22</sup> Hegaappe guyyiyan, Hizqqiyaasi GODAA oosuwaa akeekanchcha gidiya Leewatussi haasayidi, eta minttettiis.

Asai ubbai issippetettaa yarshshuwaa yarshshiiddi, GODAA bantta aawatu Xoossaa galatiiddi, miiddinne uyiiddi, baalaa laappun gallassi bonchchidosona. <sup>23</sup> Kumetta yaa7ai baalaa hara laappun gallassaa gujjidi bonchchanau maayis; maayidi asai laappun gallassi baalaa ufaittiiddi bonchchiis. <sup>24</sup> Aissi giikko, Yihudaa Kawoi Hizqqiyaasi yarshshuwaa yarshshanau, sha7u korimata, laappun sha7u dorssatanne deeshshata yaa7aassi immiis; qassi halaqati sha7u korimatanne tammu sha7u dorssata yaa7aassi immidosona. Keehippe daro qeesetikka bantta huuphiyau geeyidosona. <sup>25</sup> Kumetta Yihudaa yaa7ai, qeeseti, Leewati, Israa7eelappe yiida asai ubbainne kase Israa7eela biittaappe yiidi, Yihudaa biittan de7ida asai ubbai ufaittiis. <sup>26</sup> Daawita na7aa, Israa7eela Kawuwaa Solomona wodiyaasappe doommin, hachchi gakkanaassi, Yerusalaamen haggaa milatiya baali bonchchetti erenna gishshau, Yerusalaamen asai keehippe ufaittiis. <sup>27</sup> Hegaappe guyyiyan, qeesetinne Leewati denddidi, GODAI asaa anjjana mala woossidosona; woossin Xoossai saluwan, ba de7iyo geeshsha sohuwan eta woosaa siyiis.

<sup>1</sup> Hagee ubbai polettido wode, he sohuwan de7iya Israa7eela ubbati Yihudaa kata-mata biidi, de7iyaaba ubbaa xaissana gakkanaashin, eeqaa tuussata kinchcheretti-dosona; Asheero giyo xoosee misiliyaa qanxxi olidosona; Yihudaa biittaaninne Biniyaama biittan ubban, qassi Efireema biittaaninne Minaase biittan de7iya goinniyo xoqqa sohotanne yarshshiyo sohota laalidosona. Eti hegeeta ubbaa xaissidoogaappe guyyiyan, Israa7eela asai ubbai bantta katamaa katamaanne bantta soo soo simmi-dosona.

<sup>2</sup> Hizqqiyaasi qeesetanne Leewata eta oosuwaa maaran citan citan shaakkidi es-siis. Eta oosoi xuuggiyo yarshshuwaanne issippetettaa yarshshuwaa GODAAYYO yarshshiyoogaanne Beeta Maqidasiyaa penggiyan GODAA galatiyoogaanne sabbiyoogaa. <sup>3</sup> GODAA higgiiyan xaafettidoogaadan maalladonne omarssi, Sambbatan, ag-inai xeeriyo wodiyaaninne baalaa gallassatun yarshshiyo, xuuggiyo yarshshuwaassi koshshiya meheta kawoi baappe immees.

<sup>4</sup> GODAA higgiiyan xaafettidoogaadan, qeesetinne Leewati GODAA oosuwaa oottana mala, etayyo bessiyaabaa immanaadan Yerusalaamen de7iya asaa kawoi azaziis. <sup>5</sup> Hizqqiyaasi hegaa azazosaarakka, Israa7eela asai kattaappe, woine eessaappe, zaitiyaappe, mattaa eessaappenne goshshan mokkidabaappe xeeraa GODAAYYO darissidi immidosona; banttau de7iya ubbabaappekka asirataa GODAAYYO kessidosona. <sup>6</sup> Yihudaa katamatun de7iya Israa7eela asainne Yihudaa asai booraappenne dorssaappe asirataanne GODAAYYO, bantta Xoossaayyo, dummayi wottidobaa ehi-dosona; ehiidi dooridosona. <sup>7</sup> Eti heezantto aginan doorettaa doommidi, laappunnta aginan polidosona. <sup>8</sup> Hizqqiyaasinne halaqati doorettidaagaa yiidi be7ido wode, eti GODAANNE GODAA asaa Israa7eela galatidosona.

<sup>9</sup> Hegaappe guyyiyan, Hizqqiyaasi dooridi wottido imuwaabaa qeesetanne Leewata oichchiis.

<sup>10</sup> Oichchin Xaadooqa yara gidiya qeese ubbatu halaqai Azaariyaasi Hizqqiyaasa, “Asai bantta imuwaa GODAA Beeta Maqidasiyaa ehiyoogaa doommin, nuuni miidi kallida. GODAI ba asaa anjjido gishshau, hagee keehi daroi attiis” yaagiis.

<sup>11</sup> Hegaappe guyyiyan, Hizqqiyaasi GODAA Beeta Maqidasiyan aibakko minjjiyo kifileta giigissanaadan asaa azaziis; azazin asai giigissiis. <sup>12</sup> Asai imuwaa, bau de7iyaagaappe asirataanne GODAAYYO dummayi wottidobaa ammanetti immidi, he kifileta gelissidosona. Leewee Konaanee eta bolli sunttettiis; a ishai SHim77i a kaallidi sunttettiis. <sup>13</sup> Kawoi Hizqqiyaasinne Xoossaa Beeta Maqidasiyan halaqatiya Azaariyaasi azazin, Yihi7eeli, Azaazee, Nahaati, Asaheeli, Yaarimooti, Yozabaadi, Eli7eeli, Yisimaakee, Mahaatinne Banaayi sunttettidosona; eti Konaaniyaanne a ishaa SHim77a aawatettaappe garssaara oottanau sunttettidosona. <sup>14</sup> Leewiyaa Yim-ina na7ai Qoree, arshsho bagga penggiyaa naagiyaagee, asai Xoossaayyo ba dosan coo ehiido imuwaanne dummayi wottidobaa ekkanaunne shaakki shaakkidi im-manau sunttettiis. <sup>15</sup> Qeeseti de7iyo katamatun gitaappe guutaa gakkanaassi de7iya bantta ishanttuuyo ammanettidi, eta oosuwaadan oosuwaadan shaakki shaakkidi im-manadan Edeni, Miniyaamini, Yaasu, SHamaa7ee, Amaareenne SHakaanee Qoreppe garssaara sunttettidosona. <sup>16</sup> Bantta citan citan bantta oosuwaa gallassi gallassi GODAA Beeta Maqidasiyan oottiyaageetuyyo, laittai hasttamaa gakkidonne hastta-maappe bolla gidido attumaasa ubbaayyo eta gakkiiyaagaa gakkiiyaagaa shaakkidi immidosona. <sup>17</sup> Bantta aawatu keettan keettan qoodetti uttida qeesetuyyookka im-midosona. Qassi laittai laatamaa gakkidonne laatamaappe bolla gidido Leewatuyyo bantta oosuwaadan oosuwaadan bantta citan citan shaaketti qoodettidaageetuyyo eta gakkiiyaagaa shaakkidi immidosona. <sup>18</sup> Qeesetinne Leewati bantta yeletaadan yeletaadan qoodettiyo wode, eti bantta guutta naatuura, bantta maccaasatuura, bantta macca naatuuranne bantta attuma naatuura issippe xaafettidosona; aissi giikko, eti



ammanettidi, bantta huuphiyau geeyidosona. <sup>19</sup> Qassi bantta katamatu yuushuwan de7iya hentta gadetun woikko hara katamatun de7iya Aaroonaa yara gidiiya qeesetuyyo, qeesetu zare gidiiya attuma asatu ubbaayyoonne bantta yeletaadan qoodettida Leewatu ubbaayyo eta gakkiiya qumaa shaakkanau asati sunttettidosona.

<sup>20</sup> Kawoi Hizqqiyaasi GODAA ba Xoossaa sinttan lo77o suurenne tuma gididabaa Yihudaa biittaa ubban oottiis. <sup>21</sup> Hizqqiyaasi GODAA Beeta Maqidasiyaayyo oottido ooso ubban, higgiiyaaninne azazuwan xaafettidoogaadan Xoossaa ba kumetta wozanaappe koyido gishshau, ayyo ubbabai injjetiis.

## 32

### *Asooreti Yerusalaame Olanau Naassidosona*

*(Kawotu Maxaafaa Naa77anttuwaa 18:13-17; 19:14-19,35-37; Isiyaasa 36:1-22; 37:8-38)*

<sup>1</sup> Kawoi Hizqqiyaasi GODAAYYO ammanettidi oottido ha oosuwaappe guyyiyan, Asoore Kawoi Sanaakireebi Yihudaa biittaa bolli woraajjiis; woraajjidi baayyo oiqqanau qoppidi, gimbbetti uttida katamata dooddiis.

<sup>2</sup> Sanaakireebi Yerusalaamen olanau yiidoogaa Hizqqiyaasi be7ido wode, <sup>3</sup> katamaappe kareera goggiya pultto haattaa zeeranau ba oosanchchatanne ba mino asata zoretaa bessiiis; bessin eti a maaddidosona. <sup>4</sup> Hegaa gishshau, eti daro asaa shiishshidi, heгаа heeran de7iya pulttota ubbaanne goggiya shaafaa baridosona. Baridi, “Asoore kawoti yiidi, ai haattanne demmoppona” yaagidosona.

<sup>5</sup> Hegaappe guyyiyan, Hizqqiyaasi minni oottidi, laalettida dirssaa gimbbiyaa ubbaa zaarettidi gimbbiiis; yaatidi a bolli adussa gimbbiyaa gimbbiiis. He dirssaa gimbbiyaappe kare baggaara hara dirssaa gimbbiyaa gimbbiiis; qassi Daawita Kataman de7iya Miillo giyoosaa minttiis. Daro ola miishshaakka gondalliyaakka medhdhiis.

<sup>6</sup> Yaatidi olanchchatu halaqata asaa bolli sunttiis; eta ubbaa katamaa penggiyaa matan de7iya gutaran shiishshidi, <sup>7</sup> “Hayyanintta minnite! Asoore kawuwaara de7iyaagaappe nunaara de7iyaagee aadhdhees. Hegaa gishshau, Asoore kawuwaayyoonne aara de7iya daro olanchchatuyyo yayyoppite! Dagammoppite! <sup>8</sup> Aara asa wolqqi de7ees; shin nunaara GODAI nu Xoossai nuna maaddanaunne nuuyyo olettanau de7ees” yaagidi eta minttettiis. Yihudaa Kawoi Hizqqiyaasi haasayidoban asai minettiis.

<sup>9</sup> Hegaappe guyyiyan, Asoore Kawoi Sanaakireebi ba olanchchatu ubbaara issippe Laakisha katamaa dooddishin, Yihudaa Kawuwaa Hizqqiyaasakonne Yerusalaamen de7iya Yihudaa asaa ubbaakko, oosanchchata kiittiis. <sup>10</sup> Kiittidi, “Asoore Kawoi Sanaakireebi, ‘Inttenoo, ha doodetti uttida Yerusalaame kataman de7iya asatoo, oonan ammanettidetii? <sup>11</sup> Hizqqiyaasi inttena, “Asoore kawuwaa kushiyaappe GODAI nu Xoossai nuna ashshana” yaagees; shin i inttena hegaadan balettiiddi, namisaaninne saamuwan woranau hanees. <sup>12</sup> Xoossaayyo goinniyo xoqqa sohotanne yarshshiyoo sohota diggirggidi, Yihudaanne Yerusalaame asaa, “Intte issi yarshshiyooosaa sinttan goinnite; qassi intte yarshshuwaakka a bolli xuuggite” yaagiyaagee ha Hizqqiyaasa gidennee?

<sup>13</sup> “‘Taaninne ta aawati hara kawotettatu asaa ubbaa bolli oottidobaa intte eribeekketii? He kawotettatu xoossati bantta biittaa ta kushiyaappe ashshanau danddayidonaa? <sup>14</sup> Ta aawati xaissido ha kawotettatu xoossatu ubbaa gidдон ba asaa ta kushiyaappe ashshanau danddayidai oonee? Yaatin, intte Xoossai inttena ta kushiyaappe waati ashshanau danddayii? <sup>15</sup> Hegaa gishshau, ha77ikka, Hizqqiyaasi inttena balettoppo woikko hagaadan cimmooppo. Intte Hizqqiyaasa ammanoppite. Aissi giikko, a asaa ta kushiyaappe woikko ta aawatu kushiyaappe, dere asaa xoossati



woikko kawotettaa xoossati ashshanau danddayibookkona. Yaatin, hegee intte Xoossai inttena ta kushiyaappe ashshanau waani danddayii? yaagees” yaagidosona.

<sup>16</sup> Sanaakireeba oosanchchati GODAA Xoossaa bollinne a ashkkaraa Hizqqiyaasa bolli hara corabaakka haasayidosona. <sup>17</sup> Sanaakireebi qassikka GODAA Israa7eela Xoossaa cayanaunne a bolli haasayanau dabddaabbiyaa xaafiiddi, “Sa7aa bolla de7iya kawotettatu xoossati bantta asaa ta kushiyaappe ashshibeennaagaadan, Hizqqiyaasa Xoossaikka ba asaa ta kushiyaappe ashshenna” yaagidi xaafiis. <sup>18</sup> Sanaakireeba oosanchchati katamaa omooddanau koyidi, dirssaa gimbbiyaa bolli uttida Yerusalaame asaa yashissanaunne daganttanau bantta qaalaa xoqqu oottidi, Ibraawettuwan eta bolli waassidosona. <sup>19</sup> Asaa kushiyan oosettida, ha sa7an de7iya hara asatu xoossatu bolli haasayyoogaadan, Yerusalaame Xoossaa bollikka haasayidosona.

<sup>20</sup> Hegaappe guyyiyan, Kawoi Hizqqiyaasinne Amoxa na7ai, hananabaa yootiya Isiyaasi haggaa gishshau, Xoossaa woossidosona; eti saluwaa pude waassidosona.

<sup>21</sup> Waassin Asoore kawoi dunkkaanidosan de7iya olanchchata ubbata, gadaawatanne halaqata xaissiya kiitanchchaa GODAI kiittiis. Heggaa gishshau, Asoore kawoi kauyyidi, ba biitti simmiis. Simmidi, ba xoossaa keettaa gelido wode, a naati a he sohuwan bisuwan woridosona.

<sup>22</sup> Hegaadan oottidi, GODAI Hizqqiyaasanne Yerusalaamen de7iya asaa Asoore Kawuwaa Sanaakireeba kushiyaappenne hara morkketu ubbatu kushiyaappe ashshiis; ashshidi eta shooro biittatu ubbabaappe eta shemppissiis. <sup>23</sup> Daro asati GODAAYYO imotaa immidosona; Yihudaa Kawuwaa Hizqqiyaasayyookka al77o miishsha ehiidosona. He wodeppe doommidi, kawotetta ubbai Hizqqiyaasa keehippe bonchchiis.

### *Hizqqiyaasa Harggiyaanne A Otoruwaa*

*(Kawotu Maxaafaa Naa77anttuwaa 20:1-3,12-19; Isiyaasa 38:1-3; 39:1-8)*

<sup>24</sup> He wode Hizqqiyaasi harggidi, haiqqana matii; yaatidi GODAA woossiis. Woossin GODAI ayyo woosettiis; woosettidi a pattanau malaataa immiis. <sup>25</sup> SHin Hizqqiyaasi otorettido gishshau, GODAI ayyo kehido kehaassi a galatibeenna. Heggaa gishshau, a bolli, Yihudaa bollinne Yerusalaame bolli GODAA hanqqoi wodhdhiis. <sup>26</sup> Gidikkonne, wurssettan Hizqqiyaasi ba otoruwaa aggidi, Yerusalaame asatuura issippe banatettaa kaushshiis. Heggaa gishshau, Hizqqiyaasa wodiyan GODAA hanqqoi eta bolli wodhdhibeenna.

### *Hizqqiyaasa Duretettaanne Bonchchuwaa*

<sup>27</sup> Hizqqiyaasayyo keehippe daro duretettainne bonchchoi de7ees; Hizqqiyaasi ba birau, worqqau, al77o shuchchau, sawuwau, gondalliyaunne hara al77o miishsha ubbau buquraa minjjiyoosaa keexxiis. <sup>28</sup> Kattaa, woine eessaanne zaitiyaa wottiyo sohotakka keexxiis. Dumma dumma mehee eqqiyo aqotanne dorssaa wudee eqqiyo birddiyaa oottiis. <sup>29</sup> Xoossai ayyo keehi daro aquwaa immido gishshau, baayyo katamata keexxiis; dorssaa wudiyaanne mehiyaa wudiya daruwaa shiishshiis. <sup>30</sup> Ha Hizqqiyaasikka qommo baggaara de7iya Giyoona haattaa pulttuwaa zeeridi, Daawita Katamaayyo arggo baggi zaaridi, haattaa yeddiis. Hizqqiyaasi oottidobai ubbai lo77o polettiis. <sup>31</sup> SHin Yihudaa biittan hanida maalaalissiya malaataabaa oichchanau Baabiloone haariyaageeti kiittido asati Hizqqiyaasakko yiido wode, GODAI a paacanaunne a wozanan de7iyaabaa ubbaa eranau a yeddi bessiiis.

### *Hizqqiyaasa Haiquwaa*

*(Kawotu Maxaafaa Naa77anttuwaa 26:20-21)*

<sup>32</sup> Hizqqiyaasi hanido harabainne GODAAYYO i oottido lo77o oosuwaabai Amoxa Na7aa, Hananabaa Yootiya Isiyaasa Ajjuuataa Maxaafaaninne Yihudaa Kawotunne

Israa7eela Kawotu Taarikiyaa Maxaafan xaafetti uttiis. <sup>33</sup> Hizqqiyaasi haiqqidi, ba maizzan gaittiis; gaittin qommo baggaara de7iya Daawita zerettatu makkaan a moogidosona. I haiqqin, Yihudaa asai ubbainne Yerusalaamen de7iya asai a bonchchidosona. A sohuwan a na7ai Minaasee kawotiis.

### 33

#### *Yihudaa Kawuwaa Minaasa (Kawotu Maxaafaa Naa77anttuwaa 21:1-9)*

<sup>1</sup> Minaasee kawotiyo wode, laittai ayyo tammanne naa77a; i Yerusalaamen ishatamanne ichchashu laitta kawotiis. <sup>2</sup> GODAI Israa7eela asaa sinttaappe laaggidi kessido asatu de7uwaa wogaa, he sheneyiyaagaa qullidi, ikka GODAA sinttan iitabaa oottiis. <sup>3</sup> Minaasee ba aawai Hizqqiyaasi laalido, goinniyo xoqqa sohota zaarettidi keexxiis; Ba7aalayyo yarshshiyo sohotanne Asheero giyo xoosee misileta medhdhiis. Qassi saluwaa xoolinttetu ubbatuyyookka goinniisinne etayyo oottiis. <sup>4</sup> GODAI kase, “Ta sunttai merinau Yerusalaamen de7ana” yaagi wottido GODAA Beeta Maqidasiyan Minaasee hara xoossatuyyo yarshshiyo sohota giigissiis. <sup>5</sup> GODAA Beeta Maqidasiyan de7iya naa77u dabaabatun saluwaa xoolinttetu ubbaayyo yarshshiyo sohota giigissiis. <sup>6</sup> Hinnooma Zanggaaran ba attuma naata taman xuuggidi yarshshiis. I ba huuphenkka bitiyaagaanne gojiyaagaa gididi, shareechchotanne moitilliyaa haasayissiyaageeta zoriyaa oichchiis. GODAA sinttan i daro iitabaa oottidi, a hanqqetissiis.

<sup>7</sup> Hegaappe guyyiyan, ba medhdhido eeqaa misiliyaa Xoossaa Beeta Maqidasiyaa gididon essiis. He Beeta Maqidasee, Xoossai Daawitayyoonne a na7aa Solomonayyo, “Israa7eela zare ubbaa giddoppe taani doorido ha Beeta Maqidasiyaaninne Yerusalaamen taani ta sunttaa merinau xeesissana. <sup>8</sup> Taani Israa7eela asaa azazido azazo ubbaanne Muuse baggaara imettida higgiiyaa, wogaanne pirddaa ubbaa eti naagidi oottikko, taani eta maizza aawatuyyo immido biittaappe eta kottiyaa shodissikke” yaagi wottido Beeta Maqidasiyaa. <sup>9</sup> SHin Minaasee Yihudaa asaanne Yerusalaame asaa balettiis; yaatin, eti GODAI Israa7eela asaa sinttaappe xaissido dere asaagaappe aadhdhiya iitaa oottidosona.

#### *Minaasee Ba Nagaraappe Simmiis*

<sup>10</sup> GODAI Minaaseyyoonne a asaayyo haasayiis; shin eti a haasayaa siyennan ixxidodosona. <sup>11</sup> Hegaa gishshau, GODAI Asoore kawuwaa ola gadaawata eta bolli denttiis; denttin eti Minaase siiriyaa dafuwaa aattidi oiqqidosona; oiqqidi nahaasiyaa sanssalatan qachchidi, Baabiloone biitti efiidosona. <sup>12</sup> Minaasee tuggatido wode, GODAA ba Xoossaa maaduwaa woossiis; ba aawatu Xoossaa sinttan banatettaa keehippe kaushshiis. <sup>13</sup> Minaasee Xoossaa woossido wode, Xoossai ayyo woosettiis; a watwatuwaakka siyiis. Siyidi Yerusalaamen a kawotettan zaaretti wottiis. GODAI Xoossaa gididoogaa Minaasee hegan eriis.

<sup>14</sup> Hegaappe guyyiyan, Minaasee Giyoona Pulttuwaa matan de7iya sohuwaappe doommidi, Ofeela giyo sohuwaara kanttidi biidi, Moliyaa Penggiyaa giyo penggiyaa gakkanaashin, kaseegaappe kare baggaara hara dirssaa gimbbiyaa gimbbiis. He gimbee Daawita Katamaappe arshsho baggaara de7iya zanggaaran de7ees. Yihudaa katamatu ubban ola gadaawata wottiis.

<sup>15</sup> Allaga xoossatanne eeqaa misiliyaa GODAA Beeta Maqidasiyaappe diggiis; GODAA Beeta Maqidasee de7iyo deriyaa bollinne Yerusalaamen i oottido yarshshiyo sohota ubbaa qolidi, he katamaappe kare kessidi oliis. <sup>16</sup> Minaasee qassi GODAAYYO yarshshiyoosaa ooraxissidi, issippetettaa yarshshuwaanne galataa yarshshuwaa an yarshshiis. Yihudaa asaakka GODAASSI Israa7eela Xoossaassi goinnanaadan azaziis. <sup>17</sup> Asai goinniyo xoqqa sohotun yarshshuwaa yarshshiyoogaa aggana xayikkokka, eti yarshshiyoogee GODAA bantta Xoossaa xalaalaassa.

*Minaase Haiquwaa**(Kawotu Maxaafaa Naa77anttuwaa 21:17-18)*

<sup>18</sup> Minaasee hanido harabai, i ba Xoossaa woossido woosainne GODAA Israa7eela Xoossaa sunttan hananabaa yootiyaageeti ayyo yootidobai Israa7eela Kawotu Taarikiyaa Maxaafan xaafetti uttiis. <sup>19</sup> Qassi a woosainne Xoossai ayyo woosettidobai, i oottido nagarainne naaqoi ubbai, Minaasee bana kaushshanaappe kase oottido goinniyo xoqqa sohotinne Asheeri misiletanne ba goinniyo eeqata i essido sohota ubbai Hananabaa Yootiyaageetu Taarikiyaa Maxaafan xaafetti uttidosa. <sup>20</sup> Minaasee haiqqidi, ba maizzan gaittiis; yaatin, Minaasa a kawo keettan moogidosona. A sohuwan a na7ai Amooni kawotiis.

*Yihudaa Kawuwaa Amoon**(Kawotu Maxaafaa Naa77anttuwaa 21:19-26)*

<sup>21</sup> Amooni kawotiyo wode, laittai ayyo laatamanne naa77a; i Yerusalaamen naa77u laitta kawotiis. <sup>22</sup> A aawai Minaasee oottidoogaadan, ikka GODAA sinttan iitabaa oottiis. A aawai Minaasee ootissido misiletu ubbaayyo yarshshiinne etayyo oottiis. <sup>23</sup> SHin a aawai Minaasee banatettaa kaushshidoogaadan, i banatettaa GODAA sinttan kaushshibeenna; Amooni naaquwaa yaa yaa darissiis.

<sup>24</sup> Amooni oosanchchati a bolli maqettidi, a kawo keettan a woridosona. <sup>25</sup> Hegaappe guyyiyan, Yihudaa asati Kawuwaa Amooni bolli maqettida ubbata woridosona. Woridi Amooni sohuwan a na7aa Yoosiyaa kawoyidosona.

**34***Yihudaa Kawuwaa Yoosiyaa**(Kawotu Maxaafaa Naa77anttuwaa 22:1-2)*

<sup>1</sup> Yoosiyaa kawotiyo wode, laittai ayyo hospuna; i Yerusalaamen hasttamanne isiini laitta kawotiis. <sup>2</sup> Yoosiyaa GODAA sinttan suurebaa oottiis; ushachchi haddirssi geennan, ba maizza aawaa Daawita ogiyan hemettiis.

*Yoosiyaa Eeqau Goinniyo Sohota Xaissiis*

<sup>3</sup> I kawotido hospunnta laittan biron yelaga de7iiddi, ba maizza aawaa Daawita Xoossaayyo goinnanau doommiis; qassikka i kawotido tammanne naa77antto laittan Yihudaanne Yerusalaamen de7iya goinniyo xoqqa sohotanne Asheero giyo xoosee misiletanne massi giigissidonne seerissi medhdhido misileta xaissiyoogaa doommiis. <sup>4</sup> I eqqidi azazin, Ba7aalayyo yarshshiyo sohota laalidosona; etappe bollaara de7iya ixaanaa cuwayiyoobata kqanxxertidosona. Asheeri misileta, massi giigissido ee-qatanne seerissi medhdhido misileta kinchcheretti liiqissidi, xiille kessidosona; yaatidi he xiilliyaa etayyo goinniya asatu duufuwan laalidosona. <sup>5</sup> Qassi Yoosiyaa eta qeesetu meqettaa he yarshshiyo sohota bollan xuuggiis; yaatidi Yihudaanne Yerusalaame geeshshiis.

<sup>6</sup> Minaase biittan, Efireema biittaaninne Simooni biittan, biidi Niftaaleema biittaa gakkanaashin de7iya katamatanne moorettida sohota ubbaa hegaadan oottidi geeshshiis. <sup>7</sup> Yoosiyaa yarshshiyo sohota laaliis; Asheeri misiletakka hara eeqaa misiletakka kinchcherettidi liiqissiis. Israa7eela biittan ubban ixaanaa cuwayiyoobata ubbaa qanxxerttiis. Hegaappe guyyiyan, Yoosiyaa Yerusalaame simmiis.

*GODAA Higgiyaa Maxaafai Beettiis**(Kawotu Maxaafaa Naa77anttuwaa 22:3-20)*

<sup>8</sup> Yoosiyaa kawotido tammanne hospunnta laittan, biittaanne Beeta Maqidasiyaa geeshshidoogaappe guyyiyan, GODAA ba Xoossaa Beeta Maqidasiyaa bottokonana mala, Axaaliyaa na7aa Saafaana, Yerusalaame katamaa haariya Ma7iseeyanne Yo7akaaza na7aa, waanna xaafiyaa Yo7aaha kiittiis.

<sup>9</sup> Kiitettidaageeti qeese ubbatu halaqaa Hilqqiyaakko yiidosona. Penggiyaa naagiya Leewati Minaaseppe, Efireemappe, attida Israa7eela asaa ubbaappe, Yihudaappe, Biniyaamappenne Yerusalaamen de7iyaageetuppe kase shiishshidi, Xoossaa Beeta Maqidasiyaa ehiido miishshaa Hilqqiyaayyo immidosona. <sup>10</sup> Hegaappe guyyiyan, eti GODAA Beeta Maqidasiyaa bottokonissiya halaqatuyyo immidosona. Immin eti GODAA Beeta Maqidasiyaa bottokonanaadaaninne wotti yeggidi keexxanaadan oosanchchatuyyo immidosona. <sup>11</sup> Qassi Yihudaa kawoti moorissido Beeta Maqidasiyaa loitissanau he miishshan anaaxetinne gimbbiyaageeti mittaanne shuchchaa shammanaadan immidosona.

<sup>12</sup> Oosuwaa oottiya asati ammanettidaageeta. Eta bolli sunttettida oiddu Leewati, Maraara yaraappe Yahaatanne Obaadiyaanne, Qahaata yaraappe Mashulaamanne Zakkariyaasa. Yettaa miishshaa eriya Leewati ubbai <sup>13</sup> tookkiya asatu bollinne duma duma oosuwaa oottiyaageetu bolli sunttettidosona. Qassi hara Leewati xaafeta, halaqatanne penggiyaa naagiyaageeta gididosona.

<sup>14</sup> Eti GODAA Beeta Maqidasiyaa yiida miishshaa kessiyo wode, qeese Hilqqee GODAI Muuse baggaara immido Higgiyaa Maxaafaa demmiis. <sup>15</sup> Hilqqee waanna xaafiyaa Saafaana, “Taani GODAA Beeta Maqidasiyaappe Higgiyaa Maxaafaa demmaas” yaagiis. Yaagidi he maxaafaa Saafaanayyo immiis.

<sup>16</sup> Immin Saafaani he maxaafaa kawuwaakko ehiidi, “Ne oosanchchati azazettido azazo ubbaa oottoosona. <sup>17</sup> GODAA Beeta Maqidasiyan de7iya miishshaa wurssi ekkidi, bottokonissiya halaqatuyyonne bottokoniya oosanchchatuyyo immidosona” yaagidi yootiis. <sup>18</sup> Qassikka waanna xaafee Saafaani kawuwaa, “Qeese Hilqqee taayyo maxaafaa immiis” yaagiis; yaagidi Saafaani maxaafaa kawuwaa sinttan nabbabiis.

<sup>19</sup> Nabbabin kawoi higgiyaa qaala siyido wode, azzanidi ba maayuwaa pooshshiis. <sup>20</sup> Hegaappe guyyiyan, kawoi Hilqqiyaa, Saafaana na7aa Ahiqaama, Mikaaya na7aa Abdoona, waanna xaafiyaa Saafaananne kawuwaa oosanchchaa Asaaya hagaadan yaagidi azaziis; <sup>21</sup> “Biite; biidi ta gishshaanne Israa7eelaaninne Yihudan attidaageetu gishshaa, ha beettida maxaafaa qaalaabaa ane GODAA oichchite. Aissi giikko, ha maxaafan xaafettida ubbabaa oottanau, nu maizza aawati GODAA qaala naagibeenna gishshau, nu bolli tigettida GODAA hanqqoi keehippe daro” yaagiis.

<sup>22</sup> Yaagin Hilqqeenne kawoi kiittido asati hananabaa yootiya Hulddikko biidosona. Huldda Harihaasa na7aa Tiiqiwa na7a, Beeta Maqidasiyaa maayuwaa naagiya SHaaluuma<sup>4</sup> maccaasiyo. A Yerusalaamen naa77antto shuchchan de7aasu. He biida asati iyyo ha yohuwaa yootidosona.

<sup>23</sup> Yootin Huldda eta, “GODAI Israa7eela Xoossai, ‘Inttena taakko kiittida bitaniyaayyo yootite’ yaagees. <sup>24</sup> GODAI hagaadan yaagees; ‘Be7ite, Yihudaa kawuwaa sinttan nabbabettida maxaafan xaafettida iita qanggettaa ubbaa, ha sohuwaa bollinne ha sohuwan de7iya asaa bolli ehaana hanais. <sup>25</sup> Eti tana aggidi, hara xoossatuyyo ixaanaa cuwayidosona; yaatidi eti bantta kushiyan oottidoban ubban tana hanqqetissidosona. Hegaa gishshau, ta hanqqoi ha sohuwaa bolli tigettana; i mulekka teqetenna’ yaagees.

<sup>26</sup> “GODAA oichchanau inttena kiittida Yihudaa kawuwaa hagaadan yaagite; ‘GODAI Israa7eela Xoossai neeni siyido qaalaabaa hagaadan yaagees; <sup>27</sup> “Ha sohuwaa bollinne ha sohuwan de7iya asaa bolli Xoossai haasayidobaa neeni siyido wode, ne wozanai shuggin, ta sinttan ne huuphiyaa kaushshido gishshaunne ne maayuwaa pooshshada, ta sinttan yeekkido gishshau, taani ne woosaa siyaas. <sup>28</sup> Hegaa gishshau, taani nena ne maizzan gattana; neeni saro mogettana. Taani ha sohuwaa bollinne ha sohuwan de7iya asaa bolli ehaana iitabaa ne aifee be7enna” yaagees’ yaagite” yaagaasu.

Yaagin eti biidi, ha haasayettidabaa kawuwaayyo yootidosona.

<sup>4</sup> **34:22** SHaaluuma: Ibraawettuwan SHaaluumi Hasiraha na7aa Toqaata na7aa geetettiis. Kawotu Maxaafaa Naa77anttuwaa 22:14 xeella.



*Yoosiyaasi GODAASSI Azazettanau Geppiis  
(Kawotu Maxaafaa Naa77anttuwaa 23:1-20)*

<sup>29</sup> Hegaappe guyyiyan, Kawoi Yoosiyaasi kiittidi, Yihudaa cimatanne Yerusalaame cimata ubbaa shiishshiiis. <sup>30</sup> Kawoi GODAA Beeta Maqidasiyaa pude kiyiis; Yihudaa asai ubbai, Yerusalaamen de7iya asai, qeesetinne Leewati, guuttaappe gitaa gakkanaassi de7iya asai ubbai aara issippe pude kiyidosona. Kiyin GODAA Beeta Maqidasiyaappe beettida maachchaa maxaafaa qaalaa ubbaa kawoi eti siyishin nabbabiis. <sup>31</sup> Hegaappe guyyiyan, kawoi ba sohuwan eqqidi, GODAA ogiyan hemettanaunne a higgiiyaa, a wogaanne a azazuwaa ba kumetta wozanaaninne ba kumetta shemppuwan naaganau, qassi ha maxaafan xaafettida maachchaadan oottanau GODAA sinttan geppiis. <sup>32</sup> Yerusalaameeninne Biniyaaman de7iya asata ubbaa he maachchaa naaganaadan gefissiis; gefissin Yerusalaamen de7iya asai Xoossaa, bantta maizza aawatu Xoossaa maachchai giyoogaadan oottidosona.

<sup>33</sup> Yoosiyaasi Israa7eela asau de7iya biittaappe tunabaa ubbaa diggiis. Diggidi yan de7iya ubbati GODAAYYO, bantta Xoossaayyo, oottanaadan oottiis. Yoosiyaasi de7ido laitta ubban, eti GODAA bantta maizza aawatu Xoossaa kaalliyoogaa aggibookkona.

## 35

*Yoosiyaasi Paasikaa Baalaa Bonchchiis  
(Kawotu Maxaafaa Naa77anttuwaa 23:21-23)*

<sup>1</sup> Hegaappe guyyiyan, Yoosiyaasi Yerusalaamen GODAAYYO Paasikaa Baalaa bonchchiis. Koiro aginan tammanne oiddantto gallassi Paasikaa dorssa maraa shukkidosona. <sup>2</sup> Yoosiyaasi qeeseta eta oosuwan oosuwan sunttiis; sunttidi eta GODAA Beeta Maqidasiyaa oosuwan minttettiis. <sup>3</sup> GODAAYYO geeshsha gididi, Israa7eela ubbaa tamarissiya Leewata i hagaadan yaagiis; “Geeshsha Taabootaa Daawita na7ai, Israa7eela Kawoi Solomoni keexissido Beeta Maqidasiyan wottite. Hagaappe sinttan Taabootaa intte hashiyan tookkanau koshshenna. Ha77ikka GODAAYYO, intte Xoossaayyoonne, a asaa Israa7eelayyo oottite. <sup>4</sup> Israa7eela Kawoi Daawitinne a na7ai Solomoni xaafidoogaadan, intte citan citaaninne intte aawatu keettan keettan inttena giigissite.

<sup>5</sup> “Intte Leewati intte dabbota, Israa7eela zaretu yarata maaddana mala, intte yaran yaran shaahettidi, Beeta Maqidasiyaa gididon eqqite; <sup>6</sup> Paasikaa dorssa maratakka shukkite. Intte huuphiyaukka geeyite; GODAI Muuse baggaara haasayido qaalaa eti oottanaadan intte dabbotuyyo dorssa marata giigissite” yaagiis.

<sup>7</sup> Yoosiyaasi Paasikaa yarshshuwau hananaadan he sohuwan de7iya asaayyo hastamamu sha7u dorssa maratanne deeshsha marata immiis; qassi heezzu sha7u korimatakka immiis. Hageeta ubbaa kawoi ba wudiyaappe immiis. <sup>8</sup> Kawoi sunttido halaqatikka asaayyo, qeesetuyyoonne Leewatuyyo banttabaa bantta sheniyan immidosona. Xoossaa Beeta Maqidasiyaa halaqati Hilqqee, Zakkaariyaasinne Yihi7eeli Paasikaa yarshshuwau haniya naa77u sha7anne usuppun xeetu dorssa maratanne deeshsha marata qeesetuyyo immidosona; qassi heezzu xeetu korimatakka immidosona. <sup>9</sup> Leewatu halaqati Konaaneenne a ishantti SHamaa7eenne Nataani7eeli, qassi Hashaabee, Yi7i7eelinne Yozabaadi Paasikaa yarshshuwau haniya ichchashu sha7u dorssa maratanne deeshsha marata Leewatuyyo immidosona; qassi ichchashu xeetu korimatakka immidosona.

<sup>10</sup> Paasikaa Baalaayyo ubbawai giigiis; giigin kawuwaa azazuwaadan qeeseti bantta sohuwan sohuwan, Leewatikka bantta citan citan eqqidosa. <sup>11</sup> Paasikaa dorssa marati shukettiyo wode, Leewati galbaa qaarishin, qeeseti suutaa ekkidi, yarshshiyooosaa bolli caccafidosa. <sup>12</sup> Hegaappe guyyiyan, xuuggiyo yarshshuwaayyo giigida dorssatu ashuwaa Leewati ba keettaa asan asan shaahetti uttida Israa7eela



zaretu yaratuyyo immidosona. Leewati heгаа immidoogee Muuse maxaafan xaafetidoogaadan asai GODAAYYO yarshshanaassa. Eti korimatakka heгаadan oottidosona. <sup>13</sup> Leewati wogai azaziyoogaadan shukettida Paasikaa dorssa maratu ashuwaa taman xiixxidosona; geeshsha yarshshota xaaruwan, otuwaaninne disttiyan doissidosona. Yaatidi ka77idaagaa Israa7eela zaretu yaretu ubbau eesuwan shaakki shaakkidi immidosona.

<sup>14</sup> Hegaappe guyyiyan, Leewati banttayyoonne Aaroonaa zeretta gidiya qeese-tuyyo Paasikaa yarshshuwaa giigissidosona. Aissi giikko, he qeese-tuyyo yarshshuwaanne handdaa yarshshuwaa yarshshiiddi, qammaa gakkanaashin oot-toosona. <sup>15</sup> Daawiti, Asaafi, Hemaaninne kawuwaayyo hananabaa yootiya Yidutuuni kase azazidoogaadan, Asaafa yarati, mazamuriyaa yexxiyaageeti bantta sohuwan de7oosona. Penggiyaa naagiyaageetikka bantta naagiyo penggiyaa penggiyaa naa-goosona. Eta dabboti, Leewati etayyo giigissido gishshau, eti bantta oosuwaa aggi-bookkona.

<sup>16</sup> GODAAYYO oottiyo oosoi ubbai, Paasikaa Baalaa bonchchiyoogeenne xuuggiyo yarshshuwaa GODAAYYO yarshshiyooosaa bolli yarshshiyoogee, Kawoi Yoosiyaasi azazidoogaadan hanidi, he gallassi giigiis. <sup>17</sup> Hegan shiiqida Israa7eela asai he gallassi Paasikaa Baalaa bonchchiis; eti Oittaa Baalaakka laappun gallassi bonchchidosona. <sup>18</sup> Hananabaa yootiya Sameela wodiyaappe doommin, heгаа mala Paasikaa Baalai Israa7eelan bonchchetti erenna. Yoosiyaasi, qeese-tuyyo Leewati, he sohuwan shiiqida Yihudaa asai, Israa7eela asai ubbainne Yerusalaamen de7iya asai bonchchidoogaa mala Paasikaa Baalaa kase Israa7eela kawotuppe bonchchidai issoonne baawa. <sup>19</sup> Ha Paasikaa Baalai Yoosiyaasi kawotido tammanne hospunnta laittan bonchchettiis.

*Yoosiyaasa Kawotaa Wurssettaa  
(Kawotu Maxaafaa Naa77anttuwaa 23:28-30)*

<sup>20</sup> Ha ubbaappe guyyiyan, Yoosiyaasi Beeta Maqidasiyaa giigissido wode, Gibxxe Kawoi Nakoi Efiraaxiisa SHAafaa matan de7iya Karkkamiisha giyo kataman olettanau biis. Biishin Yoosiyaasi a teqqanau kiyiis. <sup>21</sup> SHin Nakoi Yoosiyaasakko asa kiittidi, “Yihudaa kawuwau, tananne nena ooshshiyai aibee? Taani yiidoi ta morkketa olanaas-sappe attin, nena olanaassa gidenna. Ta morkketa taani eesuwan olanaadan Xoossai tana azaziis. Xoossai nena xaissennaadan, tanaara de7iya Xoossaara gaaddetiyoogaa agga” yaagiis.

<sup>22</sup> Gidikkonne, Yoosiyaasi GODAI Nako baggaara odidoogaa siyennaaninne guyye simmennan ixxiis. Ixxidi morkketa bana erenna mala, ba kawotaa maayuwaa laamiis; laammidi Magiddo dembaa olettanau geliis.

<sup>23</sup> Gelin wonddafiyaasati Kawuwaa Yoosiyaasa dukkidi caddidosona. Caddin kawoi ba ashkkaratuyyo, “Taani keehippe cadettaas; tana olaa giddoppe kessite” yaagiis. <sup>24</sup> Yaagin ashkkarati Yoosiyaasa paraa gaariyaappe denttidi, ayyo de7iya naa77antto paraa gaariyan wottidi, a Yerusalaame ehiidosona. Ehin i yan haiqqiis; haiqqidi ba maizza aawatu makkaan moogettiis. Yihudaa asainne Yerusalaame asai ubbai ayyo yeekkiis.

<sup>25</sup> Ermmaasi Yoosiyaasayyo zilaaliyo zilaassaa kessidi xaafiis; xaafin yeeho yeekkiya maccaasatinne attumaasati Yoosiyaasa qoppi qoppidi yeekkiyo wode, ha Ermmaasi kessido zilaassaa zilaaliyoogee Israa7eela biittan woga gidiis. He zilaassai Israa7eelatu Yeehuwaa Zilaassaa Maxaafan xaafetti uttiis.

<sup>26</sup> Yoosiyaasi hanido harabai, GODAA higgiiyan xaafetidoogaadan i oottido lo77o oosuwaabainne <sup>27</sup> koiroppe wurssettaa gakkanaassi i polidobai ubbai Israa7eela Kawotunne Yihudaa Kawotu Taarikiyaa Maxaafan xaafetti uttiis.

## 36

### *Yihudaa Kawuwaa Yo7akaaza (Kawotu Maxaafaa Naa77anttuwaa 23:30-35)*

<sup>1</sup> Hegaappe guyyiyan, he biittaa asai Yoosiyaasa na7aa Yo7akaaza dooridosona; dooridi a aawaa sohuwan Yerusalaamen kawoyidosona. <sup>2</sup> Yo7akaazi kawotiyo wode, laittai ayyo laatamanne heezza; i Yerusalaamen heezzu agina kawotiis. <sup>3</sup> Hegaappe guyyiyan, Gibxxe kawoi Yo7akaaza Yerusalaame kawotettaappe wottiis; wottidi heezzu sha7anne oiddu xeetu kilo giraame deexxiya xaqara biraanne hasttamanne oiddu kilo giraame deexxiya worqqaa Yihudaa asaa giirissiis. <sup>4</sup> Gibxxe kawoi Yo7akaaza ishaa Eliyaaqiima Yihudaa bollinne Yerusalaame bolli kawoyiis; kawoyidi a sunttaa Yo7aqeema yaagidi laammiis. Yaatidi Yo7aqeema ishaa Yo7akaaza Gibxxe efiis.

### *Yihudaa Kawuwaa Yo7aqeema (Kawotu Maxaafaa Naa77anttuwaa 23:36-24:7)*

<sup>5</sup> Yo7aqeemi kawotiyo wode, laittai ayyo laatamanne ichchasha; i Yerusalaamen tammanne isiini laitta kawotiis. GODAA ba Xoossaa sinttan iitabaa oottiis. <sup>6</sup> Baabiloone Kawoi Naabukadanaxoori a olidi, Baabiloone efaanau nahaasiyaa sanssalatan qachchiis. <sup>7</sup> Naabukadanaxoori qassi GODAA Beeta Maqidasiyaappe miishshaa ekkidi, Baabiloone efiidi, ba kawo keettan wottiis.

<sup>8</sup> Yo7aqeemi hanido harabai, i oottido tunabainne i oottido iitabai ubbai Israa7eela Kawotunne Yihudaa Kawotu Taarikiyaa Maxaafan xaafetti uttiis. I haiqqin, a sohuwan a na7ai Yo7aakiini kawotiis.

### *Yihudaa Kawuwaa Yo7aakiina (Kawotu Maxaafaa Naa77anttuwaa 24:8-17)*

<sup>9</sup> Yo7aakiini kawotiyo wode, laittai ayyo hospuna;<sup>5</sup> i Yerusalaamen heezzu aginanne tammu gallassa kawotiis. GODAA sinttan i iitabaa oottiis. <sup>10</sup> Laittai laamettiyo wode Kawoi Naabukadanaxoori asaa kiittidi, Yo7aakiinanne GODAA Beeta Maqidasiyan de7iya al77o miishshata aara issippe Baabiloone ehiissiis. Yaatidi a aawaa ishaa Sedeqiyaasa Yihudaa bollinne Yerusalaame bolli kawoyiis.

### *Yihudaa Kawuwaa Sedeqiyaasa (Kawotu Maxaafaa Naa77anttuwaa 24:18-20; Ermmaasa 52:1-3)*

<sup>11</sup> Sedeqiyaasi kawotiyo wode, laittai ayyo laatamanne isiino; i Yerusalaamen tammanne isiini laitta kawotiis. <sup>12</sup> GODAA ba Xoossaa sinttan i iitabaa oottiis; qassi GODAA sunttan hananabaa yootiya Ermmaasa sinttan bana kaushshibeenna.

### *Yerusalaame Kunddettaa (Kawotu Maxaafaa Naa77anttuwaa 25:1-21; Ermmaasa 52:3-11)*

<sup>13</sup> Sedeqiyaasi ammanettanaadan bana Xoossaa sunttan caaqqetida Naabukadanaxoori bolli makkaliis. GODAAKKO Israa7eela Xoossaakko simmiyoogaa aggidi, ba morggiyaa zozzissiis; ba wozanaakka muumissiis. <sup>14</sup> Qassi Yihudaa asainne eta kaalettiya qeeseti, mulekka ammanettennaageeta gididosona. Eti hara kawotettaa asai oottiyo sheneyiya oosota qullidi, GODAI Yerusalaamen geeshshido a Beeta Maqidasiyaakka tunissidosona.

<sup>15</sup> GODAI, eta maizza aawatu Xoossai ba asaayyoonne ba Beeta Maqidasiyaayyo garettiyo gishshau, ba hananabaa yootiyaageeta etayyo zaari zaaridi kiittiis. <sup>16</sup> SHin GODAA hanqqoi eta bolli wodhdhana gakkanaashiinne etayyo kessi ekkiyoosai xayana gakkanaashin, eti GODAI kiittidoogeetu bolli qilliiccidosona, a qaalaa karidosonanne hananabaa yootiyaageetu bolli miiccidosona.

<sup>5</sup> 36:9 Hospuna: Laittai ayyo hospuna woikko tammanne hospuna. Kawotu Maxaafaa Naa77anttuwaa 24:8 xeella.

<sup>17</sup> Hegaa gishshau, GODAI Baabiloone kawuwaa eta bolli denttidi ehiis. Ehin eta yelaga attuma asaa Beeta Maqidasiyaa gidдон bisuwan woriis; yelaga attumaasatuyyo, woikko geela7otuyyo, woikko cimatuuyyo, woikko ceegatuuyyo qarettennan, Xoossai eta ubbaa Naabukadanaxoora kushiyan aattidi immiis. <sup>18</sup> Baabiloone kawoi Xoossaa Beeta Maqidasiyan de7iya miishshata ubbaa, gitaanne guuttaa, GODAA Beeta Maqidasiyan de7iya buquraa, kawuwaa buquraanne a oosanchchatu buquraa ubbaa ekkidi, Baabiloone efiis. <sup>19</sup> Hegaappe guyyiyan, Baabiloone olanchchatu Xoossaa Beeta Maqidasiyaa taman xuuggidi, Yerusalaame dirssaa gimbbiyaakka laalidosona. Kawo keettata ubbaa taman xuuggidi, yan de7iya al77o miishsha ubbaa xaissidosona.

<sup>20</sup> Xaissin kawoi bisuwaappe palahidi attidaageeta omooddidi Baabiloone efiis. Parsse kawotettaa wolqqaamana gakkanaassi, eti ayyoonne a naatuyyo ashkkara gididosona. <sup>21</sup> Hegan GODAI hananabaa yootiya Ermmaasa baggaara odido qalalai polettiis. Wurssettan biittai laappun tammu laitta kumettaa asi baina soho gididi shemppiis; hegeenne, laappunna laappunna laittaa Sambbata oottidi, biittaa shemppissiyoogaa asai aggido gishshaassa.

<sup>22</sup> Parsse Kawoi Qiirsoosi kawotido koiro laittan, hananabaa yootiya Ermmaasa baggaara GODAI haasayidobaa poliis. Parsse Kawoi Qiirsoosi ba kawotettaa gidдон ubbasan hagaadan yaagidi awaajjanaadaaninne xaafidi wottanaadan GODAI a ayyaanaa denttettiis; <sup>23</sup> “Parsse Kawoi Qiirsoosi hagaadan yaagees; ‘GODAI, saluwaa Xoossai ha sa7aa kawotettata ubbaa taayyo immiis; qassi Yihudan de7iya Yerusalaamen taani ayyo Beeta Maqidasiyaa keexxanaadan tana sunttiis. Xoossaa asaa gidida ooninne yaa bo. GODAI a Xoossai aara gido!’ yaagees” yaagiis.

## Izira Maxaafaa

### *Gidduwaa Erissuwaa*

Izira Maxaafai Hanidabaa Odiya naa77u maxaafata kaalliyaagaa. Ha maxaafai Aihudatuppe omoodettidi biida amarida asati Baabilooneppe simmidoogaanne Yerusalaamen asaassi de7oikka goinoikka ooraxxidoogaa odees. Ha hanotati hagaappe kaallidi xaafettidosona.

1. Omooduwan biida Aihudatuppe Parsse Kawuwaa Qiirroosa sheniyani koiro simmiyaageeti Baabilooneppe simmidosona.
2. Beeta Maqidasee wotti yegetti keexettidi anjettiis. Xoossaassi goinniyoogeeikka wotti yegettidi doomettiis.
3. Issi amarida wodiyaappe simmin, Xoossaa higgiiyaa loittidi eriya Iziri kaalettin, hara Aihudati Yerusalaame simmidosona. Iziri Israa7eela asaa ayyaanaa de7uwaa kase sohuwaa zaaranau, asai ayyaanaa de7uwaanne issippetettaa de7uwaa wotti yeggidi minttanaadan maaddiis.

### *Aihuda Asai Bantta Biittau Simmana Mala Qiirroosi Awaajjiis*

<sup>1</sup> Parsse Kawoi Qiirroosi kawotido koiro laittan, hananabaa yootiya Ermmaasa baggaara GODAI haasayidobaa poliis. Parsse Kawoi Qiirroosi ba kawotettaa gidдон ubbasan hagaadan yaagidi awaajjanaadaaninne xaafidi wottanaadan GODAI a ayyaanaa denttettiis; <sup>2</sup> “Parsse Kawoi Qiirroosi hagaadan yaagees; ‘GODAI, saluwaa Xoossai ha sa7aa kawotettata ubbaa taayyo immiis; qassi Yihudan de7iya Yerusalaamen taani ayyo Beeta Maqidasiyaa keexxanaadan tana sunttiis. <sup>3</sup> Xoossaa asa gidida ooninne yaa bo. A Xoossai aara gido! Intte Yihudan de7iya Yerusalaame biidi, yan Yerusalaamen de7iya GODAA, Israa7eela Xoossaa Beeta Maqidasiyaa zaarettidi keexxite. <sup>4</sup> Dumma dumma biittan de7iya asai ubbai Aihudatuppe attidaageetuyyo biraa, worqqa, dumma dumma miishshatanne mehiyaa immidi maaddona; qassi Yerusalaamen de7iya Xoossaa Beeta Maqidasiyaassikka bantta dosan immiyo imotaa immona’ yaagiis” yaagees.

<sup>5</sup> Hegaappe guyyiyan, Yihudaa zaretunne Biniyaama zaretu halaqati, qeesetinne Leewati, qassi Xoossai eta wozanaa denttettido ubbati Yerusalaamen GODAA Beeta Maqidasiyaa keexxanau baanau denddidosona. <sup>6</sup> Qassi eta shooron de7iyaageetikka bantta dosan immidobaa bolli gujjidi, bira miishshaanne worqqa miishshaa, hara dumma dumma miishshatanne mehiyaa immidi, eta maaddidosona. <sup>7</sup> Hega bollikka qassi Kawoi Qiirroosi Naabukadanaxoori Yerusalaameppe efidi ba xoossatu keettan wottido GODAA Beeta Maqidasiyaa miishshata immiis. <sup>8</sup> Immin Parsse Kawoi Qiirroosi miishshata wottiyo keettaa halaqaa Mitiredaatan kesissidinne goodissidi, Yihudaa haariya SHeshibaaxaara kushiyan sheedhdhiis. <sup>9</sup> Simmida miishshatu goodai haggaa: hasttamu worqqa saineta, issi sha7u bira saineta, laatamanne uddufun billamata, <sup>10</sup> worqqaappe oosettida hasttamu miishshata, biraappe oosettida oiddu xeetanne tammu miishshatanne issi sha7u hara dumma dumma miishshata. <sup>11</sup> Worqqa miishshatunne bira miishshatu goodai muleera ichchashu sha7anne oiddu xeeta; ha miishshata ubbaa omooduwan biida asai Baabilooneppe Yerusalaame simmiyo wode SHeshibaaxaari ekki yiis.

## 2

*Omooduwaappe Simmida Israa7eela Asaa Qoodaa  
(Nahimiyya 7:4-73)*

<sup>1</sup> Baabiloone Kawoi Naabukadanaxoori omooddidi, ba biitti efido asaappe guyye bantta katamaa katamaa, Yerusalaammenne Yihudaa simmida asati hagaappe kaalliyaageeta. <sup>2</sup> Eta halaqati Zarubaabeela, Yaasa, Nahimiyaa, Saraaya, Ra7eelaaya, Marddikiyoosa, Bilishaana, Misppaara, Bigiwaaya, Rehumanne Ba7aana.

Omooduwaappe simmida Israa7eela asaa qoodai hгаа.

<sup>3</sup> Par77oosha yarati 2,172.

<sup>4</sup> SHafaaxiyaa yarati 372.

<sup>5</sup> Araaha yarati 775.

<sup>6</sup> Yaasunne Yoo7aaba naata gidiya Paahati-Moo7aaba yarati 2,812.

<sup>7</sup> Elaama yarati 1,254.

<sup>8</sup> Zattu yarati 945.

<sup>9</sup> Zakkaaya yarati 760.

<sup>10</sup> Baana yarati 642.

<sup>11</sup> Bebaaya yarati 623.

<sup>12</sup> Azggaada yarati 1,222.

<sup>13</sup> Adooniqaama yarati 666.

<sup>14</sup> Bigiwaaya yarati 2,056.

<sup>15</sup> Adiina yarati 454.

<sup>16</sup> Hizqqiyaasa yara gidiya Axeera yarati 98.

<sup>17</sup> Bexaaya yarati 323.

<sup>18</sup> Yoora yarati 112.

<sup>19</sup> Hashuuma yarati 223.

<sup>20</sup> Gibbaara yarati 95.

<sup>21</sup> Beetaliheeme asai 123.

<sup>22</sup> Naxoofa katamaa asai 56.

<sup>23</sup> Anatoota katamaa asai 128.

<sup>24</sup> Azimaaweeta katamaa asai 42.

<sup>25</sup> Qiriyaati-Yi7aariima, Kafiiranne Ba7eroota katamatu asai 743.

<sup>26</sup> Raamanne Gebaa7a katamatu asai 621.

<sup>27</sup> Mikimaasa katamaa asai 122.

<sup>28</sup> Beeteelenne Aaya katamatu asai 223.

<sup>29</sup> Nabo katamaa asai 52.

<sup>30</sup> Maagibiisha katamaa asai 156.

<sup>31</sup> Naa77antto Elaama katamaa asai 1,254.

<sup>32</sup> Hariima katamaa asai 320.

<sup>33</sup> Looda, Hadiidanne Oono katamatu asai 725.

<sup>34</sup> Yarkko katamaa asai 345.

<sup>35</sup> Sanaa7a katamaa asai 3,630.

<sup>36</sup> Hageeti omooduwaappe simmida qeeseta:

Yaasu yara gidiya Yadaaya yarati 973;

<sup>37</sup> Imeera yarati 1,052;

<sup>38</sup> Paashihuura yarati 1,247;

<sup>39</sup> Hariima yarati 1,017.

<sup>40</sup> Hageeti omooduwaappe simmida Leewata:

Hodaawiyaa yara gidiya Yaasunne Qaadimi7eela yarati 74;

<sup>41</sup> Asaafa yara gidiya mazamuriyaa yexxiyaageeti 128;

<sup>42</sup> Beeta Maqidasiyaa penggiyaa naagiya SHaaluuma, Axeera, Xalmmoona, Aqquuba,

Haxiixanne SHobaaya yarati 139.

<sup>43</sup> Hageeti omooduwaappe simmida, Beeta Maqidasiyan oottiya ashkkaratu yarata:

Xiiha yarata, Hasuufa yarata, Xabba7oota yarata, <sup>44</sup> Qeeroosa yarata, Si7aaha yarata,

Padoona yarata, <sup>45</sup> Labaana yarata, Hagaaba yarata, Aqquuba yarata, <sup>46</sup> Hagaaba



yarata, SHamilaaya yarata, Hanaana yarata, <sup>47</sup> Giddeela yarata, Gahaara yarata, Ra7aaya yarata, <sup>48</sup> Raaxiina yarata, Naqoda yarata, Gazzaama yarata, <sup>49</sup> Uzza yarata, Paaseeha yarata, Besaaya yarata, <sup>50</sup> Asina yarata, Me7uniima yarata, Nafisiima yarata, <sup>51</sup> Baaqibuuqa yarata, Haquufa yarata, Harihuura yarata, <sup>52</sup> Baaxiluuta yarata, Mahiida yarata, Harshsha yarata, <sup>53</sup> Barqqoosa yarata, Sisaara yarata, Temaaha yarata, <sup>54</sup> Naxiiha yaratanne Haxiifa yarata.

<sup>55</sup> Hageeti omooduwaappe simmida Solomona ashkkaratu yarata: Soxaaya yarata, Hassofereeta yarata, Paruuda yarata, <sup>56</sup> Yaa7ila yarata, Darqqoona yarata, Giddeela yarata, <sup>57</sup> SHafaaxiyaa yarata, Haxxiila yarata, Pokereti-Haxxabaima yaratanne Aama yarata. <sup>58</sup> Omooduwaappe simmidi, Beeta Maqidasiyan oottiya ashkkaratu yaratanne Solomona ashkkaratu yaratu qoodai muleera heezzu xeetanne uddufun tammanne naa77a.

<sup>59</sup> Haratikka qassi Telmmelaaha, Teliharshsha, Karuuba, Adaananne Imeera giyo katamatuppe Yerusalaame simmidosona. SHin eti woikko eta aawati Israa7eela sheeshsha gidiyooqaa erissanau eti danddayibookkona. <sup>60</sup> Hegeeti Dalaaya, Xoobbiyaanne Naqoda yarata; eta qoodaikka muleera usuppun xeetanne ishatamanne naa77a.

<sup>61</sup> Qeesetuppe qassi Habaaya yarati, Haqqooxa yaratinne Barzzillaaya yarati simmidosona. Hagee Barzzillaaya giyoogee Gala7aade biitta asa gidiya Barzzillaaya na7iyo machchidi, ba bolluwaa sunntaa ekkiis. <sup>62</sup> Hageeti bantta yeleta xaphuwaa eranau yeletaa maxaafan koyidosona, shin demmibookkona. Hegaa gishshau, eti tunadan qoodettidi, qeesetettan oottennaadan digettidosona. <sup>63</sup> Qassi Uriimiyaaninne Tumiimiyaa shaakkidi pirddiya qeesee denddana gakkanaashin, eti geeshsha qumaappe maanau danddayennaagaa Aihudata haariyaagee etau yootiis.

<sup>64</sup> Omooduwaappe Yihudaa biittaa simmida asaa qoodai muleera 42,360. <sup>65</sup> Hegaa bolliikka qassi 7,337 attuma ashkkaratinne macca ashkkaratinne 200 attumanne macca mazamuriyaa yexxiyaageetikka simmidosona. <sup>66</sup> Omooduwaappe muleera simmida asaa paratu qoodai 736; baquloti 245; <sup>67</sup> gaameelati 435; haretii qassi 6,720.

<sup>68</sup> Eti Yerusalaamen kase GODAA Beeta Maqidasee de7iyo sohuwaa gakkido wode, yaratu halaqatuppe amaridaageeti GODAA Beeta Maqidasee kase ba sohuwan keexettana mala, bantta dosan imotaa immidosona. <sup>69</sup> Issoi issoi bau danddayiyoogaa keenaa keenaa ha Beeta Maqidasiyaa oosuwaassi immiis; eti muleera 500 kilo giraame deexxiya worqqaa, 2,800 kilo giraame deexxiya biraanne 100 qeesetu maayuwaa immidosona.

<sup>70</sup> Hegaappe guyyiyan qeeseti, Leewatinne asaappe amaridaageeti Yerusalaamen uttidosona; mazamuriyaa yexxiyaageeti, Beeta Maqidasiyaa penggiyaa naagiyaageetinne Beeta Maqidasiyan oottiya ashkkarati Yerusalaame yuushuwan de7iyya katamatun uttidosona; qassi attida asati ubbai bantta katamatun katamatun uttidosona.

### 3

#### *Kase Eti Goinniyo Wogaa Zaaretti Doommidosona*

<sup>1</sup> Israa7eela asai bantta kataman kataman woppu giidi uttidosona. Hegaappe guyyiyan, laappuntta aginai gakkiiyo wode, eti ubbai issi asadan Yerusalaamen shiiqidodosona. <sup>2</sup> SHiiqin Yoxedeeqa na7aa Yaasunne aara oottiya qeeseti qassi Salaatiyaala na7aa Zarubaabeelinne a dabboti Xoossaa asaa Muuse higgiiyan kase xaafetti-doogaadan xuuggiiyo yarshshuwaa yarshshanau, Israa7eela Xoossaayyo yarshshiyooosaa giigissidosona. <sup>3</sup> Eti he biittan de7iyya asau yayyikkonne, aggennan yarshshuwaa yarshshiyooosaa kase i kolettido man77iyan zaarettidi keexxidosona. Keexxi giigis-sidi, xuuggiiyo yarshshuwaa GODAASSI maalladonne omarssi ubba wode yarshshidosona. <sup>4</sup> Kase xaafetti-doogaadankka eti Daase Baalaa bonchchidosona; xuuggiiyo

yarshshuwaakka hachchissi hachchissi bessiyaagaa qoodaa pacissennan yarshshidosona. <sup>5</sup> Qassi ubba wode yarshshiyoo xuuggiyo yarshshuwaa, aginai xeeriyo wode yarshshiyoo yarshshuwaanne GODAA geeshsha baalatun yarshshiyoo yarshsho ubbaakka yarshshidosona. Hegaa bollikka asai ba dosan GODAASSI immido imota ubbaakka yarshshidosona. <sup>6</sup> Laappunnta aginan koiro gallassan eti GODAAYYO xuuggiyo yarshshuwaa yarshshiyoo doommidosona; shin he wode GODAA Beeta Maqidasiyaa keexxiyo baasoi biron baasettiichchibeenna.

#### *Beeta Maqidasiyaa Zaaretti Keexxiyoogaa Doommidosona*

<sup>7</sup> Hegaappe guyyiyan, shuchchaa massiyaageetussinne anaaxetussi miishshaa qanxxidi qaxaridosona. Parsse Kawoi Qiirroosi etau azazido gishshau, Liibaanoosappe zigaa abbaa pinttidi, Yoophphe ehaanau Sidoonanne Xiirroosa biittaa asau qumaa, ushshaanne zaitiyaa immidosona.

<sup>8</sup> Hegaappe guyyiyan, eti Yerusalaamen de7iya GODAA Beeta Maqidasee de7iyo sohuwaa gakkido naa77antto laittan naa77antto aginan, Salaatiyaala na7ai Zarubaabeeli, Yoxedeeqa na7aa Yaasunne eta dabboti, qeeseti, Leewatinne omooduwaappe simmidi, Yerusalaame yiida asai ubbai oosuwaa doommidosona. Qassi GODAA Beeta Maqidasiyaa oosuwaa aawatettan xeellana mala, laatamu laitta gididoogeeanne laatamu laittappe aadhdhido Leewata sunttidosona. <sup>9</sup> Leewa zare gidiya Yaasu, a naatinne a dabboti, Hodaawiyaa yara gidiya Qaadimi7eelinne a naati issippe gididi, GODAA Beeta Maqidasiyaa oosuwaa aawatettan xeellidosona; qassi Henadaada yara gidiya Leewatikka eta maaddidosona.

<sup>10</sup> Anaaxeti GODAA Beeta Maqidasiyaa keexxanau baasuwa baasidi wurssido wode, qeeseti bantta maayuwaa maayidinne xurumbbaa oiqqidi, qassi Asaafa yara gidiya, Leewatikka, daalaa oiqqidi, Israa7eela Kawuwaa Daawita wogaadan GODAA galatanau eqqidosa. <sup>11</sup> Eti GODAA galatiiddinne kayan kayan mazamuriyan sabbiiddi, hagaadan yaagidi, au yexxidosona; “GODAI keha;

i Israa7eela siiqiyo aggenna siiqoi merinaagaa” yaagidosona.

Qassi GODAA Beeta Maqidasiyaa baasoi baasettido gishshau, asai ubbai bantta qaalaa xoqqu oottidi hobbociiddi, GODAA galatidosona. <sup>12</sup> SHin kase Beeta Maqidasiyaa be7ida cima qeesetuppe, Leewatuppenne zaretu halaqatuppe daroti ha77i Beeta Maqidasiyaa keexxanau baasettida baasuwa be7ido wode, bantta qaalaa xoqqu oottidi yeekkidosa; harati mati ufaittidi hobbocidosona. <sup>13</sup> Hegaa gishshau, ufaittidi hobbociyaagaa yeekkiyaagaappe shaakkidi eranau danddayettibeenna. Aissi giikko, eti keehippe wocamiyo gishshau, eta wocamaikka haahosan siyettees.

## 4

#### *Beeta Maqidasiyaa Zaaridi Keexxenna Mala Digganau Denddaageeta*

<sup>1</sup> Omooduwaappe simmida asati GODAASSI, Israa7eela Xoossaassi Beeta Maqidasiyaa keexxiyoogaa Yihudaanne Biniyaama morkketi siyidosona. <sup>2</sup> Siyidi, Zarubaabeelakkonne zaretu halaqatukko yiidi, hagaadan yaagidosona; “Asoore Kawoi Asiraadooni<sup>1</sup> nuna ha sohuwau ehiido gallasaappe doommidi, nuunikka intte Xoossaayyo yarshshoosinne ayyo goinnoos. Hegaa gishshau, nuunikka inttenaara issippe ane keexxoos” yaagidosona.

<sup>3</sup> SHin Zarubaabeeli, Yaasunne Israa7eela zaretu halaqati etayyo zaaridi, hagaadan yaagidosona; “Nu Xoossaassi Beeta Maqidasiyaa keexxanau nuuyyoonne intteyyo aiba issippetettinne baawa. SHin Parsse Kawoi Qiirroosi azazidoogaadan, nu xalaalal GODAASSI Israa7eela Xoossaassi Beeta Maqidasiyaa keexxana” yaagidosona.

<sup>1</sup> 4:2 Asiraadooni: Ibraawettuwan “Esar-Haddon” geetteetes. Kawotu Maxaafaa Naa77anttuwaa 19:37 xeella.

<sup>4</sup> Hegaappe guyyiyan, Yihudaa biittaa asati Beeta Maqidasiyaa keexxennaadan, he biittan de7iya asati hashiyaa sho7idosonanne yashissidosona. <sup>5</sup> Qassi Parsse Kawuwaa Qiirsoosa laittai wuranaashiinne appe simmin Daariyoosi<sup>2</sup> Parssen kawotido wodee gakkanaashin, eti Yihudaa asatu zoretaa laalanau zorettiyaageeta miishshan qaxaridosona.

*Yerusalaamee Naa77anttuwaa Keexetennaadan Digettiis*

<sup>6</sup> Hegaappe guyyiyan, Arxxekssiisi kawotaa doommioorin, eti Yihudaanne Yerusalaame asaa mootanau pailiyaa dooyidosona.

<sup>7</sup> Qassi simmidi, Arxxekssiisi kawotiiddi de7ishin, Bishilaami, Mitiredaati, Xaabi7eelinne eta yarati issippe gididi, Parsse Kawuwaa Arxxekssiisau dabddaabbiyaa xaafidosona; he dabddaabbee Sooriyaa biittaa pitaliyaanne qaalan xaafettiis.

<sup>8</sup> Biittaa haariya Rehuuminne xaafiyaa SHimshshaayi Yerusalaamebaa hagaadan yaagidi, Kawuwaa Arxxekssiisau dabddaabbiyaa xaafidosona; <sup>9</sup> “Ha dabddaabbee biittaa haariya Rehuumappe, xaafiyaa SHimshshaayappe, beni Elaama biittan de7iya Suusappe, Ereekappenne Baabilooneppe yiida pirddiyaanne daannatiyaa eta yaratuppenne <sup>10</sup> gitanne bonchchettida Kawuwaa Asanaafari<sup>3</sup> omooddi ehiidi, Samaariyaanne Efraaxiisa SHAafaappe Arggo Bagga Biittan wottido asa ubbaappe xaafettiis” yaagidosona.

<sup>11</sup> Eti ayyo kiittido dabddaabbee hagaadan yaagees; “Kawuwaa Arxxekssiisau, Efraaxiisa SHAafaappe Arggo Bagga Biittan de7iya ne ashkkaratuppe:

<sup>12</sup> “Kawuwau, ne matappe haa nuukko yiida Aihudati Yerusalaame biidi, he makkalanchchanne iita katamaa zaaridi keexxiiddi de7iyooгаа era. A gimbbiyaa ooraxissoosona; a xaphuwaakka bottokonoosona. <sup>13</sup> Qassi kawuwau, ha katamai keexettiyaabaa gidikkonne a gimbbiyaakka ooraxissiyaabaa gidikko, hegaappe guyyiyan, eti giiraanne qaraxaa qanxxennaagaa era. Hegaappe denddidaagan kawo keettawo geliya miishshai paca gidana. <sup>14</sup> Nuuni kawoi sunttin oottiyaageeta gidiyo gishshaunne kawoi kauyyishin be7anau koyenna gishshau, haggaa neeni erana mala giidi kiittoos. <sup>15</sup> Heggaa gishshau, kase ne aawatu taarikiyaa maxaafai koyettidi xeeletto; hegan xaafettidabaappe neeni ha katamai beniisappekka doommidi, makkalanchcha katama gidiyoogaanne kawotussinne biittatussi metuwaa medhdhidaagaa gidiyoogaa eranau danddayaasa. Hegaappe denddidaagan i kolettiis. <sup>16</sup> Heggaa gishshau, ha katamai keexettiyaabaa gidikkonne a gimbbiyaakka ooraxissiyaabaa gidikko, Efraaxiisa SHAafaappe Arggo Bagga Biittai ne kushiyaappe kiyidoogaa era” yaagidosona.

<sup>17</sup> Kawoi hagaadan yaagiya zaaruwaa etayyo yeddiis; “Biittaa haariya Rehuumaa, xaafiyaa SHimshshaayaa, Samaariyaanne Efraaxiisa SHAafaappe Arggo Bagga Biittan de7iya eta yara gidiya asa ubbau, inttena saro gais. <sup>18</sup> Intte taayyo yeddido dabddaabbee birshshettidi nabbabettiis. <sup>19</sup> Taani azazin, kase taarikee koyettidi xeelettiis; xeelettiyo wode, ha katamai beniisappekka doommidi, kawotussi makkalanchcha gidiyoogeenne metuwaa medhdhiyaageeti de7iyoo soho gidiyoogee erettiis. <sup>20</sup> Yerusalaamen wolqqaama kawoti kawotidosona; Efraaxiisa SHAafaappe Arggo Bagga Biittaappekka he kawoti giiraanne qaraxaa ekkidosona. <sup>21</sup> Heggaa gishshau, taani etayyo oottite giyo azazuwaa immana gakkanaashin, ha asati he katamaa keexxiyoogaa essana mala odite. <sup>22</sup> Intte ha yohuwaa shenehoo geennaadan naagettite. Aissi giikko, kawotuyyo metuwaa darissanau koshshenna” yaagidi kiittiis.

<sup>2</sup> 4:5 Daariyoosi: Daariyoosa taarikee paiduwaa 24ppe doommidi xaafettiis. Paiduwaa 6-23 gakkanaa xaafettida taarikee Beeta Maqidasee keexettoosappe issi xeetu laitta gidiyaagaa gam77in hanidabaa. <sup>3</sup> 4:10 Asanaafari: Ibraawettuwan “Osnappar” geetteetes. Ha kawoi qassi “Assurbanipal” geetteetes.

<sup>23</sup> Kawuwaa Arxxekssiisa dabddaabbee Rehuumassi, xaafiyaa SHimshshaayassinne eta yara gididiya ubbatussi nabbabettido wode, Yerusalaamen de7iya Aihuda asatukko eesotiiddi biidi, eti keexxiyoogaa wolqqan teqqidosona.

<sup>24</sup> Teqqin Yerusalaamen de7iya Xoossaa Beeta Maqidasiyaa oosoi Daariyoosi kawotido naa77antto laittai gakkanaashin, eqqosan atti aggiis.

## 5

### *Beeta Maqidasiyaa Oosoi Naa77anttuwaa Doomettiis*

<sup>1</sup> He wodiyan hananabaa yootiya Haggeenne Iddo na7ai Zakkaariyaasi Yihudaaninne Yerusalaamen de7iya Aihuda asatuyyo Israa7eela Xoossaa sunttan hananabaa yootidosona. <sup>2</sup> Salaatiyaala na7ai Zarubaabeelinne Yoxedeeqa na7ai Yaasu denddidi, Yerusalaamen de7iya GODAA Beeta Maqidasiyaa zaarettidi keexxanau doommidosona. Hananabaa yootiyaageetikka etaara issippe gididi, eta maaddidosona.

<sup>3</sup> He wode, Efiraaxiisa SHaafaappe Arggo Bagga Biittaa haariya Tattanaaya giyoogee, SHatarbbozina giyoogeenne etaara oottiyaageeti yiidi, “Intte ha Beeta Maqidasiyaa keexxana malanne polana mala, intteyyo oonee odidai?” yaagidi oichchidosona. <sup>4</sup> Eti qassi, “Ha Beeta Maqidasiyaa keexxiya asatu sunttai oonee oonee?” yaagidikka oichchidosona. <sup>5</sup> SHin he yohoi Daariyoosakko gakkina, a matappe dabddaabbee xaafettidi yaana gakkanaashin, eti bantta oosuwaa aggibookkona; aissi giikko, eta Xoossaa aifee Yihudaa biittaa cimatu bollan de7ees.

<sup>6</sup> Efiraaxiisa SHaafaappe Arggo Bagga Biittaa haariya Tattanaayi, SHatarbbozininne etaara oottiyaageeti Kawuwaa Daariyoosayyo kiittido dabddaabbee <sup>7</sup> hagaadan yaagees;

“Kawuwaa Daariyoosaa, kumetta sarotettai neeyyo gido!

<sup>8</sup> “Nuuni Yihudaa biittan de7iya gita Xoossaa Beeta Maqidasiyaakko biida. He Beeta Maqidasee gita shuchchan keexettiis; qassi gimbbiyaa bollankka mittai wodhdhiis. Osoikka gita akeekaaninne eesuwan oosettiiddi de7ees.

<sup>9</sup> “Eta kaalettiya cimata nuuni hagaadan yaagidi oichchida; ‘Ha Beeta Maqidasiyaa keexxana malanne polana mala, intteyyo oonee odidai?’ yaagidi oichchida. <sup>10</sup> Qassi neeyyo xaafidi erissana mala, eta ha oosuwan kaalettiyaageetu sunttaikka oonakko oichchida.

<sup>11</sup> “Oichchin, eti hagaadan yaagidi zaaridosona; ‘Nuuni saluwaanne sa7aa Xoossaa ashkharata; qassi nuuni Israa7eela kawuwaa gitai daro laittaappe kase baggan keexxi polido Beeta Maqidasiyaa zaaretti keexxeettes. <sup>12</sup> Nu aawati saluwaa Xoossaa hanqqetissido gishshau, i eta Baabiloone Kawuwaa Naabukadanaxoora kushiyan aatti immiis. Immin, i ha Beeta Maqidasiyaa koli aggiis; asaakka Baabiloone biitti omooduwau ekkidi biis.

<sup>13</sup> “SHin Baabiloone Kawoi Qiirroosi ba kawotido koiro laittan, Xoossaa Beeta Maqidasiyaa, haggaa zaaretti keexxana mala, awaajuwaa kessiis. <sup>14</sup> Naabukadanaxoori Yerusalaamen de7iya Xoossaa Beeta Maqidasiyaappe ekki efidi, Baabiloone biittan de7iya ba xoossatu keettan wottido worqqanne bira miishshatakka Qiirroosi zaaridi yeddiis.

“He miishshati Kawoi Qiirroosi Yihudaa biittaa haarana mala doorido SHeshibaaxaara kushiyan sheerettidosona. <sup>15</sup> SHEedhdhiiddi Kawoi Qiirroosi a hagaadan yaagiis; “Ha miishshata ekka efaada Yerusalaamen de7iya Beeta Maqidasiyan wotta; qassi Xoossaa Beeta Maqidasiyaakka kase i de7iyo sohuwan keexxa” yaagiis. <sup>16</sup> Hegaappe guyyiyan, SHeshibaaxaari yiidi, Xoossaa Beeta Maqidasiyaa keexxiyo sohuwaa Yerusalaamen baasiis. I ha77ikka wuribeennaagaa gidikkonne, he wodeesappekka doommidi, keexettiiddi de7ees’ yaagidosona.

<sup>17</sup> “Ha77i simmi ha yohoi kawuwaa ufaissiyaabaa gidikko, ane Kawoi Qiirroosi ha Beeta Maqidasiyaa Yerusalaamen keexxana mala, tumukka awaajuwaa kessidaakko



eranau kase aadhdhida Baabiloone kawotu taarikiyaa mazggafai koyettidi xeeletto. Hegaappe guyyiyan, kawoi nuuni ha yohuwaa waatanau bessiyaakko qachchido qofaa nuuyyo kiitto” yaagidi xaafidosona.

## 6

### *Qiiroosi Kase Azazido Azazoi Koyettidi Beettiis*

<sup>1</sup> Hega gishshau, Kawoi Daariyoosi azazin, Baabiloone miishshata wottiyo keettan de7iya taarikiyaa mazggafata eti koyidosona. <sup>2</sup> SHin Baabiloone kataman gidennan de7ishin, Meedoona biittan de7iya Ahimtta<sup>4</sup> giyo kataman issi xaatta maxaafai beettiis. He maxaafan xaafettidabai hagaadan yaagees;

<sup>3</sup> “Wodenau dogettennaadan, Kawoi Qiiroosi ba kawotido koiro laittan, Yerusalaamen de7iya Xoossaa Beeta Maqidasiyaa gishshau, hagaadan yaagiya awaajuwaa kessiis; ‘Yerusalaamen de7iya Xoossaa Beeta Maqidase gidiya, Aihudati yarshshuwaa yarshshiyo sohoi zaarettidi keexetto; a baasoikka baasetto. He Beeta Maqidasee usuppun tammu wara adussanne usuppun tammu wara aaho gido. <sup>4</sup> Qassi heezzu maaran gita shuchchai wodhdhin, he maaratu bollan bollaara issi maara mittai wodhdho. Hegau koshshiya miishshai ubbai kawo keettan buquraa wottiyo keettaappe imetto. <sup>5</sup> Naabukadanaxoori Yerusalaamen de7iya Xoossaa Beeta Maqidasiyaappe ekkidi, Baabiloone ehiido Xoossaa Beeta Maqidasiyaa worqqanne bira miishshati bantta sohuwau guyye Yerusalaame simmona; simmidi Xoossaa Beeta Maqidasiyan de7ona’ yaagiis” yaagees.

<sup>6</sup> Hegaappe guyyiyan, Daariyoosi xaafido dabddaabee hagaadan yaagees; “Inttenoo Efiraaxiisa SHaafaappe Argo Bagga Biittaa haariya Tattanaayaa, SHatarbbozinaanne etaara oottiya ubbatoo, he Beeta Maqidasiyaakko shiiqoppite. <sup>7</sup> Ha asati keexxiyo Xoossaa Beeta Maqidasiyaa oosuwaassi xube gidoppite. Aihudata haariyaageenne Aihuda cimati Xoossaa Beeta Maqidasiyaa kase i de7iyo sohuwan zaaridi keexxona.

<sup>8</sup> “Qassi ha Aihuda cimati Xoossaa Beeta Maqidasiyaa keexxiyo wode, eti oottiyo oosoi eqqenna mala, etassi koshshiya miishshaa ubbaa Efiraaxiisa SHaafaappe Argo Bagga Biittaaappe shiishshido kawuwaa giiraa miishshaappe intte etayyo immana mala, taani azazaas. <sup>9</sup> Yerusalaamen de7iya qeeseti saluwaa Xoossaassi xuuggiyo yarshshuwaa yarshshanau koshshiyaabai mirggota gidin, dorssa orggeta gidin woikko qassi dorssa marata gidikkokka etayyo immite. Qassi aibanne pacissennan eti koyiyo gisttiyaa, maxiniyaa, woiniyaa eessaanne zaitiyaa etayyo hachchi hachchi immite. <sup>10</sup> Hega intte immiyoogee eti saluwaa Xoossaa keehi ufaissiya yarshshuwaa yarshshanaassanne kawuwaanne kawuwaa naatu de7uwaa gishshaukka woossanaassa.

<sup>11</sup> “Ha awaajuwaa laammiya ooninne de7ikko, ‘A keettaa tuussaa shoddidi, he tuussaa xeeraa pooxidoogan lukettidi haiqqo; a keettaikka pito oliyo soho gido’ gaada gujjadakka azazaas. <sup>12</sup> Ha azazuwaa laammanaunne qassi Yerusalaamen de7iya Xoossaa Beeta Maqidasiyaa kolanau kushiyaa denttiya ai kawo woi dere gidin, ba sunttai xeesettana mala Yerusalaame doorida Xoossai a xaisso. Taani Daariyoosi haggaa azazaas. Ha yohuwaa asai ubbai minotettan polo” yaagees.

### *Beeta Maqidasiyaa Anjissiyoo Baalaa*

<sup>13</sup> Hegaappe guyyiyan, Efiraaxiisa SHaafaappe Argo Bagga Biittaa haariya Tattanaayi, SHatarbbozininne etaara oottiya ubbati Kawoi Daariyoosi azazidoogaadan minotettan oottidi polidosona. <sup>14</sup> Hega gishshau, Aihuda cimati bantta oosuwaa aggennan oottidosona; qassi hananabaa yootiya Haggeenne Iddo na7ai Zakkaariyaasi yootido qaalankka minettidosona. Israa7eela Xoossai azazidoogaadaaninne Parsse biittaa kawoti Qiiroosi, Daariyoosinne Arxxekssiisi awaajjidoogaadan Beeta Maqidasee

<sup>4</sup> 6:2 Ahimtta: Ha katamai qassi Ekibataana geetettes.



keexettidi wuriis. <sup>15</sup> Daariyoosi kawotido usuppunta laittan Adaare giyo aginan heezzantto gallassan, Beeta Maqidasiyaa oosoi polettiis.

<sup>16</sup> Hegaappe guyyiyan, Israa7eela asai, qeeseti, Leewatinne omooduwaappe simmida asai ubbai Xoossaa Beeta Maqidasiyaa anjjissiyo baalaa ufaissan bonchchidosona. <sup>17</sup> He baalaa bonchchiyo wode, eti issi xeetu korimata, naa77u xeetu dorssa orggetanne oiddu xeetu dorssa marata yarshshidosona; qassi nagaraa yarshshuwaassi tammanne naa77u Israa7eela zaretu goodan tammanne naa77u deeshsha orggetakka yarshshidosona. <sup>18</sup> Muuse Maxaafan xaafettidoogaadan, Yerusalaamen de7iya Xoossaa Beeta Maqidasiyan oottana mala, qeesetanne Leewata eta maaraadan maaraadan wottidosona.

### *Paasikaa Baalaa*

<sup>19</sup> Omooduwaappe simmida asati kaalliya laittan koiro aginan tammanne oiddantto gallassan Paasikaa Baalaa bonchchidosona. <sup>20</sup> Qassi qeesetinne Leewati banttana geeshshidosona; heгаа gishshau, eti ubbaikka geeshsha. Hegaappe guyyiyan, Leewati omooduwaappe simmida ubbaayyo, qeesetuuyoonne bantta huuphiyau Paasikaa dorssaa shukkidosona. <sup>21</sup> SHukkin, omooduwaappe simmida Israa7eela asainne Aihuda gidenna asati oottiyo tunatettaappe banttana shaakkidi, GODAAKKO, Israa7eela Xoossaakko simmida asai ubbai Paasikaa miidosona. <sup>22</sup> Qassi eti laappun gallassau Oittaa Baalaa ufaissan bonchchidosona; aissi giikko, GODAI eta ufaissii; qassi Xoossaa, hegeekka Israa7eela Xoossaa Beeta Maqidasiyaa eti keexxidi polana mala, Asoore kawuwaa qofaa GODAI laammin, kawoi eta maaddiis.

## 7

### *Iziri Yerusalaame Yiis*

<sup>1</sup> Hegaappe simmin, daro wodiyaappe guyyiyan, Parsse biittan Arxxekssiisi kawotido wodiyan Izira giyo issi asi de7iis. I Saraaya na7aa; Saraayi Azaariyaa na7aa; Azaaree Hilqqiyaa na7aa; Hilqqee SHaaluumaa na7aa; <sup>2</sup> SHaaluumi Xaadooqa na7aa; Xaadooqi Ahixuuba na7aa; Ahixuubi Amaariyaa na7aa; <sup>3</sup> Amaaree Azaariyaa na7aa; Azaaree Maraayoota na7aa; Maraayooti Zaraahiyaa na7aa; <sup>4</sup> Zaraahee Uzza na7aa; Uzzi Buuqa na7aa; <sup>5</sup> Buuqi Abishuu7a na7aa; Abishuu7i Piinihaasa na7aa; Piinihaasi El77aazara na7aa; El77aazari qeese ubbatu halaqaa Aaroona na7aa.

<sup>6</sup> Iziri Baabilooneppe yiis. I GODAI, Israa7eela Xoossai immido Muuse Higgiyaa loitti xanna7ida eranchcha asa. GODAA a Xoossaa kushee a bollan de7iyo gishshau, i oichchidobaa ubbaa kawoi ayyo immiis. <sup>7</sup> Israa7eela asaappe amaridaageetinne qassi qeesetuppe, Leewatuppe, mazamuriyaa yexxiyaageetuppe, penggiyaa naagiyaageetuppenne Beeta Maqidasiyaa ashkkaratuppe amaridaageeti Kawoi Arxxekssiisi kawotido laappunnta laittan Iziraara issippe Yerusalaame biidosona. <sup>8</sup> Kawoi kawotido laappunnta laittan ichchashantto aginan Iziri Yerusalaame gakkiiis. <sup>9</sup> Koiro aginan koiro gallassan Baabilooneppe kiyidi, ichchashantto aginan koiro gallassan Yerusalaame gakkiiis. Aissi giikko, a Xoossaa lo77o kushee a bollan de7ees. <sup>10</sup> Hega xalla gidennan Iziri GODAA Higgiyaa xanna7anaunne oottanau, qassi Israa7eela asaakka a wogaanne a pirddaa tamarissanau ba wozanaa giigissi wottiis.

### *Kawoi Arxxekssiisi Izirassi Xaafidi Immido Dabddaabbiyaa*

<sup>11</sup> GODAI Israa7eelayyo immido higgiyaa xanna7idi, loitti eriya qeesenne xaafe gidiya Izirayyo Kawoi Arxxekssiisi immido dabddaabbee hagaadan yaagees;

<sup>12</sup> “Kawotu Kawuwaa Arxxekssiisappe, qeesiyaanne saluwaa Xoossaa Higgiyaa loitti xanna7iya Iziraa, saroi neeyyo gido!

<sup>13</sup> “Ta kawotettaa gidдон de7iya Israa7eela asaappe ooninne, qeesetuppe woi Leewatuppe gidikkokka, Yerusalaame baanau koyiya asai ubbai nenaara issippe

baanaadan taani odaas. <sup>14</sup> Taaninne tanaara zorettiya laappun asati issippe gididi, neeni ne kushiyan de7iya Xoossaa Higgiyaadan, baada Yihudaaninne Yerusalaamen de7iya hanotettai ai malakko oichchanaadan nena kiittoos. <sup>15</sup> Au de7iyo sohoi Yerusalaamen de7iyo Israa7eela Xoossaassi, taani kawoinne tanaara zorettiya asati nu dosan immido worqqaanne biraa imotata neeni ekkada ba. <sup>16</sup> Hegaa bollikka qassi neeni Baabiloone biittaa kumettaappe demmido biraanne worqqa ubbaa, qassi Israa7eela asainne qeeseti Yerusalaamen de7iya bantta Xoossaa Beeta Maqidasiyaassi bantta dosan immido imotaakka ekkada ba. <sup>17</sup> Baada, ha miishshan korimata, dorssa orggetanne dorssa marata, qassi kattaa yarshshuwaayyoonne ushshaa yarshshuwaayyo koshshiyaabata shammada, Yerusalaamen de7iya intte Xoossaa Beeta Maqidasiyan yarshshiyoosan yarshsha.

<sup>18</sup> “Hegaappe palahidi attida biraanne worqqa neeninne nenaara de7iya ne biittaa asati oottanau koyiyoobaa intte Xoossaa sheniyaadan oottite. <sup>19</sup> Qassi intte Xoossaa Beeta Maqidasiyaa gidдон oosettiya oosuwaassi intte go7ettana mala, nuuni neeyyo immido miishshata ubbaa Yerusalaame Xoossaa sinttan wotta. <sup>20</sup> Hagaappe harabai intte Xoossaa Beeta Maqidasiyaassi koshshiyaabai aibanne gidikko, hegau koshshiya miishshaa kawo keettan miishshaa wottiyo keettaappe ekkana danddayaasa.

<sup>21</sup> “Hegaa gishshau, ha77i taani Kawoi Arxxekssiisi Efiraaxiisa SHaafaappe Argo Bagga Biittan de7iya miishshaa keettan aawatettai de7iyo ubbatussi ha azazuwaa immaas. Qeese gidiyaanne Saluwaa Xoossaa Higgiyaa loitti xanna7iya Iziri inttena oichchiyoobaa aiba gidikkonne ayyo immite. <sup>22</sup> Qassi heezzu sha7anne oiddu xeetu kilo giraame deexxiya biraa, issi xeetu kunttaale gisttiyaa, naa77u sha7u litiro woine eessaanne naa77u sha7u litiro wogaraa zaitiyaa, qassi koshshiya keena maxiniyaara ubbaa Izirayyo immite. <sup>23</sup> Kawuwaa bollinne kawuwaa naatu kawotettaa bolli hanqqoi yeenna mala, saluwaa Xoossai azazidobaa ubbaa saluwaa Xoossaa Beeta Maqidasiyaassi aibanne ashshennan immite. <sup>24</sup> Qassi qeesetuppe, Leewatuppe, mazamuriyaa yexxiyaageetuppe, penggiyaa naagiyaageetuppe, Beeta Maqidasiyaa ashkkaratuppenne Beeta Maqidasiyaa gidдон duma duma oosuwa oottiya asa ubbaappe intte giiraanne qaraxaa ekkana intteyyo aiba maatinne baawa.

<sup>25</sup> “Nenoo Iziraa, neeni qassi, neeyyo Xoossai immido aadhida erattetadan Efiraaxiisa SHaafaappe Argo Bagga Biittan de7iya ne Xoossaa Higgiyaa eriya asaa bolli pirddana mala, daannatanne pirddiyaageeta suntta. Qassi he higgiyaa erennaageeti de7ikko, eta tamarissite. <sup>26</sup> Ne Xoossaa Higgiyaassinne kawuwaa higgiyaassi azazettenna ooninne de7ikko, i sohuwaarakka haiquwan, yedetan, a miishshaa bonqqiyoogan woikko qashuwan qaxxayetto” yaagees.

### *Iziri GODAA Galatiis*

<sup>27</sup> Yerusalaamen de7iya GODAA Beeta Maqidasiyaa hagaadan loittana mala, kawuwaa wozanan ha qofaa wottida GODAASSI, nu aawatu Xoossaassi galatai gido! <sup>28</sup> Qassi kawuwaa, kawuwaara zorettiyaageetunne aara oottiya wolqqaama halaqatu ubbaa sinttan ba aggenaa siiquwaa taassi bessida Xoossaassi galatai gido! GODAA, ta Xoossaa kushee tanaara de7iyo gishshau, taani minettaas. Qassi Israa7eela halaqatuppe amaridaageeti tanaara simmidi, Yerusalaame baana mala shiishshaas.

## 8

### *Iziraara Issippe Omooduwaappe Simmida Asaa*

<sup>1</sup> Kawoi Arxxekssiisi kawotido wode tanaara issippe Baabiloone biittaappe simmidi, Yerusalaame yiida zaretu halaqati hageeta; eta yeletaa maaraikka hгаа:

<sup>2</sup> Piinihaasa yaraappe Gershshooma, Itaamaara yaraappe Daaneela, Daawita yaraappe SHekaaniyaa na7aa Haxxuusha,

- <sup>3</sup> Par77oosha yaraappe Zakkaariyaasinne eta yeletaa maarai xaafettido hara issi xeetanne ishatamu attumaageeta,
- <sup>4</sup> Paahati-Moo7aaba yaraappe Zaraahiyaa na7aa Eliyoo7enaayanne aara issippe hara naa77u xeetu attumaageeta,
- <sup>5</sup> Zattu yaraappe Yahaazi7eela na7aa SHekaaniyaanne aara issippe hara heezzu xeetu attumaageeta,
- <sup>6</sup> Adiina yaraappe Yonaataana na7aa Ebeedanne aara issippe hara ishatamu attumaageeta,
- <sup>7</sup> Elaama yaraappe Ataaliyaa na7aa Yishaa7iyaanne aara issippe hara laappun tammu attumaageeta,
- <sup>8</sup> SHafaaxiyaa yaraappe Mikaa7eela na7aa Zabaadiyaanne aara issippe hara hosppun tammu attumaageeta,
- <sup>9</sup> Yoo7aaba zariyaappe Yihi7eela na7aa Obaadiyaanne aara issippe hara naa77u xeetanne tammanne hosppun attumaageeta,
- <sup>10</sup> Baana yaraappe Yosiifiyaa na7aa SHalomiitanne aara issippe hara issi xeetanne usuppun tammu attumaageeta,
- <sup>11</sup> Bebaaya yaraappe Bebaaya na7aa Zakkaariyaasanne aara issippe hara laatamanne hosppun attumaageeta,
- <sup>12</sup> Azggaada yaraappe Haqqaxaana na7aa Yohanaananne aara issippe hara issi xeetanne tammu attumaageeta,
- <sup>13</sup> Adooniqaama yaraappe wurssettan simmidaageeti, Elifeleexa, Yi7u7eela, SHamaa7iyaanne etaara issippe hara usuppun tammu attumaageetanne
- <sup>14</sup> qassi Bigiwaaya yaraappekka Utaaya, Zakkuuranne etaara issippe hara laappun tammu attumaageeta.

<sup>15</sup> Taani Iziri eta Ahaawa giyo sohuwaakko goggiya shaafaa matan shiishshaas. Nuuni he sohuwan dunkkaanidi, heezzu gallassaa takkida. Qassi taani he sohuwan de7iya asaanne qeeseta qoodiyo wode, Leewa zaretuppe issuwaanne demmabeikke. <sup>16</sup> Hegaa gishshau, halaqa gidiya El77eezara, Ar77eela, SHamaa7iyaa, Elnnaataana, Yaariiba, Elnnaataana, Naataana, Zakkaariyaasanne Mashulaama giyoogeetanne qassi aadhhdhida eranchcha asa gidiya Yoyaariibanne Elnnaataana xeegaas. <sup>17</sup> Xeeгада, nu Xoossaa Beeta Maqidasiyan oottiya asaa nuuyyo yeddana mala, Kaasifiyaa giyo sohuwan de7iya Leewatussi halaqa gidiya Iddokkonne a dabbotukko, hegeetikka Beeta Maqidasiyaa ashkkara gidiyaageetukko eta kiittaaas. <sup>18</sup> Nu Xoossaa lo77o kushee nu bollan de7iyo gishshau, SHerebiyaa a naatuuranne a ishanttuura, muleera tammanne hosppunaa eti nuuyyo yeddidosona. I Israa7eela na7aa Leewa zare gidiya Maahila yaranne keehi akeekai de7iyo asa. <sup>19</sup> Qassi Hashaabiya, Maraara yara gidiya Yishaa7iyaara, a naatuuranne a ishanttu laatamaara yeddidosona. <sup>20</sup> Hegaa bollikka Leewata maaddanaadan giidi, Daawitinne aara oottiya halaqati sunttido Beeta Maqidasiyaa ashkkaratuppekka naa77u xeetanne laatamata yeddidosona. Hegeeti ubbati bantta sunttan xaafettidosona.

<sup>21</sup> Hegaappe guyyiyan, nu Xoossaa sinttan nu huuphiyaa kaushshidi, i nu ogiyan nuuyyo, nu naatuyyoonne nu aqo ubbaayyo sarotettaa immanaadan woossana mala, hegan Ahaawa SHaafaa matan taani xoomaa awaajjaas. <sup>22</sup> Aissi giikko, kawuwaayyo nuuni kase, “Nu Xoossaa lo77o kushee a koyiyaageetuura issippe de7ees; shin a wolqqaama hanqqoi a aggiyaageetu bollan de7ees” yaagidi yootido gishshau, nuuni biyo ogiyan de7iya morkketuppe nuna naaganaadan olanchchatanne paraasata immanaadan kawuwaa oichchanau taani yeellataas. <sup>23</sup> Hegaa gishshau, nuuni xoomidi, Xoossaa woossida; woossin, i nu woosaa siyiis.

<sup>24</sup> Qeesetu halaqatuppe SHerebiyaa, Hashaabiyaanne hara eta dabbo gidiya tammu asata taani dooraas. <sup>25</sup> Doorada, kawoi, kawuwaara zorettiyaageeti, kawuwaara oottiyaageetinne Israa7eela ubbai nu Xoossaa Beeta Maqidasiyaassi immido biraa

worqqaanne, miishshata ubbaa likkada eta kushiyan sheedhdhaas. <sup>26</sup> Taani etayyo immidobai haggaa: laatamanne naa77u sha7u kilo giraame deexxiya biraa, heezzu sha7anne oiddu xeetu kilo giraame deexxiya biraappe oosettida xeetu miishshata, heezzu sha7anne oiddu xeetu kilo giraame deexxiya worqqa, <sup>27</sup> hosppun kilo giraamenne oiddu xeetu giraame deexxiya worqqaappe oosettida laatamu sainetanne worqqadan al77onne muruta gidida nahaasiyaappe oosettida naa77u saineta.

<sup>28</sup> Hegaappe guyyiyan, taani etayyo hagaadan yaagaas; “Inttenne ha miishshati ubbaikka GODAAYYO dummatideta; ha birainne worqqai asai ba dosan GODAAYYO, intte aawatu Xoossaayyo immidoogaa. <sup>29</sup> Yerusalaamen de7iya GODAA Beeta Maqidasiyan miishshaa wottiyo keettaa gakkidi, qeese halaqatu sinttan, Leewatu sinttaaninne Israa7eela zaretu halaqatu sinttan sheedhdhana gakkanaashin, ha miishshata loitti naagite” yaagaas. <sup>30</sup> Heggaa gishshau, qeesetinne Leewati Yerusalaamen de7iya GODAA Beeta Maqidasiyau efaanau biraa, worqqaanne hara miishshata ubbaa miizaanan likkidi sheerettidosona.

<sup>31</sup> Hegaappe guyyiyan, nuuni koiro aginan tammanne naa77antto gallassan Yerusalaame baanau Ahaawa SHAafaa mataappe denddida. Denddidi biyo wode, nu bollan de7iya nu Xoossaa lo77o kushee nu biyo ogiyan de7iya morkketuppenne panggatuppe nuna naagiisinne ashshiiis. <sup>32</sup> Nuuni Yerusalaame gakkidi, yan heezzu gallassaa uttida.

<sup>33</sup> Oiddantto gallassi biraa, worqqaanne hara miishshata ubbaakka likkidi, Ooriyoonna na7aa qeesiyaa Maremootassi sheedhdhida. Piinihaasa na7aa El77aazari, Leewa gidiya Yaasu na7aa Yozabaadinne Biinuya na7aa No7aadee aara issippe de7oosona.

<sup>34</sup> Ubbabaikka qoodettiisinne likettiis; likettidi muleera ai keena gididaakko, he wode xaafettiis.

<sup>35</sup> Hegaappe guyyiyan, omooduwaappe simmida asai Israa7eela Xoossaassi xuuggiyo yarshshuwaa yarshshidosona. Eti Israa7eela ubbaa gishshau, tammanne naa77u korimata, uddufun tammanne usuppun dorssa orggetanne laappun tammanne laappun dorssa marata, qassi nagaraa yarshshuwaassikka tammanne naa77u deeshsha orggeta yarshshidosona. Hagee ubbai xuuggiyo yarshsho gididi, GODAAYYO shiiqiis. <sup>36</sup> Eti qassi kawoi azazido azazuwaakka kawuwaappe garssaara biittaa haariyaageetuyyoonne Efiraaxiisa SHAafaappe Arggo Bagga Biittaa haariyaageetuyyo immidosona; immin eti Israa7eela asaanne Xoossaa Beeta Maqidasiyaa oosuwaa maaddidosona.

## 9

### *Aihuda Gidenna Asatuura Ekettidaageetinne Gelettidaageeti De7iyooqaa Iziri Akeekiis*

<sup>1</sup> Ha ubbabai hanidoogaappe guyyiyan, asaa kaalettiyaageeti taakko yiidi, hagaadan yaagidosona; “Israa7eela asai, harai atto qeesetikka Leewatikka, bantta heeran de7iya Aihuda gidenna asatuppe banttana shaakkibookkona. Etikka Kanaaneti, Hiiteti, Parzzeti, Yaabuusati, Amoonati, Moo7aabati, Gibxxetinne Amooreti oottiyoogaadan tuna oosuwaa oottoosona. <sup>2</sup> Qassi banttayyoonne bantta naatuyyo Aihuda gidenna macca naatuppe machcho oottidi ekkidosona; hegaappe denddidaagan geeshsha zerettati Aihuda gidennaageetuura walakettidosona. Kaalettiyaageetinne halaqati ammanettennaageeta gididi, haggaa malabaa oottanau sintta xeera gidoosona” yaagidosona.

<sup>3</sup> Taani ha yohuwaa siyido wode, ta maayuwaanne ta qumaashshaa pooshshaas; ta huuphiyaa binnaanaanne ta buuchchaakka shoddaas; qassi daro dagammada utta aggaas. <sup>4</sup> Omooduwaappe simmida asai oottido nagaraa gishshau, Israa7eela Xoossai yootido qaalaassi yayyida asai ubbai taani de7iyo sohuwaa taakko shiiqiis. Omarssa yarshshuwaa yarshshiiyo wodee gakkanaashinkka dagammada utto sohuwaappe taani denddabeikke.



<sup>5</sup> SHin omarssa yarshshuwaa yarshshiyo wodee gakkiyo wode, ta maayoinne ta qumaashshai pooshetti uttidaashin, taani kauyyada utto sohuwaappe dendaas. Qassi gulbbatada GODAAKKO, ta Xoossaakko, ta kushiya denttada, hagaadan yaagada woossaas; <sup>6</sup> “Abeet ta Xoossau, taani ta sinttaa neekko pude denttanaukka yayyaisinne yeellatais; aissi giikko, nu nagarai doorettidi, nu huuphiyaappe pude aadhdhiis; nu naaqqoikka saluwaa gakkiis. <sup>7</sup> Nuuni nu maizza aawatu wodiyaappe doommidi, hachchi gakkanaashin, nena keehippe naaqqida. Nu nagaraappe denddidaagan nuuni, nu kawotinne nu qeeseti ha77iigaadankka allaga kawotu kushiyan mashshaassi, omooduwaassi, bonqqiyaassinne wurssetta yeellaassi aadhdhidi imettida.

<sup>8</sup> “SHin ha77i nuuyyo guutta maarotettaa wodee imettiis; aissi giikko, GODAI nu Xoossai nuuppe amarida zerettati attana mala oottiis; ha geeshsha sohuwan i nuna sarotettan wottiis. Nu Xoossai nu aifiyaa dooyiis; qassi nu ailletettaappekka nuuyyo ooratta de7uwaa immiis. <sup>9</sup> Nuuni aille gidikkonne, nu Xoossai nuna ailletettan ag-gibeenna; nu de7uwaa ooraxiis. Qassi nu Xoossaa Beeta Maqidasiyaa keexxana mala, kolettidaagaa bottokonana malanne Yihudaaninne Yerusalaamen nuuni sarotettan de7ana mala, Parsse biittaa kawotu sinttan nuuyyo ba aggenna siiquwaa bessiis.

<sup>10</sup> “SHin nu Xoossau, ha77i yaatin, nuuni woiganau danddayiyoonii? Aissi giikko, nuuni ha77ikka ne azazuwaa aggiigida. <sup>11</sup> Hananabaa yootiya ne ashkkaratu baggaara neeni hagaadan yaagadasa; ‘Intte laattanau geliyo biittai he biittan de7iya asaa tunatettaappe denddidaagan tuniis; ha gaxaappe biidi, hini gaxaa gakkanaashin, eti a bantta tuna oosuwan kunttidosona. <sup>12</sup> Hegaa gishshau, intte mino gidana mala, he biittaa aifiyaa maana malanne merinau intte naatussi laatissana mala, intte macca naata eta attuma naatuyyo immoppite; eta macca naata akka intte attuma naatuyyo ekkoppite. Eti sarotettaaninne durettettan de7ana malakka amottoppite’ yaagadasa.

<sup>13</sup> “Nu bolli gakkida iitabai ubbai nu iita oosuwaappenne nu gita naaquwaappe denddidaagaana. Gidikkonne, neeni nu Xoossai nu nagaraa daruwaa keenaa nuna pirddabaakka; shin nuuppe amaridaageeta zerettau palahissadasa. <sup>14</sup> Yaatin, nuuni ha77ikka zaarettidi, hagaala mala tunabaa oottiya asatuura imuwaaninne ehuwan walahettidi, ne azazuwaa ixixisi gaanee? Qassi ha attida guutta zerettatikka xayana gakkanaashin, ne hanqqoi nu bollan darenneeyye? <sup>15</sup> Abeet GODAU, Israa7eela Xoossau, neeni xillo. Nu naaquwaappe denddidaagan nuuppe issoinne ne sinttan eqqanau danddayennaagaa gidikkonne, nuuni zerettau palahidi attidaageeti hachchi hagan ne sinttan de7oos” yaagaas.

## 10

### *Aihudati Aihuda Gidennaageetuppe Ekkido Machchota Yedissanau Kessido Halchuwaa*

<sup>1</sup> Iziri Xoossaa Beeta Maqidasiyaa sinttan kunddidi yeekkiiddi woossiyo wodenne nagaraakka paaxiyo wode, Israa7eela asaappe daroi, maccai, attumainne naatoi ubbai akko shiiqidi, misho yeehuwaa aara yeekkidosona. <sup>2</sup> Hegaappe guyyiyan, Elaama yara gidiya Yihi7eela na7ai SHakaanee hagaadan yaagiis; “Nuuni ha biittan de7iya Aihuda gidenna maccaasata machchido gishshau, nu Xoossaassi ammanettibookko. Gidikkonne, qassi Israa7eelassi ha77ikka hidootai de7ees. <sup>3</sup> Hegaa gishshau ta godau, neeninne nu Xoossaa azazuwaassi yayyiyaageeti zoridoogaadan nuuni ha maccaasatanne etappe yelettida naata ubbaa yeddannau nu Xoossaara maacettoos. Hagee ubbai higgee giyoogaadan poletto. <sup>4</sup> Ha yohuwaa nuuni waati oottanaakko, nuna kaalettanaagee ne ooso gidiiyo gishshau, denda! Minna! Nuunikka nena maaddana” yaagiis.

<sup>5</sup> Yaagin Iziri dendi eqqidi, halaqata, qeeseta, Leewatanne Israa7eela asaa ubbaa ha geettiddaagaadan oottana mala caaqiis; etikka caaqqidosona. <sup>6</sup> Hegaappe guyyiyan, Iziri Xoossaa Beeta Maqidasiyaa sinttaappe denddidi, Eliyaashiba na7ai



Yahohanaani de7iyo kifiliyaa geliis. Gelidi kumetta qammaa omooduwaappe simmida asatu nagaraassi yeekkiiddi aqido gishshau, he sohuwan qumaa mibeenna; haattaakka uyibeenna.

<sup>7</sup> Hegaappe guyyiyan, omooduwaappe simmida asai ubbai Yerusalaame shiiqana mala, Yihudaa ubbaaninne Yerusalaamen awaajuwaa awaajjidosona. <sup>8</sup> Ha heezzu gallassatu gidдон he sohuwaa shiiqenna ooninne de7ikko, au de7iyaabai ubbai appe eckettanaadaaninne ikka omooduwaappe simmida galchchaappe shaahettidi yedet-tanaadan halaqatinne cimati kuuyidosona.

<sup>9</sup> He geetettida heezzu gallassati wurrenna de7ishin, uddufuntta aginan laatamantta gallassan Yihudaanne Biniyaama asai ubbai Yerusalaame shiiqidosa; shiiqidi, ha deexo yohuwaappenne wolqqaama iraaappe denddidaagan kokkoriiddi, Xoossaa Beeta Maqidasiyaa sinttan de7iya dabaaban uttidosa. <sup>10</sup> Uttidaashin qeese Iziri dendi eqqidi, eta hagaadan yaagiis; “Aihuda gidenna maccaasatuppe machchota ekkidi naaqqideta; he gaasuwan Israa7eela asaa naaquwaa kaseegaappekka yaa darissideta. <sup>11</sup> Ha77i intte nagaraa GODAASSI, intte maizza aawatu Xoossaassi paaxite; i dosiy-oobaakka oottite. He biittan de7iya Aihuda gidenna asatuppenne Aihuda gidenna intte machchetuppe shaahettite” yaagiis.

<sup>12</sup> Yaagin he sohuwan shiiqida galchchai bantta cenggurssaa xoqqu oottidi, hagaadan yaagidosona; “Neeni nuuyyo yootidoogaadan nuuni oottanau bessees. <sup>13</sup> SHin asaa goodai cora; irainne wolqqaamidi bukkees. Yaaniyo gishshau, nuuni iraaappe attiy-oosi banna sohuwan hagan eqqi agganau danddayokko. Qassi nuuni ha yohuwan keehippe naaqqido gishshau, hagee issi gallassan woi naa77u gallassan giigiyaabaa gidenna. <sup>14</sup> Hegaa gishshau, ha shiiqida asaa sunttan nu halaqati Yerusalaamen takkidi, koshshiyaabaa ootona. Ha yohuwaappe denddidaagan Xoossaa wolqqaama hanqqoi nuuppe simmana gakkanaashin, nu katamatun de7iya Aihuda gidenna maccaasata machchida ubbai keerido wodiyan Yerusalaame yona; qassi he katamatu cimatinne pirddiyaageetikka etaara yona” yaagidosona. <sup>15</sup> Asaaheela na7ai Yonaataaninne Ti-iqiwa na7ai Yaahizaayi eta qofaa phalqqidosona; qassi Mashulaaminne Leewa gidiya SHabbataayi phalqqiyaageeta maaddidosona.

<sup>16</sup> Hegaa gishshau, omooduwaappe simmida asai he giidoogaadan oottidosona. Qeese Iziri ubba zaretuppekka halaqata dooridi, ubbaakka eta sunttan sunttan xaafiis. Tammantta aginan koiro gallassan halaqati yohuwa qori xeellanau doommidosona. <sup>17</sup> Koiro aginan koiro gallassai gakkiiyo wode, Aihuda gidenna maccaasata machchida asata ubbaa qoridi wurssidosa.

### *Aihuda Gidenna Maccaasatuppe Machcho Ekkida Asaa Sunttaa*

<sup>18</sup> Aihuda gidenna maccaasatuppe machcho ekkidaageeti hagaappe kaallidi xaafetti-daageeta.

Qeesetuppe: Yoxedeeqa naata gidiya Yaasunne a ishanttu yaraappe Ma7iseeya, El77eezara, Yaariibanne Gadaaliyaa. <sup>19</sup> Hageeti bantta Aihuda gidenna machchota yeddana caaqqidosona; qassi bantta naaquwaa gishshau, wudiyaappe issi dorssa orggiyaa naaquwaa yarshsho oottidi yarshshidosona. <sup>20</sup> Imeera yaran Aihuda gidenna machchota ekkidaageeti Hanaananne Zabaadiyaa. <sup>21</sup> Hariima yaratuppe Ma7iseeya, Eelaasa, SHamaa7iyaa, Yihi7eelanne Ooziyaana. <sup>22</sup> Paashihuura yaratuppe Eliyoo7enaaya, Ma7iseeya, Isimaa7eela, Nataani7eela, Yozabaadanne El77aasa.

<sup>23</sup> Leewatuppe: Yozabaada, SHamaa7iyaa, Qaliixa giyo Qelaaya, Pataahiya, Yihudaanne El77eezara.

<sup>24</sup> Mazamuriyaa yexxiyaageetuppe: Eliyaashiba.

Penggiyaa naagiyaageetuppe: SHAaluuma, Xelemanne Uura.

<sup>25</sup> Qassi hara Israa7eela asaappe: Par77oosha yaratuppe Raamiyaa, Yizziyaa, Malkkiyaa, Miyaamiina, El77aazara, Malkkiyaanne Banaaya.

<sup>26</sup> Elaama yaratuppe Mataaniyaa, Zakkaariyaasa, Yihi7eela, Abdda, Yiremootanne Eelaasa.

<sup>27</sup> Zattu yaratuppe Eliyoo7enaaya, Eliyaashiba, Mataaniyaa, Yiremoota, Zabaadanne Aziiza.

<sup>28</sup> Bebaaya yaratuppe Yahohanaana, Hanaaniyaa, Zabdaayanne Atilaaya.

<sup>29</sup> Baana yaratuppe Mashulaama, Malluuka, Adaaya, Yaashuuba, SHa7aalanne Yiremoota.

<sup>30</sup> Paahati-Moo7aaba yaratuppe Adinaaha, Kalaala, Banaaya, Ma7iseeya, Mataaniyaa, Baxaali7eela, Biinuyanne Minaasa.

<sup>31</sup> Hariima yaratuppe El77eezara, Yishiyaa, Malkkiyaa, SHamaa7iyaa, SHim77oona,

<sup>32</sup> Biniyaama, Malluukanne SHamaariyaa.

<sup>33</sup> Hashuuma yaratuppe Matanaaya, Mataata, Zabaada, Elifeleexa, Yeremaaya, Mi-naasanne SHim77a.

<sup>34</sup> Baana yaratuppe Ma7idaaya, Amiraama, U7eela, <sup>35</sup> Banaaya, Bediyaa, Kaluuha, <sup>36</sup> Waaniyaa, Maremoota, Eliyaashiba, <sup>37</sup> Mataaniyaa Matanaayanne Yaa7isa.

<sup>38</sup> Biinuya yaratuppe SHim77a, <sup>39</sup> SHEleemiyaa, Naataana, Adaaya, <sup>40</sup> Makinadabaaya, SHashaaya, SHaraaya, <sup>41</sup> Azaari7eela, SHEleemiyaa, SHamaariyaa, <sup>42</sup> SHaaluuma, Amaariyaanne Yooseefa.

<sup>43</sup> Nabo yaratuppe Yi7i7eela, Matiitiyaa, Zabaada, Zabiina, Yaddaaya, Yuu7eelanne Banaaya.

<sup>44</sup> Hageeti ubbati Aihuda gidenna machchota machchidaageeta. Issooti issooti harai atto naatakka yelidosona.

## Nahimiyaa Maxaafaa

### *Gidduwaa Erissuwaa*

Nahimiyaa Maxaafaa heezzusaa shaakkidi be7anau danddayeettees:

1. Yihudaa biittaa aissana mala, Parsse kawoi kiittido Nahimee kaalettin, Yerusalaame dirssaa gimbee bottokonettidoogaa odiya taarikiyaa. Hegaappekka qassi Nahimee asaa issippetettaanne ammanuwaa wogaa ooraxissidoogaa.
2. Xoossaa higgiiyaa maxaafaa Iziri nabbabidobaanne asaikka ba nagaraa paaxidobaa odiya shaahuwaa.
3. Nahimee Yihudaa biittaa haariyaagaa gididi oottido hara harabata odiya shaahuwaa.

Ha maxaafan daridi beettiya taarikee Nahimee Xoossaa mintti ammanidoogaanne i Xoossaa woossido woosatubaa odiya taarikiyaa.

### *Nahimee Yerusalaame Gishshau Un77ettiis*

<sup>1</sup> Hakaaliyaa na7ai Nahimee oottido oosuwaa qonccissiya qaalai haggaa. Arxxekssiisi Parsse biittan kawotoosappe laatamantto laittan, Kisileewa geetettiya aginan, taani Nahimee waanna katama gididi Suusan de7ais. <sup>2</sup> De7ishin, ta ishanttuppe issoi, Hanaana giyoogee hara asatuura issippe gididi, Yihudaappe taakko yiis; yin taani Yerusalaamebaanne Baabiloone biittan omooduwan gam77idi simmida Aihudatubaa eta oichchaas. <sup>3</sup> Eti zaaridi, “Omooduwan gam77idi, bantta biittaa simmida Aihudati gita metuwaaninne yeellaa gididon de7oosona. Yerusalaame gimbbiyaa dirssai kolettiis; qassi gimbbiyaa penggetikka taman xuugettidosona” yaagidosona.

<sup>4</sup> Taani haggaa ubbaa siyido wode uttada yeekkaas. Daro gallassaa azzanada xoomaidda, saluwaa Xoossaa, hagaadan yaagada woossaas; <sup>5</sup> “Abeet GODAU, saluwaa Xoossau, gitaunne bonchchettidaagoo, nena dosiyaageetussinne ne azazuwaa naagiyaageetussi ne aggenna siiquwaa maachchaa naagiya Xoossau, <sup>6</sup> taani ne ashkkarai qassi ne ashkkarata gididi Israa7eela asaa gishshaassi qamminne gallassi nena woossiyo woosaa siyanau ne haittai ezggo; ne aifeekka duge taakko xeello. Nuuni Israa7eela asai oottido nagaraa ubbaa neeyyo paaxais; tumakka taaninne ta maizza aawati nena naaqqida. <sup>7</sup> Nuuni ne bollan keehi iita nagaraa oottida; neeni ne ashkkaraa Muuse baggaara nuussi immido azazuwaa, wogaanne higgiiyaa naagibookko. <sup>8</sup> Ne ashkkaraa Muusessi neeni hagaadan yaagada yootido qaalaa hayyanaa qoppa; ‘Inttenoo, Israa7eela asatoo, intte taayyo ammanettennan ixkikko, taani inttena Aihuda gidenna biittatun laalana. <sup>9</sup> SHin intte taakko simmidi, ta azazuwaa naagikko, intte harai atto sa7aa gaxaa gakkanaashin laalettikkokka, taani intte taayyo goinnana mala, taani doorido sohuwau zaarada shiishshana’ giidoogaa qoppa.

<sup>10</sup> “Hageeti neeni ne gita wolqqaaninne ne mino qesiyan woza ekkido ne ashkkaratanne ne asata. <sup>11</sup> Abeet Godau, taani ne ashkkarai woossiyo woosaanne nena bonchchanau dosiya, ne ashkkaratu woosaa ne haittai ezggo. Taani ne ashkkarai hachchi oottanau koyidobai taayyo ushachchanaadan, kawuwaa wozanaa shugissada tana maadda” yaagaas.

Taani he wode kawuwaassi eessaa tigiyaagaa.

## 2

### *Nahimee Yerusalaame Biis*

<sup>1</sup> Oiddu aginaappe simmin, Arxxekssiisi kawotido laatamantto laittan, Niisaana giyo aginan, issi gallassi kawuwaa sinttan woiniyaa eessai de7iyaagaa ekkada, taani ayyo immaas. He gallassappe attin, kase mulekka kawuwaa sinttan azzana erikke. <sup>2</sup> Hegaa

gishshau, kawoi tana, “Nena sakkiyaabi baawa; shin haggaa keenaa aissi azzanadii? Hagee ne wozanaa azzanissidabi issi aibakko de7iyoo gaa bessees” yaagiis.

Yaagin taani keehi yayyaidda zaarada, <sup>3</sup> “Kawoi merinau de7o! Ta maizza aawati moogettido katamai kolettidi xayin, qassi he katamaa dirssaa penggetikka taman xuugettiichchin, taani aissi azzanikkinaa?” yaagaas.

<sup>4</sup> Kawoikka zaaridi, “Yaatin, ha77i taani neeyyo ai oottanaadan koyai?” yaagiis.

Yaagin taani saluwaa Xoossaa woossa simmada, <sup>5</sup> kawuwaa hagaadan yaagaas; “Kawuwau, taani nena ufaissiyaabaa gidikko, qassi ta oichchiyoobaa neeni immanau dosikko, Yihudaa biittaa, ta maizza aawati moogettido katamaa baada, he katamaa zaarada keexxana mala, tana yeddarkkii” yaagaas.

<sup>6</sup> He wode, kawiyaa Kawuwaa Arxxekssiisa matan uttidaashin, kawoi zaaridi, “Ne biyo ogee woisa wodiya ekkane? Qassi neeni aude simmuutee?” yaagidi tana oichchiis. Taanikka ta simmana wodiya ayyo yootaas; yootin kawoi ufaittidi, tana yeddiis.

<sup>7</sup> Qassikka kawuwaa taani hagaadan yaagaas; “Kawuwau, nena ufaissiyaabaa gidikko, taani Yihudaa gakkanaashin, he biittaara kanttada baana mala, Efiraaxiisa SHaafaappe Arggo Bagga Biittaa haariyaageetussi dabddaabbee xaafetto. <sup>8</sup> Qassi Beeta Maqidasiyaa qatuwaa penggiyaa giigissanau, katamaa gimbbe dirssaa diranaunne taani de7iyo keettaa keexxanau taayyo mittaa immana mala, kawuwaa woraa naagiya Asaafassikka dabddaabbee xaafetto” yaagaas. Yaagin, Xoossaa lo77o kushee tanaara de7iyo gishshau, kawoi taani oichchidobaa ubbaa immiis.

<sup>9</sup> Kawoi tanaara amarida ola gadaawatanne paraasata yeddiis; yeddin etaara issippe Efiraaxiisa SHaafaappe Arggo Bagga Biittaa baada gakkada, kawoi yeddido dabddaabbiyaa he biittaa haariyaageetussi immaas. <sup>10</sup> SHin Beeti-Horoona katamaa asa gidiya Sanbalaaxinne Amoonaa biittaa halaqa gidiya Xoobbee, “Israa7eela asaassi lo77obaa oottiya asi yiis” giyoogaa siyido wode, keehi yiillotidosona.

<sup>11</sup> Taani Yerusalaame gakkada heezzu gallassaa yan takkaas. <sup>12</sup> Gido shin, Yerusalaamessi taani oottanaadan Xoossai ta wozanan wottido qofaa oossinne yootabeikke. Hegaappe guyyiyan, tanaara de7iya asaappe amaridaageeta ekkada, qamman denddada baas. He wode taani toggidoogaappe hara toga mehee nuuyyo baawa. <sup>13</sup> Taani bilahe denddada, Zanggaaraa Penggiyaara kiyada, Demiyaa Pulttuwaa giyo sohuwaara aadhdhada, Pituwaa Oliyo Penggiyaa giyo penggiyaa gakkanaashin baas. Heggaa baidda, kolettida Yerusalaame gimbbiyaanne qassi taman xuugettida gimbbiyaa penggeta akeekada xeellaas. <sup>14</sup> Hegaappe simmada, Pulttuwaa Penggiyaakkonne dagattida kawuwaa haattai de7iyo sohuwaa baas. Gido shin, taani toggido toga mehee aadhdhiyo ogiyaa demmabeikke. <sup>15</sup> Heggaa gishshau, qamman Qediroona Zanggaaraa giddoora aadhdhada gimbbiyaa xeellaas. Hegaappe guyyiyan, guyye simmada Zanggaaraa Penggiyaara katamaa gelaas.

<sup>16</sup> Hegan de7iya halaqatuppe ooninne taani awa biidaakko, woikko qassi ai ootidaakkonne eribeenna. Aissi giikko, taani Aihudatussi, qeesetussi, bonchchettida asatussi, halaqatussinne oosuwaa oottanau de7iya asaappe oossinne ta halchchuwaa biron yootabeikke. <sup>17</sup> Hegaappe guyyiyan, taani etau hagaadan yaagaas; “Nuuni ai mala metuwaa gidдон de7iyaakko be7eeta; aissi giikko, Yerusalaame katamai kolettiis; qassi gimbbiyaa penggetikka taman xuugettidosona. SHin hagaappe sinttau nuuni hagaadan kauyyidi de7ennaadan, ane denddidi, Yerusalaame gimbbiyaa zaarettidi gimboos” yaagaas. <sup>18</sup> Qassi Xoossaa lo77o kushee tanaara de7iyoo ganne kawoi taayyo odidobaa ubbaa etayyo yootaas.

Etikka, “Ane denddoosinne zaarettidi gimboos” yaagidosona. Yaagidi bantta kushiyaa lo77o oosuwaassi minttidosona.

<sup>19</sup> SHin Beeti-Horoona katamaa asa gidiya Sanbbalaaxi, Amoonaa biittaa asa gidiya Xoobbeenne Araba biittaa asa gidiya Gesheemi haggaa siyido wode, nu bollan qilliicciidi miiccidosona. Qassi, “Hagee intte oottiyoobai aibee? Woikko qassi kawuwaa bollan wonjjalanau koyeetii?” yaagidi oichchidosona.

<sup>20</sup> Taani zaarada, “Saluwaa Xoossai nuuyyo injjeyana; nuuni a ashkkarati gimbbiyaa doommanna. SHin Yerusalaamen de7iyaabaappe inttena gakkiiya shaaho gidin, maata gidin, woikko intte dogettennaadan qofissiyaabi intteyyo baawa” yaagaas.

### 3

#### *Yerusalaame Dirssaa Asai Zaarettidi Gimbbiis*

<sup>1</sup> Hegaappe guyyiyan, qeese ubbatu halaqai Eliyaashibinne hara qeeseti Dorssaa Penggiyaa giyo penggiyaa zaaretti gimbbidi, Xoossaassi dummayidosona; sanqqaakka aattidosona. Eti Xeetu Adussa Gimbbiyaanne Hanaani7eela Adussa Gimbbiyaa gakkanaashin gimbbido gimbbiyaa Xoossaassi dummayidosona.

<sup>2</sup> Eta lanqqiyan de7iya sohuwaa Yarkko asai gimbbiis.

Eta lanqqiyan de7iya sohuwaa Imira na7ai Zakkuuri gimbbiis.

<sup>3</sup> Hassinaa7a naati Moliyaa Penggiyaa giyo penggiyaa gimbbidosona. Eti pengge mittaa essidi, sanqqaakka aattidosona; qassi sanqqaayyo gordde mittaanne mittaa gelissiyoo hiraquwaa giigissidosona.

<sup>4</sup> Eta lanqqiyan de7iya sohuwaa Haqqooxa na7a gidiya Ooriyoona na7ai Maremooti gimbbiis.

A lanqqiyan de7iya sohuwaa Mashezaabeela na7aa Berekiyaa na7ai Mashulaami gimbbiis.

A lanqqiyan de7iya sohuwaa Ba7aana na7ai Xaadooqi gimbbiis.

<sup>5</sup> A lanqqiyan de7iya sohuwaa Taqo7a katamaa asati gimbbidosona; gido shin, he katamaa halaqati banttau imettida oosuwa ixxidosa.

<sup>6</sup> Paaseeha na7ai Yoodaahenne Basoodiyaa na7ai Mashulaami Gal77a Penggiyaa giyo penggiyaa gimbbidosona. Eti pengge mittaa essidi, sanqqaakka aattidosona; qassi sanqqaayyo gordde mittaanne mittaa gelissiyoo hiraquwaa giigissidosona.

<sup>7</sup> Eta lanqqiyan de7iya sohuwaa Gabaa7oona katamaa asa gidiya Malaaxeenne Meronoota katamaa asa gidiya Yadooni gimbbidosona. Qassi Gabaa7oonanne Mix-iphpha katamatu asatikka etaara issippe gididi, Efiraaxiisa SHaafaappe Arggo Bagga Biittaa haariyaagee de7iyo keettaa gakkanaashin de7iya sohuwaa gimbbidosona.

<sup>8</sup> Worqqaa tigiya Harihaaya na7ai Uzzi7eeli eta lanqqiyan de7iya sohuwaa gimbbiis. Qassi a lanqqiyan de7iya sohuwaa shittuwaa medhdhiya Hanaanee gimbbiis. Eti naa77ai issippe Aaho Gimbbiyaa giyo sohuwaa gakkanaashin, Yerusalaame gimbbiyaa gimbbidosona.

<sup>9</sup> Eta lanqqiyan de7iya sohuwaa Huura na7ai, Yerusalaame woradaa shaahuwaa haariya Rafaayi gimbbiis.

<sup>10</sup> Harumaafa na7ai Yadaayi ba keettaappe sintta baggaara de7iya sohuwaa gimbbiis.

A lanqqiyan de7iya sohuwaa Hashaabaniyaa na7ai Haxxuushi gimbbiis.

<sup>11</sup> Hariima na7ai Malkkeenne Paahati-Moo7aaba na7ai Hashshuubi a lanqqiyan de7iya sohuwaanne Itoone Adussa Gimbbiyaa gimbbidosona.

<sup>12</sup> Eta lanqqiyan de7iya sohuwaa Halloheesha na7ai, Yerusalaame woradaa naa77antto shaahuwaa haariya SHaaluuminne a macca naati gimbbidosona.

<sup>13</sup> Hanuuninne Zaanooaha kataman de7iya asati issippe Zanggaaraa Penggiyaa giyo penggiyaa gimbbidosona. Eti penggiyan sanqqa aattidi, sanqqaayyo gordde mittaanne mittaa gelissiyoo hiraquwaa giigissidosona. Qassi Pituwaa Oliyo Penggiyaa giyo penggiyaa gakkanaashin, sha7u wara adussa gimbbiyaa gujjidi gimbbidosona.



<sup>14</sup> Rekaaba na7ai, Beeti-Hakkareema woradaa haariya Malkkee Pituwaa Oliyo Penggiyaa giyo penggiyaa gimbbiis. Penggiyan sanqqaa aattidi, sanqqaaayyo gordde mitaanne mittaa gelissiyoo hiraquwaa giigissiiis.

<sup>15</sup> Kolihooba na7ai, Mixiphpha woradaa haariya SHaaluumi Pulttuwaa Penggiyaa giyo penggiyaa zaarettidi gimbbiis. I penggiyaassi sarggaa giigissoogaappe guyyiyan, sanqqaa aattiis; sanqqaaayyo gordde mitaanne mittaa gelissiyoo hiraquwaa giigissiiis. Hegaa bollikka qassi, SHelaaha giyo dagattida haattai de7iyo baggaara kawuwaa ataak-ilttiyaa sohuwaappe doommidi, Daawita Katamaappe yiida xekkaa biidi gakkanaashin de7iyya gimbbiyaa gimbbiis.

<sup>16</sup> Hegaappe kaalliyaaagaa Azibuuqa na7ai, Beetixuura woradaa shaahuwaa haariya Nahimee gimbbiis; i Daawita duufuwaappe sintta baggaara de7iyya sohuwaa gakkanaashin, dagattida haattai de7iyo sohuwaa gakkanaashiinne Olanchatu Keettaa gakkanaashin de7iyya sohuwaa gimbbiis.

<sup>17</sup> Hegaappe kaalliyaaagaa Baana na7aa Rehuuma aawatettaa gidдон de7iyya, Leewati gimbbidosona.

Eta lanqqiyan de7iyya sohuwaa Qa7iila woradaa shaahuwaa haariya Hashaabee ba woradaa sunntan gimbbiis.

<sup>18</sup> Appe kaalliyaaagaa Henadaada na7ai, Qa7iila woradaa naa77antto shaahuwaa haariya Baawaayinne a ishannti gimbbidosona.

<sup>19</sup> Eta lanqqiyan de7iyya sohuwaa Yaasu na7ai, Mixiphpha woradaa haariya Exeeri gimbbiis; i ola miishshaa wottiyo keettaappe sinttaa baggaara de7iyya sohuwaa gakkanaashiinne gimbbiyaayyo zooziyaa gakkanaashin de7iyya sohuwaa gimbbiis.

<sup>20</sup> Appe kaalliyaaagaa Zabbaaya na7ai Baaruki gimbbiyaa zooziyaappe doommidi, biidi qeese ubbatu halaqaa Eliyaashiba keettaa penggiyaa gakkanaashin, minotettan gimbbiis.

<sup>21</sup> Appe kaalliyaaagaa Haqqooxa na7a gidiya Ooriyoona na7ai Maremooti Eliyaashiba keettaa penggiyaappe doommidi, biidi keettaa wurssettaa gakkanaashin gimbbiis.

<sup>22</sup> Appe kaalliyaaagaa Yerusalaame heera garatiya biittan de7iyya qeeseti gimbbidosona.

<sup>23</sup> Etappe kaalliyaaagaa Biniyaamine Hashshuubi bantta keettaa sinttan de7iyya sohuwaa gimbbidosona.

Etappe kaalliyaaagaa Anaaniyaa na7a gidiya Ma7iseeya na7ai Azaaree ba keettaa sinttan de7iyya sohuwaa gimbbiis.

<sup>24</sup> Appe kaalliyaaagaa Azaariyaa keettaappe doommidi, biidi gimbbiyaa zooziyaa gakkanaashin de7iyya sohuwaa Henadaada na7ai Biinuyi gimbbiis.

<sup>25</sup> Uzaaya na7ai Paalaali gimbbiyaa zooziyaappe doommidi, biidi naagiyaageeti wochchiyo dabaabaa matan de7iyya qommo bagga kawo keettaa xoqqa gimbbiyaa sinttaa gakkanaashin de7iyya sohuwaa gimbbiis.

Appe kaalliyaaagaa Par77oosha na7ai Padaayinne <sup>26</sup> Beeta Maqidasiyaa ashkkarati, Ofeelan de7iyyaageeti gimbbidosona; eti Haattaa Penggiyaa giyo penggiyaa matan arshsho baggaara de7iyya sohuwaanne xoqqa gimbbiyaa gakkanau de7iyya sohuwaa gimbbidosona.

<sup>27</sup> Etappe kaalliyaaagaa Taqo7a katamaa asai gimbbiyaa sinttan de7iyya sohuwaappe biidi, Ofeela matan de7iyya xoqqa gimbbiyaa gakkanaashin de7iyya sohuwaa gimbbidosona.

<sup>28</sup> Hara qeesetikka ubbai Paraa Penggiyaa giyo penggiyaa matan de7iyya bantta keettaa sinttappe sinttappe doommidi, huuphessa baggaara de7iyya sohuwaa gimbbidosona.

<sup>29</sup> Etappe kaalliyaaagaa Imeera na7ai Xaadooqi ba keettaa sinttan de7iyya sohuwaa gimbbiis.

Appe kaalliyaagaa Arshsho Penggiyaa naagiya SHakaaniyaa na7ai SHamaa7ee gimbbiis.

<sup>30</sup> Appe kaalliyaagaa SHEleemiyaa na7ai Hanaaneenne Xalaafassi usuppunta na7a gidiya Hanuuni gimbbidosona.

Etappe kaalliyaagaa Berekiyaa na7ai Mashulaami ba de7iyo kifiliyaa sinttan de7iyya sohuwaa gimbbiis.

<sup>31</sup> Appe kaalliyaagaa Xomoosiyo Penggiyaa giyo penggiyaa sinttan de7iyya Beeta Maqidasiyaa ashkkaratunne zal77anchchatu keettaa gakkanaashin de7iyya sohuwaa worqqaa tigiya Malkkee gimbbiis. Qassikka i gimbbiyaa zooziyan bolla baggaara de7iyya kifiliyaa gakkanaashin de7iyya sohuwaakka gimbbiis.

<sup>32</sup> Worqqaa tigiyaageetinne zal77anchchati he kifiliyaappe doommidi, Dorssaa Penggiyaa gakkanaashin de7iyya sohuwaa gimbbidosona.

## 4

### *Nahimee Gimbbiyaa Gimbbennaadan Digganau Denddida Halchchuwaa*

<sup>1</sup> Nuuni gimbbiyaa dirssaa oosuwaa doommidoogaa Sanbbalaaxi siyido wode hanqquwaa eexxi kiyiis; qassi keehi yiillotidi, nuna baceessiis. <sup>2</sup> Ba laggetunne Samaariyaa olanchchatu sinttan i hagaadan yaagiis; “Hageeti, ha pattenaa Aihudati ai oottiyoona? Katamaa zaarettidi gimbbanau koyiyoonaayye? Yarshshuwaakka yarshshanau koyiyoona? Oosuwaa issi gallassi wurssanabaa etau milatiiyye? Gimbbiyaassi haniya shuchchaa ha xuugettidi issisan doorettida suuppaa giddoppe kessanabaa etau milatii?” yaagiis.

<sup>3</sup> A miyyiyan eqqida Amoona biittaa asa gidiya Xoobbeekka qassi hagaadan yaagiis; “Eti qassi aiba gimbbe gimbbanau danddayiyoona? Eti gimbbiyo gimbbe worakanai a bolli kiyiyaakkonne wulli aggana” yaagidi baceessiis.

<sup>4</sup> Hegaappe guyyiyan, taani hagaadan yaagada woossaas; “Nu Xoossau, eti nuna waati waati baceessiyaakkonne hagaas siya! Eti nuna cayiyo cashshai eta huuphiyau simmo. Banttau de7iyya aquwaa bonqqettiichchidi, allaga biittan omoodettida asa gidona. <sup>5</sup> Eta naaquwaa genttoppa; eta nagaraakka ne sinttappe mule quccoppa. Aissi giikko, gimbbiyaa gimbbiyaageeta nuna cashshan kaushshidosona” yaagaas.

<sup>6</sup> Nuuni gimbbiyaa oosuwaa aggennan oottida. Qassi asaikka oosuwaa minotettan oottiyo gishshau, gimbbiyaa xoqqatetta sohuwaarakka bagga keena gidi aggiis.

<sup>7</sup> Sanbbalaaxi, Xoobbee, Araba biittaa asai, Amoona biittaa asainne Ashddooda katamaa asai Yerusalaame gimbbiyaa osoi lo77o hanotettan oosettiiddi de7iyoogaanne daahettida sohotikka barettidoogaa siyido wode keehi yiillotidosona. <sup>8</sup> Hegaappe denddidaagan issippe Yerusalaame yiidi nuna olanaunne shabbiranau maqettidosona. <sup>9</sup> SHin nuuni nu Xoossaa woossida; etappe denddidaagan qamminne gallassi naagiya naaganchchataakka wottida.

<sup>10</sup> He wodiyan Yihudaa asai hagaadan yaagidosona; “Toohuwaa tookkiyoogee kaseegaappe nuna daafurssees; qassi denttanau koshshiya gimbbiyaappe kolettida daro shuchchaikka biron de7ees. Yaatin, nuuni hachchi ha gimbbiyaa waatidi gimbbanau danddayiyoona?” yaagidosona.

<sup>11</sup> Nu morkketi, “Nuuni biidi eta giddo gakkanaashin, eti oosuwaa oottennaadan teqqanaashiinne eta worana gakkanaashin, eti erokkona” yaagidosona.

<sup>12</sup> Gido shin, nu morkketu heeran de7iyya Aihudati tamma simmidi nuukko yiidi, “Eti mule baggaara yiidi, nuna olana” yaagidi nuuyyo yootidosona.

<sup>13</sup> Hegaas gishshau, nu asaappe bisuwaa, tooraanne wonddafiyya oiqqida asaa eta zariyan zariyan maarayada, osoi wuribeenna heeran gimbbiyaappe zokko baggaara naaganaadan wottaas. <sup>14</sup> Asai shabbirettidoogaa taani be7ido wode, dendda eqqada, eta, eta kaalettiyaageetanne hara halaqata ubbaa hagaadan yaagaas; “Nu morkketussi

yaayyoppite! Xoossai gitanne hoola giyo Xoossa gidiyooгаа hassayite. Hegaa gishshau, intte zaretussi, intte attuma naatussi, intte macca naatussi, intte keettaayetussinne intte keettaassi olettite” yaagaas.

<sup>15</sup> Nu morkketi nuna qohanau maqettidoogaa nuuni eridoogaa eti siyidosona. Qassi Xoossaikka eta maqquwaa hada kessidoogaa akeekidosona.

Hegaappe guyyiyan, nuuni ubbaikka simmidi, nu gimbbiyaa oosuwaa doommida. <sup>16</sup> He wodiyaappe doommidi, ta ashkkaratuppe baggai oosuwaa oottiyo wode, baggai tiran wottiyo ola miishshaa maayidi, tooraa, gonddalliyaanne wonddafiya oiqqidi naaganaadan oottaas. Qassi halaqatikka Yihudaa asa ubbaappe guyyeera eqqidi minttettoosona. <sup>17</sup> Gimbbiyaa gimbbiyaageetinne koshshiyaabaa tookkiyaageeti ubbai issi kushiyan ola miishshaa oiqqidi, issi kushiyan oosuwaa oottoosona. <sup>18</sup> Gimbbiyaa oosuwaa oottiya ubbai bisuwaa ba xeessan gixxi gixxi uttiis. Malkkataa punniyaageekka ubba wode taappe shaahetti erenna.

<sup>19</sup> Asaa kaalettiyaageeta, halaqatanne asa ubbaa taani hagaadan yaagaas; “Gimbbiyaa oosoi gitanne keehi aaho gidiyooгааappe denddidaagan, nuuni issoi issuwaappe shaahettidi haakkida. <sup>20</sup> Hegaa gishshau, intte malkkataa punniyoogaa siyiyo wode, i punettiyoosaa taakko haa shiiqite. Nu Xoossaikka nu gishshatao olettana” yaa-gaas. <sup>21</sup> Oosuwaa wonttimaatti bazzo zo77iyo wodeppe doommidi, omarssi xoolinttee kiyana gakkanaashin oottiyo wode ubban, baggai oottiyo wode, baggai tooraa oiqqidi naagoosona.

<sup>22</sup> He wode taani asaassi hagaadan yaagaas; “Qamman nuna naaganaanne gallassi qassi oosuwaa oottanau intte ubbaikka intte ashkkaratuura Yerusalaamen aqite” yaa-gaas. <sup>23</sup> Hegaa gishshau, tana gidin, ta ishannta gidin, ta ashkkarata gidin, woi qassi tana naagiyaageeta gidinkka, nuuni ubbaikka nu maayuwa kessennan aqettees; qassi nu ola miishshaikka, nuuppe mulekka shaahettenna.

## 5

### *Hiyyeesati Naaqettido Naaquwaa*

<sup>1</sup> Guutta wodiyaappe guyyiyan, daro asai, attumai maccai bantta zare gidiya Aihudatu bollan wolqqaama cabbuwaa kessidosona. <sup>2</sup> Eti hagaadan yaagidosona; “Nuuni, nu attuma naatinne nu macca naati cora; heгаа gishshau, nuuni miidi paxa de7ana mala, nuuyyo kattaa koshshees” yaagidosona.

<sup>3</sup> Harati qassi, “Nuna gakkida iita koshaappe nuna ashshiya qumaa demmanau giiddi, nu goshshai, nu woiniyaa turaa sohoinne nu keettai antennan asassi oittida” yaagidosona.

<sup>4</sup> Haratikka qassi hagaadan yaagidosona; “Nu goshshaassinne nu woiniyaa turaa sohuwaassi kawoi oichchido giiraa qanxxanau miishshaa dichchaa ekkida. <sup>5</sup> Aihuda zaretuura nuuni issi asho; nu naatikka eta naatu mala. SHin nuuni nu yelido naata aillettau aattidi immanau giddettida; ubba qassi nu macca naatuppe issooti issooti aillettau baizettidosona. Gidikonne, nu goshshainne nu woiniyaa turaa sohoi nuuppe ekettiichchido gishshau, nuuni ainne oottanau danddayokko” yaagidosona.

<sup>6</sup> Eta cabbuwaanne eta qaalaa taani siyido wode, keehi hanqqettaas. <sup>7</sup> Oottiyoobaa ta wozanan qoppoogaappe guyyiyan, asaa kaalettiyaageetanne halaqata xegada hagaadan yaagaas; “Intte ubbai intte ishannta dichchaa qanxxissiyoogan huqqunneeta” yaagada etaara ooyettaas.

He metuwaabaa haasayidi birshshanau gita galchchaakka shiishshaas. <sup>8</sup> SHiishshada hagaadan yaagaas; “Aihuda gidennaageetuyyo baizettida Aihuda zare gidiya nu ishannta wozanau nuuni nu wolqqai danddayidobaa ubbaa oottida. SHin intte qassi, intte ishannta gidiya Aihudati bantta zare gidiya inttessi banttana baizzana

mala oottiiddi de7eeta” yaagaas. Yaagin kaalettiyaageetussi zaariyo qaali xayin, co77u yaagidosona.

<sup>9</sup> Taani qassikka hagaadan yaagaas; “Intte oottiyoobai likke gidenna; nu morkketi, Aihuda gidennaageeti nu bollan qilliiccenna mala, nu Xoossaassi yayyanaunne likke gidiyaabaa oottanau intteyyo bessennee? <sup>10</sup> Taani ta huuphen, ta ishantinne ta ashkkaratikka asaassi miishshaanne kattaa tal77ida; gido shin, ane etappe dichchaa ekkiyoogaa aggoos. <sup>11</sup> Eta goshshaa, woiniyaa turaa sohuwaa, zaitiyaa wogaraanne keettaa ubbaakka etau sa7a hachchi zaarite. Qassi miishshan, kattan, woiniyaa eessan gidin zaitiyan, intte etappe ekkido xeetaappe issi kushe dichchaa ubbaa etau eesuwan zaarite” yaagaas.

<sup>12</sup> Etikka zaaridi, hagaadan yaagidosona; “Nuuni mulebaakka etaagaa zaaridi, etau immana; eta aibanne oichchokko. Neeni giidoogaadan, hegaadan nuuni oottana” yaagidosona.

Yaagin qeeseta haa taakko xegada, kaalettiyaageeti bantta giido qaala polana mala, caaqettanaadan oottaas. <sup>13</sup> Hegaappe guyyiyan, ta maayuwaa qoqqofada hagaadan yaagaas; “Ooninne intteppe ba giido qaala polennan xayikko, Xoossai a hagaadan a keettaappenne a aquwaappe qoqqofo; ikka qoqqofettidi mela atto” yaagaas.

SHiiqida asai ubbai issi qaalaa, “Amin77i” yaagidi GODAA galatidosona. Asai ubbai ba caaqqidoogaadan oottiis.

<sup>14</sup> Arxxekssiisi kawotido laatamantto laittaappe biidi, hasttamanne naa77antto laittaa gakkanaashin, taani Yihudaa haariyaagaa gidada gam77aas. He tammanne naa77u laittaa gidon, tana gidin woi ta ishantti haariyaagaassi bessiya kattaa damooza ekkibookko. <sup>15</sup> SHin taappe kase doorettida haariyaageeti asaassi deexo tooho gididi, hachchi hachchi kattaassinne woiniyaa ushshaassi oitamu xaqara biraa qanxxissidosona. Harai atto haariyaageetu ashkkaratikka banttana asaa bollan goda milatissiiddi gam77idosona. Gidikonne, taani Xoossaassi yayyido gishshau, hegaadan oottabeikke. <sup>16</sup> Taayyo de7iya wolqqaa ubbaa Yerusalaame gimbbiyaa keexxiyo oosuwaassi immaasippe attin, ta huuphessi aiba biittaanne shammabeikke. Ta ashkkaratikka ubbai tanaara he oosuwan issippe gam77idosona. <sup>17</sup> Nu heeran de7iya Aihuda gidennaageetuppe nuukko yiida asai bannan de7ishin, hachchi hachchi tanaara ta masoofiyan miya Aihudatunne eta kaalettiyaageetu qoodai xeetanne ishatama. <sup>18</sup> Hachchi hachchi issi booraa, usuppun doorettida dorssatanne daro kuttota shukki shukkidi, asaassi shiishshoosona; qassi tammu gallasan issitoo daro baattaa woiniyaa eessaa etayyo agoosona. SHin asaa bollan de7iya toohoi deexo gidiyooгаа taani eriyo gishshau, biittaa haariyaagaassi bessiya kattaa damooza oichchabeikke.

<sup>19</sup> “Ta Xoossau, taani ha asaassi oottido lo77otettaa ubbaa qoppada, taassikka lo77otettaa ootta” yaagada taani woossaas.

## 6

<sup>1</sup> Sanbbalaaxi, Xoobbee, Araba biittaa asa gidiya Gesheeminne hara nu morkketi nuuni gimbbiyaa oottidi polidoogaanne qassi oosettibeenna paca sohoikka issoinne attibeennaagaa siyidosona. Gido shin, nuuni gimbbiyaa penggetun biron sanqqaa aattiichchibookko. <sup>2</sup> Hegaa eti siyido wode, Sanbbalaaxinne Gesheemi hagaadan yaagidi, taakko kiittidosona; “Oono giyo dembban de7iya qeeri katamatuppe issuwan yaada nunaara gaitta” yaagidosona. SHin eti ta bolli iitaa oottanau maqettidosona.

<sup>3</sup> Hegaa gishshau, taani etayyo hagaadan yaagada zaarada kiittaas; “Taayyo daro oosoi de7ees; hega gishshau, taani intte giyo sohuwaa baanau danddayikke. Taani yaa bin, oosoi aissi xubettii?” yaagaas. <sup>4</sup> He kiitaa zaari zaari oiddutoo taakko kiittidosona; shin taani issi mala zaaruwaa etayyo immaas.

<sup>5</sup> Ichchashanttuwan Sanbbalaaxi ba ashkkaratuppe issuwan issi poga de7iya dabddaabbiyaa taakko kiittiis. Dabddaabbeekka hagaadan yaagees; <sup>6</sup> “Neeninne ne zare gidiya Aihudati makkalanau qoppidoogaanne hegaappe denddidaagan ha gimbbiyaa gimbbiyooogaa shooro biittan de7iya asai ubbai haasayiyooogaa Gesheemi taayyo yootiis. Qassi neeni nena kawo kessanau koyiyooogaanne <sup>7</sup> neeni Yihudaa kawo gidiyooogaa Yerusalaamen awaajjana mala, hananabaa yootiyaageeta ne wottidoogaakka i taayyo yootiis. Ha woriyaa kawoi siyiyooogee attenna. Hegaa gishshau, tanaara gaittada zorettanau haaya” yaagees.

<sup>8</sup> Taanikka, “Ha neeni giyo yoho ubbai mulekka tuma gidennabanne neeni coo medhdhidobaa” yaagada zaaraas.

<sup>9</sup> Nu oottiyo oosoi polettenna mala, “Eta kushee oosuwau daafuriichchiis” yaagidi eti nuna yashissiiddi gam77idosona.

Hegaa gishshau, “Xoossau ha77i tana minttarkkii” yaagada taani woossaas.

<sup>10</sup> Hegaappe guyyiyan, sooppe kiyennaadan gorddi wottido Mahexaabi7eela na7aa na7aa Dalaaya na7aa SHamaa7iyaakko baas. I taayyo hagaadan yaagiis; “Issi qammi audekko eti nena woranau yaanau de7iyo gishshau, neeninne taani Xoossaa Beeta Maqidasiyaa giddo gelidi, penggiyaa gorddidi qosettoos” yaagiis.

<sup>11</sup> Taani hagaadan yaagada zaaraas; “Tana milatiya asi baqatidi qosettii? Woi qassi tana milatiya asi Beeta Maqidasiyaa giddo gelidi, ba shemppuwaa ashshii? Taani hega mulekka oottikke” yaagaas. <sup>12</sup> Yohuwaa qoppiyo wode, tumukka SHamaa7ee Xoossai kiittido hananabaa yootiyaagaa gidennaagaanne Xoobbeenne Sanbbalaaxi a miishshan shammido gishshau, ta bolli worddo hananabaa yootiyaagaa gidiyooogaa akeekaas. <sup>13</sup> I miishshan shamettido waanna gaasoi tana i yashissin, i giyoogaadan oottada taani nagaran gelanaadaana. Yaatin, eti ubbai hega siyido wode, tana boriyoobaa ta bollan demmanaassa.

<sup>14</sup> “Ta Xoossau, Xoobbeenne Sanbbalaaxi oottidobaa qoppa. No7aado giyo macca hananabaa yootiyaaranne hara worddo hananabaa yootiyaageeti ubbai tana yashissanau eti oottidobaa ubbaakka qoppa” yaagada taani woossaas.

<sup>15</sup> Gimbbiyaa oosoi doomettoosappe ishatamanne naa77u gallassa giishin, Eluula giyo aginan laatamanne ichchashantto gallasan polettiis. <sup>16</sup> Nu yuushuwan de7iya kawotettatu giddon de7iya nu morkketi hega siyido wode yayyidosonanne yeellatidosona. Aissi giikko, hagee oosoi nu Xoossai maaddin oosettidoogaa akeekidosona.

<sup>17</sup> He wodiyan Aihudata kaalettiyaageeti ubba wode Xoobbiyaassi dabddaabbiyaa xaafiiddi gam77idosona; ikka zaaridi, etayyo xaafiis. <sup>18</sup> Aissi giikko, i Araaha na7aa SHakaaniyaa na7iyo machchido gishshaunne a na7ai Yahohanaani Berekiyaa na7aa Mashulaama na7iyo machchido gishshau, Aihudatuppe daroti aara caaqetti uttidosa. <sup>19</sup> He asati Xoobbee oottido lo77obaa ubbaa ta sinttan haasayoosona; qassi taani giyoobaakka ayyo yootoosona. Hegaa gishshau, Xoobbeekka ubba wode tana yashissanau dabddaabbiyaa xaafiyooogaa aggibeenna.

## 7

<sup>1</sup> Gimbbiyaa oosoi wurin, penggetuunikka sanqqai geliis. Qassi penggiyaa naagiyaageeti, mazamuriyaa yexxiyaageetinne Leewati bantta oosuwan oosuwan gelidosona. <sup>2</sup> Hegaappe guyyiyan, Yerusalaame katamaa aissiyo maataa ta ishaa Hanaanassinne qatuwaa gadaawaa Hanaaniyaassi immaas. Hanaanee hara ubbaappe aadhdhida tumanchchanne Xoossaassi yayyiya asa. <sup>3</sup> Taani eta hagaadan yaagada azazaas; “Maallado awai kiyidi ho77ana gakkanaashin, Yerusalaame gimbbiyaa penggeta dooyoppite. Qassi omarssi naagiyaageeti bantta oosuwaa wurssidi baanaappe kasetidi, penggeta mintti gorddanaadan oottite. Hegaa bollikka Yerusalaamen de7iya asaappe dooridi, issi issi kayan kayan naaganaadaaninne



qassi harati bantta heeran de7iiddi, bantta keettaa ginaa ginaa naaganaadan oottite” yaagaas.

*Omooduwaappe Simmida Asaa Sunttaa*

<sup>4</sup> He wode Yerusalaame katamai keehi aahonne gita; shin a gidдон de7iya asaa goodai keehi guutta. Qassi daro keettikka biron keexettibeenna. <sup>5</sup> Hegaappe guyyiyan, asaa kaalettiyaageeta, halaqatanne asa ubbaa shiishshada eta yeletaa maaran maaran mazggafana mala, Xoossai tana qofissiis. Omooduwaappe kasetidi simmida asaa yeletaa maaraa maxaafaakka demmaas; he maxaafan xaafettidaagee haggaa.

<sup>6</sup> Baabiloone Kawoi Naabukadanaxoori omooddidi, ba biitti efiido asaappe guyye bantta katamaa katamaa Yerusalaamenne Yihudaa simmida asati hagaappe kaalliyaageeta. <sup>7</sup> Eta halaqati Zarubaabeela, Yaasa, Nahimiyaa, Azaariyaa, Ra7aamiyaa, Nahamaana, Marddikiyoosa, Bilishaana, Misppereeta, Bigiwaaya, Nahuumanne Ba7aana. Omooduwaappe simmida Israa7eela asaa goodai haggaa.

<sup>8</sup> Par77oosha yarati 2,172.

<sup>9</sup> SHafaaxiyaa yarati 372.

<sup>10</sup> Araaha yarati 652.

<sup>11</sup> Yaasunne Yoo7aaba naata gididiya Paahati-Moo7aaba yarati 2,818.

<sup>12</sup> Elaama yarati 1,254.

<sup>13</sup> Zattu yarati 845.

<sup>14</sup> Zakkaaya yarati 760.

<sup>15</sup> Biinuya yarati 648.

<sup>16</sup> Bebaaya yarati 628.

<sup>17</sup> Azggaada yarati 2,322.

<sup>18</sup> Adooniqaama yarati 667.

<sup>19</sup> Bigiwaaya yarati 2,067.

<sup>20</sup> Adiina yarati 655.

<sup>21</sup> Hizqqiyaasa yara gididiya Axeera yarati 98.

<sup>22</sup> Hashuuma yarati 328.

<sup>23</sup> Bexaaya yarati 324.

<sup>24</sup> Hariifa yarati 112.

<sup>25</sup> Gabaa7oona yarati 95.

<sup>26</sup> Beetaliheemenne Naxoofa katamatu asai 188.

<sup>27</sup> Anatoota katamaa asai 128.

<sup>28</sup> Beeti-Azimaaweeta katamaa asai oitamanne naa77a.

<sup>29</sup> Qiriyaati-Yi7aariima, Kafiranne Ba7eroota katamatu asai 743.

<sup>30</sup> Raamanne Gebaa7a katamatu asai 621.

<sup>31</sup> Mikimaasa katamaa asai 122.

<sup>32</sup> Beeteelenne Aaya katamatu asai 123.

<sup>33</sup> Naa77antto Nabo giyo katamaa asai 52.

<sup>34</sup> Naa77antto Elaama yarati 1,254.

<sup>35</sup> Hariima katamaa asai 320.

<sup>36</sup> Yarkko katamaa asai 345.

<sup>37</sup> Looda, Hadiidanne Oono katamatu asai 721.

<sup>38</sup> Sanaa7a katamaa asai 3,930.

<sup>39</sup> Hageeti omooduwaappe simmida qeeseta:

Yaasu yara gididiya Yadaaya yarati 973;

<sup>40</sup> Imeera yarati 1,052;

<sup>41</sup> Paashihuura yarati 1,247;

<sup>42</sup> Hariima yarati 1,017.

<sup>43</sup> Hageeti omooduwaappe simmida Leewata:

Hodaawiyaa yara gidinya Yaasunne Qaadimi7eela yarati 74;

<sup>44</sup> Asaafa yara gidinya mazamuriyaa yexxiyaageeti 148;

<sup>45</sup> Beeta Maqidasiyaa penggiyaa naagiya

SHAaluuma, Axeera, Xalmmoona, Aqquuba, Haxiixanne SHobaaya yarati 138.

<sup>46</sup> Hageeti omooduwaappe simmidi,

Beeta Maqidasiyan oottiya ashkkaratu yarata:

Xiiha yarata, Hasuufa yarata, Xabba7oota yarata, <sup>47</sup> Qeeroosa yarata, Sii7a yarata, Padoona yarata, <sup>48</sup> Labaana yarata, Hagaaba yarata, SHalmmaaya yarata, <sup>49</sup> Hanaana yarata, Giddeela yarata, Gahaara yarata, <sup>50</sup> Ra7aaya yarata, Raaxiina yarata, Naqoda yarata, <sup>51</sup> Gazzaama yarata, Uzza yarata, Paaseeha yarata, <sup>52</sup> Besaaya yarata, Me7uniima yarata, Nafushesiima yarata, <sup>53</sup> Baaqibuuqa yarata, Haquufa yarata, Harihuura yarata, <sup>54</sup> Baaxiliita yarata, Mahiida yarata, Harshsha yarata, <sup>55</sup> Barqqoosa yarata, Sisaara yarata, Temaaha yarata, <sup>56</sup> Naxiiha yaratanne Haxiifa yarata.

<sup>57</sup> Hageeti omooduwaappe simmida Solomona ashkkaratu yarata:

Soxaaya yarata, Sofereeta yarata, Pariida yarata, <sup>58</sup> Yaa7ila yarata, Darqqoona yarata, Giddeela yarata, <sup>59</sup> SHafaaxiyaa yarata, Haxxiila yarata, Pokereti-Haxxabaima yaratanne Amoonaa yarata.

<sup>60</sup> Omooduwaappe simmidi, Beeta Maqidasiyan oottiya ashkkaratu yaratunne Solomona ashkkaratu yaratu goodai muleera 392.

<sup>61</sup> Haratikka qassi, Telmmelaaha, Teliharshsha, Karuuba, Adoonanne Imeera giyo katamatuppe Yerusalaame simmidosona. SHin eti woikko eta aawati Israa7eela sheeshsha gidiyooгаа erissanau danddayibookkona. <sup>62</sup> Hegeeti Dalaaya, Xoob-biyaanne Naqoda yarata; eta qoodaikka muleera 642.

<sup>63</sup> Qeesetuppe qassi Hobaaya yarati, Haqqooxa yaratinne Barzzillaaya yarati Yerusalaame simmidosona. Hagee Barzzillaaya giyoogee Gala7aade biitta asa gidinya Barzzillaaya na7iyo machchidi, ba bolluwaa sunntaa ekkiiis. <sup>64</sup> Hageeti bantta yeletaa xaphuwaa eranau yeletaa maxaafan koyidosona, shin demmibookkona. Hega gishshau, eti tunadan qoodettidi, qeesetettan oottennaadan digettidosona. <sup>65</sup> Qassi Uriimiyaaninne Tumiimiyaa shaakkidi pirddiya qeesee denddana gakkanaashin, eti geeshsha qumaappe maanau danddayennaagaa Aihudata haariyaagee etau yootiis.

<sup>66</sup> Omooduwaappe Yihudaa biittaa simmida asaa qoodai muleera 42,360. <sup>67</sup> Hega bollarikka qassi 7,337 attuma ashkkaratinne macca ashkkarati mazamuriyaa yexxiya 245 attumanne macca asati simmidosona. <sup>68</sup> Omooduwaappe muleera simmida asaa paratu goodai 736; baquloti 245; <sup>69</sup> gaameelati 435; haretii qassi 6,720.

<sup>70</sup> Yaratu halaqatuppe amaridaageeti oosuwaassi imotaa immidosona. Biittaa haariyaagee hosppun kilo giraame worqqaa, 50 disttetanne 530 qeesetu maayota immiis. <sup>71</sup> Yaratu halaqati 168 kilo giraame worqqaanne 1,250 kilo giraame biraa immidosona. <sup>72</sup> Attida asai muleera 168 kilo giraame worqqaa, 1,100 kilo giraame biraanne 67 qeesetu maayota immidosona.

<sup>73</sup> Hegaappe guyyiyan qeeseti, Leewati, penggiyaa naagiyaageeti, mazamuriyaa yexxiyaageeti, asaappe darotinne Beeta Maqidasiyaa ashkkarati, muleera Israa7eela ubbai bantta kataman kataman uttidosona.

## 8

*Iziri GODAA Higgiyaa Asaayyo Nabbabiis*

<sup>1</sup> Laappuntta aginai gakkiyo wode, Israa7eela asai ubbaikka bantta kataman kata-man uttidosa. He aginan eti ubbaikka issippe Haattaa Penggiyaa sinttan de7iya dabaaban shiiqidosa. SHiiqidi GODAI Muuse baggaara Israa7eela asaassi immido Higgiyaa Maxaafaa ehaana mala, xaafiyaa Izira oichchidosona. <sup>2</sup> Yaatin, laappuntta aginan koiro gallasan, attumai maccai, akeekanau danddayiya asai ubbai shiiqidosa Iziri Higgiyaa Maxaafaa ehiis. <sup>3</sup> Ehiidi Haattaa Penggiyaa sinttan de7iya dabaaban eqqidi, attumau maccau, akeekanau danddayiya asa ubbau Higgiyaa Maxaafaa maal-ladoppe gallassa seetai gakkanaashin nabbabiis; asaikka loitti ezgidi siyiis.

<sup>4</sup> Iziri eqqidi nabbabanau mittaappe giigissido madirakiyaa bollan eqqiis. Appe ushachcha baggaara Matiitiyaa, SHamaa7iyaa, Anaaya, Ooriyoona, Hilqqiyaanne Ma7iseeya giyo asati eqqidosa. Haddirssa baggaara qassi Padaaya, Mishaa7eela, Malkkiyaa, Hashuuma, Hashibadanaaha, Zakkaariyaasanne Mashulaama giyo asati eqqidosa.

<sup>5</sup> Iziri asa ubbaappe xoqqiya sohuwan eqqido gishshau, ubbaikka a loittidi xeellishin, eta sinttan Higgiyaa Maxaafaa dooyiis. Dooyido wode eti ubbai uttidosaappe denddi eqqidosa. <sup>6</sup> Denddi eqqin, Iziri GODAA, gita Xoossaa galatiis. Asai ubbai bantta kushiya pude denttidi, “Amin77i, Amin77i” yaagidosona. Qassi eta som77oi sa7aa bochhana gakkanaashin gufannidi, GODAASSI goinnidosona.

<sup>7</sup> Hegaappe guyyiyan denddidi, bantta de7iyoosan eqqidosa. Yaasa, Baana, SHere-biyaa, Yaamiina, Aqquuba, SHabbataaya, Hodiya, Ma7iseeya, Qaliixa, Azaariyaa, Yoz-abaada, Hanaananne Palaaya giyo Leewati higgiyaa asai akeekanaadan oottidosona. <sup>8</sup> Eti Xoossaa Higgiyaa Maxaafaappe nabbabidi, qassi nabbabettidaagee woigiyaakko, asai erana mala, birshshidi qonccissidosona.

<sup>9</sup> Asai higgiyaa qaalaa siyido wode, bantta wozanan mishettidi yeekkidosa. Hega gishshau, biittaa haariya Nahimee, qeesenne xaafe gidiya Izirinne asaassi maxaafaa birshshiya Leewati asaa hagaadan yaagidosona; “Ha gallassai GODAASSI, intte Xoos-saassi, geeshsha gallassa gidiyo gishshau, issoinne azzanoppitenne yeekkoppite” yaagi-dosona.

<sup>10</sup> Qassi Nahimee gujjidikka hagaadan yaagiis; “Biite, modhdhuwaa miite; mal77iyaabaakka uyite; qassi bannaageetussikka intteegaappe shaakkidi immite. Aissi giikko, hachchi gallassai nu GODAASSI geeshsha gallassa. GODAA ufaissai intteyyo wolqqa gidiyo gishshau azzanoppite” yaagiis.

<sup>11</sup> Leewatikka qassi, “Hagee geeshsha gallassa gidiyo gishshau, azzanoppite; haizzite” yaagidi asaa co77u oottidosona. <sup>12</sup> Hegaappe guyyiyan, asai ufaissan maanaunne uyanau qassi bannaageetussikka banttaagaappe shaakkidi immanau biidosona. Aissi giikko, eti yootido qaalaa siyidosonanne akeekidosona.

<sup>13</sup> Aginaayyo naa77antto gallassi zaretu halaqati, qeesetinne Leewati higgiyaa qaalaa etayyo birshshana mala, Izirakko yiidosona. <sup>14</sup> Hegan tamaariiddi, laappuntta aginan Daase Baalaa bonchchiyo wode, Israa7eela asai ubbai daasiyaa gidдон uttanaadan Xoossai Muuse baggaara azazidoogaa akeekidosona. <sup>15</sup> Hega gishshau, katamatu ubbaaninne Yerusalaamen hagaadan yaagidi awaajjidosa; “Deriyaa huuphiyaa kiyite; zaitiyaa wogaraappe, woran morkida wogaraappe, barsseneetiyyaa mittaappe, zambbaa mittaappenne haittai de7iyo mitta ubbaappe higgiyan xaafettidoogaadan, daasiyaa daasanau tashiyaa ehiite” yaagidosona.

<sup>16</sup> Hega gishshau, asai biidi mittaa tashiyaa ehiidosona; ehiidi bantta keettaa bollan de7iya demba sohuwan, bantta gibbiyan, Xoossaa Beeta Maqidasiyaa dabaaban,

Haattaa Penggiyaa dabaabaaninne Efireema Penggiyaa dabaaban daasiyaa daasidosona. <sup>17</sup> Omooduwaappe simmida asai ubbai daasiyaa daasidi, a gidдон uttidosa. Nawe na7aa Yaasu wodiyaappe doommidi, he gallasai gakkanaashin, eti haggaa mala baalaa bonchchi erokkona. Heggaa gishshau, ubbaikka keehi ufaittidosona. <sup>18</sup> Baalai doomettoosappe biidi wurana gakkanaashin, hachchi hachchi Iziri Xoossaa Higgiyaa Maxaafaappe asaassi nabbabiis. Baalaa laappun gallassaa bonchchoogaappe guyyiyan, hosppunta gallassan higgee azaziyoogaadan geeshsha yaa7aa oottidosona.

## 9

### *Israa7eela Asai Bantta Nagaraa Paaxidosona*

<sup>1</sup> He aginan laatamanne oiddantto gallassan Israa7eela asai xoomiiddi, waaruwaa maayidinne bantta huuphiyan baanaa tisttidi, issisaa shiiqidosa. <sup>2</sup> Banttana allaga dere asa ubbaappe shaakkidosona. Heggaa guyyiyan eqqi denddidi, etinne kase eta aawati oottido nagaraa ubbaa paaxidosona. <sup>3</sup> Hegan eti eqqidaashin, heezzu saate gididiyaagaa keenaa GODAA eta Xoossaa Higgiyaa Maxaafai etayyo nabbabettiis. Qassi hara heezzu saate gididiyaagaa bantta nagaraa paaxiidinne GODAASSI, bantta Xoossaassi, goinniiddi gam77idosona.

<sup>4</sup> Leewatuppe amaridaageeti madirakiyaa bollan kiyidi, cenggurssaa xoqqu oottidi GODAAKKO, bantta Xoossaakko, waassidosona. Hegeetikka Yaasa, Baana, Qaadimi7eela, SHabaaniyaa, Buuna, SHerebiyaa, Baananne Kanaana.

<sup>5</sup> Leewatuppe Yaasu, Qaadimi7eeli, Baani, Hashaabanee, SHerebee Hodee, SHabaanee Pataahee Israa7eela asaa hagaadan yaagidosona; “Denddi eqqidi, merinaappe merinau de7iya GODAA intte Xoossaa galatite! Galata ubbaappenne saba ubbaappe bollaara xoqqu xoqqu giidanne bonchchettida Xoossaa sunntaa sabbite” yaagidosona.

### *Nagaraa Paaxiyo Woosaa*

<sup>6</sup> Heggaa guyyiyan, Israa7eela asai hagaadan yaagidi woossidosona; “Xoossau, ne xalaalai GODA! Neeni salotanne salotun de7iya meretata ubbaa, sa7aanne a bollan de7iya meretata ubbaanne abbatanne eta gidдон de7iya meretata ubbaa medhdhadasa; ubbaassi de7uwaa immadasa. Saluwaa meretati ubbai neeyyo goinnoosona.

<sup>7</sup> “GODAU, neeni Xoossa! Neeni Abraama Uura giyo Kaladaawetu katamaappe doorada kessadasa; a sunntaakka laammada, Abraama yaagada sunntadasa. <sup>8</sup> I neeyyo ammanettiya asa gididiyoogaa be7ada, Kanaanetu, Hiitetu, Amooretu, Parzzetu, Yaabuusatunne Gerggeesetu biittaa a zaretussi laata biittaa oottada immanau ayyo maachchaa geladasa. Neeni xillo gididiyo gishshau, ne giido qaalaakka poladasa.

<sup>9</sup> “Neeni kase nu maizza aawata Gibxxe biittan gakkida tuggaa be7adasa; qassi Zo7o Abbaa giyo abbaa matan de7iiddi eti, ‘Nuna maaddarkkii!’ yaagidi waassido waasuwaakka siyadasa. <sup>10</sup> Gibxxe kawoi, a biittaa halaqatinne he biittaa asai ubbai Israa7eela asaa bollan otorettido gishshau, eta bollan malaataanne maalaalissiyaabaa oottadasa. Heggaa denddidaagan, hachchi gakkanaashin, ne sunntai bonchchuwan xeegettanaadan oottadasa. <sup>11</sup> Abbaa yaanne haanne shaakkada, gidduwaara ne asaa mela biittaaara pinttadasa. SHin shuchchai ciimma haattan olin, xaggaa duge wodhdhiyoogaadan, eta yedettiya morkketa abban mitissada xaissadasa. <sup>12</sup> Israa7eela asaa gallassi shaaraa tuussan kaalettada, qammi qassi eti hemettiyo ogiyan poo7ana mala, tamaa tuussaa eta sinttan essada kaalettadasa.

<sup>13</sup> “Neeni saluwaappe wodhdhada, ne asaa Siinaa Deriyaa bollan haasayissadasa. Sitta pirddaanne tuma gididi higgiiyaa qassi lo77o wogaanne azazuwaa etayyo immadasa. <sup>14</sup> Geeshsha ne Sambbataa eti bonchchana mala, eta taaarissadasa. Ne ashkkaraa Muuse baggaara etayyo azazuwaa, wogaanne higgiiyaa immadasa. <sup>15</sup> Eti namisettido wode saluwaappe qumaa immadasa; qassi eti saamettido wode zaallaappe

haattaa pulттissadasa. Neeni etayyo immanau caaqqido biittaa gelidi laattana mala azazadasa.

<sup>16</sup> “SHin nu maizza aawati otorettidosona. Yootin siyenna morgge zozza gididi, neeyyo azazettibookkona. <sup>17</sup> Azazettennan ixxidosa; qassi neeni etayyo oottido maalaalissiyaabaa ubbaa hassayibookkona. Eti morgge zozza gididosona; qassi bantta makkalaappe denddidaagan, Gibxxe biittaa guyye ailletettau zaaridi kaalettana mala, halaqaa banttau dooridosona. Gido shin, neeni atto giya Xoossaa; kehanne maariyaa-gaa. Siiquwan kumidaagaanne hanqquwaassi eesotennaagaa. Hegaa gishshau, neeni eta aggabaakka.

<sup>18</sup> “Eti mara milatiya eeqaa medhdhidi, ‘Inttena Gibxxe biittaappe kessida intte xoossai haggaa’ yaagidi nena gita cashshaa cayikkokka, <sup>19</sup> ne daro maarotettaa gishshau, neeni eta he biittaa bazuwan aggabaakka. Eti biyo ogiyaa kaalettana mala, gallassi shaaraa tuussai, qassi eta ogiyaa poo7issana mala, qammi tamaa tuussai etappe haakkibeenna. <sup>20</sup> Eta tamarissana mala, ne lo77o Ayyaanaa etayyo immadasa. Maanau mannaa eta doonaappe pacissabaakka; qassi eta saamuwaassikka haattaa immadasa. <sup>21</sup> Oitamu laittaa ubbaa eti bazuwan hemettiyo wode, etau koshshiyaabaappe issibaanne xaissabaakka. Eta maayoi wuribeenna; eta gedeekka kixxibeenna.

<sup>22</sup> “Bantta zawan de7iya gaxa biittanne kawotettata eti xoonidi oiqqanaadan oot-tadasa. Sihoona giyo kawoi haariyo Haseboona biittanne Ooga giyo kawoi haariyo Baasaane biittaa eti laattidosona. <sup>23</sup> Eta zerettatu qoodaa saluwaa xoolinttiyaadan darissadasa. Kase eta aawatussi gelissananne laatissana gaada neeni yootido biittaa eta gelissadasa. <sup>24</sup> Eti Kanaane biittaa laattidosona; he biittan de7iya Kanaane asaa ubbaa eta sinttan neeni kaushshadasa. Eti Kanaane asaa bollan, eta kawotu bollaanne he biittan de7iya asa ubbaa bollan bantta dosidobaa oottana mala, eta kushiyan aatta immadasa. <sup>25</sup> Qassi eti yuushoi gimbbettido katamatanne aradda biittaa xoonidi ekki-dosona; qassikka lo77obai ubbai kumido keettata, bookettida haatta ollata, woiniyaa turaa sohota, wogaratanne hara aifiyaa immiya daro mittata laattidosona. Hegaappe miidi kallidi orddidosona; ne gita kehatettan eti ufaittidosona.

<sup>26</sup> “Gidikkokka, ne asati azazettennan ixxidi, ne bollan makkalidosona; ne hig-giyaayyookka zokkuwaa zaaridosona. Neekko eti simmanaadan etayyo minttidi yootida hananabaa yootiyaageeta woridosona. Keehi gita cashshaa nena cayidosona. <sup>27</sup> Hegaappe denddidaagan eta un77ettiya morkketu kushiyan aatta immadasa; immin morkketi eta un77ettido wode neekko waassidosona. Eta waasuwwa saluwan gidada siyadasa; siyada ne maarotettaa daruwaadankka, eta eta morkketu kushiyaappe ashshiyaageeta kiittadasa.

<sup>28</sup> “SHin eti shemppuwaa demminne zaarettidi, ne sinttan nagaraa oottidosona. Oottin neenikka zaarettada eta morkketu kushiyan aattada immin, eta morkketi eta haaridosona. SHin ha77ikka eti neekko waassin, eta waasuwwa saluwan gidada siyadasa. Ne maarotettan eta zaara zaaradakka ashsha ekkadasa.

<sup>29</sup> “Ne higgiaakko eti simmana mala, neeni etayyo minttada yootadasa; shin eti otorettidosona; ne azazuwaakka ixxisi yaagidosona. Asi azazettikko de7uwaa dem-miyo ne higgiaa kanttidosona; qassi morgge zozza gididi, neeyyo zokkuwaa zaaridi, azazettennan ixxidosa. <sup>30</sup> Gidikonne, daro laittaa eta danddayadasa; hananabaa yootiyaageetu baggaara ne Ayyaanan etau minttada yootadasa; shin eti siyibookkona. Hegaappe denddidaagan Aihuda gidenna kawotettati eta haarana mala, eta kushiyan aatta immadasa. <sup>31</sup> SHin neeni kehanne maariya Xoossaa gidiyo gishshau, ne gita maarotettan eta muleera aggabaakkanne xaissabaakka.

<sup>32</sup> “Nu Xoossau, gita, wolqqaamanne yayettida Xoossau, ne aggena siiquwaa maachchaa naagiyaagoo, nu bollan gakkida metoi ne sinttan laafabaa milatoppo. Beni Asoore kawotu wodiyaappe doommidi, hachchi gakkanaashin, nu bollan, nu kawotu



bollan, nu halaqatu bollan, nu qeesetu bollan, nu hananabaa yootiyaageetu bollan, nu maizza aawatu bollaanne ne asa ubbaa bollan gita metoi gakkii. <sup>33</sup> Nuna gakkidaban ubban neeni xillo. Aissi giikko, nuuni nena naaqqikkokka neeni ammanettiyoogaa aggabaakka. <sup>34</sup> Nu kawoti, nu halaqati, nu qeesetinne nu maizza aawati ne higgiiyaa naagibookkonna; qassi neeni etau immido azazuwaanne ne mintta yootidoogaakka siyibookkonna. <sup>35</sup> Neeni eta kawotettan etayyo gita anjuuwaa immadasa; qassi aahonne mokkiya biittaakka etayyo immadasa; shin eti neeyyo goinnibookkonanne bantta iita oosuwaappe simmibookkonna.

<sup>36</sup> “Hegaappe denddaagan, nuuni hachchi aille gidiiyoogaa be7a. Qassi hegeekka eti aifiyaanne i immiyo anjuuwaa ubbaa maana mala, nu maizza aawatussi neeni immido he biittan, nuuni aille gidida. <sup>37</sup> Nu nagaraa gishshau, neeni nu bollan denttido kawoti biittaa anjuuwaa ubbaa eti go77ettoosona. Qassi nu bollaanne nu mehiyaa bollan bantta koyidobaa oottoosona; nuunikka gita metuwaa gidдон de7oos” yaagidosona.

### *Asai Bantta Maayettido Maachchaa Paramidosona*

<sup>38</sup> Hanida yoho ubbaa gishshau, nuuni haasayidi maacido maachchaa xaafida; he nuuni xaafido maachchaa woraqataa bollan nu halaqati, nu Leewatinne nu qeeseti bantta maatafaa wottidosona.

## 10

<sup>1</sup> Hagaappe kaalliyaa asati he maatafai wodhdhido woraqataa bollan paramidosona. Hegeetikka Hakaaliyaa na7aa biittaa haariya Nahimiyaa; qeesetuppe: Sedeqiyaasa, <sup>2</sup> Saraaya, Azaariyaa, Ermmaasa, <sup>3</sup> Paashihuura, Amaariyaa, Malkkiyaa, <sup>4</sup> Haxxuusha, SHabaaniyaa, Malluuka, <sup>5</sup> Hariima, Maremoota, Obaadiyaa, <sup>6</sup> Daaneela, Ginnetoona, Baaruka, <sup>7</sup> Mashulaama, Abiyya, Miyamiina, <sup>8</sup> Ma7aaziyaa, Bilggaayanne SHamaa7iyaa.

<sup>9</sup> Leewatuppe: Azaaniyaa na7aa Yaasa, Henadaada yara gidiiya Biinuya, Qadimi7eelanne <sup>10</sup> eta ishantta SHabaaniyaa, Hodiya, Qaliixa, Palaaya, Hanaana, <sup>11</sup> Miika, Rahooba, Hashaabiyya, <sup>12</sup> Zakkuura, SHerebiyya, SHabaaniyaa, <sup>13</sup> Hodiya, Baananne Baniina.

<sup>14</sup> Qassi asaa kaalettiyaageetuppe: Par77oosha, Paahati-Moo7aaba, Elaama, Zatta, Baana, <sup>15</sup> Buuna, Azggaada, Bebaaya, <sup>16</sup> Adooniyaa, Bigiwaaya, Adiina, <sup>17</sup> Axeera, Hizqqiyaasa, Azuura, <sup>18</sup> Hodiya, Hashuuma, Bexaaya, <sup>19</sup> Hariifa, Anatoota, Nebaaya, <sup>20</sup> Maagippi7aasha, Mashulaama, Heziira, <sup>21</sup> Mashezaabeela, Xaadooqa, Yadduu7a, <sup>22</sup> Palaaxiyaa, Hanaana, Anaaya, <sup>23</sup> Hoshee7a, Hanaaniyaa, Hashshuuba, <sup>24</sup> Halloheesha, Piiliha, SHobeeqa, <sup>25</sup> Rehuuma, Hashaabina, Ma7iseeya, <sup>26</sup> Akiiya, Hanaana, Anaana, <sup>27</sup> Malluuka, Hariimanne Ba7aana.

### *Israa7eela Asai Maacettido Maachchaa*

<sup>28</sup> Qassi attida asaikka qeeseti, Leewati, penggiyaa naagiyaageeti, mazamuriyaa yexxiyaageeti, Beeta Maqidasiyaa ashkkaratinne Xoossaa higgiiyaassi azazettanau Aihuda gidennaageetuppe banttana shaakkida ubbai, qassi eta machchoti, eta attuma naati, eta macca naatinne yohuwaa akeekanau asa gamma gakkida ubbai, <sup>29</sup> banttana kaalettiyaageetuura ha caaquwan maayettidosona. Hegeekka ba ashkkaaraa Muuse baggaara Xoossai etayyo immido higgiiyaadan baanau, GODAA bantta Xoossaa azazuwaa, pirddanne wogaa naaganaassanne oottanaassa. Hegee xayikko, Xoossai yeddiyo qanggettai bantta bolli yaanaadan maayettidosona.

<sup>30</sup> Eti hagaadan yaagidi maacidosona; “Nu macca naata Aihuda gidenna biittaa attuma naatussi immokko; qassi eta macca naatakka nu attuma naatussi machcho oottidi ekkokko.

<sup>31</sup> “Aihuda gidenna biittaa asati kattaa gidin woi harabaa aibanne Sambbata gallassi woi hara baala gallassi baizzanau ehiikko, etappe shammokko.

“Laappuntta laittai gakkiyo wode wode, nu biittaa goyokko; nuuni tal77ido acuwaakka oichchokko.

<sup>32</sup> “Beeta Maqidasiyaa oosuwaassi ichchashu giraame deexxiya biraa laittan laittan aggennan immana. <sup>33</sup> Hegee aibissee giikko, GODAA sinttan wottiyo oitaassa, hachchi hachchi yarshshiyo kattaa yarshshuwaassa, xuuggiyo yarshshuwaassi shukkiyo mehiyaassa, Sambbata gallassan, aginai xeeriyo wodenne laittan de7iya hara baalatun yarshshiyo yarshshuwaassanne hara geeshsha miishshatu ubbaassa; qassi Israa7eela asaa nagaraa atto giissanau yarshshiyo yarshshuwaassanne nu Xoossaa Beeta Maqidasiyaa oosuwaassi koshshiya ubbabaassa.

<sup>34</sup> “Nuuni qeesetuyyo, Leewatuyyoonne hara asa ubbaayyo saamaa yeggida. Aissi giikko, higgian xaafettidoogaadan GODAASSI, nu Xoossaassi, yarshshiyoosan yarshshuwaa xuuggiyo mittaa nu Xoossaa Beeta Maqidasiyau o yarai ehaanau bessiyaakko eranaassa.

<sup>35</sup> “Laittan laittan nu biittaa aifiyaappe koiro gakkiaagaanne aifiyaa immiya dumma dumma mittatuppe nuuni koiro maxido aifiyaa ubbaa GODAA Beeta Maqidasiyaa aggennan ehiidi sheedhdhana.

<sup>36</sup> “Higgian xaafettidoogaadan nuuni ubbaikka koiro yelettiya nu attuma naata nu Xoossaa Beeta Maqidasiyan oottiya qeesetukko ehiidi, Xoossaassi dummayana; qassi nu miizzati, nu dorssatinne nu deeshshati yeliyo koiro maraa ubbaakka yaa ehiidi, qeesetussi sheedhdhana.

<sup>37</sup> “Nuuni nu biittan morkkida kattaa aifiyaappe koiruwaa, qassi nu mitta ubbaa aifiyaa, woiniyaanne zaitiyaa imota oottidi, nu Xoossaa Beeta Maqidasiyaa haa qeesetukko ehaana. Qassi Leewati nu katamatun de7iya biitta ubbaa aifiyaappe asirataa ekkiyaageeta gidiyo gishshau, nu biittai aifidobaappe ubbaappe asirataa etayyo immana. <sup>38</sup> Leewati asirataa shiishshiyo wode, Aarona yara gidiya qeeseti etaara issippe de7anau bessees. Leewatika asirataa shiishshoogaappe guyyian, asirataappe kessido asirataa nu Xoossaa Beeta Maqidasiyaa ehiidi, miishshaa wottiyo kifiliyan wottoosona. <sup>39</sup> Israa7eela asainne Leewati kattaa, woiniyaanne wogaraa zaitiyaa imotaa, Beeta Maqidasiyaa miishshatinne Beeta Maqidasiyan oottiya qeeseti, penggiyaa naagiyaageetinne mazamuriyaa yexxiyaageeti de7iyo kifileta ehoosona.

“Nuuni nu Xoossaa Beeta Maqidasiyaa oosuwaa mulekka shenhoo gookko” yaagidi caaqqidosona.

## 11

### *Yerusalaamen De7iya Asaa*

<sup>1</sup> Asaa kaalettiyaageeti Yerusalaamen de7idosona. Qassi hinkko asaappekka tammaappe issoi issoi geeshsha kataman Yerusalaamen de7ana mala, saamaa yeg-gidi dooridosona. SHin hara uddufun kushe asai bantta katamatun de7idosona.

<sup>2</sup> Yerusalaamen de7anau bantta sheniyann maayida asaa ubbaa asai anjjiis.

<sup>3</sup> Hara katamatun de7iya Israa7eela asai, qeeseti, Leewati, Beeta Maqidasiyaa ashkkaratinne Solomona ashkkaratu yarati ubbai bantta kataman kataman de7iya gadiyaa oiqqidi de7idosona. SHin hagaappe kaallidi xaafettidaageeti, Yerusalaamen de7anau yiida biittaa kaalettiyaageeta.

<sup>4</sup> Yihudaa zariyaappe yiida kaalettiyaageeti Paareesa yara gidiya Ataayanne SHEela yara gidiya Ma7iseeya. Ataayi Ooziyaana na7aa; Ooziyaani Zakkaariyaasa na7aa; Zakkaariyaasi Amaariyaa na7aa; Amaaree SHafaaxiyaa na7aa; SHafaaxee Malaali7eela na7aa. <sup>5</sup> Ma7iseeyi Baaruka na7aa; Baaruki Kolihoosa na7aa; Kolihoosi Hazaaya na7aa; Hazaayi Adaaya na7aa; Adaayi Yoyaariiba na7aa; Yoyaariibi Zakkaariyaasa na7aa. <sup>6</sup> Paareesa yaraappe wolqqaama gidida oiddu xeetanne usuppun tammanne hospun asati Yerusalaamen de7idosona.

<sup>7-8</sup> Biniyaama zariyaappe yiida kaalettiyaageeti Saala, Gabbaayanne Sallaaya. Saalu Mashulaama na7aa; Mashulaami Yo7eeda na7aa; Yo7eedi Padaaya na7aa; Padaayi Qolaaya na7aa; Qolaayi Ma7iseeya na7aa; Ma7iseeyi Iti7eela na7aa; Iti7eeli Yishaa7iyaa na7aa. Muleera uddufun xeetanne laatamanne hosppun Biniyaama zareti Yerusalaamen de7idosona. <sup>9</sup> Ziikira na7ai Yuu7eeli eta halaqaa; qassi Hassanuu7a na7ai Yihudai kataman naa77antto maaragee de7iyo halaqa.

<sup>10-11</sup> Qeesetuppe yiida kaalettiyaageeti Yoyaariiba na7aa Yadaaya, Yaakiinanne Saraaya. Saraayi Hilqqiyaa na7aa; Hilqqee Mashulaama na7aa; Mashulaami Xaadooqa na7aa; Xaadooqi Maraayoota na7aa; Maraayooti Xoossaa Beeta Maqidasiyaa halaqa gidida Ahixuuba yara. <sup>12</sup> Etaara issippe Xoossaa Beeta Maqidasiyaa oosuwa ootti-daageeti muleera hosppun xeetanne laatamanne naa77a. Qassi hara kaalettiyaagee Adaaya; Adaayi Yirohaama na7aa; Yirohaami Palaaliyaa na7aa, Palaalee Amoxa na7aa; Amoxi Zakkaariyaasa na7aa; Zakkaariyaasi Paashihuura na7aa; Paashihuuri Malkkiyaa na7aa. <sup>13</sup> Adaayaara issippe de7iya asai muleera naa77u xeetanne oitamanne naa77a. Qassikka hara kaalettiyaagee Amaashasaaya; Amaashasaayi Azaari7eela na7aa; Azaari7eeli Ahizaaya na7aa; Ahizaayi Mashilemoota na7aa; Mashilemooti Imeera na7aa. <sup>14</sup> Amaashasaayaara issippe de7iya olanchchati muleera issi xeetanne laatamanne hosppuna. Qeesetu halaqai Haggidoolima na7aa Zabddi7eela.

<sup>15</sup> Leewatuppe yiida kaalettiyaageetuppe issoi SHamaa7iyaa; SHamaa7ee Hashshuuba na7aa; Hashshuubi Aziriqaama na7aa; Aziriqaami Hashaabiya na7aa; Hashaabee Buuna na7aa. <sup>16</sup> Qassi harati SHabbataayanne Yozabaada; eti Xoossaa Beeta Maqidasiyaappe kareera oosettiya oosotussi aawatiya Leewatu halaqata. <sup>17</sup> Qassikka harai Mataaniyaa; i galataa woosaa woossiyo wode galataa mazamuriyaa yexxiyaageetussi halaqa; i Asaafa yaraappe yelettida Zabdda na7aa na7aa, Miika na7aa. Banaara issippe yexxiyaageetu gididon Baaqibuuqee naa77antto. Qassi haraikka Abdda; i SHAamu7a na7aa; SHAamu7i Galaala na7aa; Galaali Yidutuuna na7aa. <sup>18</sup> Muleera xeetanne hosppun tammanne oiddu Leewati geeshsha kataman Yerusalaamen de7idosona.

<sup>19</sup> Penggiyaa naagiyaageetuppe Aqquuba, Xalmoonanne etaara issippe oottiya hara issi xeetanne laappun tammanne naa77ata.

<sup>20</sup> Attida qeeseti, Leewatinne Israa7eela asai ubbai bantta gadee de7iyoosan de7iyoosan dumma dumma Yihudaa katamatun de7idosona. <sup>21</sup> SHin Beeta Maqidasiyaa ashkharati Yerusalaame kataman issi baggaara de7iya Ofeela giyo heeran de7idosona. Xiihinne Gishppinne naa77ai eta kaalettiyaageeta.

<sup>22</sup> Yerusalaamen de7iya Leewatussi halaqai Uzza. I Baana na7aa; Baani Hashaabiya na7aa; Hashaabee Mataaniyaa na7aa; Mataanee Miika na7aa. Uzzi Beeta Maqidasiyan yexxiyaageetussi halaqa gidiya Asaafa yara. <sup>23</sup> Eti hachchi hachchi oottanabau kawuwaappe etayyo imettida azazoi de7ees.

<sup>24</sup> Yihudaa na7aa Zaraaha yaraappe yelettida Mashezaabeela na7aa Pataahee Israa7eela asaa xeelliyaa ubbabaassi eta doona gididi, kawuwaa matan de7ees.

### *Hara Qeeri Katamatun De7ida Asaa*

<sup>25</sup> Asaappe daroti bantta goshshaa goshshaa matan de7iya qeeri katamatun de7idosona. Hegaa gishshau, Yihudaa zareti Qiriyaati-Arbbaa7an, Diboonan, Yaqabxxi7eelaanne heгаа heeran de7iya qeeri katamatun de7idosona. <sup>26</sup> Eti qassi Yaasun, Molaadan, Beeti-PHaleexan, <sup>27</sup> Haxaari-SHu7aalan, Berssaabehaanne heгаа heeran de7iya qeeri katamatun, <sup>28</sup> Xiqilaagan, Makoonaanne heгаа heeran de7iya qeeri katamatun de7idosona. <sup>29</sup> Qassikka Enirimmoonan, Xor77aaninne Yarmmuutaanikka de7idosona. <sup>30</sup> Hegaa xalla gidennan Zaanooan, Adulaamaaninne heгаа heeran de7iya qeeri katamatuuninne Laakishaanne heгаа heeran de7iya

goshshan, qassi Azeeqaaninne hegaa heeran de7iya qeeri katamatuunikka de7idosona. Hegaa gishshau, Yihudaa asai muleera Berssaabehappe biidi, Hinnooma Zanggaaraa gakkanaashin de7iya sohuwan de7idosona.

<sup>31</sup> Biniyaama zareti Beeteleeninne hegaa heeran de7iya qeeri katamatuuninne Gebaa7an, Mikimaasan, Aayan, <sup>32</sup> Anatootan, Nooban, Anaaniyan, <sup>33</sup> Haxooran, Raaman, Gittaiman, <sup>34</sup> Hadiidan, Xabo7iiman, Nabalaaxan <sup>35</sup> Loodan, Ooononinne Kushe Hiillatu Zanggaaraa giyoosankka de7idosona. <sup>36</sup> Yihudan de7ida Leewatuppe daroti Biniyaama asaara issippe de7anaadan oosettidosona.

## 12

### *Omooduwaappe Simmida Qeesetunne Leewatu Sunttaa*

<sup>1</sup> Salaatiyaala na7aa Zarubaabeelaaranne qeese ubbatu halaqaa Yaasuura omooduwaappe simmida qeeseti hageeta: Saraaya, Ermmaasa, Izira, <sup>2</sup> Amaariyaa, Malluuka, Haxxuusha, <sup>3</sup> SHakaaniyaa, Rehuuma, Maremoota, <sup>4</sup> Idda, Ginnetoona, Abiiya, <sup>5</sup> Miyamiina, Ma7aadiyaa, Bilgga, <sup>6</sup> SHamaa7iyaa, Yoyaariiba, Yadaaya, <sup>7</sup> Saala, Amooka, Hilqqiyaanne Yadaaya. Hageeti Yaasu laittan qeesetussinne qeesetu yaratussi halaqa gididaageeta.

<sup>8</sup> Etaara issippe simmida Leewati Yaasa, Biinuya, Qaadimi7eela, SHerebiyaa, Yihudaanne Mataaniyaa. Mataanee hara banaara oottiyaageetuura issippe galataa mazamuriyaa yexxiyaageetussi halaqa. <sup>9</sup> Etaara issippe yexxiya Baaqibuuqeenne Unnoo etappe sinttaara haa simmi eqqidi yexxoosona.

<sup>10</sup> Yaasu Yoyaaqiima yeliis; Yoyaaqiimi Eliyaashiba yeliis; Eliyaashibi Yoyaadaa7a yeliis; <sup>11</sup> Yoyaadaa7i Yonaataana yeliis; Yonaataani Yadduu7a yeliis. <sup>12</sup> Yoyaaqiimi qeese ubbatu halaqa gidido laitti, hagaappe kaallidi xaafettidaageeti, qeesetu yaratu halaqa gididosona.

Saraaya yaraa halaqai Maraaya.

Ermmaasa yaraa halaqai Hanaaniyaa.

<sup>13</sup> Izira yaraa halaqai Mashulaama.

Amaariyaa yaraa halaqai Yahohanaana.

<sup>14</sup> Malluuka yaraa halaqai Yonaataana.

SHabaaniyaa yaraa halaqai Yooseefa.

<sup>15</sup> Hariima yaraa halaqai Adiina.

Maraayoota yaraa halaqai Hilqqaaya.

<sup>16</sup> Iddo yaraa halaqai Zakkaariyaasa.

Ginnetoona yaraa halaqai Mashulaama.

<sup>17</sup> Abiiya yaraa halaqai Ziikira.

Miniyaaminanne Ma7aadiyaa yaraa halaqai Pilxxaaya.

<sup>18</sup> Bilgga yaraa halaqai SHaamu7a.

SHamaa7iyaa yaraa halaqai Yonaataana.

<sup>19</sup> Yoyaariiba yaraa halaqai Matanaaya.

Yadaaya yaraa halaqai Uzza.

<sup>20</sup> Sallaaya yaraa halaqai Qaallaaya.

Amooka yaraa halaqai Ebeera.

<sup>21</sup> Hilqqiyaa yaraa halaqai Hashaabiyaa.

Yadaaya yaraa halaqai Nataani7eela.

<sup>22</sup> Leewatu halaqati Eliyaashibi, Yoyaadaa7i, Yohanaaninne Yadduu7i qeese halaqa gidido dumma dumma laittan xaafettidosona. Qassi qeeseti Parsse biittaa asa gidiya Daariyoosi kawotido laittan xaafettidosona. <sup>23</sup> Gido shin, Leewatu yaratu halaqati mazggafan xaafettidoi Eliyaashiba na7aa na7aa Yohanaani haiqqana gakkanaashin de7iya wodiyaa xalaalaana.

<sup>24</sup> Leewata kaalettiyaageeti Hashaabiya, Shebiyaanne Qaadimi7eela na7aa Yaasa. Eti Xoossa asa gidiya Kawoi Daawiti azazidoogaadan, naa77an shaahetti eqqidi, kayan kayan Xoossaa bonchchoosanne ayyo galataa mazamuriyaa yexxoosona.

<sup>25</sup> Beeta Maqidasiyaa gimbbiyaa penggiyaa matan keexettida dumma dumma miishshaa wottiyo keettaa naagiyaageeti Mataaniyaa, Baaqibuuqiyaa, Obaadiyaa, Mashulaama, Xalmoonanne Aqquuba giyoogeeta. <sup>26</sup> Hageeti Yoxedeeqa na7aa na7aa, Yaasu na7aa Yoyaaqiimi, biittaa haariyaa Nahimeenne qeesenne xaafe gidiya Iziri de7ido laittan oottidosona.

### *Nahimee Yerusalaame Katamaa Gimbbiyaa Anjissiyo Baalaa Oottiis*

<sup>27</sup> Yerusalaame gimbee gimbettidi wurido baalaa bonchchiyo wode, Leewati bantta de7iyo sohuwaappe sohuwaappe koyettidi, Yerusalaame yiidosona; yiidi daalan, diittaaanne maazinggiyan galataa mazamuriyaa ufaissan yexxiiddi, baalaa puulayidosona. <sup>28</sup> Ha baalaa bonchchanau Leewatu zareti, mazamuriyaa yexxiyaageeti ubbai bantta keexxidi uttido Yerusalaame yuushuwaappenne Naxoofatu biittan de7iyya qeeri katamatuppe, <sup>29</sup> Beeti-Gelgalappe, Gebaa7appenne Azimaawetappe shiiqettidi yiidosona. <sup>30</sup> Hegaappe guyyiyan, qeesetinne Leewati bantta huuphiyau geeyidosona; qassi asai ubbai, gimbbiyaa penggetinne gimbee Xoossaassi geeyanaadan oottiyo wogaa polidosona.

<sup>31</sup> Taani Yihudaa kaalettiyaageeta gimbbiyaa bollan shiishshaas; qassi mazamuriyaa yexxiyaageetakka naa77u citan shaakkada Xoossaa galatana mala oottaas. Issi citai gimbbiyaa huuphiyaara ushachchi simmidi, Pituwaa Oliyo Penggiyaa baggau biis. <sup>32</sup> Hoshayinne Yihudaa kaalettiyaageetuppe baggati etappe guyyeera kaalloosona. <sup>33</sup> Harati qassi etaara de7iyyaageeti Azaariyaa, Izira, Mashulaama, <sup>34</sup> Yihudaa, Biniyaama, SHamaa7iyaa, Ermmaasanne <sup>35</sup> xurumbbaa oiqqida qeeseta. Qassi etappe guyyeera yiidaagee Zakkaariyaasa; Zakkaariyaasi Yonaataana na7aa; Yonaataani SHamaa7iyaa na7aa; SHamaa7ee Mataaniyaa na7aa; Mataanee Mikaaya na7aa; Mikaayi Zakkuura na7aa; Zakkuuri Asaafa na7aa. <sup>36</sup> Zakkaariyaasa yara gidiya SHamaa7ee, Azaari7eeli, Milalaayi, Gilalaayi, Ma7aayi, Nataani7eeli, Yihudainne Hanaani Xoossaa asa gidiya Daawiti Xoossaassi yexxiyo wode go7ettiyo yetta miishsha ubbaa ekkidi, Zakkaariyaasappe guyyeera kaallidosona. Eta citaa kaalettiyaagee xaafiyaa Izira. <sup>37</sup> Pulttuwaa Penggiyaakko gakkooaappe guyyiyan, Daawita Katamaakko simmidi, gimbbiyaa bollan de7iyya xekkaa kiyidosona; kiyidi Daawita keettaa aadhdhidi, katamaappe arshsho baggaara de7iyya Haattaa Penggiyaakko biidosona.

<sup>38</sup> Naa77antto mazamuriyaa yexxiyaageetu citai gimbbiyaa huuphiyaa oiqqidi, haddirssi simmidi biis. Taani asaappe baggaara issippe gidada etappe guyyeera kaallaas. Itoone Adussa Gimbbiyaappe aadhdhidi, Aho Gimbbiyaa giyo sohuwaa gakkida. <sup>39</sup> Qassi hegaappekka simmin, Efireema Penggiyaa, Gal77a Penggiyaa, Moliyaa Penggiyaa, Hanaani7eela Adussa Gimbbiyaanne Xeetu Adussa Gimbbiyaa gakkanaashinkka biida. Wurssettan Dorssaa Penggiyaa mataara biidi, Naagiyaageetu Penggiyaa gakkidi eqqida.

<sup>40</sup> Mazamuriyan Xoossaa galatiya naa77u citaikka Xoossaa Beeta Maqidasiyaakko gakkidosona; qassi taanikka tanaara issippe de7iyya kaalettiyaageetuura gakkaas.

<sup>41</sup> Nuuppe harati hagaappe kaallidi xaafettida, xurumbbaa punniya qeesetikka gakkidosona. Hegeetikka Eliyaaqiima, Ma7iseeya, Miniyaamina, Mikaaya, Eliyoo7enaaya, Zakkaariyaasanne Hanaaniyaa. <sup>42</sup> Eta kaallidi gakkidaageeti Ma7iseeya, SHamaa7iyaa, El77aazara, Uzza, Yahohanaana, Malkkiyaa, Elaamanne Exeera. Nuuni ubbai dendi eqqooaappe guyyiyan, mazamuriyaa yexxiyaageeti Yiziraahaa eta kaalettin, bantta cenggurssaa xoqqu oottidi yexxidosona.



<sup>43</sup> He gallassi daro yarshshuwaa asai Xoossaassi yarshshiis; aissi giikko, Xoossai eta gita ufaissan ufaissii; macca asaikka naatika ufaittidosona. Hegaa gishshau, Yerusalaame asai ufaittiyo ufaissai haahuwan siyettiis.

<sup>44</sup> He gallassi asai immiyo imotataa, asirataanne laittan ka77iyaa kattaa aifiyaappe koiruwaa shiishshidi, miishshata wottiyo keettan wottidi, naagiya halaqata doori-dosona. Ha doorido asati dumma dumma katamatun de7iya shooqatuppe higgee azaziyoogaadan, qeesetussinne Leewatussi bessiya qommuwaa shiishshoosona. Aissi giikko, Yihudaa asai ubbai qeesetuuninne Leewatun keehippe ufaittidosona. <sup>45</sup> Eti Xoossai azazidobaa oottidosona; qassi geeyiyo wogaakka polidosona. Eta xalla gidennan, mazamuriyaa yexxiyaageetinne penggiyaa naagiyaageeti Daawitinne a na7aa Solomoni azazido oosuwaa polidosona. <sup>46</sup> Kase Daawitanne Asaafa wodiyaappe doommidikka mazamuriyaa yexxiyaageetu citaa kaalettiyaageeti Xoossaa yettan galatanaanne bonchchanau de7iyoogee erettidi de7iyaabaa. <sup>47</sup> Zarubaabeela laittaaninne Nahimiyaa laittan Israa7eela ubbai mazamuriyaa yexxiyaageetussinne penggiyaa naagiyaageetussi bessiya qommuwaa hachchi hachchi immidosona; qassi Leewatusikka etau dummayido qommuwaa immidosona. Leewatikka qassi Aaroona yarata gidiya qeesetussi etayyo dummayido qommuwaa immidosona.

## 13

### *Israa7eela Asai Allaga Asaappe SHAahettiis*

<sup>1</sup> He gallassi asai ubbai siyishin, Muuse Maxaafai nabbabettiis; he wode eti, “Moo7aaba biittaa asainne Amoonaa biittaa asai Xoossaa maabaran gaittanau bessenna” giya sohuwaa maxaafaa gidon demmidosona. <sup>2</sup> Aissi giikko, Israa7eela asai Gibxxeppe kiyidi, Kanaane biyo wode, Moo7aabanne Amoonaa biittaa asai etau kattaanne haattaa immennan ixxidosa. Hegaa bollikka qassi Israa7eela asaa qangana mala, Balaamassi miishshaa immidi shammidosona. Gido shin, nu Xoossai qanggettaa anjuwau laammiis. <sup>3</sup> Ha higgiiyaa Israa7eela asai siyido wode, allaga zare walahai de7iyo ubbaa Israa7eelappe shaakkiis.

### *Nahimee Moorettida Wogaa Ooraxissii*

<sup>4</sup> Hegaappe kasetidi, Beeta Maqidasiyan miishshata wottiyo kifiletussi halaqa gidiya Eliyaashibi Xoobbiyaara dabbotaa medhdhi uttiis. <sup>5</sup> Hegaappe denddidaagan kattaa imotaa, ixaanaa, Beeta Maqidasiyan de7iya dumma dumma miishshata, kattaappe woiniyaappenne zaitiyaappe Leewatussi, mazamuriyaa yexxiyaageetussinne penggiyaa naagiyaageetussi immiyo asirataanne qeesetussi immiyo qommuwaa wottiyo wogga kifiliyaa Eliyaashibi Xoobbee aqana mala, ayyo giigissii.

<sup>6</sup> Ha ubbabi haniyo wode taani Yerusalaamen de7ikke. Aissi giikko, Arxxekssiisi Baabiloone biittan kawotido hasttamanne naa77antto laittan taani simmada Baabiloone biittaa kawuwaakko baichchaas. Gido shin, guutta wodiyaappe guyyiyan, kawuwaa oichchada, <sup>7</sup> Yerusalaame simmada yaas. Yaada Xoossaa Beeta Maqidasee de7iyoosan Eliyaashibi Xoobbiyaassi aqiyo kifiliyaa giigissidi, i oottido iitabaa akeekaas. <sup>8</sup> Keehi yiillotada, Xoobbiyaa so miishshaa muliyaa kifiliyaappe kessada, kare olaas. <sup>9</sup> Kifiliyaakka qassi wogaadan geeshshana mala azazaas. Xoossaa Beeta Maqidasiyaa miishshata, kattaa, imotaanne ixaanaa zaarada he sohuwaa gelissaas.

<sup>10</sup> Qassi asai Leewatussinne mazamuriyaa yexxiyaageetussi bessiya qommuwaa immibeenna gishshau, Leewatinne mazamuriyaa yexxiyaageeti ubbai bantta oosuwaa aggidi, goshshau guyye biidoogaa be7aas. <sup>11</sup> Hegaa gishshau, taani halaqata, “Xoossaa Beeta Maqidasiyaa oosuwaa aissi oli aggidetii?” yaagada hanqqettaas. Hegaappe guyyiyan, eta xegada ubbaakka eta oosuwau oosuwau zaaraas. <sup>12</sup> Yaatin, Yihudaa asai ubbai kattaappe, woiniyaappenne zaitiyaappe immiyo asirataa Beeta Maqidasiyaa miishshata wottiyo keettaa zaaridi, ehuwaa doommiis. <sup>13</sup> Taani qeesiyaa SHeleemiyaa,

xaafiyaa Xaadooqanne Leewiyaa Padaaya miishshaa wottiyo keettau halaqa oottada sunttaas. Qassi Mataaniyaa na7aa na7aa Zakkuura na7ai Hanaani eta maaddiyaagaa. Hageeti ubbaikka koshshiyaabaa ubbaa bantta ishanttussi shaakki shaakki immiy-oogan ammanettiyaageeta gididosona.

<sup>14</sup> “Ta Xoossau tana qoppa; qassi ne Beeta Maqidasiyaa oosoi giigana mala, taani oottido lo77o oosuwaakka dogoppa” yaagada taani woossaas.

<sup>15</sup> He wodiyan taani Yihudan de7iya asai Sambbata gallassi woiniyaa gum77ishin be7aas; haratikka qassi kattaa, woiniyaa eessaa, woiniyaa aifiyaa, balasiyaa aifiyaanne hegeeta milatiyaabata bantta hariyan caanidi, Sambbata gallassan Yerusalaame ehiy-oogaa be7aas. Hegaa gishshau, eti Sambbata gallassan zal77ennaadan taani etau minttada yootaas. <sup>16</sup> Hegaa bollikka qassi Yerusalaamen de7iya Xiirsoosa biittaa asati moliyaanne hara issi issi zal77e miishshata ehiidi, Sambbatan Yerusalaamen Yihudaa asaassi baizzoosona. <sup>17</sup> Hegaa gishshau, taani Yihudaa kaalettiyaageetuura hagaadan yaagada ooyettaas; “Hagaa mala iita oosuwaa oottidi, Sambbataa aissi tunisseeetii? <sup>18</sup> Xoossai hagaa mala metuwaa nu bollaanninne nu katamaa bollan ehiidoogee, kase intte aawati hegaa mala iitabaa oottiina gidenneeyye? Ha77i intte qassi Sambbataa tunissidi, Israa7eela bollan hara hanqquwaa ehaanau haneeta” yaagaas.

<sup>19</sup> Hegaappe guyyiyan, Sambbata gallassaappe kasetidi de7iya gallassan sa7ai lem77iyo wode, Yerusalaame gimbbiyaa penggeti gorddettanaadaaninne Sambbatai aadhdhanaashin dooyettennaadan taani azazaas. Qassi Sambbata gallassan aiba zal77enne ekkidi gelennaadan naagana mala, ta ashkkaratuppe issoota issoota gimbbiyaa penggiyan essaas. <sup>20</sup> Hegaa gishshau, dumma dumma zal77e miishshata ehiya zal77anchchati issuwaappe biidi naa77aa gakkanaashin, Yerusalaame gimbbiyaappe gaxa baggaara aqidosa. <sup>21</sup> SHin taani eta hagaadan yaagada seeraas; “Gimbbiyaappe gaxaara waananau aqeeetii? Intte naa77antto hegaadan oottikko, taani wolqqankka inttena teqqana” yaagaas. He gallassaappe guyyiyan, naa77antto Sambbata galla mule yibookkona. <sup>22</sup> Leewati bantta huuphiyaa geeshshanaadaaninne Sambbata gallassaikka geeshsha gidana mala, gimbbiyaa penggeta naaganaadan taani azazaas.

“Ta Xoossau, ha ubbabaa gishshau, neeni tana qoppa; qassi ne aggenna siiquwaa gishshau, neeni taayyo qaretta” yaagada taani woossaas.

<sup>23</sup> He wode qassikka taani Yihudaa attuma asaappe issooti issooti machchiyo Ashd-dooda, Amoonanne Moo7aaba biittatuppe ekkidoogaa be7aas. <sup>24</sup> Ubba qassi iitabai eta naatuppe baggai Ashddooda biittaa woikko issi issi hara biittaa qaalan haasayooson-appe attin, bantta biittaa, Yihudaa qaalan haasayanau danddayokkona. <sup>25</sup> Taani etaara ooyettaasinne eta qanggaas; qassi etappe issoota issoota dechchada, eta huuphiyaa binnaanaa shoddaas. Hegaa xalla gidennan eti naa77antto bantta macca naata eta attuma naatussi immennaadaaninne eta macca naatakka banttassinne bantta attuma naatussi ekkennaadan Xoossaa sunttan caaqettaas. <sup>26</sup> Qassikka eta hagaadan yaagaas; “Kawoi Solomoni nagaraa oottidoogee allaga biittaa maccaasatuppe denddidaagaana gidenneeyye? Solomona mala kawoi hara daro biittaa kawotu gidonkka baawa; Xoossaikka a dosido gishshau, Israa7eela asaa ubbaa bollan kawoyiis. Gido shin, harai atto akka allaga biittaa maccaasati hagaa mala nagaraa ootissidosona. <sup>27</sup> Yaatin, nuunikka qassi intte zoriyaa siyidi, allaga maccaasaa ekkidinne hegaa mala iitabaa oottidi, Xoossaa naaqqaneeyye?” yaagaas.

<sup>28</sup> Qeese ubbatu halaqaa Eliyaashiba naatuppe issoi Yoyaadaa7a; shin a naatuppe issoi Beeti-Horoona katamaa asa gididiya Sanbbalaaxa na7iyo machchiis. Yaatin, taani a ta de7iyoosaappe yedettaas.

<sup>29</sup> “Ta Xoossau, hageeti qeesetettaa wogaa tunissidoogaanne neeni qeesetuuranne Leewatuura wottido qaalaa maachchaa kolidoogaa be7a” yaagada taani woossaas.

<sup>30</sup> Eta allaga gidiya yoho ubbaappe geeshshoogaappe guyyiyan, qeesetussinne Lee-watussi eta oosuwaa oosuwaa immaas. <sup>31</sup> Qassi yarshshuwaa xuuggiyo mittaikka wodiyan wodiyan yaana malanne asaikka bau aifidabaappe koiro aifiyaa imota oottidi ehaana mala, wogaa wottaas.

“Ta Xoossau, ne lo77otettan tana qoppa” yaagada taani woossaas.

## Astitiri Maxaafaa

### *Gidduwaa Erissuwaa*

Astitiri maxaafan odettida taariketi Parsse kawoi balggo balggo de7iyo sohuwan polettidaageeta. He taariketi ba gita xalaaninne ba asaa siiqiyo gita siiquwan, morkketi biittaappe xaissana haniyo ba asaa ashshida, Astitiro giyo Aihudatu minee taarikiyaa minttidi odoosona. Ha maxaafai Aihudati bonchchiyo, Puriima geetettidi erettiya baalaa doomettaanne a birshshettaa loittidi odees.

### *Kawiyaa Asxxiina Kawuwaa Arxxekssiisa Azazuwaa Ixxaasu*

<sup>1-2</sup> Hagee Kawoi Arxxekssiisi Hindde biittaappe Toophphiyaa biittaa gakkanaashin de7iya, xeetanne laatamanne laappun biittata haariyo wode hanidabaa. I uttidi haariyo waanna katamai Suusa geetettes.

<sup>3</sup> I kawotido heezzantto laittan, baappe garssaara haariyaageetusinne biittaa aisiyaageetussi gita gibiraa giigissiis. He gibiraa sohuwan Meedoonanne Parsse biittaa ola gadaawati, biittaa halaqatinne aisiyaageeti beettidosona. <sup>4</sup> Kawoi issi xeetanne hosppun tammu gallassaa kumettaa ba kawotettaa duretettaanne ba bonchcho angгаа ubbaa eta bessiiis.

<sup>5</sup> He gallassatuppe guyyiyan, kawoi qassikka hara laappun gallassau gam77iya gibiraa, Suusa kataman, duriyaappe manqquwaa gakkanaashin de7iya asa ubbaassi giigissiis. He gibirai kawo keettaa ataakilttiyaa sohuwan giigiis. <sup>6</sup> He sohuwan de7iya dabaabai, liinuwaappe dadettida boottanne salo milatiya magalashotun puulatti uttiis. Magalashotikka ochcha teera milatiya lo77o liinuwaa baqettan aattin, ibinabarade giyo shuchchaappe oosettida dizggiyaa bollan de7iya bira migidotun kaqetti uttidosa. Qassi worqqaappenne biraappe oosettida arssati, dumma dumma merai de7iyo al77o shuchchatuppenne inqgotuppe oosettida baasuwan maaran yegetti uttidosa. <sup>7</sup> Issoi issuwaappe dumma gidida worqqa burccukkuwan woine eessai asa ubbaassi imettes; kawoikka daro keha gidido gishshau, woine eessaassi zawi baawa. <sup>8</sup> SHin issi issi asi ba koyoogaa keenaa uyees; heгаа kawoi kasetidi, ba ashkkaratussi odi wottiiis.

<sup>9</sup> He wode Kawiyaa Asxxiinakka maccaasa ubbaassi gibiraa kawuwaa keettan giigissaasu.

<sup>10</sup> Gibirai doomettido laappuntta gallassi, Kawoi Arxxekssiisi woiniyaa eessaa alidi ufaittido wode, ba ashkkarata Mahumaana, Biztta, Harbboona, Biigita, Abaagita, Zetaaranne Karkkaasa geetettiya laappun mureessata xegidi, <sup>11</sup> “Kawiyo Asxxiino kawotaa kallachchaa goxissidi, haa ekki yiite” yaagidi azaziis. Aissi giikko, a keehippe puulanchcha gidiyo gishshau, halaqatinne asai ubbai o be7ana mala, kawoi koyiis. <sup>12</sup> SHin kawuwaa azazuwaa mureessati odin, Kawiyaa Asxxiina kawuwaa sinttau yeennan ixxaasu. Hegee kawuwaa hanqquwaa suulissiis.

<sup>13-14</sup> Hegaa gishshau, kawoi gita maatai de7iyo laappun Parssenne Meedoonaa suntata xeesidi gelissiis. Eti Karshshaana, SHetaara, Adimaata, Tarsseesa, Mereesa, Marssananne Mamukaana geettoosona. He asati aadhdhida eranchchanne he biittaa higgiiyaanne de7uwaa wogaa minttidi eroosona. Hagee malabaassi kawoi ubba wodekka eta oichchees. <sup>15</sup> Kawoi eta, “Taani, Kawoi Arxxekssiisi, ta mureessatu bolli kiittin, Kawiyaa Asxxiina ta azazuwaa polennan ixxaasu. Hegaa gishshau, higgee odiyo maaran o waatanau bessii?” yaagidi oichchiis.

<sup>16</sup> Oichchin etappe issoi, Mamukaani kawuwaa sinttaaninne halaqatu sinttan zaaridi, hagaadan yaagiis; “Kawiyaa Asxxiina kawuwaa xalaala gidennan de7ishin, a halaqata ubbaanne a kawotettaa gidдон de7iya asaa ubbaa naaqqaaasu. <sup>17</sup> Aissi giikko, ha kawotettaa gidдон de7iya maccaasai ubbai Kawiyaa Asxxiina oottidoogaa siyidi, ba azinaa azinaa karanau doommana. Etikka, ‘Kawoi Arxxekssiisi baakko yaanaadan

xeegissin, Kawiyaa Asxxiina ixxabeikkeeyye!’ yaagana. <sup>18</sup> Hega xalla gidennan, Parssenne Meedoonaa halaqatu maccaasati haggaa siyido wode, hachchi awai wullanaashinkka bantta azinata hegaadan giidi karana. Hegan maccaasatuppenne azinatuppe gidduwan ooshshai darana.

<sup>19</sup> “Hegaa gishshau kawuwau, neeni dosikko, Kawiyaa Asxxiina naa77antto ne sintti aadhdhennaadan teqqiya awaajuwaa kessa; he awaajoikka naa77antto laamettenna mala, Parssenne Meedoonaa higgiiyaa gidдон xaafetto. Hegaappe guyyiyan, a kawiyoo gidiyo bonchchuwaa ippe kehiya harannissi imma. <sup>20</sup> Aissi giikko, ha neeni aattido awaajoi ha gita kawotettan ubban odettiyo wode, issi issi maccaasiyaa dure gidin, manqqo gidin, shaakkennan ba azinaa bonchchana” yaagiis.

<sup>21</sup> Yaagin kawoinne a halaqati ha zoriyan ufaattidosona. Hega gishshau, Mamukaani giidoogaadan kawoi oottiis. <sup>22</sup> I ba kawotettaa gidдон de7iya dumma dumma biittatussi eta pitaliyaanne eta qaalan xaafidi, dabddaabbiyaa kiittiis; he awaajoi, issi issi azinaa ba keettaa keettaa aissiya halaqa gidiiyoogaa odees.

## 2

### *Asttira Kawiyoo Gidaasu*

<sup>1</sup> Hegaappe simmin, Kawuwaa Arxxekssiisa hanqqoi dochchiis; dochchin Kawiyaa Asxxiina oottidobaanne ikka i bollan kessido awaajuwaabaa qoppiis. <sup>2</sup> He wode kawo keettan oottiya ashkharati a haggaa yaagidosona; “Lo77o puulaara de7iya geela7o macca naata koyidi, kawuwaassi ehaana mala, <sup>3</sup> ne kawotettaa gidдон de7iya biittatu ubban halaqata suntta. Etikka lo77o puulaara de7iya geela7o macca naata dooridi, Suusa katamaa ehiidi, maccaasau giigida keettan wottona. Hegan he maccaasaa keettau halaafe gidiiya kawo mureessaa Hegaaya kushiyan eti de7ishin, eta puulaa loittiyaabai ubbai etau imetto. <sup>4</sup> Hegaappe guyyiyan, kawuwaa ubbaappe aadhdhada ufaissiya geela7iyaa Asxxiini sohuwan kawiyoo gidu” yaagidosona. Yaagin ha zoree kawuwaa ufaissido gishshau, kawoi hegaadan oottiis.

<sup>5</sup> Hegan Suusa kataman issi Marddikiyoosa giyo Aihuda biittaa asi de7ees. Ikka Yaa7iira na7aa; Yaa7iiri SHim77a na7aa; SHim77i Biniyaama zare gidiiya Qiisa na7aa. <sup>6</sup> Baabiloone Kawoi Naabukadanaxoori Yihudaa Kawuwaa Yo7aakiinanne hara Aihuda asaa olan omooddidi efido wode, Marddikiyoosi etaara issippe biidaagaa. <sup>7</sup> Gido shin, i he biittan de7iiddi, ba aawaa ishaa na7iyo, Ibraisxxe qaalan Hadaaso geetettiya Asttiro banaara wottidi dichchees. Asttira merankka qottankka keehi puulanchcha. I aawainne aayyiya haiqqoogaappe guyyiyan, Marddikiyoosi o efidi, ba macca na7iyo oottidi dichchiis.

<sup>8</sup> Kawoi kessido awaajuwaanne azazuwaa maaran, Suusa katamaa ehiido doorettida daro geela7otuppe issinna Asttiro. Akka yaada, maccaasau giigida keettaa halaafe gidiiya Hegaaya giyoogaa aawatettan uttaasu. <sup>9</sup> Hegaayi Asttiro be7ido wode, in keehippe ufaittiis; o dumma xeelliis. Yaatidi sohuwaarakka maanau dumma qumaanne bollaa gorppettiyo tishshaa iyyo immiis. Qassi iyyo oottanau kawo keettaappe doorettida laappun danggiriixeta sunttidi, maccaasau giigida keettan, kifile ubbaappe aadhdhidi lo77iya kifiliyan onne i danggiriixeta efidi wottiis.

<sup>10</sup> Marddikiyoosi iyyo kasetidi odidoogaadan, Asttira Aihuda asa gidiiyoogaa oossinne odabeikku. <sup>11</sup> Qassikka Marddikiyoosi Asttiri payyatettaanne iyyo haniyaabaa eranau, maccaasaa keettaa sinttaara hachchi hachchi yaanne haanne hettees.

<sup>12</sup> Geela7oti kawuwaakko gelanaappe kasetidi, issi laittaa kumettaa bantta puulaa loittiiddi gam77oosona; hegeekka, koiro usuppun aginaa karbbiyaa zaitiyan gorppettiiddi gam77idi, naa77antto usuppun aginaa qassi, lo77o sawiya shittuwan gorppettoosona. <sup>13</sup> Hegaappe guyyiyan, issi geela7iyaa kawuwaakko geliyo wodee gakkiiyo wode, ba koyido maayuwaa maaya puulattada, maccaasaa keettaappe kiyada, kawoi



de7iyoosaa gelausu. <sup>14</sup> Qammi gelada, kawuwaara aqidoogaappe hini baggan, wonttin maallado kiyausu. Kiyin kawo baakkoti de7iyo hara keettaa o efoosona. Efin he keettaassi halaafe gidiya kawo mureessai SHa7ishagaazi o naagees. Kawoi dosidinne i sunntaa xegidi, “Onakko ehiite” gaana xayikko, a naa77antto kawuwaakko gelanau danddayukku.

<sup>15</sup> Hegaa gidishin, kawuwaakko geliyo kayai Asttiro gakkiiis. Asttira Marddikiyoosa aawaa ishaa Abihaila na7iyo; Marddikiyoosi ba na7iyo kessidi dichchidooro. A maccaasau giigida keettau halaafe gidiya kawo mureessai Hegaayi zoridoogaadan maayuwaa maayaasu. O be7ida ubbai i puulaa nashshiiis. <sup>16</sup> Arxxekssiisi kawotido laappunnta laittan, Tebeeta giyo tammantta aginan Asttira kawoi de7iyoosaa gelaasu.

<sup>17</sup> Gelido wode, kawoi hara maccaasa ubbaappe aattidi, o dosiisinne hara geela7otu ubbaappe in ufaittiis. Hegaa gishshau, kawotaa kallachchaa i huuphiyan goxxidi, o Asxxiini sohuwan kawiyoo kessiis. <sup>18</sup> Hegaappe guyyiyan, kawoi Asttiri bonchchuwaassi gita gibiraa giigissiis. Giigissidi halaqatanne biittaa aissiyaageeta xeesiis. Qassi ba kawotettaa gidдон ufaissa baalai bonchchettana mala awaajjidi, imotaakka ba kehatettaa keenaa huuphiyan huuphiyan immiis.

### *Marddikiyoosi Kawuwaa SHemppuwaa Ashshiiis*

<sup>19</sup> Hegee hegaadan de7ishin, Marddikiyoosi kawuwaa keettan halaqa gididi sunntettiis. <sup>20</sup> Asttira Aihuda asa gidiyoogaa ha77i gakkanaashinkka oossinne odabeikku. O Marddikiyoosi, “Odoppa” giido gishshau, kase na7atettan azazettiyoogaadan, ha77ikka ayyo azazettaasu.

<sup>21</sup> Marddikiyoosi kawo keettan oottiiddi de7iyo wode, kawoi de7iyo kifileta geliyo penggiyaa naagiya kawo mureessatuppe naa77ati, Bigitaaninne Tereshi Kawuwaa Arxxekssiisa morkkidi, woranau maqettidosona. <sup>22</sup> Eta maqquwaa Marddikiyoosi siyidi, Kawee Asttirissi yootin, akka Marddikiyoosa sunntan kawuwaassi yootaasu. <sup>23</sup> Yootin kawoi yohuwaa loittidi, qoridi xeelliyo wode, yohoi tuma gididi beettin, he naa77u asata kocan kaqqidi woriis. Ha hanotettaikka Kawuwaa Arxxekssiisa Taarikiyaa Xaafiyo Maxaafan xaafettiis.

## 3

### *Hamaani Aihudata Xaissanau Maqettiis*

<sup>1</sup> Hegaappe guyyiyan, Kawoi Arxxekssiisi Hamaana giyo issi banaara oottiyaagaayyo sunntatettaa xoqqissidi, ba halaqatuyyo halaqa oottidi sunntiis. Hamaana aawai Ham-madaati Aihudatu morkkiyaa, Agaaga zare. <sup>2</sup> Kawoi azazi wottido gishshau, kawo keettaa penggen oottiya halaqati ubbati Hamaani kanttiyo wode, gulbbatidi a bonch-choosona. Gido shin, Marddikiyoosi Hamaanassi gulbbatennaanne bonchchennan ixxiis. <sup>3</sup> He wodiyan kawo keettaa penggen oottiya halaqati Marddikiyoosa, “Kawuwaa azazuwaa polennan aissi ixxai?” yaagidi, <sup>4</sup> hachchi hachchi odoosona; shin i eti odiy-oogaa siyanau koyibeenna. Ubba qassi, “Taani Aihuda asa gidiyo gishshau, Hamaanassi gulbbatanaanne a bonchchanau danddayikke” yaaggiis.

Hegaappe guyyiyan eti, “Ha Marddikiyoosi odiyo gaasuwa siyidi, Hamaani waananddeeshsha!” giiddi, ayyo yootidosona. <sup>5</sup> Marddikiyoosi baayyo gulbbatenna-gaanne bana bonchchennaagaa Hamaani erido wode, hanqquwaa tamaadan eexxi kiyiis. <sup>6</sup> Hegaa bollikka qassi, Marddikiyoosi Aihuda asa gidiyoogaa eriiis; eridi a xalaalaa qaxxayiyoogee laafabaa giidi qoppido gishshau, Arxxekssiisa kawotettaa gidдон de7iyya Aihuda zariyaa ubbaa woranau halchchiis.

<sup>7</sup> Arxxekssiisi kawotido tammanne naa77antto laittan, Niisaana giyo koiro aginan, Aihudata woriyo aginaanne gallassaa eranau, Puriima giyo saamaa a sinttan yeg-ganaadan, Hamaani azaziis. He saamai wodhdhido maaran, Adaare giyo tammanne

naa77antta aginan, tammanne heezzantto gallassai Aihudati wuriyo gallassa gidiyoogee qashettiis.

<sup>8</sup> Hegaappe guyyiyan, Hamaani Kawuwaa Arxxekssiisassi hagaadan yaagidi yootiis; “Ne kawotettaa gidдон mulesan laalettidi de7iya issi zare asati de7oosona; eta de7uwaa maarai hara asaagaappe dummer; heгаа xalla gidennan, eti kawuwaa higgiaaassikka haarettokkona. Hegaа gishshau, neeni eta de7ona gaada co77u giikko, hegee lo77o gidenna. <sup>9</sup> Hegaа gishshau kawuwau, ha qofai nena ufaissikko, ha asata wori xaissana mala, awaajuwaa kessa. Hegaа ne oottikko, taani heezzu xeetanne oitamu sha7u kilo giraame deexxiya biraa kawo buquraa minjiyo keettau gelissanaadan, ne kawotettaa aissiyaageetussi immana” yaagiis.

<sup>10</sup> Yaagin kawoi ba maataa erissanau awaajuwaa bolli wottiyo migido maatafaa ba biradhdhiyaappe kessidi, Aihudatu morkkiyaa, Agaaga zariyaa, Hammadaata na7aa Hamaanassi immiis. <sup>11</sup> Kawoi Hamaana, “Neeeni immana giido birai ne achchan de7o; shin ha asatu bolli ne dosidobaa ootta” yaagiis.

<sup>12</sup> Hegaа gishshau, koiro aginan, tammanne heezzantto gallassan, Hamaani kawuwaa xaafeta ubbata xeegiis. Xeeгidi, he awaajoi biitta ubban de7iya asaassi dummer dummer qaalaaninne dummer dummer pitaliyan xaafettidi, kawoppe garssaara biittaa haariyaageetukko, aaraajjaa haariyaageetukkonne dere halaqatu ubbaakko kiitettanaadan azaziis. Awaajoiikka Kawuwaa Arxxekssiisa sunttan xaafettidi, migido maatafai a bolli wodhdhoogaappe hini baggan, <sup>13</sup> eesotiya wottanchchati a kawotettaa biittaa ubbaa gattanaadan kiitettidosona. He awaajoi, “Adaare giyo tammanne naa77antto aginan tammanne heezzantto gallassan, Aihuda ubbaa, yelagaa cimaa, maccaa attumaa, naatakka ashshennan mexi issi gallassi wurssi worite; eta aquwaakka bonqqite” yaagees. <sup>14</sup> Hegaа gishshau, he keerido gallassai gakkiiyo wode, asi ubbi gigettanaadan, he awaajoi biittau ubbau kiitettiisinne asau ubbau awaajettiis.

<sup>15</sup> Kawuwaa azazuwan eesotiya wottanchchati biitta ubbaakka kiitaa gattidosona. Qassi Suusa katamankka odettiis. Yaatin, Suusa katamaa asai ubbai shabbirettiis. SHin kawuwaaranne Hamaanaara issippe uttidi, woiniyaa eessaa uyoosona.

## 4

### *Marddikiyoosi Asttiro Maaduwaа Woossiis*

<sup>1</sup> Marddikiyoosi ha hanidabaa ubbaa siyido wode, azzanidi ba maayuwaa pooshshiis; pooshshidi waaruwaa maayiiis; ba huuphiyanka bidinttaa qoliis. Ba cenggurssaakka xoqqu oottidi, misho yeehuwaa yeekkiiddi, katamaa gidдон yuuyiis. <sup>2</sup> Yuuyiiddi, kawo keettaa geliyo penggiyaa gakkanaashin biis; shin gelanau danddayibeenna. Aissi giikko, waaruwaa maayidi, kawo keettaa gelanau oossinne danddayettenna. <sup>3</sup> Kawuwaa awaajoi siyettido biitta ubban Aihudatu gidдон gita kayyoi, xoomai, yeehoinne zilaassai doomettiis. Etappe darotikka qassi waaruwaa maayidi, kayyottanau bidinttan uttidosa.

<sup>4</sup> Kawee Asttiri danggiriixetinne o naagiya mureessati yiidi, Marddikiyoosabaa iyyo odido wode, a keehippe azzanaasu. Azzanada Marddikiyoosi waaruwaa kessirggidi maayana mala, ayyo hara maayuwaa kiittaasu; shin i ekkennan ixxiis. <sup>5</sup> Hegaappe guyyiyan Asttira, kawoi iyyo oottanaadan wottido Hataaka giyo mureessaa xeeгada, Marddikiyoosa metoi aibakkonne qassi i aibissi kayyottiyaakkonne erana mala, akko kiittaasu. <sup>6</sup> Kiittin, Hataaki kawuwaa keettaa geliyo penggiyaa mata dabaaban de7iya Marddikiyoosakko biis. <sup>7</sup> Bin Marddikiyoosi, ba bolli gakkidabaa ubbaa qonccissidi, ayyo yootiis. Qassikka Aihudata worissi wurssanau Hamaani kawuwaa buquraa minjiyo keettau immanau geppido miishshaa likkiyaara ubbai attennan geeshshidi yootiis. <sup>8</sup> Hegaа xalla gidennan, Aihudata wurssanau Suusa kataman kiyida awaajoi xaafettido woraqaataakka Hataakassi immidi, heгаа Asttirissi immanaadaaninne

haniyaabaa ubbaa iyyo yootanaadan odiis. Qassi Asttira kawuwaakko gelada, ba asai wurennaadan gaannatana mala, Hataakassi yootiis.

<sup>9</sup> Hataaki yiidi, Marddikiyoosi kiittidobaa ubbaa Asttirissi yootiis. <sup>10</sup> Yootin Asttira Hataaka zaarada, Marddikiyoosakko hagaadan yaagada kiittaasu; <sup>11</sup> “Higgee, ‘Macca gidin, attuma gidin, ooninne xeegettennan de7iiddi, kawuwaara gaittanau kawo keettaassi giddo dabaabaa gelikko, haiqqo. SHin i xeegettennan kawuwaakko geliyo wode, kawoi worqqaappe oosettida ba kawotaa xam77aa xeeraa akko zaaridi bessikko, he uraa xalaalai atto’ yaagees. Ha higgiiyaa kawuwaara zorettiyaageetuppe biidi, coo asaa gakkanaashin de7iya asi ubbi erees. SHin taani hasttamu gallassa gidoosappe kawuwaakko gelanau xeegetta erikke” yaagaasu.

<sup>12</sup> Marddikiyoosi Asttira kiittido kiitaa siyidoogaappe guyyiyan, <sup>13</sup> iyyo zaaruwaa kiittiiddi, hagaadan yaagiis; “Neeni, ‘Taani kawo keettan de7iyo gishshau, hara Aihudatuppe attin, tana bochchiyaabi baawa’ gaada qoppoppa! <sup>14</sup> Neeni haga mala wodiyan co77u giikko, Aihudatussi maadoi harasaappe yaana. Etikka tumuppe attana; shin neeninne ne aawaa keettaa asai haiqqana. Neeni kawiiyo gidada yiidoogee haga mala wodiyaassakkonne ooni erii?” yaagiis.

<sup>15</sup> Asttira Marddikiyoosassi hagaadan yaagada zaarada kiittaasu; <sup>16</sup> “Ba; baada Suusa kataman de7iya Aihudata ubbaa issippe shiishsha. SHiiqidi xoomiiddi, taassi woossite. Heezzu gallassainne heezzu qammai wuranaashin, quma mooppite; haattaa uyoppite. Taanikka ta danggiriixetuura hegaadan xoomana. Hegaappe guyyiyan, i ubba higgiiyan teqettidaagaa gidikkokka, kawoi de7iyo sohuwaa taani gelana. Taani haiqqikkonne haiqqana” yaagaasu.

<sup>17</sup> Marddikiyoosi biidi, Asttira a azazidoogaadan mulebaa oottiis.

## 5

### *Asttira Gibiraa Giigissaasu*

<sup>1</sup> Xoomaa doommoosappe heezzantto gallassi Asttira kawotaa maayuwaa maayada, kawo keettan giddo dabaabaa gelada eqqaasu. He dabaabai kawoi uttiyo wuigiya baazzan de7ees. Kawoikka kawo keettaa geliyo penggiyaa baazzan de7iya, ba kawotaa araatan uttiis. <sup>2</sup> Kawiyaa Asttira gelada, giddo dabaaban eqqidaaro kawoi be7iis; be7idi in ufaittido gishshau, ba worqqa xam77aa ikko micciis. Akka shiiqada xam77aa xeeraa bochchaasu. <sup>3</sup> Kawoi o hagaadan yaagiis; “Kawee Asttiree, neeni taakko aibissi yaadii? Qassi neeni tana oichchiyoobai aibee? Harai atto ta kawotettaappe baggaa gidikkokka, taani neeyyo immana” yaagiis.

<sup>4</sup> Asttira zaarada hagaadan yaagaasu; “Kawuwau, nena ufaissiyaabaa gidikko, taani neeyyo giigissido gibiraa maanau neeninne Hamaani naa77ai hachchi omarsii yiyaakko dosais” yaagaasu.

<sup>5</sup> Hegaappe guyyiyan kawoi, “Nuuni Asttira giigissido gibiraassi baanau, Hamaana eesuwan ehiite!” yaagiis.

Yaagin naa77aikka he sohuwaa biidosona. <sup>6</sup> Eti issippe woiniyaa eessaa uyiiddi de7ishin, kawoi naa77anttuwaa Asttiro, “Neeni tana woossiyooobai aibee? Taani neeyyo immana. Qassi neeni tana oichchiyoobai aibee? Harai atto ta kawotettaappe baggaa gidikkokka, taani ne oishaa polana” yaagiis.

<sup>7</sup> Asttira zaarada hagaadan yaagaasu; <sup>8</sup> “Kawuwau, neeni tanan ufaittidabaa gidikko, qassi taani woossiyooobaa immanaunne ta oishaa polanau neeni dosiyaabaa gidikko, wontto ta giigissiiyo hara gibiraassi neeninne Hamaani yaanaadan oichchais. Taani ai koyiyaakko, he wode neessi qonccissana” yaagaasu.

### *Hamaana Maquwaa*

<sup>9</sup> Hamaani gibiraa sohuwaappe kiyidi biyo wode, keehippe ufaittido gishshau, ba wozanan poccu giiddi biis. SHin i kawo keettaa geliyo penggiyaa mataara aadhdhidi

biyo wode, hegan uttida Marddikiyoosa be7iis; ayyo denddibeennaagaanne yayyidi kokkoribeennaagaa akeekidi, Hamaani hanqquwaa eexxi kiyiis. <sup>10</sup> Gidikkonne, ba hanqquwaa danddayidi biidi, ba soo gakkiiis.

Hegaappe guyyiyan, ba laggetanne ba keettaayyiyo Zereesho issippe xeegissidi, <sup>11</sup> Hamaani ba durettaa likkiyaa, ba attuma naatu qoodaa, kawoi bana bonchchido bonchchuwaanne hara halaqatuppenne kawo oosanchchatuppe aadhdiya sunttatettaa ayyo immidi, waatidi a bonchchidaakko, etayyo gairiis. <sup>12</sup> Gujjidikka Hamaani hagaadan yaagiis; “Harai atto Kawiyaa Asttirakka ba giigissido gibiraassi kawuwaara baanau taappe attin, haraa oonanne xeegabeikku. Qassi wonttokka kawuwaara baanaadan tana xeesa wottaasu. <sup>13</sup> SHin he Aihudai Marddikiyoosi kawo keettaa geliyo penggen uttidaagaa be7iyo wode, ha ubbabaikka tana kalissenna” yaagiis.

<sup>14</sup> He wode a keettaayyiya Zereeshanne a laggeti ubbai hagaadan yaagidosona; “Neeni ishatamu wara adussa kocaa esissa; yaatada wontto guuraara Marddikiyoosi he kocan kaqettana mala, kawuwaa oichcha. Hegaappe guyyiyan, ufaittaidda gibiraa maanau ba” yaagidosona. Hamaana ha qofai ufaissido gishshau, eti giidoogaadan kocaa giigisissiiis.

## 6

### *Kawoi Marddikiyoosa Bonchchiis*

<sup>1</sup> He gallassi qammi kawuwaa xiskkoi efeennan ixxiis. Hegaa gishshau, kawoi Kawo Taarikiyaa Xaafiyo Maxaafaa ehiidi, hegan xaafettida, kase hanida taariketa ayyo nabbabana mala azaziis. <sup>2</sup> Nabbabettida taariketuppe issi Marddikiyoosi oottidobaa; hegeenne, kawoi de7iyo kifiliyaa naagiya, Bigitaananne Teresha giyo naa77u mureessati kawuwaa woranau maqettido maqquwaa Marddikiyoosi qonccissidoogaa. <sup>3</sup> Kawoi, “Yaatin, i haggaa qonccissidoogaassi ayyo imettida sunttatetta woi woi to aibee?” yaagiis.

Kawuwaa ashkkarati zaaridi, “Ayyo aibinne oosettibeenna” yaagidosona.

<sup>4</sup> Kawoikka zaaridi, “Kawo keettaa kare dabaaban oonee de7iyai?” yaagiis. He wode ba giigissido kocan Marddikiyoosa kaqqanau, kawuwaa oichchana giidi, Hamaani kawo keettaa kare dabaabaa geliiddi de7ees.

<sup>5</sup> Kawuwaa ashkkarati, “Hamaani hagan de7ees” yaagidosona.

Kawoi zaaridi, “Haa gela giite” yaagiis.

<sup>6</sup> Hamaani geloogaappe guyyiyan kawoi, “Kawoi bonchchanau dosiyo asayyo ai oottanau koshshii?” yaagidi oichchiis.

Hamaani, “Kawoi taappe haraa oona bonchchanau dosii?” yaagidi ba wozanan qoppiis. <sup>7-8</sup> Hegaa gishshau, Hamaani kawuwaassi yaagidi zaariis; “Kawoi bonchchanau dosiyo asaayyo kawoi maayido ba kawotaa maayuwaa ehiisso. Qassi ba toggiyo paraa huuphiyanka kallachchaa goxisso. <sup>9</sup> Hegaappe guyyiyan, banaara oottiya halaqatuppe issi keehi bonchchettidaagaa xeegissidi, kawotaa maayuwaa a maiz-zanaadaaninne kawuwaa paran a utissidi, katamaa dabaabaa kessanaadan azazo. Yaatobare he keehi bonchchettida halaqai a sinttan hemettiiddi, ‘Kawoi bonchchanau dosiyo urau hagaadan oottees’ yaagidi awaajjo” yaagiis.

<sup>10</sup> Yaagin kawoi zaaridi, Hamaana hagaadan yaagidi azaziis; “Hodde eesuwan dendda! Denddada kawotaa maayuwaanne ta paraa ekkada, ne giidoogaadan Aihudaa Marddikiyoosassi ootta. I kawo keettaa geliyo penggen de7ees. Ne giidobaappe issibaanne ashshoppa” yaagiis.

<sup>11</sup> Hegaa gishshau, Hamaani Marddikiyoosa kawotaa maayuwaa maizzidi, kawuwaa paraa bollan utissiiis. Qassi katamaa dabaaban appe sinttaara hemettiiddi, “Kawoi bonchchanau dosiyo urau hagaadan oottees” yaagidi awaajjiis.



<sup>12</sup> Hegaappe guyyiyan, Marddikiyoosi kawo keettaa pengge guyye simmidi biis. SHin Hamaani daro azzanido gishshau, ba som77uwaa gullettidi, eesotidi ba soo biis. <sup>13</sup> Biidi bana gakkidabaa ubbaa ba keettaayee Zereeshissinne ba laggetussi yootiis. Yootin eti a, “A sinttan neeni kauyyanau doommido ha bitanee, Marddikiyoosi, Aihuda asa gidikko, ne aara egettada, a xoonanau mulekka danddayakka; tumuppe i nena xoonana” yaagidosona.

### *Hamaani Kaqettiis*

<sup>14</sup> Eti biron hegaa haasayiiddi de7ishin, kawuwaa mureessati gakkidi, Hamaana Astitira giigissido gibiraassi eesoyiiddi efidosona.

## 7

<sup>1</sup> Efin kawoinne Hamaani Kawee Astitiri gibiraa maanau biidosona. <sup>2</sup> He naa77antto gallassa gibiraassi biidi, eti woiniyaa eessaa uyiiddi de7ishin, kawoi qassikka, “Kawee Astitiree, neeni woossiyoobai aibee? Taani neeyyo immana. Qassi neeni tana oichchiy-oobai aibee? Harai atto ta kawotettaappe bagгаа gidikkokka, taani ne oishaa polana” yaagidi oichchiis.

<sup>3</sup> Kawiyaa Astitira zaarada yaagaasu; “Kawuwau, neeni tanan ufaaittidabaa gidikko, qassi ta oishaakka polanau neeni dosidabaa gidikko, ta woosainne ta oishai taaninne ta asai haiqqennan attanaassa. <sup>4</sup> Aissi giikko, taaninne ta asai issoinne attennan wuri haiqqanau baizettida. Nuuni baizettidoogee macca aillenne attuma aille gididi de7anaassa gidiyaakko, taani co77u gaana; aissi giikko, hegaa mala metoi kawuwaa waissanau bessiyaabaa gidenna” yaagaasu.

<sup>5</sup> Kawoi Arxxekssiisi zaaridi, “Hegaa oottanau xalidaagee oonee? I he bitanee awan de7ii?” yaagidi Kawiyo Astitiro oichchiis.

<sup>6</sup> Oichchin Astitira, “Nu morkkee, nuna yedettiyaagee haggaa ha iitaa Hamaana” yaagaasu.

He wode Hamaani kawuwaa sinttaaninne kawee sinttan daro dagammiis. <sup>7</sup> Kawoi keehippe hanqqettidi, ba uttosaappe denddi eqqidi, kawo keettaa ataakilttiyaa sohuwaa biis. SHin Hamaani kawoi a bolli iitabaa ehaanau qachchirggidoogaa erido gishshau, Kawiyaa Astitira a haiquwaappe ashshana mala woossanau guyye attiis.

<sup>8</sup> Kawoi kawo keettaa ataakilttiyaa sohuwaappe simmidi, wontta eti woine eessa uyiyo sohuwaa geliyo wode, Hamaani Kawee Astitirippe maarotaa woossana giidi, a uttido arssaa bollan gufannidaagaa be7iis. Be7idi hanqquwaa eexxi kiyidi, ba qaalaakka xoqqu oottidi, “Laa ha bitanee hagan kawo keettan, ubba qassi ta sinttan, kawera zin77anau koyiyye?” yaagiis.

Kawoi biron hegaa haasayishin, kawo mureessati yiidi, Hamaana som77uwaa gulleidosona. <sup>9</sup> Qassi etappe issoi, Harbboona giyo mureessai, “Kawuwau, Hamaani nena haiquwaappe ashshida Marddikiyoosa kaqqana giidi essido ishatamu wara kocai a son de7ees” yaagiis.

Kawoi zaaridi, “Hamaana efidi, he kocan kaqqite!” yaagidi azaziis.

<sup>10</sup> Hegaa gishshau, Marddikiyoosa kaqqana giidi giigissido kocan Hamaani kaqettiis. Hegaappe guyyiyan, kawuwaa hanqqoi dochchiis.

## 8

### *Aihudati Bantta Morkketa Zaarettidi Olanaadan Odettiis*

<sup>1</sup> Aihudatu morkkee Hamaani kaqettido gallassi Kawoi Arxxekssiisi Hamaana aquwaa ubbaa Kawee Astitirissi aattidi immiis. Qassi Marddikiyoosi iyyo mata dabbo gidiyooogaa Astitira kawuwaassi yootaasu. Hegaa gishshau, he gallasappe doommidi, Marddikiyoosi kawuwaakko gelanau danddayiis. <sup>2</sup> Kawoikka Hamaanappe guyye



ekkido ba migido maatafaa kessidi, Marddikiyoosassi immiis. Immin Asttira Marddikiyoosa Hamaana aquwaa bollan aawayada sunttaasu.

<sup>3</sup> Hegaappe guyyiyan, Asttira yeekkaidda, kawuwaa tohuwaa bollan zaarettada kunddada, Agaaga zare gidiya Hamaani Aihudatu bollan tukkido iita maqqoi oosuwan pe7ennaadan kawuwaa woossaasu. <sup>4</sup> Yaatin, kawoi ba worqqa xam77aa iyyo miccin, a dendda eqqada, hagaadan yaagaasu; <sup>5</sup> “Kawuwau, neeni tanan ufaiddabaa gidikko, qassi ta oishaakka polanau neeni dosidabaa gidikko, ne kawotettaa gidдон de7iya Aihuda ubbaa wurssidi worana mala, Agaaga zare gidiya Hammadaata na7ai Hamaani kessido awaajuwaa shaariya hara awaajuwaa neeni kessanaadan woossais. <sup>6</sup> Ha ubba bashshai ta asaa bollan gakkiyo wode, taani waana xeellanau danddayiyaanaa? Qassi ta dabbotakka muliyaa xaissiyo wode, taani waana xeellanau danddayiyaanaa?” yaagaasu.

<sup>7</sup> Hegaappe guyyiyan, Kawoi Arxxekssiisi, Kawiyo Asttironne Aihudaa Marddikiyoosa hagaadan yaagiis; “Hamaani Aihudata woranau awaajuwaa kessido gishshau, taani mittaa kocan a kaqissidoogaanne a aquwaakka ubbaa Kawee Asttirissi immidoogaa intte ereeta. <sup>8</sup> Gidikkonne, kawo keettaa maatafai wodhdhin, kawuwaa sunttan kiyida awaajoi laamettanau danddayenna. Hegaa gishshau, intte intte baggaara Aihudata maaddanau koyidobaa xaafite. Hegaa ta sunttan xaafidi, kawo maatafaa a bollan wottite” yaagiis.

<sup>9</sup> Siiwaana giyo heezzantto aginan, laatamanne heezzantto gallassan, Marddikiyoosi kawuwaa xaafeta ubbaa xeegiis; xegidi Hinddepe Toophphiyaa gakkanaashin de7iya, xeetanne laatamanne laappun biittata kawoppe garssaara haariyaageetussi, auraajjaa haariyaageetussinne biittaa halaqatussi yeddiyo awaajuwaa xaafissiis. Awaajoi dumma dumma qaalaaninne dumma dumma pitaliyan xaafettiis; qassi Aihudatussikka eta qaalaaninne eta pitaliyan xaafettiis. <sup>10</sup> Marddikiyoosi he awaajuwaa ubbaa Kawuwaa Arxxekssiisa sunttan xaafissidi, kawo maatafaa wottiis. Wottidi kawo keettaa gaaxaatan yelettida, eesotiya parata toggiya asatu bolli biittau ubbau kiittiis.

<sup>11</sup> Kawoi kessido awaajoi katamatu ubban de7iya Aihudati issippe shiiqanaunne bantta bolli yiyaabaa olettidi teqqanau danddayana mala, maataa etau immees. Qassi ola miishshaa oiqqidi, ai biittappe gidikkokka, eta olanau yiyaageeta, eta naatuuranne eta maccaasaara ubbaa issuwaanne ashshennan wurssi woranaunne eta aquwaakka bonqqidi ekkana maataa immees. <sup>12</sup> Aihudati Kawuwaa Arxxekssiisa kawotettan heгаа oottanau keereetida gallassai, Adaare giyo tammanne naa77antto aginaa, tammanne heezzantto gallassaa. <sup>13</sup> Kawuwaa awaajuwaa biittatu ubban de7iya asai eranaadan, higge gididi awaajettiis; hegeekka Aihudati bantta morkketu bollan haluwaa kiyana banttana giigissanau danddayissee. <sup>14</sup> Kiiyttiyaageeti kawo keettaa parata toggidi, kawuwaa azazuwaa gattanau eesotidi biidosona. Qassi Suusa katamankka ha awaajoi asa ubbau odettiis.

<sup>15</sup> Marddikiyoosi salo milatiyaanne bootta kawotaa maayuwaa maayidi, ochcha teera milatiya kaabbaa, liinuwaappe dadettidaagaa bollaara gujjiis; qassi gita worqqa kallachchaakka goxxidi, kawuwaa sinttappe kiyiis. Kiyin Suusa katamai ililiisinne ufaissau poccu giis. <sup>16</sup> Hegee Aihudatussi qassi gita ufaissanne ililssa, woppanne gibira wode gidiiis. <sup>17</sup> Hegaa gishshau, kawuwaa awaajoi nabbabettido biittaanne katamaa ubban de7iya Aihudati ubbai gita baalaa awaajjidi, ufaittiidinne gibiraa miiddi pe7idosona. Hegaa gaasuwan Aihudatussi yayyidi, hegan de7iya hara zare asaappe daroti Aihuda gididosona.

## 9

<sup>1</sup> Adaare giyo tammanne naa77antto aginan tammanne heezzantto gallassai gakkiiis. He gallassai, kawoi koiro kessido awaajuwaa maaran Aihudatu morkketi eta xoonana giido gallassaa. SHin yohoi aadhdhi wodhdhin, Aihudati bantta morkketa xoonidosona. <sup>2</sup> Kawuwaa Arxxekssiisa kawotettaa gidдон de7iya Aihudati ubbai bantana qohanau koyiya ubbaa xaissanau bantta kataman kataman issippe shiiqidosa. Etaara ai asinne eqettanau danddayibeenna; aissi giikko, hara zare gidiya asai ubbai etau yayyiis. <sup>3</sup> Ubba qassi Marddikiyoosassi yayyido gishshau, kawoppe garssaara biittaa haariyaageeti, auraajjaa haariyaageetinne biittaa halaqati ubbai Aihudata haa maaddidosona. <sup>4</sup> Aissi giikko, Marddikiyoosi kawo keettan gita maatai imettidonne wolqaa gujji gujji biya asa gididoogee, he kawotettaa gidдон de7iya biitta ubban erettiis.

<sup>5</sup> He keerido gallassi Aihudati bantta morkketa ubbaa bisuwan goora7idi wurssidosa; banttana ixxiya ubbaa bollankka bantta koyaa oottidosona. <sup>6</sup> Waanna katama gidiya Suusa xallan ichchashu xeetu asaa woridosona. <sup>7-10</sup> Eti qassi Parshshandaata, Dalifoona, Aspaata, Poraata, Adaaliyaa, Ariidaata, Parmmashtta, Ariisaaya, Ariidaayanne Waizaata geetettiya, Aihudatu morkkiya Hamaana naata tammaakka woridosona. SHin eti eta aquwaa bonqqibookkona.

<sup>11</sup> Aihudati Suusa kataman worido asaa qoodai aappunakko he gallassikka kawuwaayyo odettiis. <sup>12</sup> Yaatin, kawoi Kawiyo Astiro hagaadan yaagiis; “Aihudati waanna katama gidiya Suusa xallan ichchashu xeetu asaanne Hamaana naata tammaa woridosona. Hegee hegaa gidikko, kawuwaa biittatun haratun eti woridoogeeeti aappuna gidandonaashsha! Qassi ha77i neeni woosiyobai aibee? Taani neeyyo immana. Neeni tana oichchiyoobai arabai aibee? Taani neeyyo polana” yaagiis.

<sup>13</sup> Astitira zaarada, “Kawuwaa ha qofai ufaissikko, Suusa kataman de7iya Aihudati hachchi oottidoogaadan wonttokka ootona. Qassi Hamaana naatu tammatu ahaakka kocaa bollan kaqqanaadan azaza” yaagaasu.

<sup>14</sup> Yaagin kawoi hegaa oottanaadan azaziis; awaajoikka Suusa kataman naa77anttuwaa awaajjettin, Hamaana naatu tammatu ahai kocaa bollan kaqettiis. <sup>15</sup> Adaare giyo aginan tammanne oiddantto gallasan, Suusa kataman de7iya Aihudati qassikka issippe shiiqidi, hara heezzu xeetu asaa woridosona; shin ha77ikka eti eta aquwaa bonqqibookkona.

<sup>16</sup> He wode Suusa katamaappe gaxaara de7iya kawuwaa biittatun haratun de7iya Aihudatika issippe shiiqidi, bantta morkketa ubbaa olidi teqqidosona. Eti muleera laappun tammanne ichchashu sha7u asaa woridoogaappe guyyiyan, bantta morkketuppe shemppidosona. SHin eta aquwaa bonqqibookkona. <sup>17</sup> Hagee ubbai hanidoogee Adaare giyo aginan tammanne heezzantto gallassaana; tammanne oiddantto gallasan eti shemppidi, gibiraa miiddi, uyiiddinne ufaittiiddi pe7iyo gallassa oottidosona.

<sup>18</sup> SHin Suusa kataman de7iya Aihudati tammanne heezzanttonne tammanne oiddantto gallassatun woriiddi pe7idi, tammanne ichchashantto gallasan shemppidosona. He gallassaa etikka gibiraa miiddi, uyiiddinne ufaittiiddi pe7iyo gallassaa oottidosona.

<sup>19</sup> Hegaa gishshau, qeeri qeeri katamatun de7iya Aihudati hachchi gakkanaashinkka Adaare giyo aginan tammanne oiddantto gallassaa baala gallassa oottidi bonchchoosona. He gallasan moosonanne uyoosona; qassi issoi issuwaassi qumaa imotaa immoosona.

### *Puriima Baalaa*

<sup>20</sup> Marddikiyoosi ha hanida ubba taarikiyaa xaafiis; xaafidi dabddaabbiyaa Kawuwaa Arxxekssiisa biittatun ubban, haahuwan matan, de7iya Aihuda ubbaassi kiittiis. <sup>21</sup> He dabddaabbiyan Marddikiyoosi Adaare aginan tammanne oiddanttonne tammanne ichchashantto gallassata, Aihudati laittan laittan baala oottidi bonchchana

mala, etayyo yootiis. <sup>22</sup> Aissi giikko, he gallassati Aihudati bantta morkketuppe shemppuwaa demmido gallassata; qassi he aginaikka eta azzanoinne yeehoi ufaissaunne gibiraa meettau laamettido agina. Hegaa gishshau, eti muussaaninne ushshan ufaittiiddi, issoi issuwaassinne qassi hiyyeesatussikka qumaa imotaa immiiddi bonchchana mala, etau odettiis.

<sup>23</sup> Odettin Aihudati Marddikiyoosi immido azazuwaa ekkidi, eti bonchchanau doomido baalaa laittan laittan aggennan bonchchanau maayidosona. <sup>24</sup> Agaaga zaree Hammadaata na7ai Hamaani, Aihudatu ubbatu morkkee, eta xaissanau kase maqettiis; maqettidi eta wurssi woriyo aginaanne gallassaa eranau Puriima giyo saamaa yegissiis. <sup>25</sup> SHin Asttira kawuwaakko gelidoogaappe guyyiyan, Hamaani Aihudatu bolli maqettido iita maqqoi ubbai guyye simmidi, a bolli polettanaadan kawoi xuufiyan azaziis. Yaatin, Hamaaninne a naati tammai kocan kaqettidi haiqqidosona. <sup>26</sup> Hegaa gishshau, ha naa77u gallassati Puriima Baalaa geetettoosona. Ha dabddaabbiyan etau xaafettidabaa ubbaa gaasuwan, eti bantta aifiyan be7idobaa gaasuwaaninne eta bollan gakkidabaa gaasuwan <sup>27</sup> Aihudati banttassi, bantta zaretussinne Aihuda gidanau koyiya ubbaassi, ha baalaa bonchchiyoogaa woga oottidosona. Hegeekka laittan laittan aggennan ha naa77u gallassata bonchchanaassa. <sup>28</sup> Qassi, ha kawotettaa biittan ubbaaninne katamatun ubban de7iya Aihudatu keettaa asai ubbainne yaana yeleta ubbai ha Puriima Baalaa hassayanau bessiyoogee kuuyettiis. Hegaa bollankka, Aihudati aude gidikkonne, ha Puriima gallassata bonchchanaunne he gallassatun hanidabai eta zariyankka dogettennan agganau bessees.

<sup>29</sup> Hegaappe guyyiyan, Abihaila na7iyaa, Kawiyaa Asttiranne Aihudai Marddikiyoosi Puriima Baalaa xeelliyaagan kase xaafido dabddaabbiyaa minttettanau ha-gaa naa77antto dabddaabbiyaa kumetta maatan xaafidosona. <sup>30</sup> He dabddaabbeti Arxxekssiisa kawotettan, xeetanne laatamanne laappun biittan de7iya Aihudatussi ubbaassi saroinne woppai gido giya sarotaara xaafettidi kiitettidosona. <sup>31</sup> Qassi eti kase xoomanaunne kayyottanau wogaa kessidoogaadan, ha77i eta gidin, sinttappe yaana eta zareta gidin, ha Puriima gallassata laittan laittan woga oottidi bonchchana mala, he dabddaabbeti qonccissoosona. Hegee Aihudai Marddikiyoosinne Kawiyaa Asttiranne naa77ai maayettidi kessido azazuwaa. <sup>32</sup> Kawee Asttiri azazoi Puriima Baalaa wogaa minttiis; ikka maxaafan xaafettiis.

## 10

### *Kawuwaa Arxxekssiisanne Marddikiyoosa Gitatettaa*

<sup>1</sup> Kawoi Arxxekssiisi ba kawotettaa gidдон ha gaxaappe hini gaxaa gakkanaashin de7iya asai ubbai giiraa qanxxana mala, wolqqan azaziis. <sup>2</sup> I oottido gitanne maalaalisiya oosoti ubbati, qassi Marddikiyoosakka xoqqu oottidi, waati bonchchidaakko qonccissiya taarikee Meedoonanne Parsse Kawotettaa Taarikiyaa Maxaafan xaafettiis. <sup>3</sup> Maataa baggan gidikko, Kawuwaa Arxxekssiisa istta gin, Marddikiyoosi naa77antto. Qassi i Aihudatunkka keehi bonchchettidanne dosettida asa; aissi giikko, i ba asa gidiya Aihudati, sarotettaaninne hirggi bannan de7ana mala, keehi daafurida asa.

## Iyyooba Maxaafaa

### *Gidduwaa Erissuwaa*

Iyyooba maxaafan nuuni be7iyo taarikee, daro tuggainne bashshai gakkido issi keha bitaniyaabaa odiya taarike. Ha bitanee ba naatu ubbaappenne ba aqo ubbaappe mela attida asa. Hegaa bollikka qassi hanttaara mazunntaa sahettiis. Hegaappe guyyiyan gixime xuufiyan qonccissido heezzu haasayatun Iyyoobinne Iyyooba laggeti ha sahuwan banttau siyettidabaa haasayidosona. Wurssetan qassi Xoossai Iyyoobau qoncciiis.

Iyyooba laggeti Iyyooba gakkida metuwaa bolli qofaa immiiddi, benippe bantta eriyo ammanuwaa wogan keten77idi immoosona. Hegaa gishshau eti, “Xoossai keha asassi lo77obaa immees; shin iita asa qaxxayees. Hegaa maaran Iyyooba ha metoi ubbai gakkidoogee, i nagaraa oottido gishshaassa gidanau koshshees” yaagoosona. SHin Iyyoobi geeshshanne keha asa gidido gishshau, haggaa mala qixaatee bessiyo asa gidenna. Ubba qassi erettenna qan77ishe gididaagee, a milatiya keha asa bolli haggaa mala qixaatee wodhdhidoogaa. Iyyooba ammanoi sohuwaappe deshana xayikkokka, likke pirddaa pirddidi, bana ha harggiyaa qashuwaappe birshshana malanne beni de7uwau zaarana mala, minttidi woossiyooqaa aggibeenna.

Xoossai Iyyoobi oichchido oishaassi istti naa77an zaaruwaa immibeennabaa gidikkonne, a ammanuwaa minotettaa nashshidi, ba Xoosatettaa wolqqaanne ba aadhdhida eraa maalaalissiya gixime haasayan qonccissiiis. Hegaappe guyyiyan Iyyoobi Xoossai gita gidiyooqanne aadhdhida eranchcha gidiyooqaa eridi, xalaaninne hanqquwan kumida qaalata haasayidoogau azzanidi, nagaraappe simmiis.

Wurssetan gixime gidenna yeda xuufiyan xaafettida sohuwan Iyyooba de7oi benisaa simmidoogaanne aquwaa baggaara gidikko, kaseegaappe dakko daruwaa demmidoogaa be7eettees. Iyyooba laggeti a gakkida metoi awaara yiidaakko etau gelibeenna gishshau, Xoossai eta mino seeraa seeriis. Meeze ammanuwaa qofaappe Xoossai gita gidiyooqaa eridaagee Iyyooba xalaala.

### *Seexaanai Iyyooba Paaccanaadan GODAI SHeniyaa Immiis*

#### *Iyyoobi Suure Asa*

<sup>1</sup> Uuxa giyo biittan Iyyooba giyo issi bitanee de7ees; i boree bainnanne suure asa; Xoossaassi yayyidi, iitabaappekka haakkida asa. <sup>2</sup> Ayyo laappun attuma naatinne heezzu macca naati yelettidosona. <sup>3</sup> Aquwaa gidikko, ayyo laappun sha7u dorssati, heezzu sha7u gaameelati, ichchashu xeetu waaxa boorati, ichchashu xeetu macca haretinne keehi daro ashkkaarati de7oosona. Arshsho baggaara de7iya asa ubbaappe i aadhdhida dure asa.

<sup>4</sup> A attuma naati bantta son bantta son, kayan kayan gibiraa giigissidi, bantta heezzu michcheta banttanaara maanaunne uyanau xeesoosona. <sup>5</sup> Gibiraa gallassati polettido wode, Iyyoobi maallado guuraara denddidi, ba naatu issuwaa issuwaa sunntan xuuggiyo yarshshuwaa yarshshees. I heggaa oottiyooqee, “Ta naati geelladan bantta wozanan Xoossaa qanggidi, nagara oottidaakkonne” giidi hirggido gishshaassa. I eta geeshshanaassi heggaa ubbaton oottees.

#### *Seexaanai GODAA Sintti Yiis*

<sup>6</sup> Issi gallassi kiitanchchati GODAA sinttan beettanau yiidosona; Seexaanaikka qassi etaara yiis. <sup>7</sup> Yin GODAI Seexaanaa, “Laa neeni auppe yaadii?” yaagiis.

Yaagin Seexaanai GODAAYYO, “Taani sa7an ubban yaanne haanne yuuyiyoosaappenne simerettiyoosaappe yaas” yaagidi zaariis.

<sup>8</sup> Yaagin GODAI Seexaanaa, “Yaatin, ta ashkkaraa Iyyooba akeekada be7adii? Sa7aa bollan a milatiya boree bainnanne suure asi mulekka baawa. I GODAASSI yayyiya, iitabaappekka haakkida asa” yaagiis.

<sup>9</sup> Yaagin Seexaanai, “Tumu Iyyoobi neeyyo coo yayyii? <sup>10</sup> Anne a so asaanne ayyo de7iyaabaa ubbaa neeni dirada naagabeikkii? I oottiyo ooso ubbaa neeni anjjido gishshau, a mehiyaa wudee biittaa ubbaa bollan dariis. <sup>11</sup> SHin neeni ne kushiya yeddada, ayyo de7iya aquwaa ubbaa shociyaakko, i nena tumu ne sinttan qanggana” yaagiis.

<sup>12</sup> Yaagin GODAI Seexaanaa, “Eeno, ayyo de7iyaabai ubbai ne kushiyaana. SHin neeni a bollaa bochchoppa” yaagiis. Hegaappe guyyiyan, Seexaanai GODAA sinttaappe kiyidi biis.

### *Seexaanai Iyyooba Koiro Paacciis*

<sup>13</sup> Issi gallassi Iyyooba attuma naatinne macca naati bantta baira ishaa son miiddinne woine eessaa uyiiddi de7oosona. <sup>14</sup> Yaatishin issi bitanee Iyyoobakko yiidi, “Nuuni boorata waaxidi goyishin, haretikka nu matan maataa miiddi de7ishin, <sup>15</sup> Saaba biittaa asati akeekennan yiidi, olaa kessidosona; yaatidi ubbaakka ekki biidosona. Qassi ashkkaratakka qara bisuwan busakkidosona. Yaatin, ta xalaalai attada, ha hanidabaa neeyyo yootanau yaas” yaagiis.

<sup>16</sup> I biron haasayishin, hara bitanee yiidi, “Xoossaa tamai saluwaappe wodhdhidi, dorsatanne dorsata heemmiyaageeta miis. Yaatin, ta xalaalai attada, ha hanidabaa neeyyo yootanau yaas” yaagiis.

<sup>17</sup> I biron haasayishin, hara bitanee yiidi, “Kaladaawetu biittaappe heezzu citan shaahettida ambbaanoti yiidi, nuna olidi, gaameelaa ubbaa ekki biidosona; ashkkaratakka qara bisuwan busakkidosona. Yaatin, ta xalaalai attada, ha hanidabaa neeyyo yootanau yaas” yaagiis.

<sup>18</sup> I biron haasayishin, hara bitanee yiidi, “Ne attuma naatinne macca naati bantta baira ishaa son miiddinne woine eessaa uyiiddi de7ishin, <sup>19</sup> wolqqaama gotee akeekennan bazzoppe denddidi, keettaa muleera shociis. SHocido keettaa eta bolli kunddin, naati haiqqidosona. Yaatin, ta xalaalai attada, ha hanidabaa neeyyo yootanau yaas” yaagiis.

<sup>20</sup> Hegaappe guyyiyan, Iyyoobi denddidi, kayyuwau ba maayuwaa pooshshiis; ba huuphiyaakka meedettiis. Biittan gufannidi goinniiddi, <sup>21</sup> hagaadan yaagiis;

“Taani ta aayee uluwaappe kallo yelettaas;

haiqqiyoodekka taani ekkada biyoobi baawa.

GODAI immiis;

GODAI zaaridi ekkiis.

GODAA sunttai galatetto”

yaagiis.

<sup>22</sup> Ha ubbankka Iyyoobi nagaraa oottibeenna; Xoossaa amassalibeenna.

## 2

### *Seexaanai GODAA Sintti Naa77anttuwaa Yiis*

<sup>1</sup> Hara gallassikka qassi kiitanchchati GODAA sinttan beettanau yiidosona; Seexaanaikka qassi etaara issippe a sinttan beettanau yiis. <sup>2</sup> Yin GODAI Seexaanaa, “Laa neeni auppe yaadii?” yaagiis.

Yaagin Seexaanai GODAAYYO, “Taani sa7an ubban yaanne haanne yuuyiyoosaappenne simerettiyoosaappe yaas” yaagiis.

<sup>3</sup> Yaagin GODAI a, “Ta ashkkaraa Iyyooba akeekada be7adii? Sa7aa bollan a milatiya boree bainnanne suure asi mulekka baawa. I GODAASSI yayyidi, iitabaappekka



haakkida asa. Gaasoi bainnan taani a xaissana mala, neeni tana denttettinkka, ha77i gakkanaassi i ba suurettan minni eqqiis” yaagiis.

<sup>4</sup> Seexaanai zaaridi GODAA, “‘Hegee ta mashuwaa ekko!’ yaagiyoogaadan, asi ba shemppuwaa gishshau, bau de7iyaabaa ubbaa immana. <sup>5</sup> SHin neeni ne kushiyaay yeddada, a bolla ubbaa ane shoca. Yaatiyaakko i nena tumu ne sinttan qanggana” yaagiis.

<sup>6</sup> Yaagin GODAI Seexaanaa, “Eeno, a woroppappe attin, a bolli neeni koyidobaa oottanau danddayaasa” yaagiis.

### *Seexaanai Iyyooba Naa77anttuwaa Paacciis*

<sup>7</sup> Hegaappe guyyiyan, Seexaanai GODAA sinttappe kiyidi, Iyyooba tohuwaappe huuphiyaa gakkanaassi iita masunttai a bolli kiyanaadan oottiis. <sup>8</sup> Yaatin, Iyyoobi bidinttaa bolli uttidi, kon77an bana goodiis.

<sup>9</sup> A maccaasiyaa a, “Ha77i gakkanaassikka neeni ne suurettan minna uttadii? Xoossaa qanggada haiqqaaga” yaagaasu.

<sup>10</sup> Yaagin i zaaridi o, “Neeni eeyya maccaasadan haasayaasa. Nuuni Xoossaappe lo77obaa ekkii ekkidi, iitabaa ekkokkoniiyye?” yaagiis.

Ha ubbankka Iyyoobi ba giidoban nagaraa oottibeenna.

### *Heezzu Iyyooba Laggeti A Be7anau Yiidosona*

<sup>11</sup> Iyyooba laggeti heezzati, Temaana biittaappe Elifaazi, SHuuha biittaappe Bilddaadinne Naa7ima biittaappe Xoofaari Iyyooba bolli gakkida metuwaa siyido wode, ayyo qarettanaunne a minttettanau bantta sooppe bantta sooppe qaagetti ekkidi, issippe akko yiidosona. <sup>12</sup> Eti a haahuwan eqqidi xeelliyo wode, i Iyyooba gidiyoogaa eribookkona. Guyyeppe a gidiyoogaa erido wode, bantta qaalaa xoqqu oottidi yeekkidosona; bantta maayuwaakka pooshshidi, bantta huuphiyan buhiyaa qolidosona. <sup>13</sup> Hegaappe guyyiyan, eti aara laappun gallassanne laappun qammaa biittan uttidosona. A sahoi keehi daridoogaa eti be7ido gishshau, ayyo ai asinne qalanne qaattibeenna.

## 3

### *Koiro Haasayata*

#### *Iyyoobi Ba Yelettido Gallassaa Qanggiis*

<sup>1-2</sup> Hegaappe guyyiyan, Iyyoobi ba doonaa dooyidi, ba yelettido gallassaa hagaadan yaagidi qanggiis; <sup>3</sup> “Taani shahaarettido qammainne taani yelettido gallassai coo xayona! <sup>4</sup> He gallassai xuma gido! Bolla Xoossai he gallassaa shenehoo go; a bollan poo7oikka poo7oppo. <sup>5</sup> Leelida xumainne ciggaarai a goozo; a shaarai kammo; a poo7uwaakka xumai gentto. <sup>6</sup> He gallassa qammaa sakkana xumai oiqqo. Laittaa gidдон de7iya gallassatun i qoodettoppo; aginatu qoodankka geloppo. <sup>7</sup> He gallassa qammai maino; ufaissa ililssikka an siyettoppo. <sup>8</sup> Lewaataana giyo miimminttiyaa denttanau loohida shareechchoti he gallassaa qanggona. <sup>9</sup> He qammaayyo bakkaaliyaa xoolinttee poo7oppo; poo7uwaa naagidikka demmoppo; maallado xalqqeekka ayyo xalqqoppo. <sup>10</sup> He qammai taani ta aayee uluwan shahaarettennaadaaninne ha metuwaa be7ennaadan teqqibeenna gishshau, qanggettidaagaa gido.

<sup>11</sup> “Taani ta aayee uluwan haatta kiyarkkinaashsha! Ta aayee uluwaappe yeletta wodhdhaanne haiqqarkkinaashsha! <sup>12</sup> Ta aayiyaa tana aissi ba kiyuwan zaaradeeshsha? Ba xanttaakka tana aissi xanttadeeshsha? <sup>13-15</sup> He wode taani haiqqidabaa gidiyaakko, ha77i shemppada xiskaas shin! Qolettida sohota banttau zaaretti keexxida sa7aa kawotuuranne eta zoriyaageetuura, worqqai de7iyoonne bantta keettan biraa kunttida halaqatuura issippe duufuwan zin77aas shin! <sup>16</sup> Woikko aayee uluwaappe boshettidi yelettida na7adan, woikko gallassa poo7uwaa ainne be7ibeenna yiiraadan, taani biitta

gidдон qosettaichcharkkinaashsha! <sup>17</sup> Duufuwan iitati bantta iita oosuwa a aggoosona; yan daafuranchchatikka shemppoosona. <sup>18</sup> He sohuwan qashuwaasatikka shemppidi ufaittoosona; oosuwa ootissiyaageetu waasuwa eti hegan siyokkona. <sup>19</sup> Guuttai gitaikka yan de7ees; ailleekka ba godaassi ailletiyoosaappe kiyees.

<sup>20</sup> “Metuwan de7iyaageetuyyo poo7oi aissi imettidee? De7oi cammiyoogeetussi, <sup>21</sup> haiqoi yanddeeshsha giidi amottin, yeennan ixxiyoogeetussi, qotti wottido buquraa koyiyoogaappe aattidi, haiquwaa koyiyaageetussi, <sup>22</sup> duufuwaa biidi gakkiiyo wode, ufaissaaninne ililssan pocammiyaageetussi de7oi aissi imettidee? <sup>23</sup> Ogee bayichchido uraassi, Xoossai a yuushuwaa dirirggido uraassi poo7oi aissi imettidee? <sup>24</sup> Qumaa miyoogaa gishshaa oolais; ta oolee aggenan goggiya haattaa mala. <sup>25</sup> Taani yayyidobai ta bolli gakkiiis; taani dagammidobaikka tanan haniis. <sup>26</sup> Taayyo metoppe attin, saroi, woppinne shemppoi baawa” yaagiis.

## 4

### *Elifaazi Koiro Haasayido Haasayaa*

<sup>1</sup> Hegaappe guyyiyan, Temaana biittaappe yiida Elifaazi zaaridi, hagaadan yaagiis; <sup>2</sup> “Issi uri nenaara xalidi haasayikko, neeni lanccuutee? SHin haasayennaaninne agganai oonee? <sup>3</sup> Be7a, neeni darota tamarissadasa; arggaacida kushetakka minttetadasa. <sup>4</sup> Ne qalalai xubettidaageeta kaafidi essiis; daafurida gulbbatatakka minttiis. <sup>5</sup> SHin ha77i metoi neekko yiis; yin neeni genccabaakka. Metoi nena gakkii, neeni shabbirettadasa. <sup>6</sup> Neeni Xoossaassi yayyiyoogee nena ammantidi wottennee? Ne hemettiyo suure hemetai neeyyo hidoota gidennee?

<sup>7</sup> “Ane neeni ha77i qoppa: geeshsha gidida asan xayidai oonee? Woikko suure asi awan xoqollettidi xayii erii? <sup>8</sup> Taani be7idoogaadan, iitatettaa goyidi, metuwa zeriyaageeti iitatettaanne metuwa cakkana. <sup>9</sup> Eti Xoossaappe kiyiya shemppuwan punettidi bayana; a hanquuwaa peenuqettankka eti meetetti xayana. <sup>10</sup> Iitati gudiyaaanne daariya gaammotu mala; shin Xoossai eta co77u ootteesinne eta achchaa menttees. <sup>11</sup> SHankkatidi miyoobaa demmibeenna gaammotudan, iitati namisan haiqqoosona; eta naatika laalettosona.

<sup>12</sup> “Issi gallassi issi xuuri taakko yiis; he xuurai saasukettidi, ta haittan wodhdhiis. <sup>13</sup> Taani qammi xiskkuwaa kairidaashin, tana iita aimoi un77ettiis. <sup>14</sup> Tana yashshainne kokkorssai oiqqiis; oiqqidi ta meqetta ubbaa gajigajissiis. <sup>15</sup> Issibai ta som77uwaa pittiiiddi, ta sinttaara kanttiis; kanttin dagamaappe denddidaagan ta bollan de7iya beelaalai eqqiis. <sup>16</sup> I ta sinttan eqqiis; shin i aibakko taani shaakkada eranau danddayabeikke. Hegaappe guyyiyan, co77u giidasaappe hagaadan yaagiya cenggurssaa siyaas; <sup>17</sup> ‘Haiqqiya asi Xoossaa sinttan xillo gididi beettanau danddayii? Woikko asi bana Medhdhidaagaa sinttan geeshsha gididi beettanau danddayii? <sup>18</sup> Xoossai ba ashkkaratun ammanettenna; ba kiitanchchatunkka mooruwaa demmees. <sup>19</sup> Yaatin, urqqaappe merettidaageetun, eta de7uwaa baasoi baanaa gididoogeetun, bil77aappekka esuwan haiqqiyaageetun ai keena daro mooroi beettanddeeshsha! <sup>20</sup> Maallado paxa de7iya asi omarssi gakkanaashin, ooninne hassayennan de7ishin haiqqees. <sup>21</sup> Eta de7uwaa xishee shodetti wodhdhiyo wode, eti aadhdhida eratettaa demmennan haiqqi bayoosona’ yaagiyaagaa siyaas.

## 5

### *Qassikka Elifaazi Haasayees*

<sup>1</sup> “Iyyoobaa, ane xeesa! SHin oonee neeyyo koyanai? Kiitanchchatuppe ookko simmuutee? <sup>2</sup> Eeyya uraa lanccee worees; akeekai paccido uraakka qanaatee xaissees. <sup>3</sup> Eeyya urai minnidi de7iyaagaa taani ta huuphen be7aas; shin sohuwaarakka taani

a keettaa qanggaas. <sup>4</sup> A naati saroi bannasan de7oosona; eti shilootan, maaddidi haasayyaabi bannasan kinchchettidosona. <sup>5</sup> I shiishshido kattaa namisettidaageeti maana; agunttaa gidдон mokkidaagaakka eti ayyo aggokkona. Saamettidaageeti a aquwaa ekkana hel77oosona. <sup>6</sup> Tuggai baanaappe kiyenna; metoikka biittaappe mokkenna. <sup>7</sup> Tamai piri wodhdhiyoogaadan, asi metuwau yelettiis.

<sup>8</sup> “Tana gidyaakko, taani Xoossaakko shiiqana; ta mootuwaakka a sinttan wot-tana. <sup>9</sup> Gidduwaa pilggidi eranau danddayettenna gitabatanne qoodi banna ooratabata Xoossai oottees. <sup>10</sup> Iraa biittan bukissees; gadiyaukka haattaa yeddees. <sup>11</sup> Ziqqi giidaageeta xoqqu xoqqu oottees; kayyottiyaageetakka minttettidi ufaissees. <sup>12</sup> Genanchchatu halchchuwaakka halissees; hegaa gishshau, eta kushiya oosoi polettenna. <sup>13</sup> Aadhdhida eranchchata i eta geniyan oiqqees; geellatu maqquwaakka aatti yeggees. <sup>14</sup> Etau gallassai xumana; gallassa seetanka eti henqqeleela bilahiyaadan tattaafana. <sup>15</sup> Hiyyeesata i eta morkketu bisuwaappe ashshees; i eta wolqqaamatu kushiyaappekka wotti ekkees. <sup>16</sup> Hegaa gishshau, hiyyeesatuyyo hidootai de7ees; iita asata i co77u oottees.

<sup>17</sup> “Xoossai seeriyo uri anjettidaagaa; hegaa gishshau, Ubbaa Danddayiya Xoossaa seeraa karoppa. <sup>18</sup> I masunxxissees, shin masunttaa qachchees. I dechchees, shin a kushee xallees. <sup>19</sup> Usuppun qommo metobaappe i nena ashshana; laappunttikka nena bochchenna. <sup>20</sup> Koshaa wode haiquwaappe, olaa wodekka bisuwaa qaraappe i nena ashshana. <sup>21</sup> I nena inxxarssaa lissuwaappe genttana; bashshai gakkiiyo wodekka yayyakka. <sup>22</sup> Bashshaa bollinne koshaa bolli neeni miiccana; bazzo do7atuyyookka yayyakka. <sup>23</sup> Ne goyiyo goshshan shuchchi de7enna; bazzo do7atikka nenaara saro gidana. <sup>24</sup> Ne dunkkaanee saro gidyoogaa neeni geeshshada erana; ne dorssatu bird-diyaakka neeni xomoosiyo wode, etappe issoinne paccenna. <sup>25</sup> Ne yeletai corattanaaganne ne zerettatika dembbaa maataa keena gidanaagaa neeni erana. <sup>26</sup> Gisttiyaa mirqqee ba wodiyan audiyaa yiyoogaadan, neeni adda cimada, duufuwaa baana. <sup>27</sup> Iyyoobaa, nuuni haggaa ubbaa pilggi xeellida. Hegee tuma gidyo gishshau, hegaa siyada, neeyyo ekka” yaagiis.

## 6

### *Iyyoobi Haasayees*

<sup>1</sup> Yaagin Iyyoobi zaaridi, <sup>2</sup> “Ta waayeenne ta azzanoi ubbai meezaanan likketteerenneeshsha! <sup>3</sup> Yaatiyaakko abbaa doona shafiyaappekka aadhdhi deexxana. Hegaa gishshau, ta qalalai xala gidiiis. <sup>4</sup> Ubbaa Danddayiya Xoossaa wonddafiya zubbeti tana caddidosona; ta bollaikka eta yiishshaa uyees. Xoossaa dagamai ta bolli salppiis. <sup>5</sup> Haree maatai a sinttan de7ishin caaggiyye? Woikko boorai phachchaa demmidi xaaggiyye? <sup>6</sup> Mal77ennabi maxinee gelennan meetettiyye? Woikko phuuphulle giddo haattai laqilaqiyye? <sup>7</sup> Hegaa mala qumaa taani shenetais; hegaa mala qumaa miikko, tana sakkees.

<sup>8</sup> “Taani woossido woosai gakkereenneeshsha! Xoossaikka ta wozanaa amuwaa im-meerenneeshsha! <sup>9</sup> Xoossai tana woreerenneeshsha! I ba kushiya yeddidi, ta de7uwaa turaa duutteerenneeshsha! <sup>10</sup> Taani Geeshsha Xoossaa qaalaa kaddabeenna gishshau, taayyo seelai darikkonne, ta haiqoi tana minttettees. <sup>11</sup> Taani paxa de7anau taayyo aiba wolqqi de7ii? Taani danddayanau, ta wursettai aibee? <sup>12</sup> Ta wolqqai shuchchaa wolqqaa malee? Woikko ta ashoi nahaase birataa malee? <sup>13</sup> Taani tana maaddanau aiba wolqqinne taayyo baawa; maado demmanau taani biyoosikka de7enna.

<sup>14</sup> “Metuwan de7iya uri Ubbaa Danddayiya Xoossaassi yayyiyoogaa aggiyaakkokka, a laggeti ayyo kehatettaa bessanau koshshees. <sup>15</sup> Ta ishatoo, intte irai bukkenna wode meliya shaafaa mala, tana cimmeta. <sup>16</sup> Balggo aginatun he shaafai ordde shachchaanne suuppa shachchan kumees. <sup>17</sup> SHin bonee gakkiiyo wode, he shachchai

seeridi, haatta kiyees; haattaikka he sohuwaappe xayees. <sup>18</sup> Caana mehiyaa laaggidi biya zal77anchchati haatta koyanau bantta ogiyaappe gaxi kiyidi, bazzuwan toilattiddi, haiqqi xayooona. <sup>19</sup> Teema biittaa zal77anchchatinne Saaba biittaa manddarati haattaa demmana giidi, koshshaa buusidosona. <sup>20</sup> SHin eti ammanettidi koyin xayido gishshau, yeellatidosonanne hidootaa qanxxidosona. <sup>21</sup> Inttekka taayyo he shaafatu mala gidideta; tana gakkida metuwaa be7idi yayyideta. <sup>22</sup> Taani inttena, 'Taayyo issibaa immite' woikko, 'Intte aquwaappe ta gishshaa asassi mattaayiyaa immite' giidanaa? <sup>23</sup> Woikko, 'Tana ta morkkiyaa kushiyaappe ashshite' woikko, 'Huqqunniyaageetu kushiyaappe tana wozite' giidanaa?

<sup>24</sup> "Intte tana tamaarrissite; taani co77u gaana. Taani ai mooridaakko, ane tana bessite. <sup>25</sup> Tuma gidida qaali caddees! SHin intte taayyo odiyo seerai ubbai tana ainne maaddenna. <sup>26</sup> Intte taani haasayiyo haasayaa carkko mala giidi qoppeeta. Yaatin, taani hidoota qanxxada haasayiyo haasayaa aissi qoreetii? <sup>27</sup> Aawai bannaageeta shaakki ekkana intte saamaa yeggeeta; intte laggiyaakka baizzanau washisseeta. <sup>28</sup> Ane tishshi oottidi, tana xeellite. Taani intte sinttan wordduwaa haasayikke. <sup>29</sup> Hayyanintta, ane zaarettidi qoppite; taani xillo gidiyo gishshau, ta bolli coo pirdoppite. <sup>30</sup> Taani ta inxxarssan worddotidobaa milatii? Ta doonai wordduwaanne tumaa shaakkidi haasayanau danddayennee?

## 7

### *Qassikka Iyyoobi Haasayees*

<sup>1</sup> "Asa de7oi sa7aa bollan wolqqaama baaxe gidenneeyye? A de7o laittai keraa oottiya asa de7o laittaa mala gidenneeyye? <sup>2</sup> Kuwaa amottiya ashkkaraadan, woikko ba damoozaa ekkana naagiya oosanchchaadan, <sup>3</sup> hegaadan taayyo mela aginatinne tugga qammata imettidosona. <sup>4</sup> Taani zin77iyo wode, 'Aude beegottanddinaashsha?' yaagais. SHin qammai taayyo aduqqees; sa7ai wonttana gakkanaassi hiixan aadhdha aadhdha wodhdhais. <sup>5</sup> Ta bollai guxuniyaanne googuwa maayis; ta masunttaappe giishshai goggees. <sup>6</sup> Ta laittai shimainniyaa muhuhaappekka aadhdhi eesotees; aiba hidootinne bannan ta laittai wurees.

<sup>7</sup> "Abeet Xoossau, ta laittai siiriyaara shemppiyo issi shemppo mala gidiyoogaa hassaya! Ta aifee naa77antto kehabaa be7ennan attiis. <sup>8</sup> Neeni tana ha77i be7aasa; shin naa77antto be7akka; neeni tana koyikko, taani xayaichchana.

<sup>9</sup> "SHAarai piskki giidi xayiyogaadan, duufuwaa wodhdhida uri simmidi kiyenna. <sup>10</sup> Ba sookka naa77antto simmidi yeenna; a eriya asaikka a dogees.

<sup>11</sup> "Hegaa gishshau, taani co77u giikke; taani ta tuggaa gishshau haasayana; ta de7oi cammido gishshau zuuzummana. <sup>12</sup> Hagaa keenaa neeni tana aissi naagai? Taani neeyyo abba woikko abba giddo miimintte gaadiiyye? <sup>13</sup> Taani, 'Ta hiixai tana mint-tettanddeeshsha; ta alggaikka tana zuuzunttaappe shemppissanddeeshsha!' yaagiyo wode, <sup>14</sup> neeni tana aimuwan yashsaasa; ajjuutanka tana daganttaasa. <sup>15</sup> Taani ha sakkiya bollaara de7anaagaappe sulettiyoogaanne haiqqiyoogaa doorais. <sup>16</sup> Taani ta de7uwaa karaas; taani merinau de7anau koyikke. Ta laittai siiriyaara shemppiyo issi shemppo mala gidiyo gishshau, neeni tana agga baya.

<sup>17</sup> "Neeni a gitabaadan xeellanau asi aibee? Neeni abaa aissi ezggai? <sup>18</sup> Maallado maallado neeni a xomoosaasa; qassi daqiiqan daqiiqan a paaccaasa. <sup>19</sup> Neeni taakko xeelliyogaa mulekka aggikkii? Woikko taani ta cuchchaa mittiyo wodiyaakka taayyo immikkii? <sup>20</sup> Abeet asa wochchiyaagoo, taani nagaraa oottidaba gidikko, nena aibi qohidee? Neeni aissi tana caddi kaa7iyooobaa oottadii? Neeyyo taani deexo tooho gididanaayye? <sup>21</sup> Ta balaappe aissi tana maarennan ixgai? Ta nagaraakka aissi atto geennan aggai? Simmi taani duufuwaa wodhdhiyo wodee gakkis; neeni tana koyiyo wodekka, taani beettikke" yaagiis.

## 8

*Bilddaadi Koiro Haasayido Haasayaa*

<sup>1</sup> Hegaappe guyyiyan, SHuuha biittaappe yiida Bilddaadi zaaridi, hagaadan yaagiis; <sup>2</sup> “Neeni haggaa malabaa aude gakkanaassi haasayuutee? Ne doonaappe kiyiya qaalai wolqqaama gote mala. <sup>3</sup> Ubbaa Danddayiya Xoossai pirdaanne xillobaa geellayii? <sup>4</sup> Ne naati Xoossaa bolli nagaraa oottido gishshau, i eta etau bessiyaagaadan qaxxayiiis. <sup>5</sup> SHin neeni Xoossaakko simmikko, Ubbaa Danddayiya Xoossaa woossikko, <sup>6</sup> neeni geeshshanne suure gidikko, i ne gishshau denddidi, nena maaddana; i kase ne de7uwau zaaridi woitana. <sup>7</sup> Ne doomettai guutta milatikkonne, ne wurssettai keehippe darana.

<sup>8</sup> “Kase yeletaa ane oichcha; oichchada nu maizza aawati ai ai tamaridaakko, qorada demma. <sup>9</sup> Aissi giikko, nuuni zino yelettidaageeta; nuuni aibanne erokko. Nuuni ha sa7an de7iyo laittai kuwaa mala. <sup>10</sup> Eti nena tamarissona, neeyyo yootonanne bantta akeekidobaappe haasayona.

<sup>11</sup> “Ceeccai caree bannasan diccanau danddayenna; maqqaikka haatti bannasan mokkanau danddayenna. <sup>12</sup> Biron dicciiddi, qanxxetennan de7iiddi, maataappekka eesuan shullana. <sup>13</sup> Xoossaa dogiya asaa ubbaa wurssettai heggaa mala; Xoossai banna uraa hidootaikka xayana. <sup>14</sup> I ammanettiyoobai meqqiichchiyaabaa; i ceet-tiyoobaikka shararootiyaa keettaa mala. <sup>15</sup> I ba shararootte keettan zemppees, shin eqqenna; i a oiqqana, shin a danddayenna. <sup>16</sup> I awan haattaa ushshido ataakilttiyaa mala; ataakilttiyaa sohuwaa pinni kiyana gakkanau daayees. <sup>17</sup> Keela shuchchaa yuushuwan ba xaphuwaa yeddees; shuchchatu giddonkka baayyo sohuwaa koyees. <sup>18</sup> SHin i ba sohuwaappe shodetti xayiyaakko, he sohoi a, ‘Taani nena be7abeikke’ yaagana. <sup>19</sup> Be7a, iita asatu ufaissai haggaa mala. Aissi giikko, hara asati yiidi, eta sohuwaa oiqqoosona.

<sup>20</sup> “Xoossai tumaappe boree banna asa oli aggenaa; iitaa oottiyaageeta qassi maaddenna. <sup>21</sup> I zaaridi, nena miicissananne ililissana. <sup>22</sup> Nena ixxiyaageeti yeellaa maayana; iitatu keettaa xayana” yaagiis.

## 9

*Iyyoobi Haasayees*

<sup>1</sup> Hegaappe guyyiyan, Iyyoobi zaaridi, hagaadan yaagiis; <sup>2</sup> “Ee, hagee intte giyoogee tuma gidiyoojaa taani erais. SHin asi Xoossaa sinttan xillo gidanau waani danddayii? <sup>3</sup> Aara issi uri palamettanau koyikko, he urai i oichchiyo sha7u oishaappe issuwaanne zaaranau danddayenna. <sup>4</sup> Xoossai ba wozanan aadhdhida eranchcha; ba abbiyankka daro wolqqaama. Aara eqettanau danddayiya ooninne baawa. <sup>5</sup> Erennan de7ishin, xoqqa dereta i eta sohuwaappe diggees; ba hanqquwankka aatti yeggees. <sup>6</sup> I biittaa a sohuwan qaattees; biittaa tuuqetakka yaaqiyaaqissee. <sup>7</sup> Awai awaxxennaadaaninne xoolintteti poo7ennaadan azazanau danddayees. <sup>8</sup> I barkka salota micciis; abbaa beetaa bollikka homettees. <sup>9</sup> Xoossai Wogga Beeriyaa giyo xoolinttetu citaa, Ooriyoona giyo xoolinttetu citaa, Piliyaadisa giyo xoolinttetu citaanne tohossa baggaara de7iya xoolinttetu citata medhdhidaagaa. <sup>10</sup> Gidduwaa pilggidi eranau danddayettenna gitabata, qoodi banna oorattabata i oottees.

<sup>11</sup> “Xoossai taakko shiiqiyaakkokka, taani a be7anau danddayikke; i ta lanqqeera kanttiyaakkokka, taani i hegan de7iyoojaa eranau danddayikke. <sup>12</sup> I ba koyidobaa ekin, a ooninne digganau danddayenna. ‘Waatai?’ yaagidi a oichchana asi baawa. <sup>13</sup> Xoossai ba hanqquwaa teqqenna; Ra7aaba giyo miimminttiyaa maaddiya ba morkketa ba tohuwaappe garssau aattidi yedhdhees.

<sup>14</sup> “Yaatin, taani a oishaa zaaranau lo77o qaalaa auppe demmanau danddayiyaanaa? <sup>15</sup> Taani xillo gidiyaaakkokka, pirddiya Xoossai tana maaranaadan woossanaappe attin,



taani a bolli zaarikke. <sup>16</sup> Taani a xeesin, i taayyo koyiyaakkokka, ‘Ta cenggurssaa siyiis’ gaada ammanikke. <sup>17</sup> I tana gotiyan mentterettes; gaaso bainnan i ta masunttaa darissees. <sup>18</sup> Tana shemppuwaakka shemppissennan diggees; i ta de7uwaa camettees. <sup>19</sup> Wolqqaabaa haasayikko, i wolqqaama. Pirddaabaa haasayikko, a xeesidi, pirdda keetti shiishshana asi baawa. <sup>20</sup> Taani xillo gidiyaakkonne ta doonai tana mooranchcha kessees; taani boree baina asa gidiyaakkonne, i tana geella kessees.

<sup>21</sup> “Taani boree baina asa. SHin ta de7uwaa wudikke; taani ta de7uwaa karais. <sup>22</sup> Dummatetti baawa; hegaa gishshau, taani, ‘I boree bainaageetanne iitata naa77aakka issippe xaissees’ yaagais. <sup>23</sup> Bashshai xillo asata qoppennan woriyo wode, Xoossai qilliiccees. <sup>24</sup> Xoossai ha sa7aa iita asatuyyo aattidi immiis; pirddiyaageetu aifiyaakka gooziis. Hagaa ubbaa oottidai a gidanaappe attin, harai oonee?

<sup>25</sup> “Ta de7o laittati wottaa woxxiya uraappekka aadhdhidi eesotoosona; eti lo77obaa be7ennan paallidi xayoosona. <sup>26</sup> Ta de7o laittati maqqaa wolwolotudan eesotoosona; argganttai bau miyoobaa oiqqanau saluwaappe duge paalliyoogaadan paalloosona. <sup>27</sup> Taani, ‘Ta zuuzunntaa dogana; ta som77uwaakka xumissiyooгаа aggada pashkkana’ yaagikko, <sup>28</sup> tana gakkana waaye ubbaassi taani yayyais; aissi giikko, neeni tana geeshsha geennaagaa taani erais. <sup>29</sup> Yaatin, taani mooranchcha gidaichchaappe attin, coo mela aissi daafuriyaanaa?

<sup>30</sup> “Taani ta bollaa harai atto saamunan meecettiyaakkokka, <sup>31</sup> neeni tana urqqa ollan olana; olin ta maayoikka tana shenetana. <sup>32</sup> Taani ayyo zaaruwaa immana gaanau, Xoossai ta mala asa gidenna. Gididaakko nuuni naa77ai daanna sintti aadhdhana; <sup>33</sup> shin ba kushiya nu naa77aa bolli wottidi, nuna sigettiya asi nu giddon de7eerenneeshsha! <sup>34</sup> Abeet Xoossau, tana qaxxayiyooгаа agga; tana daganttiyoogaanne yashissiyooгаа agga. <sup>35</sup> Yaatikko, taani neeyyo yayyennan haasayana; shin ha77i danddayikke.

## 10

### *Qassikka Iyyoobi Haasayees*

<sup>1</sup> “Taani ta de7uwaa karais! Hegaa gishshau, taani mootettanaappe attin, co77u giikke; taani mishettada haasayais. <sup>2</sup> Taani Xoossaa hagaadan yaagais: Hai ta bolli pirddoppa; neeni tana mootiyo mootoi aibakkonne taayyo yoota. <sup>3</sup> Neeni tana huqqunnanau bessii? Neeni ne kushiyan medhdhido uraa kariyoogee, qassi iitatu halchchuwaa polissiyooгаа lo77oo? <sup>4</sup> Ne aifee asa aife malee? Asi xeelliyooagaan neeni xeellai? <sup>5</sup> Ne de7o laittaikka asa de7o laittaa keenee? <sup>6</sup> Yaatin, ta mooruwaa aissi koyai? Ta nagaraakka aissi qorai? <sup>7</sup> Taani mooranchcha gidennaagaanne ne kushiyaappe tana ooninne ashshanau danddayennaagaa neeni eraasa.

<sup>8</sup> “Tana ne kushee giigissidi medhdhiis; shin ha77i he kushee simmidi, tana xaissees. <sup>9</sup> Neeni tana urqqaappe medhdhidoogaa hassaya. Yaatin, ha77i tana baanaadan liiqissanau hanai? <sup>10</sup> Tana maattadan ta aayee uluwan tigidaageenne dichchidaagee nena. <sup>11</sup> Tana neeni ashuwaanne gogaa maizzadasa; ta meqettaa xaphuwaara gattada waaxadasa. <sup>12</sup> Neeni taayyo de7uwaanne aggenna ne siiquwaa immadasa; ne naaguwan neeni tana paxa wottadasa.

<sup>13</sup> “SHin neeni he wodeppe doommada, ne wozanaa giddon tana qohanau qoppiyoogaa taani erais. <sup>14</sup> Taani nagaraa oottikko be7anau, neeni tana wochchaasa; ta mooruwaakka atto gaakka. <sup>15</sup> Taani mooranchcha gidikko, taayyo aayye7ana! Qassi taani xillo gidiyaakkokka, ta huuphiyaa pude xoqqu oottanau danddayikke. Aissi giikko, neeni tana yeellan kuntta wottadasanne tuggan mattoya wottadasa. <sup>16</sup> Taani otorettikko, neeni tana gaammodan yedettada oiqqana; oiqqada qassikka tana qohanau, ne maalaalissiya oosuwaa neeni oottana. <sup>17</sup> Neeni ta bolli ooratta markkata

ehaasa; ne hanqquwaakka ta bolli darissaasa; tana olanau ooratta halchchota giigisaasa.

<sup>18</sup> “Yaatin, tana ta aayee uluwaappe aissi kessadii? Ooninne tana be7ennan haiqqarkkinaashsha! <sup>19</sup> Taani de7ennan aggarkkinaashsha! Woikko ta aayee uluwaappe kiyosaara duufuwan wodhdharkkinaashsha! <sup>20</sup> Ta de7anau attida laittati guutta gidokkonaa? Taani qiibaa ufaatta ekkana mala, hai tana aggarkkii! <sup>21</sup> Leelida xuma sohuwaa taani biyo wodee matiis; taani hegaappe simmada haa yiikke. <sup>22</sup> Taani biyo sohoi sakkana xumainne cabboi de7iyo biitta; hegan de7iya poo7oikka xumaa mala” yaagiis.

## 11

### *Xoofaari Koiro Haasayido Haasayaa*

<sup>1</sup> Yaagin Naa7ima biittaappe yiida Xoofaari zaaridi, hagaadan yaagiis; <sup>2</sup> “Ha haasayetida qaalau ubbau zaaro immiya asi baawee? Woikko haga haasayida bitanee tumanchcha gidanau danddayii? <sup>3</sup> Ne mela haasayai asaa co77u oottii? Neeni qilliicciyo wode, nena seeriyaabi baawa gaadiyye? <sup>4</sup> Neeni odaidda, ‘Ta timirttee tuma; taani Xoossaa sinttan geeshsha’ yaagaasa. <sup>5</sup> Wai ana, Xoossai ne bolli ba doonaa dooyidi haasayeenneeshsha! <sup>6</sup> I neeyyo aadhdhida eratettaa xuuraa qonccisseerenneeshsha! Aissi giikko, tumu aadhdhida eratettaassi daro kifileti de7oosona. Xoossai nena ne oottido nagaraa keenaa qaxxayibeenaa era.

<sup>7</sup> “Neeni Xoossaa ciimma xuuraa qorada eranau danddayai? Woikko Ubbaa Danddayiya Xoossaa zawata koyada demmanau danddayai? <sup>8</sup> Eti salotuppekka xoqqa; neeni ainne oottanau danddayakka. Eti Si7ooliyaappekka aadhdhida ciimma; neeni eranau danddayakka. <sup>9</sup> Xoossaa aadhdhida eratetta biittaa zananaappe aduqqees; abbaa gomppaappekka aakkees. <sup>10</sup> I yiidi, nena qasho keettan yeggiyaakkonne pirdda keetti shiishshiyaakko, a digganau danddayiyai oonee? <sup>11</sup> Xoossai pattenna asata erees; iitabaa be7iyo wode, i coo aggenaa. <sup>12</sup> Eeyya asai aadhdhida eranchcha gidiyoo gaappe harddiidiyaa asa yeliyoogee matees.

<sup>13</sup> “Iyyoobaa, neeni ne wozanaa suure oottikko, ne kushiyaakka akko miccada woosikko, <sup>14</sup> nagaraa ne kushiyaappe haassikko, ne keettankka iitabai de7ennaadan oottikko, <sup>15</sup> yaatikko, neeni xoqqu gaada yeellai bannan ubbabaa xeellana; yashshiyaabi bannankka minnada eqqana. <sup>16</sup> Ne metuwaa ubbaakka neeni dogana; gukkida haattaadan, neeni a naa77antto hassayakka. <sup>17</sup> Ne de7oi seetaa awaappekka aadhdhidi poo7ana; ne de7uwaa xumaikka maallado poo7uwaa mala gidana. <sup>18</sup> Neeyyo hidoottai de7iyo gishshau, neeni hirggennan de7ana. Xoossai nena naagiyo gishshau, neeni woppu gaananne shemppana. <sup>19</sup> Neeni xiskkiyo wode, nena yashsana uri baawa; daroti nena auddashana. <sup>20</sup> SHin iitati metuwaa be7idikka akeekokkona; appe baqati attanaukka danddayokkona. Eta haiqoppe attin, hara hidootti de7enna” yaagiis.

## 12

### *Iyyoobi Haasayees*

<sup>1</sup> Yaagin Iyyoobi zaaridi, hagaadan yaagiis; <sup>2</sup> “Hayyanintta, intte tumukka asa; aadhdhida eratetta ubbaikka inttenaara haiqqana! <sup>3</sup> SHin taukka intteegaadan akeekai de7ees; taani intteppe laafikke! Ha intte haasayidobaa ubbaa ooninne erees. <sup>4</sup> Taani Xoossaa woossin, i siyido asa gidikkonne, ta laggetuyyo miicciyoobaa kiyaas; taani xillonne boree banna asa gidikkokka, qilliicciyoobaa kiyaas. <sup>5</sup> Inttena aiba metoinne gakkibeenna gishshau, ta metuwaa kareeta; kunddanau ganddigaariya bitaniyaakka sugeeta. <sup>6</sup> Bonqqiyaageetu keettati saro de7oosona; Xoossaa yiilloyiyaageetikka hirggi bannan de7oosona. Eta kushiya wolqqai eti goinniyo xoossa.

<sup>7</sup> “SHin neeni ane meheta oichcha; eti nena tamarissana. Woikko saluwaa kafota oichcha; eti neeyyo yootana. <sup>8</sup> Woikko sa7aara gooshettiya meretati nena tamarissana; abbaa moletikka neeyyo odana. <sup>9</sup> GODAA kushee haggaa oottidoogaa hageetu ubbaa gidдон erennai oonee? <sup>10</sup> Paxa de7iya meretatu ubbaa de7oinne asa ubbaa shemppoi a kushiyaana. <sup>11</sup> Inxxarssai qumaa shaakki eriyooagaan, haittai haasayaa shaakkidi erenneeyye?

<sup>12</sup> “Aadhdhida eratettai cimida asatu matan de7ees; daro wodiya de7iyoogee akeekaa immees. <sup>13</sup> Xoossaassi aadhdhida eratettainne wolqqai de7ees; zoreenne akeekai an beettes. <sup>14</sup> Xoossai qolidobaa zaaretti keexxanai oonee? I qachchido uraakka birshshi yeddantai oonee? <sup>15</sup> Xoossai iraa teqqikko, biittai meeles; i iraa bukissikko, di7oi biittaa bashshees.

<sup>16</sup> “Minotettainne xoonoi Xoossaagaa; cimettiyaageenne cimmiyaageenne naa77aikka appe garssaara de7oosona. <sup>17</sup> Zoriyaageetuppe i aadhdhida eraa qaari ekkees; halaqatakka i gooshshees. <sup>18</sup> I kawota kawotaa araataappe wottees; wottidi ailleta kessees. <sup>19</sup> Qeesetuppekka bonchchuwa qaari ekkees; wolqqaamatakka aatti yeggees. <sup>20</sup> Ammanettida asatakka co77u oottees; cimatuppekka akeekaa wotti ekkees. <sup>21</sup> Halaqata kaushshees; deriyaa kaalettiyaageetu wolqqaakka wurssees.

<sup>22</sup> “Xuman de7iya xuura yohota qonccisees; sakkana xuma sohuwaakka poo7o kessees. <sup>23</sup> Xoossai kawotettata gitayees; gitayidi qassi xoonees. Kawotettaakka aassees; aassidi qassi xaissees. <sup>24</sup> Sa7aa asaa halaqata akeekaa diggidi, ogee baina bazuwan toilattanaadan oottees. <sup>25</sup> Poo7oi baina xuman eti tattaafoonsa; mattottida asatudan eti ganddigaaroonna.

## 13

### *Qassikka Iyyoobi Haasayees*

<sup>1</sup> “Haggaa ubbaa ta aifee be7iis; ta haittaikka siyidi akeekiis. <sup>2</sup> Intte eriyooгаа taanikka erais; taani intteppe laafikke. <sup>3</sup> SHin taani Ubbaa Danddayiya Xoossaassi haasayanau koyais; inttenaara gidenna. Taani ta mootuwaa aara mootettanau amottais. <sup>4</sup> Intte erenna asa gidiyoogee erettennaadan, wordduwan kammeeta; intte ubbaikka pattenna aakimeta. <sup>5</sup> Intte ubbai co77u giidaa giderrketiishsha! Yaatiyaakko, inttena asai aadhdhida eranchcha gaana shin!

<sup>6</sup> “Ha77i ta mootuwaa siyite; ta doonaappe kiyiya palamaa ezggite. <sup>7</sup> Intte Xoossaa doona gididi, wordduwaa haasayeetiyye? A gishshaa eqqidi, cimobaa haasayeetiyye? <sup>8</sup> Intte a maaddiyooobi de7ii? Woikko ayyo xabaqa gididi mootetteeti? <sup>9</sup> I inttena pilggi xeelliyaaakko, intteppe lo77obaa demmanee? Intte asaa cimmiyooagaan, a cimmanau danddayuuteetiyye? <sup>10</sup> Intte geeman asaa som77uwaa xeellidi maaddikko, Xoossai tumu inttena seerana. <sup>11</sup> A bonchchoi inttena dagantennee? A anggai inttena yashshennee? <sup>12</sup> Intte odiyo leemisoti bidintta mala pattennaageeta; intte shiishshiyo palamai urqqaappe merettida gondalliyaa mala.

<sup>13</sup> “Ane co77u giite! Taani haasayana; haggaaappe guyyiyan, ba hanaa hano. <sup>14</sup> Taani tana gakkiiyaabaa, haiquwaa gidiiyaakkokka, ekkanaa giiga uttaas. <sup>15</sup> Be7ite, Xoossai tana woriyaabaa gidikkonne, taani a danddayan naagana. Gidikkonne, taani ta mootuwaa a sintti shiishshana. <sup>16</sup> Nagaranchcha asi a sintti shiiqanau danddayenna; hagee taani shiiqanau xaliyoogee, ooni erii, ta atettaassi gaaso gidanau danddayees. <sup>17</sup> Ta haasayaa akeekidi siyite; taani odiyoogee intte haittan gelo. <sup>18</sup> Be7ite, taani ta mootuwaa giigissaas; shatimmanaagaakka erais.

<sup>19</sup> “Abeet Xoossau, neeni tana mootanau yai? Neeni tana mooranchcha kessikko, taani co77u gaada haiqqana. <sup>20</sup> SHin neeni taayyo ha naa77ubata ootta; oottikko taani neeppe geemmikke. <sup>21</sup> Tana qaxxayiyooгаа agga; tana daganttoppa. <sup>22</sup> Hegaappe guyyiyan, tana xeesa; xeesin taani koyana. Woikko taani haasayin, taayyo zaarada

haasaya. <sup>23</sup> Bau, taani moorido mooroinne nagarai aappunee? Ta balaanne ta nagaraa ane tana bessa.

<sup>24</sup> “Neeni aibissi ne som77uwaa taappe genttai? Qassi tana aibissi ne morkkedan goodai? <sup>25</sup> Tana, carkkoi efiyo boncco malaa, yashissuutee? Woikko melida suulla malaa yedettuutee? <sup>26</sup> Neeni ta bolli xaafido mootoi camo; harai attin, taani yelagattan de7aidda oottido mooruwaanne ashshabaakka. <sup>27</sup> Neeni ta tohuwaa toho biratan qachchadasa; ta tanggiyo tanggo ubbaa wochchaasa; ta tohuwaa kottiyaa pilgga xeellaasa. <sup>28</sup> Taani musidabaadaaninne bil77ai miido afaladan musais.

## 14

### *Qassikka Iyyoobi Haasayees*

<sup>1</sup> “Maccaasappe yelettida asa baree qantta; heгаа keesaikka metuwan kumi uttiis. <sup>2</sup> I ciishshaadan ciyyidi, sohuwaarakka qoqqofetti aggees; qassi gam77ennan kuwaadan eesuwaa aadhdhiichchees. <sup>3</sup> Yaatin neeni, Xoossai, heгаа mala asakka xeelluutee? Qassi a pirddanau ne sintti shiishshuutee? <sup>4</sup> Tunabaappe geeshshabaa kessanau danddayiyai oonee? Ooninne baawa. <sup>5</sup> Asi de7ana laittati zawati uttidosa; i de7ana aginaakka neeni qooda wottadasa; neeni wottido zawaappe aadhdhiyaabi baawa. <sup>6</sup> Hega gishshau, keraa oottiya asi ba oosuwaa polidi shemppiyoogaadan, asi ba daafura laittaa polidi shemppanaadan, a aggaaga.

<sup>7</sup> “Mittaassikka hidootai de7ees; mittai qanxxikko aacees; aacaikka hegaadan haniiddi, de7i bayees. <sup>8</sup> He mittaa xaphoi biitta garssan ceeggikkokka, a durumaikka biittan musikkokka, <sup>9</sup> haattaa peenuwaa demmidi aacees; puutiyaadan ooratta licuwaa kessees.

<sup>10</sup> “SHin asi haiqqin, a wolqqai wurees; a shemppoi kiyaaappe hini baggan, i awan de7ii? <sup>11</sup> Abbaappe haattai meliyoogaadan, qassi shaafaa haattaikka to77iyoogaadan, <sup>12</sup> hegaadan asaikka haiqqees; he sohuwaappe denddenna. Saloti aadhdhana gakkanaashinkka asi beegottenna; ba xiskuwaappekka denddenna.

<sup>13</sup> “Abeet Xoossau, neeni tana duufo giddon genttada, ne hanqqoi aadhdhana gakkanaashin qottidabaa gidarkkiishsha! Neeni taayyo keeruwa immada, he gallassi tana hassayidabaa gidarkkiishsha! <sup>14</sup> Issi asi haiqqikko, simmidi paxanee? Ta laamee yaana gakkanaashin, ha tugga wodiya ubbaa danddayan naagana. <sup>15</sup> Neeni medhdhido tanakka be7anau neeni laamotiyo wode, neeni tana xeesana; xeesin taani neeyyo koyana. <sup>16</sup> Hegaappe guyyiyan, neeni tumuppe ta tangguwaa wochchana; shin ta nagaraa ta bolli qoodakka. <sup>17</sup> Ta mooroi qarcciitaa giddon yiicetti uttiis; ta nagaraakka neeni kammadasa.

<sup>18</sup> “Deree kunddiyoonne meqerettiyoogaadan, zaallaikka xoqolettiyoogaadan, <sup>19</sup> haattaikka shuchchaa bookkiyoogaadaaninne di7oikka biittaa meeccidi efiyoogaadan, hegaadan neenikka asaa hidootaa xaissaasa. <sup>20</sup> Neeni a merinau xonaasa; yaatobare i bi aggees. A meraanne laammada, ne sinttappe yeddaasa. <sup>21</sup> A naati bonchchettikko, heгаа i erenna; eti tooshettikkokka be7enna. <sup>22</sup> SHin a bolla seelai a xalaalau siyettees; i ba xalaalau yeekkees” yaagiis.

## 15

### *Naa77antto Haasayata*

#### *Elifaazi Naa77antto Haasayido Haasayaa*

<sup>1</sup> Yaagin Temaana biittaappe yiida Elifaazi hagaadan yaagidi zaariis; <sup>2</sup> “Aadhdhida eranchcha asi carkkodan ohettennabaa haasayii? Woikko arshsho bagga carkkuwaa ba uluwaa coo kunttii? <sup>3</sup> Pattenna woikko maaddenna mootuwaa mootettii? <sup>4</sup> Hega

gidikko, neeni Xoossaassi yayyiyoogaa guuttadasa; haratikka Xoossaassi goinnen-naadan diggaasa. <sup>5</sup> Ne iitatetta ne haasayan erettes; ne cincca haasayai nena genttees.

<sup>6</sup> Ne bolli pirddiyai ne doonaappe attin, tana gidikke; ne inxxarssai ne bolli markkattees.

<sup>7</sup> “Koiro yelettida asi nenee? Woikko neeni dereti merettanaappe kase yelettadii?

<sup>8</sup> Nenei Xoossaa xuura yaa7aa tumu siyadii? Woikko aadhdhida eratettaa ne xalaalai eriyaabaa neeyyo milatii? <sup>9</sup> Nuuni erennabaa neeni eriyooobi aibee? Nuuyyo gelennan aggidi, neeyyo gelidabai aibee? <sup>10</sup> Ne aawaappe bairatiya asati, cimidi puulummida asati nu giddon de7oosona.

<sup>11</sup> “Xoossai neeyyo immido minttettoinne nuuni neeyyo ashkhetettan haasayido gaalai guutteeyye? <sup>12</sup> Ne wozanai nena aissi wora efii? Ne aifeekka aissi xeelaa dereqqii?

<sup>13</sup> Yaadata neeni Xoossaa bolli hanqqettadasa; heгаа mala qaalaakka ne doonaappe kessadasa. <sup>14</sup> Asi Xoossaa sinttan geeshsha gidanau danddayii?

Woikko maccaasappe yelettida asi xillo gidanau danddayii? <sup>15</sup> Be7a, Xoossai ba kiitanchchatunkka ammanettenna; harai atto salotikka a sinttan geeshsha gidokkona.

<sup>16</sup> SHin ha sheneyiyaanne tunida asi, nagaraakka haattaadan ganiya asi ubba iitaa darennee!

<sup>17</sup> “Iyyoobaa, ane siya! Taani neeyyo yootana; taani be7idobaa ubbaa neeyyo odana. <sup>18</sup> Aadhdhida eranchcha asati bantta maizza aawatuppe demmido eratettaa genttendan tana tamarissidosona. <sup>19</sup> Ha biittai eta xalaalaassi imettiis; hara biittaa asaa timirtee eta giddon walahettibeenna.

<sup>20</sup> “Asa huqqunnidi de7iya iita asi, ba de7o laitta ubban tuggi appe shaahettenna.

<sup>21</sup> Ubbaton daganttiya cenggurssai a haittan siyettees; i saro de7ais giishin, panggati a bolli yaana. <sup>22</sup> Xumaappe kessi ekkanaagaa i ammanenna; i bisuwau qadettiis.

<sup>23</sup> A ahai ankkuwau quma gidana; baayyo xuma gallasai matattidoogaa i erees. <sup>24</sup> Metoinne tuggai olau kiyida kawuwaadan a daganttana. <sup>25</sup> Aissi giikko, i ba kushiya Xoossaa bolli denttiis; Ubbaa Danddayiya Xoossaa bollikka xaliis. <sup>26</sup> Burzzuzzai burzzuzzai kiyi uttido ordde gondalliyya oiqqidi, Xoossaa bolli makkaliis.

<sup>27</sup> “A som77oi modhdhido gishshau, a xeessaikka boborccido gishshau, <sup>28</sup> i laattidi de7iyo katamatikka olan laalettido gishshaunne i de7iyo keettatikka ooninne de7enna ona gidido gishshau, <sup>29</sup> i ba duretettan daro gam77enna; a aqoikka aara takkenna.

<sup>30</sup> “Xumaappe i kessi ekkenna; a tasheta lacoi melissana; a ciishshaakka carkkoi pitti xaissana. <sup>31</sup> Barkka bana cimmiiddi, hadaban ammanettoppo. Ammanettikko, i ekkanaabakka hadabaa. <sup>32</sup> Wodee gakkennan shulliyaanne meli simmidi, naa77antto aacanau danddayenna mittaa mala i gidana. <sup>33</sup> Teerennan wurccuwaara qoqqofettiya woiniyaa malanne ciishshai qoqqofettiyo wogaraa mala i gidana. <sup>34</sup> Xoossaassi yayyenna asatussi zaree xayana; mattaaiyan keexettida keettaakka tamai maana.

<sup>35</sup> Eti metuwaa shahaaridi, iitabaa yeloosona; eta uluwankka cimoi kumi uttiis” yaagiis.

## 16

### *Iyyoobi Haasayees*

<sup>1</sup> Yaagin Iyyoobi hagaadan yaagidi zaariis; <sup>2</sup> “Taani haggaa mala haasayaa daruwaa siyaas; intte minttettoos giiddi, tana metiyaageeta. <sup>3</sup> Ha go77i bainna intte haasayaayyo wurssetti baawee? Tanaara inttena haggaa keenaa palamissiya gaasoi aibee? <sup>4</sup> Intte ta sohuwan de7in, taani intte sohuwan de7idabaa gidiyaakko, taanikka ta hu-

uphiyaa qaattaidda, ha77i intte giyoobaa ubbaa intte bolli loittada haasayana shin!

<sup>5</sup> Hegaadankka, ta zoriyan taani inttena minttana shin! Ta doonaappe kiyiya haasayaikka inttena minttettana shin!

<sup>6</sup> “SHin taani haasayaakkokka, ta sahoi decenna; taani co77u gaada dand-dayiyaakkokka, taappe kichchenna. <sup>7</sup> Abeet Xoossau, neeni tana hitti oottadasa; ta keettaa asaa ubbaakka xaissadasa. <sup>8</sup> Nenei ta gogaa melissadasanne gunddissadasa;



ta bollaakka gilqqissadasa. Hegaa gishshau, asai tana be7idi, 'Hagee i nagaranchcha gidiyoo gau markka' yaagees. <sup>9</sup> Xoossai ba hanqquwan tana duuteretti yeggiis; ba achchaakka ta bolli garcciiis; i ta morkkee tana dereqqees. <sup>10</sup> Asati ta yuushuwan shiiqidosa; shiiqidi ta bolli qilliicciiddi, ta qinxalliyyaa baqqidosona. <sup>11</sup> Xoossai nagaraa oottiya asatuyyo tana aattidi immiis; iitatu kushiyankka i tana oliis.

<sup>12</sup> "Taani kase woppu gaada de7aas; shin Xoossai tana kinchcherettiis; ta mirggaaciyyaa oiqqidi, i tana mentterettiis. Qassi i tana zambbi kaa7anau baazzan wottiis; <sup>13</sup> a wonddafiyyaa zubbeti tana yaara haara muddidosona. Qareti bannan i ta kilahuwaa caddidi, ta ciyyiyaa ta tiriyaappe sa7an gussees. <sup>14</sup> Olanau woxxiya olanchchaadan, i tana zaari zaaridi masunxxissees. <sup>15</sup> Taani kayyottada, waaruwaa maayaas; ta wolqqaikka baanan olettiis. <sup>16</sup> Taani yeekkiyo yeehuwaa daruwan ta som77oi puuriis; ta aifeekka zo77iis. <sup>17</sup> SHin ha ubbankka taani mooridobi baawa; ta woosaikka geeshsha.

<sup>18</sup> "Biittau, biittau, ta suuttaa kammoppa; taani waassanaagaa diggoppa. <sup>19</sup> Ha77ikka ta markkai saluwaana; taayyo xabaqatiyaagee bolla xoqqaana. <sup>20</sup> Ta laggeti tana karidi xeelloosona; ta aifee Xoossaa sinttan afuttaa tigees. <sup>21</sup> Asaa asaara walassidi sigettiya asi de7iyoo gaadan, tana Xoossara sigettiya asi de7idaa gideerenneeshsha! <sup>22</sup> Aissi giikko, aramida laittati aadhdhidoogaappe guyyiyan, taani simmennasaa baana.

## 17

### *Qassikka Iyyoobi Haasayees*

<sup>1</sup> "Ta shemppiyyaa kiyausu; ta laittai qaammiis; taayyo duufoi giigi uttiis. <sup>2</sup> Tana qilliicciyaageeti tumuppe ta yuushuwan de7oosona; eti taayyo yiillotiyo yiilluwaa ubbaton taani be7ais.

<sup>3</sup> "Abeet Xoossau, neeppe hari tana maaddiyaabi banna gishshau, neeni ne huuphiyan taayyo waase gida. <sup>4</sup> Etau gelennaadan, neeni ta laggetu wozanaa dammet-tadasa. Hegaa gishshau, neeni etau xoonuwaa immoppa. <sup>5</sup> Miishshaa demmana giidi, ba laggeta aatti immiya asaa nagarai a naata kaa7ana.

<sup>6</sup> "Xoossai tana asa ubbau qilliicciyoobaa kessiis; asi som77uwan cuchchiyo asa taani gidaas. <sup>7</sup> Taani daro kayyottido gishshau, ta aifeekka galjiis; ta kushetinne ta tohoti laafidi, xinqqo keesa kiyidosona. <sup>8</sup> Keha asati tana be7idi dagammidosona; suuretikka Xoossaa kaddiyaageetu bolli yiillotidosona. <sup>9</sup> Gidikkonne, xilloti bantta ogiyaappe yaakka haakka simmakkona; suureti wolqqa gujji gujji boosona. <sup>10</sup> SHin ha77i ubbaikka ane taakko haa yiite! Yiyaakkokka, taani intte gidдон issi aadhdhida eranchcha asakka demmikke.

<sup>11</sup> "Ta de7o laittai wuriis; ta halchchido halchchoikka ta wozanaa amoikka coo attiis. <sup>12</sup> Ta laggeti qammaa gallassa goosona; xumi uttidaashin, 'Poo7ana hanees' yaagoosona. <sup>13</sup> Taani ufaissan naagiyo ta keetta duufuwaa; ta hiixaakka yan xuman hiixxana. <sup>14</sup> Duufuwaa taani, 'Neeni ta aawaa' yaagana; guxuniyaakka, 'Neeni ta aayyiyo' woikko 'Ta michchiyo' yaagana. <sup>15</sup> Yaatin, ta hidootai awaane? Ooni a be7idee? <sup>16</sup> Ta hidootai tanaara duufuwaa banddee? Nuuni naa77ai issippe biittan duge wodhdhaneeshsha?" yaagiis.

## 18

### *Bilddaadi Naa77antto Haasayido Haasayaa*

<sup>1</sup> Hegaappe guyyiyan, SHuuha biittaappe yiida Bilddaadi hagaadan yaagidi zaariis; <sup>2</sup> "Iyyoobaa, neeni ha haasayaa aude wurssuutee? Ane akeeka. Yaatobare nuuni haasayana. <sup>3</sup> Nuna aissi miizza kessai? Aissi nuna damma kessai? <sup>4</sup> Neeni ne hanqquwan nena qohaasa. Ne hanqquwan biittai baisa gidanee? Woikko zaallati bantta sohuwaappe xoqolettanee?"

<sup>5</sup> “Nagaranchchatu de7oi xomppee to7iyooogaadan to7anaagee geeshsha; i naa77antto mulekka eexxenna. <sup>6</sup> I xomppee bainna keetta mala; kase a matan de7iya xomppeekka to7ees. <sup>7</sup> I tanggiyo tanggoikka qaammee; i haraata zoriyo zoree a onggees.

<sup>8</sup> “A hemetai a efiidi, piriyan gelissees; diizzaa gidдон i hemettees. <sup>9</sup> Piree a ginddiyaa oiqqees; oiqqidi a qaatuwaa diggees. <sup>10</sup> Ayyo yurddo wodoroi geeman sa7an hiixetti uttees; i hemettiyo ogiyanka gitee wodhdhi uttees.

<sup>11</sup> “Dagamai a dooddees; dagamai a guyyeera ginddiyaa matidi yedettees. <sup>12</sup> A wolqqai namisan daafuriis; bashshai a lanqqen naagees. <sup>13</sup> Woriya harggee a bollan ubban woraajjees; a kushiyaanne a tohuwaa duushissees. <sup>14</sup> I hirggi bannan de7iyo ba keettaappe yedetettees; eti Haiquwaa giyo kawuwaakko, a efoosona. <sup>15</sup> Harggiyaa gooddanau dinniyaa laaloogaappe guyyiyan, ooninne a keettan de7ena. <sup>16</sup> I xaphoi garssaara meliyoonne tashetikka bollaara qoqqofettiyo mittaa mala gidees. <sup>17</sup> A woree biittaappe xayees; a sunttaikka sa7an hassayettennan attees. <sup>18</sup> I poo7uwaappe xumau yedetettana; asai de7iyo biittaappekka i xayana. <sup>19</sup> Ayyo na7i woikko zaree xayana; i de7ido sohuwan issi asinne paxa attenna. <sup>20</sup> Argo bagga asai a gakkidaban dagammee; arshsho bagga asaikka yashshau kokkorees. <sup>21</sup> Audekka iita asatu wurssettai hegaa mala; Xoossaa erennaageetu qaadaikka hegaa mala” yaagiis.

## 19

### *Iyyoobi Haasayees*

<sup>1</sup> Hegaappe guyyiyan, Iyyoobi zaaridi, hagaadan yaagiis; <sup>2</sup> “Intte tana aude gakkanaassi mudduuteetii? Aude gakkanaassi intte qaaln tana gaaccuuteetii? <sup>3</sup> Intte tana tammutoo cayideta; tana kaushshiiddikka yeellatekketa. <sup>4</sup> Taani tumu balidabaa gidiyaakkokka, ta balai tana oichchana. <sup>5</sup> Intte taappe kehiyoobaa intteyyo milatin, ‘Hagee metoi ubbai a gakkidoogee, i moorido gishshaassa’ yaagidi, ta bolli pirddeeta. <sup>6</sup> SHin ha metuwaa ubbaa ta bolli gattidaageenne gitiyan tana gelissidaagee Xoossaa gidiyoogaa erite.

<sup>7</sup> “Taani, ‘Naaqettaas’ yaagada waassin, taayyo alliyaabi baawa; qaalaa xoqqu oot-tada, suure pirddaassi waassinkka, siyiyaabi baawa. <sup>8</sup> Taani kanttennaadan Xoossai ta ogiyaa diriis; ta hemettiyoosaakka xuman goziis. <sup>9</sup> Ta duretettaa taappe qaariis; ta bonchchuwaakka taappe diggiis. <sup>10</sup> I tana mentteretti yeggiis; ta hidootaakka xaphuwaara xoqolettida mittaa mala oottiis. <sup>11</sup> A hanqqoi ta bolli eexxi kiyiis; i tana ba morkkedan qoodees. <sup>12</sup> Ta bolli woraajjanau i ba olanchchata kiittees; eti tana olanau ogiyaa kessoosona; ta dunkkaaniyaa yuushuwaakka dooddoosona.

<sup>13</sup> “Xoossai ta ishata taappe haassiis; tana eriyaageeti muleera taayyo allaga gididosona. <sup>14</sup> Ta dabboti taappe shaahettidosona; ta laggetikka tana dogidosona. <sup>15</sup> Ta son de7iya imattati tana dogidosona; ta macca ashkkaaratikka tana imattadaaninne betedan xeelloosona. <sup>16</sup> Taani ta ashkkaaraa xeejin, taayyo koyenna; taani woossinkka, taayyo eenenna. <sup>17</sup> Ta maccaasiyaa ta doonaa peenuwaa ixxaasu; ta ishanttikka tana shenetoosona. <sup>18</sup> Harai attin, guutta naatikka tana karoosona; taani eqqiyo wode, ta bolli qilliicoosona. <sup>19</sup> Ta mata laggeti ubbai tana shenetoosona; taani siiqidoogeetikka taayyo zokkuwaa zaaridosona. <sup>20</sup> Ta meqettai ta gogaara ohettiis; haiquwaappe qiisan taani attas.

<sup>21</sup> “Inttenoo ta laggetoo, Xoossaa kushee tana dechchido gishshau, taayyo qarettite. <sup>22</sup> Xoossai tana yedettiyoogaadan, intte tana aissi yedeteteetii? Hanno gakkanaassi intte tana tuggayidoogee gidennee?

<sup>23</sup> “Hanno gakkanaashin taani haasayido qaalai, wai hassayettidaa gideerenneeshsha! Maxaafankka wai xaafettidaa gideerenneeshsha! <sup>24</sup> Daro gam77ana mala, birata maarisan zaallaa bollan woocettidi xaafetteerenneeshsha!

<sup>25</sup> “Tana Wozidaagee paxa de7iyooogaanne wurssettan biittaa bollan i eqqanaagaa taani erais. <sup>26</sup> Ta gogai meetetti wurikkonne, taani ta ashuwaappe shaahettada, Xoossaa be7anaagaa erais. <sup>27</sup> Hara uraa gidennan, taani ta huuphen, ta aifiyan a be7ana. Hegaa gishshau, ta wozanai aiba laamotii!

<sup>28</sup> “Intte, ‘Metuwaayyo unkkoi a gidido gishshau, ane haayite! A yedettoos!’ giikko, <sup>29</sup> bisuwaayyo yayyite! Xoossaa hanqqoi bisuwaara yaana; pird dai de7iyooogaakka erite” yaagiis.

## 20

### *Xoofaari Naa77antto Haasayido Haasayaa*

<sup>1</sup> Naa7ima biittaaappe yiida Xoofaari hagaadan yaagidi zaariis; <sup>2</sup> “Ne haasayai tana lanccissido gishshau, taani ainne takkennan ne haasayaayyo zaaruwaa immana. <sup>3</sup> Ne cashsha haasayaa taani siyais; siyin ayyo bessiya zaaruwaa tana imma imma gees.

<sup>4-5</sup> “Asa biittaa bolli wottido wodiyaappe doommidi, beniisappekka nagaranchcha asatu ceeqoi qantta wodiyaassa gidiyooгаа, Xoossaa erenna asatu ufaissaikka liphida aifee xeellanaashiina gidiyooгаа neeni eraasa. <sup>6</sup> Iita asi shaaraa gakkanaashin aduqqikkokka, <sup>7</sup> i buhiyaadan pitetti xayana. A eriya ubbai, ‘I awan de7ii?’ yaagana.

<sup>8</sup> Aimuwaadan i paalli xayana; simmidikka beettenna; qammaa ajjuutaadan i xayii bayana. <sup>9</sup> A be7ida aifeti naa77anttidi, a be7okkona; i ba de7iyooosaappekka tippi giidi xayana. <sup>10</sup> Iita aawai bongqi ekkido miishshaa a naati bantta kushiyan guyye zaarana. <sup>11</sup> Payyanne mino gidiya a bollai guutta wodiyaappe guyyiyan, biitta kiyana.

<sup>12</sup> “Iita asa doonan iitatetta qumadan laqilaqikkokka, i ba inxxarssaappe garssa baggaara gentikkokka, <sup>13</sup> wurennaadan ba doonan coommiiddi, wotti bayikkokka, <sup>14</sup> a ulo gidon a qumai laamettana; laamettidi woriya shooshshaa yiishshaa mala au gidana. <sup>15</sup> Iita asi ba mittido duretetta haa cuchchana; a uluwaappe Xoossai cooshshidi kessana. <sup>16</sup> Iita asi mittiyoobai au yiishsha gidana; shooshshaa yiishshaa mala gididi, a worana. <sup>17</sup> Eessainne maattai haattaadan goggishin, i be7ennan haiqqana. <sup>18</sup> Ba daafurido daafuraa cawaa meennan, haraassi sheedhdhana; zal77idi worissido ba woriyankka ufaittena. <sup>19</sup> Aissi giikko, hiyyeesata i un77ettiis; eta shenehoo giis; hara asi keexxido keettaakka bau ekkiis.

<sup>20</sup> “A yiiqiyau zawi baawa; ba dosiyoobaa xarzzanau danddayenna; <sup>21</sup> i miidoogaappe guyyiyan, albinne attenna. Hegaa gishshau, a duretetta gam77enna. <sup>22</sup> I daro aquwaa demmiyo wode, metoi akeekennan a bolli gakki wodhdhana. <sup>23</sup> I miidi kallishin, Xoossai a qaxxayanau ba suulliya hanqquwaa a bolli gussana. <sup>24</sup> Birata bisuwaappe i baqatana; shin nahaasiyaa zubbee a caddana. <sup>25</sup> He zubbee ayyo zokkuwaara kantti kiyana; he phooliyaa xeerai a tiriya kanttidi, ciyyiyaa gussana. Hegaa gishshau, dagamai a wozanaa shabbirana.

<sup>26</sup> “I shiishshido aqo ubbai xayana; asi eettibeenna tamai a maana; a keettan attida asai ubbaikka taman meetettana. <sup>27</sup> Saloti ha bitaniyaa nagaraa qonccissana; biittaikka a bolli markkattana. <sup>28</sup> Xoossai hanqqettidi ehiyo beetan a keettainne ayyo de7iyaabai ubbai shohettidi baana. <sup>29</sup> Xoossai iita asatuyyo wottido qaada hagaa” yaagiis.

## 21

### *Iyyoobi Haasayees*

<sup>1</sup> Hegaappe guyyiyan, Iyyoobi hagaadan yaagidi zaariis; <sup>2</sup> “Ane ta haasayaa akeekidi ezggite; ezggyoogee intte tana minttettiyoogaa gido bayin. <sup>3</sup> Taani issiton haasayanau taayyo kayaa immite. Taani haasaya simmin, qilliiccite! <sup>4</sup> Taani mootettiyo ai asara

gidenna. Yaatin, tau danddayai wurikko, hegee garamissiyaabee? <sup>5</sup> Ane tana xeellite; xeellidi garamettite; intte kushiyanka intte doonaa oiqqite. <sup>6</sup> Tana gakkidabaa taani qoppiyo wodekka, tana daganttees; ta bollaikka kokkorees.

<sup>7</sup> “Iita asati aissi paxa de7iyoonaa? Eta baree aissi aduqqii? Eta wolqqaikka aissi dari dari bii? <sup>8</sup> Eta naatinne naatu naati de7oosona; eti diccishin be7anau, gam77idi de7oosona. <sup>9</sup> Eta soi hirggi bannan saro de7ees; Xoossai eta ba gatiman shoci erenna. <sup>10</sup> Eta korima boorati macca miizzaara gaittiyo wode, koxxennaadan oittoosona; macca miizzatikka aucayennan yeloosona. <sup>11</sup> Bantta naata dorssaa wudiyaadan kessoosona; eta naatika yan han duroosona. <sup>12</sup> Karaabiyaa baqqiidinne diittaa diixxiiddi, yettaa yexxoosona; pulaaliyaa punniiddikka ufaittoosona. <sup>13</sup> Eti bantta de7o laittaa ishaluwan polidi, bantta duufuwaakka saro boosona. <sup>14</sup> Yaanidikka eti Xoossaa, ‘Nuuppe haakka! Nuuni ne ogiyaa eranau koyokko! <sup>15</sup> Nuuni ayyo oottanau Ubbaa Danddayiya Xoossai oonee? Nuuni a woossidi, go7ettanabi aibee?’ yaagoosona. <sup>16</sup> Eti bantta ishalo de7uwaa bantta minotettan demmida goosona; shin taani eta qofaa ekkikke.

<sup>17</sup> “Iita asatu de7uwaa xompee to7i erii? Eta bolli bashshai wodhdhi erii? Xoossai ba hanqquwan eta qaxxayi erii? <sup>18</sup> Carkkuwaa sinttan eti suullaadan hanido wodee de7ii? Gotee pittu efiyo baanaadan eti hani eriyoona?”

<sup>19</sup> “Intte, ‘Xoossai aawatu mooruwan eta naata qaxxayees’ yaageeta. Ane Xoossai nagaranchchata eta huuphen qaxxayo! Yaatiyaakko eti bantta mooruwaa erana. <sup>20</sup> Eti bantta qixaatiyaa banttau ekkona. Ubbaa Danddayiya Xoossaa hanqquwaa xuu7aakka eti bantta huuphen uyona. <sup>21</sup> Aissi giikko, eti haiqqiichchidoogaappe guyyiyan, eta naata aibi gakkikkonne koyokkona.

<sup>22</sup> “Bolla xoqqan de7iyaageeta pirddiya Xoossaa eraa tamarissanau danddayiya asi de7ii? <sup>23</sup> Issi asi kumetta wolqqainne kumetta saroi de7ishin, ishaluwan de7iiddi haiqqees. <sup>24</sup> A bollai orddidaashin, a meqettaa kolzseekka shica de7ishin haiqqees. <sup>25</sup> SHin hara asi a shemppuwan azzanoi paccennan, ba de7on mulekka lo77obaa demmennan haiqqees. <sup>26</sup> Haiqqidi eti naa77aikka issi mala biittan moogettoosona; eta naa77aakka guxuneti kammoosona.

<sup>27</sup> “Intte tana naaqqanau qoppidi, intte wozanan halchchido halchchuwaa muliyaa taani loittada erais. <sup>28</sup> Intte, ‘He iitaa oottiya, gita bitaniyaa keettai ha77i awaanee?’ yaageeta. <sup>29</sup> Ogiyaara hemettiya asata oichchibeekketii? Eti odiyoogaa ammanekketii? <sup>30</sup> Eti, ‘Iita asati bashshaa gallassi boshettennan attoosona; Xoossaa hanqqoi qoncciyoo gallassikka eti kessi ekkana’ yaagoosona. <sup>31</sup> Iita asa a iitatettau oonee walassanai? I oottido iitabaukka a qaxxayanai oonee? <sup>32</sup> I haiqqin, a ahaa duufuwaa efiyo wode, a duufoi bonchchuwan naagettana. <sup>33</sup> Qoodi banna asai a baliyan pe7ees; a duufuwaa biittaikka utulaadan au kauyyees. <sup>34</sup> Yaatin, intte tana waati hada oduwan minttetteetii? Intte ta oishaassi zaarido zaaroi ubbai worddo!” yaagiis.

## 22

### *Hezzantto Haasayata*

#### *Elifaazi Hezzantto Haasayido Haasayaa*

<sup>1</sup> Hegaappe guyyiyan, Temaana biittaappe yiida Elifaazi hagaadan yaagidi zaariis; <sup>2</sup> “Asi Xoossaa go77anau danddayii? Harai atto aadhdhida eranchcha gidiaakkokka, i bana go77anaappe attin, Xoossaa go77enna. <sup>3</sup> Neeni xillo gidikko, hegee Ubbaa Danddayiya Xoossaa ufaissii? Ne ogee boree bannaagaa gidikko, hegan i aiba wore demmii?

<sup>4</sup> “Neeni ayyo yayyiyo gishshaasee, i nena seeriyoogeenne pirddiyoogee? <sup>5</sup> Ne iitatettau daro gidennee? Ne nagarau zawi baawa. <sup>6</sup> Neeni ne ishata gaasoi bannan waasiyaa

xeessadada; asaa maayuwaakka qaarada eta kallo ashshadada. <sup>7</sup> Neeni saametti-daageeta haattaa ushshabaakka; namisettidaageetakka qumaa diggadada. <sup>8</sup> Neeni ne wolqqaaninne ne maatan zempada, hara asaa biittaa neeyyo coo ekkadada. <sup>9</sup> Am77eta mela kushe yeddadada; aawi bannaageetakka huqgunnadada. <sup>10</sup> Ne yuushuwan gitee dooddi uttidoogee hegaassa; akeekennan yashshai nena kokkorssiyoogee hegaassa. <sup>11</sup> Neeni be7ennaadan, neeyyo xumiyooogee hegaassa; qassi kixa haattai nena muukkiyoogee hegaassa.

<sup>12</sup> “Xoossai bolla xoqqa saluwan uttidi, xoqqan de7iya xoolintteta duge xeellees. <sup>13</sup> SHin neeni, ‘Xoossai ai erii? I heгаа mala, sakkana xumaa giddoorakka pirddanau danddayii?’ <sup>14</sup> Salo gufanttuwaa bolli i simerettiyo wode, i be7ennaadan, sikkida shaarai a goozees’ yaagaasa.

<sup>15</sup> “Nagaranchchati hemettido beni ogiyan baanau qofaa qachchadii? <sup>16</sup> Eti bantta wodee gakkennan de7ishin haiqqidosona; eta de7uwaa baasoikka di7uwan meecetti xayii. <sup>17</sup> Eti Xoossaa, ‘Nuuppe haakka! Ubbaa Danddayiya Xoossai nuuyyo ai oottanau danddayii?’ yaagidosona. <sup>18</sup> Gidikonne, eta keettan lo77obaa kunttidaagee Xoossaa. Hegaa gishshau, iita asatu qofai taayyo gelenna.

<sup>19</sup> “Iita asatu bolli gakkiaabaa be7idi, xilloti ufaittoosona; suure asatika hagaadan yaagidi, eta bolli qilliiccoosona; <sup>20</sup> ‘Tumaappe nu morkketi xayidosona; eta duretetaakka tamai miis’ yaagoosona.

<sup>21</sup> “Iyyoobaa, ha77ikka Xoossaara giiga; aara saro de7a. Yaatikko, neeni anjjettana. <sup>22</sup> A doonaappe timirttiyaa ekka; a qaalatakka ne wozanan wotta. <sup>23</sup> Nenatettaa ziqqissada, Ubbaa Danddayiya Xoossaakko, neeni simma; iita ooso ubbaa ne sooppe digga. <sup>24</sup> Ne worqqa sa7an ola; ne muruta worqqaakka shaafaa shuchchan ola. <sup>25</sup> Ubbaa Danddayiya Xoossai neeyyo worqqanne doorettida bira gido.

<sup>26</sup> “Hegaappe guyyiyan, neeni Ubbaa Danddayiya Xoossan tumu ufaittana; ufaittada yeellatenna Xoossaakko pude xeellana. <sup>27</sup> Neeni Xoossaa woossana; woossin i siyana; qassi neeni ne shiiquwaa ayyo gattana. <sup>28</sup> Neeni zorettada qachchidobai neeyyo polettana; ne hemettiyo ogiyankka poo7oi poo7ana. <sup>29</sup> Aissi giikko, Xoossai otorettiyaageeta kaushshees; shin banttana ziqqissiyaageeta ashshees. <sup>30</sup> I suure asa wotti ekkees. Ne kushee naaquwaappe geeshsha gidikko, i nena ashshana” yaagiis.

## 23

### *Iyyoobi Haasayees*

<sup>1</sup> Yaagin Iyyoobi hagaadan yaagidi zaariis; <sup>2</sup> “Taani ha77ikka Xoossaa bolli makkalaisinne zuuzummais; aissi giikko, taani oolinkka a kushee ta bolli deexxiyoogaa aggibeenna. <sup>3</sup> I de7iyooosaa taani erarkkinaashsha! I uttidosaakka gakkarkkinaashsha! <sup>4</sup> Yaatiyaakko, taani ta mootuwaa a sinttan biddana shin! Ta doonaakka palaman kuttana shin! <sup>5</sup> I ta mootuwaayyo zaariyoobi aibakkokka taani erana shin! <sup>6</sup> I ba gita wolqqan tanaara eqettaneeshsha? CHii, chii, i taani odiyoogaa siyanaappe attin, heгаа hanenna. <sup>7</sup> Ta wozanai suure gidiyo gishshau, taani Xoossaara mootettanau danddayais; i ta daannai tana merinau shatinttana.

<sup>8</sup> “SHin aisee, taani arshsho biikko, i yan de7enna; qassi taani arggo biikkokka, a demmikke. <sup>9</sup> I huuphessa bagga biittan oottiyo wode, taani a be7ikke; qassi tohossa bagga biitti simmiyo wodekka, taani a demmikke. <sup>10</sup> SHin i ta tangguwaa ubbaa erees; i tana paaccikko, taani worqqaadan geeshsha gidiyoogaa i be7ana. <sup>11</sup> Taani i hemettido ogiyaa baqqa oiqqada hemettaas; a ogiyaappe wora simmabeikke. <sup>12</sup> A doonaappe kiyiya azazuwaappe taani shaahettabeikke; a qaalaakka ta wozanan wottaas.

<sup>13</sup> “Xoossai laamettenna. Aara eqettana, woikko ba koyidobaa i oottennaadan a teqqana asi baawa. <sup>14</sup> I taayyo halchchidobaa polana; hegeetu mala, hara daro



halchhotikka ayyo de7oosona. <sup>15</sup> Hegaa gishshau, a sinttan eqqiyoogee keehippe tana yashshees; heгаа ubbabaa qoppada, taani kokkorais. <sup>16</sup> Ta wozanai taahanaadan Xoossai oottiis; Ubbaa Danddayiya Xoossai tana daganttiis. <sup>17</sup> Sakkana xumai ta som77uwaa goozikkokka, tana he xumai haasayaa diggibeenna.

## 24

### *Qassikka Iyyoobi Haasayees*

<sup>1</sup> “Ubbaa Danddayiya Xoossai pirddiyo wodiya aissi keerennee? A eriyaageeti he wodiya aissi be7okkonaa? <sup>2</sup> Iita asati bantta gadiyaa aassanau, zawan de7iya shuchchaa shoddoosona. Dorssaakka wuuqqi ehiidi, bantta dorssaa wudiyan gattidi heemmoosona. <sup>3</sup> Aawai baina naatu hareta laaggidi, ekki boosona; am77ee booraakka acuwau oiqqidi, banttau ekkoosona. <sup>4</sup> Hiyyeesata ogiyaappe yedettoosona; biittan de7iya hiyyeesata ubbaa bantta sinttappe qosetissoosona. <sup>5</sup> Bazzon de7iya harddiidatudan, hiyyeesati bantta naatuyyo miyoobaa koyiiddi, bazzon daafuroosona. <sup>6</sup> Eti dembban hara asau kattaa cakkoosona; iita asatu woiniyaa teera wurccuwaakka xunqgoosona. <sup>7</sup> Eti qammaa kallo aqoosona; meeguwa wodekka bollan paliyoobi etau baawa. <sup>8</sup> Deretun bukkiya iran eti murxxoosona; geliyoosaa xayidi, shuchchaa qoommoosona.

<sup>9</sup> “Iita asati aawai baina na7aa aayee xanttaa xammiyoosaappe dafi ekkoosona; hiyyeesatu guutta naatakka acuwaaoyyo oiqqoosona. <sup>10</sup> Hiyyeesati maayuwa xayidi, kallo hemettoosona. Eti mirqqiyaa miyyiiddi namisettoosona. <sup>11</sup> Eti zaitiyaa kessanau wogaraa teeraa burxxoosona; woine teeraakka gum77iiddi saamettoosona. <sup>12</sup> Kataman kataman haiqqana haniya asati ooloosona; deshettida asatika maaduwa koyidi waassoosona; shin Xoossai eta metuwa xeellenna.

<sup>13</sup> “Poo7uwaa ixxiya asati de7oosona; eti poo7oi aibakko erokkona; a ogiyaappekka wora boosona. <sup>14</sup> SHemppuwaa woriyaagee wonttimaatti denddidi, hiyyeesatanne metootanchchata worees; qammi qassi kaisodan wuuqqees. <sup>15</sup> SHaaramuxiyaagee sa7ai lem77anaagaa naagees; i, ‘Ooninne tana be7oppo’ giidi, ba som77uwaa kammees. <sup>16</sup> Kaisoti qammi keettaa bookkidi, wuuqqanau geloosona; shin gallassi poo7uwaa ixxiidi, qosetti pe7oosona. <sup>17</sup> Eta gallassa poo7oi yashshees; shin qamma xumai eta daganttena.

<sup>18</sup> “Iita asata di7o haattai quccidi efees; eta gakkida gadee qanggettidaagaa gidees. Ooninne eta woiniyaa turaa sohuwa beenna. <sup>19</sup> SHachchai hombbiyan seerin, awai a melissi xaissiyogaadan, hegaadankka, nagaranchchati haiqqidi xayoosona. <sup>20</sup> Hari attin, yelida aayetikka eta hassayokkona. Guxunee eta ashuwa mal77in mees. Eta iita osoikka wullida mittaadan meqqana. <sup>21</sup> Aissi giikko, eti na7i baina maine maccaasaa naaqqidosona; am77e maccaasaakka maaddennan ixxidosa.

<sup>22</sup> “Xoossai ba wolqqan minota xaissees; i eta bolli denddido wodekka, eti paxa atokkona. <sup>23</sup> Xoossai eti saro de7anaadan oottikkokka, eta ogiyaa wochchees. <sup>24</sup> Iita asati guutta wodiyaassi xoqqu xoqqu goosona; shin sohuwaarakka sharafaadan shullidi xayoosona; kattaadan cakettoosona.

<sup>25</sup> “Hegee hanenna giidi, kaddiya asi de7ii? Taani odido qaalaakka worddo giidi, ammanttiya asi de7ii?” yaagiis.

## 25

### *Bilddaadi Heezantto Haasayido Haasayaa*

<sup>1</sup> Hegaappe guyyiyan, SHuuh biittaappe yiida Bilddaadi hagaadan yaagidi zaariis; <sup>2</sup> “Xoossai wolqqaama gidiyo gishshau, asai yayyidi, ayyo haarettees. I ba saluwa kawotetta saruwan naagees. <sup>3</sup> A olanchchata goodanau danddayiya asi de7ii? Xoossaa poo7oi gakkenna sohoi de7ii? De7enna. <sup>4</sup> Yaatin, asi Xoossaa sinttan waani xillo

gidanau danddayii? Maccaasappe yelettida asi waani wogaadan geeshsha gidanau danddayii? <sup>5</sup> Xoossaa sinttan aginaikka wagagga poo7o gidenna; a sinttan xoolintetikka geeshsha gidokkona. <sup>6</sup> Yaatin, Xoossaa sinttan uu7enne guxune gidiya asi ai keena laafee?” yaagiis.

## 26

### *Iyyoobi Gidduwaara Kilppayees*

<sup>1</sup> Yaagin Iyyoobi hagaadan yaagidi zaariis; <sup>2</sup> “Wolqqi bainna asa neeni aiba maado maaddadii! Daafurida qeeseta neeni aiba ashetta ashshadii! <sup>3</sup> Aadhdhida eratetta bainnaagaa aiba zore zoradii! Ai keena gita eratetta qonccissadii! <sup>4</sup> Neeni ha qaalaa haasayanaadan nena oonee maaddidai? Qassi hagaadan haasayanau nena denttettidaagee o ayyaanee?” yaagiis.

### *Bilddaadi Ba Haasayaa Wurssees*

<sup>5</sup> Yaagin Bilddaadi, “Haiqqidaageetu moitilleti biittaappe garssa baggaara haattaa gidдон kokkoroosona. <sup>6</sup> Xoossaa sinttan Si7ooleekka qoncce; aibinne a genttanau danddayenna. <sup>7</sup> Xoossai huuphessa bagga salota micciis; sa7aakka aibakko bainnasan kaqqiis. <sup>8</sup> I shaaratun haattaa kuntees; kunttin haattaa deexuwan shaarati daakettokkona. <sup>9</sup> Goobanida aginaa i ba shaaran kammees. <sup>10</sup> Poo7uwaa xumaappe shaakkanau, saloi sa7aara danttettiyoosan qammainne gallassai laamettiyo zawaa Xoossai essees. <sup>11</sup> I seeriyo wode, salotu tuuqeti dagamau kokkoroosona. <sup>12</sup> Ba wolqqan abbaa co77u oottiis; ba akeekan Ra7aaba giyo miimminttiyaa xaissiis. <sup>13</sup> I shemp-piyo shemppuwan saloti geeyidosona; a kusheekka xonggettiya shooshshaa woriis. <sup>14</sup> Hageeti ubbai Xoossai oottido oosotuppe amaridaageeta; nuuni siyoogee saasuketta xalaala. Yaatin, a wolqqa gitatetta akeekanau danddayiyai oonee?” yaagiis.

## 27

### *Iyyoobi Haasayees*

<sup>1</sup> Yaagin Iyyoobi hagaadan yaagiis; <sup>2</sup> “Ta suure pirdaa tana diggidi, ta de7uwaa camo kessida, Ubbaa Danddayiya Xoossan taani caaqqais. <sup>3</sup> Xoossai taayyo de7o shemp-puwaa immido keenan, <sup>4</sup> ta doonai wordduwaa haasayenna; ta inxxarssaikka cimuwaa odenna. <sup>5</sup> Intte haasayidoogee likke gaada taani ekkikke; haiqqana gakkanaassikka taani tana suure giyoogaa aggikke. <sup>6</sup> Ta xillotetta mintta oiqqanaappe attin, xillotetta aggikke; taani de7ido laitta ubban ta wozanai kahai tana walassenna.

<sup>7</sup> “Ta morkketinne tanaara eqettiyaageeti ubbai iitanne mooranchcha asaadan qaxxayettona. <sup>8</sup> Xoossai eta shemppuwaa eta ashuwaappe shaakkidi, eta laittaa qanttiyo wode, iitatuuyo sinttanana ufaissi aibee? <sup>9</sup> Eta bolli metoi gakkiyo wode, Xoossai eta waasuwa siyii? <sup>10</sup> Ubbaa Danddayiya Xoossan eti ufaittane? Eti ubba wode Xoossaa xeesanee?

<sup>11</sup> “Taani inttena Xoossaa wolqqaabaa tamarissana; Ubbaa Danddayiya Xoossaa matan de7iyaabaa taani intteppe qottikke. <sup>12</sup> Intte ubbai haggaa intte huuphen be7ideta. Yaatin, ha hada haasayaa aissi haasayeetii?

<sup>13</sup> “Xoossai iita asatuuyo battido qaadainne huqqunniya asati Ubbaa Danddayiya Xoossaa ekkiyo woiwai hagaappe kaalliyagaa. <sup>14</sup> Eta naati ai keenaa darikkonne, eti olan wuroosona; eta zaretikka miyoobaa xayidi namisettoosona. <sup>15</sup> Hegaappe attidaageeti boshan wuroosona; eta am77etikka etayyo yeekkokkona.

<sup>16-17</sup> “Iita asati, goodin wurena biraa shiishshinkka, eta biraa suure asati shaakki ekkana; qassi maayuwaa darissidi shiishshinkka, eti shiishshiyooгаа xilloti maayana. <sup>18</sup> Eti keexxiyo keettati shararootiyaa keetta mala; naagiyaageeti keexxido zamppaa mala.

<sup>19</sup> “Eti dure gididi, bantta hiixan zin77ana; shin eti xiskuwaappe beegottiyo wode, aibinne xayin mela attana. <sup>20</sup> Dagamai di7uwaadan qoppennan eta bolli yaana; qammankka gotee eta denttidi efaana. <sup>21</sup> Arshsho bagga carkkoi eta de7iyoosaappe pittidi efaana. <sup>22</sup> Eti kessi ekkanau baqatishin, qareti bannan eta bolli wodhdhana. <sup>23</sup> Wodhdhidi wolqqaama cenggurssaa sissiiddi, eta yedettana.

## 28

### *Aadhdhida Eratettaa Timirrtiyaa*

<sup>1</sup> “Biraa bookki kessiyoosainne worqqa geeshshanau seerissiyoosai de7ees. <sup>2</sup> Biratai asai biittaappe bookkin kiyees; nahaaseekka a shuchchaa seerissin kiyees. <sup>3</sup> Asai xomppiyaa ehiidi, xumaa xonees; biittaa xaggaa gakkidi, sakkana xumaa giddon he shuchchaa koyees. <sup>4</sup> Asai de7iyoosaappe haakkidi, asaa tohoi yedhdhi erennasaa biidi, hegan ciimma ollaa bookkees; bookkidi hegan wodoruwan yaanne haanne kuulumuliiddi, asaappe shaahettidi de7ees. <sup>5</sup> Kattai biittaappe mokkees; shin he biittaa giddoi taman seeridi, aadhdhi aadhdhi wodhdhees. <sup>6</sup> He biittaa giddon de7iya shuchchaappe sampperiyaa giyo al77o shuchchai kiyees; a baanaa giddoppekka kulkka worqqai beettes.

<sup>7</sup> “He shuchchaa bookkiyoosaa efiya ogiyaa xinggillee erenna; gaceekka be7ibeenna. <sup>8</sup> Hanttaara do7ati bantta tohuwan he sohuwaa yedhdhi erokkona; gaammoikka hegaara kanttena.

<sup>9</sup> “Asi mino zaallaa mentterettes; deriyaakka bookkidi, xaphuwaappe aatti yeggees. <sup>10</sup> Zaallaa lukkidi, kanttiyo ogiyaa kessidi, he al77o shuchchaakka demmees. <sup>11</sup> Haattai he sohuwau goggennaadan zeerees; geemmidabatakka poo7uwau kessees.

<sup>12</sup> “SHin aadhdhida eratettai awappe beettanau danddayii? Akeekai beettiyoosai awee? <sup>13</sup> Asi a tumu waagaa erenna; aissi giikko, aadhdhida eratettai paxa de7iyaageetu giddon beettanau danddayenna. <sup>14</sup> Abbaa ciimmai, ‘Aadhdhida eratettai ta giddon baawa’ yaagees.

<sup>15</sup> “Aadhdhida eratettai worqqan woikko biran shamettenna. <sup>16</sup> Aadhdhida eratettai muruta worqqan, maragidiyaanne sampperiyaa geetettiya al77o shuchchan shamettenna. <sup>17</sup> Worqqainne heregaappe oosettida miishshatu waagai aara likettenna; worqqaappe oosettida al77obankka laamettenna. <sup>18</sup> Aadhdhida eratettaa waagai zaagooliyaappe, almaaziyaappenne inqqa ubbaappe aadhdhees. <sup>19</sup> Tophaaziyoonyaa giyo Toophphiya inqqaikka aara likettenna; muruta worqqanka shamettenna.

<sup>20</sup> “Yaatin, aadhdhida eratettai auppe yii? Akeekai beettiyoosai awee? <sup>21</sup> Paxa de7iya mereta ubbaappe geemmi uttiis; saluwaa kafotikka a demmokkona. <sup>22</sup> Bashshainne haiqoi, ‘Nuuni aadhdhida eratettau odo xalaalaa nu haittan siyida’ yaagoosona.

<sup>23</sup> “Aadhdhida eratettaakko efiya ogiyaanne i de7iyo sohuwaa eriyai Xoossaa xalaala. <sup>24</sup> Aissi giikko, Xoossai sa7aa gaxaa ubbaa xeellees; xeellidi salotuppe garssaara de7iyaabaa ubbaa be7ees. <sup>25</sup> Xoossai carkkuwaassi wolqqa immido wodenne shaaraa haattaa likkido wode, <sup>26</sup> iraiikka awan bukkanaakko, dadaikka awan wodhdhanaakko wogaa wottido wode, <sup>27</sup> i he wode, aadhdhida eratettaa be7iis; be7idi paacciis; paaccidi, lo77o giis. <sup>28</sup> Hegaappe guyyian, Xoossai asaassi odiiddi, ‘Xoossaassi yayyiyoogee aadhdhida eratetta; iitaappe haakkiyoogee akeeka’ yaagees” yaagiis.

## 29

### *Iyyoobi Wurssetta Mootuwaa Mootees*

#### *Iyyoobi Haasayees*

<sup>1</sup> Iyyoobi qassikka hagaadan yaagiis; <sup>2</sup> “Ha77i ta de7iyo duussai Xoossai beni tana naagido wodiyaagaa mala gideerenneeshsha! <sup>3</sup> A xompee ta bolli poo7in, taani a

poo7uwan hemettaas. <sup>4</sup> He wodee Xoossai tananne ta so asaa naagin, taani ta kumetta wolqqaara de7ido wode. <sup>5</sup> He wode Ubbaa Danddayiya Xoossai tanaara de7ees; ta naatika ta yuushuwan de7oosona. <sup>6</sup> Taani ta kushiya maattan meecettaas; ta gaacciyo woxaappekka zaitee shaafaadan goggiis.

<sup>7</sup> “Taani kataman de7iya pirdda keettaa biido wode, daannatuura issippe uttaas. <sup>8</sup> He wode yelagati tana be7idi, ogiyaa immidosona; cimatika tana bonchchanau denddidi eqqidosa. <sup>9</sup> Halaqati haasayyoogaa aggi bayidosona; bantta doonanka bantta kushiya wottidosona. <sup>10</sup> He kataman de7iya gita asatika co77u giidosona; eta inxxarssaikka eta kookkiyaa baqqi oiqqiis.

<sup>11</sup> “Tabaa siyidaageetinne tana be7idaageeti ubbai tana galatidi haasayidosona. <sup>12</sup> Aissi giikko, maaduwaassi waassiya hiyyeesatanne aawai aayyiyaa xayin, maaddiyaabi bannaageeta taani ashshaas. <sup>13</sup> Haiqqana haniya bitanee tana anjjiis; am77iyaakka ta maaduwan ufaittaaasu. <sup>14</sup> Taani xillotetta maayodan maayaas; suure pirddaikka ta afala malanne qumaashsha mala. <sup>15</sup> Taani qooqetuyyo aife, wobbetuyyo toho gidaas. <sup>16</sup> Hiyyeesatuyyo aawa gidaas; taani erenna asatuyyookka xabaqa gidaas. <sup>17</sup> Taani iitatu gappataa menttaas; eti shankkatidi oiqqidoogeet akka eta doonaappe wotta ekkaas.

<sup>18</sup> “Hegaa gishshau, taani ta qofan, ‘Taani lo77o, adussa laittaa ta so asaa gidduwan de7ada haiqqana. <sup>19</sup> Aissi giikko, taani ba xaphota haattaa giddo yeddidanne xaazai qamma ubban a tashiyaa bolli de7iyo mittaa mala. <sup>20</sup> Taani ubbatonkka bonchchettata de7ana; ta wolqqaikka ubbaton ooraxxana’ gaada qoppaas.

<sup>21</sup> “Taani haasayyoogaa asai sirphphi gi ezgidi, ta zoriyaa ekkiis. <sup>22</sup> Taani haasayidoogaappe guyyiyan, eti zaarettidi haasayibookkona; aissi giikko, ta qalalai eta wozanan xokkiis. <sup>23</sup> Goshshanchchai iraa naagiyooogaadan, eti taani haasayanaa-gaa siyanau hanggidi naagidosona. <sup>24</sup> Eti hirggi uttidaashin, taani ta som77uwaa pashkissaas; hegan eti minettidosona. <sup>25</sup> Taani eti de7ana ogiyaa dooraas; doorada eta halaqadan uttaas. Ba olanchchatu gidдон de7iya kawuwaadan, taani eta gidдон de7aas. Qassi azzaniyaageeta minttettiya asa mala gidaas.

## 30

### *Qassikka Iyyoobi Haasayees*

<sup>1</sup> “SHin ha77i taappe yelagiya asati tana baceessoosona. Eti ta dorssaa wudiyaa heemmiya kanata maaddana ginkka taani diggido aawatu naata. <sup>2</sup> Eta aawati wolqqi ixxiidoogeetanne bolli gilqqidoogeeta gidido gishshau, tana ainne maaddibookkona. <sup>3</sup> Metuwaanne namisaa gaasuwan qammi denddidi, bazzo biiddi, xaphuwaa coomidosona. <sup>4</sup> Qassi sharafaanne bonccuwaa maxidosona; mal77enna sankkaaraa xaphotakka miidosona. <sup>5</sup> Asai waassiiddi, kaisota yedettidoogaadan, asaa giddoppe eta yedettiis. <sup>6</sup> Eti zanggaaraa gidдон, gonggolo giddooninne zaalla kooppo gidдон de7idosona. <sup>7</sup> Eti buuraa gidдон bazzo do7atudan waassidosona; doobbiyaa garssan shiiqidi, issippe de7idosona. <sup>8</sup> Eti xurqqayyiyan shocettidi, biittaappe goodettidosona. Eti sunttaara moorettidi, eeyya gididi de7idosona.

<sup>9</sup> “Ha77i eta naati tana yettan qilliiccoosona; taani eta gidдон leemisidi odiyoobaa gidaas. <sup>10</sup> Eti tana shenetidi, taappe haakkoosona; ainne yeellatennan ta som77uwan cuchchaa cuchchoosona. <sup>11</sup> Xoossai ta wolqqaa laafettidi, tana kaushshido gishshau, eti tana qohanau, bixaalaa kessirgido paraadan, yeda gididosona. <sup>12</sup> Ha seeri bannan diccida naati ta bolli denddidi, tana yedettoosona; eti tana xaissanau ta bolli woraajjoosona. <sup>13</sup> Eti ta hemettiyo ogiyaa gorddidi, tana xaissanau koyoosona; ooninne eti heгаа oottanaagaa diggenna. <sup>14</sup> Olanchchati katamaa dirssaa menttidi geliyoogaadan, eti ta bolli yiidosona. <sup>15</sup> Gita dagamai tana hitti oottiis; ta bonchchoikka carkkoi efiyoobaadan biis; ta ishaloikka shaaraadan xayiiis.

<sup>16</sup> “Ta shemppiyaa hitaasu; tuggaa gallassai tana cirppintti oiqqiis. <sup>17</sup> Qammi qammi sahoi ta meqettaa coommes; seelaikka shemppi ekkennan gede gujjees. <sup>18</sup> Ta maayoi gunddidi moorettiis; qoliyaa qooriyaadan, tana cuulli oiqqiis. <sup>19</sup> Xoossai tana urqqan oliis; olin taani biittaappe bidinttaappe kehenna asa gidaas.

<sup>20</sup> “Abeet Xoossau, taani neeyyo waassais; shin neeni taayyo allabaakka. Eqqada nena woossaas; shin neeni ta woosaa siyabaakka. <sup>21</sup> Neeni kaseegaappe dummatada, taayyo meqettaa iitadasa; ne gita wolqqan tana yedettaasa. <sup>22</sup> Neeni tana carckuwan denttadasa; denttada a togissadasa; gotiyankka tana suragissadasa. <sup>23</sup> Asau ubbau wurssetta gidida haiquwau neeni tana aattada immiyoogaa taani erais.

<sup>24</sup> “Kunddidi meqqida asi tuggatiiddi, ‘Tana maaddarkkii’ giidi waassin, au qarettena asi de7ii? <sup>25</sup> Tuggan de7iyaageetuyyo taani yeekkabeikkinaa? Hiyyeesatuyyo taani qarettabeikkinaa? <sup>26</sup> Lo77obaa demmana gaada taani amottiyo wode, iitabai tana gakkiiis. Taayyo sa7ai kehees gaada taani naagiyo wode, gallassai taayyo xumiis. <sup>27</sup> Ta wozanai hirggiis; taani woppaa demmabeikke; gallassaappe gallassan ta tuggai yaa dariis. <sup>28</sup> Ta bollai awaa suuluwan gidennan azzanuwan karexxiis; taani shiiquwan eqqada, ‘Tana maaddite!’ gaada waassais. <sup>29</sup> Taani worakanatuyyo isha, yanchchatuyyookka dabbo gidaas. <sup>30</sup> Ta gogai xiiximmidi, poqetti poqetti wodhdhees; ta bollaikka mishuwan xuugettees. <sup>31</sup> Hegaa gishshau, ta maazinqqee zilaassau diixettiis; ta imbbiliiteekka yeehuwan punettiis.

## 31

### *Iyyoobi Ba Haasayaa Poliis*

<sup>1</sup> “Maccaasa xeellada amottennaadan, taani ta aifiyaara maachchaa maacettaas. <sup>2</sup> Taani hegaa oottidabaa gidiyaakko, bollan de7iya Xoossai taayyo aiba qaada immanddeeshsha? Saluwan de7iya Ubbaa Danddayiya Xoossai asaassi immiyo woiwai aiba gidanddeeshsha? <sup>3</sup> Iitatu bolli boshai, mooruwaa oottiyaageetu bolli bashshai gakkanaagee erettidaagaa gidenneeyye? <sup>4</sup> Xoossai ta hemetaa ubbaa be7ees; ta tanguwaa ubbaakka qoodees.

<sup>5</sup> “Taani iitabaa mulekka oottabeikke; asakka cimmanau kajjeelabeikke. <sup>6</sup> Xoossai tana likke meezaanan mazzano; yaatidi taani xillo gidiyooгаа ero. <sup>7</sup> Ta hemetai ogiyaappe sher77idabaa gidikko, ta wozanaikka ta aifee xeellidobaa amottidabaa gidikkonne, qassi ta kusheekka nagaran tunidabaa gidikko, <sup>8</sup> ta carshshai ubbai shodetti xayo; taani zeridobaakka harai mo.

<sup>9</sup> “Ta wozanai ta shooruwaa maccaasa amottidaba gidikko, woikko taani i penggen zuggada naagidabaa gidikko, <sup>10</sup> ta keettaayyiyaa hara asau gaaccu; qassi hara attuma asati iira zin77ona. <sup>11</sup> Aissi giikko, shaaramuxiyoogee keehippe pokkonne pirddan qaxxayissiya nagara. <sup>12</sup> Ha nagarai tamaadan xuuggidi, ta aquwaa ubbaa xaissiyaabaa.

<sup>13</sup> “Taani ta attuma woikko ta macca ashkkarati tana mootin, eta mootuwaa karidabaa gidikko, <sup>14</sup> Xoossai tana pirddiyo wode, taani waanane? Qassi i tana oichchiyo wode, taani woiga zaarane? <sup>15</sup> Aissi giikko, tana medhdhida Xoossai ta ashkkaratakka i medhdhiis. Nuna ubbaakka nu aayee nu aayee uluwan tilidaagee issi a xalaalaa.

<sup>16</sup> “Taani hiyyeesati woossidobaa diggabeikke; woikko am77eta minttettennan agga erikke. <sup>17</sup> Aawai aayyiyaa bainna naati mela aqiyo wode, taani ta qumaa tarkka mabeikke. <sup>18</sup> Taani eta ta yelagatettaappe doommada, eta aawadan dichchaas; ta aayee uluwaappe yelettoosappe doommada, am77eta maaddaas. <sup>19</sup> Maayoi xayin, meegoi woriyo uraa, woikko kallo de7iya metootanchcha demmiyo wode, <sup>20</sup> ta dorssatu ikisiyaappe oosettida maayuwaa taani etau immennan agga erikke. Hegaa gishshau, etikka bantta polo wozanan tana galatoosona. <sup>21</sup> Taani mootuwan eta shatimmanaa-gaa erada, aawi bainna naata naaqqidabaa gidikko, <sup>22</sup> ta qesees kuriyaappe meqqo;



ta kusheekka hashiyaappe karetti wodhdho. <sup>23</sup> Hegaa taani oottennaagee Xoossaa qixaatiyaassi yayyiyo gishshaassanne a anggai tana daganttiyo gishshaassa.

<sup>24</sup> “Taani worqqan ammanettido wodee baawa. Muruta worqqaakka, ‘Taani nenan ceeqettais’ gabeikke. <sup>25</sup> Ta duretettaa daruwan, ta kushee demmido woriyan taani ufaittabeikke. <sup>26</sup> Awaa phoolettaa woikko aginaa lo77otettaa be7ada, <sup>27</sup> ta wozanan geeman eta bonchchabeikke, woikko ta kushiyaa pididi ootta yerada, etau goinnabeikke. <sup>28</sup> Taani hegaa oottidaakko, Xoossaa kaddaas shin. He nagaraikka pirdan qaxxayissiya nagara.

<sup>29</sup> “Ta morkketa gakkida iita qaadan taani ufaittabeikke; eta gakkida metuwankka hombbocabeikke. <sup>30</sup> ‘Ta morkkee xayoy’ yaaga qanggada, nagara oottabeikke. <sup>31</sup> Taani ubbaton imattaa mokkiyoogaa ta ashkharati taayyo markkattoosona. <sup>32</sup> Sa7ai qammido asa karen aissabeikke; taani ta keettaa penggiyaa ogiyaara biyaagau ubbatoo dooya wottaas. <sup>33</sup> Asai qosiyooqaadan, taani ta nagaraa ta shophphan qosabeikke. <sup>34</sup> Taani asaa haasayaassi dagammabeikke; eta boriyaassi yayyada, taani co77u giido wodeenne kare kiyennan aggido wodee baawa.

<sup>35</sup> “Taani haasayiyoogaa siyiyaabi de7eerenneeshsha! Taani haasayidobai ubbai tuma gidiiyoogau taani paramais; Ubbaa Danddayiya Xoossai taayyo zaaruwaa immo. Ta baarigaarai tana mootido pailee de7in, wai be7arkkinaashsha! <sup>36</sup> Be7iyaakko, woiitodan taani ta hashiyan sikkana shin! Kallachchadan ta huuphiyan goxxana shin! <sup>37</sup> Taani halaqadan akko shiiqada, ta oottidobaa ubbaa ayyo yootana shin!

<sup>38</sup> “Ta goshsha biittai, ‘Tana bonqqa ekkadasa!’ giidi, ta bolli waassidabaa gidikko, ta yafaratikka ta bolli yeekkidabaa gidikko, <sup>39</sup> he biittan morkkidaagaa miishsha qanxxennan coo miidabaa gidikko, woikko he biittaa oottiyaageeta namisan woridaba gidikko, <sup>40</sup> taayyo gisttiyaa gishshaa agunttai, banggaa gishshaakka sharafai he biittan mokko” yaagiis.

Iyyooba haasayai hagan polettiis.

## 32

### *Eelihu Haasayaa*

### *Eelihu Haasayees*

<sup>1</sup> Iyyoobi, “Taani xillo asa” giido gishshau, ha heezzu asati ayyo zaaruwaa immiyoogaa aggi bayidosona. <sup>2</sup> Iyyoobi Xoossaa xillo giyoogaa aggidi, bana xillo oottido gishshau, Raama yara gidiiya Buuziyaa Barkkeela na7ai Eelihu Iyyooba bolli keehippe hanqqettiis. <sup>3</sup> Eelihu qassi Iyyooba heezzu laggetakka hanqqettiis; aissi giikko, eti a coo mooranchcha giidosonappe attin, ayyo zirxxa zaaro zaaranau danddayibookkona. <sup>4</sup> Eelihu etappe kaalotiyo gishshau, eti ubbai haasayaa wurssana gakkanaashin naagiis. <sup>5</sup> Ha heezzu asati Iyyoobayyo gidiiya zaaruwaa immanau danddayibeennaagaa be7idi, i keehippe hanqqettiis.

<sup>6</sup> Hanqqettidi Buuziyaa Barkkeela na7ai Eelihu hagaadan yaagidi, haasayaa doomiis; “Taani laittan naatais; intte taappe cimeeta. Hegaa gishshau, taani ta qofaa intteyyo yootanau yayyaas. <sup>7</sup> Taani, ‘Cimati haasayona; bantta daro laittan demmido aadhdhida eratettaa tamarissona’ gaada qoppaas. <sup>8</sup> SHin asa gididon aqidi, aadhdhida eratettaa asassi immiyaagee Ubbaa Danddayiya Xoossaa Ayyaanaa. <sup>9</sup> Asaa aadhdhida eranchcha kessiyaagee cimatteta gidenna, woikko likkebai geliyoi daro de7ida asatussa gidenna. <sup>10</sup> Hegaa gishshau, siyite; taanikka ta qofaa intteyyo yootana.

<sup>11</sup> “Be7ite, intte haasayiyo wode, taani co77u gaada ezggaas; intte haasayana qaala qoppishinkka naagaas. <sup>12</sup> Taani intte giyoogaa ubbaa wurssa siyaas; shin intteppe ooninne Iyyoobi mooranchcha giidi ammantibeenna; qassi intteppe ooninne a palamau bessiya zaaruwaa immibeenna. <sup>13</sup> Iyyooba haasayaayyo kalissiya zaaruwaa

zaaranai Xoossaappe attin, asa gidenna gishshau, intte, ‘Nuuni aadhdhida eratettaa demmida’ geennaadan naagettite. <sup>14</sup> Iyyoobi palamettidoogee inttenaarappe attin, tanaara gidenna. Taani intte haasayidoogaadan ayyo zaaruwaa immikke.

<sup>15</sup> “Iyyoobaa, eti dagammidi, ne haasayaassi zaaruwaa immanau danddayibookkona; etau haasayiyoobai xayiiis. <sup>16</sup> Eti haasayiyoobaa xayidi, co77u giidi eqqikko, taanikka naaganau koshshii? <sup>17</sup> CHii, chii, taayyookka yootiyoobai de7ees; taanikka ta qofaa yootana. <sup>18</sup> Taani daro haasayiyoobai de7iyo gishshau, ta giddon de7iyya ayyaanai tana oda giidi giddees. <sup>19</sup> Be7ite, taayyo haasayiyo kayai imetennabaa gidikko, taani ho77o woine eessai kumido ogoruwaadan xuuqqana hanais. <sup>20</sup> Taayyo hagaappe guuttaa kehana mala, taani haasayanau koshshees; ta doonaakka dooyada, taani ta zaaruwaa immanau koshshees. <sup>21</sup> Ha yohuwan taani oonanne maaddikke, woikko ai asanne coo sabbikke. <sup>22</sup> Aissi giikko, asa coo sabbiiyoobi taayyo mulekka erettenna. Taani qassi hegaa hanikko, tana Medhdhidaagee tana qaxxayana.

### 33

#### *Qassikka Eelihu Haasayees*

<sup>1</sup> “Iyyoobaa, ha77i taani yootiyoogaa siya; ta giyoobaa ubbaakka ezgga. <sup>2</sup> Taani haasayanau giigaas; ta qaalatikka ta inxxarssaa xeeran de7oosona. <sup>3</sup> Ta haasayiyo qaalati ta wozanaa suuretettaa qonccissoosona; taani eriyooogaa ta inxxarssai tumatetan haasayees. <sup>4</sup> Tana Xoossaa Ayyaanai medhdhiis; Ubbaa Danddayiya Xoossaa shemppoi taayyo de7uwaa immiis. <sup>5</sup> Neeni danddayiyaabaa gidikko, taayyo zaaruwaa imma; nena giigissada, tanaara gaitta.

<sup>6</sup> “Be7a, taani Xoossaa sinttan ne mala; qassi taanikka urqqaappe merettaas. <sup>7</sup> Neeni taassi yayyiyo gaasoi baawa; taani nena naaqqikke.

<sup>8</sup> “Ne haasayaa ubbaa taani ezggaidda takkaas; neeni hagaadan yaagishin siyaas; <sup>9</sup> “Taani geeshshanne boree bainna asa; taani xillonne nagara oottabeenna asa. <sup>10</sup> SHin Xoossai tana qaxxayanau gaasuwa koyees; i tana ba morkkedan qoodees. <sup>11</sup> Ta tohuwaa toho biratan qachchees; taani tanggiyo tanggo ubbaakka i wochchees’ yaa-gadasa.

<sup>12</sup> “Iyyoobaa, neeni ha haasayan likke gidakka! Ane taani neeyyo yootais; Xoossai asappe aadhdhees. <sup>13</sup> Neeni, ‘Xoossai taani haasayido haasayau zaaruwaa immenna’ gaada, aissi aara palamettai? <sup>14</sup> Asi akeekennappe attin, Xoossai ha ogiyyaarakka he ogiyyaarakka haasayees.

<sup>15</sup> “Asai qammi hiixan zin77idi, xiskkuwaa kairido wode, Xoossai aimuwaaninne ajjuutan haasayees. <sup>16</sup> He wode asai siyanaadan haittaa dooyees; ba seerankka i eta daganttees. <sup>17</sup> Yaatidi asi nagaraa oottennaadan teqqees; otoruwaakka asaappe diggees. <sup>18</sup> Xoossai asaa bashshaappe ashshees; haiquwaappekka naagees.

<sup>19</sup> “Xoossai sakkiya harggiyan asaa oittidikka, asi ba balaappe simmanaadan seerees. <sup>20</sup> Hegaadan hanidi, harggida uri kattaa ixxees; daro mal77o qumaikka a sheneyees. <sup>21</sup> A ashoikka gilqqidi wurees; a bollaikka melin, meqettai qoodettees. <sup>22</sup> I haiqqanaunne moogettanau hanees.

<sup>23</sup> “Asau suure ogiyya bessiya, sha7an qoodettiya kiitanchchatuppe issoi ayyo gaan-natanau yiyaakko, <sup>24</sup> yiidikka ayyo qarettidi, ‘I duufuwaa gelennaadan a ashsha. Taani ayyo woziiyoobaa demmaas’ yaagiyaakko, <sup>25</sup> a bollai yelagana; a yelagatettaa wolqqaikka ayyo simmana. <sup>26</sup> He bitanee Xoossaa woossana; woossin Xoossai a woosaa siyana. Xoossai ayyo a xillotettaa zaariyo gishshau, i ufaissan Xoossaassi goinnana. <sup>27</sup> He wode asaa sinttan i hagaadan yaagidi yexxana; ‘Taani nagaraa oottaas; suurebaakka geellayaas; shin Xoossai ta mooruwaadan taayyo qanxxibeenna. <sup>28</sup> Taani duufuwan gelennaadan tana ashshiis; hekko, ha77i paxa de7ada, poo7uwaa be7ais’ yaagana.

<sup>29</sup> “Be7ite, Xoossai asaassi haggaa ubbaa zaari zaaridi oottees; <sup>30</sup> hegaadan oottidi, asaa duufuwan geliyoogaappe ashshees; de7uwan i ufaittanaadan oottees.

<sup>31</sup> “Simmi Iyyoobaa, taani yootiyoogaa ezggada siya. Ane neeni co77u gin, taani haasayais. <sup>32</sup> Neeni haasayanau koyiyoobi de7ikko, taayyo haasaya. Taani neeni xillo gidiyoogaa bessanau koyais. <sup>33</sup> Hegee xayikko, co77u gaada, taani haasayiyoogaa siya. Nena taani aadhdhida erattettaa tamaarissana” yaagiis.

## 34

### *Qassikka Eelihu Haasayees*

<sup>1</sup> Qassikka Eelihu haggadan yaagiis, <sup>2</sup> “Inttenoo, aadhdhida eranchchatoo, taani haasayiyo haasayaa siyite. Inttenoo, eranchchatoo, intte haittaa taakko yeggite. <sup>3</sup> Inxxarssai qumaa mal77uwaa eriyoogaadan, haittaikka yohuwaa shaakkidi erees. <sup>4</sup> Ane nuuni likkebaanne lo77obaa shaakkidi eroos.

<sup>5</sup> “Iyyoobi, ‘Taani xillo; shin Xoossai ta suure pirddaa tana diggiis. <sup>6</sup> Taani likke gidaidda, worddanchchadan qoodettaas. Tanan mooroi bainnankka, i tana paxennaadan masunxxissii’ yaagiis.

<sup>7</sup> “Xoossaa bolli Iyyoobadan qilliicciya asi de7ii? <sup>8</sup> I iitabaa oottiyaageetuura zupetees; nagaranchchatuurakka hemettees. <sup>9</sup> Waanidi giikko, i, ‘Asi Xoossaa ufaissana giidi oottiyoobi ainne maaddenna’ yaagees.

<sup>10</sup> “Hegaa gishshau, inttenoo, akeekanchcha asatoo, taani yootiyoogaa ane siyite! Ubbaa Danddayiya Xoossai iitabaa mulekka oottenna. <sup>11</sup> Xoossai asassi a oosuwaadan immees; aawu ogiyaadan aawussi qanxxees. <sup>12</sup> Xoossai tumuppe iitabaa oottenna; Ubbaa Danddayiya Xoossai suure pirddaa geellayenna. <sup>13</sup> Sa7aa bollan Xoossaayyo maataa immidai oonee? Qassi biittaa ubbaa bolli a sunttidai oonee? <sup>14</sup> Xoossai ba Ayyaanaanne ba de7o shemppuwaa baakko zaaridi ekkiaakko, <sup>15</sup> asho maayida ubbai issippe xayana; asi biittau duge simmana.

<sup>16</sup> “Intte akeekanchcha gidikko, haggaa siyite; ta haasayiyoogaakka ezggite. <sup>17</sup> Suure pirddaa ixxiyaagee biittaa haaranau danddayii? Yaatin, neeni xillonne wolqqaama gidiya Xoossaa pirddai? <sup>18</sup> Xoossai kawota, ‘Intte shufurota’ yaagees; qassi biittaa haariyaageetakka, ‘Intte iita’ yaagees. <sup>19</sup> Halaqatu som77uwaa xeellidi maaddenna; duriyaakka manqquwaappe aattidi xeellenna. Aissi giikko, eti ubbaikka a oosota. <sup>20</sup> Eti hekka bilahe akeekennan haiqqana; asai ubbaikka kokkoridi xayana; wolqqaamatikka ai asa kusheenne bochchennan kichchana.

<sup>21</sup> “Xoossai asaa hemetaa xeellees; a tanggo ubbaakka wochchees. <sup>22</sup> Iitaa oottiyaageeta Xoossaappe genttanau danddayiya sakkana xumi baawa. <sup>23</sup> Xoossai asaa bolli pirddanau, asai a sintti shiiqanaadan keero immenna. <sup>24</sup> Wolqqaamata ainne oichchennan mentterettes; yaatidi eta sohuwan haraata wottees. <sup>25</sup> I eta oosuwaa eriyo gishshau, eta issi qammi maataappe wottidi xaissees. <sup>26</sup> Eta iitatettaa gishshau, asi ubbi be7iyoosan i eta qaxxayees. <sup>27</sup> Qaxxayiyoogee akka eti a kaallennan ixxidi, a azazuwaakka aggido gishshaassa. <sup>28</sup> Eti hiyyeesata huqqunnidi, eta Xoossaakko waassanaadan oottidosona; oottin Xoossai hiyyeesatu waasuwa siyiis. <sup>29</sup> Xoossai co77u giikko, a pirddanai oonee? I ba som77uwaa wora zaarikko, asa maaddiyaabi baawa. <sup>30</sup> Hegaadankka, Xoossaassi yayyenna asati haarennaadaaninne asaassikka gite gidennaadan, asai ubbai digganau danddayenna.

<sup>31</sup> “Iyyoobaa, ne nagaraa Xoossaayyo paaxadii? Qassi zaarada nagara oottennaadan geppadii? <sup>32</sup> Ne mooruwaa neeyyo qonccissana mala, Xoossaa woossadii? Sinttanau iita ooso oottennan agganau maayadii?

<sup>33</sup> “Neeni Xoossai oottiyoobaa ixxaidda, ne waagai neeni dosiyoogaadan hananau koyai? Simmi qofaa qachchanai nenappe attin, tana gidikke. Hegaa gishshau, neeni qoppiyoobaa taayyo yoota. <sup>34</sup> Akeekanchcha asati taani yootiyoogaa maayoosona;

taani odiyoogaa siyiya aadhdhida eranchchatikka hagaadan yaagoosona; <sup>35</sup> ‘Iyyoobi eri paccin, haggaa haasayees; i haasayiyooobau birshshettikka baawa’ yaagoosona. <sup>36</sup> Iyyoobi iita asatudan zaaruwaa immido gishshau, wurssettaa gakkanaa paacettidaa gideerenneeshsha! <sup>37</sup> Aissi giikko, i ba nagaraa bolli makkalaa gujjees; nu sinttan Xoossaa qilliiccees. Ba qaalaakka darissidi, Xoossaa bolli biddees” yaagiis.

## 35

### *Qassikka Eelihu Haasayees*

<sup>1</sup> Eelihu qassikka hagaadan yaagiis; <sup>2</sup> “Iyyoobaa, neeni, ‘Taani Xoossaa sinttan xillo’ giyoogee likkee? <sup>3</sup> Qassi, ‘Taani nagaraa oottikko, nena ai qohiyaanaa? Nagaraa oottennan aggikko, taani go7ettiyoobi aibee?’ yaagada neeni Xoossaa oichchadasa. <sup>4</sup> Taani neeyyoonne nenaara de7iya ne laggetuyyo zaaruwaa haasayana.

<sup>5</sup> “Xoqqu gaada salota xeella; neeppe bollaara de7iya shaaratakka ane akeekada be7a. <sup>6</sup> Neeni nagaraa oottikko, hegee Xoossaa ainne qohenna. Ne mooroi darikkokka, neeni Xoossaa ainne oottakka. <sup>7</sup> Xillo gidikko, ayyo neeni ai immuutee? Woikko ne kushiyaappe i ai ekkanee? <sup>8</sup> Neeni nagaraa oottikko, ne mala asaa qohaasa; qassi xillikkokka, asaa go77aasa.

<sup>9</sup> “Huqqunnai darobare asai waassees; wolqqaamatu kushiyaappe kessi ekkanaa alluwaa xeegees. <sup>10-11</sup> SHin ooninne, ‘Xoossai, tana Medhdhidaagee, qamman mazamuriyaa immidaagee, sa7aa do7atuppe aattidi, nuna tamarissiyaageenne saluwaa kafotuppe aadhdhida eranchcha nuna oottiyaagee awan de7ii?’ yaagenna. <sup>12</sup> Iita asati waassoosona; shin Xoossai eta otoruwaa gaasuwan, etau allenna. <sup>13</sup> Hada waasuwaa Xoossai tumuppe siyenna; Ubbaa Danddayiya Xoossai heggaa ezgenna.

<sup>14</sup> “Iyyoobaa, neeni, ‘Taani Xoossaa be7anau danddayikke; ta mootoi a sinttan de7ees; taani a naagais’ yaagaasa. Yaatin, neeyyo i zaaruwaa immanau, ne gaasoi ai keena guuxxanddeeshsha! <sup>15</sup> Xoossai asaa qaxxayennabaanne nagaraakka shenehoo giidi aggiigiyaabaa gaada qoppai? <sup>16</sup> Heggaa gidikko, neeni ne doonaa coo mela dooyaasa; dooyad akka eri banna haasayaa darissaasa” yaagiis.

## 36

### *Qassikka Eelihu Haasayees*

<sup>1</sup> Eelihu gujjidikka hagaadan yaagiis; <sup>2</sup> “Xoossaa doona gidada taani neeyyo yootiyooobai biron de7iyo gishshau, guutaa danddayada siya. <sup>3</sup> Taani ta eraa zaassada ehais; tana Medhdhidaagee xillo gidiyooogaa taani nena erissana. <sup>4</sup> Taani worddo haasayikke; kumetta erai de7iyo uri nenaara de7iyoogaa ammana.

<sup>5</sup> “Be7a, Xoossai wolqqaama; shin i oonanne karenna. I akeekaukka mino. <sup>6</sup> Iitata i paxa wottenna; shin huqqunnettidaageetu maataa i naagissees. <sup>7</sup> Xoossai ba aifiyaa xillotuppe denttenna. I eta kawotuura utissidi, merinau xoqqu xoqqu oottes. <sup>8</sup> SHin asai sanssalatan qashettikko, woikko tuggaa wodoruwan oiqettikko, <sup>9</sup> i eta oosuwaanne otoruwan eti oottido nagaraa qonccissees. <sup>10</sup> Seeraa siyanaadan eta haittaa dooyees; nagaraappe simmanaadankka i eta azazees. <sup>11</sup> Eti siyidi, ayyo oottikko, bantta laittaa saruwaaninne ufaissan wursana. <sup>12</sup> SHin eti siyennan ixkikko, olan wurana; eti eraa xayido gishshau haiqqana.

<sup>13</sup> “Xoossaa ammanenna asati bantta wozanan yiilluwaa dagayoosona; i eta qaxxayiyo wodekka, maadda giidi woossokkonna. <sup>14</sup> Eti bantta yelagattetan haiqqoosona; eta de7oikka yeellan wurees. <sup>15</sup> Xoossai tuggatiyaageeta eta tuggan tamarissees; i eta metuwaa baggaara eta sissees.

<sup>16</sup> “Xoossai nena metuwaappe kessiis; kessidi metoi banna aaho sohuwaa efiis; ne miyo masoofiyankka modhdhuwaa guppiis. <sup>17</sup> SHin ha77i iitatu bolli gakkanaa

bessiya pirddai ne bolli gakkiiiddi de7ees. <sup>18</sup> Nena ooninne duretettaa bessidi cimmen-naadan, daro mattaayiyankka balettennaadan naagetta. <sup>19</sup> Ne aquwaa daroi woikko ne minotettai nena metuwaappe ashshanee? <sup>20</sup> Kawotettati bantta sohuwaappe xayiyoo gammai yaanaadan amottoppa. <sup>21</sup> Ha metoi ubbai nena gakkidoojee, nena iitaappe ashshanaassa. Hegaa gishshau, iitatettau guyye simmennaadan nena akeeka.

<sup>22</sup> “Xoossai ba wolqqan xoqqu xoqqu giis! A mala astamaaree oonee? <sup>23</sup> ‘Hagaa ootta’ giidi Xoossaa azaziya asi, woikko, ‘Neeni iita ooso oottadasa’ yaaganau danddayiya asi baawa. <sup>24</sup> Asai mazamuriyan sabbido a oosuwaa neenikka sabbanaau hassaya. <sup>25</sup> Asai ubbai Xoossaa oosuwaa be7iis; shin be7iiddi, haahuwan be7iis. <sup>26</sup> Be7ite, Xoossai gita! A gitatettaa nuuni akeekibookko; a laittaa coratettaikka goodin gakettenna.

<sup>27</sup> “Xoossai haattaa sa7aappe pude saluwaa efees; efiidi yan ira kessees. <sup>28</sup> He irai shaaraappe kiyidi, asau daro bukkanaadan oottees. <sup>29</sup> SHaarai waani yuuyiyaakko, dadaikka Xoossai de7iyo saluwan waani guummiyaakko, ooninne erenna. <sup>30</sup> I ba yuushuwan wolqqanttaa poo7uwaa laalees; shin abbaa ciimmaa i xuman kammees. <sup>31</sup> Iraa bukissiyooogan ba asaassi daro kattaakka mokissees. <sup>32</sup> I wolqqanttaa ba kushiyan oiqqees; oiqqidi ba halchchido sohuwaa shocanau azazees. <sup>33</sup> Dadai guummiyoogee uushoi uushanaagaa awaajjees; meheekka uushoi yiyoogaa erees.

## 37

### *Qassikka Eelihu Haasayees*

<sup>1</sup> “Uushoi ta wozanaa diddiqissee; ba de7iyo sohuwankka pires. <sup>2</sup> Ubbaikka Xoossaa cenggurssaa, dadaadan guummiya a qaalaa siyite. <sup>3</sup> I salo ubbaappe kiittiyo wolqqanttai biittaa gaxaappe gaxaa gakkanaashin beettees. <sup>4</sup> Hegaappe guyyiyan, a gunntaa cenggurssai siyettees; ba wolqqaama cenggurssan guummees; a cenggurssai siyettiyo wode, ba wolqqanttaa teqqenna. <sup>5</sup> Xoossaa cenggurssai maalaalissiya gunntaa guummees; nuuni akeekanau danddayenna gitabaa i oottees. <sup>6</sup> SHachchaa i, ‘Sa7an wodhdha!’ yaagees; wolqqaama irakka, ‘Bukka’ yaagidi azazees.

<sup>7</sup> “Asai ubbai a oosuwaa erana mala, he wode ba oosuwaa oosuwaa agganaadan oottees. <sup>8</sup> He wode do7atikka bantta geessuwaa geessuwaa geloosona; gelidi yan uttoosona. <sup>9</sup> Tohossa baggappe gotee yees; huuphessa baggappeka meegoi yees. <sup>10</sup> Xoossai siiriyaara shemppiyo shemppuwaappe shachchai merettees; hegan aaho haattatikka shuchchaadan minnoosona. <sup>11</sup> SHaarai haattaa tookkanaadan i oottees; ba wolqqanttaakka shaaraa gidдон laalees. <sup>12</sup> A kaaletuwan shaarati yuuyi yuuyi aadhdhoosona; i azaziyoobaa ubbaa eti sa7aa bolli oottoosona. <sup>13</sup> Xoossai iraa bukissiyoojee biittaa irxxissanaassa, woikko asaa qaxxayanaassa, woikko ba siiquwaa eta bessanaassa.

<sup>14</sup> “Iyyoobaa, hagaa siya; Xoossai oottiyo maalaalissiya oosuwaa takki gaada akeeka. <sup>15</sup> Xoossai shaarata waati azaziyaakkonne ba wolqqanttaakka waati wolqqanttiyaakko erai? <sup>16</sup> SHaarati saluwan waani tohettiyaakkonne qassi a erai polo gidido Xoossai oottiyo maalaalissiya oosuwaa neeni erai? <sup>17</sup> CHii, tohossa carkkoi yiidi, biittaa mishissiyo wode, neeni hobbiiyan metootanaappe attin, mulekka hegaa erakka. <sup>18</sup> Xoossai saluwaa heregaadan piddi oottidi micciyo wode, neeni a maaddanau danddayai? <sup>19</sup> Nuuni eraa paca gidiyo gishshau, nuuni Xoossaassi woigi haasayanaakko, neeni nuna tamarissa. <sup>20</sup> Xoossaara haasayana gaada taani oichchikke. Hagaadan oottada, i tana xaissana mala, taani aissi a dentterettiyaanaa? <sup>21</sup> Carkkoi salota pittidi geeshshidoogaappe guyyiyan, salotun phooliya awaa poo7uwaa asi xeellanau danddayenna. <sup>22</sup> Huuphessa baggaara worqqaa milatiya poo7oi beettees; Xoossaikka yashsiya anggan qoncces.



<sup>23</sup> “Nuuni Ubbaa Danddayiya Xoossaa mati shiiqanau danddayokko; a wolqqai gita. I ba tumu pirdaaninne ba gita xillotetan huqqunnenna. <sup>24</sup> Hegaa gishshau, asai ayyo yayyees; banttana aadhdhida eranchcha giyaageeta ubbata i wudenna” yaagiis.

## 38

### *GODAA Haasayaa*

#### *GODAI Iyyoobassi Haasayees*

<sup>1</sup> Hegaappe guyyiyan, GODAI gotiyaa giddoppe Iyyoobassi hagaadan yaagidi zaariis; <sup>2</sup> “Eri bainna haasayan ta zoriyaa tashsha7issiyaagee i hagee oonee? <sup>3</sup> Ane neeni asadan ne xeessaa gixxa denddada, taani oichchiyoogaa taayyo oda.

<sup>4</sup> “Taani sa7aa medhdhiyo wode, neeni awan de7ai? Ane neeyyo akeekai de7ikko, taayyo yoota. <sup>5</sup> Ha sa7ai ai keena gidanau bessiyaakko, he qofaa qachchidai oonee? Likkiyo wodoruwaakka sa7aa bolli yeggidaagee oonee? Hegaa zaaruwaa ubbaa erai? <sup>6</sup> Sa7aa tuuqeta kunddenaanadan mintti oiqqidabai aibee? Sa7aa baasuwwau koiro shuchchaa wottidai oonee? <sup>7</sup> He gallassi maallado xoolintteti issippe yexxidoogaanne kiitanchchati ubbai ufaissau ililidoogaa neeni erai?

<sup>8</sup> “Abbaa haattai, biittaa gomppaappe xuqqidi kiyiyo gallassi, a penggeta gorddi daagee oonee? <sup>9</sup> Abbaa shaaraa maizzidaagee, qassi xumankka xaaxa wottidaagee tana. <sup>10</sup> Abbaayyo kanttena zawaa medhdhidaagee, a penggiyaanne a hiraquwaa sohuwan wottidaagee tana. <sup>11</sup> Taani, ‘Hagaa gakka; shin hagaappe aadhdhoppa; ne wolqqaama beetaikka hegan eqqo’ yaagaas.

<sup>12</sup> “Iyyoobaa, neeni yelettoosappe awai maallado guuraara kiyanaadan azaza erai? <sup>13</sup> Biittaa xanxxan poo7uwaa bessana malanne iita asatakka eti qosettidosappe qoncciyaa kessana mala, neeni wonttaa azaza erai? <sup>14</sup> Gallassaa poo7oi zumatanne zanggaarata dakkoyidi wottido maayoi eqqidabaadan beettanaadan oottees; qassi urqqa miishshaa bolli wottido maatafaadan geeshshidi bessees. <sup>15</sup> Iitati banttau poo7o gi wottido xumai xayees; eti makkalau denttiyo kusheekka meqqees.

<sup>16</sup> “Ciimma abbaa giddo gelada, pulttuwaa be7adii? Woikko asi gakki erenna abbaa gidduwaa paacca xeella erai? <sup>17</sup> Haiquwaa penggeta nena oonakko bessidee? Woikko sakkana xumaa penggeta be7adii? <sup>18</sup> Sa7ai ai keena gitakko erai? Hegaa ubbaa neeni eriyaabaa gidikko, taayyo yoota.

<sup>19</sup> “Poo7oi de7iyoosaa efiya ogee awan de7ii? Qassi xumai de7iyo sohoi awee? <sup>20</sup> Eta neeni eta soo soo efaanau danddayai? Eti de7iyoosaa efiya ogeta neeni erai? <sup>21</sup> Neeni sa7ai merettiyo wode yelettido gishshaunne daro laittaakka de7ido gishshau, hegaa erennan aggakka!

<sup>22</sup> “Suuppa shachchai minjjettiyoosaa geladii? Ordde shachchai doorettidosaa akka be7adii? <sup>23</sup> Taani eta meto wodiyaassi, ola wodiyaassinne toora gallassaassi minja wottaas. <sup>24</sup> Wolqqanttai kiyiyo sohuwaa efiya ogee awan de7ii? Woikko arshsho bagga carkkoi awappe kiyidi carkkii?

<sup>25</sup> “Wolqqaama irai wodhdhiyo loossuwaa giigissidaagee, dadaassi ogiyaa kessidaagee oonee? <sup>26</sup> Asi de7enna bazzuwan iraa bukissiyai oonee? <sup>27</sup> Mela bazzo iraa haattan shuggidi, mul77o maataa mukkanaanadan oottidaagee oonee?

<sup>28</sup> “Irau woikko xaazau aawi de7ii? <sup>29</sup> Ordde shachchaunne burcce shachchau aaya de7ai? <sup>30</sup> Kinchchoi haattaa shuchchaadan minttees; abbaa haattau bolla bagga akka shachcha kessees.

<sup>31</sup> “Piliyaadisa geetettiya xoolinttetu citaa issippe gattada qachchanau danddayai? Ooriyoona geetettiya xoolinttetu citai qashettido wodoruwwa birshshanau danddayai?

<sup>32</sup> Citan citan de7iyya xoolintteta eta wodiyan wodiyan kessanau danddayai? Wogga

Beeriyaanne Qeera Beeriya geetettiya xoolinttetu citata issippe kaalettanau dand-dayai? <sup>33</sup> Saloti aqiyoo higgiiya neeni erai? Woikko he higgee sa7an haaranaadan oottanau danddayai?

<sup>34</sup> “Di7oi nena muukkanaan iraa bukissanau, ne qaala xoqqu oottada, shaarata azazuutee? <sup>35</sup> Wolqqanttati biidi yiidi, ‘Hekko, ha77i ai oottonii?’ gaana mala, neeni eta azananau danddayai? <sup>36</sup> Haatta kafuwaayyo aadhdhida eraa, kutto addiyaayyookka akeekaa immidai oonee? <sup>37-38</sup> Ba eran shaarata qoodanau danddayiyai oonee? Baanaa munaqqidi, urqqa kessidi, minttanau saluwaa shaarata geddi oottidi, haattaa duge tigiyaagee oonee?

<sup>39-40</sup> “Gaammoti ubbai bantta geessuwan geessuwan zin77idaashin woikko zug-gidi naagishin, neeni etayyo miyoobaa shankkatada immanau danddayai? Woikko namisetti uttida eta marata kalissanau danddayai? <sup>41</sup> Quuroti namisetti bichchaariyo wode, eta maratikka miyoobaa demmanau taayyo, Xoossaayyo, waassiyo wode, etayyo miyoobaa immiyai oonee?

## 39

### *Qassikka GODAI Iyyoobassi Haasayees*

<sup>1</sup> “Deriyan de7iya genessati aude yeliyaakko, neeni erai? Gaarati bannakkidi, bantta marata yeliyo wode be7adii? <sup>2</sup> Eti kunttiiddi, woisa keena aginaa gam77iyaakkonne qassi aude yeliyaakko erai? <sup>3</sup> Eti gulbbatidi, bantta marata yeliyoi audekko erai? <sup>4</sup> Eta marati bazzon diccidi minnoosona; minnidi bantta aayetu achchappe boosona; naa77antto guyye simmokkona.

<sup>5</sup> “Harddiidati yeda daanaadan oottidai oonee? Qashuwaappe eta birshshi yed-didai oonee? <sup>6</sup> Etau taani bazzuwaa de7iyoosaa oottada immaas; maxine biittan eti de7anaadan oottaas. <sup>7</sup> Katamaa wocamaappe eti haakkidi de7oosona; laaggiyaageetu waasuwaakka siyokkona. <sup>8</sup> Eti dereta banttau heemettiyo soho oottoosona; hegan miyo mul77o maataa qoroosona.

<sup>9</sup> “Menttai neeyyo oottanau eeno ganddee? Woikko ne gaaxaatan qammaa aqanddee? <sup>10</sup> Goyana mala, neeni a waaxuutee? Woikko kaduwaa goochchanaadan a oottanau danddayai? <sup>11</sup> Neeni a wolqqaa minotettan ammanettuutee? Ne daafurssiya oosuwaa i oottanaadan, ayyo yegga agguutee? <sup>12</sup> I simmidi yiidi, ne kattaa qoxxiyo ne audiyaayyo shiishshees gaada neeni an ammanettai?

<sup>13</sup> “Yanchchiya ba qefiyaa eesuwan qaattaasu; shin yanchchee qefeti sanggaanuwaa qefetunne baalletu mala gidokkona. <sup>14</sup> Yanchchiya ba phuuphulliyaa biittan phu-uphullausu; phuuphullada baanai ho7ettanaadan aggaagausu. <sup>15</sup> ‘Tohoi menttana’ woikko, ‘Bazzo do7ati yedhdhana’ gaada qoppukku. <sup>16</sup> Marati babaa gidennabaadan qoodada, etau meqettaa iitaasu. I daafurai ubbai mela attiyoogee iyyo aibanne milatenna. <sup>17</sup> Aissi giikko, taani Xoossai a aadhdhida eratettaa doganaadan oottaas; taani akeekaakka iyyo immabeikke. <sup>18</sup> SHin denddada a woxxiyo wode, banaara naasettiya paraa bollinne paraawaa bolli miiccausu.

<sup>19</sup> “Iyyoobaa, paratuyyo wolqqaa immidai, woikko paratu morggiyaa gotosho gamma maizzidai nenee? <sup>20</sup> Parati booliyaadan guppanaadaaninne yashshiya daarettaa eti daaranaadan oottidai nenee? <sup>21</sup> Parati zanggaaran biittaa booddoosona; bantta wolqqankka ufaittoosona; yaatidi ola miishshata gixxidaageetuura gaittanau ola dembbaa piriixosona. <sup>22</sup> Yashsha giyoobaa eti mulekka erokkona; eta aibinne dagantenna; eta bolli bisuwaa zaarettiyaakkonne guyye simmokkona. <sup>23</sup> Eta toggiya olanchchati oiqqido ola miishshati phooliiddi, issoi issuwara gaittidi giirettoosona. <sup>24</sup> SHin parati paachhuriiddi yashsiiddi, olau sinttau piriixosona. Malkkataa punettaa cenggurssaa siyiyo wode, co77u giidi eqqanau danddayokkona; <sup>25</sup> malkkataa

punniyo wode, ‘Hayyashsho!’ yaagoosona. Olaa peenuwaa haahuwan ekkoosona; ola gadaawati azaziyo azazuwaanane olanchchatu ceequwaa siyoosona.

<sup>26</sup> “Gacee ba qefiyaa tohossi miccidi paallanau danddayanaadan, aadhdhida er-atettaa ayyo immidai nenee? <sup>27</sup> Argganttai pude kiyidi, ba keettaa xoqqa deretun keexxanau ne azazuwaa naagii? <sup>28</sup> Argganttai aafuwaa doonan ba keettaa keexxidi de7ees; zaallatu za7otikka ayyo qato gididosona. <sup>29</sup> Hegan uttidi, baayyo miyoobaa wochchees; wochchidi a aifee haahuwaappe demmees. <sup>30</sup> Argganttaa marati suuttaa uyoosona; gauxai de7iyoosan awankka i shiiqees” yaagiis.

## 40

<sup>1</sup> GODAI Iyyooba hagaadan yaagiis; <sup>2</sup> “Iyyoobaa, asi Ubbaa Danddayiya Xoossaara mootettidi, shatimmi erii? Ane Xoossaara mootettiya uri ayyo zaaro” yaagiis.

### *Iyyoobassi Haasayiyooobai Xayiiis*

<sup>3</sup> Hegaappe guyyiyan, Iyyoobi zaaridi, hagaadan yaagiis; <sup>4</sup> “Abeet GODAU, taani pattenna laafa asa; taani neeyyo waata zaaranau danddayiyaanaa? Taani ta doonan ta kushiya wottaas. <sup>5</sup> Taani issitoo haasayaas; shin taayyo zaariyoobi baawa. Naa77anttuwaa haasayikke” yaagiis.

### *GODAI Naa77anttuwaa Haasayees*

<sup>6</sup> Hegaappe guyyiyan, GODAI gotiyaa giddoppe Iyyoobassi hagaadan yaagiis; <sup>7</sup> “Attumaasadan ne xeessaa gixxa denddada, taani oichchiyoogaa taayyo oda. <sup>8</sup> Neeni tana mooranchcha kessana hanai? Neeyyo xillo gidanau, tana worddo kessai? <sup>9</sup> Xoossaa wolqqaa mala wolqqai neeyyo de7ii? Xoossai guummiyoogaadan neeni guummanau danddayai? <sup>10</sup> Hegaa gidikko, ane ne bonchchuwaaninne gitatettan dendda! Ne puulaanne anggaa maaya! <sup>11</sup> Ne hanquuwaa teegaa ane tiga; otorettiya asa ubbaa xeellada, ane kaushsha! <sup>12</sup> Ane loitta xeellada, otorettiya ubbaa yeellaya; iitaa oottiyaageeta ubbaa eti de7iyoosan yedhdha! <sup>13</sup> Eta ubbaa biittan mooga; duufuwaa duge wottada, eta gordda. <sup>14</sup> Yaatikko, ne wolqqan neeni xoonanaagaa taani neeyyo markkattana.

<sup>15</sup> “Taani nena medhdhidoogaadan medhdhido, Bihemoota giyo do7aa ane xeella! I booradan maataa mees. <sup>16</sup> A xeessan de7iya wolqqainne a uluwaa kammida shayaa minotettai keehi daro. <sup>17</sup> A goinai zigaadan sitti gi uttiis; a gediya xaphotikka minuwan dooqettidaageeta. <sup>18</sup> A meqettati nahaasiyaa bombbaa mala; a gedekka birataa hiraqotu mala.

<sup>19</sup> “Xoossai medhdhido meretatu ubbaappe i aadhdhi maalaalissiyaagaa. A Medhdhidaagaappe attin, a xoonanau danddayiyaabi baawa. <sup>20</sup> Do7ai ubbai kaa7iyo deree ayyo miyoobaa mokissees. <sup>21</sup> Agunttai de7iyo mittaa garssan zin77ees; maqqaa gidдон torqquwan qosettees. <sup>22</sup> Agunttai de7iyo mittati bantta kuwan a genttoosona; shaafaa doonan mokkiya mittati a kammoosona. <sup>23</sup> SHaafai kixxidi goggiyo wodekka dagammenna; Yorddaanoosa SHaafai a som77uwan xarccettiyo wodekka i saro de7ees. <sup>24</sup> A aifiyaa toissidi, a oiqqanau danddayiya asi de7ii? A siiriyaakka piriya qaran caddi oiqqanau danddayiyai oonee?

## 41

### *Qassikka GODAI Haasayees*

<sup>1</sup> “Neeni Lewaataana giyo miimminttiyaa moliyaa oiqqiyo hinggittan oiqqanau, woikko a inxxarssaa wodoruwan qachchanau danddayai? <sup>2</sup> A siiriyan dafuwaa gelissanau danddayai? Woikko a gacuwaa hinggittan caddada oiqqutee? <sup>3</sup> I nena, ‘Hayyanaa tana yeddarkii’ yaagidi woossanee? Woikko i neeyyo mal77o qaalan

haasayanee? <sup>4</sup> Neeni a merinau ne ashkkara oottanau, i nenaara maachchaa maacetta-nee? <sup>5</sup> Asi kafuwaara kaa7iyooogaadan, neeni aara kaa7uutee? Woikko a qachchada, ne macca ashkkaratuyyo kaa7anau immuutee? <sup>6</sup> Moliyaa oiqqiyaageeti a waagan palamettiyoona? Woikko zal77anchchati a qanxxerettidi baizziyoona? <sup>7</sup> Neeni a galbbaa maccaamiyan, a huuphiyaakka philxxuwan caddada qohanau danddayai? <sup>8</sup> Ane a ne kushiyan bochcha; neeni aara baaxetido baaxiyaa hassayada, naa77anttada aara baaxetanau kajeelakka!

<sup>9</sup> “He miimminttiyaa oiqqanau kajeeliyoogee mela; harai attin, a be7ida ubbaikka yashshau kokkorees. <sup>10</sup> I zin77idosappe a denttanau ooninne xalenna; yaatin, ta sinttan eqqanau danddayiyai oonee? <sup>11</sup> Taani kushiya zaarana mala, taayyo koiro immidai oonee? Saloppe garssaara de7iyaabai ubbai tabaa.

<sup>12</sup> “Lewaataana gedetubaa, a gita wolqqaabaanne a lo77iya bollaabaa haasayyoogaa taani aggikke. <sup>13</sup> A galbbaa qaaranau danddayiyai oonee? Birata milatiya a maayuwa caddanau danddayiyai oonee? <sup>14</sup> Yashshiya achchai de7iyo a manggaagaa pooqqanau danddayiyai oonee? <sup>15</sup> A zokkuwaa galbbai issoi issuwaa bollan doorettidanne shuchchaadan minnida gondalleta milatees. <sup>16</sup> Eti issoi issuwaayyo keehi matattido gishshau, eta giddoora, harai atto, carkkoikka kanttanau danddayenna. <sup>17</sup> Eti ubbaikka issoi issuwaa gaitti uttido gishshau, eta aibinne shaakkenna.

<sup>18</sup> “I hedhdhishiyo wode, pholqqu giya poo7oi kiyees; a aifetikka maallado xalqqiyaadan zo77oosona. <sup>19</sup> A doonaappe tamaa laoi kiyees; tamaikka piridi wodhdhees. <sup>20</sup> Penttiya disttiyaappe garssa baggaara eexxiya maqqaappe kiyiya cuwaadan, a siiriyaappe cuwai kiyees. <sup>21</sup> A siiriyaara kiyiya shemppoi xiixintaa bonqqissees; tamaa laoiikka a doonaappe kiyees.

<sup>22</sup> “A morggiyan wolqqai de7iyo gishshau, i keehippe yashshiyaagaa. <sup>23</sup> A ashoi is-sippe nuketti uttido gishshau, a bollai birataadan minnees. <sup>24</sup> A wozanai shuchchaadan mino; gaacciyo woxaadankka mino. <sup>25</sup> I dendiyo wode, minotikka yayyoosona; eti dagammidi baqatoosona. <sup>26</sup> Akko gakkiiya bisoi ainne allaalle kessenna; toorai, woikko zubbee, woikko philxxoi a ainne oottenna. <sup>27</sup> Birataa i daladan, nahaasiyaakka musida mittaadan qoodees. <sup>28</sup> Wonddafiyaa zubbee a baqatissenna; yambbarshshan oliyo shuchchaikka ayyo suulla mala. <sup>29</sup> Dullai ayyo issi buuxa mala; tooraa xonggiyo wode, qilliiccidi miiccees. <sup>30</sup> A uluwaa bollan de7iya galbbai meqerettida kon77aadan qara; urqqaara i biyo wode, marashaadan biittaa phalqqees.

<sup>31</sup> “Abbaa penttida haattaadan bukkees; xaaro gidдон penttiya zaitiyaadankka bu-libulissees. <sup>32</sup> Baappe guyyeera phooliya ogiyaa kessees; abbaa haattaakka bootta hoommuwau laammees. <sup>33</sup> Biittaa bollan a mala mereti baawa; i yayyi erenna mereta. <sup>34</sup> Keehippe gita gidida meretata ubbaa i ziqqi oottidi xeellees; do7a ubbatussi i kawo” yaagiis.

## 42

### *GODAI Iyyooba Zaaridi Ishalissiis*

#### *Iyyoobi Zaaridi GODAASSI Haasayees*

<sup>1</sup> Hegaappe guyyiyan, Iyyoobi GODAAYYO hagaadan yaagidi zaariis; <sup>2</sup> “Neeni ub-babaa oottanau danddayiyoogaanne ne halchchuwaakka halissanau danddayiyaabi bannaagaa taani erais. <sup>3</sup> ‘Laa ha eri bannan ta zoriyaa genttiyaagee oonee?’ yaa-gada tana oichchadasa. Tumuppe taani taayyo gelibeennabaa haasayaas; ta eraappe haakkida maalaalissiyaabaa haasayaas.

<sup>4</sup> “Neeni tana, ‘Taani yootiyo wode ezgga; taani oichchiyo wode oda’ yaagadasa.

<sup>5</sup> “Taani kase nebaa ta haittan siyaas; shin ha77i ta aifiyan nena be7aas. <sup>6</sup> Hegaa gishshau, taani haasayidobai tana yeellayis. Yaatin, taani bidinttaaninne baanan uttada paaxais” yaagiis.

### *Iyyoobi Ba Laggetussi GODAA Woossees*

<sup>7</sup> GODAI haggaa Iyyoobassi haasayidoogaappe guyyiyan, Temaanaappe yiida Eli-faaza hagaadan yaagiis; “Ta ashkkaraa Iyyoobadan, intte tabaa likke haasayibeenna gishshau, ne bollinne ne naa77u laggetu bolli ta hanqqoi eexxi kiyiis. <sup>8</sup> Hegaa gishshau, ha77i laappun korimatanne laappun dorssa orggeta ekkidi, ta ashkkaraa Iyyoobakko biite; biidi xuuggiyo yarshshuwaa intte mooruwaassi yarshshite. Ta ashkkarai Iyyoobi intteyyo woossana; taanikka a woosaa siyada, intte mooruwaadan qaxxayikke. Aissi giikko, intte ta ashkkaraa Iyyoobadan tabaa likke haasayibeekketa” yaagiis.

<sup>9</sup> Hegaappe guyyiyan, Temaanaappe yiida Elifaazi, SHuuhappe yiida Bilddaadinne Naa7imappe yiida Xoofaari biidi, GODAI eta azazidoogaadan oottidosona. GODAIKKA Iyyooba woosaa siyiis.

### *GODAI Iyyoobassi Dakkuwaa Zaarees*

<sup>10</sup> Iyyoobi ba laggetuuyo woossidoogaappe guyyiyan, GODAI ayyo zaaridi ishalissiis; ayyo kaseegaa gishshaa naa77u kushe oottidi immiis. <sup>11</sup> Hegaappe guyyiyan, a ishathi, a michchetinne kase a eriyaageeti ubbati akko yiidosona; yiidi a son aara gibiraa miidosona. Ayyo azzanidi, GODAI a bolli ehiido meto ubbaappe a minttettidosona. Qassi ubbaikka ayyo worqqa migiduwaanne biraa immidosona.

<sup>12</sup> GODAI Iyyooba wurssetta laittaa koiro laittaappe aattidi anjjiis. Iyyoobayyo tammanne oiddu sha7u dorssati, usuppun sha7u gaameelati, issi sha7u waaxa booratinne issi sha7u macca hareti de7oosona. <sup>13</sup> Qassi ayyo laappun attuma naatinne heezzu macca naati yelettidosona. <sup>14</sup> Baira macca na7iyo Yimiimo, naa77anttiyo Qaxii7o, heezzanttiyo Qerenihafuuko yaagidi sunttiis. <sup>15</sup> Iyyooba macca naatudan mera lo77o macca asi biittan sa7an awaaninne beettenna. Eta aawai etayyo eta ishaturu laattiyo biittaa shaakkidi immiis.

### *Iyyooba Haiquwaa*

<sup>16</sup> Hegaappe simmin, Iyyoobi xeetanne oitamu laittaa de7iis; ba naatanne ba naatu naata oiddantto yeletaa gakkanaashin be7iis. <sup>17</sup> Iyyoobi daro wodiya de7idi, lo77o cimaa cimidi haiqqiis.



## Leemiso Maxaafaa

### *Gidduwaa Erissuwaa*

Leemiso Maxaafai hiilla haasayaaninne Leemiso haasayan giigida oosonne ammano timirtte. I daro baggi asaa de7uwan hachchi hachchi gaittiya hanotubaa odees. Koiro doomiiddikka, “Aadhdhida eratettaassi doomettai Xoossaassi yayyiyoogaa” yaagi has-sayissiiddi doommees. I tamarissiyoogee ammano wogan asi oottanabaa xalaala gidennan, asi ba hachchi hachchi de7uwan hananau bessiyoo lo77o eeshshaanne oottanau bessiyoo lo77o oosuwaa gujjidi tamarissees. Ha maxaafaa gidдон ashkкетettaaban, asassi qarettiyoobaaninne ammanettiyooban daro timirttee leemisuwan imettiis.

### *Leemisuwaassi De7iya Go77aa*

<sup>1</sup> Hageeti Israa7eela Kawuwaa Daawita na7aa Solomona leemisota. <sup>2</sup> Leemisoti asai aadhdhida eratettaa, seeraanne era haasayaa akeekanau maaddoosona. <sup>3</sup> Eti aadhdhida eratettan, de7ana de7uwaa, xillotettaa, suure pirddaanne suuretettaa tamarissiyaageeta, <sup>4</sup> hiillaa erennaageeta erissiyaageeta, wodallatussi eratettaanne adussa qofaa immiyaageeta. <sup>5</sup> Aadhdhida eranchchati ha leemisota siyidi, eraa gujjoosona; akeekanchcha asatikka lo77o zoriyaa ekkoosona. <sup>6</sup> Hegaadan leemisotanne eta birshshettaa, aadhdhida eranchchatu haasayaanne eta qan77isheta akeekanau danddayettes.

<sup>7</sup> Aadhdhida eratettaassi doomettai GODAASSI yayyiyoogaa; shin eeyyati aadhdhida eratettaanne seeraa karoosona.

### *Yelaga Naatussi Imettida Zoriyaa*

<sup>8</sup> Ta na7au, ne aawaa zoriyaa ezgga; ne aayiyaa tamarissiyooogaakka karoppa. <sup>9</sup> Hegee ne huuphiyau bonchcho kallachcha; ne qooriyaukka gozdda gidana.

<sup>10</sup> Ta na7au, nena nagaranchchati balettikko, eeno gooppa. <sup>11</sup> Eti nena, “Nunaara hindda; asa woranau zuggidi naagoos; gaaso xayikkonne xillota woranau qosetti uttoos; <sup>12</sup> Si7oolee mittiyooogaadan, nuunikka eta paxa de7ishin mittoos; nuuni eta ciimma ollan oliyo asatudan oottana. <sup>13</sup> Nuuni al77o miishsha ubbaa demmana; demmidi nu keettaa omooduwan kunttana; <sup>14</sup> nunaara zuppeta; demmidobaakka issippe shaakkana” yaagana.

<sup>15</sup> Ta na7au, etaara ogiyaa hemettoppa; ne tohuwaa eta loossuwaa yettoppa. <sup>16</sup> Aissi giikko, eti iitabaa oottanau woxxoosona; asaa suuttaa gussanau jaamoosona. <sup>17</sup> Kafoi xeellishin, a oiqqanau gitiyaa yeggiyoogee ainne maaddenna. <sup>18</sup> SHin eti bantta suuttaa gussanau zuggoosona; bantta shemppuwaa woranau qosetti uttoosona. <sup>19</sup> Geniyan go77aa demmiya ubbatu wurssettai heгаа mala; he aawu shemppuwaa ekkees.

### *Aadhdhida Eratettaa Ixxikko Nena Era!*

<sup>20</sup> Aadhdhida eratettiyaa ogiyan xeesausu; dere gutaran ba qaalaa xoqqu oottada alaahausu. <sup>21</sup> Aadhdhida eratettiyaa asai shiiqiyo sohuwan eqqada xeesausu; katamaa geliyo penggiyan eqqada, hagaadan yaagada biddausu;

<sup>22</sup> “Inttenoo, akeekai paccidoogeetoo, intte akeekaa pacaa aude gakkanaashin dosuuteetii? Qilliicciyaageetoo, qilliicciyoogan aude gakkanaashin ufaittuuteetii? Eeyyadoo, eratettaa aude gakkanaassi ixuuteetii? <sup>23</sup> Ta seeran simmite; be7ite; taani ta eraa intte bolli gussana; ta qaalaakka inttena tamarissana. <sup>24</sup> Taani xeesido wode, intte koyennan ixxideta; taani kushiya yeddinkka, ooninne akeekibeenna. <sup>25</sup> Ta zore ubbaa karideta; ta seeraakka ekkibeekketa. <sup>26</sup> Hega gishshau, inttena metoi gakkiyo wode, taani intte bolli miiccana; intte dagaman kokkoriyo wode, taani inttena qilliiccana.

<sup>27</sup> Dagamai uushuwaadan intte bolli yiyo wode, metoi gotiyaadan intte bolli yiyo wode, tuggainne waayee intte bolli gakkiiyo wode, taani inttena qilliiccana.

<sup>28</sup> “He wode eti tana xeesana; shin taani koyikke; eti tana minttidi koyana; shin demmokkona. <sup>29</sup> Aissi giikko, eti eratettaa ixidosona; GODAASSI yayyiyoogaa doori-bookkona. <sup>30</sup> Ta zoriyaa ekkibookkona; ta seera ubbaakka karidosona. <sup>31</sup> Hegaa gishshau, eti bantta oottido oosuwaaw aifiyaa maana; bantta halchchido halchchuwaaw aifiyaakka kallana. <sup>32</sup> Akeekai paccidoogeeta aadhdhida eratettaappe haakkiyoogee worees; eeyyata shenehoo giyoogee xaissees. <sup>33</sup> SHin taani odiiyoogaa siyiyaageeti ubbai woppu giidi, saro de7ana; metuwaaw hirggaappekka shemppana” yaagausu.

## 2

### *Aadhdhida Eratettaappe Beettiya Anjuwaa*

<sup>1</sup> Ta na7au, neeni ta giyoogaa ekka; ta azazuwaakka ne gidдон minjja. <sup>2</sup> Aadhdhida eratettaa ezgga; ne wozanaappe akeeka. <sup>3</sup> Eratettaa xeesa; akeekaassikka xoqqu oottada alaaha. <sup>4</sup> Asi biraa woikko qosido miishshaa koyiyoogaadan, neeni eratettaa koya. <sup>5</sup> He wode neeni GODAASSI yayyiyoogaa giyoogee aibakko akeekana; Xoossaakka loittada erana. <sup>6</sup> Aissi giikko, GODAI aadhdhida eratettaa immees; appe eratettainne akeekoi beettes. <sup>7</sup> I suuretussi maaddiya zoriyaa minjjees; boree bannan hemettiyaageetasikka i gondalle. <sup>8</sup> Tumaa pirddiyaageetu ogiyaa naagees; ba ammanettiyaageetu ogiyaakka naagees.

<sup>9</sup> He wode neeni xillotettaa, suure pirddaa, suuretettaanne lo77o ooso ubbaa erana. <sup>10</sup> Aissi giikko, neeni aadhdhida eranchcha gidana; ne eratettaikka nena ufaissana. <sup>11</sup> Nena adussi qoppiyoogee naagana; akeekaikka nena saro ashshana. <sup>12</sup> Aadhdhida eratettai nena iita asatu balaappe naagana; geellabaa haasayiyaageetuppekka ashshana. <sup>13</sup> Eti nagaraa xuman de7anau, xillotettaa ogiyaa aggoosona. <sup>14</sup> Iitaa oottiiyoogan ufaittoosona; geellaban hashshu goosona. <sup>15</sup> Eti oottiiyoogee mirqqetta; eta de7oikka geella.

<sup>16</sup> Aadhdhida eratettai shaaramuxa maccaaseepenne sheleeshshiya qaaan haasayiya laggetteeppe nena ashshana. <sup>17</sup> A ba naatettaa azinaa aggaagausu; ba Xoossaa sinttan maacettido maachchaakka dogausu. <sup>18</sup> I soo biyoogee haiqqanau biyoogaa; ikko biyoogee haiqqida asai biidosaa kaalettees. <sup>19</sup> Ikko biya oonikka guyye simmenna; de7uwaa ogiyaakka demmenna. <sup>20</sup> Hegaa aggada, neeni lo77o asatu leemisuwaaw kaalla; xillo asatu de7uwaakka qulla. <sup>21</sup> Aissi giikko, suure asatinne boree banna asati biittan gam77idi de7ana. <sup>22</sup> SHin iitati biittaappe xoqollettana; ammanttenaageetikka shodettidi xayana.

## 3

### *GODAN Ammanettiyoogaa*

<sup>1</sup> Ta na7au, taani nena tamarissiiyoogaa dogoppa; ta azazotakka ne wozanan wotta. <sup>2</sup> Aissi giikko, eti ne bariyaa adussana; ishalo de7uwaakka neeyyo gujjana. <sup>3</sup> Aggenna siiqoinne tumatettai neeppe haakkoppona; eta ne qooriyan qachcha; ne wozanankka eta xaafa. <sup>4</sup> Yaatikko, neeni Xoossaanne asaa sinttan sabbettananne nashettana.

<sup>5</sup> Ne polo wozanan GODAA ammanetta; ne akeekan zemppoppa. <sup>6</sup> Neeni oottiiyo ooso ubban a sinttaya; i nena likke ogiyaa kaalettana. <sup>7</sup> Nena ne huuphen aadhdhida eranchcha kessoppa; GODAASSI yayya; iitaappekka haakka. <sup>8</sup> Hegee ne bollaa payya wottana; ne meqettaakka xallana. <sup>9</sup> GODAA ne duretettan bonchcha; koiro aifida katta ubbaappekka xeeraa ayyo immiiyoogan a bonchcha. <sup>10</sup> Yaatikko, ne gootaratun kattai kumana; ne baattaakka aife woine eessai kumidi palahana.

<sup>11</sup> Ta na7au, GODAA seeraa karoppa; i nena qaxxayiyi wodekka lanccoppa. <sup>12</sup> Aissi giikko, aawai ba siiqiyo na7aa seeriyoo gaadan, GODAI ba ufaattiyo uraa seerees. <sup>13</sup> Aadhdhida eratettaa demmiya urai, akeekaakka babaa oottiya urai anjettidaa-gaa. <sup>14</sup> Aissi giikko, appe demmiyo go77ai biraappe demmiyo go77aappe aadhdhees; appe beettiya go77ai worqqaappe beettiya go77aappe kehees. <sup>15</sup> Aadhdhida eratettai inqquwaappe keehi al77o; neeni demmanau amottiyo ubbai aadhdhida eratettaara likkettenna. <sup>16</sup> Aadhdhida eratettai ne bariyaa adussees; i neeyyo duretettaanne bonchuwaa gujjees. <sup>17</sup> A ogeti ufaissiya ogeta; a loosso ubbaikka saro. <sup>18</sup> I bana oiqqiyaageetussi de7o mitta; a mintti oiqqiya ubbatikka anjettidaageeta.

<sup>19</sup> GODAI ba aadhdhida eratettan sa7aa medhdhiis; ba akeekankka salota minttiis. <sup>20</sup> A eratettan shaafati goggoosona; shaaratuppekka irai bukkees.

<sup>21</sup> Ta na7au, lo77o aadhdhida eratettaanne adussi qoppiyoogaa naaga; eti neeppe shaahettoppona. <sup>22</sup> Eti neeyyo de7o gidana; eti neeyyo ishalonne ufaissa de7uwaa immana. <sup>23</sup> He wode neeni ne ogiyan hirggi bannan hemettana; ne tohoikka xubet-tenna. <sup>24</sup> Neeni zin77ido wode, yayyakka; zin77adakka mal77o xiskkuwaa xiskkana. <sup>25</sup> Akeekennan gakkiya bashshau, woikko iitati xayiyi xayuwau yayyakka. <sup>26</sup> Aissi giikko, GODAI neeyyo ammanettiyaagaa gidana; ne gedeeke piriyan oiqettennaadan, i nena naagana.

<sup>27</sup> Neeyyo wolqqai de7ishin, metootidaagau lo77obaa oottiyoogaa aggoppa. <sup>28</sup> Ha77i neeyyo de7ishin, ne shooruwaayyo, “Simmada ya; taani neeyyo wontto immana” yaagoppa. <sup>29</sup> Nenan ammanettidi, ne matan de7ishin, ne shooruwaa bolli iitabaa oot-tanau halchchoppa. <sup>30</sup> Nena naaqqibeenna asa, coo mootoppa. <sup>31</sup> Sugetta oottiya asata qulloppa; eta iita oosuwaakka kaalloppa. <sup>32</sup> Aissi giikko, GODAI iitaa oottiyaageeta ixxees; shin suuretuyyo i ulottes. <sup>33</sup> GODAA qanggettai iitaa oottiyaageetu soona; shin a anjoi suurebaa haniyaageetu soona. <sup>34</sup> Otorettidi qilliicciyaageeta GODAIKKA qilliiccees; shin banttana kaushshiyaageeta nashshees. <sup>35</sup> Aadhdhida eranchchati bonchuwaa demmana; shin eeyyati kauyyana.

## 4

### *Aawai Zoriyo Lo77o Zoriyaa*

<sup>1</sup> Ta naatoo, intte aawaa zoriyaa siyite; loitti ezggite; yaatikko, intte akeekana. <sup>2</sup> Taani intteyyo lo77o timirttiyaa immiyo gishshau, ta timirttiyaa yeggoppite. <sup>3</sup> Taani ta huuphenkka ta aawaassi na7a; ta aayeessikka a siiqiyo mexi issi na7a. <sup>4</sup> Ta aawai tana tamaarissiiddi, hagaadan yaagiis; “Taani odiyoo gee neeyyo gelo; ta azazuwaa naaga; yaatikko, neeni paxa de7ana. <sup>5</sup> Aadhdhida eratettaanne akeekaa demmanau minna; taani neeyyo odidobaa dogoppa; ta qaalaappe kiyoppa. <sup>6</sup> Aadhdhida eratettaayyo zokkuwaa zaaroppa; aissi giikko, i nena ashshana; a siiqa; siiqikko i nena naagana. <sup>7</sup> Aadhdhida eratettai ubbaappe aadhdhiyo gishshau, aadhdhida eratettaa demma. Akeekai ne aquwaa ubbaa wurssi ekkikkokka a demma. <sup>8</sup> Neeni a bonchcha; ikka nena xoqqu xoqqu oottana; neeni a oiqqikko, i nena bonchchana. <sup>9</sup> I ne huuphiyan sabaa akiliiliyaa wottana; bonchcho kallachchaakka immana” yaagiis.

<sup>10</sup> Ta na7au, siya; taani giyoogaakka ekka; ne bareekka aduqqana. <sup>11</sup> Taani nena aadhdhida eratettaa ogiyaa kaalettana; suure loossuwaarakka efaana. <sup>12</sup> Neeni hemettiyo wode, ne hemettiyoosan xubbiyaabi de7enna; woxxikkokka xubettakka. <sup>13</sup> Tamaaridoogaa hassaya; timirttee neeyyo de7o gidido gishshau, loitta naaga; yed-doppa. <sup>14</sup> Nagaranchchatu ogiyaa yedhdhoppa; iita asatu ogiyankka hemettoppa; <sup>15</sup> appe haakka; an hemettoppa; appe guyye simma; yaatada ne ogiyan ba. <sup>16</sup> Aissi gi-ikko, eti iitabaa oottana gakkanaashin, xiskkanau danddayokkona; eti asa xubbennan eta xiskkoi efeenna. <sup>17</sup> Eti nagaraa oittadan moosona; sugettaa oosuwaakka ushshadan uyoosona.

<sup>18</sup> Xillotu ogee gallassai seetana gakkanaashin, gujji gujji poo7iya maallado xalqqiyaa mala. <sup>19</sup> SHin nagaranchchatu ogee sakkana xumaa mala; eti aibin xubettiyaakkokka erokkona.

<sup>20</sup> Ta na7au, taani yootiyooгаа siya; taani odiyooгааakka loittada ezgga. <sup>21</sup> Taani odidobati ne baazzaappe deshoppona; eta ne wozanan wotta. <sup>22</sup> Aissi giikko, etabai geliyo asau ubbau eti de7uwaa immoosona; eta bollaukka payyatettaa immoosona. <sup>23</sup> Ubbabaappekka ne wozanaa minttada naaga; aissi giikko, de7oi appe pulttees. <sup>24</sup> Ne doonaappe gene haasayaa digga; wordduwaa haasayiyaageetu achchappekka kichcha. <sup>25</sup> Sitti gaada sinttau xeella; ne aifee ne sinttan de7iyaabaa tishshi oottidi xeello. <sup>26</sup> Ne gediyaassi ogiyaa salallissa; suure oge xalaalan hemetta. <sup>27</sup> Suure ogiyaaappe ushachchi haddirssi baqqoppa; ne tohoi iitasaa beennaadan naaga.

## 5

### *SHAaramuxa Maccaasaappe Haakka*

<sup>1</sup> Ta na7au, ta aadhdhida eratettaa ezgga; ne haittaa ta akeekaakko yegga. <sup>2</sup> Yaatikko, adussa qofai neessi de7ana; ne haasayaikka ne eratettaa qonccissana.

<sup>3</sup> SHAaramuxa maccaasee inxxarssaappe eessaa ililoi xokkees; i haasayai za-itiyaappekka aadhdhi looxigees. <sup>4</sup> SHin a wurssettan - godare uttaadan cammausu; naa77u baggan qanxxiya mashshadan qara; <sup>5</sup> i tohoti haiquwaakko duge boosona; i hemetai sitti oottidi, duufuwau efees. <sup>6</sup> A de7uwaa ogiyaa qoppukku; i ogeti geella; shin geella gidiyoogaakka a erukku.

<sup>7</sup> Ta na7au, ha77ikka taani odiyooгаа siya; taani giyoogaappe kiyoppa. <sup>8</sup> SHAaramuxa maccaasee heeri booppa; i keettaa penggiyaakko shiiqoppa. <sup>9</sup> Hegee xayikko, neeni ne bonchuwaa haratuyyo aattada immana. Neeni ne yelagatettan meqetti baina asatu kushiyan haiqqana. <sup>10</sup> Ne aquwaa allaga asati ekkana. Ne daafurada shiishshidobai haraassa gidana. <sup>11</sup> Wurssettan ne ashoinne ne asatettaa gilqqin, neeni oolana. <sup>12</sup> Qassi hagaadan yaagana; “Taani timirttiyaa aissi ixxidanaashsha! Ta wozanaikka seeraa aissi karideeshsha! <sup>13</sup> Taani tana tamarissiyaageeti odidobaa ekkabeikke; tana zoriyaageetu zoriyaakka ezggabeikke. <sup>14</sup> Hegaa gishshau, taani deree shiiqido yaa7an, akeekennan kauyyanau de7ais” yaagana.

<sup>15</sup> Neeni ne pulttuwaappe haattaa uya; ne keettaayee xalaalaa siiqa. <sup>16</sup> Ne pulttuwaa dabaaban, ne ollaa haattaakka dembban aissi gussai? <sup>17</sup> Eta neeni ne xalaalau buzotta; hara allaga uraara koxxoppa.

<sup>18</sup> Ne pulttoi neeyyo anjjetto; yelagatettan neeni ekkido ne maccaaseera ufaitta. <sup>19</sup> Lo77iya gaareedaaninne ufaissiya genesseedan, i xanttai ubba wodekka nena alo; ubbatoo i siiqoi nena omooddo. <sup>20</sup> Ta na7au, shaaramuxa maccaasiyaa nena aibissi omooddai? Hara asa machchiyo aibissi qoommai?

<sup>21</sup> Aissi giikko, asi oottiyoobaa ubbaa GODAI be7ees; i hemettiyo loosso ubbaa xeellees. <sup>22</sup> Nagaranchchaa i oottido nagarai oiqqees. A nagaraa gitee a qachchees. <sup>23</sup> I ba eeyyatettan haliis; ba huuphiyaa naagibeenna gishshau haiqqiis.

## 6

### *Hachchi Hachchi De7uwaassi Maaddiya Timirttiyaa*

<sup>1</sup> Ta na7au, neeni miishsha tal77ida ne shooruwaassi waase gelidabaa gidikko, neeni erenna uraassi ne kushiya baqqada geppidabaa gidikko, <sup>2</sup> neeni geppido gefaa gitiyan gelidabaa gidikko, ne doonaappe kiyida qaalaa oiqettidabaa gidikko, <sup>3</sup> simmi neeni ne shooruwaa kushiyan geladasa. Hegaa gishshau, ta na7au, hegaappe kiyanaa koyikko, elle ne shooruwaa soo ba; baada waasetettaa i ne bollappe wottana mala, auddashada a woossa. <sup>4</sup> Hagaa oottennan de7aidda xiskkoppa; shemppuwaakka shemppoppa.

<sup>5</sup> SHankkaappe genessiyaa kessa ekkiyoogaadan, gitiyaappe kafiyaa attiyooogaadan, ne huuphiyaa ashsha.

<sup>6</sup> Inttenoo azallatoo, qaacotukko biite; biidi etappe tamaarite. Yaatidi aadhdhida eranchcha gidite. <sup>7</sup> Qaacota ootissanau azaziyaabi, halaqi woikko eta haariyaabi baawa; <sup>8</sup> shin banttau maanabaa bone minjjoosona; kattaa cakkiyo wodekka banttau koshshiya kattaa shiishshoosona. <sup>9</sup> Nenoo azallau, neeni aude gakkanaashin xiskku-utee? Ne xiskkuwaappekka aude dendduutee? <sup>10</sup> Neeni qassikka guuttaa zin77aasa; guuttaa xiskkaasa; kushiya shiishsha ekkada, guuttaa shemppaasa. <sup>11</sup> Yaatiyo wode hiyyeesatetta panggaadan, pacai ola miishshaa oiqqida asadan, ne bolli yaana.

<sup>12</sup> Iita asinne hanttaara asi, yuuyi yuuyidi wordduwaa odees; <sup>13</sup> i ba aifiyan qim77otees; ba tohuwan bessees; ba biradhdhiyan malaatees. <sup>14</sup> A uluwan geellatetta de7ees; i iitabaa qoppees; ubbatookka i ooshshaa medhdhees. <sup>15</sup> Hegaa gaasuwan bashshai akeekennan a bolli yaana; i hassayennan meqqana; meqqidikka paxenna.

<sup>16</sup> GODAI ixxiyo usuppun yohoti de7oosona; i shenetiyo yohoti ubba laappuna:

<sup>17</sup> karidi xeelliyaa aifiyaa,

worddotiya inxxarssaa,

ashkke asata woriya kushiya,

<sup>18</sup> iitabaa maqqiya wozanaa,

iitabaakko eesotidi woxxiya tohuwaa,

<sup>19</sup> wordduwaa bolli wordduwaa gujji gujjidi odiya worddo markkaa,

ishatu gidon ooshshaa medhdhiya asa.

### *SHAaramuxiya Asi Qaxxayettennan Antenna*

<sup>20</sup> Ta na7au, ne aawaa azazuwaa pola; ne aayyiyaa nena tamarissidoogaakka ag-goppa; <sup>21</sup> eta ubbatoo ne wozanan oiqqa; ne qooriyanka qachcha. <sup>22</sup> Neeni hemettiyo wode, eti nena kaalettana; neeni zin77iyo wode, eti nena naagana; neeni beegottiyo wodekka, eti nena zorana. <sup>23</sup> Aissi giikko, ha azazoti xomppe; timirttetikka poo7o; qassi seeraikka de7uwaakko efiya oge. <sup>24</sup> Ha azazotinne ha timirtteti iita maccaarip-penne azina machchi cimo inxxarssaappe nena naagana. <sup>25</sup> I puulaa ne wozanan qaaqqatoppa; i qim77otanka omoodettoppa. <sup>26</sup> Issi attumaasi issi oittaa immidi, shaaramuxa maaccaasa demmanau danddayees; shin azina machcho laggettiyoogee nena worissana. <sup>27</sup> Issi asi tamaa idimmin, a maayoi meetettennan attanau dand-dayii? <sup>28</sup> Issi asi tamaa bonqquwaa yedhdhi hemettin, a tohoi xuugettennan attanee? <sup>29</sup> Asa machcho laggettiya urai hegaakka mala; o bochchiya ubbai qaxxayettennan antenna. <sup>30</sup> Kaisoi namisettidi, baayyo maanau wuuqqikko, asai a karenna. <sup>31</sup> SHin i oiqettidabaa gidikko, laappun kushe qanxxana; ba son de7iya miishsha ubbaakka immana. <sup>32</sup> SHin maccaasaara shaaramuxiya asi wozana paca; he urai ba shemp-puwaa bashshees. <sup>33</sup> Deshettiyoogeenne kauyyiyooogee a gakkida saama. A yeellai appe mulekka qucettenna. <sup>34</sup> Aissi giikko, maccaasee azinai mishettidi, hanqquwaa suullana; suullidi ba haluwaa kessiyo wode, au qarettenna. <sup>35</sup> I aiba afileamakka ekkenna; ai keena imoikka a hanqquwaa doshissenna.

## 7

### *SHAaramuxa Maccaasee Cimuwaa*

<sup>1</sup> Ta na7au, ta qaalaa naaga; ta azazuwaakka baloppa. <sup>2</sup> Neeyyo paxa de7anau ta azaziyoogaa ootta; ta timirttiyaakka ne aifiyaa buluwaadan naaga. <sup>3</sup> Hassayissiyaabaadan eta ne biradhdhetun qachcha; ne wozananka xaafa. <sup>4</sup> Aadhdhida eratettaa ne michchidan, akeekaakka ne mata dabbodan xeella. <sup>5</sup> Eti nena shaaramuxiya maccaaseepenne ba qaalan cimmiya azina machchippe naagana.



<sup>6</sup> Issi gallassi taani ta keettaa maskkootiyaara kare xeellaas; <sup>7</sup> xeellada wozanaa kuntibeenna wodalla naata be7aas. Eta giddoppe issoi keehi eeyya. <sup>8</sup> He wodallai ogiyaara biidi, issi shaaramuxa maccaasee keettaa mataara kanttiis; i soo efiya ogiyaakko pinnidi, i keettaa heeran hemettees. <sup>9</sup> He wode sa7ai qammanau lankkilankkees. <sup>10</sup> Hegaappe guyyiyan, maccaasiyaa a demmaasu. A shaaramuxa gidiyoogaa i maayoi erissees. A asaa cimmanau halchchada kiyaasu. <sup>11</sup> A xalanne yeelli baina maccaasa; son woppu gaada uttukku. <sup>12</sup> A issitoo ogiyan, issitoo giyan, dabaaba ubban eqqada naagausu.

<sup>13</sup> A he na7aa qoommada yeraasu; a a aifiyaa tishshi ootta xeellaidda hagaadan yaagaasu; <sup>14</sup> “Taani ta yarshshuwaa yarshshada, ta shiiquwaa ha77i gatta simmais. <sup>15</sup> Yaadata nena xomoosanaa kiyaas; nena keehi koyaas; ha77i simmi demmaas. <sup>16</sup> Taani Gibxxeppe yiida, alleequwaara de7iya anssollaakka ta hiixan yeggaas. <sup>17</sup> Taani karbbiyaa, almmuniyaanne qarafaa geetettiya sawotuppe kessido shittuwaa ta hiixan caccafaas. <sup>18</sup> Haaya; ane wonttana gakkanaashin siiquwaa aloos; qoomettidikka ufaittoos; <sup>19</sup> aissi giikko, ta keettaawai son de7enna; haahosaa manddara biis. <sup>20</sup> Biiddi miishshaa qarcciitaa kuntti ekkidi biido gishshau, aginai goobanan uttinnan soo simmenna” yaagaasu.

<sup>21</sup> Yaagada ba mal77o haasayan a sheleeshshaasu; ba liiqo inxxarssan cimmaasu. <sup>22</sup> Yaatin, sohuwaarakka i o kaallidi, bi aggiis. Boorai shukkiyoosaa laagettiyoogaadan, gaarai eesotidi piriyan geliyoogaadan, <sup>23</sup> gelin zubbee a wozanaa caddiyoogaadan haniis. Gitiyaa giddo gelida kafo milatiis. Hagee ubbai au a shemppuwaa maanau haniyoogaa eribeenna.

<sup>24</sup> Ta na7au, ane ha77i siya; ta doonaappe kiyiqa qaalaakka ezgga. <sup>25</sup> Ne qofai he maccaaseera booppo; i ogiyan gelada xayoppa. <sup>26</sup> A caddada olidoogeeti unddenna; a woridoogeetikka keehi daro. <sup>27</sup> I soi duufuwaakko efiya badaasa oge; he ogee duge haiquwaa geessuwau kaalettees.

## 8

### *Aadhdhida Eratettiyo Sabbiyo Sabaa*

<sup>1</sup> Siyite! Aadhdhida eratettiyyaa xeesausu; akeekaikka ba qaalaa xoqqu oottidi alaahees. <sup>2</sup> Ogiyaa doonan de7iya keratu bollinne ogeti danttettiyoosan a eqqausu; <sup>3</sup> dirssaa penggiyaa lanqqen, katamaa geliyo penggen eqqada, ba qaalaa xoqqu oottada, hagaadan yaagausu; <sup>4</sup> “Inttenoo asatoo, taani inttena xeesais; taani asa ubbaa xeesais. <sup>5</sup> Inttenoo akeekai paccidoogeetoo, hayyuwaa demmanau taaarite. Inttenoo eeyya-too, akeekaa demmite. <sup>6</sup> Taani daro lo77obaa odiyo gishshau siyite; taani odiyoobai ubbai suurebaa. <sup>7</sup> Taani tumaa odais; worddobaa taani ixxais. <sup>8</sup> Taani haasayiyoobai ubbai tuma; geella woikko mirqqetta gidenna. <sup>9</sup> Akeeki de7iyo urau ta haasayai likke; erai de7iyoogeetau ta haasayai qoncce.

<sup>10</sup> “Biraa aggidi, ta zoriyaa doorite; muruta worqqaakka aggidi, eratettaa doorite. <sup>11</sup> Aissi giikko taani, aadhdhida eratettiyyaa, inqquwaa giyo daro al77o shuchchaappekka aadhdhais; neeni amottiyoobai ubbaikka tanaara laggetanau danddayenna.

<sup>12</sup> “Taassi, aadhdhida eratetteessi akeekai de7ees; eratettaikka adussa qofaikka tanaara issippe de7oosona. <sup>13</sup> Godaassi yayyiyoogee iitatettaa ixxiyoogaa; taani otoruwaanne ayyuwaa ixxais; iitasaa efiya ogiyaanne worddo haasayaa dosikke. <sup>14</sup> Zoreenne lo77o erai taageeta; akeekainne wolqqainne taassi de7oosona. <sup>15</sup> Kawoti tanan kawotoosona; qassi haariyaageeti suure higgiiyaa tanan kessoosona. <sup>16</sup> Halaqati taani maaddin, deriyaa haaroosona; sa7an dere haariya gita asata ubbaakka taani maaddais.

17 “Taani tana siiqiyaageeta siiqais; tana minttidi koyiyaageetikka demmana. 18 Duretettainne bonchchoi tanaara de7oosona; wureenna aqoinne injjee ta mataana. 19 Intte taappe demmiyo go77ai muruta worqqaappenne seerissi kessido biraappe aadhdhees. 20 Taani xillotettaa ogiyan hemettais; suure pirddaa loossuwaara kanttais. 21 Tana siiqiyaageetau taani aquwaa immana; eta keettaakka taani kunttana.

22 “GODAI tana ba ooso ubbaappe koiro medhdhiis; benippeka a oosuwau doomettai tana. 23 Beni wode, biittai sa7ai merettanaappe kase taani sunttettaas. 24 Gita abbati baina wode, haattaa pulttoti xuuqqenna wode, he wode taani yelettaas. 25 Deretinne kerati bantta sohuwan merettanaappe kase taani yelettaas. 26 GODAI sa7aanne sa7an de7iya gadeta ubbaa medhdhanaappe kase, woikko issi kophphe gidida koiro sophphee oosettanaappe kase taani yelettaas.

27 “GODAI salota micciddo wodenne gita abbatuppe bollaara salo gufanttuwaa giigissido wode, taani yan de7ais. 28 GODAI shaarata bollan wottido wode, gita abbaa pulttota xuussido wode, 29 abbaa haattati banttau imettida zawaappe pinnidi, bollau aadhdhennaadan, i eta azazido wode, sa7aa baasuwa i baasido wode, taani yan de7ais. 30 He wode taani a matan waanna oosanchcha; ubba gallassi taani a ufaissais; taukka a sinttan ufaittais. 31 I medhdhidobai ubbai, sa7aikka asaa naatikka tana ufaissoosona.

32 “Ha77ikka simmi ta naatoo, siyite; taani yootiyooogaadan oottiyaageeti anjjetidaageeta. 33 Ta timirttiyaa siyite; siyidi aadhdhida eranchcha gidite; siyidobaa shenehoo gooppite. 34 Taani yootiyooogaa siyiya urai, hachchi hachchi ta penggen beettiya urai, ta soo geliyoosankka naagiya urai anjjetidaagaa. 35 Tana demmiyaagee de7uwaa demmees; GODAAPPE i sabaa demmees. 36 SHin tana demmennan aggiya urai bana qohees; tana ixxiya ubbati, haiquwaa siiqoosona” yaagausu.

## 9

### *Aadhdhida Eratettaanne Eeyyatettaa*

1 Aadhdhida eratettiya ba keettaa keexxausu; keexxaidda he keettau laappun tuussata essaasu. 2 A ba giigissiyo gibiraayyo modhdho mehiyaa shukkaasu; woiniyaa eessaakka agada giigissaasu. Giigissada maaddaa sinttau aattaasu. 3 Yaadata asaa xeesanau ba ashkkarata kiittaasu. Kiittin ashkkarati katamaassi xoqqa sohuwan eqqidi, 4 “Inttenoo, eri paccidoogeetoo haggaa gelite!” yaagidosona. Eeyyataakka a hagaadan yaagaasu; 5 “Haa yiite; yiidi ta qumaa miite; taani agido woiniyaa eessaakka uyite! 6 Eeyyatettaa aggidi, shemppooraa paxa de7ite; akeekaa ogiyan hemettite” yaagausu.

7 Qilliicciya uraa seeriya asi bau cashshaa ekkees; iita uraa zoriyaageekka bau qohettees. 8 Qilliicciya uraa zoroppa; zorikko i nena ixkana. Aadhdhida eranchcha uraa zora; zorikko i nena siiqana. 9 Aadhdhida eranchcha uraa tamarissa; yaatikko, i kaseegaappekka aadhdhida eranchcha gidana. Xillo uraakka tamarissa; yaatikko i eraa gujjana.

10 Aadhdhida eratettaassi doomettai GODAASSI yayyiyoogaa; Geeshsha GODAA eriyoogee akeekiyoogaa. 11 Tanan aadhdhida eratettan laittai darana; ne bareekka aduqqana. 12 Neeni aadhdhida eranchcha gidikko, ne huuphiyau go7ettaasa. Neeni qilliicciyaagaa gidikkokka, ne huuphiyau qohettaasa.

13 Issi Eeyyo giyo maccaasiyaa wocama darausu; iyyo yeelli baawa; a ainne erukku. 14 A ba karen, woikko katamaassi xoqqa sohuwan oidiiyan uttaasu. 15 Uttada suure bantta ogiyaa oiqqidi biya asaa xeesaasu; xeesada, 16 “Inttenoo, eri paccidoogeetoo, taakko haa yiite” yaagausu. Akeeki bainaagaakka, 17 “Wuuqqidi uyiyo haattai mal77ees; geeman miyo qumaikka pashkkissee” yaagausu. 18 SHin haiqqida asai yan de7iyooogaa, i imattatika hirkkin, duufo gididon de7iyooogaa i erenna.

## 10

### *Solomona Leemisota*

<sup>1</sup> Hageeti Solomona leemisota. Aadhdhida eranchcha na7ai ba aawaa ufaissees; shin eeyya na7ai ba aayyiyo azzanissees.

<sup>2</sup> Nagaran demmido miishshai go77enna; shin xillotettai haiquwaappe ashshees.

<sup>3</sup> GODAI xillota namisissenna; shin nagaranchchatu amuwaa polissenna.

<sup>4</sup> Azallatettai hiyyeesissees; shin minnidi oottiyoogee dureyees.

<sup>5</sup> Aadhdhida eranchcha urai kattaa boniyan shiishshees; shin kattaa cakkiyo wode xiskkiya urai kauyyees.

<sup>6</sup> Xillo asai anjjettees; shin nagaranchchaa doonai makkalaa genttees.

<sup>7</sup> Xilluwaa sunttai anjuwan xeeseettiiddi, de7i aggees; shin nagaranchchatu sunttai sohuwaara dogettees.

<sup>8</sup> Aadhdhida eranchchati azazidobaa oottoosona; shin eeyyatettan coo biddiyaageeti bashshau boosona.

<sup>9</sup> Suure asi saro de7ees; shin geella urai ba mooruwan ohettees.

<sup>10</sup> Geniiddi qim77otiya uri meto kessees; shin yayyennan seeriya uri sarotettaa medhdhees.

<sup>11</sup> Xilluwaa haasayai de7uwaa pultto; shin nagaranchchaa haasayai makkalaa genttees.

<sup>12</sup> Ixoi palamaa denttettees; shin siiqoi mooruwaa ubbaa goodenna.

<sup>13</sup> Wozannaama asai aadhdhida eran haasayees; shin eeyya urai xam77an shocettees.

<sup>14</sup> Aadhdhida eranchchati eraa dagayoosona; shin eeyya haasayaa haasayiya urai bana bashshees.

<sup>15</sup> Duriyaa miishshai direttida katamaadan, ba godaa naagees; shin hiyyeesatettai hiyyeesaa xaissees.

<sup>16</sup> Xillo uraa a lo77o oosoi de7uwau kaalettees; shin iita uraa wurssettai qixaate.

<sup>17</sup> Seerin eeniya urai de7uwaa ogiyan hemettees; shin seerin ixxiya urai balees.

<sup>18</sup> Ixxiiddi ba ixxiyoogaa erissenna urai worddanchcha; zigirssaa laaliya uraikka eeyya.

<sup>19</sup> Daro haasayaa gidдон nagari xayenna; shin ba doonaa shiishshi ekkiya uri aadhdhida eranchcha.

<sup>20</sup> Xilluwaa inxxarssai tigettida geeshsha biraa mala; shin iita uraa qofau gatee guutta.

<sup>21</sup> Xillo uraa haasayai daro asaa go77ees; shin eeyyati bantta wozanaa pacan haiqqoosona.

<sup>22</sup> GODAA anjjoi dure kessees; i he duretettan meto walakkenna.

<sup>23</sup> Eeyya urau iitabaa oottiyoogee kaassa mala; shin wozannaama urai aadhdhida eratettan ufaittees.

<sup>24</sup> Iita urai hirggidobai a bolli gakkana; shin xilloi amottidobai imettana.

<sup>25</sup> Gotee denddidi aadhdhiichchiyo wode, nagaranchchati beettokkona; shin xilloti merinau minnidi de7ana.

<sup>26</sup> Caalai achchaa zil77issiyogaadaaninne cuwai aifiyaa poogiyogaadan, azalla uraa kiittiyoogee yiilloyees.

<sup>27</sup> GODAASSI yayyiyoogee bariyaa adussees; shin nagaranchcha uraa baree qaam-meess.

<sup>28</sup> Xillo urai sinttaara ufaissai yaana giidi naagees; shin iita urai sinttaara yaana giidi naagiyoobi aibinne baawa.

<sup>29</sup> GODAA ogee xillotussi baqati attiyo soho; shin iitaa oottiyaageetassi bashsha.

<sup>30</sup> Xilloti mulekka xoqolettokkona; shin iitati biittaa bolli de7okkona.

<sup>31</sup> Xillo asai aadhdhida eratettaa haasayees; shin geellabaa haasayiya inxxarssai qanxxettana.

<sup>32</sup> Xillo asai bessiya haasayaa erees; shin iita asai geellaa haasayees.

**11**

- <sup>1</sup> GODAI worddo meezaanaa ixxees; shin likke meezaanan ufaittees.
- <sup>2</sup> Otoroi yiyo wode kaushshatettaa yees; shin ashkhetettaara aadhdhida eratettaa yees.
- <sup>3</sup> Xillota eta suuretettaa kaalettees; shin ammanettennaageeta eta geellatettaa xaissees.
- <sup>4</sup> Hanqquwaa gallassi duretettaa go77enna; shin xillotettaa haiquwaappe ashshees.
- <sup>5</sup> Boree baina uraa ogiyaa a xillotettaa sittissees; shin iita urai ba iitatettaa kunddees.
- <sup>6</sup> Suureta eta xillotettaa ashshees; shin ammanettennaageeta eta amoi pire gididi oiqqana.
- <sup>7</sup> Iita asi haiqqiyo wode, i naagiyo ufaissaikka aara issippe haiqqees; i ba wolqqan ceqqettiyoobai ubbikka xayees.
- <sup>8</sup> Xilloi metuwaappe attees; a gishshaa iitaa bolli metoi yees.
- <sup>9</sup> Xoossaa kaddida asi ba doonan asa xaissees; shin xilloti eran kessi ekkoosona.
- <sup>10</sup> Xilloti bonchchettiyo wode, katamai ufaittees; qassi iitai haiqqiyo wode, hashshu gees.
- <sup>11</sup> Xillotu anjuwaa gaasuwan katamai diccees; shin iita uraa haasayai katamaa xaissees.
- <sup>12</sup> Ba shooruwaa kariya urau wozani baawa; shin akeekanchcha uri co77u gees.
- <sup>13</sup> Zigirssanchcha asi xuuraa laalees; shin ammanettiya asi xuuraa genttees.
- <sup>14</sup> Kaalettiyaabi xayikko, kawotettaa kunddees; shin daro zoriyaageeti de7ikko, saroi de7ees.
- <sup>15</sup> Erenna urau waase gidiya asi tumuppe metootana; hegaappe waase gidennan ixxiyoogee lo77o.
- <sup>16</sup> Ulo keha maccaasiyaa bonchchetausu; shin meqettaa iita asai duretetta xalaalaa duretees.
- <sup>17</sup> Keha asi baassi lo77obaa oottees; shin meqettaa iita asi bana qohees.
- <sup>18</sup> Iita asi demmiyo miishshai cimo; shin xillotettaa zeriya uri tumu woiuwaa cakkana.
- <sup>19</sup> Xillotettaa minnidi de7iya uri paxa de7ana; shin iitatettaa kaalliya uri haiqqana.
- <sup>20</sup> GODAI iita qofai de7iyo asata ixxees; shin suure hemettiyaageetan ufaittees.
- <sup>21</sup> Iita asi qaxxayettanaagee antenna; shin xillotu zaree attana.
- <sup>22</sup> Adussa qofi baina puulanchcha maccaasee puulai gudunntaa siiriyaa aattido worqqaa alleequwaa mala.
- <sup>23</sup> Xillotu amuwaa poloi lo77o xalaala; shin iitatu amuwaa poloi hanqqo xalaala.
- <sup>24</sup> Issi issi asati bantta miishshaa asau coo kehoosona; shin eta aqoi yaa darees. Hara asati qassi bantta miishshau pala uuzettoosona; shin eta aqoi haa paccees.
- <sup>25</sup> Keha asi duretana; harata maaddiya asi maaddetana.
- <sup>26</sup> Kattai al77in baizzanau minjiya uraa asai qanggees. SHin ba kattaa asai koyiyo wode baizziya uraa anjjees.
- <sup>27</sup> Lo77obaa minttidi koyiyo uri ufaissaa demmees; shin iitabaa koyiyo uraa iitabai demmees.
- <sup>28</sup> Ba duretettaa ammanettiya asi kunddana; shin xilloti balggo mittaadan daayana.
- <sup>29</sup> Ba so asaa bolli cabbo denttiya uri go7ettanabi aibinne baawa. Eeyyatikka aadhdhida eranchchatuyyo ashkkara gidana.
- <sup>30</sup> Xillo asi de7o aifiyaa aifiya mitta mala; shemppo ashshiyaageeti aadhdhida eranchcha.
- <sup>31</sup> Xilloti sa7an bantta oosuwaawaa waagaa ekkiiyaabaa gidikko, iitatinne nagaranchchati bantta oosuwaassi ekkana waagai waani daranddeeshsha!

**12**

- <sup>1</sup> Seeriyoogaa dosiya uri eratettaa dosees; shin seeraa ixxiya uri damma.
- <sup>2</sup> Lo77o asi GODAAPPE sabaa demmees; shin GODAI genanchchata pirddees.

- <sup>3</sup> Asa iitatettaa minttidi essenna; shin xillotu xaphoi qaaxxenna.
- <sup>4</sup> Wozannaama maccaasiyaa ba keettaawau kallachcha mala; shin ba keettaawaa kaushshiya maccaasiyaa a meqettaa miya ajaajje mala.
- <sup>5</sup> Xillotu qofai suure; shin iitatu zoree cimo.
- <sup>6</sup> Iitatu haasayai asa woranaassa; shin xillotu haasayai eta ashshees.
- <sup>7</sup> Iita asati kunddana; etau zerettikka attenna; shin xillotu zerettaa minnidi de7ana.
- <sup>8</sup> Asi ba aadhhdhida eratettaa keenaa galatettees; shin geella qofai de7iyo asi kareettees.
- <sup>9</sup> Dure asa milatidi, metuwan de7iya asaappe coo asa milatidi, oottiiddi ba de7uwaa sugiya asi keha.
- <sup>10</sup> Xillo asi ba mehayaassi qareettees; shin iita asa kehatettau meqetti baawa.
- <sup>11</sup> Ba biittaa mintti oottiya urai kattaa kallees; shin pattennabaa yedettiya uri akeekai paccidoogaa.
- <sup>12</sup> Iitati nagaranchcha asatu omooduwaa ekkanaa amottoosona; shin xillotu xaphoi daayidi de7ana.
- <sup>13</sup> Iita asa a doonaappe kiyida haasayai pire gididi oiqqees; shin xilloi metuwaappe kessi ekkees.
- <sup>14</sup> Asi ba doonaappe kiyiya qaalan lo77obaa kallees; ba oottido oosuwaawaa waagaakka ekkees.
- <sup>15</sup> Eeyya asi biyo buussai au a huuphen likke milatees; shin aadhhdhida eranchcha asi zoriyaa siyees.
- <sup>16</sup> Eeyya uraa hanqqoi sohuwaara erettees; shin cincca asi cashshaa wudenna.
- <sup>17</sup> Tumaa haasayiya asi suurebaa yootees; shin worddo markkai wordduwaa yootees.
- <sup>18</sup> Akeekennan haasayiyoo haasayai cuphedan caddees; shin aadhhdhida eranchchaa inxxarssai pattees.
- <sup>19</sup> Worddo haasayii guutta wodiyaassa; shin tuma haasayii merinaa de7ana.
- <sup>20</sup> Iitaa qoppiyaageetu wozanan genee de7ees; shin sarobaa zorettiyaageetu wozanan ufaissai kumees.
- <sup>21</sup> Xillota metoi gakkenna; shin iitatussi metoppe attin, harabi de7enna.
- <sup>22</sup> GODAI worddanchchata ixtees; shin tumanchcha asatun i ufaittees.
- <sup>23</sup> Cincca asi ba eraa qottees; shin eeyyati bantta eeyyatettaa yootoosona.
- <sup>24</sup> Minnidi oottiya uri deriyaa haarees; shin azallai haareettees.
- <sup>25</sup> Hirggiyoogee asa ufaissaa diggees; shin shonggaara de7iya haasayai a ufaissees.
- <sup>26</sup> Xillo asi ba shooruwaa zoridi, suure ogiyaa kaalettees; shin iitatu ogee tumaappe haassees.
- <sup>27</sup> Azalla asi shankkatidi ehiido ashuwaa kattenna; shin asau aqoi minnidi oottiyooogaa.
- <sup>28</sup> Xillotettaa ogiyan de7oi de7ees; he ogiyan haiqoi baawa.

## 13

- <sup>1</sup> Eranchcha na7ai ba aawaa seeraa siyees; shin qilliicciyaagee seeraa siyenna.
- <sup>2</sup> Asi ba doonaappe kiyiya qaalan lo77obaa ekkees; shin ammanttennaageeti makkalabaa amottoosona.
- <sup>3</sup> Ba doonaa naagiya urai ba shemppuwaa naagees; shin eesuwan haasayiya urai bana xaissees.
- <sup>4</sup> Azallai amottees; amottikkonne aibanne demmenna; shin minnidi oottiyaageeti kallana.
- <sup>5</sup> Xillo asati worddo haasayaa ixxoosona. SHin iita asatu haasayai yeellayeesinne kaushshees.
- <sup>6</sup> Suure de7uwaa de7iya uraa a xillotettaa naagees; shin nagaranchchaa a nagarai onggees.
- <sup>7</sup> Bana dure milatissiya asi de7ees; shin au aibinne baawa; harai qassi bana hiyyeesa milatissiyaagee de7ees; shin au daro aqoi de7ees.



<sup>8</sup> Asi ba miishshan ba shemppuwaa wozanau danddayees; shin hiyyeesaa yashissiyaabi baawa.

<sup>9</sup> Xillotussi ubbatoo poo7o; shin iitatu xomppee to7ana.

<sup>10</sup> Otoroi ooshshaa yeles; shin zoriyaa ekkiyaageeti aadhdhida eranchcha.

<sup>11</sup> Daafuri bannan demmido miishshai eesuwan xayeess; shin minni oottidi demmido aqoi, dari daridi bees.

<sup>12</sup> Koyiyobai polettennan gam77iyoogee azzanissees; shin amottidobai polettiyoogee ufaissées.

<sup>13</sup> Zore kariya uri meton geles; shin azazuwaa bonchchiya uri saruwan de7ana.

<sup>14</sup> Aadhdhida eranchchai immiyo timirttee de7o pultto; hegee asi haiquwaa piriyaappe kessi ekkana maaddees.

<sup>15</sup> Akeeki de7iyo uri bonchchettees; shin ammanettennan aggiyoogee bashshau efees.

<sup>16</sup> Cincca asai ubbai eran oottees; shin eeyyai ba eeyyatettaa qonccissees.

<sup>17</sup> Iita asati kiitettidi, meton geloosona; shin ammanttiya asati kiitettidi, sarotettaa ehoosona.

<sup>18</sup> Seeraa ixxiya asi hiyyeeseesinne yeellatees; shin seerin siiyiya urai bonchchettees.

<sup>19</sup> Amottidobaa demmiyoogee keehi ufaissées; shin iitati iitaappe haakkanau koyokkona.

<sup>20</sup> Aadhdhida eranchcha asatuura hemettiya asi aadhdhida eranchcha gidees; shin eeyya asatuura hemettiya asi metuwan geles.

<sup>21</sup> Nagaranchchata iita qaadai kaallees; shin xilloti lo77o oosuwaa woituwaa ekkana.

<sup>22</sup> Lo77o asi ba naatu naata laatissees; shin nagaranchchaa aqoi xilluwaassi dagattees.

<sup>23</sup> Hiyyeesaa goshshai daro kattaa aifanau danddayees; shin suure pirddai pacci-dooгаа gaasuwan xayeess.

<sup>24</sup> Qaixaariyan wadhdhanau qarettiya uri ba na7aa ixxees; shin ba na7aa siiqiya uri minnidi seerees.

<sup>25</sup> Xilloi a uloi kallana gakkanaassi mees; shin nagaranchchai namisettees.

## 14

<sup>1</sup> Aadhdhida eranchcha maccaasiyaa ba keettaa keexxausu; shin eeyyiya ba keettaa ba kushiyan qolausu.

<sup>2</sup> Suure hemettiya asi GODAASSI yayyees; shin ba ogiyaa geellayiya asi GODAA karees.

<sup>3</sup> Eeyyaa haasayai a zokkuwaassi gatimaa ehees; shin aadhdhida eranchchatu inxxarssai eta naagees.

<sup>4</sup> Boorati bannasan gootarai mela de7ees; shin neeyyo goyiyo wolqqaama boorati de7ikko, ne gootaran kattai kumees.

<sup>5</sup> Ammanettiya markkai ubbaton tumaa odees; shin worddo markkai worddo xalaalaa haasayees.

<sup>6</sup> Qilliicciyaagee aadhdhida eratettaa koyees; shin demmenna; akeekai de7iyo asi eratettaa demmanaagee a waayissenna.

<sup>7</sup> Eeyya asappe haakka; aissi giikko, neeni a haasayaappe era demmakka.

<sup>8</sup> Cincca asi ba oottiyoogaa eriyo gishshau, aadhdhida eranchcha gidees; shin eeyya asi ainne erennankka eriyaabaa milatiyo gishshau eeyya gidees.

<sup>9</sup> Eeyyati nagaraa oottidi, azzaniyoogaa gishshaa qilliiccoosona; shin suureti bantta nagarai atto geetettanau koyoosona.

<sup>10</sup> Ba wozanaa azzanuwaa aawu erees; a ufaissaakka ooninne aara koxxenna.

<sup>11</sup> Iitatu keettai qolettana; shin suuretu keettai minnidi de7ana.

<sup>12</sup> Asaassi likke milatiya ogee de7ees; shin bin, a wurssettai haiquwan kessi yeggees.

<sup>13</sup> Miichchankka wozanai azzani erees; ufaissaa wurssettaikka azzano gidanau danddayees.

<sup>14</sup> Iita asi ba iita oosuwaa waagaa ekkana; lo77o asikka ba lo77o oosuwaa waagaa ekkana.

<sup>15</sup> Eeyya asi ubbabaa ammanees; shin cinccai akeekidi tanggees.

<sup>16</sup> Aadhdhida eranchcha asi yayyees; iitaappekka haakkees; shin eeyyai banan ammanettidi otorettees.

<sup>17</sup> Elle hanqqettiya asati eeyya ooso oottoosona. SHin cinccati danddayanchcha.

<sup>18</sup> Eeyyati bantta azallatettaa waagaa ekkoosona; shin cinccati eratettaa kallachchaadan goxxoosona.

<sup>19</sup> Iita asati lo77o asatu sinttan hokkidi, maarotaa woossoosona. Nagaranchchatikka xillotu penggiyan hokkoosona.

<sup>20</sup> Hiyyeesai ba shooruwankka dosettenna; shin duretussi daro laggeti de7oosona.

<sup>21</sup> Ba shooruwaa kariya asi nagaraa oottees; shin hiyyeesaa maaddiyaageeti anjjetti-daageeta.

<sup>22</sup> Iitabaa maqettiyaageeti baloosona gidokkonaa? SHin lo77obaa oottanau halchchiyaageeti tumatettaanne aggenna siiquwaa demmoosona.

<sup>23</sup> Minnidi oottidoban ubban go77ai de7ees; shin coo mela haasayai hiyyeesatetta xalaalaa ehees.

<sup>24</sup> Aadhdhida eranchchatussi eta duretetta eta kallachcha; shin eeyyati bantta eeyyatettaa gujji gujjidi eeyyoosona.

<sup>25</sup> Tumu markkai shemppuwaa ashshees; shin worddo markkai kashi erikke gees.

<sup>26</sup> GODAASSI yayyiya urau mino qatoi de7ees. I a naatussikka baqatidi attiyso soho gidana.

<sup>27</sup> GODAASSI yayyiyoogee de7oi kiyiyo pultto; hegaa gishshau, neeni haiquwaappe kessa ekkanau koyikko, GODAASSI yayya.

<sup>28</sup> Kawuwaa gitatetta i haariyo asaa coratettaana; shin haariyo asi xayikko, ikka pattenna.

<sup>29</sup> Danddayanchcha asaassi gita akeekai de7ees; shin elle hanqqettiya asi ba eeyyatetta qonccissees.

<sup>30</sup> Woppu giida wozanai bollaa payya wottees; shin qanaatee bollau ajaajje harggiyaa mala.

<sup>31</sup> Hiyyeesata toochchiya asi eta Medhdhidaagaa cayeess; shin metootanchchatussi kehiya asi Xoossaa bonchchees.

<sup>32</sup> Iitati bantta iita oosuwaa kunddana; shin xilloti bantta suuretettan naagettana.

<sup>33</sup> Akeekanchcha asaa wozanan aadhdhida eratetta kumiis; shin eeyyati aadhdhida eratettaabaa aibanne erokkona.

<sup>34</sup> Xillotetta issi kawotettaa asaa xoqqu xoqqu oottees; shin nagarai ai asanne kaushshees.

<sup>35</sup> Kawoi eranchcha ashkkaran ufaittees; shin yeellaiya oosuwaa oottiya ashkkaraa hanqqettees.

## 15

<sup>1</sup> Liiqo haasayai hanqquwaa zarbbissees; shin porddolla qaalai hanqquwaa denttettees.

<sup>2</sup> Aadhdhida eranchchaa inxxarssai eraa puulayees; shin eeyyatu doonai eeyyatettaa xuuqqees.

<sup>3</sup> GODAA aifeti ubbasaa xeelloosona; iitaa oottiyaageetakka lo77uwaa oottiyaageetakka be7oosona.

<sup>4</sup> SHonggaara de7iya lo77o haasayai de7o mittaa mala; shin geella haasayai ayyaanaa kinchchees.

<sup>5</sup> Eeyya asi ba aawaa seeraa karees; shin ba aawaa zoriyaa ekkiya asi eranchcha.

<sup>6</sup> Xillo uraa keettan daro miishshai de7ees; shin iitaassi geliya miishshai metuwaa ehees.

<sup>7</sup> Aadhdhida eranchchatu doonai eraa zerees; shin eeyyatu wozanai hegaa mala gidenna.

<sup>8</sup> GODAI iitatu yarshshuwaa shenetees; shin suuretu woosai a ufaissees.

<sup>9</sup> GODAI iita asatu hemetaa shenetees; shin xillotettaa kaalliyaageeta i siiqees.

<sup>10</sup> Likke ogiyaa aggida asa iita boshai naagees; seeriyoojaa ixxiya asi haiqqees.

<sup>11</sup> Harai attin, duufoikka bashshaikka GODAA sinttan qoncciiyan beettoosona. Yaatin, asa wozanaa qofai waani appe geemmanee?

<sup>12</sup> Qilliicciya asi seeriyoojaa dosenna; aadhdhida eranchchatuppekka zore oichchenna.

<sup>13</sup> Wozanai ufaittin, som77oi poo7ees; shin wozani azzanikko, he aawu siiddees.

<sup>14</sup> Akeekiya wozanai de7iyo asi eratettaa koyees; shin eeyyati bantta eeyyatettan ufaittoosona.

<sup>15</sup> Hiiyyeesatu de7oi ubba gallassikka baaxe. SHin ufaittiya asati ubbatonkka bantta de7uwaa aloosona.

<sup>16</sup> Ooshshai de7iyo gita aquwaappe GODAA yashshatettai de7iyo guuttabai keha.

<sup>17</sup> Ooshshai de7iyoosan modhdho ashuwaa maanaappe siiqoi de7iyoosan santtaa miyoogee keha.

<sup>18</sup> Hanqqettiya asi ooshshaa kessees; shin hanqqettanau eesotenna asi ooshshaa irxxissees.

<sup>19</sup> Azalla uraassi metoi a oge ubban aguntta dirssa mala; shin suure uraa ogee badaasa.

<sup>20</sup> Eranchcha na7ai ba aawaa ufaissees; shin eeyya na7ai ba aayyiyo karees.

<sup>21</sup> Wozani bainna asi ba eeyatettan ufaittees; shin wozannaama asi likkebaa oottees.

<sup>22</sup> Zoretai xayikko, halchchidobai halettees; daro zoriyaageeti de7iyoosan halchchidobai polettees.

<sup>23</sup> Oishettidobaassi likke zaaruwaa zaariyoogee he uraa ufaissees; haasayaa likke wodiyan haasayiyoogee aiba lo77obee!

<sup>24</sup> Aadhdhida eranchchai bollau kaalettiya de7uwaa ogiyan hemetteesippe attin, duge duufuwau wottiya ogiyan hemettenna.

<sup>25</sup> GODAI otoranchchatu keettaa qolana; shin am77ee aquwaa naagees.

<sup>26</sup> GODAI iitatu qofaa shenetees; shin geeshsha qaalai a ufaissees.

<sup>27</sup> Wordduwan woriyaa demmanau jaamiya asi ba so asaa bolli metuwaa ehees; shin mattaayiyaa ixxiya asi paxa de7ana.

<sup>28</sup> Xillo asi haasayanaappe kasetidi qoppees; shin iitatu inxxarssai palabaa pulttees.

<sup>29</sup> GODAI iitatuppe haakkees; shin xillotu woosaa siyees.

<sup>30</sup> Pashkkidi xeelliyo xeelai wozanaa ufaissees; mishiraachcho odoikka bollaa pattees.

<sup>31</sup> De7uwaa immiya zoriyaa siyiya asi aadhdhida eranchchatuura issippe de7ana.

<sup>32</sup> Seeraa ixxiya asi bana qohees; shin seeraa ekkiya asi akeekaa demmees.

<sup>33</sup> GODAASSI yayyiyoogee asa aadhdhida eratettaa tamarissee; bonchchettana koyida asi koiro bana kaushshanau koshshees.

## 16

<sup>1</sup> Asi ba wozanan halchchees; shin likke zaaroi GODAAPPE beettees.

<sup>2</sup> Asi oottiyo ooso ubbai au likke milatees; shin GODAI koiro denddo qofaa yiggi xeellees.

<sup>3</sup> Ne oottiyoobaa ubbaa hadaraa GODAAYYO imma; yaatikko, neeni halchchidobai polettana.

<sup>4</sup> GODAI medhdhidobau ubbau a wurssettai de7ees; makkalanchchatu wurssettaikka bashshaa.

<sup>5</sup> GODAI otorettiya ubbaa shenetees; eti qaxxayettennan attokkona.

<sup>6</sup> Aggenna siiquwaaninne ammanettiyoogan nagarai atto geetettes; asi GODAAYYO yayyiyoogan iitabaa oottennan naagetees.

<sup>7</sup> Asa hemeti GODAA ufaissiyaabaa gidikko, he aawu ba morkketu addiniitaarakka saro de7anaadan, GODAI oottees.

<sup>8</sup> Xillotettan beettiya guuttabai wordduwan demmiyo daro woriyaappe keha.

<sup>9</sup> Asi ba wozanan ba oottanabaa halchchees; shin halchchoi GODAI maaddin polettees.

<sup>10</sup> Kawoi Xoossaappe ekkido maatan pirddees; pirddiiddi i balenna.

<sup>11</sup> Yiggiyo meezaanatinne makkiyo miishshati ammanttiyaageeta gidanaadan, GODAI koyees; baizziyooban ubban genee de7ennaadan koyees.

<sup>12</sup> Kawoti mooro oosuwaa shenetoosona; aissi giikko, eta kawotaa araatai xillotettan eqgees.

<sup>13</sup> Kawoti xillo inxxarssan ufaittoosona; tumaa haasayiyaageetakka dosoosona.

<sup>14</sup> Kawuwaa hanqqoi haiquwaa kiitanchchaa mala; shin aadhdhida eranchcha asi hanqquwaa irxxissanau auddashees.

<sup>15</sup> Kawuwaa som77oi pashkkikko, hegee simmi de7o. I nashshiyoogee badhdheesaa iraa ehiya shaaraa mala.

<sup>16</sup> Aadhdhida eratettaa demmiyoogee worqqaa demmiyoogaappe keha; akeekaa demmiyoogee biraa demmiyoogaappekka aadhdhees.

<sup>17</sup> Suureti biyo ogee iiti de7iyoozaappe haahuwaara kanttissees; ba hemetaa naagiya uri ba shemppuwaa naagees.

<sup>18</sup> Otoruwaa geeduwaa bashshai kaallees; ayyuwaa geeduwaakka kunddettai kaallees.

<sup>19</sup> Ayyiyaageetuura zuppetidi, omooduwaa shaakki ekkanaappe ashkke gididi, hiyyeesidi de7iyoogee keha.

<sup>20</sup> GODAA qaalaa loittidi ezggiya urau i oottiyoobai ubbai injjettana; GODAN ammanettiya uri anjjettidaagaa.

<sup>21</sup> Ba qofan aadhdhida eranchcha gidida asi akeekanchcha geetettes; lo77o qaalai eratettaa gujjees.

<sup>22</sup> Cincca urau eratettai de7o pultto mala; shin eeyyata seeriyoogee coo wode wurssiyoojaa.

<sup>23</sup> Aadhdhida eranchcha asi haasayanaappe kasetidi qoppees; qoppidi asi ekkiyo haasayaa haasayees.

<sup>24</sup> Lo77o qaalai eessaa ililuwaadan mal77ees; bollaakka maaddeesinne pattees.

<sup>25</sup> Asaassi suure milatiya ogee de7ees; shin wurssettan haiquwau gattees.

<sup>26</sup> Namisainne metoi asi minnidi oottanaadan giddoosona.

<sup>27</sup> Iita asi iitabaa halchchees; a haasayaikka xuuggiya tamaa mala.

<sup>28</sup> Geella asi ooshshaa denttees; zigirssanchcha asi ammanettiya laggeta shaakkees.

<sup>29</sup> Gene asi ba shooruwaa cimmes; lo77o gidenna ogiyau i a kaalettees.

<sup>30</sup> Ba aifiyaa qim77otiya asi geellabaa qoppees; ba menttershshaa saxxidi manddiya asi iitabaa polees.

<sup>31</sup> Puulummida huuphee bonchcho kallachcha; hegeekka beettiyoi xillo de7uwaa de7iina.

<sup>32</sup> Wolqqaama asa gidiyoozaappe, hanqqettanau eesotenna asa gidiyoogee lo77o; daro katamata olidi oiqqiyoozaappe, asi ba huuphiyaa haariyoogee aadhdhees.

<sup>33</sup> Asi saamaa yeggees; shin GODAI ubbabaa battees.

## 17

<sup>1</sup> Ooshshai de7iyoozan de7iya gita gibiraappe saroinne woppai de7iyoozan mela oittaa poquwaa miyoogee keha.

<sup>2</sup> Cincca ashkkarai ba godaa na7aa pattenna laafaa haarees; yaatidi ishanttuura issippe laattees.

<sup>3</sup> Worqqainne birai taman paacettiyoogaadan, GODAI asaa wozanaa paacces.

<sup>4</sup> Iita asi iita uraa haasayaa siyees; worddanchchaikka genanchchaa oduwaa ezgges.

<sup>5</sup> Hiyyeesatu bolli qilliicciya asi eta medhdhida Xoossaa cayeess; hara asa gakkiiya metuwan ufaiittiya asi qaxxayettennan antenna.

<sup>6</sup> Naatu naati cimida asatuyyo kallachcha; aawati bantta naatuyyo bonchcho.

<sup>7</sup> Daro lo77o haasayai eeyya uraassi giigenna; hegaappekka aaruwaa worddo haasayai deriyaa haariyaagaassi giigenna.

<sup>8</sup> Mattaayee bana immiyaagau dumma wolqqa mala; i simmido soho ubbai ayyo injjetees.

<sup>9</sup> Naaqettidi ba naaquwaa genttiya urai siiquwaa koyees; shin yoho zaari zaaridi woociya urai, ammanettiya laggeta shaakkees.

<sup>10</sup> Eeyyai xheetuton lissuwan shocin eriyoo gaappe akeeki de7iyo asi coo seerin eriyoo gee aadhdhees.

<sup>11</sup> Iita asi makkalabaa xalaalaa koyees; heгаа gishshau, meqetti baina daanni a bolli kiitettana.

<sup>12</sup> Eeyyatetti oiqqido uraara gaittiyoogaappe marata bonqqi ekkirgido maaheera gaittiyoogee keha.

<sup>13</sup> Lo77o oottidoogaa kushiya iitaa zaariya uraayyo iitai a sooppe mulekka kichchenna.

<sup>14</sup> Ooshshai doommiiddi, zeeruwaa xuussiya haattaa mala; heгаа gishshau, ooshshaappe kasetada palamaa aggaaga.

<sup>15</sup> Nagaranchchaa xillissiyoo geenne xilluwaa bolli pirddiyoo gee eti naa77aikka GODAA sheneyiya ooso.

<sup>16</sup> Akeekiya wozani au bainaashin, eeyyaa kushiyan aadhdhida eratettaa shammiyo miishshai aibissi de7ii?

<sup>17</sup> Laggee mule wodekka siiqees; ishaikka metuwaa wode maaddanaassi yelettees.

<sup>18</sup> Akeekai paccido asi erenna uraa acuwaa qanxxanau waase gelees.

<sup>19</sup> Ooshshaa dosiya asi nagaraa dosees; ubbato ceeqettiya asi bashshaa ba bolli xeesees.

<sup>20</sup> Geella qofai de7iyo asi lo77obaa demmenna; shikkaalobaa haasayiya asikka metuwan gelees.

<sup>21</sup> Azalla na7aa yelida aawi azzanees; eeyya na7aa aawau ufaissi baawa.

<sup>22</sup> Wozani ufaiittiyoogee asassi lo77o xale; shin kayyottiyoo gee asau wolqqa xaissees.

<sup>23</sup> Iita daannai pirddaa geellayanau geeman mattaayiyaa ekkees.

<sup>24</sup> Akeekai de7iyo uri aadhdhida eratettaa sinttan wottidi bees; shin eeyyaa aifee biittaa sa7aa xanxxaa yuuyidi xeellees.

<sup>25</sup> Azalla na7ai ba aawaa azzanissees; bana yelida aayyiyookka zil77issees.

<sup>26</sup> Xillo asa qaxxayiyoo gee, suure asakka a suuretettaa gishshau dechchiyoogee lo77o gidenna.

<sup>27</sup> Amarida qaala haasayiya asi eranchcha; woppa ayyaani de7iyo asikka akeekanchcha.

<sup>28</sup> Eeyya uri co77u giikkonne ba doonaa barikko, eranchcha milatees.

## 18

<sup>1</sup> SHaahettanau koyiya asi ba amuwaa kaallees; lo77o era ubbaakka phalqqees.

<sup>2</sup> Eeyyai ba qofaa qonccissanaagaa xalaalaa dosiyoo gaappe attin, hara asappe era ekkana dosenna.

<sup>3</sup> Iitatettaa yiyo wode, karee, kaushshinne yeelli a kaallidi yi bayoosona.



<sup>4</sup> Asaa doonaappe kiyiya haasayai ciimmaa haattaa mala; aadhdhida eratettaa pult-toikka goggiya haattaa mala.

<sup>5</sup> Mooranchchaa maaddidi, xilluwaa pirddaa geellayiyoogee lo77o gidenna.

<sup>6</sup> Eeyya asi ba haasayan ooshshaa denttees; a doonaappe kiyiya qaalai a warisrees.

<sup>7</sup> Eeyya asi, haasayiiddi bana qohees; a haasayai gite gididi, a oiqqees.

<sup>8</sup> Zigirssanchchaa qaalai mal77o qumaa mala; ufaissiiddi duge ganjjiyaa gaktees.

<sup>9</sup> Ba oottiyo oosuwan azalliya asi bashshiya urappe ainne dummatenna.

<sup>10</sup> GODAA sunttai mino gimbe mala; xillo asi yaa woxxidi saro attana.

<sup>11</sup> SHin dure asatussi eta duretettai yuushoi gimbbettido katamaa mala; eta qofan eta duretettai mino dirssaadan eta naagiyaabaa milatees.

<sup>12</sup> Asi kunddanaappe kase a wozanai otorettees; bonchchettiyooagaappekka ba huphiyaa ziqqi oottiyoogee sinttatees.

<sup>13</sup> Siyennan de7iiddi zaariyoogee, hegee he uraayyo eeyyatettanne yeella.

<sup>14</sup> Asa ayyaani harggiyaa danddayanaadan maaddees; shin ayyaani meqeretti-ichchikko, a ooni danddayanee?

<sup>15</sup> Akeekanchcha asati tamaanau keehi koyoosona; aadhdhida eri de7iyooabaakka ezggoosona.

<sup>16</sup> Immiyoobi immiyaagau ogiyaa dooyees; gita asaarakka erisrees.

<sup>17</sup> Kasetidi daannan mootiya uri baarigaarai yiidi a oichchana gakkanaashin, ubbatonkka he urai xillo milatees.

<sup>18</sup> Saamaa yeggiyoogee palamaa teqqees; naa77u wolqqaama baarigaaratakka shaakkees.

<sup>19</sup> Naaqettida ishaara giiganaagee gimbbettida katamaa omooddanaagaappekka aadhdhi waayisrees; penggiyaa gorddiyo birata hiraquwaadan, palamai dabbota shaakkees.

<sup>20</sup> Ba doonan haasayidobaappe asi ba ganjjiyaa kuntees: ba inxxarssaappe kiyidaban kallees.

<sup>21</sup> Neeni haasayidoogee nena wottees woikko worees; heгаа gishshau, neeni ne haasayaa gaasuwan yiyaabaa ekkana de7aasa.

<sup>22</sup> Machcho demmida asi lo77obaa demmiis; he urai GODANKKA nashettees.

<sup>23</sup> Hiyyeesa asi auddashidi haasayees; shin duree phenqqeshidi zaarees.

<sup>24</sup> Daro laggee de7iyoyasi xayana; shin ishappe aadhdhidi ammanttiya laggee de7ees.

## 19

<sup>1</sup> Worddo haasayaa haasayiya eeyyaappe ba de7on boree baina hiyyeesa asi keha.

<sup>2</sup> Eri baina minotai lo77o gidenna; hemettiiddi eesotiya uraikka wora bees.

<sup>3</sup> Issi issi asai ba eeyyatettan ba de7uwaa bashshees; yaatidi qassi GODAA bolli yiillotees.

<sup>4</sup> Duretettai daro laggeta gujjees; shin hiyyeesatettai de7iya laggetakka duuttees.

<sup>5</sup> Worddo markki qaxxayettennan beenna; wordduwaa haasayiyaageetikka kessi ekkokkona.

<sup>6</sup> Daro asai daannaa sinttaa koyees; coo immiya uraara asi ubbi dabbotees.

<sup>7</sup> Hiyyeesa asa a ishantti ubbai ixsoosona; hegaappekka aaruwaa a laggeti appe haakkoosona; i eta auddashidi kaallinkka, eti a gatti oittokkona.

<sup>8</sup> Aadhdhida eratettaa demmiyaagee bana siiqees; akeekaa qoraphphiyaagee lo77obaa demmees.

<sup>9</sup> Worddo markki qaxxayettennan attenna; wordduwaa haasayiyaageekka xayana.

<sup>10</sup> Azalla uraassi ishalo de7oi bessenna; hegaappekka aillee halaqata haariyoogee iitaa darees.

<sup>11</sup> Aawussi de7iya aadhdhida eratettai hanqquwaa mitisrees; moorida urau atto giyoogeeekka bonchchisrees.

<sup>12</sup> Kawuwaa hanqqoi gaammuwaa gudettaa mala; shin a nashettai maataa aacissiya akka mala.

<sup>13</sup> Eeyya na7ai ba aawaa xaissees; ooshshanchcha machchiyaakka keetti ubbaton aattiyo aato mala.

<sup>14</sup> Issi asi keettaanne aguwaa ba aawaappe laattanau danddayees; shin akeekanchcha machchiyo GODAI immees.

<sup>15</sup> Coo zolppattiya uraayyo xiskkoi yees; ooso oottenna asi namisettees.

<sup>16</sup> Azazuwaa naagidi oottiya asi, ba shemppuwaa naagees; shin shenehoo giya asi haiqqees.

<sup>17</sup> Hiyyeesaassi kehiya asi GODAASSI tal77ees; GODAI he lo77o oosuwaa acuwaa qanxxees.

<sup>18</sup> Simmiyo menttoi de7ishin, ne naata seera; seerana xayikko, neeni eta bashshadasa.

<sup>19</sup> Hanqquwaa suulliyya asi ba waagaa ekko; a aggaaga; neeni a ashshiyaabaa gidikko, haranttuwaakka neeni a hegaadan oottanaagee antenna.

<sup>20</sup> Zoriyaa siya; timirttiyaakka ekka. Yaatikko, neeni wurssettan aadhdhida eranchcha gidana.

<sup>21</sup> Asai darobaa halchchees; shin GODAI giidobai polettees.

<sup>22</sup> Asappe koyettiyaagee aggenna siiquwaa; worddanchcha gidanaappe hiyyeesa gidiyoogee keha.

<sup>23</sup> GODAASSI yayyiyoogee de7uwau kaalettees; assi yayyiya asi kallidi de7ees; iitabikka a bochchenna.

<sup>24</sup> Issi issi asai daro azalla; woxiyan tushkkido buddeenaakka pude baaranau waayettees.

<sup>25</sup> Neeni qilliicciyaagaa shocikko, akeekai paccidoogee cinccatettaa tamaarana; akeekanchcha asa neeni seerikko, i eratettaa demmana.

<sup>26</sup> Ba aawaa bonqqiya na7ai, ba aayyiyookka sooppe kessidi yedettiya na7ai, he na7ai yeellaanne kaushshaa ehiya na7a.

<sup>27</sup> Ta na7au, neeni zoriyaa siyiyoogaa aggidabaa gidikko, erau zokkuwaa zaaradasa.

<sup>28</sup> Worddo markkai suure pirddaa bolli qilliiccees; iita asaa doonai iitatettaa gubbidi mittees.

<sup>29</sup> Qilliicciyaageetussi pirddai, eeyyatussikka warai koshshees.

## 20

<sup>1</sup> Daro mattoyiya ushshaa uyiyoogee daro bidisseesinne ooshshees; mattottiya asi wozani paccido asa.

<sup>2</sup> Kawo hanqqoi gaammuwaa gudettaa mala; a yiilloyiya asi ba shemppuwaa bolli pirddees.

<sup>3</sup> Palamaappe gaxan de7iyoogee aawussi bonchcho; shin eeyya asi ubbi ooyettanau eesotees.

<sup>4</sup> Azalla goshshanchchai wodiya naagidi goyenna; heгаа gishshau, kattaa cakkiyo wode i woossees; shin aibakka demmenna.

<sup>5</sup> Asaa wozanaa halchchoi ciimma ollaa gidдон de7iya haattaa mala; shin wozanaama asi heгаа duuqqidi kessees.

<sup>6</sup> Daro asati bantta kehatettaa yootoosona; shin tumu ammanettiya asa demmanai oonee?

<sup>7</sup> Xillo asi boree bainna de7uwaa de7ees; a kaallidi, a naatika anjettidaageeta.

<sup>8</sup> Kawoi pirddanau ba kawotaa araatan uttido wode, iita ubbaa ba aifiyan harqqidi kessees.

<sup>9</sup> “Ta wozanaa geeshshaas; tanan nagarikka baawa” yaaganau danddayiya asi de7aneeshsha?

<sup>10</sup> GODAI worddo meezaanan yiggiyaageetanne likke gidennaban makkiyaageeta ixxees.

<sup>11</sup> Na7i geeshshanne suure gidiyoogee i oottiyo oosuwan erettees.

<sup>12</sup> Siyiya haittaanne xeelliya aifiyaanne, eta naa77aakka GODAI medhdhiis.

<sup>13</sup> Xiskkon ne wodiya wursoppa; wursikko neeni hiyyeesana. Beegotta; yaatikko, neeni kattaa kallana.

<sup>14</sup> SHammiya asi, “Qohees! Qohees!” yaagees; shin biidoogaappe guyyiyan, “Hiraisuwan shammaas” yaagiiddi ceeqettees.

<sup>15</sup> Erai kumido haasayai worqqaappekka inqquwaa giyo daro al77o shuchchaappekka aadhdhida al77obaa.

<sup>16</sup> Erenna asau waase geliya uraa maayuwaa qaari ekkite; imatta asau waase geliya uraa maayuwaa oiqqite.

<sup>17</sup> Wordduwan demmido kattai asa mal77ees; shin aqi kiyiiddi, doonaa gidдон shaahetaadan hanees.

<sup>18</sup> Zoriyaa ekkada ne halchchiyoobaa halchcha; zore ekkennan de7aidda olau booppa.

<sup>19</sup> Zigirssanchcha asi xuuraa genttena; hegaa gishshau, odanchcha uraara gaittoppa.

<sup>20</sup> Asi ba aawaa woikko ba aayyiyo cayikko, a de7uwaa xomppe sakkana xuman to7ana.

<sup>21</sup> Koירוora eesuwan shiiqida aqoi wurssettan anjjettena.

<sup>22</sup> Neeyyo iitaa oottida urau, taanikka ayyo iitaa oottana gooppa; GODAN ammanet-tada naaga; i nena ashshana.

<sup>23</sup> GODAI naa77u qommo meezaanata shenetees; worddo meezaanatikka a ufais-sokkona.

<sup>24</sup> Asai baanau bessiya ogiyaa GODAI kaalettees; yaatin, asi ba de7uwan baana ogiyaa waatidi akeekanau danddayii?

<sup>25</sup> Issibaa eesotidi, “Hagaa taani Xoossaassi immaas” girggiyoogeenne guyyeppe zil77ettiyoogee, hegee asa oiqqiya pire.

<sup>26</sup> Aadhdhida eranchcha kawoi makkalanchchata shaakkidi erees; i etau qarettennan qaxxayees.

<sup>27</sup> Asaa ayyaanai GODAAYYO xomppe; hegaa gishshau, i nu gidдо asatetta ubbaa pilggi xeellees.

<sup>28</sup> Aggenna siiqoinne ammanettiyoogee kawuwaa naagoosona; a kawotaa araatai aggenna siiquwan minnees.

<sup>29</sup> Yelagatu bonchchoi eta wolqqaa; cimatuyyookka eta puulunttai etau bonchcho.

<sup>30</sup> Mino qixaatee iitatettaa shoddees; wadhdhiyoogee iita wozanaa laammanau danddayees.

## 21

<sup>1</sup> Kawuwaa wozanai GODAA kushiyaana; i a wozanaa goggiya haattaa zaariyoogaadan, ba koyidosaa zaarees.

<sup>2</sup> Asi oottiyoobai ubbai aawussi likke milatees; shin GODAI a wozanaa qofaa paacces.

<sup>3</sup> Yarshshuwaa yarshshiyogaappekka aattidi, xillobaanne suurebaa oottiyoogaa GODAI dosees.

<sup>4</sup> Iitati otorettiyoogaaninne ayyiyoogan erettoosona; hegeekka nagara.

<sup>5</sup> Mino oosanchchaa halchchoi dureyees; shin eesotiya ubbai hiyyeesana.

<sup>6</sup> Worddotidi dagayido aqoi penttuwaa suuluwaadan xayees; hegaa koyiyaageeti haiquwaa koyoosona.

<sup>7</sup> Iitati suurebaa oottanau ixxiyo gishshau, eta makkala oosoi eta ekkidi bees.

<sup>8</sup> Mooranchchati geella ogiyan hemettoosona; shin geeshshati suurebaa oottoosona.

<sup>9</sup> Ooyettiya machcheera issi keettan de7iyogaappe he keettaa shakuwan de7iyoogee keha.

- <sup>10</sup> Iitati iitabaa oottanau amottoosona; bantta shoorotussi qarettokkona.
- <sup>11</sup> Qilliicciyaagee qaxxayettido wode, wozani paccido urai aadhdhida eraa tamaarees; qassi wozannaama urai tamaridi, eraa demmees.
- <sup>12</sup> Xillo Xoossai iitatu son oosettiyaabaa ubbaa be7ees; eta aatti yeggidi xaissees.
- <sup>13</sup> Hiyyeesaa waasuwa siyanaappe giidi, ba haittaa tucchiya uri, ikka waassana; waassin alliyaabai xayana.
- <sup>14</sup> Geeman immiyo imoi hanqquwaa doshissees. Afala giddoora immido mattaayee suulo hanqquwaa irxxissees.
- <sup>15</sup> Suure pirddai pirddettido wode, hegee xilluwaassi ufaissa; shin iitaa oottiyaagee-tussi dagama.
- <sup>16</sup> Akeeka ogiyyaappe haddirida uraa haiqoi naagees.
- <sup>17</sup> Aaro injjiyan de7ana giya urai manqqees; woine eessanne zaite dosiya asi duretenna.
- <sup>18</sup> Issi issiton Xoossaasata ashshanau iita asati qaxxayettoosona; ammanettenna asatikka suure asatu gishshaa qaxxayettoosona.
- <sup>19</sup> Ooyettiyanne yiillotiya machcheera de7anaappe bazzon de7iyoogee keha.
- <sup>20</sup> Wozannaama uraa son mal77o qumainne oissai minjjetees; shin eeyya asi bau de7iyaabaa ubbaa mirggees.
- <sup>21</sup> Xillotettaanne aggenna siiquwaa koyiya uraa baree aduqqees; qassi he urai xillotettaanne bonchchuwaa demmees.
- <sup>22</sup> Wozannaama asi wolqqaama olanchchati de7iyo katamaa olidi oiqqees; oiqqidi eti ammanettido mino qatuwaakka laalees.
- <sup>23</sup> Ba doonaanne ba inxxarssaa naagiya asi bana metuwaappe naagees.
- <sup>24</sup> Ootettiyanne ayyiya asi qilliicciyaagaa geetettees; i otoranchcha gidido gishshau, asau qoppenna.
- <sup>25</sup> Azallaa amoi worees; aissi giikko, i oottanau koyenna. <sup>26</sup> Azallai gallassa kumettaa darobaa demmanau amottees; shin xilloi bau ashshennan immees.
- <sup>27</sup> GODAI iitatu yarshshuwaa shenetees; hegaappekka eti au iita qofan shiishshiyoyarshshuwaa aatti shenetees.
- <sup>28</sup> Worddo markkai xayana; shin qoppidi akeekan haasayiya uraa haasayai ehettana.
- <sup>29</sup> Iita asi taagaa xalaalai likke gees; shin suure asi yuushshi qoppees.
- <sup>30</sup> Asi ba aadhdhida eratettan, akeekaaninne zoriyan GODAARA eqettanau dand-dayenna.
- <sup>31</sup> Olaayyo paraa kooranau danddayettees; shin olaa xoonissiyaagee GODAA.

## 22

- <sup>1</sup> Lo77o sunttai daro duretettaappe aadhdhees; sabettiyoogeeikka biraappenne worqqaappe aadhdhees.
- <sup>2</sup> Duriyaanne manqquwaa ubbaakka GODAI medhdhiis; hegan eti naa77aikka lagge.
- <sup>3</sup> Cincca asi iitaa be7idi, qosetti aattees; shin akeeki paccido asi metuwan gelidi qohettees.
- <sup>4</sup> Neeni ashkke gidikkonne GODAASSI yayyikko, duretettaa, bonchchuwaanne de7uwaa demmana.
- <sup>5</sup> Iita uraa ogiyan agunttainne piree de7ees; shin bana naagiya asi etappe haakkees.
- <sup>6</sup> Na7i waanidi de7ana bessiyaakko tamarissa; yaatikko, i cimidikka heгаа aggenna.
- <sup>7</sup> Duree hiyyeesaa haarees; tal77i ekkidaagee tal77iyau immidaagau aille gidees.
- <sup>8</sup> Nagaraa zeriya urai waayiyaa cakkees; harata i tuggayiyo tuggaikka attees.
- <sup>9</sup> Keha asi ba qumaappe hiyyeesau coo immiyo gishshau anjettana.
- <sup>10</sup> Qilliicciya asa diggarggikko, palamai, ooshshainne cashshai kichchana.
- <sup>11</sup> Neeni wozanaa geeshshatettaanne keha haasayaa dosikko, kawoi nenaara dabbo-tees.

<sup>12</sup> GODAI tumaa naagees; shin worddanchchatu qaalaa i aatti yeggees.

<sup>13</sup> Azalla asi, “Taani kare kiyikko, gaammoi tana maana; tana ogiyan asi worana” yaagees.

<sup>14</sup> SHaaramuxa maccaasee doonai ciimma ollaa mala; GODAI hanqqettido uri a gidдон kunddees.

<sup>15</sup> Na7a wozanaa azallatetta baqqi oiqqees; shin qaixaariyan qaxxayiyoogee appe haassees.

<sup>16</sup> Baayyo aquwaa gujjana giidi, hiyyeesaa naaqqiyaageenne duriyaassi imuwaa immiyaagee naa77aikka hiyyeesana.

### *Hasttamu Aadhdhida Era Haasayata*

<sup>17</sup> Ne haittaa haa yeggada, aadhdhida eranchchai odiyoojaa siya; ne wozanaakka ta eraakko zaara. <sup>18</sup> Aissi giikko, eta ne wozanan wottikkonne ne doonankka eta ubbaa hassayikko, neeni ufaittana. <sup>19</sup> Ne ammanoi GODAN gidana mala, taani nena - ee nena - hachchi tamarissaas. <sup>20</sup> Taani neessi zoreenne erattetai de7iyo hasttamu leemisota xaafoohoo! <sup>21</sup> Nena kiittidaagaayyo neeni likke zaaruwaa zaarana mala, taani nena tumatettaa tamarissaas.

<sup>22</sup> Hiyyeesatussi aibinne baina gishshau, etabaa bonqqoppa; shilootankka metootanchchatu maataa xaissoppa. <sup>23</sup> Aissi giikko, GODAI eta gishshaa mootettana; eta bonqqidaageetakka i bonqqana.

<sup>24</sup> Hanqqettiya uraara laggetoppa; hanqqettanau eesotiya uraarakka zuppetoppa. <sup>25</sup> Neeni a hanuwaa meezetikko, guyyeppe agganau danddayakka.

<sup>26</sup> Asassi aco ta qanxxana gaada waase geloppa. <sup>27</sup> Neeni qanxxiyooobi xayikko, ne zin77iyo hiixai attennan, neessi de7iyaabai ubbai ekettana.

<sup>28</sup> Ne maizza aawati tokkido beni zawaa shoddoppa.

<sup>29</sup> Ba oosuwaa cinccatettan oottiya asa be7adii? I kawotussi ootteesippe attin, coo asatussi oottenna.

## 23

<sup>1</sup> Neeni deriyaa haariyaagaara qumaa maanau uttido wode, ne sinttan de7iyaagaa loittada akeeka. <sup>2</sup> Neeni daro yora asa gidikko, naagetta. <sup>3</sup> I nena paaccanau danddayiyo gishshau, aadhdhida mal77o qumau yiiqetoppa.

<sup>4</sup> Duretanau daafuoppa; heгаа mala keesiyaa agganau cincca gida. <sup>5</sup> Hegaa mala duretetta neeni xeellishin xayana; qefiyaa kessidi argganttaagaadan, saluwaa paalana.

<sup>6</sup> Uuziyaa qumaa mooppa; a mal77o qumaakka maanau amottoppa. <sup>7</sup> Milatissanau i nena, “Ma; uya” yaageesippe attin, a wozanai nenaara de7enna. <sup>8</sup> Neeni miido qiiba qumaa cooyana; ne galataikka hada gidana.

<sup>9</sup> Eeyyaassi payyabaa haasayoppa; aissi giikko, ne aadhdhida era haasayaa i karana.

<sup>10</sup> Beni zawaa shoddoppa; qassi aawi baina naatu gadiyaa zawaa sugoppa; <sup>11</sup> aissi giikko, eta ashshiya GODAI mino; i eta gishshaa nenaara mootettana.

<sup>12</sup> Ne asttamaaree neessi odiyooгаа ezgga; ne haittaakka eraa qaalaakko yegga.

<sup>13</sup> Na7a seerennan aggoppa; neeni a qaixaariyan wadhdhikko, i haiqqenna. <sup>14</sup> Neeni a qaixaariyan wadhdhikko, a shemppuwaa haiquwaappe ashshaasa.

<sup>15</sup> Ta na7au, neeni aadhdhida eranchcha gidikko, ta wozanaikka ufaittana; <sup>16</sup> ne inxxarssai suurebaa haasayiyo wode, ta wozanai ufaittees.

<sup>17</sup> Nagaranchchata qanaatoppa; shin ubbatoo GODAASSI yayyiyoogaa aggoppa. <sup>18</sup> Yaanikko neeyyo sinttanau sa7i kehana; sinttappe yaana kehikka neeyyo xayenna.

<sup>19</sup> Ta na7au, siya; wozannaama gida; ne wozanaa suure ogiyan wotta. <sup>20</sup> Daro woine eessaa uyiyaageetuuranne ashuwaa muussau yaaretiyaageetuura zuppetoppa; <sup>21</sup> aissi



giikko, mattottiyaageetinne yoranchchati manqqana; xiskkuwaa daroi asaa wurida curqqaa maizissees.

<sup>22</sup> Nena yelida ne aawai odiyoojaa siya; ne aayyiyaakka ceeggido wode karoppa.

<sup>23</sup> Tumaa, aadhdhida eratettaa, timirttiyaanne akeekaa shammappe attin, mulekka baizzoppa. <sup>24</sup> Xillo na7aa aawai keehippe ufaittana; wozannaama na7aa yelida urikka an poccu gaana. <sup>25</sup> Ne aawainne ne aayyiya ufaittona; nena yelidaarakka poccu gu.

<sup>26</sup> Ta na7au, ta zoriyaa ezgga; taani haniyoogaadan hana. <sup>27</sup> Aissi giikko, shaaramuxiya maccaasiyaa ciimma ollaa mala; laggettuwaa oiqqiya machchiyaakka un77o ollaa mala. <sup>28</sup> A panggadan zuggada naagausu; ammanettenna attumaasaa asaa gidдон darissausu.

<sup>29</sup> “Woo!” giyo waasoi oossee? Azzanoi oossee? Ooshshi oossee? Zuuzunnti oossee? Gaasoi bannan masunxxiyai oonee? Aifee zo77iyoi oossee? <sup>30</sup> Woine eessaa uyiiddi gam77iyaageetussa gidennee? Walahettida woine eessaa uyi uyi be7iyaageetussa gidennee? <sup>31</sup> Woine eessai zo77ido wode, a merai birilliyaa gidдон phooliyo wode, uyishin yalalattiiddi geliyo wode, a xeelloppa. <sup>32</sup> Wurssettan i shooshshadan dukkees; mulumuqqe shooshshadankka ba yiishshaa yiishshees. <sup>33</sup> Ne aifee be7i erennabaa be7ana; ne wozanaikka suure qoppaanaunne haasayanau danddayenna. <sup>34</sup> Neeni abbaa gidдон dambalai qaattiyo markkabiya xeeran zin77ida uraa mala gidana. <sup>35</sup> Neeni, “Eti tana dechchidosona; shin taani qohettabeikke. Eti tana wadhdhidosa; shin tau erttibeenna. Hara ushshaa uyanau taani aude denddanddinaashsha?” yaagana.

## 24

<sup>1</sup> Ta na7au, iita asatu mala gidarkkinaashsha gooppa; etaara dabbotanaukka amottoppa; <sup>2</sup> aissi giikko, eti ubbatoo makkalabaa maqettoosona; bantta inxxarssan genebaa haasayoosona.

<sup>3</sup> Keettaa aadhdhida eratettan keexettees; akeekankka minnees. <sup>4</sup> Erai de7ikko, qol77oi al77obaaninne lo77oban ubban kumees.

<sup>5</sup> Wozannaama urau gita wolqqai de7ees; eranchcha asikka minotettaa gujjees. <sup>6</sup> Neeni olau kiyanaappe kasetada halchchuwaa halchchana koshshees; daro zoriyaageetu zoriyan xoonoi beettees.

<sup>7</sup> Eeyyai aadhdhida eratettaa akeekanau danddayenna; au yaa7ankka odiyooobi aibinne baawa.

<sup>8</sup> Iitaa oottanau halchchiya urai genanchcha geetettana. <sup>9</sup> Eeyyatettaa qofai nagara; asai qilliicciyaagaa ixxees.

<sup>10</sup> Neeni metuwaa gallassi laafikko, ne wolqqai guutta giyoogaa.

<sup>11</sup> Haiqqanau bessennan, haiquwau pirddidi efiyoogeeta ashsha; worana haniyo wode co77u gaada xeelloppa. <sup>12</sup> Neeni, “Nuuni haggaa eribookko” yaagikko, wozanaa eriyaagee i be7ennee? Ne de7uwaa naagiyaagee erennee? Asa ubbau a oosuwaa oosuwaadan zaarennee?

<sup>13</sup> Ta na7au, eessaa ma; eessai lo77o. Eessaa ililoi manggaagan mal77ees. <sup>14</sup> Aadhdhida eratettaikka heggaa mala; i ne shemppuwau mal77o gidiyoogaa era. Neeni a demmiyaabaa gidikko, sinttaara yaana kehai neessa; neeni ekkana gaada ufaissan naagiyoobaikka xayenna.

<sup>15</sup> Xilluwaa keettaanne aquwaa bonqqanau qoppiya iita asadan hanoppa. <sup>16</sup> Xillo asi laapputoo kunddikkokka denddees; shin iitatu metuwan xayana.

<sup>17</sup> Ne morkkee kunddiyo wode ufaittoppa; i xubettiyo wodekka, “Hashshu!” gooppa.

<sup>18</sup> Neeni ufaittikko, GODAI heggaa be7idi ufaittenna; a hanqgettiyoogaakka aggiigana.

<sup>19</sup> Iitaa oottiyaageetu gishshau hirggoppa; eta mala gidarkkinaashsha gooppa. <sup>20</sup> Aissi giikko, iita urau sinttaara yaana kehi baawa; iitatu xompeeekka to7ana.

<sup>21</sup> Ta na7au, GODAAYOONNE kawuwaayyo yayya; etayyo makkaliyaageetuura akka zuppetoppa. <sup>22</sup> Aissi giikko, heгаа mala asata qoppenna metoi gакkees; kawuwaappenne GODAAPPE yaana metuwaa oonee eriyai?

### *Hara Aadhdhida Era Haasayata*

<sup>23</sup> Aadhdhida eranchchati gujjidikka hagaadan yaagidosona:

Pirddiiddi maaddiyoogee lo77o gidenna. <sup>24</sup> Mooranchchaa, “Neeni moorabaakka” yaagiya daannaa asai qanggana; kawotettatika a ixkana. <sup>25</sup> Mooranchchaa qaxxayyaageeti keehi nashettanne anjettana.

<sup>26</sup> Suure zaaruwaa zaariyoogee dabbotau malaata mala.

<sup>27</sup> Kasetada ne gadiyaa ootta; kattaakka zera; heгаappe guyyiyan, ne keettaa keexxa.

<sup>28</sup> Ne shooruwaa bolli gaasoi bannan markkattoppa; ne doonanka cimmoppa. <sup>29</sup> “I tau oottidoogaadan, taani au oottana; taani au a oosuwaa kushiya zaarana” yaagoppa.

<sup>30</sup> Taani issi gallassi, issi azallanne akeekai paccido bitaniyaa gaden de7iya woiniyaa turaa giddoora kanttaas. <sup>31</sup> Kanttiyo wode, agunttainne sharafai goozi wottiis; yushuwan de7iya shuchchaa gimbeekka qolettiiichchiis. <sup>32</sup> Taani a be7ido wode, qoppaas; taani be7idoogaappe timirttiyaa tamaaraas. <sup>33</sup> Neeni guuttaa liphphi ga; guuttaa xiskka; ne kushiyaakka shiishshada guuttaa shemppa ekka. <sup>34</sup> Hegaappe guyyiyan, hiyyeesatetta pangadan yaana; pacaikka ola miishshaa oiqqida asadan puttu gaana.

## 25

### *Solomoni Xaafido Hara Leemisota*

<sup>1</sup> Hageetikka qassi, Yihudaa Kawuwaa Hizqqiyaasa asati duuqqidi xaafido Solomona leemisota.

<sup>2</sup> Xuuraa genttiyoogee Xoossaayyo bonchcho; xuuraa pilggidi kessiyoogee qassi kawotuyyo bonchcho.

<sup>3</sup> Salotu xoqqatettaanne sa7aa ciimmatetta asi gakkennaagaadan, kawotu qofaakka asi eranau danddayenna.

<sup>4</sup> Biraappe shiyaa diggargga; heгаappe guyyiyan, wogaacee qoxxidi, lo77obaa kessana.

<sup>5</sup> Kawuwaa sinttappe iitata diggargga; yaatikko, a kawotaa araatai xillotettan minni eqqana.

<sup>6</sup> Kawuwaa sintti aadhdhiyo wode ceeqettoppa; gita asatuppe gidduwan soho koyoppa. <sup>7</sup> Neepe gitatiya asassi sohuwaa immanau halaqai nena denttin kauyyiyooгаappe, halaqai nena, “Hagaakko xoqqu ga” giyoogee neeyyo keha.

<sup>8</sup> Ne aifiyan be7idobaa markkattanau dabaabaa baanau eesotoppa; aissi giikko, neeni markkatta simmin, hara asi ne markkatettai bala gidiyooгaa qonccissikko, neeni yeellatana. <sup>9</sup> Neeppenne ne shooruwaappe gidduwan palami merettikko, aara haasayada ne palamaa wurssa. Hara asa xuuraa qonccissoppa. <sup>10</sup> Hegee xayikko, neeni odiyooгaa siyida asi nena kaushshana; hegan ne sunttai naa77antto simmennaadan moorettana.

<sup>11</sup> Koshshiyu wodiyan haasayettida likke qaalai biraa bolli tigido worqqaa alleequwaa mala.

<sup>12</sup> Ezggiya uraa eranchcha asi zoriyo zoree haittan wottido worqqaa woikko geeshsha worqqaaappe oottido alleequwaa mala.

<sup>13</sup> Kattaa cakkiyo boniyan irxxa haattai uyin aliyoogaadan, kiittin ammanettiya asi bana kiittiyaageeta ufaissees.

<sup>14</sup> Immennabaa “Immana” yaagiiddi ceeqettiya asi iri banna shaaraanne carkkuwaa mala.

<sup>15</sup> Danddayanchcha asi deriyaa haariyaagau odidi maizzees; liiqo qaalai meqetta kanttidi geles.

- <sup>16</sup> Eessaa demmikko, kallana gakkanaashin ma; shin darissikko, neeni cooyana.
- <sup>17</sup> Nena uufidi ixxennaadan, ne shooruwaa soo ubbaton booppa.
- <sup>18</sup> Ba shooruwaa bolli wordduwan markkattiya asi dullai, bisoinne qara zubbee asa qohiyooqaa keenaa qohees.
- <sup>19</sup> Metuwaa wode ammanettenna uran zemppiyooqee qaaxxiya achchan coommiyoogaanne silida tohuwan hemettiyoogaa mala.
- <sup>20</sup> Azzani uttida asassi yettaa yexxiyoogee meego gallassi maayuwaa qaariyoogaanne masunttaa bolli caalabaa tigiyoobaa mala.
- <sup>21</sup> Ne morkkee namisettikko, miza; saamettikko, ushsha. <sup>22</sup> Aissi giikko, neeni heгаа oottiyoogee a huuphiyan tamaa bonqquwaa kaashidi qoliyoogaa mala. GODAIKKA neeyyo woitana.
- <sup>23</sup> Huuphessa bagga carkkoi iraa ehiyoogaadan, zigorssai hanqquwaa ehees.
- <sup>24</sup> Ooyettiya maccaaseera issi keettan de7anaappe son shakkuwaa huuphiyan de7iyooqee keha.
- <sup>25</sup> Daafurida uri irxxa haattaa uyidi aliyoogaadan, haaho biittaappe yiya lo77o odoi ufaissees.
- <sup>26</sup> Iita uraa eeshshaa tamaariya xillo asi bulqqotida pulttuwaanne moorettida olla haattaa mala.
- <sup>27</sup> Daro eessaa miyoogee lo77o gidenna; hegaadankka, ba bonchcho koyiyoogee bonchchissenna.
- <sup>28</sup> Ba huuphiyaa naagenna asi dirssai meqqido katamaa mala.

## 26

- <sup>1</sup> Boniyan shachchai, kattaa cakkiyo wodiyanikka irai koshshennaagaadan, eeyyau bonchchoi koshshenna.
- <sup>2</sup> Kafoti yaanne haanne paallidi, asa qohennaagaadan, gaasoi bannan qanggiyo qanggetti asa gakkenna.
- <sup>3</sup> Parau lissuwaa, hariyau poxooruwaa koshshiyooqaadan, azallaa zokkuwau waraa koshshees.
- <sup>4</sup> Eeyya urau a eeyyatettaadan zaaroppa; zaarikko neenikka a mala gidana.
- <sup>5</sup> Eeyya urau a eeyyatettaadan zaara; hinna xayikko, i bana eranchchadan qoodana.
- <sup>6</sup> Eeyya asa bolli kiitaa kiittiyoogee ba tohuwaa qanxxiyooqaanne woriyaabaa uyiyoogaa mala.
- <sup>7</sup> Eeyya uraa leemiso wobble uraa tohuwaa mala maaddenna.
- <sup>8</sup> Eeyya uraa bonchchiya asi shuchchaa yambbarshshaa bolli qachchi wottidi yambbariya asa mala.
- <sup>9</sup> Eeyya uraa leemiso mattottida asi ba kushiya caddida agunttaa kessanau baaxetiyoogaa mala.
- <sup>10</sup> Eeyya asa woikko bau ogiyaara kanttiya asa oosossi qaxariya asi demmido asa ubbaa coo dukkiya wondafiyaasa mala.
- <sup>11</sup> Kanai ba cooshshaa guyye simmidi miyoogaadan, eeyyai ba eeyyatettaa oosuwaa zaari zaari oottees.
- <sup>12</sup> Barkka bana, “Taani aadhdhida eranchchaa” giya asa be7adii? Appe eeyya urau sinttanaa lo77o qaada de7ees.
- <sup>13</sup> Azallai, “Ogiyan gaammoi de7ees; yashshiya gaammoi aaho ogiyan yuuyees” yaagees.
- <sup>14</sup> Penggee ba maaxafiyan yaanne haanne qaaxxiyoogaadan, azallaikka ba hiixan yaanne haanne aadhdhi wodhdhees.
- <sup>15</sup> Issi issi asati daro azalla; eti harai attin, woxiyan tushkkido buddeenaakka pude baaranau daafuroosona.
- <sup>16</sup> Azalla asi markkaara odiya laappun eranchchatuppekka bana aadhdhida eranchcha giidi qoppes.

<sup>17</sup> Bana gattiyaabi bainnasan palamau aadhdiya asi ogiyaara biya kanaa haittaa oiqqiya asa mala.

<sup>18-19</sup> Ba shooruwaa cimmiidi, “Taani kaassau oottaas” yaagiya asi, gooyidi tamaa xiifaa oliya, woikko woriya zubbiiyaa dukkiya asa mala.

<sup>20</sup> Mittai wurikko, tamai to7ees; zigiriyaabi xayikko, ooshshai attees.

<sup>21</sup> Xiixinttai bonqquwaa darissiyooogaadaaninne mittai tamaa darissiyooogaadan, amalanchcha asi ooshshaa darissees.

<sup>22</sup> Zigirssanchchaa qaalai mal77o qumaa mala; ufaissiiddi duge ganjjiyaa gakkées.

<sup>23</sup> Wozanan iitabai de7ishin, ba inxxarssan cimo qaalaa haasayiya asi biran sheeshshido urqqa miishshaa mala.

<sup>24</sup> Lo77o milatiya iita asi ba wozanan de7iya iitatettaa ba nasho haasayan genttees.

<sup>25</sup> A wozanan laappun tunatettaa kumi uttido gishshau, i lo77o qaalaa haasayikkokka a ammanoppa. <sup>26</sup> Ba morkketettaa i genttikkokka, i oottiyo iitatettaa yaa7an qonccana.

<sup>27</sup> Haratussi ollaa bookkiya uri he ollan bau kunddana; haratu bolli shuchchaa gonddorssiya uraa bolli he shuchchai simmiidi gonddorettana.

<sup>28</sup> Worddotiya inxxarssai ba qohido asata ixxees; sheleeshsho haasayai bashshaa ehaanaappe attin, harabaa eheenna.

## 27

<sup>1</sup> Wonttoban ceeqettoppa; wonttoi ehaanabaa neeni erakka.

<sup>2</sup> Nena hara asi galatoppe attin, neeni nena nerka galatoppa; asai ne gishshaa markkattoppe attin, neeni ne kehatettaa odoppa.

<sup>3</sup> SHuchchai gita tooho; shaahetaa tookkiyoogee deexo; shin eeyya urai denttiyo ooshshai eta naa77aappekka deexxees.

<sup>4</sup> Hanqqossi qareti baawa; yiilloikka bashshiya di7o mala; shin qanaatiyan ubba gattoppo.

<sup>5</sup> Geemmida siiquwaappe baliyo wode qoncciyaa seeriyoogee keha.

<sup>6</sup> Morkkee nena darotoo yeriyoogaappe siiqoi nena dechchiyoogee keha.

<sup>7</sup> Kallida uraa eessaa ililoi iitees; shin namisettida uraa cammiyaabaikka mal77ees.

<sup>8</sup> Ba soo aggidi yuuyiya asi, ba keettaappe haakkada paalliyaa kafee mala.

<sup>9</sup> SHittoinne sawiya ixaani asaa ufaissiyooogaadan, siiqo laggiyaa zoreekka ufaissees.

<sup>10</sup> Ne siiqo laggiyaanne ne aawaa siiqo laggiyaa aggoppa; nena metido wode ne ishaa soo booppa. Haahuwan de7iya ishaappe matan de7iya shooroi keha.

<sup>11</sup> Ta na7au, neeni aadhdiya eranchcha gida. Yaatiyaakko taani ufaittananne tana boriyaageetu oishaakka zaarana.

<sup>12</sup> Cincca asi metoi yiyo wode be7idi qosettees; shin akeekai paccido asi sitti gi biidi, metuwan gelees; yaatidi guyyeppe wai ana gees.

<sup>13</sup> Erenna asau waase geliya uraa maayuwaa qaari ekkite; imatta asau, waase gelida uraa maayuwaa oiqqite.

<sup>14</sup> Maallado guuran ba qaalaa xoqqu oottidi, ba shooruwaa sarotiyoogee a qanggiyoogaa mala.

<sup>15</sup> Walassada duuxxenna machchiyaanne irai bukkini xokkidi aggenaa aatoi issi mala. <sup>16</sup> Carkko teqqanau woikko zaite cuccumidi oiqqanau danddayettennaagaadan, o co77u oottanau danddayettenna.

<sup>17</sup> Biratai birataa poshiyoogaadan, asai issoi issuwaappe tamaarees.

<sup>18</sup> Balase giyo mittiyo ishalissidi naagida uri i aifiyaa maana; bana aissidaagaa kabboyiya ashkkarai bonchchettana.

<sup>19</sup> Haattai heregaadan som77uwaa bessiyooogaadan, aawu wozanai aawu eeshshaa bessees.

<sup>20</sup> Haiqoinne bashshi kalli erokkona; hegaadankka, asa amoi kallenna.

<sup>21</sup> Birainne worqqai taman paacettidi geeyiyoogaadan, asikka ba ekkiyo galatan paacettees.

<sup>22</sup> Eeyya asa kattaara udulan yeggada, udula mittan caddiyaakko, appe eeyyatetta kichchenna.

<sup>23</sup> Ne dorssati de7iyo hanotaa loittada era; ne mehiyaa wudiyaakka wozanappe heemma. <sup>24</sup> Aissi giikko, duretetta merinau de7enna; kallachchaikka yeletaappe yeletau aadhdhennan agganau danddayees. <sup>25</sup> Mela maatai buucettidoogaappe, aaca maatai kiyidoogaappenne deriyaa bollan de7iyo maatai shiiqidoogaappe guyyiyan, <sup>26</sup> dorssatu ikisiyaappe neeni neeyyo maayiyoojaa kessana; deeshshata baizzido birankka neeyyo gadiyaa shammana. <sup>27</sup> Attiya deeshshatu maattai neessi, ne so asaassinne ne macca ashkkaaratussi quma gidana.

## 28

<sup>1</sup> Iitati ooninne yedettennan baqatoosona; shin xilloti gaammo mala xala.

<sup>2</sup> Issi kawotetta nagaranchcha gidikko, a haariyaageeti laametti laamettidi haaroosona. SHin kaalettiyaageeti aadhdhida eranchchanne akeekanchcha gidiyo wode, mino gididi, daro wodiya takkees.

<sup>3</sup> Hiyyeesata huqqunniya hiyyeesa daannai kattaa xaissiya wolqqaama iraa mala.

<sup>4</sup> Higgiyaa bonchchenna urai mooranchchaa sabbees; shin higgiyaa bonchchiyaagee mooranchchatu qofaa phalqees.

<sup>5</sup> Iita asatussi suure pirddaabai gelenna; shin GODAASSI goinniyaageetussi ubbabaikka gelees.

<sup>6</sup> Geella asa gididi, dure gidiyoogaappe suure asa gididi, hiyyeesa gidiyoogee keha.

<sup>7</sup> Higgiyaa naagiya wodallai akeekanchcha. SHin pattenna shufurotuura zuppetiyaagee ba aawaa yeellayees.

<sup>8</sup> Miishshaa dichchau immiyoogaaninne bonqqiyoogan duretiya asi he aquwaa hiyyeesatussi kehiya asassi shiishshees.

<sup>9</sup> Higgiyaa siyanaappe giidi, ba haittaa wora zaariya uraa woosai GODAA sheneyiyaabaa.

<sup>10</sup> Suureta iita ogiyaa kaalettiya uri ba bookkido ollan bau kunddana; shin geeshsha asi lo77obaa laattana.

<sup>11</sup> Dure asi bana aadhdhida eranchcha giidi qoppees; shin akeekai de7iyo hiyyeesai a paacces.

<sup>12</sup> Xilloti xoonido wode, asai ubbai ufaittees; shin iitati maataa oiqqido wode, asai qosettees.

<sup>13</sup> Ba nagaraa genttiya uri aacenna; shin paaxiyaageenne nagaraa aggiyaagee maarettana.

<sup>14</sup> GODAAYYO ubbatoo yayyiya asi anjettidaagaa; shin ba wozanaa dammissiya asi meton gelana.

<sup>15</sup> Hiyyeesa asaa haariya iita daannai gudiya gaammuwaanne namisettida godariyaa mala.

<sup>16</sup> Wozani paccido daannai ba asaa naaqqees; shin asa naaqqiyoogaa ixxiyaagee daro laittaa haarana.

<sup>17</sup> Asa worida asi haiqqana gakkanaashin baqatiiddi de7ees; a ooninne shiishshi ekkenna.

<sup>18</sup> Boree bainnan hemettiya uri qohettennan attana; shin geella asi issi kuttan kunddana.

<sup>19</sup> Ba gadiyaa oottiya urai kattaa kallees. SHin shufurota kaalliya urai ubbatoo hiyyeesidi de7ees.

<sup>20</sup> Ammanettida urai daro anjettana; shin duretanau jaamiyaagee qaxxayettennan attenna.



21 SHaakkidi maaddiyoogee lo77enna; shin asi guutta oittaa gishshau giidikka, shaakkidi maaddees.

22 Uuzettiya urai duretanau jaamees; bana hiyyeesatetti oiqqanaagaakka erenna.

23 Asa coo sabbiya uraappe seeriya uri guyyeppe galatettees.

24 Ba aawaappenne ba aayeppe wuuqqidi, “Taani ainne nagara oottabeikke” yaagiya urainne bashshiya urai issi mala.

25 Yaaretiya urai ooshshaa denttees; shin GODAN ammanettiyaagee kallees.

26 Banan ammanettiya asi eeyya; shin aadhdhida eratettan hemettiyaagee saro de7ees.

27 Hiyyeesau immiya urau paccenna; shin eta be7anaappe giidi qilimmiyaagee qanggettaa ekkana.

28 Iita asati sunttettiyo wode, asai qosettees; shin eti xayiyo wode, xilloti corattoosona.

## 29

1 Daroton seerin ixxidi, morgge zozzida urai hassayennan meqqana; he urau pax-oikka baawa.

2 Xillo asati sunttettiyo wode asai ufaittees; shin iitati biittaa haariyo wode asai oolees.

3 Aadhdhida eraa dosiya asi ba aawaa ufaissees; shin shaaramuxa maccaasatu heeran yuuyiya asi ba miishshaa wurssees.

4 Tumaa pirddiya kawoi ba kawotettaa woppu oottees; shin mattaaye maanau yiiqetiyaagee ba kawotettaa bashshees.

5 Ba shooruwaa sabbidi haasayiya urai, a tohuwaassi gitiyaa yeggees.

6 Iita asi gitee oiqqiyoogaadan, ba nagaran oiqettees; shin xillo asi ufaittanaunne yexxanau danddayees.

7 Xillo asi hiyyeesaa maataa erees; shin iita asi hegaa mala eraa mulekka erenna.

8 Qilliicciyaageeti kataman ooshshaa denttoosona; shin aadhdhida eranchcha asati hanqquwaa gabbissoosona.

9 Aadhdhida eranchcha asi eeyya asa pirdda keettaa efiikko, eeyyai hanqqetteesinne qirees; au yaatobare saroi xayees.

10 Suutta gussanau jaamiya asati suure asa ixxoosona; qassi xillo asakka woranau koyoosona.

11 Eeyya asi ba hanqquwaa yeddi bessees; shin aadhdhida era asi ba hanqquwaa mittees.

12 Issi sunttettida urai worddo odo ekkikko, a oosanchchati ubbai iita kiyooosona.

13 Hiyyeesinne asa naaqqiya asi issibaa koxxoosona; eta naa77aa aifiyaakka GODAI xeelissees.

14 Issi kawoi hiyyeesassi suure pirddikko, i ba kawotettan gam77ana.

15 Qaixaareenne seeri naatussi aadhdhida eraa immees; shin yedan diccida na7i ba aayyiyo kaushshees.

16 Iita asati dariyo wode, nagarai darees; shin xilloti eta kunddettaa be7ana.

17 Ne na7aa seera; yaatikko, i nena saruwaa diggenna; i nena ufaissana.

18 GODAI kaalettiyo kaaletuwaa ekkenna deree yeda; shin higgiiyaa naagiya uri anjettidaagaa.

19 Ashkkari coo odo xalaalan seeretti erenna; odoi au geliyaakkokka i azazettenna.

20 Eesuwan eesuwan haasayiya uraa be7a eraishsha? Appe eeyya uraassi sinttanau daro ufaissai de7ees.

21 Ne ashkkaraassi naatettan doommin, i koyiyoobaa ubbaa ayyo imma meezeyikko, issi gallassi neeyyo de7iyaabaa ubbaa ekkana i kajeelanaagee antenna.

22 Hanqqettiya asi ooshshaa denttettees; elle yiillotiya asi daro nagaraa oottees.

23 Otoroi asa kaushshees; shin ziqqi giya ayyaanai de7iyo asi bonchchettees.

<sup>24</sup> Kaisoora shaakkiya uri bana ixxiya asa; i dabaaban tumaa odikkokka qaxxayettees; tumaa odana xayikko qassi, GODAI a qaxxayana.

<sup>25</sup> Asassi yayyiyoobi he aawussi pire gidees; shin GODAN ammanettiya asi saro de7ees.

<sup>26</sup> Daroti sunttatetta de7iyo asata auddashoosona; shin suure pirddai GODAA achchappe beettees.

<sup>27</sup> Xilloti nagaranchchata shenetoosona; nagaranchchatikka suure uraa shenetoosona.

## 30

### *Aguri Haasayido Haasayaa*

<sup>1</sup> Hagaappe kaallidi xaafettidaagee Yaaqe na7ai Aguri haasayido hayyo haasayaa. He bitanee Iti7eelassinne Ukaalassi haggaa haasayis. <sup>2</sup> Tumu taani ai asappekka eeyyaa darais; asassi de7iya akeeki taassi de7enna. <sup>3</sup> Taani aadhdhida eraa tamarabeikke; Geeshsha Xoossaabaakka aibanne erikke. <sup>4</sup> Saluwaa pude kiyidi, duge wodhdhidai oonee? Carkko ba kushen oiqqidai, haatta ba afalan yiicidai, sa7aa gaxaa a sohuwan sohuwan wottidai oonee? Ane erikko a sunntaa taayyo oda. A na7aa oona giyo?

<sup>5</sup> Xoossai odiyo qaalai ubbai tuma; baakko baqatidi biya ubbaassi i gondalle. <sup>6</sup> A qaalaa bolli aibanne gujjoppa; gujjikko i nena seerana; neeni worddanchcha gidiy-oogaakka i qonccissana.

<sup>7</sup> Abeet GODAU, taani nena naa77ubata oichchais; taani haiqqana gakkanaashin, eta tana diggoppa. <sup>8</sup> Koiruwan, taani asa cimmennaadaaninne worddo haasayennaadan tana naaga; naa77anttuwan, taayyo koshshiya keesa qumaa immappe attin, tana dure woikko manqqo kessoppa. <sup>9</sup> Hinna xayikko, dure gidada, “GODAI oonee?” gaada nena kaddana; woikko manqqo gidada, wuuqqana; yaatada ta Xoossaa sunntaa cayissana.

<sup>10</sup> Nena qanggenna malanne i qanggin neeyyo gometenna mala, ashkkaraa a godaa sinttan boroppa.

<sup>11</sup> Bantta aawata qanggiyaanne bantta aayeta anjjenna asati de7oosona. <sup>12</sup> Daro tunaa tuni uttidi, banttana geeshshadan qoodiya asati de7oosona. <sup>13</sup> Otoruwaa me-exxiya asatinne asa karidi xeelliya asati de7oosona. <sup>14</sup> Eta achchai biso mala gidin, eta manggaagai billama mala gidin, hiyyeesatanne metootanchchata naaqqidi, etabaa bonqqiya asati de7oosona.

<sup>15</sup> Ullatteessi naa77u macca naati de7oosona. Eti, “Hamma! Hamma!” yaagidi waassoosona. Mulekka kalli erenna heezzubati de7oosona; oiddanttoi qassi mule, “Gidana” gi erenna. <sup>16</sup> Hegeetikka:

duufuwaa,  
maine maccaasaa,  
haatti kalissi erenna mela biittaanne,  
“Tau gidana!” gi erenna tamaa.

<sup>17</sup> Ba aawaa baceessiya na7aa aifiyaa, ba aayiyaa cimin kariya na7aa aifiyaa, zanggaaran de7iya quuroti woocana; a ashuwaa ankkoti maana.

<sup>18</sup> Tana heezzubati maalalissoosona; oiddanttoi ubba taayyo gelenna. <sup>19</sup> Hegeetikka:  
arggantti saloora paalliyo paaluwaa,  
shooshshi shuchchaa bollaara sololiyo sololettaa,  
markkabee abbaa bollan solddiyo soldduwaanne  
wodallinne geela7oi siiquwaa doommiyo doomettaa.

<sup>20</sup> SHaaramuxa maccaasiyaa haniyo hanoikka hegaa mala. A muussaa mausu; shin miidoogaappe guyyiyan, ba doona quccarggada, “Taani ainne moorabeikke” yaagausu.

<sup>21</sup> Heezzu yohotun biittai qaaxxees; oiddanttuwaa ubba tookkanaukka dandday-ibeenna. <sup>22</sup> Hegeetikka:

aillee kawotido wode,

- eeyyai kattaa kallido wode,  
<sup>23</sup> asi ixrido maccaasiyaa azina gelido wodenne  
 macca ashkkariyaa ba godiyo laattido wode merettiya hanotaa.  
<sup>24</sup> Sa7aa bolli oiddu guutta meretati de7oosona; shin eti keehi aadhdhida eranchcha.  
<sup>25</sup> Hegeetikka:  
 Cuncalleta - cuncalleti wolqqi bainna mereta;  
 shin banttau miyoobaa bone shiishshidi, minjjoosona.  
<sup>26</sup> Guppalleta - guppalleti guutta wolqqai de7iyoogeta;  
 shin bantta keettaa shuchchaa kooppuwan keexxoosona.  
<sup>27</sup> Booleta - booletussi kawoi baawa;  
 shin eti ubbaikka maaran mankkan zattoosona.  
<sup>28</sup> Zareta - zareti kushiyan oiqqinkka oiqettoosona;  
 shin eti harai attin, kawo keettanka de7oosona.  
<sup>29</sup> Bantta maataa bessiiddi hemettiya heezzu meretati de7oosona; oiddanttoikka  
 lo77o hemetaa hemettes. <sup>30</sup> Hegeetikka:  
 do7a ubbaappe minniyanne yayyidi baqati erenna gaammuwaa;  
<sup>31</sup> inddetu gidдон аyyiiddi hemettiya adde kuttuwaa,  
 deeshsha orggiyaanne  
 ba olanchchatu gidдон eqqiya kawuwaa.  
<sup>32</sup> Neeni eeyyada otorettidabaa gidikkonne, iitabaa oottanau halchchidabaa gidikko,  
 ane takki gaada qoppa.  
<sup>33</sup> Maattaa bukkiyoogee oissaa kessiyooagaan, siiriyaa yimppiyoogekka suuttaa  
 ehiyoogaadan, hegaadan hanqquwaa denttettiyoogee ooshshaa ehees.

## 31

### *Kawoi Limu7eeli Haasayido Haasayaa*

- <sup>1</sup> Hagaappe kaallidi xaafettida hayyo haasayai, Kawuwaa Limu7eela aayiyaa  
 Kawuwaa Limu7eela tamarissidoogaa.  
<sup>2</sup> “Laa ta na7au, ta uluwaappe wodhdhidaagoo, taani shiiqettada yelidoogoo,  
<sup>3</sup> maccaasan ne wolqqaa wursoppa; he kawota bashshiya maccaasatun ne akataa  
 xaissoppa.  
<sup>4</sup> “Limu7eelaa, hagee kawotussi bessenna; woiniyaa eessaa uyiyoogee kawotussi  
 bessenna; mattoyiya ushshaa uyiyoogee deriyaa bolli sunttettidaageetussi bessenna.  
<sup>5</sup> Eti uyiyo wode higgiiyaa baloosona; balidi naaqqettida asaa maataa shenehoo goosona.  
<sup>6</sup> Mattoyiya ushshaa haiqqana haniya uraanne sa7ai iitido urau immite. <sup>7</sup> Eti bantta  
 manqqotettaanne bantta tugga de7uwaa dogana mala uyona.  
<sup>8</sup> “Bantta metuwaa odanau danddayennaageetu gishshaa neeni oda; maaddiyaabi  
 bainnaageetu maataa gishshau neeni bidda. <sup>9</sup> Biddada etayyo suure pirddaa pirdda;  
 hiyyeesatunne metootanchchatu maataa naaga” yaagada tamarissaasu.

### *Wozannaama Machchiyo*

- <sup>10</sup> Wozannaama machcho ooni demmanau danddayii? Inqquwaa giyo al77o  
 shuchchaappekka a al77ausu. <sup>11</sup> I keettaawai o ubbabankka ammanees; ayyo de7anau  
 bessiyaabaappe aibinne paccenna. <sup>12</sup> A ba de7o laitta ubban ayyo lo77obaappe attin,  
 iitabaa oottukku.  
<sup>13</sup> Suufiyaanne liinuwaa a koyada, ufaittaidda ba kushiyan oottausu. <sup>14</sup> A  
 zal77anchchatu markkabetu mala; ba qumaa haaho biittaappe ehausu. <sup>15</sup> A ba so  
 asaassi qumaa kattanaanne ba macca ashkkaratussi oosuwaa bazzanau, sa7ai biron  
 gamma de7ishin denddausu. <sup>16</sup> Gadiyaa a koyada shammausu; ba kushiyan oottada  
 demmido miishshan woiniyaa turaa tokkausuu.

<sup>17</sup> A gooba oosanchcha gidiyoojaa xalaala gidennan, minonne cincca asa. <sup>18</sup> A ba woriyaa demmanau minnada zal77ausu; a oottaidda qamissiyo, ba xomppiyaa eesuwan toissukku. <sup>19</sup> A ba hinddiriitan suqqada, ba afalaa daddausu.

<sup>20</sup> A hiyyeesatussinne metootanchchatussi babaappe coo immausu.

<sup>21</sup> I so asai ubbai ho77iya maayuwaa maayido gishshau, shachchai bukkiyaakko, a hirggukko. <sup>22</sup> Arssaa bollan hiixxiyo maayuwaa sikkausuu; liinuwaappe dadettida zo7o maayuwaaakka baayyo maayausu.

<sup>23</sup> Dere cimati shiiqiyo dubbushan i keettaawai bonchchettida asa.

<sup>24</sup> Liinuwaappe maayuwaanne qabattuwwaa ootta oottada, zal77anchchatussi baiz-zausu.

<sup>25</sup> A minonne bonchcho asa; yiya laittatussi a mulekka hirggukku. <sup>26</sup> Aadhdhida eran a haasayausu; ammanttiya zoree i inxxarssaappe kiyees. <sup>27</sup> A ba so asaa de7uwaa injjeyanau ubbaton ooso oottaidda de7ausu; azalla hanoi i bollan beetti erenna.

<sup>28</sup> I naati denddi eqqidi, o nashshoosona; i keettaawaikka o galatiiddi, <sup>29</sup> “Lo77obaa oottida daro maccaasati de7oosona; shin neeni eta ubbaappe aadhdhaasa” yaagees.

<sup>30</sup> Mera lo77otetti allaalle kessenna; puulikka xayana; shin GODAASSI yayyiya mac-caasiyaa, a galatettanau bessausu. <sup>31</sup> A oottidobau ubbau iyyo i kushiya zaarite; a oottido oosoi ubbai dabaaban o galatisso.

## Eranchchaa Maxaafaa

### *Gidduwaa Erissuwaa*

“Eranchchaa Maxaafaa” gidдон xaafettidi beettiyaabati, asa de7oi qantta gidiyoo-gaa xalaala gidennan, daafurai, shabbirssai, pirddaa geellatettainne arggaacai kumidoogaa gidiyoo-gaa eridi, “Asa de7oi hada” yaagidi qachchida issi eranchchaa qofata. Ha eranchchaa asaa de7uwaa wurssettaa gakkanaashin naagiya, Xoossaa oosoi aibakko eranau au ixettiis. Gidikkonne asai ba de7ido laitta ubbaaninne bau danddayettido keena ubban, minnidi oottanaageenne Xoossai immidobatun ufaittanaagee koshshiyoo-gaa zorees.

Eranchchaa qofatuppe dariya baggati issoi issuwaara maayettenna xeelati de7iyoo-geetanne hidootaa qanxxiyo hanotati de7iyoo-geeta. Gidikkonne ha maxaafai Geeshsha Maxaafaa giddo gelidoo-gee, Geeshsha Maxaafaa bolli eqqida ammanoi harai attin, ha issoi issuwaara maayettenna qofaanne siree kumido maxaafaa ba gomppan oiqqiyo keena aaho gidiyoo-gaa bessees. Hagee ha Eranchchaa Maxaafai asaa de7uwaa heregaadan bessiyoo gishshau, daro asati ha maxaafaappe minttettu-waa demmidosona. Hegaadanka ha qofata oiqqida Geeshsha Maxaafai, ini ikka, de7uwaassi gita birshshettaa immiya Xoossan hidootaa oottanaadan zoriyoogaa akeekidosona.

### *Ubbabaikka Hada*

<sup>1</sup> Hagee, Daawita na7aa, Yerusalaamen kawotida eranchchaa qaalaa. <sup>2</sup> He eranchchaa, “Ubbabaikka hada; qassi ubbabaikka hadaappe aadhdhida hada; ubbabaikka muleera hada” yaagiis. <sup>3</sup> Ba de7iyoo-san ubban, asi daafuridi oottiyooban ubban ayyo woree aibee? <sup>4</sup> Issi yeletai aadhdhiyo wode, hara yeletai sohuwaa oiqqees. SHin ha biittai merinaukka laamettennan de7ees. <sup>5</sup> Awai mokkeesinne wullees; qassi naa77anttuwaakka mokkanau yaa mokkiyo sohuwaakko eesotees. <sup>6</sup> Carkkoi issitoo tohossi issitoo huuphessi carkkees; qassi yuuyi yuuyi aadhdhidi, simerettidi yees. <sup>7</sup> Goggiya haattai ubbai abban gelees; shin abbai kumi erenna. He haattai qassikka simmidi gogganau, guyye ba pulttiyo sohuwaa bees. <sup>8</sup> Ubbabaikka salettiyaabaa. Salettiyaabai i woisa keenaa salettiyaakkokka odi wurssanau danddayettenna. Aifee xeellidi, kalli erenna; haittaikka siyidi, tau gidiiis gi erenna. <sup>9</sup> Kase hanidabai sintanaukka simmidi i hanana; qassi ha77i haniiddi de7iyaabaikka kase hanidabaa. Hegaa gishshau, salo gufantton oorattabaa giyoobi aibinne baawa. <sup>10</sup> Ooninne, “Be7ite! Hagee oorattabaa” giikko, hegee ooratta gidenna; hegee nuuni yelettanaappe kase baggan hanidabaa. <sup>11</sup> Kase aadhdhida wodetun hanidabata zaaridi hassayiyaabi baawa; guyyeppe hananabata akka etappe guyyiyan ooninne hassayenna.

### *Aadhdhida Eratetta Alenna*

<sup>12</sup> Taani eranchchaa, Yerusalaamen Israa7eelassi kawo gidada de7aas. <sup>13</sup> Taani biittan sa7an de7iyaabaa ubbaa qora qorada erananne aadhdhida eratettan pilgga xeellanau ta qofaa qachchaas. Yaadata asaa ubbaassi Xoossai immido de7oi keehippe daafurssiyaabaanne ufaissennabaa gidiyoo-gaa akeekaas. <sup>14</sup> Saloppe garssa baggan hanidabaa ubbaa taani be7aas; shin ubbabaikka hada; carkkuwaa oiqqanau yedettiyoogaa mala.

<sup>15</sup> Geellai sittanau danddayenna; qassi bannabaakka qoodanau danddayettenna.

<sup>16</sup> Taani woni ta wozanan hagaadan yaagada qoppaas; “Taappe kase Yerusalaame haarida ubbatuppe taani gitanne aadhdhida eranchchaa gidaas. Cincatettaanne eraa giyoogee i aibakko paaccada eraas” yaagaas. <sup>17</sup> Qassi taani aadhdhida eratettaappe, gooshshaappenne eeyyatettaappe gidduwan de7iya dummatettaa aibakko eranau keehi daafuraas. SHin wurssettan hegeekka carkkuwaa oiqqanau yedettiyoogaa mala



hada gidiyooqaa eraas. <sup>18</sup> Aadhdhida eratetta dariyo wode azzanissiyaabai darees; erai dariyo wodekka qassi metoi darees.

## 2

### *Bana Ufaissiyooqee Hada*

<sup>1</sup> Taani ta wozanan, “Ane taayyo gita ufaissaa immiyaabi aibakko, qassi de7iyo de7uwaa giddonkka lo77obi aibakko be7ana” yaagada qoppaas; shin hegeekka hada. <sup>2</sup> Ubbatoo miicciyoogee eeyyatetta gidiyooqaa, qassi daro ufaissaikka ainne go77ennabaa gidiyooqaa akeekaas. <sup>3</sup> Hegee hegaa gidi uttidaashin, aadhdhida eratetta demmanau amottada, ta wozanaa woine eessan ufaissaidda, hegaa suganau eeyyatettan qofaa qachchaas. Qassi asai ha sa7aa bolli baayyo de7iya qantta wodiya aattiyo, ubbaappe aadhdhiya lo77o ogeekka haggaa gaada qoppaas.

<sup>4</sup> Qassi hara issi gitabaa oottaas; taayyo de7iyo keettata keexxaas; woiniyaa turaakka tokkaas. <sup>5</sup> Dumma dumma ataakilttiyaanne aifiyaa aifiya mittata tokkiyo sohuwaanne asai shemppiyo sohuwaa gannatiyaadan loittada giigissaas. He sohuwan dumma dumma aifiyaa aifiya mittata tokkada, dichchaas. <sup>6</sup> He dicciya mittata ushshanau, haattaa dagayiyo sohuwaa zeerada giigissaas. <sup>7</sup> Attumanne macca ailleta shammaas; qassi ta son yelettida hara ailletikka taayyo de7oosona. Taappe kase Yerusalaamen de7ida oogaappenne dariya mehiyaa, deeshshaanne dorssaa wudiyaa haaraas. <sup>8</sup> Taani haariyo dumma dumma biittatuppe bonchchettida kawo keetta buquraa ehiissada, daro worqqaanne biraa taayyo dagayaas. Qassi, tana sabbidi yexxiya attumanne macca yettanchchata qaxaraas; hegaa bolliikka, asassi ufaissaa immiya keehi daro macca asaakka shiishshaas.

<sup>9</sup> Hegaa gishshau, taani taappe kase Yerusalaamen de7ida ooppenne aadhdhida gita asa gidaas. Ta aadhdhida eratettaikka tanaara wurssettai gakkanaashin de7iis. <sup>10</sup> Ta aifee xeellidobaanne ta wozanai amottidobaa ubbaa demmaas; ta asatetta koyiyo ufaissaa ubbaakka diggabeikke. Taani oottido ooso ubban ufaittais; ta daafuraayyo woreekka hegaa. <sup>11</sup> Gido shin, hegaa ubbaa ootta simmada taani akeekiyo wode, keehi taani ayyo daafuridobai ubbaikka hada gidiyooqaa be7aas. Salo gufantton go77iyaabi aibinne baawa; ubbaikka carkkuwaa oiqqanau yedettiyoogaa mala.

### *Eranchchaa Ba De7uwaappe Demmido Eraa*

<sup>12</sup> Hegaappe guyyiyan, taani aadhdhida eratetta, eeyyatettainne gooshshai aibakko paaccada eranau qofaa doommaas. Kawuwaa man77iyan kawotiya hara kawoi kase oosettidabaappe aadhdhiya harabaa ai oottanee? <sup>13</sup> Taani hagaadan yaagaas; “Tumukka poo7oi xumaappe kehiyoogaadan, aadhdhida eratetta eeyyatettaappe kehees. <sup>14</sup> Cincca asati bantta dendiyo sohuwaanne biidi gakkiiyo sohuwaa eroosona; shin eeyyati hegaa ubbaa erokkona” yaagaas. Gidoppe attin, eta naa77aa wurssettaikka issuwaa.

<sup>15</sup> Taani ta wozanan, “Eeyyaa gakkiiya qaadai tanakka gakkies; yaatin, taani aadhdhida eranchchaa gidiyooqee tana ai maaddii?” yaagada qoppaas. Qassi taani ta wozanan, “Hagee ubbabaikka hada!” yaagaas. <sup>16</sup> Aissi giikko, eeyyin aadhdhida eranchchaa gidin, haiqoppe hefinttan simmidi, a hassayiyaabi baawa; sinttappe yiya laittatun nuuni ubbaikka dogetti attana. Eeyyai haiqqiyoogaadan, aadhdhida eranchchaa haiqqees.

### *Ootti Daafuriyooqee Hada*

<sup>17</sup> Metoppe attin, go77iyaabi banna gishshau, ha sa7aa de7oi tana iitiis. Hegeekka hada; carkkuwaa oiqqanau yedettiyoogaa mala. <sup>18</sup> Salo gufantton taani keehi daafuradada demmido ta aquwaa ubbaa taappe guyyiyan yiya urau yeggada biyo gishshau, taani daafuridobai ubbai tana iitiis. <sup>19</sup> Taappe guyyiyan yiya bitanee aadhdhida

eranchchakko eeyyakko ooni erii? SHin i oona gidinkka, taani keehi daafuridobaanne ta cinccatetta taani demmidobaa ubbaa bau ekkidi, goda gidana; yaatikko, hegeekka hada.

<sup>20</sup> Hegaa gishshau, salo gufantton haggaa keenaa aissi daafuridanaashsha gaada ta wozanan azzanaas. <sup>21</sup> Asi ba de7ido laittan bau de7ida aadhdhida erattetan, eraaninne hiillan daafuridi demmidobaa ubbaa ainne daafuribeennaagau yeggidi bees. Hegeekka qassi, hadanne likke gidennabaa. <sup>22</sup> Yaatin, salo gufantton asi keehi daafuridi oottidobaappe ubbaappe ai go77a demmii? <sup>23</sup> I ba de7uwaa laittan daafuriyo daafurai ubbai azzanoppenne kayyoppe harabaa ainne au gujjenna; harai atto qammikka a huuphee qofaappe shemppenna; gido shin, he ubbaikka hada.

<sup>24</sup> Hegaa gishshau, asassi go77a gidiyaabi aibee giikko, asi ba daafuridobaappe miidinne uyidi ufaittiyoogaa. He ufaissaikka qassi Xoossaa kushiyaappe imettidabaa gidiyoogaa taani akeekaas. <sup>25</sup> Aissi giikko, a shene gidana xayikko, min uyinkka asau ufaissi awan beettii? <sup>26</sup> Xoossaa ufaissiya uraassi Xoossai cinccatettaa, erattettaanne ufaissaa immees; nagaranchchaassi mati i daafuridi shiishshanaadan, daafuraa immees; shin i shiishshidoogaa Xoossai ekkidi, baayyo yayyiyaagau harau immees. Hegaa gishshau, ha ubbaikka hadanne carckuwaa oiqqanau yedettiyoogaa mala.

### 3

#### *Ubbabaukka Wodee De7ees*

<sup>1</sup> Ubbabau wodee de7ees; saloppe garssa baggaara oosettiyaabau ubbau a laittai laittai de7ees.

<sup>2</sup> Hegaa gishshau, yelettanau wodee de7ees; haiqqanaukka wodee de7ees.

Tokkanau wodee de7ees; tokkidoogaa shoddanaukka wodee de7ees.

<sup>3</sup> Woranau wodee de7ees; pattanaukka wodee de7ees.

Qolanau wodee de7ees; qassi keexxanaukka wodee de7ees.

<sup>4</sup> Yeekkanau wodee de7ees; miiccanaukka wodee de7ees.

Kayyottanau wodee de7ees; qassi ufaittidi yexxanaukka wodee de7ees.

<sup>5</sup> SHuchchaa laalanau wodee de7ees; shuchchaa shiishshanaukka wodee de7ees.

Qoomettanau wodee de7ees; qassi shaahettanaukka wodee de7ees.

<sup>6</sup> Koyidi demmanau wodee de7ees; bashshanaukka wodee de7ees.

SHiishshi oiqqanau wodee de7ees; laalanaukka wodee de7ees.

<sup>7</sup> Peeranau wodee de7ees; sikkanaaukka wodee de7ees.

Co77u gaanau wodee de7ees; qassi haasayanaukka wodee de7ees.

<sup>8</sup> Dosanau wodee de7ees; ixnanaukka wodee de7ees.

Olaassi wodee de7ees; saruwaassi wodee de7ees.

<sup>9</sup> Yaatin, oosanchchi ba daafurido daafuraappe aiba wore demmii? <sup>10</sup> Taani qassi, asaa naati daafuridi oottana mala, Xoossai immido toohoi keehi deexo gidiyoogaa

be7aas. <sup>11</sup> Xoossai ubbabaa a wodiyan wodiyan loittidi oottiis. Xoossai asaa wozanan merinatettaa wottiis; heгаа gidikkonne, Xoossai oottidobaa ubbaa koiruwaappe wurs-settai gakkanaashin, asai wurssidi eranau danddayenna. <sup>12</sup> Hegaa gishshau, asi ba de7ido laittan lo77iyaabaa oottiyoogaappenne, ufaittiyoogaappe aadhdhiyaabi aibinne bannaagaa taani akeekaas. <sup>13</sup> Qassi, asassi au a daafurau waaga gidiyaabi muus-saaninne ushshan bana ufaissiyooгаа; hegeekka au Xoossaappe imettida imota.

<sup>14</sup> Xoossai oottidobai ubbai merinau de7iyaabaa gidiyooгаа taani eraas; i oottidobaa bollan gujjanau woikko appe haa guuttanau danddayettenna. Xoossai heгаа oottidoogee, asai baayyo yayyidi bonchchanaassa. <sup>15</sup> Ha77i haniiddi de7iyaabai woikko sinttappe hananau de7iyaabai ubbai kase aadhdhida wodiyan hanidabaa; aissi giikko, Xoossai kase hanidabai zaari zaaridikka hananaadan oottees.

### *Ha Sa7an Pirddi Geellattidobaa*

<sup>16</sup> Qassi taani, salo gufantton geeshsha pirddaa sohuwan iitatettaa, xillotettaa sohuwanka nagarai de7iyooгаа be7aas. <sup>17</sup> Be7ada ta wozanan, “Xoossai xilluwaanne iitaa naa77aakka pirddau shiishshana; aissi giikko, Xoossai allaalle ubbaunne ooso ubbau wodiya keeri wottiis” yaagada qoppaas.

<sup>18</sup> Qassi taani ta wozanan, “Asai do7atuppe kehennaagaa eta bessanau, Xoossai eta paacces” yaagaas. <sup>19</sup> Aissi giikko, asaa gidin, do7ata gidinkka, eta qaadaa is-suwaa; issoi haiqqiyooгаadan, hankkoikka haiqqees. Qassi naa77aikka issi carkkuwaa shemppoosona; heгаа gishshau, asatikka do7atuppe kehokkona; hegeekka hada. <sup>20</sup> Eti naa77aikka issi sohuwaa boosona; naa77aikka biittaappe merettido gishshau, biittau simmoosona. <sup>21</sup> Yaatin, asaa shemppoi saluwaa pude kiyiyooгаanne do7atu shemppoi biittaa ciimmau duge wodhdhiyooga shaakkidi eranau danddayiyai oonee? <sup>22</sup> Hegaa gishshau, asi ba oottido oosuwan ufaittiyoogaappe kehiyaabi harabi ayyo bannaagaa be7aas. Aissi giikko, au de7iya lo77o qaadaa heгаа xalaala. Asi haiqqiichchobare appe guyyiyan haniyaabaa bessanau, a haiqoppe guyye ehaanau danddayiyai oonee?

## 4

<sup>1</sup> Taani qassikka, salo gufantton asi asa ai keenaa naaqqiyaakkonne xeellaas. Naaqettidaageeti banttana minttettiyaabaa xayidi yeekkoosona. Naaqqiyaageetussi gita maataa de7iyooгаappe attin, naaqettiyaageeta maaddiyaabi ooninne baawa. <sup>2</sup> Hegaa gishshau, taani, “Ha77i paxa de7iyaageetuppe kase haiqqiichchidaageeti keha” yaagaas. <sup>3</sup> Gido shin, ha naa77aappekka aadhdhidi qassi, mule yelettibeennaageetu qaadaa lo77o; aissi giikko, eti salo gufantton oosettiya naaquwaa muliyaa be7ibookkona.

<sup>4</sup> Asai ba amottidobaa demmanau keehi daafuridi oottees; shin he daafurai ba laggiyaa bollan qanaatiyo qofaappe denddaagaana gidiyooгаа taani akeekaas. Hegeekka qassi hada; carkkuwaa oiqqanau yedettiyooga mala. <sup>5</sup> Ba kushiya xaaxidi, utti aggiya azallai, namisan haiqqees. <sup>6</sup> Daafuraaninne carkkuwaa oiqqanau yedettiyooga mala jaaman daafuridi demmiyo naa77u kushebaappe, woppaan demmiyo issi kushebai darees.

<sup>7</sup> Qassi taani, salo gufantton hada gididabaa issi harabaakka be7aas. <sup>8</sup> Hegeekka issi barkka de7iya bitaniyaabaa; ayyo attuma na7i woikko ishi baawa. Shin i daafuriyo daafurau zawi baawa; qassi baayyo de7iyaaban alenna. I barkka bana oichchiiddi, “I ta hгаа oossi daafuriyaanaa? Tana ta huuphiyaa aibissi ufaissaa diggiyaanaa?” yaagidi oichchiis. Hegeekka qassi hadabaanne tugga de7o.

<sup>9</sup> Issuwaa gidiyooгаappe naa77a gidiyooгee lo77o; aissi giikko, eta oosoi issuwaa-gaappe aadhdhidi, lo77o aifiyaa immanau danddayees. <sup>10</sup> Qassi, naa77aappe issoi kunddikko issoi denttees; shin barkka de7iya urai kunddikkonne a denttiyaabi banna gishshau, au aayye7ana! <sup>11</sup> Meego wodiyan naa77ai issippe zin77ikko ho77ees; shin

barkka zin77iya uraa auppe ho77anau danddayii? <sup>12</sup> Issi asi barkka teqqanau danddayenna metuwaa naa77u asati issippe eqettidi, teqqanau danddayoosona. Heezzu achchan dooqettida wodoroikka elle duuxxenna.

<sup>13</sup> Lo77o zoriyaa ekkenna ceega kawuwaappe hiyyeesa gidikkonne, aadhdhida eranchcha yelagai keha. <sup>14</sup> Aissi giikko, i he hiyyeesa gidiyo sohuwaappe denddidi, woikko qasho keettaappe kiyidi, ba biittan kawo gidiyo sohuwaa gakkanau danddayees. <sup>15</sup> Taani salo gufantton de7iyaanne hemettiya asa ubbai kawuwaa kawotettaa araataa laattiya yelagaa kaalliyaagaa be7aas. <sup>16</sup> Issi kawoi haariyo asai qoodi banna cora gidanau danddayees. SHin kawotaappe i kichchiyo wode, i oottidobau ooninne a galatenna. Hegaa gishshau, ha ubbaikka hada; carkkuwaa oiqqanau yedettiyoogaa mala.

## 5

### *Gefa Geppanau Ellelloppa*

<sup>1</sup> Xoossaa keettaa geliyo wode, ne tohuwaa akeekada tangga. Siyanau mataa shiqiyoogee, eeyyati yarshshuwaa shiishshiyoo gaappe aadhdhees; aissi giikko, eti iita oosuwaa oottiiddi de7iyoo gaaga erokkonna. <sup>2</sup> Ne doonan haasayanau, Xoossaa sintanka biddanau eesotoppa. Qassi issibaa Xoossassi immana gaada ne wozanan eesotada geppaichchoppa; aissi giikko, Xoossai saluwan de7ees, neeni qassi hagan sa7an de7aasa; hega gishshau, ne haasayiyo qalalai guutta gido bayin. <sup>3</sup> Hirggai dariyo wode, qamman aimoikka darees; hegaadankka, biddaa daroi eeyyatettaa qaalaa kessees. <sup>4</sup> Xoossaassi neeni geppidobaa polanau gam77oppa; aissi giikko, gam77iya eeyyatun Xoossai ufattenna. Hegaa gishshau, neeni geppidobaa ubbaa pola. <sup>5</sup> Issibaa Xoossassi geppidi, polennan aggiyoogaappe koiro geppennan aggiyoogee lo77o. <sup>6</sup> Nena ne doonai nagaran yeggennaadan, ne doonaa zawaappe aadhdhida yeda oottoppa; qassi Xoossaassi oottiyaagau, “Kasekka haggaa taani akeekennan geppaas” gooppa. Aissi giikko, hega Xoossai keehi hanqqettiyo gishshau, neeni daafurada demmidobaa, ne kushiya oosuwaa ubbaa i ba hanqquwan quccidi xaissanau danddayees. <sup>7</sup> Daro aimuwaa aimottikkonne woikko qassi darobaa haasayikkonne he ubbaikka hada; hega gishshau, neeni hega aggaagada Xoossaassi yayya.

### *De7oi Hada*

<sup>8</sup> Issi kawotettaa ba biittan de7iya hiyyeesata naaqqishiininne pirddaa geellayishin neeni be7ikko, darin maalaaletoppa. Issi issi halaqau appe bollaara sunttettidi, a xeelliyaa hara halaqai de7ees. Qassi eta naa77aappekka bollaara sunttettidi, eta xeelliyaa hara halaqatikka de7oosona. <sup>9</sup> Harai attin, kawuwaa gidikkonne, goshshaappe beettiya aifeti xayikko, woppa de7anau danddayenna.

<sup>10</sup> Bira dosiya uraassi biri gidi erenna; doretanau siiqiya uraikka miishshaa kalli erenna. SHin ha ubbaikka hada. <sup>11</sup> Duretettaa dariyo wode, miyaabaikka hega keenaa darees. Yaatin, ba aquwaa coo aifiyan xeellidi, “Taani dure” gaanaappe attin, harabaa au ai maaddii!

<sup>12</sup> Oosuwaa oottiya asi guutta min, daro min, saro xiskkuwaa xiskkidi aqees; shin duree ba duretettaassi ubba wode un77ettidi qoppiyo gishshau, xiskkuwaa xayidi de7ees.

<sup>13</sup> Salo gufantton keehi azzanissiyaabaa harabaakka taani be7aas; iita wodiyan bana maaddo giidi, asi bau de7idabaappe guyye wottidi dagayees. <sup>14</sup> Qassi he duretettaa issi iitabai gaittin xayiichchees. I na7a yelidabaa gidikkokka, na7a laatissiyoo baara xayidi, mela attees. <sup>15</sup> Asi ubbi koiro kallo yelettidoogaadan, mela kushiyaara simmidi baana. Ai keenaa i daafuridi oottikkonne, ba daafuridobaappe ekkidi biyoobi aibinne baawa.

<sup>16</sup> Asi kallo yelettidi, kallo guyye simmiyoogee kassi keehi azzanissiya iitabaa. A daafuri ubbi carckuwaa kuuciiyoogaadan hada gidaappe sinttan, i hegan ai maadet-tii? <sup>17</sup> I ba laittaa ubbaa xuma de7uwan, azzanuwan, yiillotiyoogan, harggiyaaninne hanqquwan wurssees.

<sup>18</sup> Hegee heгаа gidikkonne, taani akeekido issi lo77obai de7ees; hegeekka salo gufantton Xoossi asi de7anaadan immido qantta laittaa gidдон, asi daafuraappe miyoogee, uyiyoogeenne ufaiittiyoogee lo77onne bessiyaabaa. Aissi giikko, a qaada i heгаа. <sup>19</sup> Xoossai asassi duretettaanne aquwaa immiyoogee, ba daafuraa waagaa demmidi, miidinne uyidi ufaiittanaassa. Hegeekka qassi Xoossaappe au imettida imota. <sup>20</sup> Xoossai a wozanan ubba wode ufaissaa kuntti wottiyo gishshau, i ba de7uwaa laittaaabaa daro qoppenna.

## 6

<sup>1</sup> Salo gufantton asa bolli gakkiiya keehi iitabaa taani be7aas. <sup>2</sup> Xoossai asassi aquwaa, duretettaanne bonchchuwaa ubbaa immees; ayyo koshshiyaabaappe aibanne pacissenna. SHin, ayyo imettida aqonne duretetta ubban keettaawu ufaiittana mala, kumetta sheniyaau immenna. Heгаа xallakka gidenna; i daafuridi demmidoban hara daafuribeennaagee ufaiittanaadan oottees. Hegeekka hadanne keehi azzanissiya iitabaa.

<sup>3</sup> Issi asi xeetu naata gakkanau yelidi, adussa laittaa de7idi ceegganau danddayees; shin i bau imettidaban ufaiittiyo qaada i au xayikko, qassi wurssettan bonchcho mooguwaakka moogettennan attikko, appe ba ayyee uluwan haiqqidi yelettida boshai keha gais. <sup>4</sup> Aissi giikko, he boshai coo yelettiis; simmidi qassi, a ooninne hassayenna xumau bees; a sunttaikka he xuman kamettidi attees. <sup>5</sup> I awaa poo7uwaa be7ibeenna; de7obaikka aibakko eribeenna. Hinkko bitaniyaagaappe aadhdhidi shemppiyai a. <sup>6</sup> Heгаа gishshau, ufaissi bainnan de7ishin, naa77u sha7u laittaa de7iya asappe he boshaa qaada i lo77o. Aissi giikko, wurssettan naa77aikka issi sohuwaa boosona.

<sup>7</sup> Asi daafuridi oottiyo ubbai bau miyoobaa demmanaassa; shin a uloi audenne gidana gi erenna. <sup>8</sup> Yaatin, cincca asi eeyyaappe aibin kehii? Hiyyeesaikka keehi cinccidi, haratu sinttan waani simerettanaakko eriyoogee au ai maaddii? <sup>9</sup> Aifiyan be7iyobai amottiyoobaappe keha. Qassi hegeekka carckuwaa oiqqanau yedettiyoogaa mala hada.

<sup>10</sup> Haniyaabai ubbaikka kasetidi kuuyetti uttiis. Issi issi asi waananau de7iyaakko, adussa wodiyaappe kase baggan eretti uttiis; qassi ai asinne baappe minniyaagaara gaaddetanau danddayenna. <sup>11</sup> Haasayai corattiyo wode, hadabai corattees; hegee yaatin, asa ai maaddii?

<sup>12</sup> Hada gididi, kuwaadan coo aadhdhiya guutta laittaa baagaa asi waatidi aattanau koshshiyaakko eriyai oonee? Qassikka asi haiqqidi biichchin, salo gufantton hananau de7iyaabaa asassi odanau danddayiyai oonee?

## 7

### *De7obaa Qoppiyoogaa*

<sup>1</sup> Waagai al77o gidido lo77o shittuwaappe lo77o sunttai aadhdhees; yelettiyo gallas-saappekka haiqqiyo gallasai lo77o.

<sup>2</sup> Gibiraa keettaa biyoogaappe, yeeho keettaa biyoogee lo77o; aissi giikko, asa ubbaa wurssettai haiqo; paxa de7iya asaikka heгаа ba wozanan wottanau koshshees.

<sup>3</sup> Miichchaappe azzanoi keha; aissi giikko, azzanoi som77uwaa karexissikkokka wozanaa poo7issees.

<sup>4</sup> Ubbatoo ufaissiyaabaa xallaa qoppiya urai de7ikko, he urai eeyya; shin cincca asi haiquwaabaakka qoppes.



<sup>5</sup> Eeyyati sabbidi yexxiyo yettaa siyyoogaappe, aadhdhida eranchcha asi seeriyo seeraa ezggiyoogee lo77o.

<sup>6</sup> Eeyyaa miichchai, suuppa agunttaa taman yeggin eexxiiddi xuuqqiyoogaa mala. Hegeekka qassi hada.

<sup>7</sup> Sugetta oosoi aadhdhida eranchchaa eeyya kessees; maganxxuwaa asappe ekkiyoogee wozanaa bashshees.

<sup>8</sup> Ai yohuwaassi gidikkonne, doomettaappe wurssettai keha; qassi otoranchcha uraappekka danddayanchcha urai keha.

<sup>9</sup> Hanqqoi azallati haluwaa kiyanao go7ettiyo miishsha gidiyo gishshau, elle hanqqettoppa.

<sup>10</sup> “Ha77i wodiyaappe kase aadhdhida wodee aissi keha gididee?” gaada oichchoppa; aissi giikko, heгаа mala oishai aadhdhida eranchcha giyo asi oichchiyo oisha gidenna.

<sup>11</sup> Ha sa7an de7iya asi ubbi aadhdhida eranchcha gidanao koshshees; aissi giikko, aadhdhida eratettaa demmiyoogee aquwaa laattiyooгаappe guuxxenna. <sup>12</sup> Miishshai asa iitaappe kammidi ashshiyooгаadan, aadhdhida eratettaikka ashshees. SHin, aadhdhida eratettai miishshaappe dariyoogee, i asassi de7o immanau danddayiyoogaana.

<sup>13</sup> Ane Xoossai oottidobaa akeeka! Xoossai geellayidobaa ooni sittissanau danddayii? <sup>14</sup> Neeyyo ubbawai giigido wodiyan ufaitta; qassi metoi gakkiyo wodiyan kka akeeka; aissi giikko, ufaissa gidin, meto gidin, Xoossai yeddiyo wodiyan yees. SHin augee kasetidi yaanaakko, neeni erakka.

<sup>15</sup> Ha hada gidida laittan taagan darobaa taani be7aas. Hegeekka, geellai ba geelatettaa oottiiddi, adussa laittaa de7iyoo wode, xillotettaa oottiya xilloi qantta laittan haiqqees. <sup>16</sup> Hegaa gishshau, neeni elle xayennaadan, keehi daro xillo woikko keehi daro aadhdhida eranchcha gidoppa. <sup>17</sup> Qassi wodee bannan neeni haiqqennaadan, ubba hanttaara iitanne gidoppa; ubba yooqolo eeyyanne gidoppa. <sup>18</sup> Ha ubbankka Xoossaassi yayyiya urai, meto ubbaappe xoonuwan kiyanao danddayiyo gishshau, neeni daro iita woikko daro xillonne gidennan giddo asa gida.

<sup>19</sup> Aadhdhida eratettai aadhdhida eranchchatuyyo immiyo wolqqai tammu katamata haariya asatau wolqqaappe darees.

<sup>20</sup> Xillobaa xalaalaa oottiiddi, nagara oottennan de7iya asi ha sa7aa bollan baawa.

<sup>21</sup> Asai haasayiyo qaalaa muliyaa ezggada polana gooppa; neeni muliyaa ezggana giikko, ne ashkkarai nena qanggishin, neeni siyana. <sup>22</sup> Qassi neenikka ne huuphen harata qanggidoogaa ne wozanao erees.

<sup>23</sup> Hagaa ubbaa taani aadhdhida eratettan pilggada xeellaas; yaatada, “Taanikka aadhdhida eranchcha gidana” yaagaas. SHin taani giidoogaadan hanibeenna.

<sup>24</sup> Aadhdhida eratettai ubbatonkka haahuwan de7iyaabaanne ciimmabaa; yaatin, a qoridi demmanau danddayiyai oonee? <sup>25</sup> Taani eranau, pilgga xeellanaunne aadhdhida eratettaanne yoho ubbaa wurssettaa eranau, qassi nagarai eeyyatetta gidiyoogaanne eeyyatettikka gooshsha gidiyoogaa eranau, ta wozanan yuushsha yuushshada qoppaas.

<sup>26</sup> Taani haiquwaappe aadhdhidi cammiya hara issibaa pilgga xeellada demmaas; hegeekka, i wozanao pire woikko yardde gidin, i kushee sanssalata mala gidido issi maccaaseebaa. Xoossaa ufaissiya urai ippe kessi ekkana; shin nagaranchchaa a ba piriya waaxada oiqqana.

<sup>27</sup> Eranchchai hagaadan yaagiis; “Taanikaalla kaallada, pilgga xeellada, haraa demmidobai haga. <sup>28</sup> Hegeekka, taani hachchi gakkanaashin koyada demmabeennabaa. SHa7u attuma asaa giddoppe bonchchoi bessiyoo issi asa xallaa demmaas; shin macca asaa giddoppe issinonne demmanau danddayabeikke. <sup>29</sup> Taani qorada demmido harabai, Xoossai asaa suure qofai de7iyooгeeeta oottidi medhdhiis; shin asai daro hiilla ogiyaa koyidi biis” yaagiis.

## 8

<sup>1</sup> Aadhdhida eranchcha asa mala asi oonee? Yohotu ubbaa birshshettaa eriyai oonee? Aadhdhida eratettaa pashkkissidi, xumida som77uwaa poo7issees.

*Kawossi Azazettiyoogaa*

<sup>2</sup> Kawuwaassi azazetta; aissi giikko, azazettanau neeni kase Xoossaa sinttan caaqqa uttadasa. <sup>3</sup> Ubba wode iita oosuwaa oottoppa; aissi giikko, kawoi ba koyidobaa oottanau danddayiyo gishshau, neeni a sinttappe elle xayana. <sup>4</sup> Mulebaa oottanau kawuwaassi maatai de7ees; yaatin, “Aissi haggaa oottadii?” yaagidi a oichchanau danddayiyai oonee? <sup>5</sup> A azazuwaa poliya urai qaxxayettenna; aadhdhida eranchcha asi likke gidiiya wodiyaanne oottiyo ogiyaa erees. <sup>6</sup> Issi asa bollan deexo metoi gakkikkonne, yoho ubbaassi au a wodeenne a ogee ogee de7ees. <sup>7</sup> Sinttappe hananabaa eriyaabi baawa; heggaa gishshau, “Hagee hanana” giidi odanau danddayiyai oonee? <sup>8</sup> SHemppoi shaahettidi biyo gallassi oiqqidi, teqqanau danddayiyya asi baawa; woikko haiqoi ba gallasan yeennaadan digganau danddayiyya asikka baawa. Hegee ooninne kessi ekkannau danddayenna ola. Heggaa gishshau, haiquwaa sinttan iitatetti iitaa oottiya uraa ashshi ekkenna.

*Iita Asatunne Keha Asatu Hanota*

<sup>9</sup> Salo gufantton haniyaabaa ubbaa taani akeekada qoppiyo wode, issi asi bau de7iyya haariyo maataa hara asa qohanau go7ettiyoogaa be7aas. <sup>10</sup> Qassi iita asati bonchchuwan moogettishin be7aas. Hegaappe aadhdhiyaageekka qassi, mooguwaappe simmiyo wode, eti he iitatettaa oottido katamaa asai shiiqidi, eta sabbishin siyaas. Hegee ubbaikka hada.

<sup>11</sup> Asi halchchidi iitabaa oottiyo gaasoi, iitabaa oottida asata eesuwan qaxxayiyaabi banna gishshaassa. <sup>12</sup> Nagaranchchai xeetutoo iitabaa oottishin, a baree aduqqikkokka, Xoossaassi yayyiyaageetussi sa7ai lo77anaagaa taani erais. <sup>13</sup> Iitati Xoossaassi yayyenna gishshau, sarotettaa etassi baawa; Xoossaassi eti yayyenna gishshau, eta bareekka kuwaadan qaamma. <sup>14</sup> Ha sa7an oosettiya issi hadabai de7ees; hegeekka, geeshsha asati nagaranchchatussi yiya qixaatiyaa ekin, nagaranchchati qassi, geeshshatussi yiya lo77obaa ekkoosona. Ha ubbaikka hada.

<sup>15</sup> Heggaa gishshau, asi ba de7on ufaattikko lo77o gaada qofaa immais; aissi giikko, asi miyoogaappe, uyiyoogaappenne bana ufaissiyooogaappe aadhdhida lo77obi ayyo saloppe garssa baggaara hara baawa. Xoossai au immido laittan i daafuridi demmidoban hegaadan oottikko, ufaittanau danddayees.

<sup>16</sup> Taani aadhdhida eratettaa aibakko eranaunne asi ha sa7aa bollan daafuriyo daafuraa akeekanau halchchaas; wurssettan asi xiskko xayidi oottiyo duuxxenna osoo de7iyooogaa be7aas. <sup>17</sup> Hegaappe guyyiyan, Xoossai oottidobaa ubbaa be7aas. Qassi saloppe garssa baggan oosettida oosuwaa asi pilggidi eranau danddayennaagaa eraas. Asi ai keenaa daafuridi pilggi xeellikkonne, a birshshettaa eranau danddayenna. Qassi aadhdhida eranchcha asi, “Taani haggaa erais” giikkonne, i eranau danddayenna.

## 9

<sup>1</sup> Ha ubba yohotubaa adussa wodiya taani qoppidoogaappe guyyiyan, aadhdhida eranchchanne xillo gidida asatinne eta oosoti Xoossaa kushiyan de7oosona gaada qachchaas; shin siiqoi naagiya, ixoi naagiya ooninne bana naagiyaabaa kasetidi erenna. <sup>2</sup> Dummatetti bannan de7ishin, ubbaa gakkiiya qaadaa issuwaa; xillo gidin makkalanchcha gidin, lo77o gidin iita gidin, geeshsha gidin tuna gidin, yarshshuwaa yarshshiyaagaa gidin yarshshennaagaa gidin, eta ubbaa qaadaa issuwaa. Lo77o asassi nagaranchchaagaappe kehiya qaadaa baawa; caaqo caaqqanau yayyiyaageekka caaqqanau xaliyaagaappe dummatenna.

<sup>3</sup> Asa ubbaa qaadai issuwaa gidiyoogee, ha sa7an de7iya hara iitatettaakka mala daro iita. Asi de7uwan de7ido laittan ubban a wozanai iitatettaanne gooshshan kumidi de7ees; wurssettan haiqqi aggees. <sup>4</sup> Haiqqida gaammuwaappe paxa de7iya kanai keha; aissi giikko, paxa de7iyaageetuura de7iya asassi hidootai de7ees.

<sup>5</sup> Paxa de7iya asati issitoo haiqqanau de7iyooгаа eroosona; shin haiqqidaageeti aibanne erokkona. Eti mulekka dogettiichchidaageeta gidiyoo gishshau, ainne maaddokkona. <sup>6</sup> Eta siiqoi, ixoinne qanaatee ubbai etaara issippe xayiichchiis. Hegaa gishshau, hagaappe hini baggan salo gufantton oosettiya yoho ubban etau merinaukka qaadi baawa.

<sup>7</sup> Ba, ne qumaa ufaissan ma; ne woiniyaa eessaakka ne wozanai pashkkishin uya. Aissi giikko, Xoossai heгаа neeyyo kaseppekka bazzi wottiis. <sup>8</sup> Ubba wode ne maayoi bootta gido; ne huuphiyankka zaitiyaa tiyetta. <sup>9</sup> Saloppe garssa baggaara Xoossai neessi immido ha hada de7uwan, ne hada de7otu ubban neeni siiqiyo ne machcheera ufaittada de7a; aissi giikko, neeni saloppe garssa baggaara daafurada oottidobaa ubbaappe nena gakkiya saami heгаа. <sup>10</sup> Ne kushee oottanau demmidobaa ubbaa ne kumetta wolqqan ootta; aissi giikko, neeni baanasan duufuwan oosoi, woikko halchchoi, woikko eri, woikko aadhdhida eratetti baawa.

<sup>11</sup> Taani saloppe garssaara harabaakka be7aas; hegeekka, eesotiya wottanchchati ubba wode xoonokkona; woikko mino olanchchatikka ubba wode olan xoonokkona; woikko aadhdhida eranchchati ubba wode qumaa demmokkona; woikko cinccati ubba wode duretokkona; woikko tamarida asati ubba wode sabettokkona. SHin ubbaikka qaadainne wodee oottoogaadan hanees.

<sup>12</sup> Hegaa bollikka qassi, sinttappe yaanau de7iya meto wodee aude gakkanaakko, eranau danddayiya asi baawa; kafoi paalliiddi piriyan geliyoogaadan, woikko molee yarddiyan oiqettiyoogaadan, asi ubbi qoppennan gakkiya iita wodiyan oiqettees.

### *Aadhdhida Eratettaanne Eeyyatettaa*

<sup>13</sup> Salo gufantton taani be7idobai harabaikka de7ees; hegeekka aadhdhida eratettai gita leemiso gidiyooгаа. <sup>14</sup> Issi biittan issi guutta asai de7iyoo qeeri katamiyaa de7ausu; he katamiyo issi wolqqaama kawoi olanau denddiis. Denddidi o dooddiis. <sup>15</sup> Qassi, issi hiyyeesa shin cincca gidida bitanee, he katamen de7ees; i ba aadhdhida eratettan he katamiyo ashshiis. SHin, he hiyyeesa bitaniyaa zaarettidi hassayidabi baawa. <sup>16</sup> Taani, “Aadhdhida eratettai wolqqaappe darees” yaagaas. Gido shin, aadhdhida eranchcha gidikkonne, hiyyeesa asi karettees; i haasayiyoobaakka ezggiyaabi baawa. <sup>17</sup> Hegaa gidikkokka, deriyaa haariyaagee azallatu yaa7an waassiyoo waasuwa siyiyooгааappe, leelan odettiya aadhdhida eranchchaa qaalaa siyiyoogee lo77o. <sup>18</sup> Aadhdhida eratettai olaa miishshaappe lo77o; shin issi nagaranchcha asi daro lo77obaa moorees.

## 10

<sup>1</sup> Haiqqida udunxxeti sawiya zaitiyaa shittuwaa xinqqettanau danddayoosona; hegaadankka, guutta eeyyatettai aadhdhida eratettaanne gita bonchchuwaa moorees.

<sup>2</sup> Aadhdhida eranchcha asa wozanai a ushachchau kaalettees; shin eeyya asa wozanai haddirssau kaalettees. <sup>3</sup> Eeyya asi ogiyan hemettiyo wodekka, ayyo akeeki baawa; hegaappe denddidaagan i eeyya gidiyooгаа asi ubbi erees.

<sup>4</sup> Ne halaqai ne bollan hanqqettikkonne, ne sunttettido sohuwaappe kichchaichchoppa; aissi giikko, co77u giidi danddayiyoogee gita mooruwaakka atto giissees.

<sup>5</sup> Salo gufantton taani be7ido hara iitabai de7ees; hegeekka deriyaa haariyaageeti oottiyo naaquwaa. <sup>6</sup> Eeyyati daro xoqqa sunttatettaa oiqqidi de7iyoo wode, dureti hirkki ziqqa sohuwan uttidosa. <sup>7</sup> Taani, ailleti haariyaageetudan paraa toggidi biishiinne qassi haariyaageeti ailletudan gediyan hemettishin be7aas.

<sup>8</sup> Olla bookkiya uri he ollan i kunddana; qassi gimbbe dirssaa koliya uraa shooshshai dukkana. <sup>9</sup> SHuchchaa a sohuwaappe aatti yeggiya uri he shuchchan deshettees; qassi mitta qeriya urikka he mittan deshettees.

<sup>10</sup> Tunida kaltaa poshennan coo qerikko, daro wolqqaa wurssees; shin aadhdhida eran oottiyoogee oosuwaa purissees.

<sup>11</sup> SHOoshshai dukkirggin, shooshshaa jallettiyo daadumataa daadumatiyoogee he aawussi ainne maaddenna.

<sup>12</sup> Aadhdhida eranchchaa haasayai ayyo bonchchuwaa imissees; shin eeyyai ba doonaappe kiyida qaalan i bau metuwan geles.

<sup>13</sup> Eeyyai ba haasayaa eeyya qaalan doommidi, iitatettaanne gooshshan polees.

<sup>14</sup> Eeyyai darobaa haasayees. Gidikkonne, sinttappe hananau de7iyaabaa ooninne erenna. Asi haiqqiichchin, hananau de7iyaabaa ayyo odanau danddayiyaabi baawa.

<sup>15</sup> Eeyya asi ba oosuwaa daafurees; i ba soo biyo ogiyaa erenna.

<sup>16</sup> Yiira na7a gidida kawoinne maallado guuraara gibiraa giigissidi, banttau miya halaqati de7iyo biittee neeyyo aayye7ana! <sup>17</sup> Bonchchettida kawoinne mattuwaassa gidennan wolqqaanne minotettaa demmanau maaran miyaanne uyiya halaqati de7iyo biittiyaa galatettidaaro.

<sup>18</sup> Bitanee azalla gidikko, a kaarai woddees; a kushee billi giidaagaa gidikko, a keettaa aattees.

<sup>19</sup> Qumaa miyoogaanne woiniyaa eessaa uyiyoogan ufaissai beettees; shin miishshi ubbabaa shammees.

<sup>20</sup> Siyiyaabi baawa gaada ne wozanaa qofan gidikkonne, kawuwaa cayoppa; woikko ne zin77iyo kifiliyan duriyaa cayoppa; aissi giikko, ne giidoogaa saluwaa kafoi woikko, qefiyaara de7iya meretati biidi, etayyo yootana.

## 11

### *Aadhdhida Eranchcha Uri Oottanau Bessiyaabaa*

<sup>1</sup> Ne oittaa haattaa bollan ola; daro gallassatuppe guyyiyan, neeni zaarettada a demmana. <sup>2</sup> Neeyyo de7iya aquwaa laappun woikko, ubba hosppun sohuwan shaakkada wotta; aissi giikko, sinttappe ha sa7aa bolli aiba iitabi yaanaakko, neeni erakka.

<sup>3</sup> SHaarai haattan kumidabaa gidikko, biittaa bollan iraa tigees.

Mittai huuphessi kunddin tohossi kunddin, he ba kunddido sohuwan de7ees.

<sup>4</sup> Carkkuwaa hanotaa naagiya ooninne kattaa zerenna; qassi shaarai denddanaashin naagiya ooninne ba kattaa cakkenna.

<sup>5</sup> Carkkoi awaara biyaakko, a ogiyaa erakka; qassi na7i aayee uluwan waani merettiyaakkokka erakka. Hegaadankka, ubbabaa medhdhiya Xoossai ba oosuwaa waati oottiyaakko, eranau danddayakka.

<sup>6</sup> Maallado guuran gidinkka omarsan, ne zersettaa zeriyoogaa aggoppa; aissi giikko, maalladoogee lo77anaa omarsaagee lo77anaa neeni erakka.

<sup>7</sup> Poo7oi ufaissiyaabaa. Awa aifiyaa be7iyoogee akka lo77obaa. <sup>8</sup> Asi keehi adussa laittaa ha sa7an de7ikko, he ubba laittankka ufaitto. SHin xuma wodeta qoppa. Aissi giikko, he wodeti aduqqana. Yaanau de7iya ubbabaikka hada.

### *Wodallatussinne Geela7otussi Bessiya Zoriyaa*

<sup>9</sup> Neno yelagau, yelagatettaa keehi lo77obaa gidiyo gishshau, ne yelagatettaa laittan ufaitta; ne wozanaikka ufaitto. Ne aifee xeellidobaanne ne wozanai amottidobaa ubbaa pola. SHin, he neeni oottidobaa ubbaa gishshau, nena Xoossai pirddanau de7iyoogaa dogoppa.

<sup>10</sup> Hegaa gishshau, simmi ne wozanaappe hirggaa, ne bollaappekka seelaa diggargga. Aissi giikko, naatettainne yelagatettaa hada.

## 12

<sup>1</sup> Ne yelagatettaa laittan nena Medhdhidaagaa qoppa. Metiya gallassati yeennan de7ishin, neeni, “Tana hagee ufaissenna” giyo wodeti gakkennan de7ishin, <sup>2</sup> awainne poo7oi, aginainne xoolinttee xumennan de7ishin, irai bukki aadhdhinka shaarai haa simmennan de7ishin, nena Medhdhidaagaa qoppa. <sup>3</sup> Aissi giikko, hegee keettaa naagiyaageeti kokkoriyo wode, mino asi quunniyo wode, gaacciyaageeti qoodan gu-uxxido gaasuwan gaachchaa aggiyo wode, qassi maskkootiyaara xeelliyageeti galjjiyo wode gidana. <sup>4</sup> He wode wogga ogiyaakko simmida penggeti gorddettiyo wode, gaacciya woxatu cenggurssai ziqqi giyo wode, kafuwaa waaso asaa xiskkuwaappe beegottiyo wode, shin, yettanchcha macca naatu yettaa cenggurssai leppiyo wode gidana. <sup>5</sup> He wodee asai xoqqa sohota kiyanaunne aaho ogetuura hemettanau yayyiyo wode, ne huuphee puulummiyo wode, neeni nena danddayada hemettiyoogee neeyyo ixxiyo wode, amoyiyaabai aggiyo wode gidana. He wodee asi ba merinaa keettaa biyo wode, yeekkiyaageetikka aaho ogiyaara yeekkiiddi yuuyiyo wode gidana.

<sup>6</sup> Bira qacina duuxxennan, worqqa kereekka meqqennan, haattaa otoikka pultuwaa lanqqiyan meqqennan, haattaa pude goochchiyo wodoroikka duuxxennan de7ishin, <sup>7</sup> biittai kase ba ekettido biittaakko simmennan, shemppoikka bana immida Xoossaakko simmidi beennan de7ishin, nena Medhdhidaagaa qoppa.

<sup>8</sup> Eranchchai odiiddi, “Hada! Hada! Ubbabaikka hada!” yaagiis.

### *Wurssetta Qofaa*

<sup>9</sup> Eranchchaassi aadhdhida eratetta de7iyo gishshau, eratetta dere asaa tamaris-siis. I daro leemisota pilggi qoridi, issuwaa issuwaa a maaran maaran dummayidi wot-tiis. <sup>10</sup> Eranchchai likke gidida qaalaa demmanau koyiis; heгаа gishshau, i xaafidobai sittanne tuma.

<sup>11</sup> Eranchchatu qalalai henttanchchai wudiyaa laaggiyo xeeraa lee7e gatimaa mala. Qassi issippe shiishshido leemisotikka gomppaa gakkidi geliya misimaaretu mala.

<sup>12</sup> Ta na7au, ha ubbaappe bollaara neeni naagettanau koshshiyaabai de7ees. Max-aafaa xaafidi wurssanau danddayettenna. Qassi darobaa pilggi xeellidi aggennan ixxiyoogeeikka asatetta daafurssees.

<sup>13</sup> Hekko ubbabai odettiis; heгаа gishshau, ubbabau kuushshai haggaa: Xoossaassi yayya; a azazuwaa naaga. Aissi giikko, hegee asassi waanna ooso. <sup>14</sup> Xoossai ooso ubbaa bollan, qassi geemmida yoho ubbaa bollan, lo77o gidin, iita gidinkka pirdanau de7ees.



## Isiyaasa

### *Gidduwaa Erissuwaa*

Isiyaasa maxaafai Kiristtoosi yelettanaappe kase, hosppuntto xeetu laittaa heeran Yerusalaamen de7ida, hananabaa yootiya Isiyaasa sunttan xeesettees. Ha maxaafaa heezzu waanna waanna kifiletun shaakkidi be7anau danddayeettees.

1. Miraafiyaa 1ppe biidi 39 gakkanaashin de7iyaagee tohossa baggaara de7iya Yihudaa kawotettaa Asoore giyo wolqqaama shooro kawotettaa qimiixiyooqaa odees. Yihudaa heгаа mala daafan yeggidaagee Asoore kawotettaa minotettaa gidennan, asaa nagaraa, Xoossaassi azazettennan ixxiyooqaa, hegaadankka eti Xoossan ammanettennan aggiyooqaa gidiyooqaa Isiyaasi malaatiis. Hananabaa yootiyaagee qoncce haasayaaninne oosuwan asaanne asaa kaalettiyaageeta xil-lotettainne suure pirddai kumido de7uwaakko simmana mala akeekissiis; qassi Xoossaassi azazettennan aggiyooqee gammaa meettaanne bashshaa kaalettiyooqaa etassi minttidi odiis. Isiyaasi heгаа bollikka gujjidi odiiddi, yaana wodetun sa7aa yuushuwan saroi kumido, boree bannan kaalettiya, Daawita zare gidiya kawoi yaanau de7iyooqaa kasetidi odiis.
2. Miraafiyaa 40ppe biidi 55 gakkanaashin de7iya kifiliyaappe dariya baggai Yihudaa asai omoodettidi Baabiloone biido wode, eta de7oi kunddidonne eti hidootaa qanxxido wodetubaa odees. Hananabaa yootiyaagee Xoossai ba asaa he han-otaappe birshshi yeddana wodeenne eti ooratta de7uwaa doommana mala, eta Yerusalaame efaana wodee matattidoogaa odiis. Ha miraafetu gidдон qonccidi beettiya yohoi Xoossai taarikiyaayyo Goda gidiyooqanne ba asaayyo ayyo de7iya halchchuwaa, hegeenne Israa7eela asaa baggaara anjjettanau de7iya asaakko eti biidi, oottanau bessiyooqaa odiya kifile.
3. Miraafiyaa 56ppe biidi 66 gakkanaashin de7iya kifilee odiyooqee guyyen Yerusalaamen de7iya asaabaa; he asai Xoossai ba asaassi gelido qaalaa polanaagaa geeshshidi eranau, markka gidiyaabaa demmanau koyiiddi uttiis. Eti bairayidi oottanaadan koyettida oosoti xillotettaa, suure pirddaa, Sambbataa bonchchiyooqaa, yarshshuwaa yarshshiyooqanne woosan sheekkiyooqaa. Ha kifiliyan erettida miraafee 61:1-2 de7iyaagaa gidishin, Yesuusi koiro oosuwaa doommiiddi, ba xeessaabau markka oottidi shiishshido qaalati ha paidotu gidдон de7oosona.

<sup>1</sup> Ooziyaani, Yo7aataami, Akaazinne Hizqqiyaasi Yihudaa kawota gidido wode, Amoxa na7ai Isiyaasi Yihudaabanne Yerusalaamebaa be7ido ajjuutai haggaa.

### *GODAI Ba Asaa Seeriis*

<sup>2</sup> Salotun de7iyaageetoo, siyite; sa7an de7iyaageetoo, ezggite; aissi giikko, GODAI hagaadan yaagiis; “Taani naata dichcha gattaas; shin eti taayyo makkalidosona. <sup>3</sup>Boorai ba godaa erees; hareekka bana haaridaagaa zadaluwaa erees; shin Israa7eelati erokkona; ta asati akeekokkona.

<sup>4</sup>“Nagaraa oottiya kawotettau, intte naaquwan deexettida asau, iitaa oottiya zariyau, tuniya naatoo, intteyyo aayye7ana! GODAA intte aggideta; Israa7eela Geeshshaa sheneyideta; ayyo zokkuwaa zaarideta. <sup>5</sup>Intte aissi makkalaa bolli makkalaa gujji gujji beetii? Aissi qassikka shocettuuteetii? Intte kumetta huuphee sakettiis; intte kumetta wozanaikka daafuriis. <sup>6</sup>Tohuwaa biradhdhiyaappe huuphiyaa binnaanaa gakkanaassi payyatetti baawa; masuntti, kixinne giyyiyaabi de7ees; etinne giyyibookkona, woikko meecetti qashettibookkona, woikko zaitiyan tiyettidi looxigibookkona.

<sup>7</sup> “Intte biittai xafe gidiis; intte katamatikka taman xuugettidosona; intte goshshaa intte xeellishin, allagati ekkoosona; imatta asati laalin, mela attiiis. <sup>8</sup> Yerusalaame kata-mai woiniyaa turaa naagiyo daasedan, lallehiyaa naagiyo zamppadaaninne morkkiyan direttida katamadan hanidi attiiis. <sup>9</sup> Ubbaappe Wolqqaama GODAI nuuyyo amarida zareta ashshennaakko, nuuni Sadooma katamaadaaninne Gamooraa katamaadan hanidashin” yaagiis.

<sup>10</sup> Inttenoo, Sadooma haariyaageetu malatoo, GODAA qaalaa siyite! Inttenoo, Gamooraa asaa malatoo, nu Xoossaa higgiiyaa ezggite! <sup>11</sup> GODAI hagaadan yaagees; “Intte yarshshuwaa daroi taayyo ai go77ii? Hanno gakkanau intte taayyo shiishshido xuugettida orgge dorssatanne xiikkido mehetu modhdhuwaa yarshshuwaa taani kallaas; korima booratu, dorssa maratunne deeshshatu suuttan taani ufaittikke. <sup>12</sup> Intte tau goinnanau yiyo wode, ta Beeta Maqidasiyaa dabaabaa inttena yedhdhite giidai oonee? <sup>13</sup> Simmi hada yarshshuwaa ehiyoogaa aggite! Intte cuwayiyo ixaanai tana sheneyees; aginaa xeeruwaa intte bonchchiyo gallassaa, intte Sambbataanne intte keerido yaa7ata, ha shiiqota ubbaa iitatettaara issippe walahettidaageeta taani dand-dayikke. <sup>14</sup> Aginaa xeeruwaa intte bonchchiyo gallassanne keerettida intte baalaa gallassata taani ixxaas; eti taayyo tooho gididosona; taani eta tookkaidda daafuraas.

<sup>15</sup> “Intte kushiya miccidi, intte woossiyo wode, taani ta aifiyaa intteppe genttana; intte daro woosaa woossikkokka, taani siyikke; aissi giikko, intte kushee suuttan munaqettiis. <sup>16</sup> Meecettite; geeyite; intte iita oosuwaa ta sinttappe diggite. Iitaa oottiy-oogaa aggite; <sup>17</sup> lo77obaa oottanau tamarite. Xillo pirddaa koyite; un77ettidaageetu morggiyaa oiqqite. Aawu bainnaageetuyyo pirddite; azini haiqqido maccaasatuyyo mootettite” yaagees.

<sup>18</sup> Qassikka GODAI, “Haayite; ane zorettoos. Intte nagarai baaraadan zo77ikkokka, shachchaadan booxxana; sinadan zo77ikkokka, puuttodan booxxana. <sup>19</sup> Intte eeno giidi, tau azazettikko, biittaappe mokkiya murutaa maana. <sup>20</sup> SHin intte ixxis giidi makkalikko, bisuwan meetettana” yaagees. GODAI ba doonaappe haggaa haasayistten-nee.

### *Nagarai Kumido Katamaa*

<sup>21</sup> Ammanettida gita katamiyaa waanada shaaramuxa gidadee! A kase suure pirddai kumidooro; xillotettai kase i giddon de7iis; shin ha77i asa woriyaageeti i giddon de7oosona. <sup>22</sup> Ne birai shiyiichchiis; ne lo77o woiniyaa eessaikka haattaara yeelettiis. <sup>23</sup> Intte daannati makkalanchchatanne kaisotu exata gididosona; eti ubbatikka mat-taayiyaa dosoosonanne miishshaa yedettoosona; aawi bainnaageetussi pirddokkona; azini haiqqido maccaasatu mootoi etakko shiiqenna.

<sup>24</sup> Heggaa gishshau, Godai, Ubbaappe Wolqqaama GODAI, Israa7eela Wolqqaamai, hagaadan yaagees; “Hai taani ta ixotuppe shemppana; taani ta morkketu bolli ta haluwaa kessana. <sup>25</sup> Taani ta kushiya ne bolli wottana; ne kinssaa qulxxuxxissada geeshshana; nenaara walahettidabaa ubbaa geeshshada yedissana. <sup>26</sup> Taani beniigeetu mala daannata, koiroogeetu mala zoriyaageeta neeyyo zaarana. Heggaaappe guyyiyan, neeni Xillotettaa Katama, Ammanettida Katama geetettana” yaagees.

<sup>27</sup> Xiyoonee suure pirddan, bantta nagaraa paaxiyaageetikka xillotettan wozettana. <sup>28</sup> SHin makkalanchchatinne nagaranchchati naa77aikka meqqana; GODAA ag-giyaageeti xayana. <sup>29</sup> Bassaa wottanau dosido wolaa gishshau, intte yeellatana; intte doorido kaashshaa gishshaukka intte kauyyana. <sup>30</sup> Boncoi qoqqofettiyo woladan, woikko dubbi bainna shooqadan, intte hanana. <sup>31</sup> Minoi galaba gidana; a osoikka xiifa gidana; eti issippe xuugettana; he tamaa toissiyaabi xayana.

## 2

### *Merinaa Sarotettaa (Mikiyaasa 4:1-3)*

<sup>1</sup> Yihudaa biittaabaanne Yerusalaame katamaabaa Amoxa na7ai Isiyaasi be7idoogee hagua.

<sup>2</sup> Wurssetta gallassatun GODAA Beeta Maqidasee keexettido deree deretu ubbaappe xoqqidi beettana; kera ubbatuppekka bollaara xoqqu xoqqu gaana. Kawotettatun de7iya asai ubbai akko zulana. <sup>3</sup> Daro asai yiidi, “Haayite! GODAA deriyaa, Yaaqooba Xoossaa Beeta Maqidasiyaa ane pude kiyooos. I koyiyooogaadan nuuni baana mala, i nuna ba ogiyaa tamarissana” yaagana. Aissi giikko, higgee Xiyooneppe, GODAA qaalaikka Yerusalaameppe kiyana. <sup>4</sup> Kawotettatuppenne kawotettatuppe gidduwan i pirddananne daro asatu palamaa shaakkana. Eti bantta bisuwaa marasha, bantta tooraakka baaca kessanau qoxxana. Kawotettaa kawotettaa bolli bisuwaa denttena. Hegaappe guyyiyan eti mulekka olaa timirttiyaa tamarokkona.

<sup>5</sup> Inttenoo, Yaaqooba zaretoo, haayite! Ane GODAA poo7uwan hemettoos.

### *GODAA Gallassaa*

<sup>6</sup> GODAU, ne asaa, Yaaqooba zareta aggadasa. Eti awai mokkiyo bagga biittaa asatu bitan kumidosona; Pilisxxeema asatudan kaayoosona. Eti allaga asatuura issippe zuppetoosona. <sup>7</sup> Eta biittai birainne worqqai kumidoogaa; eta miishshau zawi baawa. Eta biittai pari kumidoogaa; eta para gaaretussi zawi baawa. <sup>8</sup> Eta biittai eeqati kumidoogaa; eti bantta kushee oottido oosuwau hokkidi goinnoosona.

<sup>9</sup> Hegaa gishshau, asai ubbai tooshettananne kauyyana. Etaatto gooppa.

<sup>10</sup> GODAA dagamaappenne a angгаа bonchchuwaappe attanau zaallaakko biite; biitta gidдон qosettite! <sup>11</sup> Asa otoroi giyyana; a kilahoikka seerana; he gallassi GODAA xalaalai xoqqu xoqqu gaana. <sup>12</sup> Ubbaappe Wolqqaama GODAI issi gallassaa keeriis. He gallassi otorettiyaageeta, ayyiyaageetanne xoqqu xoqqu giidaageeta kaushshana; <sup>13</sup> adussanne xoqqa gididiya Liibaanoosa zigatanne Baasaane wolaa ubbaa xaissana; <sup>14</sup> xoqqa deretakka keratakka dembbayana; <sup>15</sup> katamaa naagiyo adussa miixata ubbaanne katamaa yuushuwan de7iya mino gimbbeta ziqqissana; <sup>16</sup> GODAI gitanne lo77iya markkabetakka haattan mitissana. <sup>17</sup> Asa otoroi ziqqi gaana; a ayyoikka xayana. He gallassi GODAA xalaalai xoqqu xoqqu gaana; <sup>18</sup> eeqa ubbaikka muleera xayagana.

<sup>19</sup> GODAI ha biittaa qaattanau denddiyo wode, a dagamaappenne a angгаа bonchchuwaappe attanau asai shuchchaa gonggoluwanne biittaa ollau baqatana.

<sup>20</sup> He gallassi asai goinnanau medhdhido bantta bira misiletanne bantta worqqa misileta occotuyyoonne wurkkaawurkkotuyyo olana. <sup>21</sup> GODAI ha biittaa qaattanau denddiyo wode, a dagamaappenne a angгаа bonchchuwaappe attanau eti gonggolo gidдонne shuchchaa kooppo gidдо baqatana.

<sup>22</sup> Simmi haiqqiya asan ammanettiyoogaa aggite! Asi ai maaddii?

## 3

### *Yerusalaame Gakkana Metuwaa*

<sup>1</sup> Be7ite, Godai, Ubbaappe Wolqqaama GODAI minjjaanne maaduwaa naa77aakka Yerusalaameppenne Yihudaappe diggana hanees. <sup>2</sup> Kattaa minjjaanne haattaa minjja ubbaa, minotanne olanchchata, daannatanne hananabaa yootiyaageeta, kaayiyaageetanne cimata, <sup>3</sup> ola gadaawatanne deriyaa aissiyaageeta, zoriyaageeta, hiillatiyaageetanne cincca bitanchchata ubbaa diggana hanees.

<sup>4</sup> Taani yelaga attuma naata eta halaqa kessana; guutta naati eta haarana. <sup>5</sup> Asai asaa bolli, shooroi shooruwaa bolli denddidi, issoi issuwaa sugana. Yelagai cimaa bolli, karettidaagee bonchchettidaagaa bolli denddana.

<sup>6</sup> Issi asi ba aawaa keettan ba ishanttuppe issuwaa oiqqidi, “Neeyyo maayoi de7ees; neeni nuuyyo suntta gida; ha qolettida sohuwaa aawatettaa ekka” yaagana.

<sup>7</sup> Yaagin i he gallassi ba qaalaa xoqqissidi, “Tanan xalee baawa; ta son qumi woikko maayoi baawa; intte bolli tana suntoppiti” yaagana.

<sup>8</sup> Yerusalaamee ganddigaarees; Yihudai kunddees; aissi giikko, eti bantta oduwaaninne bantta oosuwan GODAA bolli denddidi, a bonchchuwaa toochchoosona. <sup>9</sup> Eta som77uwaa merai eta bolli markkattees; eti bantta nagaraa Sadooma asaadan awaajjoosona; bantta nagaraa qottokkona. Eta aayye7ana! Aissi giikko, eti bantta bolli iitabaa ehiidosona.

<sup>10</sup> Xillotuyyo, “Intteyyo lo77o gidana” gaada oda; aissi giikko, eti bantta oosuwaa aifiyaa maana. <sup>11</sup> Iitatuyyo aayye7ana! Eta iitana; aissi giikko, eti bantta kushiya oosuwaa waagaa ekkana. <sup>12</sup> Yelagati ta asaa un77ettoosona; maccaasatikka eta haaroosona. Ta asau, inttena kaalettiyaageeti inttena wora kaalettoosona; intte biyo ogiyyaakka balettoosona.

### *GODAI Ba Asaa Pirddana*

<sup>13</sup> GODAI daannadan, shilootan uttees; asaa pirddanau denddees. <sup>14-15</sup> Asaa cimatanne kaalettiyaageeta pirddanau shiishshidi, Godai, Ubbaappe Wolqqaama GODAI hagaadan yaagees; “Woiniyaa turaa tokkidosaa bashshidaageeti inttena; hiyyeesatuppe bonqqidobai intte keettan de7ees. Ta asaa aissi kinchcheretteeti? Hiyyeesatu som77uwaa aissi gaacceeti?” yaagees.

### *GODAI Xiyoone Maccaasata Seeriis*

<sup>16</sup> GODAI qassikka, “Xiyoone maccaasati otorettidosona; bantta ziizziyaa essi ekkidi, bantta aifiyan qim77otiiddi, bantta hemetaa makkisiiddi, bantta gediya albbuwaa giirissiiddi hemettoosona. <sup>17</sup> Hegaa gishshau, taani Godai Xiyoone maccaasatu huuphiyaa cittuwan goo7issana. Taani GODAI eta huuphiyaa bo77ayana” yaagees.

<sup>18</sup> He gallassi Godai Xiyoone maccaasatu alleeqota, hegetinne eta giirettiya albbuwaa, shaashiyaa, qooriyaa gujjumaa, <sup>19</sup> haittaa gutichchaa, kushiya sagaayuwaa, som77uwaa kammiyo kutaa, <sup>20</sup> huuphiyan wottiyo alleequwaa, qesiyan qachchiyo sanssalataa, xeessan gixxiyo danccuwaa, shittuwaa xaaramusiyaa, kitaafaa, <sup>21</sup> siiriyaanne biradhdhiyaa migiduwaa, <sup>22</sup> minja maayuwaa, adussa maayuwaa, jaanuwaa, borssaa, <sup>23</sup> heregaa, liinuwaa giyo qacinaappe dadettida, gidloora maayiyo maayuwaa, binnaan wottiyo alleequwaanne sharbbiyaa ubbaa dafi ekkana.

<sup>24</sup> SHittuwaa gishshaa xinqquwaa gidana; danccuwaa gishshaa wodoruwaa, goofariyaa gishshaa meeseeliyaa, adussa maayuwaa gishshaa waaruwaa, puulaa gishshaa mazo xalaala gidana.

<sup>25</sup> Ne asati bisuwan, ne olanchchati olan haiqqana. <sup>26</sup> Xiyoone penggetun de7iya asai yeekkananne zilaalana; mela attidi, biittan uttana.

## 4

<sup>1</sup> He gallassi laappun maccaasati issi attumaagaa oikkidi, “Nuuni nu kattaa maana; nu maayuwaa maayana; ‘Azini bainnaageeta’ giyo cashshaappe attana mala, ‘Onakko machchota’ geettanau nuna ne sunttan xeesissarkkii” yaagidi woossana.

### *GODAI Yerusalaame Geeshshana*

<sup>2</sup> He gallassi GODAA mittaa marai lo77ananne bonchchettana; Israa7eela asaappe attidaageetussi he biittaa kattai ceeqonne bonchcho gidana. <sup>3</sup> Xiyoonen attiyaageeti, Yerusalaamen gam77iyaageeti, Yerusalaamen paxa de7iyaageetuura xaafettiyaageeti, “Eti geeshshata” geettana. <sup>4</sup> Godai Xiyoone maccaasatu qitaa meeccana; pirddiyooaaninne xuuggiyoogan suuttaa gussiyo mooruwaa Yerusalaameppe i geeshshana. <sup>5</sup> GODAI Xiyoone Deriyaa ubbaa bollinne yan shiiqiyaageetu bolli gallassi shaaraan cuwaa, qammi eexxiya tamaa poo7uwaa medhdhana; merettidi bonchcho ubbaa bolli

kammiyoobaa gidana. <sup>6</sup> I gallassaa awaa suuluwaappe ashshiya kuwanne gotiyaappenne iraa baqati attiyo soho gidana.

## 5

### *Woiniyaa Turaa Tokkiyo Sohuwaa Leemisuwaa*

<sup>1</sup> Taani ta siiqiyoogau a woiniyaa turaa tokkiyo sohuwaabaa siiqo yettaa yexxana.

Taani siiqiyoogau  
araddida keran woiniyaa turaa tokkiyo sohoi de7ees.

<sup>2</sup> Biittaa bookkidi,  
shuchchaa qori kessidi,  
ubbaappe lo77iya woiniyaa turaa tokkiis.  
Tokkidi naagiyo shakkuwaa a gidдон shakkiis;  
woiniyaa eessaa gum77iyooosaa woocidi giigissiis.  
Hegaappe guyyiyan, lo77o aifiyaa aifees  
yaagidi naagiis;  
shin caaliya aifiyaa aifiis.

<sup>3</sup> Yaatin, ta siiqoi hagaadan yaagiis;  
“Inttenoo, Yerusalaamen de7iyaageetoo,  
inttenoo, Yihudaa asatoo,  
taappenne ta woiniyaa turaa tokkiyo sohuwaappe gidduwan de7iya yohuwaa  
ane ha77i pirddite.

<sup>4</sup> Taani ta woiniyaa turaa sohuwaassi oottidoogaappe  
haraa ai oottanaagee attidee?  
Lo77o aifiyaa aifees yaagada naagishin,  
aissi caaliya aifiyaa aifidee?

<sup>5</sup> Ha77i taani ta woiniyaa turaa  
sohuwaa oottiyooobaa intteyyo yootais.  
Taani dirssaa shoddana;  
he turaikka xayanaadan oottana.

Taani gimbbiyaa qolana;  
he sohoikka tubettana.  
<sup>6</sup> Taani he sohuwaa la7a biitta oottana.  
He turai xunqgettenanne bul77ettenna;  
yaatin, kinddiichchoinne agunttai yan mukkana.  
Irai an bukkennaadan, taani shaarata azazana” yaagiis.

<sup>7</sup> Ubbaappe Wolqqaama GODAA woiniyaa turaa sohoi  
Israa7eela asaa.  
Yihudaa asai i ufaattiyo darkkuwaa.  
Eti suure pirddoosona giidi naagiis;  
shin suutaa gussidosona.  
Xillotettaa oottoosona giidi naagiis;  
shin waaso gidiis.

<sup>8</sup> Sohoi xayin, intte xalaalai biittaa bolli de7ana gakkanaashin, keettaa keettaa bolli gujjiyaageetoo, gadiyaa gadiyaara gattiyaageetoo, intteyyo aayye7ana! <sup>9</sup> Ubbaappe Wolqqaama GODAI tana hagaadan yaagiis; “He gita keettati onana; he lo77o keettatun de7anau asi xayana. <sup>10</sup> Tammu waaxa booratun tokkido woiniyaa aifiyaappe issi oto gidiya gum77ettida woiniyaa eessaa xalaalai kiyana; tammu qun77a kattaa zerin, issi qun77a kattaa xalaalaa aifana” yaagiis.



<sup>11</sup> Mattoyiya ushshaa koyanau maallado guuraara denddiyaageetuyyoonne woiniyaa eessan xuugettana gakkanaashin, sa7aa qamissiyaageetuyyo aayye7ana! <sup>12</sup> Eta imatuwan maazingqee, diittai, karaabee, cachcha zayeenne woiniyaa eessai de7ees; shin eti GODAA oosuwaa wudokkona; i ba kushiyan oottidobaa bonchchokkona. <sup>13</sup> Yaatin, ta asai akeekaa xayido gishshau, omoodettidi baana; eta deriyaa aisiyaageetikka namisan haiqqana; eta aaho dereekka koppisaa melana. <sup>14</sup> Duufoi ba gomppaa aasees; ba doonaakka zawi bannaagaa hanggees; hanggidi, Yerusalaamen de7iya gita asaanne hankko daro asaa, wocamiyaageetanne ufaiyyaageeta mittana.

<sup>15</sup> Asai ubbai tooshettanne kauyyana; otorettiyaageeti ubbaikka kauyyana. <sup>16</sup> SHin Ubbaappe Wolqqaama GODAI, suure pirddan xoqqu xoqqu gaana; geeshsha Xoossai geeshsha gidiyooгаа ba xillotettan bessana. <sup>17</sup> He wode dorssati bantta qooruwan heemettiyoogaadan heemettana; dorssa marati qolettida duretu keettatu giddon maana.

<sup>18</sup> Cimo baqettan nagaraa, gaare wodoruwan iitatettaa goochchiyaageetuyyo aayye7ana! <sup>19</sup> “Ane Xoossai ellello! Nuuni be7ana mala, ba oosuwaa eesoyo! Gatto! Ee, nuuni erana mala, Israa7eela Geeshshai qoppido qofai poletto” yaagiyaageetuyyo aayye7ana!

<sup>20</sup> Iitaa lo77o lo77uwaa iita yaagiyaageetuyyoo, xumaa poo7o poo7uwaa xuma oottiyaageetuyyoonne cammiyaagaa mal77iyaagaa mal77iyaagaa cammiyaagaa oottiyaageetuyyoo aayye7ana!

<sup>21</sup> Banttana, “Taani aadhdhida eranchcha! Taani cincca gidikkinaa!” yaagi qoppiyaageetuyyo aayye7ana!

<sup>22</sup> Woiniyaa eessaa uyiyoogan erettidaageetuyyoonne mattoyiya ushshaa walakkanau goobiyaageetuyyo aayye7ana! <sup>23</sup> Mattaaiyyaa ekkidi, mooranchchata xillissiyaageetuyyoonne xillo asatussi suure pirddaa diggiyaageetuyyo aayye7ana! <sup>24</sup> Tamaa lacoï dala a oiqqiyoogaadaaninne mela maatai eexxi xayiyooogaadan, hegaadan eta xaphoi wooqqana; eta ciishshaikka buhiyaadan laaletti xayana; aissi giikko, eti Ubbaappe Wolqqaama GODAA higgiiyaa ixxidosa; Israa7eela Geeshshaa qaalaakka karidosona. <sup>25</sup> Hegaa gishshau, GODAA hanqqoi a asaa bolli eexxi kiyees; i ba kushiya eta bolli denttidi, eta diippees. Dereti qaaxxoosona; haiqqida asaa ahai ogiyan buura mala gidees; yaaninkka a hanqqoi simmenna; a kushee ha77ikka dendidosan de7ees.

<sup>26</sup> GODAI haahuwan de7iya kawotettatuyyo malaataa xoqqan essees; sa7aa gaxan de7iya morkketuyyookka suiqees. Etikka eesuan jaamidi, puttu goosona. <sup>27</sup> Eta giddon daafuriyaabinne wobbiyaabi baawa; etappe issoinne xiskkena woikko zin77enna. Xeesan gixxido qabattoikka birshshettenna; eta caammaa dafoikka du-uxxenna. <sup>28</sup> Eta zubbee qara; eta wondafeekka waaxettidaagaa. Eta paratu qinccafilee zaalla shuchchaa mala; eta paraa gaaretu irzzoikka gote mala. <sup>29</sup> Eta gudettaikka gaam-muwaagaa mala; wodala gaammotudan gudoosona; eti daariiddi, banttau miyoobaa oiqqoosona; oiqqidi, tookki ekkidi boosona; etappe wotti ekkanaï ooninne baawa.

<sup>30</sup> He gallasi eti gita abbaa gunttaadan, Israa7eela bolli guummana; issi asi he biittaa xeellikko, xumaanne waaiyyaa be7ana; poo7oikka shaaran mitettana.

## 6

### *GODAI Isiyaasa Hananabaa Yootiya Asa Kessanau Xeesiis*

<sup>1</sup> Kawoi Ooziyaani haiqqido laitti Godai bollaanne xoqqa araatan uttidaagaa be7aas; a maayoi Beeta Maqidasiyaa kumiis. <sup>2</sup> Suraafeela geetettiya kiitanchchati appe bollaara de7oosona; issi issi suraafeeliyau usuppun qefeti de7oosona; naa77u qefetun ba som77uwaa kammiis; naa77u qefetun ba tohuwaa kammiis; naa77u qefetun paalliis. <sup>3</sup> Isoi issuwaara, “Geeshshai, geeshshai, geeshshai Ubbaappe Wolqqaama

GODAATTENNEE! Sa7a ubbai a bonchchuwan kumiis” yaagidi xeesettidosona. <sup>4</sup> Eta xeessaa cenggurssan Beeta Maqidasiyaa baasoi qaaxxiis; qassi Beeta Maqidasee cuwan kumiis.

<sup>5</sup> Yaatin, taani, “Taayyo aayye7ana! Taani bayaas; aissi giikko, taani doonai tunida asa; qassi doonai tunido asatu gidдон de7ais; shin taani Kawuwaa, Ubbaappe Wolqqaama GODAA ta aifiyan be7aas” yaagaas.

<sup>6</sup> Yaagin suraafeelatuppe issoi yarshshiyooaappe qaphido tamaa bonqquwaa ekkidi paalliiddi, taakko yiis. <sup>7</sup> Tamaa bonqquwan ta doonaa bochchidi, “Be7a; ha tamaa bonqqoi ne doonaa bochchiis; bochchin ne mooroi neeppe kichchiis; ne nagaraikka atto geetettiis” yaagiis.

<sup>8</sup> Hegaappe guyyiyan Godai, “Oona kiittoo? Nuuyyo oonee baanai?” yaagishin siyaas. Siyada, “Hekko, tana kiitta” yaagaas.

<sup>9</sup> Yaagin Godai hagaadan yaagiis; “Ba; baada ha asaayyo, ‘Intte sissaa siyeeta; shin intteyyo gelenna; xeeluwaakka xeelleeta; shin be7ekketa’ yaagada yoota. <sup>10</sup> Ha asaa wozanaa dammetta; eta haittaakka tulissa; eta aifiyaakka qilimmissa; hegee xayikko, eti bantta aifiyan be7ana; bantta haittan siyana; bantta wozananka akeekana; yaatidi eti taakko simmananne paxana” yaagiis.

<sup>11</sup> Yaatin, taani, “Abeet Godau! Hagee aide gakkanaashiinee?” yaagaas.

Yaagin i zaarettidi, “Katamati de7iya asaa xayidi, qolettana gakkanaashiina, keetatikka onana gakkanaashiinanne biittaikka muleera baises gidana gakkanaashiina.

<sup>12</sup> Taani GODAI asaa haassana; biittaakka balaale kessana. <sup>13</sup> Tammu asaappe issi asi biittaa bolli attikko, ikka xayana; qanxxirggin attida wolaa durumaa mala gidana; he durumai geeshsha zeretta gidana” yaagiis.

## 7

### *Kawuwaa Akaazassi Yiida Kiitaa*

<sup>1</sup> Ooziyaana na7ai Yo7aataami yelido Akaazi Yihudaa biittan kawotido wode, Sooriyaa biittaa Kawoi Raxiininne Israa7eela biittaa Kawoi Ramaaliyaa na7ai Paaquhi Yerusalame olanau yiidosona; shin xoonanau danddayibookkona.

<sup>2</sup> Sooriyaa biittai Efireema biittaara issippe olau caagettidoogaa Daawita zariyaappe kawotida kawoi siyido wode, deriyan carkkoi qaattiyo mittaadan, a wozananne a asaa wozanai dagaman shabbirettiis.

<sup>3</sup> Yaatin, GODAI Isiyaasa, “Neeni ne na7aa SHa7aari-Yaashuuba<sup>1</sup> ekkada, Akaazaara gaittanau ba; baada maayuwaa meeciyaageetu goshshaakko efiya ogiyaa matan qommoora de7iya dalbbanttaa zaraa xeeran neeni a demmana. <sup>4</sup> Demmada ayyo hagaadan yaagada yoota; ‘Naagetta; hirggoppa; Sooriyaa asaa, Kawuwaa Raxiinanne Ramaaliyaa na7aa hanqquwau yayyoppa; ne wozanaikka shabbirettoppo; aissi giikko, naa77u kawoti tamaappe attidi cuwattiya naa77u mita duruma mala.

<sup>5</sup> “‘Sooriyaa biittaa asai Efireema asaaranne Ramaaliyaa na7aara ne bolli iitabaa maqettidi, <sup>6</sup> “Ane Yihudaa biittan woraajjidi, mentterettidinne nu gidдон shaakkidi, Xaabi7eela na7aa kawoyoos” yaagoosona’ yaaga” yaagiis.

<sup>7</sup> Gidikonne, Ubbaa Haariya GODAI hagaadan yaagees; “He eta maqqoi minnenna; mulekka hegee polettenna. <sup>8</sup> Aissi giikko, Damasqqoi Sooriyaa biittau huuphe; Kawoi Raxiikka Damasqqo katamaayyo huuphe. Usuppun tammanne ichchashu laittaa gidдон Efireema biittai bunchchettidi, kawotetta gidannan attana. <sup>9</sup> Qassi Samaaree Efireema biittau huuphe; Ramaaliyaa na7ai Samaariyaa katamaayyo huuphe; intte ammanuwan minnidi eqqennan xayikko, intteikka eqqekketa” yaagees.

### *Amaanu7eeli Yaanaagaa Bessiya Malaataa*

<sup>1</sup> 7:3 SHa7aari-Yaashuuba: Ha Ibraawetto suntaa birshshettai “Amaridaageeti simmana” giyoogaa.

10-11 Qassikka GODAI Akaazayyo, “GODAI ne Xoossai neeyyo bolla saluwaappe, woikko garssa sa7aa ciimmaappe issi malaata immana mala oichcha” yaagiis. 12 SHin Akaazi, “Oichchikke; GODAAKKA paaccikke” yaagiis.

13 Yaatin, Isiyaasi, “Inttenoo, Daawita zaretoo, siyite! Intte asaa daafurssiyoogee ai guuxxin, qassi ta Xoossaa daafursseetii? 14 Yaatikko, Godai ba huuphen intteyyo malaataa immana; geela7iyaa shahaarada attuma na7aa yelana; a sunttaakka “Amaanu7eela”<sup>2</sup> yaagada sunttana. 15 I iitaa ixkanaunne lo77uwaa dooranau eriyo wode, meqqida maattaanne eessaa usttana. 16 SHin na7ai iitaa ixkanaunne lo77uwaa dooranau eranaappe kasetidi, neeni keehi yayyido naa77u kawotu biittati booddilana.

17 “Efireema biittai Yihudaa biittaappe shaahettoosappe doommin hanibeenna meto wodiya GODAI ne bolli, ne asaa bollinne ne aawaa keettaa bolli ehaana; i ehaanaageekka Asoore biittaa kawuwaa” yaagiis.

18 He gallassai gakkioyo wode, GODAI udunxxetuyyo, Gibxxen haaho shaafan de7iya asatuyyo suiqana; i mattata, Asoore biittaa asata xeesana. 19 Yaatin, eti ubbaikka yiidi, zanggaaraa shoobban, shuchcha gonggolowan, agunttai de7iyo buuraaninne mehiyaa heemmiyoosan gau7ana.

20 He gallassi Godai Efiraaxiisa SHaafaappe hefintta baggaappe huuphiyaa qanxxiya asa xeesana; ikka Asoore biittaa kawuwaa; i yiidi, intte huuphiyaa binnaanaa, intte asatettaa beelaalaanne intte buuchcha meedana.

21 He gallassi issi asi mexi issi maatta miizzanne naa77u deeshshatu xalaalaa ashshana. 22 Gidikkokka, eti maaxxiyo maattai keehi daro gidiyo gishshau, i meqqida maattaa usttana; he biittan attida asai ubbaikka meqqida maattaanne eessaa usttana.

23 He gallassi issi sha7u biran washettiya sha7u woiniyaa anoti de7iyoosan ubban kinddiichchonne aguntta xalaalai mukkana. 24 Biitta ubban kinddiichchoinne agunttai kumido gishshau, asai yaa biyo wode, zubbiiyaanne wonddafiyaa oiqqidi baana. 25 Kase xikkiyan bul77ido keratun ha77i kinddiichchoinne agunttai kumido gishshau yayyidi, issi asinne yaa beenna. Mehee la7ettiyoosaanne dorssi tubbiyoosaa gidana.

## 8

### *Asoore Kawuwaa Yuussaa*

1 GODAI tana hagaadan yaagiis; “Gita xaatta woraqataa ekkada, ‘Omooduwau eesota! Bonqqiyau ellella!’ yaagada, nabbabettiya pitaliyan xaafa. 2 Qeesiyaa Ooriyoonanne Yibaarakiyaa na7aa Zakkaariyaasa ammanttiya markkata oottada taani sunttana” yaagiis.

3 Hegaappe guyyiyan, taani hananabaa yootiya ta keettaayeera zin77aas; yaatin, a shahaarada issi na7aa yelaasu; yelin GODAI tana hagaadan yaagiis; “A sunttaa, ‘Omooduwau-Eesota-Bonqqiyau-Ellella’ yaagada suntta. 4 Na7ai, ‘Ta aawau, ta aayee’ yaagidi xeesiyoojaa eranaappe kase, Asoore biittaa kawoi Damasqqo duretettaanne Samaariyaa omooduwaa ekkidi efaana” yaagiis.

5 GODAI qassikka taayyo hagaadan yaagidi haasayis; 6 “Ha asai loddara goggiya Salihooma haattata ixxiidi, Raxiianne Ramaaliyaa na7aa ufaittidi ekkidosona. 7 Hegaa gishshau, taani Godai minonne daro gidiya Efiraaxiisa haattaa, Asoore kawuwaa a tooranchchatu ubbaara ehaana hanais. I shafiyaa ubbaa kumidi kiyana; gaxaa ubbaa maayidi goggana. 8 Kixxiidi goggiiddi, Yihudaa gelana; eelliiddi yaara kanttana; kixai qooriyaa gakkana. Abeet Amaanu7eela,<sup>3</sup> kafoi ba qefiyaa micciyoogaadan, haattaa kixai ne biittaa ubbaa bollan micettana” yaagiis.

9 Inttenoo kawotettatoo, issippe shiiqidi garmmaamite! SHin meqerettite! Haaho biitta ubban de7iya asatoo, ezgite! Olau giigite! SHin meqerettite! Ee, olau giigite;

<sup>2</sup> 7:14 Amaanu7eela: Ha Ibraawetto sunttaa birshshettai, “Xoossai nunaara de7ees” giyoogaa.

<sup>3</sup> 8:8

Amaanu7eela: Ha Ibraawetto sunttaa birshshettai, “Xoossai nunaara de7ees” giyoogaa.

shin meqerettite! <sup>10</sup> Olaa olettanau maqettite; shin intte maqqoi laalettana; intte halchchuwaa haasayite; shin intte halchchoi halana; aissi giikko, Xoossai nunaara de7ees.<sup>4</sup>

### *GODAI Seeriis*

<sup>11</sup> GODAI ba mino kushiya ta bolli wottidi, taayyo haasayiis; taani ha asaa ogiyaa kaallenna mala, tana hagaadan yaagidi seeriis; <sup>12</sup> “Ha asai maqqo giyoobaa ubbaa maqqo gooppite; eti yayyiyoobau yayyoppite woikko dagammoppite. <sup>13</sup> Intte geeshsha gaanau bessiyaagee Ubbaappe Wolqqaama GODAATTENNEE; intte ayyo yayyanaunne dagammanau bessees. <sup>14</sup> I geeshsha soho gidana; shin Yihudaa biittaa asaayyoonne Israa7eela biittaa asaayyo i xubbiya shuchchanne ooggiya zaalla gidana; Yerusalaamen de7iya asaayyo i gitenne pire gidana. <sup>15</sup> Etappe daroi xubettana; kunddidikka meqqana; piriyan oiqettidikka omoodettana” yaagiis.

<sup>16</sup> Taani yootidoogaa naaga; ta erissiyo ashkkaratu giddon higgiiyaa attama. <sup>17</sup> Taani ba som77uwaa Yaaqooba zaretuppe genttiya GODAA naagana; qassi an ammanettana.

<sup>18</sup> Tananne taayyo GODAI immido naata be7ite. Nuuni Xiyoone Deriyan de7iya Ubbaappe Wolqqaama GODAAPPE Israa7eelayyo malaatanne markka.

<sup>19</sup> “Saasukkidinne zuuzummidi haasayiya shareechchotanne moitilliyaa haasayis-siyaageeta oichchite” yaagidi inttena zoriya asai de7ees. Haiqqidaageeta paxa de7iyaageetubaa oichchiyoogaappe, asai bantta Xoossaa oichchanau bessennee? <sup>20</sup> Higgiiyaanne GODAI yootiyoobaa siyite! He asati ha qaalaadan haasayana xayikko, etau sa7ai wonttena.

<sup>21</sup> Asai waayettidinne namisettidi, biittan toilattana; eti namisettido wode yiillotidi, pude xeellidi bantta kawuwaanne bantta Xoossaa qanggana. <sup>22</sup> Sa7aakko duge xeellidi, waayiyaa, xumaanne yashshiya shoonnuwaa be7ana; eti sakkana xumau olettana.

## 9

### *Sinttappe Kawotana Kawuwaa*

<sup>1</sup> Gidikonne, waayettidaageetussi hagaappe sinttau xumenna. Beni wode GODAI Zaabiloona biittanne Nifttaaleema biittaa kaushshiis; shin sinttappe he Meediteraane Abbaa ogiyan de7iya biittanne Yorddaanoosa SHaafaappe hefintta baggan de7iya “Aihuda gidenna asai de7iyo Galiila” giyo biittaa i bonchchana.

<sup>2</sup> Xuman hemettiya asai wolqqaama poo7uwaa be7iis; qassi sakkana xuma biittan de7iyaageetuyyo poo7oi poo7iis.

<sup>3</sup> Neeni kawotettaa asaa darissadasa; etau ufaissaa gujjadasa; asai kattaa cakkiyo wode ufaittiyoogaadan, woikko omooduwaa shaakkidi ekkiyo wode ufaittiyoogaadan, ne sinttan ufaittana. <sup>4</sup> Aissi giikko, neeni Midiyaama biittaa xoonido gallasaadan, eta deexxiya qambbaraa, eta hashiyaa xam77aanne eta naaqqiyaageetu dullaa mentterettadasa. <sup>5</sup> Woraajjiya olanchchatu caammayne suuttan munaqettida maayoi ubbai taman eettiyoobaa gidana. <sup>6</sup> Na7i nuuyyo yelettiis! Attuma na7i nuuyyo imettiis! Kawotettaa a hashiyan wodhdhana; a sunntai, “Maalaalissiyaabaa Zoriyaa-gaa, Wolqqaama Xoossaa, Merinaa Aawaa, Sarotettaa Halaqaa” geetettana. <sup>7</sup> A kawotettaa daruwaunne a sarotettau zawai de7enna; hachchippe doommidi, merinaa gakkanaassi, suure pirdaaninne xillotetan minttanaunne essanau Daawita kawotaa araataaninne a kawotettan i kawotana; Ubbaappe Wolqqaama GODAA mishoi hegaa polana.

### *Godaa Hanquwaa*

<sup>8</sup> Godai Yaaqooba zaretu bolli qaalaa kiittiis; kiittin Israa7eela kawotettaa darcunttanau gakkiiis. <sup>9</sup> Asai ubbai, Efireema asainne Samaariyaa kataman de7iyaageeti,

<sup>4</sup> 8:10 Xoossai nenaara de7ees: Hagee Ibraawetto qalaan “Amaanu7eela” giyoogaa.

ayyuwaaninne otoruwan haasayiyaageeti, hagua oottidaagee Godaa gidiyooгаа erana. <sup>10</sup> Eti, “Xuubiyaappe keexettidaageeti qolettidosona; shin nuuni eta zaarettidi, masettida shuchchatun keexxana; ettati qanxxettidosona; shin nuuni eta sohuwan zigata laammana” yaagidosona.

<sup>11</sup> Hegaa gishshau, etaara olettida morkketa GODAI eta bolli denttettiis. <sup>12</sup> Awai mokkiyo baggaappe Sooriyaa biittaa asatinne awai wulliyo baggaappe Pilisxxeema biittaa asati bantta doonaa hanggidi, Israa7eela miidosona. He ubbankka GODAA hanqqoi simmibeenna; a kusheekka biron denddidosan de7ees.

<sup>13</sup> Gidikonne, asati banttana shocidaagaakko simmibookkona; Ubbaappe Wolqqaama GODAAKKA koyibookkona. <sup>14</sup> Hegaa gishshau, mexi issi gallassi GODAI Israa7eelappe huuphiyaanne goinaa, xoqqa zambbaa daashshaanne ziqqa maqqa qanxxana. <sup>15</sup> Cimatinne bonchchettidaageeti huuphe; wordduwaa tamarissiya hananabaa yootiyaageeti goina. <sup>16</sup> Ha asaa kaalettiyaageeti, wora kaalettoosona; eta kaalliyaageetikka baloosona. <sup>17</sup> Hegaa gishshau, Godai eta yelaga asatun ufaittena; aawi baina naatussinne am77etussi qarettenna. Aissi giikko, asi ubbi iitanne Xoossaa erennaagaa; asi ubbi ba doonan iitabaa haasayees. He ubbankka Godaa hanqqoi simmibeenna; a kusheekka biron denddidosan de7ees.

<sup>18</sup> Iitatetai tamadan xuuggees; kinddiichchuwaanne agunttaa mi xaissees; sikkida worai eexxin, cuwai tuussadan sitti giidi, pude kiyees. <sup>19</sup> Ubbaappe Wolqqaama GODAA hanqquwan biittai xuugettana; asaikka taman eettiyoobaa mala gidana; ooninne ba ishaa ashshanau qoppenna. <sup>20</sup> Eti ushachcha baggappe bonqqana; shin namiset-tana; haddirssa baggappe maana; shin kallokkona; eti bantta yelido naata maana. <sup>21</sup> Minaasee Efireema, Efireemikka Minaasa maana; eti issippe gididi, Yihudaa biittaa morkkana. He ubbankka GODAA hanqqoi simmibeenna; a kusheekka biron denddidosan de7ees.

## 10

<sup>1</sup> Iita higgiiyaa kessiyaageetussinne huqqunniyo xuufiyaa xaafiyaageetuyyoo aayye7ana! <sup>2</sup> Hegan eti manqqotu pirddaa geellayoosona; hiyyeesatu maataakka sugoosona. Yaatidi am77etu aquwaanne aayiyaa aawai baina naatakka bonqqoosona. <sup>3</sup> Haaho biittaappe yiya metuwan i inttena qaxxayiyoo wode, waanuuteetii? Maaduwaa demmanau ookko baqatuuteetii? Intte duretettaa awan gottuuteetii? <sup>4</sup> Intte olan haiqqana; qachchidi goochchin, intte baana. Hegee ubbai haninkka, GODAA hanqqoi wuribeenna; qaxxayanau i ba kushiyaa yeddi wottiis.

### *Asoore Kawoi Xoossai Go7ettiyo Miishsha Kiyana*

<sup>5</sup> Godai hagaadan yaagees; “Ta yiilluwau gatima gididanne ta eexxiya hanqquwau xam77a gidida Asoore biittaa asau aayye7ana! <sup>6</sup> Taani Asooreta Xoossaa erenna kawotettatu bolli kiittana; eta duretaa ubbaa omooddanaadaaninne bonqqanaadan, qassi ogiyan de7iya urqqaadan, eta yedhdhanaadan, tana hanqqetissida asaa bolli taani Asooreta azazana” yaagiis.

<sup>7</sup> SHin Asoore kawoi hagua halchchibeenna; a wozanaikka hagaadan qoppibeenna. I halchchidoogee kawotettata bashshanaassanne muleera xaissanaassa. <sup>8</sup> I ceeqettiiddi, hagaadan yaagiis; “Ta gadaawati ubbati kawo gidokkonaayye? <sup>9</sup> Kalno katamai Karkkamiisha katamaa mala gidenneeyye? Hamaata katamai Arifaada katamaa mala gidenneeyye? Samaariyaa katamaikka Damasqqa katamaa mala gidenneeyye? <sup>10</sup> Yerusalaameeninne Samaariyan de7iya masettida eeqa misiletuppe dariya misiletussi goinniya kawotettata qaxxayanau, taani ta kushiyaa yeddaas. <sup>11</sup> Taani Samaariyaa katamaa bollinne an de7iya eeqa misiletu bolli oottidoogaadan, Yerusalaame katamaa bollinne a eeqatu bolli oottikkinaayye?” yaagiis.



<sup>12</sup> Godai Xiyoone Deriyaa bollinne Yerusalaame bolli ba oottiyo ooso ubbaa poli-doogaappe guyyiyan, Asoore biittaa kawuwaa a ayyuwaunne a otoruwau qaxxayana. <sup>13</sup> Aissi giikko, Asoore kawoi hagaadan yaagees; “Ta kushiya minotettan, ta aadhdhida eratetaaninne taayyo de7iya akeekan taani haggaa oottaas. Taani kawotettatu gidдон de7iya zawata shoddaas; eta biittatun de7iya asaa aquwaa bonqqaas; korima booraadan qaicada, kawotaa araatatun uttidaageeta ubbaa duge wottaas. <sup>14</sup> Asi kafo keettan kushiya yeddiyoogaadan, taani kawotettaa duretettaa bolli ta kushiya yeddaas. Qassi dogettidi attida phuuphulleeta shiishshiyooogaadan, taani biitta ubbaa shiishshaas. Paallanau ba qefiyaa baqqiyaabi, woi haasayanau ba doona pogiyaabi, woikko qassi waassiyaabi issoinne baawa” yaagiis.

<sup>15</sup> Tumu kalttai banan qanxxiya bitaniyaappe, “Taani aadhdhais” gaanau dand-dayiyye? Woikko magaazee bana goochchiya bitaniyaappe, “Taani darais” giyye? Xam77ai bana oiqqiya asa denttena; cugoi asa denttena. <sup>16</sup> Hegaa gishshau, Godai, Ubbaappe Wolqqaama GODAI, a mino tooranchchatu bolli laafettiya harggiyaa yeddana; a bonchchuwaappe garssaara mishoi eexxiya tamaadan eexxi kiyana. <sup>17</sup> Israa7eela Poo7oi tama gidana; Israa7eela Geeshshaikka laco gidana; yaatidi a agunt-taanne a kinddiichchuwaa issi gallassi xuuggananne maana. <sup>18</sup> GODAI ba woraa mittaa bonchchuwanne ba aradda gadiyaa bonchchuwaa xaissana; simmi hegee harggiya asi siliyoogaadan silana. <sup>19</sup> A woran attana mittati keehi guutta gidiyoo gishshau, issi guutta na7ikka qoodidi wurssana.

### *Amaridaageetu Simuwaa*

<sup>20</sup> He gallasan Israa7eelappenne Yihudaappe attidaageeti banttana shocidaageetun zemppokkona; shin eti tumuppe GODAN, Israa7eela Geeshshan zemppana. <sup>21</sup> Atettai, Yihudaa asaa atettai Wolqqaama Xoossaakko simmana. <sup>22</sup> Neno Israa7eelaa, ne asai abbaa matan de7iya shafiyaa keena gidikkokka, etappe amaridaageetu xalaalai simmana. Xillotettai kumi palahido bashshai awaajettiis. <sup>23</sup> Ee, Godai, Ubbaappe Wolqqaama GODAI sa7aa ubbaa bollan ehaanau qachchido bashshaa ehaana.

### *Xoossai Asoora Qaxxayana*

<sup>24</sup> Hegaa gishshau, Godai, Ubbaappe Wolqqaama GODAI hagaadan yaagees; “Xiyoone kataman de7iya ta asatoo, Gibxxeti oottidoogaadan, Asooreti inttena xam77an shociyo wodenne bantta gatimaa intte bolli denttiyo wode yayyoppite. <sup>25</sup> Qii guutta wodiyaappe guyyiyan, taani inttena hanqqettiyoogaa aggana; hegaappe guyyiyan, ta hanqqoi eta xaissanau baana” yaagees.

<sup>26</sup> Ubbaappe Wolqqaama GODAI Oreeba giyo shuchchaa achchan Midiyaamata shocidoogaadan, eta bolli lissuwaa denttana. I Gibxxen oottidoogaadan, ba gatimaa abbaa bolli denttana. <sup>27</sup> He gallassi, a toohoi intte hashiyaappe wodhdhana; a qambbaraikka intte morggiyaappe kichchana. Intte orddido gishshau, qambbarai meqqana.

### *Woraajjiyaageeti Olido Olaa*

<sup>28</sup> Morkkiyaa wotaaddarati Aaya katamaa gelidosona; Migiroona giyo sohuwaarakka kanttidosona; bantta ola miishshaakka Mikimaasa kataman wottidosona. <sup>29</sup> Eti deriyaa kanttiyoosaara pinnidi, Gebaa7a kataman aqidosona. Raama kataman de7iya asai ubbai kokkoriis; kawuwaa Saa7oola kataman Gib77an de7iya asaikka baqatiis. <sup>30</sup> Galliima asau, waasuwa xulluusite! Laisha asau, ezggite! Anatoota kataman de7iya asau, oichchiyoogaa odite! <sup>31</sup> Maadimeena giyo katamaa asai baqatiis; Gebiima asaikka ba shemppuwau qosettiis. <sup>32</sup> Hachchi morkkiyaa wotaaddarati Nooba kataman de7oosona; yan eti bantta kushiya qaattiiddi, Xiyoone Deriyaa, Yerusalaame katamaa baabisoosona.

<sup>33</sup> Be7ite, Godai, Ubbaappe Wolqqaama GODAI tasheta gita wolqqan qanxxana; aduqqida mittatika qanxxettana; qassi bonchchettidaageetikka kauyyana. <sup>34</sup> GODAI sikkida woraa kalttan qanxxana; Liibaanoosikka Wolqqaamaa sinttan kunddana.

## 11

### *Sarotettai Kumido Kawotettaa*

<sup>1</sup> Daawita aawaa Isseyaa zaree mittaa durumaa mala gidana; durumai aaciyooqaadan, Daawita zaretu giddoppe marai (issi kawoi) kiyana. <sup>2</sup> GODAA Ayyaanai, aadhdhida eratettaanne akeekaa Ayyaanai, zoriyaanne wolqqaa Ayyaanai, eratettaanne GODAAYYO yayyiyo Ayyaanai a bolli shemppana. <sup>3</sup> GODAAYYO yayyiyoogan i ufaittees; ba aifee be7idoban coo pirddenna; woikko ba haittai siyidoban coo kuuyenna. <sup>4</sup> SHin hiyyeesatuyyo i xilluwan pirddana; sa7an de7iya metootanchchatu yohuwaakka i suuretettan kuuyana. I ba inxxarssaa gatiman sa7aa shocana; ba doonaa shemppuwan iitata worana. <sup>5</sup> Xillotettai a xeessau dancco gidana; ammanettiyoogeekka a miyyiyau qabatto gidana.

<sup>6</sup> Wanggireelloi dorssa maraara issippe de7ana; maaheekka deeshsha maraara issippe zin77ana; miizaa maraara, gaammuwaa maraaranne daddaruwaara issippe heemettana; guutta na7i eta heemana. <sup>7</sup> Miizziyaanne beeriyaa geetettiya do7ai issippe maana; eta maratikka issippe zin77ana; gaammoi booraadan utulaa maana. <sup>8</sup> Xammiya na7i shooshshaa ollan kaa7ana; xanttaa duuxxida na7i woriya shooshshaa ollan ba kushiya yeddana. <sup>9</sup> Ta geeshsha deriyan ooninne qohettenna, woikko bayenna; aissi giikko, abbai haattan kumiyoogaadan, sa7ai GODAA eriyooogan kumana.

### *Betida Asai Simmiyo Simuwaa*

<sup>10</sup> He gallassi Isseyaa zaree asaayyo malaata gididi eqqana; eqqin kawotetta ubbai a koyana; i de7iyo sohoikka bonchchettana. <sup>11</sup> He gallassi Godai ba asaa atettaa Asooreppe, Gibxxeppe, Patisroosappe, Toophphiyaappe, Elaamappe, Baabilooneppe, Hamaatappenne abbaa doonan de7iya biittatuppe naa77anttuwaakka zaaridi ekkana ba kushiya yeddana. <sup>12</sup> Kawotettatussi malaataa i xoqqu oottidi denttana; Israa7eelappe laalettidaageeta issippe gattana; Yihudaappe piskki giidaageetakka sa7aa oiddu zooziyaappe i shiishshana.

<sup>13</sup> Hegaappe guyyiyan, Efireema qanaatee appe shaahettana; qassi Yihudaa wais-siyaageetikka xoqoletti xayana. Efireemi Yihudaa qanaatenna; Yihudaikka Efireema waissenna. <sup>14</sup> Eti arggo baggan de7iya Pilisxeema biittaa bolli paallidi wodhdhana; arshsho baggan de7iya asaakka eti issippe bonqqana. Eti Eedooma bollinne Moo7aaba bolli bantta kushiya wottana; Amoonatikka etau azazettana. <sup>15</sup> GODAI Gibxxe miyyiyan de7iya Zo7o Abbaa muleera melissana; ba laxiya carckuwaara ba kushiya Efraaxiisa SHaafaa bolli wuxaawuxana. Yaatiidi asai mela sohuwaara pinnana mala, laappun qeeri shaafa kessidi shocana. <sup>16</sup> Israa7eela asai Gibxxe biittaappe kiyiyo wode ogee de7idoogaadan, a asaappe attida atettatussi Asoore biittaappe kiyiyo ogee de7ana.

## 12

### *Galataa Yettaa*

<sup>1</sup> He wode intte hagaadan yaagana;

“Abeet GODAU, neeni tana hanqgettadasa;  
hanqquwaappekka simmadasa;  
yaatada tana minttettadasa.  
Hegaa gishshau, taani nena galatais.

<sup>2</sup> “Be7ite, Xoossai ta atotettaa;

taani an ammanettada, yayyikke.  
 Aissi giikko, GODAI Xoossai  
 taayyo wolqqanne yetta.  
 I ta atotettaa gidiis”  
 yaagana.

<sup>3</sup> Ashshiya pulttotuppe haattaa intte ufaissan duuqqana. <sup>4</sup> He gallassi qassi intte hagaadan yaagana;

“GODAA galatite!  
 A sunttaakka xeesite.  
 A oosota kawotettatu ubbaa gidдон erissite.  
 A sunntai xoqqu xoqqu giidoogaa awaajjite.

<sup>5</sup> GODAI gita oosuwaa oottido gishshau,  
 ayyo yexxite.

Hagee sa7a ubban eretto.

<sup>6</sup> Israa7eela Geeshshai intte gidдон  
 xoqqu xoqqu giido gishshau,  
 inttenoo, Xiyoonen de7iyaageetoo,  
 hobbocite! Ufaissau yexxite!”  
 yaagana.

## 13

### *Xoossai Baabiloone Qaxxayana*

<sup>1</sup> Amoxa na7aa Isiyaasayyo GODAI Baabiloonebaa qonccissin be7idoogee hagua.

<sup>2</sup> Mela deriyaa bolli banddiraa essite; essidi, intte qaalaa xoqqu oottidi, etayyo waassite; eti halaqatu penggiyaara gelana mala, wuttite. <sup>3</sup> Taani hanqqettidoogeeta qaxxayana mala, ta geeshshata azazaas; taani xooniyooogan ufaiittiya ta wolqqaama tooranchchataakka xeesaas.

<sup>4</sup> Cora asai wocamiyoogaadan, deriyaa huuphiyan wocamiyo wocamaa siyite! Qassi kawotettati issippe shiiqidi shabbirettiyo wocamaa siyite! Ubbaappe Wolqqaama GODAI tooranchchata olau salppissees. <sup>5</sup> GODAINNE i ba hanqquwaa polissanau go7ettiyo miishshati biitta ubbaa xaissanau, haaho biittaappe, salotu gaxaappe yoosona.

<sup>6</sup> GODAA gallassai matido gishshau yeekkite! He gallassai Ubbaappe Wolqqaama Xoossaa matappe bashshadan yaana. <sup>7</sup> Hegaa gishshau, kushe ubbai hilssi gaana; asa ubbaa wozanaikka seerana. <sup>8</sup> Eti dagammanna; miixainne sahoi eta oiqqana. Maareti oiqqido maccaaseedan, eti miixattana. Eti dagammidi, issoi issuwaa xeellana; eta som77oikka yeellatana. <sup>9</sup> Be7ite; meqettaa iitidi, yiilluwaaninne suulo hanqquwan biittaa baisa kessanaunne an de7iya nagaranchchata xaissanau, GODAA gallassai yees. <sup>10</sup> Saluwaa xoolinttetinne xoolinttetu citati bantta poo7uwaa immennan ixkana; awa aifee mokkiiddi xumana; aginaikka poo7ennan aggana.

<sup>11</sup> GODAI hagaadan yaagees, “Taani ha sa7aa a iitatettaa gishshau, iitatakka eta nagaraa gishshau qaxxayana. Taani otoranchchatu otoruwaa shaarana; meqettaa iitatu otoruwaakka kaushshana. <sup>12</sup> He bashsha ubbaappe attidaageeti walahi baina worqqaappekka aadhdhidi be7anau al77ana; asa na7ai Ofiira walahi baina worqqaappekka aadhdhidi be7anau al77ana. <sup>13</sup> Hegaa gishshau, Ubbaappe Wolqqaama GODAA hanqquwan, a hanqquwaa suuluwaa gallassi taani salota kokkorssana; sa7aikka ba de7iyoosaappe qaaxxana” yaagees.

<sup>14</sup> SHankkaappe baqatiya gaaraadan, woikko heemmiya asi baina dorssaa wudiyaadan, asi ubbi ba asaakko asaakko simmana; ubbaikka ba biitti baqatana.

<sup>15</sup> Beettidai ooninne cadettana; oiqettidai ooninne bisuwan haiqqana. <sup>16</sup> Eta guutta

naati eta sinttan busakettana; eta keettatika bonqqettana; eta maccaasatuurakka wolqqan hara attumaasati gaittana.

<sup>17</sup> Be7ite, biraa koyenna, worqqankka ufaittenna Meedoona biittaa asata taani eta bollan denttana. <sup>18</sup> Eta wonddafeti wodallata woroosona; qiiba naatakka yeddi maarokkona; eta aifee purggiya naatuyyookka qarettenna. <sup>19</sup> Kawotettatussi bonchcho, qassi Baabiloone asaassikka alleeqonne ayyo gidida Baabiloone biittaa GODAI Sadoomadaaninne Gamooradan aatti yeggana. <sup>20</sup> He biittan mulekka asi uttenna; woikko yeletaappe yeletaa gakkanaassikka yan asi de7enna; Araba asikka yan ba dunkkaaniyaa tolenna; dorssaa wudiyaa heemmiyaageetikka yan bantta wudiyaa allaxxissokkona. <sup>21</sup> SHin yan bazzo do7ati allaxxana. Worakanati eta keettaa kumana; guttoti hegan de7ana; bazzo deeshshati hegan guppana. <sup>22</sup> Eta qatotun godaree waassana; eta yallisa kawo keettatunkka worakanai boccana. A wodee matattiis; gallassaikka gam77enna.

## 14

### *Israa7eela Asai Omooduwaappe Simmana*

<sup>1</sup> GODAI Israa7eela asau qarettana; Israa7eelakka zaarettidi doorana. Eta eta buzo biittan wottana; betetikka etaara gaittidi, Israa7eela asaara issippe de7ana. <sup>2</sup> Daro kawotettai Israa7eela asaa ekkidi, eta sohuwaa ehaana; ehin Israa7eela asai kawotettata maccanne attuma ashkkaradan, GODAA biittan haarana. Eti banttana omooddi-daageeta omooddana; banttana huqqunnidaageetakka haarana.

### *Baabiloone Kawoi Duufuwan Gelido Gelettaa*

<sup>3</sup> GODAI inttena intte tuggaappe, metuwaappenne intte haarettido iita aillettaappe shemppissido gallassi, <sup>4</sup> intte Baabiloone kawuwaa bolli hagaadan yaagidi qilliiccana; “Huqqunniyaagee waani aggid ee; a hanqquwaa suuloikka waani attidee! <sup>5-6</sup> Kawotettata qareti baina naaquwaa naaqqida iitatu gatimaanne haariyaageetu xam77aa GODAI menttiis. Eti asaa wurssetti baina hanqquwan shocidosona. <sup>7</sup> Biitta ubbai etappe shemppidi, woppa de7ees; asaikka yettaa yexxees. <sup>8</sup> Harai attin, zigatika Liibaanoosa xiiddatika, kawuwaa kunddettan ufaittidi, ‘Neni kauyyada wodhdhaichchaappe sinttan, nuna qanxxanau yiyaabi baawa’ yaagoosona.

<sup>9</sup> “Neni yiyo wode, Si7oolee nena mokkanau hirkkin giigiis; i kase biittaa kaalettida asatu moitilleta nena sarotanaadan denttettees; qassi kase kawotettatussi kawo gidida ubbatakka eta araataappe dentti essees. <sup>10</sup> Eti ubbaikka hagaadan yaagana; ‘Hekko neenikka nunadan, wolqqa xayadasa; neenikka nu mala gidadasa! <sup>11</sup> Kase diittaa diixxiiddi sabbiyo ne bonchchoi Si7ooliyan duge geliis. Duuchhati neeni zin77iyo hiixa; guxunetikka neeni maayiyo afala gidana’ yaagana.

<sup>12</sup> “Nenoo wanttaa na7au, bakkaaliyau, saluwaappe waana kunddadii! Nenoo kawotettaa kaushshidaagoo, waana qanxxettada sa7an wodhdhadii! <sup>13</sup> Neni ne wozanan, ‘Taani saluwaa kiyana; ta kawotettaa araataakka Xoossaa xoolinttetuppe bollaara xoqqan wottana; huuphessa bagga gaxan, yaa7ai shiiqiyo deriyaa huuphiyan uttana. <sup>14</sup> SHaarati de7iyo xoqqaappekka bollau pude aadhdhana; taani tana Ubbaappe Xoqqiya Xoossaa mala oottana’ yaagadasa. <sup>15</sup> SHin neeni Si7ooliyan, hirkki ciimma ollan duge yegettadasa.

<sup>16</sup> “Nena be7iyaageeti, ‘Biittaa qaattidaagee, kawotettata kokkorssidaagee, <sup>17</sup> sa7aa bazzo kessidaagee, sa7an de7iya katamatakka aatti yeggidaagee, ba qasho asatakka soo yeddennan diggida bitanee hagee?’ yaagidi tishshi ootti akeekidi xeellana.

<sup>18</sup> “Kawotettatu kawoti ubbai ba duufuwan duufuwan bonchchuwan zin77ana. <sup>19</sup> SHin neeni ixettida tashedan, ne duufuwaappe gaxi olettadasa; ne ahai bisuwan cadetti haiqqida ahan, qassi ollan de7iya shuchchatukko duge wodhdhiyaageetu ahan kamettiis. Neni tohuwan yerettida aha mala gidadasa. <sup>20</sup> Neni mooguwaakka etaara

issippe moogettakka; aissi giikko, neeni ne biittaa bashshadasa; ne asaakka woradasa. Iitaa oottiyaageetu sunttai naa77antto mulekka xeesettoppo. <sup>21</sup> Eta aawatu nagaraa gishshau, naata woranau giigissite; hegee xayikko eti denddidi, biittaa laattana; sa7aa ubbaakka katama xalla oottana” yaagana.

#### *Xoossai Baabiloone Biittaa Xaissana*

<sup>22</sup> Ubbaappe Wolqqaama GODAI hagaadan yaagees; “Taani eta bollan denddana; denddada eta sunttaa, eta atettaa, eta zereettaanne eta yeletaa Baabilooneppe xaissana. <sup>23</sup> Taani Baabiloone guttoi de7iyoosanne haatti eelliyoosa oottana; bashshaa puxan taani a pittana. Taani Ubbaappe Wolqqaama GODAI haga odais” yaagees.

#### *Xoossai Asooreta Xaissana*

<sup>24</sup> Ubbaappe Wolqqaama GODAI hagaadan yaagidi caaqqiis; “Taani halchchi-doogaadan hanana; taani qoppidoogaadanka polettana. <sup>25</sup> Taani Asoore biittaa bitaniyaa ta biittan mentterettana; ta deretu huuphiyan taani a yedhdhana; a qambbarai eta bollaappe, a toohoikka eta hashiyaappe kichchana” yaagiis. <sup>26</sup> Sa7au muliyau qofet-tida qofai haga; kawotettatu ubbaa bollan micettida kusheekka haga. <sup>27</sup> Ubbaappe Wolqqaama GODAI haga qoppido gishshau, a ooni digganau danddayii? A kusheekka micettiis; heгаа ooni guyye zaaranau danddayii?

#### *Xoossai Pilisxeemata Xaissana*

<sup>28</sup> Kawoi Akaazi haiqqido laitti odettida qalalai hagaadan yaagiyaagaa; <sup>29</sup> “Inttenoo Pilisxeema asatoo ubbatikka, inttena shocida xam77ai meqqido gishshau ufaittoppote; aissi giikko, he shooshshaa zariyaappe hasoi kiyana; a zereettaikka qassi paalliya shooshshaa gidana. <sup>30</sup> Hiyyeesatu baira naati qumaa maana; metootanchchati woppu giidi zin77ana. SHin taani ne zariyaa koshan wurssana; qassi neeppe attidaageetakka worana.

<sup>31</sup> “Nenoo penggiyau, yeekka! Nenoo katamau, waassa! Inttenoo Pilisxeema asau ubbau, intte ubbaikka hirggan maashite! Aissi giikko, huuphessa baggappe cuwai kiyidi yees; he citaappe duuxxidi guyye attiyaabi baawa. <sup>32</sup> Kawotettai kiittidoogeetussi woigidi zaarane? ‘GODAI Xiyoone keexxiis; keexxin qohettida a asai i gidon qosetti attiyooosaa demmiis’ yaagana” yaagiya qalalai odettiis.

## 15

#### *Xoossai Moo7aaba Biittaa Xaissana*

<sup>1</sup> Moo7aaba biittaaabaa GODAI odido qalalai haga: Moo7aaban de7iya Era giyo katamai issi qammi qolettidi xayiiis; qassi Moo7aaban de7iya Qiira giyo katamaikka issi qammi qolettidi xayiiis. <sup>2</sup> Diboona katamaa asai bantta eeqa keettan yeekkanau xoqqa sohuwaa kiyidosona. Moo7aaba biittaa asai Nabonne Medaaba giyo katomatussi hegaadan yeekkees. Huuphe ubbai bo77atiichchiis; buuchcha ubbaikka meedettiichchiis. <sup>3</sup> Ogee de7iyoosan ubban eti waaruwaa maayidosona; keettaa bollan dembbayi keexxosaanne dabaaba bolla ubban eti yeekkoosonanne afuttaa holssayoosona. <sup>4</sup> Haseboona katamaa asainne El77aale katamaa asai waassoosona; eta waasuwa cenggurssaikka Yahaaxa giyoosaa gakkanaashin siyettees. Hegaa gishshau, olau gixxida Moo7aaba wotaaddarati bantta cenggurssaa xoqqissidi waassidosona; eta shemppoikka eta garssan kokkoriis. <sup>5</sup> Taani Moo7aabassi wozanaappe yeekkaas; an de7iya asai Xoo7aaronne Egilaati-SHaliishiyaa giyo katamatau baqatiis. Eti Luhiita ogiyan yeekkiiddi boosona; baggati qassi Horonaima biyo ogiyan, bantta bashshaa gishshau, waasuwa xulluusoosona. <sup>6</sup> Nimirima haattati to7idosona; maatai meliis; aacaikka shulliis; irxxabai ubbaikka xayiiis. <sup>7</sup> Hegaa gishshau, eti bantta shiishshido aquwaanne minjaa tookki ekkidi, ahaayaa giyo mittai de7iyo wombbaappe hefintti efoosona. <sup>8</sup> Moo7aaba yuushoi ubbai waaso xalla gidiis; eta waasoi Egilaimanne



Bi7eeri-Eliima gakkanaashin siyettees. <sup>9</sup> Diboona katamaa haattati suutta xalla gididosona; gidikkonne, taani Diboona katamaa bolli hegaappekka dariyaabaa ehaana. Moo7aabappe kessi ekkidi yiyaageetu bollinne he biittan paxa attidi de7iyaageetu bolli gaammuwaa yeddada wurssana.

## 16

### *Moo7aabassi Hidooti Baawa*

<sup>1</sup> Moo7aaba asai bazzo biyo ogiyan de7iya Selaa7a katamaappe yelaga dorssa orggeta Yerusalaamen de7iya biittaa haariyaagaayyo yeddite. <sup>2</sup> Moo7aaba maccaasai bantta de7iyo keettaappe gaxan laalettida kafotudan, Arnnoona SHaafaa lanqqiyan laalettana.

<sup>3</sup> Moo7aaba asai Yihudaa asaa hagaadan yaagana; “Nuna zorite; suure pirddite; seeta gallassan intte kuwaa qammaadan kuwayite. Yedetettidaageeta qosite; baqati yidaageetakka aatti immoppite. <sup>4</sup> Moo7aabappe yedetettidaageeti intte giddon de7ona; eta xaissiyaageetuppe eti qosetti attiyo soho gidite. Eta huqqunniyaageeti wuridosona; bashshai attiis; eta tuggaiyaageetikka biittaappe xayidosona. <sup>5</sup> Hegaappe guyyiyan, issi kawotaa araatai aggenaa siiquwan eqqana; he araatan, Daawita dunkkaaniyan issi ammanettiya daannai uttana. I suuretettaa koyana; xillotettaa oottanaukka eesotana” yaagana.

<sup>6</sup> Yihudaa asai hagaadan yaagana; “Moo7aaba biittaa asai ai keenaa otorettiyaakko, nu eta otoruwaabaa siyida; eta ayyuwaanne eta cashshaakka siyida; shin eta otoroi hada” yaagana.

<sup>7</sup> Hegaa gishshau, Moo7aabi yeekko; asi ubbikka Moo7aabassi yeekko; Qiirihereesa kataman intte de7iyo wode miido lo77o qumaa hassayidikka yeekkite. <sup>8</sup> Haseboona shooqatinne Siibima woiniyaa tokkiyo sohoti xayidosona; etau tashee Yaa7izeera gakkidi, bazzuwau zaa7ido doorettida woineta kawotettatu halaqati yererettidi xaisidosona; eta aacaikka zaa7idi, abbaa pinniis. <sup>9</sup> Taani Yaa7izeera katamau yeekkiyoogaadan, Siibima katamaa woinetussikka yeekkais. Haseboonanne El77aale katamato, taani ta afuttan inttena looxigissais. Aissi giikko, intte mittaa aifiyaanne intte bootida kattaa bollan olaa waasoi denddiichchiis. <sup>10</sup> Kattaa aifiyan kumida shooqaappe ufaissainne hashshu guussai ekettiichchiis. Woiniyaa tokkiyo sohuwankka mazamuree yexettenna. Ufaissan woiniyaa teeraa gum77iyo sohuwan gum77iyaabi baawa. Taani gum77iyaageeti ililiyo ililssaakka xaissaas. <sup>11</sup> Hegaa gishshau, ta wozanai Moo7aabassi, ta garssa asatettaikka Qiirihereesassi diittaadan waassees. <sup>12</sup> Moo7aabi ba xoqqa sohuwaa biikkonne, coo bana daafurssees; qassi i ba eeqa keettaa woossanau biikkonne, hegea a ainne maaddenna.

<sup>13</sup> GODAI kasetidi, Moo7aababaa yootido qaalai heгаа. <sup>14</sup> SHin ha77i GODAI hagaadan yaagees; “Konttiraate oosanchchaa laittaa qoodaadan, Moo7aaba bonchchoinne a coratettaa heezzu laittatu giddon wurana; an attiya asatika amaridaageetanne wolqqi bannaageeta gidana” yaagees.

## 17

### *Xoossai Sooriyaanne Israa7eela Qaxxayana*

<sup>1</sup> Damasqqo katamaabaa GODAI hagaadan yaagees; “Be7ite, hagaappe sinttanau Damasqqoi katama gidiyoogee attana; i burcce doore gidana. <sup>2</sup> Sooriyaa biittaa katomati asi de7enna bazzo gidana; hegan mehiyaa wudee allaxxana; eta yashissiyaabikka de7enna. <sup>3</sup> Efireemappe qatoti, Damasqqoppekka kawotettati xayana; Sooriyaa asaappe attidaageeti Israa7eela asaa bonchchuwaa mala gidana. Taani, Ubbaappe Wolqqaama GODAI haggaa odais” yaagees.

<sup>4</sup> GODAI hagaadan yaagees; “He gallassi Israa7eela bonchchoi qaarettana; a modhdhoikka shoorana. <sup>5</sup> Israa7eeli cakkiyaagee equwan de7iya kattaa shiishshi oiqqidi, maqa zawaappe qanxxi qanxxi cakkiyoogaa mala gidana; woikko Rafaima wombban kattaa cakkidi, pushalido soho mala gidana. <sup>6</sup> Wogaraa qaatti simmin, xeeran naa77u woikko heezzu poshilo aifeti attiyooagaan, woikko daashshaa giddon oiddu woikko ichchashu aifeti attiyooagaan, Israa7eelappe poshiloti attana” yaagiis. Hegaa GODAI, Israa7eela Xoossai haasayiis.

<sup>7</sup> He gallassi asai banttana Medhdhidaagaakko xeellana; bantta aifiyaakka Israa7eela Geeshshaakko zaarana. <sup>8</sup> Eti bantta kushiyan giigissido yarshshiyooosaa xeellokkona; Asheero giyo eeqee misiliyaa gidinkka, ixaanaa cuwayiyoosaa gidinkka, eti bantta biradhdhiyan medhdhidoban ammanettiyoogaa aggana.

<sup>9</sup> He gallassi Israa7eela asaa gaasuwan Hiiwetanne Amooreta katamati laalettidoogaadan, eta mino katamati laalettana; he katamati baisesa gidana. <sup>10</sup> Aissi giikko, intte inttena Ashshiyaagaa, Xoossaa dogideta; intte baqati attiyoo wogga Zaallaakka hassayibeekketa. Hegaa gishshau, neeni lo77o mittata tokkikkokka, kare biittaappe yiida lo77o ataakilttiyaa tokkikkokka, <sup>11</sup> ne tokkido gallassi eta dichchiyaakkokka, qassi ne zerido maallado neeni eta ciyyissiyaakkokka, ne azzanuwaanne ne paxanau danddayenna sahuwaa gallassi he cahau gakkida kattai baqati xayana.

### *Morkke Kawotettati Xoonettidosona*

<sup>12</sup> Be7a, daro asai guummees; eti abbaa beetaadan guummoosona. Qassi kawotettati waassoosona; eti wolqqaama haattaadan waassoosona. Eta aayye7ana. <sup>13</sup> Kawotettati daro haattatu gunttaadan guummoosona; shin GODAI eta seerana; seerin eti deriyaa huuphiyan de7iya suullai carkkuwan denddiyoogaadaaninne gotee denttiyo baanaadan, yedetettidi, haahosaa baqatana. <sup>14</sup> Sa7ai qammiyo wode, eti shabbirettana; sa7ai wonttanaappe kasetidi, eti xayiiichhana; nubaa wolqqan ekkiyaageetu qaadainne nuna bonqqiyaageetu saamai haggaa.

## 18

### *Xoossai Toophphiyaasa Asaabaa Yootido Qaalaa*

<sup>1</sup> Toophphiyaasa shaafatuppe hefintta baggaara de7iya markkabiyaasa qefeti giirettiyo biittaassi aayye7ana! <sup>2</sup> He biittai kiitettiya asata Naile SHaafaa bollaara kiittees; qassi shombboquwaa wolwoluwan wottidi, haattatu bollaarakka kiittees. Inttenoo, eesotiya kiitettiyaageetoo, issi adussanne liiqo asaakko biite; matai haahoi yayyiyo asaakko, wolqqaamanne xooniya kawotetta gididiya, shaafai eta biittaa gidduwan shaakkidi goggiyo biittaa asaakko biite.

<sup>3</sup> Inttenoo, sa7an de7iya ubbatoo, inttenoo, biittan de7iyaageetoo, deretu bollan malaatai eqqiyo wode, intte be7ana; qassi malkkataikka punettiyo wode, intte siyana. <sup>4</sup> Aissi giikko, GODAI taayyo hagaadan yaagiis; “Sa7ai seetiyo wode kiyiya wolqqaama mishuwaadan, qassi kattaa cakkiyo aginan hombbiya qamman xaazatiya xaazaadan, taani co77u gaada, ta de7iyo sohuwaappe duge xeellana” yaagiis. <sup>5</sup> Kattaa cakkiyo wodiyaappe kase, ciishshai qoletti simmin, woiniyaa aifee teeriyo wode, i xunqqiyo baacan a xeeraa xunqqirggana; daayiya maraa daashshaakka i diggirggana. <sup>6</sup> Eti ubbaikka deriyaa huuphiyan de7iya, miyoobaa wochchiya kafotussinne sa7aa do7atussi attana; miyoobaa wochchiya kafoti balgguwaa, sa7aa do7ati boniyaa eta miiddi shaacana.

<sup>7</sup> He wode adussanne liiqo asaappe, matai haahoi yayyiyo asaappe, wolqqaamanne xooniya kawotettaappe, qassi shaafai eta biittaa gidduwan shaakkidi goggiyo biittaa asaappe, Ubaappe Wolqqaama GODAASSI imotai Xiyooone Deriyaa, a sunttai de7iyo sohuwaa yaana.

## 19

### *Xoossai Gibxxe Qaxxayana*

<sup>1</sup> Gibxxe biittaabaa GODAI hagaadan yaagees; “Be7ite, GODAI eesotiya shaaraa toggidi, Gibxxe yeas. Gibxxe eeqati a sinttan kokkorana; Gibxxe asaa wozanaikka eta gidдон seerana” yaagees.

<sup>2</sup> Ubbaappe Wolqqaama GODAI hagaadan yaagees; “Taani Gibxxe biittaa asaa Gibxxe asa bolli denttana; eti bantta gidдон ishai ishaara, shooroi shooruwaara, katamai katamaara, kawotetta kawotettaara olettana. <sup>3</sup> Gibxxe asaa ayyaanai gageetana; taani eta halchchuwaa hada oottana. Eti eeqatanne moitilliyaa haasayissiya asata, kaayiyaageetanne shareechchota zoretaa bessana. <sup>4</sup> Qassi taani Gibxxe biittaa asaa issi meqetti baina godaa kushiyan aattada immana; immin issi meqetti baina kawoi eta haarana” yaagees.

<sup>5</sup> Naile SHAafaa haattai melana; shaafaikka leelan leelan meli aggana. <sup>6</sup> Zaaro haattati xinqqana; Gibxxe pulttoti guuxxunananne to77ana. SHombboqotinne ceeccati shullana; <sup>7</sup> Naile SHAafaa lanqqen de7iya sohota, abbaa shoobbati ubbai booddilana. Naile SHAafaa lanqqen zeridobai ubbai melana, laalettananne xayana. <sup>8</sup> Moliyaa oiqqiyaageeti kayyottana. Naile SHAafan piriya yeggiya ubbati yeekkana; haattan gitiyaa yeggiyaageetikka doocana. <sup>9</sup> Paatettida talbbaappe liinuwa oottiyaageeti, qassi bootta puuttuwa maayuwa daddiya shimainnetikka yeellatana. <sup>10</sup> SHimainnetinne keraa oottiya ubbatikka azzanana.

<sup>11</sup> Xo7aane katamaa haariyaageeti mulekka eeyya; aadhdhida eranchcha giyo Gibxxe kawuwa zoriyaageetu zorekka damma. Yaatin, intte Gibxxe kawuwaayyo, “Nuuni aadhdhida eranchchatu naata; nuuni beni kawotu naata” gaanau waanidi danddayeetii? <sup>12</sup> Ne aadhdhida eranchcha asati yaatin ha77i awan de7iyoonaa? Ubbaappe Wolqqaama GODAI Gibxxe bolli oottanau halchchidobaa ane eti neeyyo odonanne nena erissona. <sup>13</sup> Xo7aane katamaa haariyaageeti eeyyidosona; Memppisa katamaa haariyaageetikka cimettidosona. Gibxxe asaa zariyaa giddoppe asaa kaalettiyaageeta giidi wottidoogeeti Gibxxe balettidosona. <sup>14</sup> GODAI eta gidдон geella ayyaana walakkiis; yaatin, eti mattottida asi ba cooshshan ganddigaariyoogaadan, Gibxxee ba ooso ubban ganddigaaranaadan oottidosona. <sup>15</sup> Gibxxessi a huuphee woikko a goinai, a zambbaa tashee, woikko a shombboqoi oottanabi aibinne baawa.

### *Gibxxeti Xoossaassi Goinniyo Gallassai Yaana*

<sup>16</sup> He gallassi Gibxxe biittaa asai maccaasa mala gidana. Qassi Ubbaappe Wolqqaama GODAI eta bollan wuxaawuxiyo a kushiya be7idi, eti yashshan kokkorana. <sup>17</sup> Yihudaa biittai Gibxxe biittaa asaa yashshiyaagaa gidana; Ubbaappe Wolqqaama GODAI eta bollan oottanau qoppido qofaa gishshau, Yihudaabaa siyiya ubbai yayyana.

<sup>18</sup> He gallassi Gibxxe biittan de7iya ichchashu katamati Kanaane qaalan haasayiyaageetanne Ubbaappe Wolqqaama GODAASSI ammanettanau caaqqiyaageeta gidana. He katamatuppe issoi, “Awa katamaa” geetettidi xeesettana.

<sup>19</sup> He gallassi Gibxxe biittaayyo gidduwan, GODAAYYO yarshshiyosai giigana; qassi Gibxxe biittaa zawankka GODAAYYO tuussai eqqana. <sup>20</sup> Hegee Ubbaappe Wolqqaama GODAAYYO Gibxxe biittan malaatanne markka gidana; eti banttana huqqunniyaageetuppe denddidaagan GODAAKKO waassiyo wode, i etau ashshiyaagaa kiittana; kiittidi eta ashshana. <sup>21</sup> He wode GODAI Gibxxe biittan erettidaagaa gidana; Gibxxe asaikka he gallassi GODAA erananne yarshshuwaanne xuuggiyo yarshshuwa ekki yiidi, ayyo goinnana. Eti GODAASSI shiiqqananne bantta shiiquwaakka gattana. <sup>22</sup> GODAI Gibxxe shocana; shocanne pattana. Etikka GODAAKKO simmana; ikka eta watiwatuwa siyidi, eta pattana.

<sup>23</sup> He gallassi Gibxxeppe Asoore gakkanau aaho oge kiyana; Asoore asai Gibxxe, Gibxxe asaikka Asoore simerettana; qassi Gibxxe asai Asoore asaara issippe goinnana. <sup>24</sup> He gallassi Israa7eeli Gibxxeeranne Asooreera heezzantto biitta gididi, sa7aa giddon anjjo gidana. <sup>25</sup> Ubbaappe Wolqqaama GODAI eta hagaadan yaagidi anjjana; “Ta asau Gibxxee, ta kushee medhdhido Asooreenne taani doorido Israa7eelaa anjjettidaageeta gidite” yaagana.

## 20

### *Kallo Xiire Hemettiya Hananabaa Yootiyaagaa Malaataa*

<sup>1</sup> Asoore biittaa Kawoi Sarggooni kiittido ola gadaawai yiidi, Ashddooda giyo Pilisxxeema katamaa olidi oiqqido laitti, <sup>2</sup> he wode GODAI Amoxa na7aa Isiyaasa hagaadan yaagiis; “Ba; baada ne shayaappe waaruwaa qaara; ne tohuwaappekka ne caammaa kessa” yaagiis; yaagin Isiyaasi GODAI giidoogaadan hanidi, kallo xiirene mela tohuwan hemettiis.

<sup>3</sup> GODAI hagaadan yaagiis; “Ta ashkkarai Isiyaasi Gibxxenne Toophphiya bollan gakkiaabau malaata gidana mala, heezzu laittaa kallo xiirene mela tohuwan hemettiis. <sup>4</sup> Hegaadan Asoore kawoi, Gibxxeppe omoodettidaageetanne Toophphiyaappe betidi kiyidaageeta kallo xiirene mela tohuwara, dulleekka kallo de7ishin laag-gidi, Gibxxe yeellau efaana. <sup>5</sup> Toophphiyan ammanettiyaageetinne Gibxxen ceeqettiyaageeti yayyidi yeellatana. <sup>6</sup> Abbaa lanqqiyan de7iya asai he gallassi hagaadan yaagana; ‘Be7ite, nuuni Asoore kawuwaappe attanau maaddoosona giidi nu ufaissaa wottidonne etakko baqatido asaa bolli hagee gakkiiis; yaatin, nuuni waanidi kessi ekkanau danddayioonii?’ yaagana” yaagiis.

## 21

### *Baabiloone Kunddettaa Bessiya Ajuutaa*

<sup>1</sup> Abbaa lanqqen de7iya bazzuwau odettida GODAA qalalai haggaa. Tohossa baggappe gotiyaa carkkoi suraggiiddi yiyoogaadan, bashshai bazzoppe, hanttaara biittaappe yees.

<sup>2</sup> Issi yashshiya ajjuutai taayyo qoncciiis. Bonqqiyaagee bonqqees; xaissiyaageekka xaissees; Elaama biittau, woraajja! Meedoona biittau, katamaa doodda! Baabiloone gaasotan gakkida ooliyaa taani gidissana.

<sup>3</sup> Hegaa gishshau, ta xeessai saho xalaala gidiiis; maccaasaa maaretai oiqqiyoogaadan, tana un77oi oiqqiis; taani siyiyoogaappe denddidaagan hokkaas; taani be7idoogaappe denddidaagan dagammaas. <sup>4</sup> Tana yiicooyees; tana yashshai kokkorssees; taani amottido omarssai taayyo kokkorssau laamettiis.

<sup>5</sup> Taani be7ido ajjuutan eti gibiraa giigissidosona; minxxaafiyaakka hiixxidosona; yaatidi moosonanne uyoosona. Yaatishin, “Inttenoo halaqatoo, denddite! Denddidi intte gonddalleta quccite!” yaagiya azazoi yiis.

<sup>6</sup> Godai tana hagaadan yaagiis; “Ba; baada xomoosiya asa wotta; wottin i ba be7iyooobaa yooto. <sup>7</sup> Gammaama mehiyaa toggiyaageeta, naa77aa naa77aa gididi biya paraasata, hareta toggiyaageetanne gaameelata toggiyaageeta be7iyo wode, loittidi xeello; daro loittidi xeello” yaagiis.

<sup>8</sup> Hegaappe guyyiyan, wochchidaagee hagaadan yaagidi waassiis; “Godau, taani wochchiyoosan gallassi gallassi paci bainnan eqqaas; ta santtariyiyankka qammaa muliyaa tolettaas. <sup>9</sup> Be7ite, gammaama mehiyaa toggiya paraasati naa77a naa77a gididi yoosona” yaagiis. I qassikka hagaadan yaagiis; “Baabiloone kunddiis; a xoosatu misiletikka kunddidosona. Eti ubbaikka sa7an duge kunddidi gaacettidosona” yaagidi waassiis. <sup>10</sup> Inttenoo, ta audiyian qoxettida ta asatoo, Ubbaappe Wolqqaama GODAAPPE, Israa7eela Xoossaappe siyidobaa taani intteyyo erissais.

### *Eedoomabai Odettidaagaa*

<sup>11</sup> Eedooma biittaabaa GODAI hagaadan yaagiis; “Issi bitanee Eedooma baggaara tana xeesidi, ‘Laa wochchiyaagoo, sa7ai wonttanau woqqai attidee? Laa wochchiyaagoo, sa7ai wonttanau woqqai attidee?’ yaagees. <sup>12</sup> Wochchiyaagee zaaridi, ‘Sa7ai wonttana hanees; wonttidikka qassi qammaana; intte oichchanau koyikko, simmidikka yiidi oichchite’ yaagees” yaagiis.

### *Araba Biittaabai Odettidaagaa*

<sup>13</sup> Araba giyo biittaabaa Godai hagaadan yaagees; “Inttenoo Dadaana zal77anchchatoo, intte intte caaniyo gaameelaturakka Araba biittaa bazuwan aqana. <sup>14</sup> Inttenoo, Teema giyo biittan de7iya asatoo, saamettidaageetussi haattaa ehiite; betetuyyo miyoobaa immite. <sup>15</sup> Aissi giikko, eti bisuwaappe, shoohuwaappe shoddido bisuwaappe, dafido wonddafiyaappenne mino olaappe baqatidi yiidosona” yaagees.

<sup>16</sup> Hegaappe guyyiyan, Godai tana hagaadan yaagiis; “Konttiraate oosanchchaa wodiyaadan, mexi issi laittaa gidдон Qeedaare bonchchoi ubbai wurana. <sup>17</sup> Qeedaare biittan de7iya wonddafiyan dukkiya wolqqaama olanchchatuppe guuttati attana; hegaa GODAI Israa7eela Xoossai odiis” yaagiis.

## 22

### *Yerusalaamebai Odettidaagaa*

<sup>1</sup> Ajjuutaa Wombbaa giyo sohuwaabaa GODAI yootido qaalaa. Inttena ubbaa keettaa bollan dembbayidi oottidosaa kessidabai aibee? <sup>2</sup> Nenoo waasoi, dirbbainne wocamai kumido katamau, ne gidдон haiqqida asati bisuwan haiqqibookkona; woikko olankka haiqqibookkona. <sup>3</sup> Intte halaqati ubbai issippe baqatidosona; eti wonddafee bannan coo omoodettidosona; eti haahosaa baqatikkonne beettida ubbati ohettidosona. <sup>4</sup> Hegaa gishshau, taani hagaadan yaagaas; “Tana xeelloppite; ane taani afuxxada misho yeehuwaa yeekkais; xayida ta asaassi yeekkiya tana minttettana giidi daafuoppite” yaagaas. <sup>5</sup> Godai, Ubbaappe Wolqqaama GODAI ha gallassa Ajjuutaa Wombban dagama, yerettanne shabbirssa gallassa oottiis; qassi gimbbetikka kolettiyo gallassanne deretukkokka waassiyo gallassa.

<sup>6</sup> Elaami ba para gaaretuuranne para asatuura ba wonddafiya oiqqidi yiis; Qiira biittaa wotaaddarati qassi bantta gonddalleta giigissidosona. <sup>7</sup> Keehi lo77iya intte wombbati para gaaretun kumidosona; para asati Yerusalaame katamaa penggiyaa sinttan eqqidosa. <sup>8</sup> I Yihudaa qatota qaariis. He gallassi intte woraa keettan de7iya kawuwaa olaa miishshata xeellideta. <sup>9</sup> Qassi intte Daawita Katamaa gidдон kolettidasai daridoogaa be7ideta; be7idi ziqqa sohuwaa dalbbanttaa dagayideta. <sup>10</sup> Yaatidi intte Yerusalaamen de7iya keettata qoodideta; qoodidi gimbbiyaa minttanau keettata qolideta. <sup>11</sup> Kase gal77a dalbbanttan de7iya haattaa zaaridi, a minjjiyoosaa naa77u gimbbetuppe gidduwan giigissideta. SHin intte hegaa medhdhidaagee Xoossaa gidiyooogaa akeekibeekketa; woikko daro wodiyaappe kase hegaa halchchidaagaa yainnibeekketa.

<sup>12</sup> He gallassi Godai, Ubbaappe Wolqqaama GODAI inttena yeekkanaunne zilaalanau, intte huuphiyaa meedettanaunne waaruwaa maayanau inttena xeesiis. <sup>13</sup> SHin be7ite, intte ufaitteetanne poccu geeta; booraanne dorssaa shukkeeta; ashuwaa meeta; woiniyaa eessaakka uyeeta; “Nuuni wontto haiqqiyo gishshau, ane moosinne uyoos” yaageeta.

<sup>14</sup> Ubbaappe Wolqqaama GODAI haggaa taayyo yootiis; i, “Intte haiqqana gakkanaasikka ha nagarai intteyyo atto geettetenna. Taani Godai, Ubbaappe Wolqqaama GODAI haggaa odais” yaagiis.



*Sheebina, "Nena Era!" Giidobaa*

<sup>15</sup> Godai, Ubbaappe Wolqqaama GODAI hagaadan yaagiis; "Ba; kawo keettan sunttidda alaafiyaa SHEEBINAKKO baada hagaadan yaaga; <sup>16</sup> 'Hagan neeni ai oottai? Qassi neeni hagan neeyyo duufo bookkanau, neeyyo hagan oonee de7iyai? Nenoo xoqqa sohuwan neeyyo duufuwaa massiyaagoo, qassi shuchchaa gomppan neeyyo de7iyo sohuwaa woociyaagoo, <sup>17</sup> nenoo mino bitaniyau, nena GODAI wolqqan wora zaaridi olana. Nena i birxxotti oiqqidi, <sup>18</sup> yuushshi yuushshi aattidi kuwaasedan, issi aaho biittan oliigana. Nenoo ne godaa keettaassi yeella gidida bitaniyau, neeni yan haiqqana; ne bonchcho para gaaretikka yan attana. <sup>19</sup> Taani nena ne oosuwaappe kessana; ne daannatettaappekka nena shaarana' yaaga.

<sup>20</sup> "He gallassi taani Hilqqiyaa na7aa ta ashkkaraa Eliyaaqiima xeesana. <sup>21</sup> Xeesada ne maayuwaa a maizzana; ne gixxiyoogaakka a gixissana; ne sunttatettaakka ayyo aattada immana. I Yerusalaamen de7iyya asaassinne Yihudaa asaassi aawa gidana. <sup>22</sup> Taani Daawita keettaa qulppiyaa a hashiyan wottana; i dooyana; dooyin ooninne gorddenna; qassi i gorddana; gorddinkka ooninne dooyenna. <sup>23</sup> Taani a ammanttiya sohuwan xishedan xishana; i ba aawaa keettaassi bonchcho kawotaa araata gidana. <sup>24</sup> Wanccaappe biidi, xoqqabaa gakkanaashin kocan kaqqidoogaadan, eti a aawaa keettaa bonchcho ubbaa, naata, naatu naatakka, a bolli wottana" yaagiis.

<sup>25</sup> Ubbaappe Wolqqaama GODAI hagaadan yaagees; "He gallassi ammanettiya sohuwan xishido xishee kichchana; qanxxettanne kunddana. A bollan kaqqido tooho ubbai duuxxi wodhdhana" yaagees. Hagaa GODAI odiis.

**23***Xiirsoosabai Hiraagan Odettidaagaa*

<sup>1</sup> Xiirsoosa katamau odettida GODAA qaalai hagaa.

Inttenoo Xiirsoosa markkabiyyaa laaggiyaageetoo yeekkite! Aissi giikko, Xiirsoosa katamai keetti woikko shemppiyoosi baina baysa kiyiis; he odoi etau Qophphiroosa biittaappe yiis. <sup>2</sup> Inttenoo, abbaa lanqqiyan de7iyya asatoo, inttenoo Sidoona katamaa zal77anchchatoo, co77u giite! Intte kiittiyo asati abbaa pinnidosona. <sup>3</sup> Intte kawotettaassi geliyaagee Naile SHaafaappe cakettida SHihoora biittaa kattaa. Intte kawotettatussi zal77iyya zal77iyo soho.

<sup>4</sup> Nenoo Sidoona katamau, abbaa qatuwan, abbai, "Taani na7a yelabeikke; taani attuma na7akka macca na7akka dichchabeikke" yaagidi haasayido gishshau yeellata.

<sup>5</sup> Odoi Gibxxe biittaa gakiyo wode, eti Xiirsoosabaa siyidi mishettana.

<sup>6</sup> Inttenoo abbaa lanqqiyan de7iyya asatoo, zilaalite; hefintti Tarsseesa biitti pinnite. <sup>7</sup> Beni wode keexettida, kare biittaa oiqqidi haaranau a tohoi a haassi efiidonne, intte an ufaittiyo Xiirsoosa katamai hagaadan hanidee? <sup>8</sup> Kallachchaa goxissiya katamaa a zal77anchchati biittaa haariyaageeta gididonne a gididon baizziyaageetinne laamiyaageeti biittaa bollan bonchchettidaageeta gidido Xiirsoosa katamaa bolli hagaa halchchidai oonee? <sup>9</sup> Ooretiiyaageetu bonchcho ubbaa guuttanau, qassi biittaa bollan bonchchettidaageeta ubbaa kaushshanau, Ubbaappe Wolqqaama GODAI hagaa halchchiis.

<sup>10</sup> Inttenoo, Xiirsoosa biittaa asatoo, inttena teqqiyaabi baina gishshau, Naile SHaafaadan, intte biittaa bollan kumidi goggite. <sup>11</sup> GODAI abbaa bollan ba kushiyya micciis; i kawotettaakka qaattiis; Kanaane biittaa qatota laalana mala, GODAI aza-zuwaa immiis. <sup>12</sup> Qassi i hagaadan yaagiis; "Inttenoo, un77ettida Sidoona asatoo, intte ufaissaa poccu giyo wodee wuriis. Denddite; denddidi hefintti Qophphiroosa pinnite. Harai atto yankka intteyyo shemppoi beettenna" yaagiis.

<sup>13</sup> Baabiloone biittaa be7ite; he biittaa asai ha77i pattennabaa gidiis. Asoore biittaa asati he biittan do7ai adaraasanaadan oottidosona. Eti hegan de7iya wogga keettata kolidi, bantta qatota gimbbidosona; biittaakka baisa oottidosona.

<sup>14</sup> Inttenoo, Xiirsoosa biittaa markkabiyaasatoo, intte qatoi laalettido gishshau, zi-laalite.

<sup>15</sup> Xiirsoosa katamai laappun tammu laittaa dogettidi de7ana wodee yaana; hegeenne, issi kawuwaa laittaa keena giyoogaa. Laappun tammu laittai wuriyo wode, shaaramuxa maccaaseessi yexettiya yetta malai, Xiirsoosa katamaassi yexettana. Eti, <sup>16</sup> “Bii, dogettida shaaramuxee, ne diittaa ekka; ekkada kataman yuuya. Nena asai hassayana mala, mal77o qaalaa daro yettaa yexxa” yaagana.

<sup>17</sup> Laappun tammu laittai polettiyo wode, GODAI Xiirsoosa xomoosana. SHin hegaappe guyyian, a beni ba shaaramuxaa oosuwau simmana; simmada sa7an de7iya kawotettatu ubbaara shaaramuxana. <sup>18</sup> Gidikkonne, i zal77eenne i damoozai GODAAYO dummatidaagaa gidana; i zal77ee daro qumaanne lo77o maayuwaa shammanau, GODAASSI oottiya asatussi imettanaappe attin, miishsha keettaaninne minja keettan uttena.

## 24

### *Xoossai Sa7aa Qaxxayana*

<sup>1</sup> Be7ite, GODAI biittaa booddilissananne baisa kessana; i biittaa mooridi, an de7iya asaakka laalana. <sup>2</sup> Hara asaa bollan haniyoogaadan, qeesetu bollankka, ashkkaraa bollan haniyoogaadan godaa bollankka, ashkkaree bollan haniyoogaadan godee bollankka, shammiyaagaa bollan haniyoogaadan baizziyaagaa bollankka, tal77iyaa immiyaagaa bollan haniyoogaadan tal77iyaa ekkiyaagaa bollankka, acuwaa achchiyaagaa bollan haniyoogaadan, acuwaa ashettiyaagaa bollankka hanana. <sup>3</sup> Biittai muleera baisa kiyana; qassi muleerakka bonqqettana. Aissi giikko, ha qaalaa GODAI haasayis.

<sup>4</sup> Biittai keehi melin, a aacai ubbai shullees; biittan de7iya wolqqaama asaikka daafurees. <sup>5</sup> Biittai banan de7iya asaappe denddidaagan tuniis. Aissi giikko, eti higgiiyaa kanttidosona; wogaa menttidosona; merinaa maachchaakka kolidosona. <sup>6</sup> Hegaa gishshau, Xoossaa qanggettai biittaa mees; qassi an de7iya asatika bantta mooruwaa gaasuwan tuggatoosona. Hegaa gishshau, sa7an de7iya asati xuugettidosona; yaatin qoodan qii guutta asai attiis. <sup>7</sup> Woiniyaa turaa anoi melin, woine eessaikka al77iis; kase ufaittiya ubbai azzanees. <sup>8</sup> Karaabiyaa baqaa ufaissai sirphphi giis. Ufaittiyaageetu hombocettaikka eqqiis. Lo77iya diittaa ufaissaikka sirphphi giis. <sup>9</sup> Hagaappe sintanau yettaa yexxiiddi, eti woiniyaa eessaa uyokkona; mattoyiyaa ushshai uyiyaageetau camo gidana. <sup>10</sup> Maaraa mankkaa xayida katamai laalettis; ooninne gelennaadan, keetta ubbai gorddettiis. <sup>11</sup> Woine eessai xayidoogau asai gutaran waassees; ufaissa ubbai azzanuwau laamettiis; sa7aa ufaissai ubbai kichchiis. <sup>12</sup> Katamai qolettidi attiis; katamaa penggetikka meqerettidosona. <sup>13</sup> Wogaraa teeraa qaattidi qoqqofiyooogaadan, woikko woiniyaa teeraa maxi simmidi, poshiluwaa maxiyoogaadan, biittaa bollan de7iya kawotettatu giddon hegaadan hanana.

<sup>14</sup> Eti bantta qaalaa xoqqu oottidi, ufaissan yexxoosona; arggo baggaara de7iya ubbai GODAA gitatettaa yootana. <sup>15</sup> Hegaa gishshau, arshsho baggaara de7iyaageetoo, GODAU bonchchuwaa immite; abbaa doonan de7iya biittatun de7iyaageetoo, Israa7eela Xoossaa, GODAA sunttaassi bonchchuwaa immite. <sup>16</sup> Biittaa gaxaappe, “Xilluwau bonchchoi gido” yaagiya yettaa nuuni siyoos.

SHin taani, “Taani gilqqais! Taani gilqqais! Taayyo aayye7ana! Aissi giikko, kaddiyaageeti kaddoosona; kaddiyaageeti keehippe kaddoosona” yaagais. <sup>17</sup> Inttenoo, sa7aa bollan de7iya asatoo, dagamai, aafoinne pirez inttena naagees. <sup>18</sup> Saluwaa maskkooteti dooyettido gishshaunne, biittaa baasotikka qaaxxiyo gishshau, daganttiya

cenggurssaappe baqatiyaagee ollan kunddana; qassi ollaappe pude kiyiyaagee piriyan ohettana. <sup>19</sup> Biittai za77idi phalqqettiis; nippi giidi meqerettiis; wolqqappe qaaxxiis. <sup>20</sup> Biittai mattottida asadan ganddigaarees; carkkoi sugiyo daasedan, yonqqu gees. Makkalanchchatu mooroi a keehippe deexxido gishshau, naa77antto denddenaanadan kunddees.

<sup>21</sup> He gallassi GODAI saluwaa wolqqata saluwan, qassi sa7aa kawotakka sa7an qaxxayana. <sup>22</sup> Eti ollan de7iya qasho asatudan, issippe shiiqana; shiiqidi qasho keettan gorddettidi uttana. Qassi daro gallassaappe guyyiyan, eti qaxxayettana. <sup>23</sup> Hegaappe guyyiyan, aginaikka awaikka yeellatana. Aissi giikko, Ubbaappe Wolqqaama GODAI Xiyooone deriyaaninne Yerusalaamen kawotana; qassi i Yerusalaame cimatu sinttan ba bonchuwaa qonccissana.

## 25

### *Galataa Yettaa*

<sup>1</sup> Abeet GODAU, neeni ta Xoossaa. Taani nena xoqqu xoqqu oottana; ne sunttaakka galatana. Aissi giikko, neeni polo ammanettiyoogan beniisappe halchchettidi de7iya maalaalissiya oosota oottadasa. <sup>2</sup> Neeni katamaa shuchcha doore oottadasa; minuwan gimbbettida katamaa qoladasa. Allagatu kawo keettaakka naa77antto katama gidennaadan oottadasa. Simmidi mulekka keexettenna. <sup>3</sup> Hega gishshau, mino asati nena bonchhana; meqetti bainna kawotettatu katamatikka neessi yayyana. <sup>4</sup> Neeni hiyyeesau baqati attiyo soho. Metootanchchaukka ba metuwaa wode baqati attiyo soho, uushuwaappe sheephetiyo sohonne awaa seelaappe attiyo kuwa gidadasa. Aissi giikko, meqetti bainna asaa hanqqoi gimbbiyaa shociya uushuwaa malanne <sup>5</sup> bazzo biittaa mishuwaa mala. Awa mishoi shaaraa kuwan gabbi giyoogaadan, neeni allagatu wocamaa haizissadasa; yaatin, meqetti bainna asatu yettai sirphphi giis.

<sup>6</sup> Ubbaappe Wolqqaama GODAI asa ubbaayyo ha deriyaa bollan gita gibiraa giigis-sana; hegeekka modhdhobata, kolzziyaara de7iyaabatanne lo77o ka77ida woiniyaa eessaa gibiraa. <sup>7</sup> Ha deriyan asa ubbaa cammidabaa, kawotetta ubbaa bollankka micettida magalashuwaa taani xaissana. <sup>8</sup> Haiquwaa i merinau mittana; Ubbaa Haariya GODAI aife ubbaappe afuttaa quccana; ba asaa kaushshaakka biitta ubbaappe diggana. Haga GODAI odiis.

<sup>9</sup> He gallassi eti hagaadan yaagana; “Hagee tumu nu Xoossaa; nuuni i nuna ashshanaadan naagida; naagin i nuna ashshiis. Hagee GODAA; nuuni a naagida. Ane a atotettan hashshu goosinne ufaittoos” yaagana.

### *Xoossai Moo7aaba Biittaa Qaxxayana*

<sup>10</sup> Aissi giikko, GODAA kushee ashshanau ha deriyaa bollan gidana. SHin darccaa pito ollan yeggidi yedhdhiyoogaadan, Moo7aaba biittaa asai ba sohuwan yerettana. <sup>11</sup> Haattaa wadhdhiyaagee haattaa wadhdhanau ba kushiyaa pididi oottiyoogaadan, eti hega giddon bantta kushiyaa pididi oottana. SHin GODAI a otoruwaa a kushiyaa geniyaarakka gattidi kaushshana. <sup>12</sup> Eti xoqqissidi, minuwan gimbbido gimbbiyaa i duge ehaananne kaushshana; duge sa7an, ubba hirkki buhiyan olana.

## 26

### *Xoossai Ba Asaassi Xoonuwaa Immana*

<sup>1</sup> He gallassi Yihudaa biittan ha yettai yexettana.

Nuuyyo mino katamai de7ees;

Xoossai atotettaa a yuushuwan gimbbedaaninne qatodan essees.

<sup>2</sup> Ammanuwaa naagiya xillo kawotettai gelana mala, kareta dooyite.

- <sup>3</sup> Ba qofaa nenan wottida asa  
neeni polo sarotettan naagaasa;  
aissi giikko, i nenan ammanettees.
- <sup>4</sup> GODAN merinau ammanetta;  
aissi giikko, GODAI Xoossai merinaa Zaallaa.
- <sup>5</sup> Xoqqan de7iyaageetanne  
eta xoqqa katamaa ziqqi oottiis;  
i a kaushshees.  
Duge biittaa gakkanau ziqqi oottees;  
biittaa buhiyan oli bayees.
- <sup>6</sup> Hiyyeesaa gedee, metootanchchaa tohoi a yedhdhana.
- <sup>7</sup> Xillotu ogee salalla.  
Abeet Xilluwau, neeni  
xillotu ogiyaa salallissaasa.
- <sup>8</sup> Ee GODAU, ne higgiiyaa ogiyan hemettiiddi,  
nuuni nena naagoos.  
Nu wozanaa amoi  
ne sunntaa bonchchanaagaa xalaala.
- <sup>9</sup> Qamman taani nena laamotais;  
ta gidдон de7iya ta ayyaanai  
tumuppe nena minttidi koyees.  
Aissi giikko, ne pirddai sa7an de7iyo wode,  
sa7an de7iya asai xillotettaa tamaarees.
- <sup>10</sup> Iita asayyo kehatettaa oottikkokka,  
i xillotettaa tamaarena.  
Suure asatu biittan iitabaa oottees;  
GODAA gitatettaakka erenna.
- <sup>11</sup> Abeet GODAU, neeni  
ne kushiyyaa xoqqu oottadasa;  
shin eti be7okkona.  
Ne asau neeni mishettiyo mishuwaa  
be7idi yeellatona.  
Neeni ne morkketuyyo wottido tamai  
eta mi xaisso.
- <sup>12</sup> Abeet GODAU, neeni  
nuuyyo sarotettaa minttadasa;  
nu ooso ubbaa neeni nuuyyo oottadasa.
- <sup>13</sup> Abeet GODAU, nu Xoossau,  
neeppe harati nuna haaridosona;  
shin nuuni ne sunntaa xalaalaa bonchchoos.
- <sup>14</sup> Eti haiqqidosona;  
simmidi paxa de7okkona.  
Neeni qaxxayin xayido gishshau,  
simmidi denddokkona.  
Eti hassayettiyoobaa ubbaa qucca xaissadasa.
- <sup>15</sup> Abeet GODAU!  
Neeni asaa darissadasa.  
Asaa darissada, neeni bonchchettadasa;  
biittaa zawaa ubbaakka aassadasa.
- <sup>16</sup> Abeet GODAU!

Metuwaa wode eti nena koyidosona.  
 Neeni eta qaxxayido wode,  
 eti nena woossidosona.  
 17 Abeet GODAU! SHahaarida maccaasiyaa  
 yeliyo wodee gakkinn,  
 maaretan un77ettada waassiyooqaadan,  
 nuunikka ne sinttan hegaadan hanida.  
 18 Nuuni shahaarida; maaretaakka ohettida;  
 shin carkkuwaa yeliyaabaa gidida.  
 Nuuni sa7au atotettaa ehibookko;  
 sa7an de7iya asaakka yelibookko.

19 Haiqqida ne asai paxana;  
 eta ahaikka denddana.  
 Inttenoo, biittaa buhiyaa gidдон de7iyaageetoo,  
 intte xaazai maallado xaazaa mala gidiyo gishshaunne,  
 sa7aikka haiqqidaageeta zaarettidi immiyo gishshau,  
 beegottitenne ufaissau yexxite.

### *Pirddaanne Omooduwaappe Simmiyoogaa*

20 Ta asatoo, haa yiite; yiidi intte soo gelidi, kariyaa intte bolli gorddite. GODAA hanqqoi aadhdhana gakkanaassi, guutta wodiya inttena qosite. 21 Biittaa bollann de7iya asaa, eta nagaraa gishshau qaxxayanau, GODAI ba de7iyooosaappe kiyidi yees. Biit-taikka ba bollann gukkida suutta qonccissana; woridoogeetakka naa77antto genttenna.

## 27

1 He gallassi GODAI ba mino, gitanne wolqqaama bisuwan Lewaataana giyo kolxxiyaanne xaaxettiya shooshshaa qaxxayana; abban de7iya demiyaakka worana.  
 2 He gallassi hagaadan geetettana; “Hagee dosettida woiniyaa turaa soho; abaa yexxite!  
 3 Taani, GODAI a naagiyaagaa; taani a ha77i ha77i haattaa ushshais; ooninne a qohen-naadan, taani qamminne gallassi a naagais. 4 Taani hanqqettikke; tanaara olettannau, agunttainne gom77oree de7orkkonaashsha! Taani eta bolli kiya eqqada, eta xuugga wurssana shin. 5 Woikko baqati qosetti attannau taakko yona; tanaara giigona; ee, tanaara giigona” yaagetettana.

6 Yaana gallassatun Yaaqoobi xaphuwaa yeddana; Israa7eeli aacananne ciyyana; yaatidi aifido aifee sa7aa ubbaa kumana.

7 Eta shocidaageeta shocidoogaadan, GODAI Israa7eela asaa shocideeeyye? Woikko eta woridaageeti haiqqidoogaadan, eti haiqqidonaayye? 8 GODAI ba asaa omooduwau yeddiyoogan qaxxayiis; arshsho bagga carkkuwaa gallassi eta ba yashshiya gotiyan laaggidi kessiis. 9 Hegaa gishshau, Yaaqooba mooroi atto geetettannainne a nagarai polo qucettannai hagaana: hegeekka yarshshiyooosaa shuchchaa ubbaa i meqerettida booqintta shuchchaadan oottiyo wodenne, Asheero giyo macca xoosee misilee, woikko ixaanaa cuwayidi, yarshshiyooosaikka equwan attannadan oottiyo wode.

10 Minuwan direttida katamai oniis; kase asi de7iyo sohoi ha77i bazzodan, mela attiisinne dogettiis; i mehee heemettiyo soho gidido gishshau, mittaa bonccuwaa miiddi, marati hegan allaxxoosona. 11 Mittaa tasheti meliyo wode meqerettoosona; maccaasaikka yiidi, eta eettannau efees. Ha asai akeeki banna asa gidiyo gishshau, eta Medhdhidaagee etau qarettennanne maarena.

12 He gallassi Efiraaxiisa SHaafaappe Gibxxe SHaafaa gakkanaashin, GODAI kattaa qoxxana; inttenoo, Israa7eela asatoo, inttekkka intte kayan kayan shiiqana.



<sup>13</sup> He gallassi gita malkkatai punettana; punettin Asoore biittan xayiyaageetinne Gibxxe biittau goossidaageeti yaana; yiidi Yerusalaamen geshsha deriyen GODAAYYO goinnana.

## 28

### *Huuphessa Kawotettaa, "Nena Era!" Giidobaa*

<sup>1</sup> Efireeman de7iya mattottiyaageetu kallachchaunne, woiniyaa eessai xoonidoogeetu aradda wombban de7iya, shulliya ciishsha mala gidida a bonchchuwaa puulau aayye7ana! <sup>2</sup> Be7ite, Godaayyo wolqqaamanne mino gidida issoi de7ees; Godai a shachchaa uushuwaadan, bashshiya gotiyaadaaninne kixxidi goggiya wolqqaama haattaadan, mino kushiyan duge sa7aa olana. <sup>3</sup> He mattottiya Efireema asatu otoruwaa kallachchai tohuwan yerettana. <sup>4</sup> Aradda wombbaa huuphiyan de7iya qoqqofettiya ciishshai, a bonchchuwaa puulai wodee gakkanaappe kasetidi teerida balasiyaa mala gidana; issi asi he balasiyaa be7iyo wode, ba kushiyan oiqqosaara mi aggees.

<sup>5</sup> He gallassi Ubbaappe Wolqqaama GODAI ba asaappe attidaageetussi bonchcho kallachchanne puula alleeqo gidana. <sup>6</sup> I daannatussi likke pirddiyo ayyaana, olaa miixaappe zaariyaageetussikka wolqqa gidana.

### *Isiyaasanne Mattottidi Hananabaa Yootiya Yihudaa Asata*

<sup>7</sup> Hageetikka woiniyaa eessaa uyidi yiicotoosonanne mattoyiya ushshan ganddi-gaaroosona. Qeeseenne hananabaa yootiyaagee mattoyiya ushshan yiicotoosona; eti woiniyaa ushshan chaarikettoosona; mattoyiya ushshanka ganddigaaroosona. Ajju-utaa likke be7okkona; pirddiiddikka xubettoosona. <sup>8</sup> Eti miyo maadda ubbai cooshsha xalla gidiyo gishshau, mooretti-beenna sohoi mulekka baawa.

<sup>9</sup> Eti hagaadan yaagana; "Eratettaa i oona tamarissanee? Kiitaakka oossi qonccis-sanee? Maattaa paahuwaa biron aggidaageetusseeyye, woikko xanttaa biron duuxxi-daageetussee? <sup>10</sup> Aissi giikko, i giyoogee haggaa; azazuwaa bolli azazuwaa, azazuwaa bolli azazuwaa, wogaa bolli wogaa, wogaa bolli wogaa, hagan guutaa, hegan guutaa" yaagana.

<sup>11</sup> SHin GODAI allagatu qaalaaninne imattatu doonan ha asaassi haasayana. <sup>12</sup> I etau hagaadan yaagiis; "Hagee shemppuwaa. Xalalidaaggaa shemppissite. Hagee shemppi ekkiyo soho" yaagiis. SHin eti siyennan ixxidosa. <sup>13</sup> Haggaa gishshau, eti biidi kunddana mala, meqqana malanne gitiyan oiqettidi omooduwaa baana mala, GODAA qaalai etau azazuwaa bolli azazuwaa, azazuwaa bolli azazuwaa, wogaa bolli wogaa, wogaa bolli wogaa gididi, hagan guuttai, hegan guuttai gidiiis.

### *Xiyoonessi Godaa Xaphuwaa Minttiya SHuchchaa*

<sup>14</sup> Haggaa gishshau, inttenoo, Yerusalaamen de7iya asaa haariya qilliicciyaageetoo, GODAA qaalaa siyite. <sup>15</sup> Intte, "Nuuni haiquwaara maacettida; Si7ooliyaarakka caaqet-tida; nuuni wordduwaa nuussi qato oottido gishshaunne malttiyyaa nuussi qosetti attiyo soho oottido gishshau, hanttaara boshai yiidikka nuna bochchennan aadhdhana" yaagidi ceeqetteeta.

<sup>16</sup> Haggaa gishshau, Ubbaa Haariya GODAI hagaadan yaagees; "Be7ite, taani Xiy-oonen baasuwaassi shuchchaa, paacettida shuchchaa, godaa xaphuwaa minttiya, al77o shuchchaa wottaas; aani ammaniya ooninne yeellatenna. <sup>17</sup> Taani suure pird-daa baasuwaala likkiyo wodoro, xillotettaakka tumbbe oottana. Qassi intte qatuwaa wordduwaa, shachchai shocana; intte qosetti attiyoosaakka haattai muukkana" yaagees. <sup>18</sup> Hegaappe guyyiyan, intte haiquwaara maacettido maachchai laalettana. Si7ooliyaarakka caaqettido caaqoikka minnenna. Hanttaara boshai yiyo wode, intte an shocettana. <sup>19</sup> He boshai maallado maallado, qamminne gallassi hegaara aadhdhana; he aadhdhiyo wode ubbankka, inttena ekki baana.

A kiitaa akeekiyoogee intteyyo shabbirssa dagama gidana. <sup>20</sup> Arssai gediya co-gochchidi zin77anau qantta; afalaikka gatti maayanau guutta. <sup>21</sup> Aissi giikko, Paraaxi-ima Deriyaa bollan GODAI oottidoogaadan, ba oosuwaa, ba imatta oosuwaa, hegeekka ba ooratta oosuwaa oottanau denddana. Qassi Gabaa7oona wombbaan hanqqetti-doogaadan hanqqettana. <sup>22</sup> Godaappe, Ubbaappe Wolqqaama GODAAPPE i boshaa biitta ubbaa bolli ehaanau qachchidoogaa taani siyido gishshau, intte qashoi minnenna mala, qilliicciyoogaa aggite.

### *Xoossaassi Aadhdhida Eratettai De7ees*

<sup>23</sup> Intte haittaa haa yeggidi, taani yootiyoogaa siyite; ta haasayaakka akeekidi ezggite. <sup>24</sup> Kattaa zeranau goyiya goshshanchchai ubbatookka goyiiddi de7iigii? Qassi i ubba-tookka guulluwaa kinchchiiddinne liiqissiiddi de7iigii? <sup>25</sup> Gadiyaa liiqissidi, aanugaa laalees; kareta sawuwaakka zerees; gisttiyaakka a yippan, banggaakka a do7uwan, qambbaraakka au bessiya sohuwan zerees gidennee? <sup>26</sup> Aissi giikko, ha hiillaa a Xoossai a erisseesinne tamarissee. <sup>27</sup> Kareta sawuwaa udula mittan qoxxenna; aanugaakka cuguwan bukkenna. Hegaaggidi, kareta sawuwaa gatiman, aanugaakka xam77an qoxxees. <sup>28</sup> Oittaa uukkiyo kattaa qoxxiyoosan qoxxiyaagee liiqissiiyye? CHIikka, i a qoxxiiddi qoxxiiddi, merinau de7iigenna. Qassi i kattaa qoxxiyo para gaareta a bollaara laaggiiddikka kattai gaaccettanaadan oottenna. <sup>29</sup> Hageekka qassi maalaalissiya zoriyaa zoriya, oosuwaakka aadhdhida eran oottiya Ubbaappe Wolqqaama GODAAPPE yees.

## 29

### *Daawita Katamaa Yerusalaamessi Aayye7ana!*

<sup>1</sup> Nenoo Daawiti de7ido Aarii7eela giyo katamau, neeyyo aayye7ana! Laittaa bollan laittaa gujja; baalatakka zaara zaarada bonchcha. <sup>2</sup> Taani Aarii7eela giyo katamaa bironkka un77ettana; un77ettin eti zilaalananne yeekkana. He katamai suuttai kammido yarshshiyooosaa mala gidana. <sup>3</sup> Taani ne yuushuwan dooddananne adussa gimbbiyan nena dirana; ne bollan olaa miixaa keexxana. <sup>4</sup> Hegaappe guyyiyan, neeni biittaa ciimmaappe haa pude haasayana; hirkki baanaappe ne cenggurssai yaana. Ne cenggurssai moitilliyaa cenggurssaadan, biitta giddoppe kiyana; ne haasayaikka baanaa giddoppe saasukettana.

<sup>5</sup> SHin ne morkketi liiqo baana keena coranne ne meqetti bannaageetu qoodaikka carkkoi efiyo suullaa keena daro gidana. Qoppennan de7ishin eesuwan, <sup>6</sup> Ubbaappe Wolqqaama GODAI dadan, biittaa qaattan, gita cenggurssan, gotiyan, carkkuwaaninne miya tamaa lacuwan inttena xomoosona. <sup>7</sup> Aarii7eela katamaa oliya cora kawotetta ubbai, he katamaanne a qatuwaa oliya ubbai, a waissiya ubbai aimodan, qamma ajjuutadan hanana. <sup>8</sup> Namisettida asi aimuwan mees; shin beegottiyo wode a namisai aggenaa; woikko saamettida asi aimuwan uyees; shin beegottiyo wode daafurees; saamuwaakka alibeenna; Xiyoone Deriyaa oliya cora kawotetta ubbai hegaadan hanana.

### *Xoossa Azazuwaa Kariyoogee Ehiyo Qixaatiyaa*

<sup>9</sup> Inttena intterkka dammettidi, damma asa gidite; inttena intterkka qooqissidi, qooqe asa gidite. Mattottite; shin woiniyaa eessaana gidoppo. Ganddigaarite; shin mattoyiya ushshaana gidoppo. <sup>10</sup> Aissi giikko, GODAI xiskkuwaa sonnu oottiya ayyaanaa intte bollan gussii. Hananabaa yootiyaageetoo, yaatidi intte aifeta i goozis. Ajjuutaa be7iyaageetoo, intte huuphetakka gulleiyis.

<sup>11</sup> Ha ubba ajjuutai neeyyo attamettida maxaafa mala gidis. Asai, “Hei, haggaa nabbaba” yaagidi, issi nabbabi danddayiya urau immiyo wode i, “Maxaafai attamettido gishshau, taani nabbabanau danddayikke” yaagana. <sup>12</sup> Qassi maxaafaa nabbabi danddayenna urau, “Hei, haggaa nabbaba” yaagidi immiyo wode, i, “Taani nabbabanau danddayikke” yaagana.

<sup>13</sup> Yaatin, Godai hagaadan yaagana; “Hagee asai ba bolla doonan taakko shiiqees; ba inxxarssan tana bonchchees; shin eta wozanai taappe haahuwan de7ees. Eti asi medhdhido wogaa tamaariiddi, taassi hadan goinnoosona. <sup>14</sup> Hegaa gishshau, be7ite, taani ha asaa bolli zaarettadakka maalaalissiyaabaa oottana; maalaaliyaabanne ooratabaa oottana. Eta eranchchatu aadhdhida eratetta daallamana; eta akeekanchchatu akeekaikka qosettana” yaagiis.

### *Sinttappe Yaana Kehaa*

<sup>15</sup> Bantta halchchuwaa ciimmayidi, GODAAPPE qottiyaageetussi, bantta oosuwaa xuman oottiiddi, “Nuna ooni be7ii? Nuna ooni erii?” yaagiyaageetussi aayye7ana!

<sup>16</sup> Intte yohota aatti yeggeeta; urqqaa medhdhiyaagee urqqaa mala giidi qoppeeta! Merettidaagee medhdhidaagaa, “I tana medhdhibeenna” gaanee? Otoi bana medhdhidaagaa, “I ainne erenna” gaanau danddayii?

<sup>17</sup> Liibaanoosa worai aradda gadiyau laamettanau, aradda gadee qassi wora gidanau, guutta wodee attiis gidenneeyye?

<sup>18</sup> He gallassi tulleti maxaafaa qaalaa siyana; lem77ilem77aappenne xumaappe kiyidi, qooqetu aifee xeellana. <sup>19</sup> Ashkkti gujjidikka GODAN ufaittana; asaa gidдон de7iya hiyyeesatikka Israa7eela Geeshshan hashshu gaana. <sup>20</sup> Meqetti bannaageeti wurana. Qilliicciyaageeti tim77i gaana. Iitabaa oottanau wochchiyaageeti ubbai xayana. <sup>21</sup> Hegeeti yohon asa mooranchcha kessiyaageeta, shilootan asaa seeriyaageetau piriya wottiyaageetanne wordduwan xillo bitaniyaa pirddaa teqqiyaageeta.

<sup>22</sup> Hegaa gishshau, Abrahaama wozida GODAI Yaaqooba zariyau hagaadan yaagees; “Yaaqooba zaree hagaappe sinttanau yeellatenna; eta som77oikka yeellatidi, sa7aa xeellenna. <sup>23</sup> SHin eti ta kushe ooso gidiya bantta naata bantta gidдон be7iyo wode, ta sunntaa geeshshatettan naagana; eti Yaaqooba Geeshshaa geeshshatetta moorokkona. Israa7eela Xoossaakka yashshatettan bonchchana. <sup>24</sup> Ayyaan balidaageeti simmidi akeekana; zuuzummiyaageetikka timirttiyaa ekkana” yaagees.

## 30

### *Gibxxeera Maacettiyo Hada Maachchaa*

<sup>1</sup> GODAI hagaadan yaagees; “Makkalanchcha naatussi aayye7ana! Taani halchchabeennabaa oottiyaageetussi, ta Ayyaanaappe gidenna exaa banttau giigissiyaageetussi, nagaraa nagaraa bolli gujjiyaageetussi aayye7ana. <sup>2</sup> Gibxxe kawuwaa qatuwan attanaunne Gibxxe kuwan attiyoosaa koyanau, tana zoretaa bessennan, duge Gibxxe wodhdhiyaageetau aayye7ana! <sup>3</sup> Hegaa gishshau, Gibxxe kawuwaa qatoi intteyyo yeella, kuwaikka kaushsha gidana. <sup>4</sup> Eta halaqati Xo7aanen de7ikkokka, eti kiitidoogeeti Haneesa giyo katamaa gakkikkokka, <sup>5</sup> yeellappenne kaushshappe attin, haraabaa aibanne wodhdhenna asaa, aibanne maaddenna woikko go77enna asan ammanettida asi ubbi kauyyana” yaagees.

<sup>6</sup> Neegeeban de7iya do7atubaa GODAI giyoogee haggaa; kiitettiyaageeti metoinne tuggai de7iyo biittaa gidduwaara, gaammoinne gaammiyaa woriya shooshshatinne paalliya demeti kolxxiyo iita biittaaara kanttidi baana. Bantta duretetta haretu zokkuwan, bantta aquwaa gaameelatu zimettan caani ekkidi, etayyo aibanne worissenna biitti baana. <sup>7</sup> Aissi giikko, Gibxxe maadoi waagi bannabaanne mela. Hegaa gishshau, taani a, “Co77u giidi uttida Ra7aaba” yaagada sunntaas.

### *Azazetenna Asaa*

<sup>8</sup> Ha77i ba; baada sinttaara yaana wodiyaassi merinaa malaata gidana mala, eta sinttan shuchchaa masettan qaaca; mazggafankka xaafa. <sup>9</sup> Aissi giikko, hageeti makkalanchcha asatanne worddanchcha naata; eti GODAI yootiyoobaa siyanau

koyenna naata. <sup>10</sup> Eti ajjuutaa yootiyaageeta, “Ajjuutaa be7oppite” yaagoosona; hanan-abaa yootiyaageetakka, “Ufaissiyaabaappenne milatiyaabaappe attin, nuuyyo suure-baa yootoppite. <sup>11</sup> Ogiyaappe kichchite; loossuwaappekka issi baggi simmite; nuuni Israa7eela Geeshshaabaa zaarettidi siyokko” yaagoosona.

<sup>12</sup> Yaatin, Israa7eela Geeshshai hagaadan yaagees; “Intte ha qaalaa ixixidi, asa naaqqiyoogan ammanettido gishshaunne cimmiyoogan ceeqettido gishshau, <sup>13</sup> ha nagarai intteyyo za77idi wodhdhiya, akeekennan eesuwan kunddiya adussa gimbbiyaa mala gidana. <sup>14</sup> A meqoi urqqaappe medhdhidonne nippi giidi meqqida otuwaa mala gidana; he mequwaa gidдон tama kaashiyo woikko ollaappe haatta duuqqidi kessiyo kon77inne beettenna” yaagees.

<sup>15</sup> Ubbaa Haariya GODAI, Israa7eela Geeshshai hagaadan yaagees; “Intte taakko simmiyoogaanne shemppiyoogan attana; co77u giyoogeenne ammanettiyoogee intteyyo wolqqa gidana; shin intte ixixideta. <sup>16</sup> Ixxidi hagaadan yaagideta; ‘CHii, nuuni paratun uttidi baqatana’ yaagideta; heгаа gishshau, intte baqatana. Qassikka intte, ‘Eesotiya parata toggidi biichchana’ yaagideta; heгаа gishshau, inttena yedettiyaageeti eesotana. <sup>17</sup> Issi tooranchchaa be7idi, intteppe sha7u asai baqatana; ichchashu tooranchchati inttena muliyaa yedettana. Deriyaa huuphiyan essido banddiraa mittaappe attin, intte tooranchchatuppe issoinne attenna” yaagees.

<sup>18</sup> SHin GODAI intteyyo kehanau naagees; i intteyyo qarettiyoogaa bessanau dend-dees. Aissi giikko, GODAI xillo pirddiya Xoossaa; a naagiyaageeti ubbati anjjetti-daageeta.

### *Xoossai Ba Asaa Anjjana*

<sup>19</sup> Inttenoo, Yerusalaamen de7iya Xiyoone asatoo, hagaappe sinttanau yeekkekketa; intte waasuwan i intteyyo tumuppe qarettana; i intte waasuwaa siyiyo wode, intteyyo zaaruwaa immana. <sup>20</sup> Godai intteyyo metuwaa oittaaanne tuggaa haattaa immikkokka, intte asttamaaree hagaappe sinttan bana qottenna. SHin intte aifee intte asttamaariyaa be7ana. <sup>21</sup> Intte ushachchi woikko haddirssi simmiyo wode, guyyeera inttena, “Ogee haggaa; an biite” yaagiya cenggurssaa intte siyana. <sup>22</sup> Hegaappe guyyiyan, biran alleeqettida eeqatanne worqqan kamettida misileta intte tunissana. Qita curqqadan intte eta, “Nuuppe haakkite” yaagidi wora olana.

<sup>23</sup> He wode intte biittan zerido kattaassi i iraa bukissana; biittaappe mokkiya kattaikka murutanne daro gidana. He gallassi intte miizzai aaho dembban hemettana. <sup>24</sup> Gadiyaa goyiya booratinne hareti laidaaninne gillan suraggidi, maxiniyan sohido harqquwaa maana. <sup>25</sup> Intte morkketu qatoti omoodettin, asai goora7ettidi wuriyo gallassi, gita deretuppenne xoqqa deretuppe pultto haattati goggana. <sup>26</sup> He gallassi aginee poo7oi awaa poo7uwaadan hanana; awaa poo7oikka kaseegaappe laappun kushe darana; laappun gallassa poo7uwaa keenaa poo7ana. He gallassi GODAI meqqida ba asaa koolana; i dechchin masunxxida masunttaakka pattana.

### *Xoossai Asoore Qaxxayana*

<sup>27</sup> Be7ite, GODAA sunntai suulliya hanqquwaara, sikkida cuwaa shaaraara haa-hosaappe yaana; a doonai hanqqoi kumidoogaa; a inxxarssaikka miya tama. <sup>28</sup> Ubbabaa pitti qucci efiya di7uwaadan, xaissiya carkkuwaa yeddana. I kawotet-tata bashshaa zazzariyan baqqana; asaa gappataakka wora efiya bixaalaa barssana. <sup>29</sup> Geeshsha baalai bonchchettiyo qammi yexxiyoogaadan, intte yexxana; GODAA deriyaa Israa7eela Zaallaakko biyo wode, pulaaliyaa punnidi yexxiya asai ufaittiyoogaadan, intte ufaittana.

<sup>30</sup> Qassi GODAI ba yashshiya cenggurssaa sissana; a qese wodhdhidi shociyo shochchaa ba suulliya hanqquwan, miya tamaa lacuwan, gotiyan, uushuwaaninne shachchaa burcciyaa qonccissana. <sup>31</sup> GODAI ba xam77an shociyo wode, Asoore biittaa



asati cenggurssaa siyidi dagamma. <sup>32</sup> GODAI eta ba qaxxayiyo xam77an shocana shochchai ubbai karaabiyaaninne diittan gidana. Olan i ba qeesiyaa denttidi, eta olana. <sup>33</sup> Aissi giikko, tamaa eettiyoosai beni giigiis; he sohoi giigidoi kawuwaassa. He sohoi ziqqanne aaho gididi, tamainne daro mittai dooretti uttidoo soho. GODAA shemppoi dinniyaa shaafaadan yiidi, he tamaa eetti kessana.

## 31

### *Xoossai Yerusalaame Naagana*

<sup>1</sup> Maaduwa koyanau duge Gibxxe wodhdhiyaageetussinne paran ammanettiyaageetussi aayye7ana! Cora gidiyo gishshau paraa gaaretun, daroppe mino gidiyo gishshau paraasatun ammanettiyaageetussi aayye7ana! Eti Israa7eela Geeshshaakko xeellokkona; woikko GODAAPPE maaduwa koyokkona. <sup>2</sup> SHin ikka bashshaa ehanau danddayiya aadhdhida eranchcha; ba giidoogaakka aggenaa; iitatu keettaa asaa bollinne iitabaa oottiyaageeta maaddiyaageetu bolli denddana. <sup>3</sup> Gibxxe biittaa asati asappe attin, xoossa gidokkona. Eta paratika ashoppe attin, ayyaana gidokkona. GODAI hanqquwan ba kushiya micciyo wode, maaddiyaagee xubettana; maadettiyaageekka kunddana; eti ubbaikka issippe xayana.

<sup>4</sup> GODAI tana hagaadan yaagees; “Gaammoi woikko wodala gaammoi mehiyaa oiqqidi daariyo wode, daro henttanchchati a bolli xeesetti shiiqikkokka, i eta waa-suwaassi dagammenna. Eta wuigiyaassikka yayyenna. Hegaadankka, Ubbaappe Wolqqaama GODAI Xiyoone Deriyaaninne a xoqqan olaa gaittanau duge wodhdhana. <sup>5</sup> Kafoi bollaara aallanttiyoogaadan, Ubbaappe Wolqqaama GODAI Yerusalaame gondallananne ashshi ekkana; i a bollaara kantidi, a wotti ekkana” yaagees.

<sup>6</sup> Inttenoo Israa7eela asatoo, intte keehippe makkalidoogaakko simmite. <sup>7</sup> Aissi giikko, asa ubbai bantta nagaranchcha kushiyan biraappenne worqqaappe medhdhido eeqata he gallassi olana.

<sup>8</sup> Tamai Xiyoonen, coocee Yerusalaamen de7iyo GODAI hagaadan yaagees; “Asooree asabaa gidenna bisuwan kunddana; asabaa gidenna bisoi eta maana. Eti bisuwa sint-tappe baqatana; eta wodalla asati deexo oosuwau azazettana. <sup>9</sup> Dagamaa gaasuwan, eta mino qatoi laalettana; eta ola gadaawatikka dagamau olaa banddiraa aggi bayidi baana” yaagees.

## 32

### *Xillotettan Aissiya Kawuwaa*

<sup>1</sup> Be7ite, kawoi xillotettan kawotana; haariyaageetikka suuretettan haarana. <sup>2</sup> Asai huuphiyan huuphiyan carckuwaappe geemmiyo soho, gotiyaappe baqatiyo soho gidana; mela sohuwan goggiya haattanne booddila biittan de7iya gita zaallaa kuwaa mala gidana. <sup>3</sup> Xeelliyaa asatu aiffee qilimmenna; siyiyaageetu haittaikka ezggana. <sup>4</sup> Tafitafiya asatu wozanai erananne akeekana. Deddotiya asatu inxxarssaikka suure geeshshidi haasayana. <sup>5</sup> Hagaappe sinttanau eeyyi bonchcho asa geetettenna. Iita asi bonchchettenna. <sup>6</sup> Aissi giikko, eeyyai eeyyatettaa haasayees; a wozanaikka nagaraa oottanau, GODAA bolli xalabaa haasayanau, namisettidaageeta kalissennan ag-ganaunne saamettidaageeta ushshennan digganau, iitabaa maqettees. <sup>7</sup> Uuzettiyaagaa uuzee iita; metootanchchai suurebaa haasayinkka, wordduwan hiyyeesaa xaissanau i iita qofaa qoppees. <sup>8</sup> Lo77o uri lo77obaa halchchees; he lo77o halchchuwan minnidi de7ees.

### *Pirdaanne Betiyaappe Simmiyoogaa*

<sup>9</sup> Inttenoo qofi bannan de7iya maccaasatoo, denddite; denddidi ta odiyooogaa siyite; inttenoo ammanettidi uttida macca naatoo, taani intteyyo yootiyoogaa ezggite. <sup>10</sup> Issi



laittaappe qiibaa aadhdhishin, intte ammanettidi uttidaageeti kokkorana; woiniyaa a wodiyan xunqqiyoogee attana. Tookkidobaappe intte aifiyaa shiishshana wodekka yeenna. <sup>11</sup> Inttenoo ishaluwan de7iya maccaasatoo, kokkorite. Inttenoo ammanettidi uttida macca naatoo, gajigajite. Intte maayuwaa qaarite; qaaridi kayyo afalaa intte xeessan gixxite. <sup>12</sup> Lo77iya shooqainne aifiyaa herxxexxida woinee xayido gishshau, azzanidi, intte tiraa baqqite. <sup>13</sup> Agunttaa buurainne kinddiichchoi ta asaa gaden mokkiis. Asai ufaittidi de7ido keettatussinne ufaissan de7ida ha katamaassi yeekkite. <sup>14</sup> Miixai attana; daro asai de7iyo katamatikka onana; qatoinne wochchiyo gimbbeti merinau baisa gidana; eti wora hareti ufaittiyoosaanne dorssaa wudee hemettiyoosaa gidana.

<sup>15</sup> Hegeenne, bolla xoqqaappe nu bolli ayyaanai gukkana gakkanaassa, mela bazzo araddana gakkanaassanne aradda biittaikka wora gidiiis geetettidi qofettana gakkanaassa. <sup>16</sup> Hegaappe guyyiyan, suure pird dai mela bazon, xillotettaikka aradda biittan de7ana. <sup>17</sup> Xillotettaa oosoi sarotetta gidana; xillotettaa aifeekka merinau woppattanne ammanettidi de7iyoobaa gidana. <sup>18</sup> Ta asai sarotetta de7iyo sohuwan, naagettiya keettaanne woppu giida shemppo sohotun de7ana. <sup>19</sup> SHachchai woraa diippikkonne, qassi katamai muleera qolettikkonne, <sup>20</sup> he haattaa ubbaa lanqqen intte kattaa zeridi, intte mehiyaakka intte haretakka henttau birshshi yeddidi, intte keehi anjjettana.

### 33

#### *Maaduwaa Demmanau Woossido Woosaa*

<sup>1</sup> Nenoo, nena xaissennan de7ishin xaissiyaagoo, neeyyo aayye7ana! Nenoo, nena aatti immennan de7ishin, aatta immiyaagoo, neeyyo aayye7ana! Neeni xaisuwaaggido wode nena xaissana; neeni aatta imuwaa aggido wode nena aatti immana.

<sup>2</sup> Abeet GODAU, nuna maara; nuuni nena naagoos; maallado maallado nuussi wolqqa gida; metuwaa wodekka nuna ashshiyaagaa gida. <sup>3</sup> Ne cenggurssai dadaadan guumiyo wode asai baqatees; neeni nuna maaddanau dendda eqqiyo wode, kawotettati laalettoosona. <sup>4</sup> Gonddoi shiiqiyoogaadan, intte omoodoi shiiqana; boolee dirbbiyooogaadan, asai a bolli dirbbana.

<sup>5</sup> GODAI bollan de7iyo gishshau, xoqqu xoqqu giis; i Xiyoonne suure pirdaaninne xillotettan kuttana. <sup>6</sup> I intteyyo intte wodiya minttiyaagaa, intte kumetta atotettaa, aadhdhida eratettaanne eraa gidana; GODAASSI yayyiyoogee au aqo gidana.

<sup>7</sup> Be7ite, eta gooba asati ogiyan waassoosona; sigatettaassi kiittidoogeetikka mishettidi yeekkoosona. <sup>8</sup> Aaho ogeti onidosona; ogiyaara kanttiyaagee aggiis. I ba maacettido maachchaa koliis; katamatakka kariis. Asakka wudibeenna. <sup>9</sup> Biittai azzaneesinne labbanees. Liibaanoosi yeellatidi meeles; Saaroonna giyo aradda dilbbai mela bazzo gidiiis. Baasaane giyo deriyaanne Qarmmeloosa deriyan de7iya mittatu haittai qoqqofettees.

#### *Xoossai Bana Ixxiyaageeta Ubbaa, "Inttena Ye77e!" Giidoogaa*

<sup>10</sup> GODAI kawotettatussi hagaadan yaagees; "Ha77i taani denddana; ha77i taani bonchchettana; ha77i taani xoqqu xoqqu gaana. <sup>11</sup> Intte utulaa shahaaridi, suullaa yelideta. Intte shemppiyo shemppoi inttena miya tama. <sup>12</sup> Asai taman xuugettida booqintta mala gidana; qassi qanxxettidi, taman eexxida aguntta mala gidana. <sup>13</sup> Inttenoo, haahuwan de7iyaageetoo, taani oottidoogaa siyite; matan de7iyaageetoo, taani wolqqaama gidiyooogaa akeekite" yaagees.

<sup>14</sup> Xiyoonen de7iya nagaranchchati yayyidosona; Xoossaasa gidennaageeta kokkorssai oiqqiis. Hegaa gishshau, eti, "Miya tamaara de7anau danddayiya uri nu giddon oonee? Eexxiiddi de7i aggiyaabaara de7anau danddayiya uri nu giddon oonee?"

yaagoosona. <sup>15</sup> Xillotettan hemettiyaagee, suurebaa haasayiyaagee, suure gidenna ogiyaara beettiya go77aa ixxiyaagee, mattaayiyaa ekkana ba kushiya yeddennaagee, suutta gussiyoojaa siyennaadan, ba haittaa tucchiyaagee, iitabaa xeellennaadan, ba aifiyaa qilimmiyaagee, <sup>16</sup> he urai xoqqasan de7ana. I baqatidi attana sohoikka mino zaalla qato gidana; a oittaikka au imettana; i uyiyo haattaikka paccenna.

### *Bonchchoi Kumido Sinttaara Yaana Laittaa*

<sup>17</sup> Intte aifeti kawuwaa a puulaara be7ana; haakkidi de7iya biittaakka be7ana. <sup>18</sup> Intte wozanai, “Qoodidaagee awan de7ii? Giiraa yiggi xeellidaagee awan de7ii? Adussa gimmbeta qoodidaagee awan de7ii?” yaagidi yashshiya benibaa qoppana. <sup>19</sup> Intte qareti bainna asata, intteyyo gelenna haasayaa haasayiya asatanne inxxarssai deddotiyo asata hagaappe sinttan be7ekketa.

<sup>20</sup> Nuuni nu baalaa bonchchiyo Xiyoono katamaa be7ite! Woppu giidi de7iyooosaa, a xishee shodettana, a wodoroiikka duuxxennanne qaaxxenna dunkkaane malaa, Yerusalaame katamaa intte intte aifiyan be7ana. <sup>21</sup> SHin GODAI nuussi he sohuwan ba gita wolqqaa qonccissana. He sohoi aaho shaafatunne goggiya haattatu mala gidana. Laaggiyo wolwolo a bollaara baanau danddayenna; gita markkabeekka yaara kanttanau danddayenna. <sup>22</sup> Aissi giikko, GODAI nu daannaa; GODAI nuuyyo higgiiyaa immidaagaa. GODAI nu kawuwaa; i nuna ashshana.

<sup>23</sup> Ne wodoruwaa qaxiballoi dol77ees; markkabiya tuussaa a sohuwan mintti oiqqanau woikko sharaakka xagaaganau danddayenna. He wode daro omooddidi ehiidobai shaakettana; harai attin, wobbetikka omooduwaa omooddana. <sup>24</sup> Xiyoonen de7iya ooninne, “Taani harggais” yaagenna; yan de7iya asaa nagarai atto geetettana.

## 34

### *Xoossai Ba Morkketa Qaxxayana*

<sup>1</sup> Inttenoo, kawotettatoo, shiiqidi siyite! Inttenoo asatoo ezggite! Biittainne biittan de7iyaabai ubbai, sa7ainne sa7an de7iyaabai ubbai siyo! Biittainne biittaappe kiyiyaabai ubbai ezggo! <sup>2</sup> Aissi giikko, GODAI kawotetta ubbaa hanqqettiis; a yiilloikka eta tooranchchatu ubbaa bollaana. I eta muleera xaissana; eta siifiyaageetussi aattidi immana. <sup>3</sup> Etappe woridoogeeti olettana; eta ahai xinqqana. Wogga dereti eta suuttan kamettana. <sup>4</sup> Saluwaa xoolintteti ubbai seerana; saloti woraqqatadan xaaxettana. Eta xoolintteti ubbai woiniyaappe haittai qoqqofettiyoogaadan, balasiyaappe aifee qoqqofettiyoogaadan qoqqofettana.

<sup>5</sup> Ta bisoi salotu gidon alana gakkanaashin uyiis. Be7ite, i Eedooma bolli, taani qang-gido asaa bolli pirddanau wodhdhees. <sup>6</sup> GODAASSI Booxira giyo kataman yarshshoi, Eedooma biittan gita shuhai de7iyo gishshau, a bisoi suuttan meecettidi, modhdhuwan xaaxettiis. Dorssatunne deeshshatu suuttan meecettidi, dorssatu kilahotu modhdhuwan xaaxettiis. <sup>7</sup> Qassi menttati, mirggotinne korima boorati etaara kunddana. Eta biittai suutta xalla gidana; eta sophpheekka modhdhuwan munaqettana. <sup>8</sup> Aissi giikko, hegee GODAI haluwaa kessiyo gallassa; Xiyoono ashshidi, a morkketussi kushiya zaariyo laittaa.

<sup>9</sup> Goggiya Eedooma haattati shidau, a sophpheekka dinniyau laamettana; a biittai eexxiya shida gidana. <sup>10</sup> Tamaikka qamman gallasan to77enna; a cuwaikka merinau cuwattana. Eedooma biittai yeletaappe yeletaa gakkanaashin, baises gidana; ooninne merinau hegara kanttena. <sup>11</sup> SHin xinggilleenne quxarssai a laattana; guttoinne quuroi an de7ana. Xoossai Eedooma bolli qoletttaa likkiyo wodoruwaanne baisatettaa likkiyo tumbbiyaa pididi oottidi yeddana. <sup>12</sup> He biittan kawotiyaabi xayana; halaqatikka hegaappe kichchana. <sup>13</sup> A qatotun agunttai, a miixatun ohai odooroi mokkana. I worakanati allaxxiyoosaanne yanchchati de7iyooosaa gidana. <sup>14</sup> Bazzo do7ati godare-tuura gaittana; tuna ayyaanati issoi issuwaara xeesettana; gamma xalaheti wodhdhidi,

yan de7ana. <sup>15</sup> Guttiyaa yan keettaa keexxana; keexxada phuuphullido phuuphulleeta haphphada qoxana. Ba maratakka ba qefetu garssan haphphana; qassi gaceti bantta laggiaara laggiaara he sohuwaa shiiqana.

<sup>16</sup> GODAA maxaafaappe koyidi nabbabite. GODAA doonai azazido gishshaunne a ayyaanai shiishshido gishshau, hageetuppe issoinne paccenna; qassi issoinne ba laggee bannan de7enna. <sup>17</sup> I etau saamaa kessiis; a kushee etau biittaa wodoruwan shaakkiis; eti a merinau haarana; yeletaappe yeleta gakkanaashin, eti an de7ana.

## 35

### *Xillotettaa Ogiyaa*

<sup>1</sup> Bazzoinne mela biittai ufaittana; bazzo ufaissaa poccu giiddi, ciishshaa ciyyana. <sup>2</sup> I keehippe ciyyana; poccu giiddi ufaissan yexxana. Liibaanoosa bonchchoinne Qarmmeloosanne Saaroonaa gitatettaa imettana; eti GODAA bonchchuwaanne nu Xoossaa gitatettaa be7ana.

<sup>3</sup> Daafurida kushetanne arggaacida gulbbataa minttettite. <sup>4</sup> Wozanan yashshai de7iyooqeeta, “Minnite! Yayyoppite! Be7ite, intte Xoossai haluwaa kessanaunne ba xoosatettan eta qaxxayanau yaana; yiidi i inttena ashshana” yaagite.

<sup>5</sup> He wode, qooqetu aifee dooyettana; tulletu haittaikka siyana. <sup>6</sup> Wobbeti genessadan guppana; duudetikka ufaissan yexxana; bazzon haattai melosan pulttoi xuuqqana. <sup>7</sup> Xuuggiya shafee dagattida haatta gidana; mela biittai haattaa pulttana; worakanati allaxxiyoosan maatai shombboqqinne ceccai mokkana.

<sup>8</sup> Yan aaho ogee de7ana; ikka Geeshshatettaa Ogiyaa geetettana. Geeshsha giden-naageeti he ogiyaara kanttokkona. SHin i geeshshatussa gidana; iita eeyyati an simeret-tokkona. <sup>9</sup> Yan gaammoi de7enna; yashshiya do7atikka hegaara kanttokkona; yaanikka beettokkona; shin wozettidaageetu xallai hemettana. <sup>10</sup> GODAI wozidoogeeti simmana; simmidi yexxiiddi, Xiyoone yaana; merinaa ufaissai eta huuphiyan wodhdhana. Eti ufaissaanne hashshu giyoobaa demmana; azzanoinne oolee wora baqatana.

## 36

*Asooreti Yerusalaame Naassidosona*  
(*Kawotu Maxaafaa Naa77anttuwaa 18:13-27; Hanidabaa Odiya Naa77antto Maxaafaa 32:1-19*)

<sup>1</sup> Kawuwaa Hizqqiyaasi kawotido tammanne oiddantto laittan, Asoore Kawoi Sanaakireebi gimbbetti uttida Yihudaa katamata ubbaa olidi oiqqiis. <sup>2</sup> Hegaappe guyyian, Asoore biittaa Kawoi Laakisha giyo katamaappe issi waannatiya ola gadaawaa cora olanchchatuura Kawuwaa Hizqqiyaasakko Yerusalaame yeddiis. Yeddin biidi, Maayuwaa Meecciyaagaa gade efiya ogiyaappe qommo baggaara de7iya dagattida haattai goggiyo zaraa lanqqen eqqiis. <sup>3</sup> Yaatin, Hilqqiyaa na7ai kawo keettan aawatiya Eliyaaqiimi, waanna xaafee SHEebininne Asaafa na7ai taarikiyaa xaafiya Yo7aahi akko kare kiyidosona.

<sup>4</sup> Kiyin Asooretu gadaawai eta, “Hizqqiyaasassi hagaadan yaagidi yootite; ‘Asoore kawoi, wolqqaamai nena hagaadan yaagees; ‘Neeni haggaa keeni aibin ammanettadii? <sup>5</sup> Neeni coo mela, ‘Olaa olettana taayyo aadhdhida erainne wolqqai de7ees’ yaagaasa. SHin neeni oonan ammanettada ta bolli haggaa makkaladii? <sup>6</sup> Neeni Gibxxe kawoi maaddana gaada qoppidabaa gidikko, meqqida shombboqo gatiman guufetiya asa mala. Aissi giikko, gatimai meqqin, pinccoi kushiya caddeesinne masunxxisees. Gibxxe kawoi banan ammanettiya asa ubbau haggaa mala.

7 “ “SHin neeni taayyo, ‘Nuuni GODAN, nu Xoossan, ammanettoos’ yaagikko, Hizqqiyaasi Yihudaa asaanne Yerusalaame asaa, ‘Intte Yerusalaamen de7iya yarshshiy-oosan goinnanau koshshees’ giidi, ayyo goinniyo xoqqa sohotanne yarshshiyso sohota diggirgido Xoossaa i gidennee?

8 “ “Ane ha77i haaya! Yaada ta godaa Asoore kawuwaara naasetta. Neeni togganau danddayiya, gidiya asa demmikko, naa77u sha7u parata taani neeyyo immana. <sup>9</sup> Neeni, ‘Gibxxeti paraasatanne paraa gaareta taayyo yeddana’ gaada ammanikkonne, ta godaa olanchchatu halaqatuppe issi laafiyaagaakka zaaranau danddayakka. <sup>10</sup> Hegaa bollikka qassi, taani ha77i tumu GODAA azazoi bannan ha biittaa xaissanau kiyidanaa? GODAI ba huuphen tana, ‘Ba, he biittaa baada, olada bashsha’ yaagidi odiis” yaagees’ yaagite” yaagiis.

<sup>11</sup> Hegaappe guyyiyan Eliyaaqiimi, SHEebininne Yo7aahi Asooretu gadaawaa hagaadan yaagidosona; “Nuuni birshshettaa eriyo gishshau, hayyanaa neeni nuuyyo ne ashkkaratuyyo Sooriyaa qalan oda. Dirssaa gimbbiyaa huuphiyan de7iya asai siyenna mala, Ibraisxxe qalan odoppa” yaagidosona.

<sup>12</sup> SHin gadaawai zaarettidi, “Ha qaalata taani inttessinne intte godaa xallaassi yootanau tana ta godai kiittideeyye? Inttenaara issippe bantta shiyaa maanaunne bantta sheeshshaa uyanau de7iya, ha dirssaa gimbbiyaa bolli uttida asaassaara ubbau odanaassa gidenneeyye?” yaagiis.

<sup>13</sup> Hegaappe guyyiyan Asooretu gadaawai denddi eqqidi, ba qaalaa xoqqu oottidi, Ibraisxxe qalan hagaadan yaagiis; “Asoore kawoi wolqqaamai inttena giyoobaa siyite! <sup>14</sup> Kawoi inttena hagaadan yaagees; ‘Hizqqiyaasi inttena cimmoppo; aissi giikko, i inttena ta kushiyaappe wotti ekkanau danddayenna. <sup>15</sup> I inttena, “GODAI tuma nuna ashshana; ha katamaikka Asoore kawuwaa kushiyan gelenna” yaagidi inttena GODAN ammanttoppo’ yaagees.

<sup>16</sup> “Ee, intte Hizqqiyaasi odiyoobaa siyoppite. Asoore kawoi inttena, ‘Tanaara sigettite; haa taakko kiyite. Yaatikko, intte ubbaikka intte woiniyaa teeraappenne intte balasiyaa teeraappe miishshana; intte bookkido ollaappekka haattaa uyishshana. <sup>17</sup> Hegaappe guyyiyan taani yaada, inttena intte biittaa milatiya biitti ekkada efaana. He biittai kattinne woine eessi, oittinne woine ataakilttee kumido biittaa’ yaagees.

<sup>18</sup> “Hizqqiyaasi inttena, ‘GODAI nuna ashshana’ yaagidi cimmennaadan naagettite. Dere asatu xoossatuppe ba biittaa Asoore kawuwaa kushiyaappe ashshida xoossi de7iyye? <sup>19</sup> Hamaata xoossatinne Arifaada xoossati awan de7iyoona? Safariwaima giyo katamaa xoossati awan de7iyoona? Eti Samaariyaa ta kushiyaappe wotti ekkidonaa? <sup>20</sup> Ha biittatu xoossatu ubbaa gidon ba biittaa ta kushiyaappe ai xoossi ashshidoogaa shin, GODAI Yerusalaame ta kushiyaappe ashshanee?” yaagiis.

<sup>21</sup> SHin asai issi qaalanne ayyo zaarennan co77u giis. Aissi giikko, kawoi eta, “Ayyo ainne zaaridi odoppite” yaagi wottiis. <sup>22</sup> Hegaappe guyyiyan Hilqqiyaa na7ai kawo keettan aawatiya Eliyaaqiimi, waanna xaafee SHEebininne taarikiyaa xaafee Asaafa na7ai Yo7aahi bantta maayuwaa pooshshidi, Hizqqiyaasakko biidosona; biidi Asooretu gadaawai giidobaa ubbaa ayyo odidosona.

## 37

### *Kawoi Hizqqiyaasi Isiyaasa Zoriyaa Oichchiis (Kawotu Maxaafaa Naa77anttuwaa 19:1-7)*

<sup>1</sup> Kawoi Hizqqiyaasi hega siyido wode, ba maayuwaa pooshshiis; pooshshidi waaruwaa maayidi, GODAA Beeta Maqidasiyaa geliis. <sup>2</sup> Kawo keettan aawatiya Eliyaaqiimi, waanna xaafee SHEebininne cima qeeseti waaruwaa maayidi, Amoxa na7aa hananabaa yootiya Isiyaasakko baana mala kiittiis. <sup>3</sup> Kiittin eti Isiyaasakko biidi, “Hizqqiyaasi hagaadan yaagees; ‘Hachchi gallasai meto gallassa, seera gallassanne



yeella gallassa. Hegeekka na7i yelettanau wodee gakkinn, bannakkada yelanau maccaaseessi wolqqi xayiyooqaa mala. <sup>4</sup> De7o Xoossaa cayanaadan, a godai, Asoore kawoi, kiittido gadaawaa qaalaa GODAI ne Xoossai siyennan aggenna. Qassi GODAI ne Xoossai he siyido qaalaa daafan a qaxxayennan aggenna. Hegaa gishshau, nu asaa gidдон palahi attanaageetussi woossa! 'yaagees' yaagidosona.

<sup>5</sup> Kawuwaa Hizqqiyaasa ashkkarati Isiyaasakko yiido wode, <sup>6</sup> Isiyaasi eta hagaadan yaagiis; "Intte godaassi hagaadan yaagidi odite; 'GODAI nena, "Asoore kawuwaa ashkkarati tana cayishin, neeni siyido cashshaa qaalaassi yayyoppa. <sup>7</sup> Be7a, oduwaa siyidi, i ba biitti simmana mala, taani a gidдон issi ayyaanaa wottana. Yaadata i ba biitti biidi, yan bisuwan haiqqanaadan, taani a oottana" yaagees' yaagite" yaagiis.

*Asooreti Haranttuwaakka Naassidosona  
(Kawotu Maxaafaa Naa77anttuwaa 19:8-19)*

<sup>8</sup> Asoore kawoi Laakisha katamaappe denndidi biichchidoogaa Asooretu gadaawai siyidi, guyye simmiis. Simmidi kawoi Liibina kataman olettiyaagaa demmiis.

<sup>9</sup> Kawoi Sanaakireebi, "Toophphiyaa Kawoi Tirihaaqi nena olanau yiis" yaagiyo oduwaa siyiis. Siyidi Hizqqiyaasassi hagaadan yaagidi kiittiis; <sup>10</sup> "Yihudaa Kawuwaa Hizqqiyaasaa, neeni ammanettiyo Xoossai nena, 'Yerusalaamee Asoore kawuwaa kushiyan gelenna' yaagidi cimmoppo. <sup>11</sup> Be7a, Asoore kawoti biittata ubbaa muleera xaissidi, eti oottidobaa neeni siyadasa. Yaatin, neeni attuutee? <sup>12</sup> Beni ta maizza aawati bashshido biittatu xoossati, hegeetinne Gozaana, Kaaraanenne Rexeefa biittatu xoos-satinne Talassaaran de7iya Edene asaa xoossati he biittata bashshaappe ashshidonaa? <sup>13</sup> Hamaata kawoi, Arifaada kawoi, Safariwaima kawoi, Henaa7a kawoinne liwa kawoi awan de7iyoonaa?" yaagidi kiittiis.

<sup>14</sup> Hizqqiyaasi dabddaabbiyaa kiitettida asatuppe ekkidi nabbabiis. Nabbabido dabddaabbiyaa GODAA Beeta Maqidasiyaa ekki efidi, GODAA sinttan micciis. <sup>15</sup> Yaatidi GODAA hagaadan yaagidi woossiis; <sup>16</sup> "Abeet Ubbaappe Wolqqaama GODAU, kiruubetuppe gidduwan uttiya Israa7eela Xoossau, sa7aa kawotettatu ubbaa bolli ne xalaalai Xoossaa. Saluwaanne sa7aa neeni medhdhadasa. <sup>17</sup> Abeet GODAU, ne haittaa haa yeggada siya. Abeet GODAU, ne aifiyaa pogada xeella. Nena, de7o Xoossaa cayanau Sanaakireebi kiittido qaalaa siya.

<sup>18</sup> "Abeet GODAU, Asoore biittaa kawoti kawotetta ubbaanne eta biittaa bashshidoogee ee tuma. <sup>19</sup> Eta xoossata taman xuuggi xaissidosona; aissi giikko, eta xoossati wonikka asa kushee massidi kessido mittanne shuchcha gidido gishshau, tumu xoos-sata gidokkona; hegaa gishshau, eti eta xaissidosona. <sup>20</sup> Ha77i simmi abeet GODAU, nu Xoossau, ne xalaalai GODAA gididoogaa sa7aa kawotettati ubbai erana mala, neeni nuna a kushiyaappe wotta ekka!" yaagidi woossiis.

*Isiyaasi Kawuwaassi Yeddido Kiitaa  
(Kawotu Maxaafaa Naa77anttuwaa 19:2-37)*

<sup>21</sup> Hegaappe guyyian, Amoxa na7ai Isiyaasi Hizqqiyaasassi hagaadan yaagidi kiittiis; "GODAI Israa7eela Xoossai hagaadan yaagees; 'Neni Asoore Kawuwaa Sanaakireeba gaasuwan tana woossido woosaa siyaas' yaagees.

<sup>22</sup> "GODAI Sanaakireebabaa hagaadan yaagidi haasayees;

" 'Xiyoonen de7iya asai nena karees;  
Yerusalaame asai ba huuphiyaa qaattidi, nena qoosees.

<sup>23</sup> Neni cayidoogeenne toochchidoogee oonee?

Neni o bollan ne qaalaa

xoqqu oottada haasayadii?

Qassi otoruwan oona

xoqqu gaada xeelladii?



Hegaa neeni oottidoi ta bollaana,  
Israa7eela Geeshshaa bollaana gidennee!

<sup>24</sup> Neeni kiittido asatu baggaara Godaa cayadasa.

Qassi hagaadan yaagadasa;

“Taani taayyo de7iya cora paraa gaaretun  
xoqqa deretu huuphiyaa, Liibaanoosa Deriyaa kiikiyaa kiyaas.

Kiyada ubbaappe aduqqiya zigatanne  
ubbaappe lo77iya xiiddata qanxxaas.

Taani xoqqau wurssetta gaxaanne  
tuujjuma woraa gakkaas.

<sup>25</sup> Taani allaga biittatun  
haattaa ollata bookkada,  
haattaa etappe uyaas.

Gibxxe biittan goggiya haatta ubbaa  
taani ta tohuwaa gomppan yedhdhada melissaas”  
yaagadasa.

<sup>26</sup> “ ‘Daro wodiyaappe kase,  
neeni gimbbettida katamata qoqqofada,  
shuchcha keela kessana mala,  
taani qofaa qachcha wottidoogaa neeni erabeikkii?

Taani ha77i poliyo halchchota  
beni halchcha wottaas.

<sup>27</sup> Hegaa gishshau, eta asaayyo wolqqai ixxin,  
eti kauyyidosonanne yeellatidosona.

Eti gade maataa mala;  
goshshan morkkida carshshaa mala.

Eti keettaa huuphiyan  
morkkiya sharafaadaaninne ka77ennan de7ishin,  
leegee miido kattaadan hanidosona.

<sup>28</sup> “ ‘SHin neeni uttiyoosaa,  
kiyiyoosaa, geliyoosaanne  
ta bolli neeni hanqqettido hanqquwaa taani erais.

<sup>29</sup> Neeni ta bolli hanqqettido gishshaunne,  
ne otoruwaakka taani siyido gishshau,  
taani ne siiriyaa ta duufuwaa aattana;  
ne doonankka ta bixaalaa barssana.

Yaataada neeni yiido ogiyaara  
taani nena guyye zaarana’ yaagees”  
yaagiis.

<sup>30</sup> Hegaappe guyyiyan, Isiyaasi Kawuwaa Hizqqiyaasa hagaadan yaagiis; “Hagee polettanaagau neeyyo malaatai hagee: Ha laitti intte azabba morkkida katta maana; laitti qassi ha laitti morkkidaagaa azabba maana. SHin kaalla laitti intte intte huuphen zeritenne cakkite; woiniyaa turaakka tokkitenne a teeraa miite. <sup>31</sup> Yihudaa asaa atettati xaphuwaa duge yeddidi, bollan aifiyaa aifiya mittaa mala gidana. <sup>32</sup> Aissi giikko, wuriiddi attidaageeti Yerusalaameppe, palahidaageetikka Xiyooneppe kiyana. Ubbaappe Wolqqaama GODAA mishoi hegaa oottidi polana.

<sup>33</sup> “Hegaa gishshau, Asoore kawuwaabaa GODAI hagaadan yaagees; ‘Asoore kawoi ha katamaa gelenna; woikko hagan ba wonddafiyyaa dukkenna; woi ba gondalliyyaa oiqqidi, ha katamaa sintti aadhdhenna; woikko qassi katamaa yuushuwaa biittaa

dooriyan diddiqenna. <sup>34</sup> Asoore Kawoi ba yiido ogiyaara guyye simmana; i ha katamaa gelenna. Taani GODAI haggaa odais. <sup>35</sup> Taani ta bonchchuwaa gishshaunne ta ashkkaraa Daawita gishshau, ha katamaa boshissennan ashsha ekkana' yaagees" yaagiis.

<sup>36</sup> He gallassi qammi GODAA kiitanchchai kiyidi, Asoore asai dunkkaanidosan, issi xeetanne hosppun tammanne ichchashu sha7u attumaasaa woriis. Yaatin, asai maal-lado suuridi be7iyo wode, haiqqida asaa ahai hegan kumiis. <sup>37</sup> Hegaa gishshau, Asoore Kawoi Sanaakireebi denddidi, guyye simmi biidi, Nanawe kataman uttiis.

<sup>38</sup> Issi gallassi Sanaakireebi ba xoossaa Nisirooka keettan goinniiddi de7ishin, a naati Adiraamelekinne Sar77eexeri bisuwan a woridosona. Woridi Araaraate giyo biitti baqatidosona. A na7ai Asiraadooni<sup>5</sup> a sohuwan kawotiis.

## 38

### *Kawoi Hizqqiyaasi Harggidi Paxiis*

*(Kawotu Maxaafaa Naa77anttuwaa 20:1-11; Hanidabaa Odiya Naa77antto Maxaafaa 32:24-26)*

<sup>1</sup> He wode Kawoi Hizqqiyaasi harggidi, haiqqana matiis. Yaanidaashin Amoxa na7ai hananabaa yootiya Isiyaasi akko biidi, "GODAI nena, 'Neni haiqqaasappe attin paxakka; heggaa gishshau, ne keettaa giigissa' yaagees" yaagiis.

<sup>2</sup> Yaagin Hizqqiyaasi godaakko simmi zin77idi, GODAA woossiis. <sup>3</sup> Woossiiddi, "Abeet GODAU, taani ne sinttan tumatettaaninne kumetta wozanan hemettidoogaanne qassi nena ufaissiyaabaa oottidoogaa taayyo neeni hassayana mala, taani nena woossais" yaagidi woossiis; woossiiddi Hizqqiyaasi keehi mishettidi yeekkiis.

<sup>4</sup> Hegaappe guyyiyan, GODAA qalalai Isiyaasakko hagaadan yaagiiddi yiis. <sup>5</sup> Yiidi, "Ba; baada Hizqqiyaasa, 'GODAI ne maizza aawaa Daawita Xoossai hagaadan yaagees; 'Taani ne woosaa siyaas; ne afuttaakka be7aas. Ne laittaa bolli taani neeyyo tammanne ichchashu laittaa gujjana. <sup>6</sup> Nennanne ha katamaa Asoore biittaa kawuwaa kushiyaappe ashshana; taani ha katamaayyo olettada ashshana" yaagees' yaaga" yaagiis.

<sup>7</sup> Isiyaasi gujjidikka hagaadan yaagiis; "GODAI ba giido qaalaa polanaagau malaatai haggaa: <sup>8</sup> Be7a, Akaazi pude kiyanaa giigissido xekkan de7iya kuwai tammu tangguwaa guyye simmidi baanaadan, taani oottana" yaagiis. Yaagin kuwai tammu tangguwaa guyye simmidi biis.

<sup>9</sup> Yihudaa kawoi Hizqqiyaasi harggi paxidoogaappe guyyiyan, xaafido mazamuree haggaa: <sup>10</sup> Taani, "Ta de7o laittaaayyo biron bagga gakkiiyo wode, haiquwaa penggeera gelana haniyaanaa? Ta attida laittaa bonqqirggin, mela attana haniyaanaa?" yaagaas. <sup>11</sup> Hegaadankka qassi, "Taani paxa de7iyaageetu biittan GODAA be7ikke; ha sa7an de7iyaageetu giddonkka naa77antto be7ikke. <sup>12</sup> Dorssaa heemmiyaa-gaa dunkkaaniyaadan, ta de7oi shodettiis. SHimainnee afalaa harppan xaaxiy-oogaadan, taani ta de7uwaa xaaxaas; ikka tana wonddarashiyaappe duuttiis. Gal-lassaappe qammi gakkanaashin, neeni tana xaissadasa" yaagaas. <sup>13</sup> Sa7ai wonttana gakkanaashinka taani maaduwaa demmanau waassaas. SHin gaammuwaadan i ta meqettaa ubbaa menttiis. Qassi gallasappe qammi gakkanaashin, neeni tana xaissadasa. <sup>14</sup> Taani cirashuwaadaaninne haatta kafuwaadan waassaas; haraph-phedankka zuuzummaas. Ta aifeti saluwaa pude xeelliiddi xeelliiddi daafuridosona. Abeet Godau, taani un77ettaas; neeni tana ha un77uwaappe kessa!" yaagaas.

<sup>15</sup> Haggaa ubbaa GODAI i ba huuphen oottiis; yaatin, taani ai gaanau danddayiyaanaa? Ta shemppoi keehippe un77ettido gishshau, xiskkoii taappe haakkiis. <sup>16</sup> Abeet Godau, hageetu mala yohotun asi paxa de7ees. Hai ta payyatettaa zaarada, tana paxa wottarkkii! <sup>17</sup> Be7a, taani ha gita tuggaa tuggatidoogee taayyo lo77o giidiis. Neni ta

<sup>5</sup> 37:38 Asiraadooni: I Ibraawetto qaalan "Esar-Haddon" geetettees.

shemppuwaa bashshaa ollaappe guyye zaarada ashshadasa; neeni ta nagara ubbaa neeppe guyye zaarada oladasa. <sup>18</sup> Aissi giikko, duufoi nena galatenna; haiqoikka nena sabbenna. Ciimma ollau duge wodhdhiyaageeti nena ammanttees giidi ufaissaa oottokkona. <sup>19</sup> Taani hachchi nena galatiyoogaadan, paxa de7iyaageetu xalaalati nena galatoosona; neeni ammanttiyoogaa aawai ba naatussi yootees.

<sup>20</sup> GODAI tana ashshana; hegaa gishshau, nuuni nu de7o laitta ubban, GODAA keettan baqettan waaxettida diittan yexxana.

<sup>21</sup> Hagaappe kase Isiyaasi, “Balasiyaa teeraa daaxxidi, a kixaa bolli wottite. Yaatikko, i paxana” yaagi wottiis.

<sup>22</sup> Yaagin Hizqqiyaasikka, “Taani paxada GODAA Beeta Maqidasiyaa pude kiyanaa-gau malaatai aibee” yaagidi Isiyaasa oichchi wottiis.

## 39

### *Baabilooneppe Kiitettidi Yiida Asata*

*(Kawotu Maxaafaa Naa77anttuwaa 20:12-19)*

<sup>1</sup> He wode, Baladaana na7ai, Baabiloone Kawoi Marodaaki Baladaani, Hizqqiyaasi harggidi paxidoogaa siyido gishshau, dabddaabbiyaanne imuwaa Hizqqiyaasayyo yeddiis. <sup>2</sup> Yeddin Hizqqiyaasi kiitettidi yiida asata mokkiis. Yaatidi ba buquraa minjjiyo keettan de7iya biraa, worqqaa, sawuwaa, al77o zaitiyaa, ba ola miishshaanne ba buquraa minjjiyo keettan de7iyaabaa ubbaa eta bessiis. Ba son woikko ba kawotettaa gidдон de7iyaabaa ubbaappe Hizqqiyaasi eta bessennan aggidobi aibinne baawa.

<sup>3</sup> Hegaappe guyyiyan, hananabaa yootiya Isiyaasi Kawuwaa Hizqqiyaasakko yiidi, “Ha asati woigidonaa? Eti auppe yiidonaa?” yaagidi oichchiis.

Oichchin Hizqqiyaasi, “Eti taakko haaho biittaappe, Baabilooneppe yiidosona” yaagiis.

<sup>4</sup> Isiyaasi qassikka, “Eti ne son ai ai be7idonaa?” yaagiis.

Yaagin Hizqqiyaasi, “Eti ta son de7iya ubbabaa be7idosona; ta buquraa minjjiyo keettan de7iyaabaappe taani eta bessabeennabi aibinne baawa” yaagiis.

<sup>5</sup> Hegaappe guyyiyan, Isiyaasi Hizqqiyaasa, “Ubbaappe Wolqqaama GODAI giyoobaa siya. <sup>6</sup> I hagaadan yaagees; ‘Ne kawo keettan de7iyaabai ubbabainne ne maizza aawati hachchi gakkanaashin shiishshidobai ubbabai muleera omoodettidi, Baabiloone biitti baana gallassati yaana; appe aibinne antenna. <sup>7</sup> Qassi neeyyo yelettana, ne ashonne ne suutta gidiya, ne attuma zaretuppekka omoodettidi baana; biidi Baabiloone kawo keettan mureessa gididi oottana’ yaagees” yaagiis.

<sup>8</sup> Yaagin Hizqqiyaasi zaaridi, “Neeni odido GODAA qalalai lo77o” yaagiis. Aissi giikko, Hizqqiyaasi, “Taani de7ido laittan saroinne woppai de7ana gidennee” yaagidi qoppiis.

## 40

### *Minttettoi Kumido Qaalaa*

<sup>1</sup> Intte Xoossai hagaadan yaagees; “Ta asaa minttettite! Minttettite!

<sup>2</sup> Yerusalaamessikka, a omooduwan de7ido wodee polettidoogaa, i nagarai atto geetettidoogaa yootite; i nagaraa gishshau, GODAI o naa77u dakko qaxxayidoogaa yootite” yaagees.

<sup>3-4</sup> Issi hagaadan yaagiya cenggurssai siyettees; “Bazzuwan GODAA ogiyaa giigissite; nu Xoossaayyo mela biittan aaho ogiyaa sitti oottite. Wombba ubbai xoqqu gaana; deree ubbainne kerai ubbai ziqqi gaana. Moorettida ogee salallana; kirttaakirtto biittaikka dembbattana. <sup>5</sup> He wode, GODAA bonchchoi qonccana; asho maayida ubbai hegaa issippe be7ana. Aissi giikko, GODAA doonai hegaa haasayiiis” yaagees.

<sup>6</sup> Issi cenggurssai, “Waassa!” yaagiyaagaa siyaas.

Siyada taani, “Woigada waassoo?” yaagaas.

“Asai ubbai maataa mala; a bonchcho ubbaikka dembbaa ciishshaa mala. <sup>7</sup> GODAI ba shemppuwaa a bollan shemppiyo wode, maatai melees; ciishshaikka qoqqofettees. Asai tumu maataa mala. <sup>8</sup> Maatai melees; ciishshaikka qoqqofettees; shin nu Xoossaa qalalai merinau eqqidi de7ees” yaagada waassa.

<sup>9</sup> Neno mishiraachchuwaa yootiya Xiyoonnee, xoqqa deriyaa pude kiya; neno mishiraachchuwaa yootiya Yerusalaamee, ne cenggurssaa wolqqappe xoqqu ootta; yayyoppa; xoqqu ootta; yaatada Yihudaa katamatussi, “Intte Xoossai hageeho” yaagada yoota. <sup>10</sup> Be7ite, Ubbaa Haariya GODAI wolqqaara yees; yin a qesee ayyo haarana. Be7ite, a woitoi aara de7ees; a oosuwaa waagaikka a sinttaana. <sup>11</sup> I ba wudiyaa henttanchchaadan mizees; ba dorssa maratakka ba qesiyan shiishshidi, ba kiyuwan idimmana. Xanttiyaageetakka loddaara kaalettana.

### *Ubbaappe Bolla Gidida Israa7eela Xoossaa*

<sup>12</sup> Haattata ba kushiya kophphiyan makkidai, salota takkaaruan likkidai, biittaa buhiyaa qun77an makkidai, qassi deretanne keratakka meezaanan likkidai oonee? <sup>13</sup> GODAA Ayyaanaa azazidai, woikko a zoriyaabaa gididi tamarissidai oonee? <sup>14</sup> I bau qonccanaadan, oonaara zorettidee? Woikko a sitta pirdaa ogiyaa oonee tamarissidai? Woikko a aadhdhida eratettaa tamarissidai woi a akeekaa ogiyaa bessidai oonee?

<sup>15</sup> Be7ite, kawotettati gombbo gididon de7iya issi xohetta haatta mala. Eti meezaanan de7iya guutta baanadan qoodettidosona. Be7ite i haruurota liiqo baanadan denttees. <sup>16</sup> Liibaanoosa mittai ayyo eettanau gidenna; an de7iya do7atikka xuuggiyo yarshshuwaassi gidokkona. <sup>17</sup> Kawotettati ubbai a sinttan bannabaa mala; eti a sinttan ubba banna melaappekka guuttadan qoodettoosona.

<sup>18</sup> Yaatin, Xoossaa intte oonaara milatissuuteetii? Woikko aibiira likkissi xeelluuteetii? <sup>19</sup> Eeqa misile gidikko, kushe hiilla eriya asi a massees; heгаа qassi worqqa tigiyaagee worqqa sheeshshees; biraa tigiyaageekka a bolli biraa sanssalataa medhdhees. <sup>20</sup> Hegaayyo miishshi banna hiyyeesai yarshshuwau musenna mittaa doorees; yaatidi, he misilee qaaxxennaadan essanau kushe hiillaa eriya asa koyees.

<sup>21</sup> Eribeekketii? Woikko siyibeekketii? Hagee intteyyo koiroppe odettibeennee? Woikko sa7ai merettoosappe hagee intte akeekibeekketii? <sup>22</sup> I biittaa irzuwaappe bolla baggan ba araatan uttees; biittan de7iyaageeti a sinttan gumburo mala. Salota magalashodan pididi oottiyaagee, qassi de7iyo soho oottidi, dunkkaanedan toliyaagee, <sup>23</sup> halaqata bannabadan oottiyaagee, biittaa kaalettiyaageetakka hada oottiyaagee a. <sup>24</sup> Biron eti tokettosaaranne zerettosaara, qassi xaphuwaakka biron biittan yeddosaara, GODAI eta bolli carkkuwaa yeddiigiis; etikka melidosona; melin gotee eta suullaadan efi aggiis.

<sup>25</sup> Geeshshai eta, “Yaatin, taani aara likkettanau tana oonaara milatissuuteetii?” yaagees. <sup>26</sup> Intte aifiyaa xoqqu oottidi, saluwaa xeellite; he xoolintteta medhdhidai oonee? I eta olanchchaadan kaalettees; eta qoodaakka erees. I eta ubbaakka eta sunttan sunttan xeesees. A angгаа gitatettaappenne a wolqqa minotettaappe dendidaagan, etappe issoinne xayenna.

<sup>27</sup> Neno Yaaqoobaa, neno Israa7eela, “Ta ogee GODAAPPE geemmiis; Xoossai ta pirdaa shenehoo giis” yaagada aissi amassalai? Qassi aissi hegaadan gaada haasayai? <sup>28</sup> Erabeikkii? Siyabeikkii? GODAI merinaa Xoossaa; i biittaa ubbaakka medhdhidaagaa. I daafureenna; woikko wolqqai au wureenna; ooninne a qofaa eranau dandayenna. <sup>29</sup> Daafuranchchau wolqqa immees; minotetti bannaagaukka minotettaa gujjees. <sup>30</sup> Harai atto yelaga naatika daafuroosona; qassi wolqqa wuroosona. Wodalatika muleera daafuridi kunddoosona. <sup>31</sup> SHin GODAA ammanettidi naagiyaageeti, bantta wolqqa ooraxissana. Eti arggantatudan, qefiyan pude kiyana; woxxidi daafurokkona; hemettidikka wolqqa wurokkona.

## 41

### *Israa7eelassi Xoossaa Maaduwa*

<sup>1</sup> GODAI hagaadan yaagees; “Inttenoo abbaa doonan de7iya biittatoo, co77u giidi, taani yootiyooqaa siyite! Asai bantta minotettaa ooraxissona; eti haa shiiqona; shiiqidi haasayona. Ane nuuni pirddettanau issippe shiiqoos.

<sup>2</sup> “Biyo soho ubban xooniya issuwaa arshsho baggappe denttidai oonee? I kawotet-tata a sinttan aattidi immees; yaatin, i kawota tohuwaappe garssaara yedhdhees. I eta ba bisuwan baanaadan oottees; qassi ba wonddafiyen suullaadan oottees. <sup>3</sup> I eta yedettiiddi, a tohoi kase yedhdhibeenna ogiyaarakka saro kanttees. <sup>4</sup> Hagua ootti-daageenne polidaagee qassi yeletata akka koiroppe xeesidaagee oonee? Taani GODAI, koiroi, wurssettaageetuura akka de7iyaagee, taani a” yaagees. <sup>5</sup> Abbaa doonan de7iya biittati be7idi yayyidosona; sa7aa gaxatikka kokkoridosona. Eti issippe shiiqidi, taakko yiidosona. <sup>6</sup> Asa ubbai ba shooruwaa shooruwaa maaddees; qassi ba ishaa, “Minna” yaagees. <sup>7</sup> Kushiyaa hiillanchchai worqqa tigiyaagaa minttettees; kalttan massiyaagee naariqan qoxxiyaagaa, “Minna” yaagees. I birataa issippe gattiyooqaa, “Hagee lo77o” yaagees; qassi he eeqai qaaxxennaadan, eti misimaariyan baxxannoosona.

<sup>8</sup> GODAI hagaadan yaagees, “SHin neno Israa7eela, ta ashkkarau, taani doorido Yaaqoobaa, ta dabbuwaa Abrahaama zariyau, <sup>9</sup> taani nena biittaa gaxaappe ekkada, qassi wurssetta haahosaappe xegada, ‘Neni ta ashkkaraa’ yaagidoogoo, taani nena dooraas; qassi taani nena olikke. <sup>10</sup> Taani nenaara de7iyo gishshau yayyoppa; taani ne Xoossaa gidiyo gishshau dagammoppa. Taani nena minttana; qassi taani nena maaddana. Taani nena ta xooniya ushachcha kushiyan kaafada oiqqana.

<sup>11</sup> “Be7a, nena hanqqettiya ubbai yeellatidi kauyyana; nenaara eqettiyaageeti kasekka bannabaadan hanidi xayana. <sup>12</sup> Nenaara ooyettiyaageeta neeni koyana; shin neeni eta demmakka. Nenaara olettiyaageeti kasekka bannabaadan, shufuro gididi xayana. <sup>13</sup> Aissi giikko, taani GODAI, ne Xoossai, ne ushachcha kushiya oiqqana. Nena, ‘Yayyoppa, taani nena maaddana. <sup>14</sup> Neno guxuniyau, Yaaqoobaa, inttenoo Israa7eela asau, yayyoppite; taani inttena maaddana. Taani, inttena woziyaagee, Israa7eela Geeshshaa’ yaagais. <sup>15</sup> Be7a, taani nena ooratta, qaranne achchaara de7iya, qoxxanau go7ettiyo miishsha oottaas. Neeni dereta qoxxada liiqissana; kerata akka suullaadan oottana. <sup>16</sup> Neeni eta suraggana; suraggin carkkoi eta efaana; goteekka eta laalana. SHin neeni GODAN ufaittana; qassi Israa7eela geeshshan bonchchettana.

<sup>17</sup> “Hiyyeesatinne metootanchchati haattaa koyin etau xayiyoo wode, qassi eta kook-keekka saamuwan meliyoo wode, taani GODAI etau siyana; taani, Israa7eela Xoossai eta aggikke. <sup>18</sup> Taani mela xoqqa sohotun shaafaa, qassi wombbatu giddonkka pulttuwaa xuussana. Bazzuwaa haatti eelliyooosa, qassi mela biitta akka haatti xuuqqiyooosa oottana. <sup>19-20</sup> Israa7eela Geeshshai hegaa medhdhidoogaa, qassi GODAA kushee hegaa oottidoogaa asai be7ananne erana mala, qassi qoppananne issippe akka akeekana mala, taani bazzuwan zigaanne guuganttaa, barsseneetiyaanne zaitiyaa wogaraa mokissana. Qassikka bazzuwan xiiddaa, odooruwaanne wogaraa issippe wottana” yaagees.

### *Xoossai Worddo Xoossata Ixxees*

<sup>21</sup> “GODAI, ‘Ane intte mootuwaa haa aattite’ yaagees. Yaaqooba Kawoi, ‘Ane intte markka akka haa ehiite’ yaagees. <sup>22</sup> Ane eti bantta misileta haa ehin, aibi hananau de7iya akka, eta misileti nuuyyo yootona. Nuuni akeekana malanne eta wurssetta akka erana mala, kase yohoti aibakko nuuyyo yootite; woi qassi sinttappe hananaba akka nuuyyo awaajjite. <sup>23</sup> Intte xoossata gidiyooqaa nuuni erana mala, sinttappe yaanau de7iya abbaa nuussi yootite. Nuuni dagammanna malanne yayyana mala, lo77o gidin iita gidin, ane issibaa oottite. <sup>24</sup> Be7ite, intte bannabaa mala; intte oosoikka hada. Inttena dooriya asikka ba huuphiyau shenehiyaagaa.



<sup>25</sup> “Taani huuphessa baggappe issuwaa denttaas; denttin i yiis. Qassi ta sunntaa xeesiya issoi arshsho baggappe yaana. Urqqaa medhdhiyaagee urqqaa yedhdhiyoogaadan, i kaalettiyaageeta yedhdhana.

<sup>26</sup> “Hagaa nuuni erana mala, koiro nuussi awaajjidai oonee? Woikko nuuni, ‘I likke’ gaana mala, kasetidi nuussi yootidai oonee? Ooninne hagaa yootidai baawa; ooninne hananabaa yootibeenna. Qassi intte qaalaakka siyidai baawa. <sup>27</sup> Taani hagaa kasetada Xiyoonesi awaajjaas; qassi taani Yerusalaamessikka mishiraachchuwaa yootiyaagaa immaas. <sup>28</sup> SHin taani xeellido wode issoinne baawa; taani zoriyaa oichchiyo wode, eta misiletu gidon zaaruwaa immiya issoinne baawa. <sup>29</sup> Be7ite, eti ubbaikka hada; eta oosoikka mela; seerissidi medhdhido eta misileti mela carkko” yaagees.

## 42

### *Xoossaa Ashkkaraa*

<sup>1</sup> Taani kaafada oikkido ta ashkkarai, ta shemppoi an ufaiyyoogee, taani doori-doojee hageeho. Taani ta Ayyaanaa a bolli wottaas; i kawotettatussi suure pirddaa ehaana. <sup>2</sup> I waassenna; woi ba qaala xoqqissenna; woi qassi ba qaala ogiyan sissenna. <sup>3</sup> Dincsettida shombboquwaa i menttena; qassi lii7attidi eexxiya muqaaddaakka i toissenna. I ammanettidi, suure pirddaa ehaana. <sup>4</sup> I biittan suure pirddaa essennan de7iiddi aggenaa; woikko guyye geenna. Abbaa doona biittatun de7iya asai ubbai a higgiiyaa siyanau naagees.

<sup>5</sup> Xoossai GODAI, salota medhdhidi miccidaagee, sa7aanne sa7aappe kiyiyaabaa ubbaa oottidaagee, sa7an de7iya asau shemppuwaa immiyaagee, an hemettiya ubbau de7uwaa immiyaagee hagaadan yaagees; <sup>6-7</sup> “Taani GODAA; taani nena xillottetan xeesaas; taani ne kushiya oiqqada, nena naagana. Neeni qooqiyaa aifiyaa dooyana mala, omoodettidaageeta omooduwaa keettaappe kessana mala, xuman de7iyaageetakka qasho keettaappe kessana mala, taani nena kawotettatussi poo7o oottada, qassi asaassikka maachcha oottada immana. <sup>8</sup> Taani GODAA; hegee ta sunntaa. Ta bonchchuwaa taani harau immikke; ta galataakka masettidi giigida misiletussi immikke. <sup>9</sup> Be7ite, kase taani yootidobati ubbai polettidosona. Ha77i qassi taani oorattabaa awaajjais; eti hananaappe kasetada taani intteyyo yootais” yaagees.

### *Galataa Yettaa*

<sup>10</sup> GODAASSI ooratta mazamuriyaa yexxite;  
biittaa gaxaappe doommidi, a galataa yootite.

Abbaa bollan biyaageetinne

an kumida ubbaikka ane waassona.

Abbaa doona biittatinne etan de7iya ubbaikka yexxona.

<sup>11</sup> Bazzoinne bazon de7iya katamati,  
qassi Qeedaare asai de7iyo mootatikka  
bantta qaala xoqqu ootona.

Selaa7a giyo kataman de7iyaageetikka  
deriyaa huuphiyaappe bantta ililssaa sissona.

<sup>12</sup> Eti bonchchuwaa GODAU immona;  
a galataakka gaxa biittatun awaajjona.

<sup>13</sup> GODAI mino asadan kiyana;  
olanchcha asadan, i ba hanqquwaa denttana.

I waassana;

ba qaalaakka xoqqu oottidi alaahana.

I mino gidiyoogaa ba morkketa bessana.

### *Xoossai Ba Asaa Maaddanau Qaalaa Geliis*

<sup>14</sup> GODAI hagaadan yaagees;

“Adussa wodeesappe taani saruwan takkaas;  
 co77u gaada danddayaas.  
 Ha77i maaretai oikkido maccaaseedan,  
 taani waassana;  
 tookka tookkada shemppananne peenuqana.

<sup>15</sup> Taani deretanne kerata laalana;  
 etan mokkidabaa ubbaa melissana.  
 Shaafata haruuro kessana;  
 deelletakka melissana.

<sup>16</sup> “Taani qooqeta  
 eti erenna ogiyaara ehaana;  
 eti erenna loossuwaarakka kaalettana.  
 Eta sinttan de7iya xumaa poo7uwau laammana;  
 kirttaakirtto sohuwaakka salallissana.  
 Hageeta taani etau oottana;  
 taani eta mulekka aggikke.

<sup>17</sup> SHin massidi giigissido misiletun ammanettiyaageeti,  
 qassi seerissidi giigissido misileta,  
 ‘Intte nu xoossata’ yaagiyaageeti  
 guyye simmana.  
 Eti muleerakka yeellatana”  
 yaagees.

### *Israa7eela Asai Tamaarennan Ixxido Ixuwaa*

<sup>18</sup> GODAI hagaadan yaagees; “Inttenoo tulletoo, siyite; inttenoo qooqetoo, intte be7ana mala xeellite. <sup>19</sup> Ta ashkkaraappe hara qooqee oonee? Taani kiittiyo uraappe hara tullee oonee? GODAASSI dummatida uraadan, woikko GODAA ashkkaraadan qooqee oonee? <sup>20</sup> Darobaa xeellaasa; shin akeekakka. Ne haittatikka dooya; shin siyakka” yaagees.

<sup>21</sup> GODAI ba xillotettaa gishshau, ba higgiiyaa gitayanaunne bonchchanau dosiis.  
<sup>22</sup> SHin hagee asai bonqqettiisinne wotti ekettiis. Eti ubbaikka diizzan ohettidi, qasho keettan qosettidosona. Eti bonqqettidosona; shin eta ashshiyaabi baawa. Qassi omoodettidosona; shin ooninne, “Zaarite” yaagiyaabi baawa.

<sup>23</sup> Intte giddoppe haggaa siyanai oonee? Qassi sinttappe yaana wodiyaabaa ezgganai oonee? <sup>24</sup> Yaaqooba omooddiyaagau, Israa7eela bonqqiyaagau aattidi immidai oonee? A bollan nuuni nagaraa oottido, a ogiyan eti beennan ixxidonne a higgiiyaukka eti azazettennan ixxido GODAA gidenneeyye? <sup>25</sup> Hegaa gishshau, i eta bolli ba hanqquwaa suuluwaanne yashshiya olaa gussiis; i eta yuushuwan tamaa eettiis, shin eti eribookkona; i eta xuuggiis; shin eti akeekibookkona.

## 43

### *Xoossai Ba Asaa Ashshana Giis*

<sup>1</sup> SHin nenoo Yaaqoobaa, nenoo Israa7eelaa, nena medhdhida GODAI hagaadan yaagees; “Taani nena wozido gishshau yayyoppa. Taani nena ne sunttan xeesaas; neeni taagaa. <sup>2</sup> Neeni haattaa gidduwaara pinniyo wode, taani nenaara gidana. Neeni shaafatu gidduwaara pinniyo wodekka eti nena muukkokkona. Neeni tamaa giddoora aadhdhiyo wode, xuugettakka; lacoikka nena meenna. <sup>3</sup> Aissi giikko, taani nena Ashshiyaagaa Israa7eela Geeshshaa, GODAA ne Xoossaa. Taani Gibxxe neeyyo wozo oottada, Toophphiyaanne Saaba ne laamiyaa immana. <sup>4</sup> Neeni ta sinttan al77onne bonchcho gidiyo gishshaunne, taanikka nena siiqiyo gishshau, ne laamiyau asaa, ne shemppuwaa laamiyaukka kawotettata immana.

<sup>5</sup> “Taani nenaara de7iyo gishshau yayyoppa; taani ne zerettata arshshoppenne arggoppe shiishshada ehaana. <sup>6-7</sup> Taani huuphessa bagгаа, ‘Eta zaarada eha!’ yaagana. Tohossa baggaakka, ‘Eta teqqoppa’ yaagana. Ta attuma naata haahuwaappe, ta macca naatakka sa7aa gaxaappe ehaana; ta sunttan xeegettida ubbata, taani ta bonchchuwau medhdhidoogeeta, taani giigissidoogeetanne oottidoogeeta hammite” yaagana.

### *Israa7eeli Xoossaa Markka*

<sup>8</sup> Aifee de7ishin qooqida asata, haittaikka de7ishin tullidaageeta kessa; <sup>9</sup> Kawotettati ubbai issippe shiiqona; asaikka yaa7aa utto. Eta gidloppe haggaa yootanaunne kase aadhdhida yohota nuna bessanau danddayiyai oonee? Hara asaikka siyidi, “Hagee tuma” yaagana mala, eti likke gidiyooгаа bessanau bantta markkata ehoona;

<sup>10</sup> GODAI hagaadan yaagees; “Intte ta markkata; intte tana erana malanne ammanana mala, qassi taani Xoossaa gidiyooгаа akeekana mala, taani doorido ta ashkkarati inttena. Taappe kase hara xoossi merettibeenna; woikko taappe guyyiyankka hara xoossi de7enna.

<sup>11</sup> “Tanattennee; taani GODAA. Taappe attin, hara ashshiyaabi baawa. <sup>12</sup> Taani yootaas, ashshaasinne awaajjaas. Intte giddon hara allaga xoossi de7ibeenna. Taani Xoossaa gidiyooгau taayyo intte markkata. <sup>13</sup> Taani Xoossaa; xaphoppe doommadakka taani tanattennee. Ta kushiyaappe ooninne ashshenna; taani oottidoogaa laammanau danddayiyaabi baawa” yaagees.

### *Baabilooneppe Kessi Ekkiyoogaa*

<sup>14</sup> GODAI, inttena Woziyaagee, Israa7eela Geeshshai hagaadan yaagees; “Intte gishshau, Baabiloone kiittada eta gordde mittaa menttana; eta ililssaikka zilaassau laamettana. <sup>15</sup> Taani GODAA, intte Geeshshaa, Israa7eela medhdhidaagaa, intte Kawuwaa” yaagees.

<sup>16</sup> Abbaa giddon ogiyaa, wolqqaama haattatu giddoorakka loossuwaa kessidi, <sup>17</sup> para gaaretanne parata, olanchchatanne mino asata abbaa ehiidi, eti denddennaanadan zaqqulssida GODAI, qassi eta muqaaddaa lacuwaadan toissida GODAI hagaadan yaagees; <sup>18</sup> “Kase yohota haasayoppite; benibatakka qoppoppite. <sup>19</sup> Be7ite, ha77i taani oorat-tabaa oottais; ikka ha77i mokkees. Intte hegaa erekettiyye? Taani bazzon ogiyaa, mela biittankka shaafata kessana. <sup>20-21</sup> Bazzo do7ati, worakanatinne yanchchati tana bonchchana. Aissi giikko, ta galataa awaajjana mala, ta giigissidonne doorido ta asaassi taani bazzon haattaa, mela biittankka shaafata immais.

### *Israa7eela Nagaraa*

<sup>22</sup> “SHin neno Yaaqoobaa, neeni ta sunttaa xeesabaakka; neno Israa7eela, neenikka tana salettadasa. <sup>23</sup> Neeni taayyo xuuggiyo yarshshuwaassi dorssaa ehabaakka; woi hara yarshshotunkka tana bonchchabaakka. Taani nena kattaa yarshshuwaa imma gaada waissabeikke; woi qassi ixaanaa imma gaada daafurssabeikke. <sup>24</sup> Neeni taayyo ixaanaa miishshan shammabaakka; woikko ne mehiyaa yarshshuwaa modhdhuwan tana kalissabaakka. SHin neeni ne nagaran tana wais-sadasa; ne naaquwankka tana daafurssadasa.

<sup>25</sup> “Tana, ne mooruwaa ta gishshau gaada qucciyai tanattennee; ne nagaraakka zaarettada hassayikke. <sup>26</sup> Tana hassayissa; ane issippe ha yohuwaa mootettoos. Neeni xillo gidiyooгаа be7anau ane ne yohuwaa bidda. <sup>27</sup> Ne koiro aawai nagaraa oottiis; nena tamarissiyaageetikka tana naaqqidosona. <sup>28</sup> Hegaa gishshau, taani Beeta Maqidasiyaa halaqata tunissaas; Yaaqooba bashshau, Israa7eelakka cashshau aattada immaas” yaagees.

1-2 GODAI hagaadan yaagees; “Ta ashkkarau Yaaqoobaa, taani doorido Israa7eela, ha77ikka siya. Taani nena medhdhaas; ne aayee uluwan nena giigissaasinne maadaas. Ta ashkkaraa Yaaqoobaa, taani dooridoogoo, yayyoppa. <sup>3</sup> Taani saamettida biittan haattaa gussana; mela biittanka pulttuwaa gogissana. Taani ta Ayyaanaa ne naatu bolli, ta anjuwaakka ne zerettatu bolli gussana. <sup>4</sup> Haattaa doonan morkkida maataadan, qassi goggiya pulttuwaa lanqqiyan de7iya mittaadan, eti morkkana. <sup>5</sup> Isoi, ‘Taani GODAAGAA’ yaagana; harai qassi bana Yaaqooba sunttan xeesana; haraikka, qassi ba kushiya bolli, ‘Taani GODAAGAA’ yaagidi xaafana; i qassi bana Israa7eeli xeegettiyo siiqo sunttan xeesana” yaagees.

<sup>6</sup> GODAI, Israa7eela Kawoi, a Woziyaagee, Ubbaappe Wolqqaama GODAI hagaadan yaagees; “Koiroi tana; wurssettaikka tana. Taappe hara Xoossi baawa. <sup>7</sup> Ta mali oonee? De7ikko ane awaajjo; qassi ane ta sinttan eqqidi yooto. Beniisappe doommidi, sinttappe yaanabata yootiyaagee oonee? Ane eti sinttappe hananabaa nuuyyo yootona. <sup>8</sup> Yayyoppite; qassi dagammoppite. Taani hгаа intteyyo beniisappe doommada yotabeikkinaa? Qassi awaajjabeikkinaa? Hegau taayyo intte markka. Taappe attin, hara Xoossi de7ii? Hara Zaalli baawa; taani oonanne erikke” yaagees.

### *Eeqaa Goinuwaa Bolli Haasayettida Bore Haasayaa*

<sup>9</sup> Eeqa misileta massidi medhdhiya ubbati hada; eti an ufaiyyoobati eta go77okkona. Eta markkatikka be7okkonanne erokkona. Hгаа gishshau, eti yeellatana. <sup>10</sup> Xoossa giigissidai, woikko aibaunne go77enna misile massidai oonee? <sup>11</sup> Be7ite, a laggeti ubbai yeellatana; kushe hiillanchchati ubbai asa. Ane eti ubbaikka issippe shiiqidi eqqona. Eti yayyana; qassi eti ubbaikka issippe yeellatana.

<sup>12</sup> Birataa qoxxiyaagee ba qoxxiyo birataa taman wottees; wottidoogee bonqqidaagaa naariqan qoxxidi, ba mino qesiyan a meretaa giigissees. Hгаа giigissidi namisettees; a minotettaikka wurees. Haattaakka uyenna; labbanees.

<sup>13</sup> Anaaxee wodoruwan likkees; likkidi irssaasiyan a bolli malaataa wottees; yaatidi maloogiyan lil77issees. Lil77idaagaa likkidi, puulaara de7iya asa misile milatissi giigissidi, ba son wottees. <sup>14</sup> I hгаа oottanau zigaa qanxxees; woikko wolaa woi xiiddaa wora giddoppe dooridi diccanaadan oottees. Woi ixkikko, i zigaa tokkin, irai a dichchanaashin naagees. <sup>15</sup> Hгааappe guyyiyan, i assi eettiyo mitta gidees; ikka appe baggaa ekkidi, eettidi ho77ees; qassi baggaa eettidi, oittaa uukkees. Appekka xoossaa medhdhidi, ayyo goinnees; qassi misiliyaa massidi, a sinttan gufannees. <sup>16</sup> Appe baggaa taman eettidi, qumaa kattees; baggan ashuwaa xiixxidi, kallidi mees. Qassi tamaa ho77i simmidi, “Hashshukkonne, laa hagee aiba ho77ii!” yaagees. <sup>17</sup> Qassi attida mittaa massidi, bau goinniyo xoossa misile kessees. He misiliyaa sinttan gufannidi, ayyo goinnees; yaatidi, “Neni ta xoossaa gidido gishshau, tana ashsha” yaagidi woossees.

<sup>18</sup> Eti ainne erokkona; ainneka akeekokkona. Aissi giikko, eti be7enna mala, eta aiffee goozettiis; qassi akeekenna mala, eta wozanaikka gorddettiis. <sup>19</sup> Eeqaa oottiya asi ba wozanan, “Appe baggaa taman eettaas; a bonqquwankka oittaa uukkaas; ashuwaakka an xiixxada maas. Yaatin, appe attidaagaa sheneyiya eeqaa oottada medhdhoo? Qassi mittaa muduwau gufannada goinnoo?” yaagiyo eri woi akeeki oossinne baawa. <sup>20</sup> I bidinttaa mees; a cimettida wozanai a wora kaalettiis. I ba shemppuwaa ashshanau woikko, “Ta ushachcha kushiyan de7iyaagee eeqappe attin, Xoossaa gidenna” gaanau danddayenna.

### *Xoossai Medhdhidaaganne Ashshiyaagaa*

<sup>21</sup> GODAI hagaadan yaagees; “Yaaqoobaa, neno Israa7eela, neni ta ashkkaraa gidiyo gishshau, ha yohota hassaya. Taani nena giigissaas; neni ta ashkkaraa. Neno Israa7eela, taani nena dogikke. <sup>22</sup> Taani ne mooruwaa shaaraadan, ne nagaraakka ciggaaraadan quccaas. Taani nena wozido gishshau, taakko simma” yaagees.

<sup>23</sup> Inttenoo salotoo, GODAI haggaa oottido gishshau, ufaissan yexxite. Inttenoo biittaa ciimmatoo, ililite. Inttenoo deretoo, woraunne a gidдон de7iya mitta ubbau, maza-muriyaa kinchchite. Aissi giikko, GODAI Yaaqooba wozis; qassi Israa7eela gidдонkka i bonchchettana.

<sup>24</sup> Nena Woziyaagee, aayee uluwan nena tilida GODAI hagaadan yaagees; “Taani GODAA, ubba yohota Medhdhidaagaa; salota tarkka tolidaagaa; sa7aakka tarkka miccidaagaa. Ta hegaa oottiyo wode, tanaara ooni de7ii? <sup>25</sup> Taani worddo hananabaa yootiyaageetu malaataa hada oottais; qassi shareechchotakka eeyya kessais. Taani aadhdhida eranchchata guyye zaarais; eta eraakka eeyya oottais. <sup>26</sup> Taani ta ashkkaraa qaalaa minttais; ta kiittidoogeeti hanana giidobaakka polais. Taani Yerusalaame katamaa, ‘Neni asi de7iyo soho gidana’ yaagais; Yihudaa katamataakka, ‘Intte simmidi keexettana; intte gimbbiyaakka ooraxissana’ yaagais. <sup>27</sup> Taani haattaa ciimmataakka, ‘Melite! Intte goggiya haattataakka melissana’ yaagais. <sup>28</sup> Qassi Qiirsoo, ‘Neni ta asaa heemmiyaagaa; neni Yerusalaame katamaa, “Ne simmada keexettana” yaagadanne, Beeta Maqidasiyaakka, “Ne baasoi baasettana” yaagada ta halchchuwaa poliyaagaa’ yaagais” yaagees.

## 45

### *Xoossai Qiirsoo Kawo Kessanau Dooris*

<sup>1</sup> GODAI tiyidoogau, kawotettata ayyo haarissana mala, kawotu gittaa birshshana malanne penggeekka ayyo a sinttan dooyettana mala, a ushachcha kushiya oiqqido Qiirsoo GODAI hagaadan yaagees; <sup>2</sup> “Taani ne sinttaara baana; dereta dembbayana. Nahaasiyaa birataa sanqqata menttana; birata hiraqotakka qanxxana. <sup>3</sup> Nena ne sunttan xeesiyaagee tana GODAA, Israa7eela Xoossaa gidiyooгаа neni erana mala, taani neeyyo xuma sohuwan de7iya aquwaanne geeman qosettida duretaa immana. <sup>4</sup> Ta ashkkaraa Yaaqooba gishshaunne taani doorido Israa7eela gishshau, taani nena ne sunttan xeesais. Neni tana erana xayikkonne, taani nena bonchcho sunttan xeesais.

<sup>5-6</sup> “Taani GODAA; taappe hari baawa; taappe hara Xoossi de7enna. Awai mokkiyoosaappe biidi, wulliyooгаа gakkanaashin de7iya asai taappe hari bannaagaa erana mala, taani nena gixissais. Gidikkonne, neni tana erabaakka. Taani GODAA; taappe hari baawa. <sup>7</sup> Taani poo7uwaa oottais; xumaakka medhdhais. Sarotettaa oottais; bashshaakka ehais. Taani GODAI, ha ubba yohota oottiyaagaa.

<sup>8</sup> “Inttenoo salotoo, bollappe duge xillotettaa tigate; shaaratikka a bukkona. Biittai dooyetto; dooyettin atotettaikka pude mokko. Xillotettaikka aara issippe dicco. Taani GODAI haggaa medhdhaas.

### *Xoossai Meretaassinne Taarikiyaassi Godaa*

<sup>9</sup> “Bana Medhdhidaagaara baaxetiyaagau aayye7ana! Aissi giikko, i urqqa miishshaappe issuwaa. Urqqai medhdhiyaagaa, ‘Ai oottai?’ woi qassi, ‘Neni hiillaa erakka’ yaagiiyye? <sup>10</sup> Ba aawaa, ‘Ai yeladii?’ yaagiya urau, woikko ba aayyiyo, ‘Ai maarettadii?’ yaagiya urau aayye7ana! <sup>11</sup> GODAI, Israa7eela Geeshshai, a Medhdhidaagee, hagaadan yaagees; ‘Sinttappe hananabaa eranaunne ta naatubaa tana oichchanau intte besseetii? Ta kushiyan taani oottanabaakka tana azazanau besseetii? <sup>12</sup> Taani sa7aa oottaas; asaakka a bolli medhdhaas. Salota taani ta kushiyan tolaas; etan de7iya meretata ubbaakka azazaas. <sup>13</sup> Taani Qiirsoo xillotettan denttaas; a ogiyaa ubbaakka suure oottana. Miishsha qanxxennan, woikko mattaaye immennan, i ta katamaa keexxana; ta asaakka omooduwaappe kessana’ yaagees. Taani Ubbaappe Wolqqaama GODAI haggaa odais” yaagees.



<sup>14</sup> GODAI hagaadan yaagees; “Gibxxe duretainne Toophphiyaa zal77ee, qassi geesaa adussa gidiya Sabaa7ata asatikka neekko yiidi, nebaa gidana. Eti sanssalatan qashet-tidi, nena kaallana. Eti neeyyo goinniiddi, ‘Xoossai ne xallaara de7ees; hari baawa; appe hara xoossi baawa’ yaagidi neeyyo watiwatana” yaagees.

<sup>15</sup> Abeet Xoossau, Israa7eela Ashshiyaagoo, tumuppe neeni nena genttiya Xoossaa. <sup>16</sup> Eeqaa medhdhiyaageeti ubbaikka yeellatananne kauyyana. Eeqa misiliyaa medhdhiyaageeti ubbai issippe kaushshau baana. <sup>17</sup> SHin Israa7eela GODAI merinaa atotettan ashshirggiis; intte merinaukka yeellatekketanne kauyyekketa.

<sup>18</sup> Salota medhdhida GODAI, biittaaakka giigissidi oottidaagee, qassi asi de7anaadaanappe attin, biittaa coo medhdhibeenna Xoossai hagaadan yaagees; “Taani GODAA; taappe hari baawa; <sup>19</sup> taani geeman, awankko issi xuma biittan haasayabeikke. Yaaqooba zerettaassikka, ‘Tana mela sohuwan koyite’ gabeikke. Taani GODAI tumaa haasayais; likkebaa odais.

### *Saluwaa Sa7aa Medhdhida Xoossanne Baabiloone Eeqata*

<sup>20</sup> “Inttenoo kawotettatuppe attidaageetoo, issippe shiiqidi haayite; mataa shiiqite. Mittaappe oosettida eeqa misiliyaa tookki yuuyiyaageetaunne, ashshanau danddayenna xoossaa woossiyaageetau eri baawa. <sup>21</sup> Ane yootite; intte mootuwaa shiishshite; etikka ane issippe zorettona. Adussa wodiyaappe kase haggaa odidai oonee? Benippe haggaa awaajjidai oonee? Tana GODAA gidikkinaayye? Taappe attin hara Xoossi baawa. Taani xillo Xoossanne Ashshiyaagaa. Taappe hari baawa.

<sup>22</sup> “Inttenoo biittaa gaxan de7iya ubbatoo, taakko simmidi, attite. Aissi giikko, taani Xoossa; taappe hari baawa. <sup>23</sup> Taani ta huuphiyan caaqqaa; guyye simmenna qaalai ta doonaappe xillotettan kiyiis: ‘Asai ubbai taayyo gulbbatana; inxxarssa ubbaikka tanan caaqqana’ yaagaas.

<sup>24</sup> “Eti tabaa haasayiiddi, ‘Xillotettainne minotettai GODAA xalaalan de7ees’ yaagana” yaagees.

A ixxiyaageeti ubbai akko yaana; yiidi yeellatana. <sup>25</sup> SHin Israa7eela zerettai ubbai GODAN, xoonuwaanne bonchchuwaa demmana.

## 46

<sup>1</sup> Beela giyo Baabiloone eeqai goinnees; Naba giyo eeqaikka hokkees. Kase intte tookkiyo eta misileti ha77i caana mehetu bollan caanettidi, etau deexo tooho gididosona. <sup>2</sup> Caana meheti deexuwaappe denddidaagan, caanaara issippe kunddidosona; eeqati banttana ashshanau danddayenna gishshau, bantta huuphiyaukka omoodettidi biidosona.

<sup>3</sup> GODAI hagaadan yaagees; “Inttenoo, Israa7eelappe attidaageetoo, Yaaqooba zaretoo, taani yootiyoogaa siyite; intte yelettido wodiyaappe doommada taani inttena tookkaas. <sup>4</sup> Intte cimmana gakkanaashinkka taani tanakka; intte puulummana gakkanaashinkka, taani inttena maaddana. Taani inttena medhdhaas; taani inttena denttana; taani inttena tookkananne ashshana.

<sup>5</sup> “Tana o mala guuteetii? Qassi oonaara likkissuuteetii? Nuuni issi mala gidanaadan, tana oonaara gatti xeelluuteetii? <sup>6</sup> Worqqaa bantta qarcciitaappe qoliyaageetinne biraa meezaanan wottidi likkiyaageeti heggaa etau xoossa oottidi medhdhana mala, worqqaa tigiyaagaa qaxaroosona. Ikka xoossa oottidi medhdhees; yaatin, eti he eeqaa sinttan hokkidi goinnoosona. <sup>7</sup> Eti a denttidi, bantta hashiyan tookkoosona; tookkidi a sohuwan a wottoosona. Yaatobare i hegan eqqi aggees; hegaappe yaa haa qaaxxenna. Issi asi ayyo waassikkokka, zaaruwaa immenna; qassi a metuwaappekka a ashshenna.

<sup>8</sup> “Inttenoo nagaranchchatoo, haggaa hassayitenne qoppite; intte wozanan kahan wot-tite. <sup>9</sup> Beni wode hanida yohota hassayite. Aissi giikko, taani Xoossaa; hari baawa. Taani Xoossaa; ta mali ooninne baawa. <sup>10</sup> ‘Ta qofai minnana; qassi taanikka ta halchchuwaa

ubbaa polana' yaagais. Wurssettan hananabaa doomettan, qassi biron hanibeenna yohota beni wodiyaappe doommada awaajjais. <sup>11</sup> Arshsho baggappe bonqqiya kafo, haaho biittaappe ta qofaa poliya asa taani xeesada, taani giidoogaa taani polana; taani halchchidobaakka taani oottana.

<sup>12</sup> “Inttenoo wozanai muumidoogeetoo, xillotettaappekka haakkidaageetoo, taani yootiyoogaa siyite; <sup>13</sup> taani ta xillotetta mataa ehais; ikka haaho gidenna. Ta atotetta gam77enna; taani ta atotetta Xiyoonessi, ta bonchchuwaakka Israa7eelassi immana” yaagees.

## 47

### *Baabiloone Bolli Yiya Pirddaa*

<sup>1</sup> GODAI hagaadan yaagees; “Bii Baabiloone geela7ee, duge wodhdha; wodhdhada baanan utta. Bii Kaladaawetu na7ee, ne kawotaa araataa aggada sa7an utta. Aissi giikko, hagaappe sinttanau neeni saaphotiyaaronne baalotiyaaro geetettakka. <sup>2</sup> Woxaa ekkada kattaa gaacca. Ne gullettaa qaara; ne adussa maayuwaakka kessa. Ne xifaa bessa; yaatada shaafata pinna. <sup>3</sup> Ne kalloi qaarettana; ne pokkoikka beettana. Taani haluwaa kiyana; oossikka qarettikke” yaagees.

<sup>4</sup> Nuna Woziyaagee, ayyo sunttai Ubbaappe Wolqqaama GODAA gidiyoogee, Israa7eela Geeshshaa.

<sup>5</sup> GODAI hagaadan yaagees; “Bii Kaladaawetu na7ee, ba; baada xuman co77u gaada uttaaga. Aissi giikko, hagaappe sinttau neeni kawotettatu kawiyoo geetettakka. <sup>6</sup> Taani ta asaa hanqqettaas; ta laataakka tunissaas; taani eta ne kushiyan aattada immaas. Neeni etau qarettabaakka; cimidaageetu bollankka ne qambbaraa keehi deexettadasa. <sup>7</sup> Neeni, ‘Taani merinau kawiyoo gidana’ yaagadasa. Hegaa gishshau, ha yohota ne wozanan qoppabaakka; eta wurssettaakka hassayabaakka.

<sup>8</sup> “Nenoo woppu gaada uttidaareenne ishaluwaa dosiyaaree, siya. Ne wozanan, ‘Tana; taappe attin, hari baawa. Taani am77e kiyikke; woikko yelada na7i bainna maine gidikke’ yaagadasa. <sup>9</sup> Ha naa77u yohoti issi gallassi aifee liphanaashin, ne bolli yaana. Ne bitai daro, ne murunnoikka gita wolqqaama gidikkonne, neeni ne naatuppe mela attiyooeenne am77etetta ne bolli kumettan yiyoogee attenna.

<sup>10</sup> “Neeni ne iitatettan ammanetta uttadasa; qassi, ‘Tana ooninne be7enna’ yaagadasa. Ne aadhdhida eratettainne cinccatetta nena wora kaalettin, neeni ne wozanan, ‘Tana, taappe attin, hari baawa’ yaagadasa. <sup>11</sup> SHin neeni waata daadumatada haassanaakko erenna iitai ne bolli yaana. Neeni waagaa qanxxanau danddayenna boshai ne bollan wodhdhana; qassi neeni aibanne erenna bashshai qoppennan ne bolli yaana.

<sup>12</sup> “Ane neeni ne naatettaasappe oottaidda de7ido ne bitaanne ne murunnuwaa ha77ikka aggoppa. Ooni erii, ne googaadan hananaakko; woi neeni an daganttanaakko.

<sup>13</sup> Zore xalaalan ne daafuradasa. Saluwaa xoolinttiyaa qoodiyaageeti, a xeellidi hananabaa yootiyaageeti, qassi, aginaa xeeruwan xeeruwan ne bollan yaanabaa yootiyaageeti ane nena ashshona. <sup>14</sup> Be7a, eti durcca mala; tamai eta maana. Eti tamaa lacuwaappe banttana ashshanau danddayokkonna. Hegee asi ba bollaa ho7ettanau ho77iyo bonqqo woikko qassi asi a sinttan uttanau danddayiyo tama gidenna. <sup>15</sup> Neeni etaara daafuridoogeeti, ne naatettaasappe doommidi, nenaara zal77idaageeti neeyyo hegae mala. Eti ubbaikka ba ginaara ginaara laalettana; nena ashshiyaabikka issoinne baawa.

## 48

### *GODAI Sinttappe Hananabaa Eriya Xoossaa*

<sup>1</sup> “Inttenoo Yaaqooba zaretoo, Israa7eela sunttan xeesettiyaageetoo, qassi Yihudaa zerettaappe yiidaageetoo, haggaa siyite. Intte GODAA sunttan caaqqeeta; Israa7eela Xoossaa xeeseeta; shin tumatettaanne xillotettan gidenna. <sup>2</sup> Intte inttena geeshsha katamaa sunttan xeeseeta; Israa7eela Xoossan zemppeeta; a sunttai Ubbappe Wolqqaama GODAA.

<sup>3</sup> “Taani kase hanidabata daro wodiyaappe kase yootaas; ta doonaappe eti kiyidosona. Kiyin eti eesuwana polettanaadan, taani oottaas. <sup>4</sup> Aissi giikko, neeni yootin siyennaagaa, ne morggee birataa mala gidiyooqaa, ne som77oikka nahaasiyaa giyo birataadan leeqqamennaagaa taani eraas. <sup>5</sup> Hegaa gishshau, neeni, ‘Haggaa ta eeqai oottiis; qassi ta masettida misiletinne ta seerissidi oottido misilee oottiis’ geennaadan, taani heggaa neeyyo benippe doommada odaas. Qassi eti hananaappe kasetada, taani eta neeyyo awaajjaas.

<sup>6</sup> “Neeni kase siyadasa; ha77i simmi haggaa ubbaa be7a. Yaatin, neeni haggaa ubbaa tuma giikkii? Ha77ippe doommada sinttanau neeni oorattabaa siyanaadan, taani oottana. <sup>7</sup> Eti ha77i merettidosonappe attin, beni merettibookkona. Neeni, ‘Be7a, taani eta erais’ geennaadan, hachchippe kase neeni mulekka etabaa siyabaakka. <sup>8</sup> Neeni mulekka siyabaakka; qassi mulekka erabaakka. Ne haittai benippe akka dooyet-tibeenna. Aissi giikko, neeni cimmiyaagaa gidiyooqaa taani erais; qassi yelettoos-appekka neeni makkalanchcha geetettada xeesettadasa.

<sup>9</sup> “Ta sunttaa gishshau, taani ta hanqquwaa zaarana; taani nena xaissennaadan, ta hanqquwaa teqqana. <sup>10</sup> Be7a, taani nena paaccaas; shin biraadan gidenna; taani nena metuwaa taman paaccaas. <sup>11</sup> Taani ta gishshau, haggaa oottais. Aissi giikko, ta sunttai toshettanau taani koyikke. Taani ta bonchchuwaa harau immikke.

### *Qiiroosi Kaalettanau Xoossai Doorido Asa*

<sup>12</sup> “Nenoo Yaaqoobaa, taani xeesido Israa7eela, taani giyoobaa siya. Taani tana; koiroikka wurssettaikka tana. <sup>13</sup> Biittaa baasuwaawaa ta kushee baasiis. Salotakka ta ushachcha kushee micciis. Taani eta xeesiyo wode, eti issippe eqqoosona.

<sup>14</sup> “Intte ubbai issippe shiiqidi siyite; eeqatuppe hagee hananaagaa kasetidi yootidai oonee? GODAI dooridoogee a qofaa Baabiloone bolli polana; a qeseekka Baabiloone biittaa asaa bolli gidana. <sup>15</sup> Taani ta addiniitai a xeesaasinne ayyo yootaas; a ehiidai tana. Qassi i oottiyoobai ubbai ayyo injjetana.

<sup>16</sup> “Taakko haa shiiqidi, haggaa siyite; taani koiroppe doommadakka geeman haasayabeikke; hegee hanido wodiyaappekka doommada taani yan de7ais” yaagees.

Qassi Ubbaa Haariya GODAINNE a Ayyaanai ha77i tana kiittidosona.

### *Xoossai Ba Asaassi Halchchido Halchchuwaa*

<sup>17</sup> GODAI, nena Woziyaagee, Israa7eela Geeshshai hagaadan yaagees; “Taani GODAI, ne Xoossai, nena maaddiyaabaa tamaarissiyaagaa. Neeni baanau bessiya ogiyankka nena kaalettiyai tana. <sup>18</sup> Neeni ta azazuwaa siyidabaa gidiyaakko, ne sarotettai shaafaa haattaadan goggana shin; ne xillotettaikka abbaa beetaadan hanana shin. <sup>19</sup> Ne zaree abbaa shafiyaadan, ne naatikka qoodi banna sa7aa baanaadan corattana shin; eta sunttaikka ta sinttappe xayennan woikko kichchennan aggana shin” yaagees.

<sup>20</sup> Baabiloone biittaaappe kiyite; Baabiloone asaappekka baqatite! Qaalaa xoqqu oottidi, ufaissan haggaa haasayite; sa7aappe sa7aa gaxaa gakkanaashin, haggaa kiittite. Kiittidi, “GODAI ba ashkkaraa Yaaqooba woziis” yaagidi odite. <sup>21</sup> I eta bazzo giddoora kaalettido wode, eti saamettibookkona. Zaallaappe haattaakka etau pulttissiis; zaallaa i phalqqin, haattai xuuqqiis.

<sup>22</sup> GODAI, “Iitatussi saroi baawa” yaagees.

## 49

### *Israa7eeli Biittan De7iya Asaayyo Poo7o*

<sup>1</sup> Inttenoo, abbaa doonan de7iya biittatoo, taani odiyoogaa siyite. Inttenoo, haahuwan de7iya kawotettatoo, ezggite. Taani yelettanaappe kase GODAI tana xeesiis; qassi ta aayee uluwan de7ishin, ta sunntaa sunntiis. <sup>2</sup> Ta inxxarssaa qara bisuwaadan oottiis; ba kushiya kuwan tana genttiis; i tana poshshido zubbe oottiis; yaatidi ba shoohuwaa gidдон tana yeggidi qottiis.

<sup>3</sup> I tana, “Neeni taani nenan bonchchettiyo ta ashkkaraa Israa7eela” yaagiis.

<sup>4</sup> SHin taani hagaadan yaagaas; “Taani mela coo daafuraas; ta wolqqaakka go77ennabaanne hadaban coo wurssaas. Ta pirddai GODAA mataana; ta waagaikka ta Xoossaa mataana” yaagaas.

<sup>5</sup> Ha77ikka, taani GODAA aifiyaa sinttan bonchchettido gishshaunne ta Xoossai taayyo wolqqa gidido gishshau, Yaaqooba akko zaaranaunne Israa7eela akko shi-ishshanau, taani au ashkkara gidanaadan, tana ta aayee uluwan tilida GODAI hagaadan yaagees; <sup>6</sup> “Neeni Yaaqooba zariyaa denttanaunne Israa7eelappe attidaageeta zaarada ehaanau, neeni taayyo ashkkara gidiyoogee qii guuttabaa. Hegaa gishshau, ta atotettaa biittaa gaxaa gakkanaadan, taani nena kawotettatuyyo poo7o oottana” yaagees.

<sup>7</sup> Asai karidoogau, ixidoogaunne deriyaa haariyaageetu ashkkarau, GODAI, Israa7eela Woziyaagee, Israa7eela Geeshshai hagaadan yaagees; “Ammanettiya GODAA gishshaunne nena doorida Israa7eela Geeshshaa gishshau kawoti be7idi, denddi eqqana. Deriyaa haariyaageetikka be7idi goinnana” yaagees.

### *Yerusalaamee Zaaretti Oosettana*

<sup>8</sup> GODAI hagaadan yaagees; “Taani doorido wodiyan ne oishaa zaaraas. Atotettaa gallassi taani nena maaddaas. Taani nena naagana; neeni biittaa zaarettada essana mala, asi de7enna biittata akka neeni laatissana mala, taani nena asaayyo maachcha oottada immaas. <sup>9</sup> Omooduwan de7iyaageeta, ‘Kiyite!’ xumaa qashuwan de7iyaageetakka, ‘Birshshettite!’ gaana mala, asaassi maachcha oottada nena immana. Eti ogiyaa lanqqen heemettana; booddila kera ubbaa bolli allaxxana. <sup>10</sup> Eti namisettokkona woi saamettokkona. Eta bazzuwaa mishoi xuuggenna; awaikka eta meenna. Eta qarettiyaagee eta kaalettana; pultto haattaakkokka eta laaggana.

<sup>11</sup> “Taani ta dereta ubbaa oge kessana; ta wogga ogetikka zanggaaraappe xoqqu gaana. <sup>12</sup> Be7a, ta asai haahosaappe yaana: huuphessa baggaappenne arggo baggaappe yaana. Qassi Asiwaane biittaappekka yaana” yaagees.

<sup>13</sup> Inttenoo salotoo, ufaissan yexxite. Neno biittau ufaitta. Inttenoo deretoo, ililite! Aissi giikko, GODAI ba asaa minttettiis; qassi ba metootanchchatussikka qarettees.

<sup>14</sup> SHin Xiyoona, “GODAI tana aggi bayiis; Godai tana dogi bayiis” yaagausu.

<sup>15</sup> GODAI hagaadan yaagidi zaarees; “Aayyiyaa ba xanttiyo na7aa doganau dand-dayaiyye? Ba uluwaappe yelido na7au qarettেকেয়ে? Geelladan a dogiyaakkokka, taani nena dogikke! <sup>16</sup> Be7a, taani nena ta kushiya gomppan xaafa wottaas; ne dirssaa gimbbetikka ubbatoo ta sinttan de7oosona.

<sup>17</sup> “Nena zaarettidi keexxiyaageeti yaana; nena qolidaageeti kiyidi baana. <sup>18</sup> Ane xoqqu gaada, ne yuushuwaa xeella; ne naati ubbai issippe shiiqidi, neekko yaana. Taani GODAI ta de7uwan caaqqais: neeni eta ubbaa alleeqodan maayana; bullashettanau haniya maccaaseedan, neeni eta qumaayana.

<sup>19</sup> “Ne bashsha sohotinne baises biittati ha77i nenan de7iya asaassi keehi un77ana; qassi nena qolidaageetikka neeppe haakkana. <sup>20</sup> Neeni kayyottiyo laittatun neeyyo yelettida naati ne haittan odiiddi, ‘Hagee sohoi nuuyyo keehi un77o; hegaa gishshau, nuuyyo de7anau aaho sohuwaa imma’ yaagana. <sup>21</sup> Yaagin neeni ne wozanan, ‘Hageeta naata ubbaa taayyo oonee yelidai? Taani yelada xontta attaas shin; taani mainaas shin;

taani omoodettada wora baas shin. Yaatin, hageeta oonee dichchidai? Be7a; taani tarkka attaas; yaatin hageeti naati ubbai auppe yiidonaa? yaagana” yaagees.

<sup>22</sup> Ubbaa Haariya GODAI hagaadan yaagees; “Be7a, taani kawotettatussi malaataa bessana; taani asaassi ta banddiraa essana. Eti ne attuma naata idimmidi ehaana; ne macca naatakka bantta hashiyan tookkidi ehaana. <sup>23</sup> Kawoti nena dichchiya aawata gidana; eta macca kawotikka nena xanttiyaageeta gidana. Eti gufannidi, neessi goinnana; qassi ne tohuwaa baanaakka laaccana. Taani GODAA gididoogaa neeni hegan erana; tanan ammanettidi naagiyaageeti yeellatokkona” yaagees.

<sup>24</sup> Omooduwan ekkidobaa wolqqaamaa kushiyaappe zaarissana danddayettiyye? Woikko omooddidi efiido asi meqetti baina iitaa kushiyaappe kessi ekkana danddayiyye?

<sup>25</sup> SHin GODAI hagaadan yaagees; “Wolqqaami omooddidi efiidobai simmana; meqetti baina iitatu kushiyan omoodettida asikka kessi ekkana. Aissi giikko, ne-naara olettiyaageetuura taani olettana; ne naatakka taani ashshana. <sup>26</sup> Nena huqqunniyaageeti bantta ashuwaa maanaadan, taani oottana; qassi woine eessaa uyidi mattottiyoogaadan, eti bantta suutaa uyidi mattottana. Yaatabare asa ubbai taani GODAA, nena Ashshiyaagaa, Woziyaagaanne, Yaaqooba Wolqqaama gidiiyoogaa hegan erana” yaagees.

## 50

<sup>1</sup> GODAI hagaadan yaagees; “Taani intte aayyiyo yeddido paramai awan de7ii? Woikko oossi inttena taani baizzidanaa? Be7ite, intte nagaraa gishshau, intte baizettideta; intte mooruwaa gishshau, intte aayyiya yedettaasu. <sup>2</sup> Taani yiido wode, aibissi hegan asi xayidee? Taani xeesido wode, ‘Yee!’ gaanau aibissi asi hegan de7ibeennee? Taani inttena wozanau ta kushee qantteyye? Woikko inttena ashshanau taayyo wolqqi baaweeyye? Be7ite, taani seerada abbaa melissais. SHaafata akka bazzo oottais. Etan de7iya moleti haattai xayin wooqqoosona; saamoi worin haiqqoosona. <sup>3</sup> Taani salota karettabaa maizzais; waaruwaakka eti kamettiyoobaa oottais” yaagees.

### *Xoossaa Ashkkarai Azazettiyaagaa*

<sup>4</sup> Daafuridaagaa taani qalan waatada minttettanaakko erana mala, Ubbaa Haariya GODAI taayyo tamarida inxxarssaa immiis. I tana maallado maallado beegottidi, taani tamaraya asadan siyanaadan, ta haittaa ezggissees. <sup>5</sup> Ubbaa Haariya GODAI ta haittaa dooyiis; taanikka makkalanchcha gidabeikke; guyyekka simmabeikke. <sup>6</sup> Taani ta zokkuwaa shociyaageetussi, ta gacuwaakka buuchchaa shoddiyaageetussi aattada immaas. Ta som77uwaa kaushshaappenne cuchchaa cushettiyoosaappe genttabeikke. <sup>7</sup> Ubbaa Haariya GODAI tana maaddiyo gishshau, taani yeellatabeikke; heгаа gishshau, taani ta som77uwaa salo giyo shuchchaadan oottaas. Taani yeellatennan attanaagaakka erais. <sup>8</sup> Tana shatinttiyaagee matan de7ees; yaatin, tana mootiyaagee oonee? Ane issippe tanaara eqqo! Ta baarigaarai oonee? Ane tanaara gaitto! <sup>9</sup> Be7ite, Ubbaa Haariya GODAI tana maaddees; yaatin, tana mooranchcha gaanai oonee? Be7ite, eti ubbaikka maayuwaadan ceeggi wurana; bil77ai eta maana.

<sup>10</sup> Intte giddoppe GODAASSI yayyiyaageenne a ashkkaraa qaalaassi azazettiyaagee oonee? Xuman hemettiyaageenne poo7oi bainaagee i oonee? He urai GODAA sunttan ammanetto; ba Xoossanka zemppo. <sup>11</sup> Be7ite, inttenoo tamaa eettiya ubbatoo, yiichcha xomppiyaa lacuwaa intteyyo shiishshiyaageetoo, intte eettido tamaa poo7uwan hemettite! Intte yiicido xomppiyaa lacuwaa poo7uwan simerettite! Intte ta kushiyaappe ekkana de7iyoobi haggaa: Intte hanttaara seelan zin77ana.



## 51

*Yerusalaame Minttettiya Qaalaa*

<sup>1</sup> GODAI hagaadan yaagees; “Inttenoo xillotettaa kaalliyaageetoo, inttenoo tana, GODAA koyiyaageetoo, siyite. Intte phalqqettidi ekettido shuchchaanne intte bookettidi kiyido ollaa xeellite. <sup>2</sup> Intte aawaa Abrahaamakonne inttena yelida Saarikko xeellite. I barkka de7ishin, taani a xeesaas; xeesada anjjaasinne qoodan corayaas.

<sup>3</sup> “GODAI Xiyoooneeninne a qolettido sohotun de7iya ubba asaa minttettana. I bazzuwaa Edene Gannatiyaadan, i mela sohotakka GODAA ataakilttiya soo huwaadan oottana. Ufaissainne hashshu guussai yan de7ana; galataanne mazamuriyaa cenggursai yan siyettana.

<sup>4</sup> “Ta asau; taani yootiyobaa siyite. Ta kawotettau, ne haittaa taakko yeggada ezgga. Aissi giikko, higgee taappe kiyees; ta suure pirdaikka kawotettatussi poo7o gidana. <sup>5</sup> Ta xillotettaa eesotidi shiiqana; ta ashettaikka kiyidi, ogiyan de7ees. Ta qesee asaa haarana; abbaa doona biittatun de7iya asai ubbai tanan ammanettidi naagana; qassi taani eta ta wolqqan ashshanaagaa, ufaissa oottidi naagana. <sup>6</sup> Pude xoqqu giidi, salota xeellite; duge sa7aakka xeellite. Aissi giikko, saloti cuwaadan piskki giidi xayana; sa7aikka afaladan wurana; an de7iya asai ubbai udunxxetudan haiqqana. SHin ta ashetta merinau de7ana; ta xillotettaikka wurena.

<sup>7</sup> “Inttenoo xillotettaa eriyaageetoo, ta higgeekka intte wozanan de7iyooageetoo, siyite. Asaa boriyau yayyoppite; eta cashshaukka dagammoppite. <sup>8</sup> Aissi giikko, maayuwaa miyoogaadan, bil77ai eta maana; dorssaa ikisiyaa miyoogaadan, guxunee eta maana. SHin ta xillotetta merinau de7ana; ta ashettaikka yeleta ubbau gakkana” yaagees.

<sup>9</sup> Abeet GODAAU, beegotta! Beegotta! GODAA qesiyau, wolqqaa maaya; kase aadhdhida wodetuuninne yeletatun beegottidoogaadan beegotta. Ra7aaba giyo demiyaa qanxxerettidaagee, miimminttiyaakka caddidaagee nena gidikkiyye? <sup>10</sup> Abbaanne gita ciimma haattaa melissidaagee nena gidikkiyye? Neeni wozidoogeeti pinnana mala, ciimma abbaa oge oottidaagee nena gidikkiyye? <sup>11</sup> GODAI wozidoogeeti simmidi, yexxiiddi Xiyooone yaana; yiidi merinaa ufaissai eta bollan de7ana; eti ufaissaanne hashshu giyoobaa demmana. Qassi azzanoinne yeheoi etappe haakkana.

<sup>12</sup> GODAI hagaadan yaagees; “Inttena minttettiyaagee tana. Yaatin, haiqqiya asau yayyanau, maatadan eesuwan meliya asaa na7au yayyanau intte oonee? <sup>13</sup> Intte salota miccidanne sa7aa baasuwaakka baasida GODAA, inttenakka medhdhida Xoossaa dogidetii? Eti inttena xaissanau giigissido, inttena huqqunniya asatu hanqquwaa gaasuwan gallassa kumetta yayyideta. SHin inttena huqqunniyaageetu hanqqoi awan de7ii? <sup>14</sup> Omoodettidaagee eesuwan birshshettana; haiqqenna; ollanka gelenna; ayyo oittikka paccenna. <sup>15</sup> Aissi giikko, taani GODAA ne Xoossaattennee. Dambbalai waassanaadan, abbaa qaattais. Ta sunntai Ubbaappe Wolqqaama GODAA. <sup>16</sup> Salota miccanaadan, biittaa baasuwaakka baasanaadan, qassi Xiyooone, ‘Neeni ta asa’ gaanaadan, taani ta qaalaa ne doonan wottaas; ta kushiya kuwan taani nena genttaas” yaagees.

<sup>17</sup> Neno, GODAA kushiyaappe a hanqquwaa xuu7aa uyida Yerusalaamee, beegotta! Dendda! Neeni ganddigaarissiya xuu7aa cinggada uyadasa. <sup>18</sup> A yelido naatu ubbaappe o kaalettiyaabi issoinne baawa; qassi a dichchido naatu ubbaappekka i kushiya oiqqiyaabi issoinne baawa. <sup>19</sup> Dakko daro bashshai ne bollan gakkii; yaatin, nena oonee minttanau danddayiyai? Hegeetikka kolettaa, bashshaanne bisuwaa. Yaatin, taani nena waatada minttettanee? <sup>20</sup> Ne naati labbanidosona; eti gitiyaa gidдон gelida genesseedan, oge ubbaa gaxan kunddidosona. Eti GODAA hanqquwaaninne ne Xoossaa seeran kumidosona.

<sup>21</sup> Hegaa gishshau, neno, woine eessaa uyennan mattottida metootanchchee, haggaa siya. <sup>22</sup> Ne Godai, ba asau mootettiya GODAI ne Xoossai hagaadan yaagees; “Be7a; nena ganddigaarissiya, ta hanqquwaa xuu7aa taani ne kushiyaappe akkaas; neeni

naa77anttuwaa a mulekka uyakka. <sup>23</sup> Taani heгаа nena tuggayiyaageetu kushiyan wottana. Eti nena, ‘Nuuni ne bollaara hemettidi aadhdhana mala, zaqqulla’ yaagidosona. Yaagin neeni aadhdhana gakkanau, ne zokkuwaa etau biittadaaninne ogedan oottadasa” yaagees.

## 52

### *Xoossai Yerusalaame Ashshana*

<sup>1</sup> Neno Xiyooone katamau, beegotta; beegottada minotettaa afalaadan maaya. Neno, geeshsha katamau, Yerusalaamee, ne bonchcho maayuwaa maaya; aissi giikko, ha-gaappe sinttanau qaxxarettibeennaageenne tunai ne giddo gelenna. <sup>2</sup> Neno, omoodettida Yerusalaamee, ne baanaa qoqqofa. Dendda; denddada ne kawotaa araatan utta. Inttenoo, omooduwan de7iya Xiyooone asatoo, intte qooriyan qashettida sanssalataa birshshite.

<sup>3</sup> Aissi giikko, Ubbaa Haariya GODAI hagaadan yaagees; “Intte kasekka waaga ekken-nan baizettideta; qassi ha77ikka miishsha immennan coo wozettana. <sup>4</sup> Ta asai koiro bete gididi, Gibxxe biittaa biis; shin Asooreti ta asaa coo huqqunnidosona. <sup>5</sup> Yaatin, ta asai waaga qanxxennan coo omooduwan biichchin, tau hagan aibee de7iyai? Eta haariyaageeti waassoosona; ta sunttaikka ubbatoo gallassa kumettaa cayettees. <sup>6</sup> Hegaa gishshau, ta asai ta sunttaa erana; he gallassi haasayiyai tana gidiyooгаа eti erana. Ee hegee tana. Taani GODAI hagaadais” yaagees.

<sup>7</sup> Lo77o mishiraachchuwaa ehiya, sarotettaa yootiya, ufaissiya mishiraachchuwaa yootiya, atotettaa yootiyaanne, Xiyooonekka, “Ne Xoossai kawotees” giiddi deretu bollaara yiya bitaniyaa tohoti aiba lo77iyoonaa! <sup>8</sup> Siyite, intte katamaa naagiyaageeti bantta qaalaa xoqqu oottidi, ufaissau issippe yexxoosona; GODAI Xiyooone simmiyo wode, a simettaa eti bantta aifiyan be7ana. <sup>9</sup> Inttenoo Yerusalaamen qolettida sohotoo, issippe ufaissau yexxite; aissi giikko, GODAI ba asaa minttettiis; Yerusalaame kata-maakka woziiis. <sup>10</sup> GODAI ba geeshsha qesiyaa kawotettatu ubbaa sinttan qonccissiiis; qassi biittaa gaxai ubbaikka nu Xoossaa atotettaa be7ana.

<sup>11</sup> Inttenoo GODAA keettaa miishshata tookkiyaageetoo, kichchite, kichchite; yaappe kiyite. Tunabaa bochchoppite; a giddoppe kiyiichchite. Intte huuphiyaukka geeyite. <sup>12</sup> SHin kiyiiddi, eesuwan kiyekketa; woikko betidi beekketa; aissi giikko, GODAI intteppe sinttau aadhdhidi kaalettana; Israa7eela Xoossaiikka guyyeera gididi, inttena naagana.

### *Metoi Gakkiyo Ashkkaraa*

<sup>13</sup> GODAI hagaadan yaagees; “Be7ite, ta ashkkarai akeekan oottana; i bonchchettidi, xoqqu xoqqu gaana; i keehi gitatana. <sup>14</sup> A som77oi asa ubbaagaappe, a meraikka asa naatuugaappe moorettiis; moorettin a be7idi, daro asai dagammiis. <sup>15</sup> SHin ha77i daro kawotettati ubbai aban garamettana; <sup>6</sup> appe denddidaagan, kawoti bantta doonaa oiqqana; aissi giikko, eti banttau odettibeennabaa be7ana; siyibeennabaakka akeekana” yaagees.

## 53

<sup>1</sup> Nuuni odidoogaa ooni ammanidee? GODAI ba wolqqaa oona bessidee? <sup>2</sup> I a sinttan mela biittan de7iya durumaappe xaphuwaa yeddidi, aaciya yelaga aacaadan dicciis. Nuuni a loitti xeellanau, ayyo merai woikko gottai baawa; nuuni akko shiiqanau ayyo puuli baawa. <sup>3</sup> I asan karettiisinne ixettiis; i harggeppenne metoppe shaahetti erenna azzaniya asa gidiiis. I asi a be7anaappe giidi, ba som77uwaa wora zaariyo asadan karettiis; nuunikka a bonchchibookko.

<sup>6</sup> 52:15 daro kawotettati ubbai aban garamettana: Ibraawetto qaalan “Kawotettata ubbaa i aracana” yaagees.

<sup>4</sup> I tumu nu harggiyaa bau ekkiis; qassi nu azzanuwaakka tookkiis. SHin a gakkida metoi, deshettainne waayee Xoossaappe ayyo yiidabaa giidi nuuni qoppida. <sup>5</sup> SHin i nu mooruwaa gishshau, cadettidi masunxxiis; nu nagaraa gishshaukka shocettidi liiqiis. I qaxxayettidoogan, nuuni saruwaa demmida; a masunttan nuuni paxida. <sup>6</sup> Nuuni ubbai oge balida dorssatudan wora biida; nuuni ubbaikka nu ogiyau ogiyau simmida. GODAI nu ubbai naaqqido naaquwaa a bolli wottiis.

<sup>7</sup> I un77etiisinne qohettiis; shin ba doonaa pogibeenna. SHukkanau efiyo dorssaadan laagettiis; ba ikisiyaa meediyaageetu sinttan co77u giya dorssa maraadan, ikka ba doonaa pogibeenna. <sup>8</sup> Eti a huqqunnidinne a bolli sugetta pirddaa pirddidi efidosona. I ta asaa mooruwaa gishshau shocettidi, paxa de7iyaageetu biitaappe i kichchidoogaa a zariyaappe oonee akeekidai? <sup>9</sup> I ba haiquwan iita asatuura qoodettiis; haiqqidikka dure asa duufuwan moogettiis. Gidikkonne, palabaa i oottibeenna; ba doonanka worddo haasayibeenna.

<sup>10</sup> SHin i qohettanaagee GODAA shene gidiis; qassi GODAI i tuggatanaadan oottiis. I bana nagarau yarshsho oottiyo wode, ba zersettaa be7ana. A bareekka aduqqana; GODAA sheneekka a kushiyan polettana. <sup>11</sup> A shemppiyaa waayettidoogaappe guyyiyan, i de7uwaa poo7uwaa be7ana; be7idi ufaittana. Ta xillo ashkkarai ba eratettan darota xillissana; eta mooruwaakka tookkana. <sup>12</sup> Hegaa gishshau, gita asatu gidduwan taani au bonchcho sohuwaa shaakkada immana; qassi minotuura i omooduwaa shaakkana. Aissi giikko, i ba shemppuwaa haiquwau aattidi immiis; yaatidi mooranchchatuura paidettiis. Gidikkonne, i daro asaa nagaraa tookkiis; tookkidi mooranchchatuuyyookka gaannatiis.

## 54

### *Xoossai Israa7eela Siiqiyo Siiquwaa*

<sup>1</sup> GODAI hagaadan yaagees; “Bii, yelabeenna mainee, yexxa! Neno, maareti oiqqi erennaaree, ne qaalaa xoqqu oottada ilila! Aissi giikko, ba azinaara de7iya maccaasee naatuppe, barkka de7iya maccaasee naati darana. <sup>2</sup> Ne dunkkaaniyaa sohuwaa aassa; qassi neeni de7iyo sohuwan magalashotakka pididi oottada micca. Guyye gooppa; wodoruwaakka adussa; xishiyaakka mintta. <sup>3</sup> Neeni ushachcha baggaaranne had-dirssa baggaara aakkana; ne zareti kawotettata laattana; laattidi eta baisa katamatun keexxidi uttana.

<sup>4</sup> “Yayyoppa; aissi giikko, neeni yeellatakka. Dagammoppa; aissi giikko, neeni kauyyakka. Neeni ne yelagatetta yeellaa dogana; ne am77etettaa boriyaakka hagaappe sinttan hassayakka. <sup>5</sup> Aissi giikko, nena Medhdhidaagee neessi azinaa; ayyo sunttaikka Ubbaappe Wolqqaama GODAA. Israa7eela Geeshshai nena Wozidaagaa; i biitta ubbaa Xoossaa geettees” yaagees. <sup>6</sup> Ne Xoossai hagaadan yaagees; “Azinaa muleera aggi bayin, dogettada azzaniya maccaaseedaanne yelagatettan azinaa sooppe kiyida maccaaseedan neeni hana uttidaashin, taani GODAI nena xeesaas.

<sup>7</sup> “Issi guutta wodiya taani nena aggaas; shin gita maarotan nena taani shiishshana. <sup>8</sup> Suulliya hanqquwan, taani ta sinttaa neeppe guutta wodiya genttaas; shin merinaa siiquwan taani neeyyo qarettana” yaagees. GODAI, nena Woziyaagee hгаа odees.

<sup>9-10</sup> Neessi qarettiya GODAI hagaadan yaagees; “Hagee taassi Nohe wodiya mala. He wode taani Nohe bashshaa haattai naa77anttuwaa sa7aa mittennaadan caaqqaa; hegaadanka, nena naa77antto hanqqettennaanne seerennan agganau taani caaqqaa. Dereti qaaxxanau, keratika bantta de7iyoosaappe kichchanau dand-dayoosona; shin ta aggenaa siiqoi neeppe shaahettenna; ta sarotettaa maachchaikka kichchenna” yaagees.

<sup>11</sup> GODAI hagaadan yaagees; “Nenoo, metootida katamee! Gotee yaanne haanne shocidooree, minttettiyaabi xayidooree, be7a, taani nena bonchcho shuchchan alleeqissada keexxana; ne baasuwanikka sampperiyaa giyo shuchchaa hiixxana. <sup>12</sup> Ne adussa shuchchaa gimbbiyan de7iya gumbbuwaa taani inqquwaa giyo daro al77o zo7o shuchchan gimbbana; ne penggiyaa phooliya al77o inqquwan, ne dirssa ubbaakka bonchcho shuchchan gimbbana. <sup>13</sup> Ne attuma naata ubbaa GODAI tamarissana; ne naatu sarotettaikka darana. <sup>14</sup> Neeni xillotettan minnada eqqana; sugettainne huqqun-nai neeppe haakkana. Neeni aibaassikka yayyakka; dagamaikka neekko shiiqenna. <sup>15</sup> Nena olanau denddiyaabi de7ikko, hegee ta sheniyaa oottenna; taani ne bagga gidiyogishshau, nena olanau denddiya ubbai kunddana.

<sup>16</sup> “Be7a, womppiinan tamaa womppiinidi, ba halchchuwau haniya ola miishshaa qoxxiya wogaaciyaa taani medhdhaas. Qassi bashshanaadan, bashshiyaageetakka taani medhdhaas. <sup>17</sup> Nena qohanau oottido ai miishshinne nena qohidi kantti kiyenna. Nena mootiya inxxarssa ubbau gidiya zaaruwaa neeni immana. GODAA ashkkaratu laatai haggaa; eta taani shatinttana” yaagees. GODAI heggaa yootees.

## 55

### *Xoossaappe Beettiya Maarotaa*

<sup>1</sup> GODAI hagaadan yaagees; “Inttenoo saamettidaageetoo, ubbaikka haattaakko haa yiite; miishshi bainnaageetoo, haayite. SHammite; miite. Haa yiidi, miishsha qanxxennan coo woine eessaakka maattaakka shammitte. <sup>2</sup> Intte miishshaa quma gidennabau aibissi kesseetii? Kalissennaban intte wolqqaa aibissi wursseetii? Ane loittidi, taani odiyooqaa ezggite; lo77obaa miite; qassi modhdhuwan intte asatettaa ufaissite.

<sup>3</sup> “Ta asau, siyite; taakko haa yiite. SHemppooraa paxa de7ana giikko, taani yootiyooqaa siyite. Taani inttenaara merinaa maachchaa maaccettana. Taani anjjana gaada Daawita anjjidoogaadan, inttenakka anjjana. <sup>4</sup> Be7ite, taani a asaayyo markka, kaalettiyaagaanne halaqa oottaas. <sup>5</sup> Be7a, neeni erenna kawotettata xeesana; qassi GODAA ne Xoossaa Israa7eela Geeshshaa gaasuwan, nena erenna kawotettati neekko eesotidi yaana. Aissi giikko, GODAI nena bonchchiis” yaagees.

<sup>6</sup> GODAI beettiyo wode a koyite; matan de7iyo wode a xeesite. <sup>7</sup> Iitai ba oosuwaa, nagaranchchaikka ba qofaa aggo; GODAAKKO i simmo. Simmin i a maarana. I nu Xoossaakko simmo. Simmin i ayyo coo atto gaana.

<sup>8</sup> Aissi giikko, GODAI, “Ta qofai intte qofaa mala gidenna; intte ogeekka ta ogiyaa mala gidenna. <sup>9</sup> Saloti sa7aappe xoqqiyooqaadan, ta ogee intte ogiyaappe xoqqees; ta qofaikka intte qofaappe xoqqees. <sup>10</sup> Irainne suuppa shachchai saluwaappe wodhdhidi, biittaa alidi, mukkanaadaaninne aifanaadan oottiyooqaadan, qassi zeriyaagau zerettaa, miyaagaukka kattaa immennan guyye saluwaa simmennaagaadan, <sup>11</sup> ta doonaappe kiyiya qaalaikka heggaa mala. I taani halchchidoogaa polana; qassi kiitti-doogaa oottanaappe attin, taakko coo simmenna.

<sup>12</sup> “Intte ufaissan kiyana; kiyidi saruwan moissettana. Derettinne kerati intte sinttan ufaittidi yexxana; dembban de7iya mittati ubbaikka bantta kushiyaa baqqana. <sup>13</sup> Agunntaa gishshaa xiiddai, gom77oriyaa gishshaakka xaittai mukkana. Mukkidi hegee GODAI hassayettiyoobanne merinau xayenna malaata gidana” yaagees.

## 56

### *Aihuda Gidenna Asaikka Xoossaa Asa Gidana*

<sup>1</sup> GODAI hagaadan yaagees; “Tumu pirddaa naagite; xillobaa hanite; aissi giikko, ta ashettai ellellidi yaana; ta xillotettaikka matan qonccana. <sup>2</sup> Haggaa oottiya uraa, Sambbataa tunissennaadan bonchchiya uraanne iitabaa oottennan ixxiya uraa taani anjjana” yaagees.



<sup>3</sup> GODAAKKO shiiqida betee, “GODAI tana ba asaappe tumu shaakkana” gooppo. Qassi mureessaikka, “Be7a, taani melida mitta” gooppo.

<sup>4</sup> GODAI hagaadan yaagees; “Ta Sambbatata bonchchiya, tana ufaissiyaabaa dooriyaanne ta maachchaa minttidi naagiya mureessatussi, <sup>5</sup> etassi taani ta Beeta Maqidasiyaa giddooninne ta dirssaa gimbbiyaa gidдон, eti hassayettiyoobaa immana. Macca naatuppenne attuma naatuppe lo77iya sunntaa taani etau immana; taani etau merinau xayenna sunntaa immana. <sup>6</sup> GODAASSI oottanau, GODAA sunntaa dosanaunne a ashkkara gidanau, banttana akko shiishshiya beteta, qassi Sambbataa tunissennan bonchchiyaageetanne ta maachchaa minttidi naagiyaageeta ubbata <sup>7</sup> taani ta geeshsha deriyaa ehaana; ehaada ta woosa keettan eta ufaissana. Eti ta yarshshiyosaa bollan shiishshiyo, xuuggiyo yarshshoinne hara yarshshoi ekettana; aissi giikko, ta keetta asai ubbai Xoossaa woossiyo keetta geetettana” yaagees.

<sup>8</sup> Israa7eelappe laalettidaageeta shiishshiya, Ubbaa Haariya GODAI, “SHiiqidaageetu bolli gujjada, taani haratakka shiishshana” yaagees.

### *Israa7eela Kaalettiyaageeti Pirddettidosona*

<sup>9</sup> Inttenoo bazzo do7atoo, inttenoo woran de7iya do7atoo, ubbaikka haa yiidi miite. <sup>10</sup> Israa7eela asaa naagiyaageeti qooqe; etau ubbaukka eri baawa. Eti ubbaikka boccanau danddayenna duude kanatu mala. Eti zin77idi aimottoosona; eti xiskko dosoosona. <sup>11</sup> Eti daro yiqetiya kana mala; miidi kalli erokkona. Eti akeeki paccido henttanchcha; eti ubbai bantta ogiyaa ogiyaa simmidosona; ubbaikka bantta go77a xallaa koyoosona. <sup>12</sup> Eti ubbaikka, “Haa yiite; woiniyaa eessaa ane uyoos. Ane nu mattoyiyaa ushshaa kumettaa ganoos! Wonttoikka hachchi mala gidana; woikko hachchipekka aadhdhi lo77ana” yaagoosona.

## 57

### *Israa7eelati Eeqau Goinniyo Goinoi Pirddettees*

<sup>1</sup> Xillo asi haiqqees; shin hegaa akeekidi qoppiyaabi baawa. Banttana Xoossaassi immida asati biittaappe xayooosona; shin xillo asi bashshai yaanaappe kasetidi eketiyoogaa ooninne akeekenna. <sup>2</sup> I biidi sarotetta de7iyo sohuwaa gelees. Suuretettan hemettiyaageeti haiqqidi shemppuwaa demmoosona.

<sup>3</sup> GODAI hagaadan yaagees; “Inttenoo, shareechchee naatoo, inttenoo laggettiyaarinne shaaramuxiyaari zerettatoo, haayite. <sup>4</sup> Intte o bolli qilliicceetii? Intte oona qooseetii? Intte inxxarssaakka o bolli kesseeetii? Intte makkalanchchatu naatanne worddanchchatu naata gidekketii? <sup>5</sup> Intte wolaa giddooninne daashsha mitta ubbaa garssan amuwan xuugetteetanne tunabaa ootteeta; intte naatakka zanggaaraa shoobbaaninne shuchchaa kooppuwan shukkidi yarshsheeta. <sup>6</sup> Zanggaaraa shoobban de7iya liiqo shuchchati intte xoossata. Intte etau ushshaa yarshshuwaa tigideta; kattaa yarshshuwaa akka immideta. Yaatin, taani hagan ubban ufaittiyaabaa intteyyo milatii? <sup>7</sup> Keehi xoqqanne adussa deriyaa huuphiyan intte hiixaa yeggideta; yeggidi yan yarshshanau pude kiyideta. <sup>8</sup> Intte penggiyaappenne qosillettaappe so baggaara eeqaa misileta essideta. Tana aggiigidi, intte arssaa aassidi, yaa pude kiyideta. Etaara maachchaa maacetideta; yaatidi eta arssaa dosideta; eta kalluwaakka be7ideta. <sup>9</sup> Zaitiyaa ekkidi, Molooka giyo eeqaakko biideta; intte shittuwaakka darissideta; inttiyo kiitettiyaageeta haahosaa kiittideta; harai attin, Si7ooliyaa gakkanaashin wodhdhideta. <sup>10</sup> Intte hara xoossata koyiiddi daafurideta; shin, ‘Hidooti baawa’ yaagibeekketa. Intte wolqqai haa ooraxxiis; hegaa gishshau, labbanidi kunddibeekketa.

<sup>11</sup> “Intte oossi yayyidi, taayyo worddotideti? Intte tana hassayibeekketa; intte wozanankka qoppibeekketa. Taani daro wodiya co77u giido gishshaassa gidennee, intte taassi yayyennan aggidooqe? <sup>12</sup> Taani intte xillotettaanne intte oosota awaajjana;



shin inttena ainne go77okkona. <sup>13</sup> Intte waassiyoo wode, intte shiishshido eeqati inttena ashshona! Eta ubbaakka carkkoi ekki efaana; issiton shemppiyo shemppoi eta punni xaissana. SHin tana baayyo baqati attiyo soho oottiya asi biittaa laattana; ta geeshsha deriyaakka i ekkana” yaagees.

*Xoossai Ba Asaa Maaddanaunne Pattanau Immido Hidootaa*

<sup>14</sup> GODAI hagaadan yaagees; “Gimbbite, Gimbbite! Ogiyaakka giigissite; ta asaa ogiyaappe xubbiyaabaa ubbaa diggite” yaagees. <sup>15</sup> Aissi giikko, merinau de7iyaagee, gitai, xoqqan de7iyaagee, a sunttaikka Geeshshaa geetettiyoogee, hagaadan yaagees; “Taani xoqqu giidanne geeshsha sohuwan de7ais; gidikkonne, bantta oottido nagarau azzanidi simmiyaageetuuranne banttana ziqqi oottiyaageetuura de7ais. Yaadata taani bantta oottido nagarau azzanidi simmiyaageetu ayyaanaanne banttana ziqqi oottiyaageetu wozanaa ooraxissais. <sup>16</sup> Taani merinau mootikke; ubbatonkka hanqqettikke. Hanqqettikko asaa ayyaanai, taani medhdhido asaa shemppoi daafurana. <sup>17</sup> Eta nagaraa gaasuwaaninne eta yaariyaa gaasuwan, taani eta hanqqettaas. Hanqqettada eta shocaas; ta sinttaakka etappe genttaas. SHin eti ha77ikka simmidi, bantta wozanaa qofan biidosona. <sup>18</sup> Taani eta ogeta be7aas; shin taani eta pattana, kaalettanne yeekkiyaageeta minttettana. <sup>19</sup> Israa7eela biittan yeekkiyaageetu menttershshan galataa wottana. Haahuwaaninne matan de7iyaageetussi saroi gido. Taani eta pattana” yaagees. <sup>20</sup> SHin iitati bulqquwaanne urqqaa pude pushakkiya, woppu gaanaukka danddayenna abbaa beetaa mala. <sup>21</sup> Ta Xoossai, “Iitatussi saroi baawa” yaagees.

## 58

*Tumu Xoomaa*

<sup>1</sup> GODAI hagaadan yaagees; “Ne qaalaa xoqqu oottada waassa; guyye gooppa. Ne cenggurssaa malkkataagaadan xoqqissa. Ta asaassi eta makkalaa, Yaaqooba keettaa asaassikka eta nagaraa yoota. <sup>2</sup> SHin eti tana hachchi hachchi koyoosona; ta ogiyaakka kaallanau dosiyaabaa milatoosona. Xillobaa oottida kawotettadaanne Xoossaa aza-zuwaa olibeenna asadan, eti tana suure pirddaa oichchoosona; taakko Xoossaakko shiiqanaukka dosoosona” yaagees.

<sup>3</sup> Eti shiiqidi GODAA, “Nuuni xoomida; shin neeni aibissi nuna xeellabeikkii? Nuuni nunatettaa kaushshida; shin neeni nuna aibissi erabeikkii?” yaagoosona.

GODAI zaaridi, eta hagaadan yaagees; “Be7ite, intte xoomiyo gallassi inttena ufais-siyaabaa ootteeta; intte oosanchcha ubbaa huqqunneeta. <sup>4</sup> Be7ite, intte ooshshaunne waretau xoomeeta; qassi meqetti banna deshettaa dechchanau xoomeeta. Hachchi intte xoomiyo haggaa mala xomai, intte qaalai bolla siyettanaadan ootenna. <sup>5</sup> Taani dooriyo xomai haggaa maleeyye? Issi asi banatettaa kaushshiyooogee haggaa mala gallasaaneeyye? Qassi taani koyiyo xomai asi ba huuphiyaa ceccaadan duge hokissiyooogeeeyye? Bidinttaa tisttidi, waaruwaa hiixxidi zin77iyooogeeeyye? Yaatin, haggaa xoomaa giidi xeegeetiyye? Qassi he xoomiyo gallasaikka GODAI ufaattiyo gallassa geetettiyye?

<sup>6</sup> “Taani doorido xoomaa haggaa be7ite: pirddan naaqqidi qachchidoogeeetu sanssalataa lefettiyoogaa, qambaraa gonniyaa birshshiyooogaa, huqqunnettidaageeta huqqunnuwaappe kessiyoooganne qambaraa ubbaa menttiyoogaa. <sup>7</sup> Qassi taani doorido xomai namisettidaagau intte qumaa shaakkiyoogaa, keetti banna hiyyeesata soo ekkiyoogaa, kallottidaageeta be7iyo wode, maizziyoogaa, maaduwaa koyiyo intte dabbuwaappe intte sinttaa genttannan aggiyoogaa.

<sup>8</sup> “Yaatikko, intte poo7oi maallado xalqqiyaadan poo7ana; intte paxatettaikka eesuwan yaana. Intte xillotettai intteppe sinttaara baana; GODAA bonchchoikka intteppe guyyeera gididi, inttena naagana. <sup>9</sup> He wode intte xeesana; xeesin GODAI

intteyyo koyana. Intte maaduwaa ekkanau waassana; waassin GODAI, 'Hekko, taani hagan de7ais!' yaagana.

"Intte giddoppe intte huqqunniyo qambaraa diggikko, qassi biradhdhiyan malaatiyoogaanne iitabaa haasayyoogaa aggikko, <sup>10</sup> namisettidaagaa qumaa mizidi kalissikko, naaqtetidaagaa i koyiyoobaa kalissikko, he wode intte poo7oi xuman poo7ana; intte qammaikka seeta gallassa gidana. <sup>11</sup> GODAI inttena ubbatoo kaalettana; inttena mela bazzuwan koshshiyaabaakka i inttiyo kunttana. Intte bollaa xaphuwaakka minttana. Qassi intte haattaa ushshiyo gannatiyaa malanne a haattai mulekka to77enna pultuwaa mala gidana. <sup>12</sup> Beni qolettidaageeta intte zaarettidi keexxana; daro wodiyaappe kase baasettida baasotikka keexettidi xoqqu gaana. Inttekka qolettida gimmbeta zaarettidi gimbbiyaageetanne asai de7iyo sohotun ogiyaa kessiyaageeta geetetti xeesettana" yaagees.

### *Sambbataa Bonchchiyoogaa Woituwaa*

<sup>13</sup> Qassikka GODAI hagaadan yaagees; "Sambbataa GODAAYYO dumma gallassadan xeellikko, he ta geeshsha gallassi intte go77aa yedettiyaageeta gidana xayikko, Sambbataa ufaissiyaanne bonchchettida GODAA gallassa bonchcho giidi xeesikko, qassikka intte intte ogiyaa beennan aggidi, bonchchiyaabaa gidikko, woikko inttena ufaissiyaabaa oottennaanne hadabaa haasayennan aggikko, <sup>14</sup> he wode intte GODAN ufaittana. Qassi taani inttena daro bonchchettidaageeta oottana; intte aawaa Yaaqooba biittaappe laatettidabaa intte maanaadan, taani inttena oottana. Taani GODAI haggaa haasayaas" yaagees.

## 59

### *Hananabaa Yootiyaagee Asaa Nagaraa Pirddiis*

<sup>1</sup> Be7ite, GODAA kushee inttena ashshanau qaammibeenna; a haittaikka siyennan ixnanau tullibeenna. <sup>2</sup> SHin intte nagarai intteppenne intte Xoossaappe gidduwan shaahotettaa medhdhiis. Qassi i siyenna mala, intte nagarai a sinttaa intteppe genttiis. <sup>3</sup> Aissi giikko, intte kushee suuttan, intte biradhdheekka naaquwan tuniis; intte doonai wordduwaa haasayees; intte inxxarssaikka iitabaa zuuzummees.

<sup>4</sup> Xillotettan mootiyai baawa; tumatettan pirddiyaikka baawa. Eti mela palaman ceeqettoosona; wordduwaa haasayoosona. Qassi metuwaa shahaaridi, iitatettaa yeloosona. <sup>5</sup> Eti shooshshaa phuuphulliyaa qoxoosona; shararootiyaa keettaakka keexxoosona. Eta phuuphullea miya asi haiqqees; phuuphulliyaaappe issoi me77ikko, shooshshai a giddoppe kiyees. <sup>6</sup> Eti keexxido shararootte keettai maayanau eta go77enna. Eti bantta medhdhidoogan banttana kammokkona. Eta oosoi iita ooso; makkala oosoi eta kushiyan de7ees. <sup>7</sup> Eta tohoti iitabaa oottanau woxxoosona; xilluwaa suuttaa gussanauka jaamoosona. Eta qofai iita qofa. Eti biido soho ubban qohoinne bashshai de7ees. <sup>8</sup> Eti sarotettaa ogiyaa erokkona; eti biyo ogiyan suure pirddi baawa; eti bantta ogiyaa geellayidosona; he ogetuura hemettiya ooninne sarotettaa erenna.

### *Asai Ba Nagaraa Paaxiis*

<sup>9</sup> Hegaa gishshau, suure pirddai nuuppe haakkiis; xillotettaikka nuukko gakkenna. Nuuni poo7uwaa koyoos; shin be7ite, xuma gidiis; wolqqaama poo7uwaa koyoos; shin xuman hemettoos. <sup>10</sup> Nuuni aifee bainna qooqedan, dirssaa gimbbiyaakko tattaafos. Sa7ai lem77in hemettiyaabaadan, seeta gallassi xubettoos. Qassi kumetta wolqqaara de7iya asatu giddon nuuni haiqqida asatu mala gidida. <sup>11</sup> Nuuni ubbaikka gaamuwaadan gudoos; haraphphetudankka azzanidi ooloos. Nuuni suure pirddaa koyida; shin demmibookko. Qassi atotettaakka koyida; shin i nuuppe haakkiis.

<sup>12</sup> Aissi giikko, nu mooroi ne sinttan dariis; nu nagaraikka nu bolli markkattees. Nu mooroi nunaara de7ees; nu naaquwaakka nuuni eroos. <sup>13</sup> Nuuni makkalidi,

GODAA kaddida; nu Xoossaa kaalliyoogaa aggidi, guyye simmida; sugettaanne geniyaa haasayida. Qassi nuuni shahaarido worddo qaalaa nu wozanaappe yelida. <sup>14</sup> Suure pirddai guyye simmiis; xillotettaikka nuuppe haakkiis; aissi giikko, tumatetta gutaran xubettees; ammanettiyo hanotaayyo geliyo sohoi xayiiis. <sup>15</sup> Tumatetti awaaninne beettenna; iitatettaappe haakkiya asi bau omoodettees.

### *Xoossai Ba Asaa Ashshanau Giigi Uttiis*

GODAI be7idi, suure pirddai bannaagau azzaniis. <sup>16</sup> Huqqunnettidaageeta maadiya asi bannaagaa GODAI be7iis; be7idi gaannatiya asi bannaagau garmettiis. Hegaa gishshau, i eta ba gita wolqqaaninne ba suure pirddan ashshanau, i ba huuphen geliis. <sup>17</sup> GODAI xillotetta tiran wottiyo ola miishshadan maayiiis; ba huuphiyanka atotetta qophiyaa wottiis. Haluwaa kessiyo maayuwaakka maayidi, mishuwaa qumaashshaa qumaayiiis. <sup>18</sup> I etau eta oosuwaadan oosuwaadan zaarana; ba morkketussi hanqquwaa, ba baarigaaratussikka qixaatiyaa zaarana. Abbaa doona biittatun de7iyaageetussikka eta oosuwau bessiyaagaa immana. <sup>19</sup> Hegaa gishshau, arggo baggaara de7iyaageeti GODAA sunttaayyo yayyana; arshsho baggaara de7iyaageetikka a bonchchuwaayyo yayyana. Aissi giikko, GODAA carrkoi gagantti yeddin, goggiya di7uwaadan i yaana.

<sup>20</sup> GODAI hagaadan yaagees; “Taani Xiyoonesinne Yaaqooba zaretun bantta nagaraappe simmiyaageetussi Woziyaagaa gidada yaana” yaagees.

<sup>21</sup> Qassikka GODAI hagaadan yaagees; “Tana gidikko, taani etaara maacettiyo maachchai haggaa: intte bollan de7iya ta Ayyaanainne taani intte doonan wottido ta qaalai hachchippe doommidi, merinaa gakkanaashin, intte doonaappe, intte naatu doonaappenne intte naatu naatu doonaappe shaahettenna. Taani GODAI haggaa odais” yaagees.

## 60

### *Sinttappe Yaana Yerusalaame Bonchchuwaa*

<sup>1</sup> GODAI hagaadan yaagees; “Dendda! Denddada poo7issa; aissi giikko, ne poo7oi yiiis. GODAA bonchchoikka ne bollan poo7iis. <sup>2</sup> Be7a, xumai sa7aa kammana; sakkana xumaikka asaa bollan wodhdhana. SHin GODAI ne bolli denddana; a bonchchoikka ne bolli poo7ana. <sup>3</sup> Kawotettati ne poo7uwaakko, kawotikka ne wonttaa wajajjaakko yaana.

<sup>4</sup> “Xoqqu gaada ne yuushuwaa xeella. Eti ubbai issippe shiiqidi, neekko yaana. Ne attuma naati haahuwaappe yaana; ne macca naatika ba7ettidi, neekko yaana.

<sup>5</sup> He wode neeni be7ada ufaittana; ne wozanaikka keehi poccu gaana. Aissi giikko, abbaa bollan de7iya gidai neekko simmana; kawotettatu duretettaikka neekko yaana.

<sup>6</sup> Midiyaama biittaappenne Eefa biittaappe yiida yelaga gaameelatu wudee ne biittaa kammana. Qassi worqqaanne ixaanaa caanettida gaameelati GODAA galataa awaajjiiddi, Saabappe yaana. <sup>7</sup> Qeedaarenne Nabaayoota dorssaa wudeti ubbai yarshshuwaassi ta yarshsho sohuwaa neekko shiiqana; qassi taanikka ta bonchcho keettaa bonchchana.

<sup>8</sup> “Ha shaaraadaaninne bantta keettaakko paalliya haraphphetudan paalliyaageeti oonee? <sup>9</sup> Hageeti Tarsseesappenne abbaa doonan de7iya haaho biittatuppe denddidi, ne asaa neekko miyyiya markkabetta. Hegaarakka gujjidi, kawotettati ubbai a asaa bonchchanaadan oottida GODAA ne Xoossaa, Israa7eela Geeshshaa suntaa bonchchanau, biraanne worqqa caanidi ekki yaana.

<sup>10</sup> “Allaga biittaa asai ne dirssaa gimbbana; eta kawoti neeyyo oottana. Nena taani ta hanqquwan kase shocidabaa gidikkokka, ha77i ta qaretan taani nena maaraas.

<sup>11</sup> Ne penggeti ubbato dooya de7ana. Kawotettatu duretettaanne omoodettida kawota neekko ehaana mala, gallassikka qammikka gorddettokkona. <sup>12</sup> Neessi oottenna asai

woikko kawotettai ubbai muleera xayana. <sup>13</sup> Ta Beeta Maqidasiyaa sohuwaa loittana mala, Liibaanoosa bonchchoi, zigai, xiiddainne xaittai neekko yaana; taani ta tohuwaa wottiyo sohuwaa bonchchana. <sup>14</sup> Nena huqqunnidaageetu attuma naati neessi hokki-iddi, neekko yaana; nena karida ubbati ne sinttan goinnana. Eti nena, 'GODAA Katamee Xiyoonnee, Israa7eela Geeshshaa Katamee' yaagidi xeesana.

<sup>15</sup> "Ooninne ne giddoora kanttennaagaa keenaa neeni kase olettadasanne ixettadasa. SHin ha77i taani nena merinau gita oottana; qassi yeleta ubbai ufaittiyo soho oot-tana. <sup>16</sup> Neeni kawotettatu maattaa uyana; kawotu xanttaakka xammana. Hegaappe guyyiyan, taani GODAI nena Ashshiyaagaa; Woziyaagaanne, Yaaqooba Wolqqaamaa gidiyooogaa neeni erana. <sup>17</sup> Nahaasiyaa gishshaa worqqaa, birataa gishshaakka biraa, mittaa gishshaa nahaasiyaa, shuchchaa gishshaa birataa taani neeyyo ehaana. Taani nena haariyaageeta saro, ne halaqatakka xillo oottana. <sup>18</sup> Hegaappe guyyiyan, sugetta oosoi ne biittan siyettenna; ne zawankka laalettainne bashshai siyettenna. Neeni ne dirssaa gimbbiyaa, 'Atotettaa,' ne penggetakka, 'Galataa' yaagada xeesana.

<sup>19</sup> "Hegaappe guyyiyan, gallassi neeyyo awaa poo7uwaa koshshenna; qammikka aginaa poo7uwaa koshshenna. Aissi giikko, GODAI neeyyo merinaa poo7o gidana; ne Xoossai neeyyo bonchcho gidana. <sup>20</sup> Ne awai naa77antto wullenna; ne aginaikka poo7iyooogaa aggenna. Aissi giikko, GODAI neeyyo merinaa poo7o gidana; neeni yeekkido gallassatikka wurana. <sup>21</sup> Ne asai ubbai xillo gidana; eti biittiyookka merinau laattana. Eti taani ta bonchchuwaa qonccissanau tokkido puuteta; eti ta kushe oosota. <sup>22</sup> Intte giddon issi keettan de7iya qoodan guutta asata taani sha7issana; ubbaappe qoodan guuxxiyaageetakka gita kawotetta oottana. Taani GODAA; wodee gakkiyo wode, taani haga eesuwan polana" yaagees.

## 61

### *Atotettaa Mishiraachchuwaa Yootiya Lo77o Oduwaa*

<sup>1</sup> Ubbaa Haariya GODAA Ayyaanai ta bollan de7ees; aissi giikko, qohettidaagee-tussi lo77o mishiraachchuwaa yootana mala, GODAI tana tiyiis. I tana wozanai meqqidoogeetussi koolettiyoogaanne omoodettidaageetussi omooduwaappe kiyiy-oogaa awaajjana malanne qashettidaageetussi birshshettiyoogaa awaajjana mala ki-ittiis. <sup>2</sup> GODAI doorido laittaanne nu Xoossai haluwaa kessiyo gallassaa awaajjana malanne azzaniyaageeta ubbata minttettana mala, tana kiittiis. <sup>3</sup> Hegaadankka qassi, Xiyoonen kayyottiyaageetussi, bidinttaa gishshaa akililiyaa, azzanuwaa gishshaa ufaissaa zaitiyaa, daafura ayyaanaa gishshaa galataa qumaashshaa immana mala, tana kiittiis. Eti GODAI ba bonchchuwau tokkido xillo mitta geetettidi xeesettana.

<sup>4</sup> Eti beni qolettidaageeta zaarettidi keexxana; beni kunddidaageetakka zaarettidi essana. Eti onidaageetanne daro yeletaappe kase kolettida katamata zaarettidi ke-exxana. <sup>5</sup> Allaga biittaa asati intte dorssaa wudiyaa heemmana; imattatikka intte gadiyaa goyananne intte woiniyaa turaa naagiyaageeta gidana. <sup>6</sup> Intte qassi, "GODAA qeeseta" geetettidi xeesettana; asaikka inttena, "Nu Xoossaa oosanchchata" yaagidi xeesana. Intte kawotettatu duretettaa maana; eta gidankka intte bonchchettana.

<sup>7</sup> Intte yeellaa gishshaa intte naa77u kushe saamaa ekkana; kauyyidoogaa gishshaakka intte qaadan intte ufaittana. Hegaa gishshau, intte intte biittan naa77u dakuwaa laattana; intte ufaissaikka merinaa ufaissa gidana.

<sup>8</sup> Xoossai hagaadan yaagees; "Taani GODAI suure pirdaa dosais; wuussaanne mooruwaa ixkais. Taani ammanettada, eta oosuwaa waagaa etayyo qanxxana. Taani etaara merinaa maachchaa maacettana. <sup>9</sup> Eta zareti kawotettatu giddon, eta naatikka dere asatu giddon erettana; eta be7ida ubbai taani, GODAI anjjido asata eti gidiyooogaa geeshshidi erana" yaagees.



<sup>10</sup> Taani GODAN keehippe ufaittais; ta shemppiyaakka ta Xoossan hashshu gausu. Aissi giikko, bullachchiyaagee ba huuphiyan ciishsha akiliiliyaa wottiyoogaadan, bullashettiyaarakka dumma dumma alleequwan alleeqettiyoogaadan, i tana atotettaa maayuwaa maizziis; xillotettaa qumaashshaakka bollaara taayyo gujjiis. <sup>11</sup> Biittai carshshaa mokkiyoogaadaaninne atakilttiyaa sohoikka tokkidobaa dichchiyoogaadan, hegaadankka, Ubbaa Haariya GODAI xillotettaanne galataa kawotetta ubbaa sinttan caarissana.

## 62

<sup>1</sup> Xiyoone gishshau, taani co77u giikke; Yerusalaame xillotettai gita poo7uwaadan, i atotettaikka eexxiya xomppiyaadan poo7ana gakkanaashin, taani co77u giikke. <sup>2</sup> Kawotettati ne xillotettaa, kawoti ubbaikka ne bonchchuwaa be7ana. GODAI ba doonaappe sunttiyo ooratta sunttan neeni xeesettana. <sup>3</sup> Neeni GODAA kushiyan lo77ida akiliilenne kawotettaa kallachcha mala gidana. <sup>4</sup> Hagaappe sinttanau neeni, “Dogetta attidaaro” geetettakka. Qassi ne biittiyaakka, “Xontta attidaaro” geetettukku. SHin neeni, “Ta ufaissai in de7iyooro,” ne biittiyaakka, “Azinaa gelidaaro” geetettana. Aissi giikko, GODAI nenan ufaittana; ne biitteessikka i azina mala gidana. <sup>5</sup> Wodallai geela7iyo machchiyoogaadan, ne naati nena machchana; machchiyo bullachchiyaagee bullashettiyaarin ufaittiyoogaadan, hegaadankka, ne Xoossai nenan ufaittana.

<sup>6-7</sup> Neno Yerusalaamee, ne dirssaa gimbbiyaa bollan wochchiyaageeta taani wottaas; eti gallassikka qammikka co77u gookkona. Inttenoo, Yerusalaamebaa GODAA hassayissiyaageetoo, i Yerusalaame keexxana gakkanaashiinne biittaa ubbaa bollan nashettida katama oottana gakkanaashin, intteyyookka shempoppite; akka shemp-pissoppite.

<sup>8</sup> GODAI ba ushachcha kushiyaaninne ba wolqqaama qesiyana hagaadan yaagidi caaqqiis; “Taani naa77antto intte kattaa intte morkketussi quma oottada immikke; qassi intte daafurido intte woine eessaakka allagati uyokkona. <sup>9</sup> SHin cakkidaageeti bantta kattaa maana; yaatidi GODAA eti galatana; woiniyaa teeraa maxidaageeti ta Beeta Maqidasiyaa dabaaban uyana” yaagees.

<sup>10</sup> Aadhdhite! Penggiyaara kiyidi biite! Asaayyo ogiyaa kessite! Kessite, wogga ogiyaa kessite! SHuchchatakka diggite; kawotettati ogiyaa demmana mala, banddiraa essite.

<sup>11</sup> Be7ite, GODAI biittaa sa7aa gaxaassi hagaadan yaagidi awaajjiis; “Xiyoone asaayyo hagaadan yaagite; ‘Be7ite, inttena Ashshiyaagee gakkiiis! Be7ite, a waagai aara de7ees; oosuwau i immiyo keraikka a sinttan de7ees’ yaagite” yaagiis. <sup>12</sup> Intte, “GODAI Wozido Geeshsha Asata” geetettidi xeesettana; Yerusalaameekka, “Koyettidaaro, Yegetta At-tabeenna Katamiyo” geetettana.

## 63

### *Aihuda Gidenna Asata Xoossai Xooniyo Xoonuwaa*

<sup>1</sup> Eedooma biittan de7iyya Booxira giyo katamaappe zo7o maayuwaa maayidi yiyaagee, hegee i oonee? Ha puulaara de7iyya maayuwaa maayidi, ba wolqqa minotetan sinttau horddofiyai oonee?

GODAI, “Hegee xilluwaa haasayiyaanne wolqqan ashshiya tana gidikkinaa!” yaagees.

<sup>2</sup> Woiniyaa gum77iyoosan woiniyaa yedhdhiya bitaniyaa maayuwaadan, ne maayoi aibissi zo77idee?

<sup>3</sup> GODAI hagaadan yaagidi zaarana; “Woiniyaa gum77iyoosaa taani tarkka yedhdhaas; kawotettatuppe issi asinne tanaara baawa. Taani eta ta hanqquwan yedhdhaas; ta yiilluwankka eta dirxxerettaas. Eta suuttai ta maayuwaa bollan xacettin, ta maayoi ubbai moorettiis. <sup>4</sup> Taani ta asaa woziyo gallassainne eta morkketussi haluwaa kessiyo laittai gakkiiis. <sup>5</sup> Taani xeellaas; shin tana maaddiya issi asinne beettibeenna.



Maaddiyaabi xayido gishshau, taani maalaallettaas. Hegaa gishshau, ta qesee taayyo xoonuwaa ehiis; ta hanqqoikka tana maaddiis. <sup>6</sup> Taani ta hanqquwan kawotettata yedhdhaas; ta yiilluwankka eta mentterettaas; eta suuttaakka taani biittan gussaas” yaagana.

### *Xoossai Israa7eelassi Kehiyo Kehaa*

<sup>7</sup> GODAI nuussi oottido ooso ubbaa gishshatau, GODAA aggenna siiquwaanne a galataa taani yootana; ee, ba maarotaaninne ba kehatettaa daruwan Israa7eela asaassi i immido cora lo77obaa taani yootana. <sup>8</sup> GODAI odiiddi, “Eti tumu ta asatanne ta naata gidiyo gishshau, tana cimmanau koyokkona” yaagiis. Hegaa gishshau, i eta Ashshiyaagaa gidiiis. <sup>9</sup> Eta waayee ubban i waayettiis. A sintta kiitanchchai eta ashshiis. I eta ba siiquwaaninne ba maarotan woziis. Kase aadhdhida wodetu ubban i eta denttidi tookkiis.

<sup>10</sup> SHin eti makkalidosona; a Geeshsha Ayyaanaakka azzanissidosona. Hegaa gishshau, i simmidi, etau morkke gidiiis; etaarakka olettiis.

<sup>11</sup> Hegaappe guyyiyan asai benibaa, i ba ashkkaraa Muuse wode oottidobaa hassayidi, hagaadan yaagiis; “Ba wudiyaa henttanchchatuurakka ubbaa abbaa giddoora kanttisiidi kessidaagee awan de7ii? Qassi he wode ba Geeshsha Ayyaanaa eta giddon wottidaagee ha77i awan de7ii? <sup>12</sup> Ba bonchcho qesiyaa gita wolqqaa Muusessi ushachcha kushe gidanaadan kiittidaagee, ba merinaa haittaa kessanau, eta sinttan de7iya haattaa shaakkidaagee, <sup>13</sup> eta ciimmaa giddoora pinttidaagee awan de7ii?” yaagidosona.

Bazzuwaara kanttiya paraadan, eti xubettibookkona. <sup>14</sup> Wombbaa duge wodhdhiya mehiyaadan, GODAA Ayyaanai eta shemppissiis. Hegaadan neeni ne sunntaa bonchchissanau ne asaa kaalettadasa.

### *Maarotaanne Maaduwaaw Demmanau Woossiyo Woosaa*

<sup>15</sup> Abeet GODAU, saluwaara duge xeella; xeellada neeni de7iyo geeshshanne bonchcho gidida sohuwaara be7a. Neeni mishettiyo mishoinne ne wolqqai anee? Ne wozanai nuna laamotiyo laamotainne ne qaretai nuuppe haakkiis. <sup>16</sup> Abrahaami nuna erana xayikkokka, Yaaqoobi nuna akeekennan xayikkokka, abeet GODAU, neeni nu aawaa. Beni wodiyaasappekka doommidi, ne sunntai nuna woziyaagaa. <sup>17</sup> Abeet GODAU, nuuni ne ogiyaappe bayanaadan, aibissi oottadii? Qassi nuuni neessi yayyennaadan, nu wozanaa aibissi dammissadii? GODAU, ne ashkkaratu gishshau, ne biittaa laattida zaretu gishshau, nuukko simma. <sup>18</sup> Ne geeshsha asai ne Beeta Maqidasiyaa guutta wodiyaassi laattidosona; shin nu morkketi a duge zaaridi yedhdhdidosona. <sup>19</sup> Neeni beniisappe haarabeenna asaadaaninne ne sunntankka xeesettibeenna asaadan nuuni hanida.

## 64

<sup>1</sup> Abeet GODAU, neeni salota daakkada duge wodhdhidada gidarkkiishsha! Wodhdhin deretikka gaji gajidi kokkoridaa gidorkkonaashsha! <sup>2</sup> Tamai qaixaariyaa miidi, haattaa penttissiyooagaadan, duge wodhdhada, ne sunntaa ne morkketa erissa; kawotetatakka ne sinttan kokkorssa. <sup>3</sup> Kasekka neeni nuuni naagibeenna maalaalissiyaabaa oottido wode wodhdhadasa; wodhdhin dereti ne sinttan gaji gajidi kokkoridosona. <sup>4</sup> Beniisappe doommidi, nenan ammanettidi, naagiyaageetussi maalaalissiyaabaa oottida neeppe attin, hara Xoossaa asa haitti siyibeenna; asa aifeekka be7ibeenna. <sup>5</sup> Xillotettaa ufaittidi oottiyaageetanne ne ogiyan nena hassayiyaageeta neeni gakkada maaddaasa. Be7a, neeni hanqqettadasa; shin nagaraa oottiyoogaa aggibookko. Nuuni nagaraa oottiiddi, adussa wodiya de7ida; yaatin, nuuni waanidi attanee? <sup>6</sup> Nuuni ubbaikka tuna asa gidida; nu xillotetta ooso ubbaikka qita curqqa mala. Nuuni ubbaikka bonccodan shullida; nu nagarai nuna carkkodan, pittidi efis. <sup>7</sup> Ne sunntaa

xeesiyai, woikko nena mintti oikkanau koyiyai baawa. Aissi giikko, neeni ne sinttaa nuuppe genttadasa; nuna nu nagaraa gishshau, agga bayadasa.

<sup>8</sup> Gidikonne, abeet GODAU, neeni nu aawaa; nuuni urqqa; neeni urqqa medhdhidaagaa; nuuni ubbaikka ne kushiyan merettida. <sup>9</sup> Abeet GODAU, keehi hanqqettoppa; nu nagaraakka merinau hassayoppa. Be7a, nuuni ubbaikka ne asa gidiyo gishshau, nuna maara. <sup>10</sup> Ne geeshsha katamati bazzo gididosona; harai attin, Xiyoone kata- maikka bazzo gidiis; Yerusalaameekka battaale gidiis. <sup>11</sup> Nu aawati nena galatido geeshshanne lo77o gidida nu Beeta Maqidasee taman xuugettiis; qassi nu lo77o sohota ubbaikka moorettidosona. <sup>12</sup> Abeet GODAU, neeni haggaa ubbaa be7adakka aggaaguutee? Neeni co77u gaada, nuna zawi banna qixaatiyaa qaxxayuuteeyye?

## 65

### *Xoossai Makkalanchchata Qaxxayees*

<sup>1</sup> GODAI hagaadan yaagees; “Taani tana oichchibeennaageetuyyo qonccaas; qassi tana koyibeennaageetuyyo beettaas. Taani ta sunntaa xeesibeenna kawotettaayyo, ‘Yee! Yee!’ yaagada koyaas. <sup>2</sup> Bantta qofaa kaalliiddi, lo77o gidenna ogiyan hemettiya makkalanchcha asatukko gallassa ubban ta kushiya miccaas. <sup>3</sup> Ha asai ataakilttiyaa gidдон yarshshiiddinne xuubiyaa bollan ixaanaa cuwayiiddi, taani xeellishin, tana ubba wode hanqqetissoosona. <sup>4</sup> Qassi eti duufo gidдон uttiyaageeta; geema sohuwan qammaa aqiyaageeta. Gudunntaa ashuwaa miyaageeta; eta xaaruwan tuna ashuwaa cambbai de7iyooageeta. <sup>5</sup> Hegaa oottiiddi, eti qassi harata, ‘Yan intteyyo de7ite; nuuni intteppe geeshsha gidiyo gishshau, nuukko shiiqoppite!’ yaagoosona. Eti ta siire gidдoppe kiyiya cuwanne gallassaa ubbaa eexxiya tama.

<sup>6</sup> “Be7ite, ta sinttan xaafetti uttiis; taani etau zaaranappe attin, co77u giikke; eta qaxxayanau qachchaas. <sup>7</sup> Ee, taani eta mooruwaanne eta aawatu mooruwaa acuwaa issippe etau qanxxana. Aissi giikko, eti deriyaa bollan ixaanaa cuwayidosona; qassi keratu bollan tana cayidosona. Eti kase oottido oosuwaa acuwaa taani etau qanxxana” yaagees.

<sup>8</sup> GODAI hagaadan yaagees; “Woiniyaa aifee woiniyaa turan de7iyo wode asai, ‘A gidдон anjjo de7iyo gishshau, a xaissoppite’ giyoogaadan, taani ta ashkkaratu gishshau, hegaadan oottana; taani eta ubbaakka xaissikke. <sup>9</sup> Taani Yaaqoobappe zerettaa, Yihudaappekka ta dereta laattiyaageeta kessana; taani dooridoogeeti a laattana; ta ashkkaratika yan de7ana. <sup>10</sup> Tana koyida ta asaayyo Saaroonaa giyo dembbai dorssaa wudiyaa heemmiyo soho gidana; qassi Akoora Wombbai miizzaa wudiyaa allaxxiisiiyo soho gidana.

<sup>11</sup> “SHin inttenoo, GODAA aggidaageetoo, ta geeshsha deriyaa dogidaageetoo, Qaada giyo eeqaayyo maaddaa giigissidaageetoo, qassi intte wurssettaa eranau, Saama giyo eeqaayyo walaha woine eessaa wanccan kunttidaageetoo, <sup>12</sup> taani intte wurssettaa bisuwau aattada immana; intte ubbaikka goora7ettanau hokkana. Aissi giikko, taani inttena xeesin koyibeekketa; haasayinkka siyibeekketa” yaagees. Intte ta sinttan iitabaa oottideta; taani dosennabaakka doorideta.

<sup>13</sup> Hegaa gishshau, Ubbaa Haariya GODAI hagaadan yaagees; “Be7ite, ta ashkkarati maana; shin intte namisettana. Ta ashkkarati uyana; shin intte saamettana. Ta ashkkarati ufaittana; shin intte yeellatana. <sup>14</sup> Be7ite, ta ashkkarati wozanan ufaittidi yexxana; shin intte wozanan azzanidi waassana. Qassi intte ayyaanai meqqido gishshau, intte zilaalidi yeekkana. <sup>15</sup> Intte intte sunntaa ta doorettidaageetussi qanggettau immana. Ubbaa Haariya GODAI inttena worana; shin i ba ashkkarata dumma sunntan xeesana. <sup>16</sup> He biittan anjuwaa koyiya ubbai tumatettaa Xoossai anjjanaadan woossana. He biittan caaqqo caaqqiya ubbaikka tumatettaa Xoossan caaqqana; aissi giikko, kase metoti dogettidosona; ta aifiyaa sinttaappekka geemmidosona” yaagees.

*Ooratta Meretaa*

<sup>17</sup> GODAI hagaadan yaagees; “Be7ite, taani ooratta salotanne ooratta sa7aa medhdhais; kasebai ubbai hassayettennanne qofettenna. <sup>18</sup> SHin taani medhdhiyooban merinau ufaittitenne hashshu giite. Aissi giikko, taani medhdhido Yerusalaama ufais-san kumidaaro gidana; Yerusalaame asikka hashshukonne giyaagaa gidana. <sup>19</sup> Taani Yerusalaamen ufaittana; ta asanka hashshu gaana. Hagaappe sinttanau yeekkiyaabaa cenggurssainne un77ettidi waassiyaabaa cenggurssai yan siyettenna.

<sup>20</sup> “Yerusalaame giddon hagaappe sinttanau, guutta wode xalaala de7idi haiqqiya qii na7i, woikko ba laittaa wurssennan haiqqiya cima asi de7enna. Xeetu laittaa haiqqiya urai daro yelagan haiqqiis geetettana; xeetu laittaa gattennan haiqqiyaagee qanggettidabaadan qoodettana. <sup>21</sup> He wodetun asati keettata keexxidi, etan de7ana; woiniyaa turatakka tokkidi, eta aifiyaa maana. <sup>22</sup> Eti keexxin, harai de7enna; harai maanau tokkiyoobaa tokkokkona. Ta asaa laittai mittaa laittaadan aduqqana; qassi taani dooridoogeeti bantta adussa wodiyau bantta kushiyaa oosuwan ufaittana. <sup>23</sup> Eti coo daafurokkona; woikko naata boshau yelokkona; aissi giikko, eti bantta naaturakka GODAN anjettida zersetta gidana. <sup>24</sup> Eti tana xeesanaappe kasetada taani etau koyana; qassi eti biron haasayishin, taani etau siyana. <sup>25</sup> Wanggireelloinne dorssaa marai issippe heemettana; gaammoikka booraadan, utulaa maana. Qassi shooshshaayyo buhee quma gidana. He wodetun ta geeshsha dere ubban, eti qohokkonanne bashshokkona. Taani GODAI haggaa odais” yaagees.

**66***Xoossai Aihuda Gidenna Asaa Bolli Pirddana*

<sup>1</sup> GODAI hagaadan yaagees; “Saloi ta kawotaa araata; sa7aikka ta tohoi yedhdhiyo soho. Yaatin intte taayyo keexxana keettai ai mala keettee? Taani shemppana sohoinne awaanee? <sup>2</sup> Hageeta ubbabaakka ta kushee oottiis gidennee? Hegaa gishshau, hageeti ubbatikka taageeta. SHin taani bana ziqqi oottiyaagaakko, ba oottido nagarau azzanidi simmiyaagaakkonne ta qaalan kokkoriyaagaakko xeellana.

<sup>3</sup> “Asai ubbai bau bau injjetiya ogiyaa doorido gaasuwan, korimaa yarshshiyaagee asa woriya uraa mala; dorssa maraa yarshshiyaageekka kanaa goora7iya asa mala; kattaa yarshshuwaa yarshshiyaageekka gudunntaa suuttaa yarshshiya ura mala; qassi hassayissiya ixaanaa cuwayiya urikka eeqaassi goinniya asa mala. Eta shemppoikka eta tunatettan ufaittees. <sup>4</sup> Hegaa gishshau, taani metuwaa etayyo doorana; eti yayyidobaakka taani eta bollan ehaana. Aissi giikko, taani xeesido wode, ooninne koyibeenna; taani haasayido wodekka ooninne ezgibeenna. Eti ta sinttan iitabaa oottidosona; taani ufaittannabaa dooridosona” yaagees.

<sup>5</sup> Inttenoo, GODAA qaalaayyo yayyidi kokkoriyaageetoo, a qaala siyite; “Intte ishannti, inttena ixxiyaageeti, ta sunntaa gishshau, inttena bohiyaageeti, ‘Intte ufaissaa nuuni be7ana mala, GODAI ane bonchchettin be7ana’ yaagidosona; shin eti yeellatana. <sup>6</sup> Katamaappe yiya waasuwa siyite; Beeta Maqidasiyaappe yiya cenggurssaakka siyite. Hegee cenggurssai ba morkketussi eta oosuwa mala kushiyaa zaariya GODAA cenggurssaa.

<sup>7</sup> “Bannakkennan na7a yeliya maccaasi de7ii? Leessoikka un77ettennan attuma na7a yeliya maccaasi de7ii? <sup>8</sup> Haggaa malabaa oonee siyidai? Qassi haggaa malabaa oonee be7idai? Issi biittaa asai pexi issi gallassi yelettanau danddayiyye? Woikko kawotettai issi kuttan yelettii? Yerusalaama bannakkosaarakka, issi kuttan ba naata yelaagaasu. <sup>9</sup> Yelana wodiyaa gattiya taani eti yelanaadan oottikkinaayye? Qassi yelanaadan oottiya taani yeliyo uluwaa gorddiyaanaayye? Haggaa giyaagee tana, GODAA ne Xoossaa.

<sup>10</sup> “Inttenoo Yerusalaamo siiqiya ubbatoo, iira ufaittite; i gishshaukka ufaissan poccu giite. Inttenoo issi yeekkiya ubbatoo, iira keehippe ufaittite. <sup>11</sup> Aissi giikko, intte i

minttettiya xanttaa xammidi kallana; qassi i daro bonchchuwaappe loitti uyidi, intte ufaittana” yaagees.

<sup>12</sup> GODAI hagaadan yaagees; “Be7ite, taani iyyo sarotettaa shaafadan darissana; kawotettatu duretettaakka kumidi goggiya pulttuwaadan, iyyo ehaana. Yaatobare intte hegaa xammana; i hashiyan intte toohettana; i kiyuwan uttidi, intte baalotana.

<sup>13</sup> Aayyiyaa ba na7aa minttettiyoogaadan, taanikka inttena minttettanna; intte Yerusalaamen minettana. <sup>14</sup> Intte hegaa be7iyo wode, intte wozanai ufaittana; intte meqettaikka maataadan aacana. Qassi GODAA kushee a ashkkaratuura de7iyooeenne a hanqqoi a morkketu bollan de7iyooege erettana” yaagees.

<sup>15</sup> Be7ite, GODAI tamaa ekkidi yaana. Ba hanqqettidoogeeta qaxxayanaunne tamaa lacuwan seeranau gotiyaa qefiyaa toggidi, i yaana. <sup>16</sup> Aissi giikko, GODAI asho maayida ubbaa tamaaninne bisuwan pirddana. Qassi GODAA bisuwan haiqqidaageetu qoodai darana.

<sup>17</sup> GODAI hagaadan yaagees; “Ataakilttiyaa sohuwan bantta eeqau goinnanau, bantta gidдон de7iya issuwaa kaallidi, banttana dummayidi geeshshiyaageeti, qassi gudunttaa ashuwaa, sheneyiyaabaanne eceriyaa miyaageeti ubbai issippe xayana.

<sup>18</sup> “Taani eta oosuwaanne eta qofaa eriyo gishshau, kawotettata ubbaanne dumma dumma qaalan haasayiyaageeta issippe shiishshanau yais; eti shiiqidi, ta bonchchuwaa be7ana. <sup>19</sup> Taani eta gidдон malaataa oottana; etappe attidaageetakka ta gitatettaa siyibeennanne ta bonchchuwaa be7ibeenna kawotettatukko, Tarsseesakko, Liibiyaakko,<sup>7</sup> Lidiyaakko, Tubaalakko, Yaawaanakonne abbaa doonan de7iya haaho biittatukko kiittana; kiittin eti ta bonchchuwaa kawotettatu gidдон yootana. <sup>20</sup> Israa7eela asai kattaa yarshshuwaa geeshsha miishshan wottidi, GODAA Beeta Maqidasiyaa ehiyoogaadan, eti intte ishantta ubbaa kawotettatu ubbaa giddoppe paratun, paraa gaaretun, gaameelatun, baqulotuuninne miishshata caaniyo gaaretun uttissidi, taayyo imo gidanaadan, ta geeshsha deriyaa Yerusalaame ehaana. <sup>21</sup> Etappe issoota issoota taani qeesetanne Leewata kessana. Taani GODAI hagaada odais” yaagees.

<sup>22</sup> Qassikka GODAI hagaadan yaagees; “Taani medhdhiyo ooratta salotinne ooratta sa7ai ta sinttan minnidi de7iyooogaadan, hegaadankka, intte zerettainne intte sunttai minnidi de7ana. <sup>23</sup> Aginaa xeeruwaappe biidi hara xeeruwaa gakkanaashiinne issi Sambbataappe biidi hara Sambbataa gakkanaashin, asai ubbai ta sinttan goinnanau yaana. <sup>24</sup> Eti kiyidi biidi, ta bolli makkalida asatu ahaa be7ana. Hegeeta miya guxunee haiqqenna; eta xuuggiya tamaikka to77enna. Eti asa ubbau sheneyiyaabaa gidana” yaagees.

<sup>7</sup> 66:19 Liibiyaakko: Ibraawettuwan “Puuxa” geetteetes.

## Ermmaasa Hiraagaa

### *Gidduwaa Erissuwaa*

Hananabaa yootiya Ermmaasi Kiristtoosi yelettanaappe kase laappuntto xeetu laittaa wurssettaaninne usuppuntto xeetu laittaa doomettaa heeran de7iis. Ermmaasi daro wodiyaa oottido ba oosuwan eta eeqaa goinuwaanne eta nagaraa oosuwaa gaasuwan Xoossaa asaa bolli gita bashshai yiiddi de7iyooqaa eta minttidi erissiiis. Ba yootidoogee ubbai polettidoogaa paxa de7idi ba aifiyan be7iis. Baabiloone Kawoi Naabukadanaxoori Yerusalaame oiqqidi, katamaanne Beeta Maqidasiyaa laaliis. Yihudaa kawoinne asaappekka dariya baggai omoodettidi Baabiloone biis. Gujjidikka Ermmaasi asai omooduwaappe simmanaagaanne Israa7eela kawotettai eqqanaagaa kasetidi odiis.

Ermmaasa maxaafaa oiddu kessidi be7anau danddayettes.

1 Yoosiyaasa, Yo7aaqeeema, Yo7aakiinanne Sedeqiyaasa kawotettaa laittatun Yihudaa asaassinne eta kaalettiyaageetussi Xoossaappe yiida qaalaa.

2 Hananau odettida dumma dumma qaalatanne Ermmaasa de7uwan polettida waanna waanna yohota gujjidi, Ermmaasa xaafiyaa Baaruki xaafidi oiqqido qeeri dautaraappe beettida xuufeta.

3 Dumma dumma allaga biittaa asaayyo Xoossaappe odettida hiraagaa qaalata.

4 Yerusalaame oiqettaabaanne asai omoodettidi Baabiloone baanabaa odiya gujo taariketa.

Ermmaasi ba asaa pala siiqiyaanne eta bolli bashshaa pirddaa aattanau keehippe daro ixxiya asa. Hananabaa yootiya asa gididi oottana mala Xoossai a xeesido gishshau, bana gakkida metuwaa gaasuwan i azzanido mino azzanoi a maxaafaa gidдон daro sohuwan xaafetti uttiis. Xoossaa qaalai a wozanaa gidдон tamaadan xuuggiyo gishshau, heгаа baridi wottiiganau danddayibeennaagaa qonccissiiis.

Ha maxaafan xaafettida hananabaa yootido gita gita qaalatuppe issooti issooti metoi kumido Ermmaasa laittaappe kanttidi, wozanan xaafettido gishshau, hassayissiya astamaare koshshennan, ubbaton naagiyo ooratta maachchai Xoossaa asaassi imettiyo wodee yaanau de7iyooqaa malaatoosona (31:31-34).

<sup>1</sup> Biniyaama biittan Anatoota kataman de7iya qeesetuppe issuwaa gidiya Hilqqiyaa na7aa Ermmaasa qaalai hагаа. <sup>2</sup> Amoonaa na7ai, Yihudaa Kawoi Yoosiyaasi kawotido tammanne heezzantto laittan GODAA qaalai Ermmaasayyo yiis. <sup>3</sup> Qassi Yoosiyaasa na7ai, Yihudaa Kawoi Yo7aaqeeemi kawotido laittatun GODAA qaalai Ermmaasayyo yiis. Qassikka Yoosiyaasa na7ai, Sedeqiyaasi kawotin, tammanne isiini laittaa gakkanaashin, GODAA qaalai daroton ayyo yiis. He laitti ichchashantta aginan Yerusalaame asai omoodettidi biis.

### *Ermmaasi Xeesettiis*

<sup>4</sup> GODAA qaalai taakko hagaadan yaagiiddi yiis; <sup>5</sup> “Taani nena ne aayee uluwan tilanaappe kase eraas. Neeni uluwaappe yelettanaappe kase taani nena geeshshada dummaya wottaas. Qassi kawotettatuyyo hananabaa yootiyaagaa oottada nena sunttaas” yaagiis.

<sup>6</sup> Yaagin taani, “Hai Ubbaa Haariya GODAU, taani na7a. Taani waati haasayiyaakko erikke” yaagaas.

<sup>7</sup> SHin GODAI tana hagaadan yaagiis; “Taani na7a’ gooppa. Taani nena kiittiyo asa ubbaakko ba. Taani azaziyoogaa ubbaakka yoota. <sup>8</sup> Etau yayyoppa. Aissi giikko, taani nena ashshanau nenaara issippe de7ana. Taani GODAI hагаа odaas” yaagiis.



<sup>9</sup> GODAI ba kushiya yeddidi, ta doonaa bochchiis. Bochchidi, “Be7a; taani ta qaalaa ne doonan wottaas. <sup>10</sup> Neeni shoddanaunne qolanau, xaissanaunne aatta yegganau, keexxanaunne tokkanau, dere asaa bollinne kawotettatu bolli taani hachchi nena sunttaas” yaagiis.

<sup>11</sup> GODAA qaalai taakko yiidi, “Ermmaasaa, neeyyo aibi beettii?” yaagiis.

Yaagin taani zaarada, “Lauze giyo mittaappe kiyida gatimai beettes” yaagaas.

<sup>12</sup> GODAI tana, “Neeni likke be7adasa. Aissi giikko, taanikka ta qaalai polettin, hegaadan be7anau naagais”<sup>1</sup> yaagiis.

<sup>13</sup> Naa77anttuwaakka GODAA qaalai taakko yiidi, “Harabai qassi aibi beettii?” yaagiis.

Yaagin taani zaarada, “Issi penttiya xaaroi huuphessa baggappe haa simmidi, geddi gi uttidaagee beettes” yaagaas.

<sup>14</sup> GODAI tana, “Huuphessa baggappe bashshai poridi, biittan de7iya asaa ubbaa bolli gukkana. <sup>15</sup> Taani huuphessa bagga kawotettatun de7iya asaa ubbaa xeesana hanais. Taani GODAI haggaa odaas. Eta kawoti yiidi, Yerusalaame geliyo penggetun, dirssaa yuushuwaa ubbaaninne Yihudaa katamatu ubban bantta araatata wottana. <sup>16</sup> Yihudaa asai tana aggidi, hara xoossatuyyo yarshshiidinne bantta kushiyan eti oottidobaayyo goinniiddi, oottido eta iitatettaa ubbaa gishshau, taani ta pirddaa eta bolli yootana.

<sup>17</sup> “SHin neeni ne huuphiyau giiga! Dendda eqqada, taani nena azaziyoogaa ubbaa etayyo oda. Etayyo yayyoppa. Neeni etayyo yayyikko, taani nena eta sinttan gujja yashissana. <sup>18</sup> Hachchi taani nena ha biittaa ubbaa bolli, Yihudaa kawotu bolli, halaqatu bolli, qeesetu bollinne ha biittaa asaa bolli gimbettida katamadan, birata tuussadaaninne nahaase biratan dirido dirssadan oottada minttaas. <sup>19</sup> Eti nenaara olettana. SHin taani ashshanau nenaara issippe de7iyo gishshau, nena xoonokkona. Taani GODAI haggaa odaas” yaagiis.

## 2

### *Israa7eela Asaa Nagaraa*

<sup>1</sup> GODAA qaalai taayyo yiidi, <sup>2</sup> “Ba; baada Yerusalaame asaa haittan hegaadan yaagada awaajja; ‘Neeni yelagatettan taayyo ai keena ammanettidaakko, qassi neeni biron mishiran de7iyo wode, tana ai keena siiqidaakko, taani GODAI hassayais. Neeni bazzo gidduwaara, zeretti zeretti erenna biittaara tana kaalladasa. <sup>3</sup> He wode Israa7eeli GODAAYYO geeshsha. I shiishshiyo baira katta; appe miida ubbati mooranchcha gididosona. Yaatin, eta bolli iitabai yiis. Taani GODAI haggaa odaas’ yaaga” yaagees.

<sup>4</sup> Inttenoo, Yaaqooba asatoo, Israa7eela zaretoo, ubbaikka GODAA qaala siyite!  
<sup>5</sup> GODAI hegaadan yaagees; “Kase intte aawati tanan ai mooro demmidi, taappe haakkidi biidonaa? Eti pattenna eeqatuyyo goinniiddi, pattennabaa gididosona. <sup>6</sup> Eti, ‘Nuna Gibxxeppe kessidaagee, qa77enne aafu gidida bazzuwaara, koshainne sakkana xumai de7iyo biittaara, ai asinne aadhdhenna woikko de7enna sohuwaara kaalettida GODAI awan de7ii?’ yaagibookkona. <sup>7</sup> Intte appe teeraanne lo77obaa maana mala, taani inttena aradda biittau ehaas; shin intte yiidi, ta biittaa tunissidetanne tana sheneyiyaabaa oottideta. <sup>8</sup> Qeesetikka, ‘GODAI awan de7ii?’ yaagibookkona. Ta higgee eta kushiyan de7iyo asatikka tana eribookkona. Deriyaa haariyaageetikka ta bolli makkalidosona. Hananabaa yootiyaageetikka Ba7aala sunttan hananabaa yootidi, pattenna eeqatuyyo goinnidosona” yaagees.

<sup>9</sup> Qassikka GODAI hegaadan yaagees; “Hegaa gishshau, taani inttena bironkka mootana; intte naatu naatakka mootana. <sup>10</sup> Ane arggo baggi biidi, Qophphiroosa giyo haruuruwaa xeellite. Woikko arshsho baggi Qeedaare giyo biittaa asa kiittidi xomoosissite. Yaatidi ane haggaa malabai hegaappe kase baggan hanidaakkonne be7ite.

<sup>1</sup> 1:12 “Naagais” giyoogee Ibraisxxe qaalan “Lauze” giyoogaa milatees.

<sup>11</sup> Eti tumu xoossata gidana xayikkonne, deree ba xoossata laammibeenna. SHin ta asai tana ba bonchchuwaa pattenna eeqatun laammiis” yaagees.

<sup>12</sup> Qassikka GODAI hagaadan yaagees; “Salotoo, ‘Poora!’ giite; dagammidi kokkorite!

<sup>13</sup> Aissi giikko, ta asai naa77u iitabata oottiis; hegeetinne, de7o haattaa pulttuwaa tana aggiis; haattaa oiqqanau danddayenna, xoo7etiichchida ollaa baayyo bookkiis.

<sup>14</sup> “Israa7eeli ashkkanne gidenna; son yelettida aillenne gidenna. Yaatin, i aissi do7i oiqqiyoobaa gididee? <sup>15</sup> A morkketi gaammodan, a bollan gudidosa. Eti bantta qaalaa xoqqu oottidi daaridosona; eti a biittaa booddila kessidosona; a katamatikka laalettidi, de7iyaabaa xayidosona. <sup>16</sup> Hegaa bollikka Memppisanne Xaafinaasa asati a liiphiyaa meedidosona. <sup>17</sup> Neno Israa7eela, i nena ogiyan kaalettishin, GODAA ne Xoossaa aggidoogan haga ne bolli ehiidai nena gidikkii? <sup>18</sup> Naile SHAafaappe haattaa uyanau Gibxxe biyoogee nena ai maaddanee? Woikko Efiraaxiisa SHAafaappe haattaa uyanau Asoore biittaa biyoogee nena ai go77anee? <sup>19</sup> Simmi ne iitatettai nena qaxxayana; neeni tana aggidoogee ne bolli pirddana” yaagees.

Godai, Ubbaappe Wolqqaama GODAI hagaadan yaagees; “Neeni tana GODAA ne Xoossaa aggidoogee ai keena iitanne camo gidiyaakko, ane eranne be7a. Neeni taayyo yayyiyo yashshi nenan baawa.

<sup>20</sup> “Taani ne qambaraa beni menttaas; ne qashuwaakka duuttaas. Yaatinkka, ‘Taani neeyyo oottikke’ yaagadasa. Yaagada dere ubbaa bollinne daashsha mittaa ubbaa garssan shaaramuxadan zin77adasa. <sup>21</sup> Taani nena muruta zereettaappe ekkada, lo77o woine turadan tokkaas. Yaatin, waana guyye simmada, woran morkkida, moorettida woine tura gidadii?” yaagees.

<sup>22</sup> Qassikka Ubbaa Haariya GODAI hagaadan yaagees; “Neeni hancciiciyan meecettiyaakkokka, saamunaa darissada gorppettiyaakkokka, ne mooruwaa qitai ha77ikka ta sinttaana. <sup>23</sup> Neeni waanada, ‘Taani tunabeikke; taani Ba7aala eeqatuyyo goinnanau woxxabeikke’ gaanau danddayai? Ane neeni wombban hanidobaa xeella; neeni oottidobanne akeeka. Neeni yaanne haanne wottaa jaamiya gaameelee mala. <sup>24</sup> Neeni bazzuwaa meezetida, ba ziitaa wode carkkuwaa singgettiya haree mala. A birassau eqqaichchin, ooni o teqqanau danddayii? O ziittiya ai wodala hareenne daafureenna; i i ceggenan o demmi aggees. <sup>25</sup> Neno, Israa7eela, ne caammai wurana gakkanaashiinne ne kookkee melana gakkanaashin, hara xoossatu geeduwaa hagaadan woxxoppa. SHin neeni, ‘Ixxisi, hegee tana ainne maaddenna. Aissi giikko, taani imatta xoossata siiqarggaas; taani etau goinnana’ yaagadasa.

<sup>26</sup> “Kaisoi ohettido wode yeellatiyoogaadan, Israa7eela asai yeellatees; etikka, eta kawoti, eta halaqati, eta qeesetinne eta hananabaa yootiyaageeti ubbai yeellatoosona.

<sup>27</sup> Eti mittaa, ‘Neeni ta aawaa’ yaagoosona; qassi shuchchaa, ‘Neeni tana yeladasa’ yaagoosona. Eti taayyo bantta som77uwaa aggidi, bantta zokkuwaa zaaridosona. SHin eti metootiyo wode tana, ‘Dendda! Denddada nuna ashsha!’ yaagoosona. <sup>28</sup> SHin anee, intte intteyyo medhdhido xoossati awan de7iyoona? Intte metootiyo wode inttena ashshanau danddayikko, ane denddona! Inttenoo, Yihudaa asatoo, intte xoossati intte katamatu keena cora” yaagees.

<sup>29</sup> GODAI hagaadan yaagees; “Intte tanaara aissi mootetteetii? Intte ubbaikka taayyo makkalideta. <sup>30</sup> Taani inttena coo mela qaxxayaas; qaxxayinkka intte baayibeekketa. Namisettida gaammuwaadan, intte bisoi intte hananabaa yootiyaageeta mirggiis” yaagees.

<sup>31</sup> Inttenoo, ha wodiya yeletatoo, GODAA qaalaa siyite! I hagaadan yaagees; “Taani intteyyo, Israa7eelatuyyo bazzo mala woi sakkana xuma biittaa mala gidi-danaayye? Yaatin, aissi ta asai, ‘Nuuni nu shenedan baana; naa77antto mulekka neekko simmokko’ yaagii? <sup>32</sup> Geela7iyaa ba alleequwaa woikko bullashettiyaara ba bullachchaa maayuwaa dogai? SHin ta asai tana qoodi bainna gallassaa dogiis. <sup>33</sup> Neeni

ne laggettotu geeduwaa woxxiyoogaa aiba meezetadii! Keehi iita maccaasatikka ne ogiyaappe tamaanau danddayoosona. <sup>34</sup>Qassi menttidi gelishin oiqqido asaa suuttan gidennan, xillo hiyyeesatu suuttaa xacan ne maayoi mooretti uttiis.

“Neeni haggaa ubbaa oottadakka, <sup>35</sup>‘Taani xillo; tumuppe GODAI ta bolli hanqqet-tenna’ yaagaasa. Neeni, ‘Taani nagara oottabeikke’ giyo gishshau, taani ne bollan pirdana. <sup>36</sup>Yaani neeni ne ogiyaa laammanau aissi bichchaarai? Kase nena Asoore biittai yeellayidoogaadan, Gibxxe biittaikka yeellayana. <sup>37</sup>Neeni haggappekka ne huuphiyaa oiqqada kiyana. Aissi giikko, GODAI neeni ammanettiyoogeeta ixxiis. Neeni etan maadettakka” yaagees.

### 3

#### *Ammanettenna Israa7eelo*

<sup>1</sup> GODAI haggadan yaagees; “Issi asi ba keettaayyiyo yeddin, a baada hara azinaa gellikko, he bitanee naa77antto o zaarii? Zaarikko he biittai aadhdhida tunaa tunees! SHin neeni shaaramuxadan, cora laggettotuura de7adasa; yaanadakka ha77i neeni taakko simmuutee! <sup>2</sup> Ane xoqqu gaada, aibinne baina dereta xeella. Neeni shaaramuxadan zin77abeennasi hegan de7ii? Arabai bazzon bonqqanau uttidi naagiyoogaadan, neeni laggettota naagaidda ogiyaa xaphon uttadasa. Yaataada ne shaaramuxaaninne ne iitatettan biittaa tunissadasa. <sup>3</sup> Heggaa gishshau, badhdheesai teqettiis; silaa iraiikka bukkennan aggiis. Heggaa hanikkokka, neeyyo shaaramuxiyo merai de7ees; neeni yeellatennan ixxadasa.

<sup>4</sup> “Ha77i neeni tana, ‘Ta aawau, ta naatettaasappe doommin, neeni tana siigaasa. <sup>5</sup> Neeni ubbaton ta bolli yiillotuutee? Ne hanqqoi merinaukka aggennee?’ yaagaasa. Ee, neeni haggaa yaagaasa; shin neeni oottanau danddayiyo iitaa ubbaa oottaasa” yaagees.

<sup>6</sup> Kawoi Yoosiyaasi kawotido laitti, GODAI tana haggadan yaagiis; “Hanna ammanoi baina Israa7eela oottidobaa neeni be7adii? A dere ubbaa bollinne daashsha mittatu ubbaa garssi baada, yan shaaramuxaasu. <sup>7</sup> A haggaa ubbaa oottadakka, taakko simmausu gaada qoppaas, shin simmabeikku. Qassi i michchiyaa, ammanettenna Yihudakka heggaa be7aasu. <sup>8</sup> Ammanoi baina Israa7eela daroton shaaramuxido gishshau, paramaa immada o yeddaas. Heggaa gidinkka Israa7eeli michchiyaa, ammanettenna Yihuda yayyennaaggaa taani be7aas; akka kiyada shaaramuxaasu. <sup>9</sup> SHaaramuxiyoogee iyyo qii laafabaa gidiyo gishshau, mittaaranne shuchchaara shaaramuxada biittaa tunissaasu. <sup>10</sup> Hegan ubbankka i michchiyaa, ammanettenna Yihuda, coo simmidabaa milatausuppe attin, kumetta wozanaappe taakko simmabeikku. Taani GODAI haggaa odaas” yaagiis.

<sup>11</sup> GODAI taayyo haggadan yaagiis; “Ammanettenna Yihudippe ammanoi baina Israa7eela xillo. <sup>12</sup> Ba; baada huuphessa baggaassi haggadan yaagada awaajja; ‘GODAI haggadan yaagees; “Bii, ammanoi baina Israa7eelee, simma! Taani maarotai kumidoogaa gidiyo gishshau, taani nena iita aifiyan xeellikke. Merinau hanqqettikke. <sup>13</sup> Gidikonne, neeni, ‘Taani GODAA ta Xoossaa bolli makkalaas. Allaga xoossatuura daashsha mittaa ubbaa garssan shaaramuxaas. Ne qaalaayyo azazettabeikke’ gaada ne mooruwaa ammananau koshshees. Taani GODAI haggaa odaas” yaagees’ yaaga” yaagiis.

<sup>14</sup> Qassikka GODAI haggadan yaagees; “Inttenoo, ammanettenna asatoo, simmite; aissi giikko, taani intte azinaa. Taani inttena issuwaa issi katamaappe, naa77aa issi yaraappe doorada ekkana; ekkada inttena Xiyoone ehaana. <sup>15</sup> Heggappe guyyiyan, taani ta wozanaadan, inttena heemmiya henttanchchata intteyyo immana. Eti inttena eratettaaninne akeekan heemmana” yaagees.

<sup>16</sup> Qassikka GODAI, “He gallassatun intte he biittan corattiyo wode, asati, ‘GODAA Maachchaa Taabootaa’ giidi haasayokkona. I etayyo karihinne geenna, woikko has-sayettenna, woikko bannaageekka etau qofettenna; qassi harai oosettenna. <sup>17</sup> He

wodiyani eti Yerusalaame GODAA Kawotaa Araataa giidi xeesana. Kawotetta ubbaappe asai GODAA sunntaa bonchchanau Yerusalaame shiiqana. Hegaappe sinttan eti ixixisi giidi, bantta iita qofaa kaallokkona. <sup>18</sup> He gallassatun Yihudaa asati Israa7eela asatuura issippe gaittidi, huuphessa bagga biittaappe taani kase intte aawata laatissido biittaa issippe yaana” yaagees.

### *Xoossaa Asai Eeqaa Misiletussi Goinniis*

<sup>19-20</sup> GODAI hagaadan yaagees; “Taani inttena attuma naatudan waata wot-tanaakkonne, payya biittaa, kawotetta ubbaappe aadhdhidi, lo77iya biittaa waata laatissanaakkonne qoppaas. Qassi tana, ‘Ta aawau’ giidi xeesananne tana kaalliy-oosaappe guyye simmikkona gaada qoppaas. SHin Israa7eela asatoo, intte ba azi-naayyo ammanettenna maccaaseedan taayyo ammanettibeekketa” yaagees.

<sup>21</sup> Aibakko bainna xoqqa deretu bollan cenggurssai siyettees; hegeenne, Israa7eela asaa yeehuwaanne watiwatuwaa. Aissi giikko, eti bantta ogiyaa geellayidosonanne GODAA bantta Xoossaa dogidosona. <sup>22</sup> GODAI eta, “Inttenoo, ammanoi bainna asatoo, taakko simmite. Intte ammanettana mala, taani inttena pattana” yaagiis.

Yaagin eti, “Eeno, nuuni neekko simmana. Aissi giikko, neeni GODAA nu Xoossaa. <sup>23</sup> Nuuni keratu huuphiyaaninne deretu huuphiyan eeqau goinniyoogee tumuppe cimo. Tumuppe nuuyyo, Israa7eelatuyyo atotettai GODAANA, nu Xoossaana. <sup>24</sup> Nu yelagatettaasappe doommin, nu aawati daafuridi demmidobaa, eta dorssaanne miiz-zaa, eta maccenne attuma naata, yeellayiya eeqati mi xaissidosona. <sup>25</sup> Nu yelagatettaas-appe doommidi, hachchi gakkanaassi, nuunikka nu aawatikka GODAA nu Xoossaa bolli nagaraa oottida. GODAA nu Xoossaa qaalaassi azazettibookko. Hegaa gishshau, ane nuuni yeellau duge gufannoos; qassi kaushshai nuna afaladan kammo” yaagoosona.

## 4

### *Simmite Giyo Xeessaa*

<sup>1</sup> GODAI hagaadan yaagees; “Israa7eela asau, simmikko, haa taakko simmite. Intte taani shenetiyo intte eeqata ta sinttappe diggikko, taappe wora baana xayikkonne <sup>2</sup> intte tuman, suuretetaaninne xillotettan, ‘GODAI ero!’ giidi caaqqikko, he wode kawotettati an anjettananne an ceeqqana” yaagees.

<sup>3</sup> GODAI Yihudaa asaayyoonne Yerusalaamen de7iyaageetuyyo hagaadan yaagees; “Intte otta biittaa goyite; agunntaa bolli zeroppite. <sup>4</sup> Inttenoo, Yihudaa asatoo, Yerusalaamen de7iyaageetoo, intte intte huuphen Xoossaayyo qaxxarettite; intte wozanaa shoohuwaa diggite. Hegee xayikko, intte oottido iitatettaa gishshau, ta hanqqoi tamaadan eexxi kiyana. A ooninne toissanau danddayenna” yaagees.

### *GODAI Huuphessa Bagga Biittaappe Iitabaa Ehees*

<sup>5</sup> GODAI hagaadan yaagees; “Yihudan yootite. Yerusalaamen, ‘Biitta ubban malkkataa punnite!’ yaagidi awaajjite. Intte qaalaa xoqqissidi, hagaadan giidi waas-site! ‘Issippe shiiqite! Ane gimbbey yuuyi aadhdhido katamaa hinddite!’ yaagite. <sup>6</sup> Asai Xiyoone baana mala malaatite! Intteyyo saro attanau baqatite! Gam77oppite! Aissi giikko, taani huuphessa bagga biittaappe iitabaanne gita bashshaa ehais. <sup>7</sup> Gaammoi ba de7iyo buuraappe kiyiyoogaadan, kawotettata xaissiyaagee ba sohuwaappe denddiis. Denddidi intte biittaa xaissanau yiis. Intte katamati moorettidi ona gidana. <sup>8</sup> Hegaa gishshau, waaruwaa maayidi, ‘Aayyee! Aayyee!’ yaagidi zilaalitenne yeekkite. Aissi giikko, GODAA hanqqoi suulliyaagee nu bollappe kichchiichchibeenna” yaagees.

<sup>9</sup> Qassikka GODAI, “He gallassi, kawuwaa wozanainne halaqatu wozanai taahana. Qeesetikka dagamma. Hananabaa yootiyaageetikka, ‘Poora!’ giidi doonaa oiqqana” yaagees.



<sup>10</sup> Yaagin taani, “Hai Ubbaa Haariya GODAU, bisoi eta qooriyan wodhdhiyo wode, ‘Intteyyo sa7i saro gidana’ yaagada, ha asaanne Yerusalaame pala cimo cimmadasa” yaagaas.

<sup>11</sup> He wodiyan ha asaassinne Yerusalaamessi, GODAI hagaadan yaagees geetettana; “Bazzuwan de7iya aibinne bainna xoqqa deretuppe michchiyaa carkkoi ta asaa bolli carkkana; shin hegee kattaa suragganaassanne geeshshanaassa gidenna. <sup>12</sup> Hegaappe keehi wolqqaamiya carkkoi ta azazuwan carkkana; ha77i taani eta bolli pirddana” gees geetettana.

### *Yihudaa Biittai Morkkiyan Doodettiis*

<sup>13</sup> Be7ite, morkkee shaaraadan kiyees. A paraa gaaretikka gote mala; a parati argganttaappekka aadhdhi eesotoosona. Aayye7ana nunoo! Baa xayida!

<sup>14</sup> Nenoo Yerusalaamee, attana mala, ne wozanaa meeccada iitatettaappe geeshshargga! Iita qofai ne wozanan aude gakkanaashin gam77anee? <sup>15</sup> Daana katamaappenne Efireema Deriyaappe yiidaageeti iitabaa awaajjoosona. <sup>16-17</sup> GODAI hagaadan yaagees; “Kawotettatuyyo yootite; Yerusalaameyyookka hagaadan yaagidi awaajjite; ‘Haaho biittaappe olai yees; yiidi Yihudaa katamatu bollan alaahees. I ta bolli makkalido gishshau, gaden de7iya kattaa naagiyaageetuugaadan, he olanchchati Yihudaa yuushuwan yuuyi aadhdhoosona’ yaagite” yaagees.

<sup>18</sup> Yihudaa asatoo, intte hanoinne intte oosoi haggaa ubbaa intte bolli ehiis. Hagee intteyyo qixaate. I ai keesa cammiyaabee! Intte wozanaa ai keesa caddiyaabee!

### *Ermmaasi Ba Asaa Gishshau Zilaaliis*

<sup>19</sup> Aayyee tanoo! Taani haggaa waata danddayanee! Aayyee ta wozanau! Ta wozanai diddiqees; taani co77u gaanau danddayikke. Aissi giikko, taani malkkataa punettaanne olaa alaassaa siyaas. <sup>20</sup> Iitabai iitabaa kaallees; mule biittai moorettiis. Ta dunkkaanetinne magalashoti eesuwan xayidosona. <sup>21</sup> Taani aude gakkanau olaa malaataa xeellaneenne malkkataa punettaa siyanee?

<sup>22</sup> GODAI hagaadan yaagees; “Ta asai eeyya; eti tana erokkona. Eti qofi bainna naata; etayyo akeeki baawa. Eti iitabaa oottanau eranchcha; shin lo77obaa oottanau erokkona” yaagees.

### *Ermmaasi Be7ido Ajuutaa*

<sup>23</sup> Taani sa7aa xeellaas; xeellada sa7ai giigiichchibeenaaagaanne aibinne bainna mela gidiyoogaa be7aas. Qassi salota xeellaas; xeellada etan poo7oi bainnaagaa be7aas. <sup>24</sup> Taani dereta xeellaas; xeellada eti qaaxxiyoogaanne kerati ubbai guyyenne sinttau gajigajiyoogaa be7aas. <sup>25</sup> Taani xeellaas; shin aiba asanne be7abeikke; saluwaa kafotikka ubbai paallidi baqatidosona. <sup>26</sup> Taani xeellaas; xeellada aradda biittai qa77e gididoogaa be7aas; GODAA sinttan, a suulo hanqquwaa sinttan he biittaa katamatikka yoodettidosona.

<sup>27</sup> GODAI hagaadan yaagees; “Mule biittai moorettana; shin taani a wurssa xaissikke. <sup>28</sup> Haggaa gishshau, sa7ai yeekkana; salotikka bollan xumana. Aissi giikko, taani garggaas; marssettikke. Taani qofaa qachchaichchaas; aggikke” yaagees.

<sup>29</sup> Paraasatunne wonddafiyaasatu garmmaamuwan, asai katama ubbaappe goossiis. Baggati woxxidi woraa garssi gelin, baggati qassi zaallaa shibboosona. Katamai ubbai onidi, de7iya asa xayiiis.

<sup>30</sup> Nenoo, mooretaichchidaaree, neeni ai oottai? Ne zo7o maayuwaanne aissi maayai? Worqqa alleeqonne aissi wottai? Ne aifiyaa ciruwaanne aissi tiyai? Neeni coo mela nena loittaasa. Ne laggettoti nena karidosona; eti nena woranau koyoosona. <sup>31</sup> Taani maareta ohettida maccaasiyaa waassiyooqaa mala waasuwaas siyaas. I waasoi koiro na7a yeliya maccaasee ooliyaa mala. He waasoi, Yerusalaama shemppuwaa



teqettada, ba kushiya zohaidda, “Aayyee tanoo! Hekko tana woranau hanoosona!” yaagada waassiyoo waasuwa.

## 5

### *Yerusalaame Asaa Nagaraa*

<sup>1</sup> GODAI hagaadan yaagees; “Ane Yerusalaame ogiyaa pudenne duge hemettite; ane yuuyi aadhdhidi xeellitenne akeekite; a gutaranka koyite. Xillo pirddiyaanne tumaa koyiya issi asa intte demmikko, taani Yerusalaame maarana. <sup>2</sup> SHin eti, ‘GODAI ero’ giikkokka, eti tumuppe wordduwan caaqoosona” yaagees.

<sup>3</sup> Abeet GODAU, ne aifeti tumaa xeellokkonaayye? Neeni eta dechchadasa, shin eta sakkibeenna. Neeni eta kinchcherettadasa, shin eti seeraa ekkennan ixxidosa. Eti bantta som77uwaa zaallaappe aatti minttidi, bantta nagaraappe simmennan ixxidosa.

<sup>4</sup> Hegaappe guyyiyan, taani hagaadan yaagada qoppaas; “Hageeti hiyyeesa kanchche; hageeti eeyya. Aissi giikko, eti GODAA ogiyaa, bantta Xoossaa higgiiyaa erokkona. <sup>5</sup> Simmi taani gita asatukko baananne etau odana. Aissi giikko, eti GODAA ogiyaa, bantta Xoossaa higgiiyaa eroosona” yaagada qoppaas. SHin eti ubbaikka issippe a qambaraa menttidosaanne qashuwaakka duuttidosona. <sup>6</sup> Hega gishshau, gaammoi ba woraappe kiyidi, eta worana. Suilaalee bazzoppe kiyidi, eta mi xaissana. Maahee eta katamata zuggidi naagana. He katamatuppe kiyiya ubbai puuzetti wurana. Aissi giikko, eta makkalai dalggiis; eta hereecaikka dariis.

<sup>7</sup> GODAI hagaadan yaagees; “Taani intte nagaraa aissi atto goo? Intte naati tana aggidi, worddo xoossatun caaqidosona. Taani eta mizada kalissaas; shin eti shaaramuxidosonaanne shaaramuxatu keettaa ziiridosona. <sup>8</sup> Eti xiikettida korima paradan ziittiiddi, hara asa machcho laggettanau jaamoosona. <sup>9</sup> Tumu taani ha yohotu gishshau, eta qaxxayanau bessikka? Haga mala kawotettaassi ta haluwaa kessikka?” yaagees.

<sup>10-11</sup> Qassikka GODAI hagaadan yaagees; “I woiniyaa turaa maaraa giddoora biiddi bashshite; shin wurssi xaissoppite. I tasheta kari olite; aissi giikko, eti GODAASSA gidokkona. Israa7eela asatinne Yihudaa asati mulekka ammanettibookkona” yaagees.

<sup>12</sup> Eti hagaadan giidi, GODAA bolli wordduwaa haasayidosona; “I ainne oottenna; qohiyaabi aibinne nu bolli yeenna. Morkkiyaa bisuwaa woikko koshaa nuuni mulekka be7okko. <sup>13</sup> Hananabaa yootiyaageeti carkko mala; etan Xoossaa qaalai baawa. Hega gishshau, eti giyoobai ubbai eta gakko” yaagoosona.

<sup>14</sup> Hega gishshau, GODAI, Ubaappe Wolqqaama Xoossai Israa7eela asaa hagaadan yaagees; “Eti ha qaalaa haasayido gishshau, taani ta qaalaa ne doonan tama kessana. Ha asaakka mitta kessana; he tamai eta mi xaissana” yaagees.

<sup>15</sup> GODAI inttena hagaadan yaagees; “Inttenoo, Israa7eela asatoo, taani intte bolli haaho biittaappe issi kawotetta ehais. Inne wolqqaamanne beni kawotetta. Eta qaalaa intte erenna, eta haasayaikka intteyyo gelenna kawotetta. <sup>16</sup> Eta zubbiiyaa shoohei dooya de7iya duufo mala. Eti ubbaikka wolqqaama asa. <sup>17</sup> Eti intte kattaanne qumaa dafidi maana. Intte attuma naatakka macca naatakka worana. Intte dorssaakka miiz-zaakka dafidi maana. Intte woiniyaa turaa teeraakka balasiyaa giyo mitta teeraakka dafidi maana. Intte ammanettiyo, gimbettida katamatakka eti bantta bisuwan olidi bashshana” yaagees.

<sup>18</sup> GODAI Ermmaasa hagaadan yaagees; “SHin he gallassatun gidikkokka, taani ta asaa muleera wurssa xaissikke. <sup>19</sup> Asai nena, ‘GODAI nu Xoossai nu bolli haga ubbaa aissi oottidee?’ giidi oichchiyo wode, neeni etayyo, ‘Intte tana, GODAA aggidi, inttesan imatta xoossatussi oottidoogaadan, hegaadan intte akka asaan imatta asatussi oottana’ yaaga” yaagiis.

*Xoossai Ba Asaa, "Inttena Erite" Gees*

<sup>20</sup> Qassikka GODAI, "Hagaa Yaaqooba asatuuyo oda; Yihudaa biittanka hagaadan yaagada awaajja; <sup>21</sup> 'Inttenoo, aifee de7ishin xeellennaageetoo, haittai de7ishin siyennaageetoo, eeyyanne damma asatoo, hagaa siyite! <sup>22</sup> Laa intte taayyo aissi yayyekketii? Intte ta sinttan aissi kokkoreketti? Aissi giikko, taani shaahetaa abbaayyo zawa, merinaw a pinttena dirssa oottaas. Beetati pushakettikkokka xoonanaw danddayokkona. Eti guummikkokka pinnanaw danddayokkona. <sup>23</sup> SHin ha asatuuyo muumenne makkala wozanai de7ees. Eti issi baggi simmidi, wora biidosona. <sup>24</sup> Eti bantta wozanan, "Nuussi silaa irara gabbaa irara wodiyan wodiyan immiya, nuna nu kattaa dabarssissennan shiishissiya GODAASSI, nu Xoossaassi, ane yayyoos" gi-bookkona. <sup>25</sup> Intte iita oosoi hageeta teqqiis. Intte nagarai inttena lo77obaappe ashshiis' yaaga" yaagees.

<sup>26</sup> GODAI hagaadan yaagees; "Ta asaa gidдон iita asati de7oosona. Kafota oiqqanaw naagiya asatudan zuggidi naagoosona. Eti gitiyaa yeggoosona; yeggidi asata oiqqoosona. <sup>27</sup> Koottan kafoi kumidoogaadan, eta keettan cimoi kumiis. Hegaa gishshau, eti gitanne dure gididosona. <sup>28</sup> Eti orddenne modhdho gididi diccidosona. Eta iita oosuwaassi zawai baawa. Eti aawi bainna naata shatinttanaw eta gishshaa mootettokkona; hiyyeesatu maataakka naagibookkona. <sup>29</sup> Yaatin, taani GODAI eta hegaa gishshau, qaxxayanaw bessikkinaa? Hagaa mala kawotettaa bolli ta haluwa kessanaw bessikkinaa?" yaagees.

<sup>30</sup> Qassikka GODAI hagaadan yaagees; "Daro iitabainne daganttiyaabai biittaa bollan haniis. <sup>31</sup> Hananabaa yootiyaageeti wordduwaa yootoosona; qeesetikka eta zoriyan aissoosona. Ta asaikka hegaa malabaa dosees! SHin wurssettan waanuuteetii?" yaagees.

**6***Yerusalaamee Morkkiyan Doodettiis*

<sup>1</sup> Qassikka GODAI, "Inttenoo, Biniyaama asatoo, intte shemppuwaa ashshanaw baqatite! Yerusalaameppe kiyite! Taqo7a kataman malkkataa punnite! Beeti-Hakkareema giyoosan malaataa bessite! Aissi giikko, huuphessa baggappe iitabainne hanttaara bashshai yaana hanees. <sup>2</sup> Taani lo77iyaanne ufaissiya Xiyoone katamata xaissana. <sup>3</sup> Morkketi henttanchchatudan bantta wudiya ekkidi, a bolli yaana. Yiidi a yuushuwan bantta dunkkaaniyaa dunkkaanana; bantta wudiyaanne bantta sohuwan sohuwan heemmana. <sup>4</sup> Eti issi issuwaa, 'Yerusalaameera olettanaw giigite! Denddite! Ane nuuni a seeta gallassi oloos. SHin aayye7ana! Sa7ai qammees; omarsaa kuwai aduqqi aduqqi bees. <sup>5</sup> Hegaa gishshau, denddite! Denddidi ane qamma oloos; olidi a qatuwaa laaloos' yaagidi maqettoosona" yaagees.

<sup>6</sup> Ubbaappe Wolqqaama GODAI hagaadan yaagees; "Mittata qanxxite. Yerusalaame gimbbiyaa lanqqen biittaa dooridi diddiqite. He kataman naaqoi kumido gishshau, i qaxxayettanaw bessees. <sup>7</sup> Ollai ba haattaa pulttiyoogaadan, ikka ba iitatettaa pulttees. Makkalabainne bashshabai a gidдон siyettees. Muletoo a sahoinne masunttai ta sinttan beettees. <sup>8</sup> Nenoo Yerusalaamee, taani nena seeriyogaa ekka. Ekkennan ixkikko, taani neeppe shaahettananne ne biittaa issi asinne de7enna baadine biitta kessana" yaagees.

*Israa7eela Asaa Makkalaa*

<sup>9</sup> Ubbaappe Wolqqaama GODAI hagaadan yaagees; "Woiniyaa teeraa poshiliyoogaadan, Israa7eela asaa atettata loittidi poshiliate. Woiniyaa teeraa qoriya asadan, intte kushiyaa daashshatu gidдо naa77anttuwaakka yeddite" yaagees.

<sup>10</sup> Taani oossi odooshsha? Oona seerooshsha? Ooni siyanddeeshsha? Be7ite, eti siyenna mala, eta haittai baretti uttiis. Be7ite, GODAA qaalai etayyo qilliicciyoobaa

gidiis; eti an ufaittokkona. <sup>11</sup> Hegaa gishshau, GODAA hanqqoi tanan kumi uttiis. Taani ha hanqquwaa teqqanau danddayikke.

Yaatin, GODAI tana hagaadan yaagees; “Ta hanqquwaa ogiyan de7iya naatu bollinne shiiqida yelaga asaa bolli tiga. Maccaasiyookka azinaakka, ceeggi wurida asaakka i ekki baana. <sup>12</sup> Taani he biittan de7iyaageetu bolli ta kushiya yeddiyo wode, eta keettati, eta goshshaarakka eta maccaasaarakka ubbai haratuyyo imettana” yaagees.

<sup>13</sup> Qassikka GODAI hagaadan yaagees; “Guuttaikka gitaikka ubbai woriyaa maanau yiiqetees. Hananabaa yootiyaageetikka qeesetikka ubbai asa cimmoosona. <sup>14</sup> Ta asaa masunttaa sakkennabaa giidi, guutta xaliyaa wottoosona. Saroi bannan, ‘Saro; saro!’ yaagoosona. <sup>15</sup> Ha sheneyiya oosuwaa oottidi, eti yeellatidonaa? CHii, eti mulekka yeellatibookkona. Eti yeelli aibakkokka erokkona. Hegaa gishshau, etikka kunddidaageetu gidon kunddana. Taani eta qaxxayiyoo wode, eta kaushshana” yaagees.

<sup>16</sup> GODAI hagaadan yaagees; “Ogiyan eqqidi xeellite; beni loossoti de7iyooosaa oichchite. ‘Lo77o ogee awan de7ii?’ yaagidi oichchitenne an hemettite. Yaatidi intteyyo shemppi ekkite. Yaagin intte, ‘Nuuni he ogiyan hemettokko!’ yaagideta. <sup>17</sup> Taani naagiyaageeta intte bolli sunttada, ‘Malkkatai punettiyo wode siyite!’ yaagada odaas. SHin intte, ‘Nuuni siyokko’ yaagideta.

<sup>18</sup> “Hegaa gishshau, kawotettatoo, siyite! Maabarattoo, taani ta asaa oottiyoobaa erite!  
<sup>19</sup> Sa7an de7iya asatoo, haga siyite! Taani eta iita qofaa gishshau, itabaa ha asaa bolli ehais. Aissi giikko, eti ta qaalaa siyennan ixxidosa; ta higgiaakka oli bayidosona.  
<sup>20</sup> Saaba giyo biittaappe yiida ixaani woikko haaho biittaappe yiida sawiya qimamee tau aisse? Intte xuuggiyo yarshshoikka ekettenna. Intte yarshshoi tana ufaissenna” yaagees.

<sup>21</sup> Hegaa gishshau, GODAI hagaadan yaagees; “Be7ite, taani ha asaa sinttan xubeta wottana. Wottin aawatinne naati issippe etan xubettana. SHoorotinne laggeti xayana” yaagees.

### *Huuphessa Baggaappe Woraajjiya Olanchchata*

<sup>22</sup> Qassikka GODAI hagaadan yaagees; “Be7ite, huuphessa bagga biittaappe olanchchati woraajjoosona; issi gita kawotettai sa7aa gaxaappe denddiis.  
<sup>23</sup> Eti wonddafiyaanne tooraa oiqqidosona. Eti qareti bannaageetanne yeddi maarennaageeta. Eti bantta paran piriixiyo wode, abbai guummiyoogaadan guummoosona. Inttenoo, Xiyoone katamaa asatoo, eti inttena olanau issi asadan salppidosona” yaagees.

<sup>24</sup> Nuuni he oduwaa siyin, nu kushee hilssi giis. Maccaasiyo maaretai oiqqiyooogaadan, nuna metoi un77iis. <sup>25</sup> SHooqaa kiyoppite; ogiyaarakka hemettoppite. Aissi giikko, morkkee bisuwaa oiqqiis; yaara haarakka daganttiyaabai de7ees. <sup>26</sup> Hai ta asau, waaruwaa maayidi, bidinttan gondoretite; ba mexi issi na7aassi yeekkiyaabaadan misho yeehuwaa yeekkite. Aissi giikko, xaissiyaagee akeekennan de7ishin, nu bolli yaana.

<sup>27</sup> GODAI Ermmaasa hagaadan yaagees; “Ermmaasaa, neeni eta ogiyaa xomoosana malanne paaccana mala, taani nena birataa paacciya asa kessaas; ta asaakka paacettiya birataa kessaas. <sup>28</sup> Eti ubbai zigiri yuuyiya, odin ekkenna makkalanchcha. Eti nahaasenne birata; eti ubbaikka mooruwaa oottoosona. <sup>29</sup> Birataa bollan de7iya kinssaa xuuggidi geeshshana mala, womppiinai wolqqappe womppiinettiis. SHin geeshshanau waayido waayee ubbaikka mela; ta asaa gidon de7iya iitati kichchibookkona. <sup>30</sup> GODAI eta oli aggidoo gishshau, eti Olettida Biraa getettoosona” yaagees.

## 7

<sup>1</sup> GODAAPPE Ermmaasassi yiida qaalai hagua; <sup>2</sup>“GODAA Beeta Maqidasiyaa penggen eqqa. Eqqada, ha qaalaa hagaadan yaagada awaajja; ‘Inttenoo, GODAAYYO goinnanau ha penggetuura geliya Yihudaa asatoo, ubbaikka GODAA qaalaa siyite! <sup>3</sup> Ubbaappe Wolqqaama GODAI, Israa7eela Xoossai hagaadan yaagees; “Intte ogiyaanne intte oosuwaa laammite; laammikko, taani inttena ha sohuwan wottana. <sup>4</sup> Cimo qaalan, ‘Hagee GODAA Beeta Maqidasiyaa! Hagee GODAA Beeta Maqidasiyaa! Hagee GODAA Beeta Maqidasiyaa!’ yaagidi ammanettoppote. <sup>5</sup> Intte intte ogiyaanne oosuwaa tumuppe laammikko, issoi issuwaassi tumaa pirddikko, <sup>6</sup> betetanne aawai baina naata, azinai haiqqido am77e maccaasaa naaqqennan aggikko, ha sohuwan xillo asatu suuttaa gussennan aggikkonne, intte qohettennaadan, hara xoossatuyyo goinnennan aggikko, <sup>7</sup> yaanikko, taani intte maizza aawatuyyo meri merinau immido biittan inttena wottana. <sup>8</sup> Be7ite! Intte ainne pattenna cimo qaalan ammanetteeta” yaagees’ yaaga” yaagees.

<sup>9</sup> GODAI hagaadan yaagees; “Intte wuuqqeeta, woreeta, shaaramuxeeta, caaqqidi wordduwaa markkatteeta, Ba7aala giyo eeqaayyo yarshshuwaa yarshsheeta, hagaappe kase intte erenna hara xoossatuyyo goinneeta. <sup>10</sup> Yaatidi ta sunttan xeegettida Beeta Maqidasiyaa yiidi, ta sinttan eqqidi, ‘Nuuni saro attida!’ yaageeta. SHin ha sheneyiya oosuwaa ubbaa oottanau saro attidetii? <sup>11</sup> Ta sunttan xeegettida ha Beeta Maqidasee intteyyo panggati qosettiyo gonggolo giidetiyye? Intte oottiyoojaa ubbaa taani ta huuphen be7aas” yaagees.

<sup>12</sup> GODAI hagaadan yaagees; “Taani ta sunttaassi de7iyoosaa oottada koiro doorido, Seelon de7iya ta sohuwaa ane biite. Ta asaa Israa7eela iitatettaa gishshau, taani he sohuwaa waatidaakko be7ite. <sup>13</sup> Intte ha ubbabaa oottideta. Taani intteyyo zaara zaarada odaas; shin siyennan ixxideta. Taani inttena xeesaas; shin taayyo koyibeekketa. <sup>14</sup> Hegaa gishshau, taani Seelo bolli oottidoogaa, hagan intte ammanettiyo, ta sunttan xeegettida ha Beeta Maqidasiyaa bollikka oottana. Intteyyoonne kase intte aawatuyyo immido sohuwan hagan, taani Seelo bolli oottidoogaa malaa zaarettada oottana. <sup>15</sup> Intte dabbota, Efireema zerettata taani diggidoogaadan, ta sinttappe inttenakka diggana” yaagees.

### *Asai Azazettennan Ixxiis*

<sup>16</sup> GODAI hagaadan yaagees; “Ermmaasaa, hejaa gishshau, ha asatuyyo woossoppa; eta gishshataa oichchoppa woikko waassoppa; neeni etabaa gaannatoppa. Aissi giikko, taani neeyyo siyikke. <sup>17</sup> Eti Yihudaa katamatuuninne Yerusalaame ogetun oottiyooobi aibakko be7ikkiiyye? <sup>18</sup> Naati mittaa mixoosona; aawati tamaa eettoosona; maccaasati, ‘Saluwaa kawiiyo’ giyo xoosseessi oittaa uukkanau xiilliyaa munaqqoosona. Eti tana qohana giidi, ushshaa yarshshuwaa hara xoossatuyyo gussoosona. <sup>19</sup> Hagan tumu qohettiyai tanee? Hagan qohettidi yeellatiyai bantta huuphiyau eta gidokkonaa?” yaagees.

<sup>20</sup> Hegaa gishshau, Ubbaa Haariya GODAI hagaadan yaagees; “Be7ite, ta yiilloinne ta hanqqoi ha sohuwaa bolli, asaa bollinne mehiyaa bolli, gaden de7iya mittaa bollinne biittan de7iya kattaa bolli gukkana. Gukkidi eexxana; to77anaukka danddayenna” yaagees.

<sup>21</sup> Ubbaappe Wolqqaama GODAI, Israa7eela Xoossai hagaadan yaagees; “Intte xuug-giyo yarshshuwaa hara yarshshotuura gujjidi, he ashuwaa intteyyo miite. <sup>22</sup> Taani eta Gibxxe biittaappe kessiyo gallassi, xuuggiyo yarshshobaa gidin, hara yarshshotubaa gidin, intte maizza aawatussi odabeikke woikko azazabeikke. <sup>23</sup> SHin taani etayyo ha azazuwaa immaas; ‘Taayyo azazettite. Yaatikko, taani intte Xoossaa gidana; inttekka ta asaa gidana. Intteyyo lo77ana mala, taani inttena azaziyo oge ubban hemettite’ yaa-gaas. <sup>24</sup> SHin eti taayyo siyennan woikko ezggennan ixxidosa. Eti bantta iita wozanaa muumetettaadan hemettidosona; eti sinttau biyoogaa aggidi, guyye biidosona. <sup>25</sup> Intte



maizza aawati Gibxxe biittaappe kiyido gallassaappe doommidi, hachchi gakkanaassi, taani ta ashkkarata, hananabaa yootiyaageeta wonttin wonttin intteyyo kiittaidda takkaas. <sup>26</sup> SHin intte taayyo siyennan woikko ezggennan ixxideta. Intte morggiyaa zozzidetanne intte maizza aawatuppekka aadhdhidi, iitabaa oottideta.

<sup>27</sup> “Hagaa ubbaa neeni etayyo yootana; shin eti ne giyoobaa siyokkona. Neeeni eta xeesana; shin eti neeyyo koyokkona. <sup>28</sup> Hegaa gishshau, Ermmaasaa, neeni etayyo hagaadan yaaga; ‘GODAU ba Xoossau azazettenna woikko seerin simmenna kawotettai hagaa. Tumai xayiiis; tumai eta inxxarssaappe bayiiis. <sup>29</sup> Intte huuphiyaa meedissidi olite. Aibinne baina xoqqa deretu bolli kiyidi zilaalite. Aissi giikko, GODAI bana yiilloyida yeletaa ixxiisinne aggi bayiiis’ yaagees.

<sup>30</sup> Qassikka GODAI hagaadan yaagees; “Yihudaa asati ta sinttan iitabaa oottidosona. Eti ta sunttan xeegettida Beeta Maqidasiyaa tunissanau, tana sheneyiya eeqata ehiidi, a giddon wottidosona. <sup>31</sup> Eti bantta attuma naatanne macca naata taman xuuggidi yarshshanau, Hinnooma Zanggaaraa xoqqan Toofeeta giyo yarshsho sohuwaa gimbidosona. SHin hegee taani eta azazabeennabaanne ta qofan binnabaa. <sup>32</sup> Hegaa gishshau, he sohoi Hinnooma Zanggaaraa woikko Toofeeta geetettiyoogee attidi, SHuha Zanggaaraa yaagettidi xeesettana gallassati yoosona. Aissi giikko, moogiyo sohoi baina gishshau, Toofeeti eti bantta ahaa moogiyo soho gidana. <sup>33</sup> He wode he asatu ahai saluwaa kafotuyyoonne sa7aa do7atuyyo quma gidana; eta yashissidi yedettiyaabi de7enna. <sup>34</sup> Taani ililssaanne ufaissaa cenggurssai, bullachchiyaagaanne bullashettiyaari cenggurssai Yihudaa katamatuuninne Yerusalaame ogetun siyettennaadan teqqana. Aissi giikko, biittai baises attana” yaagees.

## 8

<sup>1</sup> GODAI hagaadan yaagees; “He wodiyan Yihudaa kawotu meqettai, halaqatu meqettai, qeesetu meqettai, hananabaa yootiyaageetu meqettainne Yerusalaamen de7iya asatu meqettai ubbai duufuwaappe maxettidi kiyana. <sup>2</sup> Kiyidi eti siiqido, kiitettido, kaallido, zoriyaa oichchidonne goinnido awau, aginaunne saluwaa xoolintte ubbau micettana. Eta meqettai shiiqenna woikko moogettenna; shin biittaa bollan pito mala gidana. <sup>3</sup> Taani laalidosan de7iya, ha iita kawotettaappe attida asati ubbai de7uwaappe haiquwaa doorana. Taani Ubbaappe Wolqqaama GODAI hagaa odais” yaagees.

### *Nagaraanne Qixaatiyaa*

<sup>4</sup> GODAI tana hagaadan yaagiis; “Asatuyyo yaaga; ‘GODAI hagaadan yaagees; “Issi asi kunddikko, simmidi denddenneeyye? Woikko issi asi wora biikko, guyye simmenneeyye? <sup>5</sup> Yaatin, ha asai aissi wora biidee? Yerusalaamee aissi ubbatoo wora bii? Eti cimuwaa baqqi oiqqidosona; haa simmennan ixxidosa. <sup>6</sup> Taani minttada ezggaas; shin eti tumaa haasayokkona. ‘Ta ai oottidanaashsho?’ giidi ba iita oosuwaa paaxiyaabi issoinne baawa. Ubbaikka olayyo piriixiya paraadan bau bau woxxees. <sup>7</sup> Harai atto, shimalaa giyo kafoti bantta wodiya eroosona; haraphpheti, dagicetinne waaliyaa giyo kafoti bantta simmiyo wodiya naagoosona; shin ta asai GODAA wogaa erenna.

<sup>8</sup> “ “Yaatin, waanidi, ‘Nuuni aadhdhida eranchcha; aissi giikko, GODAA higgee nunaara de7ees’ gaanau danddayettii? Worddanchcha xaafeti bantta biiriyana ta higgiiyaa worddo kessidoogaa be7ekketiyye? <sup>9</sup> Aadhdhida eranchchati yeellatana; eti kauyyananne oiqettana. Eti GODAA qaalaa olirggin, etayyo aiba eratetti de7ii? <sup>10</sup> Hegaa gishshau, taani eta machcheta haratuyyo, eta gadiyaakka eta xoonidaageetuyyo immana. Aissi giikko, guuttaikka gitaikka ubbai woriyaa maanau yiigetoosona. Hananabaa yootiyaageetikka qeesetikka ubbai asaa cimmoosona. <sup>11</sup> Eti ta asaa masunttaa sakkennabaa giidi, guutta xaliyaa wottoosona. Saroi binnan, ‘Saro, saro!’ yaagoosona. <sup>12</sup> Ha sheneyiya oosuwaa oottidi, eti yeellatidona? CHii, eti mulekka yeellatibookkona.



Eti yeelli aibakkokka erokkona. Hegaa gishshau, etikka kunddidaageetu gidдон kund-dana; eti qaxxayettiyo wode kauyyana. Taani GODAI haggaa odaas” yaagees’ yaaga” yaagiis.

<sup>13</sup> GODAI haggadan yaagees; “Taani eta tumuppe dafa ekkana. Eta woiniyaa turan aifee xayana; balasiyaa giyo mittankka aifee xayana. Ayyo bonccoikka shullana; taani etayyo immidobai etappe ekettiichchana” yaagees.

<sup>14</sup> Yaagin asati haggadan yaagoosona; “Nuuni co77u giidi aissi uttiyoonii? Ane issippe shiiqite; hini gimbettida katamata gelidi, yan haiqgoos. GODAI nu Xoossai nuna haiquwau pirddirggiis; nuuni a bolli nagaraa oottido gishshau, nuuyyo uyanau woriya haattaa immirggiis. <sup>15</sup> ‘Sa7i saro gidana’ giidi ufaissan naagida; shin lo77obi yibeenna. ‘Nuuni paxana’ giidi naagida; shin dagama gidiiis. <sup>16</sup> Nu morkketu paraa daarettai Daana giyo kataman siyettees; eta korima paratu caagettan biittai ubbai qaaxxees. Biittaanne biittan de7iyaabaa ubbaa, katamaanne kataman de7iya asaa ubbaa mi xaissanau yiidosona” yaagoosona.

<sup>17</sup> GODAI haggadan yaagees; “Be7ite, taani shooshshata intte gidдо yeddana. Murun-niyaageetu daadumatai teqqanau danddayenna hasota intte gidдо yeddana; yeddin eti inttena dukkana” yaagees.

### *Ermmaasi Azzaniis*

<sup>18</sup> Paxanau danddayenna keenaa taani azzanaas; ta wozanaikka ta gidдон seerees. <sup>19</sup> Ta asai haaho biittan waassiyo waasuwa siyite. Eti, “GODAI Xiyoonen baawee? Ha Xiyoonen Kawoi naa77antto yan de7ennee?” yaagidi waassoosona.

Waassin GODAI eta Kawoi, “Eti bantta massido misiletun, bantta pattenna allaga eegatun woni tana aissi yiilloyidonaa?” yaagees.

<sup>20</sup> Yaagin asai, “Hekko cahaa wodeenne aadhdiis; boneenne wuriis; nuuninne attibookko” yaagidi waassoosona.

<sup>21</sup> Simmi ta asai mazunxxido gishshau, ta wozanaikka mazunxxiis. Taani kayyottais; yeellai tana oiqqiis. <sup>22</sup> Gala7aaden tiyiyo xalee baaweeyye? Yan aakimee de7ennee? Yaatin, ta asaa meqoi aissi paxennee?

## 9

<sup>1</sup> Ta huuphee haatta olla gideerenneeshsha! Ta aifetikka afutta pultto gidorkkon-aashsha! Yaatiyaakko taani ta asatuppe morkketu kushiyan haiqqidaageetuyyo qaminne gallassi yeekkana shin! <sup>2</sup> Taani ta asaappe shaahettada baana mala, taayyo bazzon manddarai aqiyo sohoi de7eerenneeshsha! Aissi giikko, eti ubbai shaaramuxa; eti makkaliya asaa zata.

<sup>3</sup> GODAI haggadan yaagees; “Ta asati bantta inxxarssan wordduwaa odanau ubba wode giigi uttidosa; eta biittan tumaa gishshaa worddoi minniis. Eti iitaappe iitau aadhhoosona; tana erokkona” yaagees.

<sup>4</sup> Qassikka GODAI haggadan yaagees; “SHooroi shooruwaappe naagettite; intte ishatakka ammanettoppate. Aissi giikko, ishi ubbi cimmiyaagaanne shooro ubbi zigiriyaagaa. <sup>5</sup> SHooroi shooruwa cimmes; issoinne tumaa haasayenna. Eti bantta inxxarssaa wordduwaa haasayanau tamarissi wottidosona. Eti nagaraa oottidi daafuroosona. <sup>6</sup> Neeni cimo gidдон de7aasa. Eti bantta cimuwan tana erennan ixxidosa” yaagees.

<sup>7</sup> Hegaa gishshau, Ubbaappe Wolqqaama GODAI haggadan yaagees; “Taani eta seeris-sada paaccana. Ta asaa gishshau, simmi taani arabaa ai oottanau danddayiyaanaa?

<sup>8</sup> Eta inxxarssai woriya zubbe mala; eti an cimuwa haasayoosona. Bantta doonan issoi issuwaassi saro qaalan haasayoosona; shin bantta wozanan piriya wottoosona.

<sup>9</sup> Yaatin, taani ha yohuwaayyo eta qaxxayanau bessikkinaa? Taani ta huuphiyau haggaa mala kawotettaa bolli haluwaa kiyikkinaa?” yaagees.

<sup>10</sup> Taani xoqqa deretussi yeekkananne waassana; bazzo hentta gadgetubaa zilaalana. Aissi giikko, eti bayidosona; yaara issi asinne kanttena. Mehe xaagoinne siyettenna; saluwaa kafotinne do7ati baqatidi biichchidosona.

<sup>11</sup> GODAI hagaadan yaagees; “Yerusalaame katamaa taani qolettida keelanne worakanati geessiyo ona oottana. Yihudaa katamatakka ooninne de7enna baiseso oottana” yaagees.

<sup>12</sup> Hagaa akeekanau aadhdhida eranchchi oonee? Ihara asaassi yootana mala, GODAI ba inxxarssan oossi odidee? Issi asinne a gidloora kanttena mala, biittai moorettidi, bazzodan onidoogee aibissee?

<sup>13</sup> GODAI yaagiis; “Hagee hanidoogee, etayyo taani immido higgiiyaa eti aggido gishshaassa. Eti taayyo azazettennaanne ha higgiiyaa kaallennan ixido gishshaassa.

<sup>14</sup> Hegaa aggidi, eti bantta wozanaa muumetettaa kaallidosona; eti bantta aawati tamarissidoogaadanka Ba7aala giyo eeqatuyyo goinnidosona” yaagiis.

<sup>15</sup> Hegaa gishshau, Ubbaappe Wolqqaama GODAI, Israa7eela Xoossai hagaadan yaagees; “Be7ite, taani ha asaa cammiya qumaa mizananne woriya haattaa ushshana.

<sup>16</sup> Eti woikko eta aawati erenna kawotettatu giddon taani eta laalana. Taani eta xaissana gakkanaashin, bisuwan yedettana” yaagees.

### *Yerusalaame Asai Zilaaliis*

<sup>17</sup> Qassikka Ubbaappe Wolqqaama GODAI hagaadan yaagees; “Ane qoppite. Yeehuwaa yeekkiya maccaasata xeesidi ehiissite; zilaassaa zilaaliya eranchcha maccaasatau kiittite. <sup>18</sup> Eti eesuwani yiidi, nu aifee afuttaa siluwaa xohana gakkanaassinne nu aifiyaa ciroi haattaa pulttana gakkanaassi nu bolli zilaalona. <sup>19</sup> Xiyoonen hagaadan giya zilaassaa cenggurssai siyettees; ‘Aayyeeroo! Nuuni moorettida! Nuuni mulekka kauyyida! Nu keetta qolettiichchido gishshau, nuuni biittaa aggidi baanau koshshees’ yaagoosona” yaagees.

<sup>20</sup> Inttenoo, maccaasatoo, GODAA qaala siyite! Intte haittai a doonaappe kiyiya qaala ezggo. Intte macca naata zilaassaa tamarissite; shooryaa shooryo koissaa tamarissu. <sup>21</sup> Aissi giikko, haiqoi naata ogiyan, wodallatakka gutaran qeexiiddi yiidi, nu maskkooteta gakkiiis; nu kawo keettatunkka geliis.

<sup>22</sup> GODAI tana hagaadan yaagidi azaziis; “GODAI hagaadan yaagees; ‘Asaa ahai pituwaadan dembban laalettana; eti cakkiyaageeti cakkidi olido kattaa mala; eta ooninne shiishshenna’ yaaga” yaagidi azaziis.

<sup>23</sup> GODAI hagaadan yaagees; “Aadhdhida eranchchai ba eran ceqqoppo; wolqqaamai ba wolqqan ceqqoppo; woikko duree ba doretettan ceqqoppo. <sup>24</sup> SHin ceqqiya urai ooninne tana eriyoogaanne akeekiyoogan ceqqo. Aggenna siiquwaa, suure pirddaanne xillotettaa sa7aa bollan oottiya GODAA, tana eriyoogan ceqqo. Aissi giikko, taani hageetan ufaittais. Taani GODAI hagaadaas” yaagees.

<sup>25</sup> Qassikka GODAI hagaadan yaagees; “Be7ite, bantta asho xalaalaa qaxxarettida asata taani qaxxayana gallassati yoosona. <sup>26</sup> Hegeetikka Gibxxe, Yihudaa, Eedooma, Amoonanne Moo7aaba biittaa asatanne bantta huuphiyaa shubeeriyaa meedidi, bazon de7iya asata ubbata. Aissi giikko, ha kawotettatu ubbaa asai tumuppe qaxxarettibeenna; Israa7eela asai ubbaikka ba wozanan qaxxarettibeenna” yaagees.

## 10

### *Xoossanne Eeqaa*

<sup>1</sup> Inttenoo, Israa7eela asatoo, GODAI intteyyo yootiyo qaala siyite! <sup>2</sup> GODAI hagaadan yaagees; “Deretu ogiyaa intte tamaroppite. Dereti saluwaa bolli malaataa be7idi dagammikkokka, intte dagammoppite. <sup>3</sup> Aissi giikko, deretu wogai hada. Eti mittaa woraappe qanxxoosona; massiyaagee kalttan massees. <sup>4</sup> Eti biraanne worqqaani alleeqissoosona; qaaxxennaadan madooshan misimaariyaa xishidi oittoosona. <sup>5</sup> Eta

eeqati eti leehiyaa garssan kafuwaa daganttanau essiyo misile mala. Haasayanau dand-dayokkona. Hemettanau danddayenna gishshau, asai eta tookkees. Etayyo mulekka yayyoppite. Aissi giikko, eti inttena qohanau danddayokkona; qassi maaddanaukka danddayokkona” yaagees.

<sup>6</sup> Abeet GODAU, ne mali ooninne baawa. Neeni gita; ne sunttaikka gitanne wolqqaama. <sup>7</sup> Abeet kawotettatu Kawuwau, nena bonchchennan agganai oonee? Nena bonchchanau bessees; aissi giikko, aadhdhida eranchcha asaa giddooninne eta kawotettaa ubbaa giddon ne mali baawa. <sup>8</sup> Eti eeyyanne damma; eti mittaappe massido, pattenna eeqatuppe ai tamaariyoonaa? <sup>9</sup> He eeqati Tarsseesappe yiida bi-raaninne Ufaazeppe yiida worqqan alleeqettidosona. Eti woiniyaa eessaanne saluwaa milatiya meraara de7iya maayuwan kamettidosona. Eti ubbai kushe oosuwaa hiillatun oosettidosona. <sup>10</sup> SHin GODAI tumu Xoossaa; i de7o Xoossanne merinaa Kawuwaa. A hanqquwan biittai qaaxxees; kawotettatika a yiilluwaa danddayokkona.

<sup>11</sup> GODAI hagaadan yaagees; “Etayyo hagaadan yaagada yoota; ‘Hegeeti saluwaanne sa7aa medhdhibeenna xoossati sa7aappenne salo garssaappe xayana’ yaaga” yaagees.

### *Xoossaa Sabbiyo Sabaa*

<sup>12</sup> Ba wolqqan sa7aa medhdhidaagee,  
ba aadhdhida eran sa7aa essidaagee,  
ba akeekan salota miccidaagee a.

<sup>13</sup> I wolqqaamiyo wode,  
salotun de7iya haattati guummoosona.  
I shaarata sa7aa gaxaappe pude denttees.  
I iraa bukissiiddi,  
wolqqanttaa wolqqammissees.  
Carkkuwaakka ba minjja man77iyaappe kessees.

<sup>14</sup> Asi ubbi era xayidi dammiis;  
worqqaa tigiya asi ubbi  
ba eeqatun yeellatiis.

Aissi giikko, he eeqati cimo;  
etan shemppoi baawa.

<sup>15</sup> Eti pattennabaa;  
eti qire ooso.  
Eti qaxxayettiyo wodiyan xayana.

<sup>16</sup> SHin Yaaqooba Saamaa gidiyaagee  
hegeeta mala gidenna.  
Aissi giikko, i ubbabaa medhdhidaagaa;  
Israa7eeli i baassi doorido zare.  
A sunttaikka Ubbappe Wolqqaama GODAA.

### *Yiya Iitaa*

<sup>17</sup> Inttenoo, morkkee dooddidoogeetoo, biittaappe kiyanau intteyyo de7iyaabaa qoridi shiishshite. <sup>18</sup> Aissi giikko, GODAI hagaadan yaagees; “Taani ha wodiyan ha biittan de7iya asata kessada yambbarana. Intte omoodettana mala, taani intte bolli iitabaa ehaana” yaagees.

<sup>19</sup> Aayyee ta masuntau! Ta masunttai paxennaagaa. SHin taani, “Hagee ta hargge; taani danddayanau bessees” yaagaas.

<sup>20</sup> Ta dunkkaanee qoletti xayiiis; a wodoroi ubbai duuxerettiis. Ta naati ubbai taappe shaahettidi biichchidosona; eti baawa. Ta dunkkaaniyaa zaaridi tolanau woikko ta magalashuwaa kaqqanau ha77i issi asinne attibeenna.

<sup>21</sup> Henttanchchati dammidosona; eti GODAA oichchibookkona. Hegaa gishshau, etau injjetennan ixxiisinne eta wudee ubbai laalettiiis. <sup>22</sup> Siyite! Ooratta odoi yiis;

hegeenne, “Huuphessa baggaara de7iya kawotettan gita dirbbai denddiis” yaagiyaa-gaa. A olanchchati yiidi, Yihudaa katamata baisanne worakanati geessiyooosaa kessana.

<sup>23</sup> Abeet GODAU, asa de7oi he aawussi buzo gidennaagaanne ba hemetaa suuris-sanaagee aawu shene gidennaagaa taani erais. <sup>24</sup> Abeet GODAU, tana seera; shin likkiyan gido. Ne hanqquwan gidoppo; hankkoode neeni tana guuttada xaissana. <sup>25</sup> Ne hanqquwaa nena erenna kawotettatu bollinne ne sunntaa xeesenna asatu bolli tiga. Aissi giikko, eti Yaaqooba asaa miidosona; eti eta ashshennan mi bayidosonanne eta aawaa biittaa xaissidosona.

## 11

### *Ermmaasanne GODAA Maachchaa*

<sup>1</sup> GODAAPPE Ermmaasayyo yiida qaalai haggaa; <sup>2</sup> “Ha maachchaa qaalata siya; siyada Yihudaa asaayyoonne Yerusalaame kataman de7iyaageetuyyo yoota. <sup>3-4</sup> GODAI Israa7eela Xoossai hagaadan yaagees gaada oda. “Taani kase intte aawata Gibxxe biittaappe, birataa seerissiya coociyaappe kessiyo wode, azazido maachchaa qaalaayyo azazettennaagee qanggettidaagaa. Taani GODAI hagaadan yaagaas; “Taayyo eeno giite; ta inttena azaziyoobaa ubbaa oottite. Yaanikko, intte ta asa gidana; taanikka intte Xoossaa gidana. <sup>5</sup> Hegaadankka, maattaanne eessaa goggiya biittaa kase intte aawatussi immanau, taani caaqqido caaquwaa polana” yaagaas. Hegeenne, hachchi intte laattido biittaa’ yaaga” yaagees.

Yaagin taani, “Eeno, GODAU, amin77i” yaagaas.

<sup>6</sup> Yaagin GODAI taayyo hagaadan yaagiis; “Haggaa ta qaalaa ubbaa Yihudaa kata-matuuninne Yerusalaame ogetun hagaadan yaagada awaajja; ‘Ha maachchaa qaalaa siyite; siyidi a kaallite. <sup>7</sup> Kase intte aawata taani Gibxxe biittaappe kessoosappe hachchi gakkanaashin, zaara zaarada, “Taayyo azazettite!” gaada seeraas. <sup>8</sup> SHin eti ta qaalaa siyibookkona woikko ezggibookkona. Heggaa aggidi, eti bantta iita wozanaa muumetettaa kaallidosona. Taani ta maachchaa qaalaa eti naagana mala azazaas; shin eti ixxidosa. Heggaa gishshau, he maachcha gidдон xaafettida qanggettaa ubbaa eta bolli ehaas’ yaaga” yaagiis.

<sup>9</sup> Zaaridikka GODAI taayyo hagaadan yaagiis; “Yihudaa asaa giddooninne Yerusalaamen de7iyaageetu gidдон maqqoi de7ees. <sup>10</sup> Eti kase ta qaalaa siyennan ixxida bantta maizza aawatu nagarau guyye simmidosa. Eti hara xoossatuyyo goin-nidosonanne etayyo oottidosona. Israa7eela asatikka Yihudaa asatikka taani kase eta maizza aawatuura maacettido maachchaa kanttidosona. <sup>11</sup> Heggaa gishshau, GODAI eta hagaadan yaagees; ‘Eti baqatidi attanau danddayenna metuwaa taani eta bolli ehaana. Eti taayyo waassinkka, taani etau siyikke. <sup>12</sup> He wode Yihudaa katamatu asatinne Yerusalaame asati biidi, bantta ixaanaa cuwayiyo xoossatussi waassana. SHin metuwaa wode he xoossati mulekka eta maaddokkona. <sup>13</sup> Inttenoo, Yihudaa asatoo, intte xoossati intte katamatu keena cora. Qassi Ba7aala giyo he yeella xoossaassi ixaanaa cuwayanau intte essido yarshshiyo sohota Yerusalaame ogetu keena cora’ yaagees.

<sup>14</sup> “Ermmaasaa, ha asatuyyo tana ainne woossoppa; eta gishshaa gaannatoppa woikko oichchoppa. Aissi giikko, eti bantta metuwaa gallassi tana xeesiyo wode taani etau siyikke.

<sup>15</sup> “Darotuura ba iita maqquwaa maqettaidda ta siiqiya ta Beeta Maqidasiyan beet-tanau bessii? Intte intte iita oosuwaa oottishin, yarshshettida mehiyaa ashoi inttena qixaatiyaappe ashshanee? Ashshiyaakko intte ufaittana shin” yaagiis.

<sup>16</sup> GODAI nena, Dicciya, Lo77o Aifiyaa Aifiya Wogara yaagidi sunntiis. SHin i ha wogaraa wolqqaama dadaa gunntan, taman xuuggana; a tashetikka meqerettana.

<sup>17</sup> Taani, inttena tokkida Ubbaappe Wolqqaama GODAI intte bolli iitabaa ehaanau awaajjaas. Aissi giikko, Israa7eela asatinne Yihudaa asati Ba7aalayyo ixaanaa cuwayidi, tana yiilloyidosona.

### *Ermmaasa Woranau Maqettido Maquwaa*

<sup>18</sup> GODAI eta maquwaa taayyo qonccissido gishshau, taani eraas. He wode eti iitaa oottiyoogaa i tana bessiis. <sup>19</sup> Taani shuhau kaalettidi efiyo aada dorssa maraa mala gidaas. Eti ta bolli, “Ane nuuni mittaakka a aifiyaakka xaissoos. A sunttai mulekka has-sayettenna mala, ane nuuni a paxa de7iyaageetu gidoppe xoqollidi xaissoos” yaagidi maqettidobaa taani erabeikke. <sup>20</sup> SHin abeet Ubbaappe Wolqqaama GODAU, xillo pirddiyaagoo, asaa wozanaa kahaa qoriyaagoo, neeni eta bolli ne haluwaa kessiyoogaa tana bessa. Aissi giikko, taani ta qohuwaa neeyyo magannaas.

<sup>21</sup> Hegaa gishshau, “GODAA sunttan hananabaa yootoppa; yootikko neeni nu kushiyan haiqqana” yaagidi, nena woranau koyiya Anatoota asaaba GODAI giyoogee haggaa. <sup>22</sup> Ubbaappe Wolqqaama GODAI hagaadan yaagees; “Taani eta qaxxayana. Eta wodallati bisuwan haiqqana; eta macca naatinne attuma naati koshan haiqqana; <sup>23</sup> etappe issoinne attenna. Aissi giikko, taani qaxxayiyo laitti Anatoota asaa bolli iitabaa ehaana” yaagees.

## 12

### *Ermmaasa Oishaa*

<sup>1</sup> Abeet GODAU, taani nenaara mootettiyo wode, ubbabankka neeni xillo. Gidikkonne, taani xillo pirddaabaa nenaara haasayanau koshshees. Iita asati oottiyoobai etau aissi injetii? Ammanettennaageeti aissi ishalidi de7iyoonaa? <sup>2</sup> Neeni eta tokkadasa; tokkin xaphuwaa yeddidosona; diccidi aifiyaa aifidosona. Eti nena doonaappe yeggokkona; shin eta wozanaappe neeni haahuwan de7aasa. <sup>3</sup> SHin abeet GODAU, neeni tana eraasa. Tana be7aasa; taani neeyyo ai qoppiyaakko paaccaasa. SHukkiyo dorssatudan, neeni he iita asata goochchada kessa! SHuhaa gallassau eta dummayada wotta! <sup>4</sup> Biittai melanainne dembba ubban morkkida maatai shullanai aude gakkanaassee? Biittan de7iya asaa iitatettaa gishshau, do7ainne kafoi wuriis. Hegaa bollikka asati, “GODAI nuuni oottiyoobaa demmenna” yaagoosona.

### *GODAA Zaaruwaa*

<sup>5</sup> GODAI Ermmaasassi hagaadan giidi zaariis; “Neni tohuwan woxxiya asatuura wottaa naasettada daafurikko, paraara waana naasettuutee? Neni saro biittan xubettikko, Yorddaanoosa woraa garssan waana hemettuutee? <sup>6</sup> Ne ishata, intte so asati nena aattidi immidosona; eti nena iiggidosona. Hegaa gishshau, eti neeyyo lo77obaa haasayikkonne, etan ammanettoppa.

<sup>7</sup> “Taani Israa7eela aggaas; taani ta doorettida kawotettaa olaas. Taani ta siiqiyo asaa a morkketu kushiyan aattada immaas. <sup>8</sup> Ta doorettida asai taayyo bazzon de7iya gaammo mala gidiiis. I ta bolli gudiis; heggaa gishshau, taani a ixxaas. <sup>9</sup> Ta doorettida asai taayyo hara gaceti dooddidi dukkiyo gazza gacee mala gididee? Biite; biidi do7ata ubbaa shiishshite; shiishshidi a maana mala ehiite.

<sup>10</sup> “Daro allaga kawoti ta woiniyaa turaa sohuwaa mooridosona; ta gadiyaa tub-bidosona; ta lo77o biittaa bazzo oottidosona. <sup>11</sup> He biittai moorettidi oxxiis; ta sinttan melanne baises gidiiis. Qarettiyaabai baina gishshau, mule biittaikka moorettiis. <sup>12</sup> Bazuwan de7iya aibinne baina xoqqa deretu ubbaa kanttidi, bonqqiyaageeti yiidosona; aissi giikko, GODAA bisoi biittaa ha gaxaappe hini gaxaa gakkanaassi miis. Hegaa gishshau, ooninne saro attanau danddayenna. <sup>13</sup> Eti gisttiyaa zeridi, agunttaa cakkidosona. Eti daro daafuridosona; shin ainne worissibookkona. GODAA hanquwaa teegaa gaasuwan eta kattai xayiis” yaagiis.



<sup>14</sup> GODAI hagaadan yaagees; “Taani ta asatuyyo Israa7eelatuyyo immido biittaa oiqqida, ta iita shooro kawotettata gidikko, taani eta eta biittaaappe xoqollana. Qassi Yihudaa asatakka eta giddoppe xoqollana. <sup>15</sup> SHin eta biittaaappe xoqollidoogaappe guyyiyan, zaarettada taani etayyo qarettana; taani eta huuphiyan huuphiyan eta laata gade, eta kawotettaa biitti zaarada ehaana. <sup>16</sup> Kase ta asaa Ba7aala sunttan caaqqanaadan tamaarissidoogaadan, eti ta asaa ogiyaa loitti tamaarikkonne ta sunttan, ‘GODAI ero!’ yaagidi caaqqikko, eti ta asaa gidдон minnidi de7ana. <sup>17</sup> SHin ai kawotettinne azazettennan ixkikko, taani a muleera xoqollada xaissana. Taani GODAI hagaadaas” yaagees.

## 13

### *Liinuwaa Danccuwaa*

<sup>1</sup> GODAI tana, “Ba; baada liinuwaa giyo qacinaappe dadettida danccuwaa shammada, ne xeessan dancca; shin haattan boshissoppa” yaagiis. <sup>2</sup> Hega gishshau, taani GODAI azazidoogaadan danccuwaa shammada, ta xeessan danccaas.

<sup>3</sup> GODAA qalalai naa77antto taakko yiis; yiidi, <sup>4</sup> “Neni shammido danccuwaa, ne xeessan neni danccidoogaa ekkada, Efiraaxiisa SHAafaa efa. Efaada, shuchchaa kooppuwan qosa” yaagiis. <sup>5</sup> Yaagin taani GODAI tau odidoogaadan efaada, Efiraaxiisa SHAafaa lanqqen qosaas.

<sup>6</sup> Daro gallasaappe guyyiyan GODAI, “Dendda; Efiraaxiisa SHAafaa baada, taani nena, ‘Yan qosa’ giido danccuwaa ekka” yaagiis. <sup>7</sup> Yaagin taani Efiraaxiisa SHAafaa baada, bookkada, danccuwaa ta qottidosaappe kessada ekkaas. SHin he danccoi ha77i moorettidi, muleera ainne go77ennabaa gidiiis.

<sup>8</sup> Hegaappe guyyiyan, GODAA qalalai taakko yiis; <sup>9</sup> “GODAI hagaadan yaagees; ‘Taani hegaadan Yihudaa asaa ayyuwaanne Yerusalaame gita otoruwaa giishshana. <sup>10</sup> Ta qaalaa siyennan ixkidi, bantta wozanaa muumetettaa kaallidi, hara xoossatussi oot-tanaanne goinnanau biya ha iita asati, ha danccuwaadan mulekka go77ennabaa gidana. <sup>11</sup> Danccoi asa xeessaa baqqi oiqqiyoogaadan, Yihudaa asai ubbainne Israa7eela asai ubbai ta asa gidana malanne ta sunttaayyo galatanne bonchcho gidana mala, eti tana baqqi oiqqanaadan oottaas. SHin eti siyennan ixkidosona’ yaagees” yaagiis.

### *Woiniyaa Eessaa Xuggaa*

<sup>12</sup> Qassikka i, “Ermmaasaa, asaayyo hagaadan yaaga; ‘GODAI Israa7eela Xoossai, “Issi issi xuggan woiniyaa eessai kumana” yaagiis’ yaaga. Yaagin eti nena, ‘Woni nuuni issi issi xuggan woiniyaa eessai kumanaagaa erokkoniiyye?’ yaagikko, <sup>13</sup> neni etayyo yaagada yoota, ‘GODAI yaagees; “Taani ha biittan de7iya asaa ubbaa, harai atto Daawita kawotaa araatan uttiya kawota, qeeseta, hananabaa yootiyaageetanne Yerusalaamen de7iya asaa ubbaa, eti mattottana gakkanaashin, woiniyaa eessan kunttana. <sup>14</sup> Taani eta, asaa asaara, aawaa na7aara dom77issana. Taani eta xaissanappe attin, etau kehikke, qarettikkenne maarikke” yaagees’ yaaga” yaagiis.

### *Omooduwaabaa*

<sup>15</sup> Siyitenne ezggite; aggite otorettoppite. Aissi giikko, haga GODAI yootiis.

<sup>16</sup> GODAI intte Xoossai xumissanaappe kasetidi, intte tohoikka xumiya deriyan xubettanaappe kasetidi, a bonchchite. Intte, “Poo7oi yaana” giidi naageeta; shin i sakkana xumau laammana.

<sup>17</sup> SHin intte siyennan ixkikko, intte otoruwaa gishshau, taani geeman yeekkais. GODAA wudee omoodettidi biichchido gishshau, taani yeekkais; ta aifeekka afutta holssayees.

<sup>18</sup> GODAI tana, “Kawuwaassinne kawuwaa aayeessi, kaweesi hagaadan yaagada yoota; ‘Intte bonchcho alleeqo kallachchai intte huuphiyaappe kunddido gishshau,

intte kawotaa araataappe duge wodhdhite. <sup>19</sup> Neegeeba biittan de7iya katamati ubbai gorddettiichchidosona. Eta dooyanau issi asikka yan baawa. Yihudaa asai muleera betidi biichchiis' yaaga" yaagiis.

<sup>20</sup> Qassikka GODAI, "Ane xoqqu gaada, huuphessa baggaappe yiyaageeta xeella. Neeyyo imettida wudee, neeni ceeqettido dorssati awan de7iyoonaa? <sup>21</sup> Neeni neeyyo dabbo gidana mala, koyidoogeeti nena xoonidi haariyo wode woiguutee? Yeland-deedan maaretai nena oiqqennee? <sup>22</sup> Neeni ne wozanan, 'Hagee ubbai ta bolli aissi gakkidee?' giikko, ne maayoi daahettidoogeekka nena asi daafidoogeekka ne nagarai darido gishshaassa. <sup>23</sup> Tumu Toophphiyaa asi ba bolla meraa, woikko maahee ba gazzatettaa laammanau danddayii? Danddayenna! Hegaadankka, iita oosuwaa ootti meezetidaageeti intte, lo77o oosuwaa oottanau mulekka danddayekketa" yaagiis.

<sup>24-25</sup> GODAI hagaadan yaagees; "Taani inttena bazzo carkkoi efiyo suullaadan laalana. Intte saamai, taani intteyyo gattana basoi hagua. Intte tana dogido gishshaunne worddo xoossatun ammanettido gishshau, <sup>26</sup> intte kalloi beettana mala, taani intte bollaappe maayuwaa qaara yeggana. <sup>27</sup> Neeni laggettiyoogaa, neeni korima paraadan, zii tau caaggiyoogaanne ne yeelli bainna shaaramuxatettaa, neeni keraaninne dembban oottiyo sheneyiya oosuwaa taani be7aas. Yerusalaamee, neeyyo aayyee! Neeni aude gakkanaashin geeyennan de7uutee?" yaagees.

## 14

### *Koshaabaa*

<sup>1</sup> Koshaabaa GODAI Ermmaasassi yootido qalalai hagua; <sup>2</sup> "Yihudaa biittai kayyottees; a katamati labbanoosona. An de7iya asati biittan uttidi yeekkoosona; Yerusalaame asai waasuwaa xulluusees. <sup>3</sup> Dure asati haattaa tikkanau bantta ashkkarata kiittoosona. Kiittin eti haattaa ollaa boosona; shin haatta demmokkona. Bantta otuwaa mela tookki ekkidi simmoosona. Haniyoobaa xayiyellatidi, bantta huuphiyaa gullettoosona. <sup>4</sup> Irai bukkenna gishshau, biittai melidi za77ees. Goshshanchhati yeellatidi, bantta huuphiyaa gullettoosona. <sup>5</sup> Maati bainna gishshau, wushiyaa ba yelido galo mariyo dembban ola bayada bausu. <sup>6</sup> Wora hareti aibinne bainna xoqqa deretun eqqidi, worakanatudan hel77oosona. Eta miyoobi xayin, eta aifee xeellanau daafuriis" yaagiis.

<sup>7</sup> Asai hagaadan yaagidi woossiis; "Abeet GODAU, nu nagarai nu bollan markkat-tikkonne, ne sunntaa gishshau, nuussi issibaa ootta. Nuuni neeppe darotoo guyye sim-mida; ne bollan nagaraa oottida. <sup>8</sup> Abeet Israa7eeli naagiyo ufaissau, metuwaa wodiyan a ashshiyaagoo, neeni biittan imattadan, issi qamma aqanau gelida ogiyaasadan aissi hanai? <sup>9</sup> Neeni dagammida asadan, ashshanau danddayenna mino asadan aissi hanai? Abeet GODAU, neeni nu gidduwan de7aasa! Nuuni ne sunntan xeesettida; nuna neeni aggoppa!" yaagiis.

<sup>10</sup> Ha asatubaa GODAI hagaadan yaagees; "Eti toilattiyoogaa keehippe siiqoosona; bantta tohuwaa teqqokkona. Hega gishshau, GODAI etan ufaittena. I eta iita oosuwaa hassayidi, eta nagaraa gishshau, eta qaxxayana" yaagees.

<sup>11</sup> Hegaappe guyyian, GODAI tana; "Ha asatu sarotettau tana woossoppa. <sup>12</sup> Eti xoomikkokka, taani eta waasuwaa siyikke. Xuuggiyo yarshshuwaanne kattaa yarshshuwaa eti yarshshikkokka, taani eta yarshshuwaa ekkikke. Taani eta olan, koshaaninne boshan xaissana" yaagiis.

<sup>13</sup> Yaagin taani hagaadan yaagaas; "Abeet Ubbaa Haariya GODAU, hananabaa yootiyaageeti etayyo, 'Intte olaa be7ekketa woikko koshi inttena oikkenna. Taani intteyyo ha biittan paccenna sarotettaa immana' yaagees yaagoosona" yaagaas.

<sup>14</sup> Yaagin GODAI taayyo hagaadan yaagiis; "Hananabaa yootiyaageeti ta sunntan wordduwaa yootoosona. Taani eta kiittabeikke, woikko azazabeikke, woikko etau

yootabeikke. Eti intteyyo hananabaa giidi yootiyoobai worddo ajjuutaa, pattenaa kaayuwaanne qoppi ekkidi yootiyo worddobaa. <sup>15</sup> Hegaa gishshau, GODAA sunttan hananabaa yootiyaageetubaa gidikko, taani GODAI eta kiittabeikke. SHin eti, ‘Olai woikko koshai ha biittaa bochchenna’ yaagoosona. He hananabaa yootiyaageeti bantta huuphiyau olaaninne koshan xayana! <sup>16</sup> Qassi eti hananabaa yootiyo asai koshaanne olaa gaasuwan haiqqana; eta ahai karen Yerusalaame ogiyan olettana. Eta woikko eta maccaasaa, eta attuma naata woikko eta macca naata moogiyaabi xayana. Taani etayyo bessiya waayiyaa eta bolli tigana” yaagiis.

<sup>17</sup> Ta azzanuwaabaa taani asaayyo hagaadan yaagada yootana mala, GODAI tana azaziis; “‘Ta asai daro deshettidi, keehippe mazunxxido gishshau, ta aifeti qamminne gallassi shemppennan afuxxona. <sup>18</sup> Taani dembbaa biikko, bisuwan siifetti-daageeta be7ais. Katamaa gelikko, qassi koshan gilqqidaageeta be7ais. Hananabaa yootiyaageetinne qeeseti, “Nuuni paci bainnan oottoos” goosona; shin eti bantta oot-tiyoobaa erokkona’ yaaga” yaagiis.

### *Asai GODAA Woossiis*

<sup>19</sup> Abeet GODAU, neeni Yihudaa mule aggadii? Xiyooone asaa ixxadii? Neeni nuna paxennaadan oottada aissi dechchadii? “Saro gidana” giidi naagida; shin aibinne lo77obi nuuyyo gakkibeenna. “Paxana wodee yaana” giidi naagida; shin dagama xalaalai yiis.

<sup>20</sup> Abeet GODAU, nuuni nu iitatettaanne nu aawatu mooruwaa paaxoos; nuuni tumuppe ne bolli nagaraa oottida. <sup>21</sup> Nuna ne sunttaa gishshau karoppa; ne bonchcho araatai de7iyo Yerusalaame kaushshoppa. Neeni nunaara maacettido maachchaa hassaya; ne maachchaa kanttoppa. <sup>22</sup> Woni kawotettatu eeqatuppe issoi ira bukissanau danddayii? Saloi ba sheniyau diifiyaa duge kiittanau danddayii? Danddayenna! Abeet GODAU, nu Xoossau, hejaa danddayiyaagee nena! Haggaa ubbaa oottiyaagee nena gidiyo gishshau, nuuni nenan ufaissaa oottoos.

## 15

### *Yihudaa Asaa Bolli Gakkiya Pirddaa*

<sup>1</sup> Hegaappe guyyiyan, GODAI taayyo hagaadan yaagiis; “Harai atto Muuseenne Sameeli ta sinttan eqqiyaakkonne, ta wozanai ha asatukko simmenna. Eta ta sinttappe digga; eti boona. <sup>2</sup> Qassi eti nena, ‘Nuuni au baanee?’ giidi oichchikko, GODAI hagaadan yaagees gaada etayyo oda; ‘Haiquwau pirddettidaageeti, haiquwau boona. Bisuwau pirddettidaageeti, bisuwau boona. Koshau pirddettidaageeti, koshau boona. Omoodettanau pirddettidaageeti, omooduwau boona’ yaagees” yaagiis.

<sup>3</sup> GODAI hagaadan yaagees; “Taani oiddu qommo bashshaa eta bolli ehaana; hegeetinne, eta woranau bisuwaa, eta ahaa goochchanau kanata, eta ashuwaa miidi xaissanau saluwaa kafotanne sa7aa do7ata. <sup>4</sup> Hizqqiyaasa na7ai, Yihudaa Kawoi Minaasee Yerusalaamen oottido palaa gishshau, taani eta sa7aa kawotetta ubbau dagama oottana.

<sup>5</sup> “Yerusalaame asatoo, intteyyo oonee qarettanai? Intteyyo azzananai oonee? ‘Intte ai malee?’ giidi inttena oichchanau eqqanai oonee?” yaagees.

<sup>6</sup> GODAI hagaadan yaagees; “Intte tana aggideta; ha77i ha77ikka intte guyye simmideta. Hegaa gishshau, taani intte bolli ta kushiya yeddada inttena xaissaas; taani intteyyo qarettaidda daafuraas. <sup>7</sup> Taani eta he biittaa katamatu penggiyan laidaa ekkada suraggaas. Eta naatakka wora wurssaas; taani ta asaa xaissaas. Aissi giikko, eti bantta iita ogiyaappe simmennan ixxidosa. <sup>8</sup> Taani eta am77etu qoodaa abbaa shafiyaappekka darissaas. Taani gallassa seetan eta wodallata wori xaissiyaageeta eta aayetu bolli ehaas. Qoppennan de7ishin, mishuwaanne dagamaa taani eta bolli duge yeddaas. <sup>9</sup> Laappun naati haiqqido aayiyaa siiphuwaa teqettada labbanaasu. Iyyo

gallassai qammiis; a kauyyaasunne yeellataasu. Biron paxa de7iyaageetakka taani eta morkketu sinttan bisuwan siiffissaas. Taani GODAI haggaa odaas” yaagees.

### *Ermmaasi Ba Metuwaa GODAASSI Maganniis*

<sup>10</sup> Aayyee ta aayee! Tana yelennan aggarkkiishsha! Taani biitta ubban de7iya asaara ooyettiyaanne baaxetiya asa gidaas. Taani oossinne tal77abeikke, woikko ooppenne tal77ada ekkabeikke; gidikkonne, asai ubbai tana qanggees.

<sup>11</sup> GODAI haggadan yaagiis; “Tumuppe taani nena lo77obaassi ashsha ekkana. Tumuppe ne morkketi metuwaa wodenne waayiyaa wode neessi watiwatanaadan, taani oottana.

<sup>12</sup> “Woni asi birataa, huuphessa baggaara yiya birataa woikko nahaasiyaa ment-tanau danddayii? <sup>13</sup> Biitta ubban intte oottido nagaraa gishshau, taani intte aquwaa peeshshaa, coo bonqqiyaageetussi immana. <sup>14</sup> Taani inttena intte erenna biittan intte morkketuuyo ailleyana; aissi giikko, ta hanqqoi miya tamaa gididi, merinau eexxana” yaagiis.

<sup>15</sup> Abeet GODAU, neeni eraasa. Tana hassayada maadda; tana yedettiyaageetu bolli ta haluwaa kessa. Neeni etabaa danddayada, tana wora yeggoppa. Taani ne gishshau cayettiyoogaa qoppa. <sup>16</sup> Abeet GODAU, Ubbaappe Wolqqaama Xoossau, taani ne sunttan xeesettido gishshau, ne qaalai taakko yin maas. Min tana pashkkissiisinne ta wozanaa ufaissiis. <sup>17</sup> Coo pocammiyaageetu citan uttabeikke; etaara ufaittabeikke. Neeni ne kushiyaa ta bolli wottido gishshaunne taayyo yiillotido gishshau, taani tarkka dumma uttaas. <sup>18</sup> Saho! taappe duuxxennan ixxiyoogeenne ta masunttai paxennan ixxiyoogee aibissee? Neeni taayyo meliya shaafadan, to7iya pulttodan, hanana hanaiyye?

<sup>19</sup> Hegaa gishshau, GODAI haggadan yaagees; “Neni taakko simmikko, taani zaarada nena ekkana; neeni taayyo oottana. Hada yohuwaa aggada, bonchcho qaala xalaala yootikko, neeni ta doona gidana. Hageeti asati neekko simmana; shin neeni etakko simmakka. <sup>20</sup> Taani nena ha asaayyo nahaasiyaa giyo birataara gimbbettida gimbbe oottana. Eti nenaara olettana; shin nena xoonokkona. Aissi giikko, taani GODAI nena ashshanaunne wotta ekkana nenaara de7ais. <sup>21</sup> Iitatu kushiyaappe taani nena ashshana; qareti bainnaageetuppekka taani nena wozana” yaagees.

## 16

### *GODAI Ermmaasa Azazidobaa*

<sup>1</sup> GODAA qaalai, haggadan yaagiiddi, taakko yiis; <sup>2</sup> “Neni machcho ekkoppa; maccaa attumaakka ha sohuwan yeloppa. <sup>3</sup> Ha sohuwan yelettida macca naatinne attuma naati, eta yelida aayetinne aawati hananabaa taani GODAI neeyyo haggaa odais. <sup>4</sup> Eti hanttaara harggiyan haiqqana; etayyo yeekettenna, woikko eti moogettokkona; eta ahai biittaa bollan pito mala gidana. Eti bisuwaaninne koshan wurana; eta ashoi saluwaa kafotuyyoonne sa7aa do7atuyyo quma gidana” yaagiis.

<sup>5</sup> GODAI taayyo haggadan yaagiis; “Yeeho keettaa geloppa; yeekkanau woikko qaret-tanau booppa. Aissi giikko, taani GODAI ha asaa bollappe ta sarotettaa, aggenna ta siiquwaanne ta maarotaa diggaichchaas. <sup>6</sup> Gitatika guuttatika ha biittan haiqqana; eti moogettokkona. Ai asinne etau yeekkenna; ai asinne etau qaacenna woikko huuphe meedissidi kayyottenna. <sup>7</sup> Yeekkiya asau haatta ushuwaa efidi, qumaa aara issippe miidinne uyidi, kayyuwaa balettiyaabi issoinne de7enna. Harai atto aayiyaa woikko aawai haiqqido uraakka balettiyaabi baawa.

<sup>8</sup> “Gibirai de7iyo keettaakka geloppa; maanaunne uyanau etaara issippe uttoppa. <sup>9</sup> Taani Ubbaappe Wolqqaama GODAI, Israa7eela Xoossai haggaa odais. Be7a, taani ufaissaanne ililssaa cenggurssaa, machcho bullachchiyaaganne bullashettiyaari cenggurssaa ha sohuwaappe diggana. Hegaa asai ba laittan ba aifyan be7ana.

<sup>10</sup> “Neeni ha qaalaa ubbaa ha asaayyo odiyo wode, eti nena, ‘GODAI aissi haggaa mala gita iitabaa nu bolli awaajjidee? Nuuni ai mooridoo? GODAAYYO, nu Xoossaayyo, nuuni oottido nagari aibee?’ yaagana. <sup>11</sup> He wode neeni etayyo yaaga; ‘ “Taani GODAI haggaa oottidoogee kase intte aawati tana aggidoo gishshaassa, eti hara xoossata kaallido gishshaassa, etau oottidonne goinnido gishshaassa, tana aggidonne ta higgiiyaa naagen-nan ixxido gishshaassanne <sup>12</sup> intte kase intte aawatuppekka aadhdhi iitido gishshaassa. Be7ite, intte huuphiyan huuphiyan intte iita wozanaa muumetettaa kaallideta; taayyo azazettennan ixxideta. <sup>13</sup> Heggaa gishshau, taani inttena ha biittaaappe denttada, intte woikko intte aawati erenna biitti olana. Yan intte hara xoossatussi gallassinne qammi goinnana. Taani mulekka intteyyo qarettikke” yaagees’ yaaga” yaagiis.

### *GODAI Israa7eelata Zaaridi Ehaana*

<sup>14-15</sup> GODAI hagaadan yaagees; “ ‘Israa7eela asaa Gibxxe biittaaappe kessida GODAI ero’ yaagidi caaqqiyoogaa asai aggidi, ‘Israa7eela asaa huuphessa bagga biittaaappenne eta i laalido biittatu ubbaappe zaaridi ehiida GODAI ero’ yaagidi caaqqana gallassai yaana. Aissi giikko, taani eta kase eta aawatussi immido buzo biittaa zaarada ehaana” yaagees.

### *Yiya Qixaatiyaa*

<sup>16</sup> GODAI hagaadan yaagees; “Be7ite, taani moliyaa oiqqiya daro asatussi kiit-tais; eti eta oiqqana. Hegaappe guyyiyan, taani daro shankkanchchatussi kiittana; shankkanchchati dere ubbaappe, kera ubbaappenne shuchchaa kooppotuppe eta shankkatidi kessana. <sup>17</sup> Aissi giikko, taani eta ogiyaa ubbaa be7ais. Eti taappe qosettibookkona; eta nagaraikka ta aifiyaappe geemmibeenna. <sup>18</sup> Taani eta iitatet-taanne eta nagaraa gishshaa etau naa77u kushiyaa zaarana. Aissi giikko, eti bantta ixettida eeqatun, he aha milatiyaageetun ta biittaa tunissidosonanne bantta sheneyiya misiletun ta laataa kunttidosona” yaagees.

### *Ermmaasa Woosaa*

<sup>19</sup> Abeet GODAU, ta wolqqau, ta wolqqama miixau, metuwaa gallassan taani baqata attiyo sohuwau, kawotettati sa7aa gaxaappe neekko yaana. Yiidi hagaadan yaagana; “Nu aawati pattenanne maaddenna worddo xoossatu xalaalaa laattidosona. <sup>20</sup> Woni asi bau xoossata medhdhanau danddayiyye? Danddayenna! I medhdhiyaakkokka eti tumu xoossata gidokkona!” yaagana.

<sup>21</sup> GODAI hagaadan yaagees; “Heggaa gishshau, taani eta erissana. Issiton ta wolqqaanne ta minotettaa eta erissana; yaatobare eti ta sunntai GODAA gidiiyoogaa erana” yaagees.

## 17

### *Yihudaa Nagaraanne Qixaatiyaa*

<sup>1</sup> GODAI hagaadan yaagees; “Yihudaa nagarai birata biiriyan xaafettiis; eta wozanaa bollinne eti yarshshiyooosan de7iya kaciya bolli almmaaziya giyo shuchchaa xeeran qaacettidi xaafettiis. <sup>2-3</sup> Eta naati irxxa mita ubbaa garssan, xoqqa keratu bollaanne dembba biittan de7iya deretu bollan, giigissido yarshshiyoo sohotun Asheero giyo xooseessi essido misiliyau goinnoosona. Intte biitta ubbaa bollan oottido nagaraa acuwau qanxxo oottada, intte miishshaanne intte aqotaa ubbaa taani intte morkketuyyo immana. <sup>4</sup> Taani inttena laatissido biittaaappe intte baana; taani inttena intte erenna biittan intte morkketuyyo ailleyana. Aissi giikko, intte ta hanqquwaa oiset-tideta; i merinau eexxana” yaagees.

### *Dumma Dumma Leemisota*



<sup>5</sup> GODAI hagaadan yaagees; “Asan, haiqqiya asaa wolqqan ammanettiyaageenne ba wozanan taappe wora simmiyaagee qanggettidaagaa. <sup>6</sup> He asi bazzo buura mala. Kehabai yiyo wode be7enna. I bazzon, mela sohon, asi de7enna maxine biittan de7ana.

<sup>7</sup> “GODAN ammanettiya asi, i ammanettiyoi GODAA gidiyo asi anjettidaagaa. <sup>8</sup> I haattaa lanqqiyan tokettidi, ba xaphuwaa goggiya haattau yeddida mittaa mala. Awaa suuluwaassikka i yayyenna. Aissi giikko, he mittaa haittai irxxi irxxashin de7ees. Irai bukkenna laittanka hirggenna; aifiyaa aifiyoogaakka dabarssenna.

<sup>9</sup> “Asa wozani ubbabaappe aadhdi cimmiyaabanne keehi daro iita. A ooni eranau danddayii? <sup>10</sup> Taani GODAI asau ubbau a ogiyaadaaninne a oosuwaadan zaaranau, asaa wozanaa qoraisinne a kahaa paaccas” yaagees.

<sup>11</sup> Xillenna ogiyaara duretiya asi babaa gidenna phuuphulliyaa qoxiya kuraachchee mala. I ba laittaa biron baggettishin, a aggidi xayana; wurssettan i eeyya gidana.

<sup>12</sup> Nu Beeta Maqidasee koiroppe doommidi, bonchcho kawotaa araataadan, xoqqa deriyaa huuphiyan beettes. <sup>13</sup> Abeet GODAU, Israa7eeli ufaissan naagiyoogoo, nena aggida ubbati yeellatana. Nena aggidi wora biyaageeti, nena GODAA, de7o haattaa pulttuwaa aggido gishshau, eti biittan xaafettana.

### *Ermmaasa Woosaa*

<sup>14</sup> Abeet GODAU, tana patta; taani paxana. Tana ashsha; taani attana. Aissi giikko, neeni taani galatiyoogaa.

<sup>15</sup> Asati tana, “GODAI nuna naassido naasee awan de7ii? Ane polo!” yaagoosona.

<sup>16</sup> Neeni eta bolli iitabaa kiittana mala, taani mulekka nena denttettabeikke; eti metootana gallassaa taani amottabeikke. Ta doonaappe kiyida qaala neeni eraasa.

<sup>17</sup> Tana daganttoppa. Neeni metuwaa gallassi taayyo baqata attiyo soho. <sup>18</sup> Tana yedettiyaageeta yeellaya; shin tana yeellayoppa. Eta dagantta; shin tana daganttoppa. Eta bolli meto gallassaa eha; eta naa77u kushe qixaatiyaa qaxxaya.

### *Sambbataa Bonchchiyoogaa*

<sup>19</sup> GODAI tana hagaadan yaagiis; “Ba, Yihudaa kawoti katamaa geliyoonne kiyiyo Biniyaama Penggiyaa giyo penggiyaaninne hara Yerusalaame penggetu ubban baada eqqa. <sup>20</sup> Eqqada eta hagaadan yaaga; ‘Inttenoo Yihudaa kawotoo, inttenoo Yihudaa asatoo, inttenoo Yerusalaamen de7iya asatoo, inttenoo ha penggetuura geliya asatoo, ubbaikka GODAA qaala siyite! <sup>21</sup> GODAI hagaadan yaagees; “Sambbata gallassan tooho tookkenna malanne aibanne tookkidi, Yerusalaame penggiyaara gelenna mala, intteyyo naagettite! <sup>22</sup> Sambbata gallassan intte keettaappe tooho tookkidi kessoppite, woikko aiba oosonne ootoppite. Kase intte aawata taani azazidoogaadan, Sambbata gallassaa dummayidi bonchchite. <sup>23</sup> Gidikkonne, eti siyibookkona; bantta haittaakka taakko yeggibookkona. Eti siyennaaninne taappe tamaarennan ixidosona.

<sup>24</sup> “ ‘SHin intte taani GODAI yootiyoogaa siyikko, Sambbata gallassan ai toohonne tookkidi, ha katamaa penggetuura gelennan aggikko, Sambbata gallassaa dummayidi, an ai oosonne ootennan bonchchikko, <sup>25</sup> Daawita kawotaa araatan uttiya kawoti bantta halaqatuura paratanne paraa gaareta toggidi, he penggetuura gelana. Eti Yihudaa asaaranne Yerusalaame kataman de7iya asaara gelana; ha katamai merinau asi de7iyo katama gidana.

<sup>26</sup> “ ‘ “Asai xuuggiyo yarshshuwanne hara yarshshuwaa, kattaa yarshshuwaa, ixaanaanne galataa yarshshuwaa ekkidi, Yihudaa katamatuppe, Yerusalaame yuushuwan de7iya moottatuppe, Biniyaama biittaappe, bargguwaappe, gezziyaappenne Neegeebappe GODAA Beeta Maqidasiyaa yaana.

<sup>27</sup> “ ‘ “SHin intte Sambbata gallassata dummayidi bonchchanaadaaninne Sambbata gallassatun tooho tookkidi, Yerusalaame penggetuura gelennaadan, taani yootidoogaa

siyennan ixkikko, taani he penggetun tamaa oittana. Oittin Yerusalaame kawo keettata maana. He tamai to77enna” yaagees’ yaaga” yaagiis.

## 18

### *Ermmaasi Urqqaa Medhdhiya Bitaniyaa Soo Biis*

<sup>1</sup> GODAAPPE Ermmaasassi yiida qaalai haga; <sup>2</sup> “Dendda; denddada urqqaa medhdhiya bitaniyaa soo ba. Yan taani nena ta qaalaa sissana” yaagiis. <sup>3</sup> Yaagin taani duge urqqaa medhdhiya bitaniyaa soo baada, i ba medhdhiyo irzzuwan urqqaa medhdhiyaagaa be7aas. <sup>4</sup> I medhdhishin, miishshai a kushiyan moorettiis. Moorettin i he urqqaa zaaridi munaqqidi, bana lo77iya hara miishsha kessidi medhdhiis.

<sup>5</sup> He wodiyan GODAA qaalai, hagaadan yaagiiddi, taakko yiis; <sup>6</sup> “Israa7eela asatoo, ha urqqaa medhdhiya bitanee oottiyoogaadan, taani inttena oottanau danddayikkinnaa? Israa7eela asatoo, be7ite; urqqai bana medhdhiyaagaa kushiyan de7iyooogaadan, inttekka ta kushiyan de7eeta. <sup>7</sup> Ai wode gidikkonne, taani issi biittaabaa woikko issi kawotettaabaa, ‘Taani inttena xoqollana, yooddananne xaissana’ gaada yootin, <sup>8</sup> he taani yootido kawotettai ba iitatettaappe aggidi simmikko, taani eta bolli ehaana giido iitabaa eheennan agga bayana. <sup>9</sup> Qassi ai wode gidikkonne, taani issi biittaabaa woikko issi kawotettaabaa, ‘Taani inttena keexxananne tokkana’ gaada yootin, <sup>10</sup> he kawotettai taani yootiyoogaa siyennan ixkikkonne ta sinttan iitabaa oottikko, taani oottana giido lo77obaa oottennan agga bayana.

<sup>11</sup> “Hegaa gishshau, ha77i Yihudaa asatuyyoonne Yerusalaamen de7iyaageetuyyo hagaadan yaaga; ‘GODAI yaagees; “Be7ite, taani intte bolli iitabaa medhdhaisinne halchchais. Intte ubbaikka intte iita ogiyaappe simmite; intte ogiyaanne intte oosuwa laammite” yaagees’ yaaga. <sup>12</sup> SHin eti, ‘Hegee ainne maaddenna! Nuuni nu halchchidoogaadan hanana; nuuni huuphiyan huuphiyan nu iita wozanaa muumetettaadan oottana’ yaagana” yaagiis.

<sup>13</sup> Hegaa gishshau, GODAI hagaadan yaagees; “ ‘Hagaa malabaa siyi ereetii?’ yaagidi ane kawotettatu giddon lal77ite. Geela7iyaa Israa7eela keehippe sheneyiyaabaa oottaasu. <sup>14</sup> I bau, Liibaanoosa Deriyaa bollan de7iya shachchai, zaallaa xeeraappe xayii erii? He deriyaappe goggiya irxxa haattai meli erii? <sup>15</sup> SHin ta asati tana dogiichchidosona; eti pattenna xoossatussi ixaanaa cuwayoosona. Bantta ogiyaappe, bantta beni loossuwaappe xubettidosona; eti ogiyaa aggidi, gaxaara biidosona. <sup>16</sup> Eti bantta biittaa daganttiyaabaanne merinau karettidabaa kessidosona. Yaara aadhdhiya ooninne sheneteesinne ba huuphiyaa qaattees. <sup>17</sup> Arshsho bagga carkkuwaadan, taani eta eta morkketu sinttan laalana. Eta metuwa gallassi taani etayyo zokkuwaa zaaranaappe attin, ta som77uwaa zaarikke” yaagees.

### *Ermmaasa Bolli Maqettido Maquwaa*

<sup>18</sup> Asati hagaadan yaagidosona; “Haa yiite; ane Ermmaasa bolli maqettoos. Aissi giikko, qeeseti tamarissiyo higgee, aadhdhida eranchchati immiyo zoree, hananabaa yootiyaageeti yootiyo qaalai xayenna. Haa yiite; ane a mootoos. I yootiyo qaalaa siyennan aggoos” yaagidosona.

<sup>19</sup> Abeet GODAU, ta yootiyoogaa siya; ta morkketi ta bolli haasayiyoogaa ezgga. <sup>20</sup> Lo77o oottida asau iitaa zaariyo? SHin eti taayyo ollaa bookkoosona. Taani ne hanqqoi etappe simmana mala, eta gishshaa lo77obaa haasayanau ne sinttan eqqidoogaa qoppa. <sup>21</sup> Hegaa gishshau, eta naata koshau aattada imma; etakka bisuwau aattada imma. Eta maccaasatikka na7i bainnaageetanne am77e gidona. Eta attumaasatikka woriya harggiyan gaittona; eta wodallatikka olan siifettona. <sup>22</sup> Eti qoppennan neeni eta bolli bonqqiyaageeta yeddin, eta keettan waasoi kiyo. Aissi giikko, eti tana ongganau ollaa bookkidosona; ta tohuwaassikka piriya wottidosona. <sup>23</sup> SHin abeet GODAU, eti

tana woranau maqettidoogaa ubbaa neeni eraasa. Neeeni eta iitatettaa atto gooppa, woikko eta nagaraa ne sinttappe quccoppa. Eti ne sinttan xoonettidi kunddona. Ne hanqquwaa wode neeni eta hagaadan ootta.

## 19

### *Meqqida Gombbuwaa Leemisuwaa*

<sup>1</sup> GODAI hagaadan yaagees; “Ba; baada urqqaa medhdhiyaagaappe gombbo shamma. SHammada nenaara amarida dere cimatanne amarida qeese cimata ekkada, <sup>2</sup> Kon77a Me7o Penggiyaa giyo penggiyaa lanqqiyaara aadhdhada, Hinnooma Zanggaaraa ba; yan taani neeyyo yootiyo qaalaa awaajja. <sup>3</sup> Hagaadan yaaga; ‘Inttenoo Yihudaa kawotoo, inttenoo Yerusalaame katamaa asatoo, GODAA qaalaa siyite! Ubbaappe Wolqqaama GODAI, Israa7eela Xoossai hagaadan yaagees; “Be7ite, siyiya ubbau haittau iitiya palabaa ha biittaa bolli taani ehaana. <sup>4</sup> Aissi giikko, asati tana aggidosona; eti woikko eta aawati, woikko Yihudaa kawoti erenna hara xoossatuzzi xuuggiyo yarshshuwaa yarshshiyooogan ha sohuwaa tunissidosona. Eti xillo asatu suuttaa ha sohuwan kunttidosona. <sup>5</sup> Qassi taani eta azazabeennabaa, woikko yootabeennabaa, woikko ta wozanan qoppabeennabaa oottidosona; eti bantta attuma naata Ba7aalayyo taman xuuggiyo yarshsho oottidi yarshshanau, goinniyo xoqqa sohotun yarshshiyooosaa gimbbidosona. <sup>6</sup> Hega gishshau, ha sohoi Toofeeta woikko Hinnooma Zanggaaraa geetettiyoogee attidi, SHuha Zanggaaraa yaagettidi xeegettana gallassati yoosona.

<sup>7</sup> “‘Yihudaanne Yerusalaame asaa halchchuwaa taani ha sohuwan halissana. Eti bantta morkketu bisuwaaninne banttana woranau koyiyaageetu kushiyan haiqqanaadan taani oottana. Eta ahaa saluwaa kafotuyyoonne sa7aa do7atuyyo quma oottada immana. <sup>8</sup> Taani ha katamaa baisanne qilliicciyoobaa kessana. Hegaara aadhdhiya ubbai a bashshan garamettidi, ‘Poora!’ yaagana. <sup>9</sup> Eti bantta macca naatunne attuma naatu ashuwaa maanaadan taani oottana. Eta woranau koyiya morkketi eta waissiyoo waayiyaaninne dooddiyo doodan, eti ubbai issoi issuwaa ashuwaa maana” yaagees’ yaaga.

<sup>10</sup> “Hegaappe guyyiyan, nenaara issippe biida asatu sinttan he gombbuwaa mentta. <sup>11</sup> Menttada eta hagaadan yaaga; ‘Ubbaappe Wolqqaama GODAI hagaadan yaagees; “Zaaridi koolin oiqqennaadan oottidi, issi asi gombbuwaa menttiyoogaadan, taani ha kawotettaanne ha katamaa mentterettana. Asati ahaa moogiyo sohoi baina gishshau, Toofetan moogana. <sup>12</sup> Taani GODAI ha sohuwaanne an de7iya asaa oottanaagee hгаа; taani GODAI ha katamaa Toofetadan oottana. <sup>13</sup> Yerusalaame asaa keettatinne Yihudaa kawotu keettati, keettaa bollan dembbayidi oottidosan saluwaa xoolinttetuzzi ixaanaa cuwayidonne hara xoossatuzzi ushshaa yarshshuwaa gussido keettati ubbai Toofeeta giyo sohuwaadan tunidaageeta gidana” yaagees’ yaaga” yaagees.

<sup>14</sup> Hegaappe guyyiyan, Ermmaasi GODAI hananabaa yootanau kiittido Toofetappe simmidi yiidi, GODAA Beeta Maqidasiyaa gidдон de7iya dabaaban eqqiis. Eqqidi asa ubbau hagaadan yaagiis; <sup>15</sup> “Ubbaappe Wolqqaama GODAI, Israa7eela Xoossai hagaadan yaagees; ‘Siyite, taani ha katamaa bollinne a heeran de7iya moottatu ubbaa bolli ehaana giido itabaa ubbaa eta bolli ehaana hanais. Aissi giikko, eti morgge zozza gididi, taani yootidobaa siyennan ixxidosona’ yaagees” yaagiis.

## 20

### *Ermmaasanne Paashihuura*

<sup>1</sup> He wode GODAA Beeta Maqidasiyan halaqa gidiya, Imeera na7aa Paashihuura giyo qeese, Ermmaasi ha yohoti hananabaa yootishin siyiis. <sup>2</sup> Siyidi Paashihuuri hananabaa yootiya Ermmaasa deshissiis; deshissidi Qommo Biniyaama Penggiyaa

giyo GODAA Beeta Maqidasiyaa geliyoosan de7iya gonggiyaa luhuwan qashissii. <sup>3</sup> Wonttetta gallassi Paashihuuri Ermmaasa qashuwaappe birshshin, Ermmaasi ayyo hagaadan yaagiis; “Hachchippe doommin, GODAI ne sunntaa Paashihuura yaagenna; i ne sunntaa Yan Han Dagama yaagana. <sup>4</sup> Aissi giikko, GODAI hagaadan yaagees; ‘Taani nena ne huuphiyaayyoonne ne laggetu ubbaayyo dagama kessana. Eti neeni xeellishin, bantta morkketu bisuwan wurana. Taani Yihudaa asaa ubbaa Baabiloone kawuwaa kushiyan aattada immana. I eta omooddidi, Baabiloone efaana; efidi yan bisuwan eta worana. <sup>5</sup> Hegaadankka, ha katamaa aquwaa peeshshaa ubbaa, ootti kessidobaa ubbaa, duretettaa ubbaanne Yihudaa kawotu miishshaa ubbaa taani eta morkketussi aattada immana. Immin eti eta bonqqi oiqqidi, Baabiloone efaana. <sup>6</sup> Qassi neeni Paashihuurikka ne son de7iya asai ubbai omoodettidi, Baabiloone baana. Neeni wordduwaa hananabaa yootido ne laggetu ubbaarakka yan haiqqananne yan moogettana’ yaagees” yaagiis.

### *Ermmaasi GODAASSI Maganniis*

<sup>7</sup> Abeet GODAU, neeni tana cimmasada; taanikka cimettaas. Neeni taappe minnada, tana xoonadasa. Gallassa kumettaa taani asi miicciyoobaa kiyaas; ubbai tana qilliecces. <sup>8</sup> Taani haasayiyo wodiyan ubban xoqqissada, “Makkalabainne bashshai gakkiiis” yaagada waassais. GODAA qalalai taayyo gallassa kumettan karenne qilliecces. <sup>9</sup> Taani, “Taani GODAABAA denttada haasayikke” woikko, “A sunntan naa77antto yootikke” giikko, GODAA qalalai ta meqettaa gidдон qum77ettidi, eexxiya tama mala gididi, ta wozanan michchees. Taani gidдон oiqqada ashshana gaada daafuraas; shin teqqanau danddayabeikke. <sup>10</sup> Taani daro saasukettaa siyais; “Yan han dagamai de7ees! Ane a mootite! Nuunikka a mootoos” yaagoosona. Taayyo mata laggeti ubbai ta kunddettaa naagidi, “Ooni erii, nuuni a oiqqana malanne nu haluwaa kessana mala, i cimettanau danddayees” yaagoosona.

<sup>11</sup> SHIN GODAI yashissiya toora qaraadan tanaara de7ees. Hegaa gishshau, tana yedettiyaageeti xubettana; eti tana xoonokkona. Etau giigenna gishshau, eti gita yeellaa yeellatana. Eta kaushshai mulekka dogettenna. <sup>12</sup> Abeet Ubbaappe Wolqqaama GODAU, xillota paacciyaagoo, wozanaa kahaa be7iyaagoo, neeni ta morkketu bollan ta haluwaa kessada tana bessa. Aissi giikko, taani ta mootuwaa neeyyo aattaas.

<sup>13</sup> GODAAYYO yexxite! GODAA galatite! Aissi giikko, i hiyyeesata iitatu kushiyaappe ashshees.

<sup>14</sup> Taani yelettido gallassai qanggettidaagaa gido! Ta aayyiyaa tana yelido gallassai anjjettoppo! <sup>15</sup> Ta aawaayyo, “Neeyyo mishiraachcho; neeyyo attuma na7ai yelettiis!” yaagi yootidi, daro ufaissida bitaneeekka qanggettidaagaa gido! <sup>16</sup> He bitanee GODAI qarettennan aatti yeggidi xaissido katamatudan hano. He bitanee maallado waasuwwaa, gallassa seetan, “Olai gakkiiis!” giyo oduwaa siyo. <sup>17</sup> Aissi giikko, ta aayyiyaa taayyo duufo gidana malanne i uloikka tana merinau oiqqi uttana mala, tana uluwan woribeenna. <sup>18</sup> Taani metonne azzano be7anaunne laittaa ubbaa yeellataidda wurssanau, aissi ta aayee uluwaappe kiyidanaashsha?

## 21

### *Yerusalaamee Xoonettanaagaa Hiraagai Odettiis*

<sup>1-2</sup> Kawoi Sedeqiyaasi Malkkiyaa na7aa Paashihuuranne Ma7iseeya na7aa qeesiyaa Xafaaniyaa ha oishaa oichchana mala, Ermmaasakko kiittiis. Eti, “Baabiloone Kawoi Naabukadanaxoori ba olanchchatuura ha katamaa yuuyi aadhdhidi dooddido gishshau, ane nuussi GODAA oichcha. Ooni erii, GODAI beniigaadan, maalaalissiya oosuwaa nu gishshau oottidi, a guyye zaaranaakkonne” yaagidosona.

GODAAPPE Ermmaasassi yiida qalalai haggaa. <sup>3</sup> Ermmaasi etayyo zaaridi, hagaadan yaagiis; “Biidi Sedeqiyaasassi yaagite; <sup>4</sup> GODAI Israa7eela Xoossai hagaadan yaagees;



“Neeni Baabiloone kawuwaaranne gimbbiyaappe kareera ne katamaa dooddiya a olanchchatuura olettiyo, ne kushiyan de7iya ola miishshaa taani guyye zaarana. Qassi eta ubbaakka ha katamau giddo gelissana. <sup>5</sup> Taani ta huuphen yeddido kushiyan, wolqqaama qesiyan, yiilluwan, hanqquwaaninne gita teegan nena olana. <sup>6</sup> Taani ha kataman de7iyaageeta, asaakka mehiyaakka shocana. Eti iita boshan wurana. <sup>7</sup> Hegaappe guyyiyan, Yihudaa Kawuwaa Sedeqiyaasa, a oosanchchatanne boshappe, bisuwaappenne koshaappe palahida, ha katamaa asaa ubbaa, Baabiloone Kawuwaa Naabukadanaxoorayyoonne eta woranau koyiya morkketuyyo taani GODAI aattada immana. I eta qara bisuwan siifana. I etau qarettenna, woikko saalidi aggenna, woikko maarenna” yaagees’ yaagite” yaagiis.

<sup>8</sup> GODAI Ermmaasa, “Gujjadakka asaayyo hagaadan yaagada yoota; ‘GODAI hagaadan yaagees; “Be7ite, taani intte sinttan de7uwaa ogiyaanne haiquwaa ogiyaa wottaas. <sup>9</sup> Ha katamaa giddon takkiya asi ooninne bisuwan, koshan woikko boshan haiqqana. SHin katamaappe kiyidi biidi, katamaa dooddidi oiqqida Baabiloonetussi ba kushiyaasi immiya asi ooninne paxa attana; he urai ba shemppo xalaalaa ashshana. <sup>10</sup> Aissi giikko, taani ha katamaassi kehanau gidennan iitanau ta qofaa qachchaas. Taani Baabiloone kawuwaassi a aattada immana; ikka ha katamaa taman xuuggana. Taani GODAI haggaa odaas” yaagees’ yaaga.

<sup>11</sup> “Qassikka Yihudaa kawuwaa keettaa asaayyo hagaadan yaaga; ‘GODAA qaalaa siyite! <sup>12</sup> Inttenoo, Daawita zaretoo, GODAI inttena hagaadan yaagees; “Wonttin wonttin suure pirddite; bonqqettidaageeta huqqunniyaageetu kushiyaappe ashshite. Hinna xayikko, intte iita oosuwaagaasuwana ta hanqqoi tamadan eexxi kiyana; ooninne a toissenna” yaagees’ yaaga” yaagiis.

<sup>13</sup> GODAI hagaadan yaagees; “Nenoo, Yerusalaamee, neeni dembban de7iya zaal-ladan, dilbbaappe pude xoqqu gaada beettaasa; shin taani nenaara olettana. Neeni, ‘Ooninne ta bolli xalenna woikko ta de7iyoosaa gelenna’ yaagaasa; <sup>14</sup> shin taani GODAI nena ne oosuwaadan qaxxayana. Taani ne kawo keettan tamaa oittana; oittin ne yuushuwan de7iyaabaa ubbaa mi xaissana” yaagees.

## 22

### *Ermmaasi Yihudaa Kawuwaa So Asaayyo Yootido Qaalaa*

<sup>1</sup> GODAI hagaadan yaagees; “Ba; duge Yihudaa kawuwaa soo baada, yan haggaa qaalaa oda. <sup>2</sup> ‘Nenoo Yihudaa kawuwau, Daawita kawotaa araatan uttiyaagoo, neenikka ne ashkkaarattikka ha penggiyaara geliya ne asai ubbaikka GODAA qaalaa siyite! <sup>3</sup> GODAI hagaadan yaagees; “Suure pirddaanne xillobaa oottite. Bonqqettidaageeta huqqunniyaageetu kushiyaappe ashshite. Betetu bolli, aawai banna naatu bollinne azinati haiqqido maccaasatu bolli genebaa woikko makkalabaa oottoppote. Qassi xillo asa suutta ha sohuwan gussoppite. <sup>4</sup> Intte taani giidoogaadan tumu azazettikko, Daawita kawotaa araatan uttiya kawoti paraanne para gaariyaa toggidi, bantta oosanchchatuuranne bantta asaara ha kawo keettaa penggetuura gelana. <sup>5</sup> SHin intte azazettennan ixkikko, ‘Ha kawo keettaa ona gidana’ yaagada taani GODAI ta huuphiyan caaqqais” yaagees’ yaaga” yaagees.

<sup>6</sup> GODAI Yihudaa kawuwaa keettaabaa hagaadan yaagees; “Neeni taayyo Gala7aade biittaanne Liibaanoosa Deriyaa xeeraa mala gidikkokka, taani nena bazzonne asi de7enna katama oottana. <sup>7</sup> Taani nena qoliyaageeta huuphiyan huuphiyan ola miishshaa oittada, neeyyo kiittana. Eti zigaappe masettida ne tuuqeta qanxxerettidi, taman olana.

<sup>8</sup> “Cora kawotettaappe asai he katamaa lanqqiyaara aadhdhana. Aadhdhiiddi, issai issuwaa, ‘GODAI aissi ha gita katamaa hagaadan oottidee?’ yaagidi oichchana.



<sup>9</sup> Oichchin eti, ‘Eti GODAA bantta Xoossaara maacettido maachchaa aggido gishshaas-sanne hara xoosatussi goinnidonne oottido gishshaassa’ yaagana” yaagees.

### *Ermmaasi SHaaluumabaa Yootido Qaalaa*

<sup>10</sup> Haiqqida Kawuwaa Yoosiyaasayyo yeekkoppite woikko kayyottoppite. Hegaa aggidi, omoodettidi biida SHaaluumayyo seelettidi yeekkite. Aissi giikko, i mulekka guyye simmenna; ba yelettido biittaa naa77antto be7enna.

<sup>11</sup> Ba aawaa gishshaa Yihudan kawotidi de7iiddi, ha sohuwaappe biida Yoosiyaasa na7aa SHaaluumabaa GODAI hagaadan yaagees; “I mulekka guyye simmenna. <sup>12</sup> I omoodettidi biido biittan haiqqana. Mulekka ha biittaa be7enna” yaagees.

### *Ermmaasi Yo7aqeemabaa Yootido Qaalaa*

<sup>13</sup> Ba keettaa sugettan keexxiyaagaayyo, xillo gidenna ogiyan pooqiya bolli pooqiya gujjiyaagaayyo, ba dere asaayyo ainne immennaanne kera qanxxennan ootissiyaa-gaayyo, ayyo aayyee! <sup>14</sup> I, “Taani taayyo aaho pooqiyaara de7iya gita keettaa keexxana” yaagees. Yaagidi ba keettau gita maskkooteta kessees; kessidi zigaa masettan bollaa kammidi, zo7o qalamiyaa tiyees.

<sup>15</sup> Bau neeni daro zigan keexxidoogee nena lo77o kawo kessees gaada qoppadii? Ne aawaa Yoosiyaasassi miyoobinne uyiyoobi xayidee? I suure pirdaanne xillobaa oottiis. Hegaa gishshau, au ubbabaikka injjetiis. <sup>16</sup> I hiyyeesatuuyoonne metootanchchatuyyo suure pirddiyo gishshau, au ubbabaikka haniis. GODAA erees yaagiyoojee haggaa. <sup>17</sup> SHin harabaa aggidi, ne aifeenne ne wozanai jaamiyoojee ne go77aa demmanaassanne xillo suutta gussanaassa, asa suganaassanne huqqunanaassa.

<sup>18</sup> Hegaa gishshau, GODAI Yoosiyaasa na7aa, Yihudaa Kawuwaa Yo7aqeemabaa hagaadan yaagees; “I haiqqiyo wode eti ayyo, ‘Aayyee! Aayyee! Ta ishau!’ yaagidi yeekkokkona. Qassi, ‘Ta godau, aayyee! Ta kawuwau, aayyee!’ yaagidi zilaalokkona. <sup>19</sup> A moogoikka hariyaa mooguwaa mala gidana. A ahai gooshettidi, Yerusalaame penggetuppe ya baggan olettana” yaagees.

### *Yerusalaame Gakkiya Metuwaabaa Ermmaasi Yootido Qaalaa*

<sup>20</sup> GODAI Yerusalaamebaa hagaadan yaagees; “Ba; pude Liibaanoosa baada, yan waassa. Baasaane biittan waasuwa xulluusa. Abaarima Deriyanka waassa. Aissi giikko, olau nenaara zuppetiyaageeti ubbai xoonettidosona. <sup>21</sup> Neeni saro de7ishin, taani neessi yootaas; shin neeni, ‘Taani siyikke’ yaagadasa. Ne yelagatettaasappe doommidikka ne hanoi haggaa; neeni taayyo azazettennan ixxada. <sup>22</sup> Ne henttanchchata ubbaa carkkoi efaana; olau nenaara zuppetiyaageetikka omoodettidi baana. He wode ne iitatettaa ubbaa gishshau, yeellatananne kauyyana. <sup>23</sup> Inttenoo, Liibaanoosa zigan keexettida keettan de7iyaageetoo, maaretai oiqqido maccaaseegaa mala un77oi intte bolli puttu giyaakko, waani oolanddetiishsha!” yaagees.

<sup>24</sup> GODAI hagaadan yaagees; “Ta de7oi ero! Neeni Yo7aqeema na7ai, Yihudaa Kawoi Yo7aakiini, ta ushachcha kushiyan de7iya ta attamiyo migido gidiyaakkonne ta nena kessa yeggana. <sup>25</sup> Nena woranau koyiyaageetuyyo, neeni yayyiyo Baabiloone Kawuwaa Naabukadanaxoorayyoonne a olanchchatuyyo taani nena aattada immana. <sup>26</sup> Taani nenakka nena yelida ne aayyiyookka intte yeleta biitta gidenna hara biittau olana; olin intte naa77aikka yan haiqqana. <sup>27</sup> Intte simmanau laamotiyo biittaa mulekka simmekketa” yaagees.

<sup>28</sup> Bau ha bitanee Yo7aakiini, karidonne meqqida gombboo? I ooninne koyenna miishshee? Aissi inne a naati yedetettidi, bantta erenna biittan olettidi attidonaa? <sup>29</sup> Bii biittee, biittee, biittee! GODAA qaalaa siya! <sup>30</sup> GODAI hagaadan yaagees; “Ha bitaniyaa, ‘Na7i bainna asa, ba laitta ubban de7oi injjetenna asa’ gaada xaafa. Aissi giikko,

a zerettaappe issuwaassinne injjetenna; Daawita kawotaa araatan uttiyai woikko Yihudan kawotiyai etappe issoinne de7enna” yaagees.

## 23

### *GODAI Ba Huuphen Oottana Giidobata*

<sup>1</sup> GODAI hagaadan yaagees; “Ta hentta gaden de7iya dorssata bashshiyaanne laaliya henttanchchatau aayye7ana!” yaagees.

<sup>2</sup> GODAI Israa7eela Xoossai ba asaa heemmiya henttanchchatubaa hagaadan yaagees; “Intte ta dorssata laalidi, wora yedettideta. Intte eta xomoosibeenna gishshau, taani intte oottido iitatettau ubbau inttena qixaatiyaara xomoosana. <sup>3</sup> Hegaappe guyyiyan, ta wudiyaappe attidaageeta kase laalido biitta ubbaappe taani ta huuphen shiishshana. SHiishshada eta guyye eta hentta gade zaarana. Etikka hagan yelettidi corattana. <sup>4</sup> Taani eta loitti heemmiya henttanchchata etau wottana. Eti naa77antto yayyokkonanne dagammokkona; etappe issoinne bayenna. Taani GODAI hagaadaas” yaagees.

<sup>5</sup> GODAI hagaadan yaagees; “Taani Daawitassi xillo aacaa denttana gallassati yaana. I kawodan kawotananne aadhdhida erattetan haarana; biittan i suurebaanne xillobaa oottana. <sup>6</sup> I kawotiyo laittan taani Yihudaa ashshana; Israa7eelakka saro wottana. I xeeseetana sunntai GODAA, nu Xillotettaa geetettana” yaagees.

<sup>7-8</sup> Hegaa gishshau, GODAI hagaadan yaagees; “Asai, ‘Israa7eela asaa Gibxxe biittaappe kessidi ehiida GODAI ero’ yaagidi caaqqiyoogaa aggidi, ‘Israa7eela zerettaa huuphessa bagga biittaappenne i laalido biittatu ubbaappe ehiida GODAI ero’ yaagidi caaqqana gallassati yaana. Hegaappe sinttan eti bantta buzo biittan de7ana” yaagees.

### *Worddo Hananabaa Yootiyaageetubaa*

<sup>9</sup> Hananabaa yootiyaageetubaa taani qoppiyo wode, ta wozanai taahees; ta meqettati ubbaikka kokkoroosona. GODAA gishshaunne a geeshsha qaalaa gishshau, taani mattottida asa mala, woiniyaa eessai wolqqa diggido asa mala gidaas. <sup>10</sup> Aissi giikko, biittai shaaramuxatun kumiis. Qanggettaa gishshau, biittai yeekkes; bazzo hentta gadetikka melidosona. Hananabaa yootiyaageeti iita ogiyaa hemettoosona; bantta wolqqaakka likke gidennasan go7ettoosona.

<sup>11</sup> GODAI, “Hananabaa yootiyaageenne qeeseenne naa77aikka tunidosona; harai attin, ta Beeta Maqidasiyankka eta iitatettaa taani demmaas” yaagees.

<sup>12</sup> Qassikka GODAI, “Hegaa gishshau, eta ogee hallixxana; eti xumau laagettidi, an kunddana. Eti qaxxayettiyo laitti taani eta bollan iitabaa ehaana” yaagees.

<sup>13</sup> Qassikka i hagaadan yaagees; “Samaariyan de7iya hananabaa yootiyaageetu gid-don sheneyiyaabaa be7aas. Eti Ba7aala sunntan hananabaa yootoosonanne ta asaa Israa7eela wora kaalettoosona. <sup>14</sup> Qassi Yerusalaamen de7iya hananabaa yootiyaageetu gid-donkka daganttiyaabaa be7aas. Eti shaaramuxoosonanne worddotiiddi hemettoosona. Ooninne ba iita oosuwaappe simmennaadan, eti iitaa oottiyaageeta gede minttettoosona. Eti ubbaikka taayyo Sadooma mala; Yerusalaame asaikka Gamooraa mala” yaagees.

<sup>15</sup> Hegaa gishshau, Ubbaappe Wolqqaama GODAI hananabaa yootiyaageetubaa hagaadan yaagees; “Yerusalaamen de7iya hananabaa yootiyaageetuppe tunabai kiyidi, biitta ubban laalettido gishshau, taani eta cammiya qumaa mizana; taani eta woriya haattaa ushshana” yaagees.

<sup>16</sup> Ubbaappe Wolqqaama GODAI hagaadan yaagees; “Hananabaa yootiyaageeti yootiyoobaa siyoppite. Eti hanannabaa, ‘Hanana’ giidi, wordduwaa odoosona. GODAI ba doonaappe yootin gidennan, eti banttappe qoppi ekkidi, ajjuutaa yootoosona.

<sup>17</sup> Tana kariyaageeta eti, ‘GODAI, “Intte saro de7ana” yaagees’ yaagoosona. Qassi bantta

wozanaa muumetettaa kaalettiyaageeta ubbaa eti, ‘Intte bolli aiba iitabinne yeenna’ yaagoosona” yaagees.

<sup>18</sup> SHin be7anau woikko a qaalaa siyanau GODAI zoriyoosan etappe ooninne eqqibeenna. A qaalaa ezggidai woikko siyidai ooninne baawa. <sup>19</sup> GODAA gotee, aatti yeggiya gaga hanqqoi hageeho kiyiis! I iita asatu huuphiyan eqqana. <sup>20</sup> A wozanaa qofaa oottidi polennan de7iiddi, GODAA hanqqoi simmenna. Wurssetta gallassatun haggaa intte akeekana.

<sup>21</sup> GODAI hagaadan yaagees; “Taani hananabaa yootiyaageeta kiittabeikke; shin eti woxxoosona. Taani etau odabeikke; shin eti hananabaa yootoosona. <sup>22</sup> Eti taani zoriyoosan eqqidabaa gidinyaakko, ta qaalaa ta asaassi yootana shin! Eti eta iita ogiyaappenne eta iita oosuwaappe zaarana shin!” yaagees.

<sup>23</sup> Qassikka GODAI, “Taani mata xalaalan Xoosee? Haahosan Xoossaa gidikkaana? <sup>24</sup> Taani be7ennaadan, geema sohon bana qottanau asi danddayii? Saluwaaninne sa7an kumidaagee tana GODAA gidikkaana?” yaagees.

<sup>25</sup> GODAI hagaadan yaagees; “Ta sunttan wordduwaa hananabaa yootiyaageeti giyoobaa siyaas. Eti, ‘Taani aimottaas; taani aimottaas!’ yaagoosona. <sup>26</sup> Ha hananabaa yootiyaageeti bantta qoppi ekkido wordduwan aude gakkanaassi ta asaa cimmanee? <sup>27</sup> Eta aawati Ba7aala giyo eeqaa gaasuwan ta sunttaa dogidoogaadan, eti issoi issuwaassi yootiyo aimuwan ta asai ta sunttaa doganaadan oottanau qoppoosona. <sup>28</sup> Aimuwaa aimottida hananabaa yootiyaagee ba aimuwaa yooto. SHin ta qaalaa siyidaagee he qaalaa ashshennan aattennan yooto. Dalainne gisttee awan gaittii? <sup>29</sup> Ta qaalai tama mala gidennee? Zaallaa mentterettiya madooshaa mala gidennee?” yaagees.

<sup>30</sup> GODAI hagaadan yaagees; “Hegaa gishshau, taani ta qaalaa issoi issuwaappe wuuqqiya hananabaa yootiyaageetu bolli de7ais. <sup>31</sup> Hegaadankka, bantta inxxarssan haasayiiddi, ‘GODAI yaagees’ yaagiya hananabaa yootiyaageetu bolli de7ais. <sup>32</sup> Taani GODAI haggaa odais! Wordduwaa aimottidi, hananabaa yootiyaageetu bolli taani de7ais. Eti he aimuwaa yootidi, bantta wordduwaaninne bantta ceequwan ta asaa wora kaalettoosona. Taani eta kiittabeikke woikko, ‘Yootite’ gabeikke. Eti ha asaa ainne maaddokkona. Taani GODAI haggaa odaas” yaagees.

### *GODAA Toohuwaa*

<sup>33</sup> GODAI tana hagaadan yaagiis; “Ermmaasaa, ha asaappe issoi, woikko hananabaa yootiyaagee, woikko qeese, ‘GODAA tohoi aibee?’ giidi oichchikko, neeni eta, ‘“GODAA tohoi inttena; heggaa gishshau, ta bollappe taani inttena wottana” yaagees’ yaaga. <sup>34</sup> Hananabaa yootiyaagee, woikko qeese, woikko asaappe issoi, ‘Hagee GODAA toohuwaa’ yaagidi haasayikko, taani he bitaniyaanne a so asaa qaxxayana. <sup>35</sup> Heggaa aggidi asai, ‘GODAI woigidee?’ woikko, ‘GODAI yootidobai aibee?’ yaagidi ba laggetanne ba dabbota oichchanau bessees. <sup>36</sup> Heggaa gishshau, ooninne, ‘GODAA toohuwaa’ yaagidi naa77antto haasayanau bessenna. Aissi giikko, aawu doonaappe kiyiya qaalai aawussi toho gidees. Hegan de7o Xoossaa, Ubbaappe Wolqqaama GODAA, nu Xoossaa qaalaa intte mirqqeeta.

<sup>37</sup> “Neenikka hananabaa yootiyaageeta, ‘GODAI inttena woigidee?’ woikko, ‘Ai yootidee?’ yaagada oichchanau bessees. <sup>38</sup> SHin intte, ‘Hagee GODAA toohuwaa’ giikko, GODAI hagaadan yaagees; ‘Taani inttena, “‘Hagee GODAA toohuwaa’ gooppite’ yaaginkka intte, “Hagee GODAA toohuwaa” giideta. <sup>39</sup> Heggaa gishshau, tumuppe taani inttena dogana; inttenanne inttessinne intte aawaassi immido katamaa ta sinttappe wora olana. <sup>40</sup> Taani intte bolli merinaa kaushshaanne merinau dogettenna yeellaa ehaana’ yaagees” yaagiis.

## 24

### *Balasiyaa Teeraa Qoliyo Naa77u Keeshetu Leemisuwaa*

<sup>1</sup> Yo7aqeema na7aa, Yihudaa Kawuwaa Yo7aakiina<sup>2</sup> Yihudaa halaqatuura, kushe oosuwaa hiillatuuranne birataa qoxxiyaageetuura Yerusalaameppe Baabiloone Kawoi Naabukadanaxoori omooddidi, Baabiloone efi simmin, GODAI tana ajjuutaa bessiis; bessin taani GODAA Beeta Maqidasiyaayyo sintta baggaara balasiyaa teeraa qoliyo naa77u keesheta be7aas. <sup>2</sup> Issi keeshiyan koiro teeridabaa milatiya daro lo77o balasiyaa teerai de7ees. Naa77antto keeshiyan qassi maanau giigenna daroppe iita balasiyaa teerai de7ees. <sup>3</sup> GODAI tana, “Ermmaasaa, hegee neeni be7iyoogee aibee?” yaagidi oichchiis.

Oichchin taani, “Balasiyaa teeraa be7ais. Lo77o teerai keehippe lo77o; iita teerai qassi maanau giigenna keehippe iita” yaagada odaas.

<sup>4</sup> Hegaappe guyyiyan, GODAA qalalai taakko yiis; <sup>5</sup> “GODAI Israa7eela Xoossai ha-gaadan yaagees; ‘Taani Yihudaa biittaappe omooduwan Baabiloone biittaa yeddido asata, ha lo77o balasiyaa teeraadan lo77o gaana. <sup>6</sup> Taani keha aifiyan eta xeellana; qassi taani eta zaarada ha biitti ehaana. Taani eta keexxanaappe attin qolikke. Taani eta tokkanaappe attin shoddikke. <sup>7</sup> Taani GODAA gidiyoogaa eti eranaadan, taani etau wozanaa immana. Eti bantta kumetta wozanaappe taakko simmanau de7iyo gishshau, eti ta asa gidana; taanikka eta Xoossaa gidana’ yaagees.

<sup>8</sup> “Qassi GODAI hagaadan yaagees; ‘Yihudaa Kawuwaa Sedeqiyaasa, a halaqata, ha biittan attida Yerusalaame asaa atettatanne Gibxxe biittan de7iyaageeta, maanau giigenna he keehippe iita balasiyaa teeraadan iita gaana. <sup>9</sup> Laalada yeddiyo bi-itta ubban taani eta ha sa7aa kawotettatu ubbau daganttiyaabaanne cayiyoobaa, boriyoobaanne leemisiyoobaa, qilliicciyoobaanne qanggiyoobaa oottana. <sup>10</sup> Taani etayyoonne eta maizza aawatuyyo immido biittaappe eti muleera xayana gakkanau, bisuwaa, koshaanne boshaa eta bolli yeddana’ yaagees” yaagiis.

## 25

### *Laappun Tammu Laitta Omooduwaa Hiraagaa*

<sup>1</sup> Yoosiyaasa na7ai, Yihudaa Kawoi Yo7aqeemi kawotido oiddantto laittan, Baabiloone Kawoi Naabukadanaxoori kawotido koiro laittan, Yihudaa asaa ubbaa xeel-liyaaban Ermmaasakko yiida qalalai haggaa. <sup>2</sup> Hananabaa yootiya Ermmaasi Yihudaa asaa ubbaayyoonne Yerusalaamen de7iya ubbatuyyo hagaadan yaagiis; <sup>3</sup> “Amoxa na7ai, Yihudaa Kawoi Yoosiyaasi kawotido tammanne heezzantto laittaappe doom-midi, hachchi gakkanaassi, laatamanne heezzu laittaa GODAA qalalai taakko yiis. Yin taanikka zaara zaarada intteyyo yootaas; shin intte siyennan ixxideta.

<sup>4</sup> “GODAI ba ashkharata, hananabaa yootiyaageeta ubbaa zaari zaaridikka intteyyo kiittiis; shin intte haizzidi siyennan ixxideta. <sup>5</sup> Eti hagaadan yaagidosona; ‘Intte ubbaikka intte iita ogiyaappenne intte iita oosuwaappe ha77i simmite. Simmikko, GODAI intteyyoonne intte maizza aawatuyyo meri merinaassi immido biittan intte de7ana. <sup>6</sup> Hara xoossatussi oottanaunne goinnanau kaalloppite. Qassi intte kushee oottidoban GODAA yiilloyoppite. Yaanikko GODAI inttena qohenna’ yaagidosona.

<sup>7</sup> “GODAI hagaadan yaagees; ‘Intte taani yootiyoogaa siyanaagaa aggidi, intte kushee oottidoban tana yiilloyideta; yaatidi inttena qohiyaabaa intte huuphiyan ehiideta’ yaagees.

<sup>8</sup> “Hegaa gishshau, Ubbaappe Wolqqaama GODAI hagaadan yaagees; ‘Intte ta qaalau azazettennan ixxido gishshau, <sup>9</sup> taani huuphessa bagga asaa ubbaanne ta ashkharaa, Baabiloone Kawuwaa Naabukadanaxoori xeezana. Xeezada eta ha biittaa bolli, ha biittan de7iya asaa bollinne haggaa heeran de7iya kawotettatu ubbaa bolli ehaana. Taani

<sup>2</sup> 24:1 Yo7aakiina: Ibraisxxe qalaan Yekoneyah geetettees.



ha biittata muleera xaissana; qassi be7idai dagammiyoobaa, “Pooa!” giyoobaanne merinau baisa oottana. Taani GODAI haggaa odaas. <sup>10</sup> Taani etappe ililssaanne ufais-saa cenggurssaa, bullachchiyaagaanne bullashettiyaari cenggurssaa, woxan gaacciyo cenggurssaanne xomppiyaa poo7uwaa xaissana. <sup>11</sup> Ha biittai muleera bashsha baisa biitta gidana; ha kawotettatika Baabiloone kawuwaayyo laappun tammu laittaa haarettana.

<sup>12</sup> “Laappun tammu laittai poletti simmin, taani GODAI Baabiloone kawuwaanne a kawotettaa asaa eta mooruwaa gishshau qaxxayana; eta biittaakka merinau baisa oottana. <sup>13</sup> Taani he biittaa bollan haasayidobaa ubbaa, Ermmaasi kawotettatu ubbaa bolli, “Hanana” giidi yootido, ha maxaafan xaafettidabaa ubbaa he biittaa bollan ehaana. <sup>14</sup> Daro kawotettatinne gita kawoti Baabilooneta ailleyidi haarana. Taani etayyo eta hanuwaadaaninne eta kushiya oosuwaadan qanxxana’ yaagees” yaagiis.

### *GODAI Kawotettatu Bolli Ehiyo Pirddaa*

<sup>15</sup> GODAI Israa7eela Xoossai taayyo hagaadan yaagiis; “Haggaa ta hanqquwaa woine eessai kumido wanccaa hei. Efaada taani nena kiittiyo kawotettata ubbaa ushsha. <sup>16</sup> Eti uyidi, taani eta giddo yeddiyo bisuwaa gaasuwan ganddigaarananne gooyana” yaagiis.

<sup>17</sup> Yaagin taani GODAA kushiyaappe wanccaa ekkada, i tana kiittido kawotettata ubbaa ushshaas. <sup>18</sup> Hachchi hanidoogaadankka eta ubbaa bashshanne dagama, cashshanne qanggetta oottana mala, Yerusalaamenne Yihudaa katamata, a kawotanne a halaqata ubbaa ushshaas. <sup>19</sup> Gibxxe biittaa kawuwaa, a ashkkarata, a halaqata, a biittaa asaa ubbaanne <sup>20</sup> yan de7iya allaga asata ubbaa ushshaas. Uuxa biittaa kawota ubbaa ushshaas. Pilisxxeema biittan de7iya Asqqaloona, Gaaza, Eqiroonanne Ashddoodappe attida baggaa kawota ubbaa ushshaas. <sup>21</sup> Eedooma, Moo7aabanne Amoonaa ushshaas. <sup>22</sup> Xiirroosa kawota ubbaa, Sidoona kawota ubbaanne Meediteraane Abbaappe hefintta gaxan de7iya biittaa kawotakka ushshaas. <sup>23</sup> Dadaana, Temaana, Buuzanne bantta huuphiyaa shubeeriyaa meediya asata ubbata ushshaas. <sup>24</sup> Araba biittaa kawota ubbaanne bazzon de7iya zaretu kawota ubbaa ushshaas. <sup>25</sup> Zimira, Elaamane Meedoonaa kawota ubbaa ushshaas. <sup>26</sup> Huuphessa bagga biittaa kawota ubbaa, haahuwaaninne matan de7iya kawota ubbaa eta kayan kayan, sa7aa bollan de7iya kawotettata ubbaa ushshaas. Eta ubbaappe guyyiyan, Baabiloone kawoikka uyana.

<sup>27</sup> GODAI tana hagaadan yaagiis; “Hegaa gishshau, etayyo yoota; ‘Ubbaappe Wolqqaama GODAI, Israa7eela Xoossai inttena, “Uyitenne mattottite. Cooyitenne kunddite. Taani intte giddo yeddiyo bisuwaa gaasuwan naa77antto denddoppite” yaagees’ yaaga. <sup>28</sup> SHin eti ne kushiyaappe wanccaa ekkennaaninne uyennan ixkikko, etau hagaadan yaagada yoota; ‘Ubbaappe Wolqqaama GODAI inttena, “Intte uyanau koshshees! <sup>29</sup> Be7ite, taani ta sunttan xeesettida katamaa bolli iitabaa oottanau doommais. Yaanin intte qaxxayettennan attidi buuteetii? Intte qaxxayettennan attidi beekketa! Aissi giikko, taani sa7an de7iya ubbaa bolli bisuwaa xeesais. Taani Ubbaappe Wolqqaama GODAI haggaa odaas” yaagees’ yaaga.

<sup>30</sup> “Hegaa gishshau, Ermmaasaa, ha qaalai ubbai eta bolli hananaaggaa etayyo yoota. ‘GODAI bolla xoqqan gummana. GODAI ba de7iyo geeshsha sohuwaappe ba gunttaa sissana. I ba hentta gadiyaa bollan wolqqappe gummana. I woiniyaa teeraa yedhdhidi, gum77iyaageeti waassiyooagaadan, sa7an de7iya ubbaa bolli waassana.

<sup>31</sup> A wocamai sa7aa gaxaa gakkidi siyettees. Aissi giikko, GODAAYYO kawotettatuura mootoi de7ees. GODAI asa ubbaara pirddeettana; i iitata bisuwau aattidi immana. Taani GODAI haggaa odaas’ yaaga” yaagiis.

<sup>32</sup> Ubbaappe Wolqqaama GODAI, “Be7a, iitabai kawotettaappe kawotettau laalettees; sa7aa gaxaappe gaganttiya carkkoi denddees” yaagees.



<sup>33</sup> He wodiyan GODAI woridoogeetu ahai, biittaa bollan ha gaxaappe hini gaxaa gakkanau laalettana. Etayyo yeekettenna, eta ahai shiiqenna woikko moogettenna. Eti biittan pito mala gidana.

<sup>34</sup> Inttenoo, henttanchchatoo, yeekkitenne waassite. Inttenoo, wudiyaa kaalet-tiyaageetoo, bidinttan gonddorettite. Aissi giikko, intte shuhettiyo wodee gakkii; intte kunddananne lo77o urqqa miishshadan meqerettana. <sup>35</sup> Henttanchchati baqatidi biyoosi baawa; wudiyaa kaalettiyaageetikka kessi ekkiyoosi baawa. <sup>36</sup> GODAI eta hentta gadiyaa xaissiyoo gishshau, henttanchchati waassiyoo waasuwaanne wudiyaa kaalettiyaageeti yeekkiyo yeehuwaa siyite. <sup>37</sup> GODAA suulo hanqquwaa gaasuwan saro de7iya hentta gadee onana. <sup>38</sup> Gaammoi ba de7iyo woraappe kiyiyoogaadan, GODAIKKA ba de7iyoosaappe kiyana. Eta biittaikka naaqqiyaageetu bisuwaaninne GODAA suulo hanqquwan baisa biitta gidana.

## 26

### *Ermmaasi Haiquwaa Pirdaappe Attiis*

<sup>1</sup> Yoosiyaasa na7ai Yihudaa Kawoi Yo7aqeemi koiro kawotido wode, ha qalalai GODAAPPE yiis. <sup>2</sup> GODAI tana hagaadan yaagiis; “GODAA Beeta Maqidasiyaa dabaaban eqqa. Eqqada GODAA Beeta Maqidasiyan goinnanau Yihudaa katamatuppe yiya ubbaayyo oda. Taani, ‘Oda’ gaada azazido qaalaa ubbaappe issuwaanne ashshoppa. <sup>3</sup> Ooni erii, eti siyidi, bantta iita ogiyaappe simmanaakkonne. Yaatiyaakko taanikka eta oosuwaa iitatettaa gishshau, eta xaissanau qoppidoogaa agga bayana.

<sup>4</sup> “Etayyo yoota; ‘GODAI hagaadan yaagees; “Intte taani yootiyoogaa siyennan ixkikko, taani intteyyo immido higgian beennan ixkikkonne, <sup>5</sup> (intte siyennan ixkinkka) taani zaara zaarada intteikko kiittido, hananabaa yootiya ta ashkkaratu qaalaa siyennan ixkikko, <sup>6</sup> yaatikko taani ha Beeta Maqidasiyaa Seelodan oottana. Ha katamaakka sa7an de7iya kawotettatau ubbau qanggetta oottana” yaagees’ yaaga” yaagiis.

<sup>7</sup> Ermmaasi GODAA Beeta Maqidasiyan ha qaalaa yootishin, qeeseti, hananabaa yootiyaageetinne asai ubbai siyidosona. <sup>8</sup> Qassi Ermmaasi GODAI, “Asa ubbaayyo oda” giidi a azazido qaalaa ubbaa yooti polido wode, qeeseti, hananabaa yootiyaageetinne asai ubbai a oiqqidosona. Oiqqidi, “Neeni haiqqanau besaasa! <sup>9</sup> Neeni, ‘Ha Beeta Maqidasee Seelodan hanana; qassi ha katamaikka baisanne ona gidana’ yaagada, GODAA sunttan aissi hananabaa yootadii?” yaagidosona. Yaagidi GODAA Beeta Maqidasiyan shiiqida asati ubbai Ermmaasa dooddidosona.

<sup>10</sup> Yihudaa halaqati heгаа siyido wode, kawuwaa keettaappe kiyidi, GODAA Beeta Maqidasiyaa yiidosona. Yiidi GODAA Beeta Maqidasiyaa yuushuwaa gimbbiyau Ooratta Penggiyaa giyo penggiyan uttidosa. <sup>11</sup> Qeesetinne hananabaa yootiyaageeti halaqatuyyoonne asaa ubbaayyo hagaadan yaagidosona; “Intte intte haittan siyidoogaadan, ha bitanee ha katamaa bollan hananabaa yootido gishshau, i haiqqanau bessees!” yaagidosona.

<sup>12</sup> Yaagin Ermmaasi halaqatussinne asaa ubbaassi hagaadan yaagidi haasayii; “Ha intte siyido qalalai ubbai ha Beeta Maqidasiyaa bollinne ha katamaa bolli, ‘Hanana’ gaada taani yootana mala, GODAI tana kiittiis. <sup>13</sup> Hegaa gishshau, ha77i intte ogiyaakka intte oosuwaakka laammite; GODAA intte Xoossaa qaalau azazettite. Yaatikko, GODAI intte bolli ehaana giido iitabaa aggiigana. <sup>14</sup> Tana gidikko, taani intte kushiyan de7ais. Intteyyo lo77onne suure milatidabaa ta bolli oottite. <sup>15</sup> Intte mati siree bainnan issibaa erite. Intte tana worikko, intte intte bolli, ha katamaa bollinne a gidon de7iya asaa bolli xillo suuttaa acuwaa ehaana. Aissi giikko, taani ha qaalaa ubbaa intte haittan yeggana mala, tumuppe GODAI tana kiittiis” yaagiis.

<sup>16</sup> Yaagin halaqatinne asai ubbai qeesetuuyoonne hananabaa yootiyaageetuyyo hagaadan yaagidosona; “Ha bitanee haiqqanau bessenna! Aissi giikko, i GODAA nu Xoossaa sunttan nuuyyo yootiis” yaagidosona.

<sup>17</sup> Dere cimatuspekka issooti issooti eqqidi, shiiqida asaassi ubbaassi hagaadan yaagidi yootidosona; <sup>18</sup> “Hizqqiyaasi Yihudan kawotido laittan Mooreshetappe yiida Mikiyaasi Yihudaa asau ubbau hagaadan yaagidi, hananabaa yootiis; ‘Ubbaappe Wolqqaama GODAI hagaadan yaagees; “Xiyoonee shooqaadan goyettana. Yerusalaame katamaikka qolettidi, shuchcha doore gidana. Beeta Maqidasee keexettido deree woraa maayana” yaagees’ yaagiis. <sup>19</sup> Yaatin, Yihudaa Kawoi Hizqqiyaasinne Yihudaa asai ubbai a woridee? CHii, Hizqqiyaasi GODAASSI yayyidi, GODAAYYO watiwatiis. Watiwatin GODAI ba oottana giido iitabaa aggiigiis. SHin nuuni nurkka nu bolli pala iitabaa ehaana hanoos” yaagiis.

<sup>20</sup> (Qiriyaati-Yi7aariima giyoosan de7iya SHamaa7iyaa na7aa Ooriyoona giyo issi hara bitanee de7ees; ikka Ermmaasi yootidoogaadan, ha katamaa bollinne ha biittaa bolli GODAA sunttan hananabaa yootiis. <sup>21</sup> Kawoi Yo7aqeemi, a olanchchati, a oosanchchati Ooriyoona yootidoogaa siyido wode, kawoi a woranau koyiis. Ooriyoona hegaa siyidi yayyidi, Gibxxe biitti baqatiis. <sup>22</sup> Gido shin, Kawoi Yo7aqeemi Akiboora na7aa Elnaataanne hara asata Gibxxe kiittiis. <sup>23</sup> Eti Ooriyoona Gibxxeppe kessidi, Kawuwaa Yo7aqeemassi efidosa. Efin bisuwan i a worissidi, a ahaa dere makkaan olissiis.)

<sup>24</sup> SHin Saafaana na7aa Ahiqaami Ermmaasa maaddido gishshau, asai a woranau aattidi immibeenna.

## 27

### *Ermmaasi Ba Morggiyan Wottido Qambaraa*

<sup>1</sup> Yoosiyaasa na7ai Sedeqiyaasi, Yihudan kawotaa doommido heeran, ha qalalai GODAAPPE Ermmaasassi yiis. <sup>2</sup> GODAI taayyo yootidoogee haga; “Neeyyo qambaraanne gonniyo dafo wodoruwaara de7iya qinqqiriitiyaa medhdha; medhdhada ne morggiyan wotta. <sup>3</sup> Wottada Yihudaa Kawuwaa Sedeqiyaasakko Yerusalaame kiitettida asatu bolli, Eedooma kawuwaassi, Moo7aaba kawuwaassi, Amoonaa asatu kawuwaassi, Xiirsoo kawuwaassinne Sidoona kawuwaassi kiitta. <sup>4</sup> Eti bantta godatuyyo hagaadan yaagidi yootana mala, eta azaza; ‘Ubbaappe Wolqqaama GODAI, Israa7eela Xoossai hagaadan yaagees; <sup>5</sup> “Ta gita wolqqaaninne ta yeddido kushiyan ha sa7aa, sa7an de7iya asaa, mehiyaanne do7aa taani medhdhaas. A taani ta dosiyo urau immais. <sup>6</sup> Simmi ha77i taani biitta ubbaa ta ashkkaraassi, Baabiloone Kawuwaa Naabukadanaxoorassi aattada immaas. Qassi taani bazzo do7atikka ayyo haarettana mala oottaas. <sup>7</sup> A biittai haarettiyo wodee gakkanaashin, kawotettati ubbai ayyo, a na7aayyoonne a na7aa na7aayyo haarettana. Hegaappe guyyiyan, daro kawotettatinne gita kawoti a haarana.

<sup>8</sup> ““SHin ai biittinne woikko ai kawotettinne ha Baabiloone Kawuwaa Naabukadanaxoorassi azazetennan ixkonne a qambaran gelennan ixkonne, taani GODAI he kawotettaa a kushiyan xaissana gakkanaashin, bisuwan, koshaaninne boshan qaxxayana. <sup>9</sup> Hegaa gishshau, inttena, ‘Baabiloone kawuwaassi haaretekketa’ yaagiya intte hananabaa yootiyaageeti, intteyyo kaayiyaageeti, intte aimuwaa birshshiyaageeti, intte shareechhotinne maliyaageeti yootiyooгаа siyoppite. <sup>10</sup> Aissi giikko, eti intteyyo wordduwaa yootoosona; hegaa inttena intte biittaappe haassoosona. Taani inttena laaggada kessana; inttekkayayana. <sup>11</sup> SHin ai kawotettinne Baabiloone kawuwaa qambaran gelidi, ayyo haarettikko, taani GODAI he kawotettaa a biittan ashshana; eti he biittaa goyananne yan de7ana” yaagees’ yaaga” yaagiis.

<sup>12</sup> Taani Yihudaa Kawuwaa Sedeqiyaasassikka haga milatiya qaalaa yootaas; “Baabiloone kawuwaa qambaran hokkada gela. Gelada ayyoonne a asaayyo haarettana.

Yaatikko, neeni paxa de7ana. <sup>13</sup> GODAI Baabiloone kawuwaassi haarettennan ixxiya kawotettaassi giidoogaadan bisuwan, koshaaninne boshan neeninne ne asai aissi haiqgeetii? <sup>14</sup> ‘Intte Baabiloone kawuwaassi haarettekketa’ giya hananabaa yootiyaageetu qaala siyoppite. Aissi giikko, hegee eti intteyyo yootiyoogee worddo. <sup>15</sup> GODAI hagaadan yaagees; ‘Taani eta kiittabeikke; shin eti ta sunttan, “Hananabaa” giidi wordduwaa yootoosona. Hegaa gishshau, taani inttena laaggada kessana; intteikka intteyyo hananabaa yootiyaageetikka xayana’ yaagees” yaagaas.

<sup>16</sup> Hegaappe guyyiyan, taani qeesetussinne ha asaa ubbaassi hagaadan yaa-gada haasayaas; “GODAI hagaadan yaagees; “GODAA Beeta Maqidasiyaa miishshai Baabilooneppe ha77i mataara simmidi yaana” yaagidi yootiya intte hananabaa yootiyaageetu qaala siyoppite. Aissi giikko, eti intteyyo yootiyoogee worddo. <sup>17</sup> Eti giyoobaa siyoppite; Baabiloone kawuwaassi haarettitenne paxa de7ite! Ha kata-mainne aissi qolettiichchida soho gidanee? <sup>18</sup> Eti hananabaa yootiyaageeta gidikkonne GODAA qalalai etan de7ikko, GODAA Beeta Maqidasiyan, Yihudaa kawuwaa keet-taaninne Yerusalaamen attida keena miishshai Baabiloone beennaadan tana, Ub-baappe Wolqqaama GODAA woossona’ yaagees.

<sup>19-20</sup> “Baabiloone Kawoi Naabukadanaxoori Yo7aqeema na7aa, Yihudaa Kawuwaa Yo7aakiinanne Yihudaaninne Yerusalaamen de7iya gita asaa ubbaa omooddidi efido wode, ha kataman attida tuussatubaa, Abba Sainiyaabaa, gaaretubaanne hara mi-ishshatu ubbatubaa Ubbaappe Wolqqaama GODAI hagaadan yaagees. <sup>21</sup> Ee, Ubbaappe Wolqqaama GODAI, Israa7eela Xoossai GODAA Beeta Maqidasiyan, Yihudaa kawuwaa keettaaninne Yerusalaamen attida miishshatubaa hagaadan yaagees; <sup>22</sup> ‘Eti Baabiloone biittau miyettana; taani eta gishshau yaana gallassai gakkanaassi, eti yan de7ana. He wode taani eta guyye zaarada eta sohuwan wottana. Taani GODAI hagaada odaas’ yaagees” yaagaas.

## 28

### *Ermmaasanne Hananabaa Yootiya Hanaaniyaa*

<sup>1</sup> He laitti, Yihudaa Kawoi Sedeqiyaasi kawotaa doommido heeran, oiddantto laittan, ichchashantto aginan Gabaa7oonappe yiida Azuura na7ai hananabaa yootiya Hanaa-nee, GODAA Beeta Maqidasiyan qeesetunne asatu ubbaa sinttan taayyo hagaadan yaagidi haasayiis; <sup>2</sup> “Ubbaappe Wolqqaama GODAI, Israa7eela Xoossai hagaadan yaagees; ‘Taani Baabiloone kawuwaa qambbaraa menttana. <sup>3</sup> Baabiloone Kawoi Naabukadanaxoori hagaappe denttidi, Baabiloone efido, GODAA Beeta Maqidasiyaa miishsha ubbaa taani naa77u laittaa giddon zaarada, ha sohuwaa ehaana. <sup>4</sup> Qassi taani Yo7aqeema na7aa Yihudaa Kawuwaa Yo7aakiinakka, Yihudaappe omoodettidi, Baabiloone biida asaa ubbaa zaarada ha sohuwaa ehaana. Aissi giikko, taani Baabiloone kawuwaa qambbaraa menttana. Taani GODAI hagaada odaas’ yaagees” yaagiis.

<sup>5</sup> Yaagin GODAA Beeta Maqidasiyaa giddon eqqida qeesetunne asatu ubbatu sinttan hananabaa yootiya Ermmaasi hananabaa yootiya Hanaaniyaassi <sup>6</sup> hagaadan yaagiis; “Amin77i! GODAI yaato! GODAA Beeta Maqidasiyaa miishshatanne omoodettidi biida asaa ubbaa Baabilooneppe zaaridi, ha sohuwaa ehiidi, neeni odido qaala GODAI polo! <sup>7</sup> Gidikkonne, ane taani neessikka ha asaa ubbaassikka yootiyooгаа siya. <sup>8</sup> Beni neep-penne taappe kase de7ida hananabaa yootiyaageeti olai, iitabainne boshai daro biittatu bollinne gita kawotettatu bolli hananaagaa yootidosona. <sup>9</sup> SHin, ‘Sarobai hanana’ giidi yootiya hananabaa yootiyaagaabaa gidikko, he yootiyaagaa qalalai polettiyo wode, he wode tumuppe GODAI a kiittidoogee erettana” yaagiis.

<sup>10</sup> Hegaappe guyyiyan, hananabaa yootiya Hanaanee hananabaa yootiya Ermmaasa morggiyaappe qambbaraa ekkidi menttiis. <sup>11</sup> Mentidi Hanaanee asaa ubbaa sinttan hagaadan yaagidi haasayiis; “GODAI hagaadan yaagees; ‘Taani naa77u laittatu gidдон Baabiloone Kawuwaa Naabukadanaxoora qambbaraa kawotettatu ubbaa morggiyaappe denttada hagaadan menttana’ yaagees” yaagiis. Yaatin, hananabaa yootiya Ermmaasi denddidi, ba biyoosaa biis.

<sup>12</sup> Hananabaa yootiya Hanaanee hananabaa yootiya Ermmaasa morggiyaappe qambbaraa menttidoogaappe guyyiyan, GODAA qaalai hananabaa yootiya Ermmaasassi yiis; <sup>13</sup> yiidi, “Ba; baada Hanaaniyaassi yoota; ‘GODAI hagaadan yaagees; ‘Neeni mitta qambbaraa menttadasa; shin taani a gishshaa birata qambbaraa medhdhana” yaagees. <sup>14</sup> Qassikka Ubbaappe Wolqqaama GODAI, Israa7eela Xoossai hagaadan yaagees; “Eti Baabiloone Kawuwaa Naabukadanaxoorayyo haarettana mala, taani ha kawotettatu ubbaa morggiyan birata qambbaraa wottana; etikka ayyo haarettana. Taani harai attin, bazzo do7atakka ayyo immaas” yaagees’ yaaga” yaagiis.

<sup>15</sup> Hegaappe guyyiyan, hananabaa yootiya Ermmaasi hananabaa yootiya Hanaaniyaa hagaadan yaagiis; “Hanaaniyaa, siya! GODAI nena kiittibeenna; shin neeni ha asai worddohan ammanettana mala oottadasa. <sup>16</sup> Hegaa gishshau, GODAI hagaadan yaagees; ‘Taani nena ha sa7aa bollaappe diggana. Neeni ha asai ta bollan makkalanaadan zorido gishshau, neeni ha laitti haiqqana’ yaagees” yaagiis.

<sup>17</sup> He laittikka laappunnta aginan hananabaa yootiya Hanaanee haiqqiis.

## 29

### *Ermmaasi Baabiloonen De7iya Omoodettida Asaassi Yeddido Dabddaabbiyaa*

<sup>1</sup> Hananabaa yootiya Ermmaasi omoodettidaageetu gidдон de7iya attida cima-tussi, qeesetussi, hananabaa yootiyaageetussinne Naabukadanaxoori Yerusalaameppe omooddidi, Baabiloone efiido hara asatussi ubbaassi Yerusalaameppe yeddido dabddaabbee hagaappe kaallidi xaafettidaagaa. <sup>2</sup> Hagee hanidoogee, Kawoi Yo7aakiini, kawiyaa a aayiyaa, a oosanchchati, Yihudaanne Yerusalaame halaqati, kushe oosuwa hiillatanne birataa qoxxiyaageeti Yerusalaameppe kiyi simmiina. <sup>3</sup> Ermmaasi Yihudaa Kawoi Sedeqiyaasi Baabiloone Kawuwaa Naabukadanaxoorayyo kiittiyo Saafaana na7aa El77aasanne Hilqqiyaa na7aa Gamaariyaa bollan he dabddaabbiyaa kiittiis.

Dabddaabbee hagaadan yaagiis; <sup>4</sup> “Ubbaappe Wolqqaama GODAI, Israa7eela Xoossai, taani Yerusalaameppe Baabiloone omoodissada yeddido asau ubbau hagaadan yaagais; <sup>5</sup> ‘Keettata keexxidi, etan de7ite. Kattaa zeridi, aifiyaa miite. <sup>6</sup> Maccaasaa ekkite; ekkidi maccaa attumaa yelite. Intte naatussikka maccaasaa giigissidi immite; intte macca naatakka azinau immite. Etikka maccaa attumaa yelona. Yan qoodaa corattite; guuxxoppite. <sup>7</sup> Qassi taani inttena omooduwau yeddido katamaassi saroi de7anaadan koyite. He katamaayyo GODAA woossite. Aissi giikko, ayyo saroi de7ikko, intteyyookka saroi de7ana’ yaagais.

<sup>8</sup> “Ee, Ubbaappe Wolqqaama GODAI, Israa7eela Xoossai hagaadan yaagees; ‘Intte gidдон de7iya intte hananabaa yootiyaageetinne shareechchoti yootiyooban cimettoppite. Eti aimottiyo aimokka siyoppite. <sup>9</sup> Aissi giikko, eti ta sunttan “Hananabaa” giidi worddoba yootoosona; taani eta kiittabeikke’ yaagees.

<sup>10</sup> “GODAI hagaadan yaagees; ‘Baabiloone laittai laappun tammai polettiyo wode, taani intte gishshau yaana; yaada, “Taani inttena intte biitti zaarada ehaana” giido lo77o qaalaa polana. <sup>11</sup> Aissi giikko, taani intteyyo halchchiyo halchchuwa taani GODAI erais; hegeenne, intteyyo sintta wodiyaanne ufaissaa immana mala, saro halchchoppe attin, iita halchcho gidenna. <sup>12</sup> Hegaappe guyyiyan, intte tana xegana; taakko yaananne tana woossana; taanikka intteyyo siyana. <sup>13</sup> Intte tana koyana; intte



tana intte polo wozanaappe koyido wode demmana. <sup>14</sup> Taani intteyyo beettana. Taani inttena omooduwaappe zaarana. Taani inttena laalido kawotettatu ubbaappenne soho ubbaappe shiishshana. Shiishshada taani inttena omooduwau yeddanaappe kase intte de7ido sohuwaa guyye zaarada ehaana. Taani GODAI haggaa odaas' yaagees.

<sup>15</sup> “Intte, ‘GODAI hananabaa yootiyaabaa nuuyyo Baabiloonen denttiis’ yaagideta. <sup>16</sup> Yaagido gishshau, Daawita kawotaa araatan uttiya kawuwaabaa, ha kataman de7iya asaa ubbaabaanne inttenaara omooduwan kiyibeenna intte dabbotubaa GODAI haggadan yaagees. <sup>17</sup> Ee, Ubbaappe Wolqqaama GODAI haggadan yaagees; ‘Taani eta bolli bisuwaa, koshaanne boshaa ehaana. Qassi taani eta maanau giigenna woqqida balasiyaa teeraa mala oottana. <sup>18</sup> Taani eta bisuwan, koshaaninne boshan yedettana; yedettada taani eta sa7an de7iya kawotetta ubbaayyo bollai caaliyoobaa oottana. Qassi taani eta kessada yeddido biitta ubban qanggetta, dagama, borene cashsha oottana. <sup>19</sup> Aissi giikko, hananabaa yootiya ta ashkkaratu bolli taani etayyo zaara zaarada kiittido ta qaalaa eti siyennan ixxidosa. Inttekka omoodetti biidaageeti siyennan ixxideta. <sup>20</sup> Taani Yerusalaameppe Baabiloone omoodissada yeddido asatoo, intte ubbaikka ta qaalaa, GODAA qaalaa siyite’ yaagees.

<sup>21</sup> “‘Hananabaa’ giidi intteyyo GODAA sunttan worddobaa yootiya Qolaaya na7aa Akaababaanne Ma7iseeya na7aa Xidiqiyaabaa Ubbaappe Wolqqaama GODAI, Israa7eela Xoossai haggadan yaagees; ‘Taani eta Baabiloone Kawuwaa Naabukadanaxoorayyo aattada immana. Intte xeellishin, i eta worana. <sup>22</sup> Hegaappe guyyian, Yihudaappe omoodettidi, Baabiloone biida asai issi uraa qangganau koyikko, “GODAI nena Baabiloone kawoi taman xuuggido Xidiqiyaadaaninne Akaabadan otto” yaagana. <sup>23</sup> Aissi giikko, eti Israa7eelan pala nagaraa oottidosona. Eti bantta shoorotu maccaasaa laggettidosona; yaatidi taani eta azazabeenna worddobaa ta sunttan haasayoosona. Heggaa eriyaagee tana; hegau taani markka. Taani GODAI haggaa odaas' yaagees” yaagiis.

### *SHamaa7iyaa Dabddaabbiyaa*

<sup>24</sup> GODAI Nehelaamiyaa SHamaa7iyaayyo ha kiitaa kiittana mala, Ermmaasayyo odiis. <sup>25</sup> “Ubbaappe Wolqqaama GODAI, Israa7eela Xoossai haggadan yaagees; ‘Neeni ne sunttan dabddaabbiyaa Yerusalaamen de7iya asaayyo ubbaayyo, Ma7iseeya na7aa qeesiyaa Xafaaniyaayyoonne hara qeesetu ubbaayyo yeddadasa. Neeni Xafaaniyaa haggadan yaagadasa; <sup>26</sup> “GODAA Beeta Maqidasiyan halaqa gidana mala, nena GODAI Yoodaaha gishshaa qeese oottidi sunttiis. ‘Hananabaa yootoos’ giya gooyiya asata, qaphiyaaninne toollan gelissanau bessees. <sup>27-28</sup> Nuuni Baabiloonen de7ishin, Ermmaasi xaafidi, nuuyyo haggadan yaagidi kiittiis; ‘Yan intte gam77ana. Keettata keexxidi, de7ite. Kattaa zeridi, aifiyaa miite’ yaagiis. Heggaa gishshau, intte gidon hananabaa yootiya Anatootappe yiida Ermmaasa aissi heggadan oottabeikkii?” yaagadasa’ yaagees” yaagidi kiittiis.

<sup>29</sup> Qeesiyaa Xafaanee hananabaa yootiya Ermmaasayyo ha dabddaabbiyaa nababiis. <sup>30</sup> Nabbabin GODAA qalalai Ermmaasassi haggadan giidi yiis; <sup>31</sup> “Kiitaa omooduwan de7iya asaayyo ubbaayyo haggadan yaagada kiitta; ‘Nehelaamiyaa SHamaa7iyaabaa GODAI haggadan yaagees; “Taani kiittennan SHamaa7ee intteyyo, ‘Hananabaa’ giidi yootido gishshaunne inttena wordduwaa ammanttido gishshau, <sup>32</sup> taani GODAI Nehelaamiyaa SHamaa7iyaanne a so asaa qaxxayana. Ta bolli i makkalabaa haasayido gishshau, ha asaa gidon ayyo issi urinne paxa attenna. Qassi i ba huuphenkka taani ta asaassi oottana kehatettaa be7enna. Taani GODAI haggaa odaas” yaagees’ yaaga” yaagiis.



<sup>1</sup> GODAAPPE Ermmaasassi yiida qaalai hagua. <sup>2</sup> GODAI Israa7eela Xoossai hagaadan yaagees; “Ermmaasaa, taani neeyyo odido qaalaa ubbaa xaatta maxaafan xaafa. <sup>3</sup> Taani ta asaa Israa7eelanne Yihudaa omooduwaappe guyye zaarada ishalissiyo gallassati yaana; taani eta maizza aawatussi immido biittau eta zaarana; etikka laattana. Taani GODAI hagua odais” yaagees.

<sup>4</sup> GODAI Israa7eela asaabaanne Yihudaa asaaba yootido qaalai hagua. <sup>5</sup> GODAI hagaadan yaagees; “Taani asai yashshau waassiyo waasuwa siyaas; dagama waasoppe attin, hagee saro waaso gidenna. <sup>6</sup> Ane lal7itenne wochchite! Attumaasi bannakkidi, na7a yelanau danddayii? Yaatin, attumaasai ubbai maaretai oiqqido maccaasadan, ba kushiyan ba uluwaa oiqqidaashin taani be7iyoogee aibee? Asaa ubbaa som77oi aissi tossu giidee? <sup>7</sup> Aayye7ana! He gallassai hanttaara gallassa; heгаа mala gallassi mulekka baawa. He gallassai Yaaqooba zaretussi meto wode gidana. Gidikonne eti hegaappe attana” yaagees.

<sup>8</sup> Ubbaappe Wolqqaama GODAI hagaadan yaagees; “He gallassi taani eta morggiyaappe qambaraa menttana; eti qashettido sanssalataakka duuttana. Hagaappe sinttanau allaga biittaa asai eta ailleyenna. <sup>9</sup> Hegaa aggidi eti GODAASSI, bantta Xoossaassi, oottana; taani etayyo denttiyo Kawuwaa Daawitassi eti haarettana.

<sup>10</sup> “Hegaa gishshau, ta ashkkaarato, Yaaqooba zareto, yayyoppite! Inttenoo, Israa7eelato, dagammoppite! Intte haahosan de7ishin, taani inttena ashshana; intte zaretakka eti omoodettido biittaappe yedissana. Yaaqooba zareti simmidi, aibakko bochchennan saro de7ana; eta ai asinne yashissenna. Taani GODAI hagua odais. <sup>11</sup> Taani inttena ashshanau inttenaara de7ais. Taani GODAI hagua odais. Taani inttena laalido kawotettata ubbaa muleera xaissana; shin inttena muleera xaissikke. Taani inttena likke pirddan qaxxayana; qixaatee bannan inttena muleera coo yeddikke” yaagees.

<sup>12</sup> GODAI hagaadan yaagees; “Intte deshettai paxennaagaa; intte masunttaikka hanttaara. <sup>13</sup> Intte yohuwan inttena maaddiyaabi baawa; intte masunttaukka xalee baawa; intteyyo paxoi baawa. <sup>14</sup> Intte siiqoti ubbati inttena dogidosona; eti inttebaa wudokkona. Taani inttena morkkedan shocaas; meqetti banna asi qaxxayiyoogaadan qaxxayaas. Aissi giikko, intte mooroi dalggiis; intte nagaraikka dariis. <sup>15</sup> Ha paxenna intte deshettau aibissi waasseetii? Intte mooroi dalggido gishshaunne intte nagarai darido gishshau, hagua intte bolli taani oottais.

<sup>16</sup> “SHin inttena biittaa kessi miida ubbati meetettana; intte morkketi ubbatikka omooduwau baana. Inttena bonqqidaageeti bonqqettana; inttebaa olan ekkidaagee-tubaakka olan ekkana. <sup>17</sup> Taani intteyyo kehissana; intte masunttaikka pattana. Aissi giikko, eti inttena, ‘Hageeti olettidaageeta; Xiyoone asaaba wudiyaabi baawa’ yaagoosona. Taani GODAI hagua odais” yaagees.

<sup>18</sup> GODAI hagaadan yaagees; “Taani Yaaqooba zaretu keettaa omoodettosaappe guyye zaarada, ishalissana; eti de7iyo sohuwaukka qarettana. Yerusalaame kata-maikka kase ba qolettidosan, kawo keettaikka kase ba sohuwan simmidi keexettana. <sup>19</sup> Yan de7iya asai ubbai galataa mazamuriyaanne ufaissaa yettaa yexxana. Taani eta qoodaa darissana; eta qoodai naa77antto guuxxenna. Taani eta bonchchettida dere oottana; eti guuxxokkona. <sup>20</sup> Eta zerettaa beni wode de7uwaadan de7ana; eta maabaraikka ta sinttan minni eqqana. Eta un77ettiyaageeta ubbaakka taani qaxxayana. <sup>21</sup> Eta halaqai eta asaappe issuwaa gidana; eta haariyaagee eta giddoppe kiyana. Taani a ta mati ehaana; ehin i taakko shiiqana. Taani shiishshennan de7ishin, xalidi taakko shiiqanau danddayiyai oonee? Taani GODAI hagua odais. <sup>22</sup> Hegaa gishshau, intte ta asa gidana; taanikka intte Xoossaa gidana” yaagees.

<sup>23</sup> Be7ite, GODAA hanqqoi gotiyaadan hanees; ikka sirimettiiddi, iitatu huuphiyan yaana. <sup>24</sup> GODAI ba wozanaa halchchuwaa wurssidi polana gakkanaashin, a eexxiya hanqqoi guyye simmenna. Hegaa guyyeppe yiya wodetun intte akeekana.

## 31

### *Israa7eela Asai Ba Biitti Simmana*

<sup>1</sup> GODAI hagaadan yaagees; “He wode taani Israa7eela yaratussi ubbaassi Xoossaa gidana; etikka ta asa gidana” yaagees.

<sup>2</sup> GODAI hagaadan yaagees; “Bisuwaappe palahida asai taappe aaro kehatettaa bazzuwan demmiis. Israa7eela asai shemppi ekkanau koyido wode, <sup>3</sup> taani GODAI etau haahosaappe hagaadan yaagaida qonccaas; ‘Israa7eela asau, taani inttena merinaa siiquwan siiqais; ta aggenna siiquwan taani inttena taakko shiishshaas. <sup>4</sup> Geeshsha Israa7eela asau, taani inttena zaarettada keexxana; intteikka keexettana. Zaarettidikka karaabiyaa oikkidi, ufaittiyaageetuura yexxananne durana. <sup>5</sup> Intte zaarettidikka Samaariyaa keratu bolli woiniyaa turata tokkana; tokkidaageeti a teeran ufaittana. <sup>6</sup> Efireema gezziyan naagiyaageeti, “Haayite; GODAAKKO, nu Xoossaakko, pude Xiy-oonne ane boos!” yaagidi xeesiyo wodee yaana’ yaagaas” yaagees.

<sup>7</sup> GODAI hagaadan yaagees; “Yaaqooba asaassi ufaissan yexxite; kawotettatu ubbaappe aadhdhiya Israa7eelassi hombbocite. ‘GODAI Israa7eela asaappe attidaageeta ashshiis’ yaagidi galataa mazamuriyaa yexxite. <sup>8</sup> Be7ite, taani eta huuphessa bagga biittaappe ehaana; sa7aa gaxaappekka taani eta shiishshana. Qooqeti, wobbeti, abbe ixeta maccaasatinne maaretai oiqqido maccaasati etaara issippe yaana; keehi daro asai ba biittaa simmana. <sup>9</sup> Taani eta zaarada ehiyo wode, eti ufaissaa daruwan yeekiidinne woossiiddi yaana. Taani eta shaafaa lanqqiyaara, eta xubbenna sitta ogiyaara kaalettana. Aissi giikko, taani Israa7eela asaassi aawa; Efireemikka taassi baira na7a.

<sup>10</sup> “Inttenoo, kawotettatoo, GODAA qaalaa siyite! Siyidi haahosan, abbaa doonan de7iya biittatun hagaadan yaagidi awaajjite; ‘Israa7eelata laalidaagee i eta shiishshana; qassi henttanchchai ba wudiyaa dorssaa heemmiyoogaadan, i eta heemmana’ yaagite. <sup>11</sup> Aissi giikko, GODAI Yaaqooba zareta woziiis; i eta etappe minniyaageetu kushiyaappe ashshiis. <sup>12</sup> Eti yiidi Xiyoonne Deriyan ufaissau yexxana; eti GODAI immiyo kehatettan, kattan, woine eessan, zaitiyan, dorssaa maratuuninne miizzaa maratun ufaittana. Eti haattaa loitti ushshido ataakiltte soho mala gidana; eti naa77antto shullokkona. <sup>13</sup> He wode geela7oti ufaittidi durana; wodallatikka cimatikka ufaittana. Taani eta yeehuwaa ufaissau laammana; taani eta minttettana; eta azzanuwaa gishshaa taani eta ufaissana. <sup>14</sup> Taani qeesetussi daro qumaa immana; ta asaikka ta kehatettan kallana. Taani GODAI haggaa odais” yaagees.

### *GODAI Israa7eela Maariis*

<sup>15</sup> GODAI hagaadan yaagees; “Yeehoinne zilaassai Raama giyo kataman siyettiis; Raaheela ba naatuyyo yeekkausuu; eti xayido gishshau, agga gin, aggenan ixxaasu” yaagees.

<sup>16</sup> GODAI hagaadan yaagees; “Yeekkiyoogaa aggidi, intte aifiyaa afuttaa quccite. Aissi giikko, intte oottido oosuwwau woiuuwaa intte ekkana; morkkiyaa biittaappe intte naatikka simmana. Taani GODAI haggaa odais. <sup>17</sup> Intte naati bantta biitti simmanau de7iyo gishshau, intteyyo sinttanau ufaissai de7ees. Taani GODAI haggaa odais.

<sup>18</sup> “Efireema zareti azzanidi, hagaadan yaagidi odiyooogaa tumuppe taani siyaas; ‘Neeeni nuna xurqqayettibeenna mirgguwaadan wadhdhadasa; nuunikka keedida. Neeeni GODAA nu Xoossaa gidiiyo gishshau, ane nuna zaara; nuuni neekko simmana. <sup>19</sup> Nuuni kase neeppe wora simmidi biida; shin ha77i paaxida. Neeeni nuna qaxxaya

simmin yeellatidi, nu tiraa baqqida; nuuni nu yelagatettaa laittaa nagaraa gishshau, kauyyidanne yeellatida' yaagidosona.

<sup>20</sup> “Tumu Israa7eeli taayyo al77o na7ee? I taani siiqiyo na7ee? Ee! Taani darotoo a bolli iitabaa haasayikkokka, a hassayiyoogaa aggabeikke. Hegaa gishshau, ta wozanai a laamotees; taani assi keehi qarettais. Taani GODAI haggaa odais.

<sup>21</sup> “Ogiyan malaataa wottite; malaatiyo mittatakka essite. Yaatidi intte biido ogiyaa akeekite. Geeshsha Israa7eela asau, simmite; intte katamatukko simmite. <sup>22</sup> Inttenoo, ammanoi bainna Israa7eelatoo, aude gakkanaashin toilattuuteetii? GODAI sa7aa bollan issi ooratabaa medhdhana; hegeenne, maccaasi attumaasaassi eqettidi, saro ashshiyoojaa mala ooratabaa” yaagees.

### *GODAA Asai Sinttanau Ishalana*

<sup>23</sup> Ubbaappe Wolqqaama GODAI, Israa7eela Xoossai, haggadan yaagees; “Taani Israa7eela asaa omooduwaappe zaarada ishalissiyoo wode, Yihudaa biittaaninne a katamatun eti naa77anttuwaa, ‘Nenoo xillotetta de7iyoo sohuwau, nenoo geeshsha deriyau, GODAI nena anjjo’ yaagana. <sup>24</sup> Yihudaanne Yihudan de7iya katamatun ubban asai de7ana; goshshanchchatikka wudiyaara yuuyiya henttanchchatikka yan de7ana. <sup>25</sup> Taani daafuranchchata gazddissana; qassi namisettidi gilqqidaageetakka kalissana” yaagees.

<sup>26</sup> Hegan beegottada ta yuushuwaa xeellaas; ta xiskkoikka taayyo mal77o xiskko gidiis.

<sup>27</sup> GODAI haggadan yaagees; “Taani Israa7eela biittaaninne Yihudaa biittan asaanne mehiyaa kunttiyo wodee yaana. <sup>28</sup> Eta xoqollanau, qolanau, aatta aatta yegganau, xais-sanaunne bashshaa ehaanau wudada naagidoogaa keenaa, eta zaarada gimbbanaunne tokkanau wudada naagana. Taani GODAI haggaa odais.

<sup>29</sup> “He wode asai, ‘Aawati caala woiniyaa teeraa min, naatu achchai zil77iis’ yaagidi haasayiyoogaa aggana. <sup>30</sup> SHin asai issoi issoi ba nagaran nagaran haiqqana; caala woiniyaa teeraa miya asa ubbau a achchai achchai zil77ana” yaagees.

<sup>31</sup> GODAI haggadan yaagees; “Taani Israa7eela asaaranne Yihudaa asaara ooratta maachchaa maacettiyo gallassati yaana. <sup>32</sup> He maachchai taani eta Gibxxeppe kessanau eta kushiyaa oiqqido wode, eta maizza aawatuura maacettido maachchaa mala gidenna; taani etayyo azina mala gida uttinkka eti ta maachchaa kanttidosona. Taani GODAI haggaa odais. <sup>33</sup> SHin taani GODAI he gallassatuppe guyyiyan Israa7eela asaara maacettana maachchai haggaa: taani ta higgiiyaa eta giddon wottana; qassi eta wozanankka xaafana. Taani eta Xoossaa gidana; qassi etikka ta asa gidana. <sup>34</sup> Asi ba shooruwaa woikko ba ishaa, ‘GODAA era’ yaagidi tamarissiyoojaa aggana; aissi giikko, guuttaappe doommidi, gitaa gakkanaashin, eti ubbai tana erana. Taani eta naaquwaa atto gaana; eta nagaraakka naa77antto hassayikke. Taani GODAI haggaa odais” yaagees.

<sup>35</sup> GODAI, awaa gallasan poo7issidaagee, aginainne xoolintteti qamman poo7anaadan higgiiyaa wottidaagee, abbaakka qaattidi, beetai guummanaadan oottiyaagee, Ubbaappe Wolqqaama GODAA geetettiyaagee, haggadan yaagees; <sup>36</sup> “Ha eqqidi de7iya mereta higgee ta sinttappe kichchikko, he wode Israa7eela zerettati ta sinttan merinau kawotetta gididi de7iyoojaa attana. Taani GODAI haggaa odais” yaagees.

<sup>37</sup> GODAI haggadan yaagees; “Bolla saloti likettanau, woikko garssa sa7aa baasoikka erettanau danddayikko, he wode taani Israa7eela zerettata ubbaa, eti oottido mooruwaa ubbaa gishshau, ta sinttappe diggana. Taani GODAI haggaa odais” yaagees.

<sup>38</sup> GODAI haggadan yaagees; “Hanaani7eela Adussa Gimbbiyaappe doommidi, Zooziyaa Penggiyaa gakkanaashin, Yerusalaame katamai taayyo, GODAAYYO, katama gididi, simmidi keexettiyo gallassati yaana. <sup>39</sup> He katamaa zawaikka arggo baggaappe

kaallidi biidi, Gaareeba Keraanne Go77a yuushuwaa gakkanaassi aakkana. <sup>40</sup> Ahaa moogiyoonne bidinttaa oliyo zanggaarainne Qediroona Zanggaaraappe qommoora arshsho baggaara biidi, Paraa Penggiyaa zooziyaa gakkanaashin de7iya gade ubbai GODAASSI dummatidi, geeshsha gidana. Hagaappe sinttanau katamai merinau shodet-tennanne qolettenna” yaagees.

## 32

### *Ermmaasi Gadiyaa SHammiis*

<sup>1</sup> Yihudaa Kawoi Sedeqiyaasi kawotido tammannta laittan, Baabiloone Kawoi Naabukadanaxoori kawotido tammanne hosppunta laittan GODAAPPE Ermmaasayyo qaalai yiis. <sup>2</sup> He wode Baabiloone kawuwaa olanchchati Yerusalaame dooddidosona; hananabaa yootiya Ermmaasi Yihudaa kawuwaa keettan de7iya, naagiyaageetu dabaaban gorddetti uttiis.

<sup>3</sup> Yihudaa Kawoi Sedeqiyaasi a hegan qachchidi, hagaadan yaagiis; “Neeni aissi hagaadan yaagada hananabaa yootai? ‘GODAI hagaadan yaagees; “Be7a, taani ha katamaa Baabiloone kawuwaa kushiyan aattada immana hanais; immin i omooddana. <sup>4</sup> Yihudaa Kawoi Sedeqiyaasi Baabiloonetu kushiyaappe kessi ekkenna; i tumaappe Baabiloone kawuwaa kushiyan gelana. I a sinttan eqqidi, aara haasayana; i a ba aifiyan be7ana. <sup>5</sup> Hegaappe guyyiyan, Naabukadanaxoori Sedeqiyaasa Baabiloone efaana; efin taani a bolli pirddana gakkanaashin, i yan de7ana. Taani GODAI haggaa odais. Neeni Baabiloonetuura olettiaabaa gidikko, hegee nena kessenna” yaagees’ yaagadasa” yaagiis.

<sup>6</sup> Yaagin Ermmaasi, “GODAA qaalai he wode taakko hagaadan yaagiiddi yiis; <sup>7</sup> ‘Ne aawaa ishaa SHaaluuma na7ai, Hanaami7eeli neekko yiidi, “Anatoota kataman de7iya ta gadiyaa shamma; aissi giikko, shammanau dabbotai gattiyoi nena” yaagana’ yaagiis.

<sup>8</sup> “GODAI giidoogaadan, ta aawaa ishaa na7ai Hanaami7eeli taakko naagiyaageetu dabaabaa yiidi, ‘Biniyaama biittan Anatootan de7iya ta gadiyaa shamma; gadiyaa shammanaunne buzottanau gattiyoi nena’ yaagiis. Yaagin taani hegan GODAA qaala gidiyoogaa eraas. <sup>9</sup> Yaatada Anatoota kataman de7iya gadiyaa ta aawaa ishaa na7aa Hanaami7eelappe shammaas; shammada i ekkiyo waagaa ayyo meezaanan kilaas; kilin tammanne laappun xaqara bira gidiiis. <sup>10</sup> SHamaa paramaa markkati de7iyoosan paramada, maatafaa an wottaas; miishshaakka meezaanan kilada immaas.

<sup>11</sup> “Hegaappe guyyiyan, taani attamettida shamaa paramaanne attamettibeenna shamaa paramaa ekkaas. <sup>12</sup> Ekkada ta aawaa ishaa na7ai Hanaami7eeli, shamaa paramaa paramida markkatinne naagiyaageetu dabaaban uttida Aihudati ubbai xeelishin, he shamaa paramaa Mahiseeya na7aa na7aa, Neeriyaa na7aa Baarukassi immaas. <sup>13</sup> Immada eta sinttan taani Baaruka hagaadan yaagada azazaas; <sup>14</sup> ‘Ubbaappe Wolqqaama GODAI, Israa7eela Xoossai, hagaadan yaagees; “Daro wodiyaa gam77ana mala, ha attamettida paramaanne attamettibeenna paramaa ekka efaada, urqqaappe merettida otuwan wotta” yaagees. <sup>15</sup> Aissi giikko, Ubbaappe Wolqqaama GODAI, Israa7eela Xoossai, hagaadan yaagees; “Ha biittan asai zaaridikka keettaa, gadiyaanne woiniyaa turaa tokkiyo sohuwaa shammana” yaagees’ yaagaas” yaagiis.

### *Ermmaasa Woosaa*

<sup>16</sup> Taani Neeriyaa na7aa Baarukayyo shamaa paramaa woraqataa immidoogaappe guyyiyan, GODAA hagaadan yaagada woosaa; <sup>17</sup> “Abeet Ubbaa Haariya GODAU, neeni salotanne sa7aa ne gita wolqqaaninne ne yeddido kushiyan medhdhadasa! Neessi danddayettennabi mulekka baawa. <sup>18</sup> Neeni sha7atuyyo aggenna siiquwaa besaasa; shin aawatu mooruwaa eta naatu bolli zaaraasa. Abeet gitanne wolqqaama Xoossau, ne sunttai Ubbaappe Wolqqaama GODAA geettees. <sup>19</sup> Ne zoree gita; ne oottiyo oosoikka



wolqqaama. Asaa ogiyaa ubbaa neeni be7aasa; asau ubbaukka a ogiyaadaaninne a oosuwaadan zaaraasa.

<sup>20</sup> “Neeni Gibxxen malaataanne oorattabaa oottadasa; hachchi gakkanaassikka ha ooratta oosota Israa7eela asaa giddooninne hara kawotettatu ubbaa gidдон oottiyoo-gaa aggabaakka. Hegaappe denddidaagan ne sunntai ubbasan erettiis. <sup>21</sup> Neeni ne asaa Israa7eela Gibxxeppe malaataaninne oorattaban, ne mino qesiyaaninne ne yed-dido kushiyan, qassi gita dagaman kessadasa. <sup>22</sup> Eta maizza aawatuyyo neeni immanau caaqqido biittaa, maattainne eessai goggiyo ha biittaa etayyo immadasa; <sup>23</sup> immin eti ha biittaa gelidi laattidosona. SHin eti neeyyo azazettibookkona; ne higgiiyaakka kaallibookkona; eti oottanaadan neeni azazidobaa ubbaakka oottibookkona. Hegaa gishshau, neeni eta bolli ha bashsha ubbaa ehaadasa.

<sup>24</sup> “Be7a, Baabilooneti katamaa oiqqanau gimbbiyaa yuushuwan biittaa dooridi doo-ddidosona; olaappe, koshaappenne boshaappe denddidaagan, katamai etaara olettiya Baabiloonetu kushiyan aadhdhidi imettiis. Neeni ha77i be7iyoo-gaadan, ne giidobai ubbai polettiis. <sup>25</sup> Abeet Ubbaa Haariya GODAU, katamai Baabiloonetuyyo imettanau hanishinkka, neeni tana, ‘Markkata xeesada, miishshan ha gadiyaa shamma’ yaa-gadasa” yaagada woossaas.

<sup>26</sup> Hegaappe guyyiyan, GODAA qalai Ermmaasayyo hagaadan yaagiiddi yiis; <sup>27</sup> “Taani GODAA, asaa ubbaa Xoossaa. Taassi danddayettennabi de7ii?” yaagiis. <sup>28</sup> Hegaa gishshau, GODAI hagaadan yaagees; “Taani ha katamaa Baabiloonetuyyoonne Baabiloone Kawuwaa Naabukadanaxoorayyo aattada immana; immin eti a oiqqana. <sup>29</sup> Ha katamaa bolli woraajjiya Baabilooneti yiidi, katamaa taman xuuggana; keettaa bollan dembbayidi oottidosan Ba7aalayyo ixaanaa cuwayidinne hara xoossatuyyo ushshaa yarshshuwaa gussidi, tana hanqqetissida asati de7ido keettata akka xuuggana.

<sup>30</sup> “Israa7eela asainne Yihudaa asai bantta yelagatettaappe doommidi, ta sinttan iitabaa oottidosonappe attin, harabaa oottibookkona; eti bantta kushiyan oottido oosuwan tana hanqqetissidosona. <sup>31</sup> Keexettido wodiyaappe hachchi gakkanaashin, ha katamaa asati tana hanqqetissidosonanne yiilloyidosona; hegaa gishshau, taani ha katamaa ta sinttappe xaissana. <sup>32</sup> Israa7eela asainne Yihudaa asai, eta kawotinne halaqati, eta qeesetinne hananabaa yootiyaageeti oottido iita ooso ubban tana han-qquetissidosona. <sup>33</sup> Eti bantta som77uwaa aggidi, bantta zokkuwaa taayyo zaari-dosona. Taani eta zaara zaarada tamarissikkokka, eti siyibookkonanne seeraakka ekkibookkona. <sup>34</sup> Eti sheneyiya bantta eeqata ta sunntan xeesettida Beeta Maqidasiyaa gidдон essidi tunissidosona. <sup>35</sup> Eti bantta attuma naatanne macca naata Molooka eeqaayyo yarshshanau Hinnooma Zanggaaran Ba7aalayyo yarshshiyoo xoqqa sohota giigissidosona. Eti hegaa oottana mala, taani eta azazabeikke; Yihudaa asaa eti nagaraa ootissanau hegaa mala sheneyiyaabaa oottanaagee ta wozanan mulekka aadhdhibeenna” yaagiis.

### *GODAI Israa7eela Asaa Zaarada Ishalissana Yaagiis*

<sup>36</sup> Intte Yerusalaame asai, “Ha katamai olan, koshaaninne boshan Baabiloone kawuwaa kushiyan aadhdhidi imettana” yaagido ha katamaabaa GODAI Israa7eela Xoossai hagaadan yaagees; <sup>37</sup> “Be7ite, taani ta suulo hanqquwaaninne ta gita yiilluwan eta laalido biitta ubbaappe shiishshana; shiishshada ha sohuwaa zaarada ehaada, eti sarotettan de7anaadan oottana. <sup>38</sup> Eti ta asa gidana; taanikka eta Xoossaa gidana. <sup>39</sup> Eti taayyo merinau yayyana mala, taani etayyo issi wozanaanne issi ogiyaa immana; hegee etayyoonne etappe guyyiyan, eta naatuyyo lo77o gidana. <sup>40</sup> Taani etaara merinau maachchaa maacetana. He maachchan taani etayyo lo77obaa oottiyoo-gaa aggikke; eti taappe wora simmenna mala, taani eti taayyo yayyanaadan oottana. <sup>41</sup> Taani etayyo lo77obaa oottiyoo-gan ufaittana; qassi taani ta kumetta wozanaappenne ta kumetta shemppuwaappe ha biittan eta tumaappe tokkana” yaagees.



<sup>42</sup> Qassikka GODAI hagaadan yaagees; “Taani ha asaa bolli ha iita bashshaa ubbaa ehiidoogaadan, hegaadankka taani etayyo immana giido lo77obaa ubbaa immana. <sup>43</sup> Intte, ‘Ha biittai asaikka meheekka de7enna, baisa biitta gidana; i Baabiloonetussi imettiichchiis’ yaagido biittan asai zaarettidi, gadiyaa shammana. <sup>44</sup> Asai gadiyaa miishshan shammana; markkaa sinttan paramaa paramidi, maatafaa wottana. Hagee ubbai Biniyaama biittan, Yerusalaame yuushuwan de7iya heeratun, Yihudaa katamatun, gezziyan de7iya katamatun, bargguwan de7iya katamatuuninne Neegeeba Bazuwan de7iya katamatu ubban hanana. Aissi giikko, taani eta zaarada ishalissana. Taani GODAI haga odais” yaagees.

### 33

#### *GODAI Naa77anttuwaakka Israa7eela Asaa Ishalissana Yaagiis*

<sup>1</sup> Ermmaasi biron naagiyaageetu dabaaban de7ishin, GODAA qalalai naa77anttuwaakka yiis. <sup>2</sup> Sa7aa medhdhida GODAI, giigissidi a sohuwan wottida GODAI, a sunttaikka GODAA geetettiyoogee tana hagaadan yaagees; <sup>3</sup> “Neeni tana xeesa; taani neeyyo koyana; neeni erenna gitabaanne wolqqaamabaa taani neeyyo yootana. <sup>4</sup> Baabiloonetu biittaa doorettaa, doodettaanne bisuwaa teqqana mala, dirssaa gimbbiyaa minttanau qolido ha katamaa keettatubaanne Yihudaa kawotu keettatubaa taani GODAI, Israa7eela Xoossai odais. <sup>5</sup> Inttenaara olettanaunne taani ta hanqquwaaninne yiilluwan shocana asatu ahaa he sohotun kunttanau Baabilooneti geloosona. Aissi giikko, eta iitatettaa ubbaa gishshau, taani ha katamaappe ta som77uwaa genttaas.

<sup>6</sup> “Gidikkonne, taani ha katamaanne an de7iya asaa zaarada pattana; eta payy-atettaakka zaarana; keehi daro saruwaanne woppa de7uwaa taani etayyo immana. <sup>7</sup> Taani Yihudaa asaanne Israa7eela asaa omooduwaappe zaarada ishalissana; eti kase de7idoogaadan oottada taani eta gimbbana. <sup>8</sup> Eti tana naaqqido nagara ubbaappe taani eta geeshshana; geeshshada eti tana naaqqido naaquwaanne makkalido makkala ubbaa atto yaagana. <sup>9</sup> Hegaappe guyyiyan, Yerusalaame katamai taayyo ufaissaa, bonchchuwaanne galataa sa7an de7iya kawotettatu ubbaa sinttan ehaana. Taani Yerusalaame asaassi oottiyo lo77obaanne he katamaassi ehiyo duretettaanne sarotettaa siyidi, kawotettati ubbai yashshan kokkorana” yaagees.

<sup>10-11</sup> GODAI hagaadan yaagees; “Intte, ‘Asainne mehee bainna bazzo’ giido ha sohotun, asainne mehee bainna Yihudaa katamatuuninne Yerusalaame ogetun, ufaissaanne ililssaa cenggurssai, bullachchiyaagaanne bullashettiyaari cenggurssainne GODAA Beeta Maqidasiyaa galataa yarshshuwaa ehiiddi, hagaadan yaagidi yexxiya asaa cenggurssai siyettana;

‘Ubbaappe Wolqqaama GODAA galatite;  
aissi giikko, i keha.

Aggenna a siiqoi merinaagaa’ yaagoosona.

Aissi giikko, taani eta omooduwaappe zaarada eta biitti ehaana; eti kase de7idoogaadan oottada, taani ishalissada wottana” yaagees.

<sup>12</sup> Ubbaappe Wolqqaama GODAI hagaadan yaagees; “Ha asainne mehee bainna baisa biittaaninne an de7iya katamatun henttanchchati bantta dorssaa wudiyaa allaxxiisyyo gadee de7ana. <sup>13</sup> Gezziyan de7iya katamatun, bargguwan de7iya katamatun, Neegeeba Bazuwan de7iya katamatun, Biniyaama biittan, Yerusalaame yuushuwan de7iya heeratuuninne Yihudaa katamatun henttanchchati bantta dorssaa zaarettidi qoodana. Taani GODAI haga odais” yaagees.

<sup>14</sup> GODAI hagaadan yaagees; “Taani Israa7eela asaayyoonne Yihudaa asaayyo oot-tana giido lo77o qaalaa poliyo gallassati yaana; <sup>15</sup> he gallassatuuninne he wodetun taani

Daawita zariyaappe issi xillo Aacaa denttana; i he biittan suure pirdaanne xillotettaa oottana. <sup>16</sup> He wode Yihudaa asai attana; Yerusalaame asaikka woppu giidi de7ana; ha katamaikka GODAA, Nu Xillotettaa yaagetti xeesettana. <sup>17-18</sup> Daawita zerettaappe Israa7eela kawotaa araatan uttiya asi mulekka xayenna. Hegaadankka, xuuggiyo yarshshuwaa, kattaa yarshshuwaunne hara yarshshuwaa ubbatoo yarshshanau Leewa zariyaappe qeese gidiya asi merinaukka ta sinttan xayenna. Taani GODAI haggaa odais” yaagees.

<sup>19</sup> GODAA qaalai Ermmaasakko yiis. <sup>20</sup> GODAI hagaadan yaagees; “Taani gallasaa saaranne qammaara maachchaa maacettaas; he maachchan eti banttau keerettida wodiyan simerettoosona. He gallasaanne qammaa maachchaa intte laammanau danddayikko, <sup>21</sup> taani a zariyaappe kawotaa araatan uttana asi mulekka xayennaadan, ta ashkkaraa Daawitaara maacettido maachchaa laammana; qassi ubbatoo taayyo oottiya, Leewa zare gidiya qeesetuura maacettido maachchaakka laammana. <sup>22</sup> Taani ta ashkkaraa Daawita zerettatanne ta sinttan oottiya Leewa zare qeeseta qoodanau danddayettenna saluwaa xoolinttetudaaninne makkin wurenna abbaa shafiyaadan corayana” yaagees.

<sup>23</sup> GODAA qaalai qassikka Ermmaasakko hagaadan yaagiiddi yiis; <sup>24</sup> “Ha asai, ‘GODAI ba doorido naa77u kawotettata, Israa7eelanne Yihudaa aggi bayiis’ yaagidi haasayyoogaa neeni akeekabeikkii? Eti ta asaa karidi, bana danddayida kawotetta kiyokkona giidi qoppoosona. <sup>25</sup> Taani GODAI gallasaanne qammaara maacettido maachchaanne saluwaanne sa7aa higgiiyaa minttabeennabaa gidiyaakko, <sup>26</sup> taani Yaaqooba zerettatanne ta ashkkaraa Daawita zerettata agga bayana; yaatabeennabaa gidiyaakko, Abrahaama, Yisaaqanne Yaaqooba zaretu bolli kawoyanau Daawita zerettaa doorennan aggana. Taani ta asaa maarana; taani eta zaarada ishalissana” yaagiis.

## 34

### *Kawuwaa Sedeqiyaasassi Odettida Hiraagaa*

<sup>1</sup> Baabiloone Kawoi Naabukadanaxoori, a olanchchati ubbainne i haariyo kawotetatun de7iya asai ubbai, Yerusalaammenne Yerusalaame yuushuwan de7iya katamata ubbaa oliyo wode, ha qaalai GODAAPPE Ermmaasayyo yiis; <sup>2</sup> GODAI Israa7eela Xoossai hagaadan yaagiis; “Ba; baada Yihudaa Kawuwaa Sedeqiyaasa hagaadan yaaga; ‘GODAI hagaadan yaagees; “Be7a, taani ha katamaa Baabiloone kawuwaa kushiyan aattada immana; immin i ha katamaa taman xuuggana. <sup>3</sup> Neeni a kushiyaappe kessa ekkakka; neeni omoodettananne ayyo aadhdha imettana. Neeni ne aifiyan Baabiloone kawuwaa be7ana; ikka nenaara haasayana. Hegaappe guyyiyan, neeni Baabiloone biitti baana” yaagees.

<sup>4</sup> “ ‘Gidikonne, Yihudaa Kawuwau Sedeqiyaasaa, GODAI giyoobaa siya! Nebaa GODAI hagaadan yaagees; “Neeni olan haiqqakka; <sup>5</sup> neeni saro haiquwaa haiqqana. Neepe kase de7ida kawotu bonchchuwaassi, ne maizza aawatussi ixaanaa cuwayidoogaadan, asai ne bonchchuwaassikka ixaanaa cuwayana. Yaatidi, ‘Aayyee nu kawuwau!’ yaagidi neeyyo yeekkana. Taani GODAI haggaa odais” yaagees’ yaagada yoota” yaagiis.

<sup>6</sup> Hegaappe guyyiyan, hananabaa yootiya Ermmaasi ha hiraagaa ubbaa Yihudaa Kawuwaa Sedeqiyaasayyo Yerusalaamen yootiis. <sup>7</sup> He wode Baabiloone kawuwaa olanchchati Yerusalaame katamaanne Yihudan attida katamata olidosona. Laakis-hanne Azeeqa geetettiya katamatu xalaalai Yihudan attida gimbbettida katamata.

### *Ailleta Aillettaappe Kessiyo Awaajjuwaa*

<sup>8</sup> Kawoi Sedeqiyaasi ailleta aillettaappe kessiyo awaajjuwaa awaajjanau Yerusalaa-men de7iya asaa ubbaara maachchaa maacettidoogaappe guyyiyan, Ermmaasassi GODAAPPE qaalai yiis. He awaajjoi, <sup>9</sup> “Asai ubbai ba Ibraawe attumaasatanne maccaasata aillettaappe kesso; ooninne Aihuda asa gidida ba ishaa aille oottoppo” yaagees. <sup>10</sup> Hegaa gishshau, asai ubbainne halaqati ubbai maacettido maachchaadan, bantta attumanne macca ailleta aillettaappe kessanaunne naa77antto zaaridi ailleyennan agganau maayidosona; maayidoogaadankka eta aillettaappe kessidosona. <sup>11</sup> SHin bantta qofaa laammidi, aillettaappe kessido bantta attumanne macca ailleta zaaridi ailleyidosona.

<sup>12</sup> Hegaappe guyyiyan, GODAA qaalai Ermmaasakko yiis. <sup>13</sup> GODAI Israa7eela Xoos-sai hagaadan yaagees; “Taani intte maizza aawata Gibxxeppe, aillettaa biittaappe kessido wode, etaara maachchaa maacetta uttaas. <sup>14</sup> He maachchaa maaran, ‘Ibraawe aillee de7iyo asai ubbai, ailleta usuppun laittaa ootissi simmidi, laappunnta laitti aillettaappe kessi yeddite’ yaagada azazaas. SHin intte maizza aawati taani odiyooгаа siyennan ixxidisonanne taayyo azazettibookkona. <sup>15</sup> Inttekka mata wodiyaappe kase intte nagaraa aggidi, ailleta aillettaappe kessanau awaajjideta; awaajjidi ta sinttan likkebaa oottideta. Qassi heгаа oottanau ta sinttan, ta sunntai xeesettiyo ta Beeta Maqidasiyan maachchaa maacettideta. <sup>16</sup> SHin ha77ikka intte intte qofaa laammidi, ta sunntaa tunissideta. Waatidi giikko, eti koyidoogaadan, aillettaappe kessido intte attumanne macca ailleta zaaridi ailleyideta.

<sup>17</sup> “Hegaa gishshau, taani GODAI odiyooгee hгаа: intte taayyo azazettennan ixxidi, intte ishaa woikko intte shooruwaa aillettaappe kessiyo awaajjuwaa awaajjibeekketa. Be7ite, intte bolli olai boshainne koshai kiyana mala, taani awaajjais. Taani inttena sa7aa bolli de7iya kawotettatussi dagama oottana. <sup>18</sup> Ta maachchaa kanttida asaa, ta sinttan maacettido maachchaa qaalata naagennan ixxida asaa, eti maachchau shukkidi, bagгаа bagгаа kessi maaran wottidi, naa77u bagгааappe gidduwaara kanttido, he maraadan taani eta oottana. <sup>19</sup> He asatikka Yihudaa halaqata, Yerusalaae halaqata, biittaa haariyaageeta, qeesetanne maaran wottido maraa ashuwaa gid-doora kanttida asaa ubbaa. <sup>20</sup> Taani eta eta morkketu kushiyaaninne eta woranau koyiya asatu kushiyan aattada immana; immin eta ahai saluwaa kafotuyyoonne sa7aa do7atuyyo quma gidana.

<sup>21</sup> “Taani Yihudaa Kawuwaa Sedeqiyaasanne a halaqatakka eta morkketu kushiyan, eta woranau koyiyaageetu kushiyaaninne inttena oliyooгаа aggida Baabiloone kawuwaa olanchchatu kushiyan aattada immana. <sup>22</sup> Taani GODAI Baabiloone olanchchata azazana; azazin eti ha katamaa simmana. Simmidi eti ha katamaa olana, omooddananne taman xuuggana. Yihudan de7iya katamatakka asi de7enna baisa soho oottana” yaagees.

## 35

### *Ermmaasanne Rekaaba Yarata*

<sup>1</sup> Yoosiyaa na7aa Yihudaa Kawuwaa Yo7aqeema laittan, Ermmaasassi GODAAPPE qaalai hagaadan yaagiiddi yiis; <sup>2</sup> “Rekaaba yara gididiyaa asaakko baada, etaara haasaya. Haasayada Beeta Maqidasiyaa kifiletuppe issuwaa giddo gelissada woine eessaa etau imma” yaagiis. <sup>3</sup> Yaagin baada, Habaadiiniyaa na7aa na7aa, Ermmaasa na7aa Ya7azaaniyaa, a ishantanne a attuma naata ubbaa, heгаа giyooгee Rekaaba yaraa muliyaa ekkada, <sup>4</sup> Beeta Maqidasiyaa ehaas. Ehaada Yigidaaliyaa na7aa, hananabaa yootiya Hanaana erissiyo ashkkaratu kifiliyaa eta gelissaas. He kifilee penggiyaa naagiya SHaaluuma na7aa Ma7iseeya kifiliyaappe bolla bagгааara, halaqatu kifiliyaa matan de7ees. <sup>5</sup> Hegaappe guyyiyan, taani Rekaaba yaratu sinttan woiniyaa eessai kumido xuggatanne xuu7ata wottada, “Woiniyaa eessaa uyite” yaagaas.

<sup>6</sup> SHin eti zaaridi, “Nuuni woiniyaa eessaa uyokko; aissi giikko, nu maizza aawaa Rekaaba na7ai Yonadaabi nuna, ‘Inttekka intte naatika woiniyaa eessaa merinau uyoppite. <sup>7</sup> Qassi keettaa keexxoppite; zersettaa zeroppite; woine turaakka tokkoppite. Hegaa aggidi, dunkkaane gidдон de7ite. Yaanikko intte adussa laittaa ha biittan de7ana’ yaagiis. <sup>8</sup> Nu maizza aawaa Rekaaba na7ai Yonadaabi nuna azazido ubbau nuuni azazettida. Nuuni, woikko nu maccaasati, woikko nu attuma naati, woikko nu macca naati nu de7o laittaa ubban woine eessaa uyibookko; <sup>9</sup> de7iyo keettaakka keexxibookko; woiniyaa turaa sohoi, woikko goshshai, woikko zersettaikka nuussi baawa. <sup>10</sup> Nuuni dunkkaane gidдон de7ida; nu maizza aawai Yonadaabi azazido ubbaukka azazettida. <sup>11</sup> SHin Baabiloone Kawoi Naabukadanaxoori nu biittaa bolli woraajjido wode, ‘Baabiloonetunne Sooretu olanchchatuppe attanau, haa Yerusalaame ane boos’ yaagida. Ha77i nuuni Yerusalaamen de7iyoogee hegaassa” yaagidosona.

<sup>12</sup> Hegaappe guyyiyan, GODAA qaalai Ermmaasayyo yiis. <sup>13</sup> Ubbaappe Wolqqaama GODAI, Israa7eela Xoossai hagaadan yaagees; “Ba; baada Yihudaa asaanne Yerusalaame asaa hagaadan yaaga; “Ta qaalaa siyiyoogaanne taani tamarissidoogau azazettiyoogaa aissi ixxiditii? Taani GODAI haga odais. <sup>14</sup> Rekaaba na7ai Yonadaabi ba attuma naata woiniyaa eessaa uyennaadan azazido azazuwaa eti naagidosona; eti bantta maizza aawaa azazuwau azazettido gishshau, hachchi gakkanaassi woiniyaa eessaa uyokkona. Taani intteyyo zaara zaarada odais; shin intte taani yootiyoogaa siyibeekketa. <sup>15</sup> Qassi taani zaara zaarada hananabaa yootiya ta ashkkarata ubbaa inttekkoyeddaas; yeddin eti, “Intte ubbaikka intte iita ogiyaappe ha77i simmite; intte oosuwaakka loittite; hara xoossatussi goinnoppitenne ootoppite. Yaatikko, taani GODAI intteyyoonne intte maizza aawatuuyo immido biittan intte de7ana” yaagidosona. SHin intte taani odiyoogaa siyanau intte haittaa taakko yeggekketa. <sup>16</sup> Rekaaba na7aa Yonadaaba zereetti eta maizza aawai eta azazido azazuwaa polidosona; shin ha asai taayyo azazettibeenna’ yaaga” yaagees.

<sup>17</sup> Hegaa gishshau, GODAI, Ubbaappe Wolqqaama Xoossai, Israa7eela Xoossai hagaadan yaagees; “Siyite, taani Yihudaa asaa bollinne Yerusalaamen de7iyaageetu bolli ehaana giido iitabaa ehaana. Aissi giikko, taani etassi odaas; odin eti siyennan ixxidosa. Taani eta xeesaas; xeesin eti koyennan ixxidosa” yaagees.

<sup>18</sup> Hegaappe guyyiyan, Ermmaasi Rekaaba yarata hagaadan yaagiis; “Ubbaappe Wolqqaama GODAI, Israa7eela Xoossai inttena hagaadan yaagees; ‘Intte intte maizza aawaa Yonadaabayyo azazettido gishshau, a wogaa kaallido gishshaunne i azazidobaa ubbaakka polido gishshau, <sup>19</sup> Rekaaba na7ai Yonadaabi taayyo GODAAYYO oottiya attuma asa audenne xayenna’ yaagees” yaagiis.

## 36

### *Baaruki Xaatta Maxaafaa Asaayyo Nabbabiis*

<sup>1</sup> Yoosiyaasa na7ai Yihudaa Kawoi Yo7aqeemi kawotido oiddantto laittan, GODAI Ermmaasa hagaadan yaagiis; <sup>2</sup> “Issi xaatta maxaafaa ekkada, taani Yoosiyaasa wodiyan koiro neeyyo odido gallasaappe doommada, hachchi gakkanaassi Israa7eela bolli, Yihudaa bollinne hara kawotettatu ubbaa bolli haasayido qaalaa ubbaa xaafa. <sup>3</sup> Taani Yihudaa asaa bolli ehaana gaada halchchido boshaa ubbaa siyidi, ooni erii, eti bantta iita oosuwaappe simmanaakkonne. Simmikko taani eta naaquwaanne eta nagaraa atto gaana” yaagiis.

<sup>4</sup> Hegaa gishshau, Ermmaasi Neeriyaa na7aa Baaruka xeesiis; xeesidi GODAI ayyo yootidobaa ubbaa Baarukayyo yootin, i xaatta maxaafan xaafiis. <sup>5</sup> Hegaappe guyyiyan, Ermmaasi Baaruka, “Taani qasho keettan de7iyo gishshau, GODAA Beeta Maqidasiyaa gelanau danddayikke. <sup>6</sup> Hegaa gishshau, neeni asai xoomiyo gallassi GODAA Beeta Maqidasiyaa baada, taani yootin, neeni xaatta maxaafan xaafido GODAA qaalaa etau



nabbaba; bantta katamatuppe yiida Yihudaa asau ubbaukka nabbaba. <sup>7</sup> Ha asaa bolli GODAI awaajjido hanqqoinne yiilloi hanttaara gidiyo gishshau, ooni erii, eti bantta iita oosuwaappe simmidi, GODAA woossanaakkonne” yaagiis. <sup>8</sup> Yaagin Neeriyaa na7ai Baaruki hananabaa yootiya Ermmaasi azazidoogaadan, GODAA Beeta Maqidasiyan GODAA qaalaa ubbaa nabbabiis.

<sup>9</sup> Yoosiyaasa na7ai Yihudaa Kawoi Yo7aqeemi kawotido ichchashantto laittan, uddufunnta aginan, Yerusalem de7iya asaunne Yihudaa katamatuppe yiida asau ubbau GODAA sinttan xoomanaadan awaajjidosona. <sup>10</sup> Baaruki GODAA Beeta Maqidasiyan, qommo bagga dabaaban, Ooratta Penggiyaa giyoosan de7iya, Saafaana na7aa, xaafiyaa Gamaariyaa kifiliyan eqqidi, Ermmaasa qaalai xaafettido xaatta maxaafaa asau ubbau nabbabiis.

### *Baaruki Xaatta Maxaafaa Halaqatuyyo Nabbabiis*

<sup>11</sup> Saafaana na7aa na7ai, Gamaariyaa na7ai Mikaayi maxaafaappe GODAA qaalaa Baaruki nabbabishin siyido wode, <sup>12</sup> kawo keettan xaafee uttiyo kifiliyaa biis. I biyo wode, xaafee Elishamaa7i, SHamaa7iyaa na7ai Dalaayi, Akiboora na7ai Elnnaataani, Saafaana na7ai Gamaaree, Hanaaniyaa na7ai Xidiqeenne hara halaqati hegan uttidosa. <sup>13</sup> Baaruki asaayyo maxaafaappe nabbabishin siyido qaalaa ubbaa Mikaayi etayyo yootiis. <sup>14</sup> Yootin halaqati Nataaniyaa na7aa Yihuuda Baarukakko kiittidi, “Asaayyo neeni nabbabido maxaafaa ekkada haa ya” yaagidosona. (Nataanee SHEleemiyaa na7aa; SHEleemee Kuusha na7aa.) Yaagin Baaruki maxaafaa ekkidi, etakko yiis. <sup>15</sup> Etikka a, “Ane uttada, nuuyyo maxaafaa nabbaba” yaagidosona.

Yaagin Baaruki maxaafaa nabbabiis. <sup>16</sup> I nabbabido qaalaa ubbaa siyidosona; siyidi ubbaikka yayyidi, issoi issuwaa xeellidi, Baaruka, “Ha qaalaa ubbaa nuuni kawuwaassi odanau koshshees” yaagidosona. <sup>17</sup> Qassikka zaaridi, “Neeni ha qaalaa ubbaa waatada xaafidaakko nuuyyo yoota. Haggaa neeyyo Ermmaasi ba doonaappe yootin xaafadii?” yaagidosona.

<sup>18</sup> Yaagin Baaruki, “Ee, ha qaalaa ubbaa Ermmaasi ba doonaappe taayyo yootiis; yootin taani qalamiyan ha xaatta maxaafan xaafaas” yaagiis.

<sup>19</sup> Yaagin eti Baaruka, “Neeninne Ermmaasi biidi qosettite; intte de7iyo sohuwaakka ooninne eroppo” yaagidosona.

### *Kawoi Xaatta Maxaafaa Xuuggiis*

<sup>20</sup> Halaqati maxaafaa xaafiyaa Elishamaa7a kifiliyan wottoogaappe guyyiyan, kawoi de7iyo dabaabaa biidi, hanidabaa ubbaa kawuwaassi yootidosona. <sup>21</sup> Yootin he maxaafaa ehaana mala, kawoi Yihuuda kiittiis; kiittin Yihuudi xaatta maxaafaa Elishamaa7a kifiliyaappe ehiidi, kawuwaassinne a yuushuwan eqqida halaqatussi nabbabiis. <sup>22</sup> Uddufunnta aginan sa7ai balggo gidiyo gishshau, kawoi balgguwaa aattiyo keettan uttiis. He wode kawuwaa sinttan de7iya coociyan tamai eexxees. <sup>23</sup> Yihuudi heezzu woi oiddu sohota nabbabidoogaappe guyyiyan, kawoi he sohota xaatta maxaafaappe senxxiyan qanxxi qanxxidi, taman oliis; hegaadan oottidi, he maxaafaa mulerakka xuuggi aggiis. <sup>24</sup> Ha qaalaa ubbaa siyidikka kawoinne aara oottiya halaqati ainne yayyibookkona; woikko azzanidi, bantta maayuwaa pooshshibookkona. <sup>25</sup> Harai atto Elnnaataani, Dalaayinne Gamaaree kawoi he maxaafaa xuuggennaadan woossinkka, eta woosaa siyennan ixxiis. <sup>26</sup> Ixxidi kawuwaa na7aa Yiraahima7eela, Aziri7eela na7aa Saraayanne Abddi7eela na7aa SHEleemiyaa, xaafiyaa Baarukanne hananabaa yootiya Ermmaasa oiqqana mala kawoi azaziis. SHin GODAI eta qottiis.

### *Ermmaasi Wotti Yeggidi Xaafido Xaatta Maxaafaa*

<sup>27</sup> Ermmaasi yootin, Baaruki xaafido qaalai de7iyo maxaafaa kawoi xuuggi simmin, GODAA qaalai Ermmaasakko hagaadan yaagiiddi yiis; <sup>28</sup> “Ha77ikka hara xaatta maxaafaa ekkada, Yihudaa Kawoi Yo7aqeemi kase xuuggido xaatta maxaafaa gidon



de7iya qaala ubbaa xaafa. <sup>29</sup> Qassi Yihudaa Kawuwaa Yo7aqeema hagaadan yaaga: ‘GODAI hagaadan yaagees; “Neeni, “Baabiloone kawoi tumuppe yiidi, ha biittaa bashshana; qassi i gidдон de7iya asaanne mehiyaakka wurssana” gaada aissi xaafadii?’ yaagada maxaafaa xuuggadasa. <sup>30</sup> Hegaa gishshau, taani GODAI neessi Yihudaa Kawuwaa Yo7aqeemassi hгаа odais: Daawita kawotaa araatan uttiya zaree neeyyo mulekka de7enna. Ne ahaikka coo olettidi, gallassi awaa suuluwaaninne qammi kinchchuwan sho7ettana. <sup>31</sup> Intte nagaraa gishshau nena, ne zariyaanne nenaara oottiya ubbaa taani qaxxayana. Intte taani yootidoogaa siyennan ixixido gishshau, taani yootido itabaa ubbaa intte bollinne Yihudaaninne Yerusalaamen de7iya asaa bolli ehaana” yaagees’ yaaga” yaagiis.

<sup>32</sup> Hegaappe guyyiyan, Ermmaasi hara xaatta maxaafaa ekkidi, Neeriyaa na7aa xaafiyaa Baarukassi immiis. Immin Baaruki Yihudaa Kawoi Yo7aqeemi taman xuuggido xaatta maxaafaa qaala ubbaa Ermmaasi ayyo doonan yootin xaafiis. Qassi Ermmaasi hegaa milatiya hara qaalaakka gujjiin, ubbaakka Baaruki xaafiis.

## 37

### *Ermmaasanne Kawuwaa Sedeqiyaasa*

<sup>1</sup> Baabiloone Kawoi Naabukadanaxoori Yo7aqeema na7aa Yo7aakiina sohuwan Yoosiyaasa na7aa Sedeqiyaasa Yihudaa biittan kawoyiis. <sup>2</sup> Sedeqiyaasi, aara oottiya halaqatinne he biittan de7iya asai ubbaikka GODAI hananabaa yootiya Ermmaasa baggaara yootido qaalaassi azazettibookkona. <sup>3</sup> SHin Kawoi Sedeqiyaasi SHeleemiyaa na7aa Yehukaalanne Ma7iseeya na7aa qeesiyaa Xafaaniyaa hagaadan yaagidi, Ermmaasakko kiittiis; “Nu gishshatau GODAA nu Xoossaa woossa” yaagiis.

<sup>4</sup> He wode Ermmaasi biron qashettiichhibeenna gishshau, asaa gidдон simerettees. <sup>5</sup> Gibxxe kawuwaa olanchchati, Gibxxeppe kiyidi yiyoogaa Yerusalaame dooddida Baabiloone olanchchati siyido wode, eti Yerusalaameppe aggidi, guyye simmidosona.

<sup>6</sup> Hegaappe guyyiyan, GODAA qalai hananabaa yootiya Ermmaasakko yiis. <sup>7</sup> GODAI Israa7eela Xoossai hagaadan yaagees; “Tana intte oichchana mala, inttena kiittida Yihudaa kawuwaassi hagaadan yaagite; ‘Be7ite, inttena maaddanau kiyida Gibxxe kawuwaa olanchchati bantta biitti simmidi baana. <sup>8</sup> Qassi Baabiloone olanchchati simmidi yaana; yiidi olettidi, ha katamaa oiqqana; tamankka a xuuggana’ yaagite” yaagees.

<sup>9</sup> GODAI hagaadan yaagees; “ ‘Baabiloone olanchchati naa77antto simmidi yookkona’ yaagidi inttena intterkka cimoppite. Aissi giikko, eti simmidi yaanaagee antenna! <sup>10</sup> Intte Baabiloone olanchchata muliyaa xooniyaakkonne etappe attidi, olan ma-sunxxidi, dunkkaaniyaa gidдон zin77idaageetikka denddidi, ha katamaa taman xuuggana” yaagees.

### *Ermmaasi Qashettiis*

<sup>11</sup> Gibxxe kawuwaa olanchchati Yerusalaame matido gishshau, Baabiloone olanchchati bantta de7iyo sohuwaa aggidi, guyye simmidosona. <sup>12</sup> He wode Ermmaasi bana gakkiiya gadiyaa ekkana Biniyaama biitti baanau Yerusalaameppe denddiis. <sup>13</sup> Gido shin, i biidi, Biniyaama Penggiyaa giyo penggiyaa gakkishin, penggiyaa naagiyaageetuppe issoi, Hanaaniyaa na7aa SHeleemiyaa na7ai, Yiiriyaa giyoogee a, “Neeni Baabiloone baasa gidikkii?” yaagidi oiqqiis.

<sup>14</sup> Ermmaasi zaaridi, hagaadan yaagiis; “Neeni giyoogee worddo; taani Baabiloone biya asa gidikke” yaagiis. SHin Yiiree i giyoogaa siyennan ixixiis; ixixidi Ermmaasa oiqqi ekkidi, halaqatukko efiis. <sup>15</sup> Halaqatikka keehi hanqqettidi, Ermmaasa wadhdhdosona; wadhdhi simmidi, eti qasho keetta kessido, xaafiyaa Yonaataana keettan efiidi wottidosona. <sup>16</sup> Ermmaasi hegan biitta gidдон de7iya kifliyan daro wodiya gam77iis.

<sup>17</sup> Hegaappe guyyiyan, Kawoi Sedeqiyaasi asa kiittidi, Ermmaasa ba de7iyoosaa kawo keettaa xeesissiis; xeesissidi asi erennan a, “GODAI neeyyo yootidobi aibakko de7ii?” yaagidi oichchiis.

Ermmaasi zaaridi, “Ee de7ees; neeni Baabiloone kawuwaa kushiyan aadhdhada imettana” yaagiis. <sup>18</sup> Qassikka Ermmaasi Kawuwaa Sedeqiyaasa hagaadan yaagidi oichchiis; “Tana intte qasho keettan yegganau taani ne bollan, neeyyo oottiya halaqatu bollan woikko ha asaa bollan aiba mooro oottidanaa? <sup>19</sup> Qassi, ‘Baabiloone kawoi intte bollaanne ha biittaa bollan yiidi olenna’ yaagidi neeyyo hananabaa yootidaageeti ha77i awan de7iyoona? <sup>20</sup> Hegaa gishshau, ta godau kawuwau, siya! Taani oichchiyoobaa neeni polana mala, nena woossais. Taani he sohuwan haiqqennaadan, qasho keetta gidiya xaafiyaa Yonaataana keettau tana guyye zaaroppa” yaagiis.

<sup>21</sup> Hegaa gishshau, Kawoi Sedeqiyaasi naagiyaageetu dabaaban Ermmaasa wottana mala azaziis. Hegan a wottidaashin, katamaappe daabboi xayana gakkanaashin, hachchi hachchi issi issi daabbuwaa uukkiyoosaappe ehi ehiidi, ayyo immidosona.

## 38

### *Ermmaasi Haatta Ollan Olettiis*

<sup>1</sup> Mataana na7ai SHafaaxee, Paashihuura na7ai Gadaalee, SHEleemiyaa na7ai Yehukaalanne Malkkiyaa na7ai Paashihuuri Ermmaasi asaa ubbaassi yootido qaalata siyidosona. <sup>2</sup> Ermmaasi giiddi, “GODAI hagaadan yaagees; ‘Ha kataman attiya ooninne olan, koshaanne boshan haiqqana. SHin Baabiloonetukko biya ooninne haiqqenna. Ba huuphiyaa ashshana; paxakka de7ana’ yaagees. <sup>3</sup> Qassikka GODAI, ‘Hagee Yerusalaame katamai Baabiloone kawuwaa olanchchatu kushiyan aadhdhidi imettana; etikka a omooddana’ yaagees” yaagiis.

<sup>4</sup> Hegaappe guyyiyan, halaqati kawuwaakko biidi, hagaadan yaagidosona; “Ha bitanee haiqqanau koshshees; haggaa mala xala qaalaa haasayidi, ha kataman de7iya olanchchatinne asai ubbai shugganaadan oottiis. I asa qohiyaabaa amottesippe attin, sarobaa amottenna” yaagidosona.

<sup>5</sup> Yaagin Kawoi Sedeqiyaasi zaaridi, hagaadan yaagiis; “Intte a bolli oottana giidobaa aibanne taani inttena digganau danddayikke” yaagiis. <sup>6</sup> Yaagin eti Ermmaasa kawo keettaa dabaaban de7iya, kawuwaa na7aa Malkkiyaa haatta ollan yeggidosona; eti wodoruwan a duge wottidosona. He wode he ollan silimoppe attin, haatti baawa; Ermmaasi he silimuwaa giddo geliis.

<sup>7</sup> SHin Toophphiyaa asa gidiya, kawo keettan oottiya, Abemeleka giyo issi mureessai Ermmaasi ollan olettidoogaa siyiis. He wode kawoi Biniyaama Penggiyan pirdda shilootan uttiis. <sup>8</sup> Abemeleki kawuwaakko biidi, hagaadan yaagiis; <sup>9</sup> “Ta godau kawuwau, ha asati gita iitabaa oottidosona; hegeekka aibee giikko, hananabaa yootiya Ermmaasa haatta ollan yeggidosona. Qassi kataman qumi baina gishshau, i hegan namisan haiqqees” yaagiis.

<sup>10</sup> Yaagin kawoi zaaridi, Toophphiyaa asa gidiya Abemeleka, “Hagaappe heezzu asa nenaara ekkada baada, Ermmaasi haiqqennan de7ishin, haatta ollaappe kessite” yaagiis.

<sup>11</sup> Yaagin Abemeleki asaa ekkidi biis; biidi kawo keettan buquraa minjiyo kifiliyaappe garssa baggaara de7iya kifiliyaa gelidi, gal77a maayuwaa curqqaa ekkiis. He curqqaa wodoruwaa xeeran qachchidi, Ermmaasassi duge olla giddo yeddiis.

<sup>12</sup> Toophphiyaa asa gidiya Abemeleki Ermmaasa olla giddo duge xegidi, “Haggaa maayuwaa curqqaa wodoruwaappe garssa baggaara ne shophphan wotta” yaagiis. Ermmaasikka i giidoogaadan oottiis. <sup>13</sup> Yaatin, he wodoruwan goochchidi, Ermmaasa ollaappe kessidosona. Kessidi naagiyaageetu dabaabaa gelissidi gorddidosona.

### *Sedeqiyaasi Ermmaasa Naa77anttuwaakka Oichchiis*

<sup>14</sup> Hegaappe guyyiyan, Kawoi Sedeqiyaasi Ermmaasakko kiitti ehiissidi, GODAA Beeta Maqidasiyaa geliyo heezzantto penggiyaa matan a, “Taani issibaa nena oichchana. Neeni taappe aibanne qosoppa” yaagiis.

<sup>15</sup> Yaagin Ermmaasi zaaridi Sedeqiyaasau, “Taani yootikko, neeni tana worikkii? Taani zorinkka, neeni siyakka” yaagiis.

<sup>16</sup> Kawoi Sedeqiyaasi Ermmaasassi qosan hagaadan yaagidi caaqqiis; “Taani nena worennaagaanne qassi nena woranau koyiyaageetussikka aattada immennaagaa nuussi de7uwaa immida GODAA sunttan caaqqais” yaagiis.

<sup>17</sup> Yaagin Ermmaasi Sedeqiyaasau zaaridi, “GODAI, Ubbaappe Wolqqaama Xoossai, Israa7eela Xoossai hagaadan yaagees; ‘Baabiloone kawuwaa halaqatussi kushiya immikko, neeni paxa attana; ha katamaikka taman xuugettenna; neenikka ne keettaa asaikka paxa de7ana. <sup>18</sup> SHin neeni etassi kushiya immennan ixkikko, ha katamaa Baabilooneti omooddana; eti a xuuggana; neenikka etappe kessa ekkakka’ yaagees” yaagiis.

<sup>19</sup> Qassikka Kawoi Sedeqiyaasi Ermmaasa, “Taani yayyiyoogee ha biittaappe kaddidi, Baabiloonetukko biida Aihudatussa. Aissi giikko, Baabilooneti tana eta kushiyan aattidi immikko, Aihudati tana tuggayana” yaagiis.

<sup>20</sup> Ermmaasi zaaridi, “Aikko baawa! Eti nena etayyo aattidi immokkona. Taani yootiyo GODAA qaalaassi hayyanaa azazetta. Hegee neeyyo lo77o gidana; neenikka paxa attana. <sup>21</sup> SHin neeni kushiya immennan ixkikko, GODAI tana bessido ajuutai de7ees. <sup>22</sup> Hegeekka aibee giikko, Yihudaa kawuwaa keettan attida maccaasati ubbai omoodettidi, Baabiloone halaqatukko baana. Biiddi eti nena hagaadan yaagana; ‘Neeyyo mata lagge gidiyaageeti nena balettidosona; eti nena xoonidosona. SHin ha77i ne tohoi silimuwaa giddo gelin, he laggeti nena yeggidi biidosona’ yaagana. <sup>23</sup> Qassi ne keettaayetinne ne naati ubbai Baabiloonetun omoodettidi baana. Neenikka eta kushiyaappe kessa ekkakka; Baabiloone kawoi nena oiqqana. Ha katamaikka taman xuugettana” yaagiis.

<sup>24</sup> Yaagin Sedeqiyaasi Ermmaasau zaaridi, hagaadan yaagiis; “Hagaa neeni taayyo yootidoogaa asassi odana xayikko, neeni haiqqakka. <sup>25</sup> Halaqati taani nenaara haasayidoogaa siyidi yiidi, ‘Nenaara kawuwaara ai haasayidaakko, nuuyyo yoota. Neeni nuuyyo qottennan yootikko, nuuni nena worokko’ yaagidi nena oichchana. <sup>26</sup> Oichchikko neeni, ‘Taani he sohuwan haiqqennaadan, tana zaarada qasho keetta gidiya Yonaataana keettaa yeddennaadan, kawuwaa woossaas’ yaagada zaara” yaagiis.

<sup>27</sup> Hegaappe guyyiyan, halaqati ubbai Ermmaasakko yiidi, he oishaa oichchidosona. Kawoi a azazidoogaadan, ikka etayyo yootiis. Etikka co77u giidi aggididosona; aissi giikko, Ermmaasi kawuwaara haasayishin siyidabi ooninne baawa.

<sup>28</sup> Yerusalaamee ohettana wodee gakkanaashin, Ermmaasi naagiyaageetu dabaaban gorddettidi gam77iis.

## 39

### *Yerusalaame Kunddettaa*

*(Kawotu Maxaafaa Naa77anttuwaa 25:1-12; Ermmaasa 52:4-16)*

<sup>1</sup> Sedeqiyaasi Yihudan kawotido uddufuntta laittan, tammannta aginan, Baabiloone Kawoi Naabukadanaxoorinne a olanchchati ubbai yiidi, Yerusalaame dooddidosona.

<sup>2</sup> Sedeqiyaasi kawotido tammanne isiinintta laittan, oiddantto aginan, uddufuntta gallasan Baabiloone olanchchati katamaa gimbbiyaa menttidosona. <sup>3</sup> He wode Baabiloone kawuwaa halaqati, Nerggaali-SHareexera, Samggari-Neba, Sarssekiimanne hara Nerggaali-SHareexera geetettiyaageeti, hara cora halaqatuura issippe yiidosona; yiidi Giddo Penggiyaa giyo penggen uttidosona.

<sup>4</sup> Yihudaa Kawoi Sedeqiyaasinne a olanchchati ubbai Baabiloone olanchchata be7ido wode, qamman katamaappe kiyidi, kawuwaa ataakilttiyaa sohuwaa efiya ogyaa oiqqidi, naa77u dirssaa gimmbeta issippe gattiya penggiyaara baqatidosona. Eti Yorddaanoosa Dilbbaakko simmidi biidosona. <sup>5</sup> SHin Baabiloone olanchchati eta guyyeera yedettidi, Yarkko dembbaa gattiiddi, Sedeqiyaasa oiqqidosona. Oiqqidi Hamaata biittan, Ribila kataman de7iya Kawuwaa Naabukadanaxoorakko efiidosona. Efin Kawoi Naabukadanaxoori yan Sedeqiyaasa bolli pirddiis. <sup>6</sup> Qassi Sedeqiyaasa naata Sedeqiyaasi xeellishin, yan Ribila kataman woriis; Yihudaa halaqata ubbaakka woriis. <sup>7</sup> Hegaappe guyyiyan, Sedeqiyaasa aifeta wooci kessidi, a Baabiloone biittaa efaanau sanssalatan qachchiis.

<sup>8</sup> He wode Baabiloone olanchchati kawo keettaanne asai de7iyo keettata ubbaa taman xuuggidosona; Yerusalaame gimbbiyaakka qolidosona. <sup>9</sup> Kawuwaa naagiyaageetu halaqai Naabuzaraadaani kataman attida asatanne kaddidi banan gaittida asata ubbaa issippe omooduwan Baabiloone biittaa efiis. <sup>10</sup> SHin kawuwaa naagiyaageetu halaqai Naabuzaraadaani aibinne etau bainna hiyyeesatuppe amariidaageeta Yihudan aggidi, etayyo woiniyaa turaa sohotanne goyiyo gadeta immiis.

### *Ermmaasa Birshshettaa*

<sup>11</sup> Naabukadanaxoori kawuwaa naagiyaageetu halaqaa Naabuzaraadaana hagaadan yaagidi azaziis; <sup>12</sup> “Baada Ermmaasa koya demmada, ayyo koshshiyaabaa ubbaa ootta; a bolli hara iitabaa aibanne oottoppa” yaagiis. <sup>13</sup> Hegaa gishshau, Naabuzaraadaani, Naabushaazibaani, Nerggaali-SHareexerinne Baabiloone kawuwaa halaqati ubbai issippe gididi kiittidi, <sup>14</sup> Ermmaasa qashetti uttido, naagiyaageetu dabaabaappe kessidosona. Kessidi ba soo efidi wottana mala, Saafaana na7aa na7aa, Ahiqaama na7aa Gadaaliyaassi hadaraa immidosona. Hegaappe denddidaagan Ermmaasi ba biittaa asaara issippe de7iis.

### *Abemelekassi Odettida Kiitaa*

<sup>15</sup> Ermmaasi naagiyaageetu dabaaban gorddetti uttidaashin, GODAA qaalai akko hagaadan yaagiiddi yiis; <sup>16</sup> “Ba; baada Toophphe asa gididiya Abemelekassi hagaadan yaaga; ‘Ubbaappe Wolqqaama GODAI, Israa7eela Xoossai, hagaadan yaagees; “Hegaappe kase taani yootidoogaadankka ha katamaa bollan lo77obaa gidennan, bashshaa ehaana. Hegee ubbai haniyo wode, neenikka ha kataman uttada, ne aifiyan be7ana. <sup>17</sup> Gido shin, he gallassan taani GODAI nena wotta ekkana; neeni yayyiyo ne morkketu kushiyankka aadhdhada imettakka. <sup>18</sup> Taani nena ashshana; neeni olan haiqqakka; neeni tanan ammanettido gishshau, haiquwaappe attana. Taani GODAI haga odais” yaagees’ yaaga” yaagiis.

## 40

### *Ermmaasi Gadaaliyaara De7iis*

<sup>1</sup> Kawuwaa naagiyaageetu halaqai Naabuzaraadaani Ermmaasa Raaman birshshi simmin, GODAA qaalai Ermmaasakko yiis. Ermmaasi kase Naabuzaraadaani Yerusalaameppenne Yihudaappe omooddidi, Baabiloone biittaa efaanau sanssalatan qachchido asaa gidon de7ees.

<sup>2</sup> Kawuwaa naagiyaageetu halaqai Ermmaasa dumma kessidi, hagaadan yaagiis; “GODAI ne Xoossai ha bashshaa ha biittaa bollan ehaana giis. <sup>3</sup> Giidoogaadan ha77i ehiis; GODAA bollan intte nagaraa oottido gishshaunne ayyo azazettennan ixido gishshau, hagee ubbai haniis. <sup>4</sup> Be7a, ha77i taani ne kushiyan de7iya sanssalataa birshshada nena yeddaas. Tanaara Baabiloone biittaa baana giikko hindda; taani neeyyo koshshiyaabaa ubbaa kuttana. Baabiloone biittaa baanau koyana xayikko booppa. Biittai ubbai ne sinttan de7ees; nena lo77ida sohuwaa awanne ba” yaagiis.



<sup>5</sup> Ermmaasi a matappe biichchennan de7ishin, Naabuzaraadaani gujjidikka yaagiis; “Saafaana na7aa na7aa, Ahiqaama na7aa Gadaaliyaakko ba; aissi giikko, Baabiloone Kawoi Naabukadanaxoori a Yihudaa katamata haariyaagaa oottidi sunttiis. Hegaa gishshau, aara issippe gidada, hegan asaara de7a. Woikko nena lo77ida sohuwaa awanne ba” yaagiis. Hegaappe guyyiyan, kawuwaa naagiyaageetu halaqai au shin-qqiyaanne hara imota immidi yeddiis. <sup>6</sup> Ermmaasi Mixiphphan de7iya Ahiqaama na7aa Gadaaliyaakko biis. I hegan attida asaara issippe de7iis.

*Gadaalee Yihudaa Haariis*  
(*Kawotu Maxaafaa Naa77anttuwaa 25:22-24*)

<sup>7</sup> Yihudaa ola gadaawatuppenne olanchchatuppe amaridaageeti bantta kushiya Baabiloone kawuwaassi biron immiichchibookkona. Eti Baabiloone kawoi Gadaaliyaa he biittaa haariyaagaa oottidi sunttidoogaanne Baabiloone biittaa omoodettidi beennan Yihudan attida hiyyeesatussi halaqa oottidoogaa siyidosona. <sup>8</sup> Siyidi Nataaniyaa na7ai Isimaa7eeli, Qaareeha naati Yohanaaninne Yonaataani, Taanihumeeta na7ai Saraayi, Naxoofa katamaappe yiida Efaaya naatinne Maa7ika katamaappe yiida issi bitaniyaa na7ai Yazaanee bantta olanchchatu ubbaara Gadaaliyaakko Mixiphpha yiidosona. <sup>9</sup> Saafaana na7aa na7ai, Ahiqaama na7ai Gadaalee etayyo hagaadan yaagidi caaqqiis; “Baabiloonetuyyo kushiya immanau yayyoppite; ha biittan uttidi de7ite; Baabiloone kawuwaassikka haarettite. Yaatikko, mule ubbabi inttessi lo77o gidana. <sup>10</sup> Taani Mixiphphan uttada, Baabiloone biittaappe inttenaara gaittanau yiya ubbaara intte doona gidada haasayana. SHin intte intte de7iyo heeran heeran woiniyaa, wogaraa zaitiyaanne hara ofintta kattaa aifiyaa ubbaa shiishshidi dagayite” yaagiis.

<sup>11</sup> He wode Moo7aaba biittan, Amoonaa biittan, Eedooma biittaaninne hara biittatun de7iya Aihuda ubbai Baabiloone kawoi amarida Yihudaa asati Yihudan attana mala oottidoogaanne eta haariyaagaa oottidi Gadaaliyaa sunttidoogaa siyidosona. <sup>12</sup> Siyidi bantta laalettidi de7iyo biittatuppe Yihudaa simmidi, Gadaalee de7iyoosaa Mixiphpha yiidosona. Hegan eti daro woiniyaanne hara ofintta kattaa aifiyaa shiishshidi dagayidosona.

*Isimaa7eeli Gadaaliyaa Woriiis*

<sup>13</sup> Hegaappe guyyiyan, Qaareeha na7ai Yohanaaninne kushiya immibeenna ola gadaawati ubbai Gadaaliyaakko Mixiphpha yiidi, <sup>14</sup> “Amoonaa Kawoi Ba7aliisi Nataaniyaa na7aa Isimaa7eela nena worana mala yeddidoogaa erai?” yaagidosona. SHin i eti giyoogaa ammanennan ixxiis.

<sup>15</sup> Hegaappe guyyiyan, Qaareeha na7ai Yohanaani Mixiphphan de7iya Gadaaliyaakko yiidi, xuuran hagaadan yaagiis; “Ooninne erennan de7ishin baada, Nataaniyaa na7aa Isimaa7eela taani worana. Aissi giikko, i nena woriyaabaa gidikko, ne matan shiiqida Aihuda ubbai laalettana; qassi Yihudan attida asai ubbaikka wurana” yaagiis.

<sup>16</sup> SHin Ahiqaama na7ai Gadaalee zaaridi, hagaadan yaagiis; “Isimaa7eelabaa neeni odiyobai ubbai worddo gidiyo gishshau, hega malabaa oottoppa” yaagiis.

## 41

<sup>1</sup> Laappuntta aginan kawo zare gididi, kawuwaara oottiya halaqatuppe issi, El-ishamaa7a na7aa na7ai, Nataaniyaa na7ai Isimaa7eeli tammu asatuura issippe biittaa haariya Gadaaliyaara gaittanau Mixiphpha biis. Ubbai issippe uttidi qumaa miishin, <sup>2</sup> Nataaniyaa na7ai Isimaa7eelinne aara de7iya tammu asati bantta bisuwaa bisuwaa kessidi, Baabiloone kawoi Yihudaa haariyaagaa oottidi sunttido Ahiqaama na7aa Gadaaliyaa woridosona. <sup>3</sup> Hegaa bollikka qassi Isimaa7eeli Mixiphphan Gadaaliyaara de7iya Aihudatanne Baabiloone olanchchata ubbaa woriis.



<sup>4</sup> Gadaalee haiqqin wonttetta gallassi, a haiquwaa ooninne eranaappe kasetidi, <sup>5</sup> Sekeemappe, Seeloppenne Samaariyaappe hospupun tammu asati azzaniiddi, bantta buuchchaa meedidi, bantta maayuwaa pooshshidinne bantta bollaakka puuzidi yiidosona. Eti GODAA Beeta Maqidasiyau immiyo kattaa yarshshuwaanne ixaanaa imotaa ehiidosona. <sup>6</sup> Isimaa7eeli Mixiphphappe kiyidi, yeekkiiddi etan gaittanau biis; biidi etan gaittido wode, “Ahiqaama na7aa Gadaaliyaakko haa yiite; yiidi a be7ite” yaagiis. <sup>7</sup> Eti katamaa giddo geliyoorin, Isimaa7eelinne aara de7iya asati he asata woridi, ollan oli aggidosona.

<sup>8</sup> SHin he hospupun tammu asatuppe tammati Isimaa7eela hagaadan yaagidi woosidosona; “Hai nuna woroppa! Nuuni nu shooqan qosido daro gisttee, banggai, wogaraa zaiteenne eessai de7ees” yaagidosona. Yaagin i eta worennan yeddi aggiis. <sup>9</sup> Isimaa7eeli worido asaa ubbaa olido ollai, Israa7eela kawoi Baa7ishi olanau yiido wode, Kawoi Asi bookissido gita ollaa. Nataaniyaa na7ai Isimaa7eeli he ollaa ahan kunttiis. <sup>10</sup> Isimaa7eeli kawuwaa macca naatanne Mixiphphan attida asaa ubbaa omooddiis. Hegeeti kawuwaa naagiyaageetu halaqai Naabuzaraadaani Ahiqaama na7aa Gadaaliyaara issippe Mixiphphan wottidoogeeta. I eta omooddidi, banaara ekkidi, Amoona biittaa baanau denddiis.

<sup>11</sup> Qaareeha na7ai Yohanaaninne aara issippe de7iya ola gadaawati Isimaa7eeli oottido iitabaa ubbaa siyidosona. <sup>12</sup> Siyidi bantta asaa ekkidi, aara olettanau biidosona; Isimaa7eelakka Gabaa7oonan de7iya gita deelliyaa matan gakkidi oiqqidosona. <sup>13</sup> Isimaa7eeli omooddidi banaara efido asai ubbai Qaareeha na7aa Yohanaananne aara de7iya ola gadaawata be7ido wode, keehi ufaittidosona. <sup>14</sup> He omoodettidaageeti ubbai guyye simmidi biidi, Qaareeha na7aa Yohanaan gaittidosona. <sup>15</sup> SHin Isimaa7eelinne hara hospupun asati issippe Yohanaanappe kessi ekkidi, Amoona biittaa baqatidosona.

<sup>16</sup> Hegaappe guyyiyan, Isimaa7eeli Gadaaliyaa wori simmidi, Mixiphphappe omooddidi ehiido olanchchati, maccaasati, naatinne mureessati ubbai Qaareeha na7aa Yohanaanaaranne hara ola gadaawatuura denddidi biidosona. <sup>17-18</sup> Baabiloone kawoi haariyaagaa oottidi sunttido Ahiqaama na7aa Gadaaliyaa Isimaa7eeli worido gishshau, Baabiloonetussi yayyidosona; yayyidi Baabiloonetuppe baqatidi, Gibxxe baanau denddidosona. Biiddi Beetaliheeme matan de7iya Kimihaama giyo sohuwan shemppidosona.

## 42

### *Gibxxe Beennaadan GODAI Odiis*

<sup>1</sup> Ola gadaawati ubbai, Qaareeha na7ai Yohanaani, Hoshaaya na7ai Azaariyaasinne asai ubbai, guuttaappe gitaa gakkanaashin yiidi, <sup>2</sup> hananabaa yootiya Ermmaasa hagaadan yaagidosona; “Nuuni nena oichchiyoobaa nuussi oottarkkii! Ha attida nu gishshatau GODAA ne Xoossaa woossarkkii! Nuuni kase daro; shin ha77i neeni be7iyooogaadan, guuttatu xallai attida. <sup>3</sup> Nuuni biyo ogiyaanne nuuni oottanabaa i nuna bessanaadan, GODAA ne Xoossaa nu gishshatau woossa” yaagidosona.

<sup>4</sup> Hananabaa yootiya Ermmaasi zaaridi, “Lo77o. Intte giidoogaadankka, GODAA intte Xoossaa taani woossana; qassi intteppe aibanne qosennan, i yootiyooobaa ubbaakka intteyyo yootana” yaagiis.

<sup>5</sup> Eti zaaridi, Ermmaasau hagaadan yaagidosona; “GODAI ne Xoossai ne baggaara nuuyyo kiittiyooobaa ubbaa nuuni polana xayikko, GODAI ba huuphen nu bolli tumunne ammanettida markka gido. <sup>6</sup> Nuuni dosiyooobaa gidin, ixxiyoobaa gidinkka, nuuni nena akko kiittiyo GODAI nu Xoossai azaziyoobaa nuuni oottana. Aissi giikko, nuuni ayyo azazettikko, nuuyyo ubbabi lo77o gidana” yaagidosona.

<sup>7</sup> Tammu gallassaappe guyyiyan, GODAA qaalai Ermmaasakko yiis. <sup>8</sup> Yaatin, i Qaareeha na7aa Yohanaana, aara de7iya ola gadaawatanne asaa ubbaa, guuttaappe gitaa gakkanaashin xegidi, <sup>9</sup> hagaadan yaagiis; “Intte woosaa taani akko shiishshana mala, intte tana kiittido GODAI Israa7eela Xoossai hagaadan yaagees; <sup>10</sup> ‘Intte ha77i ha biittan uttikko, taani inttena keexxanaappe attin kolikke; tokkanappe attin, shoddikke. Aissi giikko, taani kase intte bollan ehiido iitabai tana azzanissiis. <sup>11</sup> Intte ha77i yayyiyo Baabiloone kawuwaassi ainne yayyoppite! Inttena a kushiyaappe ashshanau taani inttenaara de7iyo gishshau yayyoppite! Taani GODAI haga odais. <sup>12</sup> Taani intteyyo qarettana; yaatada i intteyyo qarettidi, inttena intte biittau zaaranaadan oottana’ yaagees.

<sup>13</sup> “SHin intte GODAASSI, intte Xoossaassi, azazettennan ixixidi, ‘Ha biittan uttokko’ giikko, <sup>14</sup> qassi intte, ‘Olaa woriyaanne olau punniyo malkkataa siyennasaaninne namisi bainnasaa Gibxxe biidi, yan de7ana’ giikko, <sup>15</sup> inttenoo Yihudan attidaageetoo, GODAI inttena giyoobaa siyite. Ubbaappe Wolqqaama GODAI, Israa7eela Xoossai hagaadan yaagees; ‘Intte Gibxxe biidi, yan de7anau qofaa qachchikko, <sup>16</sup> he intte yayyido olai Gibxxen inttena oiqqana; intte hirggido koshaikka inttena kaallidi baana; inttekka yan Gibxxen haiqqana. <sup>17</sup> Gibxxe biittaa biidi de7anau qofaa qachchida asai ubbai olan, woi koshan woikko boshan haiqqana. Taani eta bollan ehiyo iitabaappe issoinne kessi ekkenna; issoinne attenna’ yaagees.

<sup>18</sup> “Ubbaappe Wolqqaama GODAI, Israa7eela Xoossai hagaadan yaagees; ‘Yerusalaa-men de7iyaageetu bollan ta hanqqoinne ta yiilloi gukkidoogaadan, intte Gibxxe geliyo wode intte bollanka ta hanqqoi hegaadan gukkana. Intte dagama, cashsha, qangget-tanne qilliicciyoobaa gidana; ha sohuwaa naa77antto mulekka be7ekketa’ yaagees.

<sup>19</sup> “Yihudan attidaageetoo, GODAI inttena, ‘Gibxxe booppite!’ yaagiis. Taani hachchi inttena, ‘Ye77e!’ giidobaa erite. <sup>20</sup> Intte tana, ‘Nu gishshatau GODAA nu Xoossaa woosaa; i neeyyo yootiyoobaa ubbaakka nuuyyo yoota; nuuni oottana’ yaagidi, tana GODAAKKO, intte Xoossaakko, kiittideta; hegan gita balaa balideta. <sup>21</sup> Taani i giidoogaa ubbaa hachchi intteyyo yootaas. SHin GODAI intte Xoossai ta baggaara intteyyo kiittido qaalau intte azazettennan ixixideta. <sup>22</sup> Simmi haga erite: intte biidi de7anau koyiyo biittan intte olan, koshaaninne boshan haiqqidi wurana” yaagiis.

## 43

### *Ermmaasa*

<sup>1</sup> GODAI eta Xoossai kiittido qaalaa ubbaa Ermmaasi etayyo odidi wurssidoogaappe guyyiyan, <sup>2</sup> Hoshaya na7ai Azaariyaasi, Qaareeha na7aa Yohanaaninne otoranchcha asai ubbai Ermmaasa hagaadan yaagidosona; “Neni wordduwaa yootaasa! GODAI nu Xoossai nuuni Gibxxe biidi uttenna mala yootanau, nena nuukko mule kiittibeenna. <sup>3</sup> SHin Baabiloone biittaa asai nuna woranaadan woi omooddidi bantta biittaa efaanaadan, neeni nuna eta kushiyan aattada immana mala, nena nu bollan denttidaagee Neeriyaa na7aa Baaruka” yaagidosona.

<sup>4</sup> Hega gishshau, Qaareeha na7ai Yohanaani, ola gadaawati ubbainne asai ubbai Yihudaa biittan de7anau, GODAI eta azazido azazuwaa polennan ixixidosona. <sup>5</sup> Ixxidi Qaareeha na7ai Yohanaaninne ola gadaawati ubbai bantta laalettido kawotettatu ubbaappe Yihudan de7anau simmida Yihudaa asaa banttanaara ekkidi, Gibxxe biidosona. <sup>6</sup> Qassi kawuwa naagiyaageetu halaqai Naabuzaraadaani Saafaana na7aa, Ahiqaama na7aa Gadaaliyaara issippe de7ana mala ashshido attumaasata, maccaasata, naatanne kawuwa macca naata ubbaa efiidosona. Qassikka hananabaa yootiya Ermmaasanne Neeriyaa na7aa Baarukakka efiidosona. <sup>7</sup> Hegaadan hanidi, GODAI azazidoogaa ixixidi, Gibxxe biitti gelidi, Xaafinaasa giyo katamaa gakkanaashin biidosona.

<sup>8</sup> Xaafinaasan GODAA qalalai Ermmaasakko hagaadan yaagiiddi yiis; <sup>9</sup> “Gita shuchchata ne kushiyan oiqqa ekkada, Yihudaa asai be7ishin, Xaafinaasan de7iya Gibxxe kawuwaa keettaa geliyoosaappe sintta baggaara de7iya baasuwan mooga. <sup>10</sup> Moogada eta hagaadan yaaga; ‘Ubbaappe Wolqqaama GODAI, Israa7eela Xoossai hagaadan yaagees; “Taani kiittada, ta ashkkaraa Baabiloone Kawuwaa Naabukadanax-oorra ehiissana; ehiissada ha moogettida shuchchatu bollan a kawotaa araataa wottana. Yaatobare i ba kawotaa dunkkaaniyaa a bollan essana. <sup>11</sup> I yiidi Gibxxe biittaa olana. Haiquwau de7iyaageeti haiqqana; omooduwau de7iyaageetikka omoodettana; qassi olan haiqqanau de7iyaageetikka olan haiqqana. <sup>12</sup> Gibxxe xoossatu keettata i taman oittana; eeqatakka xuuggana, woikko omooduwau ekkidi efaana. Henttanchchai ba calaa maayiyoogaadan, i Gibxxe biittaa maayana. Yaatidi hegaappe saro baana. <sup>13</sup> Gibxxe biittan Heliyopoliisa giyo kataman de7iya hawulttiyaa i mentterettana; Gibxxe xoossatu keettakka taman xuuggana” yaagees’ yaaga” yaagiis.

## 44

### *Gibxxen De7iya Aihudatussi Odettida GODAA Qaalaa*

<sup>1</sup> Gibxxe biittan Migidoola, Xaafinaasanne Memppisa geetettiya katamatuuninne tohossa baggaara de7iya Patiroosa biittan de7iya Aihudata xeelliaagan GODAA qalalai Ermmaasakko hagaadan yaagiiddi yiis; <sup>2</sup> “Ubbaappe Wolqqaama GODAI, Israa7eela Xoossai, hagaadan yaagees; ‘Yerusalaame bollaanne Yihudaa katamatu ubbaa bollan taani ehiido bashshaa ubbaa intte intte huuphen be7ideta. Eti hachchi gakkanaashin, koletti uttidosa; ooninne yan de7enna. <sup>3</sup> Hegee hanidoogee eti iita oosuwaa oottidi, tana hanqgetissido gishshaassa. Eta gidin, inttena gidin, woi intte maizza aawata gidin, ooninne erenna hara xoossaassi ixaanaa cuwayidi, ayyo goinnidosona. <sup>4</sup> “Hagaa malaa taani GODAI ixxiyo sheneyiyaabata oottoppiti!” yaagidi yootana mala, zaara zaarada ta ashkkarata, hananabaa yootiyaageeta, kiittaas. <sup>5</sup> SHin odioogaa eti siyennan woikko ezggennan ixxidosa. Eti hara xoossatuyyo ixaanaa cuwayiyo iita oosuwaa aggennan ixxidosa. <sup>6</sup> Hegaa gaasuwan ta suulliia hanqqoinne yiilloi tigettiis; tigettidi Yihudaa katamatuuninne Yerusalaame ogetun eexxiis. Etikka hachchi intte be7iyooogaadan, kolettidaageetanne baises gididosona’ yaagees.

<sup>7</sup> “Ha77ikka GODAI, Ubbaappe Wolqqaama Xoossai, Israa7eela Xoossai, hagaadan yaagees; ‘Intteyyo zerettaa attena mala, maccaasaa, attumaasaa, naatanne yoogata Yihudaa biittaappe xaissanaadan, ha pala iitabaa intte intte bolli aissi ootteetii? <sup>8</sup> Intte de7anau gelido ha Gibxxe biittan hara xoossatuyyo ixaanaa cuwayiyoogan tana aissi hanqgetisseetii? Woikko sa7an de7iya kawotettatu ubbaa gidon qangget-tanne bore gididi, intte huuphiyaa bashshanau aissi koyeetii? <sup>9</sup> Kase intte aawati, Yihudaa kawotinne eta keettaayeti, qassi inttenne intte keettaayeti Yihudaa katamatu-uninne Yerusalaame ogetun oottido iitatettaa ubbaa dogidetiiyye? <sup>10</sup> Intte hachchi gakkanaashin, inttenatettaa ziqqissibeekketa; taassikka yayyibeekketa. Qassi taani inttessinne intte maizza aawatussi immido higgiaanninne wogan bibeekketa’ yaagees.

<sup>11</sup> “Hegaa gishshau, Ubbaappe Wolqqaama GODAI, Israa7eela Xoossai, hagaadan yaagees; ‘Be7ite, bashshaa ehaanaayyo, Yihudan de7iya inttena ubbaa muleera xais-sanaayyo taani qofaa qachchaas. <sup>12</sup> Yihudan attidaageetu giddoppe, Gibxxe bi-idi, yan de7anau qofaa qachchidaageeta taani xaissana. Eti ubbai Gibxxen wu-rana; olaanne koshan haiqqana. Gitaappe guutaa gakkanaashin de7iya ubbai olaanne koshan wurana. Eti dagama, cashsha, qanggetanne qilliicciyoobaa gidana. <sup>13</sup> Taani Yerusalaame olan, koshaanne boshan qaxxayidoogaadan, Gibxxe biittan de7iyaageetakka qaxxayana. <sup>14</sup> Yihudan attidaageetuppe Gibxxe biidi de7iyaageeti mulekka kessi ekkokkona. Eti simmidi yiidi de7ana giidi amottiyo Yihudaa biittaa ai

asinne simmenna; haiquwaappe palahida issi amara asaappe attin, simmidi yaana hara asi de7enna' yaagees" yaagiis.

<sup>15</sup> Yaagin bantta maccaasati hara xoossatuyyo ixaanaa cuwayiyoogaa eriya atumaasati ubbainne hegan eqqida maccaasati ubbai gita maabara gididi, Gibxxen tohossa baggaara de7iya Patiroosa giyoosan de7iya asai ubbai Ermmaasa hagaadan yaagidosona; <sup>16</sup> "Neeni GODAA sunttan nuuyyo yootiyoobaa ubbaa nuuni siyokko. <sup>17</sup> Nuuni oottana giidobaa ubbaa oottana. Nuuni, nu maizza aawati, nu kawotinne nu halaqati Yihudaa katamatuuninne Yerusalaame ogetun kase oottidoogaadan, Saluwaa Kawiyo geetettiya nu xoosseessi ixaanaa cuwayana; ushshaa yarshshuwaakka iyyo gussana. Aissi giikko, nuuni kase heгаа oottiyo wode, nuuyyo daro qumai de7ees; he wode nuuyyo sa7ai keha; nuna aibinne metibeenna. <sup>18</sup> SHin Saluwaa Kaweessi ixaanaa cuwayiyoogaanne ushshaa yarshshuwaa gussiyooogaa aggoosappe haa simmin, nuuyyo ubbabaikka pacciis; nuuni olaaninne koshan wurida" yaagidosona.

<sup>19</sup> Maccaasati gujjidikka hagaadan yaagidosona; "Nuuni Saluwaa Kawiyo milatiya oittaa uukkiyo wode, ixaanaa cuwayiyo wodenne ushshaa yarshshuwaa iyyo gussiyoo wode ubban, nu azinati erennan de7ishin, nuuni oottidobi aibinne baawa" yaagidosona.

<sup>20</sup> Ayyo hegaadan giidi zaarida asau ubbau, maccaunne attumau, Ermmaasi hagaadan yaagiis; <sup>21</sup> "Inttenne intte maizza aawati, intte kawotinne intte halaqati, qassi biittan de7iya asai ubbai Yihudaa katamatuuninne Yerusalaame ogetun ixaanaa cuwayidoogaa GODAI erenna woikko dogiis giidi qoppeetii? <sup>22</sup> Intte oottiyo iitanne sheneyiya oosuwaa GODAI co77u gaanau danddayibeenna gishshau, intte biittaa moorettida, baisanne qanggettida biitta oottiis. Hachchi intte be7iyooogaadan, intte biittai asi de7enna biitta gidiiis. <sup>23</sup> Ha bashshai ubbai inttena gakkidoogee intte hara xoossatuyyo ixaanaa cuwayido gishshaassa, GODAA naaqqido gishshaassa, GODAA qaalaa siyennan ixido gishshaassanne a higgiaassinne a wogaassi azazettennan ixido gishshaassa" yaagiis.

<sup>24</sup> Hegaappe guyyiyan, Ermmaasi asau ubbau, maccaunne attumau hagaadan yaagiis; "Inttenoo, Yihudaappe yiidi, Gibxxe biittan de7iya asatoo, ubbaikka GODAI giyoobaa siyite! <sup>25</sup> Ubbappe Wolqqaama GODAI, Israa7eela Xoossai, hagaadan yaagees; 'Inttenne intte keettaayeti, "Nuuni Saluwaa Kaweessi ixaanaa cuwayana; ushshaa yarshshuwaakka iyyo gussana" giidi caaqqido caaquwaa polidi, oosuwaa bessideta. Ha77ikka gidikko, intte caaquwaa minttitenne polite' yaagees.

<sup>26</sup> "Gidikonne, inttenoo, Gibxxe biittan de7iya Yihudaa asatoo, GODAI giyoobaa siyite! GODAI hagaadan yaagees; 'Hagaappe hini baggan Gibxxe biittan de7iya Yihudaa asaappe issoinne ta sunttan, "Ubbaa Haariya GODAI ero!" giidi caaqqenna mala, taani ta gita sunttan caaqqaaas. <sup>27</sup> Taani eta bolli lo77obaa ehaanaassi gidennan, iitabaa ehaanaassi xeellais. Gibxxen de7iya Yihudaa asai muleera wurana gakkanaashin, olaaninne koshan haiqqana. <sup>28</sup> SHin olaappe attida issi amaridaageeti Gibxxeppe Yihudaa simmana. He wode Gibxxen de7iya Yihudaa asai ta qaalaappenne eta qaalaappe oogee tumattidaakkonne akeekidi erana.

<sup>29</sup> "Taani inttena ha sohuwan qaxxayanaagaunne, "Taani intte bolli iitabaa ehaana" giidoogee tumattanaagau, taani GODAI intteyyo malaataa immais: <sup>30</sup> taani Yihudaa Kawuwaa Sedeqiyaasa ayyo morkke gididi, a woranau koyiya Baabiloone Kawuwaa Naabukadanaxoorassi aattada immidoogaadan, Gibxxe Kawuwaa Hofirakka a woranau koyiya a morkketussi aattada immana. Taani GODAI hagaada odis' yaagees" yaagiis.



<sup>1</sup> Yoosiyaasa na7ai Yo7aqeemi Yihudan kawotido oiddantto laittan, Neeriyaa na7ai Baaruki ha qaalata Ermmaasi yootin siyidi, maxaafan xaafiis. He wode Ermmaasi ayyo yootido qaalai haggaa. <sup>2</sup> “Baarukaa, nena GODAI, Israa7eela Xoossai hagaadan yaagees; <sup>3</sup> ‘Neeni, “GODAI ta sahuwaa bollan azzanuwaa gujjido gishshau, aayyee tanoo! Taani yeehuwan daafurada shemppuwaakka xayaas” yaagadasa’ yaagees.

<sup>4</sup> “Baarukaa, nena GODAI hagaadan yaagees; ‘Taani keexxidoogaa taani qolana; taani tokkidoogaakka taani shoddana. Hegaakka qassi taani biittan sa7an ubban oottana. <sup>5</sup> Yaatin, neeni neeyyo gitabaa koyaiyye? Hegaa koyoppa. Aissi giikko, asaa ubbaa bollan taani iitabaa ehaana. Taani GODAI haggaa odais. SHin neeni biidosan ubban taani nena haiquwaappe ashshana’ yaagees” yaagiis.

## 46

### *Gibxxe Pirddaa*

<sup>1</sup> Kawotettatubaa odanau GODAI Ermmaasassi kiittido qaalai haggaa. <sup>2</sup> Yo7aqeemi Yihudan kawotido oiddantto laittan, Efiraaxiisa SHAafaa matan, Karkkamiisha giyo sohuwan, Baabiloone Kawoi Naabukadanaxoori xoonido Gibxxe Kawuwaa Nako olanchchatubaa GODAI hagaadan yaagees; <sup>3</sup> “Gibxxe ola gadaawati hagaadan yaagidi garmmaamoosona; ‘Intte wogga gonddalliyaanne qeeri gonddalliyyaa giigissite; giigis-sidi olau salppite! <sup>4</sup> Intte paraa bixaalidi toggite; intte huuphiyan birata qophiyaa wottidi, intte sohuwaa sohuwaa oiqqite! Intte tooraa leefite; intte ola maayuwaakka maayite!’ yaagoosona.

<sup>5</sup> “SHin hagee taani be7iyoogee aibee? Gibxxe olanchchati yayyidi, guyye sim-midosona. Wolqqaamati xoonettidosona; xoonettidi guyyenne xeellennan eesotidi baqatidosona. Eta yuusho ubban dagamai de7ees! Taani GODAI haggaa odais. <sup>6</sup> Eesotidi woxxiyaageeti kessi ekkanau danddayokkona; mino olanchchatikka attanau dand-dayokkona. Huuphessa bagga biittan, Efiraaxiisa SHAafaa matan ubbaikka xubettidi kunddi aggoosona.

<sup>7</sup> “Hegee Naile SHAafai kixxidi, yuushuwaa ubbaa kumiyoogaadan, biitta ubbaa kumidaagee oonee? <sup>8</sup> Hegee Naile SHAafai kixxidi, yuushuwaa ubbaa kumiyoogaadan, biitta ubbaa kumidaagee Gibxxe! Gibxxee hagaadan yaagees; ‘Taani kixxada, biittan sa7an eellana; katamatanne katamatun de7iya asaa ubbaa bashshana. <sup>9</sup> Paratoo, piri-ixite! Paraa gaareta laaggiyaageetoo, eesuwaa laaggite! Gonddalliyyaa oiqqida Tooph-phiyaappenne Liibiyaappe<sup>3</sup> yiida olanchchatoo, kiyite! Lidiyaappe yiida wonddafiyyaa dukettan loohida olanchchatoo, woraajjite!’ yaagees” yaagiis.

<sup>10</sup> He gallassai Godai, Ubbaappe Wolqqaama GODAA gallassa, GODAI ba morkketu bollan haluwaa kiyiyo gallassa. A bisoi kallana gakkanaashin, eta maana; alana gakkanaashinkka eta suutaa uyana. Aissi giikko, Godai, Ubbaappe Wolqqaama GODAI huuphessa bagga biittan, Efiraaxiisa SHAafaa matan eta yarshsho oottidi ekkana.

<sup>11</sup> Inttenoo, Gibxxe asatoo, Gala7aade biittaa biidi, intteyyo tiyettiyo xaliyaa demmite. Gido shin, intte coo mela xaliyaa darisseetappe attin, intteyyo paxoi mule baawa.

<sup>12</sup> Intte yeellaa kawotettati siyidosona; intte yeekkiyo yeehuwaa biittai sa7ai siyiis. Aissi giikko, intte olanchchati issoi issuwan xubettidi, mulee issippe kunddidosona.

### *Naabukadanaxoora Yuussaa*

<sup>13</sup> Baabiloone Kawoi Naabukadanaxoori Gibxxe biittaa olanau yiyo wode, GODAI hananabaa yootiya Ermmaasassi yootido qaalai haggaa: <sup>14</sup> “Haggaa Gibxxen yoota; qassi Gibxxe katamatun Migidoolan, Memppisaaninne Xaafinaasan awaajja. ‘Olai intte yuushuwan de7iya asaa ubbaa wurssiiddi de7iyo gishshau, denddi eqqidi giigettite!’ yaaga. <sup>15</sup> Intte wolqqaama xoossai Aphphisi aissi kunddidee? GODAI a sugido gishshau

<sup>3</sup> 46:9 Liibiyaappe: Ibraawettuwan “Puuxa” geetettees.



kunddiis. <sup>16</sup> Intte olanchchati xubettidi kunddidosona. Kunddidi issoi issuwaa, ‘Dend-dite! Denddidi ha morkkiyaa bisuwaappe attanau, nu asaakko, nu biitti ane simmoos’ yaagoosona. <sup>17</sup> Eti yan Gibxxe kawuwaa, ‘Ba wodiya coo wurssiya odanchchaa’ giidi sunttana” yaagiis.

<sup>18</sup> Ubbaappe Wolqqaama GODAA geetettiya Kawoi hagaadan yaagees; “Taani ta de7uwan caaqqais: deretu gidduwan Taaboora Deree, woikko abbaa lanqqiyan de7iya Qarmmeloosa Deree aduqqiyoogaadan aduqqiya morkkee intte bolli yaana. <sup>19</sup> Inttenoo, Gibxxe biittan de7iyaageetoo, omooduwan baanau giigite. Aissi giikko, Memppisa katamai kolettidi, ooninne de7enna bazzo gidana.

<sup>20</sup> “Gibxxe biittai lo77iya ussee mala; shin huuphessa bagga biittaappe yiya boxiyan a saxettana. <sup>21</sup> Gibxxen qaxarettida olanchchati modhdhida mirggotu mala. Ee, etikka issippe guyye simmidi baqatidosona; eti bantta sohuwan eqqibookkona. Aissi giikko, eta bashshaa gallassai, eti qaxxayettana wodee gakkiiichchiis.

<sup>22</sup> “Morkketi wolqqan woraajjiyo wode, Gibxxe asai baqatiya shooshshaadan solddana; he morkketi mittaa qanxxiya asatudan, kalttaa ekkidi, a bolli yaana. <sup>23</sup> Yiidi asai sixima woraa qeexidi xaissiyooogaadan, Gibxxe asaa siifi wurssana. Taani GODAI haggaa odais. Morkketu qoodai booliyaappekka corattees; eta qoodanau danddayettana. <sup>24</sup> Gibxxe asai kauyyana; huuphessa baggappe yiya asatu kushiyanikka aadhdhidi imettana” yaagees.

<sup>25</sup> Ubbaappe Wolqqaama GODAI, Israa7eela Xoossai hagaadan yaagees; “Taani Teebisa katamaa xoossaa Amoonaa, Gibxxe kawuwaa, Gibxxe biittaanne Gibxxe xoossata, Gibxxe kawotanne Gibxxe kawuwan zempipiyaageeta ubbaa qaxxayana. <sup>26</sup> Eta woranau koyiya Baabiloone Kawuwaa Naabukadanaxoora kushiyaanne a olanchchatu kushiyan aattada immana.

“Hegaappe simmin, Gibxxe biittai kaseegaadan asi de7iyo biitta gidana. Taani GODAI haggaa odais.

### *GODAI Ba Asaa Ashshana*

<sup>27</sup> “Inttenoo, ta ashkkaaratoo, Yaaqooba zaretoo, yayyoppite! Inttenoo, Israa7eelatoo, dagammoppite! Intte haahosan de7ishin, taani inttena ashshana; intte zaretakka eti omoodettido biittaappe yedissana. Yaaqooba zareti simmidi, aibakko bochchennan saro de7ana. Eta ai asinne yashissenna. <sup>28</sup> Inttenoo, ta ashkkaaratoo, Yaaqooba zaretoo, taani GODAI inttenaara de7iyo gishshau, yayyoppite! Taani inttena laalido kawotettata ubbaa muleera xaissana; shin inttena muleera xaissikke. Taani inttena likke pirddan qaxxayana; qixaatee bannan inttena muleera coo yeddikke. Taani GODAI haggaa odais” yaagees.

## 47

### *Pilisxeema Pirddaa*

<sup>1</sup> Gibxxe kawoi Gaaza olanaappe kasetidi, Pilisxeema biittaa xeelliyaagan GODAAPPE hananabaa yootiya Ermmaasakko yiida qaalai haggaa. <sup>2</sup> GODAI hagaadan yaagees; “Be7ite, huuphessa bagga biittappe haattai xuuqqananne di7oi gelido kixa haattadan goggana. Goggidi biittaanne biittaa bollan de7iyaabaa ubbaa, katamatanne katamatu giddon de7iya asaa ubbaakka muukkana. Yaatabare asai waassana; he biittan de7iya ubbai yeekkana. <sup>3</sup> Aissi giikko, eti paratu kottiyaa, paraa gaaretu giirettaanne gaaretu irzzotu gonddorssaa siyana; siyidi aawati bantta kushee arggaacido gishshau, bantta naata maaddanau guyye simmikkona. <sup>4</sup> Pilisxeema asaa xaissanaanne Xiirsoosanne Sidoona maaddanau attidaageeta biittaappe xaissanau wodee gakkiiis. GODAI Pilisxeema asata, hegeetikka Meediteraane Abbaa xanxxan attida Kafittoore zareta xaissana hanees. <sup>5</sup> Gaaza asai gita kayyuwaa kayyottiis; Asqqaloona

asaikka sirphphi giis. Inttenoo, abbaa xanxxa garan attidaageetoo, intte aude gakkanaashin, intte bollaa qanxxerettiiddi kayyottuuteetii?

<sup>6</sup>“Intte, ‘Nenoo GODAA bisuwau, neeni co77u geennan ixxyoogee aude gakkanaashinee? Ne shoohuwau simma gela! Co77u gaada shemppa!’ yaageeta. <sup>7</sup>SHin GODAI a azazirggin, i waani co77u go geetii? Asqqaloona bollinne abbaa xanxxa biittan de7iya asaa bolli i a sunttirggiis” yaagees.

## 48

### *Moo7aaba Pirddaa*

<sup>1</sup> Moo7aaba biittaa xeelliaagan Ubbaappe Wolqqaama GODAI, Israa7eela Xoossai hagaadan yaagees; “Nabo katamaassi aayye7ana! Aissi giikko, i bayana. Qiriyaataima katamai kauyyananne omoodettana; eta qatotikka kauyyananne meqerettana. <sup>2</sup> Hagaappe hini baggan Moo7aaba ceeqoi xayana. Aissi giikko, Haseboona kataman de7iya asai Moo7aaba bolli, ‘Haayite! He biittaa ane muleera xaissoos’ yaagidi iitabaa maqettiis. Nenoo, Maadimeena katamau, nenakka sirphphi oottana; ne geeduwaa olai kaallana.

<sup>3</sup>“Horonaima asai, ‘Laalettainne wolqqaama bashshai gakkiiis’ yaagidi waassiyo waa-suwaa siyite! <sup>4</sup> Moo7aabi meqerettana; a naati yeekkiyo yeehuwaa siyite! <sup>5</sup> Eti yeekkiiddi, Luhuuta pudettaa kiyana; Horonaima dugettaakka bashshau waassiyaageetu waa-suwaa siyiiddi wodhdhana. <sup>6</sup> Eti issoi issuwaa, ‘Baqatite! Bazzon de7iya harddiidaan woxxidi, intte shemppuwaa ashshite!’ yaagana.

<sup>7</sup> “Nenoo, Moo7aaba biittau, neeni ne wolqqaaninne ne duretettan ceeqettido gishshau, neenikka omoodettana. Qassi Kamoosha giyo xoossaikka ba qeesetuuranne ba halaqatuura issippe omoodettidi, harasaa baana. <sup>8</sup> GODAI yootidoogaadan, katamata ubbaa xaissiyaagee yaana; issi kataminne attenna; wombbainne dembbai ubbai issippe xayana. <sup>9</sup> Moo7aabayyo i paallidi attiyo qefiyaa immite. A katamati ubbai baisa gidana; issi asinne etan de7enna.

<sup>10</sup> “GODAA oosuwaa shenehoo giidi oottiya urai qanggettidaagaa gido! GODAI azazi wottin, suutta gussennaadan ba bisuwaa teqqiya uraikka qanggettidaagaa gido!

<sup>11</sup> “Moo7aabi yelagatettaappe doommidi, ishaluwan de7ida asa mala; i hara biittau omoodettibeenna. Moo7aabi baattaappe baattau tigettennaaninne qaaxxennan, mal77oi laamettennaaninne sawoi aggennan, uttidi de7i bayida woine eessaa mala. <sup>12</sup> Moo7aaba aatti yeggiyaageeta taani GODAI kiittiyo gallassati yaana. Eti a aatti yeggidi, baattaappe cinggiriishana; cinggiriishidi, a baattaa mentterettana. <sup>13</sup> Yaatin, Israa7eela asai ba ammanettido, Beeteelen de7iya eeqan kauyyidoogaadan, Moo7aaba asaikka ba xoossan Kamooshan kauyyana.

<sup>14</sup> “Intte, ‘Nuuni wolqqaama asanne mino olanchcha’ giidi aissi ceeqetteetii? <sup>15</sup> Be7ite, Moo7aaba biittainne yan de7iya katamati bayidosona. A yelaga attumaasatikka shuhettanau duge biidosona. Taani Kawoi, Ubbaappe Wolqqaama GODAA geetetiyaagee haggaa odais. <sup>16</sup> Moo7aaba bashshai matattiis; tuggai a bollan yiyo wodeekka eesotiiddi gakkiiis.

<sup>17</sup> “A yuushuwan de7iya asau, a gitatettaakka eriya ubbau, ‘Mino gidida kawotaa xam77ai waani meqqidee! Bonchchettida xam77ai waani kinchchettidee!’ yaagidi zilaalite.

<sup>18</sup> “Inttenoo, Diboona kataman de7iyaageetoo, intte bonchcho sohuwaappe wodhdhidi, mela biittan uttite. Aissi giikko, Moo7aaba xaissiyaagee intte bollankka yaana; intte qatuwaa ubbaakka laalana.

<sup>19</sup> “Aaro7era kataman de7iyaageetoo, ogiyaa doonan eqqidi xeellite; kessi ekkidi baqatiya attumaasaanne maccaasaa, ‘Aibee kiyidai?’ yaagidi oichchite.

<sup>20</sup> “Oichchobare eti, ‘Moo7aabi meqqido gishshau kauyyiis; ayyo yeekkittenne zi-laalite! Moo7aabi bayidoogaa Arnnoona SHaafaa lanqqiyan awaajjite!’ yaagidi zaarana.

<sup>21</sup> “Gezziyan de7iya Holoona, Yaahixa, Mefa7aata, <sup>22</sup> Diboona, Nabo, Beeti-Dibilaataima, <sup>23</sup> Qiriyaataima, Beeti-Gamuula, Beeti-Ma7oona, <sup>24</sup> Qiriyootanne, Booxira geetettiya katamatu bollaanne mataanne haahuwan de7iya Moo7aaba katamatu bollan pirddai yiis. <sup>25</sup> Moo7aaba kacee qanxxettiis; a qeseekka meqqiis. Taani GODAI haggaa odais.

<sup>26</sup> “GODAA bollan otorettido gishshau, Moo7aaba ushshidi mattoyite. Mattoyin ba cooyido cooshshaa bollan gondoretto; asai ubbaikka a bollan qilliicco. <sup>27</sup> Kase neeni Israa7eela bollan qilliiccabekkii? Abaa haasayiyo wode, neeni karada huuphiyaa qaattidoogee Israa7eeli kaisotu giddoppe oiqettiineeyye?

<sup>28</sup> “Inttenoo, Moo7aabann de7iyaageetoo, katamaappe kiyi biidi, shuchchaa kooppuwaa gidдон de7ite. Aafuwaa doonan ba keettaa keexxiya haraphphee mala gidite. <sup>29</sup> Moo7aabi keehi otorettiis; Moo7aaba asai ai keenaa ayyiyaakko, minddatiyaakkonne otorettiyaakko, qassi banttana eti ai keenaa xoqqissi wottidaakko, taani siyaas. <sup>30</sup> Taani GODAI eta minddaa erais; shin ainne maaddenna; eta ceeqoikka aibakka ootenna. <sup>31</sup> Hegaa gishshau, taani Moo7aabassi waassais; Qiirihereesa asaasikka kayyottada yeekkais.

<sup>32</sup> “Inttenoo, Siibima asau, Yaa7izeera asaassi yeekkiyoogaappe aattada taani inttessi yeekkais. Intte tashee daayidi, Maxine Abbaa pinnidi, Yaa7izeera gakkida woiniyaa turaa mala; shin intte ofintta teeraanne intte woiniyaa wurccuwaa bonqqiyaageeti yiidi xaissirggidosona. <sup>33</sup> Lo77o kattai aifiyo Moo7aaba biittaappe pashkkainne ufaissai ekettiichchiis. Woiniyaa teeraa gum77iyo sohotuppekka woine eessai goggennaadan teqqarggaas. Ooninne naa77antto a ililiiddi gum77enna. Asaa cenggurssai siyettikkokka, ufaissa cenggurssa gidenna.

<sup>34</sup> “Eti Haseboonaanne El77aalen waassiyoo waasoi Yahaaxa gakkanaashin siyettees. Qassi Xoo7aaroppe biidi, Horonaimanne Egilaati-SHaliishiyaa gakkanaashin siyettees. Harai atto Nimiriima haattaikka meliis.

<sup>35</sup> “Taani Moo7aabann asai goinniyo xoqqa sohotun yarshshiyaageetanne bantta xoossatussi ixaanaa cuwayiyaageeta xaissana. Taani GODAI haggaa odais. <sup>36</sup> Eti kase demmido duretettai ubbai ha77i xayichchido gishshau, ta wozanai Moo7aabassinne Qiirihereesa asaassi baliyan yeekkiya asadan yeekkees. <sup>37</sup> Eti ubbai bantta huuphiyaanne bantta buuchchaa meedidosona; bantta kushiyaakka qanxxidi masunxxisidosona; qassi bantta xeessankka waaruwaa gixxidosona. <sup>38</sup> Moo7aabann de7iya keetta ubbaanne dabaaban yeehoppe attin, harabi baawa. Aissi giikko, Moo7aaba taani ooninne koyenna otodan menttaas. Taani GODAI haggaa odais.

<sup>39</sup> “Moo7aabi aiba meqo meqqidee! A asainne aiba waaso waassii! Moo7aabi yeellatiiddi, ba zokkuwaa wora aiba zaaro zaarii! Hegaa gishshau, Moo7aabi ba yuushuwan de7iya ubbatussi miicciyoobaanne dagammiyoobaa gidiis” yaagees.

<sup>40</sup> GODAI haggadan yaagees; “Argganttai ba qefiyaa pididi ootti paalliiddi yiyooogaadan, morkkee Moo7aaba bollan yaana. <sup>41</sup> A katamati ohettana; a qatotikka ekettana. He gallassi Moo7aaba mino olanchchatu wozanaikka maaretai oiqqido maccaasee wozanaa mala gidana. <sup>42</sup> Moo7aabi ta bollan, GODAA bollan makkalido gishshau xayana; haggaaappe sinttau i kawotetta gidenna.

<sup>43</sup> “Inttenoo, Moo7aabann de7iyaageetoo, yashshiyaabai, ollainne piree inttena naagees. Taani GODAI haggaa odais. <sup>44</sup> Yashshiyaabaappe baqatidi woxxiya ooninne ollan kunddana; qassi ollaappe pude kiyiya ooninne piriyan ohettana. Aissi giikko, taani Moo7aaba qaxxayiyo wodiyan hegaa oottana. Taani GODAI haggaa odais.

<sup>45</sup> “Baqatidi biidaageeti wolqqa xayidi, Haseboona katamaa kuwan eqqidosa. Aissi giikko, Haseboona katamaappe tamai, qassi Kawoi Sihooni beni de7ido keettaappe laco kiyidi, Moo7aaba biittaa ubbaanne an de7iya makkalanchcha asaa maana. <sup>46</sup> Moo7aaba asau, intteyyo aayye7ana! Kamoosha giyo xoossaassi goinniyaageeti xayidosona; eta attuma naatinne macca naati omoodettidi biidosona.

<sup>47</sup> “Gidikkonne, wurssetta wodetun taani Moo7aaba asaassi zaarada sa7aa ishalisana. Taani GODAI haggaa odais” yaagees.

Moo7aaba bolli odettida hiraagai hagan wuriis.

## 49

### *Amoona Pirddaa*

<sup>1</sup> Amoona asaa xeelliyaaagan GODAI haggadan yaagees; “Israa7eelassi attuma na7i baawee? Woikko laattiyaaabi baawee? Yaatin, Molooka giyo xoossau goinniya asati Gaada biittaa aissi oiqqidonaa? Eta katamankka aissi uttidonaa? <sup>2</sup> Amoona asai de7iyoo Raaba katamaa bollan olaa waasoi siyettanaadan, taani GODAI oottana gallassati yaana. He katamai qolettidi, baysa attana. A yuushuwan de7iyoo qeeri katamatikka taman xuugettana. Israa7eela asaikka bana ba laataappe yedettidaageeta yedettana. Taani GODAI haggaa odais.

<sup>3</sup> “Inttenoo, Haseboona asatoo, Aaya katamai kolettiichchido gishshau zilaalite! Inttenoo, Raaba asatoo, yeekkite! Waaruwaa maayidi kayyottite! Qassi wozanaa bayidi, katamaa gimbbiyaa gidдон woxerettite! Aissi giikko, intte xoossai Molooki ba qeesetuuranne ba halaqatuura omoodettana. <sup>4</sup> Inttenoo, ammanoi banna asatoo, intte, ‘Nu bollan ooni woraajji?’ yaagidi intte duretettaanne intte aradda wombbatun aissi ceqetteetii? <sup>5</sup> Taani ne yuushuwan de7iyaaageeti ubbai nena dagantanaadan oottana. Taani Godai, Ubbaappe Wolqqaama GODAI haggaa odais. Intte ubbaikka kiyidi baqatana; qassi baqatidi biidaageeta shiishshiyaaabi xayana.

<sup>6</sup> “Gidikkonne, wurssetta wodetun taani Amoona asaassi zaarada ishalissana. Taani GODAI haggaa odais” yaagees.

### *Eedooma Pirddaa*

<sup>7</sup> Eedooma biittaa xeelliyaaagan Ubbaappe Wolqqaama GODAI haggadan yaagees; “Temaana asaayyo aadhdhida eratetta baawee? Cinca asatuppe zoree xayiiichchidee? Eta aadhdhida eratetta etappe goossiichchidee? <sup>8</sup> Inttenoo, Dadaan de7iyaaageetoo, baqatidi ciimma gonggoluwana qosettite! Aissi giikko, taani Eesawa zeretta qaxxayiyoo wodiyan, a bolli bashshaa ehaana. <sup>9</sup> Woiniyaa maxiyaageeti yiikko, maxiiddi poshiluwaa ashshokkonaa? Kaisoti qammi gelikkokka, banttana koshshiyaaagaa xalaalaa ekkokkonaa? <sup>10</sup> SHin taani Eesawa zeretta qaarada kallo ashshana; eti qosettanau danddayenna mala, eti qosettiyo sohotakka taani qaarada, qoncce soho oottana. Eesawa zeretta ubbai xayana; etappe issoinne antenna. <sup>11</sup> Intte gidдон de7iyoo aaya aawu haiqqiichchido naata taayyo aggi bayite; eta taani dichchana. Qassi intte am77etikka tanan ammanettona” yaagees.

<sup>12</sup> GODAI haggadan yaagees; “Simmi qaxxayettanau bessenna asati qixaatiyaa xuu7aa uyiyaageeta gidaappe attin, intte waani qaxxayettannan attana giidi qoppeetii? Tuma inttekka qixaatiyaa xuu7aappe uyeetappe attin, coo atteketa. <sup>13</sup> Booxira katamai baysa gididi attana; a be7ida asaassi ubbaassi daganttiyaabaa, qilliicciyoobaanne qanggiyoobaa gidana. Qassi a yuushuwan de7iyoo qeeri katamati ubbaikka merinau kolettidi attana. Haggaa taani GODAI ta sunttan caaqqais” yaagees.

<sup>14</sup> Taani GODAAPPE yiida issi kiitaa siyaas. Kawotettatu gidдо kiitettidaagee, “Eedooma bolli woraajjanau shiikite! Aara olettanau denddite!” yaagiis.



15-16 GODAI hagaadan yaagees; “Simmi taani inttena kawotettatu giddon guuttana; asaa giddonkka karettidaageeta oottana. Inttenoo, shuchchaa kooppuwaaninne de-riyaa bollan de7iyaageetoo, intte yashissiyo yashshainne intte otoroi inttena cimmiis. Intte intte keettaa argganttaagaadan xoqqan keexxikkokka, taani inttena hegaappekka duge wottana.

17 “Eedooma biittai asa daganttiya biitta gidana. Yaara aadhdhiya asai ubbai a bashshaa be7idi, dagammananne, ‘Poora!’ gaana. 18 Sadoominne Gamoori bantta yuushuwan de7iya katamatuura bayiyo wode hanidoogaadan, ooninne yan de7enna; asi mulekka yan uttenna. Taani GODAI haggaa odais.

19 “Yorddaanoosa SHaafaa lanqqiyan de7iya woraappe lo77o qooroi de7iyoosaa qoppennan kiyiyya gaammuwaadan, taani yaada, Eedooma asata qoppennan eta biittaappe yedettana. Hegaappe guyyiyan, ta doorido asa a bollan sunttana. Ta malai baawa; taani oottana giidobaakka teqqanau danddayiyya asi baawa. Ai henttanchchi tanaara eqettanau danddayii?

20 “Hegaa gishshau, taani GODAI Eedooma bollaanne Temaana katamaa asaa bollan oottanau halchchidobaanne qoppidobaa siyite! Eta naata wolqqan goochchidi efaana; heggaa gaasuwan eta so asai ubbai dagammana. 21 Eedooma kunddettaa giirettai biittaa qaattana; Eedoomatu waasoikka Zo7o Abbaa gakkanaashin siyettana. 22 Argganttai ba qefiyaa piddi oottidi, bollappe duge eesuwan paallidi yiyoogaadan, morkkee Booxira bollan yaana. He gallassi Eedooma olanchchati maaretai oiqqido maccaaseedan hirggana” yaagees.

### *Damasqo Pirddaa*

23 Damasqo xeelliyaaagan GODAI hagaadan yaagees; “Iita oduwaa siyido gishshau, Hamaatanne Arifaada katamatun de7iya asai yeellatiisinne yayyiis. Beetai shociyo abbaadan, eta wozanai shemppuwaa demmanau danddayibeenna. 24 Damasqo asai daafuriis; eti dagaman shabbirettidi baqatidosona; maccaasiyo maaretai oiqqiy-oogaadan, metoinne tuggai eta oiqqiis. 25 Ufaissai kumido he erettida katamai asi de7enna soho gidana! 26 Hegaa gishshau, he gallassan he kataman de7iya yelaga attumaasa ubbai katamaa giddo ogetun haiqqana; olanchchati ubbaikka wurana. Taani, Ubbaappe Wolqqaama GODAI haggaa odais. 27 Taani Damasqo katamaa dirssaa gimbbiyan tamaa yeddana; he tamai Benihadaada qatota ubbaa maana” yaagees.

### *Qeedaare Yaratu Bollinne Haxooraa Kawotettatu Bolli Yaana Pirddaa*

28 Baabiloone Kawoi Naabukadanaxoori olidi xoonido Qeedaarenne Haxooraa kawotettata xeelliyaaagan GODAI hagaadan yaagees; “Denddite; denddidi Qeedaare asaa olite! He arshsho baggaara de7iya asaa wurssite! 29 Eta dunkkaanetanne eta wudeta ekkite! Eta magalashota, eta aquwaa ubbaanne eta gaameelata ekkite! Yaatidi etau, ‘Intte yuusho ubban shabbirssai denddiis!’ yaagidi odite.

30 “Inttenoo, Haxooran de7iyaageetoo, Baabiloone Kawoi Naabukadanaxoori intte bollan iitabaa oottanau maqetti uttido gishshau, baqatite; haahosaa biidi, ciimma gonggoluwana qosettite! Taani GODAI haggaa odaas.

31 “Naabukadanaxooraa, dendda! Denddada hirggi bannan saro de7iya kawotettatu bolli woraajja! Taani GODAI haggaa odais. Eta katamaa gimbbiyau ifitti woikko hiraqoi baawa. Eti banttarkka de7oosona.

32 “Eta gaameelati bonqqettana; eta wudeekka omoodettana. Bantta huuphiyaa shubeeriyaa meedissiyaageeta ubbaa taani carkkuwan laalana; taani ubbasaara eta bolli bashshaa ehaana. Taani GODAI haggaa odais. 33 Haxoori merinaukka worakanati de7iyo bazzo gididi attana. Ooninne yan de7enna; asi mulekka yan uttenna” yaagees.

### *Elaama Pirddaa*



<sup>34</sup> Yihudaa Kawoi Sedeqiyaasi koiro kawotido wode, Elaama biittaa xeelliyaagan GODAAPPE Ermmaasakko yiida qaalai haggaa. <sup>35</sup> Ubbappe Wolqqaama GODAI haggadan yaagees; “Elaamassi waanna wolqqa gidiya eta wonddafiyaasata taani worana. <sup>36</sup> Ubbasaara taani Elaama bollan carkkuwaa ehaana; etakka he carkkuwan ubbasaa laalana. Hegaa gishshau, Elaama asai laalettidi gakkenna biitti de7enna. <sup>37</sup> Eta morkketu sinttaaninne eta woranau koyiyaageetu sinttan taani Elaama daganttana. Taani ta gita hanqquwan eta bolli bashshaa ehaana. Taani GODAI haggaa odais. Taani eta xaissana gakkanaashin, bisuwan yedettana. <sup>38</sup> Taani Elaama kawuwaanne eta halaqata xaissada, ta kawotaa araataa yan wottana.

<sup>39</sup> “Gidikonne, wurssetta wodetun taani Elaama asaa zaarada ishalissana. Taani GODAI haggaa odais” yaagees.

## 50

### *Baabiloone Pirdaa*

<sup>1</sup> Baabiloone biittaaanne Baabiloone asaa xeelliyaagan hananabaa yootiya Ermmaasa baggaara GODAI odido qaalai haggaa: <sup>2</sup> “Kawotettatu giddon oditenne awaajjite. Bandiraa xoqqu ootti oiqqidi, aibanne qosennan, haggadan yaagidi yootite; ‘Baabiloonee kunddiis! Beelanne Mardduuka geetettiya a xoosatikka yeellatidosonanne meqerettidosona. Qassi a misiletinne a eeqati meqerettidosona. <sup>3</sup> Huuphessa bagga biittaaappe issi kawotettai yaana; yiidi Baabiloone biittaa bashshana. Yaatobare asaikka meheekka ubbai baqatana; ooninne yan de7enna’ yaagite” yaagiis.

### *Israa7eela Asai Simmana*

<sup>4</sup> GODAI haggadan yaagees; “He wodiyaaninne he gallassatun Israa7eela asainne Yihudaa asai issippe gididi, yeekkiiddi yaana; yiidi GODAA bantta Xoossaa koyana. <sup>5</sup> Eti Xiyoone efiya ogiyaa oichchidi, bantta sinttaa yaa zaaridi, ‘Haayite! Nuuni mulekka dogettenna merinaa maachchaa GODAARA ane maacettoos’ yaagana.

<sup>6</sup> “Ta asai bayida dorssatu mala gidii; eta henttanchchati eta balettidi, deriyan wora yeddidosona. Issi deriyaappe hara deriyaa toilattiiddi, bantta birddiyaa dogidosona. <sup>7</sup> Demmida ubbai eta dechchiis. Eta morkketi, ‘Nuuni ainne mooribookko; hagee metoi ubbai eta gakkidoogee, eti GODAA, bantta shemppo sohuwaa, bantta maizza aawatu hidootaa naaqqido gishshaassa’ yaagidosona.

<sup>8</sup> “Inttenoo, Israa7eela asatoo, ha77i simmi Baabiloone asaa giddoppe kiyidi baqatite! Baabiloonetu biittaaappe biite! Yaatidi wudiyaa kaalettiya deeshsha orggiyaa mala gidite. <sup>9</sup> Aissi giikko, taani huuphessa bagga biittaaappe gita gita kawotettatu citata denttada, Baabiloone bolli ehaidda de7ais. Eti a olana; olidikka oiqqana; eta zubbee dukkidi zambbiya olanchchaa mala. <sup>10</sup> Baabiloone biittai bonqqettana; a bonqqiya ubbai kallana. Taani GODAI haggaa odais.

### *Baabiloone Kunddettaa*

<sup>11</sup> “Inttenoo, Baabiloone asatoo, ta asaa bonqqiyaageetoo, intte ufaittidi, poccu giideta. Qooruwaa kallida usseedan, intte phixxillideta; korima paraadan caaggideta. <sup>12</sup> SHin ha77i intte waanna katamai yeellatananne kauyyana. Qassi kawotettatu giddonkka Baabiloonee ubbaappe wurssetta gidana; haatti bainna mela bazzo gidana. <sup>13</sup> GODAA hanqquwaa gaasuwan, Baabiloonee asi de7ennasaa gidana; i muleera qolettana. A lanqqiyaara aadhdhiya ubbai a bollan gakkida boshaa be7idi, dagammananne, ‘Poora!’ gaana.

<sup>14</sup> “Inttenoo, wonddafiyaa dukkiyaageetoo, Baabiloone olanau a yuushuwan salppite; i GODAA bollan nagaraa oottido gishshau, intte zubbetun ubban a dukkite. <sup>15</sup> Ubbaa baggaarakka Baabiloone bollan olaa waasuwa waassite! Baabiloonee kushiyaa immiis; a adussa gimbbeti kunddidosona; a gimbbiyaa dirssaikka kolettiis. GODAI a bollan haluwaa kiyiiddi de7iyo gishshau, inttekka a bollan haluwaa kiyite! I haratu

bollan oottidobaa inttekka a bollan oottite! <sup>16</sup> Zerettaa zeriyaagaanne cahaa wode baacaara kiyiyaagaa ubbaa Baabilooneppe xaissite. Un77ettiyaageetu bisuwaassi yayyido gishshau, he biittan de7iya asai ubbai ba yaraakko yaraakko simmidi, ba biitti biitti baqatana.

### *Israa7eela Asai Simmana*

<sup>17</sup> “Israa7eeli gaammoi yedettidi laalido dorssaa mala. Koiro Asoore kawoi a ashuwaa miis; wurssettan qassi Baabiloone Kawoi Naabukadanaxoori a meqettaa xoggiis. <sup>18</sup> Hegaa gishshau, Ubbaappe Wolqqaama GODAI, Israa7eela Xoossai, taani haggaa odais: Asoore kawuwaa taani qaxxayidoogaadan, Baabiloone kawuwaakka a biittaakka qaxxayana. <sup>19</sup> SHin Israa7eela i heemettiyo sohuwaa zaarana; Qarmmeloosanne Baasaane Deretun i heemettana. Qassi eti Efireema gezziyaaninne Gala7aade gezziyan kallidi maana. <sup>20</sup> He wodiyaaninne he gallassatun asai Israa7eelan mooruwaa koyana; shin mooroi xayana; Yihudan nagaraa koyana; shin beettenna. Aissi giikko, haiquwaappe taani ashshido Israa7eela asaa atettaa nagaraa taani atto yaagana. Taani GODAI haggaa odais” yaagees.

### *Baabiloone Pirdaa*

<sup>21</sup> Qassikka GODAI haggaaadan yaagees; “Miraataima biittaanne Piqooda biittan de7iya asaa bollan denddite; denddidi eta olite, woritenne eta mule xaissite. Taani inttena azazidoogaadan ubbabaa oottite. <sup>22</sup> He biittan olaa waasoi siyettees; gita bashshaikka gakkis. <sup>23</sup> Biittaa sa7aa ubbaa liiqissiya dijinoi aiba mego meqqidee! Aiba liiqo liiqidee! Kawotettatu ubbaa gidдон Baabiloonee aiba daganttiyaabaa gididee! <sup>24</sup> Nenoo, Baabiloonee, taani nena oiqqanau piriya wottaas; wottin neeni erennan de7aidda gelada oiqettadasa. Neeni tanaara, GODAARA gaaddetido gishshau oiqettadasa. <sup>25</sup> Taani GODAI ta ola miishshaa wottiyo keettaa dooyaas; dooyada ta hanquuwaa ola miishshaa appe kessaas. Aissi giikko, taani Godai, Ubbaappe Wolqqaama GODAI Baabiloone biittan oottiyo oosoi de7ees. <sup>26</sup> Yaara haara a bolli woraajjite! Kattai de7iyo a gootarata pogite; omooduwaakka kattaadan issidiran guuppite! Aibanne ashshennan akka wurssi xaissite! <sup>27</sup> Boorata shukkiyoogaadan, eta olanchchata siifite! Baabiloone asaayyo aayye7ana! Aissi giikko, eta gallassai, eti qaxxayettiyo wodee gakkis.

<sup>28</sup> “Omoodettida asati Baabilooneppe kessi ekkidi, Yerusalaame baqatana. Baabiloone biittaa asai Beeta Maqidasiyaa bollan oottidobaassi GODAI eta Xoossai haluwaa kiyiyoogaa eti Xiyoonen haasayana.

<sup>29</sup> “Baabiloone olanau wonddafiyaa dukkiyaageeta ubbaa xegite; issoinne kessi ekkennaadan, eti a yuushuwan dooddona. GODAA bolli, Israa7eela Geeshshaa bolli, i otorettido gishshau, ayyo a oosuwaadan zaarite. I haratu bollan oottidoogaadan, a bollankka oottite. <sup>30</sup> Hegaa gishshau, a yelaga attumaasati katamaa gidдо ogiyan haiqqana; he gallassi a olanchchati ubbai xayana. Taani GODAI haggaa odais” yaagees.

<sup>31</sup> Godai, Ubbaappe Wolqqaama GODAI haggaaadan yaagees; “Nenoo, otoranchchau, taani ne bolli denddaas. Aissi giikko, ne gallassai, neeni qaxxayettiyo wodee gakkis.

<sup>32</sup> Otoranchchai xubettidi kunddana; a denttiyaabikka de7enna. Taani a katamatu gidдон tamaa eettana; he tamai yuushuwan de7iya ubbaa mirggana” yaagees.

<sup>33</sup> Ubbaappe Wolqqaama GODAI haggaaadan yaagees; “Israa7eela asainne Yihudaa asai issippe naaqqettiis. Eta omooddidi efiidaageeti eta wolqqappe mintti oiqqidosona; oiqqidi yeddennan diggidosona. <sup>34</sup> SHin eta Woziyaagee mino; a sunttaikka Ubbaappe Wolqqaama GODAA. I eta biittaayyo shemppuwaa immanau, eta gishshau mootettees. SHin Baabiloone biittan de7iyaageetuyyo shabbirssaa immana.

<sup>35</sup> “Baabiloone asainne Baabiloone biittan de7iyaageeti bisuwan haiqqona!

“A halaqatinne a aadhdhida eranchchati bisuwan haiqqona! Taani GODAI haggaa odais.

<sup>36</sup> “A worddo hananabaa yootiyaageeti, eeyyati bisuwan haiqqona!

“A wolqqaama olanchchati, dagammidaageeti bisuwan haiqqona!

<sup>37</sup> “A paratu bollinne a paratu gaaretu bolli, qassi maccaasa mala gidida a allaga olanchchatu bolli bisoi yo!

“A buquraa minjjiyo keettaa bolli bisoi yo! Yaatobare a buqurai ubbai bonqqettana.

<sup>38</sup> “A bolli koshai yo! Yaatobare a haattai melana. Aissi giikko, Baabiloone biittai eeqaa misileti kumido biitta; he misileti asaa daganttoosonanne eeyyettoosona.

<sup>39</sup> “Hegaa gishshau, Baabiloonee bazzo do7atinne worakanati de7iyo soho gidana; qassi yanchchatikka an de7ana. An merinaukka asi de7enna; yeleta ubbankka asi an uttenna. <sup>40</sup> Xoossai beni Sadoomanne Gamooraa eta yuushuwan de7iya katamatuura issippe xaissidoogaadan, Baabiloonen ooninne de7enna; asi mulekka yan uttenna. Taani GODAI haggaa odais.

<sup>41</sup> “Be7ite, asai huuphessa bagga biittaappe yees; mino kawotettatanne daro kawoti sa7aa gaxaappe yaanau denddoosona. <sup>42</sup> Eti bantta wonddafiyaanne tooraa oiqqidosona; eti meqettaa iitanne yeddi maarena asa. Eti bantta paraa toggidi biyo wode, beetai shociyo abbaa gunttaadan hanees. Neno, Baabiloonee, eti ubbaikka olau giigida asaa gididi, ne bollan salppidosona.

<sup>43</sup> “Baabiloone kawoi eta oduwaa siyiis; siyin a kushee daafuridi, hilssi giis; maaretai oiqqido maccaaseedan, un77oi a oiqqiis.

<sup>44</sup> “Yorddaanoosa SHaafaa lanqqiyan de7iya woraappe lo77o qooroi de7iyoosaa qoppennan kiyiya gaammuwaan, taani yaada, Baabiloone asaa eta biittaappe yeddetana. Hegaappe guyyiyan, ta doorido asa a bollan sunttana. Aissi giikko, ta mali baawa; taani oottana giidobaakka teqqanau danddayiya asi baawa. Ai henttanchchi tanaara eqettanau danddayii? <sup>45</sup> Hegaa gishshau, taani GODAI Baabiloone asaa bollaanne Baabiloone biittaa bollan halchchidobaanne qoppidobaa siyite! Eta naata wolqqan goochchidi efaana; heggaa gaasuwan eta so asai ubbai dagamma. <sup>46</sup> Baabiloone kunddettaa giirettai biittaa qaattana; Baabiloonetu waasoikka kawotettatu ubban siyettana” yaagees.

## 51

### *Baabiloone Bollan Gujo Pirddaa*

<sup>1</sup> GODAI haggaa yaagees; “Baabiloone asanne Baabiloone biittaa xaissiyaabaa taani kiittana. <sup>2</sup> Taani Baabiloone bolli allagata kiittana; eti yiidi, a suraggana; a biittaa baisa oottana. A bashshaa gallassi eti ubbasaara a dooddana. <sup>3</sup> A olanchchati wonddafiya dukkanaashin woikko bantta ola miishshaa gixxanaashin gattoppite. A yelagata ashshoppite; a olanchchata muliyaa xaissite. <sup>4</sup> Eti Baabiloone biittan siifetti wurana; eta katamatu ogetunkka cadetti kunddana. <sup>5</sup> Israa7eela biittainne Yihudaa biittai Israa7eela Geeshshaa, tana, naaqqido nagaran kumidaaggaa gidikkonne, Israa7eela gidin, Yihudaa gidin, naa77aakka taani eta Xoossai, Ubbappe Wolqqaama GODAI yeggabeikke.

<sup>6</sup> “Baabilooneppe baqatite! Asi ubbi ba shemppuwaa shemppuwaa ashsho! I oottido nagaraa gaasuwan intte wuroppite! Hagee wodee taani GODAI ta autiyaa achchiyo wode. <sup>7</sup> Baabiloonee sa7an de7iya asai ubbai uyidi mattottiyo woine eessai tigettiyo, ta kushiyan de7iya worqqa wanccaa mala. Kawotettati ubbati he woine eessaa uyidi gooyidosona. <sup>8</sup> Baabiloonee qoppennan kunddidi meqqiis. Hegaa gishshau, ayyo yeekkite! A masunttaassi xaliyaa immite. Ooni erii, i paxanaakkonne. <sup>9</sup> Baabiloonen de7iya allaga asati, ‘Nuuni Baabiloone pattanau koyida; shin paxanau danddayibeenna. Ane a aggiigidi, nu biitti biitti simmoos. Aissi giikko, a pirddai haakkidi, saluwaa gakkii; bolla saluwaa guffanttuwaa gakkanau pude xoqqiis’ yaagidosona” yaagees.

<sup>10</sup> Israa7eela asai, “GODAI nuna shatinttiis! Ane Yerusalaame biidi, GODAI nu Xoossai oottidobaa asaassi odoos!” yaagana.

<sup>11</sup> GODAI Baabiloone xaissanau qofaa qachchido gishshau, Meedoonatu kawota olau denttiis; i ba Beeta Maqidasiyaa autiyaa hagaadan oottidi achchana. Meedoonatu gadaawati hagaadan yaagidosona; “Zubbeta leefite; gondalleta oiqqite! <sup>12</sup> Baabiloone bolli olaa banddiraa denttite; naagiyaageetakka minttite! Wochchiyaageetakka eta sohuwan sohuwan wottite; zuggidi naagiya olanchchatakka giigissite!” yaagidosona. Aissi giikko, GODAI Baabiloonen de7iya asaa bolli haasayidobaanne qoppidobaa oot-tana.

<sup>13</sup> Baabiloonee daro shaafatinne daro aqoi kumido biitta; shin a wurssettai gakkiiis; a de7uwaa turaikka duuxxiis. <sup>14</sup> Ubbaappe Wolqqaama GODAI, “Boolee biittaa kumiy-oogaadan, taani asata ne biittan kunttana; etikka nena xoonido ufaissaa bantta qaalaa xoqqu oottidi, ne bollan gairana” yaagidi ba sunttan caaqqiis.

### *Galataa Mazamuriyaa*

<sup>15</sup> GODAI ba wolqqan sa7aa medhdhiis;  
ba aadhdhida erattetan biittaa baasiis;  
salotakka ba akeekan micciis.

<sup>16</sup> I haasayiyo wode,  
saluwan de7iya haattati guummoosona.

SHaarata i sa7aa gaxaappe ehees.

Qassi irai bukkiyo wodekka,  
wolqqanttaa wolqqammissees.

Ba minjiyo sohuwaappekka carkkuwaa kessees.

<sup>17</sup> Asi ubbi akeekinne eri bainnaagaa.

Qassi worqqaa tigidi,  
eeqa misileta medhdhiyaageeti ubbati yeellatidosona.

Aissi giikko, eta misileti worddonne shemppoi bainnaageeta.

<sup>18</sup> He misileti pattenaaageetanne  
karettidaageeta.

Eta bollan pird dai yiyo wode, eti xayana.

<sup>19</sup> SHin Yaaqooba Xoossai  
heгаа mala gidenna.

Aissi giikko, i ubbabaa medhdhidaagaa.

Israa7eela asai i baassi doorido zare.  
A sunttaikka Ubbaappe Wolqqaama GODAA.

### *GODAA Dijinuwaa*

<sup>20</sup> GODAI hagaadan yaagees; “Baabiloonee, neeni ta dijononne ta ola miishsha. Nenan go7ettada taani biittata mentterettaas; kawotettatakka xaissaas. <sup>21</sup> Nenan paratanne paraa toggiyaageeta, para gaaretanne eta laaggiyaageeta mentterettaas. <sup>22</sup> Nenan maccaanne attumaa, cimaanne naatuwaa, wodallatanne geela7ota mentterettaas.

<sup>23</sup> Nenan henttanchchaaanne a wudiyaa, goyiyaagaanne a waatta boorata, deriyaa haariyaageetanne halaqata mentterettaas” yaagees.

### *Baabiloone Pirdaa*

<sup>24</sup> GODAI hagaadan yaagees; “Baabiloone asainne Baabiloonen de7iyaageeti Xiyooone bolli oottido iitaa haluwaa taani intte xeellishin kessana.

<sup>25</sup> “Nenoo, Baabiloonee, neeni biittaa sa7aa bashshiya wogga deriyaa mala; shin taani GODAI nena morkkais. Taani ta kushiya yeddada, nena deriyaa bollappe duge gond-dorssana; hegaappe guyyiyan, neeni biittanne bidintta gidada attana. <sup>26</sup> Naa77antto neeppe baasuwan yeggiyo woikko gimbbiyau ekkiyo shuchchi de7enna; neeni merin- aukka baisa gidana. Taani GODAI haga odais.

<sup>27</sup> “Baabiloone bolli olaa banddiraa denttite; asaa ubbaa gidдон malkkataa punnite. A olanau asaa ubbaa giigissite; Araaraate, Miinanne Ashkkanaaza kawotettata xeesite. Ola gadaawaakka sunttite; booliyaa keena daro paratakka ehiite. <sup>28</sup> Baabiloone olanau kawotettata ubbaa giigissite; Meedoona kawota, eta halaqata, deriyaa haariyaageetananne eti haariyo biittaa asaa ubbaa denttite.

<sup>29</sup> “Baabiloone ooninne de7enna bazzo oottanau GODAI halchchido halchchuwaa poliyo gishshau, biittai ubbai kokkoreesinne porqqattees. <sup>30</sup> Baabiloone olanchchati olaa olettiyoogaa aggidosona; aggidi bantta qatuwan utti bayidosona. Eta wolqqai hitiis; hitin eti maccaasa mala gididosona. Eta keettatikka xuugettidosona; eta kata-maa yuushuwaa gimbbiyaa penggetikka meqqidosona. <sup>31</sup> Ha gaxaappe hini gaxaa gakkanaashin, katamai morkkiyan ohettidoogaa Baabiloone kawuwaassi yootanau, woxxiyaagee woxxiyaagaa kaallidi, kiitettidaageekka kiitettidaagaa kaallidi boosona. <sup>32</sup> Qassi shaafaara pinniyo sohota ohettidoogaa, qatoti xuugettidoogaanne olanchchati dagammidoogaa eti kawuwaassi yootanau boosona” yaagees.

<sup>33</sup> Ubaappe Wolqqaama GODAI, Israa7eela Xoossai hagaadan yaagees; “Baabiloone biittai kattaa qoxxiyo audiyaa mala; guutta wodiyaappe guyyiyan, i cakettiyo wodee yaana” yaagees.

<sup>34-35</sup> Yerusalaame asai hagaadan yaagees; “Baabiloone Kawoi Naabukadanaxoori nuna wurssidi miis; nu katamaakka mela de7iya oto mala kessiis. Demee mittiy-oogaadan, a mittiis; mal77oban kunttidoogaadan, i nu aquwan ba ganjjiyaa kunttiis; yaatidi attidaagaa mucidi cuchchiis. Hegaa gishshau, Baabiloonee nu bollinne nu asaa bolli oottido iitabai ubbai a bolli simmo. Nu suuttaa acoi Baabiloonen de7iya asaa achcho” yaagees.

### *GODAI Israa7eela Asaa Maaddana*

<sup>36</sup> Hegaa gishshau, GODAI Yerusalaame asaassi hagaadan yaagees; “Ne gishshataa taani mootettana; ne haluwaakka taani kessana. Taani Baabiloone haattaa melissana; a pulttotakka toissana. <sup>37</sup> Baabiloonee shuchcha doorene worakanati de7iyo geesso gidana. Qassi a be7ida ubbai dagammananne, ‘Poora!’ gaana. An issi asinne naa77antto de7enna. <sup>38</sup> Baabiloone asai ubbai gaammodan gudees; qassi gaammo maradan daarees. <sup>39</sup> Etau bollai ho77iyo wode, taani etayyo ufaissiya ushshaa gibiraa giigissana; eti hegaappe uyidi, banttana balana gakkanaashin, taani eta mattoyana. Eti naa77antto denddenaanadan, merinau xiskkana. Taani GODAI haggaa odais. <sup>40</sup> SHukkanau efiyo dorssatudan, dorssa orggetudaanne deeshsha orggetudan, taani eta shuhau efaana.

### *Baabiloone Bolli Gakkanabaa*

<sup>41</sup> “Asai ubbai sabbiyo Baabiloonee ohettiis! Baabiloonee kawotettatu ubbaa gidдон aiba daganttiyaabaa gididee! <sup>42</sup> Baabiloone morkketi abbaa beetai denddiyoogaadan denddidi, kataman eellidosona. <sup>43</sup> A katamati kolettidi, daganttiyaabaa kiyidosona; iri bukkenna bazzo biitta, ai asinne de7enna biittanne asa na7i gidduwaara kanttena biitta kiyidosona. <sup>44</sup> Beela giyo Baabiloone xoossaa taani qaxxayana; i mittidobaakka taani a uluwaappe kesissana. Hegaappe guyyiyan, kawotettati akko zuliyoogaa aggana; Baabiloone gimbbeekka kunddana.

<sup>45</sup> “Ta asau, a giddoppe kiyite! Intte ubbaikka GODAA hanqquwaa suuluwaappe intte huuphiyaa huuphiyaa ashshite! <sup>46</sup> Biittan odettiya oduwaa siyiyo wode, hirggop-pitenne yayyoppite! Laittan laittan odoi oduwaa kaalli kaallidi yaana. He wode kawoi kawuwaa bolli denddiyo makkala odoi biittan siyettana.

<sup>47</sup> “Hegaa gishshau, taani Baabiloone eeqa misileta qaxxayiyo gallassati yaana. He biittai ubbaikka yeellatana; siifettidaageeti ubbai katamaa gidдон kunddana. <sup>48</sup> Huuphessa baggappe yiya bashshiyaageetu kushiyan Baabiloonee ohettiyo gishshau, saloinne sa7ai qassi eta gidдон de7iya ubbabi ililana. Taani GODAI haggaa odais.



<sup>49</sup> Baabiloonee Israa7eela asaanne hara biittan de7iya asaa ubbaa woridoogaadan, Baabiloone asaikka haiqqanau koshshees.

### *Baabiloonen De7iya Israa7eelatussi Odettida Hiraagaa*

<sup>50</sup> “Ta asau, intte olaappe kessi ekkideta. Hegaa gishshau, biite! Hagan eqqop-pite! Intte de7iyoo haaho biittanka tana GODAA hassayite; Yerusalaamekka qoppite.

<sup>51</sup> Intte, ‘Nuuni cayettido gishshau kauyyida; allagati GODAA Beeta Maqidasiyan de7iya geeshsha sohota gelido gishshau, nuuni yeellaa maayida’ yaagideta.

<sup>52</sup> “SHin taani GODAI Baabiloone eeqata qaxxayiyoo wodee yaana. Deshettidaageeti biitta ubban oolana. <sup>53</sup> Baabiloonee saluwaa pude kiyidi, yan qatuwaa medhdhanau danddayiyaakkonne, yaa gakkanau kiyidi, a yan bashshiya asaa taani kiittana. Taani GODAI haggaa odais.

### *Baabiloonee Xayana*

<sup>54</sup> “Baabilooneppe asaa waasuwa cenggurssai, Baabiloone biittaappe gita bashshaa kooshinchchai siyettana! <sup>55</sup> Aissi giikko, GODAI Baabiloone bashshana; a wolqqaama cenggurssaakka co77u oottana. Abbaa beetaadan guummiya morkketi woraajjiiddi garmmaamana. <sup>56</sup> Bashshiyaageeti Baabiloone bolli yaana; yin a olanchchati omood-ettana; eta wonddafeekka meqqana. Taani GODAI haluwaa kessiya Xoossaa gidiyo gishshau, eta oosuwaadan taani etau zaarana. <sup>57</sup> Taani a halaqata, a aadhdhida er-anchchata, a deriyaa haariyaageeta, a ola gadaawatanne a olanchchata mattoyana; eti naa77antto denddenaan, merinau xiskkana. Taani Kawoi, Ubbaappe Wolqqaama GODAA geetettiyaagee haggaa odais” yaagees.

<sup>58</sup> Ubbaappe Wolqqaama GODAI haggaa yaagees; “Orddiyan gimbbettida Baabiloone yuushuwaa gimbee sa7an belettana; a adussa penggetikka taman xuugettana. Asai oottidobai ubbai hada; kawotettatika tami maanabau coo daafuroosona” yaagees.

### *Ermmaasi Baabiloone Kiitaa Yeddiis*

<sup>59</sup> Mahiseeya na7aa Neeriyaa na7ai Saraayi Kawuwaa Sedeqiyaasassi oottiya halaqa. Sedeqiyaasi Yihudan kawotido oiddantto laitti, Saraayi aara Baabiloone biis. Biyo wode Ermmaasi Saraaya bolli kiitaa yeddiis. <sup>60</sup> Baabiloone bollan gakkanau de7iya iitabaa ubbaanne Baabiloone xeelliyaa harabaa ubbaa Ermmaasi issi xaatta maxaafan xaafiis. <sup>61</sup> Xaafidi Saraaya haggaa yaagiis; “Neni Baabiloone biittaa gakkido wode, ne qaalaa xoqqu oottada, asaassi ha maxaafaa nabbaba. <sup>62</sup> Qassi haggaa yaagada woossa; ‘Abeet GODAU, neni, “Taani ha sohuwaa bashshana; ha sohuwan paxa qaaxxiya mereti, asikka, meheekka, do7ikka de7enna; ha sohoi merinau bazzo gidana” yaagadasa’ yaaga. <sup>63</sup> Ha xaatta maxaafaa nabbabada wurssidoogaappe guyyiyan, shuchchaa he maxaafaara gatta qachchada, Efiraaxiisa SHaafan ola. <sup>64</sup> Olada, ‘ “Taani GODAI a bollan ehiyo iitaa gaasuwan, Baabilooneekka haggaa naa77antto denddenaan muukettana” yaagais’ yaaga” yaagiis.

Ermmaasi haasayido qalalai haggaa polettiis.

## 52

### *Yerusalaame Kunddettaa*

*(Kawotu Maxaafaa Naa77anttuwaa 24:18-25:7; Ermmaasa 39:1-10)*

<sup>1</sup> Sedeqiyaasi kawotiyo wode, laittai ayyo laatamanne isiino; Yerusalaamen i tammanne isiini laittaa kawotiis. A aayee sunntai Hamuxaalo; a Liibina kataman de7iya Ermmaasa na7iyoo. <sup>2</sup> Yo7aqeemi oottidoogaadan, Sedeqiyaasikka GODAA sinttan iitabaa oottiis. <sup>3</sup> GODAI Yerusalaame asaa bollinne Yihudaa asaa bolli hanqqettido gishshau, wursettan eta ba sinttappe diggiis.

Sedeqiyaasi Baabiloone kawuwaa bolli makkalidi denddiis. <sup>4</sup> Denddin Sedeqiyaasi kawotido uddufuntta laitti, tammantta aginan, tammantta gallassi Baabiloone Kawoi Naabukadanaxoori ba olanchchata ubbaa ekkidi yiidi, Yerusalaame dooddiis. Eti a yuushuwankka biittaa keelaa diddiqidosona. <sup>5</sup> Sedeqiyaasi kawotido tammanne isiinintta laittaa gakkanaassi, Yerusalaame katamai doodettidi gam77iis.

<sup>6</sup> Hegaa gaasuwan biittan koshai suullin, he laitti oiddantto aginan, uddufuntta gallassan, he biittaa asaayyo miyoobi xayiiis. <sup>7</sup> Yaanidaashin katamaa yuushuwaa gimbee issi baggaara qolettiiis. Qolettin Baabiloone asai katamaa yuuyi aadhdhidi naagikkokka, Yihudaa kawuwaa olanchchati mule ubbai qammi kawo ataakilttiyaa sohuwaa efiya ogiyaa oiqqidi, naa77u dirssaa gimbeta issippe gattiya penggiyaara kiyidi baqatidosona. Eti Yorddaanoosa Dilbbaakko simmidi biidosona. <sup>8</sup> SHin Baabiloone olanchchati Kawuwaa Sedeqiyaasa yedettidi, Yarkko dembaa gattiiddi oiqqidosona. Oiqqin a olanchchati ubbai appe shaahettidi laalettidosona.

<sup>9</sup> Hegaappe guyyiyan, eti a Hamaata biittan, Ribila kataman de7iya Baabiloone kawuwaakko efiidosona. Efin yan Naabukadanaxoori Sedeqiyaasa bolli pirddiis. <sup>10</sup> Qassi Sedeqiyaasa naata Sedeqiyaasi xeellishin, Baabiloone kawoi woriis. Yihudaa halaqata ubbaakka eti yan Ribila kataman woridosona. <sup>11</sup> Hegaappe guyyiyan, Sedeqiyaasa aifeta wooci kessidi, sanssalatan a qachchidi, Baabiloone biittaa ekkidi efiidosona. Efidi i haiqqana gakkanaashin, yan qasho keettan a wottidosona.

### *Beeta Maqidasee Qolettiiis*

*(Kawotu Maxaafaa Naa77anttuwaa 25:8-17)*

<sup>12</sup> Naabukadanaxoori Baabiloonen kawotido tammanne uddufuntta laittan, ichchashantto aginan, tammantto gallassan, kawuwaa oosanchchatuppe issoi, kawuwaa naagiyaageetu halaqai Naabuzaraadaani Yerusalaame geliis. <sup>13</sup> Gelidi GODAA Beeta Maqidasiyaa, kawo keettaanne Yerusalaamen de7iya keettata ubbaa taman xuuggiis; gita keetta giyo keetta ubbaa xuuggiis. <sup>14</sup> Baabiloone olanchchati ubbai kawuwaa naagiyaageetu halaqaa azazuwan, Yerusalaame katamaa yuushuwan de7iya dirssaa gimbbiyaa ubbaa qolidosona. <sup>15</sup> Naabuzaraadaani wurssetta hiyyeesata, kataman attida asatanne kaddidi Baabiloone olanchchatun gaittida asata kushe hiillaa eriya asatuurakka gujjidi, omooduwau efiis. <sup>16</sup> SHin Naabuzaraadaani wurssetta hiyyeesatuppe amaridaageeta woiniyaa turaa tokkanaadaaninne gadiyaa goyanaadan, Yihudan ashshiis.

<sup>17</sup> Baabiloone asati GODAA Beeta Maqidasiyan de7iya nahaasiyaappe medhdhido tuussata, miishshata wottiyo gaaretanne Abba Sainiyaa mentterettidosona; mentterettidi nahaasiyaa ubbaa Baabiloone efiidosona. <sup>18</sup> Hegaadankka, qassi kereta, akaafata, xomppiyaa shaluwaa xeeraa pittiyooobata, kuixaarota, ixaanaa sainetanne yarshshiyoo wode go7ettiyo nahaase miishshata ubbaa ekki efiidosona. <sup>19</sup> Kawuwaa naagiyaageetu halaqai Naabuzaraadaani qassikka worqqaappenne biraappe oosettida distteta, tamaa ekkiyo miishshata, kuixaarota, kereta, xomppiyaa wottiyo ballata, ixaanaa sainetanne ushshaa yarshshuwaassi go7ettiyo otota ekkidi biis. <sup>20</sup> Kawoi Solomoni GODAA Beeta Maqidasiyan oosettiyaabatussi medhdhido naa77u tuussati, Abba Sainee, appe garssaara de7iya tammanne naa77u korimatu misiletinne miishshata wottiyo gaareti merettido nahaase biratati meezaanan likkanau danddayettennaagaa keena daro. <sup>21</sup> Naa77u tuussatika issi mala gididi, issoi issoi tammanne hosppun wara adussa. Eta xeessaa yuushoi tammanne naa77u wara. Eta giddoi kofa gididi, biratai oiddu biradhdhe keenaa ordde. <sup>22</sup> Naa77u tuussatu huuphiyankka nahaasiyaappe oosettida gumbboti de7oosona. Issi gumbbuwaa geesai ichchashu wara gididi, yuushoi gitiyaa misiliyaaninne roomaaniyaa teeraa misiliyan alleeqetti uttiis. Naa77antto gumbboikka a mala. <sup>23</sup> Gumbbotussi miyyiyan miyyiyan de7iya roomaanetu misileti

uddufun tammanne hosppuna; yuushuwan de7iya gite milatiya misiletuppe bolla baggaara de7iya roomaane misileti muleera issi xeeta.

*Yihudaa Asai Omoodettidi Baabiloone Biis  
(Kawotu Maxaafaa Naa77anttuwaa 25:18-21, 27-30)*

<sup>24</sup> Kawuwaa naagiyaageetu halaqai Naabuzaraadaani qeese ubbatu halaqaa Saraaya, appe kaalliya qeesiyaa Xafaaniyaanne penggiyaa naagiya hara heezzu asata oiqqiis.

<sup>25</sup> Qassi he wode gakkanaashin, kataman de7iya asaappe ola gadaawaa, kawuwaa zoriyaageetuppe laappun asata efiis. Ola gadaawaa xaafiyaa, hegeenne olanchchata asaa giddoppe qoridi kessiyaagaanne hara usuppun tammu gita asata efiis. <sup>26</sup> Halaqai Naabuzaraadaani eta ubbaa ekkidi, Baabiloone kawuwaakko, Ribila katamaa efiis.

<sup>27</sup> Yan Ribila kataman, Hamaata biittan Baabiloone kawoi eta ubbaa worissiis. Hegaadan hanidi, Yihudaa asai ba biittaappe denddidi, omooduwau biis.

<sup>28</sup> Naabukadanaxoori kawotido laappuntta laittan heezzu sha7anne laatamanne heezzu asaa Yihudaappe omooddiis. <sup>29</sup> Qassi tammanne hosppuntta laittan hosppun xeetanne hasttamanne naa77u asaa Yerusalaameppe omooddiis. <sup>30</sup> Naabukadanaxoori kawotido laatamanne heezzantto laittan kawuwaa naagiyaageetu halaqai Naabuzaraadaani laappun xeetanne oitamanne ichchashu asaa omooddiis. Omoodettida asaa qoodai muleera oiddu sha7anne usuppun xeeta.

<sup>31</sup> Ewiili-Marodaaki kawotido laitti Yihudaa kawuwaa Yo7aakiina bonchchidi, qashuwaappe birshshiis. Hegee hanidoogee Yo7aakiini omoodetti qashettidi biido hasttamanne laappuntta laitti, tammanne naa77antto aginan, laatamanne ichchashantto gallasaana. <sup>32</sup> Ewiili-Marodaaki Yo7aakiinaara mal77o qaalaa haasayidi, Baabiloonen omooduwan de7iya hara kawotu ubbaappe aattidi, a bonchchiis.

<sup>33</sup> Hegaa gishshau, Yo7aakiini qasho keettan maayido maayuwaa laammiis. Laammidi i attida ba de7o laitta ubban kawo maaddaappe miis. <sup>34</sup> Yo7aakiini haiqqana gakkanaashin, hachchi hachchi ayyo koshshiyaabaa ubbaa Baabiloone kawoi immiis.

## Ermmaasa Zilaassaa

### *Gidduwaa Erissuwaa*

Ermmaasa Zilaassai Kiristtoosi yelettanaappe kase ichchashu xeetanne hosppun tammanne usuppun laittan Yerusalaamee laalettido gaasuwaaninne asaikka omoodettidi biido gaasuwan, giximiyan giigida ichchashu azzano zilaassata oiqqidaagaa. Ha maxaafaassi dariya baggai yeehobaanne azzanobaa odiyaagaa gidikkonne, Xoossan ammanettiyoobaanne hidootan de7iyoojaa yootiya kifiletikka an de7oosona. Ha giximeta Aihuda asati Kiristtoosi yelettanaappe kase ichchashu xeetanne hosppun tammanne usuppun laittan, he biittaa bolli gakkida bashshaa hassayanaassi, laittan laittan xoomiyoonne azzaniyo wogata poliyo gallassatun go7ettoosona.

### *Yerusalaame Tuggaa*

<sup>1</sup> Kase asai kumido Yerusalaame katamiyaa ha77i waanada mela attadee! Kase kawotettatu gidдон gita gididaara ha77i azini haiqqido maccaaseedan, waanada barkka attadee! Katamatu ubbaa gidдон kawiyо gididaara ha77i waanada aille gidadee! <sup>2</sup> Qamma ubban afuttai i gacuwaara holssattishin, yeekkaidda aqaasu. Kase o dosiyaageetuppe ha77i o minttettiyaabi issoinne baawa. I laggeti o kaddidi, iyyo morkke gididosona. <sup>3</sup> Yihudiyaa naagettaiddanne ailletaidda omoodettada baasu. A ha77i kawotettatu gidдон de7ausu; shin shemppiyo soho demmabeikku. O yedetti-daageeti a metoota uttidaashin gakkidi demmidosona. <sup>4</sup> Laittaa gidдон bonchchiyo baalata yiyaabi baina gishshau, Xiyooni ogeti azzanoosona. Katamaa penggeti baisa attidosona; i qeesetikka ooloosona. I geela7o naatikka tuggatidosona; qassi a ba huphiyaukka iita tuggaa tuggata uttaasu. <sup>5</sup> I morkketi iyyo goda gididosona; etau injjetin de7idosona. Aissi giikko, i nagaraa daruwaa gaasuwan GODAI o tuggayiis; i guutta naati morkkiyan omoodettidi biidosona. <sup>6</sup> Xiyooni puulai ubbai ippe qaarettiichchiis; i halaqatikka maataa miyo sohuwaa xayida gaaraa mala gididosona. Eti wolqqa xayidi, banttana yedettiyaageetu sinttappe baqatidosona.

<sup>7</sup> Yerusalaama ha77i ba tuggaanne ba un77uwaa gallassatun beni ba bonchcho buquraa hassayaasu. I asai ubbai morkketu kushiyan aadhdhidi imettido wode, o maaddiyaabi issoinne attibeenna. I morkketi o xeellidi, i bashshan miiccidosona. <sup>8</sup> Yerusalaama gita nagaraa oottaasu; hegaa gishshau, a tunabaa gidausu. Kase o bonchchida ubbai ha77i i kalluwaa be7ido gishshau, o karees. Akka oolausunne guyye simmausu. <sup>9</sup> I tunatettai i afalaa xeeraa baqqi oiqqiis. Sinttappe ba bolli hananabaa a qoppabeikku. Hegaa gishshau, i kunddettai daganttiyaagaa. A, “Abeet GODAU, ta tuggaa be7a! Ta morkketi tana xoonidosona” ginkka, o minttettiyaabi issoinne baawa. <sup>10</sup> Morkketi i bonchcho buquraa ubbaa bollan bantta kushiya yeddidosona. Dere kawotettati, kase neeni GODAI maabaraa gidдо gelissennan diggido asati, i Beeta Maqidasiyaa gelishin be7aasu. <sup>11</sup> I asati namisettidi, qumaa demmanau ooloosona. Eti paxa de7ana gishshau giidi, bantta bonchcho buquraa ubbaa quman laammoosona.

Yerusalaama hagaadan yaagaasu; “Abeet GODAU, xeella; taani karettidoogaa be7a! <sup>12</sup> Inttenoo, hagaara aadhdhiyaageetoo, hagee inttessi ubbaassi aibanne gidennee? Metoi ubbi GODAI ba eexxiya hanqquwaa gallassi ta bolli ehiido metuwaa malee? <sup>13</sup> GODAI bolla xoqqaappe tamaa duge yeddiis; he tamai ta meqettaa gidдо geliis. Ta gediya oiqqanau piriya wottiis; tana guyye zaariis. I tana gallassa ubban labbantidi, yeggi bayiis. <sup>14</sup> Taani oottido nagaraa ubbaa shiishshi qachchidi, qambbaraadan ta morggiyan wottiis. Yaatidi ta wolqqa wurssiis. Taani eqettanau danddayennaageetussi Godai tana aattidi immiis. <sup>15</sup> Godai ta gidдон de7iya wolqqaama olanchchata ubbaa ixxiis. Ta yelagatakka xaissanau olanchchata ta bollan xeegiis. Woiniyaa

teeraa gum77iyo sohuwan yedhdhiyoogaadan, Godai Yihudaa asaa yedhdhiis. <sup>16</sup> Taani yeekkiyoogeenne ta aiffee afuttaa holssayyoogee hegaassa. Tana minttettanaunne ta wolqqaa kunttanau issi asinne baawa. Morkkee goobiis; ta naatinne mela attidosona” yaagausu.

<sup>17</sup> Xiyoona ba kushiya miccaasu; shin o minttettiyaabi baawa. I yuushuwan de7iyaageeti o morkkanaadan, GODAI oottiis. Yerusalaama eta gidдон tunabaa gidaasu.

<sup>18</sup> A hagaadan yaagausu; “GODAI xillo; a qaalau azazettennan makkalidaara tana. Inttenoo, asatoo ubbaikka siyite! Ta metuwaakka be7ite. Ta wodallatinne ta geela7oti omoodettidi biidosona. <sup>19</sup> Taani tana dosiyaageeta xeegaas; shin eti tana cimmidosona. Ta qeesetinne ta cimati bantta akataa gastissanau qumaa koyiiddi, katamaa gidдон haiqqi wuridosona. <sup>20</sup> Abeet GODAU, ta waayiyaa be7a! Ta garssai shabbirettiis. Taani keehippe makkalido gishshau, ta wozanai meqqiis. Karen bisoi wurssees; soonikka haiqo xalaalai de7ees. <sup>21</sup> Asai taani zilaaliyoogaa siyiis; shin tana minttettiya issi asinne baawa. Ta morkketi ubbai taani metootiyoogaa siyidosona; siyidi neeni oottidoban ufaittidosona. Etikka tanadan hanana mala, eta bolli neeni awaajjido gallassaa eha! <sup>22</sup> Eta iitatettai ubbai ne sintti gakko; ta nagaraa ubbaa gishshau, neeni tana qaxxayidoogaadan, etakka qaxxaya! Aissi giikko, ta zilaassai dariis; ta wozanaikka meqqiis” yaagausu.

## 2

### *Godai Yerusalaame Qaxxayiis*

<sup>1</sup> Godai ba hanqquwan Xiyoono dulkka shaaraappe garssaara waati wottidee! I Israa7eela puulaa saluwaappe duge sa7aa oliis. I ba hanqquwaa gallassan ba Beeta Maqidasiyaakka qoppibeenna. <sup>2</sup> Godai Yihudan de7iya keettata ubbaa qarettennan xaissiis. Qassi ba hanqquwan he biittaa qatota ubbaa koliis. He kawotettaanne a halaqata sa7an duge wottidi kaushshiis. <sup>3</sup> Ba suulliya hanqquwan Israa7eela wolqqaa ubbaa mentterettiis. Morkkee a olanau yiyo wode, Godai ba ushachcha kushiya eta bollappe diggirggiis. Lacottiya tamaadan, Israa7eela biittan eexxi kiyidi, ba yuushuwan de7iyaabaa ubbaa mi xaissiis. <sup>4</sup> Morkkiyaadan i ba wonddafiyaa eta bolli dafiis. Huqqunniyaageetudan i ba kushiya minttidi, xeellin lo77iya asaa ubbaa woriis. Xiyoone keettatu bolli ba hanqquwaa suuluwaa tamaadan qoliis. <sup>5</sup> Godai morkkedan hanidi, Israa7eela xaissiis. I kawo keettatanne qatota ubbaa qoliis. Yihudaa asaa bollan kayyuwaanne yeehuwaa gujjiis.

<sup>6</sup> I ba Beeta Maqidasiyaa ataakiltte gidдон de7iya daasiyaadan, shoddi oliis. Laittaa gidдон bonchchiyo baalatinne Sambbatati mule dogettanaadan, GODAI oottiis. Ba gita hanqquwan kawuwaanne qeesiyaa kariis. <sup>7</sup> Godai baayyo yarshshuwaa yarshshiyo sohuwaa ixxiis; ba Beeta Maqidasiyaakka aggi bayiis. Kawo keettatu gimbbiyaa morkketu kushiyan aattidi immiis. Asai laittaa baalaa bonchchiiddi wocamiyoogaadan, morkketi GODAA Beeta Maqidasiyan wocamidosa. <sup>8</sup> GODAI Xiyooni gimbbiyaa qolanau qachchiis; o likkiyo wodoruwaa micciis; o xaissennan de7iiddi, ba kushiya zaarena. Hegaa gishshau, gimbbeenne qatoi issippe kunddanaadan oottiis. <sup>9</sup> Yerusalaame penggiyaa sanqqati biittan duge moogettidosona; eta hiraqotakka i mentterettidi xaissiis. I kawoinne halaqati omoodettidi, kawotettatu gidдо biidosona. Higgiyaa tamarissiyaabikka baawa; i hananabaa yootiyaageetussikka GODAAPPE ajjuutai yiyoogaa aggiis. <sup>10</sup> Xiyooni cimati co77u giidi, biittan utti aggidosa; bantta huuphiyan baanaa qolidi, waaruwaakka maayidosona. Yerusalaame geela7oti sa7au duge hokkidosa.



<sup>11</sup> Ta aifee afuxxii afuxxidi galjjiis; ta wozanaikka azzanuwan shabbirettiis. Aissi giikko, ta asai xayyiis; guutta naatinne yiira naati katamaa ogiyan labbanidi kund-didosona. <sup>12</sup> Eti bantta aayeta, “Qumaa imma! Woine eessaa imma!” yaagidi waassoosona. Katamaa ogiyan deshettidi labbaniya asatudan eti labbanin, eta aayetu kiyuwan eta shemppoi kiyees.

<sup>13</sup> Nenoo, Yerusalaamee, taani nebba ai gaanau danddayiyaanaa? Woi qassi ne gohuwaa taani aibiira likkanau danddayiyaanaa? Nenoo, dosettida Xiyoonee, qassi taani nena waata minttettanau danddayiyaanaa? Ne masunttai abbaa keena ciimma. Yaatin, nena ooni pattanau danddayii? <sup>14</sup> Ne hananabaa yootiyaageeti neeyyo word-donne pattenna ajjuutaa be7idosona; eti neeni omooduwau beenna mala, ne nagaraa qonccissidi yootibookkona. Eti balettiya worddo ajjuutaa neeyyo be7idosona.

<sup>15</sup> Ne mataara aadhdhiya ubbai ba biradhdhiyaa ne bollan dukkees. Qassi, “Biittan sa7an ubbaappe aadhdhada lo77iya katamiyaa hannii? Kumetta biittau ufaissa geetettida katamiyaa hannii?” yaagidi nena baceessees; ba huuphiyaakka qaattees.

<sup>16</sup> Ne morkketi ubbai bantta doonaa ne bolli dooyidosona; baceessiiddinne yiilluwan bantta achchaa garcciiddi, “Nuuni o xaissida! Nuuni naagidi uttido gallassaikka haggaa; ha77i gakkidi be7ida!” yaagoosona. <sup>17</sup> GODAI ba halchchidoogaa oottiis; beni wode i awaajjido ba qaalaakka poliis. Yerusalaamissi qarettennan o qoliis. I morkketakka ufaissiis; o huqqunnidaageetu wolqqaakka xoqqu xoqqu oottiis.

<sup>18</sup> Nenoo, Xiyoonee, Godaakko ne dirssaa gimbee waasso! Ne afuttaikka qamminne gallassi shaafaadan goggo! Neeni nena shemppissoppa; ne aifiyaukka shemppuwaa immoppa! <sup>19</sup> Dendda; qammi poo7oora denddada waassa. Godaa sinttan ne wozanaa haattaadan gussa. Ogiyaa doonan ubban namisettidi, labbanida ne naatu shemp-puwaassi ne kushiya akko pude denttada woossa!

<sup>20</sup> Abeet GODAU, be7a! Neeni o bolli kase hagaadan oottidaakko, ane qoppa. Aayeti bantta kiyuwan ishalissidi dichchido bantta naata moona gai? Qassi qeesetinne hananabaa yootiyaageeti Godaa Beeta Maqidasiyaa gidдон haiqqona gai?

<sup>21</sup> Cimai naatoi katama gidдо ogiyaa buhiyan zin77iis; ta geela7otinne ta wodallati bisuwan wuridosona. Neeni ne hanqquwaa gallassi eta woradasa; etau qarettennan eta siifadasa.

<sup>22</sup> Gibiraa gallassau xeejiyoogaadan, neeni tana daganttiyaageeta ubbasaappe xee-gadasa. GODAA hanqquwaa gallassan kessi ekki paxa attidai issoinne baawa. Taani ta kiyuwan ishalissada dichchido naata ubbaa morkkee wori xaissiis.

### 3

#### *Qixaatiyaa, Nagaraappe Simmiyoogaanne Hidootaa*

<sup>1</sup> GODAA hanqquwaa gatiman metuwaa be7ida asi tana. <sup>2</sup> I tana laaggi kessidi, poo7oi bainna xumau efiis. <sup>3</sup> I zaari zaaridikka gallassa muliyaa tana shocanau ba kushiya ta bollan denttiis. <sup>4</sup> I ta galbbaanne ta ashuwaa ceegissiis; ta meqettaakka menttiis. <sup>5</sup> I tana diriis; metuwaaninne daafuran i tana dooddiis. <sup>6</sup> Beni aidekko haiqqida asadan, tana xumaa gidдон wottiis. <sup>7</sup> Taani kiyennaadan, ta yuushuwaa diriis; deexo sanssalatanka tana qachchiis. <sup>8</sup> Taani a xeegeas; akko waassinkka, i ta woosaa siyennan ixxiis. <sup>9</sup> Ta ogiyan masettida shuchchaa wottidi gorddiis; ta hemettiyoosaakka geellayyiis.

<sup>10</sup> I taayyo zuggiya maahiyaa mala, woikko qosettidi naagiya gaammuwaa mala giddiis. <sup>11</sup> I tana ta ogiyaappe kessi oliis; olidi duuterettiis. Yaatidi tana asi bannasan yeggi bayiis.

<sup>12</sup> Ba wonddafiya dafidi, tana dukkanau maliis. <sup>13</sup> I ba wonddafiya dafidi, ta wozanaa aifiyaa caddiis. <sup>14</sup> Taani asa ubbaassi miicciyoobaanne gallassa kumettaa boridi yexxiyoobaa gidaas. <sup>15</sup> I tana camuwan kunttiis; qassi godare uuttaadan cammiya xuu7aa ushshidi, tana kalissiis.

<sup>16</sup> I ta achchaa anccuwan menttiis; buhiyaa gidдон i tana yedhdhiis. <sup>17</sup> Saroi taappe haakkiis; ufaissaakka taani dogaa. <sup>18</sup> Hegaa gishshau, taani, “Ta wolqqai taappe kichchiis; taani GODAN hidootaa wottidobai ubbaikka xayiiis” yaagaas. <sup>19</sup> Ta metuwaanne taani toilattiyoogaa hassayin, de7oi tana cammiis. <sup>20</sup> Hegee taani mulekka dogennabaanne ta shemppoikka azzaniyoobaa.

<sup>21</sup> Gidikkonne, taani ha issibaa ta wozanan qoppiyo wode, taayyo sinttanau hidootai de7ees. <sup>22</sup> Hegeenne, GODAA aggenaa siiquwaappe denddidaagan nuuni xayibookko. A qaretaikka mule wuri erenna; <sup>23</sup> eti maallado maallado ooratta. Neeni keehippe ammanettiyaagaa. <sup>24</sup> Taani taayyo, “GODAI tana gakkida saama; heгаа gishshau, taani an hidootaa wottais” yaagaas.

<sup>25</sup> Bantta hidootaa an wottiyaageetussinne a koyiyaageetussi GODAI lo77o. <sup>26</sup> Hegaa gishshau, asi GODAI ashshiyoo ashettaa danddayan naagikko lo77o. <sup>27</sup> Qassi asi ba yelagattetan de7iiddi, danddayaa tamarikko lo77o.

<sup>28</sup> GODAI metuwaa ehiyo wode, i co77u giidi, barkka utti aggo. <sup>29</sup> I ba som77uwaa biittaa gattidi ziggo. Ooni erii, au sinttanau hidootai de7anaakkonne. <sup>30</sup> I ba qinxalliyyaa baqqiyaagaassi besso; ba morkketi cayiyo cashshaakka kallo.

<sup>31</sup> Aissi giikko, Godai asa merinau olidi aggenaa; <sup>32</sup> issi wode azzanuwaa ehiikkonne, i ba aggenaa siiquwaa daruwaadan qarettees. <sup>33</sup> Aissi giikko, i asa tuggayiyoogaanne metoyiyoogan ufaittena.

<sup>34</sup> A asaa kaalettiyaageeti qashettidaageeta bantta gediyaappe garssa baggaara yedhdhidosa; <sup>35</sup> qassi Ubbaappe Xoqqiya Xoossaa sinttan asassi de7iya maataa diggoosona; <sup>36</sup> qassikka shilootan pirddaa geellayoosona. Eti Godai heгаа ubbaa be7enna giidi qoppiyoonaayye?

<sup>37</sup> Godai azazibeenaa azazidi, polissanau danddayiyai oonee? <sup>38</sup> Iitabaa gidin lo77obaa gidinkka, haasayidi poliyaagee Ubbaappe Xoqqiya Xoossaa gidenneeyye? <sup>39</sup> Yaatin, nuuni asa gidiyaageeti nu nagaraa gishshau, i nuna qaxxayiyo wode, aibissi zuuzummiyoo?

<sup>40</sup> Hegaa aggidi, ane nu ogiyaa paaccoosinne qoroos; GODAAKKO ane simmoos. <sup>41</sup> Ane nu wozanaanne nu kushiyaa saluwan de7iya Xoossaakko denttidi, hagaadan yaagoos; <sup>42</sup> “Nuuni nena naaqqida; neeyyo makkalida; neenikka nuuyyo atto gabaakka. <sup>43</sup> Ne maaarotettaikka ne hanqquwan kamettiis; qassi neeni nuussi qarettennan nuna siifadasa. <sup>44</sup> Nu woosai neekko kanttennaadan, ne huuphiyaa shaaran kammadasa. <sup>45</sup> Asaa gidдон nuna pitonne buura oottadasa. <sup>46</sup> Nu morkketi ubbai nu bollan haasayidosona. <sup>47</sup> Nuuni dagammidanne gitiyan gelida; bayidanne xayida” yaagoos.

<sup>48</sup> Ta asai metuwan xayido gishshau, ta aifee shaafaadan afutaa goggees. <sup>49-50</sup> Ta aifee GODAI saluwaappe duge xeellidi be7ana gakkanaashin, mule wode aggenan afutaa tigees. <sup>51</sup> Ta kataman de7iya maccaasatu ubbaa bollan gakkidabaa ta aifee be7ido wode, ta wozanai azzaniis.

<sup>52</sup> Coo tana morkkiyaageeti tana kafuwaa shankkatiyoogaadan shankkatidosona. <sup>53</sup> Eti tana paxa de7ishin ollan yeggidi, ollaa doonaa shuchchan gorddidosa. <sup>54</sup> Haattai kumidi, ta huuphiyaara goggiyo wode, taani xayaas gaada qoppaas.

<sup>55</sup> Abeet GODAU, taani ciimma ollaa gidдон de7aidda ne sunntaa xeegaas. <sup>56</sup> Ta waasuwaas siyanaadan taani nena woossiyo wode, neeni taayyo siyadasa. <sup>57</sup> Taani nena xeesido wode, taakko shiiqada, “Yayyoppa” yaagadasa. <sup>58</sup> Abeet Godau, neeni ta mootuwaa mootettada, tana wozadasa. <sup>59</sup> Abeet GODAU, neeni ta tuggaa be7adasa. Hegaa gishshau, ta mootuwaa neeni pirdda. <sup>60</sup> Eti haluwaa kessanau ta bollan maqettiyo maqquwaa ubbaa be7adasa. <sup>61</sup> Abeet GODAU, eti tana cayiyo cashshaanne ta bollan maqettiyo maqquwaa ubbaa siyadasa. <sup>62</sup> Qassi ta morkketi gallassa kumettaa ta bollan zuuzummiyoogaanne saasukkiyoogaa siyadasa. <sup>63</sup> Be7a, eti uttiiddinne eqqiiddi, tana bori boridi yexxoosona.

<sup>64</sup> Abeet GODAU, eti oottido oosuwaassi bessiya waagaa etau qanxxa! <sup>65</sup> Eta wozanaa dammetta! Ne qanggettai eta gakko! <sup>66</sup> Abeet GODAU, neeni eta ne hanqquwan yedettada, ne salotuppe garssaara eti de7iyoosaappe eta xaissa!

## 4

### *Yerusalaame Qixaatiyaa*

<sup>1</sup> PHooliya worqqai ba meraa laammidi tasiis. Beeta Maqidasee keexettido shuchchai katamatu oge ubbaa doonan laaletti uttiis. <sup>2</sup> Kase bonchchettida worqqa lagge gidida Xiyooone naati ha77i kushe hiillai urqqaappe medhdhido miishshaa mala gididosona.

<sup>3</sup> Harai atto worakaniyaanne ba maraa xanttausu; shin ta asai bazzuwan de7iya yanchchaadan, ba naatussi meqettaa iitiis. <sup>4</sup> Saamuwaa gaasuwan xammiya naatu inxxarssai kookkiyaara ohettiis; naati qumaa woossidosona; shin etau immiyaabi issoinne baawa. <sup>5</sup> Kase mal77iya quma xalaalaa miidaageeti ha77i ogiyaa doonan namisan wuroosona; qassi kase ishaluwan diccidaageeti ha77i bidinttaa bolli zaqqullidosona.

<sup>6</sup> Ta asaa gakkida qixaatee o kusheenne bochchennaaninne qoppennan aadhdhi wodhdhida Sadooma katamaa asaa gakkida qixaatiyaappekka dariis. <sup>7</sup> A halaqati kase shachchaappe aadhdhida geeshshanne maattaappe aadhdhida bootta. Eta bollai zo7o inqquwaappe aadhdhida arssa; eta meraikka sampperiyaa giyo al77o inqquwaa mala. <sup>8</sup> SHin ha77i eta som77oi shaalaappe aadhdhidi karexxiis; asi ogiyan be7idinne eta erenna. Eta gogaikka eta meqettaara oigettidi, mittaadan meli uttiis.

<sup>9</sup> Miyobaa xayidi, loddi giidi, koshan haiqqidaageetuppe olan haiqqidaageeti keha. <sup>10</sup> Ta asaa bollan yiida bashshaa gaasuwan, qarettiya aayeti bantta yelido naata doissidi, banttau quma kessidi miidosona. <sup>11</sup> GODAA hanqquwaa xuu7ai kumiis; i ba suulliya hanqquwaa tigiis. Tigidi Yerusalaame katamaa baasuwaara miida tamaa eetti kessiis.

<sup>12</sup> Ha sa7an de7iya kawotuppe woikko kawotettatu gidдон de7iya asaappe ooninne morkkee Yerusalaame penggiyaara gelana giidi ammanibeenna. <sup>13</sup> SHin hagee hanidoogee a hananabaa yootiyaageetinne a qeeseti oottido nagaraa gishshaassa; qassi eti xillotu suuttaa a gidдон gussido gishshaassa. <sup>14</sup> Eti qooqe asadan, ogiyan tattaafosona; qassi eti suuttan tunido gishshau, eta maayuwaa ooninne bochchanau koyenna. <sup>15</sup> Hegaa gishshau, asai eta, “Kichchite! Intte tuna! Kichchite! Nuna bochchoppite!” yaagidi eta bolli waassiis.

Yaatin, eti baqatidi toilattido wode, kawotettatu gidдон de7iya asai eta, “Intte nunaara hagan de7anau danddayekketa” yaagidosona. <sup>16</sup> GODAI ba huuphen eta laaliis; i etabaa naa77antto qoppenna. Eta qeesetikka bonchchettibookkona; eta cimaticka nashettibookkona.

<sup>17</sup> Nu aifee maaduwaa demmanau xeelliiddi, coo mela daafuriis. Nuna ashshanau danddayenna kawotettata, eti yaana giidi wochchida.

<sup>18</sup> Asati nu kottiyaa kaalliyo gishshau, nu katamaa ogiyan hemettanau danddayibookko. Nu wurssettai matattiis; nu laittai wuriis; nu xayiyu wodeekka gakkiiis. <sup>19</sup> Nuna yedettiyaageeti saluwaara paalliya argganttaappekka aadhdhidi eesotoosona. Eti nuna deriyaa huuphiyaara yedettidosona; qassi bazzuwan zuggidi, nuna naagidosona.

<sup>20</sup> GODAI tiyido kawuwaa, nuuni siiriyaara shemppiyo nu shemppuwaa, eti bantta piriyan oiqqidosona. Nuuni a kuwaa garssan uttidi, kawotettatu gidдон de7ana giidi qoppida.

<sup>21</sup> Inttenoo, Uuxa biittan de7iya Eedooma asatoo, ufaittitenne poccu giite. SHin hanqquwaa xuu7ai inttekkokka gakkana; intteikka mattottidi, kallo attana.

<sup>22</sup> Inttenoo, Xiyooone asatoo, intte mooruwaa qixaatee polettiis. Hagaappe sinttan i inttena omooduwan wottenna.

SHin Eedooma asatoo, intte mooruwaa i qaxxayana; intte nagaraakka qonccissana.

## 5

*Maarotaa Ekkanau Woossiyo Woosaa*

<sup>1</sup> Abeet GODAU, nu bolli gakkidabaa ubbaa hassaya; nuna xeella; nu kaushshaakka be7a! <sup>2</sup> Nu laata biittai allagatussi, nu keettaikka betetussi imettiis. <sup>3</sup> Nuuni aawi haiqqi-ichchido naata gidida; nu aayetikka am77e maccaasa gididosona. <sup>4</sup> Nu uyiyo haattaassi miishshaa qanxxoos; eettiyo mittaakka shammi ekkoos. <sup>5</sup> Nuna yedettiyaageeti nu ginddiyaa xapho gakkidosona. Nuuni daafurida, shin shemppanau danddayibookko. <sup>6</sup> Nuuni quma kallana giidi, Gibxxe asatussinne Asoore asatussi kushiyaa immida. <sup>7</sup> Nagaraa oottidaageeti nu maizza aawata; shin eti ha77i de7okkona. Eti ekkanau bessiya qixaatiyaa ekkiyaageeti nuna.

<sup>8</sup> Ailleti nuna haariyaageeta gididosona; eta kushiyaappekka nuna wotti ekkiyaabi issoinne baawa. <sup>9</sup> Bisuwan woriyaageeti bazzon de7iyo gishshau, nuuni nu shemp-puwaa shenehoo giidi, nu qumaa demmida. <sup>10</sup> Koshai suullido gaasuwan harggin, nu gogai tamaa coociyaadan michchees. <sup>11</sup> Xiyoonen maccaasata, Yihudaa katamatunkka geela7ota wolqqan oiqqidi mooridosona. <sup>12</sup> Halaqata efidi kaqqidosona; cimatikka bonchchettibookkona. <sup>13</sup> Yelaga attumaasati woxan gaaccidosona; attuma naatika deexo mittaa tookkidi ganddigaaridosona. <sup>14</sup> Cima attumaasati katamaa penggen pirddanau uttiyoogaa aggidosona; yelaga attumaasati yettaa yexxiyoogaa aggidosona. <sup>15</sup> Nu wozanaappe ufaissai biichchiis; nu durssaikka yeehuwau laamettiichchiis; <sup>16</sup> kallachchai nu huuphiyaappe kunddiichchiis. Nuuni nagaraa oottido gishshau, nuuyyo aayye7ana! <sup>17</sup> Hegaa gishshau, nu wozanai daafuriis; nu aifeekka galjjiis. <sup>18</sup> Aissi giikko, Xiyoone Deree baisa gidiis; worakanatika an hasoosona.

<sup>19</sup> SHin abeet GODAU, neeni merinau kawotaasa; ne kawotaa araataikka yeletaa ubbaa gakkanaashin de7ees. <sup>20</sup> Neeni nuna aissi ubba wode dogai? Qassi haggaa keena adussa wodiya nuna aissi aggai? <sup>21</sup> Abeet GODAU, nuna neekko zaara; nuunikka simmana! Nu beni bonchchuwaa zaarada, nuna ooraxissa! <sup>22</sup> Neeni nuna ubba mule aggadiyye? Ne hanqquwaassikka likkee baaweeyye?

## Hananabaa Yootiya Hizqqeela Maxaafaa

### *Gidduwaa Erissuwaa*

Hananabaa yootiya Hizqqeeli Yerusalaamee Kiristtoosa yeletaappe kase, ichchashu xeetanne hosppun tammanne usuppun laittan laalettanaappe kasenne laalettoogaappe guyye, omooduwan Baabiloonen de7iis. I hananabaa yootidoogee Baabiloonen omooduwan de7iya asaassanne Yerusalaamen de7iya asaassa. Hizqqeela maxaafaassi oiddu kifileti de7oosona.

1. Xoossaa pirddai asaa bolli yaanau matidoogaanne Yerusalaamee oiqettiyoonne laalettiyo wodee gakkidoogaa minttidi erissiya kiitaa.
2. Xoossai ba asaa huqqunnidanne balettida dumma dumma kawotettata qaxxayiyaagaa gidyoogaa odiya qaalata.
3. Yerusalaame kunddettaappe simmin Israa7eela asaa minttettanau imettida kiitaanne sinttappekka lo77o qaadai gakkanau de7iyooogaa yootiya hidootaa qaalaa.
4. Beeta Maqidaseenne Israa7eela kawotettai beni ba sohuwaa simmanaagaa Hizqqeeli misiledan bessidoogaa. Hizqqeeli gita ammanoinne aassi qoppiya wozanai de7iyo asa. Sinttappe hananabaa i ajjuutan be7iis. A kiitaappe dariya baggai qoncce gidida leemiso oosuwan odettiis. Hizqqeeli asi ba giddo asatetan, ba wozanaaninne ba ayyaanau ooraxxanau koshshiyooogaanne asi ubbi ba nagaran nagaran oishettanau de7iyooogaa minttidi odiis. Hegaarakka gujjidi, asaa de7oi ooraxxanau de7iyo hidootaa qonccissiis. Hizqqeeli qeesenne hananabaa yootiyaagaa gidyoogaadan, Beeta Maqidasiyaabaanne geeshshatettaabaa dumma wudettidi xeelliya asa i gidyoogaa bessiiis.

### *Hizqqeeli Xoossaa Kawotaa Araataa Be7iis*

<sup>1</sup> Hasttamantta laittan, oiddantto aginan, ichchashantto gallasan, taani Kabaara SHaafan omoodetti biidaageetu giddon de7ishin, taani, Buuza na7ai, qeese Hizqqeeli, saloti dooyettin, Xoossaa ajjuutaa be7aas. <sup>2</sup> Kawoi Yo7aakiini omoodettoosappe ichchashantta laittan, ichchashantto aginan, <sup>3</sup> Baabiloone biittan Kabaara SHaafaa matan de7iya taakko, GODAA qaalai yiis; GODAA kusheekka hegan ta bolli de7ees.

<sup>4</sup> Taani xeelliyo wode, gotee huuphessaara yiyaagaa be7aas; wolqqaama poo7oi gita shaaraa dooddi wottiis; he shaaraa giddoora wolqqanttai pozhzhu gees. Wolqqanttau giddo wozanai phooliya nahaasiyaa milatees. <sup>5</sup> Gotiyaa giddon oiddu paxa de7iya meretati de7oosona. Eti asa milatoosona; <sup>6</sup> shin etau issuwau issuwau oiddu oiddu som77oinne oiddu oiddu qefee de7ees. <sup>7</sup> Eta gedee sitti giidaagaa; eta gediya yachchai mara gede malanne quccidi geeshshido nahaasiyaa birataadan phoolees. <sup>8</sup> Eta qefiyaappe garssaara oiddu baggaarakka asa kushe milatiya kushee de7ees. <sup>9</sup> Eta qefee issoi issuwaa bochchees; eti ubbaikka yaanne haanne simmennan tollu giidi sinttau boosona. <sup>10</sup> Etau issuwau issuwau sintta baggaara asa som77oi de7ees; ushachcha baggaara gaammuwaa som77oi de7ees; qassi haddirssa baggaara boora som77oi de7ees; qassi guyye baggaara argganttaa som77oi de7ees; <sup>11</sup> eta som77oi heгаа milatees. Eta qefee bollau micetti uttiis; eta issuwaa issuwaa naa77u qefee naa77u baggaarakka hinkko meretaa qefiyaa bochchees; qassi naa77u qefee eta bollaa bollaa kammees. <sup>12</sup> Eti ubbaikka tollu giidi sinttau biidosona; yaanne haanne simmennan, bantta ayyaanati biyoosaa awanne boosona. <sup>13</sup> Ha paxa de7iya meretatu giddon issi eexxiya tama bonqqo milatiyaageenne sinttaunne guyye qaaxxiya, eexxiya xompe malatiyaagee de7ees; he tamai phooleesinne a giddoppekka wolqqanttai kiyees. <sup>14</sup> Ha paxa de7iya meretati wolqqanttaadan, sinttaunne guyye simerettoosona.



<sup>15</sup> Ha oiddu meretata taani xeellaidda, eta miyyessan sa7an de7iya irzzota be7aas; issi issi meretaa miyyessan issi issi irzzoi de7ees. <sup>16</sup> Ha irzzoti inqquwaadan phooloosona; eti oiddaikka issoi issuwaa milatoosona. Issi irzzoi naa77u irzzo gididi merettiis; meretidi issoi issuwaa giddoora kantti uttiis. <sup>17</sup> Eti biyo wode bantta sinttaa zaari wottido oiddu ginaappe issuwau augaa gidikkonne boosona; ha meretati biyo wode irzzoi wora simmenna. <sup>18</sup> He oiddu irzzotuyyo wogganne yashshiya charkketi de7oosona; he charkketussi yuusho ubban xeelliya aiffee kumiis.

<sup>19</sup> Ha meretati biyo wode, eta miyyiyan ha irzzoti bululoosona; he meretati biittaappe pude denddiyo wode, ha irzzotikka denddoosona. <sup>20</sup> Eta ayyaanati biyo awanne ha irzzotikka denddidi boosona; aissi giikko, ha paxa de7iya meretatu ayyaanati irzzotu giddon de7oosona. <sup>21</sup> Ha meretati biyo wode, irzzotikka boosona; meretati eqqiyo wode, irzzotikka eqqoosona; qassi meretati biittaappe pude denddiyo wode, irzzoti etaara issippe denddoosona. Aissi giikko, ha meretatu ayyaanati irzzotu giddon de7oosona.

<sup>22</sup> Ha paxa meretatu huuphiyaappe bolla baggaara heregaadan phooliya salo gufantto milatiyaabai de7ees. <sup>23</sup> He gufantto milatiyaagaappe garssa baggaara eta qefee sitti giidi, issuwaagee issuwaagaakko micetti uttiis; qassi eta ubbawka eta bolla kammiya naa77u naa77u qefee de7ees. <sup>24</sup> Ha meretati paalliyo wode, eta qefiyaa giiret-tai haattaa kixaa gunttaadan, qassi Ubbaa Danddayiya Xoossaa cenggurssaadaaninne cora olanchchatu wocamaadan haniyaagaa siyaas. Eti paaluwaa aggiyo wode, bantta qefiyaa shiishshi ekkoosona.

<sup>25</sup> Eti bantta qefiyaa shiishshi ekkidi, he sohuwan eqqidaashin, eta huuphiyaappe bolla baggaara de7iya he gufantto milatiyaasaappe cenggurssai yiis. <sup>26</sup> He gufantto milatiyaagaappe bolla baggaara sampperiyaa giyo inqquwaappe merettida kawotaa araata milatiyaagee de7ees; he kawotaa araata milatiyaagaa bolli asa milatiyaagee uttiis. <sup>27</sup> Taani a be7iyo wode, a xeessaappe bolla baggai taman de7iya nahaasiyaa birataadan phooles; qassi xeessaappe garssa baggai tamaa milatees; a yuushuwan phooliya poo7oi de7ees. <sup>28</sup> A yuushuwan de7iya phooliya poo7oi ira gallassi shaaran eqqida zuullaa milatees.

Hegee GODAA bonchchuwaa qonccettaa milatees. Taani heгаа be7ido wode, biittan duge gufannada, issoi haasayiyo cenggurssaa siyaas.

## 2

### *Xoossai Hizqqeela Hananabaa Yootanau Xeegiis*

<sup>1</sup> I tana hagaadan yaagiis; “Laa asa na7au, denddada ne gediyan eqqa. Taani neeyyo yootana” yaagiis. <sup>2</sup> Yaagin Ayyaanai ta giddo gelidi, tana ta gediyan essiis. I taayyo yootiyoogaakka siyaas.

<sup>3</sup> Hagaadan yaagiis; “Laa asa na7au, taani nena Israa7eela asaakko, ta bolli makkalida makkalanchcha kawotettaakko kiittais; etinne eta aawati hachchi gakkanaassikka ta bolli makkaliiddi de7oosona. <sup>4</sup> Eti wozana muumenne morgge zozza gidiyo gishshau, taani nena etakko kiittais. Baada, ‘Ubbaa Haariya GODAI hagaadan yaagees’ yaaga. <sup>5</sup> Eti makkalanchcha zare gidiyo gishshau, eti siyin ixxin, hananabaa yootiyaagee eta giddon de7iyoogaa eti erana. <sup>6</sup> Laa asa na7au, etayyookka eta qaalaayyookka yayyoppa! Qum77uudeenne agunttai ne yuushuwan de7iyaabaa gidikkokka, qassi masimasotu gidduwan neeni uttikkokka, yayyoppa. Eti makkalanchcha zare gidiyo gishshau, eta qaalaayyo yayyoppa; woikko etayyo shabbirettoppa. <sup>7</sup> Eti makkalanchcha zare gidiyo gishshau, siyin ixxin, ta qaala eta yoota.

<sup>8</sup> “SHin, asa na7au, taani neeyyo yootiyoogaa siya! He makkalanchchatudan, neenikka makkalanchcha gidoppa; ne doonaa dooyada, taani neeyyo immiyoogaa ma” yaagiis.

<sup>9</sup> Hegaappe guyyiyan, taani xeelliyo wode, kushee taakko yedetti uttidaagaa be7aas; he kushiyan xaatta maxaafai de7ees. <sup>10</sup> I ta sinttan he xaatta maxaafaa birshshiiis; he xaatta maxaafan naa77u baggaarakka yeehoi, azzanoinne misho waasoi xaafetti uttiis.

### 3

<sup>1</sup> Qassi i tau hagaadan yaagiis; “Laa asa na7au, he ne sinttan de7iyaagaa ma; ha xaatta maxaafaa ma. Maada baada, Israa7eela asaayyo yoota” yaagiis. <sup>2</sup> Yaagin taani hanggaas; hanggin taani maanaadan, xaatta maxaafaa i tana barssiiis. <sup>3</sup> Barssidi tana, “Laa asa na7au, ha taani nena barssiyo xaatta maxaafaa ma; maada ne uluwaa an kunta” yaagiis. Yaagin taani miyo wode, ta doonan eessaadan mal77iis.

<sup>4</sup> Hegaappe simmidi, i tana hagaadan yaagiis; “Laa asa na7au, ha77i Israa7eela asaakko ba; baada ta qaalaa etayyo yoota. <sup>5</sup> Neeni kiitettidoi Israa7eela asaassappe attin, allaga biittaa qaalaaninne deexo qaalan haasayiya asaakko gidenna. <sup>6</sup> Qassi taanikka nena eta haasayai gelenna, allaga biittaa qaalaa deexuwaa haasayiya daro asaakko kiittabeikke. Tumaa gais; taani nena hegeetukko kiittidabaa gidiyaakko, eti neeni yootiyoogaa siyana shin! <sup>7</sup> Israa7eela asai taani yootiyoogaa siyanau koyenna gishshau, eti neeni yootiyoogaakka siyokkona. Aissi giikko, kumetta Israa7eela asai morgge zozzanne wozana muume gidiyo gishshau, ne yootiyoogaa siyokkona. <sup>8</sup> SHin taani nenakka etaagaadan morgge zozzanne mino oottana. <sup>9</sup> Taani ne som77uwaa salo giyo shuchchaappe aaro minniya shuchchaa oottana. Eti makkalanchcha asa gidikkokka, etayyo yayyoppa; woikko etayyo shabbirettoppa” yaagiis.

<sup>10</sup> Qassi i tana hagaadan yaagiis; “Laa asa na7au, taani neeyyo yootiyo qaalaa ubbaa minttada ezganne ne wozanan wotta. <sup>11</sup> Ha77i dendda baada, omooduwan de7iya ne asau yoota. Eti siyin ixkinka etau, ‘Ubbaa Haariya GODAI hagaadan yaagees’ yaagada yoota” yaagiis.

<sup>12</sup> Hegaappe guyyiyan, tana Ayyaanai pude denttin, taappe guyyessan, wolqqaama cenggurssan, “GODAA bonchchoi i de7iyoosan galatettidaagaa gido!” giishin siyaas. <sup>13</sup> Qassi paxa de7iya meretatu qefee issoi issuwaara boshettiyo cenggurssai, eta miyyiyan de7iya irzzotu cenggurssaara gaittidi, biittaa qaattaadan haniya guntaa siyaas. <sup>14</sup> Hegaappe guyyiyan, Ayyaanai tana pude denttidi, hara sohuwaa efiis. Yaatin, taani GODAA kushee ta bolli minni uttidaashin, ta ayyaanan camettaiddanne yiillotaidda baas. <sup>15</sup> Baada Kabaara SHaafaa matan, Tel-Abiiban de7iya omoodetti-daageetukko gakkaas. Taani hegan dagammada, etaara laappun gallassaa gam77aas.

#### *GODAI Hizqqeela Wochchiya Asa Oottidi Sunttiis*

<sup>16</sup> Laappunnta gallassaa wurssettan GODAA qaalai taakko hagaadan yaagiiddi yiis; <sup>17</sup> “Laa asa na7au, taani nena Israa7eela asaassi wochchiya asa oottaas. Ta doon-aappe kiyiia qaalaa siyido paido ubban, etikka naagettanaadan seera. <sup>18</sup> Taani na-garanchchaa, ‘Tuma neeni haiqqana’ yaagiyo wode, neeni baada a seerana xayikko, a shemppoikka attana mala, i ba nagara ogiyaappe simmanaadan neeni a, ‘Nena ye77e!’ gaana xayikko, he nagaranchchai ba nagaran haiqqana; shin a suutta taani neeppe achchana. <sup>19</sup> SHin neeni nagaranchchaa seerin, i ba nagaraappe woikko ba iita ogiyaappe simmennan ixkikko, i ba nagaran haiqqana; shin neeni ne huuphiyaa ashshana.

<sup>20</sup> “Qassi xillo asi ba xillotettaappe guyye simmidi, iitaa oottiyo wode, taani a sinttan xubiyaa wottin, i haiqqana. I simmanaadan neeni a, ‘Nena ye77e!’ gabeenna gishshau, i ba nagaran haiqqana; i kase oottido xillo oosoi zaaridi qofettenna; shin taani a suuttaakka neeppe achchana. <sup>21</sup> Qassi neeni xillo asi nagaraa oottennaadan seerin, ikka nagaraappe bana naagikko, tuma i paxa de7ana. Aissi giikko, i neeni seeridoogaa siyiis; neenikka ne huuphiyaa ashshana” yaagiiddi yiis.

#### *Hizqqeela GODAI Duudissiis*

<sup>22</sup> He sohuwan GODAA kushee ta bolli de7ees; qassi i tana, “Dendda; denddada dembbaa ba. Taani neeyyo yan yootana” yaagiis. <sup>23</sup> Yaagin taani denddada, dembbaa baas. He sohuwan kase Kabaara SHAafaa matan taani be7idoogaadan, hegan GODAA bonchchoi eqqidaagaa be7aas; be7ada taani ta som77uwaa biittaa gattada gufannaas.

<sup>24</sup> Hegaappe guyyiyan, Ayyaanai ta giddo gelidi, tana ta gediyan essidi, tana hagaadan yaagiis; “Ba; ne soo baada, ne bolli kariyaa gorddada uttaaga. <sup>25</sup> Laa asa na7au, wodoroi ne bolli wodhdhin, neeni qashettana; heгаа gishshau, neeni asaakko kiyana danddayakka. <sup>26</sup> Qassi neeni duude gidanaadaaninne eta seerennaadan, taani ne inxxarssaa ne kookkiyaara gatta oittana. Aissi giikko, eti makkalanchcha asa. <sup>27</sup> SHin taani neeyyo yootiyo wode, taani ne doonaa dooyin, neenikka etayyo, ‘Ubbaa Haariya GODAI hagaadan yaagees’ yaagana. Siyiya ooninne siyo; siyennan ixxiya ooninne ixxo. Aissi giikko, eti makkalanchcha asa.

## 4

### *Yerusalaamee Morkkiyan Doodettiyoogau Hizqqeeli Malaataa Bessiis*

<sup>1</sup> “Laa asa na7au, urqqaappe medhdhido xuubiyaa ekkada, ne sinttan wotta; yaatada Yerusalaame katamaa misiliyaa a bolli medhdha. <sup>2</sup> Medhdhada a doodda; katamaa gimbbiyaa yuushuwan biittaa doora; olanchchati galchchiyoosaa giigissa; gimbbiyaa laaliyo ola miishshaakka yuushuwan essa. <sup>3</sup> Qassi birata bashiyaa ekkada, birata godaadan neepenne katamaappe gidduwan essa. Ne som77uwaakka akko zaara. He katamai doodettana; qassi dooddidaikka nena. Hagee Israa7eela asaayyo malaata gidana.

<sup>4</sup> “Hegaappe guyyiyan, neeni ne haddirssa miyyiyan zin77a. Israa7eela asaa nagaraa ubbaa taani ne bolli wottana. Neeni ne haddirssa miyyiyan zin77ido gallassatu qoodaa keenaa Israa7eela asaa nagaraa tookkana. <sup>5</sup> Israa7eela asaa nagaraa neeni 390 gallassaa tookkana; issi issi gallassai issi issi laitta qixaatiyaara lagge. Hegaа keena wodiyaа neeni Israa7eela asaa nagaraa tookkana.

<sup>6</sup> “Hegaа ne wurssidoogaappe guyyiyan, qassi zaarada ne ushachcha miyyiyan zin77a; zin77ada Yihudaa asaa nagaraa tookka. Issi issi gallassai issi issi laitta qixaatiyaara lagge gidiyo gishshau, eti oottido nagaraa qixaatiyaa oitamu gallassaa neeni zin77anaadan, taani neeyyo immaas. <sup>7</sup> Ne som77uwaa Yerusalaame doodettaakko zaarada, ne qesiyaa kallo wottada, Yerusalaame bolli hananabaa yoota. <sup>8</sup> He doodettan neeni gam77iyo gallassai wuranaashin, issi miyyiyaappe hara miyyiyau aadhdha wodhdhennaadan, taani nena wodoruwan qachhana.

<sup>9</sup> “Ha77i neeni, gisttiyaanne bangгаа, baaqeelaanne misiraa, maldduwaanne qambaraa ekkada, kattaa wottiyo issi baattan qolada, appe neeyyo oittaa uukka; heгаа neeni ne haddirssa miyyiyan zin77iyo 390 gallassaa maana. <sup>10</sup> Hachchi hachchi neeni miyo oittai 230 giraame deexxiyaagaa gido; heгаа a wodiyan wodiyan ma. <sup>11</sup> Hachchi hachchi neeni uyiyo haattai naa77u burccukko gido; heгаа a wodiyan wodiyan uya. <sup>12</sup> He walakkido kattaa bangгаа oittaa uukkiyoogaadan uukka; uukkaidda asai xeelishin, asaa shiyaa melaa ettada uukka; yaatada ma. <sup>13</sup> Hegee Israa7eela asai taani eta laaliyo kawotettatu gidдон de7iiddi, tunida qumaa maanaagaayyo malaata” yaagiis.

<sup>14</sup> Yaatin, taani zaarada hagaadan yaagaas; “Ubbaa Haariya GODAU, hegee hanoppo! Taani tana tunissa erikke. Ta naatettaappe doommada hachchi gakkanaashin, bautaa woikko bazzo do7i puuzidi woridobaa ma erikke; tunida ashoi ta doonakko shiiqi erenna” yaagaas.

<sup>15</sup> Yaagin i zaaridi, tana hagaadan yaagiis; “Daro lo77o, yaatikko, asaa shiyaa melan uukkiyoogaa aggada, miizaa oshaa kiyyiyan ne oittaa uukkaasa” yaagiis.

<sup>16</sup> I qassikka hagaadan yaagiis; “Laa asa na7au, be7a; Yerusalaame katamaa katti gelennaadan, taani teqqana. Asai kattaa hirggiiddi, makkidi maana; qassi haattaakka

yayyiiddi, likkidi uyana. <sup>17</sup> Etau de7iya kattainne haattai wurana; eti issoi issuwaa, 'Poora!' giiddi xeellana; eti bantta nagaraa qixaatiyan gilqqana.

## 5

### *Yerusalaame Bolli Yiya Bashshaa Malaataa*

<sup>1</sup> “Laa asa na7au, qara bisuwaa ekkada, ne huuphiyaanne ne buuchchaa an meeda. Yaatada meezaanan likkada, ne binnaanaa heezzu kessada shaakka. <sup>2</sup> Neeni dooddiyo wodee wuriyo wode, ne shaakkido binnaanau issi kushiya Yerusalaame katamaa misiliyaassi gidduwan taman xuugga. Naa77antto kushiya katamaa yuushuwan ubban bisuwan qanxxeretta. Heezzantto kushiya qassi carkkuwau laala; aissi giikko, taani eta bisuwan yedettana. <sup>3</sup> Qassi hegaappe guutta binnaanaa ekkada, ne maayuwaa xeeran qachcha. <sup>4</sup> He neeni qachchidoogaappe guutta ekkada, taman olada xuugga. Hegan doommida tamai Israa7eela asaa ubbaa gakkana” yaagiis.

<sup>5</sup> Ubbaa Haariya GODAI hagaadan yaagees; “Hagee Yerusalaame katamaa; taani biittata a yuushuwan wottada, kawotettatu ubbaayo giddo gul77an a wottaas. <sup>6</sup> SHin i ba iita oosuwan, ba yuushuwan de7iya biittatuppenne kawotettatuppe yaa iitidi, ta higgiaanne ta wogaa naagennan ixxiis; i ta higgiaassi makkaliis; ta wogaakka kaallennan ixxiis” yaagees.

<sup>7</sup> Hegaa gishshau, Ubbaa Haariya GODAI hagaadan yaagees; “Neeni ne yuushuwan de7iya kawotettaappe yaa iitada, ta azazuwaa kaallennaanne ta wogaa naagennan ixxadasa. Ne yuushuwan de7iya kawotettatu wogaa kaalladasa” yaagees.

<sup>8</sup> Hegaa gishshau, Ubbaa Haariya GODAI hagaadan yaagees; “Nenoo, Yerusalaamee, taani neeyyo morkke; hara kawotettati ubbai be7ishin, ne bolli ta pirddaa ehaana. <sup>9</sup> Neeni taani ixxiyoobaa ubbaa oottido gishshau, taani hagaappe kase gattabeennaagaa, qassi hagaappe sinttaukka gattenna pirddaa ne bolli gattana. <sup>10</sup> Hegaappe denddidaagan, intte giddon aawati bantta naata maana; qassi naatika bantta aawata maana. Taani intte bolli pirddaa ehaana; intteppe attidaageetakka carkko ubbau laalana.

<sup>11</sup> “Hegaa gishshau, taani Ubbaa Haariya GODAI ta de7uwan caaqqais: Intte intte sheneyiya eeqatuuninne tuna oosotun ta Beeta Maqidasiyaa tunissido gishshau, taanikka inttena xaissana. Taani intteyyo qarettikkenne intteppe issuwaanne ashshikke. <sup>12</sup> Intte asaappe issi kushee katamaa giddon boshaanne koshan haiqqana; naa77antto kushee katamaappe kareera olan wurana; qassi heezzantto kushiya taani carkko ubbau laalada, eta bisuwan yedettana.

<sup>13</sup> “Ta yiilloi wurana; taani eta bolli hanqqettido hanqqoikka wodhdhana; yaatobare tau irxxi gaana. Taani eta bollan hanqqettido hanqquwaa wurssiyo wode, taani GODAI qanaatiyan haasayidoogaa eti erana.

<sup>14</sup> “Intte yuushuwan de7iya kawotettatu giddooninne intte mataara aadhdhiya ubbaa sinttan taani inttena baisanne qilliicciyoobaa oottana. <sup>15</sup> Taani inttena ta hanqquwaanne ta yiilluwan hanttaara pirddaa pirddido wode, intte intte yuushuwan de7iya kawotettatussi qilliicciyoobaanne cayiyoobaa, inttena be7ida asi naagettiyoobaanne daganttiyaabaa gidana. Taani GODAI haggaa odaas. <sup>16</sup> Taani intte bolli woriyaanne xaissiya koshaa wondafiyaa dukkiyo wode, inttena xaissanau dukkana. Taani intteyyo koshaa yaa yaa darissana; Yerusalaame katamaa kattai gelennaadan, taani teqqana. <sup>17</sup> Taani koshaanne bazzo do7aa intte bolli yeddin, eti intte naata xaissana. Taani boshaa, suutta gussiyogaanne olaa intte bolli ehaana. Taani GODAI haggaa odaas” yaagees.

## 6

### *GODAI Eeqau Goinniyoogaa Pirddiis*



<sup>1</sup> GODAA qaalai taakko hagaadan yaagiiddi yiis; <sup>2</sup> “Laa asa na7au, Israa7eela dere-tukko ne som77uwaa zaarada, eta bolli hananabaa yoota. <sup>3</sup> Hagaadan yaaga; ‘Inttenoo, Israa7eela deretoo, Ubbaa Haariya GODAA qaalaa siyite! Ubbaa Haariya GODAI Israa7eela deretuyyoonne keratuyyo, zanggaaratuyyoonne wombbatuyyo hagaadan yaagees; “Be7ite, taani, ta addiniitai intte bolli olaa ehaana; qassi intte goinniyo xoqqa sohotakka xaissana. <sup>4</sup> Intte yarshshiyi sohoti qolettana; qassi intte ixaanaa cuwayiyo sohotikka meqerettana. Taani intte asaa intte eeqatu sinttan worana. <sup>5</sup> Taani Israa7eela asaa ahaa eta eeqatu sinttan zin77issana; intte meqettaakka intte yarshshiyi sohotu yuushuwan laalana. <sup>6</sup> Intte de7iyooosan ubban intte katamatinne intte goinniyo xoqqa sohoti qolettana. Hegaappe denddidaagan intte yarshshiyi sohoti baisanne moorettidaageeta gidana; intte eeqati meqerettananne xayana; intte ixaanaa cuwayiyo sohotikka meqeretti wodhdhana; intte oosoi ubbai pitetti xayana. <sup>7</sup> Intte asai shuhet-tidi, intte gidдон kunddana. Taani GODAA gidiyooгаа intte hegan erana.

<sup>8</sup> “ ‘Taani intteppe amaridaageeta paxa ashshana; yaatobare kawotettatu gidдон intte laalettana. <sup>9</sup> Kessi ekkidi attidaageeti yan omooduwan de7ana. Yan de7iyiyo wode, eti tana hassayana; qassi eeqau goinniyoogaaninne iitaa oottiyoogan eti tana azzanis-sidoogaa akeekana. Eti bantta oottido iita oosuwaappenne eta yeellayiya hanotaappe denddidaagan, banttarkka banttana shenetana. <sup>10</sup> Qassi taani GODAA gidiyooгаа eti erana. Taani eta bolli iitabaa ehaana giidoogee coo hada baabiso gidenna” yaagees.

<sup>11</sup> “ ‘Ubbaa Haariya GODAI hagaadan yaagees; “Intte kushiya baqqite! Intte gediyanikka biittaa giirissite! Qassi hagaadan yaagite; ‘Israa7eela asaa sheneyiya oosuwaayyo aayye7ana!’ yaagite. Aissi giikko, eti olan, koshaaninne boshan wurana. <sup>12</sup> Haahuwan de7iyaagee boshan haiqqana; matan de7iyaagee olan haiqqana; qassi paxa attidaagee koshan haiqqana. Hegaadan oottada, taani ta hanqquwaa eta bolli wurssana. <sup>13</sup> Eta asaa ahai eta eeqaa matan, eti yarshshiyooosaa yuushuwan, xoqqa keratu bollinne deretu kiikiyaa bolli, irxxa mittaa garssan, daro bonccoi de7iyiyo ettaa garssan, bantta eeqatussi yarshshuwaa xuuggido sohuwan ubban kunddido wode, eti taani GODAA gidiyooгаа erana. <sup>14</sup> Qassi taani ta kushiya eta bolli yeddada, eti de7iyiyo biittaa ubbaa, bazzuwaappe biidi Ribila giyo katamaa gakkanaashin, bashshanne baisa oottana. Taani GODAA gidiyooгаа eti hegan erana” yaagees’ yaaga” yaagiiddi yiis.

## 7

### *Israa7eelassi Wurssettai Gakkiis*

<sup>1</sup> GODAA qaalai taakko hagaadan yaagiiddi yiis; <sup>2</sup> “Laa asa na7au, Ubbaa Haariya GODAI Israa7eela biittaaayyo hagaadan yaagees; ‘Wurssettaa! Ubbasaara biittaa bollan wurssettai gakkiis. <sup>3</sup> Hekkoo, wurssettai intte bolla gakkiis! Taani ta hanqquwaa intte bolli yeddana. Taani intte oosuwaadan, intte bolli pirddana; intte tuna hanotaadan, taani inttena qaxxayana. <sup>4</sup> Taani intteyyo qarettikkenne intteppe issuwaanne ashshikke. Taani tumaappe intte tuna hanotaa gaasuwan inttena qaxxayana. Taani GODAA gidiyooгаа intte hegan erana’ yaagees.

<sup>5</sup> “Ubbaa Haariya GODAI hagaadan yaagees; ‘Bashshaa! Bashshaa bollan bashshai yees. <sup>6</sup> Wurssetti gakkiis! Wurssettai gakkiis! I intte bollan denddiis. Be7ite, i gakkiis! <sup>7</sup> Ha biittan de7iyaageetoo, intte pirddai gakkiis; wodee gakkiis; gallassai matattiis! Hegee shabbirssa gallassappe attin, deriyaa bollan ufaissan ililiyo gallassa gidenna. <sup>8</sup> Ha77i matan taani ta hanqquwaa intte bolli gussana; ta yiilluwaakka intte bollan wurssana. Taani intte oosuwaadan, intte bolli pirddana; intte tuna hanotaadan, inttena qaxxayana. <sup>9</sup> Taani intteyyo qarettikkenne intteppe issuwaanne ashshikke. Intte ogiyaadaaninne intte gidдон de7iya tuna oosuwaadan, taani inttena qaxxayana. Yaatobare intte inttena shocidai tana GODAA gidiyooгаа erana.



<sup>10</sup> “Gallassai hageeho! Gakkiis! Intte pirddai gakkiis! Intte iitatettaa aaciis; intte otoroikka ciyiis. <sup>11</sup> Makkalaa gaasuwan iita ooso dariis; etappe, woikko eta coratettaappe, woikko eta dorettaappe, woikko eta bonchchuwaappe attanabi baawa. <sup>12</sup> Wodee gakkiis; gallassaikka matattiis! Hanqqoi asaa ubbaa bollaana gidiyo gishshau, shammiyaagee ufaittoppo; woikko baizziyaageekka azzanoppo. <sup>13</sup> Eti naa77ai paxa de7iyo peeshan, baizzidaagee ba baizzidoogaa guyye zaarena. GODAA hanqqoi asaa ubbaa bolli yees; eta nagaraappe denddidaagan etappe issoinne ba shemppuwaa ashshenna. <sup>14</sup> Ta hanqqoi asaa ubbaa bolli de7iyo gishshau, eti olau xurumbbaa punnidi, ubbabaa giigissikkokka, ooninne olau kiyenna.

### *Israa7eela Asaa Nagaraa Gaasuwan Yiya Qixaatiyaa*

<sup>15</sup> “Kareera olai, soora boshainne koshai de7ees. Katamaappe gaxan de7iyaagee olan haiqqana; katamaa gidдон de7iyaageeti koshaaninne boshan wurana. <sup>16</sup> Etappe kessi ekkidi attiyaageeti bantta nagaraa gaasuwan wombaappe yashshan baqatida haraphphetudan, deriyaa bollan oolana. <sup>17</sup> Kushe ubbai doccana; gulbbata ubbaikka haattaadan hanana. <sup>18</sup> Eti waaruwaa maayana; qassi yashshan kokkorana. Eta som77oikka yeellaa maayana; eta huupheekka meedettana. <sup>19</sup> Eti bantta biraa ogiyan olana; eta worqqaikka tunabaa gidana. GODAA hanqquwaa gallassi eta birainne eta worqqai eta ashshanau danddayenna. Eta xube gididi, nagaran gelissida birainne worqqai eta uluwaa kumidi, eta namisaappe ashshenna.

<sup>20</sup> “Eti bantta lo77o alleequwan otorettidosona; otorettidi hegeeta bantta tuna eeqanne yeellayiya misile medhdhanau go7ettidosona. Hegaa gishshau, taani hegeeta etau tunabaa kessaas. <sup>21</sup> Taani eta alleequwaa omoodo oottada, allagaunne biittan sa7an de7iya iitatau aattada immin, eti a tunabaa kessana. <sup>22</sup> He wode taani ta som77uwaa Israa7eelappe wora zaarana; qassi ta bonchcho Beeta Maqidasiyaa pang-gati gelidi tunissana.

<sup>23</sup> “Biittai ubbai suutaa gussiyaageetun kumido gishshaunne katamaikka makkala oosuwan kumido gishshau, sanssalataa giigissa. <sup>24</sup> Eta keettata baassa oottana mala, taani ubbaappe iita kawotettaa ehaana. Wolqqaamatu otoruwaakka taani xaissana; eta geeshsha sohotikka tunana. <sup>25</sup> Bashshai yiyo wode, eti saruwaa koyana; shin demmukkona. <sup>26</sup> Bashshai bashshaa bolli, qassi iita odoi iita oduwaa bolli yaana. Eti hananabaa yootiyaagaa, “Ne ajjuutaa yoota” yaagana. Qeesetussi tamarissiyoo timirttee xayana; cimatussikka zoriyoobi xayana. <sup>27</sup> Kawoi yeekkana; halaqai hidootaa qanxxana; he biittaa asaa kushee yashshan kokkorana. Taani etau eta oosuwaadan oottana; eta pirddaadan, eta bolli pirddana. Taani GODAA gidiyoogaa eti hegan erana’ yaagees” yaagiiddi yiis.

## 8

### *Hizqqeeli Ajjuutan Yerusalaame Nagaraa Be7iis*

<sup>1</sup> Nuuni omoodettido usuppunta laittan, usuppunta aginan, ichchashantta gallas-san, taani ta son uttidaashin, Yihudaa cimatika ta sinttan uttidaashin, Ubbaa Haariya GODAA kushee ta bollan wodhdhiis. <sup>2</sup> Taani xeellada, asa milatiyaagaa be7aas; ayyo xeessaappe garssa baggai tamaa milatees; qassi xeessaappe bolla baggai phooliya nahaasiyaa birataa milatees. <sup>3</sup> I kushe milatiyaagaa taakko yeddidi, ta huuphiyaa binnaanaa oiqqiis. Ayyaanai tana sa7aappenne saluwaappe gidduwau pude denttidi, Xoossaa ajjuutan tana Yerusalaame efiis. Efidi huuphessa baggaara Beeta Maqidasiyaa giddo dabaabaa geliyo penggiyaara gelissidi, GODAA qanaatiyaa denttettiya eeqai eqqidaagaa bessiiis. <sup>4</sup> Kase taani dembba biittan ajjuutan be7idoogaadankka, Israa7eela Xoossaa bonchchuwaa hegan be7aas.

<sup>5</sup> Hegan i tau hagaadan yaagiis; “Laa asa na7au, huuphessa baggi xeella” yaagiis. Yaa-gin taani xeelliyo wode, qanaatiyaa eeqai dirssaa penggiyaa sinttan de7iya yarshshiy-oosaa matan de7iyaagaa be7aas. <sup>6</sup> Qassikka i tau hagaadan yaagiis; “Laa asa na7au, eti oottiyoobaa be7ai? Tana ta Beeta Maqidasiyaappe haassanau Israa7eela asai oottiyo gita tunatettaa be7ai? Hegaappekka aadhdhiya tunatettaa neeni biron be7ana” yaagiis.

<sup>7</sup> Hegaappe guyyiyan, tana Beeta Maqidasiyaa dabaabaa pengge ehiis; ehin taani xeelliyo wode, godan xoo7ee de7iyaagaa be7aas. <sup>8</sup> I tana, “Laa asa na7au, godaa bookka” yaagiis; yaagin taani bookkiyo wode, issi penggee hegan de7iyaagaa be7aas. <sup>9</sup> Qassi i tana, “Gela; gelada eti hagan oottiyo gita tunatettaa be7a” yaagiis. <sup>10</sup> Yaagin taani giddo gelada xeelliyo wode, godaa bollan yuuyyi aadhdhidi biittaara gooshettiya meretatu misilee, geeshsha gidenna do7atu misileenne Israa7eela asaa eeqatu ubbaa misilee kumidaagaa be7aas. <sup>11</sup> Etappe sintta baggaara Israa7eela asaappe laappun tammu cimati eqqidosa; qassi SHaafaana na7aa Yazaaneekka eta gidдон eqqiis. Ubbaikka ixaanaa cuwayiyoobaa bantta kushiyan oiqqidosona; ixaanaa cuwaikka toqqattees.

<sup>12</sup> Qassi i tana hagaadan yaagiis; “Laa asa na7au, haggaa Israa7eela asaa cimati ubbaikka xuman bantta eeqa misiliyaa keettan eti oottiyoobaa be7ai? Aissi giikko, eti, ‘GODAI nuna be7enna; GODAI ha biittaa aggiis’ yaagoosona” yaagiis. <sup>13</sup> Qassikka i tana, “Hegaappekka aadhdhiya tunatettaa neeni biron be7ana” yaagiis.

<sup>14</sup> Hegaappe guyyiyan, i tana Beeta Maqidasiyau huuphessa bagga penggiyau efin, hegan Tamuza giyo bantta xoossau kayyottidi yeekkiya maccaasaa be7aas. <sup>15</sup> I tana, “Laa asa na7au, haggaa be7ai? Hegaappe aadhdhiya tunatettaa neeni biron be7ana” yaagiis.

<sup>16</sup> Hegaappe guyyiyan, i tana GODAA Beeta Maqidasiyau giddo dabaabaa efiis; hegan Beeta Maqidasiyaa penggen baranddaappenne yarshshiyooosaa gidduwan laatamanne ichchashu attumaasaa gididiyaagaa be7aas. Eti bantta zokkuwaa GODAA Beeta Maqidasiyaakko, bantta som77uwaa arshshokko zaaridi, arshshoora mokkiya awaayyo goinnoosona.

<sup>17</sup> I tana hagaadan yaagiis; “Laa asa na7au, haggaa be7adii? Yihudaa asaassi ha tunatettaa oottiyoogee ubba laafabaa gididee? Eti biittaa makkala oosuwan kunttidi, zaari zaaridi tana hanqgetissanau bessii? Be7a, eti bantta danddayido keenan tana iissidi cayoosona. <sup>18</sup> Heggaa gishshau, taani etaara hanqquwan gaittana. Taani etayyo qarettikkenne etappe issuwaanne ashshikke. Eti bantta cenggurssaa xoqqu oottidi, ta haittan waassinkka, taani etau siyikke” yaagiis.

## 9

### *Eequ Goinniyaageeta Woridosona*

<sup>1</sup> Hegaappe guyyiyan, taani siyishin, GODAI ba qaalaa xoqqu oottidi, hagaadan azaziis; “Inttenoo, katamaa asaa woriyaageetoo, ubbaikka intte woriya ola miishshaa intte kushiyan kushiyan oiqqidi, haa shiiqite” yaagiis. <sup>2</sup> Yaagin huuphessi xeelliya qommo bagga penggiyaara woriya ola miishshaa oiqqidi, yiya usuppun asata be7aas. Etaara issippe liinuwaappe dadettida maayuwa maayidi, ba miyyiyan xaafiyoobaa korjuwan oiqqida issi bitanee de7ees. Eti giddo gelidi, nahaasiyaappe oosettida yarshshiyooosaa lanqqen eqqidosa.

<sup>3</sup> Israa7eela Xoossaa bonchchoi kase ba de7iyo kiruubetuppe denddidi, Beeta Maqidasiyaa pengge biis. Hegan GODAI ayyo liinuwa maayidi, ba miyyiyan xaafiyoobaa korjuwan oiqqida bitaniyaa xeesiis. <sup>4</sup> Xeesidi a hagaadan yaagiis; “Yerusalaame katamaa gidduwaa kanttada baidda, yan oosettiya tunatettaa gishshau, ooliiddinne kayyottiiddi de7iya asaa som77uwan malaataa wotta” yaagiis.

<sup>5</sup> Taani siyishin, i haratakka hagaadan yaagiis; “A geedo kaallidi, katamaa gid-duwaa kanttiiddi worite! Issuwaanne ashshoppite; oossinne qarettoppite. <sup>6</sup> Cimata, wodallatanne geela7ota, maccaasatanne naata ubbaakka worite; shin som77uwan malaatai de7iyo asa oonanne bochchoppite. Woruwaa ta Beeta Maqidasiyan doom-mite” yaagiis. Yaagin eti woruwaa Beeta Maqidasiyaa sinttan eqqida cimatum doom-midosona. <sup>7</sup> Hegaappe guyyiyan, i eta hagaadan yaagiis; “Beeta Maqidasiyaa tunissite; dabaabaakka ahan kunttite; kiyite” yaagiis. Yaagin eti kiyidi, katama gid-don ubban woruwaa doommidosona.

<sup>8</sup> Eti woriiddi de7ishin, taani tarkka attada, ta som77uwaa biittaa gatta gufannada, ta qaalaa xoqqu oottada, “Abeet Ubbaa Haariya GODAU, ha neeni Yerusalaame bollan gussiyo ne hanqquwan, Israa7eelappe attida muliyaakka wurssuuteeyye?” yaagaas.

<sup>9</sup> I zaaridi, taayyo hagaadan yaagiis; “Israa7eelanne Yihudaa nagarai keehi dariis; biitta ubban suuttaa gussiyaageeti kumidosona; qassi katama ubban tumu pirddaa geellayiyaageeti kumidosona. Aissi giikko, asai, ‘GODAI ha biittaa aggiis; GODAI be7enna’ yaagoosona. <sup>10</sup> Hegaa gishshau, taani etayyo qarettikkenne etappe is-suwaanne ashshikke. Taani etayyo eta oosuwaadan oottana” yaagiis.

<sup>11</sup> Hegaappe guyyiyan, liinuwaa maayidi, ba miyyiyan xaafiyoobaa korjjuwan oiqqida bitanee guyye simmidi, “Neeni tana azazidoogaadan oottaas” yaagiis.

## 10

### *GODAA Bonchchoi Beeta Maqidasiyaappe SHaahettiis*

<sup>1</sup> Taani xeelliyo wode sampperiyaa giyo inqquwaappe oosettida kawotaa araatai kiruubetu huuphiyaappe bolla baggaara de7iyya salo gufantto milatiyaagan de7iyyaagaa be7aas. <sup>2</sup> Liinuwaa maayida bitaniyaa GODAI hagaadan yaagiis; “Kiruubetuppe garssa baggaara irzzotu gid-dooraa kanttada ba; baada hegaappe xiixinttaa bonqquwaa ne kushiyan kophpheta ekkada, katamaa bolli laala” yaagiis.

Yaagin taani xeellishin, tamaa ekkana geliis. <sup>3</sup> Bitanee soo geliyo wode, kiruubeti Beeta Maqidasiyaappe tohossa baggaara eqqidosa; gid-doo dabaabaakka shaarai kumiis. <sup>4</sup> GODAA bonchchoi kiruubetu bollappe dendididi, Beeta Maqidasiyaa pengge biis. SHaarai Beeta Maqidasiyaa kumiis; dabaabaikka GODAA bonchchuwaa phoolettan kumiis. <sup>5</sup> Kiruubetu qefiyaa giirettai Ubbaa Haariya GODAA cenggurssaadan, kare dabaaban siyettes.

<sup>6</sup> Liinuwaa maayida bitaniyaa GODAI, “Kiruubetu garssa bagga irzzotu gid-doppe tamaa ekka” yaagidi azazin, i gelidi issi irzzuwaa miyyiyan eqqiis. <sup>7</sup> Kiruubetuppe issoi bantta gid-don de7iyya tamaakko ba kushiya yeddidi, appe guuttaa ekkidi, liinuwaa maayida bitaniyaa kushiyan wottin, ikka ekkidi kiyiis. <sup>8</sup> Kiruubetu qefiyaappe garssa baggaara asa kushe milatiyaagee de7ees.

<sup>9</sup> Taani xeelliyo wode, kiruubetu miyyessan oiddu irzzoti de7oosona; issi issi kiruubiyaa miyyiyan issi issi irzzoi de7iyyaagaa be7aas; he irzzoti inqquwaadan phooloosona. <sup>10</sup> Eti oiddaikka issoi issuwaa malatoosona; issi irzzoi naa77u irzzo gididi merettiis; merettidi issoi issuwaa gid-dooraa kantti uttiis. <sup>11</sup> Kiruubeti biyo wode, oiddu baggaukka yaanne haanne simmennan boosona; issi irzzoi biido geeduwaa hankko irzzoti yaanne haanne simmennan tollu giidi boosona. <sup>12</sup> Eta kumetta bollan, hegeenne eta zokkuwan, eta kushiyan, eta qefiyaaninne eta oiddu irzzotun xeelliya aifee kumiis. <sup>13</sup> Taani siyishin, irzzoti Bichchaariya Irzzota geetetti xeegettidosona. <sup>14</sup> Issi issi kiruubiyau oiddu som77oi de7ees. Issi som77oi kiruubiyaa som77uwaa, naa77anttoi asa som77uwaa, heezanttoi gaammuwaa som77uwaanne, oiddanttoi arganttaa som77uwaa.

<sup>15</sup> Hegaappe guyyiyan, kiruubeti pude denddidosa. Hageeti taani Kabaara SHaafaa matan be7ido paxa de7iyya meretata. <sup>16</sup> Qassi kiruubeti biyo wode, eta miyyessan de7iyya irzzotikka bululoosona; qassi kiruubeti biittaappe pude denddanau bantta

qefiyaa micciyo wodekka irzzoti eta miyyiyaappe shaahettokkona. <sup>17</sup> Eti eqqiyo wode, irzzotikka eqqoosona; qassi eti biittaappe pude denddiyo wode, etikka denddoosona. Hegeekka paxa de7iya meretatu ayyaanati etan de7iyo gishshaassa.

<sup>18</sup> Hegaappe guyyiyan, GODAA bonchchoi Beeta Maqidasiyaa penggeppe denddi, kiruubetuppe bolla baggan eqqiis. <sup>19</sup> Taani xeellishin, kiruubeti bantta qefiyaa miccidi, irzzotuurakka issippe biittaappe pude denddidosona. Eti GODAA Beeta Maqidasiyau arshsho bagga penggiyaara eqqidosona; Israa7eela Xoossaa bonchchoikka etappe bolla baggaara de7ees.

<sup>20</sup> Hageeti Kabaara SHaafan taani Israa7eela Xoossaappe garssa baggaara be7ido paxa de7iya meretata; qassi eti kiruubeta gidiyoogaa taani eraas. <sup>21</sup> Eta ubbaukka oiddu oiddu som77otinne, oiddu oiddu qefeti de7oosona; eta qefetuppe garssa baggaara asa kushe milatiyaagee de7ees. <sup>22</sup> Eta som77oti Kabaara SHaafaa matan taani be7ido som77ota milatoosona. Eti ubbaukka tollu giidi, sinttau boosona.

## 11

### *Yerusalaame Bolli Gakkida Pirddaa*

<sup>1</sup> Hegaappe guyyiyan, Ayyaanai tana denttidi, arshsho xeelliya GODAA Beeta Maqidasiyaa pengge efiis. Hegan he penggiyaa geliyoosan laatamanne ichchashu attumaa-sai de7ees; eta gidдон asaa kaalettiya Azuura na7aa Azaaniyaanne Banaaya na7aa Palaaxiyaa be7aas. <sup>2</sup> GODAI tana hagaadan yaagiis; “Laa asa na7au, ha asati ha kataman iita halchchuwaa halchchiyaageetanne iita zoriyaa zoriyaageeta. <sup>3</sup> Eti hagaadan yaagoosona; ‘Nuuni keettaa zaaretti keexxana wodee matattiis. Ha katamai asho xaaro; qassi nuuni asho’ yaagoosona. <sup>4</sup> Hegaa gishshau, asa na7au, hananabaa yoota! Eta bolli hananabaa yoota!” yaagiis.

<sup>5</sup> Hegaappe guyyiyan, GODAA Ayyaanai ta bolli wodhdhidi, tana hagaadan yaagiis; “Eta yaaga; ‘GODAI hagaadan yaagees; “Israa7eela asau, intte hegaadan geeta; shin taani intte ai qoppiyaakko erais. <sup>6</sup> Ha kataman intte daro asaa woridi, oge ubban ahaa kunttideta” yaagees.

<sup>7</sup> “ ‘Hegaa gishshau, Ubbaa Haariya GODAI hagaadan yaagees; “Intte woridi hegan olido ahai asho; qassi ha katamaikka asho xaaro; shin taani inttena ha katamaappe yedettada kessana. <sup>8</sup> Intte olau yayyideta; taani he intte yayyido olaa intte bolli ehaana. Taani Ubbaa Haariya GODAI haggaa odais. <sup>9</sup> Taani inttena ha katamaappe kessada, allagatuuyo aatta immana; taani intte bolli pirddana. <sup>10</sup> Intte olan wurana; taani inttena intte biittan pirddana. Taani GODAA gidiyoogaa intte hegan erana. <sup>11</sup> Ha katamai intteyyo asho xaaro gidenna; inttekka a gidдон asho gidekketa. Taani intte bolli Israa7eela zawan pirddana. <sup>12</sup> Taani GODAA gidiyoogaa intte hegan erana. Aissi giikko, intte ta azazuwaa kaallennan ixxideta; ta wogaakka naagennan ixxidi, intte yuushuwan de7iya kawotettatu wogaadan de7ideta” yaagees’ yaaga” yaagiis.

<sup>13</sup> Taani hananabaa yootishin, Banaaya na7aa Palaaxee haiqqiis; haiqqin taani duge gufannada, ta qaalaa xoqqu oottada, hagaadan yaagada waassaas; “Abeet Ubbaa Haariya GODAU, Israa7eelappe attidaageeta muleera wurssana hanaiyye?” yaagaas.

### *GODAI Omooduwan De7iyaageetussi Immido Hidootaa*

<sup>14</sup> GODAA qalalai taakko hagaadan yaagiiddi yiis; <sup>15</sup> “Laa asa na7au, Yerusalaamen de7iya Israa7eela asai nebaanne omooduwan de7iya ne dabbotubaa, ‘Eti GODAAPPE haakkidosona; ha biittaikka nuuyo laata gididi imettiis’ yaagidi haasayoosona.

<sup>16</sup> “Hegaa gishshau, neeni hagaadan yaaga; ‘Ubbaa Haariya GODAI hagaadan yaagees; “Taani eta haaho kawotettatu giddo yeddikkokka, qassi biittatun laalikkokka, biido biittatun guutta wodiya taani etaara gidana” yaagees’ yaaga.



17 “Hegaa gishshau, neeni hagaadan yaaga; ‘Ubbaa Haariya GODAI hagaadan yaagees; “Taani inttena kawotettatuppenne intte laalettido biittatuppe shiishshana; qassi Israa7eela biittaa taani zaarada intteyyo immana” yaagees’ yaaga.

18 “Eti guyye simmidi yiidi, sheneyiya misiliyaanne tuna eeqaa biittaappe xaissana. 19 Taanikka etau shaahettibeenna wozanaa immana; qassi ooratta ayyaanaakka eta gidдон wottana. Etappe shuchcha wozanaa diggada, asho wozanaa etau immana. 20 He wodiyan eti ta higgiiyaa kaallana; ta azazuwaakka naagana. Eti ta asa gidana; taanikka eta Xoossaa gidana. 21 SHin he sheneyiya misiliyaanne tuna eeqau goinnanau dosidaageeta gidikko, taani eta oosuwaadan eta oottana. Taani Ubbaa Haariya GODAI haggaa odais” yaagiiddi yiis.

### *Xoossaa Bonchchoi Yerusalaameppe SHaahettiis*

22 Hegaappe guyyiyan, eta miyyiyan irzzoti de7iyo kiruubeti, bantta qefiyaa miccidosona; Israa7eela Xoossaa bonchchoikka etappe bollaara de7ees. 23 GODAA bonchchoi katamaa giddoppe denddidi, arshsho bagga deriyaa bolli eqqiis. 24 Xoossaa Ayyaanai tau immido ajjuutan Ayyaanai tana biittaappe pude denttidi, Baabiloonen de7iya omoodettidaageetukko efiis. Hegaappe guyyiyan, ajjuutai taappe shaahettiis. 25 SHaahettin taanikka GODAI tana bessidobaa ubbaa omooduwan de7iyaageetuyyo yootaas.

## 12

### *Hizqqeeli Omoodettidi Biyoogaa Malaataa Bessiis*

1 GODAA qalalai taakko hagaadan yaagiiddi yiis; 2-3 “Laa asa na7au, neeni makkalanchcha asaa gidдон de7aasa. Eti makkalanchcha asa gididiyo gishshau, etau aifee de7ees, shin demmokkona; etau haittai de7ees, shin siyokkona. Hegaa gishshau, asa na7au, omooduwan biya asadan, neeni efaanau danddayiyoobaa ubbaa shiishsha qachchada, gallassi eti xeellishin kiyada, ne de7iyoosaappe hara sohuwaa ba. Eti makkalanchcha asa gidikkonne, ooni erii, eti akeekana. 4 Gallassi eti xeellishin, omooduwaa biya asadan, neeni qachchidobaa kare kessa; qassi omarssi eti xeellishin, omooduwaa biya asaadan kiya. 5 Eti xeellishin, ne keettaa godaa lukka; lukkada he xoo7iyaara kiya. 6 Neeni kessido miishshaa eti xeellishin, ne hashiyan tookkada, lem77ishin denddada ba. Biittaa be7ennaadan, ne som77uwaa kamma. Ha neeni haniyoobai Israa7eela asau malaata gidanaadan, taani oottaas” yaagiis.

7 Taanikka i tana azazidoogaadan oottaas. Omooduwau biya asadan, gallassi taani qachchidobaa kare kessaas. Omarssan qassi ta keettaa godaa ta kushiyan lukkada kiyaas; taani kessido miishshaa eti xeellishin, ta hashiyan tookkada, lem77ishin baas.

8 Maallado GODAA qalalai taakko hagaadan yaagiiddi yiis; 9 “Laa asa na7au, he makkalanchcha zareti, Israa7eela asati nena, ‘Neeni oottiyobai aibee?’ giidi oichchidosona gidokkonaa? 10 Neeni eta hagaadan yaaga; ‘Ubbaa Haariya GODAI hagaadan yaagees; “Ha hiraagai Yerusalaamen de7iya halaqaabaanne Israa7eela asaa kumettaabaa” yaaga’ yaagees. 11 Neeni eta, ‘Taani intteyyo malaata. Taani oottidoogaadan, intte bolli hanana; intte omoodettidi, hara biitti baana’ yaaga.

12 “Eta gidдон de7iya halaqai godaa lukki kiyidi, ba miishshaa ba hashiyan tookkidi, lem77ishin baana; i biittaa be7ennaadan, ba som77uwaa kammana. 13 Taani GODAI ta gitiyaa a sinttan yeggada, a oiqqana. Taani a Baabiloone katamaa ehaana; shin i he katamaa be7ennan haiqqana. 14 A yuushuwan de7iya a maaddiyaageetanne a olanchchata ubbaa taani piskki oottana; taani eta bisuwan yedettana.

15 “Eta taani hara biittatunne kawotettatu gidдо laaliyo wode, taani GODAA gidiyogaa eti erana. 16 Eti bantta biyo kawotettatu gidдон bantta tuna oosuwaa paaxana mala, taani etappe amaridaageeta olaappe, koshaappenne boshaappe kessi ekkanaadan oottana. Taani GODAA gidiyogaa eti hegan erana” yaagiiddi yiis.



*Yashshau Kokkoriya Hananabaa Yootiyaagaa Malaataa*

<sup>17</sup> GODAA qaalai taakko hagaadan yaagiiddi yiis; <sup>18</sup> “Laa asa na7au, ne oittaa kokkoraidda ma; qassi ne haattaakka gajigajaidda uya. <sup>19</sup> Biittan de7iya asau hagaadan yaaga; ‘Ubbaa Haariya GODAI Israa7eela biittan de7iya Yerusalaame asaabaa hagaadan yaagees; “Eti bantta oittaa hirggan maana; bantta haattaakka shabbirssan uyana. Aissi giikko, yan de7iya asai ubbai makkalanchcha gidido gishshau, eta biittai qaarettidi, kallo attana. <sup>20</sup> Ha77i asai kumido katamati xayana; qassi biittaikka baisa gidana. Taani GODAA gidiyooгаа intte hegan erana” yaagees’ yaaga” yaagiiddi yiis.

*Asaa Leemisuwaassi GODAI Immido Zaaruwaa*

<sup>21</sup> GODAA qaalai taakko hagaadan yaagiiddi yiis; <sup>22</sup> “Laa asa na7au, ha Israa7eela asai, ‘Gallassai aadhdhiis; ajjuutai ubbaikka hada gidiiis’ yaagidi leemisiyoobai i aibee? <sup>23</sup> Hegaa gishshau, etayyo neeni, ‘Ubbaa Haariya GODAI hagaadan yaagees; “Taani ha leemiso i naa77antto hassayettennaadan oottana; eti zaarettidi, heгаа Israa7eela biittan leemisokkona” yaagees’ yaaga. Qassi etayyo, ‘Gallassai matattiis; ajjuutai ubbaikka polettana hanees’ yaaga. <sup>24</sup> Hagaappe sinttau Israa7eela asaa gidдон worddo ajjuutainne cimo murunnoi de7enna. <sup>25</sup> Taani GODAI ta oottanaagaa yootais; hegeekka gam77ennan polettana. Inttenoo, makkalanchcha asatoo, taani yootiyoobaa ubbaa intte laittan taani polana. Taani Ubbaa Haariya GODAI hagaа odais” yaagiiddi yiis.

<sup>26</sup> Qassikka GODAA qaalai taakko hagaadan yaagiiddi yiis; <sup>27</sup> “Laa asa na7au, Israa7eela asai hagaadan yaagees; ‘I be7ido ajjuutai sinttanau daro laittaassa; qassi i adussa wodiyan hananaagaa yootees’ yaagees. <sup>28</sup> Hegaa gishshau, neeni etau hagaadan yaaga; ‘Ubbaa Haariya GODAI hagaadan yaagees; “Taani yootiyo qaalai polettanaappe attin, issoikka gam77enna. Taani Ubbaa Haariya GODAI hagaа odais” yaagees’ yaaga” yaagiiddi yiis.

## 13

*Worddo Hananabaa Yootiya Attumaasatussi Odettida Hiraagaa*

<sup>1</sup> GODAA qaalai taakko hagaadan yaagiiddi yiis; <sup>2</sup> “Laa asa na7au, Israa7eelan ha77i hananabaa yootiyaageetu bolli hananabaa yoota. Bantta qofaappe denddidi, hananabaa yootiyaageeta hagaadan yaaga; ‘GODAA qaalaa siyite! <sup>3</sup> Ubbaa Haariya GODAI hagaadan yaagees; “Aibanne be7ennan coo banttau denddiya eeyya hananabaa yootiyaageetuyyo aayye7ana! <sup>4</sup> Israa7eela asau, intte hananabaa yootiyaageeti qolettida katamaa gidдон de7iya worakanatu mala. <sup>5</sup> GODAA gallassi olan minni eqqanaadan, Israa7eela asaassi dirssaa gimbbiyaa bottokonidi minttanau, gimbbee kolettidosaa pude bibookkona. <sup>6</sup> Eta ajjuutai worddo, qassi eta murunnoikka worddo. Eti GODAI kiittennan, ‘GODAI hagaadan yaagees’ yaagoosona. Yaatidi eti yootidoogaa GODAI polana yaagidi naagoosona. <sup>7</sup> Taani yootennan de7ishin, ‘GODAI hagaadan yaagees’ yaagidi yootiyo intte worddo ajjuutaanne worddo murunnuwaa be7ibeekketii?” yaagees.

<sup>8</sup> “ ‘Hegaa gishshau, Ubbaa Haariya GODAI hagaadan yaagees; “Intte worddobaa haasayido gishshaunne worddo ajjuutaa be7ido gishshau, taani intteyyo morkke. <sup>9</sup> Ta kushee worddo ajjuutaa be7idi, worddo hananabaa yootiyaageetu bolli pirddau de7ees. Eti ta asaa yaa7an gelokkona, woikko Israa7eela asai xaafettido mazggafan xaafettokkona, woikko eti Israa7eela biittaakka gelokkona. Taani Ubbaa Haariya GODAA gidiyooгаа intte hegan erana.

<sup>10</sup> “ “ ‘Saroi bainnan de7ishin, eti ta asaa, ‘Sa7i saro!’ yaagidi wora kaalettidosona. Qassi asai shuchchaa coo keelidi dirin, eti nooraa tiyoosona. <sup>11</sup> Hegaa gishshau, he tiyiyaageeta, ‘He intte tiyido gimbbee kunddana! Wolqqaama irai bukkana; qassi taani GODAI ordde shachchaa duge yeggana; hanttaara goteekka denddana’ yaagidi

yootite. <sup>12</sup> He gimbbée kunddido wode, asai inttena, intte a tiyido noorai anee? giidi oichchennan agganee?” yaagees.

<sup>13</sup> “Hegaa gishshau, Ubbaa Haariya GODAI hagaadan yaagees; “Taani ta hanqquwan hanttaara gotiyaa yeddana; qassi biittaa bashshanau ta yiilluwan ordde shachchaanne wolqqaama iraa suulliyya hanqquwaara kiittana. <sup>14</sup> Intte nooraa tiyido gimbbiyaa taani mentterettana, biittan laalananne baasuwa mela ashshana. I kunddiyo wode intte a gidдон haiqqana. Taani GODAA gidiyooḡaa intte hegan erana. <sup>15</sup> Hegaadan hanidi, ta hanqqoi gimbbiyaa bollinne gimbbiyaa nooraa tiyida asatu bolli wurana. Taani inttena, ‘Ha77i gimbbée baawa; gimbbiyaa nooraa tiyidaageetikka de7okkona. <sup>16</sup> Israa7eelan de7iya, Yerusalaamebaa hananabaa yootidaageeti, saroi bainnan ayyo saruwa be7idaageeti, eti de7okkona’ yaagais. Taani Ubbaa Haariya GODAI hagaadais” yaagees’ yaaga.

### *Worddo Hananabaa Yootiya Maccaasatussi Odettida Hiraagaa*

<sup>17</sup> “Laa asa na7au, bantta qofaappe denndidi, hananabaa yootiya ne asaa maccaasatukko ha77i ne som77uwaa zaara; zaarada eta bolli hananabaa yoota. <sup>18</sup> Hagaadan yaaga; ‘Ubbaa Haariya GODAI hagaadan yaagees; “Hara asaa bollan asayyo wolqqai de7anaadan, eta kushiyan ubban murunnobaa sikkidi wottiyaanne qantanne adussa asaassi shaashiyaa giigissiya maccaasatoo, intteyyo aayye7ana! Intte ta asaa woranaunne pattanau intteyyo maatai de7anaadan koyeeta. <sup>19</sup> Issi kophphe bangga woikko issi baso oitta demmanau, yeellayiyaabaa oottidi, ta asaa sinttan tana kaushsheeta. Hegaa giyoogee intte haiqqanau bessennaageeta woridi, attanau bessennaageeta ashsheeta giyoogaa. Yaatidi ta asaassi wordduwaa odeeta; etikka intte wordduwaa siyoosona” yaagees.

<sup>20</sup> “Hegaa gishshau, Ubbaa Haariya GODAI hagaadan yaagees; “Intte hara asaa bollan asayyo wolqqai de7anaadan, intte kushiyan wottido murunnuwaa taani ixxis. Taani a intte kushiyaappe duutta olana; piriyaappe kessi ekkiya kafuwaadan, taani eta intte wolqqaappe ashsha ekkana. <sup>21</sup> Taani intte shaashiyaakka qaara ekkada, ta asaa merinau intte kushiyaappe wotta ekkana. Taani GODAA gidiyooḡaa intte hegan erana. <sup>22</sup> Taani azzanissabeenna xillo asaa wozanaa intte wordduwan azzanissideta; nagaranchchatikka bantta iita oosuwaappe simmidi, bantta shemppuwaa ashshennaadan, intte eta minttideta. <sup>23</sup> Hegaa gishshau, naa77antto worddo ajjuutaa be7ekketa; murunnobaakka ootteketa. Taani ta asaa intte kushiyaappe wotta ekkana. Taani GODAA gidiyooḡaa intte hegan erana” yaagees’ yaaga” yaagiiddi yiis.

## 14

### *GODAI Eeqassi Goinniyoogaa Ixxiis*

<sup>1</sup> Israa7eela cimatuḡpe amaridaageeti taakko yiidi, ta sinttan uttidosa. <sup>2</sup> Yaatin GODAA qaalai taakko hagaadan yaagiiddi yiis; <sup>3</sup> “Laa asa na7au, ha asati bantta wozanan eeḡaa essidosona; qassi eta nagarai etayyo xubbiya shuchcha mala gidiiis. Yaatin, taani eti tana oichchanaadan oottooyye? <sup>4</sup> Hegaa gishshau, neeni etayyo hagaadan yaagada yoota; ‘Ubbaa Haariya GODAI hagaadan yaagees; “Israa7eela asaappe ooninne eeḡaa ba wozanan wottikko, a nagarai ayyo xubbiya shuchcha mala gidikko, qassi hananabaa yootiyaagaakko i biikko, taani GODAI ta huuphen a eeḡatu coratettaadan ayyo zaarana. <sup>5</sup> He eeḡati ubbati Israa7eela asaa taappe wora zaaridosona; shin ha77i taani etayyo immiyo zaaruwan eta wozanaa taakko zaarana” yaagees’ yaaga.

<sup>6</sup> “Hegaa gishshau, Israa7eela asaassi hagaadan yaagada oda; ‘Ubbaa Haariya GODAI hagaadan yaagees; “Nagaraa paaxite! Intte eeḡaappe simmite! Intte tuna ooso ubbaappekka simmite!

<sup>7</sup> “ “Israa7eela asa gidin, woikko Israa7eela biittan de7iya allaga asa gidinkka, taappe shaahettidi, ba wozanan eeqaa wottikko, a nagarai ayyo xubbiya shuchchaa mala gidikko, qassi i ta zoriyaa oichchanau hananabaa yootiyaagaakko biikko, taani GODAI ta huuphen ayyo zaaruwaa immana. <sup>8</sup> Taani he uraara egettana; taani a leemisonne malaata oottana; taani a ta asaa giddoppe xaissana. Taani GODAA gidiyoogaa intte hegan erana.

<sup>9</sup> “ “Hananabaa yootiyaagee cimettidi, hananabaa yootikko, he hananabaa yootiyaa-gaa cimmidaagee tana GODAA. Taani a bolli ta kushiya yeddada, ta asaa giddoppe a xaissana. <sup>10</sup> Eti naa77aikka bantta nagaraa nagaraa qixaatiyaa tookkana; hananabaa yootiyaagaa qixaateekka hananabaa oichchiyaagaa qixaateekka issi mala gidana. <sup>11</sup> Hegaa gishshau, Israa7eela asati taappe wora bookkona; bantta nagaran ubban banttana tunissokkona. Eti ta asa gidana; taanikka eta Xoossaa gidana. Taani Ubbaa Haariya GODAI haggaa odais” yaagees’ yaaga” yaagiiddi yiis.

### *Noha, Daaneelanne Iyyooba*

<sup>12</sup> GODAA qaalai taakko hagaadan yaagiiddi yiis; <sup>13</sup> “Laa asa na7au, issi biittaa asai nagaraa oottidi, taayyo ammanettennan ixkikko, taani ta kushiya yeddada, etau qumaa xaissada, koshaa ehaana; he biittaa asaanne mehiyaa worana. <sup>14</sup> Harai atto ha heezzu asati, Nohee, Daaneelinne Iyyoobi he biittan de7iyaakkokka, eti bantta xillotettan bantta shemppo xalaalaa ashshana. Taani Ubbaa Haariya GODAI haggaa odais.

<sup>15</sup> “Woi taani eta biittaa bollan bazzo do7ata yeddin, he do7ati an de7iya asaa xaissin, he do7atu gaasuwan ooninne giddoora kanttennaadan, he biittai baises gidikko, <sup>16</sup> taani Ubbaa Haariya GODAI ta de7uwan caaqqais: Harai atto, ha heezzu asati he biittan de7iyaakkokka, eti bantta attumanne bantta macca naata ashshanau danddayokkona. Eta xalaalai attana; shin biittai baises gidana. Taani Ubbaa Haariya GODAI haggaa odais.

<sup>17</sup> “Woikko taani he biittaa bollan bisuwaa ehaada, ‘Ha biittaara bisoi kantto’ gaada, an de7iya asaanne mehiyaa worikko, <sup>18</sup> taani Ubbaa Haariya GODAI ta de7uwan caaqqais: Ha heezzu asati he biittan de7iyaakkokka, bantta attumanne bantta macca naata ashshanau danddayokkona. Eta xalaalai attana. Taani GODAI haggaa odais.

<sup>19</sup> “Woikko taani he biittaa bollan boshaa yeddada, ta hanqquwaa a bollan gussikko, an de7iya asaanne mehiyaa worikko, <sup>20</sup> taani Ubbaa Haariya GODAI ta de7uwan caaqqais: Harai atto, Nohee, Daaneelinne Iyyoobi he biittan de7iyaakkokka, eti bantta xillotettan bantta shemppuwaa ashshanaappe attin, bantta attumanne bantta macca naatakka ashshokkona. Taani Ubbaa Haariya GODAI haggaa odais” yaagiiddi yiis.

<sup>21</sup> Ubbaa Haariya GODAI hagaadan yaagees; “Taani asaanne mehiyaa woranau Yerusalaame bolli ta oiddu hanttaara pirddata, bisuwaa, koshaa, bazzo do7aanne boshaa yeddiyo wode, i ai keena aaro iitabaa gidanddeeshsha! <sup>22</sup> SHin amarida asati paxa attana; eti bantta attumanne bantta macca naatakka ashshana. Eti inttekkoyiyo wode, eta hanotaanne eta oosuwaa intte be7idi, taani Yerusalaame bolli ehiido bashshai ubbai bessiyaagaa gidiyoogaa akeekana. <sup>23</sup> Intte eta hanotaanne eta oosuwaa be7idi, taani eta bolli coo pirddabeennaagaa erana. Taani Ubbaa Haariya GODAI haggaa odais” yaagees.

## 15

### *Woiniyaa Turaa Leemisuwaa*

<sup>1</sup> GODAA qaalai taakko hagaadan yaagiiddi yiis; <sup>2</sup> “Laa asa na7au, woiniyaa turai bazzon de7iya hara mittaappe aibin kehii? <sup>3</sup> Go77i de7iyo mitti turaappe qanxxetti erii? Aibakko kaqqiyo koca appe kessa erai? <sup>4</sup> A oisettodan taman yeggin, ya baggainne ha baggai taman meetettin, gidduwan attida xiixinttai ai maaddanee? <sup>5</sup> Xuugettennan de7iiddi, kase aikko maaddibeennaagee, tamai min eexxiichchidi aikko maaddenna.

<sup>6</sup> “Hegaa gishshau, Ubbaa Haariya GODAI hagaadan yaagees; ‘Taani bazzo mittaa gidдон de7iya woiniyaa turaa tamau oiseto oottada immidoogaadan, Yerusalaamen de7iya asaakka hegaadan oottana. <sup>7</sup> Taani ta som77uwaa eta bollan zaarana. Eti issi tamaappe kiyikkokka, hara tamai eta maana. Taani ta som77uwaa eta bolli zaariyo wode, taani GODAA gidiyooгаа eti erana. <sup>8</sup> Eti tanan ammanettennan aggido gishshau, taani eta biittaa baises kessana. Taani Ubbaa Haariya GODAI haggaa odais’ yaagees” yaagiiddi yiis.

## 16

### *Ammanettenna Yerusalaamo*

<sup>1</sup> GODAA qaalai taakko hagaadan yaagiiddi yiis; <sup>2</sup> “Laa asa na7au, Yerusalaamo i tuna oosota erissa. <sup>3</sup> Hagaadan yaaga; ‘Ubbaa Haariya GODAI Yerusalaamo hagaadan yaagees; “Ne zareenne ne yeletai Kanaane biittaaana; ne aawai Amooore biittaa asa; ne aayyiyaakka Hiite biittaa asa. <sup>4</sup> Ne yelettiyo gallassi ne gul77ai qanxxettibeenna; woikko nena geeshshanau haattan meecettabaakka; woikko maxiniyan gorppettata carqqiyan xaaxettabaakka. <sup>5</sup> Ha geetettidabatuppe issuwaanne oottanau neeyyo az-zanidabi baawa. Neeni yelettido gallassi karettido gishshau, dembban olettadasappe attin, neeyyo ooninne qarettibeenna.

<sup>6</sup> “ “Hegaara taani kanttaidda, neeni ne suuttaa gidдон murqquuqada zohettishin be7aas; be7ada neeni ne suuttaa gidдон zin77idosan de7ishin, “Paxa de7a” yaagaas. <sup>7</sup> Taani nena shooqan de7iya kattaadan dichchaas. Neeni dicca aduqqada, gamma gakkadasa. Ne xanttai uttiis; ne binnaanaikka dicciis; shin neeni kallo attadasa.

<sup>8</sup> “ “Naa77anttuwaa taani hegaara kanttaidda, nena xeelliyo wode, neeni gelossi gakkada borssida asa gidadasa. Yaatin, ta maayuwaa ne bolli yeggada, ne kalluwaa kammaas. Taani neeyyo caaqqada nenaara maachchaa maacettin, neeni taaro gidadasa. Taani Ubbaa Haariya GODAI haggaa odais.

<sup>9</sup> “ “Taani ne bollai suuttan moorettidaagaa haattan meecca geeshshada, zaitiyan tiyaas. <sup>10</sup> Taani nena alleeqo qamisiyaa maizzaas; qassi lo77o galbbaappe oosettida caammaakka wotissaas; qassi liinuwwa shaashiyaakka nena qacissaas; qassi al77o kutaakka qumaashshaas. <sup>11</sup> Nena ta alleequwan alleeqaas; ne kushiyan sagaayuwaa wottaas; ne qooriyankka gujjumaa wottaas. <sup>12</sup> Qassi ne siiriyen gutichchaa, ne haittanikka gutichchaa, ne huuphiyankka lo77o kallachchaa wottaas. <sup>13</sup> Neeni worqqaanne biran alleeqettadasa; ne maayoi ubbai payya liinuwwa, al77o kutaanne alleeqo qamise. Ne miyo qumai muruta xiilliyaa, eessaanne zaitiyaa. Neeni keehi puulanchcha gidada, kawoottatun erettadasa. Aissi giikko, taani neeyyo immido bonchchoi nena haggaa oottiis. Taani Ubbaa Haariya GODAI haggaa odais.

<sup>15</sup> “ “SHin neeni ne puulan ammanettadasa; haratun erettidoogaappe denddiidaagan shaaramuxa gidadasa; ogiyaara kanttiya ubbaara shaaramuxadasa. <sup>16</sup> Ne maayuwaaappe amaridaagaa ekkada, ne goinniyo sohota alleeqissadasa; yaatada yan shaaramuxadasa. Hegaa mala hanotai haggaa kase hanibeenna; haggaaappe sinttanaukka hananau bessenna. <sup>17</sup> Taani neeyyo immido worqqaappenne biraappe oosettida lo77o alleequwaa, attuma misileta oottada medhdhadasa; yaatada etaara shaaramuxadasa. <sup>18</sup> Taani immido alleeqo maayuwaa he misileta maizzadasa. Qassi ta zaitiyaanne ta ixaanaa etau shiishshadasa. <sup>19</sup> Qassi taani neeyyo immido qumaa, muruta xiilliyaa, zaitiyaanne eessaa eta sinttan sawuwaa tonggu giya yarshsho oottada shiishshadasa. Taani Ubbaa Haariya GODAI haggaa odais.

<sup>20</sup> “ “Qassikka, neeni taayyo yelido attuma naatanne macca naata efaada, eeqatuyyo yarshshadasa. Neeni shaaramuxa kiyidoogee neeyyo guuxxidee? <sup>21</sup> Neeni ta naata shukkada, eeqaassi taman yarshshadasa. <sup>22</sup> Neeni tunatettaanne ne shaaramuxan



ubban de7aidda, kase ne yelagatettaa laittaa, kallo ne suuttan murqquuqada, zohettido wodiya dogadasa.

<sup>23</sup> “ “Aayye7ana! Neeyyo aayye7ana! Taani Ubbaa Haariya GODAI haggaa odais. Ha ne iitatetta ubbaa bolli qassi, <sup>24</sup> dabaaba ubban eeqau goinniyo sohota neeyyo giigis-sadasa. <sup>25</sup> Oge doonan ubban shaaramuxiyo sohota keexxada, ne puulaa tunissadasa; ogiyaara kanttiya ubbau ne asatettaa aatta immada, shaaramuxettaa darissadasa. <sup>26</sup> Neeni amo xallan kumida, ne shooro Gibxxetuura shaaramuxadasa; ne shaaramux-ettaa daruwankka tana hanqqetissadasa. <sup>27</sup> Hegaa gishshau, taani ta kushiya ne bolli yeddaas; nena gakkiiya ne shaahuwaakka guuttaas. Taani nena ne pokko hanotan yeellatiya, nena morkkiya Pilisxxeema maccaasatussi aattada immas. <sup>28</sup> Neeni alenna asa gidiyoo gishshau, Asoore biittaa asarakka shaaramuxadasa. He ubbankka hagee tau gidana gabaakka. <sup>29</sup> Hegaappe qassi, zal77iyan aqida Baabiloonetuuraakka shaaramuxadasa; hegankka gidana gabaakka.

<sup>30</sup> “ “Neeni ha yeelli bainna shaaramuxeedan haniyaara, ne aiba laafa asee! Taani Ubbaa Haariya GODAI haggaa odais. <sup>31</sup> Neeni oge doonan shaaramuxiyo sohota neeyyo keexxiyo wodenne dabaaba ubban eeqau goinniyo sohota giigisiyo wode, hara shaaramuxatudan, shaaramuxati ekkiyo miishshaakka ekkabaakka.

<sup>32</sup> “ “Bii ha shaaramuxa maccaasee, neeni ne azinaa aggada, allagatuura zin77adasa! <sup>33</sup> Attumaasai shaaramuxatussi miishshaa qanxxees; shin neeni ne laggettatussi miishshaa qanxxaasa; eti mulesaappe neekko yaanaadan, maganxxaa etau immas. <sup>34</sup> Hegan ne shaaramuxatettaa hara maccaasatuugaappe dummera; nenaara shaaramux-anau nena kaalliyaabi issoinne baawa. Harai neeyyo qanxxennan, yaa qanxxada shaaramuxiyoogan, haratuppe neeni dummera” yaagees.

#### *GODAI Yerusalaami Bolli Pirddana*

<sup>35</sup> “ Hegaa gishshau, bii ha shaaramuxee, GODAA qaala siya! <sup>36</sup> Ubbaa Haariya GODAI haggadan yaagees; “Neeni ne shaaramuxatettan ne laggettatussi ne bollaa qaarido gishshau, neeyyo tuna eeqati darido gishshaanne ne naatu suuttaa neeni etayyo gussido gishshau, <sup>37</sup> neeni etan ufaattido ne laggettota ubbaa, neeni siiqiy-oogetanne neeni ixxiyoogeeta taani shiishshana hanais. Taani eta ne bolli ubbasaara shiishshada, eta sinttan nena mulxxu oottada qaarana; qaarin eti ne kalluwaa be7ana. <sup>38</sup> Taani shaaramuxida maccaasatu bollinne suuttaa gussida maccaasatu bolli pirddiy-oogaadan, ne bolli pirddana; taani ta hanquwaaninne ta mishuwan ne bolli haiquwaa ehaana. <sup>39</sup> Taani nena ne laggettatussi aatta immas; eti ne shaaramuxiyo sohotanne eeqau goinniyo sohota qoli xaissana. Eti ne maayuwa mulxxu ootti qaaridi, ne lo77o alleequwaakka wotti ekkidi, nena kallo xiire ashshana. <sup>40</sup> Eti nena shuchchan caddi woriyaanne bantta bisuwan qanxxerettiya guite asaa ne bolli ehaana. <sup>41</sup> Eti ne keettaa xuuggidi, daro maccaasaa sinttan ne bolli pirddana. Taani ne shaaramuxatettaa agis-sana; neenikka ne laggettatussi naa77antto yaa miishshaa qanxxakka. <sup>42</sup> Haggadan oottin, taani ne bolli hanqqettido hanqqoi wodhdhana; taani ne hanotan mishettido mishoikka hegan aadhdhana. Taani hegan woppu gaada, naa77antto hanqqettikke.

<sup>43</sup> “ “Neeni ne yelagatettaa laittaa dogada, ha iita ooso ubban tana hanqqetissadasa. Hegaa gishshau, tumaappe ne oottidobaa ubbaa taani ne bollan zaarana. Neeni ne tuna oosotu ubbaa bolli shaaramuxatettaa aibissi gujjadii? Taani Ubbaa Haariya GODAI haggaa odais.

#### *Yerusalaami Michcheta Naa77aa*

<sup>44</sup> “ “Bii Yerusalaamee, asai ne bolli, ‘Na7iyaakka aayee mala’ giidi leemisuwaa yootana. <sup>45</sup> Tumu neeni ba azinaanne ba naata shenetida ne aayee mala; qassi bantta azinaa azinaanne bantta naata naata shenetida ne michchetu mala. Ne aayiyaa Hiite biittaa asa; ne aawai qassi Amooore biittaa asa. <sup>46</sup> Ne baira michchiya ba



macca naatuura neeppe huuphessa baggaara de7iya Samaariyo; qassi neeppe kaalo michchiyaa ba macca naatuura neeppe tohossa baggaara de7iya Sadoomo. <sup>47</sup> Neeni eta ogiyaa kaallidoogeenne eta tuna oosota oottidoogee nena alibeenna. SHin neeni guutta wodiyan oottido oosoi etaagaappe iitaa darees.

<sup>48</sup> “ “Taani Ubbaa Haariya GODAI ta de7uwan caaqqais: Neeninne ne macca naati oottidoogaadan, ne michchiyaa Sadoomanne i macca naati oottibookkona. <sup>49</sup> Ne michchiyaa Sadooma oottido nagarai haggaa: anne i macca naati otoranchcha, kallidaageetanne ishaluwan de7iyaageeta gidikkonne, eti metootanchchaanne hiyyeesaa maaddibookkona. <sup>50</sup> Eti otoranchcha gididi, ta sinttan tuna oosota oottidosona. Hegaa gishshau, intte be7idoogaadankka, taani eta xaissaas.

<sup>51</sup> “ “Samaariyaa neeni oottido nagarau baggaakka oottabeikku; neeni etaagaappe aadhdhida tuna oosota oottadasa. Yaataada he ne oottido tuna oosotu ubbaa gaasuwan, ne michcheta xillo milatanaadan oottadasa. <sup>52</sup> Neeni ne michcheta suure asa kessido gishshau, kaushshaa maaya. Aissi giikko, ne nagarai etaagaappe aadhdhi iitin, hegan eti neeppe xillo milatidosona. Hegaa gishshau, yeellatada, kaushshaa maaya.

<sup>53</sup> “ “Gidikkonne, Sadoomonne i macca naata, qassi Samaariyoonne i macca naata taani zaarada ishalissiyo wode, nenakka ishalissana. <sup>54</sup> Neban neeni keehi yeellatana; neeni kauyyidoogan, ne michcheta neeppe kehiyoogaa eridi minettana. <sup>55</sup> Ne michcheta, Sadooma ba macca naatuura, qassi Samaariyaakka ba macca naatuura bantta kase ishaluwau simmana; neenikka ne macca naatuura intte kase ishaluwau simmana. <sup>56-57</sup> Ne iitatetta qonccanaappe kase, ne otoruwaa wode, neeni harai atto, ne michchee Sadoomi bolli qilliicabeikkii? Gidikkonne, ha77i neeni Eedooma macca naatinne a shooro ubbai, qassi Pilisxxeema macca naatinne ne yuushuwan de7iya, nena ixxiya ubbai qiriyoobaa kiyadasa. <sup>58</sup> Ne shaaramuxatettaaninne ne tuna oosotun qaxxayettana. Taani GODAI haggaa odais” yaagees.

<sup>59</sup> “ “Ubbaa Haariya GODAI haggaaadan yaagees; “Neeni maachchaa kanttido gishshaunne caaquwaa kolido gishshau, neeni oottido oosuwaadan, taani neeyyo oottana. <sup>60</sup> Gidikkonne, taani ne yelagatetta wodiyan nenaara maacettido maachchaa qaalaa hassayana; qassi merinaa maachchaakka nenaara maacettana. <sup>61</sup> Hegaappe guyyiyan, taani ne bairanne ne kaalo michcheta neekko ehiyo wode, neeni ne hemetaa hassayada yeellatana. Taani eta neeyyo macca naata oottada immana; shin hegee taani nenaara maacettido maachchaadan gidenna. <sup>62</sup> Hegau taani ta maachchaa nenaara wottana. Taani GODAA gidiyooqaa neeni hegan erana. <sup>63</sup> Taani neeni oottido nagaraa ubbaa atto yaagiyo wode, neeni ne oottidobaa hassayada, yeellau ne doonaa oiqqana. Taani Ubbaa Haariya GODAI haggaa odais” yaagees’ yaaga” yaagiiddi yiis.

## 17

### *Naa77u Argganttattunne Woiniyaa Turaa Leemisuwaa*

<sup>1</sup> GODAA qalalai taakko haggaaadan yaagiiddi yiis; <sup>2</sup> “Laa asa na7au, Israa7eela asaa qan77ishiyaa qan77isha; etau leemisuwan yoota. <sup>3</sup> Haggaaadan yaaga; ‘Ubbaa Haariya GODAI haggaaadan yaagees; “Lo77iya baalletinne gita gita qefeti de7iyo issi argganttai de7ees. He argganttai Liibaanoosa yiis; yiidi zigaa xeeran uttiis. <sup>4</sup> Uttidi he zigaa licuwaa menttiis; he menttido licuwaa ekkidi, zal77ee dariyo biittaa, zal77anchchatu katamaa efiis.

<sup>5</sup> “ “I Israa7eela biittaaappe puutiya efiidi, aradda biittan, daro haattai de7iyoosan tokkiis. <sup>6</sup> Pude aacida turai darii aduqqennan daayiis. A daashshai argganttaakko simmidi daayiis; shin a xaphoi biitta giddo geliis. He turai maraa yeliis; haittaakka kessiis.

<sup>7</sup> “ “Hegaadankka, lo77iya baalletinne gita gita qefeti de7iyo hara issi argganttai de7ees. Haattaa demmana giidi, he turai ba tokettidosaaappe he argganttai

de7iyoosaakko, ba xaphuwaanne ba daashshaa yeddiis. <sup>8</sup> I tokettidoi aacanau, aifanaunne lo77o woine gidanau danddayiyoosan, aradda biittan, daro haattai de7iyoosaana” yaagees’ yaaga.

<sup>9</sup> “Etayyo neeni hagaadan yaaga; ‘Ubbaa Haariya GODAI hagaadan yaagees; “He turai diccane? Koiro a tokkida argganttai a shoddennee? SHoddidi a aifeta qoqqofidi, a irxxa haittata melissennee? A he sohuwaappe xaphuwaara pude shoddanau gita wolqqaa, woikko daro asaa koshshenna. <sup>10</sup> A shoddidi, harasan tokkiyaakko, i diccane? Arshsho bagga bazzo carkkoi shocin, ba tokettidosan muleera melenne?” yaagees’ yaaga” yaagiiddi yiis.

### *Leemisuwaa Birshshettaa*

<sup>11</sup> Hegaappe guyyiyan, GODAA qalalai taakko hagaadan yaagiiddi yiis; <sup>12</sup> “Ha makkalanchcha asaayyo hagaadan yaaga; ‘He leemisuwaa birshshettai aibakko erekketii? Hegee aibee giikko, Baabiloone kawoi Yerusalaame yiidi, eta kawuwaanne eta halaqata omooddidi, Baabiloone efiis. <sup>13</sup> Qassi kawuwaa keettaa asaappekka issuwaa ekkidi, aara issippe caaqqidi maacettiis; yaatidi asaa giddon aifettiyaageeta omooddidi efiis. <sup>14</sup> Hegaa oottidoogee eta kawotettai wolqqaa xayidi, naa77antto denddenaan, bantta maachchaa xalaalaa naagidi de7anaadaana. <sup>15</sup> SHin Yihudaa kawoi makkali denddidi, paratanne daro olanchchata yeddanaan, Gibxxe kiittiis. Ayyo hegee hananddeeshsha? Hagaa malabaa oottidaagee i bau kessi ekkanddee? Qassi maachchaa kanttidi, i bau kessi ekkanddee?

<sup>16</sup> “Taani Ubbaa Haariya GODAI ta de7uwan caaqqais: Bana kawoyida kawuwaa maachchaa kanttido gishshaunne caaquwaa karido gishshau, he kawuwaa biittan, Baabiloonen i haiqqana. <sup>17</sup> Baabiloone kawoi daro asaa woranau gimbbiyaa lanqen biittaa diddiqidi giiggiyo wode, Gibxxe kawoi ba olanchchatuuranne ba daro asaara yinkka, ainne maaddenna. <sup>18</sup> I caaquwaa kariis; maachchaa kanttiis. I ba kushiyaakka immidi, ba giidoogaa polibeenna. Hegaa gishshau, au kessi ekkiiyoosi baawa.

<sup>19</sup> “Hegaa gishshau, taani Ubbaa Haariya GODAI ta de7uwan caaqqais; i karido ta caaquwaanne i kanttido ta maachchaa taani a bolli zaarada ehaana. <sup>20</sup> Taani ta gitiyaa a bolli miccin, i ta piriyan ohettana. I taayyo ammanettennan ixido gishshau, taani a Baabiloone efaada, hegan a bolli pirddana. <sup>21</sup> Doorettida a olanchchati bisuwan haiqqana; paxa attidaageeti bantta ginaara ginaara laalettana. Hagaa haasayidaagee tana GODAA gidiiyoogaa intte erana.

<sup>22</sup> “‘Ubbaa Haariya GODAI hagaadan yaagees; “Taani adussa zigaa xeeraa licuwaappe qanxxa ekkada, xoqqanne adussa deriyaa huuphiyan tokkana. <sup>23</sup> Taani a Israa7eela deriyaa huuphiyan tokkana; hegan maraa yelidi, aifiyaakka aifananne lo77o ziga gidana. Kafo zaree mulee an keexxana; eti a maaraa kuwan shemppana. <sup>24</sup> Xoqqa mittaa ziqqi oottiyaagee, ziqqa mittaa xoqqu oottiyaagee, irxxa mittaa melissiyaageenne mela mittaakka aacissiyaagee, tana GODAA gidiiyoogaa bazzo mitta ubbai erana. Taani GODAI hagaa yootaas; taani yootidoogaa taanikka oottana” yaagees’ yaaga” yaagiiddi yiis.

## 18

### *GODAI Asaa A Oosuwaadan Oosuwaadan Pirddees*

<sup>1</sup> GODAA qalalai taakko hagaadan yaagiiddi yiis; <sup>2</sup> “Israa7eela biittaabaa intte, ‘Aawati caala woiniyaa teeraa min, naata achchai zil77iis’ giidi intte leemisiyoobai aibee? <sup>3</sup> Taani Ubbaa Haariya GODAI ta de7uwan caaqqais: Hegaappe sinttau intte Israa7eela biittan ha leemisuwaa leemisekketa. <sup>4</sup> Asaa ubbaa shemppoi taagaa; aawaa shemp-poikka na7aa shemppoiikka taagaa. Nagaraa oottiya shemppoi i bau haiqqana.

<sup>5</sup> “Issi asi xillo gidikko, tumu pirddaanne suuretettaa oottikko, <sup>6</sup> i deriyaa bolli de7iya eeqau goinniyo sohotun maana xayikko, i Israa7eela asaa eeqau goinnana

xayikko, ba shooruwaa maccaasaa tunissana xayikko, qassi kushe qitai yiido maccaasaara zin<sup>77</sup>ana xayikko, <sup>7</sup> oonanne huqqunnana xayikko, acuwaassi oiqqidobaa guyye zaarikko, issi uraanne bonqqana xayikko, bau de<sup>7</sup>iyaagaappe namisettida asa mizikko, kallottidaagaa maizzikko, <sup>8</sup> i woriyaa ekkanau dichchau tal<sup>77</sup>ana xayikko, ba kushiyaa balaappe shiishshi ekkikko, asaa giddon tumaa pirddikko, <sup>9</sup> ta higgiiyan hemettikko, ta wogaakka polidi naagikko, yaatikko, i xillo asa, i tumu paxa de<sup>7</sup>ana. Taani Ubbaa Haariya GODAI haggaa odais.

<sup>10</sup> “Ha bitaniyaassi shemppo woriyaa, bonqqiya, woikko ha geetettidabatuppe augaa gidinkka oottiya issi iita na<sup>7</sup>i de<sup>7</sup>ikko, <sup>11</sup> ba aawai oottibeennabaa ubbabaa oottees. I deriyaa bolli de<sup>7</sup>iya eeqau goinniyo sohotun mees; i ba shooruwaa maccaasaa tunissee; <sup>12</sup> i hiyyeesaanne manqquwaa huqqunnees; i asabaa bonqqees; acuwaassi oiqqidobaa zaarena; eeqaukka goinnees; tunabaakka oottees; <sup>13</sup> i dichchau tal<sup>77</sup>idi, woriyaa ekkees. Hegaa mala asi paxa de<sup>7</sup>anee? CHii, i paxa de<sup>7</sup>enna! I heggaa mala tunabaa oottido gishshau, i tuma haiqqana; a suutaa acoikka a bollaana gidana.

<sup>14</sup> “Ha iita bitaniyaa na<sup>7</sup>ai ba aawai oottiyo ha nagaraa ubbaa be<sup>7</sup>iiddi, i heggaa malabaa oottana xayikko, <sup>15</sup> i deriyaa bolli de<sup>7</sup>iya eeqau goinniyo sohotun maana xayikko, Israa<sup>7</sup>eela asaa eeqau goinnana xayikko, i ba shooruwaa maccaasaa tunissana xayikko, <sup>16</sup> i oonanne huqqunnana xayikko, acuwaassi oiqqidobaa guyye zaarikko, i asabaa bonqqana xayikko, bau de<sup>7</sup>iyaabaappe namisettidaageeta mizikko, kallottidaageetakka maizzikko, <sup>17</sup> i woriyaa ekkanau dichchau tal<sup>77</sup>ana xayikko, balaappe kushiyaa shiishshi ekkikko, i ta higgiiyaa naagikko, ta wogankka hemettikko, yaatikko, i paxa de<sup>7</sup>anappe attin, ba aawaa nagaran haiqqenna. <sup>18</sup> SHin a aawai ba ishantta wolqqan bonqqido gishshaunne ba asaa giddon iitaa oottido gishshau, ba nagaran haiqqana.

<sup>19</sup> “SHin intte, ‘Na<sup>7</sup>ai ba aawaa nagaran aissi qaxxayettennee?’ yaageeta. Na<sup>7</sup>ai tumu pirddaanne suuretettaa oottidi, ta higgiiyaa minttidi naagikko, i tumu paxa de<sup>7</sup>ana. <sup>20</sup> Nagaraa oottiya shemppoi i bau haiqqana. Na<sup>7</sup>ai aawaa nagaran qaxxayettenna; hegaadanka, aawai na<sup>7</sup>aa nagaran qaxxayettenna. Xillo asa xillotettaa he aawussa gidana; iita asa iitatettaikka he aawussa gidana.

<sup>21</sup> “SHin nagaranchchai ba oottido nagara ubbaappe simmidi, ta azazuwaa naagikkonne tumu pirddaanne suuretettaa oottikko, i tumu paxa de<sup>7</sup>anaappe attin haiqqenna. <sup>22</sup> I oottido naaquwaappe issoinne qofettenna. Ba oottido xillo oosuwaa gishshau, i paxa de<sup>7</sup>ana. <sup>23</sup> Nagaranchchai ba ogiyaappe simmidi, paxa de<sup>7</sup>iyooogan ufaittaisippe attin, taani Ubbaa Haariya GODAI a haiquwan ufaittikke.

<sup>24</sup> “SHin xillo asi ba xillotettaappe guyye simmidi, nagaranchcha asi oottiyo nagaraanne tuna oosuwaa oottikko, i paxa de<sup>7</sup>anee? CHii, i oottido xillo oosuwaappe issoinne qofettenna; i ammanettennan ixido gishshaunne i oottido nagaraa ubbaa gishshau, i haiqqana.

<sup>25</sup> “Intte hegan, ‘Godaa ogee suure gidenna’ yaageeta. Inttenoo, Israa<sup>7</sup>eela asatoo, ha<sup>77</sup>i siyite! Suure gidennai intte ogiyaa gidennee ta ogee? <sup>26</sup> Xillo asi ba xillotettaappe guyye simmidi, nagaraa oottiyo wode, i ba oottido nagaraa gishshaa haiqqana. <sup>27</sup> SHin iita asi ba iitatettaappe guyye simmidi, tumu pirddaanne suuretettaa oottiyo wode, i ba shemppuwaa ashshana. <sup>28</sup> I ba oottido nagaraa ubbaa qoppidi simmido gishshau, i tumu paxa de<sup>7</sup>anaappe attin haiqqenna. <sup>29</sup> SHin Israa<sup>7</sup>eela asati, ‘Godaa ogee suure gidenna’ yaagidosona. Inttenoo, Israa<sup>7</sup>eela asatoo, suure gidennai intte ogiyaa gidennee ta ogee?

<sup>30</sup> “Hegaa gishshau, inttenoo, Israa<sup>7</sup>eela asatoo, taani inttena ubbaakka intte ogiyaadan ogiyaadan pirddana. Nagarai intte xayuwaaassi gaaso gidennaadan paaxite; intte mooro ubbaappekka simmite. Taani Ubbaa Haariya GODAI haggaa odais. <sup>31</sup> Intte naaqqido naaqqo ubbaappe shaahettidi, ooratta wozanaanne ooratta ayyaanaa ekkite.

Inttenoo Israa7eela asatoo, aibissi haiqqeetii? <sup>32</sup> Taani issi asa haiquwaaninne ufaittikke. Hegaa gishshau, intte nagaraa paaxi simmidi, paxa de7ite! Taani Ubbaa Haariya GODAI haggaa odais” yaagiis.

## 19

### *Zilaassaa*

- <sup>1</sup> GODAI Hizqqeela, “Israa7eela halaqatuyyo hagaadan yaagada zilaala;  
<sup>2</sup> ‘Intte aayyiyaa gaammotu gidдон  
 a aiba gaammoo!  
 Yelaga gaammotu gidдон gisada,  
 ba marata dichchaasu.  
<sup>3</sup> A ba maratuppe issuwaa dichchin,  
 wodala gaammo kiyiis.  
 I shankkaa tamaridi, asaa miis.  
<sup>4</sup> Kawotettati ubbai abaa siyidi,  
 ollan a gelissidi oiqqidosona.  
 Eti a hinggittan goochchidi,  
 Gibxxe biitti efiidosona.  
<sup>5</sup> “ ‘A aayyiyaa naagoogee polettennan ixxin,  
 hidootai xayidoogaa be7ada,  
 ba maratuppe naa77antuwaa dichchada,  
 wodala gaammo kessaasu.  
<sup>6</sup> I wodala gaammo gididi,  
 hara gaammotu gidдон  
 yaanne haanne simerettiis.  
 I shankkaa tamaridi, asaa miis.  
<sup>7</sup> I eta wolqqaama qatuwaa mentterettidi,  
 katamaakka bashshiis.  
 Biittainne biittan de7iya asai ubbai  
 a gudettan shabbirettiis.  
<sup>8</sup> Yuushuwan de7iya kawotettati ubbai  
 a oiqqanau piriya yeggidosona.  
 Bantta gitiyaakka miccidosona;  
 bantta ollan a oiqqidosona.  
<sup>9</sup> Eti bantta hinggittan a goochchidi,  
 koottadan giigida guutta keettan yeggidi,  
 Baabiloone kawuwaakko efiidosona.  
 Naa77antto a gudettaa Israa7eela deretun siyettennaadan,  
 eti a qasho keettaa gelissidosona.  
<sup>10</sup> “ ‘Ne aayyiyaa haattaa doonan  
 tokettida woiniyaa turaa mala.  
 Daro haattai de7iyo gishshau,  
 he woiniyaa turai aifiyaa darxxaxxi uttiis;  
 qassi daro maratuura de7ees.  
<sup>11</sup> A maratuppe minniyaagee  
 haariyaageetu xam77aa gididiis.  
 A marai gita maratuppe aduqqidi,  
 bollau aadhdhiis.  
 Ba maratu coratettaaninne  
 xoqqatettan bollaara beettiis.  
<sup>12</sup> SHin he turai hanquwan shodettidi,

biittan olettiis.  
 Arshsho carkkoi a aifiyaa melissiis;  
 a mino marai melin, tamai miis.  
<sup>13</sup> Ha77i qassi i haatti bainna  
 mela bazzuwan tokettiis.  
<sup>14</sup> Tamai a maratuppe issuwaa oiqqidi,  
 a aifiyaarakka dippi oottidi miis.  
 Yaatin, kawotaa xam77a gidiya  
 ai mino marikka a bollan attibeenna.  
 “ ‘Hagee yeeho zilaassa; haggaa zilaassadan go7ettanau bessees’ yaaga” yaagiis.

## 20

### *Makkalanchcha Israa7eela*

<sup>1</sup> Nuuni omoodettido laappuntta laittan, ichchashantta aginan, tammantta gallassan, Israa7eela cimatupe amaridaageeti GODAA oichchanau yiidi, ta sinttan uttidosa.

<sup>2</sup> Yaatin, GODAA qalalai taakko hagaadan yaagiiddi yiis; <sup>3</sup> “Laa asa na7au, Israa7eela cimatupe hagaadan yaagada yoota; ‘Ubbaa Haariya GODAI hagaadan yaagees; “Intte yiidoogee tana oichchanaassee? Taani Ubbaa Haariya GODAI ta de7uwan caaqqais: Taani inttenan oishettikke” yaagees’ yaaga.

<sup>4</sup> “Eta bolli pirdduutee? Laa asa na7au, tumu eta bolli pirdduutee? Hegaa gidikko, eta maizza aawatu tuna oosuwaa eta erissa. <sup>5</sup> Eta hagaadan yaaga; ‘Ubbaa Haariya GODAI hagaadan yaagees; “Taani Israa7eela doorido wode, Yaaqooba zaretussi Gibxxen de7ishin, tanatettaa erissada, ‘Taani GODAA intte Xoossaa. <sup>6</sup> Taani inttena Gibxxeppe kessada, inttessi doorido biittaa, maattainne eessai goggiyo biittaa, biitta ubbaappe aadhdhida lo77o biittaa ehaana’ gaada caaqqaa. <sup>7</sup> Qassi taani eta, ‘Intteppe issoi issoi ba siiqiyo tuna eeqata diggo; Gibxxe eeqatun tunoppite. Taani GODAA intte Xoossaa’ yaagaas.

<sup>8</sup> “ “SHin eti taayyo makkalidi, ta odiyoogaa siyennan ixxidosa. Eti bantta amot-tido tuna eeqata diggibookkona; Gibxxe eeqaukka goinniyoogaa aggibookkona. Hegaa gishshau, eti Gibxxen de7ishin, ta hanqquwaa eta bolli gussanau, ta yiilluwaakka eta bolli wurssanau qoppaas. <sup>9</sup> SHin eti de7iyo kawotettatu giddooninne Israa7eela asaa Gibxxeppe kessiyoogan, taani tanatettaa erissido asaa sinttan ta sunntai tunennaadan oottaas. <sup>10</sup> Hegaa gishshau, taani eta Gibxxeppe kessada, bazzuwau ehaas. <sup>11</sup> Azazettiya ubbau de7uwaa immiya ta wogaa taani eta immiis; ta higgiaakka eta tamarissaas. <sup>12</sup> Qassi eta geeshshiyaagee tana GODAA gidiyoogaa eti erana mala, taani ta Sambbataa taappenne etappe gidduwan malaata oottada immiis.

<sup>13</sup> “ “SHin Israa7eela asai ha bazzuwankka ta bollan makkalidosona. Azazettida ubbau de7uwaa immiya ta wogaadan hemettibookkona; ta higgiaakka menttidosa; ta Sambbataakka daro tunissidosona. Yaatin, taani bazzon ta hanqquwaa eta bolli gussada, eta wurssanau qoppaas. <sup>14</sup> SHin taani eta Gibxxeppe kessiyoogaa be7ida kawotettatu sinttan ta sunntai tunennaadan, eta xaissabeikke. <sup>15</sup> Qassi taani eti bazzuwan de7ishin, etayyo immido biittaa, maattainne eessai goggiyo biittaa, biitta ubbaappe lo77iyya biittaa eta gelissennaan caaqqaa. <sup>16</sup> Aissi giikko, eti eeqau goinnidi, ta higgiaakka ixxido gishshaassa, ta wogaadan hemettibeenna gishshaassanne ta Sambbataakka tunissido gishshaassa. <sup>17</sup> Gidikkonne, taani eta qarettido gishshau, bazzuwan eta wurssa xaissabeikke.

<sup>18</sup> “ “Eti bazzuwan de7ishin, taani eta naata hagaadan yaagaas; ‘Intte aawatu wogaadan hemettoppite; eta higgiaakka naagoppite; woikko eta eeqatun tunoppite. <sup>19</sup> Taani GODAA intte Xoossaa. Ta wogaadan hemettite; ta higgiaakka naagite. <sup>20</sup> Taappenne intteppe gidduwan malaata gidana malanne taani GODAA intte Xoossaa gidiyoogaa intte erana mala, Sambbataa hara gallassaappe dummayite’ yaagaas.



21 “ “SHin he naatika ta bollan makkalidosona; azazettiya asa ubbau de7uwaa immiya ta wogaadan hemettibookkona; ta higgiaakka eti naagibookkona; ta Sambataakka tunissidosona. Yaatin, taani bazzon ta hanqquwaa eta bolli gussanau, ta yiilluwaakka eta bolli wurssanau qoppaas. 22 SHin taani ta kushiya shiishsha ekkaas. Taani eta Gibxxeppe kessiyoogaa be7ida kawotettatu sinttan ta sunttai tunennaadan, eta xaissabeikke. 23 Qassi eta hara kawotettatussinne hara biittatussi laalanau bazzon caaqqaa. 24 Aissi giikko, eti ta wogau azazettennan ixsidosa; ta higgiaakka mentidosona; ta Sambataa tunissidosonanne bantta aawatu eeqa amottidosona. 25 Hegaadankka, qassi etassi lo77o gidenna wogatanne de7uwaa immenna higgeta immaas. 26 Eti bantta yarshshuwan tunanaadan, eti bantta baira naata yarshshanaadan, taani eta yedda besaas. Taani hega oottidoogee eta qaxxayanaassanne taani GODAA gidioogaa eta erissanaassa” yaagees’ yaaga.

27 “Hegaa gishshau, asa na7au, Israa7eela asaassi hagaadan yaagada yoota; ‘Ubbaa Haariya GODAI hagaadan yaagees; “Intte aawatikka tanan ammanettennan ixidi, hegan tana cayidosona. 28 Taani etau immanau caaqqido biittaa eta ehaas. Etikka xoqqa keraanne irxxa mittaa be7ido wode, etan ubban bantta yarshshuwaa yarshshidosona. Eti bantta xuuggiyo yarshshuwan, bantta cuwayiyo ixaanaaninne bantta gussiyo ushshaa yarshshuwan tana hanqqetissidosona. 29 Yaatin, taani eta, ‘Hagee intte biyo xoqqa sohoi aibee?’ yaagada oichchaas. Hachchi gakkanaassi he sohoi goinniyo xoqqa soho geetetti xeesettes” yaagees’ yaaga.

30 “Hegaa gishshau, Israa7eela asaayyo hagaadan yaagada yoota; ‘Ubbaa Haariya GODAI hagaadan yaagees; “Intte maizza aawati oottido nagara ubbaa oottidi, aissi inttena tunisseeti? Eta tuna eeqa aissi goinneeti? 31 Hachchikka hega mala imuwaa shiishshiyo wodenne intte attuma naata taman xuuggidi yarshshiyo wode, intte eeqa ubban inttena tunisseeta. Inttenoo, Israa7eela asatoo, taani inttenan oishettoo? Taani Ubbaa Haariya GODAI ta de7uwan caaqqais: Taani inttenan oishettikke. 32 Intte, ‘Nuuni mittaunne shuchchau goinniya hara kawotettatu malanne sa7an de7iya asaa mala gidana’ yaagidi qoppeeta. SHin intte qofai mulekka hanenna.

### *GODAI Qaxxayeesinne Maarees*

33 “ “Taani Ubbaa Haariya GODAI ta de7uwan caaqqais: Taani ta mino qesiyan, ta yeddido kushiyaaninne ta gussido hanqquwan intte bolli kawotana. 34 Kawotettatu giddoppe taani inttena kessana; intte laalettido biitta ubbaappe ta mino qesiyan, ta yeddido kushiyaaninne ta gussido hanqquwan taani inttena shiishshana. 35 Taani inttena kawotettatu bazzuwaa giyo bazzuwaa ehaana; ehaada inttena ta sinttan essada, intte bolli pirddana. 36 Gibxxe biittaa bazzuwan intte maizza aawatu bolli pirddidoogaadan, hegaadankka intte bolli pirddana. Taani Ubbaa Haariya GODAI hega odais. 37 Taani inttena huuphiyan huuphiyan qoodada gelissana; ta maachchaa intte naaganaadan, taani inttena oottana. 38 Makkalanchchatanne nagaranchchata taani intte giddoppe diggana; ha77i eti de7iyo biittaappe taani eta kessana; shin eti Israa7eela biittaa gelennaadan teqqana. Taani GODAA gidioogaa intte hegan erana” yaagees.

39 “ ‘Ubbaa Haariya GODAI hagaadan yaagees; “Inttenoo, Israa7eela asatoo, intte ha77i taani odioogaa siyennan ixixikko, biidi ubbaikka intte eeqa goinnite. SHin hegaappe guyyiyan, intte imuwaaninne intte eeqa ta geeshsha suntta tunisseketa. 40 Ta geeshsha deriyan, xoqqu giida Israa7eela deriyaa bollan intte Israa7eela asai kumettai taayyo, Ubbaa Haariya GODAAYO goinnana. Taanikka inttena mokka ekkana; intte yarshshuwaa, intte doorido imuwaanne intte geeshsha imuwaa taani intteppe koyais. 41 Intte laalettido kawotettatu giddoppe taani inttena ehiyo wodenne hara biittatuppe taani inttena shiishshiyo wode, sawuwaa tonggu giya yarshshuwaa ekkioogaadan, taani inttena ekkana. Kawotettati xeellishin, taani intte gidon geeshshaa gidioogaa erissana. 42 Taani kase intte maizza aawatuuyo immana gaada

caaqqido Israa7eela biittaa inttena zaarada ehiido wode, taani GODAA gidiyooгаа intte erana. <sup>43</sup> Intte intte iita hemetaanne intte tuna oosuwaa intte he sohuwan hassayana; intte oottido iita oosuwaa ubbaa intte shenetana. <sup>44</sup> Inttenoo, Israa7eela asatoo, taani intte iita hemetaadaaninne intte tuna oosuwaadan gidennan, ta sunntaa gishshau taani oottiyo wode, taani GODAA gidiyooгаа intte erana. Taani Ubbaa Haariya GODAI hгаа odais” yaagees’ yaaga” yaagiiddi yiis.

### *Neegeeba Pirddaa*

<sup>45</sup> GODAA qaalai taakko hagaadan yaagiiddi yiis; <sup>46</sup> “Laa asa na7au, tohossa baggi sim-mada xeella; tohossa baggau oda; Neegeeba Wora bolli hananabaa yoota. <sup>47</sup> Neegeeba Woraassi hagaadan yaaga; ‘GODAA qaalaa siya! Ubbaa Haariya GODAI hagaadan yaagees; “Taani ne giddon tamaa oittana; he tamai ne irxxa mittaakka ne mela mittaakka ubbaa maana. He eexxiya tamai to7enna; tohossappe biidi, huuphessi gakkanaashin de7iya asaa som77uwaa ubbaa he laco labana. <sup>48</sup> Taani GODAI oittido tama gidiyooгаа asai ubbai be7ana. He tamai to7enna” yaagees’ yaaga” yaagiiddi yiis.

<sup>49</sup> Yaagin taani zaarada, “Hai Ubbaa Haariya GODAU, hгаа ta yootanau tana aza-zoppa. Eti tana, ‘I ubbatoo leemisuwaa odees gidennee?’ yaagidi haasayoosona” yaagaas.

## 21

### *GODAA Bisuwaa*

<sup>1</sup> GODAA qaalai taakko hagaadan yaagiiddi yiis; <sup>2</sup> “Laa asa na7au, ne som77uwaa Yerusalaamekko zaarada, asai goinniyo sohotu bolli qaalaa oda; Israa7eela biittaa bollar hananabaa yoota. <sup>3</sup> Hagaadan yaaga; ‘GODAI hagaadan yaagees; “Taani neeyyo morkke. Taani ta bisuwaa shoohuwaappe shoddada, xillo asaanne iita asaa ubbaa wurssana. <sup>4</sup> Taani ta bisuwaa shoddada, huuphessappe tohossa gakkanaashin de7iya asaa ubbaa xaissana. <sup>5</sup> Hegan taani GODAI ta bisuwaa a shoohuwaappe shoddi-doogaanne guyye zaarennaagaa asai ubbai erana” yaagees’ yaaga.

<sup>6</sup> “Hegaa gishshau, asa na7au, asai ubbai xeellishin, ne wozanai meqqin, camo yeehuwaa yeekka. <sup>7</sup> Eti nena, ‘Aissi yeekkai?’ giidi oichchiyo wode, hagaadan yaaga; ‘Sinttaara yiya iita oduwaassi yeekkais. Wozani ubbai yashshan seerana; kushe ubbai arggaacana; eta goobatettai ubbai etappe kichchana; gulbbata ubbaikka kokkorana. He wodee gakkii! I tumu polettana! Taani Ubbaa Haariya GODAI hгаа odais’ yaaga” yaagiiddi yiis.

<sup>8</sup> GODAA qaalai taakko hagaadan yaagiiddi yiis; <sup>9</sup> “Laa asa na7au, hagaadan yaagada hananabaa yoota; ‘GODAI hagaadan yaagees; “Bisuwaa! Leefettidanne qucettida bisuwaa! <sup>10</sup> Siifanau leefettiis. Wolqqanttaadan pholqqu gaanau qucettiis. Ta asai imettida seeraanne qixaatiyaa ubbaa ixrido gishshau, hagaappe guyyiyan, ooninne ufaittena. <sup>11</sup> Go7ettanau bisoi qucettiis; leefettidanne qucettidi, siifiyaagau imettiis.

<sup>12</sup> “ “Laa asa na7au, yeekkanne zilaala! Aissi giikko, he bisoi giigettidoogee ta asaa bollaanne Israa7eela halaqatu ubbaa bollaana. Halaqatikka ta asaara issippe bisuwan haiqqana. Hegaa gishshau, ne tiraa baqqa. <sup>13</sup> Taani ta asaa paaccana; eti nagaraa paaxennan ixrikko, ha metoi ubbai eta bolli gakkana. Taani Ubbaa Haariya GODAI hгаа odais” yaagees’ yaaga.

<sup>14</sup> “Ha77ikka asa na7au, hananabaa yoota; ne kushiyaakka baqqa. He wode bisoi naa77a heezza zaaridi shocana; hegeekka daganttiya, woriyaanne siifiya bisuwaa. <sup>15</sup> Hegee eta wozanai seeranaadaaninne etappe daroti haiqqanaadan oot-tana. Bisoi wolqqanttaadan pholqqu gees; siifanau qucettiis. <sup>16</sup> Neno, qara bisuwau, ushachchaanne haddirssau, ne simmido bagгаа ubbaa busakka. <sup>17</sup> Taanikka qassi ta kushiya baqqana; ta hanqqoikka dochchana. Taani GODAI hгаа odaas” yaagiiddi yiis.

*Baabiloone Kawuwaa Bisuwaa*

<sup>18</sup> GODAA qalalai taakko hagaadan yaagiiddi yiis; <sup>19</sup> “Laa asa na7au, Baabiloone kawuwaa bisoi yiyo naa77u ogetun malaataa wotta. Naa77u ogetikka issi biittaappe dendoosona. Naa77u ogeti gaittiyo balla ogiyan malaata gidiya tuussaa essa. <sup>20</sup> Issi ogiyan de7iya malaatai Raaba giyo Amoonatu katamaa biyoosaa malaatees; hinkkoi qassi Yihudan gimbbettida Yerusalaame katamaa biyoosaa malaatees. <sup>21</sup> Baabiloone kawoi ogeti gaittiyo ballan, malaata tuussatu matan eqqana. I augaa ogiyaa baanaakko eranau, wonddafiyaa zubbeta saamaa yeggana; ba eeqatuura zorettana; mehiyaa maracciyaakka xeellana. <sup>22</sup> Hegaadan oottin, Yerusalaame efiya ogee saaman kiyana. He saamai kawoi biidi, qatuwaa laaliyoobata giigissanaadan, olaa waasuwa waasanaadan, ceequwaa ceeqettanaadan, qatuwaa laaliyoobata dirssaa penggetukko shiishshanaadaaninne biittaa keelidi, gimbbiyaara gattidi diddiqanaadan, ayyo odana. <sup>23</sup> Yerusalaame asai Baabiloone kawuwara maacettido gishshau, hagee bantta bolli gakkees giidi qoppibookkona. SHin Baabiloone kawoi eta eta nagaraa hassayissidi, omooduwau efaana.

<sup>24</sup> “Hegaa gishshau, Ubbaa Haariya GODAI hagaadan yaagees; ‘Intte nagarai qoncciiis; intte mooranchcha asa gidiyoogaa asai ubbai erees; intte oosoi intte nagaranchcha gidiyoogaa bessees. Hegaa gishshau, intte mooroi hassayettana; intteikka intte morkkiyau aadhdhidi imettana’ yaagees.

<sup>25</sup> “Nenoo iitanne tuna gidida Israa7eela halaqau, ne wurssetta pirddaa gallassai gakkiiis. <sup>26</sup> Ubbaa Haariya GODAI hagaadan yaagees; ‘Ne huuphiyaappe kallachchaa dentta; ne huuphiyan xaaxidoogaakka qaara. Hagaappe sinttanau kaseegaadan hananabi baawa; ziqqi giidaagee xoqqu gaana; xoqqu giidaageekka ziqqi gaana. <sup>27</sup> Bashshaa! Bashshaa! Taani ha katamaa bashshana! Pirddiyo maatai de7iyoogee yaana gakkanaashin, ha katamai naa77antto keexettenna. I yiyo wode taani ayyo aattada immana’ yaagees.

<sup>28</sup> “Laa asa na7au, hagaadan yaagada hananabaa yoota; ‘Israa7eela cayiya Amoonatuyyo Ubbaa Haariya GODAI hagaadan yaagees; “Bisuwaa! Bisoi siifanau shoohuwaappe shodettiis; wurssanaunne wolqqanttaadan pholqqu gaanau qucettiis. <sup>29</sup> Intte be7iyo ajjuutai worddo; intte yootiyo hiraagaikka worddo. Intte iitanne tuna asa; intte wurssetta pirddaa gallassai gakkiiis. Intte qooriyan bisoi wodhdhana hanees. <sup>30</sup> Bisuwaa shoohuwau zaarite. Intte merettido sohuwan, intte yelettido biittan taani intte bolli pirddana. <sup>31</sup> Taani ta hanqquwaa intte bolli gussana; ta hanqquwaa tamai intte bolli eexxi kiyana. Taani inttena bashshiyooogan loohida, meqetti baina asatuyyo aatta immana. <sup>32</sup> Intte tamaassi eettiyo mitta gidana; intte suuttai intte biittan gukkana; intte naa77antto hassayettekketa. Taani GODAI haggaa odaas” yaagees’ yaaga” yaagiiddi yiis.

**22***Yerusalaame Nagaraa*

<sup>1</sup> GODAA qalalai taakko hagaadan yaagiiddi yiis; <sup>2</sup> “Laa asa na7au, suuttaa gusiyaageeti kumido katamaa bolli pirddanau giigadii? Yaatikko, i oottido tuna ooso ubbaa ayyo yoota. <sup>3</sup> Hagaadan yaaga; ‘Ubbaa Haariya GODAI hagaadan yaagees; “Neeni daro asaa suuttaa gussido gishshaunne eeqau goinniyoogan nena tunissido gishshau, ne wodee yiis. <sup>4</sup> Neeni gussido suuttan mooranchcha gidadasa; ne medhdhido eeqankka tunadasa. Yaatin, ne pirddaa gallassai matattiis; ne wurssettaa laittaikka gakkiiis. Hegaa gishshau, taani nena kawotettatussi baceessiyooobanne hara biittatusikka qilliicciyoobaa kessana. <sup>5</sup> Nenoo, suntti moorettidonne shabbirettida katamau, mataaninne haahuwan de7iyaageeti nena qilliiccana.

6 “ “Ne gidдон de7iya Israa7eela halaqati ubbati suuttaa gussanau bantta wolqqaa ai keena go7ettiyaakko be7a. 7 Ne gidдон de7iyaageeti bantta aawaanne bantta aayyiyo bonchchokkona; eti betetakka huqqunnidosona; am77etanne aawu aaya banna naata naaqqoosona. 8 Eti ta geeshsha miishshata karoosonanne ta Sambbataakka tunissoosona. 9 Ne gidдон de7iyaageetuppe issooti issooti harata worissanau wordduwaa yootoosona; haraati deriyaa bolli de7iya eeqau goinniyo sohotun moosona; qassi haraati maccaasaara shaaramuxoosona. 10 Ne gidдон de7iyaageetuppe issooti issooti ba aawaa machcheera zin77oosona; haraati qassi kushe qitai yiido maccaaseera wolqqan gaittoosona. 11 Ne gidдон de7iyaageetuppe issooti issooti ba shooruwaa machcheera zin77oosona; ba na7aa machcheera zin77oosona; ba aawaa na7ee, ba michcheera zin77oosona. 12 Ne gidдон de7iyaageetuppe issooti issooti miishshaa ekkidi, shemppuwaa woroosona; haraati bantta miishshaa dichchau immoosonanne, bantta shooruwaa miishshaa yashissidi ekkoosona. Qassi intte tana mulekka dogideta. Taani Ubbaa Haariya GODAI haggaa odais.

13 “ “Ne gidдон de7iya asai bessenna miishshaa ekkiyo gishshaunne shemppuwaa woriyo gishshau, taani hanqquwan ta kushiya baqqana. 14 Taani nena qaxxayiyu gallasi ne goobatetta nenaara de7anee? Woikko ne kushee mino gidanee? Taani GODAI haggaa yootaas; taani yootidoogaa taanikka oottana. 15 Taani ne asaa kawotettatu giddooninne hara biittatu gidдон laalana; ne tunatettaakka taani ne bollappe xaissana. 16 Hara kawotettatu sinttan neeni kauyyana; shin taani GODAA giddiyooгаа neeni erana” yaagees’ yaaga” yaagiiddi yiis.

### *GODAA Tamai Geeshshees*

17 Hegaappe guyyian, GODAA qalalai taakko haggadan yaagiiddi yiis; 18 “Laa asa na7au, Israa7eela asai ainne pattenne toce mala; eti ubbaikka biraa seerissidi xillissiyu wode, toce gididi attiya nahaase, qorqqoro, biratanne irssaase mala. 19 Heggaa gishshau, Ubbaa Haariya GODAI haggadan yaagees; ‘Intte ubbaikka toce mala gidido gishshau, taani inttena ubbaikka Yerusalaame giddo shiishshana. 20 Asai biraa, nahaasiyaa, birataa, irssaasiyaanne qorqqoruwaa tamaa coociyaakko shiishshidi seerissiyooгаadan, taani ta hanqquwaaninne ta yiilluwan inttena shiishshada, katamaa gidдон seerissana. 21 Taani inttena shiishshada, ta hanqquwaa tamaa intte bolli womppiinin, intte hegan seerana. 22 Birai coociyan seeriyooгаadan, intte Yerusalaamen seerana. He wode taani GODAI ta hanqquwaa intte bolli gussidoogaa intte erana’ yaagees” yaagiiddi yiis.

### *Israa7eela Asaa Kaalettiyaageetu Nagaraa*

23 GODAA qalalai taakko zaaridikka haggadan yaagiiddi yiis; 24 “Laa asa na7au, eta biittai tunido gishshau, ta hanqquwan irai bukkennaadan diggada, taani Israa7eela asaa qaxxayanau haniyoogaa etau yoota. 25 Eta halaqati ba woridobaa gudiiddi mentterettiya gaammo mala; eti asaa woroosona; miishshaa gidin, hara buquraa gidin, ubbaa banttau ekkoosona; eti daro maccaasaa am77e kessidosona. 26 Qeeseti ta higgiyaa menttidosona; ta geeshshabaakka tunissidosona. Geeshshaanne tunaa shaakkokkona; qassi geeshshaappenne tunaappe gidduwan de7iya dummatettaa tamarissokkona; ta Sambbataa bonchchokkona. Hegaappe denddidaagan, taani Israa7eela asaa gidдон bonchchettabeikke. 27 A gidдон de7iya halaqati bantta woridobaa duuterettiya wanggireellotu mala; eti banttau doretanau asaa woroosona. 28 Yerusalaame katan de7iya hananabaa yootiyaageeti godaa nooraa tiyiya asadan, worddo ajjuutaa be7iyooгаanine worddo hiraagaa yootiyooган, eta nagaraa genttoosona. GODAI yootennan de7ishin, ‘Ubbaa Haariya GODAI haggadan yaagees’ yaagoosona. 29 He biittaa asati bonqqoosona; hiyyeesatanne metootanchchata huqqunnoosona; eti betetakka yashissidi, miishshaa ekkidi, likke pirdaa diggoosona.



<sup>30</sup> “Taani biittaa xaissennaadan, eta giddon dirssaa gimbee kolettido baggaara eqqidi naagiya issi asa koyaas; shin oonanne demmabeikke. <sup>31</sup> Hegaa gishshau, ta hanqquwaa eta bolli gussana; taani ta hanqquwaa taman eta xaissana; taani eti oottido oosuwaa eta bolli zaarana. Taani Ubbaa Haariya GODAI haggaa odais” yaagiiddi yiis.

## 23

### *Naa77u Shaaramuxiya Michchetu Leemisuwaa*

<sup>1</sup> GODAA qaalai taakko hagaadan yaagiiddi yiis; <sup>2</sup> “Laa asa na7au, issi aayeepe yelet-tida naa77u maccaasati de7oosona. <sup>3</sup> Eti Gibxxen de7iiddi, bantta yelagatettaappekka doommidi, shaaramuxa gididosona. He biittan eta xanttan attumaasai kaa7iis; eta geela7otettaikka ekettiis. <sup>4</sup> Etappe bairee sunntai Ohoolo; qassi i michchee kaalee sunntai Ohoolibo. Eta naa77aakka taani machchin, taayyo attumanne macca naata yelidosona. Ohoola Samaariyo; Ohooliba qassi Yerusalaamo.

<sup>5</sup> “Ohoola taayyo machcho gidada de7aiddakka shaaramuxaasu; a bana laggettiya Asoore wotaaddarata minttada siiqaasu. <sup>6</sup> Eti salo milatiya maayuwaa maayida olanchchata, biittaa haariyaageetanne ola gadaawata; eti ubbaikka amoyiya, yelaga attumaasatanne paraa toggiya paraasata. <sup>7</sup> A bana shaaramuxa oottada, ubbaappe lo77iya Asoore attumaasatuyyo immaasu. I shaaramuxatetta Asoore biittaa eeqatussi goinnada, tunanaadan o oottiis. <sup>8</sup> A Gibxxen doommido shaaramuxatettaa ha77ikka aggabeikku; i yelagatettaappe doommidi, attumaasati i xanttaa kaa7oosonanne iira shaaramuxoosona.

<sup>9</sup> “Hegaa gishshau, a minttada siiqiyo Asoore biittaa laggettotuyyo taani o aattada immaas. <sup>10</sup> Eti o qaaridi kalloyidosona; i attumanne macca naata omooddi oiqqidosona; okka bisuwan woridosona. Bana gakkida pirddaa gaasuwan, maccaasatu giddon qilliicciyoobaa gidaasu.

<sup>11</sup> “I michchiyaa Ohooliba haggaa be7aasu; be7ikkonne a ba amuwaaninne ba shaaramuxan ba michcheeppe tunaa daraasu. <sup>12</sup> Akka qassi Asoore biittaa haariyaageeta, ola gadaawata, lo77o maayuwaa maayida olanchchatanne paraa toggiya paraasata, ubbatikka amoyiya, yelaga asata minttada siiqaasu. <sup>13</sup> Akka bana tunissidoogaa be7aas; eti naa77aikka issi ogiyaa boosona.

<sup>14</sup> “A ba shaaramuxatettaa yaa darissaasu; a attumaasatu misilee godaa bollan, zo7o qalamiyan meretti uttidaagaa be7aasu. <sup>15</sup> Eti bantta xeessan zinnaariyaa gixxi-daageetanne bantta huuphiyankka lo77iya carqqiyaa xaaxidaageeta. Eti ubbaikka Baabiloone biittaa halaqata milatoosona. <sup>16</sup> A eta misileta be7osaarakka daro siiqada, eta xeegeenau Baabiloone biitti asa kiittaasu. <sup>17</sup> Yaatin, Baabilooneti ikko yiidi, iira shaaramuxidi, o tunissidosona. Tunidoogaappe guyyiyan, a etakka shenetada, wora simmaasu. <sup>18</sup> A ba shaaramuxatettaa qoncciyann oottido wodenne ba kalluwaa qaara bessido wode, taani i michcheeppe wora simmidoogaadan, ippekka shenetada wora simmaas. <sup>19</sup> SHin a Gibxxen shaaramuxa gidada de7iyo, ba yelagatettaa wodiya has-sayada, ba shaaramuxaa kaseegaappe yaa darissaasu. <sup>20</sup> Eta attumatetta hariyaagaa mala, etappe kiyiya zerettaikka paraagaa mala gidido ba laggettota minttada siiqaasu. <sup>21</sup> (Nenoo, Ohoolibee, ne yelagatettaa wode, attumaageeti ne xanttan kaa7ishin, ne geela7otettaikka ekkishin, neeni polido shaaramuxatettaa zaaradikka ha77i oottanau amottaasa.)

### *GODAI Naa77u Michchetu Bolli Pirddiis*

<sup>22</sup> “Hegaa gishshau, Ohoolibee, Ubbaa Haariya GODAI hagaadan yaagees; ‘Taani ne laggettota, he neeni shenetada wora simmidoogeeta ne bolli denttana; taani eta ne bolli ubbasaara ehaana. <sup>23</sup> Etikka Baabiloonetanne Kaladaaweta ubbaa, Paqooda, SHoo7anne Qo7aana attumaasata, Asooreta ubbaa, amoyiya yelaga asata, biittaa haariyaageeta, ola gadaawata, olanchchata, halaqatanne paraa toggiya paraasata.



<sup>24</sup> Eti ola paraa gaaretuura, caana gaaretuuranne daro olanchchatuura huuphessa baggaappe intte bolli yaana. Eti wogga gondalliyaanne qeeri gondalliyaa oiqqidi, birata qophiyaa wottidi, ne yuushuwan salppana. Taani nena etan pirddissana; etikka nena bantta wogaadan pirddana. <sup>25</sup> Taani hanqquwaa ne bolli yeddana; etikka nenaara hanqquwaa suuluwan gaittana. Eti ne siiriyaanne ne haittaa qanxxana; neeppe attidaageetikka bisuwan busakettana. Eti ne attuma naatanne ne macca naata oiqqana; neeppe attidaageetakka taman xuuggana. <sup>26</sup> Eti ne maayo ubbaa neeppe qaari ekkana; ne alleeqo ubbaakka neeppe kessi ekkana. <sup>27</sup> Hegaadan oottada, neeni Gibxxeppe ehiido shaaramuxatettaa qaaqqaanne ne shaaramuxatettaa ubbaa taani nena agissana. Neeni naa77antto Gibxxetu eeqa misileta xoqqu gaada xeellennaadan, woikko eta hassayennaadan, taani nena oottana' yaagees.

<sup>28</sup> “Ubbaa Haariya GODAI hagaadan yaagees; ‘Taani nena neeni ixxiyoogeetuyyo, neeni shenetada, etappe wora simmidoogeetuyyo aattada immana. <sup>29</sup> Eti nena ixnananne neeni daafurada demmidobaa bonqqirggidi, nena kallo xiire ashshana. Ne shaaramuxatettaa pokkoi qonccanaadan oottana. Ne ziitainne ne shaaramuxatettaa amoi, <sup>30</sup> haggaa ne bolli ehiis. Aissi giikko, neeni kawotettatuura shaaramuxadasa; eta eeqatun nena tunissadasa. <sup>31</sup> Ne michchiyaa biido ogiyaa neenikka baadasa. Heggaa gishshau, nenakka taani i xuu7aa ushshana’ yaagees.

<sup>32</sup> “Ubbaa Haariya GODAI hagaadan yaagees; ‘Neeni ne michchee xuu7aappe uyana; he xuu7aikka gitanne cin77a. I tigin, daruwaa ekkiyo gishshau, ne bolli qiriyaanne miichchaa ehaana. <sup>33</sup> Neeni mattuwaa jiilaawananne azzanana. Hegee he ne michchee Samaaree xuu7ai dagamaanne bashshaa xuu7aa. <sup>34</sup> Ne a cinggada uyana; uyada xuu7aakka menttana; menttido kon77ankka ne xanttaa gaarana. Taani Ubbaa Haariya GODAI haggaa odais’ yaagees.

<sup>35</sup> “Heggaa gishshau, Ubbaa Haariya GODAI hagaadan yaagees; ‘Neeni tana dogido gishshaunne taayyo zokkuwaa zaarido gishshau, neeni ne ziitaanne ne shaaramuxuwaa waaggaa ekkana’ yaagees” yaagiiddi yiis.

<sup>36</sup> GODAI tana hagaadan yaagiis; “Laa asa na7au, Ohooli bollinne Ohoolibi bolli pirdduutee? Pirddikko, eti oottido tuna oosuwaa etayyo oda. <sup>37</sup> Eti naa77aikka shaaramuxidosonanne shemppuwaa woridosona. Eti bantta eeqa goinnidosona. Harai attin, eti taayyo yelido bantta attuma naatakka bantta eeqatuyyo quma oottidi yarshshidosona. <sup>38</sup> Heggaapekka harabaa eti ta bolli oottidosona; eti ta Beeta Maqidasiyaa tunissidosona; ta Sambbataakka shaaridosona. <sup>39</sup> Eti bantta naata eeqatussi yarshshido gallassi, he gallassi eti ta Beeta Maqidasiyaa gelidi tunissidosona. Eti ta keettan oottidoogee haggaa.

<sup>40</sup> “Hegaadankka qassi, eti haahosaappe attumaasati yaanaadan, asa kiittidosona; kiittin etikka yiidosona. Yin intte naa77u michcheti intte bollaa meecettideta; intte aifiyaakka qalamiyaa tiyideta; alleequwaakka wottideta. <sup>41</sup> Xaraphpheezei sinttan de7iyo lo77o arssaa bolli uttideta; intte he xaraphpheezeaa bollan ta ixaanaanne ta wogaraa zaitiyaa wottideta. <sup>42</sup> Hirggi baina asaa cenggurssai intte achchan siyettees; mattottidaageetikka maari baina asaa bazzoppe yiidosona. Yiidi intte kushiyan sagaayota wottidosona; qassi lo77iya kallachchatakka intte huuphiyan goxxidosona.

<sup>43</sup> “Taani ta wozanan, ‘Hageeti attumaasati ha bollai wuriichchido maccaasatuura shaaramuxana giidi haniyoonaa?’ yaagaas. <sup>44</sup> Attumaasai shaaramuxeera shaaramuxiyoogaadan, eti etaara shaaramuxidosona. Ee, eti he shaaramuxanau qaaqqatiya Ohooliiranne Ohoolibiira shaaramuxidosona. <sup>45</sup> Eti shaaramuxa gidiyo gishshaunne shemppuwaa woriyo gishshau, xillo asati shaaramuxatu bollinne shemppuwaa woriyaageetu bolli pirddiyo pirddaa eta bolli pirddoosona” yaagiis.

<sup>46</sup> Ubbaa Haariya GODAI hagaadan yaagees; “Eta shabbiriyaanne etabaa bonqqiya asata denttetta ekkada ya. <sup>47</sup> Ha shabbiriya asati yiidi, eta shuchchan caddonanne

bisuwan busakkona; eti eta attumanne macca naata worona; eta keettaakka taman xuuggona. <sup>48</sup> Maccaasai ubbai inttena qullennaadan duuttanau, taani biitta ubbaappe shaaramuxatettaa xaissana. <sup>49</sup> Intte naa77u michcheti intte shaaramuxatettaa qix-aatiyaanne eeqatussi intte goinnido nagaraa waagaa ekkana. Taani Ubbaa Haariya GODAA gidiyoogaa intte hegan erana” yaagees.

## 24

### *Disttiyaa Leemisuwaa*

<sup>1</sup> Nuuni omoodettido uddufuntta laittan, tammantta aginan, tammantta gallassan, GODAA qaalai taakko hagaadan yaagiiddi yiis; <sup>2</sup> “Laa asa na7au, haga hachchi gallassaa mazggafan xaafa. Aissi giikko, Baabiloone kawoi Yerusalaame dooddidoi hachcha. <sup>3</sup> Ha makkalanchcha asaayyo ha leemisuwaa oda; ‘Ubbaa Haariya GODAI hagaadan yaagees; “Nahaasiyaa disttiyaa taman wottada, haattaa an tiga. <sup>4</sup> Yaadata gedaanne anggaasuwaa milatiya lo77o ashuwaa ubbaa muxada, an yegga; lo77o meqettaakka qanxxeretada, an kunta. <sup>5</sup> Hegaassi neeni ekkana dorssai wudiyaappe doorettidaagaa gido. Mittaa disttiyaappe garssaara korada, ashuwaakka meqettaakka ka77ana gakkanaashin doissa” yaagees’ yaagada oda.

<sup>6</sup> “Ubbaa Haariya GODAI hagaadan yaagees; ‘Suuttaa gussiyaageetu katameeyyo aayye7ana! SHiyidi mulekka geeyennan ixida nahaase disttiyaa mala a gidaasu. I gidдон de7iya muxettida ashuwaa ubbaa doorennan, gaittaagaa gaittaagaa kessada wurssa.

<sup>7</sup> “‘Aissi giikko, he katamiyaa worido asaa suuttai hanno gakkanaashinka in de7ees; suuttaa gussaida, baanan kammanau biittan gussennan, aibinne kammenna zaallaa bollan gussaasu. <sup>8</sup> Haluwaa kyanau, ta hanqquwaa denttettanaadan, i kamettenna mala, a gussido suuttaa taani zaallaa bollan wottaas’ yaagees.

<sup>9</sup> “Hegaa gishshau, Ubbaa Haariya GODAI hagaadan yaagees; ‘Suuttaa gussiya katameeyyo aayye7ana! Taanikka mittaa keehi guuppana. <sup>10</sup> Hegaa gishshau, daro mittaa wotta; tamaakka eetta. Ashuwaa loittada doissa; cambbaakka mal77etta; meqetta xuugetto. <sup>11</sup> I suullidi michchin, a bollan de7iya nahaaseekka bonqqin, a bollan de7iya qitai seeranaadaaninne a bollan de7iya shiyai xugetti xayanaadan, mela disttiyaa tamaa bonqquwaa bolli wotta. <sup>12</sup> He daafurai ubbai coo mela gidiis; a bollan de7iya daro shiyai harai atto, tamanka kichchibeenna. <sup>13</sup> Bii Yerusalaamee, hegee shiyai ne shaaramuxatettaa leemiso. Taani nena geeshshanau daafurinkka, neeni ne tunatettaappe geeyennan ixido gishshau, ne bollan ta hanqqoi wurana gakkanaashin, neeni naa77antto geeyakka. <sup>14</sup> Taani GODAI haga yootaas; hagee hanana. Taani guyye simmikke; qarettikke; ta qofaa laammikke. Ne ogiyaadaaninne ne oosuwaadan, taani nena pirddana. Taani Ubbaa Haariya GODAI haga odais’ yaagees” yaagiiddi yiis.

### *Hizqqeela Machchiyaa Haiqqaasu*

<sup>15</sup> GODAA qaalai qassikka taakko hagaadan yaagiiddi yiis; <sup>16</sup> “Laa asa na7au, neeni siiqiyoonne ne aifiyau lo77iya ne machchiyo taani issi kuttan woraagana. Hegan kayy-ottoppa, yeekkoppanne afuxxoppa. <sup>17</sup> Oola, shin ne ooliyaa asi siyoppo; haiqqidabau kayyottoppa. Neeni ne huuphiyan xaaxiyoogaa xaaxa; ne gediyanikka caammaa wotta. Ne doonaa kammoppa; shochchaakka mooppa” yaagiiddi yiis.

<sup>18</sup> Yaagin maallado taani asaassi yootaas; he galla omarssi ta keettaayyiyaa haiqqaasu. Wonttetta gallassi maallado GODAI tana azazidoogaadan oottaas. <sup>19</sup> Yaatin, asai tana, “Ha neeni oottiyoogaayyo birshshettai aibakko nuussi aissi yootikkii?” yaagidi oichchiis.

<sup>20</sup> Oichchin taani etayyo hagaadan yaagada zaaraas; “GODAA qaalai taakko hagaadan yaagiiddi yiis; <sup>21</sup> ‘Israa7eela asaa hagaadan yaaga; “Ubbaa Haariya GODAI hagaadan

yaagees; ‘Intte ceeqettiyo, intte aifiyaa lo77iyaanne intte shemppoi amottiyo ta Beeta Maqidasiyaa taani tunissana hanais. Intte guyye ashshido intte attuma naatinne intte macca naati bisuwan wurana. <sup>22</sup> He wode taani oottidoogaadan, intte akka oottana. Intte doonaa kammekketa; shochchaakka meekketa. <sup>23</sup> Intte huuphiyaa xaaxeeta; intte gediyan caammaa wotteeta. Kayyottekketa woikko yeekkeketa. SHin intte intte nagaraa gaasuwan gilqqananne issoi issuwaayyo oolana. <sup>24</sup> He wodiyan Hizqqeeli intteyyo malaata gidana; ubbabaakka i oottidoogaadan, intte oottana. Hagee haniyo wode, taani Ubbaa Haariya GODAA gidiyoojaa intte erana’ yaagees” yaaga.

<sup>25</sup> “‘GODAI tana hagaadan yaagiis; “Laa asa na7au, taani eta ufaissaanne bonchchuwaa, eta aifiyau lo77iyaabaanne eta wozanai amottiyoobaa, qassi eta attuma naatanne eta macca naata etappe wotta ekkana. <sup>26</sup> He gallassi neeyyo woriyaa odanau issi kessi ekkidi attida asi yaana. <sup>27</sup> He gallassi ne doonai dooyettana; neenikka aara haasayana; naa77antto duude kiyakka. Hegaadan hanada, neeni asaayyo malaata gidana. Taani GODAA gidiyoojaa eti hegan erana” yaagiis’ yaagiiddi yiis” yaagaas.

## 25

### *Amoonatu Bolli Odettida Hiraagaa*

<sup>1</sup> GODAA qalalai taakko hagaadan yaagiiddi yiis; <sup>2</sup> “Laa asa na7au, ne som77uwaa Amoonaa biittaaakko zaarada, Amoonatu bolli hananabaa yoota. <sup>3</sup> Hagaadan yaaga; ‘Ubbaa Haariya GODAA qaalaa siyite. Ubbaa Haariya GODAI hagaadan yaagees; “Intte ta Beeta Maqidasee tuniyo wode, Israa7eela biittai baises attiiyo wodenne Yihudaa asai omooduwau biyo wode, ‘Hashshu!’ giido gishshau, <sup>4</sup> taani inttena arshsho bagga biittaa asaassi laata oottada immana. Yaatobare eti intte gidдон kambbiyaa keexxana; keexxidi de7ana. Intte maana teeraa eti maana; intte maattaakka eti uyana. <sup>5</sup> Taani Raaba katamaa gaameelati heemettiyo soho kessana; Amoonatu katamataakka dorssaa wudee allaxxiyo soho oottana. Taani GODAA gidiyoojaa intte hegan erana” yaagees.

<sup>6</sup> “‘Aissi giikko, Ubbaa Haariya GODAI hagaadan yaagees; “Intte Israa7eela bashshan kushiyaa baqqido gishshau, guppido gishshaunne ufaittido gishshau, <sup>7</sup> taani intte bolli ta kushiyaa yeddaas. Inttena kawotettatussi omoodo oottada immana. Taani inttena asaappe shaakkana; kawotettatu gidдонpekka xaissana. Taani GODAA gidiyoojaa intte hegan erana” yaagees.

### *Moo7aaba Biittaa Bolli Odettida Hiraagaa*

<sup>8</sup> “‘Ubbaa Haariya GODAI hagaadan yaagees; “Moo7aabinne Eedoomi, ‘Be7ite, Yihudai hara kawotettatukka mala’ yaagido gishshau, <sup>9</sup> taani Moo7aaba biittaa bollan woraajjana; woraajjada a zawaa naagiya, Beeti-Yashimoota, Ba7aali-Ma7oonanne Qiriyaataima geetettiya, erettida katamata xaissana. <sup>10</sup> Hagaappe sinttanau Amoonaturakka gujjada, eti kawotettatu gidдон hassayettennaadan, taani eta arshsho bagga biittaaappe yiida asatuuyyo aattada immana. <sup>11</sup> Taani Moo7aaba pirddana. Taani GODAA gidiyoojaa eti hegan erana” yaagees.

### *Eedooma Biittaa Bolli Odettida Hiraagaa*

<sup>12</sup> “‘Ubbaa Haariya GODAI hagaadan yaagees; “Eedoomati Yihudaa bolli haluwaa kiyido gishshaunne daro moorido gishshau, <sup>13</sup> taani Ubbaa Haariya GODAI ta kushiyaa Eedooma bolli yeddana. Yeddada an de7iya asaanne mehiyaa mule xaissana; xaissada baises kessana. Temaana katamaappe biidi, Dadaana katamaa gakkanaashin, eti bisuwan busakettana. <sup>14</sup> Taani Eedoomayyo ta asaa Israa7eela baggaara haluwaa kiyana. Israa7eelati eta bolli ta hanqquwaanne ta yiilluwaa keenaa oottana. Taani haluwaa kiyidoogaa eti erana. Taani Ubbaa Haariya GODAI haggaa odais” yaagees.

### *Pilisxeematu Bolli Odettida Hiraagaa*

<sup>15</sup> “Ubbaa Haariya GODAI hagaadan yaagees; “Pilisxxeemati bantta wozanaa iitattetan haluwaa kiyido gishshaunne aqida lancciyen Yihudaa xaissanau koyido gishshau, <sup>16</sup> taani ta kushiya Pilisxxeematu bolli yeddana. Yeddada taani etanne abbaa doonan attidaageeta ubbaa xaissana. <sup>17</sup> Taani etau gita haluwaa kiyana; ta hanqquwan eta qaxxayana. Taani etayyo haluwaa kiyiyo wode, taani GODAA gidiiyoogaa eti erana” yaagees’ yaaga” yaagiiddi yiis.

## 26

### *Xiirsoosa Katamaa Bolli Odettida Hiraagaa*

<sup>1</sup> Nuuni omoodettido tammanne isiinintta laittan, aginaayyo koiro gallasan, GODAA qaalai taakko hagaadan yaagiiddi yiis; <sup>2</sup> “Laa asa na7au, Xiirsoosa katamaa asai ufaittidi, ‘Yerusalaamee kunddiis; a zal77iyaa wolqqaikka xayiiis. I laalettidi xayido gishshau, hagaappe sinttan nuuni durretana’ yaagoosona. <sup>3</sup> Hegaa gishshau, Ubbaa Haariya GODAI hagaadan yaagees; ‘Nenoo, Xiirsoosa katamaa, taani neeyyo morkke. Abbaa beetai yiyoogaadan, taani daro kawotettata ne bollan ehaana. <sup>4</sup> Eti ne dirssaa gimbbiyaa qolana; ne miixaakka laalana. Taani nena biitta ubbaa qucci efiirggin, kallo de7iya zaalla oottana. <sup>5</sup> Yaatobare neeni asati bantta moliyaa gitiyaa melissanau micciyo soho gidana. Taani Ubbaa Haariya GODAI hagaada odais. Hara kawotettati Xiirsoosa katamaa bonqqana. <sup>6</sup> Waannatiya biittan de7iya qeeri katamata bisuwan wurssana. Taani GODAA gidiiyoogaa eti hegan erana’ yaagees.

<sup>7</sup> “Ubbaa Haariya GODAI hagaadan yaagees; ‘Xiirsoosa bolli olaa denttana mala, kawotuyyo kawo gidiiya Baabiloonne Kawuwaa Naabukadanaxoora taani huuphessa baggappe ehaana; a taani paratuura, paraa gaaretuura, paraasatuuranne daro olanchchatuura ehaana. <sup>8</sup> Eti waannatiya biittan qeeri katamata bisuwan wurssana; eti nena dooddidi, ne dirssaa gimbbiyaara gattidi, biittaa diddiqana. Yaatidi bantta gondalliyyaa ne bolli denttana. <sup>9</sup> Dirssaa gimbbeta dom77idi laaliyo miishshan dirssaa gimbbiyaa mentterettana; bantta ola miishshankka ne adussa gimbbeta laalana. <sup>10</sup> A parati daro gidiiyo gishshau, eti denttiyo baanai nena kammama. Paratinne paratu gaareti laalettida katamaa dirssaa penggiyaa geliyoogaadan, geliyo wode, eti sissiiyo caagettainne giirettai ne dirssaa gimbbiyaa qaattana. <sup>11</sup> Eta parati ne gididon de7iya ogeta ubbaa yedhdhana. Ne asaakka bisuwan wurssana; ne wolqqaama tuussatikka sa7an kunddana. <sup>12</sup> Baabilooneti ne aquwaanne ne zal77iyo miishshata bonqqana. Ne dirssaa gimbbetanne ne lo77o keettata ubbaa qolana; qolidi he shuchchaa, he mittaanne he laalettida burcce ubbaa efidi, abban olana. <sup>13</sup> Ne mal77o yettaa taani teqqana; ne diittaa cenggurssaikka naa77antto siyettenna. <sup>14</sup> Taani nena kallo de7iya zaalla oottana; qassi neeni asati bantta moliyaa gitiyaa melissanau micciyo soho gidana. Taani GODAI hagaada yootido gishshau, neeni naa77antto keexettakka. Taani Ubbaa Haariya GODAI hagaada odais’ yaagees.

<sup>15</sup> “Ubbaa Haariya GODAI Xiirsoosa katamaayyo hagaadan yaagees; ‘Ne morkketi ne bollan woraajjiyo wode, abbaa doona biittatun de7iya asati ne asai siifettiiddi guurummiyo guurunttaa siyidi, yashshau kokkorana. <sup>16</sup> Hegaappe guyyiyan, abbaa doona biittatun de7iya kawoti bantta araataappe wodhdhana. Bantta qumaashshaanne kushiyan sikkidi alleeqissido bantta maayuwaa qaarana; qaaridi yashshau kokkoriiddi, biittan uttana. Ne bolli gakkida metuwaa qoppiiddi, eti daro shabbirettana; kokkorssaikka eta aggennan ixkana. <sup>17</sup> Hegaappe guyyiyan, eti neeyyo hagaadan yaagidi zilaalana;

“Aayyee, erettida katamaa, abbaa gididon

wolqqaamiya asati de7iyo katamaa, neeni waana laalettadii!

Neeninne ne gididon de7ida asati

abbaa lanqqiyan de7iya asaa ubbaa yashissideta shin!



<sup>18</sup> Neeni kunddiyo gallassi  
haruuroti kokkoridosona.  
Abbaa gidдон de7iya haruuroti  
ne wulettan dagammidosona”  
yaagana’ yaagees.

<sup>19</sup> “Ubbaa Haariya GODAI hagaadan yaagees; ‘Ha77i asi de7enna katamatudan, taani nena baises kessana. Qassi taani ciimma abbaa ne bollan ehin, he daro haattai nena kamma. <sup>20</sup> He wode taani nena duge ciimma ollau biyaageetuura issippe, adussa wodiyaappe kase haiqqida asatukko duge yeggana. Neeni biittaappe garssan, beni moogettida burcceti de7iyoosan, ciimma ollau biyaageetuura issippe de7anaadan, taani nena oottana. Neeni naa77antto asi de7iyo katama kiyakka; paxa de7iyaageetu biittanka simmada, ne sohuwaa oiqqakka. <sup>21</sup> Taani ne wurssettaa daganttiya wurssetta oottana; neeni naa77antto mulekka de7akka. Asi nena koyana; shin neeni naa77antto mulekka beettakka. Taani Ubbaa Haariya GODAI hagaada odais’ yaagees” yaagiiddi yiis.

## 27

### *Xiirsoosassi Kessido Zilaassaa*

<sup>1</sup> GODAA qalalai taakko hagaadan yaagiiddi yiis; <sup>2</sup> “Laa asa na7au, Xiirsoosassi zilaala. <sup>3</sup> Abbaa doonan de7iyaanne abbaa doona daro biittatun de7iya asaara zal77iya, he katamaassi hagaadan yaagada yoota; ‘Ubbaa Haariya GODAI hagaadan yaagees; “Nenoo Xiirsoosaa, neeni, ‘Taani puulan wotoi baina kumetta’ yaagada otorettadasa. <sup>4</sup> Ne zawai abbaa gul77aana; nena keexxiyaageeti nena lo77o markkabetan oottidi keexxidosa. <sup>5</sup> Ne sanqqaa Saniira giyo sohuwaappe qanxxido xiiddan oottidosona; ne markkabiya tuusaa Liibaanoosappe yiida zigaappe giigissidosona. <sup>6</sup> Markkabiya solddissanau haattaa guyye pushakkiya ne moqeta Baasaane ettaappe oottidosona; ne wuigiya Qophphiroosappe yiida dumma xiiddaa sanqqan oottidosona; he wuigee danggarssaa zaaliyan alleeqettiis. <sup>7</sup> Ne sharai banddiraadan haahuwan beettana mala, kushiyan sikkidi alleeqissido Gibxxetu liinuwaappe oosettidaagaa; nena goolloyiyoobatika Eliisha haruuruwaappe yiida, salo milatiyaanne ochcha teera milatiya carqqiyaappe oosettidaageeta. <sup>8</sup> Ne markkabiya solddissiyaageeti Sidoonanne Ariwaada geetettiya katamatuppe yiidaageeta; ne markkabiya laaggiyaageeti loohida ne asata. <sup>9</sup> Markkabiya gidдон za77idasaa shiddiyaageeti Gebaalappe yiida cimatanne eranchcha asata; abban biya markkabe ubban de7iya oosanchchati ne suuqiyaappe shammoosona.

<sup>10</sup> “ “Parssepe, Lidiyaappenne Liibiyaappe yiida olanchchati ne olanchchata maadididi olettidosona; bantta gonnalliyaanne bantta ola qophiyaa ne gidдон kaqqidosona; kaqqidi eti nena bonchchissidaageeta. <sup>11</sup> Ariwaadappenne Heleekappe yiida olanchchati ne dirssaa gimbbiyan naagoosona; Gamaadappe yiida asati ne adussa gimbbiyan naagoosona. Eti bantta gonnalliyaa ne gimbbiyaa yuushuwan kaqqidosona; neeni puulan wotoi baina kumetta gidanaadan oottidaageeti eta.

<sup>12</sup> “ “Ne duretettaa daruwaa gaasuwan Tarsseesi nenaara zal77iis; i biraa, birataa, qorqqoruwaanne irssaasiyaa immidi, ne miishshaara laammiis. <sup>13</sup> Giriikee, Tubaalinne Mesheki nenaara zal77idosona; ailletanne nahaasiyaa birataappe oosettida miishsha immidi, ne miishshaara laammidosona. <sup>14</sup> Beeti-Togarmmi toggiyo parata, ola paratanne baluqota immidi, ne miishshaara laammiis. <sup>15</sup> Rooda biittaa asai nenaara zal77iis; qassi abbaa doona biittatun de7iya asai danggarssaa zaaliyaanne zophphiya giyo mittaa ehiidi, neeyyo qanxxiis.

<sup>16</sup> “ “Ne duretettaa daruwaa gaasuwan, Sooriyaa asatika nenaara zal77idosona; eti maata milatiya inqquwaa, zo7o inqquwaa, yelelluwaappe oosettida alleequwaa, ochcha teera milatiya carqqiyaa, lee7e liinuwaanne alleequwaa sikkido maayuwaa



immidi, ne miishshaara laammidosona. <sup>17</sup> Yihudaanne Israa7eela asati nenaara zal77idosona; eti gisttiyaa, mal77o komppuwaa, eessaa, zaitiyaanne balasaame giyo xaliyaa immidi, ne miishshaara laammidosona. <sup>18-19</sup> Ne duretettaa daruwaa gaasuwaaninne ne shiishshido duma duma miishshatu gaasuwan Damasqo asati nenaara zal77idosona; eti Helbboona woiniyaa eessaanne Saahooraa dorssaa ikisiyaa immidi, ne miishshaara laammidosona. Hegaadankka qassi, qoxxido birataanne duma duma qimameta neeyyo immidi laammidosona.

<sup>20</sup> “ “Dadaana asati kooraa gilaasiyaa ehiidi zal77idosona. <sup>21</sup> Arabatinne Qeedaare biittaa halaqati ubbai ne zal77e miishshaassi dorssa marata, dorssa orggetanne deeshshata ehiidi zal77idosona. <sup>22</sup> Saabanne Raa7ima zal77anchchati inqquwaa, worqqaanne lo77o doorettida qimameta immidi, ne miishshaara laammidosona. <sup>23</sup> Kaaraane, Kaneeha, Edene, Asoorene Kilimmaada geetettiya katamati ubbai nenaara zal77idosona. <sup>24</sup> Eti lo77o maayota, salo milatiya maayuwaa, alleequwaa sikkido maayuwaa, gazza minxxaafeta, loitti dooqqido baqettaanne wodoruwaa immidi, ne miishshaara laammidosona.

<sup>25</sup> “ “Ne miishshati zal77anchchatu gita markkabetun caanettidi biidosona. Neenikka darobai caanettin kumada, abbaa bollan biya markkabe mala gidadasa. <sup>26</sup> Ne markkabiya solddissiyaageeti nena ekkidi, abbaa giddo ginaa efiidosona; shin arshsho carrkoi nena abbaayyo giddo ginan mentterettiis. <sup>27</sup> Neeni meqerettido gallassi ne duretettainne ne zal77e miishshai ubbai, ne markkabiya solddissiyaageeti, ne markkabiya laaggiyaageeti, ne markkabe giddon za77idasaa shiddiyaageeti, ne zal77anchchatinne ne giddon de7iya olanchchati ubbai abbaa giddo muukettidosona. <sup>28</sup> Muukettiyaageeti waassiyoo cenggurssai abbaa gaxaa gakkanaashin siyettees.

<sup>29</sup> “ “Markkabiya solddissiyaageetinne laaggiyaageeti ubbai bantta markkabetuppe kiyidi, abbaa gaxan eqqidosa. <sup>30</sup> Eti ubbaikka bantta huuphiyan baanaa qolidi, bidinttan gondorettiiddi, ne bashshaa gishshau, iita yeehuwaa yeekkidosa. <sup>31</sup> Neeyyo kayyottidi, bantta huuphiyaa meedidi, waaruwaa maayidosona; eti daro mishettidi, neeyyo yeekkidosa. <sup>32</sup> Neeyyo eti hagaadan yaagidi zilaalidosona;

‘Ha77i abbaa giddon sirphphi giida,  
Xiiroosaara likkettiyaai oonee?

<sup>33</sup> Ne zal77e miishshai abbaa pinnidi yiyo wode,  
biittan de7iya daro asaa kalssadasa;  
ne aquwan kawoti duretidosona.

<sup>34</sup> SHin ha77i abbaa ciimman meqerettadasa.  
Ne zal77e miishshaikka neeyyo oottiya asati  
ubbatikka nenaara abbaa giddon muukettidi xayidosona.

<sup>35</sup> Abbaa doona biittatun de7iya asai ubbai  
ne bolli gakkidabaa be7idi dagammidosona.  
Eta kawotikka daro yayyidosona;  
eta som77oi yashshaa erissees.

<sup>36</sup> Ne wurssettai daganttiyaagaa giddiis;  
neeni naa77antto mulekka de7akka.  
Hegaa gishshau, biitta ubban de7iya  
zal77anchchati, “Poora!” giidosona’  
yaagidi zilaalidosona” yaagees’ yaaga” yaagiiddi yiis.

## 28

### *Xiiroosa Halaqaa Bolli Yaana Pirdaa*

<sup>1</sup> GODAA qaalai taakko hagaadan yaagiiddi yiis; <sup>2</sup> “Laa asa na7au, Xiiroosa halaqaayyo hagaadan yaagada yoota; ‘Ubbaa Haariya GODAI hagaadan yaagees; “Ne

wozanai otorettido gishshau, ‘Taani xoossa; taani abbaa giddo ginan, xoossatu araatan uttaas’ yaagadasa. Neeni, ‘Taani xoossadan, aadhdhida eranchcha kiyaas’ gaada qoppikkonne, neeni asappe attin, xoossa gidakka. <sup>3</sup> Neeni Daaneelappekka aadhdhida eranchchee? Ai xuurikka neeppe geemmennee? <sup>4</sup> Tumukka neeni ne aadhdhida eraaninne ne akeekan dure gidadasa; biraanne worqqa ne buquraa minjjiyo keettaa shiishshadasa. <sup>5</sup> Ne zal77iyaa eran daro woriyaa demmadasa; ne duretaappe denddi-daagan ne wozanai otorettiis” yaagees.

<sup>6</sup> “ ‘Hegaa gishshau, Ubbaa Haariya GODAI hagaadan yaagees; “Neeni, ‘Taani xoossadan, aadhdhida eranchcha’ gaada qoppiyo gishshau, <sup>7</sup> taani ne bolli kawotettatu ubbaappe meqetti banna, iita morkketa ehaana; ehin neeni ne aadhdhida eran shiishshido aqo ubbaa xaissana; ne bonchchuwaakka eti tunissana. <sup>8</sup> Nena eti woridi, abbaa ciimman olana. <sup>9</sup> Yaatin, nena worana haniyaagaa sinttan neeni, ‘Taani xoossa’ guutee? Nena woriyaageetu kushiyan neeni asappe attin, xoossa gidakka. <sup>10</sup> Neeni allagatu kushiyan ammanenna asi haiqqiyo haiquwaa haiqqana. Taani Ubbaa Haariya GODAI hagaada odaas” yaagees’ yaaga” yaagiiddi yiis.

### *Xiirsoo Kawuwaa Kundettaa*

<sup>11</sup> Qassikka GODAA qaalai taakko hagaadan yaagiiddi yiis; <sup>12</sup> “Laa asa na7au, Xiirsoo kawuwaa hagaadan yaagada zilaala; ‘Ubbaa Haariya GODAI hagaadan yaagees; “Neeni kase aadhdhida eran kumidaagaa; neeni asi leemisidi odiyo aadhdhida puulanchcha gidadasa. <sup>13</sup> Neeni Edenen, Xoosaa gannatiyan kase de7adasa; sarddiyoone, tophaaziyoone, almaaze, biralle, maragide, yasphphiide, sampperenne baluura geetettiya al77o shuchchan alleegettada, lo77o worqqa alleequwaa kase maayadasa; neeni merettido gallassi hagee ubbai neeyyo giigiis. <sup>14</sup> Taani nena naagiya kiruube oottada sunttaas; yaatada nena tiyaas. Ta geeshsha deriyaa bollan neeni de7adasa; qassi tamaadan phooliya al77o shuchchatu gidдон simerettadasa.

<sup>15</sup> “ “Neeni merettido gallasaappe doommada, itabai ne bolli beettido gallassai gakkanaashin, boree bannan de7adasa. <sup>16</sup> Ne daro zal77iyaappe denddiidaagan, makkalan kumada, nagaraa oottadasa. Hegaa gishshau, ta geeshsha deriyaappe tunabaadan, nena wolqqan kessaas. Neno, naagiya kiruubiyau, he tamaadan phooliya al77o shuchchatu gidдoppe taani nena yedettaas. <sup>17</sup> Neeni puulanchcha gidiyo gishshau, daro otorettadasa; ne bonchchuwaa gaasuwan, ne aadhdhida eraa tunissadasa. Hegaa gishshau, taani nena sa7an olaas; hara kawoti nena qilliiccanaadan oottaas. <sup>18</sup> Ne nagaraa daruwaaninne ne cimo zal77iyan, ne goinniyo sohota ubbaa tunissadasa. Hegaa gishshau, taani tamai ne gidдoppe kiyanaadan oottaas; ikka nena miis. Ubbati xeellishin, taani nena sa7aa bollan bidintta kessaas. <sup>19</sup> Nena kase eriya kawotettati ubbai neban dagammidosona. Ne wurssettai yashshiyaagaa giddiis; neeni naa77antto mulekka de7akka” yaagees’ yaagada zilaala” yaagiiddi yiis.

### *Sidoona Bolli Yaana Pirddaa*

<sup>20</sup> GODAA qaalai taakko hagaadan yaagiiddi yiis; <sup>21</sup> “Laa asa na7au, ne som77uwaa Sidoona katamaakko zaarada, a bolli hananabaa yoota. <sup>22</sup> Hagaadan yaaga; ‘Ubbaa Haariya GODAI hagaadan yaagees; “Neno, Sidoonaa, taani neeyyo morkke! Taani ne bolli oottiyooban ta bonchchoi qonccana. Ne gidдон de7iyaageeta pirddiyoogan taani ta geeshshatettaa bessiyoo wode, taani GODAA gidiyoogaa eti ubbai erana. <sup>23</sup> Taani ne gidдон boshaa yeddana; ne ogiyan suuttai gukkanaadan oottana. Ubbaa baggaara yiya olaa gaasuwan ne asai bisuwan haiqqana. Taani GODAA gidiyoogaa eti hegan erana.

<sup>24</sup> “ “Hagaappe sinttanau Israa7eela yuushuwan de7iya, a karidi xeelliya biitta ubbaappe, aguntta malanne kinddiichcho mala gididi qohiyaabi ooninne de7enna. Taani Ubbaa Haariya GODAA gidiyoogaa eti hegan erana” yaagees’ yaaga” yaagiiddi yiis.

### *Israa7eela Asai Anjjettiis*

<sup>25</sup> Ubbaa Haariya GODAI hagaadan yaagees; “Israa7eela asaa eti laalettido biitta ubbaappe shiishshada, taani ehiyo wodenne he kawotettatu ubbaa sinttan taani ta geeshshatettaa bessiyoo wode, taani ta ashkkaraa Yaaqoobassi immido bantta biittan eti de7ana. <sup>26</sup> Hegan eti saruwan de7ana; keettaa keexxana; woiniyaa turaakka tokkana. Eta karidi xeelliyaa eta shoorota ubbaakka taani pirddiyo wode, Israa7eela asai saruwan de7ana. Taani GODAA eta Xoossaa gidiyoojaa eti hegan erana” yaagees.

## 29

### *Gibxxe Bolli Yaana Pirddaa*

<sup>1</sup> Nuuni omoodettido tammannta laittan, tammannta aginan, tammanne naa77antta gallasan, GODAA qaalai taakko hagaadan yaagiiddi yiis; <sup>2</sup> “Laa asa na7au, ne som77uwaa Gibxxe kawuwaakko zaarada, a bollinne Gibxxe biittaa ubbaa bolli hanan-abaa yoota. <sup>3</sup> Hagaadan yaaga; ‘Ubbaa Haariya GODAI hagaadan yaagees; “Nenoo, Naile SHaafaa gidдон zin77ida, keehi gitanne yashshiya do7au, ‘Naile SHaafai taagaa; a medhdhidai tana’ yaagiya Gibxxe kawuwau, taani neeyyo morkke! <sup>4</sup> Taani ne manggaagan hinggittaa gelissana; ne shaafan de7iya moleti ne gogaara oiqettanaadan oottana; moleti ne gogaara oiqetti uttidaashin, taani nena haattaappe goochchada gaxi kessana. <sup>5</sup> Taani nenanne ne shaafan de7iya moleta ubbaa bazzo olana; ne ahai dembban oletti attana; ne ahaa shiishshidi moogiyaabi xayana. Taani nena saluwaa kafotussinne sa7aa do7atussi quma oottana. <sup>6</sup> Gibxxen de7iya asai ubbai taani GODAA gidiyoojaa hegan erana.

“ “Nenoo Israa7eela asaassi maqqa guufe gidadasa; <sup>7</sup> eti nena oiqqido wode meqqada, eta kushiyaa caddadasa; eti nenan zempido wode meqqada, eta zokkuwaa duuttadasa. <sup>8</sup> Hegan gishshau, taani Ubbaa Haariya GODAI ne bollan bisuwaa dent-tiyaageeta ehaana; eti ne asaanne ne mehiyaa ubbaa wurssana. <sup>9</sup> Gibxxe biittai asi baina baysa biitta gidana. Taani GODAA gidiyoojaa eti hegan erana.

“ “Hegeekka neeni, ‘Naile SHaafai taagaa; a medhdhidai tana’ yaagido gishshau, <sup>10</sup> taani ne bollinne ne shaafaa bolli denddaas. Taani huuphessa baggaara Migidoolappe doommada, tohossa baggaara Asiwaane katamaa gakkanaassi, hegaappekka Toophphiyaawaa zawaa gakkanaassi Gibxxe ubbaa asi baina baysa soho kessana. <sup>11</sup> Asa gidin mehe gidin, hegaara kanttenna; oitamu laittai wurana gakkanaashin, aibinne hegan de7enna. <sup>12</sup> Taani Gibxxe biittaa biitta ubbaappe aadhdhida baysa biitta oottana; a katamatikka oitamu laittai wuranaashin, hara kolettida katama ubbaappe aaruwaa kolettidi de7ana. Gibxxe asaa taani kawotettatu giddooninne hara asaa gidдон laalana” yaagees.

<sup>13</sup> “ ‘Ubbaa Haariya GODAI hagaadan yaagees; “Oitamu laittappe guyyiyan, taani Gibxxeta laalido kawotettatu giddoppe shiishshana. <sup>14</sup> Taani eta eti yelettido tohossa Gst ibxxen de7iya Patiroosa biittaa zaarana; hegan eti laafa kawotetta gididi de7ana. <sup>15</sup> Gibxxee hara kawotettatu ubbaappe aadhdhida laafa kawotetta gidana. Naa77antto hara kawotettatu bolli bana xoqqu xoqqu oottenna. Naa77antto i hara kawotetta haarennaadan, taani a guuttana. <sup>16</sup> Israa7eela asai naa77antto maado demmanau etan ammanettenna; Gibxxen ammanettidoogee ai keena moorokko Israa7eela asai akeekana. Taani Ubbaa Haariya GODAA gidiyoojaa eti hegan erana” yaagees’ yaaga” yaagiiddi yiis.

### *Kawoi Naabukadanaxoori Gibxxe Xoonana*

<sup>17</sup> Nuuni omoodettido laatamanne laappunnta laittan, koiro aginan, koiro gallasan, GODAA qaalai taakko hagaadan yaagiiddi yiis; <sup>18</sup> “Laa asa na7au, Baabiloone Kawoi Naabukadanaxoori Xiirraa bolli olaa denttanau giigiis; etau huuphee xiirettana gakkanaashiinne hasheekka masunxxana gakkanaashin, olanchchati deexo

toohuwaa tookkanaadan oottidosona; gido shin, kawoikka olanchchatikka ha daafura ubban eti Xiirrosappe demmidobi baawa. <sup>19</sup> Hegaa gishshau, Ubbaa Haariya GODAI hagaadan yaagees; ‘Taani Gibxxe biittaa Baabiloone Kawuwaa Naabukadanaxoorayyo aattada immana; ikka ba olanchchatu damooza gidana mala, omooduwaaninne bonqqiyan ekkidobaa ubbaa ekkidi baana. <sup>20</sup> Inne a olanchchati taayyo oottido gishshau, taani ayyo Gibxxe biittaa eta daafurau damooza oottada immana. Taani Ubbaa Haariya GODAI haga odais’ yaagees.

<sup>21</sup> “He gallassi taani Israa7eela asaa minttana. Hizqqeela, neenikka asaayyo yootanaadan, taani nena minttana. Taani GODAA gidiyoojaa eti hegan erana” yaagiiddi yiis.

## 30

### *GODAI Gibxxe Qaxxayana*

<sup>1</sup> Qassikka GODAA qaalai taakko hagaadan yaagiiddi yiis; <sup>2</sup> “Laa asa na7au, hagaadan yaagada hananabaa yoota; ‘Ubbaa Haariya GODAI hagaadan yaagees; “He gallassaayyo, ‘Aayyee7ana!’ yaagidi zilaalite! <sup>3</sup> Aissi giikko, he gallassai matiis! GODAA gallassai gakkis! He gallassai shaarai sikkido gallassanne kawotettatu ubbaayyo meto gallassa gidana. <sup>4</sup> Gibxxe bolli olai yaana; Toophphiyaa bollankka tuggai yaana. Daroti Gibxxe biittan haiqqana; he biittaa duretettai bonqqettana; a baasoikka bayana. <sup>5</sup> He olai Toophphiyaa, Lidiyaa, Liibiyaa, Arabaanne olau maacettida biittaa asaa ubbaa Gibxxeera gattidi wurssana” yaagees.

<sup>6</sup> “‘GODAI hagaadan yaagees; “Gibxxe maaddiyaageeti kunddana; a otorettiyo wolqqai wurana. Migidoolappe biidi Asiwaane gakkanaashin, eti bisuwan haiqqana. Taani Ubbaa Haariya GODAI haga odais. <sup>7</sup> Gibxxe biittai biitta ubbaappe aadhdhida baises biitta gidana; a katamatikka hara kolettida katama ubbaappe aaruwaa kolettidi de7ana. <sup>8</sup> Taani Gibxxe taman oittiyo wodenne a maaddiyaageeti ubbai haiqqi wuriyo wode, taani GODAA gidiyoojaa eti erana.

<sup>9</sup> “ “He gallassi taani saro de7iya Toophphiyaa asaa daganttanau asata markkabiyan kiittana. Gibxxee qaxxayettiyo gallassi Toophphiyaa asaa bolli tuggai yaana. Be7ite, he gallassai gakkis!” yaagees.

<sup>10</sup> “ ‘Ubbaa Haariya GODAI hagaadan yaagees; “Baabiloone Kawuwaa Naabukadanaxoora kushiyan taani Gibxxe duretettaa xaissana. <sup>11</sup> Kawotettatu ubbaappe aadhdhidi, meqettaa iitiya olanchchata kaalettidi yiidi, i biittaa xaissana; eti Gibxxe asaa bolla bisuwaa shoddidi, biittan ahaa kunttana. <sup>12</sup> Naile SHaafaa taani melissana; taani Gibxxe iita asatu kushiyan aattada immana; immin eti he biittanne an de7iyaabaa muleera xaissana. Taani GODAI haga odaas” yaagees.

<sup>13</sup> “ ‘Ubbaa Haariya GODAI hagaadan yaagees; “Memppiisa kataman de7iya ee-gatanne misileta ubbaa taani xaissana; Gibxxe biittan naa77antto halaqi de7enna; biitta ubbaa taani yashissana. <sup>14</sup> Taani Patiroosa giyo tohossa bagga Gibxxe baises kessana; huuphessa baggaara de7iya Xo7aane kataman tamaa yeddana; Teebisa katamaakka qaxxayana. <sup>15</sup> Gibxxeyyo qato gidida Pelusiyaaman ta hanqquwaa gussana; Teebisa asaa ubbaa wurssana. <sup>16</sup> Taani Gibxxen tamaa oittana; Pelusiyaamikka keehi tuggatana; Teebisa dirssaa gimbee kolettana; Memppiisa kataman duuxxenna metoi gakkana. <sup>17</sup> Oona katamaaninne Bibaasita kataman de7iya yelagai ubbai bisuwan wurana; maccaasatikka omoodettidi baana. <sup>18</sup> Gibxxe wolqqaa taani mentterettiyo wode, Xaafinaasan gallassai qammana; i otorettiyo wolqqai wurana; Gibxxe shaarai kammana; katamatu ubban de7iya asai omooduwan baana. <sup>19</sup> Taani Gibxxe hegaadan qaxxayana. Taani GODAA gidiyoojaa eti hegan erana” yaagees’ yaaga” yaagiiddi yiis.

### *Gibxxe Kawoi Xoonettiis*



<sup>20</sup> Nuuni omoodettido tammanne isiinintta laittan, koiro aginan, laappunnta gallasan, GODAA qaalai taakko hagaadan yaagiiddi yiis; <sup>21</sup> “Laa asa na7au, taani Gibxxe kawuwaa qesiyaa menttaas; a woishshaaninne curqqan xaaxi koolidi pattiya hiillikka baawa; hagaappe sinttanau i minotettaa ehiidi, biso oiqqanau danddayenna. <sup>22</sup> Hegaa gishshau, Ubbaa Haariya GODAI hagaadan yaagees; ‘Taani Gibxxe kawuwaayyo morkke. Au kase meqo qesiyaanne payya de7iya qesiyaa naa77aakka taani menttana; a bisoikka a kushiyaappe sa7an wodhdhanaadan oottana. <sup>23</sup> Taani Gibxxeta kawotettatu giddooninne hara biittatun laalana.

<sup>24</sup> “Taani Baabiloone kawuwaa qesiyaa minttada, ta bisuwaa a oittana. SHin Gibxxe kawuwaa qesiyaa menttana; ba morkkiyaa sinttan i haiqqana haniyaabi ooliyoogaadan oolana. <sup>25</sup> Ee, taani Gibxxe kawuwaa qesiyaa daafurssada, Baabiloone kawuwaa qesiyaa minttana. Taani Baabiloone kawuwaa ta bisuwaa oittiyo wodenne i Gibxxe bolli a denttiyo wode, Gibxxeti taani GODAA gidiyooгаа erana. <sup>26</sup> Gibxxeta taani kawotettatu giddooninne biitta ubban laalana. Taani GODAA gidiyooгаа eti hegan erana’ yaagees” yaagiiddi yiis.

## 31

### *Gibxxe Zigan Leemisettiis*

<sup>1</sup> Nuuni omoodettido tammanne isiinintta laittan, heezzantta aginan, koiro gallassan, GODAA qaalai taakko hagaadan yaagiiddi yiis; <sup>2</sup> “Laa asa na7au, Gibxxe kawuwaassinne asaa ubbaassi hagaadan yaagada yoota; ‘Ne gitatettan nena taani oonaara likkoo?

<sup>3</sup> “Neeni lo77o daashsha kuwai de7iyo Liibaanoosa zigaa mala. I aduqqidi dicciis; a xeeraikka shaaraa gakkiiis. <sup>4</sup> Hegan a dichchiya haattai de7ees; ciimmaappe kiyiyya pulttotikka i tokettido sohuwan yushuwan ubban goggoosona; he pulttoti mittai mokkiyoosaa ubbaa gakkidi ushshoosona. <sup>5</sup> He mittai haattai darido gishshau, woran de7iya hara mitta ubbaappe geesaa aduqqees; a daashshatikka ordenne adussa. <sup>6</sup> Saluwaa kafoti ubbai a daashshan bantta keettaa keexxidosona; bazzo do7atikka a daashshaa garssan maraa yelidosona; gita kawotettati ubbai a kuwan uttoosona. <sup>7</sup> He mittai ba gitatettaaranne ba daashshaa adussatettaara aiba lo77ii! Ba xaphuwaakka haattaa ciimmau duge yeddi wottiis. <sup>8</sup> Harai atto Xoossaa gannatiyankka he zigaara likkettiya zigi baawa; aagaa mala daashshi de7iyo xiiddikka baawa; hejaa mala irxxa mittikka baawa. Xoossaa gannatiyankka hejaa mala lo77o mitti baawa.

<sup>9</sup> Taani a daro daashshan puulanchcha oottaas. Edene giyo Xoossaa gannatiyan de7iya mittati a qanaatidosona.

<sup>10</sup> “Hegaa gishshau, Ubbaa Haariya GODAI hagaadan yaagees; “He mittai aduqqidi diccido gishshau, a xeeraikka shaaraa gakkido gishshaunne i ba geesan otorettido gishshau, <sup>11</sup> taani a aggaagaas; yaatada wolqqaama, allaga kawotettaassi aattada immaas. He kawotettai ayyo a iitatettaadan oottana. <sup>12</sup> Meqettaa iita allagati he mittaa qanxxi olana; qanxxido tasheti deretun, wombbatuuninne zanggaaratun oletti attana. A kuwan uttiya hara kawotettati he sohuwaa aggidi baana. <sup>13</sup> Saluwaa kafoti yiidi kunddida mittaa bolli uttana; bazzo do7atikka a tasheta yedhdhana. <sup>14</sup> Haattaa lanqgen dicciya mittatu gidдон adan aduqqidi, xerai shaaraa gakkiiyo mitti de7enna. Haiqqiya asaa bolli gakkiiya haiquwaa pirddai he mittaa bolli gakkana; he pirddai i haiqqidi, duufuwan geliyaageetuura Si7ooliyan gelanaassa” yaagees.

<sup>15</sup> “Ubbaa Haariya GODAI hagaadan yaagees; “He mittai Si7ooliyan geliyo gallassi ciimmaappe kiyiyya pulttoti ayyo kayyottanaadan taani oottana; he pulttotu haattai goggennaadan taani oottana; Liibaanoosikka a gishshau azzananaadan oottana. Qassi woraa mittai ubbai shullana. <sup>16</sup> Taani he mittaa Si7ooliyan oliyo wode, a kunddettaa cenggurssan kawotettai ubbai qaaxxana. Kunddidi Si7ooliyan gelida Edene mittatinne



haattaa uyiya doorettidanne lo77o Liibaanoosa mittati ubbai a kunddettan minetana. <sup>17</sup> Kawotettatu gidдон aara maadettidanne a kuwan uttida ubbai kase bisuwan haiqqidaageetuura gaittanau aara issippe Si7ooliyan gelana. <sup>18</sup> Edene gannatiyaa gidдо mittatunkka heгаа keena gitinne lo77oi baawa; shin ha77i Edene mittatudan, ikka haiqqidi Si7ooliyan geles; hegan i bisuwan haiqqida ammanibeennaageetu ubban gaittana.

“ “He mittai Gibxxe kawuwaanne a asaa ubbaa leemiso. Taani Ubbaa Haariya GODAI hагаа odais” yaagees’ yaaga” yaagiiddi yiis.

## 32

### *Gibxxee Haulaashuwan Leemisettiis*

<sup>1</sup> Nuuni omoodettido tammanne naa77antto laittan, tammanne naa77antto aginan, koiro gallassan, GODAA qaalai taakko hagaadan yaagiiddi yiis; <sup>2</sup> “Laa asa na7au, Gibxxe kawuwaassi zilaala! Hagaadan yaaga; ‘Neni kawotettatu gidдон nena gaammo kessadasa; shin neni abbaa gidдон de7iya haulaasho mala. Neni shaafatuppe kiyadasa; ne gedetun purchchakkada, haattaa bulqqoyadasa.

<sup>3</sup> “ ‘Ubbaa Haariya GODAI hagaadan yaagees; “Daro asai shiiqiyo wode, taani ta gitiyan nena oiqqana; oiqqin he asai nena goochchidi, haattaappe gaxi kessana.

<sup>4</sup> Kessin taani nena biittan ola aggana; yaatada saluwaa kafota ne bolli utissana; bazzo do7atakka ne ashuwaa kalssana. <sup>5</sup> Taani ne ashuwaa deretu bollan laalana; ne wombbatakka ne ahan kuttana. <sup>6</sup> Dereta kammidi, shaafata kumana gakkanaashin, ne suuttai gukkanaadan oottana. <sup>7</sup> Taani nena xaissiyо wode, saluwaa goozana; xoolintetakka xumissana; awaakka shaaran kammaana; aginaikka ba poo7uwaa diggana. <sup>8</sup> Neeppe bollaara de7iya saluwaa poo7ota ubbaa xaissada, neeyyo biittaa xumissana. Taani Ubbaa Haariya GODAI hагаа odais.

<sup>9</sup> “ “Taani ne bolli gakkida bashshaa oduwaa neeni erenna biittaa ubbaa gattiyo wode, he asaa wozanai shabbirettana. <sup>10</sup> Taani ne bolli gattiyoobai kawotettata ubbaa daganttana. Taani ta bisuwaa eta sinttan leelleesiyo wode, kawotettati yashshan kokkorana; neeni kunddiyo gallassi eti ubbaikka bantta shemppuwau shemppuwau yayyana” yaagees.

<sup>11</sup> “ ‘Ubbaa Haariya GODAI Gibxxe kawuwaayyo hagaadan yaagees; “Baabiloone kawuwaa bisoi ne bollan yaana. <sup>12</sup> Hara kawotettaappe aadhhdidi, meqettaa iitiya olanchchati bantta bisuwan ne cora asaa wurssanaadan taani oottana. Eti Gibxxe otoruwaa xaissana; a cora asaikka wurana. <sup>13</sup> Daro haattaa lanqqen de7iya mehe ubbaakka taani xaissana; hegaappe guyyiyan, haattaa bulqqoyiya asa gidin mehe gidin, mulekka de7enna. <sup>14</sup> He wode taani ne haattata xillissana; ne shaafatakka woppu oottada gogissana. Taani Ubbaa Haariya GODAI hагаа odais. <sup>15</sup> Taani Gibxxe baisa kessiyo wode, an de7iyaabaa ubbaa quccada xaissiyо wodenne an de7iya asaa ubbaa shociyo wode, taani GODAA gidiyoogaa eti erana.

<sup>16</sup> “ “Hegee ubbai etayyo zilaaliyo zilaassa gidana. Kawotettatu maccaasati Gibxxessinne a cora asaassi zilaalana. Taani Ubbaa Haariya GODAI hагаа odais” yaagees’ yaaga” yaagiiddi yiis.

### *Si7ooliyan Geliya Asatubaa*

<sup>17</sup> Nuuni omoodettido tammanne naa77antto laittan, koiro aginan, tammanne ichchashantto gallassan, GODAA qaalai taakko hagaadan yaagiiddi yiis; <sup>18</sup> “Laa asa na7au, Gibxxe asaa coraa gishshau yeekka! Hara haiqqida, wolqqaama kawotettatuura eta Si7ooliyaa yedda. <sup>19</sup> Eta, ‘Inttenoo Gibxxetoo, intte ooppe lo77uwaa dareetii? Intte Si7ooliyan gelana; hegan intte GODAA ammanibeennaageetuura issippe zin77ana’ yaaga.

<sup>20</sup> “Gibxxe biittaayyo bisoi shodetti uttido gishshau, eti bisuwan haiqqidaageetu giddo kunddana; Gibxxee ba cora asaa ubbaara duge gooshettana. <sup>21</sup> Si7ooliyan de7iya wolqqaama halaqati Gibxxebaanne Gibxxe maaddidaageetubaa haasayiiddi, ‘Eti haa duge yiidosona; GODAA ammanennan, bisuwan haiqqidaageetuura eti zin77idosona’ yaagoosona.

<sup>22</sup> “Asooree Si7ooliyan de7ees. Olan haiqqida Asoore olanchchatu duufoti a yuushuwan dooddi uttidosona. <sup>23</sup> He duufoti ciimma ollatuppe hirkki xaggattiyaasan de7oosona. A olanchchati, kase kawotettata ubbaa yashshan kokkorssidaageeti, ha77i a yuushuwan de7oosona.

<sup>24</sup> “Elaamikka Si7ooliyan de7ees. Elaama olanchchati ubbai a duufuwaa yuushuwan dooddi uttidosona. Kase kawotettata ubbaa yashshan kokkorssidaageeti GODAA ammanennan, bisuwan haiqqidaageetuura gaittidi yeellatiiddi, ciimma ollan geloosona. <sup>25</sup> Haiqqidaageetu gidduwan Elaamassi sohoi giigi uttiis. Elaama olanchchatu duufoti a yuushuwan de7oosona; eti ubbaikka bisuwan haiqqidosona. Eti ubbaikka GODAA ammanibeenaaageeta. Eti kase asaa yashsidaageeta gidikkokka, ha77i yeellatiiddi, bisuwan haiqqida asaara ciimma ollan de7oosona.

<sup>26</sup> “Meshekinne Tubaali bantta olanchchatuura issippe Si7ooliyan de7oosona; eti kase kawotettata ubbaa yashshan kokkorssidaageeta gidikkokka, eti ubbaikka bisuwan haiqqidosona. Eti ubbaikka GODAA ammanennaageeta. <sup>27</sup> Kase olanchchati moogettiyoogee bantta kumetta ola miishshaara; eta gondalleta eta tiran wottin, eta bisota eta huuphessan wottin, moogettidosona. SHin hageeti hegaa mala kumetta bonchchoi imettin moogettibookkona. Eti kase kawotettata yashsidaageeta.

<sup>28</sup> “Intte Gibxxe asatikka xoonettananne bisuwan haiqqida, ammanenna asatuura issippe zin77ana.

<sup>29</sup> “Eedoomi ba kawotuuranne ba halaqatuura issippe Si7ooliyan de7ees; etikka kase mino olanchchata; shin ha77i olan haiqqida, ammanenna asatuura ciimma ollan gelidosona.

<sup>30</sup> “Huuphessa bagga halaqatinne Sidoona asati Si7ooliyan de7oosona. Eti kase bantta wolqqan asaa yashsidosona; shin ha77i etikka bantta yeellaara yaa gelidosona. GODAA ammanennan, bisuwan haiqqida asatuura issippe gaittidi, yeellatiiddi ciimma ollan geloosona.

<sup>31</sup> “Gibxxe kawoinne a olanchchati bisuwan haiqqida olanchchata yan be7idi minetana. Taani Ubbaa Haariya GODAI haggaa odais. <sup>32</sup> Taani haggaa kase kawotettati ubbai Gibxxe kawuwaassi yayyanaadan oottidabaa gidikkokka, inne a olanchchati GODAA ammanennan, bisuwan haiqqida asatuura issippe zin77ana. Taani Ubbaa Haariya GODAI haggaa odais” yaagiis.

## 33

### *GODAI Hizqqeela Wochchiya Asa Oottidi Sunttiis*

<sup>1</sup> GODAA qaalai taakko haggadan yaagiiddi yiis; <sup>2</sup> “Laa asa na7au, ne biittaa asaassi haggadan yaagada yoota; ‘Taani issi biittaa bollan olaa ehiyo wode, he biittaa asai bantta bolli yiyaabaa wochchiya asa dooro. <sup>3</sup> He wochchiyaagee morkkee yiyoogaa be7inne asai naagettanaadan, malkkataa punno. <sup>4</sup> Punnin ai asinne he malkkataa cenggurssaa siyidi, naagettennan ixxin, olai yiidi a worikko, suuttaa acoi aagaa. <sup>5</sup> I malkkataa cenggurssaa siyidi, naagettennan ixxido gishshau, a suuttaa acoi a bollaana. I siyidi naagettidaakko, haiquwaappe attiyoogaa shin! <sup>6</sup> SHin he wochchiyaagee morkkee yiyoogaa be7iiddi, malkkataa punnennan aggikkonne asaa erissana xayikko, olaikka yiidi, he asaappe issi uraa worikko, he urai ba nagaran haiqqees; shin taani a suuttaa wochchiyaagaa achchana’ yaaga.

<sup>7</sup> “Laa asa na7au, taani nena Israa7eela asaayyo wochchiyaagaa oottaas; taani neeyyo yootiyooqaa siya; siyada asaakka erissa. <sup>8</sup> Issi iita asa taani, ‘Laa neeni tumu haiqqana’ yaagiyo wode, i ba nagaraappe simmana mala, neeni ayyo yootana xayikko, he nagaranchchai ba nagaran haiqqees; shin taani a suuttaa neeppe achchana. <sup>9</sup> SHin nagaranchchai ba nagaraappe simmanaadan neeni yootin, i ixikko, ba nagaran haiqqees; shin neeni ne shemppuwaa ashshadasa.

### *GODAI Likke Pirddees*

<sup>10</sup> “Laa asa na7au, Israa7eela asau hagaadan yaaga; ‘Intte, “Nuuni oottido nagarainne naaqoi nu bolla de7ees; hegaappe denddidaagan nuuni gilqqi wurida. Yaatin, nuuni waanidi paxa de7anau danddayioonii?” yaageeta. <sup>11</sup> Taani ta de7uwan hagaadan yaagada caaqqais; “Nagaranchchai ba nagaraa aggidi, paxa de7ana mala koyaisippe attin, nagaranchchaa haiquwan ufaittikke. Taani Ubbaa Haariya GODAI hagaada odais. Inttenoo, Israa7eela asau, simmite; intte iita oosuwaappe guyye simmite! Aissi haiqqanau koyeetii?” yaagais’ yaaga.

<sup>12</sup> “Laa asa na7au, ne biittaa asaassi hagaadan yaagada yoota; ‘Xillo asi nagaraa oottikko, a xillotettai a ashshenna; qassi nagaranchchai ba nagaraappe simmiichchikko, kase nagaran i qaxxayettenna. Xillo asikka nagaraa oottikko, kase xillotettaa gishshau de7uwan de7anau danddayenna. <sup>13</sup> Taani xillo asa, “Neeni tumu paxa de7ana” yaagido wode, i ba xillotettan ammanettidi nagaraa oottikko, ba oottido nagaran i haiqqanaappe attin, kase xillotettai ayyo qofettenna. <sup>14</sup> Qassi taani nagaranchcha asa, “Neeni tuma haiqqana” yaagido wode, i ba nagaraappe simmidi, pirddaanne suure oosuwaa oottikko, <sup>15</sup> miishshaa tal77anau oittidobaa zaarikko, wuuqqidobaakka guyye zaarikko, nagaraa oottiyoogaa aggidi, de7uwaa immiya higgiiyaa kaallikko, yaatikko, i tuma paxa de7anaappe attin haiqqenna. <sup>16</sup> I kase oottido nagarai issoinne qofettenna; ha77i pirddaanne suure oosuwaa oottido gishshau, i tuma paxa de7ana.

<sup>17</sup> “ ‘SHin ne biittaa asai, “Godaa ogee likke gidenna” yaagoosona; shin likke gidennaagee eta ogiyaa. <sup>18</sup> Xillo asi ba xillotettaa aggidi, nagaraa oottikko, i ba nagaran haiqqana. <sup>19</sup> Qassi nagaranchcha asi ba nagaraappe simmidi, pirddaanne suure oosuwaa oottikko, he oosuwan i paxa de7ana. <sup>20</sup> SHin intte, “Godaa ogee likke gidenna” yaageeta. Israa7eela asau, taani intte bolli intte oosuwaadan oosuwaadan pirddana’ yaaga” yaagiiddi yiis.

### *Yerusalaame Kunddettai Odettiis*

<sup>21</sup> Nuuni omoodettido tammanne naa77antto laittan, tammantto aginan, ichchashantto gallassan, Yerusalaameppe kessi ekki yiida issi asi katamai kunddidoogaa tau yootiis. <sup>22</sup> He bitanee yaanaappe issi gallassaa kasetidi de7iya omarssi GODAA kushee ta bollan shemppiis; shemppin maallado he bitanee taakko gakkanaappe kasetidi, ta doonai dooyettiis; taani duude gidiyooeenne attiis.

<sup>23</sup> Yaatin, GODAA qaalai taakko hagaadan yaagiiddi yiis; <sup>24</sup> “Laa asa na7au, Israa7eela biittan kolettida katamatun de7iya asati hagaadan yaagoosona; ‘Abrahaami barkka de7iya issi asa; ha biittaa laattiis; shin nuuni cora; biittaikka tuma nuuyyo laata gade gididi imettiis’ yaagoosona.

<sup>25</sup> “Hegaa gishshau, etayyo hagaadan yaaga; ‘Ubbaa Haariya GODAI hagaadan yaagees; “Intte ha77ikka goora7idi, suuttaa kessirggibeenna ashuwaa meeta; qassi eeqau goinneeta; shemppuwaa woreeta. Hagaada ubbaa oottiiddi, tumu intte biittaa laattuuteetii? <sup>26</sup> Intte intte bisuwan ammanetteeta; intte tuna oosuwaa ootteeta; intte ubbaikka intte shooruwaa shooruwaa maccaasaa tunisseeta. Hegaa ubbaa oottiiddi, tumu intte biittaa laattuuteetii?” yaagees’ yaaga.

<sup>27</sup> “Etayyo hagaadan yaaga; ‘Ubbaa Haariya GODAI hagaadan yaagees; “Taani ta de7uwan caaqqais: Kolettida katamatun de7iya asati bisuwan haiqqana; katamaappe

gaxan de7iya asata taani bazzo do7au quma oottada immana; deretuuninne gong-golotun de7iya asati boshan haiqqana. <sup>28</sup> Taani he biittaa moorettidanne baisa biitta kessana; eti otorettiyo wolqqai wurana; Israa7eela dereti aiba asinne kanttena baisa soho gidana. <sup>29</sup> Eti oottido tunabaa gaasuwan taani biittaa moorettidanne baisa biitta kessiyo wode, taani GODAA gidiyoojaa eti erana” yaagees’ yaaga.

<sup>30</sup> “Laa asa na7au, asai katamaa dirssaa lanqqiyaaninne bantta keettatu peng-giyan eqqidi, issoi issuwaara hagaadan yaagidi, nebaa haasayees; ‘Haayite; GODAA achchappe yiida qaali aibakko ane siyoos’ yaagoosona. <sup>31</sup> Eti kase asai yiyoogaadan neekko yoosona; ta asaadan ne sinttan uttoosona; neeni odiyoojaa akka siyoosona; shin oottokkona. Eti siiqobaa haasayoosona; shin eta wozanai go77a xalaalau yaaretees. <sup>32</sup> Be7a, neeni etayyo issi siiqo mazamuriyaa lo77o cenggurssan yexxiyaanne diittaa loittidi diixxiya asa mala. Aissi giikko, eti neeni odiyoojaa siyoosona; shin issuwaakka oottokkona.

<sup>33</sup> “SHin neeni yootidoogee tumu polettana; polettiyo wode, hananabaa yootiyaagee eta giddon de7iyoojaa eti erana” yaagiiddi yiis.

## 34

### *Israa7eela Henttanchchata*

<sup>1</sup> GODAA qalalai taakko hagaadan yaagiiddi yiis; <sup>2</sup> “Laa asa na7au, Israa7eela henttanchchatu bollan hagaadan yaagada hananabaa yoota; ‘Ubbaa Haariya GODAI hagaadan yaagees; “Inttenoo, inttena heemmiya Israa7eela henttanchchato, intteyyo aayye7ana! Intte dorssata heemmanau bessennee? <sup>3</sup> Eta maattaa uyeeta; eta ikisiyaappe dadettida suufiyaa maayeeta; etappe modhdhidaageeta shukkidi meeta; shin dorssata suure heemmeketa. <sup>4</sup> Daafuridaageeta gasttissibeekketa; harggidaageeta pattibeekketa; meqqidaageeta koolibeekketa; wora biidaageeta zaaribeekketa; bayidaageeta koyibeekketa. Intte eta wolqqan meqettaa iitidi haarideta. <sup>5</sup> Dorssati ubbai heemmiyaabi xayin laalettidosona; laalettidi bazzo do7atussi quma gididosona. <sup>6</sup> Ta dorssati laalettidosona; eti keratu ubbaa bollinne deretu ubbaa bolli bichchaaridosona. Biitta ubbaa gaxaa gakkanaashin laalettidosona; shin eta xomoosiyaabi woikko koyiyaabi baawa” yaagees.

<sup>7</sup> “Hegaa gishshau, inttenoo, henttanchchato, GODAA qaalaa siyite! <sup>8</sup> Ubbaa Haariya GODAI hagaadan yaagees; “Taani ta de7uwan caaqqais: Ta dorssata heemmiyaabai xayin, ta dorssati oiqettidi, bazzo do7atussi ubbaassi quma gididosona. Ta henttanchchati ta dorssata koyibeenna gishshaunne eti ta dorssata heemmennan ag-gidi, banttana heemmido gishshau, <sup>9</sup> inttenoo, henttanchchato, GODAA qaalaa siyite! <sup>10</sup> Taani intteyyo, henttanchchatuyyo morkke; ta dorssata taani intteppe ekkana; taani inttena naa77antto etau henttanchcha kessikke. Hagaappe sinttau intte intte xallaa heemmiiddi de7ekketa. Ta dorssata taani intteppe wotta ekkana; hagaappe sinttan eti intteyyo quma kiyokkona. Taani Ubbaa Haariya GODAI haggaa odais” yaagees.

### *Lo77o Henttanchchaa*

<sup>11</sup> “Aissi giikko, Ubbaa Haariya GODAI hagaadan yaagees; “Taani ta huuphen ta dorssata xomoosananne koyana. <sup>12</sup> Henttanchchai ba dorssatuppe bayin koyiyooogaadan, taanikka ta dorssata koyana; shaarai goozidonne xumai sikkido gallassi eti laalettido soho ubbaappe taani eta shiishshana. <sup>13</sup> Qassi taani kawotettatu giddoppenne hara biittaa ubbaappe kessada shiishshana; shiishshada eta biitti ehaana. Ehaada Israa7eela deretun, pulttotuuninne asai de7iyo sohotun taani eta heemmana. <sup>14</sup> Taani eta lo77o qooruwan heemmana; qassi Israa7eela kerati eti heemettiyo soho gidana. Hegan eti lo77o qooroi de7iyo Israa7eela keratu bolli heemettananne allaxxana. <sup>15</sup> Taani ta huuphen ta dorssata heemmananne allaxissana. Taani Ubbaa Haariya GODAI haggaa odais. <sup>16</sup> Taani bayidaageeta koyana; wora biidaageetakka zaarana; meqqidaageeta

koolana; harggidaageetakka pattana. SHin modhdhidaageetanne minnidaageeta xaisana; aissi giikko, taani suure pirddiya henttanchcha” yaagees.

<sup>17</sup> “Inttenoo, ta wudiyaa dorssatoo, inttebaa gidikko, Ubbaa Haariya GODAI hagaadan yaagees; “Inttena ubbaakka taani pirddana; kehaa iitaappe, dorssaa deeshshaappe taani shaakkana. <sup>18</sup> Intte lo77o qooruwan heemettiyoogee gidana xayinee, attida maataa intte tohuwan yererettiyoogee? Qassi intte xillo haattaa uyiyoogee gidana xayinee, attida haattaa tohuwan bulqqoyiyoogee? <sup>19</sup> Ta dorssati intte intte tohuwan yererettido maataa maanaunne intte intte tohuwan bulqqoyido haattaa uyanau bessii?” yaagees.

<sup>20</sup> “Hegaa gishshau, Ubbaa Haariya GODAI hagaadan yaagees; “Be7ite, modhdho dorssatuppenne gilqqa dorssatuppe gidduwan taani ta huuphen pirddana. <sup>21</sup> Laafata intte intte miyyiyaaninne intte morggiyan sugiyo gishshaunne gaxi kessana gakkanaashin, intte eta intte kaciyan qaiciyo gishshau, <sup>22</sup> taani ta dorssata ashshana. Hagaappe sinttau ooninne eta oiqqenna; ta keha dorssatuppenne ta iita dorssatuppe gidduwan taani pirddana. <sup>23</sup> Taani eta bollan issi henttanchchaa, ta ashkkaraa Daawita sunttana; i eta heemmananne etau henttanchcha gidana. <sup>24</sup> Hegaappe sinttan taani GODAI eta Xoossaa gidana; ta ashkkarai Daawiti eta gidдон halaqa gidana. Taani GODAI hagaadaas.

<sup>25</sup> “ “Taani etaara sarotettaa maachchaa maacettana; iita do7ata akka taani biittaappe diggana; yaatobare ta dorssati bazzon saro de7ana; wora garssankka hirggi bannan al-laxxana. <sup>26</sup> Taani etanne ta deriyaa yuushuwan de7iya sohota anjjana. Etau koshshiya irakka wodiyan immana; he irai etau anjjo gidana. <sup>27</sup> Gaden de7iya mittati aifana; biittaikka kattaa mukkana. Asai ubbai he biittan saro de7ana. Taani eta qambbaraa menttada, eta ailleyidaageetu kushiyaappe kessiyo wode, taani GODAA gidiyoogaa eti erana. <sup>28</sup> Hegaappe guyyiyan, eti hara kawotettatussi bonqqiyoobaa kiyokkona; biittan de7iya do7atikka eta mookkona. Aibinne daganttenan, eti saro de7ana. <sup>29</sup> Taani etau aradda gadiyaa immana; eti naa77antto koshan wurokkona; woikko qassi hara kawotettatussi cayiyoobaa kiyokkona. <sup>30</sup> He wode eti taani GODAI, eta Xoossai etaara de7iyoo gaanne Israa7eela asai ta asaa gidiyoogaa erana. Taani Ubbaa Haariya GODAI hagaadaais. <sup>31</sup> Inttenoo, Israa7eela asatoo, intte ta dorssata; ta qooruwan miya dorssata; taanikka intte Xoossaa. Taani Ubbaa Haariya GODAI hagaadaais” yaagees’ yaaga” yaagiiddi yiis.

## 35

### *Eedooma Pirddaa*

<sup>1</sup> GODAA qaalai taakko hagaadan yaagiiddi yiis; <sup>2</sup> “Laa asa na7au, Eedooma biittan de7iya Se7iira Deriyaa bolli hananabaa yoota. <sup>3</sup> Hagaadan yaaga; ‘Ubbaa Haariya GODAI hagaadan yaagees; “Nenoo, Se7iira Deriyau, taani neeyyo morkke; taani ta kushiya ne bolli yeddada, nena moorettidanne baises kessana. <sup>4</sup> Taani ne katamata qolana; neenikka baises gidana. Taani GODAA gidiyoogaa neeni hegan erana.

<sup>5</sup> “ “Neeyyo Israa7eelaara wurena morkketetta de7iyo gishshau, eta metuwaa wode, eta wurssetta qixaatiyaa wode, eta neeni bisuwau aattada immido gishshau, <sup>6</sup> taani Ubbaa Haariya GODAI ta de7uwan caaqqais: taani nena haiquwan qaxxayana; neeni haiquwaappe kessa ekkana mulekka danddayakka! Neeni asa woriya asa gidiyo gishshau, nena woriya asi nena kaallana! <sup>7</sup> Taani Se7iira Deriyaa moorettida baises kessana; qassi hegaara yaanne haanne aadhdhiya ubbaakka xaissana. <sup>8</sup> Taani ne dereta ubbaa ahan kunttana; ne kerati, ne wombbatinne ne zanggaarati bisuwan haiqqidaageetu ahan kamettana. <sup>9</sup> Taani nena merinau baises oottana; ne katamati ona gidana. Taani GODAA gidiyoogaa intte he wode erana.



10 “ “Taani GODAI Israa7eelanne Yihudaa biittatun de7ishin intte, ‘Ha naa77u kawotettatanne ha naa77u biittata nuuni oiqqana; eti nubaa gidana’ giido gishshau, 11 taani Ubbaa Haariya GODAI ta de7uwan caaqqais: Intte eta morkkidi, eta bolli yiillotido yiilluwaadaaninne qanaatido qanaatiyaadan, taani intteyyo zaarana. Taani inttena pirddiyo wode, taani tana gidiyooгаа inttena erissana. 12 Qassi intte, ‘Israa7eela dereti baisa attidosona; nuuni mi xaissana mala, nuussi imettidosona’ giidi, haasayido cashshaa ubbaa taani GODAI siyidoogaa intte he wode erana. 13 Neeni ta bolli otoret-tadasanne darissada haasayadasa; taanikka hegaa siyaas” yaagees.

14 “ ‘Ubbaa Haariya GODAI hagaadan yaagees; “Biittai sa7ai ufaittana mala, taani inttena baisa kessana. 15 Israa7eela asaa laatai baisa gididoogan intte ufaittido gishshau, Se7iira Deriyaanne Eedooma biittaa ubbaa taani baisa oottana. Taani GODAA gidiyooгаа intte hegan erana” yaagees’ yaaga.

## 36

### *Xoossai Israa7eela Anjjana*

1 “Laa asa na7au, Israa7eela deretuyyo hananabaa hagaadan yaagada yoota; ‘Inttenoo, Israa7eela deretoo, GODAA qaalaa siyite! 2-3 Intte morkketi, “Beni xoqqa dereti ubbai nubaa gididosona!” yaagido gishshau, eti inttena mentterettidi baisa oottido gishshau, intte cora kawotettatun haarettanaadan oottido gishshaunne inttena daro cayettiyaabaanne qilliicettiyaabaa oottido gishshau, 4 GODAA qaalaa siyite! Ubbaa Haariya GODAI deretussinne keratussi, zanggaaratussinne wombbatussi, yuushuwan de7iya hara kawotettati oiqqidonne qilliiccido sohotussinne moorettidanne baisa gidida katamatussi hagaadan yaagees. 5 I tumuppe hagaadan yaagees; “Taani ta eexxiya hanquwan hara kawotettatu bollinne Eedooma bolli haasayaas. Eti wozanaappe ufaittiiddinne kariiddi, ta biittaa banttau ekkidosona; hentta gadgetakka laattidosona. 6 Hegaa gishshau, Israa7eela biittaabaa hananabaa yoota. Kawotettatu cashshaa gishshau, taani GODAI hanquwan mishettada giyoogaa ubbaa deretuyyo keratuyyo, zanggaaratuyyoonne wombbatuyyo yoota. 7 Yuushuwan de7iya kawotettati ubbai cayettanaagaa taani Ubbaa Haariya GODAI tumuppe caaqqada yootais.

8 “ “SHin inttenoo, Israa7eela deretoo, intte daayana; ta asaassi Israa7eelassi aifana. Aissi giikko, eti eesuwan bantta biitti simmana. 9 Taani inttenaara de7ais; taani inttekkko simmana; intte biittai goyettananne zerettana. 10 Taani Israa7eela asaa qoodaa ha biittan darissana; katamatun asai de7ana; laalettida sohoti simmidi gimbbettana. 11 Taani asaakka mehiyaakka intte bolli darissana; eti yelettananne corattana. Beniigaadankka intte bolli asai de7anaadan taani oottana. Taani intteyyo kaseegaappe aadhdhiya lo77obaa oottana. Taani GODAA gidiyooгаа intte hegan erana. 12 Taani ta asai Israa7eeli intte bollaara hemettanaadan oottana. Naa77antto eta naata xaissekketa. Eti inttena laattana; inttekkka etayyo laata gidana” yaagees.

13 “ ‘Ubbaa Haariya GODAI hagaadan yaagees; “Asai inttena, ‘Asaa wursseeta; intte kawotettaakka na7i bainnabaa kesseeta’ yaagees. 14 Hegaa gishshau, hagaappe sinttanau intte asaa wurssekketanne intte kawotettaa na7i bainnabaa kessekketa. Taani Ubbaa Haariya GODAI hagaada odais. 15 Qassi kawotettatu cashshaa hagaappe sinttanau taani inttena sissikke; intte asaa yeellaakka hagaappe sinttanau tookkekketa; qassi intte asaassi xube gidekketa. Taani Ubbaa Haariya GODAI hagaada odais” yaagees’ yaaga” yaagiiddi yiis.

16 Qassikka GODAA qaalai taakko hagaadan yaagiiddi yiis; 17 “Laa asa na7au, Israa7eela asati bantta biittan de7iyo wode, eti bantta ogiyaaninne bantta oosuwan biittaa tunissidosona; ta sinttan eta eeshshai maccaasaa kushe qitaa tunatettaa mala. 18 Eti biittan suuttaa gussido gishshaunne bantta eeqan biittaa tunissido gishshau, ta hanquwaa eta bollan gussaas. 19 Taani eta kawotettatu gidon laalaas; etikka biitta

ubban laalettidosona. Taani eta eta eeshshaadaaninne eta oosuwaadan pirddaas. <sup>20</sup> Eti biido soho ubban asai eta, ‘Hageeti GODAA asata; shin eti a biittaappe wolqqan kiyidaageeta’ yaagees; hegan eti ta geeshsha sunntaa tunissidosona. <sup>21</sup> SHin Israa7eela asai biido kawotettatu ubbaa gidдон tunissido ta geeshsha sunntaabai tana michchees.

<sup>22</sup> “Hegaa gishshau, neeni Israa7eela asaayyo hagaadan yaaga; ‘Ubbaa Haariya GODAI hagaadan yaagees; “Inttenoo, Israa7eela asatoo, taani haggaa oottiyoogee, intte biido kawotettatu ubbaa gidдон tunissido ta geeshsha sunntaa gishshaassappe attin, intte gishshaassa giddenna. <sup>23</sup> Intte tunissin, kawotettatu gidдон tunida ta gita sunntaa geeshshatettaa taani bessana. Eti xeellishin, intte baggaara taani ta geeshshatettaa bessiyo wode, taani GODAA giddiyooгаа eti erana. Taani Ubbaa Haariya GODAI haggaa odais.

<sup>24</sup> “ ‘Aissi giikko, taani inttena kawotettatu gidдoppe kessana; biitta ubbaappekka shiishshana. SHiishshada intte biitti zaarada ehaana. <sup>25</sup> Taani inttena xillo haattan aracana; yaatada inttena intte tunatetta ubbaappenne intte eeqa ubbaappe geeshshana.

<sup>26</sup> “ ‘Taani intteyyo ooratta wozanaa immana; ooratta ayyaanaakka intte gidдон wottana; qassi shuchcha wozanaa intteppe kessada, asho wozanaa immana. <sup>27</sup> Taani ta Ayyaanaa intte gidдон wottana; yaatada intte ta wogaa kaallanaadaaninne ta higgiiyaa minttidi naaganaadan oottana. <sup>28</sup> Taani intte maizza aawatussi immido biittan intte de7ana; intte ta asa gidana; taanikka intte Xoossaa gidana. <sup>29</sup> Intte tunatetta ubbaappe taani inttena ashshana; kattai intteyyo daranaadan oottana; koshaakka naa77antto intte bolli ehiikke. <sup>30</sup> Koshaa gaasuwan intte kawotettatu gidдон kauyyennaadan, taani intte mittaa aifiyaanne intte shooqaa kattaa darissana. <sup>31</sup> He wode intte intte iita ogiyaanne intte lo77o gidenna oosuwaa hassayana; hassayidi intte nagaraanne intte tuna oosuwaa gishshau, intte inttena shenetana. <sup>32</sup> Taani haggaa ubbaa oottiyoogee intte gishshaassa gidennaagaa erite. Inttenoo, Israa7eela asatoo, intte intte hanotan yeellatitenne kauyyite. Taani Ubbaa Haariya GODAI haggaa odais” yaagees.

<sup>33</sup> “ ‘Ubbaa Haariya GODAI hagaadan yaagees; “Taani inttena intte nagaraa ubbaappe geeshshiyo gallassi, intte katamatun zaarettidi asai de7anaadan oottana; qolettidaageetikka simmidi gimbbettana. <sup>34</sup> A mataara aadhdhiya asaa sinttan baises gididi de7iya biittai baises giddiyooгаа aggidi goyettana. <sup>35</sup> Asai haasayiiddi, ‘Hagee kase baises gidida biittai ha77i Edene Gannatiyaa mala gididiis; kase qolettida, asi de7ennanne baises katamatikka ha77i gimbbettidanne asi de7iyo katamata gididosona’ yaagana. <sup>36</sup> He wode intte yuushuwan de7iya attida kawotettati taani GODAI qolettida katamata zaarada keexxidoogaanne qa77ettida biittai simmidi kattaa mokkanaadan oottidoogaa erana. Taani GODAI haggaa yootaas; taani yootidoogaa taanikka oottana” yaagees.

<sup>37</sup> “ ‘Ubbaa Haariya GODAI hagaadan yaagees; “Israa7eela asai qassikka issiton tana maaduwaa oichchanaadan oottana; yaatada eta qoodaa dorssaa wudiyaadan corissana. <sup>38</sup> Yarshshiyo dorssaa wudiyaadan, Yerusalaamen baalaa gallasan yarshshuwaassi shiishshido dorssaa wudiyaadan, eta qolettida katamatun asaa wudee kumana. Taani GODAA giddiyooгаа eti he wode erana” yaagiis’ yaaga” yaagiiddi yiis.

## 37

### *Mela Meqettai De7iyo Zanggaaraa*

<sup>1</sup> GODAA kushee ta bolli wodhdhiis; i tana GODAA Ayyaanan kessidi, meqettai kumi uttido wombban wottiis. <sup>2</sup> I tana eta gidдон yaanne haanne kaalettiis; taanikka kinchchillidi melida meqettati kumidaageeta wombbaa gidдон be7aas. <sup>3</sup> I tana, “Laa asa na7au, ha meqettati simmidi, paxa shemppooraa de7anau danddayiyoona?” yaagiis.

Yaagin taani, “Ubbaa Haariya GODAU, haggaa neeni eraasa” yaagaas.

<sup>4</sup> Yaagin i tana hagaadan yaagiis; “Ha meqettatuyyo hagaadan yaagada hananabaa yoota; ‘Inttenoo, mela meqettatoo, <sup>5</sup> GODAA qaalaa siyite! Ubbaa Haariya GODAI hagaadan yaagees; “Taani shemppuwaa intte giddo gelissana; yaatobare intte paxa de7ana. <sup>6</sup> Taani intte bolli xaphota wottada, ashoikka intte bolli simmanaadan oottada, inttena gogaa maizzana. Intte paxa shemppoorra de7ana mala, taani intte giddo shemppuwaa gelissana. He wode intte taani GODAA gidiyoogaa erana” yaagees’ yaaga” yaagiis.

<sup>7</sup> Yaagin i tana azazidoogaadan hananabaa yootaas; taani hananabaa yootishin, giirettainne cenggurssai siyettiis; qassi meqettati shiiqidi, ba sohuwan sohuwan ohetidosona. <sup>8</sup> Taani xeelliyo wode, eta bollan xaphoti de7oosona; ashoikka eta bollan simmiis; gogaakka maayidosona; shin shemppoi etan de7enna.

<sup>9</sup> Yaatin, i tana hagaadan yaagiis; “Laa asa na7au, carkkuwaassi hananabaa hagaadan yaagada yoota; ‘Ubbaa Haariya GODAI hagaadan yaagees; “Nenoo, carkkuwau, oiddu zooziyaarakka haa ya; yaada eti shemppoorra de7anaadan, ha haiqqidaageetu giddo zaarada punna” yaagees’ yaaga” yaagiis. <sup>10</sup> Yaagin i tana azazidoogaadankka, taani hananabaa yootaas; yootin shemppoi eta giddo geliis; gelin paxidi, keehi daro olanchchata gididi eqqidosa.

<sup>11</sup> Hegaappe guyyiyan, i tau hagaadan yaagiis; “Laa asa na7au, ha meqettati kumetta Israa7eela asaa leemiso; Israa7eela asaikka, ‘Nu meqettati melidosona; nu sintta ufaissaikka kichchiis; nuuni muleera xayida’ yaagoosona. <sup>12</sup> Hega gishshau, etassi hagaadan yaagada hananabaa yoota; ‘Ubbaa Haariya GODAI hagaadan yaagees; “Inttenoo, ta asatoo, taani intte duufuwaa dooyana; dooyada inttena hegaappe kessana; taani inttena zaarada, Israa7eela biitti ehaana. <sup>13</sup> Ta asatoo, taani intte duufuwaa dooyiyo wodenne inttena kessiyo wode, taani GODAA gidiyoogaa intte erana. <sup>14</sup> Taani ta Ayyaanaa intte giddon wottana; wottobare intte paxa de7ana. Qassi taani inttena intte biittan wottana. He wode taani GODAI yootidoogaanne yootada oottidoogaa intte erana. Taani GODAI hгаа odais” yaagees’ yaaga” yaagiis.

<sup>15</sup> Zaaridikka GODAA qalalai taakko hagaadan yaagiiddi yiis; <sup>16</sup> “Laa asa na7au, issi mittaa gatimaa ekkada, a bolli, ‘Hagee Yihudaagaanne aara de7iya Israa7eela asaagaa’ yaagiyaagaa xaafa. Qassi hara gatimaa ekkada, a bolli, ‘Hagee Efireemaagaa; ikka qassi Yooseefaagaanne aara de7iya Israa7eela asaagaa’ yaagiyaagaa xaafa. <sup>17</sup> Hegaappe guyyiyan, eti ne kushiyan issi gatima gidanaadan, eta naa77aa issippe gatta.

<sup>18</sup> “Ne biittaa asai nena, ‘Hagee neeni oottiyoogee aibee? Nuuyyo birshshettaa oda’ yaagidi oichchiyo wode, <sup>19</sup> etayyo hagaadan yaaga; ‘Ubbaa Haariya GODAI hagaadan yaagees; “Taani Efireema kushiyan de7iya Yooseefa gatimaanne aara de7iya Israa7eela zareta ekkana hanais; ekkada eta naa77aa issi gatima oottanau, Yihudaa gatimaara gattana. Yaatobare eti naa77ai ta kushiyan issuwaa gidana” yaagees’ yaaga.

<sup>20</sup> “He neeni eta bolli xaafido naa77u gatimata eta sinttan oiqqada, <sup>21</sup> eta hagaadan yaaga; ‘Ubbaa Haariya GODAI hagaadan yaagees; “Taani Israa7eela asaa eti biido kawotettatu giddoppe kessana; taani eta ubbasaappe shiishshada, eta biitti zaarada ehaana. <sup>22</sup> Israa7eela deretu bolli, eta biittan taani eta issi kawotetta oottana; eta ubbaa bolli issi kawoi kawotana. Qassi eti naa77antto naa77u biitta kiyokkona; woikko naa77u kawotetta gididi shaahettokkona. <sup>23</sup> Hegaappe guyyiyan, eti bantta eeqatu-uninne bantta sheneyiyaabatun, woikko bantta naaquwan banttana tunissokkona. Waanidi giikko, taani eta eti guyye simmido nagaraa ubbaappe ashshana; qassi taani eta geeshshana. Eti ta asaa gidana; taanikka eta Xoosaa gidana.

<sup>24</sup> “ “Ta ashkkarai Daawiti etayyo kawo gidana; etau ubbau issi henttanchchaa xalaalai de7ana. Eti ta higgiiyaa kaallana; ta wogaakka minttidi naagana. <sup>25</sup> Taani ta ashkkaraa Yaaqoobassi immidonne intte maizza aawati de7ido biittan eti de7ana. He biittan eti, eta naatinne eta naatu naati merinau de7ana; ta ashkkarai Daawiti eta

bollan merinau halaqa gidana. <sup>26</sup> Taani etaara Sarotettaa maachchaa maacettana; he maachchaikka etaara merinaa maachcha gidana. Taani eta minttada essana; eta qoodaakka corissana; ta Beeta Maqidasiyaakka merinau eta giddon wottana. <sup>27</sup> Yaadata taani hegan etaara de7ana. Taani eta Xoossaa gidana; etikka ta asa gidana. <sup>28</sup> Ta Beeta Maqidasee eta giddon merinau de7iyo wode, Israa7eelata geeshshiyaagee tana, GODAA gidiyooгаа kawotettati erana” yaagees’ yaaga” yaagiiddi yiis.

## 38

### *Googa Bolli Odettida Hiraagaa*

<sup>1</sup> GODAA qalai taakko hagaadan yaagiiddi yiis; <sup>2</sup> “Laa asa na7au, Maagooga biitan de7iia Googakko, Meshekanne Tubaala asaayyo waanna halaqaakko simmada, a bolli hananabaa yoota. <sup>3</sup> Hagaadan yaaga; ‘Ubbaa Haariya GODAI hagaadan yaagees; “Laa Googaa, Meshekanne Tubaala asaayyo waanna halaqau, taani neeyyo morkke. <sup>4</sup> Taani nena guyye zaarana; ne manggaagan hookkuwaa gelissada, nena ne kumetta olanchchatuura, ne paratuura, kumetta ola miishshaa maayida ne paraasaturanne bantta bisuwaa leelleesiya, gitanne guutta gondalliyaa oiqqida guite asaara nena goochchada kessana. <sup>5</sup> Parsseppe, Toophphiyaappenne Liibiyaappe<sup>1</sup> yiida asai gondalliyaa oiqqidi, huuphiyan birata qophiyaa wottidi, etaara gidana. <sup>6</sup> Qassi Goomerinne a olanchchati ubbai, huuphessa gaxan de7iia Beeti-Togarmminne a olanchchati guitee, he cora asati nenaara gidana.

<sup>7</sup> “ “Neeninne neekko shiiqida asai ubbai giigite; inttena makkite. Yaadata neeni eta azaziyaagaa gida. <sup>8</sup> Daro wodiyaappe guyyiyan, neeni koyettana; sinttappe yaana laittatun neeni daro wodiya baissa gididi de7ida biittaa, olaappe shemppida biittaa, an de7iia asai daro kawotettatuppe Israa7eela deretukko shiiqido biittaa woraajjana. Eti daro kawotettatuppe shiiqidaageetanne ubbaikka ha77i saruwan de7iiaageeta. <sup>9</sup> Neeni, ne olanchchatinne nenaara de7iia daro kawotettati gotiyaadan denddana; intte shaaraadan, biittaa kammana” yaagees.

<sup>10</sup> “ ‘Ubbaa Haariya GODAI hagaadan yaagees; “He wode qofai ne wozana giddo yin, neeni iitabaa halchhana. <sup>11</sup> Neeni hagaadan yaagana; “Taani he direttibeenna qeeri katamati de7iyo biittaa woraajjana; he woppu giidi, hirggi bannan de7iia asata, etau ubbawukka dirssi, penggee woikko hiraqoi bannaageeta taani olana. <sup>12</sup> Taani eta omooddanne bonqqana; kase baissa gidida biittaa simmidi uttida, kawotettatu gidloppe shiiqida, miizzaanne miishshaa haarida, biittaayyo gul77an uttida asaa bollan ta kushiyaa denttana’ yaagana. <sup>13</sup> Yaagin Saaba asai, Dadaana asainne Tarsseesa katamatu zal77anchchati ubbai hagaadan yaagana; ‘Neeni bonqqanau yaadii? Neeni ne olanchchata omooduwaa toossanau, biraanne worqqaa efiissanau, miizzaanne miishshaa ekkanaunne keehi daro omooduwaa oiqqanau shiishshadii?’ yaagana” yaagees’ yaaga.

<sup>14</sup> “Hegaa gishshau, asa na7au, Googa bolli hananabaa yoota. Hagaadan yaaga; ‘Ubbaa Haariya GODAI hagaadan yaagees; “He wode, ta asai Israa7eeli hirggi bannan de7iyo wode, neeni denddana. <sup>15</sup> Denddada, neeni de7iyo huuphessa gaxa biittaappe yaana. Neeninne nenaara de7iia cora kawotettati paraa toggidi, mino olanchcha gididi, guitee yaana. <sup>16</sup> Biittaa kammiya shaaraadan, neeni ta asaa Israa7eela bolli woraajjana. Laa Googaa, sinttappe yaana wode, taani nena ta biittaa bolli woraajjissana. Hegaa taani oottiyoogee kawotettati tana eranaassanne taani ne baggaara oottiyooaban ta geeshshatetta eta sinttan beettanaassa” yaagees.

<sup>1</sup> 38:5 Liibiyaappe: Ibraawettuwan he biittai “Puuxa” geettees.



17 “‘Ubbaa Haariya GODAI hagaadan yaagees; “Taani ta ashkkaratu baggaara, Israa7eelan hananabaa yootiyaageetu baggaara kase aadhhdida wode yootidoi nena. Eti he wode daro laittaa taani nena eta bolli ehaanaagaa yootidosona” yaagees.

### *Googa Bolli Yiya Pirddaa*

18 “‘Ubbaa Haariya GODAI hagaadan yaagees; “Googi Israa7eela bolli woraajjiyo wode, ta hanqqoi suullana. 19 He wode Israa7eela biittan wolqqaama biittaa qaattai hanana; heгаа taani ta mishuwaaninne ta eexxiya hanqquwan awaajjais. 20 Abbaa molee, saluwaa kafoi, deriyan de7iya meheenne do7ai, sa7aa bollan woxxi qaaxxiya mereta ubbainne sa7an de7iya asai ubbai ta sinttan kokkorana. Dereti kunddana; aafotikka woddana; qassi dirssaa gimbee ubbaikka qolettana. 21 Taani ta deretu ubban Googa bolli bisoi denddanaadan oottana; olanchchatu bantta bisuwaa bantta bolli zaaridi, issoi issuwaa siifana. Taani Ubbaa Haariya GODAI hagaada odais. 22 Taani boshaaninne haiquwan a qaxxayana; qassi wolqqaama iraa, shachchaa, eexxiya tamaanne dinniyaa taani a bolli, a olanchchatu bollinne aara de7iya cora kawotettatu bolli bukissana. 23 Hegaadan oottada, taani ta gitatettaanne ta geeshshatettaa bessana. Qassi daro kawotettata taani tanatettaa erissana. Taani GODAA gidiyooгаа eti hegan erana” yaagees’ yaaga.

## 39

### *Googi Xoonettana*

1 “‘Ubbaa Haariya GODAI hagaadan yaagees; ‘Laa asa na7au, Googa bolli hananabaa yoota. Hagaadan yaaga; “Meshekanne Tubaala asaayyo waanna halaqau Googaa, taani neeyyo morkke. 2 Taani nena guyye zaarana; huuphessa gaxa biittaaappe goochcha kessada, Israa7eela deretu bollan taani nena ehaana. 3 Hegaappe guyyiyan, taani ne haddirssa kushiyaappe wonddafiya, ne ushachcha kushiyaappe zubbiyaa shocada olissana. 4 Neeni, ne olanchchatinne nenaara de7iya kawotettati ubbai Israa7eela deriyaa bollan kunddi attana. Taani intte ashuwaa miya kafotussinne bazzo do7atussi quma oottada immana. 5 Taani Ubbaa Haariya GODAI yootido gishshau, intte milxxi giida dembban kunddi attana. 6 Maagooga biittaaanne abbaa doonan, hirggi bannan uttida asaa bollan taani eexxiya tamaa yeddana. Taani GODAA gidiyooгаа eti hegan erana. 7 Taani ta geeshsha sunttai ta asaa Israa7eela giddon erettanaadan oottana. Hagaappe sinttanau ta geeshsha sunttai cayettenna. Hegaappe guyyiyan, kawotettati taani GODAA, Israa7eela Geeshshaa gidiyooгаа erana” yaaga’ yaagees.

8 “‘Ubbaa Haariya GODAI hagaadan yaagees; ‘“He gallassai yaana; antenna” yaagada taani yootido gallassai hagaada. 9 He wode Israa7eela katamatun de7iya asai kiyidi, ola miishshata ubbaa taman eettana; hegeetikka gitanne guutta gonddalleta, wonddafa-tanne zubbeta, tooratanne dullata. Laappun laitta kumettaa eti hegeeta eettiyo mittaa kessidi go7ettana. 10 Eti mittaa mixanau woikko woraappe eettiyo mittaa qanxxanau koshshenna. Aissi giikko, eti shiishshido ola miishshata eettiyo mitta oottidi go7ettana. Bantana bonqqidaageeta eti bonqqana; banttabaa ekkidaageetuppe eti ekkana. Taani Ubbaa Haariya GODAI hagaada odais.

11 “‘He gallassi Googi moogettiyo sohuwaa taani ayyo Israa7eela biittan immana. He sohoi abbaappe arshsho baggaara de7iya Ogiyaasatu Wombbaa giyo wombbaa giddoona gidana. Googinne a olanchchatu ubbai hegan moogettiyo gishshau, eta duufoi hegaara hemettiya asau ogiyaa gorddana. He sohoikka qassi, “Googa Olanchchatu Wombbaa” yaagetettidi xeegettana. 12 Hegaappe guyyiyan, Israa7eela asai biittaa geeshshanau, laappun agina kumettaa he ahaa moogiiddi gam77ana. 13 He biittan de7iya asai ubbai ahaa moogiyooگان maadettana; heгаа gishshau, taani xooniyo gallassi etau bonchcho gidana. Taani Ubbaa Haariya GODAI hagaada odais. 14 Laappun



aginaappe guyyiyan, attida ahai de7ikko, biittai geeyanaadan, yuuyi yuuyidi attida ahaa mooganau, asai doorettana. <sup>15</sup> Eti biittan yuuyishin, asaa meqetta beettikko, he meqetta miyyiyan malaataa wottana. Wottin moogiyageeti yiidi, Googa Olanchatu Wombban moogana. <sup>16</sup> Hegaadan oottin biittai simmidi geeyana. Hega heeran, “Googa Olanchatu Katamaa” geetetti xeegettiya katamai de7ana’ yaagees.

<sup>17</sup> “Ubbaa Haariya GODAI hagaadan yaagees; ‘Laa asa na7au, kafo zare ubbaanne sa7aa do7ata ubbaa hagaadan yaagada xeesa; “Taani intteyyo Israa7eela deretu huuphiyan giigissido gita yarshshuwaassi ubbasaappe shiiqidi, issippe haayite. Hagan intte ashuwaa maana; suuttaakka uyana. <sup>18</sup> Intte mino asatu ashuwaa maana; biittaa halaqatu suuttaakka uyana. Eti intteyyo dorssa galssa, anqqara dorssa, tumaleessa deeshshanne ordde boora mala gidana. Eti ubbaikka xiihettida Baasaane mehetu mala. <sup>19</sup> Taani intteyyo giigissiyo yarshshuwaappe kallana gakkanau, modhdhuwaa intte maana; qassi mattottana gakkanau, suuttaa intte uyana. <sup>20</sup> Taani intteyyo aattiyo maaddaappe parata, paraasata, mino asatanne dumma dumma qommo wotaaddarata intte ganjee kallana gakkanaashin intte maana” yaagada xeesa. Taani Ubbaa Haariya GODAI haga odais.

<sup>21</sup> “ Taani kawotettatu gidдон ta bonchchuwaa qonccissana. Qassi taani qaxxayiyo qixaatiyaanne taani eta bollan denttido ta kushiya kawotettati ubbai be7ana. <sup>22</sup> He gallasaappe doommidi, Israa7eela asai taani GODAA eta Xoossaa gidiyooгаа erana. <sup>23</sup> Qassi Israa7eela asai omooduwan biidoogee bantta nagaraa gaasuwaana gidiyooгаа hara kawotettati erana. Eti taayyo ammanettennan ixido gishshau, taani ta som77uwaa etappe genttada, eta eta morkketussi aattada immaas; immin eti ubbaikka olan haiqqi wuridosona. <sup>24</sup> Eta tunatettaanne eta iitatettaa keenaa etau bessiya qixaatiyaa qaxxayaas; ta som77uwaakka etappe genttaas’ yaagees.

<sup>25</sup> “Ubbaa Haariya GODAI hagaadan yaagees; ‘Ha77i taani Yaaqooba zareta omooduwaappe zaarada ehaana; qassi Israa7eela asaa ubbaayyo qarettana. Taani ta geeshsha sunttai cayettennaadan oottana. <sup>26</sup> Eti eta yashshiyaabi issoinne bainnasan, bantta biittan saro deettaa doommiyo wode, kase bantta yeellaanne taayyo eti ammanettennan ixidoogaa dogana. <sup>27</sup> Taani eta kawotettatu ubbaa gidloppe zaarada ehaana; qassi eta morkketu biittaappekka eta shiishshana. Hegaadan oottada, taani geeshsha gidiyooгаа kawotettata ubbaa bessana. <sup>28</sup> Taani eta kawotettatu giddo omooduwau yeddido gishshaunne eta shiishshada, eta biitti zaarido gishshau, taani GODAA eta Xoossaa gidiyooгаа eti erana. Taani etappe issuwaanne kawotettatu gidдон aggikke. <sup>29</sup> Taani ta Ayyaanaa Israa7eela asaa bolli gussana; naa77antto ta som77uwaa etappe mulekka genttikke. Taani Ubbaa Haariya GODAI haga odais’ yaagees” yaagiiddi yiis.

## 40

### *Sinttappe Keexettana Beeta Maqidasiyaa Ajjuuataa (40:1-48:35)*

#### *Hizqqeeli Ajjootan Yerusalaame Biis*

<sup>1</sup> Nuuni omoodettido laatamanne ichchashantta laittan, Yerusalaamee xoonettido tammanne oiddantto laittan, ooratta laittai gelido tammannta gallassan, GODAA kushee ta bolli de7ees. <sup>2</sup> Xoossaa ajjuutan i tana Israa7eela biittaa efidi, issi xoqqa deriyaa huuphiyan essiis. He deriyaappe tohossa baggaara katama milatiya keettati de7oosona. <sup>3</sup> I tana yaa ekkidi efis; efin taani nahaasiyaa birataadan phooliya issi bitaniyaa be7aas. He bitanee liinuwaappe oosettida meetiriyaanne likkiyo gatimaa oiqqidi, dirssaa penggen eqqiis. <sup>4</sup> I tana hagaadan yaagiis; “Laa asa na7au, nena taani ha sohuwaa ehiidoogee taani nena bessiyooгаа ubbaa neeni mintta akeekanaassa. Hega

gishshau, ne aifiyan xeella; ne haittan siya; ne wozanan wotta. Neeni be7iyooobaa ubbaa Israa7eela asau yoota” yaagiis.

### *Arshsho Penggiyaa*

<sup>5</sup> Taani Beeta Maqidasiyaa muleera yuuyi aadhdhida dirssaa gimbbiyaa be7aas. He bitaniyaa kushiyan likkiyo usuppun adussa wara gatimai de7ees. Issi adussa warai issi waraa bolli oiddu biradhdheta gujjidoogaa. I gimbbiyaa likkiis; likkin gimbbiyaayyo geesai 6 wara; gomppaikka 6 wara gidiiis.

<sup>6</sup> Hegaappe guyyiyan, arshsho baggaara de7iya dirssaa penggiyaakko biis. Xekkata pude kiyidi, penggiyaa goccillaa likkiis; likkin 6 wara gidiiis. <sup>7</sup> Hegaappe kanttin, loossoinne ushachchaaranne haddirssaara penggiyaa naagiyaageeti eqqiyo heezzu heezzu kifileti de7oosona; issi issi kifilee 6 wara adussanne 6 wara aaho. Eta giddon de7iya godati 5 wara ordde. Penggiyaa naagiyaageetu kifiletuppe ya baggaara, Beeta Maqidasiyaa xeelliyaa baranddaa goccillai 6 wara.

<sup>8</sup> Hegaappe guyyiyan, he bitanee geliyoosaa baranddaa likkiis; likkin 8 wara gidiiis. <sup>9</sup> Hegee Beeta Maqidasiyaa xeelliyaa penggiyaa wurssettan de7ees. He baranddaa tuuqetu orddetetta naa77u naa77u wara. <sup>10</sup> Arshsho bagga penggiyan so baggaara, geliyo loossuwaa penggiyaa naagiyaageetu kifileti, ha baggaara heezzai ya baggaara heezzai de7oosona. Eta gomppai ubbaageekka lagge; eta shaakkiya dirssaa gimbbiyaa orddetettaikka lagge.

<sup>11</sup> Hegaappe guyyiyan, he bitanee dirssaa penggiyaa kanttiyo sohuwaa gomppaa likkiis; likkin muleera 13 wara gidiiis. Penggetuppe gidduwan de7iya loosoi 10 wara. <sup>12</sup> Issi issi penggiyaa naagiyaageetu kifiliyaa sinttan geesai issi wara, gomppaikka issi wara gidido godai de7ees; naagiyaageetu kifileti naa77u baggaarakka usuppun usuppun wara.

<sup>13</sup> Hafinttan de7iya naagiyaageetu kifiletu guyye gaxaappe hefinttan de7iya naagiyaageetu kifiletu guyye gaxaa gakkanaashin de7iya sohuwaa likkiis; likkin 25 wara gidiiis. <sup>14</sup> He bitanee giddo dabaabaa xeelliyaa wurssetta kifiliyaa likkiis; likkin 20 wara gidiiis. <sup>15</sup> Penggiyaa geliyoosaappe biidi, hini wurssettan de7iya a baranddaa gakkanaashin de7iya zananai 50 wara. <sup>16</sup> Kifiletu ubban kare baggi xeelliyaa guutta guutta maskkooteti de7oosona; qassi kifiletuppe gidduwan de7iya godaayyookka maskkooteti de7oosona. Yanne haanne shaakkiya godatu bollan zambbaa misilee meretti uttiis.

### *Kare Dabaabaa*

<sup>17</sup> Hegaappe guyyiyan, he bitanee tana kare dabaabaakko efiis. Hegan taani dabaabaa yuushuwan de7iya shuchchaa hiixxido baasuwaanne he baasuwan keexettida hasttamu kifileta be7aas. <sup>18</sup> SHuchchai hiixettido baasoi dabaabaa yuushuwaa ubbaa gakkiiis; hegee kare dabaabai giddo dabaabaappe ziqqees. <sup>19</sup> Giddo dabaabaakko gattiya, xoqqan oosettida, dirssaa penggee de7ees. He bitanee naa77u penggetuppe gidduwan de7iya sohuwaa likkiis; likkin gomppai 100 wara gidiiis.

### *Huuphessa Penggiyaa*

<sup>20</sup> Hegaappe guyyiyan, he bitanee tana huuphessa baggi efiis. Huuphessa baggi xeelliyaa dirssaa penggiyaa zananaanne gomppaa i likkiis. He dirssaa penggee kare dabaabaakko gattiyaagaa. <sup>21</sup> Loossuwaappe ushachchanne haddirssa baggaara de7iya heezzu heezzu naagiyaageetu kifileti, etappe gidduwan de7iya godatinne a baranddai koiro Arshsho Penggiyaa baggan likkidoogeetuura bixe lagge gididosona. Dirssaa penggiyaa zananai muleera 50 wara; gomppaikka 25 wara. <sup>22</sup> Baranddai, maskkootetinne merettida zambbaa misilee kase Arshsho Penggiyaa baggan be7idoogeetuura issi mala.

Yaa gattiya laappun xekkati de7oosona. Baranddai dabaabaa sinttan wurssetta baggaara de7ees. <sup>23</sup> Arshsho baggaadan, ha huuphessa baggankka giddo dabaabaayyookka hara penggee de7ees. He bitanee ha naa77u dirssaa penggetuppe gidduwan de7iya sohuwaa likkiis; likkin 100 wara gidiiis.

### *Tohossa Penggiyaa*

<sup>24</sup> Hegaappe simmidi, he bitanee tana tohossa bagga dirssaa pengge kaalettiis; kaalettin baada, hegan hara dirssaa penggiyaa be7aas. I a likkiyo wode, ikka haratu keena gidiiis. <sup>25</sup> Likke haratuugaadan, ha dirssaa penggiyaa matan de7iya kifiletuyyo ubbau maskkooteti de7oosona. Dirssaa penggiyaa zananai 50 wara; gomppaikka 25 wara. <sup>26</sup> Yaa gattiya laappun xekkati de7oosona. Baranddai dabaabaa sinttan wurssetta baggaara de7ees. Penggiyaa bolli ya baggaaranne ha baggaara zambbaa misilee meretti uttiis. <sup>27</sup> Giddo dabaabaayyookka hara penggee de7ees. He bitanee ha naa77u dirssaa penggetuppe gidduwan de7iya sohuwaa likkiis; likkin 100 wara gidiiis.

### *Giddo Dabaabaayyo Tohossa Bagga Penggiyaa*

<sup>28</sup> He bitanee tana tohossa dirssaa penggiyaa baggaara hini giddo dabaabaakko efiis. I dirssaa penggiyaa likkin, hara penggetuugaara likke gidiiis. <sup>29</sup> Hegau naagiyaageetu kifileti, godatinne baranddati ubbai hara dirssaa penggetuugaara issi mala. He dirssaa penggiyaa yuushuwan de7iya kifiletu ubbau maskkooteti de7oosona. Ha penggiyaa zananai 50 wara; gomppaikka 25 wara. <sup>30</sup> A yuushuwan baranddati de7oosona; eta zananai 25 wara; gomppaikka 5 wara. <sup>31</sup> He baranddati kare bagga dabaabaa xeelloosona. Penggiyaa bolli ya baggaaranne ha baggaara zambbaa misilee meretti uttiis. Yaa gattiya hosppun xekkati de7oosona.

### *Giddo Dabaabaayyo Arshsho Bagga Penggiyaa*

<sup>32</sup> He bitanee tana arshsho bagga dirssaa penggiyaara hini giddo dabaabaakko efiis. I he dirssa penggiyaa likkin, hara penggetuura likke gidiiis. <sup>33</sup> Naagiyaageetu kifileti, godatinne baranddai ubbai hara dirssaa penggetuugaara issi mala. He dirssaa penggiyaa yuushuwan de7iya kifiletu ubbau maskkooteti de7oosona. He penggiyaa zananai 50 wara; gomppaikka 25 wara. <sup>34</sup> Baranddai kare bagga dabaabaa xeellees. Penggiyaa bolli ya baggaaranne ha baggaara zambbaa misilee meretti uttiis. Yaa gattiya hosppun xekkati de7oosona.

### *Giddo Dabaabaayyo Huuphessa Bagga Penggiyaa*

<sup>35</sup> He bitanee tana huuphessa bagga dirssaa penggiyaakko efiis. I he dirssaa penggiyaa likkin, ikka hara penggetuura likke gidiiis. <sup>36</sup> Naagiyaageetu kifileti, godatinne baranddai ubbai hara dirssaa penggetuugaara issi mala. He dirssaa penggiyaa yuushuwan maskkooteti de7oosona. He penggiyaa zananai 50 wara; gomppaikka 25 wara. <sup>37</sup> Baranddai kare bagga dabaabaa xeellees. Penggiyaa bolli ya baggaaranne ha baggaara zambbaa misilee meretti uttiis. Yaa gattiya hosppun xekkati de7oosona.

### *Huuphessa Penggiyaa Matan De7iya Keettata*

<sup>38</sup> Kare dabaabau huuphessa baggaara, giddo dirssaa penggiyaa baranddaara ohet-tida, hara kifileekka de7ees. Xuuggiyo yarshshuwau ehiyo mehiyaa ashoi meecettiyo he kifiliyaana. <sup>39</sup> He baranddan ha baggaara naa77u xaraphpheedati, ya baggaarakka naa77u xaraphpheedati de7oosona; xuuggiyo yarshshuwaassi, nagaraa yarshshuwaassinne naaquwaa yarshshuwaassi shukkiyo mehe ubbai shukettiyo he xaraphpheedatu bollaana. <sup>40</sup> Baranddaappe kare baggaara huuphessa dirssaa penggiyaa matan naa77u xaraphpheedati ha baggaara, naa77u xaraphpheedati ya baggaara de7oosona. <sup>41</sup> Hegaa gishshau, yarshshuwau shiiqida mehee shukettiyo muleera hosppun xaraphpheedati de7oosona; etappe oiddati baranddan de7oosona; oiddati qassi kare dabaaban de7oosona. <sup>42</sup> Qassi xuuggiyo yarshshuwaa wottanau giigissido,

shuchchaappe masettidi oosettida oiddu xaraphpheedati de7oosona. Etau geesai issi wara; zananai issi waranne takkaaro; qassi gomppaikka issi waranne takkaaro. Xuuggiyo yarshshuwaanne hara yarshshota ubbaa shukkiyo miishshati he xaraphpheedatu bollan uttoosona. <sup>43</sup> Issi takkaaro aduqqiya kaqqiyo hookkoti godaa bolli yuuyi aadhdhidi xishetti uttidosona. Yarshshuwaassi shiishshiyi ashoi ubbai he xaraphpheedatu bolli wodhdhees.

<sup>44</sup> Hegaappe guyyiyan, he bitanee tana giddo dabaabaa gelissii. Hegan penggeti giddo dabaabaakko dooyettiyo naa77u kifileti de7oosona. Etappe issi kifilee huuphessa dirssaa penggiyaa mataara tohossa baggi xeellees; naa77anttoi qassi tohossa dirssaa penggiyaa mataara huuphessa baggi xeellees. <sup>45</sup> He bitanee tana hagaadan yaagiis; “Tohossa baggi xeellia kifilee Beeta Maqidasiyan oottiya qeesetubaa. <sup>46</sup> Huuphessa baggi xeellia kifilee qassi yarshshiyooosan oottiya qeesetubaa. Qeeseti ubbai Xaadooqa yaraappe yelettida Leewata; GODAAKKO shiiqidi, assi oottanau bessosona geetettidai eta xalaala” yaagiis.

### *Giddo Dabaabaanne Beeta Maqidasiyaa*

<sup>47</sup> He bitanee dabaabaa likkiis; likkin zananai 100 wara, gomppaikka 100 wara gidii. Dabaaban Beeta Maqidasiyaa sintta baggaara issi yarshshiyooosai de7ees. <sup>48</sup> Hegaappe guyyiyan, i tana Beeta Maqidasiyaa baranddaa efiis. Baranddaa geliyo goccillaa likkiis; likkin geesai 5 wara; gomppaikka 14 wara. Haddirssaaranne ushachchaara de7iya godatu orddetettaa heezzu heezzu wara gidii. <sup>49</sup> Baranddaa zananai 20 wara; gomppaikka 10 wara. Yaa gattiya 10 xekkati de7oosona. Geliyoosan ushachchaaranne haddirssaara eqqida naa77u tuuqeti de7oosona.

## 41

<sup>1</sup> Hegaappe simmidi, he bitanee tana Beeta Maqidasiyan de7iya Geeshsha Sohuwaa gelissii. He Geeshsha Sohuwaa godaa orddetettaa likkiis; likkin 6 wara gidii. <sup>2</sup> Penggiyaa gomppai qassi 10 wara gidii. Haddirssaaranne ushachchaara de7iya godatu gomppai ichchashu ichchashu wara. Qassi i Geeshsha Sohuwaa likkiis; likkin zananai 40 wara, gomppaikka 20 wara gidii.

<sup>3</sup> Hegaappe guyyiyan, qol77o geliis. He geliyo penggiyaa godaa orddetettaa likkiis; likkin 2 wara gidii. Penggiyaa gomppai 6 wara gidii; haddirssaaranne ushachchaara de7iya godatu gomppai laappun laappun wara. <sup>4</sup> Qassi i qol77uwaa likkiis; likkin zananai 20 wara, gomppaikka 20 wara gidii. Hegaappe guyyiyan i tana, “Hagee Ubbaappe Aadhdhiya Geeshsha Sohuwaa” yaagiis.

### *Beeta Maqidasiyaa Yuushuwan Keexettida Kifileta*

<sup>5</sup> He bitanee Beeta Maqidasiyaa godaa likkiis; likkin orddetettaa 6 wara gidii. He godaara oiqettidi, Beeta Maqidasiyaa yuushuwan keexettida oiddu oiddu wara aakkiya daro kifileti de7oosona. <sup>6</sup> He kifileti issi issuwaa bolli keexettida heezzu pooqe gidishin, issi issi pooqiyau hasttamu kifileti de7oosona. Zamadaa yeggiyo mittai Geeshsha Sohuwaa giddo gelenna mala, koiro godaara oisettidi, hara shuchchaa wottidosona. <sup>7</sup> He shuchchai garssa wurssetta pooqiyaa orddido gishshaanne pude shiiqiiddi lee7iyo gishshau, kifiletikka pude shiiqiyo wode, aakki aakkidi boosona. Koiro wuigiyaappe giddo pooqiyaara kanttidi, killi wurssetta pooqiya gakkanaashin efiya xekkati de7oosona.

<sup>8</sup> Taani Beeta Maqidasiyaa yuushuwan xoqqu giida baasoi de7iyaagaa be7aas. A yuushuwan de7iya kifileti he baasuwa bollan keexettidosona; he baasoi giddo dabaabaappe 6 wara xoqqees. <sup>9-11</sup> He kifiletu godaa orddetettaa 5 wara. Kifileta geliyo naa77u penggeti, issi huuphessa baggaara, issi qassi tohossa baggaara de7oosona; qassi he kifiletu yuushuwan de7iya baasuwa aahotettaa 5 wara. Beeta Maqidasiyaa



baasuwaappenne giddo dabaaban de7iya kifiletuppe gidduwan de7iya mela sohoi 20 wara.

### *Arggo Baggaara Keexettida Keettaa*

<sup>12</sup> Beeta Maqidasiyaappe arggo baggaara de7iya mela sohuwaappe hefintta baggaara issi keetta de7ees. He keettaayyo zananai 90 wara; gomppaikka 70 wara. He keettaa godai 5 wara ordde.

### *Beeta Maqidasee Likettiis*

<sup>13</sup> He bitanee Beeta Maqidasiyau kare baggaa likkiis; likkin zananai 100 wara. Beeta Maqidasiyaa zokkossaappe biidi, hini arggo bagga keettaa zokkossaa gakkanaashin de7iya sohuwaa likkin, 100 wara gidiiis. <sup>14</sup> Arshsho baggaara de7iya Beeta Maqidasiyaa gomppai naa77u mela sohota gujjidi likkin, 100 wara aakkees. <sup>15</sup> Naa77u baggaarakka de7iya kanttiyo sohota gujjidi, arggo baggaara de7iya keettaa zananai likkiis; likkin 100 wara gidiiis.

### *Beeta Maqidasiyaayyo Giddo Oosota*

Beeta Maqidasiyaa Geeshsha Sohoi, a qol77oinne a baranddai <sup>16</sup> wuigiyaappe biidi, maskkooteta gakkanaashin, mittan licetti uttiis; maskkootetikka mittan licetti uttidosona. <sup>17-18</sup> Beeta Maqidasiyaayyo so bagga kifiletu godai penggetuppe bollau aadhdhana gakkanaashin, zambbatunne kiruubetu misiletun alleeqetti uttiis; kifiliyan yuuyi aadhdhanaashinka zambbaa misileenne kiruubiyaa misilee walahan meretti uttiis. Kiruubetussi ubbaassi naa77u naa77u som77oi de7ees. <sup>19</sup> Issi baggaara asa som77o milatiyaagee zambbaa misiliyaakko xeellees; qassi hara baggaara gaammo som77o milatiyaagee zambbaa misiliyaakko xeellees. <sup>20</sup> Wuigiyaappe denddidi biidi, penggetuppe bolla baggan de7iyo sohuwaa gakkanaashin, godaa yuusho ubbai hegaadan alleeqettiis. <sup>21</sup> Beeta Maqidasiyaa pengge qosilettati ubbai oiddu zooze gididi masettidaageeta; eti ubbaikka issi likke.

### *Mittaappe Medhdhido Yarshshiyosaa*

Ubbaappe Aadhdhida Geeshsha Sohuwaa geliyoosaa sinttan <sup>22</sup> mittaappe merettida yarshshiyosaa milatiyaabi beettees. Ikka oiddu zooze gididi, gomppaikka zananaiikka lagge; eti naa77aikka naa77u naa77u wara; ayyo geesai qassi heezzu wara. Zozetu tuussati, gedetinne miyyiyaara de7iya sanqqati ubbaikka mittaappe oosettidaageeta. He bitanee tana, “Hagee GODAA sinttan de7iya xaraphheezaa” yaagiis.

### *Beeta Maqidasiyaa Penggeta*

<sup>23</sup> Geeshsha Sohuwaayyo issi penggee de7ees; qassi ubbaappe aadhdhida geeshsha sohuwaayyo issi penggee de7ees. <sup>24</sup> Issi issi penggiyaayyo gidduwan dakkotidi dooyettiya naa77u sanqqati de7oosona. <sup>25</sup> Geeshsha Sohuwaa godatu bolli merettidoogaadan, penggetu sanqqatu bollikka kiruubetunne zambbatu misilee meretti uttiis. Baranddaappe bolla baggaara sinttau zoxida kaarai mittaappe oosettidaagaa. <sup>26</sup> He baranddaa godatu miyyiyan maskkooteti de7oosona. Godatikka zambbaa misiliyan alleeqettidosona.

## 42

### *Beeta Maqidasiyaa Matan Keexettida Naa77u Keettata*

<sup>1</sup> Hegaappe guyyiyan, he bitanee tana huuphessa bagga penggiyaara kare dabaabaa kaalettiis; kaalettidi Beeta Maqidasiyaa giddo dabaabaa gimbbiyaara oiqettida keettaakko, tana ehiis. <sup>2</sup> Ha keetta 100 wara adussanne 50 wara aaho. <sup>3</sup> Ha keettaayyo issi issi maskkooteti Beeta Maqidasiyaa xeelloosona; harati qassi kare dabaabaa xeelloosona. He keettaa kifileti heezzu pooqe keexettidosona. <sup>4</sup> He kifiletu penggeti huuphessi xeelloosona. Etappe sintta baggaara 10 wara aahonne 100 wara adussa gidida,



hemettiyo ogee de7ees. <sup>5</sup> He keettaayyo bolla heezzantto pooqee naa77anttuwaappe xuummees; naa77anttoi qassi koiruwaappe xuummees. Gaasotaikka eti issoi is-suwaappe guyye shiiqi shiiqidi gimbbettido gishshaassa. <sup>6</sup> Qassi eti heezzu pooqe gidiyo gishshaassanne kare dabaaban de7iya hara keettatudan, etayyo tuussai banna gishshaassa. <sup>7-8</sup> He kifiletuppe sintta baggaara, kare dabaabaa gidдон 50 wara aduqqiya dirssaa gimbbeenne hara issi keettaa godai 50 wara aduqqiyaagee de7ees. <sup>9</sup> Ha hara keettaa penggee arshsho baggaara de7ees.

<sup>10</sup> Hegaadanka, Beeta Maqidasiyaappe tohossa baggaara kare dabaaban hara keetta de7ees. <sup>11</sup> He keettaa kifiletu sinttan asai hemettiyo ogee de7ees. He keetta huuphessa baggan de7iya keettaara issi mala; adussatetta, aahotetta, kifiletinne penggeti ubbai issi mala. <sup>12</sup> Ha keettaa sinttankka hara keettainne dirssaa gimbee de7ees. He keettaa penggeekka arshsho baggaara de7ees.

<sup>13</sup> Hegaappe guyyiyan, he bitanee tana hagaadan yaagiis; “Hageeti kifileti, huuphes-saaranne tohossaara Beeta Maqidasiyaa kare dabaabaakko xeelliaageeti qeesetu kifileta. Eta gidдон GODAASSI oottiya qeeseti ubbaappe aadhdhida geeshsha qumaa maana. He kifileti geeshsha gidido gishshau, ubbaappe aadhdhida geeshsha imota, hegeetinne kattaa yarshshuwaa, nagaraa yarshshuwaanne naaquwaa yarshshuwaa ubbaa, eti hegan wottana. <sup>14</sup> Beeta Maqidasiyaa gelida qeeseti kare dabaabaa kiyiyo wode, GODAASSI oottiyo wode maayido geeshsha maayuwaa kessidi, he kifiletun wottennan kiyokkona. Aissi giikko, maayoti geeshsha. Eti kare asaakko kiyiiddi, kase maayiyota hara maayota maayidi kiyanau koshshees” yaagiis.

### *Beeta Maqidasee Keexettido Sohuwaa Likkiyaa*

<sup>15</sup> He bitanee Beeta Maqidasiyaa kare dabaaban de7iya keettata likki wurssidi, arshsho baggi xeellia dirssaa penggiyaara tana kare kessiis. Kessidi Beeta Maqidasiyaa heeraa yuushshi aattidi likkiis. <sup>16</sup> Likkiyo gatimaa ekkidi, arshsho bagгаа likkin, zanana 500 wara gidдиis. <sup>17</sup> Simmidi huuphessa bagгаа he gatiman likkiis; likkin 500 wara gidдиis. <sup>18</sup> Simmidi tohossa bagгаа likkiis; likkin 500 wara gidдиis. <sup>19</sup> Simmidikka arggo bagгаа likkiis; ikka 500 wara gidдиis. <sup>20</sup> Hegaadan oottidi, i oiddu baggatakka likkiis. A yuushuwan 500 wara aduqqidi, 500 wara aakkiya dirssaa gimbee de7ees. He gimbee geeshsha sohuwaa hankko coo sohuwaappe shaakkanaassa.

## 43

### *GODAA Bonchchoi Beeta Maqidasiyaa Simmiis*

<sup>1</sup> Hegaappe guyyiyan, he bitanee tana arshsho baggi xeellia penggiyaakko ehiis. <sup>2</sup> Ehin taani Israa7eela Xoossaa bonchchoi arshsho baggappe yiyaagaa be7aas. A yuussaa cenggurssai daro haattaa kixaa gunttaa mala; qassi biittaikka a bonchchuwan poo7iis. <sup>3</sup> Taani be7ido ajuutai kase GODAI Yerusalaame katamaa xaissanau yiido wode be7ido ajuutaa milatees; qassi Kabaara SHaafaa matan taani be7ido ajuutaakka milatees. Hega be7ada, taani ta som77uwaa biittaa gattada gufannaas. <sup>4</sup> GODAA bonchchoi arshsho xeellia penggiyaara Beeta Maqidasiyaa gidдо geliis. <sup>5</sup> He wode GODAA Ayyaanai tana pude denttidi, gidдо dabaabaa gelissii; gelissin GODAA bonchchoi Beeta Maqidasiyaa kumiis.

<sup>6</sup> Hegan he bitanee ta miyyiyan eqqidaashin, issoi Beeta Maqidasiyaa gidдоppe taayyo haasayishin siyaas. <sup>7</sup> I hagaadan yaagiis; “Laa asa na7au, hagee ta araataa sohonne ta gedee yedhdhiyo soho. Taani Israa7eela asaa gidдон merinau de7ana. Hagaappe sinttau Israa7eela asaa gidin, eta kawota gidin, hara xoossatussi goinniyoogan, woikko bantta kawotu ahan ta geeshsha suntaa tunissokkona. <sup>8</sup> Waatidi giikko, issi godaa xalaalai tananne etanne shaakkin, bantta penggiyaa taagaa miyyiyan, bantta pengge mittaakka taagaa miyyiyan wottidosona. Wottidi bantta sheneyiya

oosuwan ta geeshsha sunntaa tunissidosona. Hegaa gishshau, taani ta hanqquwan eta xaissaas. <sup>9</sup>Ha77i simmi hara xoossatussi goinniyoogaa aggonaa; bantta kawotu ahaakka ta achchappe diggona. Yaatikko, taani eta gidдон merinau de7ana.

<sup>10</sup>“Laa asa na7au, taani nena bessido Beeta Maqidasiyaabaa Israa7eela asaassi yoota; eti bantta oottido nagaran yeellatana mala, a meraabaanne i keexettido maaraa etayyo oda. <sup>11</sup>Eti bantta oottidoban yeellatiyaageeta gidikko, Beeta Maqidasiyaa meraa, i keexettido maaraa, kiyiyo sohota, geliyo sohotanne a kumetta misiliyaa etau qonccissa. Hegaadankka qassi, a wogaa ubbaanne a higgiiyaa ubbaa eta erissa. Qassi eti woga ubbaanne higge ubbaa naaganaunne polanau danddayana mala, neeni eti xeellishin xaafa.

<sup>12</sup>“Beeta Maqidasiyaa higgee haggaa: Beeta Maqidasee keexettido deriyaa huupheenne a yuushuwan de7iya heerai ubbai ubbaappe aadhdhida geeshsha gidana. Ee, Beeta Maqidasiyaa higgee haggaa.

### *Yarshshiyooosaa*

<sup>13</sup>“Yarshshiyooosai kase Beeta Maqidasiyaa likkiyaadankka, issi waraa bolli oiddu biradhdheta gujjido, adussa waran likettiis. Yarshshiyooosaa baasuwaaw yuushuwan issi wara ziqqiyaanne issi wara aakkiya boo7ee de7ees; he boo7iyaassi kare bagga xekkai issi takkaaro xoqqees. Yarshshiyooosaa geesai haggaa mala: <sup>14</sup>baasuwaappe biidi, koiro xekkaa gakkanaashin 2 wara; naa77antto xekkai issi waraa sookko shiiqi doommidi, 4 wara xoqqees; qassikka issi waraa sookko shiiqidi, <sup>15</sup>yarshshoi xuugettiyo coocce de7iyo heezantto xekkai 4 wara xoqqees. I oiddu zooze gididi, oiddu zooziyankka issi issi kacee de7ees; issi issi kacee issi wara xoqqees. <sup>16</sup>Yarshshuwaa xuuggiyo coocce oiddu zooze gididi, zananai 12 wara, gomppaikka 12 wara. <sup>17</sup>Naa77antto xekkaikka haggaa mala oiddu zooze gididi, zananai 14 wara, gomppaikka 14 wara. He xekkaayyo kare bagga gaxai issi takkaaro xoqqees. Yarshshiyooosaa pude efiya xekkati arshsho baggan de7oosona” yaagiis.

<sup>18</sup>Qassikka i tana haggadan yaagiis; “Laa asa na7au, Ubbaa Haariya GODAI haggadan yaagees; ‘Yarshshiyooosaa wogai haggaa. Xuuggiyo yarshshuwaa yarshshanaunne suutta aracanau, yarshshiyooosaa gimbbidi poliyo gallassi, <sup>19</sup>taakko shiiqidi, taayyo oottiya Xaadooqa yaraappe yelettida Leewa zare qeesetussi nagaraa yarshsho oottada, issi mirgguwaa imma. Taani Ubbaa Haariya GODAI haggaa odais. <sup>20</sup>Neeni he suuttaappe ekkada, oiddu kaceta, naa77antto xekkaa oiddu zooziyaanne he xekkaayyo gaxaa tiya. Haggadan oottada, yarshshiyooosaa tunatettaappe geeshsha. <sup>21</sup>Qassi nagaraa yarshshuwaaassi imettida he korimaa ekkada, Beeta Maqidasiyaabaa gididi, geeshsha sohuwaappe kare baggaara ayyo azazettida sohuwan xuugga.

<sup>22</sup>“‘Wonttetta gallassi tilla bollaara de7iya issi deeshsha orggiyaa ekkada, nagaraa yarshshuwaaassi yarshsha. Kase korimaa suuttan geeshshidoogaadan, he deeshsha orggiyaa suuttan yarshshiyooosaa geeshsha. <sup>23</sup>Geeshshiyooogaa polada, tilla bollaara de7iya issi mirgguwaanne tilla bollaara de7iya issi dorssa orggiyaa ekkada, <sup>24</sup>naa77aakka GODAA sintti shiishsha. Yaatobare qeeseti eta bolli maxiniyaa qolidi, GODAAYYO xuuggiyo yarshsho oottidi yarshshona.

<sup>25</sup>“‘Laappun gallassa kumettaa, hachchi hachchi issi deeshshaa nagaraa yarshshuwaaassi, qassi tilla bollaara de7iya issi mirgguwaanne tilla bollaara de7iya issi dorssa orggiyaa shiishsha. <sup>26</sup>Qeeseti laappun gallassaa kumettaa yarshshiyooosaa tunatettaappe geeshshona. Yaatidi GODAAYYO a dummayona. <sup>27</sup>Ha gallassati wuriyo wode, hospunnata gallassaappe doommidi, qeeseti intte xuuggiyo yarshshuwaaanne intte issippetettaa yarshshuwaa yarshshiyooosaa bollan yarshshona. He wode taani inttenan ufaiittana. Taani Ubbaa Haariya GODAI haggaa odais’ yaagees” yaagiis.

## 44

### *Arshsho Penggiyaa Wogaa*

<sup>1</sup> Hegaappe guyyiyan, he bitanee tana guyye zaaridi, Beeta Maqidasiyaayyo arshsho baggaara de7iya kare bagga dirssaa penggiyaakko ehiis; ehiyo wode, dirssaa penggee gorddetti uttiis. <sup>2</sup> I tana hagaadan yaagiis; “Ha penggee gorddiyan de7i bayanaappe attin, naa77antto dooyettenna. Asikka aara gelenna; aissi giikko, GODAI Israa7eela Xoossai aara geliis. Hegaa gishshau, he penggee gorddiyan de7ana. <sup>3</sup> Gidikkonne, Israa7eela halaqai GODAA sinttan oittaa maanau hegan uttana danddayees. Penggiyaa baranddaara i gelanaunne kiyana danddayees” yaagiis.

### *Beeta Maqidasiyaa Geliyo Wogaa*

<sup>4</sup> Hegaappe guyyiyan, he bitanee tana Huuphessa Penggiyaakko efiya ogiyaara efiidi, Beeta Maqidasiyau sintta baggi gattiis. Hegan taani xeelliyo wode, GODAA bonchchoi GODAA Maqidasiyaa kumi uttidaagaa be7aas; be7ada ta som77uwaa biittaa gattada gufannaas.

<sup>5</sup> Yaatin, GODAI tana hagaadan yaagiis; “Laa asa na7au, GODAA Beeta Maqidasiyaa wogata ubbaanne a higgeta ubbaa xeelliyaagan taani neessi yootiyooqaa ne haittan minttada siya; ne aifiyankka minttada xeella. Beeta Maqidasiyaa gelanaunne kiyanaubessiya asatinne bessenna asati augeetakko minttada akeeka. <sup>6</sup> Makkalanchcha Israa7eela asaassi hagaadan yaagada yoota; ‘Ubbaa Haariya GODAI hagaadan yaagees; “Inttenoo, Israa7eela asatoo, intte oottiyo tuna oosoi eqqo. <sup>7</sup> Intte taayyo ta qumaa, modhdhuwaanne suuttaa yarshsho oottidi shiishshiyo wode, wozanainne ashoi qaxxaret-tibeenna allaga asata ta Beeta Maqidasiyaa gelissidi, eti a tunissanaadan oottideta. Intte tunatettaa ubbaa bollankka gujjidi, ta maachchaa kanttideta. <sup>8</sup> Qassi ta geeshsha miishshatu bolli aawatennan ixixidi, ta Beeta Maqidasiyan allagata aawayideta” yaagees.

<sup>9</sup> “Hegaa gishshau, Ubbaa Haariya GODAI hagaadan yaagees; “Israa7eela asaa gid-don de7iya allaga asi, ba wozanaanne ba ashuwan qaxxarettibeennaagee, ooninne ta Beeta Maqidasiyaa geloppo.

### *Leewati Ekkiyo Qixaatiyaa*

<sup>10</sup> ““Taappe haakkida Leewati, Israa7eela asai tana aggidi wora simmin, bantta eeqatussi goinnanau wora simmidaageeti, bantta qixaatiyaa ekkona. <sup>11</sup> Gidikkonne, eti ta Beeta Maqidasiyan oosanchcha gidona; ta Beeta Maqidasiyaa dirssaa penggeta naag-ona; Beeta Maqidasiyaa oosuwaakka ootona. Eti xuuggiyo yarshshuwaanne asai ehiyo hara yarshshuwaa shukkona; qassi asaassi oottanau, eti asaakko shiiqona. <sup>12</sup> SHin eti kase Israa7eela asaa eeqatussi goinissido gishshaunne asaa nagaran onggiya xube gidido gishshau, eti bantta nagaraa qixaatiyaa ekkanaadan, taani caaqqaa. Taani Ubbaa Haariya GODAI haggaa odais. <sup>13</sup> Eti qeese gididi oottanau taakko shiiqoppona; woikko taassi dummatida geeshshabaakkonne ubbaappe aadhdhida geeshshabaakko shiiqoppona. Eti bantta oottido tuna oosuwa gishshau, yeellaa maayona. <sup>14</sup> Gidikkonne, eti Beeta Maqidasiyan aawatanaadaaninne a giddon oottanau de7iya ooso ubbaakka oottanaadan, taani eta sunttana.

### *Qeesetu Wogaa*

<sup>15</sup> ““SHin Israa7eela asai tana aggidi, wora simmido wode, ta Beeta Maqidasiyaa wogaa ammanettidi polida, Leewa zare qeeseti, Xaadooqa yarati, eti taayyo oottanau taakko shiiqona. Modhdhuwaanne suuttaa shiishshiiddi, eti ta sinttan ootona. Taani Ubbaa Haariya GODAI haggaa odais. <sup>16</sup> Ta Beeta Maqidasiyaa eti gelona; taayyo oottanau ta yarshshiyooosaa eti shiiqona; aawatettaakka eti oiqqona. <sup>17</sup> Eti Beeta Maqidasiyaassi giddo dabaabaa geliyo wode, liinuwaappe dadettida maayuwa maayona; giddo dabaabaa penggen woikko Beeta Maqidasiyaa giddon oottiyo wode, suufe maayo maayoppona. <sup>18</sup> Eti bantta huuphiyan liinuwa shaashiyaa xaaxona; bantta

xeessankka liinuwaa suriyaa gixxona. Banttana cawayiyaabaa aibanne maayoppona. <sup>19</sup> Asai de7iyo kare dabaabaa eti kiyiyo wode, Beeta Maqidasiyan oottiiddi maayido maayuwaa qaaridi, geeshsha kifiletun wottona. Hegee xayikko, eti bantta geeshsha maayuwan asaa GODAASSI geeshshana.

<sup>20</sup> “ “Qeeseti bantta huuphiyaa meedettooppona, woikko bantta dishkkuwaa adusoppona; bantta huuphiyaa likkiyan qanxxissona. <sup>21</sup> Ai qeeseenne giddo dabaabaa geliyo wode, woine eessaa uyoppo. <sup>22</sup> Eti azini haiqqido, woikko yeddido maccaasa ekkoppona. Israa7eela asaappe geela7iyo ekkona; woikko azinai qeese gididi de7iiddi haiqqido maccaasa ekkona.

<sup>23</sup> “ “Qeeseti GODAASSI dummatidabaappenne dummatennan coo de7iyaabaappe gidduwan de7iya dummatettaa ta asaa tamarissona. Qassi geeshshaappenne tunaappe gidduwan de7iya dummatettaa eta bessona. <sup>24</sup> Ai mootoi denddikkokka, qeeseti higgee odiyoogaadan pirddona. Ta higgiaanne ta wogaa naagidi, ta baalata bonchchona; ta Sambbataakka dummayidi bonchchona.

<sup>25</sup> “ “Qeesee haiqqida ahaakko shiiqidi, bana tunissoppo. Gidikonne, haiqqidaagee aawa, woikko aayo, woikko yelido attuma na7a, woikko macca na7a, woikko isha, woikko azina gelabeenna michcho gidikko, bana tunisso. <sup>26</sup> Tunidoogaappe guyyiyan, laappun gallassaa qoodidi takko. Hegaappe guyyiyan, i geeshsha gidana. <sup>27</sup> Hegaappe simmidi, Geeshsha Sohuwan oottanau giddo dabaabaa biyo gallassi, ba nagaraa yarshshuwaa shiishsho. Taani Ubbaa Haariya GODAI haggaa odais.

<sup>28</sup> “ “Qeesetuyyo laati baawa; taani etayyo laata. Israa7eela biittan etayyo aiba laatanne immoppite; eta laatai tana. <sup>29</sup> Eti kattaa yarshshuwaa, nagaraa yarshshuwaanne naaquwaa yarshshuwaa moona. Israa7eela biittan GODAASSI dummayidobai ubbai etassa. <sup>30</sup> Koiro gakkiiya dumma dumma kattaayyo koiro aifeenne intte GODAAYYO immiyo imota ubbai qeesetussa. Intte keettan anjjoii shemppana mala, intte xiilliyaappe koiro kushiyaa etayyo immite. <sup>31</sup> Qeeseti bautidabaa woikko do7i woridobaa kafo asho gidin, mehe asho gidin, aibanne mooppona.

## 45

### *GODAASSI Dummayido Saamaa*

<sup>1</sup> “ “Biittaa intte laattanau saaman shaakkiyo wode, he biittaappe issi saamaa GODAASSI dummayidi wottite. Hegeekka tammanne naa77u kilo meetirene bagga aduqqiyaanne tammu kilo meetire aakkiya soho gido. He sohoi muleekka geeshsha soho gido. <sup>2</sup> He sohuwaappe zananai 500 wara, gomppaikka 500 wara gidido sohoi Beeta Maqidasiyaassa gido; a yuushuwan 50 wara gidida kayye sohoi de7o. <sup>3</sup> He GODAAYYO dummayido sohuwaappe zananai tammanne naa77u kilo meetirene bagga, gomppai qassi ichchashu kilo meetire gidido sohuwaa likkada shaakka. Hegan Beeta Maqidasee, ubbaappe aadhdhida geeshsha sohoi de7o. <sup>4</sup> Hegee Beeta Maqidasiyaa giddon GODAASSI oottanau, akko shiiqiya qeesetussi dummatida geeshsha soho gido; qassi eti bantta keettaa keexxiyo sohonne Beeta Maqidasiyaayyokka geeshsha soho gido. <sup>5</sup> Qassi attiya tammanne naa77u kilo meetire bagga aduqqiyaanne ichchashu kilo meetire bagga aakkiya sohoi Beeta Maqidasiyan oottiya Leewatussa gido; eti banttau de7iyo katamata hegan keexxona.

<sup>6</sup> “ “He GODAAYYO dummayido sohuwaa miyyiyan tammanne naa77u kilo meetirene bagga aduqqiyaanne naa77u kilo meetirene bagga aakkiya sohoi katamaa keexxanau de7o; he sohoi Israa7eela asaassa ubbaassa gido.

### *Israa7eela Halaqaassi Imettida Saamaa*

<sup>7</sup> “ “Israa7eela halaqaassi imettida saamai naa77u baggaarakka GODAAYYO dummayido sohuwaaninne katamaa sohuwan zawatees. I arggo baggaara Meediteraane



Abbaa gaktees; arshsho baggaara qassi biittaayyo arshsho bagga zawaa gaktees. Ayyo zananai Israa7eela zariyaappe issuwaa saamaadan, arggo bagga zawaappe biidi, arshsho bagga zawaa gaktees. <sup>8</sup> He saamai Israa7eela biittaa halaqaassi laata gade gido. Hagaappe sinttan ta halaqati ta asaa huqqunnoppona; eti Israa7eela asai ubbai ba zariyan zariyan gadiyaa ekkanaadan ootona” yaagees.

### *Halaqati Azazettiyo Higgiyaa*

<sup>9</sup> “Ubbaa Haariya GODAI hagaadan yaagees; “Inttenoo, Israa7eela halaqatoo, intteyyo ha77i gidana! Intte makkaliyoogaanne asaa huqqunniyoogaa aggite; suure pirddaanne xillotettaa oottite. Ta asaa eta laata biittaappe xoqollidi gooddiyoogaa aggite. Taani Ubbaa Haariya GODAI haga odais.

<sup>10</sup> “ “Intte ubbaayyookka likke meezaanainne lagge gidida makkiyoobai de7o. <sup>11</sup> Likkiyoobatu ubbaayyo giddo gidiyaagee homare<sup>2</sup> yaagiyo likkiyo miishsha gido. Melabaa makkiyo eefaa giyo miishshai homaree oiqqiyoogau tammantto kushe gido; qassi gukkiyaabaa makkiyo baatiyaa giyo miishshaikka homariyaayyo tammantto kushe gido. Hegaa giyoogee efaanne baatee bixe lagge giyoogaa. <sup>12</sup> Guuttabaa likkiyo wode, intte likkiyo miishshai saqile<sup>3</sup> gido. Laatamu gerai issi saqile gido; qassi usuppun tammu saqilee issi minaane gido.

<sup>13</sup> “ “Intte imuwaa immiiddi, hagaadan immite. Intte qoxxi shiishshiyo gist-tiyaappe usuppun tammaappe issi kushiya, banggaappe usuppun tammaappe issi kushiya, <sup>14</sup> qassi wogaraa zaitiyaappe xeetaappe issi kushiya immite. Hageeta likkiyo wode, neeni makkiyo miishshai baate gido. Tammu baatee issi homare woikko issi koore gidees. <sup>15</sup> Israa7eela asai heemmiyo naa77u naa77u xeetu dorssai de7iyo issi wudiyaappe issi issi dorssa immite. Hegeeti asaa nagaraa atto giissanau, kattaa yarshsho, xuuggiyo yarshshonne issippetetta yarshsho gidona. Taani Ubbaa Haariya GODAI haga odais. <sup>16</sup> Biittan de7iya asai ubbai haga ubbaa Israa7eela halaqaassi immo. <sup>17</sup> Halaqai oottanau bessiya oosoi, Israa7eela asai bonchchiyo baalatun, aginai xeeriyo gallassatuuninne Sambbatatun xuuggiyo yarshshota, kattaa yarshshotanne ushshaa yarshshota shiishshiyoogaa. Israa7eela asaa nagaraa atto giissanau, nagaraa yarshshota, kattaa yarshshota, xuuggiyo yarshshotanne issippetetta yarshshota ubbaa i shiishsho” yaagees.

<sup>18</sup> “Ubbaa Haariya GODAI hagaadan yaagees; “Koiro aginan, koiro gallassi tilla bollaara de7iya issi mirgguwaa Beeta Maqidasiyaa geeshshanau shiishsha. <sup>19</sup> Qeesee ha nagaraa yarshshuwaa suuttaappe ekkidi, Beeta Maqidasiyaa penggiyaa qosilet-tata, yarshshiyoosaa yuushuwan de7iya xekkaayyo de7iya oiddu zoozetanne giddo dabaabaa efiya dirssaa penggiyaa qosilettata tiyo. <sup>20</sup> Ooninne balidi woikko erana xayidi oottido nagaraa atto giissanau, aginaassi laappuntta gallassan hegaadankka ootta. Yaataada Beeta Maqidasiyaa tunatettaappe geeshsha.

<sup>21</sup> “ “Koiro aginan, tammanne oiddantto gallassan Paasikaa Baalaa bonchchite; qassi laappun gallassi gakkanaashin, irshshoi gelibeenna oittaa miite. <sup>22</sup> He koiro gallas-san halaqai ba gishshaanne ba asaa gishshaa nagaraa yarshsho oottidi, issi korimaa shiishsho. <sup>23</sup> He baalai bonchchettiyo laappun gallassatun hachchi hachchi laappun korimatanne laappun dorssa orggeta ubbaikka tilla bollaara de7iyaageeta xuuggiyo yarshsho oottidi, GODAASSI shiishsho. Hegaarakka issippe nagaraa yarshshuwaassi hachchi hachchi issi deeshsha orggiyaa shiishsho. <sup>24</sup> Issi issi korimaanne issi issi dorssa orggiyaa yarshshiyo wode, kattaa yarshshuwaassi 22 kilo giraame gisttiyaanne heezzu litiro zaitiyaa shiishsho.

<sup>2</sup> 45:11 Homare: Issi homaree 220 kilo giraame woikko 220 litiro gidees. <sup>3</sup> 45:12 Saqile: Issi saqilee tammanne isiini giraamenne bagga deexxees.



25 “ “Laappuntta aginan, tammanne ichchashantta gallassan doommiya laappun gallassa baalaa wodiyan ubban, nagaraa yarshshuwaa, xuuggiyo yarshshuwaa, kattaa yarshshuwaanne zaitiyaa kaseegaappe dummayennan halaqai shiishsho” yaagees.

## 46

### *Goinuwaa Wogaa*

1 “ ‘Ubbaa Haariya GODAI hagaadan yaagees; “Giddo dabaabaa gelissiya arshsho bagga dirssaa penggee ooso gallassatun usuppunatunkka gorddetidi gam77o; shin Sambbata gallassinne aginai xeeriyo gallassi dooyetto. 2 Israa7eela asaa halaqai dirssaayyo pengge bagga dabaabaappe geliyo baranddaa baggaara gelidi, dirssaa pengge mittaa matan eqqo. Eqqidaashin qeeseti i immido xuuggiyo yarshshuwaanne issippetettaa yarshshuwaa yarshshona. I hegan dirssaa penggen goinnidi, simmidi kare kiyo. SHin dirssaa penggee omaranaashinkka gorddettoppo. 3 He biittaa asaikka Sambbataanne aginai xeeriyo wodiyan he dirssaa penggiyaa geliyoosan, GODAA sinttan goinnona.

4 “ “Halaqai Sambbata gallassi GODAASSI xuuggiyo yarshsho oottidi, usuppun dorssa maratanne issi dorssa orggiyaa, ubbaikka tilla bollaara de7iyaageeta shiishsho. 5 Issi dorssa orggiyaara 22 kilo giraame kattaa yarshshuwaa shiishsho. Dorssa maratuura shiiqiya kattaa yarshshoi halaqai bau shiishshanau koyidoogaa keena gido. Qassi 22 kilo giraame kattaara heezzu litiro zaitee shiiqo.

6 “ “Aginai xeeriyo gallassi gallassi qassi issi mirgguwaa, usuppun dorssa maratanne issi dorssa orggiyaa, ubbaikka tilla bollaara de7iyaageeta shiishsho. 7 Issi issi mirgguwaanne issi issi dorssa orggiyaa yarshsho wode, kattaa yarshshuwaassi 22 kilo giraame gisttiyaanne heezzu litiro zaitiyaa shiishsho. Dorssa maratuura shiiqiya kattaa yarshshoi halaqai bau shiishshanau koyidoogaa keena gido. 8 Halaqai geliiddi, dirssaa penggiyaa baranddaara aadhdhidi gelo; kiyiiddikka hegaara kiyo.

9 “ “SHin he biittaa asai baala gallassi GODAA sinttan goinnanau yiyo wode, goinuwau huuphessa penggiyaara gelidaageeti tohossa penggiyaara kiyona; qassi tohossa penggiyaara gelidaageeti huuphessa penggiyaara kiyona. Ai asinne ba sinttan de7iya penggiyaara sitti giidi kiyoppe attin, ba gelidosaara kiyoppo. 10 Eti geliyo wode, halaqai etaara gelo; eti kiyiyo wodekka, etaara kiyo.

11 “ “Ufaissa gallassatuuninne laitta baalatun issi issi mirgguwaaranne issi issi dorssa orggiyaara shiiqiya kattaa yarshshoi 22 kilo giraame gisttenne heezzu litiro zaite gido. Qassi dorssa maratuura shiiqiya yarshshoi halaqai bau shiishshanau koyidoogaa keena gido. 12 Halaqai ba dosan immiyo yarshshuwaa, xuuggiyo yarshshuwaa, woikko issippetettaa yarshshuwaa GODAASSI ehiyo wode, arshsho bagga dirssaa penggee ayyo dooyetto. Ba xuuggiyo yarshshuwaa woikko issippetettaa yarshshuwaa Sambbata gallassi i shiishshiyooagaan shiishsho. Yaatidi i kiyidi bin, dirssaa penggee gorddetto.

### *Hachchi Hachchi SHiishshiyoo Yarshshuwaa*

13 “ “Halaqai hachchi hachchi tilla bollaara de7iya issi laitta gidido issi dorssaa xuuggiyo yarshsho oottidi, GODAASSI shiishsho; i heгаа maallado maallado paccennan eho. 14 Hegaarakka naa77u kilo giraame xiillee issi litiro zaitiyan munaqettidi, maallado maallado katta yarshsho gididi shiiqo. Hagee intte GODAASSI hachchi hachchi shiishshiyoo yarshshuwaa wogaa. 15 Hagee simmi dorssai, kattaa yarshshoinne zaitee paci bannan maallado maallado shiiqanau bessees” yaagees.

### *Halaqaa Gadiyaabaa*

16 “ ‘Ubbaa Haariya GODAI hagaadan yaagees; “Halaqai ba gadiyaappe shaakkidi, ba attuma naatuppe issuwaassi immikko, hegee he na7aassanne a naatussa gidees. 17 SHin halaqai ba gadiyaappe shaakkidi, ba ashkkaratuppe issuwaassi immikko, Ishatamantta

Laittaa baalai gakkanaashin, he gadee abaa. Hegaappe guyyiyan, halaqaassi simmo; hegee halaqaassa gidiyo gishshau, merinau assanne a naatu xalaalaassa. <sup>18</sup> Halaqai asaa sugidi, asaa laata gadiyaa wolqqan ekkoppo. Ta asai ba laata gadiyaappe xoqolettenna mala, i ba attuma naatussi ba gadiyaappe immo” yaagees’ yaaga” yaagiis.

### *Yarshshuwaa Doissiyu Sohota*

<sup>19</sup> Hegaappe guyyiyan, he bitanee tana huuphessi xeelliya, qeesetu kifiletukko geliyoosaa ehiis. Hegeetikka giddo dabaabau gattiya tohossa bagga dirssaa penggiyaa matan de7iyaageeta. Etappe arggo baggaara taani issi sohuwaa be7aas. Be7in i tana hagaadan yaagiis; <sup>20</sup> “Ha sohoi qeeseti nagaraa yarshshuwaanne naaquwaa yarshshuwaa doissiyu sohonne kattaa yarshshuwaa uukkiyo soho. Ha sohuwan go7ettiyo gaasoi he geeshsha yarshshota asaakko kare dabaabaa kessin, asai geeshshabaa bochchidi geeyennaadan naaganaassa” yaagiis.

<sup>21</sup> Hegaappe guyyiyan, he bitanee tana kare bagga dabaabau efidi, he dabaabaayyo oiddu zooziyaa tana yuushshiis. He dabaabaa zooziyan ubbankka qeeri dabaabati de7iyaageeta be7aas. <sup>22</sup> Etaubaukka zananai 40 wara; gomppaikka 30 wara; oiddu zooziyan de7iya dabaabatikka issi lagge. <sup>23</sup> He oiddu dabaabatu yuushuwankka shuchchaa gimbee de7ees; qassi gimbbiyaa lanqqiyan akko shiiqidi oosettida, tamaa eettiyo sohota de7oosona. <sup>24</sup> He bitanee tana, “Hageeti ubbai Beeta Maqidasiyan oottiyaageeti ehiyo yarshshuwaa doissiyu sohota” yaagiis.

## 47

### *Beeta Maqidasiyaa Garssappe Pulattiya Haattaa*

<sup>1</sup> He bitanee zaaridi, tana Beeta Maqidasiyaa geliyoosaa efiiis. Beeta Maqidasiyaa geliyo penggiyaappe garssaara haattai pulattidi, Beeta Maqidasiyaappe arshsho baggi goggees. Beeta Maqidasiyaayyo tohossa baggaara duge goggidi, yarshshiyooosaaappe tohossa baggaara kanttees. <sup>2</sup> I tana huuphessa penggiyaa baggaara kessidi, arshshokko xeelliya penggiyaa yuushuwaara kaalettidi efiiis. He penggiyaappe tohossa baggaara haattai goggees.

<sup>3</sup> He bitanee likkiyo meetiriyaa ba kushiyan oiqqidi, arshsho baggi biidi, goggiya haattaa kaallidi, 1,000 waraa likkiis. Likkidi tana haattaa giddoora kaalettiis; haattai taayyo meeshi meqettaa gakees. <sup>4</sup> Naa77anttokka 1,000 waraa likkidi, haattaa giddoora tana kaalettiis. Haattai taayyo gulbbataa gakkiiis. Qassi 1,000 waraa likkidi, tana haattaa giddoora kaalettiis. He wode haattai taayyo xeessaa gakkiiis. <sup>5</sup> I qassikka 1,000 waraa likkiis. SHin he haattai daro ciimma gidido gishshau, taani pinnanau danddayabeikke; i asi wadhdhennan pinnanau danddayenna shaafa gidiiis. <sup>6</sup> He bitanee tana, “Laa asa na7au, haggaa be7adii?” yaagiis.

Hegaappe guyyiyan, i tana shaafaa gaxau guyye zaariis. <sup>7</sup> Taani simmada yaa gakkiiyo wode, shaafaa doonan ha baggaaranne ya baggaara keehi daro mittai de7iyaaggaa be7aas. <sup>8</sup> I tana hagaadan yaagiis; “Ha haattai arshsho bagga biittau goggidi, Aaraba Wombban geles. I hegan goggenna Maxine Abban geliyo wode, he haattai ooraxxidi, xillo haatta kiyees. <sup>9</sup> Ha shaafai goggidi biyo sohuwan de7iya, sham77i giya meretati ubbai paxa de7ana; qassi he shaafai yaa goggidi, abbaa haattaa ooraxxissidi xillissiyu gishshau, qoodan daro corattida moleti yan de7ana. Hegaappe denddaagan, he shaafai goggiyoosan de7iyaabai ubbai paxa de7ana. <sup>10</sup> Moliyaa oiqqiyaageeti abbaa doonan eqqana; Enggaadappe biidi En-Egilaima gakkanaashin de7iya sohoi moliyaa oiqqanau gitiyaa yeggiyo soho gidana. Meediteraane Abban de7iya moletudan, hegankka daro dumma dumma qommo moleti de7ana. <sup>11</sup> SHin abbaa doonan de7iya careenne deellee maxine gididi attanappe attin, ooraxxokkona. <sup>12</sup> He shaafaa doonan ha baggaaranne ya baggaara miyo aifiyaa aifiya, daro dumma dumma qommo mittati

de7ana. Eta haittai qoqqofettenna; aifiyoogaakka aggokkona. Beeta Maqidasiyaappe kiyiya haattai etakko goggiyo gishshau, eti aginan aginan ooratta aifiyaa aifana. Eti aifido aifee quma gidana; eta haittaikka xale gidana” yaagees.

<sup>13</sup> Ubbaa Haariya GODAI hagaadan yaagees; “Israa7eela zaretussi tammanne naa77atussi biittaa laata gade oottada, neeni shaakana zawai haggaa. Yooseefa zaretussi naa77u saamai imetto. <sup>14</sup> Taani kase intte maizza aawatuyyo ha biittaa laatissanau caaqqas; ha77i intte ubbaikka likkiyan shaakkidi laattite.

<sup>15</sup> “Biittaayyo huuphessa bagga zawai haggaa: Meediteraane Abbaappe denddidi, Hetiloona katamaanne Hamaata Pinuwaa kanttidi, Xedaade katamaa gakkées.

<sup>16</sup> Hegaappe qassi Berootanne (Damasqqoppenne Hamaatappe giddo zawan de7iya) Sibraima katamata kanttidi, Hauraana zawan de7iya Tiikona<sup>4</sup> katamaa gakkées.

<sup>17</sup> Hegaassi Israa7eela biittaayyo huuphessa bagga zawai Hamaata biittaa huuphessa baggau aggidi, Meediteraane Abbaappe arshsho baggi biidi, Damasqqo biittaa zawan de7iya Haxaari-Enaana katamaa gakkées.

<sup>18</sup> “Arshsho bagga zawai Haxaari-Enaanappe denddidi, Damasqqoppenne Hauraanappe gidduwaara kanttees. Hegaappe qassi Israa7eelappenne Gala7aadeppa gidduwan de7iya Yorddaanoosa SHaafan zawatiiddi, Maxine Abbaa kanttidi biidi, Taamaara katamaa gakkées.

<sup>19</sup> “Tohossa bagga zawai Taamaarappe denddidi biidi, Mariiba Qaadeesan de7iya pulttuwaa gakkanaashiina. Hegaappe huuphessaara arggo baggaa oiqqidi, Gibxxe SHaafaa kaallidi biidi, Meediteraane Abbaa gakkées.

<sup>20</sup> “Arggo bagga zawai Meediteraane Abbaa gididi, huuphessa baggaara Hamaata Pinuwaappe arggo baggaa gakkées.

<sup>21</sup> “Hegaa gishshau, ha biittaa Israa7eela zaretu likkiyan shaakki ekkite.

<sup>22</sup> Intteyyoonne intte giddon naata yelidi de7iya betetuyyo biittaa laata oottidi shaakkite. Eta intte intte biittan yelettida Israa7eela asadan xeellite. Eti inttenaara issippe Israa7eela zaretuura gadiyaa saaman ekkona. <sup>23</sup> Betee Israa7eelan ai zariyaara de7ikkokka, he i de7iyo zariyaa giddon ayyo laata biittaa immite. Taani Ubbaa Haariya GODAI haggaa odais.

## 48

### *Biittaa SHaahuwaa*

<sup>1</sup> “Biittaa shaakkanau mazggafettida zaretu sunntai haggaa: Huuphessa baggaara issi saamai Daana zariyaayyo imetto. Hegeekka Hetiloonappe Hamaatau efiya ogiyaa kaallidi, hegaappekka Damasqqo biittan de7iya Haxaari-Enaana katamaa gakkées. Hegee arshshoppe biidi arggo gakkanau de7iya sohuwaassi huuphessa bagga zawa gidana.

<sup>2</sup> Daana zawaara oiqettidi, arshshoppe arggo gakkanaashin de7iya issi saamai Aseera zariyaayyo imetto. <sup>3</sup> Aseera zawaara oiqettidi, arshshoppe arggo gakkanaashin de7iya issi saamai Niftaaleema zariyaayyo imetto. <sup>4</sup> Niftaaleema zawaara oiqettidi, arshshoppe arggo gakkanaashin de7iya issi saamai Minaase zariyaayyo imetto. <sup>5</sup> Minaase zawaara oiqettidi, arshshoppe arggo gakkanaashin de7iya issi saamai Efireema zariyaayyo imetto. <sup>6</sup> Efireema zawaara oiqettidi, arshshoppe arggo gakkanaashin de7iya issi saamai Roobeela zariyaayyo imetto. <sup>7</sup> Roobeela zawaara oiqettidi, arshshoppe arggo gakkanaashin de7iya issi saamai Yihudaa zariyaayyo imetto.

### *Biittaayyo Giddo Ginan De7iya Dumma Sohuwaa*

<sup>4</sup> 47:16 Tiikona: Ibraawettuwan Hazer-Hatikkon geetettes.

<sup>8</sup> “Yihudaa zawaara oiqettidi, arshshoppe arggo gakkanaashin de7iya issi saamaa dummaya wotta. Ayyo gomppai tammanne naa77u kilo meetireenne bagga gidees. Arshshoppe arggo gakkanaashin de7iya zananai issi zariyaa shaakkin gakkiya saamaara lagge. Ayyo giddo ginan Beeta Maqidasee de7ees.

<sup>9</sup> “He saamaappe neeni GODAASSI dummayada wottiyo sohoi tammanne naa77u kilo meetireenne bagga adussanne tammu kilo meetire aaho gido. <sup>10</sup> He sohuwaayyo baggai qeesetuyyo dummayido soho gido; i huuphessa baggaara tammanne naa77u kilo meetireenne bagga adussa; arggo baggaara ichchashu kilo meetire aahonne arshsho baggaarakka ichchashu kilo meetire aaho; qassi tohossa baggaara tammanne naa77u kilo meetireenne bagga adussa. GODAA Beeta Maqidasee ayyo giddo ginan de7ees. <sup>11</sup> Ha dummayi wottido sohoi Israa7eela asai ta ogiyaappe wora simmiyo wode, etaara wora simmida Leewatudan gidennan, ammanettidi taayyo oottiiddi gam77ida, geeshsha qeesetussi, Xaadooqa yaratussi imetto. <sup>12</sup> Hegee GODAASSI dummayido biittaappe etayyo dumma saama; i ubbaappe aadhdhida geeshsha. Eta saamai Leewatu saaman zawato.

<sup>13</sup> “Qeesetu zawaara oiqettidi, Leewatuyyookka zananai tammanne naa77u kilo meetire bagga, gomppaikka ichchashu kilo meetire gidido issi saamai imetto. <sup>14</sup> Eti he gadiyaappe aibanne baizzoppona woikko laammoppona. Hegee biitta ubban dummatidaagaa gidiyo gishshau, hara asa kushiyan gelanau bessenna; GODAASSI i geeshsha soho.

<sup>15</sup> “Attida naa77u kilo meetireenne bagga aahonne tammanne naa77u kilo meetireenne bagga adussa sohoi katamaa asai ubbai keettaa keexxiyoonne mehiyaa heemmiyo soho gido; katamai he biittaayyo giddo ginan de7o. <sup>16</sup> He katamai oiddu zooziyaara de7ees. Huuphessa baggai 4,500 wara; tohossa baggai 4,500 wara; arshsho baggai 4,500 wara; arggo baggaikka 4,500 wara. <sup>17</sup> Katamaassi hentta gadee de7o; he gadee huuphessa baggaara, tohossa baggaara, arshsho baggaaranne arggo baggaara 250 wara aaho gido. <sup>18</sup> Geeshsha sohuwaa baggaara attida sohoi arshshokko wadhdhiyo wode, zananai ichchashu kilo meetire; arggo baggi wadhdhiyo wode, zananai ichchashu kilo meetire. He sohuwan mokiidabai ubbai he kataman oottiyaageetussi quma gidana. <sup>19</sup> Israa7eela zare ubbaappe he kataman oottanau yiyaageeti he biittaa goyona. <sup>20</sup> Intte dummayiyo sohoi muleera oiddu zooziyaarakka tammanne naa77u kilo meetireenne bagga aduqqees. He sohoi katamai keexettido sohuwaanne geeshsha sohuwaa banan gujjees.

<sup>21-22</sup> “Beeta Maqidasiyaappe, qeesetu saamaappe, Leewatu saamaappenne katamaa sohuwaappe arshsho baggaaranne arggo baggaara de7iya attida biittai halaqaassa gido. He biittaassi gomppai tammanne naa77u kilo meetireenne bagga. He halaqaa biittai huuphessa baggaara Yihudaa gakkida saaman, tohossa baggaara Biniyaama gakkida saaman zawatees.

### *Attida Zaretussi Imettida Biittaa*

<sup>23</sup> “Attida zaretussi biittai hagaadan shaahettees. Arshshoppe arggo gakkanaashin, issi saamai Biniyaama zariyaayyo imetto. <sup>24</sup> Biniyaama zawaara oiqettidi, arshshoppe arggo gakkanaashin de7iya issi saamai Simoona zariyaayyo imetto. <sup>25</sup> Simoona zawaara oiqettidi, arshshoppe arggo gakkanaashin de7iya issi saamai Yisaakoora zariyaayyo imetto. <sup>26</sup> Yisaakoora zawaara oiqettidi, arshshoppe arggo gakkanaashin de7iya issi saamai Zaabiloona zariyaayyo imetto. <sup>27</sup> Zaabiloona zawaara oiqettidi, arshshoppe arggo gakkanaashin de7iya issi saamai Gaada zariyaayyo imetto. <sup>28</sup> Gaada tohossa zawai Taamaara katamaappe denddidi, Mariiba Qaadeesan de7iya pulttuwaara kanttidi, Gibxxe SHAafaa kaallidi biidi, Meediteraane Abbaa gakkees.

<sup>29</sup> “Intte Israa7eela asaassi shaakkana biittai haggaa; hageeti eta gakkana saamata. Taani Ubbaa Haariya GODAI haggaa odais.

*Katamaa Penggeta*

<sup>30-31</sup> “Katamaappe kiyiyo penggeti hageeta. Eti Israa7eela zaretu sunttan xeegettana. Huuphessa dirssaa gimbbee 4,500 wara aduqqana; he gimbbiyan Roobeela penggiyaa, Yihudaa penggiyaanne Leewa penggiyaa geetettiya heezzu penggeti de7ana. <sup>32</sup> Arshsho dirssa gimbbee 4,500 wara aduqqana; he gimbbiyan Yooseefa penggiyaa, Biniyaama penggiyaanne Daana penggiyaa geetettiya heezzu penggeti de7ana. <sup>33</sup> Tohossa dirssaa gimbbee 4,500 wara aduqqana; he gimbbiyan Simoona penggiyaa, Yisaakoora penggiyaanne Zaabiloona penggiyaa geetettiya heezzu penggeti de7ana. <sup>34</sup> Argo dirssaa gimbbee 4,500 wara aduqqana; he gimbbiyan Gaada penggiyaa, Aseera penggiyaanne Nifttaaleema penggiyaa geetettiya heezzu penggeti de7ana.

<sup>35</sup> “Katamaa yuushoi muleera likkin, 18,000 wara gidana. He wodeppe doommidi he katamai, ‘GODAI Hegan De7ees’ yaagetetidi xeesettana” yaagees.



## Daaneela Hiraagaa

### *Gidduwaa Erissuwaa*

Daaneela maxaafai xaafettidoogee Aihuda asati Aihuda gidenna kawotettatu haaruwaa garssan aqidi, gita yedetainne huqqunnai gakkini, eti barchchiyaa be7iyo wodiyaana. Maxaafaa xaafidaagee ajjuutaappe beettida taariketuuninne oosotun go7ettidi, he wode de7iya asaa minttettees. Xoossai huqqunnidi haariya kawuwaa xaissidi, asaa huqqunnaa qashuwaappe kessanaagau hidootaa immees.

Ha maxaafai naa77u waanna waanna kifiletun shaahettees.

1. Daaneelinne aara issippe omooduwan de7iya amarida asati Xoossaa ammaniyo mino ammanuwaaninne ayyo azazettiyo hanotan bantta morkketa xoonidoogaa odiya taariketa gidishin, etikka polettidoogee Baabiloonenne Parsse kawotettaa laittaana.
2. Daaneeli dumma dumma ajjuutaa be7iis. He ajjuutati leemisuwan bessiiddi, Baabilooneppe doommidi, dumma dumma kawotettati dendra dendra kundanaagaanne eta haariya Aihuda gidenna kawoi xayin, Xoossaa asai xoonuwaa demmanaagaa bessees.

### *Daaneelinne A Laggeti Baabiloonen Tamaaridosona*

<sup>1</sup> Yihudaa Kawoi Yo7aqeemi kawotido heezzantto laitti, Baabiloone Kawoi Naabukadanaxoori Yerusalaame katamaa bolli woraajjidi, he katamaa dooddiis.

<sup>2</sup> Godai Yihudaa Kawuwaa Yo7aqeemanne Xoossaa Beeta Maqidasiyan de7iya miishshatuppe unddenaagaa a kushiyan aattidi immiis. Immin ikka he miishshata Baabiloone biittan de7iya ba xoossatu eeqa keettaa ehiis; ehiidi ba xoossaa miishshaa minjjiyo keettan wottiis.

<sup>3</sup> Hegaappe guyyiyan, kawoi Ashifanaaza giyo ba oosanchchatu halaqaa hagaadan yaagidi azaziis; “Israa7eela asaa giddoppe kawo zare gidiyaageetanne gita asatu zare gidiyaageeta doora. <sup>4</sup> Doorana yelagati asatettan wottiyooobi bannaageeta, malanchchata, ai tamarissikkokka eranau danddayiyaageeta, akeekiyaageeta, erattetai kumidoogeetanne kawuwaa keettan oottanau danddayiyaageeta. Eta Baabiloonetu qaalaanne xifatiyaa tamarissa” yaagiis. <sup>5</sup> Qassi eti hachchi hachchi maana qumainne uyana woiniyaa eessai kawuwaassi ka77ida kattaappenne ushshaappe gidanaadan, kawoi azaziis. Hegaadankka, heezzu laittaa loohidoogaappe guyyiyan, kawuwaa sintti shiiqidi, oosuwaa doommanaadan kuuyiis.

<sup>6</sup> Doorettidaageetu giddoppe Yihudaa zare gidiyaageeti Daaneela, Hanaaniyaa, Mishaa7eelanne Azaariyaa giyoogeeti de7oosona. <sup>7</sup> Oosanchchatu halaqai eta sunntaa laammidi, Daaneela Bilxxaasoora, Hanaaniyaa Sidiraaqa, Mishaa7eela Misaaqa, Azaariyaa Abbdanaago giidi sunntiis.

<sup>8</sup> Daaneeli kawuwaa qumaa miyoogaaninne woiniyaa eessaa uyiyoogan bana tunisenna mala, ba wozanan qofaa qachchiis; qachchidi he qofan maayanaadan, oosanchchatu halaqaa woossiis. <sup>9</sup> Woossin he halaqai Daaneela sabbana malanne ayyo qarettana mala, Xoossai oottiis. <sup>10</sup> Gido shin, oosanchchatu halaqai Daaneelayyo odiiddi, “Taani intteyyo ha qumaanne ushshaa azazida ta godaa kawuwaayyo yayyais. Inttenaara laggetiya yelagatu som77uwaappe intte som77oi gilqqi beettikko, intte gaasuwan kawoi tana worana” yaagiis.

<sup>11</sup> Hegaappe guyyiyan, oosanchchatu halaqai sunntin Daaneela, Hanaaniyaa, Mishaa7eelanne Azaariyaa hadaraa ekkida bitaniyaa Daaneeli hagaadan yaagiis, <sup>12</sup> “Nuuyyo maanau ataakiltte xalaalaa, uyanaukka haatta xalaalaa immada, nuna ne ashkharata tammu gallassatun paacca. <sup>13</sup> Hegaappe guyyiyan, nu som77uwaanne

kawo qumaa miya yelaga asatu som77uwaa xakkaya xeellada, nuna ne ashkkarata neeyyo milati beettidaagaadan ootta” yaagiis.

<sup>14</sup> Yaagin i hegaa maayidi, tammu gallassaa eta paacciis. <sup>15</sup> Tammu gallassaappe guyyiyan, kawuwaa qumaa miida yelagatu ubbaappe payyidinne anqqaridi beettidosona. <sup>16</sup> Yaatin, etau battido qumaanne woiniyaa eessaa diggirgidi, ataakilttiyyaa immiis.

<sup>17</sup> Ha oiddu yelagatuuyo Xoossai eraanne ubba qommo xifateenne timirttee geliyo akeekaa immiis. Daaneeli qassi ajjuutaanne aimuwaa ubbaa birshshettaa erees.

<sup>18</sup> Kawoi yelagati baakko gelanaadan azazido wodee polettin, oosanchchatu halaqai eta Naabukadanaxoora sintti aattiis. <sup>19</sup> Kawoi eta haasayissido wode, Daaneela, Hanaaniyaa, Mishaa7eelanne Azaariyaa mala asi eta gidon beettibeenna. Yaatin, eti kawuwaassi oottanau gelidosona. <sup>20</sup> Kawoi eta oichchido ai aadhdhida erattetanne akeeka oishan, a kawotettan de7iya shareechchotuppenne murunniyaageetu ubbaappe eti tammu kushe aadhdhidi beettidosona. <sup>21</sup> Daaneeli Kawoi Qiirsoosi kawotido koiro laittai gakkanaassi oottiiddi gam77iis.

## 2

### *Naabukadanaxoora Aimuwaa*

<sup>1</sup> Naabukadanaxoori ba kawotido naa77antto laitti aimuwaa aimottiis. He aimoi a keehin shabbirin, xiskkoi a efeennan ixxiis. <sup>2</sup> Yaatin, i aimottido aimuwaa ayyo yootana mala, shareechchoti, murunniyaageeti, bitiyaageetinne aadhdhida eranchchati xeegetti yaanaadan kawoi azaziis. Azazin yiidi, a sinttan eqqidosa. <sup>3</sup> Kawoi eta, “Taani tana shabbiriya aimo aimottaas; he aimoi aibakko eranau koyais” yaagiis.

<sup>4</sup> Aadhdhida eranchchati kawuwaa Sooretu 1 qalan, “Kawuwau, merinau de7a! Ne aimuwaa nuuyyo ne ashkkaratuyyo yoota; nuuni neessi a birshshettaa yootana” yaagidosona.

<sup>5</sup> Yaagin kawoi aadhdhida eranchchata hagaadan yaagiis; “Taani minttada qachchido qofai haggaa. Intte ha aimuwaanne a birshshettaa tana erissana xayikko, taani inttena qanxxa yeggana; intte keettati buura ule kiyana. <sup>6</sup> SHin intte aimuwaanne a birshshettaa taayyo yootikko, imuwaa, woiuwaanne daro bonchchuwaa taappe intte ekkana. Hegaa gishshau, ane aimuwaanne a birshshettaa tana erissite” yaagiis.

<sup>7</sup> Yaagin naa77anttuwaakka eti zaaridi, “Kawoi aimuwaa nuuyyo ba ashkkaratuyyo yooto; nuuni a birshshettaa erissana” yaagidosona.

<sup>8</sup> Yaagin kawoi etassi zaaridi, “Taani intte halchchuwaa erais; taani minttada qachchido qofaa inttekka erido gishshau, hagganaa sugana giidi haneeta. <sup>9</sup> Intte aimuwaa taayyo yootana xayikko, issi pirddai inttena naagees. Hanotai laametana giidi intte ufaissaa oottiyo gishshau, taayyo worddonne gene qaalaa yootanau maqettideta. Hegaa gishshau, aimuwaa taayyo yootite; yaatikko, intte a birshshettaa erissanau danddayiyoogaa taani erana” yaagiis.

<sup>10</sup> Aadhdhida eranchchati kawuwau zaaridi, “Kawoi oichchiyo oishaa zaaranau danddayiya issi asinne biittan baawa. Ai gitatidanne wolqqaamida kawoikka haggaa malabaa shareechchota, murunniyaageeta woikko aadhdhida eranchchata oichchi erenna. <sup>11</sup> Kawoi oichchido oishai deexo; asaara issippe de7enna xoossatuppe attin, haggaa kawuwaassi qonccissanau danddayiyaabi mulekka baawa” yaagidosona.

<sup>12</sup> Hegaa gishshau, kawoi yiillotiis; keehippe hanqqettiis. Hanqqettidi Baabiloonen de7iya aadhdhida eranchchata ubbaa wurssanaadan azaziis. <sup>13</sup> Azazin aadhdhida eranchchata woranau awaajoi kiyiis. Kiyin woriyaageeti Daaneelanne a laggeta woranau koyidosona.

<sup>1</sup> 2:4 Daaneela 2:4 ppe biidi miraafiyaa 7 gakkanaashin Sooretu qalan xaafettiis.

*Xoossai Daaneela Aimuwaa Birshshettaa Erissiis*

<sup>14</sup> Kawuwaa naagiya olanchchatu halaqai Ariyooki, Baabiloonen de7iya aadhdhida eranchchata woranau kiyiyo wode, Daaneeli a akeekaaninne hiillan haasayissiis. <sup>15</sup> I kawuwaa naagiya olanchchatu halaqaa Ariyooka, “Kawuwaa awaajoi aissi hagaadan palattidee?” giidi oichchiis. Oichchin Ariyooki hanotaa Daaneelayyo odiis. <sup>16</sup> Hegan Daaneeli kawuwaakko gelidi, aimuwaa birshshettaa erissanau, baayyo wodee imetana mala woossiis.

<sup>17</sup> Hegaappe guyyiyan, Daaneeli ba soo simmidi, ba heezzu laggetuyyo, Hanaaniyaayyo, Mishaa7eelayyoonne Azaariyaayyo hanotaa odiis. <sup>18</sup> Eti Baabiloonen de7iya hankko aadhdhida eranchchatuura issippe haiqqennaadan, saluwaa Xoossai maarotaa etau oottidi, ha xuuraa etau qonccissanau woossana mala, etau yootiis.

<sup>19</sup> He qamman xuurai Daaneelayyo ajuutan qoncciiis. Yaatin, Daaneeli saluwaa Xoossaa hagaadan yaagidi galatiis;

<sup>20</sup> “Aadhdhida eratettainne wolqqai  
Xoossaassa gidiyo gishshau,

a sunttai merinaappe merinaa gakkanaassi galatettidaagaa gido.

<sup>21</sup> Wodetanne aginata i laammees.

Kawota kawotettaappe diggees;

qassi kawota kawotettan utissees.

Aadhdhida eranchchatuyyo aadhdhida eraa,

akeekiyaageetuyyookka eraa i immees.

<sup>22</sup> Ciimma xuuraanne geemmida yohuwaa  
i qonccissees.

Xuman de7iyaabaakka i erees;

poo7oikka aara de7ees.

<sup>23</sup> Abeet ta maizza aawatu Xoossau,  
taani nena galataisinne sabbais.

Aissi giikko, neeni taayyo

aadhdhida eraanne wolqqaa immadasa.

Nuuni nena oichchidoogaa

tana ha77i erissadasa.

Kawuwaa aimuwaa nuna erissadasa”  
yaagiis.

*Daaneeli Aimuwaanne A Birshshettaa Kawuwaa Erissiis*

<sup>24</sup> Hegaappe guyyiyan, Daaneeli Baabiloonen de7iya aadhdhida eranchchata wurssanau kawuwaappe azazuwaa ekkida Ariyookakko biidi, “Aadhdhida eranchchata woroppa. Tana kawuwaakko gelissa; yaatobare taani a aimuwaa birshshettaa a erissana” yaagiis.

<sup>25</sup> Ariyooki sohuwaara Daaneela kawuwaakko gelissidi, kawuwaassi, “Yihudaappe omoodettidi yiida asaappe kawuwaa aimuwaa birshshettaa erissanau danddayiya asa demmaas” yaagiis.

<sup>26</sup> Kawoi Bilxxaasoora geetettiya Daaneela, “Taani aimottido aimuwaanne a birshshettaa tana erissanau danddayai?” giidi oichchiis.

<sup>27</sup> Oichchin Daaneeli hagaadan yaagidi zaariis; “Kawuwau, neeni oichchido xuuraa qonccissanau danddayiya aadhdhida eranchchi, shareechchoi, murunniyaabi, woikko maliyaabi baawa. <sup>28</sup> SHin xuurata qonccissiya issi Xoossai saluwan de7ees. Wurssetta gallassatun hananabaa i nena bessiiis. Ne arssan zaqqullada, neeni aimottido aimoinne ajuutai haggaa.

<sup>29</sup> “Kawuwau, neeni arssan zaqqullada, sinttappe hananabaa qoppadasa. He wode xuuraa qonccissiya Xoossai sinttappe hananabaa nena bessiiis. <sup>30</sup> Ha xuurai taassi

qonccidoogee taani hara asaappe aadhdhida eranchcha gidiina gidennan, neeni kawoi aimuwaa birshshettaa eranaadaananne ne huuphe giddon simerettida qofaa akeekanaadaana.

<sup>31</sup> “Kawuwau, neeni keehi gita, phooliyaanne xeellanau yashshiya misilee ne sinttan eqqidaagaa be7adasa. <sup>32</sup> Ha misiliyaa huuphee geeshsha worqqaappe, a tirainne kusheti biraappe, uloinne wodirati nahaasiyaa giyo birataappe, <sup>33</sup> suilee birataappenne tohuwau yachchai baggai birataappe baggai urqqaappe merettiis. <sup>34</sup> Neeni ha misiliyaa xeellishin, issi shuchchai asa kushee bochchennan deriyaappe xoqolettidi, birataappenne urqqaappe merettida misiliyaa tohuwaa yachchatu bolli wodhdhidi gaacciis. <sup>35</sup> He wode biratai, urqqai, nahaase giyo biratai, birainne worqqai ubbai gaacettidi, boniyan audiyana de7iya suullaa mala gidiis; gidin aibanne ashshennan carkkoi pittidi efis. SHin misiliyaa bolli wodhdhida shuchchai wogga dere kiyidi, biittaa sa7aa kumiis.

<sup>36</sup> “Hagee ne aimuwaa; qassi ha77i birshshettaa nuuni neeyyo odana. <sup>37</sup> Kawuwau, neeni kawotuyyo kawo. Saluwaa Xoossai neeyyo kawotettaanne wolqqa, minotettaanne bonchuwaa immiis. <sup>38</sup> Biitta ubbaa bollan nena haariyaagaa oottiis; asaa, bazzo do7aanne saluwaa kafuwaa ne kushiyan wottiis. Hega gishshau, worqqa huuphee nena.

<sup>39</sup> “Neepe guyyiyan, minotettan nena gakkenna hara kawotettai denddana. Kaalidi, biittaa ubbaa haariya, nahaase birata gidiya, heezzantto kawotettai denddana. <sup>40</sup> Wurssettan ubbabaa gaaceretti liiqissiya birataadan minnida oiddantto kawotettai denddana. Biratai ubbabaa gaacerettidi liiqissiyooagaan, ikka baappe kase denddida kawotettata gaacerettidi liiqissana.

<sup>41</sup> “Tohotinne tohuwaa biradhdheti baggai birataappe, baggai urqqaappe merettidoogee taani be7idoogaadankka, he kawotettai shaahettida kawotetta gidana. Biratai urqqaara walakettidaagaa ne be7idoogaadankka, baggai birataadan minnidagaa gidana. <sup>42</sup> Tohuwaa biradhdheti baggai birata, baggai urqqa gididoogaadan, hegaadankka ha kawotettau baggai mino, baggai laafa gidana. <sup>43</sup> Biratai urqqaara walakettidaagaa ne be7idoogaadan, he naa77u bagga asai geluwan ehuwan walakettana; shin biratai urqqaara walakettanau danddayennaagaadankka, eti issuwaa gididi gam77anau danddayokkona.

<sup>44</sup> “He kawotu laittan, saluwaa Xoossai mulekka kunddenna, hara asaukka imettenna kawotettaa essana. He eqqida kawotettai he kawotettata ubbaa gaaceretti xaissana; shin i merinau eqqidi daana. <sup>45</sup> Asa kushee bochchennan deriyaappe xoqoletti wodhdhidi, birataappe, nahaasiyaappe, urqqaappe, biraappenne worqqaappe merettida misiliyaa gaacerettida shuchchaa birshshetta he kawotettaa.

“Gita Xoossai sinttanau hananabaa kawuwaa bessiiis. Aimoikka tuma; birshshetaikka ammanettidaagaa” yaagidi zaariis.

### *Kawoi Daaneelassi Woitiis*

<sup>46</sup> Hegaappe guyyiyan, Kawoi Naabukadanaxoori Daaneela bonchchidi, som77uwaa biittaa gattidi gufanniis; yaatidi asai a sinttan yarshshuwaa yarshshanaadaaninne ixaanaa cuwayanaadan azaziis. <sup>47</sup> Kawoi Daaneela, “Tumaappe ne Xoossai xoossatu Xoossaa, kawotu Godaanne xuuraa qonccissiyaagaa. Neeni ha xuuraa qonccissanau danddayidoogee hegaassa” yaagiis.

<sup>48</sup> Hegaappe guyyiyan, kawoi Daaneela keehi bonchchiis; daronne al77o imotatakka ayyo immiis; Baabiloone biittaa haariyaagaa oottiis. Qassi Baabiloonen de7iya aadhdhida eranchchatu ubbaa bolli halaqa oottidi, a sunttiis. <sup>49</sup> Daaneeli oichchin, kawoi Sidiraaga, Misaaqanne Abbdanaaga Baabiloone biittaa aissiyaageeta oottidi sunttiis; shin Daaneeli kawo keettan gam77iis.

### 3

#### *Naabukadanaxoori Essido Worqqa Misiliyaa*

<sup>1</sup> Kawoi Naabukadanaxoori geesai usuppun tammu wara, gomppai usuppun wara gidiyo misiliyaa worqqaappe medhdhidi, Baabiloone biittan Duura Dembban essiis.

<sup>2</sup> Essidi he misiliyaa anjjissanau yaanaadan, kawoppe garssaara biittaa haariyaageeta, ola gadaawata, auraajjaa haariyaageeta, kawuwaa zoriyaageeta, miishsha keettan oottiyaageeta, pirdda daannata, higge eranchchatanne auraajjan auraajjan de7iya hara halaqata xeegeis. <sup>3</sup> Yaatin, kawoppe garssaara biittaa haariyaageeti, ola gadaawati, auraajjaa haariyaageeti, kawuwaa zoriyaageeti, miishsha keettan oottiyaageeti, pirdda daannati, higge eranchchatinne auraajjan auraajjan de7iya hara halaqati issippe he misiliyaa anjjissanau shiiqidi, Kawoi Naabukadanaxoori essido misiliyaa sinttan eqqidosona.

<sup>4</sup> He wode awaajuwaa awaajjiyaagee ba qaalaa xoqqu oottidi, hagaadan yaagiis; “Inttenoo, asau, kawotettatoo, dumma dumma qalan haasayiya zaretoo, <sup>5</sup> ubbaikka malkkataa, pulaaliyaa, maazingqiyaa, diittaanne cora baqettan waaxettida diittaa issippe kaa7iyo wode siyosaarakka, Kawoi Naabukadanaxoori essido worqqa misiliyaayyo gufannidi goinnite. <sup>6</sup> Misiliyaa sinttan gufannidi goinnenna urai ooninne eexxiya itoone tamaa giddo olettana” yaagiis.

<sup>7</sup> Yaagin asai ubbai, kawotettati ubbainne dumma dumma qalan haasayiya zareti ubbai malkkataa, pulaaliyaa, maazingqiyaa, diittaanne cora baqettan waaxettida diittaa issippe kaa7iyo wode siyosaarakka, biittan gufannidi, Kawoi Naabukadanaxoori essido worqqa misiliyaayyo goinnidosona.

#### *Misiliyaayyo Goinnennan Ixxida Heezzu Aihudata Mootidosona*

<sup>8</sup> Hegaa gishshau, he wode issi issi Baabiloone asati sinttau aadhdhidi, Aihudata mootidosona. <sup>9</sup> Eti Kawuwaa Naabukadanaxoori hagaadan yaagidosona; “Kawuwau, merinau de7a. <sup>10</sup> Kawuwau, neeni malkkataa, pulaaliyaa, maazingqiyaa, diittaanne cora baqettan waaxettida diittaa issippe kaa7iyo wode, siyiya ooninne biittan gufannidi, worqqa misiliyaayyo goinnanaadan, <sup>11</sup> qassi biittan gufannidi goinnenna asi de7ikko, eexxiya itoone tamaa giddo olettanaadan awaajuwaa kessadasa. <sup>12</sup> SHin kawuwau, neeni Baabiloone biittaa bolli sunttido Aihudati, Sidiraaqi, Misaaqinne Abbdanaagoi ne azazuwaa ixxidosa; ne xoosatuyyo oottokkona; qassi ne essido worqqa misiliyaayyookka goinnokkona” yaagidosona.

<sup>13</sup> Naabukadanaxoori heгаа siyido wode, hanqquwaa eexxi kiyidi, Sidiraaqa, Misaaqanne Abbdanaaga ehaanaadan azaziis. Azazin eta kawuwaa sintti ehiidosona. <sup>14</sup> Naabukadanaxoori eta hagaadan yaagiis; “Sidiraaqaa, Misaaqaa, Abbdanaagoo, ha intte ta xoosatuyyo oottennaageenne ta essido worqqa misiliyaayyo goinnennaagee tumee? <sup>15</sup> Ha77i malkkataa, pulaaliyaa, maazingqiyaa, diittaanne cora baqettan waaxettida diittaa kaa7iyoogaa siyiyo wode, taani essido misiliyaayyo gufannidi goinnikko, daro lo77o. SHin intte goinnennan ixzikko, sohuwaara eexxiya itoone tamaa giddon olettana. Ai xoossee inttena ta kushiyaappe ashshanai?” yaagiis.

<sup>16</sup> Sidiraaqi, Misaaqinne Abbdanaagoi kawuwaassi zaaridi, “Kawuwau Naabukadanaxooraa, ha yohuwan nuuni neeyyo zaaruwaa immanau bessenna. <sup>17</sup> Kawuwau, nuuni eexxiya itoone tamaa giddo olettiyaakkokka, nuuni ayyo oottiyo Xoossai he tamaappe nuna ashshanau danddayees. Qassi kawuwau, i nuna ne kushiyaappekka ashshana. <sup>18</sup> SHin kawuwau, ubba i nuna ashshennan ixxiyaakkokka, nuuni ne xoosatuyyo oottennaagaanne neeni essido worqqa misiliyaayyo goinnennaagaa era” yaagidosona.

#### *Heezzu Aihudata Haiquwau Pirddidosona*



<sup>19</sup> He wode Naabukadanaxoori Sidiraaqa, Misaaqanne Abddanaago bolli hanqquwaa suulliis; suullin a som<sup>77</sup>oi etau kaseegaappe dummatiis. Tamai kase eexxiyoogaappe laappun kushiyaa aadhdhidi eexxanaadan azaziis. <sup>20</sup> Sidiraaqa, Misaaqanne Abddanaaga qachchidi, eexxiya itoone tamaa giddo olanaadan, ba olanchchatu giddoppe mino asata azaziis. <sup>21</sup> Yaatin, ha asata, eta qoliyaara, suriyaara, huuphiyan xaaxido xaattaaranne hara maayo ubbaara gatti qachchidi, eexxiya itoone tamaa giddo olidosona. <sup>22</sup> Kawuwaa azazoi keehi esoo gidido gishshaunne itoone tamaikka kaseppe aadhdhi eexxiyo gishshau, Sidiraaqa, Misaaqanne, Abddanaaga taman olida he mino asata tamaa lacoï wori aggiis. <sup>23</sup> Ha heezzu qashettida asati, Sidiraaqi, Misaaqanne Abddanaagoi, eexxiya itoone tamaa giddo wodhdhididosona.

<sup>24</sup> Hegaappe guyyiyan, Kawoi Naabukadanaxoori bana maalaalissin eesuwan denddi eqqidi, “Nuuni qachchidi eexxiya itoone tamaa giddo olido asati heezza gidokkon-aayye?” yaagidi bana zoriyaageeta oichchiis.

Oichchin eti, “Kawuwau, ee heezza” yaagidi zaaridosona.

<sup>25</sup> Kawoi zaaridi, “Be7ite, taani qashuwaappekka birshshettidi, tamaa giddon yaa, haa hemeterettiya, tamaikka ainne bochchenna oiddu asata be7ais! Oiddanttoi qassi xoossatu na7a milatees,” yaagiis.

#### *Heezzu Aihudati Tamaappe Kiyidosona*

<sup>26</sup> Yaatin, Naabukadanaxoori eexxiya itoone tamaa lanqqe shiiqidi, ba qaala xoqqu oottidi, “Ubbaappe Xoqqiya Xoossaa ashkkaratoo, Sidiraaqaa, Misaaqaa, Abddanaagoo, kiyite! Kiyidi haayite!” yaagidi xeegiis. Yaatin, Sidiraaqi, Misaaqanne Abddanaagoi tamaa giddoppe kiyidosona. <sup>27</sup> Kawoppe garssaara biittaa haariyaageeti, ola gadaawati, auraajjaa haariyaageeti, kawuwaassi oottiya hara halaqati ubbai etakko shiiqididosona. SHiiqidi tamai eta bolla bochchibeennaagaa, eta huuphiyaa binnaanaappe issoikka malaatettibeennaagaa, eta maayoikka labettibeennaagaanne tama peenoikka etan bannaagaa be7idosona.

<sup>28</sup> Hegaappe guyyiyan, Naabukadanaxoori hagaadan yaagiis; “Sidiraaqa, Misaaqanne Abddanaago Xoossai galatetto! I ba kiitanchchaa kiittidi, banan ammanettida ba ashkkarata ashshiis. Eti kawuwaa azazuwaa ixxididosona; bantta Xoossaappe attin, hara xoossaassi oottanaappenne goinnanaappe haiqqanaagaa dosidosona. <sup>29</sup> Hega gishshau, Sidiraaqa, Misaaqanne Abddanaago Xoossaa toochchidi haasayiya ai asikka, woikko ai kawotettikka, woikko dumma dumma qalan haasayiya ai zareekka qanxxettanne muxettana mala, eta keettaikka laalettidi, pito doore gidana mala, taani awaajjaas. Aissi giikko, hara ai xoossinne hagaadan oottidi, asa ashshenna” yaagiis.

<sup>30</sup> Hegaappe guyyiyan, kawoi Sidiraaqa, Misaaqanne Abddanaaga Baabiloone biittan xoqqu xoqqu oottidi sunttiis.

## 4

#### *Naabukadanaxoori Aimottido Naa77antto Aimuwaa*

<sup>1</sup> Kawoi Naabukadanaxoori asa ubbaassi, kawotettatu ubbaassinne dumma dumma qalan haasayiya zaretu ubbaassi hagaadan yaagidi, dabddaabbiyaa kiittiis.

“Saro de7eetii!

<sup>2</sup> “Ubbaappe Xoqqiya Xoossai taayyo oottido maalaalissiyaabaanne oorattabaa taani intteyyo odanau koyais.

<sup>3</sup> “A malaatai aiba gitee!

I oottiyo oorattabai aiba minoo!

A kawotettai merinaa kawotetta;

a maataikka yeletaappe yeletaa gakkanaashiina.

<sup>4</sup> “Taani Naabukadanaxoori ta kawo keettan gita duretettaaninne injjiyan de7ais. <sup>5</sup> Issi gallassi taani tana yashshiya aimo aimottaas. Taani ta arssan zaqqullada, be7ido aimoinne ajjuutai tana daganttiis. <sup>6</sup> Hegaa gishshau, ha aimuwaa birshshettaa tana erissana mala, Baabiloonen de7iya aadhdhida eranchchata ubbaa taakko ehaanaadan azazaas. <sup>7</sup> He wode shareechchoti, murunniyaageeti, aadhdhida eranchchatinne xoolinttiyaa paidiyaageeti taakko yin, ta aimuwaa etau yootaas; shin eti birshshettaa tana erissanau danddayibookkona. <sup>8</sup> Wurssettan ta xoossaa sunttan Bilxxaasoora geetetti xeegettiya, geeshsha xoossatu ayyaanai aani de7iyo Daaneeli taakko gelin, ayyo ta aimuwaa hagaadan gaada yootaas.

<sup>9</sup> “Aadhdhida eranchchatu halaqau Bilxxaasoora, geeshsha xoossatu ayyaanai nenan de7iyoogaanne ai xuurinne neeppe geemmennaagaa taani erais. Taani aimottido aimoi haggaa; ane taayyo a birshshettaa oda.

<sup>10</sup> “Taani ta arssan zaqqullada, biittaassi giddo ginan issi mittai eqqidaagaa ajjuutan be7aas; he mittau geesai daro adussa. <sup>11</sup> He mittai diccidi gitatiisinne minniis; ayyo xeera saluwaa gakkees; sa7aappe sa7aa gaxaa gakkanaashin beettes. <sup>12</sup> He mittaa haittai xeellanau lo77iyaagaa; a aifeekka keehi daro; ubbaukka miyoobi an de7ees. Bazzo do7ati a kuwan shemppidosona; saluwaa kafotikka a daashshaa gidдон keexxidi de7idosona. Paxa de7iya ubbai appe miis.

<sup>13</sup> “Ta arssan zaqqullada, geeshsha kiitanchchai saluwaappe wodhdhishin ajjuutan be7aas. <sup>14</sup> Ikka ba qaalaa xoqqu oottidi, hagaadan yaagiis; “Ha mittaa qanxxite; a tashiyaa karite; a haittaakka pirxxite; a aifiyaakka laalite. A garssan de7iya do7atinne a daashshan de7iya kafoti ubbai baqatona. <sup>15</sup> SHin durumaanne a xaphuwaa birataappenne nahaasiyaappe qoxxido sanssalatan qachchidi, biittan, maataa gidдон aggi bayite. Saluwaappe wodhdhiya akkan ka77o; qassi bazzuwan maataa gidдон do7aara de7o. <sup>16</sup> A wozanai kahai asaagaappe do7aagau laametto. Hegaadan hanidaashin, a bolli laappun laittai wuro. <sup>17</sup> Ubbaappe Xoqqiya Xoossai asaa naatu kawotetta ubbaa haariyoogaa, kawotetta i ba koyiyo uraassi immiyoogaanne harai atto, asa ubbaappe karettidaageetakka i sunttiyoogaa paxa de7iya asai ubbai erana mala, qasho qofaa kiitanchchati awaajjidosa. Pirddaakka geeshshati odidosona” yaagiis.

<sup>18</sup> “Taani Kawoi Naabukadanaxoori aimottido aimoi haggaa. Ha77i simmi Bilxxaasoora, taayyo a birshshettaa oda. Aissi giikko, ta kawotetta gidдон de7iya aadhdhida eranchchatuppe issoinne tana birshshettaa erissanau danddayibeenna; shin geeshsha xoossatu ayyaanai nenan de7iyo gishshau, neeni danddayaasa’ yaagaas.

### *Daaneeli Aimuwaa Birshshiis*

<sup>19</sup> “He wodiyan Bilxxaasoora geetettiya Daaneeli dagammidi, haniyoobaa xayiiis. I ba qofan shabbirettido gishshau, guutta wodiya co77u giidi takkiis. Yaatin, kawoi, ‘Bilxxaasoora, ha aimoinne a birshshettaa nena daganttoppo’ yaagiis.

“Yaagin Bilxxaasoori zaaridi, ‘Ta godau, ha aimoi nena ixxiyaageetussi, a birshshettaikka qassi ne morkketussi gideerenneeshsha! <sup>20</sup> Neeni aimuwan be7ido mittai, diccidi minnidaagee, xeera saluwaa gakkidoogee, sa7aappe sa7aa gaxaa gakkanaashin beetti-daagee, <sup>21</sup> haittai xeellanau lo77idoogee, aifeekka keehi daridoogee, ubbau miyoobi an de7iyoogee, bazzo do7ati a kuwan shemppidoogeenne saluwaa kafotikka a daashshaa gidдон keexxidi de7idoogee, <sup>22</sup> kawuwau, he mittai nena! Neeni gitatadasanne minnadasa; ne gitatetta diccidi, saluwaa gakkiiis; ne kawotaa maataikka sa7aa gaxaa gakkiiis.

<sup>23</sup> “Kawuwau, neeni geeshsha kiitanchchai saluwaappe wodhdhidi, “Ha mittaa qanxxidi xaissite; shin a durumaanne a xaphuwaa birataappenne nahaasiyaappe qoxxido sanssalatan qachchidi, biittan, maataa gidдон aggi bayite. Saluwaappe wodhdhiya akkan i ka77o; laappun laittai wurana gakkanaashin, bazzo do7adan de7o!” giyo wode be7adasa.

<sup>24</sup> “Kawuwau, a birshshettai hagua. Hagee Ubbaappe Xoqqiya Xoossai ta godaa kawuwaa bolli polanau kiittido pirddaa. <sup>25</sup> Neeni asa giddoppe goodettada, bazzo do7atuura issippe de7ana. Neeni booradan maataa maananne saluwaappe wodhdhiya akkan ka77ana. Qassi Ubbaappe Xoqqiya Xoossai asaa naatu kawotetta ubbaa haariyoogaanne kawotettaa ba koyido urau immiyoogaa neeni erana gakkanaashin, laappun laittai ne bollan aadhdhana.

<sup>26</sup> “Durumai ba xaphuwaara biittan attanaadan azazettidoogee, neeni saluwaa Xoossai biittaa ubbaa haariyoogaa eriyo wode, ne kawotetta neeyyo simmanaagaa bessees. <sup>27</sup> Hegaa gishshau, kawuwau, ta zoriyaa ekka. Nagaraa oottiyoogaa aggada, xillobaa ootta; huqqunnettidaageeta naaqqiyoogaa aggada, etau qaretta. Yaatin, geella neeni saro de7ana wodee aduqqikkonne’ yaagiis.

<sup>28</sup> “Hagee ubbai Kawuwaa Naabukadanaxoora bolli gakkiiis. <sup>29</sup> Tammanne naa77u aginaappe guyyiyan, kawoi Baabiloonen de7iya kawo keetta bolli dembbayi keexxidosan hemettiiddi <sup>30</sup> hagaadan yaagiis; ‘Hagee ta kawo keetta an de7ana mala, taani ta gita wolqqan, ta gitatettaa bonchchuwaassi gimbbissido Baabiloone katamaa gitaa gidennee?’ yaagiis.

<sup>31</sup> “I haasayidi wurssennan de7ishin, saluwaappe hagaadan giya qaalai puttu giis; puttu giidi, ‘Kawuwaa Naabukadanaxoora, ne bollan pirddettida pirddai hagua: ne kawotetta neeppe ekettiis. <sup>32</sup> Neeni asaa giddoppe goodettada, bazzo do7aara daana; neeni booradan maataa maana. Ubbaappe Xoqqiya Xoossai asaa naatu kawotetta ubbaa haariyoogaanne kawotettaa i ba koyido uraassi immiyoogaa neeni erana gakkanaashin, laappun laittai ne bolli aadhdhana’ yaagiis.

<sup>33</sup> “Naabukadanaxoora bolli giidobai sohuwaarakka polettiis. Asa giddoppe goodettidi, booradan maataa miis. A bollaikka saluwaappe wodhdhiya akkan ka77iis. A binnaanai ankuwaa baalliyaadan, a xugunntaikka kafuwaa xugunntaadan dicciis.

### *Naabukadanaxoori Xoossaa Galatiis*

<sup>34</sup> “He laappun laittai wurido wode, taani Naabukadanaxoori xoqqu gaada saluwaa xeellaas; ta wozanai kahaikka simmiis. Simmin Ubbaappe Xoqqiya Xoossaa galataas; merinau de7iyaagaakka bonchchaasinne sabbaas.

“A maatai merinaa maataa;  
a kawotettaikka yeletaappe yeleta gakkanaashiina.

<sup>35</sup> Sa7an de7iya asai ubbai  
ayyo aibanne gidenna.

Saluwan de7iya kiitanchchatu bollinne  
sa7an de7iya asaa bolli  
i ba dosaa oottees.

A kushiyaa teqqanau danddayiyaabi baawa,  
woikko a ‘Ai oottai?’ yaagidi  
oichchiyaabi baawa.

<sup>36</sup> “Ta wozanai simmaanne, ta kawotettaa bonchchuwaa gishshau, ta anggainne ta puulai taayyo simmi aggiis. Kase tana zoriyaageetinne ta oosanchchati tana koyidosona. Taani ta kawotettan minnaas; kasegaappekka aadhdhiya gitatetta taayyo gujettiis.

<sup>37</sup> “Ha77i simmi taani Naabukadanaxoori saluwaa Kawuwaa galatais; a xoqqu xoqqu oottaisinne bonchchais. Aissi giikko, i oottiyoobai ubbai likke; a ogeti ubbaikka xillo; qassi otoruwan biyaageeta i kaushshanau danddayees” yaagidi xaafiis.

<sup>1</sup> Issi gallassi Kawoi Belshshaaxaari ba oosanchchatuppe issi sha7atussi gibiraa giigis-siis; giigissidi etaara issippe woiniyaa eessaa uyiis. <sup>2</sup> Belshshaaxaari woiniyaa eessaa uyidi, ba aawai Naabukadanaxoori Yerusalaamen de7iya Beeta Maqidasiyaappe ehiido worqqaappenne biraappe oosettida ushsha miishshata ehaana mala azaziis. Aissi giikko, inne a oosanchchati, a keettaayetinne a baakkoti ubbai he ushsha miishshatun eessaa uyana mala, i koyiis. <sup>3</sup> Yaatin, eti he Yerusalaamen de7iya Xoossaa Beeta Maqidasiyaappe ehiido worqqaappe oosettida ushsha miishshata kawuwaayyo ehiidosona. Ehin kawoi, a oosanchchati, a keettaayetinne a baakkoti he miishshatun tigettida woine eessaa uyidosona. <sup>4</sup> Eti he woine eessaa uyiiddi, worqqaappe biraappe, nahaasiyaappe, birataappe, mittaappenne shuchchaappe oosettida xoossata galatidosona.

<sup>5</sup> He wode qoppennan de7ishin, asa kushe biradhdheti auppeikko kiyidi yiidi, kawo keettan meeshettida godaa bollan, xomppiyaa wottiyo ballaa sinttan xaafidosona. He kushee xaafiyo wode, kawoi ba huuphen be7iis. <sup>6</sup> Be7in a som77oi laamettidi, bidintta milatiis; qassi yashshan a gaadee kokkoriis; a gulbbataikka ixxiis.

<sup>7</sup> Kawoi ba qaalaa xoqqu oottidi, murunniyaageeta, aadhdhida eranchchatanne xoolinttiyaa paidiyaageeta ehaanaadan azaziis. Eti yin Baabiloone aadhdhida eranchchata hagaadan yaagiis; “Ha xifatiyaa nabbabidi, a birshshettaa tau yootiya uri ooninne, ochchaa teeraa milatiya maayuwa maayana; a qooriyan worqqa sanssalataa aattana; qassi i ta kawotettaa haariya heezzantto asa gidana” yaagiis.

<sup>8</sup> Hegaappe guyyiyan, kawuwaa aadhdhida eranchchati ubbai a sintti aadhdhdidosona; shin etappe ooninne he xifatiyaa nabbabanau, woikko a birshshettaa odanau danddayibeenna. <sup>9</sup> Hegan Kawoi Belshshaaxaari kaseegaappe aadhdhi dagammin, a som77oikka kaseegaappe aadhdhi bidintta milatiis. A oosanchchatikka haniyoobaa xayidosona.

<sup>10</sup> Kawoinne a oosanchchati wocamiyoogaa a aayiyaa kawiyaa siyada, eti gibiraa miyo aaho keettaa gelada, hagaadan yaagaasu; “Kawuwau, merinau de7a! Ha qofan keehi shabbiretoppa; ne som77oikka laamettoppo. <sup>11</sup> Geeshsha xoossatu ayyaanai an de7iyo issi asi ne kawotettaa gidдон de7ees. Erai, akeekainne xoossatuugaa mala aadhdhida eratetta an de7ees. Kase ne aawai Kawoi Naabukadanaxoori a shareechhotussi, murunniyaageetussi, xoolinttiyaa paidiyaageetussinne aadhdhida eranchchatussi halaqa oottidi sunttiis. <sup>12</sup> Aissi giikko, ayyo lo77o ayyaanai, erainne akeekai de7ees; aimuwaa birshshanau, qan77ishiyaa odanaunne xuuraa qonccissanau i danddayees. Hega gishshau, kawoi Bilxxaasoora giidi sunttido Daaneela xeesa. I neeyyo xifatiyaa birshshettaa odana” yaagaasu.

### *Daaneeli Xifatiyaa Birshshiis*

<sup>13</sup> He wodee Daaneela kawuwaakko ehin, kawoi a hagaadan yaagiis; “Neeni Daaneelee? Ta aawai kawoi Yihudaappe omooddidi ehiidoogeetuppe issuwaa giyoi nenee? <sup>14</sup> Xoossatu ayyaanai nenan de7iyoogaanne erai, akeekainne keehi aadhdhida eratetta neeyyo de7iyoogaa taani siyaas. <sup>15</sup> Ha xifatiyaa nabbabanaunne a birshshettaa taayyo odanau murunniyaageetinne aadhdhida eranchchati yiidosona; shin eti birshshettaa taayyo odanau danddayibookkona. <sup>16</sup> Neeni birshshettaa odanaunne deexo oishatu zaaruwaa immanau danddayiyoogaa taani siyaas. Ha77i simmi neeni ha xifatiyaa nabbabanaunne a birshshettaa taayyo odanau danddayikko, ochchaa teeraa milatiya maayuwa maayana; ne qooriyan worqqa sanssalatai aadhdhana; qassi neeni kawotettaa haariya heezzantto asa gidana” yaagiis.

<sup>17</sup> Yaagin Daaneeli kawuwaassi zaaridi, “Neeni immiyo imoi neessa gido; ne woiuwaakka hara urau imma. Taani mati xifatiyaa kawuwaassi nabbabana; birshshettaakka odana.

<sup>18</sup> “Kawuwau, Ubaappe Xoqqiya Xoossai ne aawaa Naabukadanaxoorassi kawotaa, gitatettaa, bonchchuwaanne angгаа immiis. <sup>19</sup> I ayyo immido gitatettaa gaasuwan

he asatinne duma duma qaala haasayiya zaretii ayyo yayyidosonanne kokkoridosona. Ba woranau koyiyoogaa woriis; ashshanau koyiyoogaakka ashshiiis; ba xoqqissanau koyidoogaakka xoqqiisiiis; kaushshanau koyidoogaakka kaushshiiis. <sup>20</sup> SHin i otorettido wodenne a wozanai muumido wode, ba kawotaa araataappe wodhdhiis; a bonchchoikka qaarettiis. <sup>21</sup> Asaa giddoppe goodettiis; a wozanai kahaikka laamettin, do7a mala gidiis. Booradan maataa miiddi, dembbaa haretuura issippe de7iis. A bollaikka saluwaappe wodhdhiya akkan ka77iis. Hegeekka Ubbaappe Xoqqiya Xoossai asaa naatu kawotetta ubbaa haariyoogaanne i ba koyido uraassi immiyoogaa i erana gakkanaassa.

<sup>22</sup> “SHin nenoo, Belshshaaxaaraa, neeni a na7ai he ubbaa eraiddakka, ne huuphiyaa ziqqi oottabaakka. <sup>23</sup> Qassi Saluwaa Godaa bollan otorettada, ne huuphiyaa xoqqu xoqqu oottadasa. A Beeta Maqidasiyaappe bonqqiyan yiida worqqa miishshata neeni ehi-issin, ne oosanchchati, ne keettaayetinne ne baakkoti woiniyaa eessaa etan uyidosona. Qassi xeellanau, siyanaunne eranau danddayenna xoossata, biraappe, worqqaappe, nahaasiyaappe, birataappe, mittaappenne shuchchaappe oosettidaageeta galatadasa. Ne shemppuwaanne ne gelaa kessaa ba kushiyan oiqqida Xoossaa bonchchabaakka. <sup>24</sup> Hegaa gishshau, ha kushe biradhdheti appe kiitettin, ha xifatee xaafettiis.

<sup>25</sup> “Xifateekka, ‘MANEE, MANEE, TAQEEL, UUFARSSIIN’ yaagiyaagaa. <sup>26</sup> A birshshetaikka haggaa;

MANEE (goodettiis) giyoogee Xoossai ne kawotaa laittaa qoodidi, wuranaadan oottiis giyoogaa.

<sup>27</sup> TAQEEL (mazzanettiis) giyoogee meezaanan mazzanettada, kauyyada beettadasa giyoogaa.

<sup>28</sup> PAREES (shaahettiis) giyoogee ne kawotetta shaahettidi, Meedoonatuyyoonne Parssetuyyo imettiis giyoogaa” yaagiis.

<sup>29</sup> Hegaappe guyyiyan, Belshshaaxaari azazin, ochcha teeraa milatiya maayuwaa Daaneela maizzidosona; a qooriyanka worqqa sanssalataa aattidosona; qassi kawotetta haariya heeztantto asa gidanaadan awaajjidosa.

<sup>30</sup> He galla qammi morkketi gelidi, Baabiloone Kawuwaa Belshshaaxaara woridosona. <sup>31</sup> Worin a kawotetta Meedooniyaa Daariyoosi ekkiis. He wode Daariyoosayyo laittai usuppun tammanne naa77a.

## 6

### *Daaneeli Gaammotu Ollan Olettiis*

<sup>1</sup> Kawoi Daariyoosi ba kawotetta ubbaa gidдон baappe garssaara biittaa haariya xeetanne laatamu asata sunttiyoogee lo77o giidi qoppiis. <sup>2</sup> Qassi kawuwaassi aibanne pacissennaadan, he biittaa haariyaageeta xeellana mala, heezzu asata halaqa oottidi dooriis; doorettidaageetuppe issoi Daaneela. <sup>3</sup> Daaneeli oosuwaa oottanau bau de7iya duma eran hara halaqatuppenne biittaa haariyaageetuppe aadhdhidi beettiis. Hegaa gishshau, kawoi a ba kumetta kawotetta bolli bolla oottidi sunttanau halchchiis.

<sup>4</sup> Yaatin, biittaa haariyaageetinne halaqati Daaneela mootanau, i aissiyoo aisuwaa bolli bala demmana giidi koyidosona. SHin i keehi kiphatanne ammanettiya asa; qassi geellabaa oottenna asa gidido gishshau, a mootanau a bolli aiba balanne demmi-bookkona. <sup>5</sup> Wurssettan eti giiddi, “A Xoossaa higgiiyaa baggaara gidikkoppe attin, hara baggaara Daaneela mootiyoobaa demmokko” yaagidosona.

<sup>6</sup> Hegaappe guyyiyan, biittaa haariyaageetinne halaqati issippe kawuwaakko biidi, hagaadan yaagidosona; “Kawuwau Daariyoosaa, merinau de7a! <sup>7</sup> Nuuni ne kawotetta oosuwaa oottiya halaqati, biittaa haariyaageeti, ola gadaawati, zoriyaageetinne auraajjaa haariyaageeti ubbai maayido issi zoretai de7ees. Hegeekka hachchippe



biidi hasttamu gallassai gakkanaashin, ai asinne nena kawuwaa woossanaappe attin, hara ai asakka woikko ai xoossakka woossennaadan, neeni awaajuwaa kessanaassa; geelladan woossiyaabi de7ikko, gaammotu ollan olettanaadan neeni azazanaassa. <sup>8</sup> Simmi kawuwau, ha awaajoi shaarettenna Meedoonatunne Parssetu higgiaadan, minonne laamettennaagaa gidana mala parama” yaagidosona. <sup>9</sup> Hegaa gishshau, Kawoi Daariyoosi awaajuwaa xaafidi paramiis.

<sup>10</sup> Daaneeli awaajoi parametti kiyidoogaa erido wode, ba soo biis; biidi bolla pooqiyaa de7iya kifiliyaa geliis. He kifiliyaa maskkootee Yerusalaame baggi simmidi dooyetti uttidaashin, ba kase woossiyoogaadankka gulbbatidi, ba Xoossaa galatiiddi, hachchi hachchi heezzutoo woossiis.

<sup>11</sup> Hegaappe guyyiyan, ha asati issippe biidi, Daaneeli ba Xoossaa woossishiinne maaduwaa oichchishin demmidosona. <sup>12</sup> Demmidi kawuwaakko biidosona; biidi kawuwaa, “Kawuwau, ha hasttamu gallassatu giddon nena woossanaappe attin, hara ai asakka woikko ai xoossakka woossiyaabi gaammotu ollan olettanaadan awaajjabeikki-iyee?” yaagidi awaajuwaabaa haasayidosona.

Kawoi zaaridi, “Awaajjaas; awaajoi shaarettenna Meedoonatunne Parssetu higgiaadan minnidaagaa” yaagiis.

<sup>13</sup> Yaagin eti, “Kawuwau, yaatin hekko Yihudaappe omoodettidi, yiidaageetuppe issuwaa gidiya Daaneeli, neeyyookka neeni paramada kessido ne awaajuwaayyookka azazettenna. I ha77ikka hachchi hachchi heezzutoo ba Xoossaa woossees” yaagidosona.

<sup>14</sup> Kawoi hejaa siyido wode keehi azzaniis; Daaneela ashshanau qofaa qachchidi, awai wullana gakkanaashin, ashshiyo ogiyaa ubbaa koyiis.

<sup>15</sup> He wode asati issippe kawuwaakko biidi, “Kawuwau, Meedoonatunne Parssetu higgiaadan gidikko, kawoi awaajjido awaajoi woikko azazido azazoi laamettennaagaa neeyyo era” yaagidosona.

<sup>16</sup> Hegaa gishshau, kawoi azazin, Daaneela ehiidi, gaammotu ollan olidosona. Ol-ishin kawoi Daaneela, “Neni ubbaton goinniyo Xoossai nena ashsho” yaagiis. <sup>17</sup> Eti shuchchaa ehiidi, ollaa doonaa baridosona; ooninne Daaneela hegaappe kessen-naadan, kawoi ba maatafaanne ba kawotettaa halaqatu maatafaa gorddido shuchchaa bolli wottiis. <sup>18</sup> Hegaappe guyyiyan, kawoi ba keettaa simmidi, quma meennaaninne pashkkissiyaabaa aibakka baakko shiishshennan, xiskkuwaara xayidi aqiis.

<sup>19</sup> Maallado guuran kawoi denddidi, eesotiiddi gaammotu ollaakko biis. <sup>20</sup> Ollaakko bi gakkidi hirggiiddi, “De7o Xoossaa ashkkarau Daaneelaa, neeni ubbaton goinniyo ne Xoossai nena gaammotuppe ashshanau danddayidee?” yaagidi xeesiis.

<sup>21</sup> Daaneeli zaaridi, “Kawuwau, merinau de7a! <sup>22</sup> Ta Xoossai bari kiitanchchaa kiittidi, gaammotu doonaa gorddiis; eti tana bochchibookkona. Aissi giikko, taani a sinttan xillo. Qassi kawuwau, taani ne sinttankka moorobaa oottabeikke” yaagiis.

<sup>23</sup> Yaagin kawoi keehippe ufaittiis; ufaittidi Daaneela ollaappe kessanaadan azaziis. Daaneeli ollaappe kiyiis; ba Xoossan i ammanettido gishshau, a bollan aiba deshettikka beettibeenna.

<sup>24</sup> Hegaappe guyyiyan, Daaneela mootida asata ehaanaadan kawoi azaziis. Azazin eti oigettidi, bantta maccaasaaranne bantta naatuura issippe yiidi, ubbaikka gammuwaa ollan olettidosona. Eti ollaa duge gakkennan de7ishin, gaammoti sophi ekkidi, eta meqettaa mentteretti aggidosona.

<sup>25</sup> Hegaappe guyyiyan, Kawoi Daariyoosi asaa ubbaassi, kawotettatussi ubbaassinne dumma dumma qaalan haasayiya zaretussi ubbaassi hagaadan yaagidi xaafiis;

“Saro de7eetii!

<sup>26</sup> “Ta kawotettan de7iya asai ubbai Daaneela Xoossaassi yayyana malanne kokkorana mala, taani awaajuwaa kessaas.

“Aissi giikko, i de7o Xoossaa;  
 qassi i merinau de7iyaagaa.  
 A kawotettai mulekka xayenna;  
 a kawotaa maataikka mule antenna.  
<sup>27</sup> I ashsheesinne  
 metuwaappe kessi ekkees.  
 Saluwankka sa7ankka  
 malaataanne ooratabaa oottees.  
 Daaneela gaammotu doonaappe  
 ashshidaagee a!” yaagiis.

<sup>28</sup> Hegaa gishshau, ha Daaneeli Daariyoosa kawotettaa wodenne Parssiya Qiiroosa kawotettaa wode ubban ishalidi de7iis.

## 7

### *Daaneeli Be7ido Oiddu Do7atu Ajuutaa*

<sup>1</sup> Baabiloone Kawoi Belshshaaxaari kawotido koiro laitti, Daaneeli ba arssan zaqqulidi, aimuwaanne ajjuutaa be7iis. I ba aimuwan be7ido aife yohota xaafiis.

<sup>2</sup> Daaneeli hagaadan yaagidi xaafiis; “Qammi taani ta ajjuutan saluwaappe yiida oiddu carkkoti wogga abbaa bul77akkishin be7aas. <sup>3</sup> Qassi issoi issuwaappe dummatiya oiddu gita do7ati abbaappe kiyidosona.

<sup>4</sup> “Koiro do7ai gaammo milatees; qassi ayyo ankuwaadan qefee de7ees. Ta xeelishin, a qefee shodettin, biittaappe denddidi, asadan naa77u gediyan eqqanaadan oosettiis; qassi asa wozanaikka au imettiis.

<sup>5</sup> “Qassi naa77antto do7ai issi bagгаа xoqqu giidi eqqida beere giyo iita do7aa milatees. He do7ai heezzu gaille meqettaa ba doonan baaridi, ba achchan saxxi oiqqiis. Yaatidaagee, ‘Dendda; denddada daro ashuwaa ma’ geetettiis.

<sup>6</sup> “Hegaappe simmin qassi, maahe milatiya hara do7aa be7aas. A zokkuwan kafuwaa gefe milatiya oiddu qefeti de7oosona. Qassi ayyo oiddu huupheti de7oosona. Ha do7aayyo haariyo maatai imettiis.

<sup>7</sup> “Hegaappe simmin, qamma ajjuutan yashshiya, daganttiyaanne keehippe minniya oiddantto do7aa be7aas. Ayyo gita birata achchati de7oosona. I banan gaittidabaa ubbaa etan mentterettidi meesinne miishin attidaagaa bari gediyan yererettees. Kase ta be7ido do7atu ubbaappe i dummatees; ayyo tammu kacee de7ees. <sup>8</sup> Taani ha kacetubaa qoppishin, he kacetu giddoppe hara issi guutta kacee kiyishin be7aas; he kacee hankko kacetuppe heezzata xoqollidi oliis. Ha kaciyaassi asa aife milatiya aifeenne otoruwan haasayiya inxxarssai de7ees.

### *Merinaasappe De7iyaagaabai Qonccido Ajuutaa*

<sup>9</sup> “Taani heгаа xeelishin, kawotaa araatai utettau giigidosona. Giigin Merinaasappe De7iyaagee ba araatan uttiis. A maayoi shachchaadan, a huuphiyaa binnaanaikka puuttuwaadan bootta. A araatainne araataa irzzoti tamaadan lacottoosona. <sup>10</sup> Tamaa shaafai pulttidi, a araataa giddoppe kiyees. SHa7utoo sha7ati ayyo oottoosona; qassi daro miilooneti a sinttan eqqidodosona. Yaatidaashin pirddaa pirddiyoogee doomettiis; maxaafatika dooyettidosona.

<sup>11</sup> “Ha guutta kacee haasayiyo ooro qaalai taayyo siyettiyo gishshau, taani ha77ikka tolada xeellaas. Xeelishin eti ha do7aa woridi, eexxiya taman a olidi xaissidosona. <sup>12</sup> Hankko heezzu do7ata gidikko, eta maataikka ekettiis; shin eti keerettida wodiya paxa de7ona geetettidosona.

<sup>13</sup> “Qassikka taani he qamma ajjuutan, asa na7a milatiyaagee saluwaa shaaraara yiyaagaa be7aas. Yiidaagee Merinaasappe De7iyaagaakko shiiqin, eti a a sintti aattidosona. <sup>14</sup> Asai ubbai, kawotettati ubbainne dumma dumma qaalan haasayiya zareti

ubbai ayyo haarettana mala, maatai, bonchchoinne kawotettai ayyo imettiis. A maatai merinau shaarettana maataa; a kawotettai mulekka xayennaagaa.

### *Ajjuutaa Birshshettaa*

<sup>15</sup> “Tana Daaneela gidikko, ta be7idoban ubban dagammaas; ta ajjuutaikka tana shabbariis. <sup>16</sup> Yaatin, taani heгаа eqqidaageetuppe issuwaakko shiiqada, ha ubbaassi tumu birshshettaa aibakko oichchaas. Oichchin i taayyo a birshshettaa ubbaa hagaadan yaagidi odiis; <sup>17</sup> ‘Ha oiddu gita do7ati ha sa7an sinttappe denddana oiddu kawotettata. <sup>18</sup> SHin Ubbaappe Xoqqiya Xoossaa geeshshati a kawotettaa ekkidi, merinau banttassa oottana; meri merinau kawotettaa eti laattana’ yaagiis.

<sup>19</sup> “Hegaappe guyyiyan, taani hara do7atu ubbaappe dummatidi yashshiya oiddantto do7aassi de7iya tumu birshshettaa eranau koyaas. He do7aassi birata achchainne nahaase birata xugunttai de7ees; i banan gaittidabaa ubbaa mentterettidi meesinne miishin attidaagaa bari gediyan yererettes. <sup>20</sup> Qassi ha do7aa huuphiyan de7iya tammu kacetubaanne qassi guyyeppe kiyidi, etappe heezzata xoqolli olida qeeri kaciyaabaakka eranau koyaas. He qeeri kaciyaassi aifetinne ooro qaalaa haasayiya inxxarssai de7ees. He kacee hankkootu ubbaappe aadhdhi yashshiyaagaa. <sup>21-22</sup> Taani xeellishin, ha kacee geeshshatuura olaa gaittidi, Merinaasappe De7iyaagee yaana gakkanaashin, eta xooniis. Hegaappe guyyiyan, Ubbaappe Xoqqiya Xoossaa geeshshattussi pirddai pirddettiis; eti kawotettaa laattiyo wodeekka gakkiiis.

<sup>23</sup> “I taayyo birshshettaa hagaadan yaagidi yootiis; ‘Oiddantto do7ai ha sa7an sinttappe denddana oiddantto kawotettaa. He kawotettai hara kawotettaa ubbaappe dumma; biittaa sa7aa i maana, yedhdhananne mentterettana. <sup>24</sup> Qassi tammu kaceti ha kawotettatuppe denddana tammu kawota. Hegaappe guyyiyan, kase tammu kawotuppe dummatiya hara kawoi denddana. I etappe heezzu kawota xoonidi haarana. <sup>25</sup> I Ubbaappe Xoqqiya Xoossaa bolli xalidi haasayana; a geeshshatakka huqqunnana. Qassi wodetanne wogaa laammanau qaaqqatana. Wodee, wodetinne wodiya baggai gakkanaashin geeshshati a maataappe garssaara haarettana.

<sup>26</sup> “ ‘SHin heгааappe guyyiyan, pirddaa pirddiyoogee doomettana; doomettin a maatai mulee ekettana; ekettidi merinau xayana. <sup>27</sup> Saloppe garssaara de7iya kawotettatu ubbaa maatai, wolqqainne gitatettai Ubbaappe Xoqqiya Xoossaa geeshsha asatuyyo imettana. A kawotettaikka merinaa kawotetta gidana; deriyaa haariyaageeti ubbati ayyo azazettanne ayyo oottana’ yaagiis.

<sup>28</sup> “Ta ajjuutaabai hagan wuriis. Taani Daaneeli, ta qofan daro shabbarettaas; ta som77oikka heгаа erissees. SHin ubbabaakka taani ta wozanan wottaas” yaagidi xaafiis.

## 8

### *Daaneeli Be7ido Dorssa Orggiyaanne Deeshsha Orggiyaa Ajjuutaa*

<sup>1</sup> Belshshaaxaari kawotido hezzantto laitti, taani Daaneeli heгааappe kase be7ido ajjuutaappe hara ajjuutaa be7aas. <sup>2</sup> He ajjuutan ai be7idanaa giikko, Elaama biittan Suusa giyo kataman, Uulaaya giyo shaafaa lanqqen eqqidaagaa tana be7aas.

<sup>3</sup> He shaafaa lanqqen naa77u adussa kaceti de7iyo dorssa orggee eqqiis. Naa77u kacetuppe issoi guyyeppe mokkiis; shin koiro mokiidaagaappe aduqqees. <sup>4</sup> He dorssa orggee ba kaciyan qaicanau, arggo baggi, huuphessa bagginne tohossa baggi xengginshin be7aas. Aara eqettanaunne a wolqqaaappe kessi ekkanau ai meheenne danddayibeenna. I ba koyidoogaa oottiis; yaatidi bana gitayiis.

<sup>5</sup> Taani ha ajjuutaabaa qoppishin, issi deeshsha orggee arggo baggappe kiyidi, biittaa sa7aa kanttidi, tohoi sa7aa yedhdhennan yiis; ayyo naa77u aifetuppe gidduwan issi wogga kacee de7ees. <sup>6</sup> Ikka daro hanqquwaara jaamidi, shaafaa lanqqiyan taani be7ido naa77u kaciyaara de7iya dorssaakko, waretau xenggiiddi yiis. <sup>7</sup> Yi gakkidi, daro

yiillotidi, taani xeellishin, dorssa orggiyaa kaceti naa77aikka meqqana gakkanaashin, iita dom77ettaa dom77iis. Dorssa orggiyaassi aara eqettanau wolqqai baawa; heгаа gishshau, deeshsha orggee a onggidi, yedhdhi eqqiis. Deeshsha orggiyaa wolqqaappe he dorssa orggiyaa ashshiyaabi baawa.

<sup>8</sup> He deeshsha orggee keehi gitatiis; shin a wolqqai dari dari biyo wode, a wogga kacee meqqiis; meqqidaagaa sohuwan, oiddu wogga kaceti biittaayyo oiddu bagga ginaakko simmidi diccidosona. <sup>9</sup> Ha oiddu kacetuppe issuwaa bolli hara guutta kacee mokiidi, wolqqan tohossakko, arshshokkonne Israa7eela biittaakko simmidi dicciis. <sup>10</sup> I biidi saluwan de7iya olanchchata gakkanaashin dicciis; diccidi saluwaa xoolinttetuppe unddenaageeta sa7an duge olidi, eta yedhdhiis. <sup>11</sup> Qassi i bana xoqqu oottidi, olanchchatu Gadaawaara likkissiis. Hachchi hachchi assi yarshshiyo xuuggiyo yarshshuwaakka teqqiis. Qassi a Beeta Maqidasiyaakka laaliis. <sup>12</sup> Makkalaa gaasuwan geeshshatu olanchchatinne hachchi hachchi yarshshiyo yarshshoi he kaciyaassi imettiis. Tumaikka sa7an olettiis; he kacee oottiyoobai ubbai ayyo injjetiis.

<sup>13</sup> Hegaappe guyyiyan, issi geeshsha kiitanchchai haasayishin taani siyaas. Hankko geeshsha kiitanchchai ha kiitanchchaa, “Ha hachchi hachchi yarshshiyo yarshshuwa ajuutai polettana wodee audee? Ha makkalai bashshaa ehiiddi, aude gakkanaashin gam77anee? Qassi saluwaa olanchchatinne geeshsha sohoi aude gakkanaashin yerettiiddi de7anee?” yaagidi oichchiis.

<sup>14</sup> Yaagin koiro geeshsha kiitanchchai zaaridi, “Naa77u sha7anne heezzu xeetu maal-ladoinne omarsai gakkanaashin gam77ana; hegaappe guyyiyan, Beeta Maqidasee geeyana” yaagidi yootishin siyaas.

### *Kiitanchchai Gabreeli Ajuutaa Birshshiis*

<sup>15</sup> Taani, Daaneeli, ha ajuutaa be7aiddanne a birshshettaa eranau qoppaidda de7ishin, issi asa milatiyaagee ta sinttan eqqidaagaa be7aas. <sup>16</sup> Qassi taani Uulaaya SHAafaappe, “Gabreelaa, ha bitaniyaassi ha ajuutaa birshshettaa yoota” yaagiya ceng-gurssaa siyaas.

<sup>17</sup> I yiidi taani eqqido sohuwaa matido wode, taani dagammada, ta som77uwaa biittau duge zaarada kunddaas. Kunddin i tana, “Asa na7au, ha ajuutai wurssetta wodiyaabaa bessiyaagaa gidiyooгаа akeeka” yaagiis.

<sup>18</sup> I tanaara haasayiyo wode, taani biittan gufannada, xiskkuwaa kaira uttaas. Yaatin, i tana biittaappe pude denttidi, ta gediyan essiis. <sup>19</sup> Essidi tana, “Siya, taani GODAA hanqquwaa wurssettan hananau de7iyaabaa yootais; aissi giikko, ha ajuutai GODAI keeri wottido wurssetta wodiyan hananabaa yootes.

<sup>20</sup> “Neeni be7ido naa77u kaciyaara de7iya dorssa orggee Meedoonanne Parsse kawotu leemiso. <sup>21</sup> Deeshshaa orggee qassi Giriike kawuwaa leemiso; a naa77u aifetuppe gidduwan de7iya wogga kacee koiro kawuwaa. <sup>22</sup> Kacee me77i wodhdhin, a sohuwan mokiida oiddu kaceti a kawotettaappe shaahettidi kiyana oiddu kawotettatu leemiso; shin eta wolqqai koiroogaa wolqqaа gakkenna.

<sup>23</sup> “Eta kawotettaa wurssettai gakkiiyo wodenne eta makkalai zawaa gakkiiyo wode, issi meqettaa iitanne cimmiya cincca kawoi denddana. <sup>24</sup> I keehi mino gidana; shin ba wolqqaana gidenna. Daganttiya bashshaa i bashshana; i oottiyoobai ubbabai ayyo injjetana. I mino asatanne geeshsha asata xaissana. <sup>25</sup> I cimmiyo gishshau, ayyo injjetana; qassi i bana ubbaappe xoqqu xoqqu oottana. Eti sa7i saro gi uttidaashin, etappe darota worana; qassi halaqatu Halaqaara i eqettana. SHin asi bochchennan i bau xayana.

<sup>26</sup> “Neeyyo odettida naa77u sha7anne heezzu xeetu maalladuwaanne omarsaa xeelliya ajuutai tuma; shin daro wodiyaappe guyyiyan polettanau de7iyo gishshau, gorddada maatafaa a bolli wottada naaga” yaagiis.

<sup>27</sup> Taani Daaneeli, keehi daafurido gishshau, sahattada daro gallassaa zin77aas. Hegaappe guyyiyan denddada, kawuwaa oosuwaa baas. Ha ajjuutan taani keehippe shabbirettaas; akeekanaukka danddayabeikke.

## 9

### *Daaneeli Ba Asaa Gishshau Woossiis*

<sup>1</sup> Meedoonaa biittaa asa gidiya Arxxekssiisa na7ai Daariyoosi Baabiloonen kawotiis. <sup>2</sup> I kawotido koiro laitti, taani Daaneeli, Geeshsha Maxaafata nabbabaas; nabbabaidda hananabaa yootiya Ermmaasassi GODAI yootidoogaadan Yerusalaamee laappun tammu laittaa kolettidi gam77anau de7iyoojaa akeekaas.

<sup>3</sup> Hegaa gishshau, taani Godaakko Xoossaakko simmaas; simmada waaruwaa maayada, bidinttaa bolli uttada, xoomaidda, a woossaisinne ayyo watiwatais.

<sup>4</sup> Taani nagaraa paaxaidda, GODAA ta Xoossaa hagaadan yaagada woossaa; “Abeet Godau, wolqqaamanne yashshiya Xoossau, nena siiqiyaageetuyyoonne ne azazuwaayyo eeniyaageetuyyo ne aggenna siiquwaanne maachchaa naagiyaagoo, <sup>5</sup> nuuni nagaraa oottidanne balida; nuuni iitabaa oottidanne makkalida; ne azazuwaappenne ne wogaappe wora simmida. <sup>6</sup> Nu kawotuyyo, nu halaqatuyyo, nu aawatuuyyoonne biittan de7iya asa ubbaayyo ne sunttan hananabaa yootida ne ashkkarati odidoogaa siyennan ixida.

<sup>7</sup> “Abeet Godau, neeni xillo; shin nuuni hachchi yeellaa maayida. Yihudaaninne Yerusalaamen de7iya asai ubbai, nuuni neeyyo ammanettennan ixxin, neeni haaho biittaaninne mata biittan laalido Israa7eela asai ubbai yeellatida. <sup>8</sup> Abeet Godau, nuuni, nu kawoti, nu halaqatinne nu aawati nena naaqqido gaasuwan yeellaa maayida. <sup>9</sup> SHin nuuni ayyo makkalidabaa gidikkokka, Godai nu Xoossai maariyaagaanne atto yaagiyaagaa. <sup>10</sup> Nuuni GODAASSI, nu Xoossaassi, azazettibookko; qassi hananabaa yootiya ba ashkkaratu baggaara i immido a higgiiyaa naagibookko. <sup>11</sup> Israa7eela asai ubbai ne higgiiyaa menttidi, wora simmidosona; ne azazuwaassikka eenibookkona.

“Nuuni ne bolli nagaraa oottido gishshau, Xoossaa ashkkaaraa Muuse Higgiiyaa Maxaafan xaafettida qanggettainne pird dai nu bolli tigettiis. <sup>12</sup> Qassi nu bollinne nuna kaalettiyaageetu bolli gita bashshaa ehaanau neeni haasayido qaalaa nu bolli poladasa. Aissi giikko, Yerusalaame bolli gakkidabaa mali saloppe garssan hara biittaa bolli mulekka gakkibeenna. <sup>13</sup> Muuse Higgiiyan xaafettidoogaadan, ha bashshai ubbai nu bolli gakkiiis. Gakkinkka nu nagaraappe simmibookko; ne tumaa ezggibookko; nena, GODAA nu Xoossaakka maarotaa oichchibookko. <sup>14</sup> GODAI ha bashshaa nu bollan ehaanau guyye gibeenna; aissi giikko, GODAI nu Xoossai ba oottiyooban ubban xillo; shin nuuni ayyo azazettennan ixida.

<sup>15</sup> “Abeet Godau, nu Xoossau, kase ne asaa ne mino kushiyan Gibxxeppe kessada, hachchiigaadankka ne sunttaa xeeqgissidaagoo, nuuni nagaraa oottida; nuuni balida. <sup>16</sup> Abeet Godau, neeni kase ne xillo ooso ubbaa oottidoogaadan, hai ne hanqquwaanne ne teegaa ne katamaappe, Yerusalaameppe, ne geeshsha deriyaappe, wora zaara. Nuuni oottido nagarainne nu aawati oottido mooroi Yerusalaamenne ne asaanne nu yuushuwan de7iya ubbaassi qilliicciyoobaa kessiis.

<sup>17</sup> “Simmi ha77i nu Xoossau, taani ne ashkkarai woossiyo woosaanne watiwatuwaa siya. Godau, ne sunttaa gishshau gaada, ha kolettida ne Beeta Maqidasiyaa ne keha aifiyan xeella. <sup>18</sup> Abeet ta Xoossau, ne haittaa nuukko yeggada siya; ne aifiyaakka dooyada, ne sunttan xeesettida katamaa bashshaa xeella. Nuuni neessi watiwatiyoogee, nu xillotettaa gishshaassa gidennan, ne gita maarotettaa gishshaassa.

<sup>19</sup> “Abeet Godau, siya! Abeet Godau, atto ga! Abeet Godau, ezgganne ootta! Ne katamainne ne asai ne sunttan xeesettido gishshau, abeet ta Xoossau, ne sunttaa gishshau gam77oppa” yaagaas.



### *Gabreeli Daaneelassi Sinttappe Hananabaa Yootiis*

<sup>20</sup> Taani woossaidda, ta nagaraanne ta asaa Israa7eela nagaraa paaxaidanne ta Xoossaa geeshsha deriyaabaa, Yerusalaamebaa GODAASSI ta Xoossaassi watiwataidda takkaas. <sup>21</sup> Hegaadan hanaidda taani de7ishin, kase ajjuutan taani be7ido Gabreeli, taakko eesuwan paalliiddi, omarssa yarshshuwaa yarshshiyoo saatiyan puttu giis. <sup>22</sup> I hagaadan yaagidi, taayyo yootiis; “Daaneelaa, taani eraanne akeekaa neeyyo immanau ha77i yaas. <sup>23</sup> Neeni biron woosaa doommaanne ne woosaa zaaroi imettiis; taanikka hegaa neeyyo yootanau yaas. Aissi giikko, Xoossai nena keehi dosees. Hegaa gishshau, taani odiyoogaa qoppa; ajjuutaakka akeeka.

<sup>24</sup> “Laapputoo laappun tammu laittai Xoossai ne asaassinne ne geeshsha katamaassi keerido wodiya. He wodetun naaqoi wurana; nagaraa oosoi attana; mooroi maaretana; merinaa xillotettai gelana; ajjuutainne hiraagai polettanne Ubbaappe Aadhdhida Geeshsha Sohoi tiyettana.

<sup>25</sup> “Hegaa gishshau, haggaa eranne akeeka. Yerusalaame katamai bottokonettanaunne keexettanau azazoi kiyyido gallasaappe biidi Halaqai Masee yaana gakkanaashin, laapputoo laappunainne usuppun tammanne naa77utoo laappun laittai aadhdhana. Hegan Yerusalaame katamai bottokonettana; ogetikka yuushuwaa gimbbetikka oosettana. SHin gimbbettiyo wodee meto wode gidana.

<sup>26</sup> “Usuppun tammanne naa77utoo laappun laittaappe guyyiyan, Masiyaa asi worana. A matan aibinne baawa. Yiya halaqaa asai katamaanne Beeta Maqidasiyaa laalana. He katamaa wurssettai di7uwaadan akeekennan yaana. He wodeppe biidi wurssettai gakkanaashin, olainne bashshai awaajetti uttiis. <sup>27</sup> He halaqai laappun laitta gakkanaassi asaara mino maachchaa maacetana. He laappun laittatu gina shaahuwan i yarshshuwaa yarshshiyooogaanne imotaa immiyooogaa teqqana. Beeta Maqidasiyaayyo giddo ginan bashshaa tunatettaa i essana. Wurssettan awaajettida boshai a bolli tigettana” yaagiis.

## 10

### *Daaneeli Xegiroosa SHaafaa Matan Be7ido Ajjuutaa*

<sup>1</sup> Parsse Kawoi Qiirroosi kawotido heezzantto laitti, Bilxxaasoora giyo Daaneelassi hara ajjuutai qoncciiis. He ajjuutan qonccidabai tuma; qonccidabaikka wolqqaama olaabaa. He akeekai au imettidoogee ajjuutaana.

<sup>2</sup> He wode taani, Daaneeli, heezzu saaminttaa azzanaas. <sup>3</sup> Lo77o quma mabeikke; ashoi woikko woine eessi ta doonakko shiiqibeenna. Heezzu saaminttai wurana gakkanaashin aibanne tiyettabeikke. <sup>4</sup> Koiro aginan laatamanne oiddantto gallasan, Xegiroosa giyo gita shaafaa lanqqiyan taani eqqada xeellaas; <sup>5</sup> xeellada liinuwa giyo maayuwa maayida issi bitaniyaa be7aas. I ba xeessan muruta worqqaappe oosettida qabattuwa gixxi uttiis. <sup>6</sup> A bollai phooliya inqquwa milatees; a som77oi wolqqanttaadan phalqqi gees; a aifetikka tamaa lacuwa milatoosona; a kusheenne a tohoi qucettida nahaasiyaa birataadan poo7issees; a qaalaikka daro asai haasayiyo qaalaadan hanees.

<sup>7</sup> Ha ajjuutaa taani Daaneeli tarkka be7aas. Tanaara de7iya asati be7ibookkona; eti keehi dagammido gishshau, baqatidi qosettidosona. <sup>8</sup> Taani ha gita ajjuutaa xeellaidda, tarkka attaas; taayyo wolqqai ixxin daafuraas; ta som77oi keehi bullattiis. <sup>9</sup> He wode taani i haasayiyoogaa siyaas; siyada biittan duge gufannaas; gufannidosan xiskkuwa kairaas.

<sup>10</sup> Hegaappe guyyiyan, issi kushee tana bochchiis; bochchin taani kokkoraidda de7ishin, tana ta kushiyaanne ta gulbbatan gulbbatissiiis. <sup>11</sup> Gulbbatissidi i tana, “Laa, Xoossai keehi siiqido Daaneelaa, taani neeyyo yootiyo qaala loittada akeeka; dendda

eqqa. Aissi giikko, taani neekko kiitettada yaas” yaagiis. I tana hagaadan yaagin, taani kokkoraidda dendda eqqaas.

<sup>12</sup> Qassikka i hagaadan yaagiis; “Daaneelaa, ainne yayyoppa! Aissi giikko, neeni akeekaa demmanau qofaa qachchidonne ne Xoossaa sinttan ne huuphiyaa kaushshido koiro gallassaappe doommidi, ne woosai siyettiis; taanikka hegau zaaruwaa ekkada yaas. <sup>13</sup> SHin Parsse kawotettaa halaqa gidiya ayyaanai laatamanne isiini gallassaa tana teqqiis. Yaatin, kiitanchchatu halaqatuppe issoi, Mikaa7eeli tana maaddanau yiis. Taani a yan Parsse kawotettaa halaqaara aggada yaas. <sup>14</sup> Taani ha77i neekko yiidoogee, wurssetta gallassatun ne asaa bolli hananau de7iyaabaa neeyyo qonccissanaassa; aissi giikko, ha ajuutai sinttappe hananau de7iyaabaa” yaagiis.

<sup>15</sup> I heгаа taayyo yootiyo wode, taani ta som77uwan xuggunnada, sirphphi gaas. <sup>16</sup> Hegaappe guyyiyan, asa milatiya issoi ta menttershshaa bochchiis; bochchin ta doonai dooyettin, haasayaa doommaas. Doommada ta sinttan eqqidaagaa hagaadan yaagaas; “Ta godau, ha ajuutan taani keehi dagammido gishshau, daro daafuraas. <sup>17</sup> Taani ne ashkkaarai nenaara ta godaara haasayanau waata danddayiyaanaa? Ta wolqqai wuriis; shemppanauka taayyo ixettiis” yaagaas.

<sup>18</sup> Yaagin he asa milatiya issoi naa77anttuwaakka tana bochchidi, taayyo wolqqaa immiis. <sup>19</sup> Yaatidi tana, “Laa, Xoossai keehi siiqido bitaniyau, ainne yayyoppa! Saroi neeyyo gido. Ha77i simmi minna; ee minna” yaagiis.

I hegaan gin, taani minnaas; minnada, “Ta godau, neeni tana minttido gishshau, ha77i oda” yaagaas.

<sup>20</sup> Yaagin i zaaridi, “Taani neekko aibissi yiidaakko erai? Ha77i taani simmada baada, Parsse halaqa gidiya ayyaanaara olettana; qassi taani bin, Giriike halaqa gidiya ayyaanai yaana. <sup>21</sup> SHin taani neeyyo Tumaa Maxaafan xaafettidabaa yootana. Taani etaara olettiyo wode, ne halaqaa Mikaa7eelappe attin, tana maaddiya harai issoinne baawa.

## 11

### *Huuphessa Biittaa Kawuwaanne Tohossa Biittaa Kawuwaa*

<sup>1</sup> “Meedoona biittaa asa gidiya Daariyoosi kawotido koiro laittan, taani a maad-danaunne minttanau a miyyiyan eqqaas.

<sup>2</sup> “Ha77i simmi taani neeyyo tumaa odais. Hara heezzu kawoti Parsse biittan kawotana; qassi etappe guyyiyan kawotiya oiddantto kawoi, kaseegeetu ubbatuppe aadhdhida dure gidana. I ba duretettaa gaasuwan wolqqaa demmiyo wode, asai ubbai Giriike kawotettaara olettana mala denttettana.

<sup>3</sup> “Hegaappe guyyiyan, wolqqan haariya mino kawoi denddana; denddidi ba koyi-dobaa ubbaa oottana. <sup>4</sup> I denddidoogaappe guyyiyan, a kawotetta duuxerettidi, oiddu sohuwan shaahettana. A zareti a kawotettaa laattokkona; ikka qassi kase haaridoogaadan haarena. Aissi giikko, a kawotettai appe ekettidi, haratussi imettana.

<sup>5</sup> “Tohossa biittaa kawoi mino gidana; shin a halaqatuppe issoi appe aadhdhi minnidi, he gita kawotettaa haarana.

<sup>6</sup> “Guutta laittaappe guyyiyan, tohossa biittaa kawoinne huuphessa biittaa kawoi bantta gidon dabbotettaa maachchaa maacettana. Maacettin tohossa biittaa kawuwaa na7iyaa huuphessa biittaa kawuwaa gelana; shin i wolqqaikka minnenna; qassi ikka a wolqqaikka daro wodiya gam77enna. He wode a, o ajjabiyaageeti, i aawainne o maaddiyaageeti ubbai aadhdhidi imettana.

<sup>7</sup> “Hegaappe simmin, i dabbotuppe issoi tohossa biittan kawotana. Kawotidi huuphessa biittaa kawuwaa bollan woraajjana; a qatuwaa mentti gelidi, a xoonana. <sup>8</sup> Qassi eta xoossata, misiletanne biraappenne worqqaappe oosettida miishshata ekkidi, Gibxxe efaana. Yaatidi amarida wodiya huuphessa biittaa kawuwaa bochchennan

aggi bayana. <sup>9</sup> Hegaappe guyyiyan, huuphessa biittaa kawoi tohossa biittaa kawotettaa bolli woraajjana; shin diggin, guyye ba biitti baqana.

<sup>10</sup> “Huuphessa biittaa kawuwaa attuma naati olau giigidi, daro olanchchata shiishshana; shiishshidi sinttan gaittiyaabaa ubbaa meeciya wolqqaama di7uwaadan, kanttidi oliiddi, tohossa kawuwaa qatuwaa gakkana. <sup>11</sup> He wodiyan tohossa biittaa kawoi keehi hanqgettidi, huuphessa biittaa kawuwaa olanau denddana. Denddidi huuphessa biittaa kawoi shiishshido daro olanchchatuura olettidi, eta xoonana. <sup>12</sup> Daro olanchchata omooddidoogaappe guyyiyan, tohossa biittaa kawoi otoruwan pugettana. Yaatidi daro sha7aa worana; shin a xoonoi aara gam77enna.

<sup>13</sup> “Waanidi giikko, huuphessa biittaa kawoi kasegaappe aadhdhiya hara olanchchata giigissana; giigissidi amarida laittata takkiiddi, kumetta olaa miishshaa oiqqida ha olanchchata ekkidi, olau kiyana. <sup>14</sup> He wodiyan daroi tohossa biittaa kawuwaa bolli denddana. Ha ajuutai polettana mala, ne asaappekka issi issi makkalanchcha asati etaara issippe denddana; shin xoonokkona.

<sup>15</sup> “Hegaappe guyyiyan, huuphessa biittaa kawoi tohossa biitti yiidi, yuushoi gimbbetti uttido issi katamaa olidi oiqqana. Oiqqin tohossa biittaa kawuwaa olanchchati wolqqa xayana; harai atto etappe mino olanchchatikka etaara eqettanau danddayokkona. <sup>16</sup> Aara eqettiyaabi mulekka bainna gishshau, huuphessa biittaa kawoi ba koyiyoobaa ubbaa oottana. I Israa7eela giyo lo77o biittan bau minni eqqidi, a xaissiyu wolqqaa demmana. <sup>17</sup> I ba kawotettau de7iya wolqqaa ubbaa ekkidi yaanau qofaa qachchana; qachchidi yiidi, tohossa biittaa kawuwaara dabbotettaa maachchaa maacettana. He kawotettaa oogganau halchchidi, ba na7iyo au immana; shin a halchchoi polettenna.

<sup>18</sup> “Hegaappe guyyiyan, i ba qofaa abbaa xanxxan de7iya biittatukko zaaridi, etappe darota olidi, bau ekkana. SHin issi ola gadaawai a otoruwaa giishshana; yaatidi a otoruwaa a bolli zaarana. <sup>19</sup> Hegaappe guyyiyan, huuphessa biittaa kawoi ba biitti ba qatuwaa simmana. SHin i hegan xubettidi kunddana; a naa77antto ooninne be7enna.

<sup>20</sup> “A sohuwan kawotidaagee ba kawotettaa bonchchuwaa naaganau giiraa giirissiya asa kawotettaa giddo kiittana. Gidikonne, qantta wodiyaappe guyyiyan, hanqqon woikko olan gidennan i coo haiqqi xayana.

### *Huuphessa Biittaa Kawuwaa Karettidaagaa*

<sup>21</sup> “A sohuwan qassi issi karettida asi denddana; shin eti kawotettaa bonchchuwaa ayyo immokkona. Asai sa7i saro giidi uttidaashin, cimmi gelidi, kawotettaa i oiqqana.

<sup>22</sup> Hegaappe guyyiyan, daro olanchchati a sinttappe pitettidi xayana; maachchaa halaqaikka haiqqana. <sup>23</sup> Aara maachchaa maacetti simmidi, ba oottiyoobaa cimuwana oottana; amarida asatu xalaalaa i minnana. <sup>24</sup> Asai sa7i saro giidi uttidaashin, he biittan daro duretiya issi bagga i gelana. Gelidi kase ba aawai woikko ba maizza aawati oottibeennabaa oottana; ba omooddi shiishshido duretettaanne aquwaa bana kaalliyageetussi gishana. Qatotakka laalanau i halchchana; shin guutta wodiyaappe guyyiyan xayana.

<sup>25</sup> “Hegaappe guyyiyan xalidi, ba wolqqaakka minttidi, daro olanchchatuura tohossa biittaa kawuwaa bolli denddana. Qassi tohossa biittaa kawoi keehi daronne wolqqaama olanchchatuura olau denddidi, aara olettana. SHin a bolli eti kasetidi maqqido maqquwaa gaasuwan, i etaara eqettanau danddayenna. <sup>26</sup> Kawuwaara issi maaddan miyaageeti a worana; a olanchchati pitettana; a olanchchatuppe daroti olan haiqqana. <sup>27</sup> Ha naa77u kawotikka bantta wozanan iitaa qoppiyo gishshau, eti issippe issi oidiiyan uttidi haasayiiddi, issoi issuwaassi worddotana. SHin eti oottana giyoobai etau injjetenna; aissi giikko, Xoossai keerido wodee biron gakkiiichibeenna.

<sup>28</sup> “Huuphessa biittaa kawoi daro duretettaara ba biitti simmana. SHin i ba wozanan geeshsha maachchaa ixkana. Ixxidi a xaissanau issibaa a bolli oottidi, ba biitti simmana.

<sup>29</sup> “Xoossai keerido wodee gakkini, i zaaridi tohossa biittaa bolli woraajjana; shin au kasegaadan injjetenna. <sup>30</sup> Aissi giikko, arggo bagga biittaaappe yiya olaa markkabeti a daganttana. Yaatabare i guyye simmidi, geeshsha maachchaa bolli hanqqettana. Qassi hegaappe simmidi, geeshsha maachchaa aggiyaageetuura dabbotana.

<sup>31</sup> “A olanchchati Beeta Maqidasiyaakka a yuushuwaa gimbbiyaakka tunissananne hachchi hachchi yarshshiyo yarshshuwaakka teqqana. Yaatidi eti bashshaa tunatettaa yan essana. <sup>32</sup> Maachchaa koliyaageeta i ba cimo qaalan ba bagga oottana; shin bantta Xoossaa eriya asai minnananne aara egettana.

<sup>33</sup> “Asaa gidдон de7iya aadhdhida eranchchati daro asaa tamarissana; shin gutta wodiya garssan ha tamarissiyaageeti bisuwan busakettana, taman xuugettana, omoodettana woikko bonqqettana. <sup>34</sup> He metotu gidдон de7iiddi, eti gutta maado demmana; daro asaikka eta bagga milatidi, etakko shiiqana; shin wozanappe gidenna. <sup>35</sup> Aadhdhida eranchchatuppe unddenaageeti xubettana. Hegaadan hanidi, wurssettaa wodee gakkanaashin, eti paacettidi kiyana, geeyananne boree bainnaageeta gidana. Aissi giikko, Xoossai keerido wodee biron gakkiiichchibeenna.

### *Bana Xoqqissiya Kawuwaa*

<sup>36</sup> “Kawoi bana koshshaa oottana; xoossatu ubbaappe bollaara bana xoqqu oottidi gitayana; qassi xoossatu Xoossaa bolli kase siyetti erenna iita qaala haasayana. Hananau qofan qashetti uttidabai hananau de7iyo gishshau, Xoossaa hanqqoi polettana gakkanaashin, i oottiyoobai ubbai ayyo injjetana. <sup>37</sup> I kase ba maizza aawatu xoossata, woikko maccaasai siiqiyo xoossaa karana; i ba xalaalaa hara ubbaappe aattidi xoqqu oottanaappe attin, hara ai xoossanne wudenna. <sup>38</sup> I eta bonchchanaagaa gishshaa qatotu xoossaa bonchchana; a maizza aawati erenna xoossaassi worqqaa, biraa, al77o shuchchanne lo77o imuwaa immidi bonchchana. <sup>39</sup> Imatta xoossaa maaduwani mino qatotu bolli i woraajjana. Qassi ba maataa eriyaageeta i daro bonchchana. I eta daro asaa haariyaageeta oottidi sunttana; qassi biittaaakka woito oottidi, etayyo shaakki shaakkidi immana.

<sup>40</sup> “Wurssettaa wodee gakkini, tohossa biittaa kawoi denddidi, huuphessa biittaa kawuwaa olana. SHin huuphessa biittaa kawoi paraa gaareta, paraasatanne daro markkabeti ekkidi, a bolli gotiyaadan yaana. Yiidi daro biittaa bolli woraajjana; woraajjidi di7uwaadan eta meecciiddi kanttana. <sup>41</sup> Qassi i Israa7eela giyo lo77o biittaa bollanka woraajjana. Woraajjin daro biittati a kushiyan kunddana; shin Eedooma, Moo7aabanne Amoonaa biittati a kushiyaappe attana. <sup>42</sup> I daro biittatu bolli woraajjiyo wode, Gibxxeekka appe kessi ekkenna. <sup>43</sup> Gibxxe biittaa worqqaa, biraanne duretettaa ubbaa i ba kushe oottana. Liibeenne Toophphee a geeduwaa kaallana.

<sup>44</sup> “SHin arshsho baggaappenne huuphessa baggaappe yiya odoi a daganttana; daganttin hanqquwaa eexxi kiyidi, darota woranaunne mule xaissanau denddana. <sup>45</sup> I ba kawotaa dunkkaaniyaa abbaappenne puulanchcha geeshsha deriyaappe gidduwan tokkana. SHin a wurssettai gakkana; gakkini a maaddiyaabi xayana.

## 12

### *Wurssettaa Wodiya*

<sup>1</sup> “He wodiyan, ne asaa heemmiya gita halaqai Mikaa7eeli denddana. Denddin kawotetti doommoosappe doommin, he wode gakkanaashin, be7i erenna meto wodee hanana. Gidikonne, a sunttai Xoossaa Maxaafan xaafettido ne asai ubbai he wode attana. <sup>2</sup> Kase haiqqidi moogettida asaappe daroti denddana. Etappe baggati merinaa

de7uwau, baggati qassi yeellaunne merinaa kaushshau denddana. <sup>3</sup> Aadhdhida eranchchati, saluwaa poo7uwaadan, qassi darota xillotettaa ogiyaa kaalettidaageeti meri merinau xoolinttiyaadan poo7ana.

<sup>4</sup> “SHin nenoo Daaneelaa, neeni wurssettaa wodee gakkanaashin, ha maxaafaa qaalaa gorddada, maatafaa wotta. Daroti yaanne haanne bichchaarana; eraikka darana” yaagiis.

<sup>5</sup> Hegaappe guyyiyan, taani Daaneeli, hara naa77ata, issoi shaafaappe hafintta lanqqiyan, issoi shaafaappe hefintta lanqqiyan eqqidaageeta be7aas. <sup>6</sup> Etappe issoi liinuwaa maayidi, shaafaa haattaappe bolla baggaara eqqidaagaa oichchiiddi, “Ha maalaalissiyaabati polettana wisa wodiya gam77aneeshsha?” yaagiis.

<sup>7</sup> He liinuwaa maayidi, shaafaa haattaappe bolla baggaara de7iyaagee ba ushachcha kushiyaanne ba haddirssa kushiya saluwaa zaari denttidi, merinau de7iyaagaa sunttan hagaadan yaagidi caaqqiis; “Hagee wodee, wodetinne wodiya baggai gakkanaashin gam77ana; qassi geeshsha asatu wolqqai kinchchettidi wuriyo wode, ha ubbabaikka polettana” yaagiis.

<sup>8</sup> Hagee ubbaa taani siyaas; shin taayyo gelibeenna. Yaatin, taani, “Ta godau, ha yoho ubbaassi wurssettai aiba gidanee?” gaada oichchaas.

<sup>9</sup> Oichchin i zaaridi, hagaadan yaagiis; “Daaneelaa, ba. Aissi giikko, hagee maxaafai wurssettaa wodee gakkanaashin gorddettidabaanne maatafai a bolli wodhdhidobaa.

<sup>10</sup> Daroti paacettidi kiyana, geeyananne boree bainnaageeta gidana; shin iitati iitabaa oottana. Iitatuppe issi urinne akeekenna; shin aadhdhida eranchchati akeekana.

<sup>11</sup> “Hachchi hachchi yarshshiyo yarshshoi teqettoosappenne bashshaa tunatettai he sohuwan eqqoosappe 1,290 gallassa. <sup>12</sup> Gencidi 1,335 gallassati wuranaashin gattiya uri anjettidaagaa.

<sup>13</sup> “Nena gidikko, neeni wurssettai gakkanaashin ba. Neeni shemppana; shemppada gallassatu wurssettan nena gakkiya laataa ekkana denddana” yaagiis.



## Hananabaa Yootiya Hoose7a Maxaafaa

### *Gidduwaa Erissuwaa*

Hananabaa yootiya Hoose7i Samaaree Kiristtoosa yeletaappe kase laappun xeetanne laatamanne isiini laittan kunddanaappe kasetidi, hanotati meto gidi uttido wodiyan, hananabaa yootiis; i hananabaa yootidoogee hananabaa yootiya Amoxappe guyye gidishin, huuphessa bagga Israa7eela kawotettan yootiis. Hoose7i keehi darissidi oidoogee asai eeqau goinnidoogaanne Xoossaa ammaniyo ammanuwaa pacissidoogaa. Hoose7i haggaa asai Xoossaassi ammanettennan aggiyoogaa qonccissidi odanau, issi ammanettenna maccaasiyo machcho oottidi ekkidoogaa leemiso oottidi go7ettees. A machchiyaa Goomera ayyo ammanettennan ixxidoogaadan, Xoossaa asaikka Xoossaa aggi bayiis. Hegaa gaasuwan Israa7eela asaa bolli pird dai yaana hanees. Gidikkonne wurssettan Xoossai ba asaa siiqiyo siiqoi dariyo gishshau, ba asaa baakko zaaridi, baappenne ba asaappe gidduwan de7iya siiquwaa ooraxissees. A gita siiqoi hagaappe kaalliya haasayan qoncciiis; “Israa7eela asatoo, taani inttena waata oloo? Taani inttena waata aattada immoo? Taani inttena siiqiyo siiqoi gita gidiyo gishshau, taani haggaa ubbaa oottanau ta wozanai eenenna” (11:18) yaagiis.

<sup>1</sup> Ooziyaani, Yo7aataami, Akaazinne Hizqqiyaasi kaalli kaallidi Yihudan kawotido wode, qassi Yo7aasha na7ai Iyorbbaami Israa7eelan kawotido wode, Bi7eera na7aa Hoose7akko yiida GODAA qalalai haggaa.

### *Hoose7a Maccaasiyoonne Naata*

<sup>2</sup> GODAI koiro Hoose7a baggaara haasayido wode, Hoose7a, “Ba; baada shaaramuxa maccaasiyo neeyyo ekka; ekkada shaaramuxeepe naata yela. Aissi giikko, shaaramuxiya maccaasiyaa ba azinaappe shaahettiyoogaadan, ta asai taappe shaahettiis” yaagiis.

<sup>3</sup> Yaagin biidi, Dibilaima na7iyo Goomero ekkiis; ekin shahaarada, attuma na7a au yelaasu. <sup>4</sup> Yaatin, GODAI Hoose7a, “Na7aa sunntaa ‘Iziraa7eela’ yaagada sunnta. Aissi giikko, Iziraa7eelan gukkida suuttaa autiyau taani Yeehu zaretta qantta wodiyan achchana; Israa7eela kawotettaakka xaissana. <sup>5</sup> He gallassi taani Iziraa7eela Wombban Israa7eela olanchchata mentterettana” yaagiis.

<sup>6</sup> Goomera naa77anttuwaa shahaarada, macca na7iyo yelaasu. Yaatin, GODAI Hoose7a, “I sunntaa ‘Loruhaamo’<sup>1</sup> yaagada sunnta. Aissi giikko, hagaappe sinttanau taani Israa7eela asau qarettikke; etau mulekka atto giikke. <sup>7</sup> SHin taani Yihudaa asaassi qarettana; taani GODAN, eta Xoossan, eta ashshanaappe attin, wonddafiyen woikko bisuwan woikko olan woikko paratun woikko paraasatun ashshikke” yaagiis.

<sup>8</sup> Goomera Loruhaamo xanttaa duuttidoogaappe guyyiyan, haranttuwaa shahaarada, attuma na7aa yelaasu. <sup>9</sup> Yaatin, GODAI Hoose7a, “A sunntaa ‘Lo7aama’<sup>2</sup> yaagada sunnta. Aissi giikko, intte ta asa gidekketa; taanikka intte Xoossaa gidikke.

### *Israa7eela Asai Ooraxxana*

<sup>10</sup> “Israa7eela asai makkanaunne qoodanau danddayettenna abbaa shafe keena gidana. Etau, ‘Intte ta asa gidekketa’ geetetti odettidosan, ‘Intte de7o Xoossaa naata’ geetettana. <sup>11</sup> Yihudaa asainne Israa7eela asai issippe shiiqana; shiiqidi banttau issi halaqaa doorana; dooridi omoodo biittaappe simmananne ishalidi de7ana. Aissi giikko, Iziraa7eela gallassai gita gallassa gidana.

<sup>1</sup> 1:6 Loruhaamo: “Loruhaamo” giyoogee “Qarettennaaro” giyoogaa. <sup>2</sup> 1:9 Lo7aama: “Lo7aama” giyoogee “Ta asa gidenna” giyoogaa.

## 2

<sup>1</sup> “Intte ishannta, ‘GODAI inttena, “Ta asa” yaagees’ yaagite. Qassi intte michcheta, ‘GODAI inttena, “Taani intteyyo qarettais” yaagees’ yaagite.

### *Israa7eela Asai SHaaramuxee Goomeri Mala Ammanettennaagaa*

<sup>2</sup> “Intte aayyiyo zorite; o zorite. Aissi giikko, a ta machcho gidukku; taanikka i azina gidikke. A ba som77uwaa shaaramuxatto bessiyogaa aggu; ba shaaramuxa oosuwaakka ba xanttatu gidduwaappe diggu. <sup>3</sup> Hegee xayikko, a yelettido gallassaadan, taani o xiire kallo ashshana. Qassi melida bazzo biittaadan o oottana; taani o saamuwan worana. <sup>4</sup> Eti shaaramuxeepe yelettida naata gidido gishshau, taani i naatussi qarettikke. <sup>5</sup> Eta aayyiya shaaramuxaasu; eta ba uluwan tookkidaara kaushshabaa hanaasu. Waanada giikko, a, ‘Taani ta kattaanne ta haattaa, ta suufiyaanne ta liinuwa, ta zaitiyaanne ta ushshaa taassi immiya ta laggettota kaallada baana’ yaagaasu.

<sup>6</sup> “Hegaa gishshau, taani i ogiyaa agunttan gorrdana; a ba loossuwaa demmenna mala, taani gimbbiyaa gimbbana. <sup>7</sup> A ba laggettotu geeduwaa woxxana, shin gakkukku; eta koyana, shin demmukku. Hegaappe guyyiyan a, ‘Tau ha77i duussaappe beniigee kehiyo gishshau, simmada ta koiro azinaakko baana’ yaagana.

<sup>8</sup> “Kattaa, woiniyaa eessaanne zaitiyaa iyyo immidaageenne eti Ba7aala giyo eeqau shiishshiyo biraanne worqqaa iyyo darissidaagee tana gidiyogaa a erennan ixxaasu. <sup>9</sup> Hegaa gishshau, ka77iyo wode ta kattaa, qassi teeriyo wode ta woiniyaa taani ippe zaarada ekkana. Hegaadankka, i kalluwaa maizzanau, suufiyaappenne liinuwaappe dadettida maayuwaakka ippe qaara ekkana. <sup>10</sup> Qassi i laggettotu sinttan taani i kalluwaa bessana; ta kushiyaappe ooninne o ashshenna. <sup>11</sup> Taani i ufaissai ubbai, i gibirai, i aginai xeeriyo gallassati, i Sambbata gallassati, laittan laittan bonchchettiya i baalati ubbai attanaadan, oottana. <sup>12</sup> Akka, ‘Ta laggettoti taayyo immido kerai haggaa’ yaagido i woiniyaa turatanne balase geetettiya mittata taani xaissana; taani eta wora oottana; oottin bazzo do7ati eta maana. <sup>13</sup> A tana dogada, ba laggettota kaallaidda, gutuchchatuuninne alleeqotun bau alleeqettaidda, Ba7aala giyo eeqaayyo ixaanaa cuwayido baala gallassatu gishshau, taani o qaxxayana. Taani GODAI haggaa odaas.

### *GODAI Israa7eela Asaa Siiqiis*

<sup>14</sup> “Hegaa gishshau, taani o labada bazzo ehaana; ehaada taani iyyo siiqo qalan odana. <sup>15</sup> Yan taani i woiniyaa turaa sohuwaa iyyo zaarada immana; Metuwaa Wombbaakka a ufaissan naagiyoobai geliyo pengge oottana. Gibxxe biittaappe kiyido wodiyaadan, ba geela7otettaa laittaadan, a yan yexxana” yaagees.

<sup>16</sup> Qassikka GODAI hagaadan yaagees; “He gallassi a tana, ‘Ta azinaa’ yaagada xeesanappe attin, hagaappe sinttanau, ‘Ta Ba7aala’ yaagada xeesukku. <sup>17</sup> Aissi giikko, taani i doonaappe Ba7aalantta sunntaa diggana; hagaappe sinttanau taani o Ba7aala sunntaa xeesissikke. <sup>18</sup> He gallassi taani ta asaa gishshau sa7aa do7atuura, saluwaa kafo-tuuranne biittaara gooshettiya meretatuura maachchaa maacetana. Taani biittaappe wonddafiya, bisuwaanne olaa xaissana; yaatobare eti woppu giidi, saro de7ana.

<sup>19</sup> “Taani nena merinau taassi giigissana; giigissaidda xillotettaaninne suure pirddan, aggenna siiquwaaninne maarotan taassi giigissana; <sup>20</sup> taani ammanettada nena taassi giigissana. Neenikka GODAA erana” yaagees.

<sup>21</sup> Qassikka GODAI, “He gallassi taani zaaruwaa immana; taani salotussi zaaruwaa immin, eti sa7aassi zaaruwaa immana. <sup>22</sup> Sa7aikka kattau, woine eessaanne zaitiyau zaaruwaa immana; immin eti Iziraa7eelau zaaruwaa immana. <sup>23</sup> Taani o biittan taassi zerana. Kase taani qarettabeenaarissi ha77i qarettana. Qassi ta asa gidennaageeta, ‘Ta asa’ gaana; etikka tana, ‘Neeni nu Xoossaa’ yaagana” yaagees.

### 3

#### *Hoose7anne SHaaramuxa Maccaasiyoo*

<sup>1</sup> GODAI tana, “Israa7eela asai hara xoossatukko simmidi, woiniyaa teeraa melaa lichchakkuwaa siiqishinkka GODAI eta siiqiyooqaadan, ba; baada laggettuwaa siiqada, shaaramuxaidda de7iya beni ne machchiyo neenikka zaarettada siiqa” yaagiis.

<sup>2</sup> Yaagin taani o tammanne ichchashu xaqara biraaninne xeetanne ishatamu kilo giraame deexxiya gisttiyan shammaas. <sup>3</sup> SHammada o, “Neeni shaaramuxennaaninne hara asaara de7ennan tanaara daro wodiyaa de7anau koshshees. Taanikka nenaara de7ana” yaagaas.

<sup>4</sup> Hegaadankka, Israa7eela asai kawoi woikko halaqai bainnan, yarshshoi woikko eeqa tuussi bannaaninne eefuudiyaa giyo maayoi woikko so giddo eeqaa misilee bannan daro wodiyaa de7ana. <sup>5</sup> Hegaappe guyyiyan, Israa7eela asai simmidi, GODAA bantta Xoossaanne Daawita bantta kawuwaa koyana; koyidi wurssetta gallassatun eti kokkoriiddi, GODAAKKONNE a anjuwaakko yaana.

### 4

#### *GODAI Israa7eela Mootiis*

<sup>1</sup> Inttenoo, Israa7eela asatoo, GODAA qaalaa siyite! Aissi giikko, ha biittan de7iya asaa ubbaa GODAI mootiyoobai de7ees. Hegeekka, ha biittan ammanoi, siiqoinne Xoossaa eriyoogee baawa. <sup>2</sup> Ha biittan de7iyaabai qanggetta, worddo, asa woro, wuussanne shaaramuxa xalaala. Eti maachcha ubbaa kanttidosona; asaa woroi woruwaa kaallees. <sup>3</sup> Hegaa gaasuwan biittai melana; biittan de7iya ubbai daafurana. Sa7aa do7atikka, saluwaa kafotikka, harai attin, abbaa moletikka haiqqana.

#### *GODAI Qeeseta Mootiis*

<sup>4</sup> GODAI hagaadan yaagees; “Inttenoo, qeesetoo, taani inttena mootiyoobai de7ees. Hegaa gishshau, ooninne hara asaara palamettoppo; qassi ooninne hara asa mootoppo. <sup>5</sup> Intte gallassi xubettana; hananabaa yootiyaageetikka inttenaara qammi xubettana. Hegaa gishshau, taani intte aayyiyo xaissana. <sup>6</sup> Ta asai eratetta xayin bayiis. Intte eratettaa ixrido gishshau, taanikka intte tau qeese gidanaagaa ixrais. Intte Xoossaa higgiiyaa intte dogido gishshau, taanikka intte naata dogana.

<sup>7</sup> “Qeeseti dari dari biido keenaa, tana darissi naaqqidosona; taanikka eta bonchchuwaa yeellau laammana. <sup>8</sup> Ta asaa nagarai etau quma gidii; hegaa gishshau, eti ta asaa moorobaa ootissanau jaamoosona. <sup>9</sup> Qeesetikka asai haniyoogaadan hanana. Taani eta hanotaa gishshau, eta qaxxayana; qassi eta oosuwaadan, etau zaarana. <sup>10</sup> Eti GODAA aggido gishshau, maana, shin kallokkona; shaaramuxana, shin naata corayokkona.

#### *GODAI Eeqau Goinniyoogaa Ixxees*

<sup>11</sup> “SHAaramuxatetta, gam77ida woine eessainne yelaga woine eessai ta asaa wozanaa bashshees. <sup>12</sup> Ta asai mittaappe oosettida eeqa misiliyaa zoriyaa oichchees; eta gatimai eta oishaa zaarees. SHAaramuxa ayyaanai eta balettiis; eti bantta Xoossaappe shaahettidi shaaramuxidosona. <sup>13</sup> Deretu huuphiyan yarshshuwaa yarshshoosona; keratu bollankka kuwai lo77o gidiyo adussanne daashsha mittatu garssankka ixaanaa cuwayoosona.

“Hegaa gishshau, intte macca naati shaaramuxa kiyooosona; intte naatu maccaasatikka shaaramuxoosona. <sup>14</sup> Intte macca naati shaaramuxiyo wodenne intte naatu maccaasati shaaramuxiyo wode, taani qaxxayikke; aissi giikko, attuma asati bantta huuphiyan shaaramuxiyaageetuura zuppetoosona; shaaramuxiyaageetuura yarshshuwaa yarshshoosona. Hegaa gishshau, akeekai banna asai aadhdhi wodhdhana.

<sup>15</sup> “Israa7eela asatoo, intte shaaramuxa kiyikkokka, Yihudaa asai intteegaadan, mooranchcha gidoppo. Gelggala booppite; Beeti-Aweenikka pude kiyoppite; ‘GODAI ero!’ yaagidi caaqgoppite. <sup>16</sup> Israa7eela asai makkalanchcha usseedan makkaliis. Yaatin, GODAI eta aaho dembban dorssa maratudan waatidi heemmanee? <sup>17</sup> Efireema asai eeqatun gaittiis; eta aggiigite. <sup>18</sup> Eti daro woiniyaa uyi simmidi, shaaramuxiyooogaa aggokkona; eta haariyaageetikka yeellayiyaabaa keehippe dosoosona. <sup>19</sup> Carkkoi eta efaana; bantta eeqau yarshshido yarshshotu gaasuwan eti yeellatana.

## 5

<sup>1</sup> “Inttenoo, qeesetoo, haggaa siyite! Inttenoo, Israa7eela asatoo, ezggite! Kawuwaa keettaa asatoo, akeekite! Ha pirddai intte bolli pirddettiis. Intte Mixiphphan piredan hanideta; Taaboora Deriyaa bollikka micciddo gitedan hanideta. <sup>2</sup> Makkalanchchati woriya diizzadan hanidosona; heggaa gishshau, taani eta ubbaa qaxxayana. <sup>3</sup> Efireemabaa taani erais; Israa7eelikka taappe geemmibeenna. Efireemaa, neeni ha77i shaaramuxa kiyadasa; Israa7eelikka tuniis” yaagees.

### *Hoose7i Asai Eeqaassi Goinnennaadan Seeriis*

<sup>4</sup> Israa7eela asai bantta Xoossaakko simmennaadan, eta iita oosoi eta teqqiis; shaaramuxa ayyaanai eta giddon de7ees. Heggaa gishshau, eti GODAA erokkona. <sup>5</sup> Israa7eela asaa otoroi eta bollan markkattees; heggaa gishshau, Israa7eela asainne Efireema asai bantta nagaran xubettoosona; Yihudaa asaikka etaara xubettees. <sup>6</sup> Eti GODAASSI yarshshanau bantta dorssatu wudiyaanne mehiyaa wudiya laaggi ekkidi baana; shin eti a demmokkona. Aissi giikko, i etappe shaahettiichchiis. <sup>7</sup> Eti GODAAYYO ammanettibookkona; eti yelido naatikka assa gidokkona. Heggaa gishshau, ha aginai xeeranaashin, etikka eta biittaikka xayana.

### *Israa7eelinne Yihudai Olettiyo Olaa*

<sup>8</sup> Gib77a kataman malkkataa, Raama kataman xurumbbaa punnite. “Biniyaama asau, nuuni intte guyyiyan de7oos; heggaa erite!” yaagidi, Beeti-Aweenan waasuwa xulluusite. <sup>9</sup> Qaxxayettiyo gallassi Efireemi baises attana; Israa7eela zaretu giddon tumu hanabaa taani yootais.

<sup>10</sup> GODAI hagaadan yaagees; “Yihudaa halaqati zawaa sugiyaageetu mala gididosona; taani ta hanquuwaa eta bollan haattaadan gussana. <sup>11</sup> Efireema asai maaddanau dandayenna kawotettatuppe maaduwa oichchanau qachchido gishshau, naqettiisinne pirddan qohettiis. <sup>12</sup> Heggaa gishshau, taani Efireema asaayyo bil77a mala, Yihudaa asaayyookka quno mala.

<sup>13</sup> “Efireemi ba harggiyaa, Yihudaikka ba masunttaa be7ido wode, Efireemi Asoore biitti biis; biidi he biittaa haariya gita kawuwaa maaduwa oichchiis. SHin i eta harggiyaa xallanau woikko eta masunttaa pattanau danddayibeenna. <sup>14</sup> Heggaa gishshau, taani Efireemayyo gaammodan hanana; Yihudaayyookka wodala gaammodan hanana. Taani eta mentterettada, tookka ekkada baana; ooninne eta taappe wotti ekkenna. <sup>15</sup> Eti bantta mooruwaa akekana gakkanaashiinne tana koyana gakkanaashin, taani guyye ta sohuwaa simmashshana. Eti bantta tuggau tana minttidi koyana” yaagees.

## 6

### *Israa7eela Asai Nagaraappe Tuma Gidenna Simuwaa Simmiis*

<sup>1</sup> Israa7eela asai hagaadan yaagees; “Haayite! Ane GODAAKKO simmoos. I nuna mentterettiis, shin i nuna pattana; i nuna masunxxiis, shin i nu masunttaa qachchana. <sup>2</sup> Naa77u gallasaappe guyyiyan, i nuna pattana; heezantto gallassi nuuni a sinttan de7ana mala, i nuna denttana. <sup>3</sup> GODAA ane eroos; a erana mala, minttidi ane

a kaalloos. Awai mokkiyoogee tuma gidiyooagaan, ikka tumu beettana. Badhdheesa iraadana, biittaa aliya balggo iraadana, i nuukko yaana” yaagees.

<sup>4</sup> GODAI hagaadan yaagees; “Efireema asau, taani inttena waatooshsha! Yihudaa asau, taani inttena waatooshsha! Aissi giikko, intte siiqoi maallado shaaraa mala; sohuwaara xayiya guuraa xaazaa mala. <sup>5</sup> Hegaa gishshau, taani hananabaa yootiyaageetu baggara inttena qanxxerettaas; ta doonaappe kiyida qaalana taani inttena woraas. Ta pirddaikka intte bolli poo7uwaadan pozhzhu gaana. <sup>6</sup> Aissi giikko, taani aggenna siiquwaa koyaisippe attin, yarshshuwaa koyikke; Xoossaa eriyooogaa koyaisippe attin, xuuggiyo yarshshuwaa koyikke.

<sup>7</sup> “SHin eti Addaamedana, maachchaa kanttidosona; kanttidi yan taassi ammanettennan ixxidosa. <sup>8</sup> Gala7aade katamai iita oosuwaa oottiya asati de7iyo katama; he katamai asaa suuttan mooretti uttiis. <sup>9</sup> Panggati asa woranau qosetti uttidi naagiyooagaan, qeesetu citaikka hegaadan naagees; naagidi Sekeema katamaa efiya ogiyan asaa worees. Ee, eti yeellaiya kobabaa oottoosona. <sup>10</sup> Taani Israa7eela asan dagantiyabaa be7aas. Efireema giddon shaaramuxatettai de7ees; Israa7eelikka tuniis.

<sup>11</sup> “Yihudaa biittaa asatoo, inttenakka qaxxayana gallassaa taani keera wottaas.

## 7

<sup>1</sup> “Taani Israa7eela pattanaunne zaarettada ishalissanau koyiyo wode, Efireema nagarainne Samaariyaa asaa iita oosoi qoncci beettees. Aissi giikko, eti worddotoosona; kaisoti son keettaa mentti gelidi wuuqqoosona; panggatikka karen bonqqoosona. <sup>2</sup> SHin taani eta iita oosuwaa ubbaa hassaiyoogaa eti akeekokkona. Eta iita oosoti eta dooddi wottidosona; he iita oosoti ubba wodekka ta sinttan de7oosona.

### *Kawo Keettan Denddida Maquwaa*

<sup>3</sup> “Eti kawuwaa bantta iitatettan, halaqatakka bantta wordduwan ufaissoosona. <sup>4</sup> Eti ubbaikka makkalanchcha; daabbuwaa uukkiyaagee coociyan eettido tamaadan, eti hanqquwan eexxi kiyooosona. He uukkiyaagee munaqqiyoogaa polidi, munaqai denddana gakkanaashin, tamaa eettenna. <sup>5</sup> Nu kawuwaa baalaa bonchchiyo gallassi, makkalanchchati halaqata woine eessan mattoyidi harggissidosona; uukkiyaagee ba kushiya denttidi, qilliicciyaageetussi malaatees. <sup>6</sup> Eta wozanai tama cooce mala; eti shiiqidi maqettidosona. Uukkiyaagee qamma ubbaa xiskkiiddi aqees; sa7ai wontiyo wode tama lacodan, a hanqqoi eexxi kiyees. <sup>7</sup> Eti ubbaikka tama coocedan michchoosona; michchidi banttana haariyaageeta moosona. Eta kawoti ubbaikka kunddidosa; etappe ooninne tana xeesiyaabi baawa.

### *Israa7eela Asaanne Hara Kawotettatu Asaa*

<sup>8</sup> “Efireema asai hara kawotettatu asaara walahettiis; Efireema asai aatti yeggibeenna oittaa mala gidiis. <sup>9</sup> Allagati a wolqqaa miidosona, shin i hega eribeenna; a huupheekka puulummiis, shin i hega eribeenna. <sup>10</sup> Israa7eela asaa otoroi eta bollan markkattees. Hegee ubbai haninkka eti GODAAKKO, bantta Xoossaakko, simmi-bookkona woikko a koyiobookkona.

<sup>11</sup> “Efireema asai qofi banna eeyya haraphphe mala. Maaduwaa demmanau issiton Gibxxe xeesees; issiton qassi Asoorekko simmees. <sup>12</sup> Eti biyo wode, taani eta bollan gitiyaa yeggana; taani eta saluwaa kafotudan, duge goochchada wottana. Eta iita oosuwaa gishshau, taani eta qaxxayana.

<sup>13</sup> “Etau aayye7ana! Aissi giikko, eti taappe wora simmidosa. Eta bashshiyaabai yo! Aissi giikko, eti ta bolli makkalidosona. Taani eta wozanau koyaas; shin eti ta bolli wordduwaa haasayoosona. <sup>14</sup> Bantta hiixan zin77idi zilaaloosonappe attin, bantta wozanaappe tana woossokkona. Kattaassinne woine eessaassi bantta bollaa mashshan qanxxiiddi, hara xoossata woossoosona; shin eti ta bolli makkalidosona.



<sup>15</sup> “Taani eta loohissaasinne minttaas; yaatinkka tau iitabaa maqettoosona. <sup>16</sup> Eti simmoosona, shin taakko simmokkona. Eti wora xonggiya wonddafiya mala. Eta halaqati iitabaa haasayyoogaa daafan, bisuwan wurana; hegan eti Gibxxe asan qilliiccettana.

## 8

### *Israa7eela Asai GODAA Ixxiis*

<sup>1</sup> “Malkkataa punna! Aissi giikko, eti ta maachchaa kanttidi, ta higgiiya menttido gishshau, GODAA asaa bolli morkkee arggantaadan aallanttees. <sup>2</sup> Eti, ‘Abeet nu Xoos-sau, nuuni Israa7eela asai nena eroos’ yaagidi taayyo waassoosona. <sup>3</sup> SHin Israa7eela asai lo77obaa ixido gishshau, morkkee eta yedettana.

<sup>4</sup> “Eti tana oichchennan banttau kawota kawoyidosona; taani yootennan de7ishin, halaqata dooridosona. Bantta xayuwau gaaso gidiiya eeqa misileta bantta biraappenne worqqaappe medhdhidosona. <sup>5</sup> Samaariyaa asau, mara milatissidi intte medhdhido eeqa taani ixxaas; ta hanqqoi intte bolli eexxi kiyiis. Eti geeshsha gidennan aude gakkanaasshin daanee? <sup>6</sup> Kushe hiillai a medhdhiisippe attin, i Xoossaa gidenna. Samaariyaa eeqa misilee meqerettana.

<sup>7</sup> “Eti carkkuwaa zeroosona; zeridi gotiyaa cakkoosona. Equwan de7iya eta kattau aifee baawa; hegae gishshau, xiillee baawa; xiillee de7iyaakkokka allagati maana. <sup>8</sup> Israa7eela asai mitettiis; ha77i eti allaga asatu giddon de7oosona; eti meqqida miishshadan, pattenna asa gididosona. <sup>9</sup> Eti baddo harddiidai barkka yuuyiyoogaadan yuuyiiddi, Asoore biitti biidosona; Efireema asai bana maaddiya asa miishshan sham-miis. <sup>10</sup> SHammikkokka, taani eta shiishshana. Kare biittaa kawotinne halaqati eta huqgunnolare, eti sohuwaara hitana.

<sup>11</sup> “Efireema asai nagaraa yarshshuwaa yarshshiyo daro sohota keexxiis; shin he yarshsho sohota nagaraa oottiyo soho gididosona. <sup>12</sup> Taani etau ta higgiiyan darobaa xaafaas; shin eti he higgiiya allagabaadan xeellidosona. <sup>13</sup> Eti yarshshanau dosoosona; yarshshuwaa ashuwaakka moosona; shin GODAI etan ufaittibeenna. I ha77i eta mooruwaa hassayana; qassi eta nagaraa gishshauka eta qaxxayana; eti Gibxxe biitti baana. <sup>14</sup> Israa7eela asai bana Medhdhidaagaa dogidi, kawo keettata keexxiis; Yihudaa asaikka gimbettida daro katamata keexxiis. SHin taani he katamatun tamaa yeddana; yeddin eta qatota maana” yaagees.

## 9

### *Hoose7i Israa7eela Asaa Bolli Yaana Qixaatiyaa Yootiis*

<sup>1</sup> Israa7eela asatoo, ufaittoppiti! Hara kawotettatudan, poocu gooppiti! Aissi giikko, intte intte Xoossaappe shaahettidi, shaaramuxideta; kattaa qoxxiyo aude ubban shaaramuxeessi immiyo waagaa dosideta. <sup>2</sup> Hegaa daafan intte audiyaappe katta, woiniyaa gum77iyoosaappekka eessa demmekketa; qassi woiniyaa turaikka etau aifenna. <sup>3</sup> Eti GODAA biittankka gam77okkona. SHin Efireemi Gibxxe biitti simmana; qassi Asoore biittan tuna qumaa maana.

<sup>4</sup> Eti GODAASSI woiniyaa eessaa yarshshuwaa gussokkona; eta yarshshoikka a ufaissenna. He yarshshoi etau shochcha mala gidana; hegae miya ubbai tunana. He oittai eti maanaassappe attin, GODAA Beeta Maqidasiyaa gelenna. <sup>5</sup> Keerido baala gallassinne GODAA bonchchiyo baala gallassi, intte ai oottuuteeti? <sup>6</sup> Eti bashshaappe kessi ekkikkokka, Gibxxee eta shiishshana; shiishshin Memppisa giyo katamai eta moogana. Eti shiishshido bira miishsha ubbai dooyee maayin attana; eta dunkkaaniyaa gidonkka buloi buuzoi mokkana.

<sup>7</sup> Qixaatiyaa gallassai yiis; Xoossai asaayyo a oosuwaadan oosuwaadan zaariyo wodee gakkiiis. Israa7eela asai hegae ero! Intte iita nagaraa gishshaunne intte diina morkketettaa gishshau intte, “Hananabaa yootiyaageeti eeyya; ajjuutaa

be7iyaageetikka gooyiyaageeta” yaagideta. <sup>8</sup> Hananabaa yootiyaagee ta Xoossaara issippe gididi, Efireema naagiyaagaa. SHin hemettiyo oge ubban Efireemayyo kafo oiqqiyooogaadan, piree wodhdhi uttiis; a Xoossaa keettanka morkketetta de7ees. <sup>9</sup> Beni Gib77a kataman hanidoogaadan, eti keehi tunidosona. Xoossai eta mooruwaa hassayana; hassayidi eta nagaraa qaxxayana.

### *Israa7eela Asaa Nagaraanne A Kaalliya Pirddaa*

<sup>10</sup> GODAI hagaadan yaagees; “Taani Israa7eela asaa bazzon woine teeraa demmiyoogaadan demmaas. Taani intte aawata balasiyaa giyo mittan de7iya koiro aifiyaa be7iyooogaadan be7aas. SHin eti Ba7aali-Pa7oora giyoosaa yiidi, Ba7aala giyo eeqaassi goinnidosona; yaatidi bantta dosido eeqaadanka tunidosona. <sup>11</sup> Efireema bonchchoi kafodan paalli xayana; hagaappe sinttanau yeliyoobi baawa; abbe ixettiyoobi baawa; shahaariyoobi baawa. <sup>12</sup> Eti naata yelidi dichchikkokka, issoinne attennan worarggada, eta yeloi bainna asa kessana. Taani etappe haakkido wode, etau aayye7ana. <sup>13</sup> Efireema asai omooduwau imettishin be7aas; Efireema asai bantta naata goora7iyaageetussi kessidi immanau koshshees” yaagees.

<sup>14</sup> Abeet GODAU, etau imma! Neeni etau ai immuutee? Neeni etau boshettiya uluwaanne melida xanttaa imma.

<sup>15</sup> GODAI hagaadan yaagees; “Eta iitatetta ubbai Gelggala giyoosaana; taani eta ixxiyoogaa yan doommaas. Eta oosuwaa iitatettaa gishshau, taani eta ta keettaappe gooddana; hagaappe sinttanau taani eta siiqikke; eta haariyaageetikka makkalanchcha. <sup>16</sup> Efireema asai deshettin, eta xaphoi meliis; aifiyaakka aifokkona. Eti naata yelikkokka, taani eti siiqiyo naata worana” yaagees.

### *Hoose7i Israa7eela Asaa Seeriis*

<sup>17</sup> Eti ta Xoossai giyoobaa siyenna gishshau, i eta pixiri olana; olin eti kawotettatu gidдон toilattiyaageeta gidana.

## 10

<sup>1</sup> Israa7eela asai daayida woine turaa mala; eti banttau aifiyaa aifoosona. Eti aifiyo aifee darido keenaa yarshshiyo sohota darissi keexxidosona. Eta biittai duretido keenaa, goinniyo eeqa tuussata alleeqissidi medhdhdidosona. <sup>2</sup> Eta wozanan genee kumiis; ha77i eti bantta mooruwaa qixaatiyaa ekkanau koshshees. GODAI eti yarshshiyo sohota laalana; eta eeqa tuussata xaissana.

<sup>3</sup> He wode eti, “Nuuni GODAASSI yayyibeenna gishshau, nuussi kawoi baawa; shin nuussi woni kawoi de7iyaakkonne ai oottanee?” yaagana. <sup>4</sup> Eti hekkennabaa haasayoosona; maachchaa maacettiiddikka wordduwan caaqqoosona. Hegaa gishshau, woriya sharafai shooqan doliyoogaadan, eta bollan pirddai dolana. <sup>5</sup> Samaariyaa kataman de7iya asai Beeti-Aweenan de7iya maraa misiliyaayyo yayyoosona. A bonchchoi appe shaahettiichchido gishshau, asai au yeekkana; he eeqa misiliyau oottiya qeesetikka waassana. <sup>6</sup> He eeqa misilee Asoore biitti toohetti biidi, gita kawuwaassi giiradan imettana. Efireema asai yeellatana; Israa7eela asaikka ba eeqa misiletu daafan kauyyana.

<sup>7</sup> Samaariyaa kawoi haattaa bollan qaixaaree toohettiyoogaadan, toohetti xayana. <sup>8</sup> Qassi Israa7eela asai Aweena giyo kataman eeqau goinnidi, nagaraa oottiyo xoqqa sohotikka qolettana; eti yarshshiyoosan agunttainne gom77oree mukkana. Yaatin, eti dereta, “Nuna genttite!” yaagana. Keratakka, “Nu bolli kunddite!” yaagana.

### *GODAI Israa7eela Bolli Pirddiis*

<sup>9</sup> GODAI hagaadan yaagees; “Israa7eelatoo, intte Gib77an nagaraa oottido gallasappe doommidi, nagaraa oottiyoogaa aggibeekketa. Hegaa gishshau, Gib77a kataman intte bolli olai denddana. <sup>10</sup> Taani koyiyo wode, he makkalanchchata qaxxayana.

Eti oottido daro nagaraa gaasuwan taani eta qaxxayiyo wode, kawotettati eta bollan shiiqana.

<sup>11</sup> “Efireemi kattaa yerettaa dosiya, wadhdhidi kessido mirggo mala; shin taani a puula morggiyan qambararaa wottada waaxana. Yihudaa asai goyanau koshshees; Yaaqooba asaikka gadiyaa phalqqanau koshshees. <sup>12</sup> GODAI yiidi, xillotettaa intte bolli iraadana bukissana gakkanaashin, intte a koyiyo wode gidiyo gishshau, inttessi xillotettaa zerite; zeridi aggenaa siiquwaa cakkite; otta biittaakka phalqqite.

<sup>13</sup> “Intte iitatettaa zeridi, nagaraa cakkideta; intte wordduwaa aifiyaakka miideta.

“Intte intte wolqqaaninne intte daro olanchchatun ammanettido gishshau, <sup>14</sup> intte asaa bolli olaa dirbbai denddana; dendididi beni olaa wode Kawoi SHalmmaani Beeti-Arbbeela katamaa olidi bashshidoogaadaaninne aayetuuranne naatuura gatto mentterettidoogaadan, intte qatoti hegaadan olin bayana. <sup>15</sup> Inttenoo, Beetele katamaa asatoo, intte hanttaara iitatettaa daafan intte bollikka haggaa malabai gakkana. He gallassi sa7ai wonttiyo wode, Israa7eela kawoi muleera xayana.

## 11

### *Makkalikkonne GODAI Ba Asaa Israa7eela Siiqees*

<sup>1</sup> “Israa7eeli naatettan de7iyo wode, taani a siiqaas; siiqada taani ta na7aa Gibxxe biittaappe xeesaas. <sup>2</sup> Taani eta darissada xeesin, eti taappe daro haakkidi biidosona. Ba7aala geetettiya eeqatussi yarshshuwaa yarshshidosona; qassi eeqaa misiletussi ixaanaa cuwayidosona. <sup>3</sup> Efireema asaa haraqiyaa oiqqada hemetaa tamarissidai tana; shin eta pattidaagee tana gidiyoogaa eti erokkona. <sup>4</sup> Taani eta qaretaaninne siiquwaa wodoruwan goochchaas; eta morggiyaappe qambararaa denttaas; denttada hokkada eta mizaas.

<sup>5</sup> “Eti taakko simmennan ixido gishshau, Gibxxe biitti simmana; qassi Asoore biittaa kawoi eta bolli kawotana. <sup>6</sup> Eta morkkiyaa bisoi eta katamata olana. Eta katamatu penggetakka mentterettana; eta zoretaikka laalettana. <sup>7</sup> Ta asai taappe haakkidi baanau qofaa qachchiis. Huqqunnaa qambararaa gaasuwan eti waassana; shin ooninne he qambararaa eta morggiyaappe denttena.

<sup>8</sup> “Efireemaa, taani nena waatada aggoo? Israa7eelaa, taani nena waatada aatta immoo? Taani nena waatada Adaama giyo katamaadan oottoo? Taani nena waatada Xaboima giyo katamaadan oottoo? Taani nena keehi siiqiyo gishshau, ta wozanai heggaa eenenna. <sup>9</sup> Taani ta suulliyya hanqquwan eta ainne oottikke; qassi Efireema naa77anttuwaa xaissikke. Aissi giikko, taani Xoossappe attin, asa gidikke. Taani Geeshsha Xoossai intte gidдон de7ais; inttekko suulo hanqquwan yiikke.

<sup>10</sup> “Eti GODAA kaallana; ikka gaammodan gudana. I gudiyo wode, a naati arggo baggappe yaana; <sup>11</sup> Gibxxe biittaappe kafotudan, Asoore biittaappekka haraphphetudan, paalliiddi yaana. Yin taani eta eta keettan keettan wottana. Taani GODAI haggaa odaas” yaagees.

### *Israa7eela Bollinne Yihudaa Bolli Pirddai Pirddettiis*

<sup>12</sup> Efireema asai wordduwan, Israa7eela asaikka cimuwana tana dooddidosona. Yihudaa asaikka ammanttiya Geeshsha Xoossaa bolli xalttaamiis.

## 12

<sup>1</sup> Efireema asai maalladeppe omarssi gakkanaashin oottiyoobai ubbai, arshshoora yiya carckuwaa kuuciiyoogaa woikko yedettiyoogaa mala go77enna. Eti wordduwaanne makkala oosuwaa darissoosona; Asoore biittaara maachchaa maacettoosona; wogaraa zaitiyaa Gibxxe biitti yeddoosona.

<sup>2</sup> GODAAYYO Yihudaa asaara mootoi de7ees; i Yaaqooba asaa eta ogiyaadan qaxxayana; eta oosuwaadankka au zaarana. <sup>3</sup> Yaaqoobi ba aayee uluwan

de7iiddi, ba ishaa ginddiyaa oiqqiis. Qassi gamma gakkidi, Xoossaara baaxetiis; <sup>4</sup> kiitanchchaarakka baaxetidi xooniis. Bana keha aifiyan xeellanaadan, ba ishaa yeekkidi woossiis. Yaaqoobi Xoossaa Beeteelen demmiis; demmin Xoossai yan aara haasayiis. <sup>5</sup> Hegee GODAA, Ubbaappe Wolqqaama Xoossaa. I erettido sunttaikka GODAA geetettes. <sup>6</sup> Hegaa gishshau, intte Xoossaakko simmite; siiquwaanne suure pirddaa mintti oiqqite; intte Xoossai oottanaashin naagite.

<sup>7</sup> Zal77anchchaa kushiyan worddo meezaanai de7ees; asaa i cimmiyoogaa dosees. <sup>8</sup> Efireemi, “Taani daro dure; taani taayyo aquwaa demmaas. Ta aquwaa ubbaa gidдон tanan eti bala woikko nagara gidiyaabaa demmökkona” yaagiis.

<sup>9</sup> GODAI hagaadan yaagees; “Taani inttena Gibxxe biittaappe kessada ehiida GODAA intte Xoossaa; Daase Baalaa gallassaadan, taani inttena naa77anttuwaakka dunkkaaniyan wottana. <sup>10</sup> Taani hananabaa yootiyaageetussi haasayaas. Daro ajjuutaakka etau immaas; qassi eta baggaara daro leemisota yootaas” yaagees.

<sup>11</sup> Gala7aaden nagarai de7ees; Gala7aade asati tumuppe pattenaaageeta. Eti Gelggalan korimata yarshshoosona. Hegaa gishshau, eti yarshshiyosati goshsha gidдон keelido shuchcha mala gidana.

<sup>12</sup> Yaaqoobi Sooriyaa biitti baqatiis; maccaasa ekkanau keraa oottiis. Maccaasa ekkana gishshau, i yan dorssaa heemmiis. <sup>13</sup> GODAI Israa7eela asaa hananabaa yootiyaagaa baggaara Gibxxe biittaappe kessiis; kessidi he hananabaa yootiyaagaa baggaara eta naagiis. <sup>14</sup> SHin Efireemi GODAA keehi hanqquetissiis; suutta i gussidoogaa acuwaa a Godai a achchana; qassi a cashshaa au zaarana.

## 13

### *Israa7eela Wurssetta Pirddaa*

<sup>1</sup> Efireema asai haasayido wode, siyida asai yashshau kokkoriis; Israa7eela biittan eti bonchchettida asa. SHin Ba7aala giyo eeqaayyo goinnidosona; he mooruwaa gaasuwan haiqqidosona. <sup>2</sup> Ha77ikka nagaraa bolli nagaraa oottoosona; qassi banttau goinnanau, seerissidi misileta medhdhoosona. He misileti hiillan biraappe merettidaageeta; eti ubbaikka kushe hiillai medhdhidoogeeta. Etabaa asai haasayiiddi, “Haa yiite; etayyo yarshshuwaa yarshshite; ha maraa misiliyaakka yerite” yaagees. <sup>3</sup> Hegaa daafan eti maallado shaaraa mala, woikko guuran qolettiya maallado xaazaa mala woikko carkkoi audiyaappe denttidi efiyo suulla mala woikko maskkootiyaara kiyiya cuwa mala gidana.

<sup>4</sup> GODAI hagaadan yaagees; “Taani inttena Gibxxe biittaappe kessada ehiida GODAA intte Xoossaa. Intte taappe attin, hara xoossa erekketa; ashshiyaageekka taappe attin, hari baawa. <sup>5</sup> Bazzuwan, mela biittan taani inttena naagaas. <sup>6</sup> Taani inttena mizin, miidi kallideta; kallidi otorettideta; hegaappe guyyiyan, tana dogideta. <sup>7</sup> Hegaa gishshau, taani intte bolli gaammo mala gidana; qassi maahedan, ogiyaa doonan zuggana. <sup>8</sup> Marata wotti ekkido maahedan, taani inttenaara gaittana; gaittada inttena daakerettana. Qassi taani inttena gaammodan yan maana; bazzo do7adan, inttena poosherettana.

<sup>9</sup> “Israa7eela asatoo, intte ta bolli, inttena maaddiyaagaa bolli morkketettan denddiyo gishshau, taani inttena xaissana. <sup>10</sup> Intte tana, ‘Nuussi kawonne deriyaa haariyaageeta imma’ yaagidi oichchideta. Inttena ashshanau intte kawoi anee? Intte deriyaa haariyaageeti intte katamatu gidдон augan de7iyoona? <sup>11</sup> Taani ta hanqquwan intteyyo kawuwaa immaas; immada ta yiilluwan a diggaas.

<sup>12</sup> “Efireema mooroinne nagarai xaafettidi, mazggafa keettan uttiis. <sup>13</sup> Maareti oiqqido maccaasiyaa tuggatiyoogaa mala tuggai a bolli yaana. SHin i eri bainna na7a; aissi giikko, i yelettiyo wodee gakkini, ba aayee uluwaappe wodhdhennan ixxiya

na7a mala. <sup>14</sup> Eta taani duufuwaappe ashshana; haiquwaa wolqqaappekka wozana. Haiquwau, ne boshati awaanee? Duufuwau, ne bashshai awaanee?

“Taani ta asaayyo qarettikke. <sup>15</sup> Efireemi ba ishanttu gidon minnikkokka, GODAI yeddido arshsho bagga carrkoi bazzoppe carkkiiddi yaana. Yobare a pulottoti to77ana; a haatta ollatikka melana. Buquraa i minjjiyo keettatun de7iya al77o miishsha ubbai bonqqettana. <sup>16</sup> Samaariyaa asai bantta Xoossaa bolli makkalido gishshau, bantta mooruwaa qixaatiyaa ekkanau bessees. Eti bisuwan busakettana; eta guutta naatikka kinchchettana; eta shahaara maccaasatu uloikka phalqqettana” yaagees.

## 14

### *Hoose7i Israa7eela Asai GODAAKKO Simmanaadan Watiwatiis*

<sup>1</sup> Israa7eela asau, intte nagaraa gaasuwan xubettidi kunddideta. Intte ha77i GODAAKKO, intte Xoossaakko simmite. <sup>2</sup> GODAAKKO simmidi, hagaadan yaagidi woosite; “Nu nagara ubbaappe nuna maara; neeni nuna ne kehatettan shiishsha ekka; yaatin nuuni nu inxxarssan nena galatana. <sup>3</sup> Asoore biittai nuna ashshenna; nuuni olaa paratakka toggokko. Nuuni nu kushen medhdhido eeqa misileta mulekka, ‘Hageeti nu xoossata’ gookko. Aawai bainnaageetussi qarettiyai nena” yaagite.

### *GODAI Israa7eela Asaa Ooraxissanau Ufaissaa Immiis*

<sup>4</sup> GODAI hagaadan yaagees; “Ta hanqqoi etappe simmiis; heгаа gishshau, taani eta makkala hanuwaappe eta pattana; pattada eta wozanappe siiqana. <sup>5</sup> Taani Israa7eela asaayyo xaaza mala gidana; eti ciishshaadan ciyyidi, Liibaanoosa zigaadan, xaphuwaa yeddana. <sup>6</sup> Eta yelaga marati daayana; wogaraadan eti lo77ana. Eta sawoikka Liibaanoosa zigaadan tonggu gaana. <sup>7</sup> Asai simmidi, ta kuwaa garssan de7ana; kattaa carshshaadan, eti salqqisalqqana; qassi eti woiniyaa turaadan ciyyana; Liibaanoosa woiniyaa eessaadan, deree eriyooobaa gidana. <sup>8</sup> Hagaappe sinttan Efireema asai eeqa misileera gaittena; taani intte woosaa siyananne inttena naagana. Taani irxxa zigaa mala; intteyyo anjjo ubbai taappe beettana” yaagees.

### *Wurssettaa*

<sup>9</sup> Aadhdhida erai de7iyo ooninne haggaa akeeko; wozani de7iyo ooninne haggaa ero. GODAA ogee suure; xilloti he ogiyaara hemettoosona. SHin nagaranchchati an xubettoosona.



## Hananabaa Yootiya Yuu7eela Maxaafaa

### *Gidduwaa Erissuwaa*

Hananabaa yootiya Yuu7eeli aude de7idaakkonne a de7o taariken daro erettiyaabi baawa. Gido shin, maxaafai beettidoi Kiristtoosa yeletaappe kase, oiddantto woikko ichchashantto xeetu laittaa heeraana geetettidi qofettees. He wodee Parsse kawotetta de7iyo wode. Yuu7eeli odiiddi, Israa7eela biittan daro boolee yaanaagaanne biittaa bashshiya awai awaxxin biittai koshatanaagaa odees. Ha hanotati qassi Godaa Gallassai matattidoogaa odoosona. Godaa Gallassai gakkiiyo wode, a geeshsha shenee polettennaadan warettiyaageeta ubbaa i qaxxayanaagaakka gujjidi odoosona. Hananabaa yootiyaagee asai nagaraappe simmiyaabaa gidikko, Xoossai eta kase eti de7iyo hanotaakko zaaridi, anjjanaagaa hassayissiis. Hanana giidi i yootidobaappe gitatidi beettiya hidootai Xoossai attuma asatunne macca asatu bolli, yelagatunne cimatu bolli, ba asaa ubbaa bolli ba ayyaanaa gussanaagaa odiya sohuwaa.

<sup>1</sup> Putu7eela na7aa Yuu7eelakko GODAI kiittido qaalai haggaa.

### *Boolee Biittaa Kammiis*

<sup>2</sup> Inttenoo cimato, haggaa siyite! Yihudaa biittan de7iyya asau ubbau, ezggite! Haggaa malabai intte wode woikko intte aawatu wode hani erii? <sup>3</sup> Hegaa intte naatussi yootite; yootin intte naati bantta naatussi yootona; qassi eta naatikka kaalliyaa yeletaassi yootona.

<sup>4</sup> Gondduwaappe attida kattaa wude boolee miis; wude booliyaappe attida kattaa gumbburoi miis; qassi gumbburuwaappekka attida kattaa ukkubboi miis.

<sup>5</sup> Inttenoo mattottiyaageetoo, beegottidi yeekkite! Inttenoo, woine eessaa uyiya ubbatoo, zilaalite! Aissi giikko, mal77iyya woine eessai intte doonaappe attiis. <sup>6</sup> Qoodai banna wude boolee ta biittaa woraajjiis. Eta achchai gaammuwaa achchaa mala; qassi eta kasilaikka gaammee kasilaa mala. <sup>7</sup> Eti ta woiniyaa turaa booddilissidosona; ta balasiyaa mittaakka xoggidosona. Eti poquwaa ubbaa poqqi olido gishshau, woiniyaanne balasiyaa tasheti ubbai booxxidosona.

<sup>8</sup> Asau, ba yelagatettan a giigido azinai haiqqin, waaruwaa maayada yeekkiya geela7eedan, ubbaikka yeekkite! <sup>9</sup> Kattaa yarshshoinne ushshaa yarshshoi GODAA Beeta Maqidasiyaa biyoogaa aggiis; heggaa gishshau, GODAASSI oottiya qeeseti yeekkoosona. <sup>10</sup> SHooqai mela attiis; biittaikka yeekkees. Aissi giikko, kattai xayiiis; woiniyaa turai meliis; zaiteekka laafiis.

<sup>11</sup> Inttenoo goshshanchchatoo, azzanite! Inttenoo, woiniyaa turaa tokkiyaageetoo, zilaalite! Aissi giikko, cahau gakkida gistteenne banggai gaden xayiiichchiis. <sup>12</sup> Woiniyaa turai meliis; balasiyaa mittaikka shulliis; roomaane giyo mittai, temire giyo mittai, appiliyaa giyo mittainne qassi shooqan de7iyya hara mitta ubbaikka meliis. Heggaa gishshau, asaappe ufaissai haakkiis.

<sup>13</sup> Inttenoo qeesetoo, waaruwaa maayidi yeekkite! Inttenoo, yarshshiyooosan oottiya qeesetoo, zilaalite! Inttenoo, ta Xoossaa sinttan oottiyaageetoo, Beeta Maqidasiyaa gelite; gelidi waaruwaa maayidi aqite. Aissi giikko, kattaa yarshshuwaanne ushshaa yarshshuwaa Xoossaa Beeta Maqidasiyan yarshshiyooobi baawa.

<sup>14</sup> Xoomaa awaajjite; geeshsha yaa7au asaa xeesidi shiishshite; cimatanne biittan de7iyya asa ubbaa GODAA intte Xoossaa Beeta Maqidasiyaa shiishshite; yaatidi yan GODAAKKO waassite!

<sup>15</sup> GODAA gallassai matees; he gallassau aayye7ana! He gallassai Ubbaa Danddayiya Xoossaappe bashsha gallassa gididi yees. <sup>16</sup> Nu sinttaappe kattai, nu Xoossaa Beeta Maqidasiyaappe ufaissainne ililssai xayiiis gidennee? <sup>17</sup> Zeretta biitta gidдон buuqqiis;

kattai meliichchido gishshau, kootta ubbai gufanniis; gootaratikka kolettiichchidosona. <sup>18</sup> Meheti keehi waassoosona; miizaa wudiyaukka heemettiyoosai bainna gishshau, yaanne haanne bichchaaroosona. Harai atto, dorssaa wudetikka tuggatoosona.

<sup>19</sup> Abeet GODAU, tamai bazzon de7iya hentta gadeta mirggido gishshaunne dembban de7iya mitta ubbaa lacoï xuuggirggido gishshau, taani neekko waassais. <sup>20</sup> Goggiya haattai melido gishshaunne tamai bazzon de7iya hentta gadeta mirggido gishshau, harai atto, bazzo do7atikka neekko waassoosona.

## 2

### *Booleti Olanchatudan Woraajidosona*

<sup>1</sup> Xiyoonen malkkataa punnite; ta geeshsha deriyanka malkkataa sissite! Yihudaa biittan de7iya asai ubbai yashshau kokkoro; aissi giikko, GODAA gallassai yees; yiidi matattes. <sup>2</sup> He gallassai xumanne ciggaara gallassa; shaaranne sakkana xuma gallassa! Coranne mino boolee deretu bollan xalqqee wodhdhiyoogaadan wodhdhiis. Eta mali beniisappe doomin de7ibeenna; hagaappe sinttanau daro yeletaa gakkanaukka eta mali de7enna.

<sup>3</sup> Etappe sinttaara tamai mees; qassi etappe guyyeera lacoï xuuggees; etappe sinttai Edene Gannatiyaa mala; shin etappe guyyee booddila bazzo mala; etappe aibinne kessi ekkenna. <sup>4</sup> Eta merai paraa meraa mala; eti olaa paratudan, eesuwan woxxoosona. <sup>5</sup> Parai goochchiyo gaaretudan giiroosona; mela gattaa miya tamaa lacuwaadan xaragoosona; olaa baanau salppida wolqqaama olanchchatudan, eti deretu xeeraara guppoosona. <sup>6</sup> Etappe sinttaara asai kokkorees; eta yashshau ubbaa som77oi karexxees. <sup>7</sup> Eti wolqqaama asatudan woxxoosona; olanchchatudan dirssaa gimbbiyaakka gi77oosona. Eti ubbaikka maaran salppoosona; bantta salppiyaappe gaxi kiyokkona. <sup>8</sup> Eti issoi issuwaara sugettokkona; ubbaikka ba salppiyan salppiyan sitti giidi, sinttau hemettoosona. Eti banttanaara olettiyaageetu gidduwaara xuussidi kanttoosona; he wode eta teqqiyaabi baawa. <sup>9</sup> Eti katamaa eesuwan woraajjoosona; dirssaa gimbbiyaa bollanka woxxoosona. Eti keettaa bollikka kiyooosona; qassi kaisodan, maskkootiyaara geloosona. <sup>10</sup> Etappe sinttaara biittai qaaxxees; salotikka kokkoroosona. Awainne aginai xumoosona; qassi xoolinttetikka bantta poo7uwaa genttoosona. <sup>11</sup> GODAI ba olanchchatu sinttan guummees; au azazettiya olanchchati coranne wolqqaama. GODAA gallassai gitanne daroppe yashshiyaagaa. He gallassaa danddayanai oonee?

### *Nagaraappe Simmanaadan Xeesiyo Xeessaa*

<sup>12</sup> GODAI hagaadan yaagees; “Ha77ikka xoomiiddi, yeekkiiddinne kayyottiiddi polo wozanaappe taakko simmite. <sup>13</sup> Intte wozanaappe attin, intte maayuwaaw pooshshop-pite” yaagees.

GODAAKKO, intte Xoossaakko, simmite; aissi giikko, i qaretainne maarotai kumidoogaa; hanqquwau eesotennaagaanne siiqoi daridoogaa; i inttena qaxxayanau yeemottennaagaa. <sup>14</sup> Ooni erii, GODAI intte Xoossai, ba hanqquwaappe simmidi, intteyyo daro kattaa anjuwaa immanaakkonne. He wode GODAASSI, intte Xoossaassi, kattaa yarshshuwaanne ushshaa yarshshuwaa intte yarshshana.

<sup>15</sup> Xiyoonen malkkataa punnite; xoomaa awaajjite; geeshsha yaa7au asaa xeesidi shiishshite! <sup>16</sup> SHiiqida yaa7aa geeshshite; cimata issippe ehiite; guutta naatanne xammiyaageetakka ashshoppite. Bullachchaawai ba kare keettaappe kiyo; bullashettiyaarakka ba siirixaappe kiyu. <sup>17</sup> GODAU oottiya qeeseti Beeta Maqidasiyaa barandaa appenne yarshshiyooosappe gidduwan eqqidi yeekkona. Eti hagaadan yaagidi woossona; “Abeet GODAU, ne asau qaretta; ne asaa kawotettatu giddon boriyoobaanne baceessiyooosappe kessoppa. Asai ba giddon aissi, ‘Eta Xoossai awan de7ii?’ yaagane?” yaagona.

<sup>18</sup> Yaatin, GODAI ba biittaassi mishettana; qassi ba asaukka qarettana. <sup>19</sup> GODAI zaaridi ba asaa hagaadan yaagana; “Be7ite, taani intteyyo kattaa, woine eessanne za-itiyaa inttena adda kalissiyaagaa yeddana; taani inttena mulekka kawotettatu gidдон boriyoobaa kessikke.

<sup>20</sup> “Huuphessa baggaara yiida booliyaa taani yedettada, intteppe haassana; bazzonne mela biitti taani eta yedettana. Sintta baggaara de7iyaageeta Maxine Abbau, guyye baggaara de7iyaageeta qassi Meediteraane Abbau zaarada yeddana; eta ahai xinqquwaa xo77u gaana. Hegee ubbai eti intte bolli gita iitabaa oottido gishshaassa” yaagana.

<sup>21</sup> Biittau, simmi yayyoppa; GODAI gitabaa oottido gishshau, ufaittanne hashshu ga!  
<sup>22</sup> Inttenoo sa7aa mehetoo, yayyoppite; aissi giikko, bazzon de7iya hentta gadee aaciis; mittaikka ba aifiyaa aifiis; balasiyaa mittainne woiniyaa turaikka aifiyaa herxxexxiis.

<sup>23</sup> Inttenoo Xiyoone asatoo, ufaittite; GODAN, intte Xoossan, hashshu giite! Aissi giikko, i badhdheesaa iraa intteyyo darissidi immiis; qassi i kasegaadan, intteyyo badhdheesaa iraanne ofinttaa iraa gidissidi immiis. <sup>24</sup> Kattaa qoxxiyo audetun kattai kumana; woiniyaa eessainne zayitee gum77iyo ollata kumidi palahana.

<sup>25</sup> GODAI hagaadan yaagees; “Kase taani intte giddo yeddido, ta wolqqaama wudeti, gonddoti, booleti, gumbburotinne ukkubboti miido laittatu acuwaa taani intteyyo qanxxana. <sup>26</sup> Maanau intteyyo daro qumai de7ana. Hegaa gishshau, intte kallananne maalaalissiyaabaa intteyyo oottida GODAA intte Xoossaa sunntaa galatana. Qassi ta asai naa77antto mulekka yeellatenna. <sup>27</sup> He wode taani Israa7eela gidдон de7iyooogaa, taani GODAI intte Xoossaa gidiyooogaanne taappe attin, hara xoossi bainnaagaa intte erana. Qassi ta asai naa77antto mulekka yeellatenna.

### *GODAA Gallassaa*

<sup>28</sup> “Hegaappe guyyiyan hagaadan hanana; taani asa ubbaa bolli ta Ayyaanaa gussana. Intte attuma naatinne intte macca naati hananabaa yootana; intte cimatikka aimuwaa aimottana; intte wodalla naatika ajjuutaa be7ana. <sup>29</sup> He gallassatun ta attuma ashkkaratu bollinne ta macca ashkkaratu bolli taani ta Ayyaanaa gussana.

<sup>30</sup> “Qassi taani bolla saluwan maalaalissiyaabaa, garssa sa7ankka suuttaa, tamaanne sitti giidi pude denddiya cuwaa bessana. <sup>31</sup> Gitanne daroppe yashshiya GODAA gallasai gakkanaappe kase awai xumana; aginaikka suutta milatana. <sup>32</sup> He wode hagaadan hanana; GODAA sunntaa xeesiya ubbai attana. GODAI giidoogaadan, Xiyoone Deriyaaninne Yerusalaamen kessi ekkidi attiyaageeti de7ana. Qassi GODAI xeesidoogeeti paxa de7ana.

## 3

### *Aihuda Gidenna Asatu Bollan Xoossai Pirddana*

<sup>1</sup> “He gallassatuuninne he wodiyan taani Yihudaanne Yerusalaame asaa omooduwaa zaarananne ishalissada wottana. <sup>2</sup> Taani kawotettatu ubban de7iya asaa shiishshada, duge Yoosaafixa Wombbaa wottana; wottada eti ta asaa Israa7eela bolli oottido mooro ubbaa gishshau, taani eta yan pirddana. Aissi giikko, eti ta asaa kawotettatu gidдон laalidosona; qassi ta biittaakka banttau shaakki ekkidosona; <sup>3</sup> ta asaa bollan saamaa yeggidosona; shaaramuxa maccaasaa demmanau, attuma na7aa immidosona; qassi woine eessaa uyanau, macca na7iyo baizzidosona.

<sup>4</sup> “Inttenoo, Xiiroosa, Sidoonanne Pilisxxeema biittaa asatoo, intte ta bolli ai oottanau qoppidetii? Taani oottidoogaa haluwaa kessanau koyeetii? Hegaa intte koyikko, taani eesotada intte oottido oosuwaa intte bolli zaarana. <sup>5</sup> Aissi giikko, intte ta biraanne ta worqqa ekkideta; ta al77o miishshaakka intte eeqa keettata gelissideta. <sup>6</sup> Yihudaa biittaa asaanne Yerusalaame katamaa asaa eta biittaappe haassi efidi, Giriike biittaa asau baizzideta. <sup>7</sup> Be7ite, intte baizzido sohuwaappe taani eta ha77i kessana; kessada intte oottidobaa ubbaa intte huuphiyan zaarana. <sup>8</sup> Taani intte attuma naatanne intte

macca naata Yihudaa biittaa asau aatta immana; qassi etikka haaho biittan de7iya Saaba biittaa asau eta baizzana. Taani GODAI haggaa odaas.

<sup>9</sup> “Hagaadan yaagidi kawotettatu giddon awaajjite; ‘Olau giigite; mino asata denttette! Olanchatati shiiqonanne kiyona. <sup>10</sup> Intte marashaa biso, intte baacaakka toora kessanau qoxxite! Daafuranchchai, “Taani mino!” yaago. <sup>11</sup> Inttenoo, yuushuwan de7iya kawotetta ubbatoo, eesuwan haa yiite; yiidi hegan shiiqite’ yaagite” yaagees.

Abeet GODAU, ne olanchchata yaa duge wotta!

<sup>12</sup> Qassikka GODAI hagaadan yaagees; “Kawotettati denddidi, Yoosaafixa Wombbaa yoona; aissi giikko, Israa7eela yuushuwan de7iya kawotettatu ubbaa bollan pirddanau taani yan uttana. <sup>13</sup> Eta iitatettai keehi dariis. Hegaa gishshau, cahaa wodee gakkinn baacan cakkioogaadan, eta cakkite; woiniyaa aifee gum77iyo ollan kumin yedhdhiyoogaadanka, eta yedhdhite. <sup>14</sup> Pirddaa wombban GODAA gallassai gakkis; heggaa gishshau, daro daro asai pirddaa wombban de7ees. <sup>15</sup> He gallassi awainne aginai xumana; xoolinttetikka bantta poo7uwaa genttana.

### *GODAI Ba Asaa Anjjana*

<sup>16</sup> “GODAI Xiyoonen gididi guummana; Yerusalaamenkka ba cenggurssaa sissana; saloinne sa7ai kokkorana. SHin GODAI ba asaassi Israa7eelassi baqati attiyo sohonne qato gidana. <sup>17</sup> Taani ta geeshsha deriyan Xiyoonen de7iya GODAA intte Xoossaa gidioogaa intte he wode erana. Yerusalaame katamai geeshsha gidana; qassi allagati naa77antto Yerusalaame woraajjokkona.

<sup>18</sup> “He gallassi dereti aife eessaa, woiniyaagaa xokkana; keratika maattaa goggana. Yihudaa biittan de7iya shaafa ubbaara haattai shohattana. GODAA Beeta Maqidasiyaappe pulttoi goggana; goggidi, SHiixima Zanggaaraa ushshana.

<sup>19</sup> “Gibxxe biittai baisa gidana; Eedooma biittaikka booddila bazzo gidana. Aissi giikko, eti Yihudaa asaa bolli iitabaa oottidosona; qassi Yihudaa biittan xillo asaa suuttaakka gussidosona. <sup>20</sup> SHin Yihudaa biittai merinau, Yerusalaame katamaikka yeleta ubbaa gakkanaashin, asi de7iyo soho gidana. <sup>21</sup> Taani haluwaa kessennan aggido eta suuttaa haluwaa biron kessana; aissi giikko, GODAI Xiyoonen de7ees” yaagees.

## Hananabaa Yootiya Amoxa Maxaafaa

### *Gidduwaa Erissuwaa*

Odido kiitai Geeshsha Maxaafaa gidдон haratuugaappe adussan xaafettido, istta giyo hananabaa yootiya asi Amoxa. Amoxi Yihudan de7iya issi katamaappe yiida asa gidikkonne, Kiristtoosa yeletaappe kase, hospunta xeetu laittaassi baggaa heeran ha kiitaa huuphessa baggaara de7iya Israa7eela kawotettau aattiis. He wodee daro duretettai, ayyaanaa de7uwankka asai diccidonne ammanttiya hanotettai beettido wode. Gidikkonne Amoxi duretettai dure asaa xalaalaassi bazzettidoogaa be7iis; qassi hara baggaara suure pirddai xayiyoogeenne hiyyeesata huqqunniyoogee biittan daridoogaa be7iis. Ammanuwaa oiqettaa gidikkokka tumaappe haakkidaagaa, lo77o milatiya iitai kumidoogaanne anoi baina sarotettai de7iyooogaakka be7iis. Hegaa gaasuwan Xoossai ba asaa bolli qixaatiyaa ehaanaagaa hanqquwaaninne xalan kumidi yootiis. Hegaarakka, “Suure pirddai shaafaa haattaadan goggo” yaagidi qofis-siis. Hegaadan hanikko, “Ubbaa Haariya Godai attida Israa7eela asaassi qarettidi maaranaakkonne ooni erii!” yaagiis (5:15).

<sup>1</sup> Ooziyaani Yihudaa biittan kawo, qassi Yo7aasha na7ai Iyorbbaami Israa7eela biittan kawo gididi de7ido laittan Taqo7a biittan dorssaa heemmiyaageetuppe issoi Amoxi, biittai qaaxxanaappe naa77u laittappe kase Israa7eelabaa be7ido ajjuutai haggaa.

<sup>2</sup> I hagaadan yaagiis; “GODAI Xiyoone Deriyan gudees; Yerusalaame katamankka ba cenggurssaa sissees. Henttanchchati mehiyaa heemmiyo hentta gadeti meloosona; Qarmmeloosa Deriyaa huuphiyan de7iya irxxaikka shullees” yaagiis.

### *Israa7eela Yuushuwan De7iya Biittatu Bollan GODAI Pirddiyo Pirddaa*

#### *Sooriyaabaa*

<sup>3</sup> GODAI hagaadan yaagees; “Damasqqo asai zaari zaaridi oottido nagaraa gishshau, taani eta qaxxayennan aggikke. Aissi giikko, eti Gala7aade biittaa asaa birata achchaara de7iya gaariyan yettidi qoxxidosa. <sup>4</sup> Hegaa gishshau, taani Kawuwaa Hazaa7eela keettan tamaa yeddana; yeddin he tamai Kawuwaa Benihadaada qatotakka maana. <sup>5</sup> Taani Damasqqo katamaa penggiyaa hiraquwaa menttana; Aweena Wombban de7iya asaa yedettanne kawotaa xam77aa oiqqidaagaakka Beeti-Edeenappe xaissana; qassi Sooriyaa biittaa asaikka omoodettidi, Qiira giyoosaa baana” yaagees GODAI.

#### *Pilisxeemabaa*

<sup>6</sup> GODAI hagaadan yaagees; “Gaaza katamaa asai zaari zaaridi oottido nagaraa gishshau, taani eta qaxxayennan aggikke. Aissi giikko, eti biittan de7iya asa ubbaa omooddidi, Eedooma biittaa asau baizzidosona. <sup>7</sup> Hegaa gishshau, taani Gaaza katamaa dirssan tamaa yeddana; yeddin he tamai katamaa qatotakka maana. <sup>8</sup> Ashddoodan de7iya asaa taani yedettanne kawotaa xam77aa oiqqidaagaakka Asqqaloonappe xaissana. Egiroona kataman de7iya asaikka qaxxayana; qassi Pilisxeema biittaa asaappe attidaageetikka haiqqana. Taani Ubbaa Haariya GODAI haggaa odais” yaagees.

#### *Xiiroosabaa*

<sup>9</sup> GODAI hagaadan yaagees; “Xiiroosa katamaa asai zaari zaaridi oottido nagaraa gishshau, taani eta qaxxayennan aggikke. Aissi giikko, eti maacetido ishatettaa maachchaa kanttidi, omoodettida asaa ubbaa Eedooma asaassi baizzidosona. <sup>10</sup> Hegaa gishshau, taani Xiiroosa katamaa dirssan tamaa yeddana; yeddin he tamai katamaa qatotakka maana” yaagees.

#### *Eedoomabaa*



<sup>11</sup> GODAI hagaadan yaagees; “Eedooma biittaa asai zaari zaaridi oottido nagaraa gishshau, taani eta qaxxayennan aggikke. Aissi giikko, eti bantta ishannta Israa7eelata bisuwan yedettidosona; eti etau qarettibookkona. Eti ubbatoo hanqqettoosona; eta yiiloi merinaukka simmenna. <sup>12</sup> Hegaa gishshau, taani Temaana katamaa bolli tamaa yeddana; yeddin he tamai Booxira katamaa qatota maana” yaagees.

### *Amoonabaa*

<sup>13</sup> GODAI hagaadan yaagees; “Amoona biittaa asai zaari zaaridi oottido nagaraa gishshau, taani eta qaxxayennan aggikke. Aissi giikko, eti bantta zawaa aassanau Gala7aade biittan de7iya shahaara maccaasatu uluwaa daakkidosona. <sup>14</sup> Hegaa gishshau, taani Raaba katamaa dirssan tamaa yeddana; yeddin he tamai katamaa qatota maana. Hegaappe guyyiyan, olaa gallassi waasoi darana; qassi olanchchati gotiyaadan wolqqaamana. <sup>15</sup> Eta kawoinne aara oottiya halaqati ubbai omoodettidi issippe baana” yaagees.

## 2

### *Moo7aababaa*

<sup>1</sup> GODAI hagaadan yaagees; “Moo7aaba biittaa asai zaari zaaridi oottido nagaraa gishshau, taani eta qaxxayennan aggikke. Aissi giikko, eti Eedooma biittaa kawuwaa meqettaa bidintta kiyana gakkanaashin xuuggidosona. <sup>2</sup> Hegaa gishshau, taani Moo7aaba biittan tamaa yeddana; yeddin he tamai Qiriyoota katamaa qatota maana. Moo7aaba biittaa asai shabbirssaa gidдон, olaa waasuwwa gidдоонinne malkkataa punettaa gidдон haiqqi wurana. <sup>3</sup> Taani Moo7aaba biittaa haariyaagaa xaissana; qassi halaqata ubbaakka aara issippe worana” yaagees.

### *Yihudaabaa*

<sup>4</sup> GODAI hagaadan yaagees; “Yihudaa biittaa asai zaari zaaridi oottido nagaraa gishshau, taani eta qaxxayennan aggikke. Aissi giikko, eti GODAA higgiiyaa ixxidosa; a azazuwaakka naagibookkona. Eta aawati kaallido worddo xoossati etakka balettidosona. <sup>5</sup> Hegaa gishshau, taani Yihudaa biittaa bolli tamaa yeddana; yeddin he tamai Yerusalaame qatota maana” yaagees.

### *Israa7eela Bollan GODAI Pirddiyo Pirddaa*

<sup>6</sup> GODAI hagaadan yaagees; “Israa7eela asai zaari zaaridi oottido nagaraa gishshau, taani eta qaxxayennan aggikke. Aissi giikko, eti miishshaa ekkana gishshau, xilluwaa baizzoosona; qassi caammaa acuwwa ekkana gishshau akka hiyyeesaa baizzoosona. <sup>7</sup> Manqqota biittaa baanan onggidi, eta huuphiyaa yedhdhoosona; naaqqetidaageetu pirddaakka geellayoosona. Qassi aawainne na7ai naa77ai issi maccaasiyo laggettiyoogan ta geeshsha sunntaa keehippe tunissoosona. <sup>8</sup> Eti asaappe acuwaassi oiqqido maayuwwa yarshshiyo sohotu ubbaa matan hiixxidi, an zin77oosona; qassi asaappe maqqacco oottidi ekkido woine eessaa bantta Xoossaa keettan uyoosona.

<sup>9</sup> “Gidikonne, zigaadan aduqqidi, wolaadan minnida Amooore biittaa asata eta sinttappe xaissidaagee tana. Taani etau bolla aifiyaarakka garssa xaphuwaarakka ubbaa xaissaas. <sup>10</sup> Taani inttena Gibxxe biittaappe kessada, bazzon oitamu laittaa kaalettaas; qassi Amoooretu biittaakka intteyyo laata oottada immaas.

<sup>11</sup> “Intte attuma naatu gidдоppe hananabaa yootiyaageeta, intte yelaga asaa gidдоppekka banttana GODAASSI dummayida Naaziraaweta denttaas. Inttenoo, Israa7eela asatoo, hagee tuma gidennee? Hagaa taani GODAI odaas. <sup>12</sup> SHin intte he Naaziraaweta caaquwwa kolissidi, woine eessaa ushshideta; hananabaa yootiyaageetakka, ‘Hananabaa yootoppite’ yaagidi azazideta.

<sup>13</sup> “Be7ite, kattaa darissidi caanido gaaree me77iyooogaadan, taani inttena mentana. <sup>14</sup> Pala woxxiyaagee baqatidi kessi ekkenna; minuwaayyo wolqqi ixkana;

olanchchaikka ba shemppuwaa ashshenna. <sup>15</sup> Wonddafiyan dukkiyaagee ba sohuwan eqqanau danddayenna; tohuwaa bol77oikka kessi ekkenna; paraawaikka ba shemppuwaa ashshenna. <sup>16</sup> He gallassi harai atto olanchchatu gidдон keehi xalanchcha giyoogetikka kallo xiire baqatana” yaagees GODAI.

### 3

<sup>1</sup> Inttenoo Israa7eela asatoo, GODAI intte bolli, Gibxxe biittaappe i kessido asa ubbaa bolli haasayidoogaa siyite. <sup>2</sup> “Sa7an de7iya asa ubbaappe taani intte xalaalaa dooraas. Hegaa gishshau, intte oottido nagara ubbaassi taani inttena qaxxayana” yaagees.

#### *Hananabaa Yootiyaagaa Oosuwaa*

<sup>3</sup> Naa77u asati maayettennan de7iiddi issippe hemettiyoona?

<sup>4</sup> Gaammoi oiqqiyoobaa demmennan woran coo gudiiyye? Woikko wodala gaammoi aibakko yedettidi oiqqennan ba geessuwan daariyye?

<sup>5</sup> Oiqqanau yeggido gitiyaa gidдон katti xayikko, kafoi coo ohettii? Woikko piree aibakko oiqqiyoobi bannan coo pirii?

<sup>6</sup> Katamaa gidдон olaa malkkatai punettiyo wode, asai yashshan kokkoreenneeyye? Woikko GODAI kiittennan de7ishin, bashshai issi katamaa bollan yiyye?

<sup>7</sup> Tumaappe Ubbaa Haariya GODAI ba xuuraa hananabaa yootiya ba ashkkaratussi kasetidi qonccissennan de7iiddi, aibanne oottenna.

<sup>8</sup> Gaammoi gudin, yayyennai oonee? Ubbaa Haariya GODAI odin, hananabaa yootennai oonee?

#### *Samaariyaa Kunddettaa*

<sup>9</sup> Ashddooda katamaaninne Gibxxe kawo keettatun de7iya ubbatussi hagaadan yaagidi awaajjite; “Samaariyaa deretu bolli shiiqite; shiiqidi yan haniya gita wocamaanne sugetta oosuwaa be7ite” yaagite.

<sup>10</sup> GODAI hagaadan yaagees; “Ha asati sittabaa oottiyoogaa erokkona; sugettaaninne bonqqidi ehiido miishshan bantta keettaa kuntti wottidosona” yaagees. <sup>11</sup> Hegaa gishshau, Ubbaa Haariya GODAI hagaadan yaagees; “Morkkee intte biittaa dooddana; intte gatuwaa laalana; intte duretu keettaakka bonqqana” yaagees.

<sup>12</sup> GODAI hagaadan yaagees; “Henttanchchai gaammuwaa doonaappe dorssaa wotti ekkiyo wode, dorssaayyo naa77u gedeta woikko duuxa haittaa wotti ekkiyoogaadan, hegaadanka Samaariyaa biittan ishaluwan uttida Israa7eela asaappe amaridaageetu xalaalai attana” yaagees.

<sup>13</sup> Godai, Ubbappe Wolqqaama GODAI Xoossai hagaadan yaagees; “Hagaa siyite; siyidi Yaaqooba zaretu bolli markkattite. <sup>14</sup> Taani Israa7eela asaa eta nagaraa gishshau qaxxayiyo gallassi, Beetele kataman de7iya yarshshiyo sohota kolana; yarshshiyo sohuwan de7iya kacetikka me77idi, sa7an wodhdhana. <sup>15</sup> Balggo eti de7iyo keettaanne bone eti de7iyo keettaa ubbaa taani xaissana. Danggarssaa zaaliyan alleeqissidi, eti keexxido keettaikka kolettana; qassi gita gita keettati ubbaikka xayana” yaagees.

### 4

<sup>1</sup> Inttenoo, Samaariyaa maccaasatoo, Baasaane biittaa macca miizzatudan modhdhidaageetoo, hagaa siyite! Intte hiyyeesata huqqunneeta; manqqotakka tuggay-eeta. Intte keettaawatakka, “Nuussi ushshaa hammite” yaageeta. <sup>2</sup> Ubbaa Haariya GODAI hagaadan yaagidi, ba geeshshatettan caaqqiis; “Intte manxxaquwan oiqettidi gooshettana gallassainne intteppe attida amaridaageetikka manxxaquwan ohettidi biya moletudan hanana gallassai yaana. <sup>3</sup> Intte ubbaikka dirssaa xoo7iyaara goochchin kiyidi, Hermmoonen olettana” yaagidi caaqqiis.

#### *Israa7eela Asai Bantta Balaappe Tamaaranau Danddayibookkona*

<sup>4-5</sup> Ubbaa Haariya GODAI hagaadan yaagees; “Inttenoo, Israa7eela asatoo, biite; Beetele biidi, nagaraa oottite; Gelggalakka biidi, nagaraa gujjidi oottite. Maallado maallado intte yarshshuwaa yarshshite; heezzantto gallassi gallassi intte asirataa ehiite. Irshshuwaa yeggidi uukkido oittaa xuuggidi, galataa yarshshuwaa yarshshite. Intte intte dosan immiyooobaa gishshau, otorettiiddi awaajjite. Aissi giikko, intte oottanau dosiyoogee heгаа” yaagees.

<sup>6</sup> Qassikka GODAI hagaadan yaagees; “Intte katama ubban taani koshaa yeddada, harai atto intte achchan daxiyooobaakka xaissaas; shin intte hegankka taakko simmibeekketa. <sup>7</sup> Kattaa cakkiyo wodee gakkanau biron heezzu aginai de7ishin, taani intteyyo iraa teqqaas. Taani issi kataman iraa bukissada hara kataman bukkennaadan diggaas; issi shooqan bukkiis; hara bukkibeenna shooqai qassi meliis. <sup>8</sup> Hegaa gishshau, naa77u woikko heezzu katamatu asai haattaa uyanau issi katamaa biidosona; shin alibookkona. Hegankka qassi intte taakko simmibeekketa” yaagees.

<sup>9</sup> GODAI, “Taani intte kattaa bollan harggiyaa yeddaas; intte ataakilttiyaanne intte woine turaa, intte balasiyaa mittaanne intte wogaraa ubbaa boolee miis; shin intte hegankka taakko simmibeekketa” yaagees.

<sup>10</sup> GODAI, “Taani Gibxxe asatu bolli boshaa yeddidoogaadan, intte bollankka boshaa yeddaas; intte wodalla naata bisuwan woraas; intte paratikka omoodettanaadan oottaas. Intte moottan haiqqida asaa ahaa xinqquwan inttena ullaas; shin intte hegankka taakko simmibeekketa” yaagees.

<sup>11</sup> GODAI, “Sadoomanne Gamooraa katamata xaissidoogaadan, intteppekka darota xaissaas; ha attida intteikka tamaappe eexxiiddi attida xiifa mala; shin intte hegankka taakko simmibeekketa” yaagees.

<sup>12</sup> GODAI, “Hegaa gishshau, Israa7eela asatoo, taani inttena hegaadan oottada qaxxayana hanais. Taani inttena hagaadan oottada qaxxayana haniyo gishshau, Israa7eela asau, intte Xoossaara gaittanau giigite” yaagees.

<sup>13</sup> Dereta giigissidaagee, carckuwaakka medhdhidaagee, ba wozanaa qofaa asau qonccissiyaagee, wonttaa poo7uwaa xumau laammiyaagee, biittan de7iya xoqqa dereta yedhdhiyaagee, au sunttai GODAA, Ubbappe Wolqqaama Xoossaa.

## 5

### *Israa7eela Asai Nagaraa Paaxana Mala Yootettiis*

<sup>1</sup> Israa7eela asatoo, taani intte bolli zilaaliyo zilaassaa siyite!

<sup>2</sup> “Geela7iyaa Israa7eela kunddaasu;  
simmi naa77antto denddukku.

Sa7an olettaasu;  
o denttiyaabikka baawa!” yaagaas.

<sup>3</sup> Ubbaa Haariya GODAI hagaadan yaagees; “SHa7u olanchchata olau yeddiya Israa7eela katamaassi xeetu olanchchatu xalaalai attana; xeetu olanchchata olau yeddiya Israa7eela katamaassi qassi tammu olanchchatu xalaalai attana” yaagees.

<sup>4</sup> GODAI Israa7eela asaassi hagaadan yaagees; “Tana koyite; yaatikko, intte de7uwan de7ana. <sup>5</sup> SHin Beetele koyoppite. Gelgala geloppite. Berssaabehi pinnoppite. Aissi giikko, Gelgali omoodettana; Beeteleekka xayana” yaagees.

<sup>6</sup> GODAA koyite; yaatikko, intte de7uwan de7ana. Hegee xayikko, i Yooseefa zariyaa tamaadan xuuggana; Beeteelen de7iya asaakka tamai maana. He tamaa etau ooninne toissenna.

<sup>7</sup> Inttenoo, suure pirddaa geellayidaageetoo, xillotettaakka sa7an oliyaageetoo, haggaa siyite.

<sup>8</sup> Piliyaadisa geetettiya laappun xoolinttettanne Ooriyoona geetettiya xoolinttetu citaa medhdhidaagee, sakkana xumaa wonttau, gallassa poo7uwaakka qammau laamiyaageenne abban de7iya haattata pude saluwaa xeesidi, sa7a micettaa bolli duge tigiyaagee, au sunntai GODAA. <sup>9</sup> I qatota laalanau wolqqaamatu bolli bashshaa ehees.

<sup>10</sup> Intte pirddaa gutaran seeriyaagaa ixxeeta; tumaa yootiyaagaakka sheneteeta. <sup>11</sup> Intte hiyyeesata yedhdhidi, eta kattaakka etappe bonqqidi ekkideta. Yaatidi maset-tida shuchchan keettata gimbbideta; shin intte he keettatun de7ekketa. Lo77iya woine turatakka tokkideta; shin intte he woiniyaa eessaa uyekketa. <sup>12</sup> Aissi giikko, intte naaqoi aappunakkonne intte nagaraikka ai keena gitakko taani erais. Intte xillota naaqeeta; mattaayiyaakka ekkeeta; qassi gutaran hiyyeesatu pirddaa geellayeeta. <sup>13</sup> Hegaa gishshau, haggaa mala wodiyan cincca asi co77u gees; aissi giikko, wodee iita.

<sup>14</sup> De7uwan de7anau lo77obaappe attin, iitabaa oottoppote; yaatikko, intte giy-oogaadan, GODAI, Ubbaappe Wolqqaama Xoossai inttenaara gidana. <sup>15</sup> Iitabaa ixsite. Lo77obaa dosite. Pirddaa gutaranka suure pirddaa pirddite. Yaatikko, ooni erii, GODAI, Ubbaappe Wolqqaama Xoossai Yooseefa zerettatuppe attida amaridaageetussi qarettanaakkonne.

<sup>16</sup> Hegaa gishshau, Godai, Ubbaappe Wolqqaama GODAI Xoossai hagaadan yaagees; “Dabaaba ubban waasoi kiyana; oge ubbankka asai, ‘Aayye, aayye!’ gaana. Goshshanchhati yeehuwau, koizziyaageetikka koissau xeegettana. <sup>17</sup> Woiniyaa turaa soho ubban yehoi de7ana; aissi giikko, taani inttena qaxxayanau intte giddoora kanttana” yaagees GODAI.

<sup>18</sup> Inttenoo, GODAA gallassai yaanaadan amottiyaageetoo, intteyyo aayye7ana! GODAA gallassaa aissi amotteetii? He gallassai xumappe attin, poo7o gallassa gidenna. <sup>19</sup> He gallassi intte gaammuwaappe baqati attiyo wode, maahee gaittiyo asa mala, hegaappekka qassi baqati ba soo gelidi, ba kushiyaa godan zemppissiyo wode, shooshshai dukkiyo asa mala gidana. <sup>20</sup> GODAA gallassai xumappe attin, poo7o gidenna; sakkana xumappe attin, poo7o shori mulekka baawa!

<sup>21</sup> GODAI hagaadan yaagees; “Taani intte bonchchiyo baalata ixxaasinne shenetaas; intte geeshsha yaa7atikka tana ufaissokkona. <sup>22</sup> Intte taayyo xuuggiyo yarshshuwaanne kattaa yarshshuwaakka yarshsheeta; shin taani heggaa ekkikke. Qassi intte taayyo galatau ehiyo issippetetta yarshshuwaa modhdho mehetakka xeellikke. <sup>23</sup> Intte mazamuriyaa cancettaa ta matappe haassite; intte diixxiyo diittaakka siyikke. <sup>24</sup> SHin suure pirddai pultto haattaadan, xillotettaikka to77enna shaafaa haattaadan goggo.

<sup>25</sup> “Inttenoo, Israa7eela asatoo, taani inttena bazzon oitamu laittaa kaalettiyo wode, taassi yarshsho yarshshidetii? Woikko imota immidetii? <sup>26</sup> He wode intte intte kushiyan medhdhido Kawuwaa Sakkuuta giyo eeqaanne Keewaana giyo intte xoolinte xoossaa eeqaa tookkideta. <sup>27</sup> Hegaa gishshau, taani inttena omoodissada Damasqqo katamaappe aattada haahosaa yeddana” yaagees. Haggaa giyaagee au sunntai Ubbaappe Wolqqaama Xoossaa geetettiyo GODAATTENNE.

## 6

### *Israa7eeli Xayanaagaa*

<sup>1</sup> Inttenoo, Israa7eela asai maaduwa oichchiyo bonchchettida Israa7eela biittaa ha-laqatoo, inttenoo, Xiyoonen baaluwan de7iyaageetoo, Samaariyaa katamankka hirggi bannan uttidaageetoo, intteyyo aayye7ana! <sup>2</sup> Ane Kalne giyo katamaa biidi be7ite. Hegaappe qassi Hamaata giyo gita katamaa biidi, yaara qassi duge Pilisxxeematu katamaa Gaate wodhdhite. Eti intte naa77u kawotettatuppe kehiyoonaa? Eta biit-tai intte biittaappe aakkii? <sup>3</sup> Inttenoo, iita gallassai eesuwan yeenna giidi, sugetta oosuwaa oottiyaageetoo, <sup>4</sup> danggarssaa zaaliyaappe oottido arssan zin77iyaageetoo,

minxxaafiyankka injjetidi uttiyaageetoo, qassi dorssaa wudiyaappe anqqaratanne mi-  
 izzaa zadaluuwaappe daddarota miyaageetoo, <sup>5</sup> Daawitadan yettaa miishshaa intteyyo  
 giigissidi, maazinggiyan dumma dumma yettaa yexxiyaageetoo, <sup>6</sup> woiniyaa eessaa  
 keriyaara ganiyaageetoo, keehi al77o shittuwaakka tiyettiyaageetoo, Yooseefa zaretu  
 bashshaassi ainne azzanennaageetoo, intteyyo aayye7ana! <sup>7</sup> Hegaa gishshau, omood-  
 ettidi baanaageetuppe koiroti inttena gidana; he wode intte injje duussainne intte  
 baalotiyoogee attana.

<sup>8</sup> Godai, Ubbaappe Wolqqaama GODAI Xoossai hagaadan yaagidi, barkka banan  
 caaqqiis; “Taani Yaaqooba otoruwaa ixkais; eta qatotakka shenetaas; taani kata-  
 maanne kataman de7iya ubbaa eta morkketussi aattada immana” yaagiis.

<sup>9</sup> Issi keettan tammu asai attikko, etikka haiqqana. <sup>10</sup> Haiqqidaageetu dabbotuppe is-  
 soi ahaa mooganau sooppe kessidi efaana; efiiddi, he keettaa qol77on de7iya bitaniyaa,  
 “Nenaara attida hara asi de7ii?” yaagidi oichchana. Oichchin i zaaridi, “Baawa”  
 yaagana. Yaagin oichchiyaagee, “Haizza, haizza! GODAA sunntaa nuuni xeesanau  
 koshshenna” yaagana.

<sup>11</sup> GODAI azazin, wogga keettati kolettana; qeeri keettatika me7erettana. <sup>12</sup> Parati  
 zaallaa bollan piriixanau danddayiyoona? Woi qassi goshshanchchai booraa waaxidi,  
 abbaa goyanau danddayii? SHin intte tumu pirddaa marzziyau, xillotettaa aifiyaakka  
 camuwau laammideta. <sup>13</sup> Intte Lodabaara katamaa xoonido gishshau ufaitteeta; qassi,  
 “Nuuni Qarnnaima katamaakka nu minotettan oiqqida” yaageeta.

<sup>14</sup> GODAI, Ubbaappe Wolqqaama Xoossai hagaadan yaagees; “Inttenoo, Israa7eela  
 asatoo, taani intte bolli issi kawotettaa denttana; denttin eti inttena Hamaata Pin-  
 uwaappe doommidi, Araba Wombbaa gakkanaassi tuggayana” yaagees.

## 7

### *Boolee Yaanaagaa Bessiya Ajjuuataa*

<sup>1</sup> Ubbaa Haariya GODAI tana ajjuutaa bessiis. He ajjuutan taani kawuwaa gakkiiya  
 kattai cakettidoogaappe guyyiyan, naa77anttuwaa caarida carshshaa bolli i booliyaa  
 wudiyaa medhdhishin be7aas. <sup>2</sup> Eti irxxabaa ubbaa miidi wurssido wode taani, “Abeet  
 Ubbaa Haariya GODAU, hai hayyanaa atto garkkii! Yaaqooba zareti waanidi attanau  
 danddayiyoona? Eti qii guuttatenne!” yaagaas.

<sup>3</sup> Hegaa gishshau, GODAI qarettidi, ba qofaa laammiis; laammidi hagaadan yaagiis;  
 “Ha neeni be7idobai polettenna” yaagiis.

### *Taman Pirddanaagaa Bessiya Ajjuuataa*

<sup>4</sup> Ubbaa Haariya GODAI tana hara ajjuutaa bessiis. Ubbaa Haariya GODAI ba asaa  
 pirddanau tamaa xeesiis; xeesin he tamai gita ciimma abbaa mirggidi, biittaakka  
 xuugganau doommiis. <sup>5</sup> Yaatin taani hagaadan yaagaas; “Abeet Ubbaa Haariya GODAU,  
 hai hayyanaa ha tamaa toissarkkii! Yaaqooba zareti waanidi attanau danddayiyoona?  
 Eti qii guuttatenne!” yaagaas.

<sup>6</sup> Hegaa gishshau, GODAI qarettidi, ba qofaa laammiis; laammidi Ubbaa Haariya  
 GODAI hagaadan yaagiis; “Hageekka qassi polettenna” yaagiis.

### *Gimbbiyaa Sittatettaa Likkiyo Tumbbiyaa Bessiya Ajjuuataa*

<sup>7</sup> Qassikka i tana hara ajjuutaa bessiis. Taani he ajjuutan be7iyo wode, Godai gim-  
 biyaa sittatettaa likkiyo tumbbiyaa oiqqidi, tumbbiyan likettidi gimbettida gimbbiyaa  
 matan eqqiis. <sup>8</sup> Eqqidi GODAI tana, “Amoxaa, ha neeni xeelliyooogee aibee?” yaagidi  
 oichchiis.

Oichchin taani, “Tumbbiyaa” yaagaas.

Yaagin Godai tana, “Be7a, taani ta asaa Israa7eela gidдон tumbbiyaa yeggais; taani  
 eta qaxxayennan aadhdhikke. <sup>9</sup> Yisaaqa zareti goinniyo xoqqa sohōti kolettana;



Israa7eela geeshsha sohotikka xayana; qassi Iyorbbaama kawotettaa bollikka taani bisuwaara denddana” yaagiis.

### *Amoxanne Amaaxiyaa*

<sup>10</sup> Beetele kataman qeese gididi de7iya Amaaxee Israa7eela Kawuwaa Iyorbbaa-makko hagaadan yaagidi kiittiis; “Amoxi Israa7eela asaa giddon de7iiddi, ne bolli maqettiis; i ba oduwan biittaa bashshees. <sup>11</sup> Aissi giikko, i hagaadan yaagees; ‘Iyorbbaami bisuwan haiqqana; Israa7eela asaikka bantta biittaappe omoodettidi baana’ yaagees” yaagiis.

<sup>12</sup> Yaatin Amaaxee Amoxa hagaadan yaagiis; “Nenoo hananabaa yootiyaagoo, ba; hini Yihudaa biitti baqata baada, yan quma ma; hananabaakka yan yoota. <sup>13</sup> SHin hagee Beetelee kawoi goinniyo sohonne kawotettaa geeshsha soho gidido gishshau, naa77antto ha sohuwan hananabaa yootoppa” yaagiis.

<sup>14</sup> Yaagin Amoxi zaaridi, Amaaxiyaassi hagaadan yaagiis; “Taani mehiyaa heemmiyaagaanne ettaa aifiyaa maxiyaagaappe attin, hananabaa yootiyaagaa woikko hananabaa yootiyaagaa na7aa gidikke. <sup>15</sup> SHin GODAI tana dorssaa wudiyaa heemmiyoosaappe ekkidi, ‘Baada ta asau Israa7eelau hananabaa yoota’ yaagiis. <sup>16</sup> Ha77i simmi GODAI giyoobaa siya! Neeni, ‘Israa7eela bolli hananabaa yootoppa; Yisaaqa zaretu bollikka markkattoppa’ yaagadasa. <sup>17</sup> Hegaa gishshau, GODAI hagaadan yaagees; ‘Ne machchiyaa katamaa giddon shaaramuxa gidana; ne attuma naatinne ne macca naati bisuwan haiqqana; ne biittaikka wodoruwan shaakettana; qassi neeni ne huuphiyaukka allaga biittan haiqqana. Israa7eela asaikka bantta biittaappe omoodettidi tuma baana’ yaagees” yaagiis.

## 8

### *Teerai Kumido Keeshiyaa Bessiya Ajuutaa*

<sup>1</sup> Ubbaa Haariya GODAI tana hara ajuutaa bessii; hegeekka, teerai kumido keeshiyaa. <sup>2</sup> I tana, “Amoxaa, ha neeni be7iyoogee aibee?” yaagidi oichchiis.

Oichchin taani, “Teeri kumido keeshiyaa be7ais” yaagaas.

Yaatin GODAI taayyo hagaadan yaagiis; “Ta asaa Israa7eelassi wurssetta<sup>1</sup> gakkii; hagaappe sinttanau taani eta qaxxayennan aadhdhikke” yaagiis.

<sup>3</sup> Ubbaa Haariya GODAI hagaadan yaagees; “He gallassi kawo keettan yexxiyo yettai yeehuwau laamettana; haiqqida asaa ahai mule sohuwan darana; qassi co77u gin, yan han olettana” yaagees.

### *Israa7eela Kunddettaa*

<sup>4</sup> Inttenoo, metootanchchata yedhdhiyaageetoo, biittan de7iya hiyyeesatakka xaisanau koyiyaageetoo, haggaa siyite! <sup>5</sup> Intte hagaadan yaageeta; “Nuuni kattaa baizzanau aginai xeriyo baalai aude aadhdhane! Qassi nuuni nu zal77iyaa doommanau Sambbatai aude aadhdhanddeeshsha! Yaatiyaakko nuuni kattaa guuttaban makki makkidi, daro miishshaa ekkidi baizzana. Qassi worddo miizaanan likki likkidi, asaa cimmana. <sup>6</sup> Nuuni hiyyeesaa biran, metootanchchaakka mexi naa77u tohuwaa caamman shammana; qassi gisttiyaa harqquwaa muruta gisttiyaa waagan baizzana” yaageeta.

<sup>7</sup> GODAI Yaaqoobi ceeqettiyo ba sunttan hagaadan yaagidi caaqqiis; “Taani eti oottido iita oosuwaa mulekka dogikke. <sup>8</sup> Biittai qaaxxiyoogeenne biittan de7iya asai ubbai yeekkiyoogee heggaa gaasuwaana gidenneeyye? Ee Naile SHaafai kixxidi qaaxxiyoogaadan, biitta ubbai qaaxxidi balbbuqettana; qassi he kixai wodhdhiyoogaadan wodhdhana” yaagiis.

<sup>1</sup> 8:2 “Wurssetta” giyoogee Ibraisxxe qaalaa “Teeraa” malatees.

<sup>9</sup> Ubbaa Haariya GODAI hagaadan yaagees; “He gallassi taani awaa seeta gallassi wulissana; sa7aakka galla xumissana. <sup>10</sup> Taani intte baalaa ufaissaa azzanuwau, intte yettaakka yeehuwau laammana. Mexi issi na7ai haiqqin yeekkiya asadan, intte intte huuphiyaa meedettidi waaruwaa maayanaadan, taani inttena oottana. He gallassaa wurssettai daro camo gidana” yaagees.

<sup>11</sup> Ubbaa Haariya GODAI hagaadan yaagees; “Be7ite, taani biitta ubbaa bollan koshaa yeddiyo gallassati yoosona. Taani koshaa yeddiyo gallassi, asai siyanau GODAA qaalaa xayidi namisettanappe attin, kattaa xayidi namisettenna woikko haattaa xayidi saamettenna. <sup>12</sup> Asai arshsho bagga abbaappe arggo bagga abbaa gakkanaashininne huuphessappe tohossi gakkanaashin bichchaarana. Eti GODAA qaalaa koyanau yaanne haanne woxxana, shin demmokkona. <sup>13</sup> He gallassi puulanchcha geela7otinne wodallati saamuwan hitti gaana. <sup>14</sup> Samaariyaa eeqatun caaqqiyaageeti, ‘Daana xoos-sai ero!’ yaagiyaageetinne, ‘Berssaabeha xoosai ero’ yaagiyaageeti kunddana. Eti naa77antto mulekka denddokkona” yaagees.

## 9

### *GODAA Pirddaa*

<sup>1</sup> Yarshshiyoo sohuwaa matan Godai eqqidaashin, taani be7aas. I tana hagaadan yaagiis; “Baasoi qaaxxanaadan, Beeta Maqidasiyaa gumbbuwaa shoca; shocada asa ubbaa huuphiyan mentteretta. Hegaappe attiya asaa taani bisuwan worana. Baqatiya asi kessi ekkenna; kessi ekkida asikka paxa antenna. <sup>2</sup> Eti biittaa bookkidi, Si7ooliyau duge wodhdhikkokka, taani eta hegaappe kessana. Saluwaa pude kiyikkokka, taani eta hegaappe duge wottana. <sup>3</sup> Eti Qarmmeloosa Deriyaa xeeran qosettikkokka, taani eta koyada hegaappe kessana. Abbaa ciimmaa giddo gelidi, ta sinttaappe geemmikkokka, taani miimminttiyaa azazin, i eta dukkana. <sup>4</sup> Qassi bantta morkketun omoodettidi, eti biikkokka, yan eti bisuwan haiqqanaadan, taani azazana; taani eta iita aifiyan xeellanaappe attin, lo77o aifiyan xeellikke” yaagiis.

<sup>5</sup> Godai, Ubbaa Wolqqaama GODAI sa7aa bochchees; bochchin sa7ai seerees; qassi sa7an de7iyaabai ubbaikka yeekkees. Naile SHAafai kixxidi balbbuqettiyoogaadan, biitta ubbai balbbuqettees; qassi he kixai wodhdhiyoogaadanka wodhdhees. <sup>6</sup> I bau de7iyoo sohuwaa saluwan giigissees; a baasuwaakka sa7an baasees. Qassi i abbaa haattata xeesidi, biittaa bollan duge gussees; ayyo sunntai GODAA.

<sup>7</sup> GODAI hagaadan yaagees; “Inttenoo, Israa7eela asatoo, intte taayyo Toophphiya asaa mala gidekketiyye? Taani inttena Gibxxe biittaappe kessidoogaadan, Pilisxxeema asaa Kafttoorappe, qassi Sooriyaa asaakka Qiirappe kessaas” yaagees.

<sup>8</sup> GODAI hagaadan yaagees; “Be7ite, Ubbaa Haariya GODAA aifee nagaranchcha kawotettaa bollan de7ees. Taani a biittaa bollappe xaissana; shin taani Yaaqooba zariyaa muleera xaissikke.

<sup>9</sup> “Be7ite, kattaa zazzariyan zazzariyoogaadan, Israa7eela asaa kawotettatu ubbaa gidдон zazzaranaadan, taani azazana; shin eta gidдон ammanettiyaageetuppe issoinne sa7an wodhdhidi xayenna. <sup>10</sup> ‘Nuna aiba iitabinne gakkenna woikko demmenna’ yaagiya ta asaa gidдон de7iya nagaranchchati ubbai bisuwan wurana” yaagees.

### *Israa7eela Asaassi Sa7ai Kehana*

<sup>11</sup> Qassikka GODAI, “He gallassi taani kolettidi kunddida keettadan hanida Daawita kawotettaa denttana; xoo7etida sohotakka bottokonana; qassi qolettidasaaakka ooraxis-sana; taani a beniigaadan oottada keexxana. <sup>12</sup> Hegeenne Israa7eela asai Eedooma biittaappe attidaageetanne ta sunntan xeesettida kawotettata ubbaa laattanaassa” yaagees. Hagaa oottiyaagee tana GODAA.

<sup>13</sup> GODAI hagaadan yaagees; “Be7ite, kattaa cakkiyaageeti cakkidi wursennan de7ishin, gadiyaa goyiyaageeti gakkiyo wodee, woiniyaa teeraa gum77iyaageetikka gum77idi wursennan de7ishin, woiniyaa zeriyaageeti gakkiyo gallassati yaana. He wode dereti mal77o woiniyaa eessaa xokkana; keratu ubbaappekka woine eessai goggana. <sup>14</sup> Omooduwan biida ta asaa Israa7eela zaarada ishalissana. Eti qolettida katamata zaaretti keexxidi, etan de7ana. Woine turaakka tokkidi, appe woine eessaa uyana. Qassi ataakilttetakka tokkidi, eta aifiyaa maana. <sup>15</sup> Taani Israa7eela eta biittan tokkana; eti taani etayyo immido biittaappe naa77antto mulekka shodettokkona” yaagees. Hagua yootiyaagee GODAA intte Xoossaa.

## Hananabaa Yootiya Abdiyyu Maxaafaa

### *Gidduwaa Erissuwaa*

Ha qantta maxaafai Yerusalaamee laalettanaappe kase, darin erettenna wodiyan xaafettiis. He wode tohossau baqqiya arshsho baggan de7iyaanne Yihudaara adussa wodiya morkkettidi de7ida Eedoomi Yerusalaame laalettan ufaiddi, a bollan woraa-jjiya morkketa maaddiidinne katamaa aquwaakka bonqqiiddi de7ees. Abdiyyu, Eedoomi Israa7eela morkketu haratuurakka xoonettanaunne hanttaara qixaatiyaa ekkana de7iyooqaa yootiis.

<sup>1</sup> Ubbaa Haariya GODAI Eedooma biittaabaa Abdiyyussi qonccissido ajjuutai haggaa.

### *GODAI Eedooma Qaxxayana*

Eedoomabaa GODAI hagaadan yaagidi, ba kiittiyo uraa bollan kawotettatukko kiitidoogaa nuuni siyida; “Denddite! Eedooma biittaa oloos” yaagidi kiittiis. <sup>2</sup> GODAI Eedooma hagaadan yaagees; “Be7a, kawotettatu gidдон taani nena laafa kessana; neeni keehippe karettana. <sup>3</sup> Neno, zaallaa kooppuwaa gidдон de7iyaagoo, ne keettaa xogga deretu bollan keexxidaagoo, qassi ne wozanan, ‘Tana hagaappe duge ooni wottii?’ yaagiyaagoo, nena ne wozanaa otoroi cimmiis. <sup>4</sup> Neni argganttaadan pude haakkada paallikko, ne keettaakka xoolinttetu gidдон keexxikkokka, taani nena hegaappe duge wottana” yaagees GODAI.

<sup>5</sup> “Kaisoti woikko bonqqiyaageeti qammi yiikko, banttau giddiyaagaa keena xalaalaa wuuqqoosona; woiniyaa teeraa maxiyaageetikka maxiiddi, poshiluwaa ashshoosona; shin ne morkketi nena muleera xaissana. <sup>6</sup> Abeet Eesawa zareti waani bonqqet-tanddonaashsha! Qosan de7iya eta aqoikka waani qocirettanddeeshsha! <sup>7</sup> Nenaara maachchan de7iyaageeti ubbai nena ne biittaappe gaxi yedettana; qassi ne dabbotikka cimmiidi nena xoonana. Ne qumaa miyaageetikka neeyyo gitiyaa yeggana; shin neeni hegea akeekakka” yaagees.

<sup>8</sup> GODAI qassikka hagaadan yaagees; “He gallassi taani Eedoomappe aadhdhida eranchchatanne Eesawa Deriyaappekka eraa xaissana. <sup>9</sup> Inttenoo, Temaana asatoo, intte olanchchati dagamma; Eesawa Deriyaa bolli de7iya asai ubbaikka goora7ettana.

### *Eedoomi Qaxxayettiyo Gaasuwaa*

<sup>10</sup> “Yaaqooba zare giddiya ne ishanntu bolli neeni oottido iitabaa gishshau, neeni yeellaa maayana; neeni merinau xayaagana. <sup>11</sup> Morkketi yiidi eta aquwaa bonqqiyo wode, he gallassi neeni gaxi shiiqada eqqa xeelladasa. Qassi penggiyaara gelidi, Yerusalaame katamaa saamaa yeggidi shaakkida allagatuppe neeni issuwaa malattenne. <sup>12</sup> Neni ne ishai metootiyo gallassi a metuwan ufaittanau bessenna; qassi Yihudaa asaa bolli bashshai gakkiiyo gallassikka hashshu gaanau bessenna. Ee, eta un77uwaa gallassi eta bolli miiccanaukka bessenna! <sup>13</sup> Eta tuggaa gallassi ta asai de7iyo katamaa gelanaunne eta waaiyan neeni ufaittanau bessenna shin! Qassi eta tuggaa gallassi neeni eta aquwaa bonqqanau bessenna; <sup>14</sup> etappe baqatiyaageeta woranau neeni balla ogiyan zuggada naaganaunne attidaageetakka eta un77uwaa gallassi morkketussi aattada immanau bessenna shin!

### *Xoossai Aihuda Gidenna Asatu Bollan Pirddana*

<sup>15</sup> “Aihuda gidenna asatu ubbaa bolli GODAA gallassai gakkiiis. Neno Eedoomaa, neeni haratu bolli oottidobai ne bolli osettana; ne daafaikka ne huuphiyan simmana. <sup>16</sup> Ta asai ta geeshsha deriyaa huuphiyan metuwaa xuu7aa uyiis. Hegaadan eta yuushuwan de7iya kawotettati zaari zaaridikka metuwaa xuu7aa uyana; uyidi eti ubbaikka kase hani erennabaa hanana.

*Israa7eela Xoonuwaa*

<sup>17</sup> “SHin Xiyoone Deriyan bashshaappe kessi ekkiyaageeti de7ana; Xiyooneekka geeshsha gidana; Yaaqooba zaretikka bantta biittaa laattana. <sup>18</sup> Yaaqooba zareti tama gidana; Yooseefa zaretikka laco gidana; Eesawa zareti utula gidana. Tamai utulaa miyoogaadan, Yaaqooba zaretinne Yooseefa zareti Eesawa zareta miidi muleerakka xaissana” yaagees GODAI.

<sup>19</sup> Neegeeba Bazzuwan de7iya asai Eesawa Deriyaa laattana; garatiya biittan de7iya asai Pilisxxeematu biittaa laattana. Eti Efireema biittaanne Samaariyaa biittaa laattana. Qassi Biniyaama zaretikka Gala7aade biittaa laattana. <sup>20</sup> Omoodettidi de7ida Israa7eela asai simmidi, Kanaane biittaa Siraafita giyo katamaa gakkanaashin laattana; qassi Yerusalaameppe omoodettidi, Safaraada giyo sohuwan de7iya asati Neegeeba Bazzuwan de7iya katamata laattana. <sup>21</sup> Ashshiyaageeti Eesawa asaa haaranau Xiyoone Deriyaa bolli kiyana; kawotettaikka GODAABAA gidana.



## Hananabaa Yootiya Yoonaasa Maxaafaa

### *Gidduwaa Erissuwaa*

Yoonaasa maxaafai Xoossaa azazuwaa polikke giida issi hananabaa yootiya bitaniyaa bolli gakkida dumma dumma metota odiya taarrike maxaafa gidiyo gishshau, hara maxaafatuppe i dummatees. Xoossai Yoonaasa, “Israa7eelassi diina morkke gididanne wolqqaamaa, Asoore kawotettaassi waanna katama gidida Nanawe ba” yaagidi azaziis; shin Yoonaasi, “ ‘Xoossai kase he katamaa xaissana’ giidi odido mino oduwaa oosuwan peeshshennan agganau hanees” giidi qoppido gishshau, Xoossaa qaalaa ekkidi Nanawe baanau koyibeenna. Daro taarrikebati polettidoogaappe guyyiyan ufaiteennan de7iiddi azazettiis. Kase odettida bashshaa hiraagai polettibeenna gishshau puuriis.

Ha maxaafai ubbabaa bollan Xoossaassi maatai de7iyooгаа oodes. Ubba qassi Godai siiqoinne maarotai kumido Xoossaa gidiyo gishshau, ba asaa morkketa qaxxayiyooгааappenne xaissiyooгааappe, etayyo atto giyoogaanne eta ashshiyooгаа dosiyooгаа qonccissees.

### *Yoonaasi Azazettennan Ixxiis*

<sup>1</sup> GODAA qalalai Amiitaaya na7aa Yoonaasakko hagaadan yaagiiddi yiis; <sup>2</sup> “Dendda! Denddada he gita katamaa Nanawe ba; baada he katamaa asaa iitatetta ta sintti gakkido gishshau, etayyo markkatta” yaagiis. <sup>3</sup> SHin Yoonaasi GODAA sinttaappe baqatidi, Tarsseesa giyo biitti baanau denddiis; i Yoophphe katamaa wodhdhidi, Tarsseesi biya markkabiya demmiis. GODAA sinttaappe baqatidi, etaara Tarsseesi baanau miishshaa qanxxidi, markkabiyan geliis.

<sup>4</sup> SHin markkabee biishin, GODAI abbaa bolli wolqqaama carckuwaa denttiis; denttin abbaa beetai keehi darido gishshau, markkabee me77ana haniis. <sup>5</sup> Yaatin, markkabiya laaggiyaageeti yayyidi, ubbaikka bantta xoossaakko xoossaakko waassidosona. Qassi markkabee kauyyana mala, a gidдон de7iya caanaa denttidi, abban olidosona. SHin Yoonaasi markkabiyaayyo gidдо kifiliyaa gelidi, yan zin77idi, xiskkuwaa kairiis.

<sup>6</sup> Markkabiya halaaqai akko biidi, “Aissi xiskkadii? Dendda, denddada ne xoossaa woossa! Ooni erii, i ba lo77o aifiyan xeellidi, nuna ashshanaakkonne” yaagiis.

<sup>7</sup> Markkabiya laaggiyaageeti issoi issuwau hagaadan yaagidosona; “Haayite; ha iitabai nuna o gaasuwan gakkidaakko eranau saamaa yeggoos” yaagidosona. Yaagidi saamaa yeggin, saamai Yoonaasa bollan wodhdhiis. <sup>8</sup> Wodhdhin eti Yoonaasa hagaadan yaagidi oichchidosona; “Ha iitabai o gaasuwan nu bolli gakkidaakko, ane nuussi yoota. Ne oosoi aibee? Auppe yaadii? Ne biittai awee? Neeni o zaree?” yaagidosona.

<sup>9</sup> Yaagin Yoonaasi zaaridi, hagaadan yaagiis; “Taani Ibraawe asa; abbaanne biittaa medhdhida GODAAYYO, saluwaa Xoossaayyo goinnais” yaagiis.

<sup>10</sup> Yaagin GODAA sinttappe i baqatiyoogaa i etau yootidobaappe asati erido gishshau yayyidosona. Yayyidi a, “Laa aiba palabaa oottadii?” yaagidosona.

<sup>11</sup> Qassi abbaa beetai kaseegaappe haa darido gishshau, asati Yoonaasa, “Nuuyyo abbai woppaana mala, nena nuuni waatinoo?” yaagidi oichchidosona.

<sup>12</sup> Oichchin i etau, “Ha wolqqaama beetai intte bollan denddidoogee ta gaasuwaana gidiyoogaa taani erais. Hegaa gishshau, tana denttidi, abban olite. Yaatikko, abbai intteyyo woppu gaana” yaagiis.

<sup>13</sup> SHin markkabiya laaggiyaageeti markkabiya guyye abbaa dooni kessanau wolqqappe shaaridosona; gidikkonne, abbaa beetai keehippe darido gishshau, kessanau danddayibookkona. <sup>14</sup> Hegaa gishshau, eti hagaadan yaagidi, GODAAKKO

waassidosona; “Abeet GODAU, ha bitaniyaa shemppuwaa gishshau, neeni nuna xais-sennaadaaninne ha geeshsha suuttaa acuwaakka neeni nuuppe achchennaadan, nuuni nena minttidi woossoos. Aissi giikko, GODAU, neeni ne koyiyooagaan oottadasa” yaagidosona.

<sup>15</sup> Hegaappe guyyiyan, Yoonaasa denttidi, abban olidosona; olin abbaa beetai woppu giis. <sup>16</sup> Yaatin, asati GODAASSI keehi yayyidosona; GODAASSI yarshshuwaa yarshshidosona; shiiquwaakka shiiqqidosona.

<sup>17</sup> Yoonaasa mittana mala, issi gita moliyaa GODAI giigissii; giigissin he moliyaa uluwan Yoonaasi heezzu gallaanne heezzu gammaa de7iis.

## 2

### *Yoonaasa Woosaa*

<sup>1</sup> Yoonaasi moliyaa uluwan de7iiddi, hagaadan yaagidi, GODAAKKO, ba Xoossaakko, woossiis; <sup>2</sup> “Taani ta tuggaa gidдон de7aidda GODAA xeegaas; xeeḡin i tau koyiis. Taani Si7ooliyaa ulo gidдон de7aidda waassaas; neenikka ta waasuwaa siyadasa. <sup>3</sup> Neeni tana ciimma abbaa xaggau duḡe oladasa; haattai ta yuushuwaa dooddiis; ne dambbalainne ne beetai ta bollaara kanttidosona. <sup>4</sup> Hegaa gishshau, taani hagaadan yaagaas; ‘Taani ne sinttappe wora olettaas; gidikkonne, taani ne geeshsha Beeta Maqidasiyaa zaarettada be7ana’ yaagaas.

<sup>5</sup> “Haattai tau qooriyaa gakkanaashin mittiis; ciimma abbai tana muukkiis; abban de7iya maataikka ta huuphiyan xaaxettiis. <sup>6</sup> Taani dereti baasettido sohuwaa duḡe wodhdhaas; biittaainne a hiraquwan merinau gorddettaas. SHin abeet GODAU, ta Xoossau, neeni ta shemppuwaa ciimma ollaappe kessadasa.

<sup>7</sup> “Taani hitido wode, nena GODAA hassayaas. Ta woosaikka neekko, ne geeshsha Beeta Maqidasiyaa gakkiiis. <sup>8</sup> Hada eeqatuyyo goinniyaageeti GODAN ammanettiyoogaa aggidosona. <sup>9</sup> SHin taani galataara neeyyo yarshshana; taani shiiqqidobaa ubbaakka gattana. Aissi giikko, atotettai GODAAPPE yees” yaagiis.

<sup>10</sup> Hegaappe guyyiyan, GODAI moliyaa azazin, molee Yoonaasa biittaa bollan cooyiis.

## 3

### *Yoonaasi GODAASSI Azazettiis*

<sup>1</sup> GODAA qaalai naa77anttuwaakka Yoonaasakko hagaadan yaagiiddi yiis; <sup>2</sup> “Dendda! Denddada he gita katamaa Nanawe ba; baada taani neeyyo yootiyo qaalaa etayyo markkatta” yaagiis.

<sup>3</sup> Yaagin Yoonaasi denddidi, GODAA qaalaadan Nanawe biis. Nanawee keehi gita katama; ha gaxaappe ya gaxaa gakkanau heezzu gallassa hemetissees. <sup>4</sup> Yoonaasi katamaa biidi gakkidi, issi gallassa ogiyaa katamaassi gidḡokko hemettiis; hemettiiddi, “Oitamu gallasaappe guyyiyan, Nanawee xayana” yaagidi awaajjiis.

<sup>5</sup> Yaatin, Nanawe asai Xoossaa ammaniis; ammanidi xoomaa awaajjiis. Gitaappe guuttaa gakkanaashin, ubbaikka waaruwaa maayidosona.

<sup>6</sup> Odoi Nanawe kawuwaakkokka gakkiiis; gakkini ba kawotaa araataappe wodhdhidi, kawotaa maayuwaa maayidoogaakka qaaridi, waaruwaa maayidi, bidinttan uttiis. <sup>7</sup> Yaatidi Nanawe asaassi hagaadan yaagidi awaajjissii; “Kawuwaappenne kawuwaa oosanchchatuppe imettida azazuwaa maaran, hachchippe doommidi, asainne mehee, miizzainne dorssaikka ubbai aibanne inxxarssaainne laaccoppona; haattaakka ganxxoppona. <sup>8</sup> Asaikka meheekka waaruwaa maayo; asai ubbai minttidi Xoossaakko waasso; bantta iita ogiyaappenne sugetta oosuwaappekka simmona. <sup>9</sup> Yaatiyaakko ooni erii, Xoossai nuussi qarettidi, nuuni xayennaadan, ba wolqqaama hanqquwaappe simmanaakkonne” yaagiis.

<sup>10</sup> Eti bantta iita ogiyaappe simmidoogaa Xoossai be7ido wode, etau qarettidi, eta bolli ehaana giido iitabaa aggi bayiis.

## 4

### *Yoonaasa Yiilluwaanne GODAA Qaretaa*

<sup>1</sup> SHin hegee Yoonaasa mulekka ufaissibeenna. Hegaa gishshau, i keehi hanqqettiis; <sup>2</sup> hanqqettidi, GODAA hagaadan yaagidi woossiis; “Abeet GODAU, taani biron ta deren de7aidda giidoogee haggaa gidennee? Taani ne sinttappe baqatada Tarsseesi baanau eesotidoogee kka hegaassa. Neeni qaretainne maarotai kumido Xoossaa gidiyooqaa, hanqquwau eesotennaagaanne aggenaa siiquwan kumidaagaa, qassi ehaana giido iitabaakka aggaagiya Xoossaa gidiyooqaa taani kasekka eraas. <sup>3</sup> Abeet GODAU, ha77i simmi hai hayyanaa tana wora; paxa de7iyooqaa haiqqiyooqee taayyo keha” yaagiis.

<sup>4</sup> Yaagin GODAI a hagaadan yaagiis; “Tumu neeni hagau hanqqettanau bessii?” yaagiis.

<sup>5</sup> Yaagin Yoonaasi katamaappe kiyidi biis; biidi katamaappe arshsho baggan uttiis. Hegan bau daasiyaa daasidi, a kuwan uttidi, katamaa bolli gakkiiyaabaa be7anau naagiis. <sup>6</sup> Awaa suuluwaappe Yoonaasa ashshana mala, GODAI Xoossai issi gosiyaa mokissidi giigissiis; he gosiyaa haittaikka Yoonaasa huuphiyaappe bolla baggaara kuwa gidanaadan oottiis. Yoonaasi he gosiyaa gaasuwan keehippe ufaittiis. <sup>7</sup> SHin wonttetta gallassi maallado Xoossai guxuniyaa giigissiis; he guxunee gosiyaa miyoorin, gosee meli aggiis. <sup>8</sup> Awai kiyiyo wode, Xoossai michchiya carckuwaa arshsho baggappe yeddiis; hegaappe denddidaagan Yoonaasi labbanana gakkanaashin, awai Yoonaasa huuphiyaa xuuggiis. Yaatin i, “Paxa de7iyooqaa haiqqiyooqee taayyo keha” yaagidi haiquwau woossiis.

<sup>9</sup> Woossin Xoossai Yoonaasa hagaadan yaagiis; “Tumu neeni ha gosiyaa gishshau hanqqettanau bessii?” yaagiis.

Yaagin Yoonaasi, “Ee bessees; ubba haiqqana gakkanaassi hanqqettanau bessees” yaagiis.

<sup>10</sup> Yaatin, GODAI Yoonaasa hagaadan yaagiis; “Issi qammi morkkidi, naa77antto qammi melida gosiyaaassi, neeni an daafurabeennaagaassinne dichchabeennaagaassi haggaa keenaa qarettadasa. <sup>11</sup> Ushachchanne haddirssaa shaakkidi eribeenna xee-tanne laatamu sha7u asainne daro mehee Nanawen de7ees. Yaatin taani ha gita katamaayyo qarettanau besseenee?” yaagiis.

## Hananabaa Yootiya Mikiyaasa Maxaafaa

### *Gidduwaa Erissuwaa*

Hananabaa yootiya Mikiyaasi Isiyaasa wode de7ida asa. I yelettidoogee tohossa bagga Yihudaa kawotettaa gidдон de7iya issi guutta gaxare katamaana. Amoxi huuphessa kawotettaa bolli bashshai yaanaagaa yootidoogaadan, Mikiyaasikka he gaasotun Yihudaa kawotettaa bolli bashshai gakkanaagaa yootiis. Asai pirddaa geel-layiyo, he sheneyiya oosuwaa bolli Xoossai pirddaa ehaanaagaa minttidi erissiis. Gidikonne Mikiyaasa hiraagaa qalalai sinttappe lo77obati yaanau de7iyooogaa bessiya daro malaatatakka gujjidi oiqqiis.

Dummayidi mintti xeellanau bessiya kifileti Xoossaa haaruwaa garssan kumetta sa7ai saruwaa demmanaagaa (4:1-4); Daawita kawotettaa turaappe gita kawoi dend-didi, asaassi saruwaa immanaagaa (5:2-4); hegaadankka qassi Israa7eelan hananabaa yootidaageetu qalalai mexi issi xiqisiyan kuuyettiyoogaa odiyaaageeta. He xiqisee odi-iddi, “I nuuppe koyiyooogee: nuuni likkebaa oottanaagaa, kehatettaa kumido siiquwaa bessanaagaan nu Xoossaara kumetta ashkкететтан hemettanaagaa” (6:8).

<sup>1</sup> Yo7aataami, Akaazinne Hizqqiyaasi kaalli kaallidi Yihudan kawotido wode, Moore-sheta katamaa asa gidiya Mikiyaasakko yiida GODAA qalalai hagua; i be7ido ajuutai Samaariyaabanne Yerusalaamebaa.

### *Yerusalaamessinne Samaariyaassi Zilaaliyo Zilaassaa*

<sup>2</sup> Inttenoo, asau ubbau, siyite! Qassi sa7aunne sa7an de7iya ubbatoo, hagua ezggite! Ubbaa Haariya GODAI intte bolli markkattees; i ba geeshsha Beeta Maqidasiyan inttebaa haasayees. <sup>3</sup> Be7ite, GODAI ba de7iyo geeshsha sohuwaappe yees; duge yiidi, deretu huuphiyan hemettees. <sup>4</sup> Eessaa muqaaddai taman seeriyooogaadan, dereti a tohuwaappe garssaara seerana; eti keraappe zanggaarau duge goggiya haattaadan goggana.

<sup>5</sup> Hagee ubbai haniyoogee Yaaqooba zaretu mooruwaa gishshaassanne Israa7eela asaa nagaraa gishshaassa. Yaaqooba zaretu mooruwaassi gaaso gididai oonee? Eta katamaa Samaariyaa gidennee? Yihudaa asai goinniyo xoqqa sohoi awee? Yerusalaame gidenneeyye? <sup>6</sup> Hegaa gishshau, GODAI hagaadan yaagees; “Taani Samaariyaa, dembban keelettida burcce shuchchanne woiniyaa turaa tokkiyo soho oottana. Qassi taani a shuchchaa burcciyaa duge zanggaarau olana; a baasuwaakka kalloyana. <sup>7</sup> A eeqa misileti ubbai kinchchettana; a eeqa keettan oottiya shaaramux-atussi imettida shaaramuxaa kerai ubbai taman xuugettana; taani a eeqata ubbaa xaissana. Aissi giikko, he kerai ubbaikka shaaramuxidi demmidobaa gidiiyo gishshau, ikka qassi simmidi, hara shaaramuxeessi imettana” yaagees.

### *Yeehuwaanne Waasuwa*

<sup>8</sup> Hegaa gishshau, taani yeekkananne waassana; kallo xiireenne mela tohuwan hemet-tana; worakanaadan waassana; qassi yanchchaadankka aayyee gaana. <sup>9</sup> Aissi giikko, Samaariyaa masunttai paxanau danddayennaagaa. He tuggai Yihudaa biittaa gakkiiis; qassi ta asai de7iyo Yerusalaame katamaa penggiyaakka matiis.

<sup>10</sup> Gaate kataman de7iya nu morkketuyyo hega odoppite; eta sinttan mule yeekkoppite. Beeti-Ofira kataman buhiyan gondoretite. <sup>11</sup> Inttenoo, SHafiira katan de7iyaageetoo, kallottidi yeellatiiddi, omooduwau biite. Xaa7inaana kataman de7iyaageeti yaappe kiyana xalokkona. Beeti-Exeela katamai yeehoi de7iyo soho gidiiyo gishshau, i intteyyo attiyo soho gidanau danddayenna. <sup>12</sup> Metoi GODAAPPE Yerusalaame pengge gakkanaashin yiido gishshau, Marootan de7iya asai, “Lo77obai yanddeeshsha!” giidi naagiiddi daafuriis.

<sup>13</sup> Inttenoo, Laakisha kataman de7iyaageetoo, gaariyaa goochchiya parata waaxite. Yerusalaame asai nagaraa oottanaadan gaaso gididai inttena; aissi giikko, Xiyoone asaa nagarai koiro intte bolli beettiis. <sup>14</sup> Hegaa gishshau, inttenoo Yihudaa asatoo, intte biiddi, Mooresheta-Gaate katamaa asaayyo imotaa immana. Akiziiba katamaa asaikka Israa7eela kawota cimmiyaageeta gidana.

<sup>15</sup> Inttenoo, Mareesha kataman de7iyaageetoo, GODAI inttena xooniyaagaa intte bolli ehaana; bonchchettida Israa7eela kaalettiyaageeti Adulaama gonggoluan qosettana. <sup>16</sup> Inttenoo, Yihudaa asatoo, intte siiqiyo naati intteppe omoodettidi baanau de7iyo gishshau, intte huuphiyaa meedettite; intte huuphiyaakka ankkuwaa huuphiyaadan bo77ayite.

## 2

### *Hiyyeesata Huqunniyaageetu Bollan Gakkanau De7iya Iita Qaadaa*

<sup>1</sup> Iitabaa halchchiyaageetuyyo, qassi bantta hiixan de7iiddi, palabaa waati oot-tanaakko qoppiyaageetuyyo aayye7ana! Wolqqai eta kushiyan de7iyo gishshau, sa7ai wonttiyo wode, bantta halchchuwaa poloosona. <sup>2</sup> Eti goshsha gadiyaa amottikko, asabaa wolqqan ekki aggoosona; keettata koyikkokka ekki aggoosona. Asa maataa yedhdhidi, a laataa coo bonqqoosona.

<sup>3</sup> Hegaa gishshau, GODAI hagaadan yaagees; “Be7ite, taani intte bollan iitabaa ehaanau halchchais; hegaappe intte kessi ekkana danddayekketa. Hegee iita wode gidiyo gishshau, intte otorettiiddi simerettanau danddayekketa. <sup>4</sup> He gallassi eti intte bollan leemisi leemisidi qilliiccana; qassi hagaadan yaagidi zilaaliiddi, inttena baceessana;

‘Nuuni ubbaikka muleera xayida.

GODAI nu biittaa ekkidi,  
makkalançchatussi shaakki shaakkidi  
immirggiis’ yaagana” yaagees.

<sup>5</sup> Hegaa gishshau, gadiyaa saaman shaakkiyo wode, GODAA yaa7aa gidдон ne saamaa kessiya issi asinne de7enna.

<sup>6</sup> Asai tana hagaadan yaagees; “Nu bolli hananabaa yootoppa. ‘Hagee hagee intte bolli hanana’ giidi ooninne haasayanau koshshenna. Hegaa mala kaushshai nu bolli mulekka yeenna” yaagoosona.

<sup>7</sup> Yaagin taani eta, “Inttenoo Yaaqooba zaretoo, ‘GODAA Ayyaanai danddayanchcha gidenneeyye? I heгаа malabaa oottiiyye?’ yaagidi intte oichchanau bessii?” yaagaas.

GODAI hagaadan yaagees; “Suure ogiyan biyaageetuyyo ta qaalai lo77obaa oottees gidennee? <sup>8</sup> SHin mata wodiyaappe doommidi, ta asai issoi issuwaa bolli morkkedan denddiis. Intte saro asatu maayuwaa, ola qofi mulekka bannan ammanettidi kant-tiya asatu maayuwaa qaari ekkeeta; <sup>9</sup> ta asaa gidдон de7iya maccaasata eta lo77o keettaappe laaggidi kesseeta; ta anjuwaakka eta naatu bollappe merinau ekkirggeeta. <sup>10</sup> Denddite; denddidi biite! Hagee intteyyo shemppiyo soho gidenna. Aissi giikko, ha sohoi tunatettaappe denddidaagan daro moorettiis.

<sup>11</sup> “Issi cimmiya worddanchchai yiidi, ‘Intteyyo sinttappe woine eessainne mattoyiya ushshai guufettana’ yaagidi wordduwaa hananabaa yootiyaakko, i intteyyo hananabaa yootiyaagaa gidana.

<sup>12</sup> “Inttenoo, Yaaqooba zaretoo, taani inttena ubbaikka shiishshana; taani Israa7eela asaappe attidaageeta tumuppe muliyaakka shiishshana. Dorssati birddiyan shiiqiyoogaadaaninne dorssaa wudee hentta gaden shiiqiyoogaadan, taani eta issippe shiishshada wottana. He sohoi daro asaa wocaman kumana. <sup>13</sup> Eta kessiyaagee etappe sinttatidi kiyana; etikka penggiyaa menttidi, hegaara kiyidi baana. GODAI ba huuphen etayyo kawo gididi, eta sinttau aadhdhidi, eta kaalettana” yaagees.



### 3

#### *Mikiyaasi Israa7eela Kaalettiyaageeta Seeriis*

<sup>1</sup> Taani hagaadan yaagaas; “Inttenoo, Yaaqooba zaretu halaqatoonne Israa7eela asaa kaalettiyaageetoo, siyite! Intte suure pirddaa eranau intteyyo bessenneeyye? <sup>2</sup> Intte lo77uwaa ixidi, iitaa doseeta. Ta asaappe eta galbbaa qaareeta; eta ashuwaakka eta meqettaappe shaakkeeta. <sup>3</sup> Intte ta asaa ashuwaa meeta; eta galbbaakka etappe qaareeta; eta meqettaa mentterettidi, eta ashuwaakka xaaruwan yegganau muxiy-oogaadan muxeretteeta” yaagaas.

<sup>4</sup> He wode eti GODAAKKO waassana, shin i etau zaarena; i ba sinttaa he wode etappe qottana; aissi giikko, eti iita oosuwaa oottidosona.

<sup>5</sup> Ba asaa wora kaalettiya hananabaa yootiyaageetubaa GODAI hagaadan yaagees; “Intteyyo miyoobaa immiyo wode, ‘Neeyyo sa7ai saro’ yaageeta; shin inttena quma mizennaagaa bolli olaa awaajjeeta. <sup>6</sup> Hegaa gishshau, intteyyo gallassai qamma gidanappe attin, ajjuutaa be7ekketta; sa7aikka xumanappe attin, naa77antto murun-nekketa. Hananabaa yootiyaageetussi awai wullin, gallassai xumana. <sup>7</sup> Ajjuutaa be7iyaageeti yeellatana; murunniyaageetikka kauyyana. GODAA matappe etau zaaroi baina gishshau, eti yeellatidi, ubbaikka bantta doonaa oiqqana” yaagees.

<sup>8</sup> SHin tana gidikko, taani Yaaqooba zaretussi eta mooruwaa, Israa7eela asaassikka eta nagaraa odana mala, wolqqan, GODAA Ayyaanan, suure pirddaanne minotettan kumaas. <sup>9</sup> Inttenoo, suure pirddaa ixxiyaanne sitta yohuwaakka geellayiya Yaaqooba zaretu halaqatoonne Israa7eela asaa haariyaageetoo, hagaas siyite. <sup>10</sup> Intte Xiyoone katamaa suuttaa gussidi keexxeeta; Yerusalaame katamaakka makkalan keexxeeta. <sup>11</sup> A halaqati mattaayyan pirddoosona; a qeeseti damoozan tamarissoosona; qassi a hananabaa yootiyaageetikka miishshaa qanxxin murunnoosona. SHin yaatidikka, “GODAI nu giddon de7ees gidennee? Nu bolli aiba iitabaikka yeenna” yaagidi an ammanettoosona. <sup>12</sup> Hegaa gishshau, intte gaasuwan Xiyoone katamai shooqadan goyettana; Yerusalaame katamaikka kolettidi issisan doorettida suuppa shuchcha gidana. Beeta Maqidasee keexettido sohoikka wora gidana.

### 4

#### *Sarotettai Kumido GODAA Kawotettai Yaana (Isiyaasa 2:2-4)*

<sup>1</sup> Wurssettaa gallassatun GODAA Beeta Maqidasee keexettido deree deretu ubbaappe xoqqidi beettana; kera ubbatuppekka bollaara xoqqu xoqqu gaana. Dere asai akko zulana. <sup>2</sup> Daro kawotettatu asai yiidi, “Haayite; GODAA deriyaa, Yaaqooba Xoossaa Beeta Maqidasiyaa ane pude kiyoo. I koyiyoogaadan nuuni baana mala, i nuna ba ogiyaa tamarissana” yaagana. Aissi giikko, higgee Xiyooneppe, GODAA qaalaikka Yerusalaameppe kiyana. <sup>3</sup> I daro asatu gidduwan pirddana; haahuwan de7iya mino kawotettatu palamaakka shaakkana. Eti bantta bisuwaa marasha, bantta tooraakka baaca kessanau qoxxana; kawotettai kawotettaa bolli bisuwaa denttenna. Hagaappe guyyian, eti muleera olaa timirttiyaa tamarokkona. <sup>4</sup> SHin asi ubbi ba woiniyaa turaa kuwaaninne balasiyaa kuwan woppu giidi uttana; ai asinne eta yashissenna. Aissi giikko, Ubbaappe Wolqqaama GODAI hagaas haasayiis.

<sup>5</sup> Asai ubbai ba xoossaa xoossaa sunttan hemettana; shin nuuni GODAA nu Xoossaa sunttan meri merinau hemettana.

#### *Israa7eela Asai Omooduwaappe Simmana*

<sup>6</sup> GODAI hagaadan yaagees; “He gallassi taani wobbeta shiishshana; qassi omooduwan haaho sohuwaa biidaageetanne taani tuggayidoogeetikka shiishshana.

<sup>7</sup> Taani wobbeta wuriiddi attida atetta oottana; qassi omooduwan haaho sohuwaa

biidaageetakka mino kawotetta kessana. He wodiyaappe doommada merinaa gakkanaashin, taani GODAI Xiyooone Deriyan eta bolli kawotana” yaagees.

<sup>8</sup> Neno, GODAA asaa wochchiyo Yerusalaame xoqqa gimbbiyau, neeyyo kase ne haariyo maatai, qassi Yerusalaame kawotetta zawai ubbaikka simmana.

<sup>9</sup> Ha77i neeni cenggurssaa xoqqu oottada waassiyooeenne maaretai oiqqido maccaaseedan un77ettiyoogee aibissee? Neeyyo kawoi baina gishshaasseeyye? Woi nena zoriyaabi xayido gishshaassee? <sup>10</sup> Inttenoo, Xiyooone asatoo, maaretai oiqqido maccaaseedan oliiddi abaraadite. Aissi giikko, intte katamaappe kiyiyoogee attena; kiyidi dembban de7ana; hegaappekka Baabiloone baana. Gidikonne, yan intte attana; GODAI inttena intte morkketu kushiyaappe wozana.

<sup>11</sup> SHin ha77i daro kawotettati ne bolli shiiqidosa; shiiqidi, “Yerusalaamee tuno; nu aifeekka Xiyooone dereqqa” yaagoosona. <sup>12</sup> SHin eti GODAA qofaa erokkona; a halchchuwaakka akeekokkona. Kattaa qoxxiyo audiyau shiishshido mirqqiyaadan, GODAI eta qaxxayanau shiishshiis.

<sup>13</sup> GODAI hagaadan yaagees; “Inttenoo, Yerusalaame asatoo, denddite; denddidi, intte morkketa qoxxite. Taani intte kaciya birata, intte qinccafiliyaakka nahaase oottana. Intte daro kawotettata kinchcherettana; eti sugettan shiishshidobaa ubbaa intte GODAAYYO dummayana; eta aquwaakka intte sa7a ubbaa Godaayyo immana” yaagees.

## 5

<sup>1</sup> Inttenoo, Yerusalaame asatoo, intte olanchchata shiishshite! Aissi giikko, nuuni morkketun doodettida; etikka Israa7eela kaalettiyaagaa gappataa gatiman shocanau hanoosona.

### *Beetaliheemeppe Kaalettiyaagee Kiyanaagee Hiraagan Odettiis*

<sup>2</sup> GODAI hagaadan yaagees; “Neno Efiraataa, Beetaliheeme katamau, neeni Yihudaa katamatu giddon guutta; shin au denddoi beniisappe doommidi, merinaappe gididoogee, Israa7eela asaa haariyaagee taayyo neeppe kiyana” yaagees.

<sup>3</sup> Hegaa gishshau, maaretan oiqettiya maccaasiyaa he na7aa yelana gakkanaashin, GODAI Israa7eela asaa morkketu kushiyan aattidi immana. Hegaappe guyyiyan, omooduwan de7iya a ishantti simmidi, bantta asaara walahettana. <sup>4</sup> I yaana; yiidi, GODAA minotettan, GODAA ba Xoosaa sunntaa anggan ba asaa heemmana. I sa7aa gaxaa gakkanaashin gita gidido gishshau, eti sarotettan de7ana. <sup>5</sup> I etau sarotetta gidana.

### *GODAI Israa7eela Asaa Ashshananne Eta Morkketakka Xaissana*

Asoore biittaa asati nu biittaa woraajjiyo wodenne nu qatotakka yererettidi geliyo wode, nuuni asaa heemmananne kaalettana gididipalahiya asaa denttidi, etaara olaa gaittana. <sup>6</sup> Eti Asoore biittaa olan xoonana; qassi he biittan de7iya Naamiruudi keexxido katamaakka haarana. Asoore biittaa asati nu biittaa woraajjiyo wodenne nu zawaakka yedhdhiyo wode, nu biittaa haariyaagee nuna etappe ashshana.

<sup>7</sup> Yaaqooba zaretu atettati daro dere asaa giddon GODAI kiittido akka malanne maataa bollan wodhdhiya diife mala gidana. Akkainne diifee yaanau asaa azazuwaa naagennaagaadan, Israa7eela asaikka GODAAPPE attin, asaa naagenna. <sup>8</sup> Yaaqooba zaretu atettati kawotettatu giddon, daro asaa giddon, bazzo do7atu giddon de7iya gaammo malanne dorssaa wudiyaa giddon de7iya wodala gaammo mala gidana. I hegaara kanttiyo wode yererettesinne mentterettes; ooninne ashshanau danddayenna. <sup>9</sup> Ne kushee nenaara eqettiyaageetu bolli denddana; ne morkketi ubbaikka xayana.

<sup>10</sup> GODAI hagaadan yaagees; “He gallassi taani ne parata ne giddoppe xaissana; ne para gaaretakka mentterettana. <sup>11</sup> Taani ne biittaa katamata xaissana; ne qatotakka

ubbaa laalana. <sup>12</sup> Qassi ne kaayuwaa taani xaissana; murunniyaageetikka hagaappe sinttanau ne gidдон de7okkona. <sup>13</sup> Taani ne eeqa misiletanne ne goinnanau essido shuchchata ne giddoppe xaissana; hagaappe sinttanau neeni ne kushiyan medhdhidobaassi goinnakka. <sup>14</sup> Taani Asheero giyo xoosee misiliyaa ne giddoppe xoqollana; ne katamatakka xaissana. <sup>15</sup> Taayyo azazettibeenna kawotettatu bolli yiilluwaaninne hanqquwan taani haluwaa kiyana” yaagees.

## 6

### *GODAI Israa7eela Asaara Mootettees*

<sup>1</sup> GODAI Israa7eela asaara mootettiyoogaa siyite.

Abeet GODAU dendda! Denddada xoqqa deretu sinttan pirddetta; neeni giyoobaa keratikka siyona. <sup>2</sup> Inttenoo deretoo, inttenoo, sa7ai eqqido mino baasotoo, GODAI mootiyo mootuwaa siyite. GODAI ba asaara mootettees; Israa7eela asaara i palamettees.

<sup>3</sup> GODAI eta hagaadan yaagees; “Ta asau, taani inttena waatidanaa? Taani intteyyo waanada tooho gididanaa? Ane taayyo odite! <sup>4</sup> Taani inttena Gibxxe biittaappe kessaas; qassi inttena ailletettaappe wozaas. Inttena kaalettana mala Muusa, Aaroonanne Mi-iriyaamo inttessi kiittaas. <sup>5</sup> Ta asau, Moo7aaba Kawuwaa Baalaaqi halchchidobaanne Bi7ooraa na7ai Balaami au zaaridobaa hassaya. SHiixima giyoosaappe Gelggali neeni biyo wode, ogiyan hanidabaa ane hassaya. Hegaa hassayikko, taani GODAI nena ashshanau oottido oosuwaa neeni akeekana” yaagees.

### *Xoossai Ba Asaappe Koyiyobaa*

<sup>6</sup> GODAA, xoqqa sohuwan de7iya Xoossaa sinttan goinnanau yaidda taani ai ekkada shiiqoo? Ayyo xuugettiya yarshsho gidana mala, issi laitta gidido mirggota ekkada, a sintti yooshsha? <sup>7</sup> GODAI sha7u dorssa orggetun woikko tammu sha7u shaafatun de7iya haattaa keena wogaraa zaitiyan ufaittanddee? Ta naaquwaa gishshau, ta baira na7aa, ta shemppuwaa nagaraa gishshaukka ta yeluwaa immooshsha?

<sup>8</sup> Hai asau, GODAI neeyyo lo77obaa odi wottiistenne. GODAI neeppe koyiyoogee aibee giikko, neeni suurebaa oottanaagaa, aggenna siiquwaa bessanaagaanne ashkкетettan ne Xoossaara hemettanaagaa.

<sup>9</sup> GODAASSI yayyiyoogee aadhdhida erattetta. Yerusalaame katamaa asaa GODAI hagaadan yaagees; “Qaxxayana gatimaanne he gatimaa giigissidaageekka oonakko akeekite. <sup>10</sup> Nagaranchchaa keettan de7iya nagaran shiishshido buquraanne ta ixxiyo worddo makkiyo miishshata taani doganeeyye? <sup>11</sup> Yaatin, ha worddo meezaanan likkiyaagaanne worddo miishshan makkiya asaa nagaraa taani waatada atto gaanau danddayiiaanaa? <sup>12</sup> He katamaa dureti makkalan kumidaageeta; an de7iya asai ubbai worddanchcha. Eta doonaa gidдон de7iya eta inxxarssaikka ba huuphiyau geella.

<sup>13</sup> “Hegaa gishshau, taani intte nagaraa gaasuwan inttena xaissanaunne digganau denddaas. <sup>14</sup> Intte maana, shin kallekketa; namisaikka intteppe duuxxenna. Intte buuridi shiishshana, shin intteyyo dagattenna; intte dagayidobaakka taani olaa yeddada xaissana. <sup>15</sup> Intte kattaa zerana, shin gakkinn cakkekketa; wogaraa teeraa gum77ana, shin he zaitiyaa tiyettekketa; woiniyaa teeraakka intte gum77ana, shin a eessaa uyekketta. <sup>16</sup> Intte Kawuwaa Omira wogaa, a na7aa Kawuwaa Akaaba soo iita oosuwaanne eta zoriyaa kaallido gishshau, taani inttena xaissana; taani inttena asi ubbi boriyooba oottana. Asai ubbai inttena cayiyo cashshaakka intte tookkana” yaagees.

## 7

### *Israa7eela Asaa Tunatettaa*

<sup>1</sup> Aayye7ana tanoo! Taani teerai maxetti wuriichchin yiidi, woiniyaa turaappenne balasiyaa mittaappe ba amottidobaa demmanau danddayibeenna namisettida bitaniyaa mala gidaichchaas. <sup>2</sup> Xoossaa dosiya keha asi biittan mulekka baawa; asaa garssan suure asi xayis. Asi ubbi asa suuttaa gussanau zuggidi naagees; qassi ubbaikka ba ishaa gitiyan oiqqanau kaallees. <sup>3</sup> Eta kusheti naa77aikka iitabaa oottanau loohi uttidosona. Halaqainne daannai mattaayiyaa oichchoosona; gita asati bantta amottidobaa odoosona; eti ubbaikka issippe iitaa phuphphuroosona. <sup>4</sup> Eta garssan onakkoi keha giyoogee aguntta mala; qassi onakkoi suure giyoogee gom77ore mala. GODAI hananabaa yootiyaageetu baggaara odidoogaadan, i ba asaa qaxxayiyoo gallassai gakkis; eti shabbirettiyo wodeekka ha77a.

<sup>5</sup> Ne shooruwaa ammanoppa; ne laggiyaakka ammanettoppa. Neeni qoommada aqiyo ne keettaayeessi odiyoobaakka akeekada oda. <sup>6</sup> Aissi giikko, na7ai ba aawaa karees; na7iyaa ba aayee bolli, na7aa machchiyaakka ba bollotee bolli denddoosona; aawussi aawu so asai morkke gidees.

<sup>7</sup> SHin tana gidikko, taani ufaissan GODAA xeellashshana; tana ashshiya Xoossaa taani naagashshana; ta Xoossai tabaa siyana.

### *GODAI Ashshiyaagaa*

<sup>8</sup> Ta morkkiyau, ta metuwan ufaittoppa. Taani kunddikkokka denddana; taani xuman uttikkokka, GODAI taayyo poo7ana. <sup>9</sup> Taani GODAA naaqqas; heгаа gishshau, i taayyo mootettidi, ta pirddaa kessana gakkanaashin, taani a hanqquwaa danddayana. I tana poo7uwau kessana; taanikka i ashshiyo ashettaa be7ana. <sup>10</sup> He wode ta morkkeekka be7ana; qassi tana, “GODAI ne Xoossai awan de7ii?” yaagi yaagidi qilliicciyaagee yeellaa maayana; i ogiyan de7iya urqqaadan yerettishinkka taani ta aifiyan be7ana.

<sup>11</sup> Inttenoo, Israa7eela asatoo, intte katamaa gimbbe dirssati direttiyo gallassai yaana; he gallassi intte zawaikka aakkana. <sup>12</sup> He gallassi intte asai inttekkoo simmana. Eti Asoore biittaappe, Gibxxe katamatuppe, Efiraaxiisa SHaafaa heeran de7iya sohotuppenne qassi haahosan de7iya abbatu doonaappenne xoqqa deretuppe inttekkoo simmana. <sup>13</sup> SHin biittai an de7iya asaa iitatettaa gaasuwan asi baina baises gidana.

### *Xoossai Israa7eelassi Qarettido Qaretaa*

<sup>14</sup> Neeni ne asaa, aradda biittai yuushuwan de7iyo bazuwan barkka de7iya ne buzo dorssaa wudiyaa ne gatiman heemma. Eti kaseegaadankka Baasaaneeninne Gala7aaden heemettona.

<sup>15</sup> GODAI, “Intte Gibxxe biittaappe kiyido wodiyaadan, taani inttena maalaalis-siyaabaa bessana” yaagees.

<sup>16</sup> Kawotettati ubbai heгаа be7idi yeellatana; eta wolqqaikka hada gidiyo gishshau, eti yeellatidi, bantta doonaa oiqqana; eta haittaikka tullana. <sup>17</sup> Eti shooshshaadan, biittaa laaccana; sa7aara tiran gooshettiya meretatudan kokkoriiddi, bantta qatuwaappe kiyana. Kiyidi gita dagaman GODAAKKO, nu Xoossaakko, simmana; eti GODAASSI yayyiiddi de7ana.

<sup>18</sup> Naaquwaa atto yaagiyaagee, ba asaa atettatu makkalaa qoodennaagee ne mala Xoossai oonee? Neeni hanqqoi hanqqoshin, merinau de7a aggakka; aissi giikko, neeni ne asaassi ne aggenna siiquwaa bessiyooogan ufaittaasa. <sup>19</sup> Neeni nuuyyo qassikka qarettana; nu naaquwaa ne tohuwan yedhdhana; ee nu nagaraakka abbaa ciimman olana. <sup>20</sup> Neeni beniisappekka doommada nu maizza aawatussi geppada caaqqidoogaadan, Abrahaamane Yaaqooba zare gidida ne asaassi ne ammanettiyoogaanne ne aggenna siiquwaa bessana.

## Hananabaa Yootiya Naahooma Maxaafaa

### *Gidduwaa Erissuwaa*

Naahooma maxaafai beniisappe doommidi Israa7eelassi diina morkke gididi de7ida Asoore waanna katamai Nanawee kunddidoogaa ufaissaa giximiyan yootees. Nanawe katamai Yesuusa yeletaappe kase, laappuntta xeetu laittaa wurssettan olan bayidoogee, meqettaa iitanne otoranchcha asaa bolli Xoossai waati pirddidaakkonne bessees.

<sup>1</sup> Elqqoosha kataman de7iya Naahoomi Nanawebaa yootido qaalainne be7ido ajjuutai haggaa.

### *Nanawe Bollan GODAI Hanqqettido Hanqquwaa*

<sup>2</sup> GODAI qanaatiyaanne haluwaa kessiya Xoossaa; GODAI haluwaa kessiyaagaanne hanqquwan kumidaagaa; GODAI banaara eqettiyaageetussi haluwaa kessees; qassi ba morkketa qaxxayanau ba hanqquwaa giigissi wottiis. <sup>3</sup> GODAI hanqqettanau eesotenna; wolqqaikka aagee gita; i mooranchchaa ai gidikkonne, qaxxayennan aggenna.

GODAASSI carckuwaanne gotiyaa giddoora ogee de7ees; shaaraikka a tohoi yedhdhin denddiya baana. <sup>4</sup> I abbaa seeridi melissees; shaafata ubbaakka toissees. Baasaaneenne Qarmmelooosi shulloosona. Liibaanoosa ciishshaikka qoqqofettees. <sup>5</sup> A sinttan dereti qaaxxoosona; keratika maashoosona. I qoncciyoo wode biittai sa7ai qaaxxana; sa7an de7iyaabai ubbaikka kokkorana. <sup>6</sup> A hanqquwaa sinttan eqqanai oonee? A hanqquwaa suuluwaakka danddayanai oonee? A hanqqoi tamaadan bukkiyo wode, zaallati za77idi phalqqettoosona.

<sup>7</sup> GODAI keha; metuwaa gallassikka baqati attiyo soho; i banan ammanettiyaageeta erees. <sup>8</sup> SHin i ba morkketa di7uwan muukissidi xaissana; banaara eqettiyaageetakka xumau yedettana.

<sup>9</sup> Intte GODAA bolli maqettiyoobai i aibee? I heggaa muleera xaissana; metoikka naa77antto denddenna. <sup>10</sup> Eti, xaxiballettida aguntta malati, qassi uyidi mattottidabaadan ganddigaariyaageeti, mela utulaadan taman xugetti xayana. <sup>11</sup> Nanawee, GODAA bolli iitabaa maqqiyaagee, iita zoriyaa zoriyaagee ne giddoppe kiyiis.

<sup>12</sup> GODAI hagaadan yaagees; “Nanaweti minonne cora gidikkokka, xoqolettidi xayana. Yihudaa asau, taani inttena kase tuggayaas; shin hagaappe sinttanau tuggayikke. <sup>13</sup> Ha77i taani Asooretu qambbaraa intte morggiyaappe menttana; intte qashettido qashuwaakka taani duuterettana” yaagees.

<sup>14</sup> Nanawee, GODAI ne bolli pirddido pirddai hagaadan yaagiyaagaa; “Hagaappe sinttanau ne sunntaa xeesissiya zeretti neeyyo de7enna. Ne xoossatu keettan de7iya misiletanne eeqata taani xaissana. Neeni hanttaara gidido gishshau, taani ne duufuwaa bookkana” yaagiyaagaa.

<sup>15</sup> Be7ite, issi kiitettidaagee lo77o mishiraachchuwaa odiiddinne sarotettaa awaajjiddi, xoqqa deretu bollaara gakkiiis. Inttenoo, Yihudaa asatoo, intte morkketi muleera xayidosona; eti naa77antto intte biittaa woraajjokkona. Heggaa gishshau, intte baalata bonchchite; intte shiiqqidobaakka gattite.

## 2

### *Nanawe Kunddettaa*

<sup>1</sup> Neno Nanawe katamau, mentterettiyaabai kiyiichchiis! Heggaa gishshau, ne qatuwaa naaga; ne ogiyaakka wochcha; ne gittaa mintta; ne wolqqaakka kuntta.

<sup>2</sup> Bonqqiyaageeti bonqqidi, eta woiniyaa turaa xaissikkokka, GODAI Israa7eela bonchchuwaa zaaridoogaadan, Yaaqooba bonchchuwaakka zaarana.



<sup>3</sup> Olanchchatu gondalleti zo7o; olanchchatikka zo7o maayuwaa maayidosona. Eti olau giigiyo wode, para gaareti tamaa lacuwaadan pholqqu goosona; eti bantta tooraa toomaakka maggulssoosona. <sup>4</sup> Para gaareti ogiyan adaraasuwa kinchchoosona; eti yaanne haanne jaamiiddi, katamaa ogiyan yuuyoosona. Qassi eti laco poddu giyo xomppiyaa milatoosona; wolqqanttaadankka eesotoosona. <sup>5</sup> Nanawee ba halaqata xeesidi shiishshees; shin a halaqati hemettiiddi xubettoosona. Eti katamaa gimbbe dirssaakko eesotoosona; shin eta morkketa qohuwaappe naagiya gondaltee giigiis. <sup>6</sup> SHaafaa baggaara de7iya katamaa dirssaa penggeti dooyettidosona; kawo keettaikka shabbirettiis. <sup>7</sup> Kawiyaa omoodettada baasu; i macca ashkkaarattikka azzanidi, haraphetudan waassoosona; waassiiddi bantta tiraakka baqqoosona.

<sup>8</sup> Dagatti uttida haattai pogi bessin goggiyoogaadan, Nanawe asai katamaappe baqatana. Asi eta ba qaala xoqqu oottidi, “Eqqite; eqqite!” yaagidi xeesana; shin ooninne guyye xeellenna. <sup>9</sup> He katamaa aquwaassi, an minjettida bonchcho miishshaassikka qoodi baawa. Hegaa gishshau, he biraa bonqqite! He worqqaakka qassi bonqqite!

<sup>10</sup> Nanawe katamai baisa gidiiis; qassi onidi, bazzo gidiiis! Asaa wozanai yashshan seeriis; gaadeekka kokkoriis; asa ubbaa xeesai gajigajiis; som77oikka bullattiis! <sup>11</sup> Gaammotu geesso mala, wodala gaammoti de7iyo soho malanne attumanne macca gaammoti bantta maratuura eta yashsiyaabi bannan, yuuyiyo wora mala gidida Nanawe katamai ha77i awan de7ii? <sup>12</sup> Gaammoi ba maratussi gidiyaabaa oiqqiis; banaara de7iya macca gaammeessikka mentterettidi immiis. Ba geessuwaa hasi oiqqidoban, ba gonggoluwaaakka hasi ehiido ashuwan kunttiis.

<sup>13</sup> Ubbaappe Wolqqaama GODAI hagaadan yaagees; “Be7a, taani ne bollan denddaas! Taani ne para gaareta taman xuuggana; ne wodala gaammotakka bisoi maana. Neeni hasiyobaa taani biittaappe xaissana; neeyyo kiitettiyaageetu qaalaikka naa77antto mulekka siyettenna” yaagees.

### 3

#### *Nanawe Katameessi Aayye7ana!*

<sup>1</sup> Daro asaa suuttaa gussida Nanawe katameessi aayye7ana! Worddoi in kumi uttiis. A wolqqan ekkidonne bonqqido duretau qoodi baawa. <sup>2</sup> Nanawe katamen lissuwaa arpeelloi, irzzuwaa gondorssai, paratu adaraasoinne para gaaretu gufettai siyettes. <sup>3</sup> Paraasati piriixoosona; bisoi phopholqqattes; toorattikka phooloosona. Daro asai haiqqiis! Ahai ahaa bolli doorettiis! Haiqqidabau qoodi baawa! Hegaara kanttidi biya asaikka ahan xubettes. <sup>4</sup> Hagee ubbai hanidoogee puulanchcha gidida Nanawi shaaramuxaa gaasuwaana. A daro murunnuwaa oottausu; kawotettata ba shaaramuxan, asaakka ba murunnuwan ailleyaasu.

<sup>5</sup> Ubbaappe Wolqqaama GODAI hagaadan yaagees; “Be7a, taani ne bollan denddaas! Taani ne maayuwaa ne bollappe qaarana; qaarada ne kalluwaa dere asaa, ne pokkuwaakka kawotettata bessana. <sup>6</sup> Taani nena pito oliyo soho kessana; taani nena karana; qassi asi ubbi nenan qilliicciyoobaa oottana. <sup>7</sup> Nena be7iya ubbai neeppe sher77i gaana; sher77i giidi, ‘Be7ite, Nanawe katamiyaa baisa gidaasu. Iyyo azzaniyai oonee? O minttettiyaabikka auppe beettanddeeshsha!’ yaagana” yaagees.

<sup>8</sup> Neno Nanawe katamee, neeni Teebiso giyo Gibxxe katameeppe darai? O Naile SHaafai dooddi wottiis. SHaafai iyyo qato; haattattikka iyyo dirssa. <sup>9</sup> Toophphenne Gibxxee iyyo zawi banna wolqqa; Puuxinne Liibee o maaddiyaageeta. <sup>10</sup> Gidikonne, a omoodettada baasu; in de7iya guutta naattikka darxxettidi, ogiyaa gaxan ubban kunddidosona. I bonchchettida asatu bollan saamai yegettiis; i gita asati ubbaikka sanssalatan qashettidosona.

<sup>11</sup> Neno Nanawe katamee, neeni qassi mattottidi ganddigaariya asadan hanana. Ne morkketu sinttappe baqatada attiyoosaa neeni koyana. <sup>12</sup> Ne qatoti ubbai koiro teerida teerai gau7ido balasiyaa mittatu mala; he balasiyaa mittaa qaattiyo wode, teerai miyaagau doonan wodhdhees. <sup>13</sup> Be7a, ne olanchchati ubbai macca asa mala. Ne zawaa penggetikka ne morkketussi aakkidi dooyettidosona; gordde mittaakka tamai mirggiis.

<sup>14</sup> Ne morkketi nena dooddidi un77ettiyo wode uyanau haattaa tikka. Ne qatotakka mintta; urqqaa yedhdha; yedhdhada appe xuubiyaa medhdhiyo miishshan xuubiyaa giigissa. <sup>15</sup> Nena yan tamai maana; boolee kattaa miyoogaadan, nena bisoi busakkana.

Neeni booliyaadan dara; gumbburuwaadankka coratta. <sup>16</sup> Neeni ne zal77anchchata saluwaa xoolinttetuppe aattada corayadasa. SHin hegeeti ubbai booliyaadan ubbabaa mirggidi, paalli xayana. <sup>17</sup> Ne halaqatinne ne ola gadaawati, meego gallassi dirssa gidдон surqqettidi sham77i sham77iya booletu mala. Eti awai kiyiyo wode paallidi xayoosona; eti de7iyo sohuwaakka eriyaabi baawa.

<sup>18</sup> Neno Asoore kawuwau, ne henttanchchati xiskkidosona; ne bonchchettida asatika zaqqullidosona. Ne asai deretu bollan laalettis; eta shiishshiyaabikka baawa.

<sup>19</sup> Ne me7oi koolettena; ne masunttaikka paxenna. Nebaa siyida ubbai ufaittidi, kushiyaa baqqana. Aissi giikko, ne zawi baina iitatettaappe kessi ekkida asi mulekka baawa.

## Hananabaa Yootiya Imbbaaqooma Maxaafaa

### *Gidduwaa Erissuwaa*

Hananabaa yootiya Imbbaaqoomayyo hiraagaa qaalai yiidoogee Baabiloonati darin minnido wodiyan, Kiristtoosa yeletaappe kase, laappunnta xeetu laittaa wurssettaana. Ha meqettaa iita asati oottiiddi de7iyo sugetta oosuwan Imbbaaqoomi keehi daro un77ettido gishshau, “Yaatin hageeta makkalanchchata waata co77u gaada xeellai? Nagarachchati banttappe xilluwaa dariyaageeta xaissanau denddiyo wode, aibissi co77u gaadii?” yaagidi Xoossaa oichchiis (1:13). Xoossai ayyo zaaruwaa immiiddi, “Taani ubbabaakka ta wodiyan oottais” yaagi zaaridoogaappe guyyiyan, hegee gakkanaashin, “Xilloi ammanuwan de7uwaa demmees” yaagiis (2:4).

Maxaafaassi attiya kifilee makkalanchchatu bollan gakkiya bashshaabau odettida hiraagaa gidishin, wurssettaa heeran Xoossaa gitatettaabanne ha giximiyaa xaafida bitaniyaa ammanuwaa minotettaabaa qonccissiya mazamuree de7ees.

<sup>1</sup> Hananabaa yootiya Imbbaaqoomassi GODAI ajjuutan qonccissido qaalai haggaa.

### *Imbbaaqoomi Suure Pird dai Xayidoogaa GODAASSI Maganniis*

<sup>2</sup> Imbbaaqoomi hagaadan yaagiis; “Abeet GODAU, neeni tana maaddanaadan taani xeesiyo wode, aude gakkanaashin siyennan ixxuutee? Qassi taani naaqqetada neeyyo waassiyo wode, aude gakkanaashin ashshennan ixxuutee? <sup>3</sup> Ha naaquwaa tana aissi bessai? Mooruwaa xeellaidda neeni aissi co77u gaada danddayai? Bashshainne makkalai ta sinttaana; waretainne ooshshai biitta ubban dariis. <sup>4</sup> Heggaa gishshau, higgee leppiis; tumi kiya erenna. Qassi nagarachchati xillo asata dooddi oiqqido gishshau, pird dai geellattees” yaagiis.

### *GODAI Imbbaaqoomassi Immido Zaaruwaa*

<sup>5</sup> GODAI zaaridi ba asaa hagaadan yaagiis; “Intte yuushuwan de7iya kawotettata xeellite! Xeellidi garamettitenne maalalettite! Aissi giikko, intteyyo yootiyaakkokka intte ammanenna oosuwaa taani intte wodiyan oottana hanais. <sup>6</sup> Taani Kaladaaweta, he meqetti baina dirbbiya asata denttais. Eti banttabaa gidenna biittaa olidi oiqqanau biitta ubban yuuyoosona. <sup>7</sup> Eti yashissiiddinne daganttiiddi, bantta xalaalaa bonchchissiya higgiiyaa kessoosona. <sup>8</sup> Eta parati maahetuppekka aadhdhida eesanchchanne namisettida omarssa wanggireellotuppekka aadhdhida hanttaara. Eta paraasati yeddiiddi, haahosaappe yoosona; eti arggantai aibakko oiqqanau paalliyogaadan paalloosona. <sup>9</sup> Eta olanchchati ubbai sugettabaa oottanau bazzo carkkuwaadan carkkiiddi yoosona. Yiidi asaa omooddidi, shafiyaadan shiishshoosona. <sup>10</sup> Eti kawotu bolli qilliiccoosona; haariyaageetakka eti baceessoosona; qassi shuchchan direttida geessotu ubban eti miiccoosona. He geessota omooddanau eta lanqqiyan biittaa keeloosona. <sup>11</sup> Hegaappe guyyiyan, eti ubbabaakka carkkuwaadan pittidi kanttana. He makkalanchchatussi eta wolqqai eta xoossaa” yaagiis.

### *Imbbaaqoomi Naa77anttuwaakka GODAASSI Maganniis*

<sup>12</sup> Abeet GODAU, ta Xoossau, ta Geeshshau, neeni merinaappe doommada de7iya Xoossaa gidikkii? Neeni nu Zaalla gidiyo gishshau, nuuni haiqqokko. Abeet GODAU, Kaladaaweta nuna pirddanaadan, neeni eta denttadasa; denttada wolqqaakka etau immadasa. <sup>13</sup> Ne aifeti daro geeshsha gidiyo gishshau, iitabaa xeellanau dosokkona; iitabai oosettiyo wode be7aidda co77u gaanau danddayakka. Yaatin, ha makkalanchchata aibissi co77u gaada xeellai? Nagarachchati banttappe xilliyaa asata mittiyo wode aibissi co77u gai?

<sup>14</sup> Neeni asaa abbaa moletudan, kaalettiyaabi etau bainna tiran gooshettiya mere-tatudan oottadasa. <sup>15</sup> Kaladaaweti dere asaa ubbaa qaphiyan qoridi kessana; eti eta bantta qeera gitiyan oiqqana; qassikka eti eta bantta wogga gitiyan buuridi shiishshana; yaatidi eti ufaittananne hashshu gaana. <sup>16</sup> Hegaa gishshau, eti bantta qeera gitiyaayyo yarshshoosona; bantta wogga gitiyaayyo ixaanaa cuwayoosona. Aissi giikko, eti ishaluwan de7iyoinne mal77uwaa miyoi he gitetu wolqqaana. <sup>17</sup> Yaatin, eti bantta bisuwaa shoddi shoddi kawotettata ubba wode qareti bannan woriiddi de7anee?

## 2

<sup>1</sup> Wochchiyo adussa gimbbiyaa bolli kiya eqqada taani naagana. He sohuwan GODAI tana giyoobaanne ta maganau i immiyo zaaruwaa siyanau xeellashshana.

### *GODAI Imbbaaqoomassi Immido Naa77antto Zaaruwaa*

<sup>2</sup> GODAI taassi zaaridi, “Woxxiya urai nabbabana mala, masettida shuchchaa bolli taani neeyyo qonccissiyo ajjuutaa orddiyan xaafa. <sup>3</sup> Aissi giikko, ajjuutan beettidabai ba keerettida wodiya naagees. He ajjuutai polettiyo wodee eesuwan gakkana; worddo gididi attenna. Takkiyaabaa milatikkokka naaga; aissi giikko, i tumuppe yaana; gam77enna.

<sup>4</sup> “Be7a, i otorettiis; a amoikka suure gidenna; shin xilloi ba ammanuwan de7ana. <sup>5</sup> Duretetti asa cimmees; miishshau yaaretiya asi otorettees. I duufodan yora gidiyo gishshaunne haiqodan kalli erenna asa gidiyo gishshau, kawotettata ubbaa baayyo shiishshees; asa ubbaakka baayyo omooddees.

<sup>6</sup> “Omoodettida asai banttana omooddidaagaa keehippe borananne qilliiccana. Eti hagaadan yaagana; ‘Babaa gidenna miishshaa shiishshidi koriyaagaunne aco asaappe wolqqan ekkido aquwan duretiyaagau aayye7ana! Hagee hagaadan haniiddi, aude gakkanaashin de7anee?’ yaagana. <sup>7</sup> Neeni etappe tal77ido asati ne akeekennan ne bolli dendididi, nena kokkorssana. Hegaappe guyyiyan, eti ne aquwaa ubbaa bonqqana. <sup>8</sup> Neeni daro asaa aquwaa bonqqido gishshau, etappe attidaageeti ne aquwaa bonqqana. Aissi giikko, ne daro asaa suuttaa gussadasa; qassi sa7a ubban, katamatu bollinne etan de7iya asaa bollikka sugetta oosuwaa oottadasa.

<sup>9</sup> “Metoi nena gakkennaadan, ne keettaa xoqqa sohuwan keexxanau sugettan miishshaa shiishshiyaagoo, neeyyo aayye7ana! <sup>10</sup> Daro asaa ne genada xaissidoogaa gaasuwan ne so asaa kaushshadasa; neeni ne bolli bashshaa ehaadasa. <sup>11</sup> Harai atto ne keettaa gimbbiyaa shuchchaikka ne bolli waassana; waassin zabaayetikka waasuwa allana.

<sup>12</sup> “Katamaa makkalan baasidi, asaa suuttan keexxiyaageetoo, intteyyo aayye7ana! <sup>13</sup> Ubbaappe Wolqqaama GODAI asai oottiyoobai ubbai tama kaho gidanaadan, qassi kawotettati ubbai daafuriyoobai coo mela gidanaadan, qofaa qachchi wottiis. <sup>14</sup> Aissi giikko, haattai abbaa kammiyoogaadan, GODAA bonchchuwaa eratettai sa7aa kumana.

<sup>15</sup> “Ba shooro asai kallottin be7ana giidi, ba hanqquwaa xuu7aa eta ushshidi mat-toyiya urau aayye7ana! <sup>16</sup> Neeni bonchchuwaa gishshaa kaushshaa maayana. Ha77i simmi laa neno, uya! Uyada ganddigaara! GODAASSI ushachcha kushiyan de7iya xuu7ai neekko yaana; ne bonchchoi kaushshau laamettana. <sup>17</sup> Neeni Liibaanoosa xaissidoogaadan, neenikka xayana. Neeni do7ata wora wurssadasa; ha77i qassi eti nena yashissana. Aissi giikko, ne daro asaa suuttaa gussadasa; qassi sa7a ubban, katamatu bollinne etan de7iya asaa bollikka sugetta oosuwaa oottadasa.

<sup>18</sup> “I bau eeqi ai maaddii? A asi giigissiis gidennee? Worddoppe attin, an harabi aibinne beettenna. Yaatin, a medhdhida bitanee ha ainne haasayenna eeqaa ammaniyoogee a ai maaddanaassee? <sup>19</sup> Mittaappe masettidaagaa ‘Beegotta!’ giyaagoo, qassi shuchchaappe masettida duudiyaa, ‘Dendda eqqa!’ giyaagoo, neeyyo aayye7ana! I

woni neeyyo aibakko qonccissanau danddayii? Be7a, i worqqaaninne biran sheeshshidoogaa; au shemppoi baawa.

<sup>20</sup> “SHin GODAI ba geeshsha Beeta Maqidasiyaana. Hegaa gishshau, biittan sa7an de7iya asai ubbai a sinttan co77u go” yaagiis.

### 3

#### *Imbbaaqooma Woosaa*

<sup>1</sup> Hananabaa yootiya Imbbaaqoomi mazamuredan yexxiiddi, woossido woosai ha-gaa:

<sup>2</sup> Abeet GODAU, neeni kase oottidobaa taani siyada yayyaas. Abeet GODAU, nu wodiyankka he oosota zaarettada ootta; eti nu wodiyankka erettona. Neeni hanqqet-tiyo wode ne maarotaa qoppa.

<sup>3</sup> Xoossai Temaana giyo sohuwaappe yees; he Geeshshai Paaraana Deriyaappe yees. A bonchchoi saluwaa kammiis; a galataikka sa7aa kumiis. <sup>4</sup> A phoolettaikka awaa poo7uwaa mala; a wolqqai qosetti uttido a kushiyaappe pozhzhu giya poo7oi kiyees. <sup>5</sup> GODAI boshaa baappe sinttau kiiitees; haiquwaakka ba geeduwaa kaalettees. <sup>6</sup> I eqqidi biittaa qaattiis. Qassi i xeellidi kawotettata kokkorssiis. Merinaasappe de7ida dereti meqerettidosona; qassi i eta bollan hemettiyo beniisappe de7ida keratikka laalet-tidosona. <sup>7</sup> Taani Toophphiya asai tuggatishin be7aas; Midiyaama biittaa asaikka kokkorishin be7aas.

<sup>8</sup> Abeet GODAU, neeni aibissi hanqqettadii? SHaafati nena hanqqetissidonaa? Woi abbaa bolli hanqquwaa eexxa kiyadii? CHii, neeni ne paratanne ne para gaareta toggidoogee ne asaassi xoonuwaa immanaassa. <sup>9</sup> Neeni ne wonddafiya giigissadasa; giigissada zubbeta dukkanau dafadasa. Biittaa phalqqada haattaa kessadasa. <sup>10</sup> Dereti nena be7idi, yashshau kokkoridosona; haattaa kixaikka kanttiis. Qassi haattaa ci-immatikka waassoosona; waassiiddi bantta dambbalaa haa haa darissidosona. <sup>11</sup> I dafidi yeddido zubbetu poo7uwaaninne ne tooratu phoolettan awainne aginai bantta de7iyoosan de7iyoosan eqqidodosona.

<sup>12</sup> Neeni hanqqettaidda biitta ubban yuuyadasa; kawotettataikka hanqquwan yedhd-hadasa. <sup>13</sup> Neeni ne asaa ashshanaunne ne tiyettidaagaa ashshanaau kiyadasa; iitatu halaqaa shocadasa; a maayuwaa qaarada a kallo xiire ashshadasa. <sup>14</sup> A olanchchatu gadaawaa neeni a tooran a caddadasa. Eti nuna laalanau gotiyaadan yoosona; metootanchchaakka geeman mittanau dosoosona. <sup>15</sup> Neeni ne paratun abbaa yedhd-haidda aadhdhiyo wode, daro haattai hoommuwaa goppu gees.

<sup>16</sup> Taani haggaa ubbaa siyin, ta bollai gajigajiis; ta menttershshai kokkoriis; ta meqet-taikka kokkoriis; ta tohotikka qassi gunddidodosona. Nuna tuggayiyaageeta GODAI qaxxayana gakkanaashin, metuwaa gallassaa taani danddayan naagana.

<sup>17</sup> Balasiyaa giyo mittai aifana xayikkokka, woiniyaa turan aifee xayikkokka, wog-arai aifennan ixikkokka, gadee kattaa morkennan ixikkokka, birddiyan dorssi xayikkokka, qassi aqon mehee xayikkokka, <sup>18</sup> hegee ubbai xayikkokka, taani GODAN ufaittana; tana ashshiya Xoossan taani ufaissaa poccu gaana. <sup>19</sup> Ubbaa Haariya GODAI tau wolqqa; ta tohuwaa gaaraa tohuwaadan minttees; taani xoqqa sohotun hemettanau tana danddayissee.

(Yexxiyaageeta kaalettiyaagaa hassayissiyooobaa: ha mazamuree diixxiyoobaa di-ixxiiddi yexxiyo mazamure.)



## Hananabaa Yootiya Hagge Maxaafaa

### *Gidduwaa Erissuwaa*

Hananabaa yootiya Hagge maxaafan xaafettida qantta qantta kiitati Kiristtoosa yeletaappe kase, ichchashu xeetanne laatamu laittan Xoossai hananabaa yootiya Hagge baggaara odidoogeeta. Asai omooduwaappe simmidi Yerusalaamen de7uwaa doommoosappe issi amarida laittati aadhdhidobaa gidikkonne, Beeta Maqidasee laalet-tosaarakka de7ees. Hegaa gishshau, kiitai asaa kaalettiyaageeti Beeta Maqidasiyaa bottokonanaadan denttettiyaagaa. Asai ooraxxikkonne geeyikko, sinttappe Xoossai etau saruwaanne duretettaa immanaagaa odees.

### *Beeta Maqidasiyaa Zaarettidi Keexxanaadan GODAI Immido Azazuwaa*

<sup>1</sup> Kawoi Daariyoosi kawotido naa77antto laitti, usuppunta aginan koiro gallassi GODAA qaalai hananabaa yootiya Hagge baggaara Salaatiyaala na7aa, Yihudaa biittaa haariya Zarubaabeelakkonne Yoxedeeqa na7aa, qeese ubbatu halaqaa Yaasukko ha-gaadan yaagiiddi yiis; <sup>2</sup> “Ubbaappe Wolqqaama GODAI hagaadan yaagees; ‘Hagee asai, GODAA Beeta Maqidasiyaa zaarettidi keexxiyo wodee biron gakkibeenna’ yaagees” yaagiiddi yiis.

<sup>3</sup> Yaatin, GODAA qaalai hananabaa yootiya Hagge baggaara hagaadan yaagiiddi yiis; <sup>4</sup> “Ta asau, ta Beeta Maqidasee qoletti uttidaashin, intte intte alleeqettida keettatun de7anau hagee intteyyo wodeeyye?” yaagiis.

<sup>5</sup> Hegaa gishshau, Ubbaappe Wolqqaama GODAI hagaadan yaagees; “Ane intte inttena gakkiiiddi de7iyaabaa qoppite. <sup>6</sup> Intte daruwaa zerideta; shin guutta shi-ishshideta. Meeta, shin kallekketa; uyeeta, shin alekketa. Maayeeta, shin inttena ho77enna; damoozaa ekkiyaagee daassa qarcciitan yegganau ekkees” yaagees.

<sup>7</sup> Qassikka Ubbaappe Wolqqaama GODAI hagaadan yaagees; “Ane intte inttena gakkii-iddi de7iyaabaa qoppite. <sup>8</sup> Simmi deriyaa pude kiyidi, mittaa qanxxidi ehiite; ehiidi Beeta Maqidasiyaa zaarettidi keexxite. Yaatobare taani an ufaittanne bonchchet-tana” yaagees GODAI.

<sup>9</sup> Qassikka Ubbaappe Wolqqaama GODAI hagaadan yaagees; “Intte daro kattaa shiishshanau halchhideta; shin guutta gidiis; akka intte soo gelissido wode, taani punniyoorin xayi aggiis. Hagee aibissi hanidee? Taani hagee oottidoogee, intte ub-baikka intte keettaa keettaa keexxishin, ta keetta qolettidi attido gishshaassa. <sup>10</sup> Hegaa gishshau, bolla saloi iraa immennan, biittaikka kattaa mokkennan ixxidosa. <sup>11</sup> Qassi biittanne deretu bolli, kattaa bolli, woiniyaa turaanne zaitiyaa wogaratu bolli, biittai pude mokkiyoobatu bolli, asanne mehiyaa bollinne intte daafuridi oottidobaa ubbaa bolli taani koshaa xeegees” yaagees.

### *Asai GODAASSI Azazettiis*

<sup>12</sup> Hegaappe guyyiyan, Salaatiyaala na7ai Zarubaabeeli, Yoxedeeqa na7ai, qeese ubbatu halaqai Yaasunne omooduwaappe simmida asai ubbai GODAA bantta Xoos-saa qaalaayyoonne GODAI eta Xoossai hananabaa yootiya Hagge baggaara kiittido qaalaayyo azazettidosona; asaikka GODAAYYO yayyidosona. <sup>13</sup> Yaatin, GODAI kiittido Haggee asaa, “Asau, GODAI inttena, ‘Taani inttenaara de7ais’ yaagees” yaagidi GODAA kiitaa asaayyo yootiis.

<sup>14</sup> Yaatin, GODAI Salaatiyaala na7aa, Yihudaa biittaa haariya Zarubaabeela, Yoxedeeqa na7aa, qeese ubbatu halaqaa Yaasanne omooduwaappe simmida asa ubbaa denttettiis; denttettin eti yiidi, Ubbaappe Wolqqaama GODAA, bantta Xoossaa

Beeta Maqidasiyaa keexuwaa doommidosona. <sup>15</sup> Hagee hanidoi Kawoi Daariyoosi kawotido naa77antto laittan, usuppunta aginan laatamanne oiddantta gallassaana.

## 2

### *Zaarettidi Keexxido Beeta Maqidasiyaa*

<sup>1</sup> He laittan laappunta aginan laatamanne isiinintta gallassan GODAA qalalai hananabaa yootiya Hagge baggaara hagaadan yaagiiddi yiis; <sup>2</sup> “Salaatiyaala na7aa, Yihudaa haariya Zarubaabeelayyo, Yoxedeeqa na7aa, qeese ubbatu halaqaa Yaasuyyoonne omooduwaappe simmida asaayyo hagaadan yaagada yoota; <sup>3</sup> ‘Ha Beeta Maqidasiyaa bonchchoi kase ai malakko be7ida asaappe attidabi intte giddon de7ii? Hachchi intte a xeelliyoo wode, waani uttidee? Intte aifiyan i bainnabaa milatees gidennee?

<sup>4</sup> “ ‘Gidikonne, Zarubaabeelaa, ha77i minna! Taani GODAI hagaada odais. Yoxedeeqa na7au, qeese ubbatu halaqau Yaasuu, neenikka minna! Biittan de7iya asa ubbau, intteikka minnite! Minnidi oottite; aissi giikko, taani inttenaara de7ais. Taani Ubbaappe Wolqqaama GODAI hagaada odais. <sup>5</sup> Intte Gibxxeppe kiyiyo wode, taani inttenaara maacettido maachchaadan, ta Ayyaanai inttenaara de7iyo gishshau yayyoppite!

<sup>6</sup> “ ‘Qassikka taani Ubbaappe Wolqqaama GODAI hagaada odais. Taani qantta wodiyan issitoo gujjada, salotanne sa7aa, abbaanne mela biittaakka qaattana. <sup>7</sup> Kawotettata ubbaakka qaattana; qaattada kawotettatu ubban de7iya aqoi haa yaanaadan oottana. Taani Ubbaappe Wolqqaama GODAI ha Beeta Maqidasiyaa bonchchuwan kuttana. <sup>8</sup> Birai tabaa; worqqaikka tabaa. <sup>9</sup> Koiroogaa bonchchuwaappe ha naa77antto Beeta Maqidasiyaa bonchchoi darana; taani Ubbaappe Wolqqaama GODAI ha sohuwan sarotettaakka immana’ yaagada yoota” yaagiiddi yiis.

<sup>10</sup> Daariyoosi kawotido naa77antto laittan, uddufunnta aginan laatamanne oiddantto gallassan GODAA qalalai hananabaa yootiya Hagge baggaara hagaadan yaagiiddi yiis;

<sup>11</sup> “Ubbaappe Wolqqaama GODAI hagaadan yaagees; ‘Higgee woigiyaakko eranau ane qeeseta hagaada oichcha: <sup>12</sup> “Issi urai yarshshuwaassi geeshshi wottido ashuwaa ba afalaa xeeran xaaxi ekkidi efiishin, he afalaa xeerai oittaa, woikko woxiyaa, woikko woine eessaanne zaitiyaa, woikko hara ai qommo qumanne bochchikko, he boshettida qumai tumu geeshsha gidanau danddayii?” yaagada oichcha’ yaagees” yaagidi yiis.

Oichchin qeeseti, “Gidanau danddayenna” yaagidi zaaridosona.

<sup>13</sup> Hagee qassikka, “Ahaa bochchidi tunida issi urai hageetuppe issi qommo qumaanne bochchikko, he qumai tumu tunanee?” yaagidi oichchiis.

Oichchin qeeseti, “Ee tunana” yaagidi zaaridosona.

<sup>14</sup> Yaatin, Hagee zaarettidi, “GODAI hagaadan yaagees; ‘Ha asainne ha kawotettai ta sinttan hegaakka mala; eti oottiyo oosoinne eti shiishshiyo imotai ubbaikka hegaakka mala tuna’ yaagees” yaagiis.

### *GODAI Ba Asaa Anjjana*

<sup>15</sup> GODAI hagaadan yaagees; “Hachchippe doommidi, intte bollan gakkidabaa akeekite! GODAA Beeta Maqidasiyaa gimbbettaa doommanaappe kase, <sup>16</sup> intte naa77u kunttaale kattaa ekkana giidi, kattaa wottosaa biideta; shin issi kunttaale xallaa demmideta. Qassi issi xeetu litiro woine eessaa ekkana woiniyaa gum77iyo ollaakko biideta; shin intte mexi oitamu litiro xalla woine eessaa demmideta. <sup>17</sup> Taani intte kushee oottido ooso ubbaa bollan melissiya carkkuwaa, kattaa harggiyaanne shachchaa yeddada xaissaas. SHin intte ha ubbankka taakko simmibeekketa” yaagees GODAI.

<sup>18</sup> “Hachchi gallasaappe, ha uddufunnta aginan laatamanne oiddantto gallasaappe doommidi, ane akeekite; qassi GODAA Beeta Maqidasiyaa baasoi baasettido gallasaappekka doommidi qoppite. <sup>19</sup> Ha77i zerettau haniya katti intte gootaran xayikkonne, qassi woiniyaa turai, balasee, roomaaneenne wogaraikka hachchi

gakkanaashin aifiyaa aifana xayikkonne, hachchippe doommada taani inttena anj-jana” yaagees.

*GODAI Zarubaabeelassi Oottana Giidobaa*

<sup>20</sup> He aginan laatamanne oiddantto gallassan GODAA qalalai naa77anttuwaa Haggekko hagaadan yaagiiddi yiis; <sup>21</sup> “Yihudaa haariya Zarubaabeelayyo hagaadan yaagada yoota; ‘Taani salotanne sa7aa qaattana; <sup>22</sup> kawotettatu araatata aatta yeggana; eta wolqqa xaissana. Para gaareta eta laaggiyaageetuura aatta yeggana; paratinne paraasatika mulee bantta gidon haiqettana. <sup>23</sup> Ta ashkkaarau, Salaatiyaala na7au Zarubaabeelaa, taani Ubbaappe Wolqqaama GODAI nena he gallassi ekkana; ekkada taani nena ta maatafaa migido mala oottana. Aissi giikko, taani nena dooraas’ yaagada yoota” yaagiiddi yiis.

## Hananabaa Yootiya Milkkiyaasa Maxaafaa

### *Gidduwaa Erissuwaa*

Hananabaa yootiya Milkkiyaasa maxaafai beettidoogee Kiristtoosi yelettanaappe kase ichchashantto xeetu laittaana gidishin, Yerusalaamen de7iya Beeta Maqidasee naa77antto oosettidoogaappe guyyiyaana. Hananabaa yootiyaagee minttidi qofissiyooogee qeesetikka hankko asaikka Xoossaara maacettido maachchaa ooraxissanaagaa. Xoossaa asai ba de7uwankka ba goinuwanikka yeda gididi, moorettidoogee erettidaagaa. Qeesetikka hankko asaikka bessiya yarshshuwaa shiishshennan aggiyoogaaninne i etassi immido kaaletuwan beennaaninne de7ennan ixxiyoogan Xoossaa cimmidosona. Hegaa gishshau, Xoossai ogiyaa giigissanaunne ba maachchaa awaajjanau kiitettiyaagaa kasetidi kiittana; kiittidi asaa bolli pirddanaunne asaa geeshshanau i yaana.

<sup>1</sup> GODAI Milkkiyaasa baggaara Israa7eela asaassi yootido hiraagaa qaalai haggaa.

### *GODAI Israa7eela Siiqiyo Siiquwaa*

<sup>2</sup> GODAI ba asaa, “Taani inttena siiqaas” yaagees.

SHin intte, “Neeni nuna aibin siiqadii?” yaageeta.

Yaagin GODAI, “Eesawi Yaaqooba ishaa gidenneeyye? Gidikkonne taani Yaaqooba siiqaas; <sup>3</sup> shin Eesawa ixxaas. Taani Eesawa gezziyaa baisa oottaas; a gadiyaakka worakanati allaxxiyo bazzo oottaas” yaagees.

<sup>4</sup> Eesawa zeretta gidiya Eedoomati, “Nu katamati kolettidosona; shin nuuni eta zaarettidi keexxana” yaagana.

Giikkonne Ubbaappe Wolqqaama GODAI hagaadan yaagees; “Eti zaarettidi keexxanddosona; shin taani kolana. Asai eta, ‘Ha biittai iita biitta; ha biittaa asaikka GODAI merinau hanqqettido asa’ yaagana” yaagees.

<sup>5</sup> Hegaa intte intte aifiyan be7ana; be7idi, “Hekko GODAI Israa7eela biittaa zawaappe kareerakka gita” yaagana.

### *GODAI Qeeseta Seeriis*

<sup>6</sup> Ubbaappe Wolqqaama GODAI hagaadan yaagees; “Inttenoo, ta sunntaa kaushshiya qeesetoo, na7ai ba aawaa, ashkkaraikka ba godaa bonchchees. Yaatin, taani intteyyo aawaa gidikko, intte tana bonchchiyo bonchchoi anee? Qassi taani intteyyo goda gidikko, intte taassi yayyiyo yashshai anee?”

“Intte ta sunntaa kaushshideta; yaatidi qassi, ‘Nuuni ne sunntaa waatidi kaushshidoo?’ yaageeta. <sup>7</sup> Intte taayyo yarshshiyooosaa bollan tunida yarshshuwaa shiishshiyooogan ta sunntaa kaushshideta.

“Qassikka intte, ‘Nuuni nena waatidi tunissidoo?’ yaageeta.

“Intte GODAASSI yarshshiyoo sohoi karettidabaa gidennee yaagidi qoppiyoogan tana tunissideta. <sup>8</sup> Intte yarshshuwaa yarshshiyoo wode, qooqiyaa woi hargganchchaa woi wobbe gidida mehiyaa yarshshikko, hegee itabaa gidennee? Intte heгаа mala mehiyaa intte halaqaayyo imota oottidi immiyaakko, i hegan ufaittanabaanne inttena maaddanabaa intteyyo milatii?” yaagees.

<sup>9</sup> Qassikka Ubbaappe Wolqqaama GODAI hagaadan yaagees; “Xoossai intteyyo qaretana mala, ha77i a woosite. Woni intte heгаа mala imotaa ayyo immin, i inttena maaddanee?” yaagees.

<sup>10</sup> Ubbaappe Wolqqaama GODAI hagaadan yaagees; “Intte taayyo yarshshiyooosaa bollan coo hadan tamaa eettiyoogaappe, intteppe issi urai Beeta Maqidasiyaa penggiyaa gorddiyaabaa gideerenneeshsha! Taani inttenan ufaittikke; intte immiyo imotaakka ekkikke” yaagees.

<sup>11</sup> Qassikka Ubbaappe Wolqqaama GODAI hagaadan yaagees; “Awai mokkiyoosaappe biidi wulliyooosaa gakkanaashin, ta sunntai kawotettatu gidдон gita. Soho ubban asati taayyo ixaanaa cuwayoosona; geeshsha yarshshuwaakka yarshshoosona; aissi giikko, ta sunntai kawotettatu gidдон gita” yaagees.

<sup>12-13</sup> Ubbaappe Wolqqaama GODAI hagaadan yaagees; “SHin intte, ‘GODAASSI yarshshiyo sohoi tuna; an wottiyo yarshshoikka karettidaagaa’ yaagidi a kaushshideta. Qassi intte, ‘Hagee daafurssiyaabaa’ yaagi qilliicidi, intte siiriyā sim77eeta.

“Intte bonqqi ekkidoogaa woi wobbiyaa woi hargganchchaa imota oottidi shishsheeta. Yaatin, taani intte kushiyaappe hegaa ekkoo? <sup>14</sup> Taayyo yarshshana giidi shiiqettido attuma dorssai a wudiyaa gidдон de7ishin, boriyoobai de7iyo dorssaa yarshshiya he cimmiyaagee qanggettidaagaa gido! Aissi giikko, taani gita Kawuwaa; ta sunntaikka kawotettatu gidдон yayettidaagaa” yaagees.

## 2

<sup>1</sup> Qassikka Ubbaappe Wolqqaama GODAI hagaadan yaagees; “Qeesetoo, ha77i ha azazoi inttessa. <sup>2</sup> Intte siyennan ixkonne ta sunntaa bonchchanau intte wozanan qoppennan ixkonne, taani intte bolli qanggettaa kiittana; intte anjjuwaakka taani qang-gana. Intte intte wozanan tana bonchchanau qoppibeenna gishshau, taani ha77ikka inttena qangarggaas. <sup>3</sup> Be7ite, taani intte zerettata qaxxayana. Intte yarshshuwau ehiido mehiyaa tociyaakka intte som77uwan laalana; intte he tociyaara issippe a oliyoosaa baana. <sup>4</sup> He wode ta maachchai Leewa zerettatuura minnidi de7anaadan, taani intteyyo ha azazuwaa kiittidoogaa intte erana” yaagees.

<sup>5</sup> “Taani etaara maacettido maachchai de7uwaanne sarotettaa maachchaa; eti taayyo yayyanaadan, taani de7uwaanne sarotettaa etayyo immaas; etikka taayyo yayyidosonanne ta sunntaikka bonchchidosona. <sup>6</sup> Tumaa higgee eta doonan de7iis; eta inxxarssankka worddoi beettibeenna. Eti tanaara sarotettaanne suuretettan hemettidosona; qassi darotakka nagaraappe zaaridosona. <sup>7</sup> Qeeseti Ubbaappe Wolqqaama GODAI kiittidoogeeta gidido gishshau, eta doonai eratettaa tamaarissanau koshshees; asaikka higgiiyaa eta doonaappe tamaaranau bessees” yaagees.

<sup>8</sup> Ubbaappe Wolqqaama GODAI hagaadan yaagees; “SHin qeesetoo, intte ogiiyaappe wora simmideta; intte timirttiyankka darota xubbideta; taani Leewa zaretuura maacettido maachchaakka tunissideta. <sup>9</sup> Hegaa gishshau, intte ta ogiiyan hemettennan ixkidooridan, intte tamaarissiiyo higgiiyankka asa ubbaa issi likke xeellennan ixkidooridan, taani inttena asa ubbaa sinttan karettidaageetanne kauyyidaageeta oottaas” yaagees.

### *Asai GODAN Ammanettibeenna*

<sup>10</sup> Nuussi ubbaassi issi aawai de7ees gidenneeyye? Nuna issi Xoossai medhdhiis gidenneeyye? Yaatin, nuuni nu maizza aawatu maachchaa koliyoogan issi issuwaassi aissi ammanettennan ixkiiyo? <sup>11</sup> Yihudaa asai ammanettibeenna; qassi Israa7eelaanne Yerusalaamen asai tunatettaa oottiis; aissi giikko, Yihudaa asai GODAI dosiiyo Beeta Maqidasiyaa tunissii; qassi allaga xoossaassi goinniya macca naatakka machchiis. <sup>12</sup> Hagaa oottiyaagee oona gidikkokka, GODAI a Yaaqooba maabaraappe xaisso; he asi Ubbaappe Wolqqaama GODAASSI yarshshuwaa ehiyaagaa gidikkokka, GODAI a shoddo.

<sup>13</sup> Qassi intte oottiyo harabai aibee giikko, GODAI intte yarshshuwaakko xeellenna gishshau, woi a ekkenna gishshau, yarshshiyo sohuwaa yeehuwan, afuttaanne zilaassan kunteeta. <sup>14</sup> Intte, “I aissi nu yarshshuwaa ekkennee?” yaagidi oichchikko, gaa-soi haggaa: intte intte yelagattan ekkido machcheera machcheera he wode maacettido maachchaa kolideta; intte machchiyaa machchiyaa intteyyo siiqonne intte maachchan



machchidooro. Hegau GODAI markka. <sup>15</sup> GODAI inttessinne intte keettaayeessi keettaayeessi issi bollainne issi ayyaanai de7anaadan oottibeenneeyye? Hegaa aissi oot-tidee? Geeshsha zerettai de7anaadaana gidennnee? Hegaa gishshau, intteppe ooninne ba yelagatettan ekkido machcheera maacettido maachchaassi ammanettennaagaa gidennaadan naagetto. <sup>16</sup> Aissi giikko, “Taani GODAI, Israa7eela Xoossai, azinai ba machchiyo yeddiyoogaa ixkais; hegee iitabaa” yaagees. Hegaa gishshau, Ubbaappe Wolqqaama GODAI, “Intte machcheera machcheera maacettido maachchaassi ammanettennaageeta gidennaadan naagettite” yaagees.

### *Pirddaa Gallassai Matattiis*

<sup>17</sup> Intte intte haasayan GODAA daafurssideta.

SHin intte, “Nuuni a waatidi daafurssidoo?” yaageeta.

Intte a daafurssidoogee, “Iitaa oottiyaageeti ubbai GODAA sinttan suure; qassi ikka etan ufaittees” yaagiyoogan woikko, “Tumaa pirddiya Xoossai awan de7ii?” yaagiyoogaana.

## 3

<sup>1</sup> Ubbaappe Wolqqaama GODAI hagaadan yaagees; “Be7ite, ta biyo ogiyaa giigisanaadan, taani kiittiyo asa kasetada yeddana; qassi intte koyiyo Godaikka intte qoppennan de7ishin, ba Beeta Maqidasiyaa puttu gaana. Intte naagiyo, ta maachchaa kiitaa ekkidi yiya ta kiittiyoogekka yaana” yaagees.

<sup>2</sup> SHin i biraanne worqqaa seerissidi geeshshiya tamaa malanne maayuwaa meeciyo saamunaa mala gidiyo gishshau, i yiyo gallassi danddayanai oonee? Qassi i qoncciyoo wode a sinttan eqqanau danddayiyai oonee? <sup>3</sup> I biraanne worqqaa geeshshiyaagaadaaninne tigiyaagaadan uttidi, Leewa zareta geeshshana; eti GODAASSI likke yarshshuwaa yarshshana gakkanaashin, i eta geeshshana. <sup>4</sup> Yaatobare beni wodetuugaadaaninne aadhdhida laittatuugaadan, Yihudaa asainne Yerusalaame asai yarshshiyo yarshshoi GODAA ufaissiyaagaa gidana.

<sup>5</sup> Ubbaappe Wolqqaama GODAI hagaadan yaagees; “Hegaappe guyyiyan, taani pirddaa pirddanau inttekko yaana; yaada murunniyaageetu bolli, shaaramuxiyaageetu bolli, wordduwan caaqqidi markkattiyaageetu bolli, oosanchchatussi bessiya damoozaa immennan diggiyaageetu bolli, azinai haiqqido am77iyoonne aaya aawu haiqqido naata tuggaiyaageetu bolli, betiyaa pirddaa geellaiyaageetu bollinne taayyo yayyennaageetu bolli eesuwana markkattana” yaagees.

### *Asirataa Imuwaa*

<sup>6</sup> Qassikka Ubbaappe Wolqqaama GODAI hagaadan yaagees; “Taani GODAI laamet-tikke; hegae gishshau, inttenoo Yaaqooba zaretoo, intte xayibeekketa. <sup>7</sup> Intte maizza aawatu wodiyaappe doommidi, intte ta wogaappe wora simmideta; akka naagibeekketa. Ha77i taakko simmite; taanikka inttekko simmana” yaagees.

SHin intte, “Nuuni waani simminoo?” yaagidi oichcheeta.

<sup>8</sup> GODAI, “Asi Xoossa wuuqqii? Wuuqqenna, shin intte tana wuuqqeeta” yaagees.

Qassikka intte, “Nuuni nena waati wuuqqiyoonii?” yaageeta.

Ubbaappe Wolqqaama GODAI hagaadan yaagees; “Intte asirataaninne imotan tana wuuqqeeta. <sup>9</sup> Intte Israa7eela asai ubbai tana wuuqqiyo gishshau, intte qanggetti-daageeta. <sup>10</sup> Ta Beeta Maqidasiyan qumi de7anaadan, asirata ubbaa gootaran yeggite. Yaatidi taani saluwaa maskkootiyaa dooyada anjuuwaa intteyyo palahissada gussana xayikko, tana hegan paaccite. <sup>11</sup> Intte biittai mokkiyo kattaa meennaadan, taani intte gishshau qunuwaa seerana; gaden de7iya woiniyaa aifeekka qoqqofettenna. Taani Ubbaappe Wolqqaama GODAI hagai odais. <sup>12</sup> Intte biittai de7anau ufaissiya biitta gidiyo gishshau, kawotettati ubbai inttena, ‘Anjettidaageeta’ yaagana” yaagees.

<sup>13</sup> GODAI hagaadan yaagees; “Intte ta bolli xala qaalaa haasayideta.

“Yaatidi qassi, ‘Nuuni ne bolli woigi haasayidonii?’ yaagidi oichcheeta.

<sup>14</sup> “Qassikka intte, ‘Xoossaassi oottiyoogee hada. A azazuwaa naagiyoogaaninne Ubbaappe Wolqqaama GODAA sinttan azzaniiddi hemettiyoogan nuuni ai go7ettiyoonii? <sup>15</sup> Nuuni otorettiyaageeti anjettishin be7eettes; iitaa oottiyaageetikka ishalidi de7iyoojaa xalla gidennan, Xoossaa paaccidikka kessi ekkoosona’ yaageeta” yaagees.

#### *GODAI Ba Asaa Maaranau Yootido Qaalaa*

<sup>16</sup> He wode GODAASSI yayyiyaageeti issai issuwaa haasayidosona; GODAIKKA ezggidi siyiis. GODAASSI yayyiyaageetinne a sunttaakka bonchchidaageeti dogettennaadan, eta hassayissiya maxaafai a sinttan xaafettiis. <sup>17</sup> Ubbaappe Wolqqaama GODAI hagaadan yaagees; “Eti tabaa gidana; taani oottiyo gallassi eti taassi dummatida asa gidana; aawai baassi oottiya ba na7aa maariyoogaadan, taani eta maarana. <sup>18</sup> He wode intte zaarettidikka xilluwaappenne nagaranchchaappe gidduwan de7iya zawaanne Xoossaassi azazettiyaageetuppenne azazettennaageetuppe gidduwan de7iya zawaa be7ana” yaagees.

## 4

#### *GODAA Gallassai Matattiis*

<sup>1</sup> Ubbaappe Wolqqaama GODAI hagaadan yaagees; “Be7ite, coociyaa tamaadan eexxiya gallassai matattiis; otorettiyaageetinne iitaa oottiyaageeti ubbai utula mala gidana. He yiya gallassai eta xuuggana; etayyo xaphuwaa xeeraakka ashshenna. <sup>2</sup> SHin intteyyo, ta sunttaassi yayyiyaageetuyyo a qefiyaa gidon pattiyaabai de7iyo xillotettaa awai mokkana. Inttekka qashuwaappe yedettida anqqara galuwaadan buraaqana.

<sup>3</sup> Taani oottiyo gallassi, nagaranchchati intte tohuwaappe garssa baggaara bidintta mala gidana; inttekka eta yedhdhana. Taani Ubbaappe Wolqqaama GODAI haggaa odais.

<sup>4</sup> “Israa7eela asai ubbai oottanaadan, Siinaa Deriyaa bollan taani ta ashkkaraa Muuse baggaara azazido azazuwaanne higgiiyaa hassayite.

<sup>5</sup> “Be7ite, gitanne bonchchettida GODAA gallassai yaanaappe kasetada, taani inttessi hananabaa yootiya Eelaasa kiittana. <sup>6</sup> Kiittin i yiidi, taani yaada biittaa qanggettan shocennaadan, aawatu wozanaa naatukko, naatu wozanaakka aawatukko zaarana” yaagees.

## Maatiyoosa Wonggeliyaa Mishiraachchuwaa

### *Gidduwaa Erissuwaa*

Maatiyoosa Wonggeliyaa Mishiraachchoi Yesuusi yaana giyo hidootai kase odetti uttido Xaliyaa gidiyoogaanne Xoossai Gal77a Maachchan ba asaassi immido hidootaa qaalaa polidoogee a baggaara gidiyoogaa mishiraachchuwaa qaalaa oiqqidaagaa. Ha mishiraachchuwaa qalalai Yesuusi eta gidдон yelettidi diccido Aihudatu xalaalaassa gidennan, kumetta sa7an de7iya asaassa.

Maatiyoosa Wonggeliyaa mishiraachchoi daro akeekan xaafettida maxaafa. Yesuusa yeletan doommidi, i xammaqettidoogaanne i paacettidoogaa odi simmidi, Galiilan i qaalaa odidobaa, tamarissidobaanne hargganchchata pattidobaa odees. Hegaappe kaallidi Yesuusi Galiilappe Yerusalaame biidoogaanne a ha sa7aa de7uwaa wurssetta saaminttan hanidabata qonccissees. Hegeetikka i masqqaliyaa bollan, misimaariyan xishetti kaqettidi haiqqidobaanne haiquwaappe paxidi dendidobaa yootees.

Ha Wonggeliyaa Mishiraachchoi Yesuusa, Xoossaa higgiiyaa birshshettaa immanau maatai de7iyooogaanne Xoossaa Kawotettaabaa tamarissiya gita asttamaare oot-tidi shiishshees. A timirttiyaappe dariya baggai dumma dumma meran giigissido ichchashu kifiletun shaahettees.

1. Xoossaa kawotettan de7ana asaa eeshshaa, oosuwaa, maataanne wurssetta qaadaa odiya Deriyaa Bolla Timirttiyaa (Miraafiyaa 5ppe biidi 7 gakkanaashin).
2. Tammanne naa77u erissiyo ashkkarati Wonggeliyaa tamarissanau biido wode etayyo imettida kaaletuwaa (Miraafiyaa 10).
3. Xoossaa kawotettaabaa tamarissishin shiiqida dumma dumma leemisota (Miraafiyaa 13).
4. Erissiyo ashkkaratettaa birshshettaa odiya timirttiyaa (Miraafiyaa 18).
5. Ha77i laittaa wurssettaanne Xoossaa Kawotettaa yuussaa xeelliyaagan imettida timirttiyaa (Miraafiyaa 24ppe biidi 25 gakkanaashin).

### *Yesuus Kiristtoosa Yeletaa Turaa* (Luqaasa 3:23-38)

<sup>1</sup> Hagee Daawita zarenne Abrahaama zare gidida Yesuus Kiristtoosa yeletaa yootiya maxaafaa.

<sup>2</sup> Abrahaami Yisaaqa yeliis; Yisaaqi Yaaqooba yeliis; Yaaqoobi Yihudaanne a ishannta yeliis. <sup>3</sup> Yihudai Ti7imaaro giyo maccaaseeppe Paareesanne Zaraaha yeliis; Paareesi Hexiroona yeliis; Hexirooni Raama yeliis. <sup>4</sup> Raami Aminadaaba yeliis; Aminadaabi Na7asoonaa yeliis; Na7asooni Solomona yeliis. <sup>5</sup> Solomoni Ra7aabo giyo maccaaseeppe Boo7eeza yeliis; Boo7eezi Uruto giyo maccaaseeppe Yobeeda yeliis; Yobeedi Isseya yeliis. <sup>6</sup> Isseyi Kawuwaa Daawita yeliis.

Kawoi Daawiti Solomona yeliis. Solomona aayyiyaa koiro Ooriyoona giyoogaa machchiyo. <sup>7</sup> Solomoni Robi7aama yeliis; Robi7aami Abiyya yeliis; Abiyyi Asaafa yeliis. <sup>8</sup> Asaafi Yoosaafixa yeliis; Yoosaafixi Yoraama yeliis; Yoraami Ooziyaana yeliis. <sup>9</sup> Ooziyaani Yo7aataama yeliis; Yo7aataami Akaaza yeliis; Akaazi Hizqqiyaasa yeliis. <sup>10</sup> Hizqqiyaasi Minaasa yeliis; Minaasee Amoona yeliis; Amooni Yoosiyaasa yeliis. <sup>11</sup> Israa7eela asai omoodettidi, Baabiloone biitti biido wode, Yoosiyaasi Yo7aakiinanne a ishannta yeliis.

<sup>12</sup> Asai omoodetti Baabiloone biitti biidoogaappe guyyiyan, Yo7aakiini Salaatiyaala yeliis; Salaatiyaali Zarubaabeela yeliis. <sup>13</sup> Zarubaabeeli Abiyuuda yeliis; Abiyuudi Eliyaaqiima yeliis; Eliyaaqiimi Azoora yeliis. <sup>14</sup> Azoori Xaadooqa yeliis; Xaadooqi Akiima yeliis; Akiimi Eliyuuda yeliis. <sup>15</sup> Eliyuudi El77aazara yeliis; El77aazari Maataana

yeliis; Maataani Yaaqooba yeliis. <sup>16</sup> Yaaqoobi Kiristtoosa giyo Yesuusa yelida Mairaami azinaa Yooseefa yeliis.

<sup>17</sup> Hegaa gishshau, zare ubbai Abrahaamappe Daawita gakkanaassi tammanne oidda; Daawitappe doommidi, asai Baabiloone biitti omoodettidi biido wode gakkanaassi tammanne oidda; asai Baabiloone biitti omoodettidi biido wodeppe Kiristtoosi yelettido wodiya gakkanaassi tammanne oidda.

*Yesuus Kiristtoosa Yeletaa  
(Luqaasa 2:1-7)*

<sup>18</sup> Yesuus Kiristtoosa yeletai haggaa mala; a aayyiyaa Mairaama Yooseefayyo giigaasu; a he wode Yooseefaara gaittinnan de7aidda, Geeshsha Ayyaanau shahaaraasu. <sup>19</sup> O giigissi wottida Yooseefi, xillo asa gididaagee, o kaushshanau koyibeenna; ibaa qonccis-sennan o aggi bayanau qoppiis. <sup>20</sup> SHin i heggaa qoppishin, Godaa kiitanchchai aimuwan aara gaittidi, “Daawita na7au Yooseefaa, Mairaama Geeshsha Ayyaanau shahaarido gishshau, o ekkanaagaa yayyoppa. <sup>21</sup> Attuma na7a a yelana; qassi neeni Yesuusa gaada a sunttana; aissi giikko, i ba asaa eta nagaraappe ashshana” yaagiis.

<sup>22-23</sup> Qassi Godai hananabaa yootiyaagaa baggaara, “Geela7iyaa shahaarada na7aa yelana; a sunttai Amaanu7eela geetettana” giidoogee polettana mala, hagee ubbai haniis; “Amaanu7eela” giyoogee “Xoossai nunaara de7ees” giyoogaa.

<sup>24</sup> Yooseefi xiskkuwaappe beegottidi, Godaa kiitanchchai bana azazidoogaadan, Mairaamo efiis. <sup>25</sup> SHin ba baira na7aa a yelana gakkanaassi o bochchibeenna; qassi na7aa Yesuusa giidi sunttiis.

## 2

*Arshshoppe Yiida Eranchchata*

<sup>1</sup> Yesuusi Yihudaa biittan Beetaliheeme giyo kataman Heeroodisi kawotidi de7iyo wode yelettiis; hegaappe guyyiyan, xoolinttiyaa paidiya asati arshsho baggappe Yerusalaame yiidi, <sup>2</sup> “Aihuda kawo gidanau yelettida na7ai awan de7ii? Aissi giikko, nuuni arshsho baggaara kiyida a xoolinttiyaa be7idi, ayyo goinnanau yiida” yaagidi oichchidosona.

<sup>3</sup> Kawoi Heeroodisi, heggaa siyidi dagammiis; Yerusalaamen de7iyya asai ubbaikka dagammiis. <sup>4</sup> Heeroodisi qeese halaqata ubbatanne higgiiyaa tamarissiyaageeta xeesidi, “Kiristtoosi awan yelettanddeeshsha?” yaagidi oichchiis.

<sup>5-6</sup> Oichchin eti zaaridi, “Yihudaa biittan Beetaliheeme kataman yelettana. Hananabaa yootiyaagee,

‘Yihudaa biittan de7iyya Beetaliheemee,

neeni Yihudaa biittaa haariyaageetuppe ainne laafakka.

Aissi giikko, ta asaa,

Israa7eela haariyaagee neeppe kiyana’

giidi xaafiis” yaagidosona.

<sup>7</sup> Hegaappe guyyiyan, Heeroodisi arshsho baggappe yiida asata geeman xeesidi, xoolinttee etau beettido wodiya etappe geeshshidi eris. <sup>8</sup> Yaatidi Beetaliheeme eta yeddiiddi, “Biidi na7aa mintti koyite; a demmido wode taanikka baada ayyo goinnanadan, tana erissite” yaagiis.

<sup>9</sup> Eti kawoi giidoogaa siyidi biidosona; biiddi ogiyan arshsho baggaara eti kase be7ido xoolinttiyaa be7idosona; he xoolinttee na7ai de7iyoosaa gakkidi eqqana gakkanaassi, eta kaalettiis. <sup>10</sup> Eti he xoolinttiyaa be7ido wode, zawai bainna daro ufaissaa ufaittidosona. <sup>11</sup> Soo gelidi, na7ai ba aayee Mairaamiira de7iyyaagaa be7idosona; gulbatidi ayyo goinnidosona; hegaappe guyyiyan, bantta saaxiniyaa dooyidi, worqqaa, ixaanaanne karbbiyaa ayyo immidosona.

<sup>12</sup> Eti Heeroodisakko simmenna mala, Xoossai aimuwan eta, “Inttena erite” gin hara ogiyaara bantta dere simmidosona.

### *Gibxxe Baqatidosona*

<sup>13</sup> Eti biidoogaappe guyyiyan, Godaa kiitanchchai aimuwan Yooseefayyo beettidi, “Heeroodisi na7aa woranau koyiyo gishshau, denddada na7aanne na7aa aayyiyo ekkada Gibxxe biitti baqata; taani neeyyo odana gakkanaassi, yan uttaashsha” yaagiis.

<sup>14-15</sup> Yaagin Yooseefi qammi denddidi, na7aanne na7aa aayyiyo ekkidi, Gibxxe biitti biis; Godai hananabaa yootiyaagaa baggaara, “Taani ta na7aa Gibxxe biittaappe xeesaas” giidoogee polettana mala, Heeroodisi haiqqana gakkanaassikka i yan de7iis.

### *Heeroodisi Guutta Naata Worissiis*

<sup>16</sup> Hegaappe guyyiyan, Heeroodisi arshsho baggappe yiidaageeti bana cimmidoogaa erido wode, daro hanqqettiis; hanqqettidi xoolinttee kase beettido wodiyaabaa etappe siyidoogaadankka, wotaaddarata yeddidi, Beetaliheemeeninne Beetaliheeme heeran de7iya naa77u laitta attuma naatanne qassi naa77u laittappe guuxxiya attuma naata ubbaa worissiis.

<sup>17-18</sup> Hananabaa yootiya Ermmaasi,  
“Yeehoinne zilaassai Raama giyo kataman siyettiis;  
Raaheela ba naatuyyo yeekkausu.  
Eti haiqqiichchido gishshau,  
agga gin, aggennan ixxaasu”  
giidi haasayidoogee polettiis.

### *Gibxxeppe Simmidosona*

<sup>19</sup> SHin Heeroodisi haiqqidoogaappe guyyiyan, Godaa kiitanchchai Gibxxe biittan de7iya Yooseefayyo aimuwan beettidi <sup>20</sup> a, “Dendda; na7aanne na7aa aayyiyo ekkada, Israa7eela biitti simma; aissi giikko, na7aa woranau koyiyaageeti haiqqiichchidosona” yaagiis. <sup>21</sup> Yaagin Yooseefi denddidi, na7aanne na7aa aayyiyo ekkidi, Israa7eela simmiis.

<sup>22</sup> SHin Yooseefi Arkkelawoosi ba aawaa Heeroodisa sohuwan Yihudaa biittan kawotidoogaa siyido wode, yaa baanau yayyiis; Xoossai ayyo aimuwan yootin, Galiila biitti biis. <sup>23</sup> Hananabaa yootiyaageeti, “Asai a, ‘Naazireeta asa’ giidi Xeesana” giidoogee polettana mala, Naazireeta giyo katamaa biidi de7iis.

## 3

### *Xammaqiya Yohaannisi Qaalaa Odiis*

*(Marqqoosa 1:1-8; Luqaasa 3:1-18; Yohaannisa 1:19-28)*

<sup>1-2</sup> He wode Xammaqiya Yohaannisi asaa, “Saluwaa kawotetta matattido gishshau, intte nagaraappe simmite” yaagiiddi, Yihudaa Bazzuwan yootiiddi yiis. <sup>3</sup> Aissi giikko, hananabaa yootiya Isiyaasi, Yohaannisabaa yootiiddi,  
“Issoi bazzon ba qaalaa xoqqu oottidi,  
‘Godaa ogiyaa giigissite.

I hemettana loossuwaakka  
ayyo sitti oottite’ giis”  
yaagiis.

<sup>4</sup> Yohaannisau gaameelaa ikisiyan dadettida afalai de7ees; qassi ba xeessan dafuwaa gixxees; i miyo qumaikka boolenne degeera eessa. <sup>5</sup> Asai he wode Yerusalaameppe, Yihudaa biitta ubbasaappenne Yorddaanoosa giyo shaafaa heeran de7iya biitta ubbaappe akko yees. <sup>6</sup> Yiidi ba nagaraa paaxin, Yorddaanoosa giyo shaafan asaa xammaqiis.

<sup>7</sup> SHin Yohaannisi daro Parisaawetinne Saaduqaaweti xammaqettanau baakko yiyaageeta be7idi, eta hagaadan yaagiis; “Ha shooshshatoo, Xoossaa hanqqoi yaana



haniyaagaappe baqatana mala, intteyyo oonee odidai? <sup>8</sup> Simmi intte intte nagaraappe simmidoogaa erissiyaabaa oottite. <sup>9</sup> Intte intte wozanan, ‘Abrahaami nu aawaa’ giidi qoppoppite. Aissi giikko, taani inttessi yootais; Xoossai ha shuchchata Abrahaamassi na7a kessanaukka danddayees. <sup>10</sup> Beexee mittaa xaphuwan qanxxanau giigi uttiis; lo77o aifiyaa aifenna mitta ubbai qanxxettidi, taman yegettana.

<sup>11</sup> “Intte intte nagaraappe simmidoogaa erissanau, taani inttena haattan xammaqais; shin taappe guyyeera yiyaagee, inttena Geeshsha Ayyaanaaninne taman xammaqana. I taappe daro minnees; taani harai atto a caammaa tookkanaukka bessikke. <sup>12</sup> A kushiyan kattaa suraggiyo laidai de7ees. Kattaa qoxxiyo audiyaa keehi geeshshees; ba gisttiyaa gootaran qolana; shin dalaa to77enna taman xuuggana” yaagiis.

### *Yesuusi Xammaqettiis*

*(Marqoosa 1:9-11; Luqaasa 3:21-22)*

<sup>13</sup> Yesuusi he wode Yohaannisan xammaqettanau, Galiilappe Yorddaanoosa giyo shaafaa akko biis. <sup>14</sup> SHin Yohaannisi a, “Taani nenan xammaqettanau koyiyo wode neeni taakko yai?” yaagidi, a qofaa laammanau koyiis.

<sup>15</sup> SHin Yesuusi zaaridi a, “Nuuni xillotetta ooso ubbaa hagaadan polanau bessiyo gishshau, ha77i tau eeno ga” yaagiis. Yaagin Yohaannisi au eeno giis.

<sup>16</sup> Yesuusi xammaqettidoogaappe guyyiyan, sohuwaara haattaappe kiyiis; saloi dooyettin, Xoossaa Ayyaanai haraphphedan yiishiininne ba bolli wodhdhishin be7iis; <sup>17</sup> qassi saluwaappe, “Taani siiqiyo ta Na7ai, tana ufaissiyaagee hгаа” yaagiya qalalai yiis.

## 4

### *Yesuusi Paacettiis*

*(Marqoosa 1:12-13; Luqaasa 4:1-13)*

<sup>1</sup> Hegaappe guyyiyan, xalahe halaqai Yesuusa paaccana mala, Geeshsha Ayyaanai bazzo Yesuusa efiis. <sup>2</sup> Efin Yesuusi oitamu gallassanne oitamu qammaa xoomidoogaappe guyyiyan namisettiis. <sup>3</sup> Xalahe halaqai yiidi a, “Neeni Xoossaa Na7a gidikko, ane ha shuchchati oitta gidana mala azaza” yaagiis.

<sup>4</sup> SHin Yesuusi zaaridi, “Xoossaa maxaafai, ‘Asi Xoossai haasayiyo qaala ubban de7anaappe attin, oitta xalaalan de7enna’ yaagees” yaagiis.

<sup>5</sup> Hegaappe guyyiyan, xalahe halaqai Yesuusa geeshsha katamaa efidi, Beeta Maqidasiyaa xeeraa kessidi, <sup>6</sup> “Neeni Xoossaa Na7aa gidikko, ane duge guppa. Aissi giikko, Xoossaa maxaafai,

‘Xoossai ba kiitanchchata  
neeyyo azazana’

qassi ‘Eti ne tohoi shuchchan xubettenna mala,  
bantta kushiyan nena denttana’

yaagees” yaagiis.

<sup>7</sup> Yesuusi zaaridi a, “Qassikka Xoossaa maxaafai, ‘Goda ne Xoossaa paaccoppa’ yaagees” yaagiis.

<sup>8</sup> Qassi xalahe halaqai Yesuusa issi daro gita deriyaa xeeraa kessidi, sa7an de7iya kawotetta ubbaanne eta bonchchuwaa bessiis. <sup>9</sup> Bessidi a, “Neeni taayyo gulbbatada goinnikko, taani hгаа ubbaa neeyyo immana” yaagiis.

<sup>10</sup> Hegaappe guyyiyan, Yesuusi zaaridi a, “Laa ha Seexaanau haakka; aissi giikko, Xoossaa maxaafai, ‘Godaayyo, ne Xoossaayyo goinna; a xalaalau ootta’ gees” yaagiis.

<sup>11</sup> Hegaappe guyyiyan, xalahe halaqai a aggi bayin, kiitanchchati yiidi, ayyo oottidosona.

*Yesuusi Ba Tamaariisiiyo Oosuwaa Galiilan Doommiiis*  
(*Marqqoosa 1:14-15; Luqaasa 4:14-15*)

<sup>12</sup> Yohaannisi qashettidoogaa Yesuusi siyido wode, Galiila giyo biitti biis.  
<sup>13</sup> Naazireeteppe kiyidi, Qifirinaahooma katamaa biidi, yan de7iis; Qifirinaahoomi Zaabiloona biittaaaninne Nifttaaleema biittan abbaa matan de7ees. <sup>14</sup> Hegee hanidoogee hananabaa yootiya Isiyaasi giidoogee polettanaassa; hananabaa yootiya Isiyaasi hagaadan yaagiis;  
<sup>15</sup> “Zaabiloona biittaaaninne Nifttaaleema biittan, abbaa ogiyan Yorddaanoosa SHAafaappe hefintta baggan, Aihuda gidenna asai de7iyo Galiilan,  
<sup>16</sup> xuman de7iya asai wolqqaama poo7uwaa be7iis. Qassi haiquwaa kuwai de7iyo biittan uttidaageetuyyo poo7oi kiyiis” yaagiis.  
<sup>17</sup> He wodiyaappe doommidi Yesuusi, “Intte nagaraappe simmite; aissi giikko, saluwaa kawotetta matattiis” giidi qaalaa yootuwaa doommiiis.

*Yesuusi Moliyaa Oiqqiya Oiddu Asata Xeejiis*  
(*Marqqoosa 1:16-20; Luqaasa 5:1-11*)

<sup>18</sup> Yesuusi Galiila Abbaa mataara aadhdhiiddi, naa77u ishannti PHeexiroosa giyo Simooninne a ishaa Inddiraasi, moliyaa oiqqiyaageeta gidido gishshau, gitiyaa abban yeggiyaageeta be7iis. <sup>19</sup> Be7idi eta, “Tana kaallite; taani inttena asa oiqqiyoogaa tamarissana” yaagiis. <sup>20</sup> Yaagin eti sohuwaarakka bantta gitiyaa yeggi bayidi, Yesuusa kaallidosona.  
<sup>21</sup> Yesuusi hegaappe sinttaukko biiddi, hara naa77u ishannta, Zabddiyoosa naata Yaaqoobanne a ishaa Yohaannisa be7iis; eti bantta aawaa Zabddiyoosaara wolwolo giddon bantta gitiyaa giigissiyaageeta be7idi xeesiis. <sup>22</sup> Xeesin sohuwaarakka eti wolwoluwaanne bantta aawaa yeggi bayidi, Yesuusa kaallidosona.

*Yesuusi Daro Asaa Tamaariisiihinne Pattiis*  
(*Luqaasa 6:17-19*)

<sup>23</sup> Yesuusi Aihuda woosa keettatun tamarissiiddi, kawotettaa wonggeliyaa mishi-raachchuwaa yootiidinne qassi hargge ubbaappenne saho ubbaappe asaa pattiiddi, Galiila biitta ubban yuuyiis. <sup>24</sup> A woree Sooriyaa biittaa ubbaa gakkiiis; asai dumma dumma harggiyan ohettidi harggida asanne sahettida asa ubbaa, xalaheti oiqqido asaa, kaarettai oiqqido asanne, qassi bollai silido asaa Yesuusakko ehiis; ehin i eta pattiis. <sup>25</sup> Daro asai Galiilappe, tammu katamatuppe, Yerusalaameppe, Yihudaappenne Yorddaanoosappe hefinttan de7iya biittaaappe Yesuusa kaalliis.

## 5

*Yesuusi Deriyaa Bollan Gididi Tamaariisido Timirttiyaa*  
(*Miraafiyaa 5-7*)

<sup>1</sup> Yesuusi daro asaa be7idi, deriyaa huuphiyaa kiyidi uttiis. Bana kaalliyaageeti baakko shiiqin, <sup>2</sup> tamarissuwaa doommidi, eta hagaadan yaagiis.

*Tumu Ufaissaa*  
(*Luqaasa 6:20-23*)

<sup>3</sup> Bantta ayyaanan hiyyeesa gididoogaa eriyaageeti anjjettidaageeta; aissi giikko, saluwaa kawotetta etassa.

<sup>4</sup> Kayyottiyaageeti anjjettidaageeta;  
aissi giikko, Xoossai eta minttettana.

<sup>5</sup> Ashkketi anjjettidaageeta;  
aissi giikko, eti sa7aa laattana.

<sup>6</sup> Namisettiyaageetinne saamettiyaageeti  
kattaa haattaa koyiyooagaan,  
xillobaa oottanau laamotiyaageeti  
anjettidaageeta;  
aissi giikko, Xoossai eta kalissana.

<sup>7</sup> Maariyaageeti anjjettidaageeta;  
aissi giikko, Xoossai eta maarana.

<sup>8</sup> Wozanaa geeshshati anjjettidaageeta;  
aissi giikko, eti Xoossaa be7ana.

<sup>9</sup> Asa sigettiyaageeti anjjettidaageeta;  
aissi giikko, Xoossai eta,  
ba naata giidi xeesana.

<sup>10</sup> Xillotettaa gishshau  
yedetettiyaageeti anjjettidaageeta;  
aissi giikko, saluwaa kawotettai etassa.

<sup>11</sup> “Intte tana kaalliyo gishshau, asai inttena boriyo wodenne waissiyo wode, qassi intte bolli iitabaa ubbaa wordduwan haasayiyo wode, intte anjjettidaageeta. <sup>12</sup> Intteyyo saluwan gita woitoi de7iyo gishshau, ufaittite; hashshu giite; aissi giikko, asai intteppe kase de7ida hananabaa yootiyaageetakka hegaadan waissiis.

*Maxiniyaanne Poo7uwaa Leemisuwaa  
(Marqqoosa 9:50; Luqaasa 14:34-35)*

<sup>13</sup> “Asa ubbaassi intte maxine mala; shin maxinee laqilaqana xayikko, naa77antto a waatidi laqilaqissanee? Kare olin, asi a yedhdhi hemettanaappe attin, wodeppe ainne go77enna.

<sup>14</sup> “Sa7au intte poo7o mala; deriyaa huuphiyan keexettida katamai geemmana danddayenna. <sup>15</sup> Xomppe oittidi, son de7iya asa ubbau poo7ana mala, xoqqiyaasan wottiyoogaappe attin, kere giddon qum77i wottiya asi baawa. <sup>16</sup> Hegaadankka, asi intte oottiyo lo77o oosuwaa be7idi, saluwan de7iya intte Aawaa galatana mala, intte poo7oi asa sinttan poo7o.

*Muuse Higgiyaabaa*

<sup>17</sup> “Taani Muuse higgiyaanne hananabaa yootiyaageeti tamarissiyooгаа xaissanau yiidobaa intteyyo milatoppo; taani polanau yiidoogaappe attin, xaissanau yabeikke.

<sup>18</sup> Aissi giikko, taani intteyyo tumaa odais; saloinne sa7ai aadhdhana gakkanaassi, qassi ubbabaikka polettana gakkanaassi, higgiyaappe issi qaalaikka woi issi pitaleekka xayenna. <sup>19</sup> Hegaa gishshau, ha azazo ubbaappe guuxxiya issi azazuwaa kanttiya urai ooninne, qassi haratika baagaadan oottanaadan tamarissiya urai ooninne, saluwaa kawotettan ubbaappe guutta gidana; shin higgiyaa oottiyaageenne tamarissiyaagee ooninne saluwaa kawotettan gita gidana. <sup>20</sup> Aissi giikko, taani intteyyo odais; intte xillotettai higgiyaa tamarissiyaageetu xillotettaappenne Parisaawetu xillotettaappe darana xayikko, saluwaa kawotettaa intte mulekka gelekketa.

<sup>21</sup> “Beni asaa, ‘Asa woroppa; asa worida ooninne pirddettana’ giidoogaa siyideta. <sup>22</sup> SHin taani intteyyo odais; ba ishaa hanqgettiya ubbai pirddettana; ba ishaa cayiya ubbai yaa7aa pirddau shiiqana; qassi ba ishaa, ‘Eeyyai’ giya ubbai Gaannabiyaa tumaa pirddau shiiqana. <sup>23</sup> Hegaa gishshau, neeni yarshshiyooosan yarshshishin, ne ishaa naaqqidobai neeyyo hegan hassayettikko, <sup>24</sup> ne yarshshuwaa he sohuwankka

yegga bayada ba; kasetada ne ishaara sigettaichcha; hegaappe guyyiyan yaada, ne yarshshuwaa yarshsha.

<sup>25</sup> “Nena mootiyaagaara pirdda keettaa baidda ogiyan elle aara sigettaichcha; hegee xayikko, i nena daanna sintti aattana; qassi daannai nena polisiyau aattidi immin, polisee nena qachchana. <sup>26</sup> Taani neeyyo tumaa odais; neeni issi santtimee attennan, ne maqqaccuwaa wurssada qanxxana gakkanaassi, mulekka qasho keettaappe kiyakka.

### *SHaaramuxanau Bessenna*

<sup>27</sup> “ ‘SHaaramuxoppa’ giidoogaa siyideta. <sup>28</sup> SHin taani intteyyo odais; maccaaro xeellidi amottiya ubbai, ba wozana giddon he wode iira shaaramuxiis. <sup>29</sup> Ne ushachcha aifee nena nagara ootissikko, neeppe shoddada ola baya; aissi giikko, ne bollai muleera Gaannabiyaa taman olettanaagaappe, appe issoi xayiyoogee neeyyo keha. <sup>30</sup> Qassi ne ushachcha kushee nena nagara ootissikko, neeppe qanxxada ola baya; aissi giikko, ne bollai muleera Gaannabiyaa taman olettanaagaappe, appe issoi xayiyoogee neeyyo keha.

### *Machchiyo Yeddana Bessenna*

*(Maatiyoosa 19:9; Marqqoosa 10:11-12; Luqaasa 16:18)*

<sup>31</sup> “ ‘Qassi ba machchiyo yeddiya ooninne o yeddiyo paramaa immo’ geetettiis. <sup>32</sup> SHin taani intteyyo odais; ba machchiyaa shaaramuxennan de7ishin yeddiya ooninne o shaaramuxa kessees; qassi azinai yeddido maccaasiyo ekkiya ooninne shaaramuxees.

### *Caaquwaabaa*

<sup>33</sup> “Qassi beni asaa, ‘Wordduwan caaqqoppa, shin ne Godau caaqqidoogaa pola’ giidoogaa siyideta. <sup>34</sup> SHin taani intteyyo odais; mulekka caaqqoppite; saloi Xoossaa kawotaa araataa gidiyo gishshau, saluwan mulekka caaqqoppitenne; <sup>35</sup> qassi sa7ai a gedee yedhdhiyoosaa gidiyo gishshau, sa7an caaqqoppite; qassi Yerusalaamee gita kawuwaa katama gidiyo gishshau, Yerusalaamenkka caaqqoppite. <sup>36</sup> Neeni issi binnaan akka bootta woi kareta kessanau danddayenna gishshau, ne huuphiyankka caaqqoppa. <sup>37</sup> SHin intte, ‘Ee’ woi, ‘CHii’ giite; hageetuppe hara caaqoi xalahe ha-laqaappe yees.

### *Lancciyaa Uluwan Oiqqanau Bessenna*

*(Luqaasa 6:29-30)*

<sup>38</sup> “ ‘Aife gishshaa aife; achcha gishshaa achcha’ giidoogaa siyideta. <sup>39</sup> SHin taani intteyyo odais; intteyyo iitabaa oottiya uraa diggoppite; ooninne ne ushachcha bagga qinxalliyaa baqqikko, ne haddirssa bagga qinxalliyaakka a bessa; <sup>40</sup> ne qoliyaa ekkana issi urai nena mootikko, he urai ne kootiyaakka ekko. <sup>41</sup> Ooninne nena issi saate ogiyaa banaara wolqqan efiikko, aara naa77u saate ogiyaa ba. <sup>42</sup> Nena woossiyya urau imma; qassi neeppe tal77ana koyiya uraukka diggoppa.

### *Morkkiyaa Siiqiyoogaa*

*(Luqaasa 6:27-36)*

<sup>43</sup> “ ‘Ne shooruwaa siiqa; ne morkkiyaa morkka’ giidoogaa siyideta. <sup>44-45</sup> SHin taani intteyyo odais; saluwan de7iya intte Aawau naata gidana mala, intte morkketa siiqite; inttena qanggiyaageetakka anjite; inttena ixxiyaageetuyyo lo77obaa oottite; inttena waissiyaageetuyyookka Xoossaa woossite; aissi giikko, iita asaukka lo77o asaukka Xoossai ba awaa awaxxissees; qassi xillotuyyookka nagaranchchatuyyookka ba iraa bukkissees. <sup>46</sup> Aissi giikko, intte inttena siiqiyaageetu xalaalaa siiqikko, intteyyo ai woi to de7ii? Harai atto, giiraa ekkiyaageetikka hegaadan oottoosona. <sup>47</sup> Intte intte ishanttu xalaalaa sarotikko, harati oottiyoogaappe aadhdhiyaabaa ai oottidetii? Harai atto, Xoossaa ammanenna asaikka hegaadan oottees. <sup>48</sup> Hegaa gishshau, saluwan de7iya intte Aawai bali bainnaagaa gidiyoogaadan, intteikka bali bainnaageeta gidite.

## 6

### *Hiyyeesau Immiyo Maaraa*

<sup>1</sup> “Intte ammano oosuwaa asa bessanau asa sinttan oottenna mala naagettite; hegee xayikko, saluwan de7iya intte Aawai intteyyo woiuwaa immenna.

<sup>2</sup> “Hegaa gishshau, intte aibakko hiyyeesau immiyo wode, lo77o milatiya iitati banttana bonchchissanau, Aihuda woosa keettatuuninne ogetun awaajissiyooogaadan awaajissoppite; taani intteyyo tumaa odais; eti bantta woiuwaa ekkiichchidosona. <sup>3-4</sup> SHin intte hiyyeesau immiyo wode, geeman immanaadan, intte ushachcha kushee oottiyoogaa intte haddirssa kushee eroppo; geeman be7iya intte Aawai intteyyo qoncciyann immanna.

### *Woosaabaa (Luqaasa 11:2-4)*

<sup>5</sup> “Xoossaa woossiiddi, lo77o milatiya iitatudan hanoppite; aissi giikko, banttana asi be7ana mala; Aihuda woosa keettatuuninne ogetu doonan eqqidi, Xoossaa woossiyooogaa dosoosona; taani intteyyo tumaa odais; eti bantta woiuwaa muleera ekkiichchidosona. <sup>6</sup> SHin intte Xoossaa woossiyo wode, intte soo gelite; kariyaa gorddidi, geeman de7iya intte Aawaa woossite; geeman be7iya intte Aawai intteyyo qoncciyann immanna.

<sup>7</sup> “Xoossaa intte woossiyo wode, Xoossaa ammanenna asaagaadan, mela bidoppite; aissi giikko, Xoossaa ammanenna asai adussidi Xoossaa woossin siyees giidi qoppees. <sup>8</sup> Hegaa gishshau, he asaagaadan hanoppite; aissi giikko, intte Aawai inttena koshshiyaagaa intte woossanaappe kasetidi erees. <sup>9</sup> Simmi intte hagaadan yaagidi, Xoossaa woossite;

‘Saluwan de7iya nu Aawau,  
ne geeshsha sunttai anjjetto.

<sup>10</sup> Ne kawotettai yo;  
ne shenee saluwan hanidoogaadan,  
sa7ankka hano.

<sup>11</sup> Hachchi hachchi koshshiya qumaa  
nuuyyo hachchi imma.

<sup>12</sup> Nuuni nuna naaqqidaageetuyyo  
atto giyoogaadan,  
neenikka nu naaquwaa atto ga.

<sup>13</sup> Nuna iitabaappe ashshanaappe attin,  
paacen gelissoppa.

Kawotettai, wolqqainne bonchchoi  
merinaukka neessa. Amin77i’ yaagite.

<sup>14</sup> “Intte inttena naaqqida hara asaa naaquwaa atto giikko, saluwan de7iya intte Aawaikka intteyyo atto gaana. <sup>15</sup> SHin intte inttena naaqqida hara asaa naaquwaa atto gaana xayikko, intte Aawaikka intte naaquwaa atto geenna.

<sup>16</sup> “Qassi intte xoomiyo wode, lo77o milatiya iitatudan, kayyottiyaabaa milatoppite; aissi giikko, eti xoomiyoogaa asai be7ana mala, bantta som77uwaa bullaalissoosona; taani intteyyo tumaa odais; eti bantta woiuwaa muleera ekkiichchidosona.

### *Xoomaabaa*

<sup>17-18</sup> “SHin intte xoomiyo wode, intte Aawai intte xoomiyoogaa eranaappe attin, asi erenna mala, intte som77uwaa meeccite; intte huuphiyaakka tiyettite; yaatikko, geeman de7iya intte Aawai intte oottiyoogaa geeman be7idi, intteyyo qoncciyann immanna.

### *Ha Sa7aa Bollan Aquwaa Dagayanau Bessenna (Luqaasa 12:33-34)*



19 “Bil77i bashshiyooasaaninne birati shiyiyoosan, kaisoikka bookkidi wuuqqiyoosan, sa7an intte huuphessi miishsha dagayoppite. 20 SHin bil77inne qunoi bashshennasan, kaisoikka bookkidi wuuqqennasan intte huuphessi saluwan miishsha dagayite. 21 Aissi giikko, ne wozanai ne miishshai de7iyoosan de7ana.

*Bollaa Xomppiyaabaa*  
(Luqaasa 11:34-36)

22 “Bollaa xomppee aifiyaa; heгаа gishshau, ne aifee payya gidikko, ne bolla ubbai poo7o gidana. 23 SHin ne aifee payya gidana xayikko, ne bolla ubbai xumana; simmi ne bolli de7iya poo7oi xumikko, xumai ai keenaa xumanddeeshsha!

*De7ossi Hirgganau Bessenna*  
(Luqaasa 16:13; 12:22-31)

24 “Naa77u godatuyyo haarettanau danddayiyai ooninne baawa; aissi giikko, woi issuwaa ixidi, hinkkuwaa siiqana; woi issuwaa bonchchidi, hinkkuwaa karana; Xoossaassinne miishshaassi haarettanau danddayekketa.

25 “Hegaa gishshau, taani intteyyo odais; intte paxa de7anau maanabaassinne uyanabaassi, woi intte bollau maayanabaassi hirggoppite; shemppoi qumappe aadhdhennee? Qassi bollai maayoppe aadhdhennee? 26 Paalliya kafota xeellite; eti zerokkona; cakkokkona; gootarankka qolokkona; shin saluwan de7iya intte Aawai eta mizees; intte etappe keehi aadhdhekketii? 27 Intte giddon keehi qoppidi, ba geesaa bolli issi wara gujjanau danddayiyai oonee?

28 “Aissi maayossi hirgheetii? Dembban de7iya ciishshati waani dicciyaakko, akeeki xeellite; eti daafurokkona woi puutto suqqokkona. 29 SHin taani intteyyo odais; harai atto, Solomoni heгаа keena bonchchettidaagaa gidiiddi, he ciishshatuppe issuwaagaa malaa maayibeenna. 30 SHin laafa ammanoi de7iyoogeetoo, Xoossai, hachchi de7idi, wontto coociyaa taman eexxiya dembbaa maataa maizziyaagee, inttena etaagaappe aattidi waati maizzennee? 31 Simmi, ‘Nuuni ai maanee? Woi ai uyane? Woi ai maayane?’ yaagidi hirggoppite. 32 Aissi giikko, he ubbabaa Xoossaa ammanennaageeti darissidi koyoosona; he ubbai inttena koshshiyooгаа saluwan de7iya intte Aawai erees. 33 SHin kasetidi, Xoossaa kawotettaanne a xillotettaa koyite; i intteyyo he ubbabaa immana. 34 Hegaa gishshau, wonttobau hirggoppite; aissi giikko, wonttoi bau hirggana; gallassa ubbaukka gidiya a huuphe waayee de7ees.

## 7

*Hara Asaa Bolli Pirddanau Koshshenna*  
(Luqaasa 6:37-42)

1 “Xoossai intte bolli pirddenna mala, inttekka haratu bolli pirddoppite. 2 Aissi giikko, intte haratu bolli pirddiyoogaadan, Xoossai intte bolli pirddana; qassi intte haratuyyo immanau makkiyooban i intteyyo makkana. 3 Ne aifiyan de7iya tuussaa be7akka; shin ne ishaa aifiyan de7iya suullaa aissi xeellai? 4 Woi ne aifiyan tuussai de7ishin, neeni ne ishaa, ‘Taani ne aifiyaappe suullaa kessoo’ waanada gaanau danddayai? 5 Laa ha lo77o milatiya iitau, kasetada ne aifiyaappe tuussaa kessargga; heгааappe guyyiyan, ne ishaa aifiyaappe suullaa kessanau geeshshada xeellana danddayaasa.

6 “Geeshshabaa kanatuyyo immoppite; eti guyye simmidi, inttena saxxana. Qassi inqquwaa giyo intte al77o shuchchaa gudunttatu sintti oloppite; eti bantta tohuwan yedhdhana.

*Woosaa Aifiyaa*  
(Luqaasa 11:9-13)

7 “Woosite; intte ekkana. Koyite; intte demmana. Kare yiidi xeesite; intteyyo karee dooyettana. 8 Aissi giikko, woossiya ubbai ekkana; koyiya urai demmana; qassi kare

yiidi xeesiya urau karee dooyettana. <sup>9</sup> Woi intte gidдон ba na7i, ‘Oitta imma’ giikko, shuchcha immiya aawu de7ii? <sup>10</sup> Qassi, ‘Mole imma’ giikko, ayyo shooshsha immanee? <sup>11</sup> Intte iita gidiiddi, intte naatussi lo77obaa immiyooogaa erikko, yaatin, saluwan de7iya intte Aawai bana woossiyaageetussi lo77obaa waati darissidi immanddeeshsha!

<sup>12</sup> “Hegaa gishshau, hara asi intteyyo oottanau koyiyo ubbabaa inttekka asau oottite; aissi giikko, Muuse higgiiyaa birshshettainne hananabaa yootiyaageeti tamaarissiyoogee hegaa.

*Un77o Penggiyaabaa*  
(Luqaasa 13:24)

<sup>13</sup> “Un77o penggiyaara gelite. Aissi giikko, bashshau efiya penggee aaho; ogeekka woggaa. Hegaara geliya asaikka daro.

<sup>14</sup> “Aissi giikko, de7uwau efiya penggee un77o; ogeekka xuntta. Qassi hegaara biya asatikka amaridaageeta.

*Mittai Ba Aifiyan Erettees*  
(Luqaasa 6:43-44)

<sup>15</sup> “Bolla baggaara dorssa milatidi, inttekko yiya wordduwaa hananabaa yootiyaageetuppe naagetite; shin tumaappe eti garssa baggaara wanggireellotu mala. <sup>16</sup> Eti aifiyo aifiyan intte eta erana; aguntti woine giyo turaa aife aifenna; gom77oreekka balase giyo mittaa aife aifenna. <sup>17</sup> Hegaadankka, lo77o mitta ubbai lo77o aife aifees; shin iita mitti iita aife aifees. <sup>18</sup> Lo77o mitti iita aife aifanau danddayenna; qassi iita mittikka lo77o aife aifanau danddayenna. <sup>19</sup> Lo77o aife aifenna mitta ubbai qanxxettidi, taman yegettana. <sup>20</sup> Hegaa gishshau, intte eti aifiyo aifiyan eta erana.

<sup>21</sup> “Saluwan de7iya ta Aawai giidoogaa oottiya urai saluwaa gelanaappe attin, ‘Ta Godau, ta Godau’ giya ubbai gelenna. <sup>22</sup> He gallassi daro asai tana, ‘Nu Godau, nu Godau, nuuni ne sunttan hananabaa yootibookkonii? Ne sunttan xalaheta kessibookkonii? Qassi nuuni Xoossai oottiyo malaataa ne sunttan oottibookkonii?’ yaagana. <sup>23</sup> Taani he wode eta, ‘Taani inttena mulekka erikke; iitabaa oottiyaageeti intte ta matappe haakkite’ yaagana.

*SHuchchaa Bolli Woikka SHafiya Bolli Keexettida Keettatu Leemisuwaa*  
(Luqaasa 6:47-49)

<sup>24</sup> “Hegaa gishshau, haggaa ta qaalaa siyidi oottiya ubbai shuchchan ba keettaa keexxida wozannaama asa mala. <sup>25</sup> Irai bukkiis; di7oi di77iis; carkkoikka carkkidi, he keettaa sugiis. SHin keettaa shuchchan keexettido gishshau kunddibeenna.

<sup>26</sup> “Haggaa ta qaalaa siyidi oottenna asai ubbai, ba keettaa shafiyan keexxida eeyya asa mala. <sup>27</sup> Irai bukkiis; di7oi di77iis; carkkoikka carkkidi, he keettaa sugin, keettaa kunddiis. He keettaa wolqqaama kunddettaa kunddiis” yaagiis.

<sup>28</sup> Yesuusi ba haasayiyoogaa wurssido wode, asai i tamaarissiyooogan garamettiis. <sup>29</sup> Aissi giikko, i eta tamaarissiiddi, higgiiyaa tamaarissiyaageetudan gidennan, bau alaafetettaa de7iyo asadan tamaarissees.

## 8

*Yesuusi Inchchirichchai Oiqqido Bitaniyaa Pattiis*  
(Marqqoosa 1:40-45; Luqaasa 5:12-16)

<sup>1</sup> Yesuusi deriyaappe wodhdhido wode, daro asai a kaalliis. <sup>2</sup> Inchchirichchai oiqqido issi bitanee Yesuusakko yiidi, a sinttan gulbbatidi, “Godau, neeni koyikko, tana pattanau danddayaasa” yaagiis.

<sup>3</sup> Yesuusi ba kushiya yeddidi, a bochchidi, “Taani koyais; paxa” yaagiis. Yaagin sohuwaarakka inchchirichchai bitaniyaa yeddi aggiis. <sup>4</sup> Yesuusi a, “Simmi haggaa

ooyyoonne yootoppa; shin qeesiyaakko baada ne bollaa a bessa; neeni paxidoogaa asaa erissanau Muusee azazido yarshshuwaa yarshsha” yaagiis.

*Yesuusi Mato Halaqaa Na7aa Pattiis*  
(Luqaasa 7:1-10)

<sup>5-6</sup> Yesuusi Qifirinaahooma katamaa gelido wode, issi mato halaqai akko yiidi, “Ta Godau, ta ashkkaraa asatettai silin, daro sahettiiddi, son zin77iis; hai pattarkkiishsha” yaagidi woossiis.

<sup>7</sup> Woossin Yesuusi, “Taani baada a pattana” yaagiis.

<sup>8</sup> SHin mato halaqai zaaridi yaagiis; “Ta Godau, nena ta soo gelissanau tau bessenna; shin neeni doona xalaalaa haasaya; ta ashkkarai paxana. <sup>9</sup> Aissi giikko, taani taappe bol-laara de7iyaageetuyyo haarettiya asa; qassi taappe garssaara wotaaddarati de7oosona. Taani issuwaa, ‘Ba’ giikko bees; qassi hinkkuwaa, ‘Haaya’ giikko yees; ta ashkkaraa, ‘Hagaa ootta’ giikko oottees” yaagiis.

<sup>10</sup> Yesuusi hegaa siyido wode garamettidi, bana kaalliya asaa hagaadan yaagiis; “Taani intteyyo tumaa odais; taani hagaa mala ammanuwaa harai atto, Israa7eela biittanka be7abeikke. <sup>11</sup> Taani intteyyo odais; daro asai arshshoppenne arggoppe yiidi, Abrahaamaara, Yisaaqaaranne Yaaqoobaara saluwaa kawotettan issippe uttana. <sup>12</sup> SHin kawotettan de7anau bessiyo asai xumau kare olettana; hegan eti yeekkananne bantta achchaa garccana” yaagiis.

<sup>13</sup> Yesuusi mato halaqaa, “Ne soo ba; neeni ammanidoogaadan neeyyo hanana” yaagiis; yaagin mato halaqaa ashkkarai he saatenkka paxi aggiis.

*Yesuusi Daro Asata Eta Harggiyaappe Pattiis*  
(Marqqoosa 1:29-34; Luqaasa 4:38-41)

<sup>14</sup> Yesuusi PHeexiroosa soo biidi, a bollotiyaa qoxonne misho harggada zin77idaaro be7iis. <sup>15</sup> I kushiyaa i bochchin, qoxoinne mishoi o aggi bayiis; aggi bayin, a denddada ayyo oottaasu.

<sup>16-17</sup> Sa7ai omariyo wode, asai xalaheti oiqqido daro asaa Yesuusakko ehiis; hanan-abaa yootiya Isiyaasi, “I nu sahuwaa bau ekkiis; qassi nu harggiyaakka tookkiis” giidoogee polettana mala, Yesuusi tuna ayyaanata ba qalan kessidi, harggida asa ubbaakka pattiis.

*Yesuusa Kaalliyaageeta Gakkiya Metuwaa*  
(Luqaasa 9:57-62)

<sup>18</sup> Yesuusi daro asai ba matan yuuyi aadhdhidi eqqidoogaa be7idi, abbaappe hefintti pinnana mala, ba erissiyo ashkkarata azaziis. <sup>19</sup> Higgiyaa tamarissiya issoi akko yiidi, “Tamarissiyaagoo, neeni biyoosaa ubbaa taani nena kaallana” yaagiis.

<sup>20</sup> Yesuusi a, “Worakanatussi ollai de7ees; kafotussikka keetta de7ees; shin taani, Asa Na7ai, zin77ada shemppa ekkiyoosikka tau baawa” yaagiis.

<sup>21</sup> Qassi kaalliyaageetuppe issoi a, “Godau, taani kaseta baada ta aawaa moogoo?” yaagiis.

<sup>22</sup> SHin Yesuusi a, “Neni tana kaalla; haiqqidaageeti bantta haiqqidaageeta moogona” yaagiis.

*Yesuusi Beetaa Co77u Oottiis*  
(Marqqoosa 4:35-41; Luqaasa 8:22-25)

<sup>23</sup> Yesuusi wolwoluwan gelin, erissiyo ashkkarati aara biidosona. <sup>24</sup> Beetai wolwoluwaa kumana gakkanaashin, sohuwaara abban wolqqaama gotee denddiis; shin Yesuusi xiskkiis. <sup>25</sup> Erissiyo ashkkarati akko biidi, xiskkuwaappe denttidosona; denttidi a, “Godau, nuuni xayoos; nuna ashsharkkii” yaagidosona.

<sup>26</sup> Yesuusi eta, “Ha ammanoi paccidoogeetoo, aissi yayyeetii?” yaagiis. Hegaappe guyyiyan denddidi, gotiyaanne beetaa aggite gin, goteenne beetai woppu giidosona.

<sup>27</sup> Asai garamettidi, “Hagee laa harai atto, goteenne beetai azazettiyoogee aiba asee?” yaagiis.

*Yesuusi Xalahee Oiqqido Naa77u Asata Pattiis*  
(*Marqqoosa 5:1-20; Luqaasa 8:26-39*)

<sup>28</sup> Yesuusi abbaappe hefinttan de7iya Gerggesenoona giyo biittaa pinniis; xalaheti oiqqido naa77u asati he biittan de7oosona; asa moogiyo gonggoluwaaappe eti kiyidi, aara gaittidosona. Eti daro wolqqaama gidiyo gishshau, ooninne he ogiyaara aadhhanau danddayibeenna. <sup>29</sup> Eti bantta qaalaa xoqqu oottidi, “Xoossaa Na7au, nunanne nenanne aibee gattiyai? Wodee gakkennan nuna qaxxayanau yaadii?” yaagidosona.

<sup>30</sup> Etappe haahuwan gudunttaa wudee heemettees. <sup>31</sup> Xalaheti Yesuusa, “Neeni nuna kessanabaa gidikko, hini gudunttaa wudiyaa giddo yeddarkkii” yaagidi woossidosona.

<sup>32</sup> Yesuusi eta, “Biite” gin eti bitaniyaappe kiyidi biidi, gudunttatun gelidosona. Gelin gudunttaa wudee ubbai kakaa huuphiyaara jaamiiddi, abban gelidi, meetetti bayiis.

<sup>33</sup> Gudunttaa wudiyaa heemmiyaageeti baqatidi, katamaa biidosona; biidi xalaheti oiqqido asati hanidobaa ubbaa yootidosona. <sup>34</sup> Yootin kataman de7iya asai ubbai Yesuusaara gaittanau kiyiis; a be7ido wode, ba biittaaappe baana mala woossiis.

## 9

*Yesuusi Bollai Silido Bitaniyaa Pattiis*  
(*Marqqoosa 2:1-12; Luqaasa 5:17-26*)

<sup>1</sup> Yesuusi wolwoluwan gelidi, abbaa pinnidi, ba katamaa biis. <sup>2</sup> Amarida asati bollai silido issi bitaniyaa halan tookkidi, Yesuusakko ehiidosona; Yesuusi eta ammanuwaa be7idi, bollai silido bitaniyaa, “Ta na7au, yayyoppa; ne nagarai atto geetettiis” yaagiis.

<sup>3</sup> Yaagin higgiiyaa tamarissiyaageetuppe issooti issooti bantta wozanan, “Laa ha bitanee Xoossaa bolli iitabaa haasayeesittennee!” yaagidosona.

<sup>4</sup> Yesuusi eta qofaa eridi, eta hagaadan yaagiis; “Intte intte wozanan hegaadan iitabaa aissi qoppeetii? <sup>5</sup> ‘Ne nagarai atto geetettiis’ giyoogee mateeyye? Woi, ‘Dendda eqqada hemetta’ giyoogee matee? <sup>6</sup> SHin sa7aa bollan nagara atto gaanau taayyo, Asa Na7aayyo, alaafetettai de7iyooogaa taani inttena erissana” yaagidi, hegaappe he bollai silido bitaniyaa, “Dendda eqqa; yaatada ne halaa tookkada, ne soo ba” yaagiis.

<sup>7</sup> Yaagin silida bitanee denddi eqqidi, ba soo biis. <sup>8</sup> SHin daro asai hegaa be7idi yayyiis; yayyidi asaayyo haga mala alaafetettaa immida Xoossaa galatiis.

*Yesuusi Maatiyoosa Xeesiis*  
(*Marqqoosa 2:13-17; Luqaasa 5:27-32*)

<sup>9</sup> Yesuusi hegara aadhhiiddi, Maatiyoosa giyoogee giiraa giiriyoosan uttidaagaa demmida a, “Tana kaalla” yaagiis.

Yaagin Maatiyoosi denddi eqqidi, a kaalliis.

<sup>10</sup> Yesuusi maatiyoosa son qumaa maanau uttidaashin, giiraa ekkiya daro asatinne nagaranchchati yiidi, aaranne i erissiyo ashkkaratuura issippe uttidosona. <sup>11</sup> Issi issi Parisaaweti hegaa be7idi, Yesuusi erissiyo ashkkarata, “Inttena tamarissiyaagee giiraa ekkiyaageetuuranne nagaranchchatuura qumaa aissi issippe mii?” yaagidosona.

<sup>12</sup> SHin Yesuusi eti giyoogaa siyidi, “Hargganchchatussippe attin, payyatuyyo aakime koshshenna. <sup>13</sup> SHin intte biidi, Xoossaa maxaafai, “Taani maarotettaa koyaisippe attin, yarshshuwaa koyikke’ giyoogee woigiyoogaakkonne erite; aissi giikko, taani nagaranchchata xeesanau yiidoogaappe attin, xillota xeesanau yabeikke” yaagiis.

*Xoomaabaa Oichchido Oishaa*  
(*Marqqoosa 2:18-22; Luqaasa 5:33-39*)

<sup>14</sup> He wode Yohaannisi erissiyo ashkkarati Yesuusakko yiidi, “Nuuninne Parssaaweti xoomoos; shin neeni erissiyo ashkkarati aissi xoomokkonaa?” yaagidi a oichchidosona.

<sup>15</sup> Yesuusi eta hagaadan yaagiis; “Bullachchaa yiida asati machchiyo ekkiyaagee bant-tanaara de7ishin, karryottanau danddayiyoona? Danddayokkona; shin machchiyo ekkiyaagaa eta matappe efaana wodee yaana; eti he wode xoomana.

<sup>16</sup> “Ceega maayo bolli ooratta woto wotti sikkiya asi baawa; aissi giikko, he woto maayuwaa peererettana; peerettaikka kaseegaappe darana. <sup>17</sup> Ho77o woine eessa ceega ogoron naaqqiya asi baawa. SHin naaqqikko, he woiniyaa eessai ogoruwaa daakkana; baukka gukkana; ogoroikka moorettana. SHin, ho77o woine eessa ooratta ogoron naaqqeettes; naa77aikka moorettokkona” yaagiis.

*Yaa7iyoosa Na7eebaanne Yesuusa Maayuwaa Bochchida Maccaaseebaa  
(Marqqoosa 5:21-43; Luqaasa 8:40-56)*

<sup>18</sup> Yesuusi etayyo heгаа odishin, Aihuda halaqatuppe issoi akko yiidi, a sinttan gulbatidi, “Ta na7iyaa ha77i haiqqaasu; shin neeni yaada ne kushiya i bolli wottarkkii; haiquwaappe a paxana” yaagiis.

<sup>19</sup> Yaagin Yesuusi denddidi, ba erissiyo ashkkaratuura issippe a kaallidi biis. <sup>20</sup> Biishin tammanne naa77u laittaasappe doommidi, i bollaappe suuttai goggiyo issi maccaasiyaa guyyeera shiiqada, Yesuusa afalaa macaraa bochchaasu. <sup>21</sup> Aissi giikko, a ba wozanan, “Taani a afalaa xalaalaa bochchikko paxana” yaagada qoppaasu.

<sup>22</sup> SHin Yesuusi simmidi o xeellidi, “Ta na7ee, yayyoppa; nena ne ammanoi pattiis” yaagiis. He sohuwaarakka maccaasiyaa paxa aggaasu.

<sup>23</sup> Yesuusi Aihuda halaqaa soo gakkido wode, yeehuwan dinkkiyaa punniya asaanne yeekkiya asaa be7idi, <sup>24</sup> “Kare kiyite; guutta na7iyaa xiskkaasuppe attin, haiqqabeikku” yaagiis. Yaagin asai a bolli keehi miicciis. <sup>25</sup> SHin daro asaa kare i kessidoogaappe guyyiyan, soo gelidi, na7ee kushiya oiqqiis; oiqqin na7iyaa dendda aggaasu. <sup>26</sup> He odoi he biitta ubbaa gakkiiis.

*Yesuusi Naa77u Qooqeta Pattiis*

<sup>27</sup> Yesuusi hegaara aadhdhidi biishin, naa77u qooqeti bantta qaalaa xoqqu oottidi, “Daawita na7au, nuna maararkkii” yaagiiddi a kaallidosona.

<sup>28</sup> Yesuusi soo gelido wode, qooqeti akko yiidosona; yin Yesuusi eta, “Taani haga oottanau danddayiyoogaa ammaneetii?” yaagiis.

Eti, “Ee Godau” yaagidosona.

<sup>29</sup> Hegaappe guyyiyan, Yesuusi eta aifiyaa bochchidi eta, “Intteyyo intte amanuwaadan hano” yaagiis. <sup>30</sup> Eta aiffee dooyetti aggiis; Yesuusi etayyo, “Haga ooyyoonne odoppite” yaagidi minttidi yootiis. <sup>31</sup> SHin asati biidi, he biitta ubban Yesuusabaa odidosona.

*Yesuusi Issi Duudiyaa Pattiis*

<sup>32</sup> Eti kiyidi biishin, amarida asati xalahee oiqqin duudida bitaniyaa Yesuusakko ehiidosona. <sup>33</sup> Yesuusi xalahiyaa kessidoogaappe guyyiyan, duude bitanee haasayiis. Asai, “Hagee oorattabaa; haga malabai Israa7eela biittan mulekka hanibeenna” yaagiis.

<sup>34</sup> SHin Parisaaweti, “I xalahetu halaqaa wolqqan xalaheta kessees” yaagidosona.

*Yesuusi Asaassi Qarettiis*

<sup>35</sup> Yesuusi eta Aihuda woosa keettatun tamarissiiddinne kawotettaa wonggeliyaa mishiraachchuwaa yootiiddi, qassi hargge ubbaappenne saho ubbaappe asa pattiiddi, wogga katamatuuninne qeeri katamatun ubban yuuyiis. <sup>36</sup> Daro asaa be7idi, heemmiya asi baina dorssadan asai hirggiyo gishshaunne asaa maaddiyaabi baina gishshau, asaayyo qarettiis. <sup>37</sup> Yaatidi ba erissiyo ashkkarata, “Kattai daro; shin cakkiya asai guutta. <sup>38</sup> Simmi kattaa Godai kattaa cakkanau oosanchcha yeddana mala, a woosite” yaagiis.



## 10

### *Yesuusi Kiittido Tammanne Naa77u Asatubaa (Marqqoosa 3:13-19; Luqaasa 6:12-16)*

<sup>1</sup> Yesuusi ba tammanne naa77u erissiyo ashkkarata xeesidi, eti tuna ayyaanaa kessana mala, qassi hargge ubbaanne saho ubbaa pattana mala, etayyo maataa immiis. <sup>2</sup> Yesuusi kiittido tammanne naa77atu sunttai, koiroogee PHeexiroosa giyo Simoonanne a ishaa Inddiraasa, Zabddiyoosa naata ishantta, Yaaqoobanne Yohaannisa, <sup>3</sup> Piliphphoosanne Barttalamoosa, Toomaasanne giiraa ekkiya Maatiyoosa, Ilppiyoosa na7aa Yaaqoobanne Taaddiyoosa giyo Libddiyoosa; <sup>4</sup> ba biittau mishettiya Simoonanne Yesuusa aattidi immida Asqgorootu Yihudaa.

### *Yesuusi Kiittido Tammanne Naa77ati Tamaarissanau Kiitettidosona (Marqqoosa 6:7-13; Luqaasa 9:1-6)*

<sup>5</sup> Yesuusi ha tammanne naa77ata hagaadan yaagidi kiittiis; “Aihuda gidenna asaa biitti booppite; qassi Samaaretu katamaakka geloppite; <sup>6</sup> heгаа gishshaa bayida dorssaakko, Israa7eela asaakko biite. <sup>7</sup> Biidi, ‘Saluwaa kawotetta matattiis’ yaagidi yootite. <sup>8</sup> Hargganchchata pattite; haiqqidaageeta haiquwaappe denttite; inchchirichchai oiqqidoogeetakka pattite; xalahetakka kessite. Intte coo ekkideta; coo immite. <sup>9</sup> Worqqa woi bira woi santtime intte kiisiyan oiqqoppite; <sup>10</sup> woi ogiyau qarcciita, woi naa77antto qole, woi caamma woi xam77a oiqqoppite. Aissi giikko, oosanchchau koshshiyaabaa immanau bessees.

<sup>11</sup> “Intte geliyo kataman woi qeeri kataman ubban inttena mokkanau ufaittiyai oonakkonne akeekan xomoosite; intte hegaappe kiyana gakkanaashin, aagan uttite. <sup>12</sup> Qassi soo geliiddi sarotite. <sup>13</sup> He keettan de7iya asai inttena mokiikko, intte sarotido sarotai eta gakko. SHin eti inttena mokiikkannan ixkikko, intte sarotido sarotai intteyyo guyye simmo. <sup>14</sup> Qassi issi issi keetta woi katamai inttena mokiikkannan woi intte yootiyooobaa siyennan ixkikko, he keettaappe woi he katamaappe kiyiiddi, intte tohuwaappe buhiyaa shocite. <sup>15</sup> Taani intteyyo tumaa odais; Xoossai pirddaa gallassi he katamaa asatuppe, Sadooma katamaa asaunne Gamooraa katamaa asau pirddaa kehissana.

### *Godai Yaanaappe Kasetidi, Yedetainne Metoi Hanana (Marqqoosa 13:9-13; Luqaasa 21:12-17)*

<sup>16</sup> “Be7ite! Taani inttena dorssaa wanggireello giddo yeddiyoogaadan yeddais. Hegaa gishshau, shooshshadan cincca gidite; qassi haraphphedan, ashkke gidite. <sup>17</sup> SHin asappe naagettite. Aissi giikko, asi inttena pirdda keettau aattidi immana; qassi ba Aihuda woosa keettatunkka inttena lissuwan garafana. <sup>18</sup> Deriyaa haariyaageetu sinttaaninne kawotu sinttan ta gishshau intte eqqidi, etassinne Aihuda gidenna asaassi wonggeliyaa mishiraachchuwaa yootana. <sup>19</sup> SHin eti inttena pirddau aattiyo wode, intte haasayanabaa he saatiyan Xoossai intteyyo immiyo gishshau, intte gaanabaunne woi woigi haasayanaakkonne hirggoppite. <sup>20</sup> Aissi giikko, inttenan de7idi haasayiyai intte Aawaa Geeshsha Ayyaanaa gidiyooagaappe attin, haasayiyaageeti inttena gidekketa.

<sup>21</sup> “Ishai ba ishaa, aawai ba na7aa worissana; naati bantta aawatu bollinne bantta aayetu bolli denddidi, eta worissana. <sup>22</sup> Qassi asai ubbai inttena ta sunttaa gishshau ixkana; shin wurssettai gakkanaashin genciyaagee attana. <sup>23</sup> Eti inttena issi katamaappe yedettikko, hara katamaa baqatite. Aissi giikko, taani intteyyo tumaa gais; taani, Asa Na7ai, yaana gakkanaashin, intte intte oosuwaa Israa7eela katama ubban ootti wurssekketa.

<sup>24</sup> “Tamaariyaagee bana tamarissiyaagaappe darena; ashkkaraikka ba godaappe darena. <sup>25</sup> Tamaariyaagee bana tamarissiyaagaa keeni gidiyoogee, ashkkaraikka ba godaa keeni gidiyoogee au gidana; eti keettaawaa Bi7eeli-Zeebula giidi xeesikko, a so asaa ai keenaa mooridi xeesaneeshsha!

*Oossi Yayyanau Bessiyaakko  
(Luqaasa 12:2-7)*

<sup>26</sup> “Simmi asassi yayyoppite; aissi giikko, gentti wottidobai qoncciyaa kiyennan attenna; qottidobaikka erettennan attenna. <sup>27</sup> Taani intteyyo xuman odiyooobaa poo7uwan haasayite; intteyyo haittan saasukkidi odidobaa, keettaa huuphiyan awaa-jjite. <sup>28</sup> Ashuwaa woriyaageetuyyo yayyoppite; eti shemppuwaa woranau dand-dayokkona. SHin shemppuwaanne ashuwaa Gaannabiyan xaissanau danddayiya Xoossaassi yayyite. <sup>29</sup> Naa77u siine kafoti bakkannan baizettokkonaayye? Intte Aawai gaana xayikko, he siine kafotuppe issinniyaakka sa7an wodhdhukku. <sup>30</sup> SHin harai atto, intte huuphiyan de7iya binnaana ubbaikka qoodan de7ees. <sup>31</sup> Simmi yayyoppite; daro siine kafotuppe intte aadhdheeta.

*Kiristtoosabaa Markkattanau Bessees  
(Luqaasa 12:8-9)*

<sup>32</sup> “Hegaa gishshau, asa sinttan tabaa markkattiya ooyyo gidikkonne, taanikka saluwan de7iya ta Aawaa sinttan markkattana; <sup>33</sup> shin asa sinttan tana kaddiya oonanne taanikka qassi saluwan de7iya ta Aawaa sinttan a kaddana.

<sup>34</sup> “Taani sa7aassi sarotettaa ehaanau yiidobaa inttessi milatoppo; taani tooraa ehaanau yiidoogaappe attin, sarotettaa ehaanau yabeikke. <sup>35</sup> Aissi giikko, taani na7aa a aawaappe, na7iyo i aayeepppe, na7aa machchiyookka i bolloteeppe shaakkanau yaas; <sup>36</sup> asassi morkketi a so asata gidana.

<sup>37</sup> “Ba aawaa woi ba aayyiyo taappe aattidi siiqiyaagee tabaa gidanau bessenna; ba attuma na7a woi ba macca na7iyo taappe aattidi siiqiyaagee tabaa gidanau bessenna. <sup>38</sup> Ba masqqaliyaa tookkidi, ta geeduwaa kaallennaagee tabaa gidanau bessenna. <sup>39</sup> Ba shemppuwaa ashshiyaagee bashshana; shin ta gishshau ba shemppuwaa bashshiyaagee ashshana.

<sup>40</sup> “Inttena mokkiyaagee tana mokkees; qassi tana mokkiyaagee tana kiittidaagaa mokkees. <sup>41</sup> Hananabaa yootiyaagaa hananabaa yootiyaagaa sunttan mokkiyaagee, hananabaa yootiyaagaa woituwaa aara shaakkana; qassi xilluwaa xilluwaa sunttan mokkiyaagee, xilluwaa woituwaa aara shaakkana. <sup>42</sup> Ooninne ha ta erissiyo ashkkaratuppe guuxxiya issuwau tana kaalliyaagee a gidiyo gishshau, harai atto bule haatta xalaalaa uyanau immikkokka, taani intteyyo tumaa gais; i ba woituwaa ekkana” yaagiis.

## 11

*Xammaqiya Yohaannisappe Kiitettida Asata  
(Luqaasa 7:18-35)*

<sup>1</sup> Yesuusi ba tammanne naa77u erissiyo ashkkarata azaziyoogaa polido wode, hegaappe denddidi, katamatun tamarissanaunne yootanau biis.

<sup>2</sup> Xammaqiya Yohaannisi qasho keettan de7iiddi, Yesuusi oottidobaa siyidi, ba erissiyo ashkkaratuppe akko kiittidi, <sup>3</sup> “Yaanaagee neneeyye? Woi nuuni haraa naaganee?” yaagidi oichchiis.

<sup>4</sup> Oichchin Yesuusi zaaridi, etayyo hagaadan yaagiis; “Biidi intte be7iyoogaanne siyiyoogaa Yohaannisau yootite; <sup>5</sup> qooqeti xeelloosona; wobbeti hemettoosona; inchchirichchai oiqqidoogeeti paxoosona; tulleti siyoosona; haiqqidaageeti denddoosona; hiyyeesati wonggeliyaa mishiraachchuwaa siyoosona. <sup>6</sup> Tana sirena urai anjettidaagaa” yaagiis.

<sup>7</sup> Yohaannisi erissiyo ashkkarati guyye simmidi biishin, Yesuusi Yohaannisabaa shiiqida asaassi hagaadan yaagidi haasayiis; “Ai be7anau bazzo kiyidetii? Carkkoi qaattiyo shombboquwaa be7anau kiyidetiyye? <sup>8</sup> Yaatin, ai be7anau kiyidetii?”

Lo77iya maayuwaa maayida bitaniyaa be7anau kiyidetiiyye? Lo77iya maayuwaa maayiaageeti kawotu keettan de7oosona. <sup>9</sup> Yaatin, ai be7anau kiyidetii? Hananabaa yootiyaagaa be7anau kiyidetii? Ee, taani intteyyo odais; hananabaa yootiyaa-gaappekka aadhdhiyaagaa be7ideta. <sup>10</sup> Aissi giikko, Xoossaa maxaafan,

‘Xoossai, “Be7a, ta kiittiyoogaa taani neeppe sinttau yeddana.

I neeyyo ogiyaa kessana” yaagees’ geetettidi Yohaannisabai xaafettiis. <sup>11</sup> Taani intteyyo tumaa odais; aayee uluwaappe yelettida asa ubban Xammaqiya Yohaannisappe aadhdhiya ooninne de7ibeenna; shin saluwaa kawotettan ubbaappe laafiyaageekka appe aadhdhana. <sup>12</sup> Xammaqiya Yohaannisa wodiyaappe doommidi, hachchi gakkanaashin, saluwaa kawotetta daro naaqqettes; wolqqaama asati wolqqan a ekkoosona. <sup>13</sup> Aissi giikko, hananabaa yootiya ubbatinne Muuse higgee Yohaannisa wode gakkanaashin, kawotettaabaa haasayidosona; <sup>14</sup> intte eta kiitaa ammananabaa gidikko, yaana giido Eelaasi ha Yohaannisa. <sup>15</sup> Simmi siyiya haitti de7iyoogee siyo!

<sup>16</sup> “SHin taani ha wodiya asaa aibiira leemisoo? Eti qocan uttiya naata milatoosona; eti bantta laggeta xeesidi, <sup>17</sup> ‘Nuuni intteyyo cachcha zaiyaa punnida; shin duribeekketa; yeeho yettaakka kessida; shin yeekkibeekketa’ yaagoosona. <sup>18</sup> Aissi giikko, Yohaannisi xoomiidinne woine eessa uyennan yin eti, ‘A bolli xalahee de7ees’ yaagidosona. <sup>19</sup> Taani, Asa Na7ai, maddanne uyaidda yin, eti tana, ‘Ha yoraanne woine eessaa uyiyaagaa be7ite; giiraa ekkiyaageetuuranne nagaranchchatuura siiqqettes’ yaagoosona; shin Xoossaa aadhdhida eratetta ba oosuwan tuma gididi beettes” yaagiis.

*Ammanennan Ixxido Gishshau Walasettida Katamata  
(Luqaasa 10:13-15)*

<sup>20</sup> Hegaappe guyyiyan, Yesuusi ba malaataappe dariya baggaa oottido katamatun de7iya asai bantta nagaraappe simmibeenna gishshau, eta hagaadan yaagidi, boruwaa doommiis; <sup>21</sup> “Koraaziine katamau, neeyyo aayye7ana; Beetasaida katamau, neeyyookka aayye7ana; aissi giikko, intte bolli Xoossai oottido malaatai Xiirsoosa katamaaninne Sidoona kataman oosettidobaa gidiyaakko, eti waaruwaa maayidi, bidinttaa tisttettidi, beni bantta nagaraappe simmanaagaa shin. <sup>22</sup> Taani intteyyo odais; pirddaa gallassi Xoossai intteppe Xiirsoosa katamaunne Sidoona katamau pirddaa kehissana. <sup>23</sup> Qassi Qifirinaahooma katamau, neeni saluwaa pude xoqqu gaanau koyadii? Neeni Si7ooliyaa duge yegettana; aissi giikko, ne bolli Xoossai oottido malaatai Sadooma kataman oosettidobaa gidiyaakko, Sadooma katamai hachchi gakkanaassikka de7anaagaa shin. <sup>24</sup> Taani intteyyo odais; pirddaa gallassi Xoossai neeppe Sadoomayyo pirddaa kehissana” yaagiis.

*Kiristtoosan SHemppuwaa Demmiyoogaa  
(Luqaasa 10:21-22)*

<sup>25</sup> Yesuusi he wode zaaridi, hagaadan yaagiis; “Ta Aawau, saluwaa sa7aa Godau, neeni hгаа aadhdhida eranchchatuppenne akeekanchchatuppe genttada, erenna naatussi qonccissido gishshau, nena galatais; <sup>26</sup> ee ta Aawau, aissi giikko, hagee ne shenedan oosettiis.

<sup>27</sup> “Ta Aawai taassi ubbabaa immiis; Aawaappe harai Na7aa erenna; Na7aappenne Na7ai Aawaa bessanau koyiyo asatuppe attin, harai Aawaa erenna.

<sup>28</sup> “Daafuranchchatoo, deexuwaa tookkiyaageetoo, ubbati taakko haa yiite; taani inttena shemppissana. <sup>29</sup> Taani ashkkenne wozanappe kauyyiyaagaa gidido gishshau, ta qambaran waaxettite; taappe tamarite; intte shemppuwaukka intte shemppo

demmana. <sup>30</sup> Aissi giikko, ta qambbarai giiga; qassi taani inttena toossidoogeekka kaushsha” yaagiis.

## 12

### *Sambbataabaa Oichchido Oishata* (*Marqqoosa 2:23-28; Luqaasa 6:1-5*)

<sup>1</sup> Yesuusi he wode Sambbata gallassi, tiya bangga giddoora aadhdhees. Aadhdhishin i erissiyo ashkkarati namisettidi, tiya bangгаа duuttidi, muussaa doommidosona. <sup>2</sup> SHin Parisaaweti hegaa be7idi Yesuusa, “Be7a, ne erissiyo ashkkarati Sambbata gallassi oottanau higge gidennabaa oottoosona” yaagidosona.

<sup>3</sup> SHin Yesuusi etassi hagaadan yaagiis; “Daawitinne aara de7iyaageeti namisettido wode, Daawiti oottidobaa nabbabibeekketii? <sup>4</sup> Daawiti Xoossaa keettaa gelidi, qeesetu xalaalai maanaappe attin, inne aara de7iyaageeti maanau higge gidennaagaa Xoossaassi yarshshido oittaa miidi, banaara de7iyaageetussikka immiis. <sup>5</sup> Woi Sambbata ubban Beeta Maqidasiyan de7iya qeeseti Sambbataa higgiiyaa mooriyoogaa, qassi menttidi eti borettennaagaa Muuse higgiiyan nabbabibeekketii? <sup>6</sup> SHin taani intteyyo odais; Beeta Maqidasiyaappe aadhdhiyaagee hagan de7ees. <sup>7</sup> Xoossaa maxaafai, “Taani maarotettaa koyaisippe attin, yarshshuwaa koyikke’ giyoogee woigiyoogaakko intte eriyaakko, nagari bainna asa bolli pirddekketa. <sup>8</sup> Aissi giikko, taani, Asa Na7ai, Sambbataa Godaa” yaagiis.

### *Kushee Silido Bitanee Paxiis* (*Marqqoosa 3:1-6; Luqaasa 6:6-11*)

<sup>9</sup> Yesuusi hegaappe denddidi, Aihuda woosa keettaa biis. <sup>10</sup> Hegan kushee gunddido issi bitanee de7ees; Yesuusa mootana koyiya asati, “Sambbatan, pattiyoogee higgee?” yaagidi a oichchidosona.

<sup>11</sup> Oichchin Yesuusi eta, “Intte giddon issi dorssi de7iyo urai, he dorssai Sambbata gallassi aafuwan kunddikko, oiqqidi kessennai oonee? <sup>12</sup> Yaatin, asi dorssappe waani keehi darennee! Hegaa gishshau, Sambbata gallassi lo77obaa oottiyoogee higge” yaagiis. <sup>13</sup> Hegaappe guyyiyan bitaniyaa, “Ne kushiya piddi ootta” yaagin bitanee piddi oottin, a kushee hinkko kushiyaadanka paxi aggiis. <sup>14</sup> SHin Parisaaweti kare kiyidi, Yesuusa waati woranaakko maqettidosona.

### *Xoossai Doorido Ashkkaraa*

<sup>15</sup> SHin Yesuusi eta zoretaa eridi, he sohuwaappe aggidi biishin, daro asai a kaalliis; harggida ubbaa pattiis. <sup>16-17</sup> Xoossai hananabaa yootiya Isiyaasa baggaara giidoogee polettana mala, Yesuusi asatuuyo, “Tabaa hara asassi yootoppite” yaagiis. <sup>18</sup> Xoossai Isiyaasa baggaara hagaadan yaagiis;

“Taani doorido ta ashkkaarai,  
taani siiqiyo, tana ufaissiyaagee hageeho.

Taani ta Ayyaanaa  
a bolli wottana.

I suure pirddaa Aihuda gidenna asa ubbau yootana.

<sup>19</sup> I palamettenna; woi wocamenna.

Ba qaalaakka ogiiyan sissenna.

<sup>20</sup> Suure pirddaa i

xoonissana gakkanaassi,  
dincsettida shombboquwaa menttenna;  
qassi cuwattiya muqaaddaakka i toissenna.

<sup>21</sup> Aihuda gidenna asai ubbai  
an ammanana”  
yaagiis.

*Yesuusabaanne Bi7eeli-Zeebulabaa  
(Marqoosa 3:20-30; Luqaasa 11:14-23)*

<sup>22</sup> Hegaappe guyyiyan, amarida asati xalahee oiqqin duudida issi qooqe bitaniyaa Yesuusakko ehiidosona; Yesuusi he duude bitaniyaa pattidi, haasayissiisinne a aifiyaakka xeelissiisi. <sup>23</sup> Asai ubbai garamettidi, “Laa hagee Daawita na7a gidand-deeshsha?” yaagiis.

<sup>24</sup> SHin Parisaaweti heгаа siyidi, “Ha bitanee xalahetu halaqai Bi7eeli-Zeebuli baayyo wolqqaа immin, xalaheta kessees” yaagidosona.

<sup>25</sup> SHin Yesuusi eta qofaa eridi, eta hagaadan yaagiis; “Ba giddon shaakettiya kawotetta ubbai xayana; qassi ba giddon shaakettiya katamai woi keetta asaikka eqqenna. <sup>26</sup> Qassi Seexaanai Seexaanaa kessiyaabaa gidikko, ba giddon shaakettiis; yaatin, a kawotettai waanidi eqqanee? <sup>27</sup> Tau Bi7eeli-Zeebuli wolqqaа immin, taani xalaheta kessiyaabaa gidikko, intte asau wolqqaа ooni immin xalaheta kessanee? Hegaа gishshau, eti intte bolli pirddana. <sup>28</sup> SHin Xoossaa Geeshsha Ayyaanai tau wolqqaа immin, taani xalaheta kessiyaabaa gidikko, simmi Xoossaa kawotettai inttekkо yiichchiis.

<sup>29</sup> “Woi asi kasetidi, wolqqaama asa qachchennan de7iiddi, a keettaa gelidi, a miishshaa bonqqanau waanidi danddayii? Qachchidoogaappe guyyiyan, a keettaa bonqqana danddayees.

<sup>30</sup> “Ta bagga gidenna urai tabaa ixxees; qassi tanaara issippe shiishshennaagee laalees. <sup>31</sup> Hegaа gishshau, taani intteyyo odais; Xoossai asayyo ai nagara gidinkka, qassi ai cashsha gidinkka atto gaana; shin Geeshsha Ayyaanaа cayidaagaayyo atto geenna. <sup>32</sup> Ta bolli, Asa Na7aa bolli, iitabaa haasayiya o nagaraanne Xoossai atto gaana; shin Geeshsha Ayyaanaа bolli iitabaa haasayiya o nagaraanne sa7an gidin, saluwan gidin, Xoossai atto geenna.

*Lo77o Mittai Ba Aifiyan Erettees  
(Luqaasa 6:43-45)*

<sup>33</sup> “Lo77o aifiyaa demmanau lo77o mittaa dichchana bessees; iita mittaa intte dichchikko, iita aifiyaa demmana; aissi giikko, mittai erettiyoi ba aifiyo aifiyaana. <sup>34</sup> SHooshshatoo, intte iita gidiiddi, waatidi lo77obaa haasayanau danddayeetii? Aissi giikko, doonai wozana giddon kumidabaa haasayees. <sup>35</sup> Lo77o asi ba lo77o minjjaappe lo77obaa kessees; qassi iita asi ba iita minjjaappe iitabaa kessees. <sup>36</sup> Taani intteyyo odais; asi ba haasayido pattenna haasaya ubbau pirddaa gallassi zaaro immana. <sup>37</sup> Aissi giikko, ne haasayai nena xillissana; woi ne haasayai ne bolli pirddana” yaagiis.

*Malaata Oottin Be7anau SHiiqida Oishaa  
(Marqoosa 8:11-12; Luqaasa 11:29-32)*

<sup>38</sup> Hegaappe guyyiyan, higgiiyaa tamarissiya issi issi asatinne Parisaaweti zaaridi Yesuusa, “Tamarissiyaagoo, neeni malaata oottishin, nuuni be7anau koyoos” yaagidosona.

<sup>39</sup> SHin i zaaridi, etayyo hagaadan yaagiis; “Ha wodiyaа asai iitai, Xoossau ammanet-tennaagee, malaata koyees; hananabaa yootiya Yoonaasa malaataappe attin, hara malaati au imettenna. <sup>40</sup> Yoonaasi gita moliyaa uluwan heezzu gallassaanne heezzu qammaa de7idoogaadan, taani, Asa Na7aikka, biitta giddon heezzu gallassaanne heezzu qammaa de7ana. <sup>41</sup> Nanawe asai Yoonaasi yootidoogan bantta nagaraappe simmido gishshau, pirddaa gallassi denddidi, inttena mootana; be7ite, Yoonaasappe aadhdhiyaagee hagan de7ees. <sup>42</sup> Tohossa bagga biittaa kawiyaa Solomona aadhdhida eratettaa siyanau sa7aa gaxaappe yiido gishshau, pirddaa gallassi denddada, inttena mootana; be7ite, Solomonappekka aadhdhiyaagee hagan de7ees.



*Tuna Ayyaanai Asaa Bolli Simmidi Geliyoogaa  
(Luqaasa 11:24-26)*

<sup>43</sup> “Tuna ayyaanai asaappe kiyido wode, baayyo shemppiyoosaa koyiiddi, haatti bainnasaara aadhdhees; shin demmenna. <sup>44</sup> He wode, ‘Taani aggada yiido ta keettaa simmana’ yaagees; simmidi yiyo wode, keettai mela de7iyaagaanne pitetti geeyidi, giigi uttidaagaa demmees. <sup>45</sup> Hegaappe guyyiyan, biidi baappe iitiya laappun hara ayyaanata ehees; he ayyaanati gelidi, hegan de7oosona. He bitaniyaa de7oi kaseegaappe guyyeegee keehi iitees. Ha wodiya iita asaukka qassi hegaadan hanana” yaagiis.

*Yesuusa Aayyiyoonne A Ishantta  
(Marqqoosa 3:31-35; Luqaasa 8:19-21)*

<sup>46</sup> Yesuusi daro asaayyo haasayishin, a aayyiyaanne a ishantti aara haasayanau koyidi, karen eqqidosa. <sup>47</sup> Issoi a, “Ne aayyiyaanne ne ishantti nenaara haasayanau koyidi, karen eqqidosa” yaagiis.

<sup>48</sup> SHin Yesuusi zaaridi, “Ta aayyiya oonee? Ta ishantti oonee?” yaagiis. <sup>49</sup> Ba kushiyan ba erissiyo ashkkaratukko malaatidi, “Be7ite, ta aayyiyaanne ta ishantti hageetihona. <sup>50</sup> Aissi giikko, saluwan de7iya ta Aawai koyiyoobaa oottiya ubbai, ta isha ta michchonne ta aayo” yaagiis.

## 13

*Zeriyaagaa Leemisuwaa  
(Marqqoosa 4:1-9; Luqaasa 8:4-8)*

<sup>1</sup> Yesuusi he gallassi sooppe kiyidi, abbaa lanqqiyan uttiis. <sup>2</sup> Keehi daro asai ba lanqqiyan yuuyi aadhdhidi shiiqettin, wolwoluwaa giddo gelidi uttiis; asai ubbai abbaa lanqqiyan eqqiis. <sup>3</sup> Asaassi leemisuwan darobaa hagaadan yaagidi yootiis; “Issi bitanee zerettaa zerau kiyiis. <sup>4</sup> I zerishin, issi issi zerettai ogiyaa doonan wodhdhiis; wodhdhidaagaa kafoi yiidi miis. <sup>5</sup> Qassi issi issi zerettai guutta biittai de7iyo shuchchaa ancuwaa bolli wodhdhiis; daro biittai baina gishshau, he zerettai sohuwaara mokkiis. <sup>6</sup> SHin awai kiyido wode carshshai shulliis; adussa xaphuwaa yeddibeenna gishshau meli bayiis. <sup>7</sup> Issi issi zerettai aguntta giddon wodhdhiis; wodhdhidi morkkidaagaa agunttai diccidi cuulliis. <sup>8</sup> Issi issi zerettai aradda biittan wodhdhidi mokkiis; issi xeeu aifiyaa, issi usuppun tammaa, issi hasttamaa aifiis. <sup>9</sup> Siyiyo haitti de7iyo urai siyo!” yaagiis.

*Yesuusi Leemisuwan Yootido Gaasuwa  
(Marqqoosa 4:10-12; Luqaasa 8:9-10)*

<sup>10</sup> Erisiyo ashkkarati Yesuusakko shiiqidi, “Neeni aissi etassi leemisuwan odai?” yaagidosona.

<sup>11</sup> Yesuusi zaaridi, etassi hagaadan yaagiis; “Inttessi saluwaa kawotettaa xuuraa erai imettiis; shin etassi imettibeenna. <sup>12</sup> Aissi giikko, de7iyoogau gujettana; au darana; shin bainaagaappe harai atto, he de7iyaageekka ekettiichhana. <sup>13</sup> Taani eti xeelliiddi demmenna gishshaunne siyiiddikka siyenna gishshau, woi qassi eti akeekenna gishshaunne etau leemisuwan odais.

<sup>14</sup> “Isiyaasi etabaa hananabaa yootidoogee polettees; hananabaa yootidoogee haggaa; ‘Intte sissaa siyana;

shin intteyyo gelenna;

intte xeeluwaa xeellana;

shin be7ekketa.

<sup>15</sup> Aissi giikko, ha asaa wozanai dammiis;

bantta haittaa tulissidosona;

bantta aifiyaakka qilimmidosona.  
 Hegee bainnaakko, eti bantta aifiyan be7ana;  
 bantta haittan siyana;  
 bantta wozanankka akeekana;  
 eti taakko, Xoossaakko simmana;  
 taanikka eta pattana, shin attiis'  
 yaagees.

<sup>16</sup> “SHin intte aifee xeelliyo gishshaunne intte haittaikka siyiyo gishshau, intte an-jjettidaageeta. <sup>17</sup> Taani intteyyo tumaa odais; hananabaa yootiya darotinne xilloti intte be7iyooгаа be7anau amottidosona; shin be7ibookkona. Intte siyiyoogaa siyanau amottidosona; shin siyibookkona.

*Yesuusi Zeriyaaгаа Leemisuwaa Birshshettaa Odiis*  
*(Marqoosa 4:13-20; Luqaasa 8:11-15)*

<sup>18</sup> “Simmi kattaa zeriyaagaa leemisuwaa birshshettaa giyoogaa siyite. <sup>19</sup> Kawotettaa qaalaa siyidi, akeekenna ooninne ogiyaa doonan wodhdhida zerettaa mala; xalahe halaqai yiidi, eta wozanan zerettidaagaa maxirggees. <sup>20</sup> SHuchchaa ancoi de7iyo biittan wodhdhida zerettaa qaalaa siyidi, sohuwaara ufaissan ekkiyaageeta milatees. <sup>21</sup> SHin hegee ha77issau de7iyoogaappe attin, aani xaphoi baawa; qaalaa gaasuwan waayee woi yedetai yiyo wode, sohuwaara xubetti aggees. <sup>22</sup> Qassi aguntta gidon wodhdhidaagee qaalaa siyiyaagaa milatees; shin ha sa7aa de7uwau hirggiyoogeenne duretetta siiqiyooгee qaalaa cuullees; cuullin he zerettaa aifennan atti aggees. <sup>23</sup> Aradda biittan zerettidaagee qaalaa siyidi, akeekiya asa milatees; yaatidi aifees; issoi xeetaa, issoi usuppun tammaa issoi hastamaa aifees” yaagiis.

*Zardduwaa Leemisuwaa*

<sup>24</sup> Yesuusi etayyo hara leemisuwaa hagaadan yaagidi odiis; “Saluwaa kawotettaa ba goshshan lo77o zerettaa zerida bitaniyaa milatees. <sup>25</sup> SHin qammi asai xiskkiichchi-daashin, a morkkee yiidi, gisttiyaa zeridoogaa bolli zardduwaa zeridi biis. <sup>26</sup> SHin gisttee morkkidi, aifido wode, zarddoikka a gidon beettiis.

<sup>27</sup> “A ashkkarati akko yiidi, ‘Godau, neeni ne goshshan lo77o zerettaa zerabeikkii? Yaatin, zarddoi auppe yiidee?’ yaagidosona.

<sup>28</sup> “Yaagin Godai, ‘Hegaa morkkee oottiis’ yaagiis.

“Ashkkarati, ‘Nuuni biidi shoddanaagaa dosai?’ yaagidosona.

<sup>29</sup> “SHin i, ‘CHii, zardduwaa intte shoddiiddi, gisttiyaara shoddana. <sup>30</sup> Bochchoppite; cakkiyo wodee gakkanaashin, issippe diccona. Cakkiyo wodee gakkinn, taani cakkiyaageeta, kasetidi zardduwaa maxite; maxidi taman xuugganau mirqqiyan mirqqiyan qachchite; shin gisttiyaa ta gootaran qolite’ gaana” yaagiis.

*Sanaafice Giyo Mittee Zerettaa Leemisuwaa*  
*(Marqoosa 4:30-32; Luqaasa 13:18-19)*

<sup>31</sup> Yesuusi etayyo hara leemisuwaa yaagidi odiis; “Saluwaa kawotettaa sanaafici giyo qii mittee aifiyo milatees; he mittee aifiyo asi ekkidi, ba goshshan zeriis. <sup>32</sup> He zerettiyaa zeretta ubbaappe guuxxausu; shin diccido wode, hara ataakilte ubbaappe gitatausu; kafei yiidi, i tashiyann keexxiyoogaa keena gita mitta gidausu” yaagiis.

*Irshshuwaa Leemisuwaa*  
*(Luqaasa 13:20-21)*

<sup>33</sup> Qassikka Yesuusi hara leemisuwaa etau yaagidi odiis; “Saluwaa kawotettaa issi mishiriyaa heezzu kere xiilliyaa ekkada, munaqqido munaqai ubbai denddana gakkanaassi, aani tigido irshshuwaa milatees” yaagiis.

*Yesuusi Leemisuwan Tamaarissido Gaasuwaa*  
*(Marqoosa 4:33-34)*

<sup>34-35</sup> Yesuusi asau he ubbaa leemisuwan odiis; leemiso i bannan i issibaakka odenna; hananabaa yootiyaagee,  
 “Taani etayyo haasayiyo wode  
 leemisuwan haasayais.  
 Sa7ai merettoosappe doommidi  
 geemmida yohota odais”  
 giidoogee polettana mala, heгаа i odiis.

### *Yesuusi Zardduwaa Leemisuwaa Birshshettaa Odiis*

<sup>36</sup> Hegaappe guyyiyan, Yesuusi asaa yeggi bayidi, soo geliis; erissiyo ashkkarati akko biidi, “Goshshan de7iya zardduwaa leemisuwaa birshshettaa nuuyyo oda” yaagidosona.

<sup>37</sup> Yaagin Yesuusi zaaridi, hagaadan yaagiis; “Lo77o zerettaa zeriyaagee tana Asa Na7aa. <sup>38</sup> Goshshai sa7aa; lo77o zerettaa kawotettaa asaa; zarddoi xalahe halaqaa asaa. <sup>39</sup> Zardduwaa zerida morkkee xalahe halaqaa; cakkiyo wodee, wodiya wurssettaa; qassi cakkiyaageeti kiitanchchata.

<sup>40</sup> “Hegaa gishshau, zardduwaa maxidi, taman xuuggiyoogaadan, wodiya wurssettan heгаа mala gidana. <sup>41</sup> Taani, Asa Na7ai, ta kiitanchchata kiittana; eti ta kawotettaa gidon xube gidiya ubbaanne iitabaa oottiyaageeta shiishshana. <sup>42</sup> Shiishshidi to77enna taman olana; hegaan eti yeekkana; qassi achchaa garccana. <sup>43</sup> He wode xilloti bantta aawaa kawotettan awa aifiyaadan poo7ana. Siyiya haitti de7iyo urai siyo!

### *Moogido Miishshaa Leemisuwaa*

<sup>44</sup> “Saluwaa kawotettaa goshshan moogido miishsha milatees; issi bitanee he miishshaa demmidi, zaarettidi moogiis; daro ufaittiiddi biidi, baayyo de7iyaabaa ubbaa baizzidi, he goshshaa shammiis.

### *Inqquwaa Giyo Daro Al77o SHuchchaa Leemisuwaa*

<sup>45</sup> “Qassi saluwaa kawotettaa inqquwaa giyo daro al77o shuchchaa koyiyya zal77anchchaa milatees. <sup>46</sup> He zal77anchchaa daro al77o inqquwaa demmidi, biidi baayyo de7iyaabaa ubbaa baizzidi, a shammiis.

### *Gitiyaa Leemisuwaa*

<sup>47</sup> “Qassi saluwaa kawotettaa ubba qommo moliyaa oiqqiya abban yeggido gitiyaa milatees. <sup>48</sup> Molee gitiyaa kumido wode, moliyaa oiqqiya asati abbaappe gaxaa kessidi uttidosona; uttidi lo77o moliyaa qoridi, keeshiyan yeggidosona; shin iita moliyaa wora olidosona. <sup>49</sup> Wodiya wurssettan hegaan hanana; kiitanchchati yiidi, nagaranchchata xillotu gidoppe qoridi, <sup>50</sup> to77enna taman olana; hegaan eti yeekkana; qassi achchaa garccana.

<sup>51</sup> “Hagee ubbai intteyyo gelidee?” yaagidi eta oichchiis.

Eti, “Ee” yaagidosona.

<sup>52</sup> Yaagin i, “Hegaa gishshau, saluwaa kawotettan erissiyo ashkara gidida higgiyaa tamarissiya ubbai, ba minjjidosappe ooratta miishshaanne gal77a miishshaa kessiya asa milatees” yaagiis.

### *Naazireeten Yesuusa Ekkennan Ixxidoogaa (Marqqoosa 6:1-6; Luqaasa 4:16-30)*

<sup>53</sup> Yesuusi ha leemisota yootidi wurridoogaappe guyyiyan, hegaappe denddidi, <sup>54</sup> ba yelettido katamaa biis. Biidi Aihuda woosa keettan tamarissiyoogaa siyida asai garamettidi, hagaadan yaagiis; “Hagee ha aadhdhida eratettaanne Xoossai oottiyo malaataa oottanau wolqqaa awappe ekkidee? <sup>55</sup> Hagee anaaxiyaa na7aa gidennee? A aayyiyaa Mairamo gidekke? A ishantti Yaaqoobanne Yooseefa, Simoonanne Yihudaa

gidokkonaayye? <sup>56</sup> A michchenti ubbai nunaara de7okkonaayye? Yaatin, i haggaa ubbaa awappe demmidee?” yaagiis. <sup>57</sup> Eti i giyoobaa ekkennan ixxidosa.

SHin Yesuusi he asaassi, “Hananabaa yootiyaagee ba biittaaanne bantta so asaani bonchchettennaagaappe attin, hara ubbasan bonchchettees” yaagiis. <sup>58</sup> Eti amanibeenna gishshau, Xoossai oottiyo malaataa he sohuwan keehi oottibeenna.

## 14

### *Xammaqiya Yohaannisa Haiquwaa (Marqqoosa 6:14-29; Luqaasa 9:7-9)*

<sup>1</sup> He wode oiddantto biittaa haariya Heeroodisi Yesuusabaa siyiis; <sup>2</sup> siyidi ba ashkkaratussi, “Hagee haiquwaappe denddida Xammaqiya Yohaannisa; Xoossai oottiyo wolqqaama malaataa i oottiyoogee hegaassa” yaagiis.

<sup>3</sup> Aissi giikko, Heeroodisi ba ishaa Piliphphoosa machchee Heeroodiyaadi gaasotaan Yohaannisa oitti qashissidi, qasho keettan yeggi wottiis. <sup>4</sup> Aissi giikko, Yohaannisi Heeroodisa, “Neeni Heeroodiyaado ekkannau bessenna” yaagiis. <sup>5</sup> Heeroodisi Yohaannisa woranau koyiis; shin Yihudaa asai hananabaa yootiya asadan Yohaannisa xeellido gishshau yayyiis.

<sup>6</sup> SHin Heeroodisi yelettido gallassai gakkinn, Heeroodiyaadi na7iyaa asaa sinttan durada Heeroodisa ufaissaasu; <sup>7</sup> ufaissin Heeroodisi na7iyo, “Nena lo77idabaa aibanne gidikko, tana oichcha; taani neessi immana” yaagidi iyyo caaqqiis. <sup>8</sup> Na7iyaa ba aayee zoriyaa ekkada Heeroodisa, “Xammaqiya Yohaannisa huuphiyaa ha soruwan wottada tau imma” yaagaasu. <sup>9</sup> Kawoi au qarettiis; shin ba caaquwaa gishshaunne banaara uttida imattaa gishshau, iyyo immana mala azaziis. <sup>10</sup> Kawoi kiittidi, Yohaannisa qooriyaa qasho keettan muucissiis. <sup>11</sup> Huuphiyaa soruwan wotti ehiidi, na7eessi immidosona; na7iyaa he huuphiyaa ba aayee kko efaasu. <sup>12</sup> Yohaannisi erissiyo ashkkarati yiidi, a haa efiidi moogidosona; moogidi Yesuusau biidi odidosona.

### *Yesuusi Ichchashu SHa7u Asaa Miziiis (Marqqoosa 6:30-44; Luqaasa 9:10-17; Yohaannisa 6:1-14)*

<sup>13</sup> Yesuusi heggaa siyidi, wolwoluwan gelidi, he sohuwaappe barkka asi bannasaa biis; asai heggaa siyidi, katamaappe denddidi, tohuwan a kaalliis. <sup>14</sup> Yesuusi wolwoluwaappe kiyido wode, daro asaa be7idi, he asau qarettiis; yaatidi etaara de7iya hargganchchata pattiis.

<sup>15</sup> Sa7ai omariyo wode, Yesuusi erissiyo ashkkarati Yesuusakko yiidi, “Hagee sohoi asi banna soho; ha77i sa7aikka qammiichchiis; asai ubbai qeeri katamata biidi, bau qumaa shammana mala, asaa yedda” yaagidosona.

<sup>16</sup> SHin Yesuusi eta, “Asai baannau koshshenna; asau miyoobaa intte immite” yaagiis.

<sup>17</sup> Eti zaaridi a, “Nuuyyo haggan ichchashu oittappenne naa77u moleppe attin, hari baawa” yaagidosona.

<sup>18</sup> Yaagin Yesuusi eta, “Hegeeta tau haa ekki ehiite” yaagiis. <sup>19</sup> Asai maatan uttana mala, Yesuusi azaziis; ichchashu oittaaanne naa77u moliyaa oiqqidi, saluwaa pude xeellidi, Xoossaa galatiis; he oittaa menttidi, ba erissiyo ashkkaratussi immin, eti daro asaayyo gishidosona. <sup>20</sup> Asai ubbai miidi kalliis; kallin attida xarzzai tammanne naa77u samppaa kumidaaggaa denttidosona. <sup>21</sup> Miida asai maccaasaanne naata paidennan, ichchashu sha7aa gidiaaggaa keena.

### *Yesuusi Abbaa Bollaara Hemettidi Biis (Marqqoosa 6:45-52; Yohaannisa 6:15-21)*

<sup>22</sup> Yesuusi daro asaa yeddiiddi, ba erissiyo ashkkarati wolwoluwan gelidi, baappe sinttatidi, abbaappe hefintti pinnana mala azaziis. <sup>23</sup> Asaa yeddidi, Xoossaa woossannau deriyaa huuphiyaa barkka kiyiis; sa7ai qammiichchinkka hegan barkka de7ees. <sup>24</sup> SHin

wolwoloi he wode abbaa bollan de7ishin, sintta baggaara carkkoi carkkiyo gishshau, beetai wolwoluwaa sugees.

<sup>25</sup> Baira kuttoi waassi simmin, Yesuusi abbaa bolli hemettiiddi, etakko yiis. <sup>26</sup> Erissiyo ashkkarati abbaa bolli i hemettishin be7idi dagammidi, “Hegee moitille gidennee!” yaagidi yayyidi waassidosona.

<sup>27</sup> SHin Yesuusi sohuwaara eta, “Aikko baawa; tanattennee; yayyoppite” yaagiis.

<sup>28</sup> PHeexiroosi zaaridi a, “Ta Godau, hegee nena gidikko, taani haattaa bollaara neekko baana mala, tana azazarkkii” yaagiis.

<sup>29</sup> Yesuusi PHeexiroosa, “Haa ya” yaagiis.

PHeexiroosi wolwoluwaappe wodhdhidi, haattaa bollaara hemettiiddi, Yesuusakko beettaa doommiis. <sup>30</sup> SHin wolqqaama carkkuwaa be7idi yayyiis; haattai bana mituwaa doommido wode, ba qaalaa xoqqu oottidi, “Ta Godau tana ashsharkkii!” yaagiis.

<sup>31</sup> Sohuwaara Yesuusi ba kushiya yeddidi, PHeexiroosa oiqqidi, “Laa ha ammanoi laafidoogoo! Aissi siradii?” yaagiis.

<sup>32</sup> Eti naa77ai wolwoluwan gelido wode, carkkoi woppu giis. <sup>33</sup> Wolwoluwaa gidдон de7iya erissiyo ashkkarati Yesuusa, “Neeni Xoossaa Na7aa gididoogee tuma” yaagidi au goinnidosona.

### *Yesuusi Genssereexen Hargganchchaa Pattiis (Marqqoosa 6:53-56)*

<sup>34</sup> Eti abbaa pinnidi, Genssereexa giyo biittaa gakkidosona. <sup>35</sup> He biittaa asai Yesuusa eriis; eridi heгаа heera biitta ubbaa kiittidi, harggiya asa ubbaa akko ehiis. <sup>36</sup> Harggiya asai a afalaa macara xalaalaa bochchana mala, a woossiis; macaraa bochchida ubbaikka paxiis.

## 15

### *Aawatu Wogaabaa (Marqqoosa 7:1-13)*

<sup>1</sup> Hegaappe guyyiyan, higgiiyaa tamarissiya issi issi asatinne Parisaaweti Yerusalaameppe Yesuusakko yiidi, <sup>2</sup> “Neeni erissiyo ashkkarati aissi nu aawatu wogaa mooriyoonaa? Aissi giikko, eti qumaa maanaappe kasetidi, bantta kushiya meecettokkona” yaagidosona.

<sup>3</sup> Yesuusi zaaridi, eta hagaadan yaagiis; “Intte intte wogaa gishshau, Xoossaa aza-zuwaa poliyoogaa aissi ixheetii? <sup>4</sup> Aissi giikko Xoossai, ‘Ne aawaanne ne aayyiyo bonchcha’ qassi, ‘Ba aawaa woi ba aayyiyo cayiyaagee haiqqo’ yaagiis. <sup>5-6</sup> SHin intte, ‘Issi asi ba aawaa woi ba aayyiyo maaddiyoobi bau de7in, “Hegee Xoossabaa” giikko, ba aawaa woi ba aayyiyo bonchchanau bessenna’ yaageeta; yaatidi intte intte wogaa polanau Xoossaa qaalaa xaissideta. <sup>7</sup> Ha lo77o milatiya iita asatoo, Isiyaasi balennan inttebau hananabaa yootiiddi,

<sup>8</sup> ‘Xoossai hagaadan yaagiis;

“Hagee asai tana

ba bolla doonan bonchchees;

shin eta wozanai

taappe haahuwan de7ees.

<sup>9</sup> Asai tau mela goinnees;

aissi giikko, asi oottido azazuwaa

Xoossaa higgiiyaa milatissidi

tamarisseees” giis’ yaagiis”

yaagiis.



*Asaa Tunissiyaabata  
(Marqoosa 7:14-23)*

<sup>10</sup> Yesuusi daro asaa baakko xeesidi, “Siyitenne akeekite; <sup>11</sup> asa tunissiyaabai doona giddo geliyaabaa gidenna; shin asa tunissiyaabai doonappe kiyiyaabaa” yaagiis.

<sup>12</sup> Hegaappe guyyiyan, erissiyo ashkkarati akko yiidi, “Parisaaweti neeni haasayidoogaa siyidi, hanqqettidoogaa akeekai?” yaagidosona.

<sup>13</sup> SHin Yesuusi zaaridi, “Saluwan de7iya ta Aawai tokkibeenna mitta ubbai shodetana. <sup>14</sup> Etabau hirgoppite; eti qooqe kaalettiya qooqeta; qooqee qooqe kaalettikko, naa77aikka ollan kunddana” yaagiis.

<sup>15</sup> Yaagin PHeexiroosi zaaridi, “Ha leemisuwaa birshshettaa nuuyyo odarkkii” yaagiis.

<sup>16</sup> Yesuusi eta hagaadan yaagiis; “Intteyyo qassi ha77i gakkanaashinkka gelibeennee?

<sup>17</sup> Doonan geliya ubbai ulo giddo biidi, qassi uloppe gaxi kiyiyooгаа erekketii? <sup>18</sup> SHin doonappe kiyiyaabai wozanappe kiyees; asa tunissiyaabai heгаа malaa. <sup>19</sup> Aissi giikko, wozana giddoppe iita qofai, woriyooгee, shaaramuxiyooгee, qassi shaaramuxanau qaaqqatiyooгee ubbai, wuuqqiyooгee, wordduwaa markkattiyooгee, cashshai kiyees.

<sup>20</sup> Hega milatiyaabai asa tunissiyooгaaappe attin, meeccibeenna kushen miyooгee asa tunissenna” yaagiis.

*Kanaane Asa Gidiya Issi Maccaasee Ammanuwaa  
(Marqoosa 7:24-30)*

<sup>21</sup> Hegaappe guyyiyan, Yesuusi heгаappe aggidi, Xiiroosanne Sidoona giyo katamati de7iyo biitti biis. <sup>22</sup> Kanaane giyo biittaa maccaasa issinniyaa heгаappe Yesuusakko yaada, ba qaalaa xoqqu oottada, “Ta Godau, Daawita na7au, tana maararkkii; ta na7iyo xalahee pala ohetta oiqqiis” yaagaasu.

<sup>23</sup> SHin Yesuusi iyyo qaalanne qaattibeenna; erissiyo ashkkarati akko yiidi, “Ha mishiriyaa nu geeduwaa kaalla kaallada, ba qaalaa xoqqu oottada yootausu; heгаа gishshau, neeni o yeddarkkii” yaagidi woossidosona.

<sup>24</sup> Yesuusi zaaridi, “Taani bayida dorssau, Israa7eela asaa xalaalau kiitettaas” yaagiis.

<sup>25</sup> SHin a yaada, “Ta Godau, tana maaddarkkii!” yaagada au goinnaasu.

<sup>26</sup> Qassi i zaaridi, “Naatu qumaa ekkidi, zairotuyyo oliyooгee lo77o gidenna” yaagiis.

<sup>27</sup> Mishiriyaa, “Ee ta Godau, heгee tuma; shin harai atto zairotikka bantta godati miishin, masoofiyaappe laalettida suuppaa moosonattennee” yaagaasu.

<sup>28</sup> Yaagin Yesuusi zaaridi o, “Ha mishiree, ne ammanoi gita; neeni koyidoogaadan neeyyo hano” yaagiis. I na7iyaa sohuwaarakka paxa aggaasu.

*Yesuusi Daro Hargganchchata Pattiis*

<sup>29</sup> Yesuusi heгаappe denddidi, Galiila Abbaa mati biis; qassi issi deriyaa bolli kiyidi, heگان uttiis. <sup>30</sup> Daro asai wobbeta, qooqeta, quunatanne duudeta, qassi hara darota ekkidi, akko ehiis; ehiidi a matan wottiis. Yesuusi eta pattiis. <sup>31</sup> Hega gishshau, asai duudeti haasayishin, quunati sitti giishin, wobbeti hemettishin, qooqeti xeellishin be7idi garamettidi, Israa7eela asaa Xoossaa galatiis.

*Yesuusi Oiddu SHa7u Asaa Miziis  
(Marqoosa 8:1-10)*

<sup>32</sup> Yesuusi ba erissiyo ashkkarata baakko xeesidi, “Ha daro asai tanaara heezzu gallassi gakkanaassi gam77ido gishshau, taani ha asau qarettais; etau ha77i miyoobi baawa. Qassi eti ogiyan daafuridi kunddena mala, quma mizennan eta mela yeddanaukka koyikke” yaagiis.

<sup>33</sup> Erissiyo ashkkarati zaaridi Yesuusa, “Nuuni ha bazzuwan heгаа keena asaa kalisiya quma auppe demmanee?” yaagidosona.

<sup>34</sup> Qassi Yesuusi eta, “Intteyyo aappun oittai de7ii?” yaagidi oichchiis.

Eti, “Laappun oittainne guutta moletuppe amaridaageeti de7oosona” yaagidosona.

<sup>35</sup> Yesuusi asaa, “Sa7an uttite” yaagiis. <sup>36</sup> Yaagidi he laappun oittaanne moliyaa oiqqidi, Xoossaa galatiis; menttidi erissiyo ashkkaratussi immiis; qassi erissiyo ashkkarati daro asaassi immidosona.

<sup>37</sup> Asai ubbai miidi kalliis; miishin attida laappun sampmaa kumida xarzzaa erissiyo ashkkarati denttidosona. <sup>38</sup> Miida asai maccaasaanne naata paidennan, oiddu sha7u attumaasa. <sup>39</sup> Yesuusi asaa yeddidoogaappe guyyiyan, wolwoluwan gelidi, Magedoona giyo biitti biis.

## 16

### *Malaataa Be7anau Oichchido Oishaa (Marqqoosa 8:11-13; Luqaasa 12:54-56)*

<sup>1</sup> Issi issi Parisaawetinne Saaduqaaweti Yesuusakko yiidi, a paaccanau koyidosona; yaatidi banttana saluwaappe malaata bessana mala woossidosona. <sup>2</sup> SHin Yesuusi zaaridi, eta hagaadan yaagiis; “Sa7ai qammiyo wode intte, ‘Saloi zo77ido gishshau, sa7ai booqallana’ yaageeta; <sup>3</sup> wonttimaatti qassi, ‘Saloi zo77idi gubbanido gishshau, hachchi irai bukkana’ yaageeta; saluwaa xeellidi, sa7ai hananabaa eranau dand-dayeeta; shin ha wodiya malaataa shaakki eranau danddayekketii? <sup>4</sup> Ha wodiya asai iitai, Xoossau ammanettennaagee, malaata koyees; hananabaa yootiya Yoonasa malaataappe attin, hara malaati au imettenna” yaagiis. Yaagidi, eta yeggi bayidi biis.

### *Parisaawetunne Saaduqaawetu Irshshuwaa (Marqqoosa 8:14-21)*

<sup>5</sup> Erissiyo ashkkarati abbaa pinnido wode, qumaa efaanaagaa dogidosona. <sup>6</sup> Yesuusi eta, “Parisaawetu irshshuwaappenne Saaduqaawetu irshshuwaappe inttena eridi naagettite” yaagiis.

<sup>7</sup> Eti bantta gidдон, “I haga giyoogee nuuni qumaa ehibeenna gishshaassa” yaagidi haasayaa doommidosona.

<sup>8</sup> SHin eti giyoogaa Yesuusi eridi, “Ha ammanoi paccidoogeetoo, qumi bainna gishshau, aissi intte gidдон haasayeetii? <sup>9</sup> Ha77ikka intteyyo gelibeennee? Taani ichchashu oittaa ichchashu sha7u asaayyo battidoogaa, qassi intte aappun sampmaa kunttidi denttidaakko hassayekketii? <sup>10</sup> Woi taani laappun oittaa oiddu sha7u asaayyo battidoogaa, qassi intte aappun sampmaa kunttidi denttidaakko hassayekketii? <sup>11</sup> Taani inttena Parisaawetu irshshuwaappenne Saaduqaawetu irshshuwaappe naagettite giyoogaappe attin, oittabaa intteyyo haasayabeennaagaa intte waanidi akeekketii?” yaagiis.

<sup>12</sup> Erissiyo ashkkarati Yesuusi banttau odidoogee, Parisaawetu timirttiyaappenne Saaduqaawetu timirttiyaappe eti naagettanaagaa gididoogaappe attin, oittan tigiyo irshshuwaappe naagettanaagaa gidennaagaa he wode akeekidosona.

### *PHeexiroosa Ammanuwaanne Markkatettaa (Marqqoosa 8:27-30; Luqaasa 9:18-21)*

<sup>13</sup> Yesuusi Piliphphoosi-Qiisaariyaa giyo biittaa gakkido wode, ba erissiyo ashkkarata, “Asai tana, Asa Na7aa oona gii?” yaagidi oichchiis.

<sup>14</sup> Erissiyo ashkkarati zaaridi, “Nena issi issi asai, Xammaqiya Yohaannisa yaagees; harati qassi Eelaasa yaagoosona; qassi baggati Ermmaasa woi hananabaa yootiyaagee-tuppe issuwaa yaagoosona” yaagidosona.

<sup>15</sup> Yaagin Yesuusi eta, “Yaanin intte tana oona geetii?” yaagiis.

<sup>16</sup> Simoon PHeexiroosi zaaridi, “Neni de7o Xoossaa Na7aa Kiristtoosa” yaagiis.

<sup>17</sup> Yesuusi zaaridi, hagaadan yaagiis; “Yoonaa na7aa Simoonaa, haga neessi saluwan de7iya ta Aawai erissidoogaappe attin, asi ooninne nena erissibeenna gishshau, neni

anjettidaagaa. <sup>18</sup> PHeexiroosaa, taani neeyyo odais; neeni shuchcha; taani ha zaallaa bolli ta woosa keettaa keexxana; ta woosa keettaa harai atto, Si7ooliyaa wolqqaikka xoonanau danddayenna. <sup>19</sup> Taani neessi saluwaa kawotettaa qulppiyaa immana; neeni sa7an qachchiyo ubbai saluwan qashetti uttiis; neeni sa7an birshshiyo ubbai saluwanka birshshetti uttiis” yaagiis.

<sup>20</sup> Hegaappe guyyiyan, Kiristtoosa i gididoogaa erissiyo ashkkarati oossinne odenna mala, eta azaziis.

*Yesuusi Bana Gakkana Metuwaabanne Haiquwaabaa Koiro Oduwaa Odiis*  
(*Marqoosa 8:31-33; Luqaasa 9:22-27*)

<sup>21</sup> He wodeppe doommidi Yesuusi, “Taani Yerusalaame bin, tana cimati, qeese ha-laqatinne higgiiyaa tamarissiyaageeti daro waissanau bessees; eti tana woranaunne taani heezzantto gallassi haiquwaappe denddanau bessees” yaagidi, ba erissiyo ashkkaratussi geeshshidi oduwaa doommiis.

<sup>22</sup> PHeexiroosi a issi baggi zaaridi, “Ta Godau, Xoossai nena hegaappe ashsho; hagee ne bolli mulekka yeenna” yaagidi a zoranau doommiis.

<sup>23</sup> SHin Yesuusi guyye simmidi PHeexiroosa, “Ha Seexaanau, neeni ta matappe kichcha; neeni asi dosiyoojaa qoppiyoogaappe attin, Xoossai dosiyoojaa qoppenna gishshau, tau xube gidadasa” yaagiis.

*Yesuusa Kaalliyo Hanotaa*  
(*Marqoosa 8:34-9:1; Luqaasa 9:23-27*)

<sup>24</sup> Hegaappe guyyiyan, Yesuusi ba erissiyo ashkkarata hagaadan yaagiis; “Tana kaallanau koyiia urai de7ikko, bana yeggi bayo; yaatidi ba masqqaliyaa tookkidi, tana kaallo. <sup>25</sup> Aissi giikko, ba shemppuwaa ashshana koyiia urai bashshana; shin ba shemppuwaa ta gishshau bashshiya urai ashshana. <sup>26</sup> Issi urai sa7an de7iya ubbabaa bau shiishshidi, ba shemppuwaa bashshikko, a ai maaddanee? Woi issi urai ba shemppuwaa wozanau ai immana danddayii? <sup>27</sup> Aissi giikko, taani, Asa Na7ai, ta Aawaa bonchchuwan ta kiitanchchatuura yaana hanais; asa ubbau he wode a oosuwaa malaa immana. <sup>28</sup> Taani intteyyo tumaa gais; amarida asati, taani, Asa Na7ai, kawo gidada yiyoogaa be7ana gakkanaassi, haiqqennaageeti hagan de7oosona” yaagiis.

## 17

*Yesuusa Merai Laamettiis*  
(*Marqoosa 19:2-13; Luqaasa 9:28-36*)

<sup>1</sup> Yesuusi usuppun gallasappe guyyiyan, banaara PHeexiroosa, Yaaqoobanne, Yaaqooba ishaa Yohaannisa ekkidi, eta xalaalaa gita deriyaa huuphiyaa kessiis. <sup>2</sup> Qassi eti xeellishin, eta sinttan laamettiis; a som77oi awa aifiyaadan poo7iis; a maayoikka poo7uwaadan booxxiis. <sup>3</sup> Muuseenne Eelaasi Yesuusaara haasayishin, ha heezzu erissiyo ashkkarati be7idosona. <sup>4</sup> PHeexiroosi Yesuusa, “Ta Godau, nuuni hagan de7iyoogee nuussi lo77o; neeni dosikko, nuuni hagan heezzu zamppata issuwaa neessi, issuwaa Muusessi, issuwaa Eelaasassi zamppayana” yaagiis.

<sup>5</sup> I haasayishin, poo7iya shaarai yinne eta gentti aggiis; genttin shaaraappe, “Hagee taani siiqiyo tana ufaissiya ta Na7aa; i giyoogaa siyite” giya qalalai yiis.

<sup>6</sup> Erissiyo ashkkarati he qaalaa siyido wode, daro yayyidi, gufanni wodhdhdidosona. <sup>7</sup> Yesuusi etakko yiidi, eta bochchiis; bochchidi, “Denddite; yayyoppite” yaagiis. <sup>8</sup> Eti xoqqu giidi xeelliyo wode, Yesuusa xalaalaappe attin, hara asa oonanne be7ibookkona.

<sup>9</sup> Eti deriyaappe wodhdhishin, Yesuusi eta, “Taani Asa Na7ai, haiquwaappe denddana gakkanaassi, ha intte be7idoogaa ooyyoonne odoppite” yaagidi azaziis.

<sup>10</sup> Erissiyo ashkkarati Yesuusa, “Yaatin, higgiiyaa tamarissiyaageeti aissi, ‘Eelaasi kasetidi yaanau bessees’ giyoonaa?” yaagidi oichchidosona.

<sup>11</sup> Oichchin i zaaridi yaagiis; “Eelaasi kaseti yiidi, ubbabaa giigissana. <sup>12</sup> SHin taani intteyyo odais; Eelaasi hagaappe kase yiichchiis. Yin asai a ba koyidobaa ubbaa oottidoogaappe attin eribeenna; hegaadankka, qassi tana, Asa Na7aa, asai waissana” yaagiis.

<sup>13</sup> Erissiyo ashkkarati he wode banttau Yesuusi Xammaqiya Yohaannisabaa odiyooгаа akeekidosona.

*Yesuusi Xalahee Oiqqido Na7aa Pattiiis*  
(*Marqqoosa 9:14-29; Luqaasa 9:37-43*)

<sup>14</sup> Eti daro asaakko yiido wode, issi bitanee Yesuusakko yiidi, a sinttan gulbbatidi, <sup>15</sup> “Ta Godau, ta na7aa kaarettai oiqqin, i daro wode taman, qassi daro wode haattan kunddiyo gishshau, i keehi sahettees; a pattarkkii. <sup>16</sup> Ne erissiyo ashkkaratukkokka a ehaas; shin pattanau danddayibookkona” yaagiis.

<sup>17</sup> Yesuusi zaaridi eta, “Ammanenna ha wodiya geella asau! Taani inttenaara aude gakkanaassi de7anee? Qassi inttebaa aude gakkanaassi danddayanee? Na7aa taakko haa ekki yiite” yaagiis. <sup>18</sup> Yesuusi xalahiyaa, “Appe kiya” giidi azazin, xalahee na7aappe kiyi aggiis; sohuwaarakka na7ai paxi bayiis.

<sup>19</sup> Hegaappe guyyiyan, erissiyo ashkkarati banttarkka Yesuusakko yiidi, “Nuuni xalahiyaa kessanau aissi danddayibookkonii?” yaagidosona.

<sup>20</sup> Yaagin Yesuusi eta yaagiis; “Hegee intte ammanoi guuxxido gishshataassa; taani intteyyo tumaa odais; intteyyo sanaafici giyo qii mittee aifee keena ammanoi de7iyaakko, intte ha deriyaa, ‘Hagaappe yaa shiiqa’ yaagiyaakko i shiiqana; intte ai oottanauka danddayana. <sup>21</sup> SHin hгаа malaa woosappenne xoomappe harabai kessanau danddayenna” yaagiis.

*Yesuusi Ba Haiquwaabaa Naa77anttuwaa Odiis*  
(*Marqqoosa 9:30-32; Luqaasa 9:43-45*)

<sup>22</sup> Erissiyo ashkkarati Galiilan, issippe shiiqi uttidaashin, Yesuusi eta, “Tana, Asa Na7aa, asi asau aattidi immana. <sup>23</sup> Asai tana worana; worin taani heezzantto gallassi haiquwaappe denddana” yaagiis. Erissiyo ashkkarati daro qarettidosona.

*Beeta Maqidasiyaa Giiraa Giiriyoogaa*

<sup>24</sup> Yesuusinne erissiyo ashkkarati Qifirinaahooma katamaa yiido wode, Beeta Maqidasiyaassi giiraa ekkiyaageeti PHeexiroosakko yiidi, “Inttena tamarissiyaagee Beeta Maqidasiyaa giiraa giirenee?” yaagidosona.

<sup>25</sup> I zaaridi, “Giirees” yaagiis.

PHeexiroosi soo gelido wode, Yesuusi kasetidi a, “Simoonaa, ne qofai aibee? Ha sa7aa kawoti qaraxaa woi giiraa ooppe ekkiyoonaa? Bantta biittaa asaappe ekkiyoonaa?” yaagiis.

<sup>26</sup> Yaagin PHeexiroosi, “Hara biittaa asaappe ekkoosona” yaagiis.

Yesuusi PHeexiroosa, “Yaatikko, biittaa asai giiranau bessenna. <sup>27</sup> SHin nuuni ha asata hanqetissanau koyokko; neeni abbaa baada aani piriya yegga; yaatada koiro kiyiya moliyaa oiqqada, a doonaa pooqqiyo wode, giirau gidiya miishshaa neeni demmana. Hгаа ekkada, ta giiraanne ne giiraa etau qanxxa” yaagiis.

## 18

*Ubbaappe Aadhdhiyaagee Oonee?*  
(*Marqqoosa 9:33-37; Luqaasa 9:46-48*)

<sup>1</sup> Erissiyo ashkkarati Yesuusakko he wode yiidi, “Saluwaa kawotettan ubbaappe aadhdhiyaagee oonee?” yaagidosona.

<sup>2</sup> Yaagin Yesuusi issi guutta na7aa xeesidi, eta gidдон essidi, hagaadan yaagiis;

<sup>3</sup> “Taani intteyyo tumaa odais; Xoossaakko intte simmidi, guutta naatudan hanana

xayikko, saluwaa kawotettaa mulekka gelanau danddayekketa. <sup>4</sup> Simmi ha guutta na7aadan, bana kaushshiya ooninne saluwaa kawotettan ubbaappe aadhdhiyaagaa. <sup>5</sup> Qassi haggaa mala na7a ta sunttan mokkiya ooninne tana mokkees. <sup>6</sup> SHin tana ammaniya ha guutta naatuppe issuwaa balettiya ooninne, gaacciyo wogga woxaa ba qooriyan qachchidi, ciimma abban mitettiyoogee au keha.

### *Xubiyaassi Gaaso Gidiyaabaa*

*(Marqqoosa 9:42-48; Luqaasa 17:1-2)*

<sup>7</sup> “Sa7ai asaa xubbiyo gishshau, sa7aayyo aayye7ana; aissi giikko, xubbiyaabai yuussaa aggenna; shin xubee a gaasotan yiyo uraayyo aayye7ana.

<sup>8</sup> “Ne kushee woi ne tohoi nena balettikko, neeppe qanxxa ola; neeni naa77u kushiyaaranne naa77u tohuwaara merinaa taman olettanaagaappe wobbe woi duuxa kushiyaara merinaa de7uwaa geliyoogee neeyyo keha. <sup>9</sup> Qassi ne aifee nena balettikko, neeppe wooca ola; neeni naa77u aifiyaara Gaannabiyaa taman olettanaagaappe issi aifiyaara merinaa de7uwaa geliyoogee neeyyo keha.

<sup>10</sup> “Intte ha guuttatuppe issuwaanne karenna mala, inttena naagite; aissi giikko, taani intteyyo odais; saluwan eta kiitanchchati ubba wode, saluwan de7iya ta Aawaa sinttan de7oosona. <sup>11</sup> Aissi giikko, taani, Asa Na7ai, bayidaagaa ashshanau yaas.

### *Bayida Dorssaa Leemisuwaa*

*(Luqaasa 15:3-7)*

<sup>12</sup> “Issi asayyo xee tu dorssati de7iyaageetuppe issoi bayikko, uddufun tammanne uddufunaa deriyan yeggi bayidi, he bayidaagaa koyanau beennee? Intte woigetii?

<sup>13</sup> Taani intteyyo tumaa gais; i demmikko, bayibeenna uddufun tammanne uddufun dorssatuppe aattidi, he issi dorssan ufaittees. <sup>14</sup> Hegaadankka, saluwan de7iya intte Aawai ha guuttatuppe issoi bayyanaagaakka koyenna.

### *Moorida Asassi Oottanau Bessiyaabaa*

<sup>15</sup> “Ne ishahi nena naaqqikko, nerikka akko baada, a mooruwaa au yoota; i nebaa siyikko, ne ishahi balaappe zaaradasa. <sup>16</sup> SHin i nebaa siyennan ixkikko, naa77u woi heezzu markkai markkattidoogan yoho ubbai tumattiyo gishshau, hara issi woi naa77u asa nenaara ekka efa. <sup>17</sup> I etabaa siyennan ixkikko, ubbabaa woosa keettaassi oda; qassi woosa keettaa giyoogaakka i siyennan ixkikko, ammanenna asadaaninne giiraa ekkiya asadan a paida.

<sup>18</sup> “Taani intteyyo tumaa gais; sa7an intte qachchiyo ubbai saluwankka qashetti uttiis; qassi sa7an intte birshshiyo ubbai saluwankka birshshetti uttiis.

<sup>19</sup> “Qassikka taani intteyyo odais; intteppe naa77u urai sa7an Xoossaa woossiyooban aibiinne maayettikko, saluwan de7iya ta Aawai heggaa intteyyo immana. <sup>20</sup> Aissi giikko, naa77u urai woi heezzu urai ta sunttan shiiqiyoosan, taani hegan eta gidduwan de7ais” yaagiis.

### *Atto Giyoogaa*

<sup>21</sup> PHeexiroosi he wode Yesuusakko yiidi, “Godau, ta ishahi tana aapputoo naaqqikko taani ayyo atto gaanau bessii? Laappunto gakkanaassi naaqqiineeyye?” yaagidi a oichchiis.

<sup>22</sup> Yesuusi zaaridi a, “Chii, taani nena laappun tammutoo laappunto gaisippe attin, laappunto giikke.

<sup>23</sup> “Aissi giikko, saluwaa kawotettaa ba ashkkaratuura miishshaa qoodettanau qop-pida kawuwaa milatees. <sup>24</sup> He kawoi miishshaa qoodettanau doommido wode, daro sha7u paundde acoi de7iyoo issi bitaniyaa akko ehiidosona. <sup>25</sup> SHin he ashkkarau acuwaa qanxxiyoobai xayin, a godai he acuwaa qanxxanau, a machchiyaanne inne a naati, qassi au de7iya ubbabai baizettana mala, a azaziis. <sup>26</sup> Heggaa gishshau, ashkkarai



ba godaa sinttan gulbbatidi, ‘Ta godau, hai nanggashsharkkii; taani neeyyo ubbabaakka qanxxana’ yaagidi a woossiis. <sup>27</sup> Woossin a godai au qarettidi, a yeddi bayiis; a acuwaakka ayyo maari aggiis.

<sup>28</sup> “SHin he ashkkarai kiyidi, ba lagge ashkkaratuppe issoi baappe ishatamu bira gidiyaagaa tal77idaagaara gaittidi, ‘Ne bolli de7iya ta miishshaa qanxxa’ yaagi oiqqidi, a cuulliis.

<sup>29</sup> “Cuullin he a lagge ashkkarai a sinttan gulbbatidi, ‘Hai nanggashsharkkii; taani neeyyo ubbabaakka qanxxana’ yaagidi a woossiis.

<sup>30</sup> “SHin ixxidi ekki efidi, a laggee he acuwaa qanxxana gakkanaashin, qasho keettaa gelissiis. <sup>31</sup> Hegaa gishshau, a lagge ashkkarati heгаа be7idi, daro yiillotidosona; bantta godaakko biidi, i oottido ubbabaa au odidosona.

<sup>32</sup> “Hegaappe guyyiyan, godai he ashkkaraa xeesidi, ‘Ha iita ashkkarau, neeni tana woossido gishshau, taani he aco ubbaa neeyyo maara aggaas. <sup>33</sup> Taani neeyyo he acuwaa maaridoogaadan, neenikka ne lagge ashkkarau maaranau bessennee?’ yaaggiis. <sup>34</sup> Yaagidi a daro hanqqettidi, ba acuwaa ubbaa i qanxxana gakkanaashin, paxa kaa7ettana mala, qasho keettaa gelissiis.

<sup>35</sup> “Intte huuphiyan huuphiyan intte ishau wozanappe atto gaana xayikko, he godai ba ashkkaraa oottidoogaadan, saluwan de7iya ta Aawaikka inttena hegaadan oottana” yaaggiis.

## 19

### *Yesuusi Geluwaa Ehuwaabaa Tamaariisiiis* (Marqqoosa 10:1-12)

<sup>1</sup> Yesuusi he haasayaa wurssidoogaappe guyyiyan, Galiilappe denddidi, Yord-daanoosa SHaafaappe hefinttan de7iya Yihudaa biittaa biis. <sup>2</sup> Daro asai a kaallidi biidaagaa hegan pattiis.

<sup>3</sup> Issi issi Parisaaweti paaccanau Yesuusakko yiidi, “Issi asi issiban gaasottidi, ba machchiyo yeddana nu higgee azazii?” yaagidi a oichchidosona.

<sup>4</sup> Oichchin Yesuusi zaaridi, hagaadan yaaggiis; “Xoossai koiro eta medhdhiiddi, atumaasanne maccaasa oottiis. <sup>5</sup> Hegaa gishshau, ‘Issi asi ba aawaanne ba aayyiyo aggi bayidi, ba machcheera issippe de7ees; eti naa77ai issi asa gidoosona’ yaagiya qaala nabbabibeekketii? <sup>6</sup> Hegaa gishshau, eti issi asa gidiyoogaappe attin, naa77u asa gidokkona; heгаа gishshau, Xoossai issippe gattidoogaa asi shaakkoppo” yaaggiis.

<sup>7</sup> Parisaaweti Yesuusa, “Yaatin, Muusee aissi issi urai ba machcheeyyo paramaa immidi yeddana mala azazidee?” yaagidosona.

<sup>8</sup> Yesuusi zaaridi, “Intte intte maccaasaa yeddana mala, Muusee inttena azazidoogee, intte yootin siyennaageeta gidido gishshaassappe attin, koiro heгаа mala gidenna. <sup>9</sup> Taani intteyyo odais; ba machchiyo shaaramuxennan de7ishin yeddidi, haranno ekkiya ooninne shaaramuxees; harai yeddidooro ekkiyaageekka shaaramuxees” yaaggiis.

<sup>10</sup> Erisiyo ashkkarati a, “Azina giddooninne machchi gidдон de7iya wogai heгаа mala gidikko, ekkennaaninne gelennan de7iyoogee keha” yaagidosona.

<sup>11</sup> SHin Yesuusi eta yaaggiis; “Hagaa mala timirttee Xoossai immidoogeetussappe attin, asa ubbaassa gidenna; <sup>12</sup> aissi giikko, bantta aayee uluwaappe yelettiyo wodekka, atumatetti bannan yelettidaageeti de7oosona; qassi asi qaaratidoogeetikka de7oosona; qassi saluwaa kawotettaa gishshau, banttana qaaratidaageeti de7oosona; ha timirtiyaa eranau danddayiya ooninne ero” yaaggiis.

### *Yesuusi Guutta Naatu Bolli Ba Kushiyaa Wottiis* (Marqqoosa 10:13-16; Luqaasa 18:15-17)

<sup>13</sup> Yesuusi he wode ba kushiya guutta naatu bolli wottidi, Xoossaa woossana mala, issi issi asai naata akko ehiis; shin erissiyo ashkkarati he asaa hanqqettidosona. <sup>14</sup> SHin Yesuusi, “Guutta naati taakko yiyoogaa diggoppite; aissi giikko, saluwaa kawotetta hageetu malaassa” yaagiis.

<sup>15</sup> Yaagidi ba kushiya eta bolli wottidoogaappe guyyiyan, hegaappe aggi bayidi biis.

### *Yelaga, Dure Bitaniyaa Oishaa*

*(Marqoosa 10:17-31; Luqaasa 18:18-30)*

<sup>16</sup> Issi bitanee Yesuusakko yiidi, “Tamaarissiyaagoo, taani merinaa de7uwaa demmanau lo77obaa ai oottoo?” yaagiis.

<sup>17</sup> Yesuusi a, “Lo77obai aibakko tana aissi oichchai? Issuwaa xalaalai lo77o; shin neeni merinau de7anau koyikko, azazota naaga” yaagiis.

<sup>18</sup> Bitanee, “Augeeta?” yaagidi oichchiis.

Oichchin Yesuusi zaaridi, “Woroppa; shaaramuxoppa; wuuqqoppa; worddo markkattoppa; <sup>19</sup> ne aawaanne ne aayyiyo bonchcha; ne shooruwaakka ne huuphedan siiqa” yaagiis.

<sup>20</sup> He yelaga bitanee Yesuusa, “Taani heгаа ubbaakka guutta naatettaasappe doom-mada naagaas; yaatin, tau pacciyaabi aibee?” yaagiis.

<sup>21</sup> Yesuusi bitaniyaa, “Neeni polida asa gidanau koyikko, baada neeyyo de7iyaabaa baizzada, he miishshaa hiyyeesau imma; neeni saluwan duretana; yaatada yaada tana kaalla” yaagiis.

<sup>22</sup> SHin he yelaga bitanee heгаа siyido wode, i daro dure gidiyo gishshau, qarettiiddi aggi bayidi biis.

<sup>23</sup> Yesuusi ba erissiyo ashkkaratussi, “Taani intteyyo tumaa gais; dure asi saluwaa kawotettaa gelanaagee daro meto gidana. <sup>24</sup> Taani gujjad akka intteyyo odais; dure asi Xoossaa kawotettaa gelanaagaappe, gaameelai marppiyaa xoo7iyaara aadhdhanaagee matattees” yaagiis.

<sup>25</sup> Erissiyo ashkkarati heгаа siyidi garamettidi, “Yaatin, ooni attanau danddayii?” yaagidosona.

<sup>26</sup> Yesuusi eta tishshi ootti xeellidi, “Hagee asau danddayettenna; shin Xoossau ubbabai danddayettees” yaagiis.

<sup>27</sup> PHeexiroosi he wode zaaridi Yesuusa, “Be7a, nuuni nuuyyo de7iya ubbabaa aggi bayidi, nena kaallida; yaatidi nuuni ai demmaneeshsha?” yaagiis.

<sup>28</sup> Yaagin Yesuusi eta hagaadan yaagiis; “Taani intteyyo tumaa gais; taani, Asa Na7ai, ooratta biittan ta kawotaa araatan uttiyo wode, tana kaallida intteikka tammanne naa77u Israa7eela zaretu bolli pirddanau, tammanne naa77u kawotaa araatan uttana.

<sup>29</sup> Ta sunntaa gishshau, keettata woi ishantta woi michchentta, woi aawaa woi aayyiyo woi machchiyo, woi naata woi gadiyaa aggida ooninne, xeetu kushiyaappe dichchaa ekkana; qassi merinaa de7uwaakka laattana. <sup>30</sup> SHin daroti ha77i sinttan de7iyaageeti guyye aadhdhana; qassi daroti ha77i guyyen de7iyaageeti sinttau aadhdhana.

## 20

### *Woiniyaa Turaa Giddon Oottiya Oosanchchatu Leemisuwaa*

<sup>1</sup> “Saluwaa kawotetta woiniyaa giyo turaa gidduwaa oosanchchata keraa ootissanau, maallado guuraara kiyida woiniyaa turaa godaa milatees. <sup>2</sup> I he oosanchchatuyyo hachchi hachchi issi shilingge qanxxanau etaara giigidi, ba woiniyaa turaa gidduwaa ootissanau eta yeddiis.

<sup>3</sup> “Qassi heezzu saate gidishin kiyidi, oosoi bannan qocan eqqida hara asata be7idi, <sup>4</sup> eta, ‘Intteikka qassi ta woiniyaa turaa gidduwaa oottanau biite; taani intteyyo bessiya waagaa qanxxana’ yaagiis; yaagin eti biidosona. <sup>5</sup> Naa77anttuwaakka usuppun

saatiyaaninne uddufun saatiyan kiyidi, hegaadan oottiis. <sup>6</sup> Tammanne isiini saatiyan i kiyiyo wode, harati hegan eqqidaageeta demmidi, ‘Ooso oottennan kumetta gallassaa hagan aissi eqqi pe7idetii?’ yaagiis.

<sup>7</sup> “Yaagin eti, ‘Nuna ootissiya asi xayido gishshau eqqi pe7ida’ yaagidosona.

‘I, ‘Inttekka qassi ta woiniyaa turaa gidduwaa oottanau biite’ yaagiis.

<sup>8</sup> “Sa7ai omariyo wode, woiniyaa turaa godai oosanchchatu halaqaa, ‘Oosanchchata xeesada, wurssettan oosuwan gelidaageetuppe doommada koiro gelidaageeta gakkanaassi, eta damoozaa qanxxa’ yaagiis.

<sup>9</sup> “Tammanne isiinintta saatiyan oosuwaa doommidaageeti yiidi, huuphiyan huuphiyan issi issi shilinggiyaa ekkidosona. <sup>10</sup> Koiro oosuwaa doommida asati yiido wode, daruwaa ekkanau qoppidosona; shin etikka huuphiyan huuphiyan issi issi shilinggiyaa ekkidosona. <sup>11-12</sup> Ekkidi, ‘Ha guyyeppe yiidaageeti issi saate xalaalaa oottidosona; kumetta gallassaa daafuraanne hombbiyaa ekkida nuugaara eta damoozaa lagge oot-tadasa’ yaagidi banttana oosuwan gelissidaagaa bolli zuuzummidosona.

<sup>13</sup> “SHin i etappe issuwaa hagaadan yaagiis; ‘Ta jaalau, taani nena naaqqabeikke; issi shilinggiyan tanaara giigabeikkiiyye? <sup>14</sup> Neegaa ekkada ba; taani ha wurssettan oosuwan gelidaagaassikka neegaa keenaa immanau koyais. <sup>15</sup> Taani ta miishshan ta koyidobaa oottanau tau maati baawee? Woi taani keha gidido gishshau, neeni qanaatai?’ yaagiis.

<sup>16</sup> “Hegaadankka, qassi guyyeegeeti sinttau aadhdhana; sinttaageeti guyye aadhdhana; aissi giikko, xeesettidaageeti daro; shin doorettidaageeti guutta” yaagiis.

### *Yesuusi Ba Haiquwaabaa Heezzanttuwaa Odiis*

*(Marqqoosa 10:32-34; Luqaasa 18:31-34)*

<sup>17</sup> Yesuusi Yerusalaame biiddi, ogiyan banaara biya tammanne naa77u erissiyo ashkharata gaxaa kessidi, dumma etassi yaagiis. <sup>18</sup> “Be7ite, nuuni Yerusalaame ha77i kiyeettes. Yaani tana, Asa Na7aa qeese halaqatussinne higgiiyaa tamarissiyaageetussi aattidi immana; eti ta bolli haiqo pirddaa pirddana. <sup>19</sup> Qassi Aihuda gidenna asaassikka tana aattidi immana; he Aihuda gidenna asai ta bolli qilliiccananne tana lissuwan garafana; yaatidi masqqaliyaa bolli misimaariyan xishidi, tana kaqqana; kaqqin taani heezzantto gallassi haiquwaappe denddana” yaagiis.

### *Zabddiyoosa Naatu Aayee Woosaa*

*(Marqqoosa 10:35-45)*

<sup>20</sup> He wode Zabddiyoosa naatu aayiyaa ba naatuura Yesuusakko yaasu; yaada a sinttan gulbbatada issibaa a woossaasu.

<sup>21</sup> Yesuusi o, “Ai koyai?” yaagidi oichchiis.

A zaarada, “Ha ta naa77u naati ne kawotettan issoi neeppe ushachcha baggaara, qassi issoi neeppe haddirssa baggaara uttona garkkii” yaagada woossaasu.

<sup>22</sup> SHin Yesuusi zaaridi naata, “Intte ai woossiyaakko erekketa; taani uyana burcukkuwaappe uyanaunne taani xammaqettana xinqqatiyaa xammaqettanau dand-dayeetii?” yaagiis.

Yaagin eti, “Ee danddayoos” yaagidosona.

<sup>23</sup> Yesuusi, “Taani uyiyo burcukkuwaappe tumakka intte uyana; shin taappe ushachcha baggaaranne haddirssa baggaara uttanaageeta dooranau taayyo maati baawa; shin he sohoi ta Aawai immanau giigissi wottidoogeetussa” yaagiis.

<sup>24</sup> Hankko tammu erissiyo ashkharati heгаа siyido wode, he naa77u ishannta hanqqettidosona. <sup>25</sup> SHin Yesuusi eta ubbaa baakko xeesidi, hagaadan yaagiis; “Aihuda gidennaageetu halaqatinne hegeeta kaalettiya asati bantta asaa haariyoogaa ereeta. <sup>26</sup> Intte giddon heгаа mala gidenna; shin intte giddon gitatana koyiya ooninne intteyyo ashkara gidanau bessees. <sup>27</sup> Qassi intte giddon ubbaappe bolla gidana koyiyai ooninne

intteyyo aille gidanau bessees. <sup>28</sup> Hegaadan taani, Asa Na7ai, asaayyo oottanaunne daro asaa wozanau ta shemppuwaa immanau yiidoogaappe attin, asi tau oottanau yabeikke” yaagiis.

*Yesuusi Naa77u Qooqeta Pattiis*  
(*Marqqoosa 10:46-52; Luqaasa 18:35-43*)

<sup>29</sup> Yesuusinne erissiyo ashkkarati Yarkkoppe kiyishin, daro asai eta kaalliis. <sup>30</sup> Naa77u qooqe asati ogiyaa doonan uttidaageeti Yesuusi hegaara aadhhiyoogaa siyidi, bantta qaalaa xoqqu oottidi, “Godau, Daawita na7au, nuna maararkkii” yaagidosona.

<sup>31</sup> Daro asai eta, “Haizzite” giidi hanqqettiis; shin eti bantta qaalaa keehi xoqqu oottidi, “Godau, Daawita na7au, nuna maararkkii!” yaagidosona.

<sup>32</sup> Yesuusi ogiyan eqqidi, eta xeesiis; xeesidi, “Taani intteyyo ai oottanau koyeetii?” yaagiis.

<sup>33</sup> Qooqeti, “Godau, nu aifiyaa pattarkkii” yaagidosona.

<sup>34</sup> Yesuusi etau qarettidi, eta aifiyaa bochchiis; sohuwaarakka eta aifee xeelli aggin, a kaalli bayidosona.

## 21

*Yesuusi Gita Bonchchuwan Yerusalaame Geliis*  
(*Marqqoosa 11:1-11; Luqaasa 19:28-40; Yohaannisa 12:12-19*)

<sup>1</sup> Eti Yerusalaame matidi, Dabira Zaitte giyo deriyaa lanqqiyan de7iya Beetafaage giyo qeeri katamaa gakkidosona; Yesuusi erissiyo ashkkaratuppe naa77aa sinttau kiittidi, <sup>2</sup> eta hagaadan yaagiis; “Intteppe sinttan de7iya qeeri katamaa biite; biidi issi hariyaa qashuwan de7iyaaro i maraara intte sohuwaara demmana; eta birshshidi, tau ekki yiite. <sup>3</sup> Ooninne inttena oichchikko, ‘Godai hageeta koyees’ yaagite; sohuwaarakka i eta yeddi bayana. <sup>4-5</sup> Hananabaa yootiyaagee,

“Xiyooone katamau,

‘Be7a, ne kawoi ashkke gididi,

hariyaa bolli, hare maraa bolli uttidi,

neekko yees’ yaagite”

yaagidi haasayidoogee polettana mala, hagee haniis.

<sup>6</sup> Erissiyo ashkkarati biidi, Yesuusi banttana azazidoogaadan oottidosona.

<sup>7</sup> Hariyoonne hare maraa ehiidi, bantta maayuwaa eta zokkuwan hiixxidosona;

hiixxin Yesuusi toggiiis. <sup>8</sup> He daro asaappe dariya baggai ba maayuwaa ogiyan hiixxiis;

qassi harati mittaa tashiyaa kari karidi, ogiyan hiixxidosona. <sup>9</sup> Yesuusappe sinttaara

hemettiya daro asainne qassi a geeduwaa kaalliya daro asai, ba qaalaa xoqqu oottidi,

“Daawita na7ai galatetto!

Godaa sunttan yiyaagee anjjettidaagaa!

Xoossai galatetto!” yaagiis.

<sup>10</sup> Yesuusi Yerusalaame katamaa gelido wode, kataman de7iya asai ubbai, “Hagee oonee?” yaagidi shabbirettiis.

<sup>11</sup> Asai, “Hagee Galiilan de7iya Naazireeta giyo katamaappe yiida hananabaa yootiya Yesuusa” yaagiis.

*Yesuusi Beeta Maqidasiyaa Geliis*  
(*Marqqoosa 11:15-19; Luqaasa 19:45-48; Yohaannisa 2:13-22*)

<sup>12</sup> Yesuusi Beeta Maqidasiyaa gelidi, hegan baizziyaageetanne shammiyaageeta ubbaa kare yedettiis; qassi miishshaa laammiyaageetu xaraphpheezaanne haraphphiya baizziyaageetu oidiyaa aatti yeggidi, <sup>13</sup> eta, “Xoossaa maxaafan, ‘Ta keetta Xoossaa woossiyo keetta geetettana’ yaagettidi xaafetti uttiis; shin intte a panggati qosettiyo gonggolo kesseeta” yaagiis.

<sup>14</sup> Qooqetinne tohoi silidoogeeti Yesuusakko Beeta Maqidasiyaa yin, i eta pattiis. <sup>15</sup> SHin qeese halaqatinne higgiiyaa tamaarissiyaageeti Yesuusi oottiyo ooratabaa be7ido wodenne, guutta naati Beeta Maqidasiyan bantta qaalaa xoqqu oottidi, “Daawita na7ai galatetto” yaagiyooгаа be7ido wode hanqqettidosona.

<sup>16</sup> Hanqqettidi Yesuusa, “Hageeti giyoogaa siyai?” yaagidosona.

Yesuusi, “Ee siyais; Xoossaa maxaafai, ‘Guutta naatinne xammiya naati nena galatana mala, eta erissadasa’ yaagiyaagaa mulekka nabbabibeekketii?” yaagiis. <sup>17</sup> Yesuusi eta aggi bayidi, he katamaappe Biitaaniyaa giyo katamaa biidi, yaani aqiis.

*Aifee Xayido Balase Mittiyo*  
(*Marqqoosa 11:12-14, 20-24*)

<sup>18</sup> Yesuusi maallado katamaa simmidi yiidi namisettiis. <sup>19</sup> Ogiyaa doonan issi balase giyo mittiyo be7idi, ikko biis; biidi he balasen haitta xalaalappe attin, aife ainne demmibeenna; o, “Naa77anttuwaa merinaukka aifoppa” yaagin, he balasiyaa sohuwaara mela aggaasu.

<sup>20</sup> Erissiyo ashkkarati heгаа be7idi garamettidi, “Ha balasiyaa waanada issi kuttan mela aggadee?” yaagidosona.

<sup>21</sup> Yesuusi zaaridi, “Taani intteyyo tumaa gais; intte ammanoi de7iyoogetanne sirennaageeta gidikko, ha balasiyo taani oottidoogaa mala xalaalaa oottekketa; shin harai atto intte ha deriyaa, ‘Denddada abban kundda’ giikkokka hanana; <sup>22</sup> intte ammanidi Xoossaa woossiyoobaa aiba gidikkokka ekkana” yaagiis.

*Yesuusa Alaafetettai Yiidosaa*  
(*Marqqoosa 11:27-33; Luqaasa 20:1-8*)

<sup>23</sup> Yesuusi Beeta Maqidasiyaa yiidi tamaarissishin, qeese halaqatinne Aihuda cimati akko yiidi, “Neeni haggaa oottanau neeyyo ai alaafetetti de7ii? Neeyyo ha alaafetettaa oonee immidai?” yaagidosona.

<sup>24</sup> Yesuusi zaaridi eta, “Taanikka inttena issibaa oichchana; intte tau heгаа odikko, taani haggaa ai alaafetettan oottiyaakko, intteyyo odana; <sup>25</sup> Yohaannisi xammaqiyo alaafetettai awappe yiidee? Xoossaappe yiideeyye asappe yiidee?” yaagiis.

Eti bantta giddon palamaa doommidi, “Nuuni, ‘Xoossaappe yiis’ yaagikko i nuna, ‘Yaatin, Yohaannisi yootidoogaa aissi ammanibeekketii?’ yaagana. <sup>26</sup> SHin nuuni, ‘Asappe yiis’ yaagikko, asai ubbai Yohaannisi hananabaa yootiyaagaa gididoogaa eriyoo gishshau, asau yayyoos” yaagidosona. <sup>27</sup> Eti Yesuusayyo, “Nuuni erokko” yaagidi zaaridosona.

Yesuusi, “Taanikka haggaa ai alaafetettan oottiyaakko, intteyyo odikke” yaagiis.

*Naa77u Naatu Leemisuwaa*

<sup>28</sup> “SHin intte ai qoppeetii? Naa77u naati de7iyo issi bitanee de7ees; he bitanee baira na7aakko biidi, ‘Ta na7au, hachchi baada ta woiniyaa turaa ootta’ yaagiis. <sup>29</sup> Na7ai zaaridi, ‘Ixxaas’ giis; shin guyyeppe ba wozanan qoppi ekkidi, woiniyaa turaa oottanau biis. <sup>30</sup> Aawai hinkko na7aakko biidi, bairau giidoogaadankka au giis; kaalo na7ai zaaridi, ‘Ero ta godau’ yaagiis; shin bibeenna. <sup>31</sup> Ha naa77u naatuppe ba aawai koyidoogaa oottidaagee augee?” yaagiis.

Yaagin eti, “Bairaa” yaagidosona.

Yesuusi eta hagaadan yaagiis; “Taani intteyyo tumaa gais; giiraa ekkiyaageetinne shaaramuxati intteppe sinttatidi, Xoossaa kawotettaa gelana. <sup>32</sup> Aissi giikko, Xammaqiya Yohaannisi xillotettaa ogiyaa tamaarissiiddi, inttekketa yin, i giyoogaa ammanibeekketa. SHin giiraa ekkiyaageetinne shaaramuxati i giyoogaa ammanidosona; intte harai atto heгаа be7idikka, intte nagaraappe simmidi, i giyoogaa ammanibeekketa” yaagiis.



*Woiniyaa Turaa Giddon Oottiya Goshshanchchatu Leemisuwaa  
(Marqqaosa 12:1-12; Luqaasa 20:9-19)*

<sup>33</sup> Qassikka Yesuusi hagaadan yaagiis; “Hara leemisuwaakka siyite; woiniyaa giyo turaa tokkida issi bitanee de7ees; woiniyaa turaa yuushshi aattidi diriis; qassi he woiniyaa gum77iyo ollaakka bookkiis; heгаа naagiya asaayyo adussa shuchchaa gimb-biis. Hegaappe guyyiyan, kottaa oottiya asau immidi, hara dere biis. <sup>34</sup> Woiniyaa aifiyaa maxiyo wodee gakkin, bana gakkiiyaagaa ekkidi yaana mala, ba ashkkarata ba kottaawatukko kiittiis. <sup>35</sup> Kottaawati a ashkkarata oiqqidi, issuwaa wadhdhdidosona; issuwaa woridi, qassi hinkkuwaa shuchchan caddidosona. <sup>36</sup> Qassikka he bitanee kaseegetuppe dariya hara ashkkarata kiittiis; kottaawati he ashkkaratakka kaseegetudan oottidosona.

<sup>37</sup> “SHin wurssettan i, ‘Ta na7aa eti bonchchana’ yaagidi ba na7aa etakko kiittiis.

<sup>38</sup> “SHin kottaawati na7aa be7idi, bantta giddon, ‘Gadiyaa laattanaagee heгаа; hind-dite a woridi, gadiyaa nuuni laattoos’ yaagidosona. <sup>39</sup> Na7aa oiqqidi, woiniyaa turaa giddoppe gaxaa kessidi woridosona.

<sup>40</sup> “Simmi woiniyaa turaa godai yiyo wode, he kottaawata waatanee?” yaagidi oichchiis.

<sup>41</sup> Oichchin eti, “I he iita asata wori wurssidi, woiniyaa turai aifiyo wode bana gakkiiyaagaa wodiyan sheedhdhiya hara kottaawatuyyo immana” yaagidosona.

<sup>42</sup> Yesuusi eta hagaadan yaagiis;

“ ‘Gimbbiyaageeti karidi ixxido shuchchai

godaa xaphuwaa minttiya, ubbaappe aadhdhiya shuchcha gidiiis.

Hagee Godai oottidobaa;

qassi nu aifiyaukka garamissiyaabaa’

yaagiyaagaa Xoossaa maxaafaappe mulekka nabbabibeekketii?

<sup>43</sup> “Hegaa gishshau, taani intteyyo odais; Xoossaa kawotettai intteppe ekettidi, lo77o aifiyaa immiya asau imettana. <sup>44</sup> He shuchchaa bolli kunddiya ubbai meqerettana; qassi he shuchchai asa bolli kunddikko, he kunddido uraa gaaccana” yaagiis.

<sup>45</sup> Qeese halaqatinne Parisaaweti Yesuusi odido leemisuwaa siyido wode, banttabaa haasayiyoogaa eridosona. <sup>46</sup> Eti Yesuusa oiqqanau koyidosona; shin Yesuusa daro asai hananabaa yootiyaagaa giidi qoppi uttido gishshau, he asau yayyidosona.

## 22

*Bullachchaa Oduwaa Leemisuwaa  
(Luqaasa 14:15-24)*

<sup>1</sup> Yesuusi asaayyo naa77anttuwaa leemisuwan hagaadan yaagidi haasayiis; <sup>2</sup> “Saluwaa kawotettai ba na7aayyo bullachchaa makkida kawuwaa mala. <sup>3</sup> He kawoi bullachchaa odi wottido asata xeesanau ba ashkkarata kiittiis; shin asati yaanau koyibookkona.

<sup>4</sup> “Qassi hara ashkkarata, ‘Xeesettidaageeta, “Taani qumaa giigissaas; ta sanggatinne ta daddaroti shuhettidosona; ubbabaikka mahettiis. Bullachchaa haa yiite” yaagite’ yaagidi kiittiis. <sup>5</sup> SHin xeesettidaageeti koyennan ixxidi, bantta oosuwau oosuwau biidosona; issoi ba goshshau bin, hinkkoi ba zal77iyau biis. <sup>6</sup> Attidaageeti qassi kawuwaa ashkkarata oiqqidi wadhdhidi woridosona.

<sup>7</sup> “Kawoi daro hanqqettiis; qassi ba wotaaddarata yeddidi, he shemppuwaa wori-daageeta worissidi, eta katamaa xuugissiis. <sup>8</sup> Hegaappe guyyiyan, ba ashkkarata, ‘Bullachchai mahettiis; shin xeesettidaageeti bullachchau bessiya asa gidokkona. <sup>9</sup> Hegaa gishshau, wogga ogiyaa biidi, intte demmido asa ubbaa bullachchau xeesite’ yaagiis. <sup>10</sup> He ashkkarati ogiyaa biidi, bantta demmido asa ubbaa lo77uwaa iitaa shiishshidi, bullachchaa daasiyaa kunttidosona.

<sup>11</sup> “SHin kawoi qumaa maanau uttida asaa be7anau gelido wode, bullachchaa maayuwaa maayibeenna issi bitaniyaa hegan be7idi, <sup>12</sup> ‘Ta jaalau, bullachchaa maayuwaa maayennan waanada haggaa geladii?’ yaagin bitanee co77u giis.

<sup>13</sup> “Hegaappe guyyiyan, kawoi ba ashkkarata, ‘Ha bitaniyaa kushiyaanne tohuwaa qachchidi, kare xumaa kessi olite; i hegan yeekkananne achchaa garccana’ yaagiis.

<sup>14</sup> “Aissi giikko, xeesettidaageeti daro; shin doorettidaageeti guutta” yaagiis.

*Giiraa Giirettaabaa Oichchido Oishaa*  
(*Marqqoosa 12:13-17; Luqaasa 20:20-26*)

<sup>15</sup> Hegaappe guyyiyan, Parisaaweti biidi, a haasayaappe bala demmidi, a oiqqana mala maqettidosona. <sup>16</sup> Qassi bantta erissiyo ashkkaratuppenne Heeroodisa baggatuppe amaridaageeta akko kiittidosona. Kiittin eti, “Tamaarissiyaagoo, neeni tumaa haasayiyoogaanne Xoossaa ogiyaa tumatettan tamarissiyooгаа nuuni eroos; aissi giikko, neeni asappe asa shaakkakanne dummayakka. <sup>17</sup> Ne qofai aibakko nuuyyo oda; nuuni Roome biittaa Kawuwaa Qeesaarayyo giiraa giiriyoogee wogeeyye woga gidennee?” yaagidosona.

<sup>18</sup> SHin Yesuusi eta iita qofaa eridi, “Ha lo77o milatiya iita asatoo, aissi tana paacceetii? <sup>19</sup> Giiraa qanxxiyo miishshaa tana bessite” yaagiis. Yaagin eti santtimiyaa au ehiidosona. <sup>20</sup> I, “Ha merainne sunntai oogee?” yaagiis.

<sup>21</sup> Yaagidi eta oichchin, eti, “Roome biittaa Kawuwaa Qeesaaraagaa” yaagidosona.

Hegaappe guyyiyan, Yesuusi eta, “Yaatikko, Qeesaaraagaa Qeesaarassi, Xoossaagaa Xoossaassi immite” yaagiis. <sup>22</sup> Eti hegaa siyido wode, garamettidi a yeggi bayidi biidosona.

*Haiqqidaageetu Dendduwaabaa*  
(*Marqqoosa 12:18-27; Luqaasa 20:27-40*)

<sup>23</sup> Haiqqida asi denddenna giya Saaduqaawetuppe issi issi asati he gallassi Yesuusakko yiidi, hagaadan yaagidi, a oichchidosona; <sup>24</sup> “Tamarissiyaagoo, Muusee, ‘Issi asi na7a yelennan haiqqikko, he haiqqidaagaa ishai a machchiyo aissidi, ba ishaayyo na7a yelanau bessees’ yaagiis. <sup>25</sup> Nunaara laappun ishantti de7oosona; bairai machchiyo ekkidi, na7a yelennan haiqqiis; haiqqin a machchiyo a ishai aissii. <sup>26</sup> Qassi naa77anttoikka haiqqiis; heezanttoikka, laappunnta gakkanaashinkka hegaadan hanidosona. <sup>27</sup> Ubbaappe guyyiyan, he maccaasiyaa haiqqaasu. <sup>28</sup> Yaatin, haiqqida asai haiquwaappe denddiyo gallassi he maccaasiyaa laappunatuppe augaayyo machcho gidanee? Aissi giikko, laappunati ubbaikka o ekkidosona” yaagidosona.

<sup>29</sup> Yesuusi zaaridi, hagaadan yaagiis; “Xoossaa maxaafata woi a wolqqaa intte erenna gishshau baleeta. <sup>30</sup> Aissi giikko, haiqqida asai haiquwaappe denddiyo gallassi, saluwan de7iya kiitanchchatu mala gidanaappe attin, attumaasinne ekkenna; maccaasinne gelenna. <sup>31-32</sup> SHin haiqqidaageetu dendduwaabaa gidikko, Xoossai, ‘Taani Abrahaama Xoossaa, Yisaaqa Xoossaa, Yaaqooba Xoossaa’ yaagidi intteyyo odidoogaa mulekka nabbabibeekketii? Xoossai paxa de7iyaageetu Xoossaa gidiyoogaappe attin, haiqqidaageetu Xoossaa gidenna” yaagiis.

<sup>33</sup> Daro asai hegaa siyidi, a timirttiyan garamettiis.

*Ubbaappe Aadhdhiya Azazuwaa*  
(*Marqqoosa 12:28-34; Luqaasa 10:25-28*)

<sup>34</sup> SHin Yesuusi Saaduqaaweta co77u oottidoogaa Parisaaweti siyido wode, issisaa shiiqididosona. <sup>35</sup> Eta giddoppe higgiiyaa tamarissiya issi, Yesuusa paaccanau issibaa oichchiis. <sup>36</sup> “Tamarissiyaagoo, higgiiyaa gidon ubbaappe aadhdhiya azazoi augee?” yaagidi a oichchiis.

<sup>37</sup> Oichchin Yesuusi zaaridi, hagaadan yaagiis; “ ‘Neeni Godaa ne Xoossaa ne kumetta wozanaappe, ne kumetta shemppuwaappe, ne kumetta qofaappe siiqa’ yaagiis. <sup>38</sup> Hegee ubbaappe gitatiya azazonne qassi ubbaappe aadhdiya azazo. <sup>39</sup> Qassi naa77antto azazoikka a mala; hegee, ‘Neeni ne shooruwaa ne huuphedan siiqa’ giyaagaa. <sup>40</sup> Muuse higge ubbainne hananabaa yootiyaageetu timirttee ha naa77u azazotun qashettes” yaagiis.

*Kiristtoosabaa Oichchido Oishaa*  
(*Marqqoosa 12:35-37; Luqaasa 20:41-44*)

<sup>41-42</sup> Parisaaweti issisaa shiiqidaashin Yesuusi eta, “Kiristtoosabaa woigi qoppeetii? I o na7ee?” yaagidi oichchiis.

Oichchin eti, “Kiristtoosi Daawita na7aa” yaagidosona.

<sup>43</sup> Yesuusi eta, “Yaatin, Daawiti bana Geeshsha Ayyaanai haasayissin Kiristtoosa woigidi, ‘Godaa’ giidi xeesii? <sup>44</sup> Qassikka Daawiti, ‘Godai ta Godaa,

“Taani ne morkketa neeni yedhdha eqqiyoobaa oottana gakkanaassi, hagan taappe ushachcha baggaara utta” giis’ yaagiis. <sup>45</sup> Daawiti Kiristtoosa, ‘Godaa’ giidi xeesikko, yaatin, Kiristtoosi waanidi Daawita na7a gidii?” yaagiis.

<sup>46</sup> Yesuusau issi qaala zaaranau danddayida issi asinne baawa; qassi he gallasappe doommin, hara oisha a oichchanau xalidai oonikka baawa.

## 23

*Muuse Higgiyaa Tamaariissiyaageetunne Parisaawetu Iitatettaa*  
(*Marqqoosa 12:38-39; Luqaasa 11:43-46; 20:45-46*)

<sup>1</sup> Hegaappe guyyiyan, Yesuusi shiiqida asaayyoonne ba erissiyo ashkkaratuyyo hagaadan yaagidi haasayiis; <sup>2</sup> “Higgiyaa tamarissiyaageetinne Parisaaweti Muuse higgiyaa tamarissiyoo maataara de7oosona. <sup>3</sup> Hegaa gishshau, intte oottana mala, eti inttena azaziyo ubbabaa oottitenne qassi naagite; shin eti oottiyoogaadan ootoppite; aissi giikko, eti bantta yootiyogaa oottokkona. <sup>4</sup> Tookkanau deexxiya toohuwaa eti qachchidi, asa toossoosona; shin bantta huuphen harai atto, he toohuwaa biradhdhiyan bochchanaukka koyokkona.

<sup>5</sup> “SHin eti bantta ooso ubbaa asi be7anaadan oottoosona; aissi giikko, bantta som77uwaaninne bantta kushiya qesiyan qachchiyo xiqisiyaara de7iya kitaafaa aas-soosonanne bantta maayuwaa macaraakka adussoosona. <sup>6</sup> Asi banttana imattiyoosan bonchcho sohuwaa dosoosona; qassi Aihuda woosa keettatunkka daro lo77iya oidiyaa dosoosona. <sup>7</sup> Asi giyan banttana bonchchidi sarotanaagaanne ‘Tamarissiyaagoo’ giidi banttana xeesanaagaa koyoosona.

<sup>8</sup> “SHin inttena tamarissiyaagee issuwaa xalaala gidido gishshaunne intte ubbai ishannta gidido gishshau, issoi issuwaa, ‘Tamarissiyaagoo’ giidi xeesoppite. <sup>9</sup> Ha sa7an oonanne ‘Aawa’ giidi xeesoppite; aissi giikko, intteyyo saluwan de7iya issi Aawai de7ees. <sup>10</sup> Issoi issuwaa, ‘Godau’ giidikka xeesoppite; aissi giikko, intteyyo issi Godai, Kiristtoosa xalaalai de7ees. <sup>11</sup> Intte gididon ubbaappe gitatiyaagee intteyyo ashkkara gidanau bessees. <sup>12</sup> Bana gitatiya oonikka kauyyana; qassi bana kaushshiya oonikka gitatana.

*Higgiyaa Tamarissiyaageetinne Parisaaweti Borettidosona*  
(*Marqqoosa 12:40; Luqaasa 11:39-42,44,52; 20:47*)

<sup>13</sup> “Lo77o milatiya iitadoo, higgiyaa tamarissiyaageetoonne Parisaawetoo, asaayyo saluwaa kawotettaa intte gorddiyo gishshau, intteyyo aayye7ana; aissi giikko, intte huuphiyaunne gelekketa; qassi gelanau koyiyaageetanne gelissekketa.

<sup>14</sup> “Lo77o milatiya iitadoo, higgiiyaa tamarissiyaageetoonne Parisaawetoo am77etu keettaa intte bonqqidi, intteyyo lo77o milatanau Xoossaa woosaa adusseeta; heгаа gishshau, intteyyo aayye7ana; ubbaappe aadhdhiya pirddaa intte ekkana.

<sup>15</sup> “Lo77o milatiya iitadoo, higgiiyaa tamarissiyaageetoonne Parisaawetoo intte issi uraa ammanttanau abbaaninne sa7an yuuyiyo gishshaunne qassi intte a ammanttiyo wode, he uraa intteegaappe naa77u kushe iitida Gaannabiyau na7a oottiyo gishshau, intteyyo aayye7ana.

<sup>16</sup> “ ‘Ooninne Beeta Maqidasiyan caaqqikko, aibinne baawa; shin Beeta Maqidasiyan de7iya worqqan caaqqikko, he caaqoi a gakkees’ giya intteyyo qooqi uttidi asa kaalet-tiyaageetoo, intteyyo aayye7ana. <sup>17</sup> Ha eeyyati, ha qooqeti, worqqai aadhdhiyye? Worqqaa geeshsha oottiya Beeta Maqidasee aadhdhii? <sup>18</sup> Qassi intte, ‘Ooninne yarshsho yarshshiyooaban caaqqikko, aikkokka baawa; shin ooninne a bolli de7iya yarshshon caaqqikko, he caaqoi a gakkees’ yaagidi tamarisseeta. <sup>19</sup> Ha eeyyati, ha qooqeti, yarshshoi aadhdhiyye? Woi yarshsho geeshsha oottiya a yarshshiyooabai aadhdhii? <sup>20</sup> Hegaa gishshau, yarshsho yarshshiyooaban caaqqiya urai he yarshshiyooabanka caaqqees; qassi a bolli de7iya ubbabanka caaqqees. <sup>21</sup> Beeta Maqidasiyan caaqqiya urai, he Beeta Maqidasiyaaninne a gidдон de7iya Xoossan caaqqees. <sup>22</sup> Saluwan caaqqiya urai, Xoossaa kawotaa araataaninne he araatan uttiyaagan caaqqees.

<sup>23</sup> “Lo77o milatiya iitadoo, higgiiyaa tamarissiyaageetoonne Parisaawetoo, intteyyo aayye7ana. Aissi giikko, kareta sawuwaappe, katikallaappenne okashiyaappe asirataa intte immeeta; shin higgiiyan de7iya keehi koshshiyaageeta aggi bayeeta; hegeeti pird-daa, maarotettaanne xillotettaa. Haratakka aggennan, intte oottanau bessiya yohoti hegeeta. <sup>24</sup> Intteyyo qooqi uttidi, asa kaalettiyaageetoo, intte ushshaappe udunxxiyaa gaccidi, gaameelaa mitteeta.

<sup>25</sup> “Lo77o milatiya iitadoo, higgiiyaa tamarissiyaageetoonne Parisaawetoo, intteyyo aayye7ana. Aissi giikko, intte shaatiyaayyoonne keriyayyo bolla baggaa geeshsheeta; shin intteyyo gidloora bonqqiyooeenne uuzettiyoogee kumi uttiis. <sup>26</sup> Ha qooqe Parisaawiyau, shaatiyaayyoonne keriyayyo garssaa kasetada geeshshargga; hegaappe guyyiyan, bolla baggaikka geeshsha gidana.

<sup>27</sup> “Lo77o milatiya iitadoo, higgiiyaa tamarissiyaageetoonne Parisaawetoo, intteyyo aayye7ana. Aissi giikko, kare baggaara aannuwan tiyettidi, lo77i uttidi, qassi garssa baggaara haiqqida asa meqettinne wooqqidabai ubbabai kumido duufota milateeta. <sup>28</sup> Hegaadanka, qassi bolla baggaara asa ubbau xillo milateeta; shin intteyyo garssa baggaara lo77o milatiya iitatettainne makkalai kumi uttiis.

<sup>29</sup> “Lo77o milatiya iitadoo, higgiiyaa tamarissiyaageetoonne Parisaawetoo, intteyyo aayye7ana. Aissi giikko, hananabaa yootiyaageetu duufuwaa bolli keettaa ke-exxeeta; qassi xillotu duufuwaakka loitteeta. <sup>30</sup> Qassi intte, ‘Nuuni beni nu aawatu wode de7idobaa gidiiyaakko, etaara issippe hananabaa yootiyaageeta worokko shin’ yaageeta. <sup>31</sup> Hegaa gidikko, hananabaa yootiyaageeta woridaageetu naata intte gididoo-gaa intte huuphen markkateeta. <sup>32</sup> Simmi intte aawati doommidoogaa polekketii!

<sup>33</sup> “Ha shooshshatoo, shooshshaa naatoo, Gaannabiyaa pirddaappe waanidi attuu-teetii? <sup>34</sup> Hegaa gishshau, be7ite, taani hananabaa yootiyaageeta, aadhdhida er-anchchatanne higgiiyaa tamarissiyaageeta inttekkoo kiittais. Etappe issuwaa issuwaa intte worananne masqqaliyaa bolli misimaariyan xishidi kaqqana; qassi issuwaa issuwaa intte woosa keettatun lissuwan garafananne katamappe katama yedettana. <sup>35</sup> Hegaa gishshau, xilluwaa Aabeela woroosappe doommidi, Beeta Maqidasiyaap-penne yarshshiyooasappe gidduwan intte worido Baraakiyaa na7aa Zakkaariyaasa wodiya gakkanaassi, haiqqida xillo ubbatu suutta gishshau, intte qaxxayettana. <sup>36</sup> Taani intteyyo tumaa odais; ha ubbabai ha wodiya asaa bolli gakkana.

*Yerusalaamessi Odettida Mino Oduwaa  
(Luqaasa 13:34-35)*

<sup>37</sup> “Yerusalaame katamaa asau, Yerusalaame katamaa asau, hananabaa yootiyaageeta intte woreeta; Xoossai intteikko kiittidoogeetakka shuchchan caddeeta; kuttiiyaa ba marata ba qefiyan haphphiyoogaadan, taani intte asaa issi diri shiishshanau aapputoo koyidanaa! SHin tana diggideta. <sup>38</sup> Be7ite, intte keettai muleera ona gidana. <sup>39</sup> Aissi giikko, taani intteyyo odais; intte, ‘Godaa sunttan yiyaagee anjettidaagaa’ gaana gakkanaashin, naa77anttuwaa tana be7ekketa” yaagiis.

## 24

*Yesuusi Beeta Maqidasee Laalettanaagaa Kasetidi Odiis  
(Marqoosa 13:1-2; Luqaasa 21:5-6)*

<sup>1</sup> Yesuusi Beeta Maqidasiyaappe kiyidi biishin, Beeta Maqidasiyaa dirssa giddon de7iya keettata bessanau erissiyo ashkkarati akko yiidosona. <sup>2</sup> Yesuusi zaaridi eta, “Hagaa ubbaa be7eetii? Taani intteyyo tumaa odais; ha keettatun de7iya issi shuchchinne attennan ubbai qolettana” yaagiis.

*Wodiyaa Wurssettaabaa  
(Marqoosa 13:3-13; Luqaasa 21:7-19)*

<sup>3</sup> Yesuusi Dabira Zaita giyo deriyaa bollan uttidaashin, erissiyo ashkkarati banttarkka akko yiidi a, “Hegee aude hananaakko, nuuyyo odarkkii; qassi ne yuussaayyoonne wodiyaa wurssettaayyo malaatai aiba gidanee?” yaagidosona.

<sup>4</sup> Yesuusi zaaridi, eta hagaadan yaagiis; “Inttena ooninne balettana mala naagettite. <sup>5</sup> Aissi giikko, daro asati ta sunttan, ‘Taani Kiristtoosa’ yaagiiddi yaana; yiidi daro asaa balettana. <sup>6</sup> Matan de7iya olaa cenggurssaanne haahuwan de7iya olaa oduwaa siyanau intte de7eeta; hegea malabai hananau bessiyo gishshau, naagettite; hirggoppite; shin wurssettai biroona. <sup>7</sup> Aissi giikko, issi biittaa asai hara biittaa asaara olettana; qassi issi kawotettai hara kawotettaara olettana; koshainne biittaa qaattai ubbasan de7ana. <sup>8</sup> Hegee ubbaikka koiro leesso mala.

<sup>9</sup> “Asai he wode inttena waissananne worana; ta sunttaa gishshau, dere ubbai inttena ixkana. <sup>10</sup> He wode daroti ammanuwaa aggana; bantta giddon issoi issuwaa aattidi immananne issoi issuwaa ixkana. <sup>11</sup> Qassi wordduwaa hananabaa yootiya daroti denddidi, daro asaa cimmana. <sup>12</sup> Makkalai dariyo gishshau, daro asaa siiqoi irxxana. <sup>13</sup> SHin wurssettaa gakkanaashin gencciya urai attana. <sup>14</sup> Asa ubbau markka gidana mala, kawotettaa wonggeliyaa mishiraachchoi sa7a ubban odettana; hegaappe guyyiyan, wurssettai gakkana.

*Hanttaara Waayiyaa  
(Marqoosa 13:14-23; Luqaasa 21:20-24)*

<sup>15</sup> “Hegaa gishshau, hananabaa yootiya Daaneeli odido bashshaa tunatettai geeshsha sohuwan eqqidaagaa intte be7ana; hegee woigiyoogaakko, nabbabiyaagee akeeko. <sup>16</sup> Yihudaa biittan he wode de7iyaageeti deriyaakko baqatona. <sup>17</sup> Keettaa huuphiyan de7iya uraikka ba son de7iyaabaa ekkanau wodhdhoppo. <sup>18</sup> Gaden de7iyaagee ba maayuwaa ekkanau guyye simmoppo. <sup>19</sup> He wode shahaara maccaasatuyyoonne xanttiya maccaasatuyyo aayye7ana. <sup>20</sup> Balggon woi Sambbatan intte baqatenna mala, Xoossaa woosite; <sup>21</sup> aissi giikko, sa7ai merettoosappe hachchi gakkanaashin de7ibeennabainne qassi hagaappe sinttaukka mule de7enna iita waayee he wode de7ana. <sup>22</sup> Xoossai he gallassatu qoodaa guuttiyoi bannaakko, asa gididai ooninne attenna; shin i ba doorido asatu gishshau, he gallassatu qoodaa guuttana.



<sup>23</sup> “He wode ooninne inttena, ‘Be7ite. Kiristtoosi hagan de7ees’ woi, ‘Hegan de7ees’ yaagikko abaa ammanoppite. <sup>24</sup> Aissi giikko, worddanchcha Kiristtoosatinne wordduwaa hananabaa yootiyaageeti denddana; denddidi banttau danddayettikko, harai atto Xoossai dooridoogeetakka balettanau gita malaataanne garamissiyaabaa bessana. <sup>25</sup> Be7ite, taani intteyyo hegaa kasetada yootaas.

<sup>26</sup> “Hegaa gishshau, asai inttena, ‘Be7ite, Kiristtoosi bazzon de7ees’ giikko, hegaa booppite; woi inttena, ‘Be7ite, qol77on de7ees’ giikkokka, etabaa ammanoppite. <sup>27</sup> Aissi giikko, wolqqanttai arshshoppe wolqqammidi, arggo gakkanaassi phooliyoogaadan, ta yuussai, Asa Na7aa yuussai, hegaadan hanana.

<sup>28</sup> “Gauxai de7iyoosaa ankkoi shiiqana.

*Asaa Na7ai Kiristtoosi Naa77anttuwaa Yaana  
(Marqqoosa 13:24-27; Luqaasa 21:25-28)*

<sup>29</sup> “He wode waayiyaappe guyyiyan, sohuwaara awai xumana; aginai poo7iyoogaa aggi bayana; xoolintteti saluwaappe kunddana; qassi saluwan de7iya wolqqatikka qaaxettana.

<sup>30</sup> He wode ta malaatai, Asa Na7aa malaatai, saluwan beettana; sa7an he wode de7iya asa zare ubbai yeekkana. Qassi taani, Asa Na7ai, wolqqaaranne gita bonchchuwaara saluwaa shaara gidloora yiishin, eti be7ana. <sup>31</sup> I ba kiitanchchata gita malkkataara kiittana; kiittin kiitanchchati sa7au ha gaxaappe ya gaxaa gakkanaashin, qassi sa7an oiddu zooziyaappe au doorettida asaa shiishshana.

*Godai Yaana Gallassaa Malaataa  
(Marqqoosa 13:28-31; Luqaasa 21:29-33)*

<sup>32</sup> “Leemisuwaa balasiyo giyo mitteeppe akeekite; balasiyaa aaciyo wodenne i tashee bonccottiyo wode, bonee matattidoogaa intte erana. <sup>33</sup> Hegaadankka, intte he ubbabaa be7iyo wode, i matattidi pengge shiiqidoogaa erite. <sup>34</sup> Taani intteyyo tumaa odais; ha ubbabai hanana gakkanaassi, ha wodiyaa asai haiqqiichchenna. <sup>35</sup> Saloinne sa7ai aadhdhana; shin ta qalalai mulekka aadhdhenna.

*Godai Yaana Gallassaa Ooninne Erenna  
(Marqqoosa 13:32-37, Luqaasa 17:26-30,34-36)*

<sup>36</sup> “SHin he gallassanne he saatiyaa Aawaa xalaalaappe attin, harai atto saluwan de7iya kiitanchchata gidin, woi tana Na7aa gidinkka ooninne eriyaabi baawa. <sup>37</sup> Ta yuussai, Asa Na7aa yuussai, Nohe wode hanidoogaa mala gidana. <sup>38</sup> Aissi giikko, bashshiya haattaa yuussaappe kase wode, Nohee markkabiyan gelido gallassai gakkanaashin, asai meesinne uyees; qassi attumaasai machcheesinne maccaasai azinaa gelees. <sup>39</sup> Bashsha haattai yiidi, eta ubbaa efaana gakkanaashin, eti akeeki-bookkona; taani, Asa Na7ai, yiyo wodee, hegaa mala gidana.

<sup>40</sup> “He wode naa77u asati gaden oottiyaageetuppe issuwaa efaana; issoi attana. <sup>41</sup> Naa77u maccaasati woxan gaacciyaageetuppe issinniyo efaana; issinniyaa attana.

<sup>42</sup> “Simmi intte Godai ai gallassi yaanaakkonne intte erenna gishshau, naagi uttite. <sup>43</sup> SHin kaisoi qammaappe woqqa wodiyan yaanaakko keettaawai eridaakko, ba keettai bookettenna mala, beegottidi naagi uttanaagaa erite. <sup>44</sup> Hegaa gishshau, intteikka giigi uttite; aissi giikko, taani, Asa Na7ai, intte qoppenna saatiyan yaana.

*Itanne Lo77o Ashkkaraa Leemisuwaa  
(Luqaasa 12:41-48)*

<sup>45</sup> “Yaatin, ba so asau qumaa koshshiyo wodiyan immana mala, a godai sunttido ammanettida wozannaama ashkkari oonee? <sup>46</sup> I hegaadan oottishin, a godai yiidi demmiyo ashkkarai anjettidaagaa. <sup>47</sup> Taani intteyyo tumaa odais; godai he ashkkaraa

babaa ubbaa bolli sunttana. <sup>48</sup> SHin ashkkaarai iita gidikko, ‘Ta godai gam77idi yaana’ yaagidi ba wozanan qoppidi, <sup>49</sup> ba lagge ashkkaarata waraa doommikko, mattot-tiyaageetuura miikkonne uyikko, <sup>50</sup> he ashkkaaraa godai i qoppibeenna gallasaaninne i eribeenna saatiyan yaana. <sup>51</sup> Yiidi a qanxxerettidi, lo77o milatiya iita asati de7iyoosan wottana; hegan i yeekkananne achchaa garccana.

## 25

### *Tammu Geela7otu Leemisuwaa*

<sup>1</sup> “He wode saluwaa kawotetta i bantta kuraaziyaa oiqqidi, machchiyo bullachchiyaa-gaa mokkanau kare kiyida tammu geela7ota milatana. <sup>2</sup> Etappe ichchashati eeyya; qassi ichchashati cincca. <sup>3</sup> Eeyyati bantta kuraaziyaa oiqqidosona; shin lambba oiqqi-bookkona. <sup>4</sup> SHin cinccati bantta kuraaziyaanne xaaramusiyan lambbaa oiqqidosona. <sup>5</sup> Machchiyo bullachchiyaagee yeennan gam77in, he geela7oti banttana xiskkissin zin77i bayidosona.

<sup>6</sup> “Bilahe gidido wode, ‘Be7ite, machchiyo bullachchiyaagee gakkii; a mokkanau kare kiyite’ yaagiya gita cabboi denddiis.

<sup>7</sup> “He wode he geela7oti ubbati beegottidi, bantta kuraaziyaa giigissidosona. <sup>8</sup> Eeyyati cinccata, ‘Nu kuraazee to77ana haniyo gishshau, intte lambbaappe nuuyyo immerkketii’ yaagidosona.

<sup>9</sup> “SHin cinccati zaaridi eta, ‘CHii, nuuyyoonne intteyyo gidenna; heгаа gishshaa intteyyo baizziyaageetukko biidi shammi ekkite’ yaagidosona. <sup>10</sup> Yaagin eeyya geela7oti lambbaa shammanau biichchidaashin, machchiyo bullachchiyaagee puttu gin, giigi uttida ichchashu geela7oti aara issippe bullachchaa keettaa gelidosona; kareekka gorddetti aggiis.

<sup>11</sup> “Guyyeppe qassi hinkko geela7oti yiidi, ‘Godau, godau, nuuyyo dooyarkkii’ yaagidosona.

<sup>12</sup> “SHin machchiyo bullachchiyaagee zaaridi, ‘Taani intteyyo tumaa odais; taani inttena erikke’ yaagiis.

<sup>13</sup> “Simmi taani, Asa Na7ai, yaana gallassaa woi saatiyaa intte erenna gishshau, naagi uttite.

### *Hezzu Ashkkaaratu Leemisuwaa (Luqaasa 19:11-27)*

<sup>14</sup> “Aissi giikko, saluwaa kawotetta i ba ashkkaarata xeesidi, bau de7iyaabaa etau sheedhdhidi, oge baana haniya bitaniyaa milatees. <sup>15</sup> Etau huuphiyan huuphiyan eta wolqqaa keenaa issuwau ichchashu sha7u biraa, issuwau naa77u sha7u biraa, qassi issuwau issi sha7u biraa immidi, ba ogiyaa biis. <sup>16</sup> Ichchashu sha7u biraa ekkida ashkkaarai sohuwaara biidi zal77idi, hara ichchashu sha7u biraa worissiis. <sup>17</sup> Hegaadankka, qassi naa77u sha7u biraa ekkida ashkkaarai hara naa77u sha7u biraa worissiis. <sup>18</sup> SHin issi sha7u biraa ekkidaagee biidi, ollaa bookkidi, ba godaa miishshaa moogiis.

<sup>19</sup> “Daro wodiyaappe guyyiyan, he ashkkaaratu godai yiidi, ba miishshaa etaara goodettiis. <sup>20</sup> Ichchashu sha7u biraa ekkida ashkkaarai yiidi, hara ichchashu sha7u biraa sheedhdhiiddi, ‘Ta godau, neeni tau ichchashu sha7u biraa immadasa; be7a, hara ichchashu sha7u biraa worissaas’ yaagiis. <sup>21</sup> A godai a, ‘Hayyanaashsho! Neeni lo77onne ammanettiya ashkkara; neeni guuttaban ammanettadasa. Taani nena darobaayyo alaafe oottana; haa gelada ne godaara ufaitta’ yaagiis.

<sup>22</sup> “Qassi naa77u sha7u biraa ekkidaageekka yiidi, ‘Ta godau, neeni tau naa77u sha7u biraa immadasa; be7a, taani hara naa77u sha7u biraa worissaas’ yaagiis. <sup>23</sup> A godai a, ‘Hayyanaashsho! Neeni lo77onne ammanettiya ashkkara; neeni guuttaban

ammanettadasa. Taani nena darobaayyo alaafe oottana; haa gelada ne godaara ufaitta' yaagiis.

<sup>24</sup> “Issi sha7u biraa ekkidaagee qassi yiidi, ‘Ta godau, neeni zerabeennasaappe cakkiya asa gidiyooqaanne katta laalabeennasaappe maxiya meqetti baina asa gidiyooqaa taani erais. <sup>25</sup> Taani yayyaas; yaatada baada ne biraa biittan moogaas; be7a, ne birai hageeho’ yaagiis.

<sup>26</sup> “A godai zaaridi, a hagaadan yaagiis; ‘Ha iita azalla ashkkaarau, taani zerabeennasaappe cakkiya asa gidiyooqaanne katta laalabeennasaappe maxiya asa gidiyooqaa eradii? <sup>27</sup> Yaatin, neeni ta miishshaa bankkiyan wottidobaa gidiyaakko, taani simmiyo wode ta miishshaa woriyaara ekkanaagaa shin attiis. <sup>28</sup> Hegaa gishshau, he miishshaa appe wotti ekkidi, tammu sha7u birai de7iyooqaayyo immite. <sup>29</sup> Aissi giikko, de7iyoo ubbau harai gujettana; i bau gidiyaagaappe darissidi ekkana; shin bainaagaappe harai atto, he au de7iya guuttaikka appe eketiichchana. <sup>30</sup> Allaalle kessenna ashkkaarau kare xumaa kessi olite; hegan i yeekkananne ba achchaa garccana’ yaagiis.

### *Wodiyaa Wurssettan Hanana Pirddaa*

<sup>31</sup> “Taani, Asa Na7ai, kiitanchcha ubbatuura bonchchuwan yiyo wode, ta bonchcho kawotaa araatan uttana. <sup>32</sup> Sa7an de7iya asai ubbai ta sintti shiiqana; heemmiyaagee dorssata deeshshatuppe shaakkiyoogaadan, taani he asaa naa77u kessada shaakkana. <sup>33</sup> Qassi dorssata taappe ushachcha baggaara essada, deeshshata taappe haddirssa baggaara essana.

<sup>34</sup> “Hegaappe guyyiyan, taani kawoi taappe ushachcha baggaara de7iyaageeta hagaadan yaagana; ‘Ta Aawai anjjidoogeetoo, haa yiidi sa7ai merettoosappe hachchi gakkanaashin, intteyyo giigida kawotettaa laattite. <sup>35</sup> Aissi giikko, taani namisettin mizideta; saamettin ushshideta; imatta gidada binkka morkideta. <sup>36</sup> Taani kallottin maizzideta; harggin be7ideta; qashettin taakko gakkideta’ yaagana.

<sup>37</sup> “Hegaappe guyyiyan, xilloti zaaridi, a hagaadan yaagana; ‘Godau, neeni namisettin, aude be7idi mizidoo? Woi neeni saamettin, aude be7idi ushshidoo? <sup>38</sup> Neeni imatta gidada yin aude be7idi morkidoo? Woi neeni kallottin aude maizzidoo? <sup>39</sup> Qassi neeni harggin, woi qashettin neekko biidi aude nena be7idoo?’ yaagana. <sup>40</sup> Taani kawoi zaarada, ‘Taani intteyyo tumaa odais; intte ha ta ishanttu ubbaappe harai atto, laafiya issuwaayyo oottidobaa gidikkokka, hegan tau oottideta’ yaagana.

<sup>41</sup> “He wode, taappe haddirssa baggaara de7iyaageeta taani yaagana; ‘Ha qanggettidaageetoo, ta matappe kichchite; biidi xalahe halaqaayyoonne a kiitanchchatuyyo giigida merinaa taman gelite. <sup>42</sup> Aissi giikko, taani namisettin, tana mizibeekketa; saamettin ushshibeekketa. <sup>43</sup> Taani imatta gidada bin, tana morkibeekketa; kallottin maizzibeekketa; qassi harggin, qashettinkka tana be7ibeekketa’ yaagana.

<sup>44</sup> “He wode eti qassi hagaadan yaagidi zaarana; ‘Godau, neeni namisettin woi saamettin, woi imatta gidada bin woi kallottin, woi harggin woi qashettin, aude be7idi, nena maaddennan ixxidonii?’ yaagana.

<sup>45</sup> “He wode taani kawoi zaarada eta, ‘Taani intteyyo tumaa odais; intte ha ubbaappe laafiya issuwaa maaddennan ixxidooqee, tana maaddennan ixxidooqaa’ yaagana.

<sup>46</sup> Hegeeti merinaa qaxxayuwau baana; shin xilloti merinaa de7uwau baana” yaagiis.

## 26

### *Yesuusa Bolli Maqettidosona*

*(Marqqoosa 14:1-2; Luqaasa 22:1-2; Yohaannisa 11:45-53)*

<sup>1</sup> Yesuusi ha timirttiyaa ubbaa wurssido wode, ba erissiyoo ashkkaarata, <sup>2</sup> “Naa77u gallassappe guyyiyan, Paasikaa Baalaa bonchchiyo gallassa gidiyooqaa ereeta. He

gallassi tana, Asa Na7aa, asai masqqaliyaa bolli misimaariyan xishidi kaqqanau aatti immana” yaagiis.

<sup>3</sup> He wode qeese halaqatinne dere cimati Qayaafa giyo qeese ubbatu halaqaa gita keetan shiiqidi, <sup>4</sup> asi erennan Yesuusa oiqqidi, woranau maqettidosona. <sup>5</sup> SHin eti, “Asai ooshshaa kessenna mala, Paasikaa bonchchiyo gallassi hegaa oottokko” yaagidosona.

*Issi Maccaasiyaa Yesuusa SHittuwaa Tiyaasu  
(Marqqoosa 14:3-9, Yohaannisa 12:1-8)*

<sup>6</sup> Yesuusi Biitaaniyaa kataman inchchirichchaa harggiya Simoonaa son de7ishin, <sup>7</sup> issi mishiriyaa albbasxxiroosa giyo shuchchaappe oottido bilqqaadiyaa kumida daro al77o shittuwaa ekkada yaasu; yaada qumaa i miishin, he shittuwaa Yesuusa huuphiyan tigaasu. <sup>8</sup> SHin erissiyo ashkkarati hegaa be7idi hanqqettidosona; hanqqettidi, “Ha shittuwaa coo mooriyoogee aibissee? <sup>9</sup> Aissi giikko, ha shittuwaa al77o waagan baizzidi, miishshaa hiyyeesau immanau danddayettes” yaagidosona.

<sup>10</sup> Yesuusi eti giyoogaa eridi, eta hagaadan yaagiis; “Ha maccaasiyo aissi waisseetii? A tau lo77obaa oottaasu. <sup>11</sup> Hiyyeesati ubba wode inttenaara de7oosona; shin taani inttenaara ubba wode de7ikke; <sup>12</sup> a ha shittuwaa ta bolli tigiyoogee tana mooganau giigissanaassa. <sup>13</sup> Taani intteyyo tumaa odais; sa7a ubban ha wonggeliyaa mishiraachchuwaa odiyoosan awaanikka, asai o hassayana mala, a oottidoogee odettana” yaagiis.

*Yihudai Yesuusa Aattidi Immanau Maayiis  
(Marqqoosa 14:10-11; Luqaasa 22:3-6)*

<sup>14</sup> He wode tammanne naa77u erissiyo ashkkaratuppe issoi Yihudaa Asqqorootu giyoogee qeese halaqatukko biis. <sup>15</sup> Biidi, “Taani intteyyo Yesuusa oittikko, tau ai immuuteetii?” yaagin eti ayyo hasttamu biraa qoppidi immidosona. <sup>16</sup> Hegaappe guyyiyan, Yihudai Yesuusa aattidi immanau injjetiyya wodiyya wochchees.

*Yesuusi Aihudatu Paasikaa Kahuwaa Ba Kiittidoogeetuura Miis  
(Marqqoosa 14:12-21; Luqaasa 22:7-14, 21-23; Yohaannisa 13:21-30)*

<sup>17</sup> Oittaa miyo gallassaa bonchchiyo koiro gallassi, erissiyo ashkkarati Yesuusakko yiidi, “Paasikaa bonchchiyo gallassi neeni maana qumaa awan giigissanee?” yaagidosona.

<sup>18</sup> Yaagin Yesuusi eta, “Katamaa biidi, issi bitaniyaa, ‘Tamaarissiyaagee nena, “Tau wodee gakkii; taani ta erissiyo ashkkaratuura Paasikaa bonchchiyo gallassaa ne son aattana” yaagees’ yaagite” yaagiis.

<sup>19</sup> Erissiyo ashkkarati Yesuusi banttana azazidoogaadan oottidi, Paasikaa bonchchiyo gallassi maana qumaa giigissidosona.

<sup>20</sup> Sa7ai omarido wode, Yesuusi tammanne naa77u erissiyo ashkkaratuura qumaa maanau uttiis. <sup>21</sup> Eti miishin, Yesuusi eta, “Taani intteyyo tumaa odais; intteppe issi urai tana aattidi immana” yaagiis.

<sup>22</sup> Eti daro dagammidi, huuphiyan huuphiyan, “Godau, tumu taneeshsha?” giyoogaa doommidosona.

<sup>23</sup> Yesuusi zaaridi, “Ba kushiyyaa tanaara issippe shaatiyan yeddidi tushkkiyaagee tana aattidi immana. <sup>24</sup> Taani, Asa Na7ai, Xoossaa maxaafai haiqqana giidoogaadan haiqqana; shin tana, Asa Na7aa, aattidi immiya urau aayye7ana; he urai yelettannan attiyaakko au keha shin” yaagiis.

<sup>25</sup> A oittiya Yihudai zaaridi, “Tamaarissiyaagoo, neeni giyoogee tanee?” yaagiis. Yaagin Yesuusi zaaridi a, “Neeni ne huuphen gaadasa” yaagiis.

*Godaa Kahuwaa Ekkiyo Wogaa  
(Marqqoosa 14:22-26; Luqaasa 22:15-20; Koiro Qoronttoosa 11:23-25)*

<sup>26</sup> Eti miishin, Yesuusi oittaa ekkidi, Xoossaa galatiis; he oittaa menttidi, ba erissiyo ashkkaratuyyo immiiddi, “Heite; miite; hagee ta ashuwaa” yaagiis.

<sup>27</sup> Burccukkuwaa ekkidi, Xoossaa galatiis. Etau immiiddi, “Ubbai hagaappe uyite; <sup>28</sup> aissi giikko, hagee daro asaa nagarai atto geetettana gishshau gukkiya ta suuttaa; ta suuttai ooratta maachchaa. <sup>29</sup> SHin taani intteyyo odais; taani ta Aawaa kawotettan ooratta woine eessaa inttenaara uyana gallassai gakkanaashin, naa77anttuwaa ha woine eessaa mulekka uyikke” yaagiis.

<sup>30</sup> Mazamuriyaa yexxidoogaappe guyyiyan, Dabira Zaitte giyo deriyaa biidosona.

*Yesuusi PHeexiroosi Kaddanaagaa Kasetidi Yootiis  
(Marqqoosa 14:27-31; Luqaasa 22:31-34; Yohaannisa 13:36-38)*

<sup>31</sup> Yesuusi he wode eta, “Hachchi qammi intte ubbai tana yeggi bayidi baqatana; aissi giikko, Xoossaa maxaafai,

‘Xoossai dorssaa heemmiyaagaa worana;

worin dorssaa wudee laalettana’

yaagees. <sup>32</sup> SHin taani haiquwaappe denddidooagaappe guyyiyan, intteppe kasetada Galiilaa baana” yaagiis.

<sup>33</sup> PHeexiroosi zaaridi, “Eti ubbati nena yeggi bayidi baqatikkokka, taani nena mulekka yeggikke” yaagiis.

<sup>34</sup> Yesuusi PHeexiroosa, “Taani neeyyo tumaa odais; hachchi qammi kuttoi waasanaappe kase, neeni tana heezzutoo kaddana” yaagiis.

<sup>35</sup> Yaagin PHeexiroosi zaaridi, “Taani harai atto, nenaara issippe haiqqiyaakkokka, nena mulekka kaddikke” yaagiis.

*Yesuusi Geetesemaanen Woossiis  
(Marqqoosa 14:32-42; Luqaasa 22:39-46)*

Qassi erissiyo ashkkarati ubbatikka hegaadan giidosona.

<sup>36</sup> Yesuusi he wode ba erissiyo ashkkaratuura Geetesemaane giyo sohuwaa biidi eta, “Taani hiniyo baada Xoossaa woossishin, intte hagan uttiishshite” yaagiis. <sup>37</sup> Yaagidi PHeexiroosanne Zabddiyoosa naata naa77aa banaara ekki efidi, daro kayyuwaanne waayiyaa doommiis. <sup>38</sup> Qassi eta, “Taani haiqqana gakkanaassikka kayyottais; hagan takkidi, tanaara naagite” yaagiis.

<sup>39</sup> Guuttaa sinttaukko shiiqiiddi, biittan gufannidi, “Ta Aawau, danddayettiyaabaa gidikko, ha burccukkuwaa taappe digga; shin neeni koyiyoogaadan hanoppe attin, taani koyiyoogaadan hanoppo” yaagidi Xoossaa woossiis.

<sup>40</sup> Yesuusi erissiyo ashkkaratukko simmidi yiis; xiskkidaageeta demmidi PHeexiroosa, “Intte issi saatekkonne xiskkennan tanaara naaganaukka danddayibeekketii?

<sup>41</sup> Paaciyan intte gelenna mala, naagitenne Xoossaa woossite; ayyaanai giigi uttiis; shin ashoi daafuranchcha” yaagiis.

<sup>42</sup> Yesuusi qassi naa77anttuwaa biidi, “Ta Aawau, taani ha burccukkuwaappe uyen-nan de7ishin burccukkuwaa denttanaagee danddayettennabaa gidikko, neeni koyiyoobai hano” yaagidi Xoossaa woossiis. <sup>43</sup> Qassikka simmi yiidi, erissiyo ashkkaratu aifiyaa xiskkoi goози wottido gishshau, xiskkidaageeta demmiis.

<sup>44</sup> Qassikka eta yeggi bayidi biidi, heezanttuwaa kase qaaliyo zaarettidi, Xoossaa woossiis. <sup>45</sup> Hegaappe guyyiyan, erissiyo ashkkaratukko yiidi, “Ha77i gakkanaashinkka xiskkeetiinne shemppeetii? Be7ite, tana, Asa Na7aa, nagaranchcha asatuyyo aattidi immiyo wodee gakkiiis. <sup>46</sup> Denddidi hinddite; be7ite, tana aattidi immiyaagee hageeho gakkiiis” yaagiis.

*Yesuusi Ba Morkketun Oiqettiis  
(Marqqoosa 14:43-50; Luqaasa 22:47-53; Yohaannisa 18:3-12)*



<sup>47</sup> Yesuusi hegea biron haasayishin, tammanne naa77u erissiyo ashkkaratuppe issoi, Yihudai, gakki wodhdhiis; qassi qeese halaqatinne dere cimati kiittin, bisuwaanne dullaa oiqqida daro asai aara issippe yiis. <sup>48</sup> Yesuusa aattidi immiyaagee he daro asaa, “Taani yeriyoogee a; a oiqqite” yaagidi malaataa yooti wottiis.

<sup>49</sup> Sohuwaarakka Yesuusakko shiiqidi, “Tamaarissiyaagoo, saro de7ai” yaagidi a yeri ekkiis.

<sup>50</sup> Yesuusi a, “Ta jaalau, neeni oottanabaa ootta agga” yaagiis.

Hegaappe guyyiyan, he daro asai shiiqidi, Yesuusa mintti oiqqiis. <sup>51</sup> Yesuusaara de7iyaageetuppe issoi ba bisuwaa shoddinne qeese ubbatu halaqaa ashkkaaraa shocidi, a haittaa qanxxi oliis. <sup>52</sup> Yesuusi he wode a hagaadan yaagiis; “Ne bisuwaa a shoohuwan zaarada wotta; aissi giikko, biso shoddiya ubbai bison haiqqana. <sup>53</sup> Ta Aawai daro sha7u kiitanchchata issi kuttan yeddidi, tana maaddana mala, taani a woossanau danddayiyoogaa erikkiyye? <sup>54</sup> Yaatin, Xoossaa maxaafati hagaadan hananau bessees yaagidoogee waanidi polettanau danddayii?” yaagiis.

<sup>55</sup> Hegaappe guyyiyan, Yesuusi he shiiqida daro asaa hagaadan yaagiis; “Tana pangga kessidi, pangga oiqqiyooagaan oiqqanau bisonne dulla oiqqidi yiidetii? Taani Beeta Maqidasiyan tamarissaidda, gallassi gallassi inttenaara oottiyo wode tana oiqqibeekketa; <sup>56</sup> shin hagee ubbai hanidoogee hananabaa yootiyaageeti Xoossaa maxaafatun xaafidoogee polettanaassa” yaagiis.

Erissiyo ashkkarati he wode ubbati a yeggi bayidi baqatidosona.

### *Yesuusi Pirdda SHangguwau Aadhdhiis*

*(Marqqoosa 14:53-65; Luqaasa 22:54-55,63-71; Yohaannisa 18:13-14,19-24)*

<sup>57</sup> Yesuusa oiqqidaageeti qeese ubbatu halaqaa Qayaafakko, higgiiya tamarissiyaageetinne cimati shiiqidosaa ekki efiidosona. <sup>58</sup> SHin PHeexiroosi qeese ubbatu halaqaa dirssa giddo gakkanaashin, haahuwan a kaalliis; yohuwaa wurssettaa be7anau dirssa giddo gelidi, naagiyaageetuura utti bayiis.

<sup>59</sup> Qeese halaqatinne yaa7aa asai ubbai Yesuusa woranau a bolli worddo markka demmanau koyidosona. <sup>60</sup> SHin harai atto daroti yiidi, a bolli wordduwaa markkat-tinkka appe ainne demmibookkona. Guyyeppe naa77ati yiidi, <sup>61</sup> “Ha bitanee, ‘Taani Xoossaa Beeta Maqidasiyaa qolada, heezzu gallassan zaaretta keexxanau danddayais’ yaagiis” yaagidosona.

<sup>62</sup> Qeese ubbatu halaqai denddi eqqidi Yesuusa, “Hageeti nena mootiyo mootuwau neeyyo zaariyoobi baawee?” yaagiis. <sup>63</sup> SHin Yesuusi co77u giis; qassikka qeese ubbatu halaqai a, “Taani nena de7o Xoossaa sunttan callais; neeni Xoossaa Na7aa Kiristtoosa gidikko nuussi oda” yaagiis.

<sup>64</sup> Yaagin Yesuusi zaaridi, “Neni ne huuphenkka gaadasa; shin taani intteyyo odais; hagaappe sinttan, intte tana, Asa Na7aa, wolqqaama Xoossaappe ushachcha baggaara uttidaashiininne saluwaa shaaraara yiishin be7ana” yaagiis.

<sup>65</sup> Hegaappe guyyiyan, qeese ubbatu halaqai ba maayuwaa pooshshi olidi, “Hagee cayiichchiis; nuna hagaappe sinttan aissi hara markka koshshii? I ha77i cayiyoogaa intte siyideta. <sup>66</sup> Intte qofai aibee?” yaagiis.

Yaagin eti, “Au haiqoi bessees” yaagidi zaaridosona.

<sup>67</sup> Hegaappe guyyiyan, eti a som77uwan cuchchidi, a dechchidosona; harati qassi a baqqidi, <sup>68</sup> “Kiristtoosaa! Nena dechchidai oonee? Ane nuuyyo hananabaa yoota” yaagidosona.

### *PHeexiroosi Yesuusa Kaddiis*

*(Marqqoosa 14:66-72; Luqaasa 22:56-62; Yohaannisa 18:15-18,25-27)*

<sup>69</sup> PHeexiroosi keettaappe kareera dirssa giddon uttidaashin, issi ashkkariyaa akko yaada, “Neenikka Galiilaa Yesuusaara issippe de7aasa” yaagaasu.

<sup>70</sup> SHin i eta ubbaa sinttan he ashkkariyo, “Neeni giyoobai aibakko taani erikke” yaagidi kaddiis.

<sup>71</sup> Qassi biidi dirssaa penggekko kiyishin, hara ashkkariyaa a be7ada, hegan de7iya asatuyyo, “Ha bitanee Naazireeta Yesuusaara de7ees” yaagaasu.

<sup>72</sup> Yaagin PHeexiroosi naa77anttuwaa caaqqidi, “Taani heгаа bitaniyaa erikke” yaagiis.

<sup>73</sup> Guuttaa gam77ishin, hegan eqqida asati PHeexiroosakko yiidi, “Neenikka tuma etaara issippe de7aasa; aissi giikko, neeni haasayiyo haasayaikka nena erissees” yaagidosona.

<sup>74</sup> Hegaappe guyyiyan PHeexiroosi, “Taani heгаа bitaniyaa erikke!” yaagidi, bana ganggettaanne caaquwaa doommiis.

He wode sohuwaarakka kuttoi waassi aggiis. <sup>75</sup> PHeexiroosi bana Yesuusi, “Neeni kuttoi waassanaappe kase heezzutoo tana kaddana” giidoogaa hassayidi, kare kiyidi, mishettidi yeekkiis.

## 27

### *Yesuusi PHilaaxoosa Sintti Pirddau SHiiqiis*

*(Marqqoosa 15:1; Luqaasa 23:1-3; Yohaannisa 18:28-32)*

<sup>1</sup> Maallado guuraara qeese halaqati ubbatinne dere cimati Yesuusa woranau maqetidosona; <sup>2</sup> eti Yesuusa qachchidi efidi, deriyaa haariya PHenxxeniyaa PHilaaxoosayyo aattidi immidosona.

<sup>3</sup> Yesuusa he wode oittida Yihudai PHilaaxoosi Yesuusa bolli pirddidoogaa be7idi, “Aayye7ana! Oittennan aggarkkinaashsha!” yaagidi, he hasttamu biraa qeese halaqatuyyoonne dere cimatuuyyo guyye zaaridi, <sup>4</sup> “Taani geeshsha asa oittada nagaraa oottaas” yaagiis.

SHin eti a, “Hegge nuuyyo ai metoo? Hegge ne shene” yaagidosona.

<sup>5</sup> Yihudai biraa Beeta Maqidasiyan oli bayiis; eta matappe aggidi biidi, suletti haiqqiis.

<sup>6</sup> Qeese halaqati biraa ekkidi, “Ha birai suutta miishsha gidishin, nuuni Beeta Maqidasiyaa miishshaara gattiyoogee higge gidenna” yaagidosona. <sup>7</sup> Yaagidi issippe zorettidi, asa biitta asayyo moogo gade oottanau urqqa miishsha medhdhiyaageetu gadiyaa shammidosona. <sup>8</sup> Hega gishshau, he gadee hachchi gakkanaassikka, suutta gade geetettidi xeesettes.

<sup>9</sup> Hananabaa yootiya Ermmaasi, “Eti Israa7eela asai au qanxxanau qoppido hasttamu xaqara biraa ekkidi, <sup>10</sup> Godai tana azazidoogaadan, urqqa miishsha medhdhiyaageetu biittaa shammanau immidosona” giidoogee he wode polettiis.

### *PHilaaxoosi Yesuusa Qoridi Oichchiis*

*(Marqqoosa 15:2-5; Luqaasa 23:3-5; Yohaannisa 18:33-38)*

<sup>11</sup> Yesuusi deriyaa haariyaagaa sintti shiiqin, deriyaa haariyaagee a, “Neeni Aihudatu kawoo?” yaagidi oichchiis.

Yesuusi a, “Neenikka gaasa” yaagiis.

<sup>12</sup> Qeese halaqatinne dere cimati a mootin, etau ainne zaaro immibeenna. <sup>13</sup> He wode, PHilaaxoosi Yesuusa, “Hageeti nena mootiyoobaa ubbaa siyikkii?” yaagiis.

<sup>14</sup> Yesuusi harai atto, issi qaalakka zaarennan ixxin, deriyaa haariyaagee daro garamettiis.

### *Yesuusi Haiquwau Pirddettiis*

*(Marqqoosa 15:6-15; Luqaasa 23:13-25; Yohaannisa 18:39-40; 19:1-16)*

<sup>15</sup> Deriyaa haariyaagee Paasikaa bonchchiyo gallassan, asai koyiyo issi uraa qashuwaappe birshshiyoo meeze de7ees. <sup>16</sup> He wode issi Barbbaana giyo daro erettida iita asi qasho keettan de7ees. <sup>17</sup> Hega gishshau, daro asai issisaa shiiqidaashin

PHilaaxoosi, “Taani intteyyo Barbbaana birshshooyye, woi Kiristtoosa giyo Yesuusa birshshoo?” yaagidi asaa oichchiis. <sup>18</sup> Aissi giikko, eti qanaatidi Yesuusa oittidoogaa i erees.

<sup>19</sup> PHilaaxoosi pirda keettan uttidaashin, a machchiyaa ayyo, “He xillo bitaniyaa ainne oottoppa; aissi giikko, taani hachchi qammi aimuwan aban daro waayettaas” yaagada kiittaasu.

<sup>20</sup> SHin qeese halaqatinne dere cimati PHilaaxoosi Barbbaana birshshidi, Yesuusa woranaadan, shiiqida asai a woossana mala, asaa cimmidosona.

<sup>21</sup> PHilaaxoosi zaaridi eta, “Taani eta naa77aappe intteyyo oona birshshanau koy-eetii?” yaagin eti, “Barbbaana birshshanau koyoos” yaagidosona.

<sup>22</sup> PHilaaxoosi, “Yaatin, Kiristtoosa giyo Yesuusa waatoo?” yaagidi eta oichchin ubbai, “Masqqaliyaa bolli misimaariyan xishettidi kaqetto” yaagidosona.

<sup>23</sup> PHilaaxoosi asaa, “Aissi? Ai itabaa oottidee?” yaagiis.

SHin asai kaseegaappekka ba qaalaa xoqqu oottidi, “Masqqaliyaa bolli misimaariyan xishettidi i kaqetto” yaagidosona.

<sup>24</sup> Ooshshi denddanaagaappe attin, aibinne polettennaagaa PHilaaxoosi be7idi, haataa ekkidi, “Ha bitanee haiqqiyooban taani gelikke; heгаа intte erite” yaagidi shiiqida asaa sinttan ba kushiya meecettiis.

<sup>25</sup> SHiiqida asai ubbai zaaridi, “A suutta gomee nunanne nu naata gakko” yaagiis.

<sup>26</sup> Hegaappe guyyiyan, PHilaaxoosi Barbbaana etau birshshiis; birshshidi lissuwan Yesuusa garafidi, masqqaliyaa bolli misimaariyan xishidi kaqqanau etau aattidi immiis.

*Wotaaddarati Yesuusa Bolli Qilliiccidosona  
(Marqqoosa 15:16-20; Yohaannisa 19:2-3)*

<sup>27</sup> Hegaappe guyyiyan, PHilaaxoosa wotaaddarati Yesuusa deriyaa haariyaagaa ooso keettaa ekki efin, wotaaddarati ubbai a lanqqiyan yuuyi aadhhdidi eqqidodosona. <sup>28</sup> A afalaa qaari ekkidi, zo7o afalaa a maizzidosona. <sup>29</sup> Qassi agunntaa akililiyaa giigissidi, a huuphiyan wottidosona; a ushachcha kushiyan shombbogo gatimaa oittidi, a sinttan gulbbatidi, “Aihudatu kawuwau, saro de7ai!” yaagidi, a bolli qilliiccidosona. <sup>30</sup> A bolli cuchchidosona; he shombbogo gatimaa ekkidi, a huuphiyaa shocidosona. <sup>31</sup> Eti a bolli qilliiccidoogaappe guyyiyan, zo7o afalaa appe qaari ekkidi, a afalaa a maizzidosona; qassi masqqaliyaa bolli misimaariyan xishidi a kaqqanau ekki efidosona.

*Yesuusi Kaqettiis*

*(Marqqoosa 15:21-32; Luqaasa 23:25-43; Yohaannisa 19:17-27)*

<sup>32</sup> Eti kare kiyiiddi, issi Simoona giyo Qareena biitta asa demmidi, Yesuusa masqqaliyaa wolqqan toossidosona. <sup>33</sup> Golggottaa giyoosaa gakkidosona. “Golggottaa” giyoogee “Guuggiyaa Sohuwaa” giyoogaa. <sup>34</sup> Hegan eti ciyyee walahettido woine eessaa Yesuusayyo uyanau immidosona; immin i heгаа ganxxi xeellidi, uyennan ixxiis.

<sup>35</sup> Eti masqqaliyaa bolli misimaariyan xishidi a kaqqidoogaappe guyyiyan, a afalaa shaakkidi, saamaa yeggidi ekkidosona. <sup>36</sup> Hegaappe guyyiyan, a naaganau hegan utti bayidosona. <sup>37</sup> Qassi, “Hagee Aihudatu Kawuwaa Yesuusa” yaagidi mootiyo xifatiyaa a huuphessaara wottidosona. <sup>38</sup> Yesuusaara he wode naa77u panggata issuwaa appe ushachcha baggaara, qassi issuwaa appe haddirssa baggaara, masqqaliyaa bolli misimaariyan xishidi kaqqidosona.

<sup>39</sup> Ogiyaara aadhhdhiya asai Yesuusa karidi, ba huuphiyaa qaattiiddi cayiis. <sup>40</sup> “Beeta Maqidasiyaa qolada heezzu gallassa gidдон keexxiyaagoo, ne huuphiyaa ashsha; neeni Xoosaa Na7a gidikko, ane masqqaliyaa bollappe wodhdha” yaagiis.

<sup>41</sup> Hegaadankka, qeese halaqati higgiiyaa tamarissiyaageetuuranne cimatuura is-sippe Yesuusa bolli qilliicciiddi, hagaadan yaagidosona; <sup>42</sup> “Harata ashshiis; shin

bana ashshanau danddayenna. I Israa7eela kawo; ane masqqaliyaa bollappe ha77i wodhdho; nuunikka qassi a ammanana. <sup>43</sup> Xoossan i ammanettes; Xoossai a ashshana koyikko ane ashsho; aissi giikko, i bana, ‘Taani Xoossaa Na7aa’ gees” yaagidosona.

<sup>44</sup> Qassi harai atto, aara masqqaliyaa bolli misimaariyan xishettidi kaqettida pangatikka hegaadan giidi, a bolli qilliiccidosona.

### *Yesuusi Haiqqiis*

*(Marqqoosa 15:33-41; Luqaasa 23:44-49; Yohaannisa 19:28-30)*

<sup>45</sup> Usuppun saateppe doommidi, uddufun saate gakkanaashin, biitta ubbai xumiis.

<sup>46</sup> Uddufun saate gidiyo heeran Yesuusi ba qaalaa xoqqu oottidi, “Elohee, Elohee, laamaa sabaqitaanii?” yaagiis. Hegaa giyoogee, “Ta Xoossau, ta Xoossau, tana aissi aggadii?” giyoogaa.

<sup>47</sup> Hegan eqqida asaappe issoi heгаа siyidi, “Ha bitanee Eelaasa xeesees” yaagiis.

<sup>48</sup> Sohuwaara etappe issoi woxxidi, gombbilla mala ispponjjiyaa ekkidi, caala woine eessaa kuntuus; heгаа shombboqo gatimaa xeeran wottidi, ushshanau a doonaakko shiishshiis. <sup>49</sup> SHin hankkooti, “Nangga, Eelaasi a ashshanau yaanaakkonne be7oos” yaagidosona. <sup>50</sup> Yesuusi naa77anttuwaa ba qaalaa xoqqu ootti waassidi, haiqqi bayiis.

<sup>51</sup> Akeekite; Beeta Maqidasiyan kaqettida magalashoi qommoppe duge gakkanaassi, naa77u kiyidi, pooshetti wodhdhiis; biittai qaaxxiis. Qassi zaallaikka phalqqettiis; <sup>52</sup> duufoti dooyettidosona. Xoossaa asatuppe daroti haiqqidaageeti, haiquwaappe denddidosona. <sup>53</sup> Eti duufuwaappe kiyidi, Yesuusi haiquwaappe denddidooгаappe guyyiyan, geeshsha katamaa biidosona; hegan eta daro asai be7iis.

<sup>54</sup> Mato halaqainne aara Yesuusa naagiya wotaaddarati biittai qaaxxiyoogaanne hegan hanidabaa ubbaa be7ido wode daro yayyidosona; yayyidi, “Tumu hagee Xoossaa Na7aa” yaagidosona.

<sup>55</sup> Hegan daro maccaasati, Galiilappe doommidi, Yesuusa maaddiiddi kaallidaageeti, haahuwan eqqidi xeelloosona. <sup>56</sup> Eta gidдон Magddala giyo katamaappe yiida Mairaama, Yaaqoobanne Yooseefa aayyiya Mairaamanne Zabddiyoosa naatu aayyiya de7oosona.

### *Yesuusi Moogettiis*

*(Marqqoosa 15:42-47; Luqaasa 23:50-56; Yohaannisa 19:38-42)*

<sup>57</sup> Sa7ai omariyo wode, Yooseefa giyo issi dure bitanee, Armmaatiyaasa katamaa asi yiis; i ba huuphenkka Yesuusa kaalliyaagaa. <sup>58</sup> Yooseefi PHilaaxoosakko biidi, Yesuusa ahaa ekkanaу woossiis; woossin PHilaaxoosi Yooseefayyo imettana mala azaziis. <sup>59</sup> Yesuusa ahaa ekkidi, geeshsha moogo afalan xaaxiis. <sup>60</sup> Xaaxidi baayyo moogettanau shuchchaa woocido ooratta gonggoluwaa gidдон a ahaa wottiis; qassi he gonggoluwaa doonan gita shuchchaa gondдорssi wottidi, aggi bayidi biis. <sup>61</sup> Magddala katamaappe yiida Mairaamanne hinkko Mairaama hegan gonggoluwaaakko simmidi uttidosona.

<sup>62</sup> Sambbataassi gigettiyo gallassaappe wonttetta gallassi, qeese halaqatinne Parisaaweti PHilaaxoosaara gaittidi, hagaadan yaagidosona; <sup>63</sup> “Godau, he worddoi paxa de7iyo wode, ‘Taani heezzu gallassaappe guyyiyan, haiquwaappe denddana’ yaagidoogaa nuuni hassayida. <sup>64</sup> Hegaa gishshau, a moogido gonggoluwaa heezzu gallassa gakkanaassi, mintti naagana mala azazarkkii; hegee xayikko erissiyo ashkharati biidi, a ahaa wuuqqidi asaayyo, ‘Haiquwaappe denddiis’ yaagana; yaagin naa77antto worddoi kase wordduwaappe ubba yaa palattana” yaagidosona.

<sup>65</sup> PHilaaxoosi eta, “Intteyyo naagiyaageeti de7oosona; biidi intte danddayiyoogaa keenaa naagissite” yaagiis.

<sup>66</sup> Yaagin eti biidi, shuchchaa bolli maatafaa attamidi, qassi naagiyaagaa yaani wottidi, Yesuusa moogido gonggoluwaa naagissidosona.

## 28

### *Yesuusi Haiquwaappe Denddiis*

*(Marqqoosa 16:1-10; Luqaasa 24:1-12; Yohaannisa 20:1-10)*

<sup>1</sup> Sambatai aadhdhin Woggaa gallassi sa7ai wonttishin, Magddala giyo katamaappe yiida Mairaamanne hinkko Mairaama Yesuusi moogettido gonggoluwaa be7anau biidosona. <sup>2</sup> Godaa kiitanchchai saluwaappe wodhdhido gishshau, biittai daro qaaxxiis; he kiitanchchai yiidi, shuchchaa gonddorssi olidi, a bolli kiyi uttiis. <sup>3</sup> A merai wolqqantta milatees; a maayoikka shachchaadan bootta. <sup>4</sup> Naagiyaageeti kiitanchchau yashshaa kokkoridi, haiqqida asadan hanidosona.

<sup>5</sup> Kiitanchchai maccaasata hagaadan yaagiis; “Yayyoppite; aissi giikko, masqqaliyaa bolli misimaariyan xishidi kaqqido Yesuusa intte koyiyoogaa taani erais. <sup>6</sup> I hagan baawa; aissi giikko, i ba giidoogaadanka haiquwaappe denddiichchiis; haa yiidi, i zin77idosaa be7ite. <sup>7</sup> Intte ha77i eesuwan biidi, Yesuusi erissiyo ashkkaratuyyo, ‘Yesuusi haiquwaappe denddiichchiis. Qassi i intteppe kasetidi, Galiilaa bees; intte a yaani be7ana’ yaagidi odite. Be7ite, taani intteyyo odaas” yaagiis.

<sup>8</sup> Eti yayyiiddinne qassi daro ufaittiiddi, Yesuusi moogettido gonggoluwaa matappe eesuwan aggidi, erissiyo ashkkaratukko odanau woxxidosa.

<sup>9</sup> Sohuwaara Yesuusi etaara gaittinne eta, “Saro de7eetii” yaagi aggiis; eti akko shiiqidi, a tohuwaa oiqqidi, ayyo goinnidosona. <sup>10</sup> Yesuusi he wode eta, “Yayyoppite; ta ishantti Galiilaa baana mala, biidi etau yootite; eti tana yaani be7ana” yaagiis.

<sup>11</sup> He maccaasati biishin, gonggoluwaa naagiya wotaaddaratuppe amaridaageeti katamaa biidi, hanidabaa ubbaa qeese halaqatuyyo odidosona. <sup>12</sup> Qeese halaqati cimatuura issippe shiiqi zorettidi, wotaaddaratuyyo daro miishshaa immidi, <sup>13</sup> “ ‘Nuuni xiskkidaashin erissiyo ashkkarati qammi yiidi, a ahaa wuuqqidosona’ yaagite; <sup>14</sup> ha yohuwaa deriyaa haariyaagee siyikko, nuuni ayyo yooti maizzana; qassi inttena aibinne hirgissennaadan oottana” yaagidosona.

<sup>15</sup> Wotaaddarati miishshaa ekkidi, banttau odidoogaadan oottidosona. Ha yohoi Aihudatu matan hachchi gakkanaashinkka, odettiiddi de7ees.

### *Yesuusi Ba Erissiyo Ashkkaratuyyo Beettiis*

*(Marqqoosa 16:14-18; Luqaasa 24:36-49; Yohaannisa 20:19-23; Yesuusi Kiittidoogetu Oosuwaa 1:6-8; Koiro Qoronttoosa 15:3-8)*

<sup>16</sup> SHin tammanne isiini erissiyo ashkkarati Yesuusi banttana biite giido Galiila Deriyaa biidosona. <sup>17</sup> Biidi a be7ido wode ayyo goinnidosona; shin etappe issooti issooti siridosona.

<sup>18</sup> Yesuusi etakko shiiqidi, eta hagaadan yaagiis; “Maata ubbai saluwaaninne sa7an taayyo imettiis. <sup>19</sup> Hegaa gishshau, intte biidi, asa ubbaa tana kaalliyaaageeta oottite; Aawaa sunttan, Na7aa sunttaaninne Geeshsha Ayyaanaa sunttan eta xammaqite. <sup>20</sup> Taani inttena azazidobaa ubbaa eti naagana mala, eta tamaarissite; taani wodiyaawurssettai gakkanaassikka ubba wode inttenaara de7iyoogaa akeekite” yaagiis.



## Marqqoosa Wonggeliyaa Mishiraachchuwaa

### *Gidduwaa Erissuwaa*

Marqqoosa Wonggelee koiro dendiiddikka, “Hagee Xoossaa Na7aa Yesus Kiristtoosa mishiraachchuwaa qaalau doomettaa” giiddi doommees. Ha wonggeliyaa mishiraachchuwaa gidдон Yesuusi oosuwaasanne maataasa gididi shiiqiis. A maatai a timirttiyan, xalahiyaa citaa bolli ayyo de7iya wolqqaaninne nagaraa atto giyoogan beettiis. Yesuusi, “Asaa nagaraa aillettaappe kessanau taani ta de7uwaa aattada immanau yiida Asaa Na7aa” yaagidi i ba huuphen haasayiiis.

Marqqoosi Yesuusa taarikiyaa sitta ogiyaaninne wolqqai kumido ogiyan odiis. I bairayidi odidoogee Yesuusa qaalaanne timirttiyaa gidennan i oottido ooratta oosota. Xammaqiya Yohaannisa taarikiyaa, Yesuusa xinqqatiyaanne paaciyaa qanttan erissi simmidi, Yesuusa tamarissuwaanne patuwaa aassidi odees. Takkiiddi takkiiddi Yesuusa kaalliyaaageeti Yesuusa loittidi eri eridi biidosona. Yesuusa ixxiyaageetikka ixuwaa gujji gujjidi biidosona. Wurssetta miraafeti Yesuusa de7uwan wurssetta saaminttaa gidдон polettida oosota, hegeetikka a kaqettaabaanne a dendduwaabaa odiyaageeta.

Wonggeliyaa mishiraachchuwaa wurssettan haphaa gidдон beettiya naa77u kifileti issi issi birshshettatu xalaalan de7iyaageeta.

### *Xammaqiya Yohaannisa Awaajuwaa*

*(Maatiyoosa 3:1-12; Luqaasa 3:1-18; Yohaannisa 1:19-28)*

<sup>1</sup> Xoossaa Na7aa Yesus Kiristtoosa wonggeliyaa mishiraachchuwaa doomettaa.

<sup>2</sup> Hananabaa yootiya Isiyaasi xaafido maxaafan Xoossai,

“Be7a, ta kiittiyoogaa

taani neeppe sinttau yeddana.

I neeyyo ogiyaa kessana.

<sup>3</sup> Isooi bazzon ba qaalaa xoqqu oottidi,

‘Godaa ogiyaa giigissite.

I hemettana loossuwaakka

ayyo sitti oottite’ giis”

yaagees.

<sup>4</sup> Xammaqiya Yohaannisi asaa xammaqiiddinne, “Intte nagaraappe simmidi xammaqettite; Xoossai intte nagaraaatto gaana” yaagidi qaalaa yootiiddi bazzon kiya wodhdhiis. <sup>5</sup> Yihudaa biittan de7iya asai ubbainne Yerusalaame katamaa asai ubbai Yohaannisakko yees. Yiidi ba nagaraa paaxin, Yohaannisi he asaa Yorddaanoosa SHaafan xammaqees.

<sup>6</sup> Yohaannisi gaameelaa ikisiyan daddido afalaa maayidi, ba xeessan dafuwaa gixxees; qassi booliyaanne degeeraa eessaa mees. <sup>7</sup> Yohaannisi qaalaa yootiiddi, “Taappe guyyeera daro minniyaagee yees; harai atto, hokkada a caammaa dafuwaa birshshanaukka taayyo bessenna. <sup>8</sup> Taani inttena haattan xammaqais; shin i inttena Geeshsha Ayyaanan xammaqana” yaagees.

### *Yesuusi Xammaqettidoogaanne Paacettidoogaa*

*(Maatiyoosa 3:13-17; 4:1-11; Luqaasa 3:21-22; 4:1-13)*

<sup>9</sup> Yesuusi he wode Galiila biittan de7iya Naazireete katamaappe yin, Yohaannisi Yorddaanoosa SHaafan a xammaqiis. <sup>10</sup> Yesuusi haattaappe kiyosaara saloi dooyet-tishiinne Geeshsha Ayyaanai ba bolli haraphphedan wodhdhishin be7iis. <sup>11</sup> Qassi saluwaappe, “Taani siiqiyo ta Na7ai nena; tana nebai ufaissees” yaagiya qalalai yiis.

<sup>12</sup> Sohuwaarakka Geeshsha Ayyaanai bazzo a yeddiis. <sup>13</sup> Yesuusi bazzon bana Se-exaanai paaccishin, oitamu gallassa gattiis; do7aarakka de7iis; kiitanchchatikka yiidi, ayyo oottidosona.

*Yesuusi Moliyaa Oiqqiya Oiddu Asata Xeesiis*  
(Maatiyoosa 4:12-22; Luqaasa 4:14-15; 5:1-11)

<sup>14</sup> Yohaannisi qashettiichchidoogaappe guyyiyan, Yesuusi Xoossaa kawotettaa wonggeliyaa mishiraachchuwaa yootiiddi, Galiila biitti biis; <sup>15</sup> biidi, “Wodee gakkii; Xoossaa kawotettaikka matattiis. Intte nagaraappe simmidi, wonggeliyaa mishiraachchuwaa ammanite” yaagiis.

<sup>16</sup> Yesuusi Galiila Abbaa lanqqiyaara aadhdhiiddi, moliyaa oiqqiyaageeta, Simoonanne a ishaa Inddiraasa, bantta gitiyaa abban yeggiyaageeta be7iis. <sup>17</sup> Be7idi eta, “Tana kaallite; taani inttena asa oiqqiyoogaa tamarissana” yaagiis. <sup>18</sup> Yaagin eti sohuwaarakka bantta gitiyaa yeggi bayidi, Yesuusa kaallidosona.

<sup>19</sup> Yesuusi guuttaa sinttaukko biidi, Zabddiyoosa naata naa77u ishantta, Yaaqoobanne Yohaannisa wolwolo gidдон bantta gitiyaa giigissiyaageeta be7iis. <sup>20</sup> I be7osaarakka eta xeesin, bantta aawaa, Zabddiyoosa, a oosanchchatuura wolwolo gidдон yeggi bayidi, Yesuusa kaallidi biidosona.

*Tuna Ayyaanai Oiqqido Bitanee Paxiis*  
(Luqaasa 4:31-37)

<sup>21</sup> Eti Qifirinaahooma giyo katamaa gelidosona; Yesuusi Sambbata gallassi sohuwaara Aihuda woosa keettaa gelidi, tamarissuwaa doommi aggiis. <sup>22</sup> Baayyo alaafetettai de7iyo asadan, asaa i tamarissiyogaappe attin, higgiiyaa tamarissiyaageetudan tamarissenna gishshau, asai a timirttiyan garamettiis.

<sup>23</sup> He wode iita ayyaanai de7iyo issi bitanee Aihuda woosa keettaa gelosaarakka ba qaalaa xoqqu oottidi, <sup>24</sup> “Naazireeta Yesuusaa, neeni nuuppe ai koyai? Nuna xaissanau yaadii? Neeni oonakko erais; neeni Xoossaa geeshshaa gidikkii!” yaagiis.

<sup>25</sup> Yesuusi he iita ayyaanaa, “Haizza; bitaniyaappe kiya” yaagidi azaziis.

<sup>26</sup> Iita ayyaanai bitaniyaa daferettinnee, wolqqappe waasissidi, appe kiya aggiis. <sup>27</sup> Asai ubbai garamettidi, “Hagee aibee? Ha bitanee ba alaafetettan harai atto, iita ayyaanatakka azazees; etikka qassi ayyo azazettoosona; hagee aiba ooratta timirttee?” yaagidi, ba gidдон issoi issuwaa oichchiis.

<sup>28</sup> Yesuusabai sohuwaara Galiila biittan de7iya heera ubbaa gakkii aggiis.

*Yesuusi Daro Hargganchchata Pattiis*  
(Maatiyoosa 8:14-17; Luqaasa 4:38-41)

<sup>29</sup> Yesuusi Aihuda woosa keettaappe kiyosaara, Yaaqoobaaranne Yohaannisaara Simoona soonne Inddiraasa soo bi aggiis. <sup>30</sup> Simoona bollotiyaa qoxonne misho harggada zin77idaaribaa i yaa gakkosaarakka ayyo odi aggidosona. <sup>31</sup> I ikko shiiqidi, i kushiyaa oiqqidi, o dentti essiis; qoxoinne mishoi o aggin, a etayyo oottaasu.

<sup>32</sup> Harggida asa ubbaanne xalaheti oiqqido asa ubbaa omarssi awai wullidoogaappe guyyiyan, akko ehiidosona. <sup>33</sup> Kataman de7iya asai ubbai he kare shiiqiis. <sup>34</sup> Yesuusi dumma dumma harggiyan oiqettida daro asaa pattidi, daro xalahetakka kessiis. Kiristoosa i giddiyoogaa xalaheti erido gishshau, eta haasayissennan diggiis.

*Yesuusi Galiilan Tamarissiis*  
(Luqaasa 4:42-44)

<sup>35</sup> Yesuusi maallado wonttimaattan denddidi, sooppe kiyidi, asi bannasaa biis; biidi yan Xoossaa woossiis. <sup>36</sup> Simooninne aara de7iyaageeti a koyiiddi biidosona. <sup>37</sup> Eti a demmidi, “Asai ubbai nena koyees” yaagiis.

<sup>38</sup> Yaagin Yesuusi qassi eta, “Hegaa heeran de7iya hara katamata hinddite; taani hegankka qaalaa yootanau bessees; aissi giikko, taani yiidoogee hegaassa” yaagiis. <sup>39</sup> Yaagidi Aihuda woosa keettatun qaalaa yootiidinne xalaheta kessiiddi, Galiila biitta ubbaa yuuyiis.

*Yesuusi Inchchirichchai Oiqqido Bitaniyaa Pattiis*  
(Maatiyoosa 8:1-4; Luqaasa 5:12-17)

<sup>40</sup> Inchchirichchai oiqqido issi bitanee Yesuusakko yiidi, a sinttan gulbbatidi, “Neeni koyikko, tana pattanau danddayaasa” yaagidi woossiis.

<sup>41</sup> Yesuusi ayyo qarettiis; ba kushiya yeddidi, a bochchidi, “Taani koyais; paxa!” yaagiis. <sup>42</sup> Sohuwaarakka inchchirichchai bitaniyaa yeddi aggin, bitanee paxi aggiis. <sup>43</sup> Yesuusi wolqqappe godatidi, sohuwaara a kessi yeddiis. <sup>44</sup> Yesuusi a, “Nena era! Hagaa ooyyoonne yootoppa; shin baada ne bollaa qeesiyaa bessa; qassi neeni ha77i geeshsha gididoogaa asaa erissanau, Muusee azazido yarshshuwaa yarshsha” yaagiis.

<sup>45</sup> SHin bitanee biidi, yohuwaa ubbasan asa ubbau oduwaanne laaletttaa doommiis; hejaa gishshau, Yesuusi qoncciyaa kiyidi, katama gelanau danddayibeenna; shin asi bannasan gaxan de7iis; qassi asai ubbasaappe akko yees.

## 2

*Yesuusi Bollai Silido Bitaniyaa Pattiis*  
(Maatiyoosa 9:1-8; Luqaasa 5:17-26)

<sup>1</sup> Amarida gallasaappe guyyiyan, “Yesuusi Qifirinaahooma guyye simmidi, son de7ees” giyo odoi siyettiis. <sup>2</sup> Keetta ekkennan ixxin, harai atto, kareekka un77ana gakkanaassi daro asai shiiqiis; shiiqin Yesuusi qaalaa asau yootees. <sup>3</sup> Oiddu asati bollai silido issi bitaniyaa tookkidi, akko ehiidosona. <sup>4</sup> Asai darido gishshau, bitaniyaa Yesuusakko efaanau etayyo danddayettennan ixxin, Yesuusi de7iyo ginaara keettaa qaaridi, kaaraa lukkidosa; he lukkidosaara bitaniyaa i zin77ido halaara duge yeddidi, Yesuusa sinttan wottidosona. <sup>5</sup> Yesuusi eta ammanuwaa be7idi, he bollai silido bitaniyaa, “Ta na7au, ne nagarai atto geetettiis” yaagiis.

<sup>6</sup> Yaagin higgiiyaa tamarissiyaageetuppe he sohuwan uttida issooti issooti bantta wozanan, <sup>7</sup> “Laa ha bitanee haggaa mala iitabaa Xoossaa bolli aissi haasayii? Xoossaa xalaalappe attin, harai ooni nagara atto gaanau danddayii?” yaagidi qoppidosona.

<sup>8</sup> Eti bantta wozanan hegaadan qoppidoogaa Yesuusi sohuwaara ba ayyaanan eridi, eta hegaadan yaagiis; “Intte intte wozanan aissi hegaadan qoppeetii? <sup>9</sup> Bollai silido bitaniyaa, ‘Ne nagarai atto geetettiis’ giyoogee matee? Woi, ‘Dendda eqqada ne halaa tookkada hemetta’ giyoogee matee? <sup>10</sup> SHin taayyo, Asa Na7aayyo, sa7aa bollar nagara atto gaanau alaafetettai de7iyoogaa taani inttena erissana” yaagidi he bollai silido bitaniyaa, <sup>11</sup> “Nena gais; dendda eqqa; yaatada ne halaa tookkada ne soo ba” yaagiis.

<sup>12</sup> Bitanee sohuwaara denddi eqqidi, ba halaa tookkidi, asai ubbai xeellishin biis; bin asai ubbai garamettidi, “Nuuni haggaa malabaa mulekka be7i erokko” yaagidi Xoossaa galatiis.

*Yesuusi Leewa Xeesiis*  
(Maatiyoosa 9:9-13; Luqaasa 5:27-32)

<sup>13</sup> Yesuusi naa77anttuwaa Galiila Abbaa dooni biis; asai ubbai akko yiidaagaa tamarissiis. <sup>14</sup> Hegaara aadhdhiiddi, Ilppiyoosa na7aa Leewa, giyoogee giiraa gi-iriyooosan uttidaagaa demmidi, “Tana kaalla” yaagiis. Yaagin Leewi denddi eqqidi, a kaalliis.

<sup>15</sup> Yesuusi qumaa maanau Leewi son uttidaashin, giiraa ekkiya daro asainne nagaranchchati aaranne i erissiyoo ashkkaratuura issippe uttidosa. Aissi giikko, a

kaalliyaageetu gidдон hegeetu mala asati daridosona. <sup>16</sup> Higgiyaa tamarissiya issi issi Parisaaweti Yesuusi nagaranchchatuuranne giiraa ekkiyaageetuura qumaa miishin be7idi, “I aissi nagaranchchatuuranne giiraa ekkiyaageetuura qumaa mii?” yaagidi, erissiyoo ashkkarata oichchidosona.

<sup>17</sup> Yesuusi eti giyoogaa siyidi, “Hargganchchatuppe attin, payyatuyyo aakime koshshenna; taani nagaranchchata xeesanau yiidoogaappe attin, xillota xeesanau yabeikke” yaagidi etayyo zaariis.

*Xoomaabaa Eranau SHiiqida Oishaa*  
(Maatiyoosa 9:14-17; Luqaasa 5:33-39)

<sup>18</sup> Xammaqiya Yohaannisi erissiyoo ashkkaratinne Parisaaweti xoomoosona; amarida asati Yesuusakko yiidi, “Yohaannisi erissiyoo ashkkaratinne Parisaaweti erissiyoo ashkkarati xoomoosona; shin neeni erissiyoo ashkkarati aissi xoomokkonaa?” yaagidosona.

<sup>19</sup> Yesuusi eta hagaadan yaagiis; “Bullachchaa yiida asati machchiyo ekkiyaagee banttanaara de7ishin, xoomanau danddayiyoona? Machchiyo ekkiyaagee etaara de7ishin, xoomanau danddayokkona. <sup>20</sup> SHin machchiyo ekkiyaagaa eta matappe efaana wodee yaana; eti he wode xoomana.

<sup>21</sup> “Ceega maayo bolli ooratta woto wotti sikkiya asi baawa; wotti sikkikko, ooratta wotoi ceega maayuwaa peererettana; peerettaikka kaseegaappe darana. <sup>22</sup> Qassi ho77o woine eessa ceega ogoron naaqqiya asi baawa; shin naaqqikko, he woiniyaa eessai ogoruwaa daakkana; baukka gukkana; ogoroikka moorettana; shin ho77o woine eessaa ooratta ogoron naaqqeettes” yaagiis.

*Sambbataabaa Eranau SHiiqida Oishaa*  
(Maatiyoosa 12:1-8; Luqaasa 6:1-5)

<sup>23</sup> Yesuusi issi Sambbata gallassi tiya bangгаа gidдоора aadhdhishin, erissiyoo ashkkarati aara biiddi, bangгаа tiyaappe duutettaa doommidosona. <sup>24</sup> Parisaaweti Yesuusa, “Be7a; neeni erissiyoo ashkkarati Sambbata gallassi higge gidennabaa aissi oottiyoonaa?” yaagidosona.

<sup>25</sup> Yesuusi eta, “Daawiti namisettidi, miyoobaa koyido wode, banaara de7iyaageetuura oottidobaa mulekka nabbabibeekketii? <sup>26</sup> Abiyaataari qeese ubbatu halaqa gidido wode, Daawiti Xoossaa keettaa gelidi, qeesetu xalaalai maanaappe attin, ooninne maanau higge gidennaagaa Godaa sinttan wottido oittaa miidi, banaara de7iyaageetuuyyookka immiis” yaagiis.

<sup>27</sup> Qassikka Yesuusi eta, “Sambbatai asau merettidoogaappe attin, asi Sambbatau merettibeenna. <sup>28</sup> Hega gishshau, taani, Asa Na7ai, harai atto, Sambbataukka Goda” yaagiis.

### 3

*Kushee Silido Bitaniyaa*  
(Maatiyoosa 12:9-14; Luqaasa 6:6-11)

<sup>1</sup> Yesuusi Aihuda woosa keettaa naa77anttuwaa geliis; hegan kushee silido issi bitanee de7ees. <sup>2</sup> Issi issi asai Yesuusa mootanau koyidi, kushee silido bitaniyaa Sambbatan i pattiyaakko be7anau mintti naagees. <sup>3</sup> Yesuusi he kushee silido bitaniyaa, “Dendda eqqada sinttau haa ya” yaagiis. <sup>4</sup> Hegaappe guyyiyan asaa, “Sambbatan lo77obaa oottiyoogee wogeeyye iitabaa oottiyoogee wogee? Asa shemppo ashshiyoogee wogeeyye woriyoogee wogee?” yaagidi oichchiis.

SHin asai co77u giis. <sup>5</sup> Yesuusi hanqqettidi, eta yuushshi aatti xeellidi, eti yootin siyennaageeta gidido gishshau, etau keehi qarettiis; he bitaniyaa, “Ne kushiya piddi ootta” yaagiis; bitanee piddi oottin, a kushee paxi aggiis. <sup>6</sup> Parisaaweti Aihuda

woosa keettaappe kare kiyidi, Yesuusa waati woranaakko maqettanau, Heeroodisa baggatuura sohuwaara issisaa shiiqidosa.

### *Asai Abbaa Lanqqen Yesuusakko SHiiqiis*

<sup>7</sup> Yesuusi ba erissiyo ashkkaratuura Galiila Abbaa biis; Galiilappenne Yihudaappe yiida daro asai a kaalliis. <sup>8</sup> Qassikka daro asai Yerusalaameppe, Eedomiyaasappe, Yorddaanoosa SHAafaappe hefintta baggappe, Xiirsoosa katamaappenne Sidoona kata-maappe Yesuusi oottidobaa siyidi, Yesuusakko yiis. <sup>9</sup> Yesuusi daro asai bana un77enna mala, ba erissiyo ashkkarati wolwoluwaa baayyo takkissana mala azaziis. <sup>10</sup> Daro asaa i pattido gishshau, harggiya asai ubbai a bochchanau sugerettees. <sup>11</sup> Iita ayyaanai de7iyo asatikka a be7ido wode ubban a sinttan gufannidi, bantta qaalaa xoqqu oottidi, “Neeni Xoossaa Na7aa gidikkii!” yaagoosona.

<sup>12</sup> Yesuusi he iita ayyaanati babaa asau yootidi, bana qoncciyaa kessenna mala, eta minttidi azaziis.

### *Yesuusi Tammanne Naa77u Erissiyo Ashkkarata Doorriis (Maatiyoosa 10:1-4; Luqaasa 6:12-16)*

<sup>13</sup> Yesuusi deriyaa bolli kiyidi, ba koyido asata baakko xeesiis; xeesidoogeeti akko biidosona. <sup>14-15</sup> Eti banaara de7ana malanne qaalaa yootanau eta kiittana mala, xalaheta kessanaukka etayyo maatai de7ana mala, tammanne naa77u asata doorriis.

<sup>16</sup> I doorido tammanne naa77ati hageeta: PHeexiroosa yaagidi sunttido Simoona, <sup>17</sup> Bo7anerggeesa yaagidi sunttidoogeeta, Zabddiyoosa naata Yaaqoobanne Yaaqooba ishaa Yohaannisa. “Bo7anerggeesa” giyoogee “Dadaa milatiya asata” giyoogaa. <sup>18</sup> Inddiraasanne Piliphphoosa, Barttalamoosanne Maatiyoosa, Toomaasanne Ilppiyooosa na7aa Yaaqooba, Taaddiyoosanne ba biittau mishettiya Simoona, <sup>19</sup> Yesuusa aatti immida Yihudaa Asqqoroota.

### *Yesuusanne Bi7eeli-Zeebula (Maatiyoosa 12:22-32; Luqaasa 11:14-23; 12:10)*

<sup>20</sup> Yesuusi soo biis; naa77anttuwaakka qassi daro asai shiiqin, inne erissiyo ashkkarati harai atto, qumaa maanaukka danddayibookkona; <sup>21</sup> asai a, “Gooyees” giyo gishshau, a dabboti hegaa siyidi, a ekkanau biidosona.

<sup>22</sup> Higgiiyaa tamarissiya issi issi asati Yerusalaameppe yiidi, “A bolli Bi7eeli-Zeebuli de7ees” yaagidosona; qassi harati, “Xalahetu halaqai baayyo wolqqaa immin, xalaheta kessees” yaagidi haasayidosona.

<sup>23</sup> Yesuusi asaa baakko xeesidi, leemisuwaa yootiiddi, “Seexaanai Seexaanaa waati kessanau danddayii? <sup>24</sup> Issi kawotettai ba gidдон shaahettikko, he kawotettai eqqana danddayenna; <sup>25</sup> qassi issi keetta asaikka ba gidдон shaahettikko, he keettaa asaikka eqqanau danddayenna. <sup>26</sup> Qassi Seexaanai banaara ooyettidi shaahettikko, xayanaappe attin, de7ana danddayenna.

<sup>27</sup> “SHin wolqqaama asa kasetidi qachchennan de7iiddi, a keettaa gelidi, a miishshaa bonqqanau danddayiya asi baawa; qachchidoogaappe guyyiyan, a keettaa bonqqana danddayees.

<sup>28</sup> “Taani intteyyo tumaa gais; Xoossai asa naatuyyo nagara ubbaanne eti cayiyo cashsha ubbaa atto gaana; <sup>29</sup> shin Geeshsha Ayyaanaa bolli iitabaa haasayiya ooyyoonne merinau nagara gidanaappe attin, Xoossai mulekka atto geenna” yaagiis. <sup>30</sup> Yesuusi hegaa giidoogee, issi issi asati, “A bolli iita ayyaanai de7ees” yaagido gishshaassa.

### *Yesuusa Aayyiyoonne Ishantta (Maatiyoosa 12:46-50; Luqaasa 8:19-21)*



<sup>31</sup> A aayyiyaanne a ishantti yiidi, karen eqqidi, akko asa kiittidi, a xeesissidosona. <sup>32</sup> Daro asai a matan uttiis; he kiittidoogee a, “Be7a; ne aayyiyaanne ne ishantti karen eqqidi, nenaara gaittanau koyoosona” yaagiis.

<sup>33</sup> Yaagin Yesuusi zaaridi, “Ta aayyiyaa oonee? Qassi ta ishantti oonee?” yaagiis. <sup>34</sup> Ba matan uttida asaa yuushshi aatti xeellidi, “Be7ite; ta aayyiyaanne ta ishantti hageetihona. <sup>35</sup> Xoossai koyiyooobaa oottiyai ubbai ta isha, ta michchonne ta aayo” yaagiis.

## 4

### *Zerettaa Zeriyaagaa Leemisuwaa (Maatiyoosa 13:1-9; Luqaasa 8:4-8)*

<sup>1</sup> Yesuusi naa77anttuwaa Galiila Abbaa lanqqiyan tamaarisuwaa doommiis; keehi daro asai ba lanqqiyan yuuyi aadhdhidi shiiqettin, abban de7iya wolwolo giddo gelidi, aani uttiis; qassi he asai ubbai abbaa lanqqiyan de7ees. <sup>2</sup> I eta darobaa leemisuwan tamarissiis. Tamarissiiddi hagaadan yaagiis,

<sup>3</sup> “Siyite; issi bitanee zerettaa zeranau kiyiis. <sup>4</sup> I zerishin, issi issi zerettaa ogiyaa doonan wodhdhiis; wodhdhidaagaa kafoi yiidi miis. <sup>5</sup> Issi issi zerettaa guutta biittai de7iyo shuchchaa ancuwaa bolli wodhdhiis; daro biittai baina gishshau, he zerettaa sohuwaara mokkiis. <sup>6</sup> Awai kiyido wode shulliis; adussa xaphuwaa yeddibeenna gishshau, meli bayiis. <sup>7</sup> Issi issi zerettaa aguntta gidдон wodhdhiis; wodhdhidi mokki-daagaa agunttai diccidi cuullin, aifennan attiis. <sup>8</sup> Issi issi zerettaa aradda biittan wodhdhidi mokkiis; diccidi issoi hastamaa, issoi usuppun tammaa aifin, issoi xeetaa aifiis” yaagiis. <sup>9</sup> Yaagidi, “Siyana u haitti de7iyo urai siyo” yaagiis.

### *Yesuusi Leemisuwan Odido Gaasota (Maatiyoosa 13:10-17; Luqaasa 8:9-10)*

<sup>10</sup> Yesuusi yootidoogaa siyida hara asatinne tammanne naa77u erissiyo ashkkarati Yesuusi barkka de7ishin, akko shiiqidi, he leemisuwaa birshshettaa a oichchidosona. <sup>11-12</sup> Oichchin Yesuusi etassi hagaadan yaagiis; “Inttessi Xoossaa kawotettaa xuura yohuwaa erai imettiis; shin harati kawotettaappe kareera de7iyaageeti, xeeluwaa xeellidi be7enna mala, qassi sissaa siyidikka akeekenna mala, eti naa77anttuwaa Xoossaakko simmin, i eta nagaraa atto geenna mala, etayyo ubbabai leemisuwan odettiis” yaagiis.

### *Zeriyaagaa Leemisuwaa Birshshettaa (Maatiyoosa 13:18-23; Luqaasa 8:11-15)*

<sup>13</sup> Yesuusi eta, “Ha leemisuwaa erekketii? Yaatin, leemiso ubbaa waati eruuteetii? <sup>14</sup> Zeriyaagee Xoossaa qaalaa zerees. <sup>15</sup> Qaalai zerettiyo ogiyaa doonan de7iyaageeti hageeta; eti qaalaa siyiyo wode, Seexaanai sohuwaarakka yiidi, eta wozanan zerettida qaalaa efirggees. <sup>16</sup> Hegaadankka qassi shuchchaa ancoi de7iyo biittan zeretti-daageeti hageeta; eti qaalaa siyidi, sohuwaara ufaissan ekkoosona. <sup>17</sup> Eti ha77issau de7iyoogaappe attin, etau mino xaphoi baawa; guyyeppe qaalaa gaasuwan waayee woi yedetai yiyo wode, eti sohuwaara xubetti aggoosona. <sup>18</sup> Qassi aguntta gidдон zerettidaageeti hageeta; eti qaalaa siyiyaageeta. <sup>19</sup> SHin ha sa7aa de7uwau hirggiyoogee duretettaa siiqiyooegeenne harabaa amottiyooogee eta wozanan gelidi, qaalaa cuullees; cuullin aifennan atti aggees. <sup>20</sup> SHin aradda biittan zerettidaageeti qaalaa siyidi ekkiyaageeta; issoi hastamaa, issoi usuppun tammaa aifin, issoi xeetaa aifiis” yaagiis.

### *Geeman De7iya Xomppiyaa (Luqaasa 8:16-18)*

<sup>21</sup> Yesuusi gujjidi, “Xomppe ehiidi, kereppe woi arssappe garssaara wottiya asi de7ii? Xoqqan wottenneeyye? <sup>22</sup> Aissi giikko, qosidobai ubbai qoncciyaa kiyana; qassi genttidobai ubbaikka beettennan antenna. <sup>23</sup> Siyanau haitti de7iyo urai de7ikko siyo” yaagiis.

<sup>24-25</sup> Qassikka eta, “Intte siyiyoogaa ezggidi siyite; Xoossai intte makkido qun77an intteyyo makkana. I intteyyo darissidi immana; aissi giikko, issibai de7iyo urau gujji immana; bainaagaappe harai atto, au de7iya he guuttiyookka ekkirggana” yaagiis.

### *Dicciya Zeretta Leemisuwaa*

<sup>26</sup> Yesuusi qassikka yaagiis; “Xoossaa kawotettai ba gaden katta zeriya asa mala. <sup>27</sup> He bitanee qammi xiskkees; maallado denddees; i ba huuphen waaniyaakkonne erennan, he zerettai mokkeesinne diccees. <sup>28</sup> Biittai kattaa barkka mokkeesinne aifees; koiro carshshai caarees; guyyeppe aifanau kukkumees; qassi wursettan kumetta aifiyaa aifees. <sup>29</sup> SHin kattai gakkiiyo wode, kattaa shiishshiyiyo wodee gakkido gishshau, bitanee sohuwaarakka baacaara geli aggees” yaagiis.

### *Sanaafici Giyo Mittee Zeretta Leemisuwaa (Maatiyoosa 13:31-34; Luqaasa 13:18-19)*

<sup>30</sup> Yaagidi Yesuusi, “Nuuni Xoossaa kawotettaa ai milatees gaanee? Woi aibiira leemisanee? <sup>31</sup> Xoossaa kawotettai sanaafici giyo qii mittee aifiyo milatees. He mittee aifiyo zeriyo wode, sa7an de7iya mitta aife ubbaappekka guuxxausu; <sup>32</sup> o zerin makkada ataakiltte ubbaappe gitatausu; daro daashshaa daayausu. Kafoi i tashiyaa kuwan bau keettaa keexxana danddayees” yaagiis.

<sup>33</sup> Yesuusi haggaa mala daro leemisuwan asau gelana gakkanaassi, ba qaala yootiis. <sup>34</sup> Asaayyo leemiso bannan yootenna; shin Yesuusi ba erissiyo ashkkaratu xalaalaa de7iyo wode, etayyo ubbaba birshshidi yootees.

### *Yesuusi Beeta Co77u Oottiis (Maatiyoosa 8:23-27; Luqaasa 8:22-25)*

<sup>35</sup> He gallassi sa7ai omarin, Yesuusi ba erissiyo ashkkarata, “Abba hefintti pinnoos” yaagiis. <sup>36</sup> Erissiyo ashkkarati daro asaa yeggi bayidi, Yesuusi kase geli uttido wolwoluwan gelidi, Yesuusa banttanaara efiidosona; hara wolwolotikka hegan de7oosona. <sup>37</sup> Wolqqaama gotee denddin, beetai wolwoluwaa shocin, haattai kumana gakkanaassi wolwoluwaa giddo geliis. <sup>38</sup> He wode Yesuusi wolwoluwan guyye baggaara borkkotaa borkkotidi xiskkiis. Erissiyo ashkkarati a denttidi, “Tamaarissiyaagoo, nuuni xayiyiyo wode coo xeellai?” yaagidosona.

<sup>39</sup> Yaagin i beegottidi gotiyaa, “Co77u ga” giidi, abbaakka, “Woppu ga” giis; goteekka co77u gin, ubbabaikka woppu giis. <sup>40</sup> Yesuusi ba erissiyo ashkkarata, “Aissi hagaadan yayyeetii? Intte waani ammanekketii?” yaagiis.

<sup>41</sup> Eti daro yayyidi bantta gidon, “Hagee laa harai atto, goteenne abba azazettiyoo oonee?” yaagidosona.

## 5

### *Yesuusi Tuna Ayyaanai Oiqqido Bitaniyaa Pattiis (Maatiyoosa 8:28-34; Luqaasa 8:26-39)*

<sup>1</sup> Eti abbaappe hefintti pinnidi, Gerggesenoona giyo biitti gakkidosona. <sup>2</sup> Asa moogiyo gonggoluwaaappe iita ayyaanai de7iyo issi bitanee kiyidi, Yesuusi wolwoluwaappe kiyido wode, Yesuusaara gaittiis; <sup>3</sup> bitanee he gonggoluwaa aqidi pe7idi, yan de7ees; a ooninne naa77anttuwaa harai atto, sanssalatan qachchanaukka danddayibeenna. <sup>4</sup> Aissi giikko, i darotoo huqqunnaaninne sanssalatan qashettidi de7ees; shin sanssalataa duuterettes; huqqunnaakka mentterettes; a xoonanau danddayidai

ooninne baawa. <sup>5</sup> I ubba wode gallassinne qammi, he gonggoluwaa giddooninne dere bolli waassees; ba bollaakka shuchchan gaarees.

<sup>6</sup> Yesuusa haahuwan be7ido wode, woxxidi ayyo goinniis. <sup>7</sup> He bitanee ba qaalaa xoqqu oottidi, “Ubbaappe Bolla Xoossaa Na7au Yesuusaa, nenanne tana aibee gattiyai? Tana qaxxayenna mala, taani nena Xoossaa sunttan woossais” yaagiis. <sup>8</sup> I heгаа aissi giidee giikko, Yesuusi a, “Laa ha iita ayyaanau, ha bitaniyaappe kiya” yaagidoogaassa.

<sup>9</sup> Yesuusi a, “Ne sunttai oonee?” yaagidi oichchiis.

Oichchin i, “Nuuni daro gidido gishshau, ta sunttai Leegiyoona” yaagiis. <sup>10</sup> Yaagidi iita ayyaanata he biittaappe kessi yeddenna mala, Yesuusa minttidi woossiis.

<sup>11</sup> He deriyaa bollan daro gudunttaa wudee heemettees; <sup>12</sup> iita ayyaanati Yesuusa, “Nuna hini gudunttaa wudiyaakko yeddarkkii; etan biidi geloos” yaagidi woossin, <sup>13</sup> Yesuusi, “Biite” yaagiis. Yaagin iita ayyaanati bitaniyaappe kiyidi, gudunttatun gelidosona; naa77u sha7aa gidido gudunttaa wudee kakaa huuphiyaara jaamiiddi, abban gelidi, meetetti bayiis.

<sup>14</sup> Gudunttaa wudiya heemmiyaageeti baqatidi, hanidabaa katamaaninne katamaappe gaxa biittan yootidosona; yootin heгаа be7anau asai yiis. <sup>15</sup> Asai Yesuusakko yiidi, xalaheti beni oiqqido Leegiyoona giyo bitanee ba wozanai simmin, maayuwaa maayidi, hegaan uttidaagaa be7idi, ubbai yayyiis. <sup>16</sup> Heгаа be7ida asati xalaheti oiqqido bitanee hanidobaanne qassi gudunttaa wudiyaabaa he asaassi yootidosona. <sup>17</sup> Heгаа gishshau, asai bantta biittaappe Yesuusi baana mala, woosaa doommiis.

<sup>18</sup> Yesuusi wolwoluwan gelishin, xalaheti oiqqido bitanee Yesuusaara de7ana mala, Yesuusa woossiis. <sup>19</sup> SHin Yesuusi ixixidi a, “Ne soo simmada, Godai neessi waanida gitabaa oottidaakkonne qassi i neessi waanida kehakko ne so asau yoota” yaagiis. <sup>20</sup> Bitanee biidi, Tammu Katamaa giyoosan yuuyidi, Yesuusi baassi waanida gitabaa oottidaakko, yootuwaa doommiis; i yootidoogaa siyida asai ubbai garamettiis.

*Yaa7iroosa Na7aanne Yesuusa Maayuwaa Bochchida Maccaasiyo  
(Maatiyoosa 9:18-26; Luqaasa 8:40-56)*

<sup>21</sup> Yesuusi simmidi, wolwoluwan gelidi, abbaa pinnidoogaappe guyyiyan, daro asai abbaa lanqqiyan a mati yuuyi aadhdhidi shiiqiis. <sup>22</sup> Yaa7iroosa giyoogee, Aihuda woosa keettaa halaqatuppe issoi, Yesuusa be7ido wode akko yiidi, a tohuwan kunddiis; <sup>23</sup> kunddidi, “Ta na7iyaa harggada haiqqana hanausu; a paxada payya de7ana mala, yaada ne kushiya i bolli wottarkkii” yaagidi Yesuusa minttidi woossiis.

<sup>24</sup> Yesuusi Yaa7iroosaara biis; biishin keehi daro asai a kaalliiddi un77iis.

<sup>25</sup> Tammanne naa77u laittaasappe doommidi, i bollaappe suuttai goggiyo issi maccaasiyaa de7ausu. <sup>26</sup> Daro aakimeti o aakimishinkka, a paxa kaa7ettaasu; ba miishshaa ubbaa wurssinkka iyyo haa iitidoogaappe attin, ainne o maaddibeenna. <sup>27</sup> He maccaasiyaa Yesuusabaa siyada, asaa giddoora Yesuusappe guyyeera yaada, a afalaa bochchaasu. <sup>28</sup> Aissi giikko a, “Taani harai atto, a afalaa bochchikko paxana” yaagada qoppaasu.

<sup>29</sup> Ippe goggiya suuttai sohuwaarakka aggi bayiis; a ba waayiyaappe paxidoogaa ba bollan era aggaasu. <sup>30</sup> Yesuusi baappe wolqqai kiyidoogaa ba huuphen eridi, sohuwara daro asaa giddon guyye simmidi, “Ta afalaa bochchidai oonee?” yaagiis.

<sup>31</sup> Erissiyo ashkharati a, “Asai nena sugiyoogaa be7aidda, “Tana oonee bochchidai?” yaagai?” giidosona.

<sup>32</sup> Yesuusi heгаа ooni oottidaakkonne be7anau yuushshi aattidi xeelliis; <sup>33</sup> shin mishiriyaa baayyo hanidabaa erada, yashshaa kokkoraidda yaada Yesuusa sinttan gufannaasu; qassi tumu hanidabaa ubbaa ayyo yootaasu. <sup>34</sup> Yootin Yesuusi o, “Ta na7ee, nena ne ammanoi pattiis; saruwan ba, ne waayiyaappenne paxa” yaagiis.

<sup>35</sup> Yesuusi biron hegaa giishin, Aihuda woosa keettaa halaqaa sooppe kiitettida asati yiidi, “Ne na7iyaa haiqqachchaasu; simmi tamaarissiyaagaa aissi daafurssai?” yaagidosona.

<sup>36</sup> SHin Yesuusi eti giyoogaa siyidi, Aihuda woosa keettaa halaqaa, “Ammano xalaalaa ammanappe attin, yayyoppa” yaagiis. <sup>37</sup> Yesuusi PHeexiroosappe, Yaaqoobappenne Yaaqooba ishaa Yohaannisappe harai ooninne bana kaallenna mala diggiis. <sup>38</sup> Eti Aihuda woosa keettaa halaqaa soo gakkido wode, Yesuusi asai wozanaa bayidi yeekkiyoogaanne zilaaliyoogaa be7iis. <sup>39</sup> Gelidi asaa, “Aissi wozanaa bayidi yeekkeetii? Na7iyaa xiskkaasuppe attin, haiqqabeikku” yaagiis.

<sup>40</sup> Yaagin asai a bolli miicciis; shin asa ubbaa kare kessidi, na7ee aawaanne ayyiyo he banaara de7iya erissiyo ashkkaratanne ekkidi, na7iyaa de7iyoosaa geliis. <sup>41</sup> Yesuusi na7ee kushiya oiqqidi, “Xaalitaa, qumii” yaagiis; hegaa birshshettai, “Guutta na7ee, taani nena dendda gais” giyoogaa.

<sup>42</sup> Na7iyaa sohuwaarakka dendda eqqada hemetettaasu; a tammanne naa77u laitta na7a; hegee haniyoogan asai keehi daro garamettiis. <sup>43</sup> Yesuusi hegaa eti ooyyoonne odenna mala, eta mintti azazidi, “Iyyo miyoobaa immite” yaagiis.

## 6

### *Yesuusa Naazireeten Ekkennan Ixxidosona (Maatiyoosa 13:53-58; Luqaasa 4:16-30)*

<sup>1</sup> Yesuusi hegaappe kiyidi, ba biitti Naazireete katamaa biis; erissiyo ashkkaratikka a kaallidi biidosona. <sup>2</sup> Sambbata gallassi Aihuda woosa keettan tamarissuwaa doommiis; i tamarissiyooogaa siyida daro asai garamettidi, “Hagee ha ubbabaa auppe demmidee? Ha ayyo imettida aadhhdida eratettai aibee? Xoossai oottiyo malaataa i waatidi oottii? <sup>3</sup> Hagee anaaxiyaa gidennee? Mairaami na7aa, Yaaqooba ishaa, Yoosa ishaa, Yihudaa ishaa, Simoona ishaa gidenneeyye? A michchentti nunaara hagan de7okkonaayye?” yaagidi, i giyoobaa ekkennan ixxiis.

<sup>4</sup> Yesuusi he asaassi, “Hananabaa yootiyaagee ba biittan, ba dabbotuuninne bantta so asan bonchchettennaagaappe attin, ubbasan bonchchettees” yaagiis. <sup>5</sup> I he sohuwan ba kushiya amarida asatu bolli wottidi, eta pattidoogaappe attin, Xoossai oottiyo malaataa oottanau ainne danddayibeenna. <sup>6</sup> Asai ammanibeenna gishshau garamettiis.

### *Yesuusi Tammanne Naa77u Erissiyo Ashkkarata Kiittiis (Maatiyoosa 10:5-15; Luqaasa 9:1-6)*

Hegaappe guyyiyan, Yesuusi hegaa heeran de7iya qeeri katamatun yuuyi yuuyidi, asaa tamarissee. <sup>7</sup> Yesuusi tammanne naa77u erissiyo ashkkarata baakko xeesidi, naa77aa naa77aa kiittiis; qassi etayyo iita ayyaanata kessiyo wolqqaa immiis. <sup>8</sup> Immidi eta, “Oge xam77appe attin, quma, qarcciita, intte kiisen miishsha ainneka oiqqoppite. <sup>9</sup> Intte tohuwan caammaa wottite; shin naa77u qole maayoppite” yaagiis. <sup>10</sup> Qassikka eta, “Inttena asi awan mokiikkokka, katamaappe kiyana gakkanaashin, he keettan utti bayite. <sup>11</sup> Inttena asi mokiikkasaa woi intte yootiyoobaa siyennasaa awa gidikkokka, he biittan de7iya asaayyo hegee markka gidana mala, he sohuwaappe kiyidi, intte tohuwaappe buhiyaa shocite” yaagiis.

<sup>12</sup> Tammanne naa77u erissiyo ashkkarati biidi, asai ba nagaraappe simmanaadan, qaalaa yootidosona. <sup>13</sup> Eti asaappe daro xalaheta kessidi, harggiya asaa daruwaa zaitiyaa tiyidi pattidosona.

### *Xammaqiya Yohaannisa Haiquwaa (Maatiyoosa 14:1-12; Luqaasa 9:7-9)*

<sup>14</sup> Asai Yesuusa sunntaa denttiyo gishshau, Kawoi Heeroodisi hegaa ubbaa siyiis; issi issi asai, “Xammaqiya Yohaannisi haiquwaappe dendiis; Xoossai oottiyo wolqqaama malaataa i oottiyoogee hegaassa” yaagiis.

<sup>15</sup> SHin harati a, “Hagee Eelaasa gidennee?” yaagidosona.

Harati qassi, “Hagee beni wode hananabaa yootiyaageeta milatiya hananabaa yootiyaagaa gidennee?” yaagidosona.

<sup>16</sup> SHin Heeroodisi hegaa siyido wode, “Hegee taani qooriyaa muucissido xammaqiya Yohaannisa gidennee? He i haiquwaappe paxiis” yaagiis.

<sup>17</sup> Aissi giikko, Heeroodisi ba ishaa Piliphphoosa machchiyo Heeroodiyaado ekki wottiis; Heeroodisi i gishshau, ba huuphen asa kiittidi, Yohaannisa oittidi, qashissi wottiis. <sup>18</sup> Aissi giikko, Yohaannisi Heeroodisa, “Neeni ne ishaa machchiyo ekkanau bessenna” yaagi wottiis.

<sup>19</sup> Heeroodiyaada Yohaannisau uluwan morkkiyaa oiqqada a worissanau koyaasu; shin danddayabeikku. <sup>20</sup> Yohaannisi xillo asanne geeshsha asa gididoogaa Heeroodisi erido gishshau, ayyo yayyidi, loitti naagi wottiis; Yohaannisi giyoobaa siyidi, ba wozanan keehi metootiidikka abaa ufaissan siyiis.

<sup>21</sup> Heeroodisi ba yelettido gallassi, deriyaa haariyaageetuyyo, shaalaqatuyyoonne Galiilan de7iya gita asaayyo imatuwaa giigissido wode, wurssettan Heeroodiyaada injje gallassaa demmaasu. <sup>22</sup> Heeroodiyaadi na7iyaa imattaa imattiyoosaa gela durada, Heeroodisanne a imattata ufaissaasu; ufaissin kawoi na7iyo, “Nena lo77idabaa aiba gidikkonne tana oichcha; taani neeyyo immana” yaagiis. <sup>23</sup> Qassi iyyo daro caaqqidi, “Neeni oichchidobaa aiba gidikkokka, taani neeyyo immana; harai atto, ta kawotettaappe baggaa gidikkokka, taani neeyyo immana” yaagiis.

<sup>24</sup> Na7iyaa kare kiyada ba aayyiyo, “Ai imma goo?” yaagada oichchaasu.

Oichchin, i aayyiyaa, “Xammaqiya Yohaannisa huuphiyaa imma ga” yaagaasu.

<sup>25</sup> Na7iyaa eesuwan kawuwaakko baada a, “Xammaqiya Yohaannisa huuphiyaa soruwan wottada, neeni ha77i tau immanaagaa koyais” yaagaasu.

<sup>26</sup> Yaagin kawoi daro qarettiis; shin ba caaquwaa gishshaunne ba imattatu gishshau iyyo caaqqido caaquwaa maanau koyibeenna. <sup>27</sup> Hegaa gishshau, sohuwaara zabainnaa kiittidi, Yohaannisa huuphiyaa ehaana mala azaziis; zabainnai qasho keettaa biidi, Yohaannisa qooriyaa muuciis. <sup>28</sup> He muucidoogaa soruwan wotti ehiidi, na7eeyyo immiis; na7iyaa qassi ba aayeeyyo immaasu. <sup>29</sup> Yohaannisi erissiyo ashkkarati hegaa siyido wode yiidi, a ahaa ekki efidi moogidosona.

### *Yesuusi SHa7u Asaa Miziis*

*(Maatiyoosa 14:13-21; Luqaasa 9:10-17; Yohaannisa 6:1-14)*

<sup>30</sup> Yesuusi kiittidoogeeti simmidi, Yesuusaara gaittidi, bantta oottidobaanne bantta tamarissidobaa ubbaa Yesuusassi odidosona. <sup>31</sup> Biyaabainne yiyaabai darin, harai atto qumaa maanauka eta gattennan ixido gishshau, Yesuusi eta, “Nurkka guutaa shemppi ekkanau asi bainnasaa hinddite” yaagiis. <sup>32</sup> Yesuusinne eti banttarkka wolwuluwan uttidi, asi bainnasaa biidosona.

<sup>33</sup> Eti biishin, daro asai eta be7idi eriis; eridi katama ubbaappe woxxidi, eti biyoosaa etappe kasetidi gakkiiis. <sup>34</sup> Yesuusi wolwoluwaappe kiyidi, daro asaa be7iis; asai heemiya asi banna dorssaa mala gidido gishshau, qarettidi asaa darobaa tamarissuwaa doommiis.

<sup>35</sup> Sa7ai omariyo wode, Yesuusi erissiyo ashkkarati akko yiidi, “Hagee sohoi asi banna soho; ha77i sa7aikka qammiichchiis; <sup>36</sup> asai dere gididonne qeeri katamatu gidido biidi, bau miyoobaa shammana mala, asaa yedda” yaagidosona.

<sup>37</sup> SHin Yesuusi zaaridi eta, “Asau miyoobaa intte immite” yaagiis.

Yaagin eti, “Nuuni biidi, naa77u xeetu biran oittaa shammiidi, asai maanau immanee?” yaagidi a oichchidosona.



<sup>38</sup> Yesuusi eta, “Intteyyo aappun oittai de7ii? Biidi be7ite” yaagiis.

Eti be7idi, “Ichchashu oittanne naa77u mole” yaagidosona.

<sup>39</sup> Yesuusi ba erissiyo ashkkarata asa ubbaa citan citan shaakki shaakkidi, maatan utissana mala azaziis. <sup>40</sup> Asai xeetai xeetainne ishatamai ishatamai citan citan uttiis. <sup>41</sup> Yesuusi ichchashu oittaanne naa77u moliyaa oiqqidi, pude saluwaa xeellidi, Xoossaa galatiis; oittaa menttidi asau gishana mala, erissiyo ashkkaratussi immiis; qassi naa77u moliyaakka eta ubbau shaakkiis. <sup>42</sup> Asai ubbai miidi kalliis. <sup>43</sup> Kallin attida oittaa xarzzainne moliyaa xarzzai tammanne naa77u samppaa kumidaagaa erissiyo ashkkarati denttidosona. <sup>44</sup> Oittaa miida attumaasai ichchashu sha7a.

*Yesuusi Abbaa Bollan Hemettidi Biis*  
(Maatiyoosa 14:22-33; Yohaannisa 6:15-21)

<sup>45</sup> Sohuwaara Yesuusi he daro asaa moissiiddi, ba erissiyo ashkkarati wolwoluwan gelidi, abbaappe hefinttan de7iya Beetasaida giyo katamaa baappe sinttatidi baanaadan azaziis. <sup>46</sup> Erissiyo ashkkarata moissidoogaappe guyyiyan, Xoossaa woossanau deriyaa huuphiyaa kiyiis.

<sup>47</sup> Sa7ai qammiyo wode wolwoloji abbaa gidduwan de7ishin, Yesuusi abbaappe gaxan barkka de7ees. <sup>48</sup> Carkkoi erissiyo ashkkaratukko carkkiyo gishshau, erissiyo ashkkarata abbaa shaariyoogee waissiyooogaa Yesuusi be7idi, kuttoi waassana haniyo wode abbaa bolli hemettiiddi, etakko yiis; eta yeggidi aadhdhanau koyiis. <sup>49</sup> SHin abbaa bolli i hemettishin, eti a be7idi, banttau moitille milatin waassidosona. <sup>50</sup> Aissi giikko, eti ubbai a be7idi, yashshaa kokkoridosona; shin sohuwaara Yesuusi eta, “Aikko baawa; tanattennee yayyoppite” yaagiis. <sup>51</sup> Yesuusi etaara issippe wolwoluwan gelin, carkkoi woppu giis; gin eti daro garamettidosona. <sup>52</sup> Aissi giikko, eta wozanai dammido gishshau, eti oittaaabaa akeekibookkona.

*Yesuusi Genssereexen Hargganchchata Pattiis*  
(Maatiyoosa 14:34-36)

<sup>53</sup> Eti abbaa pinnidi, Genssereexa giyo biittaa gakkidosona; gakkidi wolwoluwaa gaxaa shiishshi qachchidosona. <sup>54</sup> Eti wolwoluwaappe wodhdhiyoogan, asai sohuwaara Yesuusa erinne <sup>55</sup> heгаа heeran de7iya biitta ubban woxerettidi, hargganchchata halan tookkidi, “Yesuusi de7ees” gin siyidosaa ehuwaa doommiis. <sup>56</sup> Yesuusi biido soho ubban qeeri kataman gidin, gita kataman gidin, dere gidon gidinkka, asai hargganchchata giyaa sohuwaa efees. Yesuusi ba afalaa macaraa gidikkonne hargganchchata boshissana mala, asai a woossiis; woossin bochchida ubbaikka paxiis.

## 7

*Yesuusi Asi Medhdhido Wogaa PHalqqiis*  
(Maatiyoosa 15:1-9)

<sup>1</sup> Parisaawetinne Yerusalaameppe yiidi, higgiiyaa tamarissiya amarida asati Yesuusakko shiiqididosona. <sup>2</sup> SHiiqidi Yesuusi erissiyo ashkkaratuppe issooti issooti geeyenna kushiyan, heгаа giyoogee meecettennan qumaa miyaageeta be7idosona.

<sup>3</sup> Aissi giikko, Parisaawetinne Aihuda asai ubbai bantta aawatu wogaa naagidi, bantta kushiya loitti meecettennan mookkona. <sup>4</sup> Qassi giyaappe yiidikka meecettennan de7iiddi mookkona. Qassi eti bantta aawatuppe ekkido hara daro wogai de7ees; hegee siiniyaanne keriyaa nahaasiyaappe medhdhido miishshaanne arssaa meecciyo wogaa.

<sup>5</sup> Parisaawetinne higgiiyaa tamarissiyaageeti Yesuusa, “Ne erissiyo ashkkarati aissi aawatu wogaa kaallennan ixidi, bantta kushiya meecettennan oittaa miyoonaa?” yaagidi oichchidosona.

6-7 Yesuusi eta hagaadan yaagiis; “Isiyaasi hananabaa yootido wode, inttebaa, lo77o milatiya iitatubaa xaafidoogaadankka,

‘Xoossai, “Hagee asai tana

ba bolla doonan bonchchees.

SHin eta wozanai taappe haahuwan de7ees;

asai tau mela goinnees.

Aissi giikko, asi oottido azazuwaa

Xoossaa higgiiyaa milatissidi tamarissee” giis’  
giidi hananabaa tumaa yootiis.

<sup>8</sup> “Xoossaa azazuwaa intte aggi bayidi, asa wogaa minttidi naageeta” yaagiis.

<sup>9</sup> Qassikka Yesuusi, “Intte intte wogaa naaganau Xoossaa azazuwaa yeggi bayeeta.

<sup>10</sup> Aissi giikko Muusee, ‘Ne aawaanne ne aayyiyo bonchcha.’ Qassi, ‘Ba aawaanne ba aayyiyo cayiyaagee haiqqo’ yaagiis. <sup>11</sup> SHin issi urau ba aawaa woi ba aayyiyo maaddiyoobi de7ishin i, ‘Hagee qurbbaane; heгаа giyoogee Xoossaabaa giyoogaa’ giikko, <sup>12</sup> i ba aawaa woi ba aayyiyo wodeppe maaddanaagaa ainne koyekketa. <sup>13</sup> Hegaadankka qassi intte haratuyyo immido intte wogan Xoossaa qaalaa karidi, heгаа mala darobaa ootteeta” yaagiis.

### *Asa Tunissiyaabata*

*(Maatiyoosa 15:10-20)*

<sup>14</sup> Yesuusi daro asaa qassikka baakko xeesidi, “Ubbai taani giyoogaa siyitenne akeekite. <sup>15</sup> Asa wozanappe kiyiyaabai asa tunissiyogaappe attin, kareppe asa wozanan gelidi, asa tunissiyaabi aibinne baawa; <sup>16</sup> siyanau haittai de7iyo urai ooninne siyo” yaagiis.

<sup>17</sup> Yesuusi daro asaa yeggi bayidi soo gelido wode, i erissiyo ashkkarati he leemisuwaabaa a oichchidosona. <sup>18</sup> Oichchin i eta, “Intteyyookka qassi gelibeennee? Kareppe asa wozanan geliyaabai aibinne asa tunissanau danddayennaagaa akeeketii? <sup>19</sup> Aissi giikko, qumai asa ulo giddo gelidi, gaxi kiyiyogaappe attin, asa wozana giddo gelenna” yaagiis. Hegaadankka Yesuusi quma ubbai geeshsha gidiyoogaa erissiis.

<sup>20</sup> Qassikka Yesuusi hagaadan yaagiis; “Asa tunissiyaabai asa wozana gidloppe kiyiyaabaa. <sup>21</sup> Aissi giikko, asa wozana gidloppe kiyiyaabai iita qofa; shaaramux-anau qaaqqatiyoogaa, wuuqqiyooqaa, woriyooqaa, shaaramuxiyooqaa, <sup>22</sup> duretettaa amottiyoogaa, iitatettaa, geniyaa, amottiyoogaa, qanaatiyoogaa, cashshaa, ayyuwaa, azallatettaa. <sup>23</sup> Ha iitabai ubbaikka asa wozana gidloppe kiyidi, asa tunissee” yaagiis.

### *Issi Giriike Mishiree Ammanuwaa*

*(Maatiyoosa 15:21-28)*

<sup>24</sup> Yesuusi hegaappe aggidi, Xiiroosanne Sidoona giyo katamatu matan de7iya biitti biidi, issi keettaa geliis; qassi i yaani de7iyoogaa ooninne eranaagaa koyibeenna; shin qosettidi gam77anau danddayibeenna. <sup>25</sup> SHin ba guutta na7ee bolli iita ayyaanai de7iyo issi maccaasiyaa Yesuusabaa siyada, sohuwaara akko yanne a tohuwan gufanna wodhdhaasu. <sup>26</sup> He mishiriyaa Aihuda gidukku; a yelettidoikka Sirofinqqe giyo biit-taana; a ba na7eeppe xalahiyaa kessana mala, Yesuusa woossaasu.

<sup>27</sup> SHin Yesuusi zaaridi, “Naati kasetidi qumaa kallona; aissi giikko, naatu qumaa ekkidi, zairotuyyo oliyoogee lo77o gidenna” yaagiis.

<sup>28</sup> Mishiriyaa zaarada, “Tumakka ta Godau, harai atto masoofiyaa lanqqiyan de7iya zairotikka naatuppe attida suuppaa moosona” yaagaasu.

<sup>29</sup> Yesuusi qassi o, “Ha ne qaalaa gishshau, ne soo ba; xalahee ne na7eeppe kiyiis” yaagiis.

<sup>30</sup> Mishiriyaa ba soo biyo wode, i na7iyaa xalahee ippe kiyin, hiixan zin77idaaro demmaasu.

### *Yesuusi Tullenne Duude Gidida Issi Bitaniyaa Pattiis*

<sup>31</sup> Yesuusi Xiirsoosa biittaappe kiyidi, Sidoonaaranne Tammu Katamaa giyo biittaara kanttidi, Galiila Abbaakko biis. <sup>32</sup> Asai tullenne duude gidida bitaniyaa Yesuusakko ehiidi, ba kushiya a bolli wottana mala, Yesuusa woossiis. <sup>33</sup> Yesuusi barkka he bitaniyaa daro asaappe gaxaa kessidi, ba biradhdhiyaa a haittan yeddiis; qassi cuchchaa cuchchidi, a inxxarssaa bochchiis. <sup>34</sup> Bochchidi saluwaa pude xeellidi, tookki shemp-pidi, “Efttah” yaagiis; heгаа giyoogee dooyetta giyoogaa. <sup>35</sup> Bitaniyaa haittai sohuwaara dooyetti aggiis; qassi a dooqettida inxxarssaikka birshshetti aggiis; bitanee ainne waayettennan haasayi bayiis.

<sup>36</sup> Yesuusi asa ubbaa, “Hagaa ooyyoonne odoppite” yaagidi odiis; shin i keehi mintti odin, asai qassi oduwaa yaa darissiis. <sup>37</sup> Hegaa siyida asai ubbai daro garmettidi, “Ubbabaakka i loitti oottees. Harai atto tulliyyaakka sissees; qassi duudiyaaakka haasayis-sees” yaagiis.

## 8

### *Yesuusi Oiddu SHa7u Asaa Miziis (Maatiyoosa 15:32-39)*

<sup>1</sup> Amarida wodiyaappe guyyiyan, daro asai qassi Yesuusakko shiiqiis; asaayyo miyoobi xayin, Yesuusi ba erissiyo ashkkarata baakko xeesidi yaagiis; <sup>2</sup> “Ha daro asai tanaara heezzu gallassi gakkanaassi gam77idi, miyoobaa ainne demmibeenna gishshau, taani asau qarettais. <sup>3</sup> Taani asaa namisaara soo yeddikko, asai biiddi, ogiyan daafuridi kunddana; aissi giikko, issoi issoi haahosaappe yiis” yaagiis.

<sup>4</sup> Yesuusi erissiyo ashkkarati zaaridi Yesuusa, “Ha bazzuwan ha asa ubbaa mizanau gidiya oitta demmanau danddayiyai oonee?” yaagiis.

<sup>5</sup> Yaagin Yesuusi eta, “Inttessi aappun oittai de7ii?” yaagidi oichchiis.

Eti, “Laappun oittai de7ees” yaagidosona.

<sup>6</sup> Yesuusi daro asaa, “Sa7an uttite” yaagidi azaziis; qassi laappun oittaa ekkidi, Xoossaa galatiis; galatidi he oittaa menttidi, asaayyo gishana mala, ba erissiyo ashkkaratuyyo immiis. Erissiyo ashkkarati he daro asaassi gishidosona. <sup>7</sup> Etayyo qassikka amarida suuppa moleti de7oosona; Yesuusi hegeetuyyookka Xoossaa galatidi, asau gishana mala, erissiyo ashkkarata azaziis. <sup>8</sup> Asai ubbai miidi kalliis; asai miishin attida xarzzai laappun samppaa kumidaagaa erissiyo ashkkarati denttidosona. <sup>9</sup> Qumaa miida asai oiddu sha7aa gidana; hegaappe guyyiyan, Yesuusi asaa yeddiis. <sup>10</sup> I qassi ba erissiyo ashkkaratuura sohuwaara wolwoluwan gelidi, Dalmanuta giyo biitti biis.

### *Parisaaweti Banttau Malaatai Oosettana Mala Oichchidosona (Maatiyoosa 16:1-4)*

<sup>11</sup> Parisaaweti yiidi, Yesuusa paaccanau eqqidi, saluwaappe malaataa banttana bessana mala, Yesuusaara palamaa doommidosona.

<sup>12</sup> Yesuusi keehi tookki shemppidi, “Ha wodiya asai aissi malaata koyii? Taani intteyyo tumaa odais; ha wodiya asau malaati ubbakka imettenna” yaagiis. <sup>13</sup> Qassi eta hegan yeggi bayidi, naa77anttuwaa wolwoluwan gelidi, abbaappe hefintti pinniis.

### *Parisaawetu Irshshuwaanne Heeroodisa Irshshuwaa (Maatiyoosa 16:5-12)*

<sup>14</sup> Erissiyo ashkkarati qumaa efaanaagaa dogidosona; etau wolwoluwaa gidдон issi oittappe hari baawa. <sup>15</sup> Yesuusi eta, “Inttena erite; Parisaawetu irshshuwaappenne Heeroodisa irshshuwaappe naagettite” yaagidi azaziis.

<sup>16</sup> Eti bantta gidдон, “I hagaa giyoogee nuussi qumi baina gishshaassa” yaagidi haasayaa doommidosona.

<sup>17</sup> Yesuusi eti giyoogaa eridi, eta yaagiis; “Intteyyo oitti bannaagaa aissi haasayeetii? Ha77inne erekkeitii? Woi akeekekketii? Yootin siyekketii?” <sup>18</sup> Intteyyo aifee de7ees; be7ekkeitii? Qassi haittai de7ees; siyekketii? Intteyyo hassayettennee? <sup>19</sup> Taani ichchashu oittaa ichchashu sha7u asau battido wode, aappun samppaa kumida xarzzaa denttidetii?” yaagiis.

Yaagin eti, “Tammanne naa77u samppaa kumida xarzzaa denttida” yaagidosona.

<sup>20</sup> “Taani qassikka laappun oittaa oiddu sha7u asau battido wode, aappun samppaa kumida xarzzaa denttidetii?” yaagiis.

Yaagin eti, “Laappun samppaa kumida xarzzaa denttida” yaagidosona.

<sup>21</sup> I qassi, “Ha77inne akeekibeekketii?” yaagiis.

### *Yesuusi Beetasaidan Issi Qooqiyaa Pattiis*

<sup>22</sup> Yesuusinne erissiyo ashkkarati Beetasaida giyo katamaa biidosona; amarida asati qooqe bitaniyaa Yesuusakko ehiidi, he bitaniyaa bochchana mala, a woossidosona.

<sup>23</sup> Yesuusi qooqe bitaniyaa kushiya oiqqidi, qeeri katamaappe gaxaa kessiis; a aifiyan cuchchidi, ba kushiya a bolli wottidi, “Neeyyo aibakko beettii?” yaagidi oichchiis.

<sup>24</sup> Bitanee xeellidi, “Taani asaa be7ais; shin asai hemettiiddi, mita milatees” yaagiis.

<sup>25</sup> Hegaappe guyyiyan, Yesuusi naa77anttuwaa bitaniyaa aifiyan ba kushiya wottin, bitanee loittidi xeelliis; a aifee paxiis; qassi ubbabaakka geeshshidi be7iis. <sup>26</sup> Yesuusi bitaniyaa a soo yeddiiddi, “Harai atto qeeri katamaakka geloppa” yaagiis.

### *PHeexiroosa Ammanuwaanne A Markkatettaa (Maatiyoosa 16:13-20; Luqaasa 9:18-21)*

<sup>27</sup> Yesuusi ba erissiyo ashkkaratuura Piliphphoosa-Qiisaariyan de7iya qeeri katamata biis; biishin ogiyan Yesuusi, “Tana asai oona gii?” yaagidi ba erissiyo ashkkarata oichchiis.

<sup>28</sup> Erissiyo ashkkarati, “Issi issi asai nena, ‘Xammaqiya Yohaannisa’ gees; harati, ‘Eelaasa’ goosona; qassi harati, ‘Hananabaa yootiyaageetuppe issuwaa’ goosona” yaagidosona.

<sup>29</sup> Yaagin Yesuusi eta, “Yaanin intte tana oona geetii?” yaagidi oichchiis.

PHeexiroosi, “Neni Kiristtoosa” yaagidi zaariis.

<sup>30</sup> Yesuusi, “Tabaa ooyyoonne odoppite” yaagidi eta azaziis.

### *Yesuusi Bana Gakkana Metuwaabaanne Waayiyaabaa Koiruwaa Haasayiiis (Maatiyoosa 16:21-28; Luqaasa 9:22-27)*

<sup>31</sup> Yesuusi ba erissiyo ashkkarata, “Taani, Asa Na7ai, daro waayettanau bessees; cimati, qeese halaqatinne higgiiyaa tamarissiyaageeti tana ixnanau bessees; eti tana woranaunne taani hezzantto gallasappe guyyiyan, haiquwaappe denddanau bessees” yaagidi tamarissuwaa doommiis. <sup>32</sup> Hegaa i etayyo geeshshidi odiis; PHeexiroosi a issi baggi zaaridi, zorettaa doommiis.

<sup>33</sup> SHin Yesuusi guyye simmidi, ba erissiyo ashkkarata xeellidi PHeexiroosa, “Kichcha ta matappe! Ha Seexaanau, neni asi dosiyooobaa qoppiyoogaappe attin, Xoossai dosiyooobaa qoppakka” yaagiis.

### *Yesuusa Kaalliyoogee Bana Kaddanaagaa Oichchees (Maatiyoosa 10:38-39; 16:24-28; Luqaasa 9:23-27; 14:26-27)*

<sup>34</sup> Qassi Yesuusi daro asaanne ba erissiyo ashkkarata baakko xeesidi, hagaadan yaagiis; “Tana kaallana koyiya urai de7ikko, bana yeggi bayo; yaatidi ba masqqaliyaa tookkidi, tana kaallo. <sup>35</sup> Aissi giikko, ba shemppuwaa ashshana koyiya urai bashshana; shin ta gishshaunne wonggeliiyaa mishiraachchuwaa gishshau ba shemppuwaa bashshiya urai ashshana. <sup>36</sup> Aissi giikko, issi urai sa7an de7iya ubbaba ba shi-ishshidi, ba shemppuwaa bashshikko, a ai maaddanee? <sup>37</sup> Issi urai ba shemppuwaa wozanau ai immana danddayii? <sup>38</sup> Xoossaa ammanenna mala diggiya ha nagaranchcha

wodiyan, issi urai tanaaninne ta qaalan yeellatikko, taanikka, Asa Na7ai, qassi ta Aawaa bonchchuwan geeshsha kiitanchchatuura yiyo wode, aani yeellatana” yaagiis.

## 9

### *Yesuusa Merai Laamettiis (Maatiyoosa 17:1-13; Luqaasa 9:28-36)*

<sup>1</sup> Yesuusi eta, “Taani intteyyo tumaa gais; amarida asati Xoossaa kawotettai wolqqaara yiyaagaa be7ennan haiqqennaageeti hagan de7oosona” yaagiis.

<sup>2</sup> Yesuusi usuppun gallassappe guyyiyan, banaara PHeexiroosa, Yaaqoobanne Yohaannisa ekkidi, eta xalaalaa gita deriyaa bolli kessiis; kessidi eta sinttan laamettiis; <sup>3</sup> a maayoikka phooliis; sa7an maayo meecciya ooninne geeshshanau danddayennaagaa keenaa daro booxxiis. <sup>4</sup> He heezzu erissiyo ashkkarati, Eelaasinne Muusee Yesuusaara haasayiyaageeta be7idosona.

<sup>5-6</sup> PHeexiroosi Yesuusa, “Tamarissiyaagoo, nuuni hagan de7iyoogee nuussi lo77o; nuuni heezzu zamppata issuwaa neessi, issuwaa Muusessi, qassi issuwaa Eelaasassi zamppayana” yaagiis. I woigiyaakkonne eribeenna; aissi giikko, ikko hinkkootikka daro yayyidosona.

<sup>7</sup> Hegaappe guyyiyan, shaarai yiidi eta kammin shaaraappe, “Hagee taani siiqiyo ta Na7aa; i giyoogaa siyite” giya qalalai yiis. <sup>8</sup> Sohuwaara eti yuushshi aatti xeelliyo wode, Yesuusappe attin, haraa oonanne bantta matan be7ibookkona.

<sup>9</sup> Eti deriyaappe wodhdhishin, Yesuusi eta, “Taani, Asa Na7ai, haiquwaappe dendana gakkanaassi, intte be7idobaa ooyyoonne odoppite” yaagidi azaziis.

<sup>10</sup> I azazidoogaa eti, “Eeno” giidi, “Ha haiquwaappe denddiyoogaa giyoogee woigiyoogee” yaagidi, bantta gidдон haasayettidosona.

<sup>11</sup> Eti Yesuusa, “Higgiyaa tamarissiyaageeti aissi, ‘Eelaasi kasetidi yaanau bessees’ giyoonaa?” yaagidi oichchidosona.

<sup>12</sup> I zaaridi yaagiis; “Eelaasi kaseti yiidi, ubbabaa giigissees; yaatin, aissi Xoossaa maxaafai, ‘Asa Na7ai daro waayettananne ixettana’ yaagii?” <sup>13</sup> SHin taani intteyyo odais; Eelaasi yiis; qassi abai Xoossaa maxaafan xaafettidoogaadankka, asai a ba koyidobaa oottiis” yaagiis.

### *Yesuusi Tuna Ayyaanai Oiqqido Na7aa Pattiis (Maatiyoosa 17:14-21, Luqaasa 9:37-43)*

<sup>14</sup> Yesuusi, PHeexiroosi, Yaaqoobinne Yohaannisi hinkko erissiyo ashkkaratukko simmidi yiyo wode, daro asai eta yuuyi aadhdhi eqqidaagaanne higgiyaa tamarissiya amarida asati etaara palamettiyaageeta be7idosona. <sup>15</sup> He daro asai Yesuusa be7ido wode dagammidi, sohuwaara akko woxxi yiidi, a sarotiis. <sup>16</sup> Yesuusi ba erissiyo ashkkarata, “Etaara ai palametteeti?” yaagidi oichchiis.

<sup>17</sup> He daro asaa gidloppe issi bitanee zaaridi, “Tamarissiyaagoo, ta na7aa bolli haasayaa diggiya iita ayyaanai de7iyo gishshau, a neekko ekkada yaas. <sup>18</sup> Ha iita ayyaanai a oiqqiyo wode ubban, a ooggees; a doonaarakka hoommoi goppattees; qassi achchaa garccissees; bollaakka zoxissees. Appe ha iita ayyaanaa kessana mala, ne erissiyo ashkkaratuyyo odaas, shin kessanau danddayibookkona” yaagiis.

<sup>19</sup> Yesuusi zaaridi eta, “Ammanenna ha wodiya asau! Taani inttenaara aude gakkanaassi de7anee? Qassi inttebaa aude gakkanaassi danddayanee? Na7aa taakko haa ekki yiite” yaagiis. <sup>20</sup> Yaagin eti na7aa akko ehiidosona; he iita ayyaanai Yesuusa be7idosaarakka na7aa kokkorssi bayiis; na7ai sa7an kunddidi, doonaara hoommoi goppu giishin gondoretiiis. <sup>21</sup> Yesuusi he na7aa aawaa, “Hagee ne na7aa oiqqoosappe woqqa wode gidanee?” yaagidi oichchiis.



Oichchin, na7aa aawai, “I guuttan de7iyo wodeesappe doommiis. <sup>22</sup> A woranau daro wode tamaaninne haattan oliis; shin neeni danddayikko, nuuyyo qarettada nuna maaddarkkii” yaagiis.

<sup>23</sup> Yaagin Yesuusi a, “‘Neeni danddayikko’ gai? Ammaniya asayyo ubbabai danddayettes” yaagiis.

<sup>24</sup> Sohuwaara na7aa aawai ba qaalaa xoqqu oottidi, “Taani ammanais; shin gujja ammananaadan, tana maaddarkkii” yaagiis.

<sup>25</sup> Yesuusi asai dari dari biyoogaa be7idi, iita ayyaanaa, “Ha tullenne duude ayyaanau, ha na7aappe kiya gaada nena ta azazais; qassi naa77anttuwaa aani geloppa” yaagiis.

<sup>26</sup> He iita ayyaanai waassidi, na7aa keehi kokkorssidi, appe kiyiis. Na7ai haiqqidabaa milatin, daro asai, “Na7ai haiqqiis” yaagiis. <sup>27</sup> SHin Yesuusi na7aa kushiyaa oiqqidi denttin, na7ai denddi eqqiis.

<sup>28</sup> Yesuusi soo gelidoogaappe guyyiyan, erissiyo ashkkarati Yesuusa dumma, “Nuuni he iita ayyaanaa kessanau aissi danddayibookkonii?” yaagidi oichchidosona.

<sup>29</sup> Yesuusi zaaridi, “Hegaa malai woosappenne xoomappe attin, haraban kiyanau danddayenna” yaagiis.

*Yesuusi Bana Gakkana Metuwaabanne Haiquwaabaa Naa77anttuwaa Odiis  
(Maatiyoosa 17:22-23; Luqaasa 9:43-45)*

<sup>30</sup> Eti hegaappe denddidi, Galiilaara aadhdhidi biidosona; Yesuusi ba de7iyoosaa ooninne erana mala koyibeenna. <sup>31</sup> Aissi giikko, i ba erissiyo ashkkarata, “Tana, Asa Na7aa, asi asau aattidi immananne worana; taani qassi heezzu gallassappe guyyiyan, naa77anttuwaa haiquwaappe denddana” yaagidi tamarissee.

<sup>32</sup> SHin etau i giyoogee gelibeenna; qassi a oichchanaukka yayyidosona.

*Ubbaappe Aadhdhiyaagee Oonee?  
(Maatiyoosa 18:1-5; Luqaasa 9:46-48)*

<sup>33</sup> Eti Qifirinaahooma giyo katamaa biidosona; biidi soo gelidoogaappe guyyiyan, Yesuusi eta, “Ogiyan ai haasayeetii?” yaagidi oichchiis. <sup>34</sup> SHin eti biidi ogiyan, “Nu gidдон nu ubbaappe aadhdhiyaagee oonee?” yaagidi palamettido gishshau, co77u gididosona. <sup>35</sup> Yesuusi uttidi, tammanne naa77u erissiyo ashkkarata xeesidi eta, “Ooninne sinttau aadhdhana koyikko, ubbaappe guyye aadhdhidi, he ubbau ashkkara gidanau bessees” yaagiis.

<sup>36</sup> Issi guutta na7aa oiqqidi, eta gidдон essiis; he guutta na7aa qoommidi eta, <sup>37</sup> “Hageetu mala guutta naatuppe issuwaa ta sunttan mokkiya ooninne tana mokkees; qassi tana mokkiya ooninne tana kiittidaagaa mokkiyoogaappe attin, ta xalaalaa mokenna” yaagiis.

*Yesuusi, “Nubaa Ixxenna Urai Nu Bagga” Yaagiis  
(Luqaasa 9:49-50)*

<sup>38</sup> Yohaannisi a, “Tamarisssiyaagoo, issi asi ne sunttan xalaheta kessiyaagaa nuuni be7idi, nu bagga gidenna gishshau, a diggida” yaagiis.

<sup>39</sup> SHin Yesuusi yaagiis; “Ooninne ta sunttan Xoossai oottiyo malaataa oottidi, sohuwaara ta bolli itabaa haasayanau danddayiyaabi bainna gishshau diggoppite; <sup>40</sup> aissi giikko, nubaa ixenna urai nu bagga. <sup>41</sup> Taani intteyyo tumaa odais; intte taageeta Kiristtoosaageeta gidiyi gishshau, ooninne intteyyo ta sunttan bule haatta uyanau immikkokka, ba woituwaa ekkana.

*Nagaraa Gaasuwaa  
(Maatiyoosa 18:6-9; Luqaasa 17:1-2)*

<sup>42</sup> “Tana ammaniya ha guuttatuppe issuwaa balettiya oonanne, gaacciyo wogga woxaa a qooriyan qachchidi, abban a oliyoogee au keha. <sup>43-44</sup> Ne kushee nena balettikko, qanxxa ola; neeni naa77u kushiyaara guxunee mule haiqqennasaanne qassi mulekka to77enna Gaannabiyaa taman geliyoogaappe, duuxa kushiyaara de7uwaa geliyoogee neeyyo keha. <sup>45-46</sup> Ne tohoi nena balettikko, qanxxa ola; neeni naa77u tohuwaara guxunee mule haiqqennasan, qassi mulekka to77enna Gaannabiyaa taman yegettiyoogaappe, wobbe gidada de7uwaa geliyoogee neeyyo keha. <sup>47-48</sup> Ne aiffee nena balettikko, wooca ola; neeni naa77u aifiyaara guxunee mule haiqqennasan qassi mulekka to77enna Gaannabiyaa taman yegettiyoogaappe, issi aifiyaara Xoossaa kawotettaa geliyoogee neeyyo keha.

<sup>49</sup> “Aissi giikko, quman maxiniyaa yeggiyoogaadan, tamai asa ubbaa bolli yegettana. <sup>50</sup> Maxinee lo77o; shin i mal77ana xayikko, zaaridi a waati mal77ettuuteetii? Inttenan maxinee de7o; yaatidi issoi issuwaara sarotettan de7ite” yaagiis.

## 10

### *Machcho Yeddana Bessenna (Maatiyoosa 19:1-2; Luqaasa 16:18)*

<sup>1</sup> Yesuusi hegaappe denddidi, Yihudaa biitti biis; biidi Yorddaanoosa SHaafaa pinniis. Daro asai naa77anttuwaa akko shiiqin, kaseegaadankka he asaa tamarissuwaa doommiis.

<sup>2</sup> Issi issi Parisaaweti paaccanau Yesuusakko yiidi, “Issi asi ba machchiyo yeddana nu higgee azazii?” yaagidi a oichchidosona.

<sup>3</sup> Oichchin i zaaridi, “Muusee inttena woigi azazidee?” yaagiis.

<sup>4</sup> Eti, “Muusee, ‘Issi asi ba machcheeyyo paramaa immidi yeddo’ giis” yaagidosona.

<sup>5</sup> Yesuusi zaaridi, eta hagaadan yaagiis; “Intte yootin siyennaageeta gidiyo gishshau, Muusee ha azazuwaa intteyyo xaafiis. <sup>6</sup> SHin Xoossai koiro medhdhiyo wode, atumaasanne maccaasa oottidi, eta medhdhiis. <sup>7</sup> Hegaa gishshau, issi asi ba aawaanne ba aayyiyo aggi bayidi, ba machcheera issippe de7ees; <sup>8</sup> eti naa77ai issi asa gidoosona; hegaa gishshau, eti issi asa gidiyoogaappe attin, naa77u asa gidokkona. <sup>9</sup> Hegaa gishshau, Xoossai issippe gattidoogaa asi shaakkoppo” yaagiis.

<sup>10</sup> Eti soo simmido wode, erissiyoo ashkkarati ha yohuwaabaa Yesuusa naa77anttuwaa oichchidosona. <sup>11</sup> Yesuusi eta yaagiis; “Ba machchiyo yeddidi, haranniyo ekkiya urai ooninne ba machchen shaaramuxees. <sup>12</sup> Qassi maccaarakka ba azinaappe kiyada hara azinaa gelikko shaaramuxausu” yaagiis.

### *Yesuusi Guutta Naata Anjjiis (Maatiyoosa 19:13-15; Luqaasa 18:15-17)*

<sup>13</sup> Yesuusi guutta naata bochhana mala, issi issi asai naata akko ehees; shin erissiyoo ashkkarati he asaa hanqqettidosona. <sup>14</sup> Yesuusi hegaa be7idi, ba erissiyoo ashkkarata hanqqettiis; eta, “Guutta naati taakko yiyoogaa diggoppite; aissi giikko, Xoossaa kawotettaa hageetu malaassa. <sup>15</sup> Taani intteyyo tumaa gais; Xoossaa kawotettaa guutta na7adan ekkenna urai ooninne he kawotettaa mulekka gelenna” yaagiis. <sup>16</sup> Yaagidi guutta naata qoommidi, ba kushiyaara eta bolli huuphiyan huuphiyan wottidi, eta anjjiis.

### *Miishshaa Siiqoi Ehiyo Metuwaa (Maatiyoosa 19:16-30; Luqaasa 18:18-30)*

<sup>17</sup> Yesuusi baanau kiyido wode, issi bitanee woxxiiddi yiidi, a sinttan gulbbatidi, “Lo77o tamarissiyaagoo, merinaa de7uwaa laattanau taani ai oottoo?” yaagidi a oichchiis.

<sup>18</sup> Oichchin Yesuusi, “Aissi tana lo77uwau gai? Xoossaa xalaalaappe attin, hara lo77oi ooninne baawa. <sup>19</sup> Xoossaa azazuwaa, ‘Woroppa; shaaramuxoppa; wuuqqoppa; worduwaawaa markkattoppa; cim Coppa; ne aawaanne ne aayyiyo bonchcha’ yaagiyaagaa eraasa” yaagiis.

<sup>20</sup> Bitanee Yesuusa, “Tamaarissiyaagoo, taani heгаа ubbaa naatettaasappe doommada ha77i gakkanaassikka naagais” yaagiis.

<sup>21</sup> Yesuusi bitaniyaa dosiis; tishshi ootti xeellidi, “Neeyyo issibai paccees; baada neeyyo de7iyaabaa ubbaa baizzada, he miishshaa hiyyeesau imma; neeni saluwan duretana. Yaataada yaada tana kaalla” yaagiis. <sup>22</sup> SHin bitanee heгаа siyidi, i daro dure gidiyo gishshau, ba som77uwaa xumissidi, ufaittinnan aggi bayidi biis.

<sup>23</sup> Yesuusi ba erissiyo ashkkarata yuushshi aatti xeellidi, “Daro dure asi Xoossaa kawotettaa gelanaagee waani metanddeeshsha!” yaagiis.

<sup>24</sup> Erissiyo ashkkarati a haasayaa siyidi garamettidosona; shin Yesuusi qassikka eta, “Naatoo, miishshan ammanettiya asatuyyo Xoossaa kawotettaa gelanaagee woqqaa metanddeeshsha! <sup>25</sup> Dure asi Xoossaa kawotettaa gelanaagaappe, gaameelai marppiyaa xoo7iyaara aadhdhanaagee matattees” yaagiis.

<sup>26</sup> Yaagin erissiyo ashkkarati garamettidi, “Yaatin, ooni attanau danddayii?” yaagidi issoi issuwaa oichchidosona.

<sup>27</sup> Yesuusi eta tishshi ootti xeellidi, “Hagee Xoossau danddayettiyoogaappe attin, asau danddayettenna; aissi giikko, Xoossau ubbabaikka danddayettees” yaagiis.

<sup>28</sup> PHeexiroosi Yesuusa, “Be7a; nuuni nubaa ubbaa aggi bayidi, nena kaallida” yaagiis.

<sup>29</sup> Yesuusi yaagiis; “Taani intteyyo tumaa gais; ta gishshaunne wonggeliyaa mishiraachchuwaawaa gishshau, keettaa woi ishannta woi michchentta, woi aawaa woi aayyiyo woi machchiyo, woi naata woi gadiyaa aggida asi ooninne, <sup>30</sup> ha77i ha wodiyan xeetutooppe dariya keettata, ishannta, michchentta, aayeta, naata, gadiyaa, qassi waayiyaakka ekkana. Sinttappe yaana wodiyanikka merinaa de7uwaa ekkana. <sup>31</sup> SHin daroti ha77i sinttan de7iyaageeti guyye aadhdhana; qassi daroti ha77i guyyen de7iyaageeti sinttau aadhdhana” yaagiis.

*Yesuusi Bana Gakkana Metuwaabaanne Haiquwaabaa Hezzanttuwaa Odiis  
(Maatiyoosa 20:17-19; Luqaasa 18:31-34)*

<sup>32</sup> Eti Yerusalaame biiddi, ogiyan de7oosona; Yesuusi ba erissiyo ashkkaratuppe sinttan hemettees. Eti garamettidosona; a kaallidaageetikka yayyidosona. Naa77anttuwaa tammanne naa77u erissiyo ashkkarata gaxaa kessidi, bana gakkanabaa dumma etassi hagaadan yaagidi odiis; <sup>33</sup> “Be7ite; nuuni Yerusalaame ha77i kiyeettees; yaani tana, Asa Na7aa, qeese halaqatussinne higgiiyaa tamaarissiyaageetussi aattidi immana. Eti ta bolli haiqo pirddaa pirddana; qassi Aihuda gidenna asaassikka tana aattidi immana. <sup>34</sup> He Aihuda gidenna asai ta bolli qilliiccananne cuchchana; tana lissuwan garafananne worana; taani qassi heezzu gallasappe guyyiyan, haiquwaappe dendana” yaagiis.

*Yaaqoobinne Yohaannisi Woossido Woosaa  
(Maatiyoosa 20:20-28)*

<sup>35</sup> Zabddiyoosa naati Yaaqoobinne Yohaannisi Yesuusakko yiidi, “Tamaarissiyaagoo, nuuni nena woossiyo ubbabaa nuuyyo oottarkkii” yaagidosona.

<sup>36</sup> Yesuusi eta, “Taani intteyyo ai oottoo?” yaagiis.

<sup>37</sup> Yaagin eti a, “Ne bonchcho kawotettan neeni uttiyo wode, nuuppe issuwaa neeppe ushachcha baggaara qassi issuwaa haddirssa baggaara utissarkkii” yaagidosona.

<sup>38</sup> SHin Yesuusi eta, “Intte ai woossiyaakkonne erekketa; taani uyanau bessiyo burccukkuwan uyanau danddayeetii? Qassi taani xammaqettanau bessiyo xinqqatiyaa xammaqettanau danddayeetii?” yaagiis.

<sup>39</sup> Yaagin eti zaaridi, “Ee danddayoos” yaagidosona.

Yesuusi qassi, “Taani uyanau bessiyo burccukkuwan intte uyana; taani xammaqetanau bessiyo xinqqatiyaakka intte xammaqettana. <sup>40</sup> SHin taappe ushachcha baggaaranne haddirssa baggaara uttanaageeta dooranau taayyo maati baawa; shin he sohoi Xoossai immanau giigissi wottidoogeetussa” yaagiis.

<sup>41</sup> Hankko tammu erissiyo ashkkarati heгаа siyido wode, Yaaqoobanne Yohaannisa hanqqettidosona. <sup>42</sup> Yesuusi eta ubbaa baakko xeesidi, hagaadan yaagiis; “ ‘Aihuda gidennaageeta haariyaageeta’ giidi qoppiyoogeehinne hegeeta kaalettiya asati bantta asaa haariyoogaa ereeta. <sup>43</sup> SHin intte giddon heгаа mala gidenna; intte giddon gitatana koyiyai ooninne intteyyo ashkkara gidanau bessees. <sup>44</sup> Qassi intte giddon ubbaappe bolla gidana koyiyai ooninne intte ubbaayyo aille gidanau bessees. <sup>45</sup> Aissi giikko, harai atto taani, Asa Na7aikka, asau oottanaunne darota wozanau ta shemppuwaa immanaunne yiidoogaappe attin, asi tau oottanau yabeikke” yaagiis.

*Yesuusi Qooqiyaa Barxximoosa Aifyaa Pattiis*  
(Maatiyoosa 20:29-34; Luqaasa 18:35-43)

<sup>46</sup> Eti Yarkko giyo katamaa biidosona; Yesuusi ba erissiyo ashkkaratuuranne keehi daro asaara Yarkkoppe kiyishin, Ximoosa na7ai qooqee, Barxximoosa giyoogee, ogiyaa doonan woossiiddi uttiis. <sup>47</sup> Barxximoosi Naazireeta Yesuusa gididoogaa siyidi, ba qaalaa xoqqu oottidi, “Daawita na7aa Yesuusaa, tana maararkkii!” yaagettaa doommiis.

<sup>48</sup> Daro asai a, “Haizza!” giidi hanqqettiis.

SHin, i ba qaalaa kaseegaappekka keehi xoqqu oottidi, “Daawita na7au, tana maararkkii!” yaagiis.

<sup>49</sup> Yesuusi ogiyan eqqidi, “A haa xeesite” yaagiis.

Yaagin eti qooqiyaa, “Aikko baawa; dendda eqqa; nena xeesees” yaagidi xeesidosona.

<sup>50</sup> Qooqee ba maayuwaa oli bayidi, guppi denddi eqqidi, Yesuusakko biis.

<sup>51</sup> Yesuusi a, “Taani neeyyo ai oottanau koyai?” yaagiis.

Yaagin qooqee, “Tamaarissiyaagoo, taani xeellanaagaa koyais” yaagiis.

<sup>52</sup> Yaagin Yesuusi a, “Ba; ne ammanoi nena pattiis” yaagiis. Sohuwaarakka a aifee xeelli aggin, ogiyan Yesuusa kaalli bayiis.

## 11

*Yesuusi Gita Bonchchuwana Yerusalaa Geliis*  
(Maatiyoosa 21:1-11; Luqaasa 19:28-40; Yohaannisa 12:12-19)

<sup>1</sup> Eti Yerusalaa matiiddi, Dabira Zaita Deriyaa lanqqiyan de7iya Beetafaaganne Biitaaniyaa giyo katamata gakkidosona; Yesuusi ba erissiyo ashkkaratuppe naa77aa sinttau kiittidi, <sup>2</sup> “Intteppe sinttan de7iya qeeri katamaa biite; biidi yaa gelosaara ooninne mulekka toggibeenna qashuwan de7iya hare maraa intte demmana; a birshshidi, haa ekkidi yiite. <sup>3</sup> Ooninne inttena, ‘Hegaa aissi ootteetii?’ yaagidi oichchikko, ‘Godai haggaa koyees; sohuwaara zaaridi, haa yeddi bayana’ yaagite” yaagiis.

<sup>4</sup> Eti biidi, hare maraa penggiyaa matan ogiyan qachchi wottidoogaa demmidi birshshidosona. <sup>5</sup> Hegan eqqida issi issi asati eta, “Hare maraa waatanau birshsheetii?” yaagidosona. <sup>6</sup> Erissiyo ashkkarati Yesuusi banttana azazidoogaa yootin, asati yeddi bayidosona. <sup>7</sup> Eti hare maraa Yesuusakko ehiidi, bantta maayuwaa a zokkuwan hiixxidosona; hiixxin Yesuusi he hare maraa toggiiis. <sup>8</sup> Daro asai ba maayuwaa ogiyan hiixxiis; qassi harati mittaa tashiyaa kari karidi, ogiyan hiixxidosona. <sup>9</sup> Yesuusappe sinttaara hemettiya asainne a geeduwaa kaalliya asai ba qaalaa xoqqu oottidi, “Xoossai galatetto!

Godaa sunttan yiyaagee anjjettidaagaa.

<sup>10</sup> Godaa sunttan yiya nu aawaa

Daawita kawotetta anjettidaagaa.  
Salo ubbaappe bolla saluwan  
de7iya Xoossai galatetto”  
yaagidosona.

<sup>11</sup> Yesuusi Yerusalaame biidi, Beeta Maqidasiyaa geliis; qassi ubbabaa yuuyi yuuyi xeellidoogaappe guyyiyan, sa7ai qammiyo gishshau, tammanne naa77u erissiyo ashkkaratuura Biitaaniyaa giyo katamaa biis.

*Yesuusi Qanggido Balase Mittiyo  
(Maatiyoosa 21:18-19)*

<sup>12</sup> Wonttetta gallassi eti Biitaaniyaappe kiyidi biishin, Yesuusi namisettiis.  
<sup>13</sup> Haahuwan issi balase giyo mittiyo tashiyaa maaya uttidaaro be7idi, geelladan i bolli aifee beettikkonne giidi, be7anau ikko biis; shin ikko i biyo wode, tashe xalaalaappe attin, ainne aife demmibeenna; aissi giikko, balasee aifiyo wodee gakkibeenna.  
<sup>14</sup> Yesuusi he balasiyo, “Neepe naa77antto merinau asi aife mooppo” yaagiis. Erissiyo ashkkarati i giyoogaa siyidosona.

*Yesuusi Beeta Maqidasiyan Zal77iyaageeta Kessiis  
(Maatiyoosa 21:12-17; Luqaasa 19:45-48; Yohaannisa 2:13-22)*

<sup>15</sup> Eti Yerusalaame biidosona; Yesuusi Beeta Maqidasiyaa gelidi, hegan baizziyaageetanne shammiyaageeta kare yedetaa doommiis; qassi miishshaa laammiaageetu xaraphpheezanne haraphphiyaa baizziyaageetu oidiyaa aatti yeggidi, <sup>16</sup> ooninne aibakko tookkidi, Beeta Maqidasiyaa giddoora aadhdhanaagaa diggiis. <sup>17</sup> Yesuusi asaa hagaadan yaagidi tamarissiis; “Xoossaa maxaafan, ‘Ta keetta Aihuda gidenna asai ubbai Xoossaa woossiyo keetta geetettana’ yaagettidi xaafetti uttiis; shin intte a panggati qosettiyo gonggolo kessideta” yaagiis.

<sup>18</sup> Qeese halaqatinne higgiiyaa tamarissiyaageeti heгаа siyidi, a xaissana ogiyaa koshshaa doommidosona; shin keehi daro asai i tamarissiyoogan garmettiyo gishshau, ayyo yayyidosona.

<sup>19</sup> Sa7ai omarido wode, Yesuusinne erissiyo ashkkarati katamaappe gaxaa kiyidosona.

*Balase Giyo Mittiyya Melaasu  
(Maatiyoosa 21:20-22)*

<sup>20</sup> Eti wonttetta gallassi maallado ogiyaara aadhdhiiddi, he balasiyaa xaphuwaara melaichchidaaro be7idosona. <sup>21</sup> PHeexiroosi hassayidi, “Tamarissiyaagoo, be7a; neeni qanggido balasiyaa melaichchaasu” yaagiis.

<sup>22</sup> Yesuusi zaaridi, eta hagaadan yaagiis; “Xoossaa ammanite. <sup>23</sup> Taani intteyyo tumaa gais; ooninne ba wozanan sirennan ba giidobai hananaagaa ammanidi, ha deriyaa, ‘Denddada abban kundda’ giikko hanana. <sup>24</sup> Hegaa gishshau, taani intteyyo odais; Xoossaa intte woossiyoobanne oichchiyoobaa ubbaanne ekkirggidobaadan ammanite; intte ekkana. <sup>25</sup> Xoossaa woossanau intte eqqiyo wode, saluwan de7iya intte Aawai intte nagaraa atto gaana mala, ooninne inttena naaqqidobai de7ikko, au atto giite. <sup>26</sup> SHin asa nagara intte atto gaana xayikko, saluwan de7iya intte Aawaikka intte nagaraa intteyyo atto geenna” yaagiis.

*Yesuusi Aiba Maatan Oottii Giya Oishaa  
(Maatiyoosa 21:23-27; Luqaasa 20:1-8)*

<sup>27</sup> Eti qassikka Yerusalaame biidosona; Yesuusi Beeta Maqidasiyan hemetettishin, qeese halaqati, higgiiyaa tamarissiyaageetinne cimati akko yiidosona. <sup>28</sup> Yiidi a, “Neeni haga oottanau neeyyo ai alaafetetti de7ii? Woi neeyyo ha alaafetettaa immidai oonee?” yaagidosona.



<sup>29</sup> Yesuusi zaaridi eta, “Taanikka inttena issibaa oichchana; tau odite; taani qassi ha-gaa ai alaafetettan oottiyaakko, intteyyo odana. <sup>30</sup> Yohaannisi xammaqiyo alaafetettaa ekkidoi Xoossaappeeyye woi asappee? Tau odite” yaagiis.

<sup>31</sup> Eti bantta gidдон palamaa doommidi, “Nuuni, ‘Xoossaappe yiis’ yaagikko, i nuna, ‘Yaatin, Yohaannisi yootidoogaa aissi ammanibeekketii?’ yaagana. <sup>32</sup> SHin, ‘Asappe yiis gaanee?’ yaagidosona; qassi asai ubbai Yohaannisi hananabaa yootiyaagaa gididoogaa eriyo gishshau, asau yayyidosona. <sup>33</sup> Hegaa gishshau, eti Yesuusayyo, “Nuuni erokko” yaagidi zaaridosona;

Yesuusi, “Taanikka haggaa ai alaafetettan oottiyaakko, intteyyo odikke” yaagiis.

## 12

### *Woiniyaa Turaa Tokkiya Goshshanchchatu Leemisuwaa (Maatiyoosa 21:33-46; Luqaasa 20:9-19)*

<sup>1</sup> Yesuusi etayyo oduwaa leemisuwan yaagidi doommiis; “Issi bitanee woiniyaa giyo turaa tokkidi, dirssaa yuushshi aattidi diriis; qassi he woiniyaa gum77iyo ollaakka bookkiis; heggaa naagiya asaayyo adussa shuchchaa gimbbiis; hegaappe guyyiyan, kotta oottiya asau immidi, hara dere biis. <sup>2</sup> Woiniyaa aifiyaa maxiyo wodee gakkinn, bana gakkiiyaagaa ekkidi yaana mala, issi ashkkaraa ba kottaawatukko kiittiis. <sup>3</sup> Kottaa oottiyaageeti a ashkkaraa oiqqidi wadhdhidi, kushe mela yedettidosona. <sup>4</sup> Naa77anttuwaa hara ashkkaraa etakko kiittiis; kiittin eti he ashkkaraassi huuphiyaa qoo7idinne kaushshidi yeddidosona. <sup>5</sup> Woiniyaa turaa godai qassikka hara ashkkaraa kiittiis; he ashkkaraa woridosona; qassi hara darotakka hegaadan oottidosona; issuwaa issuwaa wadhdhidi, harata woridosona.

<sup>6</sup> “Woiniyaa turaa godaayyo kiittanau ubbaappe wurssettan i daro siiqiyo a na7aa xalaalai attiis; i, ‘Eti ta na7aa bonchchennan aggokkona’ giidi, ba na7aa etakko kiittiis.

<sup>7</sup> “SHin kottaa oottiyaageeti bantta gidдон, ‘Laattanaagee haggaa; hinddite a woroos; a aqoi nubaa gidana!’ yaagidosona. <sup>8</sup> Na7aa oiqqidi woridi, a ahaa woiniyaa turaa giddoppe gaxaa kessi olidosona.

<sup>9</sup> “Simmi woiniyaa turaa godai waatanee? Yiidi he kottaawata wori wursside, woiniyaa turaa kottaa oottiya hara asau immana.

10-11 “ ‘Gimbbiyaageeti karidi ixido shuchchai

godaa xaphuwaa minttiya,  
ubbaappe aadhdhiya shuchcha gidiis.

Hagee Godai oottidobaa;

qassi nu aifiyaukka garamissiyaabaa’  
yaagiyaagaa Xoossaa maxaafaappe nabbabibeekketii?” yaagiis.

<sup>12</sup> Qeese halaqati, higgiiyaa tamarissiyaageetinne cimati Yesuusi he leemisuwaa banttanan leemidoogaa erido gishshau, a oiqqanau koyidosona; shin asau yayyidi, aggi bayidi biidosona.

### *Giiraa Giirane Agganee Giya Oishaa (Maatiyoosa 22:15-22; Luqaasa 20:20-26)*

<sup>13</sup> Qassi a haasayaappe bala demmidi, a oiqqana mala, Parisaawetuppenne Heerood-isa baggatuppe amaridaageeta akko kiittidosona. <sup>14</sup> Kiittin yiidi, “Tamarissiyaagoo, neeni tumaa haasayiyoogaanne asappe asa shaakkennaagaa nuuni eroos; aissi giikko, neeni asa dummayakka; qassi Xoossaa ogiyaa tumatettan tamarissaasa. Nuuni Roome biittaa Kawuwaa Qeesaarayyo giiraa giiriyoogee wogeeyye woga gidennee? Giiraa giiraneeyye digganee?” yaagidosona.

<sup>15</sup> SHin eti lo77o milatiya iita asa gididoogaa Yesuusi eridi, “Tana aissi paacceetii? Issi santtimiyaa haa ehiite; taani be7ais” yaagiis. <sup>16</sup> Eti au ehiidosona; “Ha merainne sunntai oogee?” yaagidi eta oichchidosona.

Oichchin eti, “Roome biittaa Kawuwaa Qeesaaraagaa” yaagidosona.

<sup>17</sup> Yesuusi zaaridi eta, “Yaatikko, Qeesaaraagaa Qeesaarassi, Xoossaagaa Xoossaassi immite” yaagin eti abaa garamettidosona.

### *Haiquwaappe Denddiyoogaa*

*(Maatiyoosa 22:23-33; Luqaasa 20:27-40)*

<sup>18</sup> Haiqqida asi denddenna giya Saaduqaawetuppe issi issi asati Yesuusakko yiidi, hagaadan yaagidi, a oichchidosona; <sup>19</sup> “Tamaarissiyaagoo, Muusee nuuyyo higgiiyaa xaafiidi, ‘Machcho ekkida asi na7a yelennan haiqqikko, he haiqqidaagaa ishai a machchiyo aissidi, ba ishaayyo na7a yelanau bessees’ yaagiyaagaa xaafiis. <sup>20</sup> Issi wode laappun ishannti de7iyaageetuppe bairai machchiyo ekkidi, na7a yelennan haiqqiis. <sup>21</sup> Haiqqin naa77anttoi o aissii; ikka na7a yelennan haiqqiis; heezanttoikka hegaadan haniis. <sup>22</sup> Laappunatikka o ekkidi, na7a yelennan haiqqidosona; ubbaappe guyyiyan, qassi he maccaasiyaa haiqqaasu. <sup>23</sup> Yaatin, haiqqida asai haiquwaappe denddiyo gallassi, a etappe augaayyo machcho gidanee? Aissi giikko, laappunatikka o ekkidosona” yaagidosona.

<sup>24</sup> Yesuusi zaaridi, eta hagaadan yaagiis; “Intte baliyoogee, Xoossaa maxaafatanne Xoossaa wolqqa intte erenna gishshaassa! <sup>25</sup> Aissi giikko, haiqqida asai haiquwaappe denddiyo gallassi, saluwan de7iya kiitanchchatu mala gidanaagaappe attin, attuma asinne ekkenna; macca asinne gelenna. <sup>26</sup> SHin haiqqidaageetu dendduwaabaa gidikko, Muuse maxaafan xaafettida xaragettiya buuraabaa odiya sohuwan, Xoossai Muusa, ‘Taani Abrahaama Xoossaa, Yisaaqa Xoossaa, Yaaqooba Xoossaa’ giidoogaa mulekka nabbabibeekketii? <sup>27</sup> I paxa de7iyaageetu Xoossaa gidiyoogaappe attin, haiqqidaageetu Xoossaa gidenna; intte keehi balideta” yaagiis.

### *Ubbaappe Aadhdhiya Azazuwaa*

*(Maatiyoosa 22:34-40; Luqaasa 10:25-28)*

<sup>28</sup> Higgiiyaa tamarissiyaageetuppe issoi eti palamettiyoogaa shiiqidi siyiis; qassi Yesuusi etayyo loitti zaaridoogaa siyidi, “Azazo ubbaappe aadhdhiya azazoi augee?” yaagidi Yesuusa oichchiis.

<sup>29</sup> Yesuusi zaaridi, a hagaadan yaagiis; “Azazo ubbaappe aadhdhiya azazuwaa siyite; ‘Israa7eela asau, Godai nu Xoossai issi Godaa. <sup>30</sup> Intte Godaa intte Xoossaa intte kumetta wozanaappe, intte kumetta shemppuwaappe, intte kumetta qofaappe, intte kumetta wolqqaappe siiqite’ yaagees. <sup>31</sup> Qassi azazo ubbaappe aadhdhiya naa77antto azazoi haa; ‘Neeeni ne shooruwaa ne huuphedan siiqa’ giyaagaa; hageetuppe aadhdhiya hara azazoi baawa” yaagiis.

<sup>32</sup> Higgiiyaa tamarissiyaagee Yesuusa yaagiis; “Tamarissiyaagoo, tumaa gaadasa; neeni ‘Xoossai issi Xoossaa xalaala. Appe attin, hari baawa’ giidoogee tuma. <sup>33</sup> Xoossaa kumetta wozanaappe, kumetta qofaappenne kumetta wolqqaappe siiqiyooeenne qassi ba shooruwaakka ba huuphedan siiqiyoogee, xuuggiyo yarshshuwaappenne hara yarshsho ubbaappe aadhdhees” yaagiis.

<sup>34</sup> Yesuusi higgiiyaa tamarissiyaagaa zaaroi aadhdhida eranchcha asa zaaro gididoogaa be7idi, “Neeeni Xoossaa kawotettaappe haakkabaakka” yaagiis; hegaappe guyyiyan, Yesuusa harabaa oichchanau ooninne xalibeenna.

### *Yesuusi O Na7ee? Yaagiya Oishaa*

*(Maatiyoosa 22:41-46; Luqaasa 20:41-46)*

<sup>35</sup> Yesuusi Beeta Maqidasiyan tamarissiiddi, hagaadan yaagiis; “Higgiyaa tamaris-siyaageeti Kiristtoosa woigidi Daawita na7a giyoonaa? <sup>36</sup> Daawiti bana Geeshsha Ayyaanai haasayissin,

‘Godai ta Godaa, “Taani ne morkketa

neeni yedhdha eqqiyoobaa oottana gakkanaassi,

hagan taappe ushachcha baggaara utta” giis’

yaagiis. <sup>37</sup> Daawiti ba huuphen Kiristtoosa, ‘Godaa’ giidi xeesikko, yaatin, Kiristtoosi waanidi, Daawita na7a gidii?” yaagiis.

Daro asai Yesuusi giyoogaa ufaissan siyiis.

*Yesuusi, “Muuse Higgiyaa Tamarissiyaageetuppe Naagettite” Yaagiis*

*(Maatiyoosa 23:1-36; Luqaasa 20:45-47)*

<sup>38</sup> Yesuusi tamarissiiddi, hagaadan yaagiis; “Higgiyaa tamarissiyaageetuppe naagettite; eti adussa maayuwa maayidi yuuyiyoogaanne giyaa sohuwanka asai eta bonchchidi sarotiyoogaa dosoosona. <sup>39</sup> Eti Aihuda woosa keettatun daro lo77iya oidiyaa dosoosona; qassi asi banttana imattiyoosanka bonchcho sohuwaa dosoosona.

<sup>40</sup> Eti am77etu keettaa bonqqidi, banttau lo77o milatanau Xoossaa woosaa adus-soosona; eti ubbaappe aadhdhiya pirdaa ekkana” yaagiis.

*Am77ee Muxuwaatiyaa*

*(Luqaasa 21:1-4)*

<sup>41</sup> Yesuusi Beeta Maqidasiyan muxuwaataa yeggiyo saaxiniyaa matan uttidi, asai ba miishshaa he saaxiniyan yeggiyoogaa be7iis; daro dure asai daro miishshaa he saaxiniyan yeggees. <sup>42</sup> Issi hiyyeesa am77iyaa yaada, issi santtimiyaa laamettiya naa77u bakkannata he saaxiniyan yeggaasu. <sup>43</sup> Yesuusi ba erissiyo ashkkarata xee-sidi, “Taani intteyyo tumaa gais; muxuwaataa saaxiniyan yeggida asa ubbaappe ha hiyyeesa am77iyaa darissada yeggaasu. <sup>44</sup> Aissi giikko, harati ubbai banttau palahida miishshaappe yeggidosona; shin a ba pacaappe, bau de7iya aquwaa muleera imma aggaasu” yaagiis.

## 13

*Yesuusi Beeta Maqidasee Qolettanaagaa Kasetidi Yootiis*

*(Maatiyoosa 24:1-2; Luqaasa 21:5-6)*

<sup>1</sup> Yesuusi Beeta Maqidasiyaappe kiyishin, erissiyo ashkkaratuppe issoi a, “Tamaris-siyaagoo, hagee aiba lo77o shuchchakkonne qassi aiba lo77o shuchcha keettakko be7ai!” yaagiis.

<sup>2</sup> Yesuusi zaaridi, “Ha gita shuchcha keettata be7ai? Ha keettatun de7iya issi shuchchinne attennan ubbai qolettana” yaagiis.

*Godai Yaanaappe Kasetidi Gakkana Yedetaanne Waayiyaa*

*(Maatiyoosa 24:3-14; Luqaasa 21:7-19)*

<sup>3</sup> Yesuusi Beeta Maqidasiyaappe hini baggaara Dabira Zaita Deriyaa bolli uttidaashin, PHeexiroosi, Yaaqoobi, Yohaannisinne Inddiraasi banttarkka akko yiidi a, <sup>4</sup> “Hegee aude hananaakko, nuuyyo odarkkii; qassi hegee ubbai polettana wodiya erissiya malaatai aiba gidanee?” yaagidi oichchidosona.

<sup>5</sup> Yesuusi qassi etayyo hagaadan yaagidi, oduwaa doommiis; “Inttena ooninne balet-tenna mala naagettite. <sup>6</sup> Daro asati ta sunttan, ‘Taani Kiristtoosa’ yaagiiddi yaana; yiidi daro asaa balettana. <sup>7</sup> Matan de7iya olaa cenggurssaanne haahuwan de7iya olaa oduwaa intte siyiyo wode, hirgoppite; hegaa malabai hananau bessees; shin wurssettai biroona. <sup>8</sup> Aissi giikko, issi biittaa asai hara biittaa asaara olettana; qassi issi kawotettai hara kawotettaara olettana; biittaa qaattai ubbasan de7ana; koshaikka de7ana; shin hegee koiro leesso mala.

<sup>9</sup>“SHin intte intte huuphen naagettite; aissi giikko, asi inttena oiqqidi, pirdda keettau aattidi immana; qassi ba Aihuda woosa keettatunkka inttena lissuwan garafana; deriyaa haariyaageetu sinttaaninne kawotu sinttan ta gishshau intte markkattanau eqqana. <sup>10</sup> Wonggeliyaa mishiraachchoi koiroora dere ubbau odettiichchanau bessees. <sup>11</sup> Eti inttena pirdda keettaa ehiyo wodenne aattidi immiyo wode, woigidi haasayanaakkonne koiroora hirgoppite; he saatiyan Xoossai intteyyo immiyoobaa haasayite. Aissi giikko, Geeshsha Ayyaanai haasayanaappe attin, haasayiyaageeti inttena gidekketa.

<sup>12</sup> “Ishai ba ishaa, aawai ba na7aa worissana; qassi naati bantta aawatu bollinne bantta aayetu bolli denddidi, eta worissana. <sup>13</sup> Asai ubbai inttena ta sunntaa gishshau ixkana; shin wurssettai gakkanaashin gencciyaagee attana.

*Yerusalaame Gakkana Hanttaara Metuwaa  
(Maatiyoosa 24:15-28; Luqaasa 21:20-24)*

<sup>14</sup> “SHin hananabaa yootiya Daaneeli odido bashshaa tunatetta eqqanau bessen-nasan eqqidaashin intte be7iyo wode, hegee woigiyoogaakko, nabbabiyaagee akeeko; Yihudaa biittan he wode de7iyaageeti deriyaakko baqatona. <sup>15</sup> Keettaa huuphiyan de7iya uraikka issibaa ekkana duge wodhdhidi, ba soo geloppo. <sup>16</sup> Gaden de7iyaageekka ba maayuwa ekkana guyye simmoppo. <sup>17</sup> He wode shahaara mac-caasatuuyoonne xanttiya maccaasatuuyo aayye7ana. <sup>18</sup> SHin hagee ubbai haniyo wodee balggo gidenna mala, Xoossaa woosite; <sup>19</sup> aissi giikko, Xoossai sa7aa koiro medhdhoosappe doommidi, ha77i gakkanaassi, mulekka de7ibeenna metoi, qassi hagaappe sinttaukka mule de7enna metoi asaa bolli he wode de7ana. <sup>20</sup> Godai he gallassatu goodaa guuttiyoi bannaakko, asa gididai ooninne antenna; shin i ba doorido asatu gishshau, he gallassatu goodaa guuttiis.

<sup>21</sup> “He wode ooninne inttena, ‘Be7ite; Kiristtoosi hagan de7ees’ woi, ‘Be7ite; Kiristtoosi hagan de7ees’ yaagikko, heгаа ammanoppite. <sup>22</sup> Aissi giikko, worddanchcha Kiristtoosatinne wordduwaa hananabaa yootiyaageeti denddana; denddidi banttau dand-dayettikko, harai atto Xoossai dooridoogeet akka balettanau malaataanne garamisiyaabaa bessana. <sup>23</sup> SHin intte naagettite; taani intteyyo ubbabaa kasetada odaas.

*Kiristtoosa Naa77antto Yuussaa  
(Maatiyoosa 24:29-31; Luqaasa 21:25-28)*

<sup>24</sup> “SHin he wode he waayiyaappe guyyiyan, awai xumana;

aginai poo7iyoogaa aggi bayana;

<sup>25</sup> xoolintteti saluwaappe kunddana;

qassi saluwan de7iya wolqqatikka qaaxettana.

<sup>26</sup> He wode taani, Asa Na7ai, gita wolqqaaranne bonchchuwaara shaaraa gidloora yishin, eti be7ana. <sup>27</sup> He wode taani kiitanchchata sa7aa oiddu zooziyaa kiittana; kiittada sa7aa gaxaappe saluwaa gaxaa gakkanaashin, Xoossai doorido asaa shiishshana.

*Wodee Gakkidoogaa Malaatiya Balase Mittiyo  
(Maatiyoosa 24:32-35; Luqaasa 21:29-33)*

<sup>28</sup> “Leemisuwaa balasiyo giyo mitteeppe akeekite; balasiyaa aaciyo wodenne i tashee bonccottiyo wode, bonee matattidoogaa intte ereeta. <sup>29</sup> Hegaadankka intte he ubbabai haniyoogaa be7iyo wode, i matattidi pengge shiiqidoogaa erite. <sup>30</sup> Taani intteyyo tumaa odais; ha ubbabai hanana gakkanaassi, ha wodiya asai haiqqiichchenna. <sup>31</sup> Saloinne sa7ai aadhdhana; shin ta qalalai mulekka aadhdhenna.

*Wurssetta Gallasaanne Saatiyaa Ooninne Erenna  
(Maatiyoosa 24:36-44)*

<sup>32</sup> “SHin he gallassanne he saatiyaa Aawaa xalaalaappe attin, harai atto saluwan de7iya kiitanchchata gidin, woi tana Na7aa gidinkka ooninne eriyaabi baawa. <sup>33</sup> He wodee aude gidanaakko, intte erenna gishshau, naagettite; minnite; Xoossaa woossite. <sup>34</sup> Ta yuussai ba keettaa aggidi, oge biya bitaniyaa mala; bitanee ba ashkkaratuyyo huuphen huuphen oosuwaa immidi, eta ba oosuwaayyo alaafe oottiis; qassi kariyaa naagiyaageekka minttidi naagana mala azaziis.

<sup>35</sup> “Hegaa gishshau, minnite; aissi giikko, keettaawai omarssa gidin, woi qamma bilahe gidin, woi kuttoi waassiyo wode gidin, woi maallado guuraara gidin aude yaanaakko, intte erekketa. <sup>36</sup> Intte akeekennan i yiikko, inttena xiskkidaageeta demmenna mala minnite. <sup>37</sup> Taani intteyyo odiyooгаа asa ubbau odais; minnite” yaagiis.

## 14

### *Kiristtoosa Bolli Maqettidosona*

*(Maatiyoosa 26:1-5; Luqaasa 22:1-2; Yohaannisa 11:45-53)*

<sup>1</sup> Paasikaa Baalaa giyoogaa bonchchiyo gallassainne oittaa meettaa bonchchiyo gallassai gakkanau naa77u gallassai attiis; qeese halaqatinne higgiiyaa tamaarissiyaageeti asi erennan Yesuusa oiqqidi woriyo ogiyaa koyoosona. <sup>2</sup> “Asai ooshshaa kessenna mala, Paasikaa bonchchiyo gallassi hegaa oottokko” yaagidosona.

### *Yesuusa SHittuwaa Tiyida Maccaasiyo*

*(Maatiyoosa 26:6-13; Yohaannisa 12:1-8)*

<sup>3</sup> Yesuusi Biitaaniyaa kataman inchchirichchaa harggiya Simoona son qumaa maanau uttidaashin, issi mishiriyaa albasxxiroosa giyo shuchchaappe oottido bilqqaadiyaa kumida narddoosiyaa giyo daro al77o shittuwaa ekkada yaasu; yaada he bilqqaadiyaa menttada shittuwaa Yesuusa huuphiyan tigaasu. <sup>4-5</sup> He sohuwan de7iya asaappe issoi issoi hanqqettidi, “Ha shittuwaa coo mooriyoogee aibissee? Ha shittuwaa xeetanne ishatamu biraappe dariya waagan baizzidi, miishshaa hiyyeesau immanau danddayettes” yaagidi bantta gidon haasayoosona; yaatidi he mishiriyao daro boridosona.

<sup>6</sup> SHin Yesuusi hagaadan yaagiis; “Ha maccaasiyo ainne gooppite; o aissi waisseetii? A tau lo77obaa oottaasu. <sup>7</sup> Hiyyeesati ubba wode inttenaara de7oosona; intte koyido wode audenne eta maaddanau danddayeeta; shin taani ubba wode inttenaara de7ikke. <sup>8</sup> A ba danddayidoogaa oottaasu; qassi tana mooguwau giigissanau kasetada shittuwaa tiyaasu. <sup>9</sup> Taani intteyyo tumaa odais; sa7a ubban wonggeliyaa mishiraachchuwaa odiyooaan awaanikka, asai o hassayana mala, ha a oottidoogee odettana” yaagiis.

### *Yihudai Yesuusa Aattidi Immanau Zorettaa Maayis*

*(Maatiyoosa 26:14-16; Luqaasa 22:3-6)*

<sup>10</sup> Tammanne naa77u erissiyoo ashkkaratuppe issoi Yihudaa Asqqoroota giyoogee, Yesuusa qeese halaqatuyyo aattidi immanau etakko biis. <sup>11</sup> Eti hegaa siyido wode ufattidi, “Nuuni neeyyo miishsha immana” yaagidosona; yaagin Yihudai Yesuusa aattidi immanau injjetiyya wodiyyaa wochchees.

### *Yesuusi Ba Erissiyoo Ashkkaratuura Paasikaa Miis*

*(Maatiyoosa 26:17-25; Luqaasa 22:7-14,21-23; Yohaannisa 13:21-30)*

<sup>12</sup> Oittaa miyo gallassaa bonchchiyo koiro gallassi, Paasikaa qumaa maanau anqqara dorssaa shukkiyo wode, Yesuusi erissiyoo ashkkarati a, “Paasikaa bonchchiyo gallassi neeni maana qumaa nuuni awa biidi giigissanee?” yaagidi oichchidosona.

<sup>13</sup> Yesuusi ba erissiyoo ashkkaratuppe naa77ata hagaadan yaagidi kiittiis; “Katamaa biite; intte biishin, otuwan haattaa tookkida issi bitanee inttenaara gaittana; a kaallite. <sup>14</sup> I biidi geliyo keettaawaa, “Tamaarissiyaagee nena, “Taani ta erissiyoo ashkkaratuura Paasikaa qumaa maanau ta imatta kifilee awaane?” yaagees’ yaagite. <sup>15</sup> Keettaawai



inttena pooqiyaa bollan de7iya giigi uttida aaho kifiliyaa bessana; hegan nuuyyo giigissite” yaagiis.

<sup>16</sup> He naa77u erissiyo ashkkarati kiyidi, katamaa biidosona; Yesuusi banttau odi-doogaadanka ubbabaa demmidi, Paasikaa qumaa giigissidosona.

<sup>17</sup> Sa7ai omariyo wode Yesuusi tammanne naa77u erissiyo ashkkaratuura yaa biis.  
<sup>18</sup> Eti uttidi masoofiyaappe qumaa miishin, Yesuusi eta, “Taani intteyyo tumaa odais; intteppe issoi tanaara miyaagee, tana aattidi immana” yaagiis.

<sup>19</sup> Erissiyo ashkkarati dagammidi, huuphiyan huuphiyan a, “Tumu taneeshsha?” giyoogaa doommidosona.

<sup>20</sup> Yesuusi zaaridi, “I ha intte tammanne naa77atuppe issuwaa; i tanaara issippe tushkkanau ba oittaa shaatiyan yeddiyaagaa. <sup>21</sup> Taani, Asa Na7ai, Xoossaa max-aafai haiqqana giidoogaadan haiqqana; shin tana, Asa Na7aa, aattidi immiya urau aayye7ana; he urai yelettennan attiyaakko, au keha shin” yaagiis.

*Qurbbaaniyaa (Godaa Kahuwaa) Ekkiyo Wogaa*

*(Maatiyoosa 26:26-30; Luqaasa 22:14-20; Koiro Qoronttoosa 11:23-25)*

<sup>22</sup> Eti miishin, Yesuusi oittaa ekkidi, Xoossaa galatiis; he oittaa menttidi, ba erissiyo ashkkaratuyyo immiiddi, “Heite; hagee ta ashuwaa” yaagiis.

<sup>23</sup> Burccukkuwaa ekkidi, Xoossaa galatidi, etayyo immiis; immin ubbaikka he burccukkuwaappe uyidosona. <sup>24</sup> Yesuusi, “Hagee ooratta maachchan daro asaa gishshau gukkiya ta suuttaa. <sup>25</sup> Taani intteyyo tumaa odais; taani Xoossaa kawotettan ooratta woine eessaa uyana gallassai gakkanaassi, naa77anttuwaa ha woine eessaa mulekka uyikke” yaagiis.

<sup>26</sup> Mazamuriyaa yexxidoogaappe guyyiyan, Dabira Zaite Deriyaa biidosona.

*PHeexiroosi Kaddanaagaa Yesuusi Kasetidi Yootiis*

*(Maatiyoosa 26:31-35; Luqaasa 22:31-34; Yohaannisa 13:36-38)*

<sup>27</sup> Yesuusi eta, “Intte ubbai tana yeggi bayidi baqatana; aissi giikko, Xoossaa maxaafai, ‘Xoossai dorssaa heemmiyaagaa worana;

worin dorssai ubbai laalettana’ yaagees. <sup>28</sup> SHin taani haiquwaappe denddidogaappe guyyiyan, intteppe kasetada Galiila baana” yaagiis.

<sup>29</sup> PHeexiroosi zaaridi, “Eti ubbati nena yeggi bayidi baqatikkokka, taani nena mulekka yeggikke” yaagiis.

<sup>30</sup> Yaagin Yesuusi PHeexiroosa, “Taani neeyyo tumaa odais; hachchi qammi kuttoi naa77utoo waassanaappe kase, neeni tana heezzutoo kaddana” yaagiis.

<sup>31</sup> SHin PHeexiroosi kaseegaappekka minttidi, “Taani harai atto, nenaara issippe haiqqiyaakkokka, nena mulekka kaddikke” yaagiis. Qassi harati ubbatikka hegaadan giidosona.

*Yesuusi Geetesemaanen Woossiis*

*(Maatiyoosa 26:36-46; Luqaasa 22:39-46)*

<sup>32</sup> Geetesemaane giyo sohuwaa biidosona; Yesuusi ba erissiyo ashkkarata, “Taani Xoossaa woossanaashin, intte hagan uttiishshite” yaagiis.

<sup>33</sup> Yesuusi PHeexiroosa, Yaaqoobanne Yohaannisa banaara ekki efiis; daro gencceeci-isinne waayettiis. <sup>34</sup> Qassi eta, “Taani haiqqana gakkanaassikka kayyottais; hagan takkishshite; xiskkoppite” yaagiis.

<sup>35</sup> Guuttaa sinttaukko shiiqiiddi, biittan gufannidi, danddayettiyaabaa gidikko, he wodee baappe aadhdhana mala, Xoossaa woossiis. <sup>36</sup> Qassikka, “Abbaa, ta Aawau, ubbabi neeyyo danddayettes; ha burccukkuwaa taappe digga; shin neeni koyiyoobai hanoppo attin, taani koyiyoobai hanoppo” yaagiis.

<sup>37</sup> Yesuusi erissiyo ashkkaratukko simmi yiidi, xiskkidaageeta demmidi PHeexiroosa, “Simoonaa, xiskkadii? Neeni issi saatekkonne naaganau danddayabeikkii? <sup>38</sup> Paaciyann intte gelenna mala, naagitenne Xoossaa woossite; ayyaanai giigi uttiis; shin ashoi daafuranchcha” yaagiis.

<sup>39</sup> Qassikka biidi kaseegaadankka Xoossaa woossiis. <sup>40</sup> Erissiyo ashkkaratukko guyye simmida i yiyo wode, xiskkidaageeta demmiis; eta aifiyaa xiskkoi goozi wottido gishshau, ayyo ai haasayiyaakkokka eribookkona.

<sup>41</sup> Heezanttuwaa etakko yiidi, “Ha77i gakkanaassikka xiskkeetiinne shempeetii? Gidana; wodee gakkiiis; be7ite, tana, Asa Na7aa, nagaranchcha asatun aattidi immiyo wodee gakkiiis. <sup>42</sup> Denddidi hinddite; be7ite, tana aattidi immiyaagee hageeho gakkiiis” yaagiis.

### *Yesuusi Ba Morkketu Kushiyan Oiqettiis*

*(Maatiyoosa 26:47-56; Luqaasa 22:47-53; Yohaannisa 18:3-12)*

<sup>43</sup> Yesuusi heгаа biron haasayishin, tammanne naa77u erissiyo ashkkaratuppe is-soi, Yihudai, sohuwaara gakki wodhdhiis; qassi qeese halaqati higgiiyaa tamarissiyaageetinne cimati kiittin, bisuwaanne dullaa oiqqida daro asai aara issippe yiis.

<sup>44</sup> Yesuusa aattidi immiyaagee he daro asaayyo, “Taani yeriyoogee a; a oiqqidi loitti naagidi, ekki efite” yaagidi malaataa yooti wottiiis.

<sup>45</sup> Yihudai gakkosaarakka Yesuusakko shiiqidi, “Tamarissiyaagoo” yaagidi Yesuusa yeri ekkiis. <sup>46</sup> He daro asai Yesuusa mintti oiqqiis. <sup>47</sup> SHin matan eqqidaageetuppe issoi ba bisuwaa shoddinne qeese ubbatu halaqaa ashkkaaraa shocidi, a haittaa qanxxi oliis.

<sup>48</sup> Yesuusi zaaridi, he shiiqida daro asaa, “Tana pangga kessidi, pangga oiqqiy-oogaadan oiqqanau bisonne dulla oiqqidi yiidetii? <sup>49</sup> Taani Beeta Maqidasiyan tamarissaidda, gallassi gallassi inttenaara de7iyo wode tana oiqqibeekketa; shin Xoossaa maxaafati giidoogee polettanau bessees” yaagiis.

<sup>50</sup> Erissiyo ashkkarati ubbati a yeggi bayidi baqatidosona.

<sup>51</sup> Naxala xalaalan ba kalluwaa kammida issi yelaga bitanee Yesuusa kaalliyaagaa asai oiqqiis. <sup>52</sup> SHin he bitanee naxalaa oli bayidi, kallo xiire baqatiis.

### *Yesuusa Pirda SHangguwaa Efidosona*

*(Maatiyoosa 26:57-68; Luqaasa 22:54-55,63-71; Yohaannisa 18:13-14,19-24)*

<sup>53</sup> Asai Yesuusa qeese ubbatu halaqaa soo, qeese halaqa ubbati, cimatinne higgiiyaa tamarissiyaageeti shiiqidosaa ekki efiiis. <sup>54</sup> PHeexiroosi qeese ubbatu halaqaa dirssa giddo gakkanaassi haahuwan a kaalliis; yan naagiyaagaara tamaa ho77iiddi, utti bayiis.

<sup>55</sup> Qeese halaqatinne yaa7aa asai ubbai Yesuusa woranau a bolli markka koyidosona; shin ainne demmibookkona. <sup>56</sup> Aissi giikko, daro asati a bolli wordduwaa markkattidosona; shin eta markkatettaa issi mala gidenna.

<sup>57-58</sup> Issi issi asati denddi eqqidi Yesuusa bolli, “I, ‘Taani asai keexxido ha Beeta Maqidasiyaa qolada, asai keexxibeenna hara Beeta Maqidasiyaa heezzu gallassa giddon keexxana’ giishin, nuuni siyida” yaagidi wordduwaa markkattidosona. <sup>59</sup> SHin harai atto eta markkatettaa hegankka issi mala gidibeenna.

<sup>60</sup> Qeese ubbatu halaqai asa ubbaa sinttan denddi eqqidi Yesuusa, “Hageeti nena mootiyo mootuwau neeyyo zaariyoobi baawee?” yaagidi oichchiis. <sup>61</sup> SHin Yesuusi co77u giidi, ainne zaaribeenna; qeese ubbatu halaqai a, “Anjettida Xoossaa Na7ai Kiristtoosi nenee?” yaagidi naa77anttuwaa oichchiis.

<sup>62</sup> Yesuusi zaaridi, “Ee tana; intte tana, Asa Na7aa, wolqqaama Xoossaappe ushachcha baggaara uttidaashiinne saluwaa shaaraara yiishin be7ana” yaagiis.

<sup>63</sup> Qeese ubbatu halaqai ba maayuwaa pooshshi olidi, “Nuna hagaappe sinttan aissi hara markka koshshii? <sup>64</sup> Intte a cashshaa siyideta; intte qofai aibee?” yaagiis; yaagin eti ubbai, “I haiqqana bessees” yaagidi a bolli pirddidosona.

<sup>65</sup> Etappe issooti issooti a bolli cushettaa doommidosona; a aifiyaa goozidi dechchidi, “Nena dechchidai oonee? Ane hananabaa yoota!” yaagidosona; qassi naagiyaageetikka a qinxalliyyaa baqqiiddi ekki efidosona.

*PHeexiroosi Yesuusa Kaddiis*

*(Maatiyoosa 26:69-75; Luqaasa 22:56-62; Yohaannisa 18:15-18,25-27)*

<sup>66</sup> PHeexiroosi dirssa gidдон hirkkiira de7ishin, qeese ubbatu halaqaa macca ashkkaratuppe issinniyaa yaasu. <sup>67</sup> Yaada PHeexiroosi tamaa ho77iyaagaa be7ada, tishshi ootta xeellada, “Neenikka Naazireeta Yesuusaara issippe de7aasa” yaagaasu.

<sup>68</sup> SHin PHeexiroosi, “Neeni giyoobai aibakko taani erikke; tau akeekettenna” yaagidi kaddiis; yaatidi dirssaa penggiyaakko kiyiis; kuttoikka waassiis.

<sup>69</sup> He ashkkariyaa PHeexiroosa be7ada, a matan eqqida asata, “Ha bitaneekka etaara de7ees” gaada gujjada oduwaa doommaasu. <sup>70</sup> SHin PHeexiroosi qassikka kaddiis.

Guuttaa gam77ishin, matan eqqida asati naa77anttuwaa PHeexiroosa, “Neeni tuma etaara issippe de7aasa; aissi giikko, neeni Galiila biitta asa” yaagidosona.

<sup>71</sup> SHin PHeexiroosi, “Taani hegaa intte giyo bitaniyaa erikke!” yaagidi bana qangget-taanne caaquwaa doommiis.

<sup>72</sup> Sohuwaarakka kuttoi naa77anttuwaa waassi aggiis; PHeexiroosi bana Yesuusi, “Neeni kuttoi naa77utoo waassanaappe kase heezzutoo tana kaddana” giidoogaa has-sayidi, daro yeekkiis.

## 15

*Yesuusa PHilaaxoosakko Efidosona*

*(Maatiyoosa 27:1-2,11-14; Luqaasa 23:1-5; Yohaannisa 18:28-38)*

<sup>1</sup> Maallado guuran sohuwaara qeese halaqati cimatuuranne higgiiyaa tamaris-siyaageetuura yaa7aa asa ubbaara maqettidi, Yesuusa qachchidi efidi, PHilaaxoosayyo aattidi immidosona.

<sup>2</sup> PHilaaxoosi a, “Neeni Aihudatu kawoo?” yaagidi oichchiis.

Yesuusi zaaridi a, “Neenikka gaasa” yaagiis.

<sup>3</sup> Qeese halaqati Yesuusa daroban mootidosona. <sup>4</sup> SHin PHilaaxoosi naa77anttuwaa Yesuusa, “Neeyyo zaariyoobi baawee? Eti ne bolli woqqa mootuwaa ehiyaakko be7ikkii?” yaagidi oichchiis.

<sup>5</sup> SHin Yesuusi harabaa zaarennan ixxin, PHilaaxoosi garamettiis.

*Yesuusa Haiquwan Pirddidosona*

*(Maatiyoosa 27:15-26; Luqaasa 23:13-25; Yohaannisa 18:39-40; 19:1-16)*

<sup>6</sup> PHilaaxoosayyo Paasikaa Baalaa bonchchiyo gallasan asai koyiyo issi uraa qashuwaappe birshshiyoo meezee de7ees. <sup>7</sup> He wode issi Barbbaana giyo bitanee ooshshaa kessidi shemppo worida asatuura issippe qasho keettan de7ees. <sup>8</sup> SHiiqida daro asai PHilaaxoosi kasegaadankka oottana mala, ba qaalaa xoqqu oottidi, woosaa doommiis. <sup>9</sup> PHilaaxoosi asaa zaaridi, “Taani intteyyo Aihudatu kawuwaa birshshiy-oogaa koyeetii?” yaagidi oichchiis. <sup>10</sup> Aissi giikko, qeese halaqati Yesuusa qanaatidi aatti immidoogaa PHilaaxoosi eriis.

<sup>11</sup> SHin qeese halaqati Yesuusa gishshaa Barbbaana birshshanaadan, he shi-iiqida asai PHilaaxoosa woossana mala, asaa maqqidosona. <sup>12</sup> PHilaaxoosi zaaridi naa77anttuwaa, “Yaatin, ha Aihuda kawo intte giyoogaa waatoo?” yaagiis.

<sup>13</sup> Yaagin asai PHilaaxoosayyo naa77anttuwaa ba qaalaa xoqqu oottidi, “Masqqaliyaa bolli misimaariyan xishada a kaqqa” yaagiis.

<sup>14</sup> PHilaaxoosi asaa, “Aissi? I ai iitabaa oottidee?” yaagiis.

SHin asai kasegaappekka ba qaalaa xoqqu oottidi, “Masqqaliyaa bolli misimaariyan xishada a kaqqa” yaagiis.

<sup>15</sup> PHilaaxoosi asaa ufaissanau koyidi, Barbbaana asaayyo birshshiis; yaatidi lisuwan Yesuusa garafidi, masqqaliyaa bolli misimaariyan xishidi kaqqanau etau aattidi immiis.

*Wotaaddarati Yesuusa Qilliiccidosona  
(Maatiyoosa 27:27-31; Yohaannisa 19:2-3)*

<sup>16</sup> Hegaappe guyyiyan, wotaaddarati Yesuusa deriyaa haariyaagaa ooso keettaa ekki efiidi, hara wotaaddarata ubbaa issippe xeesidosona. <sup>17</sup> Qassi zo7o afalaa a maizzidosona; agunttaa akiliiliyaa giigissidi, a huuphiyan wottidosona. <sup>18</sup> Hegaappe guyyiyan a, “Aihudatu kawuwau saro de7ai” yaagiiddi, ayyo zigettaa doommidosona. <sup>19</sup> A huuphiyaa shombboqo gatiman shocidosona; qassi a bolli cuchchidosona; gulbbatidi ayyo goinnidosona. <sup>20</sup> A bolli qilliiccidoogaappe guyyiyan, zo7o afalaa appe qaari ekkidi, a afalaa a maizzidosona; maizzidi masqqaliyaa bolli misimaariyan xishidi, a kaqqanau ekki efiidosona.

*Yesuusa Kaqqidosona  
(Maatiyoosa 27:32-44; Luqaasa 23:26-43; Yohaannisa 19:17-27)*

<sup>21</sup> Eti biidi, Iskkinddiranne Rufoosa yelida aawaa, issi Simoona giyo Qareena biitta asi, gaxaappe katamaa yiyaagaara gaittidi, Yesuusa masqqaliyaa wolqqan toossidosona. <sup>22</sup> Yaatidi Golggottaa giyoosaa Yesuusa efiidosona. “Golggottaa” giyoogee “Guuggiyaa Sohuwaa” giyoogaa. <sup>23</sup> Karbbiyaa giyo xalee wolahettido woine eessaa Yesuusayyo uyanau immidosona; shin i uyennan ixxiis. <sup>24</sup> Eti masqqaliyaa bolli misimaariyan xishidi, a kaqqidosona; qassi oona gakkanaakko eranau a afalaa shaakkidi, saamaa yeggidosona.

<sup>25</sup> Eti masqqaliyaa bolli misimaariyan xishidi a kaqqiyo wode, maallado heezzu saate. <sup>26</sup> Eti, “Aihudatu kawuwaa” yaagidi a mootiyo xifatiyaa xaafi wottidosona. <sup>27</sup> Yesuusaara naa77u panggata issuwaa appe ushachcha baggaara, qassi issuwaa appe haddirssa baggaara masqqaliyaa bolli misimaariyan xishidi kaqqidosona. <sup>28</sup> Xoossaa maxaafai, “Iitabaa oottida asatuura i paidettiis” yaagiyoojee polettiis.

<sup>29</sup> Ogiyaara aadhdiya asai Yesuusa karidi, ba huuphiyaa qaattiiddi cayiis; “A77a! Beeta Maqidasiyaa qolada heezzu gallassa gidon keexxiyaagoo, ne huuphiyaa ashsha; <sup>30</sup> ane masqqaliyaa bollappe wodhdha” yaagiis.

<sup>31</sup> Hegaadankka qeese halaqati higgiiyaa tamarissiyaageetuura issippe Yesuusa bolli qilliiccidi, hagaadan yaagidosona; “Harata ashshiis; shin bana ashshanau danddayenna; <sup>32</sup> nuuni be7idi ammanana mala, Kiristtoosi Israa7eela kawoi, ane masqqaliyaa bollappe ha77i wodhdho” yaagidosona. Qassi harai atto, aara masqqaliyaa bolli misimaariyan xishettidi kaqettidaageetikka a bolli qilliiccidosona.

*Yesuusa Haiquwaa  
(Maatiyoosa 27:45-56; Luqaasa 23:44-49; Yohaannisa 19:28-30)*

<sup>33</sup> Usuppun saateppe doommidi, uddufun saate gakkanaassi, biitta ubbai xumiis. <sup>34</sup> Uddufun saatiyan Yesuusi ba qaalaa xoqqu oottidi, “Elohee, Elohee, laamaa sabaqitaanii?” yaagiis. Hegaa giyoogee, “Ta Xoossau, ta Xoossau, tana aissi aggadii?” giyoogaa.

<sup>35</sup> Hegan eqqida asaappe issoi issoi hegaa siyidi, “Be7ite; Eelaasa xeesees” yaagiis. <sup>36</sup> He asaappe issoi woxxidi, gombbilla mala ispponjjiyan caala woine eessaa kunttiis; hegaa shombboqo gatimaa xeeran wottidi, “Nanggite; Eelaasi masqqaliyaappe a wotanau yaanaakkonne ane be7oos” yaagiiddi Yesuusa doonaakko ushshanau shiishshiis.

<sup>37</sup> SHiishshin Yesuusi ba qaalaa xoqqu ootti waassidi, haiqqi bayiis.

<sup>38</sup> Beeta Maqidasiyan kaqettida magalashoi qommoppe duge gakkanaassi, naa77u kiyidi pooshetti wodhdhiis. <sup>39</sup> Masqqaliyaappe sintta baggaara hegan eqqida issi mato halaqai, hegaa keenaa Yesuusi waassidi haiqqidoogaa be7ido wode, “Ha bitanee tumu Xoossaa Na7aa” yaagiis.



<sup>40</sup> Hegan haahuwan eqqidi xeelliya amarida maccaasati de7oosona; eta gidдон Magddala giyo katamaappe yiida Mairaama, kaaluwaa Yaaqoobanne Yoosa aayyiya Mairaamanne Salooma de7oosona. <sup>41</sup> He macca asati Yesuusi Galiilan de7iyo wode, a kaallidaageetanne a maaddidaageeta; qassi Yesuusaara issippe Yerusalame biida hara daro macca asati hegan de7oosona.

*Yesuusa Mooguwaa*

*(Maatiyoosa 27:57-61; Luqaasa 23:50-56; Yohaannisa 19:38-42)*

<sup>42-43</sup> Sa7ai omarido wode, yaa7aa asan bonchchettida issi Yooseefa giyo bitanee, Xoossaa kawotetta yaanaagaa naagi uttidaagee, Armmaatiyaasa giyo katamaa asi yiis; he gallasai wonttetta Sambbataayyo giigettiyo gallassa gidido gishshau, Yooseefi xalidi PHilaaxoosakko biidi, Yesuusa ahaa ekkanau woossiis. <sup>44</sup> PHilaaxoosi Yesuusi haiqqidoogaa siyido wode garamettiis; mato halaqaa xeesidi, “I haiqqoosappe gam77idee?” yaagidi oichchiis. <sup>45</sup> PHilaaxoosi Yesuusi haiqqidoogaa mato halaqaappe siyidi, a ahaa Yooseefayyo imissiis. <sup>46</sup> Yooseefi moogo afalaa shammiis; Yesuusa ahaa masqqaliyaappe wottidi, afalan xaaxidi, shuchchaa woocido asa moogiyo gonggoluwaa gidдон a ahaa wottiis; qassi he gonggoluwaa doonan gita shuchchaa gondдорssidi wottiis. <sup>47</sup> Magddala katamaappe yiida Mairaamanne Yoosa aayyiya Mairaama Yesuusa ahaa eti awan wottiyaakko be7oosona.

## 16

*Yesuusi Haiquwaappe Denddiis*

*(Maatiyoosa 28:1-8; Luqaasa 24:1-12; Yohaannisa 20:1-10)*

<sup>1</sup> Sambbatai aadhdhidoogaappe guyyiyan, Magddala katamaappe yiida Mairaama, Yaaqooba aayyiya Mairaamanne Salooma biidi, Yesuusa ahaa tiyanau shittuwaa shammidosona. <sup>2</sup> Woggaa gallassi maallado daro guuran xalq qee kiyishin, he gonggoluwaa biidosona. <sup>3</sup> Eti bantta gidдон issoi issuwara, “Gonggoluwaa doonaappe nuuyyo shuchchaa oonee gondдорssidi digganaishsha?” yaagidi haasayoosona.

<sup>4</sup> Eti xeelliyo wode, he daro gita shuchchaa gondдорssirggidoogaa be7idosona. <sup>5</sup> Yesuusi moogettido gonggoluwaa gidдо geliyo wode, issi wodalla bitanee bootta maayuwaa maayidi, ushachcha baggaara uttidaagaa be7idi dagammidosona.

<sup>6</sup> SHin i eta, “Dagammoppite. Masqqaliyaa bolli misimaariyan xishidi kaqqido Naazireeta Yesuusa intte koyeeta. I hagan baawa; denddiichchiis. Eti a wottidosaa haggaa be7ite. <sup>7</sup> SHin biidi Yesuusi erissiyo ashkkaratuyyoonne PHeexiroosayyo, ‘Yesuusi intteppe kasetidi Galiila bees; i intteyyo odidoogaadankka intte a yaani be7ana’ yaagidi haggaa yootite” yaagiis.

<sup>8</sup> Macca asati banttana yashshai kokkorssido gishshau, Yesuusi moogettido gonggoluwaaappe kiyidi baqatidosona; qassi eti yayyido gishshau, asau heгаа ooyyoonne ainne yootibookkona.

*Yesuusi Magddala Mairaamissi Beettiis*

*(Maatiyoosa 28:9-10; Yohaannisa 20:11-18)*

Maccaasati biidi, banttau odidobaa ubbaa PHeexiroosaunne aara de7iyaageetau qanttan yootidosona; hegaappe guyyiyan, Yesuusi ba huuphen erissiyo ashkkaratu bolli, merinau ashshiya laamettenna geeshsha wonggeliyaa mishiraachchuwaa, awai mokkiyoosaappe wuliyooosaa gakkanaassi kiittiis.

<sup>9</sup> Yesuusi haiquwaappe denddidoogaappe guyyiyan, Woggaa gallassi maallado, laapun xalaheta kessido Magddala katamaappe yiida Mairaamiyyo kasetidi beettiis. <sup>10</sup> A baada kase aara de7iyaageetuyyo, qarettiiddinne yeekkiiddi uttidaageetuyyo odaasu; <sup>11</sup> shin Yesuusi paxa de7iyoogaanne iyyo beettidoogaa eti siyido wode, i oduwaa tuma gibookkona.



*Yesuusi Naa77u Erissiyo Ashkkaratussi Beettiis  
(Luqaasa 24:13-35)*

<sup>12</sup> Hegaappe guyyiyan, etappe naa77ati katamaappe gaxaa kiyidi biishin, ogiyan Yesuusi kaseegaappe dummatidi, etayyo beettiis. <sup>13</sup> Eti guyye simmidi, haratuyyo odidosona; shin haratika eta oduwaa tuma gibookkona.

*Yesuusi Tammanne Isiini Erissiyo Ashkkaratussi Beettiis  
(Maatiyoosa 28:16-20; Luqaasa 24:36-49; Yohaannisa 20:19-23; Yesuusi Kiittidoogeeu Oosuwaa 1:6-8)*

<sup>14</sup> Guyyeppe tammanne isiini erissiyo ashkkarati qumaa miishin, Yesuusi etayyo beettiis. Etayyo ammanoi bainna gishshau, i eta boriis; qassi haiquwaappe i dendidoogaa hinkkooti etau yootin, eti ammanennan ixxido gishshaunne yootin siyen-naageeta gidiyo gishshau, i eta boriis.

<sup>15</sup> I eta hagaadan yaagiis; “Sa7a ubbaa biidi, asa ubbau wonggeliyaa mishi-raachchuwaa yootite. <sup>16</sup> Ammaniyaageenne xammaqettidaagee attana; shin ammanennaagaa bolli Xoossai pirddana. <sup>17</sup> Ammaniyaageetuyyo ha malaatati imettana: eti ta sunttan xalaheta kessana; qassi eti dumma dumma qalan haasayana. <sup>18</sup> Eti shooshsha oiqqikkokka, woi marzze uyikkokka eta qohenna. Qassi eti bantta kushiyaa harganchchatu bolli wottana; wottin he harganchchati paxana” yaagiis.

*Yesuusi Saluwaa Pude Kiyiis  
(Luqaasa 24:50-53; Yesuusi Kiittidoogeeu Oosuwaa 1:9-11)*

<sup>19</sup> Godai Yesuusi erissiyo ashkkaratuura haasayidoogaappe guyyiyan, Xoossai a pude saluwaa ekki efin, Xoossaappe ushachcha baggaara uttiis. <sup>20</sup> Erissiyo ashkkarati biidi, ubbasan qaala yootidosona. Godaikka etaara issippe oottees; eti yootiyo qaalaikka tuma gididoogaa Xoossai etayyo immiyo malaatatun erissiis.

## Luqaasa Wonggeliyaa Mishiraachchuwaa

### *Gidduwaa Erissuwaa*

Luqaasa Wonggelee Yesuusa, koiro yaana gi wottidaagaa, Israa7eela ashshiyaa-gaa, hegaadankka asaa naata ubbaa ashshiyaagaa yaagidi odees. Luuqaasi Yesu-  
usa Xoossaa Ayyaanai xeesidoogee “Hiyyeesatuyyo wonggeliyaa mishiraachchuwaa  
odanaassa” gidiiyoogaanne ha Wonggelee asaassi de7iya dumma dumma metuwaa  
qaariyo wolqqaa oiqqidaagaa gidiiyoogaa odees. Luqaasa Wonggeliyaa gidдон, Yesu-  
usabaa odiya koiro miraafetuuninne qassi Yesuusi saluwaa pude kiyidoogaa odiya  
wurssetta miraafetun darissidi, odidoi ufaissaabaa. Yesuusi saluwaa kiyidoogaappe  
guyyiyan Kiristinnaa ammanoi waani diccidaakkonne waani aakkidaakko odiya  
taarikiyaa ha maxaafaa xaafida bitanee Yesuusi Kiittidoogeetu Oosuwaa maxaafan  
odiis.

Kiitanchchatu mazamuriyaabaa, Yesuusi yelettido wode henttanchchati biidi  
be7idoogaa yootiya taarikee, Yesuusi naatettan de7iiddi Beeta Maqidasiyaa biidobai,  
qaretanchcha Saamiraawiyaanne bayidi beettida na7aa taarikee Luqaasa wonggeliyaa  
gidдо xalaalan beettiyaageeta. Ha wonggeliyaa gidдон ha gaxaappe hini gaxaa  
gakkanaashin waannatidi xeelettidabati woosaa, Geeshsha Ayyaanaa, Yesuusa  
oosuwaa gidдон maccaasaassi de7iya sohuwaanne Xoossai nagaraa atto giyoogaa.

<sup>1-2</sup> Bonchcho Tewofiloosaa, koiro bantta aifiyan be7idaageetuppenne Xoossaa qaalaa  
odidaageetuppe ekkidoogaadan, nu matan polettida Yohuwaassi daroti taarikiyaa  
maaran maaran xaafanau doommidosona. <sup>3-4</sup> Hegaa gishshau, neeni tamarido  
yohuwaa geeshshada erana mala, taani qassi koiruwaappe doommada, ubbaa akeekan  
qorada, maaran maaran neessi xaafikko, lo77o yaagada qoppaas.

### *Xammaqiya Yohaannisi Yelettanaagaa Kiitanchchai Gabreeli Kasetidi Yootiis*

<sup>5</sup> Yihudaa biittaa kawuwaa Heeroodisa wodiyan, Zakkaariyaasa yaagiyo issi qeesee  
de7ees. I Abiyya qeesetuppe issuwaa. A machchiyaanne qeesiyaa Aaroonaa zare; i sunt-  
tai Elssaabeexo. <sup>6</sup> Eti naa77aikka Xoossaassi xillo gididi, Godaa higgiiyaanne azazuwaa  
ubbaa moorennan, naagidi polidosona. <sup>7</sup> Elssaabeexa maine gidido gishshau, etassi  
na7i baawa; naa77aikka daro cimidosona.

<sup>8-9</sup> Bantta qeesetu kayan Zakkaariyaasi Xoossaa sinttan oottishin, qeesetu  
meeziyaadan, Godaa Beeta Maqidasiyaa gelidi, ixaanaa cuwayanau saamai a gakkiiis.  
<sup>10</sup> Ixaanaa i cuwayiyo wode, asai ubbai karen eqqidi, Xoossaa woossees.

<sup>11</sup> Xoossaa kiitanchchai ixaanaa i cuwayiyo sohuwaappe ushachcha baggaara eqqidi,  
ayyo beettiis. <sup>12</sup> Zakkaariyaasi hega be7idi, dagammidi yayyin, <sup>13</sup> kiitanchchai  
Zakkaariyaasa hagaadan yaagiis; “Yayyoppa; ne woosai siyettiis. Ne machchiyaa  
Elssaabeexa neessi attuma na7a yelana; neeni he na7aa Yohaannisa yaagada sunttana.  
<sup>14</sup> I yelettin, neeni daro ufaittana; haratikka ufaittana. <sup>15</sup> Xoossaa sinttan i gita gidana;  
mattoyiyaabaanne woine eessa uyenna. Biron ba aayee uluwan de7ishin, Geeshsha  
Ayyaanai aani kumana. <sup>16</sup> Israa7eela asaappe daruwaa Godaakko, eta Xoossaakko,  
zaarana; <sup>17</sup> Godaassi asaa giigissanau, aawatu wozanaa naatukko zaaranau, azazetten-  
naageetakka xillotettaa eraassi zaaranau, Eelaasa ayyaanaaninne wolqqan Godaappe  
sinttaara bees” yaagiis.

<sup>18</sup> Zakkaariyaasi, “Taani cima; ta machchiyaanne ceeggaasu; hega ta aibin eranee?”  
yaagidi, kiitanchchaa oichchiis.

<sup>19</sup> Kiitanchchai zaarettidi yaagiis; “Taani Xoossaa sinttan eqqiya Gabreela; taani ne  
sinttan eqqada haasayanau, qassi ha mishiraachchuwaa neessi odanau, tana Xoossai  
neekko kiittiis. <sup>20</sup> Ha77i siya; ba wodiyan polettana ta qaalaa neeni ammanabeenna

gishshau, ta neessi odido yohoi polettanaashin, neeni duudana; ne doonai haasayanau danddayenna” yaagiis.

<sup>21</sup> “Beeta Maqidasiyaa gidдон i waanidi gam77idee?” yaagidi garamettiiddi, asai zakkaariyaasa naagees. <sup>22</sup> Kare i kiyido wode, haasayanau danddayibeenna. Beeta Maqidasiyaa gidдон i aibakko ajuutan be7idoogaa asai akeekiis; duudidaagee birad-hdhiiddi haasayees.

<sup>23</sup> Ba oosuwaa wodiya wurrssidi, soo biis. <sup>24</sup> He wodiyaappe guyyiyan, a machchiyaa Elssaabeexa shahaarada, ichchashu aginau bana genttaasu. <sup>25</sup> Elssaabeexa, “Xoossai taakko xeelliis; asa sinttan tana yeellaappe ashshanau maaddiis” yaagaasu.

### *Yesuusi Yelettanaagaa Gabreeli Kasetidi Yootiis*

<sup>26</sup> Usuppunta aginan Xoossai kiitanchchaa Gabreela Galiila biittan Naazireete giyo katamaa kiittiis. <sup>27</sup> Daawita zare gidiya Yooseefa giyo bitaniyaassi giigida issi geela7eekko Xoossai a kiittiis; he geela7ee sunttai Mairaamo. <sup>28</sup> Kiitanchchai ikko yiidi, “Daro doorettidaaree, saro; Godai nenaara de7ees; nena i daro anjjiis” yaagiis.

<sup>29</sup> Mairaama hegaa siyada daro dagammaasu. Dagammada, “Hegee woigiyo sarotee?” yaagada qoppaasu. <sup>30</sup> Kiitanchchai hagaadan yaagiis; “Mairaamee yayyoppa; Xoossan sabettadasa; <sup>31</sup> be7a; neeni shahaarada attuma na7a yelana; a sunttaa Yesuusa yaagada sunttana. <sup>32</sup> I gita gidana; qassi Ubbaappe Bolla Xoossaa Na7a geetettana; Godai ayyo a aawaa Daawita kawotettaa immana; <sup>33</sup> inne Yaaqoobantta zariyan merinau kawotana; a kawotettaassi wurssetti baawa” yaagiis.

<sup>34</sup> Mairaama kiitanchchaa, “Taani geela7o gidishin, hegee waanidi hananee?” yaagaasu.

<sup>35</sup> Kiitanchchai zaaridi Mairaamo, “Geeshsha Ayyaanai ne bolli yaana; Ubbaappe Bolla Xoossaa wolqqai nenan shemppana; hegaa gishshau, ne yelana geeshsha na7ai Xoossaa Na7aa geetettana. <sup>36</sup> Be7a; ne dabbiyaa Elssaabeexa ceeggikkonne attuma na7a shahaaraasu; asai beni o maine gees; shin a ha77i usuppun agina shahaara. <sup>37</sup> Hegeenne Xoossaassi danddayettennabi banna gishshaassa” yaagiis.

<sup>38</sup> Mairaama, “Taani Godaa ailliyo; ne qaalaadan, taassi hano” yaagaasu. Kiitanchchainne i matappe biis.

### *Mairaama Elssaabeexo Xomoosaasu*

<sup>39</sup> Guutta gallasaappe guyyiyan, Mairaama denddada, deree dariyo Yihudaa giyo biittan de7iya issi katamaa eesuwan baasu. <sup>40</sup> Qassi Zakkaariyaasa soo gelada, Elssaabeexo sarotaasu. <sup>41-42</sup> Elssaabeexa Mairaami sarotaa siyido wode, i uluwan de7iya na7ai qaaxxiis. Elssaabeexin Geeshsha Ayyaanai kumin, qaalaa xoqqissada, “Neeni maccaasa ubban anjettidaaro; ne uluwan de7iya na7ainne anjettidaagaa; <sup>43</sup> neeni ta Godaa aayyiyaa taakko yaanau, hegaa mala bonchchoi taassi waanidi bessii? <sup>44</sup> Neeni saro giyo qaalan ta uluwan de7iya na7ai ufaissan qaaxxiis; <sup>45</sup> Godai neeyyo odido qalalai polettanaagaa ammanidaara neeni anjettidaaro” yaagada Mairaamissi odaasu.

### *Mairaama Galata Woosaa Woossaasu*

<sup>46-49</sup> Mairaama hagaadan yaagaasu;  
 “Taani a ailliyaa toshettidoogaa  
 i be7ido gishshau,  
 ta shemppoi Godaa bonchchees;  
 ta ayyaanaikka ta Xoossaa tana ashshiyaagan ufaittees.  
 Be7a; wolqqaama Xoossai taassi  
 daro gitabaa oottido gishshau,  
 hachhippe sinttan tana asai ubbai  
 anjettidaaree yaagana.

A sunttai geeshsha.

<sup>50</sup> I baassi yayyiya ubbaassi  
yeletaappe yeletaa gakkanaashin,  
maarotettaa immees.

<sup>51</sup> Ba kushiyan wolqqaama oosuwaa  
oottiis.

Otoranchchata eta qofaara laaliis.

<sup>52</sup> Kawota kawotettaappe duge wottidi,  
ziqqan de7iyaageeta xoqqu oottiis.

<sup>53</sup> Namisettidaageeta lo77obaa kalissidinne  
dureta mela kushe yedettiis.

<sup>54-55</sup> Nu aawatussi odidoogaadan,  
Abrahaamassinne a zariyaassi Xoossai  
maarotettaa merinau immanau hassayidi,  
ailliyaa Israa7eela maaddiis”  
yaagaasu.

<sup>56</sup> Mairaama heezzu agina gidiyaagaa keenaa Elssaabeexi matan uttidoogaappe  
guyye baggan, ba soo simmaasu.

### *Xammaqiya Yohaannisi Yelettiis*

<sup>57</sup> Elssaabeexissi yeliyo wodee gakkin, attuma na7aa yelaasu. <sup>58</sup> I shoorotinne i  
dabboti Godai maarotettan iyyo oottido lo77obaa siyidi, iira ufaittidosona.

<sup>59</sup> Hosppuntta gallassan, na7aa qaxxaranau yiidosona; a aawaa sunttaadan, Za-  
kkaariyaasa giidi, sunttanau qoppidosona; <sup>60</sup> shin a aayyiya zaarada, “CHii! Yohaannisa  
giidi sunttana” yaagaasu.

<sup>61</sup> Eti zaarettidi, “Ne dabboppe he sunttan xeesettiyai issoinne baawa” yaagidosona.

<sup>62</sup> Qassi, “Woigi sunttanee?” yaagidi, a aawaa biradhdhidi oichchidosona.

<sup>63</sup> Aawai xaafiyoobaa oichchi ekkidi, “Na7aa sunttai Yohaannisa” giidi xaafin, ubbai  
garamettiis. <sup>64</sup> Sohuwaara a doonai dooyettin, inxxarssai birshshettiis; Xoossaa anjji-  
iddi haasayiis.

<sup>65</sup> Eta shooro ubbai yayyiis; ha ubba yohoi deree dariyo Yihudaa biittaa ubban daro  
haasayettiis. <sup>66</sup> Siyida asai ubbai hegaa qoppiiddi, Xoossaa wolqqai a bolli de7iyooogaa  
erido gishshau, “Ha na7ai wode waananeeshsha?” yaagiis.

### *Zakkaariyaasi Hananabaa Yootiis*

<sup>67</sup> Yohaannisa aawaa Zakkaariyaasan, Geeshsha Ayyaanai kumin, hagaadan hanan-  
abaa yootiis;

<sup>68</sup> “Ba asaa maaddanau yiidi,  
eta wozido gishshau,

Godai, Israa7eela Xoossai anjjetto.

<sup>69-70</sup> Kaseesappe de7iya hananabaa  
yootiya geeshshatu doonan haasayidoogaadan,  
ba ashkkaraa Daawita zariyaappe denttidi,  
nuna ashshiya wolqqaamaa nuukko kiittiis.

<sup>71</sup> Xoossai nu morkketuppenne  
nuna ixxiyaageetu ubbaa kushiyaappe  
nuna ashshees.

<sup>72-73</sup> Hagaadan nu aawatussi  
maarotettaa immiis.

Nu aawaa Abrahaamassi caaqqido caaquwaa  
geeshsha maachchaa qoppiis.

<sup>74-75</sup> Aani nu morkketu kushiyaappe nuuni attidi,

yayyennan nu de7uwaa wodiyaa ubban  
 Xoossaa sinttan geeshshatettaaninne  
 xillotettan ayyo oottanau,  
 nuna danddayissiis.

<sup>76</sup> “Ta na7au, neeni Godaa ogiyaa  
 giigissanau appe sinttau biyo gishshau,  
 Ubbaappe Bolla Xoossaassi oottiya  
 hananabaa yootiyaagaa geetettana.

<sup>77</sup> Xoossai eta nagaraa atto giyoogan  
 a asai attanau danddayiyoogaa  
 eta erissanau baasa.

<sup>78</sup> Hegeenne, nu Xoossaa maarotettainne  
 qaretai daro gidiyo gishshau,  
 saluwaa poo7uwaa i nu bollan poo7issana;

<sup>79</sup> he poo7oi nuna sarotaa ogiyaa kaalettanau,  
 xumaaninne haiquwaa kuwan  
 de7iyaageetussi poo7ana”  
 yaagiis.

<sup>80</sup> Guutta na7ai diccidi, ayyaanan minniis; Israa7eelatussi qoncciyann beettana gakkanaassi bazzuwan de7iis.

## 2

### *Yesuusi Yelettiis (Maatiyoosa 1:18-25)*

<sup>1</sup> He wode, sa7an de7iya asa ubbaa sunntai xaafettana mala, Roome biittaa kawoi, Augisxxoosi azaziis. <sup>2</sup> Asaa sunntai koiro xaafettiyo wode, Qereneyoosi Sooriyaa biittaa haariyaagaa. <sup>3</sup> Asa ubbai huuphiyan huuphiyan xaafettanau, ba yelettido biittaa biis.

<sup>4-5</sup> Yooseefi qassi Daawitannta keettanne zare gidido gishshau, ayyo giigida Mairaami-ira xaafettanau Galiilan de7iya Naazireete katamaappe Yihudaa biittan Beetaliheme giyo Daawita katamaa issippe biis. <sup>6</sup> He wode Mairaama shahaara; eti yan Beetalihemen de7ishin, a yeliyo wodee gakkii; <sup>7</sup> ba baira na7aa yelaasu; imattai aqiyo keettan sohoi banna gishshau, maayuwan na7aa xaaxada, miizzai kattaa wottin miyo qoriyan zin77issaasu.

### *Henttanchchatanne Kiitanchchata*

<sup>8</sup> He deren dorssaa wudiyaa qamma heemmiiddi, dembban aqiya asati de7oosona. <sup>9</sup> Godaa kiitanchchai etakko yiis; Godaa bonchchoi eta yuuyi aadhdhidi poo7iis. Eti daro yayyin, <sup>10-11</sup> kiitanchchai eta, “Hachchi Godai Kiristtoosi, ashshiyaagee Daawita kataman yelettidoogaassi taani asa ubbaa ufaissiya mishiraachchuwaa intteyyo odiyo gishshau, yayyoppite; <sup>12</sup> maayuwan xaaxettida gacino na7ai miizzai kattaa wottin miyo qoriyan zin77idaagaa demmanaagee intteyyo malaata gido” yaagiis.

<sup>13</sup> Akeekennan he kiitanchchaara daro saluwaa kiitanchchati kiyidi beettidosona.

<sup>14</sup> Xoossaa galatiiddi,  
 “Salo ubbaappe bolla saluwan  
 de7iya Xoossaassi bonchchoi gido.  
 Sa7an a ufaissiya asaassi  
 sarotettai gido”  
 yaagidosona.



<sup>15</sup> Kiitanchchati etappe shaahettidi, saluwaa biichchidaashin, dorssaa heemmiyaageeti bantta gidдон, “Ane Beetaliheme gakkanaashin biidi, Xoossai nuussi odido yohoi hanidaagaa be7oos” yaagidosona.

<sup>16</sup> Eesuwan yiidi, Mairaamonne Yooseefa demmidi, miizzai kattaa wottin miyo qoriyan gacino na7ai zin77idaagaa be7idosona. <sup>17</sup> Eti be7ido kiitanchchai ha gutta na7aabaa etassi odidoogaa erissidosona. <sup>18</sup> Hegaa siyida ubbai dorssaa heemmiyaageeti odido yohuwan garamettiis. <sup>19</sup> Mairaama qassi ha ubba yohuwaa ba wozanaa gidдон wottada, qoppaidda de7ausu. <sup>20</sup> Dorssaa heemmiyaageeti kase etassi kiitanchchai yootidoogaadan hanin, siyido ubbaa gishshaunne be7ido ubbaa gishshau, Xoossaa galatiiddinne bonchchiiddi simmidosona.

### *Guutta Na7aa Yesuusa Beeta Maqidasiyaa Efidosona*

<sup>21</sup> Hosppun gallasaappe guyyiyan, Yesuusi qaxxarettiyo wodee gakkın, Mairaama a yelanau shahaaranaappe kase kiitanchchai a sunttidoogaadan, a sunttai Yesuusa geetettiis.

<sup>22-23</sup> Muuse higgee azaziyoogaadan, Mairaamissinne Yooseefassi geeyiyo wodee gakkın, Godaa higgee, “Baira yelettida attuma ubbai Godaassi dummatidaagaa geetetto” giidoogaadan, Godaassi Yesuusa immanau Yerusalaame efidosona. <sup>24</sup> Qassi Godaa higgee, “Naa77u buuba haraphpheta woikko naa77u mara haraphpheta” giidoogaadan, Godaassi yarshshuwaa yarshshanau efidosona.

<sup>25-26</sup> Yerusalaamen Simoona giyo bitanee de7ees; i Xoossau yayyiya xillo asa; qassi Israa7eelati attiyo wodiya naagiiddi de7ees. He wode, Geeshsha Ayyaanai a bolli de7iyaagee, “Godai tiyido Kiristtoosa be7ennan haiqqakka” yaagidi, a erissi wottiis. <sup>27</sup> Simooni ayyaanai kaalettin, Beeta Maqidasiyaa geliis. Aayyiyaanne aawai higgee azaziyoogaadan, guutta na7aa Yesuusa Beeta Maqidasiyaa ehin, <sup>28</sup> Simooni he na7aa idimmidi, Xoossaa galatiiddi yaagiis.

<sup>29-31</sup> “Ubbaa Haariya Godau, neeni asa ubbaa sinttan giigissido ne ashettaa

taani ta aifiyan be7ido gishshau,  
ha77i ne qaalaadan,  
taani ne aillee sarotan haiqqana.

<sup>32</sup> He ashettai Israa7eela gidenna asau nebaa bessiya poo7o mala;  
qassi ne asaa Israa7eelassi bonchcho”  
yaagiis.

<sup>33</sup> Yooseefinne Mairaama Simooni Yesuusabaa odidoogan garamettidosona. <sup>34-35</sup> Simooni eta anjjiis; anjjidi a aayyiyo Mairaamo, “Israa7eelan de7iya darotu kunddettaassinne dendduwaassi a ixissiyaageetussi Xoossaappe malaata gidanau, qassi darota wozanan de7iya geemmida qofai qonccana mala, ha na7ai Xoossaappe doorettiis. Ne wozanaakka qara bisuwaadan, qaretai qanxxana” yaagiis.

<sup>36</sup> Aseera zersettaappe yelettida Panu7eela na7iyaa Haanna hananabaa yootiyaaro. A ba geela7otetta azinaara laappun laittaa de7aasu. <sup>37</sup> I azinai haiqqin, hosppun tammanne oiddu laittaa azina gelennan de7aasu. A daro cima; qassi xoomaidanne woossaidda gallassinne qammi Xoossau goinnaasu; Beeta Maqidasiyaappe kiyennan de7aasu. <sup>38</sup> He saatiyankka shiiqada, Xoossaa galataasu. Qassi Xoossai Yerusalaame wozin be7ana yaagidi naagiya asaa ubbau na7aabaa odaasu.

### *Naazireete Simmidosona*

<sup>39</sup> Eti Godaa higgee azazidoogaadan, ubbabaa polidoogaappe guyye baggan, Galiila biittan de7iya Naazireete giyo bantta katamaa biidosona. <sup>40</sup> Na7ai diccidi minniis;

aadhdhida eratettai aani kumiis; ayyaanan minniis; Xoossaa aaro kehatettai a bolli de7ees.

<sup>41</sup> Yesuusa aayyiyaanne aawai laittan laittan, Paasikaa gallassaa bonchchiyo wode, Yerusalaame boosona. <sup>42</sup> I yelettoosappe tammanne naa77u laitta gidin, haroodee-gaadankka Yerusalaame biidosona. <sup>43</sup> Paasikaa gallassaa bonchchiyo wodee wurin, eti guyye bantta soo simuwaa doommidosona; shin Yesuusi so asai erennan Yerusalaamen attiis. <sup>44</sup> Eti ogiyaa asaara issippe de7ees giiddi, issi gallassa ogiyaa biidosona. Bantta dabuwaa giddooninne eriyo asaa gidдон a koyidosona.

<sup>45-46</sup> Xayin a koyiiddi, Yerusalaame simmidi, Yesuusi Beeta Maqidasiyan tamaris-siyaageetuppe siyiiddinne eta oichchiiddi eta gidдон uttidaagaa heezzantto gallas-saappe guyyiyan demmidosona. <sup>47</sup> A doonaappe kiyiyaabaa siyida ubbai i immiyo era zaaruwan garamettiis.

<sup>48</sup> Aayyiyaanne aawai a be7idi garamettidosona. Mairaama, “Ta na7au, nuna aissi hagaadan oottadii? Ne aawainne taani nena koyiiddi, daro tuggatida” yaagaasu.

<sup>49</sup> Yesuusi zaaridi, “Tana aissi koyidetii? Taani ta Aawaa keettan de7anau bessiyooгаа ereketti?” yaagiis. <sup>50</sup> SHin i giidobaa eti akeekibookkona.

<sup>51</sup> Etaara duge Naazireete biis. Yan etassi azazettees. Mairaama ha ubba yohuwaa ba wozanan wottausu. <sup>52</sup> Yesuusi aadhdhida eratettaaranne geesaara dicciiddi, Xoos-saaninne asan sabettiis.

### 3

#### *Xammaqiya Yohaannisi Tamaarissido Timirttiyaa (Maatiyoosa 3:1-12; Marqqoosa 1:1-8; Yohaannisa 1:19-28)*

<sup>1</sup> Xibaariyoosi, Roome biittaa kawoi kawotido tammanne ichchashantta laittan, PHenxxeniya PHilaaxoosi Yihudaa haariyo wode, Heeroodisi Galiila haarees; a ishai Piliphphoosi, Ixuriyaasanne Xiraakonidoosa biittaa haarees; Lisaaniyoosikka Abi-laaniisa biittaa haarees.

<sup>2</sup> Haanninne Qayaafi qeese halaqa. He wode bazzon de7iya Zakkaariyaasa na7aa, Yohaannisakko Xoossaa qaalai yiis. <sup>3</sup> Yohaannisi Yorddaanoosa SHaafaa heera biittaa ubban, “Intte nagaraa atto gaanaassi, nagaraappe simmidi xammaqettite” yaagidi yootiis. <sup>4</sup> Hananabaa yootiya Isiyaasi ba maxaafan hagaadan xaafiis;

“Issoi bazzon ba qaalaa xoqqu oottidi,

‘Godaa ogiyaa giigissite.

I hemettana loossuwaakka  
ayyo sitti oottite.

<sup>5</sup> Gisa biitta ubbai kumana.  
Dereenne kerai ubbai baasettidi giigana.

Geella ogee sitta gidana.

Moorettida ogee salallana.

<sup>6</sup> Asai ubbai Xoossai ashshiyooгаа  
be7ana’ giis”

yaagiis.

<sup>7</sup> Hegaa gishshau, Yohaannisi banan xammaqettana giidi yiida asaa, “Ha shooshshatoo, Xoossaa hanqqoi yaana haniyaagaappe baqatana mala, intteyyo oonee odidai?

<sup>8</sup> Intte nagaraappe simmidoogaa erissiyaabaa oottite. Abrahaami nu aawaa giidi, intte gidдон haasayanau doommoppite. Aissi giikko, ‘Xoossai ha shuchchata Abrahaa-massi na7a kessanaukka danddayees’ yaagada, taani inttessi odais. <sup>9</sup> Beexee mittaa xaphuwan qanxxanau giigi uttiis. Simmi lo77o aifiyaa aifenna mitta ubbai qanxxettidi, taman yegettana” yaagiis.

<sup>10</sup> “Yaatin nu ai oottanee?” yaagidi, daro asai a oichchiis.

<sup>11</sup> I asaassi zaaridi, “Naa77u qolee de7iyo urai issi qoliyaa aibinne bainna urau immo; qumai de7iyo uraikka hegaadan ootto” yaagiis.

<sup>12</sup> Qaraxaa shiishshiyaageeti xammaqettanau yiidi, “Tamaarissiyaagoo, nuuni ai oottanee?” yaagidosona.

<sup>13</sup> “Higgee azaziyoogaappe aattidi, ekkoppite” yaagiis.

<sup>14</sup> Wotaaddarati, “Qassi nuuni ai oottanee?” yaagidi a oichchidosona.

Oichchin, “Wolqqan dafidi, woi wordduwan mootidi, ooppenne miishsha ekkoppite. Intte damoozai intteyyo gidana yaagidi, ufaittidi de7ite” yaagiis.

<sup>15</sup> Asai Godai tiyido Kiristtoosa naagiiddinne Yohaannisabaa bantta wozanaa gid-don qoppiiddi, “Hagee Kiristtoosa gidennan aggenna” yaagidi, a mali wottidaashin,

<sup>16</sup> Yohaannisi eta ubbaassi zaaridi, “Taani inttena haattan xammaqais; shin taappe wolqqaamiyaagee yees. Taani a caammaa qashuwaa birshshanaukka bessikke. I inttena Geeshsha Ayyaanaaninne taman xammaqana. <sup>17</sup> A kushiyan kattaa suraggiyo laidai de7ees. Kattaa qoxxidi, audiyaappe geeshshidi pittees; gisttiyaa gootaran qolees; shin dalaa to7enna taman xuuggana” yaagiis.

<sup>18</sup> Hegaa gishshau, Yohaannisi asaa daro dumma zoriyaa zoriiddi, wonggeliyaa mishiraachchuwaa asau yootees; <sup>19</sup> shin deriyaa haariya Heeroodisi ba ishaa machchiyo Heeroodiyaado ekkido gishshaunne hara iitabaa oottido gishshau, Yohaannisi a hanqqettidi seeriis. <sup>20</sup> Hegaa ubbaa bolli hara iitabaa gujjidi, Heeroodisi Yohaannisa qasho keettaa gelissiis.

### *Yesuusi Xammaqettiis*

*(Maatiyoosa 3:13-17; Marqqoosa 1:9-11)*

<sup>21</sup> Ubba asai xammaqettidoogaappe guyye baggan, Yesuusi qassi xammaqettiis. I woossishin, saloi dooyettiis. <sup>22</sup> Geeshsha Ayyaanai haraphphe milatiiddi, a bolli wodhdhiis. Qassi saluwaappe, “Taani siiqiyo ta Na7ai nena; tana nebai ufaissees” yaagiya qaalai yiis.

### *Yesuusa Yeletaa Turaa*

*(Maatiyoosa 1:1-17)*

<sup>23</sup> Yesuusi yelettoosappe hasttamu laitta keena gidishin, tamaarissanau doommiis. <sup>24</sup> Asai a Yooseefa na7aa yaagidi qoppiis. <sup>25</sup> Yooseefi Eela na7aa; Eeli Maaxaata na7aa; Maaxaati Leewa na7aa; Leewi Milkka na7aa; Milkki Yoona na7aa; Yooni Yooseefa na7aa; Yooseefi Maataatiyu na7aa; Maataatiyu Amoxa na7aa; Amoxi Naahooma na7aa; Naahoomi Esiliima na7aa; Esiliimi Naage na7aa; <sup>26</sup> Naagee Maa7ata na7aa; Maa7ati Maataatiyu na7aa; Maataatiyu Seemeya na7aa; Seemeyi Yooseefa na7aa; Yooseefi Yooda na7aa; <sup>27</sup> Yoodi Yoonaana na7aa; Yoonaani Reesa na7aa; Reesi Zarubaabeela na7aa; Zarubaabeeli Salaatiyaala na7aa; Salaatiyaali Neera na7aa; <sup>28</sup> Neeri Milkka na7aa; Milkki Hada na7aa; Hadi Yoosaasa na7aa; Yoosaasi Qosaama na7aa; Qosaami Elmmodaama na7aa; Elmmodaami Eera na7aa; <sup>29</sup> Eeri Yoosee7a na7aa; Yoosee7i El77eezara na7aa; El77eezari Yoraama na7aa; Yoraami Maaxaata na7aa; Maaxaati Leewa na7aa; <sup>30</sup> Leewi Simoona na7aa; Simooni Yihudaa na7aa; Yihudai Yooseefa na7aa; Yooseefi Yoonaana na7aa; Yoonaani Eliyaaqiima na7aa; <sup>31</sup> Eliyaaqiimi Meliyaa na7aa; Melee Mainaana na7aa; Mainaani Maaxaata na7aa; Maaxaati Naataana na7aa; Naataani Daawita na7aa; <sup>32</sup> Daawiti Isseya na7aa; Isseyi Yobeeda na7aa; Yobeedi Boo7eeza na7aa; Boo7eezi Salimooni na7aa; Salimooni Na7asooni na7aa; <sup>33</sup> Na7asooni Aminadaaba na7aa; Aminadaabi Raama na7aa; Raami Arnna na7aa; Arnni Hexiroona na7aa; Hexirooni Paareesa na7aa; Paareesi Yihudaa na7aa; <sup>34</sup> Yihudai Yaaqooba na7aa; Yaaqoobi Yisaaqa na7aa; Yisaaqi Abrahaama na7aa; Abrahaami Taara na7aa; Taari Naakoori na7aa; <sup>35</sup> Naakoori Saruuga na7aa; Saruugi Raa7u na7aa; Raa7u Peeleega na7aa; Peeleegi Ebeera na7aa; Ebeeri Sheela na7aa; <sup>36</sup> Sheeli Qainiima na7aa; Qainiimi Arifaakisaada na7aa; Arifaakisaadi Seema na7aa; Seemi Nohe na7aa; Nohee Laameeka

na7aa; <sup>37</sup> Laameeki Maatusaala na7aa; Maatusaali Heenooka na7aa; Heenooki Yaa-reeda na7aa; Yaareedi Malaali7eela na7aa; Malaali7eeli Qainaana na7aa; <sup>38</sup> Qainaani Heenoosa na7aa; Heenoosi Seeta na7aa; Seeti Addaame na7aa; Addaamee Xoossaa na7aa.

## 4

### *Yesuusi Paacettiis*

*(Maatiyoosa 4:1-11; Marqoosa 1:12-13)*

<sup>1</sup> Yesuusi Geeshsha Ayyaan an kumidi, Yorddaanoosappe simmiis. <sup>2</sup> Ayyaanai kaalet-tin, bazzo biidi, oitamu gallassaa xalahe halaqan paacettiis. He gallassatun ainne quma mibeenna gishshau, oitamu gallassaappe guyyiyan namisettiis.

<sup>3</sup> Xalahe halaqai a, “Neeni Xoossaa Na7aa gidikko ha shuchchaa, ‘Oitta gida’ gaada azaza” yaagiis.

<sup>4</sup> Yesuusi zaaridi, “Xoossaa maxaafai, ‘Asi Xoossaa qaalaa ubban de7anaappe attin, oitta xalaalan de7enna’ yaagees” yaagiis.

<sup>5</sup> Xalahe halaqai a gita deriyaa huuphiyaa kessidi, sa7aa kawotettaa ubbaa issi kuttan bessii. <sup>6</sup> Xalahe halaqai, “Ha wolqqa ubbainne bonchchoi taassi imettido gishshau, taani dosiyo oossinne immana; neessikka immana. <sup>7</sup> Hegaa gishshau, neeni taassi goinnikko, ha ubbai neessi gidana” yaagiis.

<sup>8</sup> Yesuusi zaaridi, “Xoossaa maxaafai, ‘Godau, ne Xoossau goinna; a xalaalau ootta’ yaagees” yaagiis.

<sup>9</sup> Xalahe halaqai Yesuusa Yerusalaame efidi, Beeta Maqidasiyaa xeeraa kessidi, “Neeni Xoossaa Na7aa gidikko, ane duge guppa. <sup>10-11</sup> Aissi giikko, Xoossaa maxaafai, ‘Xoossai nena naagana mala, ba kiitanchchata azazana’ qassi ‘Eti ne tohoi shuchchan xubettenna mala, bantta kushiyan nena denttana’ yaagees” yaagiis.

<sup>12</sup> Yesuusi zaaridi a, “Qassikka Xoossaa maxaafai, ‘Godaa ne Xoossaa paaccoppa’ yaagees” yaagiis.

<sup>13</sup> Xalahe halaqai Yesuusa paacciyooгаа ubbaa wurssidoogaappe guyye baggan, ha77issau appe shaahettiis.

### *Yesuusi Galiilan Tamarissuwaa Doommiis*

*(Maatiyoosa 4:12-17; Marqoosa 1:14-15)*

<sup>14</sup> Yesuusi Ayyaanaa wolqqan Galiila simmiis. Abai heгаа heeran de7iya biitta ubban odettiis. <sup>15</sup> I bantta Aihuda woosa keettatun tamarissiiddi, ubban galatettiis. Yesuusi ba diccido Naazireete katamaa yiis.

### *Naazireeten Yesuusa Ixxidosona*

*(Maatiyoosa 13:53-58; Marqoosa 6:1-6)*

<sup>16</sup> Haroodeegaadan Sambbata gallassan Aihuda woosa keettaa gelidi, nabbabanau denddiis. <sup>17-19</sup> Hananabaa yootiya Isiyaasan xaafettidi xaaxettida maxaafaa ayyo immidosona. He maxaafaa dooyidi,

“Taani hiyyeesaassi

lo77o mishiraachchuwaa

yootanau tiyettido gishshau,

Godaa Ayyaanai ta bollan de7ees.

Qashettidaageetussi birshshettiyoogaa,

qooqetussi xeelliyooгаа yootana mala,

qassi qohettidaageeta qohuwaappe

kessana mala,

dosettida Godaa laittaa yootana mala,  
tana kiittiis”  
geetettidi, xaafettida sohuwaa demmiis.

<sup>20</sup> Maxaafaa xaaxidi, Aihuda woosa keettan naagiyaagaassi immidi uttiis. Aihuda woosa keettan de7iya asai a akeekidi xeellees. <sup>21</sup> Yesuusi etassi haasayanau doommidi, “Hachchi nabbabettin, intte siyiyo wode, ha Xoossaa maxaafai giidoogee polettiis” yaagiis.

<sup>22</sup> Ubbai ayyo markkattidosona. A doonaappe kiyiya aaro kehatettaa qaalaa garamettidi, “Hagee Yooseefa na7aa gidennee?” yaagidosona.

<sup>23</sup> Yesuusi eta hagaadan yaagiis; “Intte taassi, ‘Xaliyaa godau, ne huuphiyaa patta’ yaagiyo leemisuwaa yootanaagaa taani geeshshada erais. Qassi, ‘Neeni Qifirinaahooma kataman oottidoogaa nuuni siyida; hegaadan hagan ne biittan ootta’ yaagidi, intte taassi yootana” yaagiis. <sup>24</sup> Qassikka hagaadan yaagiis; “Tumaa gais; hananabaa yootiyaagee ba biittan bonchchetti erenna.

<sup>25</sup> “SHin taani intteyyo tumaa gais; Eelaasa wodiyan heezzu laittanne usuppun agina gakkanaashin, saloi gorddettin, sa7an ubban wolqqaama koshai geliis. Gelido wode, Israa7eelan daro am77e maccaasati de7oosona. <sup>26</sup> Eelaasi Sidoona biittan de7iya Siraafita giyo kataman issi am77e maccaaseekko kiitettoorippe attin, etappe ookkonne kiitettibeenna. <sup>27</sup> Hananabaa yootiya Elssaa7a wodiyan Israa7eelan daro inchchirichchaa harggiya asai de7ees. Sooriyaa Naa7imaanappe attin, etappe harai issoinne paxibeenna” yaagiis.

<sup>28</sup> Aihuda woosa keettan de7iya ubbai hegaa siyidi, daro hanqqettidosona. <sup>29</sup> Eti denddidi, katamaappe Yesuusa gaxaa efidosona. Efidi kakaara duge olanau katamai keexettido deriyaa huuphiyaa a kessidosona. <sup>30</sup> SHin i eta gidduwaara kanttidi biis.

### *Tuna Ayyaanai Oiqqido Bitaniyaa (Marqqoosa 1:21-28)*

<sup>31</sup> Galiilan Qifirinaahooma giyo katamaa wodhdhidi, Yesuusi Sambbatan asaa tamarisseees. <sup>32</sup> A qalalai alaafetettai de7iyo asa qaala mala gidido gishshau, asai a timirttiyaa siyidi garamettiis.

<sup>33</sup> Aihuda woosa keettan iita ayyaanai de7iyo bitanee ba qaalaa xoqqu oottidi, <sup>34</sup> “Hai aggarkkii; Naazireeta Yesuusaa, neeni nuuppe ai koyai? Nuna xaissanau yaadii? Neeni oonakko erais; neeni Xoossaa geeshshaa gidikkii!” yaagiis.

<sup>35</sup> Yesuusi he iita ayyaanaa, “Haizaa; bitaniyaappe kiya” yaagidi azaziis. Iita ayyaanai a eta matan gufanti yeggidi, ainne qohennan bitaniyaappe kiyi aggiis.

<sup>36</sup> Ubbai garamettidi bantta gidдон, “Hagee aiba qaalee? Alaafetettaanne wolqqan iita ayyaanata azazees; qassi appe kiyidi boosona” yaagidi haasayidosona.

<sup>37</sup> Yesuusabai hegaa heeran de7iya biitta ubbaa gakki aggiis.

### *Yesuusi Daro Hargganchchata Pattiis (Maatiyoosa 8:14-17; Marqqoosa 1:29-34)*

<sup>38</sup> Yesuusi Aihuda woosa keettaappe denddidi, Simoona soo biis. Biyo wode, Simoona bollotiyaa wolqqaama qoxuwaanne mishuwaa harggada zin77idaaribaa Yesuusayyo yootidosona. <sup>39</sup> I matan eqqidi, qoxuwaanne mishuwaa agga gin, mishoinne qoxoi o aggiis. Sohuwaara denddada etayyo ootta aggaasu.

<sup>40</sup> Dumma dumma harggiyan ohettida asaa ubbaa awai wullin, akko ehiidosona. Ba kushiya eta ubbaa bolli huuphiyan huuphiyan wottidi, ubbaa pattiis. <sup>41</sup> Pattin xalaheti qassi, “Neeni Xoossaa Na7aa Kiristtoosa gidikkii!” yaagidi waassiiddi, daro asaappe kiyidosona. I Kiristtoosa gididoogaa eti erido gishshau, haasayennaadan Yesuusi eta seeridi diggiis.



*Yesuusi Qassikka Galiilan Tamaarissiis*  
(Maatiyoosa 4:23-25; Marqqoosa 1:35-39)

<sup>42</sup> Wonttin kiyidi, asi bainnasaa biis. Asai a koyiiddi, akko yiis. I eta matappe beenna mala, digganau koyidosona. <sup>43</sup> SHin i, “Taani hara kataman de7iya asaukka Xoossaa kawotettaa wonggeliyaa mishiraachchuwaa yootanau bessees. Aissi giikko, Xoossai tana kiittidoogee hegaassa” yaagiis.

<sup>44</sup> Yaagidi, Galiilan de7iya Aihuda woosa keettatun yootiis.

## 5

*Yesuusi Koiro Erissiyo Ashkkarata Xeesiis*  
(Maatiyoosa 4:18-22; Marqqoosa 1:16-20)

<sup>1</sup> Asai Xoossaa qaalaa Yesuusappe siyiiddi a sugin, Yesuusi Genssereexa abbaa lanqqiyan eqqiis. <sup>2</sup> Eqqidi abbaa lanqqiyan de7iya naa77u wolwoluwaa be7iis. Hegan moliyaa oiqqiyaageeti wolwoluwaappe kiyidi, bantta gitiyaa meeccoosona. <sup>3</sup> Yesuusi he wolwolotuppe issuwan, Simoonaagan gelidi, “Ha wolwoluwaa abbaa lanqqiyaappe guuttiyo giddokko shiishsha” yaagidi Simoona woossiis. He wolwoluwaa gidдон uttidi, deriyaa tamarissiis.

<sup>4</sup> Haasayaa wurssidoogaappe guyye baggan Simoona, “Ciimmatiya sohuwaa shiiqa; moliyaa oiqqanau intte gitiyaa haattan yeggite” yaagiis.

<sup>5</sup> Simooni zaaridi, “Godau, qamma ubbaa daafuridi, ainne oiqqibookko; shin ha77i ne qaalaadan gitiyaa yeggais” yaagiis.

<sup>6</sup> Yeggidoogaappe guyye baggan, keehi daro moliyaa oiqqin, gitee daahettana haniis. <sup>7</sup> Etaara issippe oottiya hara wolwoluwan de7iyaageeti yiidi banttana maaddana mala, eta wuttin, yiidi naa77u wolwoluwaakka haattai mittana gakkanaashin, moliyaa kuntidosona.

<sup>8</sup> SHin Simoon PHeexiroosi heгаа be7ido wode, Yesuusa tohuwan kunddidi, “Godau, taani nagaranchcha gidido gishshau, taappe shaahetta” yaagiis. <sup>9</sup> Simooninne aara de7iya hara asai ubbai bantta oiqqido daro moliyaa be7idi, garamettidosona. <sup>10</sup> Hegaadankka Simoonaara issippe oottiyaageeti, Zabddiyoosa naati, Yaaqoobinne Yohaannisi garamettidosona.

Garamettin Yesuusi Simoona, “Yayyoppa; hagaappe sinttan neeni asa oiqqiyaagaa gidana” yaagiis. <sup>11</sup> Eti wolwolota haattaappe gaxaa kessidoogaappe guyye baggan, ubbabaa aggi bayidi, Yesuusa kaallidosona.

*Yesuusi Inchchirichchai Oiqqido Bitaniyaa Pattiis*  
(Maatiyoosa 8:1-4; Marqqoosa 1:40-45)

<sup>12</sup> Yesuusi katamatuppe issinnen de7ishin, issi inchchirichchai bolla ubban kumido bitanee Yesuusakko yiidi, a be7idi, a sinttan gulbbatidi, “Godau, neeni koyikko, tana pattanau danddayaasa” yaagidi woossiis.

<sup>13</sup> Yesuusi ba kushiyya yeddidi, a bochchidi, “Taani koyais; paxa!” yaagin, sohuwaarakka inchchirichchai bitaniyaa yeddi aggiis. <sup>14</sup> Yesuusi a, “Hagaa oossinne yootoppa; shin qeesiyaakko baada ne bollaa a besa; neeni geeshsha gididoogaa asaa erissanau Muusee azazidoogaadankka yarshshuwaa yarshsha” yaagiis.

<sup>15</sup> SHin Yesuusabai daro sohuwaa gakkiyo wode, cora asai i odiyooгаа siyanaunne bantta harggiyaappe paxanau shiiqoosona. <sup>16</sup> SHin Yesuusi asi bainnasaa biidi woossees.

*Yesuusi Silida Bitaniyaa Pattiis*  
(Maatiyoosa 9:1-8; Marqqoosa 2:1-12)

<sup>17</sup> Issi gallassi, Yesuusi tamarissishin, Galiilaaninne Yihudan de7iya katamaa ubbaappenne Yerusalameppe yiida Parisaawetinne higgiiyaa tamarissiyaageeti he sohuwan uttidosona. Yesuusi hargganchchata pattana mala, Godaa wolqqai a bolli

de7ees. <sup>18</sup> Amarida asati bollai silido issi bitaniyaa halan tookkidi, Yesuusakko ehi-idosona; ehiidi, soo gelissanaunne Yesuusa sinttan a wottanau koyidosona. <sup>19</sup> Asai darido gishshau, soo a gelissanau etassi ogee xayin, keettaa huuphiyaa kiyidi, kaaraa lukkidi, bitaniyaa a halaara duge yeddidi, Yesuusa sinttan de7iya asaa gidдон wot-tidosona. <sup>20</sup> Yesuusi eta ammanuwaa be7idi, “Bitaniyau, ne nagarai atto geetettiis” yaagiis.

<sup>21</sup> Yaagin, higgiiyaa tamarissiyaageetinne Parisaaweti, “Laa hagee Xoossaa bolli iitabaa haasayiaagee oonee? Xoossaa xalaalappe attin, harai ooni nagara atto gaanau danddayii?” yaagidi, bantta gidдон qofaa doommidosona.

<sup>22</sup> Yesuusi eta qofaa eridi, “Intte intte wozanan hagaadan aissi qoppeetii? <sup>23</sup> ‘Ne nagarai atto geetettiis’ giyoogee mateeyye woi ‘Dendda eqqada hemetta’ giyoogee matee? <sup>24</sup> Qassi sa7aa bollan nagara atto gaanau taayyo Asa Na7aayyo alaafetettai de7iyooogaa taani inttena bessana” yaagidi, bollai silido bitaniyaa, “Nena gais; dendda eqqa. Yaatada ne halaa tookkada ne soo ba” yaagiis.

<sup>25</sup> Sohuwara eta sinttan denddi eqqidi, ba zin77ido halaa tookkidi, Xoossaa galati-iddi, ba soo biis. <sup>26</sup> Bin eti ubbai, garamettidosona. Daro yayyidi, “Hachchi nuuni oorattabaa be7ida” yaagidi Xoossaa galatidosona.

*Yesuusi Maatiyoosa Geetettiya Leewa Xeegiis  
(Maatiyoosa 9:9-13; Marqqoosa 2:13-17)*

<sup>27</sup> Hegaappe guyyiyan, Yesuusi kiyidi, giiraa ekkiya Leewa giyoogee giiraa ekkiyo ba sohuwan uttidaagaa demmidi, “Tana kaalla” yaagiis. <sup>28</sup> Yaagin Leewi ubbabaa aggi bayidi, denddi eqqidi, a kaalliis.

<sup>29</sup> Leewi ba son Yesuusa mokkanau daro imatuwaa makkiis. Hegan giiraa ekkiyaageetinne hara asai etaara issippe uttidosona. <sup>30</sup> Parisaawetinne higgiiyaa tamarissiya, etaara oottiyaageeti, “Giiraa ekkiyaageetuuranne nagaranchchatuura intte aissi issippe meetii? Qassi aissi issippe uyeetii?” yaagidi, Yesuusi erissiyo ashkkaratu bolli zuuzummidosona.

<sup>31</sup> Yesuusi zaaridi, “Hargganchchatuppe attin, payyatuyyo aakimee koshshenna. <sup>32</sup> Taani nagaranchchati bantta nagaraappe simmanaadan, eta xeesanau yiidoogaappe attin, xillota xeesanau yabeikke” yaagiis.

*Xoomaabaa Oichchido Oishaa  
(Maatiyoosa 9:14-17; Marqqoosa 2:18-22)*

<sup>33</sup> Eti Yesuusa, “Yohaannisi erissiyo ashkkarati daro wode xoomoosona; woos-soosona; qassi Parisaaweti erissiyo ashkkaratika hegaadan oottoosona. SHin ne erissiyo ashkkarati moosona, uyoosona” yaagidosona.

<sup>34</sup> Yesuusi eta hagaadan yaagiis; “Bullachchaa yiida asata machchiyo ekkiyaagee etaara de7ishin, xoomissanau danddayeetii? Danddayekketa; <sup>35</sup> shin machchiyo ekkiyaagaa eta matappe efaana wodee yaana; eti he wode xoomana” yaagiis.

<sup>36</sup> Yesuusi etayyo leemisuwaa odiiddi, “Ooratta maayuwaappe peeridi, ceega maayo bolli wotti sikkiya asi baawa; hegaadan oottikko, ooratta maayuwaa peererettana; ooratta maayuwaappe peeridoogeecka ceega maayuwaassi giigenna. <sup>37</sup> Ho77o woine eessa ceega ogoron naaqqiya asi baawa; naaqqikko he woiniyaa eessai ogoruwaa daakkana; baukka gukkana; ogoroikka moorettana. <sup>38</sup> SHin ho77o woine eessa ooratta ogoron naaqqanau koshshees; eti issoi issuwaa naagoosona. <sup>39</sup> Gam77ida woine eessa lo77o yaagiyo gishshau, a uyirggidi, oorattaa uyanau koyiyai ooninne baawa” yaagiis.

## 6

*Sambbataabaa Oichchido Oishaa  
(Maatiyoosa 12:1-8; Marqqoosa 2:23-28)*

<sup>1</sup> Yesuusi issi Sambbata gallassi tiya bangga giddoora aadhdhishin, i erissiyo ashkkarati tiya bangгаа duuttidi, bantta kushiyan shigichchidi moosona. <sup>2</sup> Issi issi Parisaaweti, “Sambbatan oottanau woga gidennabaa aissi ootteeti?” yaagidosona.

<sup>3</sup> Yesuusi etassi zaaridi, hagaadan yaagiis; “Daawitinne aara de7iyaageeti namiset-tido wode, Daawiti oottidobaa nabbabibeekketii? <sup>4</sup> Daawiti Xoossaa keettaa gelidi, qeesetuppe attin, ooninne maanau higge gidennaagaa Xoossaassi yarshshido oittaa miidi, banaara de7iyaageetussikka immiis” yaagiis.

<sup>5</sup> Qassi Yesuusi, “Taani Asa Na7ai, Sambbataa Godaa” yaagidi etassi odiis.

*Yesuusi Kushee Silido Bitaniyaa Pattiis*  
(Maatiyoosa 12:9-14; Marqqoosa 3:1-6)

<sup>6</sup> Yesuusi hara Sambbatan Aihuda woosa keettaa gelidi tamarissiiis. Hegan ushachcha kushee gunddido issi bitanee de7ees. <sup>7</sup> Higgiyaa tamarissiyaageetinne Parisaaweti Yesuusa mootiyoobaa demmanau, i Sambbatan asa pattikko be7ana yaagidi naagi uttidosona. <sup>8</sup> SHin i eta qofaa eridi, kushee gunddido bitaniyaa, “Dend-dada, hagan gidduwan eqqa” yaagin, bitanee denddidi eqqiis.

<sup>9</sup> Hegaappe guyyiyan, Yesuusi eta, “ ‘Higgee Sambbatan lo77obaa oottanaagaa azazi-yye? Iitabaa oottanaagaa azazii? Asa shemppo ashshanaagaa azaziyye woranaagaa azazii?’ yaagada inttena oichchais” yaagiis.

<sup>10</sup> Yesuusi eta ubbaa yuushshi aatti xeellidi bitaniyaa, “Ne kushiya piddi ootta” yaagiis. I piddi oottin, a kushee paxiis.

<sup>11</sup> Eti daro hanqqettidosona. Hanqqettidi, “Nuuni Yesuusa ai oottanee?” yaagidi, bantta gidon haasayidosona.

*Yesuusi Tammanne Naa77u Erissiyo Ashkkarata Dooriiis*  
(Maatiyoosa 10:1-4; Marqqoosa 3:13-19)

<sup>12</sup> He wodiyan Yesuusi Xoossaa woossanau deree de7iyoosaa biis. Biidi gamma ubban Xoossaa woossiiddi aqiis. <sup>13</sup> Qassi bana kaalliyaageeta wonttin xeesiis; etappe tammanne naa77aa dooridi, “Kiitettidaageeta” yaagidi sunttiis. <sup>14</sup> Hegeeti PHeexiroosa yaagidi sunttido Simoona, a ishaa Inddiraasa, Yaaqooba, Yohaannisa, Piliphphoosa, Barttalamoosa, <sup>15</sup> Maatiyoosa, Toomaasa, Ippiyooosa na7aa Yaaqooba, ba biittaassi mishettiya Simoona, <sup>16</sup> Yaaqooba na7aa Yihudaanne Yesuusa aattidi immida Yihudaa Asqoroota.

*Yesuusi Daro Asaa Tamarissiiis; Pattiis*  
(Maatiyoosa 4:23-25)

<sup>17-18</sup> Etaara deriyaappe duge wodhdhidi, kaalliyaageetuppe daruwaara issippe dem-bba biittan eqqiis. Qassi i giyoobaa siyidi, bantta harggiyaappe paxanau Yihudaa ubbaappe, Yerusalameppe, abbaa matan de7iya Xiirrosappenne Sidoonappe yiida daro asai he sohuwan de7ees.

Tuna ayyaanan waayettiyaageeti bantta harggiyaappe paxidosona. <sup>19</sup> Wolqqai appe kiyidi, eta ubbaa pattiyo gishshau, asai ubbai a bochchanau keehi koyees.

*Ufaissaanne Kayyuwaa Gaasota*  
(Maatiyoosa 5:1-12)

<sup>20</sup> Yesuusi ba erissiyo ashkkaratukko xeellidi, hagaadan yaagiis; “Xoossaa kawotetta inttebaa  
gidiyo gishshau,  
hiyyeesati intte anjettidaageeta.

<sup>21</sup> Intte digin kallana gishshau,  
ha77i namisettiyaageeti anjettidaageeta.  
Intte digin miiccana gishshau,  
ha77i yeekkiyaageeti anjettidaageeta.

<sup>22</sup> Intte tana Asa Na7aa  
kaalliyo gishshau,  
asi inttena ixxiyo wode,  
asappe shaakkiyo wode,  
boriyo wode,  
inttena iita sunttan xeegiyo wodekka  
intte anjjettidaageeta.

<sup>23</sup> “Intteyyo saluwan gita woittoi de7iyo gishshau, he wode ufaissan guppite; aissi giikko, eta aawati hananabaa yootiyaageeta hegaadan oottidosona.

<sup>24</sup> “SHin duretoo, intte  
ufaittidi de7iyo gishshau,  
intteyyo aayye7ana.

<sup>25</sup> Intte digin namisettana gishshau,  
ha77i kallidaageetoo, intteyyo aayye7ana.

Intte qarettana gishshaunne  
yeekkana gishshau,  
ha77i miicciyaageetoo,  
intteyyo aayye7ana.

<sup>26</sup> Asa ubbai inttebaa loittidi  
haasayiyo wode aayye7ana;  
aissi giikko, eta aawati  
hananabaa yootiya worddanchchatussi  
hegaadan oottoosona.

*Morkkiyaa Siiqiyoogaa*  
(Maatiyoosa 5:38-48; 7:12)

<sup>27</sup> “SHin taani yootiyoogaa siiyiyaageetoo, taani intteyyo odais; intte morkketa siiqite; inttena ixxiyaageetussi lo77obaa oottite; <sup>28</sup> inttena qanggiyaageeta anjjite; inttena naaqqiyaageetussi Xoossaa woossite. <sup>29</sup> Ooninne ne qinxalliyyaa baqqikko, hinkko qinxalliyaakka bessa; ooninne ne kootiyaa ekkikko, qoliyaakka diggoppa.

<sup>30</sup> “Nena woossiya ubbau imma; ne miishshaa ekkiya uraappe guyye zaara yaagada oichchoppa. <sup>31</sup> Asi intteyyo oottanau intte dosiyoogaadan, haraukka hegaadan oottite.

<sup>32</sup> “Intte inttena siiqiyaageetu xalaalaa siiqikko, intteyyo ai galati de7ii? Aissi giikko, nagaranchchatikka banttana siiqiyaageeta siiqoosona. <sup>33</sup> Intte intteyyo lo77obaa oot-tiyaageetussi lo77obaa oottikko, inttessi ai galati de7ii? Aissi giikko, nagaranchchatikka qassi hegaadan oottoosona. <sup>34</sup> Intte guyye ekkanau qoppidi tal77ikko, inttessi ai galati de7ii? Nagaranchchatikka guyye ekkanau nagaranchchatussi tal77oosona; <sup>35</sup> shin Xoossai bana galatennaageetussikka iitatussikka keha gidido gishshau, intte morkketa siiqite; etayyo lo77obaa oottite; qassi ainne guyye ekkanau qoppennan tal77ite; intte ekkana woittoi darana. Qassi intte Ubbaappe Bolla Xoossaa naata gidana. <sup>36</sup> Intte Aawai Xoossai maariyoogaadan maarite.

*Hara Asaa Pirddanau Bessenna*  
(Maatiyoosa 7:1-5)

<sup>37-38</sup> “Haratu bolli pirddoppite; Xoossai intte bolli pirddenna. Harata iita gooppite; Xoossai inttena iita geenna. Atto giite; Xoossai intteyyo atto gaana. Immite; Xoossai intteyyo immana. Baqqi naaqqidi siilli kunttin, palahidi wora laalettiyaagaa Xoossai intte kiyuwan idinttidi immana. Aissi giikko, intte harau immanau likkidi makkiyooban Xoossai intteyyo likkidi immana” yaagiis.

<sup>39</sup> Yesuusi etassi leemisuwaa odiiddi, hegaadan yaagiis; “Qooqee qooqe kaalet-tana danddayii? Kaalettikko, naa77ai ollan kunddokkonaa? <sup>40</sup> Tamaariyaagee bana

tamaarissiyaagaappe aadhdhenna; shin tamaridi wurssida ubbai tamarissiyaagaa mala gidees.

<sup>41</sup> “Ne aifiyan de7iya tuussaa be7akka; shin ne ishaa aifiyan de7iya suullaa aissi xeellai? <sup>42</sup> Ne aifiyan de7iya tuussaa be7ennan waanada ne ishaa, ‘Ta ishau, taani ne aifiyan de7iya suullaa kessoo’ gaanau danddayai? Laa ha lo77o milatiya iitau, kasetada ne aifiyaappe tuussaa kessargga. Hegaappe guyyiyan, ne ishaa aifiyan de7iya suullaa kessanau geeshshada xeellana danddayaasa.

### *Mittai Ba Aifiyan Erettees*

*(Maatiyoosa 7:16-20; 12:33-35)*

<sup>43</sup> “Lo77o mitti iita aife aifenna; hegaadankka, iita mitti lo77o aife aifenna. <sup>44</sup> Aissi giikko, mitta ubbai ba aifiyo aifiyan erettees; agunttappe balase giyo mitta aife, gom77oreppe woine aife maxi erettenna. <sup>45</sup> Lo77o asi ba wozana gidon de7iya lo77o minjaappe lo77obaa kessee; qassi iita asi ba iita minjaappe iitabaa kessee; aissi giikko, asa dooni a wozanan kumidabaappe haasayees.

### *Naa77u Qommo Keettaa Keexxiya Asata*

*(Maatiyoosa 7:24-27)*

<sup>46</sup> “Taani giyoogaa oottiyoogaa aggi bayidi, aissi tana, ‘Godau, Godau’ geetii? <sup>47</sup> Taakko yiya ubbai qassi ta qaalaa siyidi azazettiyaagee ai mala asakko taani inttena bessana. <sup>48</sup> I gita ollaa bookkidi, aaho shuchchaa hiixxidi, gimbbidi, keettaa keexxida asa mala. Di7oi di77ido wode, he keettaa sugiis; shin minttidi keexxido gishshau, qaattanau danddayibeenna. <sup>49</sup> SHin ta qaalaa siyidi oottenna urai, aaho shuchcha hiixxennaaninne gimbbennan biittan keetta keexxida asa mala. Di7oi sugin, keettai sohuwaara kunddi aggiis; he keettai wolqqaama kunddetta kunddiis” yaagiis.

## 7

### *Yesuusi Mato Halaqaa Ashkkaaraa Pattiiis*

*(Maatiyoosa 8:5-13)*

<sup>1</sup> Yesuusi ubbabaa asau wurssi odirgidoogaappe guyye baggan, Qifirinaahooma geliis. <sup>2</sup> Issi mato halaqai de7iyaagaassi i dosiyo ashkkaarai harggidi, haiqqana matiis. <sup>3</sup> He mato halaqai Yesuusabaa siyido wode, Yesuusi yiidi, ba ashkkaaraa pattanau woossana mala, Yihudaa cimata Yesuusakko kiittiis. <sup>4</sup> Etinne Yesuusakko yiidi, “Neeni hegaa ayyo oottanau bessees. <sup>5</sup> Aissi giikko, i nu asaa siiqidi, Aihuda woosa keettaa ba miishshan keexxiis” yaagidi daro woossidosona. Yesuusinne etaara biis.

<sup>6</sup> Biidi mato halaqaa keettaa gakkanau matido wode, mato halaqai ba laggeta akko kiittidi, “Ta Godau, daafuroppa; aissi giikko, nena ta soo gelissanau tau bessenna. <sup>7</sup> Hegaa gishshau, taani neekko shiiqanau laafa gidiyoogaa erais; shin neeni doona xalaalaa haasaya; ta ashkkaarai paxana. <sup>8</sup> Taani taappe bollaara de7iyaageetuyyo haarettiya asa; taappe garssaara wotaaddarati de7oosona. Taani issuwaa, ‘Ba’ giikko bees; qassi hinkkuwaa, ‘Haa ya’ giikko yees; ta ashkkaaraa, ‘Hagaa ootta’ giikko oottes” yaagiis.

<sup>9</sup> Yesuusi hegaa siyido wode, aban garamettidi, guyye simmidi, bana kaalliya daro asaa, “Inttena gais; taani hagaa mala ammanuwaa harai atto, Israa7eela biittankka be7abeikke” yaagiis.

<sup>10</sup> Kiitettida asati mato halaqaa soo guyye simmidi, a ashkkaarai paxidaagaa be7idosona.

### *Yesuusi Issi Am77ee Na7aa Haiquwaappe Denttiis*

<sup>11</sup> Guyyeppe Yesuusi ba erissiyo ashkkaaratuuranne daro asaara Naina giyo issi katamaa biis. <sup>12</sup> Yesuusi katamaa dooni shiiqido wode, asai haiqqida asa ahaa tookkidi efees. Haiqqidaageenne ba aayeessi issi na7aa; a ba azina'i haiqqoosappe am77e



gidada de7ausu. Katamaa asaappe daroi o kaalliis. <sup>13</sup> Godai o be7idi, iyyo qarettidi, “Yeekkoppa” yaagiis. <sup>14</sup> I shiiqidi, ahaa saaxiniyaa bochchin, tookkida asai eqqiis. Yesuusi, “Na7au, dendda gais” yaagin, <sup>15</sup> haiqqidaagee xoqqu giidi uttiis. Qassi haasayaa doommin, Yesuusi na7aa a aayeessi immiis.

<sup>16</sup> Asa ubbai daro yayyidi, “Hananabaa yootiya goobai nu gidдон beettiis; qassi Xoossai ba asaa maaddanau yiiis” yaagiiddi Xoossaa galatidosona. <sup>17</sup> Hagee i oottidobai Yihudaa biittaa ubbaaninne hegaa heeran de7iya biitta ubban haasayettiis.

*Xammaqiya Yohaannisappe Yesuusakko Kiitettida Asata  
(Maatiyoosa 11:2-19)*

<sup>18</sup> Yohaannisi erissiyo ashkkarati hegaa ubbaa Yohaannisassi yootidosona. <sup>19</sup> Yohaannisi ba erissiyo ashkkaratuppe naa77aa baakko xeesidi, “Yaanaagee neneeyye? Woikko nuuni haraa naagane?” yaagidi, eti oichchana mala, Yesuusakko kiittiis.

<sup>20</sup> Kiittin eti akko yiidi, “Yaanaagee neneeyye? Woikko nuuni haraa naagane?” yaagidi oichchana mala, Xammaqiya Yohaannisi nuna neekko kiittiis” yaagidosona.

<sup>21</sup> He gallassi Yesuusi daro harggissidi, paxa kaa7iya sahuwaappenne iita ayyaanaappe daro asaa pattiis. Qassi daro qooqe asaa xeelissiis. <sup>22</sup> Yesuusi zaaridi, “Biidi intte be7idoogaanne siyidoogaa Yohaannisassi yootite; qooqeti xeelloosona; wobbeti hemettoosona; inchchirichchai oiqqidoogeeti paxoosona; tulleti siyoosona; haiqqidaageeti denddoosona; hiyyeesati wonggeliyaa mishiraachchuwaa siyoosona. <sup>23</sup> Tana sirena urai anjettidaagaa” yaagiis.

<sup>24</sup> Yohaannisi kiittidoogeeti biichchidoogaappe guyyiyan, Yesuusi Yohaannisabaa shiiqida asaassi hagaadan yaagidi haasayiis; “Ai be7anau bazzo kiyidetii? Carkkoi qaattiyo shombboquwaa be7anau kiyidetiiyye? <sup>25</sup> Yaatin ai be7anau kiyidetii? Lo77iya maayuwaa maayida bitaniyaa be7anau kiyidetiiyye? Lo77iya maayuwaa maayidaageetinne duretidi ufaissan de7iyaageeti kawo keettan de7oosona. <sup>26</sup> Yaatin ai be7anau kiyidetii? Hananabaa yootiyaagaa be7anau kiyidetii? Ee; taani intteyyo odais; hananabaa yootiyaagaappekka aadhdhiyaagaa be7ideta. <sup>27</sup> Xoossaa maxaafan, ‘Godai, “Be7a, ta kiittiyoogaa taani neeppe sinttau yeddana.

I neeyyo ogiyaa kessana” yaagees’ geetettidi Yohaannisabai xaafettiis.

<sup>28</sup> “Taani intteyyo odais; aayee uluwaappe yelettida asa ubban Xammaqiya Yohaannisappe aadhdhiya ooninne de7ibeenna; shin Xoossaa kawotettan ubbaappe laafiyaageekka appe aadhdhana” yaagiis.

<sup>29</sup> Siyida asai ubbai harai atto qaraxaa shiishshiyaageeti attennan, Yohaannisan xammaqettidi, Xoossai xillo gidiyooogaa ammanidosona. <sup>30</sup> SHin higgiiyaa tamaris-siyaageetinne Parisaaweti Yohaannisan xammaqettibeenna gishshau, Xoossai etassi qoppidobaa ixxidosa.

<sup>31</sup> Yesuusi, “Yaatin taani ha wodiyaa asaa aibiira leemisoo? Eti ai milatiyoonaa? <sup>32</sup> Eti qocan uttiya naata milatoosona; bantta gidдон issoi issuwaa xeesidi, ‘Nuuni intteyyo cachcha zaiyaa punnida; shin duribeekketa. Yeeho yettaakka kessida; shin yeekkibeekketa’ yaagoosona. <sup>33</sup> Aissi giikko, Xammaqiya Yohaannisi Xoomiidinne woine eessa uyennan yin intte, ‘A bolli xalahee de7ees’ yaagideta. <sup>34</sup> Taani Asa Na7ai, maddanne uyaidda yin, intte tana Asa Na7aa, ‘Ha yoraanne woine eessaa uyiyaagaa be7ite! Giiraa ekkiyaageetuuranne nagaranchchatuura siiqettes’ yaageeta. <sup>35</sup> SHin Xoossaa aadhdhida eratettai ba oosuwan tuma gididi beettes” yaagiis.

*Issi Maccaasiyaa Yesuusa Tohuwaa SHittuwaa Tiyaasu*

<sup>36</sup> Parisaawetuppe issoi banaara laaxaa maanau Yesuusa woossin, Yesuusi a soo yiidi, laaxaa maanau uttiis. <sup>37</sup> He kataman issi nagaranchcha mishiriyaa de7iyaara Yesuusi a son laaxau uttidoogaa erada, albbasxxiroosa giyo shuchchaappe ooset-tida bilqqaadiyaa kumida shittuwaa ehaasu. <sup>38</sup> Guyyeera a tohuwaa matan eqqada yeekkishin, i afuttai a tohuwan xokkidi, laagottidoogaa ba huuphiyaa binnaan quccausu. Tohuwaa quccaidanne yeraidda shittuwan tiyausu. <sup>39</sup> Yesuusa ba soo xeesida Parisaawee hegaa be7idi, ba wozana gidon qoppiiddi, “A nagaranchcha gidiyo gishshau, hagee tumu hananabaa yootiyaagaa gidiyaakko, ha bana bochchiya mishiriyaa oonakko erana” yaagiis.

<sup>40</sup> Yesuusi zaaridi, “Simoonaa, neessi taani odiyoo bai de7ees” yaagiis.

Yaagin, Simooni, “Tamaariissiyaagoo, yoota” yaagiis.

<sup>41</sup> Yesuusi hagaadan yaagiis; “Naa77u asati issi bitaniyaappe miishsha tal77idosona. Issoi naa77u xeetanne ishatamu biraa tal77in, naa77anttoi laatamanne ichchashu biraa tal77iis. <sup>42</sup> Hegaa qanxxanau etassi miishshi xayin, acuwaawai naa77aakka maariis. Yaatin etappe augee a aattidi siiqanai?” yaagiis.

<sup>43</sup> Simooni zaaridi, “Dariya biraa aggido bitaniyaa gidennan aggenaa” yaagiis.

Yaagin Yesuusi Simoonaa, “Tumu pirdadada” yaagiis.

<sup>44</sup> Yesuusi mishireekko xeellidi, Simoonaa hagaadan yaagiis; “Hanno mishiriyo be7ai? Taani ne soo yin, harai atto haattaa ta tohuwaassi immabaakka; shin hanna ba afuttan ta tohuwaa laagottada, ba huuphiyaa binnaan quccaasu. <sup>45</sup> Neeni tana yerabaakka; shin a taani soo geloosappe ha77i gakkanaashin, ta tohuwaa yerausu. <sup>46</sup> Neeni ta huuphiyaa zaitiyan tiyabaakka; shin a ta tohuwaa shittuwan tiyaasu. <sup>47</sup> Hegaa gishshau, taani inttessi odais; a daro siiqido gishshau, i nagarai daroi atto geetettiis; shin guutta nagaraa atto giido urai guutaa siiqees” yaagiis.

<sup>48</sup> Yesuusi mishiriyo, “Ne nagarai attiis” yaagiis.

<sup>49</sup> Yaagin, aara laaxaa maanau uttidaageeti bantta wozana gidon qoppiiddi, “Harai atto nagaraakka atto gaanau danddayiyaagee hagee oonee?” yaagidosona.

<sup>50</sup> Yesuusi mishiriyo, “Nena ne ammanoi ashshiis; saruwan ba” yaagiis.

## 8

### *Yesuusa Kaallidanne Au Oottida Macca Asata*

<sup>1</sup> Hegaappe guyyiyan, Yesuusi Xoossaa kawotettaa mishiraachchuwaa yootiiddi, dumma dumma gita katamaanne guutta katamaa bees. Biyo wode, tammanne naa77u erissiyo ashkkaratinne <sup>2</sup> iita ayyaanaappenne wolqqaama harggiyaappe paxida issi issi maccaasatinne aara issippe de7oosona. Hegeetinne laappun xalaheti kiyido Magddala giyo katamaappe yiida Mairaamo, <sup>3</sup> Heeroodisa keettan azaziya Kuza machchiyo Yohaano, Sosinonne Yesuusau banttassi de7iyaagaappe immida daro asata.

### *Zeriyaagaa Leemisuwaa*

*(Maatiyoosa 13:1-9; Marqqoosa 4:1-9)*

<sup>4</sup> Asai katamaappe kataman Yesuusakko shiiqees. Daro asai shiiqidaagau Yesuusi leemisuwaa hagaadan yaagidi odiis; <sup>5</sup> “Issi bitanee ba zerettaa zeranau kiyiis. Zerishin, issoi issoi ogiyaa doonan wodhdhidi yerettiis. Yaatin, kafoi hegaa miis. <sup>6</sup> Harai shuchchaa bolli wodhdhiis. Mekkidi, dubbai banna gishshau meliis. <sup>7</sup> Issi issi zerettaa aguntta gidon wodhdhiis; wodhdhidi makkidaagaa agunttai diccidi cuulliis. <sup>8</sup> Issi issi zerettaa aradda biittan wodhdhidi mokkiis; diccidi xeetu kushiya aifis” yaagiis.

### *Yesuusi Leemisuwan Haasayido Gaasotaa*

*(Maatiyoosa 13:10-17; Marqqoosa 4:10-12)*

Yesuusi hegaa haasayiiddi, “Siyanau haitti de7iyo urai siyo!” yaagidi wolqqappe haasayiis.

<sup>9</sup> I erissiyo ashkkarati, “Yaatin, ha leemisuwaa birshshettai aibee?” yaagidi Yesuusa oichchidosona. <sup>10</sup> Oichchin, i hagaadan yaagiis; “Inttessi Xoossaa kawotettaa xuuraa erai imettiis, shin harati xeellidi be7enna mala, siyidikka akeekenna mala, taani leemisuwan haasayais.

*Yesuusi Zerettaa Leemisuwaa Birshshiis*  
(Maatiyoosa 13:18-23; Marqqoosa 4:13-20)

<sup>11-12</sup> “Leemiso i hagaada. Zerettaa Xoossaa qaala. Ogiyaa doonan de7iya zerettaa qaala siyidaageetu leemisuwaa bessees; shin hegaappe guyyiyan, eti ammanidi attenna mala, xalahe halaqai yiidi, eta wozanaappe qaala efirgges. <sup>13</sup> SHuchchaa bollan de7iyaageeti siyiiddi, a qaala ufaissan ekkiyaageeta milatoosona; etassi xaphoi baawa. Eti ha77issau ammaniyoogaappe attin, paacee yiyo wode xubettiyaageeta. <sup>14</sup> Qassi aguntta gidдон wodhdhidaageeti siyiyaageeta milatoosona. Siyidi banttau de7iiddi, de7uwaa wodiya qofan durettaaninne lo77o de7uwan cuulettiyo gishshau, eta aifee bootennan atti agges. <sup>15</sup> SHin aradda biittan wodhdhidaageeti hegeeti lo77o wozanaappenne tumu wozanaappe qaala siyidi naagidaageeta; eti danddayaara naagidi aifoosona.

*Geeman Wottido Xomppiyaa*  
(Marqqoosa 4:21-25)

<sup>16</sup> “Xomppe oittidi, keren qum77iyai woikko arssa gidдон wottiya asi baawa; shin asai geliiddi, poo7uwaa be7ana mala, xomppiyaa qoncciyann wottees. <sup>17</sup> Aissi giikko, qosidobai ubbai qoncciyaa kiyana; qassi genttidobai ubbaikka beettennan attenna.

<sup>18</sup> “Simmi, intte siyiyo yohuwaa ezggidi siyite; aissi giikko, issibai de7iyo urau gujji immana. Bainnaagaappe harai atto, he au de7iyaabaa milatiyaagaakka ekkirggana” yaagiis.

*Yesuusa Aayyiyoonne Ishantta*  
(Maatiyoosa 12:46-50; Marqqoosa 3:31-35)

<sup>19</sup> Yesuusa aayyiyaanne ishantti akko yiidosona; shin daro asaa giddoora aadhdhiyo sohoi banna gishshau, aara gaittanau danddayibookkona. <sup>20</sup> Asai Yesuusa, “Ne aayyiyaanne ne ishantti nenaara gaittana koyidi, karen eqqidosa” yaagiis.

<sup>21</sup> SHin Yesuusi zaaridi, “Ta aayyiyaanne ta ishantti Xoossaa qaala siyiyaageettanne oottiyaageeta” yaagiis.

*Yesuusi Gotiyaa Seeriis*  
(Maatiyoosa 8:23-27; Marqqoosa 4:35-41)

<sup>22</sup> Issi gallassi, Yesuusi ba erissiyo ashkkaratuura issippe wolwoluwan gelidi, “Abbaa hefintti pinnoos” yaagiis; yaagin biidosona. <sup>23</sup> Biishin Yesuusi xiskkiis. Wolqqaama gotee abbaa bolli yiis. Wolwoluwan haattai kumi kumi yees. Yiidi haattai eta mittana hanin, <sup>24</sup> erissiyo ashkkarati Yesuusakko biidi, “Godau, Godau, nuuni xayoo” yaagidi, xiskkuwaappe a denttidosa.

Yesuusi denddidi, gotiyaanne beetaa aggite gin, goteenne beetai woppu giidosona. <sup>25</sup> Yaatin Yesuusi, “Intte ammanoi anee?” yaagiis.

Eti yayyidinne garamettidi bantta gidдон, “Hagee laa harai atto, gotiyaanne haattaa azaziyaagee oonee? Etikka ayyo azazettoosona” yaagidosona.

*Yesuusi Xalaheti Oiqqido Bitaniyaa Pattiis*  
(Maatiyoosa 8:28-34; Marqqoosa 5:1-20)

<sup>26</sup> Galiila ginan sinttaara de7iya Gerggesenoona giyo biittaa wolwoluwan biidosona. <sup>27</sup> Yesuusi abbaappe gaxaa kiyiyoorin, xalaheti de7iyo bitanee katamaappe kiyidi, aara

gaittiis; asa moogiyo gonggoluwana i daro laittaa de7iyoo gaappe attin, son de7enna. <sup>28</sup> Yesuusa be7idi, a sinttan kunddidi, qaalaa xoqqu oottidi, “Ubbaappe bolla Xoossaa Na7au Yesuusaa, tananne nenanne aibee gattiyai? Hayyanaa tana qaxxayopparkkii” yaagiis. <sup>29</sup> I heгаа aissi giidee giikko, Yesuusi tuna ayyaanai bitaniyaappe kiyidi baana mala azazidoogaassa. Daroto tuna ayyaanai bitaniyaa oiqqi uttido gishshau, sanssalataaninne huqqunna biratan qashettidi naagettees; shin sanssalataa duuttees. Xalahee a bazzo yedettees.

<sup>30</sup> Yesuusi a, “Ne sunttai oonee?” yaagidi oichchiis.

Daro xalaheti an de7iyoo gishshau, “Ta sunttai Leegiyoona” yaagiis. <sup>31</sup> Xalaheti Yesuusa, “Nuna ciimma ollau yeddopparkkii” yaagidi woossidosona.

<sup>32</sup> He deriyaa bollan daro gudunttaa wudee hemettees; xalaheti gudunttatu giddo gelana mala Yesuusa woossin, i, “Biite” yaagiis. <sup>33</sup> Yaagin xalaheti bitaniyaappe kiyidi, gudunttatun gelin, wudee kakaara jaamiiddi abban gelidi, meetetti bayiis.

<sup>34</sup> Gudunttaa wudiyaa heemmiyaageeti hanidabaa be7ido wode, baqati biidi, katamaaninne katamaappe gaxa biittan yootidosona. <sup>35</sup> Yootin asai hanidabaa be7anau kiyidi, Yesuusakko biis. Xalahee kiyido bitanee ba wozanai simmin, maayuwaa maayidi, Yesuusa gediya matan uttidaagaa asai be7idi yayyiis. <sup>36</sup> Hegaa be7ida asati xalaheti oiqqido bitanee waani paxidaakko, asaassi yootidosona. <sup>37</sup> Gerggesenoona biittan de7iya asai ubbai daro yayyido gishshau, bantta matappe baana mala, Yesuusa woossidosona. Yesuusi wolwoluwan gelidi simmiis.

<sup>38-39</sup> Xalaheti kiyido bitanee Yesuusaara de7ana mala, Yesuusa woossiis; shin i, “Ne soo simmada, Xoossai neessi waanida gitabaa oottidaakko yoota” yaagidi a yeddiis. Yeddin, bitanee baassi Yesuusi waanida gitabaa oottidaakko, kataman de7iya asa ubbau yootiiddi biis.

*Yaa7iroosa Na7iyoonne Yesuusa Maayuwaa Bochchida Mishiriyo  
(Maatiyoosa 9:18-26; Marqqoosa 5:21-43)*

<sup>40</sup> Ubba asai Yesuusa naagiiddi uttido gishshau, i simmido wode morkkidosona. <sup>41-42</sup> Yaa7iroosa giyoogee Aihuda woosa keettaa halaqai Yesuusakko yiis. Ayyo tammanne naa77u laitta na7iyaa de7iyaara harggada haiqqana haniyo gishshau, Yesuusa tohuwan kunddidi, ba soo gelana mala, a minttidi woossiis.

Yesuusi yaa biishin, asai ubbasaara shiiqidi, a un77iis. <sup>43</sup> Tammanne naa77u laittaasappe doommidi, i bollaappe suuttai goggiyo issi maccaasiyaa de7ausu. Aakimetussi ganxxaidda ba miishsha ubbaa wurssaasu; shin ooninne o pattanau danddayibeenna. <sup>44</sup> Guyyeera shiiqada Yesuusa afalaa macaraa bochchaasu; bochchin i bollaappe goggiya suuttai sohuwaarakka aggi bayiis.

<sup>45</sup> Yesuusi, “Tana bochchidai oonee?” yaagiis.

Ubba asai, “Nuna gidokko” yaagin, PHeexiroosinne aara issippe de7iyaageeti, “Goda, daro asai nena sugiiddi un77ees; ‘Tana bochchidai oonee?’ gai?” yaagidosona.

<sup>46</sup> SHin Yesuusi, “Taappe wolqqai kiyido gishshau, tana issi urai bochchidoogaa taani erais” yaagiis.

<sup>47</sup> Maccaasiyaa qosettada attanau danddayennaagaa erada, kokkoraidda Yesuusa sinttan gufannaasu; a Yesuusa aissi bochchidaakkonne qassi waanada sohuwaara paxidaakko asa ubbaa sinttan Yesuusau yootaasu. <sup>48</sup> I, “Ta na7ee, nena ne ammanoi pattiis; saro ba” yaagiis.

<sup>49</sup> Yesuusi biron heгаа giishin, issi asi Aihuda woosa keettaa halaqaa sooppe yiidi, “Ne na7iyaa haiqqaichchaasu; simmi tamaariisyaagaa daafurssoppa” yaagiis.

<sup>50</sup> SHin eti giyoobaa Yesuusi siyidi, “Yayyoppa; ammano xalaalaa ammana; a paxana” yaagidi Yaa7iroosassi yootiis.

<sup>51</sup> Yesuusi soo geliiddi, PHeexiroosappe, Yaaqoobappe, Yohaannisappe, na7ee aay-eepenne aawaappe harai ooninne banaara gelenna mala diggiis. <sup>52</sup> Ubbai na7eessi, “Aayyee aayyee!” yaagidi yeekkoosona. SHin Yesuusi, “Yeekkoppite; na7iyaa xiskkausuppe attin, haiqqabeikku” yaagiis.

<sup>53</sup> A haiqqidoogaa eridi, asai a bolli miicciis. <sup>54</sup> SHin Yesuusi i kushiya oiqqidi, “Na7ee, dendda” yaagidi xeesiis. <sup>55</sup> Na7ee shemppoi simmin, sohuwaara na7iyaa dendda aggaasu. Yesuusi, “Iyyo miyoobaa immite” yaagidi azaziis. <sup>56</sup> I aawainne aayyiyaa garamettidosona. SHin Yesuusi, “Hanidaagaa oossinne odoppite” yaagidi azaziis.

## 9

*Yesuusi Ba Erissiyo 12 Ashkkarata Wonggeliyaa Mishiraachchuwaa Odanaadan Kiittiis*

*(Maatiyoosa 10:5-15; Marqqoosa 6:7-13)*

<sup>1</sup> Yesuusi ba tammanne naa77u erissiyo ashkkarata issippe baakko xeesidi, xalahiyaa ubbaa asaappe kessanaunne harggiyaageeta pattanau etassi wolqqaanne alaafetettaa immiis.

<sup>2</sup> Xoossaa kawotettaabaa yootanaunne harggiyaageeta pattanau eta kiittiis. <sup>3</sup> I eta hagaadan yaagiis; “Gatima woi qarcciita woi quma woi miishsha ainnekka ogiyaa biiddi oiqqoppite; naa77antto qoliyaakka oiqqoppite. <sup>4</sup> Inttena asi awan mokiikkokka, katamaappe kiyana gakkanaashin, he keettan utti bayite. <sup>5</sup> Katamaa asai inttena mokiikkannan ixkikko, he katamaappe kiyite; kiyiiddi eti inttena mokiikkannan ixkidoogaassi marka gidana mala, intte tohuwaappe buhiyaa shocite” yaagiis.

<sup>6</sup> Erissiyo ashkkarati biidi, qeeri katama ubban Xoossaa qaalaa yootiiddinne harggiya asaa ubbasan pattiiddi yuuyoosona.

*Heeroodisi Yesuusa Woriyaa Siyiis*

*(Maatiyoosa 14:1-12; Marqqoosa 6:14-29)*

<sup>7-8</sup> Galiila biittaa haariya Heeroodisi hanidabaa ubbaa siyiis. Issi issi asai, “Yohaannisi haiquwaappe denddiis” yaagees; hinkko asai, “Eelaasi kiyidi beettiis” yaagees; harati, “Beni hananabaa yootiyaageetuppe issoi denddiis” yaagoosona. Hegaa gishshau, Heeroodisi ba wozana giddon metootiis. <sup>9</sup> Metootidi, “Taani Yohaannisa qooriyaa muucissarggaas; shin hagaadan asai haasayiyo bitanee oonee?” yaagidi, Yesuusa be7anau koyiis.

*Yesuusi Ichchashu SHa7u Asaa Miziis*

*(Maatiyoosa 14:13-21; Marqqoosa 6:30-44; Yohaannisa 6:1-14)*

<sup>10</sup> Yesuusi kiittidoogeeti simmidi, bantta oottidobaa ubbaa Yesuusassi odidosona. Yesuusi eta xalaalaa ekkidi, Beetasaida giyo katamaa matan de7iya bazzuwaa biis.

<sup>11</sup> Asai a eridi kaallin, eta mokiiki, Xoossaa kawotettaabaa yootiis; harggiyaappe pattanau koshshiyoogetakka pattiis.

<sup>12</sup> Sa7ai omariyo wode, tammanne naa77u erissiyo ashkkarati Yesuusakko yiidi, “Asa ubbai dere giddonne qeeri katamatu giddo biidi, aqiyoosaanne shinqqe demmana mala, asaa yedda; aissi giikko, nuuni hagan asi bannasan de7oos” yaagidosona.

<sup>13</sup> SHin Yesuusi eta, “Asau miyoobaa intte immite” yaagiis.

Yaagin eti, “Nuuyyo ichchashu oittappenne naa77u moleppe hari baawa; nuuni ha daro asau qumaa shammanau baanaagaa koyai?” yaagidosona. <sup>14</sup> Aissi giikko, he sohuwan ichchashu sha7u gidiya asai de7ees.

Yesuusi ba erissiyo ashkkarata, “Ishatamu ishatamu asaa citan citan shaakki shaakki utissite” yaagiis. <sup>15</sup> Erissiyo ashkkarati i giidoogaadan, ubba asaa utissidosona.

<sup>16</sup> Yesuusi ichchashu oittaanne naa77u moliyaa oiqqidi, saluwaa pude xeellidi, Xoossaa galatiis; he oittaanne moliyaa menttidi, “Daro asaa sintti aattite” yaagidi, erissiyo



ashkkaratussi immiis. <sup>17</sup> Asa ubbai miidi kalliis; kallin attida xarzzai tammanne naa77u sampmaa kumidaagaa denttidosona.

*PHeexiroosa Ammanuwaanne A Markkatettaa*  
(Maatiyoosa 16:13-19; Marqqoosa 8:27-29)

<sup>18</sup> Issitoo Yesuusi barkka woossiyo wode, i erissiyo ashkkarati a matan de7oosona; de7ishin, “Asai tana oona gii?” yaagidi eta oichchiis.

<sup>19</sup> Eti zaaridi, “Asai nena Xammaqiya Yohaannisa yaagees; hara asai Eelaasa yaagees; harai qassi beni hananabaa yootiyaageetuppe issoi denddiis yaagees” yaagidosona.

<sup>20</sup> Yaagin Yesuusi eta, “Yaanin intte tana oona geetii?” yaagiis.

PHeexiroosi zaaridi, “Neeni Xoossai tiyido Kiristtoosa” yaagidi zaariis.

*Yesuusa Kaalliyo Hanotaa*

(Maatiyoosa 10:38-39; 16:24-28; Marqqoosa 8:34-38; Luqaasa 14:26-27)

<sup>21</sup> SHin Yesuusi eta, “Hagaa oossinne odoppite” yaagidi, minttidi azaziiddi, <sup>22</sup> “Taani, Asa Na7ai, daro waayettanau bessees; tana cimati, qeese halaqatinne higgiiyaa tamarissiyaageeti ixnanau bessees; eti tana woranaunne taani heeztantto gallassi haiquwaappe denddanau bessees” yaagiis.

<sup>23-24</sup> Yesuusi asa ubbaa hagaadan yaagiis; “Ba shemppuwaa ashshana koyiya urai bashshana; shin ba shemppuwaa ta gishshau bashshiya urai ashshana; heгаа gishshau, tana kaallana koyiya urai de7ikko, bana yeggi bayo; yaatidi ubba gallassi ba masqqaliyaa tookkidi, tana kaallo. <sup>25</sup> Issi urai ba huuphiyaa bashshidi, woi bau pacissidi, sa7an de7iya ubbabaa bau shiishshikko, a ai maaddanee? <sup>26</sup> Asi tanaaninne ta qaalan yeellatikko, taani Asa Na7ai, ta bonchchuwaara, ta Aawaa bonchchuwaaranne geeshsha kiitanchchatu bonchchuwaara yiyo wode, aani yeellatana. <sup>27</sup> Taani intteyyo tumaa gais; amarida asati Xoossaa kawotettaa be7ennan haiqqennaageeti hagan de7oosona” yaagiis.

*Yesuusa Merai Laamettiis*

(Maatiyoosa 17:1-8; Marqqoosa 9:2-8)

<sup>28</sup> Yesuusi hegaadan giidoogaappe guyyiyan, hosppun gallassa gidiaagaa gam77idi, PHeexiroosa, Yohaannisanne Yaaqooba ekkidi, woossanau deriyaa huuphiyaa kiyiis.

<sup>29</sup> I woossishin, a merai laamettiis. A maayoikka phoolidi booxxiis. <sup>30</sup> Akeekennan, Muusanne Eelaasa giyo naa77u asati kiyi beettidi, aara haasayidosona. <sup>31</sup> Eti bonchchuwaara beettidi, Yesuusi Xoossaa qofaa polanau Yerusalaamen haiqqanaagaa aara haasayidosona.

<sup>32</sup> SHin PHeexiroosinne aara de7iyaageeti xiskkuwan kairidosona. SHin beegottidi, Yesuusa bonchchuwaanne aara issippe eqqida naa77u asata be7idosona. <sup>33</sup> He naa77u asati Yesuusa matappe biishin, PHeexiroosi Yesuusassi woigiyaakko akekidi erennan a, “Ta Godau, nuuni hagan de7iyoogee nuussi lo77o; nuuni heezzu zamppata issuwaa neessi, issuwaa Muusessi, issuwaa Eelaasassi zamp-payana” yaagiis.

<sup>34</sup> PHeexiroosi heгаа etassi giishin, shaarai yiidi, eta genttiis. Genttishin erissiyo ashkkarati yayyidosona. <sup>35</sup> SHaaraappe, “Hagee taani doorido ta Na7aa; i giyoogaa siyite” giya qaalai yiis. <sup>36</sup> Yiidoogaappe guyyiyan, Yesuusi barkka attiis. Eti co77u giidi, oossinne he wode be7ido yohuwaappe ainne odibookkona.

*Yesuusi Tuna Ayyaanai Oiqqido Na7aa Pattiiis*

(Maatiyoosa 17:14-18; Marqqoosa 9:14-27)

<sup>37</sup> Wonttetta gallassi, eti deriyaappe duge wodhdhido wode, daro asai Yesuusaara gaittiis. <sup>38</sup> Asai qoppennan asaappe issoi ba qaalaa xoqqu oottidi, “Tamarissiyaagoo, taassi issi na7aa xalaalai de7iyo gishshau, neeni a be7anau nena woossais; <sup>39</sup> qassi iita ayyaanai au denddees; denddidi akeekennan a waasissees; a doonaara hoommoi goppattana gakkanaashin a kokkorssidi, ubba gallassi qohiyooagaappe attin, a elle

yeddenna. <sup>40</sup> Ne erissiyo ashkkarati he iita ayyaanaa kessana mala, taani eta woossaas; shin danddayibookkona” yaagiis.

<sup>41</sup> Yesuusi zaaridi eta, “Ammanenna ha wodiya geella asau! Taani inttenaara aude gakkanaashin de7anee? Qassi inttebaa aude gakkanaashin danddayanee? Ne na7aa haa ekka ya” yaagiis.

<sup>42</sup> Na7ai yiishin, xalahee a sa7an ooggidi kokkorssiis; shin Yesuusi tuna ayyaanaa agga giidi, na7aa pattidi, a aawaassi zaaridi immiis. <sup>43</sup> Asa ubbai Xoossaa gita wolqqan garamettiis.

*Yesuusi Ba Haiquwaabaa Naa77anttuwaa Yootiis  
(Maatiyoosa 17:22-23; Marqqoosa 9:30-32)*

Eti ubbai Yesuusi oottido ubbanan garamettishin, i ba erissiyo ashkkaratussi yootiiddi, <sup>44</sup> “Tana Asa Na7aa asi asau aattidi immana; ha yohuwaa dogoppite” yaagiis. <sup>45</sup> SHin i giyoogaa eti akeekibookkona; eti akeekenna mala, etappe yohoi geemmiis. He yohuwaa a oichchanau yayyoosona.

*Ubbaappe Aadhdhiyai Oonee? Giyo Oishaa  
(Maatiyoosa 18:1-5; Marqqoosa 9:33-37)*

<sup>46</sup> Erissiyo ashkkarati, “Nu gidдон aadhdhiyaagee oonee?” yaagidi palamettidosona. <sup>47</sup> Yesuusi eti qoppiyoogaa eridi, guutta na7aa ehiidi, ba matan essidi, <sup>48</sup> “Ha guutta na7aa ta sunttan mokkiya ooninne tana mokkees; qassi tana mokkiyaagee tana kiitti-daagaakka mokkees; aissi giikko, intte ubbaa gidдон guuxxiyaagee ubbaappe gitatees” yaagiis.

*Intte Giyoogaa PHalqqenna Urai Intte Bagga  
(Marqqoosa 9:38-40)*

<sup>49</sup> Yohaannisi zaaridi, “Godau, issi asi ne sunttan xalaheta kessiyaagaa nuuni be7idi, nu bagga gidenna gishshau, a diggida” yaagiis.

<sup>50</sup> SHin Yesuusi a, “Intte giyoobaa phalqqenna urai intte bagga gididiyo gishshau, a diggoppite” yaagiis.

*Samaariyaa Asati Yesuusa Mokkanau Koyibookkona*

<sup>51</sup> Yesuusi saluwaa biyo wodee matin, Yerusalaame baanau denddiis. <sup>52</sup> Qassi ba kiittiyoogeeta baappe sinttau kiittiis; kiittin eti ayyo ubbabaa giigissanau, Samaariyaa biittan de7iya issi qeeri katamaa biidosona. <sup>53</sup> SHin i Yerusalaame baanau denddido gishshau, asai a mokkibeenna. <sup>54</sup> I erissiyo ashkkarati Yaaqoobinne Yohaannisi heгаа be7idi, “Godau, nuuni Eelaasi oottidoogaadan, ‘Tamai saluwaappe yiidi eta mo’ yaa-gana mala koyai?” yaagidosona.

<sup>55</sup> SHin guyye simmidi eta, “Aggite, inttessi ai mala ayyaani de7iyaakko erekketa. <sup>56</sup> Taani, Asa Na7ai, asa shemppo ashshanau yiidoogaappe attin, bashshanau yabeikke” yaagiis. Eti harasan de7iya qeeri katamaa biidosona.

*Yesuusa Kaalliyageeta Gakkiya Paaciyaa  
(Maatiyoosa 8:19-22)*

<sup>57</sup> Eti ogiyaara biishin, issi bitanee a, “Godau, neeni biyoosaa ubbaa taani nena kaallana” yaagiis.

<sup>58</sup> Yesuusi a, “Worakanatussi ollai de7ees; kafotussikka keetta de7ees; shin taani, Asa Na7ai, zin77ada shemppa ekkioosikka tau baawa” yaagiis.

<sup>59</sup> Yesuusi haraa, “Tana kaalla” yaagiis.

SHin, bitanee “Godau, taani kaseta baada ta aawaa moogoo?” yaagiis.

<sup>60</sup> Yaagin Yesuusi a, “Haiqqidaageeti bantta haiqqidaageeta moogona; nena gidikko baada, Xoossaa kawotettaabaa yoota” yaagiis.

<sup>61</sup> Qassi hara bitanee, “Godau, taani nena kaallana; shin koiroora ta so asaa saro goo?” yaagiis.

<sup>62</sup> SHin Yesuusi a, “Booraa goyiiddi, guyye xeelliyai ooninne Xoossaa kawotettaassi bessenna” yaagiis.

## 10

### *Wonggeliyaa Tamaarissanaadan, Yesuusi 70 Erisiyo Ashkkarata Kiittiis*

<sup>1</sup> Hegaappe guyyiyan, Godai hara laappun tammu asata dooriis. Etappe naa77aa naa77aa bau baanau qoppi uttido katamaanne sohuwaa ubbaa baappe sinttau kiittiis.

<sup>2</sup> I eta hagaadan yaagiis; “Kattai daro; shin cakkiyaageeti guutta; heгаа gishshau, kattaa Godai kattaa cakkiyaageeta yeddana mala, a woosite. <sup>3</sup> Ha77i biite; taani inttena wanggireello gidon de7iya dorssa maraadan yeddais. <sup>4</sup> Korjjokka qarcciitakka caammakka oiqqoppite; ogiyan oonanne sarotoppite.

<sup>5</sup> “O keettanne intte geliyo wode koiroora, ‘Sarotettai ha keettaassi gido’ yaagite. <sup>6</sup> Sarotettaa koyiya asi hegan de7ikko, sarotettan i de7ana; shin koyennan ixkikko, sarotettai inttekko simmana. <sup>7</sup> Oosanchchaassi damoozaa qanxxanau koshshiyo gishshau, eti immiyoobaa miiddinne uyiiddi he keettan utti bayite; ha sooppe ya soo booppite.

<sup>8</sup> “Intte ai katamanne geliyo wode, asi inttena mokiikko, intte sinttau aattidobaa miite. <sup>9</sup> Hegan de7iya hargganchchata pattidi eta, ‘Xoossaa kawotettai inttekko matiis’ yaagite; <sup>10</sup> shin intte geliyo katama ubbai inttena mokkennan ixkikko, he katamaa ogiyaa kiyidi, <sup>11</sup> ‘Nuuni inttena yeellayanau, harai atto intte katamaappe nu tohuwaa oiqqida buhiyaakka inttessi pittoos; shin Xoossaa kawotettai inttekko matidoogaa heгаа erite’ yaagite. <sup>12</sup> He gallassi Sadooma katamai ekkido pirddaappe aadhdhiya pirddai he katamaa gakkanaagaa taani inttessi odais.

### *Ammanennan Ixxido Gishshau Walassido Katamata (Maatiyoosa 11:20-24)*

<sup>13</sup> “Koraaziine katamau, neeyyo aayye7ana; Beetasaida katamau, neeyyookka aayye7ana; aissi giikko, intte bolli Xoossai oottido malaatai Xiirsoosa katamaaninne Sidoona kataman oosettidobaa gidiyaakko, eti waaruwaa maayidi, bidinttaa tistidi, beni bantta nagaraappe simmanaagaa shin; <sup>14</sup> pirddaa gallassi Xoossai intteppe Xiirsoosa katamaunne Sidoona katamau pirddaa kehissana. <sup>15</sup> Qassi Qifirinaahooma katamau, neeni saluwaa pude xoqqu gaanau koyadii? Neeni Si7ooliyaa duge wodhdhana.

<sup>16</sup> “Intte giyoobaa siyiya asi taani giyoobaa siyees; inttena ixxiya urai tana ixxees; tana ixxiya urai tana kiittidaagaakka ixxees” yaagiis.

### *70 Erisiyo Ashkkarati Kiitettidosappe Simmidosona*

<sup>17</sup> Laappun tammu asati, “Godau, harai atto xalahetikka ne sunttan nuussi azazettidosona” yaagiiddi ufaissan simmidosona.

<sup>18</sup> Yesuusi etassi hagaadan yaagiis; “Seexaanai wolqqanttadan saluwaappe kunddishin, taani be7aas. <sup>19</sup> Intte shooshshaanne masimasuwaa yedhdhidi hemettana mala, morkkiyaa wolqqaa ubbaa bolli inttessi godatettaa immaas. Inttena qohiyaabi aibinne baawa. <sup>20</sup> Tuna ayyaanai inttessi azazettiyo gishshau ufaittoppite; shin intte sunttai saluwan xaafettido gishshau ufaittite” yaagiis.

### *Yesuusi Ba Ufaissaa Qonccissiis (Maatiyoosa 11:25-27; 16:13-17)*

<sup>21</sup> Yesuusi he wode Geeshsha Ayyaanan ufaittidi, hagaadan yaagiis; “Ta Aawau, saluwaa sa7aa Godau, neeni heгаа aadhdhida eranchchatuppenne akeekanchchatuppe genttada, erenna naatussi qonccissido gishshau, nena galatais; ee, ta Aawau, aissi giikko, hegee ne shenedan oosettiis.

<sup>22</sup> “Ta Aawai taassi ubbabaa immiis; Aawaappe harai ooninne Na7ai oonakko erenna; Na7aappenne Na7ai Aawaa bessanau koyiyo asatuppe attin, harai ooninne Aawai oonakko erenna” yaagiis.

<sup>23</sup> Yesuusi ba erissiyo ashkkaratukko guyye simmidi, eta xalaalaa hagaadan yaagiis; “Intte be7iyooгаа be7iyaageeti anjjettidaageeta. <sup>24</sup> Taani inttessi yootiyooгee aibee giikko, hananabaa yootiyaageetuppe darotinne kawoti intte be7iyooгаа be7anau koyidosona; shin be7ibookkona; intte siyiyooгааakka siyanau koyidosona; shin siyi-bookkona” yaagiis.

### *Asau Qarettiya Samaare Bitaniyaa*

<sup>25</sup> Higgiyaa tamarissiya issoi Yesuusa paaccanau akko yiidi, “Tamarissiyaagoo, taani merinaa de7uwaa laattanau ai oottoo?” yaagidi a oichchiis.

<sup>26</sup> Yesuusi zaaridi, “Higgiyan xaafettidaagee aibee? Neeni ai nabbabai?” yaagiis.

<sup>27</sup> Bitanee zaaridi, “Neeni Godaa ne Xoossaa ne kumetta wozanaappenne ne kumetta shemppuwaappe, ne kumetta wolqqaappenne ne kumetta qofaappe siiqa; ne shooruwaakka ne huuphedan siiqa” yaagiis.

<sup>28</sup> Yaagin Yesuusi a, “Neeni giyoogee tuma; heгаа ootta; neeni merinau de7ana” yaagiis.

<sup>29</sup> SHin higgiyaa tamarissiyaagee bana xillissanau koyidi Yesuusa, “Ta shooroi oonee?” yaagiis.

<sup>30</sup> Yesuusi zaaridi, “Issi bitanee Yerusalaameppe Yarkko bees; biishin, panggati a bolli kiyidosona. Eti a maayuwaa qaari ekkidi, a shocidi, haiquwaappenne paxaappe gidduwan yeggidi biidosona. <sup>31</sup> Issi qeese qaadadan he ogiyaara biiddi, he bitaniyaa be7iis; be7idi a yeggi bayidi, harasaara aadhdhiis. <sup>32</sup> Hegaadankka qassi Leewa zaree he sohuwaaara biiddi, bitaniyaa be7idi, yeggi bayidi, harasaara aadhdhiis. <sup>33</sup> SHin Samaariyaa asa issoi he ogiyaara biiddi, akko yiis. A be7idi, ayyo qarettiis. <sup>34</sup> Akko shiiqidi, zaitiyaanne woiniyaa eessaa a masunttaa bolli tigidi, qachchiis. Ba hariyaa togissidi, imattai aqiyoo sohuwaa efiis; efiidi a maaddiiddi aqiis. <sup>35</sup> Wonttetta gallassi naa77u shilinggiyaa kessidi, imattai aqiyoo sohuwaa naagiyaagaassi immidi, ‘A naaga; neeni aani wurssiyo miishshai aappuna gidikkonne, taani guyye simmiyo wode, neessi qanxxana’ yaagiis.

<sup>36</sup> “Yaatin he panggati shocido bitaniyaassi ha heezzu asatuppe augee shoorotiyai?” yaagiis.

<sup>37</sup> Yaagin higgiyaa tamarissiyaagee, “Ayyo kehidaagee shoorotees” yaagiis.

Yaagin Yesuusi a, “Baada neenikka hegaadan ootta” yaagiis.

### *Yesuusi Marttinne Mairaami Soo Biis*

<sup>38</sup> Yesuusinne i erissiyo ashkkarati biishin, i issi qeeri katamaa gelin, issi Martto giyo maccaasiyaa a ba son mokkaasu. <sup>39</sup> Marttissi Mairaamo giyo michchiyaa de7iyaara Yesuusa tohuwaa matan uttada, a qaalaa siyaausu. <sup>40</sup> SHin Martta baassi oosoo darido gishshau, ba wozana giddon daro metootaasu. Yesuusakko shiiqada, “Godau, taani ha ubba oosuwaa oottishin, ta michchiyaa utta bayidoogaa qoppikkii? Yaatikko o tana maadda ga” yaagaasu.

<sup>41</sup> Yaagin Yesuusi zaaridi o, “Marttee, Marttee, neeni daroban hirggaasa; qassi tug-gataasa. <sup>42</sup> SHin koshshiyaagee issibaa; Mairaama baappe ooninne ekkenna lo77obaa dooraasu” yaagiis.

## 11

*Yesuusi Woosaabaa Tamarissiiis*  
(Maatiyoosa 6:9-13; 7:7-11)

<sup>1</sup> Yesuusi issi sohuwan woossees. Woosaa wurssido wode, i erissiyo ashkkaratuppe issoi, “Godau, Yohaannisi ba erissiyo ashkkarata tamarissidoogaadan, nuuni woigi woossanaakko, nuna tamarissa” yaagiis.

<sup>2</sup> Yesuusi eta, “Xoossaa woossiiddi, hagaadan yaagite; ‘Saluwan de7iya nu Aawau, ne geeshsha sunttai anjjetto. Ne kawotettai yo.

Ne shenee saluwan hanidoogaadan, sa7ankka hano.

<sup>3</sup> Hachchi hachchi koshshiya qumaa nuuyyo hachchi imma.

<sup>4</sup> Nuuni nuna naaqqidaageetuyyo ubbaa atto giido gishshau, neenikka nu naaquwaa atto ga. Nuna iitabaappe ashshanaappe attin, paacen gelissoppa’ yaagite” yaagiis.

<sup>5</sup> Yesuusi ba erissiyo ashkkarata hagaadan yaagiis; “Geelladan hai intteppe issoi qamma bilahe ba lagge asa soo biidi, ‘Ta ishau, taassi heezzu baso oitta tal77a. <sup>6</sup> Aissi giikko, ta laggee ogeppe ta soo yiis; taani a sintti aattiyooobi baawa’ yaagikko, <sup>7</sup> a laggee sooppe haasayiiddi, ‘Tana daafursoppa; karee gorddettiichchiis; ta naatikka tanaara hiixan de7oosona; taani denddada, neessi ainne immanau danddayikke’ yaagane? <sup>8</sup> Taani inttessi odiyoogee aibee giikko, i a lagge gidido gishshau, denddi eqqidi, ayyo ainne immennan ixkikkokka, a laggee a oichchiiddi waissido gishshau, denddidi i koyiyoojaa ubbaa immana.

<sup>9</sup> “Taani inttessi odais; woossite, intte ekkana; koyite, intte demmana; kare yiidi xeesite; karee intteyyo dooyettana. <sup>10</sup> Aissi giikko, woossiya ubbai ekkana; koyiya urai demmana; qassi kare yiidi xeesiya urau karee dooyettana.

<sup>11</sup> “Intte giddon ba na7i, ‘Quma imma’ giikko, shuchcha immana aawi de7ii? ‘Mole imma’ giikko shooshsha immanee? <sup>12</sup> Woi, ‘PHuuphulle imma’ giikko masimaso immanee? <sup>13</sup> Intte iita gidiiddi, intte naatussi lo77obaa immiyoojaa erikko, yaatin saluwan de7iya Aawai bana woossiyaageetussi Geeshsha Ayyaanaa waati darissidi immanddeeshsha?” yaagiis.

*Yesuusanne Bi7eeli-Zeebula  
(Maatiyoosa 12:22-30; Marqqoosa 3:20-27)*

<sup>14</sup> Yesuusi bitaniyaappe duude xalahiyaa kessiis; xalahee kiyidoogaappe guyyiyan, bitanee haasayaa doommin, asai garamettiis. <sup>15</sup> SHin etappe issoi issoi, “Xalahetu halaqaa Bi7eeli-Zeebuli baayyo wolqqaa immin, xalaheta kessee” yaagiis. <sup>16</sup> Harati a paaccanau i saluwaappe malaataa oottana mala koyidosona. <sup>17</sup> SHin Yesuusi eta qofaa eridi, eta hagaadan yaagiis; “Ba giddon shaakettiya kawotetta ubbai xayana; shaakettiya keettaikka kunddana. <sup>18</sup> Yaatin Seexaanaa kawotettai ba giddon shaakettikko, he kawotettai waanidi eqqanee? Intte tana, ‘Bi7eeli-Zeebuli neessi wolqqaa immin, xalaheta kessaasa’ yaageeta. <sup>19</sup> Tau Bi7eeli-Zeebuli wolqqaa immin, taani xalaheta kessiyaabaa gidikko, intte asau wolqqaa ooni immin, xalaheta kessanee? Hegaa gishshau, eti intte bolli pirddana. <sup>20</sup> SHin Xoossai tau wolqqaa immin, taani xalaheta kessiyaabaa gidikko, simmi Xoossaa kawotettai inttekko yiichchiis.

<sup>21</sup> “Tooraanne gondalliyyaa oiqqida mino bitanee ba keettaa naagikko, a mehee saro de7ana. <sup>22</sup> SHin appe minniyaagee yiidi, a xoonidi i ammani uttido tooraanne gondalliyyaa appe wotti ekkidi, a mehiyaa shaakkees.

<sup>23</sup> “Ta bagga gidenna urai tabaa ixtees; qassi tanaara issippe shiishshennaagee laalees.



*Tuna Ayyaanai Asaa Giddo Simmidi Geliyo Geluwaa  
(Maatiyoosa 12:43-45)*

<sup>24</sup> “Tuna ayyaanai asappe kiyiyo wode, baayyo shemppiyoosaa koyiiddi, haatti bain-nasaara aadhdhees; au beettennan ixkikko, ‘Taani aggada yiido ta keettaa simmana’ yaagees; <sup>25</sup> simmidi yiyo wode, keettaa pitettidi, giigi uttidaagaa demmees. <sup>26</sup> Hegaappe guyyiyan, biidi baappe iitiya laappun hara ayyaanata ehees; he ayyaanati gelidi, hegan de7oosona; he bitaniyaa de7oi kaseegaappe guyyeegee keehi iitees” yaagiis.

*Tumu Ufaissaa*

<sup>27</sup> Yesuusi haggaa gin, asaa giddoppe issi maccaasiyaa qaalaa xoqqu oottada, “Nena tookkida uloinne neeni xammido xanttai anjettidaageeta” yaagaasu. <sup>28</sup> SHin Yesuusi, “Anjettidaageeti Xoossaa qaalaa siyidi, he qaalai azaziyoogaadan oottiyaageeta” yaagiis.

*Yoonasi Malaataa Gidiyo Hanotaa  
(Maatiyoosa 12:38-42)*

<sup>29</sup> Daro asai shiiqido wode, Yesuusi haggadan yaaganau doommiis; “Malaataa koyiia ha wodiya asai iita; hananabaa yootiya Yoonasa malaataappe harai ayyo imettenna. <sup>30</sup> Yoonasi Nanawe katamaa asaassi malaata gididoogaadan, taani Asa Na7ai, ha wodiya asaassi malaata gidana. <sup>31</sup> Tohossa bagga biittaa kawiyaa Solomona aadhdhida eratettaa siyanau sa7aa gaxaappe yiido gishshau, pirddaa gallassi denddada, ha wodiya asaa mootana; be7ite; Solomonappekka aadhdhiyaagee hagan de7ees. <sup>32</sup> Nanawe asai Yoonasi yootidoogan bantta nagaraappe simmido gishshau, pirddaa gallassi denddidi, intte bolli pirddana; be7ite; Yoonasappe aadhdhiyaagee hagan de7ees.

<sup>33</sup> “Soo geliya asaassi poo7ana mala, xomppiyaa xomppidi, xoqqan wottanaappe attin, genttidi woikko keriyaa qum77idi wottiyai ooninne baawa. <sup>34</sup> Ne aifee ne bollaassi xomppe mala; ne aifee payya gidiyo wode ne bolla ubbai poo7o; shin ne aifee payya gidana xayikko, ne bollai xuma gidana. <sup>35</sup> Heggaa gishshau, ne bolli de7iya poo7oi xuma gidenna mala naagetta. <sup>36</sup> Simmi ne bolla ubban ainne xumi bannan kumetta poo7oi de7ikko, xompee ba wagagga poo7uwaa ne bolli poo7issiyooogaadan, ne bollai wagagga poo7o gidana” yaagiis.

*Parisaawetanne Higgiyaa Tamaarissiyaageeta Walassiis  
(Maatiyoosa 23:1-36; Marqqoosa 12:38-40)*

<sup>37</sup> Yesuusi haasayaa wurssido wode, issi Parisaawee, “Tanaara laaxaa markkii” yaagidi a woossiis; woossin Yesuusi gelidi maanau uttiis. <sup>38</sup> Laaxaa maanaappe kase Yesuusi kushiya meecettibeennaagaa be7idi, Parisaawee garamettiis.

<sup>39</sup> Garamettin Godai a, “Parisaawetoo, shaatiyaayyoonne keriyaayyo bolla baggaa geeshsheeta; shin intteyyo giddoora bonqqiyooegeenne iitatettaa kumi uttiis. <sup>40</sup> Eeyyato, gaxaa medhdhida Xoossai gidduwaa medhdhibeenneeyye? <sup>41</sup> SHin intte siiniyaaninne sainiyan de7iyaagaa hiyyeesaassi immite; inttessi ubbabaikka geeshsha gidana.

<sup>42</sup> “SHin Parisaawetoo, intteyyo aayye7ana! Aissi giikko, bootta sawuwaappe, kareta sawuwaappe, xalotiyaappenne tokkidobaa ubbaappe asirataa Xoossayyo intte immeeta; shin xillotettaanne Xoossaa siiqiyooogaa intte aggi bayeeta; haratakka aggennan, oottanau bessiya yohoti hageeta.

<sup>43</sup> “Parisaawetoo, Aihuda woosa keettan intte bonchcho sohuwan uttanau koyiyo gishshaunne giyan bonchcho sarotaa koyiyo gishshau inttessi aayye7ana. <sup>44</sup> Lo77o misatiya iitattoo, higgiiyaa tamaarissiyaageetoo, Parisaawetoo, inttessi aayye7ana; aissi giikko, intte asi erennan yedhdhi hemettiyo beettenna duufo misateeta” yaagiis.

<sup>45</sup> Higgiyaa tamarissiyaageetuppe issoi a, “Tamarissiyaagoo, neeni heгаа yaagiy-oogan nuna qassi cayaasattennee” yaagiis.

<sup>46</sup> Yaagin Yesuusi zaaridi, hagaadan yaagiis; “Higgiyaa tamarissiyaageetoo, inttessi aayye7ana; aissi giikko, tookkanau deexxiya toohuwaa asa toosseeta; shin tookkiya asa maaddanau harai atto, intte intte huuphen biradhdhiyankka he toohuwaa bochchekketa.

<sup>47</sup> “Intte aawati worido hananabaa yootiyaageetussi duufuwaa bolli keettaa intte keexxiyo gishshau, inttessi aayye7ana. <sup>48</sup> Simmi intte aawati hananabaa yootiyaageeta worin, intte eta duufuwaa bolli keettaa keexxiyo gishshau, ‘Eta oosoi lo77o’ yaagidi, etabaa markkateeta. <sup>49</sup> Hegaa gishshau, Xoossaa aadhdhida eratetta, ‘Taani hananabaa yootiyaageetanne kiittidaageeta etakko kiittana; kiittidoogeetuppe issuwaa issuwaa eti worana; issuwaa issuwaa tuggayana’ yaagiis. <sup>50-51</sup> Aabeela woroosappe doommidi, yarshshiyooaappenne Beeta Maqidasiyaappe gidduwan worido zakkariyaasa wodiya gakkanaashin, sa7ai merettoosappe doommidi gukkida hananabaa yootiya ubbatu suuttaa gishshau, ha wodiya asai qaxxayettanau bessees; ee, ha wodiya asai qaxxayettanau bessees gais.

<sup>52</sup> “Higgiyaa tamarissiyaageetoo, eraa keettaa dooyiya qulppiyaa intte ekkideta; intte huuphiyaunne gelibeekketa; qassi gelanau koyiyaageetanne gelissekketa” yaagiis.

<sup>53-54</sup> Yesuusi hegaappe biido wode, higgiyaa tamarissiyaageetinne Parisaaweti a daro ixuwaa doommidi, i balabaa haasayikko oiqqanau naagiiddi, daro yohuwaa keehi oichchidosona.

## 12

### *Yesuusi “Lo77o Milatiya Parisaawetu Iitatettaappe Naagetite” Yaagiis (Maatiyoosa 10:26-27)*

<sup>1</sup> He wode daro sha7u asai issoi issuwaa yedhdhana gakkanaashin shiiqi utti-daashin, Yesuusi erissiyoo ashkkaaratussi koiroora odanau doommidi, “Parisaawetu irshshuwaappe naagetite; hegeenne, lo77o misatiya iitatettaappe naagetite giyoogaa. <sup>2</sup> SHin aibinne gentti wottidobai qoncciyaa kiyennan antenna; qassi qotti wottidobaikka erettennan antenna. <sup>3</sup> Hegaa gishshau, intte xuman haasayidobai ubbai gallassi poo7uwan siyettana; intte asi bannasan haittan saasukkidi odidobai ubbai keettaa huuphiyan awaajettana.

### *Oossi Yayyanau Bessiyaakko (Maatiyoosa 10:28-31)*

<sup>4</sup> “Ta ishato, taani intteyyo odais; ha77i ashuwaa woridi, guyyeppe ainne hegaappe aadhdhiyaabaa oottanau danddayennaageetau yayyoppite. <sup>5</sup> SHin intte oossi yayyanaakko, taani inttena erissana; woridoogaappe guyyiyan, Gaannabiyan olanau wolqqai de7iyooogaassi yayyite; ee assi yayyite gais.

<sup>6</sup> “Ichchashu siine kafoti santtimiyan baizettokkonaayye? Etappe issinnonne Xoossai dogenna. <sup>7</sup> SHin harai atto intte huuphiyan de7iya binnaana ubbaikka qoodan de7ees; simmi yayyoppite; daro siine kafotuppe intte aadhdheeta.

### *Kiristtoosabaa Markkattanau Bessees (Maatiyoosa 10:32-33; 12:32; 10:19-20)*

<sup>8</sup> “Taani intteyyo odais; tabaa asa sinttan markkattiya ooyyookka taanikka Asa Na7ai, qassi Xoossaa kiitanchchatu sinttan markkattana; <sup>9</sup> shin asa sinttan tana kaddiyaagaa taanikka Asa Na7ai, qassi Xoossaa kiitanchchatu sinttan a kaddana.

<sup>10</sup> “Ta bolli, Asa Na7aa bolli, iitabaa haasayiya ubbaa nagarai atto geetettana; shin Geeshsha Ayyaanaa cayiya uraa nagarai atto geetettana.

<sup>11</sup> “Inttena Aihuda woosa keettatukko, daannatukkonne deriyaa haariyaageetukko ehiyo wode, ‘Waatidi zaarane? Woi woigidi haasayane?’ yaagidi hirgoppite; <sup>12</sup> aissi

giikko, intte he wode gaanau bessiyaabaa inttena Geeshsha Ayyaanai tamarissana” yaagiis.

### *Dure Bitaniyaa Eeyyatettaa*

<sup>13</sup> Daro asaappe issoi a, “Tamarissiyaagoo, ta aawai aggidi haiqqido aquwaa ta ishai tanaara shaakkana mala, ayyo yoota” yaagiis.

<sup>14</sup> SHin Yesuusi, “Bitaniyau, tana intte bolli pirddiya daanna woi hegaa inttessi shaakkiyaagaa oottidi sunttidai oonee?” yaagiis. <sup>15</sup> Qassi eta, “Asassi daro miishshai de7ikkokka, a shemppoi he duretettan de7enna gishshau naagettite; duretetta amo ubbaappekka inttena naagite” yaagiis.

<sup>16</sup> Etassi leemisuwaa odiiddi, “Issi dure bitaniyaa biittai daro mokkees. <sup>17</sup> Bitanee, ‘Taassi ta kattaa wottiyo sohoi bainna gishshau waatooshsha’ yaagidi, ba wozanan qoppiis; <sup>18</sup> ‘Taani waatane giikko, ta gootaraa qolada, hara gitatiyaagaa gootarana; ta kattaanne tabaa ubbaa hegan wottana. <sup>19</sup> Yaatada tana, “Laa tanooshsho, neessi daro laittaassi gidiya daro miishshai de7ees; shemppa, ma, uya, ufaitta” gaana’ yaagiis.

<sup>20</sup> “SHin Xoossai a, ‘Laa ha eeyyau, neeni hachchi qamma haiqqaasa; yaatin, ha neeni shiishshidobai oossi gidanee?’ yaagiis.

<sup>21</sup> “Xoossaa matan dure gidennan, bau miishsha shiishshiyai ooninne he bitaniyaa mala” yaagiis.

### *Xoossaa Ammanettiyoogaa (Maatiyoosa 6:25-34)*

<sup>22</sup> Yesuusi erissiyo ashkkarata, “Hegaa gishshau, taani intteyyo odais; intte paxa de7anau maanabaassinne woi intte bollau maayanabaassi hirggoppite. <sup>23</sup> Aissi giikko, shemppoi qumappe aadhdhennee? Qassi bollai maayoppe aadhdhennee? <sup>24</sup> Qooraasetta xeellite; eti zerokkonna; cakkokkonna; etau minjiyo keetti woi gootari baawa; eta Xoossai mizees; kafotuppe intte keehi aadhdheeta. <sup>25</sup> Intte gidon daro qoppidi, ba geesaa bolli issi wara gujjanau danddayiyai oonee? <sup>26</sup> Yaatin intte hegaa mala, guuttabaa oottanau danddayennaageeti aissi harabau hirggeetii?

<sup>27</sup> “Ciishshati waani dicciyaakko xeellite; daafurokkonna woi puutto suqqokkonna. SHin taani intteyyo odais; harai atto, Solomoni hegaa keena bonchchettidaagaa gidiiddi, he ciishshatuppe issuwaagaa malaa maayibeenna. <sup>28</sup> Laafa ammanoi de7iyoogetoo, Xoossai hachchi de7idi, wontto coociyaa taman eexxiya dembbaa maataa maizziyaagee, inttena etaagaappe aattidi, waati maizzennee?

<sup>29-30</sup> “Intte maanabaanne uyanabaa darissidi koyoppitenne qassi hirggoppite. Aissi giikko, ha sa7an de7iya ammanenna asati he ubbabaa darissidi koyoosona; qassi he ubbai inttena koshshiyooagaa intte Aawai erees. <sup>31</sup> Hegaa aggi bayidi, Xoossaa kawotettaa koyite; i hegeeta inttessi immana.

### *Ha Sa7an Miishshaa Dagayanau Bessenna (Maatiyoosa 6:19-21)*

<sup>32</sup> “Amarida dorssa wudiyau, intte Aawai ba kawotettaa inttessi immanau ufaittiyo gishshau yayyoppite. <sup>33</sup> Inttessi de7iyaabaa baizzite; hiyyeesau immite; kaisoi shiiqen-nasan, bil77ai bochchennasan, saluwan wurenna miishshaa dagayidi, ceeggenna korjjuwaa intte huuphessi oottite. <sup>34</sup> Aissi giikko, intte wozanai intte miishshai de7iyooosan de7ana.

### *Oosanchchatu Minotettaa*

<sup>35-36</sup> “Bantta godai bullachchaappe soo simmidi, kariyaa dooyanau xeegiyo wode, sohuwaara dooyanau naagiya asatudan, intte xeessan qabattuwwa mintti gixxidi, xomppiyaa xomppidi, giigi uttite. <sup>37</sup> Bantta godai soo yiyo wode, xiskkennan naagiiddi uttida ashkkarati waani anjettanddonaashsha! Taani tumaa gais; i eta, ‘Uttite’ giidi, ba qabattuwwa minttidi, eta sinttau qumaa aattana. <sup>38</sup> Omarssa gidin, woi qamma bilahe

gidin, audenne eta godai yiidi, eta giigi uttidaageeta be7ikko, eti waani anjjettand-donaashsha! <sup>39</sup> SHin intte issibaa erite; hegeenne aibee giikko, kaisoi yaana wodiya keettaawai eridaakko, beegottidi kaisuwan ba keettaa bookissenna. <sup>40</sup> Taani, Asa Na7ai, intte qoppenna wodiyan yaana gishshau, inttekka qassi giigi uttanau bessees” yaagiis.

*Itanne Keha Oosanchchatu Leemisuwaa  
(Maatiyoosa 24:45-51)*

<sup>41</sup> PHeexiroosi a, “Godau, neeni ha leemisuwaa nuussi odaiyye ubbaassi odai?” yaagiis.

<sup>42</sup> Godai zaaridi yaagiis; “Yaatin ba so asau qumaa koshshiyo wodiyan immana mala, a godai sunttiyo ammanettiya wozannaama ashkkari oonee? <sup>43</sup> I hegaadan oottishin, a godai yiidi, demmiyo ashkkarai anjjettidaagaa. <sup>44</sup> Taani intteyyo tumaa odais; godai he ashkkaraa babaa ubbaa bolli sunttana. <sup>45</sup> SHin he ashkkarai, ‘Ta godai gam77idi yaana’ yaagidi, ba wozanan qoppidi, hara ashkkarata, attumaageetanne maccaageeta deshettaa doommikko, qassi meettaanne ushshaa doommikkonne mattottikko, <sup>46</sup> he ashkkaraa godai i qoppibeenna gallasaaninne qassi i eribeenna saatiyan yaana. Yiidi a qanxxerettidi, ammanettenna asai de7iyoosan wottana.

<sup>47</sup> “Ba godai dosiyoobaa eriiddi giigettibeenna ashkkarai, woi i dosiyoogaadan oot-tennan ixida ashkkarai, lissuwan daro garafettana. <sup>48</sup> SHin ba godai dosiyoobaa erenan lissuwan garafanau bessiyaabaa oottida ashkkarai lissuwan guuttaa garafettana. Daruwaa immido uraappe daroi koyettees. Appekka dariyaagaa immido uraappe keehi daroi koyettees.

*Ubbabaa Aggidi Yesuusa Kaalliyogaa  
(Maatiyoosa 10:34-36)*

<sup>49</sup> “Taani taman sa7aa oittanau yaas; ha77ikka xuugettappe harabaa ainne koyikke. <sup>50</sup> Taani xammaqettana xinqqatiyaa de7ausu; he xinqqatiyaa polettanaashin, taani waana tuggataneeshsha! <sup>51</sup> Taani sa7aassi sarotettaa ehaanau yiidabaa inttessi milatii? CHii, chii, taani intteyyo odais; taani asaa gidduwan shaahotettaa medhdhanau yidoogaappe attin. <sup>52</sup> Aissi giikko, hagaappe sinttan issi keettan ichchashu asati de7ana; de7ishin heezzai naa77aa bolli, naa77ai heezzaa bolli denddidi, shaahettana. <sup>53</sup> Aawai ba na7aa bolli, na7ai ba aawaa bolli, aayyiyaa ba na7ee bolli, na7iyaa ba aayee bolli, bollotiyaa ba na7aa machchee bolli, na7aa machchiyaa ba bollotee bolli, denddidi shaahettana” yaagiis.

*Wodiya Hanotaa Eriyoogaa  
(Maatiyoosa 16:2-3)*

<sup>54</sup> Yesuusi qassi asaa, “Awai wulliyo baggaara kiyiya shaaraa intte be7iyo wode, sohuwaara, ‘Wolqqaama irai yees’ yaageeta; tumakka yees. <sup>55</sup> Tohossa baggaara carkkoi carkkiyo wode, ‘Hombbana hanees’ yaageeta; tumakka hombbees. <sup>56</sup> Intte lo77o misatiya iitati, sa7aanne saluwaa xeellidi, hananabaa eriiddi, ha wodiyaabaa aissi erekkeitii?

*Mootiyaagara Sigettiichchiyoogaa  
(Maatiyoosa 5:25-26)*

<sup>57</sup> “Yaatin aissi intte intte huuphiyan xilluwaa pirddekketii? <sup>58</sup> Nena pirdda keettan mootiyaagee daanna sintti goochchenna mala, qassi daannai nena polisiyau aattidi immenna mala, poliseekka qasho keettaa gelissenna mala, nena mootiyaagara pirdda keettaa baidda, ogiyan sigettaichcha. <sup>59</sup> Taani neeyyo odais; neeni issi santtimee attention, ne maqqaccuwaa wurssada qanxxana gakkanaassi, mulekka qasho keettaappe kiyakka” yaagiis.

## 13

### *Nagaraappe Simmenna Ubbai Xayana*

<sup>1</sup> Issi issi asai he wode yiidi, Galiila asatubaa Yesuusassi odiiddi, “PHilaaxoosi Galiila asata woridi, eta suuttaa eti yarshshiyooabaara walakkiis” yaagiis. <sup>2</sup> Yesuusi zaaridi, hagaadan yaagiis; “Ha Galiila asati haiqqido gishshau, yaatin inttessi hara Galiila asa ubbaappekka nagaranchcha milatiyoonaa? <sup>3</sup> CHii, eti gidennaagaa taani inttessi odais; shin intte nagaraappe simmennan ixkikko, intte ubbaikka hegaadan haiqqana. <sup>4</sup> Woikko Saliihoomen shuchchan keexxido adussa keettaa eta bolli kund-didi, worido tammanne hosppun asati Yerusalaamen de7iya ubbaappe daro naaqqi-daageeta inttessi milatiyoonaa? <sup>5</sup> CHii, eti naaqqibeennaagaa taani inttessi odais; nagaraappe simmennan ixkikko, intte ubbai hegaadan haiqqana” yaagiis.

### *Aifenna Balasee Leemisuwaa*

<sup>6</sup> Qassi Yesuusi ha leemisuwaa etassi odiis; “Hagee augee giikko, issi bitaniyaassi woiniyaa turaa giddon tokettida balasiyo giyo mittiyaa de7ausu. He bitanee mittiyaa aifidaakkonne giidi yin, aifee i bolli xayis. <sup>7</sup> Woiniyaa turaa oottiyaagaa i, ‘Taani ha balaseeppe aife demmana yaagaidda, heezzu laitta gakkanaashinkka ya yaada ainne demmabeikke. He balasiyaa aissi gaden coo eqqa bayadee? Qanxxa ola’ yaagiis. <sup>8</sup> SHin woiniyaa turaa oottiyaagee zaaridi, ‘Godau, taani o bul77ada i xaphuwan oshaa yegganaashin, ha laittikka agga baya. <sup>9</sup> Laitti a aifikko lo77o; shin aifennan ixkikko qanxxettu’ giis” yaagiis.

### *Yesuusi Issi Quuna Mishiriyo Sambbatan Pattiis*

<sup>10</sup> Issi Sambbatan Yesuusi Aihuda woosa keettatuppe issuwan tamaarissee. <sup>11</sup> Tammanne hosppun laittaasappe doommada, i bolli iita ayyaanai de7iyaagee harggissin, sahattada de7iya issi mishiriyaa de7ausu. Quuna gididaara muleera sitti gaada eqqanau danddayabeikku. <sup>12</sup> Yesuusi o be7ido wode, “Maccaasee, ne harggiyaappe paxadasa” yaagiis. <sup>13</sup> Ba kushiyaa i bolli wottin, sohuwaara sitti ga eqqada Xoossaa galataasu.

<sup>14</sup> SHin Aihuda woosa keettaa halaqai Yesuusi Sambbata gallasan harggiyaappe mishiriyo pattido gishshau hanqqettidi asaa, “Ooso oottiyo gallassati usuppuna; intte yiidi harggiyaappe paxanau bessiyoi he gallassatuunappe attin, Sambbataana gidenna” yaagiis.

<sup>15</sup> Godai zaaridi, “Ha lo77o milatiya iita asatoo, intteppe issoinne Sambbatan booraa woi hariyaa gaaxaataappe birshshidi, haattaa ushshanau efeednee? <sup>16</sup> Hanna Abrahaama zariyaa tammanne hosppun laittaasappe Seexaanai qachchidoora qashuwaappe Sambbatan birshshettanau bessekkee?” yaagiis. <sup>17</sup> I immiyo zaaroi a morkketa yeellayis; i oottido ooratta yoho ubban asai ubbai ufaittiis.

### *Sanaafici Giyo Mittee Zerettaa Leemisuwaa (Maatiyoosa 13:31-32; Marqqoosa 4:30-32)*

<sup>18</sup> Yesuusi, “Xoossaa kawotettaa ai milatii? I ai milatiyaakko, taani inttena waata bessoo? <sup>19</sup> Xoossaa kawotettaa sanaafici giyo qii mittee aifiyo milatees. He mittee aifiyo asai ekkidi zeriis; zerin morkkidaara diccada gita mitta gidaasu; gidin kafoi i tashiyaa bolli baassi keexxiis” yaagiis.

### *Irshshuwaa Leemisuwaa (Maatiyoosa 13:33)*

<sup>20</sup> Qassikka Yesuusi, “Xoossaa kawotettaa ai milatiyaakko, taani inttena waatada bessoo? <sup>21</sup> Issi mishiriyaa heezzu kere xiilliyaa ekkada, munaqqido munaqai ubbai denddana gakkanaassi, aani tigidu irshshuwaa milatees” yaagiis.



*Un77o Penggiyaabaa  
(Maatiyoosa 7:13-14,21-23)*

<sup>22</sup> Yerusalaame biiddi, gita katamaaninne qeeri kataman de7iya asaa tamaarissiiddi aadhdhees. <sup>23</sup> Aadhdhishin issi bitanee a, “Ta Godau neeni ashshanaageeti amari-daageetee?” yaagiis.

Yaagin Yesuusi eta, <sup>24</sup> “Taani intteyyo odais; daro asai gelanau koyana shin dand-dayenna gishshau, un77o penggiyaara gelanau olettite. <sup>25</sup> Keettaawai denddidi, ba keettaa gorddirggin, karen intte eqqidi, ‘Godau, godau, nuussi dooyarkkii’ yaagidi xeessaa doommiyo wode, i zaaridi, ‘Intte awappe yiyaakko, taani inttena erikke’ yaagana.

<sup>26</sup> “He wode intte, ‘Nuuni nenaara miida; uyida; neeni nu biittan tamaarissadasa’ yaagana.

<sup>27</sup> “Yaagin I qassi, ‘Taani inttessi odais; intte awappe yiyaakko, taani inttena erikke; makkalati ubbaikka ta matappe haakkite’ yaagana.

<sup>28</sup> “Abrahaami, Yisaaqi, Yaaqoobinne hananabaa yootiyaageeti ubbai karen intte eqqidaashin, Xoossaa kawotettan de7iyaageeta intte be7iyo wode, intte yeekkananne achchaa garccana. <sup>29</sup> Asai arshshoppenne arggoppe, qassi huuphessa baggappenne tohossa baggappe yiidi, Xoossaa kawotettan qumaa maanau uttana. <sup>30</sup> Be7ite; ha77i guyyen de7iyaageeti sinttau aadhdhana; ha77i sinttan de7iyaageeti guyye aadhdhana” yaagiis.

*Yesuusi Yerusalaame Walassiis  
(Maatiyoosa 23:37-39)*

<sup>31</sup> He wode Parisaawetuppe issoi issoi Yesuusakko yiidi, “Heeroodisi nena woranau koyiyo gishshau, hagaappe baichcha” yaagidosona.

<sup>32</sup> Yaagin Yesuusi zaaridi, “Biidi he worakanaassi, ‘Hachchinne wontto xala-heta kessana; qassi harggida asaakka pattana; yaatada heezzantto gallassi ta oosuwaa wurssana’ yaagite. <sup>33</sup> SHin hananabaa yootiyaagee Yerusalaameppe harasan haiqqanau bessenna gishshau, taani hachchi, wonttonne wonttifen ogiyaa bollan de7anau bessees.

<sup>34</sup> “Yerusalaame katamaa asau, Yerusalaame katamaa asau, hananabaa yootiyaageeta intte woreeta; Xoossai inttekkko kiittidoogeetakka shuchchan caddeeta; kuttiyaa ba marata ba qefiyan haphphiyoogaadan, taani intte naata issi diri shiishshanau aapputoo koyidanaa! SHin tana diggideta. <sup>35</sup> Be7ite, Xoossai intte keettaa muleera yeggi bayana; taani intteyyo odais; intte, ‘Godaa sunttan yiyaagee anjettidaagaa’ gaana gakkanaashin, tana be7ekketa” yaagiis.

## 14

*Yesuusi Qassikka Issi Hargganchchaa Sambbatan Pattiis*

<sup>1</sup> Issi Sambbata gallassi Yesuusi Parisaawetu halaqatuppe issuwaa soo laaxaa maanau biis. He wode eti a daro naagoosona. <sup>2</sup> Bollai kixxido issi bitanee Yesuusa sinttan de7ees. <sup>3</sup> Yesuusi higgiiyaa tamaarissiyaageetanne Parisaaweta, “Nu higgee Sambbatan asa pattanau azaziiyye azazennee?” yaagiis.

<sup>4</sup> SHin eti co77u giidosona. Yesuusi he bitaniyaa bollaa bochchidi, pattidi yeddiis. <sup>5</sup> Yesuusi eta, “Intteppe Sambbatan ba boorai woi haree ollan kunddin, Sambbata giidi, sohuwaara ollaappe kessenai oonee?” yaagiis.

<sup>6</sup> SHin etau ha yohuwaassi zaaruwaa immanau danddayettennan ixxiis.

*Bana Ziqqi Oottiyooaanne Imatobaa*

<sup>7</sup> Issi issi imattati bonchcho sohuwaa waatidi dooriyaakko, Yesuusi xeellidi, leemisuwaa odiiddi, hagaadan yaagiis; <sup>8</sup> “Nena asi bullachchaa xeesikko, bonchcho sohuwan uttoppa. Neepe bonchchettiya asi xeesettidaakkonne ooni erii? <sup>9</sup> Nenanne

anne xeesidaagee yiidi nena, ‘Ha sohuwaa ayyo imma’ yaagin, neeni yeellatada ziqqiyaasan uttana. <sup>10</sup> SHin nena xeesidaagee yiidi nena, ‘Ta ishau pude aadhdha’ gaana mala, ubbaappe ziqqiyaasan utta; he wode neeni imatta ubbaa sinttan bonchchettana. <sup>11</sup> Aissi giikko, bana xoqqu oottiya urai ziqqi gaana; bana ziqqi oottiya urai xoqqu gaana” yaagiis.

<sup>12</sup> Yesuusi bana ba soo xeesida bitaniyaa hagaadan yaagiis; “Neeni laaxaa woi kahuwaa ne son katissiyo wode, ne laggeta woi ne ishannta woi ne dabbota woi ne dure shoorota xeesoppa; aissi giikko, eti nena kayan xeesidi, he kushiya neessi zaarana. <sup>13</sup> SHin neeni qumaa katissiyo wode, hiyyeesata, quunata, wobbeta, qooqeta xeesa. <sup>14</sup> Eti ne kushiya zaaranau danddayenna gishshau, neeni anjettana. Xilloti haiquwaappe dendiyo wode ne kushiya Xoossai zaarana” yaagiis.

*Gita Gibiraa Leemisuwaa  
(Maatiyoosa 22:1-10)*

<sup>15</sup> Qumaa maanau uttida asaappe issoi hegaa siyidi Yesuusa, “Xoossaa kawotettan qumaa maanau uttanaageeti anjettidaageeta” yaagiis.

<sup>16</sup> SHin Yesuusi zaaridi, hagaadan yaagiis; “Issi bitanee daro qumaa katissidi, daro asaa xeesiis. <sup>17</sup> Qumaa miyo wodee gakkinn, kase xeesetti uttida asaa, ‘Ubbabai ha77i giigi uttido gishshau, haa yiite’ gaanau, ba ashkkarata asaakko kiittiis. <sup>18</sup> SHin ubbai huuphiyan huuphiyan banttana aggi bayana mala woossidosona. Koירוogee ashkkaraassi yootiiddi, ‘Taani biittaa shammaas; he biittaa baada be7anau koshshees; hayyanaa tana hanqqettoppa’ yaagiis.

<sup>19</sup> “Hankkoi, ‘Taani ichchashu waaxa boorata shammidoogeeta goya be7ana bais; hayyanaa tana hanqqettoppa’ yaagiis.

<sup>20</sup> “Harai qassi, ‘Taani machchiyo ekkido gishshau, baanau danddayikke’ yaagiis.

<sup>21</sup> “Ashkkarai simmidi, hegaa godaassi odiis. Odin godai daro hanqqettidi, ba ashkkaraa, ‘Elle katamaa ogiyaanne toho ogiyaa baada, hiyyeesata, quunnida asata, wobbetanne qooqeta ekkada ya’ yaagiis.

<sup>22</sup> “A ashkkarai, ‘Ta godau, neeni azazidoogaadan oottaas; shin ha77ikka sohoi de7ees’ yaagiis.

<sup>23</sup> “Yaagin godai ashkkaraa, ‘Dere garssa ogiyaanne loossuwaa baada, ta keettaa kumana mala, asaa ta soo eha. <sup>24</sup> Aissi giikko, kase ta soo xeesettida asatuppe issoinne ta qumaa meennaagaa taani intteyyo odais’ giis” yaagiis.

*Yesuusa Kaalliyogee Yarshshettiyoogaa Koyees  
(Maatiyoosa 10:37-38)*

<sup>25</sup> Yesuusi daro asaara biidi, asaakko guyye simmidi, <sup>26</sup> “Taakko yiya ooninne ba aawaa, ba ayyiyo, ba machchiyo, ba naata, ba ishannta, ba michchentta, harai atto banakka ixkana xayikko, tana kaalliyagaa gidanau danddayenna. <sup>27</sup> Ba huuphe masqqaliyaa tookkidi, tana kaallenna urai ta erissiyo ashkkara gidanau danddayenna.

<sup>28</sup> “Intteppe issi urai shuchcha keettaa keexxanau koyikko, keettaa polanau woqqu miishshaa koshshiyaakko, koירוora uttidi qoodennai oonee? <sup>29-30</sup> Yaanana xayikko, keettaa doommidi, i polanau danddayennan aggin, hegaa be7ida asai ubbai, ‘Ha bitanee keexxanau doommidi, polana danddayibeenna’ yaagidi, a bolli miichchaa doommeees.

<sup>31</sup> “Woi tammu sha7u asai de7iyo kawoi laatamu sha7u asai de7iyo kawuwaara olettanau danddayiyaakkonne, koירוora uttidi qoppennee? Qoppaana xayikko, hegee yaatin aiba kawoo? <sup>32</sup> Baassi danddayettana xayikko, hinkko kawoi haahuwan de7ishin sigettanau woosseees. <sup>33</sup> Hegaadan baassi de7iya ubbabaa aggi bayenna urai tana kaalliyagaa gidanau danddayenna.

*Go77enna Maxiniyaa  
(Maatiyoosa 5:13; Marqqoosa 9:50)*

<sup>34</sup> “Maxinee lo77o; shin laqilaqana xayikko, naa77antto a waatidi laqilaqissanee?  
<sup>35</sup> Biittaunne lo77enna; araddissiyaabaanne gidenna. Asai a oli bayees. Siyanau haittai de7iyoogee hegaa siyo” yaagiis.

## 15

### *Bayidi Beettida Dorssaa (Maatiyoosa 18:12-14)*

<sup>1</sup> Issi gallassi, giiraa shiishshiyaageetinne nagaranchchati Yesuusabaa siyanau daroti akko shiiqidosona. <sup>2</sup> Parisaawetinne higgiiyaa tamaarissiyaageeti, “Hagee nagaranchchatuura dabbotees; etaara mees” yaagidi, Yesuusa bolli zuuzummidosona.

<sup>3</sup> Zuuzummin Yesuusi etassi ha leemisuwaa odiiddi, <sup>4</sup> “Intteppe issi uraassi xeetu dorssi de7iyoogee etappe issinna geelladan bayiyaabaa gidikko, uddufun tammanne uddufunaa buuran yeggi bayidi, issinno demmana gakkanaashin koyanau beennee?  
<sup>5</sup> He bayida dorssiyo demmido wode ufaittidi, ba hashiyan tookkees. <sup>6</sup> Tookkidi soo ehiidi, ba laggetanne ba shoorota issippe xeesees; xeesidi, ‘Taani ta bayida dorssiyo demmido gishshau, tanaara ufaittite’ yaagidi, etassi odees. <sup>7</sup> Taani intteyyo odiyoogee aibee giikko, hegaadan nagaraappe simmana koshshenna uddufun tammanne uddufun xillotun ufaittanaappe ba nagaraappe simmiya issi nagaranchchan saluwan de7iyaageeti ufaittana.

### *Bayidi Beettida Bootta SHilinggiyaa*

<sup>8</sup> “Woikko tammu bootta shilinggee de7iyooora geelladan, issi shilinggee bayikko, xomppiyaa xomppada, ba keettaa pittada demmana gakkanaashin, minttada koyennaara oonee? <sup>9</sup> Demmido wode, a ba laggetanne ba shoorota issippe xeesada, ‘Taani ta bayida shilinggiyaa demmido gishshau, tanaara ufaittite’ yaagana. <sup>10</sup> Taani inttessi odais; hegaadan Xoossaa kiitanchchati nagaraappe simmiya issi nagaranchchan ufaittana” yaagiis.

### *Bayidi Beettida Na7aa*

<sup>11</sup> Qassikka Yesuusi hagaadan yaagiis; “Issi bitaniyaassi naa77u naati de7oosona. <sup>12</sup> Etappe kaaloi ba aawaa, ‘Ta aawau, neessi de7iyaabaappe tana gakkiiyaagaa shaakkada hamma’ yaagin, aawai baassi de7iyaabaa ba naa77u naatussi shaakkiis.

<sup>13</sup> “Guutta gallasaappe guyyiyan, kaalo na7ai ba miishshaa ubbaa shiishshi ekkidi, haaho dere biis. Hegan miishshaa ohettaa mooridi, ba miishshaa laaliis. <sup>14</sup> Ayyo de7iyaabai ubbai wuriichchidoogaappe guyyiyan, he biittan wolqqaama koshai gelin, i tuggatiis. <sup>15</sup> He dere asaappe issuwaakko biidi, ‘Tana neessi ashkkara oottarkkii?’ yaagin, bitanee ba gudunntaa wudiyaa heemmanau dembbaa a yeddiis. <sup>16</sup> Gudunntaa wudee miyo harqquwaa maanauka amottiis; shin ayyo ainne immidai baawa.

<sup>17</sup> “Ba mooruwaa hassayidi, ‘Qumai xoonidi sa7an attiyo ta aawaa oosanchchati aappuna shin, tana hagan namisai worii?’ <sup>18</sup> Denddada ta aawaakko baada, “Ta aawau, taani Xoossaakka nenakka naaqqaaas. <sup>19</sup> Hagaappe sinttan ne na7a geetettanauka bessikke; tana ne ashkkaratuppe issuwaadan wottarkkii” gaana’ <sup>20</sup> yaagidi denddidi, ba aawaakko yiis.

“I biron haahuwan de7ishin, a aawai a be7idi, ayyo mishettiis; woxxi qoommidi, a yeriis.

<sup>21</sup> “Na7ai, ‘Ta aawau, taani Xoossaakka nenakka naaqqaaas; hagaappe sinttan ne na7a geetettanauka bessikke’ yaagiis.

<sup>22</sup> “SHin a aawai ba ashkkarata hagaadan yaagiis; ‘Ubbaappe lo77iya maayuwaa eesuwan ehiidi, a maizzite; a kushiyan migiduwaa a gediyanikka caammaa wottite. <sup>23</sup> Modhdho mirgguwaa ehiidi shukkite; moos, ufaittoos. <sup>24</sup> Aissi giikko, hagee ta na7ai haiqqiis; shin paxiis; qassi bayiis; shin beettiis’ yaagin, ufaissaa doommidosona.

<sup>25</sup> “Baira na7ai gaden de7iyaagee yiidi, soo matiyo wode, karaabiyaanne yettaa siyiis. <sup>26</sup> Ashkkaratuppe issuwaa xeesidi, ‘Hegee aibee?’ yaagidi oichchiis. <sup>27</sup> Oichchin ashkkarai, ‘Ne ishai saro yiido gishshau, ne aawai modhdho mirgguwaa ayyo shukissiis’ yaagiis.

<sup>28</sup> “Baira na7ai hanqqettidi, soo gelennan ixxin, a aawai kare kiyidi, a woossiis. <sup>29</sup> SHin i ba aawaa hagaadan yaagiis; ‘Hagaa keena laittaa neessi daro oottaas; neeni giidobaa polennan mulekka aggabeikke; ta laggetuura ufaittana mala, taassi harai atto issi deeshsha marakka imma erakka. <sup>30</sup> SHin hagee ne na7ai, ne miishshaa shaaramuxa maccaasan wurssidaagee yin, ayyo modhdho mirgguwaa shukkadasa’ yaagiis.

<sup>31</sup> “Yaagin aawai a, ‘Ta na7au, neeni ubba wode tanaara de7aasa; tabai ubbaikka neessa. <sup>32</sup> SHin hagee ne ishai, haiqqidaagee paxido gishshaunne bayidaagee beettido gishshau, nuuni miiddi uyiiddi ufaittana koshshees’ yaagiis” giidi Yesuusi yootiis.

## 16

### *Garssaara Sunttettida Cincca Bitaniyaa*

<sup>1</sup> Yesuusi ba erissiyo ashkkaratussi yootiiddi, “Issi dure bitanee de7ees; baappe garssaara i sunttido bitanee de7iyaagee a miishshaa mooriis giyo zigirssai a gakkiis. <sup>2</sup> Ba sunttido bitaniyaa xeesidi, ‘Ha nena asai giyoogee aibee? Hagaappe sinttan neeni taappe garssaara suntta gidanau danddayenna gishshau, ne kushiyan de7iya ta miishsha ubbaa hamma’ yaagiis.

<sup>3</sup> “Yaagin bitanee, ‘Ta godai tana oosuwaappe kessana hanees. SHin hai waanoo? Taassi hem77anau wolqqi baawa; woossanau taassi pokkees. <sup>4</sup> Ta oottanabaa ta erais; i tana ta oosuwaappe kessiyo wode, bantta soo bin, tana mokkiya laggeta taani demmana’ yaagiis.

<sup>5</sup> “Ba godaappe miishshaa tal77ida asata huuphiyan huuphiyan xeesidi, koiro bitaniyaa, ‘Neeni ta godaappe ai tal77adii?’ yaagiis.

<sup>6</sup> “‘Taani xeeu baattaa kumida zaitiyaa tal77aas’ yaagiis.

“Yaagin, ‘Ne paramaa hei; uttada eesuwan ishatama gaada xaafa’ yaagiis.

<sup>7</sup> “Guyyeppe hankkuwaa ‘Ne acoi aappunee?’ yaagiis.

“‘Xeeu qun77a giste’ yaagiis.

“Yaagin, ‘Ne paramaa hei; hospun tamma gaada xaafa’ yaagiis.

<sup>8</sup> “He sunttai cinccatettan oottido gishshau, a godai a galatiis; aissi giikko, ha sa7aa asai babau poo7uwaa asaappe aadhdhida cincca.

### *Miishshaa Bessiyaasan Peeshshanau Bessiyogaa*

<sup>9</sup> “Taani intteyyo odais; worddo miishshai wuriyo wode, merinau wurena keettan inttena eti mukkana mala, he miishshan intte huuphessi lagge demmite. <sup>10</sup> Daro guutaban ammanettiya urai qassi gitaban ammanettees. Daro guutaban ammanettenna urai gitabankka ammanettenna. <sup>11</sup> Yaatin intte ha sa7aa miishshan ammanettennabaa gidikko, tumu miishshaa inttessi asi waatidi hadara yaagidi immanee? <sup>12</sup> Intte hara asa miishshaa bashshiyaabaa gidikko, intteegaa oonee intteyyo immanai?

<sup>13</sup> “Naa77u godatuyyo haarettanau danddayiya ashkkari baawa; aissi giikko, woi issuwaa ixidi, hinkkuwaa siiqana; woi issuwaa bonchchidi, hinkkuwaa karana; Xoossaassinne miishshaassi haarettanau danddayekketa” yaagiis.

<sup>14</sup> Miishsha dosiya Parisaaweti hegaa ubbaa siyidi, Yesuusa bolli qilliicidosona. <sup>15</sup> SHin Yesuusi eta, “Intte asaa sinttan intte huuphiyaa xillissiyaageeta; shin intte wozanaa Xoossai erees; aissi giikko, asa sinttan bonchchettiyaagee Xoossaa sinttan tuna gidees.

### *Muuse Higgiyaabanne Geluwaa Ekuwaabaa*

*(Maatiyoosa 11:12-13; 5:31-32; Marqoosa 10:11-12)*

16 “Muuse higgeenne hananabaa yootiyaageeti xaafido maxaafai Yohaannisa wodiya gakkanaashin de7idosona; he wodiyaappe doommin, Xoossaa kawotettai odettiis; ubbai yaa gelanau warettees. 17 SHin higgiaappe issi qaaliyaa moorettanaappe saloinne sa7ai aadhdhiyoogee matattees.

18 “Ba machchiyo yeddidi, haranno ekkiya ooninne shaaramuxees; qassi azinai yeddido maccaasiyo ekkiya ooninne shaaramuxees.

### *Dure Bitaniyaanne Hiyyeesaa Al77aazara*

19 “Daro al77o maayuwaa maayiya issi dure bitanee de7ees. Ayyo sa7ai lo77in, ubba gallassi ufaiddi de7ees. 20-21 Al77aazara giyo masunxxida issi hiyyeesai, dure bitanee miyo masoofiyaappe sa7an wodhdhiya suuppa qumaa maanau amottidi, duriyaa penggen zin77ees. Harai atto kanatika yiidi, a masunntaa laaccoosona.

22 “Hiyyeesa bitanee haiqqin, kiitanchchati a tookkidi, Abrahaama baggi aattidosona. Qassi dure bitanee haiqqidi moogettiis. 23 Si7ooliyan daro seelettiiddi, haahuwan de7iya Abrahaama xoqqu giidi xeelliis. Qassi Al77aazarakka Abrahaama matan de7iyaagaa be7iis.

24 “Ba qaalaa xoqqu oottidi, ‘Ta aawau Abrahaamaa, tana maara. Taani ha tamaa lacuwan paxa kaa7ettiyo gishshau, ba kushiyaa biradhdhiyaa xeeraa haattan yeddidi, yiidi ta inxxarssaa irxxissanau Al77aazara taakko yeddarkkii’ yaagiis.

25 “SHin Abrahaami yaagiis; ‘Ta na7au, neeni ne de7uwaa wodiyan lo77obaa ekkin, Al77aazari iitabaa ekkidoogaa hassaya; shin ha77i i hagan ufaiddiyo wode, neeni paxa kaa7ettaasa. 26 Hegaa bolli qassi haggaa baggaara de7iyaageetussi intte baggi pinnanau danddayettenna mala, qassi yaara de7iyaageetikka haa pinnanau danddayenna mala, nu giddooninne intte giddon gita afoi merettiis’ yaagiis.

27 “Yaagin dure bitanee, ‘Ta aawau, yaatikko, neeni Al77aazara ta aawaa soo yeddana mala, nena woossais. 28 Aissi giikko, taassi ichchashu ishannti de7oosona. Eti qassi ha meto sohuwaa yeenna mala, etau Al77aazari biidi markkatto’ yaagiis.

29 “SHin Abrahaami, ‘Muuseenne hananabaa yootiyaageeti xaafido maxaafai etau de7ees; he maxaafai giyoogaa eti siyona’ yaagiis.

30 “Dure bitanee, ‘CHii, ta aawau Abrahaamaa, heggaa gidenna; shin issi urai haiquwaappe denddidi, etakko biikko, eti bantta nagaraappe simmana’ yaagiis.

31 “Abrahaami, ‘Eti Muuseenne hananabaa yootiyaageeti xaafido maxaafaappe siyana xayikko, harai atto haiquwaappe issi urai denddikkokka ammanokkona’ giis” yaagiis.

## 17

### *Xubiyaabaa, Atto Geettaabanne Ammanuwaabaa (Maatiyoosa 18:6-7,21-22; Marqoosa 9:42)*

1 Yesuusi ba erissiyo ashkkarata hagaadan yaagiis; “Asa balettiyaabai yeennan attenna; shin he balettiyaabaa ehiya uraassi aayye7ana. 2 Ha guutta naatuppe issuwaa balettiyoogaappe gaacchiyo woxaa ba qooriyan qachchidi, abban mitettiyoogee au keha. 3 Intte huuphiyaassi naagettite.

“Ne ishahi nena naaqqikko, a zora. Qassi nagaraappe i simmikko, ayyo atto ga. 4 I issi gallassi nena laappuntto naaqqidi, he gallassi laappuntto, ‘Taani nagaraappe simmaas’ yaagiiddi neekko yiikkokka, ayyo atto ga” yaagiis.

5 Godai kiittidoogeeti, “Nuussi ammanuwaa gujja” yaagidi Godaa oichchidosona.

6 Yaagin Godai zaaridi, “Inttessi sanaafici giyo qii mittee aifiyo gakkiiya ammanoi de7idaakko, intte ha ettaa, ‘Ettau, neeni shodettada abban toketta’ yaagana; ha ettaikka qassi inttessi azazettana.

### *Ashkkarai Oottanau Bessiyo Oosuwaa*



<sup>7</sup> “Intte gidдон goyiya woi miizza heemmiya ashkkari de7iyo asi geella de7ikko, ba ashkkarai oottidi simmidaagaa, ‘Qumaa maanau shiiqa utta’ gii? <sup>8</sup> Gaana xayikko, ‘Taani maana kahuwaa giigissa; ne afalaa laammada, taani miishiininne uyishin, taassi kiitetta. Guyyeppe neessi ma, uya’ yaagennee? <sup>9</sup> I ba azazuwaa polido gishshau, ba ashkkaraa galatii? <sup>10</sup> Hegaadan inttekka azazettido ubbabaa oottido wode, ‘Nuuni pattenna aille; nu ooso xalaalaa oottida’ yaagite” yaagiis.

*Yesuusi Inchchirichchai Oiqqido Tammu Asata Pattiis*

<sup>11</sup> Yesuusi Yerusalaame biiddi, Galiilappenne Samaariyaappe gidduwaara aadhdhiis. <sup>12</sup> I issi qeeri katamiyo geliyo wode, inchchirichchai oiqqido tammu asati haahuwan eqqidaageeta be7iis. <sup>13</sup> Eti bantta qaalaa xoqqu oottidi, “Godaa Yesuusaa, hai nuna maararkkii!” yaagidosona.

<sup>14</sup> Yaagin Yesuusi eta be7idi, “Biidi, intte bollaa qeeseta bessite” yaagiis.

Yaagin biiddi, ogiyan inchchirichchaappe paxidosona. <sup>15</sup> Etappe issoi bau paxidoogaa be7idi, ba qaalaa xoqqu oottidi, Xoossaa galatiiddi simmiis. <sup>16</sup> Qassi Yesuusa galatiiddi, a tohuwan kunddiis. Bitanee Samaariyaa asa.

<sup>17</sup> Yesuusi zaaridi, “Inchchirichchaappe paxidaageeti tamma gidokkonaa? Yaatin uddufunati awan de7iyoonaa? <sup>18</sup> Ha hara dere bitaniyaappe harai Xoossaa galatanau simmidai baawee?” yaagiis. <sup>19</sup> Yesuusi a, “Denddada ba; nena ne ammanoi pattiis” yaagiis.

*Xoossaa Kawotettaa Yuussaa  
(Maatiyoosa 24:23-28,37-41)*

<sup>20</sup> Parisaaweti, “Xoossaa kawotettau aude yaanee?” yaagidi Yesuusa oichchidosona.

Oichchin Yesuusi, “Xoossaa kawotettau beettiya malaataara yeenna. <sup>21</sup> Qassi Xoossaa kawotettau intte gidдон de7iyo gishshau, ooninne a hageeho, hagan de7ees; woi hegan de7ees geenna” yaagiis.

<sup>22</sup> Yesuusi erissiyo ashkkaratussi odiiddi, hegaadan yaagiis; “Asa Na7ai beettana gallassatuppe issuwaa intte amottana; shin be7ekketa. <sup>23</sup> Qassi eti inttena, ‘Hagan xeellite’ woi ‘Hegan xeellite’ yaagana. SHin eta kaallidi, etaara booppite. <sup>24</sup> Wolqqanttai wolqqammidi, saluwan ha gaxaappe ya gaxaa gakkidi poo7issiyooagaan, Asa Na7ai ba gallassi hegaadan hanana. <sup>25</sup> SHin koiroora i daro waayiyaa ekkanaunne ha wodiyaan asan ixettanau bessees.

<sup>26</sup> “Ta yuussai, Asa Na7aa yuussai, Nohe wodiyan hanidoogaadan, hegaadankka hanana. <sup>27</sup> Nohee markkabiyan gelido gallassai gakkanaashin, asai meesinne uyees, qassi attumaasai machcheesinne maccaasai azinaa gelees; bashshiya haattai yiidi, asa ubbaa woriis.

<sup>28</sup> “Qassi Looxe wode hanidoogaadankka hegaadan hanana; eti moosona, uyoosona, shammoosona, baizzoosona, kattaa zeroosona, keettaakka keexxoosona. <sup>29</sup> SHin Looxee Sadoomappe kiyido gallassi, Xoossai saluwaappe tamaanne eexxiya shuchchaa bukissidi, ubba asaa wurssiis.

<sup>30</sup> “Asa Na7ai qoncciyaa beettiyo gallassi hegaadan hanana. <sup>31</sup> He gallassi keettaa huuphiyan de7iyaagee ba son de7iya miishshaa ekkanau wodhdhoppo; hegaadan goshshan de7iyaageekka guyye simmoppo. <sup>32</sup> Ane Looxe machcheebaa qoppite! <sup>33</sup> Ba shemppuwaa ashshana koyiya ubbai bashshana; shin ba shemppuwaa bashshiya ubbai ashshana. <sup>34</sup> Taani intteyyo odiyoogee aibee giikko, he gallassa qammi naa77u asati issi hiixan zin77ana; etappe issuwaa efin, issoi attana. <sup>35</sup> Naa77u maccaasati issi sohuwan gaacciyaageetuppe issinniyo efin, issinniyaa attana. <sup>36</sup> Naa77u asati gaden oottiyaageetuppe issuwaa efaana; issoi attana” yaagiis.

<sup>37</sup> Erissiyo ashkkarati qassi a, “Godau, hegee awan hananee?” yaagidosona.

Yaagin Yesuusi, “Gauxai de7iyooosaa ankkoii shiiqana” yaagidi, etassi odiis.

## 18

### *Hiyyeesa Am77iyoonne Makkalanchcha Daannaa*

<sup>1</sup> Erissiyo ashkkarati ubba gallassi salettennan woossana mala, Yesuusi etassi leemisuwaa odiiddi, <sup>2</sup> “Issi kataman Xoossaassi yayyenna qassi asassikka yeellatenna issi daannai de7ees. <sup>3</sup> He kataman issi am77e maccaasiyaa de7iyaara he daannaakko ya yaada, ‘Taaninne ta baarigaarai mootettiyo yohuwaa taassi pirdda’ yaagausu.

<sup>4</sup> “Daannai daro wodiyaasappe iyyo pirddennan ixxiis; shin ba wozanan qoppiiddi, ‘Taani Xoossaassi yayyennan woi asassi yeellatennan ixxiikkonne, <sup>5</sup> ha am77e maccaasiyaa tana waissiyo gishshau, qassi ubba wode ya yaada tana daafurssenna mala, iyyo pirddana’ giis” yaagiis.

<sup>6</sup> Qassikka Godai, “He makkala daannai giidoogaa siyite. <sup>7</sup> Yaatin bana maaddana mala, gallassinne qammi baakko waassiya doorettida asaassi Xoossai pirddennee? I etassi eesuwan zaarennee? <sup>8</sup> Taani inttessi odiyoogee aibee giikko, i eesuwan etassi pirddana; shin Asa Na7ai yiyo wode, ha sa7an ammano demmanee?” yaagiis.

### *Otorettiya Parisaawiyaanne Bana Ziqqi Oottida Giiraa SHiishshiya Bitaniyaa*

<sup>9</sup> Banttana xillo giidi, hara asa ubbaa kariyaageetussi Yesuusi issi leemisuwaa odiiddi, hagaadan yaagiis; <sup>10</sup> “Naa77u asati Xoossaa woossanau Beeta Maqidasiyaa kiyidosona; etappe issoi Parisaawe, issoi giiraa shiishshiyaagaa. <sup>11</sup> Parisaawee eqqidi, ba wozana gidдон woossiiddi, ‘Xoossau, taani hara asa ubbaadan, worddanchcha, uuzenne shaaramuxa woi ha giiraa shiishshiyaagaa mala gidenna gishshau, nena galatais. <sup>12</sup> Saaminttan saaminttan naa77utoo xoomais; taani demmiyo miishsha ubbaappe asirataa immais’ yaagiis.

<sup>13</sup> “SHin giiraa shiishshiyaagee haahuwan eqqidi, harai atto saluwaa xeellanaukka dosibeenna. SHin, ‘Xoossau, taani nagaranchcha; tana maara’ yaagidi, ba tiraa bubuxiis.

<sup>14</sup> “Taani inttessi odiyoogee aibee giikko, hagee Parisaawiyaaappe xillidi, ba soo biis. Aissi giikko, bana xoqqu oottiya urai kauyyana; shin bana kaushshiya urai xoqqu gaana” yaagiis.

### *Yesuusi Guutta Naata Anjjiis*

*(Maatiyoosa 19:13-15; Marqqoosa 10:13-16)*

<sup>15</sup> Yesuusi guutta naata bochhana mala, issi issi asai naata akko ehiis; shin erissiyo ashkkarati hegaa be7idi, he asaa hanqgettidosona. <sup>16</sup> Yesuusi guutta naata baakko xeesidi, “Guutta naati taakko yiyoogaa diggoppite; aissi giikko, Xoossaa kawotetta hageetu malaassa. <sup>17</sup> Taani intteyyo tumaa gais; Xoossaa kawotettaa guutta na7adan ekkenna urai ooninne he kawotettaa mulekka gelenna” yaagiis.

### *Dure Bitaniyaa Oishaa*

*(Maatiyoosa 19:16-30; Marqqoosa 10:17-31)*

<sup>18</sup> Yihudaa biittaa haariyaageetuppe issoi, “Lo77o tamarissiyaagoo, taani merinaa de7uwaa laattanau ai oottoo?” yaagidi Yesuusa oichchiis.

<sup>19</sup> Yesuusi zaaridi, “Tana aissi lo77o gai? Xoossaa xalaalaappe attin, hara lo77oi ooninne baawa; <sup>20</sup> Xoossaa azazuwaa, ‘SHAaramuxoppa; woroppa; wuuqqoppa; wordduwaa markkattoppa; ne aawaanne ne aayyiyo bonchcha’ yaagiyaagaa eraasa” yaagiis.

<sup>21</sup> Bitanee, “Taani hegaa ubbaa naatettaasappe doommada ha77i gakkanaassikka naagais” yaagiis.

<sup>22</sup> Yesuusi hegaa siyidi bitaniyaa, “Ha77ikka neeyyo issibai paccées; neeyyo de7iyaabaa ubbaa baizzada he miishshaa hiyyeesau gisha; neeni saluwan duretana; yaatada yaada tana kaalla” yaagiis. <sup>23</sup> SHin bitanee hegaa siyido wode, i daro dure gidiyo gishshau qarettiis.

<sup>24</sup> Bitanee daro qarettidoogaa Yesuusi be7idi, “Dure asi Xoossaa kawotettaa gelanaagee waani metanddeeshsha! <sup>25</sup> Dure asi Xoossaa kawotettaa gelanaagaappe gaameelai marppiyaa xoo7iyaara aadhdhanaagee matattees” yaagiis.

<sup>26</sup> Hegaa siyidaageeti, “Yaatin attanau danddayiyai oonee?” yaagidosona.

<sup>27</sup> SHin Yesuusi zaaridi, “Asau danddayettennabai Xoossau danddayettes” yaagiis.

<sup>28</sup> PHeexiroosi Yesuusa, “Be7a; nuuni nuussi de7iya ubbabaa aggi bayidi, nena kaallida” yaagiis.

<sup>29-30</sup> Yesuusi, “Taani inttessi tumaa gais; Xoossaa kawotettaa gishshau giiddi, keettaa woi aawaanne aayyiyo, woi ishantta, woi machchiyo, woi naata aggida asi ooninne ha77i baassi de7iyaagaappe daruwaa ekkana; qassi sinttappe yaana wodiyankka merinaa de7uwaa ekkana” yaagiis.

*Yesuusi Ba Haiquwaabaa Heezanttuwaa Yootiis  
(Maatiyoosa 20:17-19; Marqoosa 10:32-34)*

<sup>31</sup> Yesuusi tammanne naa77u erissiyo ashkkarata banaara efiiddi eta, “Nuuni ha77i Yerusalem kiyettes; hananabaa yootiyaageeti xaafido tabai, Asa Na7aabai, ubbai polettana. <sup>32</sup> Aissi giikko, eti tana Aihuda gidenna asaassi aattidi immana; ta bolli qilliicana; cuchhana; qassi tana waissana; <sup>33</sup> eti tana lissuwan garafanne worana; shin taani heezantto gallassi haiquwaappe danddana” yaagiis.

<sup>34</sup> SHin erissiyo ashkkaratussi i yootidobaappe aibinne gelibeenna; i yootidobai etappe geemmin, eranau danddayibookkona.

*Yesuusi Yarkkon Issi Qooqiyaa Pattiis  
(Maatiyoosa 20:29-34; Marqoosa 10:46-52)*

<sup>35</sup> Yesuusi Yarkko gakkana matidaashin, issi qooqe bitanee woossiiddi, ogiyaa doonan uttiis. <sup>36</sup> Uttidaagee daro asai aadhdhiyoogaa siyidi, “Hegee aibee?” yaagidi oichchiis.

<sup>37</sup> Asai, “Naazireeta Yesuusi aadhdhees” yaagidi ayyo yootiis.

<sup>38</sup> Yootin ba qaalaa xoqqu oottidi, “Daawita na7au, Yesuusaa, tana maararkkii!” yaagiis.

<sup>39</sup> Sinttan de7iyaageeti a, “Haizza!” giidi hanqqettidosona; shin i ba qaalaa kaseegaappekka keehi xoqqu oottidi, “Daawita na7au, tana maararkkii!” yaagiis.

<sup>40-41</sup> Yesuusi eqqidi, he qooqe bitaniyaa baakko ehaana mala azaziis. Qooqee akko yiidi gakkana matishin, “Taani neeyyo ai oottanau koyai?” yaagidi a oichchiis.

Oichchin qooqee, “Ta Godau, taani xeellanaagaa koyais” yaagiis.

<sup>42</sup> Yaagin Yesuusi a, “Xeella; nena ne ammanoi pattiis” yaagiis. <sup>43</sup> Sohuwaarakka a aifee xeelli aggin, Xoossaa galatiiddi, Yesuusa kaalli bayiis.

Asa ubbai hegaa be7idi, Xoossaa galatiis.

## 19

*Yesuusanne Zakkiyoosa*

<sup>1</sup> Yesuusi Yarkko giyo katamaara aadhdhees. <sup>2</sup> Hegan Zakkiyoosa giyo giiraa shi-ishshiyaageetu alaafee de7ees; i dure asa. <sup>3</sup> Zakkiyoosi Yesuusi oonakko be7anau koyiis; shin i qantta gidido gishshaunne asai daro gidido gishshau, be7anau danddayibeenna. <sup>4</sup> Yesuusi hegara aadhdhiyo gishshau, asaappe sinttau woxxidi, Yesuusa be7anau issi ettaa xeeraa kiyiis.

<sup>5</sup> Yesuusi he sohuwaa gakkiiiddi, pude xeellidi, “Zakkiyoosaa, taani hachchi ne son pe7anau bessiyo gishshau, eesuwan wodhdha” yaagiis.

<sup>6</sup> Zakkiyoosi eesuwan ettaappe wodhdhidi, ufaissan Yesuusa mokkiis. <sup>7</sup> Hegaa be7ida asai ubbai, “Hagee nagaranchchaa son imatettanau geliis” yaagidi zuuzummiis.

<sup>8</sup> SHin Zakkiyoosi eqqidi Godaa, “Ta Godau, taani taassi de7iya ubbabaappe bag-gaa hiyyeesau immana; qassi ooppenne wordduwan ekkidobaa gidikko, i bashshido mehiyaassi oiddu kushiya ayyo zaarana” yaagiis.

<sup>9</sup> Yesuusi Zakkiyoosassi yootiiddi, “Neenikka Abrahaama zeretta gidiyo gishshau, atotettai hachchi ha keettaa yiis. <sup>10</sup> Aissi giikko, taani, Asa Na7ai, bayidaagaa koy-anaunne ashshanau yaas” yaagiis.

*Tammu Ashkkaratu Leemisuwaa  
(Maatiyoosa 25:14-30)*

<sup>11</sup> Asai hegaa siyiyo wode, Yesuusi Yerusalaame matido gishshaunne etassi Xoossaa kawotettai beetana matidobaa milatido gishshau, etassi leemisuwaa yootiis. <sup>12</sup> Hegaa gishshau, hagaadan yaagiis; “Issi gita asi baassi kawotettaa ekkidi yaanau, haaho dere biis. <sup>13</sup> Ba ashkkaratuppe tammata xeesidi, ‘Taani yaanaashin, hagan zal77ite’ yaagidi, tammu paunddiyaa etassi immiis.

<sup>14</sup> “SHin a biittaa asai a ixixidi, ‘Hagee nu bolli kawotanau koyokko’ yaagiiddi, asaa a geeduwaa kiittiis.

<sup>15</sup> “He gita asi kawotettaa ekkidi simmiis. Simmidi ba miishshaa immido ashkkarati zal77idi, huuphiyan huuphiyan woqqaa worissidaakko eranau, eta baakko xeegeessis.

<sup>16</sup> “Xeegettida ashkkaratuppe koiroogee yiidi, ‘Ta godau, ne miishshai tammu paundde wodhdhiis’ yaagiis.

<sup>17</sup> “A godai a, ‘Hayyanaashsho! Neeni lo77o ashkkara; neeni ha qii guuttaban ammanettidaagaa gidido gishshau, taani nena tammu katamatuyyo alaafe oottana’ yaagiis.

<sup>18</sup> “Naa77anttoi yiidi, ‘Ta godau, ne miishshai ichchashu paundde wodhdhiis’ yaagiis.

<sup>19</sup> “A godai a, ‘Neenikka ichchashu katamatuyyo alaafe gida’ yaagiis.

<sup>20</sup> “Heezanttoi yiidi, ‘Taani curqqan xaaxada naaga wottido ne paunddiyo hanno be7a. <sup>21</sup> Aissi giikko, neeni meqetti baina asa gidiyo gishshau, neessi yayyaas. Neeni nebaa gidennabaa ekkaasa; zerabeennabaakka cakkaasa’ yaagiis.

<sup>22</sup> “Yaagin, ‘Neeni iita ashkkara; ne doonai haasayidoban nena taani pirddana. Taani tabaa gidennabaa ekkiyaagaa, qassi zerabeennabaa cakkiya meqetti baina asa gidiyoogaa eradasa. <sup>23</sup> Yaatin ta miishshaa aissi dichchau immabeikkii? Taani simmiyo wode ta miishshaa woriyaara ekkanaagaa shin attiis’ yaagiis.

<sup>24</sup> “He sohuwan eqqida asata, ‘He paunddiyaa appe wotti ekkidi, tammu paunddee de7iyooagaayyo immite’ yaagiis.

<sup>25</sup> “Yaagin, ‘Godau, ayyo tammu paunddee de7ees’ yaagidosona.

<sup>26</sup> “ ‘Taani intteyyo odais; de7iyo ubbau harai gujettana; shin bainaagaappe harai atto, he de7iyaageekka appe ekettiichhana. <sup>27</sup> SHin ha bantta bolli taani kawotana mala dosibeenna ta morkketa haa ehiidi, ta sinttan goora7ite’ giis” yaagiis.

*Yesuusi Gita Bonchchuwan Yerusalaame Geliis  
(Maatiyoosa 21:1-11; Marqqoosa 11:1-11; Yohaannisa 12:12-19)*

<sup>28</sup> Yesuusi hagaadan yaagidi haasayidoogaappe guyyiyan, etappe sinttatidi, Yerusalaame biis. <sup>29</sup> Yesuusi Dabira Zaite giyo deriyaa lanqqiyan de7iya Beetafaaganne Biitaaniyaa giyo katamata matido wode, erissiyo ashkkaratuppe naa77aa kiittidi, <sup>30</sup> “Intteppe sinttan de7iya qeeri katamaa biite; biidi yaa gelosaara biron ooninne mulekka toggibeenna qashuwan de7iya hare maraa intte demmana; a birshshidi, haa ekki yiite. <sup>31</sup> Ooninne inttena, ‘Hegaa aissi birshsheetii?’ yaagidi oichchikko, ‘Godai haggaa koyees’ yaagite” yaagiis.

<sup>32</sup> Kiitettidaageeti biidi, Yesuusi banttassi odidoogaadan demmidosona. <sup>33</sup> Eti hare maraa birshshishin, a godati, “Hare maraa aissi birshsheetii?” yaagidosona.

<sup>34</sup> Yaagin eti, “Godai haggaa koyees” yaagidi, <sup>35</sup> hare maraa Yesuusakko ehiidi, bantta maayuwaa a zokkuwan hiixxidi, Yesuusa togissidosona. <sup>36</sup> Yesuusi toggidi biishin, bantta maayuwaa i biyo ogiyan hiixxidosona.

<sup>37</sup> I Dabira Zaita Deriyaa dugettaa wodhdhana matishin, a kaalliya ubbai Xoossai oottido malaata ubbaa be7ido gishshau ufaittidi, Xoossaa galatanau bantta qaalaa xoqqu oottidi,

<sup>38</sup> “Godaa sunttan yiya kawoi  
anjjettidaagaa;

saluwan sarotettaa gido.

Qassi salo ubbaappe bolla saluwan  
de7iya Xoossai bonchchetto”

yaagidosona.

<sup>39</sup> Asaa giddoppe issi issi Parisaaweti Yesuusa, “Tamaariissiyaagoo, ne erissiyo ashkkarata haizzite giikkii?” yaagiis.

<sup>40</sup> Yesuusi zaaridi, “Taani intteyyo odais; hageeti co77u giikko, shuchchaikka waasana” yaagiis.

<sup>41</sup> Katamaa gakkanau i matidi, katamaa be7ido wode qarettidi yeekkiiddi, <sup>42</sup> hagaadan yaagiis; “Sarotettaa yiyo ogiyaa hachchi nenakkonne erarkkiishsha! SHin ha77i hegee ne aifiyaappe geemmiis. <sup>43</sup> Aissi giikko, ne bolli yaana wodee de7ees; he wode ne morkketi urqqaa nukkidi, godaa essana. He godan nena yuushshi aattidi diridi, ubba baggaara neeyyo ogiyaa gorddana. <sup>44</sup> Nenanne ne dirssaa gidдон de7iya ne asaa mentterettana. Xoossai nena be7anau yiido wodiya neeni akeekabeenna gishshau, ne morkketi shuchcha ubbaa issuwaa issuwaa bollaappe denttidi laalana” yaagiis.

*Yesuusi Beeta Maqidasiyan Zal77iyaageeta Yedettiis*

*(Maatiyoosa 21:12-17; Marqqoosa 11:15-19; Yohaannisa 2:13-22)*

<sup>45-46</sup> Yesuusi Beeta Maqidasiyaa gelidi, hegan zal77iyaageeta, “Xoossaa maxaafan, ‘Ta keetta Xoossaa woossiyo keetta gidana’ geetettidi xaafetti uttiis; shin intte a panggati qosettiyo gonggolo kessideta” yaagidi eta yedetaa doommiis.

<sup>47</sup> Yesuusi ubba gallassi Beeta Maqidasiyan tamarissee. Qeese halaqati, higgiiya tamarisseegeetinne gita asai a xaissanau koyoosona. <sup>48</sup> SHin asai ubbai a haasayaappe issoi attennan ezggi uttido gishshau, a woriyo ogee etau xayiis.

## 20

*Yesuusa Maataa Bolli Denddida Oishaa*

*(Maatiyoosa 21:23-27; Marqqoosa 11:27-33)*

<sup>1</sup> Issi gallassi Yesuusi asaa tamarisseegeetinne wonggeliyaa mishiraachchuwaa yootiiddi Beeta Maqidasiyan de7ishin, qeese halaqatinne higgiiya tamarisseegeeti cimatuura issippe akko yiidi a, <sup>2</sup> “Neeni haggaa oottanau neeyyo ai alaafetetti de7ii? Woi neeyyo ha alaafetettaa immidai oonee? Ane nuussi oda” yaagidosona.

<sup>3</sup> Yesuusi zaaridi, “Taani qassi inttena issibaa oichchais; taassi odite; <sup>4</sup> Yohaannisi xammaqiyo alaafetettaa ekkidoi Xoossaappeeyye woi asappee?” yaagiis.

<sup>5</sup> Eti bantta gidдон palamaa doommidi, “Nuuni woiganee? ‘Xoossaappe yiis’ yaagikko, i nuna, ‘Yaatin Yohaannisi yootidoogaa aissi ammanibeekketii?’ yaagana.

<sup>6</sup> SHin nuuni, ‘Asappe yiis’ yaagikko, ha asai ubbai Yohaannisi hananabaa yootiyaagaa gididoogaa eri uttido gishshau, nuna shuchchan caddana” yaagidosona.

<sup>7</sup> Hegaa gishshau eti, “He alaafetettaa i awappe ekkidaakkonne nuuni erokko” yaagidosona.

<sup>8</sup> Yesuusi, “Taanikka haggaa ai alaafetettan oottiyaakko, intteyyo odikke” yaagiis.



*Woiniyaa Turaa Gidduwaa Oottiya Goshshanchchata  
(Maatiyoosa 21:33-46; Marqqoosa 12:1-12)*

<sup>9</sup> Yaagidi asaassi ha leemisuwaa yootiis; “Asa issoi woiniyaa turaanne tokkido sohuwaa kottau immidi, haaho dere biidi, daro gam77iis. <sup>10</sup> Woiniyaa aifiyaa maxiyo wodee gakkinn, woiniyaa aifiyaappe bana gakkiiyaagaa ekkidi yaana mala, issi ashkkaraa ba kottaawatukko kiittiis; shin kottaawati a ashkkaraa wadhdhidi, kushe mela yedettidosona. <sup>11</sup> Qassi hara ashkkaraa etakko kiittiis. Eti akka wadhdhidi kaushshidi, kushe mela yeddidosona. <sup>12</sup> Qassi heezzantto ashkkaraa kiittiis. Kiitti-doojaa masunxxissidi, woiniyaa turaa gidroppe gaxi kessi olidosona.

<sup>13</sup> “Woiniyaa turaa godai, ‘Yaatin taani waatoo? Taani siiqiyo ta na7aa kiittana; eti a bonchchanaakkonne ooni erii’ yaagidi qoppiis.

<sup>14</sup> “SHin kottaawati a be7idi, bantta giddon haasayiiddi, ‘Hagaa laattanaagee a; gadiyaa nuuni laattanau a woroos’ yaagidosona. <sup>15</sup> Na7aa woiniyaa turaa gidroppe gaxaa kessidi woridosona.

“Simmi woiniyaa turaa godai eta waatanee? <sup>16</sup> Yiidi, he kottaa oottiyaageeta wori wurssidi, woiniyaa turaa kottaa oottiya hara asau immana” yaagiis.

Asai heгаа siyidi, “Hegee hanoppo” yaagiis.

<sup>17</sup> Yesuusi etakko xeellidi, “Yaatin, ‘Gimbbiyaageeti karidi ixido shuchchai godaa xaphuwaa minttiya, ubbaappe aadhdhiya shuchcha gidiiis’ geetettidi maxaafan xaafettidaagee hegee aibee? <sup>18</sup> He shuchchaa bolli kunddiya ubbai meqerettana; shin he shuchchai asa bolli kunddikko, he kunddido uraa gaaccana” yaagiis.

*Giiraa Giironii Aggonii Giya Oishaa  
(Maatiyoosa 22:15-22; Marqqoosa 12:13-17)*

<sup>19</sup> Higgiyaa tamarissiyaageetinnee qeese halaqati Yesuusi ha leemisuwaa bantta bolli odidoogaa erido gishshau, he wode a oiqqanau koyidosona; shin asaassi yayyidosona.

<sup>20</sup> Hegaassi injjetiya wodiyaa naagidi, Yesuusa haasayissiiddi, a doonaappe balabaa demmidi, a oiqqinne deriyaa haariyaagaa wolqqaassinnee a alaafettaassi aattidi immana mala, xillo milatiiddi xillo gidenna kafota akko yeddidosona. <sup>21</sup> He kafoti Yesuusa, “Tamarissiyaagoo, neeni haasayiyoogeenne tamarissiyoogee likke gidiyoojaa nuuni eroos; neeni Xoossaa ogiyaa tumatettan tamarissiyoojaaappe attin, asa shaakkennaa-gaa eroos. <sup>22</sup> Nuuni Roome biittaa Kawuwaa Qeesaarayyo giiraa giiriyoogee wogeeyye woga gidennee?” yaagidi oichchidosona.

<sup>23</sup> SHin Yesuusi eti cimmiyo cimuwaa eridi, “Tana aissi paacceetii? <sup>24</sup> Issi santtimiyaa tana bessite; ha santtimiyaa bolli de7iya merainne sunntai oogee?” yaagidi eta oichchiis.

Oichchin, eti zaaridi, “Roome biittaa Kawuwaa Qeesaaraagaa” yaagidosona.

<sup>25</sup> Yesuusi eta, “Yaatikko Qeesaaraagaa Qeesaarassi, Xoossaagaa Xoossaassi immite” yaagiis.

<sup>26</sup> Asaa sinttan a haasayan a oiqqiyoojaa demmanau danddayibookkona; heгаа gishshau, i zaarido zaaruwan garamettidi, co77u giidosona.

*Haiquwaappe Denddiyoobaa Oichchido Oishaa  
(Maatiyoosa 22:23-33; Marqqoosa 12:18-27)*

<sup>27</sup> Haiqqida asi denddena giya Saaduqaawetuppe issi issi asati Yesuusakko yiidi, <sup>28</sup> hagaadan yaagidi, a oichchidosona; “Tamarissiyaagoo, Muusee nuuyyo higgiyaa xaafiiddi, ‘Machcho ekkida asi na7a yelennan haiqqikko, he haiqqidaagaa ishai a machchiyo aissidi, ba ishaayyo na7a yelanau bessees’ yaagiyaagaa xaafiis. <sup>29</sup> Issi wode laappun ishantti de7iyaageetuppe bairai machchiyo ekkidi, na7a yelennan haiqqiis.

<sup>30</sup> Haiqqin naa77anttoi o aissii; <sup>31</sup> qassi heezanttoikka o aissii; hegaadan laappunatikka na7a yelennan haiqqidosona. <sup>32</sup> Hegaappe guyyiyan, qassi he maccaasiyaa haiqqaasu. <sup>33</sup> Yaatin haiqqida asai haiquwaappe denddiyo gallassi, a etappe augaayyo machcho gidanee? Aissi giikko, laappunatikka o ekkidosona” yaagidosona.

<sup>34</sup> Yesuusi zaaridi, etassi hegaadan yaagiis; “Ha wodiyaa asai machchiyo ekkees; maccaageeti azinaa geloosona. <sup>35</sup> SHin haiquwaappe denddidi, sinttappe yiya wodiyan de7anau bessiya attumaasainne maccaasai ekkennanne gelenna. <sup>36</sup> Aissi giikko, eti kiitanchchatu mala gidiyo gishshau, naa77anttuwaa haiqqanau danddayokkona. Qassi eti haiquwaappe denddido gishshau, Xoossaa naata. <sup>37</sup> SHin haiqqida asai denddanabaa Muusee geeshshidi erissiis. Xaragettiya buuraabaa odiya sohuwankka Godaabaa i yootiiddi, ‘Abrahaama Xoossaa, Yisaaqa Xoossaa, Yaaqooba Xoossaa’ yaagiis. <sup>38</sup> Ubbai ayyo merinau de7iyaageeta gidido gishshau, Xoossai merinau de7iyaageetu Xoossaa gidiyooaappe attin, haiqqidaageetu Xoossaa gidenna” yaagiis.

<sup>39</sup> Higgiyaa tamarissiyaageetuppe issoi issoi Yesuusa, “Tamarissiyaagoo, neeni giidoogee lo77o” yaagiis. <sup>40</sup> Aissi giikko, naa77anttuwaa issibaakka a oichchanau xalibookkona.

### *Yesuusi Oonee Giya Oishaa*

*(Maatiyoosa 22:41-46; Marqqoosa 12:35-37)*

<sup>41</sup> Yesuusi qassi eta yaagiis; “Eti woigidi Kiristtoosa Daawita na7a giyoonaa? <sup>42-43</sup> Aissi giikko, Daawiti Mazamure Maxaafan, ‘Godai ta Godaa; “Taani ne morkketa neeni yedhdha eqqiyooabaa oottana gakkanaassi, hagan taappe ushachcha baggaara utta” giis’ yaagiis.

<sup>44</sup> “Daawiti Kiristtoosa, ‘Godaa’ giidi xeesikko, yaatin Kiristtoosi waanidi, Daawita na7a gidii?” yaagiis.

### *Yesuusi, “Muuse Higgiyaa Tamarissiyaageetuppe Naagettite” yaagiis*

*(Maatiyoosa 23:1-36; Marqqoosa 12:38-40)*

<sup>45</sup> Yesuusi ba erissiyo ashkkaarata asai ubbai siyishin, <sup>46-47</sup> “Higgiyaa tamarissiyaageetuppe naagettite; eti adussa maayuwaa maayidi yuuyiyoogaanne giyaa sohuwankka asai eta bonchchidi sarotiyooogaanne dosoosona; Aihuda woosa keettan daro lo77iya oidiyaa dosoosona; asi banttana imattiyooosankka bonchcho sohuwaa dosoosona. Eti am77etu keettaa bonqqidi, banttau lo77o milatanau Xoossaa woosaa adussoosona; eti ubbaappe aadhdhiya pirddaa ekkana” yaagiis.

## 21

### *Am77ee Muxuwaataa*

*(Marqqoosa 12:41-44)*

<sup>1</sup> Yesuusi ubbasaa xeelliiddi, dure asai ba miishshaa Beeta Maqidasiyan muxuwaataa yeggiyo saaxiniyan yeggiyoogaa be7iis. <sup>2</sup> Issi daro hiyyeesa am77iyaa naa77u bakkanna hegan yeggiyoogaa be7idi, <sup>3</sup> “Taani intteyyo tumaa gais; ha hiyyeesa am77iyaa ubbaappe darissada yeggaasu. <sup>4</sup> Aissi giikko, hageeti ubbai bantta palahida miishshaappe yeggidosona; shin a ba pacaappe bau de7iya aquwaa muleera imma aggaasu” yaagiis.

### *Beeta Maqidasee Qolettanaagaa Yesuusi Kasetidi Yootiis*

*(Maatiyoosa 24:1-2; Marqqoosa 13:1-2)*

<sup>5</sup> Etappe issoi issoi Beeta Maqidasee lo77o shuchchaaninne Xoossaassi imettidaban lo77idaagaa haasayishin Yesuusi, <sup>6</sup> “Ha intte be7iyo ubbai issi shuchchi attennan, ubbai qolettana wodee yaana” yaagiis.

<sup>7</sup> Yesuusi erissiyo ashkkarati, “Tamaarissiyaagoo, yaatin, hegee aude hananee? Hegee hanana wodiya erissiya malaatai aiba gidanee?” yaagidi a oichchidosona.

*Yesuusi Meto Wodeenne Ufaissa Wodee Yaanaagaa Yootiis*  
(Maatiyoosa 24:3-14; Marqqoosa 13:3-13)

<sup>8</sup> Yesuusi, “Baloppite; naagettite; aissi giikko, daro asati ta sunttan, ‘Taani Kiristtoosa; wodee matattiis’ yaagiiddi, yaana. Eta kaallidi booppite. <sup>9</sup> Olanne ooshsha siyiyo wode dagammoppite; aissi giikko, heгаа mala yohoi koiroora hanana bessees; shin hegee wurssettai gakkana matiis giyoogaa gidenna” yaagiis.

<sup>10</sup> He wode Yesuusi haasayiiddi, “Deree deriyaa bolli, kawotettai kawotettaa bolli denddana. <sup>11</sup> Biittai wolqqappe qaaxxiyoogee, daro sohuwan koshai, wurssiya harggee yaana. Yashissiyaabainne gita malaatai saluwaappe yaana.

<sup>12</sup> “SHin ha ubbai hananaappe kase, eti inttena oiqqananne waissana; ta sunttaa gishshau, inttena Aihuda woosa keettaa asatuyyo aattidi immananne; qasho keet-tankka qashissana. Qassi inttena kawuwaa sinttinne deriyaa haariyaagaa sintti efaana. <sup>13</sup> Hegee inttessi ta gishshau, eta sinttan markkattanau lo77o wode gidana. <sup>14</sup> Hegaa gishshau, issibaa intte wozanan oiqqite; hegee aibee giikko, intte waatidi zaaruwaa immanaakko, koiroora hirgoppite giyoogaa. <sup>15</sup> Aissi giikko, intte morkketuppe ooninne inttenaara egettanaunne palamettanau danddayenna haasayaa minotettaanne aadhdhida erattettaa taani inttessi immana. <sup>16</sup> Harai atto inttena yelidaageetikka, ishantti, dabboti, laggetikka, inttena aattidi immana. Intteppekka issuwaa issuwaa eti worana. <sup>17</sup> Ta sunttaa gishshau, inttena ubbai ixkana; shin <sup>18</sup> intte huuphiyaa binnaanaappe issoinne xayenna. <sup>19</sup> Danddayan intte intte shemppuwaa ashshana.

*Yesuusi Yerusalaame Bashshaabaa Yootiis*  
(Maatiyoosa 24:15-21; Marqqoosa 13:14-19)

<sup>20</sup> “SHin wotaaddaran Yerusalaamee diretti uttidaashin intte be7iyo wode, Yerusalaame xayoi matattidoogaa erana. <sup>21</sup> He wode Yihudan de7iyaageeti deriyaakko baqatona; katama gidon de7iyaageeti katamaappe kiyona; gaxa biittan de7iyaageeti katamaa geloppona. <sup>22</sup> Aissi giikko, Xoossaa maxaafatun xaafettidaagee ubbai polettanau, Xoossai halo kessiyo wodee haggaa. <sup>23</sup> He wode shahaara maccaasatuyyoonne xanttiya maccaasatuyyo aayye7ana; aissi giikko, sa7aa bollan gita metoi yaana. Ha asaa bollankka iita hanqqoi yaana. <sup>24</sup> Eti qara bisuwan qanxxettidi haiqqana; eti dere ubban omoodettana; Aihuda gidenna asai bantta wode polettana gakkanaashin, Yerusalaame katamaa yedhdhana.

*Kiristtoosa Naa77antto Yuussaa*  
(Maatiyoosa 24:29-31; Marqqoosa 13:24-27)

<sup>25</sup> “Awa aifiyaaninne aginan xoolinttiyan malaatai beettana; sa7an de7iya issi issi dere asai abbainne beetai guummiyoogaa siyidi, hananabai etassi erettennan ixxin metootana. <sup>26</sup> Asai sa7aa bolli yaanabaa ubbaa naagiiddi, yashshan daafurana; aissi giikko, saluwan de7iya wolqqati qaaxxana. <sup>27</sup> He wode taani, Asa Na7ai, wolqqaaranne gita bonchchuwaara shaara gidloora yiishin, eti be7ana. <sup>28</sup> Hegee hananau doommiyo wode, intte wozettiyo wodee matiyo gishshau, xoqqu giidi, pude xeellite” yaagiis.

*Balasiyaa Giyo Mittaa Leemisuwaa*  
(Maatiyoosa 24:32-35; Marqqoosa 13:28-31)

<sup>29</sup> Yesuusi etassi hagaadan yaagidi, leemisuwaa yootiis; “Balasiyo giyo mittiyoonne hara mitta ubbaa akeekite. <sup>30</sup> Eta haittai acaa doommiyoogaa intte be7iyo wode, bonee matattidoogaa intte ereeta. <sup>31</sup> Hegaadankka intte hegee haniyoogaa be7iyo wode, Xoossaa kawotettai gakkana matattidoogaa erana.

<sup>32</sup> “Taani intteyyo tumaa odais; ha ubbabai hanana gakkanaashin, ha wodiyaa asai haiqqiichchenna. <sup>33</sup> Saloinne sa7ai aadhdhana; shin ta qaalai mulekka aadhdhenna.

### *Minnidi Naagiyoogaa*

<sup>34</sup> “SHin muussan, ushshan, mattooninne aqossi hirggiyooban intte wozanai balenna mala, qassi intte qoppennan he gallassai intte bolli yeennaadan, inttena naagite. <sup>35</sup> Aissi giikko, he gallassai sa7a ubban de7iya asa ubbaa piriyaadan oiqqana. <sup>36</sup> Simmi intte he yaanabaa ubbaappe attanaunne ta sinttan Asa Na7aa sinttan, eqqanau danddayana mala, ubba wode Xoossaa woosan minnite” yaagiis.

<sup>37</sup> Yesuusi gallassi gallassi Beeta Maqidasiyan tamarissee; shin qammi qammi Dabira Zaita Deriyaa kiyidi aqees. <sup>38</sup> Asa ubbai i tamarisseyoogaa siyanau guuraara akko Beeta Maqidasiyaa yees.

## 22

### *Kiristtoosa Bolli Maqettidosona*

*(Maatiyoosa 26:1-5; Marqqoosa 14:1-2; Yohaannisa 11:45-53)*

<sup>1</sup> Oittaa miyo Paasikaa Baalaa gallassaa bonchchiyo wodee gakkana matiis. <sup>2</sup> Qeese halaqatinne higgiiyaa tamarisseyoogee asaassi yayyiyo gishshau, Yesuusa woriyo ogiyaa koyoosona.

### *Yihudai Yesuusa Aattidi Immanau Zorettaa Maayiiis*

*(Maatiyoosa 26:14-16; Marqqoosa 14:10-11)*

<sup>3</sup> Hegaappe guyyiyan, Seexaanai tammanne naa77u erissiiyo ashkkaratuppe is-suwan, Asqqoroota giyo Yihudan gelin, <sup>4</sup> Yihudai biidi, qeese halaqatuuranne Beeta Maqidasiyaa wotaaddarata azaziyaageetuura, “Yesuusa waata aattada immoo” giidi haasayiiis. <sup>5</sup> Haasayin eti ufaittidi, Yihudaa, “Nuuni neessi miishsha immana” yaagidi odidosona. <sup>6</sup> I ero yaagidi, asi bannasan etassi Yesuusa aattidi immanau injjetiyya wodiyaa wochchees.

### *Yesuusi Aihudatu Paasikaa Maanau Giigettiis*

*(Maatiyoosa 26:17-25; Marqqoosa 14:12-21; Yohaannisa 13:21-30)*

<sup>7</sup> Oittaa miyo gallassaa bonchchiyo wodee gakkiiis. He gallassan Paasikaassi anqqara dorssa shukkanau bessees. <sup>8</sup> Yesuusi PHeexiroosanne Yohaannisa, “Nuuni Paasikaa Baalaa bonchchiyo gallassan maana qumaa biidi giigissite” yaagidi kiittiis.

<sup>9</sup> Kiittin, “Nuuni awan giigissanee?” yaagidi a oichchidosona.

<sup>10</sup> Yesuusi eta hagaadan yaagiis; “Siyite; katamaa intte gelanau biishin, otuwan haataa tookkida issi bitanee inttenaara gaittana. A kaallidi, i geliyo keettaa gelite. <sup>11</sup> Gelidi keettaawaa, “Tamarisseyoogee nena, “Taani ta erissiiyo ashkkaratuura Paasikaa Baalaa bonchchiyo gallassan qumaa maanau imatta kifilee awaane?” yaagees’ yaagite. <sup>12</sup> Keettaawai inttena pooqiyaa bollan de7iya makettida aaho kifiliyaa bessana. Hegan qumaa giigissite” yaagiis.

<sup>13</sup> Eti biidi, Yesuusi banttau yootidoogaadan demmidi, yaani Paasikaa Baalaa bonchchiyo gallassi maana qumaa giigissidosona.

### *Qurbbaaniyaa (Godaa Kahuwaa) Ekkiyo Wogaa*

*(Maatiyoosa 26:26-30; Marqqoosa 14:22-26; Koiro Qoronttoosa 11:23-25)*

<sup>14</sup> Qumaa miyo wodee gakkin, Yesuusi ba kiittido tammanne naa77atuura issippe maanau uttiis. <sup>15</sup> Uttidi yaagiis; “Taani waayettanaappe kasetada, inttenaara ha Paasikaa Baalaa bonchchiyo gallassan miyo qumaa maanau daro amottaas. <sup>16</sup> Aissi giikko, taani inttessi odais; hegee Xoossaa kawotettan polettana gakkanaashin, taani naa77anttuwaa hegaa miikke” yaagiis.

<sup>17</sup> Yaagidi Yesuusi burccukkuwaa ekkidi, Xoossaa galatidi, “Heite; haggaa burccukkuwan de7iyaaggaa shaakkidi uyite. <sup>18</sup> Aissi giikko, taani inttessi odais; Xoossaa kawotettai yaana gakkanaashin, hachchippe doommada woiniyaa eessaa uyikke” yaagiis.

<sup>19</sup> Qassi oittaa ekkidi, Xoossaa galatiis; he oittaa menttidi, etassi immidi, “Hagee intteyyo imettida ta ashuwaa; hagan tana hassayite” yaagiis. <sup>20</sup> Kahuwaa mirggi-doogaappe guyye baggan, kaseegaadan burccukkuwaa etassi immidi, hagaadan yaagiis; “Hagee inttessi gukkiya ta suuttan maacettida ooratta maachchaa.

<sup>21</sup> “SHin be7ite; tana aattidi immana bitanee tanaara masoofiyan issippe mees. <sup>22</sup> Aissi giikko, taani Asa Na7ai, Xoossai ba qofaa qachchidoogaadan bais; shin tana aattidi immana uraassi aayye7ana” yaagiis.

<sup>23</sup> Bantta giddoppe hegaadan oottanau ooni qoppidaakko, issoi issuwaa oichchidosona.

### *Ubbaappe Aadhdhiyai Oonee? Giyo Oishaa*

<sup>24</sup> Qassi bantta ubbaappe ooni gitakko bantta gidдон palamettidosona. <sup>25</sup> Palamettin Yesuusi eta yaagiis; “Ha sa7an de7iya kawoti bantta asaa godatoosona. Eta haariyaageeti kehiyaageeta geettoosona. <sup>26</sup> SHin intteppe gitatiyaagee intte ubbaappe guuxxiyaaggaa mala gidanaappe attin, intte hegaadan hanoppite; inttena haariyaagee inttessi ashkkaradan hano. <sup>27</sup> Qumaa maanau uttiyaagee giteeyye qumaa sinttau aattiyaagee gitee? Qumaa maanau uttidaagee gita gidennee? SHin taani intte gidдон qumaa sinttau aattiya ashkkara mala.

<sup>28</sup> “Qassi taani paacettiyo wode tana yeggibeennaageeta. <sup>29-30</sup> Ta kawotettan taani qumaa miyo sohuwan intte maana malanne, uyana mala, qassi tammanne naa77u Is-  
raa7eela zaretu bolli pirddiiddi, araatatun uttana mala, ta Aawai tana sunttidoogaadan, taani inttena sunttais” yaagiis.

### *PHeexiroosi Kaddanaaggaa Yesuusi Kasetidi Yootiis*

*(Maatiyoosa 26:31-35; Marqqoosa 14:27-31; Yohaannisa 13:36-38)*

<sup>31</sup> Godai, “Simoonaa, Simoonaa, akeeka; asai gisttiyaa harqqiyoogaadan, Seexaanai inttena harqqanau Xoossaa woossin, Xoossai ero giis. <sup>32</sup> SHin taani ne ammanoi bayenna mala, neessi Xoossaa woossaas; neeni taakko simmiyo wode, ne ishannta minttetta” yaagiis.

<sup>33</sup> Simooni, “Godau, taani nenaara qasho keettaa baanau, qassi nenaara haiqqanaukka giigaas” yaagiis.

<sup>34</sup> SHin Yesuusi, “PHeexiroosaa, taani neeyyo odais; hachchi qammi, kuttoi waasanaappe kase, neeni tana eriyoogaa heezzutoo kaddana” yaagiis.

<sup>35</sup> Yesuusi ba erissiyo ashkkaratussi, “Korjjoi woi qarcciiti woi caammi bainnan taani inttena kiittido wode, inttessi paccidabi de7ii?” yaagiis.

Yaagin eti, “Aibinne baawa” yaagidosona.

<sup>36</sup> Yesuusi eta, “SHin ha77i korjjoi woi qarcciiti de7iyoi ooninne ekki efo. Bisoi baina urai ooninne ba maayuwaa baizzidikka issi biso shammo. <sup>37</sup> Aissi giikko, taani inttessi odais; Xoossaa maxaafan xaafettida tabai polettiyo gishshau, ‘Hagee mooranchchatuura paidettiis’ geettetidi xaafettidaagee tanan polettanau bessees” yaagiis.

<sup>38</sup> Erissiyo ashkkarati, “Godau, hagan naa77u bisoti de7oosona” yaagin Yesuusi, “Hegee gidana” yaagiis.

### *Yesuusi Dabira Zaita Deriyan Woossiis*

*(Maatiyoosa 26:36-40; Marqqoosa 14:32-42)*

<sup>39</sup> Yesuusi katamaappe kiyidi, haroodeegaadan Dabira Zaita Deriyaa kiyiis. Qassi erissiyo ashkkaratika a kaallidosona. <sup>40</sup> He sohuwaa gakkidi, “Paaciyan intte gelennan



attana mala, Xoossaa woossite” yaagiis. <sup>41</sup> SHuchchaa olin gakkiyo sohuwaa keenaa etappe haakki biidi gulbbatidi <sup>42</sup> Xoossaa, “Ta Aawau, neeni koyiyoobaa gidikko, ha burcukkuwaa taappe digga; shin neeni koyiyoobai hanoppe attin, taani koyiyoobai hanoppo” yaagidi woossiis. <sup>43</sup> Saluwaappe yiidi minttettiya kiitanchchai ayyo beettiis. <sup>44</sup> Ba wozanaa gidдон mishettidi, daro minttidi woossees. I cawattiyo cawai sa7an xokkiya suutta milatees.

<sup>45</sup> Woosaappe denddidi, ba erissiyo ashkkaratukko guyye biis. Biidi eti daro qarettido gishshau, daafuridi xiskkidaageeta demmidi, <sup>46</sup> “Aissi xiskkeetii? Paaciyān gelennan attana mala, denddidi Xoossaa woossite” yaagiis.

*Yesuusi Ba Morkketu Kushiyān Oiqtetiis*

*(Maatiyoosa 26:47-56; Marqqoosa 14:43-50; Yohaannisa 18:3-11)*

<sup>47</sup> I biron hegaa haasayishin, asai yiis. Tammanne naa77u erissiyo ashkkaratuppe issi Yihudaa giyoogee he asaa kaalettiiddi, Yesuusa yeranau akko shiiqiis. <sup>48</sup> SHin Yesuusi a, “Yihudaa, neeni tana Asa Na7aa yerada aatta immai?” yaagiis.

<sup>49</sup> Yesuusaara de7iya erissiyo ashkkarati hegaa be7ido wode a, “Godau, nuuni eta bisuwan shocanee?” yaagidosona. <sup>50</sup> Etappe issoi qeese ubbatu halaqaa ashkkaarāa shocidi, a ushachcha haittaa qanxxi oliis.

<sup>51</sup> SHin Yesuusi, “Aggite” yaagidi, a haittaa bochchidi pattiiis.

<sup>52</sup> Hegaappe guyyiyan, Yesuusi baakko yiida qeese halaqata, Beeta Maqidasiyaa wotaaddarata azaziyaageetanne cima asaa hagaadan yaagiis; “Tana pangga kessidi, pangga oiqqiyoogaadan oiqqanau bisonne dulla oiqqidi yiidetii? <sup>53</sup> Taani Beeta Maqidasiyan gallassi gallassi inttenaara de7iyo wode tana oiqqibeekketa; shin hagee intte wodenne xumaa wolqqaa wode” yaagiis.

*PHeexiroosi Yesuusa Kaddiis*

*(Maatiyoosa 26:57-58,69-75; Marqqoosa 14:53-54,66-72; Yohaannisa 18:12-18,25-27)*

<sup>54</sup> Yesuusa qachchidi, qeese ubbatu halaqaa soo ekki efidosona. Qassi PHeexiroosi haahuwan kaalliis. <sup>55</sup> Eti dirssa gidдон tamaa eettidi, issippe uttidaashin, PHeexiroosikka eta gidдо gelidi, utti bayiis. <sup>56</sup> Issi ashkkariyaa PHeexiroosi tamaa achchan uttidaagaa be7idaara tishshi ootta xeellada, “Hageekka aara issippe de7ees” yaagaasu.

<sup>57</sup> SHin PHeexiroosi, “Ha mishiree, taani a erikke” yaagidi kaddiis.

<sup>58</sup> Guuttaa gam77ishin, issoi PHeexiroosa be7idi, “Neenikka etaara issippe de7aasa” yaagiis.

SHin PHeexiroosi, “Hagoo, taani etaara issippe de7ikke” yaagiis.

<sup>59</sup> Hara bitanee issi saate gidiyaagaa keenaappe guyyiyan, “Ha bitaneekka Galiila asa gidiyo gishshau, aara de7iyoogee tuma” yaagidi minttidi odiis.

<sup>60</sup> SHin PHeexiroosi, “Hagoo, neeni giyoobai aibakko taani erikke” yaagiis. I biron haasayishin, sohuwaarakka kuttoi waassi aggiis. <sup>61</sup> Godai guyye simmidi, PHeexiroosa xeelliis. Xeellin PHeexiroosi Godai bana, “Neeni hachchi kuttoi waassanaappe kase, heezzutoo tana kaddana” giidoogaa hassayiis. <sup>62</sup> PHeexiroosi kare kiyidi, mishettidi yeekkiis.

<sup>63</sup> Yesuusa oiqqida asati shocoosonanne a bolli qilliiccoosona. <sup>64</sup> A aifiyaa goozidi, “Nena dechchidai oonee? Ane hananabaa yoota” yaagidi a oichchidosona. <sup>65</sup> Qassi a hara daro cashshaa cayidosona.

*Yesuusa Pirda SHangguwaa Efidosona*

*(Maatiyoosa 26:59-66; Marqqoosa 14:55-64 Yohaannisa 18:19-24)*

<sup>66</sup> Wonttin dere cimati, qeese halaqatinne higgiiyaa tamaarissiyaageeti issisaa shiiqiidi, Yesuusa bantta shiiqidosa efidi, <sup>67</sup> “Kiristtoosi nenee? Nuussi oda” yaagidosona.

SHin i yaagidi zaariis; “Taani inttessi odikko, tana ammanekketa. <sup>68</sup> Qassi taani inttena oichchikko odekketa; woi tana qashuwaappe birshshekketa. <sup>69</sup> SHin taani

Asa Na7ai, ha77ippe doommada, wolqqaama Xoossaappe ushachcha baggaara uttana” yaagiis.

<sup>70</sup> Eti ubbai Yesuusa, “Yaatin neeni Xoossaa Na7ee?” yaagidosona.

Yaagin i zaaridi, “Intte tana, ‘Neeeni Xoossaa Na7aa’ giyoogaa tumaa geeta” yaagiis.

<sup>71</sup> Eti, “Nuuni nu huuphiyan a doonaappe siyida; simmi hagaappe sinttan nuna ai markka koshshii?” yaagidosona.

## 23

*Yesuusa PHilaaxoosa Sintti SHiishshidosona*  
(Maatiyoosa 27:1-2,11-14; Marqqoosa 15:1-5; Yohaannisa 18:28-38)

<sup>1</sup> Eti ubbai issippe dendididi, Yesuusa PHilaaxoosakko efiidosona. <sup>2</sup> Efidi, “Hagee nu dere asaa balettishin, asai Roome biittaa kawuwaassi giiraa immenna mala dig-gishiininne qassi, ‘Taani kawuwaa’ yaagishin demmida” yaagidi Yesuusa mootuwaa doommidosona.

<sup>3</sup> PHilaaxoosi Yesuusa, “Neeeni Aihudatu kawoo?” yaagidi oichchiis.

Yesuusi zaaridi a, “Neenikka gaasa” yaagiis.

<sup>4</sup> PHilaaxoosi qeese halaqatussinne asaassi odiiddi, “Ha bitaniyaa bolli taani harai atto issi moorokka demmabeikke” yaagiis.

<sup>5</sup> SHin eti, “Hagee Galiilappe doommidi, harai atto haga gakkanaashinkka, Yihudaa biitta ubban tamarissiddi, asa ooshshees” yaagidi minttidi yootidosona.

*Yesuusi Heeroodisa Sintti SHiiqiis*

<sup>6</sup> PHilaaxoosi heгаа siyido wode, “I Galiila asee?” yaagidi oichchiis. <sup>7</sup> PHilaaxoosi Heeroodisi heemmiyo biittan Yesuusi de7iyooгаа eridi, he wode Yerusalaamen de7iya Heeroodisakko a yeddiis.

<sup>8</sup> Heeroodisi Yesuusa be7anau daro wodiyaappe doommidi amotti uttido gishshau, a be7ido wode daro ufaittiis. I amottidoogee kase Yesuusabaa siyidoogaassa. Qassi Yesuusi oottiyo malaataappe be7ana yaagidi, qoppiiddi de7ees. <sup>9</sup> Heeroodisi Yesuusa darobaa oichchiis; shin Yesuusi ayyo ainne zaaribeenna. <sup>10</sup> Qeese halaqatinne higgiiyaa tamarissiyaageeti a minttidi mootiiddi, hegan eqqi bayidosona. <sup>11</sup> Heeroodisinne a wotaaddarati Yesuusa karidi, a bolli qilliiccidosona. Alleequwaara de7iya maayuwa a maizzidi, PHilaaxoosakko zaaridi yeddidosona. <sup>12</sup> Hegaappe kase bantta gidon morkketti uttida PHilaaxoosinne Heeroodisi he gallassi dabbotidosona.

*Yesuusa Bolli Haiquwaa Pirddidosona*  
(Maatiyoosa 27:15-26; Marqqoosa 15:6-15; Yohaannisa 18:39-40; 19:1-16)

<sup>13</sup> PHilaaxoosi qeese halaqata, deriyaa haariyaageetanne asaa issippe xeesidi, <sup>14</sup> hagaadan yaagiis; “‘Asa balettees’ yaagidi ha bitaniyaa taakko ehiideta; be7ite; taani a intte sinttan qoridoogaappe guyyiyan, intte a mootido mootuwan a bolli ainne bal-abaa demmabeikke. <sup>15</sup> Qassi Heeroodisi a nuukko haa yeddido gishshau, a bolli ainne demmibeennaagee erettees. Be7ite; ha bitanee bana worissanau bessiyaabaa ainne oottibeenna. <sup>16</sup> Hega gishshau, taani a lissuwan garafada, birshsha yeddana” yaagiis. <sup>17</sup> PHilaaxoosayyo Paasikaa bonchchiyo gallasan issi ura qashuwaappe birshshiyo meezee de7ees.

<sup>18</sup> SHin eti ubbai issippe, “Ha bitaniyaa worada nuussi Barbbaana birshsha” yaagiiddi wocamidosona. <sup>19</sup> Barbbaani kataman ooshshaa kessidi, asa worido gishshau, qasho keettan qashettidi de7ees.

<sup>20</sup> PHilaaxoosi Yesuusa birshshanau koyidi, naa77anttuwaa etassi haasayiis.

<sup>21</sup> SHin eti, “Masqqaliyaa bolli misimaariyan a xishada kaqqa! Kaqqa!” yaagiiddi wocamoosona.

<sup>22</sup> Heezanttuwaa PHilaaxoosi eta, “Aissi? I ai iitabaa oottidee? SHemppo worissiya iitabaa a bolli demmabeikke; hegaa gishshau, lissuwan a garafada, birshsha yeddana” yaagiis.

<sup>23</sup> SHin Yesuusi masqqaliyaa bolli misimaariyan xishettidi kaqettana mala, eti qaalaa xoqqu oottidi, minttidi yootidosona. Eta wocamainne qeese halaqatu qalalai darido gishshau, <sup>24</sup> eti woossiiddi uttido pirddaa PHilaaxoosi Yesuusa bolli pirddiis. <sup>25</sup> Yaatidi kase eti birshshissarkkii yaagidi woossiiddi uttido bitaniyaa birshshissiis; birshshettidaagee ooshshaa gishshaunne shemppuwaa worido gishshau qashettida bitaniyaa. SHin eti Yesuusa bantta koyidoogaadan oottana mala, PHilaaxoosi a etassi aattidi immiis.

### *Yesuusa Kaqqidosona*

*(Maatiyoosa 27:32-44; Marqqoosa 15:21-32; Yohaannisa 19:17-27)*

<sup>26</sup> Yesuusa efiiddi, issi Simoona giyo Qareena biitta asi gaxaappe katamaa yiyaagaa oiqqidi, Yesuusappe guyyeera tookkana mala, masqqaliyaa a bolli wottidosona.

<sup>27</sup> Yeekkiiddinne waassiiddi uttida maccaasatinne keehi daro asai issippe a kaalliis. <sup>28-29</sup> SHin Yesuusi etakko simmidi, hagaadan yaagiis; “Yerusalaame maccaasatoo, taassi yeekoppite; shin asai, ‘Maine maccaasati, na7a mulekka yelibeenna maccaasati, na7a mulekka xanttibeenna maccaasati bantta hailau’ yaagana gallasai yiyo gishshau, intte huuphessinne intte naatussi yeekkite. <sup>30</sup> He wode eti dereta, ‘Nu bolli kunddite!’ yaagana. Keratakka, ‘Nuna genttite!’ geettaa doommana. <sup>31</sup> Aissi giikko, eti qayye mittaa hagaadan oottiyaageeta gidikko, mela mittaa waataneeshsha?” yaagiis.

<sup>32</sup> Iitabaa oottida naa77u asatakka Yesuusaara gattidi woranau efiidosona. <sup>33</sup> Guuggiyaa giyo sohuwaa gakkidi, masqqaliyaa bolli misimaariyan Yesuusa xishidi kaqqidosona. He iitabaa oottidaageetakka he sohuwan issuwaa Yesuusappe ushachcha baggaara, issuwaa haddirssa baggaara, masqqaliyaa bolli misimaariyan xishidi kaqqidosona. <sup>34</sup> Yesuusi, “Ta Aawau, eti bantta oottiyoogaa erenna gishshau, eta nagaraa atto ga” yaagiis.

A maayuwaa shaakkidi, saamaa yeggidosona. <sup>35</sup> Asai eqqidi xeellishin, deriyaa haariyaageeti, “Harata ashshiis; Xoossai doorido a i gidikko, ane bana ashsho” yaagiiddi a karidi qilliiccoosona.

<sup>36-37</sup> Qassi wotaaddarati akko shiiqidi, woiniyaa eessaa caalaa ehiidi, “Neeni Aihudatu kawo gidikko, ane ne huuphiyaa ashsha” yaagidi a bolli qilliiccoosona.

<sup>38</sup> Qassi, “Hagee Aihudatu kawuwaa” giidi, Giriike qalan, Roomaisxxe qaalaaninne Ibraisxxe qalan xaafido xifatee a huuphessaara de7ees.

### *Yesuusaara Kaqettida Naa77u Daafa Asata*

*(Maatiyoosa 27:38-44; Marqqoosa 15:27-32)*

<sup>39</sup> Iitabaa oottidi masqqaliyan kaqettida asatuppe issoi, “Neeni a gidikko, ane nenne nunanne ashsha” yaagidi Yesuusa naassiis.

<sup>40</sup> SHin hankkoi a, “Neeni haggaa mala pirddan de7aiddakka Xoossaassi yayyikkii? <sup>41</sup> Nuuni nu oosuwaa malaa ekkiyo gishshau, nuussi imettida pirddai bessiyaagaa; shin hagee ainne iitabaa oottibeenna” yaagidi a hanqqettiis.

<sup>42</sup> I Yesuusa, “Yesuusaa, neeni ne kawotettaa wolqqan yiyo wode, tana dogoppa” yaagiis.

<sup>43</sup> Yaagin Yesuusi, “Taani neessi tumaa odais; hachchi neeni tanaara gannatiyan de7ana” yaagiis.

### *Yesuusi Haiqqiis*

*(Maatiyoosa 27:45-56; Marqqoosa 15:33-41; Yohaannisa 19:28-30)*

<sup>44</sup> He wode usuppun saate heera gidin, awai xumiis; uddufun saate gakkanaashin, biitta ubban sa7ai xumiis. <sup>45</sup> Xumin Beta Maqidasiyan kaqettida magalashoikka

naa77u kiyidi, pooshetti wodhdhiis. <sup>46</sup> Yesuusi qaalaa xoqqu oottidi, “Ta Aawau, taani ta shemppuwaa ne kushiyan wottais” yaagidi haiqqi bayiis.

<sup>47</sup> Mato halaqai hegaa be7idi, “Hagee tumu xillo asa” yaagidi Xoossaa galatiis.

<sup>48</sup> Hegaa be7anau issisaa shiiqi uttida asai ubbai hegaa be7ido wode, bantta tiraa bubbuxiiddi, soo simmidosona. <sup>49</sup> Yesuusa eriya asai ubbainne Galiilappe a kaallida maccaasati hegaa be7iiddi, haahuwan eqqidosa.

### *Yesuusi Moogettiis*

*(Maatiyoosa 27:57-61; Marqqoosa 15:42-47; Yohaannisa 19:38-42)*

<sup>50</sup> Yaa7aa alaafetuppe issi Yooseefa giyo lo77o xillo bitanee de7ees. <sup>51</sup> Yooseefi eta zoretaanne eta oosuwaa dosibeenna. I Armmaatiyaasa geetettiya Aihudatu katamaa asa; qassi Xoossaa kawotettaa naagiiddi uttiis. <sup>52</sup> He bitanee PHilaaxoosakko biidi, Yesuusa ahaa ekkana woossiis. <sup>53</sup> Yooseefi masqqaliyaappe ahaa wottidi, moogo afalan xaaxiis. Xaaxidi shuchchaa woocido asa moogiyo gonggoluwaa gidдон kase ooninne moogettibeennaagan ahaa wottiis. <sup>54</sup> Hegee Sambbataassi giigettiyo gallassa; Sambbatai doommana hanees.

<sup>55</sup> Galiilappe Yesuusaara yiida maccaasati Yooseefa kaalliiddi, Yesuusi moogettido gonggoluwanne a ahaa waati wottidaakko be7idosona. <sup>56</sup> Be7idi soo simmidi, shituwanne tiyettiyoobaa giigissidosona.

Higgee azaziyoogaadan, Sambbatan shemppidosona.

## 24

### *Yesuusi Haiquwaappe Denddiis*

*(Maatiyoosa 28:1-10; Marqqoosa 16:1-8; Yohaannisa 20:1-10)*

<sup>1</sup> SHin woggaa gallassi wonttimaattan maccaasati bantta giigissido shittuwaa ekkidi, Yesuusi moogettido gonggoluwaa biidosona. <sup>2</sup> Biidi, gonggoluwaa doonaappe shuchchaa gonddorssidoogaa be7idosona. <sup>3</sup> SHin gidдо gelidi, Godaa Yesuusa ahaa demmibookkona. <sup>4</sup> Maccaasati, “Haha! Laa hagee waaniichchidee?” yaagishin, phooliya maayuwaa maayida naa77u asati eti akeekennan eta matan eqqidosa. <sup>5</sup> Eti yayyidi, sa7aa xeellidaashin, asati eta yaagidosona; “Paxa de7iyaagaa haiqqida asaa sohuwan aissi koyeetii? <sup>6-7</sup> I denddiichchiis; hagan baawa. Yesuusi, ‘Tana Asa Na7aa asai nagaranchchatussi aattidi immin, masqqaliyaa bolli tana misimaariyan xishin, taani kaqettanaunne heezzantto gallassi denddanau bessees’ yaagidi kase Galiilan de7iyo wode, inttessi odidoogaa hassayite” yaagiis.

<sup>8-9</sup> Yaagin maccaasati Yesuusi giidoogaa hassayidi, i moogettido gonggoluwaaappe simmidi, hegaa ubbaa tammanne isiini erissiyo ashkkaratussinne haratu ubbaassi odidosona. <sup>10</sup> Hegaa Yesuusi kiittidoogeetussi odidai Magddala katamaappe yiida Mairaamo, Yohaano, Yaaqooba aayyiyoo Mairaamonne, qassi etaara de7iya hara maccaasata. <sup>11</sup> He maccaasatu qalalai pattenna haasaya misatin, Yesuusi kiittidoogeeti ammanibookkona. <sup>12</sup> SHin PHeexiroosi denddidi, gonggoluwaa woxxiis; hokkidi gonggoluwaa gidдо xeellidi, moogido afalaa xalaalaa be7iis. Hegaa be7idi garamettiiddi, ba soo biis.

### *Yesuusi Naa77u Erissiyo Ashkkaratussi Beettiis*

*(Marqqoosa 16:12-13)*

<sup>13-14</sup> Yesuusa kaalliyaageetuppe naa77ati hanidabaa ubbaa bantta gidдон haasayiddi, he gallassi Yerusalameppe naa77u saate keenaa haakkiya Emaahuusa giyo qeeri katamaa boosona. <sup>15</sup> Biiddi eti issippe haasayishiinne zorettishin, Yesuusi ba huuphen etakko shiiqidi, etaara bees. <sup>16</sup> SHin eti a erenna mala, eta wozanaa jallissiis.

<sup>17</sup> Yesuusi eta, “Ha intte kayyottidi hemettiiddi, issoi issuwaara haasayiyo yohoi aibee?” yaagiis. <sup>18</sup> Etappe issoi Qalayoopha giyoogee zaaridi, “Ha giddon Yerusalaamen hanidabaa erennan Yerusalaame be7anau biida imatti ne xalaalee?” yaagiis.

<sup>19</sup> Yesuusi, “I aibee?” yaagiis.

Eti hagaadan yaagidosona; “Xoossaa sinttaaninne asa ubbaa sinttan oosuwaaninne qaalan hananabaa yootiya mino gidida Naazireeta Yesuusabaa. <sup>20</sup> Nu qeese ha-laqatinne deriyaa haariyaageeti haiquwaa pirddaassi a aatti immidi, masqqaliyaa bolli misimaariyan xishidi, a kaqqidosona. <sup>21</sup> SHin nuuni, ‘Israa7eelata ashshanaagee a’ yaagidi ufaissan naagoos. Qassi hegee ubbai hanoosappe hachchi heezzu gallassa gidiiis. <sup>22</sup> Qassi nunaara de7iya issi issi maccaasati garamiyaabaa nuuyyo odidosona. Yesuusa moogido gonggoluwaa wonttimaattan biidi, <sup>23</sup> a ahaa demmi-bookkona; ‘I paxa de7ees” yaagiya kiitanchchatu ajuutaa be7ida’ yaagiiddi guyye simmidosona. <sup>24</sup> Nunaara de7iyaageetuppe issoi issoi gonggoluwaa biidi, maccaasati etassi giidoogaadan hanidaagaa be7idosona; shin Yesuusa be7ibookkona” yaagidosona.

<sup>25</sup> Yesuusi eta, “Intte aiba eeyya asee? Hananabaa yootiyaageeti odido ubbabaa intte wozanan ammananau waanidi gam77eetii? <sup>26</sup> I ha waayiyaa ekkanaunne ba bonchchuwaa bonchchettanau bessennee?” yaagiis. <sup>27</sup> Yaagidi Muuse maxaafaap-penne hananabaa yootiyaageetu maxaafaappe doommidi, Xoossaa maxaafatu ubban babai xaafettidaagaa etassi birshshiis.

<sup>28</sup> Eti bantta biyo qeeri katamaakko matishin, Yesuusi etassi haaho sohuwaa baan-abaa milatiis; <sup>29</sup> shin eti Yesuusa, “Sa7ai omariyo gishshau, nunaara aqa; sa7ainne qammana hanees” yaagidi teqqidosona. Hegaa gishshau, Yesuusi etaara aqanau geliis. <sup>30</sup> Etaara qumaa maanau uttidi, oittaa ekkidi anjjiis; menttidi etassi immiis. <sup>31</sup> Eti a akeekana mala, eta aiffee dooyettin, Yesuusa gididoogaa eridosona; erin i eta aifiyaappe geemmiis. <sup>32</sup> Eti bantta giddon, “I nuussi ogiyan odishiininne Xoossaa maxaafata birshshishin, nu wozanai mishettidi xuugettibeennee?” yaagidi haasayettidosona.

<sup>33-34</sup> Eti sohuwaara denddidi, Yerusalaame simmidosona; tammanne isiini erissiyo ashkkaratinne etaara de7iyaageeti, “Godai tumu denddiis; Simoonikka a be7iis” yaagiiddi issippe shiiqi uttidaageeta demmidosona.

<sup>35</sup> He naa77ati ogiyan hanidabaanne Yesuusi oittaa menttiyo wode, eti a waati eridaakkonne etassi odidosona.

*Yesuusi Ba Erissiyo Ashkkaratussi Beettiis*  
(Maatiyoosa 28:16-20; Marqqoosa 16:14-18; Yohaannisa 20:19-23; Yesuusi Kiitti-doogetu Oosuwaa 1:6-8)

<sup>36</sup> Eti hegaa odishin, Yesuusi ba huuphen eta giddo yiidi eqqidi, “Sarotetta inttessi gido” yaagiis.

<sup>37</sup> SHin eti dagammidi yayyidosona. Qassi etassi moitillee beettiyaabaa milatiis. <sup>38</sup> Milatin i eta, “Aissi dagammeetii? Intte wozanan aissi sireetii? <sup>39</sup> Taani tana gididoogaa, ta kushiyaanne ta tohuwaa be7ite; tana oiqqi xeellite; aissi giikko, moitillessi ashoinne meqetti baawa; shin intte be7iyooogaadan, taassi de7ees” yaagiis.

<sup>40</sup> Hegaa yaagidi, ba kushiyaanne ba tohuwaa eta bessiis. <sup>41</sup> Hegee eta ufaissin, eti garamettidi, biron ammananau danddayibeenna gishshau i, “Hagan aibakko inttessi miyoobi de7ii?” yaagiis. <sup>42</sup> Xiixxido moliyaappe issi muxuwaanne eessaa ililuwaappe eti ayyo immin, <sup>43</sup> ekkidi eta sinttan miis.

<sup>44</sup> I eta, “Taani inttenaara de7aidda, ‘Muuse higgayan, hananabaa yootiyaageetu maxaafaaninne Daawita mazamuriyaa maxaafan tabai xaafettidaagee ubbai polettanau bessees’ yaagada, inttessi yootido yohoi haggaa” yaagiis.

<sup>45</sup> He wode, Xoossaa maxaafati giyoogee etassi gelana mala, eta wozanaa dooyiis. <sup>46</sup> Dooyidi, hagaadan yaagiis; “I waayettanaunne heezantta gallassi haiquwaappe



denddanau bessees. <sup>47</sup> Qassi nagaraappe simmiyoogeenne nagaraa atto giyoogee Yerusalaameppe doommidi, Aihuda gidenna asa ubbaassi a sunttan odettanau bessees' geetettidi xaafettiis. <sup>48</sup> Ha yohuwaassi intte markka. <sup>49</sup> Ta Aawai immana giidoogaa taani inttessi yeddana; shin Xoossai saluwaappe yiya wolqqaa inttena afaladan maiz-zana gakkanaassi, Yerusalaame kataman naagite" yaagiis.

*Yesuusi Saluwaa Pude Kiyiis*

*(Marqqoosa 16:19-20; Yesuusi Kiittidoogee Oosuwa 1:9-11)*

<sup>50</sup> Hegaappe guyyiyan, Biitaaniyaa giyo katamaa gakkanaashin eta kaalettiis; ba kushiya sinttau yeddidi, eta anjjiis. <sup>51</sup> Anjjiiddi etappe shaahettidi, saluwaa biis. <sup>52</sup> Eti ayyo goinnidi, daro ufaissan Yerusalaame simmidosona. <sup>53</sup> Xoossaa galatiiddi, paccennan Beeta Maqidasiyan de7idosona.

## Yohaannisa Wonggeliyaa Mishiraachchuwaa

### *Gidduwaa Erissuwaa*

Yohaannisi Yesuusa erissiiddi, asho maayidi asatu giddon beettida Xoossaa Qaalaa yaagiiddi shiishshees. Ha Wonggelee xaafettiiddi qassi, a nabbabiya asai Yesuusi asaa ashshiya xale gididi yaana yaagido Xoossaa Na7aa gidiyoojaa ammanana malanne an ammanido gaasuwan merinaa de7oi etayyo de7anaagaa eti erana mala xaafettiis (20:31).

Wonggeliyaayyo koiro shaahoi merinaabaa gidida Xoossaa qaalainne Yesuusinne issuwaa gidiyoojaa odi simmidi, Yesuusi ashshiyaagaa gididi yaana giido Xoossaa Na7aa gidiyoojaa bessiya dumma dumma malaatata shiishshees. Hegaappe kaalidi qassi ha malaatatuppe beettida aifiyaa odiya taarikiiti kaalloosona. Ha kifilee issi issi asai Yesuusan ammanidi, a kaalliyaageeta gididobaa odees; harati qassi a waani ixidaakkonne waani ammanokko giidaakko odoosona. Miraafiyaa 13ppe biidi 17 gakkanaashin Yesuusi oiqettido omarssi ayyo a erissiyo ashkkaratuura ai keena mino gaitotetta de7iyaakko, qassi wonttetta galla kaqettanaassi etassi giigettiyo qaalaanne minttetto qaala haasayidoogaa yootoosona. Wurssetta miraafeti Yesuusi oiqettidobanne pirddau shiiqidobaa, a kaqettaanne a denduwwaa, hegaadanka qassi denduwwaappe guyyiyan erissiyo ashkkaratussi i qonccido hanotaa odoosona.

SHaaramuxaidda oiqettida maccaasee taarikiyaa (8:1-11) haphaa giddon de7iya xiqisiyaa daro birshshettatinne beni maxaafati banttan gujjokkona; harati qassi shiridi hara sohuwan gelissoosona.

Yohaannisi orddissidi bessiyoojai Yesuusa baggaara beettiya merinaa de7uwaa. Hagee coo imota gididi beettiya merinaa de7oi doommioogee ha77i nuuni de7iyo de7uwaana gidishin, ha de7uwaa banttabaa oottanau danddayiyaageeti Yesuusi oge, tumanne de7o gidiyoojaa ammaniyaageeta. Yohaannisa Wonggeliyaa hara wonggeletuppe dumma oottiyaagee Ayyaana yohotu tumatetta asaassi odidi gelissanau, asai meezetidonne hachchi hachchi de7uwan go7ettiyo yohotun, hegeetikka, haattaa, oittaa, poo7uwaa, henttanchchaa, dorssata, woiniyaa turaanne woiniyaa aifiyaa milatiya leemisotun go7ettiyoogaa.

### *De7o Qaalaa*

<sup>1</sup> Qaalai koiro de7ees; qaalaikka Xoossaara issippe de7ees; qassi qaalai Xoossaa. <sup>2</sup> Qaalai Xoossaara issippe koiro de7ees. <sup>3</sup> Xoossai ubbabaa qaala baggaara medhdhiis. Merettidabai ubbai i bainnan aibinne merettibeenna. <sup>4</sup> Aani de7oi de7ees; de7oi asau poo7o. <sup>5</sup> Poo7oi xuman poo7ees; xumai poo7uwaa xoonibeenna.

<sup>6</sup> Xoossai kiittido issi asi de7ees; a sunntai Yohaannisa. <sup>7</sup> Asai ubbai poo7uwaa baggaara ammanana mala, poo7uwaabaa markkattanau markka gididi yiis. <sup>8</sup> Poo7uwaabaa markkattanau i yiidoogaappe attin, i ba huuphen poo7o gidenna. <sup>9</sup> Asa ubbau poo7iisiya tumu poo7oi sa7aa yees.

<sup>10</sup> Qaalai sa7an de7iis; Xoossai Qaalan sa7aa medhdhiis; shin sa7ai a eribeenna. <sup>11</sup> I baageetukko yiis; shin aageeti a shiishshi ekkibookkona. <sup>12</sup> SHin i bana shiishshi ekkida ubbatuyyo, ba sunntan ammanidaageetuyyo, Xoossaa naata gidana mala, maataa immiis. <sup>13</sup> Eti Xoossaappe yelettidoogaappe attin, asi yeliyo maaran woi asa sheniyan woi attumaasa sheniyan yelettibookkona.

<sup>14</sup> Qaalai asa gididi, nu giddon de7iis. Nuuni a bonchchuwaa aaro kehatettainne tumatetta kumidoogaa be7ida. Aawaayyo issi Na7aa xalaala gidida i ekkido bonchchoi haggaa.

<sup>15</sup> Yohaannisi abaa markkattiis; ba qaalaa xoqqu oottidi, “Taani, ‘Taappe guyyeera yiyaagee taappe wolqqaamees; aissi giikko, taappe i kase de7iis’ gaada markkattidoogee haggaa” yaagiis.

<sup>16</sup> Nuuni ubbai a kumetta aaro kehatettaappe anjuwaa ekkida. <sup>17</sup> Aissi giikko, Xoossai higgiiyaa Muuse baggaara immiis; shin aaro kehatettainne tumatettai Yesuus Kiristtoosa baggaara yiis. <sup>18</sup> Xoossaa be7ida asi mulekka baawa; ba Aawaa lanqqiyan de7iya issi Na7aa xalaalai abaa markkattiis.

### *Xammaqiya Yohaannisa Markkatettaa*

*(Maatiyoosa 3:1-12; Marqqoosa 1:1-8; Luqaasa 3:1-8)*

<sup>19</sup> Yerusalaamen de7iya Aihudati qeesetanne Leewata, “Neeni oonee?” giidi Yohaannisa oichchana mala, Yohaannisakko kiittin, Yohaannisi etau markkattido markkatetta haggaa.

<sup>20</sup> Yohaannisi, “Taani Kiristtoosa gidikke” yaagidi geeshshidi markkattidoogaappe attin, markkattiyooгаа ixxiibeenna.

<sup>21</sup> Eti, “Yaatin, neeni oonee? Neeni Eelaaseeyye?” yaagidi oichchidosona.

Oichchin Yohaannisi, “Akkai gidikke” yaagiis.

Qassikka eti, “Neeni hananabaa yootiyaagee?” yaagidi oichchidosona.

Oichchin Yohaannisi, “Akkai” yaagidi zaariis.

<sup>22</sup> Yaatin, “Neeni oonee? Nuuni nuna kiittidaageetuyyo yootana mala, neeni nebaa woigai?” yaagidosona.

<sup>23</sup> Yohaannisi zaaridi, “Hananabaa yootiya Isiyaasi giidoogaadan, bazzon ba qaalaa xoqqu oottidi,

‘Godaa ogiyaa sitti oottite!’

giya cenggurssai taagaa”

yaagiis.

<sup>24</sup> Qassi Parisaaweti kiittido asati <sup>25</sup> Yohaannisa, “Neeni Kiristtoosa woi, Eelaasa woi hananabaa yootiyaagaa gidana xayikko, yaatin aissi xammaqai?” yaagidi oichchidosona.

<sup>26</sup> Oichchin Yohaannisi zaaridi, “Taani haattan xammaqais; shin intte erenna asi intte gidдон eqqiis. <sup>27</sup> I taappe guyyeera yees. Taani a caammaa qashuwaa birshshanaukka bessikke” yaagiis.

<sup>28</sup> Hagee ubbai Yorddaanoosa SHaafaappe hefinttan Biitaaniyaa giyo biittan, Yohaannisi xammaqiyoosan haniis.

### *Xoossaa Dorssaa*

<sup>29</sup> Yohaannisi wonttetta gallassi Yesuusi baakko yiishin be7idi yaagiis; “Xoossaa dorssai, sa7aa nagaraa xaissiyaagee, hageeho! <sup>30</sup> Taani, ‘Taappe guyyeera issi asi yaana; i taappe wolqqaama; aissi giikko, taappe kase de7iis’ gaada haasayidoogee haggaa. <sup>31</sup> I oonakko taani erikke; shin Israa7eela asau a qonccissanaassi haattan xammaqaidda yaas” yaagiis.

<sup>32</sup> Yohaannisi hagaadan yaagidi markkattiis; “Geeshsha Ayyaanai saluwaappe haraphhedan wodhdhishiinne a bolli uttishin, taani be7aas. <sup>33</sup> Taani a erikke; shin haattan xammaqanau tana kiittidaagee, ‘Geeshsha Ayyaanai wodhdhidi, issi asa bolli uttishin, neeni be7ana; Geeshsha Ayyaanan xammaqanaagee a’ yaagidi taayyo yootiis.

<sup>34</sup> Taani hegaa be7ada, Xoossaa Na7aa i gididoogaa markkattais” yaagiis.

### *Yesuusa Kaallida Koiro Erissiyoo Ashkkarata*

<sup>35</sup> Qassi wonttetta gallassi Yohaannisi ba erissiyoo ashkkaratuppe naa77atuura issippe eqqiis; <sup>36</sup> eqqidi Yesuusi aadhdhishin be7idi, “Xoossaa dorssai hageeho!” yaagiis.

<sup>37</sup> Yohaannisi erissiyo naa77u ashkkarati Yohaannisi giyoogaa siyidi, Yesuusa kaallidosona. <sup>38</sup> Yesuusi bana kaalliyaageeta guyye simmi be7idi, “Ai koyeetii?” yaagidi oichchiis.

Eti zaaridi, “Rabii, neeni awan de7ai?” yaagidosona. “Rabii” giyoogee “Tamaaris-siyaagoo” giyoogaa.

<sup>39</sup> Yesuusi eta, “Haa yiidi be7ite” yaagiis. Yaagin eti biidi, i de7iyoosaa be7idosona; he gallassi eti sa7ai tammu saate heera gidiyo gishshau, a matan pe7idosona.

<sup>40</sup> Yohaannisi giidoogaa siyidi, Yesuusa kaallida naa77u asatuppe issoi, Simoon PHeexiroosa ishaa Inddiraasa. <sup>41</sup> Inddiraasi koiro ba ishaa Simoonara gaittidi, “Nuuni Masiyaara gaittida” yaagiis. “Masiyaa” giyoogee “Kiristtoosa” giyoogaa. <sup>42</sup> Inddiraasi Simoon Yesuusakko ekki ehiis.

Ehin Yesuusi Simoon be7idi, “Neeni Yoonaa na7aa Simoon; ne sunttai Keefa gidana” yaagiis. “Keefa” giyoogaa birshshettainne “PHeexiroosa” giyoogaa birshshettai issuwaa; hegaa giyoogee “SHuchchaa” giyoogaa.

### *Yesuusi Piliphphoosanne Naatinaa7eela Xeegiis*

<sup>43</sup> Wonttetta gallassi Yesuusi Galiila giyo biitti baanau qofaa qachchiis; i Piliphphoosara gaittidi, “Tana kaalla!” yaagiis. <sup>44</sup> Piliphphoosi Inddiraasinne PHeexiroosi de7ido Beetasaida giyo katamaappe yiida asa.

<sup>45</sup> Piliphphoosi Naatinaa7eelaara gaittidi, “Higgiyaa maxaafan Muusee abaa xaafidogaa, qassi hananabaa yootiyaageetikka abaa xaafido Yooseefa na7aa Yesuusaara, Naazireete kataman de7iyaagaara, nuuni gaittida” yaagiis.

<sup>46</sup> Naatinaa7eeli zaaridi, “Naazireete katamaappe payyabi kiyana danddayii?” yaagiis.

Yaagin Piliphphoosi, “Yaada be7a” yaagiis.

<sup>47</sup> Naatinaa7eeli baakko yiyaagaa Yesuusi be7idi, “Genee baina tumu Israa7eela asi haggaa!” yaagiis.

<sup>48</sup> Yaagin Naatinaa7eeli Yesuusa, “Neeni tana awan erai?” yaagiis.

Yesuusi zaaridi, “Piliphphoosi nena xeesanaappe kase, neeni balasiyaa giyo mittaa garssan de7ishin, taani nena be7aas” yaagiis.

<sup>49</sup> Naatinaa7eeli zaaridi, “Tamaaris-siyaagoo, neeni Xoossaa Na7aa! Neeni Israa7eela kawuwaa!” yaagiis.

<sup>50</sup> Yaagin Yesuusi, “Taani nena balasiyo giyo mittee garssan be7aas giido gishshau ammanai? Neeni hagaappe aadhdhiyaabaa be7ana!” yaagiis. <sup>51</sup> Qassikka Yesuusi, “Taani intteyyo tumaa odais; saloi dooyettin, Xoossaa kiitanchchati ta bolli, Asa Na7aa bolli, pude kiyishiinne duge wodhdhishin, intte be7ana” yaagiis.

## 2

### *Yesuusi Galiila Biittan, Qaana Kataman Bullachchaasaa Biis*

<sup>1</sup> Heezantto gallassi Galiila biittan Qaana giyo kataman bullachchi bullashettiis; Yesuusa aayiyaa he bullachchan de7ausu. <sup>2</sup> Yesuusikka ba erissiyo ashkkaratuura issippe he bullachchaa xeesettiis. <sup>3</sup> Woiniyaa eessai wuriichchin, Yesuusa aayiyaa Yesuusa, “Etau woiniyaa eessai wuriichchiis” yaagaasu.

<sup>4</sup> Yesuusi zaaridi, “Ha maccaasee, nena gattiyaabi aibee? Ta wodee birooni gakkibeenna” yaagiis.

<sup>5</sup> Yesuusa aayiyaa ashkkarata, “I intteyyo odiyoobaa aiba gidikkonne oottite” yaagaasu.

<sup>6</sup> Aihudati haimaanootiyau oottiyoogaadan, meechchaa wogaayyo issoi issoi heezzu heezzu oto oiqqiya usuppun shuchcha baattati hegan de7oosona. <sup>7</sup> Yesuusi ashkkarata,

“Baattatun haattaa kunttite” yaagiis; yaagin eti baattatuyyo doonaa gakkanaassi haattaa kunttidosona. <sup>8</sup> Yesuusi eta, “Ha77i duuqqidi, bullachchaa alaafiyau immite” yaagiis; eti ayyo efidi immidosona.

<sup>9</sup> Bullachchaa alaafee woine eessa gidida haattaa ganxxi xeellidi, auppe yiidaakkonne eribeenna; shin haattaa kunttida ashkkarati eroosona. Bullachchaa alaafee machchiyo ekkiyaagaa xeesidi, <sup>10</sup> “Ooninne aife woine eessaa asaa kasetidi ushshees; yaatidi bullachchaasai daro uyidoogaappe guyyiyan, qiraariyaa ushshees. SHin neeni aife woine eessaa hanno gakkanaassi wotta bayadasa!” yaagiis.

<sup>11</sup> Yesuusi ba oottido wolqqaama malaatatuppe haggaa koiruwaa Galiila biittan Qaana giyo kataman oottiis; hegan ba bonchchuwaa qonccissiis. Qassi erissiyo ashkkaratikka a ammanidosona.

<sup>12</sup> Hegaappe guyyiyan, Yesuusi ba aayeera, ba ishanntuuranne ba erissiyo ashkkaratuura issippe Qifirinaahooma giyo katamaa biis; biidi amarida gallassaa takkiis.

### *Yesuusi Woosa Keettan Zal77iyaageeta Kessiis*

*(Maatiyoosa 21:12-13; Marqqoosa 11:15-17; Luqaasa 19:45-46)*

<sup>13</sup> Aihudati bonchchiyo Paasikaa Baalaa gallassai matattin, Yesuusi Yerusalaame biis.

<sup>14</sup> Biidi Beeta Maqidasiyan miizzaa, dorssanne haraphphiyaa baizziya asaa demmiis; qassi harati bantta oidiiyan uttidi, miishshaa laammiyaageeta demmiis. <sup>15</sup> I golaa xurqqayyiyaa dooqqidi, eta ubbaa dorssaaranne miizzaara Beeta Maqidasiyaappe kare kessidi yedettiis. Miishshaa laammiyaageetu xaraphpheezaakka aatti yeggidi, eta miishshaa laaliis. <sup>16</sup> Haraphphiyaa baizziyaageeta i, “Ha haraphpheta haggaaappe kessite; ta Aawaa keettaa giya oottoppote!” yaagiis.

<sup>17</sup> Erissiyo ashkkarati Xoossaa maxaafan, “Taani ne keettau mishettiyo mishoi tana tamadan xuuggees” geetettidi xaafettidaagaa hassayidosona.

<sup>18</sup> Hegaappe guyyiyan, Aihudati zaaridi, “Neeeni haggaa oottana danddayiyoogau nuna ai malaata bessuutee?” yaagidosona.

<sup>19</sup> Yaagin Yesuusi, “Ha Beeta Maqidasiyaa qolite; taani heezzu gallassan zaarettada keexxana” yaagiis.

<sup>20</sup> Qassikka Aihudati, “Ha Beeta Maqidasiyaa keexxanau oitamanne usuppun laittaa ekkiis; shin neeni heezzu gallassan keexxuutee?” yaagidosona.

<sup>21</sup> SHin i haasayiyo Beeta Maqidasee ba asatettaa. <sup>22</sup> Heggaa gishshau, Yesuusi haiquwaappe denddidoogaappe guyyiyan, erissiyo ashkkarati i heggaa giidoogaa hassayidosona. Qassi eti Xoossaa maxaafaaganne Yesuusi haasayidoogaa ammanidosona.

<sup>23</sup> Paasikaa bonchchiyoosan Yesuusi Yerusalaamen de7ishin, i oottido malaataa be7idi, daro asai a ammaniis. <sup>24</sup> SHin Yesuusi he asaa ubbaa eriyo gishshau, eta ammanibeenna. <sup>25</sup> Asabaa ooninne ayyo markkattana mala koyibeenna; aissi giikko, asa wozanan aibi de7iyaakko, i ba huuphen erees.

## 3

### *Yesuusanne Niqoodimoosa*

<sup>1</sup> Parisaawetu baggan Aihudatuyyo halaqa gidiiya Niqoodimoosa giyo issi bitanee de7ees. <sup>2</sup> Niqoodimoosi qammi Yesuusakko yiidi, “Tamaarissiyaagoo, neeni Xoossai kiittido tamaarissiyaagaa gidiiyoogaa nuuni eroos; aissi giikko, Xoossai aara de7iyo asappe attin, ha neeni oottiyo wolqqaama malaatata oottanau danddayiya asi baawa” yaagiis.

<sup>3</sup> Yaagin Yesuusi zaaridi, “Taani neeyyo tumaa odais; ooninne naa77antto yelettana xayikko, Xoossaa kawotettaa be7anau danddayenna” yaagiis.



<sup>4</sup> Niqoodimoosi, “Cima asi waanidi naa77antto yelettanau danddayii? Ba aayee uluwaa simmi gelidi, naa77anttuwaa yelettanau asi danddayii?” yaagiis.

<sup>5</sup> Yesuusi zaaridi, “Taani neeyyo tumaa odais; ooninne haattaappenne Geeshsha Ayyaanaappe yelettana xayikko, Xoossaa kawotettaa gelanau danddayenna. <sup>6</sup> Asappe yelettidaagee asa; Ayyaanaappe yelettidaagee ayyaana; <sup>7</sup> ‘Intte naa77antto yelettanau bessees’ gaada taani intteyyo odido gishshau, neeni garamettoppa. <sup>8</sup> Carkkoi ba koyidosaa carkkees. Neeni a kooshinchchaa siyaasa; shin i auppe yiyaakko woi au biyaakko, neeni erakka. Ayyaanaappe yelettida ubbai hegaa mala” yaagiis.

<sup>9</sup> Yaagin Niqoodimoosi, “Hagee waanidi hananau danddayii?” yaagidi oichchiis.

<sup>10</sup> Yesuusi zaaridi, “Neeni Israa7eelata tamaarissiyaagaa gidaidda hagaa erikkii? <sup>11</sup> Taani neeyyo tumaa odais; nuuni eriyooogaa haasayoosinne be7idoogaa markkattoos; shin nuuni markkattiyooogaa intte ekkeketa. <sup>12</sup> Taani intteyyo sa7aabaa yootin, intte ammanennaageeta gidikko, saluwaabaa yootin waani ammanuuteetii? <sup>13</sup> Saluwaappe wodhdhida taappe Asa Na7aappe attin, saluwaa kiyidabi ooninne baawa; saluwan de7iya Asa Na7ai tana” yaagiis.

<sup>14-15</sup> Muusee bazzon shooshshaa kaqqidoogaadan, tana ammanida ubbai merinaa de7uwaa ekkana mala, taani Asa Na7ai kaqettanau bessees.

<sup>16</sup> Xoossaa Na7aa ammaniya ubbai merinaa de7uwaa ekkanaappe attin, xayenna mala, Xoossai ha sa7aa keehi siiqido gishshau, ba mexi issi Na7aa immiis. <sup>17</sup> Aissi giikko, Xoossai ba Na7aa ha sa7aa pirddanau kiittibeenna; shin sa7aa a baggaara ashshanau kiittiis.

<sup>18</sup> Na7aa ammaniya ooninne pirddettenna; shin Na7aa ammanenna ooninne, Xoossaa Na7aa issuwaa ammanibeenna gishshau, ha77ikka pirddetti uttiis. <sup>19</sup> Asaa bolli pirddiyo pirddai hagaa; poo7oi sa7aa yiis; shin asaa oosoi iita gidiyo gishshau, asai poo7uwaappe aattidi, xumaa siiqees. <sup>20</sup> Iitabaa oottiya ooninne poo7o ixxees; aissi giikko, ba oosoi qonccenna mala, poo7uwaakko shiiqenna. <sup>21</sup> SHin tumaa oottiya ooninne Xoossai azazidoogaadan, i oottidoogaa poo7oi qonccissana mala, poo7uwaakko shiiqees.

### *Yesuusanne Xammaqiya Yohaannisa*

<sup>22</sup> Hegaappe guyyiyan, Yesuusinne erissiyo ashkkarati Yihudaa biitti biidosona; Yesuusi he biittan etaara amarida wodiya uttidi, asaa xammaqiis.

<sup>23</sup> Qassi Yohaannisi Saleema matan de7iya Henoona giyoosan gooba haattai de7iyo gishshau, asaa xammaqees; asai yi yiidi xammaqettes. <sup>24</sup> Yohaannisi biron qashetti-ichchibeenna.

<sup>25</sup> Hegaappe guyyiyan, Yohaannisi erissiyo ashkkaratinne amarida Aihudati meecheaabaa palamettidosona. <sup>26</sup> Eti Yohaannisakko biidi, “Tamaarissiyaagoo, Yorddaanoosa SHaafaappe hefinttan nenaara de7iyaagee, neeni abaa markkattidoogee, be7a ha77i xammaqees; asai ubbaikka akko bees” yaagidosona.

<sup>27</sup> Yohaannisi zaaridi, “Xoossai immana xayikko, asi ainne ekkana danddayenna. <sup>28</sup> ‘Taani Kiristtoosa gidikke; shin taani appe sinttau kiitettaas’ giidoogau taayyo intte intte huuphen markka. <sup>29</sup> Bullachchiyo maccaasiyaa de7iyo urai bullachchiyaagaa; he bullachchiyaagaa laggee eqqidi, i giyoogaa siyiyaagee bullachchiyaagaa haasayan daro ufaitees. Hegaa gishshau, hagee ta ufaissai polettiis. <sup>30</sup> I gitatana bessees; taani qassi guuxxana bessees” yaagiis.

<sup>31</sup> Bollappe yiyaagee ubbaappe bolla. Sa7aappe beettidaagee sa7aabaa; i qassi sa7aabaa haasayees. Saluwaappe yiyaagee ubbaappe bolla. <sup>32</sup> I ba be7idobaanne siyidobaa markkattees; shin a markkatettaa ekkiyai baawa. <sup>33</sup> A markkatettaa ekkiya ooninne Xoossai tumanchcha gidiyoogaa hegan markkattees. <sup>34</sup> Xoossai kiittidoogee Xoossaa qaala yootees; aissi giikko, Xoossai ba Geeshsha Ayyaanaa palahissidi immees. <sup>35</sup> Xoossai ba Na7aa siiqees; siiqidi ubbabaa a kushiyan wottiis. <sup>36</sup> Na7aa

ammaniya urau merinaa de7oi de7ees; shin Na7aa ammanennaagaa bolli Xoossaa hanqqoi de7anaagaappe attin, i de7o be7enna.

## 4

### *Yesuusanne Samaariyaappe Yiida Issi Maccaasiyo*

<sup>1-3</sup> Yesuusi Yohaannisaagaappe dariya kaalliyaageeta baakko shiishsheesinne xam-magees giyoogaa Parisaaweti siyidoogaa Yesuusi erido wode, Yihudaappe aggidi, Galiila biis; gidikkokka, erissiyo ashkkarati xammaqidoogaappe attin, Yesuusi ba huuphen oonanne xammaqibeenna. <sup>4</sup> Galiila biiddi, Samaariyaara aadhdhanaagee a ashshennabaa gidiis.

<sup>5</sup> Hegaa gishshau, Yaaqoobi ba na7aa Yooseefayyo immido gadiyaa matan de7iya Sikaara giyo Samaariyaa katamaa biis. <sup>6</sup> He sohuwan Yaaqooba haattaa ollai de7ees; Yesuusi hemetan daafuridi, he haattaa ollaa matan uttiis. He wode sa7ai usuppun saate heera.

<sup>7</sup> Samaariyaa katamaa maccaasa issinniyaa haattaa duuqqanau yaasu; Yesuusi he maccaasiyo, “Tana haattaa ushsharkkii!” yaagiis. <sup>8</sup> Yesuusi erissiyo ashkkarati quma shammanau katamaa biidosona.

<sup>9</sup> He maccaasiyaa zaarada, “Neeni Aihuda asa gidaidda, Samaariyaa maccaasa gidiya tana, waata haattaa ushsha gai?” yaagaasu; aissi giikko, Aihudati Samaaretuura gigettakkona.

<sup>10</sup> Yesuusi zaaridi o, “Neeni Xoossai immiyoobaanne qassi nena haattaa ushsha giyaagee oonakko eriyaabaa gidiyaakko, a woossana shin; i neeyyo de7o haattaa immana” yaagiis.

<sup>11</sup> Maccaasiyaa zaarada, “Godau, neeyyo duuqqiyoobi baawa; ollaikka ziqqa. Yaatin, de7o haattaa auppe ekkutee? <sup>12</sup> Nuuyyo ha haattaa ollaa immida nu aawaa Yaaqoobappe neeni gitatai? I, a naatinne a mehee hagaappe uyidosona” yaagaasu.

<sup>13</sup> Yaagin Yesuusi, “Ha haattaappe uyida ooninne naa77anttuwaa saamettana. <sup>14</sup> SHin taani immana haattaa uyiya ooninne mulekka saamettenna. Taani immana haattai he aawu giddon merinaa de7uwau pulttiya pultto gidana” yaagiis.

<sup>15</sup> Maccaasiyaa zaarada, “Godau, taani saamettenna malanne haattaa tikkanaukka ha sohuwaa yeenna mala, taayyo he haattaa imma!” yaagaasu.

<sup>16</sup> Yaagin Yesuusi o, “Baada ne azinaa xeesada haa ya” yaagiis.

<sup>17</sup> Maccaasiyaa zaarada, “Tau azini baawa” yaagaasu.

Yaagin Yesuusi o, “Tau azini baawa giyoogaa balabaakka. <sup>18</sup> Neeni ichchashu azinaa geladasa; ha77i nenaara de7iya bitanee ne azina gidenna. Neeni ha77i tau odidoogee tuma” yaagiis.

<sup>19</sup> Maccaasiyaa zaarada, “Godau, neeni hananabaa yootiyaagaa gidennan aggakka; <sup>20</sup> nu aawati ha deriyan goinnidosona; shin Aihudati intte asi Xoossau goinnanau bessiya sohoi Yerusalaameena yaageeta” yaagaasu.

<sup>21</sup> Yaagin Yesuusi, “Ha maccaasee tana ammana; ha deriyan woi Yerusalaamen Aawaayyo intte goinnenna wodee yaana. <sup>22</sup> Intte Samaariyaa asai intte erennabau goinneeta; atotettai Aihudatuppe yiyo gishshau, nuuni Aihudati nu eriyoo gau goinnoos. <sup>23</sup> SHin Aawau tumaappe goinniyaageeti ayyaanaaninne tumatettan goinniyo wodee matattiis; ha77ikka gakkiiichchiis. Aissi giikko, asi baayyo goinnana mala, Aawai koyiyoogeeti hageetu malaa. <sup>24</sup> Xoossai ayyaana; qassi au goinniyaageeti ayyaanaaninne tumatettan goinnanau bessees” yaagiis.

<sup>25</sup> Maccaasiyaa zaarada, “Kiristoosa giyo masee yaanaagaa taani erais. I yiyo wode nuuyyo ubbabaa yootana” yaagaasu.

<sup>26</sup> Yaagin Yesuusi, “Ha nenaara haasayiya taani a” yaagiis.

<sup>27</sup> Hinno eti haasayishin, Yesuusi erissiyo ashkkarati biidosappe simmidosona. Yesuusi maccaaseera haasayishin, eti be7idi daro garamettidosona; shin maccaasiyo, “Ai koyai?” giidai woi Yesuusa, “Ira aissi haasayai?” giidai ooninne baawa.

<sup>28</sup> Hegaappe guyyiyan, maccaasiyaa ba haatta otuwaa agga bayada, guyye katamaa baasu; baada asau, <sup>29</sup> “Taani oottidobaa ubbaa taayyo yootida bitaniyaa be7anau hinddite; hegee Kiristtoosa gidanddeeshsha?” yaagaasu. <sup>30</sup> Asai katamaappe kiyidi, Yesuusakko biis.

<sup>31</sup> Hegee hanishin, erissiyo ashkkarati Yesuusa, “Guuttabaa markkii!” yaagidi woosidosona.

<sup>32</sup> SHin i, “Taayyo intte erenna qumai taani maanaagee de7ees” yaagiis.

<sup>33</sup> Hegaa gishshau, erissiyo ashkkarati bantta gidдон, “Ayyo miyoobaa ehiida asi de7anddeeshsha?” yaagidosona.

<sup>34</sup> Yaagin Yesuusi etau, “Ta qumai tana kiittidaagee koyiyoobaa oottanaagaanne a oosuwaa polanaagaa. <sup>35</sup> Intte, ‘Oiddu aginappe guyyiyan, kattai cakettana’ geekketiyye? Taani intteyyo odais; goshshaa loitti xeellite; kattai cahaanessiis. <sup>36</sup> Zeriyaageenne cakkiyaagee issippe ufaittana mala, cakkiyaagee damoozaa ekkeesinne kattaa merinaa de7uwau shiishshees. <sup>37</sup> Aissi giikko, ‘Issoi zerees; qassi issoi cakkees’ giyo haasayai tuma. <sup>38</sup> Intte daafuribeennaagaa cakkana mala, taani inttena kiittaas; harati ootti daafuridosona; intte haratu daafuran gelideta” yaagiis.

<sup>39</sup> Maccaasiyaa, “I taani oottido ubbabaa yootiis” gaada markkattido gishshau, he kataman de7iya Samaariyaa asaappe daroi Yesuusa ammaniis. <sup>40</sup> Samaariyaa asai Yesuusakko yiido wode, bantta matan takkana mala, Yesuusa woosidosona; woossin i yaani naa77u gallassaa uttiis.

<sup>41</sup> I yootiyo qaalaa gishshau, kaseegaappe daro asai ammaniis; <sup>42</sup> qassi eti maccaasiyo, “Nuuni nu huuphen i giyoogaa siyidi ammanidoogaappe attin, neeni markkattido gishshassa gidenna; qassi i tumu ha sa7aa ashshiyaagaa gidiyooagaakka nuuni eroos” yaagidosona.

### *Yesuusi Issi Halaqaa Na7aa Pattiis*

<sup>43</sup> Naa77u gallassappe guyyiyan, Yesuusi yaappe kiyidi, Galiila biitti biis. <sup>44</sup> Aissi giikko, Yesuusi ba huuphen, “Hananabaa yootiyaagee ba biittan bonchchettenna” yaagiis. <sup>45</sup> Yesuusi Galiila gakkido wode, Galiila asai a mokkiis; aissi giikko, Paasikaa bonchchiyo gallassi eti Yerusalaamen de7iyo gishshau, i oottido ubbabaa be7idosona.

<sup>46</sup> Yesuusi haattaa woine eessa kessido, Galiilan de7iya Qaana katamaa biis. Qifiri-naahooman a na7ai sahettiyo kawo keettan oottiya issi halaqai de7ees. <sup>47</sup> Yesuusi Yihudaappe Galiila yiidoogaa he halaqai siyidi, akko yiis. Yiidi haiquwau matida ba na7aa biidi pattana mala, Yesuusa woossiis.

<sup>48</sup> Yesuusi halaqaa, “Xoossai oottiyo malaataanne garamissiyaabaa be7ennan de7iiddi, intte mulekka ammanekketa” yaagiis.

<sup>49</sup> Halaqai zaaridi, “Godau, ta na7ai haiqgennan de7ishin, tanaara hinddarkkii” yaagiis.

<sup>50</sup> Yaagin Yesuusi, “Ba; ne na7ai paxana!” yaagiis.

He halaqai Yesuusi giidoogaa ammanidi, aggidi biis. <sup>51</sup> I ba soo biishin, a ashkkarati aara ogiyan gaittidi a, “Ne na7ai paxa de7ees” giidosona.

<sup>52</sup> I ba ashkkarata ba na7au ai saatiyan kehidaakkonne oichchin eti, “Zine laappun saatiyan mishoi a aggiis” yaagidosona. <sup>53</sup> Yaagin na7aa aawai Yesuusi baayyo, “Ne na7ai paxana” giidoogee likke he saatiyaana gididoogaa hassayiis. Hegaa gishshau, inne a so asai ubbai ammaniis.

<sup>54</sup> Hagee Yesuusi Yihudaappe Galiila yiidi oottido naa77antto wolqqaama malaataa.

## 5

*Yesuusi Issi Gundda Bitaniyaa Pattiis*

<sup>1</sup> Hegaappe guyyiyan, Yesuusi Aihudati bonchchiyo baalaayyo Yerusalaame biis. <sup>2</sup> Yerusalaamen dorssaa penggiyaa matan Ibraisxxe qaalan Beetasaida giyo dagatti uttida haattai de7ees; he dagatti uttida haattaa yuuyi aadhdhida ichchashu baranddai de7ees. <sup>3</sup> Hegan haattai qaaxxiyoogaa naagiya daro hargganchcha asati, qooqeti, wobbetinne silati zin77i uttidosa. <sup>4</sup> Aissi giikko, issi issitoo Godaa kiitanchchai dagattida haattaakko biidi, haattaa qaattees; haattai qaaxxidoogaappe guyyiyan, koiro gelida urai bana oiqqida ai harggiyaappekka paxees. <sup>5</sup> He sohuwan hasttamanne hosppun laitta sahattida issi bitanee de7ees. <sup>6</sup> He bitanee hegan zin77idaagaa Yesuusi be7idi, qassi daro wodiya sahattidoogaa eridi bitaniyaa, “Paxanau koyai?” yaagiis.

<sup>7</sup> Sahettiya bitanee zaaridi, “Godau, haattai qaaxxiyo wode, tana dagattida haattan yeggiya asi baawa; shin taani gelana haniyo wode, hara urai taappe kasetidi geli-ichchees” yaagiis.

<sup>8</sup> Yaagin Yesuusi a, “Dendda eqqa; ne arssaa tookkada ba” yaagiis. <sup>9</sup> Bitanee sohuwaarakka paxi aggiis; ba arssaa tookkidi biis.

Hegee hanidoogee Sambbata gallassaana. <sup>10</sup> Hega gishshau, Aihudati paxida bitaniyaa, “Hachchi sa7ai Sambbata; neeni ne arssaa tookkiyoogee higge gidenna” yaagidosona.

<sup>11</sup> SHin bitanee, “Tana pattidaagee, ‘Ne arssaa tookkada ba’ yaagiis” yaagidi etau zaariis.

<sup>12</sup> Eti a, “Nena, ‘Ne arssaa tookkada ba’ giidaagee i oonee?” yaagidi oichchidosona.

<sup>13</sup> SHin Yesuusi he sohuwan daro asai de7iyaagaa giddo gelidi geemettido gishshau, bitanee bana pattida asi oonakkonne erenna. <sup>14</sup> Yesuusi guyyeppe he bitaniyaa Beeta Maqidasiyan demmidi, “Be7a, neeni paxadasa; hagaappe iitabai nena gakkenna mala, naa77antto nagara oottoppa” yaagiis. <sup>15</sup> Hegaappe guyyiyan, bitanee biidi, bana pattidaagee Yesuusa gididoogaa Aihudatuuyyo odiis.

<sup>16</sup> Yesuusi haggaa Sambbatan oottido gishshau, Aihudati Yesuusa waisuwa doommidosona. <sup>17</sup> Yesuusi zaaridi etayyo, “Ta Aawai ubba wode oottees; taanikka oottanau bessees” yaagiis.

<sup>18</sup> Hega gishshau, Yesuusi Sambbata gallassaa bonchchenna gishsha xalaalaassa gidennan, bana Xoossaara giigissidi, “Xoossai ta Aawaa” giido gishshau, Aihudati a woranau kasegaappe minttidi koyoosona.

*Xoossaa Na7aa Maataa*

<sup>19</sup> Yesuusi zaaridi etau, “Taani intteyyo tumaa odais; Na7ai barkka ainne ootenna. I ba Aawai oottishin be7iyooogaa xalaalaa oottees; Aawai oottiyoogaa Na7aikka oottees. <sup>20</sup> Aissi giikko, Aawai ba Na7aa siiqees; qassi i oottiyo oso ubbabaa ba Na7aa bessees. Intte garamettana mala, i hagaappe aadhdhiya oosuwaakka ba Na7aa bessana. <sup>21</sup> Aissi giikko, Aawai haiqqidaageeta haiquwaappe denttidi, paxa wottiyoogaadan, Na7aikka qassi ba siiqiyoogeeta paxa wottees. <sup>22-23</sup> Asai ubbai Aawaa bonchchiyoogaadan, Na7aakka bonchchana mala, Aawai pirdda ubbaa Na7au immidoogaappe attin, i oonanne pirddenna; Na7aa bonchchenna uri, Na7aa kiittida Aawaakka bonchchenna.

<sup>24</sup> “Taani intteyyo tumaa odais; ta qaalaa siyiyaagaunne tana kiittidaagan ammaniyaagau merinaa de7oi de7ees. Haiquwaappe de7uwau i pinnidoogaappe attin, pirddetenna. <sup>25</sup> Taani intteyyo tumaa odais; haiqqida asai Xoossaa Na7aa cenggurssaa siyiyo wodee yaana; ha77ikka yees. He cenggurssaa siyiyaageeti paxa de7ana. <sup>26</sup> Aissi giikko, Aawai banan de7oi de7iyooogaadan, ba Na7aanikka de7oi de7ana mala oottiis.

<sup>27</sup> Aawai Na7aayyo pirddiyo maataa immiis; aissi giikko, Na7ai Asa Na7aa.

<sup>28</sup> “Hagan garamettoppote; aissi giikko, duufuwan de7iyaageeti a cenggurssaa siyiyo wodee yees. <sup>29</sup> Siyidi eti duufuwaappe gaxi kiyana; lo77obaa oottidaageeti de7anau denddana; qassi iitabaa oottidaageeti pirdettanau denddana.

*Yesuusassi Markkattida Asata*

<sup>30</sup> “Taani tarkka ainne oottanau danddayikke; Xoossai tau odidoogaadan pirddais. Ta pirddai tuma; aissi giikko, taani tana kiittidaagee dosiyoobaa oottiyogaappe attin, taani dosiyoogaa oottikke.

<sup>31</sup> “Taani tabaa markkattikko, ta markkatetta tuma gidenna. <sup>32</sup> Tabaa markkattiya harai de7ees; qassi i tabaa markkattiyoogee tuma gidiyoga taani erais.

<sup>33</sup> “Intte Yohaannisakko asa kiittin, i tumau markkattiis. <sup>34</sup> Taani hegaa inttena attona gaada giyoogaappe attin, asa markkatetti tana kosshiina gidenna. <sup>35</sup> Yohaannisi muqaaddadan, eexxiisinne poo7issiis; qassi intte amarida wodiya a poo7uwan ufaittanau koyideta.

<sup>36</sup> “SHin tau Yohaannisaagaappe aadhdiya markkatetta de7ees; aissi giikko, taani wurssanau Aawai taayyo immido osoi, ha taani oottiyogaappe, Aawai tana kiittidoogaa tabaa markkattees.

<sup>37</sup> “Qassi tana kiittida Aawaikka ba huuphen tabaa markkattees. Intte a cenggurssaa mulekka siyibeekketa; a meraakka be7ibeekketa. <sup>38</sup> I kiittidoogaa intte ammanenna gishshau, a qalalai intte wozanan baawa.

<sup>39</sup> “Xoossaa maxaafatuppe merinaa de7uwaa demmiyoobaa intteyyo milatin, eta xanna7eeta; etikka tabaa markkattoosona. <sup>40</sup> SHin de7uwaa demmanau taakko yiyoogaa intte koyekketa.

<sup>41</sup> “Asi tana bonchchanaagaa koyikke. <sup>42</sup> SHin taani intte wozanan Xoossaa siiqoi bannaagaa erais. <sup>43</sup> Taani ta Aawaa sunttan yaas; shin tana mokiibeekketa. Hara asi ba sunttan yiyo wode, a mokkeeta. <sup>44</sup> Intte issoi issuwaa bonchcheeta; shin issi Xoossaappe yiya bonchchuwaa koyekketa. Yaatin, waanidi ammananau danddayeetii?

<sup>45</sup> “Taani Aawan inttena mootiyoobaa intteyyo milatoppo; inttena intte demmana giidi ufaissan naagiyo Muusee mootana. <sup>46</sup> Intte Muusa ammanidabaa gidiyaakko, tanakka ammanana; aissi giikko, tabaa xaafidai a. <sup>47</sup> SHin intte i xaafidoogaa ammanannan ixxiikko, taani giyoogaa waanidi ammanuuteetii?” yaagiis.

## 6

*Yesuusi Ichchashu SHa7u Asaa Miziiis*

*(Maatiyoosa 14:13-21; Marqqoosa 6:30-44; Luqaasa 9:10-17)*

<sup>1</sup> Hegaappe guyyiyan, Yesuusi Galiila abbaappe woi Xibiriyadoosa abbaappe hefintti pinniis. <sup>2</sup> I hargganchchatu bolli oottido wolqqaama malaataa be7ido gishshau, daro asai a kaalliis. <sup>3</sup> Yesuusi deriyaa kiyidi, yaani ba erissiyo ashkkaratuura issippe uttiis. <sup>4</sup> Aihudati bonchchiyo Paasikaa gallassai gakkiiis. <sup>5</sup> Yesuusi sinttaukko xeellidi, daro asai baakko yiyaagaa be7iis; be7idi Piliphphoosa, “Ha asaa ubbaa mizanau gidiya qumaa auppe shammanee?” yaagiis. <sup>6</sup> I hegaa Piliphphoosa paaccanau giis; aissi giikko, i ba huuphen ai oottanaakkonne erees.

<sup>7</sup> Piliphphoosi zaaridi Yesuusa, “Huuphiyan huuphiyan, harai atto issi issi barssa gattanau, naa77u xeetu biran shammido oittaikka gidenna” yaagiis.

<sup>8</sup> Qassi Yesuusi erissiyo ashkkaratuppe issoi, Simoon PHeexiroosa ishai Inddiraasi, <sup>9</sup> “Bangga oitta ichchashainne naa77u molee de7iyo issi na7ai hagan de7ees; shin ha asa ubbau hegee ai maaddanee?” yaagiis.

<sup>10</sup> Yesuusi erissiyo ashkkarata, “Asaa utissite” yaagiis. He sohuwan daro maatai de7ees. Asai ubbai uttiis; attumaasaa goodai ichchashu sha7aa gidana. <sup>11</sup> Yesuusi oittaa ekkiis; Xoossaa galatidi, hegan uttida asaayyo gishiis. Moliyaakka hegaadan oottiis; oottin asai ba koyidoogaa keenaa miis. <sup>12</sup> Eti ubbai kallidoogaappe guyyiyan, Yesuusi ba



erissiyo ashkkarata, “Issibaikka moorettena mala, attida xarzzaa shiishshite” yaagiis. <sup>13</sup> Hegaa gishshau, eti ubbaakka shiishshidosona; asai miishin attida bangga oittaa xarzzaa shiishshidi, tammanne naa77u samppaa kunttidosona.

<sup>14</sup> Asai Yesuusi oottido wolqqaama malaataa be7ido wode, “Hagee tumaappe ha sa7aa yaana giido hananabaa yootiyaagaa” yaagidosona. <sup>15</sup> Eti yiidi bana oiqqidi, wolqqan kawo oottanau haniyoogaa Yesuusi eridi, barkka deriyaa bolli naa77anttuwaa kiyiis.

*Yesuusi Abbaa Bolla Hemettidi Biis  
(Maatiyoosa 14:22-33; Marqqoosa 6:45-52)*

<sup>16</sup> Sa7ai omarido wode, Yesuusi erissiyo ashkkarati abbaakko biidosona; <sup>17</sup> wolwoluwan gelidi, abbaa pinnidi, Qifirinaahooma biidosona. Sa7aikka qammiichchiis; shin Yesuusi biron etakko yibeenna. <sup>18</sup> Wolqqaama carkkoi carkkido gishshau, abbai qaaxxees; <sup>19</sup> ichchashu woikko usuppun kilo meetire gidiaagaa keenaa eti abbaa shaarogaappe guyyiyan, Yesuusi abbaa bollaara hemettiiddi yiyaagaa be7idi yayyidosona. <sup>20</sup> SHin i, “Yayyoppite; tanattennee!” yaagiis. <sup>21</sup> Eti wolwoluwan a gelissanau koyidosona; sohuwaarakka wolwolo eti biyoosaa abbaa gaxaa gakki aggiis.

*Yesuusi De7o Oittaa*

<sup>22</sup> Wonttetta gallassi, abbaappe hefinttaara attida daro asai issi wolwolo xalaalai de7iyaagaa be7iis; Yesuusi ba erissiyo ashkkaratuura wolwoluwan gelidi, etaara beennan, eti banttarkka biidoogaa akeekidosona. <sup>23</sup> SHin Xibiriyaadoosappe hara wolwoloti Yesuusi Xoossaa galatin, asai oittaa miidosaa heeraa yiidosona. <sup>24</sup> Asai Yesuusi woi erissiyo ashkkarati hegan bainnaagaa be7idi, Yesuusa koyanau wolwoluwan gelidi, Qifirinaahooma biidosona.

<sup>25</sup> Asai Yesuusa abbaappe hefinttan demmido wode, “Tamarissiyaagoo, haggaa aude yaadii?” yaagiis.

<sup>26</sup> Yaagin Yesuusi zaaridi, “Taani intteyyo tumaa odais; intte tana koyiyoogee oittaa miido gishshassanne kallido gishshassa gidioogaappe attin, wolqqaama malaata be7ido gishshassa gidenna. <sup>27</sup> Merinaa de7o qumau, taani Asa Na7ai intteyyo immanaa-gau, oottiteppe attin, samiya qumau oottoppite; aissi giikko, Aawai Xoossai a bolli gido giyo paramaa parami wottiis” yaagiis.

<sup>28</sup> Hegaappe guyyiyan eti, “Nuuni Xoossaa oosuwaa oottanau ai oottanee?” yaagidi Yesuusa oichchidosona.

<sup>29</sup> Oichchin Yesuusi zaaridi, “Intte oottana mala, Xoossai koyiyo oosoi haggaa; i kiittidoogaa ammanite” yaagiis.

<sup>30</sup> Eti zaaridi, “Nuuni be7idi, nena ammanana mala, ai wolqqaama malaata oottutee? Ai oottutee? <sup>31</sup> Xoossaa maxaafai, ‘Eti maanau saluwaappe oittaa immiis’ giyoogaadan, nu aawati bazzon mannaa miidosona” yaagidosona.

<sup>32</sup> Yaagin Yesuusi, “Taani intteyyo tumaa odais; intteyyo saluwaappe tumu oittaa immiyaagee ta Aawaa gidioogaappe attin, intteyyo saluwaappe oittaa immidaagee Muusa gidenna. <sup>33</sup> Aissi giikko, Xoossaa oittai saluwaappe wodhdhiyaagee sa7au de7uwaa immees” yaagiis.

<sup>34</sup> Eti zaaridi, “Godau, nuuyyo he oittaa ubba wode imma” yaagidosona.

<sup>35</sup> Yaagin Yesuusi, “Taani de7o oitta; taakko yiya urai mulekka namisettenna. Qassi tana ammaniya urai mulekka saamettenna. <sup>36</sup> SHin taani intteyyo odaas; intte tana be7ideta; shin ammanekketa. <sup>37</sup> Ta Aawai tau immiyo ubbai taakko yaana; qassi taakko yiya oonanne mulekka taani wora yeddikke. <sup>38</sup> Aissi giikko, taani tana kiittidaagee koyiyoogaa oottanau saluwaappe yaasippe attin, ta koyiyoogaa oottanau yabeikke. <sup>39</sup> Tana kiittidaagee koyiyoogee haggaa; taani i tau immido ubbataakka wurssettaa gallassi denttanaappe attin, issuwaakka bashshana mala koyenna. <sup>40</sup> Aissi giikko,

ta Aawai koyiyoogee hagua; tana Na7aa be7idi, ammaniya ubbati merinaa de7uwaa ekkana; taanikka he ubbata wurssettaa gallassi denttana” yaagiis.

<sup>41</sup> Yesuusi, “Taani saluwaappe wodhdhida oittaa” giido gishshau, Aihudati a bolli zuuzummidosona. <sup>42</sup> Eti, “Hagee nuuni a aawaanne a aayyiyo eriyo Yooseefa na7aa Yesuusa gidensee? Yaatin, i woigidi, ‘Taani saluwaappe wodhdhaas’ gaanau dand-dayii?” yaagidosona.

<sup>43</sup> Yesuusi zaaridi, “Issoi issuwaara zuuzummiyoogaa aggite. <sup>44</sup> Tana kiittida ta Aawai taakko ehiido asappe attin, taakko yaanau danddayiya asi baawa; taanikka wurssettaa gallassi a denttana. <sup>45</sup> Hananabaa yootiyaageeti, ‘Xoossai asa ubbaa taaaris-sana’ yaagidi xaafidosona; Aawai giyoogaa siyiyaageenne Aawaappe taaariyaagee ooninne taakko yees. <sup>46</sup> Xoossaa matappe yiidaagaappe attin, Xoossaa be7ida asi baawa; a xalaalai Xoossaa be7iis.

<sup>47</sup> “Taani intteyyo tumaa odais; tana ammaniya urau merinaa de7oi de7ees. <sup>48</sup> Taani de7o oitta. <sup>49</sup> Intte aawati bazzon mannaa miidosona; shin haiqqidosona. <sup>50</sup> Asi appe miidi haiqqenna oittai saluwaappe yiyaagee hagua. <sup>51</sup> Saluwaappe wodhdhida de7o oittai tana; ooninne ha oittaappe miikko, merinau de7ana; qassi ha sa7ai de7ana mala, taani immana oittai ta ashuwaa” yaagiis.

<sup>52</sup> Aihudati, “Ha bitanee ba ashuwaa nuuni maana mala, nuuyyo waatidi immanau danddayii?” yaagidi bantta gidon palamettidosona.

<sup>53</sup> Hegaa gishshau, Yesuusi eta, “Taani intteyyo tumaa odais; ta ashuwaa, Asa Na7aa ashuwaa, intte maana xayikko, qassi ta suuttaakka intte uyana xayikko, inttenan de7oi baawa. <sup>54</sup> Ta ashuwaa miya uraunne, ta suuttaa uyiya uraunne merinaa de7oi de7ees. Taani wurssettaa gallassi a denttana. <sup>55</sup> Aissi giikko, ta ashoi tumu quma; ta suuttaikka tumu ushsha. <sup>56</sup> Ta ashuwaa miya urainne ta suuttaa uyiya urai tanaara de7ees; taanikka aara de7ais. <sup>57</sup> De7o Aawai tana kiittin, taani a gaasuwan de7iyooogaadan, tana miya uraikka ta gaasuwan de7ana. <sup>58</sup> Saluwaappe wodhdhida oittai hagua; intte aawati miidi haiqqido mannaa mala gidenna; ha oittaa miya urai merinau de7ana” yaagiis.

<sup>59</sup> Yesuusi Qifirinaahooma kataman Aihuda woosa keettan taaariissiiddi, hagua yaagiis.

### *Merinaa De7o Qaalaa*

<sup>60</sup> Yesuusi erissiyo ashkkaratuppe dariya baggai hegaa siyido wode, “Hagee gelenna timirtte; hagee ooyyo gelii?” yaagidosona.

<sup>61</sup> SHin Yesuusi ba erissiyo ashkkarati hegau zuuzummidoogaa eridi, “Hagee intena xubbii? <sup>62</sup> Yaatin taani, Asa Na7ai, kase de7iyooosaa pude kiyishin be7iyaakko waanuuteetii? <sup>63</sup> Geeshsha Ayyaanai de7uwaa immees; ashoi ainne go77enna. Taani intteyyo yootido qaalai ayyaananne de7o. <sup>64</sup> SHin intte gidon ammanennaageeti de7oosona” yaagiis; aissi giikko, ammanennaageeti augeetakko Yesuusi kaseesappe doommidi erees. Qassi bana aatti immanaaageet akka erees. <sup>65</sup> Qassikka Yesuusi, “Aawai ba geennan ooninne taakko yaanau danddayenna taani giidoogee hegaa gishshassa” yaagiis.

<sup>66</sup> Hegaa gaasuwan, Yesuusa kaalliyaageetuppe daroti a aggi bayidi, guyye simmidosona; naa77antto a kaallibookkona. <sup>67</sup> Yesuusi qassi ba tammanne naa77u erissiyo ashkkarata, “Inttekka aggi bayidi baanau koyeetii?” yaagiis.

<sup>68</sup> Simoon PHeexiroosi zaaridi, “Godau, nuuni ookko baanee? Neeyyo merinaa de7uwaa qaalai de7ees. <sup>69</sup> Neeni Xoossaa geeshshaa gidiyooogaa nuuni ammanoosinne eroos” yaagiis.

<sup>70</sup> Yaagin Yesuusi eta, “Taani inttena tammanne naa77ata doorabeikkinaa? Qassi intteppe issoi xalahe” yaagiis. <sup>71</sup> Yesuusi hegaa Simoona na7aa Yihudaa Asqqoroota gees;

aissi giikko, Yihudai tammanne naa77u erissiyo ashkkaratuppe issuwaa; i Yesuusa aatti immanaagaa.

## 7

### *Yesuusi Daase Baalaassi Yerusalaame Biis*

<sup>1</sup> Hegaappe guyyiyan, Yesuusi Galiilan yaa haa yuuyiis; Aihudati a woranau koyiyo gishshau, Yihudan yuuyana koyibeenna. <sup>2</sup> Aihudati bonchchiyo Daase Baalai gakki uttiis. <sup>3</sup> Hegaa gishshau, Yesuusa ishannti a, “Ne erissiyo ashkkarati neeni oottiyooгаа be7ana mala, hagaappe denddada Yihudaa biitti ba. <sup>4</sup> Aissi giikko, baayyo erettanau koyiia asi ooninne ba ooso genttena. Neeni hageeta oottiyaabaa gidikko, nebaa sa7aa erissa!” yaagidosona. <sup>5</sup> Aissi giikko, harai atto a ishanntikka a ammanibookkona.

<sup>6</sup> Yesuusi eta, “Tau injjetiya wodee gakkibeenna; shin intteyyo ai wodeekka injjetees. <sup>7</sup> Sa7ai inttena ixnanau danddayenna; shin taani sa7aa oosoi iita gidiyooгаа markkatiyo gishshau, tana ixxees. <sup>8</sup> Baalaa bonchchiyoosaa intte biite; tau injjetiya wodee gakkibeenna gishshau, taani baalaa bonchchiyoosaa baanaagee biroona” yaagiis. <sup>9</sup> I haggaa giidi, Galiilan attiis.

### *Yesuusi Daase Baalaa Sohuwan Beettiis*

<sup>10</sup> SHin a ishannti baala gallassaa bonchchiyoosaa biidoogaappe guyyiyan, ikka asi be7ennan geeman he sohuwaa biis. <sup>11</sup> Aihudati baala gallassaa bonchchiyoosan a koyoosonanne, “I awan de7ii?” yaagiiddi, a lal77oosona.

<sup>12</sup> Asaa giddon daro zuuzunttai denddiis. Amarida asai, “I lo77o asa” yaagees; harati qassi, “Akkai; i asa balettees” yaagoosona. <sup>13</sup> SHin Aihudatuuyo yayyido gishshau, ooninne abaa qoncciyaa haasayenna.

<sup>14</sup> Baala gallassaa bonchchiyoogee baggettin, Yesuusi Beeta Maqidasiyaa biidi, tamarissuwaa doommiis. <sup>15</sup> Aihudati garamettidi, “Ha bitanee ainne tamaarennan haggaa keeni waani eridee?” yaagidosona.

<sup>16</sup> Hegaa gishshau, Yesuusi zaaridi, “Taani tamarissiyoogee tana kiittida Xoossaa matappe yiyoogaappe attin, tabaa gidenna. <sup>17</sup> Xoossaa sheniyaa oottanau dosiya ooninne ha taani tamarissiyoogee Xoossaa matappe yiyaakko woi qassi taani ta huupheppe haasayiyaakko erana. <sup>18</sup> Babaa haasayiya urai ba huuphessi bonchcho koyees; shin bana kiittidaagaa bonchchuwaa koyiia urai tumanchcha; aani worddoi baawa. <sup>19</sup> Muusee intteyyo higgiiya immibeennee? SHin intteppe issoinne higgiiya naagenna. Tana aissi woranau koyeetii?” yaagiis.

<sup>20</sup> Asai zaaridi, “Nenan xalahee de7ees; nena woranau oonee koyidai?” yaagiis.

<sup>21</sup> Yaagin Yesuusi, “Taani issi wolqqaamabaa oottin, intte ubbai garamettideta. <sup>22</sup> Qaxxarai intte aawatuura yiidoogaappe attin, Muuseera yibeenna; shin intte naata intte qaxxarana mala, Muusee inttena azazido gishshau, intte Sambbatan naata qaxxareeta. <sup>23</sup> Muusee higgee azazido gishshau, intte Sambbatan qaxxariyaabaa gidikko, yaatin taani issi asayyo kumetta bollaa pattido gishshau, tana aissi hanqqetteetii? <sup>24</sup> Tumu pirddaa pirdditeppe attin, asa som77o xeellidi pirddoppite” yaagiis.

### *Kiristtoosaban Asai Palamettiis*

<sup>25</sup> Hegaa gishshau, Yerusalaame asaappe issooti issooti, “Eti woranau koyiyo bitanee haggaa gidennee? <sup>26</sup> Be7ite, qoncciyaa i haasayees; eti a ainne gookkona. Hagee Kiristtoosa gidiyooгаа halaqati tumu eriyoonaashsha? <sup>27</sup> SHin nuuni i auppe yiidaakko eroos; Kiristtoosi yiyo wode, i auppe yiyaakkonne ooninne erenna” yaagidosona.

<sup>28</sup> Hegaappe guyyiyan, Yesuusi Beeta Maqidasiyan tamarissiiddi, ba qaalaa xoqqu oottidi, “Intte tana ereeta; qassi taani awappe yiidaakkokka ereeta. Taani ta shenen yabeikke; shin tana kiittidaagee tumanchcha; intte a erekketa. <sup>29</sup> SHin taani a erais; aissi giikko, i tana kiittin, taani a matappe yaas” yaagiis.

<sup>30</sup> Hegaa gishshau, eti a oiqqanau koyidosona; shin a wodee birooni gakkibeenna gishshau, ooninne a bolli kushe wottibeenna. <sup>31</sup> SHin daro asai Yesuusa ammanidi, “Kiristtoosi yiyo wode, ha bitanee oottido malaataappe xoqqiyaagaa oottaneeyye?” yaagidosona.

### *Yesuusa Oiqqanau Wotaaddarati Kiitettidosona*

<sup>32</sup> Parisaaweti daro asai Yesuusabaa zuuzummiyoogaa siyidosona; qeese halaqatinne Parisaaweti a oitti qashissanau amarida wotaaddarata kiitettidosona.

<sup>33</sup> Yesuusi, “Taani inttenaara guutta takkana; hegaappe guyyiyan, tana kiittidaa-gaakko baana. <sup>34</sup> Intte tana koyana; shin demmekketa; aissi giikko, taani de7iyoosaa intte baanau danddayekketa” yaagiis.

<sup>35</sup> Aihudati issoi issuwaara, “Hagee nuuni demmennasaa awa baana hanii? Aihudati de7iyo Giriike katamaa biidi, Giriiketa tamarissanau haniiyye? <sup>36</sup> I, ‘Intte tana koyana; shin demmekketa’ qassi, ‘Taani de7iyoosaa intte baanau danddayekketa’ yaagees; heгаа giyoogee woigiyoogee?” yaagidosona.

### *De7o Haattaa*

<sup>37</sup> He baala gallassaa bonchchiyo gallasaappe waannatiya wurssetta gallassan Yesu-usi denddi eqqidi, ba qaalaa xoqqu oottidi, “Saamettida urai ooninne taakko yiidi uyo. <sup>38</sup> Tanan ammaniyaagau, Xoossaa maxaafai giyoogaadan, a uluwaappekka de7o haattaa shaafai goggana” yaagiis. <sup>39</sup> I heгаа a ammanidaageeti ekkana Geeshsha Ayyaanaabaa haasayiis. Yesuusi biron bonchchettichchibeenna gishshau, he wode Geeshsha Ayyaanai imettiichchibeenna.

### *Asaa Giddon PHalqqetta Merettiis*

<sup>40</sup> He asaappe dariya baggai i giyoogaa siyidi, “Tumu hagee hananabaa yootiyaagaa!” yaagiis.

<sup>41</sup> Harati, “Hagee Kiristtoosa” yaagidosona.

SHin harati qassi, “Kiristtoosi Galiilappe waani kiyii? <sup>42</sup> Xoossaa maxaafai, ‘Kirist-toosi Daawita zariyaappe Daawiti de7ido Beetaliheeme katamaappe yaana’ geen-neeyye?” yaagidosona. <sup>43</sup> Yesuusa gaasuwan asai ba giddon shaahettiis. <sup>44</sup> He asaappe issooti issooti a oiqqanau koyidosona; shin kushiyaaninne a bochchibookkona.

<sup>45</sup> Beeta Maqidasiyaa wotaaddarati qeese halaqatukkonne Parisaawetukko simmi-dosona; simmin eti Beeta Maqidasiyaa wotaaddarata, “Aissi a ehibeekketii?” yaagidi oichchidosona.

<sup>46</sup> Oichchin Beeta Maqidasiyaa wotaaddarati etau, “Ha bitanee haasayidoogaadan, mulekka ooninne haasayibeenna!” yaagidi zaaridosona.

<sup>47</sup> Parisaaweti zaaridi, “I inttenakka balettidee? <sup>48</sup> Halaqatuppe woi Parisaawetuppe a ammanida asi de7ii? <sup>49</sup> SHin higgiiyaa erenna ha asai qanggettidaagaa” yaagidosona.

<sup>50</sup> Etappe kase issoi qammi Yesuusakko biida Niqoodimoosi eta, <sup>51</sup> “Issi urai giyoobaa siyennan woi i ai oottidaakko erennan de7iiddi, kasetidi a bolli pirddiyoogee nu higgiiyan de7ii?” yaagiis.

<sup>52</sup> Yaagin eti zaaridi a, “Neenikka qassi Galiila biittaa asee? Galiila biittaaappe hanan-abaa yootiyaabi beettenaagaa Xoossaa maxaafata marammarada era” yaagidosona.

<sup>53</sup> Asai ubbai aggidi, ba soo ba soo biis.

## 8

### *SHaaramuxishin Oiqqido Maccaasiyo*

<sup>1</sup> SHin Yesuusi Dabira Zaita Deriyaakko biis. <sup>2</sup> Qassi wonttetta gallassi guuran Beeta Maqidasiyaa simmiis; daro asai akko yin, uttidi eta tamarissiis. <sup>3</sup> Higgiiyaa tamarissiyaageetinne Parisaaweti shaaramuxishin oiqqido issi mishiriyo akko ekki ehidosona. Eti asa ubbaa sinttan o essidi Yesuusa, <sup>4</sup> “Tamarissiyaagoo, ha mishiriya

shaaramuxaidda ohettaasu. <sup>5</sup> Higgiyaa bolli Muusee hannu mala maccaasa shuchchan caddana mala, nuna azaziis. Yaatin neeni woigai?” yaagidosona.

<sup>6</sup> Eti heгаа giidoogee Yesuusa mootiyooḃaa demmidi a paaccanaassa; shin Yesuusi hokkidi, ba biradhdhiyan biittaa bolli xaafiis. <sup>7</sup> Eti a oichchidi aggennan ixxin, pude xoqqu giidi, “Intte gidḃon nagara oottibeenna asi kasetidi, o shuchchan caddo” yaagiis.

<sup>8</sup> Qassikka hokkidi, biittaa bolli xaafiis.

<sup>9</sup> Eti heгаа siyido wode, kasetidi cimati kiyin, issoi issoi kiyiiddi wuridosona; wurin Yesuusa xalaalai hegaan eqqida mishireera attiis. <sup>10</sup> I pude xoqqu giidi mishiriyo, “Mishiree, asati awan de7iyoonaa? Ooninne ne bolli pirddibeennee?” yaagiis.

<sup>11</sup> Yaagin mishiriyaa, “Godau, ooninne ta bolli pirddibeenna” yaagaasu.

Yesuusi o, “Taanikka ne bolli pirddikke; ba; naa77anttada nagara oottoppa” yaagiis.

<sup>12</sup> Qassikka Yesuusi asau, “Taani sa7au poo7o; tana kaalliya ooninne de7o poo7uwaa ekkanaappe attin, xuman mulekka hemettenna” yaagidi haasayiis.

<sup>13</sup> Yaagin Parisaaweti, “Neeni nebaa markkattaasa; ne markkatetta tuma gidenna” yaagidosona.

<sup>14</sup> Yesuusi zaaridi, “Taani tabaa markkattikkokka, ta markkatetta tuma; aissi giikko, taani awappe yiidaakkonne qassi awa biyaakko, intte erekketa. <sup>15</sup> Asi pirddiyo ogiyan intte pirddeeta; taani issi uraa bollikka pirddikke. <sup>16</sup> SHin taani pirddiyaabaa gidikkokka, ta pirddai tuma; aissi giikko, tana kiittida ta Aawai tanaara de7eesippe attin, taani tarkka de7ikke. <sup>17</sup> Naa77u asa markkatetta tuma gidiyooḃee intte higgiiyan xaafetti uttiis. <sup>18</sup> Taani tabaa ta huuphen markkattais; qassi tana kiittida ta Aawaikka tabaa markkattees” yaagiis.

<sup>19</sup> Yaagin eti, “Ne aawai awan de7ii?” yaagidi Yesuusa oichchidosona.

Yesuusi zaaridi, “Intte tanakka woi ta Aawaakka erekketa; tana eridabaa gidiyaakko, intte ta Aawaakka erana” yaagiis.

<sup>20</sup> Yesuusi Beeta Maqidasiyan tamarissiiddi, muxuwaata miishshaa yeggiyo saaxiniyaa matan heгаа haasayiis. A ooninne oiqqibeenna; aissi giikko, a wodee biron gakkiiichhibeenna.

### *Ammanennan Ixxidaageetussi Imettida Mino Akeekissuwaa*

<sup>21</sup> Qassikka Yesuusi eta, “Taani baana. Bin intte tana koyana; shin intte intte nagaran haiqqana. Taani biyoosaakka baanau intte danddayekketa” yaagiis.

<sup>22</sup> Aihudati, “I, ‘Taani biyoosaa intte baanau danddayekketa’ yaagees; i bana barkka woraneeyye?” yaagidosona.

<sup>23</sup> Yesuusi zaaridi, “Intte garssa asa; taani bolla asa. Intte ha sa7aa asa; taani ha sa7aa asa gidikke. <sup>24</sup> Intte intte nagaran haiqqanaagaa taani intteyyo yootidoogee heгааassa; taani tana gidiyooḃaa intte ammanana xayikko, intte intte nagaran haiqqana” yaagiis.

<sup>25</sup> Yaagin eti, “Neeni oonee?” yaagidi oichchidosona.

Yesuusi zaaridi, “Taani intteyyo kaseesappe yootido tana. <sup>26</sup> Taani inttebaa haasaiyyoobainne pirddiyoobai darobai de7ees. SHin tana kiittidaagee tumanchcha; qassi taani appe siyidoogaa sa7aa asaayyo yootais” yaagiis.

<sup>27</sup> I ba Aawaabaa haasaiyyooḃaa eti akeekibookkona. <sup>28</sup> Heгаа gishshau, Yesuusi eta, “Tana Asa Na7aa intte masqqaliyaa bolli kaqqiyo wode, taani tana gidiyooḃaanne qassi taani ta Aawai tana tamarissidoogaadan haasaiyyooḃaappe attin, ta shenen ainne oottennaagaa intte erana. <sup>29</sup> Qassi tana kiittidaagee tanaara de7ees; taani ubba wode a ufaissiyaagaa oottiyo gishshau, i ta xalaalaa aggibeenna” yaagiis.

<sup>30</sup> Yesuusi heгаа haasayishin siyida daro asai a ammaniis.

### *Nagaraa Aillettaappe Kiyiyo Kessaa*



<sup>31</sup> Yesuusi bana ammanida Aihudata, “Intte taani tamarissiyooqau azazettikko, tumu tana kaalliyaageeta. <sup>32</sup> Intte tumatettaakka erana; qassi tumatetta inttena ailletettaappe kessana” yaagiis.

<sup>33</sup> Eti zaaridi, “Nuuni Abrahaama zare; nuuni ooyyookka ailletibookko. Yaatin neeni woigada, ‘Ailletettaappe intte kiyana’ gai?” yaagidosona.

<sup>34</sup> Yaagin Yesuusi, “Taani intteyyo tumaa odais; nagara oottiya ooninne nagara aille. <sup>35</sup> Aillee ubba wode sooni de7enna; shin na7i merinau sooni de7ees. <sup>36</sup> Na7ai inttena ailletettaappe kessikko, intte ailletettaappe intte tumu kiyana. <sup>37</sup> Intte Abrahaama zare gidiyooqaa taani erais; shin ta qaalai intte wozanan bainna gishshau, tana woranau koyeeta. <sup>38</sup> Taani ta Aawai tana bessidoogaa haasayais; qassi intteikka intte aawaappe siyidoogaa ootteeta” yaagiis.

<sup>39</sup> Eti zaaridi, “Nu aawai Abrahaama” yaagidosona.

Yaagin Yesuusi eta, “Intte Abrahaama naata gididaakko, i oottido oosuwa malaa oot-tana. <sup>40</sup> SHin Xoossaappe siyido tumaa yootida tana intte woranau koyeeta; Abrahaami hegaadan oottibeenna. <sup>41</sup> Intte intte aawai oottidoogaa ootteeta” yaagiis.

Eti zaaridi, “Nuuni shaaramuxan yelettibookko; nuuyyo issi Aawai, Xoossaa xalaalai de7ees” yaagidosona.

<sup>42</sup> Yaagin Yesuusi eta, “Intte Xoossaa naata tumu gididaakko, tana siiqana; aissi giikko, taani Xoossaa matappe yaada hagan de7ais. Tana i kiittidoogaappe attin, taani ta shenen yabeikke. <sup>43</sup> Taani giyoogaa intte akeekennaagee aibissee? Taani giyoogaa intte siyanau danddayenna gishshassa. <sup>44</sup> Intte intte aawaa xalahe halaqaa naata; qassi intte intte aawai amottiyoobaa oottanau koyeeta. I kaseppe doommidi, shemppo woridaagaa; tumatetti aani bainna gishshau, tumatettaakko shiiqi erenna. I wordduwaa haasayiyo wode, baappe haasayees; aissi giikko, i worddanchchanne qassi wordduwaukka aawa. <sup>45</sup> SHin taani tumaa haasayiyo gishshau, intte tana ammanekketa. <sup>46</sup> Intteppe tana nagara oottishin be7aas gaanau danddayiyai oonee? Taani tumaa haasayiyaabaa gidikko, tana aissi ammanekketii? <sup>47</sup> Xoossaa asa gidiya urai Xoossai giyoogaa ezggees; intte Xoossaa asa gidenna gishshau, Xoossai giyoogaa ezggeketa” yaagiis.

### *Yesuusi Abrahaamappe Kase De7iis*

<sup>48</sup> Aihudati zaaridi, “Nuuni nena, ‘Neni Samaariyaa asa; nenan xalahee de7ees’ giidi mooridoo?” yaagidosona.

<sup>49</sup> Yesuusi eta hagaadan yaagiis; “Ta bolli xalahee baawa. Taani ta Aawaa bonchchais; shin intte tana kaushsheeta. <sup>50</sup> Taani ta huuphessi bonchcho koyikke; hegaa koyiyaageenne pirddiyaagee de7ees. <sup>51</sup> Taani intteyyo tumaa odais; ta qaalaa naagiya ooninne mulekka haiqqenna” yaagiis.

<sup>52</sup> Aihudati zaaridi, “Ne bolli xalahee de7iyooqaa nuuni ha77i erida. Abrahaami haiqqiis; hananabaa yootiyaageetikka haiqqidosona; shin neeni, ‘Ta qaalaa naagiya ooninne mulekka haiqqenna’ yaagaasa. <sup>53</sup> Neni haiqqida nu aawaa Abrahaamappe darai? Hananabaa yootiyaageetikka qassi haiqqidosona. Neni nena o mala gaada qoppai?” yaagidosona.

<sup>54</sup> Yaagin Yesuusi, “Taani tana bonchchikko, ta bonchchoi hada; intte nu Xoossaa giyo ta Aawai tana bonchchees. <sup>55</sup> Intte a erana xayikkokka, taani a erais. Taani a erikke giikko, inttenadan worddanchcha gidais; shin taani a erais; qassi a qaalaa naagais. <sup>56</sup> Intte aawai Abrahaami, ta gallassaa be7anau laamotiis; be7idikka ufaittiis” yaagiis.

<sup>57</sup> Aihudati zaaridi a, “Neeyyo harai atto ishatamu laitta kumibeennaagee Abrahaama be7adii?” yaagidosona.

<sup>58</sup> Yaagin Yesuusi eta, “Taani intteyyo tumaa odais; Abrahaami yelettanaappekka kase taani de7ais” yaagiis.

<sup>59</sup> Hegaa gishshau, eti Yesuusa caddanau shuchchaa ekkidosona; shin Yesuusi etappe geemettidi, Beeta Maqidasiyaappe kiyidi biis.

## 9

### *Yesuusi Qooqe Gididi Yelettida Bitaniyaa Pattiiis*

<sup>1</sup> Yesuusi biiddi, yelettoosappe qooqe gididi de7iya issi bitaniyaa be7iis. <sup>2</sup> Erissiyo ashkkarati Yesuusa, “Tamaarissiyaagoo, ha bitanee qooqe gididi yelettanaadan, nagara oottidai oonee? I oottideeyye? Woi a yelidaageeti oottidonaa?” yaagidi oichchidosona.

<sup>3</sup> Oichchin Yesuusi, “Xoossaa oosoi a bollan qonccana mala qooqidoogaappe attin, i woi a ayyiyaanne a aawai nagara oottibookkona. <sup>4</sup> Nuuni sa7ai qammennan de7ishin, tana kiittidaagaa oosuwa oottanau bessees. Ooninne oottanau danddayenna qammai yees. <sup>5</sup> Taani sa7an de7aidda sa7au poo7o” yaagiis.

<sup>6</sup> Yesuusi hegaa giidi, sa7an cuchchiis; ba cuchchan guutta urqqaa shugissidi, he urqqan qooqe bitaniyaa aifiyaa tiyiis. <sup>7</sup> Tiyidi, “Baada Saliihooma giyo dagattida haattan ne aifiyaa meecca” yaagiis. “Saliihooma” giyoogee “Kiitettidaagaa” giyoogaa. Hegaa gishshau, bitanee biidi, ba aifiyaa meecettidi, xeelliiddi simmiis.

<sup>8</sup> Bitaniyaa shoorotinne bitanee kase woossishin be7ida asainne, “Hagee uttidi woos-siya bitaniyaa gidenneeyye?” yaagidosona.

<sup>9</sup> Qassi amaridaageeti, “Hagee attennee” yaagidosona.

Harati qassi, “CHii, hagee a milatiyoogaappe attin, a gidenna” yaagidosona.

SHin bitanee, “Taani attennee” yaagiis.

<sup>10</sup> Yaagin eti bitaniyaa, “Yaatin, ne aiffee waani xeellidee?” yaagidi oichchidosona.

<sup>11</sup> I zaaridi, “Yesuusa giyo asi guutta urqqaa shugissidi, ta aifiyaa tiyiis. Tiyidi, ‘Saliihooma giyo dagattida haattan baada ne aifiyaa meecetta’ yaagiis. Taani baada meecettada xeellaas” yaagiis.

<sup>12</sup> Eti a, “I awan de7ii?” yaagidi oichchidosona.

Oichchin bitanee, “Taani erikke” yaagiis.

<sup>13</sup> Eti kase qooqidi xeellida bitaniyaa Parisaawetukko ekki efiidosona. <sup>14</sup> Yesuusi urqqaa shugissidi, bitaniyaa aifiyaa pattido gallassai Sambbata gallassa. <sup>15</sup> Hegaa gishshau, bitanee waani xeellidaakkonne Parisaaweti a naa77anttuwaa oichchidosona. Oichchin bitanee etau, “I ta aifiyan guutta urqqaa wottiis. Ta aifiyaa meecettaas; meecettada ha77i xeellais” yaagiis.

<sup>16</sup> Parisaawetuppe issooti issooti, “Hagaa oottida bitanee Sambbata higgiiyaa naagenna gishshau, Xoossaa matappe yibeenna” yaagidosona.

SHin harati, “Nagaranchcha asi hagaa mala wolqqaama malaataa waani oottanau danddayii?” yaagidosona; yaagidi eti bantta gididon shaahettidosona.

<sup>17</sup> Hegaa gishshau, Parisaaweti bitaniyaa, “I ne aifiyaa dooyido gishshau, abaa woigai?” yaagidosona.

Yaagin bitanee, “I hananabaa yootiyaagaa” yaagiis.

<sup>18</sup> Aihudati he xeellida bitaniyaa aayyiyoonne aawaa xeesidi oichchana gakkanaassi, bitanee qooqe gididoogaanne ha77i i xeelliyoogaa ammanibookkona. <sup>19</sup> Aihudati a aayyiyoonne aawaa, “Intte, ‘Qooqe gididi yelettiis’ giyo intte na7ai hagee? Yaatin, ha77i waanidi xeellidee?” yaagidi oichchidosona.

<sup>20</sup> Oichchin bitaniyaa aayyiyaanne aawai, “Hagee nu na7aa gididoogaanne qooqe i gididi yelettidoogaa nuuni eroos. <sup>21</sup> SHin ha77i i waani xeellidaakko, nuuni erokko; woi a aifiyaa ooni pattidaakko, nuuni erokko. A oichchite; i gastta asa; babaa haasayanau danddayees!” yaagidosona. <sup>22</sup> Bitaniyaa aayyiyaanne aawai Aihudatuuyo yayyido gishshau, hegaa giidosona; aissi giikko, Aihudati Yesuusi Kiristtoosa yaagidi markkattiya urai de7ikko, he uraa Aihuda woosa keettaappe kessanau kasetidi qachchi wottidosona. <sup>23</sup> A aayyiyaanne aawai, “I gastta asa; a oichchite!” giidoogee hegaassa.

<sup>24</sup> Hegaa gishshau, qooqe gididi yelettida bitaniyaa eti naa77anttuwaa xeesidi, “Xoos-saa galata; ha bitanee nagaranchcha gidiyooгаа nuuni eroos” yaagidosona.

<sup>25</sup> Yaagin bitanee, “I nagaranchcha gidin, gidana xayin erikke; taani qooqe gidiyooгааanne ha77i xeelliyooгаа he issibaa erais” yaagiis.

<sup>26</sup> Eti zaaridi bitaniyaa, “I neeyyo ai oottidee? I ne aifiyaa waati pattidee?” yaagidosona.

<sup>27</sup> Yaagin i eta, “Taani intteyyo yootarggaas; siyibeekketa. Aissi naa77anttuwaa siyanau koyeetii? Inttekka Yesuusa kaalliyaaageeta gidanau koyeetiiyye?” yaagiis.

<sup>28</sup> Eti a cayidi, “Neeni he bitaniyaa kaalliyaaгаа; nuuni Muusa kaalliyaaageeta.

<sup>29</sup> Xoossai Muuseyyo haasayidoogaa nuuni eroos; shin ha bitaniyaa gidikko, i awappe yiidaakkonne nuuni erokko” yaagidosona.

<sup>30</sup> Yaagin bitanee, “I awappe yiidaakkonne intte erennaagee garamissiyaabaa; shin i ta aifiyaa pattiis! <sup>31</sup> Xoossaayyo yayyiya urainne Xoossai koyiyoobaa oottiya urai de7ikko, he uraabaa Xoossai siyiyoogaappe attin, nagaranchchatubaa siyenna.

<sup>32</sup> Qooqe gididi yelettida asa aifiyaa ooninne pattin, sa7ai merettoosappe doommin, siyetti erenna. <sup>33</sup> Ha bitanee Xoosaaappe yibeennabaa gidiyaakko, issibaanne oot-tanaukka danddayenna” yaagiis.

<sup>34</sup> Eti zaaridi ayyo, “Neeni nagaran yelettada diccidaagee nuna tamarissanau koyai?” yaagidosona; Aihuda woosa keettaappe a kare kessidosona.

### *Wozanaa Qooqetettaa*

<sup>35</sup> Eti bitaniyaa kare kessidoogaa Yesuusi siyiis; Yesuusi bitaniyaa demmidi, “Asa Na7aa ammanai?” yaagiis.

<sup>36</sup> Bitanee Yesuusa, “Godau, taani a ammananaadan i oonee? Taayyo odarkkii!” yaagiis.

<sup>37</sup> Yaagin Yesuusi bitaniyaa, “Neeni a be7adasa; ha nenaara haasayiyaageekka a” yaagiis.

<sup>38</sup> Bitanee zaaridi, “Godau, ammanais” yaagidi Yesuusayyo goinniis.

<sup>39</sup> Yesuusi, “Qooqeti xeellana malanne xeelliyaaageeti qooqana mala, taani pirddanau ha sa7aa yaas” yaagiis.

<sup>40</sup> Aara de7iya amarida Parisaaweti hegaa siyidi, “Nuunikka qooqeeyye?” yaagidi oichchidosona.

<sup>41</sup> Oichchin Yesuusi, “Intte qooqe gididaakko, intteyyo nagara gidenna; shin ha77i intte, ‘Nuuni xeelloos’ yaageeta; intte nagaraara de7eeta” yaagiis.

## 10

### *Yesuusi Lo77o Henttanchcha*

<sup>1</sup> Yesuusi, “Taani intteyyo tumaa odais; dorssaa birddiyau penggeera gelennan harasaara geliya ooninne kaisonne pangga. <sup>2</sup> SHin penggeera geliyaagee dorssaa heemmiya asa. <sup>3</sup> Penggiyaa naagiyaagee au penggiyaa dooyees; dorssatika a qaala siyana; i ba dorssata eta sunttan sunttan xeesidi, kare kaalettana. <sup>4</sup> I baageeta kare kessidoogaappe guyyian, etappe sinttaara homettees; etikka a qaala eriyoo gishshau, a kaalloosona. <sup>5</sup> Hara uraa qaala eti erenna gishshau, appe baqatanaappe attin, a geeduwaa kaallokkona” yaagiis.

<sup>6</sup> Yesuusi etau ha leemisuwaa odiis; shin i etau ai odiyaakkonne eti akeekibookkona.

<sup>7</sup> Yesuusi qassikka etau, “Taani intteyyo tumaa odais; taani dorssatuyyo pengge. <sup>8</sup> Taappe kase yiida ubbai kaisonne pangga; shin dorssati eti giyoogaa siyibookkona.

<sup>9</sup> Penggee tana; tanan geliya ooninne attana. I gelanne kiyana; qassi lo77o maatai de7iyooosaakka demmana. <sup>10</sup> Kaisoi wuuqqanau, woranaunne xaissanau yiyoogaappe attin, arabau yeenna; taani etau de7oi de7ana malanne kumidi palahana mala yaas.

<sup>11</sup> “Taani dorssaa loitta heemmiyaagaa; dorssaa loitti heemmiyaagee he dorssatu gishshau haiqqees. <sup>12</sup> Miishshaa ekkidi heemmiya urai wanggireelloi yiishin be7idi, dorssata yeggi bayidi baqatees. Aissi giikko, dorssati aageeta gidokkona; qassi ikka dorssata heemmiyaagaa gidenna. Hegaa gishshau, wanggireelloi dorssata oiqqeesinne laalees. <sup>13</sup> Miishshaa ekkidi heemmiyaagee miishshau heemmiyo gishshaunne dorssaabai a qofissenna gishshau, dorssata aggi bayidi baqatees.

<sup>14-15</sup> “Taani dorssaa loitta heemmiyaagaa; ta Aawai tana eriyooqaadan, taanikka qassi ta Aawaa erais. Hegaadankka, taani ta dorssata erais; ta dorssatika tana eroosona. Qassi taani ta dorssatu gishshau, haiqqanau koyais. <sup>16</sup> Ha wudiyannin bainna hara dorssatika tau de7oosona. Taani etakka ehaanau bessees. Qassi eti ta qaala siyana; issi wudee de7ana; heemmiyaageekka issuwaa gidana.

<sup>17</sup> “Taani ta shemppuwaa zaarettada ekkana mala, aattada immanau koyiyo gishshau, ta Aawai tana siiqees. <sup>18</sup> Taani dosada ta shemppuwaa aatta immiyoogaappe attin, taappe ooninne ekkenna. Taayyo ta shemppuwaa aatta immiyo maatai de7ees; qassi zaarettada ekkanaukka maatai de7ees. Taani ha azazuwaa ta Aawaappe ekkaas” yaagiis.

<sup>19</sup> He haasayaa gishshau, Aihudatu giddon qassikka shaahoi merettiis. <sup>20</sup> Etappe dariya baggai, “Aani xalahee de7ees! I gooyees! A haasayaa aissi siyeetii?” yaagidosona.

<sup>21</sup> Harati qassi, “Xalahee oiqqido asi hagaadan haasayenna; xalahee qooqe asa aife xeelissanau danddayiyye?” yaagidosona.

### *Yesuusi Asa Na7a*

<sup>22</sup> Yerusalaa Beeta Maqidasiyaa Ooraxissiyo Baalai gakkii; sa7ai he wode balggo. <sup>23</sup> Yesuusi Beeta Maqidasiyan Solomona baranddan, yaanne haanne hamettees. <sup>24</sup> Aihudati Yesuusa matan yuuyi aadhdhidi, “Neeni nuna aude gakkanaassi sirissaidda wottuutee? Neeni Kiristtoosa gidikko, nuuyyo geeshshada oda” yaagidosona.

<sup>25</sup> Yesuusi etayyo zaaridi, “Taani intteyyo yootaas; shin tana ammanekketa; taani ta Aawaa sunttan oottiyo oosoi tabaa markkattees. <sup>26</sup> SHin taani intteyyo odidoogaadan, intte ta dorssa gidenna gishshau ammanekketa. <sup>27</sup> Ta dorssati ta qaala siyoosona; taani eta erais; etikka tana kaalloosona. <sup>28</sup> Taani etayyo merinaa de7uwaa immais; qassi eti mulekka haiqqokkona. Ooninne ta kushiyaappe eta wotti ekkana danddayenna. <sup>29</sup> Eta taayyo immida ta Aawai ooppenne aadhdhees; ooninne ta Aawaa kushiyaappe eta wotti ekkana danddayenna. <sup>30</sup> Taanne ta Aawai issuwaa” yaagiis.

<sup>31</sup> Aihudati Yesuusa caddanau qassikka shuchcha denttidosona. <sup>32</sup> Yesuusi eta, “Taani oottanau ta Aawai taayyo immido daro lo77o oosuwaa inttena besaas; hegeetuppe augeetu gishshau, tana shuchchan caddanau koyeetii?” yaagiis.

<sup>33</sup> Aihudati zaaridi, “Nuuni nena lo77o ooso gishshau, shuchchan caddanau koyokko; shin neeni Xoossaa cayiyo gishshaunne qassi asa gidaidda ne huuphiyaa Xoossaa oottido gishshau, caddanau koyoos!” yaagidosona.

<sup>34</sup> Yaagin Yesuusi zaaridi, “Intte higgiiyan Xoossai, ‘Intte xoossata’ giidoogee xaafet-tibeennee? <sup>35</sup> Xoossaa maxaafata laammanau danddayettenna; Xoossai ba qaalai yiido asata, ‘xoossata’ giidi xeesidobaa gidikko, <sup>36</sup> taani, ‘Taani Xoossaa Na7aa’ giido gishshau, ta Aawai anjjidi, sa7aa kiittido tana, ‘Xoossaa cayaasa’ yaageetii? <sup>37</sup> Taani ta Aawai oottiyoogaa oottana xayikko, tana ammanoppite. <sup>38</sup> SHin taani oottiyaabaa gidikko, harai atto intte tana ammanana xayikkokka, ta Aawai tanan de7iyoogaanne taanikka ta Aawan de7iyoogaa eranaadaaninne akekanaadan, ta oosuwaa ammanite” yaagiis.

<sup>39</sup> Qassikka eti a oiqqanau koyidosona; shin i etappe baqatiis.

<sup>40</sup> Yohaannisi kase xammaqiyoosaa Yorddaanoosa SHaafaappe hefintti Yesuusi pin-nidi, yaani de7iis. <sup>41</sup> Daro asai Yesuusakko yiidi, “Yohaannisi wolqqaama malaata

oottibeenna; shin i ha bitaniyaabaa haasayidobai ubbai tuma” yaagidosona. <sup>42</sup> Yaani daro asai Yesuusa ammaniis.

## 11

### *Al77aazara Haiquwaa*

<sup>1</sup> Biitaaniyaa giyo qeeri kataman Al77aazara giyo issi bitanee harggiis; he katamai Mairaamanne i michchiyaa Martta de7ido katamaa. <sup>2</sup> Godaa tohuwaa shittuwaa tiyada, ba binnaan a tohuwaa quccidaara he Mairaamo; harggidaagee qassi i ishaa Al77aazara. <sup>3</sup> Hegaa gishshau, michchentti, “Godau, neeni siiqiyoogee harggiis” giidi Yesuusayyo kiittidosona.

<sup>4</sup> Yesuusi hegaa siyido wode, “Taani Xoossaa Na7ai harggiyaa gaasuwan bonchchet-tana mala, Xoossaa bonchchuwaassi ha harggee Al77aazara oiqqidoogaappe attin, woriya hargge gidenna” yaagiis.

<sup>5</sup> Yesuusi Martto, i michchiyoonne Al77aazara siiqees; <sup>6</sup> Al77aazari harggidoogaa Yesuusi siyido wode, ba de7iyooosan naa77u gallassaa pe7iis. <sup>7</sup> Hegaappe guyyiyan, Yesuusi ba erissiyo ashkkarata, “Naa77anttuwaa Yihudaa biitti boos” yaagiis.

<sup>8</sup> Erissiyo ashkkarati zaaridi, “Tamaarissiyaagoo, guutta wodeppe kase Aihudati nena shuchchan caddanau koyidosona; qassikka yaa buutee?” yaagidosona.

<sup>9</sup> Yaagin Yesuusi, “Issi gallassan tammanne naa77u saatee de7ees; de7enneeyye? Gallassi hemettiya asi xubettenna; aissi giikko, i ha sa7aa poo7uwaa be7ees. <sup>10</sup> SHin qammi hemettiya urai de7ikko, poo7oi aani baina gishshau, xubettes” yaagiis. <sup>11</sup> Yesuusi hegaa giidoogaappe guyyiyan, qassikka etau, “Nu dabboi Al77aazari xiskkiis; shin xiskkuwaappe a denttanau taani bais” yaagiis.

<sup>12</sup> Erissiyo ashkkarati zaaridi, “Godau, i xiskkidabaa gidikko, denddana” yaagidosona.

<sup>13</sup> Al77aazari haiqqidoogaa Yesuusi odiis; shin Al77aazari xiskkidi zin77idoogaa odiis giidi, eti qoppidosona. <sup>14</sup> Hegaa gishshau, Yesuusi geeshshidi eta, “Al77aazari haiqqiis. <sup>15</sup> Intte ammanana mala, taani he sohuwan de7ennaagaayyo, intte gishshau ufaittais. SHin hinddite; akko boos” yaagiis.

<sup>16</sup> Hegaappe guyyiyan, Menttiyaa giyo Toomaasi ba lagge erissiyo ashkkarata, “Aara haiqqanau nuunikka qassi boos!” yaagiis.

### *Yesuusi Denddoinne De7oi Tana Giis*

<sup>17</sup> Yesuusi gakkiyo wode, Al77aazari moogettoosappe oiddu gallassa gidiiis. <sup>18</sup> Biitaanee Yerusalaameppe naa77u kilo meetire keenaa haakkees. <sup>19</sup> Daro Aihudati Marttonne Mairaamo eta ishai haiqqidoogau minttettanau yiidosona.

<sup>20</sup> Martta Yesuusi yiidoogaa siyada, a mokkanau kiyaasu; shin Mairaama sooni attaasu. <sup>21</sup> Martta Yesuusa, “Godau, neeni hagan de7idabaa gidiyaakko, ta ishai haiqqenna. <sup>22</sup> SHin neeni woossiyoobaa ai gidikkokka, Xoossai neeyyo harai atto ha77ikka immanaagaa taani erais” yaagaasu.

<sup>23</sup> Yesuusi, “Ne ishai haiquwaappe denddana” yaagiis.

<sup>24</sup> Yaagin Martta, “Wurssettaa gallassi haiquwaappe denddanaagaa taani erais” yaagaasu.

<sup>25</sup> Yesuusi iyyo, “Taani denddonne de7o; tana ammaniya urai harai atto, haiqqikkokka paxa de7ana. <sup>26</sup> Qassi paxa de7iya urainne tana ammaniya urai ubbai mulekka haiqqenna; hegaa neeni ammanai?” yaagiis.

<sup>27</sup> Martta zaarada, “Godau, ee taani ammanais; neeni Xoossaa Na7aa, sa7aa yaanau de7iya Kiristtoosa gidiyooogaa taani ammanais” yaagaasu.

<sup>28</sup> Martta hegaa giidoogaappe guyyiyan, baada ba michcheeyyo geeman xeesada, “Tamaarissiyaagee yiidi, nena koyees” yaagaasu. <sup>29</sup> Mairaama hegaa siyido wode, eesuan dendda eqqada Yesuusakko baasu. <sup>30</sup> Yesuusi Martta a morkidosan



de7eesippe attin, biron qeeri katamaa gakkiiichchibeenna. <sup>31</sup> Mairaamo minttetti-iddi, sooni iira de7iya Aihudati, a eesuwan dendda eqqada kare kiyiyooqaa be7idi, Al77aazari moogettido gonggoluwaa baada yaani yeekkanau hanausu yaagidi, o kaal-lidi kiyidosona.

<sup>32</sup> Mairaama Yesuusi de7iyooosaa baada Yesuusa be7ido wode, a tohuwaa bolla kunddaasu; kunddada, “Godau, neeni hagan de7idobaa gidiyaakko, ta ishai haiqqenna shin!” yaagaasu.

<sup>33</sup> Yesuusi a yeekkiyoogaanne qassi iira yiida Aihudatika yeekkiyoogaa be7idi, ba wozanan daro mishettiis; qassi tookki shemppiis. <sup>34</sup> Eta, “Awan moogidetii?” yaagidi oichchin, “Godau, yaada be7a” yaagidi zaaridosona.

<sup>35</sup> Yesuusi afuxxiis. <sup>36</sup> Hegaa gishshau, Aihudati, “Al77aazara i ai keenaa siiqiyaakko be7ite!” yaagidosona.

<sup>37</sup> SHin etappe issooti issooti, “Hagee qooqe bitaniyaa xeelissidaagee ha bitanee haiqqenna mala teqqanau danddayennee?” yaagidosona.

### *Yesuusi Al77aazara Haiquwaappe Denttiis*

<sup>38</sup> Yesuusi qassikka wozanappe qarettidi, Al77aazari moogettido gonggoluwaaakko biis; he gonggoloi shuchchan qum77etti uttiis. <sup>39</sup> Yesuusi, “SHuchchaa pogite!” yaagidi azaziis.

Haiqqida bitaniyaa michchiyaa Martta, “Godau, i haiqqoosappe oiddu gallassa gidido gishshau, ha77i xinqqana!” yaagaasu.

<sup>40</sup> Yesuusi Martto, “Ammaniyaabaa gidikko, neeni Xoossaa bonchchuwaa be7anaagaa taani neeyyo yootabeikkinaa?” yaagiis. <sup>41</sup> Eti shuchchaa denttidosona; denttin Yesuusi saluwaa pude xeellidi, “Aawau, taani giyoogaa neeni siyido gishshau, nena galatais. <sup>42</sup> Neeni ubba wode siyiyooqaa taani erais; shin hagan yuuyi aadhhdidi eqqida asai neeni tana kiittidoogaa ammanana mala, haggaa taani eta gishshau gais” yaagiis. <sup>43</sup> Yesuusi heggaa giidoogaappe guyyiyan, ba qaala xoqqu oottidi, “Al77aazaraa, haa kiya!” yaagiis. <sup>44</sup> Haiqqida bitaniyau kusheenno tohoi shaluwan qashetti uttidaashiinne a som77oikka afalan kametti uttidaashin kiyiis. Kiyin Yesuusi eta, “Birshshidi aggi bayite! Bo!” yaagiis.

### *Kiristtoosa Bolli Maqettidosona*

*(Maatiyoosa 26:1-5; Marqqoosa 14:1-2; Luqaasa 22:1-2)*

<sup>45</sup> Hegaa gishshau, Mairaamikko yiida Aihudatuppe daroti Yesuusi oottidoogaa be7idi, a ammanidosona. <sup>46</sup> SHin etappe issooti issooti Parisaawetukko biidi, Yesuusi oottidoogaa etau odidosona. <sup>47</sup> Hegaappe guyyiyan, qeese halaqatinne Parisaaweti yaa7aa shiishshidi, “Ha bitanee daro wolqqaama malaataa oottiyo gishshau, ai oottanee? <sup>48</sup> Nuuni a co77u giidi, aggi bayikko, asai ubbai a ammanana; qassi Roome biittaa asati yiidi, nu Beeta Maqidasiyaanne nu asaa xaissana” yaagidosona.

<sup>49</sup> Etappe issoi Qayaafa giyoogee, he laitti qeese ubbatu halaqa gididaagee, “Intte ainne erekketa! <sup>50</sup> Asai ubbai xayiyooogaappe asa ubbaa gishshau, issi asi haiqqiyooqee keha gidiyooqaa intte akeekite” yaagiis. <sup>51</sup> I heggaa baappe gibeenna; shin he laitti qeese ubbatu halaqa gidiyoo gishshau, Yesuusi Aihuda asaa gishshau haiqqanau bessiyooqaa hananabaa yootiis. <sup>52</sup> Qassi Yesuusi Aihuda asaa xalaalaayyo haiqqenna; shin laaletti de7iya Xoossaa naata issippe shiishshanau haiqqana.

<sup>53</sup> He gallasappe doommidi, eti a woranau maqettidosona. <sup>54</sup> Hegaa gishshau, Yesuusi Aihudatu gididon qoncciyaa yaa haa hemettibeenna; shin bazzuwaa lanqqiyan de7iya biitti, Efireema giyo qeeri katamaa biis. Biidi ba erissiyo ashkkaratuura he sohuwan takkiis.

<sup>55</sup> Aihudati Paasikaa bonchchiyo gallasai matiis; qassi daro asai bana geeshshanau, Paasikaa bonchchiyo gallasai gakkanaappe kase he biittaaappe Yerusalaame biis. <sup>56</sup> Eti

Yesuusa koyoosona; Beeta Maqidasiyan eqqidi, “Ai qoppeetii? Paasikaa bonchchiyoosaa Yesuusi yeennee?” yaagidi issoi issuwaa oichchidosona. <sup>57</sup> Qassi qeesetu halaqatinne Parisaaweti Yesuusa qachchanau, i de7iyooosaa eriya ooninne banttayyo yootana mala azazidosona.

## 12

### *Yesuusa SHittuwaa Tiyida Maccaasiyo (Maatiyoosa 26:6-13; Marqqoosa 14:3-9)*

<sup>1</sup> Paasikaa bonchchiyo gallasaappe usuppun gallassaa kasetidi, Yesuusi i haiquwaappe denttido Al77aazari de7iyo Biitaaniyaa giyo katamaa biis. <sup>2</sup> He sohuwan eti au kahuwaa kattidosona; Al77aazari aara issippe uttidaashin, Martta kahuwaa kattausu. <sup>3</sup> Mairaama daro miishshan baizettiya narddoose giyo geeshsha shittuwaa ehaada, Yesuusa tohuwaa tiyaasu; tiyada ba binnaanana a tohuwaa quccaasu; keetta ubbai shittuwaa sawuwan tonggu gees.

<sup>4</sup> SHin Yesuusi erissiyo ashkkaratuppe issoi, Yesuusa aatti immanaagee, Yihudaa Asqqorootu, <sup>5</sup> “Ha shittoi issi xeetanne ishatamu biran baizettin, aibissi birai hiyyeesau imettennee?” yaagiis. <sup>6</sup> I kaiso gidido gishshau, hegaa giisippe attin, hiyyeesau qarettidi gibeenna; i miishshaa qarcciitaa oiqqiyaagaa gidiyo gishshau, ubba wode appe baayyo ekkees.

<sup>7</sup> Yesuusi, “Bau de7iyaabaa taani moogettiyo gallassau minjju; o aggite. <sup>8</sup> Hiyyeesati ubba wode inttenaara de7ana; shin taani ubba wode inttenaara de7ikke” yaagiis.

<sup>9</sup> Aihudatuppe daro asai Yesuusi Biitaaniyan de7iyoogaa siyidi, yaa biis; eti Yesuusa be7ana gishsha xalaalau gidennan, i haiquwaappe denttido Al77aazarakka be7anau biidosona. <sup>10</sup> Hegaa gishshau, qeese halaqati Al77aazarakka qassi woranau maqettidosona. <sup>11</sup> Aissi giikko, Al77aazara gaasuwan daro Aihudati banttana kaalettiyaageeta aggi bayidi, Yesuusa ammanoosona.

### *Yesuusi Bonchchuwan Yerusalaame Geliis (Maatiyoosa 21:1-11; Marqqoosa 11:1-11; Luqaasa 19:28-40)*

<sup>12</sup> Wonttetta gallassi Paasikaa bonchchiyoosaa yiida daro asai Yesuusi Yerusalaame biyoogaa siyiis. <sup>13</sup> Siyidi zambbaa haittaa oiqqidi, a mokkanau kiyidosona. Bantta qaalaa xoqqu oottidi,

“Xoossai galatetto!

Xoossaa sunttan yiya Israa7eela kawoi anjjettidaagaa!” yaagidosona.

<sup>14-15</sup> Xoossaa maxaafai,  
“Xiyooone katamau, yayyoppa!

Be7a, ne kawoi hare maraa bolli uttidi yees” giyoogaadan, Yesuusi hare maraa demmidi, a toggiiis.

<sup>16</sup> Yesuusi erissiyo ashkkarati hegaa kase akeekibookkona; shin Yesuusi bonchchettidoogaappe guyyiyan, Xoossaa maxaafai hegaa ubbaa giidoogaanne qassi etikka hegaa ubbaa Yesuusayyo oottidoogaa hassayidosona.

<sup>17</sup> Al77aazari moogettido gonggoluwaaappe Yesuusi a xeesidi, haiquwaappe denttido wode, Yesuusaara de7iya daro asai Yesuusayyo markkattiis. <sup>18</sup> Daro asai a mokkanau kiyidoogee, i he wolqqaama malaataa oottido gishshassa. <sup>19</sup> Hegaa gishshau, Parisaaweti issoi issuwaa, “Intte ainne oottanau danddayennaagaa be7eetii! Be7ite, dere ubbai a geeduwaa kaallees” yaagidosona.

<sup>20</sup> Paasikaa bonchchiyo gallassi goinnanau Yerusalaame biidaageetu gidдон issi issi Giriike asati de7oosona. <sup>21</sup> Eti Galiila biittan Beetasaida giyo katamaappe yiida Piliphphoosakko biidi, “Godau, nuuni Yesuusa be7anau koyoos” yaagidi woossidosona.

<sup>22</sup> Piliphphoosi biidi, Inddiraasayyo odiis; odin naa77aikka biidi, Yesuusayyo odidosona.

<sup>23</sup> Yesuusi etau hagaadan yaagiis; “Taani, Asa Na7ai, bonchchettiyo saatee gakkiiis.

<sup>24</sup> Taani intteyyo tumaa odais; issi gistte aifiyaa biittan wodhdhada wooqqana xayikko, barkka attausu. SHin he gisttee aifiyaa wooqqikko, daro aifiyaa aifausu. <sup>25</sup> Ba shemp-puwaa siiqiya ooninne bashshees; qassi ba shemppuwaa ha sa7an ixxiya ooninne merinaa de7uwau ashshees. <sup>26</sup> Ooninne tau oottikko, tana kaallanau bessees; qassi taani de7iyoosan ta ashkkaraikka de7ana. Tau oottiya oonanne, ta Aawaikka a bonchchana.

<sup>27</sup> “Ha77i ta shemppoi daro un77ettiis; yaatin woigoo? Taani, “Ta Aawau, tana ha saateeppe ashsharkkii’ yaagoo? CHii, taani ha saatiyan yiidoogee haggaa gishshassa.

<sup>28</sup> Ta Aawau, ne sunntaa bonchcha” yaagiis.

He wode saluwaappe, “Taani ta sunntaa bonchchaas; qassikka gujjada bonchchana” yaagiya qaalai yiis.

<sup>29</sup> He sohuwan eqqida daro asai he qaalaa siyidi, “Hegee dadaa” yaagiis.

Harati qassi, “Kiitanchchai ayyo haasayis” yaagidosona.

<sup>30</sup> Yesuusi zaaridi eta, “Ha qaalai intte gishshau yiidoogaappe attin, ta gishshassa gidenna. <sup>31</sup> Ha sa7ai pirddettiyo wodee ha77a; ha sa7aa haariyaagee ha77i kare olettana. <sup>32</sup> Qassi taani masqqaliyaa bolli kaqettiyo wode, asa ubbaa taakko ekkana” yaagiis. <sup>33</sup> I heggaa giidoogee ai mala haiquwaa i haiqqanaakkonne eta erissanaassa.

<sup>34</sup> Daro asai zaaridi Yesuusa, “Nu higgee Kiristtoosi merinau de7iyoogaa odees. Yaatin, neeni woigada, ‘Asa Na7ai masqqaliyaa bolli kaqettana’ gai? He Asa Na7ai oonee?” yaagidosona.

<sup>35</sup> Yaagin Yesuusi, “Poo7oi inttenaara guutta wodiya takkana. Intteyyo xumenna mala, poo7oi de7ishin, poo7uwan hemettite. Xuman hemettiya urai au biyaakkonne erenna. <sup>36</sup> Poo7uwaa asa gidana mala, intteyyo poo7oi de7ishin, poo7uwaa ammanite” yaagiis.

### *Aihudati Ammanennan Ixxido Hanotaa*

Yesuusi heggaa haasayidoogaappe guyyiyan, biidi etappe geemettiis. <sup>37-38</sup> I heggaa keena wolqqaama malaataa eta sinttan oottikkokka, hananabaa yootiya Isiyaasi, “Godau, nu markkatettaa ooni ammanidee?

Godai ba wolqqa oona bessidee?”

giidoogee tuma gidana mala, eti a ammanibookkona.

<sup>39-40</sup> Isiyaasi qassikka,

“Eta aiffee xeellenna mala,  
eta wozanaikka akeekenna mala,  
eti Xoossaakko simmin, i eta pattenna mala,

Xoossai eta aifiyaa qooqissiis.

Eta wozanaa dammissiis”

giido gishshau, eti ammananau danddayibookkona.

<sup>41</sup> Isiyaasi Yesuusa bonchchuwaa be7ido gishshaunne qassi abaa haasayido gishshau, heggaa giis.

<sup>42</sup> Heggaa gidinkka, harai atto Aihudatu halaqatuppekka daroti Yesuusa ammanidosona. SHin Parisaaweti banttana Aihudatu woosa keettaappe kessoosona giidi yayyido gishshau, ammanida giidi markkattibookkona. <sup>43</sup> Aissi giikko, eti Xoossaa sabaappe aattidi, asa sabaa siiqidodosona.

<sup>44</sup> Yesuusi ba qaalaa xoqqu oottidi yaagiis; “Tana ammaniya ooninne tana kiittidaa-gaakka ammaniyoogaappe attin, ta xalaalaa ammanenna. <sup>45</sup> Tana be7iya ooninne tana kiittidaagaakka be7ees. <sup>46</sup> Tana ammaniya ubbai xuman de7enna mala, taani poo7o gidada sa7aa yaas. <sup>47</sup> Ta qaalaa siyidi azazettenna uraa oonanne taani pirddikke; aissi giikko, taani sa7aa ashshanau yiidoogaappe attin, pirddanau yabeikke. <sup>48</sup> Tana ixxiya

oonanne qassi ta qaalaa ekkenna oonanne pirddiyaagee de7ees. Taani yootido qaalai wurssettaa gallassi he uraa pirddana. <sup>49</sup> Aissi giikko, taani haggaa taappe haasayabeikke; shin tana kiittida ta Aawai taani gaanaagaanne haasayanaagaa tana azaziis. <sup>50</sup> Qassi a azazoi merinaa de7uwaa ehiyoogaa taani erais; heggaa gishshau, taani yootiyoogee ta Aawai tana yoota giidi odidoogaa” yaagiis.

## 13

### *Yesuusi Ba Erissiyo Ashkkaratu Gediya Meeciis*

<sup>1</sup> Paasikaa bonchchiyo gallassai gakkanaappe kasetidi, ha sa7aappe shaahettidi, Aawaakko biyo wodee gakkidoogaa Yesuusi eris; ha sa7an de7iya baageeta ubba wode siiqiis; wurssettai gakkanaassi eta siiqiis.

<sup>2</sup> Yesuusinne erissiyo ashkkarati kahuwaa miishin, Simoon na7aa Yihudaa Asqqo-rootu Yesuusa aatti immanaadan, xalahe halaqai a qofissi wottiis. <sup>3</sup> Yesuusi ba Aawai ubbabaa a kushiyan wottidoogaa, qassi Xoossaa matappe i yiidoogaanne, simmidi akko baanaagaa eris. <sup>4</sup> Yesuusi miyoosaappe dendi eqqidi, bolla bagga maayuwa qaaari wottidi, pooxaa ba xeessan gixxiis. <sup>5</sup> Hegaappe guyyiyan, haattaa kuixaaruwan tigidi, ba erissiyo ashkkaratu tohuwaa meecchiyoogaanne ba xeessan gixxido pooxan qucciyooogaa doommiis.

<sup>6</sup> Yesuusi Simoon PHeexiroosakko yin PHeexiroosi, “Godau, neeni ta tohuwaa meecanau hanaiyye?” yaagiis.

<sup>7</sup> Yesuusi zaaridi a, “Taani oottiyoogaa neeni ha77i erakka; shin guyyeppe akeekana” yaagiis.

<sup>8</sup> Yaagin PHeexiroosi, “Neeni ta tohuwaa mulekka meecakka!” yaagiis.

Yesuusi a, “Taani ne tohuwaa meecana xayikko, neeyoonne taayyoonne issippetetti baawa” yaagidi zaariis.

<sup>9</sup> Yaagin PHeexiroosi Yesuusa, “Godau, yaatikko, ta tohuwaa xalaalaa meecoppa; ta kushiyaakka ta huuphiyaakka meecca!” yaagiis.

<sup>10</sup> Yesuusi zaaridi, “Bollaa meecettiichchida urai ooninne tohoppe harabaa meecettanau koshshenna; ayyo ubbasaikka geeshsha. Qassi inttekka geeshsha; shin ubbai geeshsha gidekketa” yaagiis. <sup>11</sup> Aissi giikko, Yesuusi bana aatti immana urai oonakkonne erees; i, “Intte ubbai geeshsha gidekketa” giidoogee hegaassa.

<sup>12</sup> Eta tohuwaa meecidoogaappe guyyiyan, Yesuusi ba maayuwa maayidi, ba sohuwaa guyye simmidi biidi uttiis; uttidi eta yaagiis; “Taani intteyyo oottidoogaa akeeketii? <sup>13</sup> Intte tana tamarissiyaagoonne Godau geeta; taani he intte giyoogaa gidiyo gishshau, loittideta. <sup>14</sup> Taani intteyyo Godanne inttena tamarissiyaagaa gidaidda, intte tohuwaa meecidabaa gidikko, inttekka issoi issuwaa tohuwaa meecanau bessees. <sup>15</sup> Aissi giikko, taani intteyyo oottidoogaadan, inttekka oottana mala, intteyyo leemiso gidaas. <sup>16</sup> Taani intteyyo tumaa odais; ashkkari ba godaappe aadhdhenna. Qassi kiittetida uraikka bana kiittidaagaappe aadhdhenna. <sup>17</sup> Intte heggaa eridi oottiyaabaa gidikko anjjettidaageeta.

<sup>18</sup> “Taani intte ubbaabaa haasayikke. Taani dooridoogeeta erais; shin Xoossaa maxaafai, ‘Taani barssidoogee ta kushiya saxxiis’ giidoogee tuma gidanau bessees. <sup>19</sup> Hegee haniyo wode taani tana gidiyoogaa intte ammanana mala, hegee hananaappe kasetada intteyyo haara odais. <sup>20</sup> Taani intteyyo tumaa odais; taani kiittiyo oonanne mokkiya urai tanakka mokkees; qassi tana mokkiya ooninne tana kiittidaagaa mokkees” yaagiis.

*Yesuusi Bana Aattidi Immanaagee Oonakko Kasetidi Odiis  
(Maatiyoosa 26:20-25; Marqoosa 14:17-21; Luqaasa 22:21-23)*

<sup>21</sup> Yesuusi heгаа haasayidoogaappe guyyiyan, ba wozanan daro metootiis; metootidi, “Taani intteyyo tumaa odais; tana intteppe issoi aatti immana” giidi qoncciyani odiis.

<sup>22</sup> I obaa haasayiyaakkonne, erissiyo ashkkaratuyyo mulekka erettennan ixxin, issoi issuwaa xeellidosona. <sup>23</sup> Erissiyo ashkkaratuppe issoi, Yesuusi siiqiyoogee, Yesuusa matan uttiis. <sup>24</sup> Hegaa gishshau, Simoon PHeexiroosi he erissiyo ashkkaaraa qim77otidi, “I oona giyaakko, ane a oichcha” yaagiis.

<sup>25</sup> Hegaa gishshau, he erissiyo ashkkarai Yesuusa haittaakko shiiqidi, “Godau, i oonee?” yaagiis.

<sup>26</sup> Yesuusi zaaridi, “Taani oittan cambbaa tushkkada immiyoogee a” yaagiis. Qassi oittaa mentti ekkidi, cambbaa tushkkidi, Simoona na7aa, Yihudaa Asqqorootuyyo immiis.

<sup>27</sup> Yihudai oittaa menttettaa ekkidoogaappe guyyiyan, Seexaanai sohuwaarakka Yihudan geliis. Yesuusi a, “Neeni oottanaagaa eesuwani ootta!” yaagiis. <sup>28</sup> SHin he sohuwani uttidaageetuppe ooninne Yesuusi heгаа a aissi giidaakkonne eribeenna. <sup>29</sup> Yihudai miishshaa qarcciitaa oiqqiyo gishshau, erissiyo ashkkaratuppe issooti issooti Yesuusi Yihudaa, “Paasikaa bonchchiyo gallassau banttana koshshiyaabaa baada shamma woi hiyyeesau muxuwaataa imma giis” yaagidi qoppidosona.

<sup>30</sup> Yihudai oittaa me7ettaa ekkidi, sohuwaarakka kare kiyiis; he wode sa7ai qamma.

### *Ooratta Azazuwaa*

<sup>31</sup> Yihudai kare kiyidoogaappe guyyiyan, Yesuusi yaagiis; “Ha77i taani Asa Na7ai bonchchettaas: Xoossaikka ta baggaara bonchchettiiis. <sup>32</sup> Xoossai ta baggaara, Asa Na7aa baggaara bonchchettikko, i ba huuphen tana Asa Na7aa bonchchana; qassi i tana sohuwaara bonchchana. <sup>33</sup> Ta naatoo, taani inttenaara daro wodiyaа gam77ikke. Intte tana koyana; shin taani Aihudata, “Taani biyoosaa intte baanau danddayekketa” giidoogaadan, intteyyookka ha77i odais. <sup>34</sup> Taani inttena ooratta azazuwaa azazais; issoi issuwaa siiqite. Taani inttena siiqidoogaadankka, intte issoi issuwaa siiqana bessees. <sup>35</sup> Intte issoi issuwaara siiqettikko, ta erissiyo ashkkarata gidiyooгаа asai ubbai erana” yaagiis.

### *PHeexiroosi Kaddanaagaa Yesuusi Kasetidi Odiis*

#### *(Maatiyoosa 26:31-35; Marqqoosa 14:27-31; Luqaasa 22:31-34)*

<sup>36</sup> Simoon PHeexiroosi Yesuusa, “Godau, neeni au bai?” yaagiis.

Oichchin Yesuusi zaaridi, “Taani biyoosaa neeni ha77i tana kaallanau danddayakka; shin guyyeppe kaallana” yaagiis.

<sup>37</sup> Yaagin PHeexiroosi, “Godau, taani nena ha77i kaallanau aissi danddayikkinaa? Taani ne gishshau, haiqqanaukka giiga uttaas!” yaagiis.

<sup>38</sup> Yesuusi zaaridi, “Ta gishshau haiqqanau hai tumu giiga uttadii? Taani neeyyo tumaa odais; kuttoi waassanaappe kase, neeni tana heezzutoo kaddana” yaagiis.

## 14

### *Aawaakko Efiya Ogee Yesuusa*

<sup>1</sup> Yesuusi erissiyo ashkkarata, “Intte wozanai hirggoppo; Xoossaa ammanite; tanakka ammanite. <sup>2</sup> Ta Aawaa keettan daro sohoi de7ees. Hegaa gidennaakko, taani intteyyo heгаа yootikke; taani intteyyo sohuwaa giigissanau bais. <sup>3</sup> Taani baada sohuwaa giigissoogaappe guyyiyan, taani de7iyoosan intteikka de7ana mala, simmada yaada inttena taakko ekka efaana. <sup>4</sup> Qassi intte taani biyo ogiyaa ereeta” yaagiis.

<sup>5</sup> Yaagin Toomaasi, “Godau, neeni biyoosaa nuuni erokko; ogiyaa waanidi eranau danddayiyoonii?” yaagiis.

<sup>6</sup> Yesuusi zaaridi, “Ogee, tumainne de7oi tana; ta baggaarappe attin, ooninne ta Aawaakko baanau danddayenna. <sup>7</sup> Intte tana eriyaabaa gidiyaakko, ta Aawaakka erana; ha77ippe doommidi, intte a ereetanne qassi a be7ideta” yaagiis.



<sup>8</sup> Piliphphoosi Yesuusa, “Godau, Aawaa nuna bessa; hegee nuuyyo gidana” yaagiis.

<sup>9</sup> Yesuusi zaaridi yaagiis; “Taani haggaa keena wodiya inttenaara de7inkka, tana erikkii Piliphphoosaa? Tana be7ida urai Aawaakka be7iis; yaatin, neeni woigada, ‘Aawaa nuna bessa’ gai? <sup>10</sup> Taani Aawaa giddon de7iyooqaa qassi Aawaikka ta giddon de7iyooqaa neeni ammanikkiiyye? Taani intteyyo odiyo qaalaa taani taappe odikke; shin ta giddon de7iya Aawai ba oosuwaa oottees. <sup>11</sup> Taani Aawaa giddon de7iyooqaanne qassi Aawaikka ta giddon de7iyooqan tana ammanite; hegee xayikko, abau a oosuwaabau tana ammanite.

<sup>12</sup> “Taani intteyyo tumaa odais; tana ammaniya urai taani oottiyo oosuwaa oot-tana. Taani Aawaakko biyo gishshau, he urai hagaappe aadhdiya oosuwaa oottana.

<sup>13</sup> Aawai Na7aa baggaara, ta baggaara bonchchettana mala, ta sunttan intte woossiyo ubbabaa taani intteyyo polana. <sup>14</sup> Intte ta sunttan tana ai oichchikkokka, taani polana.

<sup>15</sup> “Intte tana siiqiyaabaa gidikko, ta azazuwaa naagana. <sup>16-17</sup> Taani Aawaa woossana; inttenaara merinau de7ana mala, tumatettaa Ayyaanaa, hara minttettiyaagaa intteyyo i immana. Ha sa7ai he tumatettaa Ayyaanaa be7ennaagaanne erennaagaa gidiyo gishshau, a ekkana danddayenna; shin i inttenaara de7iyoo gishshaunne intte giddon de7ana gishshau, intte a ereeta.

<sup>18</sup> “Taani inttena intterkka yeggabeikke; taani simmada inttekkoo yaana. <sup>19</sup> Guutta wodiyaappe guyyiyan, sa7ai tana naa77antto be7enna; shin intte tana be7ana; taani paxa de7iyoo gishshau, inttekkoo qassi paxa de7ana. <sup>20</sup> Taani ta Aawaa giddon de7iyooqaanne intte ta giddon de7iyooqaa, qassi taani intte giddon de7iyooqaanne intte he gallassi erana.

<sup>21</sup> “Ta azazoi a matan de7iyoo asi, qassi he azazuwaakka naagiyaagee, i tana siiqiya asa. Tana siiqiya asa ta Aawaikka siiqees; taanikka a siiqais. Taani ayyo qonccana” yaagiis.

<sup>22</sup> Yihudaa Asqqoroota gidenna Yihudai Yesuusa, “Godau, neeni ne huuphiyaa sa7aa bessennan, nuna bessana giyoogaa woigada gai?” yaagiis.

<sup>23</sup> Yaagin Yesuusi, “Tana siiqiya ooninne ta qaalaa naagana; ta Aawai a siiqana; qassi ta Aawainne taaninne akko yiidi, aara de7ana. <sup>24</sup> Tana siiqenna urai ooninne ta qaalau azazettenna; intte siyiyo qaalai tana kiittida Aawaagaa gidiyooqaappe attin, taagaa gidenna.

<sup>25</sup> “Taani inttenaara issippe de7aidda haggaa intteyyo odaas; <sup>26</sup> shin Geeshsha Ayyaanai, minttettiyaagee, Aawai ta sunttan kiittanaagee, inttena ubbabaa tamaris-sana. Taani intteyyo odido ubbabaakka inttena hassayissana.

<sup>27</sup> “Taani sarotettaa inttenaara wottais; ta sarotettaa intteyyo immais. Taani sa7ai immiyo sarotettaa malaa immikke. Intte hirgoppitenne yayyoppite. <sup>28</sup> Taani intteyyo, ‘Taani bais; shin simmada inttekkoo yaana’ giidoogaa siyideta; intte tana siiqidobaa gidiyaakko, taappe Aawai dariyo gishshau, taani Aawaakko biyoogan intte ufaittana shin. <sup>29</sup> Hegee haniyo wode intte ammanana mala, hegee hanennan de7ishin, haara kasetada taani intteyyo odarggaas.

<sup>30</sup> “Ha sa7aa haariyaagee yiyo gishshau, taani hagaappe sinttan inttenaara keehi haasayikke. Tana i ainne oottanau danddayenna. <sup>31</sup> SHin taani Aawaa siiqiyoogaa sa7ai eranau bessees; qassi taanikka Aawai tana azazidoogaadan oottais. Denddi eqqite; hagaappe boos.

## 15

### *Woiniyaa Giyo Turaayyo Tumu Anoi Yesuusa*

<sup>1</sup> “Taani woine giyo turaayyo tumu ano; goshshanchchai ta Aawaa. <sup>2</sup> Ta giddon de7iya aife aifenna turaa mara ubbaa i karees; aifiya turaa mara ubbai kaseegaappe keehi aifanaadan, he maraa xeeraa i qanxxana. <sup>3</sup> Taani intteyyo ha77i odido qaalaa gaasuwan, intte geeshsha. <sup>4</sup> Ta giddon de7ite; taanikka intte giddon de7ana. Woiniyaa

turaa marai anoora issippe de7ennan xayikko, he marai barkka aife aifanau dand-dayennaagaadan, inttekka ta gidдон de7ennan xayikko, aife aifanau danddayekketa.

<sup>5</sup> “Taani woine turaayyo ano; intte he turaa marata. Ta gidдон de7iya urai, taanikka a gidдон de7iyo urai, daro aife aifana; aissi giikko, taani bannan intterkka ainne oottanau danddayekketa. <sup>6</sup> Ta gidдон de7enna urai tura maradan, karen yeggin melana; melidaagaa shiishshidi taman wottin, i eexxana. <sup>7</sup> Intte ta gidдон de7ikko, qassi ta qaalaikka intte gidдон de7ikko, intte koyidobaa aiba gidinkka woossite; intte ekkana. <sup>8</sup> Intte daro aifiyaa aifikkonne qassi ta erissiyo ashkkarata gidikko, hegan ta Aawai bonchchettana. <sup>9</sup> Aawai tana siiqidoogaadan, taanikka inttena siiqaas; ta siiquwan de7ite. <sup>10</sup> Taani ta Aawaa azazuwaa naagada a siiquwan de7idoogaadan, inttekka ta azazuwaa naagikko, ta siiquwan de7ana.

<sup>11</sup> “Ta ufaissai inttenaara de7ana malanne, inttekka daro ufaittana mala, taani haggaa intteyyo yootaas. <sup>12</sup> Ta azazoi haggaa; taani inttena siiqiyoogaadan, inttekka issoi issuwaara siiqettite. <sup>13</sup> Ba shemppuwaa ba laggiyaayyo aattidi immiyoogaappe aadhdiya siiqoi ooyyookka baawa. <sup>14</sup> Taani inttena azazidobaa ubbaa oottikko, intte ta laggeta.

<sup>15</sup> “Ashkkarai ba godai oottiyobaa erenna gishshau, taani inttena haggaaappe sinttau ashkkarata giikke; shin taani inttena ta laggeta gaas. Aissi giikko, ta Aawaappe siyido ubbabaa taani intteyyo yootaas. <sup>16</sup> Taani inttena dooridoogaappe attin, intte tana dooribeekketa. Intte biidi aifiyaa aifana mala, taani inttena sunttaas. Qassi Aawaikka intte ta sunttan woossidobaa ubbaa immana. <sup>17</sup> Taani inttena azaziyoogee haggaa; issoi issuwaara siiqettite.

### *Yesuusi Ha Sa7ai Ixxiyoogaa Odiis*

<sup>18</sup> “Sa7ai inttena ixkikko, kasetidi tana ixkidoogaa akeekite. <sup>19</sup> Intte sa7aabaa gididaakko, sa7ai babaadan inttena siiqana; shin taani inttena sa7aappe dooridoogaappe attin, intte sa7aabaa gidekketa; sa7ai inttena ixkiyoogee hegaassa. <sup>20</sup> ‘Ashkkarai ba godaappe darenna’ gaada taani intteyyo odidoogaa hassayite. Eti tana yedettidabaa gidikko, inttenakka yedettana. Eti ta qaalaa naagidabaa gidikko, intte qaalaakka naagana. <sup>21</sup> SHin eti tana kiittidaagaa erenna gishshau, ha ubbaa ta gaasuwan eti intte bolli wottana. <sup>22</sup> Taani yaada etau odennabaa gidiyaakko, etau nagara gidenna; shin ha77i eti oottiyoo nagaraa gaasoyiyoobi baawa. <sup>23-24</sup> Tana ixkiyaagee ta Aawaakka ixxees. Ooninne oottibeenna oosuwaa eta gidдон taani oottabeennabaa gidiyaakko, etau nagara gidennan attana; shin ha77i eti taani oottido oosuwaa be7idi, tanakka ta Aawaakka ixkidosona. <sup>25</sup> SHin eta higgiiyan, ‘Tana coo ixkidosona’ geetettidi xaafetti-daagee polettana mala, hagee haniis.

<sup>26</sup> “SHin Aawaappe yiya tumatettaa Ayyaanai minttettiyaagee yaana. Taani Aawaappe intteyyo a yeddana; qassi i tabaa markkattana. <sup>27</sup> Inttekka qassi kaseesappe doommidi, tanaara de7iyo gishshau, tabaa markkattana.

## 16

### *Geeshsha Ayyaanaa Oosuwaa*

<sup>1</sup> “Taani haggaa intte xubettenna mala, intteyyo odaas. <sup>2</sup> Eti inttena bantta Aihuda woosa keettaappe kessi yeddana. Heggaa bolli qassi inttena woriya urai Xoossau oottiyobaa au milatiyo wodee yaana. <sup>3</sup> Eti heggaa intte bolli oottiyoo tananne Aawaa erenna gishshassa. <sup>4</sup> SHin eti heggaa intte bolli oottiyoo wodee gakkiiyo wode, taani intteyyo odidoogaa intte hassayana mala, taani intteyyo haggaa odaas.

“Taani inttenaara de7iyo gishshau, koiro heggaa intteyyo odabeikke. <sup>5</sup> SHin ha77i taani tana kiittidaagaakko bais; shin intteppe ooninne, ‘Au bai?’ giidi tana oichchiyai baawa. <sup>6</sup> SHin taani haggaa odido gishshau, intte wozanan daro azzanoi de7ees.

<sup>7</sup> SHin taani intteyyo tumaa odais; taani biyoogee intteyyo keha. Aissi giikko, taani baana xayikko, minttettiyaagee inttekkoyeenna; shin taani biikko, a inttekkoyeddana. <sup>8</sup> Qassi minttettiyaagee yiidi, nagaraabaa, xillotettaabaanne pirdaaba ha sa7aa asaa erissana. <sup>9</sup> Nagaraabai asai tana ammanenna gishshassa. <sup>10</sup> Xillotettaabai qassi taani Aawaakko biyo gishshau, intte tana naa77anttuwaa be7ekketa. <sup>11</sup> Xoossaa pirdaabai qassi sa7aa haariyaagee pirdettiichchido gishshassa.

<sup>12</sup> “Taani intteyyo odiyoobai darobai de7ees; shin ha77i intteyyo gelenna. <sup>13</sup> Tumatettaa Ayyaanai yiyo wode, inttena tumatetta ubbaakko efaana. Aissi giikko, i ba siyidobaa odanaappe attin, baappe ainne odenna. Qassi sinttappe yaanabaa intteyyo i odana. <sup>14</sup> I tana bonchchana; aissi giikko, i taayyo de7iyaabaappe ekkidi, intteyyo odana. <sup>15</sup> Aawau de7iyaabai ubbai tabaa; minttettiyaagee tau de7iyaabaappe ekkidi, intteyyo odana taani giidoogee hegaassa.

### *Intte Azzanoi Ufaissau Laamettana*

<sup>16</sup> “Guutta wodeppe guyyiyan, intte tana be7ekketa; qassi guutta wodeppe guyyiyan, intte tana be7ana” yaagiis.

<sup>17</sup> Erissiyo ashkkaratuppe issooti issooti bantta giddon, “ ‘Guutta wodeppe guyyiyan, intte tana be7ekketa; qassi guutta wodeppe guyyiyan, intte tana be7ana; aissi giikko, taani Aawaakko bais’ giyoogee hegee woigiyoogee?” yaagidosona. <sup>18</sup> “ ‘Guutta wodeppe guyyiyan’ giyoogee woigiyoogee? I aibau haasayiyaakkonne nuuyyo erettenna” yaagidosona.

<sup>19</sup> Eti bana oichchanau koyiyoogaa Yesuusi eridi, eta yaagiis; “Taani, ‘Guutta wodeppe guyyiyan, intte tana be7ekketa; qassi guutta wodeppe guyyiyan, intte tana be7ana’ giidoogau intte issoi issuwaa oichcheetii? <sup>20</sup> Taani intteyyo tumaa odais. Intte yeekkananne koizzana; shin ha sa7ai ufaittana. Qassi intte azzanana; shin intte azzanoi ufaissa gidana. <sup>21</sup> Issi maccaasiyaa na7a yelana haniyo wode, ba maaretaa wodee gakkido gishshau, he maaretaabaa hirggausu; shin na7a yelidoogaappe guyyiyan, na7i ha sa7an yelettido ufaissaa gishshau, ba maaretaa hassayukku. <sup>22</sup> Hegaa gishshau, inttekkay intte wozanan hirggeeta; shin taani naa77anttuwaa inttena be7ana; qassi intte wozanai keehi ufaittana; intte ufaissaa ooninne intteppe ekkenna.

<sup>23</sup> “He gallassi intte tana ainne woossekketa. Taani intteyyo tumaa odais; intte ta sunttan woossiyoobaa ubbaa Aawai intteyyo immana. <sup>24</sup> Ha77i gakkanaassikka ta sunttan ainne woossibeekketa; intte ufaissai polettana mala, Xoossaa woossite; intte ekkana.

<sup>25</sup> “Hagaa taani intteyyo leemisuwan yootaas; shin taani leemisuwan yootenna wodee yaana; shin Aawaabaa taani intteyyo qoncciyon odana. <sup>26</sup> Taani he gallassi, intte ta sunttan Aawaa woossana; qassi intte gishshau, taani Aawaa woossana giikke. <sup>27</sup> Aissi giikko, Aawai ba huuphen inttena siiqees; intte tana siiqiyo gishshaunne taani Aawaa matappe yiidoogaa ammanido gishshau, i inttena siiqees. <sup>28</sup> Taani Aawaa matappe sa7aa yaas; qassi sa7aa aggada Aawaakko baana” yaagiis.

<sup>29</sup> Erissiyo ashkkarati zaaridi Yesuusa, “Be7a, ha77i neeni qoncciyon haasayaasa; leemison ainne haasayakka. <sup>30</sup> Neeni ubbabaa eriyoogaa nuuni ha77i eroos; qassi nena ooninne oichchana mala, neeni koyennaagaa eroos. Hegee nuna neeni Xoossaappe yiidoogaa ammanttees” yaagidosona.

<sup>31</sup> Yaagin Yesuusi zaaridi eta, “Ha77i ammaneeetii? <sup>32</sup> Be7ite, intte intte soo intte soo laalettiiyo wodeenne ta xalaalaa yeggi bayiyo wodee yaana; ha77ikka yiichchiis. SHin Aawai tanaara de7iyo gishshau, ta xalaalaa gidikke. <sup>33</sup> Intte ta giddon de7iiddi, saro de7ana mala, taani hagaa intteyyo odaas. Sa7an intte waayettana. SHin minnite; taani sa7aa xoonas” yaagiis.

## 17

### *Yesuusa Woosaa*

<sup>1</sup> Yesuusi hegaa haasayidoogaappe guyyiyan, pude saluwaa xeellidi, hagaadan yaagiis; “Aawau, wodee gakkiiis; ne Na7ai nena bonchchana mala, neeni ne Na7aa bonchcha. <sup>2</sup> Aissi giikko, neeni ayyo immido ubbau merinaa de7uwaa i immana mala, asa ubbaa bollan ayyo maataa immadasa. <sup>3</sup> Asai nena issi Xoossaa gididaagaa erana malanne, qassi neeni kiittido Yesuus Kiristtoosa erana mala, hagee merinaa de7o. <sup>4</sup> Neeni taayyo oottanau immido oosuwa polada, nena sa7an bonchchaas. <sup>5</sup> Ha77ikka qassi Aawau, sa7ai merettanaappe kase ne matan taayyo de7iya bonchchuwan ne sinttan tana bonchcha.

<sup>6</sup> “Sa7aa asaappe neeni tau immidoogeeta nenaara eretissaas; eti neegeeta; qassi neeni eta tau immadasa. Eti ne qaalaukka azazettidosona. <sup>7</sup> Ha77i neeni tau immido ubbapai neeppe yiidoogaa eti eroosona. <sup>8</sup> Aissi giikko, neeni tau immido qaalaa taani etau immaas; etikka he qaalaa ekkidosona. Taani ne matappe yiidoogee tuma gidiyoogaa eroosona; eridi neeni tana kiittidoogaakka ammanidosona.

<sup>9</sup> “Taani etau woossais; sa7au nena woossikke. SHin neeni tau immido asau woossais; aissi giikko, eti neegeeta. <sup>10</sup> Tau de7iya ubbapai nebaa; qassi neeyyo de7iya ubbabaikka tabaa. Taani eta baggaara bonchchettaas. <sup>11</sup> Taani hagaappe guyyiyan, sa7an de7ikke; eti sa7an de7oosona; taani ha77i neekko bais. Geeshsha Aawau, ha neeni tau immidoogeeti neeninne taani issuwaa gidiyoogaadan, eti issuwaa gidana mala, eta ne sunttan naaga. <sup>12</sup> Taani etaara sa7an de7aidda, neeni tau immido ne sunttaa wolqqan eta naagaas. Taani eta naagaas; Xoossaa maxaafai giidoogee polettana mala, xayoi bessiyo uraappe attin, etappe harai ooninne xayibeenna.

<sup>13</sup> “Ha77i taani neekko bais; eta wozanan ta ufaissai polettana mala, haga taani sa7an haasayais. <sup>14</sup> Taani etau ne qaalaa immaas; taani sa7aassa gidennaagaadan, etikka sa7aassa gidenna gishshau, sa7ai eta ixxiis. <sup>15</sup> Neeni xalahiyaappe eta naagana mala woossiyoogaappe attin, sa7aappe kessana mala woossikke. <sup>16</sup> Taani sa7aassa gidennaagaadan, etikka sa7aassa gidokkona. <sup>17</sup> Neeni tumatettan eta nebaa ootta; ne qaalaikka tumatettaa. <sup>18</sup> Neeni tana sa7aa kiittidoogaadan, taanikka eta sa7aa kiittaas; <sup>19</sup> qassi eti tumatettan nebaa gidana mala, eta gishshau, taani ta huuphiyaa neeyyo immais.

<sup>20</sup> “Taani eta xalaalau woossikke; shin eti qaalaa yootin, tana ammanidaageetuyyookka woossais. <sup>21</sup> Eti ubbai issuwaa gidana mala, taani woossais. Aawau, neeni ta giddon de7iyooogaadan, qassi taanikka ne giddon de7iyooogaadan, eti nu giddon de7ona. Qassi neeni tana kiittidoogaa sa7ai ammanana mala, eti issuwaa gidona. <sup>22</sup> Neeninne taani issuwaa gidiyoogaadan, eti issuwaa gidana mala, neeni tana bonchchidoogaadan, taanikka eta bonchchaas. <sup>23</sup> Taani eta giddon de7in, neeni ta giddon de7in, qassi neeni tana siiqiyoogaadan, etakka siiqidoogaanne tana sa7aa kiittidoogaa sa7ai eranaadan, eti muleera issuwaa gidona.

<sup>24</sup> “Aawau, sa7ai merettanaappe kase neeni tana siiqido gishshau, tau immido ta bonchchuwaa eti be7ana mala, neeni tau immidoogeeti taani de7iyooosan tanaara de7ana mala koyais.

<sup>25</sup> “Xillo Aawau, sa7ai nena erenna; shin taani nena erais. Qassi neeni tana kiittidoogaa hageeti eroosona. <sup>26</sup> Neeni tana siiqido siiqoi eta giddon de7ana mala, qassi taanikka eta giddon de7ana mala, taani ne sunttaa eta erissaas; sinttaukka erissana” yaagiis.

## 18

### *Yesuusi Ba Morkketu Kushiyan Oiqettiis*

*(Maatiyoosa 26:47-56; Marqqoosa 14:43-50; Luqaasa 22:47-53)*

<sup>1</sup> Yesuusi heгаа гиidi, Xoossaa woossidoogaappe guyyiyan, ba erissiyо ashkkaratuura Qediroona giyo shaafaa pinniis. He соhuwan darо wогarai de7ees; Yesuusinne erissiyо ashkkarati he wогaraa gidдо gelidosona. <sup>2</sup> Yesuusa aatti immida Yihudai he соhuwaa erees; aissi giikko, Yesuusi ubba wode ba erissiyо ashkkaratuura hegan shiiqees. <sup>3</sup> Hegaa gishshau, Yihudai paanoosiyaa, xomppiyaa, tooraanne gondalliyyaa oiqqida darо wotaaddaratanne qassi qeese halaqatinne Parisaaweti yeddido Beeta Maqidasiyaa wotaaddarata kaaletti ekkidi, he соhuwaa biis.

<sup>4</sup> Yesuusi bana gakkana haniya ubbabaa eridi, gaxi kiyidi, “Oona koyeetii?” yaagiis.

<sup>5</sup> Yaagin eti zaaridi, “Naazireeta Yesuusa koyoos” yaagidosona.

Yesuusi zaaridi, “Taani a” yaagiis.

Yesuusa aatti immida Yihudaikka hegan etaara eqqiis; <sup>6</sup> Yesuusi, “Taani a” giido wode, eti guyyekko shiiqidi, sa7an kunddidosona. <sup>7</sup> Yesuusi qassikka, “Oona koyeetii?”

Yaagin eti, “Naazireeta Yesuusa koyoos” yaagidosona.

<sup>8</sup> Yaagin Yesuusi zaaridi, “Taani a gidiyooгaa intteyyo yootaas; simmi intte tana koyiyaabaa gidikko, hageeta yeddite” yaagiis. <sup>9</sup> I, “Aawau, neeni tau immidoogeetuppe harai atto, issuwaakka bashshabeikke” giidoogee polettana mala, heгаа giis.

<sup>10</sup> Simoon PHeexiroosau bisoi de7ees; i he bisuwaa shoddinnee qeese ubbatu halaqaa ashkkaa ushachcha haittaa shocidi, qanxxi yeggiis. He ashkkaa sunttai Malkkoosa.

<sup>11</sup> Yesuusi PHeexiroosa, “Ne bisuwaa shoohuwan zaarada wotta! Ta Aawai taayyo immido burccukkuwaappe taani uyennabaa neeyo milatii?” yaagiis.

### *Yesuusi Qeese Ubbatu Halaqaa Haanna Sintti SHiiqiis*

<sup>12</sup> SHaalaqai, darо wotaaddaratinne qassi Aihudatu halaqati Yesuusa oiqqidi qachchidosona. <sup>13</sup> Koiro Yesuusa Haannakko efiidosona; aissi giikko, Haanni he laitti qeese ubbatu halaqaa gidiya Qayaafa bollo. <sup>14</sup> “Asa ubbaa gishshau, issi asi haiqqikko lo77o” giidi Aihudata zoridaagee Qayaafa.

### *PHeexiroosi Yesuusa Kaddiis*

*(Maatiyoosa 26:69-70; Marqoosa 14:66-68; Luqaasa 22:55-57)*

<sup>15</sup> Simoon PHeexiroosinne hara issi erissiyо ashkkarai Yesuusa kaallidi biidosona. He hara erissiyо ashkkaa qeese ubbatu halaqai loitti erees; hegee Yesuusaara qeese ubbatu halaqaa dirssa garssi geliis. <sup>16</sup> SHin PHeexiroosi kareera dirssaa penggen eqqiis. Qeese ubbatu halaqai loitti eriyo hara erissiyо ashkkarai kare kiyidi, penggiyaa naagiya na7eeyyo yootidi, PHeexiroosa dirssa garssi gelissiiis. <sup>17</sup> Penggiyaa naagiya na7iyaa PHeexiroosa, “Neeni ha bitanee erissiyо ashkkaratuppe issuwaa gidikkiyye?” yaagaasu.

Yaagin PHeexiroosi, “CHii, taani gidikke” yaagiis.

<sup>18</sup> Sa7ai meeggiyo gishshau, ashkkaratinne halaqati xiixinttaa tamaa oittidi, bonqqidaagaa yuuyi aadhdhi eqqidi ho77oosona; PHeexiroosikka etaara eqqidi, he tamaa ho77ees.

### *Qeese Ubbatu Halaqai Yesuusa Oichchido Oishaa*

*(Maatiyoosa 26:59-66; Marqoosa 14:55-64; Luqaasa 22:66-71)*

<sup>19</sup> Qeese ubbatu halaqai Yesuusa i erissiyо ashkkaratubanne a timirttiyaabaa oichchiis. <sup>20</sup> Yesuusi zaaridi, “Taani asa ubbau qoncciyaa odaas. Taani Aihuda ubbai shiiqiyo Aihuda woosa keettaaninne Beeta Maqidasiyan ubba wode tamarissaas; geeman ainne haasayabeikke. <sup>21</sup> Yaatin, neeni tana aissi oichchai? Taani odidoogaa siyida asaa oichcha; he asai taani odidoogaa erees” yaagiis.

<sup>22</sup> Yesuusi heгаа гиido wode, he соhuwan eqqida wotaaddaratuppe issoi Yesuusa baqqidi, “Qeese ubbatu halaqaa bolli hagaadan zaarai?” yaagiis.

<sup>23</sup> Yesuusi zaaridi, “Taani balabaa haasayidabaa gidikko, hagan de7iya asa ubbau oda; shin taani tumaa haasayidabaa gidikko, tana aissi baqqai?” yaagiis.



<sup>24</sup> Hegaa gishshau, Haanni, qashetti uttida Yesuusa, qeese ubbatu halaqaa, Qayaafakko yeddiis.

*PHexiroosi Yesuusa Naa77anttuwaa Kaddiis*  
(Maatiyoosa 26:71-75; Marqqoosa 14:69-72; Luqaasa 22:58-62)

<sup>25</sup> PHeexiroosi hegan eqqidi, tamaa ho77ees; harati a, “Neeni ha bitanee erissiyo ashkkaratuppe issuwaa gidikkiyye?” yaagiis.

Yaagin PHeexiroosi, “CHii; taani gidikke” yaagidi kaddiis.

<sup>26</sup> Qeese ubbatu halaqaa ashkkaratuppe issai, PHeexiroosi haittaa qanxxido bitaniyaa dabboi PHeexiroosa, “Taani nena aara daro wogaraa giddon be7abeikkinaayye?” yaagidi oichchiis.

<sup>27</sup> Oichchin PHeexiroosi qassikka kaddiis; sohuwaarakka kuttoi waassi aggiis.

*Yesuusi PHilaaxoosa Sintti SHiiqiis*  
(Maatiyoosa 27:1-2,11-14; Marqqoosa 15:1-5; Luqaasa 23:1-5)

<sup>28</sup> Eti Yesuusa Qayaafa sooppe deriyaa haariyaagaa ooso keettaa ekki efidosona. Sa7ai maallado guura; Aihudati Paasikaa bonchchiyo gallassa qumaa maanau, bantta huuphessi tunenna mala, deriyaa haariyaagaa ooso keettaa gelibookkona. <sup>29</sup> Hegaa gishshau, PHilaaxoosi etakko kare kiyidi, “Ha bitaniyaa intte aibin mooteetii?” yaagiis.

<sup>30</sup> Yaagin eti, “I iitabaa oottibeennabaa gidiyaakko, nuuni a neekko ehookko” yaagidosona.

<sup>31</sup> PHilaaxoosi zaaridi etayyo, “Intte a ekki efidi, intte higgee giyoogaadan, a bolli pirddite” yaagiis.

Yaagin Aihudati, “Oonanne woriyo maati nuuyyo baawa” yaagidosona; <sup>32</sup> hagee hanidoogee Yesuusi ai mala haiquwaa haiqqanaakko erissanau haasayidoogee polet-tanaassa.

<sup>33</sup> PHilaaxoosi ba ooso keettaa naa77anttuwaa gelidi, Yesuusa xeesiis; xeesidi, “Neeni Aihuda kawoo?” yaagidi a oichchiis.

<sup>34</sup> Oichchin Yesuusi PHilaaxoosa, “Ha oishaa neeni neeppe oichchaiyye woi hara asi neeyyo tabaa odidee?” yaagiis.

<sup>35</sup> PHilaaxoosi zaaridi, “Tana Aihuda asa gai? Ne zaretinne qeesetu halaqati nena tau aatti immidosona; neeni ai oottadii?” yaagiis.

<sup>36</sup> Yaagin Yesuusi, “Ta kawotettai ha sa7aana gidenna. Ta kawotettai ha sa7aana gididaakko, tana Aihudatuuyyo aatti immennaadan, ta ashkkarati tau olettana; shin ta kawotettai ha sa7aana gidenna” yaagiis.

<sup>37</sup> Hegaa gishshau, PHilaaxoosi Yesuusa, “Yaatin, neeni kawooyye?” yaagidi oichchiis.

Yesuusi zaaridi, “Neeni tana kawo gaasa. Taani tumatettaayyo markkattana gishshau yelettaas; qassi heгаа gishshau, ha sa7aa yaas. Tumaа bagga gidiya ooninne taani giyoogaa siyees” yaagiis.

<sup>38</sup> Yaagin PHilaaxoosi, “Tumatetti aibee?” yaagiis.

PHilaaxoosi heгаа giidoogaappe guyyiyan, Aihudatukko kare kiyidi, “Taani aani ai balanne demmabeikke. <sup>39</sup> SHin Paasikaa bonchchiyo gallassi, issi asa taani intteyyo qashuwaappe birshshiyoo meeze de7ees; taani intteyyo Aihudatu kawuwaa birshshiyooogaa koyeetii?” yaagiis.

<sup>40</sup> Eti zaaridi, bantta qaalaa xoqqu oottidi, “Barbbaana birshshappe attin, a gidenna!” yaagidosona. SHin Barbbaani pangga.

## 19

*Wotaaddarati Yesuusa Bolli Qilliiccidosona*  
(Maatiyoosa 27:27-32; Marqqoosa 15:15-21)

<sup>1</sup> Hegaappe guyyiyan, PHilaaxoosi Yesuusa oiqqidi, lissuwan garafiis. <sup>2</sup> Wotaaddarati agunttaappe akililiyaa loittidi, a huuphiyan wottidosona; qassi zo7o maayuwaakka

a maizzidosona. <sup>3</sup> Akko shiiqidi, “Aihuda kawuwau, shemppo gam77a!” yaagidi a qinxalliyaa baqqidosona.

<sup>4</sup> PHilaaxoosi qassikka kare kiyidi Aihudata, “Be7ite, taani aani ai balanne demmabeennaagaa intte erana mala, a inttekkko kare kessana” yaagiis. <sup>5</sup> Hegaappe guyyiyan, Yesuusi agunttaa akiliiliyaa ba huuphiyan wottidi, zo7o maayuwaa maayidi, kare kiyiis; PHilaaxoosi Aihudata, “Bitaniyaa haggaa be7ite” yaagiis.

<sup>6</sup> Qeese halaqatinne wotaaddarati a be7ido wode, bantta qaala xoxqu oottidi, “Masqqaliyaa bolli misimaariyan xishada a kaqqa! Kaqqa!” yaagidosona.

Yaagin PHilaaxoosi eta, “Intte a ekki efidi, masqqaliyaa bolli misimaariyan xishidi kaqqite; aissi giikko, taani ai balanne demmabeikke” yaagiis.

<sup>7</sup> Aihudati zaaridi, “Nuuyyo higgee de7ees; nu higgee giyoogaadan, i haiqqanau bessees; aissi giikko, i bana Xoossaa Na7aa oottiis” yaagidosona.

<sup>8</sup> PHilaaxoosi heggaa siyido wode, kaseegaappe keehi yayyiis. <sup>9</sup> Qassikka PHilaaxoosi ba ooso keettaa simmi gelidi Yesuusa, “Neeni auppe yaadii?” yaagidi oichchiis; shin Yesuusi ayyo ainne zaaribeenna. <sup>10</sup> Heggaa gishshau, PHilaaxoosi a, “Tau yootikkii? Nena birshshanau woi masqqaliyaa bolli misimaariyan xishada kaqqanau tau maati de7iyoooggaa erikkiiyye?” yaagiis.

<sup>11</sup> Yaagin Yesuusi, “Xoossai neeyyo bollappe maataa immibeennabaa gidiyaakko, neeyyo ta bolli maati de7enna shin. Heggaa gishshau, tana neeyyo aatti immidaagee aadhdhiya nagaraa oottiis” yaagiis.

#### *Yesuusa Haiquwau Pirddidosona*

*(Maatiyoosa 27:15-31; Marqqoosa 15:6-20; Luqaasa 23:13-25)*

<sup>12</sup> PHilaaxoosi heggaa siyido wode, Yesuusa birshshanau oge koyiis; shin Aihudati bantta qaala xoxqu oottidi, “Neeni a birshshiyaabaa gidikko, Kawuwaa Qeesaara dabbo gidakka! Bana kawo giya ooninne Qeesaara morkke!” yaagidosona.

<sup>13</sup> PHilaaxoosi heggaa siyidi, Yesuusa kare kessiis. Yaatidi shuchchaa baasidi kessidosaa giyoosan pirdda oidiiyan uttiis; Ibraisxxe qaalaa he sohoi gabataa giyooggaa. <sup>14</sup> He gallassai Paasikaa bonchchiyo gallassau giigissiyoo gallassa; sa7ai usuppun saate heera gidana. PHilaaxoosi Aihudata, “Intte kawuwaa haggaa be7ite!” yaagiis.

<sup>15</sup> Yaagin Aihudati bantta qaala xoxqu oottidi, “Digga! Digga! Masqqaliyaa bolli misimaariyan xishada kaqqa!” yaagidosona.

PHilaaxoosi zaaridi, “Intte kawuwaa taani masqqaliyaa bolli misimaariyan xishada kaqqiyoooggaa koyeetii?” yaagidi oichchiis.

Oichchin qeese halaqati, “Qeesaarappe hara kawoi nuuyyo baawa!” yaagidosona.

<sup>16</sup> Hegaappe guyyiyan, eti masqqaliyaa bolli misimaariyan xishidi, Yesuusa kaqqana mala, PHilaaxoosi etau aatti immiis.

#### *Yesuusa Kaqqidosona*

*(Maatiyoosa 27:32-44; Marqqoosa 15:21-32; Luqaasa 23:26-43)*

Eti Yesuusa oiqqidi, ekki efidosona. <sup>17</sup> Yesuusi ba masqqaliyaa tookkidi, Guuggiyaa Sohuwaa giyoosaa biis. “Guuggiyaa Sohuwaa” giyoogee Ibraisxxe qaalaa “Golggottaa” giyooggaa. <sup>18</sup> Eti he sohuwan masqqaliyaa bolli misimaariyan xishidi, Yesuusa kaqqidosona; qassi aara hara naa77u asata, issuwaa ya baggaara qassi issuwaa ha baggaara Yesuusa gidduwan wottidi, masqqaliyaa bolli misimaariyan xishidi kaqqidosona.

<sup>19</sup> PHilaaxoosi xifatiyaa xaafidi, masqqaliyaa bolli wottiis. I xaafidoogee, “Aihudatu Kawuwaa, Naazireeta Yesuusa” yaagees. <sup>20</sup> Yesuusi masqqaliyaa bolli misimaariyan xishettidi kaqettidosai katamaa matan de7iyo gishshau, daro Aihudati he xifatiyaa nabbabidosona. Xifatee Ibraisxxe qaalaa, Roomaisxxe qaalaaninne Giriike qaalaa xaafettiis. <sup>21</sup> Heggaa gishshau, Aihuda qeese halaqati PHilaaxoosa, “ ‘Ha bitanee bana Aihuda kawo yaagiis’ gaada xaafappe attin, ‘Aihuda kawo’ gaada xaafoppa” yaagidosona.

<sup>22</sup> Yaagin PHilaaxoosi, “Taani xaafidoogaa xaafarggaas” yaagidi zaariis.

<sup>23</sup> Wotaaddarati masqqaliyaa bolli misimaariyan xishidi, Yesuusa kaqqidoogaappe guyyiyan, a maayuwaa ekkidi, oiddu kessi shaakkidosona; issi issi wotaaddaraa issi shaahoi gakkiiis. A adussa maayuwaakka ekkidosona; adussa maayoi hashiyaappe doommidi, duge gakkanaassi yeda maayettiyaabaappe attin, qanxxettidi sikettibeenna.

<sup>24</sup> Wotaaddarati issi issuwaa, “Oona gakkanaakko, saamaa yegganaappe attin, maayuwaa peerokko” yaagidosona. Hegee hanidoogee Xoossaa maxaafai, “Ta maayuwaa shaakki ekkidosona; ta adussa maayuwan saamaa yeggidosona” giyoogee polettanaassa. Hegaa gishshau, wotaaddarati heгаа oottidosona.

<sup>25</sup> SHin Yesuusa masqqaliyaa matan a ayyiyaa, a aayee michchiyaa, Qaliyoopha machchiyaa Mairaamanne Magddala giyo katamaappe yiida Mairaama eqqidosa.

<sup>26</sup> Yesuusi ba ayyiyyaanne i siiqiyo erissiyo ashkkarai hegan eqqidaageeta be7idi, ba ayyiyo, “Ha mishiree, ne na7aa haggaa be7a!” yaagiis.

<sup>27</sup> Hegaappe guyyiyan, he erissiyo ashkkaraa, “Ne ayyiyo hanno be7a!” yaagiis. He erissiyo ashkkarai o he saatiyaappe doommidi, ba soo ekki efiis.

### *Yesuusi Haiqqiis*

*(Maatiyoosa 27:45-56; Marqqoosa 15:33-41; Luqaasa 23:44-49)*

<sup>28</sup> Hegaappe guyyiyan, Yesuusi ubbabi ha77i polettidoogaa eridi, Xoossaa maxaafai giidoogee polettana mala, “Tana saammee” yaagiis.

<sup>29</sup> He sohuwan issi xuggaa kumida caala woine eessai de7ees. Eti isponjjiyaa he woine eessan yeggidi, hiisophphe giyo mittaa xeeran wottidi, Yesuusa doonaakko shiishshidosona. <sup>30</sup> Yesuusi woine eessaa ganxxi be7idoogaappe guyyiyan, “Polettiis” yaagiis.

### *Yesuusa Miyyiyaa Tooran Caddidosona*

Qassi hegaappe guyyiyan, ba huuphiyaa ziqqi oottidi, ba shemppuwaa immiis.

<sup>31</sup> He gallasai gigettiyo gallassa gidiyo gishshaunne qassi he Sambbatai daro bonch-cho gidiyo gishshau, Sambbatan asatu ahai masqqaliyaa bolli pe7enna mala, kaqettida asatu suiliyaa menttidi, masqqaliyaappe wottana mala, Aihudati PHilaaxoosa woossidosona. <sup>32</sup> Hegaa gishshau, wotaaddarati yiidi, Yesuusaara kaqettida koiro bitaniyaa suiliyaa menttidosona; qassi aara kaqettida naa77antto bitaniyaa suiliyaakka menttidosona. <sup>33</sup> SHin Yesuusakko yiido wode i haiqqichchidoogaa be7idi, a suiliyaa menttiboorkona. <sup>34</sup> Gidikonne, wotaaddaratuppe issi a miyyiyaa tooran caddiis; caddin sohuwaarakka suuttainne haattai goggi bayiis. <sup>35</sup> Intte ammanana mala, haggaa be7idaagee markkattiis; i markkattiyoogee kuma; qassi ba haasayai tuma gidiyoogaa i erees. <sup>36</sup> Hegee hanidoogee Xoossaa maxaafai, “A meqettatuppe issiinne meqqenna” giidoogee polettanaassa. <sup>37</sup> Qassikka Xoossaa maxaafai harai, “Asai ba caddidoogaa be7ana” yaagees.

### *Yesuusi Moogettiis*

*(Maatiyoosa 27:57-61; Marqqoosa 15:42-47; Luqaasa 23:50-56)*

<sup>38</sup> Hegaappe guyyiyan, Armmaatiyaasa giyo katamaappe yiida Yooseefi Yesuusa ahaa ekki efaanau PHilaaxoosa woossiis; Yooseefi Aihudatuyyo yayyido gishshau, asi erennan Yesuusa kaalliyagaa.

Yooseefi woossin PHilaaxoosi, “Ekkada efa” yaagiis. Hegaa gishshau, Yooseefi biidi, Yesuusa ahaa ekki efiis. <sup>39</sup> Qassi Niqoodimoosi hegaappe kase Yesuusakko qammi yiidaagee, karbbiyaaranne godare uuttaara walahettida oitamanne ichchashu kilo giraame gidiyaagaa keena shittuwaa oiqqi ekkidi, Yooseefaara yiis. <sup>40</sup> He naa77u asati Yesuusa ahaa ekkidi, Aihudati ahaa xaaxiyo maaraadankka, shittuwara gattidi, liinuwaa giyo afalan xaaxidosona. <sup>41</sup> Yesuusi masqqaliyaa bolli misimaariyan xishettidi kaqettido sohuwan daro wogara de7ees; he wogara gidon shuchchaa wooci kessido

biron ooninne moogettibeenna ooratta gonggoloi de7ees. <sup>42</sup> He gonggoloi matan de7iyo gishshaunne qassi Aihudati Sambbatau giigettiyo gallassa gidiyo gishshau, Yesuusa yaani wottidosona.

## 20

### *Yesuusi Haiquwaappe Denddiis*

*(Maatiyoosa 28:1-8; Marqqoosa 16:1-8; Luqaasa 24:1-12)*

<sup>1</sup> Woggaa gallassi guuran, biron daabidaabiyaagan, Magddala giyo katamaappe yiida Mairaama Yesuusi moogettido gonggololuwaakko baasu; baada shuchchai he gonggoluwaa doonaappe denddiichchidaagaa be7aasu. <sup>2</sup> Simoon PHeexiroosakkonne Yesuusi siiqiyo hinkko erissiyo ashkkaraakko, a woxxaidda baada, “Gonggololuwaappe Godaa ekki efirggidosona; awan a wottidaakkonne nuuni erokko” yaagaasu.

<sup>3</sup> Hegaa gishshau, PHeexiroosinne hinkko erissiyo ashkkarai aggidi, gonggololuwaakko biidosona. <sup>4</sup> Naa77aikka issippe woxxidosona; shin hinkko erissiyo ashkkarai PHeexiroosappe aadhdhidi kasetidi, he gonggololuwaakko gakkiiis. <sup>5</sup> He erissiyo ashkkarai hokkidi, liinuwaa giyo afalaa be7iis; shin giddo gelibeenna. <sup>6</sup> Simoon PHeexiroosi a kaallidi yiidi, gonggoluwaa giddo geliis. Gelidi liinuwaa giyo afalai hegan de7iyaagaa be7iis; <sup>7</sup> qassi Yesuusa huuphiyan xaaxetti uttida afalai he xaaxettidoogaadankka dumma issisan de7iyaagaa be7iis; he afalai dumma de7eesippe attin, liinuwaa giyo afalaa issippe de7enna. <sup>8</sup> He wode, kasetidi gonggololuwaakko gakkida hinkko erissiyo ashkkarai geliis. Geli be7idi ammaniis. <sup>9</sup> Yesuusi haiquwaappe denddanau bessiyogaa yootiya Xoossaa maxaafaa eti biron akeekiichchibookkona. <sup>10</sup> Hegaappe guyyiyan, erissiyo ashkkarati bantta soo simmidi biidosona.

### *Yesuusi Magddala Mairaamissi Beettiis*

*(Maatiyoosa 28:9-10; Marqqoosa 16:9-11)*

<sup>11</sup> SHin Mairaama he gonggoluwaa doonan eqqada yeekkausuu. Yeekkaidda hokkada gonggoluwaa giddo xeellaasu. <sup>12</sup> Bootta maayuwaa maayida naa77u kiitanchchati Yesuusa ahai zin77idosan issoi huuphessaara issoi tohossaara uttidaageeta be7aasu. <sup>13</sup> Eti o, “Mishiree, aissi yeekkai?” yaagidi oichchidosona.

Oichchin a, “Asati ta Godaa efirggidosona; eti awan wottidaakkonne taani erikke” yaagaasu.

<sup>14</sup> Hegaa giidoogaappe guyyiyan, guyye simma xeellada, Yesuusi eqqidaagaa be7aasu. SHin i Yesuusa gididoogaa akeekabeikku. <sup>15</sup> Yesuusi o, “Mishiree, aissi yeekkai? Oona koyai?” yaagidi oichchiis.

Mairaama wogaraa naagiyaagaa gaada, “Godau, neeni ekkidabaa gidikko, a awan wottidaakko, tau yootarkkii; taani a ekka efaana” yaagaasu.

<sup>16</sup> Yesuusi o, “Mairaamee” yaagiis.

A akko simmada, Ibraisxxe qaalaa “Rabunii” yaagaasu; hejaa birshshettai “Tamaarissiyaagoo” giyoogaa.

<sup>17</sup> Yesuusi o, “Taani biron ta Aawaakko babeenna gishshau, tana bochchoppa; shin ta ishanttukko baada, ‘Taani ta Aawaakkonne intte Aawaakko, ta Xoossaakkonne intte Xoossaakko, pude bais giis’ gaada etau oda” yaagiis.

<sup>18</sup> Magddala giyo katamaappe yiida Mairaama Godaa be7idoogaanne iyyo i hejaa odidoogaa baada erissiyo ashkkaratuyyo odaasu.

### *Yesuusi Ba Erissiyo Ashkkaratussi Beettiis*

*(Maatiyoosa 28:16-20; Marqqoosa 16:14-18; Luqaasa 24:36-49)*

<sup>19</sup> He Woggaa gallassi omarssi, erissiyo ashkkarati Aihudatuyyo yayyido gishshau, kariyaa koridi, shiiqi uttidaashin, Yesuusi yiidi, eta gidduwan eqqidi, “Sarotettai intteyyo gido” yaagiis. <sup>20</sup> Hega giidoogaappe guyyiyan, ba kushiyaanne ba miyyiyaa



eta bessii; erissiyo ashkkarati Godaa be7ido wode keehi ufaittidosona. <sup>21</sup> Yesuusi naa77anttuwaakka etau, “Sarotettai intteyyo gido; ta Aawai tana kiittidoogaadan, taanikka inttena kiittais” yaagiis. <sup>22</sup> Hegaa giidoogaappe guyyiyan, eta bolli ufu giidi shemppiis; qassi, “Geeshsha Ayyaanaa ekkite. <sup>23</sup> Intte atto giido asaa nagarai atto geetettana; intte atto geennaageetu nagarai atto geetettenna” yaagiis.

### *Yesuusanne Toomaasa*

<sup>24</sup> SHin tammanne naa77u erissiyo ashkkaratuppe issoi, Mentte giyo Toomaasi, Yesuusi yiido wode etaara de7enna. <sup>25</sup> Hegaa gishshau, hinkko erissiyo ashkkarati Toomaasau, “Nuuni Godaa be7ida!” yaagidosona.

SHin Toomaasi etau, “Misimaariyan i cadettido a kushiyan de7iya malaataa be7ennaaninne he malaataa ta biradhdhiyan bochchennan, qassi ta kushiya a miyyiyan yedda be7ennan taani ammanikke” yaagiis.

<sup>26</sup> Saaminttappe guyyiyan, Yesuusi erissiyo ashkkarati qassikka sooni shiiqi uttidosa; Toomaasikka etaara de7ees. Karee koretti uttidaashin, Yesuusi yiidi, eta gidduwan eqqiis; eqqidi, “Sarotettai intteyyo gido” yaagiis. <sup>27</sup> Hegaappe guyyiyan, Yesuusi Toomaasa, “Ne kushiya haa ehaada, ta kushiya be7a, qassi ne kushiya haa ehaada, ta miyyiyan yedda be7a, neeni ammaniyaagaa gidanaappe attin, ammanennaagaa gidoppa!” yaagiis.

<sup>28</sup> Toomaasi zaaridi, “Ta Godau, ta Xoossau!” yaagiis.

<sup>29</sup> Yaagin Yesuusi, “Neeni tana be7ido gishshau ammanadasa; be7ennan ammanidaageeti anjettidaageeta” yaagiis.

### *Ha Maxaafaa Halchchuwaa*

<sup>30</sup> Yesuusi ha maxaafan xaafettibeenna hara daro malaatata ba erissiyo ashkkaratu sinttan oottiis. <sup>31</sup> SHin Yesuusi i Kiristtoosa, Xoossaa Na7aa gidiyooagaa intte ammanana malanne, qassi a ammanidi a sunttan de7uwaa intte demmana mala, hagee xaafettiis.

## 21

### *Yesuusi Laappun Erissiyo Ashkkaratussi Beettiis*

<sup>1</sup> Hegaappe guyyiyan, Yesuusi Xibiriyaadoosa giyo abbaa lanqqiyan ba erissiyo ashkkaratuyyo naa77anttuwaa beettiis. I etau hagaadan beettiis. <sup>2</sup> Simoon PHeexiroosinne mentte giyo Toomaasi, Qaana Galiilappe yiida Naatinaa7eeli, Zabddiyoosa naatinne Yesuusi erissiyo ashkkaratuppe hara naa77ati issippe de7oosona.

<sup>3</sup> Simoon PHeexiroosi etau, “Taani mole oiqqanau bais” yaagiis.

Yaagin eti, “Nuunikka nenaara baana” yaagidi, kiyidi wolwoluwaa giddo gelidosona; shin eti he gallassi qammi mole ainne oiqqibookkona.

<sup>4</sup> Maallado wonttaara awai kiyanaappe kase, Yesuusi abbaa gaxan eqqiis; shin erissiyo ashkkarati Yesuusa gididoogaa eribookkona. <sup>5</sup> Yesuusi eta, “Naatoo, mole oiqqibeekketiiyye?” yaagiis.

Yaagin eti zaaridi, “Ainne oiqqibookko” yaagidosona.

<sup>6</sup> I zaaridi, “Intte gitiyaa wolwoluwaappe ushachcha baggakko yeggite; amaridaagaa intte oiqqana” yaagiis. Hegaa gishshau, gitiyaa ushachcha baggakko yeggin, molee darido gishshau, goochchi kessanaagee eta xooniis.

<sup>7</sup> Yesuusi siiqiyo ashkkarai PHeexiroosa, “Hagee Godaattennee!” yaagiis. Simooni PHeexiroosi Godaa i gididoogaa siyido wode, kallo de7iyo gishshau, ba maayuwaa maayidi, abbaa giddo guppi geliis. <sup>8</sup> SHin hinkko erissiyo ashkkarati molee kumi uttido gitiyaa goochchiiddi, wolwoluwan abbaappe gaxi kiyidosona; eti abbaappe naa77u xeeetu wara keenaa haakkidi de7oosonappe attin, keehi haakkidi de7okkona. <sup>9</sup> Eti abbaappe gaxi kiyido wode, xiixinttaa bonqquwan molee de7iyaagaanne oittaa be7idosona.



<sup>10</sup> Yesuusi eta, “Ha77i intte oiqqido moliyaappe amaridaagaa hammite” yaagiis.

<sup>11</sup> Simoon PHeexiroosi wolwoluwan gelidi, xeetanne ishatamanne heezzu wogga moleti kumi uttido gitiyaa goochchidi, abbaappe gaxi kessiis; molee heгаа keena daro gidinkka gitee daakettibeenna.

<sup>12</sup> Yesuusi eta, “Haa yiidi, qan77iyaa qan77ite” yaagiis. Erissiyo ashkkaratuppe issoinne, “Neeni oonee?” giidi a oichchanau xalibeenna; aissi giikko, Godaa i gididoogaa eti eridosona. <sup>13</sup> Yesuusi yiidi, oittaa ekkidi, etau immiis; moliyaakka heгаadan immiis.

<sup>14</sup> Yesuusi haiquwaappe dendidooгаappe guyyiyan, ba erissiyo ashkkaratuyyo beettishin hagee heezzantto.

### *Yesuusanne PHeexiroosa*

<sup>15</sup> Eti qumaa miidoogaappe guyyiyan, Yesuusi Simoon PHeexiroosa, “Yoona na7au Simoonaa, tana hageetuppe aattada siiqai?” yaagiis.

Simoon PHeexiroosi, “Ee Godau, taani nena dosiyooгaa neeni eraasa” yaagiis.

Yesuusi a, “Ta dorssa marata heemma” yaagiis.

<sup>16</sup> Yesuusi qassikka, “Yoona na7au Simoonaa, tana siiqai?” yaagiis.

Simoon PHeexiroosi, “Ee Godau, taani nena dosiyooгaa neeni eraasa” yaagiis.

Yaagin Yesuusi, “Ta dorssata heemma” yaagiis.

<sup>17</sup> Yesuusi heezzanttuwaa, “Yoona na7au Simoonaa, tana dosai?” yaagiis.

Yesuusi heezzanttuwaa Simoon PHeexiroosa, “Tana dosai?” yaagidi oichchido gishshau, PHeexiroosi azzanidi, “Godau, neeni ubbabaa eraasa; taani nena dosiyooгaa neeni eraasa” yaagiis.

Yaagin Yesuusi, “Ta dorssata heemma. <sup>18</sup> Taani neeyyo tumaa odais; neeni wodallatetan de7iyo wode, ne xeessan qabattuwaа nerкka gixxada, neeni koyidosaa baasa. SHin cimidoogaappe guyyiyan, ne kushiyaa micca bessaasa. Nena hara urai gixissees; neeni dosennasaakka efees” yaagiis. <sup>19</sup> Yesuusi heгаа PHeexiroosi ai mala haiquwaa haiqqidi, Xoossaa bonchchissanaakkonne erissanau giis; qassi heгаа giidoogaappe guyyiyan, Yesuusi PHeexiroosa, “Tana kaalla” yaagiis.

### *Yesuusanne Hankko Erissiyo Ashkkaraa*

<sup>20</sup> PHeexiroosi guyye simmidi, Yesuusi siiqiyo erissiyo ashkkarai baappe guyyeera yiyaagaa be7iis; he erissiyo ashkkarai, kahuwaa miyoosan Yesuusakko shiiqidi a, “Godau, nena aatti immanai oonee?” yaagidaagaa. <sup>21</sup> PHeexiroosi he erissiyo ashkkaraa be7idi Yesuusa, “Godau, ha bitanee qassi waananee?” yaagiis.

<sup>22</sup> Yaagin Yesuusi a, “Taani yaana gakkanaassi i de7ana mala taani koyikko, hegee nena ai metii? Neeni tana kaalla” yaagiis.

<sup>23</sup> Hegaa gishshau, he erissiyo ashkkarai haiqqenna giyo haasayai ishanttu ubbaakko gakkis; shin Yesuusi, “Taani yaana gakkanaassi, i de7ana mala, taani koyikko, nena ai metii?” giidoogaappe attin, “Haiqqenna” gibeenna.

<sup>24</sup> He yohuwaabaa markkattidaageenne qassi heгаа xaafidaagee he erissiyo ashkkaraa; a markkatettai tuma gidiyooгaa nuuni eroos.

<sup>25</sup> Yesuusi oottido hara darobaikka de7ees; ubbabai huuphiyan huuphiyan xaafettiyaakko, xaafettiya maxaafatuyyo ha mule sa7ai gidanabaa taayyo milatenna.

## Yesuusi Kiittidoogeetu Oosuwaa

### *Gidduwaa Erissuwaa*

Yesuusi Kiittidoogeetu Oosuwaa geetettiya maxaafai Yohaannisa Wonggeliyaa kaal-lidi xaafettida maxaafa. Maxaafaayo de7iya waanna halchchoi koiro Yesuusa kaal-lida asati Geeshsha Ayyaan an kaaletettidi, abaa yootiya mishiraachchuwaa qaalaa “Yerusalaamen, Yihudaa biittan ubban, Samaariyan, sa7aa gaxaa gakkanaashin” (1:8) wonggeliyaa waati biittaa ubbaa gattidaakko odanaassa. Maxaafai Kiristinnaa ammanoi Aihuda asatu giddon doomettidi, kumetta sa7an de7iya asaa ubbaa ammano gidana gakkanaashin waani aakkidaakko yootiya taarike. Xaafidaagee, ammaniya asati Roomaa kawotettaa ongganau garssaara maqettiya asa gidennaagaanne Kiristinnaa ammanoi Aihudatu ammanuwaa kumetta oottiyaagaa gidiyoojaa erissanau keehi daafuridi oottiis.

Yesuusi Kiittidoogeetu Oosoi Yesuusabaa yootiya mishiraachchoi gakkioyohoi wodiyan wodiyan aakki aakki biyoogaanne woosa keettai eqqidoogaa qonccissiya heezzu waanna waanna sohotun shaakkanau danddayettes:

1. Kiristinnaa ammanoi Yesuusi saluwaa pude kiyi simmin doomettidobaa.
2. Israa7eela biittaa ubbaa gakkidoogaa.
3. Roome gujjidi Meediteraane Abbaa yuushuwan de7iya biittatun aakkidoogaa.

Yesuusi Kiittidoogeetu Oosuwaa maxaafan orddidi beettiyaagee Geeshsha Ayyaan aa oosuwaa gidishin, PHenxxaaqosxxe gallassi Yerusalaamen de7iya ammaniyaageetu bolli wolqqappe i wodhdhidoogaa, hegaadankka maxaafaa giddon odettida oosotu ubban beettidoogaadan, Geeshsha Ayyaan ai woosa keettaanne woosa keettaa kaalet-tiyaageeta kaalettidoogaanne minttettidoogaa gujjidi yootees. Beni wode shiiqiya Kiristinnaa kiitai odido dumma dumma qaalaa gidloppe maxi kessin, qanttan shi-qiis. Yesuusi Kiittidoogeetu Oosuwaa giddon polettida oosotikka he kiitai ammaniya asaa de7uwaaninne woosa keettaa issippetettan de7iya wolqqai woisa keena gitakko yootoosona.

<sup>1-2</sup> Tewofiloosaa, Yesuusi saluwaa biido gallassai gakkanaassi, oottanaunne tamarisanau doommido ubbabaa taani ta koiro maxaafan xaafaas. Saluwaa baanaappe kase i ba dooridi kiittidoogeeta Geeshsha Ayyaan an azaziis. <sup>3</sup> I ba kiittidoogeetussi oitamu gallassaa beettiiddinne qassi Xoossaa kawotettaabaa etau yootiiddi, ba waayiyaappe guyyiyan, haiquwaappe denddidoojaa siree bannan daro ammanttidi, bana eta bessiis. <sup>4</sup> Etaara issippe de7iiddi, eta hagaadan yaagidi azaziis; “Yerusalaameppe kiyoppite; shin intte taappe siyidoogaa ta Aawai inttessi immana giidoogaa naagite. <sup>5</sup> Aissi giikko, Yohaannisi haattan xammaqiis; shin guutta wodiyaappe guyyiyan, Geeshsha Ayyaan an intte xammaqettana” yaagiis.

<sup>6</sup> Yesuusi kiittidoogeeti Yesuusaara gaittido wode a, “Godau, ha wodiyan Israa7eelatussi kawotettaa zaaruutee?” yaagidi oichchidosona.

<sup>7</sup> Oichchin Yesuusi eta, “Ta Aawai ba godatettan keerido aginaanne wodiya intte eranaassa gidenna. <sup>8</sup> SHin Geeshsha Ayyaan ai intte bolli wodhdhiyo wode, wolqqaa intte ekkana; ekkidi Yerusalaameeninne Yihudaa biitta ubban, Samaariyaaninne sa7aa gaxaa gakkanaashinkka taassi markkattiyaageeta gidana” yaagiis.

<sup>9</sup> Hegaa giidoogaappe guyyiyan, eti xeellishin, xoqqu xoqqu giiddi, saluwaa bin, eta aifiyaappe shaarai a genttiis.

<sup>10</sup> Yesuusi biyo wode, eti saluwaa tishshi oottidi xeellishin, issi bootta maayuwaa maayida naa77u asati sohuwaara eta matan eqqidi, <sup>11</sup> “Galiila asatoo, saluwaa xeellididi, intte aissi eqqidetii? Ha intteppe saluwaa biida Yesuusi saluwaa biyoogaa intte be7idoogaadankka, simmidi yaana” yaagidosona.

### *Yihudaa Sohuwan Maatiyaasi Doorettiis*

<sup>12</sup> Hegaappe guyyiyan, Yesuusi kiittidoogeeti Dabira Zaitte geetettiya deriyaappe Yerusalaame simmidosona. Dabira Zaitte Yerusalaame matan de7ees. <sup>13</sup> Yesuusi kiittidoogeeti Yerusalaame gelidi, bantta de7iyo sohuwaa pooqiyaa pude kiyidosona; kiyidaageeti PHeexiroosa, Yohaannisa, Yaaqooba, Inddiraasa, Piliphphoosa, Toomaasa, Barttalamoosa, Maatiyoosa, Ilppiyoosa na7aa Yaaqooba, ba biittaassi mishettiya Simoonanne Yaaqooba na7aa Yihudaa. <sup>14</sup> Hageeti ubbati maccaasatuura, Yesuusa aayee Mairaamiiranne Yesuusa ishanttuura ubbai issi wozana gididi, toliidi woossoona.

<sup>15</sup> He wode, PHeexiroosi xeetanne laatamaa gidiya ammaniya asaa shiiquwan issippe de7iyya ba ishanttu gididon dendi eqqidi, hagaadan yaagiis; <sup>16</sup> “Ta ishato, Yesuusa oiqqidaageeta kaalettida Yihudaabaa Geeshsha Ayyaanai kase Daawita doonan odido Xoossaa maxaafaa qaalai polettana bessees. <sup>17</sup> Aissi giikko, Yihudai nunaara de7ees; qassi nunaara issippe oottanaassi doorettiis” yaagiis.

<sup>18</sup> Yihudai ba iita oosuwan demmido miishshan gadiyaa shammiis; sinttau gufan-nidi kunddin, a uloi gidduwaappe daahettiis; a maraccee muleerakka zaazetti aggiis. <sup>19</sup> Yihudaa bolli hanidabaa Yerusalaamen de7iyya asai ubbai siyiis; hega gishshau, he gadiyaa bantta qaalan Akelddaama giidi xeegidosona; Akelddaama giyoogee suutta gade giyoogaa.

<sup>20</sup> PHeexiroosi yootiiddi, “Aissi giikko, Mazamure Maxaafan, ‘A keetta mela de7o; ooninne hegan de7oppo’ qassi ‘A sunttatettaakka harai ekko’ geetettidi xaafettiis.

<sup>21-22</sup> “Hegaa gishshau, issi asi Godaa Yesuusa dendduwaa markkattanau, nunan gaitana bessees; Yohaannisi xammaqido wodiyaappe doommidi, Yesuusi nuuppe saluwaa biido wode gakkanaas, Godaa Yesuusi nunaara hemettido wode ubban i nunaara de7iyyaageetuppe issuwaa gidanau bessees” yaagiis.

<sup>23</sup> Yaagin ammaniya asai dooruwaassi Yosxxoosa giyo Barssaaba geetettiya Yooseefanne Maatiyaasa naa77aa essidosona. <sup>24-25</sup> Hegaappe guyyiyan, Xoossaa woossiiddi, “Ubbaa wozanaa eriya Godau, Yihudai ba sohuwaa baanau yeggi bayido oosuwaanne Yesuusi kiittido oosuwa sohuwaa ekkanaadan, ha naa77u asatuppe issuwaa neeni dooridoogaa nuna bessa” yaagidosona. <sup>26</sup> Etan saamaa yeggidosona; saamai Maatiyaasa bollan wodhdhin, Maatiyaasi Yesuusi kiittido tammanne isiinetuura qoodettiis.

## 2

### *Geeshsha Ayyaanai Erisiyo Ashkkaratu Bolli Wodhdhiis*

<sup>1</sup> PHenxxaqosxxe giyo gallassai gakkido wode, ammaniyaageeti ubbati issippe gididi, issisaa shiiqidaashin, <sup>2</sup> gagantti yeggiya gotiyaadan guummiya gunntai akeekennan saluwaappe yiidi, eti uttido keettaa ubbaa kumiis. <sup>3</sup> Qassi tama laco milatiya inxxarssati etassi beettidi, shaahetti shaahettidi, eta ubbaa bolli wodhdhidosa. <sup>4</sup> Eta ubban Geeshsha Ayyaanai kumidi, dumma dumma qaalan haasayana mala, eta danddayissin, haasayaa doommidosona.

<sup>5</sup> Sa7an de7iyya zare ubbaappe yiidi, Xoossaa woosan sheekkida Aihudati Yerusalaamen de7oosona. <sup>6</sup> Ha gunntaa siyido wode, asai ubbai shiiqiis; shiiqidi ammaniyaageeti eta qaalan haasayishin siyido gishshau, giyoobaa xayidosona.

<sup>7</sup> Garamettidi, “Ooratabaa” giidi, “Be7ite; ha haasayiyya ubbati Galiila asata gidokkon-aayye? <sup>8</sup> Yaatin, nuuni nu yelettido biittaa qaalan eti haasayishin waanidi siyiyoonii?”

<sup>9</sup> Nuuni PHartte asati, Meedoona asati, Elaameexe asati, naa77u shaafatuppe gidduwan de7iyaageeti, Yihudan, Qaphphadooqiyan, PHanxxoosan Isiyan, <sup>10-11</sup> Pirggiyan, PHinifiliyan, Gibxxen, Qareena baggan de7iya Liibiyaa woradatun de7iyaageeti, Roomeppe yiida imattati, Aihudati, Aihudatettau laamettida nuuppe amaridaageeti, Qarxxeese asatinne, Araba asati, Xoossai oottido gita oosuwaa nu qaalan eti haasayishin siyoos” yaagidosona. <sup>12</sup> Ubbaikka garamettidi, yohoi banttau qashettennan ixxin bantta gidдон, “Laa hagee woigiyoogee?” yaagidosona. <sup>13</sup> SHin harati ammaniyaageetun Qilliicciiddi, “Hageeti uyidi mattottidosona” yaagidosona.

### *PHexiroosa Haasayaa*

<sup>14</sup> SHin PHeexiroosi, Yesuusi kiittido hara tammanne isiinetuura denddi eqgidi, ba qaalaa xoqqu oottidi, etassi hagaadan yaagidi yootiis; “Aihudatoo, qassi Yerusalaamen de7iya ubbatoo, taani yootiyoogaa ezggite. Hagee intteyyo eretto; intte qoppiyoogaadan, hageeti mattottibookkona. <sup>15</sup> Aissi giikko, wonttaappe biron heezzu saate gidees. <sup>16</sup> SHin hagee hananabaa yootiya Yuu7eeli haasayidoogaa.

<sup>17</sup> “I haasayiiddi, ‘Xoossai hagaadan yaagees; wodiya wurssettan hagaadan hanana.

Taani asa ubbaa bolli ta Ayyaanaa gussana.

Intte attuma naatinne intte macca naati hananabaa yootana.

Intte wodalla naatika ajjuutaa be7ana; intte cimatika aimuwaa aimottana.

<sup>18</sup> He gallassatun ta attuma ashkkaratu bollinne ta macca ashkkaratu bolli taani ta Ayyaanaa gussana.

Gussin eti hananabaa yootana.

<sup>19</sup> Qassi taani bolla saluwan oorattabaa, garssa sa7ankka malaataa bessana.

Suuttai, tamainne shaaraadan gorddida cuwai de7ana.

<sup>20</sup> Gitanne bonchcho gidida Godaa gallassai gakkanaappe kase awai xumana; aginaikka suutta milatana.

<sup>21</sup> He wode hagaadan hanana; Godaa sunntaa xeesiya ooninne attana’ yaagiis.

<sup>22</sup> “Israa7eela asatoo, ha qaalaa siyite; Naazireeta Yesuusi intte gidдон Xoossai banan oottido wolqqaama oosuwan, oorattabaaninne malaatan intteyyo qonccissido asa; hegaa inttekka ereeta. <sup>23</sup> Yesuusi inttessi imettana mala, Xoossai kase ba sheniyaaninne ba eran ba qofaa qachchi wottiis; yaatin, a intte nagaranchchatu kushiyan masqqaliyaa bolli misimaariyan xishsidi, kaqissi worideta. <sup>24</sup> SHin haiqoi Yesuusa oiqqanau danddayibeenna gishshau, Xoossai haiquwaa seelaa appe xaissidi, a denttiis. <sup>25</sup> Aissi giikko, Daawiti Yesuusabaa hagaadan yaagees;

‘Taani metootennaadan,

Godai ta ushachchan de7iyo gishshau,

taani ubba wode Godaa ta matan be7ais.

<sup>26</sup> Hegaa gishshau, ta wozanai ufaittiis;

ta inxxarssankka ufaissai kumiis.

Qassi ta bollaikka lo77o de7ana giidi, ufaissan naagees.

<sup>27</sup> Aissi giikko, ta shemppuwaa

Si7ooliyan aggakka.

Qassi ne Geeshsha Na7aa ahaakka musissakka.

<sup>28</sup> Neeni tana de7uwaa ogiyaa erissadasa.

Neeni tanaara de7iyooogan

taani daro ufaittais’

yaagees.

<sup>29</sup> “Ishatoo, nu aawatu halaqaa Daawitabaa taani intteyyo geeshshada odanau bessees; Daawiti haiqqidi moogettiis; a duufoi hachchi gakkanaassikka nu matan de7ees. <sup>30</sup> Daawiti hananabaa yootiyaagaa gidido gishshaunne Xoossai a naatu zerettaappe issuwaa a kawotaa araatan utissanau ayyo caaqqidoogaa erido gishshau, <sup>31</sup> Kiristtoosa dendduwaa sinttau xeellidi, ‘A shemppoi Si7ooliyan attibeenna; a bol-laikka musibeenna’ giidi yootiis.

<sup>32</sup> “Xoossai ha Yesuusa haiquwaappe denttidoogaassi nuuni ubbai markka. <sup>33</sup> Hegaa gishshau, Xoossai baappe ushachcha baggan a xoqqu xoqqu oottidi, ayyo Geeshsha Ayyaanaa immana giidoogaadan, Geeshsha Ayyaanaa ekkidi, haggaa intte ha77i be7iyooogaanne siyyoogaa nu bolli gussiis. <sup>34-35</sup> Aissi giikko, Daawiti ba huuphen saluwaa kiyibeenna; shin yaagiis;

‘Godai ta godaa; “Taani ne morkketa

neeni tohuwan yedhdha eqqiyoojaa oottana gakkanaassi hagan taappe ushachcha baggaara utta” giis’ yaagiis.

<sup>36</sup> “Hegaa gishshau, Xoossai masqqaliyaa bolli misimaariyan ha intte xishidi kaqqido Yesuusa Godanne Kiristtoosa oottidoogaa Israa7eela zare ubbai tumaappe ero” yaagiis.

<sup>37</sup> Asai PHeexiroosi giidoogaa siyido wode, asau wozanai maashin, PHeexiroosanne Yesuusi kiittido harata, “Ishanttoo, yaanin nuuni ai oottanee?” yaagidosona.

<sup>38</sup> PHeexiroosi eta, “Intte nagarai atto geetettana mala, nagaraappe simmidi, intte huuphiyan huuphiyan Yesuus Kiristtoosa sunttan xammaqettite. Xoossai immiyo Geeshsha Ayyaanaa intte ekkana. <sup>39</sup> Aissi giikko, Xoossai immana giido qaalai inttessa intte naatussanne Godai nu Xoossai baakko xeesiyo haahuwan de7iyaageetu ubbaassa” yaagiis.

<sup>40</sup> PHeexiroosi etassi qaalaa haraakka gujji markkattidi, “Ha wodiya geella asaappe intte huuphiyaa ashshite” yaagidi zoriis. <sup>41</sup> PHeexiroosi yootidoogaa ekkidaageeti xammaqettidosona; he gallassi heezzu sha7u gidiya asai ammaniis. <sup>42</sup> Eti Yesuusi kiittidoogeetu timirttiyan, issippetettan oittaa menti miyoogaanne Xoossaa woosan genccoosona.

### *Ammaniya Asai Ishatettaanne Issippetettan De7iyo De7uwaa*

<sup>43</sup> Yesuusi kiittidoogeetu kushiyan daro oorattabainne malaatai oosettin, asa ubbaa yashshai oiqqiis. <sup>44</sup> Ammanida ubbati issippe de7oosona; qassi banttau de7iyaabaa ubbaakka issippe shaakkidosona. <sup>45</sup> Eti bantta biittaanne banttassi de7iyaabaa baizzi baizzidi, oonanne koshshido keena miishshaa ubbaassi shaakkidosona. <sup>46</sup> Qassi ubba gallassi, issi wozana gididi, Beeta Maqidasiyan paccennan gaittidi, bantta keettaa keettaa xeesettidi ufaissaanne pashkka wozanan qumaa moosona. <sup>47</sup> Xoossaa galatiiddi, asa ubban sabettidosona. Qassi Godai attiyaageeta gallassi gallassikka eta bolli gujjees.

## 3

### *Issi Wobbe Bitanee Paxiis*

<sup>1</sup> Issi gallassi, PHeexiroosinne Yohaannisi Xoossaa woossanau uddufun saatian Beeta Maqidasiyaa biidosona. <sup>2</sup> Yelettoosappe doommidi, wobbe gididi de7iya issi bitanee Beeta Maqidasiyaa geliya asaappe miishshaa woossanau, ubba gallassi daro lo77o giyo Beeta Maqidasiyaa penggiyan wottiyoogee de7ees. <sup>3</sup> He wobbe bitanee,



PHeexiroosinne Yohaannisi Beeta Maqidasiyaa gelana hanishin be7idi, miishsha eta woossiis.

<sup>4</sup> Woossin PHeexiroosi Yohaannisaara a tishshi ootti xeellidi, “Nuukko haa xeella” yaagiis. <sup>5</sup> Wobbe bitanee etappe aibakko ekkana qaaqqatidi, etakko xeelliis. <sup>6</sup> SHin PHeexiroosi a, “Tau miishshi baawa; shin taassi de7iyaabaa taani neessi immana; Naazireeta Yesuus Kiristtoosa sunttan denddada hemetta” yaagiis.

<sup>7</sup> Yaagidi, wobbe bitaniyaa ba ushachcha kushiyan oiqqidi, pude denttiis; sohuwaarakka a tohoinne meeshi meqettai minni aggiis. <sup>8</sup> Bitanee pude guppidi, dendi eqqiis; yanne haanne hemetaa doommiis. Hegaappe guyyiyan hemettiiddi, guppiidinne Xoossaa galatiiddi, etaara issippe Beeta Maqidasiyaa geliis.

<sup>9</sup> I hemetettihiinne Xoossaa galatishin, asai ubbai a be7iis. <sup>10</sup> Be7idi, miishsha woossana daro lo77o giyo Beeta Maqidasiyaa penggen uttidaagee a gididoogaa akeekiis; i hanidobaa be7idi garamettiis.

### *PHeexiroosi Beeta Maqidasiyan Haasayido Haasayaa*

<sup>11</sup> Bitanee PHeexiroosanne Yohaannisa oiqqi uttidaashin, asai ubbai garamettidi, Solomona baranddaa giyoosan issippe etakko woxxiis. <sup>12</sup> PHeexiroosi asaa be7ido wode asaassi yaagiis; “Israa7eela asatoo, aissi hagau garametteetii? Woi aissi nuna tishshi ootti xeelleetii? Nuuni nu huuphe wolqqan woi Xoossaa milatiyoogan ha bitaniyaa hemetissidobaa intteyyo misatii? <sup>13</sup> Abrahaama Xoossai, Yisaaqa Xoossai, Yaaqooba Xoossai, nu aawatu Xoossai, intte aatti immidoogaa PHilaaxoosi birshshanau qoppi uttidaashin, intte a sinttan, ‘Nuuni a erokko’ giido ba Na7aa Yesuusa bonchchiis. <sup>14</sup> SHin intte geeshshaanne xilluwaa, ‘Nuuni a erokko’ giidi, shemppuwaa woridaagaa a gishshaa inttessi birshshanau PHilaaxoosa woossideta. <sup>15</sup> De7uwaa immiyaagaa intte worideta; shin Xoossai haiquwaappe a denttiis; denttidoogaassi nuuni markka. <sup>16</sup> Ha wobbe bitaniyaa Yesuusa sunttaa wolqqai minttiis; intte be7iyooeenne eriyooegeekka i a sunttan ammaniyoogan oosettiis; ha intte ubbaa sinttan a hagaadan payya ootidaagee, Yesuusa i ammaniyoogaa.

<sup>17</sup> “Ha77ikka ta ishatao, intteikka inttena kaalettiyaageetuugaadan, erennan ootidoogaa taani erais. <sup>18</sup> SHin Xoossai hananabaa beni yootiya ubbatu doonan, ‘Kiristtoosi waayettana bessees’ yaagidi yootiis; ba yootidoogaakka hegaadan poliis. <sup>19-20</sup> Simmi Xoossai intte nagaraa xaissanaadan, Godaa matappe ayyaanaa minotettaa wodee intteyyo yaanaadaaninne Xoossai Yesuus Kiristtoosa kase intteyyo doorettidaagaa yeddanaadan, intte nagaraappe Xoossaakko simmite. <sup>21</sup> Xoossai hananabaa yootiya ba geeshshatu doonan benippe doommidi haasayidoogaadan, ubbabai ooraxxiyo wodee gakkanaassi, Yesuusi saluwan gam77anau bessees. <sup>22</sup> Muusee, ‘Godai Xoossai tana denttidoogaadan, intte zariyaa giddoppe intteyyo hananabaa yootiyaagaa denttana; intte i giyoogaa ubbaa siyite. <sup>23</sup> He hananabaa yootiyaagee odiyooogaa siyenna asi ooninne asaa giddoppe shaahettidi xayo’ yaagiis.

<sup>24</sup> “Qassi Sameelappe doommidi, appe guyyiyan hananabaa yootiyaageeti ubbati, ha wodiyaabaa yootidosona. <sup>25</sup> Intte hananabaa yootiyaageetu naata; qassi Xoossai Abrahaamassi, ‘Sa7an de7iya asaa ubbaa taani ne zerettaa bagaara anjjana’ yaagidi nu aawatuura maacettido maachchaa naata. <sup>26</sup> Xoossai inttena ubbata intte iita ogiyaappe guyye zaaridi anjjana mala, ba ashkkaraa denttidi, intteyyo koiro yeddiis” yaagiis.

## 4

### *PHeexiroosinne Yohaannisi Aihudatu SHanguwaa Sintti SHiiqidosona*

<sup>1</sup> PHeexiroosinne Yohaannisi asaassi yootishin, qeese halaqati, Beeta Maqidasiyaa wotaaddarata azaziyaageenne Saaduqaaweti, <sup>2</sup> eti asaa tamarissiyo gishshaunne harati haiquwaappe denddanaagau markka gidana mala, Yesuusi haiquwaappe denddidoogaa yootido gishshau, daro yiillotidi, etakko yiidosona. <sup>3</sup> Yiidi eta oiqqidi, Sa7ai

omariichchido gishshau wonttanaassi qasho keettaa gelissidosona. <sup>4</sup> SHin qaalaa siyi-daageetuppe daroti ammanidosona; ammanida attumaasaa qoodai ichchashu sha7aa keeni gidiis.

<sup>5-6</sup> Wonttetta gallassi, eta haariyaageeti, cimati, higgiiyaa tamaarissiyaageeti, qeese ubbatu halaqai Haanni, Qayaafi, Yohaannisi Iskkinddirinne qeese ubbatu halaqaa dabboti ubbai Yerusalaamen yaa7idosona. <sup>7</sup> Yesuusi kiittidoogeeta bantta gidduwan essidi, “Ai wolqqan woi o sunttan haggaa intte oottidetii?” yaagidi oichchidosona.

<sup>8</sup> He wode PHeexiroosi banan Geeshsha Ayyaanai kumin, eta hagaadan yaagiis; “Deriyaa haariyaageetoo, cimato, <sup>9</sup> hachchi ha wobbe bitaniyaassi osettida lo77o oosuwaabanne i waani paxidaakko, intte nuna oichchikko, <sup>10</sup> masqqaliyaa bolli misimaariyan intte xishidi kaqqin, Xoossai haiquwaappe denttido Naazireeta Yesuus Kiristtoosa sunttan ha bitanee paxidi, intte sinttan eqqidoogee intte ubbaassinne Israa7eela asa ubbaassi eretto. <sup>11</sup> Gimbbiyaageeti intte karidi ixido shuchchai, godaa xaphuwaa minttiya, ubbaappe aadhdhiya shuchcha gidiis; he shuchchai Yesuusa. <sup>12</sup> Asi atotettaa Yesuusa baggaara demmanaappe attin, hara o baggaaranne demmenna; nuuni a sunttan attanau bessees; aissi giikko, Xoossai saluwaappe garssan asassi immido hara suntti baawa” yaagiis.

<sup>13</sup> Yaa7aa asai PHeexiroosinne Yohaannisi xalido xalaa be7ido wode, eti tamaaribeenna coo asa gididoogaa akeekidi garamettidosona; qassi eti Yesuusaara de7iyoojaa eridosona. <sup>14</sup> Qassi paxida bitanee PHeexiroosaaranne Yohaannisaara eqqidaagaa asai be7idi, giyoobaa xayiiis. <sup>15</sup> SHin PHeexiroosinne Yohaannisi yaa7aappe kare kiyana mala asai azazidi, ba giddon zorettiiddi, <sup>16</sup> “Ha asata ai oottanee? Aissi giikko, eta kushiyan osettida gita malaatai Yerusalaamen de7iya ubbaassi beettiis. Nuuni hegaa erokko gaanau danddayokko. <sup>17</sup> SHin yohoi asau laalettenna mala, hagaappe sinttan ha asati Yesuusa sunttaa ooyyoonne denttennaadan, minttidi eta, ‘Inttena erite’ goos” yaagidosona.

<sup>18</sup> Eta xeesidi, Yesuusa sunttaa mulekka denttennaadaaninne abaa tamaaris-sennaadan azazidosona. <sup>19</sup> SHin PHeexiroosinne Yohaannisi zaaridi, “Xoossau azazettiyoogaa aggidi, intteyyo azazettiyoogee Xoossaa sinttan lo77okkonne ane intte pirddite. <sup>20</sup> Aissi giikko, nuuni be7idobanne siyidobaa yootennan agganau dand-dayokko” yaagidi yaa7au odidosona.

<sup>21</sup> Yaa7ai eta qaxxayanau gaasottiyoobi xayin, naa77anttuwaa keehi manddidi, hanidabau asai ubbai Xoossaa galatiyo gishshau, eta birshshi yeddidosona. <sup>22</sup> He harggiyaappe pattiyo malaatai osettido bitanee yelettoosappe laittai au oitamaappe aadhdhiis.

### *Yesuusi Kiittidoogeenne Ammaniyaageeti Yedetaa Wode Woossido Woosaa*

<sup>23</sup> PHeexiroosinne Yohaannisi birshshettidi, bantta dabbotukko biidi, qeese ha-laqatinne cimati banttana giidobaa ubbaa etassi odidosona. <sup>24</sup> Eti hegaa siyido wode, issi wozana gididi, Xoossaa hagaadan yaagidi woossidosona; “Ubbaa Haariya Godau, saluwaa, sa7aa, abbaanne eta giddon de7iya ubbabaa medhdhidaagoo, <sup>25</sup> neeni ne ashkkaraa nu aawaa Daawita doonan Geeshsha Ayyaanan haasayaidda, ‘Aihuda gidenna asai aissi yiillotidee?

Qassi asai aissi pattennabau maqettidee?

<sup>26</sup> Sa7aa kawoti gigettidosona; deriyaa haariyaageeti Godaa bollinne

i tiyido Kiristtoosa bolli issippe denddidosa’ yaagada haasayadasa.

<sup>27</sup> “Aissi giikko, Heeroodisinne PHenxxeniyaa PHilaaxoosi Aihuda gidenna asaaranne Israa7eela asaara, neeni tiyido Kiristtoosa ne geeshsha Na7aa Yesuusa bolli denddanau, ha kataman shiidoogee tuma. <sup>28</sup> Qassi neeni ne wolqqaaninne ne

sheniyān hanana gaada qoppa uttidobaa ubbaa oottanau shiiqidosona. <sup>29</sup> Ha77ikka Godau, eta manddettaa xeella; nuuni ne ashkkarati, ne qaalaa kumetta xalan yootanaadan, nuna danddayissa. <sup>30</sup> Pattanau ne wolqqaa besa; qassi ne geeshsha Na7aa Yesuusa sunttan oorattabaanne malaataa ootissa” giidi woossidosona.

<sup>31</sup> Eti Xoossaa woossidoogaappe guyyiyan, he eti shiiqidosai qaaxxiis. Eta ubban Geeshsha Ayyaanai kumin, Xoossaa qaalaa xalan yootidosona.

### *Koiro Ammanida Asatu Issippetettaa De7uwaa*

<sup>32</sup> Ammaniyaageeti ubbati qofaaninne wozanan issuwaa gididosona. Eta mehee ubbai issippe de7iyoorippe attin, baassi de7idabaa ooninne babaa gibeenna. <sup>33</sup> Yesuusi kiittidoogeeti Godaa Yesuusi haiquwaappe dendidooгаа gita wolqqan markkattoosona; qassi Xoossai eta ubbau aaro kehatettaa darissidi immiis. <sup>34</sup> Ammaniyaageetu gidдон metootanchchi issoinne baawa; aissi giikko, biittai woi keetta de7iyooгeeti ubbati baizzi baizzidi, ekkido miishshaa ehiidi, <sup>35</sup> Yesuusi kiittidoogeetussi immoosona; he miishshai asau koshshiyooгаadan shaahettidi, huuphiyan huuphiyan imettees.

<sup>36</sup> Qophphiroosa giyo haruuruwan yelettida Yooseefa giyo Leewa zare issoi de7ees; a sunttaa Yesuusi kiittidoogeeti Barnnaabaasa giidosona. Hegaa birshshettai “Minttettiya Na7aa” giyoogaa. <sup>37</sup> Barnnaabaasi baassi de7iya biittaa baizzidi, miishshaa ehiidi, Yesuusi kiittidoogeetussi immiis.

## 5

### *Hanaaniyaa Giyo Bitaniyaanne Saphphiro Giyo Mishiriyo*

<sup>1</sup> Issi Hanaaniyaa giyo bitanee ba maccaasee Saphphiro giyooriira gade baizziis. <sup>2</sup> He baizzido miishshaappe ba maccaasiyaa erishin ashshidi, bagгаа ehiidi, Yesuusi kiittidoogeetussi immiis.

<sup>3</sup> SHin PHeexiroosi Hanaaniyaa, “Neeni Geeshsha Ayyaanaa cimmada ne gadiyaa baizzido miishshaappe shaakkada ashshana mala, xalahee ne wozanan aissi kumidee?

<sup>4</sup> Neeni baizzanaappe kase gadee nebaa gidenneeyye? Qassi neeni baizza simminkka miishshai neessa gidenneeyye? Yaatin, hгаа malabaa oottanau aissi ne wozanan qoppadii? Neeni Xoossau worddotidoogaappe attin, asau worddotabaakka” yaagiis.

<sup>5</sup> Hanaanee he qaalaa siyidosaarakka kunddidi haiqqi aggiis; hegaa siyida ubbai daro yayyiis. <sup>6</sup> Wodalla asati soo gelidi, a ahaa xaaxidi, gade kessidi a moogidosona.

<sup>7</sup> Heezzu saate heerappe guyyiyan, Hanaaniyaa maccaasiyaa hegaa erennan de7aidda PHeexiroosi de7iyooсaa gelaasu. <sup>8</sup> Gelin PHeexiroosi o, “Intte gadiyaa hanni keena miishshen baizzidetii? Ane tau oda” yaagiis.

A, “Ee hanni keena miishshen baizzida” yaagaasu.

<sup>9</sup> PHeexiroosi maccaasiyo, “Neeninne ne azinai Godaa Ayyaanaa paaccanau aissi zorettidetii? Be7a; ne azinaa moogida asati karen de7oosona; nenakka eti kare kessana” yaagiis.

<sup>10</sup> Maccaasiyaa sohuwaarakka PHeexiroosa tohuwaa matan kunddada haiqqaa aggaasu; wodalla asati geliyo wode haiqqidaaro demmidi, kare kessidi, i azinaa lanqqiyan moogidosona. <sup>11</sup> Woosa keettaa asai ubbainne hegaa siyida hara asai ubbai daro yashshaa yayyiis.

### *Yesuusi Kiittidoogeetu Kushiyan Oosettida Oorattabanne Maalaalissiyaabata*

<sup>12</sup> Yesuusi kiittidoogeeti daro malaataanne oorattabaa asaa gidдон oottoosona; ammaniya ubbati Solomona baranddaa giyoosan issippe gaittidosona. <sup>13</sup> Hara asappe etaara gaittanau harai atto issoinne xalibeenna; shin asai eta bonchchees. <sup>14</sup> Ammaniya maccaasainne attumaasai kaseegaappe daroi Godaassi gujettees. <sup>15</sup> Hegaa gishshau, asai hargganchchata halaaninne saleenan tookkidi, PHeexiroosi hegara aadhdhiyo wode harai atto, au eeshoikkonne etappe issuwaa issuwaa bollaara aadhdhana mala,

katamaa ogetu dooni kessidi wottees. <sup>16</sup> Qassi daro asai Yerusalaame matan de7iya katamatuppe hargganchchatanne tuna ayyaanan ohettida asata ekki yees; ubbatikka paxidosona.

*Yesuusi Kiittidoogeetu Bolli Yedetai Denddiis*

<sup>17</sup> Paxin qeese ubbatu halaqainne aara de7iya Saaduqaaweti ubbati Yesuusi kiittidoogeeta daro qanaatidi, eta bolli denddidosona. <sup>18</sup> Qassi Yesuusi kiittidoogeeta oiqqidi, dere asaa qachchiyo keettan yeggidosona. <sup>19</sup> SHin Godaa kiitanchchai qammi qasho keettaa penggiyaa dooyidi, Yesuusi kiittidoogeeta kare kessidi, <sup>20</sup> “Intte biidi, Beeta Maqidasiyan eqqidi, ha ooratta de7uwaa qaalaa ubba asau yootite” yaagiis. <sup>21</sup> Yesuusi kiittidoogeeti heгаа siyido wode, guuraara Beeta Maqidasiyaa gelidi, tamarissanau doommidosona.

Qassi qeese ubbatu halaqainne aara de7iyaageeti yiidi, yaa7aanne Israa7eela cimata ubbata issippe xegidi, Yesuusi kiittidoogeeta bantta sintti ehaana mala, wotaaddarata qasho keettau kiittidosona. <sup>22-23</sup> SHin wotaaddarati qasho keettaa biidi, Yesuusi kiittidoogeeta demmibookkona; guyye simmidi yaa7au, “Nuuni biyo wode qasho keettaa kariyaa daro mintti gorddin, naagiyaageetikka penggen eqqidaageeta demmida; shin nuuni kariyaa dooyiyo wode, gidon harai atto issi asinne baawa” yaagidosona. <sup>24</sup> Yaagin Beeta Maqidasiyaa wotaaddarata azaziyaageenne qeese halaqati heгаа siyido wode, “Hagee waanidee? Qassi digin waanane?” yaagidi hirggidosona.

<sup>25</sup> Hegaappe guyyiyan, issi bitanee etakko yiidi, “Be7ite; qasho keettan intte yeggido asati Beeta Maqidasiyan eqqidi, asaa tamarissoosona” yaagidi etau odiis. <sup>26</sup> Odin, Beeta Maqidasiyaa wotaaddarata azaziyaagee wotaaddaratuura biidi, Yesuusi kiittidoogeeta ehiis; shin eti banttana asai shuchchan caddana giidi yayyido gishshau, eta loddan ehiidosona.

<sup>27</sup> Eti Yesuusi kiittidoogeeta ehiidi, yaa7aa sinttan essin, qeese ubbatu halaqai eta, <sup>28</sup> “Inttena nuuni he bitaniyaa sunttan tamarissenna mala minttidi azazibookkonii? Be7ite; intte timirttiyaa Yerusalaame katamaa muleera gattideta; qassi he bitaniyaa shemppuwan nuna oittanau qoppeeta!” yaagidi oichchiis.

<sup>29</sup> Oichchin PHeexiroosinne Yesuusi kiittido harati zaaridi yaagidosona; “Nuuni asau azazettanaappe Xoossau azazettanau bessees. <sup>30</sup> Masqqaliyaa bolli misi-mariyan xishi kaqqidi, intte worido Yesuusa nu aawatu Xoossai haiquwaappe denttiis; <sup>31</sup> Israa7eelatussi nagaraappe simuwaanne nagaraa atto geettaa Yesuusi immana mala, Xoossai haariyaagaanne ashshiyaagaa a oottidi, baappe ushachcha baggan xoqqu xoqqu oottiis. <sup>32</sup> Hegaassi nuuni markka; qassi Xoossai baassi azazettiyaageetussi immido Geeshsha Ayyaanaikka markka” yaagidosona.

<sup>33</sup> Yaa7aa asai heгаа siyido wode, daro yiillotidi, Yesuusi kiittidoogeeta woranau qoppidosona. <sup>34</sup> SHin asa ubban daro bonchchettida Gamaaliyaala giyoogee, higgiiyaa tamarissiya issi Parisaawee, yaa7an denddi eqqidi, Yesuusi kiittidoogeeta guutta wodiya kare kessana mala azaziis. <sup>35</sup> Azazidi yaa7aa hagaadan yaagiis; “Israa7eela asatoo, intte ha asata oottana qoppiyooban inttena naagite. <sup>36</sup> Aissi giikko, hagaappe kase wodiyan Tewodaasi bana gita giidi denddiis; denddin oiddu xeetu gididi asati aara gaittidosona; shin a worin, a kaallida ubbatikka laalettidi, pattenna asa gididi attidosona. <sup>37</sup> Hegaappe guyyiyan, asai qoodettiyo wode, Galiila Yihudai denddidi, daro asaa panggayidi kaalettiis; shin akka worin, a kaallida asai ubbaikka laalettiiis.

<sup>38</sup> “Ha77ikka taani intteyyo odais; ha asatuppe shaahettite; eta bochchoppite. Aissi giikko, ha qofainne ha oosoi asi oottidobaa gidikko xayana. <sup>39</sup> SHin ha qofainne ha oosoi Xoossaappe yiidabaa gidikko, intte eta xaissanau danddayekketa; geelladan yaaniiddi Xoossara intte iitettanne” yaagiis.

<sup>40</sup> Yaagin yaa7ai Gamaaliyaala zoriyaa ekkidi, Yesuusi kiittidoogeeta soo xeesidi, lissuwan garafissiis; hegaappe guyyiyan eta, “Yesuusa sunttaa naa77anttuwaa mulekka



denttoppite” giidi birshshi yeddiis. <sup>41</sup> Yesuusa sunntaa gishshau, eti kauyyanau bessiyoo-gaa Xoossai qoppido gishshau, yaa7aappe ufaittiiddi kiyidosona. <sup>42</sup> Eti ubba gallassi Beeta Maqidasiyaaninne asa son Yesuusi Xoossai tiyido Kiristtoosa gididoogaa tamarissiyoo-gaanne yootiyoo-gaa yaa gujjidosona.

## 6

### *Woosa Keettaa Kaalettiya Laappun Asati Doorettidosona*

<sup>1</sup> He wode, kaalliyaa-geetu qoodai dari dari biishin, Giriike qaalaa haasayiya Aihudatinne Yihudan de7iya Aihudati ooyettidosona; aissi giikko, Giriike qaalaa haasayiya Aihudati, “Ubba gallassi yeziyo quman nu am77eti naaqqettoosona” yaagidosona. <sup>2</sup> Yesuusi kiittido tammanne naa77ati woosa keettaa asa ubbaa xegidi, hagaadan yaagidosona; “Nuuni Xoossaa qaalaa yootiyoo-gaa aggidi, quma yezanau nuussi bessenna. <sup>3</sup> Ishatoo, lo77o geetettiya-geeta Geeshsha Ayyaanainne aadhdhida eratetta kumido laappun asata intte gidoppe doorite; nuuni qassi eta ha oosuwaassi sunntana. <sup>4</sup> SHin nuuni Xoossaa woosaaninne qaalaa yootuwan minnana” yaagidosona.

<sup>5</sup> Yesuusi kiittidoogeeti haasayido haasayai asa ubbaa ufaissii; ufaissin, ammanoinne Geeshsha Ayyaanai kumido Isxxifaanoosa, Piliphphoosa, PHirokoroosa, Niqaaroonaa, Ximoonaa, PHarmmeenanne Aihudatu ammanuwan gelida Anxxookiyaa Niigolaawoosa dooridosona. <sup>6</sup> Dooridi Yesuusi kiittidoogeetu sinttan eta essin, Yesuusi kiittidoogeeti Xoossaa woossidoogaappe guyyiyan, bantta kushiyaa eta bolli wottidosona.

<sup>7</sup> Xoossaa qalalai aakki aakki biis; kaalliyaa-geetu qoodainne Yerusalaamen keehi dari dari biis; qassi daro qeesetikka ammanidosona.

### *Woosa Keettaa Kaalettiya Isxxifaanoosi Oiqettiis*

<sup>8</sup> Aaro kehatettainne wolqqai kumido Isxxifaanoosi, asaa gidдон oorattabaanne gita malaataa oottees. <sup>9</sup> Ailletettaappe kiyida asaa giyo Aihuda woosa keettaappe, Qareenappe, Iskkinddiriyaa asatuppe, Kilqqiyaappenne Isiyaappe yiida issi issi asati denddidi, Isxxifaanoosaara palamettoosona. <sup>10</sup> SHin Isxxifaanoosi aadhdhida eratettaaninne Ayyaanan haasayiyoo-gaa teqqanau danddayibookkona.

<sup>11</sup> He wode eti, “Muusanne Xoossaa i cayishin siyida” giya worddo asata shammidosona. <sup>12</sup> SHammidi dere asaa, cimatanne higgiiyaa tamarissiyaa-geeta hanqetissidosona; Isxxifaanoosakko yiidi a oiqqidi, yaa7aakko ehin, <sup>13</sup> a bolli paidido worddo markkati, “Ha bitanee ha Beeta Maqidasiyaanne Muuse higgiiyaa cayiyoo-gaa audenne aggenaa. <sup>14</sup> Aissi giikko i, ‘Hagee Naazireeta Yesuusi ha Beeta Maqidasiyaa qolana; Muusee nuussi immido higgiiyaakka laammana’ yaagishin, nuuni siyida” yaagidosona.

<sup>15</sup> Yaa7an uttida asai ubbai Isxxifaanoosa akeekidi xeelliyoo wode, a som77oi kiitanchchaa som77uwaa milatees.

## 7

### *Isxxifaanoosa Haasayaa*

<sup>1</sup> Qeese ubbatu halaqai Isxxifaanoosa, “Hagee tumee?” yaagidi oichchiis.

<sup>2</sup> Oichchin Isxxifaanoosi hagaadan yaagiis; “Ta ishatoo, ta aawattoo, siyite! Nu aawaa Abrahaami biron Kaaraane baanaappe kase Masphphexoomiyan de7ishin, bonchcho Xoossai ayyo beettidi, <sup>3</sup> ‘Ne biittaappenne ne dabbotuppe shaahettada, taani nena bessiyoo biitti ba’ yaagiis. <sup>4</sup> He wode Abrahaami Kaladaawetu biittaappe kiyidi, Kaaraanen de7anau biis. A aawai haiqqidoogaappe guyyiyan, Xoossai a ha biittaa intte ha77i de7iyoo-saa ehiis. <sup>5</sup> I ha biittaappe harai atto, tohuwan yedhdhiyo sohuwaakka Abrahaamassi immibeenna; shin ayyo na7i xayikkokka, Xoossai a, ‘Taani neeyyoonne neeppe guyyiyan, ne zerettaayyo ha biittaa laata oottada immana’ yaagiis.

<sup>6</sup> Xoossai Abrahaamassi, ‘Ne zareti hara biittan de7ana; yaani oiddu xeetu laittau



eti ailletananne naaqqettana. <sup>7</sup> SHin taani ne zareta haariya asaa bolli pirddana; hegaappe guyyiyan, eti he deriyaappe kiyidi, hagan tau goinnana' yaagiis. <sup>8</sup> Xoossai Abrahaama zaree qaxxarettana mala aara maacettin, Yisaaqa i yelidi, hospunnata gallassi qaxxariis; Yisaaqi Yaaqooba qaxxarin, qassi Yaaqoobi tammanne naa77u aawatu halaqata qaxxariis.

<sup>9</sup> "Aawatu halaqati Yooseefa qanaatidi, Gibxxe biittaassi ailletanaadan, a baizzidosona; baizzinkka Xoossai aara issippe de7ees. <sup>10</sup> A waaye ubbaappekka a kessiis; qassi Gibxxe kawuwaa sinttankka nashuwaanne aadhdhida eratettaa ayyo immiis; Gibxxe kawoi Yooseefassi Gibxxe biittanne ba keetta ubbaa haaranaadan, sunttatettaa immiis.

<sup>11</sup> "Gibxxe biittaninne Kanaane biittan ubban koshai gelidi, daro asaa tuggayis; tuggayin nu aawati quma demmibookkona. <sup>12</sup> Yaaqoobi Gibxxe biittan kattai de7iyoojaa siyidi, nu aawata koiro yaa yeddiis. <sup>13</sup> Naa77antto buusan Yooseefi ba ishanttussi erettiis; qassi Gibxxe kawoikka Yooseefa zariyaa eriis. <sup>14</sup> Yooseefi ba aawaa Yaaqoobinne ba dabbo ubbai muleera laappun tammanne ichchashu asai baakko yaana mala, kiittidi xeeqisiis. <sup>15</sup> Yaaqoobi Gibxxe biittaa wodhdhidi haiqqiis; nu aawatikka yaani haiqqidosona. <sup>16</sup> Eta ahai he sohuwaappe Sekeema giyo biittaa tohettidi, yaani Abrahaami Hamoora naatuppe daro biran shammido makkaan moogettiis.

<sup>17-18</sup> "SHin Xoossai Abrahaamassi immana giidoogee polettiyo wodee gakkana matin, Yooseefa erenna hara kawoi Gibxxe biittan denddana gakkanaassi, asai dari dari biis. <sup>19</sup> He kawoi nu zariyaa cimmidi, guutta naati haiqqana mala, kare eta kessi olanaadan, nu aawata un77ettiis.

<sup>20</sup> "Muusee yelettidoi he wode; Xoossaa sinttan i daro lo77o na7a gididi; ba aawaa keettan heezzu agina gakkanaas dicciis. <sup>21</sup> Muusee wora olettido wode, Gibxxe kawuwaa na7iyaa demmada ba na7adan a dichchaasu. <sup>22</sup> Muusee Gibxxetu aadhdhida eratettaa ubbaa tamaridi, qaalaaninne oosuwan wolqqaama asa gididi.

<sup>23</sup> "SHin Muuseyyo yelettoosappe laittai oitamaa kumido wode, ba ishantta, Israa7eela asata be7anau ba wozanan qoppiis. <sup>24</sup> Israa7eelatuppe issuwaa Gibxxe issoi naaqqishin be7idi, he Israa7eeliyaa maaddiis; he naaqqida Gibxxe bitaniyaa woridi, a haluwaa kessiis. <sup>25</sup> Muusee ba ishantta ba baggaara Xoossai ashshana haniyoogaa eti akeekidosona giidi qoppiis; shin eti akeekibookkona.

<sup>26</sup> "Wonttetta gallassi naa77u Israa7eela asati issoi issuwara warettiyaageeta demmidi, eta sigettanau koyidi, 'Asatoo, Ishantti intte aissi issoi issuwaa naaqqeetii?' yaagiis.

<sup>27</sup> "SHin he ba shoaruwaa naaqqiyaagee Muusa, 'Nena nu bolli haariyaagaanne daanna oottidi, sunttidai oonee?' <sup>28</sup> Neeni zine Gibxxe bitaniyaa woridoogaadan, tanakka woranau koyaiyye?' yaagidi, Muusa gaxi sugi yeggiis. <sup>29</sup> Muusee heгаа siyido wode Gibxxeppe baqatidi, Midiyaama biittan bete gididi de7iiddi, naa77u attuma naata yaani yeliis.

<sup>30</sup> "Godaa kiitanchchai oitamu laittaappe guyyiyan, Siinaa Deriyaa matan de7iya bazuwaa buuran eexxiya tamaa lacuwaa gidon Muusessi beettiis. <sup>31-32</sup> Muusee ba be7idoogau garamettidi, akeeki xeellanau buuraa mati i shiiqidaashin, Godaa qalal, 'Taani ne aawatu Xoossaa, Abrahaama Xoossaa, Yisaaqa Xoossaa, Yaaqooba Xoossaa' yaagidi Muusekko yiis. Muusee yashshaa kokkoridi, xeellanau xalibeenna.

<sup>33</sup> "Godai Muusa, 'Neeni eqqido biittai geeshsha gidido gishshau, ne tohuwan de7iya caammaa kessa. <sup>34</sup> Taani Gibxxen de7iya ta asaa waaiyaa geeshsha be7ada, qassi eta ooliyaakka siyada, eta ashshanau wodhdhaas. Ha77i haa ya. Taani nena Gibxxe kiittana' yaagiis.

<sup>35</sup> “He Muusa Israa7eelati; ‘Nena nuna haariyaagaanne daanna oottidi sunttidai oonee?’ yaagidi ixxidosa; ixxin buuraa giddon ayyo beettida kiitanchchan haariyaagaanne ashshiyaagaa gidana mala, Xoossai a kiittiis. <sup>36</sup> He Muusee Israa7eelata Gibxxe biittan Zo7o Abbaaninne bazzuwan, oitamu laittau oorattabaanne Xoossai oottiyo malaataa oottiiddi, Gibxxeppe kaalettiis.

<sup>37</sup> “Israa7eela asaassi, ‘Xoossai tana denttidoogaadan, intte zariyaa giddoppe ta mala hananabaa yootiyaagaa intteyyo denttana’ yaagidai he Muusa. <sup>38</sup> I Israa7eela asaa maabaraara issippe bazzuwan de7idaagaa; i nu aawatuuranne Siinaa Deriyaa bollan baassi haasayida kiitanchchaara issippe de7iis. Yaatidi Xoossaappe de7uwaa qaalaa nuussi immanau ekkiis.

<sup>39</sup> “Muusessi nu aawati azazettanau dosibookkona; shin gede a sugi olidi, guyye gibxxe simmanau amottidosona. <sup>40</sup> Qassi Aarona, ‘Nuna kaalettiya xoossata nuussi ootta; aissi giikko, ha nuna Gibxxeppe ehiida Muusee waanidaakkonne nuuni erokko’ yaagidosona. <sup>41</sup> Mara milatissidi, he wode eeqaa oottidosona; he eeqaassi yarshshuwaa yarshshidi, bantta kushee oottido oosuwan ufaattidosona. <sup>42</sup> SHin Xoossai etau zokkuwaa zaariis; eti saluwaa xoolinttiyaassi goinnanaadan, eta yeggi bayiis; hananabaa yootiyaageetu maxaafan,

‘Israa7eela asatoo, oitamu laittaa  
bazzon shukkido mehiyaanne yarshshuwaa  
taassi yarshshidetii?

<sup>43</sup> Intte intteyyo goinnanau  
oottido eeqata, Molooka dunkkaaniyaanne  
Refaana giyo intte xoossaa xoolinttiyaa tookkideta.  
Taani inttena Baabilooneppe  
hini baggi yeddana’  
geetettidi xaafettiis.

<sup>44</sup> “Muusee ba be7idoogaa milatissidi, Godai ayyo odidoogaadan oottido markka dunkkaanee nu aawatussi bazzuwan de7ees. <sup>45</sup> Qassi nu aawati dunkkaaniyaa bantta aawatuppe kayan ekkidi, Xoossai kase yedettido Aihuda gidenna asaa biittaa oiqqido wode, Yaasuura gelissidosona; he dunkkaanee Daawiti de7iyo wodee gakkanaassikka he sohuwan de7iis. <sup>46</sup> Daawiti Xoossan sabettiis; qassi Yaaqooba Godai de7ana keettaa keexxanau Xoossaa woossiis. <sup>47</sup> SHin ayyo keettaa keexxidai Solomona.

<sup>48-50</sup> “SHin hananabaa yootiyaagee,  
‘Godai, “Saloi ta kawotaa araataa;  
sa7aikka ta tohoi yedhdhiyoosaa.  
Yaatin, taayyo ai mala keetta keexxuuteetii?  
Woi taani shemppanasai awaanee?

Ha ubbabaa ta kushiyan oottabeikkinaa?” yaagees’  
giidoogaadan, Ubbaappe Bolla Xoossai asi keexxido keettan de7enna.

<sup>51</sup> “Intte aiba morgge zozzida asee? Intte wozanai Xoossaa qaalaa ekkanaa aiba dammidee? Intte haittaikka aiba tullidee? Ubba wode Geeshsha Ayyaanaassi azazettennan ixxeeta. <sup>52-53</sup> Hananabaa yootiyaageetun intte aawati waissibeennai oonee? Xoossaa Na7ai Xilloi yaanaagaa kasetidi yootidaageetakka woridosona. Ha77i inttekka kiitanchchatu kushiyaappe Xoossaa higgiiyaa ekkidi azazettibeennaageeti, Xilluwaa aatti immidi worideta” yaagiis.

### *Isxxifaanoosa SHuchchan Caddidi Woridosona*

<sup>54</sup> Eti heгаа siyido wode, bantta wozanan Isxxifaanoosassi daro yiillotidi, bantta menttershshaa sa77idi manddidosa. <sup>55</sup> SHin Isxxifaanoosi banan Geeshsha Ayyaana

kumin, saluwaa pude tishshi ootti xeellidi, Xoossaa bonchchuwaanne Yesuusi Xoos-  
saappe ushachcha baggan eqqidaagaa be7iis. <sup>56</sup> Be7idi, “Xeelite, taani saloi dooyettin,  
Asa Na7ai Xoossaappe ushachcha baggan eqqidaagaa be7ais” yaagiis.

<sup>57</sup> Qaalaa xoqqu oottidi wocamiiddi, bantta haittaa tuccidi, issippe akko wottaa  
shoddidosona. <sup>58</sup> Katamaappe gaxaa a kessidi, shuchchan caddidosona. Markkati  
bantta maayuwaa issi Saa7oola giyo wodallaa matan wottidosona.

<sup>59</sup> Isxxifaanoosi, “Ta Godaa Yesuusaa, ta shemppuwaa ekka” yaagidi xeesishin, eti  
shuchchan a caddoosona. <sup>60</sup> Caddishin gulbbatidi, ba qaalaa xoqqu oottidi, “Ta Godau,  
ha nagaraa etau atto ga” yaagiis. Hegaa yaaginnee haiqqi aggiis. Saa7oolikka Isxxi-  
faanoosa woriyoogaa ufaittiis.

## 8

### *Saa7ooli Woosa Keettaa Asaa Yedettiis*

<sup>1</sup> He gallassi Yerusalaamen de7iya woosa keettan gita yedetai denddiis; denddin Yesu-  
usi kiittidoogeetuppe attin, ammaniyaageeti ubbati Yihudaa biittaaninne Samaariyaa  
biittan laalettidosona. <sup>2</sup> Xoossaa woosan sheekkida asati Isxxifaanoosa moogidosona;  
qassi au daro yeekkidosona. <sup>3</sup> SHin Saa7ooli woosa keettaa xaissees; ubbaa keettaa geli  
gelidi, attumaasaanne maccaasaa goochchi goochchidi, qasho keettaa yeddees.

### *Wonggelee Samaariyan Odettiis*

<sup>4</sup> Laalettida ammaniyaageeti qaalaa yootiiddi, ubbasaa biidosona. <sup>5</sup> Piliphphoosi  
Samaariyaa katamaa wodhdhidi, Kiristoosabaa asaassi yootiis. <sup>6</sup> Daro asai Piliph-  
phoosi giidoogaa keehi akeekidi siyiis; i oottiyo malaataakka be7iis. <sup>7</sup> Aissi giikko,  
tuna ayyaanati qaalaa xoqqu oottidi haasayiiddi, daro asaappe kiyidosona; qassi daro  
silatinne wobbeti paxidosona. <sup>8</sup> He kataman asai daro ufaittiis.

<sup>9</sup> SHin Simoona giyo issi bitanee kase, bana gita giiddi kaayiiddi, Samaariyaa  
asaa, “Laa hagee aiba ooratabee” giissiiddinne he kataman de7iis. <sup>10</sup> Guuttaappe  
doommidi, gitaa gakkanaashin, asai ubbai, “Xoossaa wolqqai gitai hagee” giidi abaa  
ezgges. <sup>11</sup> Daro wodiyaappe doommidi, kaayuwana Samaariyaa asaa “Laa hagee  
aiba ooratabee” giissido gishshau, asai abaa ezgges. <sup>12</sup> SHin Piliphphoosi Xoossaa  
kawotettaabanne Yesuus Kiristoosa sunttaabaa attumaageetussinne maccaageetussi  
yootin, eti abaa ammanidi xammaqettidosona. <sup>13</sup> Qassi Simoonikka ba huuphen am-  
maniis; ammanidi xammaqettidoogaappe guyyiyan, Piliphphoosaara issippe de7iiddi,  
oosettiya malaataanne Xoossai oottido gita malaataa be7idi garamettiis.

<sup>14</sup> Yesuusi kiittido Yerusalaamen de7iyaageeti, Samaariyaa asai Xoossaa qaalaa  
ekkidooogaa siyido wode, PHeexiroosanne Yohaannisa etakko yeddidosona. <sup>15</sup> Yeddin  
PHeexiroosinne Yohaannisi wodhdhidi, ammaniyaageeti Geeshsha Ayyaanaa ekkana  
mala, etau Xoossaa woossidosona; <sup>16</sup> aissi giikko, Samaariyaa asati Godaa Yesu-  
usa sunttan xinqqate xalaalaa xammaqettidoogaappe attin, etappe issuwaa bolinne  
Geeshsha Ayyaanai wodhdhiichchibeenna. <sup>17</sup> He wode PHeexiroosinne Yohaannisi  
bantta kushiyaa eta bolli wottin, eti Geeshsha Ayyaanaa ekkidosona.

<sup>18</sup> Yesuusi kiittidoogeeti bantta kushiyaa eta bolli wottin, etassi Geeshsha Ayyaanai  
imettidoogaa Simooni be7ido wode, PHeexiroosassinne Yohaannisassi miishshaa ehi-  
idi, <sup>19</sup> “Taanikka ta kushiyaa wottiyo ubbai Geeshsha Ayyaanaa ekkana mala, ha  
godatettaa taukka immerkketii” yaagiis.

<sup>20</sup> SHin PHeexiroosi ayyo hagaadan yaagiis; “Neeni Xoossaa imuwaa miishshan  
shammanau qoppido gishshau, ne miishshai nenaara coo xayoy. <sup>21</sup> Ne wozanai Xoossaa  
sinttan suure gidenna gishshau, neeyyo hagan oosoi woi sohoi baawa. <sup>22</sup> Yaatada ha  
ne wozanaa iita qofaa gishshau, nagaraappe simma; geelladan ne wozanan de7iya

iita qofaa Xoossai atto gaanaakkonne Xoossaa woossa. <sup>23</sup> Aissi giikko, neeni daro qanaatiyaa oiqqada nagaraa qashuwan de7iyooqaa taani be7ais” yaagiis.

<sup>24</sup> Yaagin Simooni PHeexiroosassinne Yohaannisassi zaaridi, “Intte giidobaappe issi-bainne tana gakkenna mala, intte tau Xoossaa woossite” yaagiis.

<sup>25</sup> PHeexiroosinne Yohaannisi markkattidoogaappenne Godaa qaala yooti-doogaappe guyyiyan, guyye Yerusalaame simmidosona; simmiiddi Samaariyan de7iya daro qeeri katamatun wonggeliyaa mishiraachchuwaa yootidosona.

### *Piliphphoosi Toophphiyaa Asa Gidiya Mureessaa Xammaqiis*

<sup>26</sup> Godaa kiitanchchai Piliphphoosa, “Denddada Yerusalaameppe Gaaza efiya bazzo ogiyaakko ba; he ogee tohossa baggaara de7ees” yaagiis. <sup>27</sup> Piliphphoosi denddidi biis. Hinddake giyo Toophphiyaa kaweesi biittaa haariya i miishsha ubbaakka naagiya Toophphiyaa asa issi mureessai de7ees; de7iyaagee goinnanau Yerusalaame biis. <sup>28</sup> Parai goochchiyo gaariyan uttidi, Yerusalaameppe guyye simmiiddi, hananabaa yootiya Isiyaasa maxaafaa nabbabees.

<sup>29</sup> Geeshsha Ayyaanai Piliphphoosa, “He gaariyaakko shiiqada hemetta” yaagiis.

<sup>30</sup> Yaagin Piliphphoosi woxxidi, hananabaa yootiya Isiyaasa maxaafaa mureessai nabbabishin siyidi a, “Neeni nabbabiyoogaa akeekai?” yaagiis.

<sup>31</sup> Mureessai, “Tau odidi akeekissiya asi bannan waanidi akeekettii?” yaagiis; qassi banaara gaariyan kiyidi uttana mala, Piliphphoosa woossiis. <sup>32</sup> Mureessai nabbabiyo maxaafaa sohoi hagaadan yaagees; “Dorssadan i shuhettanau laagettiis.

Dorssa marai ba ikisiyaa

meediyaagaa sinttan co77u giyoogaadan,

ikka ba doonaa pogibeenna.

<sup>33</sup> I kauyyidoogan au xillo pirddi xayiiis.

A de7oi ha sa7aappe pude ekettiichchido gishshau,

a zariyaabaa oonee yootanai?”

yaagees.

<sup>34</sup> Mureessai zaaridi Piliphphoosassi, “Hananabaa yootiyaagee haggaa obaa odii? Babaa odiiyye woi hara asabaa odii? Tau odarkkii” yaagiis. <sup>35</sup> Yaagin Piliphphoosi zaaridi, Xoossaa maxaafaa i nabbabiyoosaappe doommidi, Yesuusabaa wonggeliyaa mishiraachchuwaappe ayyo yootiis.

<sup>36</sup> Eti ogiyaa oiqqidi biiddi, haattai de7iyooosaa gakkidosona; mureessai, “Haattaa haggaa be7a; xammaqettiyoogaa tana diggiyai aibee?” yaagiis.

<sup>37</sup> Piliphphoosi a, “Neeni ne kumetta wozanaappe ammanikko, danddayaasa” yaagiis.

Yaagin i zaaridi, “Yesuus Kiristtoosi Xoossaa Na7a gidiiyoogaa taani ammanais” yaagiis.

<sup>38</sup> Gaaree eqqana mala mureessai azazin, inne Piliphphoosi naa77ai duge wodhd-hidi, haattan gelidosona; gelin Piliphphoosi a xammaqiis. <sup>39</sup> Eti haattaappe gaxaa kiyido wode, Godaa Ayyaanai Piliphphoosa liphphi oottidi, efi aggiis; naa77anttuwaa mureessai Piliphphoosa be7ibeenna; shin ba ogiyaa ufaittiiddi biis. <sup>40</sup> Piliphphoosi ba huuphiyau Azooxoosan de7iyooqaa eriis; qassi Qiisaariyaa yaana gakkanaassikka, katama ubban yuuyiiddi wonggeliyaa mishiraachchuwaa yootees.

<sup>1</sup> SHin Saa7ooli Godaa kaalliyaageeta woranau manddiiddi, qeese ubbatu halqaakko biis. <sup>2</sup> Biidi Godaa ogiyaa kaalliya asata maccaageetanne attumaageeta demmikko, qachchidi Yerusalaame ehaanau, Damasqqon de7iya Aihuda woosa keettatussi dabddaabbiyaa xaafanau a woossiis.

<sup>3</sup> I biiddi, Damasqqo katamaa gakkana matidaashin, qoppennan saluwaappe wolqqaama poo7oi a yuuyi aadhhdidi poo7iis. <sup>4</sup> Poo7in Saa7ooli sa7an kunddidaashin, “Saa7oolaa Saa7oolaa, aissi tana waissai?” giya qaalaa siyiis.

<sup>5</sup> Saa7ooli, “Ta Godau, neeni oonee?” yaagidi oichchiis. Oichchin, “Taani neeni waissiyu Yesuusa. Boorai bana caddiya xam77aa qakkiyoogaadan, neeni qakkikko, nena qohaasa” yaagiis.

<sup>6</sup> SHin Saa7ooli kokkoriiddinne garamettiiddi, “Ta Godau, taani ai oottanau koyai?” yaagiis.

Yaagin Godai a, “Denddada katamaa gela; neeni oottanau bessiyaabai neeyyo yaani odettana” yaagiis.

<sup>7</sup> Saa7oolaara ogiyan biya asati ainne haasayennan eqqi bayidi, qaalaa siyoosona; shin oonanne be7ibookkona. <sup>8</sup> Saa7ooli sa7aappe denddin, a aifee dooyettido wode, ainne xeellanau danddayibeenna; hegaa gishshau, eti a kushiyaa oiqqidi goochchiiddi, Damasqqo gelissidosona. <sup>9</sup> Heezzu gallassa gakkanaassikka i xeellibeenna; ainne mibeenna; ainnekka uyibeenna.

<sup>10</sup> Damasqqon issi Hanaaniyaa giyo kaalliyaagee de7ees; Godai ajjuutan a, “Hanaaniyau” yaagiis.

Yaagin Hanaanee, “Ta Godau, hagan de7ais” yaagiis.

<sup>11</sup> Godai a, “Denddada Suure giyo ogiyaa baada, Yihudaa sooni issi Saa7oola giyo Xarsseeseppe yiida bitaniyaa koya; aissi giikko, i woossees. <sup>12</sup> Qassi Hanaaniyaa giyo bitanee gelidi, Saa7ooli naa77anttuwaa xeellanaadan, ba kushiyaa a bolli wottiyooгаа ajjuutan be7iis” yaagiis.

<sup>13</sup> Hanaanee zaaridi, “Ta Godau, Yerusalaamen ne geeshsha asaa bolli he bitanee ai keena iitabaa oottidaakko, taani daro asaappe siyaas. <sup>14</sup> Qassi Damasqqon ne sunntaa xeesiyaageeta ubbaa qachchanau, qeese halaqati au maataa immidosona” yaagiis.

<sup>15</sup> SHin Godai a, “Saa7ooli Aihuda gidenna asaa sinttan, kawotu sinttaaninne Israa7eela asaa sinttan, ta sunntaa erissanaunne taassi oottanau doorettida miishsha gidido gishshau, neeni ba. <sup>16</sup> Aissi giikko, ta sunntaa gishshau, i woqqaa waayettanau bessiyaakko, taani a bessana” yaagiis.

<sup>17</sup> Yaagin Hanaanee biidi, soo gelidi, ba kushiyaa Saa7oola bolli wottidi, “Ta ishau Saa7oolaa, neeni yiyo ogiyan neessi beettida Yesuusi, neeni xeellana malanne Geeshsha Ayyaanai nenan kumana mala, tana kiittiis” yaagiis. <sup>18</sup> Sohuwaara, aibakko poqo malai Saa7oola aifiyaappe wodhdhin, Saa7ooli naa77anttuwaa xeelliis; qassi denddidi xammaqettiis. <sup>19</sup> Qumaa miidi gasttidi, Damasqqon de7iya kaalliyaageetuura amarida gallassaa takkiis.

### *Saa7ooli Damasqqon Tamaariisii*

<sup>20</sup> Sohuwaara, “Yesuus Kiristtoosi Xoossaa Na7a” yaagidi, Aihuda woosa keettatun qaalaa yootiis.

<sup>21</sup> Hegaa siyida ubbai garamettidi, “Hagee Yerusalaamen Yesuusa sunntaa xeesiyaageeta xaissiyaagaa gidenneeyye? Qassi eta qachchidi, qeese halaqatu sintti efaanaassi yibeenneeyye?” yaagidosona.

<sup>22</sup> SHin Saa7ooli qaalaa yootiyo yootoi minni minnidi biis; Yesuusi qassi Kiristtoosa gididoogaakka i akeekissidi odido gishshau, Damasqqon de7iya Aihudati ayyo zaariyooba xayidosona.

<sup>23</sup> Daro gallassaappe guyyiyan, Aihudati shiiqidi, Saa7oola woranau zorettidosona.

<sup>24</sup> SHin Aihudati bana woranau qoppidoogaa Saa7ooli siyiis; eti a woranau qamminne



gallassi katamaa penggiyaa naagoosona. <sup>25</sup> SHin i erissiyo ashkkarati a qammi efidi, dirssaa huuphiyaara keeshiyan duge wottidosona.

### *Saa7ooli Yerusalaamen Tamaarissiis*

<sup>26</sup> Saa7ooli Yerusalaame gakkido wode, erissiyo ashkkaratuura issippe gaittanau shiiqi be7iis; shin kaalliyaaagaa i gididoogaa ubbai ammanennan ixxiidi, ayyo yayyidosona. <sup>27</sup> SHin Barnnaabaasi Saa7oola Yesuusi kiittidoogeetukko efii; efidi ogiyan Godaa i waanidi be7idaakko, ayyo Godai waatidi haasayidaakkonne qassi Saa7ooli Damasqgon Yesuusa sunttan yayyennan waatidi qaala yootidaakko, etau geeshshidi odiis. <sup>28</sup> Saa7ooli Yerusalaamen yuuyiiddinne Godaa Yesuusa sunttan yayyennan qaala yootiiddi, Yesuusi kiittidoogeetuura issippe de7iis. <sup>29</sup> Qassi Saa7ooli Giriike qaala haasayiya Aihudatuura haasayeesinne palamettees; shin eti a woranau koyidosona. <sup>30</sup> Ishantti heгаа siyidi, Saa7oola duge Qiisaariyaa efidi, Xarsseese yeddidosona.

<sup>31</sup> Yihudan, Galiilaaninne Samaariyan ubban de7iya woosa keettati sarotettan de7idosona; qassi minnidosona; Godaassi yayyiyoogaaninne Geeshsha Ayyaanaa maaduwan heemettiiddi, goodankka dari dari biidosona.

### *PHeexiroosi Lidaaninne Yoophphen Tamaarissiis*

<sup>32</sup> PHeexiroosi ubbasan yuuyiiddi, Lidan de7iya geeshsha asatukko qassi wodhdhiis. <sup>33</sup> Wodhdhidi hegaan hospun laittaasappe silidi, arssan zin77idi de7iya issi Eeniyaа giyo bitaniyaa demmiis. <sup>34</sup> PHeexiroosi Eeniyaа, “Eeniyaу, Yesuus Kiristtoosi nena pattees; denddada ne hiixaa yegga” yaagiis. Yaagin sohuwaara denddi eqqiis. <sup>35</sup> Lidaaninne Saaronan de7iya asai ubbai Eeniyaа be7idi, Godaakko simmiis.

<sup>36</sup> Yoophphe kataman issi Xaabito giyo ammaniyaara de7ausu; Xaabito giyoogee Giriike qalan Dorqgo giyoogaa. A ba de7ido wode ubban lo77obaa oottaiddanne hiyyeesaa maaddaidda de7aasu. <sup>37</sup> He wode a harggada haiqqin, asai i ahaa meeccidi, pooqiyaa pude kessidi zin77issiis. <sup>38</sup> Lidi Yoophphessi mata; kaalliyaaageeti PHeexiroosi Lidan de7iyooгaa Yoophphen siyidi, “Hayyanaa nuukko eesuwan yarkkii” yaagiyo kiitaa naa77u asatu bolli akko kiittidosona.

<sup>39</sup> Kiittin PHeexiroosi denddidi, etaara biidi gakkinn, pooqiyaa pude a kessidi, kifiliyaa gelissidosona. Am77e maccaasati ubbai yeekkiiddinne Dorqqa etaara de7iyo wode ootido qamisettanne afalata ubbaа PHeexiroosa bessiiddi, a yuuyi aadhdhidi eqqidosa. <sup>40</sup> PHeexiroosi eta ubbaа kare kessidi, gulbbatidi Xoossaa woossiis; qassi ahaakko simmidi, “Xaabitee, dendda” yaagiis; yaagin Xaabita ba aifiyaa dooyada PHeexiroosa be7ada, suura uttaasu. <sup>41</sup> PHeexiroosi o ba kushiyan maaddidi, dentti essiis; hegaappe guyyiyan, ammaniyaageettanne am77eta xeesidi, paxidaaro etassi immiis.

<sup>42</sup> Ha yohoi Yoophphe katama ubban laalettiis; laalettin daro asai Godaa ammaniis. <sup>43</sup> PHeexiroosi Yoophphen issi Simoona giyo galbbaа qaaciyaagaara daro gallassaa gam77iis.

## 10

### *PHeexiroosanne Qornneliyoosa*

<sup>1</sup> Qiisaariyan ‘Xaaletu Olaasata’ geetettiya olanchchatuyyo issi mato halaqai Qornneliyoosa giyoogee de7ees. <sup>2</sup> Qornneliyoosi Xoossaa daro ammaniya asanne ba so asa ubbaara issippe Xoossaasi goinniya asa; Aihuda hiyyeesaakka i daro maaddees; qassi Xoossaa ubba wode woossees. <sup>3</sup> Issi gallassi uddufun saate heeran, “Qornneliyoosaa” giya Xoossaa kiitanchchai baakko gelishin, Qornneliyoosi ajjuutan geeshshidi be7iis.

<sup>4</sup> Qornneliyoosi yayyidi, kiitanchchaa tishshi ootti xeellidi, “Ta Godau, i aibee?” yaagiis.

Yaagin kiitanchchai zaaridi, hagaadan yaagiis; “Ne woosainne neeni hiyyeesaa maaddiyoogee Xoossaa sinttan hassayettanau saluwaa biis. <sup>5</sup> Ha77i Yoophphe asaa kiittada, PHeexiroosa giyo Simoona ehiissa. <sup>6</sup> PHeexiroosi abbaa doona keettaawaa galbbaa qaaciya Simoona sooni imattatettau uttiis; neeni oottanau bessiyaabaa i neeyyo odana” yaagiis.

<sup>7</sup> Qornneliyoosi baassi yootida kiitanchchai bin, ba ashkkaratuppe naa77atanne Xoossaassi goinniya baappe shaahettenna wotaaddaratuppe issuwaa xeesidi, <sup>8</sup> etau ubbabaa odidi, eta Yoophphe kiittiis.

<sup>9</sup> Wonttetta gallassi eti biidi, Yoophphe katamaakko matishin, PHeexiroosi usuppun saate heeran keettaa bollan dembbayidi oottidosaa Xoossaa woossanau kiyiis. <sup>10</sup> Qassi namisettidi, qumaa maanau koyiis; shin qumai ka77ishin, ajjuutaa be7iis. <sup>11</sup> Saloi dooyettin, gita afala milatiyaabai oiddu baggaara ohettidi, sa7an wodhdhishin, PHeexiroosi be7iis. <sup>12</sup> Hegan oiddu tohuwaara de7iya mehee, do7i, shooshshi, zareenne kafoi ubbi de7ees. <sup>13</sup> “PHeexiroosaa, dendda eqqada shukkada ma” giya qaalai akko yiis.

<sup>14</sup> SHin PHeexiroosi, “Ta Godau, chii! Taani aibakko tunabaanne sheneyiyaabaa mulekka ma erikke” yaagiis.

<sup>15</sup> Qassi naa77anttuwaa, “Xoossai geeshshidoogaa neeni tuna gooppa” giya qaalai akko yiis. <sup>16</sup> Heezzutoo hegaadan giis; hegaappe guyyiyan, sohuwaara he gita afala milatiyaagee pude saluwaa eketti aggiis.

<sup>17</sup> PHeexiroosi ba be7ido ajjuutaa birshshettai ai gidanddeeshsha? yaagidi, ba wozana gidдон, “Laa hagee aibee?” giishin, Qornneliyoosi kiittido asati Simoona keetta de7iyooosaa lal77iiddi, a penggen eqqidosa. <sup>18</sup> Bantta qaalaa xoqqu oottidi, “PHeexiroosa geetettiya Simoona giyo imattai hegan de7ii?” yaagidi oichchidosona.

<sup>19</sup> PHeexiroosi ajjuutan be7idobaa akeekanau qofan sheekkidaashin, Geeshsha Ayyaanai a, “Be7a, heezzu asati nena koyoosona; <sup>20</sup> denddada wodhdha; taani eta kiittido gishshau, sirennan etaara ba” yaagiis.

<sup>21</sup> PHeexiroosi asatukko wodhdhidi, “Intte koyiyoogee tana. Ai ekkana yiidetii?” yaagiis.

<sup>22</sup> Eti, “Xoossaassi yayyiya xilloi Aihuda asa ubban daro bonchchettida mato halaqaa Qornneliyoosi, nena ba soo efiissidi, qaalaa neeppe siyana mala, Xoossaa geeshsha kiitanchchai ayyo yootiis” yaagidosona. <sup>23</sup> Yaagin PHeexiroosi asata imattanau soo xeesiis.

Wonttetta gallassi, denddidi etaara biis; Yoophphe kataman de7iya ishanttuppe issooti issooti aara issippe biidosona. <sup>24</sup> Wonttetta gallassi, qiisaariyaa gakkidosona; Qornneliyoosi ba dabbotanne ba laggeta issippe xeesi shiishshidi, PHeexiroosa naagees. <sup>25</sup> PHeexiroosi gelana hanishin, Qornneliyoosi aara gaittidi, a sinttan kunddidi, assi goinniis. <sup>26</sup> SHin PHeexiroosi, “Dendda! Taanikka ta huuphen asa” yaagidi a denttiis.

<sup>27</sup> PHeexiroosi Qornneliyoosaara haasayiiddi, soo geliis; i geliyo wode daro asai shiiqidaagaa demmidi, <sup>28</sup> asaa, “Aihuda asi hara zariyaara issippetettan de7anau, woi gaittanau woga gidennaagaa intte huuphen ereeta; shin taani oonanne tuna woi sheneyiyaabaa geenna mala, Xoossai tana bessiis. <sup>29</sup> Hegaa gishshau, intte taassi kiittin, palami bannan yaas. Ha77i, ‘Tana aissi ehiissidetii?’ yaagada inttena oichchais” yaagiis.

<sup>30</sup> Qornneliyoosi hagaadan yaagiis; “Taani hachchi oiddu gallasaappe kase ha saaten uddufun saate woosaa ta sooni Xoossaa woossishin, PHooliya maayuwaa maayida asi ta sinttan eqqidi, <sup>31</sup> tana, ‘Qornneliyoosaa, Xoossai ne woosaa siyiis; neeni hiyyeesaa maaddiyooogaakka hassayiis. <sup>32</sup> Simmi asa Yoophphe kiittada, Simoon PHeexiroosa giyoogaa xeesissa; Simoon PHeexiroosi Simoona giyo galbbaa qaaciya bitaniyaa sooni

abbaa doonan imattatettaa uttiis' yaagiis. <sup>33</sup> Hegaa gishshau, taani neekko sohuwaara kiittaas; neeninne yaada loittadasa; simmi neeni nuuyyo yootanau Xoossai nena azazidobaa ubbaa siyanau ha77i nuuni ubbaikka hagan Xoossaa sinttan de7oos" yaagiis.

### *PHeexiroosa Haasayaa*

<sup>34-35</sup> PHeexiroosi haasayaa hagaadan yaagidi doommiis; "Xoossai asa som77o xeelenna; shin dere ubban baassi yayyiyaagaanne xillo ooso oottiyaagaa galatiyoogaa taani tumu akeekaas. <sup>36</sup> Xoossai asa ubbaa Godaa Yesuus Kiristtoosa baggaara, sarotettaa yootiiddi, ha wonggeliyaa mishiraachchuwaa Israa7eela asaassi kiittidoogaa intte ereeta. <sup>37</sup> Yohaannisi qaala yootido xinqqatiyaappe guyyiyan, Galiilappe doommidi, Yihudaa biitta ubban hanidabaa intte ereeta. <sup>38</sup> Xoossai Naazireeta Yesuusa Geeshsha Ayyaanaaninne wolqqan tiyiis; Xoossai aara de7iyo gishshau, lo77obaa i oottiiddinne xalahe halaqaassi haarettida ubbaa pattiiddi yuuyiis.

<sup>39</sup> "Aihuda biittaanne Yerusalaamen i oottido ubbabaassi nuuni markka. Eti masqqaliyaa bolli misimaariyan xishi kaqqidi, a woridosona. <sup>40</sup> SHin Xoossai heez-zantto gallasan haiquwaappe a denttidi bessiiis. <sup>41</sup> Xoossai koiro doorido markkata nuna, a bessiiisippe attin, asa ubbaa gidenna; haiquwaappe i denddidoogaappe guyyiyan, nuuni aara miidanne uyida. <sup>42</sup> Xoossai wonggeliyaa mishiraachchuwaa asaassi nuuni yootanaanne, paxa de7iyaageetu bollaanne haiqqidaageetu bollan pirdanau i sunttidoogee Yesuusa gididoogaa nuuni markkattanau nuna azaziis. <sup>43</sup> Xoossai aani ammaniya ubbaa nagaraa a sunttan atto gaanaagaa hananabaa yootiya ubbati markkattoosona" yaagiis.

### *Aihuda Gidenna Asati Ammanidi Geeshsha Ayyaanaa Ekkidosona*

<sup>44</sup> PHeexiroosi biron he yohuwaa yootishin, qaala siyiya ubbaa bolli Geeshsha Ayyaanai wodhdhi aggiis. <sup>45</sup> PHeexiroosaara Yoophpeppe yiida, ammaniya qaxxarettida Aihuda ubbati Aihuda gidennaageetu bollankka Geeshsha Ayyaanaa imoi gukkido gishshau garamettidosona. <sup>46</sup> Aissi giikko, eti duma duma qaalan haasayishiinne Xoossaa gitatettaa sabbishin siyidosona.

He wode PHeexiroosi zaaridi, <sup>47</sup> "Hageeti qassi nunadan Geeshsha Ayyaanaa ekkidaageeti xammaqettennaadan, haatta eta digganau danddayiyai oonee?" yaagiis. <sup>48</sup> Eti Yesuus Kiristtoosa sunttan xammaqettana mala, eta azaziis; hegaappe guyyiyan, eti banttanaara amarida gallassaa uttana mala, a woossidosona.

## 11

### *PHeexiroosi Aihuda Gidenna Asaappe Ammanidaageetu Soo Aibissi Gelidaakko Yootiis*

<sup>1</sup> Yesuusi kiittidoogeeinne Yihudaa ubban de7iya ishantti, Aihuda gidennaageetikka Xoossaa qaala ekkidoogaa siyidosona. <sup>2</sup> PHeexiroosi Yerusalaame biido wode, qaxxarettida asati aara palamettidi, <sup>3</sup> a, "Neni qaxxarettibeennaageetukko gelada, etaara qumaa maadasa" yaagidosona.

<sup>4</sup> SHin PHeexiroosi hanidabaa koi ruwaappe doommidi, maaran maaran hagaadan yaagidi yootiis; <sup>5</sup> "Taani Yoophphe kataman Xoossaa woossishin, tau wozanai dammin, ajjuutaa be7aas; gita afala milatiyaabai oiddu baggaara ohettidi, saluwaappe wodhdhidi, taakko yiis. <sup>6</sup> Hegaa giddo taani tishshi oottada xeelliyo wode, oiddu tohoi de7iyo mehiyaa, do7aa, shooshshaa, zariyaanne kafuwaa be7aas. <sup>7</sup> Qassi, 'PHeexiroosaa, dendda; shukkada ma' giya qaala taani siyaas.

<sup>8</sup> "SHin taani, 'Ta Godau, chii! Tunabai woi sheneyiyaabai mulekka ta doonaakko shiiqi erenna' gaas.

<sup>9</sup> "Qalalai saluwaappe naa77anttuwaakka, 'Xoossai geeshshidoogaa neeni tuna gooppa' yaagidi taassi zaariis.

<sup>10</sup> “Hegee heezzutoo hanin, wurssettan ubbabi saluwaa pude gooshettiis. <sup>11</sup> Hegaa peeshshanka heezzu asati Qiisaariyaappe taakko kiittetidi, taani de7iyo keettaa gakki aggidosona. <sup>12</sup> Gakkin taani sirennan etaara baana mala, Ayyaanai taassi yootiis. Qassi ha usuppun ishantti Yoophpeppe tanaara Qiisaariyaa bin, nuuni Qornneliyoosa soo gelida. <sup>13-14</sup> Kiitanchchai ba sooni eqqidi bana, ‘PHeexiroosa geetettiya Simoona xeesanau asa Yoophphe kiitta; neeninne ne keettaa asai ubbai attiyo qaalaa i neeyyo yootana’ giidoogaa Qornneliyoosi waatidi siyidaakko, nuussi odiis.

<sup>15</sup> “Odin taani haasayanau doommiyoogan Geeshsha Ayyaanai koiro nu bolli wodhdhidoogaadan, eta bollikka wodhdhi aggiis. <sup>16</sup> Godai, ‘Yohaannisi haattan xammaqiis; shin intte Geeshsha Ayyaanan xammaqettana’ yaagido qaalai taassi hassayettiis. <sup>17</sup> Xoossai nuussi Godaa Yesuus Kiristtoosa ammanidaageetussi immido imuwaa malaa Aihuda gidennaageetussikka qassi immikko, simmi Xoossaa digganau taani oonee?” yaaggiis.

### *Ammaniyaageeti Anxxookiyaa Kataman “Kiristtaane” Geetettidosona*

<sup>18</sup> Eti haggaa siyido wode bantta palamaa aggidi, “Yaatin, Xoossai Aihuda gidennaageetikka qassi nagaraappe simmidi de7anaadan, eta qaadiis” yaagidi Xoossaa galatidosona.

<sup>19</sup> Isxxifaanoosa bolli gakkida waayiyaa geedon laalettida ammaniyaageeti qaalaa Aihudatu xalaalaappe attin, haraassi issuwaassinne odennan, Pinqqe, Qophphiroosanne Anxxookiyaa gakkanaashin yuuyidosona. <sup>20</sup> SHin Qophphiroosappenne Qareenappe yiida issi issi ammaniya asati Anxxookiyaa biidi, Godaa Yesuusa wonggeliyaa mishiraachchuwaa yootiiddi, Giriike asaassikka yootidosona. <sup>21</sup> Godaa wolqqai etaara de7ees; qassi daro asai ammanidi, Godaakko simmiis.

<sup>22</sup> Ha yohoi Yerusalaamen de7iya woosa keettaa asaassi siyettin, woosa keettaa asai Barnnaabaasa Anxxookiyaa kiittiis. <sup>23</sup> Barnnaabaasi Anxxookiyaa biido wode, Xoossaa aaro kehatettaa oosuwa be7idi ufaittiis; eti ubbaikka Godan bantta kumetta wozanaappe minnidi de7anaadan, eta zoriis. <sup>24</sup> Aissi giikko, Barnnaabaasi Geeshsha Ayyaanainne ammanoi kumido lo77o asa; yaanin daro asai Godaa ammaniis.

<sup>25</sup> Hegaappe guyyiyan, Barnnaabaasi Saa7oola koyanau Xarsseese biis. <sup>26</sup> Biidi Saa7oola demmido wode, Anxxookiyaa ehiis. Barnnaabaassinne Saa7ooli woosa keettaa asaara issi laitta kumettaa uttidi, daro asaa tamarissidosona; kaalliyaageeti Anxxookiyan Kiristtaane geetettidi, koiro xeesettidosona.

<sup>27</sup> Hananabaa yootiyaageeti Yerusalaameppe Anxxookiyaa he wode wodhdhdidosona. <sup>28</sup> Eta gidoppe Agaaboosa giyoogee denddidi, sa7a ubban gita namisai denddanaagaa Ayyaanaa wolqqan hananabaa yootiis; hegee hanidoogee Qalaudeyoosa kawotettaa wodiyaana. <sup>29</sup> Kaalliyaageeti huuphiyan huuphiyan bantta wolqqaa keenaa miishshaa peeridi, Yihudan de7iya bantta ishanttussi maaduwaa yeddanaa qofaa qachchidosona. <sup>30</sup> Eti hegaadan oottidi, miishshaa Barnnaabaasa bollinne Saa7oola bolli woosa keettaa cimatussi yeddidosona.

## 12

### *Woosa Keettan Hanttaara Yedetai Doommiis*

<sup>1</sup> Kawoi Heeroodisi he wode woosa keettaa asaappe amaridaageeta waisuwaa doommiis. <sup>2</sup> Doommidi Yohaannisa ishaa Yaaqooba bisuwan worissis. <sup>3</sup> Hegee Aihudata ufaissidoogaa be7idi, gujjidi PHeexiroosakka oiqqiis; hegee Paasikaa Baalaa bonchchiyo gallassatuuna. <sup>4</sup> PHeexiroosa oiqqidi qachchiis. Paasikaa bonchchiyo gallassatuppe guyyiyan, dere asaa sintti aattanaa qoppidi, oiddu oiddu wotaaddarati a naaganaadan, tammanne usuppun wotaaddaratussi aattidi immiis. <sup>5</sup> Hegaa gishshau, PHeexiroosi qasho keettan naagettees; shin woosa keettaa asai ayyo minttidi Xoossaa woossees.

### *Kiitanchchai PHeexiroosa Qasho Keettaappe Kessiis*

<sup>6</sup> Heeroodisi PHeexiroosa asaa sintti aattanau qoppanaappe kase qammi, PHeexiroosi naa77u sanssalatan qashettidi, naa77u wotaaddaratuppe gidduwan xiskkees; naagiyaageetikka qasho keettaa penggen eqqidi naagoosona. <sup>7</sup> Akeekennan de7ishin, Godaa kiitanchchai hegan eqqi aggiis; qasho keettanka poo7oi poo7i bayiis. Kiitanchchai PHeexiroosa miyyiyaa dechchi beegotissidi a, “Elle dendda” yaagiis; sohuwaarakka sanssalatai a kushiyaappe wodhdhi aggiis. <sup>8</sup> Kiitanchchai a, “Ne suriyaa gixxa; ne caammaakka wotta” yaagin, PHeexiroosi hegaadan oottiis; oottin kiitanchchai, “Ne afalaa maayada tana kaalla” yaagiis.

<sup>9</sup> PHeexiroosi qasho keettaappe kiyidi, kiitanchchaa kaalliis; ayyo ajjuutaa be7iyooobaa misatiisippe attin, kiitanchchai oottiyoobai tuma gididoogaa eribeenna. <sup>10</sup> Kiitanchchainne PHeexiroosi koiro wotaaddaraappenne naa77antto wotaaddaraappe aadhdhidi, katamaa efiya birata penggiyaakko gakkidosona; gakkinn penggee etassi barkka dooyetti aggiis; eti kiyidi issi ogiyaara biishin, kiitanchchai sohuwaara PHeexiroosappe shaahetti bayiis.

<sup>11</sup> PHeexiroosi bana gakkidabaa akeekidi, “Tana Godai ba kiitanchchaa kiittidi, Heeroodisa kushiyaappenne Aihuda asai naagi uttido ubbabaappe ashshidoogaa ha77i tumu eraas” yaagiis.

<sup>12</sup> I heгаа akeekido wode, daro asai issippe shiiqidi Xoossaa woossiyoosaa, Marqqoosa giyo Yohaannisa aayee Mairaami soo biis. <sup>13</sup> Biidi penggen xeesin, issi Roodo giyo ashkkariyaa dooyanau yaasu. <sup>14</sup> Rooda PHeexiroosa qaalaa gididoogaa erido wode, bana ufaissin, kariyaa dooyennan guyye woxxada, PHeexiroosi karen eqqidoogaa asaassi odaasu.

<sup>15</sup> Odin asai o, “Hannee neeni gooyaasa” yaagiis. Rooda PHeexiroosa gididoogaa geeshshada odaasu. Eti, “Hegee a kiitanchchaa” yaagidosona.

<sup>16</sup> SHin PHeexiroosi karen xegidi aggenan ixxin, asai kariyaa dooyidi, a be7idi garamettiis. <sup>17</sup> SHin eti co77u gaana mala, PHeexiroosi ba kushiyan malaatidi, Godai qasho keettaappe a waati kessidaakko, etassi qonccissi yootidi, “Hagaa Yaaqoobassinne ishanttussi yootite” giidi, kiyidi harasaa biis.

### *Heeroodisa Haiquwaa*

<sup>18</sup> Sa7ai wonttido wode, PHeexiroosi au biichchidaakko gin wotaaddaratu gid-don daro wocamai kiyiis. <sup>19</sup> Heeroodisi PHeexiroosa Lal77issin, i xayido wode, naagiyaageeta qoridi, eta worana mala azaziis; hegaappe guyyiyan, Yihudaappe Qisaariyaa wodhdhidi, hegan amarida wodiyaattiis.

<sup>20</sup> Heeroodisi Xiirsoosa asaassinne Sidoona asaassi daro hanqqettiis; hanqqettin eta biittai kattaa Heeroodisa biittaappe demmiyo gishshau, eti issippe gididi, a keettaa halaqaa Bilasxxoosa bantta exa oottidi, sigaa woossanau Heeroodisakko biidosona.

<sup>21</sup> Heeroodisi sunttettido gallassi, ba kawotettaa afalaa maayidi, kawotaa araan ut-tidi, asaassi haasayiis. <sup>22</sup> Asai, “Hagee Xoossaa qaala; asa qaala gidenna” yaagidi qaalaa xoqqissidi haasayiis. <sup>23</sup> Heeroodisi Xoossaa bonchchibeenna gishshau, sohuwaarakka Godaa kiitanchchai a dechchin, guxuniyan meetettidi, haiqqi bayiis.

<sup>24</sup> SHin Xoossaa qalalai dicceesinne dari dari bees.

<sup>25</sup> Barnnaabaasinne Saa7ooli bantta oosuwaa polidi, Marqqoosa giyo Yohaannisa banttanaara ekkidi, Yerusalaameppe simmidosona.

## 13

*Barnnaabaasinne Saa7ooli Geeshsha Ayyaanai Doorin, Tamaarissanau Kiitetti-dosona*



<sup>1</sup> Anxxookiyan de7iya woosa keettan hananabaa yootiyaageetinne taaaris-siyaageeti de7oosona; eti Barnnaabaasa, Karetta giyo Simoona, Qareenappe yiida Luqiyoosa, biittaa haariya Heeroodisaara diccida Minaahanne Saa7oola. <sup>2</sup> Eti Godaassi goinnishiinne xoomishin, Geeshsha Ayyaanai, “Taani xeesido oosuwaassi Barnnaabaasanne Saa7oola tau kessite” yaagiis.

<sup>3</sup> Yaagin eti xoomidoogaappenne woossidoogaappe guyyiyan, bantta kushiya Barnnaabaasa bollinne Saa7oola bolli wottidi, eta yeddidosona.

### *Barnnaabaasinne Sa7ooli Qophphiroosa Biidosona*

<sup>4</sup> Hegaa gishshau, Geeshsha Ayyaanai eta kiittin, Selewuqiya wodhdhdidosona; hegaappe markkabiyan gelidi, Qophphiroosa haruuruwaa biidosona. <sup>5</sup> Eti Silmmaana gakkidi, Aihuda woosa keettatun Xoossaa qaala yootidosona; eta maaddanau Yohaannisi etaara de7ees.

<sup>6</sup> Eti Qophphiroosa haruuruwaa muleera PHaafu gakkanaassi yuuyidi, hananabaa yootiya issi worddanchchaa, Aihuda asa Bar-Yesuusa giyo shareechchuwa demmidosona. <sup>7</sup> He shareechchoi deriyaa haariya Sarggiyoosa PHauloosa giyo akeekanchcha bitaniyaara de7ees. Sarggiyoosa PHauloosi Barnnaabaasanne Saa7oola baakko xegidi, Xoossaa qaala siyanau koyiis. <sup>8</sup> SHin shareechchuwa Eliimaasi (Giriike qaalan hegee a sunntaa) deriyaa haariyaagaa ammanuwaa digganau koyidi, eta haasayaa phalqqiis.

<sup>9</sup> SHin PHauloosa giyo Saa7ooli banan Geeshsha Ayyaanai kumin, shareechchuwa tishshi ootti xeellidi, <sup>10</sup> a, “Laa ha xalahe halaqaa na7au, gene ubbainne iitatetta ubbai kumidoogoo, xillotetta ubbau morkkiyau, Godaa ogiyaa suuriyaa geellayyoogaa aggikkii? <sup>11</sup> Be7a; ha77i Godaa kushee ne bolli de7ees; neeni qooqe gidana; amarida wodee gakkanaashin, awaa poo7uwaa be7akka” yaagiis.

Yaagin sohuwaara ciggaarainne xumai a aifiyaa goozin, ba kushiya oiqqidi, kaalet-tiya uraa koyiiddi yuuyiis. <sup>12</sup> He wode deriyaa haariyaagee hega be7ido wode, Godai taaarissiyooogan garamettidi ammaniis.

### *Barnnaabaasinne PHauloosi PHisddiyan De7iya Anxxookiyaa Biidosona*

<sup>13</sup> PHauloosinne aara de7iyaageeti PHaafuppe denddidi, PHinifiliyan de7iya PHergge markkabiyan biidosona; Yohaannisi etappe shaahettidi, Yerusalaame simmiis. <sup>14</sup> SHin eti PHerggeppe aadhdhidi, PHisddiyan de7iya Anxxookiyaa gakkidosona; Sambbata gallassan Aihuda woosa keettaa gelidi uttididosona. <sup>15</sup> Muuse higgeenne hananabaa yootiyaageetu maxaafai nabbabettidoogaappe guyyiyan, Aihuda woosa keettaa halaqati, “Nu ishanttoo asaa minttettiya qaalai inttessi de7ikko, asau haasayerkketii” yaagidi etassi kiittidosona.

<sup>16</sup> PHauloosi denddi eqqidi, ba kushiyan malaatidi, hagaadan yaagiis; “Israa7eela asatoo, Xoossaassi yayyiyaageetoo siyite. <sup>17</sup> Ha Israa7eela asaa Xoossai nu aawata dooridi, Gibxxe biittan imattatettan eti de7ishin, eta darissiis; ba gita wolqqankka Gibxxe biittaappe eta kessiis. <sup>18</sup> Bazzuwan oitamu laitta keenaa nu aawata i danddayiis. <sup>19</sup> Kanaane giyo biittan Aihuda gidenna laappun zareta xaissidi, eta biittaa ba asaa laatissiis. <sup>20</sup> Hegaappe guyyiyan, hananabaa yootiya Sameela wodiya gakkanaas, oiddu xeetanne ishatamu laitta keenaa daannata etassi immiis. <sup>21</sup> Hegaappe guyyiyan, eti banttassi kawo immana mala woossin, Xoossai Biniyaama zariyaappe Qiisa na7aa Saa7oola oitamu laittau kawotana mala, etassi immiis. <sup>22</sup> Xoossai Saa7oola shaaridoogaappe guyyiyan, eta bolli Daawiti kawotana mala, a denttiis; Daawitabaa markkat-tiiddi, “Taani koyiyo ubbabaa ta wozanadan oottiya Isseyi na7aa Daawita demmaas’ yaagiis.

<sup>23</sup> “Xoossai, ‘Taani Daawita zariyaappe Israa7eela asaa ashshiyaagaa ehaana’ giidoogaadankka, Yesuusa ehiis. <sup>24</sup> Yesuusi yaanaappe kase Israa7eela asai ubbai

bantta nagaraappe simmidi xammaqettana mala, Yohaannisi qaalaa yootiis. <sup>25</sup> Qassi Yohaannisi ba oosuwaa wurssana haniiddi asaa, ‘Tana oona giidi qoppeetii? Taani intte naagiyoogaa gidikke; shin be7ite, a tohuwaa caammaa birshshanaukka taassi bessennaagee taappe guyyeera yees’ yaagiis.

<sup>26</sup> “Ta ishato, Abrahaama zaretoo, qassi hagan Aihuda gidennaageetoo Xoossaassi yayyiyaageetoo, ha atotettaa qalalai nuussi kiitettiis. <sup>27</sup> Aissi giikko, Yerusalaamen de7iya asainne eta halaqati Yesuusanne Sambbata gallassa ubban nabbabettiya hananabaa yootiyaageetu qaalaa akeekibeenna gishshau, a bolli pirddidi, hananabaa yootiyaageetu qaalaa polidosona. <sup>28</sup> Yesuusa worissanau issi gaasoikka etau beettenan ixxin, PHilaaxoosi a worana mala woossidosona.

<sup>29</sup> “Eti Yesuusabai Xoossaa maxaafan xaafettidaagaa ubbaa polido wode, masqqaliyaappe a wottidi moogidosona. <sup>30</sup> SHin Xoossai haiquwaappe Yesuusa denttiis. <sup>31</sup> Denttin i banaara Galiilappe Yerusalaame yiidaageetussi darotoo beettiis eti ha77i abaa asaassi markkattoosona.

<sup>32</sup> “Xoossai nu aawatussi immana giido wonggeliyaa mishiraachchuwaa nuuni inttessi yootoos. <sup>33</sup> Daawita Mazamuriyaa Maxaafan naa77antto miraafiyan, ‘Neeni ta Na7aa.

Hachchi taani ne Aawaa gidaas’  
geetettidi xaafettidoogaadan, Xoossai Yesuusa denttidi, nu aawatussi immana giidoogaa nuussi eta naatussi poliis. <sup>34</sup> Naa77anttuwaa i haiqqenna mala, haiquwaappe a denttidoogaassi Xoossai, ‘Taani Daawitayyo immana giido ammanettida geeshsha anjuwaa inttessi immana’ yaagidi haasayiis. <sup>35</sup> Hegaa gishshau, Mazamure Maxaafan harasan qassi, ‘Ne Geeshsha Na7aa ahaakka musissakka’ yaagees. <sup>36</sup> Aissi giikko, Daawiti ba wodiyan Xoossaa qofaa oottidoogaappe guyyiyan haiqqidi, ba aawatuura moogettidi musiis. <sup>37</sup> SHin Xoossai haiquwaappe denttidoogee musibeenna.

<sup>38-39</sup> “Hegaa gishshau, ta ishato, nagara atto geetta intteyyo Yesuusa baggaara odtidoogeenne, Muuse higgiiyan xillanau intteyyo danddayettenna ubbabaappe aani ammaniya ubbai xillanaagee intteyyo eretto. <sup>40</sup> Hegaa gishshau, hananabaa yootiyaageeti giidoogee intte bolli gakkenna mala naagettite;

<sup>41</sup> ‘Xoossai giidobaa qilliicciyaageetoo, be7ite; harai atto issi urai inttessi yootiyaakkokka, intte ammanenna oosuwaa taani intte wodiyan oottiyo gishshau, poora giite; haiqqite’ yaagidosona” yaagiis.

<sup>42</sup> PHauloosinne Barnnaabaasi Aihuda woosa keettaappe kiyishin, asai eta naa77antto Sambbatankka hegaa gujjidi yootana mala woossiis. <sup>43</sup> SHiiqoi laalettidoogaappe guyyiyan, daro Aihudatinne Aihudatu ammanuwan gelidi Xoossau yayyiya daroti, PHauloosanne Barnnaabaasa kaallidosona; kaallin Yesuusi kiittidoogeeti Xoossaa aaro kehatettan minnidi de7ana mala, etau yootidi minttettidosona.

<sup>44</sup> Naa77antto Sambbatan amarida asatuppe attin, katamaa asai ubbai Xoossaa qaalaa siyanau shiiqiis. <sup>45</sup> SHin Aihudati daro asaa be7ido wode, PHauloosa qanaatidosona; a haasayaa PHalqqidi, a cayidosona.

<sup>46</sup> PHauloosinne Barnnaabaasi xalidi, “Xoossaa qalalai kasetidi intteyyo odettanau koshshees; shin qaalaa intte ixxido gishshaunne merinaa de7uwaa ekkanau inttessi bessenna giidi, intte intte huuphiyan pirddido gishshau, be7ite, nuuni Aihuda gidennaageetukko simmeettes. <sup>47</sup> Aissi giikko, Godai nuna, ‘Asai ubbai intte baggaara attana mala, inttena taani Aihuda gidennaageetussi poo7o oottaas’ yaagidi azaziis” yaagidosona.

<sup>48</sup> Aihuda gidennaageeti heгаа siyido wode, ufaittidi Xoossaa qaalaa bonchchidosona; qassi merinaa de7uwaassi doorettida ubbaikka ammanidosona.

<sup>49</sup> Godaa qalai he biitta ubbaa gakkiiis. <sup>50</sup> SHin Aihudati Xoossau goinniya bonchchettida maccaasatanne kataman de7iya gita asata PHauloosa bollinne Barnnaabaasa bolli denttettin, asati eta yedetaa doommidi, bantta biittaappe kessidosona. <sup>51</sup> SHin Yesuusi kiittidoogeeti eta ixxiyoogaassi malaata gidana mala, bantta tohuwaappe baanaa shocidi, Iqooniyoone katamaa biidosona. <sup>52</sup> Qassi Anxxookiyan de7iya kaalliyaageetunkka Geeshsha Ayyaanainne ufaissai kumees.

## 14

### *PHauloosinne Barnnaabaasi Iqooniyoone Biidosona*

<sup>1</sup> Kaseegaadankka PHauloosinne Barnnaabaasi Iqooniyoonen Aihudatu woosa keettaa gelidi, qaalaa yootidosona; yootin daro Aihudatinne Aihuda gidennaageeti ammanidosona. <sup>2</sup> SHin ammanibeenna Aihudati Aihuda gidennaageetu wozanaa laammidi, ishanttu bolli hanqetissidosona. <sup>3</sup> Yesuusi kiittidoogeeti hegan daro wodiyaagam77idosona; eti Godaabaayayennan yootidosona; yootin Godai malaataanne oorattabaa eti oottana mala, etau wolqqaa immidoogan ba aaro kehatettaa qaalaabai tuma gididoogaa markkattiis. <sup>4</sup> SHin katamaa asai shaahettidi, baggai Aihudatukko, baggai Yesuusi kiittidoogeetukko simmiis.

<sup>5</sup> Aihuda gidennaageetinne Aihudati bantta halaqatuura issippe Yesuusi kiittidoogeeta qohanaunne shuchchan caddanau qoppido wode, <sup>6</sup> Yesuusi kiittidoogeeti heгаа eridi, Lisxxiranne Daribe giyo Liqaa7ooniyaa katamatanne eta heeran de7iya biittaa baqatidosona; <sup>7</sup> baqatidi, hegan wonggeliyaa mishiraachchuwaa yootoosona.

<sup>8</sup> Ba aayee uluwaappe yelettoosappe doommidi, naa77u tohoi silin, mulekka hemetenna issi bitanee Lisxxiran de7ees. <sup>9</sup> He bitanee PHauloosi yootishin siyees; PHauloosi a tishshi ootti xeelliyo wode, paxanau ayyo ammanoi de7iyooгаа be7idi, <sup>10</sup> qaalaa xoqqissidi a, “Sitti gaada ne tohuwan eqqa” yaagiis; yaagin guppi denddidi, hemetaa doommiis.

<sup>11</sup> PHauloosi oottidoogaa asai be7idi, ba qaalaa Liqaa7ooniyaa qaalan xoqqu oottidi, “Xoossati asa milatidi nuukko wodhdhididosona” yaagiis. <sup>12</sup> Asai Barnnaabaasa, “Diyaa” giidi, PHauloosi haasayaassi waannatiyo gishshau, a, “Hermmeesa” giidi sunttiis. <sup>13</sup> Beeta Maqidasee katamaa matan de7iyo Diyaa qeeseenne asai korimatanne alleeqo ciishshata Yesuusi kiittidoogeetussi yarshshuwaa yarshshanau koyidi, pengge ehiidosona.

<sup>14</sup> SHin Yesuusi kiittido Barnnaabaasinne PHauloosi heгаа siyido wode bantta maayuwaa pooshshidi, asaa giddo woxxiiddi, <sup>15</sup> bantta qaalaa xoqqu oottidi, haagaadan yaagidosona; “Asau, hагаа aissi ootteetii? Nuunikka inttenadan merettida asa; ha pattenna yohuwaappe saluwaanne sa7aa, abbaanne eta giddon de7iya ubbabaa medhdhida de7o Xoossaakko intte simmana mala, inttessi nuuni wonggeliyaa mishiraachchuwaa yootoos. <sup>16</sup> I beni asaa zare ubbaa bantta ogiyaa baana mala yeddi bayiis. <sup>17</sup> Intteyyo iraa saluwaappe bukissees; kattaakka i wodiyan immees; qassi qumaa immidi, inttena daro ufaissees; yaatidi intteyyo lo77obaa oottiiddi, ubba wodekka bau markka xayibeenna” yaagidosona. <sup>18</sup> Yesuusi kiittidoogeeti heгаа giidi, banttayyo asai yarshshenna mala, tuggatidi diggidosona.

<sup>19</sup> Anxxookiyaappenne Iqooniyooneppe yiida Aihudati asaa bantta baggi zaaridi, shuchchan PHauloosa caddidosona; etau haiqqidabaa milatin, katamaappe gaxi a goochchidosona. <sup>20</sup> SHin kaalliyaageeti a lanqqiyan yuuyi aadhdhidi eqqidaashin, i denddidi, katamaa geliis. Wonttetta gallassi Barnnaabaasaara issippe Daribe biis.

### *PHauloosinne Barnnaabaasi Sooriyan De7iya Anxxookiyaa Simmidosona*

<sup>21-22</sup> Eti Daribe kataman wonggeliyaa mishiraachchuwaa yootidi, daro asai Yesuusa ammanana mala oottidoogaappe guyyiyan, Lisxxira, Iqooniyoonenne Anxxookiyaa simmidosona; simmidi hegan kaalliyaageeta minttettiiddinne eti ammanuwan minnidi de7ana mala zoriiddi, “Nuuni Xoossaa kawotettaa gelanau daro waayettana bessees” yaagidosona. <sup>23</sup> Qassi woosa keettatussi huuphiyan huuphiyan cimata dooridi, xoomidoogaappenne woossidoogaappe guyyiyan, eti ammanido Godaassi eta hadaraa immidosona.

<sup>24</sup> PHisddiyaa biittaappe aadhdhidi, PHinifiliyaa yiidosona; <sup>25</sup> PHerggen qaalaa yootidoogaappe guyyiyan, Axaaliyaa wodhdhdidosona. <sup>26</sup> Hegaappe eti bantta polido oosuwaa gishshau, asai eta hadaraa Xoossaa aaro kehatettau immido Anxxookiyaa Markkabiyan simmidosona.

<sup>27</sup> Simmidi Anxxookiyaa gakkido wode woosa keettaa asaa shiishshidi, Xoossai banttanaara issippe oottido ubbabaanne, Aihuda gidenna asai ammanana mala, etau penggiyaa dooyidoogaa, asau yootidosona. <sup>28</sup> Yaatidi hegan kaalliyaageetuura daro wodiyaan gam77idosona.

## 15

### *Yerusalaame SHiiquwaa*

<sup>1</sup> Issi issi asati Yihudaappe Anxxookiyaa wodhdhidi, “Muuse wogaadan, intte qaxxarettennabaa gidikko, attanau danddayekketa” yaagidi ishannta tamarissuwaa doommidosona. <sup>2</sup> PHauloosinne Barnnaabaasi etaara daro ooyettidi palamettin, Anxxookiyan de7iya issi issi hara asati he palamaa gishshau, PHauloosaaranne Barnnaabaasaara Yerusalaame biidi, Yesuusi kiittidoogeetuuranne cimatuura gaittanau qofai qashettiis.

<sup>3</sup> Woosa keettaa ogiyan eta maaddishin, Aihuda gidennaageeti Xoossaakko simmidoogaa yootiiddi, Pinqqeeranne Samaariyaara aadhdhdidosona; hegee ishannta ubbaa daro ufaissiis. <sup>4</sup> Eti Yerusalaame gakkido wode, woosa keettaa, Yesuusi kiittidoogeetinne cimati eta morkidosona; morkin Xoossai banttanan oottidobaa ubbaa odidosona. <sup>5</sup> SHin Parisaawetu baggappe ammanida issi issi asati denddi eqqidi, “Intte eta qaxxaranaunne Muuse higgiiyaa naagana mala azazanau bessees” yaagidosona.

<sup>6</sup> Yesuusi kiittidoogeetinne cimati heгаа zorettanau shiiqididosona. <sup>7</sup> Keehi haasayidoogaappe guyyiyan, PHeexiroosi denddi eqqidi, eta hagaadan yaagiis; “Ta ishato, Aihuda gidennaageeti wonggeliyaa mishiraachchuwaa qaalaa ta doonaappe siyidi ammanana mala, tana Xoossai intte giddoppe beni dooridoogaa intte ereeta. <sup>8</sup> Asa wozana eriya Xoossai Geeshsha Ayyaanaa nuussi immidoogaadan, etassikka immidi tumayiiis. <sup>9</sup> Eti ammanido gishshau, i eta wozanaa geeshshidi, nu gidduwaaninne eta gidduwan dummatettaa wottibeenna. <sup>10</sup> Hega gishshau, nu aawatinne nuuni tookkanau danddayibeenna qambbaraa kaalliyaageetu morggiyan wottidi, ha77i intte aissi Xoossaa paacceetii? <sup>11</sup> SHin Godaa Yesuus Kiristtoosa aaro kehatettan eti attidoogaadan, nuunikka attidoogaa ammanoos” yaagiis.

<sup>12</sup> Asai ubbai co77u giidi, Barnnaabaasinne PHauloosi Aihuda gidenna asaa giddon bantta baggaara Xoossai oottido malaataanne oorattabaa ubbaa yootishin siyees.

<sup>13</sup> Eti haasayaa wurssidoogaappe guyyiyan, Yaaqoobi hagaadan yaagidi zaariis; “Ishato, taani giyoogaa siyite. <sup>14</sup> Xoossai Aihuda gidennaageetu giddoppe bau haniya asaa ekkana Aihuda gidennaageetuuyo koiro waatidi qoppidaakko Simooni yootiis. <sup>15-18</sup> Hananabaa yootiyaageetu qaalai hagaara giigees; Godai daro wodiyaappe doommidi, asaa hгаа erissidi, Xoossaa maxaafan hagaadan yaagiis;

Hagaappe guyyiyan, sa7an de7iya  
hara asai ubbainne tabaa gidanau  
taani xeesido Aihuda gidenna asai ubbai



Godaa koyana mala, taani simmana.  
 Taani kolettidi kunddida keettadan  
 hanida Daawita kawotettaa denttana.  
 Qolettidaagaakka zaarada keexxana;  
 taani naa<sup>77</sup>anttuwaa a essana'  
 yaagiis.

<sup>19</sup> “Hegaa gishshau, ta qofa gidikko, Aihuda gidennaageetuppe Xoossaakko simmiyaageeta nuuni waissanau koshshenna. <sup>20</sup> SHin eti eeqaan tunidabaa meenna mala, shaaramuxenna mala, sulettida mehe asho meenna malanne suutta uyenna mala, etassi nuuni dabddaabbiyaa xaafanau koshshees. <sup>21</sup> Aissi giikko, Muuse higgiiyaa kase yeletaappe doommidi Sambbatan Sambbatan Aihuda woosa keettatun nabbabiiddi, a qaalaa katamaa ubban yootiyaageeti de<sup>70</sup>oosona” yaagiis.

<sup>22</sup> Hegaappe guyyiyan, Yesuusi kiittidoogeenne cimati woosa keettaa asa ubbaara issippe bantta giddoppe amarida asata dooridi, PHauloosaaranne Barnnaabaasaara Anxxookiyaa yeddana qofaa qachchidosona; eti daro bonchchettida naa<sup>77</sup>u asata Barssaaba geetettiya Yihudaanne Sillaasa dooridosona. <sup>23</sup> Dooridi hagaadan giya dabddaabbiyaa xaafidi, eta bolli kiittidosona; “Nuuni Yesuusi kiittidoogeenne cimati intte ishannti, Anxxookiyan, Sooriyaaninne Kilqqiyan de<sup>71</sup>iya Aihuda bagga gidenna ishanntussi nu sarotaa kiittoos.

<sup>24</sup> “Nuuni azazibeenna asati nu giddoppe biidi, ‘Intte qaxxarettanaunne higgiiyaa naaganau bessees’ giidi, inttena waissidoogaanne yiilloyidoogaa siyidi, <sup>25-26</sup> nu Godaa Yesuus Kiristtoosa sunntaa gishshau, bantta shemppuwaa olida nuuni siiqiyo Barnnaabaasaaranne PHauloosaara doorettida asata intteko kiittana issi wozanan nu qofaa qachchida. <sup>27</sup> Hegaa gishshau, nuuni xaafidoogaa eti bantta huuphen bantta doonan inttessi yootana mala, Yihudaanne Sillaasa kiittida.

<sup>28-29</sup> “Aissi giikko, eeqassi yarshshidobaa mooppite; suutta uyoppite; sulettida mehe asho mooppite; shaaramuxoppite. Ha koshshiyaageetuppe attin, hara tooho inttena toossenna mala, nuuninne Geeshsha Ayyaanai yohuwaa maayida; ha ubbabaappe intte huuphiyaa naagikko, intte lo<sup>77</sup>obaa ootteeta. Simmi saro de<sup>7ite</sup>” yaagidosona.

<sup>30</sup> Hegaa gishshau, kiittetidaageeti moisetidi, Anxxookiyaa wodhdhidi, ammaniya asaa shiishshidi, dabddaabbiyaa asaassi immidosona. <sup>31</sup> Eti he minttettiya dabddaabbiyaa nabbabido wode, ufaittidosona. <sup>32</sup> Qassi Yihudainne Sillaasi bantta huuphen hananabaa yootiyaageeta gidiyo gishshau, ishannta keehi zoridi minttettidosona. <sup>33</sup> Eti Anxxookiyan amarida gallassaa uttidoogaappe guyyiyan, ishannti sarotettan moissin, bantana kiittidaageetukko simmidosona. <sup>34</sup> SHin Sillaasee yaani attana ba qofaa qachchiis.

<sup>35</sup> Qassi PHauloosinne Barnnaabaasi hara daro asatuura issippe Godaa qaalaa tamarissiiddinne wonggeliiyaa mishiraachchuwaa yootiiddi, Anxxookiyan uttidosona.

### *PHauloosinne Barnnaabaasi SHaahettidosona*

<sup>36</sup> Amarida gallasaappe guyyiyan, PHauloosi Barnnaabaasa, “Nuuni Godaa qaalaa yootido katama ubban nu ishannti waanidi de<sup>71</sup>yaakko, guyye simmidi, xomoosi be<sup>70</sup>os” yaagiis. <sup>37</sup> Yaagin Barnnaabaasi Marqqoosa geetettiya Yohaannisa banttanaara efaana koyiis. <sup>38</sup> SHin PHauloosi Marqqoosa banttanaara efaana koyibeenna; aissi giikko, i etappe PHinifiliyan shaahettiis; qassi etaara oosuwau bibeenna. <sup>39</sup> Eta gidduwan pala ooshshai kiyin, issoi issuwaappe shaahettidosona; Barnnaabaasi Marqqoosa ekkidi, markkabiyan Qophphiroosa biis. <sup>40</sup> SHin PHauloosi Sillaasa doorin, ishannti a hadaraa Xoossaa aaro kehatettau immidoogaappe guyyiyan biis. <sup>41</sup> Yaatidi woosa keettata minttettiiddi, Sooriyaaranne Kilqqiyaara aadhhiis.



## 16

### *Ximootiyoosi PHauloosaaranne Sillaaseera Gaittiis*

<sup>1</sup> PHauloosi qassi Daribenne Lisxxira biis; hegan Ximootiyoosa giyo kaalliyaaagee, issi ammaniya Aihuda maccaasee na7ai de7ees; a aawai Giriike asa. <sup>2</sup> Lisxxiraaninne Iqooniyoonen de7iya ishannti Ximootiyoosabaa loittidi markkattidosona. <sup>3</sup> PHauloosi Ximootiyoosa banaara efaanau koyidi, a aawai Giriike asa gididoogaa he sohuwan de7iya Aihuda ubbai eriyo gishshau, a oiqqidi qaxxariis. <sup>4</sup> Eti katamatuura biiddi, Yesuusi kiittido Yerusalaamen de7iyaageetinne cimati wottido higgiiyaa ammaniyaageeti naagana mala, etassi yootiiddi aadhdhdidosona. <sup>5</sup> Hegaa gishshau, woosa keettati ammanuwan minnidi, goodankka gallassappe gallassan dari dari biidosona.

### *PHauloosi Maqidooniyaa Baanaadan Xeegettiis*

<sup>6</sup> Isiyan qaalaa yootenna mala, Geeshsha Ayyaanai eta diggido gishshau, Pirggiiyaa biittaaranne Galaatiyaa biittaara aadhdhdidosona. <sup>7</sup> Eti Miisiyaa zawaa gakkido wode, Biitaaniyaa baanau koyidosona; shin Yesuusa Ayyaanai eta diggiis. <sup>8</sup> Hegaa gishshau, eti Miisiyaa mataara aadhdhidi, Xiro7aada wodhdhdidosona. <sup>9</sup> PHauloosi qammi ajjuutan issi Maqidooniyaa asi bana, “Maqidooniyaa pinnada nuna maaddarkkii” yaagiiddi eqqidi woossishin be7iis. <sup>10</sup> Ajjuutaa i be7idoogaappe guyyiyan, nuuni sohuwaara Maqidooniyaa baanau koyida; aissi giikko, wonggeliyaa mishiraachchuwaa yaani de7iya asaassi yootanau, Xoossai nuna xeesidobaa nuuyyo milatiis.

### *Lidiyaa Kiristtoosan Ammanaasu*

<sup>11</sup> Hegaa gishshau, Xiro7aadappe denddidi, sitti giidi markkabiyan Saamootiraaqe biida; wonttetta gallassi Naaphphule biida. <sup>12</sup> Hegaappe Piliphphisiyuusa biida; Piliphphisiyuusi Maqidooniyaa biittau waanna katama; qassi Roome asai de7iyo katama; nuuni he kataman amarida gallassaa uttida.

<sup>13</sup> Sambbata gallassi, katamaappe gaxan shaafaa doonan Aihudati Xoossaa woossiyo sohoi de7iyoogaa akeekidi biida; biidi uttidi hegan shiiqida maccaasaassi qaalaa yootida.

<sup>14</sup> Issi Lidiyaa giyoora, Tiyaaxiroona katamaappe yaada Xoossaa ammaniyaara, zo7o afalaa baizziya maccaasiyaa, nuuni yootiyoogaa siyausu; PHauloosi yootiyoogaakka a siyana mala Xoossai i wozanaa dooyiis. <sup>15</sup> Lidiyaa ba so asaara issippe xammaqetti-doogaappe guyyiyan nuna, “Intte tana Godaa tumu ammanausu giidi qoppikko, ta sooni takkite” gaada woossaasu; minttada shoobbaasu.

### *Piliphphisiyuusa Kataman PHauloosinne Sillaasi Qashettidosona*

<sup>16</sup> Nuuni Xoossaa woossiyoosaa biishin, iita ayyaanai i bolli de7idi kaayissiyo issi aille na7iyaa nunaara gaittaasu; he na7iyaa kaayada daro miishshaa ba godatussi demmaasu. <sup>17</sup> Gaittada PHauloosanne nuna kaallaidda, “Hageeti inttessi attana ogiyaa yootiyaageeti, Ubbaappe Bolla Xoossaa ailleta” gaada qaalaa xoqqu oottada haasayaasu.

<sup>18</sup> Ubba gallassi hegaadan gausu; shin PHauloosi yiillotidi guyye simmidi, he iita ayyaanaa, “Neeni ippe kiyana mala Yesuus Kiristtoosa sunttan nena azazais” yaagiis; sohuwaarakka iita ayyaanai ippe kiyi aggiis.

<sup>19</sup> SHin i godati bantta miishshaa demmana ogee xayidoogaa be7idi, PHauloosanne Sillaasa oiqqidi, giyaa sohuwan de7iya daannatu sintti goochchidosona. <sup>20</sup> Daannatu sintti eta efiidi, “Hageeti Aihuda asa gidiiddi, nu katamaa asaa daro waissoosona. <sup>21</sup> Nuuni Roome biittaa asa gidiiddi, ekkanaunne oottanau woga gidennabaa tamaris-soosona” yaagidosona.

<sup>22</sup> Asai issi baggi gididi, PHauloosa bollinne Sillaasa bolli denddiis; daannatikka eta maayuwa qaaari ekkidi, gatiman eta shocana mala azazidosona. <sup>23</sup> Eta daro wadhdhidoogaappe guyyiyan, qasho keettan yeggidosona. Qasho keettaa naagiyaageekka eta mintti naaganaadan azazidosona. <sup>24</sup> Azazin qasho keettaa naagiyaagee he azazuwaa ekkidi, PHauloosanne Sillaasa qasho keettaassi qol77o gelissii; eta gediyaakka mitaara gatti daraxidi qachchiis.

<sup>25</sup> SHin qamma bilahе gidiyо heeran PHauloosinne Sillaasi Xoossaa woossiiddi, mazamuriyaa yettan Xoossaa galatoosona; galatishin qashuwaasai eti giyoobaa siyees. <sup>26</sup> Qasho keettaassi xaphoi qaaxxana gakkanaassi akeekennan biittai daro qaaxxiis; sohuwaarakka penggee ubbai dooyetti aggin, qashettida asa ubbaa sanssalatai birshshetti wodhdhiis. <sup>27</sup> Qasho keettaa naagiyaagee xiskkuwaappe beegottiyo wode, qasho keettaa penggee ubbai dooyettidaageeta be7idi, qashuwaasai kessi ekkidi biichchidobaa ayyo milatin, bana woranau qoppidi, bisuwaa ekkii. <sup>28</sup> SHin PHauloosi qaalaa xoqqu oottidi, “Neeni nena qohoppa; aissi giikko, nuuni ubbaikka hagan de7oos” yaagiis.

<sup>29</sup> Qasho keettaa naagiyaagee xomppiyaa woossi ekkidi, eesuwan qol77o woxxiis; kokkoriiddi PHauloosa sinttaaninne Sillaasa sinttan gufanniis; <sup>30</sup> eta kare kessidi, “Ta godaato, taani attanau ai oottana bessii?” yaagiis.

<sup>31</sup> PHauloosinne Sillaasi a, “Godaa Yesuus Kiristtoosa ammana; neeni attana; ne so asaikka” yaagidosona. <sup>32</sup> Eti ayyoonne a son de7iya ubbaassi Godaa qaalaa yootidosona. <sup>33</sup> Qammi he saatiyankka qasho keettaa naagiyaagee eta efidi eta masunntaa meecciis; sohuwaarakka ba so asaa ubbaara xammaqetti aggiis. <sup>34</sup> PHauloosanne Sillaasa pude ba soo efidi, etassi qumaa aattiis; i ba so asaa ubbaara Xoossaa ammanido gishshau, ufaiittiis.

<sup>35</sup> Wonttin daannati, “He asata birshsha” yaagidi, polise halaqata akko kiittidosona. <sup>36</sup> Kiittin qasho keettaa naagiyaagee, “Intte birshshettana mala, daannati tau kiittidosona; simmi ha77i kiyidi sarotettan biite” yaagidi he kiitaa PHauloosassi yootiis.

<sup>37</sup> SHin PHauloosi he polise halaqata, “Nuuni Roome biittaa asa gidishin, eti nuna pirddi bannan asaa sinttan wadhdhidi, qasho keettan yeggidosona. Ha77i nuna geeman kessi yeddiyoona? Hanenna; eti bantta huuphen yiidi, nuna kessona” yaagiis.

<sup>38</sup> Polise halaqati daannatussi heгаа yootin, PHauloosinne Sillaasi Roome biittaa asa gididoogaa siyido wode, yayyidosona. <sup>39</sup> Hегaa gishshau, daannati yiidi eta, “Nuuni inttena naaqqida” giidosona. Qasho keettaappe kare eta kessidi, katamaappe kiyidi baana mala woossidosona. <sup>40</sup> PHauloosinne Sillaasi qasho keettaappe kiyidi, Lidiyaa soo biidosona; yaani ishanntuura gaittidi, eta minttettidi hegaappe biidosona.

## 17

### *PHauloosa Do7oi Tasalongqen Tamaariisii*

<sup>1</sup> PHauloosinne Sillaasi, Ampipholiisaaranne Apholooniyaara aadhdhidi, Tasalongqee yiidosona; Tasalongqen Aihuda woosa keettai de7ees. <sup>2</sup> PHauloosi ba meeziyaadankka yaa geliis; hegan heezzu Sambbata gallassatun Xoossaa maxaafatuppe asaara haasayiis; <sup>3</sup> Kiristtoosi waayiyaa ekkanaunne haiquwaappe dendanau bessiyooгаа etassi birshshidi yootiiddinne tuma gididoogaakka eta erissiiddi, “Yesuusi ha taani intteyyo odiyooгee Kiristtoosa” yaagees. <sup>4</sup> Etappe issooti issooti yohoi tuma gididoogaa akeekidi, PHauloosaaranne Sillaaseera gaittidosona; heгаadankka, Xoossaassi goinniya daro Giriiketinne daro bonchchettida maccaasati, PHauloosaaranne Sillaaseera gaittidosona.

<sup>5</sup> SHin Aihudati qanaatidi, issi issi oosoi banna iita asata qocaappe shiishshidosona; shiishshidi katamaa asaa wocamissidosona; PHauloosanne Sillaasa asaakko kessana mala koyidi, Yaasoonaa keettaa menttidosona. <sup>6</sup> PHauloosinne Sillaasi etassi beettennan

ixxin, Yaasoonanne issi issi ishannta katamaa halaqatukko goochchidi, “Hageeti biitta ubbaa metoyidaageeti, hagaakka yiidosona. <sup>7</sup> Yin Yaasooni eta ba sooni wottiis; hageeti ubbai, ‘Yesuusa giyo hara kawoi de7ees’ giidi Qeesaara azazuwaa menttoosona” yaagidi, qaalaa xoqqissidi haasayidosona.

<sup>8</sup> SHiiqida asainne katamaa halaqati hegaa siyidi metootidosona. <sup>9</sup> Halaqati Yaasoonanne harata waasiyan birshshidosona.

### *PHauloosa Do7oi Beeriyaa Tamaariisii*

<sup>10</sup> Ammaniyaageeti PHauloosanne Sillaasa sa7ai qammiyoogan sohuwaara Beeriyaa yeddidosona. Beeriyaa gakkidi, Aihuda woosa keettaa gelidosona. <sup>11</sup> Beeriyaa asati Tasalonqqen de7iya asatuppekka aadhdhiya akeekanchcha gidido gishshau, “PHauloosi giidoogee tumakkonne” yaagidi, ubba gallassi Xoossaa maxaafata tamaariiddi, qaalaa kumetta laamotan ekkidosona. <sup>12</sup> Hegaa gishshau, etappe daroti, Giriiketuppe bonchchettida daro maccaasatinne daro attumaasati ammanidosona.

<sup>13</sup> SHin Tasalonqqen de7iya Aihudati PHauloosi Xoossaa qaalaa Beeriyankka yootidoogaa siyido wode, Beeriyaa yiidi, asaa aara ooshshidosona. <sup>14</sup> Hegaappe guyyiyan, ishannti sohuwaarakka PHauloosa abbaa mati yeddi aggidosona; shin Sillaasinne Ximootiyoosi Beeriyaa attidosona. <sup>15</sup> PHauloosa moissida asati Ateena gattidosona; he asati Sillaasinne Ximootiyoosi banttau danddayettidoogaadan, eesuan baakko yaana mala, PHauloosi kiittido kiitaa ekkidi, Beeriyaa simmidosona.

### *PHauloosi Ateeni Biis*

<sup>16</sup> PHauloosi Ateenan Sillaasanne Ximootiyoosa naagiiddi, kataman eeqai kumiidaagaa be7idi yiillotiis. <sup>17</sup> Hegaa gishshau, Aihuda woosa keettan Aihudatuuranne Xoossaassi goinniya Aihuda gidenna asatuura palamettees; qassi ubba gallassi giyan banaara gaittiya asaarakka palamettees. <sup>18</sup> Qassi Eppiqoroosappenne Isxxo7ikiyaappe yiida issi issi eranchchati PHauloosaara palamettidosona; etappe issoi issoi, “Ha toofinai ai haasayanau koyii?” yaagidosona.

Harati PHauloosi Yesuusabaanne haiquwaappe i denddidooogaa banttassi yootiyo gishshau, “Ooratta xoossatubaa odiyaaabaa milatees” yaagidosona.

<sup>19-20</sup> PHauloosa oiqqidi, “Ha neeni tamarisiiyo ooratta yohoi aibakkonne nuna erissarkkii? Aissi giikko, neeni nuuyyo oorattabaa yootaasa; simmi hagee Aibakko nuuni eranau koyoos” yaagidi PHauloosa Ariyosppaagoosa giyoosaa efidosona. <sup>21</sup> Ateena asai ubbainne hegan de7iya imattati oorattabaa haasayiiddinne siyiiddi pe7iyoogaappe attin, haraban pe7okkona.

<sup>22</sup> PHauloosi Ariyosppaagoosa sinttan eqqidi, hagaadan yaagiis; “Ateena asatoo, Xoossatussi ubbaban intte daro yayyiyoogaa taani be7ais. <sup>23</sup> Aissi giikko, taani intte goinniyoogaa xeellaidda aadhdhishin, ‘Erettenna Xoossaassi’ geetettidi xaafettida yarshshuwaa sohuwaa qassi demmaas; hegaa gishshau, ha intte erennan goinniyoogaa taani inttessi yootais.

<sup>24</sup> “Sa7aanne sa7an de7iya ubbabaa medhdhida Xoossai saluwaanne sa7aa Godai, asi keexxido Beeta Maqidasiyan de7enna. <sup>25</sup> Aibakko paccido asadan, asa kushe i xeellenna; aissi giikko, i ba huuphen de7uwaa shemppuwaanne ubbabaa asa ubbaassi immees. <sup>26</sup> Xoossai asa zare ubbaa issi uraappe medhdhidi, biitta ubban wottiis; i ba huuphen eti de7ana wodiyaanne sohuwaa kase zawayiis.

<sup>27</sup> “I hegaa oottidoogee eti oiqqi oiqqi xeellidi, bana koyiiddi, geelladan demmanddon-aashsha giyoogaana; gidikkonne, Xoossai nuuppe ooyyoonne haaho gidenna. <sup>28</sup> Aissi giikko, intteppe issi issi eranchchati, ‘Nuuni a naata’ giidoogaadan, nuuni aani paxa de7oosinne de7idi qaaxettoos. <sup>29</sup> Simmi nuuni Xoossaa naata gidido gishshau, Xoossai asa cinccatetaaninne qofan worqqappe woi birappe woi shuchchappe oosettidabaa milatees yaagidi, qoppanau bessenna. <sup>30</sup> Hegaa gishshau, Xoossai asai eribeenna

wodiyaa aattiis; shin ha77i ubbasan asai ubbai nagaraappe simmana mala azazees. <sup>31</sup> Aissi giikko, Xoossai gallassaa keeri wottiis; he gallasan ba doorido uran sa7an de7iya asa ubbaa bolli xillo pirddaa i pirddana; asa ubbaassi haiquwaappe a dentti-doogan hegaa tumayiis” yaagiis.

<sup>32</sup> Etappe issi issi asati haiquwaappe dendduwaabaa PHauloosappe siyidi, a bolli qilliiccidosona; shin harati a, “Nuuni haggaa neeppe gujjidi siyana koyoos” gididosona. <sup>33</sup> Hegaa gishshau, PHauloosi eta giddoppe kiyiis. <sup>34</sup> SHin issi issi attumaasati PHauloosaara gaittidi ammanidosona; eta gidduwan Ariyosppaagoosan de7iya pirdda keettaa daannai Diyoonaasiyoosi, Damaariiso giyo issi maccaasiyaanne harati de7oosona.

## 18

### *PHauloosi Qoronttoosa Biis*

<sup>1</sup> Hegaappe guyyiyan, PHauloosi Ateenappe kiyidi, Qoronttoosa biis. <sup>2</sup> Hegan Aqila giyo issi Aihuda asa demmiis; Aqili PHanxxoosan yelettiis; Aihuda asai ubbai Roomeppe kiyana mala, Qalaudeyoosi azazido gishshau, amarida wodiyaappe kase, i ba machchee PHirisqqiliira Xaaliyaappe yiis; yin PHauloosi etaara gaittanau biis. <sup>3</sup> A oosoinne eta oosoi issi mala dunkkaane siho gidiyo gishshau, etaara uttidi, issippe oottiis. <sup>4</sup> PHauloosi Sambbata ubban Aihudatanne Giriiketa ammanttanau Aihuda woosa keettan palamettees.

<sup>5</sup> Sillaasinne Ximootiyoosi Maqidooniyaappe yiido wode, PHauloosi Aihudatussi Yesuusi ba huuphen Kiristtoosa gididoogau qaalaa yootuwaa toliis. <sup>6</sup> SHin eti PHauloosa haasayaa phalqqiininne a cayin, PHauloosi ba maayuwaappe buhiyaa qoqqofiiddi, “Intte palai inttena oiqqo; taani hegan gelikke; hagaappe hini baggan taani Aihuda gidenna asaakko bais” yaagiis.

<sup>7</sup> Hegaappe kiyidi, Xoossaassi goinniya Yosxxoosa giyo bitaniyaa soo biis; Yosxxoosa keettaa Aihuda woosa keettaa lanqqiyan de7ees. <sup>8</sup> Aihuda woosa keettaa halaqai Qarisphphoosi ba so asaa ubbaara Godaa ammaniis; Qoronttoosa asatuppekka daroti Xoossaa qaalaa siyido wode, ammanidi xammaqettidosona.

<sup>9-10</sup> Godai issi qammi ajjuutan PHauloosa, “Yayyoppa; yoota; co77u gooppa. Taani nenaara de7iyo gishshau, nena qohanau iitaban yeggana asi ooninne baawa; aissi giikko, taassi ha kataman daro asai de7ees” yaagiis. <sup>11</sup> Yaagin PHauloosi Xoossaa qaalaa asaa tamarissiiddi, issi laittanne usuppun agina etaara uttiis.

<sup>12</sup> Gaaliyoosi Akaaiyaa biittaa haariyo wode, Aihudati issippe PHauloosa bolli denddidi, pirdda keettaa a efidosona. <sup>13</sup> Efidi, “Ha bitanee higgiiyaa ixixidi, asai Xoossaassi goinnana mala labees” yaagidosona.

<sup>14</sup> PHauloosi haasayana hanishin, Gaaliyoosi Aihudata, “Aihudatoo, hegee bala ooso woi iita naaqqo gidiyaakko, taani inttebaa danddayada siyanau bessees. <sup>15</sup> SHin qalassi sunttassinne intte huuphe higgiiyaassi intte palamettikko, intte huuphen erite; haggaa taani pirddikke” yaagiis. <sup>16</sup> Yaagidi pirdda keettaappe kare eta kessiis. <sup>17</sup> Hegaappe guyyiyan, Giriike asai ubbai Aihuda woosa keettaa halaqaa Sostteniisa oiqqidi, pirdda keettaa sinttan wadhdhidosa; shin Gaaliyoosa hegee ainne metibeenna.

### *PHauloosi Anxxookiyaa Biis*

<sup>18</sup> PHauloosi daro gallassaa Qoronttoosan uttidoogaappe guyyiyan, ishantta sarotidi, PHirisqqiliiranne Aqiilaara markkabiyan Sooriyaa biis; baassi shiiqo gatoi de7iyo gishshau, Kinkkiriyaa kataman ba huuphiyaa meedettiis. <sup>19</sup> Eti Efisoona gakkido wode, PHauloosi PHirisqqilonne Aqila yaani yeggiis; shin baayyo Aihuda woosa keettaa gelidi, Aihudatuura palamettiis. <sup>20</sup> Eti banttanaara daro wodiya uttanau PHauloosa woossin i ixxiis. <sup>21</sup> SHin etappe shaahettiiddi, “Taani yiya baala gallassaa Yerusalaamen bonchchanau bessees; shin Xoossai giikko, naa77anttuwaa inttekkoo simmana” yaagidi



Efisoonaappe markkabiyan biis. <sup>22</sup> Qiisaariyaa gakkido wode Yerusalaame biidi, woosa keettaa asaa sarotidoogaappe guyyiyan, Anxxookiyaa wodhdhiis.

<sup>23</sup> Yaani amarida wodiyaa gam77idi biis; kaalliyaaageeta ubbaa minttettiiddi, Galaatiyaaranne Pirggiyaara aadhdhiis.

### *Aphiloosi Efisoona Qoronttoosa Biis*

<sup>24</sup> Iskkinddiriyan yelettida Aihuda asa issi Aphiloosa giyo yoho eranchchai Efisoona biis; Xoossaa maxaafata i daro eriya asa. <sup>25</sup> Godaa ogiyaaakka tamarida asa; Yohaannisa xinqqatiyaa xalaalaa eridi, ayyaan mishettiiddi, Yesuusabaa sitti oottidi haasayeesinne tamarissee. <sup>26</sup> Yaatidi Aihuda woosa keettan yayyennan haasayaa doommiis. PHirisqqilanne Aqiili i yootiyogaa siyido wode, banttanaara soo a efidi, Xoossaa ogiyaa kaseppe sittayidi, ayyo geeshshidi yootidosona.

<sup>27</sup> Aphiloosi Akaayiyaa pinnana koyin, ishantti a minttettiiddi, Akaayiyann de7iya kaalliyaaageeti a mokkana mala, etassi dabddaabbiyaa xaafidosona; i yaa gakkidi, Xoossaa aaro kehatettan ammaniyaageeta daro maaddiis. <sup>28</sup> Aissi giikko, Yesuusi ba huuphen Kiristtoosa gididoogaa Aihudatussi Xoossaa maxaafatuppe qonccissidi, deriyaa sinttan minttidi yootees.

## 19

### *PHauloosi Efisoona Biis*

<sup>1</sup> Aphiloosi Qoronttoosan de7ishin, PHauloosi qommo baggaara aadhdhidi, Efisoona yiis; yiidi issi issi kaalliyaaageeta demmiis. <sup>2</sup> Eta, “Intte ammanido wode Geeshsha Ayyaanaa ekkidetii?” yaagidi oichchiis.

Oichchin eti, “CHii, ekkibookko; harai atto, Geeshsha Ayyaani de7iyooabaakka siyibookko” yaagidosona.

<sup>3</sup> PHauloosi eta, “Yaatin, Aibin xammaqettidetii?” yaagiis.

Eti, “Nuuni Yohaannisa xinqqatiyan xammaqettida” yaagidi zaaridosona.

<sup>4</sup> PHauloosi, “Yohaannisi baappe guyyiyan yiya Yesuus Kiristtoosan asai ammanana mala, asaassi yootiiddi, nagaraappe simmiyo xinqqatiyan xammaqiis” yaagiis.

<sup>5</sup> Eti hegaa siyido wode, Godaa Yesuus Kiristtoosa sunttan xammaqettidosona.

<sup>6</sup> PHauloosi ba kushiyaa eta bolli wottido wode Geeshsha Ayyaanai eta bolli wodhdhin, dumma dumma qaalan haasayidosona; qassi hananabaakka yootidosona. <sup>7</sup> Hegan ubbaara tammanne naa77u asata gidiyaageeti de7oosona.

<sup>8</sup> PHauloosi Aihuda woosa keettaa gelidi, Xoossaa kawotettaabaa palamettiiddinne akeekissiiddi, asaara heezzu agina gidiyaagaa keenaa yayyennan haasayees. <sup>9</sup> SHin etappe issoi issoi makkalidi, daro asaa sinttan Godaa ogiyaa cayiiddi ammanennan ixxin, PHauloosi etappe shaahettidi, ba kaalliyaaageeta banaara efii; Xiraanoosa giyo tamaare keettan ubba gallassi palamettees. <sup>10</sup> PHauloosi naa77u laitta gakkanaassi qaalaa yootiis; hegaa gishshau, Isiyan de7iya asai ubbai, Aihudatikka Aihuda giden-naageetikka Godaa qaalaa siyidosona.

### *Xoossai PHauloosa Kushiyan Bessido Oorattabaa*

<sup>11</sup> Xoossai PHauloosa baggaara ooratta malaataa oottiis. <sup>12</sup> Hegaa gishshau, asai a bollai bochchido maarabiyaa woi maayuwaa hargganchchatussi efees; efin hargganchchatikka paxoosona; iita ayyaanatikka etappe kiyooosona.

<sup>13</sup> Iita ayyaanata kessiiddi yuuyiya Aihudatussi issoi issoi, “PHauloosi qaalaa yootiyo Yesuusa sunttan nuuni inttena kiyite giidi azazooos” yaagi yaagidi, iita ayyaanati de7iyo asatu bollan Godaa Yesuusa sunttaa xeesi be7idosona. <sup>14</sup> Qeese halaqaa Asqqeewa giyo issi Aihudaassi hegaa oottida laappun naati de7oosona.

<sup>15</sup> Iita ayyaanai etassi zaaridi, “Taani Yesuusa erais; PHauloosakka erais. SHin intte oonee?” yaagiis.



<sup>16</sup> Iita ayyaanai de7iyo bitanee eta bolli guppi wodhdhin, eti masunxxidi, he keet-taappe kallo baqatana gakkanaas, wolqqaamidi xooniis. <sup>17</sup> Efisoonan de7iia Aihudatinne Aihuda gidennaageeti ubbai hegaa siyidosona; siyidi ubbaikka daro yayyidosona; Godaa Yesuusa sunttaikka daro bonchchettiiis. <sup>18</sup> Ammaniyaageetuppe daro asati bantta oottidobaa paaxiiddinne qoncciyaa yootiiddi yoosona. <sup>19</sup> Bitiyaageetuppe daroti bantta maxaafata shiishshidi, asaa ubbaa sinttan xuuggidosona; he maxaafatu waagaa qoodiyo wode, ishatamu sha7u bira gidiis. <sup>20</sup> Hegaa mala wolqqaama ogiyan Xoossaa qaalai dicceesinne aakkees.

### *Efisoona Kataman Wocamai Denddiis*

<sup>21</sup> Hegee polettidoogaappe guyyiyan PHauloosi, “Taani Yerusalaame baada Roomekka qassi be7anau bessees” yaagidi, Maqidooniyaaranne Akaayiyaara aadhdhidi, Yerusalaame baanau qofaa qachchiis. <sup>22</sup> Qassi bana maaddiyaageetuppe naa77ata Ximootiyoosanne Erasxxoosa Maqidooniya kiittidi, bau Isiyan amarida wodiya takkiis.

<sup>23</sup> Godaa ogiyaa gishshau, he wode daro wocamai kiyiis. <sup>24</sup> Aissi giikko, biraa tigiya Dimexiroosa giyo issi bitanee Arxxemiisi Beeta Maqidasiyaa misiliyaa biraappe tigi tigi, oosanchchatussi daro woriyaa demmees. <sup>25</sup> Hegeetanne etaagaa mala oosuwaa oottiyaageeta issippe shiishshidi, hagaadan yaagiis; “Asau, nu duretetai ha oosuwaana gidiyogaa intte ereeta. <sup>26</sup> Hegee PHauloosi, ‘Asa kushee oottidoogeeti xoossata gidokkona’ yaagidi, Efisoona xalaalan gidennan amarida biittatuppe attin, Isiyan ubban daro asaassi odi maizzidoogaanne balettidoogaa intte be7idetanne siyideta. <sup>27</sup> Palabai, nu oosoi karettanaagaa xalaala gidenna; shin Isiyan de7iia ubbatinne sa7a ubban de7iyaageeti goinniyo gita Xoossee Arxxemiisi Beeta Maqidasee bonchchettennan attanaagaanne, i gitattaikka kunddanaagaa” yaagiis.

<sup>28</sup> Asai hegaa siyido wode hanqquwaa xuuqqidi, “Efisoona Arxxemiisa gita” yaagidi wocamiis. <sup>29</sup> Katama ubban wocamai denddiis; PHauloosaara hemettiya Maqidooniya asata Gaayoosanne Arisxxirokoosa banttanaara oiqqi ekkidi, issippe kaassaa sohuwaa woxxidosona. <sup>30</sup> PHauloosikka asai shiiqidosa gelana koyiis. SHin kaalliyaageeti a diggidosona. <sup>31</sup> Isiyaa biittaa halaqatuppe PHauloosa lagge gidiya issoi issoi PHauloosau kiittidi, kaassaa sohuwan qoncciyaa kiyidi i beettenna mala, a woossidosona.

<sup>32</sup> SHiiquwan wocamai denddin, dariya bagga asai harai atto aissi shiiqidaakkonne erenna gishshau, issoi issibau wocamiyo wode, hinkkoi harabau wocamees. <sup>33</sup> Aihudati Iskkinddira aatti bessin, issi issi asai i haasayana mala, asaa giddoppe sinttau a aattiis; aattin asai co77u gaana mala, i ba kushiyan malaati bessidi, asaassi mootettanau koyiis. <sup>34</sup> SHin Iskkinddiri Aihuda asa gididoogaa asai erido wode, naa77u saate gidiyaagaa keenaa ubbai issi qaalan, “Efisoona Arxxemiisa gita” yaagidi wocamiis.

<sup>35</sup> Katamaa xaafee asaa co77u oottidi, hagaadan yaagiis; “Efisoona asau, Efisoona katamai gita Arxxemiisissinne saluwaappe wodhdhida eeqa shuchchaassi eeqa keettaa naagiyaagaa gididoogaa erenna asi oonee? <sup>36</sup> Hagaa kashi giya asi bannaashin, intte woppu gaanaanne dirbbennan agganau bessees. <sup>37</sup> Aissi giikko, hageeti Beeta Maqidasiyaa miishshaa wuuqqibeennaageeta nu Xoossata akka cayibeennaageeta ehiideta. <sup>38</sup> Hegaa gishshau, Dimexiroosinne aara de7iia oosanchchati asa mootanau koyikko, pirdda keetta dooya de7ees; qassi deriyaa haariyaageetikka de7oosona; eti bantta gidon mootetona. <sup>39</sup> SHin intte hara yoho koyikko, higgiiyaa yaa7an yohuwaa qachchana. <sup>40</sup> Aissi giikko, hachchi hanidabaa shabbiretta giidi, Roome biittaa asati nuna mootana; ha shiiquwaukka gaasoi banna gishshau, nuuni gaaso odanau danddayokko” <sup>41</sup> yaagidi yaa7aa denttiis.

## 20

### *PHauloosi Maqidooniyaanne Giriike Biis*

<sup>1</sup> Wocamai irxxidoogaappe guyyiyan, PHauloosi kaalliyaageeta ehiissidi zoriis; eta, “Saro de7ite” giidi, Maqidooniya baanau kiyiis. <sup>2</sup> He biittaara aadhdhiiddi, qaalaa yootidi, asaa daro minttettidoogaappe guyyiyan, Giriike biittaa yiis. <sup>3</sup> I hegan heezzu agina uttidi, markkabiyan Sooriyaa baanau qoppishin, Aihudati bana woranau koyiyoogaa be7idi, Maqidooniyaara guyye simmanau ba qofaa qachchiis.

<sup>4</sup> PHauloosa moissidaageeti, Beeriyaappe PHarihaasa na7aa Sosiiphaaxiroosa, Tasa-longqeppe Arisxxirokoosanne Sikonddisa, Daribeppe Gaayoosanne Isiyaappe Tikiqoosanne Xirofiimoosa, qassi Ximootiyoosa. <sup>5</sup> Hegeeti sinttau biidi, nuna Xiro7aadan naagoosona. <sup>6</sup> Nuuni Oittaa Baalaa gallassaa bonchchidoogaappe guyyiyan, Piliphphisiyuusappe markkabiyan denddidi, ichchashu gallassan Xiro7aadan eta gakkidi, yaani laappun gallassaa uttida.

### *PHauloosi Wurssetta Xomoosuwaa Xiro7aada Xomoosiis*

<sup>7</sup> Nuuni Woggaa gallassi oittaa menttanau shiiqidaashin, PHauloosi wonttin baanau qoppido gishshau, etassi qaalaa yootiiddi, qammi bilahe gakkanaassi yohuwaa adus-siis. <sup>8</sup> Nuuni shiiqi uttido pooqiyan daro xompee de7ees. <sup>9</sup> Euxikoosa giyo issi wodallai maskkootiyaa bolli uttidi, keehi xiskkiis; PHauloosi haasayaa adussido wode, Euxikoosi xiskkuwan kairidaagee heezzantto pooqiyaappe sa7an kunddidi haiqqidaagaa asai denttiis. <sup>10</sup> SHin PHauloosi wodhdhidi, a bolli gufanniis; a qoommidi, “A shemppoi kiyibeenna gishshau hirgoppite” yaagiis. <sup>11</sup> Yaagidi pude pooqiya kiyidi, oittaa menttidi miis; sa7ai wonttana gakkanaas, daro wodiya haasayidoogaappe guyyiyan biis. <sup>12</sup> Wodallai paxin, soo efidi, daro ufaittidosona.

### *PHauloosi Xiro7aadappe Miliixe Biis*

<sup>13</sup> SHin PHauloosi bana yaappe nuuni mokkana mala, nuussi yootido gishshau, kasetidi markkabiyaakko biidi, Asoosa baanau denddida; aissi giikko, tohuwan baanau i qoppido gishshau nuna hegaadan azaziis. <sup>14</sup> I nunaara Asoosan gaittin, markkabiyan a ekkidi mixiliine yiida. <sup>15</sup> Wonttetta gallassi yaappe markkabiyan denddidi, kiiyo sintti gakkida; qassi wonttetta gallassi Saamoosa pinnida; Tirogiliyoomen aqidi, wonttin Miliixe yiida. <sup>16</sup> Aissi giikko, PHauloosi Isiyan daro gam77ennan Efisoona lanqqiyaara aadhdhanau ba qofaa qachchiis; bau danddayettikko, PHenxxaqosxxe giyo gallassi Yerusalame gakkanau eesotees.

### *PHauloosi Efisoona Cimatuyyo Moissettiyo Haasayaa Haasayiis*

<sup>17</sup> PHauloosi Miliixeppe Efisoona kiittidi, woosa keettaa cimata xegissiis. <sup>18-19</sup> Woosa keettaa cimati PHauloosakko yin, eta i hagaadan yaagiis; “Taani Isiyaa gelido koiro gallassaappe doommin, kaushsha ubbaaranne daro afuttaara Godaassi oot-taidda, Aihudatu yaa7aappe tana gakkida paace wode ubban inttenaara waanada de7idaakko intte ereeta. <sup>20-21</sup> Nagaraappe Xoossaakko simmiyoogaanne nu Godaa Yesuus Kiristtoosa ammaniyoogaa Aihudatussinne Aihuda gidennaageetussi markkat-taidda, yaa7ankka intte keettan keettankka inttessi yootada tamaarissidoogaappe attin, inttena go77iyaabaappe issibaanne pacissabeikke.

<sup>22</sup> “Be7ite; ha77ikka taani Geeshsha Ayyaanaassi azazettada, Yerusalame bais; yaani tau aibi kiyanaakkonne erikke. <sup>23</sup> Geeshsha Ayyaanai qashoinne waayee tana naagiyoogaa katama ubban tau yootees. <sup>24</sup> SHin ta wottaa polanaunne Godaa Yesuus Kiristtoosappe taani ekkido oosuwaa Xoossaa aaro kehatettaa wonggeliyaa mishiraachchuwaa markkattiyoogaa polanau, ta shemppuwaa pattennabaadan qoodais.

<sup>25</sup> “Be7ite; taani ha77ikka Xoossaa kawotettaabaa yootaidda, intte ubbaa gidon yuuyaas; simmi hagaappe sinttan intteppe ooninne tana be7ennaagaa erais. <sup>26</sup> Hegaa

gishshau, intteppe issi urai bayikkokka taani hegan gelennaagaa hachchi intteyyo geeshshada yootais. <sup>27</sup> Aissi giikko, Xoossai oottanau qoppidobaa ubbaa intteyyo ainne ashshennan yootaas.

<sup>28</sup> “Yesuusi ba suuttan wozido Xoossaa woosa keettaa naagite; qassi Geeshsha Ayyaanai inttena halaqa oottidi sunttido wude ubbaakka intte huuphiyaakka naagite. <sup>29-30</sup> Taani biidoogaappe guyyiyan, wudiyaassi qarettena iita wanggireelloti intte giddo gelanaagaanne, kaalliyaageetakka bantta geeduwaa kaalettanau wordduwaa haasayiya asati intte giddoppe denddanaagaa erais. <sup>31</sup> Hegaa gishshau, taani heezzu laittaa qamminne gallassi afuttan inttena huuphiyan huuphiyan minttettiyoogaa ag-gabeennaagaa qoppidi gencite.

<sup>32</sup> “Ha77ikka inttena minttanaunne geeshsha asa ubbaa gidдон laatissanau dand-dayiya Xoossaassinne a aaro kehatettaa qaalaassi inttena hadaraa immais.

<sup>33</sup> “Taani ooppenne bira woi worqqa woi afala amottabeikke; <sup>34</sup> taani ha ta kushiyan tananne tanaara issippe de7iyaageeta koshshidabaa oottidoogaa intte intte huuphen ereeta. <sup>35</sup> Intte hagaadan daafuridi oottiiddi, daafuranchchata maaddanaassinne Godaa Yesuusi ba huuphen, ‘Ekkiyaagaappe immiyaagee anjettidaagaa’ giidoogaadan, a qaalaa intte haasayanau bessiyooogaa taani ubban inttena bessaas” yaagiis.

<sup>36</sup> PHauloosi heгаа haasayi wurssidi, eta ubbaara issippe gulbbatidi, Xoossaa woos-siis. <sup>37</sup> Eti ubbaikka PHauloosa qoommidi, yeekkiiddi yeridosona. <sup>38</sup> Ubbaappe i, “Tana naa77anttuwaa mulekka be7ekketa” yaagido qaalai eta daro qarettiis; qarettin markkabiya gakkanaassi a moissidosona.

## 21

### *PHauloosi Yerusalaame Biis*

<sup>1</sup> Nuuni Efisoona cimatuppe shaahettidi, sitti giidi Qoose yiida; wonttetta gallassi Rooda gakkida; hegaappe PHaaxira biida. <sup>2</sup> Biidi Pinqqe pinniya markkabiya dem-midi, aani gelidi baanau denddida. <sup>3</sup> Nuuni Qophphiroosappe be7anau danddayiy-oosaa yiidi, arshsho xeelliyo wode Qophphiroosa haddirssa baggi yeggidi, Sooriyaa biida; biidi Xiirrosaa gakkida; aissi giikko, markkabee ba caanaa Xiirrosan wot-tees. <sup>4</sup> Yaani kaalliyaageeta demmidi, etaara laappun gallassaa uttida; PHauloosi Yerusalaame beenna mala, eti au Ayyaanan yootidosona. <sup>5</sup> Nuuni etaara uttiyo wodee wurin, kiyidi biida; eti ubbati bantta maccaasatuuranne bantta naatuura is-sippe katamaappe gaxi kessana gakkanaas, nuna moissidosona; moissin nuuni abbaa doonan gulbbatidi, Xoossaa woossida. <sup>6</sup> Hegaappe guyyiyan, issoi issuwaa sarotidi, markkabiyan gelida; etinne bantta soo simmidosona.

<sup>7</sup> Nuuni abbaa ogiyaa wurssidi, Xiirrosappe PHexelemaise gakkida; ishantta saroti-iddi, eta matan issi gallassaa pe7ida. <sup>8</sup> Wonttetta gallassi kiyidi, Qiisaariyaa biida; wonggeliyaa mishiraachchuwaa yootiya Piliphphoosa soo gakkidi, a matan uttida; Yerusalaamen doorettida laappunatuppe i issuwaa. <sup>9</sup> Piliphphoosassi hananabaa yootiya oiddu geela7o naati de7oosona.

<sup>10</sup> Nuuni unddena gallassaa uttidaashin, hananabaa yootiya issi Agaaboosa giyo bitanee Yihudaappe Qiisaariyaa yiis. <sup>11</sup> Nuukko yiidi, PHauloosa qabattuwwa ekkinnee ba kushiyaanne ba tohuwaa qachchidi, “Geeshsha Ayyaanai giyoogee haggaa; ha qa-battuwwa godaa Yerusalaamen Aihudati hagaadan qachchidi, Aihuda gidenna asatussi aattidi immana” yaagiis.

<sup>12</sup> Nuuni heгаа hegyido wode, nuuninne yaani de7iya asati PHauloosi Yerusalaame beenna mala woossida. <sup>13</sup> SHin PHauloosi zaaridi, “Intte yeekkiiddinne ta wozanaa qaretissiiddi waaneetii? Taani Godaa Yesuusa sunttaa gishshau qashettanaagaa xalaala gidennan, harai atto Yerusalaamen haiqqanaukka giiga uttaas” yaagiis.

<sup>14</sup> Zoriyaa i ekkennan ixxin, “Godai giidoogee hano” yaagidi co77u giida.

<sup>15</sup> Yaani amarida wodiya gam77idoogaappe guyyiyan, gigettidi Yerusalaame baanau kiyida. <sup>16</sup> Qiisaariyan de7iya kaalliyaageetuppe amaridaageeti qassi nunaara biidosona; eti nuuni aqanasaa Minaasoona giyo Qophphiroosa bitaniyaa soo nuna efidosona; Minaasooni daro wodiyaappe doommidi kaalliyaagaa.

### *PHauloosi Yerusalaamen Yaaqooba Xomoosiis*

<sup>17</sup> Nuuni Yerusalaame gakkido wode, ishantti nuna ufaissan mokkidosona. <sup>18</sup> Wonttetta gallassi, PHauloosinne nuuni Yaaqoobaara gaittanau biida. Woosa keettaa cimati ubbatikka de7oosona. <sup>19</sup> PHauloosi eta sarotidoogaappe guyyiyan, Aihuda gidenna asaa giddon ba baggaara Xoossai oottidobaa etassi wurssidi yootiis.

<sup>20</sup> Eti hegaa siyido wode Xoossaa galatidi, PHauloosa hagaadan yaagidosona; “Nu ishau, Aihudatu giddon Xoossaa ammanidaageetuppe aappun sha7ai de7iyaakko be7aasa; eti ubbaikka higgiiyaa mintti naagoosona. <sup>21</sup> Yerusalaame Aihudati, Aihuda gidennaageetu biittan de7iya Aihuda ubbati bantta naata qaxxarena mala, woi Aihudatu meeziyaa kaallenna mala, Muuse higgiiyaakka moorana mala neeni tamaris-siyooгаа siyidosona. <sup>22</sup> Yaatin, aibi kehee? Neeni yiidoogaa daroti siyiyo gishshau, shiiqennan aggokkona.

<sup>23</sup> “Hegaa gishshau, haga nuuni neessi yootiyoogaa ootta; shiiqoi de7iyo oiddu asati nu matan de7oosona. <sup>24</sup> Eta ekkada etaara geeya; qassi eti bantta huuphiyaa meedet-tana mala, etassi miishsha imma; eti ubbai nebaa siyidoogee tuma gidennaagaanne neeni ne huuphenkka qassi higgiiyaa naagaidda maaran de7iyoogaa erana.

<sup>25</sup> “SHin ammanida Aihuda gidenna asata gidikko, eti eeqassi yarshshidobaa meenna malanne suutta uyenna mala, sulettida mehe asho meenna malanne shaaramuxenna mala, nuuni yohuwaa qachchidi, etau dabddaabbiyaa xaafida” yaagidosona.

<sup>26</sup> Hegaappe guyyiyan, PHauloosi wonttetta gallassi asata ekkidi, etaara geeyiis; i bantta geeshshaa ai gallassi poliyaakko erissanau qassi yarshshuwaa huuphiyan huuphiyan aude immanaakko erissanau Beeta Maqidasiyaa geliis.

### *PHauloosi Beeta Maqidasiyan Oiqettiis*

<sup>27-28</sup> Laappun gallassai wurana hanishin, Isiyaappe yiida Aihudati Beeta Maqidasiyan PHauloosa be7idi, asa ubbaa hanqquetissidi, “Israa7eela asau, nuna maaddite; Israa7eela asaa, Muuse higgiiyaanne ha Beeta Maqidasiyaa ixixidi, ubbasan asa ubbaa tamaris-siyaagee ha bitaniyaa; gujjidi qassi Giriiketakka Beeta Maqidasiyaa gelissidi, ha geeshsha sohuwaa tunissiiis” yaagidi wocamiiddi, PHauloosa oiqqidosona. <sup>29</sup> Eti kase Efisoona de7iya Xirofimoosa PHauloosaara kataman be7ido gishshau, Beeta Maqidasiyaa PHauloosi a gelissidobaa etayyo milatiis.

<sup>30</sup> Katama ubbai shabbirettiis; asai ubbai shiiqidi PHauloosa oiqqidi, Beeta Maqidasiyaappe kare goochchiis; sohuwaarakka Beeta Maqidasiyaa penggeti gorddetti aggidosona. <sup>31</sup> Asai PHauloosa worana hanishin, “Yerusalaame katamai mulekka shabbirettiichchiis” giyo odoi shaalaqaakko gakkiiis. <sup>32</sup> Gakkin shaalaqai wotaaddaratanne mato halaqata issippe ekkidi, woxxiiddi asaa bolli kiyi wodhdhiis; asai shaalaqaanne wotaaddarata be7ido wode, PHauloosa wadhdhiyoogaa aggi bayiis.

<sup>33</sup> He wode, shaalaqai shiiqidi, PHauloosa oiqqidi, naa77u sanssalatan qashettana mala azazidi, i oonakkonne qassi ai oottidaakkonne asaa oichchiis. <sup>34</sup> Asaappe baggai issibaa wocamiyo wode, baggai harabaa wocamees; wocamai darido gishshau, shaalaqaassi tumaa eranau danddayettennan ixxin, wotaaddarati PHauloosa bantta de7iyoosaa efaana mala, eta azaziis. <sup>35</sup> Yedhdhidi kiyiyoosaa PHauloosi gakkido wode, asaa sugettaa gishshau, wotaaddarati a tookkidosona. <sup>36</sup> Aissi giikko, daro asai, “A wora!” yaagiiddinne wocamiiddi kaallees.

### *PHauloosi Mootuwaassi Zaruwaa Haasayiis*



<sup>37</sup> Wotaaddarati PHauloosa bantta de7iyooosaa efaana hanishin PHauloosi shaalaqaa, “Taani neessi issibaa odoo?” yaagiis.

Yaagin shaalaqai PHauloosa, “Neeni Giriike qaala erai? <sup>38</sup> Neeni hagaappe kase wode, ooshshaa kessada shemppo woridaageetuppe oiddu sha7u asata bazzo kaalet-tida Gibxxe bitaniyaa gidikkii?” yaagiis.

<sup>39</sup> SHin PHauloosi, “Taani Aihuda asa; qassi Kilqqiyan de7iya Xarsseesen yelettida waanna kataman de7iya asa. Hayyanaa tana asaassi haasayissarkkii?” yaagiis.

<sup>40</sup> SHaalaqai a, “Haasaya” yaagin, PHauloosi yedhdhidi kiyiyoosan eqqidi, asai co77u gaana mala, ba kushiyan asaakko malaatiis. Asai co77u gin, Ibraisxxe qaalaa haasay-iddi, hagaadan yaagiis.

## 22

<sup>1</sup> “Ta ishato, ta aawato, taani ha77i inttessi yootiyo yohuwaa siyite” <sup>2</sup> PHauloosi etassi Ibraisxxe qaalaa haasayiyooogaa siyidi, kaseppe keehi co77u giidosona. Gin i hagaadan yaagiis.

<sup>3</sup> “Taani Kilqqiyan de7iya Xarsseesen yelettada, ha kataman Gamaaliyaali tana tamarissin diccada, nu aawatu higgiaakka mintta tamarada, hachchi intte ub-bai haniyoogaadankka, taani Xoossaa yohuwaassi mishettiya Aihuda asa. <sup>4</sup> Taani maccaasaa attumaasaa oiqa oiqqada qasho keettan yeggida asanne, ha ogiyaa kaal-liya asaa worissana gakkanaas tuggayida asa. <sup>5</sup> Hegaadankka, qassi, qeese ubbatu halaqainne cima ubbaa yaa7ai tabaa markkattanau danddayees; taani Damasqqon de7iya eta ishanttussi Aihudatussi, etappe dabddaabbiyaa ekkada, hegan de7iya asati qashettidi qaxxayettanaadan, Yerusalaame eta ehaanau yaa baas.

### *PHauloosi Kiristtoosakko Simmido Simettaabaa Odiis (Yesuusi Kiittidoogeeu Oosuwaa 9:1-19; 26:12-18)*

<sup>6</sup> “Taani baada Damasqqo matido wode, seeta gallassa gidishin, qoppennan saluwaappe gita poo7oi ta matan yuuyi aadhdhidi poo7iis. <sup>7</sup> Taani sa7an kundda uttada, ‘Saa7oolaa, Saa7oolaa, tana aissi waissai?’ giya qaala siyaas.

<sup>8</sup> “Taani zaarada, ‘Ta Godau, neeni oonee?’ yaagaas.

“Yaagin, ‘Taani neeni waissiyo Naazireeta Yesuusa’ yaagiis. <sup>9</sup> Tanaara issippe de7iyaageeti poo7uwaa be7idi yayyidosona; shin taassi haasayiyaagaa qaala siyi-bookkona.

<sup>10</sup> “ ‘Ta Godau, taani ai oottoo?’ yaagaas.

“Godai tana, ‘Denddada Damasqqo ba. Neeni oottanau Xoossai qoppido ubbabai neeyyo yaani odettana’ yaagiis. <sup>11</sup> He wolqqaama poo7uwaa gishshau, ta aifee qooqin, tanaara de7iya asati ta kushiya oiqqidi, tana goochchin, Damasqqo gakkaas.

<sup>12</sup> “Damasqqon de7iya Aihuda ubbai daro bonchchiyo issi Hanaaniyaa giyo bitanee, nu higgiaassi azazettidi, Xoossaa minttidi woossiyaagee de7ees. <sup>13</sup> Hanaanee taakko yiidi, ta matan eqqidi tana, ‘Ta ishau Saa7oolaa, xeella’ yaagiis. Taanne he wode sohuwaarakka akko xeella aggaas.

<sup>14</sup> “Xeellin i tana hagaadan yaagiis; ‘Nu aawatu Godai neeni a qofaa eranau, a xillo Na7aa be7anaanne a doonaappekka haasayaa siyanau nena kase dooriis. <sup>15</sup> Aissi gi-ikko, neeni be7idobaanne siyidobaa asa ubbaa sinttan ayyo markkattana. <sup>16</sup> Ha77ikka aissi gam77ai? Denddada xammaqetta; a sunntaa xeesaidda, ne nagaraappekka meecetta’ yaagiis.

<sup>17</sup> “Taani guyye Yerusalaame simmada Beeta Maqidasiyan woossishin, taassi ajjuutai beettiis. <sup>18</sup> Ajjuutan Godai tana, ‘Eesotada, Yerusalaame elle kiya; aissi giikko, neeni taassi hagan markkattiyooogaa asai ekkenna’ yaagishin taani a be7aas.



19 “Taani, ‘Ta Godau, Aihuda woosa keetta ubban nena ammaniyaageeta oiqqada wadhdhidoogaanne qasho keettan yeggidoogaa eti eroosona. 20 Eti ne markkaa Isxxi-faanoosa woriyo wode, taani he yohuwaa maayaas. Qassi eta lanqqiyan eqqada, a woriyaageetu maayuwaa naagais’ yaagaas.

21 “Godai tana, ‘Taani nena Aihuda gidenna asaakko haahosaa kiittiyo gishshau ba’ yaagiis” yaagiis.

### *PHauloosi Roome Asa Gidiyoogaa Qonccissiis*

22 PHauloosi he qaalaa haasayana gakkanaassi asai i giyoogaa ezggees; hegaappe guyyiyan, bantta qaalaa xoqqu oottidi, “Hagaa biittaappe xaissa; i de7anau bessenna” yaagidosona.

23-24 Eti wocamishin, bantta maayuwaa bollau olishiininne baanaa carckuwan laalishin, shaalaqai wotaaddarati PHauloosa bantta de7iyoosaa efaana mala azaziis. Qassi asai aissi hegaadan wocamidaakko eranau, PHauloosa lissuwan garafiiddi qorana mala, eta azaziis. 25 SHin wotaaddarati PHauloosa dafuwan mintti qachchido wode, PHauloosi ba matan eqqida mato halaqaa, “Roome katamaa asa pirddi bainnan wadhdhiyoogee inttessi higgee?” yaagiis.

26 Hegaa mato halaqai siyido wode, shaalaqaakko biidi, “Ha bitanee Roome asa. Neeni ai oottana qoppai?” yaagidi oichchiis.

27 SHAalaqai PHauloosakko shiiqidi, “Neeni Roome asee? Tau yoota” yaagiis.

Yaagin PHauloosi, “Ee” yaagiis.

28 SHAalaqai PHauloosassi zaaridi, “Taani ha zaretettaa daro miishshan shammaas” yaagiis.

SHin PHauloosi, “Taani he zarettaappe yelettaas” yaagiis.

29 Hegaa gishshau, PHauloosa qoranau qoppidaageeti sohuwaara appe shaahetti aggidosona. SHAalaqaikka PHauloosi Roome asa gididoogaa erido wode yayyiis; aissi giikko, sanssalatan a qashissi wottiis.

### *PHauloosi Aihudatu SHangguwaa SHiiqiis*

30 Wonttetta gallassi shaalaqai, Aihudati PHauloosa aissi mootidaakkonne geeshshidi eranau koyidi, PHauloosa birshshiis. Birshshidi qeese halaqatinne yaa7ai ubbai shiiqana mala azaziis; qassi PHauloosa duge wottidi, eta sinttan essiis.

## 23

1 PHauloosi yaa7aa tishshi ootti xeellidi, “Ta ishato, taani hachchi gakkanaassikka Xoossaa sinttan ta de7o ubban lo77o zoriya wozanan de7aas” yaagiis. 2 Qeese ubbatu halaqai Hanaanee, PHauloosa doonaa baqqana mala, a matan eqqidaageeta azaziis. 3 PHauloosi he wode a, “Laa ha aannuwan tiyido godau, Xoossaikka nena baqqana. Neeni ta bolli higgiiyan pirddanau uttada, higgee bainnan tana baqqana mala azazai?” yaagiis.

4 PHauloosa matan eqqidaageeti a, “Neeni Xoossaa qeese ubbatu halaqaa cayai?” yaagidosona.

5 Yaagin PHauloosi, “Ta ishato, i qeese ubbatu halaqa gididoogaa taani erabeikke; aissi giikko, ‘Ne deriyaa haariyaagaa bolli iita qaalaa haasayoppa’ geetettidi Xoossaa maxaafan xaafettiis” yaagiis.

6 SHin PHauloosi baggati Saaduqaaweta; baggati Parisaaweta gididoogaa be7idi, “Ta ishato, taani Parisaawenne Parisaawiyaa na7aa; ‘Haiqqidaageeti haiquwaappe denddana’ gaada taani ufaissan naagiyo gishshau, eti ta bolli pirddoosona” yaagidi, xoqqu oottidi haasayiis.

7 PHauloosi hega yaagin, Parisaawetu giddooninne Saaduqaawetu giddon ooshshai kiyin, yaa7ai laalettis. 8 Aissi giikko, Saaduqaaweti, “Haiqqida asai denddena;

kiitanchchikka ayyaanikka baawa” yaagoosona; Parisaaweti qassi naa77aikka de7iyoogaa ammanoosona. <sup>9</sup> Gita wocamai denddiis; Parisaawetu baggappe higgiiyaa tamarissiyaageeti denddi eqqidi, “Ha bitaniyaa bolli ainne bala demmibookko; ayyo ayyaani woi kiitanchchi haasayennan aggenna” yaagidi palamettidosona.

<sup>10</sup> Ooshshai darin, shaalaqai PHauloosa eti mentterettanaakkonne giidi yayyidi, ba wotaaddarati wodhdhidi, eta giddoppe a eesuan kessidi, bantta de7iyoosaa efaana mala azaziis.

<sup>11</sup> Naa77antto qammi Godai PHauloosa lanqqiyan eqqidi, “PHauloosaa, neeni taassi Yerusalem markkattidoogaadan, Roomenka markkattanau bessees; minna; aikko baawa” yaagiis.

### *PHauloosa Woranau Maqettido Maquwaa*

<sup>12</sup> Wonttetta gallassi, Aihudati PHauloosa worana gakkanaas, meennaadaaninne uyennaadan, caagettidi gigettidosona. <sup>13</sup> PHauloosa bolli hegaa maqqida asati oita-maappe daroosona. <sup>14</sup> Eti qeese halaqatukkonne cimatumko yiidi, “Nuuni PHauloosa worana gakkanaas, ainne baarennaadan, qanggettidi caagettida. <sup>15</sup> Hegaa gishshau, inttenne yaa7ai PHauloosabaa geeshshidi qoriyaabaa misatidi, shaalaqai a inttekko duge wottana mala oichchite; nuuni i haa shiiqanaappe kase a woranau giigi uttida” yaagidosona.

<sup>16</sup> SHin PHauloosa michchee na7ai he maquwaa siyido wode, biidi wotaaddarati de7iyoosaa gelidi, PHauloosassi yootiis. <sup>17</sup> Yootin PHauloosi mato halaqatuppe issuwaa xeesidi, “Ha na7aa shaalaqaakko efa; aissi giikko, shaalaqaassi i yootiyoobai de7ees” yaagiis.

<sup>18</sup> Hegaa gishshau, mato halaqai na7aa shaalaqaakko efidi, “Qasho keettan de7iya PHauloosi, ha na7ai neessi aibakko odiyoobai de7iyo gishshau, tana baakko xeesidi, a neekko ehaanaadan, tana woossiis” yaagiis.

<sup>19</sup> SHaalaqai na7aa kushiya oiqqidi, dumma gaxi kessidi, “Nee ni taassi odanabai aibee?” yaagidi oichchiis.

<sup>20</sup> Na7ai shaalaqaassi, “Aihudati PHauloosabaa kaseppe mintti oichchiyaabaa milatidi, neeni yaa7aa a wottanaadan, nena wontto woossanau zoretaa qachchidosona.

<sup>21</sup> SHin neeni eti giyoobaa siyoppa; aissi giikko, oitamaappe dariya asati PHauloosa worana gakkanaas, quma meennaadaaninne haatta uyennaadan, caagettidi geemetti uttidi a naagoosona; neeni giyoobaa siyanau ha77ikka gigetti uttidi naagoosona” yaagiis.

<sup>22</sup> Hegaa gishshau, shaalaqai na7aa, “Ha yohuwaa neeni tana erissidoogaa oossinne odoppa” yaagidi azazidoogaappe guyyiyan, a yeddiis.

### *PHauloosi Deriyaa Haariya Pilikisa Sintti Aadhdhiis*

<sup>23</sup> SHaalaqai mato halaqatuppe naa77aa xeesidi, “Qiisaariyaa baanau, naa77u xeetu wotaaddarata, laappun tammu paraasatanne naa77u xeetu tooraasata qammaappe heezzu saatiyan giigissite; <sup>24</sup> deriyaa haariya Pilikisakko PHauloosa saro gattanau togissiyo mehenne giigissite” yaagidi, eta azaziis. <sup>25</sup> SHaalaqai Pilikisassi hagaadan giya dabddaabbiyaa xaafiis.

<sup>26</sup> “Qalaudeyoosa Lusiyooosappe deriyaa haariyaagaassi, bonchcho Pilikisassi, sarotettai neessi gido. <sup>27</sup> Aihudati ha bitaniyaa oiqqidi worana hanishin, Roome katamaa asa i gididoogaa erada, wotaaddaratuura gakkada a ashshaas. <sup>28</sup> Eti a aissi mootiyaakko eranau koyada, eta yaa7aassi duge a wottaas. <sup>29</sup> Eti bantta higgiiyaabaa i oichchidoogaassi a mootidoogaappe attin, a worissiya woi qashissiya mooto gidenna. <sup>30</sup> Eti ha bitaniyaa bolli maqetti uttido zigirssai tana gakkin, taani he sohuwaara a neekko yedda aggaas; a mootiyaageetikka biidi, ne sinttan mootana mala azazaas; saro de7a” yaagiis.

<sup>31</sup> Hegaa gishshau, wotaaddarati azazettidoogaadankka PHauloosa ekkidi, qammi Anttiphaaxiriisa gattidosona. <sup>32</sup> Wonttetta gallassi aara baanau paraasata wottidi, tohuwaasati guyye wotaaddarati de7iyoosaa simmidosona. <sup>33</sup> Paraasati Qiisaariyaa gelidi, dabddaabbiyaa deriyaa haariyaagaassi immidi, PHauloosa a sintti aattidosona. <sup>34</sup> Deriyaa haariyaagee dabddaabbiyaa nabbabidoogaappe guyyiyan, PHauloosi awa auraajjaa asakko a oichchiis; Kilqqiyaa asa i gididoogaa erido wode, <sup>35</sup> “Taani nebaa nena mootiyaageeti yiyo wode siyana” yaagidi, wotaaddarati Heeroodisa keettan a naagana mala azaziis.

## 24

### *PHauloosa Aihudati Mootidosona*

<sup>1</sup> Ichchashu gallassappe guyyiyan, qeese ubbatu halaqai, Hanaaniyaa, cimatuuranne Xarxxaluusa giyo issi xabaqaara duge Qiisaariyaa wodhdhiis; eti deriyaa haariyaagaa bolli PHauloosa mootidosona. <sup>2-3</sup> PHauloosi xeesettido wode, Xarxxaluusi a hagaadan yaagidi, mootuwaa doommiis.

“Bonchcho Pilikisaa, nuuni ne baggaara daro sarotettaa demmidaashin, ne qofan ha deriyaassi ubban ubbasankka lo77o laamee beettiyaagaassi nena daro galatidi, haggaa ekkoos. <sup>4</sup> SHin taani nena gam77ettennan, ne kehatettan nubaa neeni qanttan siyana mala, nena woossais. <sup>5</sup> Aissi giikko, ha bitanee xube gididi, sa7a ubban de7iya Aihudatu giddon ooshsha denttiiddi, Naaziraawetu bagga asaa kaalettiyaagaa gididoogaa erida. <sup>6</sup> Harai atto Beeta Maqidasiyaakka tunissanau koyishin a oiqqidi, nu higgiaadan, a bolli pirddanau qoppida; <sup>7</sup> shin shaalaqaa Lusiyooosi yiidi, wolqqan nu kushiyaappe a wotti ekkiis. <sup>8</sup> A mootiyaageetikka neekko yaana mala azaziis; neeni ne huuphen ha bitaniyaa qorada, nuuni a mootiyo yoho ubbaa eranau danddayaasa” yaagiis.

<sup>9</sup> Aihudatikka qassi, “Ha yohoi tuma” giidi, a qofaa maayidosona.

### *PHauloosi Pilikisa Sinttan Mootuwau Zaaruwaa Immiis*

<sup>10</sup> Deriyaa haariyaagee PHauloosa oichchin, i hagaadan yaagidi zaariis; “Neeni daro wodiyaasappe doommada, ha asaassi pirddaidda de7iyoogaa taani erada, ta yohuwaa ufaissan zaarais. <sup>11</sup> Taani Yerusalaame goinnanau kiyosappe tammanne naa77u gallassappe darennaagaa neeni ne huuphen erana danddayaasa. <sup>12</sup> Aihudati tana Beeta Maqidasiyan gidin, Aihuda woosa keettan gidin, kataman gidin, oonaaranne palamettishin woi asa shiishshada maqqishin, issi uraaranne be7ibookkona. <sup>13</sup> Eti ha77ikka tana mootiyoobaa shatimmanau danddayokkona.

<sup>14</sup> “SHin taani haggaa neessi yootais; taani higgiaadan de7iyaabaanne hananabaa yootiyaageeti xaafido ubbabaa ammanada, nu aawatu Xoossaassi eti worddo giyo ogiyan goinnais. <sup>15</sup> Hageeti bantta huuphen, ‘Asai ubbai, worddoikka xilloikka haiquwaappe denddana’ giyoogaadan, taanikka eti denddanaagaassi Xoossaa ammanais. <sup>16</sup> Hegaa gishshau, taani qassi, Xoossaa sinttaaninne asaa sinttan ubba wode, pokkoi bainna zoriya wozanai taassi de7ana mala minnais.

<sup>17</sup> “Taani Yerusalaameppe kiyosappe daro laittaappe guyyiyan, ta biittaa hiyyeesaassi miishsha immanaanne yarshshuwaa yarshshanau Yerusalaame baas. <sup>18</sup> Baada haggaa oottishin, asi shiiqennan, ooshshi denddennan, taani Beeta Maqidasiyan geeyishin, eti tana demmidosona. <sup>19</sup> SHin Isiyaappe yiida issi issi Aihudati hegan de7oosona; eti ta bolli yoho koyikko, yiidi tana nenan mootanau bessees. <sup>20-21</sup> Woi taani eta giddon eqqada, ‘Haiqqidaageeti denddanaagaa ammaniyo gishshau, hachchi intte sinttan ta bolli pirddoosona’ gaada ha xoqqissada haasayido issi qaaleeppe attin, yaa7aa sinttan eqqidaashin, tanan issi mooro demmidobaa gidikko, hageeti bantta huuphen hagan yootona” yaagiis.

<sup>22</sup> SHin Pilikisi Xoossaa ogiyaabaa geeshshi erido gishshau, “Taani intte yohuwaa shaalaqaa Lusiyooosi yiyo wode qachchana” yaagidi, pirddiyo wodiya sinttau keeriis. <sup>23</sup> Pilikisi qassi PHauloosa qachchennan naagana malanne a dabbotuppe ooninne ayyo oottishin, woi akko yiishin diggenna mala, mato halaqaa azaziis.

### *PHauloosi Pilikisanne Dirusilla Sintti Aadhdhiis*

<sup>24</sup> Amarida gallassaappe guyyiyan, Pilikisi Aihuda zare gidida ba maccaasee Dirusilliira yiidi, PHauloosa kiitti ehiissidi, Yesuus Kiristtoosan ammaniyoobaa i haasayishin siyiis. <sup>25</sup> PHauloosi xillotettaabaa, ba huuphe naaguwaabaanne yaana pirddaabaa haasayishin, Pilikisi yayyidi, “Neeni ha77issau ba; taassi injjetido wode, nena kiittada xeeqissana” yaagiis. <sup>26</sup> He wode qassi PHauloosi birshshettanau, baassi mattaayiyaa immanddeeshsha giidi qoppiis; heгаа gishshau, darotoo a ehiissi ehiissidi, aara haasayees.

<sup>27</sup> Naa77u laitta kumidoogaappe guyyiyan, Pilikisa sohuwaa PHorqqiyoosa Pisxxoosi ekkiis. Pilikisi Aihudata ufaissanau koyidi, qasho keettan PHauloosa aggi bayiis.

## 25

### *PHauloosi Roome Kawuwaakko Ba Yohuwaa Ekkidi Baanau Oichchiis*

<sup>1</sup> Pisxxoosi auraajjaa gelido heezzantto gallassaappe guyyiyan, Qiisaariyaappe Yerusalaame biis. <sup>2</sup> Yaani qeese halaqatinne Aihudata kaalettiyaageeti PHauloosa mootidosona. <sup>3</sup> Eti PHauloosa woranaassi ogiyan qosetti uttanau, banttana maaddidi a Yerusalaame ehaana mala, Pisxxoosa woossidosona. <sup>4</sup> Woossin Pisxxoosi etassi, “PHauloosi Qiisaariyan qashetti uttiis; taani ta huuphenkka eesuan yaa guyye simmanau qoppa uttaas. <sup>5</sup> Hegaa gishshau, i aibakko mooridobai de7ikko, intte giddon aawatiyaageeti tanaara Qiisaariyaa biidi, a mootona” yaagidi zaariis.

<sup>6</sup> Pisxxoosi eta matan hosppun woi tammu gallassaappe aattennan uttidi, Qiisaariyaa biis; wonttetta gallassi pirddiyoosan uttidi, PHauloosa ehaana mala azaziis. <sup>7</sup> I gakkido wode, Yerusalaameppe yiida Aihudati a lanqqiyan yuuyi aadhdhi eqqidi, banttassi shatimmanau danddayettenna daro deexo mootuwaa a bolli wottidosona. <sup>8</sup> PHauloosi mootettiiddi, “Taani Aihudatu higgiaakka Beeta Maqidasiyaakka Roome Kawuwaa Qeesarakka ainne naaqqabeikke” yaagiis.

<sup>9</sup> SHin Pisxxoosi Aihudata ufaissanau koyidi PHauloosa, “Pude Yerusalaame kiyada, ha yohuwaabaa yaani ta sinttan pirddettanau koyai?” yaagidi oichchiis.

<sup>10</sup> SHin PHauloosi, “Taani pirddettanau bessio Qeesara pirdda keettan eqqaichchaas. Neenikka loitta eriyoogaadan, taani Aihudata ainne naaqqabeikke. <sup>11</sup> Simmi taani naaqqidobaa woi haiqossi bessiyaabaa oottidobaa gidikko, haiquwaappe attana giikke; shin eti tana mootiyo mootoi mela gididoogaappe hini baggan, ooninne tana etassi aattidi immanau danddayenna; Qeesari tabaa pirddo gaada oichchais” yaagiis.

<sup>12</sup> Hegaappe guyyiyan, Pisxxoosi banaara zorettiyaageetuura zorettidi a, “Neeni Qeesari tabaa pirddo gaada oichchadasa; Qeesarakko baasa” yaagidi zaariis.

### *PHauloosi Agriiphanne Barnniiqi Sintti Aadhdhiis*

<sup>13</sup> Amarida gallassaappe guyyiyan, Kawoi Agriiphanne Barnniiqi Pisxxoosa sarotanau Qiisaariyaa biidosona. <sup>14</sup> Yaani eti daro gallassaa uttidaashin, Pisxxoosi kawuwaassi PHauloosabaa hagaadan yaagidi yootiis; “Hagan Pilikisi qachchidi aggi bayido issi bitanee de7ees. <sup>15</sup> Taani Yerusalaamen de7ishin, qeese halaqatinne Aihuda cimati a bolli pirddana mala, tana woossiiddi, abaa taassi yootidosona. <sup>16</sup> Taani, ‘Mootettida urai bana mootiyaageetuura issippe eqqennaanne bana mootido yohuwaassi zaaro immennan, oona gidikkonne aattidi immiyoogee Roome asaassi woga gidenna’ yaagada etassi zaaraas.

<sup>17</sup> “Hegaa gishshau, eti hagan shiiqido wode, taani gam77ennan wonttetta gallassi, pirda keettaa gelada PHauloosa ehaana mala azazaas. <sup>18</sup> A mootiyaageeti eqqidi, iitaban a mootennan aggokkona gaada taani qoppidoogaadan, ainne a mooti-bookkona. <sup>19</sup> SHin eti bantta ammanobaanne PHauloosi, ‘Paxa de7ees’ giyo haiqqida issi Yesuusa geetettiya bitaniyaabaa aara palamettoosona. <sup>20</sup> Taani ha yohuwaa waatada qoranaakko, qachchabeennan de7aidda, PHauloosi Yerusalaame biidi, ha yohuwaa yaani pirdettanau koyiyaakkonne gaada a oichchaas; <sup>21</sup> shin PHauloosi ba yohuwaa Augisxxoos Qeesaari qachchana gakkanaassi naagettanau oichchin, taani a Qeesaarakko yeddana gakkanaas, i qashettana mala azazaas” yaagiis.

<sup>22</sup> Yaagin Agriiphphi Pisxxoosa, “Taani ta huuphenkka qassi he bitanee giyoobaa siyana koyais” yaagiis.

Pisxxoosi a, “Neeni wontto i giyoobaa siyana” yaagiis.

<sup>23</sup> Wonttetta gallassi, Agriiphpinne Barnniqa daro bonchchuwana shaalaqatuuranne kataman de7iya gita asaara yiidi, pirda keettaa gelidosona; Pisxxoosi PHauloosa ehaana mala azazin ehiidosona. <sup>24</sup> Ehin Pisxxoosi hagaadan yaagiis; “Kawuwaa Agriiphphaa, hagan nunaara de7iya asa ubbau, Aihuda asai ubbai Yerusalaameenikka hagankka wocamiiddi, ‘I hagaappe sinttan paxa de7anau bessenna’ yaagidi, tana woosido bitaniyaa haggaa be7eeta. <sup>25</sup> SHin i ainne haiqossi bessiyaabaa oottidobaa taani demmabeikke; i ba huuphen, ‘Augisxxoosi Qeesaari tabaa pirdo yaagada oichchais’ giido gishshau, Qeesaarakko a yeddana ta qofaa qachchaas. <sup>26</sup> Taani abaa ta godaa Augisxxoos Qeesaarassi xaafanau tumu yohoi tau aibinne baawa; hegaa gishshau, i qorettidoogaappe guyyiyan, taani xaafiyobaa demmana mala, intte sintti, Kawuwau Agriiphphaa, ubba ne sintti a ehaas. <sup>27</sup> Aissi giikko, qashettida uraa kiittiyo wode, a aissi mootidaakko, erissennan aggiyoogee taassi eeyyatetta misatees” yaagiis.

## 26

### *PHauloosi Agriiphpha Sinttan Haasayido Haasayaa*

<sup>1</sup> Agriiphphi PHauloosa, “Neeni nebaa haasayanau danddayaasa” yaagiis. He wode PHauloosi ba kushiya miccidi hagaadan yaagidi zaariis.

<sup>2-3</sup> “Kawuwaa Agriiphphaa, Aihudatu wogaanne palamaa ubbaa neeni loittada eriyo gishshau, tana Aihudati mootiyo yoho ubbaa hachchi taani ne sinttan zaariyoogaassi ta qaada daro lo77o yaagada qoppais; hegaa gishshau, neeni ta haasayaa salettennan siyana mala, nena woossais.

<sup>4</sup> “Taani naatettaasappe doommada ta asaa giddooninne Yerusalaamen de7ido ta de7uwaa Aihuda ubbati kaseppe doommidi eroosona. <sup>5</sup> Taani koiroppe doommada, nu ammanuwaa higgiiya ooppenne minttidi naagiya Parisaawetu bagga Parisaawe gidada de7iyooгаа, eti markkattanau koyikko eroosona. <sup>6</sup> Taani ha77ikka Xoossai nu aawatussi immana giidoogaa ufaissan naagiyo gishshau, pirdettanaassi hagan eqqais. <sup>7</sup> Qassi tammanne naa77u nu aawatu zareti Xoossau qamminne gallassi ubbatoo minttidi goinniiddi, Xoossai immana giidoogaa ekkana ufaissan naagoosona; Kawuwaa Agriiphphaa, Aihudati tana mootiyoogee taani hegaa ufaissan naagiyo gishshassa. <sup>8</sup> Aihudato, Xoossai haiqqidaageeta denttiyoogaa aissi ammanekketii?

<sup>9</sup> “Taani ta huuphenkka Naazireeta Yesuusa sunntaa mooriya darobaa oottanau bessees gaada kase qoppaas. <sup>10</sup> Taani Yerusalaamen oottidoogee haggaa; qeese halagatuppe maataa ekkada, Xoossaa asatuppe darota qashissaas; eta woriyo wodekka eta haiquwaa dosaas. <sup>11</sup> Aihuda woosa keetta ubban daro wode eta qaxxayada, bantta ammanuwaa eti aggana mala godataas; taani wogi bainnaagaa eta hanqqettada, harai atto, hara biitta katamaa gakkanaassikka eta waissais.



*PHauloosi Bau Kiristtoosa Waati Ammanidaakkonne Odiis  
(Yesuusi Kiittidoogeetu Oosuwaa 9:1-19; 22:6-16)*

<sup>12</sup> “Taani ha yohuwaassi qeese halaqatuppe maataanne azazuwaa ekkada Damasqqo baas. <sup>13</sup> Kawuwau, taani seeta gallassi ogiyan de7ishin, awaa poo7uwaappe daro aadhdhiya poo7oi tananne tanaara biidaageeta yuuyi aadhdhidi, saluwaappe poo7ishin be7aas. <sup>14</sup> Nuuni ubbaikka sa7an kunddido wode, Ibraisxxe qalan, ‘Saa7oolaa, Saa7oolaa, tana aissi waissai? Boorai bana caddiya xam77aa qakkiyoogaadan, neeni qakkikko, nena qohaasa’ yaagidi taassi odishin siyaas.

<sup>15</sup> “Siyada, ‘Ta Godau, neeni oonee?’ yaagaas.

“Godai, ‘Taani neeni waissiyo Yesuusa. <sup>16</sup> SHin dendda eqqa; aissi giikko, hachchi neeni tana be7idoogaanne taani nena sinttappe bessanaagaa haratussi markkattana mala, ta oosanchcha oottada nena sunttanau neessi beettaas. <sup>17-18</sup> Eti tana ammanin, eta nagarai atto geettanaadan, Xoossai doorido asaa giddon eti bantta sohuwaa demmanaadan, qassi xumaappe poo7uwaa simmanaadaaninne xalahiyaa godatettaappekka Xoossaakko simmanaadan, eta aifiyaa neeni dooyana mala, Israa7eela asaappenne taani nena etakko kiittiyo Aihuda gidennaageetuppe nena ashshana’ yaagiis.

*PHauloosi Ba Oosuwaa Hanotaa Odiis*

<sup>19</sup> “Kawuwaa Agriiphphaa, heгаа gishshau, taassi saluwaappe beettida ajjuutaassi taani azazettanaagaa ixxabeikke. <sup>20</sup> SHin taani kasetada, Damasqqooninne Yerusalaamen hegaappe guyyiyan, Yihudaa biitta ubban de7iyaageetussinne Aihuda gidennaageetussi bantta nagaraappe simmana mala, qassi nagaraappe simmanau bessiyaabaa oottiiddi, Xoossaakko simmana mala qaalaa yootaas. <sup>21</sup> Hegaa gishshau, Aihudati tana Beeta Maqidasiyan oiqqidi woranau koyidosona. <sup>22-23</sup> Hegaa gishshau, taani Xoossaa maaduwaa ekkada, gitaassinne guuttaassi hachchi gakkanaassikka eqqada markkattais. Hananabaa yootiyaageetinne Muusee, ‘Kiristtoosi waayettana bessees; qassi haiquwaappe koiro denddidi, Aihudatussinne Aihuda gidennaageetussi atotettaa poo7uwaa yootanau bessees’ giidoogaadan, taanikka eti haasayidoogaappe haraa issibaakka haasayidobi baawa” yaagiis.

<sup>24</sup> PHauloosi babaa hagaadan yaagidi zaarishin, Pisxxoosi qaalaa xoqqu oottidi, “PHauloosaa, neeni gooyaasa; neeni daro tamaridoogee nena gooshshana hanees” yaagiis.

<sup>25</sup> SHin PHauloosi hagaadan yaagiis; “Bonchcho Pisxxoosaa, taani tumu yohuwaanne wozanaa qofaa haasayioogaappe attin gooyikke. <sup>26</sup> Taani Kawuwaa Agriiphphassi ha yohuwaa qassi qoncciyaa yootiyooгаа i erees; aissi giikko, ha yohoi geeman oosetibeenna gishshau, hagaappe issoinne appe geemmennaagaa taani geeshshada erais.

<sup>27</sup> “Kawuwaa Agriiphphaa, neeni hananabaa yootiyaageetubaa ammanai? Neeni etabaa ammaniyoogaa taani erais” yaagiis.

<sup>28</sup> Kawoi Agriiphphi PHauloosa, “Hanni keesenkka tana ammanttanau koyai?” yaagiis.

<sup>29</sup> Yaagin PHauloosi, “Daro wode gidin, guutta wode gidin, ne xalaala gidakka; shin hachchi taani yootiyooгаа siyiya ubbai qassi ha qashuwaappe attin, ta mala gidanau Xoossaa woossais” yaagiis.

<sup>30</sup> Hegaappe guyyiyan kawoikka, Pisxxoosikka, Barnniiqakka, etaara uttida ubbaikka denddidi, <sup>31</sup> issi baggi simmidi, issoi issuwaara, “Ha bitanee haiqoi atto shin, qashossikka bessiyaabaa oottibeenna” yaagidi haasayidosona. <sup>32</sup> Agriiphphi Pisxxoosa, “Ha bitanee, ‘Qeesaari tabaa pirddo’ gibeennaakko, birshshettana danddayees shin” yaagiis.

## 27

### *PHauloosi Roome Biis*

<sup>1</sup> Nuuni markkabiyan Xaaliyaa baanau qachchido wode, PHauloosanne hara amarida qashuwaa asata Augisxxoosa wotaaddarata giyoogeetuppe issi Yuuliyoosa giyo mato halaqaassi aattidi immidosona. <sup>2</sup> Isiyaa gaxan de7iya biittata biya Adiraamixiyoona markkabiyan gelidi denddida; Maqidooniyaasa gidiya Tasalonqgee Arisxxirokoosi nunaara de7ees.

<sup>3</sup> Wonttetta gallassi nuuni Sidoona gakkishin, Yuuliyoosi PHauloosassi kehidi a, “Ne dabboti nena maaddana mala, neeni etakko baanau danddayaasa” yaagiis. <sup>4</sup> Hegaappe denddidi, sinttaara nu bolli carkkiyo gishshau, Qophphiroosa haruuruwan carkkenna baggi biida. <sup>5</sup> Kilqqiyaa mataaninne PHinifiliyaa matan de7iya abbaa pinnidi, Luqiyaa de7iya Mura gakkida. <sup>6</sup> Hegan mato halaqai Xaaliyaa biya Iskkindiriyaa markkabiya demmidi, aani nuna gelissiis.

<sup>7</sup> Nuuni daro gallassaa loddaara biiddi, daro tuggan Qaniidoose ginaa gakkida; hegaara baanau nuna carkkoi diggin Salmmoonara aadhdhidi, Qarxxeesen carkkenna baggi biida. <sup>8</sup> Qassikka daro tuggan gaxaara gaxaara aadhdhidi, Luqiyaa katamaa matan de7iya abbaa doonan markkabee woppu giidi shemppiyoosaa giyoosaa yiida.

<sup>9</sup> Nuuni hegan daro wodiya gam77idoogaappe guyyiyan, Xoomai birshshetti-ichchido gishshau, markkabiyan biyoogeekka hirggissin PHauloosi eta zoriiddi, <sup>10</sup> “Asau, nu buussan gita boshainne daro qohoi de7anaagee tau beettees; bashshai yiyoogee caanaa bollanne markkabiya bolla xalaalaani gidenna; nu shemppuwaa bollika yaana” yaagiis. <sup>11</sup> SHin mato halaqai PHauloosi giidoogaappe aattidi, markkabiyan de7iyaageeta azaziyaageenne markkabiya godai giyoogaa ammanees. <sup>12</sup> He abbaa doona katamai balgguwaa shaaccanau etassi injjetenna katama; hega gishshau, dariya asati banttau danddayettikko, Pinqqe giyo katamaa gakkidi, balgguwaa yaani shaaccana mala, yaappe denddanau zorettidosona; Pinqqee awai wuliyooosaappenne ushachchappe gidduwan, qassi wuliyooosaappenne haddirssappe gidduwan de7iya abbaa doona katama.

### *Abbaa Bollan Gotee Denddiis*

<sup>13</sup> Tohossa bagga carkkoi loddaara carkkido wode, bantta qoppidoogaadan hanidabaa etassi milatin denddidosona; markkabee beenna mala oiqqiya birataa pude dafidi, Qarxxeese matattidi, lanqqiyaara aadhdhidosa. <sup>14</sup> SHin daro gam77ennan, “Auraaqiis” giyo daro wolqqaama gotee haruuruwaappe duge eta bolli denddiis. <sup>15</sup> He gotee markkabiya dechchidi aattennan diggin, baanau nuuyyo danddayettennan ixrido gishshau, markkabiya i efiyoosaa yeddi bayidi biida.

<sup>16</sup> Nuuni Qeeda giyo haruuruwan geemmido wode, daro tuggatidi markkabiya wolwoluwaa teqqanau danddayida. <sup>17</sup> Eti wolwoluwaa pude kessidoogaappe guyyiyan, wodoruwan markkabiya xaaxidi, mintti qachchidosona; Sirttiisa giyo shafiyaa bantana oogkanaakonne giidi hirggidi, markkabiya efiya sharaa wottidi, carkkuwan markkabiya coo yeddi bayidosona.

<sup>18</sup> Gotee wolqqaamidi nuna tuggayin, wonttetta gallassi caanaappe abban oluwaa doommidosona. <sup>19</sup> Heezantto gallassikka markkabiyan de7iya miishshaa eti bantta kushiyan olidosona. <sup>20</sup> Nuuni daro gallassaa awa aifiyaanne xoolinttiyaa be7ennan, wolqqaama uushoi nu bolli uushishin, sinttappe xayana giidi qoppida.

<sup>21</sup> Eti daro gallassaa katta meennan gam77idoogaappe guyyiyan, PHauloosi he wode eta gidon denddi eqqidi, hagaadan yaagiis; “Asau, intte ta zoriyaa ekkidobaa gidiyaakonne Qarxxeeseppe denddennan aggidaakko, ha bashshainne qohoi nuna gakkenna. <sup>22</sup> SHin ha77ikka taani inttena yayyoppite gaada zorais; aissi giikko, ha markkabee xayanaappe attin, intteppe issi uraa shemppoikka xayenna. <sup>23</sup> Aissi giikko,

Xoossaa kiitanchchai, tana haarida taani goinniyo Xoossaagee, zine qammi ta matan eqqidi, <sup>24</sup> PHauloosaa, yayyoppa; neeni Roome biittaa Kawuwaa Qeesaara sinttan eqqanau bessees; be7a, Xoossai nenaara biya asa ubbaa shemppuwaa ashshana' yaagiis. <sup>25</sup> Hegaa gishshau asau, yayyoppite. Aissi giikko, he kiitanchchai tau odi-doogaadan hananaagaa taani Xoossaa ammanais; <sup>26</sup> shin carkkoi nuna issi haruuruwan abbaa doonan olana" yaagiis.

<sup>27</sup> Tammanne oiddantto qamman Meediteraane Abban nuna carkkoi yaanne haanne sugishin, markkabiyan oottiyaageetussi qamma bilahe biittaakko matidobaa milatiis. <sup>28</sup> Eti likkiyo wodoruwaa xeeran deexxiyaabaa qachchidi, haattan yeggin, haattai hosp-pun tammu wara ciimmatidoogaa eridosona. Guutta gam77iiddi, naa77anttuwaa yeggidi, usuppun tammu wara ciimmatidoogaa eridosona. <sup>29</sup> Eti shuchchattiyaasan kundenna mala yayyidi, markkabee beenna mala oiqqiya oiddu birataa markkabiyaappe guyyeera abban yeggidi, sa7ai wonttana mala, Xoossaa woossoosona. <sup>30</sup> Markkabiyan oottiyaageeti markkabiyaappe baqatanau koyidi, markkabee beenna mala oiqqiya amarida biratata markkabiyaappe sintta baggaara abban yeggiyaabaa milatidi, wolwoluwaa abban wottido wode, <sup>31</sup> PHauloosi mato halaqaanne wotaaddarata, "Hageeti markkabe gidдон de7ana xayikko, intte attanau danddayekketa" yaagiis. <sup>32</sup> Hegaappe guyyiyan, wotaaddarati wolwoloji qashettido wodoruwaa qanxxidi, yeddi bayidosona.

<sup>33</sup> Sa7ai wonttana hanishin, PHauloosi ubbai qumaa maana mala, hagaadan yaagidi woossiis; "Intte hachchiira tammanne oiddu gallassaa naagideta; qassi he ubbankka quma mibeekketa. <sup>34</sup> Hegaa gishshau, guutta qumaa intte maana mala, taani intena woossais; aissi giikko, intte paxa de7anau guutta qumaa maana koshshees; harai atto intte huuphiyaa binnaanaappe issoikka xayenna" yaagiis. <sup>35</sup> PHauloosi haggaa giidi, oittaa ekkidi, ubbaa sinttan Xoossaa galatiis; menttidi Muussaa doommiis. <sup>36</sup> Doommin ubbai minettidi, banttaukka qassi qumaa miidosona. <sup>37</sup> Nuuni markkabiyan de7iyaageeti naa77u xeetanne laappun tammanne usuppuna. <sup>38</sup> Eti miidi kallido wode, caana gisttiyaa abban olidi markkabiya deexuwaa kaushshidosona.

### *Markkabee Meqqiis*

<sup>39</sup> Sa7ai wonttido wode, markkabiyan oottiyaageeti biittaa eribookkona; shin haattai goggidi abban gelidosaa lanqqiyan de7iya shafiyaa akeeki xeellidosona. Banttassi danddayettiyaakko, markkabiya he shafiyaakko laagganau bantta gofaa qachchidosona. <sup>40</sup> Yaatidi markkabee beenna mala oiqqiya biratata birshshidi, abbaa giddo yeggidosona; he wode, markkabiya koyidosaa zaaridi laaggiyo mittaa qachchido wodoruwaa birshshidosona; hegaappe guyyiyan, carkkoi markkabiya sinttau sugana mala, markkabiya efiya sharaa sintta baggaara xoqqu oottidi, buussaa doommidosona. <sup>41</sup> SHin markkabee naa77u abbai gaittidosan de7iya shafiyan dom77ettidi ohettiis; markkabiyaassi guyye baggai beetaa sugettan meqerettishin, sintta baggai xishettidi, qaaxxennan ixxi aggiis.

<sup>42</sup> Wotaaddarati qashuwaa asaappe issoinne haattaa wodhdhidi kessi ekkenna mala, eta woranau zorettidosona. <sup>43</sup> SHin mato halaqai PHauloosa ashshanau koyidi, wotaaddaratu zoretaa ixxiis; haattaa waraa eriya ubbai markkabiyaappe haattan guppi guppidi kasetidi gaxaa kiyana mala azaziis. <sup>44</sup> Attidaageetuppe baggati sanqqan, baggati markkabiya me7uwan kiyana mala azaziis; hegaadan ubbatikka gaxaa saro kiyidosona.

## 28

### *PHauloosi Malta Giyo Haruuruwaa Biis*

<sup>1</sup> Nuuni gaxaa saro kiyido wode, haruuroi Malta geetettiyoogaa erida. <sup>2</sup> Haruuruwaa asati nuussi daro kehaa kehidosona; irai bukkannau doommido gishshaunne meeggiyo

gishshau, tamaa eettidi, nuna ubbaa mokkidosona. <sup>3</sup> PHauloosi daro qaixaariyaa qoridi taman wottishin, shooshshai mishuwaa gishshau kiyidi, a kushiyan xaaxettidi, a dukkiis. <sup>4</sup> Haruuruwaa asati shooshshai PHauloosa kushiyan xaaxettidaagaa be7ido wode issai issuwaassi, “Tumu ha bitanee shemppo woriya asa; harai atto abbaappe i attinkka Xoossaa pird dai a paxa de7o gibeenna” yaagidosona. <sup>5</sup> SHin PHauloosi ba kushiyaappe shooshshaa wuxakkidi, taman oliis; a ainne oottibeenna. <sup>6</sup> Eti, “A bollai kixxees; woi akeekennan kunddidi haiqqees” yaagidi a naagoosona; shin daro wodiya naagidi, a bollan aibinne dummatidabi xayin, “Hagee xoossa” yaagidi bantta qofaa aggi bayidosona.

<sup>7</sup> Hega heeran haruuruwaa halaqaa Pupiliyoosa giyoogaassi gadee de7ees; i nuna mokkidi, heezzu gallassaa siiquwan imattiis. <sup>8</sup> Pupiliyoosa aawai qoxo, mishonne ulo kara sahetti zin77idi de7ees; PHauloosi a soo gelidi, ayyo Xoossaa woossiis; ba kushiya a bolli wottidi, a pattiis. <sup>9</sup> Hegaappe guyyiyan, he haruuruwan harggiya hara asaikka qassi yiidi paxiis. <sup>10</sup> Paxin nuna daro bonchchuwaa bonchchidosona; nuuni markkabiyan baanau denddido wode, ogiyau nuna koshshiyaabaa nuussi imidosona.

### *PHauloosi Malttappe Roome Biis*

<sup>11</sup> Heezzu aginaappe guyyiyan, haruuruwan balgguwaa aattidi Diyoosqqoroosa giyo Iskkindiriya markkabiyan baanau denddida. <sup>12</sup> Nuuni Siraakuse giyo katamaa gelidi, yaani heezzu gallassaa uttida. <sup>13</sup> Hegaappe yuuyiiddi, Regiiyume giyo katamaa gakkida. Issi gallassappe guyyiyan, tohossa bagga carkkoi carkkin, wonttetta gallassi Putiyoluusa giyo katamaa yiida. <sup>14</sup> Hegan nuuni issi issi ammaniyaageeta demmin, banttanaara laappun gallassaa uttana mala, nuna woossidosona; hegaadankka qassi Roome yiida.

<sup>15</sup> Roomen de7iya ammaniyaageeti nubaa siyidi, Afiyoosa Giyaanne Heezzu Aqiy-oosaa giyoosaa gakkanaassi nuna mokkanau yiidosona; PHauloosi eta be7ido wode Xoossaa galatidi, wozanan minettiis.

### *PHauloosi Roomen Tamaarissiis*

<sup>16</sup> Nuuni Roome gelido wode, PHauloosi bana naagiya wotaaddaraara barkka de7ana mala azazettiis.

<sup>17</sup> Heezzu gallassaappe guyyiyan, PHauloosi Aihudatu halaqata baakko xeesiis; eti shiiqido wode, eta hagaadan yaagiis; “Ta ishato, taani nu asaa woi nu aawatu wogaa phalqqiyaabaa ainne oottennan, tana Yerusalaamen qachchidi, Roome asaassi aattidi immidosona. <sup>18</sup> Eti tana qoridi, haiqossi bessiyaabai ta bolli ainne baina gishshau, tana birshshanau qoppidosona. <sup>19</sup> SHin hega Aihudati maayennan ixido wode, ‘Tabaa Qeesaari pird do’ gaanaagee tana koshshiisippe attin, taani ta zariyaa mootiy-oobai taassi de7iina gidenna. <sup>20</sup> Taani inttenaara gaittanaunne haasayanau inttena xeesidoogee hegaassa; aissi giikko, Israa7eela asai ufaissan naagiyoogaa gishshataassi taani ha sanssalatan qashettaas” yaagiis.

<sup>21</sup> Aihuda cimati PHauloosa, “Nuuni Yihudaappe nebau dabddaabbe ekkibookko. Nu ishanttuppekka harai atto, issoikka yiidi, nebua odibeenna; woi ne sunntaa mooridi, nuuyyo odibeenna. <sup>22</sup> SHin he asaa sunntaa ubbasan asai mooridi haasayiyoogaa nuuni eriyo gishshau, ne qofaa siyanau koyoos” yaagidosona.

<sup>23</sup> Eti bantta yaana gallassaa PHauloosassi keeridi, he gallassi daridi i de7iyoosaa yiidosona; yin i etassi Xoossaa kawotettaabaa markkattiis. Qassi eti Yesusabaa ammanana mala, Muuse higgiaappenne hananabaa yootiyaageeti xaafidoogaappe bochchidi eta tamaarissiiddi, maalladoppe omarssi gakkanaassi loittidi yootiis. <sup>24</sup> Baggati PHauloosi giidoogaa ammanidosona; shin baggati ammanibookkona. <sup>25</sup> Eti bantta gidon yohuwaa maayettennan ixido wode, PHauloosi issibaa giidoogaappe

guyyiyan biidosona; i hagaadan yaagiis; “Geeshsha Ayyaanai nu aawatussi hananabaa yootiya Isiyaasan,

<sup>26</sup> ‘Neeni he asaakko baada hagaadan ga;

“Intte sissaa siyana,  
shin intteyyo gelenna;

intte xeeluwaa xeellana,  
shin be7ekketa.

<sup>27</sup> Aissi giikko, ha asaa wozanai dammiis;

bantta haittaa tulissidosona;  
bantta aifiyaakka qilimmidosona.

Hegee bainnaakko, bantta aifiyan be7ana;

eta haittaikka siyana;  
eta wozanaikka akeekana;  
eti taakko Xoossaakko simmana.

Qassi taanikka eta pattana”

yaaga’ yaagiis. <sup>28</sup> Simmi hagee Xoossaa atotettai, Aihuda gidennaageetussi kiitetti-doogee inttessi eretto. Qassi etikka siyana” yaagiis.

<sup>29</sup> PHauloosi hegaa giidoogaappe guyyiyan, Aihudati bantta gidдон daro palametti-iddi biidosona.

<sup>30</sup> PHauloosi kera keettan naa77u laitta kumettaa de7iiddi, baakko yiya ubbaa mok-kees. <sup>31</sup> Bana ooninne diggennan Xoossaa kawotettaabaanne Godaa Yesuus Kiristtoos- abaa yootiiddi, yayyennan daro qonccissidi tamarissis.



## PHauloosi Qoronttoosa Asaassi Xaafido Koiro Kiitaa

### *Gidduwaa Erissuwaa*

PHauloosi Qoronttoosa asaassi xaafido koiro kiitai PHauloosi Qoronttoosa kataman essido woosa keettaa gidдон Kiristtinnaa de7uwaanne ammanuwaa xeelliyaagan denddida metuwaa xaissanau qoppidi xaafidoogaa. He wode Qoronttoosa katamai biittan sa7an de7iya asai go7ettiyo Giriike katama. Hegaa bollikka qassi Akaaya giyo Roomaa auraajjaassi waanna katama. Ha katamai gita zal77iyan, gam77idi minnida wogan, keehi aakki aakki biya yeda de7uwan woikko giigennabaa haniyoogaaninne haimaanootiyaa coratettan erettidaagaa.

Yesuusi kiittidoogee minttidi odanau koyidobati, he woosa keettaa gidдон de7iya shaahotettaabaanne yeda de7uwaabaa, asho gaitotettaabaanne geluwaa ehuwaabaa, qofa gidдо oishatubaa, woosa keettaa wogaabaa, Geeshsha Ayyaanaa imotatubaanne dendduwaabaa. Wonggeliyaa Mishiraachchoi ha oishatubaa odiyooogaa naagidi shi-shshees.

Siiqoi Xoossai ba asaassi immido imotu ubbaappe aadhdiyaagaa gidiyooogaa odiya miraafe tammanne heezai ha maxaafan keehippe daro erettida kifile geetettidi qofettes.

<sup>1</sup> Taani, Xoossaa sheniyani Yesuus Kiristtoosi kiittidoogaa gidanau xeesettida PHauloosinne, nu ishaa Sostteniisi, <sup>2</sup> Qoronttoosan de7iya Xoossaa woosa keettaassi, Yesuus Kiristtoosan geeyidaageetussi, etassinne nuussi Godaa gidiya nu Godaa Yesuus Kiristtoosa sunntaa ubba sohuwan xeesiya ubbatuura geeshsha gidanau xeesettidaageetussi ha dabddaabbiyaa xaafos.

<sup>3</sup> Xoossai, nu Aawainne nu Godai Yesuus Kiristtoosi inttessi aaro kehatettaanne sarotettaa immo.

### *Xoossaassi Galataa SHiishshiyooogaa*

<sup>4</sup> Xoossai Kiristtoosa Yesuusa baggaara inttessi immido aaro kehatettaa gishshau, taani ubba wode inttessi Xoossaa galatais. <sup>5-6</sup> Taani Kiristtoosassi markkattiyooogee inttenan minnido gishshau, intte ubaban, haasaya ubban eratetta ubban, aani duretideta. <sup>7</sup> Hegaadan intte nu Godaa Yesuus Kiristtoosa yuussaa naagishin, ayyaana imuwaappe harai atto issoinne inttessi paccenna. <sup>8</sup> Qassi nu Godaa Yesuus Kiristtoosa gallassan intte borettennaageeta gidanaadan, wurssettai gakkanaassi i inttena mintana. <sup>9</sup> Ba Na7aa nu Godaa Yesuus Kiristtoosa issippetettaassi inttena xeesida Xoossai ammanettidaagaa.

### *Ammaniya Asaa Giddon SHaahotetta Merettoppo*

<sup>10</sup> SHin ta ishato, issi wozanaaninne issi qofan issippe gidanaappe attin, shaahotetta intte gidдон de7enna mala, intte ubbai issi haasayaa haasayanaadan, nu Godaa Yesuus Kiristtoosa sunntan taani inttena woossais. <sup>11</sup> Aissi giikko, ta ishato, Qaloo7i so asai inttebaa, intte gidдон ooshshai de7iyooogaa, taassi yootidosona. <sup>12</sup> Taani giyooogee haggaa; intte huuphiyan huuphiyan, “Taani PHauloosaagaa. Taani Aphiloosaagaa. Taani Keefaagaa. Taani Kiristtoosaagaa” yaageeta. <sup>13</sup> Kiristtoosi shaahettideeyye? Intte gishshau, masqqaliyaa bolli misimaariyan xishettidi kaqettidaagee PHaulooseeyye? Woi intte PHauloosa sunntan xammaqettidetiiyye?

<sup>14</sup> Taani Qarisphphoosappenne Gaayooosappe attin, intteppe oonanne xammaqabeenna gishshau, Xoossaa galatais. <sup>15</sup> Hegaa gishshau, ooninne inttena ta sunntan xammaqettideta gaanau danddayenna. <sup>16</sup> Qassi Isxxifaanoosa so asaakka taani xammaqaas. SHin haraa gujjada xammaqidaakkonne hassayikke. <sup>17</sup> Aissi giikko, Kiristtoosi tana wonggeliyaa mishiraachchuwaa yootana mala kiittiisippe

attin, xammaqana mala kiittibeenna; qassi Kiristtoosi masqqaliyaa bolli haiqqidoogee hada gidenna mala, taani asa aadhdhida eratetta qaalan yootikke.

### *Kiristtoosi Xoossa Aadhdhida Eraanne Wolqqa*

<sup>18</sup> Aissi giikko, Kiristtoosi masqqaliyaa bolli haiqqidoogaa odiya qalalai xayiyaageetussi eeyyatetta. SHin nuussi attiyaageetussi Xoossaa wolqqa. <sup>19</sup> Xoossaa maxaafai, “Taani eranchchatu aadhdhida eratettaa bashshana;

qassi akeekanchchatu akeekaakka xaissana”

yaagees. <sup>20</sup> Aadhdhida eranchchai awan de7ii? Higgiiyaa tamarissiyaagee awan de7ii? Woi ha sa7aabaa eranau waayettiyaagee awan de7ii? Xoossai ha sa7aa aadhdhida eratetta eeyyatetta gidiyooqaa bessii!

<sup>21</sup> Aissi giikko, asai ba huuphe aadhdhida eratettan bana Xoossaa erenna mala, Xoossai ba aadhdhida eratettan diggidi, nuuni yootiyo eeyya qaalan ammaniyaageeta ashshanau qoppiis. <sup>22</sup> Aihudati malaataa oichchoosona. Qassi Giriike asati aadhdhida eratettaa gita koshshaa koyoosona. <sup>23</sup> SHin nuuni masqqaliyaa bolli misimaariyan xishettidi kaqettida Kiristtoosabaa yootoos. Hegee Aihudatussi xube; qassi Aihuda gidennaageetussi eeyyatetta. <sup>24</sup> SHin Xoossai xeesidoogeetussi Aihudatussikka Giriike-tussikka nuuni yootiyo Xoossaa wolqqainne a aadhdhida eratetta Kiristtoosa. <sup>25</sup> Aissi giikko, Xoossaa eeyyatetta asa aadhdhida eratettaappe aadhdhees; qassi a laafatetaikka asa minotettaappe minnees.

<sup>26</sup> Simmi ta ishato, Xoossai inttena xeesiyo wode intte ai mala asakko qoppite. Asa qofan intte giddon aadhdhida eranchchati, wolqqaamatinne xoqqa sheeshshati daro gidokkona. <sup>27</sup> SHin Xoossai aadhdhida eranchchata yeellayanau, sa7an de7iya eeyyata dooriis; qassi minota yeellayanau, sa7an de7iya laafata dooriis. <sup>28</sup> Xoossai ha sa7an gitabaa oottidi qoppiyoobaa xaissanau, ha sa7aa shufurobaanne karidobaa hanibeennabaa dooriis. <sup>29</sup> Hegaa gishshau, ooninne Xoossaa sinttan ceeqqanau bessenna. <sup>30</sup> SHin Xoossai inttessi Kiristtoos Yesuusa baggaara de7uwaa immiis. I nuussi Kiristtoosa aadhdhida eratettaa, xillotettaa, geeshshatettaanne qassi atotettaa immiis. <sup>31</sup> Hegaa gishshau, Xoossaa maxaafai, “Ceeqqiya urai ooninne Godan ceeqqo” yaagees.

## 2

### *Kiristtoosi Kaqettidoogaa*

<sup>1</sup> Ta ishato, taani Xoossaa qaala inttessi yootanau inttekko yiido wode, xoqqa qaalaaninne aadhdhida eratettan yootanau yabeikke. <sup>2</sup> Aissi giikko, taani inttenaara de7aidda, Yesuus Kiristtoosappenne qassi masqqaliyaa bolli misimaariyan xishettidi i kaqettidoogaappenne attin, harabaa erennaadan, ta qofaa qachchaas. <sup>3</sup> Taani daafuraaninne yashshan daro kokkorssan inttenaara de7aas. <sup>4</sup> Taani tamarissiyooqaanne yootiyoogaa Xoossaa Ayyaanaaninne wolqqan qonccissaisippe attin, cimo aadhdhida eratetta qaalaana gidenna. <sup>5</sup> Hegaa gishshau, intte ammanoi Xoossaa wolqqaanappe attin, asa aadhdhida eratettan zempibeenna.

### *Xoossaa Aadhdhida Eraa*

<sup>6</sup> Nuuni ayyaanan wozannaamidaageetu giddon aadhdhida eratettaa haasayoos. SHin hegeekka ha sa7aa aadhdhida eratettaa gidenna; woi ha sa7aa haariya xayiyaageetu aadhdhida eratettaa gidenna. <sup>7</sup> SHin nuuni yootiyo aadhdhida eratetta, Xoossai kasetidi, daro wodiyaappe kase nu bonchchuwaassi doorido asaappe geemet-tida a xuura aadhdhida eratettaa. <sup>8</sup> Ha sa7aa haariyaageetuppe ooninne ha aadhdhida

eratettaa eribeenna. Eti eridabaa gididiyaakko, bonchcho Godaa masqqaliyaa bolli misimaariyan xishidi kaqqokkona. <sup>9</sup> SHin Xoossaa maxaafai,

“Ooninne aifiyan be7ibeennaagee,

hanttanka siyibeennaagee,

qassi ooninne ba wozanan qoppibeennaagee

Xoossai bana siiqiyaageetussi giigissidoogaa”

giyoogaadan nuuni haasayoos. <sup>10</sup> Xoossai ba xuura yohuwaa ba Ayyaan nuna erissiis; aissi giikko, Geeshsha Ayyaanai Xoossaabaa harai atto geemettida yohuwaara ubbaa qorees. <sup>11</sup> Aissi giikko, asan de7iya asa ayyaanappe attin, asabaa eriyai oonee?

Hegaadanka, qassi Xoossaabaa Xoossaa Ayyaanappe attin, ooninne erenna. <sup>12</sup> Nuuni Xoossai nuussi immidobaa ubbaa eranau i nuussi yeddido Ayyaanaa ekkidoogaappe attin, sa7aa ayyaanaa ekkibookko.

<sup>13</sup> Nuuni ayyaanaa yohuwaa ayyaanaa yohuwaara likkissidi, Ayyaanai nuna tamarissido qaalan haggaa haasayeetteesippe attin, asa aadhdhida eratettaa nuna tamarissido qaalan haasayokko. <sup>14</sup> SHin Geeshsha Ayyaanai bainna asi Xoossaa Ayyaanaa yohuwaa ekkenna; aissi giikko, hegee ayyo eeyyatetta. Yohoi Geeshsha Ayyaan qoretto gishshau, i eranau danddayenna. <sup>15</sup> SHin Geeshsha Ayyaanai de7iyo asi ubbabaa qorees; shin a huuphen a ooninne qorena. <sup>16</sup> Aissi giikko, Xoossaa maxaafai,

“Godaa wozanaa eriyai oonee?  
A zoranau danddayiyai oonee?”

yaagees. SHin nuussi Kiristtoosa wozanai de7ees.

### 3

#### *Xoossaa Ashkkaratu Oosuwaa*

<sup>1</sup> Ta ishatoo, taani Ayyaanai de7iyo asaassi haasayiyoogaadan, inttessi haasayanau danddayabeikke. SHin ha sa7aa asaassi haasayiyoogaadaan ammanuwan Kiristtoosan de7iya guutta naatussi haasayiyoogaadan haasayaas. <sup>2</sup> Intte biron mino qumaa maanau danddayiichchibeenna gishshau, taani inttena maattaa paahaas; harai atto, ha77ikka danddayibeekketa. <sup>3</sup> Aissi giikko, intte ha77inne ha sa7aa asaadan de7eeta. Intte ha sa7aa asa gididiyoogaa intte gididon de7iya qanaateenne palamai erissennee? Qassi ha sa7aa asadan simerettekketiyye? <sup>4</sup> Aissi giikko, intteppe issoi, “Taani PHauloosaagaa” giikko, harai qassi, “Taani Aphiloosaagaa” giikko, ha sa7aa asa mala gidekketii?

<sup>5</sup> Yaatin, Aphiloosi oonee? PHauloosi oonee? Nuuni inttena ammanissida Xoossaa ashkkarata. Xoossai nuussi huuphiyan huuphiyan immido oosuwaa ootteettes. <sup>6</sup> Taani puutiyyaa tokkaas; Aphiloosi haattaa ushshiis; shin Xoossai puutiyyaa dichchees. <sup>7</sup> Hegaa gishshau, dichchiyaagee Xoossaa gidaappe attin, tokkiyaageekka haattaa ushshiyaageekka aibanne gidenna. <sup>8</sup> Tokkiyaageenne haattaa ushshiyaagee issi mala; shin Xoossai huuphiyan huuphiyan a daafuraa keenaa ayyo woiwana. <sup>9</sup> Nuuni Xoossaassi issippe oottiya a oosanchchata gididiyo gishshau, intte a shooqa.

Qassikka intte Xoossaa keetta. <sup>10</sup> Xoossai taassi immido aaro kehatettan daro eranchcha anaaxedan, keettaa baasuwa baasaas. Hara urai a bolli keexxees. SHin a bolli keexxiya ooninne waatidi keexxiyaakko, ba huuphiyau naagetto. <sup>11</sup> Aissi giikko, Xoossai Yesuus Kiristtoosa xalaalaa baaso oottidi wottiis. Appe hara baasuwa baasanau ooninne danddayenna. <sup>12</sup> SHin ha baasuwa bolli ooninne worqqan gidin, biran gidin, al77o shuchchan gidin, mittan gidin, gattan woi maqan keexxikko, <sup>13</sup> asa ubbaa oosoi qoncciyaa kiyana. Aissi giikko, taman qonccana gishshau, he gallassai asa ubbaa oosuwa bessana. Asai ubbai ba oosuwa waatidi oottidaakkonne tamai paaccana. <sup>14</sup> Ooninne baasuwa bolli keexxido oosoi minnidi attikko, i woiwaa

ekkana. <sup>15</sup> O oosoinne xuuetikkko, he aawi qohettana. I ba huuphen attana; shin tamaa giddoppe kessi ekkidaadan attana.

<sup>16</sup> Intte Xoossaa beeta maqidase gidiyooaanne Xoossaa Ayyaanai inttenan de7iyooгаа erekketii? <sup>17</sup> Ooninne Xoossaa beeta maqidasiyaa bashshikko, Xoossaikka a bashshana. Aissi giikko, Xoossaa beeta maqidasee geeshsha; he beeta maqidaseekka inttena.

<sup>18</sup> Ooninne ba huuphiyaa cimmooppo. Intteppe ooninne bana ha sa7an aadhdhida eranchcha yaagidi qoppikko, aadhdhida eranchcha gidanau, eeyya gido. <sup>19</sup> Aissi giikko, ha sa7aa aadhdhida eratetta Xoossaa sinttan eeyyatetta. Xoossaa maxaafai, “Xoossai aadhdhida eranchchata eta geniyan oiqqees”

yaagees. <sup>20</sup> Qassi,

“Aadhdhida eranchchatu qofaikka

go77i bannaagaa gidiyooгаа Godai erees”

yaagees. <sup>21</sup> Hegaa gishshau, ooninne asan ceeqqoppo. Aissi giikko, ubbabaikka intteegaa. <sup>22</sup> PHauloosikka, Aphiloosikka, Keefikka, ha sa7aikka, de7oikka, haiqoikka, ha77i de7iyaageekka, sinttappe yaanaageekka, ubbaikka intteegaa. <sup>23</sup> Intte Kiristtoosaageeta; Kiristtoosikka Xoossaagaa.

## 4

### *Kiristtoosa Ashkkarata*

<sup>1</sup> Asai nuna Kiristtoosa ashkkaratudaaninne Xoossaa Xuuraa naagiya sunttatudan qoppo. <sup>2</sup> Yaatidi he sunttati bantta Godaassi ammanettidaageeta gididi, beettanau koshshees. <sup>3</sup> SHin intte woi harai tana pirddikko, ainne gidenna. Harai atto, taanikka ta huuphiyaa bolli pirddikke. <sup>4</sup> Aissi giikko, taani ta huuphiyan ainnekka eriyooobi baawa; shin tana hegee xillissenna. Tana pirddiyaagee Godaa. <sup>5</sup> Hegaa gishshau, Godai xuman genttidobaa poo7uwaa kessiyaagee, wozanaa qofaa qonccissiyaagee yaana wodee gakkanaassi o bollinne oonanne pirddoppite. He wode, asai ubbai huuphiyan huuphiyan Xoossaappe galataa ekkana.

<sup>6</sup> Ta ishato, intteppe ooninne issuwaa sabbidi, issuwaa borena mala, “Xoossaa maxaafan xaafettidaagaa bonchcha” yaagiyaagaa intte nunan tamarana mala, intte gishshau, tabanne Aphiloosabaa leemisodan yootaas. <sup>7</sup> Aissi giikko, haratuppe nena oonee xoqqissidai? Neeni Xoossaappe ekkabeennabai neessi aibee de7iyai? Yaatin, neeni ekkidabaa gidikko, aissi ekkabeennabaadan ceeqetta?

<sup>8</sup> Ha77i intte kalliichchideta. Ha77i duretiichchideta. Nuuni bannan intterkka kawotideta. Nuunikka inttenaara kawotanaadan, intte kawotidaakko lo77o shin. <sup>9</sup> Aissi giikko, taassi misatiyoogaadan, nuuni ha sa7aassi, kiitanchchatussinne asaassi kaa7iyooгаа gidido gishshau, Xoossai nuna Yesuusi kiittidoogeeta haiquwaassi pirdettida asatudan, ubbaappe wurssetta oottiis.

<sup>10</sup> Nuuni Kiristtoosa gishshau eeyya, shin intte Kiristtoosan aadhdhida eranchcha. Nuuni laafa, shin intte mino. Intte bonchchettidaageeta, shin nuuni toshettidaageeta.

<sup>11</sup> Ha wodee gakkanaassi, nuuni namisettoos; saamettoos. Kallottoos; deshettoos. Qassi de7iyo sohuwaa xayidi yuuyoos. <sup>12</sup> Nuuni nu kushiyan oottidi daafuroos. Nuna asi cayiyo wode, anjjoos. Nuna yedetti yuuyiyo wodekka danddayoos. <sup>13</sup> Nu bolli iitabaa haasayiyo wode, nuuni lo77o qaalaa zaaroos. Nuuni hanno gakkanaassikka, ha sa7aa pitonne ubbabaa buura gidida.

<sup>14</sup> Taani ta siiqiyo naatudan, inttena seeranau haggaa xaafaisippe attin, yeellayanau xaafikke. <sup>15</sup> Aissi giikko, Kiristtoosan inttena dichchiya tammu sha7u asai inttessi de7ikkokka, inttessi issi aawaappe hari baawa. Aissi giikko, taani wonggeliyaa inttessi ehiidoogan, Kiristtoos Yesuusan inttessi aawa gidaas. <sup>16</sup> Simmi tanadan hanite yaagada

inttena woossais. <sup>17</sup> Hegaa gishshau, Godan ammanettida ta siiqiyo ta na7aa Ximootiy-oosa inttekko kiittaas. I ubba sohuwan de7iya woosa keetta ubban taani tamarissiyoo Kiristtoos Yesuusan de7iya ta ogiyaa inttena hassayissana.

<sup>18</sup> Taani inttena be7anau inttekko yeennabaa misatin, otorettiya issi issi asati de7oosona. <sup>19</sup> SHin Godai giikko, taani inttekko eesuwan baana; baada he otoranchcha asatussi haasayaa gidennan, eta wolqqa erana. <sup>20</sup> Aissi giikko, Xoossaa kawotettai wolqqaanappe attin, haasayaana gidenna. <sup>21</sup> Taani inttekko xam77aara yooyye woikko siiquwaaranne ashkke ayyaanaara yoo? Augaa dooretii?

## 5

### *Ammaniya Asaa Giddon Oosettida Pokkobaa*

<sup>1</sup> Intte giddon shaaramuxai de7iyoogee tumu zigirettes; hejaa mala shaaramuxai harai atto, Xoossaa ammanenna asaa giddooninne baawa. Aissi giikko, ba aawaa machchiyo aissida asi de7ees. <sup>2</sup> Inttekka otorettideta. Hegaappe intte azzananau bessennee? Hegaa mala borssuwaa oottida bitanee intte shiiquwaappe kichchanau bessees.

<sup>3-4</sup> Ai gidinkka taani ta asatettan inttenaara de7ennabaa gidikkonne, ayyaanan inttenaara de7ais. Ha77i inttenaara de7iyaabaadan hanada, hejaa mala oosuwaa oottida bitaniyaa bolli nu Godaa Yesuus Kiristtoosa sunttan pirddarggaas. Inttenne ta ayyaanai nu Godaa Yesuus Kiristtoosa wolqqaara issippe shiiqidi, <sup>5</sup> he bitaniyaa ayyaanai Godaa Yesuusa gallassan attana mala, a bollaa bashshanau Seexaanaassi intte immanaadan, taani pirddaas.

<sup>6</sup> Intte ceeqoi lo77o gidenna. Guutta irshshoi munaqa ubbaa denttiyoogaa erekketiyye? <sup>7</sup> Intte ooratta gidana mala, nagaraa irshshoi caalidaagaa kessite. Intte irshshoi bainna munaqa mala. Aissi giikko, nuuni Paasikaa gallassaa bonchchiyo dorssai, Kiristtoosi yarshshettiis. <sup>8</sup> Hegaa gishshau, nuuni Oittaa Baalaa suuretettaaninne tumatettan bonchchanaappe attin, caala irshshuwan, iitatettaa irshshuwaaninne geelatettaa irshshuwan bonchchokko.

<sup>9</sup> SHaaramuxana qaaqqatiyaageetuura intte issippe gaittena mala, inttessi dabdaabbiyaa xaafaas. <sup>10</sup> Taani giyoogee ha sa7an de7iya shaaramuxana qaaqqatiyaageetanne woi miishsha amottiyaageeta, bonqqiyaageetanne woi eeqassi goinniyaageeta ubbaakka gidenna. Hegaa gidikko, sa7aappe intte kichchanau bessees. <sup>11</sup> SHin ishantta ha77i geetettiyaageetuppe issoinne shaaramuxana qaaqqatiyaagaa woi miishshaa amottiyaagaa woi eeqassi goinniyaagaa woi cayiyaagaa woi mattottiyaagaa woi bonqqiyaagaa gidikko, intte aara issippe gaittena mala, taani inttessi xaafaas. Hegaa malaara harai atto, qumaakka mooppite.

<sup>12</sup> Aissi giikko, woosa keettappe kareera de7iyaageetu bolli pirddanau tana aibee gattiyai? Intte giddon woosa keettan de7iyaageetu bolli intte pirdekketiyye? <sup>13</sup> SHin kareera de7iyaageetu bolli Xoossai pirddana. He iitabaa oottiya uraa intte giddoppe kessirggite.

## 6

### *Ammaniya Asaa Giddon De7iya Ooshshaa Waatidi Xaissanau Bessii?*

<sup>1</sup> Intteppe issi uraassi ba ishaara mootoi de7iyaabaa gidikko, geeshshatu bolli pirddettanaagaa aggi bayidi, ammanennaageetu bolli pirddettanau waani xalidi bii?

<sup>2</sup> Geeshshati sa7aa pirddanaagaa erekketii? Yaatin, sa7aa intte pirddanaageeta gidikko, ubbabaappe guuxxiyaabaa pirddanau danddayekketii? <sup>3</sup> Ha de7uwaabai atto shin, ammaniyaageeti kiitanchchatu bolli pirddanaagaakka erekketii? <sup>4</sup> Yaatin, inttena ha de7uwaabaassi pirdda keetta koshshikko, woosa keettan asi karido asatun pirddisanau efeitii? <sup>5</sup> Taani inttena yeellayanau haggaa gais; hegee hejaa malee? Intte giddon



ishantta sigettanau danddayiya aadhdhida eranchcha asi issoinne baawee? <sup>6</sup> SHin issi ishai hinkko ishaa pirdda keettan mootidi, he yohuwaa ammanenna asan pirddissii?

<sup>7</sup> Simmi issoi issuwaa mootiyoogee intte gidon de7ikko, hegee intte kunddidoogaa bessees. Hegaappe intte naaqettiyoogeenne cimettiyoogee kehennee? <sup>8</sup> SHin intte intte huuphen issoi issuwaa harai atto, intte ishanttakka naaqheetanne cimmeeta.

<sup>9</sup> Woi makkalanchchati Xoossaa kawotettaa laattennaagaa erekketii? Baloppite. SHaaramuxana qaaqqatiyaageeti woi eeqassi goinniyaageeti woi shaaramuxiyaageeti woi attumaasa gidiiddi, attumaasaara shaaramuxiyaageeti, <sup>10</sup> woi kaisoti woi mi-ishshaa amottiyaageeti woi mattottiyaageeti woi cayiyaageeti woi bonqqiyaageeti Xoossaa kawotettaa laattokkona. <sup>11</sup> Intteppekka issi issi asai hegeetu mala. SHin Godaa Yesuus Kiristtoosa sunttaaninne nu Xoossaa Ayyaanan intte meecettidetanne geeyideta; qassi xillideta.

### *Intte Bollaa Xoossaa Bonchchuwaassi Peeshshite*

<sup>12</sup> Taani koyidobaa ubbaa oottanau danddayais. SHin ubbaikka tana maaddenna. Taani koyidobaa ubbaa oottanau danddayais. SHin aibikka tana haarena. <sup>13</sup> Qumi ulossa; uloikka qumassa. SHin Xoossai uluwaakka qumaakka xaissana. Asa bollai Godaassappe attin, shaaramuxassa gidenna. Godaikka asa bollaassa. <sup>14</sup> Xoossai Godaa haiquwaappe denttiis; qassi nunakka haiquwaappe ba wolqqan denttana.

<sup>15</sup> Intte bollai Kiristtoosa bollaappe shaahettidaagaa gidiyooгаа intte erekketii? Yaatin, taani Kiristtoosa bollaappe shaahettidaagaa efaada, shaaramuxa bolla oottoo? Hanenna! <sup>16</sup> Woi shaaramuxaara gaittiya urai issi bolla gidiyooгаа erekketii? Aissi giikko, Xoossaa maxaafai, “Eti naa77ai issi asa gidana” yaagees. <sup>17</sup> SHin Godaara gaittiya urai ayyaanan aara issuwaa gidees.

<sup>18</sup> SHaaramuxappe baqatite. Issi urai oottiyo hara nagara ubbai a bollaappe kareera de7ees; shin shaaramuxiyaagee ba bolli nagaraa oottees. <sup>19</sup> Woi intte bollai Xoossai inttessi immido inttenan de7iya Geeshsha Ayyaanaa beeta maqidase gidiyooгаа erekketii? Qassi intte intte huuphessa gidekketa. <sup>20</sup> Aissi giikko, Xoossai inttena waagan shammiis. Hegaa gishshau, intte bollan a bonchchite.

## 7

### *Geluwaa Ekuwaabaa Oichchido Oishaanne Zaarido Zaaruwaa*

<sup>1</sup> Intte taassi xaafido yohuwaassi asi maccaariira gaittennaagee lo77o. <sup>2</sup> SHin shaaramuxa gaaso gishshau, attumaasaassi huuphiyan huuphiyan machchiyaa de7u. Qassi maccaasaassikka huuphiyan huuphiyan azinai de7o.

<sup>3</sup> Azinai ba machcheessi bessiyaabaa otto; qassi hegaadan, machchiyaakka ba azinaassi bessiyaabaa oottu. <sup>4</sup> Machchiyaa ba bollaassi goda gidukku; shin i azinai goda. Hegaadankka, qassi azinai ba bollaassi goda gidenna; shin a machchiyaa goda. <sup>5</sup> Intte intte huuphen Xoossaa woosan gencanau ha77issi zoretan tegettanaappe attin, issoi issuwaa diggoppite. Intte inttena naagenna gishshau, Seexanaai inttena paaccennaadan, azinadaaninne machchidan de7ite. <sup>6</sup> SHin taani inttena heгаа intte shenedan hanite gaisippe attin, azazikke. <sup>7</sup> Taani asai ubbai tanadan haniyaakko dosais. SHin Xoossai asau huuphiyan huuphiyan dumma dumma imuwaa immi wottiis; issuwaassi hagaadan, qassi hinkkuwaassi hegaadan immi wottiis.

<sup>8</sup> Hegaa gishshau, taani machchiyo ekkibeennaageetinne am77eti tanadan coo de7iyaakko, etassi lo77o gais. <sup>9</sup> SHin amuwan xuugettiyoogaappe ekkiiyoogeenne geliyoogee lo77o gidiyoo gishshau, eti banttana naaganau danddayana xayikko, ekkonanne gelona.

<sup>10-11</sup> Machchiyaa ba azinaappe shaahettuppu. SHin shaahettikkonne gelennan de7u; woi ba azinaara sigettu. Azinaikka ba machchiyo yeddoppo yaagada, ekkidaageetanne gelidaageeta azazais. SHin haggaa azaziyaagee Godaa gidiyooгааappe attin, tana gidikke.

<sup>12</sup> Taani harata hagaadan gais; Godaa gidenna. Ammanenna machchiyaa de7iyo ammaniya asi ooninne de7ikko, a machchiyaa aara issippe de7iyoogaa i dosikko, o yeddoppo. <sup>13</sup> Qassi ammanenna azinai de7iyo ammaniya machchiyaa de7ikko, i azinai iira issippe de7iyoogaa a dosikko, appe shaahettuppu. <sup>14</sup> Aissi giikko, ammanenna azinai ba ammaniya machcheera de7idi geeyiis. Qassi ammanenna machchiyaa ba ammaniya azinaara de7ada geeyaasu. Hegee bannaakko, intte naati tuna; shin ha77i eti geeshsha. <sup>15</sup> SHin ammanennaagee ammaniyaagaappe shaahettana koyikko shaahetto. Ammaniya machchiyo gidin, woi azinaa gidin, haga mala yohuwan qashettokkona. Aissi giikko, Xoossai nuna sarotettan de7anau xeesiis. <sup>16</sup> Ammaniya maccaasee, neeni ne azinaa ashshanaakkonne ai erai? Woi ammaniya azinau; neeni ne machchiyo ashshanaakkonne ai erai?

### *Xoossai Inttena Koiro Xeesiyo Wode Intte De7iyo Hanotan De7ite*

<sup>17</sup> Gidikonne, asi huuphiyan huuphiyan Godai ayyo immidoogaadaaninne qassi Xoossai bana xeesidoogaadan de7o. Hegee woosa keetta ubban taani tamarissido higgiiyaa. <sup>18</sup> Ooninne qaxxaretti uttidi, Xoossaa ammanidobaa gidikko, ba qaxxaraa malaataa diggoppo. Qassi ooninne qaxxarettennan de7iiddi, Xoossaa ammanidobaa gidikko qaxxarettoppo. <sup>19</sup> Aissi giikko, Xoossaa azazuwaa naaganaappe attin, qaxxarettin qaxxarettana xayin allaallee baawa.

<sup>20</sup> Asi huuphiyan huuphiyan Xoossai bana xeesiyo wode de7iyoogaadan de7o. <sup>21</sup> Xoossai nena xeesiyo wode neeni aillee? Aikko baawa; shin neeni aillettaappe kiyana danddayikko kiya. <sup>22</sup> Aissi giikko, aille gidi uttida asa Godai xeesikko, i Godai aillettaappe kessido asa. Hegaadanka, aille gidenna asa Kiristtoosi xeesikko, i Kiristtoosa aille. <sup>23</sup> Xoossai inttena waagan shammiis. Asa aille gidoppite. <sup>24</sup> Ta ishato, asi huuphiyan huuphiyan Xoossai a xeesiyo wode de7iyo de7uwaadan, Xoossara de7o.

### *Geli Ekkibeenna Asatubanne Am77etubaa Oichido Oishaa*

<sup>25</sup> Geela7otussi Godai tana azazidobai baawa. SHin taani Godaassi ammanetti-daagaa gidido mala, appe maarotettaa ekkidoogaadan, inttena zorais. <sup>26</sup> Simmi ha77i metuwaassi taayyo hagee lo77o milatees; asi hagaadan hanidi de7ikko lo77o. <sup>27</sup> Neeni machchiyo ekkarggidobaa gidikko, o yeddana koyoppa. Machchiyo ekkarggabeennabaa gidikko, ekkana koyoppa. <sup>28</sup> SHin neeni machchiyo ekkikko, nagara oottabaakka. Geela7iyaakka azinaa gelikko, nagara oottabeikku. SHin hegaadan oottiyaageeti bantta bolli waayiyaa ehaana. Qassi taani inttena hegaappe ashshanau koyais.

<sup>29</sup> SHin ta ishato, taani giyoogee haga; wodee wuriis. Hagaappe sinttan machchida asati, machchibeenna asatudan hanona. <sup>30</sup> Yeekkiyaageeti yeekkennabaadan, ufattiyaageeti ufattennabaadan, shammiyaageetikka shammidikka aibinne bannabaadan, <sup>31</sup> ha sa7aa mehiyan maadettiyaageeti muleera maadettennabaadan hanona. Aissi giikko, ha sa7aa merai attiyaagaa.

<sup>32</sup> Intte hirgennan de7anaagaa taani dosais. Machchibeennaagee Godaa ufaissanau koyiyo gishshau, a oosuwaabaa qoppees. <sup>33</sup> SHin machchidaagee ba machchiyo ufaissanau koyiyo gishshau, sa7aabaa qoppees. <sup>34</sup> A qofai shaahettiis. Azina gelabeenna geela7iyaa ba ashuwaaninne ba shemppuwan geeyana koyiyo gishshau, Godaa oosuwaabaa qoppausu. SHin azinaa gelidaara ba azinaa ufaissanau koyiyo gishshau, sa7aabaa qoppausu.

<sup>35</sup> Taani haga inttena maaddana mala gaada gaisippe attin, inttena xubbanaayyo giikke. SHin intte wogabaanne maarabaa oottidi, Godaa oosuwan minnana mala koyais.

<sup>36</sup> Ooninne ba giigissido geela7iyo ekkiiyo wodee gakkinn, bana naaganau ayyo danddayettana xayikko, ba koyidoogaa otto. I o ekkikko, hegan nagari baawa. <sup>37</sup> SHin asi ba

wozanan minnikko, aikko baawa. Qassi bana naagidi, ba giigissido geela7iyo ekkennan agganaagaa, ooninne wolqqanttennan ba wozanan qofaa qachchidabaa gidikko loittiis.

<sup>38</sup> Hegaa gishshau, geela7iyo ekkiya urai loittiis; qassi ekkennaagee ubba daro loittiis.

<sup>39</sup> Gelida maccaasiyaa ba azinai de7ido keenan aani qashettidaaro. SHin i haiqqikko, Godaa ammaniya asaa wogan geliyoogaa gidoppe attin, ba dosido azinaa gelana danddayausu. <sup>40</sup> Ta qofa gidikko, gelennan de7iyaakko, a ufaittana. Qassi tanan Xoossaa Ayyaanai de7iyoobaa taayyo milatees.

## 8

### *Eeqaassi Yarshshido Ashuwaabaa*

<sup>1</sup> Eeqaassi yarshshido qumaabaa gidikko, nuuni ubbaikka eriyooogaa eroos. Eratettai otorssees; shin siiqoi dichchees. <sup>2</sup> Ooninne baayyo aibakko eriyaabaa milatikko, i biron eranau bessiyooogaa eriichchibeenna. <sup>3</sup> SHin ooninne Xoossaa siiqikko, Xoossai a erees.

<sup>4</sup> Hegaa gishshau, eeqaassi yarshshido qumaa meettaabaa gidikko, eeqa ubbai sa7an aibanne gidennaagaanne, issi Xoossaappe attin, hara Xoossi bainaagaa nuuni eroos.

<sup>5</sup> Aissi giikko, daro xoossatinne daro godati de7oosona. SHin harai atto, saluwan gidin sa7an gidin, xoossata giyoogeeti de7ikkokka, <sup>6</sup> ubbabaa medhdhidaagee nuuni ayyo de7iyoogee, issi Xoossai, Aawai, nuussi de7ees. Qassi ubbabai aani merettidoogeenne nuuni aani de7iyoogee issi Godai, Yesuus Kiristtoosikka nuussi de7ees.

<sup>7</sup> SHin ha eratettai asa ubbau de7enna. Issi issi asati eeqaara meezetido gishshau, ha77i gakkanaassikka, “Eeqau yarshshido qumaa” yaagiiddi moosona. Qassi eta zoriya wozanai shugo gididoogan, etau eti ha quman tunidabaa milatees. <sup>8</sup> SHin qumai nuna Xoossaara dabboyenna. Nuuni maana xayikkonne nuussi aibinne paccenna; miikkonne nuussi aibinne wodhdhenna.

<sup>9</sup> SHin hagee intte intte shenedan haniyoogee shugo ammanuwaara de7iyaageeta nagaran ooggenaa mala naagetite. <sup>10</sup> Aissi giikko, neeni eranchchai eeqau yarshshido qumaa maanau eeqa keettan uttidaashin, shugo ammanuwaara de7iya issi asi nena be7ikko, eeqaassi yarshshido qumaa i maanau a zoriya wozanai a minttetteeneeyye? <sup>11</sup> Yaanikko ha shugo ammanuwaara de7iya ne ishah, Kiristtoosi a gishshau haiqqidoogee, ne eratettan bayees. <sup>12</sup> Hegaadankka, intte intte ishantta naaqqiyoogaaninne eta zoriya shugo wozanaa masunxxissiyooogan Kiristtoosa naaqqeeta. <sup>13</sup> Hegaa gishshau, qumai ta ishah xubbanabaa gidikko, a xubbenna mala, haranttuwaa mulekka asho miikke.

## 9

### *Yesuusi Kiittidoogee De7iya Maataanne Eti Wolqqan Oottanau Bessiyaabata*

<sup>1</sup> Taani ailletetti baina asa gidikkinaa? Yesuusi kiittidoogaa gidikkinaayye? Nu Godaa Yesuus Kiristtoosa be7abeikkinaayye? Intte taani Godaassi oottido ta oosuwaaxeera gidekketiyye? <sup>2</sup> Taani haratuyyo Yesuusi kiittidoogaa gidana xayikkokka, intteyyo Yesuusi kiittidoogaa gidiyooogee erettidaagaa; aissi giikko, taani Godan Yesuusi kiittidoogaa gidiyooogau intte markka.

<sup>3</sup> Tana boriyaageetussi taani immiyo zaaroi haggaa. <sup>4</sup> Maanaunne uyanau nuussi maati baawee? <sup>5</sup> Yesuusi kiittido haratudaaninne Godaa ishanttudun, qassi PHe-xiroosadan, ammaniya machcheera manddaranau nuussi maati baawee? <sup>6</sup> Woi ooso oottennan agganau maati bainaageeti ta xalaaleenne Barnnaabaasa xalaalee? <sup>7</sup> Ba huuphe miishshaa miidi, wotaaddaratetta oottiyai oonee? Woikko woine tura tokkidi, a aife meennaagee oonee? Woikko dorssa wude heemmiiddi, he dorssaa wudiyaappe maatta uyennai oonee?

<sup>8</sup> Taani haggaa asa qofa xalaalan giyaanaa? Woikko higgee qassi haggaa geennee? <sup>9</sup> Aissi giikko, Muuse Higgiyan, “Audiyan kattaa yedhdhiya booraa doonaa qachchoppa”

geetettidi xaafettiis. Xoossai booratubaa qoppidee? <sup>10</sup> Woikko i heгаа giyoogee muleera nu gishshaassa gidennee? Tumakka nu gishshassi xaafettiis; goyiya bitaneekka kattaa qoxxiya bitaneekka, “Tana gakkiiyaagaa ekkana” yaagiiddi oottanau bessees. <sup>11</sup> Nuuni intte giddon ayyaana yohuwaa zeridaageeta gidiiiddi, nu bollaassi maado gidiyaabaa intteppe cakkikko gitabee? <sup>12</sup> Harati heгаа intteppe ekkana etau maati de7ikko, nuuyyo etaagaappe aadhdhiya maati baawee?

SHin nuuni Kiristtoosa wonggeliyaa ogiyaassi xube gidennaadan, ubbabaa gencciyoogaappe attin, he maatan go7ettibookko. <sup>13</sup> Beeta Maqidasiyan oottiya asati bantta qumaa Beeta Maqidasiyaappe ekkiyoogaa erekketii? Qassi yarshshiyooosan oottiyaageetikka yarshshuwaappe ekkiyoogaa erekketii? <sup>14</sup> Hegaadankka, qassi wonggeliyaa mishiraachchuwaa yootiyaageeti bantta qumaa wonggeliyaappe ekkanaadan, Godai azaziis.

<sup>15</sup> SHin taani ha maata ubban ainne go7ettabeikke. Taani haggaa xaafidoogee heгаа mala maatai taassi de7anau bessees yaagiyoogaassa gidenna. Aissi giikko, ta ceequwaa ooninne hada oottiyoogaappe haiqqiyooogee taassi keha. <sup>16</sup> Wonggeliyaa mishiraachchuwaa yootanau taani azazetta uttido gishshau, taani a yootikkokka taassi ceeqettiyoobi baawa. Wonggeliyaa mishiraachchuwaa yootennan aggikko, taassi aayye7ana. <sup>17</sup> Aissi giikko, taani haggaa dosada oottikko, taassi woitoi de7ees. SHin taani dosennan ixikkokka, wonggeliyaa gishshayyo hadaraa Xoossai taassi immiis. <sup>18</sup> Yaatin, ta woitoi aibee? Wonggeliyaa mishiraachchuwaa yootaidda, taassi wonggeliyan de7iya kumetta maatan go7ettennan, wonggeliyaa mishiraachchuwaa coo yootiyoogaa.

<sup>19</sup> Taani ai asassinne aille gidennan aggikkokka, darota zaaranau tana ubbaassi aille kessaas. <sup>20</sup> Taani Aihudata zaaranau etaara eta gidada de7aas. Ta huuphen higgiiyaappe garssaara de7ikke. SHin higgiiyaappe garssaara de7iyaageeta zaaranau higgiiyaappe garssaara de7iya asa mala gidaas. <sup>21</sup> Taani higgee banna asatuura de7aidda, higgee banna asadan hanaas. Xoossaa higgee xayiina gidenna. SHin higgee bannaageeta zaaranau, Kiristtoosa higgiiyaappe garssaara de7aas. <sup>22</sup> Taani ammanuwan shug-giyaageeta zaaranau, shugotu mala gidaas. Taani ai ogiyaaninne amarida asata ashshanau, ubba asatuura ubbanan eta mala gidaas. <sup>23</sup> Taani wonggeliyaa anjuuwaa shaakkanau, wonggeliyaa gishshau, ubbabaa oottais.

<sup>24</sup> Wottaa naasiyan woxxiya ubbai woxxees. SHin issuwaa xalaalai woituwaa ekkiyoogaa erekketiyye? Hegaadan intteikka woituwaa ekkana woxxite. <sup>25</sup> Baaxetiya asai ubbai ubbanan bana naagees. Asai heгаа oottiyoogee huuphiyan wottiyo xayiya akiliiliyaa demmanaassa. SHin nuuni oottiyoogee huuphiyan wottiyo xayenna akiliiliyaa demmanaassa. <sup>26</sup> Heggaa gishshau, taani qofi bannan woxxiyaabaadan woxxikke. Carkko yimppiya asadankka yimppikke. <sup>27</sup> SHin taani haratussi yootidoogaappe guyyiyan, ta huuphen olettidaagaa gidenna mala, ta bolla yimppada haarissais.

## 10

### “Hagetudan Hanoppite” Giyo Leemisota

<sup>1</sup> Heggaa bollan ta ishato, taani intte haggaa erana mala koyais. Nu aawati ubbai shaaraappe garssaara de7idosona; ubbaikka abbaa giddoora pinnidosona. <sup>2</sup> Eti ubbai Muusa kaalliyaageeta gidanau, shaaraaninne abban xammaqettidosona. <sup>3</sup> Eti ubbai he issi ayyaana qumaa miidosona. <sup>4</sup> Qassi ubbaikka he issi ayyaana ushshaa uyidosona. Aissi giikko, eti banttana kaalliya ayyaana shuchchaappe uyidosona; he shuchchai Kiristtoosa. <sup>5</sup> SHin Xoossai etappe dariya baggatun ufaittibeenna gishshau, eta ahai bazzon laalettiis.

<sup>6</sup> Eti iitabaa amottidoogaadan, nuunikka qassi iitabaa amottennaadan, hegee ubbai nuussi leemiso gidiiis. <sup>7</sup> Xoossaa maxaafai, “Asai maanaunne uyanau uttiis; qassi



duranau denddi eqqiis” yaagiyoogaadan, qassi etappe issooti issooti eeqassi goin-nidoogaadan, intte goinniyaageeta gidoppite. <sup>8</sup> Etappe issooti issooti shaaramuxi-doogaadan, nuuni shaaramuxanau bessenna. Hegaa gaasuwan etappe issi gallassi laatamanne heezzu sha7ai haiqqiis. <sup>9</sup> Etappe issooti issooti Godaa paaccidi, shooshshan duketti xayidoogaadan, nuuni Godaa paaccanau bessenna. <sup>10</sup> Etappe issooti issooti zuuzummin, haiqo kiitanchchai eta xaissidoogaadan zuuzummoppite.

<sup>11</sup> Hagee ubbai haratuyyo leemiso gidanau eta bolli gakkiiis. Qassi nuna wodiyaawurssettai gakkana matidoogeeta seeranau xaafettiis.

<sup>12</sup> Hegaa gishshau, bau eqqidobaa milatiyo urai ooninne kunddennaadan, bana naago. <sup>13</sup> Inttena gakkiiya paacee, asa ubbaa gakkiiya paace malappe attin, ainne dummatenna. Intte wolqqai danddayiyoogaappe aadhdhiya paaciiyan intte paaccetanau koyenna Xoossai ammanettidaagaa. SHin inttena paacee gakkiiyo wode, he paaciyaa i inttena danddayissana. Qassi he paaciyaaappe intte kessi ekkiyo ogiyaakka immana.

<sup>14</sup> Hegaa gishshau, ta siiqotoo, eeqassi goinniyoogaappe baqatite. <sup>15</sup> Intte wozannaama asa gididoogaadan, taani intteyyo odais. Taani giyoogaa intte pirddite. <sup>16</sup> Nuuni Xoossaa galatiyo anjuwaa burccukko Kiristtoosa suuttaara walahai de7iyoojaa gidenneeyye? Qassi nuuni menttiyo oittai Kiristtoosa ashuwaara walahai de7iyoojaa gidenneeyye? <sup>17</sup> Issi oittai de7iyo gishshau, nuuni daro gidikkokka, issi bolla. Aissi giikko, nuuni ubbaikka he issi oittaa shaakkeettes.

<sup>18</sup> Israa7eela asaa xeellite. Yarshshuwaa miyaageeti yarshshiyooosan maabaran de7iyaageeta gidokkonaayye? <sup>19</sup> Simmi taani woigiyaanaa? Eeqassi yarshshettida qumai pattennabeeyye woi eeqi pattennabee? <sup>20</sup> Gidenna; shin taani giyoogee Xoossaa ammanenna asati xalagetussi yarshshiyooogaappe attin, Xoossaassi yarshshokkona. Xalagetuura intte issippe zuppetana mala, taani koyikke. <sup>21</sup> Godaa burccukkuwaaninne qassi xalagetu burccukkuwan uyanau intte danddayekketa. Godaa masoofiyaaninne qassi xalagetu masoofiyan maanauka danddayekketa. <sup>22</sup> Woikko nuuni Godaa qanaatissanau koyiyoo? Nuuni appe minniyoonii?

<sup>23</sup> Ubbabaa oottanau tana diggiyaabi baawa; shin ubbaba go77enna. Ubbabaa oottanau diggiyaabi baawa; shin ubbaba maaddenna. <sup>24</sup> Ooninne hara asa go77iyaabaa qoppoppe attin, harai atto issoinne bana go77iyaabaa qoppoppo.

<sup>25</sup> Giyan axaare taran baizettiyaabaa aibanne zoriya wozanaa gishshau, ainne oichchennan miite. <sup>26</sup> Aissi giikko, sa7ainne sa7an de7iyaabai ubbai Godaabaa.

<sup>27</sup> Issi ammanenna asi inttena imattanau xeesin baanau koyikko, zoriya wozanaa gishshau, ainne oichchennan intte sintti i aattiyoojaa ubbaa miite. <sup>28</sup> SHin issi urai intteyyo, “Hagee eeqassi yarshshidoogaa” giikko, he intteyyo odida bitaniyaa gishshaunne qassi zoriya wozanaa gishshau, he qumaa mooppite. <sup>29</sup> Taani giyoogee nena ne huuphen zoriya wozanaa gishshaassa gidenna; shin hinkko bitaniyaa zoriya wozanaa gishshaassa.

Taani ta koyidoogaa hananau danddayiyo ta hanotettaa hara asa zoriya wozanai aissi pirddii? <sup>30</sup> Taani Xoossaa galatada qumaa miikko, taani Xoossaa galatada miido qumaassi aissi borettiyaanaa?

<sup>31</sup> Simmi intte ai miikkonne, woi ai uyikkonne, woi intte ai oottikkonne, ubbabaa Xoossaa bonchchuwaassi oottite. <sup>32</sup> Intte Aihuda asatussi woi Giriike asatussi woikko Xoossaa woosa keettaassi xube gidoppite. <sup>33</sup> Taani qassi daroti attana mala, eta ubbaa go77aappe attin, ta huuphe go77aa koyennan, asa ubbaa ubaban ufaissiyooogaadan, inttekka oottite.

## 11

<sup>1</sup> Taani Kiristtoosadan haniyoogaadan, inttekka tanadan hanite.

*Asai Issippe Woossiyo Wode De7anau Bessiya Wogaa*



<sup>2</sup> Ta ishato, intte ubbaban tana hassayiyo gishshaunne, wogaa taani intteyyo im-midoogaadan, intte minttidi naagiyo gishshau, inttena galatais. <sup>3</sup> SHin Kiristtoosi at-tumaasa ubbaayyo huuphe gidiyooгаа, attumaasi maccaasassi huuphe gidiyooгаanne qassi Xoossai Kiristtoosassi huuphe gidiyooгаа intte erana mala koyais. <sup>4</sup> Xoossaa woossiiddi, woi hananabaa yootiiddi, ba huuphiyaa qachchiya attumaasai ubbai Kiristtoosa toochchees. <sup>5</sup> Qassi Xoossaa woossaidda woi hananabaa yootaidda, ba huuphiyaa qachchenna maccaara ba azinaa toochchausu; aissi giikko, a ba huuphiyaa meedettaichchidaariira issi mala.

<sup>6</sup> Maccaara ba huuphiyaa qachchana xayikko, qanxxissu. SHin iyyo i huuphiyaa qanxxissanaagee woi meedissanaagee pokkikko, ba huuphiyaa qachchu. <sup>7</sup> Attumaasai Xoossaa leemisonne bonchcho gidiyoo gishshau, ba huuphiyaa qachchanau bessenna; shin maccaara attumaagaassi bonchcho. <sup>8</sup> Aissi giikko, maccaara attumaagaappe merettaasuppe attin, attumaagee maccaarippe merettibeenna. <sup>9</sup> Aissi giikko, mac-caara attumaagaa gishshau merettaasuppe attin, attumaagee maccaari gishshau merettibeenna. <sup>10</sup> Hegaa gishshau, maccaara ba azinaa alaafetettaappe garssaara de7iyooгаа erissiya malaatai kiitanchchatu gishshau, i huuphiyan de7anau bessees.

<sup>11</sup> SHin Godaa qofan maccaara attumaagee bannan de7ukku; attumaageekka mac-caara bannan de7enna. <sup>12</sup> Aissi giikko, maccaara attumaagaappe merettidoogaadan, hegaadan qassi attumaageekka maccaarippe yelettiis. Qassi ubbabaikka Xoossaappe yees.

<sup>13</sup> Intte intte huuphen pirddite. Maccaara ba huuphiyaa qacennan Xoossaa woos-sanau bessii? <sup>14-15</sup> Attumaagee ba huuphiyaa dichchikko, ayyo pokko. SHin maccaara ba huuphiyaa dichchikko, iyyo bonchcho gidiyooгаа harai atto, meretaikkonne inttena tamarissennee? Aissi giikko, maccaari huuphee o kammanau iyyo imettiis. <sup>16</sup> SHin ooninne ha yohuwan palamettana koyikko, nuussi gidin woikko Xoossaa woosa keetta-tussi gidinkka, hagaappe hara meezee baawa.

### *Qurbbaaniyaa (Godaa Kahuwaa) Ekkiyo Wogaa*

*(Maatiyoosa 26:26-29; Marqqoosa 14:22-25; Luqaasa 22:14-20)*

<sup>17</sup> SHin intte shiiqiyoogee iitabaassappe attin, lo77obaassa gidenna gishshau, taani ha azazuwaa immaidda inttena galatikke. <sup>18</sup> Aissi giikko, ubbabaikka de7o. SHin intte woosa keettan shiiqiyo wode, intte giddon phalqgettai de7iyooгаа taani siyais. Qassi hegee issi baggaara tuma gidiyooгаа ammanais. <sup>19</sup> Aissi giikko, intte matan ammanettidaageeti beettana mala, intte giddonkka qassi shaahoi de7anau bessees. <sup>20</sup> Hegaa gishshau, intte issippe shiiqiyo wode, intte shiiqoi Godaa kahuwaa maanaassa gidenna. <sup>21</sup> Aissi giikko, intte qumaa miyo wode, ubbai huuphiyan huuphiyan baagaa baagaa miyo gishshau, issoi namisettees; issoi qassi mattottees. <sup>22</sup> Maanaunne uyanau intteyyo keetti baawee? Woikko Xoossaa woosa keettaa kareetii? Qassi aibinne bannaageeta yeellayeeetii? Taani inttena woigoo? Ha yohuwan taani inttena galatoo? Galatikke.

<sup>23</sup> Aissi giikko, taani qassi intteyyo immido timirttiyaa Godaappe ekkaas. Godai Yesuusi eti a aattidi immido qammi oittaa ekkidi, <sup>24</sup> Xoossaa galatiis; oittaa menttidi, “Heite. Miite. Hagee intteyyo meqqida ta ashuwaa. Hagan tana hassayite” yaagiis. <sup>25</sup> Hegaadanka, kahuwaa mi simmin, burccukkuwaa qassi ekkidi, “Hagee burccukko i ta suuttan maacettida ooratta maachchaa. Intte appe uyido wode ubban hegan tana hassayite” yaagiis. <sup>26</sup> Aissi giikko, intte ha oittaa miido wode ubbaaninne ha burccukkuwaappe uyido wode ubban Godai yaana gakkanaassikka, a haiquwaa yooteeta.

<sup>27</sup> Hegaa gishshau, bessenna ogiyan Godaa oittaa miyaagee, woikko Godaa burccukkuwaappe uyiyaagee ooninne a ashuwaanne a suuttaa acotees. <sup>28</sup> SHin asi ba huuphiyaa qoro. Yaatidi oittaa mo. Burccukkuwaappekka uyo. <sup>29</sup> Aissi giikko, Godaa ashuwaa shaakkidi erennan oittaa miyaageenne burccukkuwaappekka uyiyaagee ba

huuphiyaassi pirddaa meesinne uyees. <sup>30</sup> Hegaa gishshau, intte gidдон daroti daa-furanchchanne hargganchcha; qassi intte gidдoppe unddennidaageeti haiqqidosona. <sup>31</sup> SHin nuuni nu huuphiyaa tumu qoridaakko, Xoossai nuna pirddenna. <sup>32</sup> Nuuni pirddettiyo wode, ha sa7aara issippe pirddettenna mala, Godai nuna seerees.

<sup>33</sup> Hegaa gishshau, ta ishato, Godaa qumaa maanau intte shiiqiyo wode, issoi issuwaa gatti ekkite. <sup>34</sup> Ooninne namisettidabaa gidikko, issippe shiiqiyo wode Xoossaa pirddan intte gelenna mala, ba sooni mo.

Attidabaa taani yaa baada giigissana.

## 12

### *Geeshsha Ayyaanaa Imotata*

<sup>1</sup> Ta ishato, Geeshsha Ayyaanaa imuwaabaa intte eranau koyais. <sup>2</sup> Intte Xoossaa ammanenna wode, ubba wode kaalliyoogaadankka, haasayenna eeqatukko intte bi-idoogaa ereeta. <sup>3</sup> Hegaa gishshau, Xoossaa Ayyaanai kaalettiyo asi ooninne, “Yesuusi qanggetto” yaagidi haasayennaagaanne qassi Geeshsha Ayyaanai kaalettikkoppe attin, harai atto issi asinne, “Yesuusi Goda” gaanau danddayennaagaa taani inttena erissais.

<sup>4</sup> Ayyaanaa imoi dumma dumma; shin immiya Ayyaanai issuwaa. <sup>5</sup> Qassi oottiyo oosoi dumma dumma; shin Godai issuwaa. <sup>6</sup> Oosuwaa oottanau dumma dumma ogee de7ishin, he oottiyo oge ubbaa asa ubbau qonccissiya Xoossai issuwaa. <sup>7</sup> SHin asa ubbaa maaddanau, Geeshsha Ayyaanaa qonccissiyo wolqqai ubbaayyo huuphiyan huuphiyan imettiis.

<sup>8</sup> Aissi giikko, Geeshsha Ayyaanai issuwaassi aadhdhida eratettaa haasayaa immees; qassi issuwaassi eratettaa haasayaa immees. <sup>9</sup> He Geeshsha Ayyaanai issuwaassi amanuwaa immidi, hinkkuwaassi hargganchchaa pattiyo wolqqaa immees. <sup>10</sup> Geeshsha Ayyaanai issuwaassi Xoossai oottiyo malaataa oottiyo wolqqaa immidi, issuwaassi hananabaa yootiyo wolqqaa immees. Issuwaassi ayyaanatu gidduwan de7iya dummatettaa eriyo wolqqaa immidi, issuwaassi dumma dumma qaalan haasayiyo wolqqaa immees. Qassi issuwaassi dumma dumma qaalan haasayidoogaa birshshiyo wolqqaa immees <sup>11</sup> SHin ha ubbabaa oottiyaagee he issi Geeshsha Ayyaanaa. Asa ubbaassi i ba koyiyoogaadan, dumma dumma imuwaa shaakki shaakkidi immees.

### *Issi Bollan De7iya Dumma Dumma Qommota*

<sup>12</sup> Kiristtoosi daro qommoti de7iyo issi bolla mala. Bollai daro qommotuppe merettidabaa gidikkokka, issi bolla. <sup>13</sup> Aissi giikko, nuuni Aihuda asa gidikkonne woi Giriike asa gidikko, woi aille gidikkonne woi goqa gidikko, ubbai issi Geeshsha Ayyaanai issi bolla gidanau xammaqettida. Qassi nuuni ubbaikka issi Geeshsha Ayyaanaa uyida.

<sup>14</sup> Aissi giikko, bollaassi qommoi daro gidiyooagaappe attin, issuwaa gidenna. <sup>15</sup> Tohoi, “Taani kushe gidenna gishshau, bolla qommo gidikke” giikko, i hega giyoogee bolla qommo gidiyooaga digganee? <sup>16</sup> Haittaikka, “Taani aife gidenna gishshau, bolla qommo gidikke” giikko, i hega giyoogee bolla qommo gidiyooaga digganee? <sup>17</sup> Bolla ubbai aife xalaala gidiyaakko, waatidi siyanau danddayii? Qassi bolla ubbai haitta xalaala gidiyaakko, waatidi singganau danddayii?

<sup>18</sup> SHin Xoossai ba koyidoogaadan, bolla qommota issuwaa issuwaa bolla wot-tiis. <sup>19</sup> Ubbai issi qommo gidiyaakko, bollai awan de7anee? <sup>20</sup> SHin qommoti daro gidikkokka, bollai issuwaa.

<sup>21</sup> Aifee kushiyaa, “Neni tana koshshakka” gaanau danddayenna. Woikko qassi huuphee tohota, “Intte tana koshshekketa” gaanau danddayenna. <sup>22</sup> SHin laafa milatiya bolla qommoti daro koshshiyaageeta. <sup>23</sup> Bolla qommotuppe bonchchettennabaa nuussi milatiyaageeta nuuni daro bonchcheettes. Qassi nuna yeellaiya bolla qom-motakka keehi bonchcheettes. <sup>24</sup> Nu bollaappe lo77iya baggaa bonchchoi koshshenna;

shin bonchchoi pacciyo bollaa qommotussi aadhdhiya bonchchuwaa immanau, Xoos-sai bollaa issippe gattiis. <sup>25</sup> Bollaa qommoti issoi issuwaassi issi mala qofaa qop-panaappe attin, bollan dummatetti de7anau bessenna. <sup>26</sup> Bollaa qommotuppe issoi seelettikko, bollaa qommoti ubbaikka aara seelettoosona; bollaa qommotuppe issoi bonchchettikko, bollaa qommoti ubbai aarakka ufaittoosona.

<sup>27</sup> Intte ubbai Kiristtoosa bolla; qassi huuphiyan huuphiyan intte ubbaikka a bollaa qommota. <sup>28</sup> Xoossai woosa keettan issi issi asata, koiruwan Yesuusi kiittidoogeeta, naa77anttuwan hananabaa yootiyaageeta, heezanttuwan tamarissiyaageeta, hegaappe guyyiyan, Xoossai oottiyo malaataa oottiyaageeta, hegaappe guyyiyan, pattiyo wolqqai de7iyooqeeta, maaddiyaageeta, woosa keettaa aissiyaageetanne dumma dumma qaalan haasayiyaageeta oottiis.

<sup>29</sup> Ubbati Yesuusi kiittidoogeetee? Ubbati hananabaa yootiyaageetee? Ubbati tamaris-siyaageetee? Ubbati Xoossai oottiyo malaataa oottiyoona? <sup>30</sup> Ubbassai pattiyo wolqqai de7ii? Ubbati dumma dumma qaalan haasayioona? Qassi dumma dumma qaalan haasayidobaa ubbati birshshioona? <sup>31</sup> SHin ubbaappe aadhdhiya imuwaa minttidi koyite.

Qassi ubbaappe keehi aadhdhiya ogiyaa taani inttena bessana.

## 13

### *Tumu Siiquwaa*

<sup>1</sup> Taani asa qaalaaninne kiitanchcha qaalan haasayikkokka taassi siiqoi xayikko, ta haasayai kilddi giya daala mala; woikko chachachi giya shappo mala. <sup>2</sup> Hananabaa yootiyo imoi taassi de7iyaakkokka, taani geema yoho ubbaanne eratetta ubbaa eriyaakkokka, qassi deriyaa harasaa efiyo ammanoi taassi de7iyaakkokka, siiqoi xayikko, taani aibanne gidikke. <sup>3</sup> Taassi de7iyaabaa ubbaa hiyyeesata mizanau immiyaakkokka harai atto, ta bollaa taman xuugganau aatta immiyaakkokka siiqoi xayikko, tana ainne go77enna.

<sup>4</sup> Siiqoi danddayanchcha. Siiqoi kehees. Siiqoi qanaatenna. Ceeqettenna; qassi otorettena. <sup>5</sup> Siiqoi baassi bessennabaanne oottenna. Uuzettenna. Yiillotenna. Siiqoi naagettidoobaakka paidenna. <sup>6</sup> Siiqoi tumatettan ufaittiyoogaappe attin, wordduwan ufaittena. <sup>7</sup> Siiqoi ubbabaa danddayees. Ubbabaikka hanana giidi, ufaissan naagees. Ubbabaa gencees.

<sup>8</sup> Siiqoi mulekka xayenna. SHin hananabaa yootiyoogeekka xayana. Dumma dumma qaalan haasayioogeekka attana. Eratettaikka xayana. <sup>9</sup> Aissi giikko, nuuni erattet-taappe bagгаа ereettes; hananabaa yootiyoogaappekka bagгаа yoteettes. <sup>10</sup> SHin kumettai yiyo wode, baggai xayana.

<sup>11</sup> Taani naatettan de7iyo wode, na7adan haasayais. Na7adan qoppais. Qassi na7adankka akeekais. Wodalla gidido wode, naatetta hanuwaa xaissaas. <sup>12</sup> Nuuni ha77i be7iyooqee heregan be7iyo lem77i lem77iya mera mala; shin he wode nuuni nu aifiyan qoncciyaa be7ana. Ha77i taani erattettaappe bagгаа erais; shin Xoossai tana wurssidi eriyoogaadan, he wode taanikka wurssa erana.

<sup>13</sup> SHin heгаа gidikko, ammanoi, hanana giidi ufaissan naagiyoogeenne siiqoi, hageeti heezai minnidi de7oosona. De7inkka hageetuppe aadhdhiyaagee siiquwaa.

## 14

### *Geesha Ayyaanaa Imotanne Eta Go77aa*

<sup>1</sup> Siiquwaa kaallite. Ayyaanaa imuwaakka minttidi koyite. SHin ubbaappe aattidi, hananabaa yootiyoogaakka koyite. <sup>2</sup> Aissi giikko, dumma dumma qaalaa haasayiyya urai Xoossaassi haasayeesippe attin, asassi haasayenna. Aissi giikko, i haasayiyoogaa ooninne akeekenna. SHin asassi qonccibeenna yohuwaa Ayyaanaa wolqqan haasayees. <sup>3</sup> SHin hananabaa yootiyaagee asa maaddanau, zoranaunne minttettanau asassi haasayees. <sup>4</sup> Dumma dumma qaalaa haasayiyya urai bana maaddees. SHin hananabaa yootiyaagee woosa keettaa maaddees.

<sup>5</sup> Intte ubbai dumma dumma qaalaa haasayanaagaa taani dosais. SHin hananabaa yootanaagaa hegaappe aattada dosais. Aissi giikko, dumma dumma qaalaa haasayiyyaagee he haasayidoogaa woosa keettaa maaddanau birshshiya asi xayikko, dumma dumma qaalaa haasayiyyaagaappe hananabaa yootiyaagee aadhdhees.

<sup>6</sup> SHin ta ishato, ha77i taani inttekko baada, dumma dumma qaalaa haasayaidda, ajjuutan woi eratettan woi hananabaa yootiyoogan woi tamarissiyooogan inttessi yootana xayikko, taani inttena ai go77iyaanaa? <sup>7</sup> Harai atto, shemppoi bannabai puulaale gidin woikko diitta gidin giiriiddi, ba giirettaa dummatettaa erissana xayikko, puulaale punniyaakkonne, woi diitta diixxiyaakko, asi waatidi eranee? <sup>8</sup> Qassi malkkataa waasoi geeyidi erettana xayikko, olaassi oonee gigettana? <sup>9</sup> Hegaadankka, qassi dumma dumma qaalaa intte haasayiyoogee qoncce gidennan xayikko, intte haasayiyoogaa asi waatidi akeekanee? Aissi giikko, carckkuwaassi intte haasayeeta.

<sup>10</sup> Ha sa7an daro qaalaa de7ennan aggenaa; qassi birshshetti banna qaalaa issoinne baawa. <sup>11</sup> SHin issi asi haasayiyo qaalaa taani erana xayikko, he haasayiyyaagee taassi imatta gidees; taanikka assi imatta gidais. <sup>12</sup> Hegaadankka, qassi Geesha Ayyaanaa imuwaa intte ekkana minttidi koyiyaageeta gidiiyo gishshau, woosa keettaa dichchanau maaddiyaabaa ubbaappe aattidi koyite.

<sup>13</sup> Hegaa gishshau, dumma dumma qaalaa haasayiyyaagee ba haasayidobaa birshshanau danddayana mala, Xoossaa woosso. <sup>14</sup> Aissi giikko, taani dumma dumma qaalaa Xoossaa woossikko, ta ayyaanaikka woossee; shin ta wozanaa qofai ainne go7ettenna. <sup>15</sup> Yaatin, taani waatoo? Taani ta ayyaanan Xoossaa woossana; qassi ta qofankka Xoossaa woossana. Ta ayyaanan yexxana; qassi ta qofankka yexxana. <sup>16</sup> Hegaa gidana xayikko, neeni ne ayyaanaa xalaalan Xoossaa galatiyaabaa gidikko, he sohuwan neeni giyoogaa erenna asi neeni Xoossaa galatiyoogaa erennan, neeni galatidoogan woigidi, "Amin77i" gaanee? <sup>17</sup> Neeni Xoossaa lo77o galataasa; shin hegee hinkko bitaniyaa maaddenna.

<sup>18</sup> Taani dumma dumma qaalaa intte ubbaappe aattada haasayiyo gishshau, Xoossaa galatais. <sup>19</sup> SHin taani woosa keettan harata tamarissanau dumma dumma qaalaa tammu sha7u qaalata haasayiyoogaappe ichchashu qaalata ta wozanaa qofan haasayanau dosais.

<sup>20</sup> Ta ishato, intte iita yohuwan yiira mala gidanaappe attin, qofan na7a mala gidoppite; intte wozanaa qofan wozannaamata gidite. <sup>21</sup> Xoossaa maxaafan,

"Godai, 'Taani ha asaassi,  
dumma dumma qaalaa haasayiyya asaaninne  
imattatu doonaan haasayana.

SHin heгаа gidikkokka,  
taani giyoobaa eti siyokkona' yaagees"  
geetettidi xaafettiis.

<sup>22</sup> Simmi dumma dumma qaalaa haasayiyoogee ammanennaageetussi malaata gidiiyoogaappe attin, ammaniyaageetussi malaata gidenna. Qassi hananabaa yootiyoogee

ammaniyaageetussi malaata gidiyoo gaappe attin, ammanennaageetussi malaata gidenna.

<sup>23</sup> Hegaa gishshau, woosa keettaa asai ubbai issippe shiiqidi, qassi ubbaikka dumma dumma qaalan haasayikko, tamaribeenna asai woi ammanenna asai gelidi, inttena ubbaa, “Gooyeeta” geenneeyye? <sup>24</sup> SHin tamaribeenna asi woi ammanenna asi woosa keettaa geliyo wode, asai ubbai hananabaa yootikko, i ba siyoban ba nagaraa akeekana. Qassi he siyidobaa ubbankka i pirddettana. <sup>25</sup> A wozanaa geema qofaikka qonccana. Hegaadankka qassi, “Xoossai tumu intte gidдон de7ees” yaagidi markkattiiddi, gufan-nidi Xoossaassi goinnana.

### *Asai Issippe Woossiyo Wode De7anau Bessiya Wogaa*

<sup>26</sup> Simmi ta ishato, aibee? Intte issippe shiiqiyo wode, huuphiyan huuphiyan, is-suwaassi mazamuree de7ees; issuwaassi tamarissiyoo gee de7ees; issuwaassi ajjuutai de7ees; qassi issuwaassi dumma dumma qaalan haasayiyoo gee de7ees; issuwaassi birshshiyoo gee de7ees. Ubbaiikka woosa keetta maaddiyaabaa gidanau bessees.

<sup>27</sup> Ooninne dumma dumma qaalan haasayikko, naa77u gididi, woi darikko heezzu gididi, kayan kayan haasayanau bessees. Qassi hara issoi eti haasayidoogaa birshsho.

<sup>28</sup> SHin birshshiya asi xayikko, dumma dumma qaalan haasayiyaagee woosa keettan sirphphi go. Ba huuphessinne Xoossaassi haasayo.

<sup>29</sup> Hananabaa yootiyaageetikka naa77u gididi woi heezzu gididi haasayona. Qassi harati eti giyoobaa pirddona. <sup>30</sup> SHin Xoossai he sohuwan uttida haraassi issibaa qonccissikko, kase haasayiyaagee sirphphi go. <sup>31</sup> Aissi giikko, ubbai tamarana malanne ubbai minnana mala, kayan kayan hananabaa yootanau danddayeeta. <sup>32</sup> Hananabaa yootiyaageetu imoi hananabaa yootiyaageetussi azazettees. <sup>33</sup> Aissi giikko, Xoossai sarotettaa Xoosaaappe attin, wocamaa Xoosaa gidenna.

Geeshshatu woosa keetta ubbatuugaadan, <sup>34</sup> maccaasai woosa keettan sirphphi go. Aissi giikko, Aihudatu higgee giyoogaadankka eti haarettanaappe attin, woosa keettan haasayanau etau maati baawa. <sup>35</sup> Maccaasai woosa keettan haasayiyoo gee pokko gidiyoo gishshau, aibakko eranau koyikkonne sooni bantta azinata oichchona.

<sup>36</sup> Xoosaa qaalaa koiro intte ehiidetii? Woikko intte xalaalaakko yiidee? <sup>37</sup> Ooninne bana hananabaa yootiyaagaa woi Ayyaanai de7iyo asa yaagidi qoppikko, taani intteyyo xaafiyoo gee Godaa azazuwaa gidiyoo ga akeeko. <sup>38</sup> SHin ooninne akeekana xayikko, akeekoppo, aggi bayo.

<sup>39</sup> Hegaa gishshau, ta ishato, hananabaa yootanau minttidi amottite. Qassi dumma dumma qaalan haasayiyoo ga akka diggoppite. <sup>40</sup> SHin ubbabaikka wogaaninne maaran hano.

## 15

### *Kiristtoosi Haiquwaappe Denddidobaa*

<sup>1</sup> Ta ishato, taani intteyyo yootido wonggeliyaa intte ekkidoogaanne qassi intte ammanoi aani eqqidoogaa inttena hassayissais. <sup>2</sup> Intte ammanoi hada gidana xayikko, qassi taani intteyyo yootido qaalaa mintti oiqqikko, intte he wonggeliyan attideta.

<sup>3</sup> Aissi giikko, taani qassi ekkidoogaa ubbabaappe aadhdhidi koshshiyaagaa kasetada inttessi immaas. Hegee aibee giikko, Xoosaa maxaafai giyoogaadan, Kiristtoosi nu nagaraa gishshau haiqqiis. <sup>4</sup> Haiqqidi moogettiis. Xoosaa maxaafai giyoogaadankka, heezzantto gallassi haiquwaappe denddiis. <sup>5</sup> Denddidi, PHeexiroosassi qoncciiis. Hegaappe guyyiyan, ba kiittido tammanne naa77atussi qoncciiis. <sup>6</sup> Hegaappe guyyiyan, ichchashu xeetaappe dariya ishatussi issitoo qoncciiis. Etappe dariya baggai hanno gakkanaassikka paxa de7ees; shin amaridaageeti haiqqidosona. <sup>7</sup> Hegaappe guyyiyan, Yaaqoobassi qoncciiis; guyyeppe ba kiittido ubbatussi qoncciiis.



<sup>8</sup> Qassi ubbaappe wurssettan, wodee gakkennan yelettida taassikka qoncciiis. <sup>9</sup> Aissi giikko, Yesuusi kiittido ubbaappe taani laafa; taani Xoossaa woosa keettaa waissido gishshau, Yesuusi kiittidoogaa geetettada xeesettanaukka bessikke. <sup>10</sup> SHin Xoossaa aaro kehatettan taani tanakka. Qassi taassi i immido aaro kehatettai hada gidibeenna; shin taani eta ubbaappe aattada oottaas. SHin tanaara de7iya Xoossaa aaro kehatettai oottiisippe attin, tana gidikke. <sup>11</sup> Simmi tana gidikkokka, woikko eta gidikkokka, nuuni ubbai yootiyoogee haggaa; inttekka haggaa ammanideta.

### *Asai Haiquwaappe Denddanabaa*

<sup>12</sup> Kiristtoosi haiquwaappe denddidoogaa yootiyoojaa gidikko, intteppe issi issi asati yaatin woigidi, “Haiqqidabai haiquwaappe denddenna” yaagiyoona? <sup>13</sup> Haiqqida urai haiquwaappe denddibeennabaa gidikko, yaatin hekko Kiristtoosikka haiquwaappe denddibeenna giyoogaa. <sup>14</sup> Kiristtoosi haiquwaappe denddibeennabaa gidikko, yaatin nuuni yootiyoogeekka mela; qassi intte ammanoikka mela. <sup>15</sup> Qassi nuuni, “Kiristtoosa haiquwaappe denttiis” yaagidi Xoossaa bolli markkattido gishshau, a worddo markkata gididi beettida. SHin haiqqidaageeta haiquwaappe i denttibeennabaa gidikko, Kiristtoosakka denttibeenna. <sup>16</sup> Aissi giikko, haiqqidaageeti haiquwaappe denddennabaa gidikko, simmi Kiristtoosikka denddibeenna. <sup>17</sup> Kiristtoosi haiquwaappe denddibeennabaa gidikko, intte ammanoikka mela; qassi intte hanno gakkanaassikka nagaraara de7eeta. <sup>18</sup> Simmi Kiristtoosa ammanidi haiqqidaageetikka qassi xayidosona giyoogaa. <sup>19</sup> Nuuni ha de7uwaa xalaalaassi Kiristtoosa yainnidabaa gidikko, ha sa7an de7iya asa ubbaappekka nubai pala.

<sup>20</sup> SHin Kiristtoosi haiqqidaageetu dendduwaassi baira gididi, haiquwaappe denddidoogee tuma. <sup>21</sup> Aissi giikko, haiqoi issi asa baggaara ha sa7aa yiidoogaadan, haiqqidaageetu denddoikka qassi issi asa baggaara yiis. <sup>22</sup> Aissi giikko, asai ubbai Addameera dabbotido gishshau haiqqidoogaadan, Kiristtoosaara dabbotido gishshau, ubbai de7uwaassi denddana. <sup>23</sup> SHin ubbaikka ba kayan kayan denddana. Kiristtoosi ubbaappe kasetidi denddiis; hegaappe guyyiyan, Kiristtoosaageeti Kiristtoosi yiyo wode denddana.

<sup>24</sup> Hegaappe guyyiyan, Kiristtoosi halaqatetta ubbaa, godatetta ubbaanne wolqqaanne xaissidi, Xoossaassi ba Aawaassi kawotettaa immiyo wode, wodiya wurssettai yaana. <sup>25</sup> Aissi giikko, Xoossai a morkketa ubbaa a tohuwaappe garssaara wottana gakkanaassi, Kiristtoosi haaranau bessees. <sup>26</sup> Ubbaappe wurssettan xayana morkkee haiquwaa. <sup>27</sup> Aissi giikko, Xoossaa maxaafai, “Xoossai ubbabaa a tohuwaappe garssaara wottidi haarissiis” yaagees. SHin ubbabaa a tohuwaappe garssaara wottidi haarissiis giyo wode, ubbabaa haarissida Xoossaappe attin, hinkko ubbai haarettiis giyoogee qoncce. <sup>28</sup> SHin ubbabai Kiristtoosassi haarettidoogaappe guyyiyan, Kiristtoosi qassi ba huuphen ubbabaa bana haarissida Xoossaassi haarettana. Xoossai qassi ubbabaa wurssidi haarana.

<sup>29</sup> Heggaa gidana xayikko, haiqqidaageetussi xammaqettiyaageeti ai oottiyoona? Haiqqidaageeti mulekka denddennabaa gidikko, asai haiqqidaageetussi aissi xammaqettii?

<sup>30</sup> Yaatin, nuuni ubba wode aissi hassayenna metuwan geliyoonii? <sup>31</sup> Ta ishato, taani nu Godaa Kiristtoosi Yesuusan taassi de7iya intte ceequwan ceeqqaidda, wonttin wonttin haiqqais. <sup>32</sup> Taani Efisoona asadan do7aara baaxetidoogee tana ai go77anee? SHin haiqqidaageeti haiquwaappe denddibeennabaa gidikko, “Simmi moosinne uyoos;

aissi giikko, nuuni wontto haiqqana” yaagiyoogaa mala.

<sup>33</sup> Cimettoppite; iita laggetettai lo77o hanotettaa moorees. <sup>34</sup> Xillotettaakko simmite. Nagara oottoppite. Intteppe issi issi asai Xoossaa erenna; taani haggaa inttena yeellayanau gais.

### *Haiquwaappe Denddida Bollaa Hanotaa*

<sup>35</sup> SHin issi asi, “Haiqqida asai waanidi denddane? Eti ai mala bollaara yaa-nee?” yaagennan aggenna. <sup>36</sup> Neno eeyyau, neeni biittan zeriyo zeretta woqqennan mokkenna. <sup>37</sup> Neeni zeriyoogee giste gidin woi hara qommo katta gidin, aife xalaalappe attin, mokkidi kiyiya bollaa gidenna. <sup>38</sup> SHin Xoossai zerettaassi ba dosido bollaa immees; qassi zeretta ubbaassikka huuphiyan huuphiyan eta bollaa immees. <sup>39</sup> Mereta ubbaa ashoi issuwaa gidenna. SHin asa ashoi issuwaa; mehiyaa ashoi dumma; kafotu ashoikka dumma; qassi moliyaa ashoikka dumma.

<sup>40</sup> Qassi saluwaa bollatinne sa7aa bollati de7oosona. SHin saluwaa bollaa bonchchoi dumma; qassi sa7aa bollaa bonchchoi dumma. <sup>41</sup> Awa aifiyaassi a huuphe bonchchoi de7ees. Aginaassikka a huuphe bonchchoi de7ees. Qassi xoolinttetussikka dumma bonchchoi de7ees; aissi giikko, issi xoolinttee hinkko xoolinttiyaappe bonchchuwan dummatees.

<sup>42</sup> Qassi haiqqidaageeti haiquwaappe denddiyo wode hegaadan hanana; haiqqiya bollai moogettidi, haiqqenna bolla gididi denddana. <sup>43</sup> Bollai tooshiyan moogettidi, bonchchuwan denddana. Qassi daafuran moogettidi, wolqqan denddana. <sup>44</sup> Mereta bollai moogettidi, ayyaana bollaa gididi denddana. Mereta bollai de7ikko, qassi ayyaanaa bollaikka de7ees.

<sup>45</sup> Hegaadankka, qassi Xoossaa maxaafan, “Koiro bitanee, Addaamee, paxa de7iya asa gidi merettiis” yaagees. SHin wurssetta Addaamee de7uwaa immiya ayyaana gidii. <sup>46</sup> SHin mereta asi koiro yin, geedoppe ayyaana asi yiisippe attin, ayyaanaagee koiro yibeenna. <sup>47</sup> Koiro Addaamee biittaappe merettiis; i biittaappe merettidaagaa. Naa77antto Addaamee saluwaappe yiis. <sup>48</sup> Biittaageeti biittaappe merettidaagaa mala. Qassi saluwaageeti saluwaappe yiidaagaa mala. <sup>49</sup> Nuuni biittaappe merettidaagaa meraa maayidoogaadan, saluwaappe yiidaagaa meraakka qassi maayana.

<sup>50</sup> Ta ishato, taani giyoogee haggaa; ashoinne suutti Xoossaa kawotettaa laattana danddayenna. Qassi musiyaagee musennaagaa laattenna.

<sup>51-52</sup> Siyite! Taani intteyyo issibaa xuurana. Nuuni ubbai haiqqokko. SHin wurssetta malkkatai punettiyo wode, liphida aifee xeellanaassi hassayennan laamettana. Aissi giikko, malkkatai punettiyo wode, haiqqida asai musenna asa gididi denddana; nuunikka laamettana. <sup>53</sup> Aissi giikko, hagee musiyaagee musennaagaa maayanau bessees; qassi hagee haiqqiyaageekka haiqqennaagaa maayanau bessees.

<sup>54</sup> SHin hagee musiyaagee musennaagaa maayiyo wode, qassi hagee haiqqiyaagee haiqqennaagaa maayiyo wode, he wode, Xoossaa maxaafai, “Haiqoi xoonettidi mitettiis.

<sup>55</sup> Haiquwau, ne yiishshai awaane?

Haiquwau, ne xoonoi awaane?”

giido qaalai polettana. <sup>56</sup> Haiqoi dukkiyo wolqqaa nagaraappe demmees; qassi nagarai wolqqaa higgiaappe demmees. <sup>57</sup> SHin nu Godaa Yesuus Kiristtoosa baggaara nuna xoonissiya Xoossaa galatai gakko.

<sup>58</sup> Taani siiqiyo ta ishato, hegaa gishshau, qaaxxennan minnidi eqqite. Intte daafurai Godaa baggaara mela gidennaagaa eridi, ubba wode Godaa oosuwaa azallennan oottite.

## 16

### *Yerusalaamen De7iya Ammaniya Asaassi SHiiqida Miishshaa Maaduwaa*

<sup>1</sup> Geeshshatussi miishshaa shiishshanau Galaatiyaa woosa keettatussi taani maaci-doogaadan, intteikka qassi hegaadan oottite. <sup>2</sup> Intte taani yaa biyo wode, miishshaa shiishshenna mala, intte ubbai Woggaa gallassi gallassi, intte demmiyo keenaappe intte keettan dagayite. <sup>3</sup> Taani yaa gakkiiyo wode, intte ammaniyo asa oona gidikkonne, intte

immidoogaa gattana mala, dabddaabbiyaara eta Yerusalaame kiittana. <sup>4</sup> Qassi taani etaara baanau koshshikko, eti tanaara issippe baana.

### *PHauloosa Halchchota*

<sup>5</sup> Taani Maqidooniyaara aadhdhaidda, inttekko baana; aissi giikko, taani Maqidooniyaara aadhdhais. <sup>6</sup> Taani biyoosaa awa gidikkonne, ta buussan intte tana maaddana mala, intte matan amarida wodiyaam gam77ennan aggikke. Woikko balgguwaakka intte matan shaaccennan waayada aggana. <sup>7</sup> Aissi giikko, taani ha77i yaara aadhdhaidda oge tohuwaara inttena be7anau koyikke. Godai giikko, intte matan amarida wodiyaam takkanau qoppais.

<sup>8</sup> SHin taani PHenxxaqosxxe giyo gallassai gakkanaassi Efisoonaan gam77ana. <sup>9</sup> Taassi oosoi kumido aaho penggee yaani dooyettiis. Qassi taassi daro morkketi de7oosona.

<sup>10</sup> Ximootiyoosi inttekko yiikko, intte matan i yayyennan de7anaadan, a loitti wottite. Aissi giikko, ikka qassi Godaa oosuwaa oottes. <sup>11</sup> Hegaa gishshau, ooninne a karoppo. SHin i taakko saro simmana mala, a maaddidi sarotettan moissite. Aissi giikko, taani i ishanttuura simmanaagaa naaga uttaas.

<sup>12</sup> SHin nu ishaa Aphiloosi hinkko ishanttuura inttekko baana mala, taani a mintta woossaas. SHin ha77i inttekko baanau koyibeenna; i baayyo injetiyoo wode inttekko baana.

### *Wurssetta Zoriyaanne Sarotaa*

<sup>13</sup> Tishshi giite. Ammanuwan minnite. Xalite. Minnite. <sup>14</sup> Ooso ubbaa siiquwan oottite.

<sup>15-16</sup> Ta ishato, Isxxifaanoosinne a so asai Giriiken koiro ammanidaageeta gidiyoo gaanne geeshshatussi oottanau banttana immidoogaa intte ereeta. Inttekketa mala asaassinne, etaara oottiya ubbaassi daafuriya ubbaassi haarettanaadan, taani inttena woossais.

<sup>17</sup> Isxxifaanoosi, Paddonaaxisinne Akaiqoosi intte bannasan tana boorasiyaa teqqido gishshau, eta yuussaa taani ufaittais. <sup>18</sup> Eti inttena ayyaanan minttettidoogaadan, tanakka ayyaanan minttettido gishshau, hegeeta mala asata dogoppite.

<sup>19</sup> Isiyaa woosa keettaa asai inttena, "Saro saro" goosona. Aqilinne PHirisqqila bantta soo shiiqiya woosa keettaa asarakka intteyyo Godaa sarotaa wozanappe kiittoosona.

<sup>20</sup> Ishantti ubbai inttessi sarotaa kiittoosona. Issoi issuwaa geeshsha yerettaa yerettidi sarotite. <sup>21</sup> Taani PHauloosi ha sarotaa ta kushiyan xaafaas.

<sup>22</sup> Godaa Yesuus Kiristtoosa siiqenna asi de7ikko, i qanggettidaagaa gido. Nu Godau, haaya.

<sup>23</sup> Godaa Yesuus Kiristtoosa aaro kehatettaa inttenaara gido.

<sup>24</sup> Kiristtoos Yesuus de7iya inttenaara ubbaara ta siiqoi gido. Amin77i.

## PHauloosi Qoronttoosa Asaassi Xaafido Naa77antto Kiitaa

### *Gidduwaa Erissuwaa*

PHauloosi Qoronttoosa asaayyo xaafido naa77antto kiitai xaafettidoogee, PHauloosayyo Qoronttoosan de7iya woosa keettaara de7iya gaitotetta daro metuwaa giddo geli uttido wodiyaana. Issi issi woosa keettaa asati issi issi deexo, bore haasayaa PHauloosa bolli haasayidosona; gidikkonne PHauloosi sigaa medhdhanau laamotai baayyo de7iyooogaa bessidi, hegee haniyo wode gita ufaissaa ufaittanau danddayiyoogaa qonccissees.

Kiitaayyo koiro shaahuwaa bollan PHauloosi Qoronttoosan de7iya woosa keettaara baayyo de7iya gaitotetta qonccissidi, woosa keettaa giddon kiyida boriyaassinne phalqgettaassi, i etau aibissi mino zaaruwaa immidaakko odees. Hegaarakka gattidi hagee a seerai eta nagaraappe zaaridonne sigan kaalettido gishshau, ufaittido ufaissaa etassi qonccissees. Kaallidi qassi Yihudan de7iya ammaniyaageeta maaddiyooobaa banttabaappe coo immana mala, eta hassayissees. Wurssetta miraa fetun PHauloosi Yesuusi Kiittido asa gidiyoo gidetta bolli shiiqida mootuwaassi zaaruwaa immees. Aissi giikko, Qoronttoosa woosa keettan issi issi asati banttana tumu Yesuusi Kiittidoogeeta kessidi, “PHauloosi Yesuusi Kiittidoogaa gidenna; i worddo” yaagidi, a guuttoosona.

<sup>1</sup> Taani PHauloosi, Xoossai kiitta gin, Kiristtoos Yesuusi kiittidoogeenne nu ishai Ximootiyoosi Xoossaayyo goinniya Qoronttoosa kataman de7iya woosa keettaayyoonne Giriike biitta ubban de7iya geshshatuyyo ha dabddaabbiyaa xaafos.

<sup>2</sup> Xoossaa nu Aawaappenne Godaa Yesuus Kiristtoosappe, aaro kehatettainne sarotettai intteyyo gido.

### *PHauloosi Xoossaayyo SHiishshido Galataa*

<sup>3</sup> Xoossaa nu Godaa Yesuus Kiristtoosa Aawaa, maarotettaa Aawaanne minttetto ubbaa Xoossaa galatai gakko; <sup>4</sup> Xoossai nuna nu huuphen minttettido minttettuwaadan, daro waayiyaa waayettiyaageeta nuunikka minttettanaadan, nu waaye ubban i nuna minttettees. <sup>5</sup> Aissi giikko, nuuni Kiristtoosa baggaara daro waayiyaa waayettiyoogaadan, hegaadankka, qassi nuuni a baggaara daro minttettuwan minetteettes. <sup>6</sup> Nuuni waayettikko, hegee inttena minttettanaassanne inttena ashshanaassa; qassi nuuni minettikko, nuuni danddayido waayiyaa malaa inttekka gencidi danddayana mala, Xoossai intteyyookka qassi minttettuwaanne danddayaa immanaassa. <sup>7</sup> Intte demmana giidi, ufaissan naagi uttidoogee daro mino; aissi giikko, intte nunaara waayettidoogaadan, hegaadan minttettuwaakka nunaara ekkanaagaa nuuni eroos.

<sup>8</sup> Nu ishatoos, nuuni Isiyaa biittan waayettido waayiyaa inttena hassayissanau koyoos; nu waayee nu wolqqaappe darin, nuna worees giidi, nuuni hirggana gakkanaassi, nuna wogi bannaagaa deexxiis. <sup>9</sup> Nuuni nu bolli haiquwaa pirddai pirddettiis yaagidi qoppida; shin hegee hanidoogee haiqqida asaa haiquwaappe denttiya Xoossan nuuni ammanettanaappe attin, nu huuphen ammanettannan agganaassa. <sup>10</sup> Xoossai haggaa mala iita haiquwaappe nuna ashshiis; i nuna ashshana; sinttappekka i nuna ashshana giidi, ufaissan naagi uttida. <sup>11</sup> Intte woossido daro woosan nuuyyo anjjoji simmido gishshau, daro asai nu gishshaa Xoossaa galatana mala, inttekka qassi nuna woosan maaddana koshshees.

### *PHauloosi Baanau Halchchido Halchchoi Laamettidoogaa*

<sup>12</sup> Nuuni ceeqettiyoogee haggaa; ha sa7an nuuni de7iyo de7oi, ubba qassi inttenaara nuuyyo de7iya issippetettai Xoossaa aaro kehatettaanappe attin, asa aadhdhida er- atettaana gidennaagaa, qassi Xoossai immido geeshshatettaaninne suuretettan nuuni de7iyooogaa nuna zoriya wozanai nuuyyo markkattees. <sup>13-14</sup> Aissi giikko, intte nabba- banaunne akeekanau danddayiyoogaa xalaalaa intteyyo xaafiyoogaappe attin, nuuni harabaa intteyyo xaafokko. Nu Godaa Yesuusa gallassi nuuni inttenan ceeqettanaa- gaadan, intteikka nunan ceeqettana mala, intte ha77i wurssi akeekenna yohuwaa digin wurssi akeekana gaada qoppais.

<sup>15</sup> Hegaa taani loitta erido gishshau, intte naa77utoo go7ettana mala, ubbaappe kasetada intteikko baanau qofaa qachchaas. <sup>16</sup> Taani Maqidooniyaa baidda inttenaara gaittanaagaanne qassi yaappe simmaidda intte mataara Yihudaa aadhdhishin, intte tana maaddanaagaa qoppa uttaas. <sup>17</sup> Hegaa gishshau, taani heggaa qoppaidda tanan ammanettabeikkinaa? Taani ta qofaa qachchiyo wode, sa7aa asadan issi kuttan, “Ee, ee” woi, “CHii, chii” gaanau giiga uttidanaa?

<sup>18</sup> SHin Xoossai ammanettidaagaa gidiyooogee tuma gidiyooogaadan, nuuni intteyyo yootiyo qaalai “Ee” nne “CHii” nne giyoogaa gidenna. <sup>19</sup> Aissi giikko, taani, Sillaasinne Ximootiyoosi Intte giddon yootido Xoossaa Na7ai, Yesuus Kiristtoosi “Ee” nne “CHii” nne giyoogaa gidenna. SHin Xoossaa baggaara i ubba wodekka “Ee”. <sup>20</sup> Aissi giikko, Xoossai immana giidobau ubbau eeno giidoogee Kiristtoosa baggaara polettana; heggaa gishshau, nuuni Kiristtoosa baggaara Xoossaa bonchchuwau, amin77i goos. <sup>21</sup> Xoossai Kiristtoosa baggaara nunanne inttena minttetteesinne tiyees. <sup>22</sup> Nuuni abaa gidiyooogaa erissiya maatafaa i nu bolli wottidi, ba Geeshsha Ayyaanaa waasedan, nu wozana giddon wottiis.

<sup>23</sup> Qassi taani Qoronttoosa beennan aggidooogee inttena qohennan agganaassa; heggau taani shemppuwaara de7anau Xoossai taayyo marka. <sup>24</sup> Nuuni inttena ufaissanau inttenaara issippe oottiyaageeta gidiyooogaappe attin, intte ammaniyooban inttena godatanau koyiyaageeta gidokko; aissi giikko, intte intte ammanuwan minnidi de7eeta.

## 2

<sup>1</sup> Taani naa77anttuwaa inttena azzanissenna mala, intteikko beennan agganaadan, ta qofaa qachchaas. <sup>2</sup> Aissi giikko, taani inttena azzanissiyaabaa gidikko, ha taani az- zanissido intte tana ufaissanaagaappe attin, oonee tana ufaissanai? <sup>3</sup> Taani intteyyo he dabddaabbiyaa xaafidoogee, tana ufaissanau bessiya asatun taani azzananau intteikko baanau koyabeennaagaassa; taani ufaittiyo wode, intte ubbaikka qassi ufaittanaagaa inttenan ubban ammanettais. <sup>4</sup> Aissi giikko, taani intteyyo daro waayiyaaninne tuggan qassi daro afuttaara xaafidoogee, inttena azzanissanaassa gidenna; shin taani inttena ubbata ai keenaa siiqiyaakkonne intte eranaassa.

### *Mooranchchau Atto Giyoogaa*

<sup>5</sup> SHin issi urai asa azzanissidobaa gidikko, taani a yohuwaa darissanau koyikke; i inttena ubbata azzanissidoogaappe attin, tana azzanissibeenna. <sup>6</sup> Intteppe dariya bagga asai he bitaniyaa mala asa hegaadan qaxxayikko, he qixaatee ayyo gidana. <sup>7</sup> Hegaa gishshau, he bitanee keehi daro azzanenna mala, intte ayyo atto gaanaunne a minttettanau bessees. <sup>8</sup> Hegaa gishshau, intte a minttidi siiqiyoogaa i erana mala, taani inttena woossais. <sup>9</sup> Aissi giikko, intte tau azazettanau ubba wode giigi uttidaakkonne qassi paaciyaa intte danddayiyaakko eranau, he dabddaabbiyaa intteyyo xaafaas. <sup>10</sup> Issi urai naaqqidoogaa intte atto giyo wode, taanikka qassi atto gais; taani atto giidobaa gidikko, atto giidobaa aibanne Kiristtoosa sinttan intte gishshau, atto gaas. <sup>11</sup> Seexaanai nuukko yiidi, nuna cimmenna mala, taani atto gaas; aissi giikko, nuuni a qofaa ereettes.



### *Ooratta Maachchaa Oosanchchatu Xoonuwaa*

<sup>12</sup> Taani Kiristtoosa wonggeliyaa mishiraachchuwaa yootanau Xiro7aada biido wode, Godai yaani tau dooyi wottiis. <sup>13</sup> Taani ta ishaa Tiita yaani demmabeenna gishshau, taayyo sheefai gagettiis. Hegaa gishshau, yaani de7iya asaa, “Saro de7ite” gaada Maqidooniya baas.

<sup>14</sup> SHin Kiristtoosa baggaara ubba wode nuna xoonuwau kaalettiya Xoossaa, Qassi Kiristtoosa timirttiyaa nu baggaara shittodan, ubbasaa gattiyaagaa galatai gakko. <sup>15</sup> Aissi giikko, nuuni attiya asa giddooninne xayiya asa giddon Kiristtoosi Xoossaayyo yarshshiyoo sawuwaa tonggu giya shitto mala. <sup>16</sup> Hegee xayiyaageetuyyo woriya zeeqo; qassi attiyaageetuyyo de7uwaa ehiya shitto; yaatin, heгаа oottanau danddayiyai oonee? <sup>17</sup> Nuuni Xoossaa qaalaa hiraisobaadan, walakkidi zal77iya hara daro asatu mala gidokko; shin Xoossai nuna kiittin, ammanettidi Xoossaa sinttan Kiristtoosa baggaara qaalaa yootoos.

## 3

### *Ooratta Maachchaa Oosanchchata*

<sup>1</sup> Nuuni zaarettidi, nu huuphiyaa sabbanau doommidoniiyye? Woi hara asatuugaadan, saba dabddaabbiyaa intteyyo yeddannau woi intteppe ekkanau koyiyoonii?

<sup>2</sup> Intte intte huuphen asai ubbai eranaadaaninne nabbabanaadan, nu wozanan xaafetti uttida nu dabddaabbe. <sup>3</sup> Ha dabddaabbiyaa Kiristtoosi ba huuphen xaafidi, nu bolli kiittidoogee tuma; ha dabddaabbee de7o Xoossaa Geeshsha Ayyaanana asa wozanan xaafettidoogaappe attin, shuchcha bolli qalamen xaafettibeenna.

<sup>4</sup> Nuuyyo Kiristtoosa baggaara Xoossan haggaa mala ammanoi de7ees. <sup>5</sup> Nu danddayai Xoossaappe yiyoogaappe attin, ha oosuwa nuuni nu huuphen oottanau danddayoos giyoobi nuuyyo aibinne baawa. <sup>6</sup> Nuuni Ooratta Maachchayyo oottana mala, Xoossai nuna danddayiisii; he Ooratta Maachchai Geeshsha Ayyaanaagaa gidiyooogaappe attin, xaafettida higgiiyaagaa gidenna. Xaafettida higgee haiquwaa ehees; shin Geeshsha Ayyaanai de7uwaa ehees.

<sup>7</sup> SHuchchaa woocidi xaafido higgee imettiyo wode, Xoossaa bonchchoi beettiis; Muuse som77uwan de7iya phoolettai xayiyaabaa gidikkokka, he phoolettai daro wolqqaama gidiyoo gishshau, Israa7eela asai a som77uwaa tishshi ootti xeellanau danddayibeenna. Haiquwaa ehiya higgee oottiyo oosoi haggaa mala bonchchuwaara yiyaagaa gidikko, <sup>8</sup> Geeshsha Ayyaanai oottiyo oosuwa bonchchoi ai keenaa aadhdhane? <sup>9</sup> Aissi giikko, asi pirdda ekkiyo oosoi bonchcho gidikko, yaatin, asi xilliyo oosuwa bonchchoi waanidi daranee? <sup>10</sup> Aissi giikko, kase bonchchoi ha77i baappe keehi aadhdhiya bonchchuwa gaasuwan xayidoogee tuma. <sup>11</sup> Aissi giikko, he xayidaagan bonchchoi de7iyaabaa gidikko, merinau de7iyaagan ai keena gita bonchchoi de7anee?

<sup>12</sup> Nuuni ufaissan naagiyo haggaa malabai nuuyyo de7iyo gishshau, qoncciyana xalidi haasayeettees. <sup>13</sup> Israa7eela asai xayiya bonchchuwa wursettaa be7enna mala, ba som77uwaa naxalan kammida Muuse mala nuuni gidokko. <sup>14</sup> SHin eta wozanai dammiis; aissi giikko, eti Gal77a Maachchaa nabbabiyo wode, hachchi gakkanaasikka, he naxalai eta wozanaa kammi wottiis; ooninne Kiristtoosaara gaittiyo wode xalaalan he naxalai kichchees. <sup>15</sup> SHin eti Muuse maxaafaa nabbabiyo wode ubban hachchi gakkanaasikka, he naxalai eta wozanaa kammi wottiis. <sup>16</sup> SHin Xoossaa maxaafai, “Ooninne Godaakko simmiyo wode audenne he naxalai kichchees” yaagees. <sup>17</sup> Godai Geeshsha Ayyaana. Godaa Ayyaanai de7iyoosan ailletetti baawa. <sup>18</sup> Nuuni ubbaikka naxalan kamettibeenna som77uwan Godaa bonchchuwa heregadan zaaridi phoolana; qassi Geeshsha Ayyaana gidiyoo Godaappe yiya he bonchchoi nuna ba meraa milatissidi, bonchchuwaappe bonchchuwa laammana.

## 4

### *PHauloosi Ba Oosuwan Ammanettida Asa*

<sup>1</sup> Simmi Xoossai nuuyyo ha oosuwaa ba maarotettan immido gishshau, nuuni salettokko. <sup>2</sup> Nuuni geeman oottiyo yeellayiya ooso ubbaa aggi bayida; qassi gene oosokka oottokko; woi Xoossaa qaalaa wordduwaara walakkokko. Hegaadankka, tumaa qonciyan haasayidi, Xoossaa sinttan asa ubbaa zoriya wozanaayyo nuna shiishsheettes.

<sup>3</sup> Nuuni yootiyo wonggeliyaa mishiraachchoi geemmidabaa gidikkokka, xayiya asatu xalaalau geemmiis. <sup>4</sup> Ha sa7aa Xoossai ammanenna asatu qofaa jallissiis; jallisidi Kiristtoosa bonchchuwaa, wonggeliyaa mishiraachchuwaa poo7uwaa banttau poo7iyaagaa, Xoossaa milatiyaagaa eti be7enna mala, eta diggiis. <sup>5</sup> Aissi giikko, Yesuus Kiristtoosi Goda gidiyooqaanne a gishshau nuuni nu huuphen intteyyo ashkkara gidiyooqaa yootettesippe attin, nu huuphebaa yootokko. <sup>6</sup> Aissi giikko, “Xumaappe poo7oi poo7ana” giida Xoossai nu wozanan ba poo7uwaa poo7issiis; qassi i ba bonchcho eratettaa poo7uwaa Kiristtoosa sinttan poo7iyaagaa nuuyyo immanau poo7issiis.

<sup>7</sup> SHin ubbaappe aadhdhiya wolqqai Xoossaagaa gidiyooqaappe attin, nuugaa gidennaagaa bessanau nuuyyo ha minjai urqqaappe merettida miishsha gidдон de7ees.

<sup>8</sup> Nuuni ubba baggaarakka un77ettida; shin me7erettibookko; qassi issi issi wode siroos; shin muleerakka aggi bayana gibookko. <sup>9</sup> Nuuni yedetettida; shin Xoossai nuna olibeenna; qassi nu morkketi nuna oli bayidosona; shin nuuni xayibookko.

<sup>10</sup> Qassi Yesuusi de7iyooqee nu asatettan beettana mala, nuuni ubba wode a haiquwaa nu asatettan tookki yuuyoos. <sup>11</sup> Aissi giikko, haiqqiya nu asatettaa bolli Yesuusi de7iyooqee beettana mala, paxa de7iya nuuni a gishshau, ubba wode haiqqiichchidi attoos. <sup>12</sup> Hegaa gishshau, haiqoi nu gidдон oottees; shin de7oi qassi intte gidдон oottees.

<sup>13</sup> Xoossaa maxaafai, “Taani ammanido gishshau haasayaas” yaagees; he ammanuwaa Ayyaanai nuuyyo de7iyo gishshau, nuunikka ammanoos; hejaa gishshau, haasayoos. <sup>14</sup> Xoossai, Godaa Yesuusa haiquwaappe denttidaagee, nunakka qassi Yesuusaara haiquwaappe denttidi, inttenaara issippe ba sintti shiishshanaagaa eroos. <sup>15</sup> Hagee ubbai intte gishshassa; Xoossaa aaro kehatetta daro asaa gakkiyo wode, asai Xoossaa bonchchuwaayyo daro galataa immana.

### *Ammanuwan De7iyooqaa*

<sup>16</sup> Hegaa gishshau, nuuni salettokko; nuuyyo harai atto, bolla bagga asatettaa wooqqiyaabaa gidikkokka, garssa bagga asatettaa gallassi gallassi ooraxxees. <sup>17</sup> Aissi giikko, ha77issau nuuni waayettiyo ha guutta waayee, ubbaappe keehi gitatiya merinaa bonchchuwaa nuuyyo beetissana. <sup>18</sup> Nuuni beettenabaa xeelliyooqaappe attin, beetiyaabaa xeellokko; aissi giikko, beettiyaabai ha77issau de7iyaagaa; shin beettenabai merinau de7iyaagaa.

## 5

<sup>1</sup> Aissi giikko, nuuni de7iyo ha sa7aa dunkkaanee qolettikko, nuuyyo asi keexxibeenna keetta, Xoossai keexxidoogee, saluwan merinau de7iyooqaa nuuni eroos. <sup>2</sup> Nuuni hagan tumu ooloosinne saluwan de7ana nu keettaa maayanau keehi amottoos. <sup>3</sup> Nuuni hejaa maayidi, kallottokko; <sup>4</sup> nuuni ha sa7aa dunkkaaniyan de7iiddi, deexettidi ooloos; aissi giikko, haiqqiya asatetta de7uwan mitettana mala, nuuni maayanau koyiyooqaappe attin, kallottanau koyokko. <sup>5</sup> Nuuyyo hagee giigissidaagee Xoossaa; qassi i ba Geeshsha Ayyaanaa oito oottidi, nuna oitti wottiis.

<sup>6</sup> Hegaa gishshau, nuuni ubba wode ammanettoos; qassi nuuni nu sooni ha asatettan de7ido keenan, Godaappe shaahettidi de7iyooqaakka eroos. <sup>7</sup> Aissi giikko, nuuni ammaniyoogan de7iyooqaappe attin, be7iyooqan de7okko. <sup>8</sup> Nuna ammanttees; qassi ha asatettan nu keettaa aggi bayidi, Godaara issippe de7iyooqee nuna ufaissees. <sup>9</sup> Hegaa

gishshau, nuuni qassi sooni de7in de7ana xayin, nu qofai a ufaissanaagaa. <sup>10</sup> Aissi giikko, nuuni huuphiyan huuphiyan oottido oosoi lo77o gidin, woi iita gidin, nuuyyo bessiyaagaa ekkana, Kiristtoosa pirdda araataa sinttan ubbaikka beettanau bessees.

### *Kiristtoosa Baggaara Xoossaa Dabbo Gidiyoogaa*

<sup>11</sup> Hegaa gishshau, nuuni Xoossaayyo yayyiyoogaa eridi, hegaadan qassi asaakka ammantteettes; Xoossai nuna muleera erees; qassi inttekka inttena zoriya wozanan nuna ereeta yaagada qoppais. <sup>12</sup> Meran ceeqettiyoogaappe attin, wozanan ceeqettenna asatuyyo intte yooti zaariyoobai intteyyo de7ana mala, intte nunan ceeqettanaadan, nuuni intteyyo gaaso gidanau koyiyoogaappe attin, nuna galatanau koyokko. <sup>13</sup> Nuuni gooyiyaabaa gidikko, Xoossaa bonchchuwaassa; woi qassi wozanaara de7iyaabaa gidikkokka, inttena go77anaassa. <sup>14</sup> Kiristtoosa siiqoi nuna godatees; aissi giikko, issi asi asa ubbaayyo haiqqidoogaa nuuni akeekida; hega gidikko asai ubbai aara haiqqiis. <sup>15</sup> Paxa de7iyaageeti bantta gishshau haiqqidaagaayyoonne qassi haiquwaappe dendidaagaayyo de7anaappe attin, sinttappe bantta huupheyyo de7enna mala, i asa ubbaa gishshau haiqqiis.

<sup>16</sup> Hegaa gishshau, nuuni hagaappe sinttau oonanne asa qofan pirddokko; harai atto, nuuni Kiristtoosa kase asa qofan pirddidobaa gidikkokka, simmi sinttappe hegaadan pirddokko. <sup>17</sup> Hegaa gishshau, ooninne Kiristtoosaara de7ikko, ooratta mereta; gal77ai aadhdhiis; be7ite, ubbabaikka ooraxxiis. <sup>18</sup> Kiristtoosa baggaara nuna banaara sigettida Xoossai ubbabaikka oottiis; qassi i nuuyyo harata banaara sigettiyo oosuwaa immiis. <sup>19</sup> Xoossai Kiristtoosa baggaara asa ubbaa banaara sigettees; asa nagaraakka asa bolli qoodenna; qassi asa banaara sigettiyo kiitaakka nuuyyo immiis.

<sup>20</sup> Simmi Xoossai nu baggaara intteyyo haasayiyoogaadan, nuunikka Kiristtoosa gishshaa haasayiya i kiittidoogeeta; qassi nuuni inttena, “Xoossaara sigettite” giidi, Kiristtoosa gishshaa woossoos. <sup>21</sup> Nuuni Xoossaa xillotettaa Kiristtoosa baggaara ekkana mala, nagara erenna Kiristtoosa nu gishshau, Xoossai nagaranchcha oottiis.

## 6

<sup>1</sup> Intte nunaara Xoossaa oosuwaa oottiiddi, a aaro kehatettaa ekkidi go7ettana mala, nuuni inttena woossoos. <sup>2</sup> Aissi giikko Xoossai,

“Taani injje wodiyan  
neeni giyoogaa siyaas;  
qassi atotettaa gallassi  
nena maaddaas”

yaagees. Be7ite, injje wodee ha77a. Be7ite, atotettaa gallassai hachcha.

<sup>3</sup> Nuuni nu oosuwaa ooninne boranaagaa koyokko; qassi oonanne xubbanaagaa koyokko. <sup>4</sup> SHin ubbaban nuuni Xoossaa ashkkarata gidiyoogaa nu huuphen bessida; daro gencan, waayiyan, metuwan, gita tuggan, <sup>5</sup> lissuwan garafettiyoogan, qashuwan, wocaman, daafuran, xiskko xayiyooogan, xooman, <sup>6</sup> geeshshatettan, eratettan, dandayan, kehatettan, Geeshsha Ayyaanan, tumu siiquwan, <sup>7</sup> tumaa haasayiyoogan, Xoossaa wolqqan nuuni Xoossaa ashkkarata gidiyoogaa nu huuphen bessida; qassi nu huuphiyaa naaganaunne olettanau nuuyyo xillotettaa ola miishshai de7ees. <sup>8</sup> Nuuni bonchchettidanne tooshettida; cayettidanne galatettida. Qassi tumaa haasayoos; shin asai nuna worddanchcha giidi qoppees. <sup>9</sup> Nuuni asi erenna asa mala; shin asai ubbai nuna erees; nuuni haiqqida asa mala; shin intte be7iyooaadankka de7oos; qaxxayettida asa mala; shin haiqqibookko. <sup>10</sup> Nuuni kayyottiyaageeta gidikkokka, ubba wode ufaittoos. Hiyyeesa milatoos; shin daro asaa dureyoos; qassi aibinne banna asa milatoos; shin ubbabaikka nubaa.

<sup>11</sup> Qoronttoosan de7iya asau, nuuni intteyyo qoncciyon yootida; nu uluwaakka inttena bessida; <sup>12</sup> Nuuni intteyyo xibibookko; xibidaageeti inttena. Nuuni nu uluwaa

intteyyo genttibookko; shin intte uluwaa nuuyyo genttidaageeti inttena. <sup>13</sup> Ha77i taani ta naatuyyo haasayyoogaadan, intteyyo haasayais; nuuni inttena nu uluwaa bessidoogaadan, inttekka nuna intte uluwaa aassi dooyidi bessite.

*Ammanenna Asaara Zuppetennan Aggiyoogaa*

<sup>14</sup> Ammanenna asatuura zuppetidi, giigenna oosuwaa oottoppote. Aissi giikko, xil-lotettaayyoonne nagaraayyo aiba gaitetti de7ii? Poo7uwaayyoonne xumaayyo aiba issippetetti de7ii? <sup>15</sup> Kiristtoosanne xalahe halaqaa issippe gattiyaabi aibee? Qassi ammaniyaageenne ammanennaagee koxxiyoobi aibi de7ii? <sup>16</sup> Xoossaa Beeta Maqidasiyaaranne eeqaara aiba zuppetetti de7ii? Aissi giikko Xoossai,

“Taani eta giddon de7ananne

eta giddon hemetettana.

Taani eta Xoossaa gidana;

qassi etikka ta asata gidana”

giidoogaadan, nuuni de7o Xoossaa beeta maqidase. <sup>17</sup> Hegaadankka, qassi Godai,

“Eta giddoppe kiyite;

etappe shaahettite.

Tunabaakka bochchoppite.

Taani inttena mokka ekkana.

<sup>18</sup> Qassi taani intteyyo aawa gidana;

inttekka taayyo attuma naatanne

macca naata gidana.

Taani Ubbaappe Wolqqaama Godai

hagaa odais”

yaagiis.

## 7

<sup>1</sup> Hegaa gishshau, ta siiqotoo, Xoossai ha ubbabaa nuuyyo immana giidoogaappe hini baggan, nu ashuwaanne nu shemppuwaa tunissiya ubbabaappe nu huuphiyaa ane geeshshoos; qassi Xoossaayyo yayyiyoogan muleera geeyidi de7oos.

*PHauloosa Ufaissaa*

<sup>2</sup> Intte uluwaa nuna bessite; nuuni oonanne naaqqibookko; oonanne bashshibookko; qassi oonanne cimmibookko. <sup>3</sup> Taani heгаа intte bolli pirddanau giikke; aissi giikko, taani kase intteyyo giidoogaadankka, intte nu wozanan de7eeta; nuuni de7inkka haiqqinkka, issippe de7oos. <sup>4</sup> Taani inttena keehi ammanais; taani inttenan gitatais; nu waayee ubban taani keehi minettaisinne wogi bainna ufaissaa ufaittais.

<sup>5</sup> Aissi giikko, harai atto nuuni Maqidooniyaa biido wode, ubba baggaarakka waayet-tidappe attin, shemppibookko; hara asaara ooshshai de7ees; nu wozanankka yashshai de7ees. <sup>6</sup> SHin kayyottidaageeta minttettiya Xoossai, Tiitu yuussan nuna minttettiis.

<sup>7</sup> Nuna kaseegaappe aatti ufaissidaagee, Tiitu yuussaa xalaala gidenna; shin intte a minttettidoogaa; intte tana be7anau amottidoogaanne tau qarettidoogaa qassi intte tana maaddanau gigettidoogaa i nuuyyo yootiis.

<sup>8</sup> Aissi giikko, ta dabddaabbee inttena azzanissidabaa gidikkokka, aissi xaafidanaashsha giikke; aissi xaafidanaashsha giikkokka, ta dabddaabbee inttena guutta wodiya azzanissidoogaa be7ais. <sup>9</sup> Ha77i tana ufaissidaagee taani inttena azzanissido gishshassa gidenna; shin intte azzanoi inttena nagaraappe zaaridoogaa gishshassa; aissi giikko, nuuni inttena aibiininne qohennaadan, Xoossai ba koyidoogaadan, inttena azzanissiis. <sup>10</sup> Aissi giikko, Xoossai koyiyo azzanoi atotettaakko gattiya nagaraappe simuwaa ehees; hegeekka zil77etti bainnaagaa; shin sa7aa azzanoi haiquwaa ehees.

<sup>11</sup> Xoossai he intte azzanuwan ai oottidaakkonne be7ite. Inttena ai keenaa gencissidaakkonne intte geeshshatettaa tumayanau inttena ai keenaa laamoyidaakko,

ai keenaa hanqqetissidaakkonne ai keenaa yashissidaakko, qassi inttena ai keenaa amoyidaakko, ai keenaa mishissidaakkonne naaqqo oosuwaa qaxxayanau ai keenaa giigidaakko be7ite; intte intte huuphen geeshsha gididoogaa ubbabankka erissideta.

<sup>12</sup> Hegaa gishshau, taani he dabddaabbiyaa intteyyo xaafidabaa gidikkokka, naaqqida uraa woi naaqqetida uraa gishshassa gidenna; shin intte nuuyyo woqqa qoppiyaakkonne Xoossaa sinttan intteyyo qonccissanau taani xaafaas. <sup>13</sup> Nuuni minettidoogee hejaa gishshassa; he nu minettaa bolli, Tiitu ufaittidoogaassi nuuni ubbaappe dariya ufaissaa ufaittida. Aissi giikko, intte ubbai a hirggaappe shemppissideta. <sup>14</sup> Taani inttebaa sabbada ayyo odin, intte tana yeellayibeekketa; shin nuuni intteyyo ubba wode tumaa haasayida; hegaadankka, nuuni Tiitu sinttan inttebaa sabbidoogee tuma gidiiis. <sup>15</sup> Hegaa gishshau, intte ubbai ayyo yayyidi kokkoridi, a waati morkkidaakkonne qassi ayyo ai keenaa azazettidaakko i hassayiyo wode, inttena keehi daro siiqees. <sup>16</sup> Taani ubaban inttena ammaniyo gishshau ufaittais.

## 8

### *Ammaniya Asati Kehidi Immidobaa*

<sup>1</sup> Nu ishatoo, Xoossaa aaro kehatetta Maqidooniyaa woosa keettatun oottidobaa inttena erissanaagaa koyoos. <sup>2</sup> Eti aadhdhido waayiyan wolqqaama paaciyaa paacettidosona; shin eti hiyyeesa gidikkokka, bantta immiyooban daro kehoosonanne qassi gita ufaissaa ufaittoosona. <sup>3</sup> Aissi giikko, eti bantta wolqqa keenaa qassi harai atto bantta wolqqaappekka dariyaagaa dosidi immidoogau taani markka. <sup>4</sup> Eti geeshshata maaddiyo lo77o oosuwaa nunaara oottanau nuna daro woossidosona. <sup>5</sup> Eti nuuni qoppidoogaappe aattidi oottidosona; kasetidi eti bantta huuphiyaa Godaayyo immidoogaappe guyyiyan, Xoossai giido mala, nuuyyookka bantta huuphiyaa immidosona.

<sup>6</sup> Hegaa gishshau, nuuni ha lo77o oosuwaa doommida Tiitu gujji oottanaadaaninne inttena maaddidi, he oosuwaa polissanaadan a woossida. <sup>7</sup> SHin intte ubaban, ammanuwan, haasayan, erattetan, gita amuwan, nuna siiqiyoogan ubbabankka duretidoogaadan, ha lo77o oosuwankka intte keha gidanaagaa nuuni koyoos.

<sup>8</sup> Taani hejaa azazanau giikke; shin haratu gita amuwaa baggaara intte siiqoi ai keena tumakko eranau gais. <sup>9</sup> Aissi giikko, intte nu Godaa Yesuus Kiristtoosa aaro kehatetta ereeta; Kiristtoosi dure gidi uttidi, intte a hiyyeesatettan duretanaadan, intte gishshau hiyyeesiis.

<sup>10</sup> Taani ha yohuwan inttena zoriyoogee haggaa; zillaitti intte doommidoogaa ha77i wurssiyoogee intteyyo lo77o; intte ooso xalaalau gidennan, oottana qofaukka kasetidaageeta. <sup>11</sup> Intte oottanau keehi amottidoogee oottidi polidoogaara giiga gidana mala, intteyyo danddayettidoogaadankka oosuwaa polite. <sup>12</sup> Aissi giikko, issi urai Xoossau immanau keehi amottikko, Xoossai au de7ida keenaa ekkanaappe attin, au bannabaa appe ekkenna.

<sup>13</sup> Aissi giikko, taani harati waayiyaappe shemppin, intte waayettanaagaa giikke; intte giiga gidanaagaappe attin. <sup>14</sup> Eta palahai intte pacaa kunttana mala, intteyyo ha wodiyan de7iya palahai eta pacaa kunttana koshshees; naa77aikka hegan giiga gidana. <sup>15</sup> Xoossaa maxaafan, “Darissidi shiishshidaagau palahibeenna; qassi guutta shiishshidaagaukka paccibeenna” geetettidi xaafettiis.

### *Tiitanne A Laggeta*

<sup>16</sup> SHin nuuni intteyyo qoppiyoogaa mala, gita qofaa Tiita qofissida Xoossaa galatai gakko. <sup>17</sup> Tiitu inttekkoo baanau ba qofaa qachchidoogee, ba huuphen inttena maaddanau daro amottido gishshappe attin, nu zore xalaalaa ekkidoogaana gidenna. <sup>18</sup> Wonggeliyaa mishiraachchuwaa yootiyo ba oosuwaa woosa keetta ubban daro bonchchettida ishaa nuuni aara issippe kiittoos. <sup>19</sup> Hegaa bollan qassi, ha nuuni oottiyo



lo77o oosuwaa i nunaara issippe oottanaunne Godaa bonchchuwau nuuni harata maaddanaassi keehi amottiyoogaa bessanau woosa keettati a dooridi sunttidosona.

<sup>20</sup> Nuuni oottiyo ha keha imuwaa gishshau, ooninne nuna boreenna mala naagettoos.

<sup>21</sup> Aissi giikko, nuuni Godaa sintta xalaalan lo77obaa oottanaagaa gidenna; shin asa sinttankka lo77obaa oottanaagaa qoppoos.

<sup>22</sup> Nuuni darotoo paacci be7ido nu ishaa, ubba wode inttena maaddanau daro amottiyaagaa, ha asatuura inttekko kiittoos; qassi ha77i i inttena daro ammaniyo gishshau, inttena maaddanau kaseegaappe aattidi keehi amottes. <sup>23</sup> Tiitubaa gidikko, i inttena maaddanau tanaara issippe oottiya ta laggiyaa; hinkko ishanttubaa gidikko, eti woosa keettati kiittidoogeetanne Kiristtoosa bonchchissiyaageeta. <sup>24</sup> Simmi woosa keetta ubbati intte siiqoi tuma gidiyooogaa erana mala, qassi nuuni inttebaa sabbiyoogee likke gidiyooogaa erana mala, intte siiquwaa eta bessite.

## 9

### *Ammaniyaageetussi Kessido Peeriyaa*

<sup>1</sup> Yihudan de7iya geeshsha asata maaddanau yeddiyoobau taani intteyyo xaafanau koshshenna. <sup>2</sup> Intte maaddanau keehi amottiyoogaa taani eriyo gishshau, Maqidooniyaa de7iya asaayyo inttebaa sabbaas. Taani etayyo, “Akaayyan de7iya ishantti zillaattaasappe doommidi, maaddanau giigettidosona” yaagada yootaas; qassi intte gita amoikka etappe dariya baggaa denttettiis. <sup>3</sup> SHin taani etayyo giidoogaadankka nuuni ha yohuwan intteban gitatiyoogee hada gidenna mala, intte giigettidaageeta gidanaadan, ha ishantta inttekko kiittais. <sup>4</sup> Geelladan Maqidooniyaa asati tanaara yiidi, intte giigettennan de7ishin, inttena demmikko, nuuni ai keenaa yeellatanddoniishsha! Intte yeellatanaagaa gookko; shin nuuni inttena keehi ammanidi gitatidoogaassa. <sup>5</sup> Hegaa gishshau, taani ha ishantti taappe sinttatidi inttekko biidi, intte immana giido imuwaa kasetidi giigissana mala, eta woossanau koshshiyooogaa akeekaas. Hegaappe guyyiyan, he imoi taani gakkiyo wode giigi uttana; hegee qassi wolqqan intte immiyooogaa gidennan, dosidi immiyooogaa erissana.

<sup>6</sup> Hagua akeekite; guutta zerettaa zeriya urai guutta kattaa cakkana; daro zerettaa zeriya urai qassi daro kattaa cakkana. <sup>7</sup> Xoossai ufaissan immiya uraa siiqiyo gishshau, qarettiiddi woi dosennan immiyooogaa gidennan, immiya urai huuphen huuphen ba wozanan qoppidobaa immo. <sup>8</sup> Xoossai intteyyo gidiyaabai ubba wode de7anaadaaninne qassi haratuyyookka intte immanau gidiyaabai de7anaadan inttena koshshiya ubbabaa intteyyo immanau danddayees. <sup>9</sup> Xoossaa maxaafai,

“I hiyyeesa asaayyo darissidi immees;

qassi a xillotettai merinau de7ana”

yaagees. <sup>10</sup> Xoossai, zeriyaagaayyo zerettaanne maanau qumaa immiyaagee, inttena koshshiya zeretta ubbaa intteyyo immana; qassi intte xillotettaappe daro aifiyaa aifissanau he zerettaa dichchana.

<sup>11</sup> Daro asai intte immiyo imuwaa nuuppe ekkidi, Xoossaa galatanaadan, intte ubba wode darissidi immiyaageeta gidana mala, Xoossai inttena ubba baggaara dureyana.

<sup>12</sup> Aissi giikko, ha intte oottiyo oosoi geeshshata koshshiyaabaa kuntti immiyooogaa xalaala gidenna; shin Xoossaa daro galataa immiyooogan kumidi goggees. <sup>13</sup> Ha intte oosoi intte ammanuwaa erissiyoo gishshau, daro asai Kiristtoosa wonggeliyaa intte ammanidi markkattiyoogaayyoonne intte maaduwaataaranne hara ubbatuura shaakkidi, darissi immiyooogaayyo Xoossaa bonchchana. <sup>14</sup> Eti intteyyo Xoossaa woossiiddi, inttenan de7iya Xoossaa aaro kehatettaa zawai bannaagaa gishshau, inttena laamotoosona. <sup>15</sup> Zawai banna Xoossaa aaro kehatettaa gishshau, Xoossaa galatai gakko.

## 10

### *PHauloosi Mootiyaageetussi Zaarido Zaaruwaa*

<sup>1</sup> Taani PHauloosi, intte, “I nunaara de7iyo wode kauyyees” giyoogee, qassi, “Nuuppe haakkidi de7iyo wode nu bolli xalees” giyoogee, Kiristtoosa doshotettaa baggaaranne a ashkкетettaa baggaara inttena woossais. <sup>2</sup> Nuna ha sa7aa meeziyaadan de7oosona giidi qoppiya issi issi asatu bolli taani xalanaagaa erais; shin taani inttekkko biyo wode intte tana xalissenna mala, inttena woossais. <sup>3</sup> Aissi giikko, nuuni ha sa7an de7ikkokka, ha sa7aa asadan olettokko. <sup>4</sup> Aissi giikko, nuuni olettiyo toorai ha sa7aagaa gidenna. SHin qatuwaa laalanau wolqqaara de7iya Xoossaa tooraa. <sup>5</sup> Nuuni asa qofa xaissoos; qassi Xoossaa erattettaa bolli denddidi xubbiya ooro qofa ubbaa laaloos. He qofa ubbai Kiristtoosayyo azazettana mala omooddoos. <sup>6</sup> Intte azazettiyoogaa polidoogaappe guyyiyan, azazettennan ixxiyoobaa ubbaa nuuni qaxxayanau gigettana.

<sup>7</sup> Intte sinttan de7iyaabaa xeellite; ooninne bana Kiristtoosabaa giidi qoppikko, heгаа gujji qoppo; Kiristtoosabaa i gididoogaadan, nuunikka qassi abaa. <sup>8</sup> Aissi giikko, Godai nuuyyo immido nu alaafetettan taani keehi orettiyaabaa gidikkokka, hegan yeellatikke; he nuuyyo immido alaafetettai inttena keexxanaassappe attin, qolanaassa gidenna. <sup>9</sup> Taani ta dabddaabbiyan inttena yashissiya asa gidada beettanau koyikke. <sup>10</sup> Aissi giikko, issi issi asai, “PHauloosa dabddaabbee deexonne wolqqaama; shin xeelliyo wode i daafuranchcha; a haasayaikka pattenna” yaagees. <sup>11</sup> Hegaa mala asi nuuni haahuwan de7iiddi xaafiyo dabddaabbiyaanne yaani inttenaara de7iiddi oottiyo oosuwan dummatetti bainnaagaa akeekana koshshees.

<sup>12</sup> Nuuni banttana nashshiya issi issi asatuura nuna paidanau woi likkissanau xalokko; shin eti banttana issoi issuwaara likkissiiddinne qassi banttana issoi is-suwaara yiggi xeelliiddi, muleera eeyyidosona.

<sup>13</sup> SHin nuuni Xoossai nuuyyo essido zawaa gidдон ceeqettiyoogaappe attin, he zawaappe pinnidi ceeqettokko; he zawai inttekkokka gакkees. <sup>14</sup> Nuuni inttekkko gakkibeennabaa milatidi, zawaa pinnokko; aissi giikko, nuuni Kiristtoosa wonggeliyaa mishiraachchuwaa yootiiddi, inttekkko kase gakkida. <sup>15</sup> Nuuni Xoossai essido zawaa pinnidi, hara asi oottido ooson ceeqettokko; shin intte ammanoi dicci dicci biyo wode, nuuni intte gidдон oottiyo oosuwaa zawai kaseegaappe keehi aakki aakki baana giidi qoppoos. <sup>16</sup> Nuuni wonggeliyaa mishiraachchuwaa intte de7iyoosaappe hini baggan yootana; qassi hara zawan oosettiichchida oosonkka ceeqettokko. <sup>17</sup> SHin Xoossaa maxaafai,

“Ceeqqiya urai ooninne

Godan ceeqqo”

yaagees. <sup>18</sup> Aissi giikko, Godai nashshiyo uraappe attin, bana nashshiya urai nashet-tenna.

## 11

### *PHauloosanne Banttana Yesuusi Kiittiis Giya Worddanchchata*

<sup>1</sup> Intte ta eeyyatettaa guuttaa gencciyaakko lo77o. Hayyanintta genccite. <sup>2</sup> Xoossai qanaatiyoogaadan, taanikka intteban qanaatais; aissi giikko, taani inttena issi attumaa-gau, Kiristtoosau immana gaada, geela7otettaara de7iya geeshsha geela7eedan giigissa wottaas.

<sup>3</sup> SHin shooshshai ba geniyaara Hewaano balettidoogaadan, Kiristtoosayyo intte im-mido intte suure qofai moorettibeennaagee wora biichchanaakkonne gaada hirggais.

<sup>4</sup> Aissi giikko, issi urai yiidi, nuuni intteyyo yootido Yesuusappe hara Yesuusa intteyyo yootikko, woi intte ekkido Ayyaanaappenne wonggeliyaappe dumma ayyaanaanne wonggeliyaa intte ekkikko, loittidi genceeta.

<sup>5</sup> Yesuusi kiittido ha waannatuppe taani aibinkka laafiyoobaa taayyo milatenna. <sup>6</sup> Taani haasayiyo haasayan tamarabeenna asa gidikkokka, erattetan gidikke; shin nuuni intteyyo ha yohuwaa asa ubbaa giddon ubba baggaara qonccissida.

<sup>7</sup> Woi taani inttena miishsha oichchennan, Xoossaa wonggeliyaa mishiraachchuwaa intteyyo coo yootidoogeenne inttena xoqqu oottanau ta huuphiyaa toochchidoogee taayyo nagara gidanddeeshsha! <sup>8</sup> Taani intteyyo oottanau hara woosa keettatun de7iya asaappe miishsha ekka ekkada, he woosa keettata bonqqaas. <sup>9</sup> Qassi taani inttenaara de7ishin, tana metin, intteppe issi uraakka waissabeikke. Aissi giikko, Maqidooniyaappe yiida ishantti tana koshshida ubbabaa taayyo immidosona; taani inttena waissenna mala, kase ta huuphen naagettidoogaadankka sinttaukka naagettana. <sup>10</sup> Kiristtoosa tumatettai tanan de7ishin, ha ta ceeqoi Akaayiyaa biittan awaaninne attenna. <sup>11</sup> Taani haggaa aissi giyaanaa? Inttena siiqenna gishshasse? Taani inttena siiqiyoogaa Xoossai erees.

<sup>12</sup> SHin he bantta ceeqettiyooban nuuni oottiyoogaadan oottanau gaasottiyaageetu gaasuwaa digganau, ha77i taani oottiyo oosuwaa gujjada oottana. <sup>13</sup> Aissi giikko, eti Yesuusi kiittibeenna worddanchcha asata; hegeetu mala asati Kiristtoosi kiittidoogeeta milatanau bantta meraa laamerettiya kiittibeenna worddanchchatanne genanchcha oosanchchata. <sup>14</sup> Hegee garamissiyaabaa gidenna; aissi giikko, Seexaanai ba huuphen poo7o kiitanchcha milatanau ba meraa laamnees. <sup>15</sup> Hegaa gishshau, Seexaanaa ashkkarati xillotettaa ashkkarata milatanau bantta meraa laamerettikko, hegee gitabaa gidenna; eti wurssettan bantta oosuwaa malaa ekkana.

### *PHauloosa Gakkida Metuwaa*

<sup>16</sup> Taani naa77anttuwaakka gais; tana ooninne eeyya giidi qoppoppo; shin intte tana, i eeyya giikkokka, taani guuttaa ceeqettanaadan, tana eeyya giite. <sup>17</sup> Taani hagaadan xalada ceeqettaida haasayiyoogee, eeyyatetta haasayappe attin, tana Godai azaziina gidenna. <sup>18</sup> Daro asai ha sa7aaban ceeqettiyo gishshau, taanikka ceeqettana. <sup>19</sup> Intte aadhdhida eranchcha gidiiyo gishshau, eeyya asaabaa ufaissan genceeta. <sup>20</sup> Aissi giikko, ooninne inttena ailleyikko, woi inttebaa miikko, woi inttebaa bonqqikko, intte bolli otorettikko, woi intte qinxalliyyaa baqqikko, genceeta. <sup>21</sup> Nuuni hegaa oottanau daro daafuranchcha gididoogaa taani yeellataida yootais.

SHin ooninne issiban xalidi ceeqettikko, taanikka ceeqettanau xalais; taani eeyya asadan haasayais. <sup>22</sup> Eti Ibraawetee? Taanikka Ibraawe. Eti Israa7eela asee? Taanikka Israa7eela asa. Eti Abrahaama zaree? Taanikka qassi Abrahaama zare. <sup>23</sup> Eti Kiristtoosa ashkkaratee? Taanikka etappe aadhdhiya ashkkara; taani gooyyiya asadan haasayais; taani daro ootta daafuraas; daro wodiya qashettaasinne lissuwan garafettaas; qassi daro wodiya haiqqaichchada attas. <sup>24</sup> Aihudati tana ichchashutoo, hasttamanne uddufunaa lissuwan garafidosona. <sup>25</sup> Roome asai tana heezzutoo dullan shociis; issi gallassi shuchchan caddii caddidi aggiis; markkabee heezzutoo me77in, abba giddon issi qammaanne issi gallassaa aqada pe7aas. <sup>26</sup> Taani daro ogiyaa hemettaas; tana kixa haattinne panggi daafirggidi ashshiis; qassi ta biittaa asainne Aihuda gidenna asai daafirggidi ashshidosona. Qassikka katamai, bazzo, abba, tana yashishiis; worddanchcha dabbotikka tana daafirggidi ashshidosona. <sup>27</sup> Taani daafuraasinne metootaas. Darotoo xiskkuwaa xayaas; namisettaas; saamettaas. Darotoo xoomaas; qassi meegettaasinne kallottaas.

<sup>28</sup> Harabaa ubbaappekka ubba gallassi tau tooho gididabai, woosa keetta ubbau hirggiyoogaa. <sup>29</sup> Daafuriyai oonee? Taani daafurikkinaayye? Nagaran geliyai oonee? Taani un77ettada ayyo qarettikkinaayye?

<sup>30</sup> Taani ceeqettanau koshshiyaabaa gidikko, taani daafuranchcha gidiiyoogaa eris-siyaaban ceeqettana. <sup>31</sup> Merinau anjettida Xoossai, nu Godaa Yesuus Kiristtoosa Aawai, taani worddotennaagaa erees. <sup>32</sup> Damasqqo kataman Aretaasa giyo kawuwaappe

garssaara deriyaa haariyaagee, tana oittanau Damasqqo katamaa naagissee. <sup>33</sup> SHin katamaa dirssaa maskkootiyaara tana keeshiyan duge wottin, appe kessa ekkaas.

## 12

### *PHauloosa Ajuutaa*

<sup>1</sup> Ceeqettiyoogee taayyo ainne allaalle kessennabaa gidikkokka, taani ceeqettanau bessees. SHin taani ajuutaabaanne Godaappe qonccidabaa haasayana. <sup>2</sup> Tammanne oiddu laittappe kase, heezzantto saluwaa pude ekettida issi bitaniyaa, Kiristtoosa ammaniyaagaa, taani erais; he bitanee ba asatettaara biidaakkonne woikko ajuutan biidaakko, taani erikke; Xoossai erees. <sup>3</sup> He bitaniyaa, heezzantto saluwaa pude ekettidaagaa, erais; i ba asatettaara biidaakkonne woikko ajuutan biidaakko, taani erikke; Xoossai erees. <sup>4</sup> Hegan he bitanee asi haasayanau danddayennabaa, asa inxxarssikka haasayanau danddayennabaa siyiis. <sup>5</sup> Taani he bitaniyaaban ceeqettana; shin taani daafuran chacha gidiyoojaa erissanaappe attin, ta huupheban ceeqettikke. <sup>6</sup> Taani ceeqettanau koyiyaabaa gidikkokka eeyyikke; aissi giikko, taani tumaa haasayais. SHin asi tabaa tanan be7iyoo gaappenne taappe siyiyoogaappe aattidi qoppenna mala ceeqettikke.

<sup>7</sup> Qassi Xoossai qoncciyoo aadhdhida gitatettan taani otorettiyoogaa digganau tana caddi oiqqiyaagee, Seexaanaa kiitanchchai, tana dechchanaunne taani otorettenna mala, tana naaganau taayyo imettiis. <sup>8</sup> Hegaa taappe shaakkana mala, taani Godaa heezzutoo woossaas. <sup>9</sup> Godai tana, “Ta aaro kehatettai neeyyo gidana; aissi giikko, ta wolqqai daafuran polettees” yaagiis; hejaa gishshau, Kiristtoosa wolqqai tanan de7ana mala, ta daafuran ceeqettanau taani daro ufaittais. <sup>10</sup> Taani Kiristtoosa gishshau daafuriyoogan, asan cayettiyoogan, waayettiyoogan, yedetettiyoogan, metootiyoogan ufaittais; aissi giikko, taani daafuriyo wode, he wode minnais.

### *PHauloosi Qoronttoosa Asaassi Un77ettidi Qoppiis*

<sup>11</sup> Taani ceeqettidoogan eeyyaas; shin hejaa intte tana wolqqan ootissideta; aissi giikko, intte tana galatanau bessees; taani aibanne gidana xayikkokka, Yesuusi kiittido ubbaappe aadhdhiyaageetuppe laafikke. <sup>12</sup> Yesuusi kiittidoogee tuma gididoogaa erissiya malaatainne oorattabainne Xoossai oottiyo malaatai intte giddon daro gencan oosettiis. <sup>13</sup> Taani ta huuphen inttena waissabeennaagaappe attin, hara woosa keetatuppe intte aibin laafeetii? Hayyanintta taani inttena naaqqidoogaa taayyo atto giite.

<sup>14</sup> Taani inttekko baanau giigetishin, hagee taayyo heezzantto wode; taani inttena waissikke. Taani inttena koyiyoogaappe attin, intte miishsha koyikke; aissi giikko, aayyiyaanne aawai bantta naatuyyo miishsha minjjiyoogaappe attin, naati bantta aay-eeyyoonne aawaayyo minjjokkona. <sup>15</sup> Taani intte shemppuwaayyo taayyo de7iyaabaa tanaara gattada ufaissan immana; yaatin, taani inttena keehi siiqiyo gishshau, intte tana ashshi siiquuteetiyye?

<sup>16</sup> Gidikkokka, taani inttena waissabeikke; shin intte tana, “Neni nuna cimmada wordduwan oiqqadasa” yaagana. <sup>17</sup> Taani harai atto, inttekko kiittido issi asa baggaarakka inttena cimmidanaa? <sup>18</sup> Tiitu inttekko baana mala, taani woossaas; qassi ammaniya ishaakka aara yeddaas. Yeddin Tiitu inttena cimmiddee? Nuuni nu oosuwa issi qofan oottibookkonii? Qassi nu hanoikka issuwaa gidenneeyye?

<sup>19</sup> Nuuni ubba wodekka intte sinttan nu huupheyyo mootettiyoobaa intteyyo milatii? Nuuni Kiristtoosan de7iyaageetudan, Xoossaa sinttan ha77i gakkanaassikka haasayoo. Nu siiqotoo, nuuni oottiyo ubbabaikka inttena maaddanaassa. <sup>20</sup> Aissi giikko, taani inttekko biyo wode, ooni erii taani koyiyoogaa mala intte gidennan agganaakkonne; qassi taanikka intte koyiyoogaa mala gidennan agganaakkonne. Qassi ooni erii hegan palamai, qanaatee, hanqqoi, yiiqetiyoogee, zigirssai, saasukkiyoogee, otoroi, metoi

de7ennan waayi aggana; tana yashshees. <sup>21</sup> Taani inttekko naa77anttuwaa biyo wode, ta Xoossai intte sinttan tana kaushshanaakkonne yayyais; taani nagara kase oottidi, bantta oottido tunatettaappe, shaaramuxatettaappenne amuwaappe simmibeenna daro asatuyyo yeekkennan aggikke gaada yayyais.

## 13

### *Wurssetta Zoriyaanne Sarotaa*

<sup>1</sup> Hagee taayyo inttekko yiishin heezzantto wode. Ai mootoikka naa77u woi heezzu markkai markkattin pirddettanau koshshees. <sup>2</sup> Taani naa77anttuwaa inttenaara gaittido wode, inttena ye77e gaas; ha77ikka haahuwan de7ikkokka, inttena ye77e gais. Taani qassikka inttekko biyo wode, nagara kase oottidaageetakka qassi harata ubbata akka qaxxayennan aggikke.

<sup>3</sup> Aissi giikko, Kiristtoosi ta baggaara haasayiyoogaa erissiyaabaa intte koyeeta. I inttenaara haasayiyo wode wolqqaama gidiyoo gaappe attin, intte giddon daafuranchcha gidenna; <sup>4</sup> aissi giikko, Kiristtoosi masqqaliyaa bolli misimaariyan xishettidi, daafuran kaqettiis; shin Xoossaa wolqqan paxa de7ees. Aissi giikko, i daafuranchcha gididoogaadan, nuunikka daafuranchcha; shin inttenaara haasayiyoogan nuuni Xoossaa wolqqan aara de7ana.

<sup>5</sup> Ammanuwan intte de7iyaakkonne ane inttena qoridi pirddite; paaciyann intte muleera kunddikkoppe attin, Kiristtoosi inttenan de7iyoo gaappe intte geeshshidi ereeta.

<sup>6</sup> Nuuni paaciyaa danddayanaagaa intte eriyoo gaappe ammanais.

<sup>7</sup> Intte iitabaa mulekka oottenna mala, nuuni Xoossaa woossoos. Nuuni paaciyaa danddayaageeta gididi beettanaassa gidenna; shin nuuni paaciyaa danddayennaageeta milatidi beettikkokka, lo77obaa intte oottanaassa. <sup>8</sup> Aissi giikko, nuuni tumaa xalaalaayyo oottanaappe attin, tumaa bolli ainne oottanau danddayokko; <sup>9</sup> nuuni daafuriyo wode ufaittoos; shin intte wolqqaama; intte bali bannaageeta gidana mala, nuuni qassi Xoossaa woossoos.

<sup>10</sup> Taani intteppe haahuwan de7aidda xaafidoo gee heгаа gishshassa; taani inttekko biyo wode, Godai taayyo immido maatan zempada, inttenaara iitettanau tana waayi koshshana. He maatai taani inttena keexxanau taayyo imettidoogaappe attin, inttena qolanau imettibeenna.

<sup>11</sup> Wurssettan ta ishatoos, saro de7ite; bali bannan de7ite; ta zoriyaa siyite; issi wozana gididi de7ite; sarotettan de7ite. Siiqo Xoossai, sarotettaa Xoossai, inttenaara issippe de7ana.

<sup>12</sup> Issoi issuwaara geeshsha yeretaa yerettidi sarotite. <sup>13</sup> Xoossaa asa ubbati inttena saro saro goosona.

<sup>14</sup> Godaa Yesuus Kiristtoosa aaro kehatettai, Xoossaa siiqoi, Geeshsha Ayyaanaa issippetettai inttenaara ubbaara gido. Amin77i.



## PHauloosi Galaatiyaa Asaassi Xaafido Kiitaa

### *Gidduwaa Erissuwaa*

Yesuusi Ashshiyaagaa gidiyoojaa odiya mishiraachchoi dumma dumma sohuwan odettishiininne Aihuda gidenna asaikka ammanidi ekki ekki biishin, “Kiristtiyaane gidanau Muuse higgiiyaa polanau koshshiiyye koshshennee?” giyo oishai issippe dend-diis. He wode PHauloosi “Kiristtiyaane gidanau Muuse higgiiyaa polanau koshshenna; Yesuusan ooratta de7uwaa demmanau anoi ammano; asai Xoossaa sinttan xillanau danddayiyoogee ammano xalaalaana” yaagidi tamarissuwaa doommiis. SHin Qeeri Iisiyaa gidдон, “Asi Xoossaa sinttan xillanau Yesuusan ammaniyoogaa xalaala gidennan, Muuse higgiiyaakka polanau koshshees” yaagi yaagidi PHauloosa timirttiyaa phalqqiya asati de7oosona.

PHauloosi haggaa Galaatiyaa kiitaa xaafidoogee ha bala timirttiyan cimettida asaa likke ammanuwaassinne Kiristtinna de7uwaassi zaaridi kaalettanaassa. PHauloosi koiro doommiiddi, i bana, “Taani Yesuusi Kiittidoogaa” yaagidi erissiiddi doommees. Yesuusi Kiittidoogaa oottidi a xeesidaagee Xoossaappe attin, asaa gidennaagaanne qassi i kiittidoogee Aihuda gidenna asatussa gidiyoojaa qonccissidi yootees. Hegaarakka oisettidi, asai xillanau danddayiyoogee ammano xalaalaana gidiyoojaa odees. Wurssetta miraafetun Kiristtinnaa eeshshai Yesuusa ammaniyo ammanuwaappe kiyiyya siiquwaappe pulittiyaagaa gidiyoojaa odees.

<sup>1</sup> Taani PHauloosi, Yesuus Kiristtoosinne qassi haiquwaappe a denttida Xoossai Aawai kiittidoogaappe attin, asappe woikko asa baggaara kiittettidaagaa gidikke. <sup>2</sup> Ha taaninne tanaara de7iyya ammaniya ishantti ubbai, Galaatiyaa biittan de7iyya woosa keetta ubbaassi sarotaa kiittoos.

<sup>3</sup> Xoossai nu Aawainne nu Godai Yesuus Kiristtoosi intteyyo aaro kehatettaanne sarotettaa immo.

<sup>4</sup> Nu Xoossaa, nu Aawaa sheniyann Kiristtoosi ha iita oosoi oosettiyo wodiyaappe nuna ashshana mala, nu nagaraa gishshau, ba huuphiyaa immiis. <sup>5</sup> Xoossaayyo merinaappe merinaa gakkanaassi bonchchoi gido. Amin77i.

### *Wonggeliyaa Tumai Issuwaa Xalaala*

<sup>6</sup> Kiristtoosa aaro kehatettan inttena xeesida Xoossaa aggidi, hara wonggeliyaakko, intte ellellidi, waani simmidaakko tau oorattabaa gidiiis. <sup>7</sup> Inttena bul77akkiyaageetinne Kiristtoosa wonggeliyaa geellayanau koyiyya amarida asati de7oosonappe attin, tumaappe hara wonggelee baawa. <sup>8</sup> SHin harai atto nuna gidin, woikko saluwaappe kiitanchcha gidin, nuuni intteyyo kase yootido wonggeliyaa mishiraachchuwaappe dummatiyyaagaa intteyyo yootiyaabaa gidikko, i qanggettidaagaa gido. <sup>9</sup> Kase nuuni giidoogaadan, ha77ikka naa77anttuwaa taani gais; intte ekkido wonggeliyaappe dummatiyyaagaa ooninne intteyyo yootikko, he urai qanggettidaagaa gido.

<sup>10</sup> Hagee tana asappe saba koyiyaabaa milatissii? Akkai! Taani Xoossai lo77o giyoogaa koyais. Woikko taani asa ufaissanau koyiyaanaa? Taani ha77ikka asa ufaissanau koyiyaabaa gidiyaaakko, Kiristtoosa aille gidikke.

### *PHauloosi Yesuusi Kiittidoogaa Kiyido Kessaa*

<sup>11</sup> Ta ishanttoo, taani intteyyo yootido wonggeliyaa mishiraachchoi asappe gidennaagaa intteyyo yootais. <sup>12</sup> Aissi giikko, taassi Yesuus Kiristtoosi qonccissiiippe attin, taani wonggeliyaa asappe ekkabeikke; asinne tana tamarissibeenna.

<sup>13</sup> Kase taani Aihuda ammanuwan de7iyyo wode, waana de7idaakko, intte siyideta; taani Xoossaa woosa keettaa qareti bannan yedettaassinne xaissanau baaxetaas. <sup>14</sup> Ta

wode de7ida ta dabbotuppe darota Aihuda ammanuwaa higgiiyaa naagiyooogan aadhdhais; nu aawatu wogaa ooppenne aadhdhada siiqaas.

<sup>15-16</sup> SHin Xoossai ba aaro kehatettan, taani biron ta aayee uluwan de7ishin, baayyo oottanau tana xeesiis; abaa yootiya wonggeliyaa mishiraachchuwaa Aihuda gidenna asaayyo taani yootana mala, Xoossai ba Na7aa tau qonccissanau koyido wode, zoretanau ookkonne babeikke. <sup>17</sup> Woikko taappe kase Yesuusi kiittidoogeetuura gaittanau Yerusalaame babeikke; shin taani sohuwaara Araba giyo biittaa baas. Hegaappe Damasqo giyo katamaa simmaas. <sup>18</sup> Heezzu laittappe guyyiyan, PHeexiroosaara gaittanau Yerusalaame baada, aara tammanne ichchashu gallassaa uttaas. <sup>19</sup> SHin Yesuusi kiittidoogeetuppe Godaa ishaa Yaaqoobappe attin, haratuura gaittabeikke.

<sup>20</sup> Taani intteyyo xaafiyooogan worddoi baawa; taani intteyyo wordduwaa odennaa-gau Xoossai markka!

<sup>21</sup> Hegaappe guyyiyan, Sooriyaa giyo biittanne Kilqqiyaa giyo biittaa baas. <sup>22</sup> Yihudan de7iya woosa keettatun he wode uttiya ammaniya asati tanaara meeze gidokkona. <sup>23</sup> SHin hara asai, “Nuna yedetti yuuyiya bitanee hagaappe kase i xaissanau koyiyo ammanuwaabaa ha77i yootees” yaagiyooogaa eti siyidosona. <sup>24</sup> Siyidi taban Xoossaa galatidosona.

## 2

### *PHauloosi Yesuusi Kiittidoogaa Gidiyoogee Yesuusi Kiittido Haratu Achchan Erettiis*

<sup>1</sup> Hegaappe simmada taani tammanne oiddu laittaappe guyyiyan, Barnnaabaasaara naa77anttuwaa Yerusalaame baidda, Tiitakka tanaara ekkada baas. <sup>2</sup> Xoossai tau ajjuutan qonccissido gishshau baas; baada taani ha77i oottiyo oosoi woikko kase oottidoogee mela antenna mala, woosa keettaa kaalettiyaageeta dumma shiishshada, Aihuda gidenna asaayyo taani yootiyo wonggeliyaa mishiraachchoi ai malakko etassi yootaas. <sup>3</sup> SHin harai atto tanaara de7iya Tiita i Giriike biitta asa gidishin, qaxxaretto giidi godatibookkona. <sup>4</sup> Gidinkka, wordduwaa nuuyyo ishanta milatidi yiidi, nunaara walahettida daro asati a qaxxaranau koyidosona. He asati Kiristoos Yesuusan nuuyyo de7iya nuuni koyidoogaadan hanana danddayiyo sheniyaa xomoosanau, wuuqettidi nu giddo gelidosona. Gelidi nuna aille oottanau koyidosona. <sup>5</sup> SHin wonggeliyaa tumatetta inttenaara minnidi de7ana mala, nuuni harai atto issi saatiyaukka etayyo haarettibookko.

<sup>6</sup> SHin halaqa milatiyaageeti taayyo ainne ooratta qofa immibookkona; haggaa aissi giyaanaa giikko, hagaappe kase eti oona gidinkka tana metiyaabaa gidenna; Xoossai asa som77o xeellidi pirdenna. <sup>7</sup> SHin guyyeppe Xoossai PHeexiroosassi, Aihudatuuyyo wonggeliyaa mishiraachchuwaa yootiyo hadaraa immidoogaadan, taukka Aihuda gidenna asaayyo wonggeliyaa mishiraachchuwaa yootiyo hadaraa immidoogaa eti be7idosona. <sup>8</sup> Aissi giikko, PHeexiroosi Aihudatuuyyo Yesuusi kiittidoogaa gididoogaadan, taanikka Xoossaa wolqqan Aihuda gidenna asaayyo Yesuusi kiittidoogaa gidaas. <sup>9</sup> Qassi kaalettiyaageeta milati beettiyaageeti, Yaaqoobi, PHeexiroosinne Yohaannisi, taayyo imettida aaro kehatetta eridi, tananne Barnnaabaasa nu kushiya oiqqidi sarotidosona. Taaninne Barnnaabaasi Aihuda gidenna asaa giddon oottanaadan, qassi eti Aihudatu giddon oottanaadan qachchidi dendda. <sup>10</sup> Eti nuna kaseesappekka taani oottanau qoppaidda de7iyo hiyyeesata qoppaanaagaa xalaalaa hassayissidosona.

### *PHauloosi Anxxookiyan PHeexiroosa Timirttiyaa PHalqqiis*

<sup>11</sup> SHin PHeexiroosi Anxxookiyaa giyo katamaa yiido wode, i moorido gishshau, qoncciiyan taani a, “Neeni mooranchcha” yaagaas. <sup>12</sup> Aissi giikko, Yaaqooba matappe kiittetida amarida asai yaanaappe kase Aihuda gidenna asatuura qumaa mees; shin eti yiidoogaappe guyyiyan, Aihuda gidennaageeta qaxxaranau koyiyyaageetuyyo yayyido gishshau, ba kushiya guyye ekkidi, Aihuda gidennaageetuppe shaahettiis. <sup>13</sup> Qassi

hinkko ammanida Aihudati PHeexiroosaara yashshaa doommidosona; harai atto barnaabaasikka etaara yashshanchcha gidiiis.

<sup>14</sup> SHin eti wonggeliyaa tumatettaadan, suure hemettennaagaa be7ada, PHeexiroosa he ubba asaa sinttan, “Neeni Aihuda gidaidda, Aihudatudan gidennan Aihuda gidennaageetudan de7aasa; shin yaatin, waatada Aihuda gidennaageeta, ‘Aihudatudan de7ite’ yaagada godatai?” yaagaas.

### *Aihudatikka Aihuda Gidennaageetikka Attiyoogee Ammanuwaana*

<sup>15</sup> Nuuni yeletan Aihuda; nagaranchcha gidida Aihuda gidenna asata gidokko.

<sup>16</sup> Yaaninkka, asi Yesuus Kiristtoosa ammanidi xillanaappe attin, higgiiyaa naagiyooogan xillennaagaa erida; ashuwaa maayida asai ubbai higgiiyaa naagiyooogan xillenna gishshau, nuuni nu huuphenkka higgiiyaa naagiyooogan gidennan, Kiristtoosan ammanidi xillana mala, Kiristtoosi Yesuusan ammanida.

<sup>17</sup> SHin nuuni Kiristtoosan xillanau koyiyaageeta gidiiddi, nu huuphen nagaranchcha gidi beettikko, yaatin Kiristtoosi nagaraa tamarissiyaagee? Hegee mulekka worddo!

<sup>18</sup> Aissi giikko, issitookka qolarggidoogaa taani zaarettada keexxiyaagaa gidikko, taani ta huuphen higgiiyaa menttiyaagaa gidiyooogaa erissais. <sup>19</sup> Taani Xoossaayyo paxa de7ana mala, higgiiyaa baggaara higgiiyaayyo haiqqaas. <sup>20</sup> Taani Kiristtoosaara a masqqaliyaa bolli misimaariyan xishettada kaqettaas; simmi, ha77i paxa de7iyaagee tana gidikke. SHin Kiristtoosi ta gidдон de7ees; taani ha77i de7iyo de7oi, tana siiqidi, ta gishshau, ba huuphiyaa immida Xoossaa Na7an de7iya ammanuwaana. <sup>21</sup> Taani Xoossaa aaro kehatettaa ixkikke; asai higgiiyaa baggaara xillotetta demmiyaabaa gidikko, yaatin Kiristtoosi coo mela haiqqiis yaagiyooogaa.

## 3

### *Xillotettai Kiristtoosan Ammaniinappe Attin Higgiiyaa Polin Beettenna*

<sup>1</sup> Akeeki bainna Galaatiyaa asatoo, intte aifiyaa sinttan Kiristtoosi masqqaliyaa bollan misimaariyan xishettidi kaqettido misilee qonccidi beettees. Yaatin, tumau intte azazettenna mala, inttena bitidai oonee? <sup>2</sup> Ane taayyo ha issi yohee xalaaliyo yootite: Xoossaa Ayyaanaa, higgee giyoogaa naagidi ekkidetiiyye woikko ammanuwan siyidi ekkidetii? <sup>3</sup> Intte hegea keena eeyyee? Xoossaa Ayyaanan doommidi, ha77i intte wolqqan poleetii? <sup>4</sup> Intte daafura ubbau ainne go77i baawee? Tumaappe go77ai de7ees. <sup>5</sup> Yaatin, Xoossai intteyyo Geeshsha Ayyaanaa immiyooegeenne intte gidдон malaataa oottiyoogee, higgee giyoogaa intte oottido gishshataasseeyye? Woikko wonggeliyaa mishiraachchuwaa siyidi, intte ammanido gishshataassee?

<sup>6</sup> Hegaadankka, Abrahaami Xoossaa ammanido gishshau, Xoossai hegea ayyo xillotettan qoodiis. <sup>7</sup> Hega gishshau, ammaniyaageeti Abrahaama zare gidiyooogaa erite.

<sup>8</sup> Xoossai Aihuda gidenna asaa ammanuwan xillissanaagaa Xoossaa maxaafai kaseti be7idi, “Ha sa7an de7iya asai ubbai nenan anjjettana” yaagidi, wonggeliyaa mishiraachchuwaa Abrahaamayyo kasetidi yootiis. <sup>9</sup> Hega gishshau, Abrahaami ammanidi anjjettidoogaadan, ammaniyaageeti Abrahaamaara anjjettana.

<sup>10</sup> Higgiiyaa oosuwan ammanettidi de7iyaageeti ubbai qanggettaa gidдон de7oosona; aissi giikko, Xoossaa maxaafai, “Higgiiyaa maxaafan xaafettida ubaban de7ennaageenne polennaagee ooninne qanggettidaagaa” yaagees. <sup>11</sup> Xoossaa maxaafai, “Xilloi ammanuwan de7ana” giyo gishshau, ooninne Xoossaa sinttan higgiiyaa naagiyooogan xillennaagee erettidaagaa. <sup>12</sup> Higgee ammanuwan zemppenna; shin Xoossaa maxaafai, “Higgee giyoogaa poliyaagee an paxa de7ana” yaagees.

<sup>13</sup> Xoossaa maxaafan, “Mitta bolli kaqetti haiqqiya ooninne qanggettidaagaa” geetetti xaafettido gishshau, Kiristtoosi nu gishshau qanggettidaagaa gididi, nuna higgiiyaa qanggettaappe woziis. <sup>14</sup> Kiristtoosi hegea aissi oottidee giikko, Xoossai immana

giido Geeshsha Ayyaanaa nuuni ammanuwan ekkanaadaaninne Abrahaama anjjo ba baggaara Aihuda gidenna asaa gakkana mala giidi oottiis.

### *Higgee Hidootaa Qaalaa SHaarena*

<sup>15</sup> Ta ishanttoo, taani asi giyoogaadan intteyyo gais; harai atto naa77u asati issi yoho haasayidi, maachchaa wottoogaappe hini baggan, ooninne he maachchaa birshshanau woikko harabaa he maachchaa bolli gujjanau danddayenna. <sup>16</sup> Abrahaaminne a zerettati Xoossai sinttappe immana giidi haasayidoogaa siyidosona. Xoossaa maxaafai daro asaayyo haasayiyoogaadan, “Ne zerettatuyyo” geenna; woigii giikko, “Ne zerettaayyo” yaagees. Hegeenne, issi asa xalla gees; ikka Kiristtoosa.

<sup>17</sup> Taani giyoogee hagai; Xoossai maachchaa wottidi, he maachchaa taani naagana yaagiis. Oiddu xeetanne hasttamu laittaappe guyyiyan yiida higgee Xoossai wot-tido maachchaa xaissanaunne sinttappe immana giidi haasayidoogaa digganau dand-dayenna. <sup>18</sup> Aissi giikko, Xoossai immiyo laatai higgiiyan beettiyaagaa gidikko, yaatin Xoossai sinttappe immana giidi, haasayidoogaana gidenna giyoogaa; shin Xoossai immana giidi haasayidoogan laataa Abrahaamayyo immiis.

<sup>19</sup> Yaatin, higgee aissi de7ii? Higgee mooro ooso gidiyaabai aibakko bessanau Xoossai immana giidi haasayido Abrahaama zaree yaana gakkanaashin gujettiis; kiitanchchaa baggaara issi gaannatiyaagan imettiis. <sup>20</sup> Gaannai issi uraa xalaalaassa gidenna; shin Xoossai issuwaa.

### *Higgiyaa Halchuwaa*

<sup>21</sup> Yaatin, Xoossai sinttappe immana giidi haasayidoogaa, issi higgee, “Hanenna” yaagii? Akkai! Mulekka geenna. Aissi giikko, higgee asaayyo de7uwaa immanau danddayiyaabaa gidikko, xillotettaikka tumu higgiiyaappe beettes giyoogaa. <sup>22</sup> SHin Yesuus Kiristtoosa ammanin, Xoossai sinttappe immana giidi haasayidoogee, ammaniyaageetuyyo imettana mala, asai ubbai nagaraassi haarettidi de7iyoogaa, Xoossaa maxaafai yootees.

<sup>23</sup> SHin ammanoi yaanaappe kase, sinttappe qonccana ammanuwaayyo higgee nuna qashettida asaadan gorddi wottiis. <sup>24</sup> Hegaa gishshau, nuuni ammanuwan xillana mala, Kiristtoosi yaana gakkanaassi higgee nuna naagiyaagaa gidiiis. <sup>25</sup> SHin ha77i simmi ammanoi yiido gishshau, higgee hagaappe sinttau nuna naagiyaagaa gidenna.

<sup>26</sup> Intte ubbai ammanuwaa baggaara Kiristtoos Yesuusan Xoossaa naata. <sup>27</sup> Aissi giikko, intte Kiristtoosaara issuwaa gidana mala xammaqettida ubbati Kiristtoosa maayideta. <sup>28</sup> Hegaa gishshau, Aihuda asaa giddooninne Giriike asaa giddon dummatetti baawa; aille woi goqa giddon dummatetti baawa; attumaasa woi maccaasa giddon dummatetti baawa. Aissi giikko, intte ubbaikka Kiristtoos Yesuusan issi asa. <sup>29</sup> Intte Kiristtoosabaa gidikko, simmi intte Abrahaama zare; qassi Xoossai sinttappe immana giidi haasayidoogaa laattiyaageeta.

## 4

### *Nuuni Xoossaa Naata Gidiyoogaa*

<sup>1</sup> SHin akeekite; ba aawaabaa laattiya na7ai naatettan de7iiddi, de7iyaabaa ubbau goda gidikkokka, ashkkaratuppe dummatiyoosi baawa. <sup>2</sup> SHin ba aawai giido wodee wurana gakkanaashin, a hadaraa ekkidaageetu kushiyaaninne a miishshaa naagiyaageetu kushiyan de7ees. <sup>3</sup> Hegaadan nuunikka qassi naatettan de7iyo wode, ha sa7aa haariya ayyaanatussi ailletida. <sup>4</sup> SHin wodiya wurssettai gakkido wode, Xoossai maccaasi yelidoogaa, higgiiya garssan yelettidaagaa, ba na7aa kiittiis. <sup>5</sup> Aissi kiittidee giikko, higgiiyan haarettidi de7iyaageeta wozanaunne nuna ba naata oottanau kiittiis.

<sup>6</sup> Xoossai intte a naata gidiyo gishshau, “Abbaa, ta Aawau” giidi waassiya ba Na7aa Ayyaanaa, nu wozanaa giddo kiittiis. <sup>7</sup> Hegaa gishshau, hagaappe sinttan neeni



Xoossaa na7a gidiyoo gaappe attin, aille gidakka; qassi neeni a na7a gidikko, Kiristtoosa baggaara Xoossaabaa laattiyaagaa.

*PHauloosi Galaatiyaa Asaabaa Hirggiis*

<sup>8</sup> SHin intte hagaappe kasiyan Xoossaa erennan de7iiddi, Xoossa gidennaageetuyyo aille gididi haarettideta. <sup>9</sup> SHin ha77i Xoossaa eridi, ubbakka Xoossan erettiichchidi, laafanne qassi karettida ha ayyaanatukko waanidi simmeetii? Wodhdhi eqqidi, aille gididi, naa77anttuwaa etayyo haarettanau koyeetii? <sup>10</sup> Gallassaa, aginaa, wodiyaanne laittaa intte loitti naageeta. <sup>11</sup> Tana inttebai yashshees; taani intteyyo coo mela daafuridanaashsha?

<sup>12</sup> Ta ishanttoo, taani inttenadan hanido gishshau, “Inttekka tanadan hanite” gaada, inttena woossais; intte tana ainne naaqqibeekketa. <sup>13</sup> Taani koiro intteyyo wonggeliyaa yootidoogee tana harggissishiina gidiyoo gaappe ereeta. <sup>14</sup> Taayyo payyatetta gu-uxxidi, intteyyo paace gidinkka, tana karibeekketa; shenetinnebeekketa. Hegaa gishshaa ubba tana Xoossaa kiitanchchaa mokkiyoogaadan, woikko Kiristtoosi Yesuusa mokkiyoogaadan mokkideta.

<sup>15</sup> Yaatin, hekko intte ufaittiyoogee beettenna! Tana gidikko, intteyyo danddayettiyaabaa gidin, taayyo intte intte aifiyaa shoddi immiyaakkonne ixxennaagaa markkattais. <sup>16</sup> Yaanin taani intteyyo tumaa yootiyo gishshau, intte morkke gidiyaanaa?

<sup>17</sup> Hara asati intteyyo qarettiyaabaa milatoosona; shin eta qofai lo77enna; aissi giikko, intte etayyo qarettana mala, taappe inttena shaakkanau koyoosona. <sup>18</sup> SHin taani intte matan de7iyo wode xalaalan gidennan, ubba wodekka lo77oban intte koyettiyaageeta gidikko lo77o.

<sup>19</sup> Ta siiqo naatoo, Kiristtoosa meretai inttenan beettana gakkanaashin, maccaasiyo maaretai tuggayiyoo gaappe keenaa, taani intte gishshau sahettais. <sup>20</sup> SHin taani intteyyo hirggiyo gishshau, ha77i intte mati baada inttenaara doonan haasayiyaakko, daro dosais.

*Aggaaranne Saara Leemiso Gidido Hanota*

<sup>21</sup> Higgsiyan haarettidi de7anau koyiyaageetoo, higgee giyoogaa siyekketii? Ane taayyo yootite. <sup>22</sup> Aissi giikko, Xoossaa maxaafai, “Abrahaamayyo ailleppenne go-qeeppe yelettida naa77u naati de7oosona” yaagees. <sup>23</sup> SHin aillee na7ai asi na7a yeliyo maaraadanka yelettiis; qassi goqee na7ai, Xoossai sinttappe immana giidi haasayidoogan yelettiis.

<sup>24</sup> Ha maccaasati naa77u maachcha gidiyoo gishshau, hagee leemiso gidana danddayees. Etappe issinniyaa, Siinaa Deriyaappe yiidaara, ba naata ailletettaayyo yelaasu; akka Aggaaro. <sup>25</sup> Ha Aggaara Araba giyo biittan de7iya Siinaa Deriyan leemissetausu; qassikka ha77i de7iya Yerusalaamen leemissetausu; aissi giikko, Yerusalaame katamai ba gididon de7iya asa ubbaara ailletettan de7ees. <sup>26</sup> SHin saluwan de7iya Yerusalaama ailletettan de7ukku; a nuussi aayyiyo. <sup>27</sup> Aissi giikko, Xoossaa maxaafai yaagees;

“Bii, yelabeenna mainee, ufaitta;  
maareti oiqqi erennaaree,  
ne qaalaa xoqqu oottada ilila!  
Aissi giikko, ba azinaara  
de7iya maccaaseeppe,  
barkka de7iya maccaaseeyyo  
daro naati de7ana”  
yaagees.

<sup>28</sup> Ta ishanttoo, nuunikka Yisaaqadan, Xoossai sinttappe immana giido naata. <sup>29</sup> SHin he wode asa maaraadan yelettidaagee, Xoossaa Ayyaanai giidoogaadan yelettidaagaa yedetti yuuyidoogaadan, ha77ikka hegaa mala. <sup>30</sup> SHin Xoossaa maxaafai woigii? “Aillee na7ai goqee na7aara issippe laattenna gishshau, ailliyo i na7aara gattada kessa



yedda” yaagees. <sup>31</sup> Hegaa gishshau, ta ishanttoo, nuuni goqee naata gidiyoo gaappe attin, aillee naata gidokko.

## 5

### *Kiristtoosan Aillettaappe Kiyiyoo ga*

<sup>1</sup> Nuuni ailletetti bannan, de7ana mala, Kiristtoosi nuna aillettaappe kessiis; simmi minnidi eqqite; naa77anttuwaa ailletetta qambbaran geloppite.

<sup>2</sup> Siyite, taani PHauloosi, inttena yaagais; intte qaxxarettiyaabaa gidikko, Kiristtoosi inttena ainne go77enna. <sup>3</sup> Qaxxarettiya ubbati higgee giyoogaa ubbaa polidi naaganau bessiyoogaa gujjada hassayissais. <sup>4</sup> Higgiyaa naagidi xillanau koyiyaageetoo, Kiristtoosappe shaahettideta; Xoossaa aaro kehatettaappekka kunddideta. <sup>5</sup> Nuna gidikko, nuuni Xoossaa Ayyaanaa baggaara ammanuwan xillanau ufaissan naagoos. <sup>6</sup> Aissi giikko, nuuni Kiristtoosi Yesuusaara issippe de7in, siiquwan oottiya ammanuwaappe attin, qaxxarettinkka, qaxxarettennan agginkka nuna ainne go77enna.

<sup>7</sup> Kase lo77o ootteeta; shin tumatettaayyo intte azazettenna mala, oonee inttena diggidai? <sup>8</sup> Ha cimoi inttena xeesida Xoossaappe yibeenna. <sup>9</sup> Asai giyoogaadan, guutta irshshoi munaqaa ubbaa denttees. <sup>10</sup> Intte harabaa qoppennaagaa taani Xoossan ammanettais; shin inttena waissiya urai oona gidikkonne, Xoossaappe ba pirdaa ekkana.

<sup>11</sup> SHin ta ishanttoo, taani hanno gakkanau qaxxarai koshshiyoo ga yootiyaabaa gidikko, tana aissi yedettiyoona? Hegee tuma gidiyaakko, taani Kiristtoosa masqqaliyaabaa tamarissin ainne waissiyaabi baawa. <sup>12</sup> Inttena waissiyaageeti banttana banttarkka mureessorkkonaashsha!

<sup>13</sup> Inttena gidikko, ta ishanttoo, aillettaappe kiyanau xeesettideta. Gidinkka aillettaappe intte kiyidoogan, intte asatettaa amoi inttena haaroppo. Hegaa gishshaa siiquwan issoi issuwaayyo haarettite. <sup>14</sup> Aissi giikko, higge ubbai issi haasayan qashettees; ikka, “Ne shooruwaa ne huuphedan siiqa” yaagiyaagaa. <sup>15</sup> SHin intte issoi issuwaara saxettiyaabaanne meetettiyaabaa gidikko, intte intte gididon wurena mala naagettite.

### *Ayyaanaanne Ashuwaa*

<sup>16</sup> SHin siyite; Xoossaa Ayyaanai inttena kaalettiyaabaa gidikko, intte asatettaa amuwaa mulekka poleketa. <sup>17</sup> Aissi giikko, nu asatettaa amottiyoobaa Geeshsha Ayyaanai ixees; qassi Geeshsha Ayyaanai amottiyoobaa nu asatettaa ixees; hageeti issi issuwaara ixettoosona. Hegaa gishshau, intte dosiyoobaa oottanau danddayekketa. <sup>18</sup> SHin Xoossaa Ayyaanai inttena kaalettiyaabaa gidikko, higgee inttena haarena.

<sup>19</sup> Asatettaa oosoi erettidaagaa; ikka aibee giikko, shaaramuxiyoo ga, tunatettaa, yeellaa xayiyoo ga, <sup>20</sup> Eeqau goinniyoogaa, bitiyoo ga, morkketettaa, palamaa, qanaatiyoogaa, hanqquwaa, bana xoqqissiyoo ga, ooyettiyoogaa, issi issuwaappe shaahettiyoogaa, <sup>21</sup> miqqainniyoogaa, woriyoo ga, mattottiyoogaa, yettanchcha kiyiyoo gaanne hageeta milatiyaageeta. Kasekka taani intteyyo yootidoogaadan, hageeta milatiyaageeta oottiyaageeti Xoossaa kawotettaa laattokkona.

<sup>22</sup> SHin Geeshsha Ayyaanaa aifee, siiquwaa, ufaissaa, sarotettaa, danddayaa, kehatettaa, lo77otettaa, ammanuwaa, <sup>23</sup> ashkketettaa, ba huuphiyaa naagiyoogaa. Hageeta milatiyaageeta diggiya higgee baawa.

<sup>24</sup> Kiristtoos Yesuusabaa gidiyaageeti bantta asatettaa a iita qofaaranne a amuwaraa issippe masqqaliyaa bollan misimaariyan xishidi kaqqidosona. <sup>25</sup> Nuuni Geeshsha Ayyaanan de7ikko, nuna qassi Geeshsha Ayyaanai kaaletto. <sup>26</sup> Ane otorettiyoogaa, woikko issi issuwaa yiilloyiyoo ga, woikko issi issuwaa qanaatiyoogaa aggoos.

## 6

### *Issoi Issuwaara Maadettiyoogaa*

<sup>1</sup> Ta ishanttoo, intte Ayyaanan de7iyaageeti issi urai ai mooro oottidi, beettikkonne, ashkкетetta ayyaanan a suurissite; qassi intte paacettenna mala, intte huuphiyaa naagite. <sup>2</sup> Issoi issuwaa toohuwaa tookkite; heгаа oottiyooḡan Kiristtoosa higgiiyau azazetteeta. <sup>3</sup> Aissi giikko, issi urai ainne hanennan de7iiddi, aibakko i hanidobaa ayyo milatikko, ba huuphiyaa cimmees. <sup>4</sup> SHin asai ubbai huuphiyan huuphiyan ba oosuwaa paacco; heгааppe guyyiyan, hara asaagaara giigissennan, ba huuphe ooso xalaalan ceeqettiyoobaa demmana. <sup>5</sup> Aissi giikko, asai ubbai huuphiyan huuphiyan ba toohuwaa tookkanau bessees.

<sup>6</sup> SHin Xoossaa qaalaa tamaariyaagee baayyo de7iya lo77obaa ubbaa bana tamaris-siyaagaara shaakko.

<sup>7</sup> Inttena intterkka cimmoppite. Ooninne Xoossaa bolli qilliiccanau danddayenna; aissi giikko, asi ba zeriyoogaa zaarettidi cakkana. <sup>8</sup> Ba asatettaa amuwan zeriyaabaa gidikko, asatettaa amuwaappe haiquwaa cakkana. SHin Ayyaanan zeriyaabaa gidikko, Ayyaanaappe merinaa de7uwaa cakkana. <sup>9</sup> Ane lo77o oosuwaa oottanau azalliyooḡaa aggoos. Aissi giikko, nuuni azallennan aggikko, cakkiyo wodee sinttappe yaana. <sup>10</sup> Yaanikko ha oottanau nuuni danddayiyoorin, asa ubbau lo77obaa oottoos; shin ubbaappe aattidi, nunaara ammanuwan de7iyaageetuyyo lo77obaa oottoos.

### *Wurssetta Zoriyaanne Sarotaa*

<sup>11</sup> Taani ta kushiyan, ai mala gita pitaletun, intteyyo xaafiyaakko be7ite. <sup>12</sup> Asaa sinttan lo77idi beettanau koyiya ubbati, intte qaxxarettana mala koyoosona; shin heгаа eti oottiyooḡee banttayyo Kiristtoosa masqqaliyaa gishshau yedetettennan attana xalaalaassa. <sup>13</sup> Aissi giikko, eti intte qaxxarettidoogan ceeqettanau inttena qaxxarettona goosonappe attin, harai atto qaxxarettidaageetikka bantta huuphen higgiiyaa naagokkona.

<sup>14</sup> SHin sa7ai taayyo kaqettin, taanikka sa7aayyo kaqettido Yesuus Kiristtoosa masqqaliyaappe attin, taani ceeqettiyoobi harabai taappe haakko. <sup>15</sup> Aissi giikko, Kiristtoos Yesuus ooratta mereta gidiyooḡee go77eesippe attin, qaxxarettinkka qaxxarettennan agginkka ainne go77enna. <sup>16</sup> Ha wogan hemettiya ubbatu bollinne Xoossaa asa ubbaa bolli, sarotettainne maarotettai de7o.

<sup>17</sup> Taani Yesuusayyo masunxxido malaataa ta bollan tookkido gishshau, heгааppe sinttau issi asikka tana waissoppo.

<sup>18</sup> Ta ishanttoo, nu Godaa Yesuus Kiristtoosa aaro kehatettai inttenaara gido. Amin77i.

## PHauloosi Efisoono Asaassi Xaafido Kiitaa

### *Gidduwaa Erissuwaa*

PHauloosi Efisoonan de7iya asaassi xaafido kiitan ubbabaappe aattidi i xeellidobai, “Xoossaa halchchoi oosuwan pe7anaagee saluwaaninne sa7an de7iyaabati ubbai xaaxi waaxin, issi Kiristtoosa maataa garssan aqiyo wodee gakkina” yaagiya qofaa (1:10). Hegaa bollanka gujoi Yesus Kiristtoosaara issippe gididi, asa zare ubbai issuwaa gidana mala, ha gita halchchuwaa oosuwan peeshshanaadan Xoossaa asaa hassayissee.

Efisoono Kiitai koiro shaahuwan xaafee issippetettaabaa xaafanau doommidoogaa aassidi, Xoossai Aawai ba asaa waati dooridaakko, etikka a na7an, Yesus Kiristtoosan bantta nagaraappe maarettidi, waani birshshettidaakkonne Xoossaa gita hidootaa qaalai Geeshsha Ayyaanaa baggaara xayenna waasiyaa waati demmidaakko odees. Naa77antto shaahuwan qassi xaafee ha kiitaa nabbabiyaageeti bantta issippetettaa de7uwan Kiristtoosan etassi de7iya issippetettaa tuma gidana mala eti waanidi de7anau bessiyaakko qofissee.

Asai Kiristtoosan de7iya issippetettan waanidi de7anau danddayiyaakko dumma dumma hiilla haasayan qonccis. Woosa keettaa issi bollaa leemiso gidido wode, Kiristtoosi he bollaayyo huuphe. Woosa keettaa gimbe keettan leemissettiyo wode, Kiristtoosi he keettaayyo godaa xaphuwaa minttiya waanna shuchcha. Woosa keettaa machchen leemissettiyo wode, Kiristtoosi azina. Xaafiyaagee Kiristtoosa baggaara qonccida Xoossaa aaro kehatettaa daro xoqqissi nashshidi haasayiyo wode, giddoi ciimmatiyo haasayaa haasayees. I ubbabaakka Kiristtoosa siiquwaa, i yarshshettidoogaa, i nagaraa atto giidoogaa, a aaro kehatettaanne a geeshshatettaa ginaara xeellees.

<sup>1</sup> Taani Xoossaa sheniyan Kiristtoos Yesuusi kiittido PHauloosi, Efisoonan de7iya geeshshatuyyo qassi Kiristtoos Yesuusau ammanettidi de7iyaageetuyyo ha dabddaabbiyaa xaafais.

<sup>2</sup> Xoossaa nu Awaappenne Godaa Yesuus Kiristtoosappe aaro kehatettainne sarottetai intteyyo gido.

### *Kiristtoosappe Beettiya Ayyaanaa Anjuwaa*

<sup>3</sup> Ayyaanaa anjjo ubban Kiristtoosa baggaara saluwaa sohuwan nuna anjjida Xoossaa, nu Godaa Yesuus Kiristtoosa Aawaa, nuuni galatoos. <sup>4</sup> Nuuni a sinttan geeshshatanne pokkoi bannaageeta gidana mala, Xoossai nuna sa7ai merettanaappe kase, Kiristtoosa baggaara ba siiquwan dooriis. <sup>5</sup> Xoossai ba sheniyan ba dosidoogaadan, Yesuus Kiristtoosa baggaara nuna ba naata oottanau kasetidi qoppi wottiis. <sup>6</sup> Xoossai ba siiqiyo Na7aa baggaara nuuyyo coo immido aaro kehatettaa bonchchuwaa gishshau, nuuppe galataa ekkanaa hega oottiis.

<sup>7</sup> Nuuni Xoossaa aaro kehatettaa daruwaadan, Kiristtoosa sunttan wozettida; hegan Xoossai nu nagaraa atto giis. <sup>8</sup> Xoossai ba aadhdhida eratetta ubbaaninne ba wozanaa qofa ubban ba aaro kehatettaa nuuyyo darissidi immiis. <sup>9</sup> Aissi giikko, Xoossai ba qoppidoogaa oottiis; qassi Kiristtoosa baggaara polanau qoppi wottido xuura yohuwaa nuna erissiis. <sup>10</sup> Xoossai wodiya wursettai gakkiiyo wode polanau qoppido qofai Kiristtoosa waanna oottidi, saluwaaninne sa7an de7iya mereta ubbaa issippe aani shiishshanaagaa.

<sup>11</sup> Ubbabai Xoossaa qofaadaaninne i giidoogaadan haniis; Xoossai kasetidi qoppi wottidoogaadan, Kiristtoosa baggaara nuuni aageeta gidanaadan, nuna dooriis. <sup>12</sup> Nuuni kasetidi, Kiristtoosa baggaara ekkana giidi ufaissan naagiyaageeti, Xoossaa bonchchuwaa galatoos. <sup>13</sup> Intteyyookka qassi hegaadan haniis; tumu kiitaa, intteyyo

atotettaa ehiida wonggeliyaa mishiraachchuwaa, intte siyido wode Kiristtoosa amanideta; Xoossai intteyyo immana giido Geeshsha Ayyaanaa baggaara, intte abaa gidiyoogaa erissiya maatafaa intte bolli wottiis. <sup>14</sup> Xoossai ba asau immana giidoogaa nuuni ekkana gakkanaassi, Geeshsha Ayyaanaa daannatuwaa oiqqida. Hegee qassi a bonchchuwau galata gidana.

### *PHauloosi Efisoona Asaayyo Woossiis*

<sup>15</sup> Hegaa gishshau, Godaa Yesuusa intte ammaniyoogaanne geeshshata ubbaa intte siiqiyoojaa taani siyoosappe doommada, <sup>16</sup> intteyyo Xoossaa galatiyoogaa aggabeikke; Xoossaa woossaidda intteyyookka woossais. <sup>17</sup> Qassi Godaa Yesuus Kiristtoosa Xoossai, bonchcho Aawai, Xoossaa intte eranaadan, inttena aadhdhida eranchcha oottiya qassi Xoossaa intteyyo qonccissiya Geeshsha Ayyaanaa intteyyo immanaadan, taani woossais. <sup>18</sup> Xoossai intte ekkana giidi, ufaissan naagi uttidoogaayyo inttena xeesidoogaanne i ba asau immana giyo anjoi ai keena durekko intte eranaadan, Xoossai intte wozanaa dooyin, a poo7uwaa intte be7anaadan, taani Xoossaa woossais.

<sup>19-20</sup> Qassi a ammaniya nunan a wolqqai keehi oottees. Ha nunan de7iya wolqqainne haiquwaappe Kiristtoosa denttidi, saluwaa sohuwan Xoossaappe ushachcha baggaara utissida gita wolqqai issuwaa. <sup>21</sup> Kiristtoosi saluwaa sunttatuppe, godatetta de7iyoogetuppe, wolqqaamatuppenne godatu ubbaappe bolla gididi haarees; i ha sa7aa xalaalan gidennan, sinttappe yaana sa7ankka hara sunttatetta ubbaappe xooqees. <sup>22</sup> Xoossai ubbabaa Kiristtoosa tohuwaappe garssan haarissiis; qassi Xoossai i ubban ubbaappe bollaara Goda gidanaadan, woosa keettaayyo a immiis. <sup>23</sup> Woosa keetta Kiristtoosa asatetta; woosa keetta Kiristtoosi ubbasan ubbabaa kunttiyo a polo.

## 2

### *Kiristtoosan Haiquwaappe De7uwau Pinniyoojaa*

<sup>1</sup> Intte azazettennan ixido gishshaunne intte nagaraa gishshau, kase wodiyan ayyaana haiquwaa haiqqideta. <sup>2</sup> He wode intte ha sa7aa iita ogiyaa hemettideta; carckuwaa gidon de7iya wolqqaama ayyaanatu halaqaayyo qassi Xoossaayyo azazettenna asaa ha77i haariya ayyaanaayyo azazettideta. <sup>3</sup> Nuunikka qassi ubbai he asaa mala; qassi nuuni nu meretetta amuwaadan de7ida; nu asatettainne nu wozanai koyidobaa oottida. Nuunikka haratuugaadan, nu meretan Xoossaa hanquwaa ekkana de7oos.

<sup>4</sup> SHin Xoossaa maarotetta daro gidiyo gishshau, ba siiquwaa daruwaadan, <sup>5</sup> Nuuni ayyo azazettennan ixidi, harai atto ayyaan haiqqidaageeta gidinkka, i Kiristtoosaara nuuyyo de7uwaa immiis. Xoossaa aaro kehatettan intte attideta. <sup>6</sup> Nuuni Kiristtoos Yesuusaara saluwaa sohuwan haaranaadan, Xoossai nuna aara issippe haiquwaappe denttiis. <sup>7</sup> I sinttappe yaana wodiyan, nuuyyo Kiristtoos Yesuusan de7iya kehatettan, ubbaappe aadhdhiya ba aaro kehatetta gitatettaa bessanau hejaa oottiis. <sup>8</sup> Aissi giikko, intte Xoossaa aaro kehatettan, ammanuwan attideta; hagee Xoossaa imoppe attin, intte oosuwaana gidenna. <sup>9</sup> Intte daafuran beettibeenna gishshau, intte ceeqettiyoobi aibinne baawa. <sup>10</sup> Aissi giikko, nuuni Xoossaa mereta; i nuuyyo kasetidi giigissi wottido lo77o oosuwaa nuuni oottanaadan, Kiristtoos Yesuusa baggaara nuna medhdhiis.

### *Kiristtoosan Beettiya Issippetetta*

<sup>11</sup> Hegaa gishshau, inttenoo zariyan Aihuda gidenna asatoo, bantta asatetta bolli kushiyan oosettidoogan, banttana qaxxarettidaageeta giya Aihudati, qaxxarettibeennaageeta giidi xeesiyoogetoo, intte kase oonakko akeekite. <sup>12</sup> He wode intte Kiristtoosappe shaahettideta; imatta gididi, Israa7eela asaappe haakkidi de7ideta; Xoossai ba asaayyo immana giidi maacido maachchaappe ainne demmibeekketa; ha sa7aa bolli

intte demmana giidi, ufaissan naagi uttidobaa demmennaaninne qassi Xoossi bainnan de7ideta. <sup>13</sup> SHin intte kase haakkidi de7iyaageeti ha77i Kiristtoos Yesuusaara de7idi, Kiristtoosa haiquwan mataa shiiqideta.

<sup>14</sup> Aissi giikko, Kiristtoosi Aihuda asaanne Aihuda gidenna asaa timidi, nuuyyo sarotettaa ehiis. Eta naa77aa shaakkidi, morkke ootti wottida morkketettaa godaa ba asatettan qoqqofi yeggiis. <sup>15</sup> I ba huuphen ha naa77u zaretuppe issi ooratta asa medhdhidi sarotettaa wottanau, Aihuda asatu higgiiyaa a azazotuuranne wogatuura issippe xaissiiis. <sup>16</sup> Kiristtoosi masqqaliyaa bolli misimaariyan xishettidi haiqqido ba haiquwan morkketettaa xaissiiis; qassi masqqaliyaa baggaara naa77u zaretakka issi asa ootti sigettidi, Xoossaakko ekki ehiis. <sup>17</sup> Kiristtoosi yiidi, Xoossaappe haakkidi de7iya intteyyo Aihuda gidennaageetuyyoonne, a matan de7iya Aihudatuuyyo ubbaayyo, wonggeliyaa mishiraachchuwaa sarotettaa yootiis. <sup>18</sup> Aissi giikko, nuuni ubbai, Aihudatikka Aihuda gidennaageetikka, issi Geeshsha Ayyaanan Kiristtoosa baggaara Aawaa sintti shiiqanau danddayoos.

<sup>19</sup> Simmi intte Aihuda gidenna asati hagaappe sinttau allaga woi imatta gidekketa; ha77i inttenne geeshshati issi biittaa asa; qassi Xoossaayyo intte so asa. <sup>20</sup> Yesuusi kiittidoogeenne hananabaa yootiyaageeti baasido baasuwa bolli intteikka keexettideta; godaa xaphuwaa minttiya waanna shuchchai Kiristtoos Yesuusa. <sup>21</sup> I keettaa ubbaa issippe shiishshi oiqqidi, Xoossaa baggaara geeshsha beeta maqidase gidana mala dichchees. <sup>22</sup> Intte qassi Xoossai ba Ayyaanan de7iyo keetta gidanau, haratu ubbaara issippe Kiristtoosan keexetteeta.

### 3

#### *PHauloosi Ammanenna Asaayyo Oottido Oosuwaa*

<sup>1</sup> Hegaa gishshau, inttenoo Aihuda gidenna asatoo, taani PHauloosi intte gishshau Kiristtoos Yesuusa qasho asa gididaagee, Xoossaa woossais. <sup>2</sup> Xoossai ba aaro kehatettan, taani inttena maaddanaadan, ha oosuwaa taayyo immidoogaa intte loitti siyideta. <sup>3</sup> Xoossai ba xuura qofaa taayyo qonccissidi, tana erissiiis; erissin taani hegaa qanttan xaafaas. <sup>4</sup> Qassi taani xaafidoogaa intte nabbabiyo wode, Kiristtoosa xuuraa taani waata akeekidaakko eranau danddayeeta. <sup>5</sup> Beni wode asai he xuura yohuwaa siyibeenna; shin Xoossai hegaa Yesuusi kiittido geeshshatuyyoonne hananabaa yootiyaageetuyyo, Geeshsha Ayyaanan ha77i qonccissiiis. <sup>6</sup> Xuura yohoi haggaa; Aihuda gidenna asai wonggeliyaa baggaara, Xoossaa anjuwaa Aihudatuura issippe laattoosona; eti issi asatettan shaahettennan de7oosona; qassi Kiristtoos Yesuusa baggaara Xoossai immana giidoogaa Aihudatuura shaakkoosona.

<sup>7</sup> Xoossai ba oosuwaa wolqqaa baggaara tau immido aaro kehatettan taani ha wonggeliyau ashkkara gidaas. <sup>8</sup> Taani geeshshatu ubbaa gidon laafiyaagaa gidikkokka, Aihuda gidenna asau zawai baina Kiristtoosa duretettaa wonggeliyaa mishiraachchuwaa yootiyo ha qaadaa Xoossai taayyo immiis. <sup>9-10</sup> Qassi taani hegan Xoossaa xuura qofaa asa ubbau qonccissa yootana; ubbabaa medhdhida Xoossai ba xuura yohuwaa beni wode ubban gentti wottiis. Xoossai ha77i hegaa woosa keettaa baggaara saluwaa sohuwan de7iya halaqatuyyoonne godatetta de7iyoogeeetuyyo zawai baina ba aadhdhida eratetta qonccissanau oottiis. <sup>11</sup> Xoossai hegaa nu Godaa Kiristtoos Yesuusa baggaara i polido ba merinaa qofaadan oottiis. <sup>12</sup> Nuuni Kiristtoosi Yesuusaara issippe gididi, a ammaniyo ammanuwan ammanettidi, ainne yayyennan Xoossaa sintti aadhdhanau danddayoos.

<sup>13</sup> Hegaa gishshau, taani intteban metootiyoogan intte hirggenna mala, inttena woossais; aissi giikko, taani intte bonchchuwau metootais.

#### *Kiristtoosa Siiquwaa*



<sup>14-15</sup> Hegaa gishshau, taani saluwaaninne sa7an de7iya ammaniya keetta asai ubbai aani sunttettido Xoossaa sinttan gulbbatais. <sup>16-17</sup> Xoossai ba bonchchuwaa daruwaadan, ba Geeshsha Ayyaan, intteyyo intte garssa asatettan intte minniyo wolqqaa immanaadaaninne, qassi ammanuwaa baggaara Kiristtoosi intte wozanaa ba keetta oottanaadan, taani Xoossaa woossais; qassikka intte xaphuwaa yeddidi, tokettidi siiquwan minnanaadan, Xoossaa woossais. <sup>18</sup> Qassi geeshshatu ubbaara Kiristtoosa siiqoi ai keena aahokko, adussakko, xoqqakkonne ciimmakko eriyo wolqqaa intte demmanaadan, taani Xoossaa woossais. <sup>19</sup> Eratettaappe aadhdhiya Kiristtoosa siiquwaa intte eranaadaaninne qassi Xoossaabaa gidiya ubban intte poli kumanaadan, taani Xoossaa woossais.

<sup>20-21</sup> Simmi nu gidдон oottiya ba wolqqaa baggaara nuuni woossiyoojaa woi qoppiyoobaa ubbaappe keehi darissi oottanau danddayiya Xoossaa, woosa keettaaninne Kiristtoos Yesuusaa ubba wode merinaappe merinaa gakkanaassi bonchchoi gido. Amin77i.

## 4

### *Bollaa Issippetettaa*

<sup>1</sup> Hegaa gishshau, taani Godaayyo oottiyo gishshau qashettidaagee Xoossai intena xeesido xeesau bessiya de7uwaa intte de7anaadan, taani inttena woossais. <sup>2</sup> Ubbaa wode intte intte huuphiyaa kaushshiyaaageeta, ashkettanne danddayanchchata gidite; issi issuwaa maaddiyooogan intte siiquwaa bessite. <sup>3</sup> Inttena issippe gatti qachchiya sarotettan, Geeshsha Ayyaanai intteyyo immiyo issippetettaa naaganau minnite. <sup>4</sup> Xoossai inttena xeesido ufaissai, intte demmana giidi naagi uttidoogee mexi issuwaa giyoogaadan, issi asatettainne issi Geeshsha Ayyaanai de7ees. <sup>5</sup> Issi Godai, issi ammanoinne issi xinqqatee de7ees. <sup>6</sup> Ubbaa Godai, ubbaa baggaara oottiyaagee, ubbaa gidдон de7iyaagee, issi Xoossai, ubbaa Aawai de7ees.

<sup>7</sup> SHin Kiristtoosi immido imuwaadan, nuuni huuphiyan huuphiyan dumma imuwaa ekkida. <sup>8</sup> Hegaa gishshau, Xoossaa maxaafai,

“I pude xoqqasaa kiyido wode,  
omoodettida darota ekkidi efiis;  
asaayyookka imota immiis”

yaagees. <sup>9</sup> Yaatin, “Pude kiyiis” giyoogee woigiyooogee? I koiro duge wodhdhiis; hege sa7au hirkki ziqqiyaasaa wodhdhiis giyoogaa. <sup>10</sup> Ha duge wodhdhidaagee ba huuphen a; he i ubbaabaa kumanaadan, salo ubbaappe xoqqiyaasaa pude kiyiis.

<sup>11</sup> Asaayyo imo immidaagee a; i issoota issoota Yesuusi kiittidoogee, harata hananabaa yootiyaageeta, qassi harata wonggeliyaa mishiraachchuwaa yootiyaageeta, qassikka harata woosa keettaa kaalettiyaageetanne tamarissiyaageeta ootti sunttiis.

<sup>12</sup> I hegaa geeshshati ubbai ammaniya asa ooso oottanaadaaninne Kiristtoosa bollaa keexxanaadan giigissanau oottiis. <sup>13</sup> Qassi nuuni ubbai Xoossaa Na7aa ammaniinnee erin beettiya issippetettaakko gakkana; nuuni Kiristtoosa polo dichchaa keenaa diccidi, gastta asa gidana.

<sup>14</sup> Nuuni beetan yaanne haanne shocettidi, bantta cimo hanotan asaa bala ogiyaa kaalettiya gene asaa timirte carkko ubban sugettidi, hagaappe sinttau na7a gidanau bessenna. <sup>15</sup> SHin nuuni siiqotettan tumaa haasayiiddi, huuphe gidiya Kiristtoosakko ubban diccanau bessees. <sup>16</sup> Bolla gidдон de7iya dumma dumma shaahoti aani issippe ohettidosona; qassi kumetta bollai baayyo imettida shaya ubban issi issuwaa gaittidi, issippe ohetti uttiis; he dumma dumma shaahoti oottanau bessiyaagaa oottiyo wode, kumetta bollai siiquwan dicceesinne bana keexxees.

### *Kiristtoosan Beettiya Ooratta De7uwaa*

<sup>17</sup> Hegaa gishshau, taani haggaa intteyyo Godaa sunnatan odaisinne markkattais. Intte go77i banna qofaa qoppiya Aihuda gidenna asatudan de7oppite. <sup>18</sup> Eta wozanai xuman de7ees; eti ainne erennaageetanne ixxaas giyaageeta gidiyo gishshau, Xoossai immiyo de7uwaappe haakkidosona. <sup>19</sup> Eta matan yeella giyoobi baawa; eti shaaramuxettiyo qaaqqau bantta huuphiyaa aatti immoosona; qassi tunabaa ubbaa paci bannan oot-toosona.

<sup>20</sup> SHin intte Kiristtoosabaa hegaadan tamaaribeekketa. <sup>21</sup> Abaa tumu siyideta; qassi tumatettaikka Yesuusan de7iyooagaan, appe tamaarideta. <sup>22</sup> Intte kase de7iyo de7uwaa aggite; qassi ba cimmiya amuwan xayiya intte ceega asatettaa xaissite. <sup>23</sup> Intte wozanainne qofai muleera ooraxxanau bessees. <sup>24</sup> Tumu xillotettaanne geeshshatetta Xoossaa leemisuwan merettida ooratta asatettaa maayite.

<sup>25</sup> Simmi worddotoppite. Nuuni ubbai Kiristtoosa asatetta issi asa gidiyo gishshau, asai ubbai ba ishau tumaa haasayanau bessees. <sup>26</sup> Hanqqettite; shin intte hanqquwan nagaraa oottoppote. Intte hanqqetti uttidaashin, awai wulloppo. <sup>27</sup> Xalahe halaqaayyo soho immoppite. <sup>28</sup> Wuuqqiya urai hagaappe sinttau wuuqqoppo; shin heggaa aggidi, hiyyeesata maaddanau, ba kushiyan lo77obaa oottiiddi daafuro.

<sup>29</sup> Intte haasayai siyiyaageeta go77ana mala, koshshiyooagaan minttettiya lo77o qaalai intte doonaappe kiyoppe attin, iita qaalai mulekka kiyoppo. <sup>30</sup> Xoossai inttena woziyo gallassau intte parametti uttido Xoossaa Geeshsha Ayyaanaa azzanissoppite. <sup>31</sup> Ixo hanotettaa, yiilluwaa, hanqquwaa, waasuwaanne cashshaa ubbaa iitatetta ubbaara intteppe xaissite. <sup>32</sup> Issoi issuwaayyo kehitenne qarettite; qassi Xoossai Kiristtoosa baggaara intteyyo atto giidoogaadan, intteikka issoi issuwaayyo atto giite.

## 5

### *Poo7uwan De7ite*

<sup>1</sup> Simmi Xoossai siiqiyo naatudan, a milatite. <sup>2</sup> Qassi Kiristtoosi nuna siiqidi, ba huuphiyaa Xoossayyo sawuwaa tonggu giya yarshsho oottidi immidoogaadan, intteikka siiquwan de7anau bessees.

<sup>3</sup> SHin geeshshatuyyo bessiyaagaan, intte gidдон shaaramuxiyoogeenne tunatetta ubbai, woi miishsha amottiyoogee mulekka siyettoppo. <sup>4</sup> Yeellayiyaabainne eeyya haasayai woi pattenna qiree intteyyo bessennabaa gidiyo gishshau, intte matan mulekka de7oppo; intte heggaa ubbaa aggidi, Xoossaa galatanau bessees. <sup>5</sup> Haggaa erite; ooninne shaaramuxiyaaggaa woi tunabaa oottiyaaggaa, woi miishsha amottiyaa-gaa gidikko, Kiristtoosa kawotettaanne Xoossaa kawotettaa laattanau danddayenna; miishsha amottiyoogee eeqau goinniyoogaappe dummatenna.

<sup>6</sup> Inttena ooninne pattenna haasayan cimmooppo; aissi giikko, haggaa gaasuwan Xoossaa hanqqoi azazettenna asaa bolli yaana. <sup>7</sup> Simmi heggaa mala asaara zup-petoppite. <sup>8</sup> Aissi giikko, kase intte xuman de7ideta; shin Godaa baggaara ha77i poo7uwan de7eeta; poo7uwan de7iya asaadan poo7uwan hemettite. <sup>9</sup> Aissi giikko, poo7oi lo77otettaa, xillotettaanne tumatettaa ubbaa aifees.

<sup>10</sup> Godaa ufaissiyaabai aibakko tamarite. <sup>11</sup> Go77i banna xuma oosuwaa qonccissi bessiteppe attin aara walahettoppite. <sup>12</sup> Eti geeman oottiyoobaa harai atto haasayiy-oogeecka pokkees. <sup>13</sup> SHin ubbawai poo7uwaa kiyiyo wode, qoncciyann beettana; aissi giikko, qoncciyann beettiya ubbawai poo7o. <sup>14</sup> Haggaa gishshau,  
“Xiskkiyaagoo, beegotta;

haiquwaappekka dendda;  
Kiristtoosi neeyyo poo7issana”  
yaagees.

<sup>15</sup> Simmi intte waani de7iyaakko akeekite; aadhdhida eratettaara de7iya asadan de7iteppe attin, aadhdhida eratetti banna asadan de7oppite. <sup>16</sup> Wodee iita gidiyo

gishshau, intte lo77o wodiya coo xaissoppite. <sup>17</sup> Hegaa gishshau, Godai koyiyoobai aibakko akeekiteppe attin, eeyyoppite.

<sup>18</sup> Qassi inttenan Geeshsha Ayyaanai kumoppe attin, inttena bashshiya woiniyaa giyo eessaa uyidi mattottoppite. <sup>19</sup> Mazamuriyaa yettan, galatiiddi yexxiyoogaaninne ayyaana yettan issoi issuwaara haasayite; qassi galatiyo yettaaninne mazamuriyaa yexxiyoogan intte wozanan Godaa galatiiddi yexxite. <sup>20</sup> Nu Godaa Yesuus Kiristtoosa sunttan, Aawaa Xoossaa ubbabau ubba wode galatite.

### *Azinabaanne Machchibaa*

<sup>21</sup> Kiristtoosayyo yayyiiddi, issoi issuwaayyo haarettite.

<sup>22</sup> Maccaasatoo, Godaayyo haarettiyoogaadan, intte azinatuyyo haarettite. <sup>23</sup> Aissi giikko, Kiristtoosi qassi woosa keettaayyo huuphe gidiyooogaadan, azinaikka ba maccaaseeyyo huuphe; qassi Kiristtoosi ba huuphen, ba bollaa gidiya woosa keettaa ashshiyaagaa. <sup>24</sup> SHin woosa keettaa Kiristtoosayyo haarettiyoogaadan, maccaasai qassi bantta azinau ubbaban haarettanau bessees.

<sup>25</sup> Azinatoo, Kiristtoosi woosa keettaa siiqidi, ba huuphiyaa ayyo immidoogaadan, intteikka intte maccaasata siiqite. <sup>26</sup> I woosa keettaa ba qaalaaninne haattan meecci geeshshidi, Xoossaayyo dummayanau haggaa oottiis. <sup>27</sup> Kiristtoosi woosa keettaa qiti woi kul77i woi heggaa milatiyaabi bannan, a kumetta bonchchuwaara geeshshanne borettennaagaa oottidi, ba huupheyyo shiishshanau koyiis. <sup>28</sup> Simmi qassi azinai ba maccaasiyo ba bollaadan siiqanau bessees; ba machchiyo siiqiyagee bana siiqees. <sup>29</sup> Aissi giikko, ba bollaa ixxiya asi mulekka baawa; shin Kiristtoosi woosa keettaa miziyooogaadaninne naagiyoogaadan ooninne ba bollaa mizeesinne naagees. <sup>30</sup> Aissi giikko, nuuni a bollaa shaaho.

<sup>31</sup> Xoossaa maxaafai yaagees; “Hegaa gishshau, attumaagee ba aawaanne ba aayyiyo aggi bayidi, ba machcheera issippe de7ana; eti naa77aikka issi asho gidana” yaagees. <sup>32</sup> Ha xuurai wolqqaama tumatetta; shin taani hagee Kiristtoosabaanne woosa keettaabaa yootees yaagais. <sup>33</sup> Gidikkokka, qassi intte huuphiyan huuphiyan intte maccaasaa intte huuphedan siiqanau bessees; maccaasa ubbaikka bantta azinaa azinaa bonchchanau bessees.

## 6

### *Yelidaageetubaanne Yelettida Naatubaa*

<sup>1</sup> Naatoo, inttena yelidaageetuyyo Godan azazettite; aissi giikko, hagee oottanau bessiyaabaa. <sup>2-3</sup> “Neeyyo ubbabai lo77anaadaaninne sa7an ne laittai aduqqanaadan, ne aawaanne ne aayyiyo bonchcha” giya azazoi Xoossai immana giidoogaara de7iya koiro azazuwaa.

<sup>4</sup> Aawatoo, intte intte naata Godaa seeraaninne zoriyan dichchiteppe attin, eta hanqgetissoppite.

### *Godatubaanne Ashkkaratubaa*

<sup>5</sup> Ailletoo, Kiristtoosayyo oottiyoogaadan, intte godatuyyo yashshatettaaninne kokkorssan suure wozanaappe azazettite. <sup>6</sup> Xoossai giidoogaa oottiyaageetudan, Kiristtoosa ailletudan, wozanaappe oottiteppe attin, asa ufaissanau oottiyaabaadan, asi be7o giidi oottoppite. <sup>7</sup> Asau gidennan Kiristtoosau oottiyoogaadan, xibennan wozanappe oottite. <sup>8</sup> Aille gidin woi goqa gidin, i oottiyo lo77o ooso ubbaayyo Godai huuphiyan huuphiyan woitanaagaa ereeta.

<sup>9</sup> Godatoo, intte ailleta naassiyooogaa aggidi, etayyo hegaadan oottite; inttenanne eta gatti haariya Godai, oonanne maaddi pirddennaagee, saluwan de7iyooogaa ereeta.

### *Xoossaa Ola Miishshatubaa*

<sup>10</sup> Wurssettan, Godaaninne a gita wolqqan minnite. <sup>11</sup> Xalahee halaqaa iita cimuwaa teqqanau intte danddayana mala, Xoossai intteyyo immiyo ollaa maayo ubbaa maayite. <sup>12</sup> Aissi giikko, nuuni saluwaa sohuwan de7iya iita ayyaana wolqqatuura, haariyaageetuura, godatettai de7iyaageetuuranne ha xuma biittaa haariyaageetuura olettiyoogaappe attin, asaara baaxetokko.

<sup>13</sup> Hegaa gishshau, iita gallassan teqqanaunne qassi wurssettai gakkanaassi warettoogaappe guyyiyan, minni eqqanau intte danddayana mala, Xoossaa ola miishsha ubbaa oiqqite. <sup>14-15</sup> Hegaa gishshau, xeessan qabattuwwaa gixxiyoogaadan tumatettaa gixxidi, tiran wottiyo ola miishshadan xillotettaa maayidi, intte tohuwan caammaa wottiyoogaadan sarotettaa wonggeliyaa mishiraachchuwaa yootanau giigidi, minni eqqite. <sup>16</sup> He ubbaappe aattidi, xalahe halaqai dafidi yeddiyo wonddafiyaa tama ubbaa toissanau, ammanuwaa ubba wode gondalledan oiqqite. <sup>17</sup> Ammanuwaa huuphiyan wottiyo birata qophedan wottite; qassi Geeshsha Ayyaanaa bisuwaa, Xoossaa qaala, oiqqite. <sup>18</sup> Xoossaa woossiiddinne a maaduwaa oichchiiddi, ubba wode Geeshsha Ayyaanan Xoossaa woossite. Hegaa gishshau, minnite; salettoppite; geeshshatu ubbaayyo Xoossaa ubba wode woossite.

<sup>19</sup> Qassi taani yayyennan wonggeliyaa xuuraa yootanau, Xoossai ta doonaa dooyidi, tau haasayiyoobaa immanaadan, taukka Xoossaa woossite. <sup>20</sup> Taani ha77i qashuwan de7ikkokka, ha wonggeliyaa gishshau taani kiitettidaagaa; taani abaa tau bessiyaa-gaadan yayyennan yootana mala, taayyo Xoossaa woossite.

### *Wurssetta Sarotaa*

<sup>21</sup> SHin taani waana de7iyaakkonne ai oottiyaakko inttekka eranaadan, nu siiqo ishai, Godaa oosuwan ammanettida ashkkaarai Tikiqoosi, tabaa ubbaa intteyyo yootana.

<sup>22</sup> Nuuni ubbai waani de7iyaakko intteyyo yootidi, inttena minttettana mala, taani a inttekko kiittaas.

<sup>23</sup> Xoossaa Aawaappenne Godaa Yesuus Kiristtoosappe sarotettainne siiqotettai amanuwaara issippe ishanntu ubbaayyo gido; <sup>24</sup> dochchenna siiquwan nu Godaa Yesuus Kiristtoosa siiqiya ubbatuura Xoossaa aaro kehatettai gido. Amin77i.

## PHauloosi Piliphphisiyuusa Asaassi Xaafido Kiitaa

### *Gidduwaa Erissuwaa*

PHauloosi Piliphphisiyuusa asaayyo xaafido kiitai xaafettidoogee, Maqedooniyaa giyo Roome biittan, Piliphphisiyuusa giyoosan de7iya woosa keettaassa. Ha woosa keettai PHauloosi Aurophphaa biittan koiro essido woosa keetta. Ha kiitai xaafettidoogee, hara ammaniya oosanchchati PHauloosa qofaa phalqqi phalqqidi waayissiyo wodiyaananne Piliphphisiyuusa woosa keettan denddida worddo timirttiyaa gaa-suwan a wozanai daro azzanidonne qasho keettan i de7ido wodiyaana. Gido shin, PHauloosi Yesuus Kiristtoosa minttidi ammaniya asa gidido gishshau, ha kiitaa bollan dalggidi beettiyaagee ufaissaanne kumetta ammanettiyoogaa.

PHauloosi ha kiitaa xaafido koiro gaasoi a metuwaa wode a maaddanau Piliphphisiyuusa ammaniya asai imotaa ayyo kiittido gishshau, eta galatanaassa. A bollanka eta bollanka dumma dumma metoi gakkidabaa gidikkokka, eti xalana malanne mule ammanettidi de7ana mala, ha gaittida injjiyan eta minttettees. Ayyuwaanne otoruwaa diggirggidi, Yesuus Kiristtoosa ashkktettan eti kumana mala, minttidi eta hassayissii. Yesuus Kiristtoosara issippe gididoogan eti demmido de7oi Xoossaa aaro kehatettaappe pultidaagaanne eti ammanuwan ekkidoogaa gidiyooaappe attin, Aihudatu wogata poliyoogan beettidaagaa gidennaagaa eta hassayissees. Yesuus Kiristtoosara issuwaa gididi de7iyaageetu ubbaayyo Xoossai immiyo saruwaabaanne ufaissaabaa etassi xaafees.

Ha kiitai erettiyoogee ufaissaa, ammanettiyoogaa, issippetettaanne Kiristtinnaa ammanuwaaninne de7uwan minnidi de7iyooogaa geeshshidi bessiyooogaana. Hegaa bollika gujjidi, PHauloosi Piliphphisiyuusa woosa keettaa siiqiyo gita siiquwaa qonccissees.

### *Sarotaa*

<sup>1</sup> Nuuni Yesuus Kiristtoosa ashkkarati PHauloosinne Ximootiyoosi, Kiristtoos Yesuusan de7iyaageetuyyo, Piliphphisiyuusa giyo kataman de7iya geeshsha ubbatuyyo, woosa keettaa kaalettiyaageetuyyoonne woosa keettaa cimatuuyyo ha dabddaabbiyaa xaafos.

<sup>2</sup> Nu Aawaa Xoossaappenne Godaa Yesuus Kiristtoosappe aaro kehatettainne sarotetai intteyyo gido.

### *PHauloosi Woossido Galata Woosaa*

<sup>3</sup> Taani inttena hassayiyo wode ubban ta Xoossaa galatais. <sup>4-5</sup> Intte koiro gallasaaappe hanno gakkanaassi, wonggeliyaa mishiraachchuwaa yootiyoogan tana maaddido gishshau, taani ubba wode intteyyo ubbaayyo ufaissan Xoossaa woossais. <sup>6</sup> Qassi intte giddon lo77o oosuwaa doommida Xoossai, Kiristtoos Yesuusi simmiyo gallassai gakkanaassi polanaagaa erais.

<sup>7</sup> Taani intteyyo ubbaayyo hegaadan qoppanau bessees; aissi giikko, taani inttena ubba wode hassayais. Ha77i taani qashuwan de7iyooogan, wonggeliyau mootettiyoogaaninne wonggeliyaa mintta essiyoogan Xoossai taayyo qaadido qaadaa inttekka tanaara shaakki ekkideta. <sup>8</sup> Aissi giikko, taani inttena ubbata Kiristtoos Yesuusappe yiya siiquwan ai keenaa siiqiyaakko, Xoossai tau markka.

<sup>9-10</sup> Qassi taani intteyyo Xoossaa woossiyooogee haggaa; lo77obai aibakko dooranau intte danddayanaadaaninne, qassi intte siiqoi tumu erattetaraanne akeeka ubbaara issippe gujji gujji diccanaadan, Xoossaa woossais; yaatidi Kiristtoosi simmiyo gallassan intte suurene borettennaageeta gidana. <sup>11</sup> Qassi intte de7oikka Xoossaa



bonchchuwaayyoonne galataayyo Yesuus Kiristtoosa baggaara beettiya xillotettaa aifiyaa aifana.

*PHauloosi Qashettidoogee Mishiraachchuwaa Qaalai Biittan Aakkanaagaa Dig-gibeenna*

<sup>12</sup> Ta ishato, ha tana gakkidabai wonggelee aakkanaadan tumu maaddidoogaa intte erana mala koyais. <sup>13</sup> Taani Kiristtoosa gishshau qashettidoogaa, kawo keettaa naagiya ubbatinne hagan de7iya harati ubbati eroosona. <sup>14</sup> Qassi taani qashettidoogee nu ishanttuppe dariyaageeti Godan keehi ammanettidi, Xoossaa qaalaa yashshi bannan kasegaappe xalidi yootanaadan maaddiis.

<sup>15</sup> Tumaappe issooti issooti qanaatiyaa gishshaunne palamaa gishshau, Kiristtoosabaa yootoosona; shin harati lo77o amuwan yootoosona. <sup>16</sup> Hageeti Xoossai taayyo wonggeliyaa naagiyo oosuwaa immido gishshau, siiqidi qaalaa yootoosona. <sup>17</sup> SHin hinkkooti taani qashuwan de7ishin, ta bolli waaye ehaanabaa etau milatin, banttana siiqiyo gita amuwan Kiristtoosabaa yootoosonappe attin, wozanappe yootokkona.

<sup>18</sup> Aikkonne baawa; milatissiyo yootonne gido woikko tumu yootonne gido, ai ogiyaaninne Kiristtoosabaa yootikko, taani hegan ufaittais. Sinttanaukka qassi taani ufaittana. <sup>19</sup> Aissi giikko, taani intte woosaaninne Yesuus Kiristtoosa Ayyaanaappe yiya maaduwan attanaagaa erais. <sup>20</sup> Ta gita amoinne Xoossaappe ekkana gaada taani ufaissan naagiyo naagoi aibee giikko, taani paxa de7inkka woi haiqqinkka yayyennan, kasegaadan ha77ikka ta kumetta asatettan Kiristtoosi bonchchettanaagaappe attin, taani harai atto issibankka yeellatennan attanaassa. <sup>21</sup> Aissi giikko, tau de7oi Kiristtoosa; qassi haiqoikka tau go77a. <sup>22</sup> SHin taani paxa de7iyooogan daro go77iyaabaa oottanabaa gidikko, augaa dooranaakko tau erettenna. <sup>23</sup> Taani ha naa77u yohotun tug-gatais; ha de7uwaappe shaahettanaunne qassi Kiristtoosaara issippe de7anau amot-tais; Kiristtoosaara issippe de7iyooogee ubbaappe aadhdhida daro lo77obaa. <sup>24</sup> SHin taani haiqqiyooogaappe intte gishshau paxa de7iyooogee inttena daro koshshiyaabaa.

<sup>25</sup> Hagee tuma gidiyoogaa taani geeshshada erais; qassi ammanuwan intte dic-canaadaaninne ufaittanaadan, taani inttenaara ubbaara paxa de7ana. <sup>26</sup> Hegaa gishshau, taani inttenaara naa77anttuwaa de7iyo wode, Kiristtoos Yesuusaara intte de7iyo de7uwan, taban ceeqettiyoobai intteyyo darana.

<sup>27</sup> Gidikkokka, intte intte huuphen Kiristtoosa wonggeliyaayyo bessiya de7uwaa de7ite; taani inttena baada be7in woikko be7ana xayin, intte issi qofan minnidi eqqidoogaanne, qassi wonggeliyaa ammanuwaayyo issi wozana gididi issippe baax-etiyooogaa siyana. <sup>28</sup> Intte morkketuyyo aibinkka yayyoppite; hegee etayyo bashshaa malaata; shin Xoossai inttena xoonissiyo gishshau, intteyyo atotettaa malaata. <sup>29</sup> Aissi giikko, Kiristtoosayyo oottiyo qaada inttena gakkidoogee intte a gishshau waayettiyo gishshassappe attin, intte a ammaniyoogaa xalaalaassa gidenna. <sup>30</sup> Taani kase baax-etishin intte be7idoogaa mala baaxeenne qassi ha77ikka taani baaxetiyoogaa intte siyiyoogaa malai inttena gakkiiis.

## 2

*Kiristtoosi Bana Kaushshidoogaa Leemisuwaa*

<sup>1</sup> Kiristtoosan intte de7iyo de7oi inttena gasttissii? A siiqoi inttena minttettii? Geeshsha Ayyaanaara intteyyo issippetetta de7ii? Intte issoi issuwaayyo keheetinne qaretteetii? <sup>2</sup> Yaatikko, intte qofan, siiquwan, wozanaaninne qofaa poluwan issuwaa gididi, tana wurssi ufaissite. <sup>3</sup> Inttena siiqiyoogan woikko ceeqettanau koyiyo hada amuwan issibaanne ootoppite; shin issoi issuwaappe gitatais yaagidi qoppennan, issoi issuwaayyo intte huuphiyaa kaushshite. <sup>4</sup> Qassi issoi issuwaa go77iyaabaa koyanaappe attin, intte huuphe xalaalaa go77iyaabaa koyoppite.

<sup>5</sup> Kiristtoos Yesuusan de7iya ha qofai qassi inttenankka de7anau bessees.

<sup>6</sup> I ubba wode Xoossaa gididi de7iis; shin Xoossaa keeni wolqqan gidanau mali be7iyoojaa bessiyaabaadan qoodibeenna.

<sup>7</sup> SHin i ba shenen ubbabaa aggi bayidi, ashkkara meretaa ekkiis; qassi asa milatidi qoncciiis.

<sup>8</sup> I bana kaushshiiis; haiquwau, ubba harai atto, masqqaliyaa bolla haiquwaukka azazettiis.

<sup>9</sup> Hegaa gishshau, Xoossai a keehi Xoqqu xoqqu oottiis; qassi suntta ubbaappekka aadhdhiya xoqqa sunntaa ayyo immiis.

<sup>10</sup> Hegaa gishshau, saluwaaninne sa7an sa7aappe garssan de7iya ubbai Yesuusa sunntaa bonchchanau gulbbatana.

<sup>11</sup> Qassi asai ubbai Yesuus Kiristtoosa Goda yaagidi, Xoossaa Aawaa bonchchuwau markkattana.

### *Ha Sa7an De7iya Asaassi Poo7o Gidiyoogaa*

<sup>12</sup> Hegaa gishshau, ta dabbotoo, taani inttenaara de7iyo wode ubban intte tau azazettidoogaadan, ha77i taani intte matan de7enna wodekka, intte kaseegaappe aattidi tau azazettanau bessees; yashshatettaaninne kokkorssan intte atotettaa polanau oottite. <sup>13</sup> Aissi giikko, Xoossai inttena bau eeno giissanaadaaninne qassi i qoppidobaa intte oottanaadan intte giddon ubba wode oottees.

<sup>14-15</sup> Geellanne nagaranchcha asaa giddon borettennaageeta, ashkkanne Xoossaa naatudankka pokkoi bannaageeta gidite; qassi zuuzummennan woikko iitabaa qoppennan ubbabaa oottite. He asaa giddonkka saluwan poo7iya xoolinttedan poo7iiddi, <sup>16</sup> de7uwaa wonggeliyaa mishiraachchuwaa etau yootite; he wode ta daafurainne ta oosoi mela xayibeennaagee erettiyo gishshau, Kiristtoosa gallassi taani inttenan gitatana.

<sup>17</sup> Harai atto intte ammanoi Xoossaayyo yarshshiyoo yarshshuwaa bolli ta suuttai ushshaa yarshshodan gukkikkokka, taani ufaittais; inttenaara ubbaara issippe ufaittais. <sup>18</sup> Hegaadan inttekkka qassi ufaittanau bessees; tanaara issippe ufaittite.

### *Ximootiyoosinne Eppafiroditoosi Oottido Oosuwaa*

<sup>19</sup> SHin taani intte de7uwaabaa siyada ufaittanaadan, Ximootiyoosa inttekkko eesuwan yeddanaagaa Godaa Yesuusan ammanettaiis. <sup>20</sup> Aissi giikko, intte de7uwaabau wozanappe hirggiya a mala asi harai ooninne tau baawa. <sup>21</sup> Aissi giikko, harati ubbati bantta huuphebaa koyoosona; Yesuus Kiristtoosabaa koyokkona. <sup>22</sup> SHin na7i ba aawau oottiyoogaadan, Ximootiyoosi tanaara issippe gididi, wonggeliyaa oosuwaa oottidoogan, ammanettiya asa gidiyoojaa erissidoogaa intte ereeta. <sup>23</sup> Hegaa gishshau, taani yohoi haniyoobaa be7ada, sohuwaara a inttekkko yeddana gaada qoppais. <sup>24</sup> Taani ta huuphen mata wodiyan inttekkko baanaagaa Godan ammanettaiis.

<sup>25</sup> SHin taani ta ishaha Eppafiroditoosa, tanaara issippe ta bagga gididi oottidaagaa, olettidaagaanne, qassi tana maaddiyooban intteyyo kiitettidi oottidaagaa inttekkko kiittanau koshshiyoojaa qoppaas. <sup>26</sup> Aissi giikko, i inttena ubbaa be7anau laamotees; qassi i sakettidoogaa intte siyido gishshau, ba wozanan daro metootees. <sup>27</sup> I tumu sakettidi, haiqqiichchidi attiis; shin Xoossai au qarettiis; a xalaalaayyo gidennan azzanoi azzanuwaa bolli gujettennaadan, taayyookka qarettiis.

<sup>28</sup> Simmi intte naa77anttuwaa a be7idi ufaittanaadan, taukka ta wozanaa azzanoi irxxanaadan, taani eesuwan a inttekkko yeddana. <sup>29</sup> Hegaa gishshau, Godan de7iya ishadan, kumetta ufaissan a mokitte; qassi a milatiya asa ubbaakka bonchchite. <sup>30</sup> Aissi giikko, intte intte huuphen tana maaddana danddayenna maaduwaa maaddanau, Kiristtoosa oosuwaa gishshau, ba shemppuwaa shenehoo giidi, haiqqiichchidi attiis.

### 3

#### *Tumu Xillotettaa*

<sup>1</sup> Wurssettan, ta ishato, Godai intteyyo ufaissaa immo. Taani kase xaafidoogaa zaarettada xaafiyoogee tana waissenna; qassi he xaafiyoogee inttena naagana.

<sup>2</sup> Iitabaa oottiyaageetuppe, he kanatuppe, qaxxarai koshshees giya asatuppe naagettite. <sup>3</sup> Aissi giikko, nuuni Xoossaa Geeshsha Ayyaanan Xoossaayyo goinniyo gishshaunne nu de7uwan Godaa Kiristtoos Yesuusan ufaittiyo gishshau, tumu qaxxaraa qaxxarettidaageeta; asatettaa bolli oosettiyaaban ammanokko.

<sup>4</sup> Qassi tau ta huuphenkka ta asatettan ammanettiyoobi de7ees. Ai asinne ba asatettan ammanettiyoobi bau de7ees giidi qoppikko, taani appe keehi aadhdhais.

<sup>5</sup> Taani yelettoosappe saamintta giishin qaxxarettas. Taani yeletan Israa7eela; Biniyaama zare; walahi bainna Aihuda asa. Aihuda higgiiyaa naagiyoogan gidikko, taani parisaaawe; <sup>6</sup> Aihuda ammanuwau mishettiyoogaa gidikko, taani woosa keettaa waissaas; issi urai higgiiyau azazettidi xilliyoojaa baggaa gidikko, tanan boree beet-tibeenna.

<sup>7</sup> SHin tana go77iya ubbabaa Kiristtoosa gishshau bayidabaadan qoodaas. <sup>8-9</sup> Tumakka, hegeetu xalaala gidenna; taani ta Godaa Kiristtoos Yesuusa eriyoogee ubbabaappe keehi aadhdhiyo gishshau, ubbabaa tana mulekka go77ennabaadan qoodaas; taani a gishshau ubbabaa yegga bayaas. Kiristtoosa demmanaunne aara de7anau ubbabaa wora olidobaadan qoodais; taani higgiiyaayyo azazettada demmiyo ta huuphe xillotetti taayyo baawa. Kiristtoosa ammanin, Xoossai immiyo xillotettai, ammanuwan Xoossaa matappe yiya xillotettai tau ha77i de7ees. <sup>10-11</sup> Taani Kiristtoosanne haiquwaappe i denddido wolqqaa eranau koyais; yaatada taani ta huuphen haiquwaappe denddana yaagiyoogan, a waaiyaa aara waayettanaunne a haiquwan a milatanau amottais.

#### *Gakkiyoosaa Gakkanau Woxxiyoogaa*

<sup>12</sup> Taani ha77i demmarggaas woikko tanan bali baawa giikke. SHin Kiristtoos Yesuusi tana baayyo oottido woiuwaa demmana gaada eesotais. <sup>13</sup> Ta ishato, taani heгаа demmarggaas gaada qoppikke; shin taani issibaa oottais; taappe guyyeera de7iyaagaa dogaa aggada, sinttan de7iyaagaa oiqqanau warettais. <sup>14</sup> Xoossai Kiristtoos Yesuusa baggaara bolla de7uwau xeesiyo woiuwaa ekkanaau, ta gakkanasaa horddofais.

<sup>15</sup> Simmi nuuni Ayyaanan gasttida ubbati haggaa qoppanau bessees; qassi intteppe amaridaageetuyyo aibiininne dumma qofai de7ikko, hegaakka Xoossai intteyyo qoncissana. <sup>16</sup> Gidikkokka, nuuni hanno gakkanaassi de7ido maaraadan, ane sinttau boos.

<sup>17</sup> Ta ishato, taani haniyoogaadan hanite. Nuuni intteyyo leemiso gidida; hegaadan inttekka nuuni intteyyo leemiso gidido maaraa kaalliyaageeta akeekite. <sup>18</sup> Aissi giikko, taani heгаа intteyyo kase darotoo yootaas; qassi ha77i naa77anttuwaakka afuxxaidda intteyyo yootais; Kiristtoosa masqqaliyaassi morkke gidada daro asati de7oosona. <sup>19</sup> Eta wurssettai bashsha; eta uloi etayyo Xoossa; yeellatanau bessiyooaban eti otorettoosona; qassi ha sa7aabaa xalaalaa qoppoosona. <sup>20</sup> Aissi giikko, nu biittai saluwaana; nuuni qassi saluwaappe yaana nuna ashshiya Godaa Yesuus Kiristtoosa naagoos. <sup>21</sup> Kiristtoosi ubbabaa baappe garssan wottanau danddayiya ba wolqqan, nu daafuranchcha asatettaa laammidi, ba bonchcho asatettaa milatissidi oottana.

### 4

#### *Wurssetta Zoriyaa*

<sup>1</sup> Ta ishato, taani siiqiyoogetoo, laamotiyoogetoo, tana ufaissiyaageetoo, tana gitaiyaageetoo, ta dabbotoo, simmi Godan intte minni eqqanau bessees.

<sup>2</sup> Ewodeenne Sinxxiikee, intte naa77aikka issi qofan michchidan, Godan de7anaadan, taani inttena zorais. <sup>3</sup> Qassi tanaara oottiya ammanettidaagoo, neeni ha maccaasata maaddanaadan, taani nena woossais; aissi giikko, eti tanaaranne eta sunntai Xoossaa de7o maxaafan xaafettido Qaleminxxoosaara qassi tanaara issippe oottiya haratu ubbaara wonggeliyaa ubbasaa gattanau daafuridosona.

<sup>4</sup> Godaara intte de7iyo de7uwan ubba wode ufaittite; taani hagua gujjadakka gais; ufaittite.

<sup>5</sup> Asai ubbai intte ashkкетettaa ero; Godai matan yaana. <sup>6</sup> Xoossaa intte woossiyo woosa ubban a keehi galatiiddi, inttena koshshiyaabaa ubbau woossiteppe attin, issibaukka hirgoppite. <sup>7</sup> Qassi asa eratettaa ubbaappe aadhdhiya Xoossaa sarotettai intte wozanaanne intte qofaa Godaa Yesuus Kiristtoosa baggaara naagana.

<sup>8</sup> Wurssettan, ta ishato, intte wozanan lo77obaanne galatissiyaabaa qoppite; tuma gidiyaabaa ubbaa, bonchchissiyaabaa ubbaa, mooro gidennabaa ubbaa, geeshshabaa ubbaa, siiqobaa ubbaa, lo77o haasaya gidiyaabaa ubbaa qoppite. <sup>9</sup> Intte taappe tamaridoogaa, ekkidoogaa, siyidoogaanne be7idoogaa ubbaa oottite; qassi nuuyyo sarotettaa immiya Xoossai inttenaara issippe gidana.

### *Baayyo Kiitettida Imotaayyo PHauloosi Galatidoogaa*

<sup>10</sup> SHin daro wodiyaappe guyyiyan, ha77i intte tabaa naa77anttuwaa qoppanau doommido gishshau, taani Godan keehi ufaittais; taayyo qoppanau intteyyo injetennan ixidoogaappe attin, tau qofaa qoppeeta. <sup>11</sup> Taani hagua tana metido gishshau giikke; aissi giikko, tau de7iyaabai taayyo gidana giyoogaa taani tamaaraas. <sup>12</sup> Taani metootidi de7iyoobi aibakko erais; qassi duretidi de7iyoobikka aibakko erais; awan gidinkka aude gidinkka, taani kaluwaanne namisaa qassi pacaanne palahaa tamaaraas. <sup>13</sup> Kiristtoosi tau immido wolqqan, ubbabaa oottanau taani danddayais.

<sup>14</sup> Gidikkokka, intte ta metuwaa tanaara metootidi daro loittideta; <sup>15</sup> Piliphphisiyuusa asau, wonggeliyaa mishiraachchoi koiro intte giddon odettiis; shin taani maqidooniyaappe kiyido wode, tana intte woosa keettappe attin, harai maaddibeennaagaa intte intte huuphen ereeta; qassi immiyoobankka ekkiyoobankka intteppe attin, harai tana maaddibeenna. <sup>16</sup> Aissi giikko, tana metoi oiqqido wode, harai atto taani Tasalongqen de7ishinkka tana zaari zaaridi maaddideta. <sup>17</sup> Taani inttebaa bolli harabai gujettanaagaa koyiyoogaappe attin, woito xalaalaa ekkanau koyikke.

<sup>18</sup> SHin taani intte immidoogaa ubbaa ekkaas; qassi tau palahidi gidiyaagee de7ees. Intte kiittido ubbabaa Eppafiroditoosappe ekkaas; koshshiya ubbai tau de7ees. Intte tau kiittido imoi Xoossaayyo sawuwaa tonggu giyaanne i dosiyo, a ufaissiya yarshsho mala. <sup>19</sup> Qassi ta Xoossai ba bonchcho duretettaa daruwan Kiristtoos Yesuusa baggaara inttena koshshiyaabaa ubbaa intteyyo immana. <sup>20</sup> Nu Xoossaayyoonne nu Aawaayyo merinaappe merinaa gakkanaassi bonchchoi gido. Amin77i.

### *Wurssetta Sarotaa*

<sup>21</sup> Kiristtoos Yesuusabaa gidiya geeshsha ubbata saro giite. Tanaara hagan de7iya ishantti inttena saro goosona. <sup>22</sup> Hagan de7iya geeshsha ubbati, ubbaappekka aattidi Kawuwaa Qeesaara keettan de7iyaageeti inttena saro goosona.

<sup>23</sup> Nu Godaa Yesuus Kiristtoosa aaro kehatettaa inttenaara gido.

## PHauloosi Qolasiyaasa Asaassi Xaafido Kiitaa

### *Gidduwaa Erissuwaa*

PHauloosi Qollasiyaasa asaassi xaafido kiitai xaafettidoogee Qeeri Iisiyan, Efisoon-appe arshsho baggaara beettiya Qollasiyaasan de7iya woosa keettaassa. Ha woosa keettaa essidai PHauloosa gidana xayikkokka, Roome biittan, Iisiyaa waanna katama gidiya Efisooneppe etassi oottiya asata kiittiyai a gidiyo gishshau, Qollasiyaasayy-ookka aawatiyo hanotai ayyo de7ees. Qollasiyaasa woosa keettan, “Xoossaa er-anaunne kumetta atotettaa demmanau, asi ubbi ayyaana wolqqatussinne maatai de7iyoogetussi goinnanau koshshees” yaagiya worddo asttamaareti de7iyooogaa PHauloosi siyiis. Ha asttamaareti harabaa qassi, “Asai ubbaikka qaxxaraa milatiya wogatussi haarettanaunne qumaa wogaanne hara wogata ubbaa naaganau koshshees” yaagoosona.

PHauloosi ha kiitaa xaafidoogee tumanchcha gidiya Kiristinnaa kiitaa odiyooogan, eta worddo timirttiyaa phalqqanaassa. I zaarido zaarotuppe waannatiyaagee “Yesuus Kiristtoosi kumetta atotettaa immanau danddayees; ha hara ammanotinne oosoti appe haassanau danddayoosona” yaagiyaagaa. Xoossai Kiristtoosa baggaara ha sa7aa medhdhiis. Qassi a baggaara zaaridi a baakko ehaana. Ha sa7aassi Kiristtoosaara maayettiyoogaa xalaalan atotettaa hidootai de7ees. Haggaa maaran PHauloosi ha gita timirttee ammaniya asa de7uwan waanidi oosuwan pe7anau danddayiyaakko yootees.

Ha kiitaa PHauloosappe ekkidi, Qollasiyaasa gattanau biida Tiikiigoosaara issippe de7iyai Anaasimoosa gidiyoogaa be7iyooogee go77iyaabaa. Waanidi giikko, PHauloosi ha Anaasimoosa geetettiya ba oosanchchaabaa denttidi, Pilmmoonassi hara kiitaa xaafiis.

<sup>1</sup> Taani PHauloosi, Xoossaa sheniyani Kiristtoosi Yesuusi kiittidoogaa gididaageenne nu ishai Ximootiyoosi, <sup>2</sup> Qolasiyaasa giyo kataman de7iya geeshshatuyyo, Kiristtoosan ammanettida ishanntuyyo ha dabddaabbiyaa xaafos.

### *PHauloosi Woossido Galata Woosaa*

Xoossaa nu Aawaappenne Godaa Yesuus Kiristtoosappe, aaro kehatettainne sarotet-tai intteyyo gido.

<sup>3</sup> Nuuni intteyyo Xoossaa woossiyo wode, Xoossaa nu Godaa Yesuus Kiristtoosa Aawaa, ubba wode galatoos. <sup>4</sup> Aissi giikko, nuuni Kiristtoos Yesuusa intte ammaniy-oogaanne geeshshata ubbaa siiqiyoogaa siyida. <sup>5</sup> Tumu kiitai wonggelee koiro inttekkoyiido wode, Xoossai sinttappe immana giidoogaa siyideta. Simmi intte ammanoinne siiqoi saluwan giigidi naagiya, Xoossai sinttappe immana giidoogan doomettiis. <sup>6</sup> He wonggelee inttekkoyi gakkiiis; gakkidi, intte a siyoosappenne Xoossaa aaro kehatettaa tumatettan eroosappe doommidi, intte gidдон de7iyooogaadankka, biitta ubban anjuwaa eheesinne ubbasaa aakkees.

<sup>7</sup> Intte heggaa nunaara issippe ashkkara gidida siiqo Eppaafirappe tamarideta; i nu gishshaa Kiristtoosayyo ammanettidi oottiyaagee, <sup>8</sup> Xoossaa Ayyaanani harata intte siiqiyoogaa nuuyyo yootiis.

<sup>9</sup> Heggaa gishshau, nuuni qassi heggaa siyido gallasaasappe doommidi, Xoossai intteyyo ba sheniyaa eriyo erattettaa, Xoossaa Ayyaanani immiyo aadhdhida erattet-taaranne akeekaara issippe kunttidi immanaadan, ubba wode balennan Xoossaa woossoos. <sup>10</sup> Hegaappe guyyiyan, Godai koyiyoogaadan intte de7anaunne, ubba wode a ufaissiyaabaa oottanau danddayana; intte oottiyo lo77o ooso ubban intte de7oi go77aara de7iyaagaa gidana; qassi Xoossaa eriyoogan intte diccana.



<sup>11</sup> Intte ubbaban ufaissan genccanaadaaninne danddayanaadan, Xoossai ba bonchchuwaa gitaadan immiyo wolqqa ubban minnite. <sup>12</sup> Qassi geeshshatuyyo giigida poo7o kawotettaa laattanau, nuna danddayissida Aawaa galatite. <sup>13</sup> I nuna xumaa wolqqaappe ashshidi, ba siiqiyo Na7aa kawotettaakko pinttiis. <sup>14</sup> Qassi i ba Na7an nuna wozidi, nu nagaraa atto giis.

### *Kiristtoosa Xoossatettaanne A Oosuwaa*

<sup>15</sup> Kiristtoosi beettenna Xoossaa leemiso; i merettidabaa ubbaappe aadhdhiya baira Na7a. <sup>16</sup> Aissi giikko, ubbabaikka aani merettiis; beettiyaageeti, beettennaageeti, ayyaanatuppe beettiya wolqqainne godatettai, halaqatettainne maatai, saluwaaninne sa7an de7iya ubbabaikka aaninne ayyo merettiis. <sup>17</sup> I ubbabaappe kase de7iis; ubbabaikka aani ba sohuwaa sohuwaa oiqqidi de7ees. <sup>18</sup> I ba bollau, woosa keettau huuphe; i ubbaappe bolla gidana mala, kasetidi haiquwaappe denddida baira Na7a gidiis.

<sup>19</sup> Aissi giikko, Xoossai koyidoogaadan, aani Xoossatetta mereta kumettai de7ees. <sup>20</sup> Yaatin Xoossai Kiristtoosa baggaara ubbabaa banaara sigettanau yohuwaa qachchiis; ba Na7ai masqqaliyaa bollan gussido suuttan saluwaaninne sa7an de7iya ubbabaa banaara sigettiis.

<sup>21</sup> Hagaappe kase, intte iitabaa oottido gishshaunne qoppido gishshau, Xoossaappe shaahettidi, aara morkkettideta. <sup>22</sup> SHin Xoossai ha77i inttena pokkoinne boree bainnaageetanne qassi geeshshata oottidi, ba sintti shiishshanau, ba Na7aa haiqqidaagaa asatettan banaara inttena sigettiis. <sup>23</sup> Hegee intte tumu ammanuwan minni eqqidi, wonggeliyaa mishiraachchuwaa siyidi, sinttappe ekkana giidoogaappe qaaxxennan minnidi de7ikko hanana; he wonggeliyaa mishiraachchoi sa7an de7iya mereta ubbaa matan odettiis. Taani PHauloosikka wonggeliyaa mishiraachchuwaa yootiyaagaa gidaas.

### *PHauloosi Yesuusi Kiittidoogaa Gididi Oottido Oosuwaa*

<sup>24</sup> Taani intteyyo waayettido gishshau, ha77i ufaittais; Kiristtoosi ba bollaayyo, heгаа giyoogee woosa keettaayyo, waayettishin paccidaagaa taani ta bollaa sahuwan kunttais. <sup>25</sup> Xoossai tana intte gishshau, woosa keettaa Ayyaanan kaalettiyaagaa oottido gishshau, a qaalaa polada yootana mala, taani woosa keettau ashkkara gidaas. <sup>26</sup> Ha qaalai hagaappe kase bagga ubban, asa ubbau erettennan geemmidi de7ees; shin ba geeshshatuyyo Xoossai ha77i qonccissiis. <sup>27</sup> Xoossai Aihuda gidenna asaayyo wottido ha asaayyo qonccibeenna bonchchonne dure yohoi aibakko geeshshata erissanau koyiis; ha asaayyo qonccibeennaagee aibee giikko, Kiristtoosi inttenan de7iyooгаа; heгаа giyoogee Xoossaa bonchchuwaa aara intte ekkanaagaa.

<sup>28</sup> Hegaa gishshau, nuuni asa ubbau Kiristtoosabaa yootoos; asa ubbaa Kiristtoosan kumetta asa oottidi, Xoossaakko shiishshana mala, nuuyyo aadhdhida eratetta ubban inttena ye77e goosinne tamarissoos. <sup>29</sup> Taani heгаа polanau, tanan oottiya Kiristtoosi taayyo immiyo wolqqan baaxetaisinne daafurais.

## 2

<sup>1</sup> Taani intteyyo, Lodoociyaa giyo kataman de7iya asaayyoonne tana be7ibeenna asa ubbaayyo ai keenaa baaxetidaakkonne intte erana mala koyais. <sup>2</sup> Eta wozanai minnana mala, siiquwan issippe gididi, tumu akeekan beettiya duretettaa ubbaa eti ekkana malanne qassi eti Xoossai asaayyo qonccissibeennaagaa, Kiristtoosa a huuphen erana mala, taani daafurais. <sup>3</sup> Geeman Xoossai minjjido erainne aadhdhida eratettai ubbai aani de7ees.

<sup>4</sup> Ooninne inttena cimo qaalan balettenna mala, taani inttena hassayissais. <sup>5</sup> Aissi giikko, taani intte matappe haakkada de7ikkokka, ayyaanan inttenaara de7ais; intte de7iyo maaraanne Kiristtoosa intte minnidi ammaniyoogaa be7ada ufaittais.

### *Kiristtoosan Beettiya Kumetta De7uwaa*

<sup>6</sup> Simmi intte Godaa Kiristtoos Yesuusa ekkidoogaadan, aani de7ite. <sup>7</sup> Aani xaphuwaa yeddidi diccite; intte tamaridoogaadan ammanuwan minnite; Xoossaa ubba wode galatite.

<sup>8</sup> Kiristtoosappe gidenna timirttiyan, ha sa7aa haariya ayyaanatu timirttiyaaninne, asappe yiida eratettan, qassi mela cimuwani inttena ooninne omooddena mala naaget-tite. <sup>9</sup> Aissi giikko, Kiristtoosa bollan Xoossatetta mereta kumetta de7ees. <sup>10</sup> Qassi halaqatettaayyoonne godatettaayyo ubbaayyo huuphe gidiya Kiristtoosappe kumetta de7uwaa demmideta.

<sup>11</sup> Intte Kiristtoosaara issi asa mala gididi, asa qaxxara mala gidennan, intte iita hanotettaa diggiyo qaxxaraa, Kiristtoosan qaxxarettideta. <sup>12</sup> Intte xammaqettido wode, Kiristtoosaara moogettidi, Kiristtoosa haiquwaappe denttida Xoossaa wolqqaa ammanido gishshau, xinqqatiyan Kiristtoosaara issippe denddideta.

<sup>13</sup> Intte intte naaquwaaninne intte asatettaa qaxxarettennan aggidooagan haiqqidi de7iyo wode, Xoossai intte naaquwaa atto giidi, Kiristtoosaara inttena paxa wottiis. <sup>14</sup> Nuna ixxiya, acuwaa paramaa a maachchaara issippe Xoossai daakkiis; daakkidi, masqqaliyaa bollan xishidi, ogiyaappe diggiis. <sup>15</sup> Kiristtoosi he masqqaliyan halaqatup-penne godatuppe wolqqaa wotti ekkidi, eta omooddidoogaa asa ubbaa qoncciyani yuushshi bessiiis.

<sup>16</sup> Hegaa gishshau, meettan woi ushshan, baala gallassaa woi aginai xeeriyo wodiya bonchchiyoogan, woi Sambbataa bonchchiyoogan, ooninne intte bolli pirddoppo. <sup>17</sup> Hageeti sinttappe yaana yohotu eesho; shin bollai Kiristtoosaagaa. <sup>18</sup> Wordduwaa ashkke milatanaunne kiitanchchaayyo goinnanau koyiyaagee, be7ibeennaagaa ajju-utan be7aas giidi otorettiyaagee, asatetta qofan coo ayyiyaagee, ooninne intte bolli pirddoppo. <sup>19</sup> Hegaa mala asi huuphe gidiya Kiristtoosa mintti oiqqidoogaa lefissees. Bolla ubbai he huuphiyaappe wolqqaa demmidi, bollan de7iya kuriyaaranne shayaara issippe ohettidi, Xoossai dichchiyo dishuwaadan diccees.

### *Haiquwan Paxankka Kiristtoosaara De7iyoogaa*

<sup>20-21</sup> Intte ha sa7aa haariya ayyaanatuppe haakkidi, Kiristtoosaara haiqqideta; yaatin, aissi ha sa7aa wogan de7iya asadan de7eetii? “Oiqqoppa; baara be7oppa; bochchoppa” yaagiya higgetuyyo aissi azazetteetii? <sup>22</sup> Ha ubbabaikka asi medhdhido higgenne timirtte gidiyo gishshau, polettoogaappe guyyiyan xayana. <sup>23</sup> Eti kiitanchchaayyo goinniyoogaaninne wordduwaa ashkke milatiyoogan qassi bantta asatettaa gilqqis-siyoogan aadhdhida eranchcha milatoosona; shin shaaramuxanau koyiyoogaa diggiy-oogee hegan ainne go77enna.

## 3

<sup>1</sup> Simmi intte Kiristtoosaara haiquwaappe denddidobaa gidikko, Xoossaappe ushachcha baggaara uttida Kiristtoosi de7iyoosan saluwan de7iyaagaa mintti koyite. <sup>2</sup> Saluwan de7iyaagaa intte qoppaanaappe attin, sa7an de7iyaagaa qoppoppite. <sup>3</sup> Aissi giikko, intte haiqqideta; qassi intte de7oi Xoossan Kiristtoosaara geemmiis. <sup>4</sup> Intteyyo de7o gidida Kiristtoosi qoncciyoni wode, he wode inttekka aara bonchchuwan qonccana.

### *Gal77anne Ooratta De7uwaa*

<sup>5</sup> Hegaa gishshau, inttenan de7iya ha sa7aa amota worite; hegeetikka shaaramuxiy-oogaa, tunatettaa, shaaramuxanau koyiyoogaa, iita amuwaa, miishsha amottiyoogaa. Miishsha amottiyoogee eeqau goinniyoogaappe dummatenna. <sup>6</sup> Hageetu gaasuwan, Xoossai azazettenna asata hanqqettana. <sup>7</sup> Kase intte ha iita qofatun de7iyo wode etan haarettideta.

<sup>8</sup> SHin ha77i intte qassi hanqquwaa, yiilluwaa, ixuwaa, intte doonaappe kiyiya cashshaanne yeellaiya haasayaa hageeta ubbaa intteppe xaissite. <sup>9</sup> Issoi issuwau

worddotoppite; aissi giikko, ceega meretaa a oosuwaara intteppe xaissirggidi, <sup>10</sup> Xoossai, a medhdhidaagee, bana milatissanaunne baayyo de7iya eratetta ubbaa immanau, ubba wode ooraxissiyo ooratta meretaa maayideta. <sup>11</sup> Ha ooratta meretan, Giriike asa woi Aihuda asa, qaxxarettidaagaa woi qaxxarettibeennaagaa, ammanoi bannaageetanne ainne tamaribeennaagaa, aille woi goqa giidi shaakkiyoobi baawa; Kiristtoosi ubbabaa; i ubbankka de7ees.

<sup>12</sup> Hegaa gishshau, Xoossai dooridoogeetudan, geeshshanne siiqidoogeeta gididi, maarotettaa, qaretaa, kehatettaa, intte huuphiyaa kaushshiyoojaa, ashkкетettaanne danddayaa maayite. <sup>13</sup> Issoi issuwaabaa danddayite; ooninne ba laggiyaa bolli hanqqettidobai de7ikko, issoi issuwau atto yaago. Kiristtoosi intteyyo atto giidoogaadan, inttekka atto giite. <sup>14</sup> Hegaa ubbaa bolli, ubbabaa issippe shiishshi qachchiya siiquwaa maayite. <sup>15</sup> Kiristtoosi immiyo sarotettaa inttena haaro; aissi giikko, Xoossai inttena issi asa oottidi, he sarotettau xeesiis. Xoossaa galatite.

<sup>16</sup> Kiristtoosa qalalai intte wozanan kumidi de7o; intteyyo de7iya aadhdhida er-  
atetta ubban issoi issuwaa tamarissitenne zorite; intte wozanan Xoossaa galatiiddi,  
xalotiyaanne mazamuriyaa, Xoossaa sunntaa xoqqu oottiya yettaa yexxite. <sup>17</sup> Intte  
ai haasayiyaabaa woi ai oottiyaabaa gidikkokka, Aawaa Xoossaa Yesuusa baggaara  
galatiiddi, oottiyoobaa ubbaa Godaa Yesuusa sunntan oottite.

### *So Asaa Giddon Ammaniya Asi Aggennan Oottanau Bessiya Oosota*

<sup>18</sup> Maccaasatoo, ammaniya asau bessiyaagaadan, intte azinatuyyo haarettite.

<sup>19</sup> Attumaasatoo, intte maccaasaa siiqite; etaara woppu giidi de7ite.

<sup>20</sup> Naatoo, inttena yelidaageetuyyo ubban azazettite. Aissi giikko, intte etau azazettiyoogee Xoossaa daro ufaissees.

<sup>21</sup> Aawatoo, intte naati wozanaa bayenna mala, eta yiilloyoppite.

<sup>22</sup> Ailletoo, sa7an intteyyo goda gidiaageetuyyo ubban azazettite; Godau yayyidi,  
suure wozanan oottiteppe attin, asa ufaissanaunne asi be7o giyoogan azazettiyaageeta  
gidoppite. <sup>23</sup> Intte oottiyo ooso ubbaa asau gidennan Godau oottiyoogaadan,  
wozanappe oottite. <sup>24</sup> Godaa Kiristtoosayyo intte oottiyo gishshau, i baageetuyyo  
immanau giigissi wottidoogaa intte laattanaagaa akeekite. <sup>25</sup> Balabaa oottida urai  
ooninne, ba oottido balaadan woi tuwaa ekkana; aissi giikko, Xoossai pirddiiddi, oo-  
nanne maaddenna.

## 4

<sup>1</sup> Godatoo, intteyyookka saluwan Godai de7iyoojaa eridi, intte ailletuyyo xillotet-  
taaninne suuretettan koshshiyaabaa oottite.

### *Zoriyaa*

<sup>2</sup> Xoossaa aggennan woossite; qassi woossiiddi azallennan, a galatiiddi woossite.

<sup>3</sup> Qassi intte woossiyo wode ubban, kaseesappe asayyo qonccibeennabaa, Kiristtoos-  
abaa nuuni yootana mala, Xoossai nuuyyo injjeyanaadan, nuuyyookka Xoossaa woos-  
site; aissi giikko, ha77i taani qasho keettan de7iyoojee hegaassa. <sup>4</sup> Qassikka taani  
bessiyaagaa keenaa qonccissada ha yohuwaa yootana mala, taayyo Xoossaa woossite.

<sup>5</sup> Intteyyo de7iya wodiya go77i bannasan xaissennan, ammanennaageetu matan  
hayyottidi de7ite. <sup>6</sup> Intte asa ubbau waati zaaranau bessiyaakko erana mala, intte  
haasayai ubba wode, siyanau kehyaagaanne ufaissiyaagaa gidanau bessees.

### *Wurssetta Sarotaa*

<sup>7</sup> Nu siiqo ishai Tikiqoosi, tanaara issippe Godaa oosuwan ashkkara gidida ammanet-  
tiya oosanchchai, ta de7uwaabaa inttena erissana. <sup>8</sup> Taani a inttekko kiittiyoogee, nu-  
uni waani de7iyaakko intteyyo i yootidi, inttena minttettana gishshassa. <sup>9</sup> Anaasimoosi,

ammanettiya siiqo ishai, intte biittaagee, aara issippe inttekko bees; eti hagan haniya ubbabaa inttena erissana.

<sup>10</sup> Tanaara qashuwan de7iya Arisxxirokoosinne Barnnaabaasayyo ishaha na7ai Marqqoosi inttena saro de7eetii goosona; taani inttena kase azazidoogaadan, Marqqoosi inttekko biikko, wozanappe a mukkite. <sup>11</sup> Yosxxoosa giyo Yesuusikka inttena saro saro gees; Aihuda asatuppe tanaara Xoossaa kawotettaayyo oottiyai, ha heezzu asatuppe harai baawa; hageeti tana daro maaddidosona.

<sup>12</sup> Eppaafiri, intte biittaagee, Kiristtoos Yesuusa ashkkaarai, inttena saro saro gees. I intte Xoossan minnidi eqqanaadaaninne Xoossai koyiyobai ubbai aibakko eridi, poli ammananaadan, ubba wode Xoossaa mintti woossees. <sup>13</sup> Aissi giikko, i intteyyo, Lodoopiyyaa asaayyoonne Hirapoliisa giyo katamaa asaayyo daro daafuriyoogaa taani markkattais.

<sup>14</sup> Nu siiqo dottoree Luqaasinne Deemaasi inttena saro de7eetii yaagoosona. <sup>15</sup> Lodoopiyyan de7iya nu ishanntuyyoonne Nimppiyyo qassi i keettan shiiqiya asaayyo nu sarotaa yootite.

<sup>16</sup> Ha dabddaabbiyaa intte nabbabidoogaappe guyyiyan, Lodoopiyyaa woosa keet-tankka nabbabissite; inttekka Lodoopiyyaa woosa keettaikka intteyyo yeddiyo dabddaabbiyaa nabbabite. <sup>17</sup> Qassi Arkkiipoosayyo, “Godai neeyyo immido oosuwa polanaagaa dogoppa” yaagidi yootite.

<sup>18</sup> Taani PHauloosi, ta kushiyan saro gaada xaafidoogaa haggaa be7ite; taani qashuwan de7iyooogaa dogoppite.

Xoossaa aaro kehatetta inttenaara gido.

## PHauloosi Tasalonqge Asaassi Xaafido Koiro Kiitaa

### *Gidduwaa Erissuwaa*

Tasalonqgee Maqadooniyaa geetettiya Rooma biittaayyo waanna katama. PHauloosi Tasalonqgen woosa keettaa essidoogee Pilphphisiyuusa yeddidi kiyidoogaappe guyyiyaana. Gidoshin, Aihudatu ammanuwaa ekkanau shiiqi eqqida Aihuda gidenna asati PHauloosi tamarissiyoo, kiristinnaa timirttiyan gooshettido gishshau, Aihudati PHauloosa qanaatidi, phalqqettaa denttidosona. Hegaa gishshau PHauloosi Tasalonqge yeddidi, wolqqan Beeriyaa biis. Takkiiddi i Tasalonqge gakkido wode, matan a maaddiya Ximootiyoosi Tasalonqge woosa keettan de7iya hanotaa ayyo istti naa77an xaafiis.

PHauloosi koiro kiitaa Tasalonqge asaassi xaafidoogee, ammaniya asaa wolqqa kunttanaassanne minttettanaassa. I eta ammanuwaabaanne eta siiquwaabaa lo77o oduwaa siyiis. Hegaa gishshau, eta galatees. Kase i eta gidдон de7ido wode, waanida de7uwaa de7idaakko eta hassayissee. Hegaappe oishata zaarees. He oishatuppekka amaridaageeti: “Kiristtoosi ha sa7aa simmanaappe kasetidi haiqqida ammaniya asi, Kiristtoosa simoi immiyo merinaa de7uwaa ekkanau danddayii? Kiristtoosi simmidi yaanai audee?” yaagiyaageeta. PHauloosikka he gaittida kayyiyan etau odiiddi, “Kiristtoosi naa77anttoo yaanaagaa ufaissan naagiiddi i yaana gakkanaashin woppu giidi intte oosuwaa oottite” yaagidi zorees.

<sup>1</sup> Nuuni PHauloosi, Sillaasinne Ximootiyoosi Tasalonqge woosa keettan de7iya asaayyo ha dabddaabbiyaa xaafos; he woosa keettaa Xoossaa nu Aawaabaanne Godaa Yesuus Kiristtoosabaa.

### *Tasalonqge Asaa De7uwaanne Ammanuwaa*

Xoossaa nu Aawaappenne Godaa Yesuus Kiristtoosappe, aaro kehatettainne sarotetai intteyyo gido.

<sup>2</sup> Nuuni Xoossaa woossiyo wode inttena hassayidi, intteyyo ubbaayyo ubba wode Xoossaa galatoos. <sup>3</sup> Nuuni nu Xoossaa, nu Aawaa sinttan ammanuwan intte oottido oosuwaanne, siiquwan intte daafurido daafuraa, qassi Xoossai intteyyo nu Godaa Yesuus Kiristtoosa baggaara immana giidoogaa ekkanau gencciyoo genccaa ubba wode hassayoos.

<sup>4</sup> Nu ishatoos, Xoossai inttena siiqiyoogaanne inttena babaa oottanau dooridoogaa nuuni eroos. <sup>5</sup> Aissi giikko, nuuni wonggeliyaa wolqqan, Geeshsha Ayyaanaaninne he wonggelee tuma gididoogaa wurssi ammaniyoogan intteyyo ehiidoogaappe attin, doona xalaalan ehibookko. Nuuni inttenaara de7iyo wode, intte gishshau waani de7idaakko, intte ereeta. <sup>6</sup> Qassi intte daro waayettikkokka, Geeshsha Ayyaanai immido ufaissaara kiitaa ekkideta; nunanne Godaa milatideta. <sup>7</sup> Hegaa gishshau, Maqadooniyaa giyo biittaaninne Akaayiyaa giyo biittan de7iya ammaniya ubbatuyyo leemiso gidideta. <sup>8</sup> Aissi giikko, Godaa qalalai intteppe kiyidi, Maqadooniyaaninne Akaayiyaa xalaalan siyettibeenna; shin Xoossaa intte ammaniyoogee ubbasan siyettiis. Simmi nuuni haasayanau koshshiyaabi aibinne baawa. <sup>9</sup> Aissi giikko, nuuni inttekkoo biido wode, intte nuna waati mokiidaakkonne qassi intte intte eeqaa aggidi, worddotenna de7o Xoossaayyo oottanau waani simmidaakko, eti bantta huuphen haasayoosona. <sup>10</sup> Qassi Xoossaa Na7ai Yesuusi, Xoossai haiquwaappe denttidoogee, nuna sinttappe yaana Xoossaa hanqquwaappe ashshiyaagee saluwaappe yaanaagaa intte naagiyoogaa eti haasayoosona.



## 2

### *PHauloosi Yesuusi Kiittido Asa Gididi Tasalonqgen Oottido Oosuwaa*

<sup>1</sup> Ta ishato, nuuni inttekko biidoogee mela gidennaagaa intte intte huuphen ereeta. <sup>2</sup> SHin nuuni inttekko yaanaappe kase Piliphphisiyuusa giyo kataman waayet-tidoogaanne cayettidoogaa intte ereeta; daro phalqqetta de7ikkokka, intteyyo a wonggeliyaa mishiraachchuwaa yootana mala, Xoossai nuuyyo minotettaa immiis. <sup>3</sup> Nuuni inttena woossiyoogee balan woi tunatettan woi geniyan gidenna.

<sup>4</sup> SHin Xoossai wonggeliyaa hadaraa ekkana nuuni ammanettiyaageeta gidin, nuuyyo he hadaraa immiis; he immidoogaadanka nuuni haasayoos. Qassi nuuni nu wozanaa xomoosiya Xoossaa ufaissiyaagaadan haasayoosippe attin, asa ufaissiyaa-gaadan haasayokko. <sup>5</sup> Nuuni inttekko cimo haasayaara yibeennaagaa, woikko nuuni uuzettiyoogaa genttiya haasayaa haasayibeennaagaa intte loitti ereeta; Xoossaikka nuuyyo markka. <sup>6</sup> Nuuni Kiristtoosi kiittidoogeeta gidiiddi, intteppe bonchcho ekkana danddayikkokka, ooppenne intteppe gidin woi haratuppekka gidin, bonchcho koy-ibookko. <sup>7</sup> SHin nuuni aayyiyaa ba naata dichchiyoogaadan, intte giddon ashkke gidida. <sup>8</sup> Inttena siiqido gishshau, Xoossaa wonggeliyaa intteyyo immanaagaa xalaala gidennan, nu de7uwaakka intteyyo immanau giigi uttida; aissi giikko, intte nuuyyo daro al77o. <sup>9</sup> Ta ishato, nu oosuwaanne nu daafuraa intte akeekeeta; intteyyo Xoossaa wonggeliyaa mishiraachchuwaa yootiiddi, inttena ainne waayissenna mala, qamminne gallassi nuuni oottida.

<sup>10</sup> Nu de7oi intte matan, ammaniyaageetu matan, geeshsha, xillonne borettennaagaa gidiyoo gau intte markka; qassi Xoossaikka markka. <sup>11</sup> Nuuni intteyyo huuphiyan huuphiyan aawai ba naatuyyo haniyoogaadan hanidoogaa ereeta. <sup>12</sup> Nuuni inttena zorida; minttettida. Qassi a kawotettaanne a bonchchuwaa shaakkanau inttena xeesiya Xoossaa ufaissiya de7uwaa intte de7ana mala, intteyyo minttidi yootida.

<sup>13</sup> Intte nuuppe Xoossaa qaala tuma gididoogaadan ekkido wode, Xoossaa kiitadan ekkidoogaappe attin, asa kiitadan ekkibeenna gishshau, nuuni Xoossaa ubba wode heгаа gaasuwan galatoos; Xoossaa qaalai ammaniyaageetun, inttenan oottees.

<sup>14</sup> Aissi giikko, ta ishato, Kiristtoos Yesuusayyo Yihudaa giyo biittan de7iya woosa keettatuura, intte leemisetteeta; hegeeti Xoossaa woosa keettata. Aihudati eta wais-sidoogaadan, intte biittaa asaikka inttena waissii. <sup>15</sup> He Aihudati Godaa Yesuusanne hananabaa yootiyaageeta woridosona; qassi nuna yedettidosona. Eti Xoossaa ufaissokkona; asa ubbaakka ixxoosona. <sup>16</sup> Aihuda gidenna asai attana mala, nuuni etau qaala yootiyoo ga diggoosona. Qassi eta nagaraikka ubba wode dari dari bees. SHin wurssettan Xoossaa hanqqoi eta bolli wodhdhiis.

### *PHauloosi Tasalonqge Asaa Naa77anttuwaa Xomoosanau Amottido Amuwaa*

<sup>17</sup> SHin ta ishato, nuuni nu qofan gidennan, asatetta xalaalan intteppe guutta wodiyau shaahettido wode, inttena daro laamotidi, be7anau keehi koyida. <sup>18</sup> Aissi giikko, nuuni inttekko simmidi baanau koyida. Harai atto, taani PHauloosikka darotoo inttekko baanau mala be7aas; shin Seexaanai nuna diggiis. <sup>19</sup> Aissi giikko, nu Godaa Yesuus Kiristtoosi yiyo wode, nuuni be7ana giidi ufaissan naagiyoo gee, woikko nu ufaissai, woikko nuuni ceeqettiyo akiliile oonee? Inttena gidekketiyye? <sup>20</sup> Aissi giikko, intte nu bonchchonne nu ufaissa.

## 3

<sup>1</sup> Hegaa gishshau, nuuyyo gencanau danddayettennan ixxido wode, Ateena giyo kataman nurkka attanau qofaa qachchida. <sup>2</sup> Inttena zoranaadaaninne intte amanuwan inttena minttanaadan, Xoossau oottiya nu ishau, nunaara issippe Kiristtoosa wonggeliyaa mishiraachchuwaa yootiya Ximootiyoo sa inttekko kiittida. <sup>3</sup> Ha waayiyaa

gaasuwan intteppe ooninne guyye simmenna mala, a kiittida. Nuuni hegau dooret-tidoogaa intte intte huuphen ereeta. <sup>4</sup> Aissi giikko, nuuni inttenaara de7iiddi, nuuni waayettanaagaa kasetidi intteyyo yootida; qassi intte eriyoogaadanka kase hegaadan haniis. <sup>5</sup> Hegaa gishshau, qassi gencanau tau danddayettennan ixrido wode, “Ooni erii xalaha halaqai eta paaccennan aggenna. Nu daafuraikka mela gidennan aggenna” yaagada intte ammanuwaabaa eranau Ximootiyoosa inttekkio kiittaas.

<sup>6</sup> SHin ha77i Ximootiyoosi intte matappe nuukko yiidi, intte ammanuwaabaanne intte siiquwaabaa intteyyo mishiraachcho giidi nuuyyo yootiis. Qassi nuuni inttena be7anau laamotiyoogaadan inttekkio nuna be7anau laamotiiddi, ubba wode nuuyyo lo77obaa qoppiyoogaa i yootiis. <sup>7</sup> Hegaa gishshau, ta ishatao, nu waayiyaaninne nu tuggan ubban intte ammanuwaa baggaara intteban minettida. <sup>8</sup> Godan minnidi intte de7ikko, nuunikka tumu de7oos. <sup>9</sup> Aissi giikko, nuuni inttebaayyo Xoossaa galatoos. Nuuni nu Xoossaa sinttan intte gishshau de7iya ufaissa ubbau a daro galatoos. <sup>10</sup> Nuuni inttena be7anaanne intte ammanuwau paccidabaa kunttanau, qamminne gallasi nu kumetta wozanaappe Xoossaa woossoos.

<sup>11</sup> Nu Aawai, nu Xoossai ba huuphen, qassi nu Godai Yesuus Kiristtoosi nuuni inttekkio biyo ogiyaa nuuyyo giigisso. <sup>12</sup> Nuuni inttena keehi siiqiyoogaadan, Xoossai intte issoi issuwaa siiqiyo siiquwaanne qassi asa ubbaa siiqiyo siiquwaa intteyyo darissonne gujjo. <sup>13</sup> Nu Godai Yesuus Kiristtoosi ba geeshshatu ubbaara yiyo wode, nu Xoossaa, nu aawaa sinttan geeshshatanne borettennaageeta oottidi, inttena i minttetto.

## 4

### *Xoossaa Ufaissiya De7uwaa*

<sup>1</sup> Simmi wursettan, ta ishatao, Xoossaa ufaissanau intte waani de7anau bessiyaakko, nuuppe tamarideta. Hegee intte kaseesappe de7iyo maaraa; shin ha77i intte kasee-gaappe loittidi oottanaadan, Godaa Yesuusa sunttan inttena woossoosinne zoroos. <sup>2</sup> Aissi giikko, nuuni Godaa Yesuusa maataa baggaara intteyyo immido azazoi augaakko, intte ereeta.

<sup>3</sup> Aissi giikko, Xoossai intteppe koyiyoogee aibee giikko, intte geeshsha gidanaa-gaanne shaaramuxiyoogaa muleera agganaagaa koyees. <sup>4</sup> Intte ubbai huuphen huuphen geeshshatettaaninne bonchchuwan machcho waati ekkiyaakko eranau besseesippe attin, <sup>5</sup> Xoossaa erenna ammanenna asatudan, keehi amottiyoogan ekkanau bessenna. <sup>6</sup> Nuuni qassi kase intteyyo yootidoogaadaaninne inttena mintti zoridoogaadan, Godai haggaa malaban ubban halo kessiyaagaa gidiyo gishshau, ooninne ha yohuwan ba ishatao naaqqanaanne cimmanau bessenna. <sup>7</sup> Aissi giikko, Xoossai nuna geeshshatettan de7anau xeesidoogaappe attin, tunatettan de7anau xeesibeenna. <sup>8</sup> Hegaa gishshau, ha timirttiyaa ixriya ooninne intteyyo ba Geeshsha Ayyaanaa immiya Xoossaa ixeesippe attin, asa ixenna.

<sup>9</sup> Intte intte huuphen issoi issuwaa siiqanaadan, Xoossai inttena tamarissido gishshau, intte intte ishatao waati siiqanaau bessiyaakko, nuuni xaafanaau koshshenna. <sup>10</sup> Qassi Maqidooniyaa biitta ubban de7iya ishatao ubbata tumu intte siiqeeta. SHin nu ishatao, intte hegaappe gujji gujjidi eta siiqana mala, inttena woossoos.

<sup>11</sup> Nuuni kase intteyyo yootidoogaadan, woppu giida de7uwaa de7ite. Qassi intte huuphe oosuwaa oottidi, inttena koshshiyaabaa demmite. <sup>12</sup> Hegaa gidikko, ammanennaageetu matan intte bonchchettanne qassi inttena koshshiyaabau oonanne auddashekketa.

### *Godai Yiyo Wode Haiqqiichchida Asainne Paxa De7iya Asai Hananabaa*

<sup>13</sup> SHin nu ishatao, intte sinttappe demmana giidi ufaissan naagiyoobi bainna asatudan kayyottenna mala, haiqqida asatubaa intte erana mala koyoos. <sup>14</sup> Nuuni Yesuusi

haiqqidoogaanne qassi haiquwaappe i denddidoogaa ammanoos; hegaadankka, Xoos-sai Yesuusa ammanidi haiqqidaageeta Yesuusaara ehaanaagaa ammanoos.

<sup>15</sup> Aissi giikko, nuuni intteyyo yootiyo Godaa qalalai haggaa; nuuni paxa de7iyaageeti, Godai yiyo gallassi hagan de7iyaageeti, haiqqidaageetuppe kasetokko. <sup>16</sup> Aissi giikko, Godai ba huuphen azazuwaara, kiitanchchatu halaqaa cenggurssaara, Xoos-saa malkkataa giirettaara saluwaappe wodhdhana. Kiristtoosa ammanidi haiqqidaageeti kasetidi haiquwaappe denddana. <sup>17</sup> Hegaappe guyyiyan, nuuni he wode paxa de7iyaageeti, Godaara carckuwaa gidдон gaittanau etaara issippe shaaran pude shiiqana. Hegan nuuni Godaara issippe ubba wode de7ana. <sup>18</sup> Heggaa gishshau, ha haasayan issoi issuwaa minttettite.

## 5

### *Godaa Yuussaa Giigidi Naagite*

<sup>1</sup> SHin ishatoos, ha yohoti aude hananaakko, wodiyaanne aginaa intteyyo xaafanau koshshenna. <sup>2</sup> Aissi giikko, Godaa gallassai kaisoi qammi yiyoogaadan yaanaagaa intte loitti ereeta. <sup>3</sup> Asai, “Ubbabai saro; aibikka hanenna” giishin, maccaasaa maaretai oiqqiyooogaadan, bashshai eti qoppennan eta bolli yaana. Eti mulekka kessi ekkokkonna.

<sup>4</sup> SHin nu ishatoos, he gallassai intteyyo kaisoi yiyoogaadan yaanau intte xuman de7ekketa. <sup>5</sup> Intte ubbai poo7uwaa asanne gallassaa asa; nuuni qammaa asa woi xumaa asa gidokko. <sup>6</sup> Heggaa gishshau, nuuni harati xiskkiyoogaadan xiskkanau bessenna. Nuuni beegottanaunne woga de7anau bessees. <sup>7</sup> Aissi giikko, xiskkiyaageeti qammi xiskkoosona; mattottiyaageetikka qammi mattottoosona. <sup>8</sup> SHin nuuni gallassaa asa gidiyaageeti woga de7anau bessees. Nuuni ammanuwaanne siiquwaa tiran wottiyo ola miishshadan oiqqidi, Xoossai nuuyyo immana gin, nuuni ufaissan naagi uttido atatettaa birata qophedan, huuphiyan wottanau bessees. <sup>9</sup> Aissi giikko, Xoossai nuna nu Godaa Yesuus Kiristtoosa baggaara atatettaa demmanau dooridoogaappe attin, a hanqquwaa ekkanaa dooribeenna. <sup>10</sup> Nuuni paxa gidin woikko haiqqidaageeta gidin, Kiristtoosaara issippe de7ana mala, Kiristtoosi nu gishshau haiqqiis. <sup>11</sup> Heggaa gishshau, intte qassi ha77i oottiyoogaadan, issoi issuwaa minttettitenne maaddite.

### *Wurssetta Zoriyaanne Sarotaa*

<sup>12</sup> Nu ishatoos, intte gidдон oottiyaageeta, inttena kaalettanaunne zoranau Godai dooridoogeeta, intte bonchchana mala, inttena woossoos. <sup>13</sup> Eti oottiyo oosuwa gishshau, eta keehi bonchchitenne siiqite. Issoi issuwaara sarotettan de7ite.

<sup>14</sup> Nu ishatoos, nuuni inttena zoroos; maari bainna de7uwaa de7iyaageeta seerite. Yayyiyaageeta minttettite. Wolqqi bainnaageeta maaddite. Asa ubbaa danddayite. <sup>15</sup> Ooninne iitaa gishshaa iitaa zaarena mala naagettite; shin issoi issuwaayyoonne qassi asa ubbaayyo lo77obaa oottanau minnite.

<sup>16</sup> Ubba wode ufaittite. <sup>17</sup> Ubba wode Xoossaa woossite. <sup>18</sup> Ubbaban galatite. Aissi giikko, Kiristtoos Yesuusa baggaara Xoossai intteppe koyiyoobai heggaa.

<sup>19</sup> Geeshsha Ayyaanaa doshissoppite. <sup>20</sup> Hanana giidi yootido qaalaa karoppite. <sup>21</sup> Ubbabaakka paaccite. Lo77obaa oiqqite. <sup>22</sup> Iita ooso ubbaappe haakkite.

<sup>23</sup> Sarotettaa Xoossai ba huuphen inttena ubbaban geeshsho; qassi nu Godai Yesuusi Kiristtoosi yiyo wode, Xoossai intte ayyaanaa, shemppuwaanne kumetta asatettaa borettennaagaa oottidi naago. <sup>24</sup> Inttena xeesiyaagee ammanettidaagaa; qassi heggaa i polana.

<sup>25</sup> Nu ishatoos, nuuyyo Xoossaa woossite.

<sup>26</sup> Ishantta ubbaa geeshsha yeruwaa yeridi sarotite.

<sup>27</sup> Intte ha kiitaa geeshsha ishanntu ubbaayyo nabbabanaadan, Godaa sunttan inttena woossais.

<sup>28</sup> Nu Godaa Yesuus Kiristtoosa aaro kehatettai inttenaara issippe gido. Amin77i.

## PHauloosi Tasalongqe Asaassi Xaafido Naa77antto Kiitaa

### *Gidduwaa Erissuwaa*

Kiristtoosa naa77antto yuussaa xeelliaagan denddida oishai wocamaa medhdhi medhdhidi biido gishshau, Tasalongqe woosa keettan metoi dari daridi biis. PHauloosi Tasalongqe asaassi xaafido naa77antto kiitai, “Godai yaana gallassai matiis” yaagiya ammanuwaabaa minttidi odees. PHauloosi etassi odiiddi, “Kiristtoosi yaanaappe kasetidi Kiristtoosa timirttiyaa phalqqiya issi ‘Makkala asa’ geetettiyaagee denddana; denddidi ha sa7an de7iya asaa kaalettin, ha sa7aa bolli iitatettainne makkalai dari daridi baana” yaagidi eta ammanuwaa suurissanau malees.

Yesuusi Kiittidoogee nabbabiyaageetussi “Metoinne waayee darikkokka eti bantta ammanuwan minnanaadan, ikka aara issippe oottiyaageetikka oottiyoogaadan, eti bantta de7uwaassi koshshiyaabaa demmanau, minnidi oottanaadan, hegaadankka qassi lo77o ooso oottanau xibennaadan” eta minttidi zorees.

<sup>1</sup> Nuuni PHauloosi, Sillaasinne Ximootiyoosi, Tasalongqe woosa keettan de7iya asaayyo ha dabddaabbiyaa xaafos. He woosa keettai Xoossaa nu Aawaabaanne Godaa Yesuus Kiristtoosabaa.

<sup>2</sup> Xoossaa nu Aawaappenne Godaa Yesuus Kiristtoosappe, aaro kehatettainne sarotet-tai intteyyo gido.

### *Kiristtoosa Yuussaa Gallassi Hanana Pirddaa*

<sup>3</sup> Nu ishato, intte ammanoi keehi dicciyo gishshaunne, intte issoi issuwaa siiqiyo siiqoi dariyo gishshau, nuuni intteyyo bessiyaadan, Xoossaa ubba wode galatanau bessees. <sup>4</sup> Hegaa gishshau, inttena yedetainne waaye ubbai gakkinkka intte genc-ciyooogaanne ammaniyoogaa nuuni nu huuphen Xoossaa woosa keettaayyo yootiiddi, intteban ceeqettoos.

<sup>5</sup> Intte waayettiyo Xoossaa kawotettaayyo bessiyaageeta gididi qoodettana mala, Xoossai pirddiyo xillo pirddau hagee malaata. <sup>6-7</sup> Xoossai tumu pirddaa pirddana. Godai Yesuusi ba wolqqaama kiitanchchatuura tamaa lacuwaa gidдон saluwaappe yiyo wode, Xoossai inttena waissiyaageetu bolli waayiyaa ehaana. Qassi waayettiya inttenanne nuna shemppissana. <sup>8</sup> Qassi Xoossai bana erennaageetanne nu Godaa Yesuus Kiristtoosa wonggeliyaa mishiraachchuwaayyo azazettennaageeta qaxxayana. <sup>9-10</sup> He gallassi, i ba geeshshatu ubban bonchchettanaunne qassi bana ammaniya ubbatun sabettanau yiyo wode, eti Godaa sinttappenne a wolqqa bonchchuwaappe shaahettidi, merinaa bashshan qaxxayettana. Nuuni intteyyo yootido kiitaa intte ammanido gishshau, intte a bonchchiyaageetu gidдонinne sabbiyaageetu gidдон de7ana.

<sup>11</sup> Nuuni intteyyo ubba wode Xoossaa woossiyoogee hegaassa. Nu Xoossai xeesido de7uwau inttena bessiyaageeta giidi qoodanaadan, nuuni a woossoos; intte lo77obaa amottiyoogaanne intte ammanuwaa oosuwaa i ba wolqqan polo. <sup>12</sup> Hegan nu Xoossaa aaro kehatettaanne qassi nu Godaa Yesuus Kiristtoosa aaro kehatettan, Godaa Yesu-usa sunntaa intte bonchchana; inttenakka i bonchchana.

## 2

### *Makkaliya Bitaniyaa*

<sup>1</sup> Ha77i nu ishato, nu Godaa Yesuus Kiristtoosa yuussaabaunne nuuni aara de7anau akko shiiqanabau, <sup>2</sup> hananabaa asi intteyyo yootiyooban woi hara asappe siyido qaalan, woi ooninne nuuppe yiida kiitadan haasayiyooagan, “Godaa gallassai gakkiiis”



giidi intte dagammennaadaaninne wozanaa bayennaadan, nuuni inttena woossoos. <sup>3</sup> Inttena ooninne ai ogiyaaninne balettoppo. Aissi giikko, kasetidi makkaliyoogeenne qassi nagaranchchai, bashshaa na7ai qonccennan de7ishin, he gallassai gakkenna. <sup>4</sup> Asi goinniyo ubbabaanne asi Xoossa giyo ubbabaa i ixkana. I bana eta ubbaappe xoqqu oottana. Qassi harai atto Xoossaa Beeta Maqidasiyaa geli uttidikka, “Taani Xoossaa” gaana.

<sup>5</sup> Intte hassayekketii? Taani heгаа intteyyo inttenaara de7aidda odaas. <sup>6</sup> I ba qaxaruwaa gallassi yaanaappe attin, ha77i yaanaagaa aibi a teqqiyaakko, intte ereeta.

<sup>7</sup> Aissi giikko, asau qonccibeenna makkalaa wolqqai ha77i oottees; shin he teqqiyaagee ogiyaappe kichchana gakkanaassi, i qonccenna. <sup>8</sup> Hegaappe guyyiyan, he makkalanchchai qonccin, Godai Yesuusi ba doonaa shemppuwan a worana. Qassi i yiyo wode ba bonchcho Yuussan a xaissana. <sup>9</sup> He makkalanchchai Seexaanaa wolqqaara yiidi, Xoossai oottiyo malaata ubbaa, worddo malaataanne garamissiyaabaa oottana. <sup>10</sup> Hegaadankka, qassi xayiya asata dumma dumma iita cimuwana balettana. Xayiyaageeti attanau tumatettaa siiqidi ekkibeenna gishshau xayana. <sup>11-12</sup> Hega gishshau, tumatettaa ammanibeenna asati, nagara oottiyoogan ufaittiyaageeti ubbai pirdettanaadaaninne worddo gidiyaabaa ammananaadan, Xoossai wolqqaama balaa eta giddo yeddana.

#### *Atotettau Doorettida Asata*

<sup>13</sup> SHin Godai siiqiyo nu ishato, nuuni Xoossaa intte gishshau, ubba wode galatanau bessees. Aissi giikko, Geeshsha Ayyaanaa wolqqan inttena ba geeshsha asa oottiyoogaaninne tumatettaa intte ammaniyoogan inttena ashshanau, Xoossai inttena bairadan dooriis. <sup>14</sup> Xoossai inttena nuuni intteyyo yootido nu wonggeliyaa mishiraachchuwaa baggaara xeesidoogee, intte nu Godaa Yesuus Kiristoosaara issippe bonchchettanaassa. <sup>15</sup> Simmi nu ishato, minnidi eqqite; nuuni inttena nu doonan gidin, woi nu dabddaabbiyan gidin, tamarissido wogaa oiqqite.

<sup>16-17</sup> Nu Godai Yesuus Kiristtoosi ba huuphen qassi Xoossai, nu Aawai nuna siiqidi, ba aaro kehatettan nuuyyo merinaa danddayaanne sinttappe ekkana giyo lo77o ufaissaa immidaagee, inttena minttetto; qassi intte lo77obaa ubbaa oottanaadaaninne haasayanaadan, inttena minttetto.

## 3

#### *PHauloosi, “Nuuyyo Woosite” Yaagiis*

<sup>1</sup> Wurssettan nu ishato, Godaa qalalai intte gidon, eesuwana aakkanaadaaninne bonchchettanaadan, nuuyyo Xoossaa woosite. <sup>2</sup> Qassi asai ubbai qaalaa ammanenna gishshau, Xoossai nuna nagaranchcha asatuppenne iita asatuppe ashshana mala, nuuyyo woosite.

<sup>3</sup> SHin Godai ammanettiyaagaa; i inttena minttettananne qassi iitaappekka naagana. <sup>4</sup> Nuuni inttena azaziyoogaa intte ha77i oottiyoogaanne qassi sinttappekka oottanaagaa Godai nuna intteban ammanttees.

<sup>5</sup> Godai intte wozanaa Xoossaa siiquwaakkonne Kiristtoosi immiyo danddayaakko kaaletto.

#### *Ooso Oottidi De7anaagee Gidde*

<sup>6</sup> Nu ishato, intte nuuppe ekkido wogaa kaallennan azalla de7uwaa de7iya isha ubbaappe intte shaahettanaadan, Godaa Yesuus Kiristtoosa sunttan inttena azazoos. <sup>7</sup> Aissi giikko, nuuni inttenaara de7iyo wode azallibeenna gishshau, intte nunadan hanidi de7anau bessiyogaa intte intte huuphen ereeta. <sup>8</sup> Nuuni intteppe oossinne tooho gidenna mala, qamminne gallassi daafuriiddinne jaamiiddi oottidi de7idoogaappe attin, bessiyaagaa oottennan ooppenne quma coo mibookko. <sup>9</sup> Nuuni

heгаа oottidoogee intte nunadan hanidi de7anaadan, nuuni intteyyo leemiso gidanaas-sappe attin, heгаа inttena oichchanau nuuyyo maati xayiina gidenna. <sup>10</sup> Aissi giikko, nuuni harai atto inttenaara de7iiddikka, “Oottanau koyenna urai ooninne mooppo” yaagidi inttena azazida.

<sup>11</sup> Aissi giikko, asa yohon geliyoogaappe attin, ainne oottennaageeti, azalla de7uwaa de7iya amarida asati intte giddon de7iyooгаа nuuni siyida. <sup>12</sup> Nuuni hegeetu mala asati maara de7uwaa de7anaadaaninne banttana koshshiyaabaa oottidi demmanaadan, Godaa Yesuus Kiristtoosa sunttan eta azazoosinne zoroos.

<sup>13</sup> SHin intte nu ishatoos, lo77o oosuwaa oottanau azaloppite. <sup>14</sup> Qassi nuuni ha dabddaabbiyan kiittido kiitaayyo azazettenna urai ooninne de7ikko, he uraa akeekite. I yeellatana mala, appe shaahettite. <sup>15</sup> SHin ishadan a seeriteppe attin, morkkedan xeelloppite.

### *Wurssetta Sarotaa*

<sup>16</sup> Sarotettaa Godai ba huuphen intteyyo ubba wodenne ubba baggaara sarotettaa immo. Godai inttenaara ubbaara gido.

<sup>17</sup> Taani PHauloosi, ha kiitaa ta kushiyan xaafaas; ta kiita ubbau malaatai hагаа. Taani hagaadan xaafais.

<sup>18</sup> Nu Godaa Yesuus Kiristtoosa aaro kehatettai inttenaara ubbaara gido.

## PHauloosi Ximootiyoosayyo Xaafido Koiro Kiitaa

### *Gidduwaa Erissuwaa*

Ximootiyoosa geetettiya, ammaniya wodallai, Qeeri Iisiyaa giyo sohuwan yelettiis. Ayyo aayyiya Aihuda; aawai qassi Giriike. I PHauloosaara zuppetiya asa; wonggeliyaa kiitaakka aara maadettidi oottiyaagaa. PHauloosi Ximootiyoosassi xaafido koiro kiitaa heezzu waanna aife yohota mintti xeellees.

Ubbaappe kasetidi kiitai woosa keettan denddidi uttida worddo timirttiyaabaa minttidi odees. Ha imatta gidida timirtee Aihudatu timirttiyaappe baggaa, Aihuda gidenna asatu timirttiyaappe baggaa oiqqidaagaa; “Hagee beettiya sa7ai nagaran hambbal-aashettiichchidaagaa gidiyoo gishshau, asi atotettaa demmanau dumma xuuraa eranau, issi issi qumata meennan agganaunne machcho ekkennaaninne azina gelennan naagettanau koshshees” yaagiya qofaa baaso oottidi oiqqidaagaa. Hegaa bollikka gujjidi a kiitai wosa keettaa aisuwabaanne goinuwa wogaabaa tamarissiya timirttiyaa, hegaadanka qassi woosa keettaa kaalettiyaageetinne eta maaddiyaageeti ai mala eeshshaara de7iyaageeta gidanau bessiyaakko odiyaabaa oiqqiis. Wurssettan Ximootiyoosi Yesus Kiristtoosassi oottiya lo77o asa waanidi gidanau danddayiyaakkonne qassi dumma dumma ammaniya asaa maabaraa achchan ayyo de7iya aawatettaa aibakko, PHauloosi a zorido zoriyaa demmoos.

<sup>1</sup> Nuna ashshiya Xoossainne nuuni be7ana giidi ufaissan naagiyo Yesuus Kiristtoosi azazido azazuwaadan, Yesuus Kiristtoosi kiittidoogaa gidida taani PHauloosi, <sup>2</sup> ammanuwaa baggaara ta tumu na7au, Ximootiyoosau ha dabddaabbiyaa xaafais.

### *Worddo Timirttiyaappe Naagettiyoogaa*

Xoossaa nu Aawaappenne nu Godaa Kiristtoos Yesuusappe aaro kehatettaa, maarotettainne sarotettaa neeyyo gido.

<sup>3</sup> Taani Maqidooniyaa baidda neeyyo giidoogaadan, neeni Efisoonaan takkana mala koyais. Issi issi asati worddo timirttiyaa tamarissoosona; hegeeti tamarissenna mala, aggite gaada oda. <sup>4</sup> Eti haisiyaa yootiyoogaanne bantta zariyaa gairiyoogaa agganaadan oda. Aissi giikko, hega malabai palamaa kaalettees; qassi Xoossaa qofaa ammanuwan erettiyaagaa oottokkona. <sup>5</sup> Ha azazuwau waanna qofai geeshsha wozanaappe, lo77o zoriya wozanaappe, asi be7o giyoobi bainna ammanuwaappe beettiya siiquwaa denttettanaassa. <sup>6</sup> Issi issi asati haggaa aggidi, pattenna haasayaakko simmidosona. <sup>7</sup> Eti ai haasayiyaakkonne woikko tumayidi yootiyoobai aibakko erokkona; shin Xoossaa higgiiyaa tamarissiyaageeta gidanau koyoosona.

<sup>8</sup> Asai bessiyaagaadan higgiiyan go7ettikko, higgee lo77o gidiiyoogaa nuuni eroos. <sup>9</sup> Issibaa akeekanau koshshees. Higgee lo77o asau merettibeenna. SHin higgiiyaa menttiyaageetuyyo, azazettennaageetuyyo, makkalanchchatuyyo, nagaranchchatuyyo, geeshshatetti bainnaageetuyyo, tunatuyyo, bantta aayyiyo woikko aawaa woriyaageetuyyo, shemppuwaa woriyaageetuyyo, <sup>10</sup> shaaramuxanau qaaqqatiyaageetuyyo, attumaasai attumaasaara shaaramuxiyaageetuyyo, asa baizziyaageetuyyo, worddanchchatuyyoonne wordduwan caaqqiyaageetuyyo, woikko tumu timirttiyaara gaittena ai ooso gidinkka oottiyaageetuyyo kiyiis. <sup>11</sup> Qassi anjjettida Xoossai taani awaajjana mala, tau hadaraa immido bonchcho wonggeliyaa giddon he timirtee de7iyooagaakka nuuni eroos.

### *PHauloosi Xoossaayyo SHiishshido Galataa*

<sup>12</sup> Taani oottiyo oosuwan taayyo wolqqaa immida nu Godaa Kiristtoos Yesuusa galatais. Tana ba oosuwau sunttidi, tana he oosuwau bessiyaagaa giidi goodiyo

gishshaukka a galatais. <sup>13</sup> Taani hagaappe kase a cayiyaagaa, a yedettiyaagaanne tug-gaiyaagaa gidikkokka, taayyo hagai i oottiis. SHin taani erennan oottido gishshaunne ammanabeenna gishshau, Xoossai tana maariis. <sup>14</sup> Qassi nu Godai zawai baina ba aaro kehatettaa ta bollan gussidi, Kiristtoos Yesuusa baggaara nubaa gidiya amanuwaanne siiquwaa taayyo immiis.

<sup>15</sup> Kiristtoos Yesuusi nagaranchchata ashshanau ha sa7aa yiis giyo haasayai amanettidaagaanne asai ubbai tuma giidi ekkana bessiyaabaa. Ubbappe aadhdhiya nagaranchchai tana. <sup>16</sup> SHin merinaa de7uwaa ekkana aani ammananau bessiya asau taani leemiso gidanaadan, ubbaappe aadhdhiya nagaranchchau taayyo Yesuus Kiristtoosi keehi danddayidoogaadan, Xoossai tana maariis. <sup>17</sup> Aifiyan beettena merinaa Xoossau issuwau, merinaa Kawuwau, merinaappe merinaa gakkanaassi galatainne bonchchoi gido.

<sup>18</sup> Ta na7aa Ximootiyoosaa, kase nebaa hananabaa yootidoogaadan, he yootidoogan lo77o olaa neeni olettana mala, ha azazuwaa neeyyo hadaraa immais. <sup>19</sup> Ammanoinne lo77o zoriya wozanai neeyyo de7o. Issooti issooti banttana zoriya wozanaa yeggi aggidi, laaggiyaabi baina markkabee bayiyoogaadan, bantta amanuwa bashshidosona. <sup>20</sup> Xoossaa cayiyoogaa aggana mala, heгаа tamaanau taani Seexaanau aatta immido Hemeneyoosinne Iskkindiri eta giddon de7oosona.

## 2

### *Woosa Keettaa Woosaa*

<sup>1-2</sup> Nuuni Xoossaa milatiyoogan, geeshshatetta ubban, sarotettaanne ashkкетetan de7ana mala, asa ubbau, kawotuyyoonne sunttatetta de7iyo ubbatuyyo, Xoossaa oichchanau, woossanau, gaannatanaunne galatanau bessiyogaa ubbabaappe kasetada taani nena erissais. <sup>3-4</sup> Asai ubbai attanaadaaninne tumatetta eranaadan koyiya nuna ashshiya Xoossaa sinttan hagee lo77iyaabaanne ufaissiyaabaa. <sup>5</sup> Aissi giikko, issi Xoossai de7ees; Xoossaappenne asaappe gidduwan gididi gaannatiya issi de7ees. Hegeekka Kiristtoos Yesuusa giyo asa. <sup>6</sup> I asaa ubbaa wozanau bana ubbau immiis. Xoossai ba wodiyan asa ubbaa wozanau koyiyoogaa bessiya markkai hagai. <sup>7</sup> Taani Xoossaa qaala yootiyaagaa, Yesuusi kiittidoogaanne qassi amanuwaaninne tumatettan Aihuda gidenna asaa tamarissiyaagaa gidada sunttettidoogee hegaassa. Taani worddotikke; tumaa haasayais.

<sup>8</sup> Hega gishshau, ubbasan de7iya attumaasai hanqqoinne palami binnan, ba geeshsha kushiyaa pude denttidi, Xoossaa woossanaadan, taani koyais.

<sup>9-10</sup> Hegaadan qassi maccaasaikka bessiya maayuwa kiphataaninne banttana shishshi ekkiyoogan maayona. Xoossau yayyais giya maccaasau bessiyogaadan, lo77obaa oottiyoogaanappe attin, huuphiyaa shurubbaa daddiyoogan, worqqan woikko inqquwan, woikko daro al77o afalan banttana alleeqissoppona.

<sup>11</sup> Maccaasai ubaban haarettidi, co77u giidi tamaro. <sup>12</sup> Taani maccaasai co77u giidi de7ona gaisippe attin, attumaasaa tamarissona woikko eta bolli aawatona giikke. <sup>13</sup> Aissi giikko, Addaamee koiro merettiis; Hewaana guyyeppe merettaasu. <sup>14</sup> Hewaana cimettada Xoossaa higgiiya menttaasuppe attin, Addaamee cimettibeenna. <sup>15</sup> SHin maccaasai amanuwan, siiquwan, geeshshatettaanne banttana kiphatiyoogan de7ikko, naata yeliyoogan attana.

## 3

### *Woosa Keettaa Kaalettiyaageeta*

<sup>1</sup> Ooninne woosa keettaa kaalettiyaagaa gidanau koyikko, lo77obaa amottiis giyo haasayai tuma. <sup>2</sup> Woosa keettaa kaalettiya urai borettennaagaa, issi machchee xalaalai de7iyoogaa, kiphatanchchaa, bana naagiyaagaa, bau bessiyaabaa oottiyaagaa, imattaa

mokkiyaagaa, tamarissanau danddayiyaagaa, <sup>3</sup> mattottennaagaa, ashkktettappe atin ooyettennaagaa, palamettennaagaa, miishsha siiqennaagaa, <sup>4</sup> naati ayyo azazettiyoogaanne bonchchiyoogaa, qassi ba keettaa aissanau danddayiyaagaa gidanau bessees. <sup>5</sup> Aissi giikko, issi urai ba keettaa aissanau danddayennaagaa gidikko, Xoossaa woosa keettaa waati aissanau danddayii?

<sup>6</sup> Otoruwan sugettidi, xalahe halaqai Xoossaa pirddan kunddidoogaadan kunddenna mala, ooratta ammanida asa gidanau bessenna. <sup>7</sup> Xalahe halaqaa boriyaaninne piriyan gelenna mala, he aawi woosa keettaappe kareera de7iya asan nashettiyaagaa gidanau bessees.

### *Woosa Keettan Maaddiyaageetubaa*

<sup>8</sup> Hegaadan qassi woosa keettan oottiyaageeti cinccata, naa77a haasayennaageeta, daro woiniyaa eessaa uyennaageeta, yaaretennaageeta, <sup>9</sup> ammanuwaa xuuraa geeshsha zoriya wozanan naagiyaageeta gidanau bessees. <sup>10</sup> Hegeeti kasetidi paacettanau koshshees. Paaciyaa aadhdhidoogaappe guyyiyan, woosa keettan oottiyaageeta gididi oottona.

<sup>11</sup> Hegaadan qassi eta maccaasati cinccata, zigireennaageeta, kiphatanchchata, ubban ammanettiyaageeta gidanau bessees.

<sup>12</sup> Woosa keettan oottiyaagee issi machchee xalaalai de7iyooogaanne qassi ba naatanne ba keettaa loitti aissiyaagaa gidanau bessees. <sup>13</sup> Aissi giikko, woosa keettaa maaddiyaageeta gididi, lo77o ooso oottiyaageeti bantta huuphiyau gita bonchchuwaa demmoosona; qassi Kiristtoos Yesuusana banttau de7iya ammanuwaa keehi xalidi haasayanau danddayoosona.

### *Gita Xuuraa*

<sup>14</sup> Taani neekko eesuan baana gaada haggaa neeyyo xaafais. <sup>15</sup> SHin taani beennan gam77ikko, Xoossaa keettan neeni waana de7anau bessiyaakko erana mala xaafais. He keettai tumatettau tuussanne tuuqe gidida de7o Xoossaa woosa keettaa. <sup>16</sup> Nu ammanuwaa xuurai gita gidiyoooga ooninne kashi gaanau danddayenna.

Kiristtoosi ashuwan qonccii;

i xillo gidiyoooga Geeshsha Ayyaanai markkattiis.

Kiitanchchatikka a be7idosona;

Aihuda gidenna asai abaa yootin siyiis.

Sa7an de7iya asai a ammaniis;

bonchchuwan i saluwaa biis.

## 4

### *Worddo Asttamaareta*

<sup>1</sup> Issi issi asai wurssetta wodiyan ammanuwaa agganaagaa Geeshsha Ayyaanai qoncciiyan yootiis. Eti worddo ayyaanatuyyo azazettana; qassi xalahetu timirttiyaa kaallana. <sup>2</sup> Haggaa mala timirttee zoriya wozanai taman bonqqida biratan xuuggidobaadan donjjillida worddanchcha asatu baggaara yiis.

<sup>3</sup> Hageetu mala asati ekkioogaanne geliyoogaa qassi issi issi qommo kattaa miyoogaa diggoosona. SHin ammaniyaageetinne tumatettaa eriyaageeti Xoossaa galatidoogaappe guyyiyan maana mala, Xoossai kattaa medhdhiis. <sup>4</sup> Aissi giikko, Xoossai medhdhidobai ubbabaikka lo77o. Xoossaa galatidi ekkikko, wora yeggiyo aibinne baawa. <sup>5</sup> Aissi giikko, he ubbaba Xoossaa qaalaaninne woosan anjettidaagaa.

### *Kiristtoosassi Lo77o Ashkkara Gidiyoogaa*

<sup>6</sup> Heggaa gishshau, neeni ishannta heggaa hassayissiyaabaa gidikko, ammanuwaanne neeni kaallido lo77o timirttiyaa qaalaa maasa; qassi neeni Kiristtoos Yesuusa ashkkara.

<sup>7</sup> SHin ammaniya asau lo77enna haasayaappenne qassi ceega maccaasa haisiyaappe



baqata. Qassi Xoossaa milatiyoogan nena loohissa. <sup>8</sup> Aissi giikko, asai ba bollaa minttiyoogee guutaa go77ees. SHin Xoossaa milatiyoogan lohissiyoogee ha77ikka sinttappekka de7uwaa immana giyo gishshau, ubbabaukka go77ees. <sup>9</sup> Ha haasayai asai ubbai ekkanau bessiyu tumu haasaya. <sup>10</sup> Nuuni hegaa demmanau daafuroosinne keehi oottoos; hegaa gishshau, nuuni cayettoos. Aissi giikko, asa ubbaa, ubbaappekka aattidi, ammaniyaageeta ashshiya de7o Xoossaappe nuuni ekkana giidi uttida.

<sup>11</sup> Haggaa azazanne tamarissa. <sup>12</sup> Neeni yelaga gidio gishshau, nena ooninne karoppo. SHin ammaniyaageetuyyo ne haasayan, hanotettan, siiquwan, ammanuwaaninne geeshshatettan leemiso gida. <sup>13</sup> Taani yaana gakkanaassi asassi Xoossaa maxaafaa nabbabiyoogan, Xoossaa qaalaa yootiyoogaaninne tamarissiyooogan minna. <sup>14</sup> Hananabaa yootiyaageeti haasayiinne cimati bantta kushiya ne bolli wottin, neeni ekkido, nenan de7iya Geeshsha Ayyaanaa imuwaa toochchoppa.

<sup>15</sup> Ne dichchai asa ubbau qonccana mala, hegaa mintta qoppa. Haggaa ubba wode ootta. <sup>16</sup> Ne huuphiyaanne ne timirttiyaa naaga. Neeni hegaa oottikko, nennanne neeni giyoogaa siyiyaageeta ashshiyo gishshau, aggennan ootta.

## 5

### *Am77etubaa Zorido Zoriyaa*

<sup>1</sup> Cima asa ne aawaa bonchchiyoogaadan bonchchappe attin, toochchoppa. Yelagata ne ishadan, <sup>2</sup> qassi cima maccaasa ne aayeedan, yelaga maccaasa ne michcheedan, kumetta geeshshatettan bonchcha.

<sup>3</sup> Tumu am77eta bonchcha. <sup>4</sup> SHin am77eeyyo naati woikko naatu naati de7ikko, he naati Xoossaa milatiyoogaa bantta so asaa bessiyooogaanne qassi hegaa oottiyoogan banttana yelidaageetuyyo kushe zaariyoogaa tamarona. Aissi giikko, hegee Xoossaa ufaissiyaabaa.

<sup>5</sup> Ai maadoikka bainna tumu am77iyaa Xoossai immana gaada ufaissan naaga uttaasu. Qassi gallassinne qammi Xoossai o maaddana mala, woossausunne oichchaasu. <sup>6</sup> SHin bana ishalissiya am77iyaa paxa de7ikkokka, a haiqqaichchaasu. <sup>7</sup> Qassi ooninne eta borena mala, ha azazuwaa imma. <sup>8</sup> SHin baageetuyyo qassi ubbaappe aattidi, ba so asaayyo qoppenna urai oonanne gidikko, he aawi ba ammanuwaa kaddidaagaa. Ammanenna asaappekka aadhida iitaa.

<sup>9</sup> Usuppun tammu laittai kumibeenna am77ee sunntaa mazggafan xaafoppa. Hegaa bollan qassi a issi azinaappe haraa gelabeennaaro gidanau koshshees. <sup>10</sup> Naata dichchiyoogan, imattaa mokkiyoogan, geeshshatu tohuwaa meecchiyoogan, waayettida asaa maaddiyoogan, lo77o ooso ubbaa kaalliyoogan, ha lo77o oosuwaa oottiyoogan erettidaaro gidanau bessees.

<sup>11</sup> SHin yelaga am77eta hinkkootu sunntaara gatta xaafoppa. Aissi giikko, eti banttana azinaa gela gela giyo wode, Kiristtoosa aggi bayana. <sup>12</sup> Koiro ammanuwaa karido gishshau, eti pirddeettana. <sup>13</sup> Hegee bannan ooso xayidi issi keettaappe hara keettaa hoskkattana. Hoskkattiyoogee hemettiyoogaa xalaala gidennan, banttau bessennabaa haasayiiddi, zigurssaanne yohon coo geliyoogaa tamaroosona. <sup>14</sup> Hegaa gishshau, nu morkketi nu bolli haasayiyo iitabaa demmenna mala, yelaga am77eti azinaa gelidi, na7a yelidi, bantta keettaa aissana mala zorais. <sup>15</sup> Aissi giikko, hagaappe kase amarida am77eti Seexaanaa kaallanau aggidi guyye simmidosona.

<sup>16</sup> Ammaniya maccaaseeyyo ainniyookka dabbo am77eti de7ikko, a eta maaddanau bessees. Woosa keettaa maadoi bessiyu tumu am77eta maaddana mala, eti woosa keettaayyo tooho gidoppona.

<sup>17</sup> Loitti heemmiya cimati, qassi ubbaappekka aattidi, qaalaa yootiyoogaaninne tamarissiyooogan daafuriyaageeti, naa77u kushe bonchchuwaa ekkanau bessees.

<sup>18</sup> Aissi giikko, Xoossaa maxaafai, “Audiyan kattaa yedhdhiya booraa doonaa qach-choppa” qassi, “Oosanchchai ba damoozaa ekkana bessees” yaagees.

<sup>19</sup> Naa77u woi heezzu markki bannan, woosa keettaa cimaa mootiyoobaa siyoppa.

<sup>20</sup> Harati yayyana mala, nagara oottiya ubbata asa ubbaa sinttan seera.

<sup>21</sup> Neeni ainne asa som77o xeellennan, issuwaa issuwaappe dummayennan ha azazuwaa naagana mala, Xoossanne Godaa Yesuus Kiristtoosa doorettida kiitanchchatu sinttan nena taani zorais. <sup>22</sup> O bollaanne eesotada ne kushiya wottoppa. Haratu nagaran geloppa. Nena geeshshatettan naaga.

<sup>23</sup> Neeni ubba wode sakettiyo gishshaunne ne uluwaa gishshau, guutta woiniyaa eessaa uyappe attin, haatta xalaalaa uyoppa.

<sup>24</sup> Issi issi asatu nagarai be7anau qoncce; eta nagarai eta pirddanau etappe sinttau aadhdhees. SHin haratu nagarai guyyeppe qoncces. <sup>25</sup> Hegaadankka, lo77o oosoikka qoncce. Qonccibeennabaa gidikkokka, gemmanau danddayenna.

## 6

### *Ashkkaratussi Imettida Zoriyaa*

<sup>1</sup> Xoossaa sunttainne nu timirttee cayettenna mala, ailletettaa qambbaraa giddon de7iyaageeti banttana haariya godatuyyo bonchchoi bessiyooгаа erona. <sup>2</sup> Ammaniya asaa aille gidiyaageetuyyo eta godati etau isha gidiyo gishshau, eta karoppona. SHin bantta oosuan go7ettiyaageeti eti siiqiyo ammaniyaageeta gidiyo gishshau, eti kaseegaappe aattidi oottanau bessees.

### *Worddo Timirttiyaanne Tumu Duretettaa*

Neeni ha yohota tamarissanaunne yootanau bessees. <sup>3-4</sup> Ai asinne dumma timirttiyaa tamarissiyaabaa gidikko, qassi nu Godaa Yesuus Kiristtoosa tumu qaalaaranne nu haimaanootiyaa timirttiyaara gaittenna urai daro otorettees; ainneka erenna. Qassi qaalaa bollan palamettanaunne ooyettanau etau giigenna qofai de7ees. Hegee qanaatiyaa, palamaa, cashshaa, iita siriya kaalettees. <sup>5</sup> Qassi eta huuphee oottenna. Tumatetti banna asatuurakka palamaa kaalettees. Eti Xoossaa milatiyoogan duretana giidi qoppoosona. Neeni he asatuppe shaahetta.

<sup>6</sup> SHin taayyo de7iyaabai tau gidana giya ura Xoossaa milatiyoogee dureyees. <sup>7</sup> Aissi giikko, nuuni ha sa7aassi ainne ehibookko; qassi appe ainneka ekkokko. <sup>8</sup> SHin miyoobainne maayiyoobai de7ikko, hegee nuuyyo gidana. <sup>9</sup> SHin duretana koyiyaageeti paaciyaanne piriyan geloosona; qassi daro asaa bashshaunne xayuwau goochchi efiya daro eeyyanne qohiya amuan kunddoosona. <sup>10</sup> Aissi giikko, miishsha siiqiyoogee iitatetta ubbau pultto. Issooti issooti heгаа amottiiddi, ammanuwaappe balettidi, daro metuwan banttana qohidosona.

### *PHauloosi Ximootiyoosa Zorido Zoriyaanne Azazido Azazuwaa*

<sup>11</sup> SHin neno, Xoossaa asau, hegaappe baqata. Xillotettaa, Xoossaa milatiyoogaa, ammanuwaa, siiquwaa, danddayaanne ashkкетettaa kaalla. <sup>12</sup> Ammanuwaa baaxiyaa loitta baaxeta. Daro asaa sinttan lo77o markkaa markkattaidda, nena Xoossai xeesido merinaa de7uwaa oiqa. <sup>13</sup> Ubbabau de7o immiya Xoossaa sinttaaninne, qassi PHenxxeniyaa PHilaaxoosa giyo biittaa haariyaagaa sinttan lo77o markkaa markkattida Kiristtoos Yesuusa sinttan taani nena hгаа azazais. <sup>14</sup> Nu Godaa Yesuus Kiristtoosi qonccana gakkanaassi, qiti bannaanne boree bannan he azazuwaa naaga. <sup>15</sup> A qonccettaa, anjettida issi sunttai, kawotu Kawoi, godatu Godai, Xoossai besiyaa wodiyan bessana. <sup>16</sup> Haiqqennaagee issi a xalaala. Ooninne akko shiiqanau danddayenna poo7uwan de7ees. Ooninne a be7ibeenna; qassi be7anaukka danddayenna. Bonchchoinne merinaa wolqqai ayyo gido. Amin77i.

<sup>17</sup> Ha77i ha wodiyan dure gidiyaageeti orettennaadaaninne qassi nuuni ufait-tanaadan, ubbabaa palahissidi nuuyyo immiya de7o Xoossan ammanettanaagaappe attin, aadhdhiya duretettan eti ammanettennaadan, eta azaza. <sup>18</sup> Eti lo77obaa oottanaadan, lo77o oosuwan duretanaadan, kehiyaageetanne haratuura shaakki ekkiyaageeta gidanaadan azaza. <sup>19</sup> Hegaa yaatiyoogan eti sinttanau banttau mino baaso gidiya miishshaa banttau shiishshoosona. Hegaappe guyyiyan, eti tumu de7uwaa ekkana.

<sup>20</sup> Ximootiyoosaa, issi issi asai balan eratetta giyo eeyya palamaappenne hada haasayaappe baqataidda, neeyyo imettida hadaraa naaga. <sup>21</sup> Aissi giikko, issooti issooti nuuyyo eratetti de7ees yaagiiddi, ammanuwaa balidosona.

Xoossaa aaro kehatetta inttenaara ubbaara gido.

## PHauloosi Ximootiyoosayyo Xaafido Naa77antto Kiitaa

### *Gidduwaa Erissuwaa*

Hagee PHauloosi Ximootiyoosassi xaafido naa77antto kiitai PHauloosi matan bana maaddiyaanne oosuwaa banaara issippe oottiya wodallaa, Ximootiyoosa zorido zoriyaa oiqqidaagaa. A zoriyaappe dariya baggai gencan minnanau bessees giyaagaa. Ximootiyoosi zoriyaanne minttettuwwaa qaalaa demmidoogee, Yesus Kiristtoosabaa tumaa markkattanaassa, mishiraachchuwwaa qaalaanne Gal77a Maachchaa timirtiyaa minttidi oiqqanaassanne metiyaabainne eqettiyaabai darikkonne tamarissiy-oogaanne Wonggeliyaa Mishiraachchuwwaa odiyooogan minnanaassa.

Ximootiyoosi pattenna haasayaappe haakkana mala, dumma mino odoi ayyo odettiis. Aissi giikko, heгаа mala odoi siyiyaageeta bashshiyooгаappe attin, harabai i immiyo go77i baawa.

Hegan ubbankka Ximootiyoosi hassayanau bessiyaabai PHauloosa hanotaanne a de7uwaa halchchuwwaa, heгаappekka a ammanuwaa, a genccaa, a siiquwaa a dand-dayaanne yedetan a gakkida metuwaa leemiso oottidi kaallanaagaa.

<sup>1</sup> Taani PHauloosi, Xoossai immana giido Kiristtoos Yesuusaara nuuyyo de7iya de7uwaabaa yootanau, Xoossai giidoogaadan, Kiristtoos Yesuusi kiittidoogee, <sup>2</sup> ta siiqona7aa Ximootiyoosayyo ha dabddaabbiyaa xaafais.

### *Ximootiyoosau Imettida Zoriyaa*

Xoossaa Aawaappenne nu Godaa Kiristtoos Yesuusappe, aaro kehatettai, maarotettainne sarotettai neeyyo gido.

<sup>3</sup> Ta zareti oottidoogaadan, taanikka tana zoriya geeshsha wozanaappe oottiyo Xoossaa qamminne gallassi woossiyo woosan ubba wode nena hassayiyo gishshau, a galatais. <sup>4</sup> Taani ne afuttaa hassaya hassayada ufaittana mala, nena be7anau daro laamotais.

<sup>5</sup> Nenan de7iya worddoi banna ammanuwaa hassayais. He ammanoi beni ne aayee aayee Loidiininne ne aayee Euniiqin de7iya ammanuwaa mala; qassi nenanka hegee de7iyooгaa eraas. <sup>6</sup> Hegaа gishshau, taani ta kushiyaа naa77aa ne bolli wottido wode, Xoossai neeyyo immido imuwaa neeni doshissenna mala, nena hassayissais. <sup>7</sup> Aissi giikko, Xoossai nuuyyo wolqqaa, siiquwaanne nu huuphiyaa naagiyoogaa immiya Geeshsha Ayyaanaa immiisippe attin, yashsha ayyaanaa immibeenna.

<sup>8</sup> Simmi, nu Godaayyo markkattiyoogan woikko a gishshau qashuwan de7iya tabankka yeellatoppa. SHin Xoossai neeyyo immiyo wolqqaa keenan tanaara wonggeliyaayyo waayetta. <sup>9</sup> Xoossai ba qofaaninne ba aaro kehatettan nuna ashshidi, ba asa oottanau xeesidoogaappe attin, nuuni oottido oosuwaa gishshau gidenna. I ha aaro kehatettaa Kiristtoos Yesuusa baggaara wodee doomettanaappe kase nuuyyo immiis. <sup>10</sup> SHin ha77i ha aaro kehatettai nuna ashshiya Kiristtoos Yesuusa yuussan nuuyyo qoncciiis. Qassi haiquwaa wolqqaakka i xaissiiis. Wonggeliyaa mishiraachchuwwaa baggaara xayenna de7uwaa nuuyyo qonccissees.

<sup>11</sup> Taani Yesuusi kiittidoogaanne Aihuda gidenna asaa tamarissiyaagaa gidada, wonggeliyaa mishiraachchuwwaa yootana mala, Xoossai tana dooriis. <sup>12</sup> Qassi taani ha metuwaa ekkiiyoogee heгаа gishshassa. SHin taani ammanidoogaa eriyo gishshau, yeellatikke. Qassi taani ayyo immido hadaraa he gallassai gakkanaassi, i naaganau danddayiyoogaa erais.

<sup>13</sup> Taani nena tamarissido tumu qaalaa leemiso ootta oiqqada, Kiristtoos Yesuusan nuuyyo de7iya ammanuwaaninne siiquwan de7a. <sup>14</sup> Nu gidдон de7iya Geeshsha Ayyaanaa baggaara neeyyo hadaraa immido lo77obaa naaga.

<sup>15</sup> Isiyaa giyo biittan de7iya ubbati taappe baqatidoogaa eraasa; eta gidдон Pigelusinne Hermmogeneesi de7oosona.

<sup>16</sup> Henesifooru tana daro wode minttettido gishshau, Godai a so asaayyo maarotettaa immo. Qassi taani qasho keettan de7iyooogan i yeellatibeenna. <sup>17</sup> SHin Roome giyo katamaa gakkidosaara tana keehi koyidi demmiis. <sup>18</sup> He gallassi Godaappe maarotettaa demmanaadan, Godai ayyo immo. Qassi Efisoona giyo kataman i tana ai keenaa maaddidaakkonne neeni loitta eraasa.

## 2

### *Kiristtoosayyo Lo77o Wotaaddara Gididi Metuwaa Ekkiyoogaa*

<sup>1</sup> Simmi ta na7au, Kiristtoos Yesuusan de7iya aaro kehatettan minna. <sup>2</sup> Qassi daro markkati de7iyooosan taappe neeni siyido yohota harata tamarissanau danddayiya ammanettida asatuyyo hadaraa imma.

<sup>3</sup> Yesuus Kiristtoosayyo ammanettida wotaaddaradan, tanaara waayetta. <sup>4</sup> Olaa biya wotaaddarai ba halaqaa ufaissanau, wotaaddara gidenna asai oottiyo oosuwan wala-hettenna. <sup>5</sup> Qassi baaxiyaa gaittiya uraikka baaxetana xayikko, woiuwaa ekkenna. <sup>6</sup> Daro daafuridi oottida biittaa goyiya bitanee shiiqida kattaappe bana gakkiiyaagaa koiro ekkanau bessees. <sup>7</sup> Neeni ubbabaa akeekanaadan, Godai nena danddayissana gishshau, taani giyoogaa qoppa.

<sup>8</sup> Taani wonggeliyaa mishiraachchuwaa yootiyoogaadan, haiquwaappe denddida Daawita zariyaa Yesuus Kiristtoosa qoppa. <sup>9</sup> Taani wonggeliyaa mishiraachchuwaa yootiyo gishshau, iitabaa oottidabaadan, harai atto qashettana gakkanaassi waayettais. SHin Xoossaa qalalai qashettenna. <sup>10</sup> Hegaa gishshau, taani Xoossai doorido asatikka Kiristtoos Yesuusan de7iya atotettaa merinaa bonchchuwaara demmanaadan, eta gishshau, taani ubbaban waayettais.

<sup>11</sup> Hagee,

“Nuuni aara issippe haiqqidobaa gidikko,  
aara issippe de7ana.

<sup>12</sup> Nuuni genccikko,  
aara issippe kawotana.

Nuuni a kaddikko,  
ikka nuna kaddana.

<sup>13</sup> Nuuni ammanettennan aggikkokka,  
i ammanettiyaagaa gididi de7ana.

Aissi giikko, i bana ba huuphen  
erikke gaanau danddayenna”  
giyaagee tumu haasaya.

### *Mino Oosanchchaa*

<sup>14</sup> Neeni ne asaa haggaa hassayissa; eti qaalan palamettenna mala, Xoossaa sinttan zora. Hegee siyiya asa mooriyoogaappe attin, ainne go77enna. <sup>15</sup> Neeni Xoossaa tumatettaa qaalaa suuretettan yootiyaagaanne qassi a oosuwaayyo yeellatenna oosanchcha gidada, Xoossai sabbiyo asadan, ne huuphiyaa Xoossau immanau minna.

<sup>16</sup> SHin ha sa7au injjetiya pattenna haasayaappe nena naaga. Aissi giikko, hegee Xoossaappe asa haassees. <sup>17</sup> Qassi eti tamarissiyoogee bollaa mirggiya cittuwaadan ubbasaa gakkana. He tamarissiyaageetuppe naa77ati Hemeneyoosanne Piliixoosa. <sup>18</sup> Eti tumaa ogiyaa aggidi, “Nuuni haiquwaappe denddiyoogee kase aadhdhiichchiis” yaagidi amarida ammaniya asatu ammanuwaa bashshoosona.



<sup>19</sup> Gidikkokka, Xoossai essido mino tuussai qaaxxana danddayenna. Qassi a bollan, “Godai baageeta erees”; qassi “Godaabaa gidiya ooninne iita ooso aggi bayo” yaagiya qaalati xaafettidosona.

<sup>20</sup> Issi gita keettan worqqaappenne biraappe merettida miishsha xalaala gidennan, mittaappenne urqqaappe merettida miishshatika de7oosona. Hegeetuppe baggati bonchcho oosuwaan etan oottanau, qassi baggati tooshettiyaabaa etan oottanau merettidosona. <sup>21</sup> Hegaa gishshau, ooninne ha iitabaa ubbaappe bana geeshshikko, i ba Godaa go77iya ooso oottanau bana immido gishshau, bonchcho ooso oottiyo miishsha gidana. Qassi lo77o ooso ubbaa oottanau gigettidaagaa gidana.

<sup>22</sup> SHin neeni iita wodallatetta amuwaappe baqata. Banttana maaddanau geeshsha wozanaappe Godaa xeesiyaageetuura issippe, xillotettaa, ammanuwaa, siiqotettaanne sarotettaa minttada kaalla.

<sup>23</sup> SHin eeyyatu palamainne ainne erennaageetu palamai ooshsha kaalettiyoogaa erada appe baqata. <sup>24</sup> Godaa ashkkaarai ubbaayyo kehiyaagaa, loitti tamarissiyaa-gaanne danddayanchcha gidanau besseesippe attin, ooyettanau bessenna. <sup>25</sup> Qassi i bana ixxiyaageeta ashkketettan seeriyaagaa gidanau bessees. Eti bantta nagaraappe simmidi, tumatettaa eranaadan Xoossai oottanaakko, ooni erii. <sup>26</sup> Qassi eti bantta wozanaa qofau simmidi, banttana ba koyidobau azazettana mala oiqqida xalahee halaqaa gitiyaappe kessi ekkana.

### 3

#### *Wurssetta Gallassatun Hananau De7iya Iita Yohota*

<sup>1</sup> SHin wurssetta gallassi waissiya wodee yaanaagaa akeeka. <sup>2</sup> Aissi giikko, asati banttana siiqiyaageeta, miishshaa siiqiyaageeta, ceeqettiyaageeta, ayyiyaageeta, cayiyaageeta, banttana yelidaageetuyyo azazettennaageeta, galatennaageeta, geeshshatetti bannaageeta, <sup>3</sup> siiqoi bannaageeta, sigettennaageeta, zigirssanchchata, banttana naagennaageeta, kehennaageeta, lo77obaa dosennaageeta, <sup>4</sup> kashi erikke giyaageeta, eesotiyaageeta, otoruwan sugettiyaageeta, qassi Xoossaappe aattidi, ufaittiyoobaa dosiyaageeta gidana. <sup>5</sup> Eti nu ammanuwaa bolla doonan ekkidabaa milatana; shin a tumu wolqqaa erikke gaana. Hegeetu mala asatukko shiiqoppa.

<sup>6-7</sup> Aissi giikko, etappe issoi issoi asa keetta gelidi, nagarai deexxidoogeeta, dumma dumma amuwan sugettiyaageeta, ubba wode tamaridi, tumatettaa eratettaa ekkana mule danddayibeenna daafuranchcha maccaasata godatoosona. <sup>8</sup> Yaaneesinne Yambbareesi Muuse yohuwaa phalqqidoogaadan, hegaadan qassi hageeti, suure qofai bannaageeti ammanuwan kunddidaageeti, tumatettaabaa phalqqoosona. <sup>9</sup> SHin Yaaneesa eeyyatettanne Yambbareesa eeyyatetta qassi qonccidoogaadan, eta eeyyatettaikka asa ubbau qonccana gishshau, eti kaseegaappe aadhdhidi go7ettokkona.

#### *Wurssetta Zoriyaa*

<sup>10</sup> SHin neeni ta timirttiyaa, ta hanotaanne ta qofaa, ta ammanuwaanne ta danddayaa, ta siiquwaanne ta genccaa, <sup>11</sup> ta yedetaanne ta waayiyaa be7adasa. Anxxookiyaanne, Iqooniyoonne Lisxxira giyo katamatun tana gakkidabaanne taani danddayido yedetaa eraasa. Godai tana he ubbaappe ashshiis. <sup>12</sup> Tumattettan Kiristtoos Yesuusan Xoossaa milatidi de7anau dosiya ubbai yedetettana. <sup>13</sup> SHin iita asatinne balettiyaageeti harata balettiiddinne bantta huuphiyau baliiddi, kaseppe iiti iiti boosona.

<sup>14</sup> SHin neeni he tumatettaa ooppe tamaridaakkonne erada, neeni tamaridoogaanne eridoogan minnada de7a. <sup>15</sup> Neeni guutta naatettaasappe doommada Kiristtoos Yesuusa ammanada, atotetta beettiyo aadhdhida eratettaa immanau danddayiya geeshsha maxaafata eradasa. <sup>16-17</sup> Xoossaa maxaafa ubban Xoossaa Ayyaanai

de7ees. Qassi he maxaafati Xoossau oottiya asi kumettanne lo77o ooso ubbau giigi-daagaa gidana mala, tumatettaa tamarissanau, balaa seeranau, mooruwaa suuris-sanaunne xillotetta de7uwau zoriyaa immanau maaddoosona.

## 4

<sup>1</sup> Taani nena Xoossaa sinttaaninne, paxa de7iya asaanne haiqqida asaa pirddanau de7iya Kiristtoos Yesuusa sinttan, qassi a yuussaaninne a kawotettan nena zorais. <sup>2</sup> Qaalaa yoota. Wodee injjetin injjetana xayin, minnada yoota. Daro danddayan asaa tamarissaidda bora, seeranne zora. <sup>3</sup> Aissi giikko, asai tumu timirttiyaa ezggennan ixxiyo wodee yaana. SHin asai bantta amuwaa kaallidi, siyanau ufaissiyaabaa yootiya tamarissiyaageeta gujji gujji shiishshana. <sup>4</sup> Eti tumu yohuwaa siyiyoogaa aggidi, haisiyaa siyanau bantta haittaa wora zaarana. <sup>5</sup> SHin neeni ubbanan ne huuphiyaa naaganau bessees. Waayiyaa danddaya. Wonggeliyaa mishiraachchuwaa yootiyaagee oottiyo oosuwaa ootta. Xoossaa ashkharadan, ne oottiyo ooso ubbaa pola.

<sup>6</sup> Tana gidikko, taani yarshshettiyo wodeenne qassi ha de7uwaa aggada biyo wodee gakkiiis. <sup>7</sup> Taani lo77o baaxiyaa baaxetaas; ta wottaanne woxxada wurssaas; amanuwaakka naagaas. <sup>8</sup> Sinttappe taayyo xillotettaa akiliilee giigi uttiis. Hegaa xillo pirddaa pirddiya Godai he gallassi taayyo sheedhdhana. Qassi Kiristtoosi qonccanaagaa dosiya ubbaassappe attin, ta xalaalaassa gidenna.

### *A Buzo Allaalletubaa*

<sup>9</sup> Taakko eesuwan yaanau minna. <sup>10</sup> Aissi giikko, Deemaasi ha wodiya sa7aa dosidi, tana aggidi, Tasalonqqe giyo katamaa biis. Qerqqiisi Galaatiyaa giyo biittaa bin, qassi Tiitu Dilmmaaxiyaa giyo biittaa biis. <sup>11</sup> Luqaasa xalaalai tanaara de7ees. Marqqoosi tana oosuwan keehi maaddanau danddayiyo gishshau, a demmada nenaara ekkada ya. <sup>12</sup> SHin taani Tikiqoosa Efiisoonaa giyo katamaa kiittaa. <sup>13</sup> Neeni yaidda, Xiro7aada giyo kataman Karppoosaagan taani yeggada yiido ta waaruwaanne qassi maxaafata taayyo ekkada ya. SHin galbban xaafettidaageeta ai gidikkonne, ekkennan yooppa.

<sup>14</sup> Birataa qoxxiya Iskkinddiri tana daro qohiis; Godai ayyo a oosuwaadan zaarana. <sup>15</sup> I nuuni yootiyoogaa keehi phalqqiyo gishshau, neeni appe nena naaga.

<sup>16</sup> Koiro tana mootiyo wode, ubbaikka aggi bayidoogaappe attin, tana ooninne maad-dibeenna. Xoossai hega etau qoodoppo. <sup>17</sup> SHin taani kumetta kiitaa Aihuda gidenna asai ubbai siyanau yootana mala, Godai ta matan eqqidi, taayyo wolqqaa immiis. Qassi gaammuwaa doonaappekka tana ashshiis. <sup>18</sup> Godai tana iitabaa ubbaappe ashshidi, ba saluwaa kawotetta sarotettan efaana; ayyo meri merinau bonchchoi gido. Amin77i.

### *Wurssetta Sarotaa*

<sup>19</sup> PHirisqqilo, Aqilanne Henesifooru so asaayyo ta sarotaa oda. <sup>20</sup> Erasxxoosi Qoronttoosa giyo kataman attiis. SHin Xirofimoosi sahettido gishshau, Miliixe giyo kataman a yeggaas. <sup>21</sup> Balggoi wodhdhanaappe kase yaanau minna.

Eubuluusi, PHudeesi, Liinoosinne Qilaadee qassi hara ishantti ubbaikka nena saro saro goosona.

<sup>22</sup> Godai Yesuus Kiristtoosi ne ayyaanaara gido. Xoossaa aaro kehatetta inttenaara ubbaara gido. Amin77i.

## PHauloosi Pilimoonayyo Xaafido Kiitaa

### *Gidduwaa Erissuwaa*

Pilimooni erettida ammaniya asa; i Qollasiyaasa woosa keettaa asa gidennan waayi aggana. Pilimoonayyo Anaasimoosa giyo ashkkarai de7ees. He ashkkarai ba godaappe betidi biido wode, qasho keettan de7iya PHauloosaara gaittiis. Anaasimoosi PHauloosa baggaara Yesuusa ammaniis. PHauloosi Pilimoonassi xaafido kiitai Pilimooni guyye simmidi biiddi de7iya ba ashkkaraara sigettanaadan, heгаа hassayissiyaagaa. Hegaa bollikka ha77i Anaasimoosi ammaniya asa gidido gishshau, heгааappe sinttan ammaniya ishadan a mokki ekkanaappe attin, ashkkaradan a qoodennaadan ayyo odees.

<sup>1</sup> Taani PHauloosi, Yesuus Kiristtoosa gishshau qashuwan de7iyaageenne nu ishaa Ximootiyoosi, nunaara oottiya nuuni siiqiyo Pilimoonayyo, <sup>2</sup> ne sooni shiiqiya woosa keettaayyo, nu michchee Afibiyyoonne nunaara issippe de7iya wotaaddaraa Arkkiposayyo ha dabddaabbiiyaa xaafos.

<sup>3</sup> Xoossaa nu Aawaappenne nu Godaa Yesuus Kiristtoosappe aaro kehatettainne sarotettaa intteyyo gido.

### *Pilimoona Siiquwaanne Ammanuwaa*

<sup>4-5</sup> Neeni geeshshata siiqiyoogaanne Godaa Yesuusa ammaniyoogaa taani siiyiyo gishshau, Xoossaa woossaidda nena hassayiyo wode ubban, ta Xoossaa galatais. <sup>6</sup> Neeni ne ammanuwaa haratuura shaakkiyoogee nuuyyo Kiristtoos Yesuusa baggaara yiya lo77obaa ubbaa erissana mala, taani Xoossaa woossais. <sup>7</sup> Aissi giikko, geeshshatu wozanai ne oosuwann minnido gishshau, ta ishau, taani ne siiquwan daro ufaissaanne minttettuwwaa demmaas.

### *Anaasimoosi Pilimoonakko Simmido Simuwaa*

<sup>8</sup> Hegaa gishshau, neeni oottanau bessiyaabaa oottana mala, taani nena azazanau Kiristtoosa baggaara xalikkokka, <sup>9</sup> Taani PHauloosi cimidaagee, Kiristtoos Yesuusayyo ha77ikka qashuwan de7iyaagee, siiquwaa gishshau, nena woossais. <sup>10</sup> Taani qashuwan de7aidda ayyo aawa gidido ta na7aa Anaasimoosa gishshau, nena woossais. <sup>11</sup> I kase nena go77enna; shin ha77i nenakka tanakka tumu go77ees.

<sup>12-13</sup> Taani wozanappe dosiyo Anaasimoosa neekko yeddais. Taani wonggeliyaa gishshau qashetta uttidaashin, ne gishshaa tau oottidi, tana maaddana mala, ta matan a ashshanau koyais. <sup>14</sup> SHin neeni ne shenedan oottanaagaa koyaisippe attin, nenaara zorettennan wolqqan ainne oottanau koyikke.

<sup>15</sup> Anaasimoosi guutta wodiya neeppe shaahettidoogee, ooni erii simmidi, ubba wodekka nenaara de7anaassakonne. <sup>16</sup> Simmi hagaappe sinttau Anaasimoosi aille gidenna; shin ailleppe i keehi aadhdhees; i taayyo ai keena siiqo ishee! Qassi i neeyyo asa baggaarakka Godaa baggaarakka ai keena aadhdhida isha gidanddeeshsha!

<sup>17</sup> Simmi neeni tana ne lagge giyaabaa gidikko, tana mokkiyoogaadan, a mokka. <sup>18</sup> I neeyyo mooridobai woi a bolli neeyyo acoi de7ikko, taappe qanxxuwaa ekka. <sup>19</sup> He acuwwaa taani qanxxana gaada, taani PHauloosi ta kushiyan xaafais. Neeni tau ne shemppuwaa acota uttidoogaa taani nena hassayissanau koshshenna.

<sup>20</sup> Ee ta ishau, Godaa baggaara neeppe go77a demmanau koyais. Kiristtoosa baggaara tana minttetta. <sup>21</sup> Taani giidoogaappe daruwaa neeni oottanaagaa erada, qassi ne tau azazettanaagaakka ammanada, haggaa neeyyo xaafais.

<sup>22</sup> Qassi intte he sohuwaarakka taayyo imatti shemppiyo keetta giigissite. Aissi giikko, Xoossai intte woosan tana intteyyo guyye zaaridi immana gaada qoppais.

### *Wurssetta Sarotaa*

<sup>23</sup> Kiristtoos Yesuusa gishshau, tanaara qashuwan de7iya Eppaafiri nena saro saro gees. <sup>24</sup> Qassi tanaara issippe oottiya Marqqoosi, Arisxxirokoosi, Deemaasinne Luqaasi nena saro saro goosona.

<sup>25</sup> Godaa Yesuus Kiristtoosa aaro kehatettai intte ayyaanaara gido.

## PHauloosi Ibraawe Asaassi Xaafido Kiitaa

### *Gidduwaa Erissuwaa*

Ha kiitai xaafettidoogee wolqqaama tuggai gakkii, ammanuwaa agganau matida ammaniya asatussa. Xaafee Xoossai banatettaa wurssetta qonccettaa qonccissi-doi tumu oge gidiya, Yesuus Kiristtoosa baggaara gidyoogaa bessidi, hageeti ammaniyaageeti bantta ammanuwan minnana mala, eta minttettees. I heгаа oottiiddi heezzu tumata gitayidi bessees:

1. Ba ekkido metuwaa baggaara Aawaassi tumu azazettida Yesuusi Xoossaayyo merinaa Na7a. I Xoossaa Na7a gidido gishshau, Gal77a Maachchaa wode hananabaa yootidaageetuppe, kiitanchchatuppenne, harai attin, Muuseppekka keehi aadhdhiyaagaa.
2. Yesuusi Gal77a Maachchaa qeesetuppe keehi aadhdhiya, merinaa qeese gidyoogaa Xoossai ba huuphen awaajjiis.
3. Yesuusa baggaara ammaniyaagee nagaraappe, yashshaappenne haiquwaappe attees. Yesuusi qeesetu ubbatu halaqa gidyoogaadan, asaayyo tumu atotettaa immees; atotettaa kase Ibraawetu ammanuwaa wogatuuninne mehetu yarshshotun eeshodan beettees; shin i ha77i tumaa oottiis.

Xaafee Israa7eela asaa taariikiyan daro erettida asaa ammanuwaa leemisodan go7ettidi (miraafiyaa 11), ha maxaafaa nabbabiya asati bantta ammanuwan minnanaadan hassayissees. Hegaadankka, miraafiyaa 12n nabbabiyaageeti bantta aifiyan Yesuusa tishshi ootti xeellidi, bantta ammanuwan minnanaadaaninne ai qommo metoinne waayeenne gakkikkokka, eti genccanaadan zorees. Wurssettan qassi zore qaalaanne akeekisso qaalaa immidi, qofaa wurssees.

### *Xoossai Ba Na7aa Baggaara Haasayyiis*

<sup>1</sup> Xoossai beni wode, nu aawatuyyo hananabaa yootiyaageetu baggaara dummera ogiyaaninne daro wodiyan haasayyiis. <sup>2</sup> SHin ha wurssetta wodiyan, ubabaa a laatissidi, sa7aa a baggaara medhdhido ba Na7aa baggaara nuuyyo haasayyiis. <sup>3</sup> Na7ai Xoossaa bonchcho poo7uwaa phoolees; qassi muleerakka a meretaa ekkidi, ba wolqqaama qaalan ha sa7aa naagees; yaatidi asaa nagaraappe geeshshidi, Ubbaappe Bolla Xoossaappe ushachcha baggaara saluwan uttiis.

### *Xoossaa Na7ai Kiitanchchatuppe Bolla*

<sup>4</sup> Xoossai ayyo immido sunttatettaa kiitanchchatuugaappe xoqqa gidyoogaadankka, etappe a keehi xoqqu oottiis. <sup>5</sup> Aissi giikko, Xoossai ba kiitanchchatuppe oona, “Neeni ta Na7aa;

taani hachchi neeyyo aawa gidaas”

giidee? Woi qassi oona,

“Taani ayyo aawa gidana;

ikka taayyo na7a gidana”

giidee? <sup>6</sup> Qassi Xoossai ba baira Na7aa ha sa7aa yeddana haniiddi, “Ta kiitanchchati ubbatikka ayyo goinnona” yaagiis. <sup>7</sup> Xoossai kiitanchchatubaa haasayiiddi,

“Taani ta kiitanchchata carkko kessais;

qassi ta ashkaratakka tama laco kessais”

yaagees. <sup>8</sup> SHin ba Na7aabaa haasayiiddi,

“Xoossau, ne kawotaa araatai

meri merinau de7ees.

Ne kawotaa xam77aikka

xillotettaa xam77aa.



<sup>9</sup> Neeni xillotettaa siiqadasa;  
 naaquwaa ixxadasa.  
 Xoossai, ne Xoossai nena  
 ne laggetuppe aattidi,  
 ufaissa zaitiyaa tiyidoogee hegaassa”  
 yaagees. <sup>10</sup> Xoossai hagaadan yaagees;  
 “Godau, koiro neeni sa7aa medhdhadasa;  
 saluwaakka ne kushiyan medhdhadasa.  
<sup>11</sup> Hegeeti ubbai xayana;  
 shin neeni de7ana.  
 Eti ubbaikka afaladan wurana.  
<sup>12</sup> Neeni eta iirichchodan dakkoyana;  
 qassi eti afaladan laamettana.  
 SHin neeni nenakka;  
 ne laittai mulekka wureenna”  
 yaagees. <sup>13</sup> SHin Xoossai ba kiitanchchatuppe issuwaanne,  
 “Taani ne morkketa neeni  
 tohuwan yedhdhiyoobaa oottana gakkanaassi,  
 hagan taappe ushachcha baggan utta”  
 gibeenna. <sup>14</sup> Kiitanchchati ubbai Xoossau oottanaunne atotettaa demmana asata  
 maaddanau Xoossai kiittido ayyaanata gidokkonaayye?

## 2

### *Atotettaa Gitabaa Gidiyoogaa*

<sup>1</sup> Hegaa gishshau, nuuni siyido tumu yohuwaappe wora beenna mala, he yohuwaa  
 mintti oiqqanau bessees. <sup>2</sup> Aissi giikko, kiitanchchati yootido qalalai tuma gidiyo  
 gishshau, naaqqiya woi azazettenna asai ubbai qaxxayettidobaa gidikko, <sup>3</sup> Yaatin,  
 nuuni ha gita atotettaa wudennaageeta gidikko, waanidi kessi ekkanee? Godai koiro ba  
 huuphen ha atotettaa yootiis; qassi i yootidoogaa siyidaageeti nuuyyo geeshshidi yooti-  
 dosona. <sup>4</sup> He siyidaageeti markkattidoogaa bolli Xoossaikka malaataa, oorattabaanne  
 Xoossai oottiyo dumma dumma malaataa oottiyoogan gujji markkattiis; qassi Geeshsha  
 Ayyaanaa imuwaakka ba koyidoogaadan, gishi gattiis.

### *Atotettaayyo Kaalettiyaagaa*

<sup>5</sup> Aissi giikko, Xoossai nuuni haasayiyo sinttappe yaana sa7aa, kiitanchchata haaris-  
 sibeenna. <sup>6</sup> SHin Xoossaa maxaafai issisan hagaadan yaagees;  
 “Xoossau, neeni asabaa qoppanau asi aibee?  
 Woi neeni ayyo hirrganau i aibee?  
<sup>7</sup> Neeni kiitanchchatuppe  
 amarida wodiyaa a guuttadasa.  
 A huuphiyanka bonchchonne  
 saba akiliiliyaa wottadasa.  
<sup>8</sup> Qassi ubbabaa a tohuwaappe garssaara  
 wottada haarissadasa”  
 yaagees. Aissi giikko, Xoossai ubbabaakka a haarissidoogan aani haarettibeennabi  
 aibinne baawa; shin ha77i ubbaba ayyo haarettiyoobi nuuyyo beettenna. <sup>9</sup> SHin nuuni  
 Yesuusa be7oos; Yesuusi Xoossaa aaro kehatettaa baggaara asa ubbau haiqqana mala,  
 amarida wodiyaa kiitanchchatuppe garssa gidiis. Qassi haiqo waayiyaa i waayettido  
 gishshau, poo7iya bonchchonne saba akiliiliyaa wottidaagaa ha77i nuuni be7oos.  
<sup>10</sup> Xoossai ubbabaa medhdhiyaagee, ubbabaakka naagiyaagee, Yesuusi daro naata  
 ehiidi, banaara bonchchissana mala, waayiyaa baggaara Yesuusa bali bannaagaa  
 oottanau bessees; aissi giikko, he naata atotettaayyo kaalettiyaagee Yesuusa.

<sup>11</sup> Aissi giikko, asa geeshshiyaagaukka qassi he geeyida asa ubbaukka Aawai issuwaa. Yesuusi eta, “Ta ishannta” giidi yeellatennan xeesiyoogee hegaassa. <sup>12</sup> Yesuusi, “Taani ne sunntaa ta ishanntuyyo awaajjana.

Maabaraa shiiquwankka nena galatana”  
yaagees. <sup>13</sup> Qassi i, “Taani ta ammanuwaa Xoossan wottana” qassikka, “Xoossai tau immido naatuura taani hagan de7ais” yaagees.

<sup>14</sup> Naata giidi i xeesiyoogeeti, ashoppenne suuttappe merettida asata gidiyo gishshau, Yesuusi ba huuphen eta milatidi, eta meretaa ekkiis; qassi i heгаа oottidoogee, xalahe halaqaa wolqqaa ba haiquwan xaissanaassa. <sup>15</sup> Qassi bantta de7o ubban haiquwau yayyidi, au ailletidi de7iyaageeta ubbata ailletettaappe kessiis.

<sup>16</sup> Aissi giikko, Abrahaama zariyaa i maaddiyooagaappe attin, kiitanchchata maaddennaagee erettiis. <sup>17</sup> Hegaa gishshau, asaa nagarai atto geetettana mala, Xoossaa oosuwan ammanettida maariya qeese ubbatu halaqa gidana mala, ubban i ba ishannta milatanau bessees. <sup>18</sup> Aissi giikko, i ba huuphen paacettido gishshaunne waayettido gishshau, paacettiyaageeta maaddanau danddayees.

### 3

#### *Yesuusi Muuseppe Bolla*

<sup>1</sup> Hegaa gishshau, Xoossai xeesido geeshsha ishato, nu ammanuwau Xoossai kiittidoogaa qeese ubbatu halaqaa, Yesuus Kiristtoosa qoppite. <sup>2</sup> Muusee ba oosuwan Xoossaa keetta ubban ammanettidaagaa gididoogaadan, Yesuusikka bana dooridi, ha oosuwau yeddida Xoossaayyo ammanettidaagaa. <sup>3</sup> Aissi giikko, keexettiya keettaappe keexxiya bitanee bonchchettiyooagaadan, Muuseegaappe aadhdhiya bonchchuwaa i ekkanau bessiyoogee erettidaagaa. <sup>4</sup> Aissi giikko, keetta ubbaa keexxidaagee issi asa; shin ubbabaa keexxidaagee Xoossaa. <sup>5</sup> Muusee Xoossaa keetta ubban ammanettida ashkkara gididi, Xoossai sinttappe gaanabaa markkattiis. <sup>6</sup> SHin Kiristtoosi Xoossaa keettan na7adan ammanettidaagaa; nuuni ekkana giidi ufaissan naagiyooogaa xalattet-taaninne ammanuwan naagikko, Xoossau keetta gidoos.

#### *Xoossaa Asai SHemppuwaa Demmana*

<sup>7</sup> Hegaa gishshau, Geeshsha Ayyaanai hagaadan yaagees;  
“Xoossaa qaalaa intte

hachchi siyiyaabaa gidikko,  
<sup>8-9</sup> intte aawati taayyo ixxi makkalidi,  
oitamu laittaa ta oosuwaa be7ido  
bazzo paaciyaa gallassaadan,  
inttekka zore ekkennan ixxoppite.

<sup>10</sup> Hegaa gishshau, taani  
he asaa hanqqettada,  
‘Eti ubba wode bantta wozanan baloosona.  
Ta ogiyaakka eribookkona’ yaagaas.

<sup>11</sup> Hegaadankka qassi,  
taani hanqqetta caaqqada,  
‘Taani shemppiyoosaa eti  
mulekka gelokkona’ yaagaas”

yaagees. <sup>12</sup> Ta ishato, de7o Xoossaaappe inttena shaakkiya iita ammanenna wozani inttenan oonaaninne de7enna mala naagettite. <sup>13</sup> SHin Xoossai inttena ubba gallassi hachchi giidi xeesishin, intteppe oonanne nagari balettin, zore ekkennan ixxenna mala, issoi issuwaa zorite. <sup>14</sup> Aissi giikko, nuuni koiro nuuyyo de7iya ammanuwaa wurssettai gakkanaassi mintti naagikko, Kiristtoosaara issippe shaakkana. <sup>15</sup> Xoossaa maxaafai,  
“Xoossaa qaalaa intte

hachchi siyiyaabaa gidikko,  
he wode eti ixxi makkalidoogaadan,  
zore ekkennan ixxoppite”  
yaagiis.

<sup>16</sup> Xoossai giyoogaa siyidi, ayyo makkalida asati oonee? Muusee Gibxxeppe kaalettin kiyida ubbata gidokkonaayye? <sup>17</sup> Xoossai oitamu laittaa oona hanqqettidee? Ahai bazzuwan attido asata, nagaraa oottidaageeta gidokkonaayye? <sup>18</sup> Qassi Xoossai baayyo azazettennan ixxidaageeti i shemppiyoosaa mulekka gelenna mala, etayyo caaqqidoogaappe attin, ooyyo caaqqidee? <sup>19</sup> Eti ammanibeenna gishshau, shemppiyoosaa gelanau danddayibeennaagaa nuuni be7oos.

## 4

<sup>1</sup> Simmi Xoossai nuna ba shemppiyoosaa, “Gelissana” giidoogee biroona gidikko, intteppe ooninne he shemppiyoosaa gelennan antenna mala yayyoos. <sup>2</sup> Aissi giikko, eti wonggeliyaa mishiraachchuwaa siyidoogaadan, nuunikka siyida; eti siyidosona; shin ammanidi ekkibeenna gishshau, ainne eta go77ibeenna. <sup>3</sup> Gidikkokka, Xoossaa oosoi sa7ai merettoosappe doommin polettidaagaa gidikkokka, Xoossai,

“Taani hanqqetta caaqqada,  
‘Eti taani shemppiyoosaa  
mulekka gelokkona’ yaagaas”

giidoogaadan, nuuni ammanidaageeti i shemppiyoosaa gelana. <sup>4</sup> Aissi giikko, laappunta gallassaabaa issisan Xoossaa maxaafai, “Xoossai laappunta gallasan ba ooso ubbaappe shemppiis” yaagiis. <sup>5</sup> Qassi he sohuwankka, “Eti taani shemppiyoosaa mulekka gelokkona” yaagiis. <sup>6</sup> Wonggeliyaa mishiraachchuwaa koiro siyidaageeti azazettibeenna gishshau, shemppo sohuwaa gelibookkona; issi issi asati he sohuwaa gelanaageeti de7oosona. <sup>7</sup> Xoossai daro wodiyaappe guyyiyan, Daawita baggaara naa77anttuwaa issi gallassaa, “Hachchi” giyo qaalan keeridi,

“Xoossaa qaalaa intte hachchi siyiyaabaa gidikko,  
zore ekkennan ixxoppite”

yaagiis. <sup>8</sup> Xoossai shemppiyoosaa asaa efidi Yaasu shemppissidobaa gidiyaakko, Xoossai hara gallassabaa guyye keerenna. <sup>9</sup> Hegaa gishshau, Xoossaa asaayyo Sambbataa shemppoi naagetti uttiis. <sup>10</sup> Aissi giikko, Xoossai shemppiyoosaa geliya ooninne, Xoossai ba oosuwaappe shemppidoogaadan, ikka ba oosuwaappe shemppana. <sup>11</sup> Simmi Israa7eela asai azazettennan ixxidi, Xoossaara issippe shemppiyoosaa gelennan attidoogaadan, nuuppe ooninne hegaa mala ixuwan he sohuwaa gelennan antenna mala minnoos.

<sup>12</sup> Aissi giikko, Xoossaa qalalai paxa de7eesinne oottees; naa77u zoozee de7iyo bisuwaappekka aadhdhidi qarattees. He qalalai shemppoinne ayyaanai, kureenne kolzzee issippe gaittiyoosaa shaakkana gakkanaassi caddees. Qassi asa wozanan de7iya koshshaanne qofaa i shaakkees. <sup>13</sup> Nuuni oottiyoobaa wochchiya Xoossaa sinttan ubbabaikka beettiyoogaappenne qoncciyaa de7iyoogaappe attin, a aifiyan geemmiya mereti aibinne baawa.

### *Yesuusi Qeese Ubbatuyyo Gita Halaqa*

<sup>14</sup> Simmi saluwaa biida qeese ubbatu gita halaqai, Xoossaa Na7ai Yesuusi, nuuyyo de7iyo gishshau, nu ammanuwaa mintti naagoos. <sup>15</sup> Aissi giikko, nu qeese ubbatu halaqai nuuni daafuriyo wode nuuyyo qarettanau danddayees; nagara i oottibeennaagaappe attin, nunadan ubbankka paacettiis. <sup>16</sup> Simmi nuna koshshiyo wode maaddiya maarotettaa ekkanaunne aaro kehatettaa demmanau, aaro kehatettaa de7iyoosaa Xoossaa araataakko, yayyennan shiiqoos.

## 5

<sup>1</sup> Qeese ubbatu halaqati huuphiyan huuphiyan ba asaa giddoppe doorettidi, he asaa gishshaa Xoossau oottanau, imuwaa immanaunne nagaraa yarshshuwaa yarshshanau sunttettidosona. <sup>2</sup> I ba huuphen daafuranchcha gidiyo gishshau, tamaribeennaagee-tuyyoonne baliyaageetuyyo qarettanau danddayees. <sup>3</sup> Hegaa gishshau, he qeese ubbatu halaqai asaa gishshau yarshshuwaa yarshshiyooqaadan, ba huuphe nagaraa gishshaukka yarshshanau bessees.

<sup>4</sup> Xoossai Aarona qeese ubbatu halaqa gidanau xeesidoogaadan, Xoossai xeesanaappe attin, ooninne qeese ubbatu halaqa gidiyo bonchchuwaa bau ekkana danddayenna. <sup>5</sup> Hegaadankka, Kiristtoosi qeese ubbatu halaqa gidiyo bonchchuwaa bau ekkibeenna; shin Xoossai a,

“Neeni ta Na7aa.

Taani hachchi neeyyo Aawa gidaas”

yaagiis. <sup>6</sup> Hegaadankka qassi harasan,

“Malkki-Xedeqi qeese gididoogaadan,  
neenikka merinau qeese gidana”

yaagiis.

<sup>7</sup> Yesuusi sa7an de7iyo wode, bana haiquwaappe ashshanau danddayiya Xoossaa keehi yeekkidinne afuxxidi woossisinne oichchiis; Xoossai a woosaa siyidoogee, i bana toochchidoogaassanne bau yayyidoogaassa. <sup>8</sup> Yesuusi Xoossaa Na7aa gidikkokka, ba waayettido waayiyan azazettiyoogaa tamaariis. <sup>9</sup> Yesuusi bali bannaagaa gidido wode, bau azazettiya ubbau merinaa atatettaa demmanau gaaso gidiis. <sup>10</sup> Qassi Xoossai Malkki-Xedeqa sunttatettaadan, qeese ubbatu halaqa gidana mala, a sunttiis.

### *Asai Balennaadan Odettida Mino Oduwaa*

<sup>11</sup> Nuuni ha yohuwan haasayanabai darobai de7ees; shin intte akeekanau azalla gidiyo gishshau, intteyyo yooti gelissanau waissees. <sup>12</sup> Aissi giikko, intte ha wodiyan tamarissiyaageeta gidanau bessikkokka, Xoossaa qaalaa koiro timirttiyaa inttena zaaretti tamarissiya issi uraa koshshees; inttena uyiyo maatta koshsheesippe attin, mino quma koshshenna. <sup>13</sup> Maatta paahettidi de7iya ooninne gacino na7a gidiyo gishshau, xillotettaa timirttiyaabaa erenna. <sup>14</sup> SHin mino qumai iitaa kehaa de7uwaa daruwan shaakkida wozannaama asaassa.

## 6

<sup>1-2</sup> Hegaa gishshau, Kiristtoosa timirttiyaa biron doommiaagaa aggi bayidi, wozannaama asa timirttiyau sinttau boos; koiro nuuni tamaanau koshshiyoo timirttiyaa wodhdhi eqqidi tamaanau nuuyyo bessenna; he timirttee aibee giikko, pattenna oosuwaappe simmiyoogaa, Xoossaa ammaniyoogaa, xinqqatebaa, kushe wotobaa, haiqoppe denddobaanne merinaa pirddaabaa. <sup>3</sup> Xoossai oottite giikko, hejaa nuuni oottana.

<sup>4-5</sup> Aissi giikko, issitookka poo7oi poo7idoogeetanne saluwaa imuwaa baari be7idaageeta, qassi Geeshsha Ayyaanaakka shaakki ekkidaageetanne Xoossaa qaalai lo77o gididoogaa siyi eridaageeta, sinttappe yaana sa7aa wolqqaakka bochchi xeellidaageeta, <sup>6</sup> hegaappe guyye simmidi kaddidaageeta nagaraappe naa77anttuwaa zaaranaagee danddayettennabaa. Aissi giikko, hegeeti Xoossaa Na7aa masqqaliyaa bolli misimaariyan xishidi kaqqoosonanne asa sinttan kaushshoosona.

<sup>7</sup> Ubba wode bukkiya iraa uyidi, goyida uraa go77iya kattaa mokkiya biittaa Xoossai anjjees. <sup>8</sup> SHin buluwa buuzuwa mokkikko, ainne go77enna; qanggettau shiiqi eqqiis. Qassi wurssettan xuugettana.

<sup>9</sup> SHin nu siiqotoo, nuuni hagaadan haasayiyaabaa gidikkokka, intte atatettau gidiya lo77obai intteyyo de7iyooqaa eroos. <sup>10</sup> Aissi giikko, intte oottido oosuwaanne qassi

ammaniyaageeta maaddidoogaaninne ha77ikka maaddiyoogan Xoossaa siiqido si-iqiwaa Xoossai doganau worddanchcha gidenna. <sup>11</sup> Intte huuphiyan huuphiyan demmana giidi, nuuni ufaissan naagi uttido kumetta tumatettaa wurssettai gakkanaassi, kaseegaadan minttidi naagana mala amottoos. <sup>12</sup> Xoossai immana giidoogaa amanuwaaninne gencan laattiyaageetu mala intte gidanaagaa nuuni koyiyoogaappe attin, azalla gidanaagaa koyokko.

### *Xoossai Immido Hidootai Sirissennaagaa*

<sup>13</sup> Xoossai Abrahaamayyo immana giidi caaqqido wode, baappe aadhdhiya giti banna gishshau, ba huuphiyan caaqqiis. <sup>14</sup> Xoossai a, “Taani nena anjjana;

ne zersettaakka corayana”

yaagidi caaqqiis. <sup>15</sup> Hegaadankka, Abrahaami gencii naagidi, Xoossai immana giidoogaa ekkiiis.

<sup>16</sup> Aissi giikko, asai baappe gitatiya uran caaqqees; qassi he caaqoi palama ubbaakka teqqees. <sup>17</sup> Hegaa gishshau, Xoossai ba immana giidoogaa laattanaageetuyyo ba qofaa mulekka laammennaagaa geeshshi yootanau keehi koyidi, hegee tuma gididoogaayyo caaqqiis. <sup>18</sup> Xoossai worddotanau danddayenna ha naa77u laamettenna yohotun, i immana giido nu sinttan de7iyaagaa oiqqanau baqatida nuuyyo gita minttettoi de7ees.

<sup>19</sup> Ha nuuni demmana giidi ufaissan naagi uttidoogee, nu shemppuwaayyo markkabiya oiqqiya qaaxxenna birata mala; he nuuni demmana giidi, ufaissan naagi uttidoogee erettida mino gididi, magalasho giddo geeshshasaa geeles. <sup>20</sup> Qassi Yesuusi Malkki-Xedeqa sunttatettaadan, merinau qeese ubbatu halaqa gididi, nu gishshaa nuuppe kasetidi, he sohuwaa geliis.

## 7

### *Qeesiyaa Malkki-Xedeqa*

<sup>1</sup> Ha Malkki-Xedeqi, Saleema kawoi, Ubbaappe Bolla Xoossaa qeese, Abrahaami kawota woridi olaappe simmishin, aara gaittidi, a anjjiis. <sup>2</sup> Abrahaami ba omooddido ubbaappe asirataa kessidi, ayyo immiis; Malkki-Xedeqa sunttau koiro birshshettai xillotettaa kawuwaa giyoogaa; qassi Saleema kawo i gidiiyo gishshau, naa77antto birshshettai sarotettaa kawuwaa giyoogaa. <sup>3</sup> Malkki-Xedeqayyo aayiyaa woi aawai, woi ayyo zare paidoi baawa; qassi a yeletau doometti woi a haiquwau wurssetti baawa; shin Xoossaa Na7aa milatidi, merinau qeese gidiiis.

<sup>4</sup> Nu aawatu halaqai Abrahaami olan omooddidi, ehiidobaappe asirataa immido Malkki-Xedeqi ai keena gitakko be7ite. <sup>5</sup> Qeese gidiiya Leewa zareti Israa7eela asaappe, hegeenne bantta dere asaappe harai atto eti Abrahaama zare gidikkokka, asirataa ekkana mala, higgiiyan azazettidosona. <sup>6</sup> Malkki-Xedeqi Leewa zare gidenna; shin Abrahaamappe asirataa ekkidi, Xoossai immana giidoogaa naagiya Abrahaama anjjiis. <sup>7</sup> Qassi anjjiyaagee anjjetiyaagaappe gitatiyoogee palanttenna.

<sup>8</sup> Issi baggaara, haiqqiya asai asirataa kessees; shin hara baggaara qassi, haiqqenna giidi markkattiyo urai asirataa kessees. <sup>9</sup> Hagaadan haasayanau harai atto, asirataa kessiya Leewikka Abrahaama baggaara asirataa immiis. <sup>10</sup> Aissi giikko, Malkki-Xedeqi Abrahaamaara gaittiyo wode, Leewi biron yelettibeenna; shin ba zariyaa Abrahaama gulbbatan de7ees.

<sup>11</sup> Israa7eela asaayyo higgee Leewa qeesetettaa baggaara imettiis. He qeesetettaa oosoi bali bannaagaa gidikko, Aaronaagaa mala gidennan Malkki-Xedeqa mala hara qeese sunttettanau aissi koshshii? <sup>12</sup> Aissi giikko, qeesetettaa laamettiyo wode, higgeekka qassi laamettanau koshshees. <sup>13</sup> Ha yohoi haasayettido urai hara zaree; a zariyaappe ooninne yarshshiyooosan qeesedan oottibeenna. <sup>14</sup> Nu Godai Yihudaa



zariyaappe yiidoogee erettidaagaa gidiyo gishshau, Muusee qeesetubaa haasayiiddi, he zariyaabaa ainne haasayibeenna.

### *Kiristtoosi Malkki-Xedeqa Mala Qeese*

<sup>15</sup> Malkki-Xedeqa mala hara qeesee yiidobaa gidiyaakko, hagee aadhdhidi erettana. <sup>16</sup> I asa higgeeninne wogan qeese gidibeenna; shin wureenna de7uwaa wolqqan qeese gidiis. <sup>17</sup> Aissi giikko, Xoossaa maxaafai, “Malkki-Xedeqi qeese gididoogaadan, neenikka merinau qeese gidana” yaagidi markkattees. <sup>18</sup> Beni de7iya higgee laafanne pattenaaagaa gidiyo gishshau attiis. <sup>19</sup> Aissi giikko, Muuse higgee aibanne bali bainnabaa oottanau danddayenna; qassi nuuni a baggaara Xoossaakko shiiqana giidi ufaissan naagi uttido ubbaappe aadhdhiyaagee yiis.

<sup>20</sup> Hegaa bollan qassi Xoossaa caaqoikka de7ees; harati qeese gidido wode, hejaa mala caaqoi baawa. <sup>21</sup> SHin Yesuusi caaquwan qeese gidiis; Xoossai a, “Godai caaqqiis; i ba qofaa laammenna.

‘Neeni merinau qeese gidana’ giis” yaagiis. <sup>22</sup> Hegaa gishshau, Yesuusi ubbaappe aadhdhiya caaquwau waase gidiis. <sup>23</sup> Kase qeesetu qoodai daro; aissi giikko, eti oottana oosuwaa haiqoi diggiis. <sup>24</sup> SHin Yesuusi merinau de7iyo gishshau, a qeesetetta laamettenna. <sup>25</sup> Hegaa gishshau, i eta gishshaa gaannatanau merinau de7iyo gishshau, Xoossaakko ba baggaara yiyaageeta muleera ashshanau danddayees.

<sup>26</sup> Nuuyyo giigiya haggaa mala, qeese ubbatu halaqai de7anau koshshees; i geeshsha; aani geneenne borssoi baawa; nagaranchchatuura i gaittena; qassi xoqqa saluwankka i bonchchettiiis. <sup>27</sup> Hara qeese ubbatu halaqatudan, i koiro ba huuphe nagaraassi yarshshidi, qassi guyyeppe asaa nagaraassi hachchi hachchi yarshshanau koshshenna; i bana yarshshido wode, naa77antennan issitoo yarshshiis. <sup>28</sup> Aissi giikko, Muuse higgee daafuranchcha asaa qeese ubbatu halaqa oottidi sunttees; shin Xoossai immana giidi caaqqido higgiaappe guyye yiida qaalai merinau bali bannaagaa, Xoossaa Na7aa sunttees.

## 8

### *Yesuusi Ooratta Maachchaa Qeese Ubbatu Halaqaa*

<sup>1</sup> Nuuni haasayiyo gitabai haggaa; saluwan Ubbaappe Bolla Xoossai uttiyo kawotaa araataappe ushachcha baggaara uttida qeese ubbatu halaqai, haggaa malai nuuyyo de7ees. <sup>2</sup> Geeshsha Sohuwaaninne tumu Dunkkaaniyan i oottees; he Dunkkaanee asi essidoogaa gidennan, Xoossai essidoogaa.

<sup>3</sup> Qeese ubbatu halaqa ubbai imuwaanne yarshshuwaa Xoossau immanau sunttettido gishshau, ha qeese ubbatu halaqaayyookka yarshshanau issibai de7anau koshshees. <sup>4</sup> Simmi sa7an i de7iyaabaa gidikko, mulekka qeese gidenna; aissi giikko, higgee azaziyoogaadan, imuwaa immiya qeeseti de7oosona. <sup>5</sup> Eti qeesetuugaadan oottiyo oosoi saluwan de7iya oosuwau tumu leemisonne eesho; aissi giikko, Muuse Dunkkaaniyaa essana hanishin, Xoossai a, “Akeeka; ubbabaakka taani nena deriyaa huuphiyan bessido leemisuwaa kaallada ootta” yaagiis. <sup>6</sup> SHin Yesuusi gaannatiyo maachchai kaseegaappe aadhdhiyoogaadankka, ayyo imettida oosoikka etaagaappe aadhdhees; aissi giikko, he maachchai Xoossai immana giido ubbaappe aadhdhiya oosuwan oosettiis.

<sup>7</sup> Aissi giikko, koiro maachchan bali bainnabaa gidiyaakko, naa77antto maachchaa koshshenna. <sup>8</sup> SHin eta boriiddi, Godai hagaadan yaagees; “Taani Israa7eela asaaranne Yihudaa asaara ooratta maachchaa maacettiyo gallassati yaana.

<sup>9</sup> He maachchai taani Gibxxe biittaappe  
eta aawatu kushiyyaa oiqqada, goochcha kessido wode,  
etaara maacettido maachchaa mala gidenna.

Eti ta maachchan ammanettibeenna gishshau,  
taanikka eta yegga bayaas.

Taani, Godai, haggaa odais.

<sup>10</sup> Aissi giikko, he gallassatuppe guyyiyan,  
taani Israa7eela asaara maacettana maachchai haggaa:

Taani ta higgiiyaa eta qofan wottana;  
qassi eta wozanankka xaafana.

Taani eta Xoossaa gidana; etikka ta asa gidana.

<sup>11</sup> Etappe ooninne ba shooruwaa  
woi ba ishaa,

‘Goda era’ yaagidi tamaarissenna.

Aissi giikko, eti guuttaappe  
gitaa gakkanaassi ubbai tana eroosona.

<sup>12</sup> Taani eta naaquwaa maarana;  
eta nagaraakka naa77antto hassayikke”

yaagees. <sup>13</sup> Xoossai ooratta maachchaa giidi haasayiyooogan koiroogaa ceegettiis; qassi  
ceeggiyaabainne wuriyaabai eesuwan xayana.

## 9

### *Saluwan Oosettiya Ayyaanaa Oosoi Sa7an Oosettiya Ayyaanaa Oosuwaappe Aadhdhees*

<sup>1</sup> Koiro maachchaayyo Xoossau goinniyo wogainne asai oottido Beeta Maqidasee de7ees. <sup>2</sup> Aissi giikko, koiro Dunkkaanee eqqiis; a gidдон muqaaddaa wottiyoogee, xaraphpheedzainne Godaa sinttan wottiyoo oittai de7ees; he sohuwaa Geeshsha Sohuwaa giidi xeesettees. <sup>3</sup> Naa77antto magalashuwaappe guyye baggaara Ubbaappe Aadhdhiya Geeshsha Soho geetettiya Dunkkaanee de7ees. <sup>4</sup> A gidдон ix-aanaa cuwayanau worqqappe oottido saaxineenne ubbasaara worqqan sheeshshido Maachchaa Taabootai de7ees. He Maachchaa Taabootan mannai de7iyo worqqa xaaroi, Aarona xam77ai aacidaageenne qassi Muuse higgee xaafettido naa77u masettida shuchchati de7oosona. <sup>5</sup> He Maachchaa Taabootaappe bolla baggaara atto giyo sohuwaa qum77uwaa bantta qefiyan genttiya bonchcho kiruubeti de7oosona; shin ha ubbabaa ha77i wurssi yootanau danddayokko.

<sup>6</sup> Hegee hegaadan giigidaashin, qeeseti ubba wode, bantta oosuwaa oottanau koiro Dunkkaaniyaa geloosona. <sup>7</sup> SHin qeese ubbatu halaqa xalaalai naa77antto Dunkkaaniyaa laittaappe issitoo geeles; geliiddi ba gishshaunne erennan asi oottido nagaraa gishshau, Xoossaayyo yarshshiyo suuttaa ekkidi geeles. <sup>8</sup> Koiro Dunkkaanee eqqi de7ishin, ubbaappe aadhdhiya geeshsha sohuwaa efiya ogee biron dooyettibeennaagaa Geeshsha Ayyaanai hegan erissees.

<sup>9</sup> He Dunkkaanee ha wodiyau leemiso; hegaa giyoogee Xoossau immiyo imoinne yarshshoi goinniyaagaa zoriya wozanaa bali bannaagaa oottanau danddayokkona.

<sup>10</sup> Hegeeti meettaabaa, ushshaabaanne dumma dumma meechchaabaa yootiyaageeta; eti ooraxxiyo wodee gakkanaassi oosettiya wogata.

<sup>11</sup> SHin Kiristtoosi haggaa de7iyya lo77obau qeese ubbatu halaqa gididi yiichchiis. Gidдон i oottiyo Dunkkaanee ubbaappe aadhdhiyaagaanne bali bannaagaa; qassi he Dunkkaaniyaa asi oottibeenna; ha merettida sa7aabaakka gidenna. <sup>12</sup> Kiristtoosi Ubbaappe Aadhdhiya Geeshsha Sohuwaa geliyo wode, deeshsha suuttanne galo suutta oiqqidi gelibeenna; shin ba suuttaa oiqqidi, nuuyyo merinaa atotettaa demmidi,

naa77anttenan issitoo geliis. <sup>13</sup> Tunida asa bolli korimaa suuttaanne deeshshaa suuttaa caccafiidi, xuugettida usa bidintta qolin, he uraa tunatettaappe geeshshanau danddayikko, <sup>14</sup> Merinaa Geeshsha Ayyaanaa baggaara bali banna yarshshodan, Xoossau bana immida Kiristtoosa suuttai, nuuni de7o Xoossau oottana mala, kase nu haiqqida oosuwaappe nuna zoriya wozanaa waati geeshshanddeeshsha!

<sup>15</sup> Hegaa gishshau, Xoossai xeesidoogeeti i immana giido merinaa anjuwaa laattana mala, Kiristtoosi ooratta maachchau gaannatiis; hegee hanana danddayiyoogee, asai koiro maachchaappe garssan de7iiddi oottido bala ailletettaappe kessiya haiqoi de7iyo gishshassa.

<sup>16</sup> Aissi giikko, haiqqiya urai azazidobai de7ikko, he urai haiqqidoogee erettana koshshees. <sup>17</sup> Aissi giikko, azazida urai haiqqido wode, i azazidoogee polettees; he azazidaagee paxa de7ishin, ainne polettenna.

<sup>18</sup> Harai atto, koiro maachchaikka suutti bannan injetibeennaagee hegaassa. <sup>19-20</sup> Aissi giikko, higgiiyan de7iya azazo ubbaa Muusee asa ubbau yootiis; hegaappe guyyiyan, galo maraa suuttaanne deeshshaa suuttaa, haattaara, zo7o dorssa ikisiyaaranne hiisophphiya giyo mittaa bonccuwaara issippe ekkidi, “Hagee inttena Xoossai azazido maachchaa suuttaa” yaagidi, higgiiyaa maxaafaa bollinne asa ubbaa bolli caccafiis. <sup>21</sup> Hegaadankka, Dunkkaaniyaa bollinne oottiyo miishsha ubbaa bolli suuttaa Muusee caccafiis. <sup>22</sup> Higgee giyoogaadan, tumakka amaridabaappe attin, ubbabaikka suuttan geeyees; suutti gukkana xayikko, atotetti baawa.

### *Kiristtoosi Yarshshettidoogee Nagaraa Quccidi Xaissees*

<sup>23</sup> Hegaa gishshau, saluwan de7iyaageeta milatiyaageeti he yarshshuwan geeyanau koshshees; shin saluwan de7iyaageetikka bantta huuphen geeyanau aadhdhiya yarshshuwaa eta koshshees.

<sup>24</sup> Aissi giikko, Kiristtoosi tumu geeshshasan leemissettiya asi oottido geeshshasaa gelibeenna; shin i ha77i nu gishshaa Xoossaa sinttan beettanau yaa saluwaa geliis. <sup>25</sup> Qeese ubbatu halaqai laittan laittan ba suuttaa gidennaagaa oiqqidi, Geeshsha Sohuwaa geliyoogaadan, i bana ubbatoo yarshshanau gelibeenna. <sup>26</sup> Hegaa gidiyaakko, Kiristtoosi sa7ai merettoosappe doommidi darotoo waayettanau koshshees; shin ha77i wodiya wurssettan nagaraa xaissanau bana yarshshidi, naa77anttenan issitoo beettiis.

<sup>27</sup> Asai ubbai issitoo haiqqanau bessees; hegaappe guyyiyan Xoossai asaa pirddana. <sup>28</sup> Hegaadankka, qassi Kiristtoosi daro asaa nagaraa xaissanau issitoo yarshshettiis; qassi i bana mintti naagiyaageeta ashshanau beettanaappe attin, naa77antto nagara tookkanau beettenna.

## 10

<sup>1</sup> Aissi giikko, higgiiyau yaana lo77obaa eesho xalaalai de7ees; ayyo tumu leemiso baawa. Ubba wode laittan laittan issi mala yarshshoi yarshshettees; hegae gishshau, higgee Xoossaakko shiiqiya asa he yarshshon bali banna asa oottanau mulekka danddayenna. <sup>2</sup> Xoossau goinniya asai ba nagaraappe muleera geeyidobaa gidiyaakko, bana zoriya wozanan naa77anttuwaa nagara qoppenna; qassi yarshshiyooagaakka aggi bayana. <sup>3</sup> SHin asai laittan laittan he yarshshuwan ba nagaraa hassayees. <sup>4</sup> Aissi giikko, korima suuttinne deeshsha suutti nagara xaissanau mulekka danddayenna.

<sup>5</sup> Hegaa gishshau, Kiristtoosi ha sa7aa yaana haniiddi, hagaadan yaagiis; “Neeni yarshshonne imo koyabaakka; shin taayyo bolla giigissadasa.

<sup>6</sup> Neeni xuuggiyo yarshshuwaaninne nagaraa yarshshuwan mulekka ufaittakka.

<sup>7</sup> Taani he wode, ‘Xaatta maxaafan

tabai xaafettidoogaadankka,  
 Xoossau, taani neeni koyiyoogaa  
 oottanau yaas' yaagaas"

yaagiis. <sup>8</sup> Yarshshoi yarshshettana mala, higgee azaziyoobaa gidikkokka, Kiristtoosi koiro, "Neeni yarshsho, imo, xuuggiyo yarshshonne nagaraa yarshsho mulekka koyabaakka; hegeetun ufaittakka" yaagiis. <sup>9</sup> Hegaappe guyyiyan Kiristtoosi, "Xoossau, taani neeni koyiyoogaa oottanau yaas" yaagiis. Hega gishshau, Kiristtoosi naa77anttuwaa essanau koiroogaa xaissees. <sup>10</sup> Yesuus Kiristtoosi Xoossai koyidoogaa oottido gishshau, ba ashuwaa naa77anttenan issitoo yarshshidoogan nuuni nu nagaraappe geeyi aggida.

<sup>11</sup> Qeese ubbai hachchi hachchi eqqidi, ba oosuwaa oottees; qassi nagara xaissanau mulekka danddayenna issi mala yarshshuwaa zaari zaaridi yarshshees. <sup>12</sup> SHin Kiristtoosi nagaraa gishshau, ubba wodiyau gidiya issi yarshshuwaa yarshshidi, Xoossaappe ushachcha baggaara utti aggiis. <sup>13</sup> Xoossai sinttappe Kiristtoosa morkketa Kiristtoosayyo tohuwan yedhdhiyoobaa oottana gakkanaassi, yaani naagees. <sup>14</sup> Aissi giikko, i issitoo yarshshidoogan, nagaraappe geeyidaageeta merinau bali bainnaageeta oottiis.

<sup>15</sup> Qassi Geeshsha Ayyaanai nuuyyo markkattiiddi, hagaadan yaagees;

<sup>16</sup> "Taani he gallassatuppe guyyiyan,  
 etaara maacettiyo maachchai hagua:

Taani ta higgiiyaa eta qofan wottana;  
 qassi eta wozanankka xaafana"

yaagees. <sup>17</sup> Qassi hegaappe guyyiyankka,

"Taani eta nagaraanne

eta makkala oosuwaa naa77antto hassayikke"

yaagees. <sup>18</sup> Xoossai he nagara atto giido wode, nagara xaissanau hagaappe sinttau yarshsho koshshenna.

### *Xoossaakko SHiiqanau Koshshees*

<sup>19</sup> Simmi ta ishato, nuuni Yesuusa suuttaa baggaara Ubbaappe Aadhdhiya Geeshsha Sohuwaa gelanau nuuyyo xalatetta de7ees. <sup>20</sup> Kiristtoosi nuuyyo ooratta ogiyaanne de7o ogiyaa magalashuwaa baggaara, hega giyoogee ba bollaa baggaara dooyiis. <sup>21</sup> Nuuyyo Xoossaa keettan sunttetida gita qeese de7iyo gishshau, <sup>22</sup> Nuuni suure wozanaara, tumu ammanuwaara, iitabaa zoriya wozanaappe geeyida wozanaanne qassi xillo haattan meecetida bollaara Xoossaakko shiiqoos.

<sup>23</sup> Nuuyyo immana giida Xoossai ammanttiyo gishshau, nuuni demmana giidi ufaisan naagi uttidoogaa mintti oiqqoos. <sup>24</sup> Issoi issuwaa waani siiqettanaakkonne qassi lo77o oosuwaa waati oottanaakko, issoi issuwau qoppoos. <sup>25</sup> Issooti issooti shiiquwaa meeze oottidi shiiqiyoogaadan, nuunikka issippe shiiqiyoogaa aggokko; shin Godaa gallassai matattiyoogaa intte be7iyo gishshau, issoi issuwaa minttettoos.

<sup>26</sup> Nuuni tumatettaa eratettaa ekkirggidi, eriiddi nagara oottiyaabaa gidikko, hagaappe sinttau nagara xaissiya yarshshoi issibinne baawa. <sup>27</sup> SHin yashshiya pirddaa naagiyoogeenne Xoossaa ixxiya ubbaa maanau wolqqaama tamai de7ees. <sup>28</sup> Muuse higgiiyau azazettenna urai, naa77u urai woi heezzu urai a bolli markkattikko, qareti bannan haiqqees. <sup>29</sup> Xoossaa Na7aa karida urai, bana nagaraappe geeshshida Xoossaa maachchaa suuttaa tunabaadan qoppida urai, qassi aaro kehatetta Geeshsha Ayyaanaa cayiya urai, ai keena iita pirddaa ekkanau bessiyaakkonne ane qoppite.

<sup>30</sup> Aissi giikko, "Taani haluwaa kessanne kushiyaa zaarana" giidaagaa nuuni eroos; qassikka, "Godai ba asaa pirddana" yaagiis. <sup>31</sup> De7o Xoossaa kushiyan kunddanaagee daro yashshiyaabaa.

<sup>32</sup> Intteyyo Xoossaa poo7oi poo7idoogaappe guyyiyan, intte daroban waayettidi, gita waretan gencido beni wodiya haassayite. <sup>33</sup> Issi issitoo inttena asa sinttan cayidosonanne paxa kaa7idosona; qassi hara wode hegaadan oottidoogeetuura issippe de7ideta. <sup>34</sup> Aissi giikko, qashuwan de7iya asatuyyo intte qarettideta; yaatidi intteyyo merinau wurena ubbaappe aadhdhiya miishshai saluwan de7iyoojaa intte huuphen erido gishshau, inttebaa ubbaa ekkirginkka ufaissan gencideta.

<sup>35</sup> Hegaa gishshau, gita woiutuwaara de7iya intte xalatettaa oloppite. <sup>36</sup> Xoossai koyiyoogaa oottidi, i intteyyo immana giidoogaa ekkana gencana koshshees. <sup>37</sup> Aissi giikko, Xoossaa maxaafai,

“Amarida wodee attiis.

Yiyaagee yaana; gam77enna.

<sup>38</sup> Ta xilloi ammanuwan de7ana.

SHin ooninne guyye simmikko,

tana ufaissenna”

yaagees. <sup>39</sup> Nuuni ammanidi attidaageetu bagga gidiyoojaa attin, guyye simmidi xayidaageetu bagga gidokko.

## 11

### *Ammanuwaa*

<sup>1</sup> Ammano giyoogee, demmana giidi ufaissan naagi uttidobai ammanttiyoogaanne be7anau danddayennabaa erissiyaagaa. <sup>2</sup> Xoossai beni ceega asaayyo markkattidoogee, eti ammanidoogaana.

<sup>3</sup> Sa7ai Xoossaa qaalan merettidoogaa ammanuwan nuuni eroos; hejaa gishshau, beettiyaabai beettennabaappe merettiis.

<sup>4</sup> Aabeeli Qaa7eelaagaappe aadhdhiya yarshshuwaa Xoossau yarshshidoogee amanuwaana. Xoossai a imuwaabaa markkattiiddi, i xillo gididoogaakka markkattiis; Aabeeli harai atto haiqqidikka, ba ammanuwan ha77i gakkanaassi haasayees.

<sup>5</sup> Heenooki haiqqennan saluwaa biidoogee amanuwaana; Xoossai efiido gishshau, ooninne a be7anau danddayibeenna. Xoossaa maxaafai, “Heenooki saluwaa baanaappe kase Xoossaa ufaissiis” yaagees. <sup>6</sup> Ammanoi binnan ooninne Xoossaa ufaissanau danddayenna; aissi giikko, Xoossaakko yiya ooninne Xoossai de7iyoojaa bana koyiyaageetuyyo woiutuwa immiyoogaa ammananau koshshees.

<sup>7</sup> Nohee be7anau danddayenna sinttappe hananabau Xoossai, “Nena naaga” gin, Xoossau yayyidi, bananne ba so asaa ashshanau markkabiya keexxidoogee amanuwaana; yaatidi hegan ha sa7aa bolli pirddidi, ammanuwan beettiya xillotetaakka Xoossaappe ekkiiis.

<sup>8</sup> Abrahaami laattanaadan, Xoossai baayyo immana giido biittaa baana mala, Xoossai bana xeesido wode, azazettidoogee amanuwaana; i ba biittaappe kiyidi biyo wode, au biyaakkonne erennan kiyiis. <sup>9</sup> Abrahaami Xoossai baayyo immana giido biittan hara biitta asadan de7idoogee amanuwaana; Xoossai he immana giidoogaa banaara issippe laattana Yisaaqaaranne Yaaqoobaara Dunkkaaniyan de7iis. <sup>10</sup> Aissi giikko, Abrahaami Xoossai lo77o baasuwan hayyottidi keexxido katamaa naagees.

<sup>11</sup> Saara ba huuphen harai atto ceeggaichchadakka, immana giida Xoossai amanettidaagaa gididoogaa erido gishshau, na7a shahaaranau wolqqaa demmidoojaa amanuwaana. <sup>12</sup> Hegaa gishshau, haiqqida asa milatiya issi bitaniyaappe saluwan de7iya xoolintte keena, abbaa lanqqiyan de7iya qoodi banna shafe keena zareti yelettidosona.

<sup>13</sup> He asati ubbati ammanuwan haiqqidosona; banttau Xoossai immana giidoogaakka ekkibookkona; shin haahuwan hejaa be7idi, sarotidosona. Qassi eti sa7an imatanne yedetettidi kiyida asata gididoogaa eridosona. <sup>14</sup> Aissi giikko, hegaadan giya



asati bantta huuphe biittaa koyiyoogaa erissoosona. <sup>15</sup> Eti he yeggidi kiyido biittaa simmanau qoppidobaa gidiyaakko, guyye simmiyo qaadaa demmennan aggokkona; shin <sup>16</sup> eti hegea aggidi, lo77iya biittaa laamotoosona; hegee saluwaa biittaa. Hegaa gishshau, Xoossai eta Xoossaa geetettanau yeellatenna. Aissi giikko, i etau katamaa giigissi wottiis.

<sup>17-18</sup> Abrahaami Yisaaqa yarshshanaakko yarshshennaakko, Xoossai eranau xomoosido wode, Abrahaami ammanuwan a yarshshiis. Xoossai Abrahaama, “Ne zaree Yisaaqa baggaara xeesettana” giidaashinkka, Abrahaami ba na7aa Yisaaqa yarshshanau giigiis. <sup>19</sup> Abrahaami Xoossai Yisaaqa harai atto, haiquwaappekka patanau danddayiyoogaa eriis; hegea gishshau, haiquwaappe guyye a zaaridi ekkiis.

<sup>20</sup> Yisaaqi wodeppe hananabau Yaaqoobanne Eesawa anjjidoogee ammanuwaana.

<sup>21</sup> Yaaqoobi haiqqana haniiddi, Yooseefa naata huuphiyan huuphiyan anjjidoogeenne gatiman guufetidi, Xoossau goinnidoogee ammanuwaana.

<sup>22</sup> Yooseefi haiqqanau matiiddi, Israa7eela asai Gibxxeppe kiyanaagaa haasayidoogeenne ba meqettaa oottanabaa eta azazidoogee ammanuwaana.

<sup>23</sup> Muusee yelettidoogaappe guyyiyan, aayyiyaanne aawai malaa lo77o na7a gididoogaa be7idi, heezzu agina qottidoogee ammanuwaana; eti kawuwaa awaajuwaukka yayyibookkona.

<sup>24</sup> Muusee diccidoogaappe guyyiyan, Gibxxe kawuwaa na7ee na7aa geetettanaagaa ixidoogee ammanuwaana. <sup>25</sup> Nagaran Muusee guutta wodiya ufaittanaagaappe, Xoossaa asaara waayettanaagaa dooriis. <sup>26</sup> Wodeppe demmana woiuwaa i tishshi oottidi xeellido gishshau, Gibxxe biittaa miishsha ubbaappe Kiristtoosa gishshau boret-tiyoogee daro aadhdiya duretetta gididoogaa qoppiis.

<sup>27</sup> Kawuwaa hanqquwau Muusee yayyennan, Gibxxe biittaappe kiyidoogee ammanuwaana; aissi giikko, beettenna Xoossaa be7idabaadan, gencidi sinttau biis. <sup>28</sup> Haiquwaa kiitanchchai Israa7eela asaayyo baira naata bochchennaadan, Muusee Paasikaa bonchchidoogeenne qosilettan suutta caccafissidoogee ammanuwaana.

<sup>29</sup> Israa7eela asai mela biittan hemettiyoogaadan, Zo7o Abbaa pinnidoogee ammanuwaana; shin Gibxxe asati geli be7ishin, haattai eta mitti aggiis.

<sup>30</sup> Israa7eela asai Yarkko giyo katamaa shuchcha dirssaa laappun gallassaa yuuyi yuuyi aadhdhidoogaappe guyyiyan, he shuchcha dirssai kunddidoogee ammanuwaana. <sup>31</sup> SHaaramuxiyaa Ra7aaba yohuwaa qoriyaageeta loitta mokkido gishshau, Xoossau azazettennan ixida asaara haiqqennan attidoogee ammanuwaana.

<sup>32</sup> Simmi harabaa gujjada ai odoo? Geedoonabaa, Baaraaqabaa, Samssoonabaa, Yoft-taahebaa, Daawitabaanne Sameelabaa, qassi hananabaa yootiyaageetubaa odanau tau wodee gidenna. <sup>33</sup> Eti kawo ubbaara olettidi xoonidoogeenne xillobaa oottidoogee ammanuwaana; yaatidi Xoossai immana giidoogaa ekkidosona; gaammotu doonaakka gorddidosona. <sup>34</sup> Wolqqaama tamaa toissidosona; bisuwaa qaraappe kessi ekkidosona; eti daafuranchcha; shin minnidosona; qassi olan wolqqaamidi, hara biittaa tooraasaa yedettidosona. <sup>35</sup> Maccaasati bantta haiqqidaageeti haiquwaappe paxidaageeta ekkidosona.

Qassi harati qashuwaappe birshshettanaagaa ixidi, kehiya de7uwaayyo haiquwaappe denddanau, bukketidi haiqqidosona. <sup>36</sup> Haratu bolli asai qilliicci kaa7iis; lissuwan garafettidosonanne sanssalatan qashettidi, qasho keettaa gelidosona. <sup>37</sup> SHuchchan cadettidosona; magaajan naa77u kiyidi phalqqettidosona; paacettidosona; bisuwan haiqqidosona; etau ubbabaikka xayin, waayettidi tuggatidi, dorssa calaanne deeshsha calaa maayidi yuuyidosona. <sup>38</sup> Etau ha sa7ai giigennan ixxin, bazzon, deriyan, gonggolo giddooninne olla giddon yuuyidosona.

<sup>39</sup> Xoossai eta ammanuwaa markkattikkokka, hegeeti ubbati i, immana giidoogaa ekkibookkona. <sup>40</sup> Xoossai nuuyyo issi lo77o qofaa qoppi wottido gishshau, eti nuuni bannan bali bannaageeta gidokkona.

## 12

### *Xoossai Nuussi Aawa*

<sup>1</sup> Simmi nuuyyo haggaa keena daro asai, shaaraadan nu matan yuuyi aadhdhidi markkattiyaagee de7ishin, nuna xubbiya ubbabaanne baqqi oiqqiya nagaraa diggoos; diggidi nu sinttan de7iya nuuni woxxana wottaa gencidi woxxoos. <sup>2</sup> Nuuni nu ammanuwau huuphenne polo gidiya Yesuusa xeelloos. Yesuusi yeellaa karidi, wodeppe au de7iya ufaissaa gishshau, masqqaliyaa bolli misimaariyan xishettidi haiqqanaagaa gencidi, Xoossaa kawotaa araataappe ushachcha baggaara uttiis.

<sup>3</sup> Intte intte wozanaa bayidi daafurena mala, nagaranchchati bana daro ixsinkka gencida Yesuusa qoppite. <sup>4</sup> Nagaraara intte baaxetiiddi, suuttaa gussana gakkanaassi biron olettiichhibeekketa. <sup>5</sup> Xoossai ba naatudan, inttena zoriyoogaa dogidetii? Xoossai inttena,

“Ta na7au, Xoossai nena qaxxayiyo wode,  
laafabaadan qoppoppa.

I nena seeriyo wodekka yayyoppa.

<sup>6</sup> Aissi giikko, i ba siiqiyo uraa qaxxayees;  
qassi ba na7adan ekkiyo ubbaakka  
lissuwan garafees”

yaagiis. <sup>7</sup> Xoossai inttena qaxxayiyo wode gencite. Aissi giikko, i inttena naatudan oottees. Aawai qaxxayenna na7i de7ii? <sup>8</sup> Naata ubbaa qaxxayiyoogaadan, inttena qaxxayennan yeggi bayikko, karen yelettidaageeta gideetappe attin, tumu naata gidekketa. <sup>9</sup> Hegaa bollan qassi, nuna yelida nu aawati nuna qaxxayido wode, nuuni eta bonchchida. Yaatin, nuuni waanidi ayyaanatu Aawaayyo keehi darissi haarettidi de7okkonii? <sup>10</sup> Aissi giikko, nuna yelida nu aawati banttana ufaissiyaadan, amarida wodiya nuna qaxxayidosona; shin Xoossai nuuni a geeshshatettaa ekkana mala, nuna maaddanau qaxxayees. <sup>11</sup> Nuuni qaxxayettiyo wode, ha77issau yiilloyees; ufaissenna. SHin qaxxayidoogeetuyyo guyyeppe he qaxxayoi xillotettaa de7uwaa sarotettaa woiuwaa immana.

### *Zoriyaanne Seeraa*

<sup>12</sup> Hegaa gishshau, intte arggaacida kushiyaanne intte daafurida gulbbataa minttetite. <sup>13</sup> Wobbiya tohoi paxanaappe attin, burqqenna mala, sitta ogiyan hemettite.

<sup>14</sup> Asa ubbaara saro de7anau minnite; qassi geeshsha de7uwaa de7ite. Aissi giikko, hegee bannan ooninne Godaa be7anau danddayenna. <sup>15</sup> Xoossaa aaro kehatettaa ooninne ekkennan antenna mala naagettite; qassi mokiidi, ba marzziyan asa waissiya camo mittadan hanidi, ooninne daro asaa tunissenna mala naagettite. <sup>16</sup> SHaaramuxanau qaaqqatiya asi ooninne de7enna mala, woi qassi issitoo miyoobau ba bairatettaa baizzida, Xoossaa Ayyaani banna Eesawa mala asikka de7enna mala naagettite. <sup>17</sup> Hegaappe guyyiyan, Eesawi ba aawaa anjuuwaa ekkanaa koyidoogaa ereeta; shin a aawai a anjennan ixxiis; aissi giikko, nagaraappe simmiyo ogiyaa i harai atto, afuxxi koyidikka demmanau danddayibeenna.

<sup>18</sup> Intte bochchanau danddayiyo deriyaakkonne eexxiya tamaakko, xumaakko, ciggaaraakkonne gotiyaakko, <sup>19</sup> qassi malkkataa waasuwaakkonne qaala cenggurssaakko yibeekketa. Asai he cenggurssaa siyido wode, haraa gujji siyenna mala woossiis. <sup>20</sup> Aissi giikko, Xoossai eta, “Harai atto, do7ikka he deriyaa bochchikko, shuchchan cadettidi haiqqo” yaagido azazuwaa eti gencanau danddayibookkona.

<sup>21</sup> Aifiyan beettiyaagee daro daganttiyaagaa gidiyo gishshau Muusee, “Taani yashshan kokkorais” yaagiis.

<sup>22</sup> SHin intte Xiyoone Deriyaa, de7o Xoossai de7iyo katamaa, issippe shiiqidi ufaiittiya daro sha7u kiitanchchatukko saluwaa Yerusalaame yiideta. <sup>23</sup> Xoossaa baira naatukko, issippe shiiqidaageetukko, eta sunntai saluwan xaafettidoogeetukko yiideta; qassi asa ubbaa pirddiya Xoossaakkonne, bali bannaageeta oottido xillo asatu ayyaanatukko yiideta. <sup>24</sup> Ooratta maachchau gaannatiya Yesuusanne Aabeela suuttaappe aadhdhiyaabaa yootiya caccafettida suuttaakko yiideta.

<sup>25</sup> Intteyyo yootiya uraa yohuwaa ezggiyoogaa intte ixxenna mala, inttena naagite. Xoossaa kiitaa sa7an banttau yootiyaagee yootiyoogaa ezggennan ixxidaageeti kessi ekkana xayikko, saluwan, “Inttena naagite” giya Xoossaappe nuuni waanidi kessi ekkanee? <sup>26</sup> He wode a cenggurssai sa7aa qaattiis; shin i ha77i, “Taani sa7aa xalaalaa gidennan, issitoo gujjada saluwaakka qaattana” yaagiis. <sup>27</sup> “Issitoo gujjada” giya qaalai qaaxxennabai minnidi de7ana mala, merettidabai qaaxxanaagaanne kichchanaagaa geeshshidi bessees.

<sup>28</sup> Nuuni qaaxxanau danddayenna kawotettaa ekkiyo gishshau, ane Xoossaa gala-toosinne a ufaissos; au bessiyoogaadan bonchchuwaaninne yashshatettan au goinnoos. <sup>29</sup> Aissi giikko, nu Xoossai tumu bashshiya tama.

## 13

### *Xoossaa Nuuni Waati Ufaissanau Bessiyaakko*

<sup>1</sup> Intte ishata siiqiyoogaa aggoppite. <sup>2</sup> Imatta mokkiyoogaakka dogoppite. Aissi giikko, yaatiyoogan issi issi asai erennan kiitanchchata mokkiis. <sup>3</sup> Qasho keettan de7iyaageetubaa inttekka etaara issippe qasho keettan de7iyoogaadan qoppite; qassi intte intte huuphen waayettiyoogaadan, waayettiyaageetubaa qoppite.

<sup>4</sup> Ekkiyoogaanne geliyoogaa asai ubbai bonchchanau bessees; qassi azinainne machchiyaa issoi issuwau ammanettanau bessees; aissi giikko, Xoossai shaaramux-anau qaaqqatiyaageetanne shaaramuxiyaageeta pirddana.

<sup>5</sup> Miishsha siiqoppe inttena naagite; intteyyo de7iyaagee intteyyo gido. Aissi giikko, Xoossai ba huuphen,

“Taani nena mulekka yeggikke  
woikko aggikke”

yaagiis. <sup>6</sup> Hegaa gishshau, nuuni xalidi,

“Godai tana maaddiyaagaa;  
taani yayyikke.

Asi tana ai oottii?”  
yaagoos.

<sup>7</sup> Xoossaa qaalaa intteyyo yootida inttena kaalettidaageeta hassayite; eti waani de7idaakkonne hassayite; qassi etaagaadan ammanite.

<sup>8</sup> Yesuus Kiristtoosi zinekka hachchikka merinaukka laamettenna. <sup>9</sup> Dumma dumma ooratta timirttiyan wora booppite. Nu wozanai Xoossaa aaro kehatettan galatiyoogee lo77o gidiyoogaappe attin, miyoobau azazettiyoogaa gidenna; hegau azazetti-daageetikka maadettibookkona.

<sup>10</sup> Nuuyyo yarshshiyosai de7ees; Dunkkaaniyaa gidдон oottiyaageeti he yarshshiy-oosaappe maanau etau maati baawa. <sup>11</sup> Qeese ubbatu halaqai nagaraa gishshau, mehiyaa suuttaa yarshshanau Ubbaappe Aadhdhiya Geeshsha Sohuwaa efees; shin he mehiyaa ashuwaa qassi dirssaappe kareera xuuggees. <sup>12</sup> Hegaa gishshau, Yesu-usikka qassi nagaraappe asaa ba suuttan geeshshanau, katamaa penggiyaappe kareera waayettiis. <sup>13</sup> Simmi nuuni i borettido boriyaa ekkidi, dirssaappe kare akko kiyos.

<sup>14</sup> Aissi giikko, nuuyyo hagan merinau de7iya katami baawa; shin nuuni yaana katamaa naagoos.

<sup>15</sup> Simmi Xoossaayyo Yesuusa baggaara ubba wode galataa yarshshuwaa immoos; heгаа giyoogee menttershshai a sunttaayyo immiyo galataa giyoogaa. <sup>16</sup> Lo77obaa oottiyoogaanne issoi issuwaa maaddiyooгаа dogoppite. Aissi giikko, Xoossaa ufais-siyaagee heгаа mala yarshshuwaa.

<sup>17</sup> Inttena kaalettiyaageetuyyo azazettite; qassi eti azaziyoogaakka oottite. Eti bantta oottidobaa Xoossau yootana gishshau, intte shemppuwaa mintti naagoosona; intte etau azazettikko, bantta oosuwaa ufaittidi oottana; hegee xayikko, eti yiillotiiddi oottana; hegee inttena ainne maaddenna.

<sup>18</sup> Nuuyyo Xoossaa woossite. Nuuni ubba wode lo77obaa oottanau koyiyo gishshau, nuna zoriya lo77o wozanai nuuyyo de7ees. <sup>19</sup> Xoossai tana inttekko eesuwan zaarana mala, Xoossaa intte mintti woossanaadan, taani inttena keehi woossais.

### *Woosaa*

<sup>20</sup> Sarotettaa Xoossai, nu Godaa Yesuusa, dorssaa heemmiya gitaa, merinaa maachchaa suuttan haiquwaappe denttiis. <sup>21</sup> Xoossai Yesuus Kiristtoosa baggaara ba sinttan bana ufaissiyaabaa inttena ootissiiddi, inttekka i koyidobaa oottana mala, lo77o ooso ubban inttena i giigisso; Xoossai meri merinau bonchchetto. Amin77i.

### *Kuushshaa*

<sup>22</sup> Ta ishatoos, taani ha dabddaabbiyaa intteyyo qanttan xaafido gishshau, intte ha zoriyaa salettannan ezggana mala, taani inttena woossais.

<sup>23</sup> Nu ishai, Ximootiyoosi qashuwaappe birshshettidoogaa erite. Eesuwan i haa yiikko, taani aara baada inttena be7ana.

<sup>24</sup> Inttena kaalettiya ubbatanne geeshshata ubbaa saro saro giite. Xaaliyaappe yiida ammaniyaageeti inttena saro saro goosona.

<sup>25</sup> Aaro kehatettai inttenaara ubbaara issippe gido. Amin77i.

## Yaaqoobi Xaafido Kiitaa

### *Gidduwaa Erissuwaa*

Hagee Yaaqooba kiitai nu hachchi hachchi de7uwaa kaalettiya qofata oiqqiis. Xaafettidoogee akka “Biittan sa7an ubban laalettida Xoossaa asaassa. Ha maxaafaa xaafidaagee aadhdhida eratettaa nuuni oosuwan peeshshiyoo hiillaanne ammaniya asaa mokuwaassinne eeshshaassi kaaletuwaa immiya yohota si7iliyaadan qoncciyaa bessees.

Hiyyeesatettaabaa, duretettaabaa, paaciyaa, lo77o eeshshaabaa, qanaatiyaabaa, ammanuwaabaanne lo77o oosuwaabaa, inxxarssaa maaduwaabaanne qohuwaabaa, aadhdhida eratettaabaa, issoi issuwaara ooyettiyo ooshshaabaa, otoruwaabaanne ashkкетettaabaa, hara asaa bolli pirddiyoo, ceequwaabaa woikko ayyuwaabaa, gencaabaanne woosaabaa, ammaniya asaassi de7anau bessiya xeelaa ubbaa qoodidi xaafiis.

Kiitaikka kiristinnaa de7uwan ammanoi oosuwan pe7ana hanotata orddissidi bessees.

<sup>1</sup> Taani Yaaqoobi Xoossaa ailleenne Godaa Yesuus Kiristtoosa aillee, biitta ubban laalettida tammanne naa77u zerettatuyyo sarotaa kiittais.

### *Danddayaa, Ammanuwaa, Aadhdhida Eratettaa*

<sup>2-3</sup> Ta ishato, intte ammanoi paacettiyoogee intteyyo danddayaa immanaagaa eridi, duma duma paacee inttena gakkiiyo wode, heгаа kumetta ufaissadan qoodite. <sup>4</sup> Intte danddayai aibinne bali bannan inttena zawatidaageetanne paci bannaageeta oottidi, ba oosuwa polo. <sup>5</sup> SHin intteppe ooninne baayyo aadhdhida eratettaa xayikko, borennan ubbau kehatetan immiya Xoossaa woosso. I ayyo immana. <sup>6</sup> SHin i aibiinne sirennan ammanuwan Xoossaa woosso. Aissi giikko, siriyaa urai carkkoi sugin qaaxxiya abbaa beetaa mala. <sup>7-8</sup> Aissi giikko, naa77u qofai de7iyo urai, ba oge ubban ba qofaa qachchennaagee, he urai Godaappe ainne demmanau qoppoppo.

### *Hiyyeesa Asanne Dure Asa Ufaissaa*

<sup>9-10</sup> SHin hiyyeesa ishii Xoossai a xoqqu oottido wode ufaitto; qassi dure ishaikka Xoossai a ziqqi oottido wode ufaitto. Aissi giikko, dure bitanee maata gidдон dicciya ciishshadan xayana. <sup>11</sup> Aissi giikko, awai ba mishuwaara kiyidi, maataa melissin, ciishshai xayees; qassi a meraa lo77otettaikka xayees; hegaadankka qassi dure bitanee babaa oottiiddi xayana.

### *Asaa Bolli Gakkiya Paaciyaa*

<sup>12</sup> Waayiyaa gencciyaa urai anjettidaagaa; aissi giikko, he waayiyaa xoonidoogaappe guyyiyan, Xoossai bana siiqiyaageetuyyo immana giido de7uwaa akiliiliyaa i ekkana. <sup>13</sup> Ooninne paacettido wode, “Tana Xoossai paacces” gooppo. Aissi giikko, Xoossai iitan paacettanau danddayenna; qassi i ba huuphen oonanne paaccenna. <sup>14</sup> SHin asi huuphiyan huuphiyan ba huuphe iita amuwan gooshettiyo wodenne cimettiyo wode paacettees. <sup>15</sup> Hegaappe guyyiyan, amoi shahaaridi, nagaraa yeles; qassi nagaraa diccidi, haiquwaa yeles.

<sup>16</sup> Ta siiqo ishato, cimettoppite. <sup>17</sup> Lo77o imo ubbainne kumetta woito ubbai saluwaappe yees. Saluwaa poo7uwaa medhdhida Xoossaappe yees; Xoossai ba huuphen dummatennanne woi mirqqidi xumissenna. <sup>18</sup> Nuuni i medhdhido meretatu gidдон Xoqqasaa ekkanaadan, nuna ba sheniyan tumu qaalan yeliis.

### *Siyidoogaa Oosuwan Peeshshiyoo*



<sup>19</sup> Hegaa gishshau, ta siiqo ishato, haggaa hassayite; asai ubbai siyanau eesoto; shin haasayanaunne hanqqettanau eesotoppo. <sup>20</sup> Aissi giikko, asa hanqqoi Xoossai koyiyo xillotettaa eheenna. <sup>21</sup> Hegaa gishshau, tuna hanota ubbaanne iitatetta ubbaa intteppe xaissidi, Xoossai intte wozanan tookkido intte shemppuwaa ashshanau danddayiya qaala ashkкетettan ekkite.

<sup>22</sup> SHin Xoossaa qaala oottiteppe attin, sissa xallan intte huuphiyaa cimmooppite. <sup>23</sup> Aissi giikko, qaala siyidi oottenna urai de7ikko, i ba meraa heregan xeelliya uraa mala. <sup>24</sup> I bana xeellidi bees; biidi sohuwaarakka i ai malakkonne dogi aggees. <sup>25</sup> SHin ooninne aillettaappe kessiya bali banna higgiiyaa xeellidi, aani aqiyaaagee qassi a naagiyaaagee, siyidoogaakka dogennaagee, he urai ba oottiyo oosuwan anjettana.

<sup>26</sup> Ba inxxarssaa naagennan bana cimmiiddi, bau Xoossaa ammaniyoobaa milatiyo urai de7ikko, a ammanoi mela. <sup>27</sup> Xoossaa Aawaa sinttan pokkoi banna geesha ammanoi haggaa; hegee augee giikko, aaya aawi banna naatanne waayettiya am77eta maaddanaagaanne sa7aa nagaraa qitaappe ba huuphiyaa naaganaagaa.

## 2

### *Hiyyeesaa Karanau Bessena*

<sup>1</sup> Ta ishato, intte nu bonchcho Godaa Yesuus Kiristtoosa ammaniiddi, som77o xeellidi, asa bonchchoppite. <sup>2</sup> Aissi giikko, worqqa migido wottidi, lo77o maayo maayida issi asi intte shiiquwaa yiikko, qassi curqqa maayo maayida hiyyeesa asikka yiikko, <sup>3</sup> lo77o maayuwaa maayida bitaniyaa intte aatti bonchchidi a, “Neeni hagan ubbaappe lo77iya oidiiyan utta” giidi qassi hiyyeesa bitaniyaa, “Neeni hinin eqqashsha; woi hagan ta tohuwaa matan sa7an utta” giikko, <sup>4</sup> yaatin intte intte gidon shaahotetta medhdhiyaageetanne iita qofaara de7iya daannata gidekketiyye?

<sup>5</sup> Ta siiqo ishato, siyite; Xoossai ha sa7an de7iya hiyyeesa asai ammanuwan duretanaunne bana siiqiyaaageetuyyo immana giido saluwaa kawotetta laattanau dooribeenneeyye? <sup>6</sup> SHin intte hiyyeesata toochchideta. Dureti inttena tug-gaiyaageeta gidokkonaayye? Eti inttena daannan mootiyaageeta gidokkonaayye? <sup>7</sup> Intteyyo imettida lo77o sunntaa cayiyaageeti eta gidokkonaayye?

<sup>8</sup> SHin Xoossaa maxaafan, “Ne shooruwaa ne huuphedan siiqa” geetettidi xaafettida kawo higgiiyaa intte polikko, lo77obaa ootteeta. <sup>9</sup> SHin intte asa som77o xeellidi bonchchikko, nagaraa ootteeta; qassi higgee intte bolli higgiiyaa menttidaageetudan pirddana. <sup>10</sup> Aissi giikko, ooninne higge ubbaa naagidi, issinno menttiyaabaa gidikko, he urai higge ubbaa menttees. <sup>11</sup> Aissi giikko, “SHAaramuxoppa” giidaagee qassi “Woroppa” giis; shin neeni shaaramuxana xayikkokka, woridabaa gidikko, higgiiyaa menttadasa. <sup>12</sup> Asa aillettaappe kessiya higgiiyan pirddaa ekkana asatudan haasayitenne etaagaadan oottite. <sup>13</sup> Aissi giikko, asa maaribeenna uraa Xoossai maarennan pirddana; maarotetta pirddaa xonees.

### *Ammanuwaanne Oosuwaa*

<sup>14</sup> Ta ishato, issi urai baayyo ammanoi de7ees giikko, qassi a ammanuwaa a oosoi erissana xayikko, a ai go77anee? A ammanoi a ashshanau danddayii? <sup>15</sup> Issi ishah, woi issi michchiyaa kallottikko, qassi etau ubba gallassi miyoobi xayikko, <sup>16</sup> Intteppe issi urai eta, “Saro biite. Tamaa ho77ite. Kallidi miite” giidi, etau koshshiyaabaa immana xayikko, eta ai go77anee? <sup>17</sup> Hegaa gishshau, ammanoi oosoi bannan barkka de7ikko haiqqidaagaa.

<sup>18</sup> SHin issi urai, “Neessi ammanoi de7ees; qassi taassi oosoi de7ees. Neeni ne ammanuwaa ne oosuwaappe shaakkada tana bessa; taanikka ta ammanuwaa ta oosuwan nena bessana” gaana. <sup>19</sup> Neeni issi Xoossai de7iyooogaa ammanaasa; hegee lo77o. Xalhetikka qassi ammanoosona; yashshan kokkoroosona. <sup>20</sup> Neeni eeyyai! Ammanoi

oosuwaappe shaahettidi go77ennaagaa eranau koyai? <sup>21</sup> Nu aawai Abrahaami ba na7aa Yisaaqa yarshshiyosaa bolli wottido wode, ba oosuwan xillibeennee? <sup>22</sup> A ammanoinne a oosoi issippe oottidoogaanne a ammanoi a oosuwan polettidoogaa be7ikkii? <sup>23</sup> Xoossaa maxaafai “Abrahaami Xoossaa ammaniis. Xoossaikka heгаа ayyo xillotettan qoodiis” giidoogee polettiis; qassi Xoossaa dabbo geetettidi i xeesettiis. <sup>24</sup> Asi ammano xalaalaana gidennan, oosuwan xilliyoogaa intte be7eeta.

<sup>25</sup> Hegaadankka qassi shaaramuxiyaa Ra7aaba kiitettiyaageeta makkada hara ogiyaara eta moissido wode, ba oosuwan xillabeikke?

<sup>26</sup> Aissi giikko, shemppoi shaahettido bollai haiqqidaagaa gidiyoogaadan, hegaadankka qassi oosoi shaahettido ammanoi haiqqidaagaa.

### 3

#### *Inxxarssaa Naagiyoogaa*

<sup>1</sup> Ta ishato, nuuni haratuppe aadhdhiya pirddaa ekkanaagaa intte eriyo gishshau, intteppe daroti tamarissiyaageeta gidoppite. <sup>2</sup> Nuuni ubbaikka daroban baleettes; issi urai ba haasayan mulekka balana xayikko, i bana naaganau danddayiya bali banna asa. <sup>3</sup> Parati nuuyyo azazettana mala, bixaalaa barssidi, nuuni koyiyoosaa ubbaa eta efeeettes. <sup>4</sup> Be7ite, markkabetikka qassi heгаа keena gita gidiiddi, gote carckkuwan laagettikkokka, eta laaggiyaagee ba koyiyoosaa zaaridi laaggiyo qii guutta mittan laagettidi boosona. <sup>5</sup> Hegaadan inxxarssai bollaa gidдон guutta qommo gidikkokka, daro gitaban ceeqettes.

Guutta tamai waanida gita woraa xuuggii! Akeekite. <sup>6</sup> Inxxarssaikka tama mala. I nu asatettaa gidдон iitabaa ubbaa oottana danddayees; asatetta ubbaa tunisseees. Qassi nu de7uwaa wottaakka taman xuuggees; Gaannabiyaa taman i xuugettana. <sup>7</sup> Aissi giikko, do7atu kafotu zariyaa, tiran gooshettiya shooshshatu zariyaanne abban de7iya meretatu zariyaa ubbaa asi aadissii; qassi etikka aadidosona. <sup>8</sup> SHin ooninne inxxarssaa aadissanau danddayibeenna; inxxarssi woriya marzzee kumido woppu geenna iita mereta. <sup>9</sup> Nuuni inxxarssan nu Godaanne Xoossaa galatoos; qassi aanikka Xoossaa leemisuwan merettida asaa qanggoos. <sup>10</sup> Issi doonaappe galatainne qanggettai kiyees. Ta ishato, hegee hegaadan hananau bessenna. <sup>11</sup> Pulttoi issi ollaappe mal77iya haattaanne cammiya haattaa pulttanau danddayii? <sup>12</sup> Ta ishato, balase giyo mitti wogara aifanau danddayii? Woi woine turi balase giyo mitta aifanau danddayii? Maxine maxine giya haattapekka mal77o haatti kiyana danddayenna.

#### *Saluwaa Aadhdhida Eraanne Sa7aa Aadhdhida Eraa*

<sup>13</sup> Intte gidдон aadhdhida eranchchinne akeekanchchi oonee? Ba lo77o de7uwan oosettida ba oosuwaa ashkhetettaanne aadhdhida eratettan besso. <sup>14</sup> SHin intte wozanan cammiya qanaateenne yiqee de7ikko, otorettoppite; qassi tumatettaa bollikka worddotoppite. <sup>15</sup> Hega mala aadhdhida eratettai saluwaappe wodhdhiyaagaa gidenna; shin hegee sa7aabaa, asaabaa, xalahetubaa. <sup>16</sup> Aissi giikko, qanaateenne yiqee de7iyoosan ooshshainne iita ooso ubbai de7ees. <sup>17</sup> SHin bollappe yiya aadhdhida eratettai ubbaappe kase geeshsha. Qassi sarotetta, ashkkenne ero giyaagaa; qassi maarotettinne lo77o aifee kumidoogaa. Sireenne lo77o milatiya iitatetti bannaagaa. <sup>18</sup> Xillotettaa aifee sarotettaa oottiyaageeti sarotettan zerido zereettaappe beettiis.

### 4

#### *Ha Sa7aa Iitatettaa Dosennan Agganaagaa*

<sup>1</sup> Olinne ooshshi intte gidдо auppe yii? Eti yiidosai intte bollaa gidдон olettiya intte ufaittanau gita amuwaa amottiyoogaappe gidennee? <sup>2</sup> Intte amotteeta; shin demmekketa; heгаа gishshau woreeta. Mintti koyeeta; shin demmanau danddayekketa;

heгаа gishshau, ooyetteetanne oletteeta. SHin Xoossaa woossenna gishshau, intte koyiyoojaa demmekketa. <sup>3</sup> Xoossaa intte woossiyo wode, intte amuwaa polanau woosseeta; qassi intte qofai iita gidiyo gishshau demmekketa. <sup>4</sup> Simmi shaaramuxiyaageetoo, ha sa7aara dabbotiyoogee Xoossaayyo ixo gidiyoogaa erekketii? Aissi giikko, ha sa7aara dabbotana koyiyai ooninne Xoossaara morkkettees. <sup>5</sup> Woi Xoossaa maxaafai, “Xoossai nunan wottido Ayyaanai wolqqaama amuwaa amottes” giyoogaa intteyyo coo giyoobaa milatii? <sup>6</sup> SHin Xoossai aaro kehatettaa aattidi immees. Hegaa gishshau, Xoossaa maxaafai, “Xoossai otorettiyaageeta ixees; shin banttana kaushshiyaageetuyyo aaro kehatettaa immees” yaagees.

<sup>7</sup> Hegaa gishshau, intte Xoossau haarettite. Yaatidi xalahe halaqaa teqqite; i intteppe baqatana. <sup>8</sup> Xoossaakko shiiqite; ikka inttekkko shiiqana. Inttenoo nagaranchchatoo, intte kushiya meecettite. Naa77u qofai de7iyoogetoo, intte wozanaa geeshshite. <sup>9</sup> Tuggatite; kayottitenne yeekkite. Intte miichchaa yeehuwau laammite; intte ufaisaakka kayyuwau laammite. <sup>10</sup> Godaa sinttan intte huuphiyaa toochchite; qassi i inttena xoqqu xoqqu oottana.

### *Asa Bolli Pirdennan Agganaagaa*

<sup>11</sup> Ta ishato, issoi issuwaa zigiroppite. Ba ishaa zigiriyaageenne a bolli pirddiyaagee higgiiya zigireesinne higgiiya bolli pirddes. Neeni higgiiya bolli pirddikko, higgiiya bolli pirddiyaagaa gidaasappe attin, higgiiyu azazettiyaagaa gidakka. <sup>12</sup> Higgiiya immiyaageenne pirddiyaagee Xoossaa xalaala; i ashshanaunne xaissanau danddayees; shin ne shooruwaa bolli pirddiyaagee neeni oonee?

### *Ceeqettennaadan Imettida Zoriyaa*

<sup>13</sup> Inttenoo, “Nuuni hachchi woi wontto he katamaa baana; biidi hegan laitta uttana; zal77ananne qassi miishsha worissana” giyaageetoo, be7ite. <sup>14</sup> Wontto intte de7oi ai hananaakkonne erekketa; guutta wodiya intte beettidi, guyyeppe xayiya cuwa mala. <sup>15</sup> Hegaa aggidi, “Godai giikko, nuuni de7ana; haggaa woi heгаа oottana” gaanau bessees. <sup>16</sup> SHin intte ha77i intte gitatettan ceeqqeeta; heгаа mala ceeqo ubbai iita.

<sup>17</sup> Hegaa gishshau, lo77obaa oottanau eriiddi oottenna urau hegeе nagara.

## 5

### *Dure Asaassi Imettida Mino Zoriyaa*

<sup>1</sup> Ha77ikka inttenoo dure asatoo, intte bolli yiya tuggau “Aayyee! Aayyee!” yaagidi yeekkitenne zilaalite. <sup>2</sup> Intte duretettai moorettiichchiis; qassi intte afalaakka bil77ai mirggiis. <sup>3</sup> Intte worqqainne intte birai shiyiichchiis. Qassi he shiyai intte bolli markkattana; intte bollaakka tamadan maana. Intte intte miishshaa wodeyyo dagayideta. <sup>4</sup> Akeekite; intte gaden kattaa cakkida asatuyyo qanxxibeenna keraa miishshai waassees; eta waasoi wolqqaama Godaa haittan siyettiis. <sup>5</sup> Intteyyo injjetin, sa7an ishalidi de7ideta; shuha gallassau xiikkiyoogaadan, intte bolla xiikkideta. <sup>6</sup> Xillo asa bolli pirddideta; qassi a worideta; i inttenaara eqettenna.

### *Godaa Naa77antto Yuussaa Danddayan Naagiyooгаа*

<sup>7</sup> Hegaa gishshau, ta ishato, Godai yaana gakkanaassi genccite; biittaa goyyiyaagee ofinttaa irainne badhdheesaa irai yaana gakkanaassi genccidi, al77o kattaa i waati naagidi gatti ekkiyaakko be7ite. <sup>8</sup> Inttekkka qassi genccite; yayyoppite. Aissi giikko, Godaa yuussai matattiis.

<sup>9</sup> Ta ishato, Xoossai intte bolli pirddenna mala, issoi issuwaa bolli zuuzummoppite. Be7ite, pirddiyaagee penggen eqqiis. <sup>10</sup> Ta ishato, waayessinne genccassi leemiso gididaageeta, Godaa sunttan haasayida hananabaa yootidaageeta hassayite. <sup>11</sup> Be7ite, danddayidi genccidaageeta nuuni anjjettidaageeta geettees. Iyyooba genccaa intte

siyideta; qassi Godai ayyo wurssettan immidoogaakka be7ideta. Aissi giikko, Godai maarotainne qaretai kumidoogaa.

<sup>12</sup> SHin ubbaappe kase, ta ishato, saluwan gidin, woi sa7an gidin, woi hara caaquwan gidin, aibinkka caaqqoppite. SHin Xoossaa pirddan intte gelennaadan, intte yohoi ee giyoobaa gidikko, “Ee” giite; chii giyoobaa gidikko, “CHii” giite.

<sup>13</sup> Intte giddon waayettiya urai ooninne de7ikko, Xoossaa woosso; ufaittiya urai ooninne de7ikko, yexxidi galato. <sup>14</sup> Intteppe sahettiya urai ooninne de7ikko, woosa keettaa cimata baakko xeeso; eti Godaa sunttan zaitiyaa a tiyidi, ayyo Xoossaa woossona. <sup>15</sup> Ammanuwan Xoossaa woossido woosai hargganchchaa pattana; Godaikka a harggiyaappe denttana; qassi nagara i oottidobaa gidikkokka Godai ayyo atto gaana. <sup>16</sup> Hegaa gishshau, intte paxana mala, intte nagaraa issoi issuwaayyo paaxitenne issoi issuwaayyo Xoossaa woossite; xillo asa woosai wolqqaama oosuwaa oottees. <sup>17</sup> Eelaasi nu mala asa. Irai sa7an bukkennaadan, i minttidi, Xoossaa woossiis; woossin heezzu laittanne usuppun agina sa7an irai bukkibeenna. <sup>18</sup> Naa77anttuwaa Xoossaa i woossin, saluwaappe irai bukkiis; sa7aikka ba kattaa mokkiis.

<sup>19</sup> Ta ishato, intteppe ooninne tumaappe wora biikko, qassi issoi a guyye zaarikko, <sup>20</sup> nagaranchchaa a bala ogiyaappe zaariya ooninne a shemppuwaa haiquwaappe ashshanaagaanne daro nagaraa kammanaagaa ero.

## PHeexiroosi Xaafido Koiro Kiitaa

### *Gidduwaa Erissuwaa*

Yesuusi kiittido PHeexiroosi xaafido koiro kiitai xaafettidoogee he kiitaa gid-don “Doorettida Xoossaa Asata” geetettidi xeesettiyaanne Qeeri Iisiyan huuphessa bagga shaahuwan laalettida ammaniyaageetussa. Kiitaayyo waanna halchchoi ammanuwaa gaasuwan metoinne waayee gakkidoogeeta gazddissanaassanne minttet-tanaassa. Xaafee hegaa oottiyoogee a haiquwaa, a dendduwaa, a naa77antto yuussaa yootiya Yesuus Kiristtoosa mishiraachchuwaa qaalaa eta hassayissiyooogaana. Yesuus Kiristtoosa de7uwaa leemisodan xeellidi, metuwaa eti gencan kanttanaadan, eta hassayissees. Hegaara oisettidi, metoi eta ammanuwaa murutatettaa paacciyooogaanne “Yesuus Kiristtoosi qoncciyoo gallassi” bessiya woiuwaa eti ekkana de7iyooogaa eta hassayissees.

Xaafee eti metuwaa gencana mala minttettiyoogaa bollikka, Kiristtoosa kaal-liyaageeti de7iyooogaadan eti de7anaadan qofissees.

<sup>1</sup> Taani, Yesuus Kiristtoosi kiittido PHeexiroosi, Xoossai doorido asatuyyo PHanxxoosa biittan, Galaatiyaa biittan, Qaphphadooqiya biittan, Isiyaa biittaaninne Bitiniyaa biittan yedettin laalettidi de7iyaageetuyyo dabddaabbiyaa xaafais. <sup>2</sup> Yesuus Kiristtoosayyo intte azazettana malanne a suuttan geeyana mala, Xoossai Aawai doorido intteyyo ba Ayyaanan geeshshidoogeetuyyo, aaro kehatettainne sarotettaa gido.

### *De7uwaa Immana Giido Ufaissaa*

<sup>3</sup> Nuuni Xoossaa, nu Godaa Yesuus Kiristtoosa Aawaa, ba maarotettaa daruwaadankka nuna naa77anttuwaa yelidaagaa, Yesuus Kiristtoosa haiquwaappe denttidoogan nuuyyo de7uwaa immana giidaagaa galatoos. <sup>4</sup> Qassi Xoossai intteyyo immana daro laataa wooqqennasan, moorettennasan, woi xayennasan saluwan naagees. <sup>5</sup> He laatai wodiya wurssettan beettanau de7iya atotettaayyo Xoossaa wolqqan ammanuwan naagetti uttida inttessa.

<sup>6</sup> Ha77i guutta wodiyaayyo harai atto duma duma paaciyann intte paacettanau koshshikkokka, hagan daro ufaittite. <sup>7</sup> Hegee harai atto, taman yeggin xayiya worqqappekka intte ammanoi daro al77onne bali bannaagaa gidiyooogaa bessanaassa; yaatidi Yesuus Kiristtoosi beettiyo wode, galataa, bonchchuwaanne sabaa intte ekkana. <sup>8-9</sup> Intte a be7ana xayikkokka, siiqeeta; intte ha77i a be7ana xayikkokka, ammaneeta. Qassi intte intte ammanuwau polo gidiyaa intte shemppuwaa atotettaa ekkiyo gishshau, yootanau danddayettenna bonchchoi kumido ufaissaa ufaitteeta.

<sup>10</sup> Xoossai intteyyo immana aaro kehatettaabau hananabaa yootidaageeti keehi koyidi, ha atotettaabaa qoridosona. <sup>11</sup> Etan de7iya Kiristtoosa Ayyaanai Kiristtoosa waayiyaabaanne hegaappe guyyiyan yaana bonchchuwaabaa kasetidi markkattiiddi, aude woi waanida wodiyan yaanaakkonne akeekissidoogaadan, eti qoroosona. <sup>12</sup> He hananabaa yootiyaageeti oottido oosoi inttessappe attin, eta huuphessa gidennaagaa Xoossai etayyo qonccissiis; ha77i intte siyido wonggeliyaa mishiraachchuwaa intteyyo yootida asati, banttau saluwaappe kiittetida Geeshsha Ayyaanaa wolqqan yootidosona. Hegaa kiitanchchatikka be7anau amottoosona.

### *Geeshshatettan De7iyooogaa*

<sup>13</sup> Hegaa gishshau, oosuwaa oottanau intte wozanan qoppi uttite; minnite. Yesuus Kiristtoosi beettiyo wode aaro kehatettaa ekkana giidi, kumetta ufaissan naagi uttite. <sup>14</sup> Xoossau azazettite; intte kase erennan amottido amuwaa kaalloppite. <sup>15-16</sup> SHin inttena xeesida Xoossai geeshsha gididoogaadan, inttekka intte ooso ubban geeshsha



gidite. Xoossaa maxaafan, “Taani geeshsha gidiyo gishshau, inttekka geeshsha gidite” geetettidi xaafettiis.

<sup>17</sup> Asa huuphen huuphen som77o xeellennan a huuphe huuphe oosuwaadan pirdiya Xoossaa woossiiddi intte, “Nu Aawau” giidi a xeesiyaabaa gidikko, ha sa7aa bolli intte de7iyo wodiyan yashshatettan de7ite. <sup>18-19</sup> Intte intte aawatuppe laattido pattenna de7uwaappe wozettidoogee, xayiya bira woi worqqa malaana gidennaagaa ereeta; borssoi woi qiti banna dorssa suuttadan, al77o Kiristtoosa suuttan intte wozettideta. <sup>20</sup> Xoossai sa7ai merettanaappe kase Kiristtoosa doori wottiis; shin intte gishshau, ha wodiya wurssettan i beettiis. <sup>21</sup> Intte ammanoinne intte ekkana giidi ufaissan naagi uttidobai Xoossan de7ana mala, Xoossai haiquwaappe a denttidi, ayyo bonchchuwa immidaagan aani ammanetta.

<sup>22</sup> Tumatettaayyo intte azazettiyoogan, lo77o milatiya iitatetti bannan, intte ishannta siiqanau intte huuphiyaa geeshshidi, issoi issuwaara minttidi wozanappe siiqettite.

<sup>23</sup> Intte haiqqiya zareppe naa77anttuwaa yelettibeekketa; shin merinau de7iya Xoossaa qalan haiqqenna zareppe yelettideta. <sup>24</sup> Aissi giikko, Xoossaa maxaafai, “Asai ubbai maataa mala; a bonchcho ubbaikka maataa ciishshaa mala. Maatai meeles; ciishshaikka qoqqofettes. <sup>25</sup> SHin Godaa qalalai merinau de7ees” yaagees. Hagee intteyyo odido wongeliyaa mishiraachchuwa qaalaa.

## 2

### *De7o SHuchchaanne Geeshsha Asaa*

<sup>1</sup> Hegaa gishshau, intteppe iitatetta ubbaa, cimo ubbaa, lo77o milatiya iitatetta, qanaatenne zigirssa ubbaa diggite. <sup>2-3</sup> Godai keha gididoogaa intte eridobaa gidikko, ha77i yelettida gacino naatudan, uyiiddi diccanaunne attanau Xoossaa geeshsha qaalaa maattaa ubba wode laamotite.

<sup>4</sup> Godaakko de7o shuchchaakko shiiqite. Asi a ixxiis; shin Xoossaa matan i doorettida al77o. <sup>5</sup> Inttekka qassi de7o shuchchadan, geeshsha qeese gididi, Yesuus Kiristtoosa baggaara Xoossaa ufaissiya ayyaanaa yarshshuwaa Xoossaayyo yarshshanau, intte intte huuphen ayyaana keettadan keexettite. <sup>6</sup> Aissi giikko, Xoossaa maxaafai, “Be7ite, taani Xiyoone giyo kataman keettaa godaa xaphuwaa minttiya, doorettida, al77o shuchchaa wottais; aani ammaniya ooninne yeellatenna” yaagees. <sup>7</sup> Hegaa gishshau, ha shuchchai intteyyo ammaniyaageetuyyo daro al77o; shin ammanennaageetuyyo, “Gimbbiyaageeti karidi ixxido shuchchai godaa xaphuwaa minttiya, ubbaappe aadhdhiya shuchcha gidiis” yaagees. <sup>8</sup> Qassikka, “Ha shuchchai asa xubbiya shuchchanne asa ooggiya zaalla” yaagees; eti Xoossaa qaalaa ammanenna gishshau, i etau qoppi-doogaadanka xubettoosona.

<sup>9</sup> SHin Xoossai xumaappe garamissiya ba poo7uwau inttena xeesiis; intte a ooratta oosuwaa yootanau doorettida zare; intte kawo qeeseta; geeshsha asanne Xoossaassi buzo asa. <sup>10</sup> Intte kase Xoossaa asa gidekketa; shin ha77i intte a asa; intte kase maarotettaa ekkibeekketa; shin ha77i maarotettaa ekkideta.

### *Xoossaa Ashkkarata*

<sup>11</sup> Ta dabbotoo, intte ha sa7an imattanne yedettin asasan de7iyaageeta gididoogaadan, ubba wode intte shemppuwaara olettiya asatettaa amuwaappe intte haakkana mala, taani inttena woossais. <sup>12</sup> Aihuda gidenna asai inttena iitabaa ootiyaageetudan zigiriyo wode, Kiristtoosi yiyo gallassi intte lo77o oosuwaa eti akeekidi, Xoossaa galatana mala, intte de7uwaa eta giddon loitti naagite.

<sup>13</sup> Godaa gishshau, asa higge ubbaayyo haarettite; kawoikka ubbaappe bolla gidiyo gishshau, ayyo haarettite. <sup>14</sup> Qassi deriyaa haariyaageetuyyookka haarettite. Aissi giikko, eti iitabaa oottiyaageeta qaxxayanaunne lo77obaa oottiyaageeta galatanau kawoppe kiitettidosona. <sup>15</sup> Aissi giikko, Xoossai intte intte lo77o oosuwan erenna eeyya

asaa haasayaa co77u oottanaagaa koyees. <sup>16</sup> Ailletettaappe kiyidi, Xoossaa ailledan de7iteppe attin, he ailletettaappe kiyidoogaa iitatetta genttiyoobaa oottoppите. <sup>17</sup> Asa ubbaa bonchchite. Intte ishantta siiqite. Xoossau yayyite. Kawo bonchchite.

### *Kiristtoosi Ekkido Metuwaa Leemisotettaa*

<sup>18</sup> Ashkkaratoo, intte lo77o godatu xalaalaayyoonne ashkke godatu xalaalaayyo gidennan, iitatuuyookka daro yayyidi haarettite. <sup>19</sup> Aissi giikko, asi naaqqiyo wode waayettiya urai Xoossaa qoppiiddi, waayiyaa danddayikko, Xoossai a anjjana. <sup>20</sup> Aissi giikko, intte nagara oottin, inttena dechchiyo wode, intte danddayikko, intteyyo ai galati de7ii? SHin lo77obaa oottidi waayiyaa intte danddayikko, Xoossai inttena hegau anjjana. <sup>21</sup> Xoossai inttena xeesidoogee hegaa gishshassa; aissi giikko, Kiristtoosi intteyyo waayettiis; intte a kaallana mala, intteyyo leemiso gidiis. <sup>22</sup> Nagara i oottibeenna; ba doonanka worddo haasayibeenna. <sup>23</sup> Asi bana cayiyo wode, zaaridi cayibeenna; waayettiyo wodekka manddibeenna. SHin xillo pirddiya Xoossaayyo bana aattidi immiis. <sup>24</sup> Nuuni nagarau haiqqidi, xillotettau de7ana mala, Kiristtoosi ba huuphen ba ashuwan nu nagaraa masqqaliyan tookkiis; intte a masunttan paxideta. <sup>25</sup> Aissi giikko, intte oge balida dorssa mala; shin ha77i intte shemppuwaa heemmiyaagaakkonne naagiyaagaakko simmideta.

## 3

### *Azinabaanne Machchibaa*

<sup>1-2</sup> Hegaadanka maccaasatoo, intte azinatuppe Xoossaa qaalau azazettenna issooti issooti de7ikkokka, intte palamettennan, eti intte yashshatettaanne intte geeshsha de7uwaa be7idi ammanana mala, etau haarettite. <sup>3</sup> Intte intte huuphe pixiyoogaanne worqqa wottiyoogan woi lo77o maayo maayiyoogan intteyyo bolla baggaa loittoppite. <sup>4</sup> SHin intte wozana giddon de7iya lo77otetta Xoossaa sinttan intteyyo daro al77o gididi, xayenna ashkkenne woppu giida ayyaana gido. <sup>5</sup> Aissi giikko, hegaadan Xoossai immana giidoogaa ammanida geeshsha maccaasati beni wode bantta azinatuyyo haarettidi, banttana hegaadan daro loittidosona. <sup>6</sup> Hegaadan Saara Abrahaama, “Ta godau” yaagada xeesaidda, ayyo azazettaasu; intteikka issibaunne yayyennan lo77obaa oottikko, i naata.

<sup>7</sup> Hegaadan azinatoo, intte maccaasati daafuranchcha mereta gidiyooгаа eridi, etaara issippe de7ite; intte woosai xubettenna mala, Xoossai immido de7uwaa aaro kehatettaa eti inttenaara issippe laattiyo gishshau, eta bonchchite.

### *Lo77obaa Oottiiddi Metuwaa Ekkiyoogaa*

<sup>8</sup> Hegaappe aadhdiyaabaa gidikko, ubbai issi qofan de7ite. Issoi issuwau qarettidi, ishanttudan siiqettite; qassi issoi issuwau kehiyaageetanne intte huuphiyaa kaushshiyaageeta gidite. <sup>9</sup> Iitaa gishshaa iitaa woi cashshaa gishshaa cashshaa zaaroppite; hegaa aggidi, Xoossai intteyyo anjjuwaa immanau inttena xeesido gishshau anjjite. <sup>10</sup> Aissi giikko, Xoossaa maxaafai hagaadan yaagees; “De7o dosiyainne lo77o wodiyaa be7anau koyiyai oona gidikkonne ba inxxarssan iitabaa haasayiyoogaanne worddo yootiyoogaa aggo.

<sup>11</sup> Iitabaa oottiyoogaa aggidi, lo77obaa ootto; sarotettaakka keehi koyonne a kaallo.

<sup>12</sup> Aissi giikko, Godaa aifee xillotukko xeellees; qassi i ubba wode eta woosaa ezggees. SHin Godai iitabaa oottiyaageeta ba hanqqo som77uwan xeellees” yaagees.

<sup>13</sup> Intte lo77obaa oottanau amottikko, inttena qohanai oonee? <sup>14</sup> SHin harai atto, xillotettaa gishshau intte waayettikkokka, anjettidaageeta. Asau yayyoppitenne hirggoppite. <sup>15</sup> SHin Kiristtoosa intte wozanan bonchchitenne a intte Goda oottite. Xoossai intteyyo immana giido inttenan de7iyaagau gaaso oichchiya ooyyoonne zaaro immanau ubba wode giigi uttite; shin hegaa ashkкетettaanne yashshatettan oottite.

<sup>16</sup> Qassi Kiristtoosan intte de7iyo lo77o de7uwaa iitabaa oottidobaadan, inttena cayiya asai ba zigiriyooban yeellatana mala, inttena zoriya wozanai geeshsha gido. <sup>17</sup> Aissi giikko, Xoossai gidobaa gidikko, iitabaa oottido gishshau waayettiyoogaappe, lo77obaa oottido gishshau waayettiyoogee keha. <sup>18</sup> Aissi giikko, Kiristtoosi nuna Xoossaakko efaanau, baayyo xillo gidiiddi, makkalanchchatu gishshau, issitoo ubbaa nagarau haiqqiis; i ba asatettan haiqqiis; shin ayyaanau paxiis. <sup>19</sup> Qassi he Ayyaanau, qashuwan de7iyo ayyaanatukko biidi, etayyo qaala yootiis. <sup>20</sup> He ayyaanati amarida hosppun asati haattan attido markkabiya Nohee keexxishin, Xoossai danddayidi gam77ido wode, Xoossaayyo azazettibeenna asaa ayyaanata. <sup>21</sup> Hegee xinqqatiyau leemiso gididi, inttena ha77i ashshees; lo77o zoriya wozanaappe Xoossaa woossiyoogaappe attin, bollaa qitaa meecchiyoogaa gidenna; hegee inttena Yesuus Kiristtoosi haiquwaappe denddidoogan ashshees. <sup>22</sup> Saluwaa biidi Xoossaappe ushachcha baggan i uttidi, kiitanchcha ubbaa, maataara de7iyaageetanne wolqqaamata haarees.

## 4

### *Geeshshatettan De7ana De7uwaabaa*

<sup>1</sup> Hegaa gishshau, Kiristtoosi ba ashuwan nuuyyo waayettido gishshau, inttekka he qofaa ola miishshadan oiqqidi, intte intteyyo minnite. Aissi giikko, ba ashuwan waayettida urai nagaraa oottiyoogaa aggiis. <sup>2</sup> Hagaappe sinttan, ha sa7an shemppoor de7anau attida wodiyan, Xoossai koyiyoogaadan de7anau bessiyoogaappe attin, asa amodan de7anau bessenna. <sup>3</sup> Aissi giikko, Aihuda gidenna asai oottanau dosiyoogaa intte oottiiddi, shaaramuxanau qaaqqatiyoogan, amuwan, mattuwan, yettan, ushshan, pokkiya eeqau goinniyoogan, de7ido kase aadhdhida wodee intteyyo gidana. <sup>4</sup> Aihuda gidenna asaara intte shori bainna oosuwa issippe oottenna gishshau garamettidi, inttena cayoosona. <sup>5</sup> SHin eti paxa de7iyo asaa bollinne haiqqida asaa bolli pird-danau giigi uttida Xoossau zaaruwaa immana. <sup>6</sup> Haiqqida asai ba asatettan asai pirddettiyoogaadan pirddettanaunne qassi ayyaanau Xoossai de7iyoogaadan de7anau, wonggeliyaa mishiraachchoi etayyo hegau odettiis.

### *Xoossai Immido Imotata Loittidi Aissiyogaa*

<sup>7</sup> Ubbabaukka wursettai matattiis. Hegaa gishshau, Xoossaa woossanau wozanaa qofai de7iyoogeetudan, inttena naagitenne minnite. <sup>8</sup> Siiqoi daro nagaraa kammiyo gishshau, ubbabaappe aattidi issoi issuwara wozanaappe siiqettite. <sup>9</sup> Zuuzummennan issoi issuwaa imattatettan mukkite. <sup>10</sup> Intte huuphiyan huuphiyan Xoossaappe duma duma aaro kehatettaa ekkidoogaadankka, Xoossaa duma imuwaa loitti gishiyaageetudan, issoi issuwau oottite. <sup>11</sup> Yesuus Kiristtoosa baggaara ubban Xoossai galatettana mala, ooninne yootiyaabaa gidikko, qaala Xoossaappe ekkidi yootiyoogaadan yoto. Qassi ooninne maaddiyaabaa gidikko, Xoossai ayyo immiyo wolqqan maaddo. Bonchchoinne godatettai Xoossaassi meri merinau gido. Amin77i.

### *Metuwaa Wode Minniyoogaa*

<sup>12</sup> Ta dabbotoo, intte gidon tamadan xuuggidi paacciya waayee yiyaagaa oorat-tabai haniyaabaadan garamettoppote. <sup>13</sup> SHin Kiristtoosa bonchchoi beettiyo wode intte ufaittana mala, aara waayettiyoogan ufaittite. <sup>14</sup> Asi inttena Kiristtoosa sunntaa gishshau boriyaabaa gidikko, intte anjettidaageeta; aissi giikko, bonchcho Ayyaanai, Xoossaa Ayyaanai, intte bolli shemppana. <sup>15</sup> Intteppe ooninne shemppo woridabaadan, woi kaisodan, woi iitabaa oottida asadan, woi hara asa yohuwan gelidabaadan waayet-toppo. <sup>16</sup> SHin ooninne Kiristtoosa ammaniyo gishshau waayettikko, Kiristtoosa sunntaa gishshau, Xoossaa galatanaappe attin, yeellatoppo.

<sup>17</sup> Aissi giikko, pird dai Xoossaa asaa bolli doomettiyo wodee gakkiiis. Qassi he pird dai koiro nu bolli doomettiyaabaa gidikko, a wonggeliyaayyo azazettennaageetu

wurssettai aiba gidanee? <sup>18</sup> Xillo asi tuggan attiyaabaa gidikko, makkalanchchainne nagaranchchai yaatin waananee? <sup>19</sup> Hegaa gishshau qassi, Xoossai giidoogaadan waayettiyaageeti lo77obaa oottiiddi, bantta shemppuwaa hadaraa banttana medhdhida ammanettiya Xoossau immona.

## 5

### *Xoossaa Asaa Aissanau Imettida Zoriyaa*

<sup>1</sup> Simmi taani woosa keettaa cimatuura cima gidiyaageenne, Kiristtoosa waayiyaa markkattiyaagee, qassi qonccana bonchchuwaa shaakkanaagee intte gidдон de7iya cimata zorais. <sup>2</sup> Intte gidдон de7iya Xoossaa dorssaa wudiyaa Xoossai koyiyooogaadan heemmite. Dosaanappe attin, wolqqan gidenna. Qassi intte go77a xalaalaa xeelennan, lo77o qofan heemmite. <sup>3</sup> Dorssaa wudiyau intte leemiso gidanaappe attin, heemmiyoogeeta wolqqan haaroppite. <sup>4</sup> Qassi heemmiyaageetu halaqai beettiyo wode, moorettenna bonchcho akiliiliyaa intte ekkana.

<sup>5</sup> Hegaadanka yelaga asatoo, cimatuuyo haarettite. Ubbaikka issoi issuwau oot-tanau intte huuphiyaa kaushshiyooгаа afaladan maayite. Aissi giikko, Xoossai otorettiyaageeta ixxees; shin banttana kaushshiyaageetuyyo aaro kehatettaa im-meas. <sup>6</sup> Xoossai ba lo77o wodiyan inttena xoqqu oottana mala, wolqqaama Xoossaa kushiyaappe garssaara inttena toochchite. <sup>7</sup> I intteyyo qoppiyo gishshau, inttena hirggissiya ubbabaa a bolli olite.

<sup>8</sup> Xalaha halaqai, intte morkkee, mittiyo uraa koyidi, gudiya gaammuwaadan gudiiddi, intte lanqqiyan yuuyiyo gishshau naagetittenne beegottite. <sup>9</sup> Sa7an de7iya intte ishantti hegaadan waayettiyoogaa eridi, ammanuwan minnidi, aara eqettite. <sup>10</sup> Aaro kehatetta ubbaa Xoossai, ba merinaa bonchchuwaayyo Kiristtoos Yesuusa baggaara inttena xeesidaagee, amarida wudiyaa intte waayettidoogaappe guyyiyan, i ba hu-uphen inttena loittananne minttana. Qassi i inttena wolqqantana. <sup>11</sup> Bonchchoinne wolqqai merinaappe merinaa gakkanaassi ayyo gido. Amin77i.

### *Wurssetta Sarotaa*

<sup>12</sup> Hagee Xoossaa tumu aaro kehatettaa gidiyoogaa taani intteyyo markkattaiddanne inttena zoraidda, intteyyo qanttан xaafido dabddaabbiyaa ammanettiya isha gaada taani qoppiyo Sillaasa bolli kiittaas; he aaro kehatettan minnite.

<sup>13</sup> Inttenaara issippe doorettida Baabiloonen de7iya woosa keettaa asainne ta na7ai Marqqoosi inttena “Saro saro” goosona. <sup>14</sup> Siiqo yeretaa yerettiiddi, issoi issuwaa sarotite.

Intteyyo, Kiristtoosaara de7iya ubbatuyyo sarotettai gido. Amin77i.

## PHeexiroosi Xaafido Naa77antto Kiitaa

### *Gidduwaa Erissuwaa*

Yesuusi kiittido PHeexiroosi xaafido naa77antto kiitai xaafettidoogee dumma dumma sohuwan de7iya, beni ammaniya asatussa. Kiitaayyo waanna halchchoi worddo asttamaaretu iita oosuwaanne eta timirttiyaa gaasuwan merettida pokko de7uwaa ixxiyoogaa. Merettida metota qaaranaa maado gidiyaagee Yesuusa bantta aifiyan be7idanne i tamaarissiyo wode bantta haittan siyida asati tamaarissido timirttiyaa baggaara Xoossaabaanne Godaa Yesu Kiristtoosabaa ammanttiya eraa demmiyoogaa. Xaafee dumma naagidi odidobai, “Kiristtoosi naa77anttoo yeenna” yaagiya worddo timirttiyaabaa. Hegaa xeelliyaaagan haasayiiddi, “Kiristtoosi simmidi yeennan gam77idoogee, Xoossai, asai ubbai ba nagaraappe simmanaagaappe attin, ai asinne xayanaagaa koyenna gishshaassa” yaagees.

<sup>1</sup> Taani Simoon PHeexiroosi, Yesuus Kiristtoosi kiittidoogeenne a ashkkaarai, nu Xoossaanne nuna ashshiya Yesuus Kiristtoosa xillotettaa baggaara nuugaa mala al77o ammanuwaa ekkidaageetuyyo ha dabddaabbiyaa xaafais.

<sup>2</sup> Xoossaanne nu Godaa Yesuusa intte eriyooagan aaro kehatettainne sarotettaa intteyyo palahidi gido.

### *Xoossaa Xeessaanne A Dooruwaa*

<sup>3</sup> Nuuni Xoossaa bonchchuwaanne lo77otettaa laattana mala, nuna xeesidaagaa nuuni eriyooagan, Xoossaa milatidi de7anau nuna koshshiyaabaa ubbaa Xoossaa wolqqai nuuyyo immiis. <sup>4</sup> Intte a imuwaa baggaara sa7an de7iya bashshiya amuwaappe kessi ekkanaadaaninne Xoossaa xoossatettaa laattanaadan, i ba immana giido daro wolqqaamanne al77o imuwaa nuuyyo immiis. <sup>5</sup> Hegaa gishshau, minnidi intte ammanuwaa bolli lo77otettaa, lo77otettaa bolli eratettaa, <sup>6</sup> eratettaa bolli inttena naagiyoogaa, inttena naagiyoogaa bolli genccaa, genccaa bolli Xoossaa milatiyoogaa, <sup>7</sup> Xoossaa milatiyoogaa bolli ishatettaa siiquwaa, ishatettaa siiquwaa bolli siiquwaa gujjite. <sup>8</sup> Aissi giikko, hageeti intteyyo keehi dariyaabaa gidikko, inttena Godaa Yesuus Kiristtoosa erattetan tishshanne aifeera de7iyaageeta oottana. <sup>9</sup> SHin hegeeti baina urai ba matan de7iyaabaa xalaalaa demmees; qassi i qooqe; i kase oottido nagarai atto geetettidoogaa erenna.

<sup>10</sup> Hegaa gishshau, ta ishato, inttena Xoossai xeesidoogaanne dooridoogaa mintanau, kaseegaappe aadhdhi minnite; aissi giikko, intte heгаа oottiyaabaa gidikko, xubettekketa. <sup>11</sup> Hegaadan qassi nu Godaanne nuna ashshiya Yesuus Kiristtoosa merinaa kawotettaa geliyo kumetta shenee intteyyo imettana.

<sup>12</sup> Hegaa gishshau, intte ha yohota eriyaabaa gidikkokka, qassi intte oiqqido tuman minnidaageeta gidikkokka, taani inttena ha yohota ubba wode hassayissiyoogaa aggikke. <sup>13</sup> Taani paxa de7ido keenan, inttena hassayissada qaasettanau koshshiyaabaa tau milatees. <sup>14</sup> Nu Godai Yesuus Kiristtoosi tau qoncciyaa yootidoogaadan, taani ha haiqqiya asatettaa gam77ennan qaara olanaagaa erais. <sup>15</sup> Taani haiqqidoogaappe guyyiyaana gidinkka, intte ha yohota ubba wode qoppaanau danddayana mala, tau danddayettidabaa ubbaa oottana.

### *Kiristtoosa Bonchchuwaa Bantta Aifiyan Be7ida Markkata*

<sup>16</sup> Nuuni a gita bonchchuwaa be7idi yootoosippe attin, medhdhi ekkido haisiyan nu Godaa Kiristtoosa wolqqaanne yuussaa intteyyo yootibookko. <sup>17</sup> Aissi giikko, daro wolqqaama bonchchuwaappe, “Taani aani daro ufaittiyo ta siiqo Na7ai haggaa” yaagiya cenggurssai yiido wode, Xoossaappe, Aawaappe bonchchuwaanne galataa i ekkiiis.



<sup>18</sup> Qassi nuunikka geeshsha deriyaa bollan aara de7iiddi, he cenggurssai saluwaappe yiishin siyida.

<sup>19</sup> Qassi hegaappe keehi aadhdhiya hananabaa yootiyaageeti haasayido nuna keehi ammanttiya qaalai nuuyyo de7ees; intte he qaalaa naagiyaabaa gidikko loittideta. Aissi giikko, hegee sa7ai wonttana gakkanaassinne maallado xoolinttiyaa poo7oi intte wozanan poo7ana gakkanaaassi, xuman poo7iya poo7uwaa mala. <sup>20</sup> Ubbaappe kasetidi, haggaa erite; Xoossaa maxaafan xaafettida hananabaa yootidobaa ooninne barkka birshshanau danddayenna. <sup>21</sup> Aissi giikko, hananabaa yootidobi ubbai geeshsha asati Geeshsha Ayyaanai kaalettin, Xoossaa qaalaa haasayidosonappe attin, asa sheniyann haasayettibeenna.

## 2

### *Worddo Asttamaareta*

<sup>1</sup> SHin hananabaa yootiya worddoti asaa giddon kase de7iyooogaadan, intte gid-donkka wordduwaa tamarissiyaageeti de7ana. Eti banttana wozida, Ubbaa Haariya Godaa kaddidi, bashshiya worddo timirttiyaa ehaana; qassi eti akeekenna bashshaa bantta bolli ehaana. <sup>2</sup> Qassi daro asai yeellayiya eta iita ogiyaa kaallana; eta gaasuwan tumaa ogee cayettana. <sup>3</sup> Wordduwaa tamarissiya hegeeti miishshau yaaretiyoogan bantta medhdhi ekkido haisiyan inttena bonqqana; beniisappe doommidi, eta pird dai giigi uttiis; eta xaissiyaagee beegottidi naagees.

<sup>4</sup> Nagara oottida kiitanchchatuyyo Xoossai qarettennan, pird daa gallasai gakkanaaassi xuma ollan eti qashetti uttido Gaannabiyan yeggiis. <sup>5</sup> Xoossai nagaranchchatu bolli bashshaa haattaa yeddiisippe attin, beni asau kehibeenna; shin xillotettaabaa yootida Nohanne hara laappun asata ashshiis. <sup>6</sup> Xoossai Sadoomanne Gamooraa giyo katamata biitta bidintta oottidi, xuuggi xaissidi, nagaranchcha gidiyaageeta gakkanabau leemiso oottiis. <sup>7</sup> Higgiyau azazettenna shaaramuxiya asatu giddon tuggatidi de7iya xillo Looxa Xoossai ashshiis. <sup>8</sup> He lo77o bitanee eta giddon de7iiddi, eti oottiyo iita oosuwa gallassi gallassi be7ido wodenne siyido wode a lo77o wozanai un77ettiis. <sup>9-10</sup> Hegaa gidikko, Godai Xoossau goinniya asata paaciyaappe waati ashshanaakko erees; nagaranchchata qassi ubbaappe aattidi, tuna amuwan ashuwaa amuwaa kaalliyaageetanne qassi Xoossaa wolqqa kariyaageeta, pird daa gallasai gakkanaaassi Godai qaxxayiididi wottanaagaakka erees.

Wordduwaa tamarissiya hegeeti xalanne otoranchcha gididoogan, bollan de7iya bonchcho meretaa cayoosonappe attin, bonchchokkona. <sup>11</sup> He asatuppe daro minonne wolqqaama gidiya kiitanchchatikka bollan de7iya bonchcho meretaa Godaa sinttan cashshan mootanau koyokkona. <sup>12</sup> SHin he asati ohettidi xayanau yelettida bantta meretan wozanai bainna woraa do7atudan hanoosona; eti erennabaa cayoosona; qassi woraa do7adan, eti coo xayana. <sup>13</sup> Eti bantta medhdhido metuwan metootana; gallassi yexxidi duriyoogaa ufaissiyaabaa giidi qoppoosona; eti kaushshatanne tunata gidi uttidi, inttenaara miyo qumaa meettan ufaittoosona. <sup>14</sup> SHAaramuxa maccaasaa xeelliyooogaa aggenaa aifee etau de7ees; qassi nagara oottiyoogaakka aggokkona. Ammanuwan minnibeenna asaa cimmoosona. Amuwaara meezetida wozanai etau de7ees; eti qanggettidaageeta. <sup>15</sup> Sitta ogiyaa aggidi balidosona. Bi7ooraa na7aa Balaama ogiyaara biidosona; Balaami makkalan miishshaa ekkanaau koyiis. <sup>16</sup> I hananabaa yootiyaagaa; shin a nagaraa gishshau, a haree asadan haasayan seeridi, a gooshsha mala hanuwaappe a teqqiis.

<sup>17</sup> He asati meliichchida pulttuwaa mala; qassi gotee tookkidi efiyo shaaraa mala; Xoossai etau sakkana xumaa giigissi uttiis. <sup>18</sup> Aissi giikko, eti hadanne ooro haasayaa hasayoosona; balan de7iya asaappe kessi ekkiaageeta shaaramuxanau qaaqqatiyo

amuwan cimmoosona. <sup>19</sup> Eti banttau bashsha amuwaara de7iiddi eta, “Intte ailletettaappe kiyana” yaagoosona; aissi giikko, issi asi bana xoonidabau aibaunne aille. <sup>20</sup> Eti nu Godaanne nuna ashshiya Yesuus Kiristtoosa eratettan ha sa7aa tunatettaappe kessi ekkidoogaappe guyyiyan, guyye simmidi, aani xubettidi xoonettiyaabaa gidikko, kase de7iyo de7uwaappe guyyegee etau iitana. <sup>21</sup> Aissi giikko, etau imettida geeshsha azazuwaa eridi aggiyoogaappe eti xillotettaa ogiyaa erennan aggiyaakko lo77o shin. <sup>22</sup> “Kanai ba cooshshaakko guyye simmees” giyo leemisoinne qassi, “Meecettida gudunttai guyye simmidi, urqqan gondorettees” giyo leemiso tuma gidiyogaa eta gakkidabai bessees.

### 3

#### *Godai Yesuusi Yaana Ufaissaa*

<sup>1</sup> Ta siiqotoo, hagee taani intteyyo xaafido naa77antto dabddaabbiyaa; taani he naa77u dabddaabbetakka intte suure qofaa qoppaanaan denttettanau inttena hassayisanaan xaafaas. <sup>2</sup> Hananabaa yootiya geeshshati beni yootido qaala intte hassayana malanne Godai inttena ashshiyaagee, ba kiittidoogeetu baggaara inttena azazido azazuwaa intte hassayana mala koyais. <sup>3</sup> Wodiyaa wurssettan, asa toochchiya bantta amuwaadan de7iyaageeti asa toochchiiddi denddanaagaa ubbaappe kasetidi erite. <sup>4</sup> Eti, “I ‘Yaana’ yaagiis. Gibeennee? Yaatin awan de7ii? Aissi giikko, nu aawati haiqqiichchidosona; shin ubbabaikka sa7ai merettoosappe doommidi de7iyogaadankka de7ees” yaagana. <sup>5</sup> Daro wodiyaappe kase Xoossai haasayin, saloinne sa7ai merettidoogaa eridi, eti akeekennan ixxidosa. Sa7ai haattaappenne haattan merettiis. <sup>6</sup> Qassi heгаа gaasuwan, he wode de7iya sa7ai he haattan meetetti xayiiis. <sup>7</sup> SHin ha77i de7iya saloinne sa7ai, Xoossau goinnenna asati pirddettiyo gallassainne xayiiyo gallassai gakkanaassi takkidi, he qaalaa tamaa naagoosona.

<sup>8</sup> SHin ta siiqotoo, ha issi yohiyo dogoppite; Godaa matan, issi gallassai sha7u gallassa mala gidiyogaanne, qassi sha7u gallassai issi gallassa mala gidiyogaa dogoppite. <sup>9</sup> Issooti issooti qoppiyoogaadan, Godai ba oottana giidoogaa oottanau takkenna; shin ooninne ba nagaraappe simmanaadan koyeesippe attin, ooninne xayana mala koyenna gishshau, inttebaa gencees.

<sup>10</sup> SHin Godaa gallassai kaisodan yaana. He gallassi saloti wolqqaama gunttan Xayana; saluwaa meretati wolqqaama mishuwan seerana; sa7ainne a bollan de7iya ubbaba xayana. <sup>11</sup> Ubbabaikka hegaadan xayiyaabaa gidikko, intte ai mala asa gidanau bessii? Intte de7oi geeshshanne Xoossaa milatiyaagaa gidanau koshshees. <sup>12</sup> Intte Xoossaa gallassaa naagishin, he gallassai eesuwan gakkanaadan, intteyyo danddayettiyaabaa oottite; he gallassi saloti xugettidi xayanne saluwaa meretatikka wolqqaama mishuwan seerana. <sup>13</sup> SHin nuuni Xoossai immana giido ooratta saluwaanne ooratta sa7aa xilloi de7anasaa naagoos.

<sup>14</sup> Hegaa gishshau, ta siiqotoo, he gallassaa naagiiddi, pokkoinne boree bainnaageeta gididi, aara sarotettan de7ana mala minnite. <sup>15</sup> Godaa danddayai atotettaa gidiyogaa intte wozanan qoppite; hegaadan qassi nu siiqo ishai PHauloosi, Xoossai bau immido aadhdhida eratettan intteyyo xaafiis. <sup>16</sup> Ba xaafiyo dabddaabbe ubban, he yohuwaabaa xaafiyo wode, i giyoogee haggaa. Tamaaribeenna asatinne minnibeenna asati Xoossaa maxaafata harata geellayyoogaadankka, he dabddaabbiyaa gididon de7iya akeekanau waayissiya yohuwaa geellayoosona. Eti heгаа oottiyooogan bantta bolli bashshaa ehoosona.

<sup>17</sup> Hegaa gishshau, ta siiqotoo, intte heгаа eriyo gishshau, makkalanchchatu balan cimettidi, wora beenna malanne, qassi minnidi de7iyo sohuwaappe kunddenna mala

naa77antte. <sup>18</sup> SHin intte nu Godaa, nuna ashshiya Yesuus Kiristtoosa aaro kehatettaaninne eratettan diccite. A ha77inne merinaa gallassai gakkanaassi galatai gakko. Amin77i.

## Yohaannisi Xaafido Koiro Kiitaa

### *Gidduwaa Erissuwaa*

Yesuusi kiittido Yohaannisi xaafido koiro kiitai naa77u waanna waanna halchchota oiqqiis; hegeetikka: nabbabiyaageetuyyo Xoossaanne a na7aa Yesuus Kiristtoosaara issippetettai de7anaadan minttettanaassanne ha issippetettaa xaissanau danddayiya worddo timirttiyaappe eti haakkana mala, eta minttidi akeekissanaassa. He wode denddida worddo timirttee “Iitabai pulttiyoogee ha nuuni de7iyo gita sa7aara gaittiyo gaitotettaana gidiyo gishshau, Xoossaa na7ai Yesuusi mulekka asa gidanau woikko, asatettaa eeshshai ayyo de7anau danddayenna” yaagiyaagaa. He asttamaareti, “Attiiyooogaa giyoogee ha sa7aa de7uwaassi un77ettiyoogaappe yeda gidiyoogaa” yaagoosona. Hegaa bollikka qassi “Iitaanne kehaa shaakkidi oiqqiyoogaa gidin, hara asaa siiqiyoogaa gidin, atotettaara eta gattiyaabi baawa” yaagoosona.

Xaafee ha timirttiyaa phalqqidi, “Yesuus Kiristtosi polo asa; Yesuusan ammaniyaageetinne Xoossaa siiqiyaageeti ubbai bantta giddonkka issoi issuwaara siiqettanau bessees” yaagidi odiis.

### *De7o Qaalaa*

<sup>1</sup> Nuuni koiroosappe doommidi de7iya, nu aifiyan be7idi, nu kushiyan a bochchi be7ido de7uwaa qaalaabaa intteyyo xaafos. Nuuni a be7ida; nu kusheekka a bochchi be7iis. <sup>2</sup> He de7oi qonccin, nuuni a be7idi, abaa intteyyo markkattoos; qassi Aawaa matan de7iya nuuyyo qonccida merinaa de7uwaabaa intteyyo yootoos. <sup>3</sup> Qassi nunaara intteyyo issippetettai de7ana mala, nuuni be7idoogaanne siyidoogaa intteyyo yootoos; nuuyyo Aawaaranne a Na7aa Yesuus Kiristtoosaara issippetettai de7ees. <sup>4</sup> Nuuni nu ufaissai polettana mala, haggaa intteyyo xaafos.

### *Xoossai Poo7o*

<sup>5</sup> Nuuni appe siyidi, intteyyo yootiyo kiitai, “Xoossai poo7o; aani xumi mulekka baawa” yaagiyaagaa. <sup>6</sup> Nuuni nuuyyo aara issippetettai de7ees giidi xuman de7ikko, nu haasayaaninne nu oosuwan worddots. <sup>7</sup> SHin poo7uwan i de7iyoogaadan, nuunikka poo7uwan de7ikko, nuuyyo issuwau issuwaara issippetettai de7ees; qassi a Na7aa, Yesuus Kiristtoosa suuttai nagara ubbaappe nuna ashshees.

<sup>8</sup> Nuuni nunan nagari baawa giikko, nurkka nuna cimmoos; nunan tumatettikka baawa. <sup>9</sup> SHin nuuni Xoossau nu nagaraa paaxikko, i nu nagaraa atto gaanaunne nu mooro ooso ubbaappe nuna geeshshanau, ammanttiyaagaanne tumubaa oottiyaagaa. <sup>10</sup> Nuuni nagara oottibookko giikko, Xoossaa worddanchcha kessoos; a qaalaikka nunan de7enna.

## 2

### *Kiristtoosi Nuuyyo Gaannatiyaagaa*

<sup>1</sup> Ta naatoo, nagara intte oottennaadan, taani haggaa intteyyo xaafais; shin ooninne nagara oottikko, Aawaa matan nuuyyo gaannatiya Yesuus Kiristtoosi, Xilloi, de7ees. <sup>2</sup> Qassi nuuni nu nagaraa atto geetettaa Kiristtoosa baggaara demmeetees; Kiristtoosi yarshshettidoogee asa ubbaa nagaraassappe attin, nu nagaraa xalaalaassa gidenna.

<sup>3</sup> Nuuni Xoossaa azazuwaa naagikko, tumu a eriyooogaa hegan shaakkanau danddayoos. <sup>4</sup> Issi urai, “Taani a erais” giidi, qassi a azazuwaa naagennan aggikko, he urai worddanchcha; tumatettikka aani baawa. <sup>5</sup> SHin a qaalau azazettiya oona gidikkonne, he urai Xoossaa siiqiyoogee tumu polettiis. Nuuni Xoossan de7iyoogaa hagee nuna erissees. <sup>6</sup> Taani, “Xoossan de7ais” giya ooninne Kiristtoosi de7idoogaadan de7anau bessees.

*Ooratta Azazuwaa*

<sup>7</sup> Ta ishato, taani intteyyo koirosappe de7iya ceega azazuwaa xaafaisippe attin, ooratta azazo xaafikke; he ceega azazoi intte siyido qaalaa. <sup>8</sup> Gidikkokka, taani intteyyo naa77anttuwaa ooratta azazuwaa xaafais; he azazuwaa tumatettaikka Kiristtoosaaninne inttenan beettees. Aissi giikko, xumai xayees; tumu poo7oi ha77i poo7ees.

<sup>9</sup> Poo7uwan de7ais giiddi, ba ishaa ixxiya ooninne hanno gakkanaassikka xuman de7ees. <sup>10</sup> Ba ishaa siiqiya ooninne poo7uwan de7ees; he uran hara ura xubbiyaabi aibinne baawa. <sup>11</sup> SHin ba ishaa ixxiya ooninne xuman de7ees; xuman hemettees. Xumai a aifiyaa qooqissi wottido gishshau, awu biyaakkonne erenna.

<sup>12</sup> Ta naatoo, Xoossai Kiristtoosa sunntaa gishshau, intte nagaraa atto yaagido gishshau, taani intteyyo xaafais. <sup>13</sup> Aawatoo, koirosappe de7iyaagaa intte erido gishshau, intteyyo xaafais. Yelagatoo, xalahe halaqaa intte xoonido gishshau, intteyyo xaafais. Guutta naatoo, Xoossaa intte erido gishshau, intteyyo xaafais.

<sup>14</sup> Aawatoo, koirosappe de7iyaagaa intte erido gishshau, intteyyo xaafais. Yelagatoo, intte mino gidiiyo gishshaunne Xoossaa qalalai inttenan de7iyo gishshau, qassi xalahe halaqaa intte xoonido gishshau, intteyyo xaafais.

<sup>15</sup> Ha sa7aa woi sa7an de7iya aibanne siiqoppite. Intte ha sa7aa siiqikko, Xoossaa siiqoi inttenan baawa. <sup>16</sup> Aissi giikko, ha sa7an de7iya ubbabai, hegeekka: asatettaa amoi, aifen xeellidi qaaqqatiyoogeenne miishshan ceqettiyoogee ha sa7aappe yiidoogaappe attin, Xoossaa yibeenna. <sup>17</sup> Ha sa7ainne ha sa7an asi amottiyo ubbabai aadhdhana. SHin Xoossai giidoogaa oottiya urai merinau de7ana.

*Kiristtoosa Morkkiyaappe Naagettiyoogaa*

<sup>18</sup> Ta naatoo, wodiya wurssettai matattiis; Kiristtoosa morkkee sinttappe yaanaagaa intte siyidoogaadan, harai atto ha77ikka a morkketi daroti denddidosona. Hegaa gishshau, wodiya wurssettai matattidoogaa nuuni hegan eroos. <sup>19</sup> Ha morkketi nu bagga gidenna gishshau, nu gidoppe kiyidosona; aissi giikko, eti nu bagga gidiyaabaa gidiyaakko, nu giddon de7ana; shin etappe ooninne nu bagga gidennaagee erettana mala, nu gidoppe kiyidosona.

<sup>20</sup> SHin Kiristtoosi intte bolli Geeshsha Ayyaanaa gussiis; qassi intte ubbai tumaa ereeta. <sup>21</sup> Tumaa intte eriyo gishshaunne qassi tuman worddoi aibinne bainaagaa intte eriyo gishshau, taani intteyyo xaafaisippe attin, tumaa intte erenna gishshau xaafikke.

<sup>22</sup> Yesuusa giyoogee Kiristtoosa gidin erikke giya urappe attin, worddanchchi oonee? Hegee Aawaanne Na7aa erikke giyaagee Kiristtoosa morkkiyaa. <sup>23</sup> Na7aa erikke giya oonaaninne Aawai de7enna; Na7aa erais giya oonaanikka qassi Aawai de7ees.

<sup>24</sup> Hegaa gishshau, koirosappe intte siyidoogaa intte wozanan minttidi naagite. Koirosappe siyidoogaa intte naagikko, intteyyo qassi Na7aaranne Aawaara issipetetta de7ana. <sup>25</sup> Qassi Kiristtoosi ba huuphen nuuyyo immana giidoogee merinaa de7uwaa.

<sup>26</sup> Taani haggaa intteyyo he inttena balettiya asatu gishshau xaafaas. <sup>27</sup> SHin Kiristtoosi intte bolli ba Geeshsha Ayyaanaa gussiis. Geeshsha Ayyaanai inttenan de7iyo gishshau, ooninne inttena tamarissana koshshenna; aissi giikko, a Geeshsha Ayyaanai inttena ubbabaa tamarissees. I tamarissidoogaadan, Kiristtoosan de7ite.

<sup>28</sup> Ta naatoo, qassi i qoncciyi wode, nuuni yashshi bainaageeta gidanaadaaninne, a yuussaa gallassi a sinttan nuuni yeellatennaadan, aani de7ite. <sup>29</sup> Kiristtoosi xillo gidiiyoogaa intte erikko, xillobaa oottiya ubbai Xoossaa na7a gidiiyoogaa eranau bessees.

**3***Xoossaa Naata*



<sup>1</sup> Nuuni Xoossaa naata geetettidi xeesettana mala, Xoossai nuna ai keenaa siiqi-daakkonne be7ite. Nuuni tumukka a naata. Ha sa7ai Xoossaa erenna gishshau, nunakka erenna. <sup>2</sup> Ta siiqotoo, ha77i nuuni Xoossaa naata; nuuni ai hananaakko biron erettibeenna; shin Kiristtoosi qoncciyoo wode, nuuni a milatanaagaa eroos. Aissi giikko, i tumu de7iyooqaa nuuni be7ana. <sup>3</sup> Qassi Kiristtoosa be7ana giidi ufaissan naagiya ooninne Kiristtoosi geeshsha gididoogaadan, bana geeshshees.

<sup>4</sup> Nagara oottiya ubbai Xoossaa higgiiyaa menttees; aissi giikko, nagari higge ment-tiyooqaa. <sup>5</sup> Kiristtoosi asaa nagaraa xaissanau qonccidoogaa intte ereeta; aani nagari baawa. <sup>6</sup> Kiristtoosan de7iya ooninne nagara oottenna; qassi nagaraa oottiya ooninne a be7ibeenna woi eribeenna.

<sup>7</sup> Ta naatoo, ooninne inttena balettoppo. Kiristtoosi xillo gidiyooqaa, xillobaa oottiya urai xillo. <sup>8</sup> Xalahe halaqai koiroosappe nagaraa oottido gishshau, nagara ubba wode oottiya urai xalahe halaqaassa; heгаа gishshau, Xoossaa Na7ai xalahe halaqaa oosuwaа xaissanau qoncciiis. <sup>9</sup> Xoossaa na7a gidiiya ooninne Xoossaa meretai aani de7iyoo gishshau, nagara ubba wode oottenna; qassi Xoossai a Aawaa gidiiyo gishshau, nagara oottanau danddayenna. <sup>10</sup> Xoossaa naatu giddooninne xalahe halaqaa naatu giddon de7iya dummatettai hagan erettees; xillobaa oottenna urai woikko ba ishaa siiqenna urai ooninne Xoossaa Na7a gidenna.

### *Issoi Issuwaara Siiqettiyoogaa*

<sup>11</sup> Aissi giikko, koiroosappe intte siyido kiitai, “Issoi issuwaara siiqettanau bessees” yaagiyaagaa. <sup>12</sup> Nuuni Qaayeela mala gidanau bessenna. Qaayeeli xalahe halaqaassa; yaanidi ba ishaa woriis. I ba ishaa aissi woridee? I oottido oosoi iita gidin, a ishai oottido oosoi lo77o gidido gishshau woriis.

<sup>13</sup> Ta ishatao, ha sa7aa asai inttena ixkikko, oorattabaa gooppite. <sup>14</sup> Nuuni nu ishata siiqiyo gishshau, haiquwaappe de7uwau pinnidoogaa eroos; ba ishaa siiqenna urai ooninne haiquwaa giddon de7ees. <sup>15</sup> Ba ishaa ixkiya ooninne shemppo woridaagaa; qassi shemppo woridaagan merinaa de7oi bannaagaa intte ereeta. <sup>16</sup> Kiristtoosi ba shemppuwaa nu gishshau aattidi immidoogan siiqoi aibakko nuuni erida; nuunikka nu ishata gishshau, nu shemppuwaa aattidi immanau bessees. <sup>17</sup> SHin dure asi ooninne ba ishai metootiyooqaa be7iiddi, ayyo qarettennan ixkikko, ba wozanan Xoossaa siiqoi de7ees gaanau waani danddayii? <sup>18</sup> Ta naatoo, nuuni oosuwaaninne tumatettan siiqettanaappe attin, coo haasayan woikko bolla doonan siiqettanau bessenna.

### *Xoossaa Sinttan Ammanettidi Eqqiyoogaa*

<sup>19-20</sup> Nuuni tumaa baggan de7iyooqaa hegan erana; qassi nu wozanai nu bolli pirddiyo wode ubban, Xoossaa sinttan tumatettaa nuna hegan erissees. Aissi giikko, Xoossai nu wozanaappe gita; qassi i ubbabaa erees.

<sup>21</sup> Ta siiqotoo, nu wozanai nu bolli pirddennabaa gidikko, nuuni Xoossaa sinttan yayyokko. <sup>22</sup> Nuuni a azazuwaa naagiyo gishshaunne a ufaissiyaabaa oottiyo gishshau, woossiyo ubbabaa appe ekkoos. <sup>23</sup> Xoossaa azazoi haggaa: Kiristtoosi nuna azazi-doogaadanka, Xoossaa Na7aa Yesuus Kiristtoosa sunttan nuuni ammananaadaaninne issoi issuwaara siiqettanaadan Xoossai nuna azaziis. <sup>24</sup> Xoossaa azazuwaa naagiya ooninne Xoossaa giddon de7ees; Xoossainne a giddon de7ees; Xoossai nuuyyo immido Geeshsha Ayyaanaa baggaara i nu giddon de7iyooqaa nuuni eroos.

## 4

### *Tumanchcha Ayyaanaanne Worddanchcha Ayyaanaa*

<sup>1</sup> Ta siiqotoo, ayyaanata ubbata ammanoppite; shin eti Xoossaappe yiidaakkonne akeekite. Aissi giikko, hananabaa yootiya daro worddoti ubbasaa biidosona. <sup>2</sup> Xoossaa

Ayyaana gidiyoojaa intte hegan erana; “Yesuus Kiristtoosi asa gididi yiidoogaa ammanais” giya ayyaana ubbai Xoossaappe yees. <sup>3</sup> Qassi Kiristtoosi asa gididi yiidoogaa ammanais geenna ayyaana ubbai Xoossaappe yibeenna; hegee Kiristtoosa morkkiya ayyaana. Intte he ayyaanai yaanaagaa kase siyideta; i harai atto ha77ikka ha sa7an de7ees.

<sup>4</sup> Ta naatoo, intte Xoossaageeta; intte giddon de7iya Geeshsha Ayyaanai ha sa7an de7iya ayyaanaappe daro wolqqaamiyo gishshau, hananabaa yootiya worddota intte xoonideta. <sup>5</sup> Eti ha sa7aa asa gidiyoo gishshau, ha sa7aabaa haasayoosona; ha sa7aa asaikka eta haasayaa siyees. <sup>6</sup> Nuuni Xoossaageeta; Xoossaa eriya ooninne nuuni giyoogaa siyees. Xoossaa erenna ooninne nuuni giyoogaa siyenna. Nuuni tumu ayyaanaanne worddo ayyaanaa hegan shaakkoos.

### *Xoossai Siiqo*

<sup>7</sup> Ta siiqotoo, siiqoi Xoossaappe yiyo gishshau, ane issoi issuwaara siiqettoos. Siiqiya ooninne Xoossaa na7a; Xoossaa i erees. <sup>8</sup> Xoossai siiqo gidiyoo gishshau, siiqenna urai ooninne Xoossaa erenna. <sup>9</sup> Xoossai nuna ba siiquwaa hagan bessis; nuuni Kiristtoosa baggaara de7uwaa demmana mala, ba issi Na7aa ha sa7aa kiittiis. <sup>10</sup> Siiqo giyoogee haggaa; Xoossai nuna siiqidi, nuuni nu nagaraappe maarotettaa demmido ba Na7aa nuuyyo kiittiisippe attin, nuuni a siiqidoogaana gidenna.

<sup>11</sup> Ta siiqotoo, Xoossai nuna hagaadan siiqidabaa gidikko, nuunikka issoi issuwaara siiqettanau bessees. <sup>12</sup> Xoossaa ooninne mulekka be7ibeenna; nuuni issoi issuwaara siiqettikko, Xoossai nu giddon de7ees; a siiqoikka nu giddon polettiis.

<sup>13</sup> Xoossai ba Geeshsha Ayyaanaa nuuyyo immido gishshau, nuuni Xoossaa giddon de7iyooogaanne ikka nu giddon de7iyooogaa eroos. <sup>14</sup> Aawai ba Na7aa ha sa7aa ashshiyaagaa gidanau kiittidoogaa nuuni be7idi markkattoos. <sup>15</sup> Yesuusi Xoossaa Na7aa gidiyooogaa markkattiya o giddooninne Xoossai de7ees; ikka Xoossaa giddon de7ees. <sup>16</sup> Xoossai nuna siiqiyoogaa nuuni nu huuphen eroosinne ammanoos.

Xoossai siiqo. Siiquwan de7iya ooninne Xoossaa giddon de7ees; Xoossaikka a giddon de7ees. <sup>17</sup> Nu de7oi ha sa7an Kiristtoosi de7idoogaa mala gidiyoo gishshau, pirddaa gallassi nuuni yayyenna mala, siiqoi nu giddon polettiis. <sup>18</sup> Siiquwan yashshi baawa; shin tumu siiqoi yashshaa kessi olees. Yashshainne qaxxayoi issippe biyo gishshau, yayyiya uraa siiqoi kumetta gidenna.

<sup>19</sup> Xoossai koiro nuna siiqido gishshau, nuuni a siiqoos. <sup>20</sup> Ooninne, “Taani Xoossaa siiqais” giidi ba ishaa ixkikko, i worddanchcha. Aissi giikko, be7ido ba ishaa siiqennaagee be7ibeenna Xoossaa siiqanau waani danddayii? <sup>21</sup> Qassi Kiristtoosi nuuyyo immido azazoi haggaa; Xoossaa siiqiya urai ba ishaakka siiqanau bessees.

## 5

### *Ha Sa7aa Xooniyoojaa*

<sup>1</sup> Kiristtoosa yaagidi, Yesuusa ammaniya ooninne Xoossaa na7a; qassi Aawaa siiqiya ooninne a Na7aakka siiqees. <sup>2</sup> Nuuni Xoossaa siiqiyoogaanne a azazuwaa naagiyoogan, Xoossaa naata siiqiyoogaa eroos. <sup>3</sup> Aissi giikko, nuuni Xoossaa siiqiyoogee a azazuwaa naagiyoogaa; a azazoikka deexo gidenna. <sup>4</sup> Aissi giikko, Xoossaa na7a gidiyoo ooninne ha sa7aa xoonanau danddayees; nuunikka ha sa7aa xoonanaagee nu ammanuwaana. <sup>5</sup> Ha sa7aa xoonanau danddayiyai oonee? Yesuusi Xoossaa Na7aa gidiyoojaa ammaniyaagaa xalaalai xoonana.

### *Kiristtoosabaa Markkattidoogaa*

<sup>6</sup> Haattaaranne suuttaara yiidaagee haggaa; ikka Yesuus Kiristtoosa; haattaaranne suuttaara i yiidoogaappe attin, haatta xalaalaa yibeenna. Geeshsha Ayyaanai tuma gidiyoo gishshau, hegee tuma gidiyoojaa i ba huuphen markkattees. <sup>7</sup> Aissi

giikko, heezzu markkati de7oosona. <sup>8</sup> Hegeeti Geeshsha Ayyaanaa, haattaanne su-  
utaa; ha heezzati issoi issuwaagaa phalqqokkona. <sup>9</sup> Nuuni asai markkattiyoogaa  
ammanikko, Xoossai markkattiyoogee asaagaappe keehi aadhdhees; aissi giikko,  
Xoossai ba Na7aayyo markkattido markkatettaa haggaa. <sup>10</sup> Xoossaa Na7aa ammaniya  
uraa wozanan ha markkatettaa de7ees. Xoossaa ammanenna urai ooninne Xoossai  
ba Na7aayyo markkattido markkatettaa ammanibeenna gishshau, Xoossaa word-  
danchcha oottiis.

<sup>11</sup> Simmi markkatettaa haggaa; Xoossai nuuyyo merinaa de7uwaa immiis; he de7oikka  
a Na7an de7ees. <sup>12</sup> Xoossaa Na7ai de7iyo ooyyoonne de7oi de7ees; Xoossaa Na7ai  
bainna ooyyoonne de7oi baawa.

### *Merinaa De7uwaa*

<sup>13</sup> Xoossaa Na7aa sunttan ammaniya intteyyo merinaa de7oi de7iyoogaa intte erana  
mala, haggaa intteyyo xaafaas. <sup>14</sup> Xoossai koyiyoogaadan, ainne nuuni a woossikko,  
i siyiyoogaa nuuni eriyo gishshau, a sinttan yayyokko. <sup>15</sup> Nuuni woossiyo ubban i  
siyiyoogaa erikko, nuuni a woossidoogaa i immanaagaa eroos.

<sup>16</sup> Ooninne haiqoi bessenna nagara ba ishai oottishin be7ikko, Xoossaa woossanau  
bessees; haiqoi bessenna nagara oottidaageetuyyo Xoossai de7o immana. Haiqoi  
bessiyo nagari de7ees; taani inttena hegau Xoossaa woossite giikke. <sup>17</sup> Mooro ooso ubbi  
nagara; shin haiqoi bessenna nagari de7ees.

<sup>18</sup> Xoossaa na7i ooninne nagara ubba wode oottennaagaa nuuni eroos. Aissi giikko,  
Xoossaa na7ai a naagees; qassi xalahee halaqaikka a qohanau danddayenna. <sup>19</sup> Nuuni  
Xoossaageeta gidioogaanne ha mule sa7aikka xalahe halaqan haarettidoogaa eroos.

<sup>20</sup> Nuuni tumu Xoossaa eranaadan, Xoossaa Na7ai yiidoogaanne nuuyyo akeekaa  
immidoogaa eroos. Nuuni tumu Xoossaa giddon, a Na7aa Yesuus Kiristtoosa giddon  
de7eettes; i tumu Xoossaanne merinaa de7uwaa.

<sup>21</sup> Ta naatoo, eeqatuppe intte huuphiyaa naagite.

## Yohaannisi Xaafido Naa77antto Kiitaa

### *Gidduwaa Erissuwaa*

Yohaannisi xaafido naa77antto kiitaa “Yesuusi kiittido cima Yohaannisi” xaafiis. Xaafettidoogee “Doorettida godeessanne i naatussa.” Ooni erii, issi man77e woosa keetteessanne in uttiya asaassa gidennan aggenaa. Ha qantta kiitai xaafettidoogee eti issi issuwaa siiqettanaadan hassayissanaassanne worddo asttamaaretuppenne eta timirttiyaappe naa77antto qofissanaassa.

<sup>1-2</sup> Taani cimai, intteyyo doorettida godatteeyyoonne ne naatuyyo ha dabddaabbiyaa xaafais; nu giddon de7iya qassi nunaara merinau de7ana tumatettaa gishshau, taani inttena tumu siiqais. Qassi ta xalaala gidennan, tumatettaa eriya ubbati inttena siiqoosona.

<sup>3</sup> Xoossaa nu Aawaa aaro kehatettai, maarotettainne sarotettai a Na7aa Yesuus Kiristtoosa aaro kehatettai, maarotettainne sarotettai tumatettaaninne siiquwan nunaara issippe gido.

### *Tumaabaanne Siiquwaabaa*

<sup>4</sup> Xoossai, Aawai nuna azazidoogaadan, ne naatuppe amaridaageeti, tumatettan de7iyoojaa be7ada taani daro ufaittaaas. <sup>5</sup> Siiqo godattee, ha77ikka nuuni ubbai issi issuwaa siiqettana mala, taani nena woossais; ha azazoi kaseesappe nunaara de7iya azazoppe attin, taani neeyyo ooratta azazo xaafikke. <sup>6</sup> Siiquwaa giyoogee nuuni Xoossaa azazuwaa naagiiddi de7iyoojaa giyoogaa. Qassi koiroosappe intte siyidoogaadankka, a azazoi aibee giikko, intte ubbai siiquwan de7anaagaa.

<sup>7</sup> Aissi giikko, Yesuus Kiristtoosi asa gididi yiidoogaa ammanokko giyaageeti, balettiya daro asati, dere giddo gelidosona. Hegaa mala urai ooninne asa balettiyaagaanne Kiristtoosa morkkiyaa. <sup>8</sup> Intte oottidoogau kumetta woituwaa ekkanaappe attin, intte oottidoogaa bashshenna mala, inttena naagite.

<sup>9</sup> Kiristtoosa timirttiyaappe haakkiya uraunne qassi a timirttiyan de7enna urau Xoossai baawa. Kiristtoosa timirttiyan de7iya uraayyo Aawainne Na7ai de7oosona. <sup>10</sup> Ooninne inttekkoo yiidi, ha timirttiyaa eheennan aggikko, intte soo a gelissoppite; sarokka gooppite. <sup>11</sup> Aissi giikko, a saro giya urai a iita oosuwaa aara shaakkees.

### *Wurssetta Sarotaa*

<sup>12</sup> Taani intteyyo xaafanau koyido darobai de7ees; shin woraqataaninne qalamiyan xaafanau koyabeikke; shin nu ufaissai polettana mala, inttenaara doonan haasayanau inttekkoo baana gaada qoppais.

<sup>13</sup> Xoossai doorido ne michchee naati nena saro saro yaagoosona.

## Yohaannisi Xaafido Heezantto Kiitaa

### *Gidduwaa Erissuwaa*

Yohaannisi xaafido heezantto kiitaa “Yesuusi kiittido cima Yohaannisi” xaafiis. I xaafidoogeeekka Gaayoosa giyo issi woosa keettaa kaalettiyaagaassa. Xaafee issi baggaara Gaayoosi hara ammaniyaageeti maaddido gishshau a galatees; hara baggaara qassi Diyooxiraaxisa geetettiya makkalanchcha bitaniyaappe naagettana mala akeekissee.

<sup>1</sup> Taani cimai, tumu siiqiyo ta siiquwaa Gaayoosayyo ha dabddaabbiyaa xaafais. <sup>2</sup> Ta siiquwau, neeni ayyaanan lo77o gidiyoojaa taani eriyoogaadan, nena aibinne waissenna malanne qassi neeni payya de7ana mala, Xoossaa woossais. <sup>3</sup> Aissi giikko, amarida ishantti yiidi, ubba wode neeni tumatettan de7iyoojaanne ne tumatettaabaa markkattido wode, taani daro ufaittaaas. <sup>4</sup> Ta naati tumatettan de7iyoojaa siyiyoojaappe aadhdhidi, tana ufaissiyaabi baawa.

### *Gaayoosabaa Asai Markkattiis*

<sup>5</sup> Ta siiquwau, nu ishantti imatta gidikkokka, neeni etayyo oottiyo ooso ubban amanettida ooso oottaasa. <sup>6</sup> Qassi eti ne siiquwaabaa woosa keettan markkattidosona; eti biyo ogiyan Xoossai dosiyoojaadan, neeni eta maaddikko, lo77obaa oottaasa. <sup>7</sup> Aissi giikko, Xoossaa ammanennaageetuppe ainne ekkennan, Kiristtoosa sunntaa gishshau kiyidosona. <sup>8</sup> Hegaa gishshau, nuuni tumatettaa etaara issippe oottana mala, hageetu mala asata maaddanau bessees.

### *Diyotirefeesi Walasettiis; Dimexiroosi Sabettiis*

<sup>9</sup> Taani woosa keettaayyo dabddaabbiyaa xaafaas; shin eta halaqa gidanau koyiyya Diyotirefeesi nuuni giyoogaa ekkenna. <sup>10</sup> Hegaa gishshau, taani yaa biyo wode, i nu bollan haasayiyo iita haasayaanne i oottido oosuwwa intteyyo yootana; qassi i hegee guuxxiis giidi, nu ishantti yiyo wode mokkenna; harai atto eta mokkanau koyiyyaageetakka diggidi, woosa keettaappe kessees.

<sup>11</sup> Ta siiquwau, lo77obaappe attin, iitabaa milatoppa. Lo77obaa oottiya ooninne Xoossaa asa; shin iitabaa oottiya ooninne Xoossaa be7ibeenna.

<sup>12</sup> Dimexiroosi lo77o gidiyoojaa asai ubbai markkattees; tumatetta ba huuphenkka abaa markkattees. Nuunikka qassi abaa markkattoos; nu markkatetta tuma gidiyoojaa inttekka ereeta.

### *Wurssetta Sarotaa*

<sup>13</sup> Taani neeyyo xaafanau koyido darobai de7ees; shin qalamiyaaninne biiriyan xaafanau koyikke. <sup>14</sup> SHin taani matan nenaara gaittanau qoppais; he wode nuuni gaittidi haasayana.

<sup>15</sup> Sarotetta nenaara gido.

Ne dabboti nena saro saro yaagoosona. Nu dabbota ubbaa eta sunntaa sunntaa xeesada, tana saro saro giis yaaga.



## Yihudai Xaafido Kiitaa

### *Gidduwaa Erissuwaa*

Yihudaa kiitai xaafettidoogee, ammanennan de7iiddi ammaniya asa milatidi, worddo timirttiyaa laaliya asatuppe ammaniya asai naa77antto PHeexiroosa milatees. Xaafee nabbabiyaageetussi odiiddi, “Naa77antenna hanotan geeshshatuyyo issiton imettida ammanuwaassi minnidi olettite” yaagidi, minttidi qofissees.

<sup>1</sup> Taani Yesuus Kiristtoosa ashkkarai Yihudai, Yaaqooba ishai, Xoossai xegidoogee-tuyyo, Xoossai Aawai siiqiyoogetuyyo, qassi Yesuus Kiristtoosi naagiyoogee-tuyyo, ha dabddaabbiiyaa xaafais.

<sup>2</sup> Maarotetta, sarotettainne siiqotetta inttenan kumo.

### *Worddo Asttamaareta*

<sup>3</sup> Ta dabbotoo, nuuni issippe shaakki ekkana atotettaabaa intteyyo xaafanau taani daro daafuriyo wode, Xoossai geeshshatuyyo naa77anttenan issitoo immido ammanuwau intte baaxetana mala, inttena zorada xaafanau koshshiyoo-gaa akeekaas.

<sup>4</sup> Aissi giikko, Xoossaa erenna issi issi asati ooninne be7ennan intte giddo gelidosona. Hegeeti nu Xoossaa aaro kehatettaabaa yootiya kiitaa shaaramuxatettau geellayitamaarissoosona; eti nu issi Kawuwaa, nu Godaa Yesuus Kiristtoosa erokko yaagoosona; qassi eti pirddaa ekkanaagaa Xoossaa maxaafati daro wodeppe kase yootidosona.

<sup>5</sup> SHin intte ha ubbabaa eriyaabaa gidikkokka, Godai Israa7eela asaa Gibxxe biittaappe waati ashshidaakkonne qassi ammanibeennaageeta guyyeppe waati xais-sidaakko, taani inttena hassayissanau koyais. <sup>6</sup> Qassi bantta de7iyoosaa aggidi, banttau imettida halaqatettaa naagibeenna kiitanchchati pirddaa ekkiyo gita gallassai gakkanaasii Xoossai eta naagiyoosan, xumaappe garssan merinau qashettidi de7oosona. <sup>7</sup> Hegaadan Sadoomanne Gamooraa giyo katamatuuninne eta heeran de7iya katamatun de7iya asai he kiitanchchatudan shaaramuxidosonanne shaaramuxanau keehi qaaqqatidosona; hegeeti merinaa taman eexxidi, haratuyyo leemiso gididosona.

<sup>8</sup> Hegaadan qassi he aimottiya asati bantta asatettaa tunissoosona; Xoossaa godatettaa karoosona; bonchcho meretataakka cayoosona. <sup>9</sup> SHin kiitanchchatu halaqai Mikaa7eeli Muuse ahaabaa xalahe halaqaara palamettido wode, “Godai nena seero” giidoogaappe attin, cashsha qaalan a bolli pirddanau koyibeenna. <sup>10</sup> SHin he asati banttau akeekennabaa ubbaa cayoosona; qassi eti yuushshi qoppenna do7atudan, mereta eratettan eriyo yohoti eta xaissiyaageeta. <sup>11</sup> Etaa aayye7ana! Aissi giikko, eti Qaayeeli hemettido ogiyaa hemettidosona. Miishsha gishshau giidi, Balaami oottidoogaa mala mooruwaa oottidosona. Qassi Qore giyo bitanee “Ixxaas” giidi xayidoogaadan, etikka “Ixxida” giidi xayidosona.

<sup>12</sup> Hegeeti siiquwan gibiraa intte miyoosan inttenaara yashshi bannan miyo wode, gita mala. Eti bantta xalaalaa naagoosona. Eti carkkoi efiyo iri banna shaara mala; qassi eti boniyan aifiyaa aifenna, xaphuwaara shodettidi, muleera melida mita mala.

<sup>13</sup> Eti bantta pokkuwaa genttena hoommotiya, iita abbaa beetaa mala. Eti Xoossai merinau sakkana xuman sohuwaa giigissi wottido yuuyiya xoolinttetu mala.

<sup>14-15</sup> Heenooki Addaameppe doommin, laappunnta yeleta gidiyaagee, daro wodeppe kase etabaa hananabaa yootiiddi, hagaadan yaagiis;

“Akeekite, Xoossaa erenna nagaranchcha

asati oottido iita ooso ubbaunne

qassi Xoossaa erenna he iita asati

Xoossaa bolli haasayido iita haasaya ubbau,  
Godai eta ubbaa bolli pirddanau,

ba daro sha7u geeshshatuura issippe yaana”  
yaagiis. <sup>16</sup> He asati ubba wode zuuzummoosonanne harata amassaloosona; qassi  
bantta iita amuwaa kaalloosona; bantta huuphiyau go77a demmanau harata sabbooso-  
nanne bantta qaalaa wogaappe aattidi, xoqqu ootti haasayoosona.

*Mino Akeekissuwaanne Zoriyaa*

<sup>17</sup> SHin ta dabbotoo, nu Godaa Yesuus Kiristtoosi kiittidoogeeti intteyyo beni  
haasayido qaalaa akeekite. <sup>18</sup> Eti intteyyo, “Wurssettaa wodiyan, bantta Xoossi baina  
amuwaa kaalliyaageeti, qassi intte bolli qilliicciyaageeti yaana” yaagidosona. <sup>19</sup> Hegeeti  
asaa gidдон shaahotettaa medhdhiyaageetanne, bantta iita amuwau haarettidaageeta,  
qassi Geeshsha Ayyaanai bainaageeta.

<sup>20</sup> SHin ta dabbotoo, ubbaappe aadhdhiya geeshsha ammanuwan intte huuphiyaa  
keexxite; qassi Geeshsha Ayyaanaa wolqqan Xoossaa woossite. <sup>21</sup> Qassi nu Godai  
Yesuus Kiristtoosi ba maarotettan intteyyo immana merinaa de7uwaa naagiiddi, intte  
huuphiyaa Xoossaa siiquwan wottite.

<sup>22</sup> Issi issi siree de7iyo asatuyyo qarettite. <sup>23</sup> Issoota issoota tamaappe dafi kessidi  
ashshite. Qassi harai atto eta iita amuwan tunida maayuwaa ixxiiddikka, issootuyyo  
issootuyyo yashshatettan qarettite.

*Galata Woosaa*

<sup>24-25</sup> Intte kunddennaadan, inttena naaganaunne borettennaageeta oottidi, ba  
bonchchuwaa sintti gita ufaissaara shiishshanau danddayiya nuna ashshiya issi Xoos-  
sau, nu Godaa Yesuus Kiristtoosa baggaara bonchchoi, gitatettai, wolqqainne maatai,  
aadhdhida wode ubbaappenne ha77inne merinaa gakkanaassinne gido. Amin77i.